


Tĩrtũm kapẽr ã kagà
nyw



New Testament in Apinayé (BR:apn:Apinayé)

Tĩrtũm kapēr ã kagà nyw

New Testament in Apinayé (BR:apn:Apinayé)

copyright © 1999 Wycliffe Bible Translators, Inc.

Language: Apinayé

Translation by: Wycliffe Bible Translators, Inc.

Apinayé [apn], Brazil

Copyright Information

© 1999, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Apinayé

© 1999, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 25 Nov 2022 from source files dated 29 Jan 2022
383a4e22-34cd-505f-9cc2-2f9921e7aa9f

Contents

Matêwre	1
Makre	100
Rukre	156
Juãw	259
Atre	332
Rômãn	419
Wam Korît	470
Sikũn Korît	516
Karatas	545
Epes	563
Piripos	579
Korosẽ	589
Wam Tesarõn	600
Sikũn Tesarõn	609
Wam Ximotre	614
Sikũn Ximotre	627
Xitre	636
Piremõ	642
Eprêw	644
Xiakre	679
Wam Pêtre	691
Sikũn Pêtre	704
Wam Juãw	711
Sikũn Juãw	721
Hapuhã Juãw	723
Jutre	725
Apokarip	730

Matêwre
Matêwre kot tanhmã
Jejus kot amnhĩ nhĩpêx
to ho pa hã kagà

Matêwre na pre kagàja nhĩpêx. Kêp Jejus nhỹ hã hkrajê jahkre xwýnh na pre. Nê kêp Ijaew. Hixi hõ pê na Rewi. Tã na pre mē pamã kagàja nhĩpêx nê kamã Jejus kot pika hwýr wrýk nê kator nê tanhmã ri amnhĩ nhĩpêx to ho pa hã harê nê hã kagà. Nê kêp mē panhõ pahihiti mex o mex ã harê nê hã kagà. Æ na pre Matêwre mē pamã Jejus jarê nê hã kagà anê.

Apraãw kanrêhã hkra nê htãmnhwýjé nhĩxi

Rukre 3.23-38

¹ Amnepêm Jejus Kris kormã pika hwýr wrýk kêt ri hkukamã higêtjê nhĩxi na jajaja.

Wýj ri higêtjê hõ nhĩxi na pre kêp Tawi.

Nê Tawi xwýj ri higêt nhĩxi pê na pre Apraãw.

² Nê Apraãw kra na pre kêp Ijak.

Nê Ijak kra na pre kêp Jako.

Nê Jako hkra na pre kêp Juta mē htõjaja.

³ Nê Juta hkra na pre wa kêp Pere nê Jera.

Nê Pere mē Jera wa katorxà na pre kêp Tama.

Nê Pere hkra na pre kêp Erõ.

Nê Erõ hkra na pre kêp Ari.

⁴ Nê Ari hkra na pre kêp Amĩnatap.

Nê Amĩnatap kra na pre kêp Nasõ.

Nê Nasõ hkra na pre kêp Samõ.

⁵ Nê Samõ hkra na pre kêp Poas.

Nê Poas katorxà na pre kêp Raap.

Nê Poas kra na pre kêp Opex.

Nê Opex katorxà na pre kêp Rutre.

Nê Opex kra na pre kêp Jese.

⁶ Nê Jese hkra na pre kêp Pahihiti Tawija.

Nê Tawi hkra na pre kêp Sarumãw.

Sarumãw katorxàja Uristi hprõ na pre. Tã nhũm pre Uristi ty nhũm Tawija hãmri mýrpê Uristi hprõ ho hprõ nê kamã hkra. Nhũm wa hkraja kêp Sarumãw.

⁷ Nê Sarumãw kra na pre kêp Ropã.

Nê Ropã hkra na pre kêp Apiasti. Nê Apiasti kra na pre kêp Asti.

⁸ Nê Asti hkra na pre kêp Josapa.

Nê Josapa hkra na pre kêp Jorã.

Nê Jorã hkra na pre kêp Ojis.

⁹ Nê Ojis kra na pre kêp Jotã.

Nê Jotã hkra na pre kêp Akaj.

Nê Akaj kra na pre kêp Ejekis.

¹⁰ Nê Ejekis kra na pre kêp Manase.

Nê Manase hkra na pre kêp Amõ.

Nê Amõ hkra na pre kêp Josis.

¹¹⁻¹² Nê Josis kra na pre kêp Jekonĩs mē htõjaja.

Kormã mē htõr ri na pre Papirõn nhõ xwýnhjaja kot mē hkurê kaxàr kaxyw mē hwýr hprõt nê mē unê. Ijaew piitã unênh pa nê ma akupým mē õ pyka hwýr mē ho hapêx nhũm mē hpãnhã Papirõn kamã pa ho pa. Jakamã nhũm Josis mē hkra Jekonĩs mē htõjaja mē hipêêxã pyrã nê Papirõn kamã pa ho pa.

Nê Jekonĩs kra na pre kêp Saraxi.

Nê Saraxi hkra na pre kêp Joropape.

¹³ Nê Joropape hkra na pre kêp Apiux.

Nê Apiux kra na pre kêp Eriakĩ.

Nê Eriakĩ hkra na pre kêp Ajo.

¹⁴ Nê Ajo hkra na pre kêp Satok.

Nê Satok kra na pre kêp Akĩ.

Nê Akĩ hkra na pre kêp Eriux.

¹⁵ Nê Eriux kra na pre kêp Eresa.

Nê Eresa hkra na pre kêp Matã.

Nê Matã hkra na pre kêp Jako.

¹⁶ Nê Jako hkra na pre kêp Juje.

Nê Juje hprõ na pre kêp Marir.

Nê Marir Kra na pre kêp Jejus.

Mê kot kãm: “Tirtûm kot mê pakaxyw âm xwÿnh” anhÿr xwÿnhnta na pre.

17 Nhûm Apraãw kanrêhã axte axpên kanrêhã mê àptâr nywjaja Tawija wÿr kêp 14. Nê Tawi nhîrô pê Papirôn hwÿr mê hapêx kêt ri axpên kanrêhã mê àptâr nywjaja mãânên kêp 14. Nê ra Papirôn kamã mê pa nhîrô pê axpên kanrêhã Jejus pê Tirtûm kot mê pakaxyw âm xwÿnhnta wÿr mãânên kêp 14. Â na pre Jejus Kris xwÿj ri higêtjê nhîxi anê.

Jejus Kris kator

Rukre 1.26-38, 2.1-7

18 Tã ã mê hixi jarênh kot anhÿr kanrêhã na pre ã Jejus Kris kator anê. Nhûm pre kormã Jujeja Marir o hprô kaxyw. Nom kormã ho hprô hkêt ri nhûm htujarô. Kormã hkukrit tã nhûm Tirtûm Karô tanhmã ho nhûm htujarô. 19 Hãmri nhûm Jujeja harênh ma nê tee ri hamaxpêr nê htÿx nhãm mêhõ kot kêp htu hã hkamnhîx. Juje kot tãm amnhî nhîpêx nê tãm hamaxpêr jakamã tee ri kot ho hprô hkukamã hamaxpêr. Nê hamaxpêr o:

—Na pa mãn ixte htute hã. Nhãm mêhõ ra kot ã hipêx anhÿr kênã. Nà kot paj ho ixprô hkêt nê. Nom kot paj ixkwÿjê mã ã kot amnhî nhîpêx anhÿr o amnhîrit kêt nê. Kot paj anê nhûm mê kuma nê ho kapêr punuj nhûm amnhî kamã hpijaàm tÿx nê. Ja pymaj kot paj ixkatàt kôt hkaga kuré kumrêx. Nom ixkwÿjê hkàx ã hkaga. Anê.

20 Nê ã hamaxpêr anhÿrja o ra gôr nê nô. Nhûm Tirtûm kapêr o mê wrÿk xwÿnhjê hõ hwÿr wrÿ nê hwÿr axàn kuri xa. Hãmri nê kãm:

—Pa Juje? E ot pa awÿr tê. Kwa tee ri Marir o aprô hkukamã ajamaxpêr punuj kêt nê. Mãmrî ho aprô. Mêhõ kot apê tanhmã ho hkêt. Tirtûm Karô na pre ã hipêx anê. Jakamã kwa tee ri ajamaxpêr kêt nê mãmrî ho aprô nê war apa.

21 Koja hkrare kato nê myre nê hprêk. Hãmri nê mê kot hkôt amnhî xunhwÿr xwÿnhjaja mê kot amnhî tomnuj piitã pê mê utâr pa. Jakamã koja kato ka wa hã hixi mê nhûm kêp Jejus. Anê.

Nhûm pre ã Tirtûm kapêr o mê wrÿk xwÿnhja kãm kapêr anê. Ijaew kapêr kãm Jejus jarênhja te kêp “Tirtûm kêp mê papytâr xwÿnh” anhÿr pyrâk. Jakamã nhûm Tirtûm kapêr o mê wrÿk xwÿnhja Juje ôt kãm ã kãm Marir jarênh anê. 22-23 Nom kormã ã kãm kapêr anhÿr xwÿj ri na pre ra Tirtûm nhÿ hã kapêr xwÿnhjê hõja kukamã tanhmã harênh to nê hã kagã. Nê hã kagã ho:

E mê inhma nê inhmar tÿx nê ho apa. Koja nhÿrmã pyka já kamã mêhõ kormã hkukrit tã htujarô. Nê hkra kato nê myre. Nhûm mê omu nê hã hixi mê nhûm kêp Emanuew. Anê.

Ijaew kapêr kãm “Emanuew” jarênhja te kêp “Ota ra Tirtûm mê pahkôt pa ho pa” anhÿr jarênhnta pyrâk. Jakamã nhûm pre Tirtûm nhÿ hã kapêr xwÿnhja Jejus kukamã ã harênh anê nê hã kagã.

24 Jakamã nhûm Tirtûm kapêr o mê wrÿk xwÿnhja Juje mã kapêr par mê nhûm hkrâkato. Hãmri nê kot kãm ujarênh xá hkôt Marir o hprô. 25 Nom kormã tanhmã ho hkêt nê ri o pa rãhã nhûm hkrareja kato. Hãmri nhûm wa hã hixi mê nhûm kêp Jejus nê mãânên kêp Emanuew.

2

Kanhêti ho studa xwÿnhjê jarênh

1 Nhûm pre Jejus Perêj kamã kato. Pika pê Jutej kamã. Pahi Eroxo kormã kot Jutej nhõ xwÿnhjê ho amnhîptâr o pa ri nhûm õ pika kamã kato. Hãmri nhûm Tirtûmja kaxkwa kamã Kra kator jarênh xá hã kanhêti raxta õ nhõ nhûm pika hõ kamã kanhêti ho studa

xwýnhjaja omu. Kanhêtiya pumu nê hkînh nê xepên mã:

—Kwa ga mẽ kanhêti raxti mũj pumu. Mãn ra Ijaew nhõ pahi nywta kato nhũm kanhêti mũj kêp ho amnhîrit xà hã ajêt. Kwa pu mẽ ma hapêr o mõi nê nhÿri tokyx omu nã.

Anê hãmri nê amnhî to pikuprõnh pa nê ma hapêr o pa. Ma myt gjêx xà hwÿr hapêr o pa hã apkati xohtõ nê. Hãmri nê ra Ijaew nhõ pika hwÿr pøj nê krî pê Jerujarê hwÿr hapêr o mõi. Pahi Erox nhõ krîja wÿr nhũm mẽ hapêr o mõi hãmri nê nhÿri pøj nê mẽ hkrare nywta ã krî nhõ xwýnhjê kukjêr o mõi ² nê mẽ kãm:

—Pa? Ot pa mẽ apê Ijaew nhõ pahi nywreta pumunh kaxyw mõi. Ham kator xwýnhhta. Mẽ inhõ pika kamã na pa prem kaxkwa hkrax rũm kot ho amnhîrit xà hã kanhêti raxta pumu. Hãmri nê nhÿri pahi nywre pumunh nê kutã mẽ ixkõn krã ho ixtêm nê ixkrî nê kãm mex o mex ã harênh kaxyw nêtãnh mẽ inhõ krî rũm hapêr o mõi. Kwa mẽ inhmã harê. Nhÿri na? Na pa mẽ inhmã omunh prãm tÿx kumrêx.

Anhÿr o hã mẽ hkukjêr o mõi jakamã nhũm mẽ piitã pahi nywja jarênh ma nê xepên mã harênh o hprõt. ³ Nhũm pahi Eroxja harênh ma nê tee ri amnhî kukamã hamaxpêr. Pahi nyw kot mẽ ho amnhîptâr ã hkamnhix nhũm já kêp omnuj tÿx nê. Nhũm krî nhõ xwýnhjaja ã hamaxpêr anhÿr ã omu nê tee ri amnhî kukamã hamaxpêr o ra kãm ma nê. ⁴ Hãmri nhũm pahi Eroxja amnhî wÿr hkwyjê hã karõ. Mẽ õ patre krãhtũmjaja nê Tirtũm kapêr tũm o mẽ ahkre ho mẽ pa xwýnhjaja nhũm amnhî wÿr mẽ hã karõ nê Tirtũm kot nhÿrmã mẽ hwÿr mênh mã xwýnhhta ã mẽ hkukjêr kaxyw. Nê mẽ kãm:

—E Tirtũm kot nhÿrmã mẽ pahwÿr mênh mã xwýnhhta ã na pa mẽ akukjêr kaxyw mẽ ato akuprõ.

Kwa mẽ atõ inhmã harê. Koja nhÿrmã kator kaxyw nê nhÿri koja we kato? Xà jar mẽ panhõ krî kamã nã? Xà nhÿri krî hõ kamã? Anê.

⁵ Hãmri nhũm mẽ kuma nê kãm:

—Nã mẽ panhõ pika pê Jutej kamã koja xep kato. Krî pê Perêj kamãã. Na pre Tirtũm nhÿ hã kapêr o mẽ pa xwýnhja ra hkukamã mẽ panhîgêjtê mã tanhmã harênh to nê hã kagã. Nê hã kagã ho:

⁶ Pa Perêj nhõ xwýnhjaja? E mẽ anhõ krî grire htã kamã koja nhÿrmã mẽ panhõ Pahi Maatija kato. Koja mẽ pahpê Ijaewjê piitã mẽ pahto amnhîptâr mex o pa. Jakamã mẽ anhõ krî grire htã koja Ijaew piitã xepên mã mex ã harênh o pa.

Ã na pre Tirtũm kot mẽ pahwÿr mênh mã xwýnhhta kukamã mẽ kãm harê nê hã kagã anê. Anê.

⁷ Hãmri nhũm pahi Erox tee ri ã harênh anhÿrja ma hãmri nê amnhî wÿr mẽ kot hã àhkukjêr o mõi xwýnhjê hã karõ. Nom nhÿri Ijaew kax ã. Hãmri nhũm mẽ ma hwÿr mra nê agjê nhũm mẽ omu nê pahi nywta ã mẽ hkukja nê mẽ kãm:

—E mẽ aprî hã inhmã pahi kator nywta jarê. Tanhmã na pre ra mẽ ate kanhêti pumunh ã mytwrÿ kute? Xà ham na ka prem omu nã amnepê mã? E mẽ aprî hã tanhmã inhmã harênh to. Anê.

Hãmri nhũm mẽ ihõja kãm:

—Nã na ra hã amgrã axkrut kaxyw. Na pa prem omu hãmri nê inhnojarêt nê man ixpa ho ixpa ry rax nê mẽ awÿr pøj. Anê.

⁸ Nhũm mẽ kuma nê mẽ kãm:

—Tÿ. Nom jar amrakati. Perêj kamã na xep kato. E mẽ mãmri ma hwÿr mõi nê kamã hapêr. Hãmri nê nhÿri omu nê akupÿn ixwÿr mõi nê inhmã harê. Pa ijaxwÿja ma hwÿr mõi nê omu nê mẽ apyrã nê kãm mex o mex ã harê. Ijaxwÿja inhmã omunh prãm tÿx kumrêx. Anê.

Nom hêx rom ã ri mẽ kãm kapêr anê. Kot nhÿri harênh mar nê hã àmnênh nhùm mẽ kot hpîr kaxyw nhùm hêx rom ã kãm omunh prãm tÿx ã amnhî jarênh anê. ⁹⁻¹⁰ Jakamã nhùm mẽ kuma hãmri nê kato nê ma Perêj wÿr môr kurê kumrêx. Hãmri nê kormã mẽ õ pika kamã mẽ pa ri kanhêti ho studa xwÿnhnta nhùm mẽ axte amnhî kukamã omu nê hkînh nê. Nhùm ma Perêj wÿr mẽ hkukamã mô nhùm mẽ omunh pê ma hkôt pa rãhã hwÿr pôj. Nhùm kanhêtiya pahi nywre nhôrkwÿ mÿri ajêt. ¹¹ Jakamã nhùm mẽ ma hkôt mra nê ixkreja wÿr pôj nê kapem xa. Hãmri nê mẽ kãm kapêr nê mẽ hwÿr agjê nê Jesus mẽ katorxãja wa omu. Hãmri nê Jesus kutã hkôn krã ho hkrî hpa nê kãm kapêr nê kãm:

—Pa Xugitre. Hêxta waa nê. Nà amex o amex. Kot kaj nhÿrmã axaptãr hãmri nê apê mẽ inhõ Pahi Maati. Nà ãm hãmri na pa mẽ apumu nê ixkînh nê. Anê.

Hãmri nê ahpÿnhã kãm hkînh xã gõ. Kãm ôr kwÿ gõ nê kãm mẽhkuxwa xã hkwy gõ nê kãm te kot rãmre kuxware pyrãk pê mîraja nhùm mẽ kãm hkwy gõ. Mẽ hkînh xã hã kãxpore xohtõ nhùm prem kãm ôr pa. ¹² Hãmri nê ra akupÿm Jerujarê kamã pahi Erox wÿr nojarêt. Nhùm kamãt nhùm mẽ gõr nê hikwÿ hãmri nê ra amÿti. Nhùm Tirtùm mẽ hpimtir kãm mẽ kãm kapêr nê mẽ kãm:

—Pa? E mẽ inhma. Kêr ka mẽ akupÿm pahi Erox wÿr amrar nê kãm mẽ hkrata jarênh kêt nê. ãm kwarî ho kwarî. Nê kêr ka mẽ pry hõ hã mãn ma mẽ anhõ pika hwÿr akupÿm apa ho apa.

Anhÿr o mẽ kãm kapêr jakamã nhùm apkati nhùm mẽ kãnhmã hkrî hãmri nê Tirtùm kot mẽ kãm hã karõ xã hkôt ma akupÿm mẽ õ pika hwÿr pa kurê kumrêx nê akupÿm pahi Erox wÿr mrar kêt nê.

Juje mẽ hprõ wa kot Erox pymaj ma Jejus o môr

Apokariþ 12.1-6, 12.13-18

¹³ Tã nhùm kanhêti ho studa xwÿnhjaja ma akupÿm hapêx hãmri nhùm Tirtùm axte Marir mjên Juje hwÿr kapêr o mẽ wrÿk xwÿnhjê hõ mẽ. Nhùm kê axte hpimtir kãm hwÿr wrÿ nê kãm kapêr nê kãm:

—Pa Juje. E kwa kãnhmã nhÿ. Na ra pahi Eroxja aprõ pê hkrata ã amÿnê. Kojã tokyx pôristi hkwyjaja mẽ anhõ krî hwÿr pôj nê war apê hpîr kaxyw ri hapêr. Jakamã kwa wa tokyx akato nê ma pika pê Ejit wÿr amôr kurê kumrêx. Nê Ejit kamã apa rãhã pa nhÿrmã akupÿn amnê war amê. E kwa tokyx. Anê.

¹⁴ Hãmri nhùm kuma nê kãnhmã nhÿ nê Marir mra nê war amnhî to akuprõ nê ra nojarêt. Hãmri nê krîja pê Jejus o kato nê ma o môr kurê kumrêx. Wa môr ryy nê hãmri nê Ejit wÿr pôj nê kamã pa ho pa.

¹⁵⁻²⁰ Rôm nhùm pahi Erox tee ri amnhî wÿr kanhêti ho studa xwÿnhjê kamã hamak o pa nom nhùm mẽ akupÿm hwÿr mrar kêt nê. Jakamã nhùm mẽ kamã gryk nê hamaxpêr o:

—Tk. Kwa nà. Na mẽ ãm inhmã hêx nê akupÿn ixwÿr mrar nê nhÿri inhmã pahi nywta jarênh kêt nê. Nà kwãr mẽ mãmri ã inhîpêx anê. Mẽ kot ixpê ho hpimxuure kaxyw ã. Nà kot paj mẽ kêp kupî nhùm mẽ rî amnhî pumu. Na xep prem kanhêti kot harênh xãja pumunh ã ra hã amgrã pyxi nê hkôt mytwrÿ kêp 6. Jakamã mãn mẽ hkrata ra hã amgrã axkrut kaxyw. Nà na pa ra ijamaxpêr. Kot paj Perêj kamã mẽ hkra myjaja ra mẽ hã amgrã axkrut xwÿnhjaja nê kormã mẽ hã amgrã axkrut kêt xwÿnh pitã mẽ himex pa. Jao ra mẽ kamã pahi nywta pî. Nà ixte hpîr mã kênã. Kojã hprêk nê ixpãnhã Ijaew o amnhîptãr kêt nê.

Anhÿr o hamaxpêr hãmri nê amnhî wÿr õ pôristi hkwyjê hã karõ

nê mê kãm mê hkrajê hã amÿnê nê mê kãm:

—E kêr ka mê ma Perěj wÿr mra nê kamã mê kêp mê hkra myrejaja ra mê hã amgrã axkrut xwÿnhjê nhîmex pa. Nê kormã mê hã amgrã axkrut kêt xwÿnhjaja mãânên mê himex par kumrêx. Nê Perěj pu hã ri krî hkryre hkôt mãânên ri ajapôj nê ã mê himex par anê. Anê.

Hãmri nhÿm mê kuma nê ma mê hwÿr mrar kurê kumrêx. Hãmri nê Perěj wÿr pôj nê mê kêp mê hkra myre piitã mê himex pa. Jakamã nhÿm mê katorxã nê mê hipêêxãjaja tee ri mê hkra htyk xwÿnhjê pumu nê hkaprî htÿx nê mÿr rÿnh nê. Nom na pre Tirtÿm nhÿ hã kapêr jarênh o mê pa xwÿnh finat Jeremîstija ra amnepê m ã mê kot amnhî nhîpêx anhÿrja kukamã mê panhîgêjtê mã mê harê nê hã kagã. Na pre mê kãm Ijaew kurê xwÿnhjê pynênh nê ma mê ò pika hwÿr mê ho hapêx par kaxyw. Hãmri nhÿm mê panã Rrakewja te ra kot tee ri ja hã mê omunh nê tanhmã amnhî nhîpêx to pyrãk nhÿm Jeremîstija tanhmã Ijaewjê jarênh to nê hã kagã. Nê hã kagã ho:

Amnepê m Perěj kamã na pre mê panã Rrakewja hpijagri ho nôrja ã ra htyk kaxyw nê tee ri hkra kator mã xwÿnhhta kukamã hamaxpêr nê mÿr o nô. Nhÿm hkwyjaja tee ri akupÿm tam hamaxpêr kaxyw kãm kapêr. Tã jarãhã Rrakew kanrêhã hkra nê htãmnhwÿ nijaja ra urãk nê tee ri mê hkrare ho hamak xãj mÿr o pa. Mê kot mê kêp utãr nê mê himex par jakamã nhÿm mê tee ri mê ho hamak xãj mÿr o pa. Anê.

Nhÿm pre finat Jeremîsja mê hkukamã ã mê harê nê mê hã kagã anê. Tã ra jarãhã mêni piitã Rrakew pyrã nê hkrajê o hamak xãj mÿr o pa.

Wa kot akupÿm wa ò pika hwÿr Jejus o môr

Juãw 7.41-42

Tã nhÿm mytwrÿ grêre nê hapêx nhÿm pahi Erox ty. Jakamã nhÿm kamãt nhÿm Jujeja gôr nê nô. Nê kê òt kãm axte amÿti. Nhÿm Tirtÿm kapêr o mê wrÿk xwÿnhja axte hwÿr wrÿ nê kãm:

—Pa Juje? E na ra Marir pê hkra pîr mã xwÿnhhta ty. Jakamã kwa wa mãmrî ma akupÿm mô. Ma akupÿm mê apê Ijaewjê nhô pika hwÿr axãmnhîx aprô mê hkrata wa o mô.

Anhÿr o kãm kapêr. Na pre ra amnepê m Tirtÿm nhÿ hã kapêr o mê pa xwÿnhjê hõja ja kukamã mê panhîgêjtê mã ja jarê nê hã kagã. Nê hã kagã kot: “Ixpê Tirtÿm kot paj nhÿrmã Ejit rÿm ma akupÿm ò pika hwÿr ixkrata wa mê kumê.” Anhÿr o kot hkukamã harênh nê hã kagã.

²¹ Jakamã nhÿm Tirtÿm kapêr o mê wrÿk xwÿnhja ã Juje mã karô anê hãmri nhÿm kuma nê ma akupÿm wa o mô. Ma akupÿm mê ò pika hwÿr wa o mô.

²² Tã ra akupÿm hpôx kaxyw htêp o mô. Hãmri nê pahi Erox kra Akêrawja ra hipêêxã mÿr pê kot Jutej kamã mê ho amnhîptãr hã harênh ma. Hãmri nê tee ri mê amnhî kukamã hamaxpêr nê kãm mê hwÿr wa o môr puma nê.

Tã nhÿm kamãt nhÿm Juje ra gôr nê nô nê kê axte amÿti. Nhÿm kê axte Tirtÿm kapêr o mê wrÿk xwÿnhja hwÿr wrÿ nê akupÿm ò pika hkwy pê Jutej wÿr môr nê wa mê hkurê nê kãm:

—Pa Juje? E kêr ka Jutej wÿr wa mê amôr kêt nê. Pãnhã nhãm mê anhô pika hõ hwÿr mãn mô nê kamã ri apa.

Anê nhÿm kuma nê hpãnhã wa mê ma mê ò pika hkwy pê Garirej wÿr wa mê juk nê ma mô. ²³ Nê kamã pôj nê krî pê Najare hwÿr mô nê kamã amnhÿm ôrkwÿ nhîpêx nê

kamã wa mẽ pa ho pa. Nhũm pre ra annepêm Tirtũm nhỹ hã kapêr o mẽ pa xwýnhjê hõja ra ã mẽ kot amnhĩ nhĩpêx anhỹrja kukamã mẽ panhĩgêjtjê mã mẽ harê nê hã kagã. Nê hã kagã kot:

Tirtũm kot mẽ pahwýr mẽnh mã xwýnhhta koja kêp Najare nhõ xwýnh. Anê.

3

Juãw Paxis kot Tirtũm kapêr jarênh o pa

Makre 1.1-6; Rukre 3.1-14; Juãw 1.19-23

¹Nhũm pre Juãw Paxisja ã amnhĩ nhĩpêx anê. Nê pika pê Jutej kamã mẽ kãm Tirtũm kapêr jarênh o pa. No ãm krĩm pa hkêt nê. ãm mẽ hpu hã krĩ pê amỹm ri kapôt ã ri mẽ kãm Tirtũm kapêr jarênh o pa. ²⁻³Tirtũm nhỹ hã kapêr o pa xwýnh finat Ijais ra kot Juãw kukamã mẽ panhĩgêjtjê mã tanhmã harênh to nê hã kagã xá hkôt. Na pre hkukamã hã kagã ho: Koja nhỹrmã mẽhõ mõn pøj. Kapôt ã mõn pøj nê mẽ kãm tanhmã mẽmoj tã karõ hto ho ri pa. Nê mẽ kãm: “Koja Tirtũm tokyx mẽ pahwýr mẽ panhõ Pahihtija mẽ nhũm wrý nhũm mẽ piitã omu. Jakamã kwa mẽ tokyx kutêp tãm amnhĩ nhĩpêx o ri apa. Te mẽ kot mẽhõ kutêp pry ho mexta pyra nê amnhĩ nhĩ ho tãm amnhĩ nhĩpêx nê tãm ajamaxpêr mex o ri apa. Kêr ka mẽ Pahihti kutêp ã amnhĩ nhĩpêx anhỹr o ri apa.” Anhỹr o koja mẽ kãm ujarênh o pa. Anê.

Na pre finat Ijaisja Juãw Paxis kukamã ã mẽ kãm harênh anê nê hã kagã. Tã nhũm hã kagã xãja kôt nhũm Juãw Paxisja mõn pøj. Hãmri nê Ijais kot hkukamã harênh xã hkôt kapôt ã ri mẽ kãm ujarênh o pa nhũm mẽ kãm mar prãm xwýnhjaja

ma hwýr mra. Nhũm mẽ kãm kapêr nê mẽ kãm:

—E koja Tirtũm tokyx kot mẽ pakaxyw ãm xwýnhja o amnhĩrit. Jakamã kwa mẽ tokyx kutêp amã amnhĩ tomnuj kaga hprãm xaj tãm amnhĩ nhĩpêx o apa.

Anhỹr o Jejus kutêp mẽ kãm kapêr o pa.

⁴Juãw Paxisja hikãxpore hkêt jakamã na pre ê mex kêt nê pa. ãm mẽmo mry pê kamer kĩ ho amnhĩm ê nhĩpêx nê hagjê nê hã pa. Nê mẽmo mry hkã ho amnhĩ pre nê ri pa. Nê mẽõ mex kur kêt nê ãm krit ku nê menh ôr o ri pa.

⁵Jakamã nhũm kapôt ã ri mẽ kãm Tirtũm kapêr jarênh o pa nhũm mẽ kot mar kaxyw ma hwýr mra. Pika pê Jutej kamã ri mẽ pa xwýnhjaja. Nê Jutej kamã krĩ pê Jerujarê nhõ xwýnhjaja. Nê pyhti pê Jotãw mýri mẽ pa xwýnhjaja. Nhũm prem piitã harênh ma nê kot mar kaxyw ma hwýr mra. ⁶Hãmri nê kapêr ma nê Tirtũm noo mã mẽ kot amnhĩ tomnuj xwýnh ã kãm amnhĩ jarê. Mẽ kot amnhĩ tomnuj kaga nê tam amnhĩ nhĩpêx o pa hprãm xaj ã kãm amnhĩ jarênh anê. Nhũm Tirtũm kaxkwa kamã hkrĩ htã mẽ kuma nê amnhĩ katut kôt mẽ kot amnhĩ tomnuj rênh pa nê axte kãm hamaxpêr kêt nê. Jakamã nhũm pre Juãw Paxisja Tirtũm mã gôx kãm mẽ hkrã kumrãr pa. Pyhti pê Jotãw kamã mẽ hkrã kumrã.

⁷Tã nhũm Parijew mẽ Satusew nhõ xwýnhjaja mããnên mẽ hkôt ma Juãw Paxis wýr mra. Mẽ urak nê mẽ kêp Ijaew jakamã haxwýja Juãw Paxis kot mẽ hkrã kumrãr kaxyw ma hwýr mra. No ãm hkwyjê hkĩnhã mẽ kot amnhĩ tomnuj kaga hprãm xaj kãm amnhĩ jarênh kêt nê. ãm amnhĩ krã hkôt hkwyjê hkôt hwýr mra nê amnhĩ to kuma. Nom nhũm Juãw Paxisja ra hprĩ hã ã mẽ hamaxpêr anhỹrja kôt mẽ omunh mex nê. Jakamã mẽ kãm:

—Tk kwa nà. Kormã mẽ ate amnhĩ tomnuj pix o ri apa kênã. Xà kot paj mẽ ate amnhĩ tomnuj o apa rãhã mẽ akrã kumrã nhũm Tĩrtũm ja hã mẽ apumu nhũm ja kãm mex nê? Nà koja já kãm mex kêt nê. Koja ja mýrapê nhýrmã tanhmã mẽ atomnuj týx to ka mẽ tee ri umaj apimxur prãm kaprý. ⁸ Na htem amnhĩ tomnuj kaga nê tãm amnhĩ nhĩpêx nê tam axpên nhĩpêx. Jakamã e kwa mẽ ã amnhĩ nhĩpêx o apa anê pa rĩ kormã mẽ akrã kumrã. ⁹ Na ka htem atýx ri ajamaxpêr o: “Mê ixpê finat Apraãw kanrêhã htãmnhwý hkwý na pa mẽ. Jakamã koja Tĩrtũm ja hã mẽ ixpumu hãmri nê mẽ ixte amnhĩ tomnuj o ixpa tã nhũm ja hã tanhmã mẽ ixto hkêt nê. Koja mẽ ixto mex nê.” Anhýr o atýx ri amnhĩ kukamã ajamaxpêr. Nom ja kot anhýr kêt. Mẽ apê Apraãw kanrêhã htãmnhwý htã mẽ ate urãk nê tãm amnhĩ nhĩpêxre hã. Kot kaj mẽ apê htãmnhwý htã amnhĩ tomnuj o ri apa hãmri nê Tĩrtũm noo mã te mẽ apê pikap kênre nhĩkwý pix pyrãk. ¹⁰ Na ra Tĩrtũm mẽ ate amnhĩ tomnuj mýrapê tanhmã mẽ ato kaxyw. Te ho mēhō nhō mēmo hpār ô hkêt nhũm kot tee ri omunh nê krãhyr nê kuwy kamã mēnh nê ho kaxār par pyrãk o koja mẽ anhĩpêx. Jao amnhĩ nê kuwy hwýr mẽ arê ka mẽ kamã amnhĩ xà htýx kamã ajamak rãhã ho ri apa. Anê.

Nhũm pre ã Juãw Paxisja Parijew mẽ Satusew nhō xwýnhjê mã kapêr anê. ¹¹ Hãmri nê hpãnhã axte mẽ kot mar kaxyw hwýr mẽ mrar xwýnhjê mã kapêr nê mẽ kãm:

—E ra mẽ ate amnhĩ tomnuj kaga xwýnhjaja. Na pa Tĩrtũm mã mẽ akrã kumrãr kaxyw gô pix o mẽ akrã kumrã. Nom koja tokyx ixpãnhã Tĩrtũm kot mẽ pakaxyw ãm mã xwýnhta tãm mẽ pahwýr pój. ãhpumunh týx o kot ijakrenh par jakamã na pa hte ãm kukwak ri

ixpa nê amnhĩ tã hã ixpijaãm o ri ixpa. Koja mẽ awýr Tĩrtũm Karō rē nhũm mẽ akarō mã agjê. Ka mẽ ý hã tam amnhĩ nhĩpêx o ri apa. Nom kormã mẽ kot tãm amnhĩ nhĩpêx kêt xwýnhjaja koja Tĩrtũm kot mẽ pahwýr mēnh xwýnhja ja hã mẽ omu nê mẽ hipêx o te kuwy kot mēmoj to kaxār par pyrãk o mẽ hipêx.

¹² —Na htem pur kãm harøj nhĩkê nê ho grã nê hpãnhã kahtwý. Nê kahuk pa hãmri nê hkapĩ nhũm kôk apê nê prýhkã ho htor pa. Nhũm mẽ hpãnhã hy ho pa nê ixkre kamã gôj kãm unhwý. Ja pyrã nê koja tokyx Tĩrtũmja mẽ piitã mẽ kot tanhmã amnhĩ nhĩpêx to ho pa hã mẽ omunh xà hkôt mẽ ho axkjê. Jakamã mẽ kot tãm amnhĩ nhĩpêx o mẽ pa xwýnhjaja koja ma amnhĩ wýr mẽ ho api nhũm mẽ kuri mex rãhã nê pa ho pa. No mẽ kot amnhĩ tomnuj rãhã ho mẽ pa xwýnhjaja koja jajê hkĩnhã tanhmã mẽ homnuj to. Nhũm mẽ ma kuwy raxja wýr pa nê kamã amnhĩ xà htýx kamã hamak rãhã nê pa ho pa.

Anhýr o mẽ kãm kapêr.

Juãw Paxis kot Jejus krã kumrãr Makre 1.9-11; Rukre 3.21-22; Juãw 1.32-34

¹³ Tã nhũm Jejus pika pê Garirej rũm kato nê ma Juãw Paxis wýr mō. Juãw kot pyhti pê Jotãw kamã hkrã kumrãr kaxyw ma hwýr mō. Hãmri nê omu nê kãm:

—Pa. E ot pa awýr amnhĩ to tẽ. Ate mẽ kuxwar ixkrã kumrãr kaxyw. Anê.

¹⁴ Hãmri nhũm tee ri kuma nê kãm:

—Kwa nà. Aa ate amnhĩ tomnure hã kot pa kêt ri akrã kumrã. Nà ka kot kaj ixkrã kumrã. Anê.

¹⁵ Hãmri nhũm kãm:

—Kwa nà. Mãmri ixkrã kumrã Juãw Paxis. Tĩrtũm kãm ja prãm kênã kot ka kêt ri axtem nê ixkaga. Kot puj mẽ Tĩrtũm kãm hprãm xà

hkôt tanhmã amnhĩ nhĩpêx to ho ri papa. Anê.

Hãmri nhũm kuma nê kãm:

—Tôe. Nà kot paj akrã kumrã. Anê.

¹⁶ Hãmri nê pyhti hwÿr o wrÿ nê kamã hkrã kumrã. Hãmri nê wa akupÿm api nê gô mÿ ri ãm rãhã nhũm kaxkwa axkjê. Hãmri nhũm kurũm Tirtũm Karõja Jejus wÿr te tuuti pyrã nê ahpãr mã hwÿr wrÿk o tẽ nê ãkre hã xa. Nhũm Jejus arĩ amnhĩ wÿr wrÿk o htẽm kãm omunh o xa. ¹⁷ Hãmri nhũm Tirtũm kaxkwa rũm kãm kapêr nê kãm:

Pa? E apê ixkra mex na ka. ãm hãmri na ka hte ixkanrêhã ã amnhĩ nhĩpêx mex anê. Inhmã ajapê kamã na ka ri apa ho apa. Anê.

4

Satanasti tee kot amnhĩ tã Jejus kamã hamak

Makre 1.12-13; Rukre 4.1-13; mãânên Eprêw 2.18, 4.15

¹ Tã nhũm Jejus Tirtũm Karõ nhÿ hã ma kapôt ã ri pa. Satanasti kot amnhĩ tã kamã hamak kaxyw nhũm ma kapôt ã ri pa. ² Ri pa hã apkati xohtô nê. Ra hã arĩgro pê 40. Nê kormã apkur kêt jakamã ra kãm prãm tÿx kumrêx nê ri pa. ³ Hãmri nhũm Satanastija nhÿhÿnh hwÿr tẽ nê hêx rom kãm kapêr nê kãm:

—Pa. E kwa mãn ka ra amã prãm tÿx nê nã? Nom xep apê Tirtũm Kra jakamã apê mêmoj hihitÿx kêt. Tirtũm pyrã nê axãhpumunh o axãhpumunh kênã. Jakamã kwa kên nhĩkwÿ mÿj mã anê kê amã pãwti hã amnhĩ jahkre ka aku nê tokyx ho amnhĩ xihtÿx. E kwa tokyx kãm akapêr. Anê.

⁴ Hãmri nhũm kuma nê kãm:

—Tk. Nà kot paj amar xã hkôt ã ri amnhĩ nhĩpêx anhÿr kêt nê. Kojã Tirtũm kãm inhmã mêmoj nhõr prãm nê inhmã mêmoj gõ pa rĩ kormã kukrê. Kapêr ã kagã htũm kot ja jarênh kot:

Na htem mẽ apkur xã pix kukwak ri htĩr nê pa hkêt nê. Na htem mãânên Tirtũm kapêr ma nê hkôt amnhĩ nhĩpêx nê htĩr nê pa. Anê.

—ã kapêr ã kagã kamã kot harênh kot anhÿr jakamã kot paj akapêr kôt ri ã amnhĩ nhĩpêx anhÿr kêt nê. ãm kwarĩ ho kwarĩ. Anê.

⁵ Hãmri nhũm Satanastija tee ri kuma hãmri nê hpãnhã ma Jerujarê hwÿr o mõ. Nê Tirtũm mã amnhĩ jarênh xã hã ixkre hprêk nhĩmõk wÿr ho api nê kÿxpê hatur xã hã ãm nhũm xa. Hãmri nê amnhĩ parpê kên rũnh nhĩkwÿ xwÿnhja pumunh o xa nhũm Satanasti kãm:

⁶—E apê Tirtũm Kra jakamã kwa ja rũm ahpãr mã ajarĩ nê ma tẽ nê pikap tẽm. Kojã Anhĩpêxãja apumunh mex nê ka tanhmã amnhĩ to hkêt nê. Kapêr ã kagã htũm kot harênh kot:

Tirtũm kojã kapêr o wrÿk xwÿnh kwÿjê mã ajarê ka ajarĩ nê ahpãr mã tẽ nhũm mẽ kÿx pê amÿ nhũm mêmoj akã hyr kêt nê. Anê.

—ã kapêr ã kagã htũm kot ajarênh anhÿr jakamã e tokyx ajarĩ. Anê.

⁷ Hãmri nhũm Jejus kuma nê kãm:

—Tk kot paj ri ate inhmã karõ xãja kôt ã amnhĩ nhĩpêx anhÿr kêt nê. Kojã Tirtũm tãm inhmã ijarĩ hã karõ pa rĩ mar xã hkôt ijarĩ. No kot pa ri amar xã hkôt ijarĩ hkêt nê. Tirtũm kapêr ã kagã htũm kot ja jarênh kot:

Kêr ka mẽ amnhĩ krã hkôt amnhĩ tã ixkamã ajamak kaxyw inhÿxi jarênh kôt tanhmã amnhĩ nhĩpêx to hkêt nê. Anê.

—ã kot ja nê kapêr kot anhÿr jakamã kwarĩ ho kwarĩ. Kot paj ri amar xã hkôt ijarĩ hkêt kumrêx. Tirtũm tãm kot inhmã ã ixte amnhĩ nhĩpêx anhÿr ã karõre hã. Anê.

⁸ Hãmri nhũm Satanasti tee ri kuma nê hpãnhã ma nhÿri kên prêeti hwÿr o tẽ nê himõk ã axte o

xa. Hâmri nê kãm pika piitã ahkre hpa. Nê mê hikukrêx piitã nhũm kãm ahkre ho xa. Kãxpore nê mêmoj mex piitã nhũm kãm ahkre nhũm Jejus piitã omunh o xa. ⁹ Hâmri nhũm kê Satanasti axte kãm:

—E mãn ka kam ri mêmoj mex mũj piitã omunh pa. Piitã inhõ na. Nom kot kaj ixkutã tẽm nê inhmã inhmex o inhmex ã ijarẽ pa ama nê amã piitã õr pa. Ka kam mêmoj piitã ho anhõ nê ho amnhĩptar o apa. Jakamã e kwa tokyx. Anẽ.

¹⁰ Hâmri nhũm kuma nê axte kãm kapẽr nê kãm:

—Tk kwa ma nhỹhỹm tẽ Satanasti. Kot paj ri amã amex o amex ã ajarẽnh kêt kumrêx. Tĩrtũm kapẽr ã kagã htũm kot ja nê kapẽr kãm hihtỹx kẽnã. Kapẽr kot:

Ker ka mê ixkapẽr pix ma nê ixkutã pix mã akõnkrã ho akrĩ nê inhmã inhmex o inhmex ã ijarẽ. Kër ka mê ã amnhĩ nhĩpêx anhỹr o ri apa.

—Anhỹr o kot hã karõ jakamã kot paj amã amex o amex ã ajarẽnh kêt kumrêx. Anẽ.

¹¹ Hâmri nhũm tee ri amnhĩ tã kuma hãmri nê ma tẽ. Tee ri kãm kapẽr kaprỹja ã amnhĩ pumu hãmri nê hkaga nê ma tẽ. Hãmri nhũm Tĩrtũm kapẽr o mê wrỹk xwỹnhjaja Jejus wỹr wrỹ nê tanhmã ho mex to nê kãm õ nhũm kukrẽ nê akupỹm hihtỹx.

Jejus kot Garirej kamã kapẽr o pa Makre 1.14-15; Rukre 4.14-15

¹² Tã nhũm Juãw Paxisja mêmoj tã pahi Erox mã akir nhũm amnhĩ tã kuma nê gryk xaj haxã nhũm hkrĩ ho hkrĩ. Hãmri nhũm Jejusja harẽnh ma nê ma akupỹm Garirej kamã krĩ pẽ Najare hwỹr ma akupỹm tẽ. ¹³ Hãmri nê ra pøj nom kamã ri pa hkêt nê. Nê hpãnhã kurũm kato nê ma krĩ pẽ Kapanaũ hwỹr tẽ. Gõ rax pẽ Garirej mỹri na pre. Pika hkwy pẽ Jepurõ mê Natari wa mê kamã na pre nhũm Jejus wa hwỹr tẽ. Hãmri nê kamã

pa. ¹⁴ Nhũm ra amnepẽm Tĩrtũm nhỹ hã kapẽr jarẽnh o mê pa xwỹnh finat Ijaisja Jejus kukamã ra mê panhĩgẽtjẽ mã ã kot amnhĩ nhĩpêx anhỹr ã harẽ nê hã kagã. Jejus kot ã mê hwỹr mõr anhỹrja kukamã nhũm pre harẽ nê hã kagã. ¹⁵ Pika hkwy kamã mê pa xwỹnhjaja nhũm pre mê hkukamã mê harẽnh mex nê. Nê pika pẽ Garirej kamã mê pa xwỹnhjaja nhũm pre mããnhẽn mê hkukamã mê harẽ. Nê pyhti pẽ Jotãw mê gõ xujanãr wa hkaẽx kãm pika piitã kamã mê pa xwỹnhjaja. Nê krĩ pẽ Garirej kamã mê kęp Ijaew kêt xwỹnhjaja nhũm pre mããnhẽn mê harẽ. Á na pre finat Ijaisja mê hkukamã Tĩrtũm nhỹ hã mê piitã mê harẽ nê hã kagã anẽ. Jejus kot ma mê hwỹr mõrja kukamã nhũm ra hprĩ hã harẽ nê hã kagã. Nê hã kagãja o:

¹⁶ E. Kot paj mê amã mêmoj mex jarẽ ka mê inhma. Mê ate Tĩrtũm pumunh kêt jakamã te mê ate kamãt kô kamã ri apa pyrãk. Tã koja Tĩrtũm mê amã amnhĩ to amnhĩrit ka mê hpãnhã te mê ate hirã kamã ri apa pyrãk o amnhĩ nhĩpêx nê ra hkõt amnhĩ xunhwỹ.

Anhỹr o mê hkukamã mê harẽ nê hã kagã. ¹⁷ Tã nhũm ra kot hkukamã mê kãm ujarẽnh xã hkõt nhũm Jejusja mê hwỹr mõ nê mê kãm Tĩrtũm kapẽr jarẽnh o ri mê hkõt pa. Nê mê kãm tanhmã amnhĩ jarẽnh to ho pa. Nom kormã hprĩ hã mê kãm amnhĩ jarẽnh kêt nê. Te ho nhãm mẽhõ jarẽnh pyrãk o mê kãm amnhĩ jarẽ nê mê kãm:

—E na ra Tĩrtũnja kot mê akaxyw ãm xwỹnhta mê nhũm mê awỹr wrỹ. Jakamã kwa mê tokyx tee ri ate amnhĩ tomnuj ã amnhĩ pumu nê ã ate amnhĩ nhĩpêx anhỹr kaga nê hpãnhã Tĩrtũm kõt mãn amnhĩ nhĩpêx o ri apa.

Anhỹr o mê kãm kapẽr o pa pẽ mê

ahkre ho ri mẽ hkôt pa.

Jejus kot amnhĩ wỳr tep pynênh xwỳnhjê hwỳr

Makre 1.16-20; Rukre 5.1-11

¹⁸ Tã nhũm Jejus ma gô rax pê Garirej mỳ ri pa nê gôx kãm ja wa omu. Simãw Pêtre mẽ htô Andreja nhũm wa gôx kãm kryhti rênh o wa xa. Hãmri nhũm Jejus wa hwỳr tẽ nê wa omu nê amnhĩ kôt wa kuwỳ nê wa kãm:

¹⁹—Pa. E kwa ma ixkôt mãn war apa. Kot paj tanhmã war ajahkre hto ka wa ma mẽ kãm ijarênh o ri apa. Mẽ kot war amar nê ra ixkôt amnhĩ xunhwỳr kaxyw. Anê.

²⁰ Hãmri nhũm wa kuma nê kryhti re nê wa ma hkôt htêm kurê kumrêx. ²¹ Hãmri nhũm mẽ ma nhãm axte mỗ nê ra jajê hwỳr kato. Jepetew mẽ hkra Xiakre mẽ Juãwja nhũm wa mẽ hwỳr kato. Nhũm mẽ ô pàr kãm kryhti ho mex o wa mẽ nhỹ. Hãmri nhũm mẽ hwỳr mra nhũm Jejus amnhĩ kôt ja wa kuwỳ nê wa kãm:

—Pa Xiakre mẽ Juãw. E wa ma ixkôt mãn wa apa. Anê.

²² Hãmri nhũm wa kuma nê hipêêxã mã amnhĩ jarê nê ma hkôt pa ho pa kurê kumrêx.

Jejus kot tanhmã amnhĩ nhĩpêx to

Rukre 6.17-19

²³ Tã nhũm Jejus Garirej kamã Ijaew mã Tirtũm kapêr jarênh o pa. Na pre hte Tirtũm kapêr o mẽ ahkre xã mã ixkre hwỳr agjê nê kamã mẽ kãm Tirtũm kapêr jarênh o hkrĩ nê mẽ kãm:

—E mẽ tee ri ate amnhĩ tomnuj ã amnhĩ pumu nê hpãnhã Tirtũm kôt mãn amnhĩ nhĩpêx o ri apa. Kot kaj mẽ ã amnhĩ nhĩpêx anê nhũm ja mã mẽ apumu nê mẽ ato hkra kurê kumrêx. Anê.

Hãmri nê akupỳm mẽ kãm mẽ à xwỳnhjê ho mex. Ahpỳnhã tanhmã mẽ à kute xwỳnhjaja nhũm akupỳm mẽ ho mex o pa. ²⁴ Jakamã nhũm mẽ piitã pikaja kamã ri axpên mã

harênh o hprôt. Nê pika pê Sir kôt mãânên ma ri axpên mã harênh o hprôt. Nhũm mẽ piitã harênh ma nê ma hwỳr mẽ à xwỳnhjê ho mra. Ahpỳnhã ri tanhmã mẽ à kute xwỳnhjaja. Mẽ à htỳx xwỳnhjaja. Nê mẽ ã kamã mẽ htyk xwỳnhjaja. Nê mẽ hkrã pipãnh xwỳnhjaja. Nê mẽkarõmnuti kot Satanasti nhỹ mã tanhmã ri mẽ ho xwỳnhjaja. Nhũm prem mẽ hamỳ nê ma Jejus wỳr mẽ o mra nhũm mẽ omu nê akupỳm mẽ ho mex pa. ²⁵ Jakamã nhũm mẽ ohtô nê ma hkôt pa. Krĩ pê Garirej rũm nê Tekap rũm nê Jerujarê rũm nê pika pê Jutej rũm. Nê pyhti pê Jotãw nhĩkjê rũm mẽ pa xwỳnhjaja. Nhũm mẽ ã ohtô nê ma Jejus kôt omunh o pa anê.

5

Jejus kot tanhmã mẽ ahkre hto

Rukre 6.20-23

¹ Nhũm Jejus amnhĩ kôt ri mẽ kot omunh o mẽ pa xwỳnhjê pumu hãmri nê mẽ ahkre kaxyw ma tẽ nê hixêx ã api nê himõk ã nhỹ. Hãmri nhũm mẽ ma hkôt mra nê pu mã hkrĩ pa. ² Hãmri nhũm mẽ ahkre nê mẽ kãm:

³ E mẽ inhma. Kot kaj mẽ atô amnhĩ kaxyw tanhmã Tirtũm mẽ wa inhmã ajamaxpêr to nê ajamaxpêr o: “Koja Tirtũm inhĩhkô mã pa hkêx pa ixtỳx ri tanhmã amnhĩ tomnuj to ho ri ixpa rãhã ho ri ixpa.” Anhỳr o ajamaxpêr. Hãmri nhũm Tirtũm ã ajamaxpêr anhỳr ã apumu nhũm ja kãm mex nê. Hãmri nhũm apê hkra mã ato mex nê atãnopxar o akôt pa ho pa ka ajamakêtkati nê axãmnhĩx akĩnh nê ri apa.

⁴ Nê kot ka mẽ atô tanhmã amnhĩ tomnuj to. Hãmri nê tee ri ja mã amnhĩ pumu nê apijaãm nê akapri nê. Nê akapri xãj amỳr o nhỹ. Amỳr rax nê. Hãmri nhũm Tirtũm

- ja hã apumu nhũm ja kãm mex nê. Jakamã nhũm anê akapri hta nê ato mex nê ka ajamakêtkati nê axãmnhix akĩnh nê ri apa.
- 5 Nê kot ka mẽ atõ agryk tokyx anhÿr kêt nê. Nê kritpêm amnhĩ tã amã mẽ hkapri ho ri apa. Hãmri nhũm Tirtũm ja hã apumu nhũm ja kãm mex nê. Hãmri nhũm ato mex nê ka ajamakêtkati nê axãmnhix akĩnh nê ri apa.
- 6 Nê kot ka mẽ atõ amã Tirtũm kãm hprãm xã hkõt amnhĩ nhĩpêx o ri apa hprãm nê. Nhũm amnhĩ tã apumu nhũm ja kãm mex nê. Hãmri nhũm ato mex nê tanhmã akrã hto ka hkõt pix mã amnhĩ nhĩpêx o ri apa. Jao ajamakêtkati nê axãmnhix akĩnh nê ri apa.
- 7 Nê mẽ kamã mẽ axukapri ho ri apa xwÿnhjaja na hte Tirtũm ja hã mẽ apumu nhũm ja kãm mex nê. Jakamã na hte mẽ hã mẽ apyrã nê mẽ akamã ukapri ho pa. Jao mẽ ato mex nê ka mẽ ajamakêtkati nê axãmnhix akĩnh nê ri apa.
- 8 Nê kot ka mẽ atõ ã ajamaxpêr anê nê ajamaxpêr o: “Nà kot paj ãm Tirtũm kapêr kõt pix mã ri amnhĩ nhĩpêx o ri ixpa. ãm ja pix na inhmã hprãm.” Anhÿr o ajamaxpêr. Hãmri nhũm Tirtũm amnhĩ tã mẽ apumu nê mẽ ato mex nê. Ka mẽ ajamakêtkati nê axãmnhix akĩnh nê ri apa. Nê nhÿrmã Tirtũm wÿr api nê kuri amex rãhã apa ho apa.
- 9 Nê kot ka mẽ atõ mẽhõ wa kot axpên kutã amnhĩ xãm xwÿnhhta axpên tã wa omu nê wa kot tanhmã axpên nhĩpêx tota nê tanhmã wa kãm akapêr to nê akupÿm tãm wa ãm. Hãmri nhũm Tirtũm ja hã apumu nhũm

ja kãm mex nê. Nê apê hkra hã ajarê ka ajamakêtkati nê axãmnhix akĩnh nê ri apa.

10 Nê koja mẽhõ mẽ ate Tirtũm kapêr mar xã hkõt amnhĩ nhĩpêx o apa hã mẽ apumu nê hã tanhmã mẽ anhĩpêx kati hto. Tã nom koja Tirtũm arĩ mẽ ato mex nê. Mẽ apê hkra jakamã mẽ kot tanhmã mẽ anhĩpêx hto htã ka mẽ ajamakêtkati nê axãmnhix akĩnh nê ri apa.

11-12 —Kwãr mẽ mãmri ixtã mẽ ato kapêr rÿ mẽ ato hêx rÿ tanhmã ri mẽ atomnuj to. Kwãr mẽ mãmri ã mẽ anhĩpêx anê. Nom kêr ka mẽ arĩ amnhĩ kaxyw inhmã ajamaxpêr tÿx rãhã pẽ ajamakêtkati nê axãmnhix akĩnh nê ri apa. Kwãr mẽ mãmri ixtã ã mẽ anhĩpêx anê nê mẽ amex kêt ã mẽ ajarê. Amnepêm na prem ã Tirtũm nhÿ hã kapêr jarênh xwÿnhjê nhĩpêx anê. Jakamã koja mẽ urak nê ã mẽ anhĩpêx anê. Hãmri nhũm Tirtũm ja hã mẽ apumu nê amnhĩm mẽ amex ã mẽ ajarê. Hãmri nê nhÿrmã kaxkwa kamã wa inhõ krĩ kamã mẽ ato mex nê. Jakamã kêr ka mẽ ã amnhĩ kukamã ajamaxpêr anhÿr pẽ mãmri akĩnh nê ajamakêtkati nê axãmnhix ri apa. Kwãr mẽ mãmri ã wa ixtã mẽ anhĩpêx anê. Anê.

Jejus krajaja te kot kaxwa mẽ kanê hpòk wa urak

Makre 9.49-50; Rukre 13.34-35

13 Nhũm Jejus arĩ mẽ kãm kapêr nê mẽ kãm:

—Nê mẽ ate ixkõt amnhĩ xunhwÿr xwÿnhjaja te mẽ ate kaxwa pyrak. Kaxwaja mẽ apkur xã ho ành mã mex. No koja mẽhõ tẽn kamã pika hkwy mẽ nê ho ahkã. Hãmri tanhmã kot wem ho nê akupÿm ho mex? Nà koja akupÿm mex kêt nê. ãm mẽ kot hkapir pix kaxyw koja mex. Ja pyrã nê kot ka mẽ atõ ate inhmã tanhmã amnhĩ nhĩpêx to ho apa hã amnhĩ jarênh tã gaa nê rĩ amã ixkõt amnhĩ

nhîpêx prâm kêt nê. Hâmri nê ra te apê kaxwa mê pika pihkâta pyrâk. Kwa mê ixujarênh ma nê kâm ajamaxpêr tÿx râhâ ho ri apa.

¹⁴⁻¹⁶ —Nê te mê ate kanê hpôk pyrâk. Nê te mê ate hixêt prêk nhîmôk ã krî xâm pyrâk. Koja krîja hixêt prêeti nhîmôk ã xa nhûm mê piitâ omu. Nê kanêja. Xà na htem kanê hpôk nê poti ho hpro? Nà na htem hpôk nê kÿx pê mêmoj nhîmôk ã unhwÿ nhûm mê piitâ mê kâm hirã nhûm mê hirã kamã mêmoj pumunh mex nê. Ja pyrã nê kot kaj mê tãm amnhî nhîpêx o ri apa nhûm mê piitâ ja hã mê apumunh kôt ra kaxkwa kamã Tirtûm mex ã harênh o pa. Anê.

Jejus kot tanhmã Mojes kapêr jarênh to

Rukre 16.16-17

¹⁷ Nhûm Jejus arî mê kâm kapêr nê mê kâm:

—Nê amnepê m Mojes kot Tirtûm nhÿ hã Ijaewjê mã tanhmã mê kot amnhî nhîpêx to hã mê kâm karôja. Nê amnepê m Tirtûm nhÿ hã kapêr jarênh o mê pa xwÿnhjê kapêrja. Ixte mê kapêr o ijapêx kaxyw na pa pre mê awÿr ixwÿrÿk kêt nê. Jakamã kwa mê ri ã axpên mã ijarênh anhÿr kêt nê. Kêt ixprî hã ixte mê amã mê kapêr jarênh nhûm mê ate mar mex kaxyw na pa pre kaxkwa rûm mê awÿr wÿ.

¹⁸ —Tirtûm kapêr ã kagã htûm kot mêmoj jarênhja. Koja ujarênh xà hkôt mêmoj tanhmã amnhî to hpar mê nhûm rî kormã kaxkwa mê pika wa hapêx pa nhûm kapêr ã kagãja mãânênh hapêx. Nom nhûm Tirtûm kapêr koja mêmojja pyrã nê aa hapêx kêt nê. Koja rãhã ho rãhã nê aa ihkjê ho tanhmã mênh to hkêt nê. Âm hãmri na pa ã mê amã harênh anê.

¹⁹ —Nê kot ka mê atô Tirtûm kapêr o pixire nê hirôp xa. Hãmri nê ra amnhî pyrã nê anhîo mã ja hã amÿnê. Apyrã nê kot hirôp âm kaxyw ka kâm hã amÿnê. Kot

kaj ã amnhî nhîpêx anê hãmri nê apê Tirtûm kra hkêt ã amnhî to amnhîrit. Nom kot ka kêt mê tãm amnhî nhîpêx o ri apa. Nê amnhî pyrã nê tãm mê kot amnhî nhîpêx kaxyw mê kâm akapêr o ri apa hãmri nhûm Tirtûm ja hã apumu nê ato hkra nê ato mex nê.

²⁰ —No Parijew nhô xwÿnhjaja nê Tirtûm kapêr tûm o mê ahkre ho mê pa xwÿnhjaja. Mê kot Tirtûm kapêr kôt amnhî nhîpêx mex ã amnhî jarênh tâ no âm hkôt ã amnhî nhîpêx anhÿr kêt nê. Jakamã kot kaj mê hkôt amnhî nhîpêx o ri apa hãmri nê mê urâk nê nhÿrmã Tirtûm mê wa inhô krî kamã apa hkêt nê. Anê.

Mê gryk o mê pa xwÿnhjê jarênh

Rukre 12.58-59; mãânênh Rômãn 12.19; Epes 4.26; Wam Ximotre 2.8; Xiakre 1.19-20

²¹ Nhûm Jejus arî mê kâm kapêr nê mê kâm:

—Nê amnepê m na prem mê panhîgê tjê mã Tirtûm kapêr kwÿ jarênh o pa nê mê kâm:

Kêr ka mê axpên par kêt nê. Kot kaj mê mêhox pî nhûm mê ja mÿrapê atomnuj nê. Nê ma mê anhô pahihiti hwÿr ato tẽ nhûm mÿrapê tanhmã ato rÿ hkôt apî. Anê.

Âm hãmri na prem mê kâm ja jarê.

²² Tã kot paj ixprî hã mê amã tanhmã harênh to ka mê inhma. Kot kaj mê mêmoj tâ anhîo kamã agryk. Hãmri nhûm Tirtûm tee ri ja hã apumu nhûm ja kâm mex kêt nê. Jakamã koja mê anhô pahihiti tanhmã ja hã mê ato japêr hã koja ja mex nê. Rÿ kot kaj mê tanhmã mêhõ japyrÿ hto. Ho hagrô rÿ ho rop. Mÿrapê kop apu akwÿ kot apynênh nê anhô pahihiti hwÿr ato htêm nê îhkram ajaxâr ronhÿx ja inhmã mex nê. Rÿ kot kaj mê tanhmã anhîo mã akapêr punuj to nê kâm; “Tk. Ate ho warêhti hã. Te apê hagrô pyrâk kênã.” Anhÿr o kâm akapêr. Tã kot apu Tirtûm

ra ã akapêr anhÿrja mÿrapê mê kot amnhÿ xà htÿx kamã hamak tÿm xàta wÿr amênh ronhÿx ja inhmã mex nê. Ja pymaj kwa kêr ka mê ã axpên mã akapêr anhÿr kêt nê. Kêt mê axpên mã tãm akapêr pix o ri axpên kôt apa.

²³ —Nê kêr ka mê tanhmã ate anhÿo nhÿpêx hto kamã Tÿrtÿm mã mex o mex ã harênh kêt nê. Kêr ka mê kãm amnhÿ jarênh o akrÿ hãmri nê ra mêhõ kot mêmoj tâ akamã gryk xwÿnh mã ajamaxpêr japêr. ²⁴ Hãmri nê akato nê ma hwÿr atêm kurê kumrêx nê wa tãm axpên mã akapêr nê tãm akupÿm axpên xãm. Hãmri nê rÿ kormã ma akupÿm tê nê Tÿrtÿm mã amnhÿ jarênh jatur xãm amê nê kãm mex o mex ã harê. Kêr ka mê ã amnhÿ nhÿpêx anhÿr o ri apa.

²⁵⁻²⁶ —Na htem tanhmã axpên nhÿpêx to hãmri nê kot tanhmã war axpên to xwÿnhjê hõja ma õ pahi hwÿr tê nê kãm tanhmã kot ho xwÿnhnta jarênh kaxyw nojarê. Hãmri nhÿm ra kamã gryk xwÿnhnta kot pahi mã harênh kaxyw nojarê ã harênh ma nê tee ri amnhÿ kukamã hamaxpêr nê ma hwÿr tê nê wa akupÿm tãm axpên xãm. Na htem ã amnhÿ nhÿpêx anê. Pahi kot wa harênh mar nê tanhmã axpên tâ wa ho pymaj na htem ã amnhÿ nhÿpêx anê nê tokyx tãm akupÿm axpên xunhwÿ. No koja mê anhÿr kêt nhÿm pahija wa harênh ma nê wa kot tanhmã axpên to xwÿnhnta õ jaxà nhÿm tee ri kãm kator prãm. Hãmri nê tanhmã amnhÿ to nê ra amnhÿ pãnhã kãm amnhÿrer pa nhÿm pahiltija rÿ kormã pòristi mã anê nhÿm kãm ure nhÿm kato. Ja pyrà nê kêr ka mê Tÿrtÿm tanhmã kot mê anhÿpêx to pymaj tokyx mê ate amnhÿ tomnuj kaga nê hkôt amnhÿ nhÿpêx rãhã ho ri apa. Anê.

Tanhmã mê pahte mê pahprõjê nhÿpêx to

Matêwre 19.3-9; Makre 9.43-47, 10.2-9; mãânên Rukre 16.18

²⁷ Nhÿm Jejus arÿ mê kãm kapêr nê mê kãm:

—Nê na pre finat Mojesja mê panhÿgêjtê mã Tÿrtÿm kapêr tÿm kwÿ jarê nê mê kãm: “Kêr ka mê amnhÿ prõ pix tânopxar o ri apa. No mê kuhpa hã nhãm mêhõ ho amnhÿkati ho ri apa hkê. Anê. Am hãmri na pre mê kãm ja hã karõ. ²⁸ Tã kot paj ixprÿ hã mê amã tanhmã harênh to ka mê inhma. Kot kaj mê nhãm mêhõ pumu nê amã ho amnhÿkati hprãm mã ajamaxpêr. Jao te ra ate ho amnhÿkati pyrãk o amnhÿ nhÿpêx. Kormã ate ho amnhÿkati hkê. Tã ra hkukamã ajamaxpêr jakamã te ra ate ho amnhÿkati pyrãk o amnhÿ nhÿpêx. ²⁹ ã mê hamaxpêr punuj anhÿr xwÿnhjaja koja mê nhÿrmã ma mê kot amnhÿ xà htÿx kamã hamak tÿm xàta wÿr ma mra nê kamã pa rãhã ho pa. Jakamã kêr ka mê nhãm mêhõ pumu nê amã hkÿnh japêr hãmri nê te ate ano kaxàr nê mênh nê axte ate omunh kêt pyrãk o amnhÿ nhÿpêx. Jao hkàx ã rÿt nê ma nhÿhÿm atêm kurê kumrêx.

³⁰ —Nê kot kaj mê anhÿhkra ho tanhmã amnhÿ tomnuj to kaxyw. Hãmri nê tee ri ja hã amnhÿ pumu nê te ate amnhÿ nhÿhkra krãhyr nê mênh pyrãk o amnhÿ nhÿpêx nê tanhmã amnhÿ tomnuj to hkê. Mê ÿhkra ho mê kot tanhmã amnhÿ tomnuj to ho mê pa xwÿnhjaja koja mê nhÿrmã ma mê kot amnhÿ xà htÿx kamã hamak tÿm xàta wÿr ma mra nê kamã pa rãhã ho pa. Anê.

Mê pahte axpên kaga hkê

³¹ Nhÿm Jejus arÿ mê kãm kapêr nê mê kãm:

—Nê na pre finat Mojes mê panhÿgêjtê mã Tÿrtÿm kapêr tÿm kwÿ jarê nê mê kãm: “Kot kaj mê atõ aprõ kaga kaxyw hãmri nê ate hkaga hã amnhÿ jarênh ã kaga nhÿpêx nê kãm agõ nê rÿ kormã hkaga.” Anê. Am hãmri na pre ã mê kãm Tÿrtÿm kapêr tÿm jarênh

anê. ³² Tã kot paj ixprî hã mẽ amã tanhmã harênh to ka mẽ inhma. Kêr ka mẽ atýx ri amã hprãm xã hkôt aprõ kaga hkêt nê. Nom koja aprõ akuhpa hã nhãm mêhõ ho amnhĩkati ka harênh ma hãmri nê amã ja hã hkaga hprãm nê mãmri kam nê hkaga. Ja tanhmã kute hkêt. Nom koja ã amnhĩ nhĩpêx anhÿr kêt tã ka amnhĩ krã hkôt hkaga. Hãmri nhũm mêhõ apãnhã ho hprõ nê o pa. Hãmri nê ra kot apê aprõ ho amnhĩkati ho pa pyrãk o hipêx. Nê nija haxwÿja. Te arĩ kêp aprõ htã akuhpa hã nhãm myja o amnhĩkati o pa pyrãk o amnhĩ nhĩpêx. Anê.

Tãm mẽ pakapêr ã Jejus kot mẽ pamã karõ

Xiakre 5.12

³³ Nhũm Jejus arĩ mẽ kãm kapêr nê mẽ kãm:

—Nê na pre finat Mojes mẽ panhĩgêt nê pahpãmjê mã Tirtũm kapêr tũm jarênh o: “Kêr ka mẽ Tirtũm mã mẽmoj to anhÿr ã amnhĩ jarê hãmri nê amnhĩ jarênh xã hkôt kãm tanhmã amnhĩ nhĩpêx to. Nom kêr ka mẽ atýx ri kãm tanhmã amnhĩ jarênh to ho amnhĩ to axêx kêt nê. ãm akatãt kôt mẽ ate amnhĩ jarênh to xã hkôt kãm tanhmã mẽmoj to.” Anê. ãm hãmri na pre mẽ kãm ja jarê. ³⁴ Tã kot paj ixprî hã mẽ amã tanhmã harênh to ka mẽ inhma. Kêr ka mẽhõ mã tanhmã amnhĩ jarênh to. Tirtũm mã pix mã amnhĩ jarênh kêt nhãm mêhõ mã mããnên tanhmã amnhĩ jarênh to. Nê akatãt kôt kãm amnhĩ jarê. Na ka htem mẽ kot mẽ axêx kêt kôt mẽ apumunh kaxyw mẽmoj nhĩxi jarênh kôt amnhĩ jarê. Nom kêr ka mẽ axte ã mẽmo nhĩxi hã amnhĩ jarênh anhÿr kêt nê. Mẽmoj tã amnhĩ jarê nê akatãt kôt amnhĩ jarênh kurê kumrêx. No mẽ kot axêx kêt kôt apumunh kaxyw mẽmoj nhĩxi hkôt amnhĩ jarênh kêt nê. Tanhmãn kaxkwa nhĩxi jarênh kôt mẽmoj tã amnhĩ jarênh kêt nê.

Kaxkwa kêp Tirtũm krĩ xã maati kênã kot ka kêt mẽ axtem nê atýx ri amnhĩ kaxyw hixi jarê. ³⁵ Rÿ mẽ kot axêx kêt kôt apumunh kaxyw pika nhĩxi jarênh kêt nê. Pika kêp Tirtũm par xãm xã kênã kot ka kêt mẽ atýx ri amnhĩ kaxyw tanhmã hixi jarênh to. Nê krĩ pê Jerujarêja mããnên kêr ka mẽ ri amnhĩ kaxyw tanhmã hixi jarênh to hkêt nê. Koja nhÿrmã Tirtũm mẽ awÿr Jerujarê hwÿr ixpê pahĩ maati hã inhmẽ pa kamã mẽ ato amnhĩptãr o ixkrĩ. Jakamã kêr ka mẽ ri atýx amnhĩ kaxyw tanhmã hixi jarênh to ho ri apa hkêt nê.

³⁶ —Nê kêr ka mẽ kot axêx kêt kôt apumunh kaxyw mẽ ri tanhmã amnhĩ krã hkĩ jarênh to hkêt nê. Kot kaj mẽ anê nê ãm tanhmã hã harênh to kaprÿ. Xã kot kaj mẽ ajamaxpêr pix o tanhmã amnhĩ krã hkĩ hto? Nã kot kaj mẽ ho anhÿr kêt nê. Jakamã mẽ ri atýx tanhmã harênh to hkêt nê.

Nê mẽ atýx ri mẽmo nhĩxi jarênh kôt mẽmoj tã amnhĩ jarênh o apa hkêt nê. ³⁷ ãm akatãt kôt tãm amnhĩ jarênh kurê kumrêx. Jao mẽ kãm: “Tÿ. Nã kot paj ho anê.” Anhÿr o mẽmoj tanhmã ho. Rÿ mẽ kãm: “Nã kot paj ho anhÿr kêt nê.” Anhÿr o mẽmoj tanhmã ho hkêt nê. ãm akatãt kôt tanhmã mẽmoj tã amnhĩ jarênh to xã hkôt ho anhÿr kurê kumrêx. Mẽ kot Satanãsti hkôt amnhĩ nhĩpêx o mẽ pa xwÿnh pixjaja na htem hêx rom mẽmoj nhĩxi jarênh kôt tanhmã amnhĩ jarênh to ho pa. Anê.

Mẽ pahte tanhmã axpên nhĩpêx to hã Jejus kot mẽ pamã karõ

Rukre 6.27-30, 23.34; mããnên Atre 7.60; Rõmãn 12.14

³⁸ Nhũm Jejusja arĩ mẽ kãm kapêr nê mẽ kãm:

—Na prem amnepêm mẽ panhĩgêtjê mã Tirtũm kapêr tũm jarênh o: “Koja mẽhõ apê ano katõk nê hkapa hã koja mẽ anhõ pahija atã mã ho anê nê kêp no kapa.

Rỳ koja mēhō apē axwa hō hkwȳr hā koja atā mā ho anē nē atā kēp wa hō hkwȳr.” Anh̄ȳr o mē kām hā karō. Ām hāmri na prem ā ja jarēnh anē. ³⁹ Tā kot paj ixprī hā mē amā tanhmā ja jarēnh to ka mē inhma. Kojā mēhō tanhmā mē anhīpēx to ka mē ām amnhī tā omu nē tanhmā amnhī tā ho hkēt nē. Kojā anhīnep akura ka ām omu nē tanhmā amnhī tā ho hkēt nē. Te ate kām ihkjē hpēr nhūm kot ihkjē kamā hkuranh pyrāk o amnhī nhīpēx nhūm ja amā mex nē. No amnhī tā tanhmā ho hkēt nē.

⁴⁰ —Nē koja mēhō anhīnōhkā hā awȳ nhūm mē anhō pahija amā anē ka māmri kām agō nē tanhmā hā kām nē hkēt nē. Te ate hkōt kry pē kām anhīnōhkā hpakā ry jagjēnh xwýnhhta nhōr pyrāk o amnhī nhīpēx. Nom kēr ka mē kamā agryk kamā kām ōr kēt nē.

⁴¹ —Nē koja mēhō ate kām jēnh tur nē hkōt ho amōr ryy kaxyw amā kapēr ka māmri kām ho anē. Nē kot amā nh̄yri hā karō xāja wýr o pōj nom kamā kām ōr kēt nē. Kām ho hakrenh ryy nē rī kormā akupým kām agō.

⁴² —Nē koja mēhō ō mēmoj kēt nē awýr tē nē mēmoj tā awýr ka māmri kām agō. Rỳ nhūm awýr tē nē apē mēmoj to ĩpresta kaxyw ka māmri kām ho ĩpresta. Kēr ka mē ā axpēn nhīpēx anh̄ȳr o ri apa. Anē.

Mē pamā axpēn kīnh ā Jēsus kot mē pamā karō

Rukre 6.32-36; mǎānēn Rōmān 12.14

⁴³ Nhūm Jēsus arī mē kām kapēr nē mē kām:

—Nē na prem amnhī krā hkōt axtēm nē tanhmā mē panhīgētjē mā mēmoj jarēnh to nē mē kām: “Kēr ka mē amā mē akrāmnhwýjē pix kīnh nē tanhmā mē ho mex to. No kēt mē kot tanhmā mē ato xwýnhjaja kēr ka mē māmri mē kamā axàhkurē ho ri apa.” Anh̄ȳr

o mē kām karō. ⁴⁴ Nom pa kot paj mē amā Tirtūm kot tanhmā ja hā karō hto hā harē ka mē inhma. Kēr ka mē kot tanhmā ri mē atomnuj to xwýnhjaja amnhī tā tanhmā mē ho hkēt nē. Ām tanhmā mē ho mex to pix hkukamā mǎn ajamexpēr. Nē mē ho Tirtūm wýr pix kukamā mǎn ajamexpēr. ⁴⁵ Na hte ā kaxkwa kamā Mēpahpām Tirtūmja amnhī nhīpēx anh̄ȳr o pa. Mē kot amnhī tomnuj xwýnhjaja nē mē kot amnhī to mex xwýnhjaja nhūm hte mē ho hpimràatā mē ho mex o axpēn pyrāk. Jao hamē wa hwýr na rē nē hamē wa hwýr myyti rē nhūm hamē wa kām hirā ho pa. Jakamā kēr ka mē urāk nē mē piitā tām mē hipēx o axpēn pyrāk. Mē kot amnhī tomnuj xwýnhjē mē mē kot amnhī to mex xwýnhjē mē ho apimràatā mē ho mex o axpēn pyrāk.

⁴⁶ —Nē xāt kaj mē amā mē piitā mē ho mex prām kēt nē ām mē kot mē ato mex xwýnh pixjaja ka mē amā mē ho mex prām nhūm Tirtūm ja hā mē apumu nhūm ja kām mex nē nā? Nā koja kām mex kēt nē. Kojā mēhō ato mex kēt tā kēr ka ām amnhī rom ho mex nē. Nhūm Tirtūm ja hā apumu nē amnhīm amex ā ajarē. Mē kot amnhī tomnuj xwýnhjaja na htem ām mē kot mē ho mex xwýnh pixjaja nhūm mē amnhī xwar mē ho mex. No tām mē kot amnhī nhīpēx xwýnhjaja na htem mē piitā mē ho mex o axpēn pyrāk. Mē kot tām amnhī nhīpēx xwýnhjaja nē mē kot amnhī tomnuj xwýnhjaja nhūm mē ho hpimràatā mē ho mex o axpēn pyrāk.

⁴⁷ —Nē na hte mē hkwȳjaja ām amnhī kwýjē pix mā kapēr mex o pa. Nom mē piitā tām mē hipēx kēt nē. Nom kēr ka mē ā amnhī nhīpēx anh̄ȳr kēt nē. Kēr ka mē kurom mē piitā tām mē hipēx o axpēn pyrāk. Mē akwýjē mē mē akwý hkēt xwýnhjaja ka mē hipēx o axpēn pyrāk. Nē tām mē kām akapēr o axpēn pyrāk. ⁴⁸ Kaxkwa

kamâ Mēpahpām Tirtūm pyrā nē mē kot amnhī tomnuj xwŷnhjē mē mē kot amnhī to mex xwŷnhjaja mē ho apimràatā mē ho mex o axpēn pyrāk. Na hte ā Tirtūmja mē panhīpēx anē. Anē.

6

Mē pahte mē kēp amrakati xwŷnhjē ho mex rāhā hā mē pamā karō

¹⁻² Nhūm Jejus arī mē kām kapēr nē mē kām:

—Nē na htem mē piitā hkwŷjē noo mā tanhmā mē kēp amrakati xwŷnhjē ho mex to. Nom kām mē hkaprī kamā tanhmā mē ho mex to hkēt nē. Ām hkwŷjaja kot ja hā mē omunh nē mē mex ā mē harēnh pix kaxyw na htem krī hkôt ri mē kēp amrakati xwŷnh piitā mē ho mex o pa. Nē mē pikuprōnh xā hā ixkre kamā kuhē nē tanhmā mē ho mex to. Mē hkwŷjaja kot ja hā mē omunh nē amnhīm mē mex ā mē ho jarkrar kaxyw. Jakamā koja nhŷrmā Tirtūmja axte ja hā mē kām mēmoj mex nhōr kēt nē. Ra jar mē hkwŷjaja kot ja hā mē omunh nē amnhīm mē mex ā mē harēnh kēnā. Jakamā kwa kēr ka mē ho mē urāk kēt nē. Nē tanhmā mēhō ho mex to kaxyw nē akwŷjē no kuhpa hā mē hkàx ā tanhmā mē ho mex to. No kot kaj mē noo mā tanhmā mē ho mex to. Mē kot hā apumunh nē ato jarkrar kaxyw tanhmā mē ho mex to nhūm kaxkwa kamā Mēpahpāmja ja hā apumu nē mē hā tanhmā ato mex to hkēt nē. Koja ām hā apumu.

³ —Ja pymaj kēr ka mē mē kēp amrakati xwŷnhjē mā mēmoj nhōr kaxyw hāmri nē mē piitā mē no hkàx ā tanhmā mē ho mex to. Hāmri nē nhām ri ja hā mē kām amnhī to jarkrar kēt nē. Aprō mā rŷ akrajē mā rŷ akrāmnhwŷ mā hā amnhī jarēnh kēt nē. ⁴ Kot kaj mē no hkàx ā tanhmā ho mex to no nhūm Tirtūm tapxipix apumunh o

nhŷ. Hāmri nē ja hā ato mex rax nē ka amex nē apa. Anē.

Tanhmā mē pahte Tirtūm mā amnhī jarēnh to hā mē pamā karō Rukre 11.1-13, 18.9-14

⁵ Nhūm Jejus arī mē kām kapēr nē mē kām:

—Nē mǎānēn ja. Na htem hakwa pix o amnhī mex ā amnhī jarēnh xwŷnhjaja Tirtūm mā amnhī jarēnh kaxyw nē mē kot Tirtūm kapēr o mē ahkre xā hā ixkreja wŷr agjē. Nē mē piitā mē noo mā kām tanhmā amnhī jarēnh to. Rŷ gāp kuhē nē mē piitā mē noo mā kām amnhī jarē. Tā mēmo kaxyw na htem mē noo mā Tirtūm mā amnhī jarē? Nā ām mē kot ja hā mē omunh nē mē mex ā mē ho jarkrar pix kaxyw. Nē mē harēnh o: “E mŷjti pumu. Na hte apkati mē ā Tirtūm mā amnhī jarēnh anē. Kot amnhī to mex xwŷnh mǎn.” Anhŷr ā harēnh kaxyw. Tā ra mē piitā mē kot ja hā omunh nē amnhīm mex ā ho jarkrar jakamā koja Tirtūm axte ja hā tanhmā ho mex to hkēt nē. Ra pika ja kamā mē kot mē omunh nē mē mex ā mē harēnh kēnā. ⁶ No mē kajaja. Kēr ka mē urāk nē ā amnhī nhīpēx anhŷr kēt nē. Ām Tirtūm mā amnhī jarēnh kaxyw nē akwŷjē no hkàx ā hitom wŷr agjē nē hitom kām ahte kām amnhī jarē. Hāmri nhūm Tirtūm tapxipix ja hā mē apumu. Mē amā amnhī to amnhīrit kēt tā mē apumu. Hāmri nē mē ato mex nē.

⁷ —Nē mē kēp Tirtūm kra hkēt xwŷnhjaja na htem sānti mā amnhī jarēnh kaxyw nē xatā kām amnhī jarē. Nē xatā kàx pēē kām amnhī jarē. Nē hamaxpēr o: “Kot paj xatā sānti mā amnhī jarē nhūm inhmar japēr.” Anhŷr o hamaxpēr jakamā xatā kām amnhī jarē. No ām htŷx ā hamaxpēr anhŷr kaprŷ. ⁸ Jakamā kwa kēr ka mē ho mē urāk kēt nē. Tirtūm ra kot mē ate mēmoj tā hwŷr xàta ra ja kukamā kot omunh mex

kênâ kot ka kêt mê xatâ hã hwÿr o akuhê.

⁹ —Nê kêr ka mê kãm amnhî jarênh kaxyw nê amnhî krâ hkôt tanhmã kãm amnhî jarênh to rÿ kãm amnhî jarênh o:

Pa Mëinhîpêêxâ maati pê kaxkwa kamã ri apa xwÿnh? Amex o amex Tîrtûm.

¹⁰ Apê mê ijamâr mex xwÿnh maati na ka.

Na hte kaxkwa kamã mê kot ri amã tanhmã amnhî nhîpêx to ho mê pa xwÿnhjaja akôt pix mã amnhî nhîpêx o ri pa. Tã ijaxwÿja inhmã mê urâk nê akôt pix mã amnhî nhîpêx o ri i xpa hprâm.

¹¹ Nê kwa jarâhã mê inhmã mëmoj gô pa mê akukwak ri ho apku.

¹² Na pa hte tōhã amnhî tomnuj nê Tîrtûm. Nom mê kot tanhmã ixtomnuj to xwÿnhjaja na pa hte âm mê omu nê amnhî tã tanhmã mê ho hkêt nê. Nê ja ho ijamakêtkati nê axte kãm ijamaxpêr kêt nê. Â ixte amnhî nhîpêx anhÿr jakamã kwa ja hã ixpumu nê ixpyrà nê ixte tanhmã amnhî tomnuj to hã ixpumu nê hã tanhmã ixto hkêt nê. Âm ho ajamakêtkati kurê kumrêx nê axte kãm ajamaxpêr kêt nê.

¹³ Nê kot paj nhÿrmã tanhmã amnhî tomnuj to kaxyw ka ja hã ixpumu nê ixte â amnhî nhîpêx anhÿrja nê ixto htÿx nê pa tanhmã amnhî tomnuj to hkêt nê. Âm mëmoj punuj pê ixpytâr rãhã ho apa Tîrtûm. Tã âm ja pix na hapêx. Anê.

—E kêr ka mê â Tîrtûm mã amnhî jarênh anê. Anê.

¹⁴ —Nê koja mëhō tanhmã anhîpêx to htã ka ho ajamakêtkati nê axte kãm ajamaxpêr pix o ri apa hkêt nê. Hã koja kaxkwa kamã Mëpahpâm maati ja hã apumu

nê apyrà nê tanhmã ate amnhî tomnuj to ho hamakêtkati nê axte kãm hamaxpêr kêt nê. ¹⁵ Nom kot kaj mê â amnhî nhîpêx anhÿr kêt nê. Nê tanhmã mê kot mê atota â anohtÿx rãhã ho apa hãmri nhÿm Mëpahpâm maati ja mê apyrà nê mê ate tanhmã amnhî tomnuj to ho hamakêtkati hkêt nê. Âm hã nohtÿx rãhã ho pa ho pa. Anê.

Tanhmã mê pahte Tîrtûm mã mex o mex â harênh to

Rukre 18.11-12

¹⁶ Nhÿm Jejus arî mê kãm kapêr nê mê kãm:

—Nê mê kot amnhî to jarkrar xwÿnhjaja na htem Tîrtûm mã amnhî jarênh kaxyw hãmri nê tōhã ho apkur kêt rãhã kãm amnhî jarênh jakamã hkuk kaprî nê hkwyjê hkôt pa. Tã mo kaxyw na htem â mê noo mã amnhî nhîpêx anê? âm mê apkur kêt rãhã Tîrtûm mã amnhî jarênh â mê omunh pix kaxyw. Tã ra jar pika ja kamã mê kot ja hã mê omunh jakamã koja Tîrtûm nhÿrmã ja hã tanhmã mê ho mex to hkêt nê. Jakamã kwa kêr ka mê ho mê urâk kêt nê. ¹⁷ Kêr ka mê tōhã Tîrtûm mã amnhî jarênh rÿy kaxyw axâpkur kaga hãmri nê amnhî krâ kahō nê amnhî jaxwÿr mux nê akukkînh nê ri akwÿjê hkôt apa. ¹⁸ Hãmri nê nhÿri mê hkàx â ahte kãm amnhî jarê nê kãm mex o mex â harê. Kot kaj mê â mê hkàx â amnhî nhîpêx anê nhÿm mê akwÿjaja mê axâpkur kaga hã mê apumunh kêt nê. Nhÿm Tîrtûm pix ja hã mê apumu. Hãmri nê nhÿrmã ja hã mê ato mex nê. Anê.

Kaxkwa kamã mëmoj mex

Rukre 12.33-34; mãânên Sikûn Ximotre 4.8; Wam Pêtre 1.4; Eprêw 10.34

¹⁹ Nhÿm Jejus arî mê kãm kapêr nê mê kãm:

—Nê mãânên ja. Kêr ka mê jar pika ja kamã akukrêx rÿnh o apa hkêt nê. Kêt jar mê hikukrêx koja kritpêm mex kêt nê. Kot kaj mê ho

akuprô nhũm amnhôre apê homnu rý paratre apê homnu. Nê kàx o mē akukrêx nhũm haxwýja apê omnu rý nhũm mēhō apê hkwy ho ahkī. ²⁰ Jakamā kēr ka mē akukrêx rūnh o apa hkêt nē. Kaxkwa kamā Tirtũm kot mē akutêp mē akukrêx o pikuprōnhja na kêt mex kumrêx o jar mē hikukrêx jakrenh par. Jakamā kēr ka mē amā nhỹrmā kaxkwa kamā akukrêx mex prām xàj tām mē piitā tām mē hipêx nē mē ho mex o ri apa. Nē mē kamā axukapri nē. Nē Tirtũm kôt ri amnhī nhīpêx mex nē. Hāmri nhũm ā mē ate amnhī nhīpêx anhỹr ā mē apumu nē mē akutêp mē amā mēmoj mex kwý jaxwý. Kaxkwa kamā mo amnhôre nē mo paratre? Nē kamā mo mē ahkīnh xwýnh? ām kamā amrakati kumrêx. ²¹ Kot kaj mē jar akukrêx rūnh hāmri nē ām tanhmā apê homnu hto pix kukamā ajamaxpēr. Nom kot kaj mē apê Tirtũm kra hā kaxkwa kamā akukrêx mā ajamaxpēr rāhā ho ra akīnh nē ri apa.

²² —Nē kot kaj mē ixkapēr ma nē ixkôt amnhī nhīpêx hāmri nē tām amnhī nhīpêx. Nē tām axpēn hipêx. Jao te hirā kamā arīt mex pyrāk o amnhī nhīpêx. ²³ No koja mēhō ixkapēr ma nē ām kuma nē ixkwým ri amnhī nhīpêx o pa. Hāmri nē te kamāt kō kamā mēhō rīt mex kêt kot amnhī nhīpêx pyrāk o amnhī nhīpêx. E kēr ka mē ā amnhī nhīpêx anhỹr pymaj ixkapēr ma nē kām ajamaxpēr tỳx rāhā ho ri apa.

²⁴ —Nē kot kaj apyxi nē anhō patrāw hamēxkrut hāmri nē arīgro pyxi hā hamē wa kām axàpēnh o amỹkry hkêt nē. Kot kaj anē nē hō gryk ā ihō kaga. Ja pyrā nē kot kaj mē jar akàxpore nē akukrêx pix mā ajamaxpēr nē amā hapê ho akwýjê pē ho anhōxý ho ri apa. Nē gryk ā Tirtũm kām hprām xà hkôt tanhmā ho mē ho mex to hkêt nē. Jakamā kwa kēr ka mē Tirtũm pix mā mām ajamaxpēr rāhā nē. Jao akàxpore nē

akukrêx pix kukamā ajamaxpēr o ri apa hkêt nē. Anē.

Mē pahte tee ri amnhī kukamā pajamaxpēr kêt ā mē pamā karō

Rukre 12.22-31; määnēn Piripos 4.6; Wam Pêtre 5.7

²⁵ Nhũm Jejus arī mē kām kapēr nē mē kām:

—E. Kwa kēr ka mē tee ri mēmoj tā amnhī kukamā ajamaxpēr kêt nē. Tanhmān axàpkur xà rý axê ka mē tee ri hkukamā ajamaxpēr kêt nē. Mēmoj piitā hkukamā tee ri ajamaxpēr o ri apa hkêt nē. Tirtũmja àhpumunh tỳx o àhpumunh tỳx xwýnh na. Na pre àhpumunh tỳx o mē anhīpêx ka mē kukwak ri atīr nē apa. Jakamā xà kot mē amā mē anhō ho pa kaxyw àhpumunh kêt? Nà ja kaxyw àhpumunh tỳx kēnā. Kêp mē anhīpêx xwýnh jakamā määnēn kēp mē amā mē anhō xwýnh. Nē kēp mē amā mē axê nhōr xwýnh.

²⁶ —Mām ka htem kuwēnhre pumu. Na hte tee ri amnhī xàpkur xà hkukamā hamaxpēr o hkapri nē ri pa hkêt nē. Mē anhīpêxà maati tām na hte kām ō ho pa. Tā kām mē ajapê htỳx o kot kuwēnhre jakrenh jakamā koja urāk nē mē amā mē anhō rāhā ho pa.

²⁷ —Nē xà kot kaj mē kritpēm atīr prām xàj ja pix kukamā ajamaxpēr rāhā nē ra ajamaxpēr kôt kritpēm atīr nē apa? Nà kot kaj mē anhỹr kêt nē.

²⁸ —Mām ka htem akunī kamā pixōrā pumu. Na hte tee ri tanhmā kute hkukamā hamaxpēr o ra hkapri nē harir kêt nē. ²⁹ Tā nom muxre nē harir ka mē omu. Te ho amnepēm pahihti Sarumāw xê mex pyrāk nom mex o hakre.

³⁰ Pixōrāreja koja mēmo arīgro hā htīr nē mux nē harir tā mēmo arīgro hā ra grā pa nē hapêx. Kêp pixōrā pix nē hapêx tokyx anhỹr tā nhũm Tirtũm ho mex nē nhũm mux nē harir. No mē kajaja na hte mē ato mex o pixōrā ho mexta jakre.

Jakamã kwa mẽmo kaxyw kot ka kêt mẽ tee ri amnhĩ xê hkukamã ajamaxpêr o ri akaprĩ nê apa? Kot kaj mẽ ã ajamaxpêr anhÿr jao kormã amnhĩ kaxyw Tirtũm mã ajamaxpêr tÿx kêt nê.

³¹ —Kwa mẽ tee ri axàpkur xà hkukamã ajamaxpêr o ri akaprĩ hkêt nê. Nê tee ri amnhĩ kukamã tanhmã ajamaxpêr to ho ri akaprĩ hkêt nê. ³² Mẽ kot Tirtũm kôt amnhĩ xunhwÿr kêt xwÿnhjaja na htem ã ri hamaxpêr anhÿr o pa. Tã nom kêr ka mẽ ho mẽ uràk kêt nê. Tirtũm ra kot mẽ panhõ mẽmoj kêt kôt mẽ pahpumunh mex kênã. ³³ Jakamã kêr ka mẽ hkôt ri tanhmã amnhĩ nhĩpêx to rãhã ho ri apa. Nê amã ja pix tânopxar prãm. Hãmri nhũm Tirtũm amnhĩ tã mẽ apumu nê apkati mẽ mẽ amã mẽmoj nhõr o pa.

³⁴ —Jakamã kwa kêr ka mẽ tee ri amnhĩ kukamã ajamaxpêr o akaprĩ nê apa hkêt nê. Tirtũm kot apkati mẽ mẽ pajamãr mex jakamã kêr ka mẽ jarãhã amnhĩ kukamã apkati mẽ ajamaxpêr kêt nê. Kêr apkati mãn. ãm jarãhã pix mã mãn mẽ ate tanhmã amnhĩ nhĩpêx tota kukamã ajamaxpêr. Tirtũm kot mẽ pahpumunh mex o pa rãhã kênã. Anê.

7

Mẽ pahte axpên to pakapêr punuj kêt ã kot mẽ pamã karõ

Rukre 6.37-38, 6.41-42; mãänên Rômãn 2.1-3; Wam Korĩt 4.5; Xiakre 4.11-12

¹ Nhũm Jejus arĩ mẽ kãm kapêr nê mẽ kãm:

—Nê kêr ka mẽ atÿx ri amnhĩ krã hkôt tanhmã akwÿjê hõ kot amnhĩ tomnuj to hã harênh kêt nê. Kot kaj mẽ ã harênh anê nhũm Tirtũm ja hã mẽ apumu nê mẽ kajaja ã mẽ ajarênh anê. ² Na hte tanhmã mẽ pahte axpên nhĩpêx to hã mẽ pahpumunh kôt tanhmã mẽ panhĩpêx to. ³⁻⁵ Jakamã kwa kêr ka mẽ mẽhõ kot tanhmã amnhĩ tomnuj to hã omu hãmri nê hã kãm kapêr tokyx

anhÿr kêt nê. Akumrêx ate tanhmã amnhĩ tomnuj to hã amnhĩ pumu nê hkaga hãmri nê rĩ kormã ate mẽmoj tã omunh xwÿnhhta wÿr tẽ nê hã tanhmã kãm akapêr to. Kêr ka mẽ ã amnhĩ nhĩpêx anhÿr o ri apa.

—Nê xà koja mẽ akwÿjê hõ tanhmã amnhĩ tomnuj to grire. Ka ate amnhĩ tomnuj tÿx o hakrenh tã ã kot amnhĩ nhĩpêx anhÿr ã omu nê hã kãm akir nhũm amã ja mex nê nã? Nã koja amã ja mex kêt nê. Kot ka akumrêx ate tanhmã amnhĩ tomnuj tota kaga hãmri nê rĩ kormã anhĩõ tanhmã kot amnhĩ tomnuj to grireta nê kãm akapêr nhũm ja amã mex nê.

⁶ —Nê xà na htem mẽ apkur xà mex jamÿ nê rop mã kurê? Nã na htem anhÿr kêt nê. Ja pyrà nê kêr ka mẽ kot Tirtũm kaga xwÿnhjê mã kapêr jarênh o ri apa hkêt nê. Anê.

Mẽ pahte mẽmoj to presija hã amnhĩ to Tirtũm wÿr

Makre 11.24; Rukre 11.5-13; Juãw 14.13-14; mãänên Wam Tesarõn 5.17; Xiakre 1.5-8, 4.1-3

⁷⁻¹¹ Nhũm Jejus arĩ mẽ kãm kapêr nê mẽ kãm:

—Nê xà kot we akraja kãm prãm nê tep ã awÿ ka axtem nê kagã hõ py nê kãm agõ? Rÿ nhũm krãhyre gre hã awÿ ka axtem nê makre hõ py nê kãm agõ? Nã na ka htem ã mẽ hipêx anhÿr kêt. Na ka htem kot mẽmoj tã mẽ awÿr xà hkôt kãm mẽmoj gõ. Mẽ ate amnhĩ tomnuj tã na ka htem akrajê ho mex o ri apa. Tã kaxkwa kamã Tirtũmja na hte mẽ ato mex o mẽ ate mẽ akrajê ho mex jakrenh. Kãm mẽ ajapê htÿx kôt na hte mẽ amã mẽmoj mex nhõr o pa. Jakamã kot ka mẽ mẽmoj tã awÿ nhũm mẽ ama nê mẽ ate mẽmoj tã hwÿr xàta kôt amã kugõ. ãm xatã mẽ ate hã axàhwÿr o ri apaja nhũm mẽ amã hprãm xwÿnhhta gõ. ãm mẽmoj tã hwÿr rãhã ho ri apa nhũm mẽ ama nê mẽ amã mẽmoj tanhmã hipêx to. Te ho

mêhō kām tep xành nê teprênhxà hpyr nê xatā gôx kām rênh o âm pyrà nê xatā mêmoj tâ awy. Hâmri nhùm mē ama nê mē amā hprām xwýnhhta gō. Te tep kanhêr xwýnhhta jatā kot tep kanhêr pyràk. Jao mē amā mêmoj prām xwýnhhta gō.

¹² —Nê mē piitā mē kot tām mē anhîpêxja na mē amā hprām. Tā kêr ka mē amnhî pyrà nê tām mē piitā mē hipêx o ri apa. Mē kot tām mē anhîpêx kêt tâ kêr ka mē axâmnhîx mē kêp anhōxy hkêt nê tām mē hipêx. Kot kaj mē ã axpên nhîpêx anê nê finat Mojes mē Tîrtûm nhỹ hã mē kapêr o mē pa xwýnhjê xujarênh xà hkôt axpên nhîpêx mex o ri apa. Anê.

Pry pijakrut jarênh

Rukre 13.24; määnên Piripos 3.19-21

¹³⁻¹⁴ Nhùm Jejus arî mē kām kapêr nê mē kām:

—Tîrtûm kapêrja mē kêp hihtýx jakamā na htem ohtô nê hkôt amnhî xunhwýr kêt nê. Na htem âm hpýnhre nê hkôt amnhî xunhwýr nê hkôt amnhî nhîpêx. Jakamā te Tîrtûm nhō krî hwýr pry grireta ã hpýnhre nê pa pyràk. No nhùm Satanasti hkôt mē kot amnhî xunhwýr xwýnhjaja na htem Satanasti kôt pix mã tanhmā amnhî tomnuj to hprām. Mē kām mex jakamā nhùm mē amnhî nhîpêx o te pry krepak rax ã axpên kôt mē ohtô nê pa pyràk o amnhî nhîpêx. Axtem kuwy hwýr pry krepakja nôr tâ nhùm mē htýx kuwyja wýr amnhî to pa. Jakamā Tîrtûm kapêrja mē apê hihtýx tâ kêr ka mē māmri hkôt amnhî xunhwý. Jao Tîrtûm nhō krî hwýr pry grireta ã măn apa. Anê.

Mê kot amnhî to hêx xwýnhjê jarênh

Rukre 6.43-44; määnên Xiakre 3.9-12; Wam Juãw 3.10, 4.4-6

¹⁵ Nhùm Jejus arî mē kām kapêr nê mē kām:

—E kwa mē o kora. Mē akwýjaja kot kêp Tîrtûm nhỹ hã kapêr jarênh xwýnh ã amnhî jarênh tâ na htem ja hã amnhî to hêx. Nhùm htem kām mē kapêr mar prām nê. Te mē kapêr mex pyràk tâ no nhùm htem âm mē kām amnhî to hêx pix o ri mē hkôt pa. Mē kot mar nê axtem nê Tîrtûm kapêr kwým tanhmā amnhî nhîpêx to kaxyw nhùm htem hêx rom tanhmā mē kām kapêr to. Jakamā kwa mē o kora. Mē axkām ajamak rom nê amnhî nê mē omunh mex nê. ¹⁶ Kêr ka aprî hã mē piitā mē kot tanhmā amnhî nhîpêx to hã mē omu nê rî kormā tanhmā mē harênh to. Mē hamaxpêr punuj xwýnhjaja kêp Tîrtûm nhỹ hã kapêr jarênh xwýnh kêt. No koja mē tām hamaxpêr nê tām amnhî nhîpêx ka ja hã mē omu nê mē kêp Tîrtûm nhỹ hã kapêr jarênh xwýnh ã mē omunh kurê kumrêx. Na htem hprî hã mē kot tanhmā amnhî nhîpêx to ho pa hã mē omu nê rî kormā tanhmā mē harênh to. ¹⁷ Na htem hamaxpêr punuj hãmri nê hkôt tanhmā amnhî tomnuj to. Nom koja mēhō hamaxpêr mex nê hãmri nê hkôt tām amnhî nhîpêx mex o pa. ¹⁸ Na htem tanhmā hamaxpêr to xà hkôt tanhmā amnhî nhîpêx to ho pa.

¹⁹ —Nê koja mēhō ô pî hpàr ô hkêt japêr nhùm tee ri omu hãmri nê krâhta nê kuwym kumê. Ja pyrà nê koja mēhō tanhmā amnhî tomnuj to ho pa nhùm Tîrtûm tee ri ja hã omu hãmri nê ã kot amnhî nhîpêx anhýr o paja mýrapê kuwy hwýr kumê. ²⁰ Jakamā kot kaj mē tanhmā mē kot amnhî nhîpêx to ho pa hã akwýjê pumu nê ra aprî hã tanhmā mē kute hã mē omunh kurê kumrêx. Mē kêp Tîrtûm nhỹ hã kapêr xwýnh ã mē omu rý mē kêp hkwym ri kapêr xwýnh ã mē omu. Anê.

Mê kot Tîrtûm nhō krî hwýr gjêx

mã xwýnhjê jarênh

Rukre 13.25-27; mãânên Sikûn Korit 13.5; Wam Juãw 2.3-6

21-23 Nhũm Jejus arĩ mẽ kãm kapêr nê mẽ kãm:

—Nê Inhĩpêêxã Tĩrtũm mẽ wa inhõ krĩja wýr koja mẽ piitã gjêx kêt nê. Âm mẽ kot kapêr kôt amnhĩ nhĩpêx o mẽ pa xwýnh pixjaja koja mẽ nhỹrmã ma hwýr agjê. Na hte mẽ hkwýjaja ixto “Pahihti” anhỹr ã ijarênh tã no âm ixkôt ri amnhĩ nhĩpêx kêt nê. Jakamã koja mẽ nhỹrmã wa inhõ krĩ hwýr àpir kêt nê. Kot paj nhỹrmã mẽ piitã mẽ htĩr ri tanhmã mẽ kot amnhĩ nhĩpêx to ho pa hã mẽ omunh xã hkôt tanhmã mẽ harênh to. Mẽ mex ã mẽ hkwýjê jarê nê mẽ kot amnhĩ tomnuj ã mẽ hkwýjê jarê. Hãmri nhũm mẽ hkwý kot ixkôt amnhĩ nhĩpêx o pa hkêt xwýnhjaja kuwya wýr ma pa pymaj tee ri amnhĩ kukamã hamaxpêr hãmri nê tanhmã inhmã amnhĩ jarênh to nê inhmã: “Kwa Jejus. Xã ate ixpumunh kêt? Na pa pre amnepêm ixtĩr ri pikap ixpare ri anhỹ hã aa mẽ kot mẽmoj pumunh kêt kwý ho anhỹr rax nê. Nê ixkwýjê nê mẽkarõmnuti jano nê mẽ kãm akapêr jarênh o ri ixpa. Kwa xã ate ja hã ixpumunh kêt?” Anhỹr o inhmã amnhĩ jarê.

—Nom mẽ htĩr ri ã mẽ kot amnhĩ nhĩpêx anhỹr o pa htã ixkapêr kôt amnhĩ nhĩpêx kêt jakamã kot paj mẽ kuma nê âm mẽ kuma nê amnhĩ nê mẽ hano nê mẽ kãm: “Tk kwa mẽ ma mra. Mẽ apê ixkwý hkêt. Mẽ ate ixkôt amnhĩ nhĩpêx o apare hã. Âm mẽ ate amnhĩ tomnuj xwýnh na ka mẽ. E mẽ ma kuwy hwýr amrar kurê kumrêx.” Anhỹr o kot paj amnhĩ nê mẽ hano. Hãmri nhũm mẽ kot ixkôt amnhĩ nhĩpêx o mẽ pa xwýnh pixjaja ma Tĩrtũm mẽ wa inhõ krĩ hwýr gjêx pa. Anê.

Ixkre pijakrut jarênh

Rukre 6.46-49; mãânên Xiakre 1.22-25; Wam Juãw 2.3-6

24 Nhũm Jejus arĩ mẽ kãm kapêr nê mẽ kãm:

—E kot paj mẽ amã awjarê ka mẽ ixujarênh ma. Nã mẽ kot ixkapêr mar nê hkôt amnhĩ nhĩpêx o mẽ pa xwýnhjaja te mẽ kot ixujarênh ja pyrãk. Mẽ kot amnhĩ nhĩpêx o te mēhõ kot amnhĩ kukamã hamaxpêr mex nê aptýx kãm amnhĩm òrkwý nhĩpêxja pyrãk. 25 Koja mēhõ aptýx kãm amnhĩm hipêx nhũm mẽmo arĩgro hã na wrýk rax nê gô htãm rax nê hanhi no nhũm arĩ âm týx nê xa. Tã kot kaj mẽ ixkôt amnhĩ nhĩpêx o ri apa hã kot kaj mẽ te ixkre ja pyrãk. Jao amex nê ajamakêtkati nê ri apa. Te ho gô htãm kot ixkre janhir nhũm arĩ âm týxta pyrãk.

26-27 —No mẽ kot ixkapêr mar nê âm mar xwýnhjaja. Te mẽ kot mēhõ kot amnhĩ kukamã hamaxpêr mex kêt nê htýx mōr nê gô mýri gyw rerek kãm amnhĩm òrkwý nhĩpêx pyrãk. Koja mẽmo arĩgro hã òrkwý hã kòk xàpêr týx nê na wrýk rax nê. Nê gô htãm nê hanhi nê kêp grãnh pa. Jakamã koja mēhõ ixkôt amnhĩ nhĩpêx kêt nê te kot ã kot amnhĩ nhĩpêx anhỹr xwýnhnta pyrãk. Jakamã kwa mẽ ixkapêr mar týx nê hkôt amnhĩ nhĩpêx rãhã ho ri apa. Te mēhõ aptýx kãm òrkwý xãm xwýnhnta pyrãk. Anê.

28 Nhũm pre Jejusja ã mẽ kãm ujarênh ry anê nhũm mẽ amnhĩ jaêr pê kot tanhmã mẽ ahkre htoja mar o hkrĩ. 29 Hãmri nê axpên mã harênh o:

—Hêxta waa nê. Âm hãmri na ã mẽ pamã kapêr anê. àhpumunh týx kôt na hte âm hãmri tanhmã mẽ pamã ujarênh to. Pêr âm Tĩrtũm kapêr tũm o mẽ ahkre xwýnhjê kurom àhpumunh týx kumrêx. Anê.

8

Kà nhy hkro xàpêr o pa xwýnh jarênh

Makre 1.40-45; Rukre 5.12-16

¹ Tã nhũm Jejus mē kãm kapēr pa hãmri nē hixét prêeta rũm akupÿn wrÿ nē ma tē nhũm mē ohtô nē ma hkôt mra. ² Hãmri nhũm mēhō my hkà nhy hkro xapêr o pa xwÿnhja omu nē hwÿr tē. Hãmri nē kutã hkõnkrã ho tēm nē hipô nē nhÿ nē amnhĩ to kuwÿ nē kãm:

—Pa Pahihti. E ot pa awÿr amnhĩ to tē. Akupÿm ate mē ixto mex kaxyw axãhpumunh tÿx jakamã kot ka amã akupÿm ixto mex prãm nē mãmri ixto mex. Anē.

³ Hãmri nhũm Jejus kuma nē hkà punuti hã ãhkra xi. Amnhĩ kamã kahak kêt nē hã ãhkra xi nē kãm:

—Nã kot paj ato mex. E akupÿm akã mex. Anē.

Hãmri nhũm hkà akupÿm mex kurê kumrêx. ⁴ Hãmri nhũm Jejus kãm:

—E kêr ka amnhĩ tã mē kãm tanhmã ijarēnh to hkêt rãhã ma patre hwÿr tē kē akupÿm akã mex ã apumu. Hãmri ka hpãnhã annepēm finat Mojes kot mē ate akupÿm amex ã Tirtũm mã tanhmã amnhĩ nhĩpêx to hã karõta ka kãm ho anē. Kē mē piitã akupÿm akã mex ã apumu. Anē.

Pôristi krãhtũm mã àpēnh xwÿnh jarēnh

Rukre 7.1-10

⁵ Tã nhũm Jejus ma krĩ pē Kapanau hwÿr mō. Hãmri nē hwÿr pōj nhũm Rõm nhõ xwÿnh pē pôristi krãhtũmja omu nē hwÿr tē. Kêp Ijaew kêt tã hwÿr tē. Na pre kãm àpēnh xwÿnh kêp à htÿx nē nō nhũm omu nē tee ri hkukamã hamaxpêr. Hãmri nē Jejus ra õ krĩ hwÿr hpôx ã omu nē hwÿr tē nē kãm harē nē kãm:

⁶ —Pa Jejus? E ot pa awÿr tē. Inhmã àpēnh xwÿnhja na ixpê à htÿx nē. Ra ã kamã htyk pa nē nō. O mÿj inhõrkwÿ kamã nō. Anē.

⁷ Nhũm Jejus kuma nē kãm:

—Tÿ? Tôe. Nã pa ma akôt tē nē akupÿm amã ho mex. Anē.

⁸⁻⁹ Hãmri nhũm tee ri kuma nē kãm:

—Kwa akĩnhã ixpê Ijaew kêt jakamã ixte amnhĩ kuk ã ixpijaam. ãm ja rũm mãn akapêr pix o akupÿm inhmã ho mex nã? Ixpê mē hkrãhtũm na pa hte inhõ pôristi mã mēmoj tã karõ nhũm mē inhmar xà hkôt inhmã mēmoj tanhmã ho. Na pa hte mē kãm: “E mē ma mra nē ã amnhĩ nhĩpêx anē.” Anē nhũm htem inhma nē ma mrar kurê kumrêx. Rÿ pa mē kãm: “E mē amnē ixwÿr mra nē ã amnhĩ nhĩpêx anē.” Anē nhũm mē inhma nē ixwÿr mra. No kêt ixrom axãhpumunh tÿx kôt na ka hte mē aja mã akapêr nhũm ama nē mē kêp hapôx nē ma mrar kurê kumrêx. Jakamã kwa ãm ja rũm akapêr pix o akupÿm inhmã ho mex nã? Anē.

¹⁰ Hãmri nhũm Jejus amnhĩ jaêr pē kot kãm ã kapêr anhÿrta ma nē hkĩnh nē. Hãmri nē hã hkôt ri mē mōr xwÿnhjê mã kãm:

—Kwa xà na ka mēmyja kapêr ma? Mē pahkĩnh ã kêp Ijaew kêt tã mē arom amnhĩ kaxyw inhmã hamaxpêr tÿx nē. Aa mē atõ urak nē ã amnhĩ kaxyw inhmã ajamaxpêr tÿx anhÿr kêt tã nhũm mē arom kãm àpēnh xwÿnh kaxyw ã inhmã hamaxpêr tÿx anē. ¹¹ Nã koja nhÿrmã mē hkwyjaja kêp Ijaew kêt tã ohtô nē pika piitã kurũm ma Tirtũm mē wa inhõ krĩ hwÿr api nē hwÿr agjê. Nē wa ixkuri wa inhõ krĩ kamã Ijaew pãr krax pē Apraãw nē Ijak nē Jako mē pimràatã pa ho pa. Mē kêp Ijaew kêt tã mē ãhkô hã apkur mex o hkrĩ nhũm Tirtũm mē ho mex rax o pa. ¹² No pēr mē apê Ijaew kwÿjaja kot kaj mē hkôt hwÿr agjêx kêt nē. Tirtũm kãm hwÿr mē agjêx prãm tã ka mē axtem nē hkaga. Jakamã kot kaj mē ma kamãt kô xihtÿx rax wÿr ajapêx nē mē kêp awry rax nē mē kot amnhĩ xà htÿx kamã hamak tũm xata kamã apa ho apa. Hãmri nē tee ri mē ixwÿr agjêx prãm kaprÿ nē akapri

xàj mur nê amnhĩ kamã agryk tỳx nê. No ãm tee ri amnhĩ kamã agryk kaprỳ. Mẽ ate Tĩrtũm kapêr kaga nê hkõt amnhĩ xunhwỳr kêt jakamã kot kaj mẽ nhỹrmã ã amnhĩ nhĩpêx anê. Anê.

¹³ Nhũm pre ã Jejusja mẽ kãm kapêr anê. Hãmri nê pòristi krãhtũmta mã kãm:

—E mãmrĩ ma akupỳm tẽ nê amã àpênh xwỳnhhta pumu. Ra ate kaxyw inhmã ajamaxpêr tỳx jakamã na pa ra akupỳm amã ho mex. E akupỳm tẽ nê omu.

Anhỹr o kãm kapêr rôm nhũm ra akupỳm kãm mex kurê kumrêx.

Jejus kot ahpỳnhã mẽ à xwỳnhjê ho mex

Makre 1.29-31; Rukre 4.38-41

¹⁴ Tã nhũm Jejus ma Simãw Pêtre nhõrkwỹ hwỳr tẽ nê hwỳr axã. Nhũm Simãw Pêtre xupãnhgêx ra à nê hkà kagro htỳx nê nõ. ¹⁵ Hãmri nhũm Jejus hwỳr axã nê omu nê ìhkra hã kupy nhũm hkà hakry nê akupỳm hihtỳx kurê kumrêx. Jakamã kànhmã nhỹ nê mẽ kãm mẽõ hã àpênh o ri mra.

¹⁶ Tã nhũm ra awjakry. Ra kamãtre ho mẽ nhũm mẽ piitã Jejus wỳr mẽ à xwỳnhjê ho mra. Nê mẽkarõmnuti kot mẽ hwỳr gjêx xwỳnhjaja nhũm mẽ hwỳr mẽ o mra. Hãmri nhũm mẽ omu nê akupỳm mẽ piitã mẽ ho mex. Mẽ à xwỳnhjê ho mex nê mẽ hkwỳjê nê mẽkarõmnuti jano. ãm kapêr pix o mẽ nê mẽ hano nhũm mẽ kêp hapôj nê ma hapêx. ¹⁷ Na pre ra Tĩrtũm nhỹ hã kapêr xwỳnh finat Ijaisja ã amnhĩ nhĩpêx anhỹrja kukamã amnepêm mẽ kãm harênh o:

Tĩrtũm kot mẽ pahwỳr mẽnh mã xwỳnhja koja nhỹrmã wrỳ nê mẽ panê mẽ paxã piitã rênh pa nê akupỳm mẽ pahto mex pa. Anê.

Na pre ã finat Ijaisja Jejus kukamã harênh anê. Tã nhũm wrỳ nê kot harênh xã hkõt ã amnhĩ nhĩpêx anhỹr o pa.

Wa kãm Jejus kõt amnhĩ xãm prãm xwỳnh wa harênh

Rukre 9.57-62

¹⁸ Tã nhũm Jejus amnhĩ pu hã rĩt nê tee ri hwỳr mẽ mrar xwỳnhjê pumu hãmri nê hkõt mẽ pa ho mẽ pa xwỳnhjê mã kãm:

—E ma pu mẽ pàr mã agjê nê ma xarmã mẽ. Anê.

¹⁹ Hãmri nhũm mẽ nojarêt rôm nhũm Tĩrtũm kapêr tũm o mẽ ahkre xwỳnhjê hõ Jejus wỳr tẽ nê kãm:

—Pa mẽ ijahkre xwỳnh? E pa ma akõt ri ixpa ho ixpa nã. Anê.

²⁰ Hãmri nhũm kuma nê kãm:

—Ko ka mã. Kam nê rĩ ma ixkõt ri apa. Nom kêr ka inhmar kumrêx. Xore na hte pika hkre kamã hikwỹ. Nê kuwênhre pĩ nhĩmõk ã hikwỹ. No pa ixpê Tĩrtũm kot mẽ awỳr inhmênh xwỳnh tã mry hkĩnhã inhõrkwỹ hkêt. Na pa hte amarĩ nhãm krĩ hwỳr ixpa nê nhãm hõ hwỳr ixpa. Tã xã kot ka ixpyrà nê ã amnhĩ nhĩpêx anhỹr o ri apa nã? Anê.

²¹ Hãmri nhũm pãnhã hõja hwỳr tẽ. Ra mẽ kot hkõt amnhĩ xunhwỳr xwỳnhjê hõja hwỳr tẽ nê kãm:

—Pa Pahĩti. E pa amã amnhĩ jarê ka inhma. Kot paj ma akõt ixpa ho ixpa no ãm kormã. Koja nhỹrmã inhĩpêxã tanhmã amnhĩ to nê ty mãn. Pa haxã hãmri nê rĩ kormã ma akõt ixpa ho ixpa. Anê.

²² Hãmri nhũm kuma nê kãm:

—Kwa nã ri ã ajamaxpêr anhỹr kêt nê. Ma ixkõt apa ho apa kurê kumrêx. Kê mẽmoj inhnê ano kupy rỳ apê àmnàr kêt nê. Kwãr mẽ htĩr tũm nê mẽ pa hkêt mã xwỳnhjaja mãn axwakre kamã amã anhĩpêxã jamãr o pa nê haxã. Anê.

Jejus kot kõt o pinhkrênh jarênh

Makre 4.35-41; Rukre 8.22-25

²³ Tã nhũm mẽ ra xarmã nojarêt nhũm Jejus mẽ hkõt mẽ pa ho mẽ pa xwỳnhjaja pàr wỳr agjê hãmri nê himõ raxja ã ma xarmã mẽ.

²⁴ Hãmri nhũm Jejus ra õtxwa nê ra gõr nê nõ. Puh nhũm naja hkoko

ho mō nê kôk xàpêr tỳx kumrêx. Nhũm gô kànhmã harĩ nê axpên tak tỳx nê. Xatã axpên tak nê pàr kre kamã axkapĩ nhũm ra àr o mō. Hãmri nhũm mẽ tee ri omu nê kãm ma htỳx kumrêx. Nê tee ri amnhĩ nhĩpêx. No nhũm Jejusja htỳx gôr nê nō. ²⁵ Hãmri nhũm mẽ hwỳr hprôt nê kumra nê kãm:

—Kwa Pahihti. Kot puj mẽ jarãhã pahtyk pa. Kwa tokyx kànhmã nhỹ nê ri tanhmã amnhĩ nhĩpêx to wehe. Anê.

²⁶ Hãmri nhũm hkrākato nê kànhmã nhỹ nê kôk mã kapêr nê kãm:

—E kwa hãmri anhĩkrê. Anê.

Puh nhũm hpinhkrênh pa nhũm gôja tãm nôr kurê kumrêx. Hãmri nhũm Jejusja hkôt mẽ pa ho mẽ pa xwỳnhjê hwỳr apkjê nê mẽ kãm:

—Hêxta waa nê. Kwa pêr ãm kor-mã te mẽ ate amnhĩ kaxyw Tĩrtũm mẽ wa inhmã ajamexpêr tỳx kêt pyrãk. Hã na ka mẽ amã ma xàj tee ri amnhĩ kukamã ajamexpêr. Anê.

²⁷ Hãmri nhũm mẽ amnhĩ jaêr pê ã kot amnhĩ nhĩpêx anhỳrja ã omu nê tee ri hamaxpêr nê axpên pumunh pê omunh o kuhê. Hãmri nê axpên mã:

—Kokỳỹ. Pêr Jejus kêp mẽ panhĩ hkêt. Mẽ pahtô kot pu we te kot amnhĩ nhĩpêx pyrã nê kôk mã pakapêr nhũm hpinhkrênh kurê kumrêx? Nã Jejusja mẽ pakurom àhpumunh tỳx o àhpumunh tỳx. Anê.

Jejus kot wa nê mẽkarômnuti janor

Makre 5.1-20; Rukre 8.26-39

²⁸ Tã nhũm mẽ ra himô rax pê Garirejja ã rê nê pika pê Geras wỳr pój nê kamã mō. Hãmri nhũm ra mẽhõ myja wa hamêxkrut nê mẽ kutã tẽ. Ra mẽkarômnuti kot hamê wa hwỳr gjêx xwỳnhja wa. Mẽkarômnuti xohtô kot tanhmã wa ho jakamã nhũm wa oprê htỳx nê hihitỳx rax nê wa pa. Jakamã nhũm mẽ piitã kãm wa uma nê amnhĩ nê mẽ htykjê jagjênh xà hã kên kre

kaêx kãm wa kumê nhũm wa kamã pa ho pa. Jakamã nhũm wa Jejus kutã tẽ nê amnhĩ wỳr omu hãmri nê amnhĩ nê tanhmã kãm kapêr to. Nom mẽkarômnuti nhỹ hã àmra kamã kãm kapêr nê kãm:

²⁹ —Pa Tĩrtũm Kra Jejus? Mo kaxyw na ka mẽ ixwỳr tẽ? Kwa tanhmã mẽ ixto hkêt nê. Ate tanhmã mẽ ixtomnu hto hã arĩgrota kormã katoore hã. Anê.

³⁰ Nhũm ra krĩ nhõ xwỳnhjê hkrit hagrô ohtô nê ri mẽ hpum pa. ³¹ Nhũm mẽkarômnuti mẽ omu hãmri nê amnhĩ to Jejus wỳ nê kãm:

—Kwa kot ka jahti wa nê mẽ ijapôx japêr nê mẽ kot amnhĩ xà htỳx kamã hamak tũm xàta wỳr mẽ ixrênh kêt nê. Hagrô hkwy mũj wỳr mãn mẽ ixrê pa mẽ hpãnhã hwỳr mãn hagjê nã? Anê.

³² Hãmri nhũm mẽ kuma nê mẽ kãm:

—Tôe mẽ tãm mẽ hwỳr mãn mra. Anê.

Hãmri nhũm mẽ kuma nê myta wa kêp hapôj nê hagrô hwỳr mrar kurê kumrêx nê hpãnhã kãm gjêx pa. Hãmri nhũm hagrôta mẽkarômnuti pymaj amýra nê ma hprôt nê himô hã hixêt prêk ã axpum rôrôk nê gôx kãm mrô nê pikaprãr pa. ³³ Hãmri nhũm hagrô jamãr o ri mẽ pa xwỳnhjaja tee ri omu hãmri nê ma akupỳm krĩm hprôt nê mẽ kãm awjarê. Nê myta wa akupỳm tãm hkrã hã harênh o hprôt. ³⁴ Hãmri nhũm krĩ nhõ xwỳnhjaja tee ri mẽ hkrit jarênh ma nê ma piitã Jejus wỳr mra nê hkaxpa. Hãmri nê amnhĩ nê kãm:

—E kwa mẽ ma amrar kurê kumrêx. Anê.

Hãmri nhũm mẽ kuma nê awjanã nê ma akupỳm pan rê.

9

ĩ kamã htyk xwỳnh jarênh

Makre 2.1-12; Rukre 5.17-26; Juãw 10.37-38

¹ Nhũm Jejus mẽ hkôt mẽ pa ho mẽ pa xwỳnhjaja awjanã nê ma

akupÿm pàr wÿr mra nê gjêx pa nê akupÿm xarmã rê nê akupÿm Jejus nhô krî hwÿr mô. ² Hâmri nê hwÿr pøj nhùm krî nhô xwÿnh kwÿjaja mē omu nê ï kamã htyk xwÿnhja mÿ nê Jejus wÿr o tē. Nôr xà kamã nôr rãhã nhùm mē hã hije nê kumÿ nê hwÿr o tē. Hâmri nhùm amnhÿ tã mē omu. Ra mē kot hkrãmnhwÿta kaxyw kãm hamaxpêr tÿx ã mē omu nê ï kamã htyk xwÿnhnta mã kapêr nê kãm:

—Pa? Kwa tee ri amnhÿ kukamã ajamaxpêr kêt nê. Na pa ra apê tanhmã ate amnhÿ tomnuj to ho ijapêx pa. Kot paj axte kãm ijamaxpêr kêt nê. Anê.

³ Hâmri nhùm Tirtÿm kapêr tÿm o mē ahkre xwÿnhjaja tee ri ã kot kãm kapêr anhÿrja ã kuma nê axpên mã:

—Tk. Kwa mēhō myti mÿj kêp Tirtÿm kêt tã te ri kot amnhÿ nhÿpêx pyrãk ã amnhÿ nhÿpêx. Tirtÿm pix na kot mē nê mē kot amnhÿ tomnuj o hapêx xwÿnh. Anê.

⁴ Hâmri nhùm Jejus amnhÿ tã mē kuma nê mē kãm:

—Kwa mē ã ajamaxpêr anhÿr kêt nê. ⁵ Ixte mē nê mē kot amnhÿ tomnuj o ijapêx par ã amnhÿ jarênh tã mē ate ja kôt ixpumunh kêt jakamã na ka mē ja kaxyw ixkôt ajamaxpêr kêt nê. Nom kot paj mē anoo mã akupÿm ï kamã htyk xwÿnhnta o mex ka mē apiitã hã ixpumu hãmri nê ixkôt ajamaxpêr kurê kumrêx. Ixpê Tirtÿm kot mē awÿr inhmênh xwÿnhnta na pa. Ixte mē anê mē ate amnhÿ tomnuj rênh kaxyw na pre mē awÿr inhmê na mē awÿr wrÿ. ⁶ Tã mē ate ja hã ixpumunh kaxyw kot paj mē anoo mã ja ho mex.

Anhÿr o mē kãm amnhÿ jarê hãmri nê ï kamã htyk xwÿnhnta mã kãm:

—E kãnhmã xa nê anôr xàta py nê ma akupÿm anhôrkwÿ hwÿr tē. Anê.

⁷ Puh nhùm kãnhmã ãm kurê kumrêx nê nôr xà py nê mē noo mã kato nê ma akupÿm ôrkwÿ hwÿr

tē. ⁸ Hâmri nhùm mē piitã no hapôx rÿnh nê omunh o kuhê nê kamã no pyma htÿx nê. Nê tee ri omu nê axpên mã:

—Kokÿÿ. Kwa aa mē pahte ã mēhō kot amnhÿ nhÿpêx anhÿr ã omunh kêt tã jarãhã ja pumu.

Anhÿr o Jejus jarê hãmri nê ÿ hã Tirtÿm mã mex o mex ã harê.

Jesus kot amnhÿ kôt Matêwre hwÿr

Makre 2.13-17; Rukre 5.27-32

⁹ Tã nhùm Jejus mē kêp kato nê hkôt mē pa xwÿnhjê mē nhùm mē ma mô. Hâmri nê pa ixpê Matêwre ixpumu. Ixte Rôm kãm mē ho amnhÿptâr xwÿnh mã krî nhô xwÿnhjê pê kãxpore hkwÿ jamÿnh xwÿnh na pa pre. Nom mē kot ho tewên kryre htã ixte amnhÿm hkwÿ ho ixârîk prãm xàj na pa pre hte mē kãm ho rÿnh nê harê. Jakamã nhùm mē piitã kãm ixkÿnh kêt nê. Tã pa pre mē kêp kãxpore jamÿnh xà hã ixkre kamã mē kêp hamÿnh o nhÿ nhùm Jejus mē hkwÿjaja ijãnh mra nê ixpumu nê amnhÿ kôt ixwÿ nê inhmã:

—Pa? E axapênnta kaga nê hpãnhã amnê mē ixkôt mãn tē nê ixkôt mãn ri apa ho apa. Anê.

Hãmri pa kuma nê ixapênh kaga nê ma hkôt tē. Nê hpãnhã hkôt ixpa ho ixpa.

¹⁰ Hãmri nê mēmo arÿgro hã amnhÿ nhôrkwÿ hwÿr Jejus nê hkôt mē pa ho pa xwÿnhjaja mē ixkrãmnhwÿ hkwÿjê hwÿ. Nhùm mē piitã mra nê inhôrkwÿ hwÿr agjê nê ixkutã apkur o hkrî. Nê ixpyrã nê Rôm nhô pahi mã mē kêp kãxpore hkwÿ jamÿnh xwÿnh kwÿ haxwÿja ixwÿr mra nê mē ixkutã apkur o hkrî. ¹¹ Hãmri nhùm Parijew nhô xwÿnhjaja mra nê inhôrkwÿ kapem mē ixãpkur ã mē ixpumu. Nê tee ri mē ixkaêx ã Jejus pumu hãmri nê hkôt mē pa ho mē pa xwÿnhjê hwÿr agjê nê mē ixtã mē kãm akir nê mē kãm:

—Kwa mẽ kot jajê kutã apkur kêt tâ mẽ akrãhtũmja axtem nẽ mẽ kutã apkur o nhỹ. Kwa na mẽ kot amnhĩ tomnuj xwỹnh kẽnã. Jejus kot amnhĩ to mex ronhỹx mẽ kutã apkur kêt nẽ. Anẽ.

¹² Hãmri nhũm Jejus amnhĩ tâ ã mẽ kapër anhỹrja ma nẽ mẽ kãm:

—Tk. Nã ixte tãm mẽ unhwỹr kaxyw na pa mẽ kutã ixãpkur o nhỹ. Xã na hte tõtôja mẽ mex xwỹnhjê hwỹr mra nẽ mẽ hkane? Nã ãm mẽ à xwỹnhjê pix wỹr na hte mra nẽ tanhmã mẽ hkane hto. Ra mẽ ate ja pumunh mex. Tã ja pyrà nẽ na pa pre mẽ kot amnhĩ to mex xwỹnhjê hwỹr ixwrỹk kêt nẽ. Mẽ kot amnhĩ tomnuj xwỹnhjê pix wỹr na pa pre wrỹ. Ixte tãm mẽ unhwỹr kaxyw mẽ hwỹr wrỹ nẽ ã jajê kutã ixãpkur o inhỹr anẽ. ¹³ Ga mẽ ma mra nẽ Tĩrtũm kapër ã kagã htũm kot ja jarẽnhja kamã harẽ nẽ ama. Harẽnh kot:

Na ka htem inhmã tanhmã amnhĩ jarẽnh to kaxyw hãmri nẽ inhmã mẽmoj gõ nẽ tanhmã ixto mex to. Nom kêt ka mẽ ãm ja pix ho anhỹr kêt nẽ. Mẽ mããnẽn mẽ piitã tanhmã mẽ ho mex to ho ri apa. Anẽ.

—Ã Tĩrtũm kapër ã kagã htũm kot ja jarẽnh kot anhỹr. Tã ja pyrà nẽ na pa pre mẽ kot amnhĩ tomnuj xwỹnhjê hwỹr wrỹ nẽ mẽ kamã ixukapřĩ ho ixpa. Mẽ kot amnhĩ tomnuj kaga nẽ hpãnhã tãm amnhĩ nhĩpêx kaxyw na pa pre ã mẽ hwỹr ixwrỹk anẽ. Tã ka mẽ ri atỹx amnhĩ krã hkõt ã ixto akapër anẽ. Anẽ.

*Mẽ kot mẽmoj tâ Jejus kukjêr
Makre 2.18-20; Rukre 5.33-35*

¹⁴ Tã nhũm Juãw Paxis kõt mẽ pa xwỹnhjaja Jejus wỹr mra nẽ mẽmoj tâ hkukja nẽ kãm:

—Pa? E ot pa mẽ awỹr mra. Kwa mẽ inhmã mẽmoj jarẽ. Na pa htem tũhã Parijew nhõ xwỹnhjê pyrà nẽ ixãpkur kêt kãm Tĩrtũm mẽ ho amnhĩ jarẽ. Tã nom akõt mẽ pa ho mẽ pa xwỹnhjaja na htem ãmnhĩx apkur o

pa kamã kãm amnhĩ jarẽnh o pa. Kwa mo na htem mẽ ixpyrà nẽ tũhã apkur kêt kamã kãm amnhĩ jarẽnh kêt nẽ? Anẽ.

¹⁵ Hãmri nhũm mẽ kuma nẽ mẽ kãm:

—Nã mo kaxyw kot kêt mẽ apkur kêt rãhã kãm amnhĩ jarẽ? Mẽ hkapřĩre hã. Mẽ kot ixkõt pa ho pa hã amnhĩ pumunh jakamã na htem hkĩnh nẽ ixkõt pa. Kormã ixte mẽ kamã ixpa kẽnã kot kêt mẽ apkur kêt rãhã Tĩrtũm mã tanhmã amnhĩ jarẽnh to. Xã na htem hkrãmnhwỹ hã hkĩnh kaxyw hã akuprõ nẽ hkapřĩ nẽ apkur kêt o kamãt nẽ mỳr o hkrĩ? Nã na htem anhỹr kêt nẽ. Na htem hã akuprõ nẽ hkĩnh nẽ hã apkur rũnh nẽ. Ja pyrà nẽ na hte ixkõt mẽ pa ho mẽ pa xwỹnhjaja ixkõt kormã ãmnhĩx hkĩnh nẽ apkati mẽ apkur o pa. Nom koja mẽ kãm ixkurẽ xwỹnhjaja nhỹrmã tanhmã ixto hãmri nhũm mẽ hkapřĩ htỹx nẽ řĩ kormã tũhã apkur kêt rãhã Tĩrtũm mã amnhĩ jarẽ. Anẽ.

*Mẽ pahte Jejus kõt amnhĩ nhĩpêx
Makre 2.21-22; Rukre 5.36-39*

¹⁶ Nhũm Jejus mẽ piitã mẽ kãm kapër nẽ mẽ kãm:

—Mẽ kot amnhĩ tomnuj xwỹnhjaja ra mẽ kot amnhĩ nhĩpêx tũm o amnhĩ pyràk jakamã na htem tanhmã mẽ kot amnhĩ nhĩpêx nyw tota kaga. ¹⁷ Tã ixte amnhĩ nhĩpêx nywja te kot mẽ ate amnhĩ nhĩpêx tũm pyràk kêt jakamã na ka htem ixkapër ma nẽ ãm ama. Kwa mẽ inhma nẽ mẽ ate amnhĩ nhĩpêx tũmja gryk ã ixkaga hkêt nẽ. Anẽ.

*Mẽ hkra htyk nẽ mẽhõ ni kamrõ
wa harẽnh
Makre 5.21-43; Rukre 8.40-56*

¹⁸ Nhũm pre ã Jejus mẽ kãm kapër anhỹr o xa. Rõm nhũm mẽõ pahitija tẽ nẽ mar o xa. Hãmri nẽ hamaxpër o:

—Kokỹy. Jejusja ãm hãmri kęp pahi maati kumrêx. Hã na ri ã

kapêr mex anê. E pa hwÿr tē nē ixkrare ho kuwÿ. Anê.

Hāmri nē hwÿr tē nē kutā hkōnkrā ho nhÿ nē kām:

—Pa akupÿm mē ixto mex xwÿnh? E ot pa awÿr tē. Kwa ma ixkôt tē nē inhmā ixkra nire pumu nē tanhmā inhmā ho kê akupÿm inhmā htîr. Na ham ixpê ty pa kaxyw amā ijamaxpêr nē man awÿr tē. Anê.

¹⁹Hāmri nhÿm kuma nē kām:

—Tôe. Nà kot paj ma akôt tē. Anê.

Hāmri nē ma hkôt tē. Mē ixpê hkôt ixpa ho ixpa xwÿnhjê mē pa mē ma hkôt mō. ²⁰⁻²¹Nhÿm mēhō ni kamrô rāhā ho pa xwÿnhja ma mē ixkôt tē. Na pre hte hkamrô hkryre rāhā ho pa hā amgrā pê 12 nē tee ri kām amnhî mex prām o pa. Jakamā Jejus jarēnh ma nē amnhî kaxyw kām hamaxpêr kurê kumrêx nē hamaxpêr o:

—Ma pa kop ma hwÿr tē nē kēp ê nhîrê pix kupēnh tā akupÿm inhmex japêr. Anê.

Hāmri nē ma mē ohtôjê kaêx kôt hwÿr tē. Nē katut kôt tē nē kēp ê nhîrê kupê. ²²Hāmri nhÿm Jejus ho hakêx nē amnhî tā omu nē kām:

—Pa? Kwa tee ri amnhî kukamā ajamaxpêr kêt nē. Ate amnhî kaxyw inhmā ajamaxpêr tÿx jakamā na ka ra akupÿm amex. E māmri ajamakêtkati nē ri apa. Anê.

Hāmri nhÿm akupÿm mex nē hkînh tÿx nē ma akupÿm tē. ²³Hāmri pa mē ma htyk xwÿnh nhîpêxà hkôt mra nē ôrkwÿ hwÿr agjê nē mē pikuprōnh xwÿnhjê pumu. Nhÿm mē ra mē hā htu rax nē. Nē omÿj ri kapri xàj pifti kakôr o hkrî nē omÿj ri mur. Kâx pê mur nē amnhî tak o hkrî. ²⁴Hāmri nhÿm Jejus mē hwÿr axà nē mē omu. Nē ra kot my hkrata htyk ā omunh tā kuri mē mÿr o mē hkrî xwÿnhjê mē kapêr nē mē kām âm ôt nē nôr ā harê nē mē kām:

—Pa? Kwa mon ka mē ri akapri nē amÿr o akrî? E mē ma mra. Na

wa hkrata wa kēp htyk kêt nē. Na âm gôr nē nō. Anê.

Hāmri nhÿm mē kot ra htyk ā omunh mex jakamā kuma nē âm kuma. Nhÿm mē hkwÿja axtem nē ri axpēn mā hā hpêr o pikēnh o hkrî. ²⁵Hāmri nhÿm kapôt mā mē hano nhÿm mē hapôj nē kapôt ā kuhê. Hāmri nhÿm Jejusja htyk xwÿnhhta wÿr axà nē hpa hā kupy nē kânhmā âm nhÿm akupÿm htîr nē kânhmā âm kurê kumrêx. ²⁶Hāmri nhÿm mē piitā akupÿm htîr kām omu nē ma ri krî piitā hkôt ri mē kām harēnh o hprôt.

Wa nohkre xwÿnh wa harēnh

Matêwre 20.29-34

²⁷Tā nhÿm Jejus kato nē ma tē. Pa mē hkôt ixpa ho ixpa xwÿnhjaja ma hkôt mō. Hāmri nhÿm wa myja wa hamêxkrut. Hamê wa nohkre xwÿnh wa Jejus jarēnh ma nē hā ajêt nē hkôt rôrôk o mō. Nē xatā amnhî to hwÿr o hkôt rôrôk o mō nē kām:

—Pa Jejus? E Tirtûm kot mē ixkaxyw axâm jakamā kwa wa ix-pumu nē wa ixkamā axukapri kêt wehe. Anê.

²⁸Hāmri nhÿm wa kuma nē wa hkukamā nhÿri ixkrem axà nhÿm wa hkôt axà nē xa nhÿm wa omu nē wa kām:

—Pa? E xàn ka wa ra amnhî kaxyw inhmā ajamaxpêr tÿx nē nà? Anê.

Hāmri nhÿm wa kām:

—Tÿ. Wa ixte amnhî kaxyw amā ijamaxpêr tÿx kênâ. Anê.

²⁹Hāmri nhÿm wa kuma nē hamê wa no hā îhkra xi nē wa kām:

—Tôe. Nà war ate tanhmā amnhî kaxyw inhmā ajamaxpêr to xà hkôt kot paj war anhîpêx. Anê.

³⁰Hāmri nhÿm wa akupÿm rit mex kurê kumrêx. Hāmri nē akupÿm kato nē ma htēm kaxyw nhÿm wa kām:

—E kêr ka wa nhām mē kām ixte war ato mex ā ijarēnh kêt nē. Âm kwarî ho kwarî.

³¹Anhÿr tā no nhÿm wa kuma nē âm kuma nē wa ma tē nē krî pu hā

mê piitã mê kãm ri war amnhĩ tã harênh o mra.

Kapêr kêt xwýnh jarênh

³²Tã nhũm Jejus ma axte nhýhým mê ixto mō. Hãmri nhũm mēhō my mēkarōmnuti kot hwýr àr nē tanhmã ho nhũm kapêr kêt nē pa xwýnhja nhũm mê Jejus wýr o tē. ³³Hãmri nhũm omu nē nē mēkarōmnuti jano nē kãm:

—E kēp akato nē ma tē. Anē.

Hãmri nhũm kuma nē kurũm kato nhũm akupým kapêr mex kurē kumrēx. Hãmri nhũm mê kot hã omunh xwýnhjaja tee ri kot mēkarōmnuti janor ã omu nē kamã no puma nē. Nē axpēn mã:

—Kokýy. Aa mê pahte ã mēhō kot anhýr pumunh kêt kumrēx tã na pu mê jarãhã ja pumu. Anē.

³⁴Nom nhũm mê hkwy pē Parijew nhō xwýnhjaja axtem nē hã mê kãm kapêr o:

—Tk. Kot amnhĩ krã hkôt mê hanor kêt kēnã. Mēkarōmnuti nhō pahĩ nhý hã kot mē nē mê hanor kēnã. Anē.

Jejus kēp mê pakamã ukapri xwýnh

Makre 6.34; Rukre 10.2-3; Juãw 4.35

³⁵Tã nhũm Jejusja krĩ ho ohtō nē hkôt ri mê kãm Tirtũm kapêr jarênh o pa. Pa mê hkôt ixpa. Na pre hte nhýri krĩ hwýr pōj nē mê kot Tirtũm kapêr o mê ahkre xà hã ixkre hwýr mra nē hwýr agjē nē mê pikuprōnh xwýnhjē jahkre. Nē mê kãm:

—E mê inhma. Tirtũm kãm mê apiitã mê ato hkra hprãm. Jakamã kwa mê ate amnhĩ tomnuj kaga hprãm xàj hkôt amnhĩ xunhwý nē kapêr kôt amnhĩ nhĩpēx. Jao amnhĩ nhĩpēx nyw o amnhĩ nhĩpēx o ri apa.

Anhýr o mê kãm kapêr. Hãmri nē ahpýnhã ri tanhmã mê à kute xwýnhjē ho mex. Nhũm mê ohtō nē hkôt mar o pa. ³⁶Hãmri nhũm mê omu nē kãm mê hkapri nē. Na prem tee ri amnhĩ kukamã

hamaxpêr o pa jao ra hkapri nē. Nhũm Jejus ja hã mê omu nē hamaxpêr o:

—Héxta waa nē. Na mê mex kêt nē pa. Te mê kēp ôwēhti jamār xwýnh kêt kot amnhĩ nhĩpēx pyrāk o htýx ri pa. Mēhō koja kãm mê hkapri nē tanhmã mê ho mex to ho pa? Anē.

Hãmri nē mê kamã ukapri nē. ³⁷Hãmri nē mê hã mê ixpē hkôt ixpa ho ixpa xwýnhjē mã kapêr nē mê inhmã:

—Na na mê kormã ohtō rax nē Tirtũm kapêr mar kêt nē. No ãm kormã mê ate mê kãm kapêr jarênh o apa kaxyw mê agrêre. Te pur rax kãm ra harôj kamrêk par nē ãm tã no ãm kaxyw hikēnh xwýnhjaja grêre pyrāk. ³⁸Jakamã kwa mê ho Tirtũm wý kē axte mê kaxyw mê akwýjē rê kē mê apyrã nē ma mê hkôt ri mê kãm kapêr jarênh o pa. Anē.

10

Jejus kot mê ho 12 nē mê rênh

Makre 3.13-19; Rukre 6.12-16

¹⁻⁴Tã nhũm Jejusja hkôt mê ixpa ho mê ixpa xwýnhjē ho 12 nē mê ixrê. Mê ixte ma krĩ piitã hwýr inhmrar nē ý hã mê ahkre nē tanhmã mê à kute xwýnhjē ho mex o ixpa kaxyw. Nē ý hã mê nē mēkarōmnuti janor o ixpa kaxyw nhũm mê ixrê. Na pre mê ixto 12 nē mê ixrê. ã mê inhĩxi kot anhýr.

Pêtre kumrēx na pre kuta. Hixi hō pē Simãw.

Nē hkôt htō Andreja ta.

Nē hkôt Jepetew kra Xiakreja ta.

Nē hkôt Xiakre htō Juãwja ta.

Nē hkôt Firiptija ta.

Nē hkôt Patoromewja ta.

Nē hkôt Tomasja ta.

Nē hkôt pa ixpē Matêwre nhũm pre mê hkôt ixta.

Ixpē pahĩ nhý hã kãm mê kēp ixujamýnh xwýnh tã nhũm pre jajē hkôt ixta.

Nē ixkôt Apew kra Xiakre hōja ta.

Nê hkôt Tatewja ta.
Nê hkôt Simâw Jeroxja ta.
Nê hkôt Jut Kariotja ta.

Kormâ kot mē kām Jejus
kurê xwÿnhjê nhîhkram ôr
mâ nhûm Jejus kot amnhî
kukamâ omunh mex tâ mē
hkôt amnhî kaxyw kuta.

Â mē ixte ÿ hã mē ahkre o ixpa
kaxyw mē ixrênh xwÿnhjê nhîxi kot
anhÿr.

*Jejus kot mē kêp 12jê mã mē
âpênh ã karô*

*Makre 6.7-13; Rukre 9.1-6, 10.1-
12, 10.14; mãânên Atre 13.50-51,
18.6*

⁵ Hãmri nhûm Jejus mē ixrênh pa
nê ma mē hwÿr mē ixrênh kaxyw
tanhmã mē inhmã kapêr to nê mē
inhmã:

—E. Kêr ka mē ma mē piitã mē
kãm ri ijarênh o apa. No âm kormã
mē kêp Ijaew kêt xwÿnhjê nhô pika
hwÿr apa hkêt nê. Rÿ mē kêp Samar
nhô krî hwÿr ka mē apa hkêt nê.
⁶ Âm mē pahpê Ijaew nhô krî kôt
pix mã mân ri apa. Mē kot tee
ri amnhî kukamã hamaxpêr o pa
jakamã te mē kêp ôwêhti pikunor
nê htÿx ri mex kêt nê pa pyrâk.
⁷ Jakamã kêr ka mē ma mē hwÿr
apa nê ã mē hkôt ri mē kãm akapêr
o apa anê nê mē kãm: “E kot kaj mē
ate amnhî tomnuj kaga nê Tirtûm
kôt amnhî xunhwÿ hãmri nhûm
amnhî tâ mē apumu nê mē ato
hkra. Jakamã e kwa mē tokyx hkôt
amnhî xunhwÿ.” Anê. Kêr ka mē
ã mē kãm akapêr anhÿr o ri mē
hkôt apa. ⁸ Hãmri nê akupÿm mē à
xwÿnhjê ho mex o ri apa. Nê mē
htÿk xwÿnhjaja ka mē akupÿm mē
ho htÿr o ri apa. Nê mē hkànhy
rûnh xwÿnhjaja ka mē akupÿm mē
ho mex o ri apa. Nê mē kamã
mêkarômnuti xwÿnhjaja ka mē nê
mê hano. E kêr ka mē ã inhÿ hã
mê ho mex o ri apa anê. Na pa
amarî tanhmã mē ato ka mē inhmã
amnhîrer kêt tâ ra mē ate tanhmã
mê ho mex to mã tâm. Tã kêr ka mē

amnhî xwar amarî ri mē ho mex o
ri mē hkôt apa. No ri mē ho mex
pãnhã kàxpore hã axàhwÿr kêt nê.

⁹⁻¹⁰ —Nê kêr ka mē ma mē
hwÿr apa kaxyw anojarêt hãmri
nê amnhî kôt akukrêx rûnh o apa
hkêt nê. Âm anhÿ kamã mē hwÿr
apa. Nê kàxpore ho rax nê ho apa
hkêt nê. Rÿ akawà kamã axê hkÿwÿ
rÿ aparkà hõ xàr nê ho amôr kêt
nê. Rÿ kô hõ py nê ri ho apa hkêt
nê. Âm anhô mrykà pix jamÿ nê
ma ho apa. Kêr kê mē ate Tirtûm
kapêr o mē ahkre nê mē ho mex
xwÿnhjaja mân amnhî pãnhã mē
amã mē axàpkur xà gô ka mē kutã
axàpkur o ri mē hkôt apa.

¹¹ —Nê kêr ka mē nhÿri krî hwÿr
ajapôj nê kamã mēhõ kot amnhî to
mex xwÿnh japêr. Nê ra omu hãmri
nê kuri mân pôj nê hkôt apikamênh
tãmtã kurûm akupÿm ajapôj nê ma
nhãm krî hõ hwÿr mra.

¹² —Nê kêr ka mē mēhõ nhôrkwÿ
hwÿr pôj nê mē kãm: “E ot pa mē
awÿr mô. Nà koja Tirtûmja mē ato
mex nê.” Anhÿr o mē kãm akapêr.
¹³ Koja mē ama nê amnhî wÿr awÿ
ka mē amnhî tâ mē omu nê mē
kãm: “E koja Tirtûm mē ato mex nê
ka mē ajamakêtkati nê ri axàmnhîx
apa.” Anhÿr o mē kãm akapêr.
No koja mē amnhî nhôrkwÿ nê mē
akuré nhûm Tirtûm ja hã mē omu
nê mē ho mex kêt nê.

¹⁴ —Nê koja nhÿri krî hõ kamã
mê akaga nê akapêr mar kêt japêr.
Ka mē tee ri amnhî tâ mē kamã
ama hãmri nê tokyx mē kurûm
ajapôj nê ma akupÿm apa. Nê
akupÿm anojarêt nê mē noo mã
akuhê nê amnhî par ã awjagrô
kapî nê ma apa. Mē kot Tirtûm
kaga hã amnhî pumunh kaxyw ka
mê ã mē noo mã amnhî nhîpêx
anê. Hãmri nê ma nhÿhÿm hpãnhã
apa. ¹⁵ Koja nhÿrmã Tirtûm mē
kot amnhî tomnuj mÿrapê tanhmã
mê ho. Na pre ã Sotô mē Komo
nhô xwÿnhjê nhîpêx anê. Na prem
amnhî tomnuj tÿx nê nhûm Tirtûm

tee ri ja hã mẽ omu nê tanhmã hã mẽ homnuj tỳx to. Tã jar mẽ kãm ixkapêr mar prãm kêt nê mẽ kot ixkaga xwỳnhjaja koja ja hã mẽ omu nê mẽ kot Sotô mẽ Komo nhõ xwỳnhjê nhĩpêx o mẽ hipêx. No ãm tanhmã mẽ ho htỳx o mẽ hakre. Anê.

Nhũm pre Jejus ã mẽ inhmã mẽ ixãpênh ã karõ anê.

Jejus kot mẽ kêp 12jê hkukamã mẽ harênh

Makre 13.9-13; Rukre 12.11-12, mãânênh Rukre 21.12-17; Wam Pêtre 3.13-17, 4.12-19; Rukre 6.40; Juãw 15.20; Rukre 12.2-9

¹⁶ Nhũm Jejus arĩ kot mẽ ixrênh xwỳnhjê mã kapêr nê mẽ inhmã:

—E kot paj ma mẽ hwỳr mẽ arê. Ma mẽ ate Tĩrtũm kapêr o mẽ ahkre ho ri mẽ hkõt apa kaxyw. Jakamã kot kaj mẽ te ôwênti kot mry xoprê hwỳr amnhĩ to mrar nhũm kot hkwy hpar pyrãk o amnhĩ nhĩpêx. Koja mẽ hkwyjaja mẽ ate mẽ ahkre ma nhũm ja mẽ kêp omnuj nê nhũm mẽ hã tanhmã mẽ anhĩpêx to. Tã nom kêr ka mẽ tee ri amnhĩ kukamã ajamaxpêr nê amã mẽ uma hkêt nê.

¹⁷ —E kwa mẽ o kora. Kêr ka mẽ ma mẽ hwỳr mra nê amnhĩ nê mẽ htãnopxar o ri apa. Koja mẽ hkwyjaja mẽ akapêr ma nê kêp mẽ aprãm nõkati. Nê mẽ apynê nê ma mẽ utar xwỳnhjê hwỳr mẽ ato mra nê mẽ kãm tanhmã mẽ ato hêx to. Hãmri nhũm mẽ mar xã hkõt mẽ atak. Tĩrtũm kapêr o mẽ ahkre xã hã ixkre kamã koja mẽ ã mẽ anhĩpêx anê.

¹⁸ —Nê koja mẽ ixtã tanhmã mẽ ato kaxyw mẽ apynê nê ma mẽ õ pahi hwỳr mẽ ato mra nê tanhmã kãm mẽ ato hêx to. Nom kwãr mẽ mamrĩ ã mẽ anhĩpêx anê. Koja mẽ ato anê ka mẽ kutã akrĩ nê mẽ kãm Tĩrtũm kapêr jarê. Ijaewjê mã nê mẽ kêp Ijaew kêt xwỳnhjê mã.

¹⁹ —Nê koja mẽ ma mẽ õ pahi hwỳr mẽ ato mra nê ã mẽ anhĩpêx anê nom kêr ka mẽ tee ri tanhmã

mẽ kãm amnhĩ jarênh to hkukamã ajamaxpêr kêt nê. Koja Tĩrtũm Karõ tãm tanhmã mẽ akrã hto ka mẽ ô ri mẽ kãm akapêr mex nê. ²⁰ Nê kot kaj mẽ amnhĩ krã hkõt ri mẽ kãm akapêr kêt nê. Tĩrtũm Karõ nhỹ hã kot kaj mẽ ô ri mẽ kãm tanhmã axujarênh to.

²¹⁻²² —Nê koja mẽ hkwyjaja ixtã mẽ akamã gryk nê. Nê mẽ atã ãmnênh pix o pa. Nê mẽ kot mẽ apar kaxyw mẽ akwyjê hã amỳnê. Koja mẽ anhĩpêxã hkwyjaja mẽ apê mẽ hkra hã amỳnê. Nhũm mẽ akra hkwyjaja mẽ apê mẽ hipêxã hã amỳnê. Nhũm mẽ atõ hkwyjaja mẽ apê mẽ htõ hã amỳnê. Nhũm mẽ akatorxãjaja mẽ atã amỳnê. Hãmri nhũm mẽ apa. No ãm kwãr mẽ mãmrĩ ã mẽ anhĩpêx anê. ã mẽ kot mẽ anhĩpêx anhỹr tã kêr ka mẽ tee ri amnhĩ kukamã ajamaxpêr pê ixkaga hkêt nê. Mẽ ãm amnhĩ to htỳx rãhã ty. Hãmri nê akaxwỳnhja ma Tĩrtũm mẽ wa inhõ krĩ hwỳr axãpir kurê kumrêx nê wa ixkuri akupỳm amex nê atĩr tũm nê apa ho apa.

²³ —Nê koja mẽ nhỹri krĩ hkwy kamã ixtã tanhmã mẽ anhĩpêx hto ka mẽ mãmrĩ mẽ kurũm ajapõj nê ma nhỹhỹm krĩ hõ hwỳr apa. Nê hpãnhã kamã mẽ kãm ri ijarênh o mẽ hkõt apa. Kot kaj mẽ kormã Ijaewjê nhõ krĩ piitã hwỳr apa hkêt ri pa akupỳn mẽ awỳr wrỳ. Kwa kêr ka mẽ ixkapêr mã ajamaxpêr tỳx rãhã ri apa.

²⁴⁻²⁵ —Mẽ ate ixkõt apa ho apa xwỳnh na ka mẽ. No pa na ixpê mẽ ajahkre xwỳnh. Jakamã koja mẽ kot tanhmã inhĩpêx to ho mãânênh mẽ anhĩpêx. Koja mẽ nhỹrmã tanhmã inhĩpêx to nê mã ixkõt mẽ ato anê nê. Mẽ pahte amnhĩ nhĩpêxja kot axpên pyrãk. Jakamã koja mẽ ixpê Satanasti hã ijarê nê mãânênh tanhmã mẽ ajarênh punuj to ho pa. Mẽ pahte amnhĩ nhĩpêxja kot axpên pyrãk jakamã koja mẽ

panhîpêx o axpên pyrâk.

26 —Tâ nom kêr ka mê tee ri amnhî kukamâ ajamaxpêr pê amâ mê uma ho apa hkêt nê. Na htem piitâ axpên pê tanhmâ hamaxpêr punuj to ho hpimxur o pa nom tee ri ho pimxur prâm kaprÿ. Koja nhÿrmâ mê hamaxpêr piitâ amnhîrît pa. Nê mëmoj piitâ ra hpimxur mex tâ koja nhÿrmâ amnhîrît par kumrêx.

27 —Nê koja nhÿrmâ mê piitâ ixte amnhî nhîpêx kôt ixpumu. Na pa ra mê hkàx ã mê amâ ixujarênh rax nê. Tâ kêr ka mê ma mê piitâ mê kâm harênh o ri apa. Nê ra ixte mê hkàx ã ahte ixte mê amâ mëmoj jarênh ta ka mê hpânâ ma mê kâm harênh o ri apa kê mê apyrâ nê harênh ma.

28 —E kêr ka mê amâ mê kot tanhmâ mê ato mâ xwÿnhjê puma ho apa hkêt nê. Mê kot mê apar mâ tâ koja mê ãm mê akrâhkâ pix pa nom tanhmâ mê akaxwÿnh to hkêt nê. Tîrtÿmja tapxipix na hte mê hkrâhkâ nê mê hkaxwÿnh mê ho pimrâatâ kot amnhî xâ htÿx kamâ hamak tÿm xâta wÿr mê rênh pumunh. Tâ kot hwÿr mê arênh pymaj kêr ka mê amâ kapêr kwÿm ri tanhmâ amnhî nhîpêx to puma ho ri apa.

29-31 —Nê Tîrtÿm kot mê pahto hapêx par pumunh tâ mãânên kot mê pajamâr mex. Mân ka htem kuwênhre pumu. Na hte Tîrtÿm kuwênhre jamâr mex o pa. Mê piitâ mê kot ãm omunh tâ nom nhÿm Tîrtÿm mê kurom hamâr mex pê mê htânopxar râhâ ho pa. Tâ kâm mê pajapê htÿx o kot kuwênhre jakrenh jakamâ kwa mê tee ri amnhî kukamâ ajamaxpêr o ri akaprî nê apa hkêt nê. Koja Tîrtÿm mê pahtânopxar râhâ ho pa. Kot mê panhî piitâ omunh par. Nê ahpÿnhâ tanhmâ mê pahkrâ hkî kute hkôt mê pahpumunh par. Tâ kot mê pahtânopxar râhâ jakamâ

mo kaxyw kot kaj kêt mê ri amâ mê uma ho apa? Anê.

Mê pahte Jejus kôt amnhî xunhwÿr rÿ mê pahte hkaga jarênh

32 Nhÿm Jejus arî kot mê hwÿr mê ixrênh xwÿnhjê mã kapêr nê mê inhmâ:

—E kwa mê māmri akwÿjê mã mê apê ixkwÿ hâ amnhî jarênh o ri apa nê amâ mê uma xâj tee ri amnhî nhîpêx kêt nê. Kot kaj mê kâm ra ate ixkôt amnhî xunhwÿr ã amnhî jarê. Pa ja hâ mê apumu hāmri nê mê apyrâ nê kaxkwa kamâ Inhîpêêxâ mã ra ate ixkôt amnhî xunhwÿr ã mê ajarê. 33 Nom kot kaj mê kot ixtâ tanhmâ mê ato pymaj apê ixkwÿ hâ amnhî jarênh kêt nê. Pa ja hâ mê apumu hāmri nê nhÿrmâ amnhî xwar Inhîpêêxâ mã mê apê ixkwÿ hkêt ã mê ajarê. Jakamâ kwa mê māmri mê kâm apê ixkwÿ hâ amnhî jarênh o ri mê hkôt apa kê mê ama nê amnhî kaxyw inhmâ hamaxpêr japêr. Anê.

Mê kâm Jejus ã hkwÿjê kurê xwÿnhjaja

Makre 8.34-35; Rukre 9.24, mãânên Rukre 12.51-53, 14.26-27; Apokarip 12.11

34 Nhÿm Jejus arî kot mê hwÿr mê ixrênh xwÿnhjê mã kapêr nê mê inhmâ:

—Ra mê awÿr ixwrÿk tâ koja mê piitâ ixkukwak ri hamakêtkati nê ãmnhîx ri pa hkêt nê. Kormâ. Koja mê akwÿjaja ixkapêr ma nê mê apyrâ nê amnhî kaxyw ixkôt hamaxpêr. Nhÿm mê akwÿjaja axtem nê kuma nê ãm kuma. Hāmri nê ixtâ tanhmâ mê atomnuj to ho pa ka mê amnhî xâ htÿx kamâ ajamak o ri apa.

35 —Koja mê akrajaja ixtâ mê apê mê hipêêxâ nê mê katorxâ kutâ amnhî xunhwÿ. Nhÿm mê wÿjjaja ixtâ mê umregêxjê kutâ amnhî xunhwÿ.

36 —Koja mê ã mê akwÿjaja ixtâ mê akutâ amnhî xunhwÿr anê. Mê

anhörkwý kamã mē akukwak ri pa htã ixtã mē akutã amnhĩ xunhwý.

³⁷—Nē mē amã mē anhĩpêxã nē mē akatorxã japêê. Nē mē amã mē akrajê japêê. Tã nom kot kaj mē gryk ã ixkôt amnhĩ nhĩpêx mex o ri apa hkêt hãmri nē apê ixkwý mã tãm kêt. ³⁸Rý nhũm mē nhỹrmã ixtã mē apar kaxyw ka mē tee ri amnhĩ kukamã ajamaxpêr nē mē kot mē apar pymaj ixkaga hã kot kaj apê ixkwý mã tãm kêt nē. ³⁹Koja mē nhỹrmã ixpĩ pa mē anê ty. Tã mē ate ixkôt amnhĩ nhĩpêx o apa xwýnhjaja. Koja mē ixpyrà nē ixtã mē apar mã tã kwa kêt ka mē amã atyk pymaj ixkaga hkêt nē. Kwãr mē mãmrĩ tanhmã ixtã mē ato. Kot kaj mē nhỹrmã Tirtũm mē wa ixri axte amnhĩ xã kamã ajamak kêt nē atĩr tũm nē amex rãhã apa ho apa. Nom kot kaj mē jar amã amex nē apa hprãm xaj ixkaga hãmri nē nhỹrmã wa ixri atĩr tũm nē apa ho apa hkêt nē. Anê.

Mē kot Jejus krajê ho mex xwýnhjê jarênh

Matêwre 25.34-40; Makre 9.41; Juãw 13.20

⁴⁰ Nhũm Jejus arĩ kot mē hwýr mē ixrênh xwýnhjê mã kapêr nē mē inhmã:

—E koja mēhõ nhỹri mē apumu nē mē apê ixkra hã tanhmã mē ato mex to nē te pa kot ixto mex pyrãk. Nē kot kaj mē tanhmã pa ixto mex to nē te Tirtũm o mex pyrãk.

⁴¹—Nē kot ka mē nhỹri Tirtũm nhỹ hã mē kãm kapêr jarênh xwýnhjê hõ tanhmã ho mex to nhũm Tirtũm hã apumu nē nhỹrmã hã ato mex nē. Rý ka mē mēhõ kot Tirtũm kôt amnhĩ nhĩpêx xwýnhjê hõ pumu nē tanhmã ho mex to. Nhũm Tirtũm hã apumu nē mãânên hã ato mex nē. Te ate mēhõ ho mexta pyrã nē mãânên ato mex nē.

⁴² Nhũm mēhõ nhỹri mē kot ixkôt kormã amnhĩ xãm nyw nē kormã àhpumunh tohtuj anhỹr xwýnhjê

hõ pumu. Nē kãm kôr ã omu nē hamaxpêr o: “Kwa Jejus kôt ri pa xwýnh mũj kãm kôr. Kormã kot Jejus kôt amnhĩ xãm týx kêt tã kêp hkwyý. E kot paj kãm gô hkwyý kê ho ixkô.” Anê hãmri nē kãm hkwyý nhũm ho ixkô. Hãmri nhũm Tirtũm hã omu nhũm kot kãm gô pix nhôr nhũm kot ho hkôm tã nhũm ja hã ho mex rax nē. Anê.

Nhũm pre ã Jejus kot mē hwýr mē ixrênh xwýnhjê mã kapêr ry rax anê. Mē ixpê 12jê mã ã kapêr anê.

11

Juãw Paxis kot Jejus jarênh mar Rukre 7.18-23, 7.5, mãânên Rukre 4.16-21

¹ Tã nhũm Jejus ra kot mē hwýr mē ixrênh xwýnhjê mã kapêr pa hãmri nē kato nē ma krĩ pu hã krĩ hkwyýjê hkôt ri pa. Nē mē kãm Tirtũm kapêr jarênh o ri mē hkôt pa.

² Nhũm Juãw Paxisja arĩ kêp prês nē mē hagiênh xã kamã hkrĩ. Nhũm pre hte hkôt mē pa ho mē pa xwýnhjaja hwýr mra nē kãm Jejus kot tanhmã amnhĩ nhĩpêx to ho pa hã harê. Hãmri nhũm harênh ma nē tee ri hkukamã hamaxpêr. Hãmri nē hkôt mē pa xwýnh wa ho axkrut nē wa kuta ³ nē hwýr wa kumê nē wa kãm:

—Kwa wa ma Jejus wýr tē nē hkukja nē kãm: “Xã ka na pre Tirtũm mē ixwýr amê nã? Xã kormã axtem mēhõ na pa mē ri hamãr o ri ixpa?” Anhỹr o hkukja hãmri nē tanhmã kot amnhĩ jarênh to hã ama nē man akupýn ixwýr tē nē inhmã harê. Anê.

⁴ Hãmri nhũm wa kuma nē ma hwýr tē. Nhũm Jejus kormã tanhmã mē à kute xwýnhjê ho mex o xa. Mē nohkre xwýnhjaja nhũm akupým mē ho mex. Nē mēkarõmnuti kot mē hwýr gjêx xwýnhjaja nhũm mē nē mē hanor o ãm rãhã nhũm Juãw kôt wa pa xwýnhta wa hwýr tēn pøj. Nē kormã mē hã omunh o wa xa.

Hâmri nê kãm Juãw Paxis kapêr jarê nhũm wa kuma nê wa kãm:

—Tÿ. Nà ãm hãmri na ja hã ijarê. Ixpê mê ate ixkamã ajamak o apa xwÿnhta na pa. Na ka wa kam ã ixte amnhĩ nhĩpêx anhÿr ã ixpumu. Jakamã wa ma akupÿm tẽ nê aprĩ hã kãm ijarê. ⁵ Na pa hte akupÿm mê nohkre xwÿnhjê ho mex. Nê mê hkànhy xwÿnhjaja pa akupÿm mê hkà ho mex. Nê mê hyk o mê pa xwÿnhjaja pa akupÿm mê hte ho mex. Nê mê htyk xwÿnhjaja pa akupÿm mê ho mê htür. Nê mê kêp amrakati nê ri mê pa xwÿnhjaja pa mê kãm mëmoj mex jarênh o ri mê hkôt ixpa. Æ na pa hte mê hipêx anhÿr o ri ixpa. Jakamã e wa ma akupÿm Juãw wÿr tẽ nê ã kãm ijarênh anê. ⁶ Kê ijarênh ma nê ixkôt hamaxpêr tÿx nê tee ri ixkukamã hamaxpêr kêt nê. Koja ã amnhĩ nhĩpêx anê nê hamakêtkati nê ri pa. E wa tokyx ma akupÿm tẽ nê kãm ã ijarênh anê. Anê.

Jejus kot tanhmã Juãw Paxis jarênh to

Rukre 7.24-35

⁷⁻⁹ Nhũm pre ã Jejus Juãw Paxis kôt wa pa ho wa pa xwÿnhja wa kãm amnhĩ jarênh anê nê akupÿm hwÿr wa kumê nhũm wa ma akupÿm hwÿr tẽ. Hãmri nhũm Jejus mê kot mar o kuhê xwÿnhjê mã tanhmã Juãw Paxisja jarênh to nê mê kãm:

—Na ka pre htem kapôt ã Juãw Paxis mar kaxyw ma hwÿr mra. Nom ê mex ã omunh kaxyw rÿ hpijaãm kãm tanhmã kapêr to hã mar kaxyw na ka prem hwÿr amrar kêt nê. Tirtüm nhÿ hã kapêr o pa jakamã na ka prem ate mar kaxyw ma hwÿr mra. Tirtüm nhÿ hã ixkukamã ijarênh o pa xwÿnh na. Ixpê Tirtüm kot mê akaxyw ixãm xwÿnh ã na hte ijarênh o pa. Nê hprĩ hã tanhmã mê amã ijarênh to. Jakamã kapêrja mex o kot wam Tirtüm nhÿ hã kapêr jarênh

xwÿnhjê kapêr piitã hakrenh par. ¹⁰ Tirtüm kapêr ã kagã htüm kot Juãw kukamã tanhmã harênh to nê harênh kot:

Kot paj Ixkra hkukamã ma mê hwÿr harênh xwÿnhja mê nhũm ma ri kutêp mê kãm harênh o pa. Mê kot mar nê kutêp tãm amnhĩ nhĩpêx o pa kaxyw.

—Anhÿr o Tirtüm Juãw Paxis kukamã harê nhũm prem hã kagã. Tã nhũm ixkukamã mê awÿr kumê. ¹¹ Juãw Paxisja na mex kumrêx. Na pre hprĩ hã ixkukamã tanhmã ijarênh to ho pa. Tã nom ixkôt mê pa ho mê pa xwÿnhjê hkínhã na pre ixkôt pa ho pa hkêt nê. Jakamã ixkôt mê pa ho mê pa xwÿnhjaja kot ixkôt hprĩ hã ixkapêr mar o pa jakamã na mê mex o mê kot Juãw Paxisja jakrenh. Anê.

¹²⁻¹³—Na pre finat Mojes kumrêx mê kãm Tirtüm kapêr kwÿ hã kagã. Tã nhũm hpãnhã Tirtüm nhÿ hã kapêr jarênh xwÿnhjaja Mojes mÿr pê hkwy hã kagã. Nhũm prem kamã harê nê kuma nê hkôt amnhĩ nhĩpêx o pa. Hãmri nhũm Juãw Paxisja mê mÿrpê kato nê tãm Tirtüm kapêr o mê ahkre ho ri pa. Tã pa hpãnhã ho mê ajahkre ho ri mê akôt ixpa nhũm mê ohtô nê inhma nê ixkôt amnhĩ xunhwÿ nê kãm ixkapêr kôt pix mã amnhĩ nhĩpêx o ri pa hprãm nê.

¹⁴—Amnepêm na pre Tirtüm nhÿ hã kapêr jarênh xwÿnhjaja mëhõja kukamã tanhmã harênh to ho pa. Nê mê kãm harênh o: “Koja nhÿrmã mëhõ te Eris kot amnhĩ nhĩpêx pyrãk o amnhĩ nhĩpêx nê mê awÿr mō. Nê mê amã Tirtüm kot mê awÿr mënh mã xwÿnhja jarênh o pa ka mê ama.” Anhÿr o mê kãm mëhõ jarê. Tã kot paj mê amã kot hkukamã harênh xwÿnhta nhÿxi jarê ka mê inhma. Nà Juãw Paxisja kukamã na prem ã harênh anhÿr o pa.

15 —E kot pa mẽ amã mẽ piitã htỳx ri tanhmã mẽ hamaxpêr to ho mẽ pa hã mẽ amã mẽ harê ka mẽ harênh ma. 16 Te mẽhprĩre kot amnhĩ nhĩpêx pyrak o na htem amnhĩ nhĩpêx. Mẽhprĩrejaja na htem mẽ òrkwỳ kapem mẽmoj to amnhĩkati nê tee ri hkwyjê kot amnhĩ nhĩpêx pumu nê mẽ kãm:

17 Kwa na pa mẽ amã gre htã ka mẽ ixkutã anhòkrepòx kêt nê. Pa mẽ ja hã mẽ apumu nê hpãnhã mẽ amã mẽ htyk jarê htã ka mẽ akapri nê amỳr kêt nê. Kwa mẽ ri ã amnhĩ nhĩpêx anhỳr kêt nê. Anê.

—Mẽhprĩjaja na htem ã axpên mã kapêr anê. Tã te mẽ ate mẽ urak. Tirtũm kot mẽ awỳr y hã kapêr jarênh xwỳnhjê rênh tã ka mẽ te mẽhprĩre kot amnhĩ nhĩpêx pyrã nê mẽ ama nê ãm mẽ ama nê mẽ hkòt amnhĩ nhĩpêx kêt nê.

18 —Juãw Paxis na pre mẽ awỳr mỗ nê ixkĩnhã apkur mex o ri pa hkêt nê. Nê ixkĩnh ã wĩhti ho hkòm kêt nê. Ka mẽ ja hã omu nê hkaga nê atỳx ri Satanasti nhỹ hã tanhmã kot amnhĩ nhĩpêx to hã hkamnhĩx. Hãmri nê mẽhprĩre kot amnhĩ nhĩpêxta pyrã nê hkòt amnhĩ nhĩpêx kêt nê.

19 Tã hãmri pa hpãnhã mẽ awỳr mỗ nê Juãw Paxis rom apkati mẽ ixàpkur mex o ri mẽ akòt ixpa. Nê kurom mẽ akutã wĩhti hkwy ho ixkòm o ri ixpa. Tã ka mẽ ja hã ixpumu nê atỳx ri ixàpkur rũnh nê ixpipãnh o ri ixpa hã ixkamnhĩx nê ã axpên mã ixto akapêr anê. Nê mẽ kot amnhĩ tomnuj xwỳnhjê hkòt ri ixpa xwỳnh ã axpên mã ijarê. ã na ka htem axpên mã ijarênh anê. Jao te mẽ ate Juãw Paxis nhĩpêx pyrã nê ixkaga nê ixkòt amnhĩ nhĩpêx kêt nê. Na hte ã htỳx ri tanhmã mẽ hamaxpêr to ho mẽ pa xwỳnhjaja amnhĩ nhĩpêx anê. No tãm ri mẽ hamaxpêr xwỳnhjaja na htem ahpỳnhã wa ixte amnhĩ

nhĩpêx ã wa ixpumu nê axpên mã wa ijarênh o: “Nà ahpỳnhã wa kot amnhĩ nhĩpêx tã no ãm hamê Tirtũm nhỹ hã kapêr mex o pa. E pu mẽ wa urak nê Tirtũm kòt amnhĩ xunhwỳ.” Anhỳr o axpên mã wa ijarê. Anê.

Mẽ kot Tirtũm kòt mẽ hamaxpêr kêt xwỳnhjê jarênh

Rukre 10.13-15

20 Na pre hte Jejus kri piitã hkòt pa nê kri nhõ xwỳnhjê mã kapêr nê mẽ kot amnhĩ tomnuj ã mẽ kãm kapêr. Koraji mẽ Pese nhõ xwỳnhjê kumrêx mã kapêr nê mẽ kãm:

21-22 —E mẽ inhma. Amnepêm kri pê Sitõ mẽ Xir wa kamã mẽ pa xwỳnhjaja na prem tanhmã amnhĩ tomnuj tỳx to ho pa nhũm Tirtũm tee ri ja hã mẽ omu nê mẽ kot amnhĩ tomnujta ã tanhmã mẽ ho. Tã kwa mẽ o kora Koraji mẽ Pesêj nhõ xwỳnhjaja. Ra ixte mẽ amã aa mẽ ate mẽmoj pumunh kêt kwỳ ho anhỳr rax tã ka mẽ omu nê ãm omu nê amnhĩ tomnuj kaga hkêt nê. Ari tanhmã amnhĩ tomnuj to ho ri apa. Mỳrapê kot kaj mẽ amex kêt nê. Kopy apu Sitõ rỳ Xir kamã mãn ixte mẽ kãm aa mẽ kot mẽmoj pumunh kêt kwỳ ho anhỳr o ri ixpa ronhỹx mẽ omu nê mẽ arom amnhĩ kaxyw ixkòt hamaxpêr tỳx kurê kumrêx. Nê tee ri kot tanhmã kot amnhĩ tomnuj to hã amnhĩ pumu nê hkapri nê hkaga hpa. No mẽ kajaja na pa hte tee ri mẽ amã aa mẽ ate mẽmoj punuj kêt kwỳ ho anhỳr o ixpa kaprỳ. Ka mẽ ja hã ixpumu nê ãm ixpumu nê amnhĩ tomnuj kaga hkêt nê. Jakamã koja nhỹrmã Tirtũm tanhmã mẽ atomnuj tỳx to. Nê tanhmã Sitõ mẽ Xir wa kamã mẽ pa xwỳnhjê jarênh to nhũm mẽ kot amnhĩ tomnuj mỳrapê amnhĩ xà htỳx kamã hamak rãhã ho pa. No mẽ kajaja mẽ ate amnhĩ tomnuj tỳx o mẽ hakrenh jakamã koja Tirtũm mẽ hkĩnhã mẽ atomnuj tỳx kumrêx. Ka mẽ amnhĩ xà htỳx

kamã ajamak rãhã ho ri apa kãm ga. Anê.

23-24 Nhũm pre ã Jejus mẽ kãm kapêr anê. Nê hpãnhã Kapanaũ nhõ xwýnhjê mã kapêr nê mẽ kãm:

—No mẽ apê Kapanaũ nhõ xwýnhjaja. Kot kaj mẽ ajaxwýja mẽ urák nê amex kêt nê. Ra ixte mẽ amã aa mẽ ate mẽmoj pumunh kêt kwý ho anhýr rax nhũm mẽ ate hã ixpumunh tã amnhĩ tomnuj kaga hkêt tã Tirtũm mẽ wa inhõ krĩ hwýr akrà. No ãm hwýr akrà kaprý. Kot kaj mẽ atõ hwýr axàpir kêt nê. Kop apu Sotõ nhõ xwýnhjaja mãn kot ã ixte amnhĩ nhĩpêx anhýr ã ixpumunh ronhýx mẽ ra kot amnhĩ tomnuj kaga nê ixkõt amnhĩ xunhwýr kurê kumrêx. No mẽ kajaja na ka mẽ ã amnhĩ nhĩpêx anhýr kêt nê. Jakamã kot kaj mẽ nhýrmã ma kuwy maatita wýr ajapêx pa kãm ga. Anê.

Jejus kot õ Papaj mã amnhĩ jarênh

Rukre 10.21-22

25-26 Tã nhũm Jejus Tirtũm mã amnhĩ jarê nê kãm:

—Pa Papaj? Nã apê mẽ inhõ Pahi Maati na ka. Pikap ri mẽ pa xwýnhjaja nê kaxkwa kamã mẽ pa xwýnhjaja apê mẽ ixpiitã mẽ inhõ Pahi Maati na ka. ãm hãmri na ka hte amnhĩ nhĩpêx mex o ri apa. Na ka hte mẽ àhpumunh tỳx ã mẽ kot amnhĩ to jarkrar xwýnhjê mã axàhpumunh tỳx o amnhĩrít kêt nê. ãm mẽ àhpumunh kêt ã mẽ kot amnhĩ jarênh xwýnhjê pix mã na ka hte axàhpumunh tỳx o amnhĩrít nhũm mẽ tapxipixjaja ja hã apumu. Nã ãm hãmri. ãm hãmri na ka hte amã hprãm xà hkõt ã mẽ piitã mẽ hipêx anhýr o ri apa Papaj. Jakamã mẽ kot amnhĩ to hkryre xwýnh pixjaja na htem hprĩ hã ate amnhĩ nhĩpêx kõt apumunh o pa. Anê.

Nhũm pre ã Jejus Tirtũm mã amnhĩ jarênh anê. ²⁷ Hãmri nê

hpãnhã mẽ kot mar o kuhê xwýnhjê mã kapêr nê mẽ kãm:

—Nã na pre ra Inhĩpêêxaja inhĩkra kamã mẽmoj piitã hagjênh pa. Ixte kãm ho amnhĩtãr o ixpa kaxyw. Jakamã tapxipix na kot ixpê Kra hã ixpumunh par. No jar pika ja kamã mẽ pa xwýnhjaja na mẽ kot ja hã ixpumunh kêt. Nê papxipix na ixte Inhĩpêêxã kot tanhmã amnhĩ nhĩpêx to hã omunh par. Jakamã na pa hte ã amnhĩ nhĩpêx o ri ixpa anê nê inhãm hprãm xà hkõt mẽ hkwýjê mã ho amnhĩrít o ri ixpa. Jakamã nhũm mẽ ixpyrà nê Inhĩpêêxã kot tanhmã amnhĩ nhĩpêx to ho pa hkõt omu.

²⁸⁻³⁰ —Nê tee ri amnhĩ kukamã mẽ ajamxpêr o ri apa xwýnhjaja te mẽ ate mẽmoj pytĩ rax tur nê ahte ho apa pyrãk. Kwa mẽ ixkõt amnhĩ xunhwý nê ixte amnhĩ nhĩpêx ã ixpumu. Ixte mẽ akamã ixukapri xwýnh na pa. Na pa hte mẽ akutã inhnojarêr rãhã ho ixpa. Jakamã kot kaj mẽ ixkõt amnhĩ xunhwý pa te ixte mẽ anê mẽmoj pytĩ ho ixwryk pyrãk o mẽ anhĩpêx nê tãm mẽ axunhwý ka mẽ tãm ajamxpêr nê tãm amnhĩ nhĩpêx o ri apa. Mo kaxyw koja ixkõt mẽ kot amnhĩ nhĩpêx o pa xwýnhjaja tee ri amnhĩ kukamã hamxpêr o pa? Nã na htem ixkamnãr rom hamakêtkati nê àmnhĩx ri pa ho pa. Anê.

12

Jejus kêp arĩgromnu hpãm

Makre 2.23-28; Rukre 6.1-5

¹ Tã nhũm Ijaew nhõ arĩgromnu pê sapja kato. Hãmri nhũm Jejus mẽ hkõt ri mẽ ixpa ho mẽ ixpa xwýnhjê mẽ pa mẽ ma mẽ hpur kõt ri nhýhým ri ixpa. Hãmri nê ra mẽ inhãm prãm nê mẽmo hy te kot harõj pyrãk xwýnhja kwý rê nê kugrà nê ma Jejus kõt hkanhar o mõ. Mẽ ixpê Ijaew na pa htem axpên pur kãm ã amnhĩ nhĩpêx anhýr o ixpa. ² Hãmri nhũm mẽ ixkwý pê

Parijew nhõ xwýnhjaja kãm mëmoj tã Jejus o kapër prãm jakamã ã më ixte amnhĩ nhĩpêx anhÿr ã më ix-pumu nê më ixtã Jejus kukjêr kurê kumrêx nê kãm:

—Kwa Tirtùm kapër tùm kot më panhõ arĩgromnu hã më pahte më hpur kãm mëmoj nhĩkênh nê më pahkurê htã nhũm ri akôt më pa ho më pa xwýnhjaja axtem nê ã amnhĩ nhĩpêx anhÿr o ri akôt pa. Mëmo hyta rê nê akôt hkanhar o pa. Kwa më kãm anê kê më ã amnhĩ nhĩpêx anhÿr kêt nê. Na htem arĩgromnu hã mëmoj tã àpênh kêt kênã. Anê.

³⁻⁴ Hãmri nhũm më kuma nê hprĩ hã më kãm Tirtùm kapër jarê nê më kãm:

—Tk. Xàn ka htem Tirtùm kapër ã kagã htùm kot pahi Tawi kot tanhmã amnhĩ nhĩpêx tota kamã harênh nê mar kêt nê? Na pre hkôt ri më pa xwýnhjê më nhũm më prãm xaj Tirtùm mã amnhĩ jarênh xã hã ixkre hwÿr agjê. Hãmri nhũm më õ patre maatija më kãm prãm tÿx ã më omu nê kãm më hkaprĩ nê më kãm mëmoj gõ. Më kot Tirtùm noo mã pãwti jaxwÿr xwýnhnta gõ nhũm më kuku. Tirtùm kapër ã kagã htùm kot ja nê më hkurê htã nhũm më kãm prãm tÿx ã më omu nê më kamã ukaprĩ xaj më kãm kugõ. ãm më õ patre pix kot ja hkur kaxyw tã nhũm më kãm kugõ nhũm më kuku. Tã nom nhũm Tirtùm ja hã më omu nhũm ja kêp omnuj kêt nê. Kot më kamã ukaprĩ nê më kãm õr ã omu nhũm ja kãm mex nê.

⁵ —Më panhõ arĩgromnu htã na hte patrejaja arĩ hã Tirtùm mã amnhĩ jarênh xã hã ixkre kamã àpênh o pa. Tirtùm kapër ã kagã htùm kôt na htem arĩgromnu htã nhũm më arĩ hã apê nhũm Tirtùm pè jamnuj kêt nê. Kumã më àpênh xwýnh kênã. ⁶ ãm hãmri na pa më amã ja jarê. Tirtùm mã amnhĩ jarênh xã hã ixkreta mex tã nom ixpê Tirtùm Kra jakamã inhmex o

ixte ixkreta jakrenh. ⁷ Tirtùm kapër ã kagã htùm kot ja harênh kot:

Kêr ka më inhmã amnhĩ jarênh kaxyw nê ãm inhmã mëmoj nhõr pix pè inhmã amnhĩ jarênh kêt nê. Më mãânên më kamã axukaprĩ o ri apa pè inhmã amnhĩ jarê. Ja na kêt inhmã hprãm.

—ã harênh kot anhÿr. Tã më ate aprĩ hã ja mar ronhÿx ka më ixkôt më pa xwýnhjê kot mëmo hy rênh nê hkanhar o mör ã më omu nê ri tanhmã më ho akapër to hkêt nê. ãm më kãm prãm ã më omu nê më kamã axukaprĩ nê.

⁸ —Kêt pa na pre Tirtùm më akaxyw ixãm nê më awÿr inhmê. Jakamã papxipix na pa hte arĩgromnu hã tanhmã më kot amnhĩ nhĩpêx to hã më kãm karõ. Kwa më jajê pumu nê më kamã axukaprĩ kêt wehe. Kwãr më mãmrĩ mëmo hyta rê nê hkanhar o ixkôt mõ. Anê.

ĩhkra grã xwýnh jarênh

Makre 3.1-6; Rukre 6.6-11

⁹ Nhũm pre ã Jejus Parijew nhõ xwýnhjê mã kapër anê hãmri nê Tirtùm kapër o më ahkre xã hã ixkre hwÿr tẽ nê axã. ¹⁰ Nhũm Parijew nhõ xwýnhjaja tanhmã ho kapër to kaxyw htãnopxar o kuhê. Jakamã nhũm ixkre kamã mëhõ my ĩhkra grã xwýnhja më pikuprõnh xwýnhjê nhĩhkó hã nhÿ nhũm Parijew nhõ xwýnhjaja omu nê axpên mã:

—Kwa pu më jar pakuhê nê Jejus kot tanhmã amnhĩ nhĩpêx to hã omu. Xã koja arĩgromnu hã mũjti ho mex nã? Koja ho anê nê Tirtùm kapër tùm kuhpa hã amnhĩ nhĩpêx. E pu më kop xa nê hã omu. Anê.

Hãmri nê hã Jejus kukja nê kãm:

—E më inhmã mëmoj jarê. Xã na htem arĩgromnu hã akupÿm më ho mex nhũm Tirtùm kãm ja mex nê nã? Anê.

11 Hāmri nhūm mē hamaxpēr kôt mē omunh mex nē mē kām:

—Kwa tanhmā na htem arīgromnu hā amnhī nhīpêx to ho pa wehe? Xà koja we mē akrit ôwêhti ahkrehti kamā tēm ka omu nē âm omu nē arīgro mex jamār pē ho axāpir kêt nē? Nà kot kaj mē tee ri omu nē ho axāpir kuré kumrêx. 12 Arīgromnu hā mē ho mexja ja mex kēnā. Tīrtūm mā mē pahpê panhīja na mē pamex o mē hkrit jakrenh jakamā kēr pu mē tee arīgromnu htā pu mē hā tanhmā axpēn to mex to ho papa. Ja na Tīrtūm kām hprām.

Anhÿr o mē kām kapēr. 13 Hāmri nē hpānhā myta mā:

—E anhīkra katāt. Anē.

Hāmri nhūm ihkra katāt nē mex kuré kumrêx. 14 Hāmri nhūm Parijew nhō xwÿnhjaja tee ri ja hā omu nē Jesus kamā gryk nē. Arīgromnu pē sap ā kot ho mex jakamā nhūm mē kamā gryk tÿx nē. Hāmri nē ma mra nē hapôj nē hā axpēn kukjêr o kuhê nē axpēn mā:

—Kwa ā kot amnhī nhīpêx anhÿrja mÿrapê tanhmā kot puj wem ho? ā kapēr anhÿrja o te mē papamjaja mē pahte hkīnhā mē kamā paxukaprī kêt pyrāk ā mē pajarē. Koja mē pahkwÿjaja kuma hāmri nē mē pahte amnhī nhīpêx kaga nē amnhī kaxyw hkôt pix mā hamaxpēr. Kwa tanhmā kot puj wem ja nē ho?

Anhÿr o axpēn kukjêr o kuhê.

Jesus kēp Tīrtūm kot mē pahwÿr mēnh xwÿnh ā harēnh

Makre 3.7-12

15 Hāmri nhūm Jesus amnhī tā Parijew nhō xwÿnhjê jamaxpēr kôt mē omu hāmri nē mē kēp kato nē hpānhā ma nhÿhÿm krī hō hwÿr ma tē. Nhūm mē ohtô nē omu nē ma hkôt mra nhūm mē omu nē akupÿm mē kām mē ā xwÿnh piitā ho mex.

16 Hāmri nē mē kām:

—E na pa akupÿm mē ato mex. Nom kēr ka mē amnhī tā ixto axāmra ho ri apa hkêt nē. Ixpē

Tīrtūm Kra hā mē kām ijarēnh kêt nē. Âm kwarī kumrêx.

Anhÿr o mē kām kapēr. 17 Na pre ra amnepēm Tīrtūm nhÿ hā kapēr xwÿnh finat Ijaisja Jesus kukamā mē kām tanhmā harēnh to nē hā kagā. Te Tīrtūm tām kapēr pyrāk o harē nē hā kagā. Nē hā kagā ho:

18 Ota ixkôt amnhī nhīpêx o pa xwÿnhhta xa. Pa na pa amnhī kaxyw âm. Inhmā hapêê. Na pa hte tanhmā kot amnhī nhīpêx to ho pa hā omu nē ixkīnh tÿx nē. Kot paj hwÿr amnhī karō mē nhūm hwÿr axā nhūm ma ÿ hā pika piitā hkôt mē piitā mē kām ijarēnh o ri mē hkôt pa. Mē kot hprī hā ixte tanhmā amnhī nhīpêx to nē tanhmā ijamaxpēr to hā ixpumunh kaxyw.

19 Nom koja ri amnhī to àmra o pa hkêt nē. Rÿ kām amnhī to rax prām o mē kām tanhmā amnhī nhīpêx to ho pa hkêt nē.

20 âm kapēr xukaprī pix o koja mē hirerek xwÿnhjê mā kapēr o pa. Nē mē kot tee ri amnhī nhīpêx ā amnhī pumunh xwÿnhjê kamā ukaprī o pa. Nē mē kot htÿx ri amnhī nhīpêx o mē pa xwÿnhjê kutā nojarêt rāhā ho pa jakamā nhūm mē hpānhā tām amnhī nhīpêx o pa. Koja ā amnhī nhīpêx anhÿr o ri mē hkôt pa rāhā ra akupÿm mēmoj piitā tām haxwÿr pa.

21 ā kot amnhī nhīpêx anhÿr o pa jakamā koja pika piitā hkôt mē pa xwÿnh kwÿjaja kukwak ri amnhī kaxyw Tīrtūm kôt hamaxpēr nē hkôt amnhī xunhwÿ. Anē.

Na pre ā finat Ijaisja Tīrtūm nhÿ hā kormā Jesus wrÿk nē kator kêt ri tanhmā kot amnhī nhīpêx to ho pa hkukamā harēnh nē hā kagā anē.

Tã nhũm mẽ hwÿr wrÿn nê ã mẽ hkôt amnhĩ nhĩpêx anhÿr o pa.

Jejus mẽ mẽkarõmnuti wa harênh Makre 3.20-30; Rukre 11.14-23, 11.31-32, 12.10

²² Tã nhũm prem Jejus wÿr mẽhõ myja o mō. Mẽkarõmnuti kot hwÿr àr nê ho nohkre nê ho kapêr kêt xwÿnhnta nhũm mẽ hwÿr o mō. Hãmri nhũm omu nê nê mẽkarõmnuti jano nê akupÿm ho mex kurê kumrêx nhũm akupÿm rīt mex nê akupÿm kapêr mex nê. ²³ Hãmri nhũm mẽ amnhĩ jaêr pê omu nê kamã no puma nê hã axpên kukjêr o:

—Kokÿÿ. Jejus na hte ãm mẽ ho mex o mẽ ho mex o pa. Mãn kêp Tĩrtũm kot mẽ pahwÿr mẽnh mã xwÿnhnta na nà? ã na hte ã amnhĩ nhĩpêx anhÿr o pa. Mãn kêp pahi finat Tawi kanrêhã tãmnhwÿta na nà? Anê.

²⁴ Nom nhũm Parijew nhõ xwÿnhjaja ã Jejus kot amnhĩ nhĩpêx anhÿr ã omu nê kêp mẽkarõmnuti hkwȳ hã hkamnhĩx. Jakamã mẽ kot hã axpêr kukjêr ã mẽ kuma nê mẽ kãm:

—Tk pêr hinhu nhĩkõoti nhÿ hã na hte mẽ nê amnhĩ kwÿjê japõx o pa. Anê.

Hinhu nhĩkõoti nhĩxi hõ pê Satanasti nhũm prem ã Satanasti nhÿ hã Jejus kot amnhĩ nhĩpêx ã hkamnhĩx anê. ²⁵ Nhũm ra mẽ hamaxpêr kôt mẽ omunh mex jakamã mẽ kãm:

—Kwa mẽ inhma mẽ ate ixpê Satanasti hkwȳ hã ixkamnhĩx xwÿnhjaja. Koja pika nhõ xwÿnhjaja axpên kutã amnhĩ xunhwÿ nê axpu hãmri nê angrã nê ma ahpÿnhã ri pa. Hãmri nê amnhĩ krã hkôt ri tanhmã amnhĩ nhĩpêx to ho pa. Jakamã nhũm mẽ õ pahija mẽ hamãr kêt nê. Nê koja krĩ nhõ xwÿnhjaja. Rÿ mẽ kot axpên to hkwȳ xwÿnhjaja mẽmoj tã axpên kãm gryk nê axpên kutã amnhĩ xunhwÿ. Hãmri nê ahpÿnhã awry

hã pa nhũm mẽ õ pahija tee ri kãm mẽ hamãr prãm kaprÿ. Mo mẽ hkwȳjaja kot ri mẽ hamãr o pa? No koja pahija tãm amnhĩ nê amnhĩ kwÿjê janor kêt nê. ²⁶ Tã ja pyrà nê ixte Satanasti nhÿ hã tanhmã amnhĩ nhĩpêx to ho ri ixpa ronhÿx pa ri mẽ nê amnhĩ kwÿjê janor kêt nê.

²⁷ —No mẽ akwȳjaja? Xà Satanasti nhÿ hã na htem mẽ nê mẽkarõmnuti japõx o pa? Kêp apu pa ixte ÿ hã mẽ nê amnhĩ kwÿjê japõx ronhÿx mẽ akwȳjaja ixpyrà nê ÿ hã mẽ nê amnhĩ kwÿjê japõx o pa. Nà Tĩrtũm nhÿ hã mẽ ixte mẽ nê mẽ hapõx o ixpa kênã. Jakamã mẽ ate ã ijarênh anhÿrja mex kêt. ²⁸ Tĩrtũm Karõ nhÿ hã ixte mẽ nê mẽ hapõx jakamã kwa mẽ ja hã ixpumu nê ixte mẽ ato amnhĩptãr kaxyw Tĩrtũm kot mẽ awÿr inhmênh kôt ixpumu kêt wehe. Pa na ka htem ijamãr o apa.

²⁹ —Satanastija àhpumunh tÿx jakamã na htem tee ri kêp hkôt mẽ kot amnhĩ xunhwÿr xwÿnhjê pytãr kaxyw nhũm mẽ nê mẽ omunh mex nê. Tã nom ixàhpumunh tÿx o ixte Satanasti jakrenh par jakamã na pa hte kêp mẽ utã nhũm mẽ hpãnhã ixkôt ri amnhĩ nhĩpêx.

³⁰ —Ra mẽ amã ixkapêr mar prãm tã nom kormã ixkôt amnhĩ xunhwÿr kêt nê. Kwa wem ma amnhĩ to amõr gri nê tokyx ixkôt amnhĩ xunhwÿ kêt wehe. Kot kaj mẽ anhÿr kêt hãmri nê mẽ apê ixkutã amnhĩ xunhwÿr xwÿnh pyràk o amnhĩ nhĩpêx.

³¹⁻³² —Nê koja mẽhõ ixkapêr ma nê kãm ixprãm kêt nhũm Tĩrtũm ixtã omu nom tokyx tanhmã ixtã ho hkêt nê. Koja kormã amnhĩ tã hamã. Karõ kot axte kãm ijarênh o amnhĩrīt nhũm jatã kot mar nê kãm ixprãm nê ixkôt amnhĩ xãm prãm xàj nhũm kormã amnhĩ tã hamã. Nom koja Karõ xatã mẽ kãm tanhmã ixto amnhĩrīt to htã nhũm mẽ kuma nê ãm kuma nê te mẽ

kêp amnhî jamak pro pyrâk. Jao ra Karô hâ hpijaam kêt o amnhî nhîpêx. Mýrapê koja Tîrtûm nhÿrmâ amnhî xwar te kêp amnhî jamak pro pyrâk o mê hipêx nhûm mê tee kâm amnhî kaprî kaprÿ. Hâmri nê amnhî xà htÿx kamã hamak o pa xàta wÿr ma pa nê kamã pa rãhã nê pa ho pa. Anê.

Mê pajamaxpêr xà hkôt tanhmã ri mê pakapêr to

Rukre 6.43-45

³³ Nhûm Jejus arî Parijew nhô xwÿnhjê mã kapêr nê mê kâm:

—Nê kot kaj mê atô anhô mêmo pâr nhûm amã ô mex nê. Ô rax nê. Ka omu nê akînh nê amnhîm mex â harê. No koja apê ô hkêt ka tee ri omu nê mex kêt â harê. Na htem â amnhîm mêmo xô hpâr pumunh kôt tanhmã kute hã harênh anê. Ja pyrã nê na htem tanhmã mê kot amnhî nhîpêx to hã mê omunh kôt tanhmã mê harênh to. Mê kot amnhî tomnuj xwÿnh â mê harê rÿ mê kot amnhî to mex xwÿnh â mê harê.

³⁴⁻³⁵ —Nê koja mêhõ hamaxpêr mex nê hãmri nê kapêr mex o pa. Nom koja hamaxpêr punuj nê kapêr punuj pix o pa. Nê htÿx ri tanhmã amnhî tomnuj to ho pa. Na htem ahpÿnhã amnhî jamaxpêr xà hkôt tanhmã kapêr to ho pa. No mê kajaja na ka htem kagã xoprê jamaxpêr pyrâk o ajamaxpêr punuj pix o ri apa. Jao akapêr punuj nê. No tãm ajamaxpêr o tãm akapêr o ri apa hkêt nê. Na htem tanhmã hamaxpêr to xà hkôt tanhmã ri kapêr to ho pa. ³⁶⁻³⁷ Koja nhÿrmã Tîrtûm mê piitã tanhmã mê kapêr to hã mê mar xà hkôt tanhmã mê harênh to. Jakamã mê akapêr mex o mê apa xwÿnhjaja koja mê amex â mê ajarê. Nom mê atÿx ri akapêr punuj o mê apa xwÿnhjaja koja mê amex kêt â mê ajarê. Hâmri nê mê akapêr punuj o apaja mýrapê mê atomnuj tÿx nê. Anê.

Jejus kot Jôhti jarênh

Makre 8.11-12; Rukre 11.29-32

³⁸ Hâmri nhûm Tîrtûm kapêr tûm o mê ahkre xwÿnh mê Parijew nhô xwÿnh kwÿjaja mêmoj tâ Jejus wÿ nê kâm:

—Kwa Pahihti. Mê inhmã aa mê ixte mêmoj pumunh kêt ô ho anê. Kot paj mê omu hãmri nê Tîrtûm kot mê ixwÿr amênh â apumunh kurê kumrêx. Jakamã e mê inhmã mêmoj to anê nã. Anê.

³⁹ Hâmri nhûm mê kuma nê mê kâm:

—Tk. Pêr âm mê ajamaxpêr punuj pix o na ka htem apa. Ixpê Tîrtûm kot mê awÿr inhmênh xwÿnh tâ mê ate ja hã ixpumunh kêt. Nê mê ate ja hã axpên mã ijarênh kêt tâ ixte mê amã aa mêmoj pumunh kêt ô ho anhÿr kaxyw hã ixwÿ. Nã pa mê amã ho anhÿr kêt nê. Kormã. Âm amnepêm Jôhti kot tanhmã amnhî nhîpêx toja pix kot paj mê amã harê.

⁴⁰ —Tîrtûm nhÿ hã kapêr xwÿnh Jôhtija amnepêm na pre tep rax kumrêxja htîr rãhã kukrê. Nhûm ôxàhkre kamã htîr nê hkrî hã apkati axkrunêpxi hãmri nê htîr rãhã ôxàhkre rûm kato. Tã ixpê Tîrtûm kot mê awÿr inhmênh xwÿnh kot paj nhÿrmã kên kre kamã ixyk nê inhnôr â apkati axkrunêpxi. Jôhti hkînhã ixyk kumrêx nê inhnôr â apkati axkrunêpxi hãmri nhûm Tîrtûm akupÿm ixto ixtîr.

⁴¹ —Nê koja nhÿrmã Tîrtûm akupÿm mê htyk nê mê hikwÿ xwÿnh piitã akupÿm mê ho htîr hãmri nhûm mê piitã Inhîpêêxã mê wa ixkutã hkrî pa wa tanhmã mê harênh to. Tîrtûm mê wa ixkuri mê htîr tûm nê mê pa ho mê pa mã xwÿnhjê hã mê hkwyjê jarê nê wa ixkuri mê pa ho mê pa hkêt xwÿnhjê jarê. Mê piitã â ahpÿnhã mê harênh anê. Amari mê pa xwÿnhjaja nê mê ô pahijaja. Jakamã nhûm Nîniwe nhô xwÿnhjaja tanhmã wa inhmã mê

ajarênh to. Jôhti kot mē hwÿr mōr nē mē kām Tirtūm kapēr jarênh o pa xwÿnhjaja nhūm mē tanhmā wa inhmā mē ajarênh to nē wa inhmā: “Na pre Jôhtija man mē inhō krī hwÿr mō nē mē inhmā akapēr jarênh o ri mē ixkôt pa. Pa prem kuma nē mē ixte amnhī tomnuj kaga nē akôt amnhī xunhwÿr kurê kumrêx Tirtūm. No or war akutā mē hkrī xwÿnh kwÿ ata mē na pre Akra Jejus tām mē hwÿr mō nē mē kām kapēr o ri mē hkôt pa nhūm prem mar tā mē ixkīnhā mē kot amnhī tomnuj kaga nē hkôt amnhī xunhwÿr kêt nē. Mē ixkurom mē kot Akra mar tā amnhī kaxyw kām hamaxpēr kêt nē.” Anhÿr o koja mē wa inhmā mē ajarē ka mē tee ri mē ama nē ra mē amā ma nē. Nom ām mē amā ma kaprÿ.

⁴²—Nē sur kām mē ò pahi nitita koja mē hpānhā tanhmā wa inhmā mē ajarênh to nē wa inhmā: “Na pa pre inhmā pahi Sarumāw kot war anhÿ hā àhpumunh tÿx ā harênh ma hāmri nē inhmā mar prām xàj ma awry hā ò pika hwÿr mō nē omu nē kapēr ma. Hāmri nē ma akupÿm inhō pika hwÿr mō nē ixkwÿjê mā àhpumunh tÿx ā harênh o ri ixpa. Tā Akra Jejus na kot àhpumunh tÿx o pahi Sarumāw jakrenh tā or war akutā mē hkrī xwÿnh kwÿ ata mē. Mē kot kapēr mar tā ixkīnhā kām mar prām kêt. Na prem kuma nē ām kuma.” Anhÿr o koja wa inhmā mē ajarē. Hāmri nē ja hā mē amā akir ka mē tee ri mar o akrī nē amnhī kamā agryk o akrī. Nom ām amnhī kamā agryk kaprÿ. Anē.

Mēkarōmnuti kot tanhmā mēhō hto hā harênh
Rukre 11.24-26

⁴³ Nhūm Jejus arī Parijew nhō xwÿnhjê mē Tirtūm kapēr tūm o mē ahkre xwÿnhjê mā kapēr nē mē kām:

—Te mē ate ixte mēhō nē mēkarōmnuti japôx xwÿnhhta pyrāk. Nhūm te kēp kator nē ma htēm

pyrāk. Nē nhÿri amgrā kamā ri pa pyrāk. Koja ja kēp omnuj nhūm tee ri kamā nhÿri hkôt xà japēr o pa. Nom tee ri hapēr o pa kaprÿ. ⁴⁴Hāmri nē tanhmā amnhī kukamā hamaxpēr to nē hamaxpēr o: “E kot paj ma akupÿm mē kot nē ixkator xwÿnhhta wÿr tē nē axà nē kamā mām ri ixpa.” ⁴⁵ Anhÿr o hamaxpēr hāmri nē ma akupÿm hwÿr tē. Nom kormā akupÿm hwÿr àr kêt ri nhūm kamā amrakati nē ri pa. Jakamā nhūm akupÿm hwÿr axà. Nom ahte hwÿr àr kêt nē. Amnhī kôt hkwyjê ho 7 nē hwÿr mē ho gjêx pa. Mē kēp 7jaja nē wamta mē nhūm mē piitā hwÿr gjêx pa. No mē kēp 7jaja na omnuj tÿx o kot wamta jakrenh jakamā nhūm mē kot hwÿr gjêx xwÿnhhta mē ŷ hā ra amnhī tomnuj tÿx nē oprê htÿx o pa. Wam pyxire kot hwÿr àrta nhÿ hā nhūm amnhī tomnuj o ri pa nom kawax pē oprê. Tā nhūm ra axte hwÿr mē ohtō nē gjêxta nhÿ hā hāmri oprê htÿx kumrêx. Ja pyrā nē kot kaj mē tokyx ixkôt amnhī xunhwÿr kêt nē hāmri nē amnhī tomnuj tÿx pix o ri apa. Anē.

Jejus kot tanhmā hkwyjê jarênh to hā harênh

⁴⁶ Nhūm Jejus arī mē ahkre ho nhÿ. Rôm nhūm katorxà nē htōjaja nhÿhÿnh hwÿr mōn pōj. Nom kormā hwÿr gjêx kêt nē. Mē kot hā hturax jakamā nhūm mē tee ri hwÿr gjêx kaxyw kormā kapôt ā hā mē omunh o kuhê. ⁴⁷ Hāmri nhūm mēhōja kapôt ā mē omu nē Jejus mā mē harē nē kām:

—Kwa Pahihti. Ota akatorxà mē atōjaja awÿr mōn pōj nē tee àr kaxyw. O mÿj mē kapôt ā kuhê. Anē.

⁴⁸⁻⁵⁰ Hāmri nhūm kuma nē kām:
—Tôe. Nà kot pa ixkato nē mē omu. Inhmā mē hapêe. Nom kot kaj mē atō Tirtūm kapēr ma nē hkôt amnhī xām nē hkôt amnhī nhÿpêx. Hā kot kaj te apē ixtō rÿ ixkatorxà pyrāk o pu mē axpên nhÿpêx o ri

papa. Pa inhmã ixkatorxã në ixtôjê japê pyrã në mãânên inhmã më ajapê në. Anê.

13

Mêmo hy hkre xwÿnh jarênh

Matêwre 13.18-23; Makre 4.1-9; Rukre 8.4-8

¹Hãmri nhũm Jejus më kãm kapêr pa në ixkre rũm kato në ma himô rax wÿr tẽ në gô mÿri më kãm ujarênh kaxyw nhÿ. Pa më ixpê hkôt më ixpa ho ixpa xwÿnhjaja ma hkôt mra. ²⁻³Hãmri në gôta wÿr pøj në mÿri ixkrĩ. Nhũm më Jejus ã hturu rax në nhũm tee ri më omunh o nhÿ. Hãmri në hamaxpêr në kãnhmã xa në tẽ në pãr krem axã në pãr kre kamã mütũm awry rũm më ahkre ho nhÿ nhũm më piitã omunh në mar mex o hkrĩ. Nhũm më kãm ujarênh o më ahkre ho nhÿ. Nom më kãm tãm ujarênh kêt në. Mẽ kot Tirtũm kapêr mar në tanhmã hkôt amnhĩ nhĩpêx to ho paja nhũm hã kuxi në më kãm harênh o nhÿ nhũm më amgrã kamã kÿx pê mar o hkrĩ. Nhũm më kãm:

⁴—E më inhma. Kojã mẽhõ ma pur mã mõ në pur kãm mêmo hy ho ukapêr o ri pa. Nom nhũm hy piitã amex kãm rôrõk kêt në. Kojã hkwyja ahpÿnhã nhÿri rôrõk. Kwÿ aptÿx kãm rôrõk nhũm kuwênhre omu në hwÿr mra në hkrêr pa.

⁵—Nê kojã kên kãm hkwy rôrõk në ra higrõt kutã nojarêr në higrõt pa. Nom nhũm kamã aptÿx në kêp pika hkryre. ⁶Jakamã nhũm higrõt nhũm hã myt ahpã në arĩgro htÿx më nhũm grã pa. Harê hkryre jakamã grã pa.

⁷—Nê kojã mrõnhĩ kamã hkwy rôrõk në higrõt tã no nhũm utĩja kêp amÿtã nhũm ô hkêt në.

⁸—No kêt hirã kamã pika mex kãm rôrõk xwÿnhja hirã kamã rôrõk jakamã higrõt mex në piitã ô rũnh në. Kamã ô hkwy kêp 30 në kamã hkwy kêp 60 në kamã hkwy kêp

100. Æ më ujarênh kot anhÿr. ⁹Kwa kêt ka më ixujarênhja ma në kãm ajamaxpêr tÿx rãhã ho apa. Anê.

Mêmo kaxyw Jejus kot më ujarênh o më ahkre

Makre 4.10-25; Rukre 8.9-15

¹⁰Hãmri pa më ixpê Jejus kôt më ixpa ho ixpa xwÿnhjaja Jejus kot më kãm ã ujarênh anhÿrja ã kuma në tee ri hkukamã ijamaxpêr. Hãmri në hã hkukja në kãm:

—Kwa axujarênhhta na pa më ixprĩ hã hkôt mêmoj pumunh kêt në. Mon ka hte ãm më ujarênh pix o më ahkre? Anê.

¹¹Hãmri nhũm më inhmã:

—Tõe. Nã kot paj më amã harê. Tirtũm kãm më ate aprĩ hã mar prãm jakamã kot paj ixprĩ hã më amã harê. Mẽ kot amnhĩ tomnuj kaga nhũm Tirtũm kot ja hã më omunh në më ho hkra. Ja na pa harê. No mÿjjaja më akĩnhã kãm ja mar prãm kêt jakamã na htem ixujarênhja ma në ãm kuma në htÿx ri pa.

¹²—No kêt më kajaja na ka më ixkõt ri apa ho apa. Nê xatã ixkapêr mar o apa jakamã na ka më aprĩ hã ixkapêr ma. Tã më ate ixkõt amnhĩ nhĩpêx o apa jakamã na pa tanhmã më akrã hto ka më aprĩ hã mar mex o mõ. No më kot ixkapêr mar në ãm mar xwÿnhjaja na më akĩnhã inhmar tÿx kêt në. Jakamã nhũm Tirtũm tanhmã më hkrã hto nhũm më hã no hkêt tokyx anê htÿx ri pa.

¹³—Ixte më kãm aa më kot mêmoj pumunh kêt kwÿ ho anhÿr rax tã nhũm më omu në ãm omu. Nê ixte amnhĩ nhĩpêxja nhũm më kãm hkĩnh kêt në. Nê më kot ixkapêr mar tã ãm inhma në kãm hprĩ hã inhmar prãm kêt në.”

—Jakamã na pa hte ã më kãm mêmoj te ho tãm pyrã në harê no ãm hã haxwÿ në më kãm ixujarênh anê.

14-15 —Na pre ra Tirtûm nhÿ hã kapêr o pa xwÿnh Ijaisja amnepê m mē hkukamã tanhmã mē harēnh to nē hã kagã. Mē kot inhmar nē ãm inhmar xwÿnhjê jarē nē tanhmã mē hkukamã mē harēnh to nē mē harēnh o:

Koja mē ujarēnh mex mar pymaj amnhÿ jamak pro nē amnhÿ no hpro nē hkôt hamaxpêr kêt nē. Jakamã koja mē kãm mē kot amnhÿ nhÿpêx mex prãm kêt nē harēnhja ma nē ãm kuma. Nē omu nē ãm omu. Mē kãm hprãm kêt jakamã koja mē ã amnhÿ nhÿpêx anē. Æ mē kot amnhÿ nhÿpêx anhÿr kêt ronhÿx mē ra Tirtûm kapêr ma nē hkôt amnhÿ xunhwÿ. Hãmri nhÿm amnhÿ tã mē omu nē mē nē mē kot amnhÿ tomnuj rēnh pa. Hãmri nhÿm mē hkôt amnhÿ nhÿpêx mex nē kapêr mar mex o pa. Tã no nhÿm mē Æ amnhÿ nhÿpêx anhÿr kêt nē. Anē.

—Æ Ijaisja mē hkukamã mē harē nē mē hã kagã anē.

16 —No kêt mē kajaja na ka htem ano ho ixte tanhmã amnhÿ nhÿpêx to ho ixpa hã ixpumunh o ixkôt apa. Nē mē ajamak o ixkapêr mar o ri ixkôt apa. 17 Amnepê m mē akukamã pahijaja nē Tirtûm nhÿ hã mē kãm kapêr o ri mē pa xwÿnhjaja na prem kãm ixpumunh prãm tÿx o pa. Nē mē kãm ixkapêr mar prãm tÿx o pa. No ãm mē akÿnhã ixpumunh nē ixkapêr mar kêt rãhã htyk pa. Kormã ixwrÿk nē jar ixkator kêt jakamã na prem arÿ htÿr nē pa ri ixpumunh kêt rãhã ra htyk pa. Æ mē kapxipixjaja na ka mē mÿr pē ixte amnhÿ nhÿpêx ã ixpumunh nē ixkapêr mar o ixkôt apa. Tã mē kurom mē ate ano ho ixpumunh nē ajamak o ixkapêr mar o ixkôt apa jakamã kwa mē ja hã amnhÿ pumu nē tãm amnhÿ

nhÿpêx o ri apa pē akÿnh nē ri apa. Anē.

Nhÿm pre ã Jejus mē ixpê hkôt ixpa ho ixpa xwÿnhjê mã kapêr anē.

Jejus kot hprÿ hã mēmo hy jarēnh Makre 4.13-20; Rukre 8.11-15

18 Hãmri nhÿm Jejus mē ixpê hkôt ixpa ho ixpa xwÿnhjê mã hprÿ hã mē ujarēnhja jarē nē mē inhmã:

—E kot paj ixprÿ hã mē amã mēmo hy ho ukapêr xwÿnh ã ixujarēnhja jarē ka mē inhma. Nã mēmo hyta te kēp Tirtûm kapêr pyrãk. Nē ahpÿnhã mēmo hy rôrôk ã pikata te kēp mē apē panhÿ ahpÿnhã mē ate Tirtûm kapêr mar nē ahpÿnhã hkôt tanhmã amnhÿ nhÿpêx tota pyrãk. 19 Jakamã mē kot mar xwÿnh kwÿjaja te mē kot aptÿx kãm hy rôrôk nhÿm kuwēnh kot hwÿr mrar nē hkrêr par xwÿnhja pyrãk. Jao Tirtûm kapêr ma no nhÿm Satanasti te kuwēnh kot hy krêr parta pyrã nē mē kot mar nē amnhÿ kaxyw hkôt hamaxpêr nē hkôt amnhÿ xunhwÿr pymaj hãmri ra tanhmã kapêrja nē mē hkrã hto. Jakamã nhÿm mē kuma nom ho hamakêtkati tokyx anē nē axte kãm hamaxpêr kêt nē pa.

20 —Nē mē kot mar xwÿnh kwÿjaja te mē kot kēnre kamã hy hkwÿ rôrôk nē higrôt nē grã par tokyx anhÿr xwÿnhja pyrãk. Jao Tirtûm kapêr ma nē hkÿnh nē. Nē kãm mar prãm nē. 21 Tã nhÿm mēhō Tirtûm nē tanhmã mē kãm kapêr to nhÿm mē kuma nē Tirtûm kaga. Te mēmo hy higrôt nom ra grã par tokyx anhÿrta pyrãk.

22 —Nē mē kot mar xwÿnh kwÿjaja te mrônhi kamã hy hkwÿ rôrôk nē higrôt nhÿm mrônhi kot kēp ãmnãr xwÿnhja pyrãk. Jao mē kãm Tirtûm kapêr mar prãm tã mããnen kãm mē hikukrêx rÿnh nē mē hikãxpore rÿnh prãm. Hãmri nē ãm ja pix kukamã hamaxpêr o pa. Nē ja gryk ã axte Tirtûm kapêr mã

hamaxpêr nê hkôt amnhî nhîpêx kêt nê.

²³ —Nê mē kot mar xwÿnh kwÿjaja te hirā kamā pika mex kām hy hkwÿ rôrôk nê higrôt nê ô rûnhta pyrāk. Jao ixkapêr ma nê amnhî krā him hagdênh tÿx nê. Nê ixkôt ri amnhî nhîpêx mex rāhā ho pa. Jakamā te mēmo hy ô rûnh nê ô mex pyrāk o amnhî nhîpêx. E ā ixujarênhja kot anhÿr. Anê.

Harôj kaàkre jarênh

Matêwre 13.36-43; Makre 4.26-29

²⁴ Nhûm Jejus axte mē kot mar o hkrî xwÿnhjê mā awjarê nom hpri hā mē kām ujarênh kêt nê. Axte mē kām mēmoj tā kuxi nê awjarê nê mē kām:

—Nā nhÿrmā Tirtûm mē kot kormā htîr ri tanhmā amnhî nhîpêx to ho pa hā mē omunh xā hkôt ahpÿnhā tanhmā mē harênh toja te mē ujarênh ja pyrāk. Koja mēhō harôj y mex o ukapêr kaxyw ma hpur mā mō. Hāmri nê hkre hpa nê ma akupÿm mō. ²⁵ Tā nhûm kamāt nhûm ra gôr nê nō. Hāmri nhûm kām hkurê xwÿnhja ma kêp ihpur wÿr tē nê harôj mexta nhÿpy axtem nê kêp harôj kaàkre hkre. Harôj kaàkreja te kot harôj mex pyrāk nom mē kot hkur kêt. Tā nhûm kêp harôj y mex nhÿpy hkre hpa hāmri nê ma akupÿm tē.

²⁶ —Tā nhûm hamē higrôt nê anhîpê ô. ²⁷ Nhûm kām mē àpênh xwÿnhjaja tee ri harôj mex kaêx ā harôj kaàkreta pumu nê hpur nhō dôn wÿr tē nê kām harê nê kām: “Kwa ate harôj mex pix kre htā pêr hkaêx ā harôj kaàkre määnênh kato. Kwa tanhmā na pre amnhî to nê hkaêx ā kato?” Anê. ²⁸ Hāmri nhûm tee ri mē kuma nê mē kām: “Nā mēhō kām ixkurê xwÿnh na pre ā inhîpêx anê.” Anê hāmri nhûm kām mē àpênh xwÿnhnta kām: “Kwa xā kot paj mē tokyx ma hwÿr mra nê nê harênh pa nê kurê nā?” Anê. ²⁹ Nhûm mē kām: “Nā kot kaj mē anê nê harôj mexta mē ho

apimràatā ixpê harênh pa. ³⁰ Kwār māmri harôj mex mē hpimràatā ô hpa măn. Ka mē rî ma hwÿr mra nê harôj kaàkre kumrêx jarênh pa nê axpên tā harê ho ê nê ma o mra nê hpôk. Hāmri nê rî kormā hpānhā harôj mex jakā nê ho akuprô nê ô ho mra nê ixkre kamā haxwÿ.” Anê. Ā mē ujarênh kot anhÿr.

Anhÿr o mē kām kapêr.

Jejus te kot mēmo hy hkryre pyrāk ā harênh

Makre 4.30-32; Rukre 13.18-19

³¹⁻³² Hāmri nhûm Jejus arî mē kām amnhî tā kuxi nê ujarênh o nhÿ. Nê tanhmā mē kām amnhî tā ujarênh to nê mē kām:

—Nā Tirtûm kot mē awÿr ixte mē ato amnhîptār kaxyw inhmênh ā ijarênhja. Te ixte mēmo hy pixire nhûm mē kot hkre nhûm higrôt pyrāk. Koja gaa nê hprêk. Hāmri nê hpa anhrā nhûm kuwênhre hwÿr mra nê hôptî kamā amnhîm haê nhîpêx nê kamā hikwÿ. Tā kot paj nhÿrmā mēmo hy jarênhnta pyrā nê ixpyxi htā pika piitā hkôt mē ho amnhîptā nê mē omunh mex rāhā ho ixpa. Anê.

Jejus te kot pāwti kaxkrit xā pyrāk ā harênh

Rukre 13.20-21

³³ Nhûm Jejus arî mē kām amnhî tā kuxi nê ujarênh o nhÿ nê mē kām:

—E kot pa hpānhā mē amā tanhmā pāwti kaxkrit xā jarênh to ka mē inhma. Na hte mēnijaja pāwti nhîpêx kaxyw hāmri nê kaxkrit xā hkwÿ ho grire nê kupy nê trik xôm mē ho ahkà. Hāmri nê ho pāwti nhîpêx. Kaxkrit xāja grire htā pāwti piitā ho kaxkrit mex nê. Tā ja pyrā nê ixpyxi htā koja mē nhÿrmā pika piitā hkôt ixkôt amnhî nhîpêx mex o pa.

Anhÿr o mē kām amnhî jarê.

Jejus kot mē ujarênh pix kām mē ahkre hā harênh

Makre 4.33-34

34 Na pre ã Jesusja mẽ ujarênh o mẽ ahkre ho pa anê. Âm mẽ ujarênh pix o mẽ ahkre ho pa. Te tãm ujarênh pyrâk no âm mẽmoj tâ haxwý rý amnhĩ tâ haxwý nê mẽ kãm tanhmã amnhĩ jarênh to. 35 ã kot mẽ ahkre ho pa anhÿr kukamã na pre ra amnepêm Tirtũm nhÿ hã kapêr o mẽ pa xwýnhjê hõja harê nê hã kagà. Te Jejus tãm tanhmã amnhĩ jarênh to pyrâk o hkukamã harê nê hã kagà nê hã hkagà ho:

Kot paj mẽ kãm ixujarênh pix kãm mẽ ahkre ho ri ixpa. Mẽmoj te ho tãm pyrã nê harê nom mẽmoj tâ haxwý nê tanhmã mẽ kãm ixujarênh to. Nê aa mẽ kot mẽmoj mar kêt xwýnh kwý kot paj mẽ kãm harê kê mẽ kuma. Anê.

Jejus kot hprĩ hã harõj kaàkre jarênh

Matêwre 13.24-30, 13.47-50

36 Tã nhũm Jejus mẽ kãm ujarênh pa nê mẽ kure nê ma tèn ixkrem axà. Hãmri pa mẽ ixpê hkõt ixpa ho ixpa xwýnhjaja ma hkõt mra nê ixkrem agjê. Hãmri nê harõj kaàkre hã ujarênhhta ã hkukja nê kãm:

—Kwa aprĩ hã mẽ inhmã harõj kaàkre jarênhhta jarê nà. Na pa mẽ kormã ixprĩ hã mar mex kêt nê. Anê.

37 Hãmri nhũm mẽ inhmã:

—Tõe pa ixprĩ hã mẽ amã harê. Âm paa.

Ixpê Tirtũm kot mẽ awÿr inhmênh xwýnh te ixte mẽmo hy mex o ukapêr xwýnhhta pyrâk.

38 Nê purta te kêp pika piitã pyrâk.

Nê harõj mexta te ra mẽ ate ixkõt amnhĩ xunhwÿr nê ixkõt amnhĩ nhĩpêx o apa xwýnhjê pyrâk.

Nê harõj kaàkreta te mẽ kot Satanasti hkõt amnhĩ nhĩpêx o mẽ pa xwýnhjê pyrâk.

39 Nê kot harõj kaàkre hkre xwýnhhta te Satanasti pyrâk.

Nê harõj jakàr xà hã arĩgrota te Tirtũm kot ahpÿnhã tanhmã mẽ harênh to xà hã arĩgrota pyrâk.

Nê mẽ kot harõj jakàr xwýnhjaja te Tirtũm kapêr o wrÿk xwýnhjê pyrâk.

40 Mẽ ujarênhja kamã na prem harõj kaàkre kumrêx jarê nê hã hpôk jarê. Ja pyrã nê koja nhÿrmã Tirtũm kot ahpÿnhã tanhmã mẽ harênh to xà hã arĩgrota ã hãmri ã mẽ kot amnhĩ tomnuj o mẽ pa xwýnhjê nhĩpêx anê.

41 —Kot paj nhÿrmã kãm mẽ pitã mẽ ho amnhĩptâr kaxyw hãmri nê kapêr o mẽ wrÿk xwýnhjê mã anê nhũm mẽ ma mran wrÿ nê mẽ kot amnhĩ tomnuj xwýnhjê pix o akuprõ. Nê mẽ kot nhãm mẽ hkwÿjê kot mẽ uràk nê tanhmã amnhĩ tomnuj to ho pa kaxyw mẽ kãm anhÿr xwýnhjaja nhũm mẽ mãânên mẽ ho akuprõ. 42 Hãmri nê mẽ ho pikuprõnh pa nê te mẽ kot harõj kaàkreta nhĩpêx pyrã nê kuwy kamã mẽ rên pa. Hãmri nhũm mẽ kamã amnhĩ xà htÿx kamã hamak rãhã nê pa ho pa. Nê amnhĩ xà htÿx ã maj tee ri mÿr rãhã ho pa. Nê tee ri amnhĩ xà hã maj amnhĩ nham o axpên kamnhar tÿx kaprÿ.

43 —No ixkõt mẽ kot amnhĩ nhĩpêx xwýnhjaja koja mẽ mẽ kurom mex kumrêx nê pa. Kot paj mẽ ho mex rax nê nhũm mẽ mex rãhã nê pa ho pa. Tirtũm kot kormã pika nyw nhĩpêx mã xwýnhhta kamã nhũm mẽ mex kumrêx nê pa ho pa. E kêr ka mẽ ixujarênhja ma nê kãm ajamaxpêr tÿx rãhã ho apa. Anê.

Mẽ hikukrêx mex o hpimxur jarênh

Piripos 3.7

44 Nhũm Jejus arĩ mẽ ixpiitã mẽ inhmã tanhmã ujarênh to. Nom hprĩ hã ujarênh kêt nê. Kê

axte mêmoy tâ kuxi nê mê inhmã tanhmã ujarênh to nê mê inhmã:

—Mê ate ixkôt amnhî xunhwÿr xwÿnhjaja te mê apê mê hikukrêx mex â pika japrôr xwÿnhhta pyrâk. Koja mêmô mê hikukrêx mex jamÿ nê o tẽ nê nhÿri amnhîm ho amũxu. Kaxyw kakwÿ nê kamã hagjê nê hity hpa nê ma akupÿm tẽ. Hâmri nhũm jãã nhũm mêmô tẽn kãm kato. Hã pikata kakwÿ nê kãm kato nê omu nê hkĩnh nê. Nê hamaxpêr o: “E pa ma tẽ nê inhôrkwÿ kamã ixkukrêx piitã ho wênê hpa nê hpãnhã kãxpore jamÿ nê ho amnhîm mê hikukrêx mex â pika japrô nê amnhîm mêmoy mexta o ixârík pa.” Anhÿr o hamaxpêr nê akupÿm hity hpa nê ma akupÿm tẽ. Hâmri nê mêmoy mexta gryk â ô mêmoy piitã ho wênê hpa. Hikukrêx nê ôrkwÿ nhũm piitã ho wênê hpa. Hâmri nê hpãnhã kãxpore jamÿ nê ma o tẽ nê amnhîm pikata japrô. Hâmri nê ma akupÿm hwÿr tẽ nê kamã mê hikukrêx mexta kwÿnh pa nê ho ô kumrêx.

—Tã te mê ate mêmô kot â amnhî nhîpêx anhÿr xwÿnhhta pyrâk. Na ka mê urâk nê inhgryk â amnhî tomnuj kaga hpa nê hpãnhã ixkôt amnhî nhîpêx. Te mêmô kot mêmoy mê hikukrêx mex gryk â hikukrêx tũm piitã kaga hpar nê mê hikukrêx mex o hpimxur xã hã pikata japrôr pyrâk. Anê.

Mêmô kot kênjaxênhjaprôrjarênh

⁴⁵ Nhũm Jejus arî mê inhmã awjarê nê mê inhmã:

—Nê ja. Na htem kãm hkĩnh nê hamakêtkati nê ri hpa hprãm xãj Tirtũm kôt amnhî xunhwÿ nê hkôt ri amnhî nhîpêx rãhã ho pa. Te mêmô my kãm kênjaxênh mex prãm nê ma ri hapêr o pa xwÿnhhta pyrâk. ⁴⁶ Nê ra nhÿri omu nê ma tẽ nê prês â mê hkukja. Nhũm mê kãm hã ho ohtô nê harê nhũm ma akupÿm tẽ nê kãm ho ô hprãm xãj hikukrêx piitã ho wênê hpa. Hâmri

nê kãxpore jamÿ nê o tẽ nê amnhîm ho haprô. Kênjaxênh mexta pix gryk â hikukrêx piitã ho wênê hpa nê hpãnhã ho amnhîm haprô.

—Tã ja pyrã nê na ka htem amex nê ajamakêtkati nê axãmnhîx ri apa hprãm xãj ixkôt amnhî xunhwÿ nê ixkôt pix mã amnhî nhîpêx o apa. Anê.

Kryhti jarênh

Matêwre 13.24-30, 13.36-43

⁴⁷⁻⁴⁸ Nhũm Jejus arî mê inhmã awjarê nê mê inhmã:

—E Tirtũm kot nhÿrmã tanhmã mê harênh to xã hã arîgro kot paj ixprî hã tanhmã mê amã harênh to. Te ho mêmoyjaja kot himô kamã kryhti rênh pyrâk. Koja mê gôx kãm kumê nê akupÿm ho api nhũm kamã tep ohtô nê. Nhũm omu nê kÿx pê amgrã kamã hkapi nê ahpÿnhã ri tanhmã kamã kute kawrà. Nê kamã mex kawrà nê kawã kamã kugjê nê mê kot hkur kêtja nhũm nhãm kurê. ⁴⁹ Ja pyrã nê Tirtũm kot ahpÿnhã ri tanhmã mê kot amnhî nhîpêx to hã mê omunh xã hkôt tanhmã mê hipêx to kaxyw arîgrota â â mê hipêx anê. Koja kapêr o mê wrÿk xwÿnhjaja mê kot hkôt amnhî xunhwÿr xwÿnhjê nê mê kot amnhî tomnuj o mê pa xwÿnhjê kawrà hpa. ⁵⁰ Nê te mê kot tep mex nê tep punu kawrà nê nhãm rênhta pyrâk o mê hipêx nê ma kuwy hwÿr mê o mra nê kamã mê kurê. Nhũm mê tee ri amnhî xã htÿx â maj amÿra nê tee ri amnhî nhîpêx kaprÿ. Anê.

Nhũm pre â Jejusja axte mê ixpê hkôt mê ixpa ho mê ixpa xwÿnhjê mã ujarênh anê. ⁵¹ Hâmri nê mê inhmã:

—E xãn ka mê atã aprî hã ixu-jarênhhta ma nã?

Anê pa mê kãm:

—Tÿ. Nã na pa mê atã ixprî hã mar mex nê. Anê.

⁵² Hâmri nhũm mê inhmã:

—Tõe. Nã âm hãmri. Na ka xep mê ra ixte mê ahkre nywta mar

mex nê. Nê mē akwỳjaja mǎānēn Tirtūm kapēr tūm mar mex nê. Te mē apē mēhō apkur xà rax pyrà nê ma ho mē piitā mē hipêx o ri mē hkôt paja pyrāk. Ja pyrà nê kêr ka mē ma mē piitā mē hkôt Tirtūm mē wa ixkapēr o mē ahkre ho ri mē hkôt apa. Anê.

Najare nhō xwỳnhjaja kot Jejus kaga hã mē harēnh

Makre 6.1-6; Rukre 4.16-30; Juãw 1.11

⁵³ ã Jejus mē inhmã ujarēnh par anê. ⁵⁴ Hāmri nê ma akupým Na-jare hwýr mō nê Tirtūm kapēr o mē ahkre xà hã ixkre hwýr tē nê axà nê mē ahkre ho nhỹ. Nhũm mē amnhĩ jaêr pê tanhmã kot mē ahkre hto hã kuma nê tee ri hkukamã hamaxpēr nê axpēn mã:

—Tk. Kwa kêp mē panhiō htã tanhmã kot we amnhĩ to nê ã ãhpumunh tỳx kôt mē pamã kapēr anê nê ri mē kãm aa mē kot mēmoj pumunh kêt kwý ho anhỹr o pa? ⁵⁵⁻⁵⁶ Na pre mē panoo mã hprêk nhũm mē pahte pahprĩ hã hkwỳjê pumunh. Kêp pĩ kuprār xwỳnh Juje mē hprō Marir wa hkraa. Nê kêp Xiakre nê Juje nê Simãw nê Jut mē htōō. Nê htōxjaja jar mē pakamã pa nhũm mē pahte mē piitā mē omunh mex kênã kot kêt we mē kurom ã ãhpumunh tỳx anê. Anê.

⁵⁷ Hāmri nê kamã gryk nê hkaga. Hāmri nhũm tee ri amnhĩ tã mē omu nê mē kãm:

—Nà Tirtūm nhỹ hã kapēr jarēnh o mē pa xwỳnhjaja na htem krĩ hkwy kamã kãm mē mar prãm nê. Nom ò krĩ kamã mē kot karàre rùm hprêk kãm omunh xwỳnhjaja na htem kuma nê ãm kuma. Anê.

⁵⁸ Tã mē kot amnhĩ kaxyw hkôt hamaxpēr kêt jakamã nhũm tee ri mē kãm aa mē kot mēmoj pumunh kêt kwý ho anhỹr rax prãm. No ãm mē kãm mēmoj to grêre nê ho anê.

14

Mē kot Juãw Paxis pĩr ã mē harēnh

Makre 6.14-29; Rukre 9.7-9

¹ Tã nhũm pika pê Garirej kamã mēō pahihtu Erox Jejus jarēnh ma ² nê tee ri hkukamã hamaxpēr nê hã ò pōristi mã kapēr nê mē kãm:

—Kwa pēr Juãw Paxis na nà? Ra ixte hã ixàmnēnh nhũm mē kot hpĩr tã mǎn tanhmã amnhĩ to nê akupým htĩr. Nà pēr tãm kênã. Jakamã na hte aa mē kot mēmoj pumunh kêt kwý ho anhỹr o pa. Anê.

³⁻⁵ Na pre ra Erox htō pê hprōptàn ho hprō. Tō arĩ htĩr tã nhũm axtem nê kêp utà nê ho hprō. Hāmri nhũm Juãw Paxisja harēnh ma nê hã kãm akir nê kãm:

—Kwa Eroxis kêp atō hprō kênã na ka kêt axtem nê kêp utà nê ho aprō. Kwa ja omnuj tỳx o omnuj tỳx. Anê.

Hāmri nhũm amnhĩ tã kuma nê kamã gryk nê kot hpĩr kaxyw. Tã nom nhũm Ijaew kot axpēn mã kêp Tirtūm nhỹ hã kapēr jarēnh xwỳnh ã harēnh jakamã nhũm mē umaj hpĩr kêt nê. ãm ho prês nê haxà nhũm hkrĩ ho hkrĩ.

⁶ Tã nhũm jãã nhũm Erox kator ã arĩgro kato nhũm mē hã akuprō nê hã hkĩnh. Hāmri nhũm hprō nyw kra niti mē hwýr axà nê ahte mē hipòk ri mē kãm gre. Mē kot omunh nê kamã hkurê kaxyw nhũm mē noo mã hpijaam kêt nê mē kãm grer o xa. Hāmri nhũm pahĩ Erox omu nhũm ja kãm mex nê nhũm hkĩnh nê kamã nopyma nê. ⁷ Hāmri nê kãm:

—Nà ãm hāmri na ka ã mē inhmã amnhĩ nhĩpêx anê. Jakamã kwa māmri mēmoj tã ixwý. Amã mēmoj prãm xà hkôt hã ixwý kot paj amã kugō. ãm hāmri na pa amã anê. E mēmoj na amã hprãm? Anê.

⁸ Hāmri nhũm kuma nê kãm:

—Ma Juãw Paxis krã na pa inhmã hprãm. Inhmã hkrã krãhta nê pasiiti kamã axà nê ixwÿr o tẽ nê inhmã agõ. Anê.

Ra katorxà kot kaxyw kãm karõ jakamã nhùm ã hã hwÿr anê. ⁹ Hãmri nhùm Eroxa tee ri kuma nhùm ja kêp omnuj nê. Nom ra mē pikuprõnh rax xwÿnhjê nhîpõk ri mē noo mã kot kãm: “E mãmrĩ amã mēmoj prãm xà hkõt hã ixwÿ pa amã kugõ.” Anhÿr jakamã kãm kot kêp nê hprãm kêt nê. Hãmri nê Juãw Paxis wÿr õ pôristi hkwy rē ¹⁰ nhùm mē ma mē hagjênh xata wÿr mra nê unê nê mut krãhta. ¹¹ Hãmri nê hkrã mÿ nê pasiiti kamã kuxà nê ma akupÿm nita wÿr o tẽ nê kãm kugõ nhùm kumÿ nê ma katorxà hwÿr o tẽ nê kãm kugõ.

¹² Hãmri nhùm Juãw Paxis kõt mē pa xwÿnhjaja tee ri mē kot hpĩr ã harênh ma nê ma hwÿr mra nê kumÿ nê ma o mõn haxà. Hãmri nê ma Jejus wÿr mra nê kãm harê.

Jejus kot mē ho ohtõ nê mē kãm mē õ hã harênh
Makre 6.30-44; Rukre 9.10-17;
Juãw 6.1-14

¹³ Hãmri nhùm Jejus Juãw Paxis jarênh ma nê hkaprĩ nê. Nê ma himõ nhîkjê hwÿr kapõt ã mõr kaxyw pãr krem axà nê ma mõ. Pa mē hkõt ixpa ho ixpa xwÿnhjaja ma hkõt mra. Hãmri nhùm krĩ hkwy kamã mē pa xwÿnhjaja harênh ma nê ohtõ nê ma mē inhîkrep pikap mra. Nê ra amnhĩ to wa nê mē inhmõr xaja wÿr põj nê mē ixkutêp hkrĩ. ¹⁴ Jakamã pa mē mõ nê mē hwÿr põj nê mē omu. Hãmri nhùm Jejus mē omu nê kãm mē hkaprĩ nê mē kãm mē à xwÿnhjê ho mex pa.

¹⁵ Tã nhùm ra myt àr kaxyw pa mē hkõt ixpa ho ixpa xwÿnhjaja tee ri mē omu nê Jejus wÿr mra nê kãm:

—Kwa na ra amÿkry htÿx nê. Amnhĩ nê mē hano kê mē ma nhÿri krĩ hkwy hwÿr mra nê tokyx amnhũm mēmoj japrõ nê kuku. Mo

jar mē apkur xà hã mēõ? Jar akunĩ pix kênã. Anê.

¹⁶ Hãmri nhùm mē inhma nê mē inhmã:

—Nà kot paj mē hanor kêt nê. Mē kajaja kot kaj mē kãm õ nhùm mē apku. Anê.

¹⁷⁻²¹ No nhùm mē ohtõ rax kumrêx. Mēmyjaja kêp 5.000. Nê kaxyw mē hprõ nê mē hkrajaja. Jakamã nhùm Jejus ã mē inhmã kapêr anê pa mē tee ri mē hkukamã ijamaxpêr nê kãm:

—Kwa nà mē panhõja raxti hã. Mē panhõ pãwti kêp sîk pix. Nê kaxyw tep grãja pijakrutre kênã kot kêt mē piitã mē hipêx. Nà xà kot paj mē ma mra nê nhÿri mē kãm mē mēmoj japrõ nhùm mē kuku? Anê.

Hãmri nhùm mē inhmã:

—Nà pu mē kãm mēmoj japrõr kêt nê. Kot puj mē kãm mē panhõta o anhgrã. E mē kãm anê kê mē ahpÿnhã ri hije nê hkrĩ hpa. Anê.

Hãmri pa mē kuma nê mē kãm anê nhùm mē piitã hkrĩ hpa. Hãmri nhùm Jejus pãwti mē tepja jamÿ nê kaxkwa hwÿr rĩt nê ho Tirtũm wÿ nê kãm:

—Pa Papaj? Nà apê mē inhmã mē inhõ ho apa xwÿnh jakamã amex o amex. Anê.

Hãmri nê mē kãm ho hkry hpa nê hkõt mē ixpa ho mē ixpa xwÿnhjê mã kugõ pa mē õ ri ho mē hipêx pa. Nhùm mē piitã apkur o hkrĩ. Mēõja grire htã nhùm Jejus tanhmã mē kãm ho rax to nhùm mē ohtõ rax kumrêx tã piitã kuku nê ho õhy htu hpa nhùm arĩ mēõ jakrêx prã. Hãmri pa mē akupÿm hakrêx o akuprõ nê ho kawà ho 12 nê ho nyt pa.

Jejus kot gõ krãhkã hã ãm nê htẽm ã harênh

Makre 6.45-52; Juãw 6.15-21

²²⁻²³ Tã nhùm Jejus mē ixpê hkõt ixpa ho ixpa xwÿnhjê mã anê pa mē akupÿm pãr mã agjê nê ma xarmã hkukamã mõ. Hãmri nhùm mē kot mar o kuhê xwÿnhjê jano nhùm mē ma akupÿm hapêx. Hãmri nhùm

Jejus kot Tirtûm mã amnhî jarênh kaxyw ahte tê nê hixêt ã api nê nhîmôk ã kãm amnhî jarênh o nhÿ.

Gaa nhûm ra kamàt nhûm arî ahte hixêt nhîmôk ã nhÿ.

²⁴Rôm pa mẽ pàr kãm mẽ inhmôr xwÿnhjaja kormã himô nhîpôk ri mō. Pu nhûm kôk xàpêr tÿx mẽ ixkaxpa. Nê gô axpên tak tÿx nê pa mẽ tee ri rrêmti ho gô rênh nhîpêx nê tee ri axpên pumu.

²⁵Tã nhûm krãhyre kà nhûm Jejus man mẽ ixkôt gô krãhkà hã xan tê ²⁶pa mẽ amnhî wÿr omu. No nhûm kormã hirã mex kêt jakamã pa mẽ ixprî hã omunh mex kêt nê. Hãmri nê tee ri omu nê mẽkarô hã hkamnhîx nê umaj ixãmra rax nê. ²⁷Hãmri nhûm mẽ inhmã kapêr nê mẽ inhmã:

—Tk. Kwa mẽ amã ma hkêt nê. Pa na pa mẽ akôt tê. Anê.

²⁸Hãmri nhûm Simãw Pêtre kuma nê kãm:

—Kwa xa ka na ka tê? Tôe apê mẽ inhô Pahihtî jakamã kwa amnhî wÿr ixwÿ pa apyrã nê gô krãhkà hã xa nê awÿr tê nã? Anê.

²⁹Hãmri nhûm kãm:

—Tôe mamrî amnê ixwÿr tê. Anê.

Hãmri nhûm kuma nê pàr rûm kato nê hwÿr tê. Urak nê gô krãhkà hã hwÿr tê. ³⁰Hãmri nê kormã htêp o htêm mẽ kôk xàpêrta kamã ama nê tee ri amnhî kukamã hamaxpêr pê ra àr o mō. Hãmri nê àmra kamã Jejus mã amnhî to akir nê kãm:

—Kwa tokyx ixto api Pahihtî. Anê.

³¹Hãmri nhûm hpa hã kupy nê ho àpir kurê kumrêx nê kãm:

—Kwa pêr ãm kormã ate amnhî kaxyw inhmã ajamxpêr tÿx kêt. Mon ka we ixkamnàr rom mãmri man ixwÿr atêmre hkêt nê? Anê.

³²Hãmri nhûm wa akupÿn mẽ ixwÿr tê nê wa axã. Hãmri nhûm kôk katat kôt pinhkrênh pa nhûm gô tãm nôr kurê kumrêx. ³³Hãmri pa mẽ Jejus kot ã amnhî nhîpêx

anhÿrja ã omu hãmri nê kãm mex o mex ã harê nê kãm:

—Kwa ãm hãmri na hte amnhî pê Tirtûm Kra hã amnhî jarê. Nà apê Kra kênã. Anê.

Jenêjare kamã Jejus kot akupÿm mẽ ho mex ã harênh

Makre 6.53-56

³⁴Tã pa mẽ ra himô hã rê nê Jenêjare hwÿr pøj. ³⁵Hãmri nê ma kapê hã ri ixpa. Hãmri nhûm pika nhô xwÿnh kwÿjaja Jejus pumu nê mẽ piitã mẽ kãm harênh o hprôt nê ahpÿnhã hwÿr nhÿhÿnh mẽ à xwÿnhjê hã karô. Nhûm mẽ man mẽ ixwÿr mẽ o mra ³⁶nê mẽ ho Jejus wÿr nê kãm:

—Pa? Kwa kê mẽ à xwÿnhjaja akupÿm mex kaxyw apê axê kupê nã? Anê.

Hãmri nhûm mẽ kãm:

—Tôe. Kwâr mẽ mãmri mran hkupê. Anê.

Hãmri nhûm mẽ kuma nê axpên pãnhã hwÿr mra nê kêp ê pix kupênh tã ra akupÿm mex nê ma akupÿm mra.

15

Parijew nhô xwÿnh mẽ Tirtûm kapêr tûm o mẽ ahkre xwÿnhjê jarênh

Makre 7.1-13

¹Tã nhûm Parijew nhô xwÿnh mẽ Tirtûm kapêr tûm o mẽ ahkre ho mẽ pa xwÿnhjaja Jerujarê rûm ma Jejus wÿr mra. Na htem mẽ ixkukamã mẽ inhîgêtjê pyrã nê apkur kaxyw nê amnhî nhîhkra kuhônñ ryy nê. Amnhî nhîhkra htyk pix kuhônñ nê hkrî hkêt nê ãm amnhî nhîhkra kuhônñ japjêê nê. Nê ô prat kuhônñ japjêê nê kormã apkur kaxyw hkrî. Tirtûm kot ja hã mẽ omunh nê mẽ mex ã mẽ harênh ã amnhî kamnhîx jakamã na pre ã amnhî nhîpêx anhÿr o pa. Jakamã nhûm mẽ ma Jejus wÿr mra. ²Hãmri nê omu nê kãm:

—Pa Jejus? E kwa mẽ inhmã mẽmoj jarê. Amnepêm mẽ panhîgêtjaja na prem apkur kaxyw nê amnhî nhîhkra kuhônñ japjê nê

rî kormã apku. Tã pa htem arî ijaxwýja ã amnhî nhîpêx anê. No akôt mê pa ho mê pa xwýnhjaja na htem mê ixpyrà nê ã amnhî nhîpêx anhÿr kêt nê. Kwa mo na htem amnhî nhîhkra tyk kuhõnh tokyx anê nê hkrî nê apku? Anê.

³ Hãmri nhùm mê kuma nê mê kãm:

—Tk. Na ka htem ãm mê panhîgêjtê hkôt pix mã amnhî nhîpêx o apa no Tîrtûm kapêr kôt amnhî nhîpêx kêt nê. ⁴ Tîrtûm na pre mëmoj tã mê pamã karõ ho:

Kêr ka mê anhîpêêxã nê mê akatorxã wa hã apijaãm nê mê ho ajuta rãhã ho ri apa. Kot kaj mê ã amnhî nhîpêx anhÿr kêt nê tanhmã mê kãm akapêr punuj to ho ri apa. Hã koja mê akwýjaja ja myrapê mê apa. Anê.

—Na pre ã Tîrtûmja mê pamã karõ anê. ⁵ No mê kajaja na ka htem ã akwýjê mã karõ anhÿr kêt nê. ãm kapêrja kwým na ka htem mê kãm karõ nê mê kãm:

Kot kaj mê mëmo arîgro hã akàxpore japêr nom kêr ka mê ho tanhmã akatorxã rÿ anhîpêêxã ho ajuta hto kaxyw wa kãm hkwy nhõr kêt nê. ãm ho ate wa ho ajuta hkêt ã wa kãm amnhî jarê hãmri nê Tîrtûm mã amnhî jarênh xã hã ixkre hwÿr o tẽ nê mê ixte tanhmã ixkreta ho mex to kaxyw mê inhmã agõ. Kot kaj mê ã amnhî nhîpêx anê nhùm Tîrtûm ja hã mê apumu nhùm ja kãm mex nê. Kêr ka mê ã amnhî nhîpêx anhÿr o ri apa.

—Anhÿr o na ka htem mê kãm karõ ho ri apa. ⁶ Nom Tîrtûm kapêr tùm kot ã ja jarênh anhÿr kêt. ãm amnhî krã hkôt na ka htem ã mê kãm karõ punuj o ri apa anê. Te mê akapêrja mex o kot Tîrtûm kapêr jakrenh pyrãk. ⁷ Mê ate Tîrtûm kôt amnhî nhîpêx ã amnhî jarênh tã ãm amnhî to axêx nê hkôt amnhî

nhîpêx kêt nê. Na pre Tîrtûm amnepêm mê akukamã tanhmã mê ajarênh to. Nhùm ÿ hã mê kãm kapêr jarênh xwýnh Ijaisja ô ri mê kãm mê ajarê nê hã kagã. Te Tîrtûm tãm kot mê ajarênh pyrãk. ⁸ Na pre mê akukamã mê ajarênh o:

Mê kãm ixkînh ã mê kot amnhî jarênh tã mê kãm ixkînh kêt. Na htem kãm ixprãm ã amnhî jarênh kaprÿ.

⁹ Mê kot ixkuhpa hã amnhî krã hkôt mëmoj tã hkwyjê mã karõ ho pa jakamã na htem kot ixkôt amnhî nhîpêx o pa hã amnhî jarênh kaprÿ. Anê.

—Na pre ã Ijaisja Tîrtûm nhÿ hã mê akukamã mê ajarê nê mê atã kagã anê. Anê.

Nhùm pre ã Jejus Parijew nhõ xwýnhjê mê Tîrtûm kapêr tùm o mê ahkre xwýnhjê mã kapêr anê.

Mëmoj kot mê pahtomnu hã harênh

Makre 7.14-23

¹⁰ Tã nhùm Jejus amnhî wÿr mê kot mar o kuhê xwýnhjê hwÿ nê axte mê kãm kapêr nê mê kãm:

—E mê inhma nê inhmar tÿx nê.

¹¹ Na hte Tîrtûm kapêr tùm o mê ahkre xwýnhjaja amnhî krã hkôt mê ate amnhî nhîhkra kuhõnh japjê hã mê amã karõ ho pa. Nê amnhî krã hkôt mê axàpkur xã hã tanhmã mê amã karõ hto ho pa. Tîrtûm kot ja hã mê apumunh kôt mê amex ã mê ajarênh kaxyw ã mëmoj tã mê amã karõ anê. Nom na hte Tîrtûm tanhmã mê kot amnhî nhîhkra kuhõnh to hã mê omunh xã hkôt tanhmã mê harênh to hkêt nê. Rÿ mê axàpkur xã pumunh kôt mê mex ã mê ajarênh kêt nê. Ja tanhmã kãm kute hkêt. Na hte ã mê kot amnhî nhîpêx anhÿr ã mê omunh xã hkôt mê mex ã mê harênh rÿ mê mex kêt ã mê harênh kêt nê. Na hte mëmoj kur ã mê omu nê ãm mê omu nê hã tanhmã mê harênh to hkêt nê. ãm mê kapêr punuj rÿ mê kapêr mex ã mê

mar kôt pix mã na hte tanhmã mẽ harênh to. Anê.

¹² Nhũm pre ã Jejus mẽ kãm kapêr anê pa mẽ hkôt mẽ ixpa ho mẽ ixpa xwýnhjaja kuma hãmri nê hwýr mra nê kãm:

—Kwa na ka ã mẽ kãm akapêr anê nhũm Parijew nhõ xwýnhjaja tee ri ama nhũm ja mẽ kêp omnuj nê. Anê.

¹³⁻¹⁴ Hãmri nhũm mẽ inhma nê tanhmã mẽ inhmã Parijew nhõ xwýnhjê jarênh to nê hprĩ hã mẽ hkukamã mẽ harênh o:

—Tk. Kwâr mãmri mẽ kêp omnuj. Mẽ kot Tirtũm kapêr tũm o mẽ ahkre ho pa htã na htem hkôt amnhĩ nhĩpêx kêt. Jakamã te mẽ nohkre xwýnh kot amnhĩ nhĩpêx pyrãk. Koja mēhõ nohkre htã amnhĩ kôt nhỹhým nohkre hõ ho mẽ hãmri nê wa hamê pry pumunh kêt nê htýx mẽ hãmri nê nhỹri ahkrehti kamã tēm. Tã Parijew nhõ xwýnhjaja te kot wam htēm xwýnhhta pyrãk nhũm mẽ kot mẽ mar xwýnhjaja te kot wam htēm xwýnh kôt hõ htēmta pyrãk. Jakamã Parijew nhõ xwýnhjaja mẽ kot mẽ mar o pa xwýnhjê mẽ koja mẽ hpimràatã nhỹrmã te ahkrehti kamã rôrôk par pyrãk o amnhĩ nhĩpêx nê mex kêt nê pa ho pa. Koja kaxkwa kamã inhõ Papaj nhỹrmã amnhĩ nê mẽ hanor pa.

—Inhõ Papaj te kêp mẽmo hy hkre ho pa xwýnhhta pyrãk. Na htem mẽmo hy hkre nhũm higrõt hapôj nê higrõt mex nê. Hãmri nhũm mẽ hwýr mra nê omu nê nê mẽmoj nhigrõt punuj jarê nê kurê. Ja pyrã nê koja nhỹrmã inhõ Papaj amnhĩ nê Parijew nhõ xwýnhjê janor pa nhũm mẽ mex kêt nê pa ho pa. Jakamã kwa kêr ka mẽ hkôt ri amnhĩ nhĩpêx kêt nê. Anê.

Nhũm pre ã Jejus mẽ ixte hkôt ixpa ho ixpa xwýnhjê mã hprĩ hã Parijew nhõ xwýnhjê hkukamã ã mẽ harênh anê pa mẽ mar o ixkrĩ. ¹⁵ Hãmri nhũm Simãw Pêtre tee ri

Tirtũm kot mẽ apkur xã hã mẽ omunh xã hkôt tanhmã mẽ harênh to hkêt ã harênh ma. Nê ãm tanhmã mẽ kapêr to pix ã mẽ mar kôt tanhmã mẽ harênh toja ma hãmri nê hã Jejus kukja nê kãm:

—Kwa mon ka ri ã ja jarênh anê Pahihti? Anê.

¹⁶ Hãmri nhũm kuma nê hprĩ hã mẽ inhmã awjarê nê mẽ inhmã:

—Kwa xãn ka mẽ kormã aprĩ hã ja mar kêt nê? ¹⁷ E pa ixprĩ hã mẽ amã harê ka mẽ inhma. Nã na htem mẽmoj ku nhũm hte mẽ hkrã hi hwýr gjêx kêt nê. Na hte mẽ ôhy pix wýr agjê nê gaa nê nhãm hapôj nê hapêx. Na htem mẽ apkur xãja ku nê ý hã tanhmã amnhĩ tomnu hto hkêt nê. Jakamã na hte Tirtũm ja hã mẽ omunh xã hkôt tanhmã mẽ harênh to hkêt nê. ¹⁸ ãm mẽ hkrã kamã mẽ hamaxpêr punuj pix nhỹ hã mẽ kot tanhmã amnhĩ tomnuj to jakamã na hte Tirtũm mẽ hamaxpêr ã mẽ omunh xã hkôt tanhmã mẽ harênh to. ¹⁹ Koja mēhõ tanhmã hamaxpêr punuj to nê ra hkôt amnhĩ tomnuj pix o pa. Na htem nhãm mẽ hpar o pa nê mẽ kêp ahkĩ nê amnhĩ to hêx nê mẽ hakwa kamã nhãm axpên mã mẽ hixi jarênh o pa. Nê nhãm mẽ kêp mẽ hprõ ho amnhĩkati nê mẽ hkuprý hwýr mra nê mẽ ho amnhĩkati. Nê tanhmã ri axpên tomnuj to ho pa. ²⁰ Mẽ hamaxpêr punuj nhỹ hã na htem ã amnhĩ nhĩpêx anhýr o pa. No na hte Tirtũm mẽ kot amnhĩ nhĩkra kuhõnh japijê hkêt ã mẽ omunh xã hkôt mẽ kot amnhĩ to mex xwýnh ã mẽ harênh kêt nê. Ja tanhmã kãm kute hkêt. Anê.

Jejus kot Ijaew kêt xwýnh ni kamã ukapri hã harênh

Makre 7.24-30

²¹ Tã nhũm Jejus mẽ inhmã kapêr pa hãmri nê mẽ inhmã anê pa mẽ ma hkôt mẽ. Ma Xir mẽ Sitõja wa pu hã ri ixpa. ²² Nhũm mēhõ nija omu nê hwýr tē. Mẽ ixkĩnhã kêp Ijaew kêt tã hwýr tē. Kanaã nhõ

xwÿnh na pre. Tã Jejus wÿr tẽ nẽ kãm:

—Ka Pahihti Jejus? Apê Tirtũm kot mẽ ixwÿr amẽn̄h xwÿnh jakamã xê ixujarẽn̄h ma nẽ ixkamã axukapri hkêt wehe. Na mẽkarõmnutija tanhmã ixpê ixkra ho nhũm ixpê omnuj tÿx kumrẽx. Anẽ.

²³ Hãmri nhũm Jejus kuma nẽ ãm kuma nẽ kãm tanhmã nẽ hkêt nẽ. Jakamã pa mẽ ixpê hkõt ixpa ho ixpa xwÿnhjaja kãm:

—Kwa hano kê ma akupÿm tẽẽ ri. Na ãm ri mẽ pahkõt xatã hkrata jarẽn̄h pix o ri pa. Anẽ.

²⁴ Nom nhũm kot amnhĩ tã kamã hamak kaxyw tanhmã mẽ inhmã hã kapẽr to nẽ mẽ inhmã:

—Nà ãm Ijaewjê pix wÿr na pre Tirtũm inhmẽ. Te mẽ kêp õwêhti pikunor pyrak o na htem htÿx ri amnhĩ nhĩpêx o pa. Jakamã ãm mẽ hwÿr pix mã na pre inhmẽ. Na kormã inhmã tanhmã nhãm mẽ hkwÿjê jarẽn̄h to hkêt nẽ. Anẽ.

²⁵ Hãmri nhũm nitita tee ri amnhĩ tã kuma nẽ hwÿr tẽ nẽ kutã hkõnkrã ho htẽm nẽ nhÿ nẽ kãm:

—Xê ma we ixkamã axukapri hkêt wehe. Anẽ.

²⁶ Hãmri nhũm kãm:

—Nà kormã. Na pre Tirtũm mẽ kêp Ijaewjê pix wÿr inhmẽ. Jakamã na pa kormã nhãm tanhmã mẽ akwÿjê ho mex to hkêt nẽ. Anẽ.

²⁷ Hãmri nhũm kãm:

—Ma ãm hãmri na ka akapẽr. Nom ixpê Ijaew kêp tã mẽ kuxwar ãm ixto mex grire kêp wehe. Anẽ.

²⁸ Hãmri nhũm kuma nẽ kãm:

—Nà ãm hãmri na ka ã akra kaxyw inhmã ajamxpêr tÿx anẽ. Jakamã kot paj nẽ mẽkarõmnutita jano. Koja axte tanhmã apê ho hkêt kumrẽx.

Anhÿr o kãm kapẽrja rôm nhũm hkraja akupÿm mex kurê kumrẽx.

Jejus kot mẽ à xwÿnhjê ho ohtô nẽ mẽ ho mex ã harẽn̄h
Makre 7.31-37

²⁹ Tã nhũm Jejus mẽ inhmã anẽ pa mẽ ixrohã krĩja pẽ ixkato nẽ ma himô rax pẽ Garirej wÿr mō. Nẽ nhÿri gō mÿri hixêt wÿr mō nẽ hã api nẽ ixkrĩ. ³⁰ Hãmri nhũm mẽ ohtô nẽ ma mẽ ixkõt mra. Nẽ mẽ à xwÿnhjaja nhũm mẽ hamÿ nẽ Jejus wÿr mẽ o mra. Na prem ohtô rax kumrẽx. Ra ri mẽ pa hkêt xwÿnhjaja nẽ mẽ nohkre xwÿnhjaja nẽ mẽ hyk o mẽ pa xwÿnhjaja. Nẽ mẽ kapẽr kêp xwÿnhjaja nẽ ahpÿnhã ri tanhmã mẽ à kute xwÿnhjaja nhũm mẽ hamÿ nẽ ma Jejus wÿr mẽ o mra nẽ kutã mẽ haxwÿ. Hãmri nhũm mẽ omu nẽ ahpÿnhã akupÿm mẽ ho mex pa. ³¹ Jakamã na pre mẽ kapẽr kêp xwÿnhjaja akupÿm kapẽr mex nẽ. Nẽ ri mẽ pa hkêt xwÿnhjaja akupÿm mrar mex nẽ. Nẽ mẽ hyk o mẽ pa xwÿnhjaja akupÿm tãm ri mra. Nẽ mẽ nohkre xwÿnhjaja akupÿm rit mex nẽ. ã ahpÿnhã akupÿm mex par anẽ. Hãmri nhũm mẽ kot hwÿr mẽ hamÿnh nẽ Jejus wÿr mẽ o mrar xwÿnhjaja amnhĩ jaêr pẽ akupÿm mẽ mex ã mẽ omu nẽ mẽ kamã no puma nẽ hkĩnh nẽ. Hãmri nẽ Tirtũm mã mex o mex ã harẽ nẽ xapẽn mã harẽn̄h o:

—Nà ãm hãmri mẽ panhõ Tirtũmja ãm mex o mex. Anẽ.

Jejus kot mẽ ho 4.000 nẽ mẽ kãm mẽ õ hã harẽn̄h

Makre 8.1-10

³² Tã nhũm Jejus mẽ ixte hkõt ixpa ho ixpa xwÿnhjaja amnhĩ wÿr mẽ ixwÿ nẽ mẽ ixkõt mẽ mrar xwÿnhjê jahkre nẽ mẽ inhmã:

—E. Ka mẽ ri kam jajê pumu. Na pa ra inhmã mẽ hkapri nẽ. Na mẽ pahkõt ri pa hã apkati axkrunẽpxi nhũm ra mẽ kêp mẽõja hapêx pa. Koja mẽ apkur kêp rãhã ma akupÿm mẽ õ krĩ hwÿr pa hãmri nẽ pry hã hirot nẽ rôrök o pa. Mẽ õ krĩ hwÿr awryy. Anẽ.

³³ Nhũm pre ã mẽ inhmã mẽ harẽn̄h anẽ pa mẽ tee ri kuma hãmri nẽ kãm:

—Kwa nom nhÿri kot pu mē kām mēmoj japrō nhÿm mē tokyx kuku? Ja kapôt pix kēnā. Nē mē ohtō griiā. Anē.

³⁴ Hāmri nhÿm mē inhmā:

—No mē panhō pāwtita? Tanhmā na arī kute nē hikwÿ? Anē.

Hāmri pa mē kām:

—Nā ām kēp 7 pix. Nē kaxyw tep kwÿ no ām grēre. Kot mē ho dare kaxyw ā. Anē.

³⁵ Hāmri nhÿm mē inhma nē mē ixkôt mē mra xwÿnhjē mā anē nhÿm mē hkrī pa. ³⁶ Hāmri nhÿm pāwti mē tep grēreta jamÿ nē ho Tirtūm wÿ nē kām:

—Pa Papaj. Nā apē mē inhmā mē inhō ho apa xwÿnh jakamā amex o amex. Ām amex kumrēx. Anē.

Hāmri nē mē kām mēmojta o hkry hpa nē mē inhmā kugō pa mē ô ri ho xa nē ho mē hipēx pa. ³⁷⁻³⁸ Hāmri nhÿm mē piitā apku nē ôhy htu hpa. Nhÿm prem mēmyjaja kēp 4.000 nē kaxyw mēnijaja nē mēhprījaja. Mē ohtō rax kumrēx tā nhÿm Jejus mēō ho mē hipēx pa. Hāmri pa mē hakrēx o akuprō nē ho kawā ho 7 nē ho nÿt. ³⁹ Hāmri nhÿm Jejus ma akupÿm mē ô krī hwÿr mē hano pa mē pâr krem agjē hāmri nē ma ijaxwÿja mō. Ma pika pē Makatā hwÿr mō.

16

Parijew nhō xwÿnh kwÿ kot aa mē kot mēmoj pumunh kêt ô ho anhÿr ā Jejus wÿr ā mē harēnh

¹ Tā pa mē ra hwÿr pōj nhÿm Parijew mē Satusew nhō xwÿnhjaja Jejus pumu nē hwÿr mra. Nē hēx rom kot kamā hamak kaxyw hwÿr mra nē kām:

—Pa Jejus? E kwa mē inhmā aa mē ixte mēmoj pumunh kêt ô ho anē nā? Pa mē ate ho anhÿr ā apumu nē Tirtūm kot mē ixwÿr amēnh ā akôt ijamaxpēr kurē kumrēx. E kwa tokyx. Anē.

²⁻³ Hāmri nhÿm mē kuma nē mē kām:

—Tk. Nā kot paj mē amā ho anhÿr kêt nē. Mē ate hā ixpumunh nē ixkôt ajamaxpēre kaxyw ā. Na ka htem kaxkwa kamā kakrā pumu nē axpēn mā na wÿk ā harē. Nē kaxkwa mex pumu nē axpēn mā amgrā hā harē. Tā ixte tanhmā mē amā mēmoj nhīpēx to hā ixpumu nom Tirtūm kot mē awÿr inhmēnh xwÿnh ā ixkôt ajamaxpēr kêt nē. ⁴ ām mē ajamaxpēr punuj pix o na ka htem ri ajamaxpēr o apa. Ixpē Tirtūm kot mē awÿr inhmēnh xwÿnh tā ka mē ja hā ixkôt ajamaxpēr kêt nē. Tā mē ate aa mēmoj pumunh kêt kwÿ ixte mē amā ho anhÿr kaxyw ka mē inhmā hā karō. Nā kot paj mē amā ho anhÿr kêt nē. Kormā. Kot paj ām nhÿrmā te amnepēm Jōhti kot amnhī nhīpēx pyrāk o amnhī nhīpēx. E ja pix kot paj mē amā harē. Nom kot paj mē amā aa mē ate mēmoj pumunh kêt ô ho anhÿr kêt nē. Anē.

Nhÿm pre ā Jejus mē kām kapēr anē hāmri pa mē ixrohā mē kēp ixkato nē ma ixpa.

Jejus kot hkôt mē pa xwÿnhjē jahkre hā harēnh

Makre 8.14-21

⁵ Tā pa mē Jejus mē ixrohā ma mō nē pâr mā agjē nē ma xarmā akupÿm rē nē hikjē hā mō. Hāmri nē tee ri mē ixàpkur xà japēr nē axpēn mā:

—Kwa na pu mē panhō pāwti ho pajamakētkati nē kure. Anē.

⁶ Hāmri nhÿm Jejus mē inhma nē tanhmā mē inhmā Parijew mē Satusew nhō xwÿnhjē jarēnh to. Nom pāwti hā kuxi nē mē inhmā mē harē nē mē inhmā:

—Kwa mē o kora. Kêr ka mē Parijew mē Satusew nhō xwÿnhjē mē kēp pāw kaxkrit xā hkwy hpyr kêt nē. Anē.

⁷ Hāmri pa mē tee ri kuma nē ixprī hā mar mex kêt nē. Nē arī kapēta ā axpēn kukjēr o hkôt mō nē axpēn mā:

—Kwa mẽ pahte mẽ panhõ pãwti rer jakamã mãn mẽ pahte mẽ õ pãw kaxkrit xà kwý hpyr nẽ mẽ pahkurẽ nà? Anẽ.

⁸ Hãmri nhũm mẽ inhma nẽ mẽ inhmã:

—Hẽxta waa nẽ. Mon ka mẽ ãm axpẽn mã mẽ panhõ pãwti hkêt pix jarẽn h o mõ? Pêr kormã mẽ ate amnhĩ kaxyw inhmã ajamaxpêr týx kêt. ⁹ Jãã ixte mẽ anoo mã pãwti kêp 5 pix tã nhũm ixte ho mẽ kêp 5.000tajẽ nhĩpêx par. Nhũm mẽ kot hkur nẽ ho õhy htu hpar nhũm mẽ ate mẽõ jakrêx o apikuprõnh par nẽ ho kawà ho 12 nẽ ho hipu. ¹⁰ Nẽ ham pãwti kêp 7 o mẽ kêp 4.000 nhĩpêx par nhũm mẽ kot hkur nẽ ho õhy htu hpar nhũm mẽ ate mẽõ jakrêx o apikuprõnh raxja. ¹¹ Ra ixte mẽ anoo mã ja ho anhÿr o axkrut tã ka mẽ ra hã ano hkêt nẽ arĩ axpẽn mã mẽ paxàpkur xà pix jarẽn h o ixkõt mõ. Nà mẽ paxàpkur xàja na pa harẽn h kêt nẽ. Parijew mẽ Satusew nhõ xwýnhjẽ nhõ pãwti kaxkrit xà pix na pa hã kuxi nẽ mẽ amã tanhmã harẽn h to. Anẽ.

¹² Nhũm pre ã mẽ inhmã kapêr anẽ hãmri pa mẽ atã kuma nẽ kãm:

—Nà na pa xep mẽ hãmri tã ama. Xep mẽ ixte Parijew mẽ Satusew nhõ xwýnhjẽ kapêr kõt amnhĩ nhĩpêx nẽ na ka mẽ ixkurẽ nẽ ã mẽ harẽn h anẽ. Anẽ.

Jejus kot amnhĩ tã hkõt mẽ pa xwýnhjẽ kukjêr ã harẽn h

Makre 8.27-30; Rukre 9.18-21

¹³ Tã pa mẽ axte Jejus kõt mõ nẽ pika pẽ Sejarej Piripos kamã kormã mõ nhũm Jejus amnhĩ tã mẽ ixkukja nẽ mẽ inhmã:

—E mẽ inhmã mẽmoj jarẽ. Tanhmã na hte mẽ akwýjaja axpẽn mã ijarẽn h to wehe? Anẽ.

¹⁴ Hãmri pa mẽ kãm:

—Nà na htem ahpÿnhã tanhmã ajarẽn h to. Na hte kamã mẽ hkwyjaja ajarẽn h o finat Juãw Paxis ã ajarẽ. Nhũm kamã mẽ hkwyjaja ato finat Eris ã ajarẽ

nhũm mẽ hkwyjaja tõhã apẽ Tirtũm nhÿ hã akapêr o apa xwýnhjẽ hõ akupÿm atĩr ã ajarẽ. Nẽ tõhã finat Jeremístija rÿ axtem hõ hã ajarẽ. Æ na htem ahpÿnhã axpẽn mã ajarẽn h anẽ. Anẽ.

¹⁵ Hãmri nhũm mẽ inhma nẽ mẽ inhmã:

—No mẽ kajaja? Ixpê mẽmhõ hã na ka htem axpẽn mã ijarẽ? Anẽ.

¹⁶ Hãmri nhũm Simãw Pêtre kãm:

—Nà apẽ Tirtũm kot mẽ ixkaxyw axãm nẽ mẽ ixwÿr amẽn h xwýnh na ka. Nẽ apẽ mẽ ixpiitã mẽ inhõ Pahi Maati na ka. Æ na pa htem axpẽn mã ajarẽn h anẽ. Anẽ.

¹⁷ Hãmri nhũm kuma nẽ kãm:

—Nà ãm hãmri na ka ã ijarẽn h anẽ Simãw Pêtre. Nom amnhĩ krã hkõt na ka ã ijarẽn h anhÿr kêt nẽ. Tirtũm tãm kot amã ixto amnhĩrit xà hkõt na ka ã ijarẽn h anẽ. ¹⁸ Nà akumrêx na ka ã ijarẽn h anẽ. Tã koja mẽ apyrã nẽ nhÿrmã mẽ kot ixkõt amnhĩ xunhwÿr xwýnhjaja ma hkwyjẽ mã ja hã ijarẽn h o ri krĩ piitã hkõt pa. Hãmri nhũm mẽ hkwyjaja mẽ kuma nẽ mẽ apyrã nẽ ixkõt amnhĩ xunhwÿ. Hãmri nhũm mẽ kêp ixprãm nõkati xwýnhjaja tee ri tanhmã mẽ kot ijarẽn h toja ma nẽ ã ijarẽn h anhÿrja nẽ mẽ kãm kapêr tã nom ho hkapyrẽ. Æ koja ixkõt mẽ kot amnhĩ xunhwÿr xwýnhjaja mẽ kãm ijarẽn h o pa anẽ.

Jao te mẽ apẽ kên nhũm ixte mẽ ato amnhĩm inhõrkwÿ nhĩpêx pyràk. Tã akumrêx ate ã ijarẽn h kot anhÿr jakamã kot paj te ixte akumrêx amÿnh nẽ ato ixtẽm nẽ inhõrkwÿ nhĩpêx kaxyw amnhĩm akumrêx axãm pyràk o anhĩpêx Simãw Pêtre.

¹⁹ —E kër ka ma inhÿ hã tanhmã mẽ piitã mẽ kãm ijarẽn h to ho ri apa. Mẽ kot hprĩ hã amar kaxyw. Koja mẽ hkwyjaja ama nẽ amnhĩ kaxyw ixkõt hamaxpêr nẽ ixkõt amnhĩ xunhwÿ. Ka ja hã mẽ omu nẽ mẽ kãm: “E ra mẽ ate Jejus kõt amnhĩ xunhwÿr jakamã kot ka mẽ nhÿrmã ty nẽ ma kaxkwa

hwÿr api nê Tirtûm mē wa kuri amex kumrêx nê atîr tûm nê apa ho apa.” Anhÿr o mē kām ijarênh o apa. No mē kot akapêr mar nê âm mar nê ixkôt amnhî xunhwÿr kêt xwÿnhjaja ka mē kām: “No mē kajaja mē ate Jejus kôt amnhî xunhwÿr kêt jakamā kot kaj mē nhÿrmā Tirtûm mē Krata wa kuri atîr tûm nê apa ho apa hkêt nê.” Anhÿr o ā inhÿ hā mē kām akapêr anhÿr o ri mē hkôt apa. Jao te ate kaxkwa hwÿr saf pyr nê Tirtûm krajê mē kahê xā rēnh nê Tirtûm kra hkêt xwÿnhjê pê kahê pyrāk o amnhî nhîpêx o apa. Anê.

Nhûm pre ā Jejus Simāw Pêtre mā kapêr anê. ²⁰ Hāmri nê hpānhā mē ixpiitā mē inhmā kapêr nê mē inhmā:

—E. Kwa kêr ka mē kormā mē piitā mē kām Tirtûm kot mē awÿr inhmēnh ā mē kām ijarênh o ri apa hkêt nê. Kormā. Anê.

Jejus kot amnhî kukamā amnhî jarênh ā harênh

Makre 8.31-33; Rukre 9.22

²¹ Hāmri nhûm Jejus hprî hā amnhî kukamā tanhmā mē inhmā amnhî jarênh to nê mē inhmā:

—Nā mē kajaja mē ate aprî hā ixpumunh mex. No mē pahkwÿjaja kām hprî hā ijarênh mar nê ixpumunh prām kêt. Ijaew krāhtûmjaja nê Tirtûm kapêr tûm o mē ahkre xwÿnhjaja nê patre krāhtûmjaja. Mē kām hprî hā ixpumunh nê kām ixkapêr mar prām kêt jakamā kot paj tokyx ma Jerujarê hwÿr mō nhûm mē kamā ixpynê nê ixtak rax nê ixpî. Nom kot paj ixtyk ā apkati axkrunêpxi nhûm Tirtûm akupÿm ixto ixtîr. Anê.

²² Hāmri nhûm Simāw Pêtre tee ri kot ā mē kām amnhî jarênh anhÿrja ā kuma nê hwÿr tē nê hpa hā kupy nê mē ixpê ho kato nê mē ixkax ā o xa. Nê ā kot amnhî jarênh anhÿrja nê kām kapêr nê kām:

—Kwa nà Pahihtî. Ri ā amnhî jarênh anhÿr kêt nê. Mo kot kêt mē ri axtem nê ā anhîpêx anê? Anê.

²³ Hāmri nhûm kuma nê hwÿr apkjê nê omu nê kām:

—Tk. Te apê Satanasti kapêr pyrāk o na ka ā inhmā akapêr anê. Kot kaj ā akapêr anê hāmri nê ixkôt apa hkêt nê. Tirtûm kām hprām xā hkôt na ā mē kot inhîpêx anhÿr kaxyw kênā. Tā ka Tirtûm jamaxpêr o ajamaxpêr kêt nê amnhî jamaxpêr o ā inhmā akapêr anê. Te apê ixpê axāmnār xwÿnh pyrāk o amnhî nhîpêx. Anê.

Jejus krajaja kot tanhmā amnhî nhîpêx to hā mē harênh

Makre 8.34-9.1; Rukre 9.23-27; Juāw 12.24-26; määnēn Rōmān 15.1; Wam Korî 10.23-24; Karatas 5.24; Piripos 2.4; Wam Pêtre 4.1; Apokarip 2.10, 12.11

²⁴ Nhûm pre ā Jejus Simāw Pêtre mā kapêr anê hāmri nê hpānhā mē ixpê hkôt ixpa ho ixpa xwÿnh piitā mē inhmā kapêr nê mē inhmā:

—E kot kaj mē ixkôt amnhî xunhwÿr ā amnhî jarê hāmri nê määnēn amnhî jarênh o: “Jejus kêp inhō Pahihtî jakamā kot paj kapêr kôt pix mā amnhî nhîpêx rāhā ho ri ixpa. Kwār ixkwÿjaja tanhmā hā inhîpêx hto.” Anhÿr o amnhî jarê.

²⁵ —Koja mē ixtā mē atōx pî rÿ tanhmā mē atō hto ka ty. Tā nom koja akaxwÿnh ma ixwÿr àpir kurê kumrêx. Hāmri ka ixkuri atîr tûm nê amex rāhā nê apa ho apa. Nom kot kaj mē jar atîr prām xāj ixkaga hāmri nê inhō krî hwÿr axāpir kêt nê.

²⁶ —Nê koja mēhō hikukrêx rax gryk ā Tirtûm kaga. Tā nhÿrmā ty hāmri nê amnhî kôt hikukrêx ô hpyr nê o mōr kêt nê. Kojā tee ri kuwy hwÿr mōr pymaj amnhî nê hikukrêx rax o amnhî pānhā amnhîrer prām kaprÿ. Tanhmā koja amnhî to nê Tirtûm mā amnhîre nê ma ô krî hwÿr api? Kojā ā amnhî nhîpêx anhÿr kêt nê.

27 —Nê ixpê Tirtûm kot mê awÿr inhmênh xwÿnh kot paj nhÿrmã kaxkwa rûm akupÿn mê awÿr wrÿ nhûm Tirtûm kapêr o mê wrÿk xwÿnhjaja man ixkôt wrÿ. Hâmri pa inhô Papaj nhÿ hã ixte mê pitã tanhmã mê kot amnhÿ nhÿpêx to hã mê omunh xà hkôt ahpÿnhã tanhmã mê harênh to. 28 ãm hãmri na pa ã mê amã amnhÿ jarênh anê. Kot paj nhÿrmã akupÿn ixte mê ato amnhÿtâr kaxyw man mê awÿr wrÿ. Tã kot kaj mê akwÿjaja akupÿn ixwrÿÿta kukamã tokyx ixte tanhmã ixte amnhÿ nhÿpêx to hã ixpumu. Anê.

17

Jejus kot hixêt prêk nhÿmök ã hirã kamã ãm ã harênh

Makre 9.2-13; Rukre 9.28-36; mãânên Sikûn Pêtre 1.16-18

1 Tã nhûm semãnja hapêx nhûm Jejus ma nhÿri hixêt prêk wÿr mô. Nê kaxyw Simãw Pêtre nê Xiakre nê Xiakre htô Juãwja nhûm ma amnhÿ kôt wa mê o mô. Nhûm wa mê mô nê hixêt prêk ã api nê himök ã kuhê. 2 Hâmri nhûm Jejus xep ra axtem nê xa. Axtem hkuk nhÿrã htÿx nê xa. Te myyti nhÿrã htÿx pyrãk. Nê ê haka htÿx kumrêx. 3 Hâmri nhûm xep ja wa kaxkwa rûm hwÿr wrÿ nê kuri kãm kapêr o xa. Mojes mê Erisja wa nhûm hwÿr wrÿ nê kuri xa. Tirtûm amnepêm amnhÿ wÿr wa ho àpir tã wa akupÿn wrÿ nê Jejus mã kapêr o xa. 4 Hâmri nhûm Jejus kôt mê môr xwÿnhjaja wa mê omu nhûm Simãw Pêtre tanhmã hamaxpêr to nê Jejus wÿr tã nê kãm:

—Kwa Pahÿhti. Nã ãm hãmri na pu mê amnê mô. Kwa pu mê kritpêm jar axkamê nê tokyx panojarêt kêt nê. Pa mê amã pô nhÿrônho axkrunêpxi nê hipêx. Amã hõ nhÿpêx nê Mojes mã hõ nhÿpêx nê Eris mã hõ nhÿpêx ka mê kamã akrÿ. E kwa pa mê amã ho anê nã?

Anhÿr o kãm kapêr. Nom amnhÿ krã hkôt ã kapêr anê. 5 Hãmri nê kormã ã kãm kapêr anhÿr rôm nhûm ra kakrã jaka htÿxja wrÿ nê wa mê hkunor pa nhûm wa mê kamã kuhê. Nhûm kakrã kamã Tirtûm mê kãm kapêr nê mê kãm:

—E ota Ixkra xa. Inhmã hapê ho inhmã hapê. E kêr ka mê kapêr mar tÿx rãhã ho ri apa. Anê.

6 Hãmri nhûm mê tee ri kuma nê kãm wa htÿx nê umaj pikap rôrök nê htu myrêp hikwÿ. 7 Hãmri nhûm Jejus mê hwÿr tã nê mê hã ïhkra jaxwÿ nê mê kãm:

—E mê kãnhmã akuhê nê amã ma hkêt nê. Anê.

8 Hãmri nhûm mê kuma nê kãnhmã rÿt nê Jejus pix pumu nhûm ahte xa nhûm kuri wa ãm xwÿnhhta wa ra ma akupÿm api. 9 Hãmri nhûm mê kormã akupÿm hixêt nhÿmök rûm mê ixwÿr wrÿk o mô nhûm Jejus mê kãm:

—E kêr ka mê ham ate mëmoj pumunh xwÿnhhta kormã nhãm mê kãm harênh kêt nê. Kot paj nhÿrmã ty nê akupÿm ixtÿr ka mê rÿ kormã mê kãm ja hã ijarênh o ri apa. Anê.

10 Hãmri nhûm mê kormã akupÿn mê ixwÿr wrÿk o mô nhûm mê Jejus mã:

—Kwa mê inhmã mëmoj jarê. Na htem Tirtûm kapêr tûm o mê ijahkre xwÿnhjaja mê inhmã: “Eris kumrêx koja Tirtûm mê pahwÿr kumê nhûm Krisja kormã hapu hã wrÿ.” Anê. Na htem ã mê inhmã war ajarênh anê. Tã ka ra wrÿ nom kormã akukamã Erisja wrÿk kêt. Anê.

11 Hãmri nhûm mê kãm:

—Nã ãm hãmri na prem ã wa ijarênh anê. Na pre ra ixkukamã te Eris kot amnhÿ nhÿpêx pyrãk xwÿnhhta tã nê ixkutêp mê kãm ijarênh o pa. 12 Tã nom nhûm mê ja hã omunh kêt nê. Na prem axtem nê kãm hprãm xà hkôt tanhmã hipêx to nê kupÿ. Tã koja mê nhÿrmã ã hipêx anhÿr pyrãk o inhÿpêx. Anê.

13 Hāmri nhũm mẽ ra hprĩ hã kuma nê axpên mã:

—Kwa Juãw Paxis pimràata na ã mẽ pamã harênh anê. Tapxipix na pre te Eris kot amnhĩ nhĩpêx pyrãk o amnhĩ nhĩpêx o pa. Tã tãm na mẽ pamã harê. Anê.

Jejus kot mēhō hkra nē mēkarōmnuti kator ã harēnh

Makre 9.14-29; Rukre 9.37-43

14 Tã nhũm mẽ ra akupỹm ahpar mã man mẽ ixwýr hpôx o mō nhũm mẽ ohtô rax nê Jejus kutêp kuhê. Hāmri nhũm mēhō myja mẽ omu nê mẽ kutã tẽ nê mẽ hkaxpa nê Jejus kutã hkõn krã ho tēm nê nhỹ nê hkra ho kuwý nê kãm:

15 —Pa Jejus. Kwa inhmã ixkra kamã axukaprĩ nê. Na hte mēkarōmnutija xatã tanhmã ixpê ho nhũm hte ý hã mra nê rôrôk nê tōhã kuwy kamã rôrôk nê tōhã gôx kãm mran mrõ nê ixpê homnuj tỳx nê. 16 Tã pa akôt mẽ pa ho mẽ pa xwýnhjê hwýr o tẽ nom nhũm mẽ kot inhmã ho mex kaxyw tee ri tanhmã ho hkaprý. Kwa xà kot kaj akupỹm inhmã ho mex nã? Anê.

17 Hāmri nhũm kuma nê mẽ ixte hkôt ixpa ho ixpa xwýnhjê mã kapêr nê mẽ inhmã:

—Hêxta waa nê. Ra mẽ ate ixte Tirtũm nhỹ hã mẽ ho mex ã ixpumunh o ixkôt apa ryy htã kormã ixpyrà nê ã mẽ hipêx anhýr kêt nê. Nã kormã mẽ kaxyw Tirtũm kôt mẽ ajamxpêr tỳx kêt jakamã na ka mẽ tee mẽ ho mex kaxyw. Anê.

Hāmri nê myta mã kãm:

—E amnê ixwýr akrata o tẽ pa omu. Anê.

18 Hāmri nhũm kuma nê hwýr o tẽ nhũm omu nê nê mēkarōmnutija kator nhũm akupỹm mex kurê kumrêx. 19 Hāmri pa mẽ ixte Jejus kôt ixpa ho ixpa xwýnhjaja ja hã omu mẽ hkãx ã amnhĩ tã hkukja nê kãm:

—Kwa na pa mẽ axwakre kamã tee ri nê hanor prãm kaprý. Kwa mon pa mẽ apyrã nê nê hanor

nhũm kator nê ma htēm kêt nê? Anê.

20-21 Hāmri nhũm mẽ inhmã:

—Nã kormã mẽ ate mẽ kaxyw Tirtũm kôt ajamxpêr tỳx kêt. Nom kot ka mẽ kaxyw hkôt ajamxpêr tỳx hāmri nê hkôt amnhĩ nhĩpêx kukwak ri mẽmoj tã awý nhũm mẽ ama nê mẽ ate mẽmoj tã axàhwýr xà hkôt mẽ amã tanhmã mẽmoj nhĩpêx to. Te mẽ ate pĩ hpàr mũj mã akapêr nê kãm: “Kwa amnhĩ jarê nê ma tẽ nê gô xujanãr kãm mãn mrõ.” Anhýr nhũm kot amar nê amar xà hkôt ã amnhĩ nhĩpêx anhýr kurê kumrêx pyrãk. Ja pyrà nê kot kaj mẽ amnhĩ kaxyw Tirtũm kôt ajamxpêr tỳx kukwak ri mẽmoj tã awý nhũm mẽ ama nê mẽ amã mẽmoj tanhmã ho rý mẽ amã mẽmoj gô. Anê.

Jejus kot htyk kukamã amnhĩ jarēnh ã harēnh

Makre 9.30-32; Rukre 9.43-45

22-23 Tã hāmri pa mẽ Jejus kôt ma mō nê nhỹri pika pẽ Garirej kamã kormã ixpa. Hāmri nhũm Jejus axte amnhĩ kukamã mẽ inhmã tanhmã htyk ã amnhĩ jarēnh to nê mẽ inhmã:

—Nã koja mẽ tokyx mẽ kãm ixtã amýnê nhũm mẽ ixpĩ. Mẽ kot ixpĩr tã kot paj ixtyk ã apkati axkrunêpxi nhũm Tirtũm akupỹm ixto ixtür. Anê.

Hāmri pa mẽ tee ri ã kot amnhĩ jarēnh anhýrja ã kuma nê ixkaprĩ htỳx kumrêx.

Jejus kot Tirtũm nhōrkwý hwýr àr Rōmãn 13.5-7; Wam Korit 10.32-11.1

24 Tã pa mẽ Jejus kôt ma mō nê ra Kapanau hwýr pøj. Hāmri nhũm mẽ kot Tirtũm mã amnhĩ jarēnh xà hã ixkre ho mex kaxyw mẽ kệp kàxpore hkwý jamýnh xwýnhjaja mẽ ixpumu nê mẽ ixwýr mra nê Simãw Pêtre mã kãm:

—Pa. Kwa xà na hte mẽ ajahkre xwýnhja mẽ pahpê hkwýjê pyrà nê Tirtũm mã amnhĩ jarēnh xà hã

ixkre ho mex kaxyw kàxpore hkwy nhôr kêt nê nà? Anê.

²⁵ Hāmri nhūm mē kuma nē mē kām:

—Tỳ kot mē kām òr o pa kēnā. Anê.

Hāmri nē ma mē ixkôt tē nē mē ixkôt mēhō nhōrkwy hwyr axā. Hāmri nē kot Jejus mā mē harēnh mā tā nhūm ra hamaxpēr ā omu nē kumrēx kām kapēr nē kām:

—Kwa inhmā mēmoj jarē Simāw Pêtre. Xà na hte pahi hkrajaja ò papaj mā kàxpore hkwy nhôr o pa nà? Xà na hte âm hkra hkêt xwýnh pixjaja kām hkwy nhôr o pa? Anê.

²⁶ Hāmri nhūm kuma nē kām:

—Nà mē kēp hkra hkêt xwýnh pixjaja na hte kām òr o pa. Anê.

Hāmri nhūm Jejus kām:

—Tỳ. Nà âm hāmri na ka ja jarē. Na hte pahi hkrajaja ò papaj mā kàxpore nhôr kêt nē. Mē kēp hkra kēnā. Tā ixpē Tirtūm Kra jakamā mo kaxyw kot pa kêt òrkwy hwyr inhgēx kaxyw kām kàxpore hkwy gō? ²⁷ Tā nom kot paj òr kêt nhūm kàxpore hkwy jamýnh xwýnhjaja tee ri ja hā ixpumu nē axpēn mā ixte amnhī tomnuj xwýnh ā ijarē. Jakamā e ma gōnhmā tē nē tep ò kanhē. Hāmri nē ho api nē apy nē hakwa jakjē nē kamā kàxpore htýxre pumu. Nē apy nē man o tē nē pahpānhā kàxpore jamýnh xwýnhhta mā agō. Anê.

Nhūm pre ā Jejus Simāw Pêtre mā karō anē nhūm kuma nē ma hwyr tē nē kot kām karō xā hkôt ā amnhī nhīpēx anē.

18

Mē kot amnhī to rūnh xwýnhjē jarēnh

Makre 9.33-37; Rukre 9.46-48; määnēn Piripos 2.3-7; Wam Pêtre 3.4, 5.5-6

¹ Tā mē ixte Jejus kôt ixpa ho ixpa xwýnhjaja amnhī kukamā ijamaxpēr nē amnhī tā Jejus kukja nē kām:

—Kwa mē inhmā mēmoj jarē Pahihti. Nhýrmā mē ixpē pahi nē anhīhkô hā mē ho amnhīptār o ri ixpata ā mē ixtō kot paj we mē ho amnhīptār rax o ixkwýjē jakre? Anê.

² Hāmri nhūm mē inhma nē amnhī wýr mēhprīre hō mā hpa ho apē nhūm hwyr tē nē mē ixkuri xa.

³ Hāmri nhūm Jejus omu nē hā mē inhmā:

—E mē inhma. Kēr ka mē apē pahi pyrāk o tanhmā amnhī jarēnh to ho ri apa hkêt nē. Âm te amarī ri mē apa pyrāk o amnhī nhīpēx. Te mēhprīre kot amnhī nhīpēx pyrāk. Kot kaj mē ā amnhī nhīpēx anhýr o apa hkêt hāmri nē nhýrmā inhīhkô hā mē ho amnhīptār kêt nē. ⁴ Jakamā kot kaj mē amā nhýrmā inhīhkô hā mē ho amnhīptār o apa hprām. Hā kot kaj mē te mēhprīre kot amnhī nhīpēx pyrā nē amā amnhī to rūnh prām kêt nē apa.

⁵ —Nē kēr ka mē apē pahi kot amnhī nhīpēx pyrāk o tanhmā amnhī jarēnh to ho apa hkêt nē. Âm te amarī ri mē apa pyrāk o amnhī nhīpēx. Jao nhýri mēhprījē hō pumu nē kamā axukapri nē kām mēmoj tanhmā ho rý kām mēmoj gō. Hāmri nē te pa ate tanhmā ixto mex to pyrāk o amnhī nhīpēx. Kot kaj mē ā amnhī nhīpēx anhýr o apa hāmri nhūm Tirtūm ja hā mē apumu nē mē ate amnhī to rūnh kêt tā mē ate amnhī to rūnh xwýnh ā mē ajarē. E kot kaj mē amā amnhī to rūnh prām hā kot kaj mē ā amnhī nhīpēx anhýr o ri apa. Anê.

Mē kot amnhī tomnuj xwýnhjē hkukamā mē harēnh

⁶ Nhūm Jejus arī mē inhmā mēhprī jarē nē mē inhmā:

—Nē mēhprīre na htem amnhī kaxyw ixkôt hamaxpēr o pa. Tā koja mēhō inhnē tanhmā mē kām kapēr to. Mē kot tanhmā amnhī tomnuj to hprām xāj tanhmā mē kām kapēr to ho pa. Hāmri nhūm

mê kuma nê mê kapêr xà hkôt tanhmâ amnhî tomnuj to. Hã koja Tîrtûm ja hã omu hãmri nê kot inhnê tanhmâ kãm kapêr to xwÿnhnta pumu nê homnuj tÿx nê. Te mê kot mēhō pynēnh nê mut ã kēn pytî hō nhōr nê ma o htēm nê gō xupÿm kãm mēnh pyrāk o hipēx. Te ho ja pyrāk no ãm homnuj tÿx o hakre.

⁷—Nê koja mēhō inhnê tanhmâ mê kot ixkôt amnhî xunhwÿr xwÿnhjê hō mã kapêr to. Kot tanhmâ amnhî tomnuj to hprãm xaj tanhmâ kãm kapêr to. Rÿ kot ixkaga hprãm xaj tanhmâ kãm kapêr to. Hãmri nhũm kuma nê mar xà hkôt ixkapêr kwÿm tanhmâ amnhî tomnuj to. Tã koja Tîrtûmja ja hã omu nê mãânēn kot inhnê kēp ãnnār xwÿnhnta pumu nê ã inhnê kãm kapêr anhÿrja mÿrapê homnuj tÿx kumrēx.

⁸⁻⁹—E kwa mê okora. Kot kaj mê anhîhkra ho tanhmâ amnhî tomnuj to rÿ apar o tanhmâ amnhî tomnuj to. Hã kêr ka mê axte ã amnhî nhîpēx anhÿr pymaj te mê ate amnhî pê krāhyr nê mēnh pyrāk o amnhî nhîpēx nê axte ã amnhî tomnuj anhÿr kêt nê. Rÿ ka mê ano ho mēmoj punuj pumu. Hã kêr ka kãm ajamaxpêr pix o apa pymaj te mê ate amnhî pê ano katōk nê kaxār nê mēnh pyrāk o amnhî nhîpēx nê nhām arît kurê kumrēx. Kêr ka mê ã amnhî nhîpēx anhÿr o ri apa. Hãmri nê nhÿrmã ty nê ma Tîrtûm nhō krî hwÿr api. No kot ka mê arî akutã ano nê arî akutã apar nê arî akutã anhîhkra rāhã ri apa htã ho amnhî tomnuj o apa. Hãmri nê nhÿrmã ty nê ate amnhî tomnuj mÿrapê ma mê kot amnhî xà htÿx kamã hamak tũm xà hwÿr ma mō.

¹⁰⁻¹¹—Nê kêr ka mê mēhprîrejê kamã axukapri rāhã ho apa. Na hte kaxkwa kamã Tîrtûm kapêr o mê wrÿk xwÿnh kwÿjaja Tîrtûm mã mê hamār mex o pa. Tã koja mēhō tanhmâ kēp hō hto nhũm mê hã

omu nê ma tē nê Tîrtûm mã harēnh kurê kumrēx. Anê.

ôwēhti pikunor jarēnh

Rukre 15.3-7

¹² Nhũm Jejus arî mê inhmã kapêr nê mê inhmã:

—E pa mê amã awjarê ka mê ixu-jarēnh ma. Nà koja mēhō my hkrit ôwēhti xohtō nê. Nê apkati mê ma hamār o pa. Hãmri nhũm pyxire nê tanhmâ amnhî to nê kēp akunok. Kwÿ kaga nê ma nhÿhÿm ahte tē nê kēp akunok. Hãmri nhũm mytita ma akupÿm o mōr kaxyw hkwy ho pikuprōnh pa hãmri nê tee ri hkwy kaēx ã pikunor xwÿnhnta japêr nom nhÿri omunh kêt nê. Hãmri nê tee ri hkukamã hamaxpêr nê ma hkwy ho mō nê nhÿri kure. Kutêp apkur kaxyw nhÿri kure hãmri nê ma akupÿm pikunor xwÿnhnta japêr o tē. ¹³ Hãmri nê hapêr ryy nê nhÿri hwÿr kato nê omu nê hkînh nê. Hãmri nê kutu nê ma akupÿm o tē. Na hte pikunor kêt xwÿnhjê nhÿ hã hkînh tã pikunor xwÿnhnta mã kato nê hkînh tÿx nê. Krit xohtō htã nom ãm kãm ho pixi nê ho hpikunor prãm kêt. ã mê ujarēnh kot anhÿr. ¹⁴ Ja pyra nê Tîrtûm kãm mēhō pyxi nê nhÿrmã ma kuwy wÿr mōr prãm kêt kumrēx. Mê piitã mê kot hkôt amnhî xunhwÿrja na kãm hprãm. Anê.

Jejus kôt mê pahtojê hō kot mê pahtomnuj jarēnh

¹⁵ Nhũm Jejus arî mê inhmã kapêr nê mê inhmã:

—Nê ja. Koja ixkôt mê atō rÿ mê atōx tanhmã atomnuj to. Hã kêr ka ma hwÿr tē nê kot tanhmã anhîpēx to hã amnhî tã kãm akapêr. Nom kêr ka mê nhām mēhō mã harēnh kêt nê. ãm tanhmã kot ato xwÿnhnta pix wÿr tē nê kumē war axpēn mã akapêr nê war axpēn ma. Nhũm ama nê akupÿm tãm anhîpēx hã kêr ka akupÿm te ixkôt kēp atō rÿ atōx pyrāk o ka wa axpēn nhîpēx nê axte jam ajamaxpêr kêt nê. ¹⁶ Nom koja

ama nê âm ama rý tanhmã ato hkêt ã amnhî jarênh japêr. Hã kêr ka mã akupým tê nê akupým amnhî kôt Kris kôt atô rý atôx o axkrut rý mẽ ho axkrunêpxi nê amnhî kôt hwýr mẽ o mra kê mẽ axpên tâ war ama. Amnepêr Tirtüm kapêr ã kagà htüm kot ja jarênh o:

Kêr ka mẽ atô tanhmã axpên nhîpêx to. Hãmri nê hã axpên mã akapêr kaxyw nê amnhî kôt akwýjê ho axkrut rý ho axkrunêpxi nê akupým hwýr mẽ o mra kê mẽ axpên tâ war ama. Anê.

—Ã Tirtüm kapêr ã kagà htüm kot ja jarênh kot anhýr. ¹⁷ Jakamã kêr ka mẽ amnhî kôt akupým kot tanhmã ato xwýnhnta wýr mẽ o mra kê mẽ atã kuma. Hãmri nhüm arî mẽ kãm kot tanhmã ato hkêt ã amnhî jarê ka tee ri amnhî tâ omu nê ikrêsti hwýr tê nê Kris kwý hã mẽ pikuprôn h xwýnhjê mã harê. Kê mẽ ama hãmri nê ja hã axte kot tanhmã ato xwýnhnta mã kapêr. Nhüm mẽ mar kêt nê arî kot tanhmã ato hkêt ã amnhî jarê ka mẽ amnhî nê hanor kurê kumrêx. Hãmri nê te kêp Kris kôt mẽ atô rý mẽ atôx kêt pyrãk o hipêx.

¹⁸ —Nê koja mêmô ixkôt amnhî xãm nê Inhîpêxã Tirtüm kôt ri amnhî nhîpêx o pa. Ka mẽ ja hã omu nê inhý hã tanhmã kãm akapêr to nê kãm: “E ra ate Jesus kôt amnhî xãm jakamã kot kaj nhýrmã Tirtüm mẽ wa kuri amex kumrêx nê atîr tùm nê apa ho apa.” Anhýr o kãm akapêr. Nom mẽ kot ixkôt amnhî xunhwýr kêt xwýnhjaja ka mẽ ã mẽ kãm akapêr anhýr kêt nê. Âm inhý hã mẽ kãm: “No mẽ kajaja mẽ ate Jesus kôt amnhî xunhwýr kêt jakamã kot kaj mẽ Tirtüm mẽ Krata wa kuri atîr tùm nê amex nê apa hkêt nê.” Anê. Kêr ka mẽ inhý hã ã ahpýnhã tanhmã mẽ kãm akapêr to ho apa anê.

¹⁹⁻²⁰ —Nê kot kaj mẽ Tirtüm mã amnhî jarênh kaxyw te axkrutre

rý axkrunêpxire htã axpên wýr akuprô nom mẽ kapxipixjaja apikuprôn h kêt nê. Kot paj mẽ akaêx ã mẽ anhîhkô hã mẽ amar o xa. Mẽ ate ano ho ixpumunh kêt tâ pa wa mẽ anhîhkô hã mẽ amar o xa. Jakamã kot kaj mẽ axpên wýr akuprô nê mêmoj tâ Tirtüm wý nhüm kaxkwa kamã ja hã mẽ ama. Nê mẽ ate hã axãhwýr xwýnhnta nhüm mẽ amã tanhmã ho. Kêr ka mẽ ã ixkamnâr rom axãmnhix amnhî to Inhîpêxã hwýr anê. Anê.

Nhüm pre ã Jesus mẽ inhmã kapêr anê.

Mẽ pahte tanhmã axpên nhîpêx to hã mẽ pamã karô

Matêwre 6.14-15; Rukre 17.3-4; mãânên Epes 4.32; Korosê 3.13

²¹ Tã nhüm Simãw Pêtre Jesus wýr tê nê mêmoj tâ hkukja nê kãm:

—Kwa inhmã mêmoj jarê Pahihti. Xã koja akôt ixtô rý ixtôx tanhmã inhîpêx to pa amnhî tâ omu nê âm omu nê amnhî tâ tanhmã ho hkêt nê. Nhüm axte tanhmã ixto nê axte tanhmã ixto ho 6 tâ pa âm amnhî tâ omu nê amnhî tâ tanhmã ho hkêt nê. Âm ho ijamakêtkati nê axte kãm ijamaxpêr kêt nê. ã amnhî tâ hipêx anhýr o 7 nhüm ja amã mex nê nã? Anê.

²² Hãmri nhüm kãm:

—Nã kot kaj ã amnhî tâ hipêx anhýr o 7 pix kêt nê. Koja mêmô xatã tanhmã ato rãhã nê ka amnhî tâ omu nê ajaxwýja amnhî tâ xatã tanhmã ho hkêt nê. Âm amnhî tâ omu nê âm omu nê tam hipêx rãhã ho ri apa. Mãmri ho anhýr o apa rãhã nê aa jam anhürer kêt nê.

²³ —E kot paj ixprî hã mẽ amã tanhmã ja jarênh to ka mẽ inhma. Tirtüm na hte xatã mẽ ate tanhmã amnhî tomnuj to hã mẽ apumu nê mẽ anê rên h o pa. Te kot pahi kot ã hkwýjê nhîpêx anhýr pyrãk. Koja mẽ ô pahija kãm mẽ ápênh xwýnhjaja kot kêp kãxpore ho ìpresta hã mẽ omunh kaxyw nhý. ²⁴ Hãmri nhüm mẽ hwýr ja ho tê nê kutã âm.

Ra kot kêp hikàxpore ho ìpresta rax xwýnhja. ²⁵ Tã no ãm aa akupým kãm ôr kêt nê ra kêp ho hapêx pa. Hãmri nhùm pahija tee ri amnhî tâ omu nê hkwýjê mã hã amýnê nê mẽ kãm: “E. Mẽ ma o tẽ nê hprõ nê hkrajaja nê ôrkwý nê hikukrêx mẽrohã ho wênê hpa nê hpãnhã kàxpore py nê man inhmã o tẽ. Kot ixpê ixkàxpore ho ìpresta nê akupým inhmã ôr kêt mýrapê.” Anê.

²⁶ —Hãmri nhùm kot ho ìpresta xwýnhhta tee ri amnhî tâ kuma nê kutã hkõnkrã ho nhý nê amnhî to hwýr kãm hihtýx nê kãm: “Kwa nã ri ixto anhýr kêt nê pahiti. Ixkamã axukapri nê hkêt wehe. Nã kot paj akupým amã kugõ kãm ga.” Anê.

²⁷ —Hãmri nhùm amnhî tâ kuma nê kãm hkapri nê. Hãmri nê kãm: “Tõe. Nã kot paj ã anhîpêx anhýr kêt nê. Kot paj anhõ kõt kaxõnh pa nê kumê ka mãmri ma ajamakêtkati nê axãmnhix apa.” Anê. ²⁸ Nhùm ã kãm kapêr anê nhùm kuma nê hkĩnh nê. Hãmri nê ma tẽ nê kato nê ixkre kapem põristi hõ pumu. Na pre ra kêp kàxpore hkwý ho grire nê ho ìpresta nhùm kato nê omu. Hãmri nê hwýr tẽ nê amnhî kĩnhã ôkre hã kumý nê kãm: “Kwa tokyx akupým ate ixpê kàxpore ho ìpresta pãnhã inhmã agõ.” Anê. ²⁹ Hãmri nhùm tee ri amnhî tâ omu nê ra ham kot pahi kutã amnhî nhîpêxta pyrà nê kutã hkõnkrã ho nhý nê kãm: “Kwa nã. Kwa ri ixto anhýr kêt nê. Nã kot paj hpãnhã amã kugõ. Kwa ixkamã axukapri nê hkêt wehe.” ³⁰ Anhýr tâ nom nhùm kuma nê ãm kuma nê hã amýnê. Hã hkwýjê mã amýnê nê mẽ kãm: “E mẽ ma jahti ho tẽ nê haxã. Kwa kot ixpê kàxpore ho ìpresta pãnhã inhmã kugõ nê rĩ kormã kato nê rĩ amnhî pumu.” Anê. Hãmri nhùm mẽ kuma nê ma o tẽ nê haxã.

³¹ —Hãmri nhùm hkwýjaja tee ri mar o kuhê nhùm mẽ kêp ja omnuj nê nhùm mẽ pahi hwýr agjê nê kãm

harê. ³² Hãmri nhùm tee ri harênh ma nê kamã gryk týx nê akupým amnhî wýr hã karõ nhùm akupým hwýr axã nhùm kãm: “Tk. Kwa na ka pre amnhî tomnuj týx nê. Ate amnhî to ixwýr nhùm inhmã akapri nê ixte anhõ kõt kaxõnh nê mênh tâ ³³ ka amnhî kĩnhã anhîõta kamã axukapri hkêt nê ri ã hipêx anê.” Anê. ³⁴ Hãmri nê kamã gryk nê hã õ põristi mã amýnê nhùm mẽ ma o tẽ nê haxã. Mẽ kot mẽ hagiênh xã hã ixkre kamã apkati mẽ tanhmã mẽ kot hipêx to kaxyw nhùm mẽ kãm hã amýnê. Tanhmã mẽ kot hipêx to rãhã nhùm kot akupým kàxpore raxta nhõr par nê rĩ kormã kator kaxyw nhùm mẽ ma o tẽn haxã. ã mẽ ujarênh kot anhýr. Anê.

³⁵ Nhùm pre ã Jejus mẽ ixte hkõt ixpa ho ixpa xwýnhjê mã kapêr anê. Hãmri nê mẽ inhmã:

—Ja pyrà nê koja ixkõt mẽ atõ rý mẽ atõx tanhmã mẽ atomnuj to ka mẽ amnhî tâ omu nê ãm omu nê ho ajamakêtkati kurê kumrêx nê axte kãm ajamaxpêr kêt nê. Te pahi kot mẽhõ nhõ kõt kaxõnh par nê axte kãm hamaxpêr kêeta pyràk. No kot kaj mẽ ã amnhî nhîpêx anhýr kêt nhùm kaxkwa kamã inhõ Paj ja hã mẽ apumu nê te ho pahi tee ri kot amnhî tomnuj xwýnhhta kot amnhî nhîpêx ã omunh nê hã àmnênh nhùm mẽ kot apkati mẽ tanhmã omnuj tota pyràk o mẽ anhîpêx. Anê.

19

Jejus kot mẽ pahte axpên kaga nê mẽ pahkurê

Matêwre 5.31-32; Makre 10.1-12; Rukre 16.18; mãânên Wam Korit 7.10-16

¹ Tã nhùm Jejus mẽ inhmã kapêr pa nê mẽ inhmã anê pa mẽ ixrohã Garirej rùm ixkato nê pyhti pê Jotãw hã rê nê hpãnhã ihkjê hã ri ixpa. Pika pê Jutej kamã. ² Hãmri nhùm mẽ ohtõ nê Jejus pumu nê man mẽ ixwýr mra nhùm mẽ omu

nê mê kām akupým mê à xwýnhjê ho mex. ³ Hāmri nhūm Parijew nhō xwýnh kwýjaja hwýr mra. Héx rom kot kamā hamak nê tanhmā ho kapêr punuj to kaxyw hwýr mra nê kām:

—Pa? Kwa mê inhmā mēmoj jarê. Tanhmā na pre amnepê m finat Mojesja mê pahte mê pahprō kaga hā mê panhīgêjtê mā karō hto? Xà kot mê pahprō pahkwým ri tanhmā amnhī nhīpêx to pu mê hkaga nhūm ja Tirtūm mā mex nê nà? Anê.

⁴ Hāmri nhūm mê kām:

—Nà na ka mê aprī hā Mojes kot tanhmā ja jarênh to mar mex kêt nê. Ja kot anhýr kêt. Amnepê mēmoj piitā hkra x kām na pre Tirtūm my nê nija wa hipêx. Axpên kaxyw wa hipêx. ⁵ Hāmri nê wa hkukamā tanhmā wa kot amnhī nhīpêx to hā wa harê nê wa harênh o:

Koja mēmyjaja hprō kaxyw hāmri nê gryk ā katorxà mê hipêxà wa hkaga nê ām hprō kôt pix mā pa ho pa. Te wa tipxi nê ri wa pa pyrāk o amnhī nhīpêx. Anê.

—Na pre ā Mojes Tirtūm nhý hā mê kām ja jarênh anê. ⁶ Jakamā koja te wa tipxi nê ri wa pa pyrāk o axpên nhīpêx o pa. Tirtūm tām kot axpên mā wa ōr kênā kot kêt wa axtem nê ri htýx ri hamaxpêr nê axpên kaga. Anê.

⁷ Hāmri nhūm mê kuma nê kām:

—Tý. Nom finat Mojes na pre mê pakukamā mê panhīgêjtê mā ā ja hā karō anê nê mê kām:

Kot kaj mê aprō kaga kaxyw hāmri nê ra kêp aprō hkêt ā hā kagā nhīpêx nê kām agō nê amnhī nê hano kê ma tē.

—Anhýr o na pre mê kām hā karō. Tā ka na ka mê ixte axpên kaga hkêt ā mê inhmā karō. Anê.

⁸ Hāmri nhūm mê kuma nê mê kām:

—Tý no ām mê kām Tirtūm kapêr kôt amnhī nhīpêx prām kêt jakamā

na pre ā mê kām ja jarênh anê. No amnepê mēmoj piitā hkra x kām na prem ā amnhī nhīpêx anhýr o pa hkêt nê. ⁹ Jakamā kêr ka mê aprō kaga hkêt nê apa. Kot kaj mê hkaga nê hpānhā nhām mēhō ho aprō nhūm Tirtūm noo mā te ate wam aprō kamā nhām aprō nyw o amnhīkati pyrāk. Tirtūm pê ja omnuj týx nê. Rý koja mēhō hprō kaga ka hpānhā ho aprō nhūm Tirtūm noo mā te ate wam mjên pê ho amnhīkati pyrāk. Ja määnên Tirtūm pê omnuj týx nê. Anê.

Nhūm pre ā Parijew nhō xwýnhjê mā kapêr anê. ¹⁰ Hāmri pa mê ixte hkôt ixpa ho ixpa xwýnhjaja ā kapêr anhýrja ā kuma nê kām:

—Xà na hte mê mjên ra kām mê hprō hkính kêt tā hkaga hkêt nê arī hkôt pa ho pa nhūm hte Tirtūm mā ja mex nê nà? Jakamā kwa xà kot paj mê nhýrmā ixprō kaga pymaj ixprō hkêt kumrêx nê ixpa ho ixpa nhūm ja mê inhmā mex nê nà? Anê.

¹¹ Hāmri nhūm mê inhmā:

—Nà ām hāmri na ka mê ja jarê. No mê ate harênhja na mê piitā mê kām mex kêt. Koja Tirtūm tām amā aprō hkêt ā ajarê ka rī aprō hkêt nê ahte ajamakêtkati nê ri apa. ¹² Na htem piitā hprō nê pa hkêt nê.

Na hte kamā tanhmā mê kute xwýnhjaja kormā hprīre ri tanhmā kute mýrapê kām hprō hprām kêt nê pa.

Nê kamā tanhmā mê ho mýrapê nhūm mê hkurê hkêt nê hprō hkêt nê pa.

Nê kamā mê kām Tirtūm mā tanhmā amnhī to ho pa pix prām xaj kām hprō hprām kêt nê pa.

Tā kot kaj mê jajê pyra nê ā amnhī nhīpêx anhýr prām nê rī kam nê aprō hkêt nê apa. Anê.

*Jejus kot amnhī nê mēhprījê janor kêt ā harênh
Makre 10.13-16; Rukre 18.15-17*

13 Tã nhũm Ijaew kwỳjaja Jejus pumu nê hwỳr mē hkrarejê jamỳ nê mē o mra. Kot mē hã ìhkra jaxwỳr nê mē ho Tìrtũm wỳr kaxyw hwỳr mē o mra. Hãmri pa mē ixte hkôt ixpa ho ixpa xwỳnhjaja tee ri mē omu nê tanhmã nê mē kãm ixkapēr to nê mē kãm:

—Tk. Mo kaxyw na ka mē Jejus wỳr mē o mra? Kormã mē raxre kênã. Kwa mē ma akupỳm mē o mra nã? Anê.

14 Hãmri nhũm Jejus mē inhma nê mē inhmã:

—Kwa nã mē ri inhnê mēhprìjê kurê hkêt nê. Kwār mē mãmri ixwỳr mē o mra. Anê.

Hãmri nê amnhĩ wỳr mē mē kãm hpa ho apê nhũm mē hwỳr mē o mra nhũm mē kuri kuhê nhũm mē omu nê mē hã mē inhmã:

—E mē jarejê pumu. Na htem hamakêtkati nê hkĩnh nê ri pa. Nê mē kãm amnhĩ to rũnh prãm kêt nê. Tã Tìrtũm kôt mē kot amnhĩ nhĩpêx o mē pa xwỳnhjaja te mē kot jajê pyràã nê kãm amnhĩ to rũnh prãm kêt nê pa. Anê.

15 Hãmri nê mē hã ìhkra jaxwỳr nê mē ho Tìrtũm wỳr hãmri nê mē inhmã anê pa mē ma axte mē kurũm mō.

Kàxpore rũnh xwỳnh jarēnh

Makre 10.17-22; Rukre 18.18-23; mãânēn Rômãn 3.19-20; Wam Xi-motre 6.6; Xiakre 2.10

16 Tã nhũm Ijaew òja Jejus wỳr tē nê kãm:

—Pa mē ijahkre xwỳnh? Kwa inhmã mēmoj jarē. Tanhmã kot pa nhỹrmã Tìrtũm ri ixtĩr tũm nê ixpa ho ixpa kaxyw amnhĩ nhĩpêx to wehe? Anê.

17 Hãmri nhũm kãm:

—Tk. Ra Tìrtũm kot nhỹrmã mē atĩr tũm nê apa kaxyw mēmoj tã mē amã karō nhũm ate mar mex kênã kot ka kêt ri axte ja hã ixkukja. Nã Tìrtũmja mex o mex jakamã kot kaj amã kuri atĩr tũm nê apa hprãm hã kot kaj kapēr kôt amnhĩ nhĩpêx no ri apa. Anê.

18 Hãmri nhũm kãm:

—No nhỹ kapēr kôt kot paj amnhĩ nhĩpêx o ri ixpa wehe? Anê.

Hãmri nhũm kãm:

—Na pre mē amã mēmoj tã karō ho:

Kêr ka mē axpēn par kêt nê.

Nê nhãm mē hprō ho amnhĩkati hkêt nê.

Nê mē kēp axàhkĩnh kêt nê.

Nê tanhmã mē ho axêx to hkêt nê.

19 Nê anhĩpêêxã mē akatorxã wa hã apijaãm nê wa ho mex pē wa kutã anojarêt o ri apa.

Nê amã akwỳjê hã ma ho te ka amã amnhĩ tã ma pyràk o mē hipêx. Jao tãm mē hipêx o ri apa.

E kot kaj amã nhỹrmã Tìrtũm kuri atĩr tũm nê apa hprãm hã kêr ka ã amnhĩ nhĩpêx anhỹr o ri apa. Anê.

20 Hãmri nhũm kuma nê kãm:

—Ku nhũm. Ra ã ixte amnhĩ nhĩpêx anhỹr o ri ixpa kênã. Nom te kormã ixtĩr tũm nê ixpa kaxyw ixte tãm kêt pyràk. Kwa axte inhmã mēmoj jarē nã? Anê.

21 Hãmri nhũm kãm:

—Nã kormã mēmoj pyxi nê arĩk.

Na ka amã akukrêx rax prãm tỳx o amã Tìrtũm prãm jakre. Jakamã ma akupỳm tē nê akukrêx rax o wēnê hpa nê hpãnhã kàxpore jamỳ nê ma mē kēp amrakati xwỳnhjê mã òr pa. Hãmri nê rĩ akupỳn ixwỳr tē nê rĩ ixkôt apa ho apa. Anê.

22 Hãmri nhũm kuma nê tee ri amnhĩ kukamã hamaxpēr. Kãm hikukrêx rax japê nê kãm kamã ìhkra karo hprãm kêt nê. Hãmri nê tee ri Jejus kot ã kãm hã karō anhỹrja ma nhũm ja kēp omnuj nê nhũm ma akupỳm htēm kurê kumrêx. 23 Hãmri nhũm Jejus tee ri omu nê mē inhmã:

—Hêxta waa nê. Kojã mē hikukrêx rũnh xwỳnhjaja ohtô nê kãm mē hikukrêx japê xaj Tìrtũm mē wa ixri htĩr tũm nê pa ho pa hkêt nê. Wa ixte amnhĩ nhĩpêxja mē kēp hihtỳx. 24 Mē kãm hikukrêx

rũnh mã ĩhkra karo hprãm kêt rãhã tee ri kãm Tĩrtũm kôt amnhĩ nhĩpêx prãm kaprý. Te ho mēhō kot menh kagō hã hkre nē kãm kagō katōk prãm kêt rãhã kãm guhkrax kãm àr prãm kaprýta pyrāk. Anē.

Nhũm pre ã Jejus mẽ inhmã kapêr anē. ²⁵ Hãmri pa mẽ kuma nē tee ri amnhĩ kukamã ijamaxpêr nē kãm:

—Kwa mẽ ixpiitã mẽ inhmã mẽ ixkukrêx japê kênã. Jakamã xà kot paj mẽ ixpiitã nhỹrmã war ari ixtĩr tũm nē ixpa ho ixpa hkêt nē nà? Anē.

²⁶ Hãmri nhũm mẽ inhmã:

—Nà kot kaj mẽ amnhĩ krã hkôt mẽ amã mẽ akukrêx japêja mã anhũrer kêt nē. ãm Tĩrtũm pix na hte ja kaxyw tanhmã mẽ akrã hto ka mẽ amã akukrêx japê hkêt nē. Jao ra mẽ apê Tĩrtũm mẽ wa ixri atĩr tũm nē mẽ apa ho mẽ apa mã xwýnh. Anē.

²⁷ Hãmri nhũm Simãw Pêtre kãm:

—Kwa no we mẽ pajaja Pahihti? Na pa prem agryk ã mẽmoj piitã hkaga hpa nē akôt ixpa ho ixpa. Jakamã kot paj mẽ nhỹrmã war ari ixtĩr tũm nē ixpa ho ixpa nà? Anē.

²⁸ Hãmri nhũm kuma nē mẽ ixpiitã mẽ inhmã:

—Tỳ. Kot paj nhỹrmã mẽmoj piitã ho nyw pa hãmri nē ixte mẽ ho amnhĩptãr o ixkrĩ xà maati kamã nhỹ nē mẽ piitã mẽ kot tanhmã amnhĩ nhĩpêx to hã mẽ omunh xà hkôt tanhmã mẽ harênh to. Tã mẽ kajaja mẽ ate ixkôt apa ho apa xwýnhjaja kot kaj mẽ inhmã Ijaew kot amnhĩ nhĩpêx ã mẽ omunh xà hkôt ahpýnhã tanhmã inhmã mẽ harênh to. Mẽ mex ã mẽ harē rý mẽ mex kêt ã mẽ harē. Kot kaj mẽ ã inhmã mẽ harênh anē. ãm hãmri na pa mẽ amã ixkapêr anē.

²⁹—Nē ka mẽ atō inhmã tanhmã amnhĩ nhĩpêx to ho apa kaxyw akwýjê re nē ma inhmã mẽmoj to anhỹr o ri apa. Tanhmã anhōrkwý rý atō rý atōx re. Rý aprō nē akrajê

re. Rý akatorxà mẽ anhĩpêxà war are. Rý akukrêx piitã rer pa hãmri nē ma mẽ piitã mẽ kãm ixkapêr o mẽ ahkre ho ri mẽ hkôt apa. Hã kot paj mẽ apumu nē mẽ ato mex rax nē. Hãmri ka mẽ ma mẽ hkôt apa nē mẽ kãm ixkapêr jarênh o apa nhũm mẽ kot mẽ amar xwýnh kwýjaja mẽ ama nē kãm mẽ akĩnh nē. Nē ra mẽ ate akwýjê rer par tã mẽ tãmjaja te mẽ apê mẽ hkra rý mẽ htō rý mẽ htōx pyrāk o mẽ anhĩpêx nē mẽ ato mex o pa. Hãmri ka mẽ nhỹrmã ty nē ma Tĩrtũm mẽ wa inhō krĩ hwýr api nē wa ixkuri amex kumrêx nē atĩr tũm nē apa ho apa. ³⁰ Nom kwa kêr ka mẽ amnhĩ tã ja ma nē amnhĩ to rũnh xwýnh ã amnhĩ kamnhĩx kêt nē. Jar mẽ kot amnhĩ to rũnh ã amnhĩ to jarkrar xwýnhjaja koja mẽ nhỹrmã amnhĩ to hkryre hã amnhĩ pumu. No jar mẽ kot amnhĩ to hkryre xwýnh ã amnhĩ jarênh to rũnh ã amnhĩ pumu. Anē.

20

Jejus kot nhỹrmã hkrajê ho mex ã harênh

Rômãn 9.14-16

¹ Nhũm Jejus arĩ mẽ ixte hkôt ixpa ho ixpa xwýnhjê mã awjarê nē mẽ inhmã:

—Nē kot paj nhỹrmã tanhmã mẽ ato mex to. Te ixpê hpur nhō dōn kot amnhĩ nhĩpêx pyrāk o mẽ anhĩpêx. Koja pur nhō dōnja ihpur kãm mẽmo xō ra hkã hpa nhũm omu hãmri nē kaxyw mẽ àpênh xwýnhjê japêr kaxyw ma gãm tē. Nē gáp xa nē mẽ kãm akir nhũm mẽ hã akuprō. ² Hãmri nhũm mẽ kãm: “E. Kot kaj mẽ jarãhã inhmã ixpur kãm apê. Kot kaj mẽ inhmã axápênh o amýkry pa hpãnhã mẽ kot apkati pixi hã mẽ àpênh pãnhã mẽ kãm amnhĩrer xaja kôt mẽ amã amnhĩre.” Anē hãmri nhũm mẽ kuma nē kãm: “Tōe. Nà kot paj mẽ amã apê.” Anē nhũm pur wýr mẽ

kurê nhùm mē ma kām àpênh mǎ mra.

³—Tǎ nhùm arĩ kÿx mǎ myt tē nhùm pur nhõ dõn akupÿm gàm tē nhùm mē hkwȳja arĩ kuhê. ⁴Nhùm tee ri mē omu nē mē kām: “Kwa mon ka mē axàpênh kêt nē arĩ akuhê? E. Mē ma wamtajê hkõt mra nē inhmǎ apê pa hpānhǎ mē amǎ amnhīrer mex nē.” Anē. ⁵Hāmri nhùm mē kuma nē ma mē hkõt mra. Tǎ nhùm ra myt kaxkwa nhīpók ri ajêt nhùm hpur nhõ dõnja mǎ hkwȳjê ho anē nē. Kê axte mē hkõt jajê jano nhùm mē ma mē hkõt mra. Tǎ nhùm ra myt ahpanh grire nhùm ma akupÿm kêwe gàm tē nē mǎ mē ho anē nē axte mē hkõt jajê rē.

⁶—Tǎ nhùm ra myt grire nhùm ma akupÿm kêwe gàm tē nē jajê pumu nhùm kê wem arĩ gáp kuhê. Hāmri nhùm tee ri mē omu nē mē kām: “Kwa mon ka mē axàpênh kêt nē atÿx gáp akuhê ho akuhê?” Anē. ⁷Hāmri nhùm mē kām: “Nà mēhõ kot mē inhmǎ mē ixàpênh ã karõre hǎ.” Anē. Hāmri nhùm mē kām: “Tõe. Mē ma mē hkõt xpur wÿr mra nē inhmǎ mǎn apê.” Anē hāmri nhùm mē kuma nē ma hkwȳjê hkõt mra.

⁸—Tǎ nhùm ra kamàt. Hāmri nhùm hpur nhõ dõnja kām àpênh xwÿnhjê krǎhtùm wÿr tē nē kām: “E. Ma mē hwÿr tē nē mē kām anē kê mē àpênh kaga nē man akõt mra ka inhmǎ mē kām amnhīre. Nom kêr ka hapu hǎ mē mõr xwÿnhjê kumrêx mǎ amnhīre nē wam mē mõr xwÿnhjê ho hapu nē mē kām amnhīre.” Anē. Hāmri nhùm kām: “Tõe. Nà kot paj mē ho anē.” Anē. ⁹Hāmri nē ã mē kām amnhīrer anē. Hapu hǎ mē mrrar xwÿnhjê kumrêx mǎ amnhīre. Te mē kot kwÿhtǎ àpênh o amÿkry pyrāk o nhùm hpānhǎ mē kām amnhīre. ¹⁰Hāmri nhùm wam mē mrrar xwÿnhjaja ja hǎ mē omu nē hkĩnh nē. Hāmri nē htÿx hamaxpêr o: “Nà kot paj xep kǎxpore jamÿnh rax o mē hakre. Ixàpênh rax o ixte

mē hakrenh kēnǎ.” Anhÿr tǎ no nhùm mē piitǎ mē kām amnhīrer o axpên pyrāk. Ra pur nhõ dõn kot kām hǎ karõ xà hkõt. ¹¹Hāmri nhùm mē hamÿ nē tee ri hkre kamǎ omu nē we ra hpur nhõ dõnja kamǎ gryk nē. ¹²Hāmri nē hwÿr mra nē kām: “Kwa jajaja na mē amǎ àpênh o ore pyxi nē. No kêt mē pajaja na pa mē kwÿhtǎ ixàpênh rax o kamàt. Arĩgro htÿx kām ixàpênh o ixām o ixtǎ kamàt tǎ ka pēr ãm mē inhmǎ amnhīrer o axpên pyrāk. Kwa na ka mē ixtomnuj nē.” Anē. ¹³Hāmri nhùm mē kuma nē mē kām: “Tk. Nà na pa mē atomnuj kêt nē. Na pa kwÿhtǎ tanhmǎ mē amǎ amnhīrer to xà jarê ka mē inhma nhùm ja mē amǎ mex nē ka mē ma hwÿr axàpênh mǎ mra. ¹⁴Kwa mē akǎxpore jamÿ nē ma mra. ãm pa inhmǎ hprǎm xà hkõt na pa ã mē amǎ amnhīrer anē. ¹⁵Ixkǎxpore jakamǎ kot paj nhām inhmǎ mēhõ mǎ õr prǎm xà hkõt kām kugõ. Tǎ ka mē ã mē hǎ ixkamǎ agryk anē. E mē akǎxporeja mÿ nē ma mra.” Anē. Nhùm ã hpur nhõ dõn mē kām kapêr anē. ã mē ujarênh kot anhÿr. Anē.

¹⁶Nhùm pre ã Jejus mē inhmǎ ujarênh anē nē mē inhmǎ:

—Ja pyrǎ nē wam mē ate ixkõt amnhī xunhwÿr xwÿnhjaja nē hapu hǎ mē kot kormǎ ixkõt amnhī xunhwÿr mǎ xwÿnhjaja kot paj nhÿrmǎ mē apiitǎ mē ato mex kumrêx o axpên pyrāk. Anē.

Jejus kot htyk kukamǎ amnhī jarênh

Makre 10.32-34; Rukre 18.31-34

¹⁷Tǎ nhùm Jejus mē inhmǎ anē pa mē ixrohǎ ma Jerujarê hwÿr mõ. Mē ohtõjê hkõt mõ. Hāmri nhùm Jejus mē xipê 12jê mǎ anē nē mē ixkwÿjê hkǎx ã mē inhmǎ kapêr kaxyw ahte hapu hǎ mē ixto mõ. ¹⁸Hāmri nē mē inhmǎ amnhī kukamǎ tanhmǎ amnhī jarênh to nē mē inhmǎ:

—E na pu mē ra Jerujarē hwÿr mō. Kamā koja mē pahkwÿjaja inhîpêx kati nē. Koja mē patre krähtümjê mē Mojes kapêr o mē ahkre xwÿnhjê nhîhkram ijaxà nhÿm mē kot ixpîr kaxyw ixtâ amÿnê. ¹⁹ Koja mē kām ixkurê xwÿnhjaja ixpynê nē Rôm nhō xwÿnhjê nhō pôristijê hwÿr ixto tē nē mē kām tanhmā ixto hêx to. Hāmri nhÿm mē kuma nē mē mar xà hkôt tanhmā inhîpêx to. Nhÿm mē hkwÿjaja ixtâ hpêr o axkê nē ixtâ akunha nhÿm mē hkwÿjaja ixto kapêr punuj nē tanhmā ijaarÿ hto nē ixtak. Hāmri nē ma ixto tē nē pî kahpa hâ inhō nē ixpî. Á koja mē inhîpêx anê. Nom kot paj ixtyk ã ixtâ apkati axkrunêpxi nhÿm Tîrtüm akupÿm ixto ixtîr. Anê.

Xiakre mē Juāw wa katorxà kot wa ho Jesus wÿr ã harênh

Makre 10.35-45; määnen Römân 12.3, 12.10, 12.16; Epes 4.2; Piripos 2.3-8; Xiakre 4.6; Wam Pêtre 5.3

²⁰ Tã nhÿm Jepetew prōja amnhî kôt Jesus wÿr hkra Xiakre mē Juāwja wa o tē. Kot wa ho Jesus wÿr kaxyw hwÿr wa o tē. Mē ixpyrà nē wa kot Jesus kôt pa ho pa xwÿnhjê hō na pre wa nhÿm wa katorxàja Jesus wÿr wa o tē. Hāmri nē kutã hkônkrã ho tēm nē nhÿ ²¹ nhÿm kām:

—Pa mo na? Anê.

Hāmri nhÿm kām:

—Ma ixkrata na pa ixte wa ho awÿr kaxyw awÿr wa o tē. Xê kot kaj nhÿrmã ate mē piitã mē ho amnhîptâr kaxyw nhÿ nhÿm ixkrata wa akutã anhîjê nē wa kêp anhō kôwenatō nē akutã anhîjê nē wa ato nhÿ. Ja prãm xà na pa ã wa ho awÿr anê. Anê.

²² Hāmri nhÿm kuma nē Xiakre mē Juāw wa omu nē wa kām:

—Nà na war akatorxàja htÿx ã war ato ixwÿr anê. Koja mē tokyx ixpî kot paj amnhî xà htÿx kām ijamak kām ty. Tã xà koja mē ixpyrà nē ã war anhîpêx anê ka wa ixpyrà

nē amnhî xà htÿx kamã ajamak rax kām ty nà? Anê.

Hāmri nhÿm wa kām:

—Tÿ. Nà kot pa wa ijaxwÿja anê nē apyrã nē amnhî xà htÿx kām ijamak kām ty. Anê.

²³ Hāmri nhÿm wa kām:

—Nà ãm hāmri na ka wa amnhî jarê. War ate ixpyrà nē ixkôt amnhî xà htÿx kām ajamak kām atyk mã kênã. Tã nom war akatorxà kot war ato ixwÿrta ã kot paj tanhmã war amã nē hkêr nē. Kêr inhō Papaj tãm koja ixkaxyw mēhō japêr nhÿm inhîhkô hâ nhÿ. No pa kot paj amnhî kaxyw mēhō jarênh kêt nê.

Anhÿr o wa kām kapêr. ²⁴ Hāmri pa mē ixte wa uräk nē Jesus kôt ixpa ho ixpa xwÿnhjaja wa katorxà kot ã wa ho Jesus wÿr anhÿrja ã kuma nē wa kamã inhgryk nē. Hāmri nē axpên mã ixkapêr o:

—Tk. Nà koja Juāw mē Xiakre wa nhÿrmã kêp ô kôwenatō nē mē pahto amnhîptâr kêt kumrêx. Anê.

²⁵ Nhÿm Jesus mē inhma nē amnhî wÿr mē ixpiitã mē inhmã hpa ho apê nē mē inhmã:

—E mē amnê ixwÿr axkamê pa mē amã awjarê mân. Anê.

Hāmri pa mē hwÿr axkamê nhÿm mē inhmã:

—E mē inhma. Na hte Ijaew kêt xwÿnhjê nhō pahijaja ã amnhî nhîpêx anhÿr o ri pa nē amarî hkrî xà kamã hkrî ho hkrî. ãhpumunh tÿx jakamã amarî ixkre hkre jakry kamã hkrî ho hkrî nē kām mē ãpênh xwÿnhjê pix mã mēmo mē ãpênh ã karô. Na htem ã amnhî nhîpêx anhÿr o hkrî. Nē mē kot mex ã harênh kaxyw tanhmã mē ho mex to ho pa. ²⁶⁻²⁷ Tã no mē kajaja. Kêr ka mē ho mē uräk kêt nē. ãm te amarî ri mē apa pyrãk o axpên nhîpêx o ri apa. Nē te mē apê mē kām axãpênh xwÿnh pyrãk o amnhî nhîpêx o ri mē hkôt apa. No kêr ka mē ho amnhîptâr mã ajamaxpêr o ri apa hkêr nê. ²⁸ Mē ate mēmoj tã pa ixkutã anojarêr ho apa kaxyw

na pa pre mẽ awỳr ixwryk kêt nê. Ixte amarĩ mêmoj to mẽ kamjaja mẽ akutã inhnojarêt o ixpa kaxyw na pa pre mẽ awỳr wry. Nê mẽ ate ixkôt amnhĩ xunhwỳr xwỳnhjê nê ixytyk kaxyw na pa pre wry. Anê.

Jejus kot no hkre xwỳnh wa ho mex ã harênh

Matêwre 9.27-31; Makre 10.46-52; Rukre 18.35-43

²⁹ Tã pa mẽ Jejus kôt kormã Jerujarê hwỳr ra Jeriko htêp o mō. Hãmri nê kurũm ixkaton mō nhũm mẽ ohtô nê mẽ ixkôt mra. ³⁰ Nhũm pry nhĩhkjê hã no hkre xwỳnh wa ahwỳr o hkrĩ xwỳnhja wa amnhĩ wỳr mẽ inhmrrar mar o nhỹ. Mẽ ohtô nê Jejus kôt mẽ mrrar xwỳnhjê mrrar ma nê mẽ kãm:

—Kwa mo na? Mêmoj wỳr na ka mẽ axohtô nê mra? Anê.

Hãmri nhũm mẽ wa kãm:

—Nã Jejus pê Najare nhõ xwỳnhhta kôt na pa mẽ mra. Anê.

Hãmri nhũm wa mẽ kuma hãmri nê kax pê Jejus mã kapêr nê kãm:

—Pa Pahihti? E apê mẽ inhõ Pahihti mex na ka. Te apê amnepêm anhĩgêt pahihti Tawita pyrãk. Jakamã kwa wa ixkamã axukapri nê akupỹm wa ixto mex. Anê.

³¹ Hãmri nhũm Jejus kôt mẽ mōr xwỳnhjaja wa kuma nê wa kãm:

—Tk. Kwa war akapêr kêt nê nhỹ nã. Anê.

Tã no nhũm wa ãm mẽ kuma nê xatã amnhĩ to kuwỳ. Kax pê amnhĩ to kuwỳ. ³² Hãmri nhũm Jejus wa kuma nê xa nê wa omu nê wa kãm:

—Pa mo na? Tanhmã kot pa wa ato? Anê.

³³ Hãmri nhũm wa kãm:

—Nã akupỹm wa inhmã wa ixrit mex prãm. Anê.

³⁴ Hãmri nhũm kãm wa hkapri nê wa no htok nhũm wa akupỹm rit mex kurê kumrêx. Hãmri nê rit mex ã amnhĩ pumu nê hkĩnh tyx nê ma Jejus kôt hkwyjê hkôt mō.

21

Jejus kot Jerujarê hwỳr ãr ã harênh

Makre 11.1-11; Rukre 19.28-40; Juãw 12.12-19

¹ Tã nhũm Jejus kormã Jerujarê hwỳr kormã mō. Pa mẽ hkôt mō nê ra Petake hwỳr ixãhtêp o mō. Hixêt pê Oriwêhti kahti ri na pre krĩja xa. Jakamã pa mẽ wa hwỳr ixãhtêp o mō nhũm Jejus mẽ ixte hkôt ixpa ho ixpa xwỳnhjê wa ho axkrut nê amnhĩ kukamã wa kumê. ² Nê wa kãm:

—E wa ma krĩ mũj wỳr mẽ ixkukamã wa tẽ. Nê wa hwỳr axã nê nhỹri jumênre mẽ hkra wa kãm ê nê wa ãm xwỳnh wa omu hãmri nê kãm ê xã hpôt nê man akupỹn amnê hamê wa o tẽ. ³ Koja mēhõ ja hã war apumu nê hã tanhmã war amã kapêr to ka wa kãm ã ijarênh anê nê kãm: “Nã mẽ panhõ Pahihti na hã karõ pa wa hwỳr tẽ.” Anhỹr o wa kãm ijarê. Hãmri nhũm war ama nê war amã òr kurê kumrêx. E wa ma hwỳr tẽ. Anê.

⁴ Tirtũm kapêr ã kagã htũm ra kot ja kukamã harênh. Na pre ra Tirtũm nhỹ hã kapêr xwỳnhjê hõ ja jarê nê hã kagã ho:

⁵ Pa Jerujarê nhõ xwỳnhjaja. Kwa mẽ tee ri amnhĩ kukamã ajamaxpêr ho amã ma hkêt nê. Ota mẽ anhõ pahi nywta ra jumênre hã nhỹ nê mẽ awỳr hpõx o tẽ. Te kot amnhĩ to grĩre xwỳnh pyrãk o amnhĩ nhĩpêx nê tẽ.

⁶ Anhỹr o kot hkukamã harênh jakamã nhũm Jejus amnhĩ kukamã ja wa kumê hãmri nhũm wa ma hwỳr htêm kurê kumrêx. ⁷ Nê krĩta wỳr pøj nhũm Jejus kot wa kãm harênh xã hkôt nhũm wa jumênreta pumu. Hãmri nê hamê wa kãm ê xã hpôt nê ma Jejus wỳr wa o tẽ. Hãmri nê kaxyw amnhĩ xê hkwy hkwrỹ nê kãm ho jumênre nywta kô kahty. Nê kãm ho htỹx nê o xa nhũm Jejus hã nhỹ nê hã mō. ⁸ Kormã Jerujarê

hwÿr hixêt ã àpir o mô. Nhũm mẽ kot omunh o kuhê xwÿnhjaja hkĩnh nẽ ma hkukamã pry ho mex kaxyw amnhĩ xê hkwÿptyr ho mô. Nẽ pô hkwyjakà nẽ utyr o mô. ⁹Nhũm mẽ hkwyjaja Jejus kukamã mra nhũm mẽ hkwyjaja hapu hã hkôt mra. Nẽ piitã kax pê Tirtũm mex o mex ã harênh o hkôt mô nẽ harênh o:

Ota Tirtũm kot mẽ pahwÿr mênh xwÿnhhta ra pøj. ãm hãmri na mẽ pahwÿr wrÿ. Ja na mex kumrêx. Kêp mẽ panhõ Pahihti mex na. ãm hãmri na pre Tirtũm mẽ pahwÿr kumê. Tirtũm mex kumrêx. ãm mex o mex.

Anhÿr o Jejus kôt Jerujarê hwÿr harênh o mô. Kot mẽ ho amnhĩptâr kurê kumrêx ã hkamnhĩx jakamã hkĩnh nẽ hkôt ã harênh anhÿr o mô. ¹⁰Hãmri nhũm krĩ nhõ xwÿnhjaja tee ri mẽ kuma nẽ axpên mã:

—Kwa mênhõ na we hpõx o mô nhũm mẽ ã hkôt harênh anhÿr o mô? Anê.

¹¹Hãmri nhũm Jejus kôt mẽ mrar xwÿnhjaja mẽ kuma nẽ mẽ kãm:

—Nã Tirtũm nhÿ hã kapêr jarênh xwÿnh pê Jejus na. Kêp Garirej kamã krĩ pê Najare nhõ xwÿnhhta na. Anê.

Jejus kot Tirtũm nhõrkwy hwÿr àr ã harênh

Makre 11.15-19; Rukre 19.45-48; Juãw 2.13-22

¹²⁻¹³Tã hãmri nhũm Jejus Jerujarê wÿr axà nẽ jumênre rũm wrÿ nẽ ma Tirtũm mã amnhĩ jarênh xà hã ixkre hwÿr tẽ nẽ axà. Hãmri nẽ tee ri mẽ kot tanhmã ixkre kamã amnhĩ nhípêx to hã mẽ omunh o xa. Nhũm mẽ axtem nẽ môx nẽ ôwêhti nẽ tuuti ho wênê ho kuhê. Mẽ kot haprôr nẽ Tirtũm mã amnhĩ jarênh kaxyw kãm hpar nẽ ôr kaxyw mẽ kãm ho wênê ho kuhê. Nom axtem nẽ mẽ kãm hã ohtô rax kãm mẽ kãm ho wênê. Hãmri nhũm Jejus mẽ hwÿr axà nẽ tee ri mẽ omu nhũm ja kêp omnuj tÿx kumrêx. Hãmri nhũm mẽ hwÿr tẽ nẽ mẽ kot

kaxpore ho pinhpanh xwÿnhjê pê mẽ ô mести rênh pa. Nẽ mẽ kot tuuti ho wênê xwÿnhjê pê hkrĩ xà hkujate nẽ rênh pa. Hãmri nẽ mẽ kãm:

—Tk. Kwa Tirtũm kapêr ã kagã htũm kot ixkreja jarênh kot:

Inhõrkwyja ãm mẽ ate inhmã amnhĩ jarênh xà hã ixkre pix kaxyw na.

Anhÿr o kot harênh tã ka mẽ axtem nẽ kamã ã amnhĩ nhípêx anê. E kwa mẽ ajapõx tokyx anê. Anê.

Hãmri nẽ mẽ kator pa nhũm mẽ ma hapêx. ¹⁴Hãmri nhũm mẽ no hkre xwÿnhjaja nẽ mẽ hyk o mẽ pa xwÿnhjaja mra nẽ agjê nẽ Jejus kutã kuhê nhũm mẽ omu nẽ akupÿm mẽ ho mex. ¹⁵⁻¹⁶Hãmri nhũm mênhprĩ hkwyjaja hwÿr mra nẽ kuri kãm mex o mex ã gre nẽ kãm grer o:

Amex kumrêx Pahihti.

Tirtũm na pre mẽ ixwÿr amê.

Kot kaj te anhÿgêt Tawi pyrã nẽ mẽ ixtõ amnhĩptâr o apa.

Anhÿr o kãm grer o kuhê. Hãmri nhũm patre krãhtũm mẽ Tirtũm kapêr tũm o mẽ ahkre ho mẽ pa xwÿnhjaja tee ri ã mẽ grer anhÿr ã mẽ kuma. Nẽ tee ri Jejus kot mẽ no hkre xwÿnhjê mẽ mẽ hyk o mẽ pa xwÿnhjê ho mex ã omunh o kuhê nẽ gryk nẽ Jejus wÿr tẽ nẽ kãm:

—Kwa na mênhprĩjaja mẽ grer kãm ã ajarênh anê ka mẽ mar kêt nẽ? Mẽ grerja mexti hã. Anê.

Hãmri nhũm mẽ kãm:

—Tÿ ixte mẽ mar kênã. Tirtũm kãm hprãm xà hkôt na mẽ ã inhmã inhmex o inhmex ã ixtã grer anê. Tirtũm kapêr ã kagã htũm kot ã mẽ hkukamã harênh kot anhÿr. Mẽ harênh kot:

Koja mênhprĩjaja Pahihti mã mex o mex ã grer o kuhê.

Anhÿr o kot mẽ hkukamã harênh kênã. Tã mãn ka mẽ kormã kamã harênh kêt jakamã na ka mẽ ja jarênh mar kêt nẽ. Kwãr mẽ mãmri ã inhmex ã grer anê.

17 Anhÿr o mē kām kapēr hāmri nē mē inhmā anē pa mē ixkreta rūm ijapōj nē ma akupÿm Petān wÿr mra nē kamā amnhūm hikra.

Jejus kot mēmo hpār mā kapēr ā harēnh

Makre 11.12-14; mǎānēn Xiakre 1.6

18 Tā nhūm kwÿhtā nhūm Jejus kànhmā nhÿ nē mē inhmā anē pa mē ixrohā ma akupÿm Jerujarē hwÿr mra. Hāmri nē kormā mō nhūm Jejus pry kahti ri ra kām prām nē. 19 Hāmri nē mēmo pī pē fikēhti jarēnhja pumu nē kot ô hkwy rēnh nē hkrēr kaxyw hwÿr māt. Hāmri nē tee ri ô japēr nhūm ô hkēt nē ām hô hpix harir. Hāmri nhūm tee ri omu nē kām:

—E kot kaj axte axô hkēt kumrēx.

Anhÿrja o nhūm grā par kurē kumrēx. 20 Hāmri pa mē ixte hkôt ixpa ho ixpa xwÿnhjaja omu nē Jejus mā:

—Kokÿÿ. Kwa tanhmā na we amnhī nhīpēx to nē grā kurē kumrēx? Anē.

21 Nhūm mē inhmā:

—Nā kot kaj mē ixpyrā nē fikēhti kot tanhmā amnhī nhīpēx to kaxyw Tirtūm mā ajamaxpēr tÿx nē nhūm amā hprām xā hkôt amā tanhmā hipēx to. Nom kēr ka mē ajamaxpēr kati ho tee ri hkukamā ajamaxpēr kēt nē. Ām kaxyw Tirtūm kôt ajamaxpēr tÿx nē nhūm mē amā tanhmā mēmoj nhīpēx to. Ām hāmri na pa mē amā ja jarē. No ām ja pix kēt. Kot kaj mē mǎānēn hixēt mÿj mā akapēr nē kām: “E anhÿr xāta rūm akato nē ma tē nē gō rax kām mrō.” Anē nhūm amar xā hkôt ā amnhī nhīpēx anē.

22 —Nē kot kaj mē mēmoj tā Tirtūm wÿ nē kaxyw kām ajamaxpēr tÿx kām hā awÿ nhūm amā mēmoj prām xwÿnhnta gō. Anē.

Mēhō nhÿ hā Jejus kot mē ahkre hā harēnh

Makre 11.27-33; Rukre 20.1-8

23 Nhūm arīgro hō hā nhūm Jejus kēwe axte Tirtūm mā amnhī jarēnh xā hā ixkreja wÿr axā nē kamā mē ahkre ho nhÿ. Mē kām tanhmā mē kot amnhī nhīpēx to nē nhÿrmā Tirtūm mē wa kuri htīr tūm nē pa kaxyw tanhmā mē kām kapēr to ho nhÿ. Hāmri nhūm Ijaew krāhtūmjē mē mē ô patre krāhtūmjaja hāmri hwÿr mra nē hēx rom mēmoj tā hkukja nē kām:

—Kwa mē inhmā amnhī jarē. Mēhō nhÿ hā na ka hte ā amnhī nhīpēx anhÿr o apa? Na ka hte akupÿm mē ho mex o apa nē tanhmā mē ahkre hto ho apa. Xā amnhī krā hkôt na ka hte ā amnhī nhīpēx anē nā? Anē.

24 Hāmri nhūm mē kām:

—Nā kot pa ixkumrēx mēmoj tā mē akukja. Ka mē inhma nē tanhmā inhmā harēnh to pa rī kormā mē amā amnhī jarē. 25-26 Finat Juāw Paxis ā kot paj mē akukja. Mēhō nhÿ hā na pre hte mē hkrā kumrār o pa? Xā amnhī krā hkôt nā? Xā Tirtūm nhÿ hā? E mē atō inhmā ja jarē. Anē.

Hāmri nhūm mē kuma nē tee ri kot tanhmā kutā kām harēnh to hkukamā hamaxpēr pē axpēn pumunh o kuhē nē axpēn mā:

—Kwa tanhmā kot puj wem kām ja jarēnh to? Or mē kot mar o kuhē xwÿnhjaja na htem kēp Tirtūm nhÿ hā kapēr jarēnh xwÿnh ā harē. Tā kot puj mē kām kot amnhī krā hkôt kot mē hkrā kumrār ā harē nhūm mē tee ri mē pama nē mē pakamā gryk tÿx nē. Nē mē paxēx rom ā mē pahte kām pakapēr anhÿr ā mē pahpumu nē kēn o mē pahtak o mē panhūmex. No kot puj mē kām Tirtūm nhÿ hā kot mē hkrā kumrār ā harē hāmri nhūm mē pamā: “Kwa ā kot anhÿr kēnā na ka prem kapēr ma nē hkôt ajamaxpēr kēt nē?” Anē. Jakamā kot puj mē ja pymaj tanhmā kām harēnh to hkēt nē. Kot puj mē ām kām aa te mē pahte ja jarēnh mar kēt pyrāk o harē. Anē.

Mê kot tanhmã Jejus mã nê nhũm kot ta pãnhã tanhmã mẽ kãm nê pymaj nhũm mẽ tee ri kãm tanhmã nê hprãm kaprý o kuhê. ²⁷ Hãmri nê kãm:

—Konên. Mẽ ixte mēhō nhỹ hã kapēr o pa hã omunhre hã. Anê.

Hãmri nhũm mẽ kuma nê mẽ kãm:

—Tk. Tõe kot pa xep ijaxwýja mẽ amã tanhmã amnhĩ jarēnh to hkēt nê. Ijaxwýja ixte mēhō nhỹ hã ã ixte amnhĩ nhĩpêx anhỹr o ri ixpa hã amnhĩ pumunhre hã. Anê.

Mēhō my mẽ hkra wa pijakrut ã wa harēnh

Matêwre 7.21-23; Rukre 7.29-30

²⁸ Hãmri nhũm Jejus axte Ijaew krãhtũmjê mẽ mẽ õ patre krãhtũmjê mã kapēr nê mẽmoj tã kuxi nê tanhmã mẽ kãm ujarēnh to nê mẽ kãm:

—E pa mẽ amã awjarē ka mẽ inhma. Koja mēhō hkra my hamêxkrut. Hãmri nê hkra kot waja mã tanhmã kapēr to nê kãm: “E kēr ka jarãhã ma tẽ nê inhmã pur kãm apê.” Anê. ²⁹ Hãmri nhũm kuma nê pur mã htēm kaga nê hitõt nê. Tãã no ãm hã ahtũmre nê tanhmã hamaxpēr to hãmri nê ma hwýr tẽ nê kamã àpēnh o xa. ³⁰ Hãmri nhũm wa hipêêxãja hpãnhã hkra kot hapu hwýr tẽ nê mã kãm kapēr anê nê kãm: “E kēr ka ajaxwýja atõ hkõt tẽ nê wa inhmã apê.” Anê nhũm kuma nê kãm: “Tõe. Nà kot paj ma tẽ.” Anhỹr tã no ãm hõta kĩnhã htēm kêt nê.

³¹ —Jakamã e. Nhỹ hkra na pre hipêêxã kapēr ma nê hkõt amnhĩ nhĩpêx nê kapēr nhĩrõp ãm kêt nê? Xà kot waja nà? Xà kot haputa? E mẽ atõ tanhmã inhmã wa harēnh to. Anê.

Hãmri nhũm mẽ kuma nê kãm:

—Nà kot wata. Kot wata na hitõt tã tanhmã hamaxpēr to nê ma tẽ nê kãm apê. Anê.

Hãmri nhũm mẽ kãm:

—Tý ãm hãmri na ka harē. No mẽ kajaja te mẽ ate hkra kot haputa

kot amnhĩ nhĩpêx pyrãk. Mẽ ate Tĩrtũm kapēr kõt amnhĩ nhĩpêx o apa hã amnhĩ jarēnh tã hkwým ri amnhĩ nhĩpêx o apa. Te mẽ ate kot hapu kot hipêêxã mã àpēnh ã amnhĩ jarēnh tã kãm àpēnh kêeta pyrãk. No kêt mẽ kot amnhĩ tomnuj o mẽ pa xwýnh kwýjaja na mẽ arom Tĩrtũm kapēr ma nê hkõt amnhĩ nhĩpêx. Jao ra tãm amnhĩ nhĩpêx o pa. Jakamã mẽ arom ma kaxkwa hwýr pa kaxyw ra tãm nê. ãm hãmri na pa mẽ amã ixkapēr. ³² Na ka mẽ finat Juãw Paxis ã ixkukja. Juãw Paxisja na pre hte mẽ ate tãm amnhĩ nhĩpêx ã mẽ amã karõ ho pa. Tã no ka mẽ ãm ama nê ãm ama nê aa kapēr kõt amnhĩ nhĩpêx kêt nê. Nom mẽ kot amnhĩ tomnuj o mẽ pa xwýnh kwýjaja mẽ arom kuma nê Tĩrtũm kõt amnhĩ nhĩpêx. Ka mẽ ja hã mẽ omu nê ãm mẽ omu nê mẽ urãk nê ã amnhĩ nhĩpêx anhỹr kêt nê. Anê.

Mẽ àpēnh punu xwýnhjê jarēnh

Makre 12.1-12; Rukre 20.9-18

³³ Nhũm Jejus arĩ Ijaew krãhtũmjê mẽ mẽ õ patre krãhtũmjê mã kapēr. Nê mẽ kot tanhmã hipêx to hkukamã mẽ kãm tanhmã amnhĩ jarēnh to. No ãm amnhĩ tã kuxi nê mẽ kãm awjarē nê mẽ kãm:

—Koja mēhō mẽ kot kãm pur kãm àpēnh kaxyw hkwyjê mã karõ nhũm mẽ ma hwýr mra nê kamã mẽmo hy hkre nê hkre pa. Hãmri nhũm hpur nhõ dõn nhỹhým no-jarêt nê kãm mẽ àpēnh xwýnhjê mã tanhmã hpur jarēnh to nê mẽ kãm: “E or ixpur nõ. Kê kamã mẽmoj kà hpa ka mẽ mãmri kamã axujamýnh pa nê ho axkjê. Nê ixkutêp inhmã inhõ jaxwý nê mãmri anhõ tanhmã ho hprãm xã hkõt tanhmã ho.”

—Anhỹr o mẽ kãm kapēr hãmri nê ma nhỹhým mõ. ³⁴ Tã nhũm ra pur kãm mẽmoj hkã pa nom nhũm hpur nhõ dõn arĩ krĩ hõ kamã hã ujahkre ho ri pa htã kuri kãm àpēnh xwýnhjê ho axkrunêpxi nê akupým

mê hwÿr mê kurê. Mê kot mê kãm hkwy nhôr nhùm mê ma kot kãm o môr kaxyw nhùm ma mê hwÿr mê kurê. ³⁵ Nhùm mê ma hwÿr mô. Môo nê ra hwÿr pôj nhùm mê amnhî wÿr mê omu nê axtem nê mê homnuj nê. Nê mê unê nê ja tak nê ja pî nê hôja nhùm mê kên o htak hãmri nê amnhî nê wa hano nhùm wa ma akupÿm ý kamã mô. ³⁶ Hãmri nhùm mê ô patrãwja tee ri wa omu nê hamaxpêr o: “Kwa na na mê ixpê inhmã mê apênh xwÿnhjê homnuj tÿx nê. Na kot paj axte mê hwÿr mê hkwyjê rê. Nom hpãnhã mê ho ohtô nê mê kurê. Kê mê ohtô nê mê hwÿr mô nê tâ inhmã inhô hkwy jamÿ nê man ixwÿr o mô.”

—Anhÿr o hamaxpêr hãmri nê mê hwÿr jajê rê nhùm mê ma akupÿm mê hwÿr mô. Nhùm mê amnhî wÿr mê ohtô hã nê mã mê ho anê nê mê hipêx kati nê nhùm mê ý kamã ma ô patrãwja wÿr akupÿm mô. ³⁷ Hãmri nhùm tee ri mê omu nê hamaxpêr o: “Hêxta waa nê. Tanhmã kot paj amnhî nhîpêx to? Na kot paj pêr mê hwÿr ixkraja mãn mê. Inhmã hapê htÿx tâ kot paj mê hwÿr kumê kê ma mê hwÿr mô. Hãmri nhùm mê kêp ixkra hã omu nê tanhmã ixpê ho hkêr nê. Nê tâ inhmã kãm inhôja kwÿgô.” Anê.

—Hãmri nê mê hwÿr kumê nhùm ma mô. ³⁸ Tã hãmri ra mê hwÿr hpôx o mô nhùm mê amÿm amnhî wÿr omu nê kêp hkra hã omu nê axtem nê hã axpên mã amÿnê nê axpên mã: “E onêj hpur nhô dôn krata tẽ. Koja nhÿrmã ô papaj mÿr pê amnhîm hpur ã pykata pytà nê ho ô. Jakamã kwa pu mê hpîr kurê kumrêx nê kêp hpur ho arîk nê ho panhõ. E tokyj pu mê kupî ri.” Anê.

³⁹ —Hãmri nhùm ra tẽ nê mê hwÿr pôj nhùm mê unê nê hpur nê ho kato nê mã ho anê nê kupî. ã mê ujarênh kot anhÿr. Anê.

⁴⁰ Nhùm pre ã Jejus mê kãm ujarênh anê. Hãmri nê hã mê hkukja nê mê kãm:

—E koja pur nhô dônja hkra jarênh ma hãmri nê tãm mê hwÿr mô hãmri nê tanhmã mê hipêx to wehe? Anê.

⁴¹ Hãmri nhùm mê kãm:

—Na koja ma akupÿm mê hwÿr mô hãmri nê mê homnuj tÿx nê mê himex pa. Hãmri nê hpãnhã nhãm hpur ã mêmojê rê nhùm mê tâ katat kôt kãm apênh o pa. Anê.

⁴² Hãmri nhùm Jejus mê kãm:

—Tÿ ãm hãmri na ka ã mê harênh anê. Kot mê ho anhÿr mã tãm kênã. Mãn ka prem ra Tirtùm kapêr ã kagã htùm kot tanhmã ja jarênh toja ma? Harênh kot:

Mê kot kên o amnhîm ôrkwy nhîpêx kaxyw nê kên maati pumu nê htÿx omnuj ã hkamnhîx nê hkagata. Mê kot hkaga htã nhùm Tirtùm mê kurom mex o kot kên piitã hakrenh par ã omunh kurê kumrêx. Tirtùm kot kên maati mex ã harênh xwÿnhhta mê pamã mex o mex.

ã Tirtùm kapêr ã kagã htùm kot ja jarênh kot anhÿr. ⁴³ Ja pyrà nê na pre ra Tirtùm amnhî kaxyw mê apê Ijaew xunhwÿ. Mê apê hkra nê hkôt mê ate amnhî nhîpêx kaxyw amnhî kaxyw mê axunhwÿ. Tã ka mê axtem nê hkaga. Te mê kot kên maati pumunh nê mex kêt ã hkamnhîx nê hkagata pyràk. Jakamã koja mê apãnhã Ijaew kêt xwÿnh kwÿjê xunhwÿ nhùm mê arom hkôt amnhî nhîpêx mex o pa. Jao ra mê kêp hkra nê. Anê.

⁴⁴ Nhùm pre ã Jejus mê kãm te kêp kên maati pyràk o mê kãm amnhî jarênh anê. Hãmri nê axte amnhî tâ kuxi nê mê kãm axte kên jarênh pyràk ã amnhî jarê nê mê kãm:

—Na kot kaj mê atõ ixkaga hãmri nê te mēhõ htÿx htēm nê kên pumunh kêt nê hã htêk nê tēm pyràk o amnhî nhîpêx. Jao

ixkutâ amnhî xãm. Rỳ ka tanhmã ajamxpêr to nê ixkaga nhũm te kên maati kot anhîpy tēm nê axôm par pyrāk o anhîpêx ka mē amex kêt kumrêx. Anê.

⁴⁵ Nhũm pre ã mē kãm ujarênh kãm mē harênh anê. Hãmri nhũm patre krãhtũmjê mē Parijew nhõ xwỳnhjaja tee ri amnhî tã kuma ⁴⁶ nhũm ja mē kêp omnuj tỳx jakamã nhũm mē kãm unênh nê haxàr prãm nê. No mē ãm amnhî tã kãm mē kot mar o kuhê xwỳnhjê puma nê. Mē kurom Jejus kêp Tĩrtũm nhỹ hã kapêr xwỳnh ã hkamnhĩx jakamã nhũm mē kãm mē uma nê. Hãmri nê kormã tanhmã ho hkêt nê.

22

Pahi kot hkra hprõ kaxyw hkwyjê hwỳr ã harênh

Rukre 14.15-24; mãănêñ Wam Korĩt 6.9-11; Epes 5.5-6; Apokarip 19.7-8

¹⁻² Tã nhũm Jejus axte mē kãm awjarê. Ijaew kot Tĩrtũm kaga hã mē kãm hã kuxi nê awjarê nê mē kãm:

—E pa mē amã ahpỳnhã mē kot Tĩrtũm kapêr mar nê tanhmã amnhî nhĩpêx to xwỳnhjê jarê ka mē inhma. Te mē kot pahihti kot hkra hprõ kaxyw nhũm kot amnhî wỳr hkwyjê hwỳr nhũm mē kot harênh mar nê ahpỳnhã tanhmã amnhî nhĩpêx to xwỳnhjaja kot amnhî nhĩpêx pyrāk. Kojã pahihtija hkra hã hkĩnh nê hã apkur mex kaxyw amnhî wỳr hkwyjê hã karõ. ³ Hãmri nhũm kãm mē àpênh xwỳnhjaja ra kot amnhî wỳr mē hã karõ xwỳnhjê hwỳr mra nê mē kãm nojarêt nhũm mē kuma nê ãm mē kuma nê axtem nê mē kêp hitõt nê. Hãmri nhũm mē tee ri mē kuma nê akupỳm tē nê pahihti mã mē harê.

⁴ —Hãmri nhũm tee ri amnhî tã mē harênh ma nê hpãnhã mē hwỳr axtem kãm àpênh xwỳnh kwỳjê rē nhũm mē ma mē hwỳr mra nê mē kãm: “Pa. E kwa mē tokyx. Na ra

pahihti mē akutêp mēõ nhĩpêx pa. Na mē moux kwỳ hpa nê ho àr mex nê. Nê mē akutêp mēmõj nhĩpêx par jakamã e kwa mē tokyx nã.” Anê. ⁵ ã mē kãm kapêr anhỳr tã nhũm mē kuma nê ãm mē kuma nê ma ahpỳnhã nhỹhỹm mra. Nhũm ja ma àpênh mã mra nhũm ja ma ihpur kãm àpênh mã ma tē nhũm ja ma nhỹhỹm mēmõ to wēnê ho tē. ⁶ Nhũm mē hkwyjaja mē kãm ujarênh xwỳnhjê pynê nê mē htak o mē kupa.

⁷ —Hãmri nhũm pahihtija mē harênh ma nê àhkurê nê. Hãmri nê mē hwỳr pòristi hkwy rē nhũm mē ma mē hwỳr mra nê mē unê nê mē kupa nê mē õ krĩ hã hpók pa. ⁸ Hãmri nhũm pahihti kãm mē àpênh xwỳnh kwỳjê mã kãm: “Kwa ra ixte mē kutêp mēõ mex kwỳ xunhwỳr tã nhũm mē ixwỳr mrar kêt nê. Ixtỳx ho mē mex ã mē hkamnhĩx nê amnhî wỳr mē hã karõ no mē mex kêt. Mē kot mē ixkutã apkur mã tãm kêt. ⁹ E kwa mē ma krĩ hkõt axtem mē hkwyjê japêr o mra. Nê nhỹri mēhõ pumu nê kãm awjarê kê man ixwỳr tē nê ixkra hã hkĩnh nê mē ixkutã apku. Mē ã mē kãm axujarênh o amrar anê.” Anê.

¹⁰ —Hãmri nhũm mē kuma nê ma mē hapêr o mra nê mē piitã mē kãm anhỳr o mra. Nhũm mē kuma nê wam tajê rom ma mē hkõt mrar kurê kumrêx. Mē kot amnhî to mex xwỳnhjaja nê mē kot amnhî tomnuj xwỳnhjaja hãmri piitã ma mē hkõt mra. Hãmri nê ixkreja wỳr mra nê hwỳr gjêx kaxyw nhũm mē kãm mē ê mex gõ nhũm mē hagjê hãmri nê kormã mē apkur xã hã ixkre hwỳr agjê nê ho nýt pa. ¹¹ Hãmri nhũm pahihtija mē hwỳr axà nê mē piitã mē omu. Nhũm ja pixi nê axtem nê hkwyjê hkĩnhã mē kot kãm ê mex nhõrja jaxàr kêt rãhã axà nê apkur o nhỹ. ¹² Hãmri nhũm tee ri ja hã omu nê hwỳr tē nê kãm: “Pa. Tk. Kwa na htem ixkrem gjêx

kaxyw nê mē kot mē kām mē ê mex nhôr jagjê nê rî kormā hwÿr agjê nê apku. Tā mon ka akwÿjê hkînhā haxâr kaga? Kwa na htem ā amnhî nhîpêx anhÿr kêt nê.” Anhÿr o kām kapêr nom nhûm kuma nê ām kuma nê tanhmā kutā kām nê hkêt nê. Ām htÿx apkur o nhÿ. ¹³ Jakamā nhûm tee ri omu hāmri nê hā mē kot kām âpênh xwÿnhjê mā amÿnê nê mē kām: “E mē hwÿr tē nê unê nê hpa nê hte hpre nê ma o tē nê kamât kô kamā amê. Kê tee ri mur nê amnhî xā htÿx kamā hamak o amnhî nham o xepên kamnhar tÿx kaprÿ ho nō nê rî amnhî pumu.” Anê. Hāmri nhûm mē kuma nê kām ho anê. Ā mē ujarênh kot anhÿr. Anê.

¹⁴ Nhûm pre Jejus ā mē kām ujarênh anê hāmri nê mē kām:

—Nā Tîrtûm kot pahihita pyrà nê amnhî wÿr mē ho ohtô nê mē hwÿr tã na hte mē piitã hkôt amnhî xunhwÿr kêt nê. Jakamā na hte ām mē ho grêre nê amnhî wÿr mē ho api. Anê.

Parijew nhô xwÿnh kot Jejus kamā hamak ā mē harênh

Makre 12.13-17; Rukre 20.20-26; määnên Rômân 12.1, 13.7

¹⁵⁻¹⁶ Tã nhûm Parijew nhô xwÿnhjaja ā Jejus kot mē kām ujarênh anhÿrja ma hāmri nê kurûm kato nê tanhmā hkukamā xepên mā hā amnênh to. Hāmri nê hwÿr mē hkwÿjê mē Erox kôt mē pa xwÿnh kwÿjê rê. Hêx rom mē kot mēmoj tã hkukjêr kaxyw hwÿr mē kurê nhûm mē ma hwÿr mra nê omu nê kām:

—Kwa Jejus. Nā ām hāmri na ka hte Tîrtûm kapêr o mē ahkre mex o ri apa nê mē kamā akahak o apa hkêt nê. Mē kot tanhmā ato kapêr punuj to htã ka aprî hā mē ahkre mex o ri apa. ¹⁷ E kwa mē inhmā mēmoj jarê. Rôm nhô pahihiti kot mē pahpê Ijaew mē pahte kām kâxpore hkwÿ nhôr ā mē pamā karôta. Kwa xà ja amā mex nà? Xà

kot pu mē kām hkwy gô? Nà xà kot pu mē kām ôr kêt nê? E kwa mē inhmā tanhmā ja jarênh to. Anê.

¹⁸ Nhûm prem ā hêx rom âhkukjêr anhÿr tã no nhûm ra mē hamaxpêr ā mē omu nê mē kām:

—Tk. Kwa mon ka mē ā axêx rom ja hā ixkukjêr anê? ¹⁹⁻²⁰ E mē atô inhmā kâxpore htÿxre hō gô pa omu. Anê.

Hāmri nhûm mē kām ja gô nhûm kupy nê kânhmā mē kām kupê nê mē kām:

—E mēhō nhîxi nê mēhō karô na ja hā? Anê.

²¹ Hāmri nhûm mē kām:

—Pahi Sesti karô nê hixi na hā. Anê.

Hāmri nhûm mē kuma nê mē kām:

—Tÿ. Tô kêr ka mē māmri kām hkwy nhôr o apa. Hā hkarô nê hā hixi. Tām kot hipêx xwÿnh jakamā ô na. No mē kajaja na pre Tîrtûm mē anhîpêx nhûm mē apê ô jakamā kwa kêr ka mē kapêr kôt pix mā ri amnhî nhîpêx o ri apa. Anê.

²² Hāmri nhûm mē amnhî jaêr pê ā kot kâxpore jarênh anhÿrja ma nê axte kām tanhmā nê hkêt nê. Hāmri nê akryk omu hāmri nê ma akupÿm mra.

Akupÿm mē htîr ā mē harênh

Makre 12.18-27; Rukre 20.27-40; Juãw 5.21, 6.39-40; määnên Wam Korî 6.14, 15.12-28; Wam Tesarôn 4.13-18

²³ Tã nhûm Satusew nhô xwÿnh kwÿjaja mē kot akupÿm mē htîr kêt ā mē hkamnhîx kêt xwÿnhjaja na pre mē. Na pre htem mē htyk nê mē hapêx kumrêx ā mē hkamnhîx jakamā xepên mā tanhmā Jejus jarênh to nê xepên mā:

—E kwa pu mē hwÿr mra nê mēmoj xihtÿx ā hkukja. Kê mē pama nê tee ri tanhmā mē pamā kapêr to hkukamā hamaxpêr kaprÿ. Kê mē piitã ja hā omu nê âhpumunh kêt ā omunh kurê kumrêx. E tokyx pu mē hwÿr.

Anhÿr jakamã Parijew nhõ xwÿnhjê pyrà nê hêx rom ma hwÿr mra nê hkukja nê kãm:

24 —Pa Jejus? Kwa mẽ inhmã mẽmoj jarê. Na pre finat Mojesja Tirtùm nhÿ hã ã mẽ panhîgêjtê mã karõ anê. Mẽ hkra hkêt rãhã mẽ pa nê mẽ htyk xwÿnhjaja nhũm mẽ harênh o:

Koja mẽhõ hprõ nê kamã hkra hkêt rãhã pan ty. Hã koja hkôt htõja hpãnhã hprõ ho hprõ nê kamã hkra. Hãmri nhũm kato nê te kêp htõ htyk xwÿnhta hkra pyràk. Anê.

Ã na pre Mojesja Tirtùm nhÿ hã mẽ kãm karõ anê. ²⁵Jakamã kwa ga mẽ ixujarênh ma. Koja mẽ kot axpên to htõ xwÿnhjaja kêp 7. Nhũm kot waja hãmri hprõ nê wa pa nhũm kamã hkra hkêt rãhã ty. Nhũm hkôt htõja hpãnhã ho hprõ ²⁶nê wa axpên to pa. Nhũm mãânên kamã hkra hkêt rãhã ty. Nhũm htõ hõta haxwÿja hpãnhã tãm o hprõ nê we wa axpên to pa grire nhũm haxwÿja kamã hkra hkêt rãhã ty. Hãmri nhũm htõ hkwÿjaja ni pyxi nê axpên pãnhã ho hprõ hpa no mẽhõ kamã hkra hkêt rãhã htyk pa. ²⁷Hãmri nhũm mẽ hprõta mẽ hkôt amnhî to hitep nê ty. ²⁸Tã Tirtùm kot akupÿm nhÿrmã mẽ ho htÿr ronhÿx nhÿ nhÿx kêp nija mjên kumrêx? Ra piitã kot ho hprõ kênã. E mẽ inhmã ja jarê. Anê.

²⁹⁻³⁰Hãmri nhũm Jejus mẽ kuma nê mẽ kãm:

—Nã kaxkwa kamã mẽ kot amnhî nhîpêxja axtem na. Mẽ htÿr ri mẽ kot Tirtùm kôt amnhî xunhwÿr xwÿnhjaja na htem ty hãmri nê Tirtùm nhõ krî kamã axte kãm hprõ hprãm kêt nê pa. Jakamã hprõ hkêt nê pa. Rÿ ni japêr nê mjên kêt nê pa. Nom ri kãm mjên rÿ hprõ hprãm kêt nê pa. Hãmri nê Tirtùm kapêr o mẽ wrÿk xwÿnhjê pyrà nê axte htyk kêt nê. Am htÿr tùm rãhã nê pa ho pa. Pêr mẽ ate Tirtùm kapêr ã kagã htũm mar

mex kêt jakamã na ka mẽ ã ja hã ixkukjêr anê. Tirtùm ãhpumunh tÿx o ãhpumunh tÿx jakamã kumã mẽ ate mẽmoj tã ixkukjêr xwÿnhta na tanhmã kêp kute hkêt. Ra ja kukamã ãhpumunh tÿx kênã.

³¹⁻³²—Nom mẽ ate akupÿm mẽ htÿr kêt ã mẽ hkamnhÿxja kot paj ix-prÿ hã mẽ amã harê. Amnepêm na pre Tirtùm pÿ hpôkja kamã tanhmã Mojes mã kapêr to. Mãn ra mẽ ate mar. Na pre kãm:

Ixpê Apraãw nhõ Tirtùm na pa. Nê mãânên ixpê Apraãw kra Ijak mẽ htãmnhwÿ Jako wa õ Tirtùm na pa.

Anhÿr o Mojes mã amnhî jarê nhũm kuma nê hã kagã. Kêp apu arÿ mẽ htyk rãhã nhÿx pre ã mẽ harênh anhÿr kêt nê. Nhÿx pre mẽ harênh o: “Amnepêm Apraãw nê hkra nê htãmnhwÿ mẽ htÿr ri ixpê mẽ õ Tirtùm na pa pre.” Anhÿr o nhÿx pre mẽ harê. Nom na pre ã amnhî jarênh anhÿr kêt nê. Mẽ pamã te Apraãwja mẽ htyk nê mẽ hapêx pyràk. Nom nhũm prem ra Tirtùm ri ra akupÿm htÿr nê mex nê pa ho pa. Tã ka htem Tirtùm kapêr kwÿm ri akupÿm mẽ htÿr kêt ã mẽ harênh o apa.

Anhÿr o Satusew nhõ xwÿnhjê mã kapêr. ³³Hãmri nhũm mẽ kot mar o kuhê xwÿnhjaja amnhî jaêr pê kot mẽ ahkreja ma.

Tirtùm kapêr maati jarênh

Matêwre 10.37; Makre 12.28-34; Rukre 10.25-28; mãânên Wam Juãw 5.3

³⁴Tã nhũm Parijew nhõ xwÿnhjaja Satusew nhõ xwÿnhjê jarênh ma. Mẽ kot tee ri kãm hamaxpêr o Jejus jakrenh prãm kaprÿ hã mẽ harênhja ma hãmri nê axpên wÿr akuprõ nê Jejus wÿr mra. Kot mẽ urãk nê hêx rom ãhkukjêr nê hamaxpêr o hakrenh kaxyw hwÿr mra. ³⁵Hõja kêp Tirtùm kapêr tùm o mẽ ahkre o mẽ

pa xwýnh jakamã hêx rom kamã hamak kaxyw kãm kapêr nê kãm:

³⁶ —Kwa Jejus. Ot pa mē awýr mra. Kwa mē inhmã mēmoj jarê. Na pre Tirtüm ahpýnhã mēmoj to 10 nê hã mē pamã karô. Mē pahte hkôt amnhĩ nhĩpêx kaxyw hã mē pamã karô. Tã nhỹ kapêr na mex o kot hkwy jakrenh wehe? Anê.

³⁷ Hãmri nhũm kuma nê mē kãm: —Nã kot mē pamã hã karô kot:

Kêr ka mē anhĩ piitã ho amã Tirtüm kĩnh týx o apa. Mē amã hkĩnh týx o mēmoj piitã hakrenh par o apa.

³⁸ E Tirtüm kot mē pamã hã karô ja na mex o piitã hakrenh par. ³⁹ Nê hkôt ja:

Kêr ka mē amã akwýjê hã ma ho te ka amã amnhĩ tã ma pyrãk. Jao ra tãm mē hipêx.

⁴⁰ ã Tirtüm kapêr ã kagã htüm kot mē pamã hã karô kot anhýr. ã mē pahte amnhĩ nhĩpêx anhýr o papaja na Tirtüm kãm hprãm týx kumrêx. Kot kaj mē ja wa hkôt amnhĩ nhĩpêx rãhã ho ri apa nê mãânên ra Tirtüm kot mē pamã mēmoj tã karô xwýnh piitã hkôt amnhĩ nhĩpêx. Ja na pre Mojes mē Tirtüm nhỹ hã kapêr xwýnhjaja amnepêem Tirtüm nhỹ hã mē panhígêjtê mã hã karô ho pa. Anê.

Jesus kot amnhĩ tã mē hkukjêr ã harênh

Makre 12.35-37; Rukre 20.41-44; mãânên Rôman 1.3-4

⁴¹ Nhũm Parijew nhõ xwýnhjaja arĩ Jejus mar o kuhê nhũm amnhĩ tã tanhmã mē hkukjêr to. Nom te nhãm mēhõ hã mē hkukjêr pyrãk o mē hkukja nê mē kãm:

⁴² —E mē inhmã mēmoj jarê. Tanhmã na ka htem axpên mã Tirtüm kot mē akaxyw ãm mã xwýnhhta jarênh to? Kêp mēhõ kanrêhã htãmnhwý koja wehe? Anê.

Hãmri nhũm mē kãm:

—Nã koja kato nê kêp pahi finat Tawi kanrêhã htãmnhwý koja.

⁴³ Anê nhũm Jejus mē kuma nê mē kãm:

—Tý. ãm hãmri na ka mē harê. No mo na htem axpên mã kêp pahi Tawi hkanrêhã htãmnhwý pix ã harê nê mãânên kêp õ pahihti hã harênh kêt nê? Tawi na pre Tirtüm Karô nhỹ hã tanhmã harênh to nê harênh o:

⁴⁴ Na pre Tirtüm inhõ Pahihti mã ã kapêr anê nê kãm: “E amnê ixwýr tẽ nê inhĩkhõ hã nhỹ nê inhmã mē ho amnhĩptãr o akrĩ. Kot paj mē kot kãm akurê xwýnh piitã mē unênh pa nê awýr mē o mra nê anhĩhkram mē haxãr pa.” Anhýr o pre kãm kapêr.

⁴⁵ ã Tawija Tirtüm kot Kris mã kapêr jarênh nê kêp õ pahi hã kagã anê. Mē kajaja na ka htem ãm kêp Tawi tãmnhwý pix ã axpên mã harênh o ri apa. No kêt Tawija na pre kêp õ Pahihti hã harênh o pa. Anê.

⁴⁶ Hãmri nhũm mē kuma nê tee ri kot tanhmã kutã kãm kapêr to hkukamã hamaxpêr nê axte mēmoj tã hkukjêr kêt nê. Tanhmã kot mē amnhĩ to nê hamaxpêr o hakre? Na prem tee ri kãm hamaxpêr o hakrenh prãm kaprý. Jejus mēmoj piitã hkukamã ãhpumunh týx o ãhpumunh týx.

23

Jesus kot tanhmã Parijew nhõ xwýnhjê jarênh to

Makre 12.38-40; Rukre 11.43-46, 20.45-47

¹ Tã nhũm Jejus mē ixte hkôt ixpa ho ixpa xwýnhjê mē mē kot mar o kuhê xwýnhjê mã kapêr nê mē inhmã tanhmã Parijew nhõ xwýnh mē Mojes kapêr o mē ahkre xwýnhjê jarênh to nê mē inhmã:

² —Nã Parijew nhõ xwýnh mē Tirtüm kapêr tùm o mē ahkre xwýnhjaja na htem hprĩ hã Tirtüm

kapêr ã kagà htùm mar mex nê.
³ Jakamã kêr ka mê mar tỳx nê
 mê kot ho mê ajahkre kôt amnhĩ
 nhĩpêx. No mê kot amnhĩ nhĩpêxja
 kêr ka mê hkôt amnhĩ nhĩpêx kêt
 nê. Mê kot Tĩrtùm kapêr tùm o mê
 ajahkre htã hkôt amnhĩ nhĩpêx kêt
 nê. ⁴ Te mê kot mēhō kot mê katut
 ã mê kãm mê jênh pytĩ janhōr tã
 no ãm mê kuxwar hkwȳ htur kêt
 kot amnhĩ nhĩpêx pyrãk o na htem
 amnhĩ nhĩpêx o pa. Jao mê amã
 mēmoj tã karō nê mê amã: “E kêr ka
 mê ã amnhĩ nhĩpêx anê ã amnhĩ
 nhĩpêx anê.” Anhỹr pix o mê amã
 kapêr o pa. Nom mê tãmjaja amnhĩ
 kapêr kôt amnhĩ nhĩpêx kêt nê.

⁵ —Na htem hkwȳjê kot mê
 omunh nê mê kot amnhĩ to mex
 ã mê harênh kaxyw mê noo mã
 tanhmã amnhĩ nhĩpêx to. Nê mê
 mê noo mã mê ê mex pix kãm
 pa. Nê amnhĩm Tĩrtùm kapêr ã
 kagà htùm kwý hã kagà nê amnhĩ
 nhōkrã hã hanhō nê amnhĩ pa hã
 hanhō nê hã pa. Mê kot hã nohtỳx
 rãhã hã mê hkamnhĩx kaxyw nhũm
 htem ã amnhĩ nhĩpêx anhỹr o
 pa. Nê mê kãm mê piitã mê kot
 amnhĩm mê rũnh ã mê harênh o
 paja nhũm htem kãm hprãm.

⁶ —Nê mê pahpê Ijaewjê nhō
 Tĩrtùm kapêr o mê ahkre xà hã
 ixkre kamã mê kot amnhĩ to rũnh
 xwýnhjê hkrĩ xà mex pix kamã
 kãm hkrĩ hprãm. Nê mēmoj tã
 mê apkur xà mex ã arĩgro hã
 nhũm htem ma mê apkur xà hã
 ixkre hwýr akuprō nhũm mê kot
 amnhĩ to rũnh xwýnhjê hkrĩ xà mex
 pix kamã kãm hkrĩ hprãm. ⁷ Nê
 nhỹri pry hã mra nhũm mê kot
 mê omunh nê mê kêp mê ahkre
 xwýnh maati hã mê hã hpijaãm
 kãm tanhmã mê kãm kapêr mex
 toja nhũm htem kãm hprãm. ã na
 hte Parijew nhō xwýnh mê Tĩrtùm
 kapêr tùm o mê ajahkre xwýnhjaja
 hêx rom mê anoo mã amnhĩ nhĩpêx
 anhỹr o pa.

⁸⁻¹⁰ —No mê kajaja. Kêr ka mê ho

mê urak kêt nê. Kê mê axpên mã
 mê ajarênh o: “Pahi Maati” anhỹr o
 mê ajarênh kêt nê. Rý mê ajarênh o:
 “mê ajahkre xwýnh maati” anhỹr o
 axpên mã mê ajarênh hkêt nê. Kêt
 paxipix na pre Tĩrtùm mê akaxyw
 ixãm jakamã paxipix na ixpê mê
 anhō Pahi Maati. Nê paxipix na
 ixpê mê ajahkre xwýnh maati. No
 mê kajaja ixkôt mê apê axpên to
 atōx nê atō na ka mê.

—Nê kêr ka mê ri axpên jarênh
 o: “Mêpahpãm” anhỹr kêt nê. Kêt
 kaxkwa kamã na Mêpahpãmja.

¹¹⁻¹² —Nê kot ka mê amnhĩ to rax
 prãm xaj tanhmã amnhĩ to jarkrar
 to ho apa htã no nhũm akwýjaja
 ama nê ãm ama nê akôt hamaxpêr
 kêt nê. No kot kaj mê piitã mê kutã
 tanhmã anojarêt to ho apa nhũm
 mê amnhĩ tã mê apumu nê axpên
 mã mê amex ã mê ajarê. Jakamã
 kot kaj mê amã mê piitã mê kot mê
 amex ã mê ajarênh prãm hãmri nê
 ri mê piitã mê kãm tanhmã amnhĩ
 nhĩpêx to pè mê kutã anojarêt rãhã
 ho ri apa. Anê.

*Jejus kot mê hkwȳjê mã kapêr tỳx
 ã harênh*

*Makre 12.40; Rukre 11.39-52,
 20.45-47*

¹³⁻¹⁴ Tã nhũm Jejus hpãnhã Par-
 ijew nhō xwýnh mê Tĩrtùm kapêr
 tùm o mê ahkre ho mê pa xwýnhjê
 mã kapêr. Nê mê kãm kapêr kãm
 hihtỳx nê mê kãm:

—E mê apê Parijew nhō xwýnh
 mê Tĩrtùm kapêr tùm o mê ahkre
 xwýnhjaja. E mê inhma. Kot kaj
 mê amex kêt nê. Mê apê mê no
 kupyw xwýnh na ka mê. Nê mê amã
 Tĩrtùm kôt amnhĩ nhĩpêx prãm kêt.
 Nê nhỹrmã atyk nê mê amã õ krĩ
 hwýr axàpir prãm kêt. Nê akwýjaja
 kot hwýr àpir pymaj na ka htem
 akwýjê nê tanhmã mê kãm axêx to
 ho apa. Mê kot mê apyrã nê Tĩrtùm
 kapêr kwým amnhĩ nhĩpêx prãm
 xaj na ka htem amnhĩ mê tanhmã
 mê kãm axêx to ho ri apa. Jao te

mê ate mê kêp Tirtûm nhô krî hwÿr kahêxà kahê htÿx pyrâk o apa.

¹⁵—Nê mê akwÿjaja kot mê akôt amnhî xunhwÿr nê mê akôt amnhî nhîpêx prâm xà na htem ma awryr hâ nhÿhÿm tanhmâ mê kâm ri axujarênh to ho ri apa. Jakamâ nhûm mêhō mê ama nê mê akôt amnhî xâm hāmri nê ra amnhî tomnuj tÿx o mê ajakre. Jakamâ koja mê nhÿrmâ mê apyrâ nê ma mê kot amnhî xà htÿx kamâ hamak tûm xâta wÿr pa. Jakamâ kwa mê o kora. Kot kaj mê amex kêt nê.

¹⁶—Hêxta waa nê. Mê apê Parijew nhô xwÿnhjê mê mê apê Tirtûm kapêr tûm o mê ahkre xwÿnhjaja kot kaj mê amex kêt kumrêx. Na ka htem mê kêp mê hikâxpore jamÿnh prâm xàj atÿx ri tanhmâ mê ahkre hto ho apa nê mê kâm: “Kot kaj mê âm hāmri mêmōj tâ amnhî jarênh kaxyw hāmri nê Tirtûm mǎ amnhî jarênh xà hâ ixkre nhîxi jarênh kôt mêhō mǎ amnhî jarê nhûm ama nê hamaxpêr o: ‘Ko. Apu âm hāmri na inhmâ amnhî jarê rÿ ko na apu âm amnhî to hêx.’ Anhÿr o hamaxpêr. Nom kot kaj mê ixkreta ho mex kaxyw mê kâm kâxpore hkwy gō hāmri nê ate mê kâm ôr xâta jarênh kôt âm hāmri mêmōj tâ mêhō mǎ amnhî jarê. Hāmri nhûm ama nê hamaxpêr o: ‘Nà âm hāmri na âm inhmâ amnhî jarênh anê. Kot ixkre ho mex kaxyw kâxpore hkwy nhôr kôt âm amnhî jarênh anê. Jakamâ na amnhî to hêx kêt nê.’” Anhÿr o hamaxpêr. Na ka htem âm mêmōj tâ amnhî jarê nê ho axêx kêt nê. ¹⁷Nom mê ate mê ahkreta mex kêt. Pêr mê ajamaxpêr mexti hâ. Tirtûm mǎ amnhî jarênh xà hâ ixkreta mex o ixkre ho mex kaxyw kâxpore nhôrta jakrenh. Tâ ka htem axtem nê mê kot kâm kâxpore nhôrta mex o ixkre jakrenh âm harê. No mê pahte âm hāmri mêmōj tâ amnhî jarênh nê aa paxêx kêt rāhâ ho papaja na Tirtûm kâm hprām.

¹⁸—Nê na ka htem mê kêp mê

hikukrêx jamÿnh prâm xàj âm atÿx ri mê ahkre anê nê mê kâm: “Kot kaj mê âm hāmri mêmōj tâ amnhî jarênh kaxyw nê Tirtûm mǎ mêmōj nhôr xà hâ mêtija jarênh kôt mêhō mǎ tanhmâ amnhî jarênh to. Hāmri nhûm mê ama nê hamaxpêr o: ‘Nà âm hāmri na inhmâ amnhî jarê rÿ ko na apu âm inhmâ amnhî to hêx.’ Anhÿr o hamaxpêr. Nom kot kaj mê Tirtûm mǎ mêmōj nhôr xà hâ mêtija âm kâm mêmōj xi. Hāmri nê ra mê ate kâm ôr xâta jarênh kôt âm hāmri mêmōj tâ mêhō mǎ amnhî jarê. Hāmri nhûm ama nê hamaxpêr o: ‘Nà âm hāmri na âm inhmâ amnhî jarênh anê. Kot Tirtûm mǎ mêmōj nhôr âm amnhî jarênh kôt kot amnhî jarênh anhÿr jakamâ na amnhî to hêx kêt nê.’ Anhÿr o hamaxpêr.” Anê. Na ka htem âm mêmōj tâ amnhî jarênh kôt kot amnhî jarênh anhÿr jakamâ na amnhî to hêx kêt nê. ¹⁹Mê ajamaxpêr kêt xwÿnh na ka mê. Tirtûm mǎ mêmōj nhôr xà hâ mêtija na mex o mê kot hâ kâm mêmōj nhôrta jakrenh. Tâ na ka htem axtem nê mê kot hâ kâm mêmōj nhôrta mex o mêtija jakrenh âm harê. ²⁰Nom Tirtûm mǎ mêtija mê mê kot hâ kâm mêmōj nhôrta te kot axpên pyrâk jakamâ kot kaj mê mêtija jarênh kôt mêmōj tâ amnhî jarê nê mǎânên mê ate hâ Tirtûm mǎ mêmōj xirja jarênh kôt amnhî jarê. Hamê wa kot axpên pyrâk jakamâ hamê wa harênh pê amnhî to axêx kêt nê. Jakamâ kêr ka mê mêmōj tâ amnhî jarênh kaxyw nê hamê wa harênh kôt âm hāmri mêmōj tâ amnhî jarê nê ho axêx kêt nê. ²¹Tâ kot kaj mê âm hāmri amnhî jarênh âm mêmōj tâ amnhî jarênh kaxyw nê Tirtûm mǎ amnhî jarênh xà hâ ixkre hkôt hâ amnhî jarê nê mǎânên Tirtûm kêp ixkre hpâm kôt hâ amnhî jarê. Jakamâ kêr ka mê hamê wa harênh pê amnhî to axêx kêt nê.

²²—Nê kot kaj mê âm hāmri amnhî jarênh âm mêmōj tâ amnhî jarênh kaxyw nê kaxkwa jarênh kôt

amnhî jarênhja o määñen kaxyw kaxkwa kamã Tirtüm krî xà maati hkôt amnhî jarê. Nê määñen Tirtüm kôt amnhî jarê. Jakamã kwa hamê wa harênh pê amnhî to axêx kêt nê.

23 —Hêxta waa nê. Mê apê Parijew nhõ xwýnh mê mê apê Tirtüm kapêr tùm o mê ahkre xwýnhjaja kot kaj mê amex kêt nê. Mê ate mê no kupyw xwýnh na ka mê. Na ka htem Tirtüm kapêr piitã hkôt amnhî nhîpêx kêt nê ãm hkwy kôt pix mã amnhî nhîpêx o ri apa. Na ka htem ãm kapêr o hpýnhre nê hkôt amnhî nhîpêx ã amnhî pumu nê ate amnhî to mex xwýnh ã amnhî jarênh o apa. No Tirtüm kãm hprãm xà piitã hkôt amnhî nhîpêx kêt nê. Mê ate tãm mê hipêx nê mê ho mex nê mê kamã axukaprî hã kot mê amã karôja. Nê mê amã Tirtüm kînh ã kapêr kôt amnhî nhîpêx hã karôja ra mê ate mar tã hkôt amnhî nhîpêx kêt nê. Mê ate kapêr piitã hkôt amnhî nhîpêx ronhÿx ja mê amã mex o mex. 24 Mê ate ãm kapêr o hpýnh nê hkôt amnhî nhîpêx jakamã te mê ate atÿx ri tanhmã axàpkur to ho mê akrî pyrãk. Jao te mê axàpkur xà hã mêõ kamã pure pumunh nê nê hanhir nê rênh tã määñen kamã kên rax pumunh tã nê hanhir nê rênh kêt rãhã hkur pyrãk. Jao Tirtüm kapêr o hpýnhre nê hkôt amnhî nhîpêx no piitã hkôt amnhî nhîpêx kêt nê. Pêr mê ajamaxpêr kêt tã na ka htem atÿx mê ahkre ho ri apa.

25 —Hêxta waa nê. Mê apê Parijew nhõ xwýnh mê mê apê Tirtüm kapêr tùm o mê ahkre xwýnhjaja kot kaj mê amex kêt nê. Mê ate mê no kupyw xwýnh na ka mê. Nã mê apê Parijew nhõ xwýnhjaja te mê ate mê kot apkur kaxyw prat kre kuhõnh punuj tã mex ã harênh nê kamã apkur pyrãk o na ka mê. Jao ãm mê akrãhkã rùm pix mã mê amex. Nê mê noo mã te mê amex

pyrãk no mê anhõxãhkre kaxwýnh kãm mê ajamaxpêrja mex kêt. Mê akapêr prãm nê mê axãhkurê nê mê anhõxÿÿ. 26 Mê ajamaxpêr mex kêt kênã. Kwa kêr ka mê tãm ajamaxpêr o tãm akwÿjê nhîpêx o ri apa. Nê axãmnhîx ri mê kêp amrakati xwýnhjê mã mêmoj nhõr o ri apa. Kot kaj mê ã amnhî nhîpêx anê nhùm Tirtüm ja hã mê apumu nê amnhîm mê amex ã mê ajarê. No na ka htem amã mê amnhî to mex prãm xaj ãm tee ri amnhî kuhõnh japjê kaprÿ.

27 —Hêxta waa nê. Mê apê Parijew nhõ xwýnhjê mê mê apê Tirtüm kapêr tùm o mê ahkre ho mê apa xwýnhjaja kot kaj mê amex kêt nê. Te mê ate mê htykjê jagjênh xà pyrãk. Na htem mê hagjênh xà ho mex o pa nom kamã mê hi nê ahpunuj pix. 28 Ja pyrã nê ã mê ate amnhî nhîpêx anhÿr. Kapôt rùm mê anhîja na mex. Te mê ate mê ho mex o apa pyrãk o na ka htem amnhî nhîpêx nhùm mê ãm akrãhkã pix pumu nom ãm mê akrã hi kaxwýnh kãm mê ajamaxpêr punuj rãhã hã mê apumunh kêt nê. Mê ate tanhmã mê no kupyw to pix kukamã ajamaxpêr jakamã te mê ate mê htykjê jagjênh xà pyrãk.

29-30 —Hêxta waa nê. Mê apê Parijew nhõ xwýnh mê mê apê Tirtüm kapêr tùm o mê ahkre xwýnhjaja kot kaj mê amex kêt nê. Mê ate mê no kupyw xwýnh na ka mê. Na ka htem ma mê hã pika hwÿr apa nê Tirtüm nhÿ hã kapêr o mê pa xwýnhjê hã pika ho mex. Nê mê kot amnhî to mex xwýnhjê hã pika ho mex. Nê axpên mã mê harênh o: “Hêxta waa nê. Na pre amnepêm mê pakukamã mê panhîgêjtaja Tirtüm nhÿ hã mê kãm kapêr xwýnhjê homnuj nê mê kupa. No kêt mê papajaja mê kamã ri papa ronhÿx pu prem mê urãk nê ã mê hipêx anhÿr kêt nê.” Anhÿr o axpên mã mê hkaprî ho ri apa.

31-32 Nom ãm amnhĩ to axêx. Mê ate ã amnhĩ nhĩpêx anhÿr o apa kênã. ã mê ate amnhĩ nhĩpêx anhÿr jao ra apê mê hkanrêhã mê hkra kumrêx ã amnhĩ to amnhĩrĩt mex o apa. ³³ Te mê ate kagã xoprê kot mê hkamnhar nê mê homnuj tÿx pyrãk jakamã koja Tĩrtũm nhÿrmã ma mê kot amnhĩ xã htÿx kamã hamak tũm xãta wÿr mê ajano ka mê ma hwÿr ajapêx. Hãmri nê tee ri amã ajapôx prãm kaprÿ nê rĩ amnhĩ pumu.

³⁴—Kot paj nhÿrmã ma mê awÿr inhÿ hã ixkapêr jarênh o mê pa xwÿnh kwÿ rê. Nê inhÿ hã mê ãhpumunh xwÿnh kwÿ rê. Nê ixkapêr o mê ahkre xwÿnh kwÿ rê. Nom kot kaj mê ãm mê kapêr ma nê apê mê hprãm nõkati nê tanhmã mê homnuj tÿx to ho apa. Nê ixpê mê hkwyjê hpar o apa. Jao pĩ kahpa hã mê hanhôr o mê hkwyjê hpa. Nhũm mê hkwyjaja Tĩrtũm kapêr o mê ahkre xã hã ixkre kamã mê ahkre ho hkrĩ ka mê omu nê mê unê nê ixkreja kamã mê htak. Hãmri nhũm mê apymaj nhãm ahpÿnhã krĩ hkwy hwÿr hprôt nê mra. ã kot kaj mê inhÿ hã ixkapêr jarênh xwÿnhjê nhĩpêx anhÿr o apa. ³⁵⁻³⁶ Na prem ra mê himex rax nê. Amnepem panhĩ kator krax rũm Atãw kra Apewta na pre Tĩrtũm nhÿ hã kapêr o pa nhũm htôja kãm mar prãm kêt nê kupĩ. Tã nhũm Tĩrtũm axte mê hwÿr ÿ hã kapêr o mê pa xwÿnh kwÿjê rê nhũm prem mã mê ho anê nê mê hkwyjê nhĩmex. Nhũm pre xatã mê hwÿr mê hkwyjê rê nhũm mê xatã mê kupa. Apew rũm Parakis kra Jakaris wÿr na prem mê himex rũnh nê. Hãmri nhũm prem Tĩrtũm mã amnhĩ jarênh xã hã ixkre kamã Jakarisja pĩ. Tã mê kajaja mê ate mê urãk nê mê amã Tĩrtũm kapêr mar prãm kêt nê mê urãk nê amã Tĩrtũm nhÿ hã kapêr xwÿnhjê nhĩmex prãm nê. ã mê ate mê anhĩgêjtê pyra

nê mê hipêx anhÿr mÿrapê koja Tĩrtũm mê apê mê hkanrêhã mê hkra nê mê htãmnhwÿjaja mê ato hpimràatã tanhmã mê ato htÿx to ka mê amnhĩ xã htÿx kamã ajamak rãhã ho ri apa. Anê.

Jejus kãm Jerujarê nhõ xwÿnhjê japê htÿx ã harênh

Rukre 13.34-35; mããnen Rõmãn 11.25-27

³⁷ Hãmri nhũm Jejus te ra kot Jerujarê nhõ xwÿnhjê pumunh nê mê kãm kapêr pyrãk o tanhmã kapêr to ho xa. Nê mê kãm:

—Hêxta waa nê Jerujarê nhõ xwÿnhjaja. Tĩrtũm kot xatã mê awÿr ÿ hã kapêr jarênh xwÿnhjê rênh nhũm mê kot mê akôt mê amã kapêr jarênh o pa htã ka mê kapêr mar kêt kumrêx. Nê axtem nê kên o mê htak o mê himex o apa. ã na ka htem amnhĩ tomnuj o apa anê. Tã nom arĩ inhmã mê ajamãr o ri ixpa hprãm. Te ho krãhyre kot nore hpro nê ho hikwÿ pyrãk o na pa inhmã mê anhĩpêx prãm nê. Nom mê amã ixprãm nõkati nê mê ate ixkaga kumrêx. ³⁸ Mÿrapê koja Tĩrtũm mê anhõ krĩ jamãr kêt nê. ³⁹ Kot paj tokyx ty nê mê api-itã mê are nê ma akupÿm api ka mê axte ixpumunh kêt nê. ãm akupÿn ixwrÿk xã hã arĩgrota pix ã koja mê akwÿjaja mê amÿrpê krĩ ja kamã ixpôx ã ixpumu. Hãmri nê mê akurom ixpumu nê hkĩnh tÿx nê. Nê tã ixkôt amnhĩ xunhwÿr kurê kumrêx. Hãmri nê axpên mã ijarênh o:

Ota Tĩrtũm kot mê pahwÿr mênh xwÿnhnta wrÿ. Nã ãm hãmri na mê pahwÿr wrÿ. Ja mex o mex.

Koja mê ã axpên mã ijarênh anê. Anê.

24

Jejus kot mê pakukamã mẽmoj jarênh

Makre 13.1-13; Rukre 21.5-19; mããnen Wam Ximotre 4.1-3; Sikũn

Ximotre 3.1-9; Apokarip 6.1-17

¹ Tã nhũm Jejus Tirtũm mã amnhĩ jarênh xà há ixkre rùm kato nê ma tê. Pa mê ixte hkôt ixpa ho ixpa xwýnhjaja kormã ixkreja pumunh o ixkuhé nê kãm harê nê kãm:

—Kwa Pahihti. Hêxta waa nê. Ixkreja âm mex kumrêx. Anê.

Hãmri nhũm mê inhmã:

² —Tý mex nom koja nhýrmã mê kãm Tirtũm kurê xwýnhjaja grãnh pa. Koja arĩ kên õ axkrutre nê axpên mýnh nê nõr kêt nê. Koja piitã anhrã nê ahpýnhã ri hikwý. Anê.

³ Hãmri pa mê kuma nê tee ri hkukamã ijamexpêr. Hãmri nhũm Jejus ma tê nê hixêt pê Oriwêhti hã api nê há nhý pa mê ma hkôt mra nê mê kot ã ixkre nhípêx anhýrta ã hkukja nê kãm:

—Kwa xà âm hãmri koja mê ã ixkreta nhípêx anê? Kwa mê inhmã aprĩ há harê. Xà koja mê nhýrmã ho anê nã? Xà koja mê tokyx ho anê? Nê akupýn mê ixwýr awrýk nhũm mêmoy piitã hapêxja. Kwa mêmoy koja we wýj ri tanhmã amnhĩ nhípêx to wehe? Anê.

⁴ Hãmri nhũm mê inhmã hprĩ há tanhmã mêmoy kot amnhĩ nhípêx to hkukamã ujarênh o nhý nê mê inhmã:

—Nã nhýrmã mêmoy piitã hapêx kaxyw tanhmã amnhĩ nhípêx toja kumrêx kot paj mê amã harê ka mê inhma. Nã koja mê ohtô nê mê awýr mra nê hêx rom te pa ixte amnhĩ nhípêx pyrãk o amnhĩ nhípêx o mê akôt pa. ⁵ Nê mê amã amnhĩ jarênh o: “E Tirtũm na pre mê awýr inhmê. Ixpê kaxkwa rùm ixwrýk xwýnhhta na pa.” Anhýr o mê akôt mê amã amnhĩ to hêx o pa. Jao ohtô nê mê nokupyr o pa.

⁶ —Nê koja mê nhýri awry há axpên par o pa nê mê atã axpên par o pa. Nom kër ka mê harênh ma nê ri tokyx mêmoy piitã hapêx ã hkamnhix kêt nê. Kormã mêmoy piitã hapêx xà há arĩgroja kormã.

⁷ Koja mêmoy piitã hapêx kaxyw nhũm ahpýnhã ri pika piitã hkôt mê pa xwýnhjaja pika hõ nhõ xwýnhjê kutã kuhê nê pijapu ho kuhê. Jao ra axpên par o pa. Hãmri nhũm nhýri pika hkwy htertet týx kumrêx. Nê mê hpur kãm mêmoy hapêx nhũm mê kãm prãm týx nê pa. Jakamã nhũm mê ohtô nê prãm xaj axkaprã. ⁸ Nom ja kormã mêmoy hapêx kaxyw krax pix na. Te ho mênijê hõ hpijagri kaxyw nê kormã kawax pê õhy xà pyrãk.

⁹ —Nê koja mê piitã ixkôt mê akamã gryk nê kãm mê akurê htýx o pa. Nê mê awýr mra nê ixtã mê apynê nê mê atomnuj týx nê mê apa. ¹⁰ Jakamã koja mê kot ixkôt amnhĩ xunhwýr xwýnh kwýjaja mê umaj tee ri amnhĩ kukamã hamaxpêr hãmri nê ixkaga. Nê ixkôt mê kãm axpên tã amýnê nê axpên kãm gryk o pa. ¹¹ Nhũm nhýri mê hkwyjaja Tirtũm nhý há kapêr jarênh xwýnh ã amnhĩ to hêx o pa. Jao mê ohtô nê mê nokupyr o pa. ¹² Koja mê ã amnhĩ nhípêx anhýrja o ra piitã kãm axpên kamã ukaprĩ hkêt o pa. ¹³ Koja mê ã ixtã mê atomnuj o pa anê. Tã nom kër ka mê amnhĩ to htýx nê ixkaga hkêt nê. Mê kot mê apar tã ka mê kaxkwa kamã akupým atír kurê kumrêx.

¹⁴ —Nê kot kaj mê apê ixkwýjaja ma krĩ piitã hkôt Tirtũm kapêr o mê ahkre ho apa. Mê kot amnhĩ tomnuj kaga nê ixkôt amnhĩ xunhwýr nhũm Tirtũm kot ja há mê omunh nê mê ho hkra há mê kãm harênh o ri mê piitã mê hkôt apa. Kot kaj mê piitã mê kãm ijarênh pa pa rĩ kormã akupýn mê awýr wrý. Anê.

Mê pahtomnuj týx xwýnh maati há harênh

Makre 13.14-23; Rukre 21.20-24; määnên Sikün Tesarôn 2.3-4

¹⁵ Nhũm Jejus arĩ mêmoy kukamã mê inhmã kapêr nê mê inhmã:

—Amnepêm Tirtũm nhý há kapêr xwýnh finat Tãñewja na pre

tanhmã mê atomnuj tỳx xwỳnh maatiya jarēnh to. Tã koja nhỹrmã ra kot harēnh xà hkôt axtem nē Tĩrtũm mã amnhĩ jarēnh xà hã ixkre hwỳr axà nē Tĩrtũm xãm xà kamã xa. Ka mê ja hã omu hãmri nē mê kot krĩ grãnh par ã hkamnhĩx kurê kumrēx. ¹⁶ Koja ã amnhĩ nhĩpêx anē ka mê amỳm amnhĩ wỳr mê omu hãmri nē ajapôj nē ma aprôt nē amrar kurê kumrēx. Mê apê jar pika pê Jutej kamã mê apa xwỳnhjaja kaj mê omu hãmri nē mê kot mê apar pymaj aprôt nē ma amrar kurê kumrēx. ¹⁷ Rỳ ka mê anhõrkwỹ hkrãmnēnh o akrĩ japêr nē amỳm amnhĩ wỳr mê omu nē akukrēx wỳr axàr nē hõ hpyr mã ajamaxpêr kêt nē. ãm wrỳ nē aprôt nē ma atēm kurê kumrēx. ¹⁸ Rỳ ka mê apur kãm axàpēnh o apa japêr nē amỳm mê omu hãmri nē akupỳm anhõrkwỹ hwỳr axê jamỳnh kaxyw atēm kêt nē. ãm mê umaj aprôt nē ma atēm kurê kumrēx.

¹⁹ —No mê htujarô nē mê hkra karàre xwỳnhjaja koja mê kēp mēmoj omnuj tỳx nē. Tanhmã kot mê amnhĩ to nē mê umaj hprôt tỳx? Nà pika ja kamã koja mê mex kêt o mex kêt. Mê kot amnhĩ tomnuj mỳrapê koja Tĩrtũm tanhmã mê homnuj tỳx to.

²⁰ —Nē kwa kêt ka mê amnhĩ to Tĩrtũm wỳ kē ã mê kot amnhĩ nhĩpêx anhỹr xà hã arĩgroja na wrỳk pē ã amnhĩ nhĩpêx anhỹr kêt nē. Rỳ mê hkôt xà hã arĩgro pē sap ã ã amnhĩ nhĩpêx anhỹr kêt nē.

²¹ —Nē ã mê kot amnhĩ nhĩpêx anhỹr ã arĩgroja ã koja mê piitã amnhĩ xà htỳx kãm hamak tỳx kumrēx. Amnepēm Tĩrtũm kot pika ho kator krax rũm amnē mê pa xwỳnhjaja kormã aa kot ã amnhĩ xà htỳx kamã hamak anhỹr kêt tã arĩgroja ã koja mê amnhĩ xà htỳx kumrēx kamã ama. Hãmri nē axte pika ja kamã ã amnhĩ xà htỳx kumrēx kamã hamak anhỹr kêt nē. ²² Kop apu Tĩrtũm kot mê kot amnhĩ

xà htỳx kamã hamak xà hã arĩgro hkwy ho gri hkêt ronhỹx ka mê api-itã apikaprãr pa. Ja pymaj koja mê amã ho gri. Kot ra amnhĩ kaxyw mê arēnh xwỳnhjê japê xàj mê amã ho gri.

²³⁻²⁴ —Tã ã mēmoj kot amnhĩ nhĩpêx anhỹr jakamã koja mēmojaja tanhmã mê amã ixto hêx to nē mê amã: “Ota ra Kris akupỳn wrỳ. Kwa mê hwỳr mra nē omu.” Anē. Rỳ mê amã: “Krisja krĩ mũj kamã na raa. Kwa mê ma hwỳr mra nē omu.” Anhỹr o mê amã ixto hêx o pa. Rỳ mê awỳr mra nē mê amã amnhĩ to hêx nē mê amã: “E. Ot pa ixpê Kris ã mê awỳr wrỳ. Tĩrtũm na mê awỳr inhmê pa wrỳ.” Anē. Rỳ mê amã: “E ixpê Tĩrtũm nhỹ hã ixkapêr xwỳnh na pa mê awỳr mõn pôj.” Anhỹr o mê amã amnhĩ to hêx. Hãmri nē mê anokupyr kaxyw mê amã aa mê kot mēmoj pumunh kêt kwỳ ho anhỹr o pa. Tĩrtũm kot amnhĩ kôt mê arēnh xwỳnhjaja kãm mê ate ja hã mê omunh nē mê gryk ã ixkaga hprãm xàj koja mê ã mê anoo mã amnhĩ nhĩpêx anhỹr o pa. Nom ãm ã amnhĩ nhĩpêx anhỹr kaprỳ ka mê ixkaga hkêt nē.

²⁵ —E kwa mê inhmar tỳx nē. Na pa ra ixprĩ hã ã mê kot amnhĩ nhĩpêx anhỹrja kukamã ã mê amã mēmoj jarēnh anē. Tã kêt ka mê amnhĩ nē ã mê kot amnhĩ to hêx anhỹr o mê pa xwỳnhjê pumunh mex o apa nē axkãm ajamak rom. ²⁶ Rỳ koja mê tanhmã mê amã ixto hêx to nē mê amã: “Ota Tĩrtũm kot mê pahwỳr mēnh xwỳnhhta kapôt ã mõn pôj. E mê tokyx ma hwỳr mra nē omu.” Anhỹr o mê amã ijarē ka mê ama nē ãm mê ama nē hwỳr amrar kêt nē. Rỳ nhũm mê amã: “Ota hitom kãm xa. E mê mamrĩ hwỳr agjê nē omu.” Anē no ka mê ãm mê ama nē ãm mê ama nē hwỳr agjê kêt nē. ²⁷ Kot paj nhỹrmã akupỳn mê awỳr ixwrỳk kaxyw hãmri nē ixpimxur

kâm ixwryk kêt nê. Koja pika pi-itâ hkôt mê pa xwÿnhjaja anhîpê ixwryk kâm ixpumu. Te mê piitâ anhîpê mê kot na haxênh pumunh pyrâk o kot kaj mê anhîpê apiitâ ixpumu. ²⁸ Te nhÿri mêmoj kro nê nôr nhÿm nhônhti kot omunh nê hã htor nê hpinhpanh nhÿm mê piitâ hã omunh pyrâk o kot paj amnhî nhîpêx. Anê.

Jejus akupÿn wryk xwÿj ri mêmoj kukamã harênh

Makre 13.24-31; Rukre 21.25-33; määnên Wam Tesarôn 4.16-17

²⁹ Nhÿm Jejus arî mê ixte hkôt ixpa ho ixpa xwÿnhjê mã kapêr nê mê inhmã:

—Nê kot paj akupÿn mê awÿr inhnojarêt nhÿm rî Tirtÿm kaxkwa kamã tanhmã mêmoj nhîpêx to. Kapêr ã kagã htÿm kot tanhmã ja kukamã harênh to nê harênh kot: Koja Tirtÿm kaxkwa ho ãk nhÿm

kanhêti piitâ rôrôk pa nhÿm myyti ahtyk nhÿm mytwryre urâk nê axte hpôk kêt nê. Anê.

³⁰ Koja ã mêmoj amnhî nhîpêx anhÿr pa hãmri pa kaxkwa hã mê amã mêmoj nhô. Hãmri nhÿm pika piitâ hkôt ri mê pa xwÿnhjaja piitâ omu nê tee ri amnhî kukamã hamaxpêr o hkaprî nê mÿr rax kumrêx. No mê kajaja kot kaj mê omu hãmri nê akupÿn mê awÿr ixwryk nê mê ato amnhîptâr mã ajamaxpêr kurê kumrêx. Kot paj kakrã kamã hirã htÿx kâm akupÿn ixihtÿx kâm mê awÿr wry. ³¹ Hãmri nê Tirtÿm kapêr o mê wryk xwÿnh maati mã anê nhÿm pifti kakô hãmri nhÿm hkwyjaja kuma nê ma mê awÿr pika piitâ hkôt anhgrã nê ma mra nê inhmã mê ato akuprô. Ixte amnhî kaxyw mê axunhwÿr xwÿnhjê o akuprô nê man akupÿn ixwÿr mê ato hapêx. Anê.

Jejus kot mêmo pâr o ejêp jarênh

Makre 13.28-31; Rukre 21.29-33

³² Nhÿm Jejus arî mê inhmã kapêr nê mê inhmã:

—E ka mê pî hpâr mÿj pumu. Na hte mêmo mytwry hã rã nhÿm mê omu nê ô hkukamã hamaxpêr kurê kumrêx. ³³ Ja pyrã nê koja ã ixte mêmoj jarênh anhÿr xwÿnhjaja amnhî nhîpêx par mê ka mê omu nê akupÿn mê awÿr ixwryk mã ajamaxpêr kurê kumrêx. Kot paj te ra mê anhôrkwÿ kapem ixãm pyrâk o amnhî nhîpêx. ³⁴ Nom akupÿn ixwryk kêt ri koja ã mê kot mêmoj kot amnhî nhîpêx anhÿr pumunh xwÿnhjaja kormã piitâ htyk kêt ri pa akupÿn wry.

³⁵ —Nê koja nhÿrmã pika nê kaxkwa wa hapêx pa. Tã no ãm ixkapêrja koja wa urâk nê aa hapêx kêt nê. Koja ãm rãhã ho rãhã. Kot paj aa ihkjê ho tanhmã mênh to hkêt nê. Anê.

Mê pahte akupÿn Jejus wryk xã hã arÿgro pumunh kêt ã mê pajarênh

Makre 13.32-37; Rukre 12.37, 17.26-30, 17.34-36; määnên Wam Tesarôn 5.2

³⁶ Nhÿm Jejus arî mê inhmã kapêr nê mê inhmã:

—Nê ixte akupÿn mê awÿr ixwryk xã hã arÿgroja mê ate omunh kêt. Nê kaxkwa kamã Tirtÿm kapêr o mê wryk xwÿnhjaja haxwÿja kot ja pumunh kêt. Nê ijaxwÿja ixpê Tirtÿm Kra htã ixte ja hã amnhî pumunh kêt. ãm inhô Papaj pix na kot ja pumunh.

³⁷ —Nê kot paj nhÿrmã man akupÿn mê awÿr wry. Akupÿn mê awÿr ixwryk xã hã arÿgrota ã koja mê htÿx ri amnhî tomnuj o pa. Te amnepêm Noehti kormã htÿr ri mê pa xwÿnhjaja kot htÿx ri amnhî tomnuj o pata pyrâk. ³⁸ Na pre htem amnhî kaxyw Tirtÿm mã hamaxpêr kêt nê. ãm jar mê kot amnhî nhîpêx pix kukamã hamaxpêr kôt pix mã amnhî nhîpêx o pa. Rôm nhÿm Noehtija gô htãm pymaj pâr rax nhîpêxta mã axã. ³⁹ Nhÿm mê ja hã omu nê ãm omu nê tanhmã ri amnhî kukamã hamaxpêr to hkêt nê. Hãmri nhÿm

naja mẽ haêr pê wrÿ nê wrÿk rax o mẽ hanhir pa. Tã akupÿn ixwrÿk xà hã arÿgroja ã koja mẽ htÿx ri ã amnhÿ nhÿpêx anhÿr o paja o pa mẽ haêr pê naja pyrã nê akupÿn wrÿ.

⁴⁰ —E kot paj mẽ amã nhÿrmã akupÿn ixwrÿk nê tanhmã mẽ anhÿpêx to hã amnhÿ jarê. Te kot ja pyrãk. Koja mẽmyjê hõ wa hamêxkrut nê hpur kãm àpênh o xa. Nhũm hõja ra ixkõt amnhÿ xãm nhũm hõja ixkõt amnhÿ xãm kêt japêr. Hãmri pa amnhÿ wÿr ra kot ixkõt amnhÿ xãm xwÿnhnta o api nhũm kot ixkõt amnhÿ xãm kêt xwÿnhnta hpur kãm ahte arÿ xa. Hãmri nê tee ri hkrãmnhwÿ japêr rÿt o xa. ⁴¹ Rÿ nhũm mênijê wa hamêxkrut nê harôj kahuk o xa. Nhũm hõja ra ixkõt amnhÿ xãm nhũm hõja ixkõt amnhÿ xãm kêt japêr. Hãmri pa amnhÿ wÿr kot ixkõt amnhÿ xãm xwÿnhnta ho api nhũm kot ixkõt amnhÿ xãm kêt xwÿnhnta tee ri hkrãmnhwÿ japêr rÿt o xa hãmri nê hamaxpêr rax kumrêx. Kot paj nhÿrmã akupÿn wrÿ nê ã mẽ anhÿpêx anê. ⁴² Tã mẽ ate akupÿn ixpõx xà hã arÿgro pumunh kêt jakamã kwa kêr ka mẽ ijamãr rãhã ho ri apa. ⁴³ Na htem htÿx ri nhÿri tanhmã amnhÿ nhÿpêx to ho pa nhũm mẽ kêp àhkÿnh xwÿnh mẽ òrkwÿ hwÿr agjê nê mẽ kêp ahkÿ. ⁴⁴ Tã mẽ ate akupÿn ixwrÿk xà hã arÿgro pumunh kêt jakamã kwa kêr ka mẽ ixwakre kamã te mẽ apê mẽ òrkwÿ nhõ dõn kot amnhÿ nhÿpêx pyrã nê atÿx ri tanhmã amnhÿ tomnuj to ho apa hkêt nê. Ixkutêp axkãm ajamak rom nê ri apa. Jao tãm ixkutêp amnhÿ nhÿpêx rãhã ho ri apa. Anê.

Mẽ kãm mẽ àpênh mex xwÿnhjê jarênh

Rukre 12.41-48

⁴⁵ Nhũm Jejus arÿ mẽ inhmã kapêr nê mẽ inhmã:

—E koja mẽ kãm àpênh xwÿnhjê hõ àpênh mex o pa hãmri nhũm

õ patrãw àpênh ã omu hãmri nê ma nhÿhÿm mõi kaxyw nê ìhkram mẽmoj piitã haxàr pa nê kãm: “E kêr ka ixwakre kamã inhmã ìnhòrkwÿ tãnopxar mex nê. Nê inhmã mẽ àpênh xwÿnhjê mã mẽ apkur xà nhõr o apa.” Anhÿr o kãm mẽmoj tã karõ hãmri nê kato nê ma nhÿhÿm mõi. ⁴⁶ Hãmri nhũm kot kãm àpênh mex xwÿnhnta wakre kamã kãm àpênh mex o pa. Jakamã nhũm õ patrãw akupÿn hpõx o mõi nhũm amnhÿ wÿr harênh ma nê hkÿnh nê. Nê tee ri amnhÿ kukamã hamaxpêr o kãm uma hkêt nê. Kot wakre kamã kutêp kãm àpênh mex jakamã tee ri tanhmã amnhÿ kukamã hamaxpêr to hkêt nê. ⁴⁷ Jakamã nhũm õ patrãwja akupÿn pøj nê kot kãm àpênh mex ã omu nê hkÿnh nê. Hãmri nê kot kãm õ mẽmoj piitã hamãr o pa kaxyw ìhkram haxàr pa. ⁴⁸ No koja axtem nê wakre kamã kãm àpênh mex kêt japêr. Nê hamaxpêr o: “Tk. Nà koja tokyx akupÿn mõi kêt nê.” Anhÿr o hkamnhÿx. ⁴⁹ Hãmri nê wakre kamã kãm mẽ àpênh xwÿnhjê htak nê pipãnh pix o pa. Nê kãm kagõxÿhti xành xwÿnhjê kõt pix mã pa. ⁵⁰ Hãmri nhũm õ patrãwja haêr pê akupÿn pøj nê tee ri ja hã omu. ⁵¹ Hãmri nê kamã gryk tÿx nê tanhmã homnuj htÿx to nê kãm mẽ àpênh punuj xwÿnhjê mẽ mẽ ho hpimràatã amnhÿ nê mẽ kator pa. Hãmri nê mẽ kot kapêr kwÿm amnhÿ nhÿpêx xwÿnhjê mẽ mẽ ho hpimràatã tanhmã mẽ homnuj to nê amnhÿ nê mẽ kator. Hãmri nhũm mẽ tee ri amnhÿ kukamã hamaxpêr nê mur nê tee ri amnhÿ nhÿpêx. Tã kêr ka mẽ ixwakre kamã ho mẽ uràk kêt nê. Mẽ kurom ixwakre kamã ixkapêr kõt amnhÿ nhÿpêx mex rãhã ho ri apa. Anê.

25

Kormã mẽ mjên kêt xwÿnhjê ho 10 nê mẽ harênh
Wam Tesarõn 5.1-3

¹ Nhũm Jejus arĩ mẽ inhmã kapêr nê mẽ inhmã:

—Nê mẽ ate Tirtũm kôt amnhĩ nhĩpêx o mẽ apa xwỳnhjaja kêr ka mẽ akupỹn amnhĩ wỳr ixkãm ajamak rom nê ri apa. Nom mẽ kêp Tirtũm prãm nõkati xwỳnhjaja koja mẽ akĩnhã ãm htỳx tanhmã amnhĩ to pix kukamã hamaxpêr o pa. Te kormã mẽ mjên kêt xwỳnhjaja kot amnhĩ nhĩpêxta pyrãk. E pa mẽ amã tanhmã mẽ harênh to ka mẽ inhma. Koja kormã mẽ mjên kêt xwỳnh kêp 10jaja ma hkrãmnhwỳ mjên mã xwỳnh kutã pry hã mra. Amnhĩ kôt kanê jamỳ nê o mra nê kutêp pry nhĩkrep hkrĩ. ²⁻⁴ Nhũm mẽ kêp 5jaja hkwyjê rom amnhĩ kukamã hamaxpêr mex nê kanê kaxyw amnhĩ kôt orti hkwy ho mỗ. No nhũm mẽ kêp 5 nê mẽ hkĩnhã ãm htỳx kanê pix jamỳ nê o mra. ⁵ Hãmri nê mẽ mjên mã xwỳnhja kutêp axpên mã kapêr o hkrĩ. Nhũm tokyx htêm kêt nhũm mẽ kutêp hkrĩ nê gaa nê ra õtxwa nê gaa nê hikwỳ nê ra õt pa.

⁶ —Tã nhũm kôt ã kamàt hãmri nhũm mjên mã xwỳnhhta hpõx o tẽ. Hãmri nhũm kot hkukamã harênh xwỳnhja mẽ õt o mẽ hikwỳ xwỳnhjê mã amỹra nê mẽ kãm: “Kwa mẽ hãmri. Ota mjên mã xwỳnhhta tẽ. Mẽ tokyx kãnhmã akri pu mẽ kutã mra.” Anê. ⁷ Hãmri nhũm mẽ hkrã hapôj nê kanê hpõk. ⁸ Nom nhũm mẽ hkwyjê hkĩnhã õ kanê kaxyw orti ho pa hkêt xwỳnhjaja ra mẽ kêp mẽ kanêja hkaprỳ hpa nhũm mẽ tee ri kot hpõk kaxyw. Hãmri nê orti hkwy hã hkwyjê hwỳ nê mẽ kãm: “Xê mẽ inhmã orti ho inhõ kanê go.” Anê. ⁹ Nom nhũm mẽ kêp nê nê mẽ kãm: “Ma mẽ inhõ kanê kamã orti grire kênã kot pa kêt mẽ amã ho go. Xê mẽ tokyx ma mra nê nhỹri amnhĩm hkwy japrõ mẽ.” Anê. ¹⁰ Hãmri nhũm mẽ tee ri mẽ kuma nê ma amnhĩm hkwy japrõr mã ma mra.

—Rõm nhũm mjên mã xwỳnhhta mẽ hãnh tẽ nhũm kanê kamã arĩ mẽ

orti xwỳnhjaja omu nê hã jêt kurê kumrêx. Hãmri nê ma hkôt mõn mẽ pikuprõnh xã hã ixkreja wỳr wa hã hkĩnh nê apkur kaxyw gjêx pa nhũm mẽ hã kahê. Mẽ gjêx xã hã oreja ra hwỳr hpõx jakamã nhũm mẽ hã kahê.

¹¹ —Tã nhũm ma mẽ kot orti japrõr mã mrar xwỳnhjaja hãmri amnhĩ to hapu nê mra nê tee ri mẽ hã hakwakre kupê nê htatak nê tee ri mẽ kãm akir nê mẽ kãm: “Xê mẽ inhmã kahê xã mẽ pa mẽ awỳr agjê.” Anê. ¹² Hãmri nhũm hprõ mã xwỳnhhta mẽ kuma nê mẽ kãm: “Tk. Nã ixte mẽ apumunhre hã kot pa kêt mẽ amã kahê xã mẽ. Kwa mẽ ma akupỹm mra.” Anê. ã mẽ ujarênh kot anhỹr. Anê.

¹³ Nhũm pre ã Jejus mẽ inhmã ujarênh anê. Hãmri nê mẽ inhmã:

—E kêr ka mẽ te kot amnhĩ kôt orti hkwy ho mõr xwỳnhjaja kot amnhĩ nhĩpêx pyrãk. Mẽ ate akupỹn ixwryk xã hã arĩgro pumunh kêt jakamã kêr ka mẽ apkati mẽ ixkamã ajamak rãhã ho apa. Anê.

Mẽ kãm mẽ àpênh xwỳnhjê jarênh Rukre 19.11-27

¹⁴ Nhũm Jejus arĩ mẽ inhmã kapêr nê mẽ inhmã:

—E kêr ka mẽ ixwakre kamã inhmã tanhmã amnhĩ nhĩpêx mex to ho ri apa pa hpãnhã mẽ amã amnhĩrer mex nê. Mẽ ate tanhmã inhmã amnhĩ nhĩpêx to ho apa xã hkôt kot paj mẽ amã amnhĩre. Te mễhõ my kot kãm mẽ àpênh xwỳnhjê nhĩpêx pyrãk. Koja nhỹhỹm nojarêr nê kãm mẽ àpênh xwỳnhjê mã hikukrêx piitã hkaga hpa. Õrkwỳ nê hpur nê hkrit. ãm mẽmoj piitã mẽ kot wakre kamã kãm hamãr o pa kaxyw mẽ kãm hkaga hpa. ¹⁵ Hãmri nê ahpỹnhã mẽ kãm kãxpore hkwy gõ. Mẽ kot kutêp kãm tanhmã ho rũnh to kaxyw ahpỹnhã mẽ kãm õr pa. Kot kãxpore pumunh mex xwỳnhja mã nhũm ho 5.000 nê kugõ. Nê kot hkôt

kax pê omunh xwÿnhja mã nhũm ho 2.000 nê kugô. Nê kormã kot omunh tÿx kêt xwÿnhja mã nhũm âm ho 1.000 pix nê kugô. Hâmri nê mẽ kãm amnhĩ jarê nê ma nhÿhÿm mỗ. ¹⁶ Hâmri nhũm kot ho 5.000 nê hamÿnh xwÿnhja kàxporeta py nê ma o mỗr kurê kumrêx nê tanhmã ho àpênh to ho mỗr kãm ra hipy axte ho 5.000 nê kumê. ¹⁷ Nhũm kot ho 2.000 nê hamÿnh xwÿnhja mãânên tanhmã ho àpênh to ho mỗr kamã ra hipy axte ho 2.000 nê kumê. ¹⁸ Nom nhũm kot ho 1.000 pix nê hpyr xwÿnhja wa hkĩnh ã axtem nê ma o tẽ nê kãm kakwÿ nê kamã haxà nê hity hpa nê ma akupÿm tẽ.

¹⁹ —Tã nhũm mẽ õ patrãwja akupÿn mỗn pôj nê mẽ kãm: “E mẽ amnê ixwÿr mra nê ixte mẽ amã kàxpore ho ixpigrãnh xwÿnhnta jarê. Tanhmã na ka prem ixkutêp inhmã hipêx to?” Anê. ²⁰ Hâmri nhũm kot ho 5.000 nê hpyr xwÿnhnta kumrêx hwÿr tẽ nê kãm: “E ota akàxporeta. Ate inhmã ho 5.000 pix nê õr tã pa amã ho rax nê amã hipy axte ho 5.000 nê kumê nhũm ho axkamur nê ra ho 10.000. Tã ota.” Anhÿr o kãm kapêr hãmri nê kãm kugô ²¹ nhũm amnhĩm hamÿ nê omu nê hkĩnh nê. Hâmri nê kãm: “Nà âm hãmri na ka inhmã ho anê. Ixte amã ho 5.000 pix nê õr tã ka ra inhmã ho rax jakamã kot kaj apê inhmã mẽ àpênh xwÿnhjê hkrãhtũm. E amnê ixwÿr axà pu mẽ apku nê pahkĩnh.” Anê.

²² —Hâmri nhũm hpãnhã kot ho 2.000 nê hpyr xwÿnhnta hwÿr tẽ nê õ patrãwta mã kãm: “E ota akàxporeta. Ate inhmã ho 2.000 pix nê õr tã pa amã ho rax nê amã hipy axte ho 2.000 nê kumê. Tã ota.” Anê.

²³ Hâmri nhũm kuma nê amnhĩm hamÿ nê omu nê hkĩnh nê. Hâmri nê kãm: “Nà âm hãmri na ka ã inhmã ho rax anê. Ixte amã ho 2.000 pix nê õr tã ka inhmã ho rax jakamã kot kaj apê inhmã mẽ

àpênh xwÿnhjê hkrãhtũm. E amnê ajaxwÿja ixwÿr axà pu mẽ apku nê pahkĩnh.” Anê.

²⁴ —Tã nhũm kot ho 1.000 pix nê hpyr xwÿnhnta hapu hã wa hkôt tẽ. Hâmri nê õ patrãw mã tanhmã kapêr to nê kãm: “Nà ra ixte apumunh tũm. Pêr axàhkurê pix kãm na ka hte apa. Nê amã akàxpore ho rax nê anhõ ho rax pix kukamã ajamaxpêr o ri apa. Nom mẽ pajaja mẽ ixàpênh rax pix kukwak ri na ka hte akàxpore rax nê apa. ²⁵ Jakamã na pa inhmã apyima nê. Nê akàxporeta py nê ma o tẽ nê kaxyw kre nê kamã haxà. Tã ka akupÿn mỗn pôj pa ajarênh ma hãmri nê hkapa nê man akupÿn amã o tẽ. Tã ota anhõ 1.000ta.” Anê. ²⁶⁻²⁷ Hâmri nhũm tee ri kuma nê kãm: “Tk. Kwa amã ixpyima nê ate ixpumunh mex anhÿr tã na ka ixte amã kàxpore nhõrta pyr nê ma ho atêm. Nê mẽ kot mẽ kêp kàxpore jamÿnh o kuhê xà kamã mẽ kãm õr nhũm mẽ ixkutêp tanhmã inhmã ho rax to hkêt nê? Pêr âm amã kaga nê ate amnhĩ tomnu pix o ri apa xwÿnh.” Anê. ²⁸⁻³⁰ Hâmri nê kêp kàxporeta py nê nhãm jam kugô nê kãm: “E amÿ nê o tẽ nê kot inhmã ho 10.000 nê õr xwÿnhnta mã agô. Hâmri nê jahti pynê nê ma o tẽ nê kamàt kô kamã amê. Apênh nexti hã. Koja tee amÿra nê amnhĩ xà htÿx kamã hamak xàj tee ri amnhĩ nham o axpên kamnhar tÿx kaprÿ nê rĩ amnhĩ pumu.” Anhÿr o kãm kapêr nhũm kuma nê hpa hã kupy nê ma o tẽ. Hâmri nhũm mẽ õ patrãwja mẽ àpênh xwÿnhjê mã kãm: “E mẽ ate ixwakre kamã mẽ axàpênh mex xwÿnhjaja kot paj ã mẽ ato mex rax anê ka mẽ akĩnh nê. Nom mẽ kot inhmã mẽ àpênh mex kêt xwÿnhjaja kot paj mẽ kêp mẽõ mẽmojta jamÿ nê nhãm mẽhõm kugô nhũm hkaprĩ nê.” Anê. ã mẽ ujarênh kot anhÿr. Anê.

Jejus kot nhÿrmã mẽ piitã

tanhmã mẽ harênh to hã harênh
Matêwre 13.35-43, 13.47-50;
mãänêh Apokarip 20.11-15

³¹ Nhũm Jejus arĩ mẽ inhmã kapêr nê mẽ inhmã:

—Nê kot paj nhỹrmã akupỹn mẽ awỹr wrỹ nhũm Tĩrtũm kapêr o mẽ wrỹk xwỹnh piitã man ixkõt wrỹ. Kot paj wrỹ nê ixpê pahi maati hã ixkrĩ xã maati kamã inhmex nê nhỹ. ³²⁻³³ Hãmri nê Tĩrtũm kapêr o mẽ wrỹk xwỹnhjê mã anê nhũm mẽ ma krĩ piitã hkõt mẽ apiitã mẽ ato pikuprõnh pa nê akupỹn ixwỹr mẽ ato hapêx. Pa mẽ apumu nê tanhmã mẽ axunhwỹr to. Te ôwêhti jamãr o pa xwỹnh kot ôwêhti kaêx ã motre pumunh nê nhãm nê motre xunhwỹr parta pyrãk. ³⁴ Hãmri nê ixupõk rũm mẽ ate ixkõt amnhĩ xunhwỹr xwỹnhjê mã ixkapêr nê mẽ amã: “E mẽ kajaja kot kaj mẽ amex kumrêx nê ri apa ho apa. Amnepêm kormã mẽmoj piitã hkêt ri na pa pre Inhĩpêêxã mẽ wa mẽ akukamã tanhmã ijamaxpêr to nê mẽ amã mẽmoj mex xunhwỹr rũnh nê. ³⁵ Tã ka prem ajapõj hãmri nê ixkõt amnhĩ xunhwỹ nê tanhmã ixto mex to ho ri apa.

Na pa pre inhmã prãm nê ixpa ka prem ixpumu nê ixkamã axukapri nê inhmã mẽmoj gõ pa kuku.

Nê na pa pre inhmã kôr nê ixpa ka prem ja hã ixpumu nê inhmã gõ pa ho ixkõ nê akupỹm ixihtyx.

Nê aa mẽ ate ixpumunh kêt tã ka prem nhỹri ixpumu nê amnhĩ nhõrkwỹ hwỹr ixwỹ.

³⁶ Nê na pa pre ixê pynajti nê ri ixpa ka prem ja hã ixpumu nê inhmã axê gõ pa haxã nê ri hã ixpa.

Nê na pa pre ixã nê inhĩkwỹ ka prem ixwỹr mra nê ixkane nê tanhmã ixto mex to pa akupỹm inhmex.

Nhũm prem ijaxã pa mẽ hagjênh xã kamã ixkrĩ ka prem ixwỹr mra nê tanhmã ixto mex to.

Ã mẽ ate ixto mex anhỹr o ri apa jakamã nhũm inhõ Papajja ixtã mẽ apumu. Tã koja ixtã mẽ ato mex rax nê.” Anê.

³⁷ —Kot paj ã mẽ ate tãm amnhĩ nhĩpêx xwỹnhjê mã ixkapêr anê. Hãmri ka mẽ tee ri inhma nê amnhĩ tã ixkukja nê inhmã: “Kwa xã mẽ pajaja na pa prem ã ato mex anê? Nã mẽ ixte ã anhĩpêx anhỹr kãm amnhĩ pumunh kêt tã na ka ã mẽ ijarênh anê. Kwa nhỹri na ka pre amã prãm nê apa pa prem apumu nê amã mẽmoj gõ ka aku? Nê nhỹri na ka pre amã kôr nê apa pa prem amã gõ hkwỹ ka ho ixkõ? ³⁸ Nê nhỹri na pa prem apumu nê amnhĩ nhõrkwỹ hwỹr awỹ? Rỳ ka pre axê pynajti nê apa pa prem amã inhĩnõhkã gõ ka hagjê? ³⁹ Nê nhỹri na ka pre axã nê anhĩkwỹ pa prem apumu nê akane? Nê nhỹri na prem ajaxã pa mẽ hagjênh xãja wỹr mra nê kamã tanhmã ato mex to? Nã mẽ pa hkêt.” Anhỹr o amnhĩ tã ixkukja. ⁴⁰ Hãmri pa mẽ amã: “Nã mẽ kêp amrakati xwỹnhjaja na pre htem pa pyrãk. Tã ka prem mẽ kamã axukapri hã tanhmã mẽ kutã anojarêt to ho ri apa jao te pa tanhmã ixto mex to ho apa pyrãk. ãm hãmri na ka prem ã mẽ ho mex anhỹr o ri apa.” Anê. Kot paj ã mẽ ate amnhĩ to mex xwỹnhjê mã ixkapêr anê.

⁴¹ —Hãmri nê hpãnhã apke rũm mẽ kot ixkõt amnhĩ xunhwỹr kêt xwỹnhjê mã tanhmã ixkapêr to nê mẽ kãm: “No mẽ kajaja kot paj ixupõk rũm mẽ unhwỹr xwỹnhhtajê hkĩnhã mẽ ato mex kêt nê. Amnepêm na pre Tĩrtũmja Satanasti mẽ mẽ kot tanhmã kãm amnhĩ nhĩpêx to ho mẽ pa xwỹnhjê mẽ mẽ ho hpimràatã mẽ kaxyw kuwy rax kumrêxja nhĩpêx. Mê kot amnhĩ tomnuj tyx mýrapê nhỹrmã kamã amnhĩ xã htỹx kamã hamak rãhã

nê pa ho pa kaxyw. Tã kot kaj mẽ ajaxwýja ma mẽ hkôt hwýr ajapêx. Mẽ apê Satanasti hkôt mẽ ate amnhĩ nhípêx o apa xwýnh jakamã kot kaj mẽ uràn ma hwýr ajapêx pa. ⁴² Aa mẽ ate tanhmã ixto mex to hkêt. Na ka pre htem inhmã prãm nê ixpa hã ixpumu nom inhmã mẽmoj nhõr kêt nê. Nê inhmã kôr nê ixpa hã ixpumu nom inhmã gô hkwý hkêt nê. ⁴³ Nê nhýri ahte ixpa hã ixpumu nom amnhĩ nhõrkwý hwýr ixwýr kêt nê. Nê ixê pynajre nê ixpa hã ixpumu nom inhmã axê nhõr kêt nê. Nê ixã nê inhĩkwý hã ixpumu nom ixkane hkêt nê. Nê mẽ kot ijaxàr nhùm arĩ ixkrĩ hã ixpumu nom ixwýr amrar nê tanhmã ixto mex to hkêt nê. Á mẽ ate inhípêx anhýr o apa jakamã e mẽ ma kuwy hwýr apa kurê kumrêx.” Anê. Kot paj ã mẽ kãm ixkapêr anê. ⁴⁴ Hãmri nhùm mẽ tee ri inhma nê amnhĩ tã ixkukja nê inhmã: “Kwa nã ã mẽ ijarênh anhýr kêt nê. Aa mẽ ixte ã anhípêx anhýre hã. Nhýri na pa prem tanhmã akute hã apumu? Nã aa mẽ ixte nhýri ã ate amnhĩ nhípêx anhýr ã apumunhre hã.” Anê.

⁴⁵ —Koja mẽ ã inhmã amnhĩ tã aprãr anhýr kaprý. Kot paj mẽ kãm: “Nã na ka pre htem mẽ kêp amrakati xwýnhjê pumu nê ãm mẽ omunh o ri apa nê mẽ kamã axukaprí hkêt nê. Á mẽ hipêx anhýr jao te pa ã inhípêx anhýr pyrãk. Jakamã kwa mẽ tokyx ma kuwy hwýr ajapêx kurê kumrêx.” Anê. Kot paj ã kuwy hwýr mẽ hanor anê. ⁴⁶ Hãmri nê hwýr mẽ rênh pa nhùm mẽ ma hwýr hapêx nê kamã amnhĩ xà htýx kãm hamak rãhã nê pa ho pa nê aa kator kêt kumrêx. No kêt mẽ ate tãm amnhĩ nhípêx o mẽ apa xwýnhjaja kot kaj mẽ kurom ma Tirtüm mẽ wa inhõ krĩ hwýr api nê kamã amex nê atĩr tùm nê apa ho pa. Kot paj ã ahpýnhã mẽ apiitã mẽ anhípêx anê. Anê.

Nhùm pre ã Jejus akupýn wrýk ã amnhĩ kukamã mẽ inhmã ujarênh anê. Hãmri nê mẽ inhmã ujarênh pa.

26

Mẽ kot Jejus ã àmnênh ã amnhĩ jarênh

Makre 14.1-2; Rukre 22.1-2; Juãw 11.45-53

¹ Tã nhùm Jejus mẽ ixte hkôt ixpa ho ixpa xwýnhjê mã ujarênh pa nê mẽ inhmã:

² —E kot puj mẽ axte pahã apkati axkrut hãmri nhùm arĩgro pê Pas kato. Jakamã koja mẽ piitã amnepêm Tirtüm kot Ejit nhõ xwýnhjê pê mẽ pakukamã mẽ panhígêjtê kator mã hamaxpêr nê hã hkĩnh kaxyw Jerujarê hwýr akuprõ. Kamã koja mẽ ixpynê nê pĩ kahpa hã inhõ nê ixpi. Koja mẽ tokyx ã inhípêx anê. Anê.

Nhùm pre ã amnhĩ kukamã mẽ inhmã amnhĩ jarênh anê. ³ Rôm nhùm Jerujarê kamã patre krãhtümjê mẽ Ijaew pigêjtaja patre maati Kajpasja nhõrkwý kamã axpên wýr akuprõ. ⁴⁻⁵ Ra mẽ kãm Jejus pĩr prãm tã mẽ kãm mẽ kot hkôt kapêr mar o pa xwýnhjê pyma nê. Hãmri nê tee ri hamaxpêr nê axpên mã:

—Hêxta waa nê. Tanhmã kot puj wem ho nê kupií? Kot puj mẽ pahkĩnh kãm tanhmã ho nhùm mẽ hkĩnh xwýnhjaja hã mẽ pakamã gryk týx nê. Pu mẽ hã axpu nê hã tanhmã axpên to. Jakamã kwa pu mẽ kormã tanhmã ho hkêt nê.

Anhýr o axpên ma.

Mêhõ ni kot Jejus krã gregrer ã harênh

Makre 14.3-9; Rukre 7.36-50; Juãw 12.1-8

⁶ Tã nhùm Jejus kormã krĩ pê Petãn kamã Simãw nhõrkwý kamã apkur o nhý. Simãwja na pre hkã kro xãpêr týx o pa nhùm Jejus ra arĩgro hõ hã akupým hkã ho mex. Hãmri nê akupým õ krĩ hwýr pøj

nê òrkwÿ hwÿr tē nē kuri apkur o nhÿ. ⁷ Hāmri nhūm mēhō nija hpôx ā omu nē hamaxpēr o:

—Ma koja pēr Jejusja pa hā apkati grēre hāmri nē ty. An pa ma hwÿr tē nē mēhkuxwa xā ho hkuxwa.

Anē hāmri nē kēn jaka ho kàx kām mēhkuxwa xāja nhūm kumÿ nē ma hwÿr o tē. Hāmri nē ho hkrā gregrer nē hā hkapīr pa nē ho hkuxwa hpa. Mēhkuxwa xā hā kàxpore xohtō rax tā nhūm ā hā hkapīr par anē. ⁸ Hāmri pa mē ixte Jejus kôt ixpa ho ixpa xwÿnhjaja tee ri ā kot hipêx anhÿr ā omu nē axpēn mā:

—Tk. Kwa na hā mēhkuxwa xàta kapīr pa. ⁹ Kop apu ma kot o htēm nē ho wēnē nē hpānhā kàxpore ho rax kumrēx nē hamÿnh nē ho mē kēp amrakati xwÿnhjē nhīpēx par o nhÿx ja kām mex nē. Kwa mo na we ā amnhī nhīpēx anhÿr kēt nē? Anē.

¹⁰ Hāmri nhūm Jejus amnhī tā mē inhma nē mē inhmā:

—Kwa kot ixto mex kaxyw kēnā na ka mē axtem nē ixtā kām akir. ¹¹ Mē kēp amrakati xwÿnhjaja koja mē arī mē akot pa rāhā nē. Ka mē amā mēmo arīgro hā tanhmā mē ho ajuta hto hprām nē tanhmā mē ho ajuta hto nē mē kām mēmoj gō. No pa kot paj ri mē akôt ixpa ka mē ixto mex ry ho apa hkēt nē. Kot paj tokyx mē apiitā mē are. ¹² Ixtyk nhūm mē kot ijaxār kukamā na ā ixkuxwa anē. Ām hāmri na ā inhīpēx anē. ¹³ Ām hāmri na pa mē amā kot ā inhīpēx anhÿrja jarē. Koja mē krī piitā hkôt axpēn mā ijarēnh ā kagā kamā ijarēnh o pa nē kamā nija kot ā inhīpēx anhÿr kamā harē nē kuma. Anē.

Jut Kariot kot mē kām Jejus ā amnēnh

Makre 14.10-11; Rukre 22.3-6

¹⁴ Tā nhūm Jut Kariotja. Kēp mē ixpē Jejus kôt ixpa ho ixpa xwÿnhjē pē 12 hō htā ra tanhmā hamaxpēr to nē axtem nē Satanasti nhÿhā ma

patre krāhtūmjē hwÿr tē nē tanhmā Jejus o mē mar to nē mē kām:

¹⁵ —E ot pa mē amā Jejus jarēnh o tē. Xā kot paj mē amā hā amÿnē ka mē hpānhā inhmā amnhire nā? Anē.

Hāmri nhūm mē kuma nē hkīnh nē. Hāmri nē kām:

—Nā kot paj mē amā amnhire.

Anē hāmri nē kām kàxpore ho 30 nē òr kurē kumrēx nhūm hamÿ nē hkīnh nē kato nē ma tē. ¹⁶ Hāmri nē mē kām Jejus pynēnh kaxyw tānopxar o ri hkôt ri pa. Mē kot mar o ri pa xwÿnhjē hkàx ā unēnh nē ma mē hwÿr o htēm kaxyw.

Jejus kot hkôt mē pa xwÿnhjē kutā apkur

Makre 14.12-21; Rukre 22.7-13; Juāw 13.21-30

¹⁷ Tā nhūm mē hkīnh pē Pasja kato. Amnepēm kormā Ejit kām mē pa ri na pre mē inhīgētjaja ôwēhti hkrare hkwy hpa nē ho anē nē kuku. Tīrtūm kot ja hā mē omunh nē Ejit nhō xwÿnhjē nē mē kator kaxyw nhūm prem ā amnhī nhīpēx anē. Tā mē ixpē mē hkanrēhā mē htāmnhwÿjaja na pa htem arī amgrā mē arīgro pē Pasja ā axpēn wÿr akuprō nē jam ijamaxpēr pē mē urāk nē ôwēhti hkrare hkwy pa nē pāwti kaxkrit kēt kām kuku. Jakamā pa mē ixte Jejus kôt ixpa ho ixpa xwÿnhjaja wa axkrut nē Jejus wÿr tē nē amnhī tā hkukja nē kām:

—Kwa nhÿri kot paj we wa tē nē mē akutēp Pas ā mē panhō hā apē? Anē.

¹⁸ Hāmri nhūm wa kām:

—Nā wa māmri ma Jerujarēja wÿr wa tē. Nē krīm axā nē mēhō myti pumunh kurē kumrēx nē kām: “E Jejus na wa inhmē pa wa awÿr tē. Na awÿr hpēr mēnh o: ‘E na pa ra inhnojarēt. Jakamā nhÿri kot paj we ixkôt ri mē pa ho mē pa xwÿnhjē mē Pas ā axpēn kutā apku?’ Anhÿr o awÿr hpēr mē.” Anē. E wa ā kām akapēr anē kē war ama nē war amā òrkwÿ nhūmōk ā

ixkre rax ô jahkre. Kamā ra kaxyw mẽ paxàpkur xà hā mẽmoj piitāā. Ka wa omu hāmri nē māmri mẽ ixkutêp kamā mẽmoj tã apê. Anê.

¹⁹ Hāmri nhũm wa kuma nē ma Jerujarē hwýr tē. Nē hwýr axà hāmri nē ra kot wa kām mẽmoj jarēnh xà hkôt mẽmoj piitā omu hāmri nē mẽ ixkutêp mẽo hā àpēnh o wa xa.

²⁰ Tã nhũm kamàt pa mẽ Jejusja kôt ixkreta wýr ixpôx pa nē hwýr agjê nē ixàpkur kaxyw ixkrī. Mẽ ixte Jejus kôt ixpa ho ixpa xwýnhjê pé 12jaja pa mẽ ixpiitā Jejus kutā ixàpkur o ixkrī. ²¹ Hāmri nhũm Jejus tanhmā mẽ inhĩo jarēnh to nē mẽ inhmā:

—E pa mẽ amā mẽmoj jarē ka mẽ inhma. Kot kaj mẽ atō mẽ kām ixkuré xwýnhjê nhĩhkram ijaxà. Anê.

²² Hāmri pa mẽ tee ri kuma nē ixkapri htyx nē. Hāmri nē axpēn pānhā amnhĩ tã hkukja nē kām:

—Kwa xà pa? Nà pa hkêt. Kot paj ã anhĩpêx anhýr kêt kumrêx Pahiti.

Anhýr o axpēn pānhā kām amnhĩ tã aprā. ²³ Hāmri nhũm mẽ inhmā:

—Nà âm hāmri na pa mẽ amā ixkapêr. Mẽ ate ixkutā guhkrax kām anhõ pāwti ho mry kagô nhek o akrī xwýnhjê hõ kot kaj mẽ kām ixtā amýnê. ²⁴ Tĩrtũm kapêr ã kagà htũm ra kot ixkukamā harēnh xà hkôt koja mẽ tanhmā ixto rax nē xpi. Nom kot mẽ kām ixtā àmnēnh mã xwýnhta hêxta waa nē. ã kot amnhĩ nhĩpêx anhýrja mýrapê koja amnhĩ xà htyx kām hamak rax kumrêx. Kop apu aa ô māmāj nhõxà hkre rũm kator kêt ronhýx ja kām mex nē. Anê.

²⁵ Hāmri nhũm Jut Kariot kot mẽ kām hā àmnēnh mã xwýnhta hāmri amnhĩ tã kuma nē kām:

—Kwa xà we pa Jejus? Xà pa kot paj ã anhĩpêx anê? Kwa nà pa hkêt. Anê.

Hāmri nhũm kām:

—Tý. Ka ã ate inhĩpêx anhýr mã kēnā. Anê.

Jejus kot amnhĩ kamrô pikapĩr kukamā harēnh

Makre 14.22-26; Rukre 22.14-23; määnēn Wam Korit 11.23-26

²⁶ Tã nhũm Jejus pāwti hõ py nē Tĩrtũm mã harē nē mẽ inhmā ho hkry nē ho mẽ inhĩpêx pa nē mẽ inhmā:

—E na pa ã mẽ amā pāwti ho hkry nē mẽ amā ôr anê. Ja pyrà nē koja mẽ ã inhĩpêx anê nē te ixto hkry hpar pyràk o inhĩpêx pa amnhĩ xà htyx kamā ijamak kām ty. Nom mẽ anê kot paj ty. E mẽ māmri aku.

Anhýr o mẽ inhmā amnhĩ jarē pa mẽ kuma nē kot mẽ inhmā ho hkry xwýnhja ku. ²⁷⁻²⁸ Hāmri nhũm hpānhā kop py nē mã ho anê nē Tĩrtũm mã harē nē mẽ inhmā kugô nē mẽ inhmā:

—Mẽ kot ixpĩr xà hā arĩgroja ã koja ixkamrô axkapĩ. Nom koja mẽ amarĩ ixpĩr nhũm amarĩ ixkamrô hpikapĩr kêt nē. Âm paa. Pa kot paj mẽ anê mẽ ìhkram amnhĩ jaxà nhũm mẽ ã inhĩpêx anê nē xpi. Koja ixkamrô axkapĩ nhũm Tĩrtũm omu nē ixkukwak ri mẽ ate ixkôt amnhĩ xunhwýr xwýnhjê nē mẽ ate amnhĩ tomnuj piitā te amnhĩ katut kôt rēnh par pyràk o hipêx nē mẽ ato hkra. Ra amnepêm kot ã amnhĩ jarēnh anhýr xà hkôt. Jakamā e mẽ ixkamrô pikapĩr mã ajamaxpêr pé wĩhti ho akôm o axpēn nhĩpêx. ²⁹ âm hāmri na pa ã mẽ amā amnhĩ jarēnh anê. Kot paj axte wĩhti ho ixkôm kêt rāhā nhũm nhýrmā inhõ Papaj akupýn mẽ awýr inhmē. Hāmri pu mẽ akupýn ixwryk xà hā arĩgrota ã pahkĩnh rax kumrêx. No âm axtem tanhmā hā pahkĩnh to. Anê.

Nhũm pre ã Jejus mẽ inhmā amnhĩ jarēnh anê. Pa mẽ axpēn pānhā kopta py nē wĩta kwý ho ixkô. ³⁰ Hāmri nē mẽ ixpiitā ho ixkôm pa nē Tĩrtũm mã mex ã gre.

Hāmri nê ijaarôj nê hixêt prêk pê Oriwêhti hwÿr ma mra.

Jejus kot Simāw Pêtre mā kapêr ā harênh

Makre 14.27-31; Rukre 22.31-34; Juāw 13.36-38

³¹ Tā nhūm Jejus tanhmā mē ixte hkôt ixpa ho ixpa xwÿnhjê jarênh to nê mē inhmā:

—E Tirtūm kapêr ā kagà htūmta kot tanhmā mē akukamā mē ajarênh to nê mē ajarênh kot:

Kot paj ôwêhti jamār o pa xwÿnhja pī hāmri nhūm ôwêhti hpi-grành pa nê ma anhrà nê ri mra.

Anhÿr o kot mē ajarênh. Te ho mē apê ôwêhti pyrà nê ā mē ajarênh anê. Tā kamàt ja kamā koja mē tanhmā inhîpêx to ka mē ixtā mē omu nê mē umaj ôwêhti pyrà nê apiitā ixkaga hpa nê ma aprôt nê mra. ³² Nê mē kot ixpîr tā kot paj akupÿm ixtîr. Hāmri nê ma akupÿm mē akukamā pika pê Garirej wÿr mō. Kamā kot puj mē axte xapên pumu. Anê.

³³ Hāmri nhūm Simāw Pêtre tee ri tanhmā mē kot amnhî nhîpêx to hkukamā amnhî jarênhja ma nê hkaprî nê kām:

—Tk. Nà kot paj ā amnhî nhîpêx anhÿr kêt nê Pahihti. Koja pahkwÿja akaga japêr no pa kot paj aa akaga hkêt nê. Kot paj akôt ixpa rāhā nê. Anê.

³⁴ Hāmri nhūm Jejus kām:

—Nà ra ixte akukamā ixāhpumunh mex. Koja apkati hkôt krāhyre hkār kêt ri ka ra mē umaj ate ixkôt apa hkêt ā mē kām amnhî tā axàprār o axkrunêpxi kām ga. Kwa jam ajamaxpêr tÿx nê. Anê.

³⁵ Hāmri nhūm tee ri kuma nê axte kām:

—Kwa nà. Mē kot ajaxār nê apîr tā kot paj arî akôt ri ixpa nhūm mē pahto amÿrà nê tanhmā panhîpêx to. Nà kot paj aa akaga hkêt nê.

Anhÿr o kām amnhî jarê. Pa mē ijaxwÿja ā kām amnhî jarênh anê.

Jejus kot Tirtūm mā amnhî jarênh Makre 14.32-42; Rukre 22.39-46

³⁶ Tā nhūm Jejus mē inhmā anê pa mē ma nhÿri mē kot kām “Gesēm” anhÿr xwÿnhja wÿr mra. Hāmri nhūm mē inhmā:

—E mē jar ixkutêp akrî. Pa ma mûtūm tē nê Tirtūm mā amnhî jarê măn. Anê.

³⁷ Hāmri nê mē ixkwÿjê ho axkrunêpxi nê amnhî kôt mē kuwÿ. Simāw Pêtre nê Jepetew kra pijakrut pê Xiakre nê Juāwja wa nhūm amnhî kôt mē kuwÿ nhūm mē ma hkôt mra. Hāmri nhūm Jejus tee ri mē kot tanhmā hipêx tota kukamā hamaxpêr o hkaprî nê amnhî kamā kahak tÿx nê. ³⁸ Hāmri nê mē kām:

—Hêxta waa nê. Na pa tee ri amnhî xà htÿx kamā ijamakja kukamā ijamaxpêr nê amnhî kamā ixkahak tÿx o ra ixkaprî nê. Te ixkaprî kot ixpîr o mōr pyrāk. Jakamā e mē jar anohtÿx nê ixto Tirtūm wÿr o akrî kê tanhmā ixto pa mē kot tanhmā ixtoja kutā ixihtÿx nê. Anê.

³⁹ Hāmri nê mē kurūm htēm grire nê Tirtūm mā amnhî jarênh kaxyw htu mÿr pê tēm nê pikap nō nê kām:

—Kwa Papaj. Hêxta waa nê. Inhmā amnhî xà htÿx kām ijamak prām kêt kumrêx. Na pa tee ri amnhî kukamā ijamaxpêr nê amnhî kamā ixkahak tÿx nê. Jakamā kot kaj amā inhnê ja ho ajapêx prām nê māmri inhnê ho ajapêx nhūm mē kām ixkurê xwÿnhjaja tanhmā ixto hkêt nê. Rÿ ko. Kot kaj amā mē kot tanhmā ixto hprām kê mē māmri tanhmā inhîpêx to. Nom pam inhmā hprām xà hkôt kêt. Anê.

⁴⁰ Hāmri nê kànhmā xa nê akupÿm Simāw Pêtreja mē hwÿr tē nê tee ri mē omu nhūm mē ra ôt pa nê hikwÿ. Nhūm mē omu nê Simāw Pêtre mā kām:

—Kwa Simāw Pêtre. E mē hāmri akrā hapôj. Kwa wem anohtÿx grire ⁴¹ nê ixkutêp amnhî to Inhō

Papaj wÿr o akrî kê mê ixkôt tanhmã mê ato htã ka mê amã mê uma xaj ixkaga hkêt nê arî mê kutã amnhî to htÿx nê akuhê. Æ mê amã mê ate amnhî nhîpêx anhÿr prãm nom kormã mê amã maa.

⁴² Anhÿr o mê kãm kapêr hãmri nê akupÿm tẽ nê axte Tirtûm mã amnhî jarẽ nê kãm:

—Kwa Papaj. Nà inhmã amnhî xà htÿx kãm ijamak prãm kêt. Na pa amnhî kukamã ijamaxpêr nê amnhî kamã ixkahak tÿx kumrêx. Jakamã kot kaj amã inhnê ja ho ajapêx prãm nê mãmri inhnê ho ajapêx kê mê kãm ixkurê xwÿnhjaja tanhmã ixto hkêt nê. Nom ko. Kot kaj amã mê kot tanhmã ixto hprãm kê mê mãmri tanhmã inhîpêx to. Nom pam inhmã ja prãm xà hkôt kêt. Anê.

⁴³ Hãmri nê kànhmã xa nê Simãw Pêtreja mê hwÿr akupÿm tẽ. Nê mê omu nhùm kê mê axte gôr nê hikwÿ. Ra mê ôtixa htÿx nê axte gôr nê hikwÿ. Nhùm Jesus tẽ nê tee ri mê omunh o xa ⁴⁴ nom axte tanhmã mê kãm nê hkêt nê. Æm awjanã nê akupÿm tẽ nê kê wam kot Tirtûm mã amnhî jarênh xà hkôt axte kãm amnhî jarẽ. ⁴⁵⁻⁴⁶ Hãmri nê akupÿm mê hwÿr tẽ nê mê kãm:

—Kwa xàn ka mê arî gôr nê anhîkwÿ? E mê tokyx akrã hapôj. Na mê ra mê kot ixwÿr mrar nê ixpynênh mã. Koja mê tokyx ixkutã mê kot amnhî xunhwÿr xwÿnhjaja mê kãm ixtã amÿnê. Ota ra kot ixtã mê kãm àmnênh xwÿnhhta tẽ. E mê tokyx kànhmã akrî pu mê kutã mra. Anê.

Mê kot Jesus pynênh ã harênh

Makre 14.43-50; Rukre 22.47-53; Juãw 18.2-11

⁴⁷ Nhùm Jesus mê kãm kapêr o ãm rãhã nhùm Jut Kariot pê mê inhîõja hwÿr tẽ. Nê amnhî kôt mê ohtô nê hwÿr mê o tẽ nhùm mê wapohti nê kô jamÿ nê hkôt o mra. Patre krãhtûm mê Ijaew krãhtûmjaja kot Jesus wÿr mê rênh xwÿnhjaja nhùm

mê man hkôt Jesus wÿr mra. ⁴⁸ Na pre ra Jut Kariot amnhî kukamã mê kãm amnhî jarênh o:

—Kot paj ixkumrêx hwÿr tẽ ka mê ixkôt hapu hã mra. Kot paj hwÿr tẽ nê kãm ixkapêr nê kahti hkôt kumÿ. Ka mê hã ixpumu nê hwÿr mra nê unênh kurê kumrêx. Ixte kahti hkôt mÿnh xwÿnhhta kot kaj mê unê. Anê.

⁴⁹ Hãmri nê Jesus wÿr tẽ nê kãm:

—Pa Jesus? Xàn ka kormã anhôt kêt nê xa?

Anê nê kahti hkôt kumÿ. ⁵⁰ Hãmri nhùm amnhî tã omu nê kãm:

—Kwa Jut. Ate tanhmã ixto kaxyw mã xwÿnh jakamã e kam nê mãmri tanhmã ixto. Anê.

Hãmri nhùm Jut kôt mê mrar xwÿnhjaja Jut kot kahti hkôt mÿnh ã omu nê hwÿr mra nê unênh kurê kumrêx. ⁵¹ Hãmri nhùm mê inhîõja tee ri ja hã mê omu nê õ wapo kapa nê patre maati mã àpênh xwÿnh kot mê hkôt htêm xwÿnhhta mã ho apê. Nê kot ho hkrã nhîpônã mã tã kuh-paw nê upôk rûm hamak nhîkjê pix krãhta. ⁵² Hãmri nhùm Jesus omu nê nê kãm kapêr nê kãm:

—Kwa akupÿm awapota hkãm haxà nê amarî xa. Na htem wapo ho mê oprê ho pa nhùm mê amnhî xwar wapo ho mê kupa. ⁵³ Xà kot paj amnhî to Tirtûm wÿ nhùm ãm inhma nê tanhmã jajê pê ixpytãr to hkêt nê? Nà kot paj amnhî to kuwÿ nhùm ixwÿr kapêr o mê wÿk xwÿnhjê rênh kurê kumrêx nhùm mê ohtô rax kumrêx nê wÿr nê mê kêp ixpytã. ⁵⁴ Nom kot paj ã amnhî to hwÿr anhÿr kêt nê. Tirtûm kapêr ã kagã htûm kot amnepêm ixkukamã ã mê kot inhîpêx anhÿr ã mê harênh jakamã kwãr mê mãmri Tirtûm kãm hprãm xà hkôt ã inhîpêx anê. Anê.

⁵⁵ Hãmri nê hpãnhã mê kot unênh xwÿnhjê mã kapêr nê mê kãm:

—Kwa na pa pre apkati mê Tirtûm mã amnhî jarênh xà hã ixkre kamã mê kãm ixujarênh o

ixpa. Ka prem tokyx ixpynênh kêt tâ jarâhâ te ixte amnhî tomnuj xwÿnh pyrâk o inhîpêx nê ixwÿr wapohti nê kô hâ akapên nê ixwÿr tē. ⁵⁶ Tâ nom ra Tîrtûm kapêr â kagâ htûm kamâ Tîrtûm nhÿ hâ mē kapêr xwÿnh kot mē akukamâ mē ajarênh nê mē atâ kagâ xâ hkôt na ka mē ri â inhîpêx anê. Anê.

Nhûm pre â Jeusja amnhî tâ mē kâm kapêr anê. Hâmri pa mē ixte hkôt ixpa ho ixpa xwÿnhjaja mē omu nê tee ri amnhî kukamâ ijamxpêr nê mē umaj ixprôt nê angrâ nê ma inhmarr kurê kumrêx.

Mê kot patre maati hwÿr Jeus o môr â harênh

Makre 14.53-65; Rukre 22.54-55, 22.63-71; Juâw 18.12-14, 18.19-24

⁵⁷ Nhûm pre Ijaew krâhtûmjê mē Tîrtûm kapêr tûm o mē ahkre xwÿnhjaja ra patre maati Kajpas nhôrkwÿ hwÿr akuprô nê Jeus kutêp hkrî. Hâmri nhûm mē kot unênh xwÿnhjaja ma mē hwÿr o tē. ⁵⁸ Hâmri nê mē hwÿr ho axâ nê hkôt gjêx pa. Nhûm Simâw Pêtre mē hkôt hapu hâ mē htânopxar o tē nê kîtare hwÿr axâ nê pôristi nhîhkô hâ nhÿ. Hâmri nê tee ri Jeus kukamâ hamaxpêr o nhÿ nê hamaxpêr o:

—Kwa tanhmâ koja mē ixpê mē inhô Pahihti nhîpêx to? E pa jar amÿm tanhmâ mē kot hipêx to hâ mē omunh o nhÿ. Anê.

⁵⁹ Hâmri nhûm patre krâhtûmjê mē juistijaja kâm Jeus pîr prâm tÿx nê. Jakamâ na prem Ijaew wa ho hamêxkrut nê axpên kôt tanhmâ mē kâm ho hêx to nhûm mē kot hâ wa mar nê ra hpîr kaxyw mē pikuprônê xwÿnhjê kapi. ⁶⁰ Jakamâ nhûm prem axpên pânâhâ mē hwÿr mra nê tanhmâ ho hêx to. Nom axpên kôt harênh kêt nê. Âm ahpÿnhâ tanhmâ ri harênh to nom wahô wa axkrut nê axpên kôt harênh kêt nê. Jakamâ nhûm mē tee ri hâ mē kuma.

Tâ nhûm ja wa mē hwÿr tē nê axpên kôt harê nê mē kâm:

⁶¹—Nâ na pre tanhmâ Tîrtûm mâ amnhî jarênh xâ hâ ixkre jarênh to nê harênh o: “Kot paj nhÿrmâ inhmâ ixkreja grânh par prâm nê kugrà hâmri nê âm ixtâ apkati axkrunêpxi pix nê akupÿm hipêx pa. Ja kaxyw ixâhpumunh tÿx.” Anhÿr o na amnhî jarê pa wa kuma.

⁶² Anhÿr o mē kâm ho hêx. Hâmri nhûm patre maati pa wa kuma nê kânhmâ xa nê Jeus mâ kapêr nê kâm:

—Kwa xâ âm hâmri na wa â ajarênh anê nâ? Xân ka pre â amnhî jarênh anê? E mē inhmâ tanhmâ amnhî jarênh to. Anê.

⁶³ Nom nhûm amarî mē kâm xa nê mē kâm tanhmâ nê hkêt nê. Hâmri nhûm patre maati pa tee ri omu nê axte kâm kapêr nê kâm:

—Kwa aprî hâ mē inhmâ tanhmâ amnhî jarênh to. Tîrtûm noo mâ amâ ixkapêr jakamâ kêr ka akatât kôt mē inhmâ amnhî jarê nê amnhî to axêx kêt nê. Xâ apê Tîrtûm Kra? Xâ ka na pre Tîrtûm mē ixkaxyw axâm? Kwa akatât kôt mē inhmâ amnhî jarê. Anê.

⁶⁴ Hâmri nhûm tâ hprî hâ mē kâm amnhî jarê nê mē kâm:

—Tÿ. Nâ âm hâmri na ka â ijarênh anê. Ixpê Tîrtûm kot mē akaxyw ixâm xwÿnhnta na pa. Na pre mē awÿr inhmê pa mē awÿr wrÿ. Tâ kot paj nhÿrmâ axte kaxkwa rûm amnê akupÿn kakrâ kamâ mē awÿr wrÿ. Hâmri nê Tîrtûm xâhpumunh o âhpumunh xwÿnhnta nhîhkô hâ nhÿ hâmri nê pam tanhmâ mē ajarênh to ka mē amnhî tâ ixpumu nê inhma. Anê.

⁶⁵ Hâmri nhûm patre maati pa tee ri â kot amnhî jarênh anhÿr â kuma nê kamâ gryk tÿx nê. Hâmri nê gryk xâj kêp patre maati hâ ê kapa nê hkaxônê pa nê kumê nê hkwyjê mâ kâm:

—Tk. Kwa mo kaxyw kot puj mē axte ri tanhmâ kot amnhî tomnuj to hâ harênh xwÿnh ô japêr? Tâm kot amnhî pé Tîrtûm Kra hâ amnhî

jarênh ã amnhĩ to hêx nhũm mẽ pahte mar kênã. ⁶⁶ Jakamã e kwa tanhmã kot puj mẽ hipêx to? Anê.

Hãmri nhũm mẽ kãm:

—Nã ã kot amnhĩ jarênh anhÿr mÿrapê koja ty. Ra htyk mã tãm kênã. Anê.

⁶⁷ Hãmri nê tanhmã hipêx kati hto. Mẽ hkwyjaja hkuk kuhtô nê ãkra ho htak nhũm mẽ hkwyjaja ãkra hpo ho htak nê hã hpêr o axkê nê kãm:

⁶⁸ —E apê Tirtũm Kra hã ate amnhĩ jarênh jakamã mãn urak nê axãhpumunh tÿx. Jakamã e mẽ kot atak xwÿnhnta nhĩxi jarê pa mẽ ama. Anê.

Simãw Pêtre kot Jejus kôt pa hkêt ã amnhĩ jarênh

Makre 14.66-72; Rukre 22.56-62; Juãw 18.15-18, 18.25-27

⁶⁹ Rôm nhũm Simãw Pêtre arĩ kítare kamã nhÿ. Hãmri nhũm mẽ kãm ãpênh xwÿnh nitita omu nê hpri hã omunh kurê kumrêx. Hãmri nê kãm:

—Xê pêr apê Jejus kôt mẽ pa xwÿnhjê hõ na ka. Anê.

⁷⁰ Hãmri nhũm tee ri amnhĩ tã kuma nê kãm mẽ uma xàj mẽ kãm amnhĩ tã aprã nê kãm:

—Tk. Kokÿ. Ixte mēhõ my ata pumunhre hã. Anê.

⁷¹ Hãmri nê mẽ umaj kãnhmã xa nê tẽ nê kítare hwÿr hakwakrem ahte mẽ hkàx ã xa. Tã nhũm hpãnhã hõja omu nê hã mẽ kãm:

—Xê ma pêr ãm hãmri na mẽ harê. Kêp Jejus kôt ri mẽ pa xwÿnhjê hõ na pêr. Anê.

⁷² Hãmri nhũm amnhĩ tã kuma nê kãm:

—Tk. Nã mẽ ri ã amnhĩ krã hkôt ri ixto axêx anhÿr kêt nê. Ixte aa mēhõta pumunh kêt kumrêx. Anê.

⁷³ Tã nhũm mẽ hkwyjaja hwÿr mra nê kãm kapêr nhũm tanhmã mẽ kãm kapêr to nhũm mẽ kuma nê kãm:

—Kwa pêr ãm hãmri na mẽ ajarê. Apê Jejus kwÿ na ka. War akapêr kot axpên pyrak kênã. Anê.

⁷⁴ Hãmri nhũm tee ri mẽ kuma mẽ kãm amnhĩ tã aprãr kãm hihtÿx nê mẽ kãm:

—Kwa nã. Na pa Tirtũm noo mã mẽ amã amnhĩ jarê. Kot paj amnhĩ to ixêx japêr nhũm inhma nê hã tanhmã ixto. Nã urak ixpê Garirej nhõ xwÿnhre hã. Ixte mēhõ mÿj pumunh kêt kumrêx tã ka mẽ xatã axpên kôt ixte hkôt ixpa ho ixpa xwÿnh ã ixkamnhĩx o xa.

Anhÿrja o ra mẽ kãm amnhĩ tã aprãr o axkrunêpxi nhũm krãhyre hkàr kurê kumrêx. ⁷⁵ Hãmri nhũm Simãw Pêtre kuma nê ra Jejus kot hkukamã krãhyre hkàr kêt ri kot hã amnhĩ aprãr o axkrunêpxi hã harênhnta mã hamaxpêr kurê kumrêx. Hãmri nê kãnhmã hakry hpar o tẽ nê hkaprĩ htÿx kumrêx nê kítare pê kato nê tẽ nê awry hã xa nê mÿr rax nê.

27

Mẽ kot pahшти Pirat wÿr Jejus o htêm ã mẽ harênh

Makre 15.1; Rukre 23.1-2; Juãw 18.28-32

¹ Tã nhũm ra myt kator o mõi mẽ nhũm mẽ hkrãhtũmjê mẽ patre krãhtũmjaja axpên wÿr pikuprõnh pa. Hãmri nê Jejus ã axpên mar o hkrĩ nê axpên mã:

—Nã kot puj mẽ hã amÿnê kê mẽ kupĩ. Kêp Tirtũm Kra hã kot amnhĩ jarênh o amnhĩ to hêx kênã. Anê.

² Hãmri nê mẽõ pôristijê mã anê nhũm mẽ hpa hpre hpa nê ma pahшти Pirat wÿr o tẽ. Pirat kêp Rôm nhõ pahшти nhÿ hã mẽ ixpê Ijaewjê ho amnhĩptar jakamã nhũm mẽ ma hwÿr o tẽ nê ãhkram haxã.

Jut Kariot kot amnhĩ pÿr ã harênh Atre 1.15-19

³ Rôm nhũm Jut Kariot tee ri mẽ kot Jejus pÿr kaxyw mẽ harênh ma nê hkaprĩ nê. Ra kot mẽ kãm hã àmnênh tã mẽ kot hpÿr kaxyw ã mẽ harênh ma nê tee ri amnhĩ kukamã hamaxpêr o hkaprĩ htÿx nê. Hãmri nê hamaxpêr o:

—Hêxta waa nê. Mo na pa pre ri axtem nê ã amnhî nhîpêx anê? Nà na pa pre amnhî tomnuj tỳx kumrêx. Anê.

Hāmri nê ra mē kot kām kàxpore ho 30 nê òrta jamỳ nê ma akupỳm patre krāhtùmjê mē Ijaew pigêtjê hwỳr o tē. Hāmri nê mē kot Tirtùm mǎ amnhî jarênh xà hǎ ixkreja wỳr mē hwỳr axà ⁴ nê nhỳri mē omu nê mē hwỳr tē nê mē kām:

—E ota mē akàxporeta. Na pa ã mē amǎ Jejus ã ixàmnênh anhỳrja o amnhî tomnuj tỳx nê. Kot tām amnhî nhîpêx o pa htǎ pa axtem nê ã mē amǎ hǎ ixàmnênh anê. Jakamǎ e mī. Mē akupỳm akàxporeta jamỳ. Kot paj amnhīm hamỳnh kêt nê. Anê.

Hāmri nhùm mē tee ri kuma nê kām:

—Kokỳ. Nom ka na ka pre mē ixwỳr tē nê ho mē inhmar kênǎ. Anê.

⁵⁻⁷ Hāmri nhùm tee ri mē kuma hāmri nê pikap kàxpore rênh pa nê ma tē nê kato. Hāmri nê hkaprī htỳx kumrêx nê hamaxpêr o:

—Kwa tanhmǎ kot pa we amnhî to? Nà kot paj amnhî pī. Anê.

Hāmri nê krī pē kato nê ma mē kot pika kakwỳnh nê ho amnhīm poti nhîpêx xà hǎ pika hwỳr tē hāmri nê amnhî mut mǎ ê nê ho amnhî pī. Hāmri nhùm patre krāhtùmjaja harênh ma nê tee ri kot kàxpore rênhta kawrà nê hǎ axpên kukja nê axpên mǎ:

—Kwa tanhmǎ kot puj wem ja ho? Jut kot mē pamǎ Jejus ã àmnênh nhùm mē pahte hpīr xà hǎ kàxpore na. Jakamǎ kot puj mē ho Tirtùm mǎ amnhî jarênh xà hǎ ixkre ho mex kêt nê. Finat Mojes kot ja nê mē panhīgêtjê kurê jakamǎ na htem mē hpar xà hǎ kàxpore ho ixkreta ho mex kêt nê. Jakamǎ kwa tanhmǎ kot puj mē ho? Anê.

Hāmri nhùm ja mē kām:

—E na pa ra ijamaxpêr. Pu mē ho jut kot amnhî pīr xà hǎ pikata japrô hāmri nê kamǎ jar mē kêt mē

pahkwỳ hkêt htyk xwỳnhjê jagjênh o papa. Anê.

Hāmri nhùm mē kuma nhùm ja mē kām mex nê. Jakamǎ nhùm arīgro hō hǎ nhùm mē ma hwỳr mra nê haprô. ⁸ Hāmri nê hǎ hixi mē nhùm kêt “mē hkamrô pikapīr xà kamǎ pika”. Mē kot Jejus pīr xà hǎ kàxpore ho haprô jakamǎ nhùm prem ã hǎ hixi mênh anê. Nhùm htem arī axpên mǎ ã hixi jarênh anhỳr o pa. ⁹⁻¹⁰ Nhùm pre ra amnepêm Tirtùm nhỳ hǎ kapêr o pa xwỳnh finat Jeremīsti mē hkukamǎ hprī hǎ ja jarê nê hǎ kagǎ. Nê hǎ kagǎ o:

Koja Ijaew nhō patrejaja mēhō kot mē kām mēhō my hǎ àmnênh pānhǎ kām kàxpore ho 30 nê òr xwỳnhja jamỳ. Hāmri nê ma o tē nê nhỳri mē kot amnhīm pika kakwỳnh nê ho poti nhîpêx o pa xà hǎ pika hkwy japrô. Ra Tirtùm kot inhmǎ mē harênh xà hkôt koja mē ã amnhî nhîpêx anê. Anê.

ã finat Jeremīsti kot Tirtùm nhỳ hǎ mē hkukamǎ mē harênh nê hǎ kagǎ anhỳr xàja kôt nhùm prem ã amnhî nhîpêx anê.

Pahihti Pirat kot Jejus kukjêr ã harênh

Makre 15.2-5; Rukre 23.3-5; Juǎw 18.33-38

¹¹ Rôm nhùm mē pahihti Pirat wỳr Jejus o tē nê hwỳr ho axà nê kutǎ ãm nhùm xa nhùm Piratja omu nê kām:

—E. Kwa inhmǎ amnhî jarê. Xà apê Ijaew nhō pahi na ka nà? Xà ka na htem amnhî wỳr ajamǎr o pa? Anê.

Hāmri nhùm kām:

—Tỳ. Nà ãm hāmri na ka ijarê. Anê.

¹² Hāmri nhùm mē hkrāhtùmjê mē patre krāhtùmjaja pahihti Pirat mǎ tanhmǎ ho kapêr punuj to. Nhùm amnhî tǎ mē kuma nom tanhmǎ kām amnhî tǎ aprǎr to hkêt

nê. ¹³ Jakamã nhũm pahihti Pirat tee ri ja hã omu nê kãm:

—Kwa xà na ka ã mẽ kot ato kapêr anhÿrja mar kêt nê nà?

¹⁴ Anhÿr tã nom nhũm Jejus akryk xa nê axte tanhmã kãm nê hkêt nê. Hãmri nhũm Pirat tee ri kot ã amnhĩ nhĩpêx anhÿr ã omu nê hamaxpêr o:

—Kokÿÿ. Mẽ kot ho kapêr punuj tã nhũm ãm mẽ kuma nê te kãm mẽ uma hkêt pyrà nê tanhmã inhmã amnhĩ tã ãprâr to hkêt nê. Anê.

Pirat kot Jejus pĩr kaxyw hã ãmnênh ã harênh

Makre 15.6-15; Rukre 23.13-26; Juãw 18.39-19.16

¹⁵⁻²¹ Tã nhũm Pirat kormã mẽ kot axpên mar xà hã ixkre kamã ÿr rãhã nhũm hprõja hwÿr hpêr mẽ nê kãm:

—Xê tanhmã mẽ kãm Jejusja ã axãmnênh to hkêt nê. Na pa kamãt ja kamã hkôt amÿti nê tee ri hkukamã ijamaxpêr. Kot amnhĩ to mex xwÿnh na. Aa tanhmã kot amnhĩ tomnuj to hkêt jakamã xê tanhmã mẽ kãm hã axãmnênh to hkêt nê. Kwarĩ. Anê.

Hãmri nhũm Piratja kuma nê hamaxpêr o:

—Nà ixte Ijaew krãhtũmjê pumunh tũm. Ijaew kwÿjaja kãm Jejus kĩnh nhũm mẽ hkrãhtũmjaja kot mẽ hã Jejus kamã gryk nê. Jakamã ixte tanhmã mẽ kãm hã ixãmnênh to kaxyw na mẽ ã ixwÿr o htêm anê. Anê.

Na htem Pas nhõ arĩgrota hapôx mẽ nhũm pre htem Ijaew o amnhĩptâr xwÿnhja mẽ kãm mẽ hagjênh xà kamã hkrĩ xwÿnhjê ho hpÿnh nê mẽ hapôj. Mẽ kãm hprãm xà hkôt nhũm mẽ kãm mẽ hapôj nhũm mẽ akupÿm kapôt ã hamakêtkati nê amnhĩx pa. Jakamã nhũm ra mẽ hagjênh xà kamã mẽhõ my pê Parapasja hkrĩ. Na pre tanhmã amnhĩ tomnuj to nhũm mẽ mÿrapê unê nê haxã. Jakamã nhũm Ijaewjaja mẽ ho amnhĩptâr xwÿnh

Pirat wÿr akuprõ nê kuhê nhũm mẽ kãm:

—E kot paj jarãhã mẽ amã mẽ hagjênh xà kamã mẽ hkrĩ xwÿnhjê hõ mã inhũre kê ãmnhĩx kato nê ri pa. Nhÿ kot paj mẽ amã kãm inhũre? Xã Parapas nà? Xã mẽ akwÿ kot amnhĩm ho mẽ anhõ pahihti Jejus pê Tĩrtũm kot mẽ akaxyw ãm xwÿnhnta kot paj mẽ amã kãm inhũre? Nhÿ wehe? E mẽ inhmã nhÿ jarê. Anê.

Pirat na pre mẽ inhõ patre krãhtũmjê pumunh mex nê. Ijaew kãm Jejus kapêr mar prãm tÿx ã nhũm mẽ hã kamã gryk tÿx nê hwÿr o mrarja kôt nhũm mẽ omunh mex nê. Jakamã ã hã mẽ hkukjêr anê. Hãmri nhũm mẽhpigêt mẽ patre krãhtũmjaja kuma hãmri nê mẽ pikuprõnh nê mẽ kuhê xwÿnhjê mã kãm:

—Kwa mẽ kãm anê kê mẽ pamã Parapas mã mãn ure nê mãmri Jejus Kris pĩ. E kwa mẽ tokyx kãm anê kê Parapas mã ure. Anê.

Hãmri nhũm mẽ mẽ kuma nê pahihti Pirat mã kãm:

—Nà mẽ inhmã Parapas mã mãn anhũre. Anê.

²² Hãmri nhũm tee ri mẽ kuma nê mẽ kãm:

—Kwa no mẽ ate Jejus pê Tĩrtũm kot mẽ akaxyw ãm xwÿnh ã harênh xwÿnhnta? Tanhmã kot paj hipêx to? Anê.

Hãmri nhũm mẽ kãm:

—Apĩ ri. Tokyx pĩ kahpa hã anhõ kê ty. Anê.

²³ Hãmri nhũm tee ri mẽ kuma nê mẽ kãm:

—Tk. Kwa nà. Tanhmã kot amnhĩ tomnuj tore hã kot pa kêt ri pĩ kahpa kunhõ nhũm ty. Anê.

Hãmri nhũm mẽ xatã ãmra kamã kãm:

—Kwa pĩ kahpa hã mãn anhõ kê ty. Kwa tokyx ã mẽ inhmã hipêx anê. Anê.

²⁴ Hãmri nhũm tee ri ja nê tanhmã mẽ kãm kapêr to no nhũm mẽ mar kêt nê. Nhũm tee ri mẽ ãmra mar o xa. Hãmri nê kãm Jejus

pîr prâm kêt jakamã amnhîm gô hkwý janhi nê mê piitã mê noo mã amnhî nhîhkra kuhôn h o xa. Mê kot hã omunh xà hkôt kãm hpîr prâm kêt ã omunh kaxyw. Hãmri nê mê kãm:

—E na pa mê anoo mã ã amnhî nhîhkra kuhôn anê ka mê ja hã ixpumu. Nà inhmã hpîr prâm kêt. Tanhmã kot amnhî tomnuj tore hã. Mê kaxipixjaja mê amã hpîr hprâm jakamã mê kam nê tanhmã ho. No pa kot paj tanhmã ho hkêt nê. Âm kwarî ho kwarî. Anê.

²⁵ Hãmri nhûm mê kuma nê kãm: —Tôe. Nà âm hãmri. Kot paj mê pamjaja amnhî tâ htykja nhô. Nê mê ixkra nê mê ixtãmnhwýjê mê amnhî to ixpimràatã amnhî tâ kunhò. Kê Tirtûm kãm tanhmã hã mê ixtô hto hprâm nê mamri tanhmã hã mê ixtô hto. Anê.

²⁶ Hãmri nhûm mê kuma nê mê kãm hprâm xà hkôt mê kãm Jesus ã amýnê nê mê kãm Parapas mã ure. Ra Parapas kot pahi Pirat pê ô pôristi kutã amnhî xãm nê kêp hõxpîrja mýrapê nhûm mê kot unênh nê haxã tâ Ijaew kãm hprâm xà hkôt akupým kãm ure. Hãmri nê ô pôristijê mã anê nhûm mê Jesus tak. Nê htak rax nê hãmri nhûm Pirat mê kãm hã amýnê nhûm mê kot pî kahpa hã nhôr o hpîr kaxyw ma o tê.

Pôristi kot Jesus ã hpêr o pikênh ã harênh

Makre 15.16-20; Juãw 19.2-3

²⁷ Tã nhûm pôristijaja mê kot pî kahpa hã Jesus nhôr kaxyw ma o tê nê pahiti Pirat nhôrkwý kamã ixkre hõ hwýr ho axã. Nhûm pôristi ohtô nê hwýr akuprô nê hã pêr o pikênh kaxyw axpên mã:

—E kwa tokyj pu mê kãm pahi xê jaxã ri. Kêp pahi hã kot amnhî jarênh kênã. Anê.

²⁸ Hãmri nê kêp ê kapa nê hpãnhã kêp pahi hã mê ê kamrêk mexja py nê kãm haxã. ²⁹ Nê kãm pahi hã mê ahkã nhîpêx nê hkrãm haxã. Nom

axtem akunî kamã mêmò mrô nhî te kot ronh kanêre pyrãk xwýnhja nhûm mê hikãx nê hkrãm haxã. Nê kãm pahi hã kô gô nhûm kupy nê o xa. Hãmri nhûm mê ho anhýr pa nê kutã hkôn krã ho rôrôk nê hkrî hpa nê hã pêr o pikênh kamã kãm:

—E âm hãmri. Apê Ijaew nhô pahi punuti na ka. Anê.

³⁰ Hãmri nê kãnhmã kuhê nê hkuk kuhtô nê kêp kô pyta nê xatã ho hkrãx pê htak. Nhûm prem ã pêr o pikênh kãm hipêx anê. ³¹ Hãmri nê kêp pahi hã ê kapa nê akupým kãm ê jaxã nê mê kot pî kahpa hã nhôr kaxyw ho kato nê ma o tê.

Pôristi kot pî kahpa hã Jesus nhôr ã harênh

Makre 15.22-32; Rukre 23.27-43; Juãw 19.17-25

³² Nhûm pôristijaja Jesus o kato nê ma kapôt mã o tê. Nê kãm pî kahpa pytîja gô nhûm kumý nê mê hkôt o hkwý. Nom ra hirok týt nê nhûm mê tee ri ja hã omu nê mêmò kot ho ajuta kaxyw mê kot omunh xwýnhjê kapi ho xa. Hãmri nê Sirên nhô xwýnh Simãw kã htyk pumu nê unê nê kãm kot Jesus o ajuta kaxyw hã karô nhûm hwýr tê nê kêp pî kahpata mý nê hkôt kãm kumý nê o tê. ³³ Hãmri nhûm mê kên nhîxêt te kot mê hkrã hi pyrãk xwýnhhta wýr mê o pój. Mê kapêr kãm na prem hixêtja jarênh o: “Korkot.” No mê pakapêr kãm Korkot jarênhja kêp “mê hkrã hi xã” nhûm mê ma hwýr Jesus o pój.

³⁴ Hãmri nê mê kot pî kahpa hã nhôr kaxyw nhûm ã htyx kumrêx kamã hamak pymaj kãm mêmò mê hkanexàja gô. Wîhti mê mêmò mry ma xã ho pihkãr nhûm mê kãm hkwý gô. Nom nhûm hkaki nê mê kot amnhî xã htyx kamã hamak kêt xã hã omunh kurê kumrêx nê hkaga. Nhûm mê tee ri ja hã omu hãmri nê kêp ê kapa nê kumê nê pî kahpa hã kuxi nê prek o îhkra nê hpar o htyx pa. Hãmri nê kãnhmã pî jarî nê ahkre kamã âm nê ho htyx

nhũm kÿxpê ajêt. ³⁵ Hãmri nhũm pòristi hkwyjaja xypên mã ê hkwy ho pigrành kaxyw hã kênre ho jôka. ³⁶ Hãmri nê ho anhÿr pa nê pikap Jejus jamâr o hkrî.

³⁷ Na htem mẽ hpar kaxyw nê tanhmã mẽ kot amnhĩ tomnuj to hã kagà nê mẽ mÿri pĩ kahpa hã hanhô. Jakamã na prem tapti hõ py nê tanhmã Jejus ã kagà hto nê hã kagà ho:

IJAEW NHÕ PAHI NA JA

HIXI PÊ JEJUS

Hãmri nê hwÿr ho api nê mÿri kunhô. ã Jejus kot amnhĩ jarênh anhÿrja mÿrapê na prem kupi.

³⁸ Hãmri nhũm mẽ hpãnã wa àhkính xwÿnh wa ho axkrut nê mãânên pĩ kahpa hã wa kunhô. Nê akutã ho Jejus nhÿjê nhũm war ajêt.

³⁹ Tã nhũm pry hã mẽ mrar xwÿnhjaja Jejus pumu nê hã hpêr o pikênh o mra nê kãm:

⁴⁰ —Kwa ka na ka pre ate Tirtũm mã amnhĩ jarênh xà hã ixkre grành par nê atã apkati axkrunêpxi nê akupÿm hipêx par ã amnhĩ jarê. Nê apê Tirtũm Kra hã amnhĩ jarê. Nê axàhpumunh o axàhpumunh jakamã e kwa amnhĩ kapa nê wrÿ pa mẽ ja hã apumu. Kwa tokyx. Anê.

⁴¹ Nê patre krãhtũmjê mẽ Tirtũm kapêr tũm o mẽ ahkre o mẽ pa xwÿnh mẽ mẽ hkrãhtũmjaja piitã hwÿr mra nê hã hpêr o axkê. ⁴² Nê xypên mã harênh o:

—E jahti na xep pre mẽ kamã ukapri ho pa nê tanhmã mẽ ho ajuta hto ho pa. Tã nom tãm tanhmã amnhĩ to nê wrÿk kêt nê. Kwa pu mẽ arĩ pakuhê nê kot amnhĩ kaxàr nê wrÿk kãm omu. Koja wrÿ pu mẽ omu nê kêp mẽ panhõ pahшти hã hkôt pajamaxpêr kurê kumrêx. E tokyx wrÿ Jejus. Pa mẽ awrÿk kãm apumu. Nà kot kaj awrÿk rax nê. ⁴³ Na hte amnhĩ kaxyw Tirtũm mã hamaxpêr o pa. Nê kêp Kra hã amnhĩ jarênh o pa. Jakamã e. Kê Tirtũm tãm hwÿr tẽ nê

kêp Kra hã akupÿm mẽ pahpê utã. Anê.

⁴⁴ Hãmri nhũm wa kot akutã hijê nê jêt xwÿnhnta wa haxwÿja mẽ mar xà hkôt mã ho kapêr anê.

Jejus tyk ã harênh

Makre 15.33-41; Rukre 23.44-49; Juãw 19.28-30; mãânên Eprêw 10.19-20

⁴⁵ Tã nhũm kaxkwa nhÿpòk ri myt ÿr mẽ nhũm te kamàt pyrãk nhũm kamàt kô rax kumrêx. Jao hã awry mẽ nhũm ra akupÿm myt katêr o mō. ⁴⁶ Hãmri nhũm Jejus kapêr kãm hihtÿx nê àmra htÿx kãm Tirtũm mã kapêr nê kãm:

—Inhõ Tirtũm inhõ Tirtũm. Kwa mon ka ixkaga? Anê.

Nom kapêr kamã kãm kapêr o:

—Eri Eri. Rãmã sapatani. Anê.

⁴⁷ Hãmri nhũm mẽ kot mar xwÿnhjaja kot Eri jarênh ã kuma nê htÿx ho finat Eris mã kapêr ã hkamnhix. ⁴⁸ Nhũm Jejus par pê guhkrax kãm wĩhti punure xa. Jakamã nhũm mẽ ã kapêr anhÿr ã kuma nhũm mẽhõ kãm hkapri nê. Hãmri nê mẽmo rerek py nê o tẽ nê kaxyw pĩ rytija py nê ho hkanhwÿ. Nê akupÿn o tẽ nê ho wĩhti nhek nê Jejus kot hkaôr kaxyw kãm kupê.

⁴⁹ Hãmri nhũm hkwyjaja tee ri ja hã omu nê nê kãm kapêr nê kãm:

—Tk. Kwa nhãm xa. Pu mẽ kop Eris jamã mãn. Koja hwÿr tẽ nê ho wrÿk japêr. Anê.

⁵⁰ Hãmri nhũm kamàt kô mẽ nhũm Jejus ra htyk kaxyw nê axte àmra htÿx nê hãmri nê ty. ⁵¹ Tykja kôt nhũm Tirtũm mã amnhĩ jarênh xà hã ixkre kamã hakwakre hã kupêxêja kÿj rũm ahpar mã axkjê nê amnhĩ kahê xà mẽnh kurê kumrêx. Utĩ rax tã axkjê nê amnhĩ kahê xà mẽ. Te Jejus htyk o te kot mẽ pahte hkôt amnhĩ xunhwÿr xwÿnhjê mã Tirtũm wÿr pry jakwa kre kahê xà mẽnh pyrãk o ã amnhĩ nhÿpêx anê. Nhũm pika httert tÿx kumrêx o kên rũnh kwÿ ohô nê hkrakrak pa. ⁵² Hãmri nhũm

mê htyk ã pika kamã mê htykjê nhôrkwÿ ho ohtô nê mê hã axkjê nhũm mê hkwÿ xwÿnhjaja akupÿm htír nê hapôj nê kuhê. Na prem kormã htyk kêt ri amnhĩ kaxyw Tĩrtũm kôt hamaxpêr. Tã nhũm Jejus ty nhũm mê ohtô nê akupÿm htír nê hapôj nê kuhê. ⁵³ Nom kormã nhÿhÿm mrar kêt nê. Arĩ mê hã pika nhĩpy Jejus akupÿm htír ã hamãr o kuhê. Tã nhũm Jejus apkati hõ hã akupÿm htír ã arĩgrota ã nhũm mê rĩ kormã ma Jerujarê hwÿr mra nê hwÿr agjê nhũm mê ohtô nê akupÿm mê htír ã mê omu.

⁵⁴ Nhũm kormã Jejus htyk o môrta ã nhũm pôristi krãhtũm mê pôristi hkwÿjaja hãmri hparpê hamãr o kuhê nê htyk kãm omu. Nê pika htertet kamã ama nê mêmoj kot tanhmã amnhĩ nhĩpêx toja pumu nê tee ri hamaxpêr nê kãm ma htÿx kumrêx. Hãmri nê axpên mã:

—Hêxta waa nê. Pêr ãm hãmri na pre htyk xwÿnhhta amnhĩ jarê. Kêp Tĩrtũm Kra kênã. Tã pu mê amari pahtÿx kupĩ. Anê.

⁵⁵⁻⁵⁶ Nhũm pre mênijaja ohtô nê amÿm Jejus tyk kãm omunh o kuhê. Marir Matarên nê Xiakre mê Juje wa katorxà Marir nê Xiakre hõ mê Juãw wa katorxàja nhũm mê kormã htyk kãm omunh o kuhê. Na prem Garirej rùm hkôt tanhmã ho ajuta hto ho hkôt Jerujarê wÿr mô.

Mê kot Jejus jaxàr ã harênh

Makre 15.42-47; Rukre 23.50-56; Juãw 19.38-42

⁵⁷ Tã nhũm ra myt grire nhũm krĩ pê Arimatej rùm hikãxpore rax xwÿnh pê Jujeja tẽ. Nom axtem Juje hõ na pre. Ra kot Jejus kôt amnhĩ xãm jakamã kãm ho wrÿk nê haxàr prãm nê. ⁵⁸ Hãmri nê ma pahi Pirat wÿr tẽ nê ì hã kuwÿ nê kãm:

—E ot pa awÿr tẽ. Kwa inhmã htyk xwÿnhhta gô pa ma o tẽ nê haxà nã? Anê.

Hãmri nhũm kuma nê kãm harê nhũm ma o tẽ nê haxà. ⁵⁹ Kaxyw

kupêxê mex ô py nê ho hkupu pa ⁶⁰ nê ma o tẽ nê ô kên kre kamã haxà. Na pre htyk kukamã kên kre kakwÿ nhũm mê kot kormã kamã mêhõ jaxàr kêt tã kamã na pre Jejus jaxà. Hãmri nê hã kên rax ô xãm nê ho hitom nê ma akupÿm tẽ. ⁶¹ Nhũm Marir Matarên mê Marir ôja wa kên kreta kapem omunh o wa nhÿ.

Pôristi kot kên kre jamãr o kuhê ã harênh

⁶² Tã nhũm apkati nhũm mê inhõ arĩgromnu pê sap kato. Hãmri nhũm Parijew nhõ xwÿnhjê mê patre krãhtũmjaja ma pahi Pirat wÿr mra nê kãm:

⁶³ —Kwa pahihti. Nà amnhĩ to hêx o pa xwÿnhhta na pre kormã htír nê pa ri tanhmã amnhĩ jarênh to ho pa. Nê nhÿrmã ty nê htyk ã apkati axkrunêpxi pix nê akupÿm htír ã amnhĩ jarê. ⁶⁴ Jakamã kwa hwÿr anhõ pôristi hkwÿ rê kê mê ma hwÿr mra nê hamãr mex o apkati axkrunêpxi. Kot ka anhÿr kêt nhũm hkôt mê pa ho mê pa xwÿnhjaja ma hwÿr mra nê ho ahkĩ nê ma o mra nê nhÿri haxà nê mê piitã mê kãm ra akupÿm htír ã harênh o hêx o pa. Te tãm kot amnhĩ kukamã amnhĩ jarênh pyrãk. Nom mê kot axte ã harênh anhÿrja koja omnuj tÿx o tãm kot ã amnhĩ jarênh anhÿrja jakre. Anê.

⁶⁵ Hãmri nhũm mê kuma nê mê kãm:

—Tõe. Nà koja mê ho anê. E mê ma hwÿr amnhĩ kôt pôristi hkwÿ ho mra kê mê hakwakre kahê xà jamãr mex o kuhê. Anê.

⁶⁶ Hãmri nhũm mê kuma nê ma hwÿr mra nê hakwakre hã kên raxta o htÿx pa. Nê mêhõ kot omunh nê kahê mênh pymaj menh ê ho hkukõ. Hãmri nê ho anhÿr pa nê pôristi mã kãm:

—E Kêr ka mê jar kuri hamãr mex o akuhê. Kê mêhõ tẽ nê tanhmã ho hkêt nê. Anê.

28

Jejus akupÿm htîr ã harênh

Makre 16.1-8; Rukre 24.1-12; Juãw 20.1-10

¹ Tã nhũm apkati nhũm tòmîk. Hãmri nhũm Marir Matarên mê Marir ôja kwÿhtã kãnhmã nhÿ nê ma akupÿm kên kreta wÿr wa tẽ. ² Puh nhũm pika htetet tÿx nê nhũm Tirtũm kapêr o mê wrÿk xwÿnhja kên kre wÿr wrÿ nê nhãm hakwakre nê kên raxta mê nê hã nhÿ. ³ Hirã htÿx kãm nhÿ. Te na jaxênh pyrãk. Nê ê haka htÿx kumrêx. ⁴ Nhũm pôristijaja tee ri omu nê kãm ma htÿx nê htetet nê umaj pikap rôrôk pa nê te htyk pyrã nê hikwÿ. ⁵ Hãmri nhũm wa nita kên kre hwÿr pøj nê tee ri Tirtũm kapêr o mê wrÿk xwÿnhta pumu. Nhũm wa kãm:

—Kwa wa amã ma hkêr nê. War ate Jejus pumunh kaxyw na ka wa tẽ. Mê kot pÿ kahpa hã nhôr xwÿnhta. ⁶ Nom jar amrakati. Na ra akupÿm htîr nê kato nê ma tẽ. E wa kam nê amnê axã nê nôr xã kaprÿ pumu. Anê.

Hãmri nhũm wa kuma nê tee ri kên kre kamã Jejus japêr nhũm kamã amrakati. ⁷ Hãmri nhũm Tirtũm kapêr o wrÿk xwÿnh wa kãm:

—E wa tokyx ma akupÿm tẽ nê hkôt mê pa ho mê pa xwÿnhjê mã harê. Kojã ma Jejus mê akukamã akupÿm Garirej wÿr mō. Garirej kamã kot kaj mê axte axpên pumu. Ra kot mê amã amnhÿ jarênh xã hkôt. E kwa wa tokyx ma akupÿm mê hwÿr tẽ. Anê.

⁸ Hãmri nhũm wa kuma nê ma akupÿm hprôt nê htêm kurê kumrêx. Kãm ma htã hkÿnh nê. Nê ma Jejus kôt mê pa ho mê pa xwÿnhjê mã ujarênh kaxyw ma mê hwÿr hprôt nê wa tẽ. ⁹ Pu nhũm ra Jejus tãm wa kutã tẽ nê wa hkaxpa. Hãmri nê wa haêr pê wa kãm kapêr nê wa kãm:

—Pa? Nhÿhÿm na ka wa tẽ? Anê.

Hãmri nhũm wa omu nê hkÿnh tÿx kumrêx nê hwÿr hprôt nê hpar pê hkôn krã ho têm nê akutã hpar ã kumÿ nê kãm mex o mex ã harê nê kãm:

—Hêxta gãã nê. Ma amex kumrêx. Amex o amex. Anê.

¹⁰ Hãmri nhũm wa kãm:

—E war amã ma hkêr nê. Mamrÿ ma tẽ nê ixkôt mê pa ho mê pa xwÿnhjê mã ijarê kê mê ma Garirej wÿr mra. Kamã kot paj mê axte axpên pumu. Anê.

Pôristi kot kãxpore hprãm xãj Jejus o hêx ã harênh

¹¹ Rôm nhũm pôristi hkwyjaja akupÿm tãm hkrã hãmri nê ma kên kreta rũm akupÿm krÿm mra. Hãmri nê patre krãhtũmjê hwÿr mra nê mê kãm ujarênh pa. ¹² Hãmri nhũm mê tee ri mê kuma nê mēhpigêjtê ho akuprô nê mê hã axpên mar o hkrÿ. Hãmri nê axpên mar pa nê pôristi mã amnhÿrer rax nê mê kãm:

¹³ —E mê amnhÿm kãxpore jamÿ nê ma ri ã mê kãm amnhÿ jarênh anhÿr o apa. Nom kêr ka mê kãm amnhÿ to axêx nê mê kãm: “Na pa prem kên kre kapem ixtÿx gôr nê inhÿkwÿ nhũm Jejus kôt mê pa ho mê pa xwÿnhjaja mra nê mê ixpê ï ho ahkÿ nê ma o mra.” Anhÿr o mê kãm amnhÿ to axêx o apa. Mê ixte kãxpore ho mê amã amnhÿrerta pãnhã. ¹⁴ Kojã pahihiti Piratja mê anhôt ã mê ajarênh ma nê hã tanhmã mê ato kaxyw hã kot paj mê axy pê tanhmã kãm ixkapêr to nhũm tanhmã mê ato hkêr nê. Jakamã e. Mê tee ri amnhÿ kukamã ajamaxpêr kêt nê. Mê mãmri ma mra nê ã mê kãm axujarênh anhÿr o ri apa. Anê.

¹⁵ Hãmri nhũm mê kuma nê mê kot amnhÿ to hêxta pãnhã kãxpore jamÿ nê ma mê mar xã hkôt mê pitã mê kãm Jejus kôt mê pa xwÿnhjê ho hêx o pa. Tã na htem arÿ jarãhã Ijaewjaja ã axpên mã mê harênh anhÿr rãhã ho pa.

*Jejus kot hkôt mē pa ho mē pa
xwÿnhjê mã mē àpênh ã karõ*

*Makre 16.14-18; Rukre 24.36-49;
Juãw 20.19-23; Atre 1.6-8*

¹⁶ Tã pa mē ixte Jejus kôt ixpa
ho ixpa xwÿnh pé 11jaja hãmri
akupÿm Jejus htîr ã harênh ma
hãmri nê ma Garirej wÿr mra.
Nhÿri Jejus kot mē inhmã mēmo
hixêt prêk jarênhja wÿr.

¹⁷ Nê ra hwÿr ixpõx o mrar mē
Jejus pumu. Tã nom nhũm mē
ixkwÿjaja tee ri omu nê htÿx ho
nhãm mēhõ hã hkamnhîx. No kêt
mē pajaja na pa prem ixprî hã
omunh kurê kumrêx nê ixkînh tÿx
nê. Nê ixkînh nê hwÿr ixprõt nê
kãm:

—Pa Jejus? Héxta waa nê. Amex
o amex. Anê.

¹⁸ Hãmri nhũm mē inhmã:
—E na pre Tîrtũm ã inhmã kapêr
anê nê inhmã: “E kêr ka amnhî
nhÿ hã mēmoj piitã tanhmã ho ho
apa. Kaxkwa kamã nê pika kamã.
Mamrî nhÿhÿm amnhî krã hkôt
amã tanhmã amnhî to hprãm xà
hkôt tanhmã amnhî nhîpêx to ho ri
apa.” Anê. Na pre mē akaxyw ã
inhmã kapêr anê.

¹⁹ —Jakamã e. Kêr ka mē ma
pika piitã hkôt ri mē kãm ijarênh o
ri apa. Kê mē ixte mē nê tanhmã
amnhî nhîpêx to hã ijarênh ma
hãmri nê ixkôt amnhî xunhwÿ nê
ixkôt ri amnhî nhîpêx o pa. Nê
kêr ka mē ja hã mē omu nê Tîrtũm
mē wa inhmã mē hkrã kumrã. Wa
ixkarõ nhÿ hã mē hkrã kumrã. Mē
kot wa inhÿ hã pix mã tanhmã
amnhî nhîpêx to ho pa kaxyw.

²⁰ —Nê mē kãm anê kê mē
ixkapêr piitã hkôt amnhî nhîpêx
rãhã ho pa. E kêr ka mē ma mē
kãm ã ijarênh anhÿr o ri mē hkôt
apa. Kot paj mē anhîhkô hã ri ixpa
rãhã nhũm nhÿrmã pikaja hapêx o
hapêx. Anê.

Na pre ã Jejus mē inhmã mē
ixàpênh ã karõ anê.

Matêwre kot Jejus jarênh nê hã
kagàja ja kôt na hapêx.

Makre Makre kot tanhmã Jejus kot amnhĩ nhĩpêx to ho pa hã kagã

Juãw Makre na pre kagãja nhĩpêx. Na pre hte ma hkwyjê hkôt mẽ kãm Jejus kot tanhmã amnhĩ nhĩpêx to hã harênh o ri pa. Na pre ra Simãw Pêtreja hprĩ hã Tirtũm kapêr o ahkre nhũm kuma nê mar tỳx nê. Hãmri nê mẽ pamã tanhmã Jejus ã kagã hto. Simãw Pêtre xô ri tanhmã kot amnhĩ nhĩpêx to hã kagã. Jejus kêp Tirtũm Kra hã hihtỳx o hihtỳx nê àhpumunh o àhpumunh ã nhũm pre harê nê hã kagã. Nê kêp mẽ pakutã nojarêt xwỳnh ã harê nê hã kagã. ã Juãw Makreja mẽ pamã Jejus jarê nê hã kagã anê.

Matêwre 3.1-10; Rukre 3.1-9; Juãw 1.6-8, 1.19-23

¹ Pa Kris kôt ixkrãmnhwỳjaja. E kot paj mẽ amã tanhmã Jejus kot amnhĩ nhĩpêx to ho pa hã kagã ka mẽ kamã harê nê ama. Kêp Tirtũm Kra na. Tãm na pre mẽ pakaxyw ãm nê mẽ pahwỳr kumê. Tã tãm kot mẽ pahwỳr wrỳk nê tanhmã amnhĩ nhĩpêx to ho paja kot paj mẽ amã ixprĩ hã harê nê hã kagã ka mẽ kamã harê nê ama.

Juãw Paxis kot Jejus kukamã harênh

² Kormã Jejus mẽ pahwỳr wrỳk xwỳj ri na pre Tirtũm nhỹ hã kapêr o pa xwỳnhjê hõ pê Ijaisja kukamã tanhmã harênh to nê hã kagã. Nê Jejus kukamã harênh o mõi xwỳnh Juãw Paxisja nhũm pre mããnên hkukamã tanhmã harênh to nê hã kagã. Te Tirtũm tãm hamaxpêr pyrãk o harê nê harênh o:

E kot paj Ixkra hkukamã ma mẽ hwỳr kot harênh xwỳnhjê hõmê kê ma kutêp mẽ kãm harênh o ri pa. Kê mẽ kuma

nê kutêp tãm amnhĩ nhĩpêx mex o pa.

³ Koja kukamã harênh xwỳnhja ma kapôt ã ri hwỳr mẽ mrar xwỳnhjê mã harênh o ri pa. Nê kỳx pê mẽ kãm kapêr nê mẽ kãm: “E mẽ inhma. Koja Tirtũm tokyx mẽ pahwỳr mẽ panhõ Pahihti mẽ nhũm wrỳ pu mẽ pahpiitã omu. Jakamã kwa mẽ tokyx kutêp tãm amnhĩ nhĩpêx. Te ho mẽ kot mễhõ kutêp pry ho mex pyrãk o amnhĩ nhĩpêx. Nom pry kumrêx o mex kêt nê. ãm amnhĩ nhĩ o tãm amnhĩ nhĩpêx nê tãm axpên nhĩpêx. Pahihtita kutêp. Mễ pahte amnhĩ nhĩpêx tũmja te kot pry nhĩnur nê krã hakỳx nê pry juk nhũm mẽ tee ri kot kãm hã mrar mex prãm kaprỳ pyrãk. Jakamã kot kaj mẽ Pahihti nyw kutêp ate amnhĩ tomnuj kaga nê tãm amnhĩ nhĩpêx nê tãm axpên nhĩpêx. Hãmri nê te mẽ kot pry nhĩnur o mex nê ho katàt nhũm ra katàt mux nê nõi pyrãk o amnhĩ nhĩpêx. E kwa kêr ka mẽ ã kutêp amnhĩ nhĩpêx anê.” Anhỳr o koja mẽ kãm harênh o pa. Anê.

Na pre ã Tirtũm Juãw Paxis kukamã harênh anê nhũm ỹ hã kapêr xwỳnh pê Ijaisja mẽ pamã hã kagã.

⁴ Tã ra kot harênh xà hkôt nhũm Juãw Paxisja tẽ. Hãmri nê kapôt ã ri mẽ kãm Tirtũm kapêr jarênh o pa nê mẽ kãm:

—Kwa mẽ tokyx amnhĩ tomnuj kaga nê tãm ri amnhĩ nhĩpêx. Kê Tirtũm ja hã mẽ apumu nê mẽ anê mẽ ate amnhĩ tomnuj rênh pa nê mẽ ato hkra. Pa mẽ piitã mẽ kot ra mẽ apê hkra hã mẽ apumunh kaxyw mẽ akrã kumrã. Anê.

⁵ Hãmri nhũm mẽ ohtô nê kot kapêr mar kaxyw ma nhỹhỹnh hwỳr kapôt mã mra. Pyka pê Jutej rũm nê Jutej kamã krĩ pê Jerujarê

rŭm nhŭm mē ohtô nē hwÿr mra.
Hāmri nē nhÿri omu nē kām:

—E ixte amnhī tomnuj kaga
hprām xäj na pa awÿr amnhī to tē.
Na pa hte amnhī tomnuj pix o ri
ixpa. Tã tee ri ja hã amnhī pumu
nē ixkaprī nē. Hāmri nē ra inhmã
amnhī tomnuj kaga nē tãm amnhī
nhÿpêx prãm nē.

Anhÿr ã amnhī jarē. Hāmri nhŭm
Tirtŭmja kaxkwa kamã hkrī htã mē
kuma nē amnhī katut kôt mē kot
amnhī tomnuj piitã rēnh pa nē axte
kãm hamaxpêr kêt nē. Jakamã
nhŭm Juãw Paxis gôx kãm mē hkrã
kumrã. Pyhti pē Jotãw kamã. ⁶Juãw
Paxisja hikàxpore hkêt jakamã na
pre ê mex kêt nē pa. ãm mēmo mry
pē kamer kī ho amnhīm ê nhÿpêx nē
hagjê nē hã pa. Nē mēmo mry hkã
ho amnhī pre nē ri pa. Nē mēo mex
kur kêt nē ãm krit ku nē menh ôr o
ri pa. ⁷Hāmri nē mē kãm tanhmã
Jejus jarēnh to ho pa nē mē kãm:

—E mē inhma. Koja tokyx Tirtŭm
kot mē pakaxyw ãm xwÿnhhta mē
pahwÿr wrÿ. Ahpumunh tÿx o kot
ijakrenh jakamã na pa hte ãm kuk-
wak ri ixpa nē amnhī tã hã ixpi-
jaàm rãhã ho ri ixpa. Te ixkrãm
ã ixpijaàm o amnhī nhÿpêx pyrãk.
⁸Na pa hte gô pix o Tirtŭm mã
mē akrã kumrãr o ri ixpa. Nom
mē pahwÿr wrÿk mã xwÿnhja koja
mē awÿr Tirtŭm Karõ rē nhŭm mē
akaxwÿnh mã agjê. Ka mē ŷ hã
tãm ri amnhī nhÿpêx rãhã ho ri apa.
Anē.

*Juãw Paxis kot Jejus krã kumrãr
ã harēnh*

*Matêwre 3.13-17; Rukre 3.21-22;
Juãw 1.32-34*

⁹Tã nhŭm Jejusja tãm Juãw Paxis
wÿr tē. Garirej kamã krī pē Najare
rŭm ma hwÿr tēn pôj. Hāmri nhŭm
Juãwja hkrã hkumrã. Pyhti pē
Jotãw kamã hkrã kumrã. ¹⁰Hāmri
nē wa gôj rŭm api nē mÿr ri kaxkwa
pumunh o xa. Nhŭm kaxkwa axkjê
nhŭm kurŭm Tirtŭm Karõ te tuuti
pyrã nē Jejus wÿr wrÿk o tē nē ïkre

hã xa nhŭm amnhī tã omunh o xa.
¹¹Hāmri nhŭm Tirtŭm kaxkwa rŭm
kãm kapêr nē kãm:

E apê Ixkra mex na ka. ãm hāmri
na ka hte ixkanrēhã amnhī
nhÿpêx mex o apa. Inhmã
ajapê kamã na ka ri apa ho
apa. Anē.

*Jejus kot Satanasti kaga hã
harēnh*

*Matêwre 4.1-11; Rukre 4.1-13;
mããñēn Eprêw 2.18, 4.15*

¹²Tã nhŭm Tirtŭm Karõja ma
kapôt mã Jejus o mō ¹³nhŭm kapôt
ã mry xoprê kaêx ã ri mrar o hã
arÿgro pē 40. Hāmri nhŭm Satanasti
omu nē ma hwÿr tē nē ri hkôt pa.
Kapôt ã ri hkôt hêx rom tanhmã
kãm kapêr to nhŭm kot mar nē
hkôt amnhī xãm prãm xäj ma hkôt
pa. Nom nhŭm Jejus hkaga kumrêx
nhŭm tee ri ho anhÿr kaprÿ nē ma
akupÿm tē. Hāmri nhŭm Tirtŭm
kapêr o mē wrÿk xwÿnhjaja Jejus
wÿr wrÿ nē tanhmã ho mex to.

*Jejus kot Tirtŭm mã àpēnh krax ã
harēnh*

Matêwre 4.12-17; Rukre 4.14-15

¹⁴Nhŭm pre ra mē ixpê Ijaew
o amnhÿptãr xwÿnh pē Eroxxja
Juãw Paxis kot mēmoj tã kãm àkjêr
mÿrapê nhŭm pre ra unê nē haxã.
Tã kot haxãr jakãnh pē nhŭm Jejus
ma akupÿm pyka pē Garirej wÿr
mō nē kamã mē kãm Tirtŭm kapêr
jarēnh o pa. Nē Tirtŭm kot mē hwÿr
mēnh ã amnhī jarēnh o pa. Nom te
nhãm mēhō jarēnh pyrãk o amnhī
jarē ¹⁵nē mē kãm:

—E na Tirtŭm kãm mē ato hkra
hprãm nē. Jakamã na ra kot mē
awÿr ãm xwÿnhhta mē nhŭm mē
awÿr wrÿ. Kwa mē tokyx kapêrja
ma nē amnhī kaxyw hkôt aja-
maxpêr. Hāmri nē ate amnhī tom-
nuj kaga nē Tirtŭm kôt mãn amnhī
nhÿpêx o ri apa. Kot kaj mē ã amnhī
nhÿpêx anē nhŭm Tirtŭm amnhī tã
mē apumu nē mē ato hkra. Anē.

Jejus kot amnhĩ kôt tep pynênh xwýnh wa hwýr ã harênh

Matêwre 4.18-22; Rukre 5.1-11

¹⁶ Tã nhũm Jejus ma Garirej kamã gô rax pê Garirej mýri mô. Hãmri nê Simãw mẽ htõ Andreja wa hwýr kato nê wa omu. Wa kot tep pynênh xwýnh jakamã na pre wa gôx kãm kryhti rênh o xa nhũm Jejus wa hãnh tẽ nê wa omu. ¹⁷ Hãmri nê amnhĩ kôt wa kuwý nê wa kãm:

—E war amnê ixkôt tẽ nê ixkôt mãn apa. War apê tep kanhêr rax o ri apa xwýnh tã kêr ka war axápênhta kaga nê hpãnhã ixkôt apa ho apa. Kot paj tanhmã war akrã hto ka wa tep pynênh pãnhã ma ri mẽ hkôt mẽ kãm ixkapêr jarênh o ri apa. Mẽ ohtô nê mẽ kot war amar nê Tirtũm kôt amnhĩ xunhwýr kaxyw. Jao kot kaj te war ate tep kanhêr rax nê Tirtũm mã ôr pyrãk o amnhĩ nhĩpêx.

Anhýr o wa kãm kapêr. ¹⁸ Hãmri nhũm wa kuma nê kryhti kaga nê ma hkôt pa ho pa kurê kumrêx. ¹⁹ Hãmri nê mẽ gô mýri mô nê Jepetew kra Xiakre mẽ htõ Juãw wa hwýr kato nê wa omu. Nhũm wa kormã hipêêxã nhĩhkô hã pãr kãm kryhti ho mex o wa nhỹ nhũm Jejus wa mẽ hwýr kato nê wa omu nê amnhĩ kôt wa kuwý. ²⁰ Hãmri nhũm wa kuma nê ma hkôt pa ho pa. Pãr kre kamã mẽ kãm àpênh xwýnhjê ri hipêêxã re nê ma Jejus kôt pa ho pa.

Jejus kot mēhō nē mēkarōmnuti janor ã harênh

Rukre 4.31-37

²¹ Hãmri nhũm Jejus mẽ hkôt mẽ pa ho mẽ pa xwýnhjaja ma krĩ pê Kapanaũ hwýr mô hãmri nê hwýr pøj. Hãmri nhũm mẽ ixpê Ijaewjê nhõ arĩgromnu pê sap kato nhũm Jejus ma Tirtũm kapêr o mẽ ahkre xã hã ixkre hwýr tẽ nê hwýr axã. Hãmri nê kamã mẽ kot Tirtũm kapêr mar kaxyw axpên wýr mẽ pikuprõnh xwýnhjê jahkre ho nhỹ. ²² Nê mẽ ahkre mex nhũm mẽ

kuma nê tee ri hamaxpêr nê axpên mã:

—Hêxta waa nê. Pêr ãm hãmri na ã mẽ pamã mêmoj jarênh anê. Tirtũm kapêr tũm o mẽ ahkre xwýnhjê rom àhpumunh týx kôt na hpri hã mẽ pajahkre mex nê. Anê.

²³ Hãmri nhũm mēhō myja mẽ hwýr axã. Na pre ra mēkarōmnuti hwýr axã nhũm ý hã amnhĩ tomnuj o pa. Hãmri nê mẽ hwýr axã nê Jejus pumu nê kãm kapêr. Nom tã nê Jejus kapêr kêt nê. Mēkarōmnuti nhỹ hã kãm kapêr. Kax pê kãm kapêr nê kãm:

²⁴ —Pa Jejus? Kwa tanhmã mẽ ixto hkêt nê. Ixte apumunh mex. Apê Najare nhõ xwýnh tã mãânênh apê Tirtũm kot mẽ ixwýr amênh xwýnh maati na ka. Tirtũm rũm na ka pre mẽ ixwýr wrý. Kwa xã kot kaj mẽ ixto ajapêx nã? Anê.

²⁵ Hãmri nhũm kãm:

—Tk. Kwa anhĩkrê nê myta kurũm akator kurê kumrêx. Anê.

²⁶ Hãmri nhũm kuma nê àmra htýx kãm myja o àk týx nê kêp kato nê ma tẽ nhũm akupým mex.

²⁷ Hãmri nhũm mẽ piitã omu nê kamã no pyma nê. Hãmri nê xatã axpên mã harênh o pa nê axpên mã:

—Kokýy. Jejus na pre àhpumunh týx kôt mēkarōmnuti jano nhũm kuma nê mẽ kurũm hapõx kurê kumrêx. Anê.

²⁸ Hãmri nhũm Garirej kamã mẽ piitã ri axpên mã harênh o pa.

Jejus kot akupým Simãw xupãnhgêx o mex ã harênh

Matêwre 8.14-15; Rukre 4.38-39

²⁹ Tã nhũm Jejus Xiakre mẽ Juãw mērohã Tirtũm kapêr o mẽ ahkre xã hã ixkre rũm kato nê ma Simãw mẽ Andre wa ôrkwý hwýr mô. ³⁰ Hãmri nê mẽ hwýr agjê. Nhũm Simãw xupãnhgêxja ra ã nê hkã kagro htýx nê nõ nhũm Jejus mẽ hwýr axã nhũm mẽ kãm harê. ³¹ Hãmri nhũm mẽ kuma nê hwýr axã nê omu nê hpa hã kupy nê kãnhmã ýr nhũm hkã hakry nê akupým mex kurê kumrêx. Hãmri nê kãnhmã xa nê tẽ

ně mẽ kãm mẽmoj nhĩpêx nhũm mẽ hkur o hkrĩ.

Jejus kot akupỹm mẽ hkwyjê ho mex ã harênh

Matêwre 8.16-17; Rukre 4.40-41

³²⁻³³ Tã nhũm myt axà nhũm mẽ ohtô nê Simãw mẽ Andre wa òrkwỹ hwỳr mra nê hakwakrem Jejus ã akuprô. Nê amnhĩ kôt mẽ à xwỳnhjê ho mra. Nê mẽkarômnuti kot mẽ hwỳr gĩêx xwỳnhjaja nhũm mẽ hwỳr mẽ o mra. ³⁴ Hãmri nhũm Jejus mẽ omu nê akupỹm ahpỹnhã mẽ piitã mẽ ho mex pa. Nê mẽkarômnutija nhũm mẽ kurũm mẽ hapôj. Mẽkarômnuti kot kêp Tĩrtũm Kra hã omunh tã no nhũm kapêr nê mẽ hkurê nê mẽ hano nhũm mẽ kapêr kêt rãhã mẽ kurũm hapôj nê ma mra.

Jejus kot Tĩrtũm mã amnhĩ jarênh ã harênh

Rukre 4.42-44

³⁵ Tã nhũm apkati nhũm kormã myt kator kêt ri nhũm Jejus kãnhmã nhỹ nê tẽ nê kato. Hãmri nê ma kapôt ã ahte nhỹhỹm tẽ nê nhỹri Tĩrtũm mã amnhĩ jarênh o nhỹ.

³⁶ Hãmri nhũm Simãw Pêtre mẽ hkwyjaja hkrã hapôj nê tee ri ixkre kamã hapêr. Hãmri nê hapôj nê ma hpri jakop o mō. ³⁷ Hãmri nê hwỳr kato nê omu nê kãm:

—Pa. Kwa na mẽ piitã tee ri ajapêr. Anê.

³⁸ Hãmri nhũm mẽ kãm:

—Tô ma pu mẽ mō. Nom kot puj mẽ akupỹm mẽ hwỳr pamōr kêt nê. Kot puj mẽ hpãnhã nhãm krĩ hkwy hkôt mãn ri pajapôj. Pa kamã mẽ kãm Tĩrtũm kapêr jarê mãn. Ja kaxyw na pre mẽ awỳr inhmê. Krĩ piitã hkôt mẽ pa xwỳnhjaja kot kapêr mar kaxyw. Anê.

³⁹ Hãmri nê mẽ ma axte Garirej kamã krĩ hkwy hkôt pa. Nê krĩ piitã hkôt Tĩrtũm kapêr o mẽ ahkre xà hã ixkre kamã mẽ kãm Tĩrtũm kapêr jarênh o pa. Nê mẽ kurũm mẽkarômnuti japôx o pa.

Jejus kot akupỹm mẽhō hkãmnu ho mex ã harênh

Matêwre 8.1-4; Rukre 5.12-16

⁴⁰ Tã nhũm mẽhō hkà hkrô xàpêr tỳx xwỳnhja Jejus wỳr tẽ. Hãmri nê hã hpiaaam kaxyw kutã hkônkrã ho tẽm nê nhỹ nê kãm:

—Pa Pahihti. E ot pa awỳr amnhĩ to tẽ. Akupỹm ate mẽ ixto mex kaxyw axàhpumunh tỳx jakamã kot ka akupỹm amã ixto mex prãm nê mãmri akupỹm ixto mex. Anê.

⁴¹ Hãmri nhũm kuma nê kamã ukapri nê hã ìhkra xi nê kãm:

—Nà kot paj ato mex. E akupỹm akà mex.

⁴² Anhỹrja kôt nhũm akupỹm hkà mex kurê kumrêx. ⁴³⁻⁴⁴ Hãmri nhũm Jejus kãm kapêr kãm hihtỳx nê hano nê kãm:

—E kër ka amnhĩ tã akwyjê mã tanhmã ijarênh to hkêt rãhã ma patre hwỳr tẽ kê akupỹm akà mex ã apumu. Hãmri ka amnepêm Mojes kot mẽ ate akupỹm mẽ amex ã Tĩrtũm mã tanhmã amnhĩ nhĩpêx to hã karō xwỳnhta ka kãm ho anê. Kê mẽ piitã akupỹm akà mex ã apumu. Anê.

⁴⁵ Hãmri nhũm kuma nê ma tẽ. Nom axtem nê ma mẽ piitã mẽ kãm amnhĩ jarênh o ri mra. Jejus kot kãm karō xà kuhpa hã ma mẽ kãm amnhĩ jarênh o ri mra. Jakamã nhũm mẽ kuma nê piitã nhỹhỹnh Jejus wỳr mra. Mẽ ohtô rax kumrêx nê hwỳr mra nhũm tee ri mẽ noo mã nhỹri krĩm pa mã. Hãmri nê ãm krĩ pu hã ri pa htã nom nhũm mẽ arĩ ohtô nê hwỳr mra.

2

Jejus kot akupỹm ì kamã htyk xwỳnh o mex ã harênh

Matêwre 9.1-8; Rukre 5.17-26; Juãw 10.37-38

¹ Tã nhũm Jejus hã apkati grêre nê hkôt mẽ pa ho mẽ pa xwỳnhjê mẽrohã ma akupỹm Kapanaũ wỳr mō. Hãmri nê hwỳr pōj nhũm mẽ piitã nhỹri mẽhō nhòrkwỹ kamã

hpôx kôt harênh ma nê hã akuprô.
² Ra hã pikuprônh rax nê ixkre nhîtom pa. Nhûm mē hkwyjaja kapôt ã kuhê nhûm Jejus Tirtûm kapêr o mē ahkre ho nhÿ. ³ Hãmri nhûm mēmyjaja kêp kwat nê ï kamã htyk xwÿnhja mÿ nê Jejus kot ho mex kaxyw hwÿr o tē. ⁴ Hãmri nê tee ri hã mē pikuprônh rax xwÿnhjê pumu nê nhÿhÿnh kot hwÿr o ãr kaxyw tee ri amnhî kukamã ho ukapi ho pa. Hãmri nê hamaxpêr nê ixkre nhîmök po hwÿr ho api nê himök kwÿ grã nê hkôt ï kamã htyk xwÿnhhta nôr xã mērohã hkôt Jejus wÿr haxã. ⁵ Hãmri nhûm mē kot kaxyw kãm hamaxpêr tÿx ã mē omu nê ï kamã htyk xwÿnhhta mã kapêr nê kãm:

—Pa? Kwa tee ri amnhî kukamã ajamaxpêr kêt nê. Na pa ra anê ate amnhî tomnuj piitã ho ijapêx. Kot paj axte kãm ijamaxpêr kêt nê. Anê.

⁶ Hãmri nhûm Tirtûm kapêr tûm o mē ahkre xwÿnhjaja tee ri ã kapêr anhÿrja ã kuma nê hamaxpêr o:

⁷ —Tk. Kwa pêr mēhō myti mÿj kêp Tirtûm kêt tã te kapêr pyrãk o amnhî nhîpêx nê mē nê mē kot amnhî tomnuj o hapêx ã amnhî jarê. Tirtûm pix kot mē nê mē kot amnhî tomnuj o hapêx kênã. Anê.

⁸ Nom nhûm Jejus mē hamaxpêr kôt mē omunh mex nê. Mē kot Tirtûm pix kot mē nê mē kot amnhî tomnuj rênh nê akupÿm mē ã xwÿnhjê ho mex kôt mē hamaxpêrja nhûm mē omunh mex nê mē kãm:

—Kwa mē ã ajamaxpêr anhÿr kêt nê. ⁹ Ixte mē nê mē kot amnhî tomnuj o ijapêx par ã amnhî jarênh tã mē ate mē ano ho ja kôt ixpumunh kêt jakamã na ka htem ja hã ixkôt ajamaxpêr kêt nê. Nom kot paj mē anoo mã akupÿm myja o mex. Ka mē ja hã ixpumu hãmri nê ixkôt ajamaxpêr kurê kumrêx. ¹⁰ Ixpê Tirtûm kot mē awÿr inhmênh xwÿnh na pa. Ixte mē anê mē ate amnhî tomnuj rênh

kaxyw na pre mē awÿr inhmê pa wrÿ. Tã mē ate ja kôt ixpumunh kaxyw kot paj mē anoo mã mytija ho mex.

¹¹ Anhÿr o mē kãm kapêr hãmri nê ï kamã htyk xwÿnhhta mã kapêr nê kãm:

—E kãnhmã xa nê anôr xã mÿ nê ma akupÿm anhôrkwÿ hwÿr tē. Anê.

¹² Hãmri nhûm kuma nê kãnhmã ãm kurê kumrêx. Hãmri nê akupÿm mex ã amnhî pumu nê hkÿnh tÿx nê nôr xã mÿ nê mē noo mã kato nê ma akupÿm ôrkwÿ hwÿr tē. Hãmri nhûm mē kot omunh xwÿnhjaja amnhî jaêr pê omu nê no hapôx kaxyw nê hkôt omunh o kuhê nê kamã no puma htÿx nê. Nê tee ri omu nê axpên mã:

—Hêxta waa nê. Aa mē pahte ã mēhō kot amnhî nhîpêx anhÿr ã omunh kêt kumrêx tã jarãhã ja pumu. Nã Tirtûmja ãm mex o mex. Anê.

Jejus kot amnhî wÿr Rewi hwÿr ã harênh

Matêwre 9.9-13; Rukre 5.27-32

¹³ Hãmri nhûm Jejus mē ma mra nê akupÿm gô rax pê Garirej wÿr mra nê gô mÿ ri pa. Hãmri nhûm mē piitã omu nê hwÿr mra nê hã akuprô nhûm Tirtûm kapêr o mē ahkre ho nhÿ. ¹⁴ Hãmri nê mē kure nê axte hkôt mē pa ho mē pa xwÿnhjê mērohã ma axte mra nê nhÿri Apew kra Rewija pumu. Rôm kãm mē ô pahihtã mã amnhî kwÿjê pê kãxpore hkwy jamÿnh xwÿnh na pre. Jakamã nhûm ãpênh o nhÿ nhûm Jejus hãnh tē nê omu nê amnhî kôt kuwÿ nê kãm:

—Pa? E kwa axãpênhhta kaga nê hpãnhã amnê mē ixkôt mãn ri apa ho apa. Anê.

Hãmri nhûm kuma nê ãpênh kaga nê ma hkôt mō nê hkôt pa ho pa.

¹⁵ Hãmri nhûm mēmo arïgro hã nhûm Rewi nhô mē apkur xã hã mēo rax nê. Jakamã nhûm amnhî nhôrkwÿ hwÿr hkrãmnhwÿjaja nê

Jejus mē hkôt mē pa ho mē pa xwýnhjê hwý. Hāmri nhūm mē ma hkôt mra nē ōrkwý hwýr agjê nē kuri apkur o hkrī. Nē māānēn mē kēp Rōm nhō pahi mā mē kēp kàxpore hkwy jamýnh xwýnh kwý nē mē ohtô nē mē kutā apkur o hkrī. ¹⁶ Hāmri nhūm Tīrtūm kapēr tūm o mē ahkre xwýnh kwý pē Parijew nhō xwýnhjaja mra nē mē apkur ā mē omu. Nē tee ri mē hkaēx ā Jejus pumu nē hkôt mē pa ho mē pa xwýnhjê hwýr agjê nē hā mē kām akir nē mē kām:

—Kwa na htem mē kot amnhī tomnuj xwýnhjê kutā apkur kêt tā ka mē Jejus mē apimraātā axtem nē mē kutā axāpkur o akrī. Mē ate amnhī to mex ronhýx ka mē kutā axāpkur kêt nē. Anē.

¹⁷ Hāmri nhūm Jejus amnhī tā mē kapēr ma nē mē kām:

—Tk. Ixte tām mē unhwýr kaxyw ixte mē kutā ixāpkur o inhýr kēnā. Xà na hte tōtô mē mex xwýnhjê hwýr mra nē mē hkane? Nà na hte ām mē à xwýnhjê pix kane ho pa. Ra mē ate ja pumunh mex. Ja pyrā nē na pa pre mē kot amnhī to mex xwýnhjê hwýr ixwryk kêt nē. Ām mē kot amnhī tomnuj xwýnhjê pix wýr na pa pre wry. Ixte tām mē unhwýr kaxyw mē hwýr wry nē jajē kutā ixāpkur o nhý. Mē ate amnhī tomnuj mā anhūrer nē hpānhā tām amnhī nhīpēx o apa kaxyw na pa pre mē awýr wry nē mē akamā ixukapri ho ri mē akôt ixpa. Tā ka mē atýx ā ixte mē kutā ixāpkur anhýrja ā ixto akapēr anē. Anē.

Mē kot Tīrtūm mā amnhī jarēnh kaxyw mēō kaga hā mē harēnh

Matēwre 9.14-17; Rukre 5.33-39

¹⁸ Juāw Paxis kôt mē pa xwýnhjê mē Parijew nhō xwýnhjaja na prem tōhā Tīrtūm mā amnhī jarēnh kaxyw nē apkur kêt rāhā kamā kām amnhī jarē. Nom nhūm Jejus kôt mē pa ho mē pa xwýnhjaja na prem kām amnhī jarēnh prām nē

apkur kām amnhīx kām amnhī jarēnh o pa. Jakamā nhūm Ijaew kwýjaja tee ri ja hā mē omu nē Jejus wýr mra nē mē hā hkukja nē kām:

—Pa? Kwa aprī hā mē inhmā mēmoj jarē. Na hte Parijew nhō xwýnhjê mē Juāw Paxis kôt mē pa xwýnhjaja tōhā Tīrtūm mā amnhī jarēnh kaxyw nē apkur kêt rāhā kām amnhī jarē. No akôt mē pa ho mē pa xwýnhjaja na htem àmnhīx apkur o pa kamā kām amnhī jarēnh o pa. Kwa mo na htem mē urāk nē tōhā apkur kêt rāhā kām amnhī jarēnh kêt nē? Anē.

¹⁹ Hāmri nhūm Jejus mē kām:

—Tk. Mo kaxyw kot mē ā amnhī nhīpēx anē? Mē hkapri hkēt kēnā. Mē kot ixkôt pa ho pa hā amnhī pumunh jakamā na htem hkīnh nē pa. Kormā ixte mē hkôt ixpa kēnā kot kêt mē Tīrtūm mā kapēr kaxyw nē ho apkur kêt kamā kām amnhī jarē. Xà na htem hkrāmnhwý hā hkīnh kaxyw hā akuprō nē hkapri nē apkur kêt nē mýr o hkrī? Nà na htem hā akuprō nē hkīnh nē apkur rūnh nē. Ja pyrā nē na hte ixkôt mē pa ho mē pa xwýnhjaja ixkôt kormā àmnhīx hkīnh nē apkati mē apkur kām kām amnhī jarēnh o pa. ²⁰ Nom koja mē kām ixkurē xwýnhjaja nhýrmā tanhmā ixto hāmri nhūm mē rī kormā hkapri htýx kām ho apkur kêt rāhā Tīrtūm mā amnhī jarē. Anē.

Nhūm pre ā Jejus mē kām hkôt ri mē pa ho mē pa xwýnhjê jarēnh anē hāmri nē axte mē kām kapēr nē mē kām:

²¹⁻²² —Mē kot amnhī tomnuj xwýnhjaja mē kot amnhī nhīpēx tūm o amnhī pyrāk jakamā na htem mē kot amnhī nhīpēx nyw kaga. Tā ixte amnhī nhīpēx nywja te kot mē ate amnhī nhīpēx tūm pyrāk kêt jakamā na ka htem inhma nē ām inhma. Kwa mē inhma nē mē ate amnhī nhīpēx tūm gryk ā ixkaga hkēt nē. Anē.

Jejus kêp arïgromnu hpãm ã kot amnhï jarênh

Matêwre 12.1-8; Rukre 6.1-5

²³ Tã nhùm mē ixpê Ijaew nhô arïgromnu pê sap kato nhùm Jejus mē hkôt mē pa ho mē pa xwÿnhjaja ma nhÿhÿm mō. Ma mē hpur kahti hkôt nhÿhÿm mō nhùm hkôt mē pa ho mē pa xwÿnhjaja ra kãm prãm nê. Hãmri nê prãm xäj purta kamã amnhïm mēmo hy te kot harôj pyræk xwÿnhhta kwÿ rê nê ma Jejus kôt hkanhar o mō. Mē ixpê Ijaewjaja na pa htem axpên pur kãm ixpa nê ã amnhï nhïpêx anê. ²⁴ Hãmri nhùm Parijew nhô xwÿnhjaja mē hkôt mra nê tee ri ja hã mē omu nê Jejus wÿr mra nê mē hã kãm akir nê kãm:

—Kwa jarãhã sap tã akôt mē pa ho mē pa xwÿnhjaja mēmo hy hkwy rê nê akôt hkanhar o pa. Tirtùm kapêr ã kagã htùm kot mē panhō arïgromnu hã mē pahte mēmoj nhïkênh nê mē pahkurê kênã. Kwa mē kãm anê kê mē ã amnhï nhïpêx anhÿr kêt nê. Anê.

²⁵⁻²⁶ Hãmri nhùm Jejus mē kuma nê hprï hã mē kãm Tirtùm kapêr tùm jarê nê mē kãm:

—Kwa xàn ka mē kormã Tirtùm kapêr ã kagã htùm kamã pahi Tawi kot tanhmã amnhï nhïpêx to kamã harênh nê mar kêt nê? Kormã Apiatar kêp patre maati ri na pre Tawi hkôt ri mē pa xwÿnhjê mē prãm xäj Tirtùm mã amnhï jarênh xã hã ixkre hwÿr agjê. Hãmri nhùm Apiatar mē kãm prãm tÿx ã mē omu nê mē kamã ukapri nê mē kãm mēmoj gō. Mē kot Tirtùm noo mã pãwti jaxwÿr xwÿnhhta nhùm mē kãm kugō nhùm mē kuku. Tirtùm kapêr ã kagã htùm kot ja nê mē kurê htã nhùm mē kãm prãm tÿx ã mē omu nê mē kamã ukapri xäj mē kãm kugō. Patre pix kot ja hkur kaxyw tã nhùm mē kãm kugō nhùm mē kuku. Tã nom nhùm Tirtùm ja hã mē omu nhùm ja kêp omnuj kêt nê. Patre kot mē kamã ukapri nê

mē kãm ôr nhùm ja hã omu nhùm ja kãm mex nê. Anê.

Hãmri nê mē kãm:

²⁷—Na pre Tirtùm panhï kumrêx o kato nê kormã mē hkôkôt nê Tirtùm mã hamaxpêr o hkrï kaxyw arïgromnu ho kato. No na pre arïgromnu kumrêx o kato nê hpãnhã kaxyw panhï ho kator kêt nê. ²⁸ Tã pa na pre Tirtùm mē akaxyw ixãm nê mē awÿr inhmê. Jakamã papxpix na pa hte arïgromnu hã tanhmã mē kot amnhï nhïpêx to hã mē kãm karô ho ri ixpa. Jakamã kwâr mē mãmri mēmojta rê nê ixkôt hkanhar o mō. Anê.

3

Jejus kot akupÿm ïhkra grã xwÿnh o mex ã harênh

Matêwre 12.9-14; Rukre 6.6-11

¹ Tã nhùm mē ixpê Ijaewjê nhô arïgromnu pê sapja axte kato. Hãmri nhùm Jejus Tirtùm kapêr o mē ahkre xã hã ixkreja wÿr tē nê axã nê kamã Tirtùm kapêr o mē ahkre ho nhÿ. Nhùm mēhō myïhkra grã xwÿnhja mē ïhkô hã mar o nhÿ. ² Nhùm Parijew nhô xwÿnhjaja kãm mē hkrãhtÿmjê mã Jejus o kapêr prãm jakamã htãnopxar o kuhê nê axpên mã:

—E kwa pu mē jar pakuhê nê kot tanhmã amnhï nhïpêx to hã omu. Xã koja jarãhã ïhkra grã xwÿnh mÿj o mex nã? Jarãhã arïgromnu kênã kot kêt kãm ïhkra ho mex. Koja ho anê nê ra Tirtùm kapêr tùm nhïrôp xa. E pu mē xa nê hã omu. Anê.

³ Hãmri nhùm Jejus ïhkra grã xwÿnhhta pumu nê kãm:

—Pa? E kãnhmã xa nê amnê ixwÿr tē. Anê.

Hãmri nhùm kãnhmã xa nê hwÿr tē nê mē piitã mē noo mã xa. ⁴ Hãmri nhùm Jejus mē kot omunh o hkrï xwÿnhjê hwÿr rit nê arïgromnu hã tanhmã mē kot amnhï nhïpêx to hã mē hkukja nê mē kãm:

—E mẽ inhma. Tanhmã na htem arĩgromnu hã axpën nhĩpêx to wehe? Xà kot ka mẽ arĩgromnu hã axà htỳx nẽ amex prãm xàj ma mẽhõ hwỳr amnhĩ to tẽ nhũm apumu nẽ apkatim arĩgro mex jamãr pẽ akane hkêt ka ty nhũm ja amã mex nẽ? Rỳ nhũm apumu nẽ tanhmã atomnuj to nẽ akupỹm amnhĩ nẽ ajano nhũm ja amã mex nẽ? Nà koja ã anhĩpêx anẽ nhũm ja amã mex kêt nẽ. E mẽ inhmã mẽmoj jarẽ. Tanhmã na pre finat Mojesja Tĩrtũm nhỹ hã arĩgromnu hã mẽ pahte axpën nhĩpêx ã mẽ pamã karõ hto? Xà kot puj mẽ hã axpën kãm paxukaprĩ rỳ hã mẽ pamã axpën kurẽ ho papa? Xà kot puj mẽ hã mẽmoj punuj pẽ mẽ utà rỳ kot puj mẽ ãm arĩgro mex pix ã mẽ utàr kaxyw arĩgro mex jamã? E mẽ atõ inhmã ja jarẽ. Anẽ.

Ra kot hprĩ hã mẽ hamaxpêr ã mẽ omunh mex nẽ ã hêx rom mẽ hkukjêr anẽ. Nom nhũm mẽhõ tanhmã kutã kãm nẽ hkêt nẽ. Mẽ ãm piitã akryk mar pẽ omunh o hkrĩ. Mẽ kot tanhmã kãm nẽ nhũm ta pãnhã tanhmã mẽ kãm nẽ pymaj nhũm mẽ tee ri kãm tanhmã nẽ hprãm nom akryk mar o hkrĩ. ⁵Hãmri nhũm Jejus tee ri mẽ ukaprĩ hkêt ã mẽ omu nẽ hkaprĩ nẽ mẽ kamã gryk nẽ. Hãmri nẽ ìhkra grà xwỳnhja mã kãm:

—Tk. Mẽ kot tanhmã inhmã ujarẽnh tore hã. E anhũhkra katàt. Anẽ.

Hãmri nhũm ìhkra katàt nẽ akupỹm mex kurẽ kumrêx. ⁶Hãmri nhũm Parijew nhõ xwỳnhjaja tee ri ã Jejus kapêr anhỹrja ã kuma nẽ kot sap ã akupỹm myta o mex ã omu nẽ kamã gryk tỳx nẽ. Nẽ hapõj nẽ ma pahi Erox kõt mẽ pa xwỳnhjê hwỳr mra nẽ mẽ kãm harẽ nẽ tanhmã hã axpën kukjêr to nẽ axpën mã:

—Kwa tanhmã kot puj mẽ ho? Na ã kapêr anhỹrja o mẽ pahto kapêr punuj nẽ. Te hkĩnhã mẽ papamjaja mẽ kamã paxukaprĩ hkêt pryak ã mẽ pajarẽ. Koja mẽ

pahkwỳjaja kuma hãmri nẽ mẽ pahte amnhĩ nhĩpêx kaga nẽ amnhĩ kaxyw hkõt pix mã hamaxpêr o pa. Ja pymaj kwa tanhmã kot puj mẽ ho? Anẽ.

Mẽ ohtõ nẽ kot Jejus kapêr mar kaxyw hwỳr mra ã mẽ harẽnh

Matêwre 4.23-25; Rukre 6.17-19

⁷⁻⁸ Tã nhũm Jejus mẽ hkõt mẽ pa ho mẽ pa xwỳnhjê mẽrohã ma akupỹm gõ rax wỳr mõ nhũm mẽ ohtõ nẽ omu nẽ ma hkõt mra. Pyka pẽ Garirej mẽ Jutej wa kurũm nẽ krĩ pẽ Jerujarẽ rũm nẽ pyka pẽ Itumêj rũm nẽ pyhti pẽ Jotãw nhĩkjê hã krĩ hkwy rũm nẽ krĩ hkwy pẽ Xir mẽ Sitõ wa pu hã krĩ hkwy rũm ohtõ nẽ ma hwỳr mra. Na prem ra harẽnh ma nẽ nhỹhỹm mõi ã omu nẽ axpën mã harẽnh o:

—E kwa tokyj pu mẽ ma hwỳr mẽ à xwỳnhjê o mõi kẽ akupỹm mẽ ho mex. Anẽ.

Hãmri nẽ hwỳr mẽ o mra nẽ hã pikuprõnh rax nẽ. ⁹⁻¹⁰ Hãmri nhũm Jejus akupỹm mẽ à xwỳnhjê ho mex. Gõ mỳri xa nẽ tanhmã mẽ ho mex to. Jakamã nhũm mẽ axte ohtõ nẽ hwỳr mra nẽ piitã kot htok nẽ akupỹm mex kaxyw hwỳr axpën nhĩgã. Hãmri nhũm tee ri amnhĩ wỳr mẽ omu nẽ hkõt mẽ pa ho mẽ pa xwỳnhjê mã:

—Kwa mẽ ma mra nẽ amnẽ kanõre jêt mũj kjẽnh o tẽ nẽ jar inhmã anhõ. Kẽ mẽ ixtã axpën nhĩgãnh o ijanẽnh japêr pa hwỳr axà nẽ amỹm mẽ ho hpỹnh nẽ akupỹm mẽ ho mex. Anẽ.

Hãmri nhũm mẽ kuma nẽ ma mra nẽ kãm ja o tẽ nẽ kunhõ. ¹¹ Na pre mẽkarõmnuti hkwyjja mẽ hkwyjê hwỳr agjê. Jakamã nhũm mẽ Jejus pumu nẽ mẽkarõmnuti nhỹ hã kęp Tĩrtũm Kra hã omunh kurẽ kumrêx. Hãmri nẽ hã hpijaam kaxyw kutã hkõnkrã ho hkrĩ nẽ mẽkarõmnuti nhỹ hã kãm kapêr nẽ kãm:

—Kwa apê Tĩrtũm Kra na ka. Anẽ.

¹² Hāmri nhūm tee ri amnhī tā mẽ kuma. Kām mẽkarōmnuti ā kot harēnh anhÿr prām kêt nē. Ām mẽ piitā mẽ kot kapēr mar nē kot amnhī nhīpēx ā omunh pē kēp Tīrtūm Kra hā omunhja na kām hprām. Jakamā nhūm mẽkarōmnuti ā harēnh anē nhūm ja nē mẽ kām kapēr nē mẽ kām:

—Tk kwa nà kēr ka mẽ tanhmā ijarēnh to hkêt nē. Anē.

Jejus kot amnhī kaxyw mẽ kēp 12 rēnh ā harēnh

Matēwre 10.1-4; Rukre 6.12-16

¹³ Tā nhūm Jejus hkôt mẽ pa ho mẽ pa xwÿnh kwÿjê mã kām:

—E pu mẽ ma mō nē krāhakÿx mÿj ā api. Anē.

Hāmri nē mẽ ma hwÿr mō nē hā api ¹⁴ nhūm Jejus amnhī kaxyw mẽ ho 12 nē mẽ kurē. Mē kot ma ŷ hā Tīrtūm kapēr o mẽ ahkre ¹⁵ nē ŷ hā mẽ nē mẽkarōmnuti janor o pa kaxyw. ¹⁶ ā mẽ hixi kot anhÿr.

Na pre ja kēp Simāw no nhūm Jejus hpānhā hā hixi hō mẽ nhūm hpānhā mãānēn kēp Pête.

¹⁷ Nē hkôt Jepetew kra Xiakre mẽ htō Juāwja wa kuta.

Hāmri nē kot Simāw nhīpēx pyrā nē wa hā hixi hō mẽ nhūm wa hpānhā mãānēn kēp Poanes. Wa kot amnhī prēprēk jakamā nhūm ā wa hā hixi mēnh anē.

¹⁸ Nē hō pē Andreja ta.

Nē hkôt Andre htō Firiptija ta.

Nē hkôt Patoromewja ta.

Nē hkôt Matēwreja ta.

Nē hkôt Tomasja ta.

Nē hkôt Arpēw kra Xiakreja ta.

Nē hkôt Tatewja ta.

Nē hkôt Simāw ōja ta.

Simāwja na pre kām mẽ ixpē Ijaewjê nhō pika pē Ijaew kīnh tÿx nē. Jakamā na pre kām nhām pika hō nhō pahi kot mẽ ho amnhīptār prām kêt nē pa.

¹⁹ Nē hkôt jut Kariotja ta.

Kormā kot mẽ kām Jejus kurē xwÿnhjê nhīhkram ōr mã nhūm Jejus kot amnhī kukamā omunh mex tā mẽ hkôt amnhī kaxyw kuta.

Ā mẽ kot ŷ hā mẽ ahkre o pa kaxyw mẽ rēnh xwÿnhjê nhīxi kot anhÿr.

Jejus mẽ mẽkarōmnuti wa harēnh

Matēwre 12.22-32; Rukre 11.14-23, 12.10; Juāw 10.19-21

²⁰ Hāmri nhūm Jejus hkôt mẽ pa ho mẽ pa xwÿnh kwÿjê rēnh pa nē ma amnhī kôt mēhō nhōrkwÿ hwÿr mẽ o mō. Na prem apkur kêt ry rax nē ra kām prām tÿx nē nhūm ma mẽ apkur kaxyw amnhī kôt mẽ o mō. Hāmri nhūm axte mẽ ā xwÿnhjaja mẽ omu nē Jejus wÿr pikuprōnh rax nhūm mẽ tokyx apkur kêt nē. ²¹ Hāmri nhūm Jejus katorxā nē htōjaja tee ri mẽ apkur kêt ā mẽ harēnh ma nē axpēn mã:

—Kwa mǎn ām ra tanhmā hkrā amnhī to nà? Hā na mẽ kot omunh kaxyw hā hpikuprōnh rax jakamā nhūm kormā apkur kêt nē. E tokyx pu mẽ ma hwÿr mra nē omu nē mẽ kēp utā nē akupÿn amnhī kôt o mō. Anē.

²² Rôm nhūm Tīrtūm kapēr tūm o mẽ ahkre xwÿnhjaja Jerujarē rūm Jejus wÿr mōn pōj. Hāmri nē tanhmā ho kapēr punuj to. Kēp mẽkarōmnuti hkwy hā hkamnhix jakamā harēnh o:

—Tk pēr hinhu nhīkōōti nhÿ hā na hte mẽ nē amnhī kwÿjê japōx o pa. Anē.

Hinhu nhīkōōti nhīxi hō pē Satanasti nhūm prem ŷ hā Jejus kot amnhī nhīpēx o pa hā hkamnhix. ²³ Hāmri nhūm amnhī tā mẽ omu nē amnhī wÿr mẽ kām hpa ho apē nē mẽ kām amnhī jarē. Nom amnhī tā kuxi nē mẽ kām mẽmoj jarē nē mẽ kām:

—Kwa mẽ inhma mẽ ate ixpē Satanasti hkwy hā ixkamnhix xwÿnhjaja. Xā na hte Satanasti mẽ nē amnhī kwÿjê janor o pa? Nà na hte ā amnhī nhīpēx anhÿr kêt nē.

24 Na hte pika nhõ xwýnhjaja axpën kutã amnhĩ xunhwý nê axpu hãmri nê anhrã nê ma ahpýnhã ri pa nê amnhĩ krã hkõt ri tanhmã amnhĩ to ho ri pa. Jakamã nhũm mē õ pahija mē hamār o pa hkêt nê. 25 Nê krĩ nhõ xwýnhjaja haxwýja. Mē kot axpën to hkwý xwýnhjaja koja mēmoj tã axpën kãm gryk nê axpën kutã amnhĩ xunhwý hãmri nê anhrã nê ahpýnhã pa hãmri nhũm mē õ pahi tee ri kãm mē hamār o pa hprãm. Mo hkwýjaja kot kêt ri mē hamār o pa? Nom tãm kot amnhĩ nê mē hanoore hã. Mē tãmjaja na prem axpën kãm gryk nê anhrã nê ahpýnhã pa. 26 Tã ja pyrà nê ixte Satanasti nhỹ hã tanhmã amnhĩ nhĩpêx to ho ixpa ronhỹx pa ri mē kurũm amnhĩ kwýjê japõx o ri ixpa hkêt nê. Mēkarõmnutijaja kêp Satanasti hkwý kênã. Koja Satanasti ixte mē kurũm mē hapõx kaxyw tanhmã inhmã nê hkêt nê. 27 ãhpumunh tỹx jakamã na hte mē kot hkõt amnhĩ xunhwýr xwýnhjê pumunh tỹx o pa nhũm mēhõ tee ri kêp mē utãr kaxyw. Tã ixãhpumunh tỹx o ixte hakrenh jakamã ixte kêp mē utãrja inhmã tanhmã kute hkêt. Na pa hte kêp mē utã nhũm mē hpãnhã ixkõt amnhĩ nhĩpêx o pa nhũm Satanasti tee ri mē hã ixpumunh o pa kaprỹ.

28 —Ãm hãmri na pa mē amã ixkapêr. Kot kaj mē tanhmã amnhĩ tomnuj to ho apa. Nê amnhĩ tomnuj tỹx kumrêx rãhã ho apa. Rỹ tanhmã akapêr punuj to ho apa. Rỹ tanhmã Tĩrtũm o akapêr punuj to ho apa. Tã tee ri ja hã amnhĩ pumu nê akaprĩ nê ã ate amnhĩ nhĩpêx anhỹrja kaga nê Tĩrtũm kõt amnhĩ xunhwý. Hãmri nhũm amnhĩ tã mē apumu nê amnhĩ katut kõt mē ate amnhĩ tomnuj nê mē akapêr punuj rênh pa nê axte kãm hamaxpêr kêt nê. Koja ho hapêx par kumrêx. 29 Nom koja Tĩrtũm Karõ xatã mē amã ixto amnhĩrĩt tã ka mē ama nê ãm ama nê te kêp amnhĩ ja-

mak pro pyrãk o amnhĩ nhĩpêx. Jao Tĩrtũm Karõ hã apijaãm kêt ã amnhĩ to amnhĩrĩt. Ja mýrapê koja Tĩrtũm nhỹrmã amnhĩ xwar te mē apê amnhĩ jamak pro pyrãk o mē anhĩpêx ka mē tee ri kãm amnhĩ kaprĩ kaprỹ. Hãmri nê mē kot amnhĩ xã htỹx kamã hamak o pa htũm xã wýr ma apa nê kamã apa rãhã apa ho apa. Anê.

30 Mē kot Satanasti nhỹ hã mē nê mēkarõmnuti janor o pa hã hkamnhĩx jakamã nhũm pre Jejus ã mē kãm kapêr anê.

Jejus katorxã mē htõjê jarênh

Matêwre 12.46-50; Rukre 8.19-21; mããnhên Eprêw 2.11-12

31 Rõm nhũm Jejus katorxã mē htõjaja hwýr mra no ãm kormã hwýr gjêx kêt nê. Mē kot hã htu rax jakamã nhũm mē tee ri hwýr gjêx kaxyw kormã kapõt ã kuhê. Hãmri nê mē kot mar o kuhê xwýnhjê hõ mã kapêr nê kãm:

—Kwa ma tẽn Jejus mã mē ijarê kê mē ixwýr kato. Anê.

32 Rõm nhũm ixkre kamã mē hkrĩ xwýnhjaja mē omu nê Jejus mã mē harê nê kãm:

—Kwa Pahihti. Ota akatorxã mē atõjaja awýr mra nê pøj nê tee ri awýr gjêx mã nê kormã kapõt ã kuhê nê atã karõ. Anê.

33-35 Hãmri nhũm mē kuma nê mē kãm:

—Tõe pa ixkato nê mē omu. Inhmã mē hapêê. Nom kot kaj mē atõ Tĩrtũm kapêr ma nê hkõt amnhĩ xãm nê hkõt amnhĩ nhĩpêx. Hã kot kaj te apê ixtõ rỹ ixkatorxã kot amnhĩ nhĩpêx pyrãk o pu mē axpën nhĩpêx. Pa te inhmã mē hapê pyrà nê inhmã mē ajapê nê. Anê.

4

Mêmo hy hkre xwýnh jarênh

Matêwre 13.1-9; Rukre 8.4-8

1 Tã nhũm Jejus axte gõ jakãx ã mē ahkre ho nhỹ. Hãmri nhũm mē axte hã htu rax jakamã nhũm tee ri mē omu hãmri nê par krem axã

ně gôx kãm amým mẽ ahkre ho nhỹ. Nhũm mẽ piitã kÿxpê omunh nẽ mar mex o kuhê. ² Hãmri nhũm mẽ ahkre ho nhỹ. Nom mẽ ujarênh pix kãm mẽ ahkre. Mẽ kot Tirtũm kapêr mar nẽ tanhmã hkôt amnhĩ nhĩpêx to ho paja nhũm hã kuxi nẽ mẽ kãm hã ujarênh o nhỹ nẽ mẽ kãm:

³ —E mẽ inhma. Koja mēhō ma pur mã mō nẽ pur kãm mẽmo hy ho ukapêr o pa nom nhũm hy piitã amex kãm rôrôk kêt nẽ. Koja ahpÿnhã rôrôk. ⁴ Koja hkwy aptÿx kãm rôrôk nhũm kuwênhre omu nẽ hwÿr mra nẽ hkrêr pa. ⁵⁻⁶ Nẽ koja kên kãm hkwy rôrôk hãmri nẽ higrôt kutã nojarêt nẽ higrôt pa. Nom nhũm kamã aptÿx nẽ kamã kêp pika hkryre jakamã nhũm higrôt nhũm hã myt apha nẽ arĩgro htÿx mẽ nhũm grã pa. Harê hkryre jakamã grã pa. ⁷ Nẽ koja hkwy mrônhi kamã rôrôk nẽ higrôt tã no nhũm utija kêp amÿtã nhũm ô hkêt nẽ.

⁸ —No koja hirã kamã pika mex kãm hkwy rôrôk. Hãmri nẽ hirã kamã rôrôk jakamã higrôt mex nẽ piitã ô rax nẽ. Kamã ô hkwy kêp 30 nẽ kamã hkwy kêp 60 nẽ kamã hkwy kêp 100. Á mẽ ujarênh kot anhÿr. ⁹ Kwa mẽ ama nẽ kãm aja-maxpêr tÿx rãhã ho ri apa. Anẽ.

Jejus kot hprĩ hã mẽmo hy jarênh Matêwre 13.10-23; Rukre 8.9-15

¹⁰ Hãmri nhũm mẽ Jejus xujarênh mar pa nẽ angrã nẽ ma akupÿm mra nhũm hkôt mẽ pa ho pa xwÿnh pẽ 12 mẽ hkwyjaja pix Jejus ri arĩk. Hãmri nẽ ujarênhã ã hkukja nẽ kãm:

—Kwa mon ka hte ã mẽ kãm axujarênh anẽ Pahihti? Na pa mẽ ixprĩ hã amar mex kêt nẽ. Anẽ.

¹¹⁻¹² Hãmri nhũm mẽ kãm:

—Nã kot paj ixprĩ hã mẽ amã harê. Tirtũm kãm mẽ ate aprĩ hã mar prãm jakamã kot paj ixprĩ hã tanhmã mẽ amã harênh to. Nã mẽ kot amnhĩ tomnu kaga nhũm Tirtũm kot ja hã mẽ omunh xã hkôt

mẽ ho hkra hã harênhja na pa hte mẽ kãm harê. No mũjjaja mẽ akĩnhã mẽ kãm mar prãm kêt jakamã na pa hte mẽ kãm mẽmoj tã haxwy nẽ awjarê nhũm mẽ ãm ixujarênh pix ma.

Na htem kuma nẽ ãm kuma nẽ htÿx ri hã pa. No kêp apu mẽ kãm hprĩ hã mar prãm ronhÿx mẽ ra hprĩ hã kuma nẽ Tirtũm kôt amnhĩ xunhwÿ nhũm amnhĩ tã mẽ omu nẽ mẽ kot amnhĩ tomnuj o hapêx. Nom mẽ kãm mar prãm kêt. Anẽ.

¹³ Tã mẽ ate aprĩ hã ixujarênhja mar mex kêt jakamã tanhmã kot kaj mẽ amnhĩ to nẽ ixujarênh piitã ama? E kot paj ixprĩ hã mẽ amã mẽmo hyta jarê ka mẽ inhma.

¹⁴ —Nã mẽmo hyta te kêp Tirtũm kapêr pyrãk. Nẽ ahpÿnhã rôrôk xã hã pikata te kêp ahpÿnhã mẽ kot Tirtũm kapêr mar xwÿnhjê kot mar nẽ ahpÿnhã tanhmã amnhĩ nhĩpêx to pyrãk. ¹⁵ Jakamã mẽ kot mar xwÿnh kwÿjaja hte kot aptÿx kãm hkwy rôrôk nhũm kuwênh kot hwÿr mrar nẽ hkrêr par xwÿnhã pyrãk. Jakamã na htem Tirtũm kapêr ma nom nhũm Satanasti te kuwênh kot hy hkrêr parta pyrãk o mẽ hipêx. Nẽ mẽ kot amnhĩ kaxyw hkôt hamaxpêr nẽ hkôt amnhĩ xunhwÿr pymaj tanhmã nẽ mẽ hkrã hto. Jakamã nhũm mẽ Tirtũm kapêr ma nom ho hamakêtkati tokyx anẽ nẽ axte kãm hamaxpêr kêt nẽ.

¹⁶ —Nẽ mẽ kot mar xwÿnh kwÿjaja te kot kênre kamã hkwy rôrôk nẽ higrôt nhũm te hã myt apha nhũm grã par tokyx anhÿr xwÿnhã pyrãk. Na htem Tirtũm kapêr ma nẽ hkĩnh nẽ. Nẽ kãm mar prãm nẽ. Te hy higrôt tokyx anhÿrta pyrãk. ¹⁷ Tã nhũm mẽhō tẽ nẽ Tirtũm nẽ tanhmã mẽ kãm kapêr to nhũm mẽ kuma nẽ hkaga. Rÿ nhũm mẽ Tirtũm ã tanhmã mẽ homnuj to nhũm mẽ tee ri amnhĩ

tã mẽ omu nẽ hkaga. Te mẽmo hy higrõt nẽ grã par tokyx anhÿrta pyrãk.

¹⁸ —Nẽ mẽ kot mar xwÿnh kwÿjaja te kot mrõnhĩ kamã hkwÿ rõrõk nẽ higrõt nhũm mrõnhĩ kot kẽp ãmnãr xwÿnhnta pyrãk. Nẽ mẽ kãm Tirtũm kapẽr mar prãm nẽ. ¹⁹ Nom mããnẽn kãm hikukrẽx rax nẽ hikãxpore rax prãm jakamã ãm ja pix kukamã hamaxpẽr o ri pa. Jao ra gryk ã axte Tirtũm kapẽr mã hamaxpẽr nẽ hkõt amnhĩ nhĩpẽx kêt nẽ. Te mrõnhĩ kot higrõt pẽ ãmnãr nhũm ô hkêeta pyrãk.

²⁰ —No mẽ kot mar xwÿnh kwÿjaja te hirã kamã pika mex kãm hy hkwÿ rõrõk nẽ higrõt nẽ ô raxta pyrãk. Na htem ixkapẽr ma nẽ amnhĩ krã him hagjẽnh tÿx nẽ. Nẽ ixkõt ri amnhĩ nhĩpẽx mex rãhã ho ri pa. Te mẽmo hy hkre kamã ô hkwÿja kẽp 30 nẽ kamã kẽp 60 nẽ kamã kẽp 100ta pyrã nẽ Tirtũm kapẽr kõt amnhĩ nhĩpẽx mex rãhã ho pa. E ã ixujarẽnhja kot anhÿr. Anẽ.

Kanẽ hpimxur ã harẽnh

Rukre 8.16-18, 8.24-25; Matẽwre 13.10-15, 25.14-30

²¹ Nhũm Jejus arĩ hkõt mẽ pa ho pa xwÿnhjẽ jahkre nẽ mẽ kãm:

—Xã na htem kanẽ hpõk nẽ poti ho hpro rÿ hitom kãm par krak ri unhwÿ? Nã na htem hpõk hãmri nẽ kÿx pẽ mẽmoj nhĩmõk ã unhwÿ. ²² Ja pyrã nẽ mẽ piitã kot hkwÿjẽ pẽ tanhmã hamaxpẽr punuj to ho hpimxur prãm tã tee ri kot ho hpimxur prãm kaprÿ. Koja nhÿrmã mẽ hamaxpẽr piitã amnhĩ to amnhĩrit pa. Nẽ mẽmoj piitã ra hpimxur mex tã koja nhÿrmã amnhĩ to amnhĩrit pa. Te mẽ kot kanẽ hpõk nẽ kÿx pẽ unhwÿr nhũm amnhĩrit mex pyrãk. Ja pyrã nẽ na pa hte Tirtũm kapẽr o ri ixpimxur o ixpa hkõt nẽ. Na pa hte ixprĩ hã mẽ amã harẽnh mex o ixpa. ²³ Kwa mẽ

ixujarẽnhja ma nẽ kãm ajamaxpẽr tÿx rãhã ho ri apa. Anẽ.

Nhũm pre ã Jejus mẽ kãm kapẽr anẽ. ²⁴ Hãmri nẽ mẽ kãm:

—Nẽ kêt ka mẽ axpẽn kãm axukapri ho ri tanhmã axpẽn to mex to ho ri apa. Kêt kẽ Tirtũm ja hã mẽ apumu nẽ mẽ apyrã nẽ mẽ akamã ukapri pẽ mẽ ato mex o pa. ²⁵ Koja mẽhõ inhmã tanhmã amnhĩ nhĩpẽx mex to pa ja hã omu nẽ kot inhmã ãpẽn mexta pãnhã ho mex nẽ. No koja inhmã ãpẽn mex kêt pa ja hã omu nẽ hã ho mex kêt nẽ.

—Nẽ koja mẽhõ kãm ixkapẽr mar prãm nom kormã hprĩ hã mar mex kêt tã arĩ mar o pa nẽ gaa nẽ mar tÿx o mõ. No koja kuma nẽ ãm kuma hãmri nẽ gaa nẽ hã no hkêt. Anẽ.

Pur kãm mẽmo hy hkre xwÿnh jarẽnh

Matẽwre 13.24-30

²⁶ Nhũm Jejus arĩ hkõt mẽ pa ho mẽ pa xwÿnhjẽ jahkre ho nhÿ nẽ mẽ kãm:

—E pa mẽ amã tanhmã mẽ kot ixkapẽr mar tÿx xwÿnhjẽ jarẽnh to ka mẽ inhma. Koja mẽhõ ixkapẽr mar tÿx nẽ ra hkõt ri amnhĩ nhĩpẽx o pa. Hãmri nẽ hamaxpẽr nyw o hamaxpẽr o pa nẽ amnhĩ nhĩpẽx nyw o amnhĩ nhĩpẽx o pa. Te mẽ hpur kãm mẽhõ kot mẽmo hy hkre xwÿnh kot amnhĩ nhĩpẽx pyrãk. Na hte hyja kre ho pa. ²⁷ Hãmri nẽ hkre hpa nẽ kamãt mẽ õt o hikwÿ nẽ arĩgro mẽ mẽmoj tã ãpẽn o pa. Rãhã nhũm mẽmo hyja arĩ hikwÿ ho hikwÿ hkêt nẽ. Koja amnhĩ nhĩpẽx õ ho amnhĩ nhĩpẽx nẽ higrõt kato nẽ hprẽk. Kre xwÿnh kot tanhmã kot amnhĩ nhĩpẽx to hã omunh kêt tã nhũm kãm hprẽk.

²⁸ —Na hte hpõm hapõx o pa nẽ higrõt o pyka kahte. Hãmri nẽ hprẽk nẽ hõ axpõt nẽ gaa nẽ hpãnhã ô. Hãmri nẽ hkamrẽk pa nẽ xa. ²⁹ Hãmri nẽ mẽ kot hikẽn mã mex nẽ nhũm kot hkre xwÿnhnta omu nẽ amnhũm hamÿnh pa. Tã mẽ

kot ixkapêr mar mex xwýnhjaja te mêmō hy ra higrôt kator nê hprêk nê hô pipôt nê ô xwýnhhta pyrâk. Nê urâk nê amnhî nhîpêx ô ho amnhî nhîpêx o pa. Anê.

Jejus te kot mêmō hy pyrâk ã kot amnhî jarênh

Matêwre 13.31-32; Rukre 13.18-19

³⁰⁻³² Nhũm Jejus arĩ mē ahkre ho nhỹ nê mē kām:

—Tirtũm kot mē awýr ixte mē ato amnhîptâr kaxyw inhmēnh ã ijarênhja. Te ixte mêmō hy pixire pyrâk. Koja mēhō mêmō hy hō pixire nê hkre nhũm ra higrôt. Nê gaa nê hprêk. Hãmri nê hpa angrà nhũm kuwênhre hwýr mra nê hōptĩ kamã amnhĩm haê nhîpêx. Mêmō hyta grire htã nhũm hkre nhũm higrôt nê ã amnhî nhîpêx anê. Tã kot paj nhỹrmã urã nê ixpyxi htã kot paj pika piitã hkôt mē ho amnhîptã nê mē omunh mex rãhã ho ri ixpa. Anê.

Á na pre Jejusja hkôt mē pa ho mē pa xwýnhjê mã amnhî tã kuxi nê ujarênh anê. ³³ Mē kām ujarênh kām mē ahkre ho pa. Te nhãm mêmōj jarênh pyrã nê amnhî tã haxwý nê harê. Mē kot tanhmã mar to hã mē omunh xã hkôt tanhmã mē kām ujarênh to. ³⁴ Na pre ãm ujarênh pix kām mē kām kapêr mar prãm kêt xwýnhjê mã amnhî jarênh rãhã ho pa. No mē kot hkôt pa ho pa xwýnhjê mã nhũm hprĩ hã ujarênh jarê nhũm mēhprĩ hã mar mex nê.

Jejus kot kôk o pinhkrênh ã harênh

Matêwre 8.23-27; Rukre 8.22-25

³⁵ Tã nhũm amýkry nhũm Jejus arĩ pâr kre kamã nhỹ. Hãmri nê hkôt mē pa ho mē pa xwýnhjê mã kām: “E pu mē ma xarmã mō.” ³⁶ Anê hãmri nê mē kot mar o hkrĩ xwýnhjê re nê pâr mã agjê nê ma xarmã mō. Garirej rũm kato nê ma xarmã pika hō hwýr mō. Nhũm pâr kwýja ma mē hkôt mō. ³⁷⁻³⁸ Nhũm

Jejus ra ôt xwa nê tē nê pâr kre kamã hkrã japar xã hã hkrã xi nê ra ôt tỳx nê nō. Nhũm kôk àpêr tỳx nê nhũm gô kãnhmã harĩ nê axpên tak. Ra ri xatã axpên tak nê pâr kre kamã axkapĩ nhũm ra mē kêp àr o mō. Hãmri nhũm mē tee ri amnhî nhîpêx nê tee ri amnhî kukamã hamaxpêr nê Jejus wýr hprôt nê kumra nê kām:

—Kwa kãnhmã nhỹ Pahihti. Kot puj mē jarãhã pahtyk pa. Anê.

³⁹ Hãmri nhũm hkrãkato nê kãnhmã nhỹ nê kôk mē gôta pumu nê wa kãm kapêr o:

—E kwa wa anhĩkrê. Anê.

Hãmri nhũm gô mē kôk hpinhkrênh kurê kumrêx.

⁴⁰ Hãmri nhũm Jejus hkôt mē pa ho mē pa xwýnhjê mã kām:

—Hêxta waa nê. Kormã mē ate amnhî kaxyw Tirtũm mē wa inhmã ajamaxpêr tỳx kêt. Hã na ka mē ri amã ma nê tee ri amnhî kukamã ajamaxpêr. Anê.

⁴¹ Hãmri nhũm mē amnhî jaêr pê ã kot amnhî nhîpêx anhỹr ã omu nê tee ri axpên pumunh pê omunh o kuhê. Hãmri nê axpên mã:

—Kokýy. Jejus kêp mē panhĩõ hkêt. Mē pahtõ kot pu te kot amnhî nhîpêx pyrã nê kôk mã pakapêr nhũm anhĩkrê? Nã mē pakuròm àhpumunh tỳx o àhpumunh tỳx. Anê.

5

Jejus kot mēhō nê mēkarõmnuti janor ã jarênh

Matêwre 8.28-33; Rukre 8.26-34

¹ Tã nhũm Jejus mē hkôt mē pa ho mē pa xwýnhjê mērohã mō nê xarmã Geras wýr pøj. ²⁻⁴ Hãmri nê pâr rũm hapøj nhũm mēhō myja Jejus pumu nê hwýr tē. Mēkarõmnuti kot hwýr àr nhũm ý hã oprê htỳx kumrêx. Hãmri nê hkwyjê hkãx ã kapôt ã mē hã pika kamã ri hkênh nê pa ho pa. Nhũm mē xatã kãx o hte hpre nê hpa hpre htã no nhũm kurê. ⁵ Nê kamãt kãm nê arĩgro hã àmra htỳx o mrap pê kên o amnhî

tak o mra. Mě hã pyka kamã nê kapôt ã hixêt ã amnhî tak tỳx rãhã ho mra. ⁶ Tã amỳm Jejus pumu nê hwỳr hprôt nê hã hpijaàm kaxyw kutã hkõn krã ho tẽm nê hparpê nhỹ. ⁷⁻⁸ Hãmri nhũm omu nê nê mẽkarõmnuti mã kapêr nê kãm:

—Kwa kurũm akato nê ma tẽ. Anẽ.

Hãmri nhũm kuma nê tanhmã myta o nhũm tãm mẽkarõmnuti nhỹ hã Jejus mã kapêr nê ãmra kamã kãm:

—Pa Tirtũm Kra Jejus? Mo kaxyw na ka ixwỳr tẽ? Kwa tanhmã ixto hkêt nê nà?

⁹⁻¹⁰ Anẽ nhũm kãm:

—Tanhmã na anhĩxi te? Anẽ.

Nhũm kãm:

—Nà ixpê Mẽohtõhti. Mẽkarõmnuti ohtõ nê kot ixwỳr gjẽx jakamã na htem ã inhĩxi jarẽnh anẽ. Kwa nê mẽ ijanor kêt nê nà? Anẽ.

¹¹⁻¹² Hãmri nhũm mẽkarõmnuti tãm amnhĩ to kuwỳ nê kãm:

—Kwa kër ka jahti nê mẽ ijaopõx japêr nê mẽ kot amnhĩ xà htỳx kamã hamak o mẽ pa htũm xàta wỳr mẽ ixrẽnh kêt nê. Hagrõ hkwy mỳj wỳr mãn mẽ ixrẽ pa mẽ hpãnhã hwỳr mãn hagjê? Anẽ.

¹³ Hãmri nhũm mẽ kãm:

—Tõe. Mẽ tãm hwỳr mra. Anẽ.

Hãmri nhũm mẽmyta pẽ hapõx pa nê ma hagrõ hwỳr mrrar kurẽ kumrẽx nê mẽ kãm gjẽx pa nhũm myja akupỳm tãm hkrã. No nhũm hagrõja mẽkarõmnuti pymaj amỳra nê axkahkũm nê hprôt nê himõ hã krã hixêt ã axpurn rõrõk nê gõx kãm mro nê hpikaprãr pa. Ohtõ rax kumrẽx. Kêp 2.000 tã hpikaprãr pa. ¹⁴ Hãmri nhũm hagrõ jamãr o ri mẽ pa xwỳnhjaja tee ri ja hã omu nê ma mẽ õ patrãw wỳr akupỳm mẽ piitã mẽ kãm harẽnh o hprôt nê mra. Hãmri nê mẽ kãm ujarẽnh pa. ¹⁵⁻¹⁶ Nhũm mẽ tee ri mẽ kuma nê ma Jejus wỳr mra nê hkaxpa nê kuri myta pumu. Nhũm ra akupỳm tãm hkrã nê ê kamã tãm amnhĩ nhĩpẽx nê nhỹ. Nhũm mẽ kot hã

omunh xwỳnhjaja mẽ kãm ujarẽnh pa nhũm mẽ kuma nê myta pumu hãmri nê tee ri amnhĩ kukamã hamaxpêr o kãm Jejus puma nê. ¹⁷ Hãmri nê amnhĩ nê kãm kapêr nê kãm:

—Kwa mẽmo kaxyw na ka mẽ ixwỳr rê? Mẽ ma akupỳm amrar tokyx anẽ. Anẽ.

¹⁸ Hãmri nhũm mẽ kuma nê akupỳm pãr wỳr agjẽ nhũm akupỳm mex xwỳnhta tee ri ja hã mẽ omu nê mẽ hkõt hkrã. ¹⁹ No nhũm Jejus kãm:

—Nà kot kaj mẽ ixkõt amõr kêt nê. Ma akupỳm anhõ krĩ hwỳr mãn tẽ nê mẽ kãm Tirtũm kot akupỳm ato mex ã amnhĩ jarẽnh o ri mẽ hkõt apa. Anẽ.

²⁰ Hãmri nhũm kuma nê ma akupỳm tẽ. Hãmri nê õ pyka pẽ Tekap kãm mẽ kãm Jejus kot tanhmã ho mex to hã harẽnh ri mẽ hkõt pa nhũm mẽ amnhĩ jaêr pẽ kuma nê tee ri hkukamã hamaxpêr.

Jejus kot akupỳm mẽhõ ho mex nê akupỳm mẽhõ ho htĩr ã harẽnh

Matêwre 9.18-26; Rukre 8.40-56

²¹ Tã nhũm Jejus mẽ hkõt mẽ pa ho pa xwỳnhjẽ mẽrohã akupỳm xarmã mõ nê rê. Hãmri nê pãr nhõ nê api nê gõ mỳri kuhê nhũm pika nhõ xwỳnhjaja Jejus pumu nê hã pikuprõnh rax nê. ²²⁻²³ Hãmri nhũm mẽhõ my pẽ Jajtija hwỳr tẽ nê kutã hkõnkrã ho htẽm nê nhỹ. Kêp Tirtũm kapêr o mẽ ahkre xà hã ixkre jamãr xwỳnh maati na pre. Nhũm hkra nija kêp à htỳx nê htyk kaxyw nê nõ. Kormã nyw. Kormã hã amgrã pẽ 12 pix tã ra kêp htyk kaxyw. Hãmri nhũm Jajtija tee ri hkukamã hamaxpêr nê ma Jejus wỳr tẽ nê hpar pẽ hkõn krã ho tẽm nê ho hwỳr kãm hihtỳx nê kãm:

—Pa akupỳm mẽ ixto mex xwỳnh maati. E awỳr na pa tẽ. Na ra ixkra ixpê htyk kaxyw. Pa tee ri omu nê kaxyw amã ijamaxpêr nê awỳr tẽ. Jakamã kwa ma ixkõt

inhörkwý hwýr tē nē inhmā omu nē hā anhíkra xi nē akupým inhmā ho mex. Anē.

²⁴ Hāmri nhūm kuma nē ma hkôt tē. Nhūm mē ohtō nē axpēn nhīgānh nē axpēn kujahēk o wa hkôt mra. ²⁵ Nhūm mēhō nija haxwýja wa hkôt tē. Na pre hte hkamrō hkryre rāhā ho pa hā ra hā amgrā kēp 12. ²⁶ Nē tōtō mā amnhīrer rax nē nhūm mē tee ri kot ho mex kaxyw nom xatā hkane kaprý. Hāmri nhūm ra hikāxpore kēp hapēx nhūm arī ām rāhā nē pa. ²⁷⁻²⁸ Hāmri nē tee ri amnhī kukamā hamaxpēr nē Jejus jarēnh ma nē hamaxpēr o:

—Ma kot paj ma hwýr tē nē kēp é pix kupēnh tā akupým inhmex japēr. Ma kot paj ho anē.

Anhýr o hamaxpēr hāmri nē ma mē hkôt hwýr htēm kuré kumrēx. Nhūm mē ohtō raxja kaēx ā mē hkôt hwýr tē. Hāmri nē katut kôt kēp é nhīrē kupē. ²⁹ ām é pix kupēnh tā akupým mex ā amnhī pumunh kuré kumrēx. ³⁰ Hāmri nhūm Jejus kot kēp é kupēnh ā amnhī tā omu nē hēx rom xa nē mē ho hakēx nē amnhī tā mē kām kapēr nē mē kām:

—Kwa mē atō na ka ri amnhī kaxyw inhmā ajamaxpēr týx pé ixpé ixē kupé? Anē.

Hāmri nhūm mē piitā kuma nē tee ri axpēn pumu nē kām amnhī tā aprā. ³¹ Hāmri nhūm hkôt mē pa ho pa xwýnhjaja kām:

—Mē kot apē amnār griā kot ka kēt ri mēhō kot apē hkupēnh xwýnh ā ri mē hkukja. Kwa mán ām mēhō amarī apē hkupé. Anē.

³² Hāmri nhūm mē kām:

—Nā na amarī ixpé hkupēnh kēt nē. Na amnhī kaxyw inhmā hamaxpēr týx pé ixpé hkupé. Tā na ixāhpumunh týx xā ho akupým mex. Nom ra ixte mēhō kot ixpé hkupēnh xwýnhhta pumunh jakamā na pa ixēx rom ā amnhī tā ri mē hkukjēr anē. E kwa mē atō inhmā amnhī jarē. Anē.

³³ Hāmri nhūm nija kuma nē tee ri kēp kot amnhī to hpimxur prām. Hāmri nē hpijaam nē hwýr htetert o tē nē kutā hkōn krā ho tēm nē nhý nē kām amnhī jarē nē kām:

—Ma pa na pa inhmā inhmex prām xāj apē axē kupé. Tā na pa akupým inhmex. Anē.

³⁴ Hāmri nhūm kuma nē kām:

—Tý. Nā ate amnhī kaxyw inhmā ajamaxpēr týx kôt ā ate amnhī nhīpēx anhýr jakamā na ka akupým amex. Kot kaj axte akamrō rāhā ho ri apa hkēt nē. E māmri ajamakētati nē ma akupým anhörkwý hwýr tē. Anē.

Hāmri nhūm kuma nē hkñnh nē ma akupým tē.

³⁵ Rôm nhūm Jajti mā mē àpēnh xwýnhjaja örkwý rūm ma ō patrāw kutā mra nē wa hkaxpa nē Jajti mā kām:

—Kwa na ra akra apē ty. Mo kaxyw kot ka kēt amnhī kôt Jejus o mō? Kwār māmri ma akupým awjanā nē tē. Anē.

³⁶ Hāmri nhūm Jejus mē kuma nē Jajti mā kām:

—Kwa tee ri akra hkukamā ajamaxpēr kēt nē. Ām kaxyw inhmā mán ajamaxpēr týx rāhā nē. Anē.

³⁷⁻⁴⁰ Hāmri nhūm mē axte mō nē mē örkwý hwýr pōj nē mē omu. Nhūm mē ra hā htu rax nē mýr o hkrī. Hāmri nhūm Jejus mē hwýr axā nē mē omu nē kot mē hkra htyk kumrēx ā omunh tā mē kām:

—Kwa mē hāmri amýr kēt nē. Na nireta htyk kēt nē. Na ām gōr nē nō. Anē.

Hāmri nhūm mē kot ra htyk ā omunh mex jakamā kuma nē ām kuma nē axtem nē ri axpēn mā hā hpēr o axkē. Hāmri nhūm Jejus mē hanor pa nē hitom kām htyk xwýnh wýr àr kaxyw nē amnhī kôt Juāw nē Xiakre nē Simāw Pētre nē kaxyw htyk xwýnh katorxā nē hipéêxā pix amnhī kôt mē ho axā. ⁴¹ Hāmri nē htyk xwýnhhta wýr tē nē hpa hā kupy nē kām kapēr nē kām:

—Pa? E kwa kànhmã nhỹ. Anẽ.

Nom amnhĩ kapër kãm harẽ nẽ kãm:

—Tarit kũm. Anẽ.

⁴² Hãmri nhũm kànhmã ỹr kurẽ kumrẽx nẽ kànhmã xa nẽ ri mra. Na pre ra hprêk nẽ ty. Na ra hã amgrà kęp 12 tã ty nhũm Jejus akupỹm ho htĩr nẽ kànhmã ỹr nhũm kànhmã xa nẽ ri mra. ⁴³ Hãmri nhũm kuri omunh xwỹnhjaja amnhĩ jaêr pẽ omu nẽ kamã no pyma nẽ hkĩnh tỹx kumrẽx. Hãmri nhũm Jejus katorxã mẽ hipêexãja wa kãm:

—E mãn ra kãm prãm nẽ. Wa tokyx kãm mẽmoj japêr kê kukrẽ. Nom kêr ka wa inhmar kumrẽx. Kêr ka wa akupỹm ixte ho htĩr ã ri mẽ kãm ijarênh o ri apa hkêt nẽ. Âm kwarĩ ho kwarĩ. Anẽ.

6

Najare nhõ xwỹnhjaja kot Jejus kaga hã mẽ harênh

Matêwre 13.53-58; Rukre 4.16-30; Juãw 1.11

¹ Tã nhũm Jejus ma õ krĩ pẽ Najare hwỹr ma akupỹm mõ nhũm hkôt mẽ pa ho mẽ pa xwỹnhjaja ma hkôt mõ. ² Hãmri nẽ hwỹr põj. Nhũm mẽ õ arĩgromnu pẽ sap kator jakamã nhũm Jejus ma Tĩrtũm kapër o mẽ ahkre xã hã ixkre hwỹr tẽ. Hãmri nẽ kamã mẽ ahkre ho nhỹ nhũm mẽ amnhĩ jaêr pẽ kapër mex ã kuma nẽ tee ri axpên pumunh pẽ hamaxpêr o hkrĩ. Jejus kęp mẽ hkwy hã hkamnhĩx nom nhũm mẽ kurom àhpumunh tỹx nẽ kapër mex jakamã nhũm mẽ kuma nẽ tee ri hamaxpêr o hkrĩ. Hãmri nẽ axpên mã:

³ —Kwa kęp mẽ panhĩõ htã tanhmã kot we amnhĩ to nẽ ã àhpumunh tỹx kôt mẽ pamã kapër anẽ nẽ ri mẽ kãm aa mẽ kot mẽmoj pumunh kêt kwỹ ho anhỹr o pa? Mẽ panoo mã na pre hprêk. Kęp pĩ kuprãr xwỹnh Juje mẽ hprõ Marir wa hkra na. Nẽ htõ Xiakre nẽ Juje nẽ Simãw nẽ Jutja ra mẽ pahte mẽ kęp htõ hã omunh mex. Nẽ htõxjaja

jar mẽ pakamã pa nhũm mẽ pahte mẽ omunh mex kênã kot kêt we mẽ kurom ã àhpumunh tỹx anẽ. Anẽ.

Anhỹr o axpên mã harẽ. Hãmri nẽ kamã gryk nẽ hkaga ⁴⁻⁶ nhũm tee ri amnhĩ tã mẽ omu nẽ hamaxpêr o:

—Hêxta waa nẽ. Mẽ kãm amnhĩ kaxyw ixkôt hamaxpêr prãm kêt kumrẽx. Anẽ.

Hãmri nẽ mẽ kãm:

—Nã Tĩrtũm nhỹ hã kapër jarênh o mẽ pa xwỹnhjaja na htem krĩ hkwy kamã kãm mẽ mar prãm nẽ. Nom õ krĩ kamã mẽ kot karàre rũm hprêk o mõi kãm omunh xwỹnhjaja na htem kuma nẽ âm kuma. Anẽ.

Hãmri nhũm mẽ kot amnhĩ kaxyw hkôt hamaxpêr kêt jakamã nhũm tee ri mẽ kãm aa mẽ kot mẽmoj pumunh kêt kwỹ ho anhỹr rax prãm kaprỹ. Nẽ âm mẽ à xwỹnhjê ho grêre nẽ mẽ hã ãhkra jaxwỹ nẽ akupỹm mẽ ho mex. Hãmri nẽ mẽ kurũm kato nẽ ma krĩ hkwy hkôt ri Tĩrtũm kapër o mẽ ahkre ho pa.

Jejus kot mẽmoj tã mẽ kęp 12jê mã karõ hã harênh

Matêwre 10.5-15; Rukre 9.1-6, 10.1-12; mãânên Atre 13.50-51, 18.6

⁷ Tã nhũm Jejus amnhĩ wỹr mẽ kot ỹ hã mẽ ahkre ho pa xwỹnh pẽ 12jê hwỹ. Ra kot amnhĩ kaxyw mẽ rênh xwỹnhhtaja nhũm amnhĩ wỹr mẽ kuwỹ. Hãmri nẽ axpên kaxyw mẽ ho axkrut nẽ mẽ kurẽ nẽ mẽ kãm mẽ àpênh ã karõ nẽ ma mẽ hkwyjê hwỹr mẽ kurẽ. Nẽ mẽ kãm:

—E kêr ka mẽ ma mẽ pahkwỹjê hwỹr mra nẽ inhỹ hã Tĩrtũm kapër jarênh o ri mẽ hkôt apa. Nẽ mẽ kurũm mẽkarõmnuti japõx o ri mẽ hkôt apa. ⁸⁻⁹ Nom kêr ka mẽ amnhĩ kôt akukrêx rax nẽ ri apa hkêt nẽ. Nẽ kawà htu nẽ ho ri apa hkêt nẽ. Nẽ amnhĩ kôt axãpkur xã ho ri apa hkêt nẽ. Rỹ akãxpore rax nẽ ri ho apa hkêt nẽ. Âm mẽ anhõ kamis nẽ mẽ apar kã ho pixire nẽ agjê nẽ ri hã apa. Nẽ mẽ amnhĩ kaxpar xã hã

mě anhõ kô pix o apa. Mě ã anhÿ kamã mẽ hkôt ri apa anê.

¹⁰ —Nê kër ka mẽ nhÿri krĩ hõ hwÿr pøj. Nê apõx xà kamã mẽhõ nhõrkwÿ kamã hkôt ri apikamênh tãmtã kurũm akupÿm ajapõj nê ma hpãnhã nhãm krĩ hõ hwÿr apa. Nom atÿx ri nhãm mẽ hwÿr amrar nê nhãm mẽ hwÿr amrar kêt nê.

¹¹ —Nê koja mẽ nhÿri mẽ akapêr kaga ka mẽ tee ri amnhĩ tã mẽ kamã ama hãmri nê tokyx mẽ kurũm ajapõj nê ma apa. Nê anojarêt nê mẽ noo mã akuhê nê amnhĩ par ã awjagrô kapĩ. Mẽ kot Tĩrtũm kaga hã amnhĩ pumunh nhũm kot amnhĩ pyrà nê mẽ hkaga hã omunh kaxyw ka mẽ ã mẽ noo mã amnhĩ nhĩpêx anê. Hãmri nê hpãnhã ma nhÿhÿm apa.

¹² Anhÿr o mẽ kãm mẽ àpênh ã karõ. Nhũm mẽ kuma nê hapõj nê ma mẽ hkwyjê hkôt pa. Ma krĩ piitã hkôt Tĩrtũm kapêr o mẽ ahkre ho ri mẽ hkôt pa nê mẽ kãm:

—E kwa mẽ tokyx amã ate amnhĩ tomnuj kaga hprãm xaj Tĩrtũm kôt mãn amnhĩ xunhwÿ. Anê.

¹³ Hãmri nê mẽ nê mẽkarõmnuti jano. Nê akupÿm mẽ ã xwÿnhjê ho mex kaxyw mẽmo htwÿm o mẽ hkrã gregrer nê Jejus nhÿ hã akupÿm mẽ ho mex.

Mẽ kot Juãw Paxis pĩr ã mẽ harênh

Matêwre 14.1-12; Rukre 9.7-9

¹⁴ Tã nhũm mẽ piitã Jejus jarênh ma nê axpên mã tanhmã harênh to ho pa. Nom ahpÿnhã tanhmã harênh to. Na prem kamã harênh o:

—Nã Juãw Paxis pimràata na. Pêr akupÿm htĩr jakamã na hte ã mẽ kot aa mẽmoj pumunh kêt kwÿ ho anhÿr o pa. Anê.

¹⁵ Nê kamã axtem harênh o:

—Nã tãm kêt. Pêr finat Eris na. Anê.

Nê kamã axtem harênh o:

—Nã tãm kêt. Pêr Tĩrtũm nhÿ hã kapêr jarênh xwÿnhjê hõ na.

Te kot amnepê mã mẽ kot Tĩrtũm nhÿ hã tanhmã amnhĩ nhĩpêx to xwÿnhjê kot amnhĩ nhĩpêx pyràk o kot amnhĩ nhĩpêx kênã.

Anhÿr o ahpÿnhã harê. ¹⁶ Hãmri nhũm Ijaew o amnhĩptàr xwÿnh pê Eroxo ãxipasja mẽ kot ã harênh anhÿr ã mẽ kuma nê Juãw Paxis mã hamaxpêr kurê kumrêx. Hãmri nê mẽ kãm:

—Nã pêr Juãw Paxista na. Ixte mẽ kãm hã ixãmnhênh nhũm mẽ kot inhmã mut krãhyr xwÿnhhta mãn ra tanhmã amnhĩ to nê akupÿm htĩr. Anê.

¹⁷⁻²⁰ Na pre ra pahi Eroxo ãxipasja htõ Pirip pê hprõ Eroxis pytà nê ho hprõ nhũm hkra niti mẽ wa hwÿr ahpã. Hãmri nhũm Juãw Paxisja tee ri ja hã pahiti Eroxo ãxipasja pumu nê hã kãm akir nê kãm:

—Tk. Kwa Tĩrtũm kêp ja omnuj. Ra kot ja nê mẽ pahkurê htã ka axtem nê ã amnhĩ nhĩpêx anê.

Anhÿr jakamã nhũm hprõ Eroxisja amnhĩ tã kuma nê kamã gryk tÿx nê. Nê kãm hpĩr prãm nê. No nhũm pahi Eroxo ãxipas kãm hpĩr prãm kêt nê. Juãw Paxis kot Tĩrtũm kôt amnhĩ nhĩpêx nhũm kot hã omunh mex jakamã kãm hpĩr prãm kêt nê. Juãw na pre hte xatã kãm Tĩrtũm kapêr jarênh o pa. Nhũm pahiti Eroxo ãxipasja kormã hprĩ hã mar mex kêt tã hã hpijaam nê kãm mar prãm nê. Nom nhũm hprõ kãm hpĩr prãm jakamã nhũm kêp mẽ kãm hã amÿnê nhũm mẽ ma o tẽ nê haxã nhũm mex nê mẽ hagiênh xà kamã hkrĩ ho krĩ.

²¹⁻²⁴ Tã nhũm jãã nhũm pahi Eroxo ãxipas kator ã arĩgro kato nhũm mẽ piitã hwÿr mra nê hã akuprõ nê hã hkĩnh nê hã apkur o hkrĩ. Õ kôwenatõjaja nê hkrãmnhwÿjaja nê krĩ hkwyjê kamã mẽõ pahijaja nhũm mẽ ohtõ nê hã akuprõ nê hã hkĩnh. Hãmri nhũm hprõ Eroxis kra nitija mẽ hwÿr axã nê mẽ kãm gre. Mẽ kot omunh nê kamã hkurê pix kaxyw mẽ noo mã hpijaam kêt nê

ã mẽ kãm grer anê. Hãmri nhũm pahi Erox omu nhũm ja kãm mex nê nhũm mẽ piitã hkĩnh nê kamã nopyma nê. Nê grer kãm hpijaam kêt nê tanhmã mẽ kãm grer to nhũm mẽ omu nê kamã no pyma nê. Hãmri nhũm pahi Erox ãxipasja kãm:

—Nà ãm hãmri. Na ka mẽ inhmã agrer mex nê. Jakamã kwa mãmri mẽmoj tã ixwỳ. Amã mẽmoj prãm xà hkôt inhmã mẽmoj jarê pa amã kugõ. ãm hãmri na pa amã amnhĩ jarê. Na pa Tirtũm noo mã ã amã amnhĩ jarênh anê. Ka mamrĩ ixkukrêx mex kwỳ hã ixwỳ pu axpên mã ho axkjê. E mẽmo na amã hprãm? Anê.

Hãmri nhũm kuma nê ma katorxã hwỳr tẽ nê kãm harê nê kãm:

—Xê mẽmoj tã kot paj we kuwỳ? Anê.

Hãmri nhũm kuma nê hamaxpêr o:

—Ma ãm hãmri koja mẽ tã jarãhã inhmã Juãw Paxis pí. Anê.

Hãmri nê hkrata mã kãm:

—Ma Juãw Paxis krã hã kot kaj awỳ kê mẽ amã kugõ ka man ixwỳr o tẽ. Anê.

²⁵ Hãmri nhũm kuma nê akupỹm pahi hwỳr axà nê kãm:

—Ma Juãw Paxis krã kot kaj inhmã agõ. Pasiiti kamã axà nê inhmã agõ pa ma amnhĩm o ixtêm kurê kumrêx. ãm ja pix na inhmã hprãm. Anê.

²⁶ Hãmri nhũm tee ri kuma nê hkaprĩ nê. Nê hamaxpêr o:

—Hêxta waa nê. Inhmã hpĩr prãm kêt. Nom ra ixte ixkutã mẽ hkrĩ xwỳnhjê noo mã inhmã kãm mẽmoj prãm xwỳnh nhõr ã amnhĩ jarênh nhũm ixte kãm õr ã amnhĩ jarênh nhũm mẽ piitã mẽ kot inhmar jakamã tanhmã kot pa we amnhĩ to nê kêp nê? Nà pa nê hkêt nê. Anê.

²⁷ Hãmri nê õ pôristijê mã kãm:

—E mẽ ma Juãw Paxis wỳr mra nê mut krãhta nê pasiiti kamã hkrã xà nê akupỹn o tẽ nê kãm agõ. Anê.

Hãmri nhũm mẽ kuma nê ma mẽ hagjênh xà hwỳr mra nê Juãw wỳr axà hãmri nê mut krãhta. ²⁸ Hãmri nê pasiiti kamã hkrã xà nê akupỹm o tẽ nê kot hã hwỳr xwỳnh mã kugõ nhũm kumỳ nê ma katorxã hwỳr o tẽ nê kãm kugõ.

²⁹ Hãmri nhũm Juãw Paxis kôt mẽ pa ho mẽ pa xwỳnhjaja tee ri harênh ma nê hkaprĩ htỳx nê. Hãmri nê pahi Erox ãxipas wỳr mra nê ì hã kuwỳ nhũm mẽ kãm kugõ nhũm mẽ kumỳ nê ma o mra nê kên kre kamã haxã.

Jejus kot mẽ ho 5.000 nê mẽ kãm õ hã harênh

Matêwre 14.13-21; Rukre 9.10-17; Juãw 6.1-14

³⁰ Tã hãmri nhũm mẽ kot Jejus nhỹ hã mẽ ahkre ho mẽ pa xwỳnhjaja akupỹn Jejus wỳr mõi pøj nê kãm amnhĩ jarê. Tanhmã mẽ kot mẽ ahkre hto ho pa nê tanhmã mẽ ho mex to ho pa hã kãm amnhĩ jarênh pa.

³¹ Tã nhũm mẽ piitã axpên pãnhã kot Jejus mar kaxyw mẽ hwỳr mra nhũm mẽ kormã apkur kêt nê. Jakamã nhũm Jejus hkôt mẽ pa ho mẽ pa xwỳnhjê mã:

—E ma pu mẽ awrã kaprỳ hwỳr mõi nê nhỹri pahkrĩ nê pakókôt nê apku.

³² Anê hãmri nhũm mẽ gõx kãm kanõre wỳr agjê nê ma ahte xarmã awrã kaprỳ hwỳr mõi. ³³ Nhũm krĩ hkwy nhõ xwỳnhjaja mẽ omu hãmri nê nhỹhỹm mẽ mõi xà hã mẽ omunh kurê kumrêx. Hãmri nê krĩ hkwy rùm ma mẽ ìhkrep mra nê mẽ kãm amnhĩ to wa nê pøj nê mẽ kutêp hkrĩ. ³⁴ Hãmri nhũm mẽ mõi nê mẽ hwỳr pøj nê kre kura nê kanõre nhõ. Hãmri nhũm Jejus mẽ hwỳr api nê mẽ omu nê hamaxpêr o:

—Hêxta waa nê. Na mẽ omnu nê pa. Te mẽ kêp õwêhti jamãr xwỳnh kêt nê htỳx ri pa xwỳnh kot amnhĩ nhĩpêx pyrãk. Mêhõ kot mẽ kamã

ukapri nê tanhmã mẽ ho mex to ho pa? Anê.

Hãmri nê mẽ kamã ukapri nê xa nê Tirtùm kapêr o mẽ ahkre rax nê.

³⁵⁻³⁶ Tã nhùm myt àr kaxyw nhùm hkôt mẽ kot pa ho pa xwýnhjaja hwýr mra nê kãm:

—Kwa hãmri na ra amýkry htýx nê. Mẽ hano kê mẽ ma nhýri krĩ hkwy hwýr mra nê tokyx amnhĩm mẽmoj japrô nê kuku nê hikwý nê gôr. Mo jar kapôt ã mẽ apkur xà? Anê.

³⁷ Hãmri nhùm mẽ kuma nê mẽ kãm:

—Kwa nà mẽ kamjaja mẽ kãm mẽmoj gô kê mẽ kuku. Anê.

Hãmri nhùm mẽ kuma nê tee ri hamaxpêr nê kãm:

—Kwa mo mẽ kaxyw mẽ pakàxpore rax? Kot pu mẽ pakàxpore ho 200 nê ho mẽ kãm mẽmoj japrôr tã nom nhùm mẽ ãm ho hkryre nê kuku nê ho ôhy htu hkêt nê. Mẽ ohtô rax kumrêx kênã. Anê.

³⁸ Hãmri nhùm mẽ kãm:

—Nà kot puj mẽ kãm mẽmoj japrôr kêt nê. No mẽ panhõ pãwtita? Tanhmã na arĩ kute? E mẽ atô tẽ nê omu nê akupýn tẽ nê inhmã harê. Anê.

Hãmri nhùm ja ma tẽ nê omu nê akupýn tẽ nê kãm:

—Nà pãwti ãm kêp 5 pix. Nê kaxyw tep ãm pijakrutre. Anê.

³⁹ Hãmri nhùm Jejus kuma nê mẽ kãm:

—Tõe. Mẽ kãm anê kê mẽ ahpýnhã ri hije nê hkrĩ. Anê.

⁴⁰ Hãmri nhùm mẽ piitã ahpýnhã kêp 50 nê hije nê hkrĩ hpa.

⁴¹ Nhùm Jejus pãwti mẽ tepta jamý nê kãnhmã kaxkwa hwýr rĩt nê Tirtùm mã kupê nê kãm harê nê kãm:

—Pa Papaj? Nà ka na apê mẽ inhmã mẽ inhõ ho apa xwýnh jakamã amex o amex. Anê.

Hãmri nê mẽ kãm ho hkry hpa nê hkôt mẽ pa ho mẽ pa xwýnhjê mã kugô nhùm mẽ ô ri ho mra nê ho

mẽ hipêx pa. Pãwti mẽ tepta nhùm mẽ ho mẽ hipêx pa. ⁴²⁻⁴⁴ Nhùm mẽ piitã apkur mex nê. Mẽõja mẽ kêp grire htã nhùm Jejus tanhmã mẽ kãm ho rax to nhùm mẽ ohtô rax tã piitã kuku nê ho ôhy htu hpa. Mẽmyjaja kêp 5.000 nê kaxyw mẽ hprô nê mẽ hkrajaja nhùm mẽõja ho mẽ hipêx pa nhùm arĩ hakrêx prã. Jakamã nhùm Jejus kôt mẽ pa ho mẽ pa xwýnhjaja akupým hakrêx o pikuprônho pa nê ho kawà o 12 nê ho nýt.

Jejus kot gô krãhkã hã htẽm ã harênh

Matêwre 14.22-33; Juãw 6.15-21

⁴⁵⁻⁴⁶ Tã nhùm Jejus hkôt mẽ pa ho mẽ pa xwýnhjê mã kãm:

—E mẽ kanôre mã axà nê ma akupým ixkukamã krĩ pê Petséj wýr rê. Pa jajê jano hãmri nê ma tẽ nê nhýri Tirtùm mã amnhĩ jarê nê rĩ ma mẽ akôt tẽ. Anê.

Hãmri nhùm mẽ kuma nê kanôre mã gjêx pa nê ma mẽ nhùm Jejus mẽ kot mar xwýnhjê janor pa nê ma hixêt prêk ã api nê Tirtùm mã amnhĩ jarênh o nhý.

⁴⁷ Tã nhùm kamãt nhùm arĩ ahte kýxpê nhý. Nhùm hkôt mẽ pa ho mẽ pa xwýnhjaja kormã kanôre kamã mõi. ⁴⁸ Hãmri nhùm Jejus amým mẽ omu nhùm kôk ra mẽ kutã àpêr týx kumrêx nhùm mẽ tee ri amnhĩ nhípêx nê tee ri rrẽmti ho gô rênh nhípêx o hkrĩ.

Tã nhùm ra krãhyre kã nhùm Jejus Tirtùm mã amnhĩ jarênh pa nê kãnhmã xa nê ma mẽ hkôt tẽ. Nom kanôre kamã htẽm kêt nê gô krãhkã hã xa nê mẽ hwýr hpar o tẽ. ⁴⁹⁻⁵⁰ Hãmri nê mẽ hwýr kato nê mẽ kamã hamak kaxyw hêx rom kot mẽ hakrenh mã. Nhùm mẽ amnhĩ wýr omu nê mẽkarô hã hkamnhĩx nê tee ri amnhĩ kukamã hamaxpêr nê umaj htertet nê ãmra rax nê. Hãmri nhùm mẽ kãm:

—Tk. Kwa mẽ amã ma hkêt nê. Pa na pa mẽ akôt tẽ. Anê.

⁵¹ Hãmri nê mẽ hwýr kanôre hkrem axà nhùm kôk xàpêr týxta

hapêx. Hāmri nhūm mē Jejus kamā no pyma nē tee ri hamaxpēr nē axpên mā:

—Kokýý. Tanhmā na we amnhī to nē gō krāhkā hā hpar o man mē pahkôt tē mē pahwýr àr mē nhūm kōk hapêx par kurê kumrêx. Anē.

Hāmri nē tee ri kot ā amnhī nhīpêx anhýrja kukamā hamaxpēr o hkrī. ⁵² Kormā mē kot hprī hā Jejus tanhmā kute hā omunh kêt jakamā. Tirtūm pyrā nē àhpumunh o àhpumunh ā omunh mex kêt jakamā tee ri pāwti grēre ho mē hipêx par nē gō krāhkā hā htēm nē kōk o pinhkrēnh ā omu nē tee ri ā kot amnhī nhīpêx anhýrja kukamā hamaxpēr.

Kenējare kamā Jejus kot akupým mē ho mex ā harēnh
Matêwre 14.34-36

⁵³ Tā nhūm mē xarmā rê nē krī pē Jenējare hwýr pōj. Hāmri nē kanôre nhō ⁵⁴ nē api nē kuhê nhūm krī nhō xwýnhjaja Jejus pumunh kurê kumrêx nē axpên mā:

—Kwa pēr Jejusta na mō. Nà tām kēnā. Anē.

⁵⁵ Hāmri nē hkīnh nē ma kape hā mē à xwýnhjê hkôt mrrar kurê kumrêx nē mē harir xā rāhā mē hamý nē akupým Jejus wýr mē o mra. Nhýri hpōx xā kamā omu nē hwýr mē o mra.

⁵⁶ Na pre htem ā Jejus nhīpêx anē. Jakamā nhūm hte ma nhýhým mra. Krī rūnh kôt mra nē krī hkryre hkôt mra nhūm mē omu nē hwýr mē à xwýnhjê ho mra nē mē ho kuwý nē kām:

—Pa? Kwa kê jajaja akupým mex kaxyw apê axê pix kupê nà? Anē.

Hāmri nhūm mē kām:

—Tōe. Nà kwār mē māmri hkupê. Anē.

Hāmri nē mē kot kēp ê kupênh xwýnh piitā akupým mex pa.

7

Mē higêt hkôt mē kot amnhī nhīpêx xwýnhjê jarēnh

Matêwre 5.21-48, 15.1-20

¹⁻⁴ Tā nhūm Mojes kapēr o mē ahkre o mē pa xwýnh kwýjaja Jerujarē rūm Jejus wýr mō. Hāmri nē hā akuprō nē hkôt mē pa ho mē pa xwýnhjê kot amnhī nhīpêx ā mē omunh o kuhê. Ijaew na prem mē hkukamā mē higêtjê kapēr kôt ri tanhmā amnhī nhīpêx to ho pa. Jakamā mē urāk nē apkur kaxyw nē xatā amnhī nhīhkra kuhōnh japjê nē rī kormā apku. No mē amnhī nhīhkra grā pix kuhōnh nē hkrī nē apkur kêt nē. Kuhōnh japjê nē kormā hkrī nē apku. Tirtūm kot ja hā mē omunh nē amnhīm mē mex ā mē harēnh ā amnhī kamnhix jakamā na prem ā amnhī nhīpêx anhýr o pa. Nē nhýri amnhīm mēō hkwý japrō nē akupým ôrkwý hwýr o mra nē haxwý nē mē higêt pyrā nē wýr japjê rūnh kumrêx nē rī kormā apku. Nē mē urāk nē poti nē gōj nē papêre hkre kahōnh japjê rūnh nē rī kormā kamā ô nhīpêx. Mē higêt pyrā nē ā amnhī nhīpêx anhýr o pa. Tirtūm kot ja hā mē omunh nē amnhīm mē mex ā mē harēnh prām xāj. Nom nhūm Jejus kôt mē pa xwýnhjaja na prem ā amnhī nhīpêx anhýr kêt nē. Na prem apkur kaxyw nē katāt kôt amnhī nhīhkra kuhō nē àmnhix apkur o hkrī. Jakamā nhūm Parijew nhō xwýnh mē Tirtūm kapēr tūm o mē ahkre xwýnhjaja tee ri ā mē kot amnhī nhīpêx anhýr ā mē omu nē mē hā Jejus kukja nē kām:

⁵ —Pa Jejus? Kwa mē inhmā mēmoj jarē. Amnepēm mē panhigêtjaja na pre htem apkur kaxyw nē amnhī nhīhkra kuhōnh japjê rūnh kumrêx nē arī kormā hkrīn apku. Jakamā na pa htem mē urāk nē ā amnhī nhīpêx anē. No akôt mē pa ho mē pa xwýnhjaja na htem ho mē ixpyrà kêt nē. Kwa

mo na htem ã amnhĩ nhĩpêx anhÿr kêt nê? Anê.

⁶ Hãmri nhũm mẽ kuma nê mẽ kãm amnepêm Tirtũm nhÿ hã kapêr xwÿnh pê Ijais kapêr jarê nê mẽ kãm:

—Nã ãm hãmri na pre finat Ijaisja amnepêm tanhmã mẽ ajarênh to. Te Tirtũm tãm kapêr pyrãk o mẽ ajarê nê mẽ ajarênh o:

Mẽ kãm ixkĩnh ã amnhĩ jarênh tã mẽ kãm ixkĩnh kêt. Na htem ãm kãm ixprãm ã amnhĩ jarênh kaprÿ.

⁷ Mẽ kot ixkapêr kuhpa hã amnhĩ krã hkôt mẽmoj tã hkwÿjê mã karõ ho pa jakamã na htem ãm kot ixkôt amnhĩ nhĩpêx ã amnhĩ jarênh kaprÿ. Anê.

Ã na pre mẽ ajarênh anê. ⁸⁻⁹ ãm hãmri na pre mẽ ajarê. Na ka htem mẽ panhĩgêt kapêr kôt pix mã amnhĩ nhĩpêx o apaja gryk ã ra Tirtũm kapêr kaga hpa. Te mẽ akapêr o kot Tirtũm kapêr jakrenh pyrãk. ¹⁰ Na pre finat Mojes Tirtũm nhÿ hã mẽmoj tã mẽ pamã karõ ho:

Ker ka mẽ anhĩpêxã nê mẽ akatorxã wa hã apijaãm o ri apa. Jao wa kutã anojarêt rãhã nê. Nom kot kaj mẽ ho mex hkêt nê tanhmã mẽ kãm akapêr punuj to hãmri nhũm mẽ akwÿjaja ja mÿrapê mẽ apa. Anê.

Na pre ã finat Mojesja Tirtũm nhÿ hã mẽ pamã karõ anê. ¹¹ No mẽ kajaja na ka mẽ axtem nê tanhmã akwÿjê mã ja hã karõ hto nê mẽ kãm: “Kot kaj mẽ mẽmo arĩgro hã akãxpore hkwÿ nom anhĩpêxã ho ajuta kaxyw kãm hkwÿ nhõr kêt nê. ãm wa kãm ate ho ajuta kêt ã amnhĩ jarê hãmri nê Tirtũm mã amnhĩ jarênh xã hã ixkre hwÿr mãn o tẽ nê mẽ ixte ixkre ho mex kaxyw mẽ inhmã agõ. Kot kaj mẽ ã amnhĩ nhĩpêx anê nhũm Tirtũm ja hã mẽ apumu nhũm ja kãm mex

nê. E kêr ka mẽ ã amnhĩ nhĩpêx anhÿr o ri apa.” Anhÿr o na ka htem akwÿjê mã karõ. ¹² Jao mẽ kot mẽ hipêxã nê mẽ katorxã ho ajuta nê mẽ hkurê. ¹³ Te mẽ amã mẽ panhĩgêt kapêr mex o kot Tirtũm kapêr jakrenh pyrãk o na ka htem amnhĩ nhĩpêx. Jao te Tirtũm kapêr mex kêt pyrãk o hipêx nê mar kêt nê apa. ã na ka htem Tirtũm kapêr kuhpa hã amnhĩ nhĩpêx anhÿr o ri apa. Anê.

Mẽ pajamaxpêr punuj kôt mẽ pahtomnu hã harênh

Matêwre 15.10-20

¹⁴ Tã nhũm Jejus Parijew nhõ xwÿnhjê mẽ hkwÿjê mã kapêr pa hãmri nê amnhĩ wÿr ra mẽ kot mar o kuhê xwÿnhjê mã hpa ho apê nê mẽ kãm:

—E pa mẽ amã mẽmoj jarê ka mẽ inhma nê inhmar mex nê. ¹⁵⁻¹⁶ Na hte Tirtũm kapêr tũm o mẽ ahkre xwÿnhjaja amnhĩ krã hkôt mẽ ate amnhĩ nhĩhkra kuhõnh japjê hã mẽ amã karõ ho pa. Nê amnhĩ krã hkôt mẽ axãpkur xã hã tanhmã mẽ amã karõ hto ho pa. Mẽ ate ã amnhĩ nhĩpêx anhÿr nhũm Tirtũm kot ja hã mẽ apumunh kôt amnhĩm mẽ amex ã mẽ ajarênh kaxyw nhũm htem ã mẽmoj tã mẽ amã karõ anê. Nom na hte Tirtũm tanhmã mẽ panhĩhkra kuhõnh to hã mẽ pahpumu nê ãm hã mẽ pa hpumu. Nê mẽmo mẽ paxãpkur xã hã mẽ pahpumu nê ãm hã mẽ pahpumu. Ja kãm tanhmã kute hkêt. Na hte ja hã mẽ omunh xã hkôt amnhĩm mẽ mex ã mẽ harênh rÿ mẽ mex kêt ã mẽ harênh kêt nê. Rÿ mẽ hakwa ho mẽmoj kur ã mẽ omunh xã hkôt tanhmã mẽ harênh to hkêt nê. ãm mẽ hakwa ho tanhmã kapêr to pix ã mẽ mar kôt na hte tanhmã mẽ harênh to.

Anhÿr o mẽ kãm kapêr. ¹⁷ Hãmri nê mẽ kot mar o kuhê xwÿnhjê re nê hkôt mẽ pa ho mẽ pa xwÿnhjê mẽ mẽ amnhĩm hikranh xã hã ixkre hwÿr agjê. Hãmri nhũm hkôt

mě pa ho mẽ pa xwýnhjaja tee ri Jejus kot tanhmã mẽ hakwa jarěnh to hã kuma nẽ hã hkukja nẽ kãm:

—Kwa mon ka ri mẽ inhmã ã ja jarěnh aně? Aně.

¹⁸ Hãmri nhũm mẽ kãm:

—Kwa xàn ka mẽ kormã aprĩ hã ja mar mex kêt nẽ? E pa ixprĩ hã mẽ amã harẽ ka mẽ inhma. Nã mẽ apkur xà na hte mẽ hkrã hi kamã mẽ hamaxpěr wýr gjêx kêt nẽ. ¹⁹ Na hte ãm mẽ ôhy pix wýr agjê nẽ gaa nẽ nhãm hapôj nẽ hapêx. Na htem mẽ apkur xà nhỹ hã tanhmã amnhĩ tomnu to hkêt nẽ. Jakamã na hte Tirtũm mẽ apkur xà hã mẽ omunh xà hkôt tanhmã mẽ harěnh to hkêt nẽ. Aně.

Nhũm pre ã mẽ kãm kapěr anhỹr o mẽ paxàpkur xà piitã mex ã harẽ. Jakamã na hte Tirtũm kra-jaja ãmnhĩx mẽmoj piitã hkur o pa nẽ kãm mẽmoj kur pyrna hkêt nẽ. Jakamã nhũm Jejus ã mẽ kãm kapěr aně nẽ mẽ kãm:

²⁰ —Mẽ hkrã hi kamã mẽ hamaxpěr punuj pix nhỹ hã na htem tanhmã amnhĩ tomnuj to. Jakamã na hte Tirtũm tanhmã mẽ hamaxpěr to ho pa hã mẽ omunh xà hkôt tanhmã mẽ harěnh to. Nom mẽ kot mẽmoj kur ã mẽ omunh xà hkôt rý mẽ ãhkra kuhõnh japjê hã mẽ omunh xà hkôt tanhmã mẽ harěnh to hkêt nẽ. Ja tanhmã kęp kute hkêt. ²¹⁻²² Nom koja mẽhõ hamaxpěr punuj nẽ ra hkôt tanhmã amnhĩ tomnuj to.

Jao axpěn kamã hpijaam kêt nẽ.

Rý mẽhõx pĩ rý mẽ kęp ahkĩ.

Rý mẽ kęp mẽ hprõ rý mẽhkuprý ho amnhĩkati.

Rý ri axpěn pẽ õxy.

Rý tanhmã hkwýjê homnuj to.

Rý tanhmã mẽ ho kapěr punuj to.

Rý hêx rom mẽ no kupyr o ri pa.

Rý mẽmoj tã amnhĩ to jarkrar o pa.

Rý axpěn kukrêx pumu nẽ kãm ho õ hprãm xaj hã õ xwýnhhta kamã gryk.

Rý htýx ri tanhmã amnhĩ nhĩpêx to.

Mẽ hamaxpěr punuj jakamã na htem ã ri amnhĩ nhĩpêx anhỹr o pa. ²³ Tã ã mẽ kot amnhĩ nhĩpêx anhỹr ã mẽ omunh xà hkôt na hte Tirtũm mẽ kot amnhĩ tomnuj xwýnh hã mẽ harẽ. Aně.

Mẽhõ kot hkra kaxyw Jejus mã hamaxpěr ã harěnh

Matêwre 5.21-28

²⁴ Tã nhũm Jejus mẽ hkôt mẽ pa ho mẽ pa xwýnhjaja nhỹhým no-jarêh hãmri nẽ krĩ rùm hapôj nẽ ma krĩ pẽ Xir pu hã ri pa. Hãmri nhũm Jejus hkwýjê mã:

—E kwa pu mẽ tokyx ixkre mũj wýr mō mẽ kuri pój nẽ kamã amnhĩm hikra. Pu mẽ pahpõx tokyx aně kê krĩ nhõ xwýnhjaja mẽ pahpõx ã mẽ pahpumunh kêt nẽ.

Anhỹr tã nom nhũm mẽ piitã mẽ harěnh ma nẽ mẽ hã akuprõ. ²⁵⁻²⁶ Nhũm mẽhõ ni haxwýja Jejus hpõx ã harěnh ma nẽ ma hwýr tẽ. Nom kęp Ijaew kêt axtem Gres nhõ xwýnh na pre. Pika pẽ Sir kamã krĩ mẽ kot kãm “Wẽnĩs” anhỹr xwýnh kamã na pre kato. Nhũm pre mẽkarõmnuti kęp hkra ni mã axà. Hãmri nhũm õ mãmãj tee ri omu nẽ ra Jejus hpõx ã harěnh ma nẽ ma hwýr tẽ. Hãmri nẽ hwýr axà nẽ hparpẽ hkõnkrã ho htẽm nẽ nhỹ nẽ kãm:

—Xê Pahihti. Inhmã ixkra nẽ mẽkarõmnuti jano kê ma tẽ kê akupým inhmã mex. Aně.

²⁷ Hãmri nhũm kãm:

—Nã kormã. Na pre Tirtũm taxy kormã Ijaewjê pix wýr inhmẽ. Jakamã na pa kormã nhãm mẽ akwýjê hõ tanhmã mẽ ato mex to hkêt nẽ. Aně.

²⁸ Hãmri nhũm tee ri amnhĩ tã kuma nẽ kãm:

—Ma ãm hãmri na ka ja jarẽ. Ixpê Ijaew kêt tã nom mẽ kuxwar we ixto mex grire kêt wehe. Aně.

²⁹ Hãmri nhũm kãm:

—Nã ãm hãmri na ka ã akra kaxyw inhmã ajamaxpěr týx aně.

Jakamã kot paj nê mēkarōmnutita jano. Koja axte tanhmã apê ho hkêt nê. E ma akupÿm hwÿr tē nê omu. Anê.

³⁰ Hāmri nhūm kuma nê ma akupÿm ōrkwÿ hwÿr tē nê omu. Nhūm ra mēkarōmnutija kēp kato nê ma tē nhūm akupÿm tām hkrã nê hkĩnh nê par kãm hkōkōt o nō.

Hamak kro nê kapēr krok xwÿnh jarēnh

Matêwre 15.29-31

³¹ Tã nhūm Jejus mē hkôt mē pa ho mē pa xwÿnhjaja krī pē Xir rūm hapôj nê akupÿm gō rax pē Garirej wÿr ma mra. Pyka pē Sitō jakre nê mō nê pyka pē Tekap jakre. ³² Hāmri nê kormã hpōx o mōr rōm nhūm mē amnhī wÿr Jejus pumu nê hwÿr mēhō myja o tē. Kapēr krok nê umar kêt xwÿnhhta nhūm mē wÿr o tē nê kãm:

—Pa? Ot pa mē awÿr ixkrãmnhwÿta o tē. Kwa hã anhĩhkra xi kê akupÿm mē inhmã mex. Anê.

³³ Hāmri nhūm omu nê hpa hã kupy nê mē kēp o kato nê nhÿri mē hkãx ã o xa. Nê akutã hamak kre kupê nê argōx mē nê ho ōhto htok. ³⁴ Hāmri nê kaxkwa hwÿr rīt nê htyk xà mēnh tÿx nê kãm kapēr. Mē pakapēr kãm kãm: “E ajamak katēr nê anhōhto kaxkrit.” Anê. Nom kapēr kãm kãm: “Epata.” Anê. ³⁵ Hāmri nhūm hamak katēr nê ōhto kaxkrit kurē kumrēx nê tām kapēr nê tām ama. ³⁶⁻³⁷ Hāmri nhūm mē kot omunh xwÿnhjaja amnhī jaēr pē Jejus kot ho mex ã omu nê kamã no pyma nê. Hāmri nhūm mē kãm:

—Kwa kêr ka mē akwÿjê mã ja hã ijarēnh kêt nê.

Anhÿr tã no nhūm mē kuma nê ãm kuma nê ma mē piitã mē kãm harēnh o ri hprōt nê mē kãm:

—Kwa Jejus na mex o mex. Na hte mē ho mex o pa nhūm mē umar kêt xwÿnhjaja akupÿm tām ama nhūm mē kapēr kêt xwÿnhjaja akupÿm tām kapēr. ãm hāmri na hte

ã mē hipêx anhÿr o pa. Nã ãm mex o mex. Anê.

8

Jejus kot mē ho 4.000 nê mē kãm mē ō hã harēnh

Matêwre 15.32-39

¹⁻² Tã nhūm arīgro hō hã nhūm mē ohtō nê nhÿri kapôt ã Jejus ã htu rax nê kot mē ahkre mar o kuhê hã apkati axkrunēpxi. Nhūm mē apkur xà hã mēōja ra mē kēp hapêx. Hāmri nhūm Jejus ja hã mē omu hāmri nê hkôt mē pa ho mē pa xwÿnhjê mã akir nê mē kãm hpa ho apê nê mē kãm:

—E mē amnê ixwÿr mra nê ixkapēr ma. Anê.

Nhūm mē hwÿr mra nê kuhê nhūm mē kãm:

—Kwa na pa inhmã mē kot inhmar o kuhê xwÿnhjê kaprī nê. Na mē ra mē pahkôt ri pa hã apkati axkrunēpxi nhūm mē apkur xà hã mēōja mē kēp hapêx. ³ Mē ō krī hwÿr awry jakamã koja mē mēmoj kur kêt rãhã ma akupÿm pa hāmri nê pry hã hirot nê rōrōk o pa. Hāmri pa inhmã mē hkaprī nê. Anê

⁴ Hāmri nhūm mē kuma nê axte tee ri hamaxpēr nê kãm:

—Kwa nã nhÿhÿnh kot puj kêt mē kãm mēmoj to mra? Jar ãm kapôt pix kēnã. Anê.

Hāmri nhūm mē kãm:

⁵ —Nã tanhmã na mē anhō pãwtija kute? Anê.

Nhūm mē kãm:

—ãm kēp 7 pix. Nê kaxyw tep kwÿ no ãm grēre. Anê.

⁶ Hāmri nhūm mē kuma nê mē kot mar o kuhê xwÿnhjê mã anê nhūm mē kuma nê hkrī pa. Hāmri nhūm pãwti jamÿ nê ho Tirtūm wÿ nê kãm:

—Pa Papaj. Nã ka na apê mē inhmã mē inhō ho apa xwÿnh. Jakamã amex o amex. ãm amex kumrēx. Anê.

Hāmri nê mē kãm ho hkry pa nê hkôt mē pa ho mē pa xwÿnhjê mã kugō nhūm mē ho mē hipêx

pa. ⁷ Nhũm hpānhã tepta py nē mã ho anē nē ho Tirtũm wỳ. Hāmri nē hkôt mē pa ho mē pa xwỳnhjê mã kugô nhũm mē mã ho anē nē hamỳ nē ho mē hipêx pa. ⁸⁻⁹ Hāmri nhũm mē ohtô rax kumrêx tâ pitã apku nē ôhy htu pa. Měmyjaja kêp 4.000 nē kaxyw mē hprôjaja nē mē hkrajaja. Tã nhũm Jejus mē apkur xãja o mē hipêx pa. Nhũm hkôt mē pa ho mē pa xwỳnhjaja hakrêx o akuprô nē ho kawà ho ⁷ nē ho nỳt. Hāmri nhũm Jejus ma akupỳm mē ô krĩ hwỳr mē kot mar xwỳnhjê jano nhũm mē ma akupỳm hapêx. ¹⁰ Hāmri nhũm Jejus hkôt mē pa ho mē pa xwỳnhjê mē ro hã kanôre hkrem agjê nē mē hkwym ma Tamanut wỳr mō.

Parijew nhõ xwỳnh kwỳ kot mějõj tâ Jejus kamã hamak ã mějõ harênh

Matêwre 12.38-42, 16.1-4; Rukre 12.54-59

¹¹ Tã nhũm mē Tamanut wỳr pôj nhũm Parijew nhõ xwỳnh kwỳjaja Jejus pumu nē ma hwỳr mra nē mějõj tâ kuwỳ nē kãm:

—Pa. Ot pa mějõ awỳr mra. Kwa mějõ inhmã aa mějõ ixte mějõj pumunh kêt ô ho anē. Pa mějõ ja hã apumu nē Tirtũm kot mějõ ixwỳr amênh ã akôt ijamaxpêr kurê kumrêx. E tokyx. Anē.

Kot tee ri mějõ kãm mějõj to anhỳr kaxyw nē ho anhỳr kêt nhũm mějõ kot hã omunh nē ma hkwỳjê mã ho kapêr punuj kaxyw nhũm mějõ ã hêx rom kãm kapêr anē. ¹² Nhũm ra kãm mějõ kot amnhĩ kaxyw hkôt hamaxpêr kêt kãm ã kapêr anhỳr mar kaga nē. Hāmri nē tee ri amnhĩ tâ mějõ hamaxpêr ã mějõ omu nējõ htyk xã mějõnh tỳx nējõ mějõ kãm:

—Hêxta waa nējõ. Mějõ ajamaxpêr punuj pix o na ka htem ri ajamaxpêr o apa. Ixpê Tirtũm kot mějõ awỳr inhmênh xwỳnh tâ ka mějõ ja hã ixkôt ajamaxpêr kêt nējõ. Nã mo kaxyw kot pa kêt mějõ amã mějõj to

anējõ? Kot paj ho anējõ ka mějõ omu nējõ ãm omu nējõ ixkôt ajamaxpêr kêt nējõ. Nã kot paj mějõ amã mějõj to anhỳr kêt nējõ. Anējõ.

¹³ Hāmri nējõ mějõ kure nējõ hkôt mějõ pa ho mějõ pa xwỳnhjê mějõhã ma mra nējõ akupỳm kanôre hkrem agjê nējõ ma xarmã mō.

Jejus kôt mějõ pa xwỳnhjaja kot hprĩ hã omunh kêt ã mějõ harênh

Matêwre 16.5-12; mãânênh Makre 6.52

¹⁴ Tã nhũm mějõ kormã kanôre kamã xarmã mōr rôm nhũm Jejus kôt mějõ pa ho mějõ pa xwỳnhjaja tee ri mějõ apkur xã japêr nējõ axpên mã:

—Kwa hêxta waa nējõ. Na pu mějõ panhõ pãwti re nējõ amnhĩ kôt o pamôr kêt nējõ. Nējõ ãm pixire nējõ o mō. Anējõ.

¹⁵ Hāmri nhũm Jejus tee ri mějõ kuma nējõ tanhmã hã mějõ kãm kapêr to. Nom mějõj tâ kuxi nējõ mějõ kãm awjarê nējõ mějõ kãm:

—Kwa oko kêr ka mějõ amnhĩ nējõ Parijew nhõ xwỳnh mějõ Pahi Erox nhõ pãw kaxkrit xã pumunh mex nējõ. Anējõ.

¹⁶ Hāmri nhũm mějõ kuma nējõ tee ri kapêrja kukamã hamaxpêr pê hã axpên kukjêr o hkri nējõ axpên mã:

—Kwa mo na ri ã mějõ pamã pãw kaxkrit xã jarênh anējõ? Mãn mějõ panhõ pãwti hkêt ã mějõ pahpumu hã na ri ã harênh anējõ nã? Anējõ.

¹⁷ Hāmri nhũm Jejus mějõ kapêr ã mějõ kuma nējõ mějõ kãm:

—Kwa moñ ka wem ãm xatã axpên mã mějõ panhõ pãwti hkêt jarênh pix o mō? Xàn pa hte mějõ apyrã nējõ tee ri mějõ paxàpkur xã hkêt kukamã ijamaxpêr o ixpa? Nã inhmã ja tanhmã kute hkêt. ¹⁸ Ra mějõ ano ho mějõ ate ixpumunh mex tâ kormã aprĩ hã tanhmã ixkute hã ixpumunh mex kêt. Nējõ mějõ ajamak o ixkapêr mar mex tâ aprĩ hã mar tỳx kêt. Kwa wem ixte amnhĩ nhĩpêx mã ajamaxpêr tỳx nējõ. E mějõ inhmã mějõj jarê. ¹⁹ Jãã ixte mějõ kêp 5.000 mã pãwti kêp 5 nhĩrênhã. Tanhmã na ka prem

hagrêx o akuprô nê ho kawà ho nýt to? E mē atō inhmā harē. Anē

Hāmri nhūm ja kām: “Na pa prem ho kawà ho 12 nê ho nýt.” Anē.
²⁰ Nhūm kuma nê mē kām:

—Tỳ na pre hagrêx ã kawà kêp 12. Tã ham ixte mē kêp 4.000 mã pãwti kêp 7 nhîrênhta. Tanhmã na ka prem hagrêx ho akuprô nê ho kawà ho nýt to? Anē.

Nhūm ja kām: “Na pa prem ho 7.” Anē. ²¹ Hāmri nhūm kuma nê mē kām:

—Tỳ ra ixte mē anoo mã ã ja ho anhÿr o axkrut tã ka mē ra hã ano hkêt nê arî axpên mã mē panhō pãwti hkêt pix jarênh o ixkôt mō. Kormã mē ate ixãhpumunh tÿx ã ixpumunh kêt. Anē.

Jejus kot akupÿm nohkre xwÿnh o mex ã harênh
Juãw 9.1-7

²² Tã nhūm mē ma krî pē Pesêj wÿr mō nê ra hwÿr pōj. Hāmri nhūm krî nhō xwÿnh kwÿjaja mē omu nê Jejus wÿr mēhō myja o tē. Ra nohkre nê rît kêt nê pa xwÿnhja nhūm mē hpa hã kupyn hwÿr o tē. Hāmri nê ho kuwÿ nê kām:

—Pa Pahihti? Ot pa mē awÿr ja ho tē. Kwa hã anhîhkra xi nê akupÿm mē inhmã no ho mex. Anē.

²³ Hāmri nhūm mē kuma nê nohkre xwÿnhhta pumu nê hpa hã kupy nê o tē nê krî pē ho kato nê nhÿri mē hkãx ã o xa. Hāmri nê no hã argôx mē nê hã îhkra xi nê kām:

—E mãn ka mēmoj pumu nà? Anē.

²⁴ Hāmri nhūm kuma nê hkrãkato nê ri rît hāmri nê kām:

—Tỳ na pa mēmoj pumu. Nom ixprî hã omunh mex kêt nê. Te mēmo pî hpār kwÿ ri mrar pyrãk. Anē.

²⁵ Hāmri nhūm axte no hã îhkra xi nhūm tã rît mex nê. Ri hprî hã mēmoj piitã omunh mex nê.

²⁶ Hāmri nhūm Jejus akupÿm ôrkwÿ hwÿr kumē nê kām:

—E kêr ka kape hã ri amrar kêt nê. Âm ma ma akupÿm anhōrkwÿ hwÿr atēm kurê kumrêx. Anē.

Jejus kot amnhî tã hkôt mē pa xwÿnhjê kukjêr ã harênh

Matêwre 16.13-20; Rukre 9.18-21

²⁷ Tã hāmri nhūm Jejus ma hkôt mē pa ho mē pa xwÿnhjê mē mē ma mō. Ma krî pē Sejurej Piripos pu hã krî hkwÿ hkôt mō. Nê kormã pry hã mō nhūm Jejus amnhî tã hkôt mē pa ho mē pa xwÿnhjê kukja nê mē kām:

—Kwa mē inhmã mēmoj jarē. Tanhmã na htem ahpÿnhã ri axpên mã ijarênh to wehe? Anē.

²⁸ Hāmri nhūm mē kām:

—Nã na htem ahpÿnhã tanhmã ajarênh to. Na hte kamã mē hkwyjaja axpên mã ato finat Juãw Paxis ã ajarē. Nê kamã mē hkwyjaja ato finat Eris ã ajarē nê mē hkwyjaja apê Tirtûm nhÿ hã kapêr o pa xwÿnh ra htyk xwÿnhjê hō hã ajarē. Æ na htem ahpÿnhã axpên mã ajarênh anhÿr o pa. Anē.

²⁹ Hāmri nhūm mē kuma nê mē kām:

—No we mē kajaja? Ixpê mēhō hã na ka htem axpên mã ijarê? Anē.

Hāmri nhūm Simãw Pêtre kām:

—Nã mē pajaja na pa htem apê Tirtûm kot mē ixkaxyw axãm nê mē ixwÿr amênh xwÿnh ã ajarē. Nê apê mē ixpiitã mē inhō Pahi Maati hã ajarē. Æ na pa htem axpên mã ajarênh anē. Anē.

³⁰ Hāmri nhūm kuma nê mē kām:

—Nã âm hāmri na ka htem ã ijarênh anē. Æ ixte anhÿr. Kwa nom kwa kêr ka mē inhma. Kêr ka mē kormã ã akwÿjê mã ijarênh anhÿr kêt nê. Anē.

Jejus kot amnhî kukamã amnhî jarênh ã harênh

Matêwre 16.21-23; Rukre 9.22

³¹ Tã nhūm Jejus amnhî kukamã hkôt mē pa ho mē pa xwÿnhjê mã tanhmã amnhî jarênh to nê mē kām:

—Nà ra mẽ ate Tirtùm kot mẽ akaxyw ixâm ã ixpumunh mex. No mẽ pahkwỳjaja kãm ja hã ijarënh mar nẽ ixpumunh prãm kêt. Ijaew krãhtùmjẽ mẽ Tirtùm kapër tùm o mẽ ahkre o mẽ pa xwỳnhjẽ mẽ patre krãhtùmjaja na mẽ kãm ja hã ixpumunh prãm kêt. Jakamã koja mẽ nhỹrmã ixpynẽ nẽ ixtak rax nẽ ixpĩ. Nom kot paj ixtyk ã ixtã apkati axkrunẽpxi hãmri nhùm Tirtùm akupỹm ixto ixtĩr. Anẽ.

³² Hãmri nhùm mẽ kot hpĩr ã amnhĩ jarënh ma nẽ tee ri hkukamã hamaxpër. Hãmri nhùm Simãw Pêtreja hwỳr tẽ nẽ hkwỳjẽ pẽ ho kato nẽ mẽ hkàx ã o xa nẽ kãm:

—Kwa nà Pahihti. Koja Tirtùm anẽ mẽ omunh mex nẽ nhùm mẽ ã anhĩpẽx anhỹr kêt nẽ. Kwa ri ã kapër anhỹr kêt nẽ. Anẽ.

³³ Hãmri nhùm kuma nẽ hwỳr apkjẽ nẽ pu hã hkõt mẽ pa ho mẽ pa xwỳnh piitã omu. Hãmri nẽ mẽ hamak mã Simãw Pêtre mã kapër nẽ kãm:

—Tk. Kwa na ka ã inhmã akapër anhỹrja o te Satanasti nhỹ hã akapër pyrãk. Tirtùm nhỹ hã na ka ã inhmã akapër anhỹr kêt nẽ. Æm jar mẽ kãm Tirtùm kapër mar prãm kêt xwỳnhjẽ jamaxpër o na ka ajamaxpër nẽ ã inhmã akapër anẽ. No Tirtùm jamaxpër o ajamaxpër kêt nẽ. Anẽ.

Jejus krajaja tanhmã kot amnhĩ nhĩpẽx hto hã mẽ harënh

Matêwre 6.24-28; Rukre 9.23-27; Juãw 12.24-26; mããnẽn Apokarip 2.10, 12.11

³⁴ Tã nhùm Jejus amnhĩ wỳr mẽ kot mar o kuhẽ xwỳnhjẽ mẽ hkõt mẽ pa ho mẽ pa xwỳnhjẽ mã anẽ nhùm mẽ hwỳr axkamẽ nẽ kuhẽ. Hãmri nhùm tanhmã mẽ ahkre hto nẽ mẽ kãm:

—E mẽ inhma. Kot kaj mẽ ixkõt amnhĩ xunhwỳr ã amnhĩ jarẽ hã kot kaj mẽ mããnẽn amnhĩ jarënh o: “Jejus kęp inhõ Pahihti jakamã kot paj ãm kapër kõt pix mã amnhĩ

nhĩpẽx rãhã ho ri ixpa. Kwãr ixkwỳjaja tanhmã hã inhĩpẽx to pa arĩ hkõt amnhĩ nhĩpẽx rãhã ho ixpa.” Anhỹr o amnhĩ jarẽ.

³⁵ —Koja mẽ ixtã mẽ atõx pĩ rỳ ixtã tanhmã mẽ ato ka ty. Ate tanhmã ijarënh to ho apa hã nhùm mẽ apĩ. Tã nom koja akaxwỳnh ma inhõ krĩ hwỳr àpir kurẽ kumrẽx nẽ kamã atĩr tùm nẽ amex rãhã nẽ apa ho apa. Nom kot kaj mẽ jar atĩr prãm xãj ixkaga hãmri nẽ hwỳr axàpir kêt nẽ.

³⁶⁻³⁷ —Nẽ koja mẽhõ hikukrẽx gryk ã Tirtùm kaga. Hãmri nẽ nhỹrmã ty nẽ ý kamã kuwy hwỳr ma mõ nẽ amnhĩ kõt kukrẽx õ hpyr nẽ o mõi kêt nẽ. Koja tee ri kuwy hwỳr mõi pymaj amnhĩ nẽ hikukrẽx rax o amnhĩ pãnhã amnhĩrer prãm kaprỳ. Tanhmã koja amnhĩ to nẽ Tirtùm mã amnhĩre nẽ ma õ krĩ hwỳr api? Koja ã amnhĩ nhĩpẽx anhỹr kêt nẽ.

³⁸ —Nẽ koja mẽhõ ixte mẽ ahkre hã inhma nhùm ja kęp omnuj japër. Nhùm kot mẽ kãm ixprãm nõkati xwỳnhjẽ hkõt pa gryk ã ixkaga. Hã kot paj nhỹrmã mẽ ato amnhĩptãr kaxyw akupỹn wrỳ nẽ amnhĩ xwar kot ixkaga xwỳnhhta kaga. Æm hãmri na pa mẽ amã ja hã amnhĩ jarẽ. Kot paj nhỹrmã inhõ Papaj nhỹ hã ixte mẽ ho amnhĩptãr kaxyw akupỹn wrỳ nhùm kapër o mẽ wrỳk xwỳnhjaja man ixkõt wrỳ. Pa mẽ wrỳ hãmri nẽ ra mẽ kot ixkaga xwỳnhjaja pa amnhĩ pyrã nẽ amnhĩ xwar mẽ hkaga hpa. Anẽ.

9

¹ Nhùm Jejus arĩ mẽ kãm kapër nẽ mẽ kãm:

—Æm hãmri na pa mẽ amã amnhĩ jarẽ. Kot paj nhỹrmã akupỹn ixte mẽ ato amnhĩptãr kaxyw mẽ awỳr wrỳ kãm ga. Tã kot kaj mẽ akwỳjaja kormã atĩr ri ja kukamã tanhmã ixte amnhĩ nhĩpẽx to hã ixpumu. Anẽ.

Jejus hirã htÿx kãm ãm ã harënh

Matêwre 17.1-9; Rukre 9.28-36; mãânënh Sikün Pêtre 1.16-18

² Tã nhùm arÿgro kêp 6 nê hapêx nhùm Jejus ma nhÿri hixêt prêk wÿr tê. Nê Simãw Pêtre nê Xiakre nê Juãwja nhùm ma amnhî kôt wa mẽ o mō. Nhùm wa mẽ ahte mō nê hixêt prêk ã api nê himök ã kuhê. Hãmri nhùm Jejus axtem nê xa. ³ Ra ê haka htÿx kumrêx nê xa. ⁴ Hãmri nhùm ja wa kaxkwa rùm hwÿr wrÿ nê kuri kãm kapêr. Finat Mojes mẽ finat Erisja wa wrÿ nê kuri kãm kapêr o xa. Tirtüm amnepêm amnhî wÿr wa ho àpir tã nhùm wa akupÿm wrÿ nê kãm kapêr. ⁵⁻⁶ Nhùm wa mẽ mex kumrêx nê hirã htÿx kãm kuhê nhùm Jejus kôt mẽ mōr xwÿnhjaja wa mẽ omu nê mẽ kamã no puma nê. Nê tee ri mẽ kãm tanhmã kapêr to hkukamã hamaxpêr. Hãmri nhùm Simãw Pêtre hamaxpêr nê Jejus mã kãm:

—Kwa Pahihti. Nã ãm hãmri na pu mẽ amnê mō. Kwa pu mẽ kritpêm jar axkamê nê tokyx panojarêt kêt nê. Pa mẽ amã pō nhÿrōnh o axkrunêpxi nê hipêx. Amã nê Mojes mã nê Eris mã hō nhÿpêx ka mẽ kamã akrî. Kwa xat pa mẽ amã ho anê nã? Anê.

⁷ Hãmri nhùm kakrã jaka htÿx wrÿ nê wa mẽ hkunor pa nhùm wa mẽ kamã kuhê. Hãmri nhùm kakrã kamã Tirtüm mẽ kãm kapêr nê mẽ kãm:

—Ota Ixkra xa. Inhmã hapê ho inhmã hapê. Kêr ka mẽ kapêr mar tÿx rãhã ho ri apa. Anê.

⁸ Hãmri nhùm mẽ kuma nê amnhî pu hã rÿt nhùm ãm Jejus pix mẽ kuri xa nhùm Mojes mẽ Erisja wa ra ma akupÿm api nhùm mẽ ãm Jejus pix pumu.

⁹ Hãmri nhùm mẽ ma akupÿm hkwÿjê hwÿr wrÿk o mō nhùm Jejus mẽ kãm:

—Kwa kêr ka mẽ ham mẽ ate mẽmoj pumunh xwÿnhhta kormã nhãm mẽ kãm harënh kêt nê. Koja

mê mẽmo arÿgro hã ixpî hãmri nhùm Tirtüm akupÿm ixtō ixtÿr ka mẽ ri kormã mẽ kãm ja hã ijarënh o ri apa.

¹⁰ Anê hãmri nhùm mẽ kuma nê mẽ kãm harënh kêt nê. ãm axpên mã pix mã harê nê kot akupÿm htÿr ã amnhî jarënhja ã axpên kukjêr o pa nê axpên mã:

—Kwa mo na ri ã akupÿm htÿr ã amnhî jarënh anê? Tanhmã kot we amnhî to nê htyk tã akupÿm htÿr? Anê.

Hãmri nê tee ri hkukamã hamaxpêr o hkôt pa.

Juãw Paxis te kot Eris pyrãk ã harënh

Matêwre 11.13-15, 17.10-13

¹¹ Hãmri nhùm mẽ kormã ahpar mã wrÿk o mōr mẽ nhùm Jejus kôt mẽ mōr xwÿnhjaja mẽmoj tã hkukja nê kãm:

—Kwa mẽ inhmã mẽmoj jarê. Na hte Tirtüm kapêr tùm o mẽ ahkre xwÿnhjaja mẽ inhmã: “Eris kumrêx koja Tirtüm mẽ pahwÿr kumê nhùm Krisja hapu hã wrÿ.” Anê. Na htem ã mẽ inhmã war ajarënh anê. Tã ka na ka ra wrÿ nom nhùm kormã Erisja akukamã wrÿk kêt nê. Anê.

¹²⁻¹³ Hãmri nhùm mẽ kãm:

—Nã ãm hãmri na htem mẽ amã ã ja jarënh anê. Na pre ra ixkukamã te kot Eris kot amnhî nhÿpêx pyrãk xwÿnhhta tê nê ixkutêp mẽ kãm ijarënh o pa. Nom mẽ kot ixkukamã ijarënh xwÿnh ã omunh kêt jakamã na prem axtem nê kãm tanhmã hipêx to hprãm xã hkôt tanhmã hipêx kati hton kupî. Tã koja mẽ ã hipêx anhÿr pyrã nê mã ixtō anê nê inhÿpêx kati nê tokyx mẽ kãm ixprãm kêt xwÿnhjaja ixpynê nê ixpî pa amnhî xã htÿx kamã ijamak kãm ty. Tirtüm kapêr ã kagã htüm kot wa ijamê wa ixkukamã wa ijarënh xã hkôt. Anê.

Jejus kot mẽhō hkra nê mẽkarōmnuti janor ã harënh

Matêwre 17.14-21; Rukre 9.37-43

14 Hāmri nhūm Jejus nē Simāw Pêtre nē Xiakre nē Juāwja mē akupŷm hkwyjê hwŷr hpôx o mra nē amnhī kukamā hkwyjê pumu nhūm mē ohtô nē mē hā akuprô nē mē kām kapêr. Nhūm Tirtūm kapêr tūm o mē ahkre ho mē pa xwŷnhjaja mēmoj tā mē hkukjêr o kuhê. 15 Jakamā nhūm Jejus mē hwŷr hpôx o tē nhūm mē pikuprônh xwŷnhjaja amnhī wŷr omu nē hkīnh nē. Hāmri nē kutā hprôt nē kām:

—Pa. Nà âm hāmri na ka akupŷn mē ixwŷr tē. Anê.

16 Hāmri nhūm mē kām:

—Kwa mēmoj tā na ka mē axpēn mā axàkjêr o akuhê? Anê.

17-18 Hāmri nhūm mēhō myja kām:

—Nà ixkra hā na pa mē axpēn mā ixkapêr. Na pre mēkarômnuti ixpê hwŷr axà nē tanhmā ixpê ho nhūm kapêr kêt nē pa. Nhūm hte xatā tanhmā ixpê ho nhūm pykap amnhī rē nē hakwa jamrô ho hikwŷ. Hāmri nē à htŷx kamā ama nē amnhī nham o axpēn kamnhar tŷx kumrêx pē htŷx pa nē hikwŷ nē ixpê omnuj tŷx nē. Na hte ā mēkarômnuti nhŷ hā amnhī nhîpêx anhŷr o pa. Jakamā na pa ate inhmā ho mex kaxyw man o tē nē tee ri ajapêr. Hāmri nē ho akôt mē pa ho mē pa xwŷnhjê hwŷ nhūm mē kot inhmā ho mex kaxyw tee ri tanhmā ho hkapyrŷ. Anê.

19 Hāmri nhūm Jejus kuma nē hkôt mē pa ho mē pa xwŷnhjê mā kām:

—Hêxta waa nē. Ra mē ate Tirtūm nhŷ hā ixte mē ho mex ā ixpumunh ryy htā ixpyrà nē ā amnhī nhîpêx anhŷr kêt nē. Mān ka mē kormā kaxyw Tirtūm kôt ajamaxpêr tŷx kêt nē. E amnê ixwŷr akra ho tē pa omu. Anê.

20 Hāmri nhūm mē hwŷr o tē nhūm mēkarômnuti Jejus pumu nē tanhmā hkrata o htŷx to nhūm pykap tēm nē hakwa jamrô nē

amnhī rēnh o nō. 21 Nhūm Jejus omu nē hipêêxà mā:

—Kwa tanhmā na ra kot amnhī nhîpêx ā mytwrŷ kute? Anê.

Nhūm kām:

—Nà hprîre rūm na hte ā amnhī nhîpêx anhŷr o pa. 22 Na hte mēkarômnuti xatā ixpê hpîr kaxyw kuwy kamā kurê nē gôx kām kurê. Kwa kot ka ate ho mex kukamā axâhpumunh japêr nē wa ixkamā axukapri nē akupŷm inhmā ho mex. Anê.

23 Hāmri nhūm Jejus kām:

—Xân ka tee ri ixte ho mex kaxyw ixkukamā ajamaxpêr? Nà ixte mēmoj piitā ho anhŷr kaxyw ixâhpumunh tŷx kênâ. Kot ka mē atô mēmoj tā amnhī kaxyw ixkôt ajamaxpêr tŷx hā kot paj amā ho anê. Anê.

24 Hāmri nhūm kuma nē kām hkra mex prām tŷx xâj kapêr tŷx nē kām:

—Nà na pa amnhī kaxyw akôt ijamaxpêr. Nom kot kaj tanhmā ixkrâ hto pa akôt ijamaxpêr tŷx rāhā ho ri ixpa Pahihti. Anê.

25 Rôm nhūm mē ohtô rax nē hwŷr kormā mra nhūm Jejus amnhī wŷr mē omu hāmri nē mēkarômnutija mā kapêr kurê kumrêx. Nē kām kapêr kām hihtŷx nē kām:

—Pa mēkarômnuti. E apê mē ho mē kapêr kêt nē mē umar kêt o apa xwŷnh ā pa amā ixkapêr ka inhma. Kêr ka mē hkrata pē akato nē ma amôr o mō nē axte tanhmā ho hkêt nē. Anê.

26 Hāmri nhūm tee ri kot kām karôja ma nē gryk xâj xatā amŷra nē mē hkrata o htŷx kumrêx nhūm htertet tŷx o nō. Hāmri nhūm kēp kato nē ma tē nhūm te htyk pyrà nē nō nhūm mē tee ri omu nē ra htyk ā hkamnhîx. 27 Hāmri nhūm Jejus hpa hā kupy nē kânhmā âm nhūm akupŷm mex nē kânhmā xa nē ri mra. Nē tām kapêr o mra nē umar mex nē.

28 Tā nhūm Jejus hkôt mē pa ho mē pa xwŷnhjê mērohā ma akupŷm

amnhim hikranh xà hã ixkreja wÿr mra nê hwÿr agjê nê hkrî. Hãmri nhum Jejus kôt mê pa ho mê pa xwÿnhjaja amnhî tâ hkukja nê kãm:

—Kwa mê inhma mêmoj jarê Pahihtî. Na pa mê tee ri axwakre kamã mê hkrata nê mêkarõmnuti janor kaprÿ. Kwa mon pa mê apyrã nê ja ho anhÿr mex kêt nê? Anê.

²⁹ Hãmri nhum mê kãm:

—Nà axtem na mêkarõmnuti ja. Na htem mê nê hanor tokyx anhÿr kêt nê. Na htem ho Tirtum wÿr tÿx nê rî kormã hano. Anê.

Jejus kot htyk kukamã amnhî jarênh

Matêwre 17.22-23; Rukre 9.44-45

³⁰⁻³¹ Tã nhum Jejus mê hkôt ri mê pa ho pa xwÿnhjê mê krîja rüm hapõj nê ma nhãm mô. Nê ma pyka pê Garirej kahti hkôt mô. Nom mê piitã mê hkàx ã mô. Jejus kormã kot amnhî tâ tanhmã hkôt mê pa ho mê pa xwÿnhjê jahkre hto ho pa jakamã kãm mê hkàx ã mê o pa hprãm nê. Hãmri nê amnhî kukamã mê kãm tanhmã amnhî jarênh to nê mê kãm:

—E kot paj mê amã tanhmã amnhî jarênh to ka mê inhma nê inhmar tÿx nê. Kojã mê kãm ixprãm kêt xwÿnhjaja tokyx mê kãm ixtã amÿnê nhum mê ixpî. Kot paj ixtÿk ã ixtã apkati axkrunëpxi hãmri nhum Tirtum akupÿm ixto ixtîr. Kwa kêr ka mê ja ma nê hã anohtÿx nê ho apa. Anê.

³² Hãmri nhum mê tee ri ã kot amnhî jarênh anhÿrja ma nê axpën mã:

—Kwa mo na ri ã mê pamã amnhî jarênh anê? Nà kêp mê panhõ Pahi Maati hã kot amnhî jarênh kênã kot kêt mēhõ kupî.

Anhÿr o axpën mã harênh o hkôt mô. Hãmri nê ã kot amnhî jarênh anhÿr mar prãm kêt jakamã hprî hã tanhmã hkukjêr to hkêt nê. Am akryk hkôt mar o mô.

Mê kot amnhî to rûnh xwÿnh jarênh

Matêwre 18.1-5; Rukre 9.46-48

³³⁻³⁴ Tã nhum Jejus mê hkôt mê pa ho pa xwÿnhjaja kormã ma krî pê Kapanaũ hwÿr mô nhum hkôt mê pa ho mê pa xwÿnh pê 12jaja tanhmã amnhî kukamã hamaxpër to hãmri nê axpën mã:

—Kwa mê pahtõ kot puj we nhÿrmã pahpê pahi nê mê ho amnhiptâr rax o ri pahkwÿjê jakre?

Anhÿr o axpën kukjêr o Jejus kôt mô. Nê axpën mã: “Nà pa.” Nhum mê hkwyjaja: “Nà kêt pa.” Anhÿr o hkôt mô. Hãmri nhum Jejus mê mar o mô. Hãmri nhum mê mô nê nhÿri amnhim hikranh xà hã ixkre hwÿr pøj nê hwÿr agjê nhum mê kãm:

—Kwa mêmoj tâ na ka mê pry hã amnhî jarênh o mô? Anê.

Hãmri nhum mê tee ri kuma nê hpîjaãm nê. Nê kãm tanhmã amnhî jarênh to hkêt nê. ³⁵ Jakamã nhum Jejus nhÿ nê mê kãm anê nhum mê kuri hkrî pa nhum mê kot mê kãm mê ho amnhiptâr rax prãmta ã mê kãm kapër nê mê kãm:

—E mê inhma. Ka mê atõ amã mê ho amnhiptâr rax prãm. Hã kêr ka te apê mê piitã mê kãm amarî axapënh xwÿnh pyrãk o amnhî nhîpêx o mê hkôt apa. Jao mêmoj to mê kutã anojarêt rãhã nê. Anê.

³⁶ Hãmri nê amnhî wÿr mēhprîre hõ mã hpa ho apê nhum hwÿr tē nhum kumÿ nê o nhÿ nê hã mê kãm kapër nê mê kãm:

³⁷ —E mê inhma. Kêr ka mê apê pahi pyrãk o tanhmã amnhî jarênh to ho ri apa hkêt nê. Am te amarî ri mê apa pyrãk o amnhî nhîpêx o ri apa. Jao nhÿri mēhprîre hõ pumu nê kamã axukapri nê kãm mêmoj tanhmã ho rÿ kãm mêmoj gõ. Hãmri nê ã amnhî nhîpêx anhÿr o te pa ate tanhmã ixto mex to pyrãk o amnhî nhîpêx. Nê kot ka mê atõ pa tanhmã ixto mex to nê te ate Tirtum o mex pyrãk o amnhî nhîpêx. E kêr

ka mẽ amã amnhĩ to rũnh prãm nẽ
ã amnhĩ nhĩpêx anhÿr o ri apa. Anẽ.

³⁸ Hãmri nhũm Juãw nhÿhÿnh tẽn
mẽ hwÿr axã nẽ Jejus mã:

—Kwa Pahihti. O mũj mẽhõ
kêp mẽ pahkwÿ hkêt tã anhÿ hã
mẽ nẽ mẽkarõmnuti janor o pa.
Pa mẽ tee ri ja hã omu nẽ kêp
mẽ pahkwÿ hkêt jakamã pa mẽ ã
kot amnhĩ nhĩpêx anhÿrja nẽ kãm
ixkapêr. Anẽ.

³⁹⁻⁴⁰ Hãmri nhũm kuma nẽ kãm:

—Kwa nã nẽ tanhmã kãm nẽ
hkêt nẽ. Koja mẽhõ inhÿ hã aa
mẽ kot mẽmoj pumunh kêt kwÿ ho
anẽ hãmri nẽ kêp mẽ panhiõ nẽ
ri mẽ pahkwÿm tanhmã mẽ ahkre
hto ho pa hkêt nẽ. Ra mẽ pahkõt
kot amnhĩ nhĩpêx mã kênã. Jakamã
kwa mẽ ja nẽ tanhmã kãm nẽ hkêt
nẽ. Kwãr mãmrĩ ã amnhĩ nhĩpêx
anẽ. Ja mex kênã.

⁴¹ —Koja mẽhõ nhÿri mẽ atõ amã
kõr ã apumu nẽ hamaxpêr o: “Kwa
Jejus kõt ri pa xwÿnh mũj kãm kõt. E
pa kãm gõ hkwyê ho ixkõ.” Anhÿr
o hamaxpêr nẽ apẽ ixkwÿ hã amã
gõ hkwyê ka ho ixkõ. Nhũm ãm kot
amã gõ pix nhõr nhũm ate ho akõm
tã nhũm Tirtũm atã omu nẽ ho mex
rax nẽ. Anẽ.

*Mẽ pahte amnhĩ tomnuj pymaj
tanhmã amnhĩ nhĩpêx to hã mẽ pa-
jarênh*

Matêwre 18.6-9; Rukre 17.1-2

⁴² Nhũm Jejus arĩ hkõt mẽ pa ho
mẽ pa xwÿnhjê mã kapêr nẽ mẽ
kãm:

—Nẽ mẽ kot ixkõt amnhĩ xun-
hwÿr tohtuj anhÿr xwÿnhjaja. Koja
mẽhõ ma mẽ hwÿr tẽn nẽ inhnẽ mẽ
kãm kapêr. Mẽ kot mẽ mar nẽ
tanhmã amnhĩ tomnuj to hprãm
xàj hêx rom mẽ kãm kapêr nhũm
mẽ mar xã hkõt tanhmã amnhĩ
tomnuj to. Hã koja Tirtũm ja hã
omu nẽ kot inhnẽ tanhmã kãm nẽ
xwÿnhhta pumu nẽ homnuj tÿx nẽ.
Te mẽ kot mẽhõ pynênh nẽ mut ã
kên pytĩĩ hõ nhõr nẽ ma o htêm nẽ
gõ xupÿm rax kãm mẽnh pyrãk o

hipêx. Te ho ja pyrãk no ãm homnuj
tÿx o hakre.

⁴³⁻⁴⁷ —E kwa mẽ o kora. Kot
kaj mẽ anhĩkra rÿ apar o tanhmã
amnhĩ tomnuj to. Hã kêr ka mẽ
axte ã amnhĩ nhĩpêx anhÿr pymaj
te ate amnhĩ pẽ anhĩkra rÿ apar
krãhyr nẽ mẽnh pyrãk o amnhĩ
nhĩpêx nẽ axte ã amnhĩ tomnuj
anhÿr kêt nẽ. Rÿ ka mẽ ano ho
mẽmoj punuj pumu. Hãmri nẽ
kãm ajamaxpêr pix o apa pymaj te
ate amnhĩ pẽ ano katõk nẽ mẽnh
pyrãk o amnhĩ nhĩpêx nẽ nhãm arĩt
kurẽ kumrêx. Kêr ka mẽ ã amnhĩ
nhĩpêx o apa rãhã nẽ. Hãmri nẽ
nhÿrmã ty nẽ ma Tirtũm mẽ wa
inhõ krĩ hwÿr api. No kot ka mẽ
arĩ akutã ano nẽ arĩ akutã apar nẽ
arĩ akutã anhĩkra rãhã ri mrar tã
tõhã tanhmã ho amnhĩ tomnuj to.
Hãmri nẽ nhÿrmã ty nẽ ma mẽ kot
amnhĩ xã htÿx kamã hamak tũm xã
pẽ kuwy maatita wÿr ma apa.

⁴⁸ Kuwyja kamã na htem mẽ
kot amnhĩ tomnuj mÿrapê
amnhĩ xã htÿx kamã hamak
rãhã ho pa ho pa hãmri nẽ aa
hapõx kêt nẽ.

⁴⁹ ã koja mẽ kot amnhĩ tomnuj o mẽ
pa xwÿnh piitã amnhĩ nhĩpêx anhÿr
rãhã nẽ pa ho pa. ⁵⁰ Jakamã kwa
kêr ka mẽ axpên to mex rãhã ho
ri apa. Nom axpên kãm agryk nẽ
tanhmã axpên nhĩpêx to ho ri apa
hkêt nẽ. Anẽ.

Nhũm pre ã Jejus hkõt ri mẽ pa
ho mẽ pa xwÿnhjê jahkre anẽ.

10

*Mẽ pahte axpên kaga nẽ Jejus kot
mẽ pahkurê*

*Matêwre 5.31-32, 19.1-12; Rukre
16.18; mãânên Wam Korĩt 7.10-16*

¹ Tã nhũm Jejus mẽ hkõt mẽ pa ho
pa xwÿnh mẽrohã ma pyka pẽ Jutej
wÿr mõ. Hãmri nẽ pyhti pẽ Jotãw ã
rẽ nẽ hpãnhã ma xarmã mõ. Nhũm
mẽ axte mẽ hã akuprõ nhũm kê
Jejus axte mẽ ahkre ho xa. ² Hãmri
nhũm Parijew nhõ xwÿnh kwÿjaja

hwÿr mra. Mě kot hêx rom kamā hamak nē mar nē tanhmā ho kapēr punuj to kaxyw hwÿr mra nē kām:

—Pa. Ot pa mē mēmoj tā akujjēr kaxyw awÿr mra. Kwa tanhmā na pre amnepēm finat Mojesja mē pahte mē pahprō kaga hā mē panhīgētjē mā karō hto? Xà koja mē pahprō mē pakapēr hkwȳm tanhmā amnhī nhīpêx to pu mē mÿrapê hkaga nhūm Tirtūm ja hā mē pahpumu nhūm ja kām mex nē nà? Anē.

³ Hāmri nhūm mē kām:

—Tanhmā na pre Mojes Tirtūm nhÿ hā ja hā mē amā karō hto? Anē.

⁴ Nhūm mē kām:

—Nà na pre harēnh o:

Kēr ka mē aprō kaga kaxyw hāmri nē ate hkaga hā amnhī jarēnh ā kagā nē kām agō nē rī kormā hkaga. Anē.

Na pre ā mē inhmā ja hā karō anē. Anē.

⁵ Hāmri nhūm mē kām:

—Tÿ nom mē kām Tirtūm kapēr kōt amnhī nhīpêx prām kēt jakamā na pre ā mē kām ja jarēnh anē.

⁶ Amnepēm mēmoj piitā hkrax kām na prem axpēn kaga hkēt nē. Na pre Tirtūm wam myja nhīpêx nē hpānhā kām hprō nhīpêx. Axpēn kaxyw wa hipêx. ⁷ Jakamā na hte mēmyjaja hprō kaxyw nē gryk ā katorxā nē hipêxā wa hkaga nē am hprō kōt pix mā pa ho pa. ⁸ Te wa tipxi nē ri wa pa pyrāk o axpēn nhīpêx o pa. ⁹ Tirtūm tām kot axpēn mā wa ōr kēnā kot kēt mēhō wa kot axpēn kaga kaxyw tanhmā wa hipêx to rÿ tanhmā wa kām kapēr to. Anē.

Nhūm pre ā Jejus mē kām kapēr anē. ¹⁰ Hāmri nē hkōt mē pa ho mē pa xwÿnhjē mē akupÿm ixkrem agjē nhūm mē kām:

—Kwa aprī hā mē inhmā mē kot axpēn kaga hā mē harēnhhta jarē pa mē ixprī hā kuma nà. Anē.

Hāmri nhūm mē kām:

¹¹ —Nà kot kaj mē aprō kaga nē hpānhā nhām mēhō ho aprō nhūm Tirtūm noo mā te ate wam aprō kamā nhām aprō nyw o amnhīkati pyrāk. Tirtūm pē ja omnuj tÿx nē. Rÿ koja mēhō hprō kaga ka hpānhā ho aprō nhūm Tirtūm noo mā te ate wam mjēn pē ho amnhīkati pyrāk. Ja määnēn Tirtūm pē omnuj tÿx nē.

¹² —Nē mēnijaja. Koja mēhō ni ra mjēn kaga nē hpānhā nhām mēhō ho mjēn. Ja mex kēt. Mjēn krax kēp mjēn kumrēx kēnā kot kēt hkaga nē hpānhā nhām hō ho mjēn. Koja anē nhūm Tirtūm noo mā te kot wam mjēn kamā nhām hō ho amnhīkati pyrāk nhūm Tirtūm pē ja omnuj tÿx nē. Anē.

Jejus kot amnhī nē mēhprjē janor kēt ā harēnh

Matēwre 19.13-15; Rukre 18.15-17

¹³ Tā nhūm Ijaew kwÿjaja Jejus wÿr mē hkrarejē jamÿ nē mē o mra. Kot mē hā ĩhkra jaxwÿr nē mē ho Tirtūm wÿr kaxyw hwÿr mē o mra. Hāmri nhūm hkōt mē pa ho pa xwÿnhjaja tee ri ja hā mē omu nē mē kām:

—Kwa mo kaxyw na ka mē Jejus wÿr mē o mra? Kormā mē rāxre kēnā. Mē ma akupÿm mē o mra nà? Anē.

¹⁴ Hāmri nhūm Jejus ja hā mē kuma nē mē kām:

—Kwa nà kwār mē māmri ixwÿr mē o mra. Mē ri inhnē mēhprjē kurē hkēt nē. Anē.

Hāmri nē mē kām hpa ho apē nhūm mē hwÿr mē o mra nhūm mē kuri kuhē. Hāmri nhūm mē hā hkōt mē pa ho mē pa xwÿnhjē mā kām:

—E mē jarejē pumu. Na htem hamakētkati nē hkīnh nē ri pare. Mē kām amnhī to rūnh prām kēt nē ri pare. Tā Tirtūm kōt mē kot amnhī nhīpêx o ri mē pa xwÿnhjaja na htem mē urāk nē kām amnhī to rūnh prām kēt nē ri pa.

¹⁵ —Na hte jarejaja hipêxā nē katorxā wa kapēr ma nē wa hkōt ri amnhī nhīpêx o ri pare. Tā

ixpê Tirtûm kot mẽ awÿr inhmênh xwÿnh na pa. Kot ka mẽ amâ ixkôt amnhî xunhwÿr prâm hã kot kaj mẽ jarejê kot amnhî nhîpêx pyrâk o amnhî nhîpêx. Jao ixkapêr ma mẽ ixkôt ri amnhî nhîpêx mex o ri apa. Anê.

¹⁶ Hâmri mẽ mēhprîrejê jamÿ mẽ mẽ hã ìhkra jaxwÿ mẽ mẽ ho Tirtûm wÿ mẽ kãm:

—Pa Papaj. E kêr ka jarejê ho mex rãhã mẽ kê mẽ mex mẽ pa. Anê.

Hikâxpore rax xwÿnh jarênh

Matêwre 19.16-22; Rukre 18.18-23; mãânên Wam Ximotre 6.6-10; Xiakre 5.1-6

¹⁷ Tã nhũm Jejus mẽ hkôt mẽ pa ho pa xwÿnhjaja nhÿri pry hã mō nhũm Ijaew krãhtũmja omu mẽ hwÿr tē mẽ mẽmoj tã hkukja mẽ kãm:

—Pa mẽ ijahkre xwÿnh maati? E kwa inhmã mẽmoj jarê. Nhÿrmã Tirtûm ri ixtîr tũm mẽ ixpa hprâm xàj mẽmo kot pa we ho anhÿr o ri ixpa? Ate amnhî to mex pix o ri apa xwÿnh jakamã kwa inhmã tanhmã ja jarênh to. Anê.

¹⁸ Hâmri nhũm kãm:

—Xà ate ixpê Tirtûm kwÿ hã ixpumunh kôt na ka ixte urâk mẽ amnhî to mex xwÿnh ã ijarê? Tirtûm pix na kot amnhî to mex rãhã xwÿnh jakamã kot kaj ã ijarênh anê mẽ ixpê Tirtûm Kra hã ijarê. Jao urâk mẽ ixte amnhî to mex xwÿnh ã ijarê. Nà xàn ka âm atÿx ri amnhî krã hkôt ã ijarênh anê?

¹⁹ —Tirtûm mex o mex jakamã kot kaj amâ nhÿrmã kuri atîr tũm mẽ apa hprâm hãmri mẽ ra kot mẽmoj tã mẽ amâ karō xà hkôt amnhî nhîpêx o ri apa. Ra ate mar mex kênã. Na pre mẽ amã:

Kêr ka mẽ axàhkînh o ri apa hkêt mẽ.

Nê mẽ hpar kêt mẽ.

Nê tanhmã axêx kêt mẽ.

Nê axêx rom tanhmã mẽ nokupyr to hkêt mẽ.

Nê mẽ kêp mẽ hprō ho amnhîkati hkêt mẽ.

Nê anhîpêxà mẽ akatorxà wa hã apijaam mẽ wa ho mex pê wa kutã anojarêt rãhã ho ri apa.

E kot kaj amâ nhÿrmã Tirtûm kuri atîr tũm mẽ apa hprâm hã kot kaj ã amnhî nhîpêx anhÿr o ri apa. Anê.

²⁰ Hâmri nhũm kuma mẽ kãm:

—Kwa ixprîre ri ra ã ixte amnhî nhîpêx anhÿr o ri ixpa kênã. Nom te ixtîr tũm mẽ ixpa kaxyw ixte kormã tãm kêt pyrâk. Anê.

²¹ Hâmri nhũm kuma mẽ hprî hã omu mẽ kãm hapê mẽ. Hâmri mẽ kãm:

—Nà kormã mẽmoj pyxire mẽ arîk. Na ka amâ akukrêx rax kînh tÿx o Tirtûm jakre. Jakamã kêr ka ma akupÿm anhōrkwy hwÿr tē mẽ akukrêx rax o wênê hpa. Nê kâxpore jamÿ hãmri mẽ ma mẽ kêp amrakati xwÿnhjê mã ôr o ri apa. Hãmri mẽ akupÿn tē mẽ arî ri ixkôt apa ho apa. Anê.

²² Hâmri nhũm kuma mẽ tee ri hikukrêx rax kukamã hamaxpêr. Kãm hapê jakamã kãm kãm ìhkra karo hprâm kêt mẽ. Hâmri mẽ tee ri Jejus kot ã kãm hã karō anhÿrja ma nhũm ja kãm mex kêt nhũm awjanã mẽ hkaprî mẽ ma akupÿm tē. ²³ Hâmri nhũm Jejus tee ri omu mẽ hkôt mẽ pa ho mẽ pa xwÿnhjê mã kãm:

—Hêxta waa mẽ. Koja mẽ hikukrêx rûnh xwÿnhjaja ohtō mẽ kãm mẽ hikukrêx japê xàj Tirtûm mẽ wa ixri hÿr tũm mẽ pa ho pa hkêt mẽ. Wa ixte amnhî nhîpêxja mẽ kêp hihtÿx. Anê.

²⁴ Hâmri nhũm mẽ tee ri kapêrja ma nhũm Jejus mẽ hamaxpêr kôt mẽ omunh mex jakamã axte tanhmã mẽ kãm harênh to mẽ mẽ kãm:

—Nà Tirtûm mẽ wa ixte amnhî nhîpêxja na mẽ hikâxpore rûnh xwÿnhjaja pê ja hihtÿx. ²⁵ Mẽ kãm hikukrêx rax mã ìhkra karo hprâm kêt rãhã tee kãm Tirtûm kôt amnhî nhîpêx prâm kaprÿ. Te ho mẽhō kot

menh kagô hã hkre nê kãm kagô katôk prãm kêt rãhã kãm guhkrax kãm år prãm kapryta pyrãk. Anê.

²⁶ Hãmri nhũm mē kuma nē tee ri amnhĩ kukamã hamaxpēr nē kãm:

—Kwa no mē ixpiitã mē inhmã mē ixkukrêx japê kênã. Jakamã xà kot paj mē ixpiitã nhỹrmã war ari ixtĩr tũm nē ixa ho ixa hkêt nê? Anê.

²⁷ Hãmri nhũm mē kãm:

—Nã kot kaj mē amnhĩ krã hkôt mē amã mē akukrêx japê mã anhũrer kêt nê. ãm Tĩrtũm pix na hte ja kaxyw tanhmã mē akrã hto ka mē amã akukrêx japê hkêt nê. Jao ra mē apê Tĩrtũm mē wa ixri atĩr tũm nē mē apa ho mē apa mã xwỹnh. Anê.

²⁸ Hãmri nhũm Simãw Pêtre kãm:

—Kwa Pahihti na pa prem agryk ã mēmoj piitã hkaga hpa nē akôt ixa ho ixa. Jakamã xà kot paj mē nhỹrmã war ari ixtĩr tũm nē ixa ho ixa kêt nê nã? Anê.

²⁹ Hãmri nhũm kuma nē hkôt mē pa ho pa xwỹnh piitã mē kãm:

—Nã ka mē atô inhmã tanhmã amnhĩ to ho apa kaxyw akwỹjê re nē ma inhmã tanhmã amnhĩ nhĩpêx to ho ri apa. Anhõrkwỹ re rý atô rý atõx rý aprõ nē akrajê re. Rý akatorxà nē anhĩpêxà wa are. Rý akukrêx piitã rer pa hãmri nē ma ixkapêr o mē piitã mē ahkre ho ri mē hkôt apa. ³⁰ Hã kot paj amnhĩ tã mē apumu nē mē ato mex rax nê. Hãmri ka mē ma mē kãm ixkapêr jarênh o mē hkôt apa nhũm mē kot mē amar xwỹnh kwỹjaja mē ama nē kãm mē akĩnh nê. Nê ra mē ate akwỹjê rer par tã mē tãmjaja te mē apê mē hkra rý mē htõ rý mē htõx pyrãk o mē anhĩpêx. Jao tanhmã mē ato mex to ho pa.

—Nê koja mē kãm ixprãm kêt xwỹnhjaja ixtã tanhmã mē atomnuj to hã ka mē nhỹrmã ma Tĩrtũm mē wa inhõ krĩ hwỹr api nê wa ixkuri amex nê atĩr tũm nē apa ho apa. ³¹ Nom kêt ka mē ja hã amnhĩ pumunh kôt amnhĩ to rax

xwỹnh ã amnhĩ to jarkrar kêt nê. Mē kot amnhĩ to rũnh xwỹnh ã amnhĩ jarênh xwỹnhjaja koja mē nhỹrmã amnhĩ to rũnh kêt ã amnhĩ pumu. Nê mē kot amnhĩ to hkryre xwỹnhjaja koja mē nhỹrmã amnhĩ to rũnh ã amnhĩ pumu. Anê.

Jejus kot amnhĩ kukamã axte amnhĩ jarênh

Matêwre 20.17-19; Rukre 18.31-34

³² Tã nhũm Jejus hkôt ri mē pa ho mē pa xwỹnhjê mã kapêr pa hãmri nê ma Jerujarê hwỹr mē o mō. Ra kamã kãm hkurê xwỹnhjaja kot hpĩr ã amnhĩ jarênh tã ma hwỹr mē o mō. Jakamã nhũm mē tee ri hkukamã hamaxpēr o hkôt mō. Nhũm mē amarĩ mē hkôt mrrar xwỹnhjaja haxwỹja kãm ma nê. Hãmri nhũm Jejus mē kêp 12ta o mō nê hkwyjê hkãx ã amnhĩ kukamã tanhmã mē kãm amnhĩ jarênh to ho mō nê mē kãm:

³³ —E na pu mē ra Jerujarê hwỹr mō. Kot puj mē hwỹr pøj nhũm mē kãm ixkurê xwỹnhjaja patre krãhtũmjê mē Tĩrtũm kapêr tũm o mē ahkre xwỹnhjê nhĩhkram ijaxà. Hãmri nhũm mē kãm Tĩrtũm kapêr kôt amnhĩ nhĩpêx prãm kêt xwỹnhjaja ixpĩr kaxyw mē kãm ixtã amỹnê ³⁴ nhũm mē mar xà hkôt tanhmã inhĩpêx kati hto. Nê mē hkwyjaja ixtã hpêr o axkê nê ixtã akunha. Nê mē hkwyjaja tanhmã ijapry hto nê ixtã argõx rê nê ixtak hãmri nê ixpĩ. Kaja mē ã inhĩpêx anê. Nom kot paj ixytk ã ixtã apkati axkrunêpxi nhũm Tĩrtũm akupỹm ixto ixtĩr. Anê.

Xiakre mē Juãw wa kot amnhĩ to Jejus wýr ã wa harênh

Matêwre 20.20-28; Rukre 22.24-30; mããñên Piripos 2.3-8; Wam Pêtre 5.3

³⁵ Tã nhũm Jepetew kra Xiakre mē Juãw wa tanhmã hamaxpêr to nê Jejus mã kãm:

—Kwa mẽ ijahkre xwỳnh. Pa wa amã mẽmoj jarẽ ka wa inhmã “y” anẽ nà? Anẽ.

Hãmri nhũm wa kãm:

³⁶—Ko wa mamrĩ inhmã mẽmoj jarẽ pa wa ama mãn. Anẽ.

³⁷Hãmri nhũm wa kãm:

—Nà kot kaj nhỹrmã ate mẽ piitã mẽ ho amnhĩptar kaxyw nhỹ pa wa akutã anhĩjẽ. Nẽ wa papxipix ixpẽ anhõ kowenatõ nẽ akutã anhĩjẽ nẽ ato nhỹ. Ja na pa wa inhmã hprãm. Anẽ.

³⁸Hãmri nhũm wa kãm:

—Nà na ka wa am atỳx ri ã amnhĩ to ixwỳr anẽ. Koja mẽ tokyx ixpĩ pa amnhĩ xà htỳx kamã ijamak rax nẽ ty. Tã xà koja mẽ ixpyrà nẽ ã war anhĩpẽx anẽ ka wa ixpyrà nẽ amnhĩ xà htỳx kamã ajamak rax kãm ty nà? Anẽ.

³⁹Hãmri nhũm wa kãm:

—Tỳ. Nà kot pa wa ijaxwỳja anẽ nẽ apyrã nẽ amnhĩ xà htỳx kamã ijamak kãm ty. Anẽ.

Hãmri nhũm wa kãm:

—Nà am hãmri na ka wa ja hã amnhĩ jarẽ. War ate ixpyrà nẽ ixkõt amnhĩ xà htỳx kãm ajamak kãm atyk mã kẽnã. ⁴⁰Tã nom war ate amnhĩ to ixwỳrta ã kot paj tanhmã war amã nẽ hkêt nẽ. Inhõ Papaj tãm koja ja kaxyw mẽhõ japẽr nhũm inhĩhkõ hã nhỹ. No pa kot paj ri ja kaxyw mẽ atõ rẽn h kêt nẽ. Anẽ.

⁴¹Hãmri nhũm wa urak nẽ Jejus kõt mẽ pa ho mẽ pa xwỳnh kwỳjaja ã wa kot amnhĩ to hwỳr anhỹr ã wa kuma nẽ wa kamã gryk nẽ.

⁴²Jakamã nhũm Jejus mẽ piitã mẽ ho akuprõ nẽ mẽ kãm:

—E mẽ inhma. Na hte Ijaew kêt xwỳnhjẽ nhõ pahihtijaja ã amnhĩ nhĩpẽx anhỹr o ri pa nẽ amarĩ hkrĩ xà kamã hkrĩ ho hkrĩ. ahpumunh jakamã amarĩ ixkre kre jakry kamã hkrĩ ho hkrĩ nẽ kãm mẽ apẽn h xwỳnhjẽ pix mã mẽmo mẽ apẽn h karõ ho hkrĩ. Na htem ã amnhĩ nhĩpẽx anẽ. Nẽ mẽ kot amnhĩm mex ã harẽn h prãm

xà tanhmã mẽ ho mex to ho pa. ⁴³⁻⁴⁵Tã no mẽ kajaja kër ka mẽ atõ amã amnhĩ to rax prãm hãmri nẽ ho mẽ kot amnhĩ nhĩpẽx pyràk kêt nẽ. Mẽ piitã mẽ kutã anojarêt rãhã ho ri apa. Kêt paa. Mẽ ate inhmã axapẽn h o apa kaxyw na pa pre mẽ awỳr ixwỳr kêt nẽ. Am pa ixte tanhmã mẽ amã amnhĩ nhĩpẽx to ho ixpa kaxyw na pa pre mẽ awỳr wrỳ. Mẽ ate nhỹrmã kuwy wỳr apa pymaj mẽ anẽ ixtyk kaxyw na pa pre mẽ awỳr wrỳ. Jakamã kot kaj mẽ atõ amã amnhĩ to rax prãm hã kër ka ixpyrà nẽ akwỳjẽ kutã anojarêt rãhã ho ri apa. Hãmri nẽ inhmã te ate amnhĩ to rax o amnhĩ nhĩpẽx pyràk o amnhĩ nhĩpẽx. Anẽ.

Jejus kot akupỳm Paximew o mex ã harẽn h

Matẽwre 20.29-34; Rukre 18.35

⁴⁶Tã nhũm Jejus mẽ hkõt mẽ pa ho mẽ pa xwỳnhjaja kormã Jerujarẽ hwỳr mõi ri ra krĩ pẽ Jeriko hkõt mõi. Hãmri nhũm mẽ ohtõ nẽ mẽ hã ajêt nẽ mẽ hkõt mõi. Nhũm mẽhõ myja pry nhĩhkrep nhỹ. Ximew kra Paximew nohkre xwỳnhja pry kamã ahwỳr o hkrĩ. ⁴⁷Hãmri nhũm Jejus mẽ hkwỳjaja hwỳr htep o mõi nhũm amnhĩ wỳr mẽ kuma nẽ mẽ kot Jejus nhĩxi jarẽn h o mõi ã kuma hãmri nẽ kax pẽ kãm kapẽr nẽ amnhĩ to kuwy nẽ kãm:

—Pa Jejus? Nà apẽ mẽ inhõ Pahihiti mex kumrẽx na ka. Te apẽ annepẽn anhĩgêt pahihiti Tawi kot amnhĩ nhĩpẽx pyràk. Jakamã kwa we ixkamã axukaprĩ nẽ akupỳm ixto mex kêt wehe. Ixte amnhĩ kaxyw akõt ijamaxpẽr xwỳnh na pa. Anẽ.

⁴⁸Hãmri nhũm Jejus kukamã mẽ mrar xwỳnhjaja kuma nẽ kãm:

—Tk. Kwa akapẽr kêt nẽ nhỹ nã. Anẽ.

Tã nom nhũm am mẽ kuma nẽ xatã amnhĩ to kuwy. Kỳx pẽ amnhĩ to kuwy nẽ axte kãm:

—Kwa ixkamã axukaprĩ nẽ akupỳm ixto mex Pahihiti. Anẽ.

⁴⁹ Hāmri nhūm Jejus kuma nē xa nē hkôt mē pa ho mē pa xwýnhjē mā kām:

—E mē atō hwýr tē nē hpa hā apy nē amnē ixwýr o tē. Anē.

Hāmri nhūm mē kuma nē nohkre xwýnhhta mā kapēr nē kām:

—E tee ri amnhī kukamā ajamaxpēr kēt nē. Na atā karō. E tokyx kànhmā xa. Anē.

⁵⁰ Hāmri nhūm mē kuma nē hkīnh týx nē. Nē kànhmā harī nē amnhī nē ō kajaati mē nē hwýr htēm kurē kumrēx. ⁵¹ Hāmri nhūm Jejus kām:

—Pa mo na? Tanhmā kot pa ato? Anē.

Hāmri nhūm kām:

—Nā akupým inhmā ixrīt mex prām Pahihti.

⁵² Anē nhūm kām:

—Tōe. Nā ra ate amnhī kaxyw inhmā ajamaxpēr týx jakamā kot kaj akupým arīt mex kurē kumrēx. E māmri ma akupým tē. Anē.

Nhūm akupým rīt mex ā amnhī pumu nē hkīnh o hkīnh. Hāmri nē Jejus ā ajēt nē ma hkôt hkīnh nē tē.

11

Jejus kot Jerujarē hwýr ar ā harēnh

Matêwre 21.1-11; Rukre 10.28-40; Juāw 12.12-19

¹ Tā nhūm Jejus mē hkôt mē pa ho mē pa xwýnhjē mē kormā Jerujarē hwýr mō. Hāmri nē krī pē Petake mē hō pē Petān wýr ahtēp o mō. Hixēt pē Oriwēhti kahti ri na pre krīja wa xa. Jakamā nhūm Jejus hkôt mē pa ho mē pa xwýnh wa ho axkrut nē mē amnhī kukamā wa kumē ² nē wa kām:

—E wa ma krī mūj wýr mē ixkukamā wa tē. Hāmri nē hwýr pōj nē nhýri jumēnre nyw mā ē nē ām xwýnhhta pumu. Kormā mē kot hā hkrī hkēt kumrēx xwýnhhta.

³ Ka wa omu nē kām ē xā hpôt nē man akupýn ixwýr o tē. Koja mēhō war apumu nē hā tanhmā war amā kapēr to ka wa ā kām ijarēnh anē nē

kām: “Nā mē panhō Pahihti na hā karō pa wa hwýr tē.” Anhýr o kām ijarē. E wa ma hwýr tē. Anē.

⁴ Hāmri nhūm wa kuma nē ma hwýr htēm kurē kumrēx nē hwýr pōj. Nhūm Jejus kot wa kām hā karō xā hkôt jumēnre nywreta pumu.

⁵ Hāmri nē kām ē xā hpôt o xa nhūm kuri mē kuhē xwýnhjaja tee ri hā wa omu nē wa kām:

—Kwa mo kaxyw na ka wa kām ē xā hpôt o xa? Kwa kot ka wa mē ixpē ho ahkī nā? Anē.

⁶ Hāmri nhūm wa mē kām:

—Nā mē panhō Pahihti na wa inhmā hā karō pa wa hwýr tē. Wa ixte ma hwýr o ixtēm kaxyw. Anē.

Hāmri nhūm mē wa kām:

—Tý? Tōe wa māmri ma kām o tē. Anē.

⁷ Hāmri nhūm wa ma akupým Jejus wýr o tē. Hāmri nē kaxyw amnhī xē hkwy hkwrý nē kām ho hkô kahty hpa nē kām ho htýx nē o xa nhūm Jejus hā nhý nē mō. ⁸ Nē kormā Jerujarē hwýr hixēt ā àpir o mō. Nhūm mē kot omunh o kuhē xwýnhjaja hkīnh nē ma hkukamā pry ho mex kaxyw amnhī xē hkwy hkwrý nē ho kām uty. Nhūm mē hkwyjaja nhýri pō hkwy jakā nē o mra nē hkukamā kām uty.

⁹⁻¹⁰ Nhūm mē hixēt ā api nē ahpar mā wrýk o mō nhūm mē piitā kàx pē Tirtüm mex o mex ā harēnh o hkôt mō. Nhūm mē hkwyjaja kukamā mra nhūm mē hkwyjaja hapu hā mra nhūm prem piitā hkôt Tirtüm mex o mex ā harēnh o mō. Nē harēnh o:

E ota Tirtüm kot mē pahwýr mēnh xwýnhhta ra pōj. Nā ām hāmri na mē pahwýr wrý. Ja mex kumrēx.

Kēp mē panhō Pahihti mex na. Koja mē panhigēt pahi Tawi pyrā nē mē pahto amnhiptā nē mē pahto mex o pa.

Ām hāmri na Tirtüm mē pahwýr kumē.

Tirtüm mex kumrēx. Ām mex o mex. Kukwak ri pix mā

na pu htem pajamakêtkati
nê paxâmnhîx papa râhã ho
papa.

Anhÿr o Jejus kôt harênh o mō. Kot
mê ho amnhîptâr kurê kumrêx ã
hkamnhîx nê hkînh nê ã hkôt kapêr
anhÿr o mō. ¹¹ Jao ra Jerujarê
hwÿr pôj nhÿm Jejus Tîrtûm mã
amnhî jarênh xà hã ixkre hwÿr tèn
axà. Nom nhÿm ra amÿkry htÿx
jakamã nhÿm hwÿr axà nê ãm hkre
pumunh o xa hãmri nê akupÿm
kato nê hkôt mê pa ho mê pa xwÿnh
pê 12jê mê nhÿm mê ma akupÿm
Petân wÿr mra.

*Jejus kot pî hpâr pê fikêhti mã
kapêr ã harênh*

Matêwre 21.18-22

¹² Tã nhÿm apkati nhÿm Jejus mê
hkôt mê pa ho pa xwÿnhjê mērohã
Petân rÿm hapôj nê ma akupÿm
Jerujarê hwÿr mra. Nhÿm Jejus ra
kãm prãm nê mō. ¹³ Hãmri nê amÿm
mêmo pî hpâr hôptî rax pê fikêhti
pumu nê hamaxpêr o:

—E pa hwÿr tē nê ô hkwy rê nê
kuwô mân. Anê.

Hãmri nê hwÿr tē. Nhÿm kormã ô
kaxyw ô mytwrÿ kator kêt jakamã
nhÿm ô hkêt nê ãm hô pix nê xa.
¹⁴ Hãmri nhÿm hwÿr tē nê tee ri ô
japêr nê ãm hô pix pumu. Hãmri nê
tee ri omu nê kãm:

—E kot kaj axte axô hkêt kumrêx.

Anhÿr o kãm kapêr nhÿm hkôt
mê pa ho mê pa xwÿnhjaja hã
kuma.

*Jejus kot Tîrtûm nhôrkwÿ hwÿr àr
ã harênh*

*Matêwre 21.12-17; Rukre 19.45-
46; Juãw 3.13-22*

¹⁵⁻¹⁷ Tã nhÿm Jejus mê hkôt mê
pa ho mê pa xwÿnhjaja Jerujarê
hwÿr agjê nê Tîrtûm mã amnhî
jarênh xà hã ixkre hwÿr agjê.
Nhÿm Jejus tee ri kamã mê kuhê
xwÿnhjê pumu. Nhÿm mê ra ixkre
kamã axtem nê môx nê ôwêhti
nê tuuti ho wênê ho kuhê. Ixkre
hwÿr mrar xwÿnhjaja kot haprôr
nê Tîrtûm mã amnhî jarênh kaxyw

kãm hpar nê ôr kaxyw mê kãm ho
wênê. Nom axtem nê hã ohtô rax
kãm mê kãm ho wênê nhÿm mê
hkwÿjaja mê kãm mê hikâxpore ho
anhîpa. Hãmri nhÿm Jejus mê hwÿr
axà nê tee ri mê kot ã amnhî nhîpêx
anhÿr ã mê omu nê mê kãm akir nê
mê kãm:

—Tk. Kwa Tîrtûm kapêr ã kagà
htûm kot ôrkwy jarênh kot:

Inhôrkwÿja ãm pika piitã hkôt
mê piitã kot inhmã amnhî
jarênh xà hã ixkre pix kaxyw
na.

Anhÿr o kot harênh tã ka mê axtem
nê kamã ã amnhî nhîpêx anhÿr o
akuhê. E kwa mê ma mra nê ajapôx
tokyx anê. Anê.

Nhÿm pre ã mê kãm kapêr anhÿr
pê mê ahkre hãmri nê ixkreja nê
mê kator pa. ¹⁸ Hãmri nhÿm pa-
tre krãhtÿmjê mê Tîrtûm kapêr tÿm
o mê ahkre xwÿnhjaja tee ri ã mê
hipêx anhÿr ã omu nê kapêr ma nê
kamã gryk tÿx nê. Hãmri nê mê kot
hã ãmnênh kaxyw tanhmã axpên
mar to nê axpên mã:

—Tk. Kwa na mê ohtô nê kãm
mar prãm nê. Koja mê anê nê gryk
ã mê pahkaga nê axte mê pakapêr
mar kêt nê. Kwa pu mê kupî ri.
E tanhmã kot puj mê ho nê kupî?
Anê.

¹⁹ Tã nhÿm myt axà nhÿm Jejus
mê hkôt mê pa ho pa xwÿnhjaja
Jerujarê rÿm hapôj nê ma nhÿri
amnhîm hikranh kaxyw mra.

*Mê pahte tanhmã mēmoj tã
Tîrtûm wÿr to hã mê pamã karô*

*Matêwre 6.14-15, 17.20; Makre
11.13; Juãw 14.13; mãânên Xiakre
1.6; Wam Juãw 3.22*

²⁰ Tã nhÿm apkati nhÿm Jejus
mê hkôt mê pa ho mê pa xwÿnhjaja
Jerujarê hwÿr akupÿm mra. Hãmri
nê axte pî hpâr pê fikêhtita pumu.
Jesús ra kot kãm kapêr xwÿnhnta
pumu nhÿm ra grã pa nê xa.
²¹ Hãmri nhÿm Simãw Pêtre Jejus
kot tanhmã pî mã kapêr toja mã
hamaxpêr nê hã kãm:

—Kwa mẽ ijahkre xwýnh. Ga mẽmoj mũj pumu. Jãã ate fikêhti mã akapêr xwýnhata na grà par kumrêx nê xa. Anê.

²²⁻²³ Hãmri nhũm kuma nê mẽ piitã mẽ kãm:

—Tỳ nà ãm hãmri na pa mẽ amã ixkapêr. Kot kaj mẽ mẽmo kaxyw Tirtũm mã ajamexpêr tỳx pê mẽmoj tã awỳ nhũm ama nê amã hprãm xà hkôt tanhmã amã hipêx to. Ka mẽ amnhĩ kaxyw Tirtũm mã ajamexpêr tỳx pê hixêt mũj mã akapêr nê kãm: “E xa nê ma tẽ nê gô xujanãr kãm mrõ.” Anhỳr o kãm akapêr nhũm amar xà hkôt ã amnhĩ nhĩpêx anê nê tẽn kamã mrõ. ²⁴ Kot kaj mẽ mẽmoj tã Tirtũm wỳ nê kaxyw ãm pix mã ajamexpêr tỳx nê nhũm amã ho anê.

²⁵⁻²⁶ —Nê kot kaj mẽ Tirtũm mã amnhĩ jarênh kaxyw nê ra mẽhõ kot tanhmã ato mã ajamexpêr. Hãmri nê ja ho ajamakêtkati kurê kumrêx nê axte kãm ajamexpêr kêt nê. ãm mẽmoj nyw pix mã ajamexpêr o tãm amnhĩ nhĩpêx o apa. Hãmri nhũm Tirtũm kaxkwa rũm ja hã apumu nê apyrã nê ate tanhmã amnhĩ tomnuj to ho hamakêtkati nê axte kãm hamexpêr kêt nê. Anê.

Mêhõ kapêr kôt Jejus kot mẽ ahkre hã mẽ kot hkukjêr

Matêwre 21.23-27; Rukre 20.1-8

²⁷ Nhũm mẽ akupỹm Jerujarê hwỳr agjê nhũm Jejus kê axte Tirtũm mã amnhĩ jarênh xà hã ixkre hwỳr axà. Nhũm hkôt mẽ pa ho mẽ pa xwýnhjaja hkôt hwỳr mra nê hkôt agjê nê kormã kamã kuhê. Hãmri nhũm Ijaew krãhtũmjê mẽ mẽ kot Tirtũm kapêr tũm o mẽ ahkre xwýnh mẽ mẽ õ patre krãhtũmjaja Jejus pumu nê hwỳr mra nê hêx rom tanhmã kãm kapêr to. Na pre ra Jejus ixkreja nê mẽmoj to wẽnê xwýnh mẽ kãxpore o mẽ hpinhpanh xwýnhjê jano nhũm mẽ tee ri ja hã omu nê kamã gryk tỳx nê. Jakamã nhũm akupỹn mẽ hwỳr

axà nhũm mẽ axte omu nê hwỳr mra kurê kumrêx ²⁸ nê kãm:

—Kwa mẽ inhmã amnhĩ jarê. Mêhõ nhỹ hã na ka hte ã amnhĩ nhĩpêx anhỳr o ri apa? Mêhõ na pre mẽ ixwỳr amê ka pre mõi? Nà xà amnhĩ krã hkôt na ka hte ã amnhĩ nhĩpêx anhỳr o ri apahti? E kwa mẽ inhmã amnhĩ jarê. Anê.

²⁹ Nhũm Jejus kot tanhmã mẽ hamexpêr to hkôt mẽ omunh mex jakamã mẽ kãm:

—Nà kot pa ixkumrêx mẽmoj tã mẽ akukja. Ka mẽ inhmã harê pa ri kormã mẽ amã tanhmã amnhĩ jarênh to. ³⁰ Finat Juãw Paxisja ã kot paj mẽ akukja. Mêhõ nhỹ hã na pre hte mẽ hkrã kumrãr o pa? Xà amnhĩ krã hkôt nà xà Tirtũm nhỹ hã? E mẽ atõ inhmã harê. Anê.

³¹⁻³² Hãmri nhũm mẽ kuma nê tee ri kot tanhmã kutã kãm harênh to hkukamã hamexpêr nê axpẽn mã:

—Kwa tanhmã kot puj mẽ kãm ja jarênh to? Mẽ kot mar o kuhê xwýnhjaja na htem Juãw Paxis kêp Tirtũm nhỹ hã kapêr jarênh xwýnh ã axpẽn mã harênh o pa. Jakamã kot puj mẽ kãm kot amnhĩ krã hkôt mẽ hkrã kumrãr o pa hã harê nhũm mẽ tee ri mẽ pama nê mẽ pakamã gryk nê. Nê mẽ paxêx rom ã kãm mẽ pakapêr anhỳr ã mẽ pahpumu nê kẽn o mẽ pahtak o mẽ panhĩmex. No kot puj mẽ kãm Tirtũm nhỹ hã mẽ hkrã kumrãr ã harê nhũm mẽ pama nê mẽ pamã: “Kwa ã kot anhỳr kênã na ka prem kapêr mar tã ixkôt amnhĩ xunhwỳr kêt nê?” Anê. Nà kot puj pêr mẽ kãm tanhmã harênh to hkêt nê. Kot puj mẽ ãm kãm aa te mẽ pahte ja jarênh mar kêt pyrãk o harê. Anê.

Mẽ kot tanhmã kãm nê nhũm kot ta pãnhã tanhmã mẽ kãm nê pymaj nhũm mẽ tee ri tanhmã kãm nê hprãm kaprỳ ho kuhê.

³³ Hãmri nê Jejus mã kãm:

—Konên. Mẽ ixte mẽhõ nhỹ hã kapêr o pa hã omunhre hã. Anê.

Hãmri nhũm mẽ kuma nê mẽ kãm:

—Tk. Tôe kot pa xep ijaxwýja mē amā tanhmā amnhī jarēnh to hkēt nē. Ijaxwýja ixte mēhō nhý hā ā ixte amnhī nhīpēx anhýr o ri ixpa hā amnhī pumunhre hā. Anē.

12

*Mē àpēnh punuj xwýnhjē jarēnh
Matēwre 21.33-46; Rukre 20.9-18*

¹ Nhūm Jejus arī Ijaew krāhtūm mē mēō patre krāhtūm mē Tirtūm kapēr tūm o mē ahkre xwýnhjē mā kapēr o xa. Nē mē kām mē kot tanhmā hipēx to hkukamā mē kām tanhmā amnhī jarēnh to. No ām hā kuxi nē mē kām awjarē nē mē kām:

—Koja mēhō hpur ā hkwyjē mā karō. Mē kot kamā kām àpēnh kaxyw mē kām karō. Hāmri nhūm mē ma hwýr mra nē kamā mēmo hy hkre nē hkre pa. Hāmri nē pu hā kahē hpa nē pur kaēx kām ixkre hprēk nhīpēx. Mē kot himōk ā mē kot kēp àhkīnh pymaj mē hapēr o hkrī kaxyw. Hāmri nē hipēx pa nhūm mēō patrāwja awry hā krī hō hwýr nojarēt nē mē kām tanhmā hpur jarēnh to nē mē kām: “E or ixpurta nō. Kē kamā mēmoj kà hpa ka mē māmri kamā awjamý nē ho axkjē. Hāmri nē ixkutēp inhō jaxwý nē māmri anhō tanhmā ho hprām xā hkōt tanhmā ho.”

—Anhýr o mē kām kapēr hāmri nē ma mō. ² Tā nhūm ra pur kām mēmoj hkà pa. Nhūm hpur nhō dōn arī krī hō kamā hā ujahkre ho pa htā kuri kām àpēnh xwýnhjē hōja nhūm akupým mē hwýr kumē. Mē kot kām o mōr kaxyw ma mē hwýr kumē nhūm ma akupým mē hwýr mō. Mōō nē ra mē hwýr pōj.

³ Hāmri nhūm mē omu nē axtem nē homnuj nē. Nē unē nē htak nē akupým hano nhūm ý kamā ma akupým mō. ⁴ Hāmri nhūm o patrāwja tee ri omu nē hpānhā ja mē nhūm ma mē hwýr mō. Mōō nē mē hwýr pōj. Hāmri nhūm kē wem omu nē mā ho anē nē. Unē nē htak

nē hkrāx pē htak nē akupým hano nhūm wamta pyrā nē ma akupým ý kamā mō. ⁵ Hāmri nhūm axpēn pānhā kām mē àpēnh xwýnh kwýjē rē nhūm mē axpēn pānhā ma mē hwýr pa. Ma mē hwýr pa nē pōj nhūm mē te ho wamtajē mē hipēx pyrā nē mē hkwyjē pynē nē htak rax nē mē hano nē mē hkwyjē pa. ⁶ Nhūm mē o patrāw mē harēnh ma nē tee ri amnhī kukamā hamaxpēr nē hamaxpēr o: “Hēxta waa nē. Tanhmā kot paj we amnhī nhīpēx to nē inhōta kwý jamý? Nà kot paj mē hwýr ixkraja mē. Inhmā hapē htā kot paj mē hwýr kumē kē ma mē hwýr mō. Hāmri nhūm mē kēp ixkra hā omu nē tanhmā ixpē ho hkēt nē. Nē jatā inhmā kām inhōja kwý gō nhūm man ixwýr o tē. Nà kot paj anē.”

—Anhýr o hamaxpēr hāmri nē ma mē hwýr hkraja mē nhūm ma mē hwýr mō.

⁷ —Tā mē hwýr hpōx o mō nhūm mē amým amnhī wýr omu nē kēp hkra hā omunh kurē kumrēx nē hā axpēn mā amýnē nē axpēn mā: “E. Nà onēj hpur nhō dōn krata tē. Koja nhýrmā o papaj mýrpē amnhūm pur ā pyka pytā nē ho ō. Jakamā e pu mē kupī nē kēp hpur ho arīk nē ho panhō. E kwa tokyj pu mē kupī ri.” Anē.

⁸ —Rôm nhūm ra mē hwýr hpōx o tē nē ra pōj nhūm mē unē nē pur nē ho kato nē ahkà kamā kupī. Ā mē ujarēnh kot anhýr. Anē.

⁹ Nhūm pre ā Jejus Ijaew krāhtūmjē mā ujarēnh anē. Hāmri nē hā tanhmā mē hkukjēr to nē mē kām:

—E mē inhmā mēmoj jarē. Koja pur nhō dōnja tee ri mē kot hkra hpīr ā harēnh ma hāmri nē tām mē hwýr mō hāmri nē tanhmā mē hipēx to wehe? Nà koja ma mē hwýr mō nē mē himex pa hāmri nē hpānhā nhām hpurta ā mēmojē rē. ¹⁰ Mān ka prem ra Tirtūm kapēr

ã kagà htùm kot ja jarēnh ma nà? Harēnh kot:

Na prem kēn o amnhīm ōrkwỹ nhĩpēx kaxyw hāmri nē kēn maati pumu nē htỹx omnuj ã hkamnhĩx nē hkaga. Mē kot hkaga htã nom nhũm Tĩrtũm mē kurom mex o kot kēn piitã hakrenh par ã omunh kurē kumrēx.

¹¹ ãm hāmri na pre ã mex ã omunh anē. Anē.

Ã Tĩrtũm kapēr ã kagà htùm kot harēnh kot anhỹr. Anē.

¹² Nhũm pre ã Jejus mē kãm ujarēnh kãm mē harēnh anē nhũm mē amnhĩ tã kuma. Tĩrtũm kapēr tũm o mē ahkre xwỹnh mē mē ō patre krãhtũm mē Ijaew krãhtũmjaja nhũm mē kot mē kãm kēn maati kaga xwỹnhjē jarēnh o te mē tãm harēnh pyrãkja ma nhũm ja mē kēp omnuj nē. Jakamã nhũm mē kãm unēnh nē haxàr prãm nē. Nom amnhĩ tã kãm mē kōt mar o kuhē xwỹnhjē puma nē. ¹³ Jakamã na prem ma mra nē hapój hāmri nē Jejus wỹr Parijew nhõ xwỹnh mē pahi Erox kōt mē pa xwỹnh kwỹjē rē. Mē kot hēx rom mēmoj tã hkukjēr nhũm kot mē mar nē tanhmã Rõm nhõ xwỹnhjē nhõ pahi Sesti kapēr kuhpa hã ri tanhmã mē kãm nē nhũm mē kot mar kaxyw. ¹⁴ Jakamã nhũm mē ma hwỹr mra nē hēx rom kãm kapēr nē kãm:

—Kwa Jejus? Nà ãm hāmri na ka hte Tĩrtũm kapēr o mē ahkre mex nē. Na ka hte mē kamã akahak o apa hkēt nē. Nē mē kot tee ri mē kot tanhmã ato kapēr punuj to htã ka hte arĩ aprĩ hã mē ahkre mex o ri apa. E kwa mē inhmã mēmoj jarē. Rõm nhõ pahihiti kot mē pahpē Ijaew mē pahte kãm kãxpore hkwy nhõr ã mē pamã karõta. Kwa xà ja amã mex nà? Xà kot pu mē kãm kugõ? Xà kot pu mē kãm ōr kēt nē? E kwa mē inhmã harē. Anē.

¹⁵ Nhũm prem ã hēx rom ja hã hkukjēr anhỹr tã no nhũm Jejus mē

hamaxpēr ã mē omunh mex mē mē kãm:

—Tk. Kwa mon ka mē axēx rom ja hã ixkukja? E mē atõ inhmã kãxpore htỹxre hõ gõ pa omu. Anē.

¹⁶ Hāmri nhũm ja kãm ja gõ nhũm kupy nē kãnhmã kupē nē mē kãm:

—E mēhõ nhĩxi nē mēhõ karõ na hã? Anē.

Anē nhũm mē kãm:

—Pahi Sesti karõ nē hixi na hã.

¹⁷ Anē nhũm mē kãm:

—Tỹ. Tõ kēr ka mē mãmri kãm hkwy nhõr o apa. Hã hkarõ nē hã hixi. Tãm kot hipēx xwỹnh jakamã õ na. No mē kajaja na pre Tĩrtũm mē anhĩpēx nhũm mē apē õ jakamã kwa kēr ka mē kapēr kōt pix mã ri amnhĩ nhĩpēx o ri apa. Anē.

Nhũm pre ã mē kãm kapēr anē nhũm mē piitã mar o kuhē. Nhũm mē kot hēx rom hkukjēr xwỹnhjaja amnhĩ jaēr pē ã kãxpore jarēnh anhỹrja ã kuma nē axpēn mã:

—Kwa mē paxēx rom mē pahte hã hkukjēr tã nhũm ãm hāmri mē pakutã mē pamã harē. Kwa tanhmã kot puj wem hkukjēr to nhũm pahi Sesti kapēr kwỹm ri mē pamã mēmoj jarē? Anē.

Hāmri nē tee ri tanhmã hkukjēr to hkukamã hamaxpēr o kuhē.

Akupỹm mē htĩr xwỹnhjē jarēnh

Matēwre 22.23-33; Rukre 20.27-40; Juãw 6.21, 6.38-40; mããnēn Wam Korĩt 6.14, 15.12-28; Wam Tesarõn 4.13-18

¹⁸ Tã nhũm Satusew nhõ xwỹnh kwỹjaja. Mē kot akupỹm mē htĩr mã hamaxpēr kēt xwỹnhjaja na pre mē. Tã mē kot mē htyk nē mē hapēx ã mē hkamnhĩx jakamã na prem axpēn mã Jejus jarēnh o:

—E kwa pu mē ma hwỹr mra nē mēmoj xihitỹx ã hkukja kē mē pama nē tee ri tanhmã mē pamã kapēr to hkukamã hamaxpēr. Hāmri nhũm mē piitã ja hã omu nē ãhpumunh kēt ã omunh kurē kumrēx. E tokyx ma pu mē hwỹr. Anē.

Hāmri nē ma hwÿr mra nē Pari-jew nhō xwÿnhjē pyrā nē hēx rom kām:

¹⁹ —Pa Jejus? Kwa mē inhmā mēmoj jarē. Na pre finat Mojesja Tirtūm nhÿ hā ā mē panhīgētjē mā karō anē. Mē hkra hkēt rāhā mē pa nē mē htyk xwÿnhjaja nhūm mē harēnh o:

Koja mēhō hprō hāmri nē kamā hkra hkēt rāhā pa nē ty. Hā koja hkōt htōja hpānhā hprō o hprō nē kamā hkra. Hāmri nhūm kato nē te kēp htō htyk xwÿnhta hkra pyrāk. Anē.

Na pre ā Mojes Tirtūm nhÿ hā ja hā mē kām karō anē. ²⁰ Jakamā kwa ga mē ixujarēnh ma. Koja mēmojjaja mē kot axpēn to htō xwÿnhjaja kēp 7. Nhūm kot waja hprō. Nē wa pa nhūm myja kormā hprō kamā hkra hkēt rāhā ty. ²¹ Nhūm hkōt htō hōta hpānhā hprō ho hprō nē wa axpēn to pa. Nhūm haxwÿja kamā hkra hkēt rāhā ty. Nhūm hkōt htō hōta haxwÿja ho hprō nē wa axpēn to pa grire nhūm wamta wa urāk nē kamā hkra hkēt rāhā ty. ²² Hāmri nhūm htō hkwyÿjaja piitā nija pyxi nē axpēn pānhā ho hprō nom mēhō kamā hkra hkēt rāhā htyk pa. Hāmri nhūm mē hprōta mē hkōt amnhī to hitep nē ty. ²³ Tā Tirtūm kot akupÿm nhÿrmā mē ho htÿr ronhÿx nhÿ nhÿx kēp nija mjēn kumrēx? Ra piitā kot ho hprō kēnā. E kwa mē inhmā ja jarē. Anē.

²⁴ Hāmri nhūm Jejus ā mē ujarēnh anhÿrja ma nē mē kām:

—Tk. Nà mē ate Tirtūm kapēr ā kagā htūm mar mex kēt. Nē mē aprī hā tanhmā Tirtūm kute hā omunh kēt jakamā na ka mē ā atÿx ja hā ixkukjēr anē. ²⁵ Kormā mē htÿr ri mē kot Tirtūm kōt amnhī xunhwÿr xwÿnhjaja na htem ty hāmri nē Tirtūm nhō krī kamā axte kām hprō hprām kēt pa. Rÿ ni japēr nē kām mjēn prām kēt nē pa. Hāmri nē Tirtūm kapēr o mē wryk xwÿnhjē

pyrā nē axte htyk kēt nē. Ām htÿr tūm rāhā nē pa ho pa.

²⁶ —Nom mē ate akupÿm mē htÿr kēt ā mē hkamnhÿxja kot paj ixprī hā mē amā harē. Amnepēm na pre Tirtūm pī hpōk kamā tanhmā Mojes mā kapēr to. Mān ra mē ate mar. Na pre kām:

Ixpē Apraāw nhō Tirtūm na pa. Nē määnēn ixpē Apraāw kra Ijak mē htāmnhwÿ Jako wa ō Tirtūm na pa.

Anhÿr o Mojes mā amnhī jarē nhūm kuma nē hā kagā. ²⁷ Kēp apu arī mē htyk rāhā nhÿx pre ā mē harēnh anhÿr kēt nē. Nhÿx pre mē harēnh o: “Amnepēm Apraāw nē hkra nē htāmnhwÿ mē htÿr ri ixpē mē ō Tirtūm na pa pre.” Anhÿr o nhÿx pre mē harē. Nom na pre ā amnhī jarēnh anhÿr kēt nē. Mē pamā te Apraāwja mē htyk nē mē hapēx pyrāk. Nom nhūm prem ra Tirtūm ri akupÿm htÿr nē mex nē pa ho pa. Tā ka htem Tirtūm kapēr kwÿm ri akupÿm mē htÿr kēt ā mē harēnh o apa. Anē.

*Tirtūm kapēr maati jarēnh
Matêwre 10.37, 22.34-40; Rukre
10.25-27; määnēn Wam Juāw 2.15,
5.3; Apokarip 2.4*

²⁸ Tā nhūm Tirtūm kapēr tūm o mē ahkre xwÿnhjē hō mē hwÿr tē nē mē kot axpēn mā kapēr ā mē omunh o xa. Hāmri nē Jejus kot tanhmā Satusew nhō xwÿnhjē mā kapēr mex toja ma nē kām:

—Nà ām hāmri na ka ā mē kām ja jarēnh anē Pahihti. Kwa inhmā mēmoj jarē. Na pre Tirtūm ahpÿnhā mēmoj to 10 nē mē pamā hā karō. Mē pahte hkōt amnhī nhÿpēx o ri papa kaxyw hā mē pamā karō. Tā nhÿ kapēr na mex o kot hkwyÿjē jahkrenh wehe? Anē.

²⁹ Hāmri nhūm kām:
—Nà Tirtūm kapēr xohtōō. Kapēr piitā hkōt mē pahte amnhī nhÿpēx o papaja na kām hprām. No pixi na mē pahte hkōt amnhī nhÿpēx o

papaja nhũm kãm hprãm tỳx o kot hkwy jakrenh. Kapër mex maati na ja. Na pre kapër o:

E mẽ apê Ijaew nhõ xwỳnhjaja. Ixpê mẽ anhõ Tirtũm ã ixpìxi mex na pa.

³⁰ Jakamã kêr ka mẽ amã ixkĩnh tỳx o mẽmoj piitã hakrenh pa. Jao mẽ anhĩ piitã ho amã ixkĩnh tỳx kumrêx o ri apa.

³¹ Anhỹr o na pre mẽ pamã karõ. Nê hkõt ja:

Kêr ka mẽ nhãm mẽ hipêx o te ka amã amnhĩ tã ma pyrãk o mẽ hipêx o ri apa. Jao tãm mẽ hipêx rãhã ho ri apa. Anê.

E ja wa kumrêx na Tirtũm kãm mẽ pahte hkõt amnhĩ nhĩpêx o ri papa hprãm tỳx nê. Anê.

³² Hãmri nhũm kuma nê kãm:

—Nà ãm hãmri na ka ja jarê Mějiahkre xwỳnh. Tirtũm pyxi mex kênã. ³³ Amnepêm na pre htem kãm amnhĩ jarênh kaxyw nê kãm mẽmoj gõ nê rĩ kormã tanhmã kãm amnhĩ jarênh to. Tã nom kot puj mẽ ã ate harênhta kõt amnhĩ nhĩpêx anhỹr o papa jao mẽ panhĩ piitã pamã Tirtũm kĩnh. Nê mẽ pamã hkĩnh o mẽmoj piitã hakrenh pa. Nê nhãm mẽ hipêx o te mẽ papamjaja pamã amnhĩ tã ma pyrãk o mẽ hipêx. Jao tãm mẽ hipêx rãhã ho ri papa. Kot puj mẽ ã amnhĩ nhĩpêx anê nhũm Tirtũm kãm ja mex o mẽ pahte kãm mẽmoj nhõrta jakre.

Anhỹr o kãm kapër. ³⁴ Hamaxpêr mex pê ã Jejus mã kapër anê nhũm kuma nê kãm:

—Nà ãm hãmri na ka ja jarê. Na ka ra mẽ kot Tirtũm kõt amnhĩ nhĩpêx o amnhĩ nhĩpêx nyw pumunh mex o mō. Nà te ate tokyx hkõt amnhĩ xãm kaxyw pyrãk. Anê.

Hãmri nhũm mẽ kãm hkurê xwỳnhjaja tee ri wa kot axpên mã kapër mar o kuhê nê axte kãm mẽmoj tã hkukjêr pyma nê. Ra tee ri mẽ kot hêx rom mẽmoj tã hkukjêr kapry jakamã axte tanhmã hkukjêr to hkêt nê.

Jejus kêp pahi finat Tawi nhõ Pahihti hã harênh

Matêwre 22.41-46; Rukre 20.41-44; mãânên Rômãn 1.3-4

³⁵ Hãmri nhũm Jejus arĩ Tirtũm mã amnhĩ jarênh xà hã ixkre kamã amnhĩ tã mẽ ahkre. Nom te nhãm mẽhõ hã mẽ hkukjêr pyrãk amnhĩ tã mẽ hkukja nê mẽ kãm:

—E mẽ inhmã mẽmoj jarê. Tirtũm kapër tũm o mẽ ajakre xwỳnhjaja na htem tanhmã mẽ amã Tirtũm kot mẽ akaxyw ãm mã xwỳnh jarênh to nê mẽ amã harênh o: “Koja kêp pahi finat Tawi kanrêhã htãmnhwỳ koja.” Anhỹr o kot mẽ amã harê. ãm kêp kanrêhã htãmnhwỳ pix ã mẽ amã harênh o pa. No na pre pahi Tawija kêp kanrêhã htãmnhwỳ hã harê nê mãânên kêp õ pahihti hã harê. Tã nom nhũm Tirtũm kapër tũm o mẽ ajahkre xwỳnhjaja na htem urã nê kêp pahihti hã mẽ amã harênh kêt nê. ãm kêp kanrêhã htãmnhwỳ pix ã harê. Kwa mo na htem Tawi pyrã nê kêp õ pahi hã harênh kêt nê?

³⁶ Na pre Tawi tãm Tirtũm kapër tũm kwỳ hã kagã nê tanhmã Tirtũm kot mẽ akaxyw ãm mã xwỳnhta jarênh to. Tirtũm Karõ nhỹ hã tanhmã harênh to. Tirtũm mex ã mẽ grer xàja kwỳ hã kagã nê hã kagã ho:

Tirtũm na pre inhõ Pahihti mã ã kapër anê nê kãm: “E amnê ixwỳr tẽ nê inhĩkhõ hã nhỹ nê inhmã mẽ ho amnhĩptar o akrĩ. Kot paj mẽ kot kãm akurê xwỳnh piitã mẽ unênh pa nê awỳr mẽ o mra nê anhĩhkram mẽ haxar pa.”

Anhỹr o pre kãm kapër. Anê.

³⁷ —Na pre ã Tawi Tirtũm kot Kris mã kapër jarênh nê kêp õ pahi hã kagã anê. Tã nom Tirtũm kapër tũm o mẽ ajahkre xwỳnhjaja na htem kêp Tawi htãmnhwỳ pix ã ri axpên mã harênh o ri pa. No kêt Tawija na pre kêp õ Pahihti hã harênh o pa. Anê.

Nhũm pre ã Jejus mẽ kãm amnhĩ jarẽnh anẽ nhũm mẽ mar o kuhẽ xwýnhjaja kuma nẽ hkĩnh nẽ. Nẽ kãm axte mar prãm nẽ.

³⁸ Hãmri nhũm arĩ mẽ ahkre ho nhỹ nẽ mẽ kãm:

—Kwa mẽ o kora. Kêr ka mẽ Tĩrtũm kapêr tũm o mẽ ahkre ho mẽ pa xwýnhjê kot amnhĩ nhĩpêx o amnhĩ nhĩpêx kêt nẽ. Mẽ omu nẽ ãm mẽ omu nẽ mẽ kot amnhĩ nhĩpêx kôt amnhĩ nhĩpêx kêt nẽ. Na htem piitã mẽ hã hpijaam kaxyw ê mex pix kãm ri pa. Nẽ mẽ kot amnhĩm mẽ rũnh ã mẽ harẽnh nhũm mẽ kot amnhĩ jarẽnh marja na htem kãm hprãm. ³⁹ Nẽ Tĩrtũm kapêr o mẽ ahkre xã hã ixkre kamã mẽ kãm amnhĩ to rũnh xwýnhjê hkrĩ xã mex pix kamã na mẽ kãm hkrĩ hprãm. Nẽ mẽmoj tã mẽ apkur xã hã arĩgro hã ma hkwýjê hkôt mẽ apkur xã hã ixkre hwýr akuprõ nẽ kãm mẽ kot amnhĩ to rũnh xwýnhjê hkrĩ xã mex pix kamã hkrĩ hprãm.

⁴⁰ —Nẽ mẽ kot mẽ mjên htyk xwýnhjê ho mex o pa hã amnhĩ jarẽnh tã amnhĩ to hêx. Nẽ na htem axtem nẽ mẽ nokupyr kaxyw mẽ hwýr mra nẽ mẽ kãm: “E ot pa awýr ato ajuta kaxyw tẽ. Ra amjên apê htyk jakamã kot paj pam amã akukrêx jamãr o ixpa.” Anẽ hãmri nẽ mẽ kêp mẽ òrkwý pytà nẽ amnhĩm mẽ kêp mẽ hikukrêx piitã ho hapêx. Te tãm kot mẽ hipêx o pa pyrãk nom tãm mẽ hipêx kêt nẽ. Nẽ te tãm amnhĩ nhĩpêx pyrã nẽ Tĩrtũm mã amnhĩ jarẽnh japjêê ho kuhẽ. Te mẽ kot Tĩrtũm mã ãm hãmri amnhĩ jarẽnh pyrãk tã hkwýjaja kot ja hã mẽ omunh pix kaxyw nhũm mẽ ã kãm amnhĩ jarẽnh anẽ. Mýrapê koja mẽ mex kêt nẽ. Koja Tĩrtũm tanhmã mẽ hipêx kati hto. Jakamã kwa kêr ka mẽ ã mẽ kot amnhĩ nhĩpêx anhýr o mẽ pa xwýnhjê kôt amnhĩ nhĩpêx o ri apa hkêt nẽ. ãm kwarĩ ho kwarĩ. Anẽ.

Kêp mjên htyk xwýnh jarẽnh

Rukre 21.1-4

⁴¹ Nhũm Jejus arĩ Tĩrtũm mã amnhĩ jarẽnh xã hã ixkre kamã mẽ omunh o xa. Na pre hte Ijaew ixkreja o mex kaxyw ixkre jamãr xwýnhjê mã hikãxpore hkwý nhõr o pa. Nhũm mẽ hikãxpore rũnh xwýnhjaja hwýr agjê nẽ kãxpore gjênh xã kamã hkwý ho rax nẽ hagjê nẽ ma akupým mra. ⁴² Tã nhũm mẽhõ ni pê mjên htyk xwýnhja haxwýja hwýr axã. Kêp amrakati kumrêx. Nẽ hikãxpore týxre ãm pijakrutre htã kãxpore rũnh xwýnhjê hpãnhã ixkreta wýr tẽ. Nẽ kãm Tĩrtũm kĩnh xãj kãxpore gjênh xã kamã hamẽ kumẽ hãmri nẽ kato nẽ ma akupým tẽ. ⁴³ Hãmri nhũm Jejus amým ã kot amnhĩ nhĩpêx anhýr ã omunh o xa nhũm ja kãm mex nẽ. Hãmri nẽ hkôt mẽ pa ho mẽ pa xwýnhjê mã harẽ nẽ mẽ kãm:

—E mãn ka mênire htêm mũj pumu. Na pre mjên kêp ty nhũm kêp amrakati nẽ hikãxpore grire htã amnhĩ pê òr pa. Kwýjê rom kãm Tĩrtũm kĩnh xãj amnhĩ pê òr pa. Apkur xã hã hikãxpore na. ⁴⁴ Kêt mẽ hkwýjaja na hte hikãxpore hkwý pix o mra nẽ gjênh xã kamã hagjê nom arĩ mẽ hikãxpore rũnh. No nija na mẽ urãk nẽ kãm hikãxpore japê hkêt nẽ. Nẽ ho òxy hkêt nẽ ãmnhix piitã o tẽ nẽ òr pa. Anẽ.

13

Jejus kot nhỹrmã mẽmoj piitã ho hapêx ã harẽnh

Matêwre 24.1-14; Rukre 21.5-9, 21.17-19; mããnên Wam Ximotre 4.1; Sikũn Ximotre 3.1

¹ Tã hãmri nhũm Jejus kôt mẽ pa ho mẽ pa xwýnhjaja arĩ Tĩrtũm mã amnhĩ jarẽnh xã hã ixkre kaxwýnh pumunh o kuhẽ nẽ hã Jejus mã:

—Hêxta waa nẽ. Ixkreja mex kumrêx Pahihti. Kên rũnh o mẽ kot hipêx jakamã mex o mex. Nẽ mẽ

kot ri Tirtüm mã hkĩnh xà nhõr nêj haxwýja piitã mex kumrêx. Anê.

² Hãmri nhũm mẽ kãm:

—Nà mex tã koja nhỹrmã mẽ kãm Tirtüm kurê xwýnhjaja grành pa. Koja arĩ kên axkrutê axpên mýnh nê nõr kêt kumrêx. Koja piitã anhgrã nê ahpýnhã ri hikwỹ.

Anhỹr o mẽ kãm kapêr. ³ Hãmri nê ixkreja rũm kato nê ma tẽ nê hixêti pê Oriwêhti hã api nê hã nhỹ. Tirtüm nhõrkwỹ kutã hixêti ja nhũm hã api nê hã nhỹ. Hãmri nhũm Simãw Pêtre mẽ Xiakre mẽ Juãw mẽ Andreja ma hkôt mra. Ahte hkôt mra nê mẽ kot Tirtüm mã amnhĩ jarênh xà hã ixkre grành par ã hkukja nê kãm:

⁴ —Kwa xà ãm hãmri koja mẽ ã ixkreja nhĩpêx anê? E aprĩ hã mẽ inhmã harê. Xà koja mẽ nhỹrmã kugrã nà xà koja mẽ tokyx ho anê? Kwa mẽmo koja we wýj ri tanhmã amnhĩ nhĩpêx to? Anê.

⁵⁻⁶ Hãmri nhũm mẽ kãm:

—Nà kot paj mẽ amã harê. Nom nhỹrmã mẽmoj piitã hapêx kaxyw tanhmã amnhĩ nhĩpêx to kumrêx kot paj mẽ amã harê ka mẽ inhma. Koja mẽ ohtõ nê mẽ apê ixkwýjê hwýr mra nê hêx rom te pa ixte amnhĩ nhĩpêx pyrãk o amnhĩ nhĩpêx o pa. Nê tanhmã mẽ amã amnhĩ jarênh to nê mẽ amã: “E pa na pre Tirtüm mẽ awýr inhmê. Ixpê kaxkwa rũm ixwrýk xwýnhta na pa.” Anhỹr o mẽ akôt mẽ amã amnhĩ to hêx o pa. Nê mẽ amã: “E na pa mẽ ato amnhĩptãr kaxyw mẽ awýr wrý.” Anhỹr o mẽ amã amnhĩ jarê. Nom kêr ka mẽ ama nê ãm mẽ ama. Mẽ kot amnhĩ to hêx xwýnh na mẽ. Kormã akupyñ ixpõx xà hã arĩgroja kormã.

⁷ —Nê koja mẽ nhỹri awry hã axpên par o pa. Nê mẽ atãã axpên par o pa. Nom kêr ka mẽ harênh ma nê ri tee ri tokyx mẽmoj piitã hapêx ã hkamnhix kêt nê. Mẽmoj piitã hapêx xà hã arĩgroja kormã.

⁸ —Nê koja mẽmoj piitã hapêx kaxyw nhũm ahpýnhã ri pika piitã hkôt mẽ pa xwýnh piitã pika hõ nhõ xwýnhjê kutã amnhĩ xunhwý nê axpu nê axpên pa.

—Nê koja pika piitã hkôt tanhmã mẽ à kuteja mẽ hamý nhũm mẽ amnhĩ xà htýx kãm hamak o pa. Nhũm nhỹri pika htertet týx nê. Nê nhỹhýnh pika hkwy kamã mẽ pa xwýnhjaja prãm xaj pikaprãr pa. Tã nom kormã mẽ kot amnhĩ xà htýx kãm hamak xà hkrax pix na ja. Te mênijaja pijagri kaxyw nê kormã õhy xà hpýnh pyrãk. Koja mẽmoj piitã hapêx kaxyw nê ã amnhĩ nhĩpêx anê.

⁹ —E pa hpãnhã mẽ kot Tirtüm mã amnhĩ jarênh xà hã ixkre grành par xwýj ri mẽmoj tanhmã kot hkukamã amnhĩ nhĩpêx to hã hã harê. Mẽ ate hã ixkukjêr xwýnhta kot paj mẽ amã harê. Nà koja mẽ kãm ixkurê xwýnhjaja mẽ awýr mra nê ixtã mẽ apynê nê mẽ atomnuj nê. Nê ma mẽ pikuprõnh xà hã ixkre hwýr mẽ ato mra nê kamã mẽ kãm mẽ ato kapêr punuj nê nhũm mẽ kuma nê ma mẽ ato mra nê mẽ ajagjê. Mẽ ate ixkôt apa ho apa xwýnh ã ã mẽ anhĩpêx anê. Nê mẽ õ pahiti hwýr mẽ ato mra nê mẽ kãm tanhmã mẽ ato kapêr punuj to. ¹⁰ Tã nom kwa kêr ka mẽ kutã akuhê nê mãmrĩ tãm mẽ kãm ijarênh o akuhê. ¹¹ Nom kêr ka mẽ kãm amnhĩ jarênh kukamã tee ri ajamaxpêr o ri amã mẽ uma hkêt nê akuhê. Rý mẽ ajamaxpêr o: “Hêxta waa nê. Mẽ kot ixkukjêr ã arĩgrota ã tanhmã kot pa we ri mẽ kãm amnhĩ jarênh to?” Anhỹr o tee ri amnhĩ kukamã ajamaxpêr kêt nê. Koja Tirtüm Karõ tanhmã mẽ akrã hto ka mẽ ý hã akatãt kôt tanhmã mẽ kãm amnhĩ jarênh to.

¹² —Nê mẽ atõ nê mẽ anhĩpêxã nê mẽ akrajaja koja mẽ ixtã mẽ atã amýnê nê ma pahĩ hwýr mẽ ato mra nê kãm mẽ ajarê nhũm mẽ kuma nê mẽ ajagjê nê mẽ akwýjê

pa. ¹³ Kojã mē piitã ixkôt mē akamã gryk nē ã kãm mē akurê ho pa anê. Nom mē kot ã mē anhîpêx anhÿr mã tâ kêr ka mē amnhî to htÿx nê ixkaga hkêt nê. Mē kot mē apar tâ ka mē kaxkwa kamã akupÿm atÿr kurê kumrêx. Hãmri nê mē kurom Tÿrtÿm mē wa ixri atÿr tÿm nê amex rãhã nê apa ho apa. Mē kot tanhmã mē ato htã mē apê akupÿm kaxkwa kamã atÿr tÿm nê apa mã xwÿnh jakamã kwa tee ri amnhî kukamã ajamaxpêr o ri apa hkêt nê. Anê.

Mē pahomnuj tÿx xwÿnh maati hã harênh

Matêwre 24.15-28; Rukre 21.20-24; mãânên Sikÿn Tesarôn 2.3-4; Apokarip 13.11-17

¹⁴⁻¹⁶ Nhÿm Jejus arÿ mē kãm kapêr nê mē kãm:

—Nê koja nhÿrmã kot mē atomnuj tÿx kumrêx xwÿnh maati axtem nê Tÿrtÿm mã amnhî jarênh xã hã ixkreja kamã amnhî xãm. Hãmri ka mē ja hã omu nê mē kot krÿ grãnh par mã ajamaxpêr kurê kumrêx. Kojã ã amnhî nhîpêx anê ka mē amÿm amnhî wÿr mē omu hãmri nê ajapôj nê ma aprôt nê amrar kurê kumrêx. Mē apê jar pika pê Jutej kamã mē apa xwÿnhjaja mē omu hãmri nê mē kot mē apar pymaj ma aprôt nê amrar kurê kumrêx. Hixêt prêk wÿr ajapôj nê aprôt nê ma mra. Nê jar Jerujarê nhô xwÿnhjaja kê mē umaj haxwÿja hapôj nê ma hprôt nê ma mra o mra. Nê kapôt ã ri mē pa xwÿnhjaja kê mē ê jamÿnh kaxyw akupÿm krÿ hwÿr gjêx kêt nê. ãm ma mē umaj hprôt nê mra o mra kurê kumrêx.

¹⁷ —Nê mē htujarô xwÿnhjaja nê mē hkra karàre xwÿnhjaja. Jajê pê koja mēmoj omnuj tÿx nê. Tanhmã kot wem amnhî to nê hprôt tÿx? Nã pika ja kamã koja mē mex kêt nê. Mē kot amnhî tomnuj mÿrapê koja Tÿrtÿm tanhmã mē homnuj tÿx to.

¹⁸⁻¹⁹ —Kojã ã mēmoj amnhî nhîpêx anê hãmri nhÿm mē piitã

amnhî xã htÿx kãm hamak rÿnh o pa. Tÿrtÿm kot mē piitã mē ho kator krax rÿm amnê mē pa xwÿnhjaja na mē kormã à htÿx kamã hamak rÿnh kêt nê. Kormã amnhî xã kamã hamak kryre. No nhÿrmã mē hprôt xã hã arÿgrota ã koja mē amnhî xã htÿx kamã hamak rax kumrêx.

—Tã akupÿn ixte mē awÿr ixwÿrk xã hã arÿgrota ã kot pa mēmoj punuj o ijapêx pa ka mē axte ã mēmoj kot anhÿr pumunh kêt nê. Nom kormã akupÿn ixwÿrk xwÿj ri kot kaj mē amnhî xã htÿx kamã ajamak o apa. Jakamã kêr ka mē ã amnhî nhîpêx anhÿrja kukamã amnhî to Tÿrtÿm wÿr nê kãm: “Pa Tÿrtÿm. Kwa kê mēmoj ã amnhî nhîpêx anhÿr kaxyw hãmri kê amgrã pê ã amnhî nhîpêx anê. Kojã na pê ã amnhî nhîpêx anê nhÿm omnuj tÿx nê.” Anhÿr o amnhî to awÿ.

²⁰ —Mê hprôt xã hã arÿgrota ã koja Tÿrtÿm kãm mē apê hkrajaja mē atyk par pymaj mē anê mēmo punuta ã arÿgro hkwy grã nê mē akukamã mē amã ho grêre. Kojã mē akamã ukapri xãj ã mē anê hipêx anê.

²¹ —Nê koja ã mēmoj amnhî nhîpêx anhÿr kaxyw hãmri nhÿm mē hêx o mē pa xwÿnhjaja ma mē awÿr mra nê hêx rom tanhmã mē amã kapêr to nê mē amã: “E ota ra Tÿrtÿm kot mē pakaxyw ãm xwÿnhhta pôj. Kwa mē tokyx hwÿr mra nê omu nê hkôt ri apa.” Anhÿr o mē amã hêx. Hãmri nhÿm mē hkwyjaja tee ri mē kuma nê mē amã: “Nã tãm kêt. Jar mē ixkamã na. E mē tokyx amnê hwÿr mãn mra nê omu.” Anhÿr o mē amã hêx o pa. Nom kêr ka mē ama nê ãm mē ama nê mē hkôt amrar kêt nê.

²²⁻²³ —E kwa mē inhma. Na pa ra ixpri hã mēmoj kot ã amnhî nhîpêx anhÿrja kukamã mē amã tanhmã harênh to. Tã kêr ka mē axkãm ajamak rom nê ri apa. Kojã mē kot amnhî to hêx xwÿnhjaja axpên

pānhā mẽ awÿr mra nē mẽ amā kēp Tirtūm kot mẽ akaxyw ām xwÿnh ā amnhī to hêx. Nē mẽ hkwyjaja kēp Tirtūm nhÿ hā kapēr jarēnh xwÿnh ā amnhī to hêx. Hāmri nē aa mẽ kot mẽmoj pumunh kêt kwÿ ho anhÿr o pa. Te Tirtūm nhÿ hā kot ho anhÿr pyrāk nom hêx rom mẽ apê Tirtūm kot amnhīm mẽ arēnh xwÿnhjê nokupyr kaxyw ā amnhī nhÿpêx anhÿr o pa. Anē.

Akupÿn Jejus wrÿk xà hā arĭgro jarēnh

Matêwre 24.29-31; Rukre 21.25-28; määnēn Sikūn Pêtre 3.10; Apokarip 1.7, 19.11-16

²⁴⁻²⁵ Nhūm Jejus arĭ mẽ kām kapēr nē mẽ kām:

—Tā koja mẽ kot amnhī xà htÿx kamā hamak xà hā arĭgrota hapêx nhūm Tirtūm ā mẽmoj nhÿpêx anē. Koja kaxkwa ho àk tÿx nē nhūm myyti ahtÿk.

Nhūm mytwrÿre axte hirā hkêt nē. Nhūm kanhēti piitā axrê nē rôrôk pa.

²⁶ Hāmri pa man akupÿn pika hwÿr wrÿ nhūm mẽ piitā ixwrÿk kām ix-pumu. Kakrā kamā kot paj ixihtÿx o inhĭrā rax kām akupÿn mẽ awÿr wrÿ. ²⁷ Hāmri nē ma krĭ piitā hwÿr Tirtūm kapēr o mẽ wrÿk xwÿnhjê rē nhūm mẽ ma mra nē amnepēm ixte amnhī kaxyw mẽ axunhwÿr xwÿnh piitā ho akuprō nē akupÿn ixwÿr mẽ ho mra. Anē.

Jejus kot mẽmo pĭ hpār ā ejêp jarēnh

²⁸ Nhūm Jejus arĭ mẽ kām kapēr nē mẽ kām:

—E ka mẽ pĭ hpār mÿj pumu. Na hte mẽmo mytwrÿ hā rā nhūm mẽ omu nē ô hkukamā hamaxpēr kurê kumrêx. ²⁹ Ja pyrā nē koja mẽmoj ā amnhī nhÿpêx anhÿr mẽ ka mẽ akupÿn mẽ awÿr ixwrÿk mā ajamaxpēr kurê kumrêx. ³⁰ Koja akupÿn ixpôx kêt ri ā mẽ kot mẽmoj kot amnhī nhÿpêx anhÿr pumunh

xwÿnhjaja kormā piitā htÿk par kêt ri pa akupÿn mẽ awÿr wrÿ.

³¹ —Nē koja nhÿrmā pika nē kaxkwa wa hapêx pa. Tā no ām ixkapēr koja wa urāk nē aa hapêx kêt nē. Koja ām rāhā ho rāhā. Kot paj aa ihkĭê ho tanhmā mēnh to hkêt nē. Anē.

Mẽ pahte akupÿn Jejus wrÿk xà hā arĭgro pumunh kêt ā mẽ pajarēnh

Matêwre 24.36-44; Rukre 12.37-40; määnēn Atre 1.9-11; Wam Tesarōn 5.2; Sikūn Pêtre 3

³² Nhūm Jejus arĭ mẽ kām kapēr nē mẽ kām:

—Nom akupÿn ixwrÿk xà hā arĭgroja mẽ ate omunh kêt. Nē kaxkwa kamā Tirtūm kapēr o mẽ wrÿk xwÿnhjaja kot ja pumunh kêt. Nē pa ixpê Tirtūm Kra htā ijaxwÿja ixte ja hā amnhī pumunh kêt. Ām Mēpahpām maatija tapxipix kot ja pumunh.

³³ —Tā mẽ ate akupÿn ixwrÿk xà hā arĭgro pumunh kêt jakamā kwa kêr ka mẽ axkām ajamak rom nē ri apa. Nē apkati mẽ amnhī wÿr ijapêr arĭt rāhā ho ri apa.

³⁴⁻³⁵ —E pa tanhmā mẽ amā akupÿn ixwrÿk xà hā arĭgro jarēnh to ka mẽ inhma. Koja mēhō nhÿhÿm nojarêt hāmri nē kām mẽ àpēnh xwÿnhjê mā mẽ àpēnh ā karō nē ôrkwÿ jamār xwÿnh mā tanhmā kām karō hto. Hāmri nē ôrkwÿ kahê xà jamār xwÿnh mā kām: “E kêr ka ixwakre kamā ijapêr arĭt rāhā ho ri apa.” Anē hāmri nē ma nhÿhÿm mō. Tā mẽ kot ijapêr rĭt rāhā ho mẽ pa xwÿnhjaja te kot ixkre kahê xà jamār xwÿnh kot amnhī nhÿpêx pyrāk. Ô patrāwja akupÿn hpôx xà hā arĭgro hā omunh kêt jakamā na hte kahê xà jamār rāhā ho pa. Koja apu axpêr kamāt nhūm akupÿn hpôx japêr. Rÿ kôt ā kamāt rÿ krāhyre kà nhūm akupÿn hpôx japêr. Rÿ kwÿhtÿk nhūm akupÿn hpôx japêr. Tā urāk nē mẽ ate akupÿn ixwrÿk xà hā arĭgro

pumunh kêt jakamã kêr ka mẽ
ijamãr rãhã ho ri apa. Jao ixkutêp
inhmã tanhmã amnhĩ nhĩpêx to
rãhã nê. Ra ixte mẽ amã hã karõ
xà hkôt. ³⁶Kop ixkre kahê xà jamãr
xwýnhja tee ri õ patrãw kamã ama
hãmri nê ra õtxwa nê htýx õt o
ýr rôm nhũm haêr pê hwýr hpõx
ronhýx ja kêp mex kêt nê. Ja pyrã
nê kêr ka mẽ ixkutêp ixkôt amnhĩ
nhĩpêx rãhã ho ri apa. Nom tee ri
amnhĩ wýr ixkãm ama hãmri nê
axte inhmã ajamaxpêr kêt pê atýx
ri tanhmã amnhĩ tomnuj to ho apa
hkêt nê.

³⁷—E ixte mẽ amã mẽmoj
jarênhja na pa hte ixkwýjê piitã mẽ
kãm harê. Jakamã kwa kêr ka mẽ
akupýn ixwryk ã ijapêr arít rãhã ho
ri apa. Anê.

Nhũm pre ã Jejus amnhĩ kukamã
mê kãm ujarênh anê.

14

*Mê kot Jejus pír kukamã
hamaxpêr ã mẽ harênh*

*Matêwre 26.1-5; Rukre 22.1-2;
Juãw 11.45-53*

¹Tã nhũm Ijaew hkĩnhã ã arĩgro
pê Pas wýr apkati axkrut. Pas
ã na hte mẽ ixpê Ijaewjaja am-
nepêm Tirtũm kot pika pê Ejit pê mẽ
inhĩgêt nê mẽ ixpãmjê kator mã ija-
maxpêr kaxyw axpên wýr akuprõ
nê hã ixkĩnh. Na pa htem arĩgroja
mã: “Pas” anê. Nê harênh o: “Mê
pahte pãw kaxkrit kêt kur ã arĩgro”
anê. ²Jakamã nhũm mẽ inhõ patre
krãhtũmjê mẽ Tirtũm kapêr tũm o
mê ahkre xwýnhjaja kãm Jejus pír
prãm nê. Nom mẽ kãm hkôt kapêr
mar o mẽ pa xwýnhjê pyma nê. Nê
tee ri hã amnhĩ jahkre nê axpên
mã:

—Hêxta waa nê. Tanhmã kot
puj wem ho nê kupiĩ? Kot puj mẽ
pahkĩnh kãm tanhmã ho nhũm mẽ
hkĩnh xwýnhjaja hã mẽ pahpumu
nê mẽ pakamã gryk týx nê. Pu mẽ
hã axpu nê hã tanhmã axpên to.

Jakamã kwa pu mẽ kormã tanhmã
ho hkêt nê. Anê.

*Mêhõ ni kot Jejus krã gregrer ã
harênh*

*Matêwre 26.6-13; Rukre 7.36-50;
Juãw 12.1-8*

³Rôm nhũm Jejus Simãw nhõrkwý
kamã kormã apkur o nhý. Krĩ
pê Petãn kamã. Simãwja na pre
hkã kro xapêr týx o pa nhũm Jejus
akupýn ho mex. Jakamã akupým õ
krĩ hwýr pøj nê kutã apkur o nhý.
Hãmri nhũm mẽhõ nija harênh ma
nê mẽ hkuxwa xà hã kãx õ py nê
ma hwýr o tẽ. Nê mẽ hwýr axã nê
nhýhýnh kãx kahte nê mẽ hkuxwa
xã ho hkrã gregrer pa. ⁴Hãmri
nhũm mẽ apkur o hkrĩ xwýnhjaja
tee ri ã kot amnhĩ nhĩpêx anhýr ã
omu nê kamã gryk nê. Nê axpên
mã:

—Tk. Kwa nã na hã mẽ hkuxwa
xãta kapír par kumrêx. ⁵Kop apu
ma o htêm nê ho wênê nê hpãnhã
kãxpore ho rax kumrêx nê hamýnh
nê ho mẽ kêp amrakati xwýnhjê
nhĩpêx par nhýx ja kãm mex nê. Mo
na ri ã amnhĩ nhĩpêx anhýr kêt nê?

Anê nê hã kãm akir. ⁶Hãmri
nhũm Jejus mẽ kuma nê mẽ kãm:

—Tk. Kwa mẽ kãm axakjêr kêt nê.
Ãm hãmri na ã inhĩpêx anê. ⁷Mê
kêp amrakati xwýnhjaja koja mẽ arĩ
mê akõt pa rãhã nê. Ka mẽ amã
mêmo arĩgro hã mẽ ho ajuta hprãm
nê tanhmã mẽ ho ajuta hto nê mẽ
kãm mẽmoj gõ. No pa kot paj ri
mê akõt ixpa ka mẽ ixto mex ry ho
apa hkêt nê. Kot paj tokyx mẽ are.
⁸Ixyk nhũm mẽ kot ijaxãr kukamã
na ã ixkrã gregrer anê. Ãm hãmri
na ã inhĩpêx anê. ⁹ãm hãmri na pa
mê amã ja jarê. Koja mẽ krĩ piitã
hkôt axpên mã ixte tanhmã mẽ anê
amnhĩ nhĩpêx to hã ijarênh o pa
nê mãânên kot ã inhĩpêx anhýrja
mãânên harênh o pa. Nhũm mẽ
piitã kot tanhmã ixto mex to hã
harênh ma. Anê.

Jut Kariot kot mē kām Jejus ā àmnēnh kaxyw ā harēnh

Matēwre 26.14-16; Rukre 22.3-6; Juāw 13.21-30

¹⁰ Tā nhūm Jut Kariotja. Jejus kôt mē pa ho mē pa xwýnh pé 12 hō na pre. Tā axtem nē Satanasti nhỹ hā ma patre krāhtūmjē hwýr tē nē axtem nē tanhmā Jejus o mē mar to nē mē kām:

—E ot pa mē amā Jejus jarēnh o tē. Xà kot paj mē amā hā amýnē ka mē hpānhā inhmā amnhĩre nà? Anē.

¹¹ Hāmri nhūm mē kuma nē hkĩnh nē. Hāmri nē kām:

—Nà kot paj mē amā amnhĩre. Anē.

Hāmri nhūm mē kuma nē kato nē ma tē nē Jejus pynēnh kaxyw htānopxar o hkôt ri pa.

Jejus kot ý hā kapēr o mē pa xwýnhjē kutā apkur ā harēnh

Matēwre 26.17-19; Rukre 22.7-13

¹² Tā nhūm arĩgro pé Pas kato. Amnepēm mē inhĩgētjaja na prem ôwēhti hkrare hkwy pa. Tĩrtūm kot ja hā mē omunh nē Ejit kām mē kām mē hkurē xwýnhjē nhĩhkra nē mē kator kaxyw na prem ā amnhĩ nhĩpēx anē. Jakamā na pa htem arĩ mē ixpē mē hkanrēhā mē htāmnhwýjaja Pas ā axpēn wýr akuprō nē jam ijamaxpēr pé mē urāk nē ôwēhti hkrare hkwy hpa nē pāwti kaxkrit kēt kām kuku.

Jakamā nhūm Jejus kôt mē pa ho pa xwýnh pé 12jaja Pas ā mē apkur xà hā Jejus kukja nē kām:

—Kwa nhỹri kot paj mē akutēp Pas ā mē panhō hā apē? Anē.

¹³ Hāmri nhūm mē kuma nē ja wa ho axkrut nē mē amnhĩ kukamā wa kumē nē wa kām:

—E wa ma Jerujarē hwýr wa tē. Nē hwýr axà nē mēhō myja pumunh kurē kumrēx. Nhūm amnhĩm gō ru nē amnhĩ kre hā poti xām nē o tē ka wa omu nē hā ajēt nē ma ōrkwỹ hwýr hkôt tē. ¹⁴ Hāmri nē ixkre nhō dōn pumu nē kām: “E Jejus na wa inhmē pa wa awýr tē.

Na awýr pēr mēnh o: ‘Nhỹri kot paj we ixkôt ri mē pa ho pa xwýnhjē mē Pas ā axpēn kutā apku?’ Anhỹr o na awýr pēr mē.”

¹⁵ —Wa ā kām akapēr anē kē war ama nē war amā ōrkwỹ nhĩmōk ā ixkre rax ō jahkre. Ra kamā kaxyw mē paxàpkur xà hā mēmoj piitāā. Ka wa omu nē māmri kamā mē ixkutēp mē panhō hā apē. Anē.

¹⁶ Hāmri nhūm wa kuma nē ma hwýr tē. Nē krĩm axà nē ra kot wa kām mēmoj jarēnh xà hkôt mēmoj piitā omu nē mē kutēp mē kām mēō hā àpēnh o wa xa.

Jejus kot mēhō kot mē kām hā àmnēnh ā harēnh

Matēwre 26.20-25; Rukre 22.21-23; Juāw 13.21-30

¹⁷ Tā nhūm kamàtre nhūm Jejus mē hkôt mē pa ho pa xwýnhjaja wa hkôt mō. ¹⁸ Hāmri nē kýxpē ixkreja wýr api nē hwýr agjē nē apkur kaxyw hkrĩ hpa nē kormā apkur o hkrĩ nhūm Jejus mē kām:

—E pa mē amā mēmoj jarē ka mē inhma nē amnhĩ krām haxàr týx nē. Kot kaj mē ixkutā axàpkur o akrĩ xwýnhjē hō mē kām ixkurē xwýnhjē mā ixtā amýnē. Anē.

¹⁹ Hāmri nhūm mē tee ri kuma nē hkapri htýx nē. Nē axpēn pānhā amnhĩ tā hkukja nē kām:

—Kwa xà pa kot paj ā anhĩpēx anē? Nà pa hkēt. Anē.

²⁰ Hāmri nhūm mē kām:

—Nà mē apē 12jē hō kot kaj ā inhĩpēx anē. Mē ate ixkutā guhkrax kām anhō pāwti ho mry kagō nhek o akrĩ xwýnhjē hō kot kaj ixtā amýnē. ²¹ Tĩrtūm kapēr ā kagà htūm kot ixkukamā harēnh xà hkôt koja mē tanhmā ixto rax nē ixpĩ. Nom kot mē kām ixtā àmnēnh mā xwýnhhta hēxta waa nē. Ā kot amnhĩ nhĩpēx anhỹrja mýrapē koja amnhĩ xà htýx kām hamak rax kumrēx. Kop apu aa ō māmāj nhōxà hkre rūm kator kēt ronhỹx ja kām mex nē.

²² Anê nê kormã mẽ apkur o hkri rôm nhùm pãwti hõ py nê ho Tirtùm wỳ. Hãmri nê mẽ kãm ho hkry nê mẽ piitã mẽ kãm òr pa nê mẽ kãm:

—E na pa mẽ amã pãwti ho hkry nê mẽ amã kugõ. Ja pyrã nê koja mẽ ã inhĩpêx anê nê te ixto hkry hpar pyrãk o inhĩpêx pa amnhĩ xà htỳx kamã ijamak kãm ty. Nom mẽ anê kot paj ty. E mẽ mãmri aku. Anê.

²³⁻²⁴ Nê hpãnhã wĩhti hã kop py nê mã ho anê nê Tirtùm mã harê. Hãmri nê mẽ kãm kugõ nê mẽ kãm:

—E mẽ kot ixpĩr xà hã arĩgrota ã koja ixkamrõ axkapĩ. Nom koja mẽ amarĩ ixpĩr nhùm amarĩ hpikapĩr kêt nê. Âm paa. Pa kot paj mẽ anê mẽ ìhkram amnhĩ jaxà nhùm mẽ ã inhĩpêx anê. Koja ixkamrõ axkapĩ nhùm Tirtùm omu nê ixkukwak ri mẽ anê mẽ ate amnhĩ tomnuj piitã amnhĩ katut kõt rênh pa nê mẽ ato hkra. Ra amnepêm kot ja hã amnhĩ jarênh xà hkõt. Jakamã e. Mẽ axpên pãnhã ixkamrõ pikapĩr mã ajamaxpêr pê ixte mẽ amã kop kãm wĩhti nhõrta o akõm o axpên nhĩpêx. Anê.

Nhùm pre ã mẽ kãm amnhĩ jarênh anê nhùm mẽ piitã ho hkõm o axpên nhĩpêx. ²⁵ Hãmri nhùm mẽ kãm:

—Âm hãmri na pa mẽ amã amnhĩ jarê. Kot paj axte wĩhti ho ixkõm kêt rãhã nhỹrmã Inhõ Papaj akupỹn mẽ awỳr inhmẽ. Hãmri pu mẽ rĩ kormã akupỹn ixpõx xà hã arĩgrota ã pahkĩnh nê. Nom axtem tanhmã hã pahkĩnh to. Anê.

²⁶ Nhùm pre ã mẽ kãm kapêr anê hãmri nhùm mẽ Tirtùm mã mex o mex ã gre hãmri nê hapõx pa nê ma hixêt pê Oriwêhti hwỳr mra.

Jejus kot Simãw Pêtre hkukamã tanhmã harênh to

Matêwre 26.31-35; Rukre 22.31-34; Juãw 13.36-38

²⁷ Tã nhùm Jejus hkõt mẽ pa ho pa xwỳnhjê hkukamã tanhmã mẽ kãm ujarênh to nê mẽ kãm:

—E mẽ inhmã. Tirtùm kapêr ã kagã htùm kot ã mẽ pajarênh kot anhỹr.

Kot paj ôwêhti jamãr o pa xwỳnhja pĩ hãmri nhùm ôwêhti hpi-gràn pa nê ma anhgrã nê ri mra.

Anhỹr o te ixpê ôwêhti jamãr xwỳnh nhùm mẽ apê ôwêhti pyrãk ã mẽ pajarênh. Tã kot paj mẽ ã amnhĩ nhĩpêx anê. ²⁸ Mẽ kot ixpĩr tã koja Tirtùm akupỹm ixto ixtĩr. Pa akupỹm ixtĩr nê ma mẽ akukamã pika pê Garirej wỳr mõ. Kamã kot paj mẽ axte axpên pumu. Anê.

²⁹ Hãmri nhùm Simãw Pêtre tee ri mẽ amnhĩ tã kuma nê kãm:

—Kwa nã. Ri ã mẽ ijarênh anhỹr kêt nê Pahihti. Kot paj akaga hkêt nê. Jajaja koja anhgrã nê hprõt nê ma mrar japêr no pa kot paj anhỹr kêt nê. Anê.

³⁰ Hãmri nhùm kãm:

—Nã kot kaj anê Simãw Pêtre. Koja apkati hkõt krãhyre hkàr kêt ri ka ra mẽ umaj ate ixkõt apa hkêt ã mẽ kãm amnhĩ tã axaprãr o axkrunêpxi kãm ga. Kwa jam ajamaxpêr tỳx nê. Anê.

³¹ Hãmri nhùm tee ri amnhĩ tã kuma kãm amnhĩ tã aprãr kãm hihtỳx nê kãm:

—Tk. Kwa nã. Kot paj ã amnhĩ nhĩpêx anhỹr kêt nê. Koja mẽ tee akõt ixpĩr mã tã no pa âm aa akaga hkêt kumrêx. Kot paj akõt ixpa ho ixpa rãhã nê. Anê.

Hãmri nhùm hkõt mẽ pa ho mẽ pa xwỳnh kwỳjê piitã ã kãm amnhĩ jarênh anê.

Jejus kot Tirtùm mã amnhĩ jarênh Matêwre 26.36-46; Rukre 22.39-46

³² Tã nhùm Jejus ma nhỹri mẽ kot kãm “Gesêm” anhỹr xwỳnhja wỳr hkõt mẽ pa ho pa xwỳnhjê ho mõ. Hãmri nê mẽ kãm:

—E mẽ jar ixkutêp akrĩ. Pa ma mũtùm tẽ nê Tirtùm mã amnhĩ jarê mãn. Anê.

³³ Hãmri nê amnhĩ kõt mẽ ho axkrunêpxi nê mẽ o mõ. Simãw

Pêtre mē Jepetew kra pijakrut pē Xiakre nē Juāwja nhūm amnhī kôt mē o mō. ³⁴ Hāmri nē amnhī kukamā mē kām hkurê xwýnhjaja kot tanhmā hipêx tota kukamā hamaxpēr o ra amnhī kamā kahak tỳx o ra hkaprī nē. Hāmri nē hkôt mē mrar xwýnhjē mā kām:

—Hêxta waa nē. Na pa tee ri amnhī xā htỳx kamā ijamakja kukamā ijamaxpēr nē amnhī kamā ixkahak tỳx o ixkaprī nē. Te ra ixkaprīja kot ixpīr o mōr pyrāk. Jakamā e mē jar anohtỳx nē ixto Tirtūm wỳr o akrī kē tanhmā ixto pa mē kot tanhmā ixtoja kutā ixihtỳx nē. Anē.

³⁵ Hāmri nē mē kurūm htēm grire nē amnhī kamā kahak o Tirtūm mā amnhī jarēnh kaxyw htu mỳr pē htēm nē pikap nō nē kām:

³⁶ —Kwa Papaj. Hêxta waa nē. Inhmā amnhī xā htỳx kām ijamak prām kêt kumrêx. Na pa tee ri amnhī kukamā ijamaxpēr nē amnhī kamā ixkahak tỳx nē. Jakamā kot kaj amā inhnē ja ho ajapêx prām nē māmri ho ajapêx nhūm mē kām ixkurê xwýnhjaja tanhmā ixto hkêt nē. Rỳ ko. Kot kaj amā mē kot tanhmā ixto hprām kē mē māmri tanhmā inhīpêx to. Nom pam inhmā hprām xā hkôt kêt.

³⁷ Anhỳr o Tirtūm mā amnhī jarē hāmri nē kànhmā xa nē akupỳm Simāw Pêtreja mē hwỳr tē nē mē omu nhūm mē ra htỳx gōr nē hikwỳ. Hāmri nhūm tee ri mē omu nē Simāw Pêtre mā kām:

—Kwa Simāw Pêtre. E mē hāmri akrā hapōj. Kwa wem anohtỳx grire nē ixkutêp amnhī to Inhō Papaj wỳr o akrī ³⁸ kē mē ixkôt tanhmā mē ato htā ka mē amā mē uma xāj ixkaga hkêt nē arī mē kutā amnhī to htỳx nē akuhē. Ā mē amā mē ate amnhī nhīpêx anhỳr prām nom kormā mē amā maa. Anē.

³⁹ Hāmri nē akupỳm tē nē axte Tirtūm mā tanhmā amnhī jarēnh to.

⁴⁰ Nē akupỳm mē hwỳr tē nē mē omu nhūm mē axte ôt pa nē hikwỳ. Nhūm tē nē tee ri mē omu hāmri nē tanhmā mē kām nē hkêt nē. Ām awjanā nē ma akupỳm tē nē axte Tirtūm mā amnhī jarē. ⁴¹⁻⁴² Hāmri nē akupỳm mē hwỳr tē nē mē kām:

—Kwa xān ka mē arī gōr nē anhīkwỳ? E mē tokyx akrā hapōj. Na mē ra ixwỳr mrar nē kot ixpynēnh mā. Koja mē tokyx ixkutā mē kot amnhī xunhwỳr xwýnhjaja mē kām ixtā amỳnē. Ota ra kot ixtā mē kām àmnēnh xwýnhhta tē. E mē tokyx kànhmā akrī pu mē kutā mra. Anē.

Mē kot Jejus pynēnh ā mē harēnh Matêwre 26.47-56; Rukre 22.47-53; Juāw 18.1-11

⁴³ Nhūm Jejus kormā mē kām kapēr o ām rāhā nhūm Jut Kariotja tē. Mē hkôt mē pa ho mē pa xwýnhjē hō htā nhūm ra amnhī kôt mē ohtō nē Jejus wỳr mē o tē nhūm mē wapohti nē kō jamỳ nē hkôt o mra. Patre krāhtūm mē Ijaew krāhtūmjē mē Tirtūm kapēr tūm o mē ahkre xwýnhjaja ra Jut kôt mē kurē nhūm mē man hkôt Jejusja wỳr mra. ⁴⁴ Na pre ra Jut Kariotja mē kām tanhmā amnhī jarēnh to nē mē kām:

—E kot paj nhỳri mē pahte unēnh mā xwýnhhta pumu nē hwỳr tē nē kahti hkôt kumỳ nē tanhmā kām ixkapēr to. Ka mē ixpumu nē hwỳr tē nē unē nē ma akupỳm o tē.

Anē hāmri nē ma hwỳr mē o tē. ⁴⁵ Nē Jejusja pumu nē hwỳr tē nē kām: “Pa mē ijahkre xwýnh.” Anē hāmri nē kahti hkôt kumỳ. ⁴⁶ Hāmri nhūm hkôt mē mrar xwýnhjaja omu nē Jejus wỳr mra nē unēnh kurē kumrêx. ⁴⁷ Hāmri nhūm Jejus kôt mē pa ho mē pa xwýnhjaja tee ri ja hā mē omu nhūm hōja ō wapo kapa nē patre maati mā àpēnh xwýnh kot mē hkôt htēm xwýnhhta mā wapo ho apē. Nē kot ho hkrā nhīpōnh mā tā kuhpaw nē upōk rūm hamak

nhĩkjê krãhta. ⁴⁸⁻⁴⁹ Hãmri nhũm Je-
jus amnhĩ tã mẽ kot unênh xwỳnhjê
mã kãm:

—Kwa na pa pre apkati mẽ
Tĩrtũm mã amnhĩ jarênh xà hã
ixkre kamã mẽ kãm ixujarênh o
ixpa ka prem tokyx ixpynênh kêt
nê. Tã jarãhã te ixte amnhĩ tomnuj
xwỳnh pyrã nê ixwỳr wapohiti nê
kô hã akapên nê ixwỳr atêm rax
nê. Nom ra mẽ ate tanhmã ixto
kaxyw arĩgro kator jakamã mẽ
mãmri tanhmã amã ixto hprãm xà
hkôt tanhmã ixto. Tĩrtũm kapêr ã
kagã htũm kot mẽ akukamã ã mẽ
ate inhĩpêx anhỳr ã mẽ ajarênh xà
hkôt. Anê.

⁵⁰ Hãmri nhũm hkôt mẽ pa ho mẽ
pa xwỳnhjaja tee ri mẽ kot unênh
ã mẽ omu hãmri nê mẽ umaj Je-
jus kaga nê ma hprôt pa nhũm ahte
mê kuri xa. ⁵¹⁻⁵² Hãmri nhũm mẽ
ma o tê. Nhũm kormã mẽhõ nyw
xwỳnhja tee ri ja hã mẽ omu nê ma
Jejus kôt tê. Nhũm mẽ amnhĩ kôt
omu nê kot unênh kaxyw kahty xà
hã kupy nhũm mẽ umaj mẽ ãhkra
kamã kahty xaja re nê ma hkênh nê
hprôt nê tèn akunok.

*Ijaew nhõ patre maati kot Je-
jus kukjêr ã jarênh*

*Matêwre 26.57-68; Rukre 22.63-
71; Juãw 18.12-14, 18.19-24*

⁵³ Tã nhũm mẽ ma mẽ õ pa-
tre maati nhõrkwỹ hwỳr Je-
jus o tê. Hãmri nhũm patre krãhtũmjê mẽ
Ijaew krãhtũmjê mẽ Tĩrtũm kapêr
tũm o mẽ ahkre xwỳnhjaja õrkwỹ
hwỳr Je-
jus ã akuprõ. ⁵⁴ Hãmri
nhũm Simãw Pêtre mẽ hkôt tê nê
mê hkôt patre maati nhõ kítare
hwỳr axà nê amỳm hã mẽ omunh o
xa. Nhũm ra pòristijaja kítare kamã
amnhĩm kuto nê hã ànhunh o hkrĩ
nhũm mẽ hwỳr tê nê mẽ ãhkõ hã
ànhunh o nhỹ.

⁵⁵⁻⁵⁶ Rõm nhũm ixkre kamã mẽ
pikuprõnh xwỳnhjaja tee ri Je-
jus ã krĩ nhõ xwỳnhjê kukja nê mẽ kãm:

—E mẽ atõ na ka pre Je-
jus kot tanhmã amnhĩ tomnuj to hã omu?

Mê atõ mẽ inhmã harê pa mẽ
ama nê Rõm nhõ xwỳnhjê nhĩhkram
haxà kê mẽ pamã kupĩ. Anê.

Hãmri nhũm mẽ axpên pãnhã
tanhmã jarênh to. Tanhmã kot
amnhĩ tomnuj to hã jarênh to htã
nom ri ho hêx jakamã axpên kwỳm
ri tanhmã ri jarênh to nhũm mẽ tee
ri mẽ kuma nê mẽ kãm:

—Tk. Kwa mẽ axpên kwỳm ri
tanhmã jarênh to hkêt nê. Axpên
kôt mãn ri tanhmã mẽ inhmã
jarênh to. Anê.

⁵⁷ Hãmri nhũm mẽ hkwỳjaja
kãnhmã kuhê nê axpên kôt tanhmã
ho hêx to nê mẽ kãm:

⁵⁸ —Nà kot paj mẽ amã tanhmã
kot amnhĩ nhĩpêx to hã harê. Na pa
prem ã kapêr anhỳr ã kuma. Na pre
tanhmã Tĩrtũm mã amnhĩ jarênh
xà hã ixkreta jarênh to nê jarênh o:
“Kot paj ixkreja grãnh pa hãmri nê
ixtã apkati axkrunêpxi nê akupỳm
hipêx. Nom kot paj amnhĩ nhĩhkra
ho hipêx kêt nê.” Anhỳr ã ã amnhĩ
jarênh anê pa mẽ kuma.

⁵⁹ Anhỳr o harênh tã nom axpên
kôt harênh kêt nê. Arĩ axpên kwỳm
ri harê. ⁶⁰ Hãmri nhũm mẽõ pa-
tre maati tee ri mẽ kot tanhmã ho
kapêr toja ma nê mẽ aptãr tũmjê
noo mã kãnhmã xa nê Je-
jus mã kãm:

—E na ka ra mẽ kot ã ajarênh
anhỳrja ma. Xà kot kaj tanhmã mẽ
inhmã amnhĩ tã axãprãr to hkêt nê?
Xà ãm hãmri na mẽ ajarê? E kwa
mê inhmã tanhmã amnhĩ jarênh
to. Anê.

⁶¹ Nõ nhũm akryk xa nê tanhmã
kãm nê hkêt nê. Hãmri nhũm tee ri
ã kot amnhĩ nhĩpêx anhỳr ã omu nê
axte kãm:

—Kwa mẽ inhmã amnhĩ jarê. Xà
apê Tĩrtũm Kra na ka? Xà ka na apê
Tĩrtũm kot mẽ ixwỳr amênh xwỳnh
na ka? Anê.

⁶² Hãmri nhũm tã kãm amnhĩ jarê
nê kãm:

—Tỹ. Ixpê tãmta na pa. Ra mẽ ate
jarãhã tanhmã ijarênh to kaxyw
apikuprõnh tã nom kot paj nhỹrmã
mê kamjaja tanhmã mẽ ajarênh to
ka mẽ amnhĩ tã ixpumu. Kot kaj

mě Tirtūm kot mẽ ato amnhĩptàr xà kutà akrĩ hāmri pa hwýr tẽ nẽ ìhkô hã nhỹ. Kakra kamã kot paj hwýr tẽ nẽ ìhkô hã nhỹ hāmri nẽ ý hã tanhmã mẽ ajarẽnh to ka mẽ amnhĩ tã ixpumu. Anẽ.

⁶³⁻⁶⁴ Hāmri nhũm tee ri ã kot amnhĩ jarẽnh anhỹrja ã kuma nẽ gryk xaj amnhĩ xẽ kaxô nẽ mẽ àptàr tũmjẽ mã kãm:

—Kwa mo kaxyw kot puj mẽ axte ri ho tanhmã kot amnhĩ tomnuj to hã harẽnh xwýnhjẽ hõ japêr? Ra tãm kot amnhĩ pẽ Tirtūm Kra hã amnhĩ to hẽx nhũm mẽ pahte paja-mak o mar kẽnã. E tanhmã kot puj mẽ ho? Anẽ.

Hāmri nhũm mẽ kãm:

—Nà kot puj mẽ kupĩ. Ra htyk mã tãm kẽnã. E kwa tokyx pu mẽ ma Rõm nhõ pahĩti hwýr o tẽ kẽ mẽ pamã hã amỹnẽ kẽ mẽ kupĩ. Anẽ.

⁶⁵ Hāmri nhũm mẽ hipêx kati rax nẽ. Nẽ hkuk kuhtõ nẽ hpãnhã no hpro nẽ htak nẽ kãm:

—E mẽ kot atak xwýnhjẽ nhĩxi jarẽ. Apẽ Tirtūm Kra hã ate amnhĩ jarẽnh jakamã mãn urak nẽ axàhpumunh týx. Jakamã e mẽ hixi jarẽ. Anẽ.

Nhũm prem ã hipêx anẽ hāmri nẽ pòristijẽ nhĩhkram haxà nhũm mẽ htak rax o kuhẽ.

Simãw Pêtre kot Jejus kôt pa hkêt ã kot amnhĩ jarẽnh

Matêwre 26.60-75; Rukre 22.54-62; Juãw 18.15-18, 18.25-27

⁶⁶⁻⁶⁷ Rõm nhũm Simãw Pêtre arĩ kítare kamã mẽ ìhkô hã ànhunh o nhỹ. Hāmri nhũm mẽõ patre maati mã àpênh xwýnh nitita mẽ hwýr kato nẽ xa. Hāmri nẽ hirã kamã hprĩ hã Simãw Pêtre pumu nẽ omunh mex kurẽ kumrẽx nẽ kãm:

—Xẽ pẽr apẽ Najare nhõ xwýnh Jejus kôt mẽ pa ho mẽ pa xwýnhjẽ hõ na ka. Anẽ.

⁶⁸ Hāmri nhũm tee ri kuma nẽ ra kãm ma nẽ. Nẽ kãm amnhĩ tã aprã nẽ kãm:

—Tk. Kokỹ. Ixte mẽhõ my ata pumunhre hã. Anẽ.

Hāmri nẽ kãnhmã xa nẽ ma tẽ nẽ kítare hwýr kahẽ hkôt ã mẽ hkax ã ahte xa nhũm krãhyre kà. ⁶⁹ Nẽ gaa nhũm hpãnhã mẽ kãm àpênh xwýnhjẽ hõja omu nẽ hã mẽ kãm:

—Xẽ ma ãm hāmri na harẽ. Kôt ri mẽ pa xwýnhjẽ hõ na pẽr. Anẽ.

⁷⁰ Hāmri nhũm amnhĩ tã kuma nẽ kãm:

—Tk. Kwa nà. Mẽ ri ã amnhĩ krã hkôt ri ixto axêx anhỹr kêt nẽ. Aa ixte mẽhõ ata pumunh kêt kumrẽx. Anẽ.

Hāmri nhũm mẽ hkwýja gaa nẽ kẽ axte hprĩ hã omu nẽ kãm:

—Kwa ãm hāmri na mẽ ajarẽ. Apẽ Jejus hkwý na ka. Ajaxwýja apẽ Garirej nhõ xwýnh kẽnã. Anẽ.

⁷¹ Hāmri nhũm tee ri mẽ kuma nẽ kãm ma htýx nẽ. Hāmri nẽ mẽ kãm:

—Kwa nà. Na pa Tirtūm noo mã mẽ amã amnhĩ jarẽ. Kot paj amnhĩ to ixêx japêr nhũm inhma nẽ hã tanhmã ixto. Nà uràn ixpẽ Garirej nhõ xwýnhre hã. Ixte mẽhõ mũj pumunh kêt kumrẽx tã ka mẽ xatã axpẽn kôt ixte hkôt ixpa ho ixpa xwýnh ã ixkamnhĩx o xa.

Anhỹr o ra mẽ kãm amnhĩ tã aprãr o axkrunẽpxi. ⁷² Hāmri nhũm axte krãhyre kà. Jao ra hkàr o axkrut. Hāmri nhũm Simãw Pêtre kuma nẽ Jejus kot ra hkukamã ã amnhĩ nhĩpêx anhỹr ã harẽnhja mã hamaxpêr kurẽ kumrẽx. Krãhyre kormã hkàr o axkrut kêt ri kot mẽ kãm amnhĩ tã aprãr o axkrunẽpxi hã harẽnhja mã hamaxpêr. Hāmri nẽ ra kãnhmã hakry hpar o tẽ nẽ hkaprĩ htýx kumrẽx. Hāmri nẽ tee ri amnhĩ kukamã hamaxpêr nẽ amnhĩ mã:

—Hêxta waa nẽ. ãm hāmri na pre Jejus ijarẽ. Tã pa kot ijarẽnh xà hkôt ã amnhĩ nhĩpêx anẽ. Kwa mo na pa axtem nẽ ã mẽ kãm amnhĩ to ixêx anẽ?

Anẽ hāmri nẽ hkaprĩ xaj mýr rax nẽ.

15

Pirat kot Jejus kukjêr ã harênh
Matêwre 27.1-2, 27.11-14; Rukre
23.1-5; Juãw 18.28-38

¹ Tã nhũm myt kato nhũm mē axte Jejus ã axpên wÿr akuprô. Patre krãhtũmjê mē Ijaew krãhtũmjê mē Tĩrtũm kapêr tũm o mē ahkre xwÿnhjê mē Ijaew nhô juistijaja nhũm mē piitã hã akuprô. Hãmri nê pôristi mã anê nhũm mē Jejus pa hpre nhũm mē ma Rôm nhô xwÿnhjê nhô pahi Pirat wÿr o tẽ. Piratja na pre hte Rôm nhô xwÿnhjê nhô pahi Sesti nhÿ hã Ijaew o amnhĩptar o pa nhũm prem ma hwÿr o tẽ. ² Hãmri nê kutã ãm nê tanhmã kãm harênh to nê kãm:

—E ot pa mē awÿr jahti ho tẽ. Na hte mē inhmã hêx rũnh o pa. Mē ixte Pahihti Sesti kapêr kwÿm ri amnhĩ nhĩpêx prãm xãj tanhmã mē inhmã hêx to. Nê axtem nê mē ixte Sesti mã kãxpore hkwy nhôr kêt ã mē inhmã karô. Nê Tĩrtũm kot mē ixkaxyw kêp mē inhô pahi hã ãm ã amnhĩ jarênh o pa. Na hte ã mē inhmã amnhĩ to hêx anhÿr o pa. Anê.

Hãmri nhũm Pirat mē kuma nê Jejus pumu nê tanhmã hkukjêr to nê kãm:

—E inhmã amnhĩ jarê. Xã ãm hãmri na mē ã ajarênh anê nã? Xã apê Ijaew nhô pahi na ka? Xã ka na htem amnhĩ wÿr akãm hamak o pa? Anê.

Hãmri nhũm kãm:

—Tÿ. Nã ãm hãmri na ka ã ijarênh anê. Anê.

³ Hãmri nhũm patre krãhtũmjaja tanhmã kãm ho kapêr to. ⁴ Nhũm mē kuma nê axte hkukja nê kãm:

—Kwa na mē ã ajarênh anê ka mē ama nê ãm mē ama nê inhmã tanhmã amnhĩ tã axãprãr to hkêt nê. Anê.

⁵ Nom nhũm Jejus ãm akryk xa nê tanhmã axte kãm nê hkêt nê. Jakamã nhũm Pirat tee ri omunh pê hamaxpêr o nhÿ.

Pirat kot Jejus pĩr ã àmnênh ã harênh

Matêwre 27.15-26; Rukre 23.13-25; Juãw 18.39–19.16

⁶ Na pre hte pahi Pirat arĩgro pê Pasja ã Ijaewjaja kãm hprãm xã hkôt mē hagjênh xwÿnhjê ho hpÿnh nê mē kãm ure. ⁷⁻¹⁰ Jakamã nhũm Ijaew kwÿjaja hwÿr mra nê kãm:

—Pa. Kwa xã kot kaj jarãhã mē inhmã mē hagjênh xwÿnhjê hõ mã anhũre nã? Anê.

Hãmri nhũm mē kuma nê hamaxpêr o:

—E paj Jejus ã mē kuma nê kãm inhũre. Mē piitã mē kãm kapêr mar prãm nhũm mēo patre krãhtũmjaja pix kot mē hkôt kamã gryk nê ã ixwÿr o mrrar anhÿr kênã. Anê.

Hãmri nê mē kãm:

—Tÿ. Nã kot paj mē amã hõm inhũre. Kwa xã kot pa mē amã mē anhô “pahihti” jarênhja mã inhũre nã? Anê.

¹¹ Hãmri nhũm patre krãhtũmjaja tee ri kuma nê mē kãm:

—Kwa mē kãm anê kê Parapas mã mãn ure. Anê.

Hãmri nhũm mē kuma nê Pirat mã kãm:

—Nã Jejus mã anhũrer kêt nê. Parapas mã mãn anhũre. Anê.

¹² Hãmri nhũm mē kãm:

—No mē ate mē anhô pahi hã harênh xwÿnhhta? Tanhmã kot paj ho? Anê.

¹³ Hãmri nhũm mē àmra kamã kãm hã amÿnê nê kãm:

—Kwa pĩ kahpa hã anhô kê ty. Anê.

¹⁴ Hãmri nhũm tee ri mē kuma nê mē kãm:

—Tk. Kwa nã. Tanhmã kot amnhĩ tomnuj tore hã kot pa ã hipêx anê.

Anhÿr tã nhũm mē xatã anhĩpê kãm kapêr kãm hihtÿx nê kãm:

—Kwa pĩ kahpa hã mãn anhô kê ty. Tokyx ã mē inhmã hipêx anê.

Anhÿr o kuhê. Kãx pê kãm anhÿr o kuhê. ¹⁵ Nhũm tee ri mē kuma hãmri nê mē kãm hprãm xã hkôt mē kãm Parapas mã ure. Nê pôristi

hkwýjê mã Jejus ã amýnê nê mẽ kãm:

—Tôe. Mẽ mamrĩ hwýr tẽ nê htak hãmri nê kapôt ã mẽ hpar xà hã pika hwýr o tẽ nê pĩ kahpa hã anhô. Anê.

Mẽ kot Jejus tak ã mẽ harênh

Matêwre 27.27-32; Juãw 19.2-3

¹⁶ Tã nhũm pòristijaja akupým ixkreja wýr Jejus o axà nê amnhĩ wýr hkwýjê hã karô nhũm mẽ hwýr agjê nê Jejus ã akuprô. ¹⁷ Hãmri nê kêp pahi hã hpêr o pikênh kaxyw kãm pahi hã mẽ ahkà nhĩpêx nê hkrãm haxà. Nom axtem nê akuñĩ kamã mẽmo mrô nhĩ te kot ronh kanêre pyrãk xwýnhja nhũm mẽ kãm hikãx nê hkrãm haxà. Hãmri nê kêp ê kapa nê pahi hã mẽ ê kamrêk ô py nê kãm haxà. ¹⁸ Hãmri nê kãm:

—E apê Ijaewjê nhô pahi na ka. Anê.

¹⁹ Hãmri nê xatã axpên pãnhã hwýr mra nê pĩ ho hkrãx pê htak nê hkuk kuhtô nê hã hpêr o pikênh pê hã hpijaam pyrã nê kutã hkôn krã ho hkrĩ. ²⁰ Hãmri nê kêp pahi xê kapa nê akupým kãm ê jaxà nê pĩ kahpa hã nhôr kaxyw ma o kato nê o tẽ.

²¹ Nom nhũm ra hiro týt nê nhũm mẽ tee ri omu hãmri nê mẽhõ kot ho ajuta kaxyw mẽ kot hkôt omunh o môr xwýnhjê kapi ho xa. Hãmri nê Sirên nhô xwýnh Simãw hkà htykreja pumu. Aresãn mẽ Rupti wa hipêêxà na pre. Nhũm htýx hamakêtkati nê mẽ kutã krĩm tẽ. Hãmri nhũm mẽ haê nê unê nê kãm Jejus o ajuta kaxyw hã karô nhũm kãm pĩ kahpaja mý nê mẽ hkôt o tẽ.

Mẽ kot pĩ kahpa hã Jejus nhôr ã mẽ harênh

Matêwre 27.33-44; Rukre 23.33-43; Juãw 19.17-27

²² Nhũm mẽ ra kên nhĩxêt te kot mẽ hkrã hi pyrãk xwýnhja wýr Jejus o pój. Mẽ kot kãm “Korkot” anhýr xwýnhja wýr. Mẽ pakapêr kãm na htem Korkotja jarênh o: “Mẽ hkrã

hi xà” anê. Jakamã nhũm mẽ ra hwýr o pój. ²³ Hãmri nê kot pĩ kahpa hã nhôr kaxyw wĩhti hkwý ho mẽ mẽmo mẽhkanexà pê mĩra ho ahkà. Kot ho kôm nê amnhĩ xà htýx kãm hamak kêt kaxyw hipêx nê kãm kugô nom nhũm hkaga nê ho hkôm kêt nê. ²⁴⁻²⁶ Hãmri nhũm myt kaxkwa nhĩpók wýr tẽ nhũm mẽ pĩ kahpata ã Jejus xi nê prek o ãhkra ho htýx nê hpar o htýx. Nê hpãnhã kaxyw kakwý nê kãnhmã pĩ kahpa jarĩ nê kre kamã ãm nê hity hpa. Nhũm Jejus kýt pê amnhĩ xà htýx kumrêx kamã hamak o ajêt. Nhũm pòristi hõja tẽ nê tapti hõ py nê hã kaga ho:

IJAEWJÊ NHÔ PAHI NA JA

Hãmri nê Jejus wýr ho api nê mý ri kunhõ. Hãmri nhũm hparpê pòristi hkwýja axpên mã ê hkwý ho hpi-gràn h kaxyw hã kênre ho jôka ho hkrĩ.

²⁷⁻²⁸ Tã nhũm mẽ wa kot amnhĩ tomnuj xwýnh wa ho axkrut nê mã wa ho anê nê. Nê pĩ kahpa hã prek o wa ãhkra ho htýx nê wa hpar o htýx hãmri nê akutã ho Jejus nhĩjê nhũm wa ajêt.

²⁹ Hãmri nhũm mẽ kot omunh mã mrrar xwýnhjaja Jejus pumu nê hã hpêr o pikênh punuj nê hkrã ho apê nê kãm:

—Kwa na ka pre ate Tirtũm mã amnhĩ jarênh xà hã ixkre gràn h par nê atã apkati axkrunêpxi nê akupým hipêx par ã amnhĩ jarênh o apa. Nê axãhpumunh o axãhpumunh ã amnhĩ jarênh o apa. ³⁰ Jakamã e kwa amnhĩ kapa nê wrý pa mẽ ja hã apumu. E kwa tokyx. Anê.

³¹ Nê patre krãhtũmjê mẽ Tirtũm kapêr tũm o mẽ ahkre xwýnhjaja piitã hwýr mra nê hã hpêr o pikênh o kuhê. Nê axpên mã kapêr o:

—E jahti na xep pre mẽ kamã ukapri ho pa nê tanhmã mẽ ho ajuta hto ho pa. Tã tãm tanhmã amnhĩ to nê wrýk kêt nê. ³² Kwa pa mẽ arĩ pakuhê nê kot amnhĩ kaxãr nê wrýk kãm omu. Kojã wrý pu mẽ

omu në kêp mē panhō pahihiti hā hkôt pajamaxpêr kurê kumrêx. E tokyx wrÿ Jejus pa mē awrÿk kām apumu. Nā kot kaj awrÿk rax në. Anê.

Hāmri nhūm akutā wa kot hijê në jêt xwÿnh wa haxwÿja kām kapêr punuj o ajêt.

Jejus htyk ā harênh

Matêwre 27.45-46; Rukre 23.44-49; Juāw 19.28-30

³³ Tā nhūm ra kaxkwa nhÿpôk ri myt nhÿr mē nhūm te kamāt pyrāk. Nhūm kamāt kô rax kumrêx o ra hā awry mē nhūm akupÿm myt katêr o mō. ³⁴ Hāmri nhūm Jejus àmra kamā Tirtūm mā kapêr në kām:

—Inhō Tirtūm inhō Tirtūm. Kwa mon ka ixkaga? Anê.

Nom kapêr kām kapêr o:

—Eri Eri rāmā sapatani. Anê.

³⁵ Hāmri nhūm mē kot mar o kuhê xwÿnhjaja kot Eri hā harênh ma në htÿx ho finat Eris mā kapêr ā hkamnhÿx. ³⁶ Hāmri nhūm ja hprôt në mēmo rereeti py në pÿ ho hkanhwÿ në o tē në ho wÿhti nhek në Jejus wÿr o tē në kot hkaôr kaxyw kām kupê. Hāmri në hkwyjê mā kām:

—E hāmri pu mē jar hkàx ā pakuhê në Eris jamā măn. Kojā kuma në hwÿr tē në o wrÿ nā? Anê.

³⁷ Nom nhūm Jejus ra htyk kaxyw në àmra htÿx në ty.

³⁸ Hāmri nhūm Tirtūm mā amnhÿ jarênh xā hā ixkre kamā hakwakre hā kupêxêja axkjê në amnhÿ kahê xā mēnh kurê kumrêx. Utÿ rax tā kÿj rūm ahpār mā axkjê në amnhÿ kahê xā mē. Te Jejus htyk o mē pahte hkôt amnhÿ xunhwÿr xwÿnhjê mā Tirtūm wÿr pry jakwa kre kahê xā mēnh pyrāk o ā amnhÿ kaxôn anê. ³⁹ Nhūm pôristi krāhtūmjê hōja Jejus parpê kutā htyk kām omunh o xa. Hāmri në tee ri omu në hamaxpêr o:

—Hêxta waa në. Ām hāmri na pre hte kêp Tirtūm Kra hā amnhÿ jarênh o pa. Tā pa mē amarÿ kupÿ. Anê.

⁴⁰⁻⁴¹ Rôm nhūm mēni kwÿjaja amÿm htyk kām omunh o kuhê. Na pre htem Garirej kamā Jejus mē hkôt mē pa ho mē pa xwÿnhjê mā mē apkur xā hā àpênh o mē hkôt pa në mē hkôt Jerujarê hwÿr mō. Marir Matarênh në Xiakre mē Jojes wa katorxā Marirja. Nê Sarome. Nê määnênh mēni hkwyjaja nhūm mē amÿm Jejus htyk kām omunh o kuhê.

Mê kot Jejus jaxàr ā harênh

Matêwre 27.57-61; Rukre 23.50-56; Juāw 19.38-42

⁴² Nhūm prem arÿgro pê sêsta hā Jejus pÿ nhūm ra amÿkry htÿx në. Sap kukamā na pre htem Ijaewjaja amnhÿm apkur xā hā mēo nhÿpêx pa nhūm sap kato nhūm mēmoj to anhÿr kêt në. ⁴³ Jakamā nhūm Juje hō pê Arimatej nhō xwÿnhja. Kêp Ijaewjê nhō juisti hō na pre. Nhūm mē piitā kām hkÿnh në axpên mā mex o mex ā harênh o pa. Na pre Tirtūm kot mē pahwÿr Jejus mēnh kôt hamaxpêr o pa. Tā Jejus htyk ā omu hāmri në hamaxpêr o:

—E pa ma pahi Pirat wÿr tē në Jejus nhÿ hā kuwÿ. Inhmā uma htā kot paj ma hwÿr tē në hā kuwÿ kê inhmā kugō pa ma o tē në tokyx haxā. Kot paj ho anhÿr tokyx anhÿr kêt nhūm mē panhō arÿgromnu pê sapja wÿr ra myt axā hāmri pa haxàr kêt në.

Anhÿr o hamaxpêr në ma Pirat wÿr tē në hā kuwÿ. ⁴⁴ Hāmri nhūm amnhÿ jaêr pê ra htyk ā harênh ma në amnhÿ wÿr pôristi krāhtūmjê hō hā karō në hā hkukja në kām:

—Kwa xā na ra Jejus ty? Anê.

Hāmri nhūm kām:

—Tÿ na ra ty. Anê.

⁴⁵ Hāmri nhūm kuma në Juje mā kām:

—Tōe. Mamrÿ ma o tē në haxā. Anê.

⁴⁶ Hāmri nhūm kuma në akupÿm Jejus wÿr tē në pôristi mā anê nhūm mē kām ho wrÿ. Nhūm kumÿ në kupêxê ho hkupu hpa në o tē në kên

kre kakwŷnh kām haxà. Hāmri nē kēn rax o hitom mex nē ma akupŷm krīm tē. ⁴⁷ Nhūm Marir Matarēn mē Juje katorxà Marir ōja wa ma hkôt tē nē kot haxàr kām omunh o xa. Kot mē hkuxwa xà ho gregrer kêt rāhā haxàr kām omu.

16

Jejus akupŷm htīr ā harēnh

Matēwre 28.1-10; Rukre 24.1-12; Juāw 20.1-10

¹⁻² Tā nhūm apkati. Nom nhūm ra mē inhō arīgromnu pē sap kator jakamā nhūm mē kormā akupŷm kēnkreta wŷr mrrar kêt nē. Hāmri arīgro mex jamār pē kōkôt o hkrī. Hāmri nhūm axte apkati nhūm tōmīk nhūm ra mē inhō arīgromnu hapēx nhūm Marir Matarēn mē Sarome mē Xiakre katorxà Marirja mē ma akupŷm kēnkreta wŷr mra. Kormā kwŷhtāā. Kormā myt kator o mōr mē nhūm mē kànhmā hkrī hāmri nē mē kot Jejus gregrer kaxyw mē hkuxwa xà hkwy jamŷ nē ma hwŷr o mra. ³ Hāmri nē kormā mōr ri tee ri amnhī kukamā hamaxpēr nē axpēn mā:

—Xē gāā nē. Mēhō koja mē pamā nhām kēnkre nē hitom raxta xām pu mē Jejus wŷr agjē nē gregrer? Utī rax kumrēx kēnā. Anē.

⁴ Hāmri nē hwŷr pōj nē omu nhūm ra hitom xàja kàx ā nō nhūm mē tee ri omu. Utī rax tā ra kàx ā nō. ⁵ Hāmri nhūm mē kēnkre hwŷr agjē nē upōk rūm mēhō nyw pumu. Nhūm ē jakajre kamā nhŷ nhūm mē amnhī jaēr pē omu nē tee ri hamaxpēr. ⁶ Hāmri nhūm mē kām:

—Kwa mē amā ma hkêt nē. Mē ate Najare nhō xwŷnh pē Jejus pumunh kaxyw na ka mē mra. Mē kot pī kahpa hā nhōr xwŷnhhta. Nom jar amrakati. Na ra Tīrtūm akupŷm ho htīr. E mē kam nē amnē agjē nē ano ho nōr xà kaprŷ pumu ⁷ nē tokyx ma akupŷm mra nē hkôt mē pa ho pa xwŷnhjē mā harē. Koja ma Jejus mē akukamā akupŷm Garirej wŷr mō. Garirej

kamā kot kaj mē axte axpēn pumu. Ra kot mē amā amnhī jarēnh xà hkôt. Kwa mē tokyx ma akupŷm mē hwŷr mra. Nē kwa kē Simāw Pētreja harēnh mar mex nē. Anē.

⁸ Hāmri nhūm mē kuma nē awjanā nē ma akupŷm hprôt. Nē tee ri hamaxpēr nē kām ma xāj httertēt tŷx jakamā kormā nhām mēhō mā harēnh kêt nē.

Jejus kot Marir Matarēn wŷr kator ā harēnh

Juāw 20.11-18

⁹ Nhūm semān nyw mā àr xà hā arīgro pē tōmīkja ā nhūm Jejus akupŷm htīr. Hāmri nē Marir Matarēn kumrēx wŷr kato. Kot nē mēkarōmnuti ho ⁷ nē nē hanor xwŷnhhta kumrēx wŷr kato. ¹⁰ Hāmri nhūm akupŷm htīr kām omu nē hkīnh tŷx kumrēx. Nē ma akupŷm tē nē Jejus krāmnhwŷjē mā harē. Nhūm mē hkaprī nē mŷr o hkrī nhūm mē hwŷr axà nē mē omu nē mē kām:

¹¹ —Xē mē amŷr kêt nē. Na ra Jejus akupŷm htīr nē ham ixwŷr kato pa inhno ho omu. Xē mē hāmri axte amŷr kêt nē.

Anhŷr tā nom nhūm mē htŷx ho amnhī krā hkôt kot ri ā harēnh anhŷr ā hkamnhix jakamā kuma nē ām kuma.

Jejus kot hkwyjē hwŷr kator ā harēnh

Rukre 24.13-35

¹² Tā nhūm Jejus axte ja wa hwŷr kato. Kôt mē pa ho pa xwŷnh wa ho axkrut nē wa hwŷr kato. Na pre wa Jerujarē rūm kato nē akupŷm wa ō krī hwŷr mōr mē nhūm wa hwŷr kato. Nom axtem tanhmā amnhī nhīpēx to nē wa hwŷr kator jakamā nhūm wa tokyx hprī hā kēp Jejus ā omunh kêt nē. ¹³ Tā kēp Jejus ā omu hāmri nē akupŷm Jerujarē hwŷr mō nē hkwyjē mā harēnh kurē kumrēx. Nom nhūm mē wa kuma nē ām wa kuma nē akupŷm htīr kôt hamaxpēr kêt nē.

Jejus kot hkwyjê mã mẽmoj tâ karô hã harênh

Matêwre 28.18-20; Rukre 24.44-49; Juãw 20.19-23; mããnên Atre 1.6-8

¹⁴Tã nhũm Jejus tâ hkôt mẽ pa ho mẽ pa xwýnh pê 11 wýr kato nhũm mẽ kamã no pyma nê hkĩnh tỳx nê omunh o kuhê. Hãmri nhũm mẽ kãm:

—Kwa hêxta waa nê. Marir Matarên mẽ akwýta mẽ kot akupým ixtír kãm ixpumunh nê mẽ amã ijarênh tâ ka mẽ ama nê ãm mẽ ama. Pêr ãm mẽ akrã hihtỳx jakamã na ka mẽ ama nê mẽ hkôt ajamaxpêr kêt nê. Anê.

¹⁵Hãmri nê mẽ kot tanhmã kãm amnhĩ nhĩpêx to ho pa hã mẽ kãm karô nê mẽ kãm:

—E kêr ka mẽ ma krĩ piitã hkôt mẽ kãm ijarênh o ri mẽ hkôt apa. Ixte tanhmã mẽ nê amnhĩ nhĩpêx toja ka mẽ aprĩ hã mẽ kãm ijarênh o ri mẽ hkôt apa. ¹⁶Nê mẽ kot mẽ akapêr mar nê amnhĩ kaxyw ixkôt hamaxpêr xwýnhjaja kêr ka mẽ hkrã kumrã nhũm mẽ nhỹrmã Tĩrtũm mẽ wa ixri htĩr tũm nê mex rãhã nê pa ho pa. No mẽ kot amnhĩ kaxyw ixkôt hamaxpêr kêt xwýnhjaja koja Tĩrtũm nhỹrmã amnhĩ nê mẽ hano nhũm mẽ ma kuwy hwýr pa.

¹⁷—Nê amnhĩ kaxyw ixkôt mẽ ajamaxpêr xwýnhjaja kot kaj mẽ inhỹ hã tanhmã amnhĩ nhĩpêx to ho ri apa. Aa mẽ kot mẽmoj pumunh kêt kwý ho anê nê inhỹ hã inhĩxi jarênh kôt mẽ nê mẽkarõmnuti janor o ri mẽ hkôt apa. Nê mẽ ate nhãm mẽ kapêr mar kêt tâ inhỹ hã ho akapêr mex o apa. Mẽ ate mar kêt tâ ra ho akapêr nhũm mẽ kot mẽ kapêrta mar xwýnhjaja hprĩ hã mẽ amar mex nê. ¹⁸Nê kot kaj mẽ nhỹri atỳx kagã xoprê hõ hpyr tâ no nhũm tanhmã mẽ ato hkêt nê. Rỳ atỳx mẽmoj to mẽ hpar xà hkwy ho akõm tâ no nhũm tanhmã mẽ ato hkêt nê. Nê inhỹ hã mẽ à xwýnhjê hã mẽ

anhĩkra jaxwý nhũm mẽ akupým mex. Kot kaj mẽ amnhĩ kaxyw ixkôt mẽ ajamaxpêr xwýnhjaja ã inhỹ hã amnhĩ nhĩpêx anhỹr o ri apa. Anê.

Jejus kot akupým kaxkwa hwýr àpir ã harênh

Rukre 24.50-53; mããnên Atre 1.6-11

¹⁹Tã nhũm mẽ panhõ Pahihti Jejusja hkôt mẽ pa ho mẽ pa xwýnhjê mã kapêr pa hãmri nhũm Tĩrtũm ma akupým amnhĩ wýr kaxkwa hwýr ho api. Hãmri nhũm kaxkwa kamã Tĩrtũm nhĩhkô hã upòk rũm nhỹ. Kot ìhkô hã mẽmoj piitã ho amnhĩptàr kaxyw hkrĩ ho hkrĩ. ²⁰Hãmri nhũm hkôt mẽ pa ho pa xwýnhjaja ma akupým àpir kãm omu hãmri nê angrã nê ma krĩ piitã hkôt mẽ kãm Tĩrtũm kapêr jarênh o pa nhũm Pahihti Jejus mẽ ìhkô hã pa ho pa. Nhũm mẽ ma ý hã hkwyjê mã aa mẽ kot mẽmoj pumunh kêt kwý ho anhỹr o ri mẽ hkôt pa nhũm mẽ ja hã mẽ omu nê axpên mã mẽ harênh o:

—Nà ãm hãmri na mẽ pamã Tĩrtũm kapêr jarênh o pa nê ho hêx kêt nê. ý hã mẽ kot aa mẽ pahte mẽmoj pumunh kêt kwý ho anhỹr o pa kênã. Nà ãm hãmri na ã mẽ pamã kapêr jarênh anhỹr o pa. Anê.

Ja kôt na Makre kot Jejus jarênhja hapêx.

Rukre Rukre tanhmã Jejus kot amnhĩ nhĩpêx to ho pa hã kagà

Rukre na pre kagàja nhĩpêx. Kêp Ijaew kêt xwýnh na pre. Tã amnhĩ kaxyw Jejus kôt hamaxpêr. Na pre kêp tôtô nê mē hkane ho pa. Nê Jejus nhỹ hã kapêr o pa xwýnhjê hõ pē Pawreja kôt pa ho pa. Tã tanhmã hamaxpêr to nê hkrãmnhwý Teopre mã kagàja nhĩpêx nê kamã tanhmã Jejus kot amnhĩ nhĩpêx to ho pa hã harê nê hã kagà.

Nê Jejus kêp Tirtũm nhỹ hã kapêr o pa xwýnh ã harê. Nê mē pahpyrà nê í ho í hã harê. Nê kêp mē pakamã ukapřĩ xwýnh ã harê. Nê kêp mē pahte amnhĩ tomnuj o hapêx xwýnh ã harê. ã na pre Rukreja hkrãmnhwý Teopre mã Jejus jarê nê hã kagà anê. Nê mãânên mē pahpiitã mē pakaxyw harê nê hã kagà.

Rukre kot Teopre mã amnhĩ jarênh

Atre 1.1-2

¹ Pa pahi Teopre. Xà amex? E ot pa awýr kagà nhĩpêx nê awýr kumê. Ixte amã Jejus jarênh kaxyw. Na prem ra ohtô nê jar mē pahkôt Jejus kot amnhĩ nhĩpêx o pa hã kagà rax nê. ² Jejus nhỹ hã Tirtũm kapêr jahkre ho mē pa xwýnhjaja na prem Jejus kot tanhmã amnhĩ nhĩpêx to hkrax kãm kot amnhĩ nhĩpêx o pa hã omunh o hkôt pa. Hãmri nê hprĩ hã mē inhmã harê nê hã kagà nhũm mē ohtô nê mē mar xà hkôt mē urà nê kot tanhmã amnhĩ nhĩpêx to ho pa hã kagà. ³ Tã pa mē harênh ma nê ijamaxpêr o:

—E kot paj ijaxwýja Jejus kot amnhĩ nhĩpêx kwý hã kagà. Nà kot paj ho anê.

Anhýr o ijamaxpêr jakamã ot pa ra ixte amã hã kagà kaxyw.

⁴ Tã kêr ka kamã harê nê ixpyrà nê ama nê aprĩ hã harênh mar týx nê mē kot amã harênh xwýnhjê hkôt ajamaxpêr týx o apa. ãm hãmri na prem mē amã harê. E kot paj amã hkwy hã kagà. Ixpê akrãmnhwý Rukre kot paj ixprĩ hã amã harê nê hã kagà.

Tirtũm kapêr o wrýk xwýnh kot Juãw Paxis jarênh

⁵ Juãw Paxis nhĩpêxã finat Jakarisja kumrêx kot paj amã harê. Kêp finat Apiasti kanrêhã htãmnhwý jakamã urak nê kêp mē apê Ijaew nhõ patre na pre. Pahihti Eroxa kormã kot mē anhõ pika kamã mē ho amnhĩptar ri nhũm Jakaris kêp patre nê pa. Nê hprõ Ijapew mē wa kêp Parãw kanrêhã htãmnhwý. ⁶ Nê wa hamê na pre Tirtũm kôt tãm amnhĩ nhĩpêx o wa pa. ãm Tirtũm kapêr kôt pix mã ri amnhĩ nhĩpêx rãhã ho wa pa.

⁷ Nom Ijapewja tanhmã hkra xà kute jakamã nhũm wa hkra hkêt nê wa pa rãhã wa ra hpigêx týx nê.

⁸ Jakamã nhũm Jakaris ma mē kot Tirtũm mã amnhĩ jarênh xà hã ixkre hwýr tē. Kwýjê pyrà nê kot Tirtũm mã tanhmã amnhĩ nhĩpêx to kaxyw ma mē hpãnhã hwýr tē nê axà. ⁹⁻¹⁰ Hãmri nê kamã Tirtũm mã amnhĩ jarênh pē kãm mē hkuxwaxà ho xêt o xa. Nhũm Ijaew kwýjaja ixkreta wýr akuprõ nê kapem kutêp Tirtũm mã amnhĩ jarênh o kuhê. ¹¹ Pu nhũm kaxkwa rũm Tirtũm kapêr o mē wrýk xwýnhja wrý nê Jakaris kutã xa. Mē hkuxwa xà ho xêt xà hã mēs kunĩhti xupók rũm xa. ¹² Hãmri nhũm amnhĩ jaêr pē amnhĩ kutã omu nê akryk omunh o xa. ¹³ Hãmri nhũm kãm:

—Pa Jakaris? Kwa tee ri ajamaxpêr o amã ma hkêt nê. Na pre Tirtũm ate akra hã hwýr o apa hã ama nê hã apumu. Jakamã

koja tanhmã aprõ hkra xà ho ka kamã akra. Nhũm nõ nẽ rax nẽ kato nẽ myre. Ka wa hã hixi nẽ nhũm kęp Juãw. ¹⁴ Koja kato ka wa omu nẽ akĩnh tỳx kumrẽx. Nhũm akwỳjaja haxwỳja ohtõ nẽ war akra jarẽnh ma nẽ war anhỹ hã hkĩnh nẽ. ¹⁵ Koja kormã akra kator kêt ri nhũm Tĩrtũm Karõja hkarõ hwỳr axà. Hãmri nhũm kato nẽ gaa nẽ hprêk nẽ Tĩrtũm mã tanhmã amnhĩ nhĩpêx to ho pa. Tĩrtũm kãm hprãm xà hkõt pix mã tanhmã amnhĩ nhĩpêx to ho pa. Nom kër ka inhmar kumrẽx. Kê mẽmoj to wĩhti ho hkõm kêt nẽ pa. Nẽ kagõxyhti ho hkõm kêt nẽ pa. ãm kwarĩ ho kwarĩ. ¹⁶ Koja hprêk hãmri nẽ mẽ apê Ijaew mã Tĩrtũm kapêr jarẽnh o mẽ hkõt pa. Nhũm mẽ ohtõ nẽ kuma nẽ kot amnhĩ tomnuj kaga nẽ Tĩrtũm kõt amnhĩ xunhwỳ nẽ hkõt amnhĩ nhĩpêx mex o pa.

¹⁷ —Tĩrtũm kot mẽ awỳr mẽ apytàr xwỳnh maati mẽnh mã xwỳnh kukamã koja mẽ kãm harẽnh o pa. Te Tĩrtũm nhỹ hã kapêr jarẽnh xwỳnh finat Eris kot amnhĩ nhĩpêx pyrãk o koja amnhĩ nhĩpêx. Nẽ uràk nẽ Tĩrtũm Karõ nhỹ hã mẽ amã Tĩrtũm kapêr jarẽnh o mẽ akõt pa. Jakamã nhũm mẽ akwỳjaja kuma hãmri nẽ amnhĩ tomnuj kaga hpa nẽ Tĩrtũm kõt pix mã amnhĩ nhĩpêx o pa. Nẽ tãm mẽ hkrajê nhĩpêx o pa. Koja mẽ ã akra Juãwja kõt amnhĩ nhĩpêx anẽ. Jao Tĩrtũm kot mẽ awỳr mẽnh mã xwỳnhhta kutêp tãm amnhĩ nhĩpêx o pa. Anẽ.

¹⁸ Nhũm pre ã Tĩrtũm kapêr o wrỳk xwỳnh Jakaris mã hkrata jarẽnh anẽ. Hãmri nhũm tee ri kuma nẽ kãm:

—Kwa xà wẽ ãm hãmri na ka ã inhãmã ixkra jarẽnh anẽ nà? Ra ixprõ mẽ wa ijamẽ wa ixpigêx tỳx kẽnã kot pa kêt wa ixkra. Anẽ.

¹⁹ Hãmri nhũm kãm:

—Nà ãm hãmri na pa ã amã harẽnh anẽ. Ixpê Gapriew na pa ã

awỳr ixwrỳk nẽ Tĩrtũm nhỹ hã amã harẽnh anẽ. Ixte Tĩrtũm nhĩhkõ hã ixkuhê xwỳnhjê hõ na pa. Tãm na awỳr inhmẽ pa awỳr wrỳ nẽ ã amã akra jarẽnh anẽ. ²⁰ Tã ate ixkõt ajamaxpêr kêt jakamã kot kaj axte axumar kêt nẽ akapêr kêt rãhã nhũm akra kato. Koja kato ka rĩ kormã akupỳm akapêr nẽ akupỳm ama. Ate ixkõt ajamaxpêr kêt jakamã kot kaj ã amnhĩ nhĩpêx anẽ nẽ rĩ amnhĩ pumu. ãm hãmri na pa ã amã ixkapêr anẽ. Anẽ.

Nhũm pre ã Tĩrtũm kapêr o wrỳk xwỳnhja Jakaris mã kapêr anẽ. Jakamã nhũm tokyx ixkre rũm kator kêt nẽ.

²¹ Hãmri nhũm ixkre kapem mẽ kuhê xwỳnhjaja tee ri kamã ama nẽ axpẽn mã:

—Tk. Kwa mo na we ri hitom kãm ho anhỹr kãm unẽ nẽ tokyx kator kêt? Anẽ.

²² Tã nhũm akupỳn mẽ hwỳr kato. Nẽ tee ri kot mẽ kãm kapêr kaxyw no ãm ãhkra pix o ri mẽ kãm tanhmã ujahkre hto. Hãmri nhũm mẽ amnhĩ jaer pè kot ã amnhĩ nhĩpêx anhỹr ã omu nẽ tee ri hkukamã hamaxpêr nẽ axpẽn mã:

—Kwa tanhmã na we amnhĩ to? Mãn hitom kãm mẽmoj tanhmã kute hã omu hã na ri ã amnhĩ nhĩpêx anẽ nà? Anẽ.

²³ Hãmri nhũm Jakaris ixkre kamã mẽmoj tã ãpênh pa hãmri nẽ ma akupỳm òrkwỹ hwỳr tẽ.

²⁴⁻²⁵ Tã nhũm hprõ Ijapewja htujarõ. Hãmri nẽ amnhĩ tujarõ hã amnhĩ pumu nẽ hkĩnh tỳx nẽ. Nẽ hamaxpêr o:

—Hêxta gàa nẽ. Ma ãm hãmri na pa pre ixkra hkêt nẽ amnhĩ kamã ixpijaam o ri ixpa. Tã ra ixtujarõ. Kot paj wa axte ri amnhĩ kamã ixpijaam kêt nẽ. Ma ãm hãmri na Tĩrtũm ã wa inhĩpêx anẽ. Na pa wa ixkĩnh tỳx kumrẽx. Anẽ.

Nhũm pre ã hamaxpêr anẽ hãmri nẽ arĩ òrkwỹ kamã hkrĩ ho hkrĩ. Aa

nhÿhÿm kator nê môr kêt rãhã hã mytwrÿ kêp 5.

Tÿrtÿm kapêr o wrÿk xwÿnh kot Marir mã hkra jarênh

Matêwre 1.18-21

²⁶ Tã nhÿm Ijapew ra htujarô hã mytwrÿ kêp 6 nhÿm Tÿrtÿm axte kapêr o wrÿk xwÿnh pê Gapriewja mẽ. Nhÿri Garirej kamã krÿ pê Najare hwÿr kumê nhÿm ma hwÿr wrÿ. ²⁷ Mêhõ pê Marir wÿr wrÿ. Nhÿm ra Juje ho mjên kaxyw. No ãm kormã hkukrit rãhã ho mjên kaxyw. Jujeja Marir pyrã nê kêp pahi finat Tawi kanrêhã htãmnhwÿ na pre. ²⁸ Jakamã nhÿm Gapriew Marir wÿr wrÿ nê kãm:

—Pa Marir? E ot pa amã Tÿrtÿm kapêr jarênh kaxyw awÿr wrÿ. Kot akôt pa ho pa jakamã koja ato mex rax kumrêx. Anê.

²⁹ Hãmri nhÿm amnhÿ tã kuma nê tee ri hamaxpêr nê hamaxpêr o:

—Xê mẽmo na we ri ã inhmã kapêr anê? Tanhmã koja we Tÿrtÿmja ixto mex rax to? Anê.

³⁰ Hãmri nhÿm Gapriew kãm:

—Kwa tee ri amnhÿ kukamã ajamaxpêr kêt nê. Tÿrtÿm kãm ajapêê. ³¹ Kot kaj atujarô nhÿm akra kato nê myre. Ka hã hixi mẽ nhÿm kêp Jejus. ³²⁻³³ Koja Tÿrtÿm amã ho mex rax nê. Nê koja mẽ piitã mẽ kãm kêp amnhÿ Kra hã ho amnhÿrit. Nê mẽ apê Ijaew o amnhÿptâr kaxyw koja mẽ akaxyw ãm nhÿm higêt pahi Tawi pyrã nê mẽ ato amnhÿptâr o pa. Mẽ ate amnhÿ wÿr kamã ajamak o apa xwÿnhhta koja. Tÿrtÿm kãm hprãm xã hkôt koja mẽ ato amnhÿptâr rãhã ho pa. Anê.

³⁴ Nhÿm pre ã kãm kapêr anê nhÿm amnhÿ tã kuma nê tee ri amnhÿ kukamã hamaxpêr hãmri nê kãm:

—Xê gàà nê. Tanhmã kot pa kêt we amnhÿ to nê ixtujarô? Kormã ixkukrit nê mo kormã inhmjên? Mê. Xã Juje kot ixkamã hkra

hkukamã na ka ã ri inhmã axujarênh anê? Anê.

³⁵ Hãmri nhÿm kãm:

—Nã koja Tÿrtÿm Karô tãm tanhmã ato ka ÿ hã tanhmã amnhÿ to hkêt tã atujarô. Jakamã koja akra kêp Tÿrtÿm Kraa. ³⁶⁻³⁷ Na ra haxwÿja anã Ijapewja htujarô. Ra hpigêx tÿx nê aa hkra hkêt nhÿm hkwyjaja kot axpên mã ôhy kamã hkra hkêt kumrêx ã harênh o pa htã ra htujarô. Tÿrtÿm kot tanhmã mẽ ho nhÿm mẽ htujarô tanhmã kêp kute hkêt. Jakamã nhÿm tanhmã ho nhÿm mjên tãm htu nhÿm ra htujarô hã mytwrÿ kêp 6. Tÿrtÿm tãm kot mẽmoj piitã tanhmã ho kaxyw ãhpumunh xihtÿx. Jakamã koja urak nê mã ato anê nê ka kormã akukrit tã atujarô. Anê.

³⁸ Nhÿm pre ã Gapriew Marir mã kapêr anê nhÿm amnhÿ tã kuma nê kãm:

—Ko. Kê mãmrÿ kãm tanhmã ixto hprãm xã hkôt mãmrÿ tanhmã inhÿpêx to. Inhmã Tÿrtÿm kapêr kôt amnhÿ nhÿpêx prãm. Kê mãmrÿ kãm tanhmã ixto hprãm xã hkôt tanhmã inhÿpêx to.

Anê nhÿm kuma nê ma akupÿm api.

Marir kot Ijapew wÿr môr ã harênh

Rukre 11.27

³⁹⁻⁴⁰ Tã nhÿm Marir amnhÿ tujarô hã amnhÿ pumu nê nã Ijapew wÿr hkra kurê kumrêx. Hãmri nê nojarêt nê ô krÿ rùm kato nê ma hwÿr mõi. Ma Ijapew papxã hwÿr mõi. Ijapew nhõ krÿja pika pê Jutej kamã nhÿri hixêt kamã na pre. Nhÿm ma hwÿr mõi hãmri nê hwÿr pøj nê Ijapew wÿr axã nê omu nê kãm:

—Ka? Xã wa amex? Anê.

⁴¹ Hãmri nhÿm kuma nê kãm:

—ÿ ma wa inhmex na pa wa ixpa.

Anhÿrja kôt nhÿm ôhy kamã hkraja haxwÿja te kot Marir kapêr mar nê amnhÿ nhÿpêx pyrãk o htu kamã ãxõnh tÿx o nõ. Hãmri nhÿm

Ijapew Tirtūm Karō nhỹ hã tanhmã Marir mã kapēr to. ⁴² Kàx pè kãm kapēr nẽ kãm:

—Xê gaã nẽ. Ra Tirtūm kot ato mex jakamã na ka akĩnh rax o mẽ inhni hkwỳjê jakrenh pa. Anhōhy kamã akraja koja Tirtūm amã ho mex rax nẽ. ⁴³ Xê mon ka ã ixto mex nẽ ixwỳr amōr anẽ? Apê inhō Pahihti katorxà htã ixto mex nẽ ã ixwỳr amōr anẽ. Hẽxta gaã nẽ. Âm hãmri na ka ixwỳr mō Marir. ⁴⁴ Na ka ixwỳr mōn pōj nẽ inhmã akapēr hãmri nhũm ixtu kamã ixkrare akapēr ma nẽ hkĩnh xàj ixtu kamã ixkamnār tỳx o nō. ⁴⁵ Na ka pre Tirtūm kapēr o wrỳk xwỳnh kot amã kapērja ma nẽ hkôt ajamaxpēr tỳx nẽ. Jakamã kot kaj Tirtūm nhỹ hã akĩnh nẽ ajamakêtcati nẽ amex nẽ ri apa. Anẽ.

Marir kot Tirtūm mã mex o mex ã grer ã harēnh

Rukre 6.20-26

⁴⁶ Hãmri nhũm Marir Ijapew kot ã kãm kapēr anhỹrja ma nẽ kãm Tirtūm mex o mex ã gre nẽ grer o: Tirtūm na mex o mex.

⁴⁷ Kêp ixkaprĩ xwỳnh na.

Kêp ixkaprĩ xwỳnh jakamã na pa inhmex nẽ ixkĩnh nẽ ri ixa.

⁴⁸⁻⁴⁹ Ixte amnhĩ to grire nhũm ja hã ixpumu nẽ ixkamã ukaprĩ nẽ ixto mex rax kumrēx.

Jakamã koja mẽ piitã axpēn kanrēhã axpēn mã ijarēnh rãhã ho pa. Tirtūm kot tanhmã ixto mex to hã ijarēnh rãhã ho pa.

Tirtūm na mex o mex nẽ hihtỳx o hihtỳx. Tã na ã inhĩpēx anẽ.

⁵⁰ Ma na hte ã amnhĩ nhĩpēx anẽ nẽ axpēn kanrēhã mẽ kot hã hpijaam xwỳnhjê pumu nẽ mẽ kutã nojarēt rãhã ho pa.

Nẽ mẽ kamã ukaprĩ rãhã ho pa.

ã na hte mẽ hipēx mex anhỹr o pa.

⁵¹ Nẽ hihtỳx o hihtỳx jakamã na hte mẽ kot amnhĩ to jarkrar o ri

mẽ pa xwỳnhjaja tanhmã mẽ ho nhũm mẽ axkaprã.

⁵² Nẽ pahihti hkwỳ kot kapēr mar nẽ âm mar xwỳnhjaja.

Na hte amnhĩ tã mẽ omu nẽ mẽ ãpēnh nẽ mẽ hapōj nẽ mẽ hpãnhã mẽ kot amnhĩ to hkryre xwỳnh kwỳ jagjê.

⁵³ Na hte mẽ kãm kapēr kôt amnhĩ nhĩpēx prãm xwỳnhjê ho mex o pa nhũm mẽ mex nẽ pa.

No mẽ kãm hprãm kêt xwỳnhjaja nhũm tanhmã mẽ ho mex to hkêt nẽ.

⁵⁴⁻⁵⁵ Âm hãmri na pre amnepē mã mẽ panhĩgēt mã amnhĩ jarēnh xà hkôt mẽ pahpē Apraaw rũm axpēn kanrēhã hkrajaja mẽ pahto mex o pa.

Mẽ pahpē Ijaew mẽ pahte kãm tanhmã amnhĩ nhĩpēx to ho papa nhũm kãm mẽ pajapē xàj mẽ pahto mex rãhã ho pa.

Nẽ mẽ pakamã ukaprĩ rãhã ho pa. Anẽ.

Nhũm pre ã Marir Ijapew mã Tirtūm mex o mex ã grer anẽ.

⁵⁶ Hãmri nẽ ri hkôt pa hã mytwrỳ axkrunēpxi nẽ ma akupỳm ò krĩ hwỳr mō.

Juãw Paxis kator ã harēnh

⁵⁷ Tã nhũm Ijapew hpijagri kaxyw õhy xà nhũm hkrare kato nẽ myre. ⁵⁸ Hãmri nhũm omu nẽ hkĩnh tỳx nẽ. Hãmri nhũm hkwỳjaja Tirtūm kot wa kamã ukaprĩ hã wa kãm wa hkra myre nhōr ã harēnh ma nẽ wa ÿ hã hkĩnh nẽ.

⁵⁹ Tã nhũm wa hkraja ra hã arĩgro pē 8 nhũm mẽ hkwỳjaja kot my kwrỳt kà krãhyr kaxyw hwỳr akuprō. Tirtūm kot mẽ kãm hã karō xà hkôt nhũm mẽ kot kãm õr ã amnhĩ to amnhĩrĩt kaxyw ã hipēx anhỹr kaxyw. Na htem ã mẽ kêp Ijaew krajē piitã mẽ hipēx anẽ. Jakamã nhũm prem ã hipēx anẽ hãmri nẽ hpãnhã tanhmã kot hã hixi mẽnh to kaxyw ri hã axpēn

kukja. Hāmri nē hipêêxà hkôt kot hā Jakaris mēnh kaxyw. ⁶⁰ Hāmri nhūm katorxà tee ri axpēn tā mē kuma nē mē kām:

—Ma koja kēp Jakaris kēt nē. Koja kēp Juāw. Anē.

⁶¹ Hāmri nhūm mē tee ri kuma nē kām:

—Kokỹ. Mo jar mē pahtō pē Juāw kot kēt ri kēp Juāw? Jar amrakati kēnā kot ka kēt wa ri ā hā hixi rēnh anē. Anē.

⁶² Hāmri nē hixi hā hipêêxà kukja. Nom nhūm arī umar kēt nē kapēr kēt jakamā nhūm mē tanhmā ri kām mē ĩhkra nhīpêx to.

⁶³ Hāmri nhūm ĩhkra ho kagà hā ahwỳ nhūm mē kām ja gō nhūm kupy nē hā mē kām hixi nhīpêx. Nhūm mē kupy nē omu hāmri nē hixi pē Juāw kôt omu. Hāmri nē tee ri hixija kukamā hamaxpēr.

⁶⁴ Rôm nhūm Jakaris akupỹm ama nē kapēr mex kurê kumrêx nē Tirtūm mā mex o mex ā harēnh o xa. ⁶⁵⁻⁶⁶ Hāmri nhūm mē omu nē ma mē piitā mē kām wa hkra jarēnh o ri axpēn kôt hprôt. Pika pē Jutej kamā hixêt kape hā krī hkôt nhūm mē ri mē piitā mē kām harēnh o hprôt. Tirtūm kot wa hkra kôt tânopxar o pa nē ho mex ā harēnh o hprôt. Hāmri nhūm mē kuma nē tee ri hkukamā hamaxpēr nē axpēn mā:

—Hêxta waa nē. Tirtūm tām na xep hte jare hkôt ri pa ho pa. Jakamā koja nhỹrmā hprêk hāmri nē tanhmā koja we amnhī nhīpêx to ho pa wehee? Anē.

Jakaris kot Tirtūm nhỹ hā kapēr ā harēnh

⁶⁷ Hāmri nhūm Jakaris Tirtūm Karō nhỹ hā Tirtūm mex o mex ā harēnh o xa. Tirtūm kot mē kēp Ijaew o mex ā harē nē mē kām:

⁶⁸ Hêxta waa nē. Nà Tirtūmjaja mex o mex. Na pre hte mē pahpāmjaja ām hkôt pix mā amnhī nhīpêx o pa. Jakamā nhūm hte Tirtūm mē pahpē

hkrajê kamā ukaprī nē mē pahto mex o pa.

E kwa pu mē kām mex o mex ā harēnh rāhā nē.

⁶⁹ Ra kot mē pahwỳr mē pahkaprī xwỳnh pē mē panhō pahihiti mēnh mā. Ja kaxyw àhpumunh xihtỳx o hihtỳx jakamā na pre ra mē pahwỳr mēnh ā amnhī jarē.

Koja kēp amnepēm Tirtūm mā tanhmā amnhī nhīpêx to ho pa xwỳnh Tawija hkanrēhā htāmnhwỳ.

⁷⁰ Amnepēm Tirtūm nhỹ hā kapēr xwỳnhjaja na prem mē kām Tirtūm kapēr jarēnh o pa nē mē kām:

⁷¹ “Koja Tirtūm mē panê mē kām mē pahkurê xwỳnhjê pumunh mex o pa.” Anē.

⁷² Tirtūm ra kot mē pahpāmjê mā amnhī jarēnh xà hkôt kām mē pakamā ukaprī rāhā ho pa hprām.

Koja aa ja ho anhỹr o hamakêtkati hkêt nē.

⁷³⁻⁷⁵ Na pre ra mē pahpām Apraāw mā mē pakukamā ā mē pahtā amnhī jarēnh anē nē kām: “Kot paj mē anē mē kām mē akurê xwỳnhjê pumunh mex nē mē ĩhkra nē mē ato ixkato. Jakamā kot kaj mē amnhī kamā amā mē uma hkêt nē axāmnhīx ri ajamakêtkati nē mē kamā apa. Nē kot kaj mē māmri axāmnhīx ri inhmā tanhmā amnhī nhīpêx to ho ri apa rāhā nē. Nē ixkôt amnhī nhīpêx o ri apa rāhā ty.” Anhỹr o na pre Tirtūm mē pakukamā mē pahtā amnhī jarē. Anē.

Nhūm pre ā Jakaris mē kām Tirtūm kapēr jarēnh anē. Hāmri nē hkrareja mỳ nē o xa nē kām:

⁷⁶ —No ka Xugitre. Kot kaj aprêk hāmri nē apê Tirtūm maati nhỹ hā kapēr jarēnh o apa xwỳnh. Jakamā

kot kaj Pahihti hkukamã më piitã më kãm harënh o ri më hkôt apa. Më kot amar në kutêp tãm amnhî nhîpêx kaxyw.

⁷⁷ —Tirtûm kot më në më kot amnhî tomnuj rënh në më ho hkra hã harënhja kot kaj më hkôt më kãm harënh o ri apa.

⁷⁸ —Na hte Tirtûm më pakamã ukaprî ho pa në më pakamã gryk tokyx anhÿr kêt në. Jakamã koja më pahwÿr më pahkaprî xwÿnhja më. Kormã më pahwÿr wrÿk kêt jakamã te më pahte kamãt kô kamã tee ri më paxàhkupênh o ri papa xwÿnh pyrãk.

—Nom koja më pahwÿr wrÿkja o te ra myt kator në më pamã hirã në mëmoj to amnhîrît mex pyrãk o më panhîpêx. Ja kaxyw koja Tirtûm më pahwÿr më pahkaprî xwÿnhja më nhùm man më pahwÿr wrÿ në më pamã më pahtyk puma xwÿnhjê mã Tirtûm kapêr o amnhîrît o pa. Më pahte mar në ra pajamakêtkati në paxãmnhîx ri papa në pahtyk kaxyw.

⁷⁹ —Më kãm më htyk puma xwÿnhjaja te kamãt kô kamã ri pa pyrãk. Tã koja më pahkaprî xwÿnhja wrÿ hãmri në tanhmã më hkrã hto nhùm më te arÿgro hã ri më pa xwÿnh kot amnhî nhîpêx pyrãk o amnhî nhîpêx. Jao hamakêtkati në axte kãm htyk puma hkêt në ri pa. Anê.

Nhùm pre ã Jakaris Tirtûm Karõ nhÿ hã hkrare mã kapêr anê.

⁸⁰ Tã nhùm Juãwja gaa në aptãr. Nê Tirtûm kôt amnhî nhîpêx o pa. Nom kormã kot Ijaew jahkre ho pa hkêt ri kapôt ã ri më puhã pa.

Ã na pre Juãw kator në amnhî nhîpêx anhÿr o pa anê. Na pre kato në hã mytwrÿ grêre hãmri nhùm Jejusja hkôt kato.

2

*Jejus kator ã harënh
Matêwre 1.18-25*

¹⁻² Na pre ã Jejus kator anê. Nhùm pre Rôm nhõ xwÿnhjê nhõ pahi Sesti Akusja õ pika piitã hkôt më ho kôta kaxyw. Aa kot më ho kôta hkêt tã ra kot më ho kôta kaxyw. Kormã pahi Sirën haxwÿja kot pika pê Sir kamã më ho amnhîptãr ri nhùm pahi Sesti Akus kot më ho kôta kaxyw. Jakamã kãm ãpênh xwÿnhjê mã kapêr në më kãm:

—E kêr ka më ho kôta kaxyw në më piitã më hixi hã kagã hpa. Anê.

³ Hãmri nhùm më piitã ã kot më hipêx anhÿr ã amnhî tã harënh ma hãmri në më kot më hixi hã kagã kaxyw piitã akupÿm papxã hwÿr ma hapêx. ⁴ Nhùm pre Marir mjên Juje haxwÿja ma krÿ pê Perěj wrÿr mõ. Garirej kamã õ krÿ pê Najare rùm kato në ma hwÿr mõ. Pika pê Jutej kamã na Perějja. Kamã na pre Juje nhîgêt Tawija kato. ⁵ Nhùm Juje kêp kanrêhã htãmnhwÿ jakamã na pre ma akupÿm hwÿr më hkwyjê hkôt mõ. Nê ma amnhî kôt kot ho hprõ mã xwÿnh Marir o mõ. Arÿ htujarõ rax rãhã nhùm mã amnhî kôt o mõ. ⁶ Nhùm wa mõõ hãmri në hwÿr pøj. Nhùm Marir hpijagri xã hã mytwrÿ mã àr jakamã nhùm kamãt nhùm õhy xã. ⁷ Nom nhùm Perěj wrÿr më hpõx nyw xwÿnhjaja ra ixkre piitã ho nyt pa nhùm wa tee ri hpijagri kaxyw amnhî to ukapi ho pa. Hãmri në nhÿri môx nhõrkwÿ punajre hwÿr axã nhùm Marir kamã hpijagri. Nhùm hkra kato në myre. Kra kot wa na pre. Hãmri nhùm kumÿ në kupêxê ho hkupu hpa në môx xàpkur xã hã kôsti kaprÿ kamã kuxi nhùm hamakêtkati në gõr në nõ.

ôwêhti jamãr xwÿnhjê jarënh

⁸ Rôm nhùm ôwêhti jamãr o më pa xwÿnhjaja kapôt ã ri hkrit ôwêhti jamãr o pa. Nhùm ra kamãt nhùm më hamãr o hkrÿ. ⁹ Pu nhùm kaxkwa rùm Tirtûm kapêr o wrÿk

xwýnhja wrý nê mē mýri ajêt. Hāmri nê tanhmā amnhī to nê mē hpuhā ho hirā rax kumrêx. Nom nhūm Tirtūm tām ā mē hipêx anê. Hāmri nhūm mē tee ri jawý Tirtūm kapêr o wrýk xwýnhja pumu nê kām ma htýx nê akryk omunh o hkrī. ¹⁰ Hāmri nhūm mē kām:

—Pa? Kwa mē amā xpyma hkêt nê. Ixte mē amā mēmoj mex jarênh kaxyw na pa mē awýr wrý. Kot kaj mē harênh ma nê akīnh nê. Nom mē kapxipixjaja kaj mē akīnh kêt nê. Koja mē piitā ja jarênh ma nê mē apyrā nê hkīnh nê pa. ¹¹ Na ra ham mē akamā ukaprī xwýnhnta kato. Pahi Tawī nhō krī mē mē anhō krī pē Perêj kamā. Kêp mē apiitā mē anhō pahihti na. Mē ate amnhī wýr kamā ajamak o apa xwýnh pē Kris na. Tām na ham kato. ¹² E pa ixprī hā mē amā tanhmā harênh to ka mē inhma. Na kato nhūm katorxā kupêxê ho kupu hpa nê kōsti kamā kuxi nhūm nō. Kwa mē tokyx ma hwýr mra nê kêp mē anhō pahihti hā omu. Anê.

¹³ Nhūm pre ā mē kām ujarênh anê. Hāmri nhūm hkwyjaja wamta kôt ohtōō nê mē hwýr wrý nê puhā harir. Hāmri nê Tirtūm mā mex o mex ā grer o harir. ¹⁴ Nê hā grer o: Tirtūm maati na mex o mex.

Jakamā mē kām hprām xā kôt pix mā amnhī nhīpêx o mē pa xwýnhjaja koja amnhī tā mē omu nê tanhmā mē ho nhūm mē hamakêtkati nê ànnhix hkīnh nê pa ho pa.

¹⁵ Anhýr o grer o harir hāmri nê ma akupým kaxkwa hwýr àpir pa nê akunok. Hāmri nhūm ôwêhti jamār xwýnhjaja mē kapêr ma nê ma akupým àpir ā mē omu nê xypên mā:

—E tokyx pu mē krīm nê Tirtūm kot mē pamā ho amnhīrīt xwýnhnta japêr nê tokyx nhýri omu. Kwa ma pu mē tokyx hwýr nê omu. Anê.

¹⁶ Hāmri nhūm mē ma hwýr mra. Hāmri nê krīm agjê nê môx nhōrkwy wýr agjê nê mē hkrareta pumu.

Nhūm kōsti kamā nō nhūm mē omu nê kuri Marir mē juje wa omu. ¹⁷ Hāmri nê akupým hapôj nê ma mē piitā mē hkôt ri mē kām harênh o pa. Ra Tirtūm kapêr o wrýk xwýnh kot mē kām harênh xāja kôt nhūm mē ma mē kām harênh o ri mē hkôt pa. ¹⁸ Nhūm mē amnhī jaêr pē mē kot harênh ma nê tee ri hkukamā hamaxpêr. ¹⁹ Nom nhūm Marir mē kot kām hkrax rûm tanhmā hkra jarênh to xāta kukamā pix mā hamaxpêr rāhā ho pa.

²⁰ Jakamā nhūm ôwêhti jamār xwýnhjaja ma akupým hkrit wýr mra. Tirtūm kapêr o wrýk xwýnh ra kot mē kām ujarênh xā hkôt nhūm mē kot Jejus pumunh jakamā ma akupým hkīnh nê Tirtūm mā mex o mex ā harênh pē hā grer o akupým mra.

Mē kot Jejus ā hixi mēnh ā harênh Matêwre 1.21; Rukre 1.31

²¹ Tā nhūm wa hkrareta ra hā arīgro pē 8 nhūm mē hwýr akuprō nê kām my kwryt kà krāhta. Na hte Ijaew mē hkra myre piitā ā mē hipêx anê. Mē piitā mē kot Tirtūm mā ôr ā mē omunh kaxyw. Jakamā nhūm mē kām ho anê nê hpānhā hā hixi mē. Marir kormā kot ho htujarō hkêt ri Tirtūm kapêr o wrýk xwýnh kot hkukamā kām hixi jarênh xāja kôt nhūm mē hā hixi mē nhūm hixi kêp Jejus.

Mē kot Tirtūm mā Jejus nhōr pyrāk o hipêx

²²⁻²⁴ Tā nhūm Marir hpijagri ho hapêx. Jakamā nhūm juje ma krī pē Jerujarê hwýr mē kot Tirtūm mā amnhī jarênh xā hā ixkre hwýr amnhī kôt o mō. Na pre ra finat Mojes amnepêm Tirtūm nhý hā mē hkukamā mē hpāmjê mā ja hā karō. Nê mē kām hā karō ho:

Koja mē aprō hpijagri. Hāmri nê hpijagri ho hapêx ka mē ma Tirtūm mā amnhī jarênh xā hā ixkre hwýr o mra nê hpānhā Tirtūm mā mēmoj

gõ. Kām tutre ho gõ rý kām tuuti hõ ho axkrut nē agõ kê patre hamý nē kām kupa. Kot ja hã omunh nē hpjagri xwýnhta akupým mex ã harēnh kaxyw.

Anhÿr o kot mē kām ja hã karõ jakamã nhũm wa ma ã amnhĩ nhĩpêx anhÿr kaxyw hwÿr mō. Nē amnhĩ kôt Jejus mý nē o mō. Tirtũm kot mē kām ja hã karõ nhũm mē kot hã kagã xà hkôt. Na pre ra finat Mojes mē kām ja jarē nē mē kām:

Kot kaj mē akra my kot wa hãmri nē te mē ate Tirtũm mã õr kaxyw hipêx pyrãk o hipêx. Kê tãm amnhĩ nhĩpêx o pa nē ý hã tanhmã kãm amnhĩ nhĩpêx to ho pa.

Anhÿr jakamã nhũm wa ra Jerujarē hwÿr nojarēt nē amnhĩ kôt Jejus mý nē ma amnhĩ kôt o mō.

Simeãw kot Jejus kukamã harēnh

25-26 Rõm nhũm Jerujarē kamã Simeãwja. Tirtũm Karõ nhÿ hã kot tanhmã amnhĩ to mex to ho pa xwýnh na pre. Na pre hte Tirtũm kapêr kôt pix mã tãm amnhĩ nhĩpêx o pa. Jakamã nhũm pre ra Tirtũm Karõ ã kãm kapêr anē nē kãm:

—E inhma Simeãw. Kot kaj atÿr rãhã nhÿrmã Tirtũm kot mē akaxyw ãm mã xwýnhja ka ano ho omu nē rĩ kormã ty.

Anhÿr o kãm kapêr jakamã nhũm kuma nē hkĩnh nē ãm pix kamã hamak o pa. Mē kêp Ijaew wÿr wrÿk nē mē ho mex mã xwýnhta pix kamã hamak rãhã ho pa.²⁷ Jakamã nhũm Jejus katorxã mē hipêxã purota wa Tirtũm mã amnhĩ jarēnh xà hã ixkreja wÿr Jejus o axã nē kormã o xa. Finat Mojes kot mē kãm hã karõ xà hkôt. Hãmri nhũm Tirtũm Karõ mē hwÿr Simeãwja mē nhũm ma mē hwÿr tē nē axã.²⁸ Hãmri nē wa hkrata pumu nē hkĩnh tÿx nē. Hãmri nē wa kêp kumý nē o xa nē hã Tirtũm mã mex o mex ã harē nē kãm:

29-32 Pa Pahi Maati. E ot pa ixte amã tanhmã amnhĩ nhĩpêx to ho ixpa xwýnh ã amnhĩ jarē.

Nã ãm hãmri na ka pre ã inhmã jare hkukamã harēnh anē. Tã ate inhmã harēnh xà hkôt pa ra inhno ho omu. Kêp mē ixkamã ukapri xwýnh ã omu. Nē kêp ate mē ixwÿr mēnh xwýnh ã omu.

Nã koja te arÿgro hã myt hirã nē mēmojpÿitã ho amnhĩrit mex pyrãk o koja mē inhĩpêx o pa. Jakamã koja hprêk hãmri nē ma Ijaew kêt xwýnhjē mã apē Tirtũm ã akapêr o amnhĩrit o pa nhũm mēhprĩ hã ajarēnh ma. Nē mē ixpē Ijaew kot paj mē ijaxwÿja kuma nē hã ixpijaãm o ri ixpa.

Jakamã kot paj ixãmnhĩx ri tanhmã amnhĩ nhĩpêx to ho ri ixpa nē ixãmnhĩx ty. Ra ixte inhno ho ate inhmã harēnh xwýnhta pumunh kēnã. Anē.

33 Nhũm pre ã Simeãw Jejus jarēnh anē. Nhũm katorxã mē hipêxã purota wa amnhĩ jaêr pē kot ã harēnh anhÿrja mar o xa.³⁴⁻³⁵ Hãmri nhũm Simeãw wa ho Tirtũm wÿ nē kãm:

—E Tirtũm. Kêr ka ja wa ho mex nē. Wa ho mex o wa ho mex rãhã ho apa. Anē.

Hãmri nē Marir mã kapêr nē kãm:

—Nã ãm hãmri na pre Tirtũm mē pakaxyw akrata xãm. Mē pahpē Ijaew kaxyw ãm. Jakamã koja hprêk nē ma Tirtũm kapêr o mē pÿitã mē ahkre ho ri mē hkôt pa. Nhũm mē kuma hãmri nē ahpÿnhã tanhmã hamaxpêr to xà hkôt tanhmã hipêx to. Jakamã nhũm mē hkwÿjaja kuma nē hkôt amnhĩ xunhwÿ nē hkôt amnhĩ nhĩpêx o pa. Jao tãm hipêx o pa. No nhũm mē hkwÿjaja kuma nē axtem nē kãm hkĩnh kêt nē. Hãmri nē tanhmã hipêx to. Jakamã kot kaj tee ri ja hã mē omu nē akapri htÿx

ně. Te mě kot wapo ho akanhwÿr nē akamā ho kaxkep nhūm apē omnuj tÿx pyrāk o kot kaj amnhī kamā ama nē mě omu. Anē.

*ānti kot Jejus pumunh ā harēnh
Wam Ximotre 5.5*

³⁶⁻³⁸ Rôm nhūm mēhō ni pē āntija mē hwÿr axà nē Jejus pumu. Āntija Panuew kra na pre. Nē Ase hkwy na pre. Ni htā kēp Tirtūm nhÿ hā kapēr jarēnh o pa xwÿnh. Na pre ra mjēn no ām kormā mjēn nē pa hā amgrā pē 7 pix nhūm pre kēp ty. Hāmri nhūm axte mjēn kēt nē pa rāhā ra hpigēx tÿx nē. Ra hā amgrā pē 84. Na pre hte Tirtūm mā amnhī jarēnh xà hā ixkre hwÿr pa nē kām amnhī jarēnh rāhā ho pa. Nē kot kām amnhī jarēnh kaxyw nē apkur kēt rāhā kām amnhī jarē. Nē arīgro hā hwÿr pa nē kamāt kām hwÿr pa. Ā na pre hte amnhī nhīpēx anhÿr rāhā ho pa anē. Jakamā mē hwÿr axà nē Jejus pumu nē hkīnh nē. Hāmri nē hā Tirtūm mā mex o mex ā harē nē kām:

—Hēxta gāà nē Tirtūm. Ām hāmri na ka mē ixwÿr Jejus mē. Ma amex o amex. Anē.

Hāmri nē Ijaew kot amnhī wÿr mē kamā ukapri xwÿnh kamā hamak xwÿnhjē mā ra Jejus kator ā harēnh o ri mē hkōt pa.

*Marir mē Juje wa kot akupÿm
Najare hwÿr mōr ā wa harēnh*

Matēwre 2.19-23

³⁹ Tā nhūm Marir mē Juje wa Tirtūm kapēr ā kagā htūm kōt Tirtūm mā amnhī jarēnh xà hā ixkre kamā tanhmā amnhī nhīpēx to hpa hāmri nē kato nē ma akupÿm mō. Ma Garirej kamā ō krī pē Najare hwÿr wa ma akupÿm mō.

⁴⁰ Tā nhūm wa hkrata ra wa kām hprēkre ho mō. Nē mex nē āhpumunh tÿx nē. Tirtūm kot tānopxar nē mēmoj to kutā nojarēt rāhā ho pa jakamā nhūm mex nē hkīnh nē pa.

*Marir mē Juje wa kot tee ri Jejus
japēr ā wa harēnh*

Rukre 4.22

⁴¹ Nhūm pre hte Marir mē Juje wa amgrā mē hkwyjē hkōt ma Jerujarē hwÿr pa. Mē kot arīgro pē Pas ā hkīnh kaxyw. Pas ā na hte mē kēp Ijaew amnepēm Tirtūm kot pika pē Ejit rūm mē hpāmjē katorja mā hamaxpēr kaxyw axpēn wÿr akuprō nē hā hkīnh. Jakamā nhūm wa ma mē hkōt hā hkīnh kaxyw Jerujarē hwÿr hkwyjē hkōt mō. ⁴² Nhūm ra Jejus hprēk o mō. Ra hā amgrā pē 12 jakamā nhūm wa ma amnhī kōt o mō. ⁴³⁻⁴⁴ Tā nhūm mē hkīnh pa hāmri nē akupÿm nojarēt nhūm Marir mē Juje wa ma hkwyjē hkōt akupÿm mō. Nhūm Jejus Jerujarē kamā ahte arīk nē akupÿm wa hkōt mōr kēt nē. Nhūm wa htÿx wam ma hkwyjē hkōt htēm ā hkamnhīx jakamā wa hapēr kēt nē. Hāmri nē wa hapu hā hamakētkati nē mē hkōt mōr o mōr ā ra hā kamāt. Hāmri nē mē kot amnhīm hikranh xāja wÿr mē hkōt pōj nē tee ri mē hkaēx ā hkra japēr o ri mra nom omunh kēt nē. ⁴⁵ Jakamā nhūm apkati nhūm wa awjanā nē ma akupÿm Jerujarē hwÿr mō nē kamā hapēr o ri pa. ⁴⁶ Nom tokyx kām kator kēt nē. Mē hkaēx ā tee ri hapēr o pa hā apkati axkrut. Nē nō nhūm apkati nhūm wa tā Tirtūm mā amnhī jarēnh xà hā ixkreja wÿr hapēr o mō nē hwÿr axà. Hāmri nē omunh kurē kumrēx. Nhūm arī mē kot Tirtūm kapēr tūm o mē ahkre xwÿnhjē mar o mē kutā nhÿ. Nē mēmoj tā ri mē hkukja nē tanhmā mē kām ujarēnh to. ⁴⁷ Nhūm mē kot mar xwÿnhjaja tee ri kapēr ā kuma nē āhpumunh tÿx ā omu hāmri nē akryk mar o hkrī. ⁴⁸ Hāmri nhūm Marir mē Juje mē hwÿr axà nē mē kuri wa hkraja pumunh kurē kumrēx. Hāmri nhūm katorxāja hwÿr tē nē kām:

—Xē Jejus. Mon ka axtem nē ā ri amnhī nhīpēx anē nē akupÿm wa

ixkôt amõr kêt nê? Na pa wa mõi nê mē pahkwỳjê hkôt pøj nê tee ri mē hkaêx ã ajapêr nê tee ri akukamã ijamaxpêr. Anê.

⁴⁹ Hãmri nhũm amnhĩ tã wa kuma nê wa kãm:

—Tỳ. Nom Inhĩpêêxã nhõrkwỹ kamã ixàrik kênã na ka wa tee ri ixkukamã ajamaxpêr nê ijapêr o ri apa. Anê.

⁵⁰ Hãmri nhũm wa kuma nê ã kot amnhĩ jarênh anhỹrja kukamã tee ri hamaxpêr. ⁵¹ Hãmri nê mē ma akupỹm mõi nê Najare hwỹr pøj nê kamã pa. Nhũm pre Jejus wa kapêr kôt ri amnhĩ nhĩpêx rãhã ho pa. Hãmri nhũm katorxãja hkrax rũm mē kot kãm tanhmã hkra kot amnhĩ nhĩpêx to hkukamã harênhja pix kukamã hamaxpêr rãhã ho pa.

⁵² Gaa nhũm Jejus ra àptàr o mõi. Nê àhpumunh tỳx nê. Nhũm mē piitã ã kot amnhĩ nhĩpêx anhỹr ã omu nê kãm hkĩnh nê. Nhũm Tĩrtũm haxwỹja kãm hapê nê.

3

Juãw Paxis kot Tĩrtũm kapêr jarênh o pa hã harênh

Matêwre 3.1-10; Makre 1.1-8; Juãw 1.19-28

¹⁻² Tã nhũm kormã pahihiti Tipeja mē ho amnhĩptàr o pa. Na pre ra mē ho amnhĩptàr ã amgrã pê 15. Nhũm Põn Piratja pahihiti Xipe mã pika pê Ijaew nhõ xwỹnhjê ho amnhĩptã. Nhũm Eroxja kãm pika pê Garirej nhõ xwỹnhjê ho amnhĩptã. Nhũm Erox tõi Firipja kãm pika pê Iturej nê hõ pê Takonĩt wa kamã mē pa xwỹnhjê ho amnhĩptã. Nhũm Risãnja kãm pika pê Apirên kamã mē ho amnhĩptã. Nhũm Anas mē Kajpasja wa kêp Ijaew nhõ patre maati.

Rõm nhũm Jejus mē Jakaris kra Juãwja wa ra hamê anhĩpê àptàr. Jakamã nhũm Tĩrtũm tanhmã Juãw mã kapêr to. Kormã kapõt ã ri pa ri nhũm kãm kapêr nê kãm tanhmã

kot amnhĩ nhĩpêx to ho pa hã kãm karõ nê kãm:

—Pa Juãw. E inhma. Kêr ka ma mē kãm ixkapêr jarênh rãhã ho ri apa. Anê.

³ Hãmri nhũm kuma nê ma ri mē kãm kapêr jarênh o pa. Pyhti pê Jotãw mỹri mē piitã mē kãm harênh o ri pa nê hpãnhã ihkjê hã ri mē pa xwỹnhjê mã harênh o ri pa. Nê mē kãm:

—E kwa mē tokyx amã amnhĩ tomnuj kaga hprãm xaj tãm ri amnhĩ nhĩpêx. Kê Tĩrtũm ja hã mē apumu nê mē anê mē ate amnhĩ tomnuj o hapêx pa. Pa mē piitã mē kot mē apê Tĩrtũm kra hã mē apumunh kaxyw mē akrã kumrã.

Anhỹr o mē kãm kapêr o ri pa. ⁴⁻⁵ Na pre ra amnepêm mē hkukamã Tĩrtũm nhỹ hã kapêr o pa xwỹnh Ijais ra Juãw kukamã kot tanhmã amnhĩ nhĩpêx to hã harê nê hã kagã. Nê hã kagã ho:

Koja nhỹrmã mēhõ mõi pøj. Kapõt ã mõi pøj nê mē kãm ujarênh o ri pa. Nê mē kãm ujarênh o: “E mē inhma. Koja Tĩrtũm tokyx mē pahwỹr mē panhõ pahihiti mē nhũm wrỹ nhũm mē piitã omu. Jakamã kwa mē tokyx kutêp tãm amnhĩ nhĩpêx o apa. Te ho mē kot mēhõ kutêp pry ho mex pyrãk o amnhĩ nhĩpêx. Jao tãm amnhĩ nhĩpêx. Nê tãm axpên nhĩpêx. Pahihtita kutêp. Mē pahte amnhĩ nhĩpêx te kot pry nhĩnur pyrãk nhũm mē tee ri kot kãm hã mrar mex prãm kaprỹ pyrãk. Hinur nê krã hakỳx nê pry juk pyrãk o na mē pahte amnhĩ nhĩpêxja. Jakamã kot kaj mē ate amnhĩ tomnuj kaga nê tãm amnhĩ nhĩpêx. Nê tãm axpên nhĩpêx. Hãmri nê te mē kot pry nhĩnur o mex nê ho katãt nhũm katãt muux nê nõr pyrãk o kot kaj mē amnhĩ

nhîpêx. Pahihti nywta kutêp. Kwa kêr ka mê ã amnhî nhîpêx anê.

⁶ Kot kaj mê anê nhûm mê ohtô nê ja hã mê apumu hãmri nê mê apyrà Tîrtûm kot mê ho hkra kaxyw amnhî to kuwÿ.” Anhÿr o mê kãm ujarênh o pa. Anê.

Nhûm pre ã finat Ijaisja Juãw Paxis kukamã mê kãm ujarênh anhÿr o pa. ⁷ Jakamã nhûm àptàr nê Ijais kot ra hkukamã harênh xà hkôt ma Tîrtûm kapêr o mê ahkre ho pa. Nhûm prem kuma hãmri nê kot mê hkrã kumrãr kaxyw hwÿr amnhî to mra. Nhûm mê omu nê tanhmã mê ahkre hto. Nê mê kãm kapêr kãm hihtÿx nê mê kãm:

—Tk. Kwa kormã. Mê ate amnhî tomnuj pix o ri apa xwÿnh kênã. Xà kot paj mê ate amnhî tomnuj rãhã mê akrà kumrã nhûm Tîrtûm ja hã mê apumu nhûm ja kãm mex nà? Nà koja ja kãm mex kêt nê. Koja ja mÿrapê nhÿrmã tanhmã mê anhîpêx to ka mê tee ri umaj apimxur prãm kaprÿ.

⁸ —Na htem amnhî tomnuj kaga nê hpãnhã tãm amnhî nhîpêx. Nê tãm ri axpên nhîpêx. Jakamã e kwa mê ã amnhî nhîpêx anhÿr o apa. No na ka htem atÿx ri ajamaxpêr o: “Mê ixpê finat Apraãw kanrêhã htãmnhwÿ jakamã koja Tîrtûm ja hã mê ixpumu hãmri nê mê ixte amnhî tomnuj mÿrapê tanhmã mê ixto hkêt nê. Koja ãm mê ixto mex rãhã nê.” Anhÿr o atÿx ri amnhî kukamã ajamaxpêr o apa. Nom ja kot anhÿr kêt. Mê apê Apraãw kanrêhã htãmnhwÿ htã urak nê tãm amnhî nhîpêx o apare hã. Kot ka mê apê kanrêhã htãmnhwÿ htã amnhî tomnuj o ri apa hãmri nê Tîrtûm noo mã te mê apê pikap kênre nhîkwÿ pix pyrãk.

⁹ —Na ra Tîrtûm kot mê ate amnhî tomnuj mÿrapê tanhmã mê ato kaxyw. Koja mê anhîpêx o te mēhō nhō mēmoj pàr ô hkêt nhûm

kot tee ri omunh hãmri nê krãhyr nê kuwy kamã mēnh nê ho xêt par pyrãk o mê anhîpêx. Jao amnhî nê kuwy hwÿr mê arênh pa ka mê kamã amnhî xà htÿx kamã ajamak rãhã ho ri apa. Anê.

Nhûm pre ã Juãw Paxisja mê kãm kapêr anê. ¹⁰ Hãmri nhûm mê kuma nê tee ri amnhî kukamã hamaxpêr nê kãm:

—Kwa xô wehe? Xà koja ã mê inhîpêx anê? Kwa tanhmã kot paj mê kot ã mê inhîpêx anhÿr pymaj amnhî nhîpêx to wehe? Anê.

¹¹ Hãmri nhûm mê kãm:

—Nà kêr ka mê axpên kãm axukapri ho ri apa. Nê mê kêp amrakati xwÿnhjê mã amnhî kutã mēmoj nhōr o ri apa. Nê mê anhînhōkã axkrut nê mēhō hinōkã hkêt xwÿnhjê mã ho pyxi nê agō nê pyxi nê ho arik. Nê mê axàpkur xà ho anhōxÿ ho apa hkêt nê. ãm axãmnhîx ri mê kêp amrakati xwÿnhjê mã amnhî kutã mê kãm mēmoj to hkryre nê agō. E kêr ka mê ã axpên nhîpêx anhÿr o ri apa. Anê.

¹² Hãmri nhûm Rôm kãm mê ò pahihti mã mê piitã mê kêp kàxpore hkwy jamÿnh xwÿnhjaja mê urak nê hwÿr mra. Kot mê urak nê mê hkrã kumrãr kaxyw hwÿr mra nê kãm:

—No we mê pajaja? Tanhmã kot paj wem amnhî nhîpêx to? Anê.

¹³ Hãmri nhûm mê kãm:

—Nà mê kajaja kêr ka mê Rôm nhō pahi kot mê amã mê ate mê kêp kàxpore hkwy jamÿnh jarênh xà hkôt pix mã hamÿnh o ri apa. No mê atÿx ri amnhî krã hkôt amnhîm hkwy jamÿnh prãm xaj mê kãm hkre kamã ho rûnh nê mê kãm harênh o ri apa hkêt nê. Anê.

¹⁴ Hãmri nhûm hpãnhã pōristi hkwyjaja hwÿr mra nê kãm:

—Kwa no we mê pajaja? Tanhmã kot paj wem ri amnhî nhîpêx to ho ixpa? Anê.

Hãmri nhûm mê kãm:

—Nà kêr ka mê anhō pahihti kot mê axàpênh pãnhã mê amã kàxpore

nhôrta pix jamý nê ajamakêtkati nê axâmnhîx ri ho amnhîm axujaprôr o ri apa. No mê akwýjaja kãm apyama nê mê amã kãxpore nhôr prãm xàj ri mê kãm tanhmã amnhî pyma hto ho ri apa hkêtnê. E kêr ka mê ã amnhî nhîpêx anhÿr o ri apa. Anê.

Juãw Paxis kot tanhmã Jejus jarênh to hã harênh

Matêwre 3.11-12; Makre 1.7-8; Juãw 1.19-28; määnên Atre 19.4

¹⁵ Nhùm pre ã Juãw Paxisja mê kãm kapêr anê. Nhùm mê kuma nê htýx kêp Tirtùm kot mê pakaxyw ãm mã xwýnhhta ã hkamnhîx.

¹⁶ Hãmri nhùm amnhî tâ ã mê hamaxpêr anhÿr ã mê omu hãmri nê mê kãm amnhî tâ aprã nê mê kãm:
—Nà pa hkêtnê. Na pa hte ãm Tirtùm mã gô pix o mê hkrã kumrãr o ri ixpa. No koja tokyx ixpãnhã Tirtùm kot mê pakaxyw ãm xwýnhhta tâm mê pahwýr pôj. àhpumunh tÿx o kot ijakrenh jakamã na pa hte ãm kukwak ri ixpa nê hã ixpijaãm o ri ixpa. Tirtùm kot mê pakaxyw ãm xwýnhhta koja mê awýr Karô rê nhùm mê akaxwýnh mã agjê ka mê ý hã tâm ri amnhî nhîpêx rãhã ho ri apa. Nom kormã mê kot tâm amnhî nhîpêx hkêtnê xwýnhhaja koja ja hã mê omu hãmri nê mê hipêx o te kuwy kot mêmôj to kaxàr par pyrãk o mê hipêx.

¹⁷ —Na htem pur kãm harôj nhîkê nê ho grã nê hpãnhã kahtwý. Nê kahuk pa hãmri nê hkapî nhùm kôk apê nê prýhka ho htor nê ho hapêx pa. Nhùm mê hy ho pa nê ixkre kamã gôj kãm unhwý. Ja pyrã nê koja tokyx Tirtùm mê piitã mê kot tanhmã amnhî nhîpêx to ho pa hã mê omunh xà hkôt mê ho axkjê. Mê kot tâm amnhî nhîpêx o mê pa xwýnhhaja koja mã amnhî wýr mê ho api nhùm mê kuri mex nê hkînh rãhã nê pa ho pa. No mê kot amnhî tomnuj xwýnhhaja koja mê hkînhã

tanhmã mê hipêx to nhùm mê ma kuwy raxja wýr pa nê kamã amnhî xà htýx kamã hamak rãhã nê pa ho pa. Anê.

¹⁸ Nhùm pre ã Juãw Paxis Tirtùm kapêr o mê ahkre anhÿr o pa.

Juãw Paxis kot Jejus krã kumrãr ã harênh

Matêwre 3.13-17; Makre 1.9-11

¹⁹ Tã nhùm Ijaew nhô pahi Eroxa ra htô hprô pé Eroxis pytà nê ho hprô nhùm Juãw Paxisja harênh ma nê ma hwýr tê nê hã kãm akir. No ãm ja pix ã kãm àkjêr kêt nê. Määnên tanhmã kot amnhî tomnuj tÿx to ho pa hã kãm akir.

²⁰ Nhùm amnhî tâ kuma nê kamã gryk tÿx nê amnhî tâ mê kãm hã amÿnê nhùm prem unê nê haxà. Jao amnhî tomnuj tÿx nê.

²¹ Nom kormã mê kot haxàr kêt ri nhùm Juãw Paxis Ijaew kwýjê krã kumrãr o xa. Rôm nhùm Jejusja hãmri tâm nhÿhÿnh hwýr tê nê kot hkrã kumrãr kaxyw kãm anê nhùm kuma nê hkrã kumrã. Hãmri nhùm Jejus gôj rûm api nê kormã gô mÿ ri Tirtùm mã amnhî jarênh o xa.

²² Pu nhùm kaxkwa axkjê nhùm kurùm Tirtùm Karô te tuuti pyrã nê hwýr wrýk o tê nê ìkre hã xa. Hãmri nhùm kaxkwa rûm Tirtùm kãm kapêr nê kãm:

Pa? E apê Ixkra mex na ka. ãm hãmri na ka hte ixkanrêhã amnhî nhîpêx o apa. Inhmã ajapê kamã na ka ri apa ho apa. Anê.

Jejus kukamã higêt nê hpãmjê nhîxi hã harênh

Matêwre 1.1-17

²³ Tã nhùm Jejus Tirtùm mã kapêr o mê ahkre ho pa hkrax. Na pre ra hã amgrã pé 30 hãmri nê kãm ho hkrax.

E kot paj hpãnhã amã Jejus kukamã hpãmjê nhîxi jarê Teopre. Ijaewjaja na prem htýx ho Juje kêp Jejus nhîpêêxã kumrêx ã hkamnhîx nom kêp hipêêxã kumrêx kêt ãm kêp hipêêxã puro na pre.

Jejus kêp Eri htâmnhwý na pre.
²⁴ Nê Eri kêp Matat kra na pre.
 Nê Matat kêp Rewi hkra na pre.
 Nê Rewi kêp Mewki hkra na pre.
 Nê Mewki kêp Jânaj kra na pre.
 Nê Jânaj kêp axtem Juje hõ hkra na pre.
²⁵ Nê Juje kêp Matatis kra na pre.
 Nê Matatis kêp Amõs kra na pre.
 Nê Amõs kêp Naũ hkra na pre.
 Nê Naũ kêp Eri hkra na pre.
 Nê Eri kêp Nakai hkra na pre.
²⁶ Nê Nakai kêp Mate hkra na pre.
 Nê Mate kêp axtem Matatis õ hkra na pre.
 Nê Matatis kêp Semeĩ hkra na pre.
 Nê Semeĩ kêp Juje hõ hkra na pre.
 Nê Juje kêp Jotre hkra na pre.
²⁷ Nê Jotre kêp Joanãn kra na pre.
 Nê Joanãn kêp Rej kra na pre.
 Nê Rej kêp Joropape hkra na pre.
 Nê Joropape kêp Saraxi kra na pre.
 Nê Saraxi kêp Neri hkra na pre.
²⁸ Nê Neri kêp axtem Mewki hõ hkra na pre.
 Nê Mewki kêp Axi hkra na pre.
 Nê Axi kêp Kojã hkra na pre.
 Nê Kojã kêp Ematã hkra na pre.
 Nê Ematã kêp Erti hkra na pre.
²⁹ Nê Erti kêp Jojue hkra na pre.
 Nê Jojue kêp Eries kra na pre.
 Nê Eries kêp Jorĩ hkra na pre.
 Nê Jorĩ kêp Matat hkra na pre.
 Nê Matat kêp axtem Rewi hõ hkra na pre.
³⁰ Nê Rewi kêp Simeãw kra na pre.
 Nê Simeãw kêp Juta hkra na pre.
 Nê Juta kêp axtem Juje hõ hkra na pre.
 Nê Juje kêp Janã hkra na pre.
 Nê Janã kêp Eriakĩ hkra na pre.
³¹ Nê Eriakĩ kêp Merea hkra na pre.
 Nê Merea kêp Mena hkra na pre.
 Nê Mena kêp Matata hkra na pre.
 Nê Matata kêp Natã hkra na pre.
 Nê Natã kêp Tawi hkra na pre.
³² Nê Tawi kêp Jese hkra na pre.

Nê Jese kêp Opex kra na pre.
 Nê Opex kêp Poas kra na pre.
 Nê Poas kêp Sarã hkra na pre.
 Nê Sarã kêp Nasõ hkra na pre.
³³ Nê Nasõ kêp Amĩnatap kra na pre.
 Nê Amĩnatap kêp Amĩ hkra na pre.
 Nê Amĩ kêp Ari hkra na pre.
 Nê Ari kêp Erõ hkra na pre.
 Nê Erõ kêp Pere hkra na pre.
 Nê Pere kêp Juta hkra na pre.
³⁴ Nê Juta kêp Jako hkra na pre.
 Nê Jako kêp Ijak kra na pre.
 Nê Ijak kêp Apraãw kra na pre.
 Nê Apraãw kêp Tera hkra na pre.
 Nê Tera kêp Nako hkra na pre.
³⁵ Nê Nako kêp Jeruk kra na pre.
 Nê Jeruk kêp Rakau hkra na pre.
 Nê Rakau kêp Parek kra na pre.
 Nê Parek kêp Epti hkra na pre.
 Nê Epti kêp axtem Sara hõ hkra na pre.
³⁶ Nê Sara kêp Kajnã hkra na pre.
 Nê Kajnã kêp Apaxat kra na pre.
 Nê Apaxat kêp Sêre hkra na pre.
 Nê Sêre kêp Noehti hkra na pre.
 Nê Noehti kêp Ramek kra na pre.
³⁷ Nê Ramek kêp Metujarẽ hkra na pre.
 Nê Metujarẽ kêp Enok kra na pre.
 Nê Enok kêp Jarate hkra na pre.
 Nê Jarate kêp Marerer kra na pre.
 Nê Marerer kêp axtem Kajnã hõ hkra na pre.
 Nê Kajnã kêp Enos kra na pre.
³⁸ Nê Enos kêp Set kra na pre.
 Nê Set kêp Atãw kra na pre.
 Nê Atãw kêp Tirtũm kra na pre.
 Tirtũm kot wam my pê Atãwja pika ho hipêx jakamã te kêp hkra pyrãk.
 ã Jejus kukamã hpãmjê nhĩxi kot anhỹr.

4

*Satanasti kot amnhĩ tã Jejus kamã hamak ã harēnh
 Matēwre 4.1-11, 16.23; Makre 1.12-13, 8.33; määnēn Eprēw 2.18,*

4.15

¹ Tã nhũm Jejus pyhti pê Jotãw rũm akupỹm ma mō. Hãmri nê Tĩrtũm Karō nhỹ hã mēmoj kutã amnhĩ to htỹx nê. Jakamã nhũm nhỹhỹm ma kapôt wỳr o mō ² nhũm Satanasti omu nê ma hwỳr tẽ nê ri hkôt pa. Kapôt ã ri hkôt hêx rom tanhmã kãm nê ho pa. Kot mar nê Tĩrtũm kapêr nhĩrôp ãm prãm xàj ma hkôt tanhmã kãm kapêr to ho pa. Hãmri nê hkôt pa o hã arĩgro pê 40 nhũm Jejus kormã apkur kêt o hã arĩgro pê 40 nê hapêx nhũm ra kãm prãm tỹx nê. ³ Hãmri nhũm Satanasti kãm:

—Kwa mãn ka ra amã prãm tỹx kumrêx nà? Nom xep apê Tĩrtũm Kra jakamã mēmoj tanhmã apê kute hkêt. Kwa kên nhĩkwỹ mũj mã anê kê amã pãwti hã amnhĩ jahkre ka aku nê tokyx ho amnhĩ xihtỹx. E kwa tokyx kãm anê. Anê.

⁴ Hãmri nhũm kuma nê kãm:

—Tk. Nà kot paj akapêr mar xà hkôt tanhmã amnhĩ nhĩpêx to hkêt nê. Kojã Tĩrtũm kãm inhmã mēmoj nhõr prãm nê inhmã mēmoj gō pa arĩ kormã kukrê. Kapêr ã kagã htũm kot ja jarênh kot:

Na htem mē apkur xà pix kukwak ri htĩr nê pa hkêt nê. Na htem mãânên Tĩrtũm kapêr mar xà hkôt tanhmã ri amnhĩ nhĩpêx to ho pa ho htĩr nê mex nê pa. Anê.

Ã kapêr ã kagã kot ja jarênh kot anhỹr jakamã kot paj amar xà hkôt ã ri amnhĩ nhĩpêx anhỹr kêt nê. ãm kwarĩ ho kwarĩ. Anê.

⁵ Nhũm pre ã Jejus Satanasti mã kapêr anê nhũm tee ri kuma hãmri nê hpãnhã ma nhỹhỹm o mō nê nhỹri kỳx pê mēmoj prêêti nhĩmōk ã o xa. Hãmri nê kãm pika piitã ahkre ho xa. Nê kãm mē hikukrêx piitã ahkre. Kàxpore nê mēmoj piitã nhũm kãm ahkre hpa nhũm anhĩpê omunh o xa. ⁶ Hãmri nhũm Satanasti kãm:

—E mãn ka kam ri mēmoj mũj piitã omu. Piitã inhō na. Inhmã na pre Tĩrtũm piitã òr pa. Kot paj inhmã mēhō mã òr prãm nê kãm kugō. ⁷ Tã amã kot paj kugō. Jakamã e. Kwa tokyx ixkutã tēm nê inhmã inhmex o inhmex ã ijarê pa ama nê rĩ amã piitã òr pa. E tokyx. Anê.

⁸ Hãmri nhũm kuma nê kãm:

—Tk. Kot paj amã amex o amex ã ajarênh kêt kumrêx. ãm kwarĩ ho kwarĩ. Amexti hã. Tĩrtũm kapêr ã kagã htũm kot ja nê kapêr kãm hihtỹx kênã. Kapêr kot:

Kêr ka mē ixkapêr pix ma. Nê ixkutã pix mã mãn akõnkrã ho akrĩ nê inhmã inhmex o inhmex ã ijarênh o ri apa. Kêr ka mē ã amnhĩ nhĩpêx anhỹr o ri apa.

Anhỹr o kot harênh jakamã kot paj ri amã amex o amex ã ajarênh kêt nê Satanasti. Anê.

⁹ Nhũm pre ã Jejus amnhĩ nê kãm kapêr anê. Hãmri nhũm tee ri kuma nê hpãnhã ma krĩ pê Jerujarê hwỳr o mō. Nê mē kot Tĩrtũm mã amnhĩ jarênh xà hã ixkre hprêk nhĩmōk wỳr ho api nê kỳxpê hatur xà hã ãm nhũm xa. Nhũm amnhĩ parpê kên rũnh nhĩkwỹ pumunh o xa. Hãmri nhũm Satanasti kãm:

—E apê Tĩrtũm Kra jakamã kwa ja rũm ahpar mã ajarĩ nê ma tẽ nê pikap tēm. Kojã Anhĩpêêxã apumunh mex nê ka tanhmã amnhĩ to hkêt nê. ¹⁰⁻¹¹ Kapêr ã kagã htũm kot ja jarênh kot:

Tĩrtũm kojã kapêr o wrỳk xwỳnh mã ajarê ka ajarĩ nê ahpar mã tẽ nhũm mē kỳx pê amỹ nhũm mēmoj akã hyr kêt nê.

Ã kapêr ã kagã kamã ajarênh kot anhỹr jakamã e tokyx ajarĩ nê ma tẽn pikap ahto. Anê.

¹² Hãmri nhũm kuma nê kê axte amnhĩ tã kãm kapêr nê kãm:

—Tk. Kwa nã. Kot pa ri amar xà hkôt ã amnhĩ nhĩpêx anhỹr kêt nê. Kojã Tĩrtũm tãm inhmã ijarĩ

hã karõ pa rĩ mar xà hkõt ijarĩ no kot pa ri amar xà hkõt ijarĩ hkêt nê. Tĩrtũm kapêr ã kagà htũm kot ja jarênh kot:

Kêr ka mê amnhĩ krã hkõt amnhĩ tã ixkamã ajamak kaxyw inhĩxi jarênh kõt tanhmã amnhĩ nhĩpêx to hkêt nê.

Ã ja nê kapêr kot anhỹr jakamã ãm kwarĩ ho kwarĩ. Kot paj ri amar xà hkõt ã amnhĩ nhĩpêx anhỹr kêt nê. Tãm kot inhmã ijarĩ hã karõre hã. Anê.

¹³ Nhũm pre ã Jejus Satanasti mã kapêr anê hãmri nhũm tee ri mêmoj piitã ho mar kaprỹ hãmri nê hk-aga nê ma nhỹhỹm tẽ. Hãmri nê kot nhỹrmã axte hwỹr htẽm nê kot mêmoj punuj o mar kaxyw kormã amnhũm hamãr o ri pa.

Jejus kot Tĩrtũm kapêr o mê ahkre ho hkrax ã harênh

Matêwre 4.12-17; Makre 4.14-15

¹⁴ Tã nhũm Jejus ma akupỹm Garirej wỹr mō. Nê Tĩrtũm Karõ nhỹ hã ãhpumunh tỹx nê hkwyjẽ mã kapêr jarênh o ri pa. Nhũm mê kuma nê piitã pikaja kamã axpẽn mã tanhmã harênh to. ¹⁵ Na pre hte mê kot Tĩrtũm kapêr o mê ahkre xà hã ixkre hwỹr agjẽ nê kamã mê ahkre ho hkrĩ. Nhũm mê piitã kuma nê kãm mar prãm nê. Hãmri nê axpẽn mã mex ã harênh o ri pa.

Najare kamã mê kot Jejus kaga hã mê harênh

Matêwre 13.53-58; Makre 6.1-6; Juãw 1.11

¹⁶ Tã nhũm Jejus ma akupỹm krĩ kamã ãptãr xãja wỹr ma mō. Najare hwỹr. Hãmri nê kamã pōj.

Nhũm Ijaew nhõ arĩgromnu pẽ sap kato nhũm Jejus ma mê hkõt Tĩrtũm kapêr o mê ahkre xà hã ixkre hwỹr tẽ. Hãmri nê hwỹr axà nê mê kuri nhỹ. Hãmri nê kamã mê kãm Tĩrtũm kapêr ã kagà htũm kamã harênh kaxyw kãnhmã xa ¹⁷ nhũm mê omu nê kãm ja gō. Finat Ijais pẽ Tĩrtũm nhỹ hã kapêr

xwỹnh kot Tĩrtũm kapêr kwỹ hã kagãja nhũm mê kãm kugō. Hãmri nhũm kupy nê kamã kormã Tĩrtũm kot tanhmã mêmoj jarênh to hõ japêr o xa. Nê kãm kato hãmri nê mê kãm kamã harẽ. Nom amnhĩ tã kamã mê kãm harênh o xa nê mê kãm:

¹⁸ Na pre ra Tĩrtũm Karõja ixto ixãhpumunh tỹx nê mê kęp amrakati xwỹnhjẽ hwỹr inhmẽ pa ra mō. Ixte mê kãm mêmoj mex jarênh o ixpa kaxyw. Nê Satanasti kot amnhĩ kõt mê unhwỹr xwỹnhjẽ hwỹr nhũm pre mããnẽn inhmẽ. Ixte mê nê Satanasti japõx o ixpa kaxyw. Nê mê kot hprĩ hã Tĩrtũm kapêr mar kêt xwỹnhjẽ hwỹr nhũm pre mããnẽn inhmẽ. Ixprĩ hã ixte mê kãm kapêr jarênh o ri mê hkõt ixpa kaxyw. Nê mê kot amnhĩ tomnuj o mê pa xwỹnhjẽ hwỹr nhũm pre mããnẽn inhmẽ. Ixte mê nê mê kot amnhĩ tomnuj rênh pa nhũm mê hamakêtkati nê ãmnhĩx ri pa kaxyw. Á na pre Tĩrtũm jajẽ piitã hwỹr inhmẽn anê pa ra man mōn pōj.

¹⁹ Nê amgrã ja kęp Tĩrtũm kot mê ato mex xà hã amgrãja nhũm ixte mê amã harênh o ixpa kaxyw na pre inhmẽ pa mōn pōj. Anê.

²⁰ Nhũm pre ã Jejus Tĩrtũm kapêr ã kagà htũm kamã mê kãm amnhĩ jarênh anê. Hãmri nê akupỹm mê kãm kagãja gō nê ho mê ahkre kaxyw akupỹm nhỹ nhũm mê piitã omunh pẽ mar o hkrĩ. ²¹ Hãmri nhũm mê kãm tanhmã amnhĩ jarênh to nê mê kãm:

—E ra Ijais kot ã ixkukamã ijarênh anhỹr xà hkõt na pa mê awỹr wrỹ nê mê anoo mã ã amnhĩ nhĩpêx anhỹr o hkrax. Anê.

²² Hāmri nhūm mē amnhī jaēr pē ã kot amnhī jarēnh anhÿr ã kuma. Nē tee ri kuma nē axpēn pumunh pē hamaxpēr o hkri. Jėjus mē kurom àhpumunh tÿx nē kapēr mex tā nhūm mē ãm kēp amnhī kwÿ pix ã hkamnhix kām hihtÿx nē. Hāmri nē axpēn mā:

—Tk. Kwa kēp Juje hkra pix kēnã koja we ri ã amnhī jarēnh anē. Anē.

²³ Hāmri nhūm amnhī tā mē kuma nē mē kām:

—Nà na ka mē ixte amnhī jarēnh ma nom ixkôt ajamaxpēr kēt nē. Jakamã axpēn mā ijarēnh o: “Tk. Kēp mē pahkapri xwÿnh ro nhÿx jar mē panhō kri kamã aa mē pahte mēmoj pumunh kēt kwÿ tanhmã mē pamã hipēx to pu mē hã omu. Te ra kot kri pē Kapanau kamã mē kām mēmoj kwÿ ho anhÿrta pyrãk. Pu mē omu nē hkôt pajamaxpēr kurē kumrēx.” Anhÿr o ri axpēn mā ijarē. ²⁴ Kojã nhām kri hō kamã mēhō kēp Tirtūm kapēr jarēnh xwÿnh ã amnhī jarē ka mē harēnh ma nē amã ma hwÿr amarar nē mar prãm nē. No kēt jar mē panhō kri kamã ixpē mē anhïõ hã ã amnhī jarēnh anē ka mē amã inhmar prãm kēt nē.

²⁵ —Kwa mē inhma. Amnepēm kormã finat Eris htir ri na pre mē hã na wrÿk kēt ry rax nē. Jao hã amgrã axkrunēpxi nē hkôt mytwrÿ pē 6. Nhūm mē õ hkēt nē pa. Ra mē kēp mēmoj grã pa nē hapēx nhūm mē kām prãm tÿx kumrēx nē pa. Nhūm mē kēp mē mjēn tyk xwÿnhjaja kām prãm xàj hiroto pa.

²⁶ Tã nom Tirtūm mē ho mex kaxyw mē hwÿr Eris mēnh kēt nē. Erisja mē urãk nē kēp Ijaew tā nhūm Tirtūm kot mē ho ajuta kaxyw mē hwÿr mēnh kēt nē. Mē kot amnhī kaxyw Tirtūm kôt hamaxpēr kēt jakamã nhūm mē hwÿr mēnh kēt nē. Axtem Ijaew kēt xwÿnhjē hō hwÿr na pre kumē. Nhām Sitō kamã kri pē Sarep kamã mjēn htyk xwÿnhhta wÿr. Tokyx kot tanhmã

ho mex to kaxyw. Jakamã nhūm ma hwÿr mō nē tanhmã kām kapēr to nhūm kuma nē amnhī kaxyw Tirtūm kôt hamaxpēr kurē kumrēx.

²⁷ —Nē finat Eriasti haxwÿja. Eris pyrã nē kēp Tirtūm nhÿ hã kapēr o pa xwÿnh tā amnhī kwÿ pē Ijaew tanhmã mē ho ajuta hto hkēt nē. Na prem ohtō nē hkã nhy nē hkro xapēr o pa. Jao ra omnuj tÿx nē. Tã nhūm Tirtūm kot akupÿm mē ho mex kaxyw mē hwÿr Eriasti mēnh kēt nē. Amnhī kaxyw mē kot hkôt hamaxpēere hã. ãm Sir nhō xwÿnh Namãja pix na pre Tirtūm Eriasti mã anē nhūm akupÿm ho mex. Kēp Ijaew kēt tā nhūm akupÿm ho mex. Tã ja pyrã nē na pa ãm mē kot amnhī kaxyw ixkôt hamaxpēr pix xwÿnhjē mã tanhmã amnhī nhÿpēx to ho ri ixpa. No mē ate amnhī kaxyw ixkôt ajamaxpēr kēt xwÿnhjē mã tanhmã ri amnhī nhÿpēx to hkēt nē. Anē.

Nhūm pre ã Jėjus mē kām amnhī jarēnh anē.

²⁸ Hāmri nhūm mē kuma nē kamã gryk tÿx nē axpēn mã hã amÿnē nē axpēn mã:

—Tk. Kwa pu mē ixkre nē kator nē ma o tē nē kupi ri. Anē.

²⁹ Hāmri nē kaxyw kãnhmã kuhē hpa nē hwÿr hprôt nē unē. Mē kot ma o htēm nē hixēt prēk jatur xà hã hkujaek nhūm ahpar mã tēn htēm nē htyk kaxyw. Mē õ krija hixēt prēk nhimõk ã na pre. Jakamã nhūm prem unē nē hatur xàta wÿr o tē. ³⁰ Tã nom nhūm tanhmã amnhī nhÿpēx to nē mē kēp akunok nē hpãnhã nhām ma tē nhūm mē tee ri hapēr nom nhÿri omunh kēt nē.

Jėjus kot mēhō nē mēkarõmnuti kator ã harēnh

Makre 1.21-28

³¹ Tã nhūm Jėjus ma akupÿm Garirej kamã kri pē Kapanau hwÿr mō. Nhūm mē õ arigromnu pē sap kato nhūm ma mē kot Tirtūm kapēr o mē ahkre xà hã ixkre hwÿr tē nē

mě ahkre ho nhỹ. ³² Hāmri nhũm mẽ kot mar o hkrĩ xwỳnhjaja kuma nẽ kãm mar prãm nẽ. Nẽ axpẽn mã:

—Hẽxta waa nẽ. Ầm hāmri na ầ mẽ pamã kapẽr anẽ. Ầhpumunh tỳx xà hkõt na hte ầm hāmri mẽ pamã awjarẽ. Anẽ.

³³ Nhũm mẽhõ myja mẽ ãhkõ hã haxwỳja mar o nhỹ. Mẽkarõmnuti na pre ra hwỳr axà nhũm ỹ hã tanhmã amnhĩ tomnuj to ho pa. Hāmri nẽ mẽ ãhkõ hã Jesus mar o nhỹ nẽ ra àmra kamã tanhmã kãm kapẽr to. Nom nhũm tãm kãm kapẽr kêt ầm kamã mẽkarõmnutija kãm kapẽr. ³⁴ Nẽ kãm:

—Pa? Jesus pẽ Najare nhõ xwỳnh? Nà ate mẽ ixto ajapẽx par kaxyw na ka mẽ ixwỳr mõ. Ra ixte apumunh mex kẽnã. Apẽ Tĩrtũm kot mẽ ixwỳr amẽnh xwỳnh maatita na ka. Jakamã kwa tanhmã kot kaj mẽ ixto? Mo kaxyw na ka pre mẽ ixwỳr mõ? Anẽ.

³⁵ Hāmri nhũm kuma nẽ mẽkarõmnuti kot kãm ầ kapẽr anhỹr ầ omunh kurẽ kumrẽx. Jakamã kutã kãm kapẽr nẽ kãm:

—Tk. Kwa anhĩkrẽ nẽ kęp akato. Anẽ.

Hāmri nhũm kuma nẽ myta o pika kura nẽ kęp kato nẽ ma tẽ. Ầm ho pika kuranh pix nhũm nõ. Hāmri nẽ akupỹm kãnhmã nhỹ nẽ akupỹm mex. ³⁶ Hāmri nhũm mẽ piitã omu nẽ kamã no pyma nẽ. Hāmri nẽ axpẽn mã:

—Kokỹỹ. Na hte Jesus amnhĩ krã hkõt ầhpumunh tỳx xà hkõt mẽkarõmnuti mã kapẽr nẽ mẽ hano nhũm htem kuma nẽ mẽ kęp hapõx kurẽ kumrẽx. Anẽ.

³⁷ Hāmri nhũm mẽ mẽõ pika kamã piitã ri axpẽn mã harẽnh o pa.

Jesus kot Simãw Pẽtre xupãnhgêx o mex ầ harẽnh

Matêwre 8.14-15; Makre 1.29-31

³⁸ Tã nhũm Jesus Tĩrtũm kapẽr o mẽ ahkre xaja rũm kato nẽ ma Simãw Pẽtre nhõrkwỹ hwỳr tẽ. Nẽ

mẽ hwỳr axà nhũm Simãw Pẽtre omu nẽ kãm upãnhgêx tanhmã kute hã harẽ nẽ kãm:

—Kwa Pahihti. Tẽ nẽ inhmã ix-upãnhgêx pumu. Na hkà kagro htỳx nẽ amnhĩ to ầpẽr o nõ. Kwa tẽn inhmã omu. Anẽ.

Hāmri nhũm kãm:

—Tõe. Nà kot paj amã omu. Anẽ.

³⁹ Hāmri nẽ hwỳr tẽn kuri xa nẽ kãm:

—Pa? E kwa akà hakry. Anẽ.

Hāmri nhũm kuma nẽ hkà hakry nẽ akupỹm hihtỳx kurẽ kumrẽx. Hāmri nẽ kãnhmã nhỹ nẽ mẽ kãm mẽõ hã ầpẽnh o ri mra.

Jesus kot mẽ ho ohtõ nẽ mẽ ho mex ầ harẽnh

Matêwre 8.16-17; Makre 1.32-34

⁴⁰ Tã nhũm ra amỹkry htỳx mẽ nhũm mẽ Jesus wỳr ahpỳnhã ri mẽ ầ xwỳnhjẽ ho mra. Nhũm amnhĩ wỳr mẽ omu hāmri nẽ mẽ piitã ri mẽ hã ãhkra jaxwỳ nẽ akupỹm mẽ ho mex pa. ⁴¹ Nhũm ra mẽkarõmnuti mẽ hkwỳjẽ hwỳr agjẽ nhũm mẽ kurũm mẽ hano nhũm mẽ tee ri amnhĩ tã omu nẽ mẽ kęp hapõx kurẽ kumrẽx. Hāmri nẽ mẽ kęp hapõx kaxyw nẽ àmra kamã kãm kapẽr nẽ kãm:

—Kwa tanhmã kot pa wem amnhĩ nẽ ato? Hẽxta waa nẽ. Apẽ Tĩrtũm Kra hã axàhpumunh tỳx kẽnã.

Anhỹr o kãm kapẽr. Ầm hāmri na prem ầ harẽnh anẽ. Kęp Tĩrtũm kot mẽ pakaxyw ầm xwỳnh kẽnã. No nhũm Ijaew nhõ pahijaja kot mẽ kapẽr mar nẽ kęp mẽkarõmnuti hkwy hã hkamnhĩx pymaj nhũm Jesus amnhĩ nẽ mẽ kãm kapẽr nẽ mẽ kãm:

—Kwa mẽ ri ầ ijarẽnh anhỹr kêt nẽ.

Anhỹr o mẽ kãm kapẽr hāmri nẽ mẽ hano nhũm mẽ hapõj nẽ ma mra.

Mẽmo kaxyw Tĩrtũm kot mẽ pahwỳr Jesus mẽnh ầ harẽnh

Makre 1.35-39

42 Tã nhũm apkati nẽ myt kator grire nhũm Jejus kot Tĩrtũm mã amnhĩ jarẽnh kaxyw kãnhmã nhỹ nẽ kato nẽ ma nhỹhỹm kapõt mã tẽ. Hãmri nhũm krĩ nhõ xwýnhjaja hkrã hapõj nẽ tee ri hapêr nẽ ma hkõt hpri jakop o mõi. Nẽ nhỹri hwýr kato nẽ omu hãmri nẽ ma nhỹhỹm mõi nẽ kurê nẽ kãm:

—Kwa Jejus. Kêr ka tokyx ma nhỹhỹm amõi kêt nẽ. Kritpêm mẽ ixkõt axkamẽ mãn. Anẽ.

43 Hãmri nhũm mẽ kuma nẽ amnhĩ tã mẽ kãm:

—Nà kot paj kritpêm mẽ akõt ixpikamẽnh kêt nẽ. Kot paj ma krĩ piitã hkõt ri Tĩrtũm kapêr o mẽ ahkre ho ri mẽ hkõt ixpa. Tĩrtũm kot tanhmã mẽ ho hkra hto hã harẽnhja kot paj mẽ hkõt ri mẽ kãm harẽnh o ri ixpa. Ja kaxyw na pre Tĩrtũm mẽ awýr inhmẽ. Anẽ.

44 Nhũm pre ã mẽ kãm amnhĩ jarẽnh anẽ. Hãmri nẽ mẽ kêp kato nẽ ma Ijaew nhõ pika piitã hkõt Tĩrtũm kapêr o mẽ ahkre ho ri pa. Ijaew nhõ Tĩrtũm kapêr o mẽ ahkre xã hã ixkre kamã mẽ piitã ho mẽ ahkre ho ri pa.

5

Jejus kot amnhĩ kõt mẽ hkwyjê hwýr ã harẽnh

Matêwre 4.18-22; Makre 1.16-20

1 Tã nhũm Jejus ma gõi rax pẽ Jenêjare hwýr mõi. Hãmri nẽ hwýr põi nẽ gõi mýri Tĩrtũm kapêr o mẽ ahkre ho xa nhũm mẽ ohtõ nẽ pu hã mar o kuhê. Nẽ kot hpri hã mar nẽ hkõt omunh kaxyw hã axpẽn nhĩgãnh o kuhê. 2 Hãmri nhũm tee ri amnhĩ tã mẽ omu nẽ amnhĩ pu hã hakẽx nẽ rĩt nẽ gõi kãm pãr kaprý hamẽxkrut nẽ jêtja wa omu. Nhũm õ dõn wa gõi kãm kryhti kuhõnh o xa. Nhũm pãr hamẽ hkaprý nẽ ajêt nhũm Jejus omu. 3 Hãmri nẽ hwýr tẽ nẽ hõm axã nẽ õ dõn pẽ Simãwja mã anẽ nhũm hkõt axã nẽ kii mẽ kêp pãrja amým kunhõ nhũm ajêt. Hãmri nhũm pãr kre rũm amým mẽ

ahkre ho nhỹ nhũm mẽ piitã omu nẽ mar mex o kuhê.

4 Tã nhũm mẽ ahkre hpa nẽ Simãw mã kãm:

—E gõi xupým wýr anhõ pãr o axkamẽ nẽ axte anhõ kryhti mẽ nẽ ho amnhĩm tep kwýmnê. Anẽ.

5 Hãmri nhũm tee ri kuma nẽ kãm:

—Kwa na pa mẽ ra kamãt kãm tee rẽnh o apkati nẽ ho hõmnẽnh kêt tã ka ri inhmã anẽ. Nom kot paj amar xã hkõt kop kumẽ. Anẽ.

6 Hãmri nẽ upým wýr pãr o axkamẽ nẽ htõ Andre mẽ wa axte kryhti mẽ. Nẽ ãm mẽnũ tipxi htã ho tep pynẽnũ rax kumrẽx. Jakamã nhũm kryhtija ra pikaxõnh kaxyw.

7 Hãmri nhũm wa tee ri ho anẽ nẽ amnhĩ wýr pãr õ ho mrrar xwýnhta wa kãm akir. Jepetew kra Juãw mẽ Xiakreja wa nhũm wa amnhĩ wýr wa kãm akir nhũm wa hwýr pãr õ ho tẽ hãmri nẽ mẽ kryhti hã hije nẽ pãr wýr ho api. Hãmri nẽ pãrta hamẽ tep o ho nýt pa nẽ hamẽ ho hipu mex nẽ. Jao nhỹx gõnh mã wa axã. 8-10 Hãmri nhũm mẽ amnhĩ jaêr pẽ tep xohtõ raxta pumu nẽ kamã no puma nẽ. Hãmri nhũm Simãwja Jejus kutã hkõn krã ho tẽm nẽ hipõ nẽ nhỹ nẽ hã hpijaãm kamã kãm kapêr nẽ kãm:

—Kwa Pahihtĩ. Kii tamũ axkamẽ. Akĩnhã ixte amnhĩ tomnuj týx xwýnh na pa. Anẽ.

Hãmri nhũm kuma nẽ ãm kuma nẽ kãm:

—Kwa nã tee ri amnhĩ kukamã ajamaxpêr kêt nẽ. Kot kaj jarãhã hpãnhã tãm amnhĩ nhĩpêx o apa. Na ka ra tep pynẽnũ rũnh o apa. Tã kot kaj ja kaga nẽ hpãnhã ma ri mẽ hkõt Tĩrtũm kapêr o mẽ ahkre ho ri apa. Koja mẽ ohtõ nẽ ama nẽ Tĩrtũm kõt amnhĩ xunhwý nẽ hkõt amnhĩ nhĩpêx o pa. Jakamã kot kaj te ate tep pynẽnũ rũnh nẽ Tĩrtũm mã õr pyrãk o amnhĩ nhĩpêx o apa. Anẽ.

Nhũm pre ã Jejus Simãw mã kapêr anẽ. 11 Hãmri nhũm mẽ gõi jakãx ã pãr janhõr týx nẽ kamã

hikukrêx piitã hkaga hpa nê ma Jejus kôt pa ho pa.

Jejus kot hkã nhy kro tÿx xwÿnh o mex ã harênh

Matêwre 8.1-4; Makre 1.40-45

¹² Tã nhũm Jejus ma krĩ hõ hwÿr mō. Hãmri nhũm mēhō my hkã nhy hkro htÿx xwÿnhja omu nê hwÿr tē nē hã hpijaãm kaxyw kutã hkōnkrã ho nhÿ nê kãm:

—Pa Pahihti. E ot pa awÿr amnhĩ to tē. Kwa akupÿm ate mē ixto mex kaxyw axãhpumunh tÿx jakamã kot ka akupÿm amã ixto mex prãm nē mãmri akupÿm ixto mex. Anē.

¹³ Hãmri nhũm kuma nē hkã punuti hã ãhkra xi. Amnhĩ kamã kahak kêt nē hã ãhkra xi nē kãm:

—Nã kot paj ato mex. E akupÿm akã mex kurê kumrêx.

Anhÿrja kôt hãmri nhũm hkàja akupÿm mex pa. ¹⁴ Hãmri nhũm Jejus kãm:

—E kër ka amnhĩ tã akwÿjê mã tanhmã ijarênh to hkêt rãhã ma patre hwÿr tē kē akupÿm akã mex ã apumu. Hãmri ka amnepêm Mojes kot mē ate akupÿm amex ã Tirtũm mã tanhmã amnhĩ nhĩpêx to hã karõta ka kãm ho anē. Kē mē mē piitã akupÿm akã mex ã apumu. Anē.

Hãmri nhũm kuma nē kãm:

—Tõe. Nã kot paj anē. Anē.

Hãmri nê ma hwÿr htēm kurê kumrêx.

¹⁵ Hãmri nhũm mē piitã axpên mã Jejus jarênh o ri hprõt nhũm mē kot kapêr mar kaxyw ma hwÿr mra. Nē mē ã xwÿnhjaja nhũm kot mē ho mex kaxyw nhũm mē hwÿr amnhĩ to mra. ¹⁶ Jakamã nhũm pre hte Jejus tōhã mē kēp hapôj nē ahte ma kapôt ã Tirtũm mã amnhĩ jarênh kaxyw mra. Nē kãm amnhĩ jarênh pa hãmri nê ma akupÿm mē hwÿr mra.

Jejus kot ã kamã htyk xwÿnh o mex ã harênh

Matêwre 9.1-8; Makre 2.1-12; Juãw 10.37-38

¹⁷ Tã nhũm Jejus ma Tirtũm kapêr o Ijaew jahkre ho pa. Jakamã nhÿri mēhō nhõrkwÿ kamã ho mē ahkre ho xa nhũm Parijew nhõ xwÿnhjê mē Tirtũm kapêr tũm o mē ahkre ho mē pa xwÿnhjaja kot mar kaxyw ma hwÿr mra. Na pre ra Garirej rũm mē hkwÿjaja ma hwÿr mra. Nē pika pē Jutej rũm mē hkwÿ haxwÿja ma hwÿr mra. Nē krĩ pē Jerujarê rũm. ã na prem ohtō nē krĩ piitã kurũm kot mar kaxyw hwÿr akuprõ nhũm mē ahkre anē. Nē Tirtũm kot ho ãhpumunh tÿx jakamã nhũm ÿ hã akupÿm mē ã xwÿnhjê ho mex. ¹⁸ Hãmri nhũm hkwÿjaja ã kamã htyk xwÿnh mÿ nē Jejus wÿr o tē. Nõr xã kamã nõr rãhã nhũm mē hã hije nē hwÿr o tē. Hãmri nē tee ri kot hwÿr ho ãr kaxyw ri mē hkupu ho pa. ¹⁹ Nom nhũm mē ra ixkre ho nÿt rax jakamã nhũm mē tee ri amnhĩ kukamã ho ukapi ho ri pa. Hãmri nê ra hamaxpêr nē ixkre nhĩmõk po hwÿr ho api nē ixkre nhĩmõk kwÿ grã nē hkõt ã kamã htyk xwÿnhhta jaxã. Nõr xã kamã nõr rãhã Jejus wÿr haxã nē mē hipõk ri ho wrÿ nē kutã kuxi nhũm nõ. ²⁰ Hãmri nhũm Jejus amnhĩ tã mē kot kaxyw kãm hamaxpêr tÿx ã mē omunh mex nē. Hãmri nē ã kamã htyk xwÿnhhta mã kapêr nē kãm:

—Pa? E na pa ra anē tanhmã ate amnhĩ tomnuj to ho apaja o ijapêx pa. Kot paj axte kãm ijamaxpêr kêt nē. Anē.

²¹ Hãmri nhũm Parijew nhõ xwÿnhjê mē Tirtũm kapêr tũm o mē ahkre ho mē pa xwÿnhjaja tee ri kot ã kãm kapêr anhÿrja ã kuma nē axpên mã:

—Tk. Kwa kēp Tirtũm kêt tã te ri kot amnhĩ nhĩpêx pyrãk o ri mē nē mē kot amnhĩ tomnuj o hapêx ã amnhĩ jarênh o kuhê. Tirtũm pix na kot mē nē mē kot amnhĩ tomnuj o hapêx xwÿnh kênã. Anē.

²² Nhũm mē ã axpên mã Jejus jarênh anē nhũm amnhĩ tã mē

kuma nê mẽ hamaxpêr kôt mẽ omunh mex nê. Jakamã mẽ kãm:

—Kwa mẽ ã ajamaxpêr anhÿr kêt nê. ²³ Ixte mẽ nê mẽ kot amnhĩ tomnuj o ijapêx par ã amnhĩ jarênh tâ mẽ ate ja kôt ixpumunh kêt jakamã na ka mẽ ixkôt ajamaxpêr kêt nê. Nom kot paj mẽ anoo mã akupÿm i kamã htyk xwÿnhnta o mex ka mẽ apiitã ja hã ixpumu hãmri nê ixkôt ajamaxpêr kurê kumrêx. ²⁴ Ixpê Tĩrtũm kot mẽ awÿr inhmênh xwÿnhnta na pa. Ixte mẽ anê mẽ ate amnhĩ tomnuj rênh kaxyw na pre mẽ awÿr inhmê pa mẽ awÿr wrÿ. Tã mẽ ate ja kôt ixpumunh kaxyw kot paj mẽ anoo mã myja o mex. Anê.

Hãmri nê hpãnhã i kamã htyk xwÿnhja mã kapêr nê kãm:

—E kãnhmã xa nê anôr xà py nê ma akupÿm anhôrkwÿ hwÿr tẽ. Anê.

²⁵ Nhũm kãnhmã ãm kurê kumrêx. Hãmri nê amnhĩ pumu nê hkĩnh tÿx nê nôr xà py nê mẽ noo mã kato nê akupÿm ôrkwÿ hwÿr ma Tĩrtũm mã mex o mex ã harênh o tẽ. ²⁶ Hãmri nhũm mẽ amnhĩ jaêr pê omu. Nê no hapôx kaxyw hkôt omunh o kuhê nê kamã no puma nê. Nê tee ri omu hãmri nê axpên mã:

—Kokÿÿ. Aa mẽ pahte ã mẽhõ kot amnhĩ nhĩpêx anhÿr ã omunh kêt tâ na pu mẽ jarãhã ja pumu. Anê.

Hãmri nê Tĩrtũm mã mex o mex ã harênh o kuhê.

Jejus kot amnhĩ kôt Rewi hwÿr ã harênh

Matêwre 9.9-13; Makre 2.15-17; Rukre 15.1-2

²⁷ Tã nhũm Jejus ma hkôt mẽ pa ho mẽ pa xwÿnhjê mẽrohã ma nhÿhÿm mõi. Hãmri nê nhÿri Rewi pumu. Rewi nhĩxi hõ pê na Matêwre. Rõm kãm mẽ õ pahihtĩ mã amnhĩ kwÿjê pê kãxpore hkwy jamÿnh xwÿnh na pre. Jakamã nhũm ujamÿnh xà hã ixkre kamã mẽ kêp hkwy jamÿnh o nhÿ nhũm

Jejus mẽ hkôt mẽ pa o mẽ pa xwÿnhjaja hãnh mra. Hãmri nhũm Jejus àpênh ã omu nê amnhĩ kôt kuwÿ nê kãm:

—Pa? E kwa axàpênhnta kaga nê hpãnhã amnê mẽ ixkôt mãn tẽ. Nê ixkôt mãn ri apa ho apa. Anê.

²⁸ Hãmri nhũm kuma nê àpênh kaga hpa nê ma hkôt mõi nê hkôt pa ho pa.

²⁹ Hãmri nhũm mẽmo arĩgro hã nhũm Rewi nhõ mẽ apkur xà hã mẽõ rax nê. Jakamã nhũm amnhĩ nhôrkwÿ hwÿr hkrãmnhwÿjaja nê Jejus mẽ hkôt mẽ pa ho mẽ pa xwÿnhjê hwÿ. Mẽ kot kutã apkur kaxyw nhũm amnhĩ kôt mẽ kuwÿ nhũm mẽ ma hkôt mra nê ôrkwÿ hwÿr agjê nê apkur o hkrĩ. Nê mẽ kêp Rõm nhõ pahĩ mã mẽ kêp kãxpore hkwy jamÿnh xwÿnh kwÿjaja nê mẽ ohtõ nê hwÿr akuprõ nê axpên kutã apkur o hkrĩ. ³⁰ Hãmri nhũm Parijew nhõ xwÿnhjê mẽ Tĩrtũm kapêr tũm o mẽ ahkre ho mẽ pa xwÿnh kwÿjaja mra nê mẽ apkur ã mẽ omu nê tee ri mẽ hkaêx ã Jejus pumu hãmri nê Jejus kôt mẽ pa ho mẽ pa xwÿnhjê hwÿr agjê nê hã mẽ kãm akir nê mẽ kãm:

—Kwa mẽ kot amnhĩ tomnuj ho mẽ pa xwÿnhjê kutã mẽ apkur kêt tâ ka mẽ apytãr xwÿnhja mẽ apim-rãatã axtem nê mẽ kutã axãpkur o akrĩ. Kwa mẽ ate amnhĩ to mex ronhÿx ka mẽ kutã axãpkur kêt nê. Anê.

³¹ Hãmri nhũm Jejus amnhĩ tâ mẽ kapêr ã mẽ kuma nê mẽ kãm:

—Tk. Nà ixte tãm mẽ unhwÿr kaxyw na pa mẽ kutã ixãpkur o nhÿ. Xà na hte tõtõja mẽ mex xwÿnhjê hwÿr mra nê mẽ hkane? Nà ãm mẽ à xwÿnhjê pix wÿr na htem mra. Ra mẽ ate ja pumunh mex kênã. Ja pyrã nê na pa pre mẽ kot amnhĩ to mex xwÿnhjê hwÿr ixwrÿk kêt nê. Mẽ kot amnhĩ tomnuj xwÿnhjê pix wÿr na pa pre wrÿ. Ixte tãm mẽ unhwÿr kaxyw na pa pre mẽ hwÿr wrÿ nê ã jajê kutã ixãpkur o inhÿr

anë. ³² ãm mẽ kot amnhĩ tomnuj xwýnhjê hwýr na pa pre wrý nê mẽ kamã ixkaprĩ ho ri ixpa. Mẽ kot amnhĩ tomnuj mã urer nê hpãnhã tãm amnhĩ nhĩpêx o pa kaxyw na pa pre mẽ hwýr wrý. Tã ka mẽ atýx ã ri mẽ ixto akapêr anë. Anë.

Mẽ hpãmjaja kot amnhĩ nhĩpêx gryk ã Jejus kaga hã mẽ harênh

Matêwre 9.14-17; Makre 2.18-22

³³ Tã nhũm Ijaew kwýjaja Jejus wýr mra nê kãm:

—Pa? E ot pa mẽ awýr mra. Kwa aprĩ hã mẽ inhmã mẽmoj jarê. Na hte Parijew nhõ xwýnhjê mẽ Juãw kôt mẽ pa xwýnhjaja tõhã Tirtũm mã amnhĩ jarênh kaxyw nê apkur kêt rãhã kãm amnhĩ jarê. No akôt mẽ pa ho mẽ pa xwýnhjaja na htem ãmnhĩx apkur o pa kamã kãm amnhĩ jarê. Kwa mo na htem mẽ urak nê tõhã apkur kêt ri kãm amnhĩ jarênh hkêt nê? Anë.

³⁴ Hãmri nhũm mẽ kuma nê mẽ kãm:

—Tk. Nà mo kaxyw koja mẽ apkur kêt rãhã kãm amnhĩ jarê? Mẽ kot ixkôt pa ho pa hã amnhĩ pumunh jakamã hkĩnh nê pa. Kormã ixte mẽ kamã ixpa kênã kot kêt mẽ Tirtũm mã amnhĩ jarênh kaxyw nê apkur kêt rãhã kãm amnhĩ jarê. Xà na htem hkrãmnhwý hã hkĩnh kaxyw hã akuprõ nê hkaprĩ nê apkur kêt nê mýr o hkrĩ? Na htem hã akuprõ nê hkĩnh nê hã apkur rũnh nê. Ja pyrã nê na hte ixkôt mẽ pa ho mẽ pa xwýnhjaja ixkôt kormã ãmnhĩx ri hkĩnh nê apkati mẽ apkur o pa. ³⁵ Nom koja mẽ kãm ixkurê xwýnhjaja nhýrmã tanhmã ixto hãmri nhũm mẽ rĩ kormã ixtã hkaprĩ htýx kãm apkur kêt ri tanhmã amnhĩ nhĩpêx to. Anë.

³⁶ Nhũm pre ã Jejus mẽ kãm hkôt ri mẽ pa ho mẽ pa xwýnhjê jarênh anë hãmri nê mẽ kãm:

—Nà mẽ kot amnhĩ tomnuj xwýnhjaja mẽ kot amnhĩ nhĩpêx tũm o amnhĩ pyrãk jakamã na htem

mẽ kot amnhĩ nhĩpêx nyw kaga. ³⁷⁻³⁹ Ixte amnhĩ nhĩpêx nywja te kot mẽ ate amnhĩ nhĩpêx tũm pyrãk kêt jakamã ka htem inhma nê ãm inhma. Kwa mẽ ixkapêr ma nê mẽ ate amnhĩ nhĩpêx tũm gryk ã ixkaga hkêt nê. Anë.

6

Jejus kêp arĩgromnu hpãm ã harênh

Matêwre 12.1-8; Makre 2.23-28

¹ Tã nhũm Ijaew nhõ arĩgromnu pẽ sapja axte kato. Hãmri nhũm Jejus mẽ hkôt ri mẽ pa ho mẽ pa xwýnhjê mẽ ma mẽ hpur kôt ri nhýhým ri pa. Hãmri nhũm hkôt mẽ pa ho mẽ pa xwýnhjaja ra kãm prãm nê mra hãmri nê prãm xaj mẽmo hy te kot harõj pyrãk xwýnhta kwý rê nê kugrã nê ma Jejus kôt hkanhar o mõ. Ijaew kot amnhĩ nhĩpêx xà hkôt. ² Hãmri nhũm Parijew nhõ xwýnhjaja kãm mẽmoj tã Jejus o kapêr prãm jakamã ã mẽ kot amnhĩ nhĩpêx anhýr ã mẽ omu nê mẽ hã Jejus kujjêr kurê kumrêx nê kãm:

—Kwa Tirtũm kapêr tũm kot mẽ panhõ arĩgromnu hã mẽ pahte mẽ pahpur kãm mẽmoj nhĩkênh nê mẽ pahkurê htã nhũm ri akôt mẽ pa ho mẽ pa xwýnhjaja axtem nê mẽmo hyta kwý rê nê akôt hkanhar o mõ. Kwa mẽ kãm anë kê mẽ ã amnhĩ nhĩpêx anhýr kêt nê. Na htem arĩgromnu hã ã amnhĩ nhĩpêx anhýr kêt nê. Anë.

³⁻⁴ Hãmri nhũm Jejus mẽ kuma nê hprĩ hã mẽ kãm Tirtũm kapêr tũm jarê nê mẽ kãm:

—Kwa xà na ka mẽ Tirtũm kapêr ã kagã htũm kamã pahi Tawi kot tanhmã amnhĩ nhĩpêx tota kamã harênh nê mar kêt nê? Na pre Tawija hkôt ri mẽ pa xwýnhjê mẽ nhũm mẽ prãm xaj Tirtũm mã amnhĩ jarênh xà hã ixkre wýr agjê nhũm patre maatija mẽ kãm prãm týx ã mẽ omu nê mẽ kãm mẽmoj gõ. Mẽ kot Tirtũm noo mã pãwti jaxwýr

xwÿnhhta nhũm mē kām kugō nhũm mē kuku. Tirtũm kapēr ā kagā htũm kot ja nē mē kurē htā nhũm mē kām prām tÿx ā mē omu nē mē kamā ukaprī xàj mē kām kugō. Patre pix kot ja kur kaxyw tā nhũm mē kām kugō nhũm mē kuku. Tā nhũm Tirtũm ja hā mē omu nhũm ja kēp omnuj kēt nē. Kot mē kamā ukaprī nē mē kām ōr nhũm mē hā omu nhũm ja kām mex nē. ⁵ Tā pa na pre Tirtũm mē akaxyw ixām nē mē awÿr inhmēnh jakamā papxipix na pa hte arīgromnu hā tanhmā mē kot amnhī nhīpēx to hā mē kām karō ho ri ixpa. Ixpē arīgromnu hpām na pa. Anē.

Jejus kot ĩhkra grā xwÿnh o mex ā harēnh

Matēwre 12.9-14; Makre 3.1-6

⁶ Tā nhũm Ijaew nhō arīgromnu pē sapja axte kato. Hāmri nhũm Jejus Tirtũm kapēr o mē ahkre xā hā ixkre hwÿr tē nē axā nē Tirtũm kapēr o mē ahkre ho nhÿ. Nhũm mēhō myja upōk rūm ĩhkra grā xwÿnhja mē ĩhkō hā mar o nhÿ. ⁷ Nhũm Parijew nhō xwÿnhjē mē Tirtũm kapēr tũm o mē ahkre ho mē pa xwÿnhjaja mē kām mē hkrāhtũmjē mā Jejus o kapēr prām xàj htānopxar o kuhē. Nē ĩhkra grā xwÿnhhta pumu nē hā axpēn mā:

—Kwa pu mē jar pakuhē nē Jejus tanhmā kot amnhī nhīpēx to hā omu. Xā koja jarāhā mÿjti ho mex nā? Jarāhā arīgromnu kēnā kot kēt kām ĩhkra ho mex. Koja anē nē Tirtũm kapēr kwÿm ri amnhī nhīpēx. E pu mē kop pakuhē nē hā omu. Anē.

⁸ Nhũm Jejus ra kot mē hamaxpēr kōt mē omunh mex jakamā amnhī wÿr myta mā hpa ho apē nē kām:

—Pa? E kànhmā xa nē amnē ixwÿr tē. Anē.

Hāmri nhũm kuma nē kànhmā xa nē hwÿr tē. ⁹ Hāmri nhũm Jejus amnhī pu hā ri mē ho hakēx nē mē kot mar o hkrī xwÿnhjē pumu nē mē kām:

—E mē inhmā mēmoj jarē. Tanhmā na htem arīgromnu hā axpēn nhīpēx to ho pa wehe? Xā kot ka arīgromnu hā axā htÿx nē nō hāmri nē amnhī mex prām xàj ma mēhō hwÿr amnhī to tē. Hāmri nhũm ām apumu nē apkatim arīgro mex jamār pē akane hkēt ka ty nhũm ja amā mex nē nā? Rÿ nhũm tanhmā atomnuj to nē akupÿm amnhī nē ajano nhũm ja amā mex nē nā? Nā koja ā anhīpēx anē nhũm ja amā mex kēt nē. Na ka htem ā amnhī nhīpēx anhÿr o apa hkēt nē. E mē inhmā mēmoj jarē. Tanhmā na pre finat Mojesja Tirtũm nhÿ hā mē pamā arīgromnu hā mē pahte axpēn nhīpēx ā karō hto? Xā kot puj mē axpēn kām paxukaprī ho papa nā? Kot puj mē pamā axpēn kurē ho papa? Xā kot puj mē hā mēmoj punuj pē axpēn pytā nā? Xā kot puj mē hā axpēn pytār pymaj arīgro mex jamā? E mē atō inhmā ja jarē. Anē.

Nhũm pre ā mē hkukjēr anē. ¹⁰ Mē hamaxpēr ā mē omunh mex pē ā mē hkukjēr anhÿr o xa. Nom nhũm arī mēhō tanhmā kutā kām nē hkēt nē. Ām akryk mar pē omunh o hkrī. Mē kot tanhmā kām nē nhũm ta pānhā tanhmā kot mē kām nē pymaj nhũm mē tee ri kām tanhmā nē hprām nom akryk mar o hkrī. Hāmri nhũm Jejus tee ri mē omu hāmri nē myta mā kām:

—Tk. Mē kot tanhmā inhmā kapēr tore hā. E anhīhkra katāt. Anē.

Hāmri nhũm ĩhkra katāt nē akupÿm mex kurē kumrēx.

¹¹ Hāmri nhũm mē kām Jejus kurē xwÿnhjaja tee ri ja hā omu nē kamā gryk tÿx nē. Arīgromnu hā kot ho mex jakamā nhũm mē kamā gryk tÿx nē. Nē hā axpēn kukjēr o kuhē nē axpēn mā:

—Kwa ā kot amnhī nhīpēx anhÿr mÿrapē tanhmā kot puj wem ho? Na ā kapēr anhÿrja o tanhmā mē pahto kapēr punuj to. Te

mê papamjaja mẽ pahte hkĩnhã pahkwýjê kamã paxukaprĩ hkêt pyrãk ã mẽ pajarê. Koja mẽ pahkwýjaja kuma hãmri nê mẽ pahte amnhĩ nhĩpêx kaga nê amnhĩ kaxyw ãm hkôt pix mã hamaxpêr o pa. Jakamã kwa tanhmã kot puj mẽ ja nê ho? Anê.

Jejus kot amnhĩ kaxyw mẽ ho 12 nê mẽ rênh ã harênh

Matêwre 10.1-4; Makre 3.13-19

¹² Tã nhũm arĩgro hõ hã nhũm Jejus ma kot Tĩrtũm mã amnhĩ jarênh kaxyw ma hixêt prêk wýr tẽ nê hã api. Hãmri nê kãm amnhĩ jarênh o apkati.

¹³ Tã nhũm kwýhtã nhũm amnhĩ kôt kot ri mẽ o pa xwýnhjê hwý nê amnhĩ kaxyw mẽ ho 12 nê mẽ kurê. Nê mẽ kãm:

—E mẽ kajaja kot paj ma mẽ pahkwýjê hwýr mẽ arê ka mẽ ma inhý hã Tĩrtũm kapêr o mẽ ahkre ho ri mẽ hkôt apa. Kot kaj mẽ apê inhý hã mẽ ahkre ho apa xwýnh. Anê.

¹⁴ Kot amnhĩ kaxyw mẽ rênh xwýnhjê nhĩxi na jajaja:

Simãw kumrêx na pre kuta nê axte hã hixi mẽ nhũm kêp Pêtre.

Nê Simãw Pêtre hkôt htõ Andreja ta.

Nê hkôt Xiakre hta.

Nê hkôt Juãw ta.

Nê hkôt Firiptija ta.

Nê hkôt Patoromew ta.

¹⁵ Nê hkôt Matêwreja ta.

Nê hkôt Tomasja ta.

Nê hkôt Apew kra axtem Xiakre hõja ta.

Nê hkôt Simãw Jeroxja ta.

¹⁶ Nê hkôt Xiakre hõ hkra Jutja ta.

Nê hkôt Jut Kariot ta.

Jut Kariotja na pre kormã kot mẽ kãm Jejus kurê xwýnhjê nhĩhkram õr mã. Nhũm kot amnhĩ kukamã omunh mex tã mẽ hkôt amnhĩ kaxyw kuta.

Ã mẽ kot Jejus nhý hã mẽ ahkre o pa kaxyw mẽ rênh xwýnhjê nhĩxi kot anhýr.

Jejus xapênh ã harênh

Matêwre 4.23-25

¹⁷ Tã nhũm Jejus akupým ý hã mẽ ahkre ho pa xwýnhjê mẽ hãmri hixêt prêêta kurũm wrý nê nhýri hinur kãm kuhê. Hãmri nhũm nhýhýnh mẽ kot mar mã xwýnhjaja hã akuprõ. Kôt mẽ pa ho mẽ pa xwýnh kwýjaja nê nhýhýnh krĩ hkwy rũm mẽ hkwyjaja. Pika pê Jutej kurũm mẽ hkwyjaja. Nê krĩ pê Jerujarê kurũm mẽ hkwyjaja. Nê gô mý ri Xir mẽ Sitõja wa kamã mẽ pa xwýnh kwýjaja. ãm ahpýnhã ri nhýhýnh krĩ hkwy rũm mẽ kot mar mã xwýnhjaja hã pikuprõnh rax nê. ¹⁸⁻¹⁹ Mẽ kot kapêr mar nhũm kot akupým mẽ ho mex kaxyw nhũm prem ma hwýr amnhĩ to pa. Mẽ hkwyjaja tanhmã ri à kute. Nhũm mẽ hkwyjaja mẽkarõmnuti kot mẽ hwýr gjêx xwýnhjaja nhũm mẽ piitã ma hwýr amnhĩ to pa. Na prem ra amnhĩ kaxyw kãm hamaxpêr o:

—E pa ma hwýr tẽ nê ãm hkupênh pix tã akupým inhmex japêr. Anê.

Hãmri nê ma hwýr mra nhũm mẽ omu nê Tĩrtũm xãhpumunh týx o akupým mẽ ho mex pa.

Jejus kot hkôt mẽ pa ho mẽ pa xwýnhjê jahkre hã harênh

Matêwre 5.1-12

²⁰ Tã nhũm Jejus hkôt mẽ pa ho mẽ pa xwýnhjê jahkre nê mẽ kãm:

E kot kaj mẽ atõ amnhĩ kaxyw tanhmã inhmã ajamaxpêr to nê ajamaxpêr o: “Nã ixkukrêx rax kêt tã na hte Tĩrtũm ixkõt pa ho pa. Koja ixkõt pa hkêt pa ixtýx ri tanhmã amnhĩ nhĩpêx to ho ri ixpa rãhã nê. Tĩrtũmja mex kumrêx o kot mẽ hikukrêx raxta jakrenh par.” Anhýr o ajamaxpêr. Hãmri nhũm Tĩrtũm ã ajamaxpêr anhýr ã apumu nhũm ja kãm mex nê. Hãmri nhũm apê hkra hã ato mex nê atãnopxar o akôt pa

- ka ajamakêtkati nê akînh nê axâmnhîx ri apa.
- 21 Nê kot kaj mê atô amâ Tîrtûm kâm hprâm xâ hkôt tanhmâ amnhî nhîpêx to ho ri apa hprâm tỳx nê. Nhûm amnhî tâ apumu nhûm ja kâm mex nê nhûm ato mex nê. Nê tanhmâ ato ka hkôt pix mâ amnhî to mex o ri apa nê ajamakêtkati nê akînh nê axâmnhîx ri apa.
- Nê kot kaj mê tanhmâ amnhî tomnuj to. Hâmri nê tee ri ja hâ amnhî pumu nê ajamaxpêr. Nê apijaam nê akaprî xàj amỳr o nhỹ. Amỳr rax nê. Hâmri nhûm Tîrtûm ja hâ apumu nhûm ja kâm mex nê. Jakamâ nhûm anê akaprî hta nê ato mex nê. Ka ajamakêtkati nê akînh nê axâmnhîx ri apa.
- 22-23 Nê kwâr mê māmri ixtâ tanhmâ mê ato kapêr punuj to nê tanhmâ mê ato hêx to nê tanhmâ ri mê atomnuj to ho pa. Kwâr mê māmri â mê anhîpêx anhỹr o pa. Ka mê âm inhmâ pix mâ ajamaxpêr rāhā ho apa pê ajamakêtkati nê axâmnhîx ri apa. Kwâr mê māmri â mê anhîpêx anê nê mê amex kêt â mê ajarênh o pa. Annepê m na pre Tîrtûm nhỹ hâ kapêr xwỳnhjaja nhûm prem â mê hipêx anê. Jakamâ koja mê urak nê â mê anhîpêx anhỹr o pa. Nhûm Tîrtûm ja hâ mê apumu nê amnhîm mê amex â mê ajarê. Hâmri nê nhỹrmâ kaxkwa kamā wa inhō krî kamā mê ato mex rax nê. Ka mê akînh nê ajamakêtkati nê axâmnhîx ri apa. Jakamâ kwâr mê māmri pika jakamā â ixtâ mê anhîpêx anê. Anê.

*Jejus kot arî mê kot mar xwỳnhjê jahkre hā harênh
Xiakre 5.1-5*

24 Nhûm Jejus nhâm hkôt mê pa ho mê pa xwỳnhjê nhîhkô hā mê kot Tîrtûm kôt amnhî nhîpêx o pa hkêt xwỳnhjê hwỳr apkjê. Nê mê omu nê tanhmâ mê kâm kapêr to. Mê hikukrêx rûnh xwỳnhjê kumrêx mâ kapêr nê mê kâm:

E kwa mê o kora mê akukrêx rûnh xwỳnhjaja. Na ka htem âm akukrêx rûnh pix mâ ajamaxpêr o ri apa nê gryk ā Tîrtûm mâ ajamaxpêr o apa hkêt nê. Jao mê amâ kapêr mar prām kêt nê. Nê âm akukrêx rûnh mâ ajamaxpêr pê akînh nê ri apikunhar o ri apa. Tâ kot ka mê nhỹrmâ ty hāmri nhûm akînh xàja apê hapêx.

25 Nê mê amâ Tîrtûm kôt ri amnhî nhîpêx prām kêt xwỳnhjaja. Kot kaj mê nhỹrmâ akaprî htỳx kâm tee ri amnhî to hwỳr kaprỳ kâm ga. Koja mê amar kêt nê.

Nê mê atỳx ri mê ate tanhmâ amnhî tomnuj to hkukamā ajamaxpêr nê apikunhar pê amnhî tomnuj o apa xwỳnhjaja. Kot kaj mê nhỹrmâ â mê ate amnhî nhîpêx anhỹrja mỳrapê mê kot amnhî xâ htỳx kamā hamak o pa htûm xâ hwỳr ma apa. Hâmri nê kamā akaprî xàj amỳr rāhā ho ri apa. Jakamâ kwa mê o kora mê amâ Tîrtûm prām kêt xwỳnhjaja. Kêr ka mê ixkapêr ma nê axkām ajamak rom nê ri apa.

26 Annepê m mê pakukamā mê pa xwỳnhjaja na prem Tîrtûm kapêr o hkwyjê jahkre ho pa. Nom axtem nê hkwy m ri tanhmâ mê kâm ho hêx to nhûm mê kuma nhûm ja mê kâm mex nê nhûm mê amnhîm mê mex â mê harê. No âm mê mex kêt. Tâ mê kajaja. Mê kot mê urak nê axpên mâ mê amex ā

mê ajarênh tâ Tirtûm mã mẽ amex kêt. Jakamã kot kaj mẽ amex kêt nê. Anê.

Mê kãm mẽ pahkurê xwýnhjê jarênh

Matêwre 5.38-48; Rukre 23.34; mãânên Atre 7.60; Rômân 12.14

²⁷ Hãmri nhùm Jejus hpãnhã mẽ piitã mẽ ahkre nê mẽ kãm:

—E mẽ ate inhmar xwýnhjaja. Kêr ka mẽ kot mẽ atomnuj xwýnhjaja amnhĩ tâ tanhmã mẽ ho hkêt nê. Âm mẽ ho mex pix o ri apa hkukamã mãn ajamaxpêr.

²⁸ —Nê mẽ kot mẽ ato kapêr punuj xwýnhjaja. Kêr ka mẽ amnhĩ xwar amnhĩ tâ tanhmã mẽ ho akapêr punuj to hkêt nê. Âm tãm mẽ kãm akapêr pê mẽ kãm akapêr mex o ri apa. Nê mẽ kot tanhmã ri mẽ ato ho pa xwýnhjaja ka mẽ ho mex pix o ri apa. Nê mẽ ho Tirtûm wýr pix kukamã mãn ajamaxpêr.

²⁹ —Nê koja mēhō anhīnep akura ka âm omu nê tanhmã amnhĩ tâ ho hkêt nê. Te ate kãm ihkjê pêr nhùm kot ihkjê kamã akuranh pyrãk o amnhĩ nhĩpêx nhùm ja amã mex nê. No kêr ka mẽ amnhĩ tâ tanhmã mẽ ho hkêt nê.

—Nê koja mēhō apê anhīnôhkã py ka tanhmã hã kãm nê hkêt nê. Kwãr mãmrĩ apê kupy. Ka mãânên te ate kry pê anhīnôhkã hpakã ry jagjênh xwýnhhta anhīnôhkã hkôt kãm ôr pyrãk o hipêx. Nom kamã agryk kãm kãm ôr kêt nê.

³⁰ —Nê koja mēhō kêp amrakati kumrêx nê awýr tē nê mẽmoj tâ awý. Ka anhō mẽmoj japêr nê mãmrĩ kãm mẽmoj gō. Kêp anhōxý hkêt kamã kãm mẽmoj gō. Rý koja mēhō apê mẽmoj to ahkĩ ka axãhkurê hkêt nê. Nê tanhmã hã ho hkêt nê. ³¹ Mẽ piitã mẽ kot tãm mẽ anhĩpêxja na mẽ amã hprãm. Tã kêr ka mẽ amnhĩ pyrã nê tãm mẽ piitã mẽ hipêx o ri apa. Mẽ kot tãm mẽ anhĩpêx kêt tâ kêr ka mẽ axãmnhĩx ri anhōxý hkêt nê tãm mẽ hipêx o ri apa.

³² —Nom kot kaj mẽ amã mẽ piitã mẽ ho mex o apa hprãm kêt japêr. Nê âm mẽ kot mẽ ato mex xwýnhjê pix ka mẽ amã mẽ ho mex prãm. Xã koja Tirtûm ja hã mẽ apumu nhùm ja kãm mex nê? Nã koja kãm mex kêt nê. Koja mēhō mẽ ato mex kêt tâ ka mẽ amnhĩ rom ho mex nê nhùm Tirtûm ja hã mẽ apumu hãmri nê mẽ amex ã mẽ ajarê. Mẽ kot amnhĩ tomnuj o mẽ pa xwýnhjaja na htem âm mẽ kot mẽ ho mex xwýnhjê pixjaja nhùm htem amnhĩ xwar mẽ ho mex o pa. No tãm mẽ kot amnhĩ nhĩpêx o mẽ pa xwýnhjaja na htem mẽ piitã mẽ ho mex o pa. Mẽ kot tãm amnhĩ nhĩpêx xwýnhjaja nê mẽ kot amnhĩ tomnuj xwýnhjaja nhùm mẽ ho hpimràatã mẽ ho mex o axpên pyrãk o pa.

³³⁻³⁶ —Nê mẽ kot amnhĩ tomnuj xwýnhjaja na htem âm mẽ kot mẽ ho mex xwýnh pixjaja nhùm htem amnhĩ xwar mẽ ho mex o pa. No mẽ kajaja. Kêr ka mẽ mãmrĩ mẽ piitã mẽ kamã axukapri pix nê. Jao axãmnhĩx ri mẽ piitã mẽ kãm mẽmoj nhõr o ri apa. Nhùm Tirtûm ja hã mẽ apumu nê ja hã mẽ ato mex nê.

—Jakamã kêr ka mẽ amarĩ mẽ kãm akurê xwýnhjê ho mex nê. Nê mẽ kamã axukapri nê. Nê mẽ piitã mẽ kãm mẽmoj nhõr o ri apa. Kê nhýrmã Tirtûm maati mẽ hã mẽ amã mẽmoj nhõr rax nê. Nê mẽ ate kot amnhĩ nhĩpêx kôt amnhĩ nhĩpêx xwýnh ã mẽ ajarê. Tirtûm na hte mẽ kot amnhĩ tomnuj xwýnhjê kamã ukapri ho pa. Jakamã kêr ka mẽ urãk nê ã mẽ hipêx anhýr o ri apa. E kêr ka mẽ ã axpên nhĩpêx anhýr rãhã nê. Anê.

Mẽ pahte axpên to pakapêr punuj kêt ã mẽ pamã karõ

Matêwre 7.1-5; mãânên Rômân 2.1-3, 14.1; Wam Korit 4.5; Xiakre 4.11-12

³⁷ Nhùm Jejus arĩ mẽ ahkre nê mẽ kãm:

—Nê kêr ka mē atỳx ri amnhĩ krā hkôt tanhmā mē kot amnhĩ tomnuj to hā tanhmā axpēn jarēnh to ho ri apa hkēt nē. Kêr kê Tirtũm mē apyrà nē ã mē ajarēnh anhỹr kêt nē.

—Nê kêr ka mē tanhmā mēhō kot ra atomnuj tota mǎ ajamaxpēr rāhā hkēt nē. Ām ho ajamakêtkati tokyx anē nē axte kām ajamaxpēr kêt nē. Kêr kê Tirtũm ja hā mē apumu nē mē apyrà nē axte tanhmā mē ate amnhĩ tomnuj to mǎ hamaxpēr kêt nē.

38 —Nê kêr ka mē axpēn kamā axukaprĩ pē tanhmā axpēn to mex to ho ri apa. Kêr kê Tirtũm ja hā mē apumu nē mē apyrà nē mē akamā ukaprĩ pē tanhmā mē ato mex to ho pa. Na hte mē pahte axpēn kamā paxukaprĩ hā mē pahpumunh xā hkôt tanhmā mē pakamā ukaprĩ to.

39 —Nom kêr ka mē atỳx ri tanhmā axpēn to akapēr to hkēt nē. Mē ate aprĩ hā axpēn jamaxpēr kôt axpēn pumunhre hā. Jakamā kot kaj mē atỳx ri mēhō ho akapēr punuj hāmri nē te mē nohkre xwỳnhjê hō kot mēmoj pumunh kêt tǎa te kot no ho omunh nē tanhmā harēnh to pyrāk o amnhĩ nhĩpêx.

40 Tirtũmja tapxipix na kot mē pajamaxpēr kôt mē pahpumunh par. Mē axāhpumunh tỳx o mē pahte hakrenh kêt jakamā kwa kêr ka mē ãm hkôt pix mǎ amnhĩ nhĩpêx o ri apa. Kot kaj mē ã amnhĩ nhĩpêx anē hāmri nē gaa nē urāk nē mē piitā mē kamā axukaprĩ pix o ri apa. 41-42 Jao mēhō kot tanhmā amnhĩ tomnuj to hā omu hāmri nē tanhmā hā kām nē tokyx anhỹr kêt nē. Akumrēx ate tanhmā amnhĩ tomnuj to hā amnhĩ pumu nē hkaga hāmri nē rĩ kormā mēhōta hwỳr tē nē kot tanhmā amnhĩ tomnuj to hā kām akapēr to. Anē.

Mē pajamaxpēr xā hkôt mē pakapēr ã mē pajarēnh
Matêwre 7.16-20, 12.33-37

43-45 Nhũm Jejus arĩ mē ahkre nē mē kām:

—Nê koja mēmo pĩ hpār mex nē ô mex nē. Nom koja pār punuj hāmri nē ômnuj nē.

—Nê na htem mēmo xō pumu nē hkôt tanhmā pār kute hā omu. No na htem rārāj pumu nē kêp akunĩ kamā mrônhĩ xō hā hkamnhĩx kêt nē. Na htem mēmo xy hpār pumu nē ô xānhre hā hkamnhĩx kêt nē. Ja pyrà nē koja mēhō hamaxpēr punuj nē mǎānēn hakwa ho kapēr punuj pix nē. Nê htỳx tanhmā amnhĩ tomnuj to ho ri pa. Nom koja hamaxpēr mex nē hāmri nē mǎānēn hakwa ho kapēr mex o pa. Na htem ahpỳnhā amnhĩ jamaxpēr xā hkôt tanhmā hakwa ho kapēr to ho ri pa. Anē.

Ixkre pijakrut jarēnh

Matêwre 7.24-27; mǎānēn Xiakre 1.22-25; Wam Juǎw 2.3-6

46 Nhũm Jejus arĩ mē hkôt mē pa ho pa xwỳnhjê jahkre ho nhỹ nē mē kām:

—Nê kot kaj mē ixpê mē anhō pahihiti hā ijarē hā kot kaj mē ixkapēr kôt amnhĩ nhĩpêx rāhā ho ri apa.

47—E pa mē amā ixprĩ hā mē kot ixkôt amnhĩ nhĩpêx xwỳnhjê kot amnhĩ nhĩpêx jarē ka mē aprĩ hā inhma. 48 Mē kot amnhĩ nhĩpêxja te mēhō hamaxpēr mex pē aptỳx kām amnhĩm ôrkwỹ nhĩpêx pyrāk. Kojā aptỳx kām ôrkwỹ nhĩpêx nhũm mēmo arĩgro hā na wrỳk rax nē. Nē gô htām rax nē hanhi nom nhũm arĩ ãm tỳx nē xa. Tǎ kot kaj mē ixkôt amnhĩ nhĩpêx ã kot kaj mē te ixkre jarēnhja pyrāk. Jao amex nē ajamakêtkati nē ri apa. Te gô htām kot ixkre janhir tǎ nhũm ãm tỳxta pyrāk. 49 Nom koja mēhō hamaxpēr mex kêt nē htỳx mō nē gô mỳri gyw rerek kām amnhĩm ôrkwỹ nhĩpêx. Hāmri nhũm mēmo arĩgro hā na wrỳk rax nē. Nē hā gô htām rax nē ôrkwỹ janhi nē kêp grānh pa. Tǎ koja mēhō ixkôt

amnhĩ nhĩpêx kêt nê te ho mēhō kot gō m̄yri gyw rerek kām ixkre nhĩpêxta pyrāk. Jao mex kêt nê pa. Jakamā kwa mē ixkapêr mar t̄yx nê te gō htām kot ixkre janhir nê grānh parta pyrāk o amnhĩ nhĩpêx o apa hkêt nê. Anē.

7

Jejus kot mēhō mā àpēnh xw̄ynh o mex ā harēnh

Matêwre 8.5-13

¹ Tā nhũm Jejus mē kām ujarēnh pa hāmri nê ma akup̄ym Kapanau hw̄yr mō. ² Nê mōō nê ra hw̄yr pōj. Nhũm krī kamā pōristi krāhtũm mā àpēnh xw̄ynhja à ht̄yx nê nō. Ra htyk kaxyw nê nō nhũm ō patrāw tee ri omu nê kām hapê jakamā tee ri hkukamā hamaxpêr o hkaprī nê. ³ Hāmri nê Jejus pōx ā harēnh ma nê hw̄yr Ijaew pigêt kw̄yjê rē nê mē kām:

—Kwa mē ma Jejus w̄yr mra nê kām ijarê kē tokyx man ixw̄yr tē nê inhmā àpēnh xw̄ynhta o mex. Anē.

⁴⁻⁵ Hāmri nhũm mē kuma nê ma hw̄yr mra nê omu nê kām:

—Pa. Na pōristi krāhtũm na aw̄yr mē inhmē pa mē mra. Mē pahkīnhā kēp Ijaew kêt tā kām mē pahkīnh nê. Tām na pre mē inhō krī kamā mē inhmā Tirtũm kapêr o mē ahkre xà hā ixkreja nhĩpêx. Tā na kām àpēnh xw̄ynhta kēp à ht̄yx nê nō nhũm apōx hā ajarēnh ma nê man aw̄yr mē inhmē. Kwa ma hw̄yr tē nê kām ho mex nà? Anē.

⁶ Hāmri nhũm mē kuma nê mē kām:

—Tōe. Ma pu mē hw̄yr. Anē.

Hāmri nê ma mē hkôt tē. Hāmri nê kormā ōrkw̄y htêp o htēm mē nhũm axte kutā hkrāmnhw̄y hkwȳ rē nhũm mē ma kutā mra. Hāmri nê mra nê mē hkaxpa nê Jejus pumu nê kām:

—Pa? Kwa na pōristi krāhtũmta ā aw̄yr karō anē. Na mē inhmā: “E kēr ka mē mra nê nh̄yri Jejus kaxpa nê kām awjarê kē ām ata rūm kapêr pix o inhmā à xw̄ynhta o mex. Kīnh

ā ixpê Ijaew kêt jakamā ixte amnhĩ kuk ā ixpijaam t̄yx. Jakamā kot paj pam hw̄yr ixtēm kêt nê. Kwa kām anē kē ata rūm kapêr pix o inhmā akup̄ym ho mex. ⁷⁻⁸ Ixpê mē hkrāhtũm jakamā na pa hte inhō pōristi mā mēmoj tā karō nhũm mē inhmar xà hkôt inhmā mēmoj tanhmā hipêx to. Na pa hte mē kām: ‘E mē ma mra nê ā amnhĩ nhĩpêx anē.’ Anē nhũm mē inhma nê ma mrar kurê kumrêx. R̄y pa mē kām: ‘E mē amnē ixw̄yr mra nê ā amnhĩ nhĩpêx anē.’ Anē nhũm mē inhma nê ixw̄yr mra. No kêt Jejus na hte ixrom tanhmā mē à kuteja mā kapêr nhũm kuma nê mē kēp hapōj nê ma mrar kurê kumrêx. Jakamā koja ata rūm kapêr pix o inhmā ho mex.” Anh̄yr o aw̄yr karō. Jakamā na pa mē akutā mra nê akaxpa nê ā amā kapêr jarēnh anē. Anē.

⁹ Hāmri nhũm Jejus amnhĩ jaêr pē mē kapêr ma nê hkīnh nê. Hāmri nê hkôt mē kot mar o pa xw̄ynhjê mā kām:

—Kwa xà na ka mē ā kot ixw̄yr karō xw̄ynh jamaxpêr anh̄yrtā ā ama? Mē pahkīnhā kēp Ijaew kêt tā mē arom amnhĩ kaxyw inhmā hamaxpêr t̄yx nê. Aa mē atō urāk nê ate amnhĩ kaxyw ā inhmā ajamaxpêr t̄yx anh̄yr kêt tā nhũm mē arom kām àpēnh xw̄ynh kaxyw inhmā hamaxpêr t̄yx nê. Anē.

¹⁰ Nhũm pre ā mē kām kapêr anē hāmri nhũm pōristi krāhtũm krāmnhw̄yjaja kuma nê awjanā nê ma akup̄ym hkrāhtũm nhōrkw̄yja w̄yr mra. Nhũm ra Jejus kām àpēnh xw̄ynhta akup̄ym ho mex nhũm mex nê ri mra. Hāmri nhũm mē akup̄ym pōj nê akup̄ym mex ā omu.

Jejus kot akup̄ym mēhō hkra ho ht̄r ā harēnh

Juāw 11.1-46

¹¹ Tā nhũm Jejus ma krī pē Naĩ hw̄yr hkôt mē pa ho mē pa xw̄ynhjê mērohā mō nhũm mē ohtō nê mē hkôt mra. ¹² Nhũm mē ra Naĩ hw̄yr

hpôx o mō. Nē hwÿr agjê. Axpêr kām agjê nē mō nhũm kêp mjên htyk xwÿnhja mē kutā tē. Nhũm hkra myja ham kêp ty. Kra pyxi htā kêp ty nhũm mē kasāw kamā kuxà nē kumÿ nē kot haxàr kaxyw o mō nhũm katorxà mē hkôt mÿr o mō. Nhũm krī nhō xwÿnh kwÿjaja ma hkôt mō. Piitā hkaprī nē hkôt mÿr o mō. ¹³Tā nhũm Jejus mē hkwÿjaja mē mō nē mē hkaxpa nē katorxà mÿr ã omu nhũm Jejus kām hkaprī nē. Hāmri nē xa nē kām:

—Pa? Kwa amÿr kêt nē. Anē.

¹⁴Hāmri nē kasāwta wÿr tē nē hā ĩhkra xi nhũm mē kot mÿnh xwÿnhjaja omu nē amarī kām o xa. Hāmri nhũm htyk xwÿnhhta mā kapêr nē kām:

—E kwa kànhmā nhÿ. Anē.

¹⁵Pu nhũm kànhmā ÿr kurê kumrêx. Nē kapêr o nhÿ. Hāmri nhũm Jejus nita mā kām:

—E ota akrata. Na akupÿm amā htîr. Anē.

Hāmri nhũm akupÿm htîr ã omu nē hkînh tÿx kumrêx. ¹⁶Hāmri nhũm mē kot omunh xwÿnhjaja amnhÿ jaêr pê akupÿm hkra htîr kām omu nē ÿ hā haxwÿja hkînh nē. Nē Tîrtûm mā mex o mex ã harê nē axpên mā:

—Kwa ãm hāmri na Tîrtûm ã mē panhîpêx anê nē mē pahwÿr ÿ hā kapêr jarênh xwÿnhhta mē nhũm mē pahwÿr mō. Tîrtûm mē pakamā ukaprī jakamā na ã mē panhîpêx anê. Nà ãm hāmri na ã mē panhîpêx anê. Anē.

¹⁷Hāmri nē piitā ma pikaja rûm mē kām harênh o hprôt nhũm mē piitā harênh ma.

Juāw Paxis tee ri Jejus kukamā hamaxpêr ã harênh

Matêwre 11.2-6, 11.22; Rukre 4.16-21

¹⁸Rôm nhũm Juāw Paxisja kêp près nē hkrī nhũm hte hkôt mē pa xwÿnhjaja hwÿr mra nē kām Jejus kot tanhmā amnhÿ nhîpêx to ho pa hā harê. Hāmri nhũm harênh ma nē

tee ri hkukamā hamaxpêr. Hāmri nē hkôt mē pa xwÿnh wa ho axkrut nē wa kuta ¹⁹nē Jejus wÿr wa kumê nē wa kām:

—Kwa wa ma hwÿr tē nē hkukja. Nē kām: “Xà ka na pre Tîrtûm mē ixwÿr amê nà? Nà xà kormā axtem hō na pa mē kormā amnhÿ wÿr hamār o ri ixpa?” Anē. E wa ma hwÿr tē nē ã hkukjêr anê nē tanhmā kot amnhÿ jarênh to hā ama hāmri nē man akupÿn tē nē inhmā harê. Anē.

²⁰⁻²¹Hāmri nhũm wa kuma nē ma hwÿr tē. Nhũm Jejus kormā mē ho mex o xa. Mē nohkre xwÿnhjaja nhũm akupÿm mē no ho mex. Nē mēkarōmnuti kot mē hwÿr gjêx xwÿnhjaja nhũm mē nē mē hapôx o ãm rāhā nhũm wa ra hwÿr tē nē kormā hā mē omunh o xa. Hāmri nē kām Juāw Paxis kapêr jarê. ²²Hāmri nhũm wa kuma nē wa kām:

—Tÿ. Nà ãm hāmri na ja hā ijarê. Ixpê mē ate ixkamā ajamak o apa xwÿnhhta na pa. Jakamā e. Wa kam nē tanhmā ixte amnhÿ nhîpêx to hā ixpumu hāmri nē ma akupÿm hwÿr tē nē aprī hā kām ijarê. Mē nohkre xwÿnhjaja na pa akupÿm mē no ho mex. Nē mē hkānhy xwÿnhjaja pa akupÿm mē hkà ho mex. Nē mē hyk o mē pa xwÿnhjaja pa akupÿm mē ho mex. Nē mē htyk xwÿnhjaja pa akupÿm mē ho htîr. Nē mē kêp amrakati nē ri mē pa xwÿnhjê mā mēmoj mex jarênh o ri ixpa. Na pa hte ã mē ho mex o ri mē hkôt ixpa anê. Jakamā e kwa wa ma akupÿm hwÿr tē nē ã kām ijarênh anê. ²³Kê ijarênh ma nē arī amnhÿ kaxyw ixkôt hamaxpêr tÿx rāhā nē. Koja ã amnhÿ nhîpêx anê nē hamakêtkati nē ri pa. Nē tee ri ijarênh kukamā hamaxpêr kêt nē. E wa tokyx ma akupÿm hwÿr tē nē ã kām ijarênh anê. Anē.

Jejus kot Juāw Paxis mex ã harênh

Matêwre 11.7-19

24-25 Nhũm pre ã Jejus wa kãm amnhĩ jarẽnh anẽ nhũm wa kuma nẽ ma akupỹm Juãw Paxis wỳr tẽ. Hãmri nhũm Jejus mẽ kot mar o kuhẽ xwỳnhjẽ mã tanhmã Juãw Paxis jarẽnh to nẽ mẽ kãm:

—Na ka prem kapõt ã mar kaxyw ma hwỳr mra. Nom ê mex ã omunh kaxyw rỳ hpijaàm kãm tanhmã kapẽr to hã mar kaxyw hwỳr amrar kêt nẽ. ²⁶ Kêp Tĩrtũm nhỹ hã kapẽr xwỳnh jakamã na ka prem mar kaxyw ma hwỳr mra. Tĩrtũm nhỹ hã kot ixkukamã ijarẽnh o pa xwỳnh na. Ixpê Tĩrtũm kot mẽ akaxyw ixãm xwỳnh ã na pre mẽ amã ijarẽnh o pa. Nẽ hprĩ hã tanhmã mẽ amã ijarẽnh to. Jakamã na kapẽr mex o kot wam Tĩrtũm nhỹ hã kapẽr jarẽnh o mẽ pa xwỳnhjẽ kapẽr jakrenh. ²⁷ Tĩrtũm kapẽr ã kagà htũm kot Juãw kukamã tanhmã harẽnh to nẽ harẽnh kot:

Kot paj Ixkra hkukamã ma mẽ hwỳr harẽnh o pa xwỳnh mẽ kê ma ri hkukamã mẽ kãm harẽnh o ri pa. Kê mẽ kuma nẽ kutêp tãm amnhĩ nhĩpêx.

Anhỹr o Tĩrtũm Juãw Paxis kukamã harẽ nhũm mẽ hã kagà. Tã nhũm mẽ awỳr kumẽ. ²⁸ Juãwja mex kumrêx. Na pre hprĩ hã ixkukamã tanhmã ijarẽnh to ho pa. Nom ixkõt mẽ pa ho mẽ pa xwỳnhjẽ hkĩnhã ixkõt pa ho pa hkêt ãm ixkukamã ijarẽnh o pa. Jakamã ixkõt mẽ pa ho mẽ pa xwỳnhjaja na mex o kot Juãw Paxisja jakrenh. Mẽ kot ixkõt hprĩ hã inhmar o pa jakamã mẽ mex o kot hakrenh. Anẽ.

²⁹ Nhũm pre ã Jejus mẽ kãm Juãw Paxis jarẽnh anẽ. Mẽ kot Juãw mar o kuhẽ xwỳnh kwỳjaja na pre htem tanhmã amnhĩ tomnuj to ho pa. Tã Juãw kot mẽ kãm Tĩrtũm kapẽr jarẽnh ma nẽ axpẽn mã Tĩrtũm mex ã harẽ. Nẽ axpẽn mã:

—Nã ãm hãmri. Tĩrtũm kapẽr na mex kumrêx. Anẽ.

Hãmri nẽ amnhĩ tomnuj kaga nẽ Tĩrtũm kõt amnhĩ xunhwỳ. Jakamã nhũm Juãw Paxis Tĩrtũm mã mẽ hkrã kumrã.

³⁰ No nhũm Parijew nhõ xwỳnhjẽ mẽ Tĩrtũm kapẽr tũm o mẽ ahkre ho mẽ pa xwỳnhjaja jajê hkĩnhã Juãw Paxis kaga kumrêx. Jakamã nhũm mẽ hkrã kumrãr kêt nẽ. Mẽ kot Tĩrtũm kapẽr kaga jakamã na pre htem Jejus kapẽr ma nẽ ãm kuma. ³¹ Hãmri nhũm Jejus mẽ kãm:

—E pa mẽ amã mẽ piitã htỳx ri hamaxpêr ã tanhmã mẽ harẽnh to ka mẽ kot amnhĩ nhĩpêx ã mẽ harẽnh ma. ³² Te mẽ kot mẽhprĩre kot amnhĩ nhĩpêx pyrãk. Mẽhprĩrejaja na htem òrkwỳ kapem hije nẽ mẽmoj to amnhĩkati ho hkrĩ. Nẽ tee ri hkwỳjẽ kot amnhĩ nhĩpêx pumu nẽ mẽ kãm:

Kwa na pa mẽ amã gre htã ka mẽ ixkutã anhõkrepõx kêt nẽ. Pa mẽ ja hã mẽ apumu nẽ hpãnhã mẽ amã mẽ htyk jarẽ htã ka mẽ akapri nẽ amỳr kêt nẽ. Kwa mẽ ri ã amnhĩ nhĩpêx anhỹr kêt nẽ.

Anhỹr o axpẽn mã kapẽr. Tã te mẽ ate mẽ urãk. Tĩrtũm kot mẽ awỳr y hã kapẽr xwỳnhjẽ rẽnh tã ka mẽ te mẽhprĩre kot amnhĩ nhĩpêxta pyrã nẽ mẽ ama ãm mẽ ama nẽ mẽ hkõt amnhĩ nhĩpêx kêt nẽ.

³³ —Juãw Paxis na pre mẽ awỳr mō nẽ ixpyrà nẽ apkur mex o ri pa hkêt nẽ. Nẽ ixpyrà nẽ wĩhti ho hkõm kêt nẽ pa. Tã ka mẽ ja hã omu nẽ hkaga nẽ atỳx ri Satanasti nhỹ hã kot tanhmã amnhĩ nhĩpêx to ho pa hã hkamnhĩx nẽ ri harẽnh o ri apa. Hãmri nẽ mẽhprĩre kot amnhĩ nhĩpêx pyrã nẽ hkõt amnhĩ nhĩpêx kêt nẽ. ³⁴ Tã pa Juãw pãnhã mẽ awỳr mō. Nẽ kurom apkati mẽ ixàpkur mex o ri ixpa. Nẽ kurom wĩhti hkwỳ ho ixkõm o ri ixpa. Ka mẽ ja hã ixpumu nẽ atỳx ri ixàpkur rũnh nẽ ixpipãnh o ri ixpa hã ixkamnhĩx nẽ ã axpẽn mã ixto akapêr anhỹr o ri apa. Nẽ mẽ kot

amnhĩ tomnuj xwỳnhjê hkôt ri ixpa hã axpên mã ijarênh o ri apa. Ā na ka htem axpên mã ijarênh anê. Jao te mê ate Juāw Paxis nhĩpêx pyrà nê ixkaga nê ixkôt amnhĩ nhĩpêx kêt nê. Na hte ã htỳx ri tanhmã mê hamaxpêr to ho mê pa xwỳnhjaja amnhĩ nhĩpêx anhỳr o ri pa.

³⁵ —No tãm ri mê hamaxpêr o mê pa xwỳnhjaja na htem ahpỳnhã Juāw mê wa ixte amnhĩ nhĩpêx ã wa ixpumu nê axpên mã wa ijarênh o: “Nà ahpỳnhã wa kot amnhĩ nhĩpêx tã wa hamê ãm hãmri Tĩrtũm nhỹ hã kapêr jarênh mex o pa. E pu mê wa uràk nê Tĩrtũm kôt amnhĩ xunhwỳ.” Anhỳr o axpên mã wa ijarênh o pa. Anê.

Parijew nhõ xwỳnh pê Simãwre jarênh

Matêwre 26.6-13; Makre 14.3-9; Juāw 12.1-8

³⁶ Tã nhũm Parijew nhõ xwỳnh pê Simãwreja amnhĩ nhõrkwỹ hwỳr Jejus mê hkôt mê pa ho pa xwỳnhjê mê kuwỳ. Mê kot kutã apkur kaxyw amnhĩ wỳr mê kuwỳ nhũm mê õrkwỹ hwỳr mra nê mê hwỳr agjê nê apkur kaxyw hkrĩ. ³⁷ Hãmri nhũm mēhõ nija mê hwỳr axà. Na pre hte amnhĩ tomnuj pix o pa. Hãmri nê Jejus õ krĩ hwỳr hpõx nê Simãwre nhõrkwỹ kamã apkur ã harênh ma nê ma hwỳr tē. Mê hkuxwaxà hã à py nê ma hwỳr o tē. ³⁸ Hãmri nê hwỳr axà nê Jejus pumu nê hwỳr tē nê pum xa. Nê tee ri tanhmã kot amnhĩ tomnuj to ho paja mã hamaxpêr nê hpijaam nê hkaprĩ nê mỳr o xa. Hãmri nê Jejus kutã hkõn krã ho tēm nê nhỹ nê no kagô ho hpar go. Hãmri nê amnhĩ krã kĩ ho hpar grà nê kupã hãmri nê hpãnhã mê hkuxwa xà ho kuxwa. Kãm hkĩnh xàj ã hipêx anê. ³⁹ Hãmri nhũm Simãwre tee ri ja hã omu nê hamaxpêr o:

—Tk. Kwa jahti kot amnhĩ tomnuj pix o pa xwỳnh tã mê ixwỳr axà nê ã Jejus nhĩpêx anê nhũm amnhĩ

nê hanor kêt nê. Kêp ãm hãmri Tĩrtũm nhỹ hã kapêr jarênh o pa xwỳnh ronhỹx ja hã omu nê amnhĩ nê hanor kurê kumrêx. Anê.

⁴⁰ Hãmri nhũm Jejus amnhĩ tã hamaxpêr ã omu nê hêx rom kãm kapêr nê kãm:

—E Simãwre. Pa amã awjarê ka inhma. Anê.

Hãmri nhũm kãm:

—Tõe. Mex. Mãmri inhã awjarê pa ama. Anê.

⁴¹ Hãmri nhũm kãm:

—Nà koja mēhõ my wa hamêxkrut. Nhũm hõja mēhõ pê kàxpore ho rax kumrêx nê ho ĩpresta. Nhũm hõja ãm kêp ho grire nê ho ĩpresta. Hãmri nê wa hamê kàxpore ho hapêx pa. ⁴² Hãmri nê akupỳm kot kêp ho ĩpresta xwỳnhnta mã hpãnhã õr kaxyw tee ri amnhĩ kukamã hamaxpêr. Ra kot ho hapêx par jakamã tee ri amnhĩ kukamã hamaxpêr. Tã nhũm kot wa kãm ho ĩpresta xwỳnhnta wa hwỳr tē nê wa kãm: “Kwa wa tee ri amnhĩ kukamã ajamaxpêr kêt nê. Na pa ra war ate ixto tewēn ã kagàta kaxõnh pa nhũm ja hapêx. Kot paj axte kãm ijamaxpêr kêt nê. Jakamã wa mãmri ajamakêtkati nê axãmnhĩx ri apa.” Anhỳr o wa kãm kapêr. Ā mê ujarênh kot anhỳr. Anê.

Nhũm pre ã Jejus Simãwre mã ujarênh anê. Hãmri nê hã hkukja nê kãm:

—E nhỹ myja koja we kãm ho tewēn xwỳnhnta kĩnh tỳx nê wehe? Anê.

⁴³ Hãmri nhũm kãm:

—Nà kot kêp ho rax nê ho ĩpresta xwỳnhnta koja kãm hkĩnh tỳx o hõta jakre. Anê.

Hãmri nhũm kãm:

—Tỳ. Nà ãm hãmri na ka ã harênh anê. ⁴⁴ Tã mãn ka ni kot ã inhĩpêx anhỳr xwỳnhnta pumu. Na ka amnhĩ nhõrkwỹ hwỳr ixwỳ pa axà nom ka inhã gô hkwỳ pa ho amnhĩ par kuhõnh kêt nê. Tã nhũm nija arom ã inhĩpêx anê nê no kagô ho ixpar

kuhõ nê amnhĩ krã kí ho grà ho nhỹ.

⁴⁵—Nê anhõrkwỹ hwỳr ixarta ã ka ixkahti hkõt inhmýnh nê ixpâr kêt nê. Tã kêt nija arom xatã ixpar pâr o nhỹ. ⁴⁶Nê ate orti ho ixkrã gregrer kêt tã nhũm arom mẽ hkuxwaxà ho ixpar kuxwa ho nhỹ. Mẽhkukwaxà hã kàxpore xohtõ htã nhũm àmnhĩx ho ixpar kuxwa ho nhỹ. ⁴⁷ãm hãmri na pa amã ja jarẽ. Nija kot amnhĩ tomnuj tỳx tã pa ra nê kot amnhĩ tomnuj o ijapêx pa. Ra kot amnhĩ tomnuj tỳx xwýnh ã amnhĩ pumunh jakamã na amnhĩ kaxyw inhmã hamaxpêr pê kãm ixkĩnh nê ã inhĩpêx anê. No ka na ka hte uràk nê amnhĩ tomnuj tỳx o apa htã uràk nê tee ri ja hã amnhĩ pumunh kêt nê. Tã nita kĩnhã ate amnhĩ tomnuj kaga hkêt jakamã na ka ãm amã ixkĩnh greire. Anê.

Nhũm pre ã Jejus Simãwre mã kapêr anê. ⁴⁸⁻⁵⁰Hãmri nê nija mã kapêr nê kãm:

—E kànhmã xa. Ra ate amnhĩ kaxyw inhmã ajamaxpêr jakamã na pa ra ate amnhĩ tomnuj piitã amnhĩ katut kõt rênh pa. Kot paj axte kãm ijamaxpêr kêt nê. Jakamã mãmri ma ajamakêtkati nê axãmnhĩx anhõrkwỹ hwỳr tẽ. Anê.

Hãmri nhũm mẽ kot axpên kutã apkur xwýnhjaja tee ri kot kãm kapêr anhỹrja ã kuma nhũm ja mẽ kãm mex kêt nê. Jakamã nhũm mẽ ri axpên mã harênh o:

—Tk. Kwa mẽhõ na hte ri kot Tirtũm kot amnhĩ nhĩpêx pyràk o amnhĩ nhĩpêx nê mẽ kot amnhĩ tomnuj o hapêx ã amnhĩ jarênh o we ri pahti? Anê.

8

Mênijê hkwy kot Jejus kõt pa hã mẽ harênh

Makre 15.40-41, 16.9

¹Tã nhũm Jejus ma mẽ piitã mẽ kãm Tirtũm kapêr o mẽ ahkre ho ri mẽ hkõt pa. Krĩ rũnh kamã nê krĩ hkryre kamã. Mẽ kot amnhĩ

tomnuj kaga nê Tirtũm kõt amnhĩ xunhwỳr nhũm kot amnhĩ tã mẽ omunh nê mẽ ho hkra kaxyw nhũm ri mẽ hkõt mẽ kãm harênh o pa. Nhũm ý hã mẽ ahkre ho mẽ pa xwýnh pê 12jaja ma hkõt ri pa. ²Nê mẽni hkwyjaja. Na pre ra Jejus mẽ hkwyjê nê mẽkarõmnuti japôj. Nê mẽ hkwyjaja tanhmã mẽ à kute xwýnhjaja nhũm akupým mẽ ho mex. Xwýnhjaja nhũm prem haxwýja ma hkõt ri pa. Hõ pê na pre Marir Matarên nhũm pre ra Jejus nê mẽkarõmnuti ho 7 nê hapôj. ³Nê Joanã. Joanã mjên Kujahti na pre kêp pahikti Erox mã mẽ àpênh xwýnhjê krãhtũm. Nê Sujãre. Nê kaxyw mênijê ohtõ nê Jejus kõt tanhmã mẽ ho ajuta hto ho mẽ hkõt pa. Jao mẽ hikàxpore ho mẽmoj japrô nê ho mẽ kãm mẽ õ nhĩpêx o ri mẽ hkõt pa.

Mẽmo hy hkre xwýnh

Matêwre 13.1-9; Makre 4.1-9

⁴Tã nhũm mẽ ra krĩ piitã rũm Jejus wỳr akuprõ. Jakamã nhũm mẽ ohtõ raxkumrêx nhũm Jejus mẽ kãm ujarênh o nhỹ. No ãm hprĩ hã ujarênh kêt nê. Mẽ kot Tirtũm kapêr mar nê tanhmã hkõt amnhĩ nhĩpêx to nhũm hã kuxi nê mẽ kãm hã ujarênh o nhỹ. ⁵Nê mẽ kãm:

—E mẽ inhma. Koja mẽhõ ma pur mã mõ nê pur kãm mẽmo hy ho ukapêr o ri pa. Nom nhũm piitã amex kãm rôrõk kêt nê. Kwý ahpýnhã nhỹri rôrõk. Hãmri nhũm hkwy aptỳx kãm rôrõk nhũm kuwênhre omu nê hwỳr mra nê hkrêr pa.

⁶—Nê kên kãm hy hkwy rôrõk nê higrõt kutã nojarét nê higrõt pa. No nhũm kamã aptỳx nê kamã kêp pika hkryre jakamã nhũm higrõt nhũm hã myt ahpa nê arĩgro htỳx mẽ nhũm grà pa. Kamã kên nhũm amgo mex kêt jakamã nhũm grà pa.

⁷—Nê mrõnhĩ kamã rôrõk xwýnhja haxwýja higrõt tã no nhũm utĩ kêp amýtã nhũm ô hkêt nê.

⁸ —No hirã kamã pika mex kãm rôrôk xwÿnhja. Hãmri hirã kamã rôrôk nê higrôt mex nê piitã ô rax nê. Piitã kamã ô kêp 100. Æ mẽ ujarênh kot anhÿr. E kwa mẽ ix-ujarênh ma nê kãm ajamaxpêr tÿx rãhã ho ri apa. Anê.

⁹ Nhũm pre ã Jejus mẽ kãm ujarênh anê. Hãmri nhũm hkôt mẽ pa ho mẽ pa xwÿnhjaja kuma nê tee ri hkukamã hamaxpêr nê kãm:

—Kwa na pa mẽ ixprĩ hã axu-jarênh kôt mẽmoj pumunh kêt nê. Aprĩ hã mẽ inhmã tanhmã harênh to pa mẽ ixprĩ hã kuma nã? Anê.

¹⁰ Hãmri nhũm mẽ kãm:

—Tôe. Nà kot paj mẽ amã harê. Tĩrtũm kãm mẽ ate aprĩ hã mar prãm jakamã kot paj ixprĩ hã mẽ amã harê. Mẽ kot amnhĩ tomnuj kaga nhũm Tĩrtũm kot ja hã mẽ omunh nê mẽ ho hkra. Ja na pa harê.

—No mũjjaja na mẽ akĩnhã kãm mar prãm nõkati. Jakamã na htem ixujarênh ma nê ãm kuma nê htÿx ri pa. Anê.

*Jejus kot prĩ hã mẽmo hy jarênh
Matêwre 13.18-23; Makre 4.13-20*

¹¹ Hãmri nhũm Jejus hkôt mẽ pa ho mẽ pa xwÿnhjê mã:

—E kot paj ixprĩ hã mẽ amã mẽmo hy ho ukapêr ã mẽ ujarênh ta jarê ka mẽ inhma.

—Nà mẽmo hyta te kêp Tĩrtũm kapêr pyrãk. Nê ahpÿnhã hy rôrôk ã pikata te kêp ahpÿnhã mẽ kot Tĩrtũm kapêr mar xwÿnhjê kot amnhĩ nhĩpêx pyrãk. ¹² Mẽ kot mar xwÿnh kwÿjaja te kot aptÿx kãm hy rôrôk nhũm kuwênh kot hwÿr mrar nê hkrêr par xwÿnh ta pyrãk. Jao Tĩrtũm kapêr ma nhũm Satanasti te kuwênh kot hy hkrêr parta pyrã nê mẽ kot amnhĩ kaxyw Tĩrtũm kapêr kôt hamaxpêr nê hkôt amnhĩ xunhwÿr pymaj tanhmã nê mẽ hkrã hto. Jakamã nhũm mẽ kapêr ma nom ho hamakêtkati tokyx anê

nê axte kãm hamaxpêr nê hkôt amnhĩ nhĩpêx kêt nê.

¹³ —Nê mẽ kot mar xwÿnh kwÿjaja te kot kênre kamã hkwy rôrôk nê higrôt nê grã par tokyx anhÿr xwÿnh ta pyrãk. Jao Tĩrtũm kapêr ma nê hkĩnh nê. Nê kãm mar prãm nê. Tã nhũm mēhō tē nê Tĩrtũm nê tanhmã kãm kapêr to nhũm mẽ kuma nê Tĩrtũm kaga. Te mẽmo hy higrôt nê grã par tokyx anhÿr ta pyrãk.

¹⁴ —Nê mẽ kot mar xwÿnh kwÿjaja te kot mrônhi kamã hkwy rôrôk nê higrôt nhũm mrônhi kot kêp ãmnãr xwÿnh ta pyrãk. Jao kãm Tĩrtũm kapêr mar prãm nê. No ãm mãânên kãm hikukrêx rax nê hikãxpore rax prãm xaj ãm ja pix mã hamaxpêr o pa. Nê gaa nê ra gryk ã axte Tĩrtũm kapêr mã hamaxpêr nê hkôt amnhĩ nhĩpêx kêt nê.

¹⁵ —Nê mẽ kot mar xwÿnh kwÿjaja te hirã kamã pika mex kãm hy hkwy rôrôk nê higrôt nê ô raxta pyrãk. Nê ixkapêr ma nê amnhĩ krã him hagjênh tÿx nê ixkôt ri amnhĩ nhĩpêx mex rãhã ho ri pa. Jakamã te ra mẽmo hy hkreta ô rax mex pyrãk. E. Æ ixujarênh kot anhÿr. Anê.

Kanê mẽ guhkrax wa harênh

Makre 4.21-25

¹⁶ Nhũm Jejus arĩ mẽ kãm ujarênh o nhÿ nê mẽ kãm:

—E mẽ inhma. Xà na htem kanê hpôk hãmri nê guhkrax o hpro rÿ par krak ri unhwÿ? Nà na htem ã hipêx anhÿr kêt nê. Na htem hpôk nê kÿxpê kuhê xã kamã unhwÿ nhũm hirã mex o kuhê. Nhũm htem ixkrem agjê nê hirã kamã mẽmoj pumunh mex nê. Ja pyrã nê na pa hte mẽ ate inhmar tÿx kaxyw ixprĩ hã mẽ amã awjarê. ¹⁷ Kormã mẽ ate mẽmoj pumunh nê aprĩ hã mar kêt tã kot kaj mẽ tokyx aprĩ hã omu nê ama. Te mẽmoj kot mẽ apê hpimxur pyrãk tã koja tokyx mẽ amã amnhĩ to amnhĩrit ka mẽ aprĩ hã omunh pa. Te mẽ ate kanê

hpôk kãm aprĩ hã mēmōj pumunh mexta pyræk. ¹⁸ Jakamã kêr ka mẽ ixkapêr mar tỳx nê hkôt ajamaxpêr rãhã ho ri apa. Jao ixkapêr piitã mar tỳx nê. Nom kot ka mẽ mar tỳx kêt nê hã ano hkêt pa nê axte kãm ajamaxpêr o apa hkêt nê. Anê.

Jejus kot tanhmã katorxã mẽ htôjê jarênh to hã harênh

Matêwre 12.46-50; Makre 3.31-35; mããnên Eprêw 2.11-12

¹⁹ Nhũm Jejus arĩ mẽ ahkre ho nhỹ. Rôm nhũm katorxã nê htôjaja nhỹhỹnh hwỳr mōn pōj. No nhũm mẽ kot mẽ hã htu rax jakamã nhũm mẽ tee ri hwỳr gjêx kaxyw nê kormã kapôt ã kuhê. ²⁰ Hãmri nhũm mēhōja mẽ omu nê Jejus mã mẽ harê nê kãm:

—Kwa Pahihti. Ota ra akatorxã mẽ atôjaja awỳr pōj nê tee ri awỳr gjêx mã. O mũj mẽ kormã kapôt ã kuhê. Anê.

²¹ Hãmri nhũm mẽ kuma nê mẽ kãm:

—Tõe pa ixkato nê mẽ omu. Inhmã mẽ hapêê. Nom kot kaj mẽ atô Tirtũm kapêr ma nê hkôt amnhĩ xãm nê hkôt amnhĩ nhĩpêx. Hã kot kaj te apê ixtō rỳ ixkatorxã kot amnhĩ nhĩpêx pyræk o pu mẽ axpên nhĩpêx. Pa te inhmã mẽ hapê pyra nê inhmã mẽ ajapê nê. Anê.

Jejus kot kôk mã kapêr ã harênh

Matêwre 8.23-27; Makre 4.35-41

²² Tã nhũm apkati hō hã nhũm Jejus himô rax ã rêr kaxyw nojarêt nê hkôt mẽ pa ho mẽ pa xwỳnhjê mã kãm:

—E kot puj mẽ jarãhã ma xarmã mō. Anê.

Hãmri nê mẽ pãr mã gjêx pa nê ma xarmã mō. Garirej rũm kato nê ma xarmã pika hō hwỳr kormã mō. ²³ Nhũm ra Jejus õtxwa nê pãr kre kamã gōr nê nō. Pu nhũm kôk àpêr tỳx nê nhũm gô axpên tak tỳx nê kãnhmã harĩ. Nê pãr kre kamã pikapĩr rax nhũm pãrta mẽ kãm àr o mō nhũm mẽ tee ri amnhĩ nhĩpêx. No nhũm Jejus arĩ htỳx gōr nê nō.

²⁴ Hãmri nhũm mẽ tee ri amnhĩ kukamã hamaxpêr nê kumra nê kãm:

—Kwa Pahihti kãnhmã nhỹ. Kot puj mẽ jarãhã pahtyk pa. Anê.

Hãmri nhũm kãnhmã nhỹ nê kôk mã kapêr nê kãm:

—E. Kwa hãmri anhĩkrê. Anê.

Hãmri nhũm hpinhkrênh par mẽ nhũm gô tãm nōr kurê kumrêx.

²⁵ Hãmri nhũm Jejus hkwyjê hwỳr apkjê nê mẽ kãm:

—Kwa kormã te mẽ ate amnhĩ kaxyw Tirtũm mẽ wa inhmã ajamaxpêr tỳx kêt pyræk. Anê.

Hãmri nhũm mẽ amnhĩ jaêr pê kot ã amnhĩ nhĩpêx anhỹr ã omu nê no hawênh rũnh nê tee ri axpên pumunh pê hamaxpêr o kuhê nê axpên mã:

—Kokỹỹ. Jejus kêp mẽ panhĩo hkêt. Mẽ pahtō kot pu we te kot amnhĩ nhĩpêx pyra nê we kôk mã pakapêr nhũm we pama anhĩkrê? Nã Jejus mẽ parom àhpumunh tỳx o àhpumunh tỳx. Jakamã na ã anê. Anê.

Jejus kot mēhō nê mẽkarõmnuti kator ã harênh

Matêwre 8.28-34; Makre 5.1-20

²⁶ Tã nhũm mẽ ra himô nhĩhkjê hã krĩ pê Geras wỳr rê. Himô nhĩkjê hã na pre pika pê Garirej. Nê Garirej nhĩkjê hã na Gerasja. Jakamã nhũm mẽ ra hwỳr rê. ²⁷⁻²⁹ Hãmri nê pãr kre rũm hapōj nê api nê mra nhũm mēhō myja mẽ kutã tẽ. Na pre ra hwỳr mẽkarõmnuti hkwyj agjê nhũm mẽ ý hã oprê htỳx nê hkênh nê ri mra. Nê õrkwyj kamã hkrĩ hkêt nê. Âm ri kapôt ã pa ho pa. Mẽ htykjê hã pika kamã kên kre kaêx kôt ri pa. Na pre ra krĩ nhō xwỳnhjaja xatã tee ri unê nê hkaxpre. Tee ri kàx o ri hkaxpre htã no nhũm amnhĩ nê rênh pa. Nhũm mẽkarõmnutija tanhmã hkrã hto nhũm kapôt pix ã ri mra. Jakamã nhũm Jejus mẽ pãr rũm hapōj nê api nhũm mẽ omu nê mẽ kutã tẽ nê Jejus kaxpa. Nhũm

amnhĩ wýr omu nê nê tanhmã mēkarōmnuti mā kapēr to. Hāmri nhũm my xoprēja hwýr tē nê kutã hkōn krã ho tēm nê nhỹ. Hāmri nê kàxpêê amnhĩ tã kãm kapēr. Nom tãm kapēr kêt nê. Mēkarōmnuti nhỹ hã kãm kapēr nê kãm:

—Pa Tirtũm Kra Jejus? Kwa mo kaxyw na ka mē ixwýr tē? Kwa tanhmã mē ixto hkêt nê. Anê.

³⁰ Hāmri nhũm mē kãm:

—Kwa tanhmã na mē anhĩxi kute? Anê.

Nhũm mē kãm:

—Nã mē ixpê Mēohtōhti. Anê.

Mēkarōmnuti ra kot hwýr ohtō nê gjêx jakamã na prem ã kãm amnhĩ nhĩxi jarēnh anê. ³¹⁻³² Hāmri nê Jejus mã:

—Kwa jahti nê mē ijapôj nê mē kot amnhĩ xã htýx kamã hamak tũm xã hwýr mē ixrēnh kêt nê. Hagrô hkwý mũj wýr mãn mē ixrê pa mē hpãnhã hwýr mãn hagjê nã? Anê.

Hagrôja kii mē kêp amým hixêt ã ri apkur o pa nhũm mē ã Jejus mã mē hwýr amnhĩ to hwýr anê. Hāmri nhũm mē kãm:

—Tôe. Tô mē tãm hwýr mãn mra. Anê.

³³ Hāmri nhũm mē kuma nê myta pē hapôj nê ma hagrôja wýr mrrar kurê kumrêx nê mē kãm gjêx pa. Hāmri nhũm myja akupým tãm hkrã. No nhũm hagrôja mēkarōmnuti pymaj amýra nê axkakhũm nê hprôt nê himô hã krã hixêt ã axpum rōrôk nê gôx kãm mrô nê pikaprãr pa. ³⁴ Hāmri nhũm hagrô jamãr xwýnhjaja tee ri omu hãmri nê ma mē ô patrãw wýr akupým mē piitã mē kãm harēnh o hprôt nê mra. ³⁵⁻³⁶ Nhũm mē tee ri mē kuma hãmri nê ma kot Jejus pumunh mã hwýr mra nê hkaxpa. Nê kuri myta pumu nhũm ra akupým tãm hkrã nê tãm amnhĩ nhĩpêx nê ê kamã mex nê nhỹ. Nhũm mē kot hã omunh xwýnhjaja mē kãm ujarēnh pa. Nhũm mē kuma nê tee ri amnhĩ

kukamã hamaxpēr o ra kãm ma nê. ³⁷⁻³⁹ Hāmri nê amnhĩ nê Jejus mã kapēr nê kãm:

—E kwa mē tokyj ma akupým amrar kurê kumrêx. Anê.

Hāmri nhũm mē kuma nê awjanã nê ma akupým pãr wýr mra nê agjê. Nhũm akupým mex xwýnhnta mē hkôt hkrã nom nhũm Jejus kãm:

—Nã kot kaj mē ixkôt amōr kêt nê. Ma akupým anhō krĩ hwýr mãn tē nê Tirtũm kot tanhmã akupým ato mex to hã mē kãm amnhĩ jarēnh o ri mē hkôt apa. Anê.

Hāmri nhũm kuma nê ma akupým krĩm tē nê ri mē kãm Jejus kot tanhmã ho mex to hã harēnh ri mē hkôt pa.

Jejus kot wa ho axkrut nê wa ho mex ã harēnh

Matêwre 9.18-26; Makre 5.21-43

⁴⁰ Tã nhũm Jejus mē ma akupým xarmã mō nê ré nê mē kutêp mē pikuprōnh xwýnhjê pumu. Nhũm mē ra amnhĩ wýr mē omu nê mē kutêp gô jakãx ã pikuprōnh rax nê. Jakamã nhũm mē mē hwýr pøj nhũm mē amnhĩ wýr Jejus pumu nê hkĩnh nê. ⁴¹⁻⁴² Hāmri nhũm Jajti ma hwýr tē. Ijaew nhō Tirtũm kapēr o mē ahkre xã hã ixkre jamãr xwýnh na pre. Nhũm pre hkra ni pyxire. Hã amgrã pē 12. Tã ra kêp ã htýx nê htyk kaxyw nê nō. Hāmri nhũm hipêêxaja tee ri omu hãmri nê Jejus wýr tē nê kutã hkōnkrã ho tēm nê nhỹ nê ho kuwý nê kãm:

—Pa akupým mē ixto mex xwýnh maati. E awýr na pa tē. Na ra ixkra ixpê htyk kaxyw. Pa tee ri omu nê kaxyw amã ijamaxpēr nê awýr tē. Kwa ma ixkôt inhōrkwý hwýr tē nê inhmã omu nê tokyx inhmã ho mex nã? Anê.

Hāmri nhũm kuma nê ma hkôt tē. Nhũm mē ohtō nê wa hkôt pry hã mra nê axpēn nhĩgã nê axpēn kujahêk o hkôt mra. ⁴³ Hāmri nhũm mēhō nija haxwýja wa hkôt tē. Na pre hte hkamrô hkryre rãhã ho pa hã ra amgrã kêp 12. Nhũm tótô tee

ri kot ho mex kaxyw hkane kaprý ho pa. ⁴⁴Jakamã nhũm tee ri amnhĩ kukamã hamaxpër hãmri nê Jejus jarênh ma nê ma mẽ hkôt hwýr htêm kurê kumrêx. Nom nhũm mẽ ohtô rax nê hkôt mör jakamã nhũm mẽ hkaêx kôt hwýr tẽ nê hkatut kôt kêp ê nhîrê kupê. Hãmri nê ãm kêp ê pix kupênh tã akupým mex. ⁴⁵Hãmri nhũm Jejus kot kêp ê kupênh ã amnhĩ tã omunh tã hêx rom mẽ ho hakêx nê mẽ omu nê mẽ kãm:

—Kwa mẽ atô na ka ri amnhĩ kaxyw inhmã ajamaxpër tỳx pẽ ixpê ixê kupê? Anê.

Hãmri nhũm mẽ piitã tee ri axpẽn pumu nê kãm amnhĩ tã aprã. Hãmri nhũm Simãw Pêtre kãm:

—Mẽ kot apê amnrã griã kot ka kêt ri mẽhõ kot apê hkupênh xwýnh ã ri mẽ hkukja. Kwa mãn ãm mẽhõ amarĩ apê hkupê. Anê.

⁴⁶Hãmri nhũm kãm:

—Nã mẽhõja amarĩ hkupênh kêt nê. Na amnhĩ kaxyw inhmã hamaxpër tỳx pẽ ixpê hkupê. Tã ixãhpumunh tỳx xàja kôt na akupým mex. Nom ixte mẽhõ kot ixpê hkupênh xwýnhja pumunh jakamã na pa ixêx rom ã amnhĩ tã ri mẽ hkukjêr anê. Kwa mẽ atô inhmã amnhĩ jarê. Anê.

⁴⁷Hãmri nhũm mẽhõ nita kuma nê tee ri kêp kot amnhĩ to hpimxur prãm kaprý. Hãmri nê hpijaãm kãm hwýr httertet o tẽ nê kutã hkõn krã ho tẽm nê nhỹ nê kãm amnhĩ jarê nê kãm:

—Ma pa na pa inhmã inhmex prãm xàj apê axê kupê. Tã na pa akupým inhmex. Anê.

⁴⁸Hãmri nhũm Jejus kuma nê kãm:

—Tõe. Nà ra ate amnhĩ kaxyw inhmã ajamaxpër tỳx kôt ate ã amnhĩ nhîpêx anhýr jakamã na ka akupým amex. E mãmri aja-makêtkati nê ma akupým tẽ. Anê.

Hãmri nhũm kuma nê hkĩnh nê ma akupým tẽ. ⁴⁹Rôm nhũm Jajti mã àpênh xwýnhjê hõ òrkwý rùm

ma ò patrãw kutã tẽ nê wa hkaxpa nê Jajti mã kãm:

—Kwa na ra apê akra ty. Jakamã mo kaxyw kot ka kêt amnhĩ kôt hwýr Jejus o mõi? Kwãr mãmri ma akupým tẽ. Anê.

⁵⁰Hãmri nhũm Jejus kuma nê Jajti mã kãm:

—Kwa tee ri akra hkukamã ajamaxpër kêt nê. Kaxyw inhmã mãn ajamaxpër tỳx nê. Koja te ra apê htyk tã koja akupým amã htĩr. Anê.

⁵¹⁻⁵³Hãmri nhũm mẽ mõi nê òrkwý hwýr pøj nê hwýr axà nê mẽ omu nhũm mẽ ra htyk xwýnhhta ã htu rax nê. Nê omũj ri mur. Hãmri nhũm Jejus mẽ hwýr axà nê mẽ mýr ã mẽ omu nê mẽ kãm:

—Kwa mẽ hãmri amýr kêt nê. Na nireta mẽ apê htyk kêt na ãm gõr nê nõ. Anê.

Hãmri nhũm ra mẽ kot htyk ã omunh mex jakamã kuma nê ãm kuma nê axtem nê ri axpẽn mã hã hpër o axkê. Hãmri nhũm Jejus htyk xwýnhhta wýr hitom wýr àr kaxyw nê amnhĩ kôt Juãw nê Xi-akre nê Pêtre nê kaxyw htyk xwýnh katorxà nê hipêêxàja. Jajê pix na pre amnhĩ kôt mẽ ho agjê. ⁵⁴Hãmri nê htyk xwýnhhta wýr tẽ nê hpa hã kupy nê kãm:

—Pa? Kwa tokyx kãnhmã nhỹ. Anê.

⁵⁵Hãmri nhũm akupým htĩr nê kãnhmã ýr kurê kumrêx. Hãmri nhũm Jejus mẽ kãm:

—E kwa mẽ tokyx kãm mẽmoj japêr kê kukrê. Mãn ra kãm prãm nê. Anê.

⁵⁶Hãmri nhũm katorxà mẽ hipêêxà wa amnhĩ jaêr pẽ akupým htĩr kãm omu nê kamã no pyma ho hkĩnh tỳx nê. Hãmri nhũm Jejus wa kãm:

—E wa inhma. Kêr ka wa akupým ixte war amã ho htĩr ã ri mẽ kãm ijarênh o ri apa hkêt nê. ãm kwarĩ ho kwarĩ. Anê.

9

Jejus kot mẽ ho 12 nẽ ahpÿnhã mẽ rẽnẽ ã harẽnẽ

Matêwre 10.1, 10.5-15; Makre 6.7-13; Rukre 10.1-12; mãânẽn Atre 13.49-50, 18.6

¹⁻² Tã nhũm Jejus hkõt mẽ pa ho mẽ pa xwÿnh pẽ 12jẽ mã kapẽr nẽ mẽ kãm:

—E mẽ amnẽ ixwÿr mra nẽ ixkapẽr ma. Na pa ra mẽ amã ixãhpumunh tÿx xã hkwy gõ. Jakamã kër ka mẽ inhÿ hã ma ri akwÿjẽ hkõt tanhmã mẽ ho mex to ho ri mẽ hkõt apa. Mẽ à xwÿnhjẽ ho mex o ri mẽ hkõt apa. Nẽ mẽ hkwyjẽ nẽ mẽkarõmnuti japõj. Nẽ mẽ piitã mẽ kãm anẽ kẽ mẽ tokyx Tirtũm kõt amnhĩ xunhwÿ kẽ mẽ ho hkra. ³ Nom kër ka mẽ amnhĩ kõt akukrêx ho ohtõ nẽ ri ho apa hkõt nẽ. Nẽ amnhĩ kaxpar xã hã kô ho apa hkõt nẽ. Nẽ kawã htur nẽ ho apa hkõt nẽ. Nẽ amnhĩ kõt axãpkur xã hã anhõ ho apa hkõt nẽ. Rÿ akãxpore rax nẽ ho apa hkõt nẽ. ãm mẽ anhõ kamıs ho pixi nẽ haxã nẽ ri hã apa. Nẽ anhÿ kamã ã ri mẽ hkõt apa anẽ. Kẽ mẽ kot mẽ akapẽr mar xwÿnhjaja tãm mãn mẽ amã mẽ anhõ ho pa.

⁴ —Nẽ kër ka mẽ nhÿri krĩ hõ hwÿr põj nẽ apõx xã kamã mẽhõ nhõrkwÿ kamã hkõt ri apikamẽnẽ tãmtã kurũm akupÿm ajapõj nẽ ma hpãnhã nhãm krĩ hõ hwÿr apa. Nom atÿx ri nhãm mẽ hwÿr amrar nẽ nhãm mẽ hwÿr amrar kêt nẽ.

⁵ —Nẽ koja mẽ nhÿri mẽ akapẽr kaga ka mẽ amnhĩ tã mẽ kamã ama nẽ tokyx mẽ kurũm ajapõj nẽ ma nhãm apa. Nẽ anojarêt nẽ mẽ noo mã akuhẽ nẽ amnhĩ par ã awjagrõ kapĩ. Mẽ kot Tirtũm kaga hã amnhĩ pumunh nhũm Tirtũm kot amnhĩ pyrã nẽ mẽ hkaga hã mẽ kot omunh kaxyw ka mẽ ã mẽ noo mã amnhĩ nhĩpẽx anẽ. Hãmri nẽ ma hpãnhã krĩ hõ hwÿr apa. Anẽ.

⁶ Nhũm pre ã Jejus mẽ kãm mẽ àpẽnẽ ã karõ anẽ. Nhũm mẽ kuma

hãmri nẽ hapõj nẽ ma mẽ hkõt pa. Ma krĩ piitã hkõt akupÿm mẽ à xwÿnhjẽ ho mex nẽ Tirtũm kapẽr o tanhmã mẽ ahkre hto ho ri mẽ hkõt pa.

Pahi Eroxt ee ri kot Jejus kukamã hamaxpẽr ã harẽnẽ

Matêwre 14.1-12; Makre 6.14-29

⁷⁻⁸ Hãmri nhũm pika pẽ Garirej kamã mẽ piitã Jejus jarẽnẽ ma nẽ ahpÿnhã ri tanhmã axpẽn mã harẽnẽ to. Mẽ hkwyjaja kęp finat Juãw Paxis akupÿm htĩr ã ri harẽ. Nhũm mẽ hkwyjaja amnepêm mẽ hkukamã Tirtũm nhÿ hã kapẽr jarẽnẽ xwÿnhjẽ hõ ra akupÿm htĩr ã harẽ. Nhũm mẽ hkwyjaja kęp finat Eris ã axpẽn mã harẽ. Jakamã nhũm pahĩhti Eroxta mẽ kot ahpÿnhã tanhmã ri harẽnẽ toja ma nẽ tee ri hkukamã hamaxpẽr. ⁹ Nẽ hamaxpẽr o:

—Kwa mẽhõ ña hte we ri ã amnhĩ nhĩpẽx anhÿr o pa wehe? Nã finat Juãw Paxis kêt. Ra ixte amnepêm hã ixãmnenh nhũm mẽ kot inhmã mut krãhyr nẽ hpĩr kẽnã. Kwa mẽhõ na hte we ri ã amnhĩ nhĩpẽx anẽ?

Anhÿr o hamaxpẽr hãmri nẽ kãm omunh prãm nẽ.

Jejus kot mẽ ho ohtõ nẽ mẽ kãm mẽ õ hã harẽnẽ

Matêwre 14.13-21; Makre 6.30-44; Juãw 6.1-14

¹⁰ Tã nhũm Jejus nhÿ hã kapẽr o mẽ pa xwÿnhjaja akupÿn hwÿr mran põj nẽ mẽ kot ri tanhmã amnhĩ nhĩpẽx to ho pa hã kãm amnhĩ jarẽ. Hãmri nhũm mẽ kuma nẽ ma krĩ pẽ Pesěj wÿr kormã mẽ o mõ. ¹¹ Hãmri nhũm krĩ hkwy nhõ xwÿnhjaja ra ma mẽ mõr ã mẽ harẽnẽ ma nẽ ohtõ nẽ ma mẽ hkõt mra nẽ nhÿri mẽ hkõt põj. Nhũm Jejus amnhĩ kõt mẽ omu hãmri nẽ tanhmã mẽ ho mex to ho xa. Kõt mẽ à nẽ mẽ pa xwÿnhjaja nhũm akupÿm mẽ ho mex. Hãmri nẽ Tirtũm kapẽr o mẽ ahkre nẽ mẽ kãm:

—E kot kaj mẽ atõ amã amnhĩ tomnuj kaga hprãm xàj Tĩrtũm kõt amnhĩ xãm nhũm amnhĩ tã apumu nẽ ato hkra. Hãmri ka ajamakẽtkati nẽ amex nẽ axãmnhĩx ri apa.

Anhỹr o mẽ kãm kapẽr pẽ mẽ ahkre ho xa.

¹² Tã nhũm myt àr kaxyw nhũm Jejus nhỹ hã mẽ ahkre ho mẽ pa xwỹnhjẽ pẽ 12jaja hwỹr mra nẽ kãm:

—Kwa na ra kamàt o mõ. Mẽ hano kê mẽ amnhĩ to krĩ hõ japẽr nẽ tokyx amnhĩm mẽmoj japrõ nẽ kuku nẽ hikwỹ nẽ gõr. Mo mẽ panhõ? ãm jar kapõt pix kẽnã. Anẽ.

¹³⁻¹⁴ Hãmri nhũm mẽ kuma nẽ mẽ kãm:

—Kwa ka mẽ kamjaja mẽ kãm mẽmoj gõ kê mẽ kuku. Anẽ.

Nhũm mẽ ohtõ rax nẽ mẽ hkõt mra. Mẽmyjaja kęp 5.000 nẽ kaxyw mẽ hprõ nẽ mẽ hkrajaja. Jakamã nhũm mẽ kęp 12jaja Jejus kot ã mẽ kãm kapẽr anhỹrja ma nẽ tee ri mẽ hkukamã hamaxpẽr nẽ kãm:

—Kwa nã mo mẽ panhõ rax? Mẽ panhõ pãwti kęp sĩk nẽ kaxyw tep grã axkrutre kẽnã kot kêt we mẽ piitã mẽ hipẽx pa. Xà kot paj mẽ ma mra nẽ nhỹri mẽ kãm mẽ apkur xà japrõ nhũm mẽ kuku? Anẽ.

Hãmri nhũm mẽ kãm:

—Nã pu mẽ kãm mẽmoj japrõr kêt nẽ. Mẽ panhõta kot puj mẽ kãm ho anhrã. E mẽ kãm anẽ kê mẽ ahpỹnhã ri hije nẽ hkrĩ nẽ apku. Anẽ.

¹⁵ Hãmri nhũm mẽ kuma nẽ mẽ kãm anẽ nhũm mẽ piitã hkrĩ pa.

¹⁶ Hãmri nhũm Jejus pãwti mẽ tepta jamỹ nẽ kãnhmã kaxkwa hwỹr rĩt nẽ kãnhmã kupẽ nẽ Tĩrtũm mã harẽ nẽ kãm:

—Pa Papaj? Apẽ mẽ inhmã mẽ inhõ xwỹnh jakamã amex o amex. Anẽ.

Hãmri nẽ mẽ kãm ho hkry hpa nẽ hkõt mẽ pa ho mẽ pa xwỹnhjẽ mã kugõ nhũm mẽ ô ri ho xa nẽ ho mẽ hipẽx par kumrẽx. ¹⁷ Nhũm mẽ piitã apkur mex o hkrĩ. Mẽõja mẽ kęp grĩre htã nhũm Jejus tanhmã

mẽ kãm ho rax to nhũm mẽ ohtõ rax tã piitã kuku nẽ ho õhy htu hpa. Nhũm arĩ mẽõ jakrẽx prã nhũm Jejus kõt mẽ pa ho mẽ pa xwỹnhjaja akupỹm hakrẽx o pikuprõnh pa nẽ ho kawã ho 12 nẽ ho nýt pa.

Jejus kot amnhĩ tã hkõt mẽ pa xwỹnhjẽ kukjẽr ã harẽnh

Matẽwre 16.13-19; Makre 8.27-29

¹⁸ Tã nhũm arĩgro hõ hã nhũm Jejus nhỹri ahte Tĩrtũm mã amnhĩ jarẽnh o nhỹ nhũm hkõt ri mẽ pa ho mẽ pa xwỹnhjaja ma hwỹr mra. Hãmri nhũm amnhĩ wỹr mẽ omu nẽ amnhĩ tã tanhmã mẽ hkukjẽr to nẽ mẽ kãm:

—Kwa mẽ inhmã mẽmoj jarẽ. Tanhmã na htem ahpỹnhã axpẽn mã ijarẽnh to wehe? Anẽ.

¹⁹ Hãmri nhũm mẽ kãm:

—Nã na htem ahpỹnhã tanhmã ajarẽnh to. Na hte kamã mẽ hkwyjaja ato finat Juãw Paxis ã ajarẽ. Nhũm kamã mẽ hkwyjaja ato finat Eris ã ajarẽ nhũm mẽ hkwyjaja tõhã apẽ Tĩrtũm nhỹ hã kapẽr jarẽnh xwỹnhjẽ hõ ra akupỹm htũr ã ajarẽ. ã na htem ahpỹnhã ajarẽnh anẽ. Anẽ.

²⁰ Hãmri nhũm mẽ kuma nẽ mẽ kãm:

—No mẽ kajaja? Ixpẽ mẽhõ hã na ka htem ixkamnhĩx? Anẽ.

Hãmri nhũm Simãw Pẽtre kãm:

—Nã mẽ pajaja na pa htem apẽ Tĩrtũm kot mẽ ixkaxyw axãm nẽ mẽ ixwỹr amẽn xwỹnh ã ajarẽ. Nẽ apẽ mẽ ixpiitã mẽ inhõ Pahi Maati hã ajarẽ. ã na pa htem ajarẽnh anẽ. Anẽ.

²¹ Hãmri nhũm kuma nẽ mẽ kãm:

—Tỹ. Nã ãm hãmri na ka htem ã ijarẽnh anẽ. ã ixte anhỹr kẽnã. Nom kêr ka mẽ inhmã kumrẽx. Kêr ka mẽ kormã ã akwỹjẽ mã ijarẽnh anhỹr o ri apa hkêt nẽ. Anẽ.

Jejus kot amnhĩ kukamã amnhĩ jarẽnh

Matẽwre 16.21; Makre 8.31-33

²² Nhũm Jejus arĩ hkõt mẽ pa ho pa xwỹnhjẽ mã kapẽr nẽ hprĩ hã

tanhmã mẽ kãm amnhĩ jarênh to nê mẽ kãm:

—Nà ãm hãmri na Simãw Pêtre ijarê. Mẽ kajaja ra mẽ ate ja hã ixpumunh mex. No mẽ pahkwýjaja na mẽ akĩnhã mẽ kãm ja hã ijarênh mar nê ja hã ixpumunh prãm kêt. Ijaew pigêtjaja nê Tirtùm kapêr tùm o mẽ ahkre o mẽ pa xwýnhjaja nê patre krãhtùmjaja mẽ kãm ja hã ixpumunh prãm kêt. Jakamã koja mẽ nhýrmã ixpynê nê ixtak rax nê. Hãmri nê ixpĩ. Nom kot paj ixyk ã apkati axkrunêpxi nhùm Tirtùm akupým ixto ixtĩr. Anê.

Jejus krajaja tanhmã kot amnhĩ nhĩpêx to hã mẽ harênh

Matêwre 10.31, 16.24-28; Makre 8.34-9.1; Rukre 14.25-33; Juãw 12.24-26; mããnên Karatas 5.24; Piripos 2.4; Wam Pêtre 4.1-2; Apokarip 2.10-12

²³ Nhùm pre ã Jejus amnhĩ kukamã hkôt mẽ pa ho mẽ pa xwýnhjê mã amnhĩ jarênh anê hãmri nê hpãnhã mẽ kot mar o kuhê xwýnh piitã mẽ kãm kapêr nê mẽ kãm:

—E kot ka mẽ atõ ate ixkôt amnhĩ xãm ã amnhĩ jarê hãmri nê mããnên ã amnhĩ jarênh anê nê amnhĩ jarênh o: “Jejus kêp inhõ Pahihti jakamã kot paj kapêr kôt pix mã amnhĩ nhĩpêx rãhã ho ri ixa. Kwãr ixkwýjaja tanhmã hã inhĩpêx to.” Anhýr o apkati mẽ ã amnhĩ jarênh anê.

²⁴ —Koja mẽ ixtã mẽ atõx pĩ rý tanhmã mẽ atõ hto ka ty. Tã koja akaxwýnh ma inhõ krĩ mex wýr àpir kurê kumrêx. Hãmri nê kamã atĩr tùm nê amex rãhã apa ho apa. Nom kot kaj mẽ jar atĩr prãm xaj ixkaga hãmri nê hwýr axàpir kêt nê.

²⁵ —Nê koja mēhõ hikukrêx rax gryk ã Tirtùm kaga. Hã koja nhýrmã ty nê ý kamã kuwy hwýr ma mō nê amnhĩ kôt hikukrêx õ hpyr nê o mōr kêt nê. Koja tee ri kuwy hwýr mōr pymaj amnhĩ

nê hikukrêx rax o amnhĩ pãnhã amnhĩrer prãm kaprý.

²⁶ —Nê koja mēhõ ixte mẽ ahkre hã inhma nhùm ja kêp omnuy nhùm ixkaga jarê. Hã kot paj nhýrmã akupýn mẽ ato amnhĩptãr kaxyw akupýn wrý nê amnhĩ xwar kot ixkaga xwýnhhta kaga. ãm hãmri na pa ã mẽ amã amnhĩ jarênh anê. Kot paj nhýrmã man akupýn inhõ Papaj nhý hã ixte mẽ ho amnhĩptãr kaxyw akupýn wrý. Nhùm kapêr o mẽ wrýk xwýnhjaja man ixkôt wrý. Pa mẽ wrý hãmri nê mẽ kot ixkaga xwýnhjaja pa amnhĩ pyrã nê mẽ hkaga. ²⁷ ãm hãmri na pa ã mẽ amã amnhĩ jarênh anê. Kot paj nhýrmã akupýn ixte mẽ ato amnhĩptãr kaxyw mẽ awýr wrý. Tã kot kaj mẽ akwýjaja kormã atĩr ri ja kukamã tanhmã ixte amnhĩ nhĩpêx to hã ixpumu. Anê.

Jejus kot kên prêk nhũmõk ã hirã kamã ãm ã harênh

Matêwre 17.1-8; Makre 9.2-8; mããnên Sikũn Pêtre 1.16-18

²⁸ Tã nhùm semãnja hapêx nhùm Jejus Simãw Pêtre nê Xiakre nê Juãw wa mẽ kãm kapêr nê mẽ kãm:

—E pu mẽ ma hixêt prêk mũj wýr mō nê hwýr api nê himõk ã Tirtùm mã amnhĩ jarê. Anê.

Hãmri nê ma amnhĩ kôt hwýr mẽ o mō nê hwýr mẽ ho api. ²⁹⁻³² Hãmri nhùm Jejus Tirtùm mã amnhĩ jarênh o xa. Nom nhùm hkôt hixêt wýr mẽ mōr xwýnhjaja õtxwa htýx nê ra gõr nê hikwý. Pu nhùm Jejus axtem hkuk nê xa. Nê ê haka htýx nê xa. Hãmri nhùm ja wa kaxkwa rùm wrý nê kuri kãm kapêr o xa. Finat Mojes mẽ finat Erisja wa kuri kãm kapêr o xa. Na pre ra annepêm Tirtùm amnhĩ wýr wa ho api. Tã nhùm wa ra akupýn wrý nê Jejus mã kapêr o xa. Mẽ hpimrãatã hirã htýx kãm axpên mã kapêr o kuhê. Jejus kormã krĩ pẽ Jerujarê kapem mẽ kot hpĩr kêt ri nhùm wa mẽ axpên mã

htyk kukamã harênh o kuhê. Nhũm wa kãm:

—Nã Tirtũm jamaxpêr xã hkôt kot kaj ã amnhĩ nhĩpêx anê.

Anhỹr o Jejus tyk kukamã kãm hamaxpêr o hihtỹx o wa xa.

Rôm nhũm mẽ ôt xwỹnhjaja hkrã hapôj nê tee ri Jejus pumu. Nhũm mex kumrêx nê hirã htỹx kãm xa nhũm mẽ omu nê kuri wa ãm xwỹnhta wa omu. ³³ Hãmri nhũm Mojes mẽ Eris wa ra akupỹm no-jarêr nhũm Simãw Pêtre tee ri ja hã wa omu nê Jejus mã kãm:

—Kwa Pahĩhti. Nã ãm hãmri na pu mẽ amnê mō. Kwa pu mẽ kritpêm jar axkamẽ nê tokyx pano-jarêr kêt nê. Pa mẽ amã pō nhĩrõnh o axkrunêpxi nê hipêx. Amã hõ nhĩpêx nê Mojes mã hõ nhĩpêx nê Eris mã hõ nhĩpêx ka mẽ kamã akrĩ. E kwa pa mẽ amã ho anê nã? Anê.

Nhũm amnhĩ krã hkôt ã kãm kapêr anê. ³⁴ Hãmri nê kormã kãm kapêr rôm nhũm kakrã jaka tỹxja wrỹ nê mẽ hkunor nhũm wa mẽ kamã kuhê. Hãmri nhũm Simãw Pêtre mẽ Juãw mẽ Xiakreja mẽ tee ri kakrã kot amnhĩ nhĩpêx ã omu nê kãm ma nê. ³⁵ Hãmri nhũm kakrã kamã Tirtũm mẽ kãm kapêr nê mẽ kãm:

—E ota Ixkra xa. Mẽ ate kamã ajamak o apa xwỹnhta na. Inhmã hapêê. Kêr ka mẽ ãm tapxipix kapêr mar tỹx o ri apa. Anê.

³⁶ Hãmri nhũm mẽ kuma nê kãnhmã rĩt nê ãm Jejus pix pumu nhũm ahte xa. Nhũm kuri wa ãm xwỹnhta wa ra ma akupỹm api nhũm mẽ Jejus pix pumu.

Mẽ tapxipixjaja na prem ã Jejus kot amnhĩ nhĩpêx anhỹr ã omu nom taxy kormã nhãm hkwỹjê mã harênh kêt nê. ãm axpên pix mã harênh pê hkukamã hamaxpêr o ri Jejus kôt pa.

Jejus kot mẽhõ nê mẽkarõmnuti janor ã harênh

Matêwre 17.14-21; Makre 9.14-29

³⁷ Tã nhũm apkati nhũm mẽ ma akupỹm ahparmã hkwỹjê hwỹr

wrỹk o mō. Nê mẽ hwỹr hpôx o mō nhũm mẽ ra mẽ kutêp pikuprõnh rax nê kuhê. ³⁸ Hãmri nhũm mẽhõ myja amnhĩ wỹr mẽ omu nê mẽ kutã tẽ nê mẽ hkaxpa nê Jejus pumu nê kãm:

—Pa Jejus. Kwa ixkamã axukapri nê inhmã ixkra ho mex. ãm ixpê pyxire. ³⁹ Na hte mẽkarõmnuti xatã ixpê tanhmã ho nhũm y hã amỹra nê mra nê rôrôk nê hakwa jamrô ho hikwỹ nhũm tokyx kãm urer kêt nê. Nhũm ra ixpê homnuj tỹx nê. ⁴⁰ Hãmri pa akôt mẽ pa ho mẽ pa xwỹnhjê hwỹr o tẽ nhũm mẽ kot inhmã ho mex kaxyw tee ri tanhmã ho hkapry. Anê.

⁴¹ Hãmri nhũm kuma nê hkôt mẽ pa ho pa xwỹnhjê mã kãm:

—Hêxta waa nê. Na ka mẽ ra ixte Tirtũm nhỹ hã mẽ ho mex ã ixpumunh o ixkôt apa ryy tã kormã ixpyrà nê ã mẽ hipêx anhỹr kêt nê. Mãn ka mẽ kormã mẽ kaxyw Tirtũm kôt ajamaxpêr tỹx kêt nê. Anê.

Hãmri nê myta mã kãm:

—E amnê ixwỹr akra ho tẽ pa inhno ho omu. Anê.

⁴² Hãmri nhũm hwỹr o tẽ nhũm mẽkarõmnuti axte kêp ho pika kura nhũm amỹra nê tẽm nê nō. Hãmri nhũm Jejus omu nê nê mẽkarõmnuti kator nhũm akupỹm mex nê kãnhmã nhỹ. Hãmri nhũm akupỹm hipêêxã mã kugō. ⁴³ Hãmri nhũm mẽ amnhĩ jaêr pê Jejus kot ã hipêx anhỹrja ã omu nê ri axpên mã harênh o:

—Kokỹy. Hêxta waa nê. Pêr ãm Tirtũmja ãm ahpumunh o ahpumunh. Anê.

Jejus kot htyk kukamã amnhĩ jarênh

Matêwre 17.22-23; Makre 9.30-32

⁴⁴ Hãmri nhũm Jejus hkôt mẽ pa ho mẽ pa xwỹnhjê mã kãm:

—E kot paj mẽ amã tanhmã amnhĩ jarênh to ka mẽ inhmar tỹx nê. Na pa pre mẽ ate aa mẽmoj pumunh kêt kwỹ ho anhỹr o ixpa

pix kaxyw mẽ awỳr ixwryk kêt nê. Koja mẽ tokyx mẽ kãm ixtã amỳnê nhũm mẽ ixpĩ. E kwa kêr ka mẽ ja ma na nê hã anohtỳx nê ho apa. Anê.

⁴⁵ Hãmri nhũm mẽ tee ri kot ã amnhĩ jarênh anhỳrja ma nê axpên mã:

—Kwa mo na pêr ri ã amnhĩ jarênh anê? Kêp mẽ panhõ Pahi Maati hã kot amnhĩ jarênh kênã kot kêt mẽhõ kupĩ.

Anhỳr o axpên mã ri harênh o kuhê. Hãmri nê mẽ kãm ã kot amnhĩ jarênh anhỳrja mar prãm kêt jakamã hprĩ hã tanhmã hã hkukjêr to hkêt nê. ãm akryk mar o kuhê.

Mẽ kot amnhĩ to rũnh xwỳnhjê jarênh

Matêwre 18.1-5; Makre 9.33-37; Rukre 22.24-27; mãânên Piriapos 2.3-9; Wam Pêtre 5.5

⁴⁶ Tã nhũm Jejus kôt mẽ pa ho mẽ pa xwỳnhjaja tanhmã amnhĩ kukamã hamaxpêr to hãmri nê axpên mã:

—Kwa mẽ pahtõ kot puj we nhỹrmã pahpê pahi nê mẽ ho amnhĩptàr rax o pahkwỳ jakre? Anê.

Hãmri nê ja hã axpên kukjêr o Jejus kôt mỗ nê axpên mã: “Nà pa.” Nhũm mẽ hkwỳja: “Nà kêt pa.” Anhỳr o hkôt mỗ. ⁴⁷ Hãmri nhũm Jejus mẽ kuma nê mẽ hamaxpêr kôt mẽ omu. Hãmri nê xa nê amnhĩ wỳr mẽhprĩjê mã hpa ho apê nhũm hwỳr tẽ nê kuri xa. ⁴⁸ Hãmri nhũm Jejus hkôt mẽ pa ho pa xwỳnhjê mã tanhmã harênh to nê mẽ kãm:

—E mẽ inhma. Kêr ka mẽ apê pahi pyrãk o tanhmã amnhĩ jarênh to ho ri apa hkêt nê. ãm te amarĩ ri mẽ apa pyrãk o amnhĩ nhĩpêx o ri apa. Jao nhỹri mẽhprĩre hõ pumu nê kamã axukaprĩ ho kãm mẽmoj tanhmã ho rỳ kãm mẽmoj gõ. Hãmri nê te pa ate tanhmã ixto mex to pyrãk o amnhĩ nhĩpêx. Nê kot ka mẽ atõ pa tanhmã ixto mex to nê te ate Tĩrtũm tanhmã ho mex to pyrãk o amnhĩ nhĩpêx. Kot kaj

mẽ ã amnhĩ nhĩpêx anhỳr o ri apa nhũm Tĩrtũm ja hã mẽ apumu nê mẽ ate amnhĩ to rũnh kêt tã nhũm tãm mẽ ate amnhĩ to rũnh xwỳnh ã mẽ ajarê. E kot kaj mẽ amã amnhĩ to rũnh prãm nê ã amnhĩ nhĩpêx anhỳr o ri apa. Anê.

Mêhõ kot Jejus nhỹ hã tanhmã amnhĩ nhĩpêx to hã harênh

Makre 9.38-41

⁴⁹ Hãmri nhũm Jejus kôt mẽ pa ho pa xwỳnhjê hõ pê Juãwja nhỹhỹnh hwỳr hpõx o tẽ nê kãm:

—Kwa Pahihti. O mỳj mẽhõ kêp mẽ pahkwỳ hkêt tã anhĩxi jarênh kôt mẽ nê mẽkarõmnuti janor o pa. Pa mẽ tee ri kot ã amnhĩ nhĩpêx anhỳr ã omu nê nê kãm ixkapêr. Kêp mẽ pahkwỳ hkêt kênã kot kêt ã mẽ hanor anhỳr o pa. Anê.

⁵⁰ Hãmri nhũm kuma nê kãm:

—Kwa nà ja nê tanhmã kãm nê hkêt nê. Koja mẽhõ mẽ pahkwỳm ri tanhmã mẽ ahkre hto hkêt nê hãmri nê kêp mẽ panhĩõõ. Ra mẽ pahkôt kot amnhĩ nhĩpêx o pa mã kênã. Jakamã kwa mẽ ja nê tanhmã kãm akapêr to hkêt nê. Kwãr mãmrĩ ã amnhĩ nhĩpêx anhỳr o ri pa. Ja mex kênã. Anê.

Samar nhõ xwỳnhjaja kot Jejus kaga hã mẽ harênh

Atre 8.14-15

⁵¹ Hãmri nhũm Jejus akupỳm kaxkwa hwỳr àpir kaxyw ra hwỳr apkati grêre ho mõi jakamã nhũm hamaxpêr o:

—E pa ma akupỳm Jerujarê hwỳr mỗ. Nà kot paj anê. Mẽ kot kamã tanhmã ixto mã tã kot paj ma akupỳm mẽ hwỳr mỗ. Anê.

⁵² Hãmri nê amnhĩ kukamã mẽ hkwỳjê rê nhũm mẽ ma mẽ hkukamã Samar nhõ krĩ kamã nhỹri mẽ kot amnhĩm hikranh xã japêr o mỗ. ⁵³ Nom nhũm Samar nhõ xwỳnhjaja kêp Jerujarê nhõ xwỳnhjê hprãm nõkati jakamã Jerujarê hwỳr mõi ã mẽ harênh ma nê amnhĩ nê mẽ hkurê. ⁵⁴ Hãmri nhũm mẽ tee ri amnhĩ tã mẽ kuma

ně awjanā ně akupŷm Jejus wŷr mra ně kām mẽ harĕ. Hāmri nhŷm Juāw mẽ Xiakre wa mẽ harĕnh ma ně mẽ kamā gryk ně ně Jejus mā:

—Kwa Pahihti. Nà na mẽ axtem ně amnhĩ ně mẽ pahkurĕ. Jakamā e kwa pu mẽ kaxkwa rūm mẽ hipy kuwy hpòk kwŷ rĕ kĕ mẽ hkaxàr pa nà? Anĕ.

⁵⁵ Hāmri nhŷm wa kuma ně wa kām:

—Tk. Kwa nà wa ajamaxpĕrja mex kĕt. Pu mẽ ā ri mẽ hipĕx anhŷr kĕt ně. Koja Tirtŷm kām ja ho anhŷr prām ně rĭ tām tanhmā mẽ ho. No mẽ papajaja pu mẽ ri mẽ kamā pagryk xà tanhmā mẽ hipĕx to hkĕt ně. Pu mẽ ā mẽ hipĕx anĕ ně ra amnhĩ tomnuj tŷx ně. Kwa wa ri ā ajamaxpĕr anhŷr kĕt ně. Anĕ.

⁵⁶ Hāmri ně mẽ ma Samar rūm hapòj ně hpānhā nhām krĭ hō hwŷr pa.

Mĕ hkwyjaja kām Jejus kòt pa hprām ā mẽ harĕnh

Matĕwre 8.18-22

⁵⁷ Tā nhŷm Jejus mẽ kormā mōr ri nhŷm mẽhōja hwŷr tĕ ně kām:

—Pa Jejus? E kot paj ma akòt ixpa ho ixpa. Anĕ.

⁵⁸ Hāmri nhŷm kuma ně kām:

—Ko ka mā. Kam ně rĭ ma ixkòt ri apa ho apa. Nom kĕr ka inhmar kumrĕx ně rĭ kormā ixkòt apa. Na hte xore pika hkre kamā hikwŷ xà. Nĕ kuwĕnhre pĭ nhĭmòk ā hikwŷ xà. No pa na Tirtŷm kot mẽ awŷr inhmĕnh xwŷnh tā jajĕ hkĭnhā inhòrkwyĭ hkĕt. Na pa hte ām nhām krĭ hō hwŷr ixpa ně nhām ixpa. Tā xà kot kaj ixpyrà ně ā amnhĩ nhĭpĕx anhŷr o ri apa nà? Anĕ.

⁵⁹ Nhŷm pre ā kām kapĕr anĕ hāmri ně nhām mẽhōja wŷr apkjĕ ně kām:

—Pa? No ka? Xà kot ka ma ixkòt apa ho apa nà? Anĕ.

Hāmri nhŷm kām:

—Tŷ no ām kormā. Koja nhŷrmā inhĭpĕxàja tanhmā amnhĩ to ně ty mām. Pa haxà hāmri ně rĭ kormā ma akòt ixpa ho ixpa. Anĕ.

⁶⁰ Hāmri nhŷm Jejus kuma ně kām:

—Kwa nà ri ā ajamaxpĕr anhŷr kĕt ně. Ma ixkòt apa ho apa kurĕ kumrĕx. Kĕ mẽmoj ano kupyr rŷ inhnĕ apĕ amnàr kĕt ně. Kwār mẽ htĭr tŷm ně mẽ pa hkĕt mā xwŷnhjaja mām axwakre kamā amā anhĭpĕxà jamār o pa nhŷm nhŷrmā ty kĕ mẽ amā haxà. Ka māmri ma Tirtŷm kapĕr o mẽ ahkre ho ri mẽ hkòt apa. Kĕ mẽ ama ně mẽ hkwyjaja hkòt amnhĩ xunhwŷ nhŷm mẽ ho hkra. Anĕ.

⁶¹ Nhŷm pre ā kām kapĕr anĕ hāmri nhŷm nhām mẽhō myja haxwŷja hwŷr tĕ ně kām:

—E. Pa kot pa ma akòt ri ixpa ho ixpa. Nom kormā. Pa ma akupŷm tĕ ně ixkwŷjĕ mā amnhĩ jarĕ ně tanhmā amnhĩ to hpa mām. Hāmri ně mẽmo arĭgro hā rĭ kormā ma akòt ixpa ho ixpa. Anĕ.

⁶² Hāmri nhŷm tee ri kuma ně kām:

—Kwa nà. Kot kaj ā ajamaxpĕr anĕ hāmri ně ixkòt apa htā te amnhĩ katut kòt arĭt rāhā ho ri apa pyràk o amnhĩ nhĭpĕx. Kwa ā ajamaxpĕr anhŷr kĕt ně ma ixkòt apa kurĕ kumrĕx. Anĕ.

10

Jejus kot mẽ hwŷr mẽ kĕp 72 rĕnh ā harĕnh

Matĕwre 10.1, 10.5-15; Makre 6.7-13; Rukre 9.1-6, 9.10-11; māmĕn Atre 13.50-51, 18.6

¹ Tā nhŷm Jejus axte amnhĩ kaxyw mẽ ho 72 ně mẽ kurĕ. Hāmri ně mẽ ho axkrut kapĕn ně ma nhŷhŷm krĭ hkwyĭ hkòt amnhĩ kukamā mẽ kurĕ. Mĕ kot mẽ hkòt ri Tirtŷm kapĕr o mẽ ahkre ho pa kaxyw. ² Hāmri ně mẽ kām:

—Na mẽ ohtò rax ně kormā Tirtŷm kapĕr mar kĕt ně. No ām kormā mẽ ate mẽ kām harĕnh o apa kaxyw mẽ agrĕre. Te pur kām haròj kamrĕk pa ně ām tā no ām kaxyw hikĕnh xwŷnh grĕre pyràk. Jakamā

kwa mẽ ho Tirtũm wỳ kê axte mẽ kaxyw mẽ hkwỳjê rê.

³—E kot paj ma mẽ hwỳr mẽ arẽ. Ma mẽ hkõt mẽ ate Tirtũm kapêr o mẽ ahkre ho ri apa kaxyw. Jakamã kot kaj mẽ te ate ôwêhti kot mry xoprê hwỳr amnhĩ to mrrar nhũm kot hkwỳ hpar pyræk o amnhĩ nhĩpêx. Koja mẽ hkwỳjaja mẽ ate mẽ ahkre ma nhũm ja mẽ kêp omnuj nê nhũm mẽ hã tanhmã mẽ anhĩpêx to. Tã kêr ka mẽ tee ri amnhĩ kukamã ajamaxpêr nê amã mẽ uma hkêt nê.

⁴—Nê kêr ka mẽ hwỳr anojarêt nê amnhĩ kõt amrykà rỳ akawà rỳ aparkà hõ ho apa hkêt nê. Âm anhỹ kamã ma mẽ hwỳr apa. Nê mẽ hwỳr mra nhũm mẽ nhỹri pry hã mẽ atõ kaxpa nê amã kapêr o xa ka wa axpên mã akapêr ry hkêt nê. Anojarêt kãm kãm akapêr krãnre nê mẽ hakre nê ma krĩm apa.

⁵—Nê kêr ka mẽ hwỳr pøj nê nhỹri mẽ ôrkwỹ hwỳr agjê nê mẽ kãm: “Xà kot paj mẽ ato Tirtũm wỳ kê mẽ ato mex nê ka mẽ ajamakêtkati nê ri apa?” Anê. ⁶Hãmri nhũm mẽ ama nhũm ja mẽ kãm mex japêr nhũm mẽ hkĩnh nê amã: “ỳ kam nê mãmrĩ mẽ ixto awỳ.” Anê. Hãmri ka mẽ ama nê tanhmã mẽ ho Tirtũm wỳr to. No koja mẽ apê ja kaga ka mẽ ho hwỳr kêt nê.

⁷—Nê kêr ka mẽ nhỹri mẽ ôrkwỹ kamã mẽ hwỳr pøj hãmri nê mẽ hkõt ri apikamênh tãmtã nê akupỹm mẽ kurũm ajapøj nê ma hpãnã krĩ hõ hwỳr apa. Nê mẽ axãmnhĩx mẽ kuri axàpkur o ri apa. Mẽmoj to akõm o ri apa. Ra mẽ ate mẽ ho mex pê mẽ kãm Tirtũm kapêr o mẽ ahkre ho apa kênã. Jakamã kwâr mẽ mãmrĩ amnhĩ pãnã mẽ amã mẽ axàpkur xà gõ ka mẽ kuri mẽ apku.

⁸—Nê kêr ka mẽ nhỹri mẽ hwỳr pøj nhũm mẽ ato mex nê. Nê mẽ amã mẽmo mẽ apkur xà gõ ka mẽ mãmrĩ axãmnhĩx aku. Aa kormã mẽ

ate mẽmojta kur kêt tã mãmrĩ ajamakêtkati nê aku. No tee ri amnhĩ kukamã tanhmã ajamaxpêr to hkêt nê.

⁹—Nê kêr ka mẽ ã mẽ kãm akapêr anê nê mẽ kãm: “Tirtũm kãm mẽ ato hkra hprãm. Na hte amnhĩ wỳr mẽ awỳ.” Anê hãmri nê akupỹm mẽ kãm mẽ à xwỳnhjê ho mex. ã kot kaj mẽ mẽ kãm amnhĩ nhĩpêx anhỹr o ri mẽ hkõt apa.

¹⁰—Nê kêr ka mẽ nhỹri mẽ hwỳr pøj nhũm mẽ âm mẽ apumu nê amnhĩ nhõrkwỹ hwỳr mẽ awỳr kêt japêr. Hãmri ka mẽ tee ri amnhĩ tã mẽ omu hãmri nê ra ma nhãm apa kaxyw. ¹¹Hãmri nê anojarêt nê mẽ kãm: “E mẽ inhma, Tirtũm kot mẽ pahwỳr mênh xwỳnhhta na mẽ awỳr wa inhmê pa wa mẽ awỳr mõ. Wa ixte Tirtũm kapêr o mẽ ajahkre kaxyw. Kãm mẽ ato hkra hprãm nhũm wa ixte mẽ amã harênh kaxyw na pa pre wa ã mẽ awỳr inhmõr anê. Tã ka mẽ harênh ma nê wa ixkaga. Jakamã kot paj wa jar mẽ anhõ krĩ kamã amnhĩ par kà hã awjagrõ kapĩ. Mẽ ate Tirtũm kaga hã amnhĩ pumunh nhũm Tirtũm kot amnhĩ pyrà nê mẽ akaga hã mẽ ate omunh kaxyw kot paj wa mẽ anoo mã ã amnhĩ par kà hã awjagrõ kapĩr anê. Kot kaj mẽ nhỹrmã tee ri ã amnhĩ nhĩpêx anhỹrja mã ajamaxpêr nê akapĩr htỳx kumrêx kãm ga. Âm hãmri na pa wa mẽ amã ja jarê.” Anhỹr o mẽ kãm akapêr nê mẽ kêp ajapøj nê ma hpãnã nhãm krĩ hõ hwỳr apa kurê kumrêx.

¹²—Koja nhỹrmã Tirtũm mẽ kot amnhĩ tomnuj mỳrapê tanhmã mẽ ho. Na pre ra ã krĩ pê Sotõ nhõ xwỳnhjê nhĩpêx anê. Na prem amnhĩ tomnuj tỳx o pa nhũm Tirtũm tanhmã mẽ kot amnhĩ tomnuj tỳx ã tanhmã mẽ ho. Tã jar mẽ kot kãm ixkapêr mar prãm kêt nê mẽ kot ixkaga xwỳnhjaja. Koja Tirtũm ixtã mẽ omu nê kot Sotõ nhõ xwỳnhjê nhĩpêx pyræk o mẽ

hipêx nom tanhmã mẽ ho htỳx o mẽ hakre.

—E kêr ka mẽ ma krĩ hkwỹ hkôt apa nê ã mẽ kãm akapêr anhỳr o ri apa. Anê.

Mẽ kot Tĩrtũm kôt hamaxpêr kêt xwỳnhjê jarênh

Matêwre 11.20-24

¹³⁻¹⁴Tã nhũm Jejus krĩ hkwỹ nhõ xwỳnhjê mã kapêr o xa nê mẽ kot amnhĩ tomnuj ã mẽ kãm akir. Krĩ pê Korajĩ mẽ Pesêj nhõ xwỳnhjê kumrêx mã kapêr nê mẽ kãm:

—E mẽ inhma. Amnepêr krĩ pê Sitõ mẽ Xir wa kamã mẽ pa xwỳnhjaja na prem tanhmã amnhĩ tomnuj tỳx to ho pa nhũm Tĩrtũm mẽ omu nê hã mẽ homnuj tỳx nê. Tã kwa mẽ o kora Korajĩ mẽ Pesêj wa kamã mẽ apa xwỳnhjaja. Ra ixte mẽ amã mẽ ate mẽmoj pumunh kêt o anhỳr rax o ixpa htã ka mẽ omu nê arĩ amnhĩ tomnuj o ri apa nê tokyx amnhĩ tomnuj kaga hkêt nê. Jakamã kot kaj mẽ amex kêt nê. Kop apu Sitõ rỳ Xir kamã mãn ixte mẽ mẽ kãm aa mẽ kot mẽmoj pumunh kêt kwỳ ho anhỳr o ri ixpa ronhỳx mẽ omu nê mẽ arom amnhĩ kaxyw ixkôt hamaxpêr kurê kumrêx. Nê tee ri tanhmã amnhĩ tomnuj to ho pa hã amnhĩ pumu nê hkaprĩ nê ã amnhĩ nhĩpêx anhỳr kaga hpa. No mẽ kajaja na pa tee ri mẽ amã tanhmã amnhĩ nhĩpêx to ho ri ixpa kaprỳ. Ka mẽ ja hã ixpumu nê ãm ixpumu nê amnhĩ tomnuj kaga hkêt nê. Tã koja nhỹrmã Tĩrtũm mẽ piitã mẽ kot amnhĩ tomnuj mỳrapê tanhmã mẽ hipêx to. Hãmri nê tanhmã Sitõ mẽ Xir wa kamã mẽ pa xwỳnhjê jarênh to nhũm mẽ kot amnhĩ tomnuj mỳrapê amnhĩ xà htỳx kamã hamak o ri pa. No mẽ kajaja mẽ ate amnhĩ tomnuj tỳx o mẽ hakrenh jakamã koja Tĩrtũm mẽ hkĩnhã mẽ atomnuj tỳx o mẽ atomnuj tỳx. Ka mẽ amnhĩ xà htỳx kamã ajamak rãhã ho ri apa ho apa. Anê.

¹⁵Nhũm pre ã Jejus mẽ kãm kapêr anê. Hãmri nê hpãnhã Kapanau nhõ xwỳnhjê mã kapêr nê mẽ kãm:

—No mẽ apê Kapanau nhõ xwỳnhjaja. Kot kaj mẽ ajaxwỳja mẽ amex kêt nê. Mẽ ate amnhĩ tomnuj kagare pyrà nê Tĩrtũm nhõ krĩ hwỳr akrà ho apa. Nom kot kaj mẽ atõ hwỳr axàpir kêt nê. Kot kaj mẽ ma kuwy maati hwỳr ajapêx pa kãm ga.

¹⁶Anhỳr o mẽ kãm kapêr hãmri nê hpãnhã hkôt mẽ pa ho mẽ pa xwỳnhjê mã kapêr nê mẽ kãm:

—Kot kaj mẽ Tĩrtũm kapêr o mẽ ahkre ho ri apa nhũm mẽhõ ama nê akapêr kôt amnhĩ nhĩpêx. Hã koja te pa kot ixkôt amnhĩ nhĩpêx pyràk o amnhĩ nhĩpêx. No koja amar kêt nê akaga hãmri nê te pa kot inhmar kêt nê ixkaga pyràk o amnhĩ nhĩpêx. Jao mãânên Tĩrtũm kaga.

Anê hãmri nhũm mẽ kuma hãmri nê angrã nê axkrut kapên nê ma ahpỳnhã krĩ hkôt angrã.

Mẽ hkĩnh nê ri mẽ pa xwỳnhjê jarênh

Apokarip 3.5

¹⁷Tã nhũm mẽ kêp 72jaja krĩ hkwỹ rũm akupỳn Jejus wỳr pôj. Piitã hkĩnh nê hpôx pa. Hãmri nê kãm:

—Kwa Pahihti. Na pa prem anhỳ hã mẽ nê mẽkarõmnuti japôx rax nê. Na pa prem mẽ nê mẽ hano nhũm mẽ ãm mẽ kurũm hapôx kurê kumrêx. Anê.

¹⁸Hãmri nhũm mẽ kuma nê mẽ kãm:

—Tõe. Ixàhpumunh tỳx o ixte Satanasti jakrenh jakamã na ka htem inhỹ hã mẽ hano nhũm mẽ tee ri mẽ akutã hihtỳx prãm. Hãmri nê te na haxênh prêprêk pyràk o amnhĩ nhĩpêx nê mẽ kurũm hapôx kurê kumrêx pa ja hã mẽ omu. ¹⁹⁻²⁰Mẽkarõmnuti te kot makre pyràk. Tã ra ixte mẽ amã ixàhpumunh tỳx xà hkwỹ nhõr jakamã na ka prem mẽ

kām akapēr nhūm mẽ tee ri akutā tanhmā amnhĩ tỳx to hprām. Tā koja Satanasti tee ri mẽ ate nhỹrmā Tirtūm mẽ wa ixri tūm nẽ apa pymaj tanhmā mẽ ano kupyw to kaprỳ. Ra Tirtūm kot õ kagà kamā mẽ atĩr tūm nẽ mẽ apa kaxyw mẽ anhĩxi hã kagà kênã. Jakamā kwa mẽ jam ajamaxpēr o akĩnh nẽ ajamakêtkati nẽ ri apa. No kêt mẽkarõmnuti kot mẽ akapēr mar nẽ mẽ kurūm hapõxta ã mẽ omunh xà hkõt pix mã akĩnh nẽ ri apa hkêt nẽ. Anẽ.

Jejus kĩnh kām kot Hipêêxà mã amnhĩ jarēnh

Matêwre 11.25-27

²¹ Tã nhūm Tirtūm Karõ tanhmā Jesus to nhūm ý hã hkĩnh nẽ xa. Hãmri nẽ Tirtūm mã kapēr nẽ kām:

—Pa Papaj? Nà apê mẽ ixpiitã mẽ inhõ Pahi Maati na ka. Pikap ri mẽ pa xwýnhjaja nẽ kaxkwa kamā mẽ pa xwýnhjaja apê mẽ ixpiitã mẽ inhõ Pahi Maati na ka. Âm hãmri na ka hte amnhĩ nhĩpêx mex o ri apa. Na ka hte mẽ àhpumunh tỳx ã mẽ kot amnhĩ jarēnh xwýnhjê mã axàhpumunh tỳx o amnhĩrĩt kêt nẽ. Âm mẽ àhpumunh kêt ã mẽ kot amnhĩ jarēnh xwýnhjê pix mã na ka hte ja ho amnhĩrĩt nhūm mẽ tapxipixjaja ja hã apumu. Âm hãmri na ka hte amã hprām xà hkõt ã mẽ piitã mẽ hipêx anhỹr o ri apa. Jakamā mẽ kot amnhĩ to hkryre xwýnhpixjaja na htem ate amnhĩ nhĩpêx ã apumunh o pa.

²² —Na ka pre inhĩhkra kamã mẽmoj piitã haxàr pa. Ixte ho amnhĩptàr o ri ixpa kaxyw. Jakamã kapxipix na ka hte ixpê akra hã ixpumunh par. No jar ri mẽ pa xwýnhjaja na mẽ kot ja hã ixpumunh kêt. Nẽ mãânẽn papxipix na ixte ate tanhmā amnhĩ nhĩpêx to hã apumunh par. Jakamã na pa hte ã amnhĩ nhĩpêx anẽ nẽ inhmã hprām xà hkõt mẽ hkwyjê mã ato amnhĩrĩt o ri ixpa nhūm mẽ ixpyrà

nẽ ate tanhmā amnhĩ nhĩpêx to ho apa hkõt apumu. Anẽ.

Jejus kõt mẽ pa xwýnhjaja kot hkõt omunh o pa hã mẽ harēnh

Matêwre 13.16-17

²³⁻²⁴ Nhūm pre Jesus ã Tirtūm mã amnhĩ jarēnh anẽ hãmri nẽ hpãnhã hkõt mẽ pa ho mẽ pa xwýnhjê mã kapēr nẽ mẽ kām:

—E na ka htem ixkõt mẽ ano ho ixte tanhmā amnhĩ nhĩpêx to hã ixpumunh o ri apa. Nẽ mẽ ajamak o ixkapēr mar o ri ixkõt apa. No amnepêm mẽ akukamã pahijaja nẽ Tirtūm nhỹ hã kapēr jarēnh o ri mẽ pa xwýnhjaja kām ixpumunh prãm tỳx o pa htã mẽ akĩnhã ixpumunh kêt rãhã htyk pa. Kormã ixwryk nẽ jar ixkator kêt jakamã na prem ixpumunh kêt rãhã ty. Nẽ mẽ kãm ixkapēr mar prãm tã mẽ akĩnhã ixkapēr mar kêt nẽ. Âm mẽ kapxipixjaja na ka mẽ mỳr pẽ ixte amnhĩ nhĩpêx ã ixpumunh nẽ ixkapēr mar o ixkõt apa. Tã mẽ kurom mẽ ate ano ho ixpumunh nẽ ajamak o ixkapēr mar jakamã kwa mẽ ja hã amnhĩ pumu nẽ tãm amnhĩ nhĩpêx o akĩnh nẽ ri apa. Anẽ.

Samar nhõ xwýnh jarēnh

Matêwre 22.34-40; Makre 12.28-34; mãânẽn Wam Juaw 3.17-18

²⁵ Tã nhūm Tirtūm kapēr tūm o mẽ ahkre o mẽ pa xwýnhja Jesus wỳr tẽ nẽ hêx rom kot kamã hamak kaxyw kãm:

—Pa? E kwa inhmã mẽmoj jarẽ. Tanhmã kot paj we nhỹrmã Tirtūm ri ixtĩr tūm nẽ ixpa kaxyw amnhĩ nhĩpêx to wehe? Anẽ.

²⁶ Hãmri nhūm kãm:

—Tanhmã na ka hte Tirtūm kapēr ã kagà htum kot mẽ htĩr tūm nẽ pa hã kagà kamã harēnh nẽ mar to? Anẽ.

²⁷ Hãmri nhūm kãm:

—Nã harēnh kot:
Kêr ka mẽ anhĩ piitã ho amã Tirtūm kĩnh o ri apa. Mẽ amã hkĩnh tỳx o mẽmoj piitã hakrenh par o ri apa.

Ně kěr ka mẽ amã mẽ piitã hã ma ho te ka amã amnhĩ tã ma pyrãk o mẽ hipêx o ri apa. Jao tãm mẽ hipêx o ri apa. Aně.

Ã Tirtũm kapêr ã kagã htũm kamã ja jarênh kot anhÿr. Aně.

²⁸ Hãmri nhũm Jejus kuma nẽ kãm:

—Tỳ. Nà ãm hãmri na ka harẽ. Kot kaj ã mẽ hipêx anhÿr o ri apa nẽ nhÿrmã Tirtũm mẽ wa ixri atĩr tũm nẽ apa ho apa. Aně.

²⁹ Hãmri nhũm kuma nom kãm mẽ piitã mẽ ho mex prãm kêt nẽ. ãm amnhĩ kwỳ pixjaja nhũm kãm mẽ ho mex o pa hprãm. Jakamã hêx rom kãm:

—Kwa no mẽmojaja kot pa we ri ã mẽ hipêx anhÿr o ri ixpa? Xà mẽ pahkwỳ pẽ Ijaew pixjaja nã? Aně.

³⁰ Hãmri nhũm kuma nẽ tanhmã kãm ujarênh to. Nom hã kuxi nẽ kãm awjarẽ nẽ kãm:

—E pa amã awjarẽ ka inhma. Kojã Ijaew nhõ xwÿnhja ma Jeru-jarẽ rũm Jeriko hwÿr ahpar mã ma mõ. Mõõ nhũm ra mẽ ahkĩnh xwÿnhjaja kutã mra. Hãmri nẽ pry kahti ri hwÿr kato nẽ unẽ nẽ htak rax nẽ. Nẽ kệp ê hkwrÿnh pa nẽ ma kurũm hprõt nẽ mra nẽ akunok nhũm mẽ kot htak o hkã rênh rãhã ra htyk kaxyw nẽ nõ. ³¹ Hãmri nhũm patreja tẽ nẽ omu. No ãm omunh o hãnh tẽ nẽ hkupu nẽ ma tẽ. Urãk nẽ kệp Ijaew tã ãm omu nẽ tanhmã ho ajuta hto hkêt nẽ hãnh omunh o tẽ nẽ hkupu nẽ ma tẽ. ³² Hãmri nhũm patre ho ajuta xwÿnhja mããnẽn tẽ. Nẽ patre pyrã nẽ omu nẽ ãm omu nẽ hkupu nẽ ma tẽ. Urãk nẽ kệp Ijaew tã omu nẽ ãm omu nẽ hkupu nẽ ma tẽ.

³³—Tã nhũm Samar nhõ xwÿnhja mããnẽn mõ. Samar nhõ xwÿnhjẽ mẽ Ijaew na prem kãm axpẽn kĩnh kêt tã nhũm mõ nẽ omu nẽ kamã ukapřĩ nẽ. Kệp Ijaew ã omunh tã tee ri omu nẽ kamã ukapřĩ nẽ. ³⁴ Hãmri nẽ hwÿr tẽ nẽ omu nẽ kãm mẽ kot htak o hkã rênh xà kane nẽ

kãm hkupu pa. Hãmri nẽ kãnhmã ãm nẽ hkrit jumẽnre hã kumẽ nẽ ma nhÿri mẽ kot amnhĩm hikranh xà hã ixkre hwÿr o mõ nẽ hwÿr o pøj. Hãmri nẽ omunh mex o apkati. ³⁵ Hãmri nẽ akupÿm no-jarêt nẽ kãxpore hkwy jamỳ nẽ o tẽ nẽ kot mẽ kãm õ xwÿnhja mã kugõ nẽ kãm: “E kot paj hãmri ma mõ. Ota ixkãxporeta. Kěr ka inhmã ã xwÿnhja tãnopxar mex nẽ. Nẽ inhmã omunh mex kê akupÿm mex. Kojã kãxporeja apẽ grire hã kot paj nhÿrmã akupÿn mõ nẽ axte hkõt amã hkwy gõ.” Anhÿr o kãm kapêr nẽ ma akupÿm mõ. ã mẽ ujarênh kot anhÿr. Aně.

³⁶ Nhũm pre ã Jejus kãm ujarênh aně. Hãmri nẽ kãm:

—E nhÿ na pre kãm mẽ kot htak xwÿnhja kapřĩ ho te tãm kãm amnhĩ tã ma pyrãk wehe? Aně.

Hãmri nhũm Tirtũm kapêr tũm o mẽ ahkre xwÿnhja kãm:

—Nà kot kamã ukapřĩ xwÿnhja na pre omu nẽ kamã ukapřĩ nẽ ho mex o te tãm kãm amnhĩ tã ma pyrãk o hipêx. Aně.

³⁷ Hãmri nhũm Jejus kãm:

—Tỳ. Nà ãm hãmri na ka harẽ. Urãk nẽ kệp Ijaew kêt tã kamã ukapřĩ nẽ ho mex nẽ. Tã kěr ka urãk nẽ ã mẽ piitã mẽ hipêx anhÿr o ri apa. Urãk nẽ mẽ kệp akwỳ hkêt tã mẽ kamã axukapřĩ ho ri apa. Aně.

Jejus kot Matre mẽ Marir wa hwÿr mõr ã harênh

Rukre 12.29-31

³⁸ Tã nhũm Jejus krĩ rũm kato hãmri nẽ hkõt mẽ pa ho mẽ pa xwÿnhjẽ mẽ mẽ ma nhãm krĩ hõ hwÿr mõ. Mõõ nẽ hwÿr pøj. Hãmri nhũm Matre mẽ omu nẽ amnhĩ nhõrkwÿ hwÿr mẽ kuwỳ nhũm mẽ ma hwÿr mõ nẽ õrkwÿ hwÿr pøj. ³⁹ Hãmri nhũm Jejus mẽ ahkre ho nhÿ nhũm Matre htõx Marirja arĩ hpar pẽ mar o nhÿ. ⁴⁰ Hãmri nhũm Matre mẽ hwÿr axã nẽ omu. Nẽ tee

ri àpênh rax kukamã hamaxpêr nê Jejus wÿr tē nê kãm:

—Xê ma Pahihti. Kormã ixàpênh rax tã nhũm Marir ixto ajuta hkêt nê. Âm akapêr pix mar gryk ã ixkôt htêm nê ixto ajuta hkêt nê. Pa ahte mē panhõ hã ixàpênh o xa. Xà amã ja mex? Xê kãm anê kê tokyx ixkôt tē pa wa hã axkrut nê mē panhõ hã ixàpênh tokyx anê. Anê.

⁴¹ Hãmri nhũm tee ri kuma nê kãm:

—Kwa Matre. Na ka âm mē panhõ pix kukamã ri ajamaxpêr nê gryk ã tee ri amnhĩ nhĩpêx. ⁴² Âm hãmri na Marir kãm ixkapêr mar prãm nê. Jakamã kot paj ri amnhĩ nê akôt hanor kêt nê. Anê.

11

Mē pahte tanhmã Tĩrtũm mã amnhĩ jarênh to hã mē pamã karõ

Matêwre 6.9-13, 7.7-11

¹ Tã nhũm apkati hõ hã nhũm Jejus nhĩri Tĩrtũm mã amnhĩ jarênh o nhỹ. Nê kãm amnhĩ jarênh pa nhũm hkôt mē pa ho mē pa xwÿnhjaja kot kãm amnhĩ jarênh ã omu nê hwÿr mra nê kãm:

—Kwa Pahihti. Amnhĩ pyrà nê mē ixte Tĩrtũm mã amnhĩ jarênh kaxyw tanhmã mē ijahkre hto. Kêr pa mē apyrã nê tanhmã kãm amnhĩ jarênh to ho ri ixpa. Na pre finat Juãw Paxisja hkôt mē pa ho mē pa xwÿnhjê mã ja jahkre nhũm mē kuma nê tãm kãm amnhĩ jarê. E kwa mē inhmã tanhmã ja jahkre hto nà? Anê.

² Hãmri nhũm mē kãm:

—Tõe. Nà kêr ka mē kãm amnhĩ jarênh kaxyw nê mãmri amnhĩ krã hkôt tanhmã kãm amnhĩ jarênh to. Rÿ kãm amnhĩ jarênh o:

Pa Mëinhĩpêêxã maati? Nà amex o amex Tĩrtũm.

Apê mē ijamãr mex xwÿnh maati na ka.

³ Nê kwa kêr ka apkati mē mē inhmã mêmogõ pa mē akukwak ri ho ixàpkur o ri ixpa.

⁴ Nê na pa hte tõiã amnhĩ tomnuj nê Tĩrtũm. Nom mē kot tanhmã ixtomnuj to xwÿnhjaja na pa hte âm mē omu nê amnhĩ tã tanhmã mē ho hkêt nê. Nê ja ho ijamakêtkati kurê kumrêx. Æ na pa hte amnhĩ nhĩpêx anhÿr o ri ixpa.

Jakamã kwa kêr ka ja hã ixpumu nê ixpyrà nê ixte tanhmã amnhĩ tomnuj to hã ixpumu nê hã tanhmã ixto hkêt nê. Âm ho ajamakêtkati kurê kumrêx nê axte kãm ajamaxpêr kêt nê.

Nê kot paj tanhmã amnhĩ tomnuj to kaxyw japêr ka ja hã ixpumu nê ixte ã amnhĩ nhĩpêx anhÿrja nê ixto htÿx nê pa ja ho anhÿr kêt nê.

E âm ja pix na hapêx. Anê.

E kêr ka mē ã Tĩrtũm mã amnhĩ jarênh anhÿr o ri apa. Anê.

Mē pahte amnhĩ to Tĩrtũm wÿr rãhã hã mē pamã karõ

Matêwre 7.7, 15.21-28; Makre 11.24; Rukre 18.1-8; Juãw 14.13-14; mãânên Rõmãn 12.12; Epes 6.18; Wam Tesarõn 5.17-18

⁵⁻⁶ Nhũm Jejus arĩ hkôt mē pa ho pa xwÿnhjê jahkre ho nhỹ nê mē kãm:

—Nê ja. Kojã mē akrãmnhwÿjê hõ. Nhũm kôt ã kamãt nhũm nhÿhÿnh awÿr mõn pøj. Ka anhõ mêmogõ kêt hãmri nê anhÿjuk ri akrãmnhwÿ hwÿr tē. Hãmri nhũm ra amnhĩ tã kahê nê nõ. Ka tee ri omu hãmri nê hakwa krem xa nê kãm akapêr nê kãm: “Pa ixkrãmnhwÿ. Na ka mē ra gõr? Kwa kãnhmã nhÿ nê inhmã anhõ mêmogõ japêr. Na ra ham ixkrãmnhwÿta mõn pøj. Nê kãm prãm tÿx nê mõ nom kaxyw inhõ hkêt. Kwa kãnhmã nhÿ nê inhmã anhõ mêmogõ japêr nê inhmã hkwy pa ma o tē kê kukrê. Âm inhõ hkêt kumrêx. Âm hãmri na pa amã amnhĩ jarê. Kwa tokyj kãnhmã nhÿ nê inhmã

měmoj japêr nà?" Anhÿr o kãm akapêr. ⁷ Hãmri nhũm ama nom kãm kànhmã ÿr prãm kêt nê. Nê amã: "Tk. Nà ra mê ixte amnhĩ tã kahê hpar nê inhĩkwÿ kênã kot pa kêt kànhmã nhÿ nê amã mẽmoj japêr." Anê. ⁸ Ka tee ri ama nê xatã kãm: "Kwa ã inhĩpêx anhÿr kêt nê ixkrãmnhwÿ. Kwa tokyx." Anhÿr o xa. Nê xatã kãm anojarêt o xa. Hãmri nhũm ra kãm amar kaga hãmri nê tã kànhmã nhÿ nê amã ate ho presija xwÿnhnta gô. No ãm kêp akrãmnhwÿ hã ate hã axãhwÿr tipxi hã amã ôr kêt nê. ãm xatã ate ho presija htÿx xwÿnhnta mã hamaxpêr nê tã kànhmã nhÿ nê amã kugô. ã mẽ ujarênh kot anhÿr.

⁹⁻¹⁰ —Tã kêt ka mẽ ja pyrã nê amnhĩ to Tĩrtũm wÿr rãhã ho ri apa nhũm ama nê ate mẽmoj tã hwÿrta amã kugô. ãm xatã ate hã axãhwÿr o ri apa nhũm amã kugô. ãm mẽmoj to hwÿr rãhã ho ri apa nhũm ama hãmri nê amã mẽmoj tanhmã hipêx to. Te ho mēhō kãm tep xành nê gôx kãm xatã tep rēnh xà rēnh o ãm pyrã nê xatã mẽmoj tã hwÿr o ri apa. Hãmri nhũm ama nê amã hprãm xwÿnhnta gô. Te ho tep kanhêr xwÿnhnta tã kot tep ô kanhêr pyrãk o anhĩpêx nê amã mẽmoj prãm xwÿnhnta gô. Anê.

Tĩrtũm kot hkrajê mã mẽmoj mex nhõr ã harênh

Makre 7.9-11

¹¹ Nhũm Jejus arĩ hkôt mẽ pa ho mẽ pa xwÿnhjê jahkre nê mẽ kãm:

—Nê xà koja akra kãm tep xành nê hã awÿ ka ama nê axtem nê kãm kagã xoprê hõ py nê agô? ¹² Rÿ nhũm krãhyre gre hã awÿ ka axtem nê kãm makre hõ py nê agô? Nà na ka htem ã akrajê nhĩpêx anhÿr kêt nê. Na ka htem mẽ kot mẽmoj tã ãhwÿr xà hkôt kãm mẽmoj gô. ¹³ Mẽ kamjaja mẽ ate amnhĩ tomnuj o ri apa htã ka htem akrajê ho mex o ri apa. Tã kaxkwa kamã Tĩrtũmja na hte mẽ pahto mex o mẽ

ate mẽ akrajê ho mexta jakrenh. Kãm mẽ pajapê htÿx kôt na hte mẽ pamã mẽmoj mex nhõr o pa. Nê mãânên amnhĩ Karôja na hte mẽ pamã kugô. Jakamã kot kaj mẽ atô Karô hã awÿ nhũm ama nê awÿr kumê nhũm wrÿ nê akarô mã axã. ã na hte Tĩrtũm kãm mẽ pajapê xaj mẽ pamã mẽmoj mex nhõr o pa anê. Anê.

Jejus mẽ Satanasti wa harênh

Matêwre 12.22-32; Makre 3.20-30

¹⁴ Tã nhũm Jejus nhÿri axte mēhō nê mẽkarõmnuti kator. Na pre ra mẽkarõmnuti tanhmã ho nhũm kapêr kêt nê pa. Hãmri nhũm Jejus omu nê nê kator nhũm akupÿm kapêr mex nê. Nhũm mẽ pũitã amnhĩ jaêr pê omu nê no hawênh rũnh nê omunh o kuhê. ¹⁵ Nom nhũm mẽ hkwÿjaja Jejus kot ã hipêx anhÿr ã omu nê htÿx ho kêp mẽkarõmnuti hkwy hã hkamnhĩx nê axpên mã harênh o:

—Tk pêr hinhu nhĩkôôti nhÿ hã na hte mẽ nê amnhĩ kwÿjê japôx o pa. Anê.

Hinhu nhĩkôôti nhĩxi hõ pê Satanasti nhũm prem Satanasti nhÿ hã Jejus kot ã amnhĩ nhĩpêx anhÿr o pa hã hkamnhĩx. ¹⁶ Jakamã nhũm mẽ hkwÿjaja hwÿr mra nê kãm:

—Kwa mẽ inhmã aa mẽ ixte mẽmoj pumunh kêt ô ho anê. Pa mẽ omu nê ate Tĩrtũm nhÿ hã tanhmã amnhĩ nhĩpêx to ho apa hã apumunh kurê kumrêx. Anê.

Nom hêx rom mẽ kot kamã hamak kaxyw ã kãm kapêr anê. ¹⁷ Nhũm ra Jejus mẽ hamaxpêr kôt mẽ omunh mex jakamã mẽ kapêr ma nê mẽ kãm:

—Kwa mẽ inhma mẽ ate ixpê Satanasti hkwy hã ixkamnhĩx xwÿnhjaja. Koja pika nhõ xwÿnhjaja axpên kutã amnhĩ xunhwÿ nê axpu hãmri nê anhgrã nê ma ahpÿnhã ri pa. Hãmri nê amnhĩ krã hkôt ri tanhmã amnhĩ to ho ri pa. Jakamã nhũm mẽ ô pahĩ mẽ hamãr o pa hkêt nê. Rÿ koja krĩ

nhõ xwýnhjaja. Mě kot axpën to hkwy xwýnhjaja mëmoj tã axpën kãm gryk nẽ axpën kutã amnhĩ xunhwý hãmri nẽ axpën pẽ anhrã nẽ ahpýnhã pa hãmri nhũm mẽ õ pahi tee ri kãm mẽ hamãr o pa hprãm. Mo õ krĩ kamã mẽ hkwy kot ri mẽ hamãr o pa? No na pre mẽ õ pahi tãm amnhĩ nẽ mẽ hanor kêt nẽ.

¹⁸—Tã ja pyrã nẽ ixte Satanasti nhỹ hã tanhmã amnhĩ nhĩpêx to ho ixpa ronhỹx pa mẽ nẽ amnhĩ kwýjê janor o ri ixpa hkêt nẽ. Nhỹx Satanasti ixte mẽ nẽ mẽ hanor kaxyw tanhmã inhmã nẽ hkêt nẽ.

¹⁹—No kêt mẽ akwýjaja? Xã Satanasti nhỹ hã na htem mẽ nẽ mẽ hapôx o pa nã? Kêp apu pa ixte ý hã mẽ nẽ mẽ hapôx ronhỹx mẽ akwýjaja ixpyrã nẽ ý hã mẽ nẽ mẽ hapôx o pa. Nã Tirtũm nhỹ hã mẽ ixte mẽ nẽ mẽ hapôx o mẽ ixpa kênã. Jakamã ã mẽ ate ijarënh anhỹr o apaja mex kêt. ²⁰Tirtũm Karõ nhỹ hã ixte mẽ nẽ mẽ hapôx o ri ixpa kênã. Jakamã kwa mẽ ja hã ixpumu nẽ Tirtũm kot ixte mẽ ato amnhĩptãr kaxyw mẽ awýr inhmẽnh kôt ixpumunh kurê kumrêx kêt wehe. Pa na ka htem ixkamã ajamak o apa.

²¹⁻²²—Satanastija àhpumunh tỳx jakamã na htem tee ri kêp mẽ kot hkôt amnhĩ xunhwýr xwýnhjê pytãr kaxyw nhũm mẽ nẽ mẽ omunh mex nẽ. Nom ixàhpumunh tỳx o ixte Satanasti jakrenh jakamã pa na pa hte kêp mẽ utã nhũm mẽ hpãnhã ixkôt ri amnhĩ nhĩpêx.

²³—Mẽ amã ixkapër mar prãm tã na ka mẽ kormã ixkôt amnhĩ xunhwýr kêt nẽ. Kwa wem ma amnhĩ to amõr gri nẽ tokyx ixkôt amnhĩ xunhwý kêt wehe. Kot kaj mẽ anhỹr kêt nẽ hãmri nẽ te mẽ ate ixkutã amnhĩ xunhwýr xwýnh pyrãk o amnhĩ nhĩpêx. ²⁴Mẽ ate ixkôt amnhĩ xunhwýr kêt xwýnhjaja te mẽ ate mẽhõ nẽ mẽkarõmnuti japôx xwýnh pyrãk.

Nhũm te kêp kator nẽ ma mõ nẽ nhỹri amgrã kamã ri pa. Nhũm ja kêp omnuj nhũm tee ri kamã nhỹri hkòkôt xã japër o pa. Nom tee ri hapër o pa nẽ hamaxpër o: “E kot paj ma akupým mẽ kot nẽ ixkator xwýnhhta wýr tẽ nẽ hwýr axã nẽ hkôt mãn ixpa.” Anẽ. ²⁵Hãmri nẽ ma akupým hwýr tẽ. Nom kormã akupým hwýr àr kêt ri nhũm kamã amrakati nẽ pa. ²⁶Jakamã nhũm ma akupým hwýr tẽn axã. Nom ahte àr kêt nẽ. Ra amnhĩ kôt amnhĩ kwýjê ho 7 nẽ hwýr mẽ ho agjê. Nẽ hwýr gjêx pa. Mẽ kêp 7jaja nẽ wamta mẽ nhũm mẽ piitã hwýr gjêx pa. No mẽ kêp 7jaja omnuj tỳx o kot wamta jakrenh jakamã nhũm mẽ kot hwýr gjêx xwýnhhta mẽ ý hã amnhĩ tomnuj tỳx o pa. Oprê htỳx nẽ. Wam pyxire nẽ kot hwýr àr nhỹ hã amnhĩ tomnuj o ri pa nom ãm kawax pẽ oprê. Tã axte hwýr mẽ ohtõ nẽ gjêxta nhỹ hã oprê htỳx kumrêx. Ja pyrã nẽ kot kaj mẽ tokyx ixkôt amnhĩ xunhwýr kêt nẽ hãmri nẽ ãm amnhĩ tomnuj tỳx pix o ri apa. Anẽ.

Mẽ hkĩnh nẽ mẽ pa xwýnhjê jarënh Rukre 8.19-21

²⁷Nhũm pre ã Jejus mẽ ahkre anẽ nhũm mẽhõ nija kuma nẽ kãm:

—Hêxta gãã nẽ. Mãn akatorxã ã ate amnhĩ nhĩpêx anhỹr o apa hã apumu nẽ hkĩnh nẽ. Anẽ.

²⁸Hãmri nhũm kãm:

—Tỳ. Nã kot anhỹr kênã. Nom kot ka mẽ atõ Tirtũm kapër ma nẽ hkôt amnhĩ nhĩpêx hãmri nẽ akĩnh rax o ixkatorxã kot ixpumunh nẽ hkĩnhhta jakre. Anẽ.

Jejus kot tanhmã Jõhti jarënh to Matêwre 12.38-42; Makre 8.12

²⁹Tã nhũm mẽ ohtõ nẽ Jejus ã akuprõ nẽ mẽmoj tã kuwý nẽ kãm:

—Pa. Kwa mẽ inhmã aa mẽ ixte mẽmoj pumunh kêt õ ho anẽ pa mẽ omu. Anẽ.

Hãmri nhũm mẽ kuma nẽ mẽ kãm:

—Tk. Kwa mẽ ajamaxpër punuj pix o na ka htem ri ajamaxpër o apa. Ixpê Tirtüm kot mẽ awÿr inhmênh xwÿnh tâ ka mẽ ja hã ixkôt ajamaxpër kêt nê. Tã mẽ ate aa mẽmoj pumunh kêt kwÿ ixte mẽ amã ho anhÿr kaxyw hã inhmã karõ. Nà kot paj kormã mẽ amã ho anhÿr kêt nê. Kot paj nhÿrmã te amnepêm finat Jõhti kot amnhÿ nhÿpêx pyrãk o amnhÿ nhÿpêx ka mẽ hã ijarênh ma nê kormã ja hã ixpumu. ³⁰ Tirtüm nhÿ hã kapêr xwÿnh pê Jõhtija amnepêm na pre tep rax kukrê. Tã nom nhÿm htÿr rãhã õxãhkre rÿm kato nhÿm mẽ omu nê Tirtüm kot mẽ hwÿr mẽnh ã omu. Tã kot paj nhÿrmã Jõhti pyrã nê tanhmã amnhÿ nhÿpêx to nhÿm mẽ ja hã ixpumu nê Tirtüm kot mẽ awÿr inhmênh xwÿnh ã ixpumunh kurê kumrêx.

³¹ —Nê koja nhÿrmã Tirtüm akupÿm mẽ htyk nê mẽ hikwÿ xwÿnh piitã akupÿm mẽ ho htÿr hãmri nhÿm mẽ piitã Inhÿpêêxã mẽ wa ixkutã hkrÿ. Pa wa mẽ piitã tanhmã mẽ harênh to. Tirtüm mẽ wa ixkuri mẽ htÿr tÿm nê mẽ pa ho mẽ pa mã xwÿnh ã mẽ hkwyÿjê jarê. Nê wa ixkuri mẽ pa ho mẽ pa hkêt xwÿnhjê jarê. Mẽ piitã ã mẽ harênh anê. Amari mẽ pa xwÿnhjaja nê mẽ õ pahijaja. Hãmri nhÿm sur kãm mẽ õ pahi niti Tirtüm mã tanhmã amnhÿ jarênh to hãmri nê hpãnhã tanhmã mẽ ajarênh to nê kãm mẽ ajarênh o: “Na pa pre inhmã pahi Sarumãw kot anhÿ hã àhpumunh tÿx ã harênh ma hãmri nê inhmã mar prãm xaj ma awry hã õ pika hwÿr ixpa nê omu nê kapêr ma. Hãmri nê ma akupÿm inhõ pika hwÿr ixpa nê ixkwÿjê mã àhpumunh tÿx ã harênh o ixpa. Tã Akra Jejus na àhpumunh tÿx o pahi Sarumãw jakrenh tâ or war akutã mẽ hkrÿ xwÿnh kwÿ mÿj na prem kapêr ma no ãm ixkÿnhã kãm mar prãm kêt nê. Na prem kuma nê ãm kuma.” Anhÿr o wa inhmã mẽ

ajarê. Hãmri nê ja hã mẽ amã akir ka mẽ tee ri mar o akrÿ nê amnhÿ kamã agryk o akrÿ.

³² —Hãmri nhÿm hpãnhã Nĩnÿwe nhõ xwÿnhjaja wa inhmã tanhmã amnhÿ jarênh to. Jõhti kot mẽ hwÿr mör nê mẽ kãm Tirtüm kapêr jarênh o pa xwÿnhjaja nhÿm mẽ tanhmã wa inhmã amnhÿ jarênh to. Hãmri nê pahi nita pyrã nê wa inhmã tanhmã mẽ ajarênh to nê wa inhmã: “Na pre Jõhti man mẽ inhõ krÿ hwÿr mō nê mẽ inhmã akapêr jarênh o ri mẽ ixkôt pa. Pa prem kuma nê mẽ ixte amnhÿ tomnuj kaga nê akôt amnhÿ xunhwÿr kurê kumrêx Tirtüm. Nom or war akutã mẽ hkrÿ xwÿnh kwÿ mÿj na pre Akra Jejus tãm mẽ hwÿr mō nê mẽ kãm kapêr o ri mẽ hkôt pa nhÿm prem kuma no ãm mẽ ixkÿnhã amnhÿ tomnuj kaga nê hkôt amnhÿ xunhwÿr kêt nê. Mẽ kot Akra mar tâ amnhÿ kaxyw kãm hamaxpêr kêt nê.” Anhÿr o koja mẽ wa inhmã mẽ ajarê ka mẽ tee ri mẽ ama nê amnhÿ kamã agryk tÿx nê. Jakamã e kwa ixte mẽ amã ã ixkapêr anhÿrja ma nê kãm ajamaxpêr tÿx rãhã ho ri apa. Anê.

Mẽ pajamaxpêr mex te kot kanê hpôk mex pyrãk ã harênh

Matêwre 5.15, 6.22-23

³³ Nhÿm Jejus arÿ mẽ ahkre ho nhÿ nê mẽ kãm:

—Xà na htem kanê hpôk nê poti ho hpro? Nà na htem ho anhÿr kêt nê. Na htem hpôk nê kÿx pê mẽmoj nhÿmök ã unhwÿ nhÿm mẽ piitã mẽ kãm hirã mex nhÿm htem ixkrem agjê nê hirã kamã mẽmoj pumunh mex o mra. ³⁴ Ja pyrã nê kot ka mẽ atõ ixkapêr ma nê ixkôt amnhÿ nhÿpêx nê tãm amnhÿ nhÿpêx o ri apa. Nê tãm mẽ hipêx o ri apa. Jao te hirã kamã mẽ rÿt mex xwÿnhjaja kot amnhÿ nhÿpêx pyrãk. Nom koja mẽhõ inhma nê ãm inhma nê ixkwÿm ri tanhmã amnhÿ nhÿpêx to ho pa. Jao te kamãt kô kamã mẽ rÿt

mex kêt xwÿnhjaja kot htÿx amnhĩ nhĩpêx o pa pyrāk o amnhĩ nhĩpêx.

³⁵—E kêt ka mē ā amnhĩ nhĩpêx anhÿr pymaj ixkapêr ma nē kām ajamaxpêr tÿx rāhā ho ri apa. ³⁶Kot kaj mē ixkapêr ma nē ixkôt amnhĩ nhĩpêx. Hāmri nē te mē ate kanê hpôk mex nhĩrā kamā ri apa pyrāk o amnhĩ nhĩpêx. Jao aprĩ hā ixkapêr ma nē aprĩ hā ixte tanhmā amnhĩ nhĩpêx to hā ixpumunh mex nē. Anē.

Jejus kot tanhmā Parijew nhō xwÿnhjê jarēnh to

Matêwre 23.25-26

³⁷Tā nhūm Jejus ra mē ahkre pa. Hāmri nhūm Parijew nhō xwÿnhja hwÿr tē nē kām:

—Pa. E kwa ma ixkôt tē nē mē ixkutā apku. Anē.

Hāmri nhūm kuma nē kām:

—Tōe. Nā kot paj ma akôt tē. Anē

Hāmri nē ma hkôt tē nē ōrkwÿ hwÿr axā nē apkur kaxyw mē ĩhkō hā nhÿ. ³⁸No ām mē hkukamā mē hpāmjê pyrā nē amnhĩ nhĩhkra kuhōnh ryy hkêt nē. Ām amnhĩ nhĩhkra htyk pix kuhōnh tokyx anē nē nhÿ. Nē ō prat kuhōnh ryy hkêt rāhā apkur kaxyw nhÿ. Jakamā nhūm kot amnhĩ kôt hwÿr xwÿnhnta tee ri ja hā omu nē hamaxpêr o:

—Tk. Kwa na hte mē ixte amnhĩ nhĩpêx kôt amnhĩ nhĩpêx mex kêt nē.

³⁹Anē nhūm Jejus amnhĩ tā hamaxpêr ā omu nē kām:

—Nā mē apê Parijew nhō xwÿnhjaja te mē ate mē kot apkur kaxyw prat kre kuhōnh punuj tā mex ā harēnh pyrāk o amnhĩ nhĩpêx. Nē ām mē akrā hkā rūm pix mā na mē amex. Nē mē noo mā te mē amex pyrāk no ām mē anhōxāhkre kaxwÿnh kām mē ajamaxpêr mex kêt. Ām mē akapêr prām. Nē mē axāhkurêê. Nē mē anhōxÿÿ. ⁴⁰Mē ate atÿx ri amnhĩ nhĩpêx o ri mē apa xwÿnh kēnā. Kwa kêt ka mē ām akrāhkā pix rūm amex nē ri apa hkêt nē. Mē

māānēn anhōxāhkre kaxwÿnh kām ajamaxpêr mex o ri apa. Nē tām mē piitā mē hipêx o ri apa. ⁴¹Kêt ka mē tām ajamaxpêr o tām mē hipêx o ri apa. Nē axāmnhÿx ri mē kēp amrakati xwÿnhjê mā mēmoj nhōr o ri apa. Kot kaj mē ā amnhĩ nhĩpêx anē hāmri nhūm Tirtūm ja hā mē apumu nē amnhīm mē amex ā mē ajarê. No na ka htem mē amā mē amnhĩ to mex prām xāj tee ri amnhĩ kuhōnh japjê kaprÿ. Anē.

Jejus kot Parijew nhō xwÿnhjaja mex kêt kukamā mē harēnh

Matêwre 23.4, 23.7, 23.13-24, 23.27-38; Makre 12.38-39

⁴²Nhūm Jejus arĩ Parijew nhō xwÿnhjê jahkre nē mē kām:

—Kwa mē okora Parijew nhō xwÿnhjaja. Kot kaj mē amex kêt nē. Na ka htem Tirtūm kapêr piitā hkôt amnhĩ nhĩpêx o apa hkêt nē ām hkwy kôt pix mā amnhĩ nhĩpêx o ri apa. Nē ām kapêr o hpÿnhre nē hkôt amnhĩ nhĩpêx hāmri nē hā amnhĩ pumu nē ate amnhĩ to mex xwÿnh ā amnhĩ to jarkrar o ri apa. Nom Tirtūm kām hprām xā piitā hkôt amnhĩ nhĩpêx hkêt nē. Mē ate tām mē piitā mē hipêx o ri apa hā kot mē amā karōja. Nē mē amā Tirtūm kÿnh ā kapêr kôt amnhĩ nhĩpêx o ri apa hā karōja mē ate mar mex tā hkôt amnhĩ nhĩpêx kêt nē. Mē ate kapêr piitā hkôt amnhĩ nhĩpêx ronhÿx ja mē amā mex kumrêx.

⁴³—Kwa mē o kora. Mē piitā mē kot amnhīm mē ate amnhĩ to rūnh xwÿnh ā amnhīm mē ajarēnhja na mē amā hprām. Nē mē piitā mē kot amnhīm mē apê mē ahkre mex xwÿnh maati hā mē ajarēnhja na mē amā hprām.

⁴⁴—Kwa mē o kora. Kot ka mē amex kêt nē. Mē kot mē akapêr mar nē mē akôt amnhĩ nhĩpêx xwÿnhjaja te mē kot htÿx ri mē hā pika nhīmōk ā ri mē pa xwÿnh kot amnhĩ nhĩpêx pyrāk. Jao mē ate amnhĩ to mex ā amnhĩ kamnhÿx nom mē ate amnhĩ to mex kêt. Te

mě kot pika mex ã hkamnhĩx nẽ htỳx ri mẽ hã pika nhĩmõk ã ri mẽ pata pyrãk o na htem amnhĩ nhĩpêx. Anẽ.

Nhũm pre ã Jejus Parijew nhõ xwỳnhjẽ mã mẽ kot amnhĩ nhĩpêx jarẽnh anẽ.

Jejus kot Tĩrtũm kapêr tũm o mẽ ahkre xwỳnhjẽ mã kapêr

Matêwre 23.1-4, 23.13, 23.29-36

⁴⁵ Hãmri nhũm Tĩrtũm kapêr tũm o mẽ ahkre ho pa xwỳnhja kuma nẽ kãnhmã xa nẽ kãm:

—Kwa na ka ã Parijew nhõ xwỳnhjẽ jarẽnh punuj anhỳr jao mããnẽn ã mẽ paja jarẽnh anẽ nà? Mẽ ixte amnhĩ nhĩpêxja ãm tipxi kẽnã. Anẽ.

⁴⁶ Hãmri nhũm kãm:

—Tỳ. Mããnẽn mẽ kajaja. Kwa o kora mẽ apê Tĩrtũm kapêr tũm o mẽ ahkre xwỳnhjaja. Kot kaj mẽ urãk nẽ amex kêt nẽ. Na ka htem mẽ kãm mẽmoj tã karõ ho ri apa nẽ mẽ kãm: “E kêr ka mẽ ã amnhĩ nhĩpêx anẽ nẽ ã amnhĩ nhĩpêx anẽ.” Anhỳr tã no ãm mẽ kajaja amnhĩ kapêrja kôt amnhĩ nhĩpêx kêt nẽ. Te mẽ ate mẽhõ kot mẽ katut ã mẽ kãm mẽ jênh pytĩ janhõr tã mẽ ho ajuta nẽ hkwỳ htur kêêta pyrãk o na ka htem amnhĩ nhĩpêx o ri apa.

⁴⁷⁻⁴⁹ —Na pre Tĩrtũm amnepê m mẽ pahpãmjẽ hkukamã tanhmã mẽ harẽnh to. àhpumunh tỳx xà hkôt tanhmã mẽ hkukamã mẽ harẽnh to nẽ mẽ harẽnh o: “Kot paj ma mẽ hwỳr inhỹ hã ixkapêr jarẽnh xwỳnhjẽ rẽ. Nom koja mẽ omu nẽ ãm mẽ omu nẽ kêp mẽ hprãm nõkati nẽ tanhmã mẽ hipêx to ho pa. Nẽ ixpê mẽ hkwỳjẽ hpar o pa. ã koja mẽ inhỹ hã ixkapêr jarẽnh xwỳnhjẽ nhĩpêx anẽ.” Anhỳr o mẽ hkukamã mẽ harẽ. Tã ã mẽ harẽnh anhỳr xà hkôt nhũm prem ã mẽ hipêx anẽ nẽ mẽ hkwỳjẽ hpa nẽ mẽ hkwỳjẽ pynẽ nẽ mẽ hãjẽ.

—Amnepê m mẽ akukamã mẽ kot ã mẽ hipêx anhỳr nhũm mẽ ate mẽ ano ho ja hã mẽ omunh kêt tã

ka htem arĩ mẽ hã pika ho mex o ri apa. Te mẽ amã mẽ hapê nẽ mẽ ho ajamak pyrã nẽ mẽ hã pika ho mex o ri apa. Nom mẽ amã mẽ hapê hã ho mex hkêt nẽ. ãm ra mẽ htyk nẽ hapêx nẽ mẽ amã Tĩrtũm kapêr jarẽnh o pa hkêtja ã na ka htem akĩnh nẽ ã axêx rom mẽ hã pika ho mex anhỳr o ri apa.

⁵⁰⁻⁵¹ —Na prem Tĩrtũm nhỹ hã kapêr jarẽnh o mẽ pa xwỳnhjẽ nhĩmex rax nẽ. Amnepê m panhĩ kator krax rũm finat Atãw kra finat Apewja na pre Tĩrtũm nhỹ hã kapêr o pa nhũm htõ kãm mar prãm kêt nẽ kupĩ. Tã nhũm Tĩrtũm axte mẽ hwỳr ý hã kapêr jarẽnh o mẽ pa xwỳnh kwỳjẽ rẽ nhũm prem mã mẽ ho anẽ nẽ mẽ hkwỳjẽ nhĩmex. Nhũm pre xatã mẽ hwỳr mẽ hkwỳjẽ rẽ nhũm mẽ xatã mẽ kupa. ã Apew rũm finat Jakaris wỳr na prem mẽ himex rax anẽ. Nẽ hpãnhã Jakarisja nhũm prem Tĩrtũm mã amnhĩ jarẽnh xà hã ixkre kamã kupĩ. Tã ka mẽ ajaxwỳja amã Tĩrtũm kapêr mar prãm kêt nẽ mẽ urãk nẽ amã ý hã kapêr jarẽnh o mẽ pa xwỳnhjẽ nhĩmex prãm. Tã ã mẽ pahpãmjẽ mẽ ato hpimràatã mẽ ate mẽ hipêx anhỳrja mỳrapê koja Tĩrtũm ja hã mẽ apê mẽ hkanrêhã mẽ htãmnhwỳjaja tanhmã mẽ ato htỳx to ka mẽ amnhĩ xà htỳx kamã ajamak o ri apa rãhã nẽ kãm ga.

⁵² —Jakamã kwa mẽ o kora mẽ apê Tĩrtũm kapêr tũm o mẽ ahkre xwỳnhjaja. Mẽ ajaxwỳja na ka htem Parijew nhõ xwỳnhjẽ pyrã nẽ Tĩrtũm kapêr o mẽ ahkre ho apa. Nẽ aprĩ hã mar mex tã no ãm amnhĩ kaxyw hkôt ajamaxpêr nẽ hkôt amnhĩ nhĩpêx kêt nẽ. Hãmri nẽ mẽ kot mẽ amar o pa xwỳnhjẽ mã atỳx ri tanhmã mẽ ahkre hto nhũm htem mẽ ama nẽ mẽ apyrã nẽ amnhĩ kaxyw Tĩrtũm kôt hamaxpêr nẽ hkôt amnhĩ nhĩpêx kêt nẽ. Mẽ kãm hprĩ hã kapêr mar mex prãm tã mẽ amar xà hkôt mẽ

ate amnhĩ nhĩpêx pyrək o amnhĩ nhĩpêx o pa. Nom mẽ kajaja na ka htem mẽ kām mẽ hamaxpêr mex nhôr kêtja mýrapê nhũm htem ã amnhĩ nhĩpêx anhÿr o pa. Jakamã kwa mẽ o kora kot kaj mẽ amex kêt nê. Anê.

Nhũm pre ã Jejus mẽ kām kapêr anê, ⁵³⁻⁵⁴ Hāmri nê kato nê ma tē. Nhũm Tirtũm kapêr tũm o mẽ ahkre ho mẽ pa xwÿnhjê mẽ Parijew nhô xwÿnhjaja hāmri kot tanhmã mẽ kām kapêr toja ma nê kamã gryk tÿx nê. Jakamã ma hkôt mra. Hêx rom mẽmoj tã hkukjêr o hkôt mra. Nê hã hkukjêr kām hihtÿx o hkôt mra. Kot tanhmã mẽ kām ujarênh to nhũm mẽ kot mar nê ra hã ãnnênh kaxyw ma hkôt ãhkukjêr o mra.

12

Mẽ pahte Tirtũm pê mẽ pajamaxpêr punuj o pahpimxur kêt

Matêwre 10.26-33

¹⁻³ Tã nhũm mẽ Jejus ã htu rax kumrêx nê hã axpên nhĩgãnh o kuhê. No nhũm kormã mẽ kām tanhmã kapêr to hkêt nê. ãm kormã hkôt mẽ pa ho mẽ pa xwÿnhjê kumrêx mã kapêr nê mẽ kām:

—Mẽ piitã kām amnhĩ kwÿjê pê hamaxpêr punuj o hpimxur hprãm tã koja nhÿrmã mẽ hamaxpêr piitã amnhĩrit pa. Nê mẽmoj piitã ra hpimxur mex tã koja nhÿrmã piitã amnhĩrit pa. Nê mẽ kot kamãt kô kamã hpimxur pê mẽmoj jarênh tã koja mẽ piitã nhÿrmã kot mẽmoj jarênh ta ma. Nê mẽ kot hitom kām kawax pê axpên mã mẽmoj punuj jarênh tã koja nhÿrmã mẽ piitã mẽmoj jarênh ta ma. Jakamã kwa kêr ka mẽ tanhmã Parijew nhô xwÿnhjaja kot amnhĩ nhĩpêx to ho pa hã mẽ omu nê ãm mẽ omu nê mẽ hkôt amnhĩ nhĩpêx kêt nê. Te mẽ kot tãm amnhĩ nhĩpêx pyrək o amnhĩ nhĩpêx tã no ãm tãm amnhĩ nhĩpêx o pa hkêt. Na htem ãm htÿx ri tanhmã amnhĩ to hêx to ho pa. Tã

kêr ka mẽ urək nê ã amnhĩ nhĩpêx anhÿr kêt nê. Anê.

Mẽ pahte pahkwÿjê pumaj Tirtũm kaga hkêt ã mẽ pamã karô

Matêwre 10.28-31

⁴ Nhũm Jejus arĩ hkôt mẽ pa ho mẽ pa xwÿnhjê mã kapêr nê mẽ kām:

—E ixkrãmnhwÿjaja. Kêr ka mẽ amã akwÿjê puma rÿ nhãm mẽ hkwÿjê puma ho ri apa hkêt nê. Koja mẽ apar tã ãm mẽ anhĩ pix pa nom tanhmã mẽ akarô hto hkêt nê. ⁵ Tirtũmja tapxipix na hte mẽ ã nê mẽ hkarô ho hpimràatã mẽ kot amnhĩ xà htÿx kamã hamak tũm xà hwÿr mẽ kurê. Tã kêr ka mẽ ja pumaj Tirtũm kapêr kwÿm tanhmã ri amnhĩ nhĩpêx to ho apa hkêt nê.

⁶⁻⁷ —Nê Tirtũm kot mẽ pahto hapêx par pumunh tã mããnnên kot mẽ pajamãr pumunh mex. Mãn ka htem kuwênhre pumu. Na hte Tirtũm hamãr mex o pa. Mẽ piitã mẽ kot ãm kuwênhre pumunh o pa htã nhũm Tirtũm mẽ kurom hamãr mex o pa. Nê htãnopxar rãhã ho pa. Nom kām mẽ pajapê htÿx o kuwênhre jakrenh jakamã kwa mẽ tee ri amnhĩ kukamã ajamaxpêr o ri akapri nê apa hkêt nê. Koja Tirtũm mẽ pahãnopxar rãhã ho pa. Ra kot tanhmã mẽ pakute hã mẽ pahpumunh par. Nê ahpÿnhã tanhmã mẽ pahkrã hkĩ kute hkôt mẽ pahpumunh par. Tã kot mẽ pahãnopxar rãhã jakamã mo kaxyw kot kaj kêt mẽ ri amã mẽhõ puma ho ri apa?

⁸ —Jakamã kwa mẽ mãmri mẽ kām mẽ apê ixkra hã amnhĩ jarênh o ri apa nê amã mẽ uma xà tee ri amnhĩ nhĩpêx o ri apa hkêt nê. Kot ka mẽ kām ra mẽ ate ixkôt amnhĩ xunhwÿr ã amnhĩ jarê. Pa ja hã mẽ apumu hãmri nê mẽ apyrã nê kaxkwa kamã Tirtũm kapêr o mẽ wrÿk xwÿnhjê mã ra mẽ ate ixkôt amnhĩ xunhwÿr ã mẽ ajarê. ⁹ Nom kot ka mẽ kot ixtã tanhmã mẽ ato pymaj apê ixkwÿ hã amnhĩ jarênh

kêt japêr. Pa ja hã mẽ apumu hãmri nê nhÿrmã amnhĩ xwar mẽ kãm mẽ apê ixkwÿ hkêt ã mẽ ajarê. Jakamã kwa mẽ mãmri mẽ kãm apê ixkwÿ hã amnhĩ jarênh o ri mẽ hkôt apa kê mẽ ama nê tanhmã inhmã hamaxpêr to. ¹⁰ Koja mẽ ama nê ãm ama nê kãm ixprãm kêt japêr. Hãmri nhÿm Tirtÿm ixtã mẽ omu nom tokyx ixtã tanhmã mẽ ho hkêt nê. Koja kormã amnhĩ tã mẽ hamãr o pa. Karõ kot axte mẽ kãm ijarênh o amnhĩrit nhÿm mẽ hkwyjaja kot mar nê kãm ixprãm nê ixkôt amnhĩ xunhwÿr kaxyw nhÿm kormã amnhĩ tã mẽ hamãr o pa. Nom koja Karõ xatã mẽ kãm ixtõ amnhĩrit tã nhÿm mẽ kuma nê ãm kuma nê te mẽ kot kêp amnhĩ jamak pro pyrãk o amnhĩ nhÿpêx o pa. Jao Karõ hã hpiaaam kêt mÿrapê koja Tirtÿm nhÿrmã amnhĩ xwar te kot mẽ kêp amnhĩ jamak pro pyrãk o mẽ hipêx nhÿm mẽ tee kãm amnhĩ kaprĩ kaprÿ. Hãmri nê amnhĩ xà htÿx kamã hamak tÿm xàta wÿr ma pa nê kamã pa ho pa. Jakamã kwa mẽ mãmri mẽ kãm mẽ apê ixkra hã amnhĩ jarênh o ri mẽ hkôt apa nê tanhmã mẽ kãm ijarênh to ho ri apa. ¹¹ Koja mẽ ama nê kãm mẽ amar prãm kêt japêr hãmri nê ixtã mẽ apynê nê tanhmã mẽ anhÿpêx to kaxyw. Nê Ijaew nhõ Tirtÿm kapêr o mẽ ahkre xà hã ixkre hwÿr mẽ ato mrar japêr. Rÿ mẽ õ pahi hwÿr mẽ ato mrar nê tanhmã kãm mẽ ato hêx to. Nom kêr ka mẽ mẽ kãm amnhĩ jarênh kaxyw nê tee ri amnhĩ kukamã ajamaxpêr o amã mẽ uma kêt nê. ¹² Koja Tirtÿm Karõ ja kaxyw mẽ amã mẽ ajamaxpêr mex gõ hãmri ka mẽ õ ri mẽ kãm amnhĩ jarê. Jakamã kwa mẽ tee ri mẽ kãm amnhĩ jarênh kukamã ajamaxpêr o ri mẽ amã mẽ uma ho apa hkêt nê. Anê.

*Mê hikukrêx rÿnh pix kukamã hamaxpêr xwÿnhjê jarênh
Wam Ximotre 6.9-10; Xiakre*

4.13-17, 5.1-6

¹³ Nhÿm Jejus arĩ mẽ ahkre o xa nhÿm mẽ mar o kuhê. Rôm nhÿm mẽhõ myja hwÿr tẽ nê kãm kapêr nê kãm:

—Pa? Kwa ot pa awÿr amã mẽmoj jarênh mã tẽ. Na pre inhÿpêêxã ty nhÿm ixtõ ixrom amnhĩm õ mẽmoj piitã ho arĩk pa. Õ pika nê hkrit nê hikukrêx nê ãm mẽmoj piitã ho arĩk par kumrêx. Kwa ma ixkôt tẽ nê kãm anê pa wa amnhĩm ho axkjê nà? Anê.

¹⁴ Hãmri nhÿm kuma nê kãm:

—Tk. Kokÿ. Na pa pre mẽ amã mẽ mẽmoj to ixpikjêr kaxyw mẽ awÿr ixwryk kêt nê. Anê.

¹⁵ Hãmri nê mẽ kot mar o kuhê xwÿnh piitã mẽ kãm kapêr nê mẽ kãm:

—Kwa kêr ka mẽ amã anhõ mẽmoj rÿnh prãm o ri apa hkêt nê. Na htem mẽmoj rÿnh kukwak ri Tirtÿm wÿr apir kêt nê. Mẽmojta kêp pika pix nhõ xwÿnh na.

¹⁶ Anhÿr o mẽ kãm kapêr hãmri nê mẽ kãm awjarê. Mẽ hkukrêx rax ã kuxi nê mẽ kãm awjarê nê mẽ kãm:

—Nà koja mẽhõ õ mẽmoj rax nê. Nê hpur kãm õ rax nê. No ãm õ jaxwÿr xà hã ixkre kêp grire. ¹⁷ Hãmri nhÿm tee ri hpur kãm õ rax kukamã hamaxpêr nê hamaxpêr o: “Kwa tanhmã kot pa amnhĩ to nê ja piitã nhÿri haxwÿ wehe? Inhmã amarĩ mẽ kêp amrakati xwÿnhjê mã hkwy nhõr prãm kêt. Kot paj ãm amnhĩm piitã ir pa nê kritpêm hkur o ixpa. Nom ixpê haxwÿr xà hã ixkreja ixpê grire.” Anê.

¹⁸ —Hãmri nê hamaxpêr o: “Nà na pa ra ijamaxpêr. Kot paj ixkre grireta grã nê hpãnhã rax õ nhÿpêx. Hãmri nê ixpur kãm inhõta jamÿ nê kamã ir pa. Nê ixãpênh xà hã ixkukrêx piitã kamã haxwÿr pa. Nà kot paj ho anê.” Anê.

¹⁹ —Hãmri nê ra ixkreja grãnh pa nê hpãnhã rax õ nhÿpêx. Nê hipêx pa hãmri nê kamã hpur kãm õta

xir pa. Nē àpênh xà hã hikukrêx piitã kamã unhwÿ. Hãmri nē omu nē hkĩnh nē. Nē hamaxpêr o: “Nà hãmri. Kot paj tokyx axte mēmoj tã ixàpênh kêt nē. Ra inhõ rax kumrêx kênã. Kot paj kritpêh ho ixàpkur mex o ixpa. Nà ãm hãmri na pa amnhĩ kukamã ijamaxpêr mex pē ixkre rax nhĩpêx.” Anē. ²⁰ Tã nhũm Tirtũm tee ri ã kot amnhĩ nhĩpêx anhÿr ã omu nhũm ja kãm mex kêt nē. Hãmri nhũm hã kãm kapêr nē kãm: “Nà na ka atÿx ri anhõ rax mē akukrêx rax o apikuprõnh kaprÿ. Na ka ãm amnhĩ pix kukamã ajamaxpêr o apa pē ã amnhĩ nhĩpêx anē. Nom kot kaj kamàt ja kamã ty nē anhÿ kamã ma mō nē amnhĩ kôt anhõ mēmoj rax õ ho amõr kêt nē. Koja hpãnhã mēhõ amÿr pē ho amnhĩptar pa ka rĩ amnhĩ pumu.” Anē. Nhũm ã Tirtũm kãm kapêr anē. ã mē ujarênh kot anhÿr.

²¹ —Mē kot amnhĩ nhõ nē amnhĩ kukamã pix mã hamaxpêr o mē pa xwÿnhjaja na htem myja pyrã nē Tirtũm mã hamaxpêr o pa hkêt nē. Jakamã koja mē nhÿrmã ty hãmri nē hkukrêx pix kukamã hamaxpêr nē amnhĩ mã pix mã hamaxpêr o paja mÿrapê Tirtũm mē wa ixri htĩr tũm nē mex nē pa ho pa hkêt nē. Mē kot amnhĩ nhõ pix kukamã hamaxpêr xwÿnhjaja nē amnhĩ kukamã pix mã mē hamaxpêr xwÿnhjaja nē mē kamã ukapri hkêt xwÿnhjaja mē õ mēmoj rũnh tã koja mē nhÿrmã ty hãmri nē amnhĩ kôt hõ ho pixi nē o mõr kêt nē. Koja mē mēmoj piitã rer pa nē ma ÿ kamã ma mō. Jakamã kwa kêt ka mē jajê pyrã nē anhõ mēmoj to anhõxy ho ri apa hkêt nē. Anē.

Mē pahte tee ri amnhĩ kukamã pajamaxpêr kêt ã mē pamã karõ

Matêwre 6.25-34; mãññen Wam Pêtre 1.3-9

²² Tã nhũm Jejus hpãnhã tanhmã hkôt mē pa ho mē pa xwÿnhjê jahkre hto nē mē kãm:

—Kwa kêt ka mē tee ri amnhĩ kukamã ajamaxpêr o ri apa hkêt nē. Amnhĩ xàpkur xà rÿ axê ka mē tee ri hkukamã ajamaxpêr kêt nē. Nē mē ãm mēmoj piitã hkukamã tee ri ajamaxpêr kêt nē. ²³ Tirtũm àhpumunh tÿx o àhpumunh tÿx xwÿnh na. Na pre àhpumunh tÿx o mē anhĩpêx ka mē kukwak ri atĩr nē apa. Tã xà kot mē amã mē anhõ ho pa hkukamã àhpumunh kêt? Nà ja kukamã àhpumunh xihtÿx kênã. Kêp mē anhĩpêx xwÿnh jakamã mãññen kêp mē amã mē anhõ ho pa xwÿnh. Nē kêp mē amã mē axê nhõr o pa xwÿnh.

²⁴ —Mãn ka htem kuwênhre pumu. Na hte tee ri amnhĩ xàpkur xà hkukamã hamaxpêr o hkapri nē ri pa hkêt nē. Na hte Tirtũm tãm kot kãm õ ho pa. Tã kãm mē pajapê htÿx o kuwênhre jakrenh jakamã koja urak nē mē pamã mē panhõ mex o pa rãhã nē. ²⁵⁻²⁶ Jakamã kwa kêt ka mē mēmo arĩgro hã axàpkur xà hkryre pumu nē ate amnhĩ pē hkrêr par nē amã prãm o akapri nē apa hkukamã tee ri ajamaxpêr kêt nē. ãm Tirtũm kamnàr rom axamnhix anhõ hkryreta ku nē akĩnh kãm tanhmã amnhĩ nhĩpêx to ho ri apa. Xà kot ka anhõ mry gire pumu nē akaprire nhũm ra tanhmã amã amnhĩ to rax to? Na htem ãm tee ri mēmo hkukamã hamaxpêr o hkapri nē pa kaprÿ. Jakamã kêt ka mē ã ri ajamaxpêr anhÿr o akapri nē apa hkêt nē.

²⁷ —Mãn ka htem akunĩ kamã pixõrãre pumu. Na hte tee ri tanhmã amnhĩ kute hkukamã hamaxpêr o hkapri nē harir kêt tã muxre nē harir ka mē omu. Te ho amnepêh finat pahihiti Sarumãw xê mex pyrak nom ãm mex o kot hakrenh.

²⁸ —Pixõrãreja arĩgro ja hã htĩr nē muxre nē harir tã koja mēmo arĩgro hã grã pa nē hapêx. Kêp pixõrã pix nē hapêx tokyx anhÿr tã na hte Tirtũm ho mex nē nhũm mux nē harir. Nom mē pajaja na hte

mě pahto mex o pixôräre ho mexja jakrenh. Jakamã kwa mẽmo kaxyw kot ka mẽ tee ri amnhĩ xê hkukamã ajamxpêr o akaprĩ nê apa? Nà kot kaj mẽ anê nê amnhĩ kaxyw Tirtũm mã ajamxpêr tỳx kêt nê.

²⁹—Kwa mẽ tee ri amnhĩ xàpkur xà hkukamã ajamxpêr rãhã o ri akaprĩ nê apa hkêt nê. Nê mẽ tee ri amnhĩ kukamã tanhmã ajamxpêr to ho ri akaprĩ nê apa hkêt nê. ³⁰Mẽ kot Tirtũm kôt amnhĩ xunhwỳr kêt xwỳnhjaja na htem ã ri hamxpêr anhỳr o hkaprĩ nê pa. Tã kêr ka mẽ ho mẽ uràk kêt nê. Tirtũm kot mẽ panhõ mẽmoj kêt kôt mẽ pahpumunh mex kênã. ³¹Jakamã kêr ka mẽ ãm hkôt ri amnhĩ nhĩpêx rãhã nê. Nê amã ja pix kukamã ajamxpêr o ri apa hprãm. Hãmri nhũm amnhĩ tã mẽ apumu hãmri nê apkati mẽ tãm mẽ amã mẽmoj nhõr o pa. Anê.

Kaxkwa kamã mẽ pakukrêx rax jarênh

Matêwre 6.19-21; mãânên Sikũn Ximotre 4.8; Eprêw 10.34; Wam Pêtre 1.4

³²Nhũm Jejus arĩ mẽ kãm kapêr nê mẽ kãm:

—E mẽ ate ixkôt amnhĩ xunhwỳr xwỳnhjaja. Ra Tirtũm kot mẽ ato hkra jakamã kwa mẽ axãmnhĩx hkamnàr rom ri tanhmã amnhĩ nhĩpêx to ho ri apa. Na hte mẽ apê hkra hã mẽ apumu nê hkĩnh nê. Koja nhỹrmã kaxkwa kamã õ krĩ hwỳr mẽ ato api ka mẽ kamã wa ixkuri amex nê atĩr tũm nê apa ho apa. Ja na mex o kot jar pika ja kôt mẽ õ mẽmoj rũnh nê pa xwỳnhhta jakrenh. ³³Jakamã kêr ka mẽ axãmnhĩx ri akukrêx kwỳ ho wênê nê hpãnhã kàxpore jamý nê mẽ kêp amrakati xwỳnhjê mã ho apigrànho o ri mẽ hkôt apa. Kot kaj mẽ ã amnhĩ nhĩpêx anê hãmri nê kaxkwa kamã akukrêx rax nê. Mo kaxkwa kamã mẽ ãhkĩnh xwỳnh koja mẽ apê ho ahkĩ? Nê kamã mo amnhõre kot mẽ apê homnu?

Kaxkwa kamã ja amrakati kumrêx. Jakamã Tirtũm kot mẽ amã mẽ akukrêx nhõr mã xwỳnhhta koja aa apê omnuj nê hapêx kêt kumrêx. ³⁴Kot kaj mẽ jar pika ja kamã akukrêx rax hãmri nê tanhmã apê omnu hto pix kukamã ajamxpêr rãhã ho ri apa. Nom kot kaj mẽ apê Tirtũm kra hã kot kaj mẽ jar akukrêx rax kêt tã kaxkwa kamã akukrêx pix kukamã ajamxpêr rãhã ho ra akĩnh nê ri apa. Anê.

Mẽ pahte Jejus kutêp tanhmã amnhĩ nhĩpêx to hã mẽ pamã karõ

Matêwre 24.42-43; Makre 13.32-37; Rukre 21.34-36; mãânên Wam Tesarõn 5.4-8

³⁵Nhũm pre Jejus arĩ mẽ ahkre nê mẽ kãm:

—E na pa pre ra mẽ apê ixkôt mẽ apa ho apa xwỳnhjê mã tanhmã amnhĩ kukamã amnhĩ jarênh to. Ixtyk nê akupỳm ixtĩr nê ma akupỳm ixàpir hãmri nê mẽmo arĩgro hã akupỳn mẽ awỳr ixwrykja na pa pre ra mẽ amã ja hã amnhĩ jarê. Tã kwa kêr ka mẽ ixwakre kamã ixte mẽ amã ã amnhĩ jarênh anhỳrja mã ajamxpêr tỳx pê ixkôt amnhĩ nhĩpêx rãhã ho ri apa.

³⁶⁻³⁸—Te mẽ õ patrãw mã mẽ àpênh mex xwỳnhjaja kot amnhĩ nhĩpêx pyrãk o amnhĩ nhĩpêx o ri apa. Koja mẽ õ patrãw ma mẽ kot xepên mã wa rer mã xwỳnh pumunh mã ma nhỹhỹm tẽ. Hãmri nhũm kãm mẽ àpênh xwỳnhjaja arĩ kutêp òrkwỳ kamã hkrĩ. Axkãm hamak rom nê kutêp hkrĩ. Akupỳn htêm nhũm mẽ kot amnhĩ wỳr mar nê kãm kahê xà mẽnh tokyx anhỳr kaxyw arĩ kutêp òt kêt nê hkrĩ. Kôt ã kamàt nhũm akupỳn hpõx o htêm rỳ arĩgro hwỳr hpõx o htêm nhũm mẽ kot amnhĩ wỳr mar nê kãm kahê xà mẽnh tokyx anhỳr kaxyw kutêp òt kêt nê hkrĩ. Akupỳn hpõx ã omunh hãmri nê tokyx apkur kaxyw kãm õ nhĩpêx kaxyw. Kêr kê akupỳn põj nê ã mẽ kot amnhĩ nhĩpêx anhỳr ã mẽ omu nê

hkĩnh nē. Tã kêr ka mē àpēnh xwýnhhtajē pyrà nē ixwakre kamã inhmã ajamaxpēr rãhã ho ri apa. Jao ixkamã ajamak o apa ho ixkôt amnhĩ nhĩpēx mex rãhã nē. No kot paj akupýn mē awýr wrý hãmri ka mē àpēnh xwýnhjē pyrã nē inhmã mēmoj nhõr kêt nē. Kêt pa kot paj mē õ patrãwta kurom mē amã mēmoj mex gõ.

³⁹ —Na htem mē kēp àhkĩnh py-maj amnhĩ nhõrkwý jamãr rãhã ho pa. ⁴⁰ Ja pyrã nē mē ate akupýn ixwrýk xã hã arĩgro pumunh kêt jakamã kêr ka mē õrkwý nhõ dõnta pyrã nē ixkutēp axkãm ajamak rom rãhã nē ri apa. Jao tãm amnhĩ nhĩpēx rãhã nē. Anē.

Mē õ patrãw mã mē àpēnh mex xwýnhjē jarēnh

Matēwre 24.45

⁴¹ Nhũm pre ã Jejus hkôt mē pa ho pa xwýnhjē jahkre anē. Hãmri nhũm Simãw Pētre kuma nē kãm:

—Kwa Pahĩti. Xãn ka mē piitã mē kãm ã akapēr anē nã? Xã ãm mē papxipixjē mã? Anē.

⁴² Hãmri nhũm kãm:

—Nã ãm ixwakre kamã mē ate ixkôt tanhmã inhmã amnhĩ nhĩpēx to ho mē apa xwýnh piitã mē amã na pa ã ixkapēr anē. Koja mē àpēnh xwýnhjē hõ õ patrãw mã àpēnh mex o pa nhũm amnhĩ tã omu nē ma nhýhým mõr kaxyw nē ãhkram mēmoj piitã haxàr pa. Hãmri nē kãm: “E kêr ka ixwakre kamã inhmã inhõrkwý htãnopxa. Nē mē àpēnh xwýnhjē mã õ mex kê mē apkur mex o pa.” Anē. Koja ã kãm mēmoj tã karõ anē hãmri nē kato nē ma nhýhým mõ.

⁴³ Hãmri nhũm kãm àpēnh mex xwýnhhta wakre kamã kãm àpēnh mex o pa. Jakamã nhũm õ patrãw akupýn hpõx o mõ nhũm amnhĩ wýr harēnh ma nē hkĩnh nē. Nē mēmoj tã amnhĩ tã kamã kahak kêt nē. Rý tee ri wakre kamã kãm àpēnh punuj ã amnhĩ pumu nē tee amnhĩ kukamã hamaxpēr kêt nē.

Kot wakre kamã kutēp àpēnh mex jakamã akupýn hpõx ã harēnh ma nē hkĩnh nē.

⁴⁴ —Jakamã nhũm õ patrãwja akupýn põj nē kot kãm àpēnh mex ã omu nē haxwýja hkĩnh nē. Hãmri nē kot kãm hamãr o pa kaxyw kãm mēmoj piitã ãhkram haxàr pa. ⁴⁵ Nom koja kãm àpēnh xwýnhhta axtem nē wakre kamã kãm àpēnh mex kêt nē. Nē tokyx akupýn mõr kêt ã hkamnhix nē wakre kamã kãm mē àpēnh xwýnhjē htak nē pipãnh pix nē mē kãm gõ xành xwýnhjē kôt pix mã pa japēr. ⁴⁶ Hãmri nhũm õ patrãw haēr pē akupýn põj nē tee ri ã amnhĩ nhĩpēx anhýr ã omu. Hãmri nē gryk týx nē tanhmã homnuj to. Hãmri nē kãm mē àpēnh punuj xwýnhjē mē mē ho pimràãtã amnhĩ nē mē hanor pa. Tã kêr ka mē ixwakre kamã ho mē urak kêt nē. Mē kurom ixkapēr kôt tãm amnhĩ nhĩpēx mex rãhã ho ri apa.

⁴⁷⁻⁴⁸ —Nē koja mēhõ kormã Tirtũm kapēr mar kêt nē htýx ri tanhmã amnhĩ tomnuj to ho pa. Hã koja Tirtũm ja hã omu nē nhýrmã kot amnhĩ tomnuj o pata mýrapē tanhmã ho nhũm amnhĩ xã htýx kamã hamak tũm xã kamã pa. Nom akrãnhmã amnhĩ xã kamã hamak o pa. Aa kot Tirtũm kapēr mar kêt jakamã koja ãm akrãnhmã amnhĩ xã kamã hamak o pa. Nom koja mēhõ kapēr mar mex tã ãm kuma nē hkôt amnhĩ nhĩpēx kêt nē. Nē xatã hirõp kuhé nē tanhmã amnhĩ tomnuj to. Hã koja Tirtũm tee ri ja hã omu nē nhýrmã tanhmã homnuj týx to. Hãmri nhũm wamtajē pyrã nē amnhĩ xã htýx kamã hamak tũm xãta kamã pa ho pa nom mē kĩnhã amnhĩ xã htýx kamã hamak rãhã ho pa. Anē.

Jejus kot nhýrmã mē kot amnhĩ tomnuj xã ho hapēx ã harēnh

Matēwre 10.34-36

⁴⁹ Nhũm Jejus arĩ hkôt mē pa ho mē pa xwýnhjē jahkre nē mē kãm:

—Nà ixte mē omnu xà piità ho ijapêx par nē mē kot tanhmā amnhī tomnuj to piità ho ijapêx par kaxyw na pa pre wrÿ. Tã ra ixte piità ho ijapêx par o inhmōr ronhÿx ja inhmā mex kumrêx. Nom kormã. ⁵⁰ Kot paj amnhī xà htÿx kãm ijamak rax o mē kot amnhī tomnuj o ijapêx o hkra. Hãmri nē nhÿrmã ho ijapêx pa. Na pa ra ixtyk kaxyw ixte amnhī kà xà kamã ijamak kukamã ijamaxpêr o ra amnhī kamã ixkahak nē ri ixpa. Tã kot paj ja ho ijapêx pa nē ixkĩnh tÿx kumrêx. Anē.

Mē kot Jejus ã axpên kutã amnhī xunhwÿr ã mē harênh
Matêwre 10.21, 10.34-35

⁵¹ Nhÿm Jejus arĩ mē ahkre nē mē kãm:

—Nē ra mē awÿr ixwrÿk tã koja mē piità ixkukwak ri hamakêtkati nē ãmnhĩ ri pa hkêt nē. Kormã. Koja mē akwÿjaja ixkapêr ma nē mē apyrã nē amnhī kaxyw ixkôt hamaxpêr. No nhÿm mē akwÿjaja mē akĩnhã kuma nē ãm kuma. Hãmri nē ixtã tanhmã mē anhĩpêx to ka mē ixpyrã nē amnhī xà htÿx kamã ajamak o ri apa.

⁵² —Nē koja tanhmã in xkre pyxi kamã mēmojaja ohtōn pa. Nhÿm war axkrutre nē ixkôt amnhī xunhwÿ nhÿm mē axkrunêpxi nē ixkwÿm ri amnhī nhĩpêx nē ixkutã amnhī xunhwÿ. ⁵³ Nhÿm mē hipêêxã hkra my mē wa ixtã axpên kutã amnhī xunhwÿ. Nhÿm mē katorxã hkra ni mē wa ixtã axpên kutã amnhī xunhwÿ. Nhÿm mē wÿj umregêx mē wa haxwÿja ixtã axpên kutã amnhī xunhwÿ. Koja mē ã ixtã axpên nhĩpêx anhÿr o pa. Anē.

Mē pahte amnhī tomnuj kaga nē Tĩrtũm kôt amnhī nhĩpêx ã mē pamã karõ

Matêwre 5.25-26, 16.2-4

⁵⁴ Nhÿm Jejus hpãnhã mē kot hkôt amnhī xunhwÿr kêt xwÿnhjê mã kapêr nē mē kãm:

—Kwa mē inhma mē ate ixkôt amnhī xunhwÿr kêt xwÿnhjaja. Na htem kaxkwa kamã na htyk rax pumu nē na wrÿk mã hamaxpêr kurê kumrêx. Hãmri nhÿm na wrÿ. ⁵⁵ Nē amgrã pē kôk krihkritja nhÿm htem kuma nē arĩgro htÿx mã hamaxpêr kurê kumrêx. Hãmri nhÿm arĩgro htÿx nē. ⁵⁶⁻⁵⁷ ã na ka htem aprĩ hã mēmoj pumunh kôt mēmoj kukamã ajamaxpêr mex o ri apa anē. Nom nhÿm Tĩrtũmja mē ate tanhmã amnhī tomnuj to mÿrapê tanhmã mē ato kaxyw nhÿm mē ate ja hã amnhī pumunh tã tokyx amnhī tomnuj kaga hkêt nē.

⁵⁸⁻⁵⁹ —Na htem tanhmã axpên tomnuj to. Hãmri nhÿm kot tanhmã war axpên to xwÿnhhta pahĩ hwÿr htêm nē kãm tanhmã kot ho xwÿnhhta jarênh kaxyw. Hãmri nhÿm kamã gryk xwÿnhhta kot pahĩ mã harênh kaxyw ã harênh ma nē hãmri tokyx hwÿr tē nē wa tãm akupÿm axpên xãm. Na htem ã amnhī nhĩpêx anē. Pahĩ kot ja mar nē tanhmã mē ho pymaj na htem ã amnhī nhĩpêx anē nē tokyx akupÿm tãm axpên xunhwÿ. No koja mē ã amnhī nhĩpêx anhÿr kêt nē nhÿm pahija mē harênh ma hãmri nē tanhmã kot hõ ho xwÿnhhta pynê nē haxã nhÿm tee kãm kator prãm o hkrĩ kaprÿ. Hãmri nē tanhmã amnhī to nē amnhī pãnhã kãm amnhī rer pa nhÿm pahihitija kormã mē kãm anē nhÿm mē kãm ure nhÿm kato. Ja pyrã nē kêt ka mē Tĩrtũm tanhmã kot mē anhĩpêx to pymaj tokyx mē ate amnhī tomnuj kaga nē hkôt amnhī nhĩpêx rãhã ho ri apa. Anē.

13

¹ Tã nhÿm axtem mē hkwÿjaja Jejus wÿr mra nē kãm:

—Pa? Kwa xãn ka ra Garirej nhõ xwÿnh kwÿjê jarênh ma nã? Na xep

prem Jerujarē hwÿr mra nē ham mē kot Tirtūm mā amnhī jarēnh xà hā ixkre kamā kām amnhī jarēnh kaxyw kormā kām mry hpar o kuhé nhūm xep pahiht Piratja mē harēnh ma nē mē hā amÿnē nhūm mē ma mē hwÿr mra nē mē himex pa. Kwa mǎn mē kot amnhī tomnuj tÿx o mē pajakrenh ā na prem mē himex nà? Anē.

²⁻³ Hāmri nhūm mē kām:

—Nà mē kot amnhī tomnuj tÿx mÿrapē mē kot mē himex kêt. Mē apiitā mē ate amnhī tomnuj o axpēn pyrāk kēnā. Tā kot ka mē amnhī tomnuj kaga nē Tirtūm kôt amnhī xunhwÿr kêt hā kot ka mē nhÿrmā ty hāmri nē ô krī hwÿr axàpir kêt nē. ⁴ No Jerujarē kamā ixkre prêkja mē kot kām “Siroe” anhÿr xwÿnhhta mē ho 18 nē mē hipy htem nē mē himex par xwÿnhjaja. Xà mē kot amnhī tomnuj tÿx mÿrapē na prem ty? Xà mē kot amnhī tomnuj tÿx o Jerujarē kamā aŕi mē htÿr xwÿnhjê jakrenh? ⁵ Nà kot anhÿr kêt. Mē apiitā mē ate amnhī tomnuj o axpēn pyrāk. Jakamā kot kaj mē ā amnhī nhÿpêx anhÿr kaga nē Tirtūm kôt amnhī nhÿpêx kêt nē hāmri nē mē urāk nē nhÿrmā ty hāmri nē Tirtūm nhô krī hwÿr axàpir kêt nē. Jakamā kwa mē ixkapêr ma nē kām ajamaxpêr tÿx rāhā ho ri apa. Anē.

Tirtūm kot mē pakamā gryk tokyx anhÿr kêt ā harēnh

Rômān 2.4; Sikūn Pêtre 3.8-9

⁶ Tā nhūm Jejus kê axte tanhmā mē ahkre hto. Nē Tirtūm kot tanhmā mē panhÿpêx to hā kuxi nē mē kām awjarē nē mē kām:

—Koja hpur nhô dôn mēmo pâr kre nhūm ra hprêk mex nē ô mā tām nē. Tā aa ô hkêt ā ra hā amgrā axkrunêpxi. ⁷ Hāmri nhūm kot hkre xwÿnhja tee ri omu nē kām àpēnh xwÿnh wÿr tē nē kām: “E kwa ma tē nē mēmo pâr mÿj krāhta nē amē. Mexti hā. Ra ô hkêt ā amgrā axkrunêpxi kēnā. Koja pêr aa ô hkêt

nē. Mo kaxyw kot kêt ô hkêt tā ô mex xwÿnh kaêx ā mē kēp àmnār o kuhé? E hwÿr tē nē krāhta nē amē.” Anē. ⁸⁻⁹ Hāmri nhūm tee ri kot kām hā karôja ma nē kām: “Kwa nà kormā. Pa kop ixàmnhÿx pâr krax ā mēmo japôk kwÿ kapī nē kop hamā mǎn. Kê axte hā amgrā pyxi nē hapêx nē ô hkêt pa kormā krāhta nē kumē. Koja amgrā ja kamā amā ô japêr ka omu nē akÿnh nē.” Anē. Ā mē ujarēnh kot anhÿr. Anē.

Nhūm Jejus ā mē kām ujarēnh anē. Mē kot amnhī tomnuj tÿx o pa htā nhūm Tirtūm kot pur nhô dôn mā àpēnh xwÿnhhta pyrā nē mē kamā gryk tokyx anhÿr kêt ā nhūm ā hā kuxi nē mē kām ujarēnh anē.

Jejus kot arÿgromnu hā mēhō ho mex ā harēnh

Rukre 14.1-6; Juāw 5.16-17

¹⁰ Tā nhūm mē ô arÿgromnu pē sap kato nhūm Jejus Ijaew pikuprōnh xà hā ixkre hwÿr axà nē kamā Tirtūm kapêr o mē ahkre ho nhÿ. ¹¹ Nhūm kamā mēhō ni hikôt rāhā nē pa xwÿnhja nhÿ. Na pre ra amnepēm mēkarōmnuti tanhmā ho nhūm katāt nē ri mŕar kêt kumrêx. Ām hikôt rāhā nē ri pa hā ra hā amgrā pē 18. ¹²⁻¹³ Hāmri nhūm Jejus omu nē amnhī wÿr kām hpa ho apē nhūm hwÿr tē nhūm hā ïhkra xi nē kām:

—E na ka ra akupÿm amex.

Anē nhūm akupÿm katāt nē mex kurê kumrêx. Hāmri nē amnhī pumu nē hkÿnh tÿx nē Tirtūm mā mex o mex ā harēnh o xa. ¹⁴ Nom nhūm mē pikuprōnh xà hā ixkre jamār xwÿnh maatija tee ri ja hā omu hāmri nē Jejus kamā gryk tÿx nē. Mē ô arÿgromnu hā akupÿm kot ho mex jakamā nhūm kamā gryk tÿx nē. Hāmri nē mē pikuprōnh xwÿnhjê mā kām:

—Tk. Kwa semān ā mē àpēnh xà hā arÿgro xohtôô. Kêp 6. Kot kaj mē māmri tômik nē sikūn nē tēs nē kwata nē kĭta nē sēsta ja ā ka mē apê rÿ māmri Jejus wÿr amnhī

to mra kê akupÿm tanhmã mê ato mex to. No sap ã kwarĩ. Sap kêp mê pahpê Ijaew nhõ arĩgromnu kênã. Na pu htem hã paxâpênh kêt nê. Jakamã arĩgro ja hã kot akupÿm mê ato mexja mex kêt. Anê.

¹⁵ Hãmri nhũm Jejus kuma nê kãm:

—Kwa xà mê kajaja na ka htem sap ã axâpênh kêt nê apa? Nà mê ate hã axâpênh kênã. Xàn ka htem sap ã akrit kawar nê akrit môx ma mê ho apa nê mê hkôm kêt nê? Nà na ka htem ma mê ho apa nhũm htem ixkõ. Mot ka kêt mê ri axtem nê mê kot sap ã tanhmã amnhĩ toja nê mê kãm akapêr? ¹⁶ Ixte ni ho mex xwÿnhnta mê pahpyrà nê kêp finat Apraãw kagrõt nyw õ na. Nhũm pre Satanasti te kot kãm ê nê ri o pa pyrãk o hipêx jakamã nhũm ÿ hã hikõt nê ri paja ã ra hã amgrã kêp 18. Tã pa nê te ixte Satanasti ho ixkrihkrit nê ixte kêp utar pyrãk o hipêx nê akupÿm ho mex. Mo kot pa kêt ri omu nê ãm omu nê arĩgromnu hã ho mex kêt nê? Nà ixte arĩgro piitã hã akupÿm mê ho mex o ixpa xwÿnh kênã. Anê.

¹⁷ Hãmri nhũm mê kot kãm kapêr mar prãm kêt xwÿnhjaja kuma nê kamã gryk nê. Te ho mēhprĩjê mã mê hamaxpêr nhõr pyrãk o mê hipêx pyrãk jakamã nhũm mê amnhĩ tã kuma nê kamã gryk nê. No nhũm mê kot ra ã amnhĩ nhĩpêx anhÿr o pa hã omunh xwÿnhjaja ja hã omu nê kãm hkĩnh nê.

Jejus te kot mēmo hy pyrãk ã harênh

Matêwre 13.31-33; Makre 4.30-32
¹⁸⁻¹⁹ Nhũm Jejus arĩ mê ahkre nê tanhmã mê kãm amnhĩ tã ujarênh to nê mê kãm:

—Nê Tirtũm kot mê awÿr ixte mê ato amnhĩptar kaxyw inhmēnh ã ijarênhja. Te ixte mēmo hy pixire pyrãk. Na htem hkre nhũm higrõt. Nê gaa nê rĩ hprêk. Hãmri nê pa anhrã nhũm kuwēnhre hwÿr mra nê hó pytĩ kamã amnhũm haê

nhĩpêx. Tã kot paj nhÿrmã mēmo hy jarênhnta pyrã nê ixpaxi htã kot paj pika piitã hkõt mê ho amnhĩptã nê mê omunh mex rãhã ho ri ixpa. Anê.

Jejus te kot pãwti kaxkrit xà pyrãk ã harênh

Matêwre 13.33-35

²⁰⁻²¹ Nhũm Jejus arĩ mê ahkre ho xa. Nom hprĩ hã amnhĩ jarênh kêt nê. ãm amnhĩ tã kuxi nê mê kãm awjarê nê mê kãm:

—E kot pa hpãnhã tanhmã mê amã pãwti kaxkrit xà jarênh to. Koja mēnijê hõ ãm hkwy ho grire nê kupy nê kaxyw mēmo xôm kãm kumê nê ho pihkãr pa nê ho pãwti nhĩpêx. Nhũm kaxkrit xaja grire htã pãwti piitã ho kaxkrit mex nê. Ja pyrã nê kot paj ixpyxi htã koja mê nhÿrmã pika piitã hkõt ixkõt amnhĩ nhĩpêx mex o pa. Anê.

Nhũm pre ã Jejus mê kãm amnhĩ tã pãw kaxkrit xaja xi nê harênh anê.

Kaxkwa hwÿr hakwa kre kahê xà jarênh

Matêwre 7.13-14, 7.21-23; Juãw 10.7-10

²² Tã nhũm Jejus arĩ krĩ pē Jeru-jarē hwÿr krĩ hkõt ri mê ahkre ho mê hkõt ri pa. ²³ Hãmri nhũm mēhõ myja hwÿr tē nê mēmoj tã hkukja nê kãm:

—Pa. Kwa inhmã mēmoj jarē. Xà koja mê ohtõ nê nhÿrmã Tirtũm ri htĩr tũm nê papa ho nà koja mê grêre? Anê.

²⁴ Hãmri nhũm kuma nê mê kot mar o kuhê xwÿnh piitã kãm:

—Nà mê kot Tirtũm kõt amnhĩ xunhwÿr xwÿnhjê pix koja mê õ krĩ hwÿr agjê. Wÿr mê gjêx xaja ãm pixii nom koja mê ohtõ nê kãm hkõt wÿr gjêx prãm kêt nê. Na htem te hwÿr mê gjêx xà hõ japêr o pa pyrãk. Nom pa na te ixpê hwÿr mê gjêx xà pixita pyrãk. Jakamã kwa kêr ka mê tokyx ixkõt amnhĩ xunhwÿr tÿx nê ixkõt ri amnhĩ nhĩpêx o ri apa. Na htem ohtõ nê kãm

ixkôt amnhĩ xunhwÿr prãm kêt nê. Ixte amnhĩ nhĩpêxja mẽ kêp hihtÿx jakamã nhũm htem ixkaga.

25 —Tã koja mẽ nhÿrmã ty nê tee ri kãm Tirtũm wÿr gjêx prãm kaprÿ. Kot paj te mẽ kêp kahê pyrãk o mẽ hipêx nhũm mẽ kapôt ã kuhê nê tee ri amnhĩ tã ixpumu nê inhmã: “Kwa mẽ inhmã kahê xà mẽ pa mẽ awÿr agjê Pahihti.” Anê. Hãmri pa mẽ kãm: “Nà ixte mẽ apumunhre hã kot pa kêt ri mẽ amã kurê.” Anê.

26 —Hãmri nhũm mẽ tee ri inhma nê inhmã: “Kwa nà ra ate mẽ ixpumunh mex kênã. Na ka pre mẽ inhõ krĩ kamã mẽ ijahkre ho ri apa nê mẽ ixkutã axàpkur o ri apa.” Anê. 27 Hãmri pa mẽ kãm: “Tk. Ixte mẽ akutã ixàpkur tã mẽ ate ixkôt amnhĩ xunhwÿÿre hã. Jakamã e mẽ ma mra. Mẽ ate amnhĩ tomnuj pix o mẽ apa xwÿnh jakamã kot kaj mẽ ixwÿr agjêx kêt nê.” Anê. Kot paj ã mẽ kãm ixkapêr anê.

28 —Hãmri nhũm mẽ amÿm ri mẽ inhmex ã mẽ ixpumunh o kuhê. Kaxkwa kamã mẽ ixkĩnh nê ri mẽ inhmex nê ixpa hã amÿm mẽ ixpumunh o kuhê. Apraãw nê Ijak nê Jako nê Tirtũm kapêr jarênh o mẽ pa xwÿnh piitã nhũm mẽ amÿm mẽ ixkĩnh nê mẽ ixàpkur mex ã mẽ ixpumunh o kuhê. Hãmri nê tee ri mẽ ixwÿr kãm gjêx prãm kaprÿ nê hkaprĩ nê mur nê amnhĩ krã hkĩ jarê nê amnhĩ kã nhê nê amnhĩ kamã gryk tÿx nê. Nõ ãm tee ri amnhĩ kamã gryk kaprÿ. ã koja mẽ amnhĩ nhĩpêx anê. 29 Nom Tirtũm kôt mẽ kot amnhĩ xunhwÿr xwÿnhjaja koja mẽ kurom pika piitã kurũm axpên wÿr akuprõ nê Tirtũm wÿr agjê nê kuri hkĩnh nê apkur mex o hkrĩ. Mẽ akwÿjaja nê pika piitã kurũm hohtõ rax nê axpên wÿr akuprõ nê hwÿr agjê nê kuri apkur mex nê hkĩnh nê pa ho pa.

30 —Mẽ apê Ijaewjaja mẽ amã Ijaew kêt xwÿnhjê hprãm nõkati htã koja mẽ hkwÿjaja mẽ akwÿjê

rom Tirtũm ri axpên wÿr akuprõ nê hkĩnh nê axpên kutã apkur mex o hkrĩ. Jakamã kwa kot kaj mẽ urak nê amã Tirtũm mẽ wa ixwÿr agjêx prãm hã kot kaj mẽ ixkôt amnhĩ xunhwÿ nê ixkapêr kôt amnhĩ nhĩpêx mex o ri apa. Anê.

Jejus kãm Jerujarê nhõ xwÿnhjê japê hã harênh

Matêwre 23.37-39

31 Hãmri nhũm Parijew nhõ xwÿnh kwÿjaja Jejus wÿr mra nê kãm:

—Pa. E ot pa mẽ awÿr mra. Kwa kêt ka ma Jerujarê hwÿr amõr kêt nê. Na ra mẽ hkĩnh wÿr pahi Eroxxja pøj nê kot tanhmã ato kaxyw atã amnhĩ jarê pa mẽ kuma. Jakamã kwa mẽ hwÿr amõr kêt nê. Nhãm krĩ hõ hwÿr mãn mõi. Anê.

32 Hãmri nhũm mẽ kuma nê mẽ kãm:

—Tk. Nà kot pa umaj nhãm krĩ hõ hwÿr inhmõr kêt nê. Kot paj ma mẽ hkwÿjê nê mẽkarõmnuti japõx pê mẽ hkwÿjê ho mex o ma hwÿr mõi. Pahi Eroxx kãm mẽ hpar pix prãm. E mẽ mãmri ma akupÿm hwÿr mra nê ã kãm ixkapêr jarênh anê. No kot paj umaj nhÿhÿm ixprõt nê ixtêm nê kêp ixpimxur kêt nê. Ra ixte õ krĩ hwÿr inhnojaret kênã. Anê.

33 Hãmri nê mẽ kot mar xwÿnhjê mã amnhĩ jarê nê mẽ kãm:

—Kot paj tanhmã amnhĩ nhĩpêx to ho ri ixpa rãhã Jerujarê hwÿr mõi pøj nê kamã ty. Kamã na htem mẽ kot Tirtũm nhÿ hã kapêr jarênh xwÿnhjê nhĩmex. Tã hwÿr kot paj mõi. Anê.

Nhũm pre ã Jejus mẽ kãm amnhĩ jarênh anê. 34 Hãmri nê te ra kot Jerujarê nhõ xwÿnhjê pumunh o ãm nê mẽ kãm kapêr pyrãk o kapêr nê mẽ kãm:

—Hêxta waa nê mẽ apê Jerujarê nhõ xwÿnhjaja. Tirtũmja xatã mẽ awÿr ÿ hã kapêr jarênh o mẽ pa xwÿnhjê rênh tã ka mẽ kapêr mar kêt nê. Nê axtem nê kên o mẽ

htak o mē himex o apa. Na ka htem ā amnhī tomnuj o apa anē. Tā arī inhmā mē ajamār o ri ixpa hprām. Te ho krāhyre kot nore hpro nē ho hikwỹ pyrāk o na pa inhmā mē anhīpēx prām tā ka mē apē ixprām nōkati nē ixkaga. ³⁵ Mýrapē koja Tirtūm mē anhō krī jamār kēt nē. Kot paj tokyx ty nē mē apiitā mē are nē ma akupỹm api ka mē axte xipumunh kēt nē. Ām akupỹn ixwryk xā hā arīgrota pix ā koja mē akwỹjaja mē amýr pē krī ja hwýr ixwryk kām xipumu. Hāmri nē mē akurom xipumu nē hkĩnh tỳx nē. Nē tā ixkōt amnhī xunhwý nē axpēn mā ijarēnh o:

E ota Tirtūm kot mē pahwýr mēnh xwýnhta pōj. Nā ām hāmri na mē pahwýr wrý. Na mex kumrēx. Anē.

14

Jejus kot axte arīgromnu hā mēhō ho mex ā harēnh
Rukre 13.10-17

¹ Tā nhūm sap nhūm Jejus ma Parijew nhō xwýnhjē krāhtūm kutā apkur kaxyw ōrkwỹ hwýr tē. Hāmri nhūm mē wa hā htu rax nē Jejus apkur ā tānopxar o kuhē. Mē kot amnhī nhīpēx kwým ri tanhmā amnhī nhīpēx to nhūm mē kot hā omunh nē ra hā āmnēnh kaxyw nhūm mē kuri htānopxar o kuhē. ² Nhūm ixkreja kamā mēhō my hte hikot xwýnh mē kuri xa. ³ Hāmri nhūm Jejus omu nē hā Parijew nhō xwýnhjē mē Tirtūm kapēr tūm o mē ahkre xwýnhjē kukja nē mē kām:

—Kwa mē inhmā mēmoj jarē. Jarāhā na mē panhō arīgromnu pē sap. Tanhmā na pre finat Mojesja Tirtūm nhỹ hā mē pahte sap ā tanhmā amnhī nhīpēx to hā mē pamā karō hto? Xā kot puj mē akupỹm mē ho mex nā? Kot puj mē ām mē omu nē akupỹm mē ho mex kēt nē? E mē atō inhmā ja jarē. Anē.

⁴ Hāmri nhūm mē kuma nē tanhmā kutā kām nē hkēt nē. Ām akryk mar o kuhē. Mē kot tanhmā kām nē nhūm kot ta pānhā mē kām tanhmā nē pymaj nhūm mē akryk mar o kuhē nē tanhmā kutā kām nē hkēt nē. Hāmri nhūm tee ri mē omu hāmri nē myja ā ĩhkra xi nē akupỹm ho mex. Hāmri nē hano nhūm ma akupỹm mex nē hkĩnh nē ma tē. ⁵ Hāmri nhūm Jejus mē kām:

—E mē inhma. Xā koja mē akra sap ā mē apē ahkrehti xupỹm kām tēm ka mē ām omu nē arīgro mex jamār pē tokyx ho axāpir kēt nē? Nā kot kaj mē ho axāpir kurē kumrēx. Rý koja akrit mōx gyw mā axā xāt ka mē omu nē ām omu nē arīgro mex jamār pē tokyx hkaxār kēt nē? Nā kot kaj mē hkaxār kurē kumrēx. Na htem sap ā tanhmā mē ho mex to ho pa. Mē panhō arīgromnu htā pu htem hā tanhmā mē ho mex to. Jakamā na pa ā hā myta ho mex kurē kumrēx anē nē ri arīgro mex jamār kēt nē. Anē.

⁶ Nhūm pre ā Jejus mē kām amnhī jarēnh anē nhūm mē kuma nom kutā kām mēmoj jarēnh kēt nē. Ra kot akupỹm ho mex jakamā nhūm mē tanhmā hā kām nē hkēt nē kuhē.

Mē pahte amnhī to hkryre hā mē pajarēnh

Matēwre 23.6-14; Rukre 6.32-36; mǎānēn Xiakre 4.10; Wam Pētre 5.5-6

⁷ Hāmri nhūm mē apkur kaxyw mē hkrī xā hā hkrī hpa. Nhūm mē hkwyjaja hkwyjē pē amnhī to wa nē mē hkrī xā mex kām hkrī hpa. Hāmri nhūm Jejus ja hā mē omunh o xa nē axte mē kām mēmoj jarē. No ām mēmoj tā kuxi nē mē kām awjarē nē mē kām:

⁸ —Nā koja mē axpēn mā mēhō rer kaxyw nē amnhī wýr mē atā karō. Mē ate kutā axāpkur kaxyw. Hāmri kēr ka mē hwýr mra nē axāpkur kaxyw nē kupip kām akri kurē kumrēx. No kot kaj mē kēp

amnhĩ to wa nẽ mẽ hkrĩ xà mex pytã nẽ hã akrĩ nhũm ra kot amnhĩ to rax xwýnhjê hõja hapu hã mẽ akõt tẽn axà. ⁹ Hãmri nhũm ixkre nhõ dõn kot amnhĩ wýr mẽ awýr xwýnhhta mẽ hkrĩ xà mexta ã mẽ awý nẽ mẽ amã: “Kwa mẽ atõ kãnhmã xa nẽ kãm mẽ hkrĩ xà kaprã.” Anẽ. Hãmri ka nhãm xa nẽ kãm anhýr xata gõ. Hãmri nẽ api-jaam kãm hpãnhã kupĩp kãm nhý. ¹⁰ Ja pymaj kêr ka mẽ kupĩp kãm akrĩ kurê kumrêx. Kê ixkre nhõ dõnja tee ri ja hã mẽ apumu nẽ mẽ amã: “Tk. Kwa ixkrãmnhwýjaja. Mẽ kupĩp kãm akrĩ hkêt nẽ. Kwa mẽ mra nẽ jar mẽ hkrĩ xà mex ã mãn akrĩ.” Anẽ hãmri nhũm ja mẽ amã mex nẽ. Nhũm mẽ piitã kot mẽ ato mex ã mẽ atã omu ka mẽ ajaxwýja amnhĩ tã omu nẽ akĩnh nẽ ajamakêtkati nẽ akrĩ.

¹¹ —Nẽ koja mẽhõ te amnhĩ to rax o hkwyjê jakrenh pyrãk o amnhĩ nhĩpêx o ri pa hãmri nhũm Tirtũm ja hã omu nẽ tanhmã hã ho. Hãmri nhũm ra amnhĩ to grire hã amnhĩ pumunh o ri pa nẽ rĩ amnhĩ pumu. Nom koja mẽhõ amnhĩ to rax o hkwyjê jakrenh pyrãk o amnhĩ nhĩpêx o ri pa hkêt nhũm Tirtũm ja hã omu hãmri nẽ tãm amnhũm kot amnhĩ to rax xwýnh ã harẽ. Anẽ.

Mẽ pahte mẽ kêp amrakati xwýnhjê ho mex ã mẽ pamã karõ

¹² Nhũm pre ã Jesus mẽ ahkre anẽ hãmri nẽ hpãnhã mẽ apkur xà hã ixkre nhõ dõnja mã kapêr nẽ kãm:

—Nà na ka hte amnhĩ wýr akwýjê pix wý. Atõjê hwý nẽ akrãmnhwýjê hwý. Nẽ mẽ hikãxpore rũnh xwýnhjê hwý. Nom nhýrmã mẽ kot amnhĩ xwar amnhĩ nhõrkwý hwýr awýr pix kaxyw na ka hte ã amnhĩ wýr mẽ hwýr anẽ.

¹³ No kêt amnhĩ wýr mẽ no kre xwýnhjê mãn wý. Nẽ mẽ hyk o mẽ pa xwýnhjê mãn wý. Nẽ mẽ hkrã pipãnh puro xwýnhjê mãn wý. Nẽ mẽ hpigêx týx xwýnhjê

mãn wý. Nẽ mẽ hirot nẽ ãpênh kêt xwýnhjê mãn wý. Kêr ka amnhĩ wýr jajê mãn wý kê mẽ awýr mra nẽ akutã apku. ¹⁴ Mo mẽ kot amnhĩ xwar awýr kaxyw mẽ õ mẽmoj? Mẽ kêp amrakati. Tã kot kaj mãmri amnhĩ wýr mẽ awý nhũm Tirtũm mẽ hã apumu hãmri nẽ nhýrmã kot akupým mẽ ho htĩr xà hã arĩgrota ã mẽ hã amã mẽmoj mex gõ nẽ ato mex nẽ. Hãmri ka akĩnh nẽ. Anẽ.

Tirtũm kutã mẽ paxãpkur xà maati jarênh

Matêwre 8.11, 25.1-10, 26.29; mããnên Apokarip 19.9

¹⁵ Hãmri nhũm mẽ apkur kaxyw hkrĩ pa nhũm Jesus nhĩhkõ hã mẽ apkur o mẽ krĩ xwýnhjê hõja tanhmã Jesus mã kapêr to nẽ kãm:

—Hêxta waa nẽ. Kot puj mẽ nhýrmã Tirtũm nhõ krĩ hwýr api nẽ kutã paxãpkur o pahkrĩ nẽ pahkĩnh týx kumrêx. Anẽ.

¹⁶ Hãmri nhũm kuma nẽ kê axte mẽ ahkre. Mẽ kot Tirtũm kutã apkur kaxyw kot amnhĩ wýr mẽ hwýrta ã nhũm mẽ ahkre. No ãm hã kuxi nẽ tanhmã mẽ kãm ujarênh to nẽ mẽ kãm:

—Koja mẽhõ amnhĩ wýr mẽ ho ohtõ nẽ mẽ kot kutã mẽ apkur mex kaxyw mẽ kuwý. ¹⁷ Hãmri nẽ mẽ hwýr kãm ãpênh xwýnh mẽ nẽ kãm: “E ma tẽ nẽ mẽ kãm awjarê kê mẽ tokyx mra pa mẽ apku.” Anẽ.

¹⁸ Hãmri nhũm kuma nẽ ma mẽ hwýr mẽ kãm ujarênh o tẽ. Hãmri nẽ wamta mã anẽ nhũm kuma hãmri nẽ hitõt nẽ kãm: “Nà kot paj hwýr ixtêm kêt nẽ. Na pa ham amnhĩm pika hkwy japrõ. Jakamã kot paj ma hwýr tẽ nẽ ixprĩ hã omu mãn. Kwa kêr ka kãm ijarê kê ixte tanhmã hã nẽ xà hkõt ã ixte amnhĩ nhĩpêx anhýrja mã hamaxpêr kêt nẽ.” Anẽ.

¹⁹ —Hãmri nhũm kuma nẽ hpãnhã nhãm ja wýr tẽ nẽ kãm awjarê nhũm kuma nẽ haxwýja hitõt nẽ kãm: “Nà kot paj hwýr ixtêm kêt nẽ. Na pa ham amnhĩm môx o 10 nẽ haprõ. Jakamã kot

paj ma hwÿr tē nē ixprī hā ri omu mān. Kwa kēr ka kām ijarē kē tee ri tanhmā hamaxpēr to hkēt nē. Ixte tanhmā hā nē xā hkôt ā ixte amnhī nhīpēx anhÿr kēt.” Anē.

²⁰ —Hāmri nhūm kuma nē hpānhā ma ihōta wÿr tē nē kām awjarē nhūm kuma nē haxwÿja hitōt nē kām: “Nà kot pa hwÿr ixtēm kēt nē. Na pa kormā ham ixprō. Kormā ixprō nyw nē inhmā rer prām kēt jakamā kot paj ma hwÿr ixtēm kēt nē.” Anē.

²¹ —Hāmri nhūm kām àpēnh xwÿnhnta tee ri mē kuma nē awjanā nē ma akupÿm tē. Kot ma mē hwÿr mēnh xwÿnhnta wÿr ma akupÿm tē nē kām mē harē. Hāmri nhūm tee ri mē harēnh ma nē mē kamā gryk nē. Hāmri nē hpānhā mē kēp amrakati xwÿnhjē hwÿr kām àpēnh xwÿnhnta mē. Mē hkrā pipānh puro xwÿnhjē hwÿr kumē. Nē mē hpigēx tÿx xwÿnhjē hwÿr kumē. Nē mē hirot nē àpēnh hkēt xwÿnhjē hwÿr kumē nhūm ma mē kām ujarēnh o tē. Hāmri nē amnhī kōt mē kuwÿ nhūm mē kuma nē wamtajē rom hkôt mrar kurē kumrēx. Hāmri nē agjē nē apkur kaxyw mē hkrī xā kamā hkrī hpa. ²² Hāmri nhūm kām àpēnh xwÿnhja ō patrāw wÿr tē nē kām mē harē nē kām: “E ate mē hā karō xāta kōt na mē ra hkrī hpa htā arī mē hkrī xā hkwy hkapyr.” Anē.

²³ —Hāmri nhūm kuma nē kām: “Hēxta waa nē. Kēt ām mē hkrī xāta hipu mex ronhÿx pa omu nē ixkīnh nē. No ām kormā piitā hipu hkēt. Kwa ma krī pu hā ri mē hapēr o mra. Nē nhÿri mē hkwyjē pumu nē mē haprō nē man amnhī kōt mē o mra kē mē hkrīxā ho hipu hpa. ²⁴ No kēt wam ixte amnhī wÿr mē hwÿr xwÿnhntaja. Mē hitōt xwÿnhjaja kot paj axte amnhī wÿr mē hwÿr kēt nē.” Anē. Ā mē ujarēnh kot anhÿr. Na hte ā Tirtūm amnhī wÿr mē piitā mē hwÿr anē. Anē.

Mē pamā Jejus kīnh tÿx ā mē

pamā karō

Matēwre 10.37-38; Makre 8.34; Rukre 9.23-25; Juāw 12.26

²⁵ Tā nhūm Jejus mē ōrkwÿ rūm kato nē kormā Jerujarē hwÿr mō nhūm mē hohtō rax nē hkôt mō. Hāmri nhūm Jejus xa nē mē ho hakēx nē mē omu nē mē kām:

²⁶ —E kot ka mē atō amā ixkōt amnhī xām prām nē ā amnhī nhīpēx anē. Nē amā atō nē atōx nē anhīpēxā nē akatorxā japē htÿx tā kēr ka amā ixkīnh tÿx o wa mē hakrenh pa. Nē amā aprō nē akrajē japē htÿx tā kēr ka amā ixkīnh tÿx o wa mē piitā mē hakrenh pa. Nē amā ixkīnh tÿx o amā amnhī japē jakre. Kēr ka mē atō ixkōt amnhī xām kaxyw nē ā amnhī nhīpēx anē.

²⁷ —Koja mē ixpī pa mē anē ty. Tā mē ate ixkōt amnhī nhīpēx o mē apa xwÿnhjaja. Kōja mē ixtā mē apar mā tā kēr ka mē amā ixkīnh tÿx o mē umaj ixkaga hkēt nē. Kwār mē māmri tanhmā ixtā mē ato. Kot kaj mē nhÿrmā Tirtūm mē wa ixri axte amnhī xā kamā ajamak kēt nē atīr tūm nē amex rāhā apa ho apa. Nom kot kaj mē ixkīnhā jar pika ja kamā amā amex nē apa hprām xāj ixkaga hāmri nē nhÿrmā wa ixri atīr tūm nē apa hkēt nē. Anē.

Mē pahte amnhī kukamā paja-maxpēr mex ā mē pamā karō

²⁸ Nhūm Jejus arī mē kām kapēr nē mē kām:

—Kwa kēr ka mē ixkōt amnhī xunhwÿr kaxyw nē amnhī kukamā ajamaxpēr mex nē. Na htem amnhīm ōrkwÿ rūnh nhīpēx kaxyw hāmri nē hkukamā hamaxpēr mex nē. Nē kaxyw krax mā kuhē xā hkukamā hamaxpēr. Nē kaxyw kÿx pē kām hikwÿ xāja kukamā hamaxpēr. Nē ōkwaēja kukamā hamaxpēr. Nē hā pōja kukamā hamaxpēr. Ā na htem amnhīm ōrkwÿ rūnh nhīpēx kaxyw hkukamā hamaxpēr mex anē.

²⁹ Nom kot kaj mē hkukamā

ajamexpēr mex kêt nē ām kaxyw pī ho grēre nē hakā. Rỳ ra hā axāpēnh rax kurē ra amā ho anh̄yr kaga nē hkaga hpa nē hatur xām mēnh kêt nē. Hāmri nhūm mē hkwyjaja hānh mra nē omu nē atā hpēr o axkē. ³⁰ Nē axpēn mā ri ajarēnh o: “E ga mē ixkre mūj pumu. Na pre hipēx xw̄ynhja hkurē kām kaga nē hipēx par kêt nē.” Anh̄yr o axpēn mā ajarē. Ja pyrā nē kêt ka mē ixkôt amnhī xunhw̄yr kaxyw nē amnhī kukamā ajamexpēr mex nē. Nē ajamexpēr o: “Nā mē kot Jejus ā tanhmā ixto ht̄yx tā kot paj hkaga hkêt nē. Kot paj hkôt amnhī nh̄ipēx rāhā ho ri ixpa.” Anh̄yr o amnhī kukamā ajamexpēr. Hāmri nē rī kormā ixkôt amnhī xām. No kot ka mē umaj ixkaga hkukamā ajamexpēr hāmri nē ixkôt amnhī xām kêt kurē kumrēx.

³¹ —Nē koja krī hō kamā pahihiti nhō pōristi xohtō nē. Nē kutā nhām krī hō kamā pahihiti nhō pōristija grēre. Tā nhūm wa hpijapu kaxyw nhūm krī hō rūm pahihiti nhō pōristi xohtōja mē grēreta w̄yr mra. Hāmri nhūm kutā krī hō kamā mē ō pōristi grēre nhō pahi nh̄y nē tee ri mē amnhī kukamā hamaxpēr nē hamaxpēr o: “Kwa koja apu krī hō rūm pōristi xohtō raxja nhūm inhō pōristi grēreja mē axpēn kutā kuhē nē axpu nhūm mē inhnē mē himex. Nā inhō pōristi grēre kēnā.” Anh̄yr o hamaxpēr.

³² —Hāmri nē pahi hōta w̄yr ō kōwenatō mē. Kormā krī hō rūm mē hōnatōja mē htēp kêt nhūm mē kutā kumē nhūm ma mē kutā tē. Hāmri nē awry hā mē hkaxpa nē mē ō pahihiti mā kām: “E na mē inhō pahihiti akutā inhmē pa tē. Na inhmā: ‘Ma tē nē mē kām awjarē. Kot puj pēr mē papijapu hkêt nē. Kwarī. Kot puj mē tām axpēn xunhw̄y.’ Anh̄yr o kapēr nē mē akutā inhmē pa tē.” ā mē ujarēnh kot anh̄yr. Ja pyrā nē na htem mēmoj kukamā hamaxpēr mex nē rī ko-

rmā tanhmā amnhī nh̄ipēx to.

³³ —Tā kêt ka mē atō amā ixkôt amnhī xām prām hāmri nē pahita pyrā nē amnhī kukamā ajamexpēr t̄yx nē rī kormā tanhmā amnhī nh̄ipēx to. Kêt ka ate inhmā tanhmā amnhī nh̄ipēx to ho apa kaxyw hāmri nē inhgryk ā te ate amā amnhī japē hkêt pyrāk o mēmoj piitā mā anh̄ihkra karo pyrāk o amnhī nh̄ipēx. Hāmri nē rī kormā ixkôt amnhī xām. ³⁴⁻³⁵ No kot kaj mē amnhī kukamā ajamexpēr kêt nē at̄yx ri ixkôt amnhī xunhw̄yr japēr. Hāmri nē mēmo ar̄igro hā mē kot ixtā tanhmā mē ato xw̄ynh̄jē pymaj ra ixkaga mā. Hā kot kaj mē te mē ate kaxwa punu pyrāk o amnhī nh̄ipēx. Kaxwaja mē apkur xā kamā mex. Na htem amnhīm ho ō xānh nē kuku. Nom koja mēhō kamā pika hkwy mē nē ho ahkā hāmri tanhmā kot mē ho nē akup̄ym ho mex? ām mē kot hkap̄ir pix kaxyw koja mex. Ja pyrā nē kot ka mē atō ate inhmā tanhmā amnhī nh̄ipēx to ho apa hā amnhī jarēnh tā gaa nē amā ixkôt amnhī nh̄ipēx prām nōkati. Hāmri nē ra te ate kaxwa punu kap̄ir mā tāmta pyrāk. E kwa mē mēmoj tā ixujarēnhja ma nē mē urāk nē amnhī kukamā ajamexpēr mex nē. Anē.

15

Ōwēhti pikunor jarēnh

Matēwre 18.12-14

¹ Tā nhūm mē kot pahihiti mā hkwyjē pē kàxpore hkwy jam̄ynh xw̄ynh̄jē mē mē kot amnhī tomnuj xw̄ynh̄jaja Jejus kapēr mar kaxyw hw̄yr mra. ² Hāmri nhūm Parijew nhō xw̄ynh̄jē mē mē kot Tirtūm kapēr tūm o mē ahkre xw̄ynh̄jaja mē hā Jejus pumu. Hāmri nē kē wem axte axpēn mā tanhmā ho kapēr punuj to nē axpēn mā:

—Tk. Kwa na hte m̄jti axtem nē mē kot amnhī tomnuj xw̄ynh̄jaja amnhī w̄yr mē kuw̄y nē tōhā mē

kutã apku. Kwa mẽ kot amnhĩ tomnuj xwýnh kênã kot kêt mẽ kutã apku o pa. Anê.

³ Hãmri nhũm Jejus amnhĩ tã mẽ kuma nê tanhmã mẽ kãm kapêr to. Nom hprĩ hã mẽ kãm kapêr kêt nê. Kê ãm amnhĩ tã kuxi nê mẽ kãm ôwêhti pikunor jarê nê mẽ kãm:

⁴ —Koja mēhō ò ôwêhti xohtô nê. Nê ma nhÿri hamãr o pa. Hãmri nhũm pyxire nê hkwý kaga nê ma nhÿhÿm ahte tē nê akunok. Hãmri nhũm ò dōnja ma kot akupÿm piitã o mōr kaxyw hkwý ho pikuprōnh pa hãmri nê tee ri hkwý kaêx ã pikunor xwýnhhta japêr. Hãmri nê ma hkwý ho mō nê nhÿri kure. Kot nhÿri kutêp apku o ri pa kaxyw kure hãmri nê ma akupÿm pikunor xwýnhhta japêr o tē. Hãmri nê hapêr ryy nê nhÿri hwÿr kato. ⁵ Nê omu nê hkĩnh tÿx nê. Hãmri nê amnhĩ kre hã kumê nê ma akupÿm hkwý hwÿr o tē. ⁶ Hãmri nê mẽ ìhkô hã kumê nê hkĩnh nê hkrãmnhwÿjê ho akuprō nê òrkwÿ htã mẽ òrkwÿ xwýnhjê ho akuprō nê mẽ kãm: “Kwa na pre ixpê ixkriita ò akunok. Pa pre hapêr kãm ixihÿtÿx nê kãm ixkato nê omu nê ixkĩnh nê. Jakamã kwa wem mããnēn inhÿ hã akĩnh.” Anê.

—Ã mẽ ujarēnh kot anhÿr. ⁷ Ja pyrã nê koja mẽ kot amnhĩ tomnuj tÿx xwýnhjê hō tee ri amnhĩ pumu nê kot amnhĩ tomnuj kaga nê Tirtũm kôt amnhĩ xãm. Hãmri nhũm kaxkwa kamã mẽ piitã ja hã omu nê hkĩnh tÿx nê. Te ho my kot ôwêhti hpikunor xwýnh mã kator nê hkĩnh tÿxta pyrãk. Na hte Tirtũm tãm mẽ kot amnhĩ nhípêx o mẽ pa xwýnhjê pumu nê hkĩnh nê. Tã koja mēhō kot amnhĩ tomnuj tÿx tã ã amnhĩ nhípêx anhÿrja kaga nê Tirtũm kôt amnhĩ xãm hãmri nhũm amnhĩ tã omu nê hkĩnh tÿx nê. Jakamã na pa hte mẽ akurom ã mẽ kot amnhĩ tomnuj xwýnhjê hkôt Tirtũm kapêr o mẽ ahkre rãhã ho ri ixpa. Anê.

Nhũm pre ã Jejus mẽ kot tanhmã ho kapêr punuj to xwýnhjê mã amnhĩ jarēnh anê.

Kàxpore pikunor jarēnh

⁸ Nhũm Jejus arĩ mẽ kãm awjarê nê mẽ kãm:

—Nê ja. Kojã mēhō ni hikàxpore kēp 10. àpēnh o arĩgro pē 10 pãnhã kàxpore kēp 10. Tã ho pyxi nê ho akunok. Hãmri nê tee ri hapêr nê hkaprĩ nê. Hãmri nê kanê hpòk nê hitom kapōnh pē hprĩ hã hapêr o ri pa nê kãm kato. ⁹ Hãmri nê kupy nê hkĩnh nê hkrãmnhwÿjê ho akuprō nê òrkwÿ htã mẽ òrkwÿ xwýnhjê ho akuprō nê mẽ kãm amnhĩ jarê nê mẽ kãm: “Xê na pre ixpê ixkàxpore hōta akunok pa tee ri hapêr tã akupÿm kãm ixkato nê kupy nê ixkĩnh nê. Jakamã xê wem inhÿ hã mããnēn akĩnh.” ã mẽ ujarēnh kot anhÿr.

¹⁰ —Ja pyrã nê koja mẽ kot amnhĩ tomnuj xwýnhjê hō pyxire nê amnhĩ tomnuj kaga nê ixkôt amnhĩ xãm. Hãmri nhũm kaxkwa kamã mẽ piitã ja hã omu nê hkĩnh nê. Te mēhō ni kot kàxpore pikunor xwýnh mã kator nê hkĩnhhta pyrãk. Anê.

Mê hkra pikunor jarēnh

¹¹ Nhũm Jejus arĩ mẽ ahkre ho xa. Tirtũm kãm mẽ piitã mẽ hapê htÿx ã mẽ ahkre ho xa. No kê ãm hã kuxi nê kê we tanhmã mẽ kãm ujarēnh to nê mẽ kãm:

—Nê koja mēhō hkra my wa axkrut. ¹² Hãmri nhũm kot hapu ò papaj wÿr tē nê kãm: “E papaj. Ot pa awÿr tē. Kot kaj nhÿrmã ty pa wa amÿr pē akukrêx o ixarĩk. Jakamã e kwa tokyx atĩr ri amnhĩ kamã wa inhmã ho axkjê pa inhō ho amnhĩptar kurê kumrêx nã?” Anê. Hãmri nhũm kuma nê wa kãm hikukrêx o axkjê. Kot wa mã hkwý gō nê kot hapu mã hkwý gō. ¹³ Hãmri nhũm kot haputa ãm ri hipêêxã hkôt pa hkrãre hãmri nê kot kãm hikukrêx nhōr jamÿnh pa

ně ma nhÿhÿm o mō ně ho wēnē hpa. Hāmri ně hpānhā kàxpore jamÿ ně ma nhÿhÿm mō. Nhÿhÿm awry hā pika hō hwÿr ma mō. Mōō hāmri ně krī hō kamā htÿx ri tanhmā amnhī tomnuj to ho ri pa. Hāmri ně gaa ně ra mē hkuprÿjē hā kàxpore ho hapēx pa. Nē kagōxÿhti hā ho hapēx pa. Nē gaa hāmri ně hikàxpore hkēt ně ri pa.

¹⁴—Rōm nhūm pikaja kamā mē hā na wrÿk kēt ry rax ně. Nē gaa nhūm mē hpur kām mē kēp mē apkur xā hā mēōja hapēx pa. Jakamā nhūm mē hkra kot haputa kēp amrakati ně kām prām tÿx ně ri pa. Hāmri ně tee ri amnhī kukamā hamaxpēr. ¹⁵Hāmri ně amnhī to krī nhō xwÿnhjē mar o ri pa. Kot mē kām tanhmā àpēnh to ně hpānhā apkur kaxyw. Hāmri nhūm mēhō kot kām hkrit hagrō jamār kaxyw hā kumē nhūm ma hwÿr tē ně kām hamār o pa. Nom kot kām hamār o pata pānhā ām kām mēmoj nhōr kryre nhūm arī kām prām tÿx kumrēx.

¹⁶Nē tee ri kot hagrō kutā ōta kur prām ně tee ri omunh o pa. ¹⁷—Nē gaa hāmri ně tanhmā hamaxpēr to. Nē tee ri kot tanhmā amnhī tomnuj toja ā amnhī pumu ně hamaxpēr o: “Hēxta waa ně. Mān mūtār inhō krī kamā inhō papaj mā mē àpēnh xwÿnhjaja ixrom apkur mex o pa. àpkur mex ně nhūm mēō jakrēx prār rūnh tā pa jar mē hkīnhā prām xà ra ixtyk o mō. ¹⁸Nā kot paj ma akupÿm mō. Hāmri ně inhō papaj pumu ně ā kām amnhī jarēnh anē ně kām: ‘Kwa Papaj. Na pa pre ixpē akra hā amnhī tomnuj tÿx kumrēx nhūm ja apē omnuj ně. Nhūm Tirtūm pē ja omnuj ně. ¹⁹Jakamā na pa ixpē akra hā amā amnhī jarēnh ā xpijaàm ně. Ixte tām kēt kumrēx. Jakamā kwa xā kot pa amā mēmoj tā ixàpēnh o ri ixpa ka hpānhā inhā inhō pa apku nà?’ Anhÿr o kot pa kām amnhī jarē. Nā kot paj anē.”

²⁰—Anhÿr o amnhī kukamā hamaxpēr hāmri ně ma akupÿm mō. Mōō ně ra hpōx o mō. Nē kormā amÿm mōr ri nhūm ō papaj hwÿr rīt ně omu ně amnhī kra hā omunh kurē kumrēx ně hkīnh ně ma kutā hprōt ně tē. Omu ně kām hkaprī ně. Nē hwÿr hprōt ně hkaxpa ně kahti hkōt kumÿ. ²¹Hāmri nhūm kām amnhī jarē ně kām: “Kwa papaj. Na pa pre amnhī tomnuj ně nhūm ja apē omnuj ně. Nē Tirtūm pē ja omnuj ně. Jakamā ixte ixpē akra hā amā amnhī jarēnh ā xpijaàm. Ixte tām kēt kumrēx.” Anē. ²²Nom kormā kām amnhī jarēnh par kēt ri nhūm hipēēxā kām mē àpēnh xwÿnhjē mā akir ně mē kām: “E kwa mē atō ma tē ně kām ē mex ō py ně akupÿn ixkrata wÿr ho aprōt ně kām haxā. Nē hpar kà ně ĩhka kamā kàx ně amnē kām hamÿ ně ho aprōt. ²³Nē akupÿm aprōt ně mōx kra htwÿm mexta ō pumu ně unē ně apī. Nē mē ho anē pu mē ixkra hā pahkīnh ně apku. E mē amnhī prēprēk ně tokÿx ā amnhī nhīpēx anē. ²⁴Na pre ma ixpē mōr o te ixpē htyk pyrāk. Tā akupÿn mō ně ixwÿr pōj ně te akupÿm inhā htÿr pyrāk. Jakamā e mē tokÿj.” Anhÿr jakamā nhūm mē hā mōx kra pī ně ho anē ně hkīnh ně hā apkur o hkrī.

²⁵—Rōm nhūm hkra kot wata kormā pur kām htÿx àpēnh o xa. àpēnh o ām tā akupÿn hpōx o tē. Hāmri ně amnhī kukamā mē kot ri mēmoj tatak ně mē grer ma. ²⁶Hāmri ně tee ri hamaxpēr o tē ně ōrkwÿ hwÿr pōj ně kormā kapem xa ně mē hā mē àpēnh xwÿnhjē hō kukja ně kām: “Kwa mēmoj tā na ka wem ā akīnh rax anē?” ²⁷Anē nhūm kām: “Nā mēhō hkēt. Atō na akupÿn pōj nhūm anhīpēēxā omu ně hkīnh tÿx ně. Nē mē inhā anē pa mē hā mōx kra htwÿm mexja pī ně hā ho anē ně hā ixkīnh ně hkur o ixkrī.” Anē. ²⁸Hāmri nhūm tee ri htō jarēnh ma ně gryk tÿx ně. Hāmri ně gryk xàj kapem hkuk punuj o

mě omunh o xa nē mẽ hwỳr àr kêt nē. Hāmri nhũm hipéêxàja tee ri omu nē hwỳr kato nē tee ri kot mẽ hwỳr ho àr kaxyw ho anhỳr kaprỳ. ²⁹ Hāmri nhũm kām: “Tk. Kwa na pa hte amā ixápênh rũnh rāhā ho ri ixpa hā ra ixtā amgrà sohtô nē. Nē aa akapêr nhĩrôp tanhmā ixām to hkêt. Tā ka hte ixpumunh nē akĩnh nē ixtā mẽmoj tōx pĩr kêt nē. ³⁰ Tā nhũm akra kot haputa apê akukrêx kwỳ jamýnh pa nē ma o mō nē axtem nē mẽ hkuprỳjê mã òr par tā akupýn mō nē pōj. Ka omu nē akĩnh nē hā mōx kra twýmta pĩ. Nà kot paj mẽ awỳr ixàr kêt nē.” Anē.

—Hāmri nē gryk tỳx nē xa. ³¹ Hāmri nhũm ò papaj tee ri kuma nē kām: “Kwa na ri ā akapêr anhỳr kêt nē. Inhmā ajapê kênā. Na ka hte ixkôt apa ho apa rāhā nē. Nē ixkukrêx piitā kêp anhōō. ³² No atōja na pre te ixpê htyk pyrāk tā arĩ htĩr. Nē te pikunor pyrāk tā te ra akupým kator pyrāk jakamā na pa omu nē ixkĩnh nē. Nē inhmā hapê ho te mãânên inhmā ajapê pyrāk.” Anē.

—Ă mẽ ujarênh kot anhỳr. Ja pyrā nē koja mēhō te kot amnhĩ tomnuj tỳx o ri pa htā amnhĩ kaxyw Tĩrtũm mã hamaxpêr nē amnhĩ to kuwỳ nē hkôt amnhĩ xām. Hāmri nhũm amnhĩ tā omu nē hkĩnh nē. Nē kām hprām nē. No mẽ kajaja. Mē apê Parijew nhō xwýnhjê mẽ Tĩrtũm kapêr tũm o mẽ ahkre xwýnhjaja. Na ka htem mẽ kot amnhĩ tomnuj xwýnhjaja kot Tĩrtũm kapêr mar o kuhê hā mẽ omu nē Tĩrtũm kĩnhā akĩnh kêt nē. Nē te hkra kot wata jamaxpêr pyrāk o ajamaxpêr nē tee ri ja hā mẽ omu nē mẽ kamā agryk nē. Nē mẽ amā mẽ hprām nōkati. Anē.

16

Mě panhōxỳ nē Jejus kot mẽ pamā karō

¹ Tā nhũm kê Jejus axte hkôt ri mẽ pa ho mẽ pa xwýnhjê jahkre. No âm mẽmoj tā kuxi nē mẽ kām tanhmā ujarênh to nē mẽ kām:

—Nà koja mēhō hikàxpore rax xwýnhja kām àpênh xwýnh mã mẽmoj to wênê ho pa kaxyw âm. No nhũm kām ho mex kêt nē. Axtem nē kêp amarĩ mẽ kām mẽmoj to fiat par o mō. Hāmri nhũm ra mēhō kot ā amnhĩ nhĩpêx anhỳr ā omu nē ma ò patrāw wỳr tē nē kām harê. ² Hāmri nhũm tee ri harênh ma nē amnhĩ wỳr hā karō. Hāmri nhũm hwỳr tē nē axà nhũm kām: “Pa. Kwa xà âm hāmri na mẽ inhmā ajarê? Kwa nà mon ka ri axtem nē ā ixpê inhō mẽmoj nhĩpêx anê? E inhmā ate mẽ kām ho fiat par xwýnhjê nhĩxi hā kagà nē inhmā agō hāmri nē ma tē. Kot ka axte inhmā axápênh kêt nē rĩ amnhĩ pumu.” Anē.

³ —Hāmri nhũm kuma nē tee ri amnhĩ kukamā hamaxpêr nē hamaxpêr o: “Hêxta waa nē. Tanhmā kot paj amnhĩ to? Ixihtỳxre hā kot pa mēhō mã pur ā apê. Nom inhmā amarĩ ri ixàhwỳr o ri ixpa hprām kêt. Ixte amnhĩ kuk ā xpijaam.” Anē. ⁴ Hāmri nē tanhmā amnhĩ kukamā hamaxpêr to nē hamaxpêr o: “Nà kot paj amnhĩ wỳr ixte mẽ kām ho fiat xwýnhjê hā karō. Nē mẽ kām mẽ ò kōōta ahpar mã hkamê kê mẽ âm inhō patrāw mã hkwỳ pix gō. Kêr kê mẽ amnhĩ tā ixpumu nē kām ixkĩnh nē. Hāmri nē inhō patrāw kot ixkaga hā ixtā harênh ma nē ixkamā ukaprĩ japêr. Hāmri nē amnhĩ wỳr ixwỳ pa ahpýnhā mẽ kutā ixàpkur o ri ixpa nhũm prām ixpir kêt nē. Nà kot paj anē.” Anē.

⁵ Hāmri nē amnhĩ wỳr mẽ hā karō nhũm mẽ hwỳr mra. Nhũm mẽ omu nē ja mã kām: “E tanhmā na ka pre inhō patrāw pē mẽmoj to fiat to? E inhmā harê.” Anē. ⁶ Hāmri nhũm kām: “Na pa pre kêp orti hā à ho 100 nē ho fiat. Ota hā kagàta. Tā pa kormā kām amnhĩrer kêt nē.” Anē nhũm kuma nē kām: “Tôe ka

inhma. Kot paj amã anhõ köt o gri ka ãm kãm ho 50 pix nẽ agõ pa ixte anhõ köt ho ijapêx par pyrãk o anhîpêx.” Anẽ. ⁷ Hãmri nẽ hpãnhã nhãm ja mã kãm: “No ka. Tanhmã na ka pre kêp mẽmoj to fiat to?” Anẽ nhũm kãm: “Na pa pre kêp pãy hã xak o 1.000 nẽ ho fiat. Tã pa kormã hpãnhã kãm amnhîrer kêt nẽ.” Anẽ nhũm kãm: “Tõe. Kot paj hãmri amã anhõ köt o gri ka ãm kãm ho 800 pix nẽ agõ pa ixte anhõ köt ho ijapêx par pyrãk o anhîpêx.” Anẽ. Nhũm ã mẽ hipêx anẽ. Hãmri nẽ hamaxpêr o: “E. Na pa mẽ kãm mẽ õ köt o hkry pa. Kojã mẽ amnhî tã kãm ixkĩnh japêr.” Anẽ.

⁸ —Hãmri nhũm õ patrãwja ã kot mẽ hipêx anhÿr ã harênh ma nẽ kãm: “Tk. Kwa ate pa ixkukamã ajamaxpêr nẽ inhãm mẽmoj to anhÿr mex kêt tã ka amnhî kukamã ajamaxpêr mex pẽ ã mẽ hipêx mex anẽ.” Anẽ. Æ mẽ ujarênh kot anhÿr. Anẽ.

Nhũm pre ã Jejus mẽ kãm ujarênh anẽ. Hãmri nẽ mẽ kãm:

—Tã ja pyrã nẽ na hte mẽ kot Tĩrtũm köt amnhî xunhwÿr kêt xwÿnhjaja ãm amnhî pix kukamã hamaxpêr mex o pa. Jao amnhî kaxyw pix mã mẽ piitã tanhmã mẽ ho mex to ho pa. Mẽ kot amnhî tã mẽ omunh nẽ mẽ kãm mẽ hkĩnh nẽ amnhî xwar tanhmã mẽ ho mex to kaxyw nhũm htem ã amnhî nhîpêx anhÿr o pa. Tã mẽ ate ixkõt amnhî xunhwÿr xwÿnhjaja. Tĩrtũm kot tanhmã mẽ ate amnhî kwÿjê ho mex to hã amnhĩm mẽ ajarênh kaxyw kêr ka mẽ amnhî mẽ mẽ piitã mẽ hkukamã ajamaxpêr mex nẽ. Pẽ tanhmã mẽ ho mex to ho ri apa. Æ mẽ ate amnhî nhîpêx anhÿrja na mex. Nom kormã mẽ ate ã amnhî nhîpêx anhÿr kêt.

⁹ —Hêxta waa nẽ. Mon ka htem mẽ urãk nẽ ã axpên to mex anhÿr kêt nẽ? Kwa mẽ ãpênh xwÿnhnta kot amnhî nhîpêx pyrã nẽ tanhmã axpên to mex to o ri apa hkêt wehe.

Jao akukrêx nẽ akãxpore ho anhõxÿ hkêt nẽ. Kêr ka nhÿrmã ty nẽ Tĩrtũm wÿr api nhũm ja hã mẽ ato mex rax nẽ. Te ho kot õ patrãw mã ãpênh xwÿnhnta kot tanhmã mẽ ho mex to xwÿnhjê hwÿr mrrar nhũm mẽ kot amnhî xwar tanhmã ho mex tota pyrãk.

¹⁰⁻¹¹ —Na hte Tĩrtũm tanhmã mẽ pakute hã mẽ pahpumunh mex nẽ. Kojã mẽ amã mẽmoj gõ ka mẽ kãm hprãm xà hkõt ho anhõxÿ hkêt nhũm ja hã mẽ apumu nẽ axte mẽ amã mẽmoj gõ. Nom hpãnhã mẽ amã õr rax o wamta jakre nẽ kugõ. Nom kot ka mẽ ri mẽmojta o anhõxÿ ho ri apa nhũm tee ri ja hã mẽ apumu nẽ axte mẽ amã mẽmoj nhõr kêt nẽ. Kojã mẽ amã mẽmoj gõ ka mẽ ho anhõxÿ ho ri apa nhũm ja kêp homnuj nẽ.

¹² —Nẽ kot kaj mẽ jar Tĩrtũm kot mẽ amã mẽmoj nhõr xwÿnhja ho anhõxÿ ho ri apa. Hã kojã nhÿrmã kaxkwa kamã mẽ amã mẽmoj mex nhõr kêt nẽ.

¹³ —Nẽ kot kaj apyxi nẽ anhõ patrãw hamêxkrut nẽ arĩgro pyxi hã hamê wa kãm axãpênh o amÿkry hkêt nẽ. Kot kaj anẽ nẽ hõ gryk ã hõ kaga. Ja pyrã nẽ kot kaj mẽ jar pika ja kamã akãxpore nẽ akukrêx pix kukamã ajamaxpêr o ri apa hã kot kaj mẽ amã hapê htÿx nẽ mẽ kêp ho anhõxÿ ho ri apa. Nẽ akukrêx rax gryk ã Tĩrtũm kãm hprãm xà hkõt akukrêx o tanhmã axpên to ajuta hto ho ri apa hkêt nẽ. Ja pymaj kwa kêr ka mẽ ãm Tĩrtũm pix mã mãn ajamaxpêr rãhã ho ri apa. Jao te akukrêx nẽ akãxpore mã axãmnhix ri anhĩkra karo ho ri apa pyrãk. Anẽ.

Nhũm pre ã Jejus mẽ ahkre anẽ. ¹⁴ Hãmri nhũm Parijew nhõ xwÿnhjaja mar o kuhê. Na prem ra mẽ hikãxpore rax gryk ã Jejus kaga. Jakamã Æ kot mẽ kãm kãxpore jarênh anhÿrja ma nhũm ja mẽ kêp omnuij nẽ nhũm mẽ hã hpêr

o pikênh o kuhê. ¹⁵ Hâmri nhùm amnhĩ tã mẽ kuma nê mẽ kãm:

—Nã na ka htem te mẽ ate tãm mẽ kot amnhĩ nhĩpêx xwýnh pyrãk o amnhĩ nhĩpêx nom ri mẽ kãm amnhĩ to axêx o ri apa. No nhùm Tirtùmja kot tanhmã mẽ ate amnhĩ nhĩpêx to nê tanhmã mẽ ajamaxpêr to hkôt mẽ apumunh par. Nê hprĩ hã mẽ anhõxy hã mẽ apumu. Te mẽ ate tãm amnhĩ nhĩpêx pyrãk nom mẽ anhõxy kamã na ka htem apa. Mëmoj te mex pyrãk nhùm htem omu nê mex ã hkamnhĩx. No nhùm Tirtùm ãhpumunh tỳx xã hkôt hprĩ hã mẽmojta pumu nhùm kêp omnuj nê. Më akurom omnuj ã omunh kurê kumrêx. Na hte hprĩ hã mẽ ate amnhĩ nhĩpêx ã mẽ apumu. Anê.

Tirtùm kapêr aa hapêx kêt ã harênh

Matêwre 5.17-18

¹⁶ Nhùm Jejus arĩ mẽ ahkre nê mẽ kãm:

—Nê na pre finat Mojesja kumrêx mẽ kãm Tirtùm kapêr kwý hã kagã. Tã nhùm hpãnhã Tirtùm nhỹ hã kapêr jarênh xwýnh kwýjaja mãânên mẽ kãm hkwy hã kagã. Nhùm prem kuma nê mẽ hkôt amnhĩ nhĩpêx o ri pa. Tã nhùm finat Juãw Paxisja mẽ hpãnhã kato nê Tirtùm kapêr o mẽ ahkre ho ri pa. Tã pa hpãnhã ho mẽ ajahkre ho ri ixpa nhùm mẽ ohtô nê ixkôt amnhĩ xunhwý nê kãm ixkapêr kôt pix mã amnhĩ nhĩpêx o ri pa hprãm nê.

¹⁷ —Tirtùm kapêr tùmja mex o mex. Kojã aa hapêx kêt nê. Kojã nhỹrmã kaxkwa nê pika wa hapêx pa no nhùm Tirtùm kapêr tùmja aa hapêx kêt nê. Kojã rãhã ho rãhã nê aa ãhkjê ho mênh kêt nê. Anê.

Më pahte xapên kaga hkêt ã mẽ pamã karô

Matêwre 5.31-32, 19.9-12; Makre 10.2-12

¹⁸ Nhùm Jejus arĩ mẽ ahkre nê mẽ kãm:

—Nê kêt ka mẽ aprô kaga hkêt nê apa. Kot kaj mẽ hkaga nê hpãnhã nhãm hõ ho aprô nhùm Tirtùm noo mã te ate wam aprô kamã nhãm ho amnhĩkati pyrãk. Nhùm ja kêp omnuj nê. Rý ka ra mēhõ kot hprô kaga xwýnhhta ka hpãnhã ho aprô. Nhùm Tirtùm noo mã te ate wam mjên pê ho amnhĩkati pyrãk. Nhùm Tirtùm pê ja omnuj nê. Anê.

Hikàxpore rax xwýnh mẽ kêp amrakati xwýnh wa harênh

Rukre 6.20-26

¹⁹ Nhùm Jejus arĩ mẽ ahkre kamã mẽ kãm awjarê nê mẽ kãm:

—Kojã mēhõ kàxpore rax xwýnh ê mex pix kãm ri pa. Nê apkati mẽ apkur mex o pa. ²⁰ Nhùm amrakati xwýnh pê Rajareja hkã nhyre nê arĩ pry kamã ãhwýr o hkrĩ. Nhùm htem hamý nê ma o pa nê hikàxpore rax xwýnh nhõrkwy jakwakrem haxwý. ²¹ Nhùm õ jakrêx kwý hkrêr prãm xãj hakwa krem ãhwýr o hkrĩ. Nhùm rop hwýr mra nê hkã nhy kunhnwýnh o kuhê.

²² —Tã nhùm Rajare ty nhùm Tirtùm kapêr o mẽ wrýk xwýnhjaja hwýr wrý nê ma akupým kaxkwa hwýr hkarô ho mō nê ho api. Hâmri nhùm kaxkwa kamã mẽ pahpãm Apraãw nhĩhkô hã hkĩnh nê apkur mex o hkrĩ.

—Tã nhùm hikàxpore rax xwýnhhta mãânên hkôt ty. Nhùm hkwyjaja hã akuprô nê hã mur nê ma o tē nê haxã. ²³ Hâmri nhùm hkarô ma mẽ kot amnhĩ xã htýx kamã hamak tùm xã pê kuwy maatita wýr ma mō. Nê kamã amnhĩ xã htýx kãm hamak rãhã ho pa. Hâmri nê amnhĩ xã hã maj kãnhmã rít nê kaxkwa kamã Apraãw pumu. Nhùm Rajare ra kuri mex nê nhỹ. ²⁴ Hâmri nhùm tee ri wa omu nê Apraãw mã akapêr nê kãm: “Kwa Apraãw. Kwa we ixkamã axukapri nê ixwýr Rajare mẽ kê ixwýr tē nê ãhkrakrã ho gô htok nê ho inhõhto jakry. Na pa

kuwy kamā amnhī xà htỳx kām ijamak tỳx kumrēx.” Anē. ²⁵ Hāmri nhūm kuma nē kām: “Tk. Nà kot pa awỳr mēnh kēt nē. Nà ka pre atīr ri amex nē akīnh nē ri apa. No nhūm Rajare akīnhā hkà nhy rax nē amnhī xà htỳx kām hamak rāhā ho ri pa. Tā ra jar inhīhkō hā hkīnh nē pa. Ka pre kurom amex nē apa htā kot kaj hpānhā amnhī xà htỳx kām ajamak rāhā ho ri apa. ²⁶ Nē pahkaēx kām ahkaprỳ griā. Jakamā nhỳhnh kot kēt awỳr rē? Ka ajaxwỳja nhỳhnh kot ka kēt mē ixwỳr rē?” Anē.

²⁷—Nhūm ā kām kapēr anē nhūm tee ri kuma nē kām: “Kwa tō ma inhō krī hwỳr mān amē kē ma ixkwỳjē hwỳr wrỳ. ²⁸ O mỳj arī inhō krī kamā ixtō kēp 5 nē arī htīr nē pa. Kē wa mē kām awjarē kē mē amnē kuwy hwỳr pa pymaj tokyx amnhī tomnuj kaga nē Tīrtūm kōt mān amnhī xunhwỳ nē hkōt ri amnhī nhīpēx o pa.” Anē.

²⁹—Hāmri nhūm Apraāw kām: “Nà pa mē hwỳr mēnh kēt nē. Ra mē kuri Tīrtūm kapēr jarēnh xwỳnhjē mē Mojes kot Tīrtūm kapēr ā kagā kēnā. Kē mē kamā harē nē ja ma nē rī tām tanhmā amnhī nhīpēx to.” Anē. ³⁰ Hāmri nhūm tee ri kuma nē kām: “Kwa nà. Koja mē kagāja mar kēt nē. No kēt Rajare na pre ra htyk tā akupỳm htīr jakamā koja mē hwỳr wrỳ nē mē kām awjarē nhūm mē akupỳm htīr ā omu nē kapēr ma hāmri nē amnhī tomnuj kaga kurē kumrēx. Kwa nà ā ri anhỳr kēt nē mē hwỳr amē hēxta waa nē.” Anē.

³¹—No nhūm kām: “Nà koja mē Tīrtūm kapēr ā kagā mar kēt ā koja mē määnēn Rajare tyk nē akupỳm htīr nē mē hwỳr wrỳk nē kot mē kām tanhmā ujarēnh to hā mar kēt nē. Jakamā kwarī pa mē hwỳr mēnh kēt nē. Kot paj ho anē nē ām ixte mē hwỳr mēnh kaprỳ pyrāk o amnhī nhīpēx.” Anē. Ā mē ujarēnh kot anhỳr. Anē.

17

Mē kot Jejus nē mē no kupyř ā mē harēnh

Matēwre 18.6; Makre 9.42; määnēn Rōmān 1.32; Sikūn Pētre 2.1, 2.18

¹⁻² Tā nhūm Jejus hkōt mē pa ho mē pa xwỳnhjē jahkre ho nhỳ nē mē kām:

—E kot paj mē kot ixkōt amnhī xunhwỳr tohtuj anhỳr xwỳnhjē jarē ka mē inhma. Nà koja mēhō mē hwỳr tē nē inhnē mē kām kapēr. Mē kot mē mar nē amnhī tomnuj prām xàj tanhmā mē kām kapēr to. Hāmri nhūm mē mar xà hkōt tanhmā amnhī tomnuj to. Hā koja Tīrtūm ja hā omu nē kot inhnē tanhmā kām nē xwỳnhta pumu nē ja hā homnuj tỳx nē. Te mē kot mēhō pynēnh nē mut ā kēn pytī hō nhōr nē ma o htēm nē gō rax kām mēnh pyrāk o koja hipēx. Te ho ja pyrāk no ām homnuj tỳx o ja jakre. Jakamā kwa mē ixkapēr ma nē kām ajamaxpēr tỳx rāhā ho ri apa. Anē.

Mē pahte amnhī tā tanhmā mēhō hto hkēt ā mē pamā karō

Matēwre 18.21; Makre 11.25-26; määnēn Epes 4.32; Korosē 3.13

³ Nhūm Jejus arī mē ahkre nē mē kām:

—Nē koja ixkōt atōjē hō tanhmā atomnuj to. Ka amnhī tā omu hāmri nē ma hwỳr tē nē ja hā kām akapēr nē kām: “Kwa mon ka axtem nē ri ā inhīpēx anē ixtō? Kwa nà ri ā inhīpēx anhỳr kēt nē.” Anē hāmri nhūm amnhī tā ama nē amā: “Nà na pa tee ri ixte tanhmā atota ā amnhī pumu nē ixkaprī nē. Nà kot paj axte ā ri anhīpēx anhỳr kēt nē. Kwa kēr ka axte tanhmā ja mā ajamaxpēr to hkēt nē. Te ate amnhī katut kōt mēnh pyrāk o hipēx pu akupỳm tām axpēn nhīpēx o papa.” Anē. Koja ā amā kapēr anē ka amnhī tā ama hāmri nē axte tanhmā kot atoja mā ajamaxpēr kēt nē.

⁴—Koja arīgro pyxi hā xatā tanhmā atomnuj to japēr. Hāmri

nē xatā tee ri ja hā amnhī pumu nē awÿr mra nē xatā amnhī tā amā kapēr nē amā: “Pa ot pa awÿr tē. Na pa ra ixkaprī nē. Kwa ixte ā anhīpēx anhÿrja pumu nē ām omu. Kot paj axte hkēt nē.” Anhÿr o xatā amā kapēr. Nē ra axte tanhmā atomnuj to nē kē axte awÿr tē nē ā amnhī tā amā kapēr anē. Nom kēr ka ama nē kamā agryk kēt nē. Ām xatā kām: “Nà kot puj anē nē akupÿm tām axpēn nhīpēx. Kot paj axte tanhmā ate ixtota mā ijamaxpēr kēt nē. Kot puj ja ho pajapēx nē tām axpēn nhīpēx o akupÿm papa.” Anhÿr o kēr ka mē xatā axpēn nhīpēx anhÿr rāhā ho ri apa nē aa jam anhÿrer kēt nē. Anē.

Mē pahte mēmoj tā Tirtūm wÿr hā mē pajarēnh

Matēwre 17.20-21, 21.21-22; Makre 11.23

⁵Tā nhūm Jejus nhÿ hā mē ahkre ho mē pa xwÿnhjaja hāmri kām:

—Kwa Pahihti. Tanhmā mē ixta pa mē amnhī kaxyw Tirtūm kōt ijaxmaxpēr tÿx rāhā ho ri ixpa. Anē.

⁶Hāmri nhūm mē kām:

—Nà ra mē ate amnhī kaxyw hkōt ajamaxpēr jakamā na ra amnhī tā mē apumu. Jakamā mē ate hkōt amnhī nhīpēx kukwak ri na ka htem mēmoj tā awÿ nhūm mē ate mēmoj tā hwÿr xà hkōt mē amā tanhmā mēmoj nhīpēx to. Te mē ate pī hpār mÿj mā akapēr nē kām: “E amnhī jarē nē ma tē nē gō xujanār kām mām mrō.” Anē nhūm kot amar nē amar xà hkōt ā kot amnhī nhīpēx anhÿrta pyrāk. Ja pyrā nē kot kaj mē ate Tirtūm kōt amnhī nhīpēx o apa kukwak ri mēmoj tā awÿ nhūm mē ama nē mē amā mēmoj tanhmā ho. Rÿ mē amā mēmoj gō. Anē.

Te mē pahpē Tirtūm mā paxàpēnh xwÿnh pyrāk

⁷Nhūm Jejus arī mē ahkre nē mē kām:

—Nē ja. Kot kaj mē amā mē àpēnh xwÿnh kwÿjaja nhūm hō amā mēmoj tā àpēnh o pa ē ho anhÿr pa. Hāmri tanhmā kot kaj kām akapēr to wehe? Xà kot kaj kām: “E hāmri axàpēnhhta kaga nē tē nē nhÿ nē apku.” Anhÿr o kām akapēr?⁸ Nà kot kaj kām anhÿr kēt nē. Kot kaj kām: “E kwa tokyx tē nē hpānhā inhmā inhō hā apē. Kot pa ixàpkur pa ka ixpānhā nhÿ nē apku.” Anhÿr kām akapēr. Kēp amā àpēnh xwÿnh jakamā ka ā kām akapēr anē.⁹ Ja pyrā nē kot puj mē Tirtūm kot mē pamā mēmoj tā karō xà hkōt tanhmā kām amnhī nhīpēx to ho ri papa. Mē ō patrāwta pyrā nē kot tanhmā mē pamā karō hto xà hkōt pu mē amnhī nhīpēx.

—Xà na htem mē ō patrāw mā mēmoj tā àpēnh pa hāmri nē hkwyjē mā amnhī to jarkrar o ri pa nē mē kām: “E ka mē ixpumu. Na pa hte inhō patrāw mā ixàpēnh mex o mē hakre ka mē ja hā ixpumu. Hēxta waa nē. Mon pa hte ri axtem ā amnhī nhīpēx anē?” Anhÿr o xà kot kaj mē kām amnhī to jarkrar o ri apa? Nà na ka htem ā amnhī nhīpēx anhÿr kēt nē.

¹⁰—Tā pa hte mē ō patrāwta pyrā nē tanhmā mē amā mēmoj tā karō hto ho ixpa. Jakamā kēr ka mē inhma nē ixte mē amā mēmoj tā karō xà hkōt tanhmā inhmā amnhī nhīpēx to ho ri apa. Hāmri nē hā amnhī to jarkrar pē amnhī jarēnh o: “Ām hāmri na pa ā Jejus mā amnhī nhīpēx anē. Hēxta waa nē. Ixpē Jejus mā tanhmā ixte amnhī nhīpēx to mex xwÿnh na pa.” Anhÿr o amnhī to jarkrar kēt nē. Kēt ām amnhī jarēnh o: “Nà ixte kām tanhmā amnhī nhīpēx to ho ixpa xwÿnh pix na pa. Na hte mēmoj tā inhmā karō pa kuma nē ŷ hā tanhmā kām amnhī nhīpēx to.” Anhÿr o amnhī jarēnh o ri apa. No ri amnhī krā hkōt atÿx tanhmā amnhī to jarkrar to ho ri apa hkēt

ně. Aně.

Jejus kot mẽ ho 10 nẽ akupỹm mẽ ho mex ã harẽnh

Matêwre 8.1-4

¹¹ Tã nhũm Jejus arĩ Garirej rũm pika pê Samar hkàx ã Jerujarẽ hwỳr kormã mō. ¹² Nẽ nhỹri krĩ hõ htêp o mōr mẽ nhũm krĩ pu hã ri mẽ pa xwỳnhjaja kêp 10 nẽ kutã mra. Mẽ hkànhy hkro htỳx xwỳnhjaja kutã mra nẽ hkaxpa nẽ amỹm kuhê nẽ omu. ¹³ Hãmri nẽ kãm:

—Pa Pahihti. Kwa mẽ ixpumu nẽ mẽ ixkamã axukaprĩ nẽ tanhmã mẽ ixto mex to. Aně.

¹⁴ Hãmri nhũm mẽ kãm:

—Tõe. Nà kot paj mẽ ato mex. E mẽ mãmri awjanã nẽ ma akupỹm mẽ anhõ patrejê hwỳr mra kẽ mẽ akupỹm mẽ akã mex ã mẽ apumu. Aně.

Hãmri nhũm mẽ kuma nẽ kapêr mar xà hkôt awjanã. Kà nhy rãhã awjanã nẽ ma akupỹm patre hwỳr mra. Nẽ kormã akupỹm hwỳr pry hã mrar rãhã piitã hkà mex pa. ¹⁵ Hãmri nhũm ãm pyxi nẽ hkwỳjê rom awjanã nẽ akupỹm Jejus wỳr Tĩrtũm mã mex o mex ã harẽnh o hwỳr tẽ. ¹⁶ Hãmri nẽ Jejus kaxpa nẽ kutã hkõnkrã ho tẽm nẽ nhỹ nẽ amnhĩ tã kãm kot ho mex ã kãm amnhĩ jarẽ. Kwỳjê hkĩnhã kêp Ijaew kêt axtem kêp Samar nhõ xwỳnh tã mẽ kurom akupỹn hwỳr tẽ nẽ kãm mex o mex ã harẽ. ¹⁷⁻¹⁹ Hãmri nhũm amnhĩ tã kuma nẽ kãm:

—No mẽ akwỳjaja? Ixte mẽ ato 10 nẽ mẽ ato mex tã ka ãm kapxipix awjanã nẽ akupỹn ixwỳr tẽ. Akwỳjê hkĩnhã apê Ijaew kêt tã akupỹm amnhĩ mex ã amnhĩ pumu hãmri nẽ mẽ kurom awjanã nẽ Tĩrtũm mã mex o mex ã harẽnh o ixwỳr tẽ. Hêxta waa nẽ. Mo na hte ixkwỳjaja apyrã nẽ amnhĩ kaxyw ixkôt hamaxpêr kêt nẽ? E kãnhmã xa nẽ mãmri ma ajamakêtkati nẽ akĩnh nẽ ma akupỹm tẽ. Aně.

Jejus akupỹn wrỳk xà hã arĩgro jarẽnh

Matêwre 24.23-24, 24.37-44; Makre 13.32-37; määnên Wam Tesarõn 5.2-8; Sikũn Pêtre 3.3-10

²⁰⁻²¹ Tã nhũm Parijew nhõ xwỳnh kwỳjaja Jejus wỳr mra nẽ omu nẽ kãm:

—Kwa mẽ inhmã mẽmoj jarẽ. Xà koja apu Tĩrtũm tokyx kot mẽ pahwỳr mênh mã xwỳnhnta mẽ nhũm mẽ pahwỳr wrỳ nẽ mẽ pahto amnhĩptar kurê kumrêx nã kormã? Aně.

Hãmri nhũm mẽ kuma nẽ mẽ kãm amnhĩ jarẽ. Te ho nhãm mênhõ jarẽnh pyrã nẽ mẽ kãm:

—Nà ra kot mẽ ho amnhĩptar o pa kênã. Nom nhỹri hkrĩ xà kamã mẽ ho amnhĩptar o hkrĩ hkêt nẽ. Na htem amnhĩ kaxyw hkôt hamaxpêr nẽ hkôt amnhĩ xunhwỳ hãmri nhũm kêp mẽ õ pahihti hã mẽ ho amnhĩptar o pa. Nẽ mẽ kãm mẽ hamaxpêr mex gõ nhũm htem hkôt ri hamaxpêr mex o pa. Aně.

²² Hãmri nẽ hpãnhã hkôt mẽ pa ho mẽ pa xwỳnhjê mã kapêr. Mẽ kot nhỹrmã tee ri kamã hamak o pa hã mẽ kãm kapêr nẽ mẽ kãm:

—Kot kaj mẽ nhỹrmã tee ri amã tokyx akupỹn ixwrỳk nẽ ixte mẽ ato amnhĩptar prãm xaj tee ri inhmã anojarêr kaprỹ ho ri apa. Nẽ axpên mã ri ijarẽnh o: “Hêxta waa nẽ. Mo na we Pahihti tokyx akupỹn mẽ pahwỳr wrỳk kêt nẽ?” Anhỹr o inhmã anojarêr o ri apa pê ixkamã ajamak rãhã ho apa.

²³ —Nẽ koja mẽ ra akupỹn ixwrỳk ã tanhmã mẽ amã ixto hêx to ho pa. Nhỹri ixkuhê nhũm mẽ kot ixpumunh ã mẽ amã ixto hêx o pa. Nom kêr ka mẽ ama nẽ ãm mẽ ama. ²⁴ Kot paj nhỹrmã akupỹn mẽ awỳr ixwrỳk kaxyw nhũm mẽ pika piitã hkôt akupỹn ixwrỳk kãm anhĩpê ixpumu. Te mẽ piitã mẽ kot anhĩpê na jaxênh pumunh pyrãk o kot kaj mẽ apiitã ixpumu. ²⁵ Nom kormã jar pika ja kamã

ixpa ri koja mẽ ohtô nê ixkaga pa amnhĩ xà htỳx kamã ijamak kãm ty. Hãmri nê mẽmo arĩgro hã ma akupỳm kaxkwa hwỳr api. Hãmri nê nhỳrmã akupỳn mẽ awỳr wrỳ.

26 —Nà kot paj nhỳrmã man akupỳn mẽ awỳr wrỳ. Akupỳn ixwrỳk xà hã arĩgrota ã koja jar pika ja kamã mẽ pa xwỳnhjaja htỳx ri tanhmã amnhĩ tomnuj to ho pa. Te amnepêm finat Noehti htĩr ri mẽ kot htỳx ri tanhmã amnhĩ tomnuj to ho pa pyràk o koja mẽ amnhĩ nhĩpêx o pa. 27 Na prem amnhĩ kaxyw Tĩrtũm mã hamaxpêr o pa hkêt nê. Nê ãm jar pika ja kamã mẽ kot amnhĩ nhĩpêx pix kukamã hamaxpêr o ri paja o ãm kôt pix mã tanhmã ri amnhĩ nhĩpêx to ho pa. Rôm nhũm Noehti gô htàm pymaj pàr raxja nhĩpêx nê kãm axà. Nhũm prem hã omu nê ãm omunh o pa nê tanhmã ri amnhĩ kukamã hamaxpêr to hkêt nê. Tã nhũm nata mẽ haer pè wrỳ. Hãmri nê wrỳk rax o ra pika piitã hanhi nhũm mẽ piitã pikaprãr pa.

28 —Akupỳn ixwrỳk xà hã arĩgrota ã koja mẽ mãânên te amnepêm Sotô nhõ xwỳnhjaja kot htỳx ri tanhmã amnhĩ tomnuj to pyràk o amnhĩ nhĩpêx. Finat Rohti kormã htĩr ri mẽ kot htỳx ri tanhmã amnhĩ tomnuj to ho pata pyràk o koja mẽ amnhĩ nhĩpêx. Na pre hte Sotô nhõ xwỳnhjaja ãm pika ja kamã mẽ kot amnhĩ nhĩpêx pix kukamã hamaxpêr o ri pa. Nê ãm kôt pix mã ri amnhĩ nhĩpêx o pa. Nê htỳx ri amnhĩ xàpkur xà pix kukamã hamaxpêr. Nê mẽ hpur kãm ri àpênh pix kukamã hamaxpêr. Nê ri amnhĩ xujaprôr pix kukamã hamaxpêr nê xapên mã mẽmoj to wênê pix kukamã hamaxpêr. Nê amnhĩm òrkwỳ nhĩpêx pix kukamã hamaxpêr. Æ na prem pika ja kamã mẽ kot amnhĩ nhĩpêx pix kukamã hamaxpêr o ri pa anhỳrja o amnhĩ

kaxyw Tĩrtũm mã hamaxpêr o pa hkêt nê.

29 —Tã nhũm Rohti mẽ ò krĩ rũm kator mẽ nhũm Tĩrtũm krĩ nhõ xwỳnhjaja kot amnhĩ tomnuj tỳx o paja mỳrapê mẽ himex pa. Jao kaxkwa rũm mẽ hipy mẽmo hpòk kwỳ rê nhũm mẽ hkaxàr pa. 30 Tã akupỳn mẽ awỳr ixwrỳkja mẽ koja mẽ te Rohti nhõ krĩ kamã mẽ kot amnhĩ nhĩpêx pyrã nê htỳx ri amnhĩ tomnuj pix o pa.

31 —Nê akupỳn ixwrỳta ã ka mẽ anhòrkwỳ nhĩmòk ã hkrãmnhên o akrĩ japêr nê akupỳn ixwrỳk kãm ixpumu. Hãmri nê akukrêx wỳr axàr nê hõ hpyr mã ajamaxpêr kêt nê. Rỳ ka mẽ apur kãm axàpênh o akuhê japêr nê akupỳn ixwrỳk kãm ixpumu. Hãmri nê akupỳm anhòrkwỳ hwỳr atêm mã ajamaxpêr kêt nê. Mo kaxyw kot ka kêt hwỳr tê? Kêt ãm inhmã mẽ ajapê hã akupỳn mẽ awỳr ixwrỳk mã ajamaxpêr o akĩnh nê ixpumunh o akuhê.

32 —Nê kêt ka mẽ Rohti prõ kot tanhmã amnhĩ nhĩpêx toja mã ajamaxpêr rãhã ho ri apa. Na pre Tĩrtũm kapêr nhĩròp xa nê amnhĩ katut kôt Sotôta wỳr rĩt hãmri nê ã amnhĩ nhĩpêx anhỳrja mỳrapê htyk kurê kumrêx. Tã kêt ka mẽ ho uràk nê amã akukrêx rax japê xaj ixkôt amòr kaxyw anhĩtôt kêt nê.

33 —Nê kwa kêt ka mẽ jar pika ja kamã tanhmã mẽ ate amnhĩ nhĩpêx to pix kukamã ajamaxpêr o ri apa hkêt nê. Nê mẽ akukrêx rax pix kukamã ajamaxpêr kêt nê. Koja nhỳrmã ja piitã mẽ apê hapêx pa. Mẽ ate kãm anhĩhkra karo hpar pyràk o piitã hipêx hãmri nhũm Tĩrtũm ja hã mẽ apumu nê hpãnhã nhỳrmã mẽ amã mẽmoj mex nhõr rax nê.

34 —Nê kot paj kamàt kãm akupỳn ixwrỳk japêr nhũm nhỳri mẽhõ ra ixkôt amnhĩ xãm xwỳnh mẽ mẽhõ kot ixkôt amnhĩ xãm kêt xwỳnh wa par kãm nòr japêr.

Hāmri pa amnhī wŷr ra ixkôt kot amnhī xām xwŷnhta o api nhūm kot ixkôt amnhī xām kêt xwŷnhta arī gôr nê nô. ³⁵ Rŷ pa arīgro hā akupŷn ixwŷrk japêr nhūm mēnijê hō wa hamēxkrut nê harôj kahuk o âm japêr. Hāmri pa ra kot ixkôt amnhī xām xwŷnhja ho api nhūm kot ixkôt amnhī xām kêt xwŷnhja ahte arī harôj kahuk o xa. Hāmri nê hamaxpêr mex kêt kumrêx o xa. ³⁶ Rŷ koja mēmyjê hō wa axkrut nê hpur kām apênh o âm japêr. Pu pa amnhī wŷr kot ixkôt amnhī xām xwŷnhta o api nhūm kot ixkôt amnhī xām kêt xwŷnhta pur kām ahte arī apênh o xa. Hāmri nê tee ri hkràmnhwŷ hkukamā hamaxpêr o xa. Anê.

Nhūm pre ā Jejus hkôt mē pa ho mē pa xwŷnhjê mā amnhī jarênh anê. ³⁷ Hāmri nhūm mē kuma nê kām:

—Kwa nhŷri koja mēmoj ā amnhī nhîpêx anê? Anê.

Hāmri nhūm mē kām:

—Nà koja nhŷri mēmojja ā amnhī nhîpêx anê ka mē omunh kurê kumrêx. Te nhŷri mēmoj kro nê nōr nhūm nhônhti kot omunh nê hā htor nê hpinhîpanh nhūm mē kot hā omunh kurê kumrêxta pyrāk. Anê.

18

Mē pahte Tirtūm mā amnhī jarênh rāhā ho papa hā mē pamā karō

Rukre 11.5-8; määnēn Wam Tesarōn 5.17

¹ Tā nhūm Jejus hkôt mē pa ho mē pa xwŷnhjê mā mēmoj tā karō. Mē kot tanhmā Tirtūm mā amnhī jarênh to hā mē kām karō. Mē kot xatā kām amnhī jarênh o pa nê amnhī kaxyw kām hamaxpêr rāhā ho pa kaxyw. No âm hā kuxi nê tanhmā mē kām hā ujarênh to nê mē kām:

² —Koja nhŷri krī hō kamā juis-tija kām Tirtūm prām nōkati. Nê määnēn kām amnhī kwŷjê hprām nōkati htā kêp juisti nê tanhmā mē

kām kapêr to ho hkrī. ³ Jakamā nhūm mēhō ni pê mjên htyk xwŷnh. Nhūm hte mēhō xatā tanhmā kêp ō mēmoj to ho pa. Hāmri nhūm tee ri amnhī tā omu nê xatā juistita wŷr mra nê kām harê nê kām: “Xê gāa nê. Na hte pahkwŷjê hōja ixtomnuj rāhā ho pa. Xê ixtā tanhmā kām akapêr to kê tām inhîpêx.” Anê. Nê xatā hwŷr mra nê amnhī to kuwŷ nê xatā hwŷr mra nê amnhī to kuwŷ. ⁴⁻⁵ No nhūm kuma nê âm kuma. Kām hkwyjê ho ajuta hprām kêt jakamā âm kuma. Tā nhūm xatā hwŷr mra. Gaa nhūm rī kām mar kaga nê. Hāmri nê hamaxpêr o: “Tk. Hêxta waa nê. Jahti na hte xatā ixwŷr mra nê tanhmā inhmā amnhī jarênh to. Nê âm xatā ixwŷr mra. Nà na pa ra inhmā mar kagyk nê. E pa tokyx tanhmā nê kot tanhmā ho xwŷnhta mā ixkapêr to. Inhmā Tirtūm pyma kamā rŷ inhmā ixkwŷjê kaprī kamā pa tanhmā nê kām nê hkêt tā kot pa anhŷr kêt nhūm amnhī tā inhmā harênh pix nê pa ra mar kurê ixkrā tātāk nê.” Anhŷr o hamaxpêr. Ā mē ujarênh kot anhŷr.

⁶ —Juisti tām hamaxpêr kêt tā nhūm nija xatā hwŷr mrar nê amnhī to hwŷr jakamā nhūm jatā tanhmā ho ajuta hto. ⁷⁻⁸ No kêt Tirtūmja. Xàn ka htem mēmoj tā awŷ nhūm juisti punutita pyrā nê mē ama nê âm mē ama? Nà koja ā amnhī nhîpêx anhŷr kêt nê. Kot ka mēmoj tā kām amnhī jarê nhūm ama nê tanhmā amā mēmoj to rŷ tanhmā amā amnhī nhîpêx to. Juistita rom mē pakamā ukaprī xwŷnh na. Tā kot paj nhŷrmā akupŷn wrŷ nê mē apumu ka mē arī amnhī kaxyw hkôt ajamaxpêr mex pê kām amnhī jarênh rāhā ho ri apa pa ja hā mē apumu nê ixkīnh tŷx nê. Ja na inhmā hprām. Anê.

Tanhmā mē kot Tirtūm mā amnhī jarênh to hā mē harênh

Matêwre 6.5-8; määnēn Wam

Pêtre 5.5-6

⁹ Tã nhũm Jejus mẽ kot amnhĩ to mex o hkwyjê jakrenh ã amnhĩ to jarkrar o ri mẽ pa xwýnhjê pumu nê tanhmã mẽ kãm kapêr to. Nom mẽ kot amnhĩ to jarkrarta ã kuxi nê mẽ kãm awjarê nê mẽ kãm:

¹⁰ —Koja mēhō wa hamēxkrut nē Tirtūm mā amnhĩ jarēnh kaxyw wa tē. Ja kēp Parijew nhō xwýnh nhũm hōja kēp mẽ ō pahĩ mā hkwyjê pē kãxpore hkwy jamýnh xwýnh. Nhũm wa Tirtūm mā amnhĩ jarēnh xà hã ixkre hwýr wa tēn axà. ¹¹⁻¹² Hāmri nhũm Parijew nhō xwýnhnta kumrēx tē nē nhýri mẽ piitã mẽ noo mã Tirtūm mã amnhĩ jarē. Nē amnhĩ to jarkrar pē kãm amnhĩ jarēnh o: “Pa Tirtūm. Era ate ixpumunh mex. Na pa hte amnhĩ to mex pix o ri ixpa. Ra ate ja hã ixpumunh mex. Na pa hte kãxpore hkwy jamýnh xwýnh nēj rom tãm amnhĩ nhípēx. Nē semãn piitã hã ixàpkur kêt rãhã amã amnhĩ jarēnh rãhã ho ixtã apkati axkrut. Nom ja pix kêt. Na pa hte mãânēn ixàpēnh pãnhã kãxpore jamý nē mẽ kot amã tanhmã amnhĩ nhípēx to ho pa xwýnhjê mã hkwy nhōr o ixpa. Nē na pa hte ri ixàhkĩnh o ri ixpa hkêt nē. Nē nhãm mẽ kēp mẽ hprō ho amnhĩkati ho ri ixpa hkêt nē. Na pa hte mẽ piitã mẽ kurom tãm amnhĩ nhípēx ã amnhĩ pumu nē ixkĩnh tỳx kumrēx. Hēxta waa nē. Mon pa hte ri ã amnhĩ to mex o ixpa anē?” Anhýr o Tirtūm mã amnhĩ to jarkrar pē kãm amnhĩ jarēnh o xa.

¹³ —Hāmri nhũm hpãnhã mẽ kēp kãxpore hkwy jamýnh xwýnhnta haxwýja Tirtūm mã amnhĩ jarē. No ãm Parijew nhō xwýnhnta rom ki hkwyjê pē awry nē ahte hipō nē kãm amnhĩ jarē. Nē kãm amnhĩ jarēnh pē amnhĩ tak nē mur nē kãm: “Kwa Tirtūm. Na pa hte amnhĩ tomnuj tỳx o ri ixpa. Nē ixtỳx ri amã prãm xà kuhpa hã tanhmã amnhĩ nhípēx to. Na pa

tee ri ja hã amnhĩ pumu nē ixkaprĩ htỳx nē. ã inhmã amnhĩ nhípēx anhýr o ri ixpa hprãm kêt tã pa hte ã amnhĩ nhípēx anhýr o ri ixpa. Kwa xà kot ka ixkamã axukaprĩ nē amnhĩ katut kôt ixte amnhĩ tomnuj rēnh pa Tirtūm?” Anhýr o kãm amnhĩ jarē.

¹⁴ —Hāmri nhũm Tirtūm hamē wa kot kãm amnhĩ jarēnh ma no ãm wamta ma nē ãm kuma. No kêt hkôt hōja ma hāmri nē kot kãm amnhĩ tã àhwýr xà hkôt amnhĩ katut kôt kot amnhĩ tomnuj rēnh pa nē ho hkra. Jakamã nhũm mex nē hkĩnh nē pa. Ra tãm hkrã hāmri nē hkĩnh nē ma htēm kurē kumrēx. ã mẽ ujarēnh kot anhýr. ãm hāmri na pa mẽ amã ja jarē. Koja mēhō Parijew nhō xwýnhnta pyrã nē kot amnhĩ to mex xwýnh ã amnhĩ kamnhĩx hāmri nē Tirtūm kot amnhĩ katut kôt kot amnhĩ tomnuj rēnh kaxyw amnhĩ to hwýr kêt nē. Koja ãm kãm amnhĩ to jarkrar pix nē. Jakamã koja Tirtūm te kot mar nē ãm mar pyrãk o hipēx. No koja mēhō kot kãxpore hkwy jamýnh xwýnhnta pyrã nē tee ri tanhmã amnhĩ tomnuj to hã amnhĩ pumu nē hkaprĩ nē. Hāmri nē amnhĩ to Tirtūm wý nhũm kuma nē tanhmã ho mex to. Anē.

Jejus kot amnhĩ wýr mēhprĩrejê hwýr ã harēnh

Matêwre 19.13-15; Makre 10.13-16

¹⁵ Tã nhũm Jejus mẽ hkôt mẽ pa ho mẽ pa xwýnhjaja arĩ pry hã Jeru-jarē hwýr mō nhũm Ijaew kwýjaja mẽ omu nē mẽ hkrare jamý nē Jejus wýr mẽ o mra. Kot mẽ hã ãhkra jaxwýr nē mẽ ho Tirtūm wýr kaxyw. Hāmri nhũm hkôt mẽ pa ho mẽ pa xwýnhjaja tee ri ja hã mẽ omu nē nē mẽ kãm kapêr nē mẽ kãm:

—Tk. Kwa mẽ ma akupým mẽ akrata o mra nã? Mo kaxyw na ka mẽ Jejus wýr mẽ o mra? Kormã mẽ ràxre kēnã. Anē.

16 Hāmri nhũm amnhĩ tā mẽ kuma nẽ mẽ kām:

—Tk. Kwa nà mẽ ri inhnẽ mèhprĩjẽ kurẽ hkêt nẽ. Kwār mẽ māmri ixwỳr mẽ o mra. Anẽ.

Hāmri nẽ amnhĩ wỳr mẽ kām hpa ho apê nhũm mẽ hwỳr mẽ o mra nhũm mẽ kuri kuhê. Hāmri nhũm hkôt mẽ pa ho mẽ pa xwỳnhjẽ mã kām:

—E mẽ jareja mẽ omu. Na htem hamakêtkati nẽ hkĩnh nẽ ri pare. Nẽ kām amnhĩ to rũnh prām kêt nẽ ri pa. Tã Tĩrtũm kôt mẽ kot amnhĩ nhĩpêx xwỳnhjaja na htem mẽ uràk nẽ kām amnhĩ to rũnh prām kêt nẽ ri pa.

17—Jarejaja na htem hipêêxà nẽ katorxà wa kapêr ma nẽ wa hkôt ri amnhĩ nhĩpêx mex o ri pa. Tã ixpê Tĩrtũm kot mẽ awỳr inhmênh xwỳnh kot ka mẽ amã ixkôt amnhĩ xunhwỳr prām. Hã kot kaj mẽ te ho jarejê kot amnhĩ nhĩpêx pyràk o amnhĩ nhĩpêx. Jao ixkapêr ma nẽ ixkôt ri tanhmã amnhĩ nhĩpêx mex to ho ri apa. Anẽ.

Kàxpore rax xwỳnh jarênh

Matêwre 19.16-30; Makre 10.17-31; mãânên Wam Ximotre 6.6

18 Tã nhũm Ijaew nhõ pahihiti hõja Jejus wỳr tẽ nẽ kām kapêr nẽ kām:

—Pa? Mẽ ijahkre xwỳnh maati? Kwa inhmã mẽmoj jarẽ. Tanhmã kot pa we nhỹrmã Tĩrtũm ri ixtĩr tũm nẽ ixpa kaxyw amnhĩ nhĩpêx mex to ho ri ixpa wehe? Anẽ.

19 Hāmri nhũm kām:

—Xà ate ixpê Tĩrtũm kwỳ hã ixpumunh kôt na ka ixte uràk nẽ amnhĩ to mex xwỳnh ã ijarẽ? Tĩrtũm pix na kot amnhĩ to mex rãhã xwỳnh jakamã kot kaj ã ijarênh anhỹr jao ixpê Kra hã ijarẽ. Nẽ uràk nẽ ixte amnhĩ to mex xwỳnh ã ijarẽ. Nà xàn ka ãm atỳx ri amnhĩ krã hkôt ã ijarênh anẽ?

20—Tĩrtũmja mex o mex xwỳnh jakamã kot kaj amã nhỹrmã kuri atĩr tũm nẽ apa hprãm hāmri nẽ ra

kot mẽmoj tã mẽ amã karõ xà hkôt amnhĩ nhĩpêx o ri apa. Ra ate mar mex kênã. Na pre mẽ amã:

Kêr ka mẽ axpên pẽ axàhkĩnh hkêt nẽ.

Nẽ mẽ axpên par kêt nẽ.

Nẽ mẽ axpên to axêx o ri apa hkêt nẽ.

Nẽ mẽ axpên pẽ aprõ ho amnhĩkati hkêt nẽ.

Nẽ mẽ anhĩpêêxà mẽ akatorxà wa hã apijaam pẽ wa kutã ano-jarêr pix o ri apa.

E kot kaj amã nhỹrmã Tĩrtũm kuri atĩr tũm nẽ apa hprãm hã kêr ka ã amnhĩ nhĩpêx anhỹr o ri apa. Anẽ.

21 Nhũm pre ã Jejus kām kapêr anẽ nhũm kuma nẽ kām:

—Kwa ixprĩre ri ra ã ixte amnhĩ nhĩpêx anhỹr o ri ixpa kênã. Nom ixte ixtĩr tũm nẽ ixpa kaxyw kormã ixte tãm kêt pyràk. Anẽ.

22 Hāmri nhũm Jejus kām:

—Nà kormã mẽmoj pyxire nẽ arĩk. Na ka amã akukrêx rax japê htỳx o Tĩrtũm jakre. Jakamã kêr ka ma akupỳm tẽ nẽ akukrêx o wênê hpa nẽ hpãnhã kàxpore jamỳ hāmri nẽ ma mẽ kêp amrakati xwỳnhjẽ mã õr pa. Hāmri nẽ rĩ akupỳn ixwỳr tẽ nẽ ixkôt apa ho apa. Anẽ.

23 Hāmri nhũm kuma nẽ tee ri amnhĩ kukamã hamaxpêr. Kām kukrêx rax japê nẽ kām ìhkra karo hprãm kêt nẽ. Jakamã tee ri Jejus kot ã kām hã karõ anhỹrja ma nẽ awjanã nẽ ma akupỳm tẽ. 24 Hāmri nhũm tee ri ja hã omu nẽ hã mẽ kot mar xwỳnhjẽ mã kapêr nẽ mẽ kām:

—Hêxta waa nẽ. Koja mẽ hikukrêx rũnh xwỳnhjaja ohtõ nẽ kām mẽ hikukrêx japê xaj Tĩrtũm mẽ wa ixri htĩr tũm nẽ pa ho papa hkêt nẽ. Wa ixte amnhĩ nhĩpêxja mẽ kêp hihtỳx. 25 Na htem kām hikukrêx rax mã ìhkra karo hprãm kêt rãhã tee ri kām Tĩrtũm kôt amnhĩ nhĩpêx prãm kaprỳ. Te ho mẽhõ kot menh kagõ hã hkre nẽ kām kagõ katõk prãm kêt rãhã

kām guhkrax kām àr prām kaprÿta pyràk. Anē.

Nhūm pre ā Jejus mē kām kapēr anē. ²⁶ Hāmri nhūm mē kuma nē tee ri amnhī kukamā hamaxpēr nē kām:

—Kwa nom mē xpiitā mē inhmā mē ixkukrēx japē kēnā. Jakamā xà kot paj mē xpiitā nhÿrmā war ari ixtīr tūm nē ixpa ho ixpa hkēt nē nā? Anē.

²⁷ Hāmri nhūm mē kām:

—Nà kot kaj mē amnhī krā hkôt mē amā mē akukrēx japēja mā anhūrer kēt nē. Tīrtūm pix na hte ā mē kot amnhī nhīpēx anhÿr kaxyw tanhmā mē hkrā hto nhūm mē kām mē hikukrēx japē htÿx kēt nē. Jao mē kēp Tīrtūm mē wa ixri htīr tūm nē mē pa ho pa mā xwÿnh. Anē.

²⁸ Hāmri nhūm Simāw Pētre kām:

—Kwa Pahihti no mē pajaja? Na pa prem agryk ā mēmoj piitā hkaga hpa nē akôt ixpa ho ixpa. Jakamā kot paj mē nhÿrmā war ari ixtīr tūm nē ixpa ho ixpa nā? Anē.

²⁹ Hāmri nhūm kām:

—Tÿ. Nà ka mē atō inhmā tanhmā amnhī nhīpēx to ho apa kaxyw akwÿjē re nē ma inhmā tanhmā amnhī nhīpēx to ho ri apa. Anhōrkwÿ re rÿ atō rÿ atōx rÿ aprō nē akrajē re. Rÿ akatorxā nē anhīpēxā war are. Rÿ akukrēx piitā rer pa hāmri nē ma ixkapēr o mē piitā mē ahkre ho ri mē hkôt apa. ³⁰ Hā kot paj ja hā mē apumu nē mē ato mex rax nē. Hāmri ka mē ma nhÿhÿm apa nē nhÿri mē kām ixkapēr jarēnh o ri mē hkôt apa nhūm mē kot mē amar xwÿnh kwÿjaja mē ama nē ra kām mē akīnh nē. Nē ra mē ate akwÿjē rer par tā nhūm mē tāmjaja te mē apē mē hkra rÿ mē htō rÿ mē htōx pyràk o mē anhīpēx nē tanhmā mē ato mex to ho pa. Hāmri ka mē nhÿrmā ty nē ma Tīrtūm mē wa inhō krī hwÿr api hāmri nē wa ixkuri amex kumrēx nē atīr tūm nē apa ho apa. Anē.

Nhūm pre ā Jejus Simāw Pētre mē hkwyjē mā kapēr anē.

Jejus kot axte htyk kukamā amnhī jarēnh

Matēwre 20.17-19; Makre 10.32-34

³¹ Tā nhūm Jejus mē kot ŷ hā kapēr jarēnh o mē pa xwÿnh pē 12jaja mē hkwyjē pē mē ho kato. Nē nhÿri mē hkàx ā mē o xa nē tanhmā mē kām amnhī jarēnh to nē mē kām:

—Amnepēm Tīrtūm nhÿ hā kapēr jarēnh xwÿnhjaja na prem ixkukamā tanhmā mē kot inhīpēx to hā ijarē nē ixtā kagā. Tā pu mē ra Jerujarē hwÿr mō. Kamā koja mē tanhmā ixtō rax nē. Ra mē kot ixkukamā ijarēnh nē ixtā kagā xà hkôt koja mē ixtō anē. ³²⁻³³ Kōja mē kām ixkurē xwÿnhjaja ixpynē nē Rōm nhō xwÿnhjē nhō pōristi hwÿr ixtō tē nē mē kām ixtō hēx nhūm mē kuma nē mē mar xà hkôt tanhmā inhīpēx to. Nē mē hkwyjaja ixtā hpēr o axkē nē akunha. Nē mē hkwyjaja ixtō kapēr punuj nē ijapry nē ixtā argōx rē nē ixtak. Hāmri nē ixpī. Ā koja mē inhīpēx anē. Nom kot paj ām ixtyk ā apkati axkrunēpxi nhūm Tīrtūmja akupÿm ixtō ixtīr. Anē.

³⁴ Hāmri nhūm mē kuma nē tee ri htyk nē akupÿm htīrja kukamā hamaxpēr no ām hprī hā hkôt hamaxpēr kēt nē.

Jejus kot no hkre xwÿnh o mex ā harēnh

Matēwre 20.29-34; Makre 10.46-52

³⁵ Tā nhūm Jejus mē kormā Jerujarē hwÿr Jerikoja tēp o mō. Hāmri nhūm pry nhīhkjē hā no hkre xwÿnhja àhwÿr o nhÿ. ³⁶ Hāmri nē amnhī wÿr mē mrrar ma. Mē ohtō nē Jejus kōt mē mrrar xwÿnhjē mrrar ma nē mē kām:

—Kwa mēmo ri? Mēmoj wÿr na ka mē axohtō nē mra? Anē.

³⁷ Hāmri nhūm mē kām:

—Nà Jejus pē Najare nhō xwÿnh kōt na pa mē mō. Anē.

³⁸ Hāmri nhūm mē kuma nē kàx pē Jejus mā kapēr nē kām:

—Pa Jejus? Apê mē inhō Pahihiti mex na ka. Te apê amnepēm anhīgēt pahihiti Tawī kot amnhī nhīpêx pyrāk. Jakamā kwa ixkamā axukapří nē akupým ixto mex kêt wehe. Ixte amnhī kaxyw akôt ija-maxpêr xwýnhjê hō na pa. Anē.

³⁹ Hāmri nhūm Jejus kukamā mē mrar xwýnhjaja tee ri kuma nē kām:

—Tk. Kwa akapêr kêt nē nhý nà. Anē.

Tā no nhūm ām mē kuma nē xatā amnhī to hwýr o nhý. Kàx pē kām kapêr o nhý. ⁴⁰ Hāmri nhūm Jejus kuma nē xa nē amnhī wýr hā karō nhūm mē hpa hā kupy nē hwýr o tē nhūm kām:

⁴¹ —Pa mo na? Tanhmā kot pa ato? Anē.

Nhūm kām:

—Nà akupým inhmā ixrīt mex prām. Anē.

⁴² Hāmri nhūm kām:

—Tōe. Nà ra ate amnhī kaxyw inhmā ajamaxpêr týx jakamā kot kaj akupým ri rīt. Anē.

⁴³ Hāmri nhūm akupým rīt mex kurê kumrêx nē ja hā amnhī pumu nē hkính týx nē. Hāmri nē ma Jejus kôt Tirtūm mā mex o mex ā harēnh o mē hkôt tē. Hāmri nhūm mē kot hā omunh xwýnhjaja haxwýja Tirtūm mā mex o mex ā harēnh o Jejus kôt mō.

19

Jakew kām Jejus pumunh prām ā harēnh

Rukre 3.8, 3.12-13

¹ Tā nhūm Jejus arī Jerujarē hwýr mō nē Jeriko hwýr pōj. Hāmri nē krī kahti hkôt pry hā mō. ² Nhūm mē ra hkôt htu rax nē hkôt omunh o mō. Jakamā nhūm Jakew pē Rōm nhō pahī mā kwýjê pē kàxpore hkwy jamýnh xwýnhjê krāhtūm xwýnhja. Na pre hikàxpore rax nē. ³ Tā haxwýja kām Jejus pumunh prām nē. Nom ām hakooti nē hprīhti jakamā tee ri kot omunh kaxyw amnhī nhīpêx nhūm mē kēp āmnār rax nē. ⁴ Hāmri nhūm ra hamaxpêr

nē ma kukamā hprôt nē tē nē nhýri pry mýri pī xām pumu nē hā api nē kutêp ajêt. Hāmri nhūm Jejus mō nē hapa. ⁵ Nē kànhmā rīt nē omu nē kām:

—Pa Jakew. E kwa tokyx tēn wrý pa ma akôt anhōrkwy hwýr tē nē ari amnhīm hikra. Anē.

⁶ Hāmri nhūm kuma nē hkính nē. Nē wrýk kurê kumrêx nē ma amnhī kôt nē o tē. ⁷ Hāmri nhūm mē kot omunh o kuhê xwýnhjaja tee ri ja hā omu nhūm ja mē kēp omunuj nē nhūm mē axpēn mā harēnh o:

—Tk. Kwa nà. Jakew kot amnhī tomnuy xwýnh tā nhūm Jejus ma hkôt tē nē kuri pōj. Anē.

⁸ Hāmri nhūm wa ōrkwy hwýr axà nē nhý nhūm Jakew Jejus mā amnhī jarēnh o:

—E. Nà ra ixte pahihiti mā kàxpore jamýnh xwýnhhta na pa pre hte ho prês jakre nē amnhīm hamýnh rax nē. Tā kot paj akupým mē kām ōr pa. Na pa pre hte mē hkwyjê pē ho 10 nē hamý. Tā kot paj hipy ho 40 nē kurê nē akupým mē kām ho ixpigrành pa. Ā kot paj mē hipêx anē. Nē ixkàxpore jakrêx kot paj ho axkjê nē mē kēp amrakati xwýnhjê mā ho ixpigrành pa. Anē.

⁹ Hāmri nhūm kuma nhūm ja kām mex nē. Jakamā nhūm kām:

—Nà ām hāmri. Ate pahkukamā panhīgēt Apraāw pyrā nē jarāhā ate amnhī tomnuy kaga jakamā na ra jarāhā anhōrkwy hwýr mē mex xà axà. Kōja Tirtūm jarāhā amnhī katut kôt ate amnhī tomnuy rēnh pa nē axte kām hamaxpêr kêt nē. ¹⁰⁻¹¹ Mē ate amnhī tomnuy xwýnhjê hwýr na pre Tirtūm inhmē pa wrý. Te nhýri mē apikunor nhūm ixte mē ajapêr o ixpa kaxyw Tirtūm kot mē awýr inhmēnh nhūm ixwrýk nē nhýri ixte mē ajapêr o ixpa nē mē amā ixkator nē ixkính nē ma akupým hwýr mē ato inhmōrta pyrāk. Anē.

Mě pahte Tirtüm mã tanhmã amnhĩ nhĩpêx to

Matêwre 25.14-30

Hãmri nhũm mẽ ohtô nê Jejus mar o hkôt Jerujarê hwÿr mra. Na prem htÿx tanhmã kot amnhĩ nhĩpêx to hã hkamnhĩx o hkôt mō nê axpên mã:

—E ma pu mẽ hkôt. Koja Jerujarê hwÿr pōj hãmri nê kêp mẽ pahpê Ijaew nhō pahi nê mẽ pahto amnhĩptâr kurê kumrêx. E kwa ma pu mẽ hkôt. Anê.

¹² Nhũm Jejus mẽ hamaxpêr kôt mẽ omunh mex nê. Jakamã kot mẽ piitã mẽ ho amnhĩptâr xà hã arĩgro hã mẽ kãm amnhĩ jarênh kaxyw. Kormã Jerujarê hwÿr ahtêp kêt ri mẽ kãm amnhĩ jarênh kaxyw. Nom hprĩ hã mẽ kãm hã amnhĩ jarênh kêt nê. ãm amnhĩ tã kuxi nê mẽ kãm awjarê nê mẽ kãm:

—Koja nhÿri krĩ hō kamã mēhō myja. Kot amnhĩ to rax o hkwyjê jakrenh xwÿnhja. Nê krĩ hō kamã krĩ piitã hkôt pahi nhō pahihtija hãmri harênh ma nê amnhĩ wÿr kuwÿ. Kot ma hwÿr mōr nhũm ò krĩ kamã nê mãânên krĩ hkwy kamã kêp mẽ ò pahi kaxyw kot ãm kaxyw nhũm hwÿr nojarêt. ¹³ Hãmri nê amnhĩ wÿr kãm mẽ ãpênh xwÿnhjê ho 10 nê tanhmã mẽ hã karō hto. Nhũm mẽ hwÿr mra nhũm mẽ kãm amnhĩ jarê nê mẽ piitã mẽ kãm kàxpore hkwy gō. Ahpÿnhã mẽ kãm hpÿnh nê kugō nê mẽ kãm: “E ota ixkàxpore hkwyta. Kot kaj mẽ ixkutêp tanhmã ri inhmã ho rax to. Kêr pa mẽmo arĩgro hã akupÿn mō kê ra ixahã inhmã ho ohtô nê pa hamÿ.” Anhÿr o mẽ kãm kapêr hãmri nê ma mō. ¹⁴ Hãmri nhũm ò krĩ nhō xwÿnhjaja ra kêp mẽ ò pahi kaxyw harênh ma nhũm ja mẽ kêp omnuj nê. Nê mẽ kãm hkĩnh kêt jakamã ma krĩ hō kamã kot mẽ kaxyw ãm xwÿnhta wÿr hkwy rê nhũm mẽ ma hwÿr mra nê hwÿr pōj. Hãmri nê kot mẽ kaxyw ãm mã xwÿnhta punu nê kãm: “Pa. E

ot pa mẽ awÿr mra. Kwa na ka xep ra mẽ ixkaxyw mẽ inhĩōja xãm kaxyw. Kwa na mẽ inhmã jahti hkĩnhiti hã. Kwa mẽ ixkaxyw ãm kêt nê nà?” Anhÿr o kãm kapêr.

¹⁵ —Tã no nhũm ãm mẽ kuma nê ãm mẽ kuma nhũm mẽ awjanã nê mã akupÿm mra. Hãmri nhũm pahija mẽ kaxyw mẽ kãm hkĩnh kêt xwÿnhta xãm nhũm ma akupÿm ò krĩ hwÿr mō. Mōō nê ra pōj hãmri nê amnhĩ wÿr kãm mẽ ãpênh xwÿnhjê hã karō nê mẽ kãm: “E no ixte mẽ amã kàxpore nhōr xwÿnhta? Tanhmã na ka prem ixkutêp inhmã ho rax to? E mẽ inhmã agō pa omu.” Anê.

¹⁶ —Hãmri nhũm wamta kãm: “Ota akàxpore ate inhmã òr xwÿnhta. Na ka pre inhmã ho pyxi nê agō pa kupy nê ho mẽmo hy hkwy japrô nê hkre. Nhũm ò pa mẽ kãm ho wênê ho ri ixpa nê hpãnhã kàxpore jamÿ nê hipy amã kurê nhũm ra kêp 10. Ota. E amÿ.” Anê.

¹⁷ —Hãmri nhũm kuma nê hkĩnh nê. Hãmri nê kãm: “Nà ãm hãmri na ka ã inhmã ho rax anê. Ixte amã ho pyxi nê òr tã ka pre inhmã hamâr mex nê nhũm kãnhmã axkamê nê ra kêp 10. Tã ra ixpê krĩ hkwy kamã mẽ ò pahi jakamã kot ka inhmã krĩ ho 10 nê inhmã hamâr o ri apa. Jakamã kwa mãmrĩ amnhĩm kàxporeta o arĩk.” Anê.

¹⁸ —Hãmri nhũm hpãnhã hōja hwÿr tē nê kãm: “E ota akàxporeta. Na pa pre ho mẽmo hy hkwy japrô nê hkre nhũm ò pa mẽ kãm ho wênê nê hpãnhã kàxpore jamÿ nê hipy amã kurê nhũm ra kêp 5. Tã ota. E amÿ.” Anê. ¹⁹ Hãmri nhũm kuma nê kãm: “Nà ãm hãmri. Hãmri na ka ã inhmã ho rax anê. Jakamã kot kaj hpãnhã inhmã krĩ ho 5 nê ho amnhĩptâr o apa. E mãmrĩ amnhĩm kàxporeta o arĩk.” Anê.

²⁰⁻²¹ —Hãmri nhũm hpãnhã hkôt hōta tē. Nom hkwyjê hkĩnhã ò pa-trãw mã tanhmã kàxpore ho rax to hkêt nê. ãm tanhmã hamaxpêr punuj to nê htÿx ri kot kêp ho

õxý nê amnhĩm piitã hamýnh par nê akupým kãm hkwȳ nhõr kêt ã hkamnhĩx. Jakamã tanhmã kãm ho rax to hkêt nê. Âm hkupu nê o tẽ nê nhỹri kutêp kuxi. Hãmri nhũm õ patrãw amnhĩ wýr hã karõ nhũm hwýr tẽ nê amnhĩ nê kãm kapêr punuj nê kãm: “Tk. Ota akàxporeta. Ixte amã tanhmã ho rax tore hã. Ixte amã ho rax ronhỹx ka amnhĩm piitã hamýnh pa nê akupýn inhmã hkwȳ nhõr kêt nê. Rý ixte tanhmã apê homnuj to ronhỹx ka hã inhmã akir. Jakamã na pa tanhmã amã ho rax to hkêt nê. Âm hkupu nê o tẽ nê ho amũxu nhũm arĩ akutêp hikwý. Tã ota.” Anhýr o amnhĩ nê õ patrãw mã kapêr punuj nê. ²²⁻²³ Hãmri nhũm tee ri amnhĩ tã kuma. Kot amnhĩ to mex xwýnh nê kãm mẽ àpênh xwýnhjê ho mex o pa xwýnh tã ã kãm àpênh xwýnh kot kãm kapêr anhýrja ma nê amnhĩ tã kamã gryk nê. Hãmri nê kãm: “Tk. Kwa xà ã ixte amnhĩ nhĩpêx anhýr? Nà ixte ã amnhĩ nhĩpêx anhýr kêt. Æ ixte amnhĩ nhĩpêx anhýr nhũm amã ixpuma ronhỹx ka pre amã ixpuma xaj ixkàxporeta py nê ixwakre kamã amnhĩ krã hkôt tanhmã inhmã ho rax to. Tã nhỹx pa pre ra akupýn awýr tẽ nê hamý. Nà na ka ã ijarênh anhýr o axêx nê amnhĩ krã hkôt tanhmã inhmã ho rax to hkêt nê. Mýrapê kot paj atomnuj týx nê ka rĩ amnhĩ pumu. Pêr ãm ajamaxpêr punuj.”

²⁴ —Nhũm pre ã kãm kapêr anê hãmri nê mẽ kot mar o kuhê xwýnhjê mã kãm: “E mẽ atõ kêp kàxpore py nê wam kot ho 10 nê hamýnh xwýnhhta mã agõ.” Anê. ²⁵ Hãmri nhũm mẽ tee ri kuma nhũm ja mẽ kêp omnuj nhũm mẽ kãm: “Kwa nà ra hikàxpore rax kênã. Ra ate kãm ho 10 nê õr kênã.” Anê. ²⁶ Hãmri nhũm mẽ kãm: “ýy nom tãã. Mãmrĩ kãm agõ. Koja mẽhõ inhmã àpênh mex pa amnhĩ tã omu nê kot inhmã àpênh mexta pãnhã ho mex nê. No koja

inhmã àpênh mex kêt nê pa tee ri ja hã omu nê ho mex kêt nê. E mãmrĩ kãm agõ.” Anê. ²⁷ Hãmri nê hpãnhã mẽ kãm: “E hpãnhã mẽ kãm ixprãm nõkati xwýnhjaja. Ixte mẽ ho amnhĩptàr mã tã mẽ kãm ixprãm nõkati xwýnhjaja. Mẽ ma mẽ hwýr mra nê mẽ ho akuprõ nê akupýn amnê ixwýr mẽ o mra nê inhnoo mã mẽ himex pa.” Anê. Æ mẽ ujarênh kot anhýr. Anê.

Nhũm pre Jejus ã mẽ kãm ujarênh anê. Tẽ tãm kêp patrãwta pyrã nê ã amnhĩ jarênh anê. Mẽ kot tanhmã amnhĩ nhĩpêx to ho pa hã mẽ omunh xà hkôt tanhmã mẽ hipêx to hã amnhĩ jarê.

Jejus kot Jerujarê hwýr àr ã harênh

Matêwre 12.1-11; Makre 11.1-11; Juãw 12.12-19

²⁸ Nhũm Jejus kormã Jerujarê hwýr mõ. ²⁹ Hãmri nê ra Petake mẽ Petãn wa htêp o mõ. Hixêt pê Oriwêhti kahti ri na krĩ wa xa. Jakamã nhũm Jejus hkôt mẽ pa ho mẽ pa xwýnh wa ho axkrut nê amnhĩ kukamã wa kumê. ³⁰ Nê wa kãm:

—E. Wa ma krĩ mũj wýr mẽ ixkukamã wa tẽ. Nê wa hwýr pøj nê nhỹri jumênre nyw mã ê nê ãm ata pumu. Kormã mẽ kot hã hkrĩ hkêt xwýnhhta. Ka wa omu nê kãm ê xà hpôt nê man akupýn ixwýr o tẽ. ³¹ Nhũm mẽhõ ja hã war apumu nê hã tanhmã war amã kapêr to ka wa kãm ã ijarênh anê nê kãm: “Mẽ panhõ Pahihti na hã karõ pa wa hwýr tẽ.” Anhýr o wa kãm ijarê. E wa ma hwýr tẽ. Anê.

³² Hãmri nhũm wa kuma nê ma hwýr htêm kurê kumrêx. Nê wa krĩm pøj nhũm Jejus kot wa kãm harênh xà hkôt jumênreta pumu. ³³ Hãmri nê kãm ê xà hpôt o xa nhũm õ dõnjaja mra nê hã wa omu nê wa kãm:

—Tk. Kwa mo kaxyw na ka wa ri mẽ ixpê mẽ ixkrit mã ê xà pôt o wa

xa? Kwa xà kot kaj wa mẽ ixpê ho ahkĩ nà? Anê.

³⁴ Hāmri nhũm wa mẽ kām:

—Nà mẽ panhõ Pahihti na wa inhmã anê pa wa tẽ. Wa ixte ma akupỹm kutã ho inhmõr kaxyw. Anê.

Hāmri nhũm mẽ wa kuma nẽ wa kām:

—Tõe. Nà wa māmri ma kām o tẽ. Anê.

³⁵ Hāmri nhũm wa ma akupỹm Jejus wýr o tẽ. Hāmri nẽ kaxyw amnhĩ xê hkwý hopôj nẽ kām ho hkô kahty nẽ kām ho htýx nẽ o xa nhũm hã nhỹ nẽ mõi. ³⁶ Kormã Jerujarẽ hwýr hixêt ã àpir o mõi. Nhũm mẽ kot omunh o mram xwýnhjaja hkĩnh nẽ ma hkukamã kot pry ho mex kaxyw amnhĩ xê hkwýptyr o mõi. ³⁷ Hāmri nhũm mẽ hixêt ã api nẽ kormã ahpar mã wrýk o mõi. Hāmri nhũm Jejus kôt mẽ pa ho pa xwýnhjaja kàx pẽ Tĩrtũm mex o mex ã harẽnh o hkôt mõi. Ra mẽ kot hkôt pikamẽnh ry nẽ kot mẽ kām aa mẽmoj pumunh kêt kwý ho anhýr rax ã omunh jakamã hkĩnh nẽ nẽ Tĩrtũm mex o mex ã harẽnh o hkôt mõi. ³⁸ Nẽ harẽnh o:

E ota Tĩrtũm kot mẽ pahwýr mẽnh xwýnhhta na ra pøj.

ãm hāmri na mẽ pahwýr wrý. Na mex kumrẽx.

Kêp mẽ panhõ Pahihti mex na. ãm hāmri na pre Tĩrtũm mẽ pahwýr kumẽ.

Tĩrtũmja mex kumrẽx. Mex o mex. Kukwak ri pix mã na pu htem pajamakêtkati nẽ paxãmnhĩx ri papa rãhã ho papa.

Anhýr o Jejus kôt harẽnh o mõi. Ra kot mẽ ho amnhĩptar kurẽ kumrẽx ã hkamnhĩx jakamã hkĩnh nẽ hkôt ã kapêr o mõi anê. ³⁹ Hāmri nhũm Parijew nhõ xwýnh kwýjaja mẽ hkôt mra nẽ tee ri mẽ kuma hāmri nẽ Jejus mã kām:

—Kwa Jejus. Mẽ kām anê kê mẽ anhĩkrẽ nà? Anê.

⁴⁰ Hāmri nhũm mẽ kām:

—Tk. Nà kot paj mẽ kām anhýr kêt nẽ. ã mẽ kapêr anhýrja na inhmã mar hprãm. Kwãr mẽ māmri Tĩrtũm mã mex o mex ã harẽnh o ixkôt mõi. Kot mẽ anhýr kêt nhũm ra pikap kên nhĩkwý xwýnhja tee ri ja hã mẽ omu hāmri nẽ tãm tanhmã amnhĩ nhĩpêx to nẽ mẽ hpãnhã tãm Tĩrtũm mã mex o mex ã harẽnh o hikwý. Jakamã kwãr mẽ māmri kapêr anê. Anê.

Jejus tee ri kot Jerujarẽ hkukamã hamaxpêr ã harẽnh

Rukre 23.27-31

⁴¹ Nhũm mẽ kormã Jerujarẽ hwýr hpôx o mõi. Kormã hixêt rũm ahpar mã hwýr wrýk o mõi. Hāmri nhũm Jejus amỹm amnhĩ hkukamã Jerujarẽ nhõ xwýnhjẽ pumunh o mõi nẽ mẽ hkukamã hamaxpêr o hkapri nẽ. Hāmri nẽ hkapri xaj mýr o mõi. ⁴² Hāmri nẽ te kot mẽ kuri mẽ omunh o ri pa pẽ mẽ kām kapêr pyrãk o mẽ kām kapêr nẽ mẽ kām:

—Hêxta waa nẽ Jerujarẽ nhõ xwýnhjaja. Kot kaj mẽ amex kêt nẽ. Mẽ ate amnhĩ kukamã axãhpumunh mex ronhýx ka mẽ ra mẽ kām mẽ akurẽ xwýnhjẽ pumaj ixkôt amnhĩ xunhwýr kurẽ kumrẽx nhũm mẽ tee ri tanhmã mẽ ato mã. Ka mẽ ra ixkukwak ri amex nẽ ajamakêtkati nẽ akĩnh nẽ ri apa ho apa. ⁴³⁻⁴⁴ Tĩrtũm tãm kot mẽ awýr inhmẽnh tã ka mẽ amã ixprãm kêt nẽ. Jakamã koja nhýrmã mẽ kām mẽ akurẽ xwýnhjaja mẽ awýr mra nẽ mẽ anhõ krĩm hipòk pa. Hāmri ka mẽ amnhĩ wýr mẽ omu nẽ tee ri ajapòx kaxyw nhũm mẽ awýr agjẽ nẽ mẽ anhĩmex pa nẽ mẽ anhõ krĩa grãnh pa. Nẽ ahpýnhã ri mẽ anhõrkwý grãnh pa. ã koja mẽ mẽmoj piitã grãnh par anê. Anê.

Jejus kot Tĩrtũm nhõrkwý hwýr àr ã harẽnh

Matêwre 21.12-17; Makre 11.15-19; Juãw 2.13-22

⁴⁵⁻⁴⁶ Tã nhũm Jejus Jerujarẽ hwýr axà nẽ jumẽnre rũm wrý hāmri nẽ

ma Tirtūm mā amnhī jarēnh xà hā ixkreja wýr tē. Hāmri nē hwýr axà nē tee ri kamā mē pa xwýnhjē pumunh o xa. Nhūm mē ra axtem nē mōx nē ôwēhti nē tuuti ho wēnē ho kuhê. Mē kot haprōr nē Tirtūm mā hpar nē kām ōr pē kām amnhī jarēnh kaxyw mē kām ho wēnē ho kuhê. Nē axtem nē mē kām hā ohtō rax kām mē kām ho wēnē. Hāmri nhūm Jejus mē hwýr axà nē tee ri mē omu mē kām akir nē mē kām:

—Tk. Kwa nà. Tirtūm kapēr ā kagà htūm kot ōrkwý jarēnh kot: Inhōrkwýja ām mē ate inhmā amnhī jarēnh xà hā ixkre pix kaxyw na.

Anhýr o kot harēnh tā ka mē axtem nē kamā ā amnhī nhīpēx anhýr o apa. E mē ajapōj nē ma ajapēx tokyx anē.

Anhýr o mē kām kapēr hāmri nē ixkre nē mē kator nhūm mē ma hapēx pa.

⁴⁷ Tā nhūm Jejus apkati mē Tirtūm mā amnhī jarēnh xà hā ixkreja wýr mra nē kamā mē ahkre ho hkrī. Hāmri nhūm mē ō patre krāhtūm mē Tirtūm kapēr tūm o mē ahkre xwýnhjē mē mē kot amnhī to rūnh xwýnhjaja kot mē ahkre ma nhūm ja mē kēp omnuj nē nhūm mē kām hpīr prām nē. ⁴⁸ Nom nhūm amarī mē pa xwýnhjaja mē kurom kām mar prām nē akryk mar o kuhê. Jakamā nhūm mē tee ri ja hā mē omu nē tanhmā mē kot hpīr to hkukamā hā xpēn ma.

20

Mēhō nhý hā Jejus kot mē ahkre hā harēnh

Matēwre 21.23-27; Makre 11.27-33

¹ Nhūm arīgro hō hā nhūm Jejus kē axte Tirtūm mā amnhī jarēnh xà hā ixkreja wýr axà nē mē ahkre ho nhý. Tanhmā mē kot amnhī nhīpēx to nē nhýrmā Tirtūm mē wa kuri htīr tūm nē pa hā mē kām kapēr o nhý. Hāmri nhūm Ijaew nhō pahijē mē mē kot Tirtūm kapēr

tūm o mē ahkre xwýnhjē mē mē ō patre krāhtūmjaja hēx rom mar o kuhê. ² Hāmri nē kām:

—Kwa mē inhmā amnhī jarē. Mēhō nhý hā na ka hte ā amnhī nhīpēx anhýr o ri apa? Na ka hte akupým mē ho mex o apa nē tanhmā mē ahkre hto ho apa. Xà amnhī krā hkôt na ka hte ā amnhī nhīpēx anē nà? Anē.

³ Hāmri nhūm mē kām:

—Nà ixkumrēx kot paj mēmoj tā mē akukja. Ka mē inhma nē inhmā harē pa rī kormā tanhmā mē amā amnhī jarēnh to. ⁴ Finat Juāw Paxisja ā kot paj mē akukja. Mēhō nhý hā na pre mē hkrā kumrār o pa? Xà amnhī krā hkôt nà xà Tirtūm nhý hā? E mē atō inhmā harē. Anē.

⁵⁻⁶ Hāmri nhūm mē kuma nē tee ri kot tanhmā kutā kām harēnh to hkukamā hamaxpēr nē xpēn mā:

—Kwa tanhmā kot puj mē kām harēnh to? Jar mē kot mar xwýnhjaja na htem kēp Tirtūm nhý hā kapēr jarēnh o pa xwýnh ā harēnh o pa. Tā kot puj mē kām kot amnhī krā hkôt mē hkrā kumrār o pa hā harē nhūm mē tee ri mē pama nē mē pakamā gryk týx nē. Nē mē paxēx rom mē pahte kām pakapēr ā mē pahpumunh kurē kumrēx nē kēn o mē pahtak o mē panhīmex. Nom kot puj mē kām Tirtūm nhý hā mē hkrā kumrār ā harē nhūm mē pamā kapēr o: “ā kot anhýr kēnā na ka prem kapēr ma nē ra ixkôt amnhī xunhwýr kēt nē?” Anē. Nà kot puj mē kām tanhmā harēnh to hkēt nē. Kot puj mē ām kām aa te mē pahte ja jarēnh mar kēt pyrāk o harē. Anē.

Mē kot tanhmā kām nē nhūm kot ta pānhā tanhmā mē kām nē pymaj nhūm mē ām tee ri kām tanhmā nē hprām kaprý o kuhê.

⁷ Hāmri nē kām:

—Konēn. Mē ixte mēhō nhý hā kapēr o pa hā omunhre hā. Anē.

⁸ Hāmri nhūm mē kuma nē mē kām:

—Tk. Tôe kot pa xep ijaxwýja mẽ amã tanhmã amnhĩ jarēnh to hkêt nē. Ijaxwýja ixte mēhō nhỹ hã ã ixte amnhĩ nhĩpêx anhỹr o ri ixpa hã amnhĩ pumunhre hã. Anē.

Mẽ àpēnh punuj xwýnhjê jarēnh

Matêwre 21.33-46; Makre 12.1-12

⁹Nhũm Jejus arĩ Ijaew nhõ pahijê mã kapêr. Nē mẽ kot tanhmã hipêx to hkukamã mẽ kãm tanhmã amnhĩ jarēnh to. No ãm amnhĩ tã kuxi nē mẽ kãm awjarē nē mẽ kãm:

—Koja mēhō hpur ã hkwyjê kot kamã kãm àpēnh kaxyw mẽ kãm karō. Hãmri nhũm mẽ ma hwýr mra nē kamã mẽmo hy hkre nē hkre pa. Hãmri nhũm ra hpur nhõ dōnja nhỹhỹm nojarêt nē kãm mẽ àpēnh xwýnhjê mã tanhmã hpur jarēnh to nē mẽ kãm: “E or ixpur nō. Kê kamã mẽmoj hkã hpa ka mẽ mãmri kamã axujamýnh pa nē ho axkjê. Nē ixkutêp inhõ jaxwý nē mãmri mẽ anhõ tanhmã ho hprãm xã hkôt tanhmã ho.” Anē.

—Nhũm ã mẽ kãm kapêr anē hãmri nē ma nhỹhỹm mō.

¹⁰—Tã nhũm ra hkã hpa. Nom nhũm hpur nhõ dōnja kormã krĩ hõ kamã ri hã ujahkre ho ri pa. Tã kuri kãm àpēnh xwýnhjê hõja nhũm akupým mẽ hwýr kumê. Mẽ kot kãm kwý nhõr nhũm ma kot kãm o mõi kaxyw ma mẽ hwýr kumê nhũm ma mẽ hwýr mō. Mõi nē mẽ hwýr pøj nhũm mẽ omu nē axtem nē unē nē htak nē akupým hano nhũm ma akupým ý kamã mō. ¹¹Hãmri nē pøj nhũm õ patrãwja tee ri omu nē hpãnhã ja mẽ nhũm ma mẽ hwýr mō. Mõi nē mẽ hwýr pøj nhũm kê wem mã ho anē nē unē nē htak nē akupým hano nhũm wamta pyrà nē ma akupým ý kamã mō.

¹²—Hãmri nhũm kê axte hkôt ja mẽ nhũm ma mẽ hwýr mããnen mō. Ma mẽ hwýr mō nē pøj nhũm mẽ te ho wamta wa hipêx pyràk o hipêx nē unē nē htak rax nē amnhĩ nē hano nē pur nē kapôt ã kumê.

Hãmri nhũm ma akupým mããnen ý kamã mō. ¹³Nhũm mẽ õ patrãw tee ri mẽ omu nē hamaxpêr o: “Hêxta waa nē. Tanhmã kot paj amnhĩ nhĩpêx to? Nã kot paj mẽ hwýr ixkra mãn mẽ. Inhmã hapê htã kot paj mẽ hwýr kumê kê ma mẽ hwýr mō. Hãmri nhũm mẽ kêp ixkra hã omu nē tanhmã ixpê ho hkêt nē. Nē tã inhmã kãm inhõja kwý gō.” Anhỹr o hamaxpêr hãmri nē ma mẽ hwýr kumê nhũm ma mẽ hwýr mō.

¹⁴—Tã ra mẽ hwýr hpõx o mõi nhũm mẽ amým amnhĩ wýr omu nē kêp hkra hã omu nē hã axpēn mã amýnē nē axpēn mã: “E onēj hpur nhõ dõn krata tē. Koja nhỹrmã õ papaj mýr pē amnhũm pur ã pyka pytà nē ho õ. Kwa pu mẽ hpĩr kurê kumrêx nē kêp hpurja o panhõ. E tokyj pu mẽ kupĩ ri.” Anē.

¹⁵—Hãmri nhũm tē nē mẽ hwýr pøj nhũm mẽ unē nē pur nē ho kato nē ma o tē nē kupĩ. Æ mẽ ujarēnh kot anhỹr. Anē.

Nhũm pre ã Jejus mẽ kãm ujarēnh anē nē hã tanhmã mẽ hkukjêr to nē mẽ kãm:

—E koja hpur nhõ dōnja hkra jarēnh ma hãmri nē tãm mẽ hwýr mō nē tanhmã mẽ hipêx to wehe? ¹⁶Koja ma mẽ hwýr mõi hãmri nē mẽ himex pa. Hãmri nē hpãnhã hpur ã nhãm mẽmojê rē nhũm mẽ tã kãm hamãr mex o pa. Anē.

Nhũm pre ã Jejus mẽ kãm ujarēnh anē hãmri nhũm mẽ kot mar xwýnhtaja ujarēnh kamã amnhĩ jarēnh mar kurê kumrêx. Mẽ kot Tirtũm kot mẽ hwýr rēnh xwýnhjê kapêr mar kêt nhũm mýrapê mẽ kãm mẽ hkurê xwýnhjaja kot mẽ kêp mẽ õ pika pytàr nē mẽ himex par ã amnhĩ jarēnh ma nhũm ja mẽ kêp omnuj týx nē. Hãmri nē hêx rom Jejus mã kãm:

—Tk. Kwa nã nhỹx pre kêt pur nhõ dōnja ã mẽ hipêx anhỹr kêt nē. Anē.

¹⁷Hãmri nhũm mẽ kuma nē mẽ omunh o xa. Nē mẽ omunh pē mẽ

no kagâr mã mẽ kãm kapêr nê mẽ kãm:

—Nà ã mẽ hipêx anhÿr mã mẽ tãm kênã. Mãn ka prem ra Tirtùm kapêr ã kagà htùm kot ja jarênh ma. Harênh kot:

Mê kot kên o amnhĩm òrkwÿ nhĩpêx kaxyw nê kên maati pumu nê htÿx omnuj ã hkamnhĩx nê hkaga.

Mê kot hkaga htã Tirtùm mẽ kurom mex o kot kên piitã hakrenh par ã omunh kurê kumrêx. Anê.

Ã Tirtùm kapêr ã kagà htùm kot mẽ ajarênh te mẽ kot kên maati punuj ã hkamnhĩx nê hkaga xwÿnhjê jarênh pyrãk o ã mẽ ajarênh kot anhÿr. Anê.

¹⁸ Nhũm pre ã Jejus mẽ kãm te kêp kên maati pyrãk o mẽ kãm amnhĩ jarênh anê. Hãmri nê axte amnhĩ tã kuxi nê mẽ kãm axte kên jarênhta pyrã nê mẽ kãm:

—Nà kot kaj mẽ atõ ixkaga hãmri nê te mēhō htÿx htēm nê kên pumunh kêt nê hã htêk nê tēm pyrãk o amnhĩ nhĩpêx. Jao ixkutã amnhĩ xãm. Rÿ ka tanhmã amnhĩ to nê ixkaga nhũm te kên maati hō htēm nê kot anhĩpy htēm nê axôm par pyrãk o anhĩpêx ka amex kêt nê. Anê.

¹⁹ Nhũm pre ã Jejus mẽ kãm ujarênh kãm mẽ harênh anê. Hãmri nhũm Tirtùm kapêr tùm o mẽ ahkre xwÿnhjê mẽ mẽ õ patre krãhtũmjaja kot mẽ kãm kên jarênh o te mẽ tãm harênh pyrãkja ma nhũm ja mẽ kêp omnuj tÿx nê. Jakamã nhũm mẽ kãm Jejus pynênh nê haxàr prãm nê. Nom amnhĩ tã kãm mẽ kot mar o kuhê xwÿnhjê puma nê.

Mê kot hêx rom Jejus kukjêr ã mẽ harênh

Matêwre 22.15-22; Makre 12.13-17; mãânên Rômãn 12.1, 13.6-7

²⁰ Hãmri nhũm Tirtùm kapêr tùm o mẽ ahkre xwÿnhjê mẽ mẽ õ patre krãhtũmjaja Jejus tãnopxar o

kuhê. Hãmri nê ra amnhĩ wÿr mẽmy hkwy hã karõ nê mẽ kãm:

—E. Mẽ ma Jejus wÿr mra nê te mẽ ate hkõt amnhĩ xunhwÿr kaxyw pyrãk o amnhĩ nhĩpêx nê mẽmoj tã ri hkukja. Mẽmoj tã hkukjêr rax nê. Kêr kê Rôm nhõ pahi Sesti kapêr kwÿm ri tanhmã mẽ amã kapêr to ka mẽ ama nê man akupÿn mra nê mẽ inhmã harênh kurê kumrêx. Pa mẽ ama nê ma hwÿr mra nê hã unê nê ma Sesti nhÿ hã mẽ pahto amnhĩptar xwÿnhta wÿr o tẽ nê ìhkram haxã. Anê.

²¹ Hãmri nhũm mẽ kuma nê mẽ kãm:

—Tõe. Nà kot paj mẽ anê. Anê.

Hãmri nê ma hwÿr mra nê hêx rom kãm kapêr nê kãm:

—Pa Jejus? Nà ãm hãmri na ka hte Tirtùm kapêr o mẽ ahkre mex o ri apa. Na ka hte mẽ kamã akahak kêt nê. Nê mẽ kot tee ri tanhmã ato kapêr punuj to htã ka aprĩ hã mẽ ahkre mex o ri apa. ²² Kwa mẽ inhmã mẽmoj jarê. Rôm nhõ pahihti kot mẽ pahte kãm kãxpore hkwy nhõr ã mẽ pahpê Ijaew mã karõta. Kwa xã we ja amã mex nã? Xà kot pu mẽ kãm kugõ nã xã kot pu mẽ kãm òr kêt nê? E kwa mẽ inhmã tanhmã harênh to. Anê.

²³ Nhũm prem ã hêx rom kãm kapêr anhÿr tã nhũm ra mẽ hamaxpêr ã mẽ omu nê mẽ kãm:

²⁴ —E mẽ atõ anhõ kãxpore htÿxre japêr nê inhmã hõ gõ pa omu. Anê.

Hãmri nhũm mẽ kãm ja gõ nhũm kupy nê omu nê kãnhmã mẽ kãm kupê nê mẽ kãm:

—E mēhō nhĩxi nê mēhō karõ na ja hã? Anê.

Hãmri nhũm mẽ kãm:

—Pahi Sesti karõ nê hixi na hã kênã. Anê.

²⁵ Hãmri nhũm mẽ kuma nê mẽ kãm:

—Tÿ. Tô kêr ka mẽ mãmrĩ kãm hkwy nhõr o apa. Hã hkarõ nê hã hixi. Tãm kot hipêx xwÿnh jakamã õ na. No mẽ kajaja na pre Tirtùm mẽ anhĩpêx nhũm mẽ apê õ jakamã

kwa kêr ka mē kapēr kôt pix mā ri amnhĩ nhĩpêx o ri apa. Anē.

²⁶ Nhũm pre ã Jejus mē kām kapēr anē nhũm mē piitã mar o kuhê. Nhũm mē kot hêx rom kām kapēr mã xwýnhjaja amnhĩ jaêr pê ã kot kàxpore jarênh anhỹrja ma. Hãmri nē tee ri axte mēmoj tã hkukjêr nhũm kot pahi Sesti kwým ri kot tanhmã harênh to kaxyw ãm tee ri tanhmã hkukjêr to kaprý. Hãmri nē axte tanhmã kām nē hkêt nē ãm akryk omunh pê mar o kuhê.

Akupým mē htír jarênh

Matêwre 22.23-33; Makre 12.18-27; Juãw 5.21, 6.39; mãânên Wam Korit 6.14, 15.12-28; Wam Tesarôn 4.13-18; Apokarip 20.4

²⁷ Tã nhũm Satusew nhõ xwýnh kwýjaja. Mē kot akupým mē htír mã hamaxpêr kêt jakamã mē htyk nē mē hapêx ã mē hkamnhĩx. Jakamã na prem tanhmã axpên mã Jejus jarênh to nē axpên mã:

—E kwa pu mē ma hwýr mra nē mēmoj xihtýx ã hkukja kê mē pama nē tee ri tanhmã mē pamã harênh to hkukamã hamaxpêr. Hãmri nhũm mē piitã ja hã omu nē ãhpumunh týx kêt ã omunh kurê kumrêx. E ma pu mē hwýr.

Anē nē ma hwýr mra nē Parijew nhõ xwýnhjê pyrã nē hêx rom ahkukja nē kãm:

²⁸ —Pa Jejus? Kwa mē inhmã mēmoj jarê. Na pre finat Mojesja Tirtüm nhỹ hã mē panhigêt mã ã karõ anē. Mē hkra hkêt rãhã mē pa nē mē htyk xwýnhjaja nhũm mē harênh o:

Koja mēhõ hprõ nē kormã kamã hkra hkêt rãhã pa nē ty. Hã koja hkôt htõja hpãnhã hprõta o hprõ nē kamã hkra. Hãmri nhũm kato nē te kêp htõ htyk xwýnhhta hkra pyrãk. Anē.

Na pre ã Mojes mē kãm karõ anē. ²⁹ Jakamã kwa ga mē ixujarênh ma. Koja mē kot axpên to htõ xwýnhjaja kêp 7. Nhũm kot waja mēhõ ho

hprõ nē wa pa nhũm kamã hkra hkêt rãhã ty. Nhũm hkôt htõ hõta hpãnhã hprõ ho hprõ ³⁰ nē wa axpên to pa. Nhũm mãânên ty. Kamã hkra hkêt rãhã ty.

³¹ —Nhũm htõ hõta. Haxwýja hpãnhã tãm o hprõ nē wa axpên to pa grire nhũm haxwýja kamã hkra hkêt rãhã ty. Hãmri nhũm htõ hkwyjaja piitã nija pyxi nē axpên pãnhã ho hprõ hpa. No ãm mēhõ kamã hkra hkêt rãhã ra htyk pa. ³² Hãmri nhũm mē hprõta mē hkôt amnhĩ to hapu nē ty. ³³ Tã Tirtüm kot akupým nhỹrmã mē ho htír ronhýx nhỹ nhỹx kêp nija mjên kumrêx? Ra piitã kot ho hprõ kênã. E mē inhmã ja jarê. Anē.

³⁴ Hãmri nhũm Jejus mē kãm:

—Nã kaxkwa kamã mē kot amnhĩ nhĩpêxja axtem na. Pika ja kamã na htem pa nē ãptar nhũm mē axpên mã mē kure. Ja mex. ³⁵ No mē kot Tirtüm kôt amnhĩ xunhwýr xwýnhjaja na htem ty hãmri nē Tirtüm nhõ kri kamã kuri axte kãm hprõ hprãm kêt nē ri pa. Rý ni japêr nē kãm mjên prãm kêt nē ri pa. ³⁶ Hãmri nē Tirtüm kapêr o mē wrýk xwýnhjê pyrã nē axte htyk kêt nē. ãm htír tùm rãhã nē pa ho pa. Tirtüm ra akupým kot mē ho htír jakamã koja mē kêp hkra nē kuri htír tùm nē mex nē pa ho pa nē axte kãm hprõ rý mjên prãm kêt nē ri pa.

³⁷ —Nom mē ate akupým mē htír mã ajamaxpêr kêt ã harênhja kot paj mē amã harê. Amnepêm na pre Tirtümja pĩ hpõk kamã Mojes mã kapêr nē kãm:

Ixpê Apraãw nhõ Tirtüm na pa. Nē mãânên ixpê Apraãw kra Ijak mē htãmnhwý Jako wa õ Tirtüm na pa.

Anhỹr o Mojes mã amnhĩ jarê nhũm kuma nē hã kagã. ³⁸ Kêp apu arĩ mē htyk rãhã nhỹx pre ã mē harênh anhỹr kêt nē. Nhỹx pre mē harênh o: “Amnepêm Apraãw nē hkra nē htãmnhwý mē htír ri ixpê

mê õ Tirtũm na pa pre.” Anhÿr o nhÿx pre mê harê. Nom na pre ã amnhĩ jarênh anhÿr kêt nê. Mê pamã te Apraãwja mê htyk nê mê hapêx pyrãk. Nom nhũm prem ra Tirtũm ri akupÿm htĩr nê mex nê pa ho pa. Tã ka htem Tirtũm kapêr kwÿm ri akupÿm mê htĩr kêt ã mê harênh o apa. Anê.

³⁹Nhũm pre ã Jejus mê kãm kapêr anê. Hãmri nhũm Tirtũm kapêr tũm o mê ahkre ho mê pa xwÿnh kwÿjaja kuma nê tee ri axte tanhmã kãm nê hprãm kaprÿ nê kãm:

—Tÿ. Nã ãm hãmri na ka ã ja jarênh anê. Anê.

⁴⁰Hãmri nhũm mê axte mẽmoj tã hkukjêr kêt nê. Tanhmã kot wem amnhĩ to nê hamaxpêr o hakre? Na prem ãm tee ri kãm hamaxpêr o hakrenh prãm kaprÿ ho kuhê. Jejus kot mẽmoj piitã hkukamã ãhpumunh tÿx o ãhpumunh tÿx.

Jejus kêp pahi finat Tawi nhõ Pahihti hã kot amnhĩ jarênh

Matêwre 22.41-46; Makre 12.35-37; mããnên Rômãn 1.3-4

⁴¹Tã nhũm Jejus kãnhmã xa nê amnhĩ tã tanhmã mê kot mar o kuhê xwÿnhjê hkukjêr to. Nom te nhãm mẽhõ hã mê hkukjêr pyrã nê mẽ kãm:

—E kwa mê inhmã mẽmoj jarê. Tirtũm kot mê akaxyw ãm mã xwÿnhnta ã na pa mê akukja. Mo na htem axpên mã kêp finat pahi Tawi kanrêhã htãmnhwÿ pix ã harê nê mããnên kêp õ pahihti hã harênh kêt nê? ⁴²Na pre Tawi Tirtũm kapêr kwÿ hã kagã nê tanhmã harênh to. Tirtũm mex ã mê grer xãja kwÿ kamã harê nê hã kagã nê hã kagã ho:

Na pre Tirtũm inhõ Pahihti mã ã kapêr anê nê kãm: “E amnê ixwÿr tẽ nê inhĩhkõ hã nhÿ nê inhmã mê ho amnhĩptãr o akrĩ.

⁴³Kot paj mê kot kãm akurê xwÿnh piitã mê unênh pa nê awÿr mẽ o mra nê anhĩhkram mẽ

haxãr pa.” Anhÿr o pre kãm kapêr. Anê.

⁴⁴Na pre ã Tawija Tirtũm kot Kris mã kapêr jarênh anê. Mê kajaja na ka htem ãm kêp Tawi kanrêhã tãmnhwÿ pix ã ri axpên mã harênh o ri apa. No kêt Tawi na pre kêp õ Pahihti hã harênh o pa. Anê.

Jejus kot tanhmã Tirtũm kapêr tũm o mẽ ahkre xwÿnhjê jarênh to

Matêwre 23.1-12; Makre 12.38-40

⁴⁵Nhũm pre ã Jejus mê kãm kapêr anê nhũm mẽ piitã mar o kuhê. Hãmri nhũm hpãnhã hkõt mẽ pa ho mẽ pa xwÿnhjê mã kapêr nê mẽ kãm:

—Kwa mẽ o kora. Kêr ka mẽ Tirtũm kapêr tũm o mẽ ahkre xwÿnhjê kot amnhĩ nhĩpêx o amnhĩ nhĩpêx kêt nê. ãm mẽ omu nê ãm mẽ omu nê mẽ kot amnhĩ nhĩpêx kõt amnhĩ nhĩpêx o ri apa hkêt nê. ⁴⁶Na htem mẽ piitã mẽ kot mẽ hã hpijaãm kaxyw mẽ ê mex pix kãm ri pa. Nê mẽ kãm mẽ piitã mẽ kot amnhĩm mẽ rũnh xwÿnh ã mẽ harênh o mẽ paja na mẽ kãm hprãm. Nê mẽ panhõ Tirtũm kapêr o mẽ ahkre xã hã ixkre kamã mẽ kãm amnhĩ to rũnh xwÿnhjê hkrĩ xã mex pix ã na mẽ kãm mẽ hkrĩ hprãm. Nê mẽmoj tã mẽ hkĩnh ã arĩgro hã nhũm htem mẽ apkur xã hã ixkre hwÿr akuprõ nê mẽ kãm mẽ kot amnhĩ to rũnh xwÿnhjê hkrĩ xã mex pix ã mẽ kãm mẽ hkrĩ hprãm. ã na htem amnhĩ nhĩpêx anhÿr o pa.

⁴⁷—Nê mẽ kêp mẽ mjên htyk xwÿnhjê ho ajuta ho pa hã amnhĩ jarênh tã ãm amnhĩ to hêx nê axtem nê mẽ nokupyr pê mẽ kêp mẽ hikukrêx piitã ho hapêx par o pa. Nê mẽ kêp mẽ òrkwÿ pytà. Nê mẽ hêx rom te tãm mẽ kot amnhĩ nhĩpêx pyrã nê Tirtũm mã amnhĩ jarênh japjêê ho kuhê. Mÿrapê koja mẽ mex kêt nê. Koja Tirtũm tanhmã ja hã mẽ hipêx to rax nê. Jakamã kwa kêr ka mẽ ã mẽ kot

amnhĩ nhĩpêx anhÿr xwÿnhjê hkôt
amnhĩ nhĩpêx o apa hkêt nê. Âm
kwarĩ ho kwarĩ. Anê.

21

*Kêp mjên htyk xwÿnh jarênh
Makre 12.41-44*

¹ Nhũm Jejus kormã Tĩrtũm mã
amnhĩ jarênh xà hã ixkre kamã mẽ
omunh o xa. Na pre hte Ijaew pi-
itã ixkreta ho mex kaxyw kãm mẽ
hikàxpore hkwy nhõr o pa. Jakamã
nhũm mẽ hikàxpore rũnh xwÿnhjaja
hwÿr agjê nê kamã kàxpore gjênh
xà kamã hkwy gjê nê ma akupÿm
mra. ² Jakamã nhũm mẽhõ ni pê
mjên htyk xwÿnh haxwÿja hwÿr
axà. Kêp amrakati kumrêx nê
hikàxpore tÿxre âm axkrut্রে htã mẽ
hpãnhã hwÿr axà. Nê kãm Tĩrtũm
kĩnh xàj hamê kamã kuxà hãmri nê
kato nê ma akupÿm tê. ³⁻⁴ Hãmri
nhũm Jejus arĩ omunh o xa. Kot
ã amnhĩ nhĩpêx anhÿr ã omunh o
xa nhũm ja kãm mex nê. Hãmri nê
hkôt mẽ pa ho pa xwÿnhjê mã harê
nê mẽ kãm:

—E măn ka mênire htêm mũj
pumu. Kêp amrakati nê hikàxpore
âm kêp grire htã amnhĩ pê òr pa.
Kwÿjê rom kãm Tĩrtũm kĩnh xàj
amnhĩ pê òr par kumrêx. Apkur
xà hã hikàxpore na. Mẽ hkwyjaja
na htem hikàxpore hkwy ho mra
nê kugjê nom arĩ mẽ hikàxpore rax.
No nhũm nire nêj mẽ kurom kãm
hikàxpore japê hkêt nê. Nê ho òxÿ
hkêt nê ãmnhĩx piitã Tĩrtũm mã òr
pa. Anê.

*Mẽ kot amnhĩ tomnuj xwÿnhjê
hkukamã mẽ harênh*

Matêwre 24.1-2; Makre 13.1-2

⁵ Tã hãmri nhũm Jejus kôt mẽ
pa ho mẽ pa xwÿnhjaja kormã
Tĩrtũm mã amnhĩ jarênh xà hã
ixkre kaxwÿnh pumunh o kuhê
nê axpên mã harê nê axpên mã
harênh o:

—Hêxta waa nê. Ixkreja mex
kumrêx. Kên rũnh o mẽ kot hipêx
jakamã mex o mex. Nê mẽ kot

ri Tĩrtũm mã hkĩnh xà nhõr nêj
haxwÿja piitã mex. Anê.

Hãmri nhũm Jejus mẽ kuma nê
mẽ kãm:

⁶ —Nà mex tã koja nhÿrmã mẽ
kãm Tĩrtũm kurê xwÿnhjaja grành
pa. Koja arĩ kên ò axkrut্রে nê
axpên mÿnh nê nõr kêt nê. Koja
piitã anghrà nê ahpÿnhã ri hikwy.
Anê.

⁷ Nhũm pre ã mẽ kot hipêx
anhÿrja kukamã mẽ kãm mẽ
harênh anê nhũm mẽ tee ri
hkukamã hamaxpêr nê kãm:

—Kwa xà koja mẽ ã hipêx anê?
Kwa mẽ inhmã aprĩ hã mẽ kot
ixkre grành parta jarê. Xà koja mẽ
tokyx ho anê nà xà kormã? Kwa
mêmo koja wÿj ri tanhmã amnhĩ
nhĩpêx to? Anê.

⁸ Hãmri nhũm mẽ kãm:

—Nà nhÿrmã mẽmoj piitã hapêx
kaxyw tanhmã amnhĩ nhĩpêx to
kumrêx kot paj mẽ amã harê ka mẽ
inhma. Koja mẽ ohtõ nê mẽ apê
ixkrajê hwÿr mra nê hêx rom te pa
ixte amnhĩ nhĩpêx pyrak o amnhĩ
nhĩpêx o pa. Nê tanhmã mẽ amã
amnhĩ jarênh to nê amnhĩ jarênh o:
“E mẽ ixpumu. Pa na pre Tĩrtũm
mẽ awÿr inhmê. Ixpê kaxkwa rũm
ixwÿk xwÿnh na pa.” Anhÿr o
mẽ akôt mẽ amã amnhĩ to hêx o
pa. Hãmri nê mẽ amã: “E ot pa ra
mẽ ato amnhĩptar kaxyw mẽ awÿr
wrÿ.” Anhÿr o amnhĩ jarênh o mẽ
akôt pa. Nom kêr ka mẽ âm mẽ ama
nê âm mẽ ama. Âm mẽ kot mẽ amã
amnhĩ to hêx o pa kênã. Kormã
akupÿn ixpôx xà hã arĩgrota kormã.

⁹ —Nê koja mẽ nhÿri awry hã
axpên par o pa. Nê mẽ atãã axpên
par o pa. Nom kêr ka mẽ harênh ma
nê ri tee ri tokyx mẽmoj piitã hapêx
kukamã ajamaxpêr kêt nê. Mẽmoj
piitã hapêx xà hã arĩgrota kormã.

¹⁰ Koja mẽmoj piitã hapêx kaxyw
nhũm ahpÿnhã ri pika piitã
hkôt mẽ pa xwÿnhjaja axpên
kutã amnhĩ xunhwÿ nê pi-
japu nê axpên pa.

11 Nē koja pika piitā hkôt tanhmā ahpÿnhā mē à kute mē hamÿ nhūm mē amnhī xā htÿx kamā hamak o pa.

Nē koja pikaja tertet tÿx nē.

Nē koja mē nhÿri pika hkwy kamā prām xāj hpikaprar pa.

Nē koja kaxkwa kamā mēmoj tanhmā amnhī anhīpêx to nhūm pika nhō xwÿnhjaja tee ri omu nē kām ma htÿx kumrêx nē htertet o kuhê.

Koja mēmoj ā amnhī nhīpêx anē pa rī kormā akupÿn mē awÿr wrÿ nhūm mēmoj piitā hapêx pa. Koja mēmoj ā amnhī nhīpêx anē.

12 —E Tirtūm mā amnhī jarēnh xā hā ixkre grānh par xwÿj ri mēmoj tanhmā hkukamā kot amnhī nhīpêx to hā mē ate ixkukjêr xwÿnhhta kot paj hpānhā mē amā harē ka mē inhma. Koja mē kām ixkurê xwÿnhjaja mē awÿr mra nē ixtā mē apynē nē tanhmā ixtā mē anhīpêx to. Nē ma mē pikuprōnh xā hā ixkreja wÿr mē ato mra nē kamā mē kām tanhmā mē ato kapêr punuj to. Nhūm mē kuma hāmri nē ma mē ato mra nē mē ajagjê. Mē ate ixkôt apa ho apa jakamā koja mē ā mē anhīpêx anē. Nē mē ō pahihiti hwÿr mē ato mra nē mē kām tanhmā mē ato kapêr punuj to. 13 Tā kêr ka mē kutā akrī nē axāmnhīx māmri tanhmā mē kām ijarēnh to ho akrī.

14 —Nom kwa kêr ka mē kām tanhmā amnhī jarēnh to hkukamā tee ri ajamaxpêr o ri mē amā mē uma hkêt nē. Rÿ mē ajamaxpêr o: “Hêxta waa nē. Tanhmā koja we mē kot ixkukjêr ā arīgrota ā pa we ri mē kām ixkapêr to?” Anhÿr o tee ri amnhī kukamā ajamaxpêr kêt nē. Ām amnhī kaxyw inh mā pix mā ajamaxpêr tÿx rāhā nē. 15 Tanhmā mē kot mē anhīpêx to hā arīgrota ā kot paj tanhmā mē akrā hto ka mē inhÿ hā tanhmā mē kām amnhī jarēnh to. Hāmri nhūm mē amnhī tā mē ama nē axte tanhmā mē ato

kapêr to hkukamā tee ri hamaxpêr o kuhê.

16 —Nē koja mē anhīpêêxā nē mē akatorxā nē mē atō nē mē akrāmnhwÿjaja. Nē kaxyw krī hkôt mē akwÿjaja ixtā mē atā amÿnē nē ma mē ō pahi hwÿr mē ato mra nhūm mē ajagjê nē mē akwÿjê pa. 17 Koja mē piitā ixtā mē akamā gryk nē kām mē akurê nē. 18-19 Nom mē kot ā mē anhīpêx anhÿr mā tā kêr ka mē amnhī to htÿx nē ixkaga hkêt nē. Mē kot mē apar tā ka mē kaxkwa kamā akupÿm atir kurê kumrêx. Hāmri nē ā mē kot mē anhīpêx anhÿr xwÿnhjê rom Tirtūm mē wa ixri atir tūm nē amex rāhā apa ho apa. Mē kot tanhmā mē ato htā mē ate kaxkwa kamā atir tūm nē apa mā xwÿnh jakamā kwa kêr ka mē tee ri amnhī kukamā ajamaxpêr o ri apa hkêt nē.

20 —Koja nhÿrmā nhÿhÿnh pōristi ohtō nē mra nē Jerujarē hwÿr pōj hāmri nē mē kām hipōk pa nē kuhê. Ka mē ja hā mē omu nē mē kot krīja grānh par mā ajamaxpêr kurê kumrêx. 21 Koja mē ā amnhī nhīpêx anē ka mē amÿm amnhī wÿr mē omu hāmri nē ajapōj nē ma aprōt nē amrar kurê kumrêx. Mē apê jar pika pē Jutej kamā mē apa xwÿnhjaja ka mē omu nē mē kot mē apar pymaj ma aprōt nē amrar kurê kumrêx. Hixêt prêk wÿr ajapōj nē aprōt nē ma mra.

—Nē kê Jerujarē nhō xwÿnhjaja mē umaj haxwÿja hapōj nē ma hprōt nē ma mrrar o mra.

—Nē jar kapôt ā ri mē pa xwÿnhjaja kê mē akupÿm krī hwÿr gjêx kêt nē. Ām ma mē umaj hprōt nē mrrar kurê kumrêx.

22 —Mē kot amnhī tomnuj mÿrapê koja Tirtūm ā mē hwÿr mē kām mē hkurê xwÿnhjê rēnh anē. Kapêr ā kagā htūm ra kot mē hkukamā ja jarēnh kot anhÿr. Jakamā koja mē nhÿrmā mē

hkukamã mẽ harênh xàja kôt ã mẽ hipêx anê.

²³ —No mẽ htujarô xwýnhjaja nê mẽ hkra karàre xwýnhjaja koja mẽ kêp mẽmoj omnuj tỳx nê. Tanhmã kot mẽ amnhĩ to nê hprôt tỳx? Nà pika ja kamã koja mẽ piitã mex kêt nê. Mẽ kot amnhĩ tomnuj mỳrapê koja Tĩrtũm ã mẽ hipêx anê. ²⁴ Koja mẽ nhỹhỹnh krĩ hõ rũm mẽ hwỳr mra nê mẽ unê nê mẽ hkamnhwỳr o mẽ kupa. Nê mẽ hkwyjê pynê nê ma nhỹhỹm ahpỹnhã mẽ õ pika hwỳr amnhĩ kôt mẽ o pa nhũm mẽ kamã mẽ hkôt pa ho pa. Koja mẽ kêp Ijaew kêt xwýnhjaja Jerujarê o amnhĩptã nê ã mẽ hipêx anê. Nê kamã pa ho pa rãhã nhũm Tĩrtũm nhỹrmã akupỹm nê mẽ kator pa. Tã koja mẽ nê mẽ kator parja o pa ra akupỹn mẽ awỳr inhnojarê. Anê.

Nhũm pre ã Jejus mẽ kãm mẽ kot Jerujarê grãnh par xwýnhjê hkukamã harênh anê.

Akupỹn Jejus wrỳk xwỳj ri mẽmoj kot tanhmã amnhĩ nhĩpêx to

Matêwre 24.29-35; Makre 13.24-31; mããnên Sikũn Pêtre 3.10; Apokarip 1.7

²⁵ Nhũm Jejus arĩ hkôt mẽ pa ho pa xwýnhjê mã kapêr nê mẽ kãm:

—Nê kot paj nhỹrmã akupỹn mẽ awỳr inhnojarê nhũm kaxkwa kamã kanhêti nê myyti nê mytwrỳre axtem tanhmã ri amnhĩ nhĩpêx to. Nhũm gô xujanãr haxwỳja hkoko htỳx jao axpên tak tỳx nê. Hãmri nhũm pika piitã hkôt mẽ pa xwýnhjaja kuma nê omu nê nê kãm ma htỳx nê mur nê httert nê tee ri amnhĩ kukamã hamaxpêr.

²⁶ —Nê koja Tĩrtũm tanhmã kaxkwa ho àk to nhũm kanhêti piitã pikarêr pa. Hãmri nhũm pika hkôt ri mẽ pa xwýnhjaja omu nê tee ri amnhĩ kukamã hamaxpêr o amnhĩ japrãr pa nê hikwỳ. ²⁷⁻²⁸ Koja ã mẽmoj amnhĩ nhĩpêx anê ka mẽ ja hã omu nê akupỹn mẽ awỳr inhnojarê mã ajamaxpêr

kurê kumrêx. Hãmri nê mẽ kot ixkôt amnhĩ xunhwỳr kêt xwýnhjê rom akĩnh kãm ijapêr arĩt o akuhê.

—Nà kot paj akupỹn mẽ awỳr wrỳ. Kakrã kamã hirã htỳx kãm akupỹn ixihitỳx kãm mẽ awỳr wrỳ. Hãmri ka mẽ apiitã pika piitã hkôt ano ho ixpumu. Kot paj ã ixwrỳk anê hãmri nê mẽmoj punuj piitã pê mẽ apytãr pa. Jakamã ka mẽ ã mẽmoj kot amnhĩ nhĩpêx anhỹrja ã omu hãmri nê tokyx ixkôt axãpirta mã ajamaxpêr nê akĩnh tỳx nê. Anê.

²⁹ —E ga mẽ pĩ hpàr mũj pumu.

³⁰ Na hte mẽmo mytwrỳ hã rã nhũm mẽ omu nê õ hkukamã hamaxpêr.

³¹ Ja pyrã nê koja ã mẽmoj amnhĩ nhĩpêx par anhỹr mẽ ka mẽ omu nê akupỹn mẽ awỳr ixwrỳkja mã ajamaxpêr kurê kumrêx. ³² Koja akupỹn ixpôx kêt ri mẽ kot ã mẽmoj kot amnhĩ nhĩpêx anhỹr pumunh xwýnhjaja kormã piitã htyk kêt ri pa ra akupỹn wrỳ.

³³ —Nê koja nhỹrmã pika nê kaxkwa wa hapêx pa. Tã no ãm ixkapêr koja wa uràk nê aa hapêx kêt nê. Koja ãm rãhã ho rãhã. Kot paj aa ihkjê ho tanhmã mênh to hkêt nê.

³⁴⁻³⁵ —Nê kwa mẽ o kora. Mẽ axkãm ajamak rom. Mẽ kot ixkôt amnhĩ xunhwỳr kêt xwýnhjaja na htem kãm tanhmã amnhĩ nhĩpêx to hprãm xà hkôt pix mã tanhmã amnhĩ nhĩpêx to ho ri pa. Jao ãm amnhĩ xàpkur xà nê amnhĩ to mex xà nê kãxpore pix kukamã hamaxpêr o pa. Nê htỳx ri tanhmã amnhĩ tomnuj to ho pa. Nê pipãnh kãm tanhmã amnhĩ to ho pa. Tã koja mẽ ã amnhĩ nhĩpêx anhỹr o pa rãhã pa ra mẽ haêr pê akupỹn wrỳ nhũm mẽ tee ri ixpumu nê kãm ma htỳx kumrêx. Te tutre htỳx ri harôj kajyr o pa nê rapuuti hwỳr àr nhũm kot haê nê unênh nhũm tee kãm kator prãm pyrãk. Koja mẽ ã amnhĩ nhĩpêx anê. Nom kêr ka mẽ ho mẽ uràk kêt nê. ãm pa inh mã hprãm xà

hkôt pix mã tanhmã inhmã amnhĩ nhĩpêx to rãhã ho ri apa.

³⁶ —Tã kêr ka mẽ ã mẽ kot amnhĩ tomnuj o pa anhỹrja kôt amnhĩ nhĩpêx o apa pymaj amnhĩ to Tĩrtũm wỳr rãhã ho apa. Kê tanhmã mẽ ato hihtỳx to ka mẽ ỹ hã ho mẽ uràk kêt nê. Kêr pa nhỹrmã akupỳn wrỳ ka mẽ ixpumu nê mẽ kurom amnhĩ kamã akahak kêt nê akĩnh tỳx nê man ixwỳr mra. Anê.

Nhũm pre ã Jejus hkôt mẽ pa ho mẽ pa xwỳnhjê jahkre anê.

³⁷ Hãmri nê apkati mẽ Tĩrtũm mã amnhĩ jarênh xà hã ixkre kamã mẽ pikuprõnh xwỳnhjê jahkre ho hkrĩ. Nhũm kamàt nhũm hkôt mẽ pa ho mẽ pa xwỳnhjê mẽ mẽ krĩ rũm hapôj nê ma hixêr prêk pê Oriwêhti hwỳr mra nê kamã amnhĩm hikra nê hikwỳ. ³⁸ Nhũm kwỳhtã nhũm mẽ kànhmã hkrĩ nê ma akupỳm krĩm mra nê ixkreja wỳr agjê. Hãmri nhũm mẽ piitã hã akuprõ nê kot mẽ ahkre hã mar o hkrĩ.

22

Mẽ kot Jejus ã àmnênh ã mẽ harênh

Matêwre 26.14-16; Makre 14.1-2; Juãw 11.47-57

¹ Tã nhũm Ijaew kĩnhã arĩgro pê Pasja àhtêp o mō. Pas ã na htem amnepêr Tĩrtũm kot pika pê Ejit pê mẽ hpãmjê kator mã hamaxpêr kaxyw axpên wỳr akuprõ nê hã hkĩnh. Na htem arĩgroja jarênh o: “Pas” anhỹr ã harê. Nê mãânênh harênh o: “Mẽ pahte pãw kaxkrit kêt kur ã arĩgro.” Anhỹr o harê. ² Jakamã nhũm mẽ õ patre krãhtũmjê mẽ Tĩrtũm kapêr tũm o mẽ ahkre xwỳnhjaja ra kãm Jejus pĩr prãm nê. No mẽ kãm hkôt mẽ kot kapêr mar xwỳnhjê pyma nê. Nê tee ri kot tanhmã ho hkukamã hamaxpêr nê axpên mã:

—Hêxta waa nê. Kwa tanhmã kot puj wem ho nê mẽ kêp kupi? Kot puj mẽ noo mã tanhmã ho

nhũm mẽ hã mẽ pakamã gryk tỳx kumrêx. Anê.

Jut Kariot kot Jejus ã àmnênh ã harênh

Matêwre 26.14-16; Makre 14.10-11; Juãw 13.21-30

³⁻⁴ Tã nhũm Jut Kariotja. Jejus nhỹ hã mẽ ahkre ho pa xwỳnh pê 12 hō na pre. Tã axtem nê tanhmã hamaxpêr to nê Satanasti nhỹ hã ma mẽ õ patre krãhtũm mẽ Tĩrtũm mã amnhĩ jarênh xà hã ixkre jamãr xwỳnh krãhtũmjê hwỳr tẽ. Hãmri nê tanhmã Jejus o mẽ mar to nê mẽ kãm:

—E ot pa mẽ amã Jejus jarênh o tẽ. Xà kot paj mẽ amã hã amỹnê ka mẽ hpãnhã inhmã amnhĩre nà? Anê.

⁵ Hãmri nhũm mẽ kuma nê hkĩnh nê. Hãmri nê kãm:

—Nà kot paj mẽ amã amnhĩre.

⁶ Hãmri nhũm mẽ kot kãm amnhĩrer ã harênh ma nê hkĩnh nê mẽ kãm:

—Tõe. Nà kot paj mẽ amã ho anê. Anê.

Hãmri nê ma tẽ nê kato. Nê Jejus pynênh kaxyw htãnopxar o ri hkôt pa. Mẽ kot mar o pa xwỳnhjê hkàx ã nhỹri unênh nê ma mẽ hwỳr o htêm kaxyw.

Jejus kot ỹ hã mẽ ahkre xwỳnhjê kutã apkur ã harênh

Matêwre 26.17-25; Makre 14.12-21; Juãw 13.21-30

⁷ Tã nhũm Pasja kato. Amnepêr Ijaewjê nhĩgêjtaja na prem ôwêhti hkrare hkwy hpar o pa. Tĩrtũm kot ja hã mẽ omunh nê Ejit kãm mẽ kãm mẽ hkurê xwỳnhjê nhĩhkra nê mẽ kator kaxyw nhũm prem ã amnhĩ nhĩpêx anê. Jakamã na htem arĩ mẽ kêp mẽ hkanrêhã mẽ htãmnhwỳjaja arĩgro pê Pas ã axpên wỳr akuprõ nê mẽ kãm hamaxpêr pê mẽ uràk nê ôwêhti hkrare hkwy hpa. Hãmri nê pãwti kaxkrit kêt kãm kuku. ⁸ Jakamã nhũm Jejus ỹ hã mẽ ahkre ho mẽ pa xwỳnhjê wa ho axkrut nê mẽ amnhĩ kukamã wa kumê. Simãw Pêtre mẽ Juãwja

nhũm wa mẽ amnhĩ kukamã wa kumẽ nẽ wa kãm:

—E wa ma mẽ ixkukamã tẽ nẽ mẽ ixkutêp Pas ã mẽ panhõ hã apê. Anê.

⁹Hãmri nhũm wa kuma hãmri nẽ kãm:

—Tõe. Nhỹri kot paj we wa tẽ nẽ mẽ akutêp hã apê? Anê.

¹⁰Hãmri nhũm wa kãm:

—Nã wa mãmri ma Jerujarẽ hwỳr wa tẽ. Nẽ hwỳr axà nẽ mẽhõ mytita pumunh kurê kumrẽx. Nhũm amnhĩm gô ru nẽ amnhĩ kre hã poti xãm nẽ o tẽ. Ka wa omu nẽ hã ajêt nẽ ma hkôt òrkwỹ hwỳr tẽ.

¹¹Hãmri nẽ ixkre nhõ dõn pumu nẽ kãm: “E jar na pa wa awỳr tẽ. Jejus na wa inhmẽ pa wa awỳr tẽ. Na awỳr pẽr mẽnh o: ‘Nhỹri kot paj ixkôt ri mẽ pa ho mẽ pa xwỳnhjẽ mẽ axpẽn kutã Pas ã apku?’ Anê. Na ã awỳr hpẽr mẽnh anê.” Anê.

¹²—E ã kãm akapêr anê kẽ war ama nẽ ra war amã òrkwỹ nhĩmõk ã ixkre rax ò jahkre. Kamã ra kaxyw mẽ paxàpkur xà hã mẽmoj piitãã. Ka wa omu hãmri nẽ mãmri mẽ ixkutêp kamã mẽmoj tã apê. Anê.

¹³Hãmri nhũm wa kuma nẽ ma krĩm tẽ. Ma tẽ nẽ hwỳr axà hãmri nẽ ra kot wa kãm mẽmoj jarẽnh xà hkôt mẽmoj piitã omu hãmri nẽ mẽ kutêp mẽõ hã àpẽn h o wa xa.

¹⁴Tã nhũm myt axà nhũm mẽ wa hkôt mõ nẽ ixkreta wỳr àpir pa. Hãmri nẽ apkur kaxyw hkrĩ hpa nhũm Jejus mẽ ìhkõ hã nhỹ.

¹⁵Hãmri nẽ mẽ kãm tanhmã amnhĩ jarẽnh to nẽ mẽ kãm:

—E na pa inhmã Pas ã mẽ anhĩhkõ hã ixàpkur prãm nẽ. Kormã ixte amnhĩ xà htỳx kãm ijamak xwỳj ri. ¹⁶Kwa mẽ inhma. Kot paj axte mẽ akutã Pas ã ixàpkur kêt ry rax nẽ. Nom koja nhỹrmã Tĩrtũm akupỳn ixte mẽ ato amnhĩptar kaxyw inhmẽ hãmri pu mẽ rĩ kormã axte arĩgro mex maatija ã pahkĩnh kãm axpẽn kutã paxàpkur rax nẽ. Anê.

¹⁷Nhũm ã mẽ kãm amnhĩ jarẽnh anẽ nẽ hpãnhã wĩhti py nẽ o xa nẽ Tĩrtũm mã harẽ nẽ kãm:

—Pa Papaj. Nã ãm hãmri na ka hte mẽ inhnẽ mẽ kãm mẽ ixkurê xwỳnhjẽ pumunh mex nẽ mẽ ìhkra pẽ mẽ ijapõj. Amex o amex. Anê.

Hãmri nẽ hpãnhã hkôt mẽ pa ho mẽ pa xwỳnhjẽ hõ mã kugõ nẽ kãm:

—E mĩ. Apy nẽ mẽ axpẽn pãnhã hkwỳ ho ixkõ. ¹⁸ãm hãmri na pa mẽ amã amnhĩ jarẽ. Kot paj axte wĩhti ho ixkõm kêt rãhã nhũm nhỹrmã Inhõ Papaj akupỳn mẽ awỳr inhmẽ. Hãmri pu mẽ rĩ kormã akupỳn ixpõx xà hã arĩgrota ã pahkĩnh rax nẽ. No ãm ra axtem tanhmã hã mẽ pahkĩnh to. Anê.

¹⁹Hãmri nẽ hpãnhã pãwti py nẽ mã ho anẽ nẽ Tĩrtũm mã harẽ. Hãmri nẽ ho hkry hpa nẽ mẽ piitã mẽ kãm òr pa nẽ mẽ kãm:

—E na pa ã pãwti ho hkry nẽ mẽ amã òr anẽ. Koja mẽ ã inhĩpêx anẽ nẽ te mẽ kot ixto hkry hpar pyrãk o inhĩpêx pa amnhĩ xà htỳx kamã ijamak kãm ty. Nom mẽ anê kot paj ty. Jakamã kër ka mẽ ixwakre kamã tõhã axpẽn wỳr akuprõ nẽ ixte mẽ ate amnhĩ tomnuj pãnhã amnhĩrer kaxyw mẽ anê ixtykja mã ajamaxpêr pẽ akĩnh nẽ pãwti hkur o akrĩ. E mẽ mãmri axãmnhĩx aku. Anê.

Nhũm pre ã mẽ kãm amnhĩ jarẽnh anẽ nhũm mẽ mar pẽ pãwtita hkur o hkrĩ. ²⁰Hãmri nẽ ra hkur pa. Hãmri nhũm Jejus axte kopta py nẽ mẽ kãm:

—Mẽ kot ixpĩr xà hã arĩgro hã koja ixkamrõ axkapĩ. Nom koja mẽ amarĩ ixpĩr nhũm ixkamrõ amarĩ hpikapĩr kêt nẽ. ãm paa. Pa kot paj mẽ anê mẽ ìhkram amnhĩ jaxà nhũm mẽ ã inhĩpêx anẽ. Koja ixkamrõ axkapĩ nhũm Tĩrtũm omu nẽ ixkukwak ri mẽ anê mẽ ate amnhĩ tomnuj piitã te amnhĩ katut kôt rẽn h par pyrãk o hipêx nẽ mẽ ato hkra. Amnepêm kot ja hã amnhĩ jarẽnh xà hkôt. Jakamã e mẽ

ixkamrô pikapīrta mā ajamaxpēr pē wīhti hkwy ho ixkō. Anē.

Jejus ā mẽ kām àmnēnh xwỳnh jarēnh

Matêwre 26.21-25; Makre 14.18-21; Juāw 13.18-19

²¹ Nhũm Jejus arī mẽ kām kapēr nē mẽ kām:

—Nē kot mẽ kām ixtā àmnēnh mā xwỳnhhta na jar mẽ pahkaêx ā mẽ pakutā apkur o nhỹ. ²² Tirtũm kām hprām xā hkôt koja mẽ tanhmā ixtō rax nē xipī. Nom kot mẽ kām ixtā àmnēnh mā xwỳnhhta hēxta waa nē. Ā kot inhĩpêx anhỹrja mỳrapê koja amnhĩ xā htỳx kām hamak rax kumrêx. Anē.

²³ Nhũm pre ā Jejus mẽ kām amnhĩ jarēnh anē. Nhũm mẽ kuma nē tee ri xapên pumunh o hkrī. Hāmri nē ri xapên kukja nē xapên mã:

—Kwa nà mẽ pahtō kot pu we ā ri hipêx anē? Nà pa hkêt.

Anhỹr o tee ri xapên kukjêr o hkrī.

Mẽ pamā amnhĩ to rũnh prām kêt ā mẽ pamā karō

Matêwre 20.20-28; Makre 10.35-45; mǎānēn Rōmān 12.3-5, 12.10, 12.16; Epes 4.2-4; Piriapos 2.3-8; Xiakre 4.1-10; Wam Pêtre 5.3

²⁴ Tā nhũm Jejus nhỹ hã mẽ ahkre ho mẽ pa xwỳnhjaja xapên mã tanhmā kapēr to ho hkrī nē xapên mã:

—Kwa mẽ pahtō kot puj wem nhỹrmā pahpê pahi nē mẽ ho amnhĩptār rax o ri papa? Anē.

Hāmri nē mẽ xapên mã: “Nà pa.” Anē nē nhānh xapên mã: “Nà kêt paa.” Anē. Hāmri nhũm mẽ nētānh xapên mã: “Nà kêt pa kēnā.”

²⁵ Anhỹr o xapên mã kapēr o hkrī. Hāmri nhũm Jejus tee ri xapên tā mẽ kuma nhũm mẽ ā hamaxpēr anhỹrja kêp omnuj nē nhũm mẽ kām tanhmā hã kapēr to nē mẽ kām:

—E mẽ inhma. Na hte Ijaew kêt xwỳnhjê nhō pahijaja ā amnhĩ

nhĩpêx anhỹr o ri pa nē amarĩ hkrī xā kamā hkrī ho hkrī. àhpumunh tỳx jakamā na htem amarĩ ixkre hkre jakry kamā kām mẽ àpēnh xwỳnhjê mã mẽmo mẽ àpēnh ā karō ho hkrī. Na htem ā amnhĩ nhĩpêx anhỹr o pa. Nē mẽ kot amnhĩm mex ā harēnh kaxyw tanhmā mẽ ho mex to ho pa. ²⁶⁻²⁷ Tā kêt ka mẽ ho mẽ urak kêt nē. Kêt ām te amarĩ ri mẽ apa xwỳnh pyrāk o xapên nhĩpêx. Ixpyrà nē amarĩ mẽmoj to mẽ kutā anojarêt rāhā ho ri apa. No mẽ ate mẽ ho amnhĩptār rax kukamā ajamaxpēr kêt nē. ²⁸ Na prem xapên mã ixtō hêx nē tanhmā ixtō kapēr punuj to htā ka mẽ ama nē ām mẽ ama nē arĩ ixkôt ri apa rāhā nē. Ām hāmri na ka htem arĩ ixkôt ri apa anē. ²⁹⁻³⁰ Kot paj amnhĩ tā mẽ ato mex rax nē. Na pre ra Tirtũm nhỹrmā ixte mẽ ato amnhĩptār o ixkrī kaxyw ixām. Tā ot pa amnhĩ pyrā nē mẽ pahkwỹ Ijaew kaxyw mẽ axunhwỹ ka mẽ nhỹrmā mẽ piitā mẽ ho amnhĩptār o apa. Nē mẽ apê ixkrāmnhwỹ hã nhỹrmā ixkutā axāpkur o apa. Anē.

Jejus kot Simāw Pêtre mã kapēr ā harēnh

Matêwre 26.31-35; Makre 14.27-31; Juāw 13.36-38

³¹ Tā nhũm Jejus Simāw Pêtre mã kapēr nē kām:

—Kwa Simāw. Na Satanasti kām hprī hã ixtā mẽ apiitā mẽ kamā hamak prām nē. Tanhmā kot mẽ akrā hto nhũm mẽ ate mẽ kām ixkurê xwỳnhjê pumaj ixkaga hã kām mẽ akamā hamak prām tỳx nē. Jakamā ā kot mẽ anhĩpêx anhỹr kaxyw na pre ra amnhĩ to Inhō Papaj ma nhũm kām: “Tōe. Kam nē māmri tanhmā mẽ kamā ajamak to.” Anē.

³² —Tā ate mẽ umaj ixkaga nē axte ate amnhĩ kaxyw inhmā ajamaxpēr kêt pymaj na pa ra ato Inhō Papaj wỳr kām xihtỳx nē Simāw Pêtre. Jakamā kêt ka mẽmo arĩgro hã tee ri ixkaga hã amnhĩ

pumu hāmri nē tokyx tām akupým ixkôt amnhĩ xām tỳx nē. Kêr kê nhỹrmã akwýjê hõ tanhmã amnhĩ tomnuj to nē tee ri amnhĩ kukamã hamaxpêr ka ja hã omu hāmri nē kãm ate tanhmã amnhĩ tomnuj tota jarê. Kê mê ã ate amnhĩ nhĩpêx anhỹr ã ajarênh ma nē apyrã nē tokyx akupým tām ixkôt amnhĩ xām tỳx kurê kumrêx. E kêr ka ã akupým ixkôt mê piitã mê hipêx anhỹr o ri apa Simãw Pêtre. Anê.

Nhũm pre ã Simãw Pêtre kot tanhmã amnhĩ nhĩpêx to hkukamã kãm ujarênh anê. ³³ Hāmri nhũm tee ri amnhĩ tã kuma nē kãm:

—Kwa nã Pahihti. Kot paj ri akwým tanhmã amnhĩ tomnuj to hkêt nē. Koja mê te ajaxã nē apĩ htã kot paj arĩ akôt ri ixpa ho ixpa nhũm mê pahto amỹrã nē tanhmã pahto. Anê.

³⁴ Hāmri nhũm kuma nē kãm:

—Nã koja apkati hkôt krãhyre hkâr kêt ri ka ra mê umaj ate ixkôt apa hkêt ã mê kãm amnhĩ tã axàprãr o axkrunêpxi kãm ga. Anê.

Jejus kot hkwyjê mã mẽmoj tã karõ

Matêwre 10.5-15; Rukre 9.1-3

³⁵ Hāmri nhũm Jejus arĩ hkôt mê pa ho pa xwýnhjê mã kapêr nē mê kãm:

—E wam ixte mê hwýr mê arênhã ã na ka prem amnhĩ kôt aparkã hkwy ho apa hkêt nē. Nê kawã jamãnh nê ho apa hkêt nē. Nê mrykã jamãnh nê amnhĩ kôt ho apa hkêt nē. ãm mê anhỹ kamã mê hwýr apa hã na pa pre mê amã karõ. Tã xãn ka prem ã mê hwýr apa anê nhũm mê amnhĩ wýr awýr kêt nê? Nã xã na prem amnhĩ wýr mê awý? Anê.

Hāmri nhũm mê kãm:

—Tý na prem amnhĩ wýr mê ixwý. Mê ixte amnhĩ kôt mẽmoj to ixpa hkêt tã na pa prem amarĩ mẽ kutã ixãpkur mex o ri mẽ hkôt ixpa. Anê.

³⁶⁻³⁷ Hāmri nhũm mê kãm:

—Tõe. Nã mê kot mê ato mex tã nom koja mê hpãnhã axtem hõ ho mê anhĩpêx. Jakamã kêr ka mê akupým mê kãm ijarênh o apa kaxyw anojarêt hāmri nê anhõ mrykã rý akawã htu nê ma amnhĩ kôt ho apa. Nê awapo. Kot kaj mê awapo hkêt japêr hāmri nê apipro xã ho wênê nê amnhĩm hõ japrõ nê ma amnhĩ kôt ho apa. E kêr ka mê ã amnhĩ nhĩpêx anê.

—Nê Tĩrtũm kapêr ã kagã htũm kot ra ixkukamã tanhmã ijarênh to nê kot ijarênh kot:

Koja mê hipêx o te mê kot amnhĩ tomnuj tỳx xwýnh nhĩpêx pyrãk. Anê.

ã mê kot inhĩpêx anhỹr kukamã ijarênh kot anhỹr. Tã na mê ra ã inhĩpêx anhỹr kaxyw. Anê.

³⁸ Nhũm pre ã Jejus mê kãm kapêr anê nhũm mê kuma nē kãm:

—Ota mê panhõ wapohti hamêxkrut Pahihti. Anê.

Hāmri nhũm mê kãm:

—Tõe. Nã hāmri. Mê amnhĩm axi nê ho amnhĩm mẽmoj to anê. Anê.

Jejus kot Tĩrtũm mã amnhĩ jarênh Matêwre 26.36-46; Makre 14.32-42

³⁹ Tã nhũm Jejus kê axte krĩja rũm kato nê hixêt pê Oriwêhti hwýr tẽ nê api nhũm hkôt mê pa ho mê pa xwýnhjaja ma hkôt mra. ⁴⁰ Hāmri nê nhỹri hixêt kahti ri hkrĩ nhũm Jejus mê kãm:

—E kwa kêr ka mê ixkutêp amnhĩ to Inhõ Papaj wýr o akrĩ. Kê mê ixkôt tanhmã mê ato htã ka mê amã mê uma xãj ixkaga hkêt nê. Arĩ mẽ kutã amnhĩ to htỳx nê akuhê. Anê.

⁴¹ Hāmri nê mẽ kurũm htêm griere nê Tĩrtũm mã amnhĩ jarênh kaxyw hkõn krã ho tẽm nê nhỹ. ⁴² Hāmri nê kãm:

—Kwa Papaj. Nã na pa ra amnhĩ xã htỳx kukamã ijamaxpêr nê amnhĩ kamã ixkahak tỳx kumrêx. Inhmã amnhĩ xã kamã ijamak prãm kêt o ijamak prãm kêt. Jakamã kot kaj amã inhnê

ho ajapêx prâm nê māmri inhnê ho ajapêx nhũm mē kām ixkurê xwýnhja tanhmã ixto hkêt nê. Rý ko. Kot kaj amã mē kot tanhmã ixto hprãm hã kê mē māmri tanhmã inhîpêx to. Nom pam inhmã hprãm xà hkôt kêt. Anê.

Nhũm pre ã Jejus amnhî to Hipêêxã Tirtũm wýr anê. ⁴³ Hãmri nhũm kuma nê hwýr kapêr o wrýk xwýnhja mē nhũm hwýr wrý nê kuri xa. Hãmri nê òxàhkre kaxwýnh kãm tanhmã ho hihtýx to. ⁴⁴ Nhũm kê axte amnhî to Hipêêxã hwýr kãm hihtýx nê. Tee ri amnhî kukamã hamaxpêr pê amnhî kamã kahak týx kumrêx. Jao hã gô rax nê te hkamrô xàhàr pyràk o pikap ahã. ⁴⁵ Hãmri nê kànhmã xa nê akupým hkôt mē pa ho mē pa xwýnhjê hwýr tē nē mē omu nhũm mē ra ôt pa nē hikwý. Mē kot tee ri Jejus kot mē kãm amnhî jarênhja kukamã hamaxpêr o hkaprî nē ôt pa nē hikwý. ⁴⁶ Hãmri nhũm Jejus tē nē tee ri mē omu nē mē kumra nē mē kãm:

—Kwa nà. Mē ri ã amnhî nhîpêx anhýr kêt nê. Kwa mē kànhmã akrî nē amnhî to Inhõ Papaj wý kê mē ato mē axihtýx. Hãmri nhũm mē tanhmã ixkôt mē ato ka mē inhý hã mē kutã amnhî to htýx nē akuhê. Anê.

*Mē kot Jejus pynênh ã mē harênh
Matêwre 26.47-56; Makre 14.43-50; Juãw 18.1-11*

⁴⁷ Nhũm pre ã Jejus mē kãm kapêr anhýr rôm nhũm hkôt pa ho pa xwýnh pê Jut Kariotja amnhî kôt mē kot Jejus pynênh xwýnhjê ho tē. Mē ho htêm rax nê. Hãmri nê kot Jejus kahti hkôt mýnh kaxyw hwýr tē ⁴⁸ nhũm amnhî tã omu nē kãm:

—Kwa Jut. Xà mē kahti hkôt mē hamýnh nē mē hpâr o na htem mē kãm mē hã amýnê? Anê.

⁴⁹ Hãmri nhũm hkôt mē pa ho mē pa xwýnhjê hõja tee ri mē kot amnhî nhîpêx ã mē omu hãmri

mē ò wapota mã hamaxpêr kurê kumrêx nê Jejus mã:

—Kwa Pahihti. Xà kot paj mē panhõ wapohti py nê ho mē panê mē hkwy hpa? Anê.

⁵⁰ Hãmri nhũm hõta kuma nê mē kaxyw ja kapa. Nhũm mē ò patre maati mã àpênh xwýnhja mē hkôt tē nhũm omu nê kãm wapo ho apê. Nê kot ho hkrã nhîpônã mã tã kuhpaw nê ho upòk rũm hamak nhîkjê pix krãhta. ⁵¹ Hãmri nhũm Jejus omu nê nê kãm kapêr nê kãm:

—Kwa nà ri ã amnhî nhîpêx anhýr kêt nê. Amarî xa. Anê.

Hãmri nê hamakja py nê akupým kãm hamak ã kuxi nê ho mex. ⁵²⁻⁵³ Hãmri nê mē kot unênh mã xwýnhjê mã tanhmã kapêr to. Mē ò patre krãhtũmjê mē Tirtũm mã amnhî jarênh xà hã ixkre jamãr xwýnhjê krãhtũm mē Ijaew nhõ pahijê mē nhũm mē ho pimràatã mē kãm kapêr nê mē kãm:

—Kwa na pa pre apkati mē Tirtũm nhõrkwy kamã mē kãm ixkapêr o ixpa ka prem tokyx ixpynênh kêt tã jarãhã te ixte amnhî tomnuj xwýnh pyràk o inhîpêx nê ixwýr wapo nê kô hã akapên nê ixwýr ã atêm rax anê. No ãm ra mē ate tanhmã ixto kaxyw arîgro kator kênã. Jakamã kot kaj mē māmri tanhmã amã ixto hprãm xà hkôt māmri tanhmã ixto. Satanasti nhý hã ã mē ate inhîpêx anhýr mã kênã. Anê.

*Simãw Pêtre kot Jejus kôt pa hkêt
ã kot amnhî jarênh*

Matêwre 26.69-75; Makre 14.66-72; Juãw 18.15-18, 18.25-27

⁵⁴ Tã nhũm mē Jejus pynê nê ma o tē. Ma mē ò patre maati nhõrkwy hwýr o tē. Nhũm Simãw Pêtre ma hapu hã mē hkôt hã mē omunh o tē. ⁵⁵ Nhũm mē patre maati nhõrkwy hwýr Jejus o axã nê hkôt gjêx pa hãmri nhũm Simãw Pêtre kítare hwýr axã nê mē kuri xa. Nhũm mē kítare kamã amnhîm kuto nê hã ànhunh o hkrî nhũm

⁵⁶ mē ihkô hã ànhunh o nhỹ. Hãmri nhũm mē kãm àpênh xwýnh niti hirã kamã hprĩ hã omunh kurê kumrêx nê mē kãm:

—Xê pěr myti ja kêp Jejus kôt mē pa ho mē pa xwýnhjê hõ na. Anê.

⁵⁷ Hãmri nhũm tee ri amnhĩ tã kuma nê kãm mē uma nê mē kãm amnhĩ tã aprã nê kãm:

—Tk. Kokỹ. Ixte mēhõ my ata pumunhre hã. Anê.

⁵⁸ Tã nhũm hpãnhã mēhõ myja kãm:

—Kwa nà. ãm hãmri na ajarê. Apê Jejus kôt ri mē pa xwýnhjê hõ na ka.

Anê nhũm kuma nê kê axte kãm:

—Kwa mē ri ã amnhĩ krã hkôt ri ixto axêx anhỹr kêt nê. ãm ixte aa mēhõta pumunh kêt kumrêx. Anê.

⁵⁹ Tã nhũm ja haxwýja axte omu nê kãm:

—Kwa ãm hãmri na mē ajarê. Apê Jejus kwý hõ na ka. Uràk nê te apê Garirej nhõ xwýnh pyràk kênã. Anê.

⁶⁰ Hãmri nhũm tee ri kuma nê mē kãm amnhĩ tã aprãr kãm hihtýx nê mē kãm:

—Tk. Ixpê Garirej nhõ xwýnh kêt. ãm ixte mēhõ mũj pumunh kêt kumrêx tã ka mē ãm xatã hkôt ixpa ho ixpa xwýnh ã ixkamnhix o akuhê.

Anhỹrja o ra mē kãm amnhĩ tã aprãr o axkrunêpxi mē nhũm krãhyre kã. ⁶¹ Hãmri nhũm Jejus arĩ ixkre kamã ãm tã Simãw Pêtre ho hakêx nê omu. Hãmri nhũm amnhĩ tã no pumu nê kot hkukamã kãm ã amnhĩ nhĩpêx anhỹr jarênhja mã hamaxpêr kurê kumrêx. Krãhyre hkàr kêt ri kot mē kãm amnhĩ tã aprãr o axkrunêpxi hã harênhja mã hamaxpêr nê kãnhmã hakry hpar o tē nē hkaprĩ htýx nē. ⁶² Hãmri nē hkaprĩ xaj kítare pē kato nē tē nē awry hã xa nē mýr rax kumrêx.

Mē kot Jejus tak ã mē harênh

Matêwre 26.67-68; Makre 14.65

⁶³ Hãmri nhũm mē kot Jejus pumunh o kuhê xwýnhjaja hã hpêr

o axkê nê htak o kuhê. ⁶⁴ Nê no hpro nê htak nê kãm:

—E atak xwýnh nhĩxi jarê. Apê Tirtũm Kra hã ate amnhĩ jarênh jakamã mãn uràk nê axàhpumunh týt. Jakamã e hixi jarê. Anê.

⁶⁵ Hãmri nê xatã hapry nê kãm kapêr punuj nê.

Mē kot mē hkrãhtũm wýr Jejus o htēm ã mē harênh

Matêwre 26.57-68; Makre 14.53-65; Juãw 18.19-24

⁶⁶ Tã nhũm myt kator o mōr mē nhũm Ijaew nhõ pahijê mē patre krãhtũmjê mē Tirtũm kapêr tũm o mē ahkre xwýnhjaja axpên wýr pikuprõnh pa. Hãmri nhũm mē ma mē hwýr Jejus o tē. ⁶⁷⁻⁶⁸ Nhũm mē omu nê tanhmã kot amnhĩ jarênh to hã hkukja nê kãm:

—Kwa mē inhmã amnhĩ jarê. Xà ka na apê Tirtũm kot mē ixkaxyw axãm xwýnhnta? Xà ka kot kaj Rõm nhõ xwýnhjê pē mē ixpytã nê mē ixto amnhĩptar o apa? Anê.

Hãmri nhũm mē kãm:

—Nà kot paj tanhmã mē amã amnhĩ jarênh to ka mē ixkôt ajamaxpêr kêt nê. Ixte ãm hãmri mē amã amnhĩ jarênh tã ka mē inhma nê ãm inhma. Nê kot pa amnhĩ xwar mēmoj tã mē akukja ka mē amnhĩ xwar inhmã tanhmã harênh to hkêt nê. ãm mē axêx rom mē ate ã ixkukjêr anhỹr kênã. ⁶⁹ Tã nom kot paj tokyx ma akupým Inhĩpêxã Tirtũm wýr api. Hihtýx o hihtýx rãhã nê pa ho pa xwýnh na. Jakamã kot paj hwýr api nhũm amnhĩ nhĩhkô hã inhỹr pa upôk rũm mē apiitã mē ato amnhĩptar o ixkrĩ. Hãmri nê nhỹrmã paa tanhmã mē ajarênh to. Anê.

⁷⁰ Hãmri nhũm mē tee ri kot ã amnhĩ jarênh anhỹrja ma nê kãm:

—Tk. Kwa akatãt kôt mē inhmã amnhĩ jarê nã. Xà apê Tirtũm Kra na ka? Anê.

Hãmri nhũm mē kãm:

—Tý ixpê Kra na pa. Anê.

⁷¹ Hāmri nhūm mē tee ri ā amnhī jarēnh anhÿrja ā kuma nē xypēn mā:

—Kwa mo kaxyw kot puj mē axte mē hkwÿjē japēr nhūm mē tanhmā kot amnhī tomnuj to hā harē? Tām kēp Tirtūm Kra hā amnhī to hēx nhūm mē pahte pahÿitā mar kēnā. E kwa tokyx pu mē ma Rōm nhō pahÿhti hwÿr o tē kē mē pamā hā amÿnē nē mē pamā kupī. Anē.

23

Mē kot pahi Pirat wÿr Jejus o htēm ā mē harēnh

Matēwre 27.1-2, 27.11-26; Makre 15.1-5; Juāw 18.28-38

¹ Tā nhūm mē Jejus o kato nē nhām Pahihti Pirat wÿr o tē. ² Hāmri nē kutā ām nē tanhmā kām ho hēx to nē kām:

—E ot pa mē awÿr jahti ho tē. Na hte mē inhmā hēx rūnh o pa. Mē ixte Pahihti Sesti kapēr kwÿm ri amnhī nhÿpēx prām xāj tanhmā mē inhmā mēmoj tā karō hto ho pa. Nē axtem nē mē ixte Sesti mā kàxpore hkwÿy nhōr kēt ā mē inhmā karō. Nē Tirtūm kot mē pakaxyw kēp mē panhō pahi hā ām xwÿnh ā amnhī jarē. Ā na hte mē inhmā amnhī to hēx anhÿr o pa. Anē.

³ Hāmri nhūm Pirat mē kuma nē Jejus pumu nē kām:

—E kwa inhmā amnhī jarē. Xā apē Ijaew nhō pahi na ka? Xā ka na htem amnhī wÿr akām hamak o pa? Anē.

Hāmri nhūm kām:

—Nā ām hāmri na ka ā ijarēnh anē. Anē.

⁴ Hāmri nhūm Pirat tanhmā hkukjēr to nē tee ri kot amnhī jarēnh ā kuma hāmri nē patre krāhtūmjē mā kām:

—Kwa mēmo mÿrapē kot pa tanhmā mē amā hā ixāmnēnh to? Kot tanhmā amnhī tomnuj tore hā. Nā kot pa kām inhÿre. Anē.

⁵ Hāmri nhūm mē tee ri kuma nē kot mē kām hā āmnēnh prām xāj hā kām kapēr kām hihtÿx nē. Nē kām:

—Kwa nā. Na pre hte pika pē Jutej kamā tanhmā mē kām hēx to ho pa. Hāmri nhūm mē ra hā xypēn kutā amnhī xunhwÿr nē hā pijapu rūnh o pa. Tā māānēn Garirej kamā ā amnhī nhÿpēx anhÿr o hkrax nē hpānhā amnē mē pahwÿr ā amnhī nhÿpēx anhÿr kaxyw mōr anē. Anē.

Mē kot Eroxo wÿr Jejus o htēm ā mē harēnh

Rukre 9.7-9

⁶ Hāmri nhūm Pahi Pirat mē kuma nē mē kām:

—Kwa xā kēp Garirej nhō xwÿnh na? Anē.

Hāmri nhūm mē kām:

—Tÿ. Kēp Garirej nhō xwÿnh kēnā.

⁷ Anē nhūm mē kām:

—Tō mē ma pahihti Eroxo āxipas wÿr mām o tē. Kēp Garirej nhō xwÿnhjē nhō pahi na. Tā ra jar Jerujarē kamā ham pōj. No axtem ixpē Jutej kamā mē pa xwÿnhjē nhō pahi jakamā kwa mē ma ō pahita wÿr mām o tē kē tām tanhmā mē amā ho. Anē.

⁸ Hāmri nhūm mē kuma nē ma pahi Eroxo āxipas wÿr o tē. Na pre ra Eroxo āxipasja xatā Jejus jarēnh ma nē kām omunh prām nē. Kām aa kot mēmoj pumunh kēt ō ho anhÿr ā omunh prām tÿx jakamā nhūm mē ma hwÿr o tē nhūm omu nē hkÿnh nē. ⁹ Hāmri nē tee ri mēmoj tā hkukja no nhūm akryk xa nē tanhmā kām nē hkēt nē. ¹⁰ Hāmri nhūm mē ō patre krāhtūmjē mē Tirtūm kapēr tūm o mē ahkre xwÿnhjaja kām ho kapēr punuj nē ho hēx kām hihtÿx nē.

¹¹ Hāmri nhūm pahi Eroxo āxipas mē kuma hāmri nē ō pōristi mē wa kām kapēr punuj nē hā hpēr o axkē nē tanhmā ri haprÿ to. Hāmri nē hā hpēr o pikēnh kām kēp pahi hā mē ē mexja py nē kām haxā nē akupÿm pahi Pirat wÿr kumē.

¹² Na pre Pahi Pirat mē Pahi Eroxo āxipasja wa kām axpēn kÿnh kēt nē. Tā hāmri nhūm Eroxo āxipasja tee ri Jejus kot kām tanhmā amnhī jarēnh

to hã mar prãm xàj tee ri hkukamã hamaxpêr hãmri nê Pirat ã hpijaàm kaxyw akupÿm hwÿr kumê. Hãmri nhũm amnhĩ tâ omu hãmri nê wa ra akupÿm kãm axpên kĩnh nê. Nê akupÿm axpên mã hpêr o axkê nê pikunhar o pa pê akupÿm axpên to hkrãmnhwÿ.

Pirat kot Jejus pÿr ã àmnênh

Matêwre 27.15-26; Makre 15.6-15; Juãw 18.39-19.16; mãânên Atre 3.13-14

¹³ Tã nhũm Pirat akupÿm amnhĩ wÿr mē hã karō. Ijaew kwÿjaja nē mē ō pahijaja nē mē ō patre krãhtũmjaja nhũm akupÿm amnhĩ wÿr mē piitã mē hã karō. ¹⁴ Hãmri nhũm mē akupÿm hwÿr gjêx pa nê kuhê nhũm mē kãm:

—E na ka mē ixwÿr mytita o tē nē tanhmã inhmã harēnh to. Kot mē akwÿjê mã tanhmã hêx to ho pa hã harē. Tã pa ra jar mē anoo mã tanhmã hkukjêr to nē tee ri kot inhmã tanhmã amnhĩ jarēnh to hã kuma. Te kot amnhĩ to mex xwÿnh pyrãk. Mē ate tanhmã ho akapêr to htã nom kot anhÿr kêt. Kot amnhĩ to mex xwÿnh na. ¹⁵ Pahi Eroxa ra ixpyrà nē tee ri tanhmã hkukjêr to nom nhũm tanhmã kãm nē hkêt nê. Nhũm tee ri ja hã omu nê akupÿn ixwÿr kumê. Jakamã kwa mēmo mÿrapê kot paj mē amã hã amÿnê nhũm mē amã kupĩ? Tanhmã kot amnhĩ tomnuj tore hã. ¹⁶ Kot paj ãm mē kãm anê kê mē htak nê kãm ure kê mãmri ma tē. Anê.

¹⁷ Arĩgro pê Pas ã na pre hte mē ō pahi mē kot mē ho prês nhũm mē hkrĩ xwÿnhjaja nhũm pre htem mē ho hpÿnh nē mē kãm ure. Jakamã na pre ã mē kãm kapêr anê nē kot Jejus tak nê kãm urer mã. ¹⁸⁻¹⁹ Nom nhũm mē kuma nhũm ja mē kêp omnuj nē nhũm mē kãm:

—Kwa nã. Apĩ ri. Apĩ nē mē inhmã Parapas mã mãn anhũre. Anê.

Parapas na pre mē ō krĩ kamã ō pôristi mē pahi Piratja mē kutã amnhĩ xãm nē kêp ō pôristi hõxpĩ.

Mÿrapê na prem ra haxã nhũm hkrĩ ho hkrĩ. Jakamã nhũm mē Pirat kot kãm urer kaxyw ã kãm kapêr anê. ²⁰ Nom nhũm kãm Jejus mã urer prãm jakamã axte hã mē hkukja nē mē kãm:

—Kwa nom mēmoj mÿrapê kot paj mē kãm hã amÿnê nhũm mē amã kupĩ?

²¹ Anhÿr tâ nhũm mē kuma nē ãm kuma. Nê xatã kãm:

—Kwa tokyx pĩ kahpa hã anhô kê ty. Anê.

²² Hãmri nhũm tee ri mē kuma nē mē kãm:

—Tk. Kwa nã. Tanhmã kot amnhĩ tomnuj tore hã kot pa kêt hã kunhō nhũm ty. Nã kot paj ãm mē kãm anê kê mē htak nê kãm ure kê ma tē. Anê.

²³ Hãmri nhũm mē xatã hã kãm kapêr kãm hihtÿx nê kãm:

—Kwa nã. Pĩ kahpa hã mãn anhô kê ty.

Anhÿr o ãm xatã kàx pê àmra kamã kãm hã amÿnê. ²⁴ Hãmri nhũm Pirat tee ri mē kuma hãmri nê tâ mē kãm hprãm xã hkôt mē kãm ã amÿnê. ²⁵ Hãmri nē mē kãm Parapas mã ure. Ra kot pahi Pirat pê ō pôristi kutã amnhĩ xãm nē kêp hõx pĩr tâ nhũm mē kãm hprãm xã hkôt akupÿm kãm ure. Hãmri nē mē ïhkram Jejus jaxã. Mē kãm hprãm xã hkôt ri mē kot tanhmã hipêx to kaxyw.

Mē kot pĩ kahpa hã Jejus nhôr ã mē harēnh

Matêwre 27.31-43; Makre 15.21-32; Juãw 19.17-20, 19.27-31; mãânên Atre 7.59-8.1

²⁶ Tã nhũm pôristijaja Jejus o kato nē ma kapôt mã o tē. Nē kãm ō pĩ kahpa gō nhũm amnhĩ kaxyw kumÿ nē o tē. Nom mē kot htak rax kurê nhũm hirot tÿx nē nhũm mē ja hã omu nē mēhō kot ho ajuta kaxyw mē hkapi ho xa. Hãmri nē Sirēn nhō xwÿnh Simãw hkà htyk pumu. Nhũm pre htÿx hamakêtkati nē mē kutã krĩm tē. Hãmri nhũm mē haêr pê unê nē kãm Jejus o ajuta

kaxyw hã karõ nhũm kãm õ pĩ kah-paja mỳ nẽ mẽ hkõt o tẽ.

²⁷ Hãmri nhũm mẽ ohtõ nẽ Jeru-jarẽ rũm Jejus kõt mõi. Nhũm mẽni hkwyjaja omu nẽ kãm hkaprĩ xaj mỳr o hkõt mõi. ²⁸ Hãmri nhũm mẽ mỳr ã mẽ kuma nẽ mẽ ho hakẽx nẽ mẽ omu nẽ mẽ kãm:

—Kwa nà Jerujarẽ nhõ xwỳnhjaja. Mẽ amã ixkaprĩ xaj amỳr kêt nẽ. Kêt mẽ kamjaja amã amnhĩ kaprĩ xaj mãn mur. Nẽ mẽ akrajẽ kamã axukaprĩ xaj mãn mur. ²⁹ Koja mẽ nhỹrmã mẽ apẽ mẽ anhõ krĩ granh pa ka mẽ apunuj nẽ amnhĩ xà htỳx kamã ajamak o ri apa. Nẽ tee ri mẽ akrajẽ hkukamã tanhmã ajamaxpẽr to nẽ ajamaxpẽr o: “Hẽxta gĩa nẽ. Na ixkrajaja ixpẽ amnhĩ xà htỳx kãm hamak o pa. Kẽp apu mẽ hkra hkêt xwỳnhjẽ pyrã nẽ ixkra hkêt nẽ ixpa ro nhỹx inhmã mex nẽ. Nhỹx pa ixkĩnh nẽ.” Anhỹr o kot kaj mẽ nhỹrmã ajamaxpẽr nom ã ajamaxpẽr anhỹr kaprỹ.

³⁰ —Nẽ kot kaj mẽ apiitã mẽmo punujta pymaj tee ri amã tokyx atyk nẽ ajapẽx par prãm kaprỹ nẽ axpẽn mã akapẽr o: “Hẽxta gĩa nẽ. Kot kẽn prẽk mỳj mẽ panhĩpy rôrõk nẽ tokyx mẽ panhĩmex par ronhỹx mẽ pamã ja mex.” Anhỹr tã no ãm tee ri ã ajamaxpẽr anhỹr kaprỹ. ³¹ Nom kêt pa. Aa ixte tanhmã amnhĩ tomnuj to hkêt tã nhũm mẽ ã inhĩpẽx anẽ. Nom mẽ ate amnhĩ tomnuj mỳrapẽ koja mẽ nhỹrmã tanhmã mẽ ato rax o ã mẽ kot inhĩpẽx anhỹrja jakrenh pa. Hẽxta waa nẽ. Na pa mẽ akukamã ijamaxpẽr nẽ ixkaprĩ htỳx nẽ. Anẽ.

³² Tã nhũm mẽ ja wa ho hamẽxkrut nẽ tanhmã wa kot amnhĩ tomnuj toja mỳrapẽ Jejus kõt wa hpĩr kaxyw hkõt mãanẽn wa o tẽ. ³³ Jakamã nhũm mẽ ra kẽn nhĩxet te kot mẽ hkrã hi pyrãk xwỳnhta wỳr mẽ o põi. Mẽ kot kãm “mẽ hkrã hi xã” anhỹr jarẽnhja

wỳr mẽ o põi. Hãmri nẽ Jejus pẽ ê kapa nẽ pĩ kahpa hã kuxi nẽ prek o ãhkra nẽ hpar o htỳx pa. Hãmri nẽ kãnhmã pĩ kahpa xãm nẽ ho htỳx nhũm xa. Hãmri nhũm mẽ hpãnhã wa kot amnhĩ tomnuj xwỳnhta mã wa ho anẽ nẽ. Nẽ prek o wa ãhkra nẽ wa hpar o htỳx pa hãmri nẽ akutã ho Jejus nhĩjẽ nẽ wa ãm nhũm wa ajẽt. ³⁴ Hãmri nhũm Jejus kỳx pẽ amnhĩ xà htỳx kumrẽx kamã hamak o jêt rãhã mẽ ho Tĩrtũm wỳ nẽ kãm:

—Kwa Papaj. ãm ixtã jajẽ pumu. Mẽ kot mẽmoj mex pumunh kêt jakamã na mẽ ã inhĩpẽx anẽ. Jakamã ãm ixtã mẽ omu nẽ mẽ kamã axukaprĩ nẽ. Anẽ.

Hãmri nhũm hparpẽ põristi hkwyjaja axpẽn mã ê hkwy ho pigranh kaxyw hã kẽnre ho jõka ho hkrĩ. ³⁵ Nhũm mẽ ohtõ rax nẽ Jejus parpẽ omunh o kuhẽ. Nhũm mẽ õ pahijaja mẽ noo mã hã hpẽr o axkẽ nẽ mẽ kãm:

—E jahti na pre te kẽp mẽ pakaprĩ xwỳnh ã amnhĩ jarẽn h o ri pa. Nẽ Tĩrtũm kot mẽ pakaxyw ãm xwỳnh ã amnhĩ jarẽn h o ri pa. Jakamã e kwa pu mẽ xa nẽ kot amnhĩ kaxar nẽ wrỳk kãm omu. Anẽ.

³⁶ Nhũm põristi mãanẽn tanhmã hã hpẽr o pikẽn h to. Nẽ hparpẽ kãm wĩhti punuti jahkre nẽ kãm:

—Kwa wrỳ nẽ mẽ ixkutã ja hkwy ho ixkõ nã. Anẽ.

³⁷ Hãmri nẽ kãm:

—E apẽ Ijaew nhõ pahi hã kot kaj amnhĩ kapa nẽ akupỹn wrỳ. Kwa tokyx pa mẽ ja hã apumu. Anẽ.

³⁸ Nhũm põristija tapti hõ py nẽ tanhmã hã kagã hto. Nẽ hã kagã ho:

IJA EW NHÕ PAHI NA JA

Anhỹr o hã kagã hãmri nẽ Jejus wỳr api nẽ mỳ ri kunhõ.

Wa kot Jejus nhĩjẽ nẽ wa jêt xwỳnh wa harẽn h

Matêwre 27.44; Makre 15.32

³⁹ Hāmri nhūm wa kot ĩhkō hā jēt xwýnh̄ta ō haxwýja kām kapēr punuj nē kām:

—Kwa kot kaj apē Tirtūm kot mē ixkaxyw axām xwýnh̄ hā kot kaj amnhī kapa nē wrý. Nē mǎānēn amnhī kōt wa ixto wrý. Anē.

⁴⁰⁻⁴¹ Hāmri nhūm ihōta kuma nē hā kām akir nē kām:

—Tk. Kwa amarī ajēt. Xà amā Tirtūm pyma hkēt ā na ka ā kēp Krata mā akapēr anē? Nà koja kām wrýk prām nē kot wrý. No pajamē pahte amnhī tomnuj mýrapē koja mē pahpī. No tām kot tanhmā amnhī tomnuj to hkēt tā nhūm mē amarī ā hipēx anē.

⁴² Anhýr o kām kapēr hāmri nē Jejus mā kām:

—Kwa Jejus. Kēr ka nhýrmā mē ixto amnhīptā hāmri nē inhmā ajamaxpēr nē ixkamā axukapri nē ixto mex nē. Anē.

⁴³ Hāmri nhūm kām:

—Nà kot kaj jarāhā ma ixkōt kaxkwa hwýr api nē hpānhā ixkuri amex nē atír tūm nē apa ho apa. Ām hāmri na pa ā amā ixkapēr anē. Anē.

Jejus tyk ā harēnh

Matêwre 27.45-56; Makre 15.33-41; Juāw 19.28-30

⁴⁴ Tā nhūm kaxkwa nhīpōk ri myt nhýr mē nhūm te ra kamāt pyrāk nhūm kamāt kō rax kumrēx. Nē kamāt kō ho ra hā awry nē. Ja mē nhūm akupým myt katēr o mō. ⁴⁵⁻⁴⁶ Nom nhūm kormā kamāt kōta ā nhūm Jejus ra htyk kaxyw nē āmra kamā Tirtūm mā kapēr nē kām:

—E Papaj. Māmri ixkarō ho amnhīptā.

Anhýrja kōt hāmri ty. Pu nhūm Tirtūm mā amnhī jarēnh xā hā ixkre kamā hakwakre hā kupēxēja axkjē nē amnhī kahē xā mēnh kurē kumrēx. Utī rax tā kōt ā axkjē nē amnhī kahē xā mē. Te Jejus htyk o kot mē pahte hkōt amnhī xunhwýr xwýnhjē mā Tirtūm wýr pry jakwa kre kahē xā mēnh pyrāk o ā amnhī

nhīpēx anē. ⁴⁷⁻⁴⁹ Hāmri nhūm mē piitā mēmoj ā kot amnhī nhīpēx anhýr ā omunh o kuhē xwýnhjaja. Nē kaxyw Jejus krāmnhwýjaja nhūm mē amým omunh o kuhē. Nē Garirej rūm mēni kot Jejus kōt mē pa ho mē pa xwýnhjaja mǎānēn mē kuri amým hkapri nē omunh o kuhē. Nhūm pōristi krāhtūmjē hōja ā mēmoj kot amnhī nhīpēx anhýr ā omu nē tee ri hamaxpēr o:

—Hēxta waa nē. Pēr ām hāmri na pre hte tām amnhī nhīpēx o pa. Tā pa mē amarī mē mar xā hkōt ixtýx kupi. Anē.

Nhūm ā hamaxpēr anhýrja kōt Tirtūm mā mex o mex ā harēnh o xa. Nhūm amarī mē kuhē xwýnhjaja mǎānēn mēmoj ā kot amnhī nhīpēx anhýrta pumu nē tee ri hkukamā hamaxpēr o ra kām ma htýx nē. Hāmri nē awjanā nē ma akupým krīm mrar kurē kumrēx.

Mē kot Jejus jaxār ā mē harēnh

Matêwre 27.57-61; Makre 15.42-47; Juāw 19.38-42

⁵⁰⁻⁵¹ Tā nhūm axtem Juje pē Arimatej nhō xwýnhja. Arimatejja pika pē Ijaew kamā na. Nhūm Jujeja kot amnhī to mex jakamā Tirtūm kōt amnhī nhīpēx o pa. Jakamā na pre hkwyjē rom Tirtūm kot mē pahwýr Jejus mēnh xwýnh̄ ā omu nē hkōt hamaxpēr. Kēp Ijaew nhō pahi hō htā hkwyjē hkōt hamaxpēr kēt nē. Jakamā nhūm prem kot Jejus pīr ā amýnē nhūm tee ri harēnh ma nhūm ja kēp omnuj nē. ⁵² Jakamā nhūm Jejus ty nhūm Juje ma pahi Pirat wýr tē nē ĩ hā kuwý nē kām:

—Pa? E ot pa awýr tē. Kwa inhmā htyk xwýnh̄ta gō pa ma o tē nē haxā. Anē.

⁵³ Hāmri nhūm kuma nē kām kugō nhūm ma o tē nē haxā. Kaxyw kupēxē hō py nē ho hkupu nē ma o tē nē kēn kre kapry kamā haxā. Mē kot kormā kamā mēhō jaxār kēt nhūm mē kamā Jejus jaxā. ⁵⁴ Arīgro pē sēsta hā nhūm prem kupi nhūm

myt xàr o mōr mẽ nhũm Juje ma o tẽ nẽ haxà. Ijaew kôt xà hã arĩgromnuja wỳr haxà. ⁵⁵ Nhũm Garirej rũm mẽni hkwȳ kot Jejus kôt pa xwỳnhjaja ma hkôt mra nẽ kot haxàr kãm omu. Mẽ hkuxwaxà ho gregrer kêt rãhã haxàr kãm omu. ⁵⁶ Hãmri nẽ ma akupỳm krĩm mra nẽ kaxyw mẽ hkuxwaxà hkwȳ ho anẽ.

Tã nhũm apkati nhũm mẽ õ arĩgromnu pẽ sap kator jakamã nhũm mẽ kormã akupỳm hwỳr mrrar kêt nẽ. Hãmri arĩgro mex jamãr pẽ arĩ hkòkòt o hkrĩ.

24

Jejus akupỳm htĩr jarẽnh

Matêwre 28.1-10; Makre 16.1-8; Juãw 20.1-10

¹ Tã nhũm apkati nhũm tòmĩk. Hãmri nhũm mẽnijaja kwỳhtã kãnhmã hkrĩ nẽ ma akupỳm kẽn kreta wỳr mẽ hkuxwaxà ho mra. ² Hãmri nẽ hwỳr àhtêp o mra nhũm ra hakwakre kahê xà raxta kahê xà hkàx ã xà nhũm mẽ tee ri omu. ³ Hãmri nẽ kẽn kre wỳr agjê nẽ kamã tee ri Jejus japêr no nhũm kamã amrakati. ⁴ Nhũm mẽ tee ri axpẽn pumunh pẽ hkukamã hamaxpêr.

Hãmri nhũm Tĩrtũm kapêr o wryk xwỳnh wa axkrut nẽ mẽ haêr pẽ mẽ hwỳr kato nẽ wa xa. Wa ê jaka nẽ hirã htỳx kãm wa xa. ⁵ Nhũm mẽ tee ri wa omu nẽ kãm wa uma htỳx nẽ. Nẽ wa umaj hkõn krã ho rôròk nẽ hkrĩ hpa. Nhũm wa mẽ omu nẽ mẽ kãm:

—Kwa mon ka mẽ ri mẽ htykjê kamã ra akupỳm htĩr xwỳnhnta japêr o ri apa? ⁶ Jar amrakati. Na ra akupỳm htĩr. Kormã Garirej kamã pa ri kot mẽ amã amnhĩ jarẽnh xà hkôt na ra akupỳm htĩr. Mãn ka mẽ arĩ kot ã mẽ amã amnhĩ jarẽnh anhỳrja ã anohtỳx japêr. ⁷ Mẽ kot unênh nẽ pĩ kahpa hã nhôr nhũm htyk nẽ htyk ã apkati axkrunêpxi hãmri nẽ akupỳm htĩr ã kot mẽ amã

amnhĩ jarẽnhnta mãn ka mẽ arĩ hã anohtỳx japêr.

⁸ Anhỳr o mẽ kãm kapêr nhũm mẽ kuma hãmri nẽ ra Jejus kot mẽ kãm ã amnhĩ jarẽnh anhỳrja mã hamaxpêr kurê kumrêx. ⁹ Hãmri nẽ awjanã nẽ ma akupỳm krĩm hkĩnh nẽ mra. Nẽ hwỳr pøj nẽ mẽ kot Jejus nhỹ hã mẽ ahkre ho mẽ pa xwỳnhjê mã awjarê. Mẽ kêp 11 xwỳnhntajê mẽ kaxyw hkwȳjê mã awjarê. ¹⁰ Mẽni kot mẽ kãm ujarẽnh xwỳnhntajê nhĩxi na pre Marir Matarên nhũm ja kêp Joanã. Nẽ Xiakre katorxà Marir òta. Nẽ kaxyw mẽni hõja. Jakamã nhũm mẽ ma akupỳm Jejus nhỹ hã mẽ ahkre ho mẽ pa xwỳnhjê hwỳr mra nẽ mẽ kãm awjarê. ¹¹ Nom nhũm mẽ kuma nẽ ãm mẽ kuma nẽ htỳx ho amnhĩ krã hkôt mẽ kot ri ã harẽnh anhỳr ã mẽ hkamnhĩx nẽ ãm mẽ kuma. ¹² Nhũm Simãw Pêtre hamaxpêr hãmri nẽ kãnhmã xa nẽ ma kẽn kreta wỳr hprõt nẽ htêm kurê kumrêx. Hãmri nẽ tee ri kẽn kre kaprỳ kamunh o xa nẽ kamã Jejus kupu xà pix pumu nẽ tee ri hkukamã hamaxpêr hãmri nẽ ma akupỳm tẽ.

Jejus kot Emau hwỳr wa mōr xwỳnh wa hwỳr kator ã harẽnh

Makre 16.12-13

¹³ Tã nhũm ra amỹkry ho mō nhũm Jejus kwỳjê hõ wa hamêxkrut nẽ Jerujarê rũm kato nẽ ma akupỳm wa õ krĩ pẽ Emau hwỳr wa mō. Jerujarê rũm Emau hwỳr ahkrãre. ¹⁴ Jakamã nhũm wa hwỳr pry hã axpẽn mã tanhmã Jejus jarẽnh to ho mō. Kẽn kre kamã mẽ kot haxàr nhũm ra ì pikunorja nhũm wa axpẽn mã harẽnh o wa mō. Nẽ tee ri hkukamã hamaxpêr o wa mō. ¹⁵ Hãmri nhũm Jejus tãm tẽ nẽ wa hã ajêt nẽ wa hkôt tẽ. ¹⁶ Nom nhũm wa hprĩ hã omunh kêt nẽ. Tỳx ho nhãm mẽhõ hã hkamnhĩx nẽ wa arĩ axpẽn mã harẽnh o wa mō. ¹⁷ Hãmri nhũm Jejus hêx rom wa kãm:

—Kwa mēmon ka wa axpēn mā harēnh o wa mō? Anē.

Hāmri nhūm wa hkaprī kamā kām harē. ¹⁸ Ihō pē Kroptija kām:

—Kwa xà na ka Jerujarē kamā ri apa htā kamā mē kot tanhmā amnhī nhīpēx toja jarēnh mar kēt nē? Kurūm amōr kēnā na ka ri mēmoj mar kēt nē ri apa. Anē.

¹⁹ Hāmri nhūm wa kām:

—Nā amrakati ixte mēmoj maare hā. Kwa mo na wehe? Kwa war aprī hā inhmā harē pa kuma. Anē.

Hāmri nhūm wa kām:

—Nā mē kot mē ixpē tanhmā Jesus pē Najare nhō xwýnhhta to kēnā. Kēp Tirtūm nhý hā kapēr jarēnh o pa xwýnh na pre. Nē Tirtūm nhý hā tanhmā amnhī nhīpēx to ho pa nhūm prem piitā amnhīm mex ā harē. ²⁰ Tā nhūm mē panhō patre krāhtūmjē mē mē panhō pahijaja axtem nē mē kām hā amýnē. Mē kot pī kahpa hā nhōr nhūm htyk kaxyw mē kām hā amýnē. ²¹ Pa prem ixtýx ho kēp Tirtūm kot mē pahwýr mēnh xwýnh ā hkamnhix nē kot Rōm nhō xwýnhjē pē mē ixpytār ā hkamnhix tā nhūm prem mē ixpē kupī. Jāā na prem ā hipēx anē nē kupī. Na ra htyk ā apkati axkrunēpxi.

²²⁻²³ —Nē jarāhā kwýhtā mēni hkwyjaja ma haxār xà hā kēn kre hwýr mra nē xep tee kamā hapēr nē omunh kēt nē. Xep ām Tirtūm kapēr o wrýk xwýnhja wa ho axkrut nē wa omu nhūm wa xa. Nhūm mē kām ra akupým htír ā harē nhūm mē akupýn mē ixwýr mra nē mē ijaēr pē mē inhmā harē. ²⁴ Hāmri nhūm mē ixkwýjaja ma mē hpānhā kēn kreta wýr mra nhūm ra mē kot harēnh xà hkôt tee ri kamā hapēr nom nhūm kamā amrakati kumrēx. Anē.

²⁵ Hāmri nhūm Jesus amnhī tā wa kuma nē wa kām tanhmā amnhī jarēnh to nē wa kām:

—Hēxta waa nē. Pēr ām mē ate mēmoj mā ajamaxpēr týx mex kēt kumrēx. Na pre ra Tirtūm nhý

hā kapēr jarēnh xwýnhjaja Tirtūm kapēr ā kagà htūm kamā ā kot amnhī nhīpēx anhýrja kukamā hprī hā harē nē hā kagà. Mē akukamā mē anhīgētjē mā harē nē hā kagà. Tā ka mē kormā aprī hā mar týx kēt nē. ²⁶ Kēt mē anē na Tirtūm kot ām xwýnhhta ty. Tā ra akupým htír nē akupým kaxkwa hwýr àpir kaxyw. Kot mē ato amnhīptār kaxyw ra akupým hwýr àpir mā. ²⁷ Amnepēm na pre finat Mojesja tanhmā hkukamā mē anhīgētjē mā harēnh to nē hā kagà. Nē hprī hā harēnh o pa. Nhūm hpānhā Tirtūm nhý hā kapēr jarēnh o mē pa xwýnhjaja ma anē nē mē kām harēnh o pa. Anē.

Nhūm pre ā Jesus wa hkôt hprī hā wa kām amnhī jarēnh anhýr o tē. Te ho nhām mēhō jarēnh pyrāk nom tām wa kām amnhī jarēnh o wa hkôt tē. No nhūm kormā wa hprī hā kēp Jesus ā omunh kēt nē.

²⁸⁻²⁹ Nhūm ā wa kām amnhī jarēnh anhýr o mōr rāhā nhūm mē ra wa ō krī hwýr hpōx o mō. Nhūm ra kamātre nhūm Jesus te kot wa rer nē nhýhým ma htēm kaxyw pyrāk o amnhī nhīpēx nhūm wa tee ri omu nē kām:

—Kwa xà kot kaj wa ixre nē ma tē? Ra kamāt o mōr kēnā. Kwa ma wa ixkôt tē nē wa inhōrkwý kamā mán wa ixri pōj. Anē.

Hāmri nhūm wa kuma nē ma wa hkôt tē. ³⁰ Nē mē wa ōrkwý hwýr pōj nē hwýr agjē. Hāmri nē apkur kaxyw hkrī nhūm Jesus tām pāwti py nē Tirtūm mā harē nē hpānhā ho axkjē nē wa kām kugō. ³¹ Hāmri nhūm wa atā kēp Jesus ā omunh kurē kumrēx. Jao nhūm wa kēp akunok nhūm wa tee ýr xà kamā hapēr nhūm hkaprý mex nē xa. ³² Hāmri nhūm wa tee ri axpēn pumu nē ri hkukamā hamaxpēr nē axpēn mā:

—Hēxta waa nē. Xep tām na. Tām na pahkôt mō nē pry hā hprī hā pamā Tirtūm kapēr ā kagà jarē pu

hkôt pahkĩnh nê mar o mô. Hêxta waa nê. Xep tãm na. Anê.

³³⁻³⁵ Hãmri nê wa kãnhmã xa nê kato nê ujanãr kurê kumrêx. Hãmri nê ma akupÿm Jerujarê hwÿr wa hkwyjê hwÿr tẽ. Nê mẽ hwÿr pøj nê axà. Nhũm Jejus nhÿ hã mẽ ahkre ho mẽ pa xwÿnh pẽ 11jaja ra axpên wÿr akuprô nê hkrĩ. Mẽ hkwyjê mẽ axpên wÿr akuprô nê axpên mã tanhmã Jejus jarênh to ho hkrĩ. Hãmri nhũm wa mẽ hwÿr axà nhũm mẽ wa omu nê wa kãm:

—Kwa na xep ra Jejus akupÿm htĩr nê Simãw Pêtre hwÿr kato. Anê.

Hãmri nhũm wa mẽ kuma nê mẽ kãm:

—Tÿ na akupÿm htĩr kênã. Na pa wa ijaxwÿja ham omu. Na pry hã wa ixtã ajêt nê ma wa ixkôt mô nê wa inhõrkwÿ kamã pøj. Hãmri pa mẽ ixãpkur kaxyw ixkrĩ nhũm pãwti py nê Tirtũm mã harê nê ho axkjê nê wa inhmã kugõ pa wa ixprĩ hã kęp Jejus ã omunh kurê kumrêx. Ixprĩ hã omunh jao nhũm wa ixpê hapêx. Anê.

Jejus kot hkwyjê piitã hwÿr kator ã harênh

Matêwre 28.16-17; Makre 16.14; Juãw 20.19-23

³⁶ Nhũm mẽ kormã axpên mã Jejus jarênh o hkrĩ rôm nhũm tãm nhÿhÿnh mẽ hwÿr axà nê xa. Mẽ haêr pẽ mẽ hwÿr nhÿhÿnh axà nê mẽ kãm:

—Pa? Xàn ka mẽ arĩ akrĩ? Anê.

³⁷ Hãmri nhũm mẽ amnhĩ jaêr pẽ omunh jao kãnhmã hakry hpar o mra. Jao hakryk kãm ma htÿx kãm omunh o hkrĩ. ³⁸ Hãmri nhũm mẽ kãm:

—Kwa mon ka mẽ amã ixpyma kamã tee ri ixpumunh o akrĩ? Kwa mẽ ixkarõ hã ixkamnhix nê amã ixpyma hkêt nê. ³⁹ Na pa akupÿn inhĩ ho mẽ awÿr ixkato nê xa. Ga mẽ inhĩhkra kamã prek tatak xàja pumu. Nê ixpar kãm omu. Kwa mẽ amã ixpyma hkêt nê. E mẽ mãmrĩ mra nê anhĩhkra ho ixkupê. Kęp apu ixkarõ hpix ronhÿx ka mẽ inhĩ

kupênh kêt nê. Mo mẽhkarõja ï? Nã na pa akupÿm ixtĩr nê inhĩ ho mẽ awÿr ixkato. Anê.

⁴⁰ Hãmri nê mẽ kãm amnhĩ nhĩhkra hpê nê mẽ kãm amnhĩ par pẽ. ⁴¹ Tã nom nhũm mẽ arĩ akryk omunh o hkrĩ. Mẽ kot omunh nê hkĩnh tã tee ri omunh o hkrĩ. Hãmri nhũm tee ri ja hã mẽ omu nê mẽ kãm:

—E kwa mẽ inhmã mẽmoj japêr pa kukrê. Anê.

⁴² Hãmri nhũm mẽ kãm tep gøj kãm ãmta gõ ⁴³ nhũm kupy nê hkur o nhÿ nhũm mẽ arĩ hã omunh o hkrĩ. Jao ra akupÿm htĩr ã omunh kurê kumrêx.

Jejus akupÿm nojarêt nê hkwyjê mã mẽmoj tã karõ

Matêwre 28.18-20; Makre 16.15-18; mããnen Atre 1.6-8

⁴⁴⁻⁴⁵ Hãmri nhũm Jejus hprĩ hã mẽ kãm Tirtũm kapêr ã kagã htũm kot hkukamã harênh ã amnhĩ jarê nê mẽ kãm:

—Nã kormã ixtyk kêt ri na pa pre ixprĩ hã mẽ amã amnhĩ kukamã amnhĩ jarê. Tirtũm kapêr ã kagã htũm kot tanhmã mẽ kot inhĩpêx to hkukamã ijarênhja. Na pre finat Mojes Tirtũm nhÿ hã ixkukamã tanhmã ijarênh to. Nê Tirtũm nhÿ hã kapêr jarênh o mẽ pa xwÿnhjaja Mojes mÿr pẽ haxwÿja ixkukamã tanhmã ijarênh to. Nê Tirtũm mex o mex ã mẽ grer ã kagã xwÿnhjaja haxwÿja ixkukamã tanhmã ijarênh to. Jajê piitã na prem Tirtũm kapêr ã kagã htũm kamã ixkukamã ijarê. ⁴⁶ Nê ijarênh o:

Tirtũm kot mẽ pakaxyw ãm xwÿnh pẽ Krisja koja nhÿrmã ty. Nê htÿk o apkati axkrunêpxi nê akupÿm htĩr.

Anhÿr o mẽ kot ijarênh. Tã pa ra mẽ kot ixkukamã ijarênh xà hkôt ã mẽ anê amnhĩ nhĩpêx anê.

⁴⁷ —No ãm Tirtũm kapêr ã kagã htũm kot papxipix ixkukamã ijarênh kêt. Kamã mããnen mẽ kajaja tanhmã mẽ akukamã mẽ

ajarēnh kute. Mē apē ixkôt amnhī xunhwÿr xwÿnhjaja ixwakre kamā tanhmā mē ate inhmā amnhī nhîpêx to ho apa hkukamā tanhmā mē ajarēnh kute. Nē mē ajarēnh kot:

E mē ate ixkôt amnhī xunhwÿr xwÿnhjaja. Kêr ka mē ma pika piitā hkôt mē kām Tirtūm kot mē awÿr mēnh xwÿnhhta jarēnh o ri mē hkôt apa. Mē kot mē amar nē amnhī tomnuj kaga nē Tirtūm kôt amnhī xunhwÿr kaxyw. Kêr kê Tirtūm ja hā mē omu nē amnhī katut kôt mē kot amnhī tomnuj rēnh pa. E kêr ka mē ma krī piitā hkôt mē kām ā ja jarēnh anhÿr o ri mē hkôt apa. Krī pē Jerujarē kumrêx kām hāmri nē rī kormā pu hā krī kuhê xwÿnh piitā hkôt ajapôj nē mē kām harēnh o ri apa. Anē.

Ā Tirtūm kapêr ā kagà htūm kot mē akukamā mē ajarēnh kot anhÿr. ⁴⁸ Tā kêr ka mē ā mē kām tanhmā ijarēnh to ho ri apa anē. ⁴⁹ No ām kormā. Kêr paj ma akupÿm kaxkwa hwÿr api hāmri nē amnhī pānhā mē awÿr Tirtūm Karō rē mǎn. Tirtūm kot ixte amnhī nhîpêx ā ijarēnh xà hkôt kot paj amnhī pānhā mē awÿr kurê. Tā kêr ka mē kormā krī ja kamā kutêp apa. Kêr kê mē awÿr wrÿ nē mē amā agjê ka mē rī kormā anhgrà nē ma ŷ hā mē kām ijarēnh o ri mē hkôt apa. Anē.

Jejus kot akupÿm kaxkwa hwÿr àpir ā harēnh

Makre 16.19-20; mǎānēn Atre 1.9-11

⁵⁰ Tā nhūm Jejus Jerujarē rūm hkôt mē pa ho pa xwÿnhjê kator nē ma krī pē Petān wÿr mē o mō. Nē kormā hwÿr mē o mōr ri nhÿri mē o xa nē kànhmā ïhkra pē nē mē ho Tirtūm wÿ. ⁵¹ ā mē ho hwÿr anhÿrja rōm nhūm Tirtūm amnhī wÿr ho àpir o mō nhūm mē noo mǎ

ma akupÿm tēn api. ⁵² Hāmri nhūm mē kām mex o mex ā harēnh pē ma akupÿm àpir kām omunh o kuhê. Nhūm ma tē nē mē kêp kakrām axà nē mē kêp akunok. Hāmri nhūm mē awjanā nē ma akupÿm Jerujarē hwÿr hkīnh nē pa. ⁵³ Hāmri nē apkati mē Tirtūm mǎ amnhī jarēnh xà hā ixkre hwÿr agjê nē kamā Tirtūm mǎ mex o mex ā harēnh o hkrī rāhā nē.

Tā ām ja pix ixkrāmnhwÿ Teopre. Ixpê Rukre na pa awÿr kagaja nhîpêx nē kamā Jejus kot tanhmā amnhī nhîpêx to hā harē nē hā kagà nē awÿr kumē.

Juãw Juãw kot tanhmã Jesus kot amnhĩ nhĩpêx to ho pa hã kagà

Juãw na pre kagàja nhĩpêx. Na pre mãânên Wam Juãw nê Sikũn Juãw nê Hapuhã Juãw nê Apokarip nhĩpêx. Juãw Paxis kêt axtem Juãw õ. Nê Jesus kôt mẽ pa ho mẽ pa xwýnhjê hõ na pre. Nê ý hã mẽ ahkre ho pa xwýnhjê hõ na pre. Nom kormã ã amnhĩ nhĩpêx anhýr o pa hkêt ri na pre kêp tep kanhêr xwýnh. Nê kêp Jesus kràmnhwý mex na pre. Jakamã na pre kagàja nhĩpêx nê kamã Jesus kot tanhmã amnhĩ nhĩpêx hã harê nê hã kagà. Nê tanhmã kapêr to hã kagà.

Na pre Jesus kêp Tĩrtũm Kra hã harê nê hã kagà. Nê ãm pix kukwak ri Tĩrtũm wa kuri mẽ pahťir tũm nê mẽ papa ho mẽ papa hã harê nê hã kagà. ã na pre Juãwja mẽ pamã Jesus jarê nê hã kagà anê.

*Jesus te kot Tĩrtũm pyrãk ã harênh
Matêwre 1.23; Juãw 8.12, 8.58,
10.30, 20.28; mãânên Atre 10.36;
Sikũn Korũt 4.4; Pĩrĩpos 2.6-11;
Korõsê 1.13-17, 2.9; Xĩtre 2.13;
Eprêw 1.1-4; Wam Juãw 1.1-4, 5.20;
Apokarip 1.17-18*

¹ Amnepê mã kormã mẽmoj kêt ri nhũm kot Tĩrtũm kapêr o amnhĩrĩt xwýnhja Tĩrtũm kôt pa ho pa. Te kêp urãk nê pa. Wa kot amnhĩ nhĩpêxja ãm tipxi. Nê wa ãhpumunh ãm tipxi. Nê wa hkarõ mãânên ãm tipxi. ãm wa tipxi rãhã nê pa ho pa. ² Kormã mẽmoj kêt ri na pre Tĩrtũm kapêr o amnhĩrĩt xwýnhhta Tĩrtũm kôt ri pa ho pa. ³ Nê Tĩrtũm nhỹ hã na pre mẽmoj piitã hã apê nê ho kato. Jao pyka ho kato nê kaxkwa ho kato nê gõ xujanãr o kato. Nê kamã mẽmoj piitã Tĩrtũm nhỹ hã ho kator pa.

Kop apu mẽmoj to kator kêt ronhỹx mẽmoj amrakati kumrêx.

⁴ Nê Tĩrtũm o amnhĩrĩt xwýnhhta pix kukwak ri na hte mẽmoj piitã hťir nê pa. Nê ãm pix kukwak ri na htem Tĩrtũm ri hťir tũm nê pa ho pa. Nê te myyti kot mẽ pamã mẽmoj piitã hirã ho pa pu mẽ kukwak ri mẽmoj piitã omunh mexja pyrã nê na pre hte mẽ pahpiitã mẽ pamã mẽ pahte amnhĩ nhĩpêx nyw nê mẽ pajamaxpêr nyw o amnhĩrĩt pu mẽ pahprĩ hã mar mex nê. ⁵ Ja kaxyw na pre wrý nê ri mẽ kãm Tĩrtũm kapêr jarênh o ri mẽ hkôt pa. Jao mẽ kot amnhĩ nhĩpêx nyw jarê nhũm mẽ kot amnhĩ tomnuj xwýnhjaja tee ri kuma nê kãm mar prãm kêt nê. Nê tee ri kãm kapêr o hapêx prãm kaprý.

*Juãw Paxis kumrêx kot tanhmã
Jesus jarênh to hã harênh*

*Matêwre 3.1-3; Makre 1.1-4;
Rukre 3.2-6*

⁶ Tã nhũm kormã Jesus mẽ kãm kapêr o pa hkêt ri nhũm Juãw Paxis kumrêx mõ nê hkukamã Tĩrtũm nhỹ hã mẽ kãm tanhmã harênh to ho pa. ⁷ Mẽ kãm mẽ kot amnhĩ nhĩpêx nyw nhõr xwýnh pê Jesus Kĩs kukamã mẽ kãm harênh o ri mẽ hkôt pa. Mẽ kot mar nê amnhĩ kaxyw Jesus kôt hamaxpêr kaxyw. ⁸ No Juãw Paxisja na pre hte mẽ kãm mẽ kot amnhĩ nhĩpêx nyw nhõr o pa hkêt nê. Na pre ãm kot mẽ kãm õr xwýnhhta kukamã mẽ kãm harênh o pa. ⁹ Jakamã na pre hte mẽ kãm harênh o ri pa nê mẽ kãm harênh o:

—E ot pa mẽ amã mēhõ jarênh o ri ixpa. Kot mẽ pamã mẽ pahte amnhĩ nhĩpêx nyw nhõr xwýnhhta. Koja tokyx mẽ pakamã põj pu mẽ omu. Koja põj nê mẽ piitã mẽ kãm Tĩrtũm kapêr jarênh o ri pa. Mẽ pahte pahprĩ hã mar mex kaxyw. Anê.

*Tirtūm kot mē ho hkra hprām
xwýnhjê jarēnh*

*Rômān 8.14; Karatas 3.26; Epes
1.5*

¹⁰ Tā nhūm Jejus man kot mēmoj piitā ho kator xwýnhhta wýr wrý nē mē hkôt ri pa. No nhūm mē kot kēp mēmoj piitā ho kator xwýnh ā omunh kēt jakamā na prem kapēr ma nē ām kuma nē amnhī kaxyw hkôt hamaxpēr kēt nē. ¹¹ Na pre wrý nē mē pakamā ī ho kato. Kēp mē pahpiitā mē pahto kator xwýnh tā nhūm mē ohtō nē omu nē ām omu nē hkôt amnhī nhīpēx kēt nē. ¹² Na prem ām grēre nē kuma nē amnhī kaxyw hkôt hamaxpēr nē hkôt amnhī xunhwý. Hāmri nhūm amnhī tā mē omu nē mē kām:

—E nā ām hāmri. Ra mē ate amnhī kaxyw ixkôt ajamaxpēr nē ixkôt amnhī xunhwýr jakamā na ka mē ixkukwak ri apē Tirtūm kraa. Anē.

¹³ Na htem ā kēp Tirtūm kra hprām xāj Jejus kôt amnhī xunhwýr anē. No na htem mē katorxā nhōxā hkre rūm hapōx kôt kēp Tirtūm kra hkēt nē. Rý amnhī krā hkôt tanhmā amnhī nhīpēx to kukwak ri kēp hkra hkēt nē. Ām Tirtūm tām kot mē ho hkra pix kukwak ri na htem kēp hkra.

*Jejus wrýk nē ī ho kator ā harēnh
Matēwre 1.20; mǎānēn Rômān 1.2-4;
Piripos 2.6-7; Eprēw 2.9, 4.15;
Wam Juāw 4.2*

¹⁴ Jakamā na pre Tirtūm o amnhīrit xwýnhhta mē pahwýr wrý nē mē pakamā ī ho kato nē mē pakamā pa. Kēp Tirtūm Kra hā pixi mex na pre. Nē kot amnhī nhīpēxja te Tirtūm kot amnhī nhīpēx pyrāk. Urāk nē mex o mex. Nē urāk nē mē pakutā nojarēt xwýnh. Na pre hte katāt kôt Tirtūm kapēr jarēnh o ri mē hkôt pa. Pa prem kuma nē mex o mex ā omu.

¹⁵ Nhūm Juāw Paxis na pre hkukamā mē kām harēnh o ri pa nē mē kām:

—E ra ixte mē amā harēnh o ri ixpa xwýnhhta na ra pōj. Te pa ixte wa nē ixkator pyrāk nom amnepē mā kormā ixkēt ri nhūm htír rāhā nē pa ho pa. Ham ī ho kator tā kēp Tirtūm Kra jakamā urāk nē rāhā ho rāhā hā pa xwýnh na. Jakamā kot amnhī to rax o kot ijakrenh par. Anē.

¹⁶ Nē kēp mē pakutā nojarēt rāhā nē pa ho pa xwýnh jakamā na hte mē pahto mex rāhā pu mē kukwak ri pamex nē ri papa ho papa.

¹⁷ Na pre finat Mojesja mē panhīgētjē mā Tirtūm kapēr jarēnh o ri mē hkôt pa nē mē kām:

—Na pre Tirtūm mē pahte tām amnhī nhīpēx o papa hā mē pamā karō. Jakamā kot puj mē kot mē pamā mēmoj tā karō xā hkôt ā amnhī nhīpēx anhýr o papa nē ra tām amnhī nhīpēx o papa. Anē.

Nhūm pre Mojesja ā mē kām kapēr o pa anē. Hāmri nhūm mē kuma no ām tee ri kām Tirtūm kôt tām amnhī nhīpēx o pa hprām kaprý. Jakamā nhūm hpānhā Jejus Krisja wrý nē mē pamā kapēr o ho kapēr o pa nē mē pamā:

—E mē ate Tirtūm kôt amnhī nhīpēx o apa hkēt tā nhūm arī kām mē ajapē nē. Nē kām mē ato mex prām. Jakamā kot kaj mē amnhī to awý nhūm tanhmā mē akrā hto ka mē ra tām ri amnhī nhīpēx o apa. Ām hāmri na pa ā mē amā ja jarēnh anē.

Anhýr o mē pamā Tirtūm kapēr jarēnh o pa. Tirtūm kapēr na mex o mex.

¹⁸ Nē aa mē pahtō mē pahte pano ho Tirtūm pumunh kēt. Ām Kraja pix na kot no ho omunh. Kaxkwa kamā kuri ri pa ho pa jakamā kot omunh mex. Nē te kot Hipēēxāja pyrāk jakamā na pre wrý nē hprī hā tanhmā kute hā mē pamā harēnh o pa. Jakamā na pu mē ra pahpiitā Tirtūm kot amnhī nhīpēx ā omu nē mar mex nē.

Juāw Paxis kot mẽ kām Jesus jarēnh o pa hã harēnh

Matêwre 3.1-12; Makre 1.1-8; Rukre 3.15-17; määnēn Atre 19.4

19-28 Na pre Juāw Paxis ma hkwyjê hkôt mẽ kām Jesus jarēnh o pa nhũm mẽ hkwyjaja kuma nê amnhĩ kaxyw Jesus kôt hamaxpêr nê hkôt amnhĩ xunhwý. Hãmri nhũm Juāw Paxis ja hã mẽ omu nê Tirtũm mã mẽ hkrã kumrã. Pyhti pê Jotãw nhĩkjê hã krĩ pê Petãn tã ri mẽ hkrã kumrãr o pa. Hãmri nhũm krĩ pê Jerujarê kamã Ijaew krãhtũmjaja harēnh ma nê ma hwýr hkwyjê rê. Mẽ kot tanhmã hkukjêr to nhũm kot mẽ kām tanhmã amnhĩ jarēnh to kaxyw. Jakamã nhũm mẽõ patre hkwyjê mẽ Tirtũm mã amnhĩ jarēnh xã hã ixkre kamã mẽ ho ajuta xwýnh kwýjê mẽ Parijew nhõ xwýnh kwýjê mẽ nhũm mẽ ma hwýr mra. Juāw Paxis wýr mra nê omu nê kãm:

—Pa. E ot pa mẽ awýr mra. Kwa mẽ inhmã amnhĩ jarê. Apê mẽ atõ na ka we? Xã ka na apê Tirtũm kot mẽ ixkaxyw axãm mã xwýnhnta na ka nã? Xã ka na pa htem amnhĩ wýr akamã ijamak o ixpa? Anê.

Hãmri nhũm mẽ kuma nê mẽ kãm: “Nã pa hkêt.” Anê hãmri nhũm mẽ kãm:

—Tõ mãn xep apê amnepê mã Tirtũm nhý hã kapêr jarēnh xwýnh pê finat Erisja. Hã na ka tanhmã amnhĩ to nê akupým atĩr nê mẽ ixkôt apa nã? Anê.

Hãmri nhũm mẽ kãm:

—Nã ixpê Eris kêt. Anê.

Hãmri nhũm mẽ kãm:

—Tõ mãn xep apê finat Mojes kot mẽ kãm harēnh o pa xwýnhnta na ka nã? Anê.

Hãmri nhũm mẽ kuma nê mẽ kãm:

—Nã ixpê tãm kêt. Anê.

Hãmri nhũm mẽ tee ri kot ã amnhĩ tã aprãr anhýrja ma nê kãm:

—Kwa apê jajê hõ hkêt tã na ka hte mẽ hkrã kumrãr o ri apa. Kwa nã akatãt kôt mẽ inhmã amnhĩ

jarê. Pa mẽ ama nê ma akupým mra nê mẽ kot awýr mẽ ixrēnh xwýnhjê mã tanhmã ajarēnh to. Tanhmã na ka hte mẽ kãm amnhĩ jarēnh to ho ri apa? E kwa mẽ inhmã amnhĩ jarê pa mẽ ama. Anê.

Hãmri nhũm tã hprĩ hã mẽ kãm amnhĩ jarê. Amnepê mã mẽ hkukamã Tirtũm nhý hã kapêr jarēnh xwýnh pê finat Ijais kot hkukamã tanhmã harēnh to nê hã kagã xã hkôt nhũm mẽ kãm amnhĩ jarê nê mẽ kãm:

—Tõe. Nã kot paj ixprĩ hã mẽ amã amnhĩ jarê ka mẽ inhma. Amnepêm Tirtũm kapêr jarēnh xwýnhjê hõ pê finat Ijaisja na pre hte mẽ kãm mẽhõ hkukamã harēnh o ri pa. Mẽhõ kot mẽ panhõ Pahihti hkukamã htēm nê kapôt ã kutêp mẽ kãm harēnh o pa xwýnhnta nhũm pre hkukamã harēnh o ri pa. Nê mẽ kãm harēnh o:

Koja nhýrmã mẽhõja kapôt ã mõn pøj nê mẽ kãm tanhmã ujarēnh to ho ri pa. Nê mẽ kãm ujarēnh o: “E mẽ inhma. Koja Tirtũm tokyx mẽ pahwýr mẽ panhõ Pahihti mẽ nhũm wrý nhũm mẽ piitã omu. Jakamã kwa mẽ tokyx kutêp tãm amnhĩ nhĩpêx o ri apa. Te ho mẽ kot mẽhõ kutêp pry ho mex pyrãk o amnhĩ nhĩpêx o ri pa. Jao amnhĩ nhĩ ho tãm amnhĩ nhĩpêx nê tãm axpên nhĩpêx o ri apa. Pahihtita kutêp.”

—Anhýr o na pre hte finat Ijaisja kot Pahihti hkukamã harēnh o ri pa xwýnhnta kukamã harēnh anê. Tã paa. Pa na pre Ijaisja ã ixkukamã ijarēnh anhýr o pa. Pa na pa hte ã Pahihti kutêp mẽ kãm harēnh o ri ixpa anê. Tã ã ixte harēnh anhýr xwýnhnta na ra mẽ pakamã pa ka mẽ kormã ja hã omunh kêt nê. Kukamã na pa hte mẽ piitã mẽ kot hkôt amnhĩ xunhwýr ã mẽ omunh kaxyw gõ pix o mẽ hkrã kumrãr o ri mẽ hkôt ixpa. Nom

na pre ra mē pahwÿr Tirtūm kot mē pakaxyw ām xwÿnh̄ta tām mē pahwÿr wrÿ. Āhpumunh tÿx o kot ijakrenh jakamā na pa hte ām kukwak ri ixpa nē amnhī tā hā ixpi-jaām o ri ixpa. Anē.

Juāw Paxis kot mē kām Jejus jahkre hā harēnh

Matêwre 3.11; Makre 1.10; Rukre 3.22

²⁹ Tā nhūm apkati nhūm Juāw Paxis amnhī wÿr Jejus pumu nē mē kot mar o kuhē xwÿnh̄jē mā ĩhkra ho ahkre nē mē kām:

—E. Onēj Tirtūm kot mē pakaxyw ām xwÿnh̄ta tē. Mē pahpē Ijaew na pu htem xatā pahte amnhī tomnuj pānhā amnhīrer kaxyw Tirtūm mā pahkrit ōwēhti hkra nyw kwÿ hpa nē ho amnhī pānhā kām amnhīrer o papa. No kēt htēm nēj koja nhÿrmā kām mē pahpiitā mē pahte amnhī tomnuj pānhā amnhīrer pa. ³⁰ Na pa pre ra mē amā harēnh o: “Te pa ixte wa nē ixkator nē ixťir nē ixpa pyrāk. Nom amnepēm kormā ixkēt ri na pre htĭr rāhā nē pa ho pa. Nē ĩ ho wrÿk nē jar kator tā kēp Tirtūm Kra jakamā urāk nē rāhā nē pa ho pa xwÿnh̄ na. Jakamā kot amnhī to rax o kot ijakrenh par.” Anhÿr o pa pre mē amā harēnh o ri ixpa ka prem inhma.

³¹ —Ixte mē amā ā harēnh anhÿr tā ijaxwÿja kormā ixte kēp Tirtūm Kra hā omunh kēt nē ām hkukamā Tirtūm nhÿ hā mē amā ā harēnh anhÿr o ri ixpa. Nē hkukamā Tirtūm mā mē akrā kumrār o ri ixpa. Tā na pa kēp Tirtūm Kra hā omu nē ā mē amā ahkre anē ka mē omu. Anē.

³²⁻³³ Nhūm pre ā Juāw Paxis mē kām Jejus jahkre anē nē mē kām:

—Nā Tirtūm na pre ixte mē akrā kumrār o ixpa kaxyw inh̄mā hā karō. Tā na inh̄mā kot mē pakaxyw ām xwÿnh̄ta o amnhīrĭt nē inh̄mā harēnh o: “Koja nhÿrmā Ixkarōja mēhō hwÿr wrÿ nē kuri arĭk. Ka ja hā omu nē kēp Ixkra hā omunh

kurē kumrēx. Koja amnhī xō ri amnhī pyrā nē mē kām Ixkarō nhōr o pa nhūm mē hkarō mā agjē.” Anhÿr o inh̄mā harē. Tā na pa ra omu. Na pre Tirtūm Karō kaxkwa rūm te tuuti pyrā nē hwÿr wrÿk o tē nē ĩkre hā xa. ³⁴ Pa ā kot hipēx anhÿr ā omu nē kēp Tirtūm Kra hā omunh kurē kumrēx. Jakamā na pa ā mē amā ahkre nē mē amā harēnh anē. Anē.

Juāw Paxis kōt pa xwÿnh̄ wa kot Jejus kōt pa hā wa harēnh

Atre 19.4

³⁵ Tā nhūm apkati nhūm Juāw Paxis axte Jejus pumu. Kot hkōt ri pa ho pa xwÿnh̄ mē wa nhÿri xa nē omunh o xa. ³⁶ Nhūm ra mē hānh tē nhūm Juāw Paxis omu nē hkōt ri pa xwÿnh̄ wa kām:

—E onēj Tirtūm kot mē pakaxyw ām xwÿnh̄ta tē. Nēj koja mē pahte amnhī tomnuj pānhā amnhīre. Anē.

³⁷ Hāmri nhūm wa kuma nē omu nē ma hkōt tē nē hā ajēt. ³⁸ Nhūm wa omu nē wa kām: “Pa mo na?” Anē nhūm wa kot kēp mē ahkre xwÿnh̄ ā omunh jakamā kām:

—Nā wa ixte ma akōt ixtēm nē nhÿri anhōrkwÿ pumunh mā na pa wa akōt tē. Anē.

³⁹ Hāmri nhūm wa kām:

—Tōe. Nā wa kam nē rĭ ma ixkōt tē. Anē.

Hāmri nhūm wa kuma nē ma hkōt wa tē nē ōrkwÿ hwÿr pōj nhūm ra amÿkry nhūm wa hkōt axā nē kuri ŷr o kamāt hāmri nē kato nē ma akupÿm tē. ⁴⁰ Kōt htēm xwÿnh̄jē hōta na pre kēp Andre. Simāw Pētre htō na pre. Nē kaxyw hōja. Wa kumā na pre Juāw Paxis Jejus jahkre nē harē nhūm wa ma hkōt tē. Tā wa ra akupÿm wa tē. ⁴¹ Hāmri nhūm Andreja htō Simāw wÿr tē nē kām:

—Kwa na pa wa jarāhā Tirtūm kot mē pakaxyw ām xwÿnh̄ta pumu. Ma pu hwÿr ka wa ixwar ano ho omu nā. Anē.

Ijaew kapēr kām “Tirtūm kot mē pakaxyw ām xwýnh” anhýrja te kot Gres kapēr kām “Kris” anhýr jarēnh pyrāk. Ijaew na prem ā Jejus jarēnh anē nē harēnh o: “Tirtūm kot mē pakaxyw ām xwýnh.” Anhýr o harē. ⁴² Jakamā nhūm ā Andreja htō mā harēnh anē nē ma akupým hwýr o tē. Nē wa hwýr pōj nhūm wa omu. Wa kēp Juāw kra hā wa omu hāmri nē Simāw mā kapēr nē kām:

—Pa Simāw. Nā apē Simāw tā kot paj axte atā anhīxi hō mē. Kot kaj määnēn apē Septi. Anē.

Mē pakapēr kām Septija te kēp “kēn” jarēnh pyrāk. No Gres kapēr kām te kēp “Pētre” jarēnh pyrāk. No Ijaew kapēr kām kēp “Septi.” Jakamā nhūm pre Jejus ā Simāw Pētre hā hixi mēnh anē.

Jejus kot amnhī kôt Firipti mē Natānaew wa hwýr ā harēnh

⁴³⁻⁴⁴ Tā nhūm apkati nhūm ra Jejus pyka pē Garirej wýr nojarēt nē nhýri Firipti pumu. Firiptija Andre mē Simāw Pētre wa urāk nē krī pē Pesēj nhō xwýnh na pre. Jakamā nhūm Jejus nhýri omu nē amnhī kôt kuwý nē kām:

—E kwa ma ri ixkôt apa ho apa. Anē.

⁴⁵ Hāmri nhūm kuma nē ma tē nē nhýri Natānaew pumu nhūm nhýri pī hpar parpē nhý nhūm omu nē kām:

—Kwa na pa jarāhā finat Mojes kot amnepēm mēhō hā kagā xwýnhhta pumu. Tirtūm kot mē pakaxyw ām xwýnhhta na. Tirtūm nhý hā kapēr jarēnh o mē pa xwýnhhaja kot hkukamā harēnh nē hā kagā xwýnhhta. Kēp Najare nhō xwýnh nē määnēn kēp finat Juje hkra. E kwa tokyx pu hwýr ka ixkuxwar ano ho omu. Anē.

⁴⁶ Hāmri nhūm tee ri kot tanhmā harēnh toja ma nē kām:

—Tk. Koký. Najare nhō xwýnh piitā kot amnhī to mexti hā kot kēt we hō kēp Tirtūm kot mē pakaxyw ām xwýnh. Anē.

Hāmri nhūm kām:

—Kwa nā ā akapēr anhýr kēt nē. Ma ixkôt tē nē ixpyrà nē ano ho omu măn. Nē rī ā ri akapēr anē. Anē.

Hāmri nhūm kuma nē ma hkôt tē. ⁴⁷ Hāmri nhūm Jejus amnhī wýr wa omu nē kuri mē kuhē xwýnhjē mā Natānaew jarēnh kurē kumrēx nē harēnh o:

—E onēj Ijaew ōja mē pahwýr hpôx o tē. Ām hāmri na hte tām amnhī nhípēx o pa. Na hte higēt finat Jako kurom hēx rom ri tanhmā mē kām amnhī to hēx to ho pa hkēt nē. Na hte ām kapēr mex pix o ri kapēr o pa. Anē.

⁴⁸ Hāmri nhūm tee ri amnhī tā kuma nē kām:

—Kwa mēhō na pre ā amā ijarēnh anē? Aa ixte nhýri apumunh kēt kumrēx tā ka ri ām hāmri ā ijarēnh anē. Anē.

Hāmri nhūm kām:

—Nā mēhō kot tanhmā inhmā ajarēnh to hkēt. Ām pa na pa hte inhno ho apumunh o ixpa. Kormā Firipti kot awýr htēm nē amā ijarēnh kēt ri pa ra ixprī hā inhno ho apumu. Na ka kormā pīta parpē nhý pa apumu. Anē.

⁴⁹ Hāmri nhūm tee ri kot hprī hā harēnh ā amnhī tā kuma nē kām:

—Kwa mē ijahkre xwýnh. Pēr ām hāmri apē Tirtūm Kra kumrēx jakamā na ka ā ijarēnh anē. Xep ka na mē ixte amnhī wýr akām ijamak o ixpa xwýnhhta na ka. Nā ka na apē mē ixpē Ijaew nhō Pahihti. Anē.

⁵⁰ Hāmri nhūm Jejus kuma nē kām:

—Nā ām hāmri na ka ixte pī hpar pē apumunh ā ajarēnhja ma nē hkôt pix mā ixpē Tirtūm Kra hā ixpumu. Tā kot kaj ja nhīrō pē axte mēmoj mex o kot ja jakrenh pumu. ⁵¹ Koja nhýrmā kaxkwa axkjē nhūm Tirtūm kapēr o mē wrýk xwýnhhaja kurūm axpēn japa ka mē omu. Finat Jako pyrà nē mē omu. Ixte Tirtūm kot mē akaxyw ixām xwýnh wýr koja mē ā wrýk

nê amnhĩ nhĩpêx anê ka ja hã mẽ omu. Kwa jam ajamxpêr tỳx rãhã ho apa. Anê.

2

Jejus kot gô ho mẽ kãm wĩhti nhĩpêx ã harênh

¹ Tã nhũm apkati axkrut nê hapêx nhũm Jejus arĩ Garirej kamã pa. Nhũm krĩ pê Kanã kamã axpên mã wahôj wa rer kaxyw nhũm Jejus katorxà ma mẽ hwỳr mō. ² Hãmri nhũm mẽ amnhĩ wỳr Jejus mẽ hkôt ri mẽ ixpa xwỳnhjê wỳ pa mẽ ijaxwỳja ma mẽ hwỳr mō nê ra mẽ hwỳr pôj. ³ Hãmri nê mẽ hkôt wa hã ixkĩnh nê apku nê wĩhti hkwỳ ho ixkôm o ixkrĩ. Tã nhũm ra wĩhti mẽ kêp hapêx nhũm Jejus katorxàja harênh ma nê Jejus mã harê nê kãm:

—Xê Jejus. Na xep ra mẽ kêp wĩhti hapêx pa. Xàt ka tanhmã mẽ ho ajuta hto mê? Anê.

⁴ Hãmri nhũm kãm:

—Tôe. Kwa tee ri ajamxpêr kêt nê. Kot paj tanhmã mẽ kãm ho. Nom kot paj kormã ixpê Tĩrtũm kot mẽ akaxyw ixãm xwỳnh ã pa kormã amnhĩ to amnhĩrit kêt nê. Anê.

⁵ Hãmri nhũm katorxà kuma nê mẽ kãm mẽ àpênh xwỳnhjê hwỳr tẽ nê mẽ kãm:

—An koja Jejus mẽ awỳr tẽ nê tanhmã mẽ amã mẽmoj tã karõ hto ka mẽ ama nê kãm ho anhỳr kurê kumrêx. Anê.

⁶ Nhũm mẽ kuri kên o poti kêp 6 nê kuhê. Piitã umpỳm rũnh kumrêx. Koja hõ pyxi nê nỳt nê kamã gô kêp 80 rit nê hkwỳ kamã kêp 100 rit. Ijaew na htem apkur kaxyw nê amnhĩ nhĩhkra kuhõnh japjê rũnh nê kormã apku. Nê apkur pa nê axte amnhĩ nhĩhkra kuhõ. Á mẽ kot xatã amnhĩ nhĩhkra kuhõnh jakamã nhũm pre htem amnhĩ ri ã poti rũnh kwỳ xunhwỳr anê. No nhũm ra hkapyr nê kuhê. ⁷ Hãmri nhũm Jejus tẽ nê omu mẽ àpênh xwỳnhjê mã kãm:

—E mẽ ma mra nê gô ru nê ho poti kuhê mỳj piitã ho nỳt pa. Anê.

Nhũm mẽ kuma nê ma mra nê ho nỳt pa. ⁸ Hãmri nhũm mẽ kãm:

—Nà hãmri. Pãnhã hõ kamã gô hkwỳ janhi nê o tẽ nê mẽ anhõ patrãw mã agô kê hkwỳ ho ixkô nê kamã ama. Anê.

Hãmri nhũm mẽ mar xà hkôt kãm hkwỳ janhi nê hwỳr o tẽ nê kãm kugô. ⁹⁻¹⁰ Nom nhũm gôja arĩ kêp gô kumrêx kêt nê. Jejus kot tanhmã ho jakamã nhũm ra hpãnhã kêp wĩhti. Jakamã nhũm mẽo patrãw wỳr hkwỳ ho tẽ nê kãm kugô nhũm hkaki nê kamã ama. Nom Jejus kot gô ho hipêx ã omunh kêt nê. Âm htỳx ho wĩhti kumrêx ã hkamnhĩx nê mex kumrêx ã hkaki. Hãmri nê amnhĩ wỳr mjên nyw xwỳnh mã hpa ho apê nhũm hwỳr tẽ nhũm kãm:

—Kwa na htem wĩhti mex o wa nê mẽ kãm kugô hãmri nhũm mẽ hpenh pa nhũm mẽ rĩ kormã hkôt omnu ho hapu nê mẽ kãm kugô. Tã ka pêr mẽ axtem nê wam mẽ kãm omnu nhõr pa hãmri nê kormã mex kumrêxja o hapu nê mẽ kãm agô. Kêt wĩhti ja na mex kumrêx. Âm mex o mex. Anê.

Jejus kot gô ho hipêx ã omunh kêt jakamã nhũm ã kãm kapêr anê. Âm mẽ àpênh xwỳnh pixjaja na prem ja hã omu. ¹¹ Nhũm Jejus kormã mẽ kãm aa mẽ kot mẽmoj pumunh kêt õ ho anhỳr kêt tã krĩ pê Kanã kamã ã mẽ kãm amnhĩ nhĩpêx anhỳr o hkrax. Jao amnhĩ to rax o amnhĩ to rax ã mẽ inhãm amnhĩ to amnhĩrit. Pa mẽ ixpê hkôt ri ixpa xwỳnhjaja ã kot amnhĩ nhĩpêx anhỳr ã omu hãmri nê kêp Tĩrtũm kot mẽ pakaxyw âm xwỳnh ã omunh kurê kumrêx.

¹² Tã nhũm Jejus hpãnhã ma krĩ pê Kapanaũ hwỳr mō. Pa mẽ hkôt ri ixpa xwỳnhjaja nê katorxà nê htõjaja pa mẽ ma ixpiitã hkôt mō. Hãmri nê hwỳr pôj nê kamã mẽ hkôt ixpa hã ixtã apkati grêre nê ma hpãnhã krĩ hõ hwỳr ixpa.

Jejus kot Tirtùm nhõrkwỹ hwýr àr ã harênh

Matêwre 21.12-13; Makre 11.15-19; Rukre 19.45-46

¹³ Tã nhũm ra arĩgro pè Pas ahtêp o mō. Pasja ã mē ixpè Ijaew na pa htem amnepêm Tirtùm kot pika pè Ejit rũm mē inhĩgêtjê kator mã ijamaxpêr kaxyw axpên wýr akuprõ nê hã ixkĩnh. Jakamã nhũm Jejus ma hkwýjê hkõt krĩ pè Jerujarê hwýr mō. Pa mē ixpè hkõt ri ixpa xwýnhjaja pa mē ma hkõt ixpa. Hãmri nê hwýr pøj ¹⁴ nê Tirtùm mã amnhĩ jarênh xà hã ixkre hwýr mra nê ixkre puhã kahêja wýr agjê. Nhũm mē kamã axtem nê mēmoj to wênê ho kuhê. Mõx o wênê nê ôwêhti ho wênê nê tutre ho wênê ho kuhê. Mē kot haprõr nê ho Tirtùm mã hkĩnh xà kaxyw mē kãm ho wênê. Nê kãxpore ho pinhpanh xwýnhjaja haxwýja mē kuri hkrĩ. ¹⁵ Hãmri pa mē Jejus kõt mē hwýr agjê nê ja hã mē omu hãmri nhũm Jejus pè ja omnuj tỳx nê. Jakamã nhũm tee ri mē omu hãmri nê amnhĩm mry hkã ho mē htak xà nhĩpêx nê ho ixkreja nê mē piitã mē kator pa. Nê mōx nê ôwêhti nê mēmoj piitã kator pa. Nê kãxpore ho pinhĩpanh xwýnhjaja nhũm mē kêp mē õ mēsti rênh pa nhũm mē hikãxpore pykap rõrõk pa nê angrã nê hikwỹ. ¹⁶ Hãmri nhũm Jejus tutre ho wênê xwýnhjê mã kãm:

—Kwa mē anhõ tutre jamý nê tokyx ma mra. Na htem Inhĩpêêxã nhõrkwỹ kamã mēmoj to wênê hkêt nê. Kêp mē ujaaprõr xà hã ixkre hkêt. E kwa mē tokyx ma mra. Anê.

Nhũm pre ã mē kãm kapêr anê nhũm mē tee ri kuma hãmri nê ma mra kurê kumrêx. ¹⁷ Pa mē hkõt mē ixpa ho ixpa xwýnhjaja ã kot mē hipêx anhýr ã omu hãmri nê ra Tirtùm kapêr ã kagã htũm kot ã amnhĩ nhĩpêx anhýrja kukamã hã kagãta mã ijamaxpêr kurê kumrêx. Kagã kot amnepêm Jejus kukamã

te ra ã kapêr anhýr pyrãk o harênh. Nê harênh kot:

Na pa hte Tirtùm nhõrkwỹ ho mex rãhã ho ixpa. Nhũm mēmoj punuj hwýr axà pa omu nhũm ja inhmã mex kêt nê.

Anhýr o kot hkukamã harênh jakamã na pa mē ã Jejus kot mē hipêx anhýrja ã omu hãmri nê ra hkukamã hã kagãta mã ijamaxpêr kurê kumrêx.

Ijaew krãhtũmjaja kot Jejus kukjêr ã mē harênh

¹⁸ Tã nhũm Ijaew krãhtũmjaja tee ri Jejus kot ixkreja nê mē kator ã omu hãmri nê hwýr mra nê kãm:

—Pa. Kwa mon ka ri ã Tirtùm mã amnhĩ jarênh xà hã ixkreja nê mē kator anê? Mêhõ na we mē ixwýr amê ka ý hã ã mē hipêx anêhti? Nà xà Tirtùm na mē ixwýr amê? E mē inhmã aa mē ixte mēmoj pumunh kêt õ ho anê. Pa mē ja hã apumu hãmri nê Tirtùm kot mē ixwýr amênh xwýnh ã apumunh kurê kumrêx. E kwa tokyx mē inhmã ho anê. Anê.

¹⁹ Hãmri nhũm mē kuma nê mē kãm amnhĩ jarê. Nom amnhĩ tã kuxi nê mē kãm awjarê nê mē kãm:

—Nà kot paj aa mē ate mēmoj pumunh kêt õ ho pixi nê mē amã ho anê ka mē omu. Tirtùm nhõrkwỹ jaa. Kot kaj mē agrã pa ixtã apkati axkrunêpxi nê akupým hipêx ka mē ja hã ixpumu.

²⁰⁻²² Anhýr o mē kãm kapêr. No ãm ixkreja jarênh kêt nê. Na pre ãm amnhĩ tã kuxi nê ã mē kãm kapêr anê. Mē kot hpĩr nhũm htyk ã apkati axkrunêpxi nê akupým htĩr ã mē kãm ã amnhĩ jarênh anê. Te mē kot Tirtùm mã amnhĩ jarênh xà hã ixkreta grãnh nhũm hã apkati axkrunêpxi nê akupým kot hipêx parta pyrãk ã hã kuxi nê ã mē kãm amnhĩ jarênh anê. Jakamã nhũm mēhprĩ hã mar mex kêt nê. ãm tee ri kuma nê kãm:

—Tk. Kwa ixkre ja na prem hipêx kaxyw nê hã amgrã xohtõ

rax nê hipêx. Hã amgrà pê 46 nê hipêx par kênã kot ka kêt atã apkati axkrunêpxi pix nê akupÿm hipêx. Anê.

Mê kot hprĩ hã mar kêt jakamã na prem ã kãm kapêr anê. Pa mê hkôt mê ixpa ho ixpa xwÿnhjaja ã mê kãm kapêr anhÿrja ã kuma nê hã inhnohtÿx rãhã ho ri ixpa. Tã nhũm mê kot Jejus pĩr nhũm hã apkati axkrunêpxi nê akupÿm htĩr nhõ arĩgrota ã pa mê kot ã amnhĩ jarênh anhÿrja mã ijamaxpêr kurê kumrêx. Nê axpên mã:

—Hêxta waa nê. Xep ãm hãmri na pre Pahihti amnhĩ kukamã ã amnhĩ jarênh anê. Mê kot hprĩ nhũm htyk ã apkati axkrunêpxi nê akupÿm htĩr ã amnhĩ kukamã amnhĩ jarênh mex nê. Te mê kot Tĩrtũm nhõrkwy grãnh par nhũm hã apkati axkrunêpxi nê akupÿm hipêx ã amnhĩ jarênh pyrãk. ãm hãmri na pre amnhĩ kukamã ã amnhĩ jarênh anê. Anê.

Jejus kot mê pajamaxpêr kôt mê pahpumunh ã harênh

²³ Tã nhũm Jejus mê hkôt mê ixpa ho ixpa xwÿnhjaja arĩ Jerujarê kamã ri ixpa ho ixpa. Nhũm ra arĩgro pê Pasja kato nhũm mê piitã hkũnh kaxyw axpên wÿr akuprõ. Nhũm Jejus mê kãm aa mê kot mêmoj pumunh kêt kwÿ ho anhÿr o ri mê hkôt pa. Nhũm mê omu nhũm mê hkwyjaja Tĩrtũm kot mê pakaxyw ãm xwÿnh ã hkôt hamaxpêr tã no ãm hkôt hamaxpêr tÿx kêt nê. ²⁴ Jakamã nhũm Jejus amnhĩ tã mê hamaxpêr ã mê omu nê hamaxpêr o:

—Nà mê kot ixkôt hamaxpêr kryre xwÿnhjaja koja mê hã apkati grêre nê ixto hamakêtkati nê htÿx ri pa. Anê.

²⁵ Jejus kot mê pahte pahtÿx ri amnhĩ tomnuj o papa hã mê pahpumunh par. Nê pahtÿx ri pajamaxpêr punuj o papa hã mê pah-

pumunh par. Jakamã na pre ã mê harênh anê.

3

Jejus mê Nĩkotê wa kot axpên mã kapêr ã wa harênh

Juãw 1.12-13; mããnên Wam Pêtre 1.23

¹ Tã nhũm Parijew nhõ xwÿnhjê õ pê Nĩkotê. Mããnên kêp Ijaew krãhtũmjê hõ. ² Jakamã na pre Jejus jarênh ma nê kãm omunh prãm nê. Hãmri nê hkwy pymaj kamãt kãm hwÿr tê nê omu nê kãm:

—Pa mê ijahkre xwÿnh. E ot pa awÿr tê. Ra mê ixte apumunh mex. Tĩrtũm na pre ate mê ijahkre ho apa kaxyw mê ixwÿr amê ka mê ixwÿr wrÿ. Mêhõ koja apyrã nê aa mê inhmã mê kot mêmoj pumunh kêt kwÿ ho anhÿr o pa? Nã amrakati kumrêx. Kop apu Tĩrtũm kot mê ixwÿr amênh kêt ronhÿx ka ã amnhĩ nhĩpêx anhÿr kêt nê. Anê.

³ Hãmri nhũm kuma nê tanhmã kãm kapêr to. No ãm amnhĩ tã kuxi nê kãm awjarê nê kãm:

—Na htem piitã mê katorxã nhõxã hkre rũm hapôj. Tã Tĩrtũm kãm mê piitã axte mê hapôx prãm. Jakamã kot kaj mê akator o axkrut kêt nê hãmri nê nhÿrmã Tĩrtũm ri atĩr tũm nê apa ho apa hkêt nê. ãm hkrajê pix na htem kuri htĩr tũm nê pa ho pa. Jakamã kwa jam ajamaxpêr tÿx nê ri ho apa. Anê.

⁴ Hãmri nhũm Nĩkotêja kuma nê tee ri ã kot kãm kapêr anhÿrja kukamã hamaxpêr nê kãm:

—Kwa ra ixãptãr kênã kot pa kêt tanhmã amnhĩ to nê akupÿm ixkatorxã nhõxã hkre hwÿr axã nê axte kurũm ixkato. Anê.

⁵⁻⁷ Hãmri nhũm Jejus kãm:

—Nà na hte mê hkrarejaja mê katorxã nhõxã hkre rũm kagõ hkôt hapôj hãmri nê kêp katorxã mê hipêêxã wa hkwyÿ. Jao wa kot amnhĩ nhĩpêx kôt amnhĩ nhĩpêx o pa. Ja pyrã nê ka mê atõ amã apê Tĩrtũm kra hprãm hã kot kaj amnhĩ

to awý nhũm wa Ixkarōja akarō mā axā hāmri ka ra apē hkraa. Te ra axte akator pyrāk o amnhī nhīpêx. Nē te mē hkra kot katorxā nē hipêêxā wa kot amnhī nhīpêx kôt amnhī nhīpêx o pata pyrā nē apām Tīrtūm kot amnhī nhīpêx kôt amnhī nhīpêx o ri apa. Nom koja Tīrtūm mē wa Ixkarōja akarō mā ār kêt nē ka apē hkra hkêt nē. Jao te axte akator kêt pyrāk o amnhī nhīpêx. Jakamā na pa amā te ate akator pijakrut o amnhī nhīpêx pyrāk o amā ā ja jarēnh anē. Kwa jam ajamxpēr tỳx rāhā ho ri apa. No ama nē tee ri amnhī kukamā ajamxpēr kêt nē.

8 —E pa ixprī hā amā ja jarē ka inhma. Na hte kōk kām nhỹhỹm àpēr prām xā hkôt àpēr o pa. Pu mē kamā ama no ām pano ho nhỹhỹnh mōr xā hkôt omunh kêt nē. Nē nhỹhỹm ma mōr xā hkôt omunh kêt nē. Ja pyrā nē na hte Tīrtūm mē wa Ixkarōja mē hkaxwýnh mā agjē nē mē ho Tīrtūm kra nom nhũm mēhprī hā kot tanhmā mē ho hā amnhī tā omunh kêt nē. Anē.

9 Hāmri nhũm Nikotē ā Jejus kot kām kapēr anhỹr ā kuma nē tee ri hamaxpēr nē kām:

—Kwa na pa ixprī hā amar kêt nē. Anē.

10 Hāmri nhũm kām:

—Kwa mon ka hte Tīrtūm kapēr tūm o Ijaew jahkre ho apa tā aprī hā ixkapēr mar kêt nē? 11 Ixte mēmoj pumunh xā hkôt ixte mē amā harēnh o ixpa htā ka mē apē Ijaew krāhtūmjaja mē amā ixkapēr mar prām kêt nē. Ā mē ate anhỹr kumrêx. Kwa jam ajamxpēr tỳx nē. 12 Na pa ra Tīrtūm kot jar tanhmā amnhī nhīpêx to hā harēnh o ixpa htā ka mē ām ama nē ixkôt ajamxpēr kêt nē. Jakamā xā kot pa hpānhā mē amā kaxkwa kamā tanhmā kot amnhī nhīpêx to hā harē ka mē ama nē mar tỳx nē? Nā kot ka mē ama nē ām ama nē hkôt ajamxpēr kêt nē. 13 Mēhō

na we ra ma kaxkwa hwýr api nē kamā mēmoj mex pumu nē man akupýn mē awýr wrý nē mē amā tanhmā harēnh to? Nā amrakati kumrêx. Ām paxipix ixpê Tīrtūm kot mē akaxyw ixām xwýnh na pa pre amnē kurūm mē awýr wrý hāmri nē ixprī hā mē amā tanhmā harēnh to ho ri ixpa.

14 —Amnepēm finat Mojesja kormā kapôt ā mē o pa ri na pre mē kām kax o kagā karōja nhīpêx nē kýxpê mē kām kunhō. Kagā kot mē hkamnhar xwýnhjaja kot hwýr rīt nē omunh nē akupým mex kaxyw mē kām kunhō. Tā ixpê Tīrtūm kot mē akaxyw ixām xwýnh kot paj nhỹrmā kagā karōta pyrā nē kýx pē pī kahpa hā ajēt. 15 Ka mē te mē kot kagā karō pumunh nē akupým mexta pyrā nē amnhī kaxyw inhmā ajamxpēr nē ixkôt amnhī xunhwý hāmri nē nhỹrmā Tīrtūm mē wa ixri atīr tūm nē amex rāhā nē apa ho apa.

16 —Tīrtūm kām pika piitā hkôt mē apiitā mē ajapê htỳx. Nē mē ajapê xāj na pre ixpê Kra hā ixpyxi hā mē awýr inhmē. Ka mē atō amnhī kaxyw ixkôt ajamxpēr nē ixkôt amnhī xām. Hāmri nē nhỹrmā atyk tā nhũm Tīrtūm akupým ato atīr ka wa ixkuri atīr tūm nē amex rāhā nē apa ho apa. Hāmri nhũm Tīrtūm aa amnhī nē nhỹhỹm amēnh kêt kumrêx. 17 No mē ate amnhī tomnuj mýrapê tanhmā ixte mē anhīpêx to kaxyw na pre mē awýr inhmēnh kêt nē. Ām ixkukwak ri mē atīr tūm nē mē amex rāhā apa ho apa hprām xāj na pre mē awýr inhmē pa mē awýr wrý. 18 Jakamā kot ka mē atō amnhī kaxyw ixpê Tīrtūm Kra hā ixkôt ajamxpēr nē ixkôt amnhī xām nhũm Tīrtūm ixtā apumu nē ate amnhī tomnuj mýrapê tanhmā anhīpêx to hkêt nē. No kêt mē kot ixkôt amnhī xunhwýr kêt xwýnhjaja na Tīrtūm ma mē kot amnhī xā htỳx kamā hamak tūm xā hwýr mē pa mā xwýnhjē

hã mẽ harê. Mẽ kot ixkôt amnhĩ xunhwýr kêt mýrapê. Anê.

Mẽ kot amnhĩ tomnuj o hpimxur prãm kaprý ã mẽ harênh

¹⁹ Nhũm Jejus arĩ Nĩkotê mã kapêr nê kãm:

—Na pre Tĩrtũm amnê pika hwýr mẽ awýr inhmẽ. Mẽ ate amnhĩ tomnuj xwýnh ã amnhĩ pumunh kaxyw mẽ awýr inhmẽ. Tã nhũm mẽ ohtõ nê amnhĩ tomnuj gryk ã kãm kapêr mar prãm kêt nê. Jao ixkaga nê kãm ixkapêr mar prãm kêt nê. ²⁰ Ra ixprĩ hã ixte mẽ kot tanhmã amnhĩ tomnuj to ho pa hã mẽ omunh mex jakamã mẽ kãm ixkapêr mar prãm kêt. Nê ixte mẽ kot tanhmã amnhĩ tomnuj to ho pa hã mẽ harênh pymaj ixkôt kãm pa hprãm hkêt nê. ²¹ No kêt mẽ kot ixkôt amnhĩ xunhwýr xwýnhjaja na mẽ kot amnhĩ nhĩpêx o pa hã hpijaãm kêt. Na htem ãmnhĩx ixkôt amnhĩ nhĩpêx o pa. Jakamã koja mẽ piitã ja hã mẽ omu nê Tĩrtũm kot tanhmã mẽ hkrã hto nhũm mẽ ra kãm hkôt pix mã amnhĩ nhĩpêx ho pa hprãm ã mẽ omunh kurê kumrêx. Anê.

Nhũm pre ã Jejus Nĩkotêja mã kapêr anê.

Juãw Paxis kot Jejus jarênh o pa hã harênh

Juãw 1.19-28

²² Tã pa mẽ ixpê Jejus kôt ri ixpa ho ixpa xwýnhjaja Jejus kôt Jerujarê rũm ijapôj nê pika pê Jutej kwý kamã ixpa. Jejus nhỹ hã Tĩrtũm mã mẽ hkrã kumrãr o ri mẽ hkôt ixpa. ²³ Nhũm finat Juãw Paxis haxwýja mẽ ixpyrà nê mẽ hkrã kumrãr o pa. Krĩ pê Sarĩ htã krĩ pê Enõ mýri pyhti rax jakamã nhũm pre htem hwýr mra nhũm kamã mẽ hkrã kumrã. ²⁴ Kormã mẽ kot haxãr kêt ri nhũm kamã mẽ hkrã kumrãr o pa.

²⁵ Rôm nhũm Ijaew hõja Juãw Paxis kôt mẽ pa ho mẽ pa xwýnhjê hwýr tẽ nê Juãw Paxis kot mẽ hkrã

kumrãr ã tanhmã mẽ hkukjêr to nhũm mẽ kuma nê tee ri hã axpên kukjêr o kuhê. ²⁶ Hãmri nê akupým Juãw Paxis wýr tẽ nê kãm:

—Kwa mẽ ijahkre xwýnh. Pyhti pê Jotãw nhĩkê hã ate mēhõ pumunh nê tanhmã mẽ inhmã harênh to xwýnhnta kôt mẽ pa ho mẽ pa xwýnhjaja na xep htem apyrã nê mẽ hkrã kumrãr o pa nhũm xep mẽ ra ohtõ nê mẽ pahkaga nê mẽ hkôt pa. Kwa xà ja amã mex nà? Anê.

²⁷ Hãmri nhũm mẽ kuma nê mẽ kãm:

—Tý ja mex kênã. Tĩrtũm kãm hprãm xà hkôt na htem mẽ hwýr mra nhũm mẽ ixpãnhã mẽ hkrã kumrã. Nà ja mex. ²⁸ Ixpê Tĩrtũm kot mẽ pakaxyw ãm xwýnh kêt. Na pa pre ra mẽ amã ja hã amnhĩ jarê ka prem inhma. Æm hkukamã na pre Tĩrtũm amnê inhmẽ pa mō nê ã jar ri ixpa anê.

²⁹ —Te ixte mẽ umre kot amnhĩ nhĩpêx pyrãk. Na htem axpên mã mẽ rer kaxyw nhũm mẽ umreja myta wýr tẽ nê hpa hã kupy nê ma ni hwýr o tẽ nê axpên mã wa kure. Hãmri nhũm hpãnhã mēhõja axpên tã wa hakre. Nhũm umreja wa kuri hkĩnh nê mar o xa. Tã te ixte mẽ umre kot amnhĩ nhĩpêx pyrãk jakamã koja mẽ ma Tĩrtũm kot mẽ pakaxyw ãm xwýnhnta wýr mra nê kapêr ma pa mẽ harênh ma nê ixkĩnh nê. ³⁰ Na htem mẽ umre hã hkĩnh kêt nê. Mjên nyw xwýnhja ã na htem hkĩnh. Tã ja pyrã nê koja mẽ axte ixte mẽ kãm Jejus jarênh mar kaxyw ixwýr mra kêt nê. Æm hwýr koja mẽ hpãnhã mra nê tãm mar o kuhê. Ja mex kumrêx.

³¹ Jejus kêp kaxkwa rũm amnê mẽ pahwýr wrýk xwýnh jakamã kot amnhĩ to rax o kot mẽ pahpiitã mẽ pajakrenh par. Mẽ papajaja mẽ pahpê pika nhõ xwýnh jakamã Jejus kĩnhã mẽ pahte mēmoj piitã omunh tohtuj anhýr. Nê pika nhõ xwýnhjê jamaxpêr pix o paja-maxpêr o ri papa.

³²—Na hte Jejus mẽ kām kaxkwa kamã kot mẽmoj pumunh xwýnh kwýjê jarênh o pa. Nê kamã kot mẽmoj mar xwýnh kwý jarênh tâ nhũm mẽ ohtô nê kuma nê ãm kuma. ³³No mẽ kot mar nê amnhĩ kaxyw hkôt hamaxpêr xwýnhjaja na htem kuma nê axpên mã harênh o: “Nà ãm hãmri na ã Tirtũm kapêr jarênh anê. Nà Tirtũm kapêr mex kumrêx.” Anhÿr o axpên mã harê.

³⁴—Tirtũm na pre mẽ pahwÿr Jejus mẽ nhũm amnê mẽ pahwÿr wrý nê Tirtũm Karô nhÿ hã mẽ pamã kapêr jarênh o ri mẽ pahkôt pa. ³⁵Tirtũm kãm Krata japê htÿx kumrêx jakamã na pre ãhkram mẽmoj piitã haxâr pa nhũm urâk nê hihtÿx o hihtÿx nê mẽmoj piitã ho amnhĩptâr o pa. ³⁶Jakamã mẽ kot amnhĩ kaxyw hkôt hamaxpêr nê hkôt amnhĩ xunhwÿr xwýnhjaja koja mẽ nhÿrmã wa kuri htÿr tũm nê mex rãhã nê pa ho pa. No mẽ kot hkaga xwýnhjaja koja mẽ ã amnhĩ nhÿpêx anhÿr kêt nê. Koja Tirtũm mẽ kot amnhĩ xã htÿx kamã hamak tũm xãta wÿr mẽ rênh pa. Anê.

4

¹Tã nhũm Parijew nhô xwýnhjaja Jejus jarênh ma. Nê hkôt mẽ pa xwýnhjaja ohtô rax o Juāw Paxis kôt mẽ pa xwýnhjê jakrenh ã mẽ harênh ma. Nê Jejus kot mẽ hkrã kumrâr rax o Juāw Paxis jakrenh ã harênh ma. ²Nom Jejus na pre mẽ hkrã kumrâr kêt nê. ãm mẽ ixte hkôt ri mẽ ixpa ho mẽ ixpa xwýnhjaja na pa prem kãm mẽ hkrã kumrâr o ri ixpa. ³Jakamã nhũm Jejus amnhĩ tâ Parijew nhô xwýnhjê jarênh ma hãmri nê mẽ kêp kato nê hpãnhã ma akupÿm Garirej wÿr mẽ pa mẽ ma hkôt ixpa.

Mêhõ ni kot amnhĩ nhÿpêx nyw o amnhĩ nhÿpêx ã harênh

Juāw 7.37-39; mãânên Apokarip 22.1, 22.17

⁴Tã pa mẽ mẽ nê kormã pyka pê Samar mã axã nê hkôt ixpa. ⁵Hãmri nê krÿ pê Sika hwÿr ixpôx o mẽ. Amnepêm finat Jako kot hkra Juje mã pyka nhôr xwýnh tâ krÿja xa pa mẽ ra hwÿr ixpôx o mẽ. ⁶Nê amnepêm Jako kot gôm kakwÿnhnta wÿr pôj. Nhũm ra kaxkwa nhÿpôk ri myt nhÿr mẽ nhũm Jejus ra mrar ryy kurê hkêngrã nê. Hãmri nê gôm kakwÿnh my ri tẽm nê hkôkôt o nhÿ. ⁷⁻⁸Hãmri pa mẽ kure nê mẽ ixãpkur xã japrôr kaxyw ma krÿm ijapêx.

Rôm nhũm Samar nhô xwýnh nija amnhĩm gô runh mã tẽ nhũm Jejus omu nê kãm:

—Kwa inhmã anhô gôta kwý pa ho ixkô. Anê.

⁹Nhũm amnhĩ jaêr pê amnhĩ tâ kuma. Ijaew na pre htem Samar nhô xwýnhjê kutã apkur rÿ mẽ hkôt ri pa rÿ mẽ ho mjên kêt nê. Rÿ mẽ kutã hkôm kêt nê. Tã nhũm Jejus ã gô hã nija wÿr anê nhũm tee ri amnhĩ tâ kuma nê kãm:

—Xê pêr apê Ijaew tâ axtem nê ri gô hã ixwÿ. Xã ate ixpê Samar nhô xwýnh ã ixpumunh kêt? Hãn ka ri hã ixwÿ. Anê.

¹⁰Hãmri nhũm kuma nê kãm amnhĩ jarê. No ãm amnhĩ tâ kuxi nê kãm kapêr nê kãm:

—Nà aprÿ hã ate ixpumunh ro nhÿx ka kam gô hã ixwÿ pa amã hkwy. Inhô gô na axte mã. Tirtũm kãm amarÿ mẽ amã ôr prãm. Na htem ho ixkô hãmri nê mex nê htÿr tũm nê pa ho pa. Anê.

¹¹Hãmri nhũm tee ri kot ã ô gô jarênh anhÿrja ã kuma nê htÿx ho gôm kakwÿnh kamã gô hã hkamnhÿx nê tee ri hkukamã hamaxpêr nê kãm:

—Xê tanhmã kot ka kêt amnhĩ to nê inhmã gôta kwý janhi? Mo kaxyw anhô gô janhir xã? Gôm kakwÿnhnta upÿm rax kênã kot ka kêt tanhmã amnhĩ to nê hkwy janhi. Nhÿhÿnh kot ka anhô gô jarênh xwýnhnta kwý janhi pa ho

ixkō hāmri nē ixtīr tūm nē ixpa ho ixpa? ¹² Mē inhō gōm kakwýnhja amnepē mā mē panhīgēt finat Jako nhō gōm kakwýnh na pre. Jako hkwýjaja na prem hkakwý nhūm kamā gō kato nhūm pre htem hanhi nē ho hkōm o pa. Nē hkrajaja nē hkrit piitā ho hkōm o pa. Jakamā na pre mē ixpē hkanrēhā htāmnhwýjē mā hkaga. Tā xep axtem anhō gō. Mē kot ho hkōm nē htīr tūm kaxyw na xep. Jakamā xē xā ate amnhī to rax o mē panhīgēt Jako jakrenh mē? Anē.

¹³ Hāmri nhūm Jejus kām:

—Nā mē anhō gōta na htem ho ixkō nē arī kām kōr o pa. ¹⁴ No ixte amā gō jarēnh xwýnhhta kot ka hkwy ho ixkō hāmri nē axte amā kōr kēt kumrēx nē apa. Nhūm te akaxwýnh kām hinore hprōt pyrāk o ka amnhī nhīpēx. Hāmri nē te hinore kamā gōja aa grā hkēt pyrā nē aa ajapēx kēt kumrēx. Nhýrmā atyk tā akupým atīr nē atīr tūm nē amex rāhā apa ho apa. Anē.

¹⁵ Nhūm nija kuma hāmri nē kām:

—Xōwehe? Xē tō tokyx inhmā anhō gōta kwý. Pa ho ixkō nē axte inhmā kōr kēt nē ixpa. Nē axte amnē amnhīm gō janhīr mā inhm-rar kēt nē. Xē tokyx inhmā hkwy mē? Anē.

Týx gō kumrēx ā hkamnhīx nē ā hā àhwýr anē. ¹⁶ Hāmri nhūm kām:

—Tō ma akupým krīm tē nē amjēn japró nē man akupýn ixwýr wa tē. Anē.

¹⁷ Hāmri nhūm tee ri kuma nē kām:

—Ma mo inhmjēn? Inhmjēn kēt na pa hte ri ixpa. Anē.

Hāmri nhūm kām:

—Tý. Nā am hāmri na ka ā amnhī jarēnh anē. ¹⁸ Na ka pre ra amjēn kēp 5. Nē my mē ri war apa xwýnh ata te kēp amjēn pyrāk nom kēp amjēn kumrēx kēt. Anē.

¹⁹ Hāmri nhūm amnhī jaēr pē kot ā kām kapēr anhýrja ma hāmri nē kām:

—Xē pēr aprī hā ate ixpumunh par pyrāk. Mān apē Tīrtūm nhý hā kapēr jarēnh o mē pa xwýnhjē hō mán ka mē? ²⁰ Xē inhmā mēmoj jarē. Nhýhým kot paj wem axpēn kōt mra nē Tīrtūm mā mex o mex ā harē? Amnepē mā mē panhīgētjaja na prem hixēt mūj nhīmōk ā api nē hā kām amnhī jarē nē kām mex o mex ā harē. No mē apē Ijaew na ka htem krī pē Jerujarē pix kām mē ixte axpēn kōt mrrar nē ā amnhī nhīpēx anhýr ā mē inhmā karō. Xā hixēt nhīmōk ā mē ixte kām amnhī jarēnhja xā apē omnuj mē? Ma xā apē omnuj kēt? Anē.

²¹ Hāmri nhūm Jejus kām:

—Nā kot kaj mē nhýrmā am Jerujarē pix kām rý hixēt mūj nhīmōk pix ā axpēn wýr akupró nē Tīrtūm mā amnhī jarēnh kēt nē.

²² Mē apē Samar nhō xwýnhjaja mē ate Tīrtūm mā mex o mex ā harēnh o apa htā aprī hā kot amnhī nhīpēx ā omunh kēt. Nē tanhmā hamaxpēr to ho pa hā omunh kēt. No mē ixpē Ijaew na pa mē arom kot tanhmā amnhī nhīpēx to nē tanhmā hamaxpēr to hā omunh mex. Mē inhīō kukwak ri koja Tīrtūm mē kot hkōt amnhī xunhwýr xwýnh piitā nē mē kot amnhī tomnuj rēnh pa. ²³ Tā koja mē piitā Mēpahpām Tīrtūm mā mex o mex ā harēnh kaxyw nhýhým pa hkēt nē. Koja mē nhýri pa xā kamā mē ōpinh xā kaxwýnh kām ā kām amnhī jarēnh anhýr o pa. Ja na Tīrtūm kām hprām. No nhýhým mrrar nē nhýri kuhē xā pix kamā kām amnhī jarēnhja nhūm kām hprām kēt nē.

²⁴ —Nē Tīrtūmja mē pahpyrā nē ī hkēt jakamā na te kaxkwa nē pika piitā hkōt pa ho pa. Jakamā na htem nhýri pa nē ōpinh xā kaxwýnh kām amnhī kaxyw kām hamaxpēr nē kām mex o mex ā harē nhūm ra amnhī tā mē kuma. Á mē kot amnhī nhīpēx anhýrja na kām hprām. Anē.

²⁵ Nhũm pre ã Jejus nija mã kapêr anê nhũm kuma nê kãm:

—Ma koja xep nhỹrmã Tĩrtũm kot mẽ pakaxyw ãm mã xwỹnh pê Krisja mẽ pahwỹr wrỹ hãmri nê hprĩ hã mẽ pamã mẽmoj piitã ho amnhĩrit pu mẽ kuma. Anê.

²⁶ Hãmri nhũm kãm:

—Kwa nhũm paa. Ixte amã ixkapêr xwỹnhja ixpê Kris na pa. Jakamã na pa ixprĩ hã amã ã ixkapêr anê. Anê.

²⁷ Nhũm pre ã kãm amnhĩ jarênh anhỹrja rôm pa mẽ ixte hkôt ri mẽ ixpa ho ixpa xwỹnhjaja ra ixujaprôr pa nê akupỹn hwỹr ixpôx o mra. Hãmri nê amnhĩ jaêr pê kot Samar nhõ xwỹnh nita mã kapêr ã omu nê tee ri hkukamã ijamaxpêr nom tanhmã hã hkukjêr to hkêt nê. Nija kêp Samar nhõ xwỹnh tâ nhũm àmnhix kãm kapêr o nhỹ. Pa mẽ omu nê ãm omu nê tanhmã hã kãm nê hkêt nê. ²⁸ Hãmri nhũm nita gôm kakwỹnh mỹr ri õ poti re nê ma akupỹm krĩm tẽ nê hkwỹjê mã awjarê. ²⁹ Nê mẽ kãm:

—Xê mẽ tokyx ma ixkôt gôm kakwỹnh wỹr mra nê mỹ ri mẽhõ my mũj pumu. Tĩrtũm kot mẽ pahwỹr mẽnh mã xwỹnhnta na. Aa kot nhỹri ixpumunh kêt tâ kot hprĩ hã ixpumunh par. Ixte tanhmã amnhĩ nhĩpêx to hã ixpumunh par. Xê mẽ ma ixkôt mra nê ixpyrà nê kapêr ã ama. Anê.

³⁰ Hãmri nhũm mẽ kuma nê ma hkôt Jejus wỹr mra kurê kumrêx.

³¹ Rôm pa mẽ ixte Jejus kôt ri ixpa ho ixpa xwỹnhjaja tee ri mẽ ixàpkur xà ho Jejus ma nê kãm:

—E ota mẽ panhõta. Kwa mẽmoj py nê aku mãn.

³² Anhỹr tâ nhũm mẽ inhma nê tanhmã mẽ inhmã amnhĩ jarênh to. Nom amnhĩ tâ kuxi nê amnhĩ jarê nê mẽ inhmã:

—Nà kormã. Inhõja axtem na. Mẽ ate inhõja pumunh kêt. Anê.

³³ Hãmri pa mẽ kuma nê tee ri hã axpên kukja nê axpên mã:

—Kwa mãn ra mẽhõ mẽ paxwakre kamã kãm mẽmoj to tẽ nhũm kukrê nã? Anê.

³⁴ Hãmri nhũm mẽ inhma nê mẽ inhmã:

—Nà mẽhõ kot kêt ri inhmã mẽmoj to mra pa kuku? Kot paj kot mẽ awỹr inhmênh xwỹnhnta mã tanhmã amnhĩ nhĩpêx to hãmri nê te ra ixàpkur mex nê hã ixihtỹx mex pyrãk o amnhĩ nhĩpêx. Tã kot paj ã kãm amnhĩ nhĩpêx anhỹr o ri ixpa rãhã ho ijapêx pa. Jao te ixàpkur rax pyrãk.

³⁵ Anhỹr o mẽ inhmã amnhĩ jarê. Hãmri nê ra Samar nhõ xwỹnhjaja mẽ ixwỹr mra ã mẽ omu nê mẽ inhmã tanhmã mẽ harênh to nom mẽ hã kuxi nê mẽ harê nê mẽ harênh o:

—Kot kaj mẽ axte mẽ atã mytwrỹ kêp 4 hãmri nhũm ra mẽ apur kãm mẽ anhõja hamỹnh mã tãm nê. Nom kormã. E ka mẽ pahwỹr mẽ mra xwỹnh nêj pumu. Ra mẽ kot amnhĩ kaxyw ixkôt hamaxpêr nê ixkôt amnhĩ xunhwỹr mã tãm jakamã te mẽ apur kãm ra mẽ anhõ jamỹnh mã tãm pyrãk. Jakamã ka mẽ atõ ma mẽ hwỹr mõ nê mẽ kot amnhĩ kaxyw ixkôt hamaxpêr nê ixkôt amnhĩ xunhwỹr kaxyw mẽ kãm ijarê. Hãmri nê te ate ixpur kãm inhmã inhõ jamỹnh xwỹnh pyrãk o amnhĩ nhĩpêx.

³⁶ —Jakamã koja mẽhõ kumrêx mẽ hwỹr tẽ nê mẽ kãm Tĩrtũm kapêr jarê hãmri nê te kêp õ pahi mã hpur kãm ahkre ho pa pyrãk. Nhũm mẽ kot mar xwỹnhjaja kuma nom kormã hprĩ hã mar tỹx kêt nê. Tã kot kaj mẽ atõ wamta kôt mẽ hwỹr tẽ nê mẽ kot ixkôt amnhĩ xunhwỹr kaxyw aprĩ hã mẽ kãm ijarênh o mẽ hkôt apa hãmri nê te apê mẽ anhõ pahi mã hpur kãm axujamỹnh xwỹnh pyrãk. Hãmri nhũm mẽ hkwỹjaja mẽ ama nê ixkôt amnhĩ xunhwỹr nê ixkôt ri amnhĩ nhĩpêx o pa. Hã koja nhỹrmã mẽ apyrã nê Tĩrtũm mẽ wa ixri mex rãhã nê htĩr tũm nê pa ho pa.

Ka mē amnhī tā mē omu nē akīnh nē apa. Te mē kot mē hpur kām ahkre xwýnhjaja nē mē kot hamýnh xwýnhjaja mēō rūnh pumunh nē hkīnhhta pyrāk.

³⁷—Na htem tōhā ā mē pur kām mē àpēnh xwýnhjē jarēnh anē nē mē harēnh o: “Axtem mē ahkre xwýnhjaja nē axtem mē kot hamýnh xwýnhjaja.” Anē. Tā te mē ate mē ujarēnh ja pyrāk. ³⁸ Na pa pre ra ma mē hwýr mē arē. Mē ate aprī hā mē kām ijarēnh nhūm mē kot mē amar nē amnhī kaxyw ixkôt hamaxpēr nē ixkôt amnhī xunhwýr kaxyw. Nom mē kajaja na ka prem akumrēx mē hwýr amrar nē mē kām ijarēnh kēt nē. Tirtūm kapēr jarēnh o mē pa xwýnhjaja na prem kumrēx mē hwýr mra nē ixkukamā mē kām ijarēnh o ri mē hkôt pa. Te mē kot hpur kām ahkre ho pata pyrāk. Tā kot kaj mē hpānhā mē kot amnhī kaxyw ixkôt amnhī xunhwýr kaxyw aprī hā mē kām ijarēnh o apa. Jakamā te mē ate mē hpur kām mēō jamýnh xwýnh kot amnhī nhīpēxta pyrāk. Anē.

Mē hkwy kot amnhī nhīpēx nyw o amnhī nhīpēx ā mē harēnh

Sikūn Korīt 5.17; Wam Juāw 4.14

³⁹ Rōm nhūm Samar nhō xwýnh kwýjaja nija kot mē kām amnhī jarēnh ma hāmri nē urāk nē amnhī kaxyw Jejus kôt hamaxpēr. Na pre ra amnhī tā tanhmā mē kām Jejus jarēnh to nē mē kām harēnh o:

—Ma aa kot nhýri ixpumunh kēt tā ra kot hprī hā ixpumunh par. Ixte tanhmā amnhī nhīpēx to hā ixpumunh par.

Anhýr jakamā nhūm mē kuma nē urāk nē amnhī kaxyw hkôt hamaxpēr kurē kumrēx.

⁴⁰ Hāmri nē man mē ixwýr mra nē Jejus pumu nē amnhī wýr kuwý nē kām:

—Pa. E kwa mē tokyx anojarēt kēt nē. Mē ma mē ixkôt mē inhō krī

hwýr mō nē mē ixkôt ri apa grire nē arī ma mō. Anē.

Hāmri nhūm mē kuma nē mē kām:

—Tōe. Nà kot paj mē anē. Anē.

Hāmri pa mē ma mē hkôt mō nē mē ō krī kamā mē hkôt ri ixpa hā apkati axkrut. ⁴¹ Nhūm Jejus mē kām Tirtūm kapēr jarēnh o ri mē hkôt pa nhūm mē axte ohtō nē kuma nē nita pyrā nē hkôt amnhī xunhwý. ⁴² Hāmri nē nita wýr mra nē kām:

—E nà ām hāmri. Akumrēx na ka mē inhmā Jejus o amnhīrit. Pa mē akôt ma hwýr mra nē mē pam omu nē kapēr ā kuma. Jao apyrā nē amnhī kaxyw hkôt ijamaxpēr nē hkôt amnhī xunhwý. Pēr ām hāmri kēp pyka piitā hkôt mē pahte amnhī tomnuj pānhā amnhīrer mā xwýnhhta na. Anē.

Garirej nhō xwýnhjaja kot Jejus pumunh ā mē harēnh

Matēwre 13.57

⁴³ Tā pa mē Jejus kôt Samar rūm ixkato nē ma pika pē Garirej wýr mō. Kamā Jejus nhō krī pē Najare htā pa mē hwýr inhmōr kēt nē. ⁴⁴ Na pre ra Jejus mē inhmā tanhmā ō krī nhō xwýnhjē jarēnh to nē mē harēnh o:

—Tirtūm nhý hā kapēr jarēnh o mē pa xwýnhjaja na htem amnhī nhō krī kamā mē kām Tirtūm kapēr jarēnh o pa nhūm mē kuma nē ām kuma. Jakamā kot paj Najare hwýr inhmōr kēt nē. Mē kām ixkapēr mar prāmre hā.

⁴⁵ Anhýr jakamā na pa prem hwýr inhmōr kēt nē. Pānhā nhām krī hō hwýr mō nē hwýr pōj hāmri nhūm mē amnhī wýr Jejus pumu nē hkīnh nē. Na prem ra krī pē Jerujarē kamā arīgro pē Pas ā mē hkīnh kām tanhmā kot amnhī nhīpēx to ho pa hā omu. Jakamā amnhī wýr omu nē hkīnh nē.

Jejus kot mēhō hkra ho mex ā harēnh

46 Tã pa mẽ kormã Garirej kamã ixpa mẽ akupỹm krĩ pẽ Kanã hwỳr mō. Kamã na pre Jejus mẽ kãm gō ho wĩhti nhĩpêx. Jakamã pa mẽ akupỹm mẽ hwỳr mō. Nhũm mẽõ pahĩ nhõ kōwenatôjê hõ hkra myja kêp à htỳx mẽ nõ. Nom Kanã kamã hkêt axtem krĩ hõ pẽ Kapanau kamã. 47 Jakamã nhũm hipêêxàja tee ri hkra pumu hãmri mẽ ra Jejus kot Jutej rũm Kanã hwỳr hpôx ã harênh ma mẽ hkra kaxyw kãm hamaxpêr mẽ ma hwỳr mōr kurê kumrêx. Hãmri mẽ nhỹri omu mẽ hwỳr tẽ mẽ kãm kapêr kãm hihtỳx mẽ kãm:

—Pa. E ot pa awỳr tẽ. Na ra ixkra ixpê htyk kaxyw. Kwa ixkamã axukapri mẽ ma ixkôt mō mẽ akupỹm inhmã ho mex. Anê.

48 Hãmri nhũm kuma mẽ kãm:

—Kwa pêr ãm ixte mẽ amã aa mẽ ate mẽmoj pumunh kêt kwỳ ho anhỹr ã ixpumunh kêt pix mã na ka htem amnhĩ kaxyw ixkôt ajamaxpêr. Nom amarĩ amnhĩ kaxyw ixkôt ajamaxpêr kêt mẽ. Anê.

49 Hãmri nhũm tee ri kuma mẽ kãm:

—Kwa tokyx. Kot kaj tokyx ixkôt amōr kêt koja ixpê ty. Anê.

50 Hãmri nhũm kãm:

—Nà koja apê htyk kêt mẽ. Ra ixte akupỹm amã ho mex kênã. Mãmri ma akupỹm mō mẽ tokyx omu. Na ra akupỹm amã mex. Anê.

Hãmri nhũm kuma mẽ kaxyw hkôt hamaxpêr kurê kumrêx mẽ ma akupỹm hwỳr mō. Nẽ mōr o apkati. 51 Nẽ kormã õ krĩ hwỳr hpôx o mōr ri nhũm ra kãm mẽ àpênh xwỳnhjaja kutã mra mẽ nhỹri pry hã hkaxpa mẽ kãm:

—Pa. Kwa na ra akra hkà hakry mẽ akupỹm amã mex. Anê.

52 Hãmri nhũm mẽ kuma mẽ hkĩnh tỳx mẽ. Nẽ mẽ kãm:

—Kwa xō wehe? Mẽmo ore hã na pre we ra hkà hakry? Anê.

Nhũm mẽ kãm:

—Nã jãã na pre kaxkwa nhĩpôk ri myt nhỹ nhũm hkà hakry mẽ

akupỹm amã mex kurê kumrêx. Anê.

53 Hãmri nhũm mẽ kuma mẽ mẽ kãm:

—Hêxta waa mẽ. Kwa pêr ãm hãmri Jejus kot inhmã akupỹm mex ã harênh xà hã ore kamã na pre akupỹm inhmã mex. Nà ãm hãmri. Anê.

Hãmri mẽ amnhĩ kaxyw Jejus kôt hamaxpêr kurê kumrêx. Nhũm òrkwỳ kamã ri mẽ pa xwỳnhjaja urak mẽ amnhĩ kaxyw hkôt hamaxpêr.

54 Nhũm Jejus ã kãm hkra ho mex anê. Na pre ra pika pẽ Garirej kamã mẽ kot mẽmoj pumunh kêt õ ho anhỹr o tipxi mẽ mẽ kãm gō pix o wĩhti nhĩpêx. Tã ra pyka pẽ Jutej rũm akupỹm mẽ hwỳr mō mẽ ã akupỹm mẽ hkrata o mex anê.

5

Jejus kot himô mỳ ri akupỹm mẽhõ ho mex ã harênh
Juãw 7.23, 10.30-33

1 Tã mẽ ixpê Ijaew mẽ ixte Tirtũm ã ixkĩnh kaxyw Jerujarê hwỳr akuprõ nhũm Jejus haxwỳja ma hwỳr mō. Pa mẽ hkôt mẽ ixpa ho mẽ ixpa xwỳnhjaja ma hkôt mō.

2 Jerujarê kamã na himôja hikwỳ. Nhỹhỹnh mẽ kot krĩ hwỳr ôwêhti ho giêx xà htã hikwỳ. Himôja nhĩxi pẽ na Petes. Nẽ pu hã mẽ à xwỳnhjê nhĩkwỳ xà hã ixkre kêp 5. 3 Piitã kamã na pre hte tanhmã mẽ à kute xwỳnhjaja hikwỳ. Mẽ nohkre xwỳnhjaja mẽ mẽ hyk o mẽ pa xwỳnhjaja mẽ mẽ i kamã mẽ htyk xwỳnhjaja. ãm ahpỹnhã tanhmã mẽ à kute xwỳnhjaja ixkre hkwyja kamã akupỹm mex prãm xà hikwỳ. 4 Na pre hte Tirtũm kapêr o mẽ wrỳk xwỳnhja tōhã himô hwỳr wrỳ mẽ gō xok. Hãmri nhũm mẽ à xwỳnhjê hõ kot amnhĩ to wa mẽ kumrêx hwỳr wrỳk mẽ kamã mrõr xwỳnhja akupỹm mex.

Kwỳjê rom akupỹm mex kurê kumrêx. Jakamã nhũm pre hte mẽ

à xwýnhjaja akupým mex prām xàj gô xok jamār o hikwý. ⁵ Jakamā nhūm mēhō myja ixkre hō kamā hikwý. Te omnuj nē arī hikwý hā amgrà xohtō rax nē. Ra hā amgrà kēp 38. ⁶ Jakamā nhūm Jejus mē hwýr tē nē omu. Nē hprī hā omu nē hamaxpēr o:

—Kwa mūj na hte omnuj nē ri pa hkēt ā amgrà xohtō rax nē. E pa akupým ho mex.

Anhýr o hamaxpēr hāmri nē kām:

—Pa. E kwa inhmā amnhī jarē. Xà amā akupým amex prām? Anē.

⁷ Hāmri nhūm kuma nē kām:

—Ku nhūm. Inhmā tokyx akupým inhmex prām tỳx kumrēx kēnā. No mēhō kot tokyx inhmý nē mē kēp ixto wa nē ixkumrēx gô xok kamā inhmōr? Na pa tee ri ixkumrēx hwýr ixtēm nē inhmā inhmōr prām nhūm mē xatā ixpē amnhī to wa nē mra nē kamā mrō. Anē.

⁸ Hāmri nhūm Jejus kām:

—Tỳ? Tōe. E na ka akupým amex. E kànhmā xa nē akupīp py nē ma akupým anhōrkwý hwýr tē. Anē.

⁹ Hāmri nhūm kuma nē ra akupým mex nē kànhmā xa nē ri mra. Nē hkính tỳx nē hikupīp py nē ma akupým ōrkwý hwýr tē. Ijaew nhō arīgromnu pē sap ā nhūm Jejus kot akupým ho mex ¹⁰ nhūm ma akupým pry hā hikupīp py nē o tē. Nhūm Ijaew nhō pahī hkwyja nhýhýnh mra nē tee ri kot sap ā hpyr nē o htēm ā omu nē kām:

—Tk. Kwa mē pahpē Ijaew na pu htem mē panhō arīgromnu hā paxápēnh kēt nē. Finat Mojex kot ja nē mē pahkurē htā ka axtem nē akupīpta py nē nhýhým o tē. Anē.

¹¹ Hāmri nhūm mē kuma nē mē kām:

—Tỳ. Kot anhýr tā kot ixto mex xwýnhta na ā inhmā kapēr anē pa mar xà hkôt kupy nē akupým inhōrkwý hwýr tē. Anē.

¹² Hāmri nhūm mē tee ri kuma nē kām:

—Kwa mēhō na we ā ri amā karō anē? Anē.

¹³ Nhūm kormā kot Jejus nhīxi mar kēt jakamā kot mē kām ahkre kaxyw hakēx nē tee ri hkwyjē kaēx ā hapēr rīt o xa. Nom nhūm mē ohtō nē pry hā mrar jakamā nhūm tee ri hapēr nhūm Jejus ra ma nhýhým tē.

¹⁴ Tā nhūm hā ahtūmre nhūm Jejus Tirtūm mā amnhī jarēnh xà hā ixkre hwýr tē nē axà nē kot ho mex xwýnhta pumu nē kām:

—Pa. E na ka ra akupým amex. Nom kwa kēr ka axte tanhmā amnhī tomnuj to ho ri apa hkēt nē. Kot kaj axte ā amnhī nhípēx anē hāmri nē apunuj tỳx o wam ate apunujta jakre kām ga. Anē.

¹⁵ Hāmri nhūm kuma nē ma tē nē kato. Nē ma mē ō pahijē hwýr tē nē mē kām:

—E na pa ra kot ixto mex xwýnhta nhīxi ma. Xep kēp Jejus. Anē.

¹⁶ Hāmri nhūm mē hixi ma nē hā tanhmā axpēn mā ho kapēr punuj to. Mē ō arīgromnu hā kot mē ho mex o pa jakamā nhūm mē axpēn jakwa kamā ri hixi ho rē nē nhýri omu nē tanhmā hā kām àkjēr to. ¹⁷ Hāmri nhūm amnhī tā mē kuma nē mē kām:

—Ku nhūm. Inhípêxà Tirtūm na hte apkati mē tanhmā mē pahto mex to ho pa. Jakamā pa hte urāk nē ā mē ho mex rāhā ho ri ixpa anē nē aa mēmo arīgro hā ja ho anhýr kaga hkēt nē.

¹⁸ Anhýr o mē kām amnhī jarē nhūm mē kuma nē kamā gryk tỳx nē. Nom mē ō arīgromnu hā kot mē ho mexja pix mýrapē kamā gryk kēt. Māānēn Tirtūm kēp hipêxà hā harēnhja mýrapē nhūm prem kamā gryk tỳx kumrēx nē axpēn mā:

—Tk. Kwa na ā amnhī jarēnh anhýr jao te kēp Tirtūm pyrāk ā amnhī jarē. E kwa pu mē kupī ri. Anē.

Tirtüm Kra kot Hipêêxà nhÿ hã amnhĩ nhÿpêx ã harênh

Juãw 14.10-13

¹⁹ Hãmri nhÿm Jejus axte mẽ kêp Ijaew nhô pahijê mã kapêr nê mẽ kãm:

—Na pa hte amnhĩ krã hkôt tanhmã amnhĩ nhÿpêx to ho ri ixpa hkêt nê. Na pa hte Inhÿpêêxà kot tanhmã amnhĩ nhÿpêx to hã omunh xà hkôt uràk nê mẽ ho mex o ri ixpa. Kwa mẽ amnhĩ krã him ja jaxà nê kãm ajamaxpêr tÿx nê ho apa.

²⁰ —Inhÿpêêxàja kãm ijapêê. Na hte inhmã kot tanhmã mẽ ho mex to piitã ho amnhÿrît. Ixte omunh nê uràk nê ÿ hã tanhmã mẽ ho mex to ho ri ixpa kaxyw. Jakamã kot paj ãm akupÿm mẽ à xwÿnhjê ho mex pix o ri ixpa hkêt nê. Kot paj mãânênh mẽ kãm mẽmoj mex o ja jakrenh o anhÿr o ri ixpa ka mẽ hã ixpumu nê ixkamã ano puma ho apa.

²¹ —Nê Inhÿpêêxà kot akupÿm mẽ htyk xwÿnhjê ho htÿr jakamã kot paj uràk nê akupÿm mẽ htyk xwÿnhjê ho htÿr o ri ixpa. Anê.

Mê htÿr tÿm nê mẽ pa mã xwÿnhjê jarênh

Juãw 3.16-17, 3.36, 6.27, 6.40, 6.60, 10.28, 17.2-3; Rômãn 6.23; Karatas 6.8; Xitre 1.2; Wam Juãw 2.25, 5.11-13

²² Nhÿm Jejus arÿ mẽ kêp Ijaew nhô pahijê mã kapêr nê mẽ kãm:

—Koja nhÿrmã Inhÿpêêxàja mẽ htÿr tÿm nê mẽ pa ho mẽ pa mã xwÿnhjê jarênh kêt nê. Ja kaxyw na pre pa ixãm. ²³ Tã mẽ piitã mẽ kot ja hã ixpumunh nê ixtã hpijaãm o ri pa kaxyw na pre mẽ kaxyw ixãm. Te mẽ kot Inhÿpêêxà hã hpijaãmta pyrã nê pa ixtã hpijaãm o pa kaxyw. Jakamã koja mẽhõ ixtã hpijaãm kêt nê hãmri nê mãânênh Inhÿpêêxà hã hpijaãm kêt ã amnhĩ to amnhÿrît. Tãm kot mẽ awÿr inhmênh kênã. ²⁴ Jakamã koja mẽhõ ixkapêr ma nê amnhĩ kaxyw

kot mẽ awÿr inhmênh xwÿnhnta kôt hamaxpêr nê ixkôt amnhĩ xãm. Hã koja nhÿrmã htyk tã ma mẽ kot amnhĩ xà htÿx kamã hamak o pa htÿm xàta wÿr mör kêt nê. Koja Inhÿpêêxà akupÿm ho htÿr nhÿm wa ixri htÿr tÿm nê mẽ mex kumrêx nê pa ho pa. Jakamã koja mẽhõ ixkôt amnhĩ xãm hãmri nê ra kêp wa ixri htÿr tÿm nê pa ho pa mã xwÿnh. Kwa mẽ jam ajamaxpêr tÿx rãhã ho apa.

²⁵ —No mẽ kãm ixkapêr mar prãm kêt xwÿnhjaja kêp Inhÿpêêxà mẽ wa ixri mẽ htÿr tÿm nê mẽ pa mã xwÿnh kêt. Tã ixpê Tirtüm Kra jakamã koja mẽ ixkapêr ma nê ixkôt amnhĩ xunhwÿ. Hã kot paj amnhĩ tã mẽ omu nê mẽ htÿr tÿm nê mẽ pa mã xwÿnh ã mẽ harê nhÿm mẽ ãmnhÿx ri hkÿnh nê pa ho pa. Kwa mẽ jam ajamaxpêr tÿx rãhã ho apa.

²⁶ —Nê Inhÿpêêxà tãm kêp mẽ ho mẽ htÿr xwÿnh. Tã ixpê Kra jakamã na pre amnhĩ pyrã nê ja kaxyw ixãm.

²⁷ —Ra kot mẽ akaxyw ixãm jakamã na pre mãânênh ixte tanhmã mẽ ajarênh to kaxyw ixãm. Wa ixri mẽ atÿr tÿm nê apa ho apa mã xwÿnhjê hã mẽ ajarênh rÿ wa ixri mẽ atÿr tÿm nê apa hkêt mã xwÿnhjê hã mẽ ajarênh kaxyw. ²⁸⁻³⁰ Jakamã kot paj nhÿrmã ra mẽ htyk nê mẽ hikwÿ xwÿnh piitã mẽ kãm ixkapêr nhÿm mẽ inhma. Koja mẽ ixkapêr ma hãmri nê akupÿm htÿr nê pika rÿm hapôx pa. Hãmri nhÿm mẽ kot kormã htÿr ri Tirtüm kapêr kôt amnhĩ nhÿpêx hkêt xwÿnhjaja mẽ kot amnhĩ tomnuj mÿrapê ma mẽ kot amnhĩ xà htÿx kamã hamak tÿm xàta wÿr ma hapêx pa. Nom nhÿm mẽ kot amnhĩ to mẽ xwÿnhjaja. Ra mẽ kot Tirtüm kôt amnhĩ nhÿpêx jakamã koja mẽ ma Tirtüm mẽ wa ixwÿr api nê wa ixri mẽ nê hkÿnh rãhã htÿr tÿm nê pa ho pa.

—Kot paj ja kaxyw tanhmā mē apiitā mē ajarēnh to. Nom kot paj amnhī krā hkôt inhmā hprām xā hkôt tanhmā mē ajarēnh to hkêt nē. Kot paj Inhīpêêxā kot mē awÿr inhmēnh xwÿnhnta nhÿ hā àhpumunh tÿx xā hkôt tanhmā mē ajarēnh to. Jao ām hāmri mē ajarē. Kwa mē jam ajamaxpēr tÿx nē. No ā ixte mē amā amnhī jarēnh anhÿrja ma nē tee ri ajamaxpēr kêt nē. Anē.

Mē kot Jejus kēp Tirtūm Kra hā harēnh xwÿnhjê jarēnh

Juāw 8.18; Wam Juāw 5.6-8

³¹ Nhūm Jejus arī mē kēp Ijaew nhō pahijē mā kapēr nē mē kām:

—E na pa ra tanhmā mē amā amnhī jarēnh to. Nom kop ām papxipix ixte ā amnhī jarēnh anhÿr ronhÿx ka mē inhma nē ajamaxpēr o: “Ko. Na apu ām hāmri ā mē inhmā amnhī jarēnh anē rÿ apu ām amnhī to hêx.” Anhÿr o ajamaxpēr. ³² Nom papxipix na pa hte ā amnhī jarēnh anhÿr kêt nē. Inhīpêêxā haxwÿja na hte ā ijarēnh anē. Nē ām hāmri na hte tanhmā ijarēnh to ho pa. Tirtūmja hêx kêt. ³³ No mē amā pika nhō xwÿnhjê pix kapēr mar prām jakamā na ka prem finat Juāw Paxisja wÿr akwÿjê rē nhūm mē ma hwÿr mra nē ixtā hukukja nhūm mē kām tanhmā ijarēnh to. Nē hprī hā mē kām ijarē. ³⁴ No mē apē pika nhō xwÿnhjaja mē ate axpēn mā tanhmā ijarēnh toja na ixpê tanhmā kute hkêt. Kojā mēhō tanhmā ixto kapēr punuj to rÿ tanhmā ijarēnh mex to pa amnhī jarēnh ma nē tee ri amnhī kukamā ijamaxpēr o ixkaprī hkêt nē. Tā nom Juāw Paxis kapērja mē amā mex jakamā na pa ā mē amā harēnh anē. Ka mē ra kot tanhmā ijarēnh toja ma nē amnhī kaxyw ixkôt ajamaxpēr nē ixkôt amnhī xunhwÿ nē nhÿrmā ty nē ma mē kot amnhī xā htÿx kamā hamak tūm xāta wÿr apa hkêt nē.

³⁵ —Juāw Paxis na pre te kanē hpôk mex nē mēmoj to amnhīrīt mex pyrā nē mē amā Tirtūm kapēr o amnhīrīt mex o pa. Ka prem te maripôtre kot kanē hā htu pyrā nē hwÿr akuprō nē mar o akuhē. Nom hkôt ajamaxpēr tÿx kêt nē. ³⁶ Na pre hprī hā mē amā ijarēnh o ri pa.

—Tā pa pam mē awÿr wrÿ nē Inhīpêêxā nhÿ hā mē akamā aa mē ate mēmoj pumunh kêt kwÿ ho anhÿr o ri ixpa. Mē ate ja hā ixpumunh nē Inhīpêêxā tām kot mē awÿr inhmēnh kôt ixpumunh kaxyw.

³⁷ —Nē Inhīpêêxāja määnēn ixpê Kra hā mē amā ixto amnhīrīt. Ra mē anhōpinh xā kaxwÿnh kām kot mē amā ixto amnhīrīt tā ka mē ama nē ām ama nē ixkôt ajamaxpēr kêt nē. ³⁸ Mē amā mē ate hkôt amnhī nhīpêx o apa hprām kêt. Mē ate kapēr mar tÿx ronhÿx ka mē ixkapēr ma nē amnhī kaxyw ixkôt ajamaxpēr kurê kumrêx. Ixpê Tirtūm kot mē awÿr inhmēnh xwÿnh kēnā.

³⁹ —Nē Tirtūm kapēr ā kagā htūm haxwÿja kot tanhmā ijarēnh to. Ka htem wa ixri atīr tūm nē apa ho apa hprām xāj kamā harēnh rāhā ho ri apa. Nē kot tanhmā pa ijarēnh to htā ka mē ixkapēr ma nē amnhī kaxyw ixkôt ajamaxpēr kêt nē. Anē.

Ijaew nhō pahijaja kot Jejus kaga hā mē harēnh

⁴⁰ Nhūm Jejus arī mē kēp Ijaew nhō pahijē mā kapēr nē mē kām:

—Nē pa na ixte Inhīpêêxā mē wa ixri ixte mē ho mē htīr tūm nē mē pa mā xwÿnh ā mē harēnh tā ka mē amnhī kaxyw ixkôt ajamaxpēr kêt nē. ⁴¹ Nom mē ate inhmex ā ijarēnh kêt tā ja ixpê tanhmā kute hkêt. Ām Inhīpêêxā pix kot inhmex ā ijarēnhja na inhmā hprām. ⁴² Ra ixte mē apumunh mex. Mē amā Tirtūm kīnh kêt. ⁴³ Tām kot mē awÿr inhmēnh tā ka mē ixpumu nē ixk-aga nē ixkôt amnhī nhīpêx kêt nē.

Nom koja mēhō amnhī krā hkôt mē awȳr tē nē tanhmā mē ajahkre hto ka mē ama nē hkôt amnhī nhīpēx kurē kumrēx.

⁴⁴—Ām pika nhō xwýnh pixjaja kot mē amex ā mē ajarēnhja na mē amā hprām. No Tirtūm kot amnhīm mē amex ā mē ajarēnhja mē amā hprām ā mē ate amnhī jarēnh tā mē amā ja prām kêt. Jakamā na ka htem ixkaga kumrēx. ⁴⁵⁻⁴⁶ Tā nom kot paj pam nhỹrmā Tirtūm mā mē apē ixkwý hkêt ā mē ajarēnh kêt nē. Mo kaxyw kot pa kêt ri ā kām mē ajarēnh anē? Finat Mojes tām koja ja hā kām mē ajarē. Na ka htem tanhmā ajamaxpēr to nē ajamaxpēr o: “Kot paj finat Mojes kot mē inhmā tanhmā kapēr to hkôt amnhī nhīpēx o ri ixpa hāmri nē nhỹrmā Tirtūm ri ixtīr tūm nē inhmex nē ixpa ho ixpa.” Anhỹr o ajamaxpēr nom hkôt amnhī nhīpēx kêt nē. Mojes na pre hte pa ijarēnh o pa. Tā mē ate kapēr kôt amnhī nhīpēx ronhỹx ka mē amnhī kaxyw ixkôt ajamaxpēr nē ixkôt amnhī xunhwý. No mē ate ixkaga jakamā koja Mojes tām Tirtūm mā mē apē ixkwý hkêt ā mē ajarē. ⁴⁷ Mē ate Mojes kapēr kôt amnhī nhīpēx kêt jakamā kot kaj mē mǎānēn ixkôt amnhī nhīpēx hkêt nē. Anē.

Nhūm pre ā Jejus Ijaew nhō pahijē mā kapēr anē.

6

Jejus kot mē ho 5.000 nē mē kām mē ō hā harēnh

Matēwre 14.13-21; Makre 6.30-44; Rukre 9.10-17

¹⁻⁴ Tā nhūm ra arīgro pē Pas ahtēp o mō. Pasja ā mē ixpē Ijaewjaja na pa htem axpēn wýr akuprō nē hā ōwēhti hkra nyw kwý pa nē ī hkur o ixkrī. Amnepēm Tirtūm kot pika pē Ejit rūm mē inhīgētjē kator kaxyw nhūm prem nojarēt nē ā hkwý hpar nē ī hkur anē. Tā arī mē ixpē mē hkanrēhā mē htāmnhwýjaja jam ijamaxpēr pē

ixkīnh kaxyw ā amnhī nhīpēx anē. Jakamā nhūm Jejus pàr krem axà nē ma himō pē Garirej ā rēr kaxyw ma xarmā mō nē rē. Himōja nhīxi hō pē na Tipe nhūm hā xarmā mō nē rē. Pa mē hkôt ixpa ho ixpa xwýnhjaja ma hkôt ixpa.

Hāmri nhūm pika nhō xwýnh kwýjaja Jejus ma mōr kām omu hāmri nē ma gō kape hā pikap mē inhīhkrep mra. Na pre ra Jejus mē kamā mē à xwýnhjē ohtō nē akupým mē ho mex nhūm mē axte omu hāmri nē ma mē inhīhkrep gō mý ri hpar o pa.

Tā pa mē xarmā rē nē pàr rūm ijapōj nē gō mý ri kýxpē ixkrī hpa.

⁵ Hāmri nhūm mē inhīhkrep mē mrar xwýnhjaja mē ixwýr hpōx o mra nhūm Jejus amnhī wýr mē omu nē mē inhīō pē Firipti mā kapēr nē kām:

—Kwa Firip. Mēmoj kot puj mē pahwýr mē mōr nējje mā ho anē nhūm mē kuku? Tanhmā kot puj mē amnhī to nē nhỹri mē kām mēmoj japrō nhūm mē kuku? Anē.

⁶ Ra tām kot tanhmā mē kām ō hto hā amnhī pumunh mex tā ā mē hā Firipti kamā hamak kaxyw mē hā hkukjēr anē. ⁷ Hāmri nhūm kuma nē tee ri mē hkukamā hamaxpēr nē kām:

—Konēn. Mē ohtō rax kumrēx kēnā. Mo mē kaxyw mē pakāxpore rax? Kot pu mē pakāxpore ho 200 nē ho mē kām mēmoj japrōr tā nhūm mē ām ho hkryre nē kuku nē ho ōhy htu hkêt nē. Mē ohtō rax o mē ohtō rax kēnā. Anē.

⁸⁻⁹ Hāmri nhūm mē inhīōja kuma nē Jejus wýr tē nē kām kapēr. Simāw Pētre htō Andreja hwýr tē nē kām:

—E ota mēhō hkrata amnhī kôt ō hkwý ho mō. No ām grire. Na pāwti kēp 5 nē kaxyw ō tep axkrutre. No mē ohtō gri ā kot kêt mē hipēx pa. Anē.

¹⁰ Hāmri nhūm kuma nē hkôt mē ixpa ho mē ixpa xwýnhjē mā kapēr nē mē inhmā:

—Tôe. Nà hāmri. E mẽ kām anê kêm mẽ hkrĩ pa. Anê.

Hāmri pa mẽ kām anê nhũm mẽ pò kamā hkrĩ hpa. Na prem ohtô kumrêx. Memyjê pixjaja kêp 5.000. Nê kaxyw mẽ hprô nê mẽ hkrajaja. Na prem ohtô ho ohtô. Tã piitã hkrĩ pa. ¹¹⁻¹² Hāmri nhũm Jejus mẽhõ hkrata pê õ pãwti jamy nê o xa nê Tĩrtũm mã harê nê kãm:

—Pa Papaj. Na ka hte mẽ inhmã mẽ inhõ ho apa. Âm kapxipix amex o amex. Anê.

Hāmri nê mẽ inhmã pãwtija gõ pa mẽ ô ri mẽ hkrĩ xwýnhjê mã õr o mra nê ho mẽ piitã mẽ hipêx pa. Pãwtija âm hkryre htã nhũm Jejus tanhmã ho nhũm ra ohtô rax kumrêx. Jakamã pa mẽ ô ri mẽ kãm õr o mra nê ho mẽ piitã mẽ hipêx pa. Nhũm Jejus hpãnhã tep axkrutreta py nê mã ho anê nê Tĩrtũm mã harê hāmri nê amnhĩ xô ri mẽ inhmã kugõ pa mẽ mã ho anê nê. Te ho pãwti nhĩpêx pyrà nê ho mẽ piitã mẽ hipêx. Hāmri pa mẽ ixpiitã apku nê inhõhy htu nhũm arĩ mẽõ jakrêx kwý hprã. Hāmri nhũm Jejus mẽ inhmã:

—E kwa mẽ hkõt mra nê mẽõ jakrêx o akuprõ kê omnu hkêt nê. Anê.

¹³ Hāmri pa mẽ kuma nê ho akuprõ nê kawà o 12 nê ho nýt. Pãwti hkryreja âm kêp 5 pix tã nhũm Jejus tanhmã ho nhũm rũnh kumrêx. Jakamã pa mẽ hakrêx prãr o kawà ho 12 nê ho nýt pa. ¹⁴ Hāmri nhũm mẽ inhĩhkrep mẽ mõr xwýnhjaja amnhĩ jaer pê Jejus kot mẽ kãm mẽõ ho rax ã omu nê ri axpên mã harênh o:

—Kokýy. Tãm mãn pre finat Mojesja amnepêm mẽ panhĩgêjtê mã harênh o ri pa. Tã ra mẽ pahwýr wrý nà? ¹⁵ Kwa pu mẽ kãm pakapêr kãm paxihtýx nê ma akupým amnhĩ kõt o mõ nê amnhĩ kaxyw âm kê mẽ pahto amnhĩptãr o pa. Anê.

Hāmri nhũm Jejus amnhĩ tã mẽ kapêr ma nhũm ja kêp omnuj nê. Jakamã nhũm mẽ kêp kato nê ma hpãnhã ahte nhýri hixêt õ hwýr tẽ.

Jejus kot gõ krãhkã hã htêm ã harênh

Matêwre 14.22-27; Makre 6.45-52

¹⁶ Tã nhũm ra kamãtre pa mẽ Jejus kõt ri ixpa ho ixpa xwýnhjaja ma akupým himô hwýr mra. ¹⁷ Nhũm kormã Jejus mẽ ixwýr akupýn htêm kêt jakamã pa mẽ tee ri kamã ama hāmri nê akupým pãr mã axà nê ma akupým Kapanau hwýr xarmã ixrêr o mõ.

¹⁸ Pu nhũm ra kòk àpêr týt nhũm gõ xatã kãnhmã harĩ nê axpên wýr mra nê axpên tak týt nê. ¹⁹ Pa mẽ kormã gõ nhĩpòk ri mõ. Nê tee ri rrêmti ho gõ rênh nhĩpêx kapry nom kormã ixrêr kêt nê. Nê kormã inhmõr o ixtã 5 kirõm pix nê. Hāmri nhũm ra Jejus gõ krãhkã hã hpar o mẽ ixkõt tẽ. Pa mẽ ixprĩ hã amnhĩ wýr omunh mex kêt nê ixtýt mẽkarõ hã hkamnhix nê mẽ inhmã uma htýx kumrêx. ²⁰ Tã nhũm mẽ inhmã ixkapêr nê mẽ inhmã:

—Tk. Kwa mẽ amã ma hkêt nê. Pa na pa mẽ akõt tẽ. Anê.

²¹ Hāmri pa mẽ kapêr ma mẽ ixkĩnh nê. Nê amnhĩ wýr pãr kre hwýr ho api nhũm axà pa mẽ xarmã ixrêr kurê kumrêx nê pãr kre rùm ijapõx pa.

Mẽ kot Jejus japêr mra ã mẽ harênh

²² Tã nhũm apkati nhũm xarpê mẽ kot Jejus wýr mra nhũm kot mẽ kãm õ xwýnhjaja tee ri hapêr o pa nê axpên mã:

—Kwa nhýhým mãn pre we tẽe? Na pre hkõt ri mẽ pa xwýnhjaja pix mẽ õ pãr kãm ma akupým xarmã mõ nom nhũm Jejusja mẽ hkõt htêm kêt nê. Nà mãn kormã jar nhýhým ri mra jakamã pu mẽ kormã omunh kêt nê. Anê.

²³ Rõm nhũm Tĩpe rùm pãr kwýja mẽ hwýr pøj. Jejus kot mẽ apkur xà ho Tĩrtũm wýr nê mẽ kãm ho

rax xà hã pikata wÿr nhùm mōn pōj. ²⁴ Hãmri nhùm mē amnhĩ wÿr omu nē tee ri pàr kãm Jejus mē hkôt mē ixpa ho mē ixpa xwÿnhjê japêr hãmri nē axpên mã:

—E kwa pu mē ma mē hkôt xarmã mō nē Kapanaũ kamã mē hapêr. Anê.

Hãmri nē mē kãm amnhĩ jarê nē mē ò pàr kwÿ hwÿr agiê nē ma mē hkôt xarmã mōn rê. ²⁵ Hãmri nē ra mē ixwÿr rê nē mē ixkôt pōj nē mē ixkaêx ã Jejus pumu nē hwÿr mra nē kãm:

—Pa mē ijahkre xwÿnh. Kwa na pa prem tee ri xarpê ajapêr hãmri nē man akôt mōn rê. Kwa tanhmã na ka pre we amnhĩ to nē man tēn rê? Anê.

²⁶ Hãmri nhùm mē kãm:

—Nà mēmo kaxyw na ka wem ri ijapêr o ri ixkôt apa? ãm jãã mē ate ixkutã axàpkur nē anhōhy htu jakamã na ka mē axte ixkutã axàpkur pix kaxyw ijapêr o ri apa. No ixte ã mē amã amnhĩ nhĩpêx anhÿr ã ixpumu nē ixpê Tirtũm Kra hã ixkôt ajamaxpêr kêt nē. Kwa mē ixpê Kra hã inhmã ajamaxpêr tÿx nē kêt wehe. Anê.

Jejus te kêp kaxkwa rũm mē paxàpkur xà maati pyrãk ã kot amnhĩ jarênh

²⁷ Nhùm Jejus arĩ hwÿr mē mrar xwÿnhjê mã kapêr nē mē kãm:

—Kwa kêr ka mē ri axàpkur xà pix kukamã ajamaxpêr o ri apa hkêt nē. Na htem mē apkur xà kukwak ri Tirtũm mē wa ixri htĩr tũm nē pa ho pa hkêt nē. No kot kaj mē amnhĩ kaxyw pa ixkôt ajamaxpêr nē ixkôt amnhĩ xunhwÿ. Hã kot kaj mē ixkukwak ri nhÿrmã atĩr tũm nē wa ixri amex nē apa ho apa. Te ixpê mē kot mē apkur xà hkur nē ÿ hã htĩr tũm nē pa ho pa xwÿnh pyrãk. Ja kaxyw na pre Inhĩpêêxà Tirtũm mē awÿr paxipix inhmê pa mē awÿr wrÿ. Anê.

²⁸ Hãmri nhùm mē kuma nē kãm:

—Kwa tanhmã kot paj wem amnhĩ nhĩpêx to nhùm Tirtũm hã mē ixpumu nē mē ixto mex nē? Anê.

²⁹ Hãmri nhùm mē kuma nē axte mē kãm amnhĩ jarê nē mē kãm:

—Nà kot kaj mē amnhĩ kaxyw pa Tirtũm kot mē awÿr inhmēnh xwÿnh kôt ajamaxpêr hãmri nhùm ixtã mē apumu nē tanhmã mē akra hto ka mē ajamakêtkati nē axãmnhix akĩnh nē tanhmã amnhĩ nhĩpêx to ho ri apa. Anê.

³⁰ Hãmri nhùm mē kuma nē kãm:

—Tõe. Kwa axte mē inhmã aa mē ixte mēmoj pumunh kêt ò ho anê. Pa mē ja hã apumu nē amnhĩ kaxyw akôt ijamaxpêr kurê kumrêx. E mēmo kot ka mē inhmã ho anê? Kwa tokyx mē inhmã axte mēmoj tanhmã ho pa mē omu.

³¹ Amnepêm finat Mojes pyrã kot kapôt ã mē panhĩgêtjê ho pa ri na pre hte apkati mē mē kãm mēo mē kot kãm “manã” anhÿr xwÿnhhta gō nhùm pre htem hkur o pa. Tirtũm kapêr ã kagã htũm kot ja jarênh kot: Na pre kaxkwa rũm mē hwÿr mē apkur xà rê nhùm mē hkur o pa.

Anhÿr o kot harênh. Tã kot kaj Mojes nē apkati mē mē inhmã mē inhō ho ri apa pa mē ja hã apumu nē rĩ kormã amnhĩ kaxyw akôt ijamaxpêr japêr. Anê.

³² Hãmri nhùm mē kãm:

—Xà Mojes na pre hte mē kãm kaxkwa rũm mē apkur xà rēnh o pa? Nà tãm kêt. Inhĩpêêxà na pre hte mē hwÿr kurê nhùm mē hkawrà nē kuku nē kukwak ri hihtÿx nē htĩr nē pa. Tã nhùm ra mē awÿr hpãnhã pa ixpê Kra hã inhmê. Kwa mē ixkapêr ma nē amnhĩkrãm haxàr tÿx nē. ³³ Na pre Tirtũm inhĩpêx o te amnepêm kot mē hwÿr kaxkwa rũm mē apkur xà rēnhhta pyrã nē amnê pika hwÿr inhmê. Jakamã te ixpê kaxkwa rũm mē apkur xà maati wrÿk xwÿnhhta pyrãk. Mē ate amnhĩ kaxyw ixkôt ajamaxpêr nē ixkôt amnhĩ xunhwÿr

hãmri nê ixkukwak ri wa ixri atír tùm nê apa ho apa kaxyw. Anê.

³⁴ Nhùm pre â Jejus mẽ kãm amnhĩ jarênh anê nhùm mẽ kuma nom hprĩ hã mar mex kêt nê. Âm htỳx ho axtem mẽ apkur xà mex pix ã harênh ã hkamnhĩx nê kãm:

—Kwa tô mẽ inhmã mẽ apkur xà maatita kwỳ gõ pa mẽ apkati mẽ hkur o ri ixpa. Anê.

³⁵ Hãmri nhùm mẽ kuma nê amnhĩ tã mẽ kãm:

—Nà mẽ apkur xà kumrêxja âm paa. Te ixpê mẽ apkur xà maati pyræk. Jakamã kot kaj mẽ atõ amnhĩ kaxyw ixkõt ajamaxpêr nê ixkõt amnhĩ nhĩpêx o apa hã kot kaj mẽ akĩnh nê apa. Te ra axàpkur nê anhõhy htu nê akĩnh o ri apa pyræk. Jao amnhĩ tã ixpumu nê akĩnh nê ajamakêtkati nê ri apa.

³⁶ —Ra mẽ ate ixpumunh mex tã kormã amnhĩ kaxyw ixkõt ajamaxpêr kêt nê. Kwa mẽ ixkapêr ma nê amnhĩ krãm haxàr tỳx nê. ³⁷ Tirtùm kot inhmã mẽ õr mã xwỳnhjaja koja mẽ ixpumu nê amnhĩ kaxyw ixkõt hamaxpêr mex kurê kumrêx. Âm mẽ kot amnhĩ nhĩpêx anhỳr xwỳnhjaja kot paj aa amnhĩ nê mẽ hanor kêt nê.

³⁸ —Nê ixte amnhĩ krã hkõt kaxkwa rùm ixwryk nê inhmã hprãm xà hkõt tanhmã amnhĩ nhĩpêx to ho ixpa kaxyw na pa pre ixwryk kêt nê. Inhĩpêxà kot mẽ awỳr inhmênh jakamã kãm hprãm xà hkõt pix mã na pa hte tanhmã amnhĩ nhĩpêx to ho ri ixpa.

³⁹ —Tã mo na hte Inhĩpêxà kãm hprãm? Nà kot inhmã mẽ õr mã xwỳnh piitã nhỹrmã wa ixkuri htír tùm nê mex nê pa ho paja na kãm hprãm. Jakamã nhỹrmã akupỳm mẽ htír ã arĩgrota ã ixte akupỳm mẽ ho htír nhùm ixte âm pixire nê ho ixpikunor kêtja na kãm hprãm.

⁴⁰ —Tã kot ka mẽ atõ ixpê Tirtùm Kra hã ixpumu nê amnhĩ kaxyw ixkõt ajamaxpêr nê ixkõt amnhĩ xãm. Hã kot kaj nhỹrmã atyk tã

pa akupỳm mẽ atír xà hã arĩgrota ã akupỳm ato atír ka wa ixkuri atír tùm nê amex nê apa ho apa. Ja na Inhĩpêxàja kãm hprãm. Anê.

Nhùm pre â Jejus mẽ kãm amnhĩ jarênh anê. ⁴¹ Hãmri nhùm Ijaew nhõ pahijaja mẽ kuri mar o kuhê nê tee ri kêp kaxkwa rùm mẽ apkur xà maati pyræk ã amnhĩ jarênh ma nhùm ja mẽ kãm mex kêt nhùm mẽ kamã gryk nê. ⁴² Jakamã axpên mã ri harênh o:

—Tk. Kwa mo na ri ã amnhĩ jarênh anê? Kêp mẽ panhĩõ kênã kot kêt ri kêp kaxkwa nhõ xwỳnh ã amnhĩ jarê. Kêp Juje mẽ Marir wa hkra na. Mẽ pahte katorxà mẽ hipêêxà wa omunh mex kênã kot kêt axtem nê kêp kaxkwa nhõ xwỳnh ã amnhĩ jarê. Anê.

⁴³ Hãmri nhùm amnhĩ tã mẽ kuma nê mẽ kãm:

—Kwa mẽ ã ijarênh anhỳr kêt nê. ⁴⁴ Koja Inhĩpêxà kot mẽ awỳr inhmênh xwỳnhhta tanhmã mẽ hkrã hto nhùm mẽ rĩ kormã amnhĩ tã ja hã ixpumu nê amnhĩ kaxyw ixkõt hamaxpêr. Tã ã mẽ kot amnhĩ nhĩpêx anhỳr xwỳnhjaja koja mẽ nhỹrmã htyk tã pa akupỳm mẽ ho mẽ htír nhùm mẽ wa ixri htír tùm nê mex kumrêx nê pa ho pa.

⁴⁵ —Amnepêm Tirtùm kapêr jarênh o mẽ pa xwỳnhjaja na prem ã ja jarênh anhỳr o:

Koja Tirtùm mẽ hkrã kaxwỳnh kãm tanhmã mẽ kãm kapêr o amnhĩrit to ho pa.

Anhỳr o harênh. Jakamã mẽ kot Tirtùm kapêr mar nê hkõt amnhĩ nhĩpêx xwỳnhjaja koja mẽ mãânên amnhĩ kaxyw pa ixkõt hamaxpêr nê ixkõt ri amnhĩ nhĩpêx o pa.

⁴⁶ —Nê mẽ apê pika nhõ xwỳnhjê hõ aa mẽ ate ixkĩnhã ano ho Inhĩpêxà pumunh kêt. Âm papxipix na ixte omunh. Kurùm na pa pre mẽ awỳr wrỳ. ⁴⁷ Tã kot ka mẽ atõ amnhĩ kaxyw ixkõt ajamaxpêr. Hã kot kaj nhỹrmã wa ixkuri atír tùm nê amex nê apa ho

apa. Kwa mẽ jam ajamaxpēr tỳx nē.

⁴⁸—Nē ixpê mẽ axàpkurxà maati jakamā pa na ixpê akupỹm mẽ ho mẽ htĩr xwỹnh. ⁴⁹ Amnepêm mẽ panhĩgêtjaja kormā kapôt ā mẽ pa ri mẽ kot “manā” anhỹr xwỹnh ta kur o ri pata ā na prem kukwak ri htĩr tũm nē pa ho pa hkêt nē. Na prem ri pa nē gaa nē rĩ hpigêt nē htyk pa. ⁵⁰ Axtem kaxkwa rũm mẽ apkur xà maati jarēnh xwỹnh ta pix kukwak ri na htem nhỹrmā htyk tã akupỹm htĩr nē wa ixri htĩr tũm nē mex nē pa ho pa. ⁵¹ Ām paa. Pa na htem inhĩ hkwy hkrē hāmri nē wa ixri htĩr tũm nē mex nē pa ho pa. Na pa pre ra amnhĩ grõnh kôt mẽ awỹr wrỹ. Jakamā ka mẽ atõ inhĩ hkwy hkrē hāmri nē nhỹrmā atyk tã pa akupỹm ato atĩr ka Tĩrtũm mẽ wa ixri atĩr tũm nē amex nē apa ho apa. Anē.

⁵² Nhũm pre ā Jejus Ijaew mǎ amnhĩ jarēnh anē. No ām mẽ kām amnhĩ tã kuxi nē amnhĩ jarē. Jakamā nhũm mẽ tee ri kuma hāmri nē tanhmā hā axpēn mǎ kapēr to. Mē kot hprĩ hā mar kêt nē ām mẽ kot ĩ hkwy hkrērja pix jarēnh mar jakamā tee ri hamaxpēr nē axpēn mǎ:

—Kwa tanhmā kot kêt we amnhĩ to nē mẽ pamā amnhĩ nhĩ hkwy gō pu mẽ kuku? Anē.

⁵³⁻⁵⁴ Hāmri nhũm amnhĩ tã mẽ kuma nē mẽ kām:

—Nà mẽ kot inhĩ hkwy hkrēr nē ixkamrō hkwy ho hkõm xwỹnh pixjaja koja mẽ nhỹrmā Tĩrtũm mẽ wa ixri htĩr tũm nē pa ho pa. Ixte akupỹm mẽ ho mẽ htĩr xà hā arĩgrota ā kot paj mẽ ho mẽ htĩr nhũm mẽ wa ixri htĩr tũm nē mex nē pa ho pa. No kot kaj mẽ inhĩ hkwy hkrēr kêt nē ixkamrō hkwy ho akõm kêt hāmri nē wa ixri atĩr tũm nē amex nē apa ho apa hkêt nē. Kwa mẽ jam ajamaxpēr tỳx rāhā nē. ⁵⁵ Kêt inhĩja kēp mẽ apkur xà maati na. Nē ixkamrōja kēp mẽ

hkõm xà maati na. Jakamā na htem inhĩ hkwy hkrē nē ixkamrō hkwy ho ixkõ nē ra kēp wa ixri mẽ htĩr tũm nē mẽ pa ho mẽ pa mǎ xwỹnh. ⁵⁶ Jakamā kot ka mẽ atõ inhĩ hkwy hkrē nē ixkamrō hkwy ho ixkõ. Hāmri pa amnhĩ tã apumu nē akarõ mǎ axà ka te apē pa pyrāk o amnhĩ nhĩpēx o apa. ⁵⁷ Inhĩpēxà kot mẽ awỹr inhmēnh xwỹnh ta kukwak ri na pa hte ixĩr tũm nē ixpa ho ixpa. Tã ja pyrā nē kot kaj mẽ inhĩ hkwy hkrē hāmri nē ixkukwak ri wa ixri atĩr tũm nē apa ho apa mǎ xwỹnh.

⁵⁸—Jakamā na pa ā mẽ amā ixpē kaxkwa rũm mẽ axàpkur xà maati hā amnhĩ jarēnh anē. Amnepêm mẽ panhĩgêtjaja na pre htem kapôt ā mẽõta kur o pa hāmri nē gaa nē hpigêt nē htyk pa. No kêt pa koja mẽ inhĩ hkwy hkrē hāmri nē mẽ kurom wa ixri htĩr tũm nē mex nē pa ho pa. Anē.

⁵⁹ Nhũm pre ā Jejus mẽ kām amnhĩ jarēnh anē. Kormā Kapanau kamā Tĩrtũm kapēr o mẽ ahkre xà hā ixkre kamā ā mẽ ahkre anhỹr o xa.

Mē ohtõ nē mẽ kot Jejus kaga hā mẽ harēnh

Sikũn Korĩt 3.6; Sikũn Pētre 3.16

⁶⁰ Hāmri nhũm mẽ kot Jejus kôt mar o mẽ pa xwỹnhjaja ohtõ nē ā kapēr anhỹrja ma nē tee ri amnhĩ kukamā hamaxpēr nē hā axpēn mǎ:

—Tk. Kwa pēr kapērja ām ri katii. Mēhõ koja we kuma nē hkõt hamaxpēr nē hkamrō nē ĩ kur o ri hkõt pa? Nà mẽ piitā mẽ kām ja mexti hā. Anē.

⁶¹ Hāmri nhũm amnhĩ tã mẽ kuma nē mẽ kām:

—Kwa xà ixkapērja mẽ apē omnuj? ⁶² Nà kot paj nhỹrmā ma akupỹm kaxkwa hwỹr api. Ixpē Tĩrtũm kot mẽ akaxyw ixām xwỹnh ā ma akupỹm hwỹr api. Hāmri ka mẽ ā ixte amnhĩ nhĩpēx anhỹr ā ixpumu nē rĩ kormā ixkõt amnhĩ xunhwỹr japēr. ⁶³ Na htem mẽmoj

kur kukwak ri kêp Tirtùm mē wa ixri htír tùm nē pa ho pa xwýnh kêt nē. Rý amnhī krā hkôt tanhmā amnhī nhīpêx to ho kêp wa ixri htír tùm nē pa ho pa mā xwýnh kêt nē. Tirtùm mē wa Ixkarō tām na hte mē hkarō mā agjē nē mē ho Tirtùm wa ixkuri mē htír tùm nē mē pa ho mē pa mā xwýnh. Tā y hā na pa ā mē amā ixkapēr anē. Nom mē amā amnhī tā kuxi nē amnhī jarē. Tā kot kaj mē ixkapēr ma nē ixkôt amnhī nhīpêx. Hā kot kaj mē nhýrmā wa ixri atír tùm nē amex nē apa ho apa. ⁶⁴⁻⁶⁵ No mē akwýjaja na ka mē ixkapēr ma nē am ama nē ixkôt ajamaxpēr kêt nē. Jakamā na pa ā mē amā ixkapēr anē nē mē amā: “Koja Inhīpêxāja tanhmā mē akrā hto ka mē rī kormā amnhī tā xpumu nē amnhī kaxyw ixkôt ajamaxpēr.” Anhýr o mē amā ixkapēr. Anē.

Nhũm ā Jejus mē kām kapēr anē. Ra kot mē hkukamā mē omunh mex. Ra kot amnhī kaxyw mē kot hkôt hamaxpēr mā xwýnhjē pumunh nē määnēn mē kamā kot mēō pahi nhīhkram haxàr mā xwýnhja nhũm määnēn ra kot amnhī kukamā omunh mex. Jakamā nhũm ā mē kām kapēr anē. ⁶⁶ Hāmri nhũm mē kot hkôt kapēr mar o mē pa xwýnh kwýjaja tee ri kuma hāmri nē hkaga nē axte hkôt pa hkêt nē. ⁶⁷ Hāmri nhũm tee ri mē kot hkaga nē ma mē mrar ā mē omu nē mē ixpê hkôt ixpa ho ixpa xwýnh pē 12jē mā kapēr nē mē inhmā:

—Pa? No mē kajaja. Xà kot kaj mē uràk nē ixkaga nē ma akupým mra nà? Anē.

⁶⁸ Hāmri nhũm Simāw Pêtre kām:

—Nà kot paj mē akaga hkêt nē. Kapxipix na htem amnhī kaxyw akôt hamaxpēr jao kêp Tirtùm mē war akuri htír tùm nē pa ho pa mā xwýnh. ⁶⁹ Ka na pre Tirtùm mē ixwýr amē. Jakamā na pa mē amnhī kaxyw akôt ijamaxpēr o ri

ixpa. Nà kot paj mē aa akaga hkêt nē. Anē.

⁷⁰ Hāmri nhũm kuma nē kām:

—Nà ixte amnhī kaxyw mē apē 12jē rēnh tā na ka mē atō akwýjē hkīnhā axtem nē Satanasti hkôt amnhī xām. Anē.

⁷¹ Nhũm pre ā finat Jut Kariot kot mē inhō pahijē nhīhkram haxàrja kukamā mē inhmā harēnh anē. Mē inhī ō na pre. Nē kêp Simāw Kariot kra na pre. Tā ra kot mē ĩhkram haxàr kaxyw nhũm Jejus kot amnhī kukamā omunh jakamā ā mē inhmā harēnh anē.

7

Jejus tōjaja kot mē hkīnh wýr amnhī kôt hwýr ā mē harēnh

Matêwre 10.36, 13.57-58

¹ Tā nhũm Jejus arī Garirej kamā ri pa nē kormā akupým Jutej wýr mōr kêt nē. Jutej kamā Ijaew nhō pahijaja ra kot hā amnēnh nhũm mē kot hpír ā harēnh jakamā nhũm mē umaj kormā hwýr mōr kêt nē.

² Tā mē ixpê Ijaew mē ixte ixkre hkryre nhīpêx nē hā ixkīnh ā arīgroja ra ahtêp o mō. Mē ixkīnhā ā na pa pre htem xpiitā Jutej wýr axpēn wýr akuprō nē ahpýnhā ri amnhĩm ixkre hkryre nhīpêx nē kamā ixkrī. ³ Jakamā nhũm Jejus tōjaja hwýr mra nē kām nojarêt nē amnhī kôt kuwý nē kām:

—E kwa tokyx pu mē pahkwýjē hkôt. Ka mē kām aa mē kot mēmoj pumunh kêt kwý ho anhýr o ri mē hkôt apa kê mē kām akapēr mar prām xwýnhjaja ja hā apumu. ⁴ Na ka hte jar te apimxur pyrāk o amnhī nhīpêx. E kwa tokyx ma pu mē hkôt. Anē.

⁵ Katorxā hkôt mē kêp Jejus tō htā kormā amnhī kaxyw hkôt hamaxpēr kêt jakamā na prem ā kām kapēr anē. ⁶ Hāmri nhũm mē kām:

—Nà kormā. Kormā ixte mē kām amnhī to amnhīrit xā hā arīgro kormā kator kêt. Jakamā kot ka mē amā mē hkôt amrar prām nē māmri

ma mē hkôt mra. ⁷ Koja mē apumu nē kām mē akurē hkêt nē. Nē mē akamā gryk kêt ka mē ri tanhmā amnhī nhîpêx to ho mē hkôt apa. No pa kot paj mē hwÿr mō nē mē kām mē kot amnhī tomnuj o pa hā mē harēnh o ri mē hkôt ixpa nhūm mē tee ri amnhī tā inhma nē ixkamā gryk nē. ⁸ Jakamā mē māmri ma mē hkôt mō. Kot paj kormā. Kormā ixte mē kām amnhī to amnhīrit xā hā arīgroja kormā kator kêt.

⁹ Anē nhūm mē tee ri kuma hāmri nē kure nē ma mē hkwÿjê hkôt Jutej wÿr mō. Nhūm Jejus kormā Garirej kamā ri pa hā apkati grēre. ¹⁰ Hāmri nē kormā ma hapu hā mē hkôt mō. Pa mē hkôt ri ixpa ho ixpa xwÿnhjaja ma hkôt ixpa.

Mē kot ahpÿnhā tanhmā Jejus jarēnh to hā mē harēnh

Juāw 7.37-44, 9.22, 10.19-21, 12.42-43

¹¹ Rôm nhūm ra mē ixpê Ijaew nhō pahijaja mē hkînhja kamā mē pikuprônĥ xwÿnhjê kaêx ā Jejus japêr o ri mra. Nē hā axpēn kukjêr o mra nē axpēn mā:

—Kwa nok? Nhÿri mǎn we? Anē.

¹² Nhūm Ijaew piitā tanhmā axpēn mā Jejus jarēnh to ho pa. Nē kamā mē hkwÿjaja harēnh o:

—Nā kot amnhī to mex o pa xwÿnh na.

Anhÿr o harēnh o pa. Nē kamā mē hkwÿjaja axtem nē harē nē harēnh o:

—Tk. Kot mē no kupyri o pa xwÿnh kēnā. Anē.

¹³ Nom mē ō pahi pymaj mē piitā mē nom tanhmā harēnh to hkêt nē. Ām axpēn mā pix mā tanhmā harēnh to ho pa.

Jejus kot mē hkînh xwÿnhjê jahkre hā harēnh

Makre 3.22; Juāw 5.16

¹⁴ Tā pa mē mē hwÿr pōj. Jejus mē pa mē hkôt ixpa ho ixpa xwÿnhjaja mē hwÿr pōj. Kormā mē hkînhja hapêx kêt ri. Hāmri

pa mē Jejus kôt Tirtūm mā amnhī jarēnh xā hā ixkreja wÿr mra nē agjê nhūm Jejus mē ahkre ho nhÿ. ¹⁵ Hāmri nhūm mē inhō pahijaja tee ri kot tanhmā mē ahkre hto hā kuma nē hā axpēn kukja nē axpēn mā:

—Kwa mē pahkînhā kot Tirtūm kapêr o istuda hkêt tā ā mē ahkre anē. Anē.

¹⁶ Hāmri nhūm amnhī tā mē kuma nē mē kām:

—Nā na pa hte amnhī krā hkôt tanhmā ri mē ajahkre hto hkêt nē.

Ām kot mē awÿr inhmēnh xwÿnhnta nhÿ hā na pa hte ā mē ajahkre anhÿr o ri mē akôt ixpa. ¹⁷ Tā kot kaj mē amā Tirtūm kām hprām xā

hkôt amnhī nhîpêx prām hā kot kaj mē ixte ŷ hā ixkapêr ā ixpumunh kurê kumrêx. ¹⁸ Amnhī krā hkôt

mē kām kapêr o ri mē pa xwÿnhjaja na htem mē kot mē mar nē mē hā hpijaam pix kaxyw tanhmā mē

kām kapêr to ho ri pa. No kêt pa na mē ate ixkapêr mar nē kot mē

awÿr inhmēnh xwÿnhnta ā apijaam pix kaxyw na pa hte tanhmā mē

amā ixkapêr to ho ri ixpa. Jakamā ām hāmri na pa hte mē amā ixkapêr

o ri ixpa. ¹⁹ —Finat Mojes na pre mē

panhîgêjtjaja kot tanhmā amnhī nhîpêx to ho pa nhūm Tirtūm kot

mē kām hā karō jarēnh o ri mē hkôt pa htā ka mē hkôt amnhī nhîpêx kêt

nē. Tā ixte hkôt amnhī nhîpêx kêt ā ixto axêx nē mē ate ixpîr kaxyw

ixtā amnhī jarēnh ri apa. Anē. ²⁰ Hāmri nhūm mē ā Jejus kot mē

kām kapêr anhÿrja ma nē hêx rom kām:

—Kwa mē ixto na pa apîr mā ka ri ā mē ijarēnh anē? Amrakati kēnā. Kwa mǎn ka akrā xpā nā? Hā na ka ā ri akapêr anē. Anē.

²¹ Hāmri nhūm mē kām:
—Nā ixte mē pahkôt xā hā arīgro hā akupÿm mēhō myta ho mex jakamā na ka prem ja hā ixpumu nhūm ja mē apê omnuj nē. Nē te ixte mē pahkôt xā hā arīgro

hã ixpijaam kêt xwÿnh pyrāk ā ijarē. ²² Nom na ka htem ixpyrā nē mē panhō arġromnu hã mēmoj tā axàpēnh o ri apa. E pa mē amā mēmoj jarē ka mē inhma. Na pre finat Mojes mē pamā mē pahte mē pahkra myre pé my kwyr̄t kà jakār ā mē pamā karō. Kukamā higētjaja kot kām ja hã karō xà hkôt. Jakamā na htem mē hkra myre hapōj nē hã semān pyxi nē hapēx nhūm mē kēp mēmy hkwr̄t kà jakā. ²³ Mē pahkôt xà hã arġgro hã hō kator tãā nhūm mē hã semān pyxi nē mē panhō arġromnu hō hã kēp my kwyr̄t kà hkwȳ krāhta. Mojes kot Tirtūm nhÿ hã ja hã mē pamā karō xà hkôt. Jao mē panhō arġromnu hã apē. Tã pa pre mē apyrā nē arġromnu hã ixàpēnh pé akupÿm mēhō myta ho mex ka mē ja hã ixpumu nē axtem nē ixtÿx ri ixtē amnhī nhīpēx o ixa xwÿnh ā ijarē nē mē ate ixpīr kaxyw ā amnhī jarē. ²⁴ Kwa mē amnhī krā hkôt tanhmā mē harēnh to ho ri apa hkēt nē. Ām mē kot tanhmā amnhī nhīpēx to ho pa hã mē omu nē ajamaxpēr o: “Kwa xà we Tirtūm kām ja mex nà?” Anhÿr o mǎn kêt mē ajamaxpēr nē rī kormā tanhmā mē harēnh to. Anē.

²⁵ Hāmri nhūm Jerujarē nhō xwÿnh kwÿjaja ja hã kuma nē tee ri hkukamā hamaxpēr. Hāmri nē hã axpēn kukja nē axpēn mā:

—Kwa xà tām na mē panhō pahijaja mē kot hpīr kaxyw hã amÿnē? ²⁶ Ota jar mē pakamā ri pa htā nhūm mē am omu nē kām tanhmā nē hkēt nē. Mǎn mē am hāmri kēp Kris ā hkamnhīx jakamā kapēr ma nē am kuma nē kēp Kris ā tanhmā ho hkēt nē. Anē.

²⁷ Hāmri nhūm mēhōja kuma nē kām:

—Tk. Nà kēp Tirtūm kot mē pahwÿr mēnh xwÿnhre hã. Kēp Najare nhō xwÿnh kēnā. Mē pahte hipēxà mē katorxà wa omunh mex. Nē kêt Tirtūm kot mē pahwÿr mēnh mā xwÿnhra koja xep mē

pahwÿr kato pu mē nhÿhÿnh htēm xà hkôt omunh kêt nē. Anē.

²⁸ Rôm nhūm Jejus arī Tirtūm mā amnhī jarēnh xà hã ixkreja kamā mē ahkre ho nhÿ. Jakamā mē kot axpēn mā harēnh ā amnhī tā mē kuma nē mē kām:

—Xà mē ate aprī hã ixpumunh nē nhÿhÿnh ixtēm xà hkôt ixpumunh? Nà mē ate ja hã ixpumunh kêt. Na pa pre amnhī hkrā hkôt mē awÿr inhmōr kêt nē. Na pre mēhō mē awÿr inhmē. Nom kot mē awÿr inhmēnh xwÿnhja kormā mē ate omunh kêt. ²⁹ Ām papxipix na ixtē omunh. Kurūm ixwÿrÿk xwÿnh na pa. Kot mē awÿr inhmēnh nhūm kurūm ixwÿrÿk jakamā ixtē ixprī hã omunh par. Anē.

³⁰ Hāmri nhūm mē hkwȳjaja tee ri ā kot amnhī jarēnh anhÿrja ma nē ri axpēn mā harēnh o:

—Kwa Tirtūm kot mē pahwÿr mēnh ā kot amnhī to hēx kēnā. E kwa pu mē ā kot amnhī to hēx anhÿr ja ā unē nē haxà nà?

Anhÿr o axpēn mā hã amÿnē. Nom kormā mē kot unēnh nē haxà xà hã arġgroja kormā kator kêt jakamā nhūm Tirtūmja nē mē omunh mex nē nhūm mē am kām unēnh prām kaprÿ. ³¹ No nhūm mē hkwȳja mē kurom kuma nē kēp Tirtūm kot mē pakaxyw am xwÿnh ā omunh kurē kumrēx nē amnhī kaxyw hkôt hamaxpēr. Hāmri nē axpēn mā harēnh o:

—Kwa mǎn kēp Tirtūm kot mē pahwÿr mēnh mā xwÿnhra mǎn nà? Mē pahtō kot pu urāk nē aa mē kām mē kot mēmoj pumunh kêt o anhÿr rax o ri papa? Amrakati kumrēx. Nà pēr tām kēnā. Anē.

Pōristi hkwȳ kot Jejus pynēnh kaxyw ā mē harēnh

³² Nhūm prem ā axpēn mā Jejus jarēnh anhÿr o kuhē hāmri nhūm Parijew nhō xwÿnhjaja hã mē kuma. Hāmri nē patre krāhtūmjē

mě mẽ ma Jejus wỳr mẽõ pòristi hkwȳ rē nē mẽ kām:

—E mẽ ma Jejus wỳr mra nē unē nē man akupỳn o tē. Anē.

³³ Hāmri nhũm mẽ kuma nē ma hwỳr mra nē omu nom tokyx unēnh kēt nē. Kormã kapēr ã mar o kuhê. Nhũm Jejus arĩ mẽ kãm kapēr o xa nē mẽ kãm:

—Nà kot paj jar mẽ akôt ri ixpa hã mytwrỳ grêre hāmri nē ma akupỳm kot mẽ awỳr inhmēnh xwỳnhhta wỳr api. ³⁴ Ka mẽ tee ri jar ijarêr o ri apa nom nhỹri ixpumunh kēt nē. Nē ma inhmōr xàta wỳr kot kaj mẽ atō ma ixkôt amōr kēt nē. Anē.

³⁵ Hāmri nhũm mẽ tee ri ã kot amnhĩ jarēnh anhȳrja ma nē axpēn mã:

—Kwa nhỹhỹm koja we ma mō pu mẽ hkôt papa hkēt nē? Mãn mẽ pahkwỳjaja kot Gresjê kamã mẽ pa xwỳnhjê hwỳr koja ma mō nē hpãnã mẽ hkôt mẽ ahkre ho pa nà? Hã na ã mẽ pamã amnhĩ jarēnh anē? ³⁶ Mo na ri mẽ pahte tee ri hapêr o papa hã mẽ pajarē nē mẽ pahte hkôt pamrar kēt ã mẽ pajarē? Anē.

Tirtũm Karō te kēp gô nyw pyràk ã harēnh

Juāw 4.13-14; Apokarip 22.1, 22.17

³⁷ Tã nhũm ra mẽ hkĩnhja hapêx kaxyw hitep xà hã arĩgro maatija kato. Jakamã nhũm Jejus kãnhmã xa nē kỳxpê mẽ hpikuprõnh xwỳnhjê mã kapēr nē mẽ kãm:

—E te mẽ amã kōr o apa pyràk xwỳnhjaja. Mě amnē ixwỳr akuprō. Kot kaj mẽ amnhĩ kaxyw ixkôt ajamaxpēr pa tanhmã mẽ ato ka mẽ apê Tirtũm mẽ wa ixri atĩr tũm nē apa ho apa mã xwỳnh.

³⁸ —Kot kaj mẽ ja hã amnhĩ pumu hāmri nē ma mẽ kãm ixkapēr jarēnh o ri mẽ hkôt apa. Te mẽ kãm kōr nhũm mẽ ate mẽ kãm gō hkwȳ nhũm mẽ kot ho hkōm pyràk o mẽ hipêx o ri mẽ hkôt apa.

Hāmri nhũm mẽ ama nē mẽ apyrã nē amnhĩ kaxyw ixkôt hamaxpēr. Pa ixte tanhmã mẽ atoja pyrà nē tanhmã mẽ ho nhũm mẽ apyrã nē kēp wa ixri htĩr tũm nē pa ho pa mã xwỳnh. Anē.

³⁹ Nhũm pre ã Jejus mẽ kãm kapēr anē. No ãm hã kuxi nē mẽ kãm kapēr nē hprĩ hã harēnh kēt nē. Tirtũm Karō kot nhỹrmã mẽ kot amnhĩ kaxyw Jejus mã hamaxpēr xwỳnhjê karō mã gjêxja nhũm ã mẽ kãm hã kuxi nē harēnh anē. No kormã akupỳm kaxkwa hwỳr àpir nē mex o mex nē hkrĩ hkēt jakamã kormã mẽ hwỳr Karō rēnh kēt nē.

Mě kot ahpỳnhã tanhmã Jejus jarēnh to hã mẽ harēnh

Juāw 7.11-13, 7.25, 10.19-21

⁴⁰ Hāmri nhũm mẽ kot Jejus mar o hkrĩ xwỳnhjaja ã kapēr anhȳrja ã kuma nē ahpỳnhã tanhmã harēnh to nē harēnh o:

—Kwa finat Mojes pyrà nē kēp Tirtũm nhỹ hã kapēr jarēnh o pa xwỳnh na nà? Anē.

⁴¹ Nhũm kamã mẽ hkwȳjaja mẽ kãm:

—Nà Tirtũm kot mẽ pakaxyw ãm xwỳnhhta na. Anē.

Nhũm kamã mẽ hkwȳjaja ja hã mẽ kuma nē mẽ kãm:

—Tk. Nà kēp Garirej nhõ xwỳnh kēnã kot kēt Tirtũm mẽ pakaxyw ãm. ⁴² Tirtũm kapēr ã kagà htũm kot kēp Garirej nhõ xwỳnh ã harēnh kēt. Kēp Pahi Tawi hkanrēhã hka-grõt nyw jakamã koja uràk nē Jutej kamã krĩ pē Perěj kamã kato. Jao koja uràk nē kēp Jutej nhõ xwỳnh.

Anhȳr o ri axpēn mã harē. Mě kot htỳx Jejus pika pē Garirej kamã kator ã hkamnhĩx jakamã ã axpēn mã harēnh anē. Nom pika pē Jutej kamã na pre kato. Krĩ pē Perěj kamã. Tã no nhũm mẽ hkwȳjaja ja hã mar kēt jakamã kēp Tirtũm kot mẽ pahwỳr mẽnh xwỳnh kēt ã hkamnhĩx.

⁴³ Jakamã nhũm mẽ ã ahpỳnhã axpēn mã harēnh anē. ⁴⁴ Nhũm

mě hkwýjaja ra kot unênh kaxyw tâ tokyx unênh kêt nê.

Pôristi kot Jejus pynênh kêt ã mẽ harênh

Matêwre 7.28-29

⁴⁵ Tã nhũm patre nhõ pôristijaja. Mě kot Jejus pynênh mã hwýr mrar tâ hãmri ã kapêr anhýrja ã kuma nê tee ri hamaxpêr nê unênh kêt nê. Nê awjanã nê ahte ý kamã ma akupým patre krãhtũmjê mẽ Parijew nhõ xwýnhjê hwýr mra. Hãmri nhũm mẽ omu nê mẽ kãm:

—Pa nok? Tanhmã na ka mẽ amnhĩ to nê unênh nê ho amõr kêt nê? Anê.

⁴⁶ Hãmri nhũm mẽ kãm:

—Nã na pa mẽ unênh kêt nê. Kapêr mex kênã. Te kot mẽ pakapêr pyrãk kêt jakamã pa mẽ tee ri kapêr ã kuma nê unênh kêt nê. Anê.

⁴⁷ Hãmri nhũm Parijew nhõ xwýnhjaja mẽ kuma nê mẽ kãm:

—Tk. Kwa mãn ka mẽ ra mẽ urãk nê tanhmã kot amnhĩ to hêx toja ma nê hkõt ajamaxpêr nã?

⁴⁸ Mě ixpê Parijew nhõ xwýnhjaja nê mẽ panhõ pahijaja na pa htem hkõt ijamaxpêr kêt nê. ⁴⁹ No kêt mẽ kot mar nê hkõt hamaxpêr xwýnhjtijaja na htem mẽ ixkĩnhã finat Mojes kapêr mar kêt nê. Æm Jejus kapêr pix na htem kuma nê hkõt hamaxpêr. Mýrapê koja Tirtũm tanhmã mẽ homnuj týx to nhũm mẽ rĩ amnhĩ pumu. Anê.

Nĩkotê kot Jejus xyr pê kapêr ã harênh

Juãw 3.1-21

⁵⁰ Hãmri nhũm Nĩkotêja mẽ mar o xa. Mě urãk nê kêp Parijew nhõ xwýnh tâ na pre ra kamãt õ mã Jejus wýr tẽ nê kãm kapêr. Jakamã tee ri mã mẽ kapêr ma hãmri nê yr pê mẽ kãm kapêr nê mẽ kãm:

⁵¹ —Tk. Kwa kormã mẽ pahte pahprĩ mã kapêr mar nê tanhmã kot amnhĩ nhĩpêx to mã omunhê mã. Na pre finat Mojesja Tirtũm nhý mã mẽ panhĩgêjtê mã ja jarênh o:

Kêr ka mẽ aprĩ mã mẽ kapêr ã mẽ ama nê mẽ kot amnhĩ nhĩpêx ã mẽ omu nê rĩ kormã tanhmã mẽ harênh to.

Anhýr tâ ka mẽ kormã aprĩ mã Jejus kot amnhĩ nhĩpêx ã omunh kêt tâ ra kot amnhĩ tomnuj xwýnh ã harê. Anê.

⁵² Hãmri nhũm mẽ tee ri kuma nê kãm:

—Tk. Kwa xà we urãk nê apê Garirej nhõ xwýnh mã na ka ã yr pê akapêr anê? Xã Tirtũm kapêr ã kagã htũm kot Garirej nhõ xwýnhjê hõ kêp ý mã kapêr jarênh o pa xwýnh ã harênh? Nã ã kot harênh anhýr kêt. Anê.

⁵³ Nhũm mẽ ã Nĩkotê mã kapêr anê hãmri nê angrã nê Tirtũm nhõrkwý rũm hapõj nê ma akupým õrkwý hwýr ãhkurê ho mra.

8

Mêhõ ni kot nhãm mẽ mjên o amnhĩkati mã harênh

Xiakre 2.10-13

¹ Tã nhũm Jejus Tirtũm nhõrkwý kamã mẽ ahkre hpa hãmri nê kato nê ma hixêt prêk pê Oriwêhti hwýr tẽ. Hãmri nê mã api nê nhýri nõ nê ra gõr.

² Tã nhũm apkati nê myt kator o mõi mẽ nhũm kãnhmã nhý nê akupým wrý nê Tirtũm mã amnhĩ jarênh xà mã ixkre hwýr tẽ. No ãm kormã ixkre pu mã kahê hkre kamã nhý. Nhũm krĩ nhõ xwýnhjaja omu nê mã htu rax nê nhũm tanhmã mẽ ahkre htu ho nhý. ³ Hãmri nhũm Parijew nhõ xwýnhjê mẽ Tirtũm kapêr tũm o mẽ ahkre ho mẽ pa xwýnhjaja hwýr mêhõ nija o tẽ. Na ra ham mêhõ pê mjên o amnhĩkati ho nõ nhũm mẽ ja mã omu nê unê nê hpa mã kupy nê ma Jejus wýr hkjênh o mõi. Hãmri nê mẽ kot mar o kuhê xwýnhjê kutã ãm nhũm xa. ⁴ Hãmri nhũm mẽ Jejus mã:

—E ot pa mẽ awýr jahti ho tẽ ka omu. Na ham mêhõ pê mjên o amnhĩkati ho nõ. Pa mẽ ja mã omu nê unê nê man awýr o tẽ. ⁵ E

tanhmã kot puj mẽ hipêx to? Na pre finat Mojes Tirtùm nhỹ hã mẽ panhigêtjê mã ja jarênh o:

Koja mênijê hõ axtem nê nhãm mêhõ pê mjên o amnhikati ho nõ ka mẽ ja hã omu nê apiitã ahpÿnhã kên rũnh jamÿ nê ho htak o apĩ.

Anhÿr o kot harênh. No ka? Tanhmã kot kaj mẽ inhmã ja jarênh to? Tanhmã kot paj mẽ hipêx to nhũm amã mex nê? E mẽ inhmã tanhmã mẽ ixte hipêx to jarê. Anê.

⁶ Nhũm mẽ ã hêx rom nija ã Jejus kukjêr anê. Kot mẽ kot hpĩr nê mẽ kãm kapêr nhũm mẽ kot hã mar nê mẽ hkrãhtũmjê hwÿr môr nê kãm kot Mojes kapêr kwÿm ri mẽ ahkre hã harênh kaxyw nhũm mẽ hêx rom ã hkukjêr anê. Hãmri nhũm mẽ kuma nê tanhmã hã mẽ kãm nê hkêt nê. ãm htÿx hikôt nê ïhkrakrã ho pyka kagã ho nhỹ. ⁷ Nhũm mẽ tee ri omu nê axte hã hkukja nhũm kãnhmã xa nê mẽ kãm:

—Tõe. Nã kot ka mẽ atõ aa tanhmã amnhĩ tomnuj to hkêt kumrêx ã amnhĩ pumu hãmri nê kam nê rĩ kaxyw kên õ py nê akumrêx ho hkura. Kê akwÿjaja rĩ kormã akôt hkwy jamÿ nê ho htak. Anê.

⁸ Hãmri nê akupÿm hikôt nê pyka kagã ho nhỹ. ⁹ Hãmri nhũm mẽ tee ri kapêrja kôt kuma hãmri nê mẽ kot mar o kuhê xwÿnhjê rũm anhrã nê ma mra. Mẽ piitã mẽ kot amnhĩ tomnuj xwÿnh ã amnhĩ pumunh mex jakamã tee ri ã kot mẽ kãm kapêr anhÿrja ma nê anhrã nê ma akupÿm hpÿnh nê axpên kôt mrrar o xa. Mêhpigêt kumrêx nê hpãnhã mẽ nywjaja nhũm mẽ hpÿnh nê ma axpên kôt mrrar o ãm kãm hapêx. Nhũm Jejus mênija pix wa ahte mẽ kot mar xwÿnhjê kutã wa arĩk. ¹⁰ Hãmri nhũm Jejus kãnhmã xa nê nita mã kapêr nê kãm:

—Pa? No mẽ kot ato kapêr xwÿnhhta mẽ? Xã na mêhõ kên o

akuranh kêt nê? Anê.

¹¹ Nhũm kãm: “Ma amrakati.” Anê nhũm kãm:

—Tõe. Nã kot paj ijaxwÿja tanhmã ato hkêt nê. E mamrĩ ma akupÿm anhõrkwy hwÿr tẽ. No ãm kêr ka axte ã amnhĩ nhĩpêx anhÿr kêt nê. ãm kwarĩ ho kwarĩ. Anê.

Jejus kot hprĩ hã amnhĩ jarênh
Juãw 1.4; Rõmãn 13.12-14; Epes 5.8-14; Wam Tesarõn 5.5-8

¹² Tã nhũm arĩgro hõ hã nhũm Jejus axte Tirtùm nhõrkwy hwÿr tẽ nê kamã mẽ ahkre ho nhỹ nê mẽ kãm:

—Nã te ixpê mẽ piitã mẽ õ kanê pyrãk. Na hte kanêja mẽ kãm hirã mex nê nhũm mẽ kamã rĩt mex o pa. Jao kamãt kô kamã ri pa hkêt nê. Ja pyrã nê na pa hte Tirtùm kot amnhĩ nhĩpêx o amnhĩrit mex o ri ixpa. Kot ka mẽ atõ amnhĩ kaxyw inhmã ajamaxpêr nê ixkôt amnhĩ xãm hãmri nê tanhmã amnhĩ tomnuj to ho apa hkêt nê. ãm Tirtùm kãm hprãm xã kôt pix mã tanhmã ri amnhĩ nhĩpêx to ho ri apa. Jao te ate kanê hpõk nhĩrã kamã arĩt mex pyrã nê apê wa ixri atĩr tũm nê apa ho apa mã xwÿnh. Anê.

¹³ Hãmri nhũm Parijew nhõ xwÿnhjaja tee ri ã kapêr anhÿr ã kuma nê kãm:

—Tk. Kapxipix na ka ã amnhĩ jarênh anê. Mêhõ kot ã ate amnhĩ jarênh anhÿrja kôt kot mẽ inhmã ajarênhre hã. Jakamã kot paj mẽ ama nê ãm ama. Anê.

¹⁴ Hãmri nhũm mẽ kãm:

—Nã mêhõ kot ã ijarênh anhÿr kêt tã no ãm hãmri na pa mẽ amã amnhĩ jarê. Ixêx kêt. Mẽ arom ixte nhÿhÿnh ixwryk xã hã amnhĩ pumunh mex. Nê mẽ arom ma akupÿm nhÿhÿm ixãpir xã hã amnhĩ pumunh mex. Jakamã ãm hãmri na pa ã mẽ amã amnhĩ jarênh anê. ¹⁵ Na ka htem amnhĩ krã hkôt tanhmã ri ijarênh to. No pa na pa kormã amnhĩ xwar tanhmã mẽ ajarênh to hkêt nê. ¹⁶ Ixte tanhmã mẽ ajarênh to

ronh̄ȳx pa ām hāmri mē ajarē. Nh̄ȳx pa ām papxipix amnh̄i krā hkôt tanhmā mē ajarēnh to hkêt nē. Nh̄ȳx mǎānēn Inh̄ipēêxà pē kot mē aw̄ȳr inhmēnh xw̄ynhta inh̄h̄kô hā pa wa ām hāmri axpēn kôt tanhmā mē ajarēnh to. Mē ate amnh̄i to mex ā mē ajarē r̄y mē ate amnh̄i tomnuj ā mē ajarē. ¹⁷ Tirtūm kapēr ā kagà htūm kot ja jarēnh kot:

Koja mēhō wa hamēxkrut nē tanhmā mēmoj jarēnh to nē ām axpēn kôt harēnh o htipxi. Hā kot kaj mē wa ama nē ām hāmri wa kot harēnh kôt ajamaxpēr kurē kumrēx.

¹⁸ Anh̄ȳr o kot harēnh. Tā pa ā amnh̄i jarēnh anē nh̄um Inh̄ipēêxà kot mē aw̄ȳr inhmēnh xw̄ynhta mǎānēn ā ijarēnh anē. Wa ixpi-jakrut tā ā wa ixte axpēn kôt amnh̄i jarēnh anh̄ȳr jakamā kwa mē ixte tanhmā amnh̄i jarēnh toja ma nē ixkôt ajamaxpēr kêt wehe. Anē.

¹⁹ Nh̄um pre ā Jejus mē kām kapēr anē. Hāmri nh̄um mē kuma nē kām: —No nh̄ȳri na we anh̄ipēêxà ja? Anē.

Hāmri nh̄um mē kām:

—Nà mē ate Inh̄ipēêxà pumunhre hā. Mē ate apr̄i hā ixpumunh ronh̄ȳx ka mē mǎānēn apr̄i hā Inh̄ipēêxà pumunh mex kurē kumrēx. Nom mē ate ixpumunh mex kêt jakamā na ka mē mǎānēn omunh mex kêt nē. Anē.

²⁰ Nh̄um pre ā Jejus mē kām kapēr anē. Ar̄i Tirtūm mǎ amnh̄i jarēnh xà hā ixkreja kamā mē ahkre ho xa. Mē kot kàxpore ḡēnh xà kuri mē ahkre ho xa. Nh̄um mē kām hkurē xw̄ynhjaja tee ri kot tanhmā mē ahkre htoja ma nē kām unēnh nē haxàr prām nē. Nom kormā mē kot ā hipēx anh̄ȳr ā ar̄igro kormā kator kêt jakamā nh̄um Tirtūmja nē mē omunh mex nē nh̄um mē ām kām unēnh prām kapr̄y.

²¹ Hāmri nh̄um Jejus ar̄i mē kām kapēr o xa nē mē kām:

—Nà kot paj nh̄ȳrmā mē arūm ixkato nē ma akup̄ym api. Ka mē tee ri ijarēnh nom nh̄ȳri ixpumunh kêt nē. Hāmri nē mē ate amnh̄i tomnuj o apa rāhā ty nē mē atō ixw̄ȳr axāpir kêt nē. Anē.

²² Hāmri nh̄um Ijaew nhō pahijaja tee ri ā kapēr anh̄ȳrja ā kuma nē axpēn mǎ hā hpēr o pikēnh o kuhē nē axpēn mǎ:

—Kwa mǎn ra kot amnh̄i p̄r kaxyw ā na ri hkôt mē paxāpir kêt ā mē pajarēnh anē na? Anē.

²³ Hāmri nh̄um amnh̄i tā mē kuma nē mē kām:

—Nà mē kajaja mē apē pyka nhō xw̄ynh na ka mē. No pa na mē arom ixpē kaxkwa nhō xw̄ynh jakamā mē pajamaxpēr kot axpēn pyrāk kêt. ²⁴ Kot kaj mē ixpē kaxkwa rūm ixw̄ryk xw̄ynh ā ixpumu nē amnh̄i kaxyw inhmā ajamaxpēr nē ixkôt amnh̄i xunhw̄ȳr kêt hā kot kaj mē ate amnh̄i tomnuj o apa rāhā nh̄ȳrmā atyk o mē kamjaja Tirtūm mǎ amnh̄i pānhā amnh̄ire. Anē.

²⁵ Nh̄um Jejus ā mē inhō pahijē hkukamā mē kot amnh̄i nh̄ipēx jarēnh anē nh̄um mē tee ri amnh̄i tā kuma nē kām:

—Kwa mē atō na ka we ri ā mē inhmā akapēr anē? Anē.

Hāmri nh̄um mē kām:

—Nà ra ixte mē amā amnh̄i jarēnh kēnā. Xàn ka mē kormā apr̄i hā inhmar kêt nē? ²⁶ Kot paj nh̄ȳrmā mē amā mē ate amnh̄i tomnuj piitā ho amnh̄ir̄it pa. Na pa kot mē aw̄ȳr inhmēnh xw̄ynhta pix xō ri tanhmā mē amā ixkapēr to ho ri ixpa. Ām hāmri na hte tanhmā mēmoj jarēnh to. Na hte hēx kêt nē. Anē.

²⁷ Nh̄um pre ā Jejus mē kām Hipēêxà kot mē hw̄ȳr mēnh ā harēnh anh̄ȳr tā no nh̄um mē Hipēêxà kēp Tirtūm ā hkôt hamaxpēr kêt nē. ²⁸ Jakamā nh̄um mē kām:

—Nà koja mē nh̄ȳrmā p̄i kahpa hā inhō ka mē r̄i kormā apr̄i hā

ixpê Tirtūm rūm mē awȳr ixwrȳk xw̄ynh ā ixpumu. Nē ixte amnhī krā hkôt ixkapēr o ri ixpa hkēt ā ixpumu. Nē ām Inhīpêxà xō ri ixprī hā ixkapēr o ri ixpa hā ixpumu. ²⁹ Ixte kām hprām xà hkôt pix mā tanhmā ri amnhī nhīpêx to ho ri ixpa jakamā na hte ixtānopxar mex o ixkôt pa ho pa. Kojā aa ixkaga hkēt nē. Anē.

³⁰ Hāmri nhūm mē hkwȳja kuma nē hkwȳjê rom kapēr kôt hamaxpēr ³¹ nhūm amnhī tā mē omu nē mē kām:

—Nā ām hāmri na ka mē tā ixkôt ajamaxpēr. Tā kêr ka mē ixkôt amnhī xunhw̄y nē ixkapēr kôt pix mā ri amnhī nhīpêx mex o ri apa. Hāmri pa ja hā mē apumu nē mē apê ixkw̄y kumrêx ā mē ajarê. ³² Ām hāmri na pa hte ā ixkapēr anh̄ȳr o ri ixpa. Tā kot kaj mē ixkôt ri amnhī nhīpêx o ri apa hāmri nē aprī hā inhmar t̄yx nē. Nom na hte kormā mēmoj kot amnhī tā mē ato ht̄yx pyrāk o mē anhīpêx ka mē tee ri amnhī krā hkôt kām anh̄urer prām kapr̄y. Tā kot kaj mē ixkôt amnhī xunhw̄y nē ixkôt ri amnhī nhīpêx hāmri nē Tirtūm nh̄y hā tām amnhī nhīpêx. Jao ŷ hā ate amnhī tomnuj mā anh̄ure. Anē.

³³ Nhūm pre ā Jejus mē kām kapēr anē hāmri nhūm mē tee ri kuma nē kām:

—Kwa mē ixpê mē pahpār krax finat Apraāw kanrêhā htāmnhw̄y kênā. Na pre mēmoj te kot amnhī tā ho ht̄yx pyrāk o hipêx kêt nē. Jakamā mēmo kot we mē ixpê hkanrêhā htāmnhw̄yê ho ht̄yx ka we ri ā mē ijarênh anē? Nā am-rakati kênā. Tā kwa mon ka ā mē ijarênh anē? Anē.

³⁴ Hāmri nhūm Jejus hprī hā mē kām awjarê nē mē kām:

—Kwa mē ixkapēr ma nē amnhī krām haxār t̄yx nē. Nā mē kot amnhī tomnuj o mē pa xw̄ynhjaja te mē kot amnhī tomnuj tām ri kot amnhī tā mē ho ht̄yx pyrāk o mē

hipêx. Jakamā nhūm mē urer kêt rāhā nē pa ho pa. Nē ā amnhī nhīpêx anh̄ȳr rāhā ho pa. ³⁵ Jakamā ixkīnhā mē kêp Tirtūm kw̄y hkēt. No pa na ixpê Tirtūm Kra jakamā māānēn ixpê hkwȳ na pa. ³⁶ Tā mē kajaja. Kot kaj mē ixpê Tirtūm Kra hā ixkôt amnhī xunhw̄y hā kot pa tanhmā mē ato ka mē ixpyrā nē apê wa ixkw̄ȳy. Hāmri nhūm mē ate amnhī tomnuj te kot mē amā urer pyrāk o mē anhīpêx ka mē ra wa ixkôt amnhī nhīpêx o ri apa. Anē.

Mē kêp Tirtūm kra hkēt xw̄ynhjê jarênh

³⁷ Nhūm Jejus arī mē kām kapēr nē mē kām:

—Nā ām hāmri na ka mē apê finat Apraāw kanrêhā htāmnhw̄y hā amnhī jarê. Nom mē apê hkanrêhā htāmnhw̄y htā urāk nē amnhī kaxyw Tirtūm kôt ajamaxpēr kêt nē. Jakamā na ka htem ixkapēr ma nē ām ama nē ixkaga. Nē axtem nē ixpīr mā. Kop apu Apraāw arī mē akamā pa ronh̄ȳx ā inhīpêx anh̄ȳr kêt nē. ³⁸ Na pa hte Inhīpêxà hkôt pix mā ri amnhī nhīpêx o ri ixpa. No mē kajaja axtem nē mē ate nhām mē kapēr kôt amnhī nhīpêx jakamā na ka htem ixkīnhā Inhīpêxà hkôt amnhī nhīpêx kêt nē. Anē.

³⁹ Hāmri nhūm mē tee ri amnhī tā kuma nē kām:

—Tk. Kwa mon ka ā mē ijarênh anē? Mē ixte Apraāw kôt amnhī nhīpêx o ri ixpa kênā. Anē.

Hāmri nhūm mē kām:

—Nā. Mē ate hkôt ri amnhī nhīpêx o apa ronh̄ȳx ka mē urāk nē Inhīpêxà kapēr kôt amnhī nhīpêx.

⁴⁰ No na ka mē ra axtem nē ixpīr mā. Ām hāmri na pre Tirtūm inh̄mā awjarê pa ô ri tanhmā mē amā mēmoj jarênh to ho ri ixpa htā ka mē ra axtem nē ixpīr mā. Kwa xà na pre Apraāwja ā mē hipêx anh̄ȳr o pa? Nā na pre ā mē hipêx anh̄ȳr kêt nē. ⁴¹ Mē ate hkôt amnhī nhīpêx

xwýnhhta axtem na. Kêp Apraãw kêt. Nê mãânên kêp Tirtùm kêt. Anê.

Hãmri nhùm mē tee ri kuma nê kām:

—Tk. Kwa nà ã mē ijarēnh anhÿr kêt nê. Mē ixte Apraãw kôt amnhĩ nhĩpêx xwýnh kênã. Tã ka ri axtem nê ã mē ijarēnh anê. Mēhō hkôt kot pa kêt wem ri axtem amnhĩ nhĩpêx o ri ixpa? Anê.

⁴² Hãmri nhùm mē kām:

—Nà mē ate Apraãw kôt amnhĩ nhĩpêx ronhÿx ka mē ixpumu nê uràk nê amã ixprãm nê. Apraãw kot hkôt amnhĩ nhĩpêx o pa xwýnhhta tãm kot mē awÿr inhmēnh nhùm mē awÿr ixwrÿk kênã. Na pa pre amnhĩ krã hkôt man mē awÿr ixwrÿk kêt nê. Tãm na pre mē awÿr inhmē pa wrÿ. ⁴³ Kwa mon ka mē aprĩ hã ixkapêr mar mex kêt nê? Nà mē amã ixkôt amnhĩ nhĩpêx prãm kêt jakamã na ka mē tee ri ixkapêr ma nê aprĩ hã mar mex kêt nê. ⁴⁴ Mē ate hkôt amnhĩ nhĩpêx xwýnhhta Satanasti na. Aa tãm kot amnhĩ nhĩpêx kêt kumrêx. Kêp mē hpar o pa xwýnhjê hpãm maati na. Nê kêp mē kām hêx o pa xwýnhjê pãm maati na. ã kot amnhĩ nhĩpêx kot anhÿr. Nê kām mē kapêr mex mar prãm kêt o pa. Nê ãm hêx pix o pa jakamã kêp mē hêx xwýnhjê pãm. ã kot amnhĩ nhĩpêx anhÿr xwýnh tã ka htem hkôt amnhĩ nhĩpêx o ri apa.

⁴⁵ —Na pa hte kurom ãm hãmri ixkapêr o ri ixpa. No mē kajaja mē apê hêx nhi xwýnh maati ja hkra jakamã mē amã ixkapêr mar prãm kêt. ⁴⁶ Xà na ka pre mē atō ixte tanhmã amnhĩ tomnuj to hã ixpumu? Nà amrakati. Ixte amnhĩ to mex o ri ixpa xwýnh na pa. Nê tãm ixkapêr o ri ixpa xwýnh tã ka mē inhma nê ãm inhma nê ixkôt ajamaxpêr kêt nê. Kwa mon ka mē ja hã ixpumunh nê ixkôt ajamaxpêr nê ixkôt amnhĩ xunhwÿr kêt nê? ⁴⁷ Tirtùm krajaja na htem kapêr mar tÿx nê hkôt amnhĩ nhĩpêx o pa.

No mē apê hkra hkêt jakamã mē amã kapêr mar prãm kêt. Anê.

Mē kot Jejus kêp Satanasti hkwy hã harēnh

⁴⁸ Hãmri nhùm mē ã Jejus kot mē harēnh anhÿrja ma nê kamã gryk tÿx kumrêx. Hãmri nê kām:

—Tk. Kwa ate amnhĩ tomnuj o apa xwýnhhti kênã. Ra Satanasti hkwy pê mēkarōmnuti tanhmã kot akra hto jakamã na ka ã mē inhmã akapêr anê. Anê.

⁴⁹ Hãmri nhùm mē kām:

—Nà mēkarōmnuti kot tanhmã ixto hkêt. Na pa hte Inhipeêxã hã ixpijaam pix o ri ixpa. Tã mē ate ixkĩnhã hã apijaam kêt jakamã mãânên pa ixtã apijaam kêt nê. ⁵⁰ Na pa hte amnhĩ krã hkôt mē piitã mē kot ixtã hpijaam prãm xaj tanhmã mē kām ixkapêr to hkêt nê. No mē piitã mē kot ixtã hpijaam o paja na Inhipeêxã kām hprãm. Tã koja nhÿrmã amnhĩ nê ixtã mē hpijaam kêt xwýnhjaja mē kot amnhĩ xà htÿx kamã hamak tùm xàta wÿr mē rēnh pa.

⁵¹ —Nê kot ka mē atō wa ixkapêr ma nê ixkôt amnhĩ nhĩpêx. Hã kot kaj wa ixri atir tùm nê apa ho apa. Kwa mē ixkapêr ma nê amnhĩ krãm haxàr tÿx nê. Anê.

Nhùm pre ã Jejus Ijaew nhō pahijê mã kapêr anê. ⁵² Nhùm mē kuma nê kām:

—Kwa pēr ãm hãmri na ka hte Satanasti nhÿ hã ã mē htir tùm nê mē pa ho pa hã mē harēnh anhÿr o ri axêx o ri apa. Finat Apraãw na pre ri paa nê ty. Tã mē kot Tirtùm nhÿ hã kapêr jarēnh o mē pa xwýnhjaja na prem uràk nê ri paa nê mãânên htyk pa. Tã ka axtem nê mē kot akapêr kôt amnhĩ nhĩpêx o mē pa xwýnhjaja ari htir tùm nê pa ho pa hã mē harê. Nà na ka ãm mē inhmã mē ho axêx o xa. ⁵³ Na pre mē pahpãm Apraãwja kot amnhĩ to rax tã ty nê hapêx. Nhùm mē kot Tirtùm nhÿ hã kapêr jarēnh xwýnhjaja mãânên mē kot

amnhĩ to rūnh tã htyk pa nẽ hapêx. Mẽ kot amnhĩ to rūnh tã htyk pa nẽ hapêx kênã kot kêt mẽ tanhmã amnhĩ to nẽ ari htĩr tũm nẽ pa. Âm mẽ ixte akapêr mar nẽ atã ixpijaam pix prãm xàj na ka ã mẽ inhmã mẽ htĩr tũm nẽ pa hã mẽ harênh anẽ. Nom na ka ã mẽ harênh anhỹr kaprỹ. Kot paj mẽ ri akapêr mar kêt nẽ. Anẽ.

⁵⁴ Hãmri nhũm mẽ kuma nẽ mẽ kãm:

—Nà na pa hte amnhĩ krã hkôt mẽ ate ixtã apijaam hprãm xàj tanhmã mẽ amã ixkapêr to hkêt nẽ. Kot paj anẽ nẽ âm ixtỹx ã amnhĩ nhĩpêx anhỹr kaprỹ. No Inhĩpêêxã tãm kãm mẽ apiitã mẽ ate ixtã apijaam o apaja nhũm kãm hprãm. Mẽ ate Tĩrtũm kôt amnhĩ nhĩpêx o apa hã amnhĩ to axêx xwỹnhta tãm na kãm mẽ ate ixtã apijaamja nhũm kãm hprãm. Tã ka htem ã amnhĩ nhĩpêx anhỹr kêt nẽ. Na ka htem ixkuk pumu nẽ axtem nẽ ixte Satanasti nhỹ hã mẽ amã ixêx o ri ixpa hã ijarẽ. ⁵⁵ Mẽ ate Inhĩpêêxã hkôt amnhĩ nhĩpêx ã amnhĩ jarênh tã âm amnhĩ to axêx o ri apa. No pa na pa hte mẽ arom âm hãmri hkôt amnhĩ nhĩpêx mex o ri ixpa. ⁵⁶ Amnepêm mẽ pahpãr krax Apraãwja na pre mẽ awỹr ixwryk kukamã ijarênh ma nẽ mẽ arom inhỹ hã hkĩnh tỹx nẽ pa. Anẽ.

Nhũm pre ã Jejus mẽ kãm amnhĩ jarênh anẽ. ⁵⁷ Hãmri nhũm mẽ kuma nẽ tee ri kot mẽ kãm tanhmã Apraãw jarênh toja ma nẽ kãm:

—Tk. Xà na ka pre finat Apraãwja ano ho omu? Nà kormã anyw kênã. Apraãw amnepêm htyk nẽ hapêx kênã kot ka kêt kot akukamã ajarênh mar nẽ hkĩnh tỹx ã harẽ. Xàn ka pre ano ho omu? Kormã akator kêt ri na pre amnepêm htyk nhũm mẽ haxãr kênã. Nà na ka âm mẽ inhmã amnhĩ to axêx. Te amnepêm mẽ hkukamã apa nẽ ate mẽ omunh nẽ mẽ harênh pyrãk.

Kwa akatãt kôt mẽ inhmã awjarẽ. Anẽ.

Jejus kêp rãhã ho rãhã xwỹnh ã harênh

⁵⁸ Hãmri nhũm Jejus mẽ kãm:

—Nà ixêx kêt. Âm hãmri na pa ã mẽ amã amnhĩ jarênh anẽ. Amnepêm kormã Apraãw kator kêt ri na pa pre ixrãhã ho ixrãhã ixpa na pa. Ixrãhã ho ixrãhã ixpa xwỹnh jakamã na pa pre hte inhno ho Apraãw pumunh mex o ri ixpa. Kwa mẽ ixkapêr ma nẽ amnhĩ krã him haxãr tỹx nẽ. Anẽ.

⁵⁹ Hãmri nhũm mẽ tee ri kot ã amnhĩ jarênh anhỹrja ã kuma nẽ kamã gryk tỹx nẽ. Nẽ axpên mã:

—Kwa tanhmã kot we amnhĩ to nẽ amnepêm rãhã nẽ pa ho pa xwỹnh ã amnhĩ jarẽ? Tĩrtũm pix na rãhã ho rãhã pa xwỹnh. Anẽ.

Hãmri nẽ kamã gryk xàj kên rūnh kwỹ kawrà ho ri hprôt nẽ kot ho htak o hpĩr kaxyw. Nom nhũm ra amnhĩ tã mẽ omu nẽ mẽ kêp akunok nẽ Tĩrtũm mã amnhĩ jarênh xà hã ixkreja rũm kato nẽ ma tẽ.

9

Jejus kot no hkre xwỹnh o mex ã harênh

Makre 8.22-26

¹ Hãmri nhũm Jejus ma tẽ pa mẽ hkôt ri mẽ ixpa ho mẽ ixpa xwỹnhjaja ma hkôt mra. Hãmri nẽ nhỹri no hkre xwỹnh pumu. Katorxã nhõxã hkre rũm na pre no hkre nẽ kato. Hãmri nẽ ra hprêk nẽ hpri kamã àhwỹr o hkrĩ. ² Tã hãmri pa mẽ mra nẽ omu nẽ hã Jejus kukja nẽ kãm:

—Kwa mẽmoj mýrapê na pre we myti něj no hkre nẽ kato? Xà tãm kot tanhmã amnhĩ tomnuj to mýrapê nã? Xà katorxã rỹ hipêêxã kot amnhĩ tomnuj mýrapê na pre ã no hkre nẽ kator anẽ? Anẽ.

³ Hãmri nhũm mẽ inhmã:

—Nà mẽhõ kot tanhmã amnhĩ tomnuj to mýrapê no hkre nẽ kator kêt. Âm Tĩrtũm kot ho mex nhũm

mě kot ja hã omunh kaxyw na pre ã no hkren kator aně. Tã kot paj Tirtũm nhỹ hã no ho mex ka mẽ ja hã ixpumu. Na pa hte kormã jar pikap ri ixpa ri Tirtũm mã tanhmã amnhĩ nhĩpêx mex to ho ri ixpa. ⁴ Na htem arĩgro hã mẽmoj tã apê nhũm kamãt nhũm mẽ kãm ure nê ãpênh kêt nê. Ja pyrã nê na pu htem kormã pahťir ri jar pikap ri papa ri Tirtũm mã tanhmã amnhĩ nhĩpêx to ho ri papa. Tã kot puj mẽ nhỹrmã ty hãmri nê axte jar ã amnhĩ nhĩpêx anhỹr kêt nê. Jakamã kwa kër pu mẽ ri jar pikap ri papa ri kãm tanhmã amnhĩ nhĩpêx mex to ho ri papa. ⁵ Na pa hte ã kãm amnhĩ nhĩpêx anhỹr jao te kanê hirã mex pyrã nê ixprĩ hã mẽ kãm Tirtũm kot amnhĩ nhĩpêx o amnhĩrit mex o ri ixpa. Aně.

⁶ Nhũm pre ã Jejus mẽ inhmã amnhĩ jarěnh aně. Hãmri nê kot nohkre xwỹnhhta no o mex kaxyw hikõt nê argõx mẽ nê ho gyw kwỹ nhĩpêx nê kãnhmã xa nê ho no kukõ. ⁷ Hãmri nê kãm:

—E ma gõ gjěnh xà pê Siroe hwỹr tẽ nê kamã amnhĩ no kuhõ. Aně.

Mě pakapěr kãm Siroeja mẽ kot kãm: “Nhỹhỹm mẽnh xwỹnh” anhỹr jarěnh pyrãk. Tã nhũm Jejus hwỹr kumẽ nhũm ma hwỹr tẽ. Hãmri nê kamã amnhĩ no hã gyw kuhõnh pa jao rĩt mex kurê kumrêx. Hãmri nê rĩt mex ã amnhĩ pumu nê hkĩnh tỹx nê ma akupỹm õrkwỹ hwỹr tẽ. ⁸ Hãmri nhũm õrkwỹ kuri mẽ õrkwỹ xwỹnhjaja nê mẽ kot pry kamã ahwỹr o hkrĩ hã omunh xwỹnhjaja amnhĩ jaěr pê ra rĩt mex ã omu nê tee ri hã axpẽn kukja nê axpẽn mã:

—Kwa pěr pry kamã ãhwỹr o hkrĩ xwỹnhhta na nã? Aně.

⁹ Hãmri nhũm kamã mẽ hkwyjaja mẽ kãm:

—Tỹ. Tãm na. Aně.

Nhũm kamã mẽ hkwyjaja mẽ kãm:

—Nã tãm kêt. Axtem mẽhõ na. Te kot urãk nom tãm kêt. Aně.

Anhỹr o ri axpẽn mã harê. Tã nhũm tãm mẽ kãm amnhĩ jarê nê mẽ kãm:

—Tỹ pa kẽnã. Pa na pa pre hte inhno hkre nê ri ixpa htã ra ixrĩt mex. Aně.

¹⁰ Hãmri nhũm mẽ tee ri kuma nê kãm:

—Kwa no tanhmã na ka we amnhĩ to nê ra arĩt mex?

¹¹ Aně nhũm mẽ kãm:

—Nã mẽ kot kãm “Jejus” anhỹr xwỹnhhta na ixwỹr tẽ nê ixkaxyw gyw kwỹ kagõ nê ho inhno kukõ. Hãmri nê mẽ kot gõ mã: “Siroe” anhỹr xwỹnhhta kamã ixte amnhĩ no kuhõnh kaxyw hwỹr inhmã aně pa ma hwỹr tẽ nê kamã amnhĩ no kuhõ nê ixrĩt mex kurê kumrêx. Aně.

¹² Hãmri nhũm mẽ kuma nê kãm:

—No nhỹhỹm na ato mex xwỹnhja ma tẽ? Aně.

Hãmri nhũm mẽ kãm:

—Koněn. Ixte nhỹhỹm htẽm xà hkõt omunhre hã. Aně.

¹³ Hãmri nhũm mẽ kuma nê ma Parijew nhõ xwỹnhjê hwỹr o mõ nê mẽ kãm harê. ¹⁴ Nê mẽ kãm:

—E ot pa mẽ awỹr jahti ho tẽ. Na xep Jejusja jarãhã akupỹm kãm no ho mex. Mẽ panhõ arĩgromnu htã nhũm hã no ho mex. Aně.

¹⁵ Hãmri nhũm mẽ tee ri mẽ kuma nê myta pumu nê kãm:

—E mẽ inhmã amnhĩ jarě. Tanhmã na ka pre we amnhĩ to nê anohkre nê akrĩ htã ra ano mex nê? Aně.

Hãmri nhũm mẽ kãm:

—Nã na pre Jejus gyw o inhno kukõ nê inhmã aně pa gõ ho amnhĩ no kuhõ nê ixrĩt kurê kumrêx. Aně.

¹⁶ Hãmri nhũm mẽ kuma nê tee ri Jejus ã axpẽn kukjêr o kuhê nê axpẽn mã harěnh o:

—Kwa mẽ panhõ arĩgromnu hã kot ho mex jakamã kệp Tirtũm rũm mẽ pahwỹr wrỹk xwỹnh kêt. Ām kot amnhĩ tomnuj xwỹnh kẽnã. Aně.

Nhũm mẽ hkwyjaja harěnh o:

—Kwa nà. Kot amnhĩ tomnuj xwýnh ronhỹx àhpumunh tỳx kôt no ho mex kêt nê. Anê.

¹⁷ Hãmri nê hpãnhã no mex xwýnhhta mã kãm:

—No ka? Ate kot ano ho mex xwýnh ã amnhĩ tã harênh jakamã mēhō hã na ka hkamnhĩx? Mēhō na wehe? Anê.

Hãmri nhũm mē kãm:

—Konên. Mãn kēp Tĩrtũm kapēr jarênh o ri mē pa xwýnh mãn. Hã na ã inhno ho mex anê. Anê.

¹⁸ Hãmri nhũm mē tee ri kuma nê axpên mã:

—Kwa pēr aa nohkre hkêt kênã. Na pre âm amnhĩ to hêx o pa. E kwa pu mē amnhĩ wýr katorxà nê hipêêxà wa hã karō kê wa man tē nê tanhmã mē pamã harênh to. Anê.

Hãmri nê wa hã karō ¹⁹ nhũm wa mē hwýr tēn axà nhũm mē wa kãm:

—Pa. E mē inhmã mēmoj jarê. Xà we wa akrata na âm ja nà? Xà tãm na ka hte wa nohkre nê kator ã harê? Kwa tanhmã na we amnhĩ to nê ra rít mex? Anê.

²⁰ Hãmri nhũm wa mē kãm:

—Ỡy wa ixkra kênã. Na pre wa ixpê nohkre nê kato. ²¹ Tã ra tanhmã amnhĩ to nê ra rít mex. No wa ixte kot ho mex xwýnhhta pumunh kêt. Kwa mē tãm mãn hkukja nê ama. Ra àptàr kênã. Kê tãm mãn mē amã tanhmã amnhĩ jarênh to ka mē ama.

²² Anhýr o mē kãm wa hkrata jarê. No âm wa kãm mē uma nê ã mē kãm kapēr anê nê mē kãm Jejus nhĩxi jarênh kêt nê. Na pre Parijew nhō xwýnhjaja ra Jejus nê mē kãm kapēr nê mē kãm:

—Ka mē atō Tĩrtũm kot mē pakaxyw Jejus xãm ã harê hãmri nê axte Tĩrtũm kapēr o mē ahkre xà hã ixkreja wýr agjêx kêt kumrêx nê rĩ amnhĩ pumu.

²³ Anhýr o nê mē hkurê jakamã nhũm wa mē umaj ã mē kãm hkra jarênh anê nê kot ho mex xwýnh nhĩxi jarênh kêt nê. ²⁴ Hãmri

nhũm mē axte amnhĩ wýr no mex xwýnhhta ã karō nê kãm:

—Kwa akatát kôt mē inhmã amnhĩ jarê. Ate kot ano ho mex ã harênh xwýnhhta na kot amnhĩ tomnuj pix o pa xwýnh kênã kot kêt ano ho mex. Jakamã kwa Tĩrtũm noo mã akatát kôt mē inhmã amnhĩ jarê nê axêx kêt nê. Anê.

²⁵ Hãmri nhũm mē kãm:

—Ko ixte ja hã omunh kêt. Âm ja pix na ixte omunh. Na pa pre inhno hkre nê ri ixpa htã ra ixrít mex nê. Anê.

²⁶ Hãmri nhũm mē tee ri kot amnhĩ jarênhja ã kuma nê kãm:

—No tanhmã na we mytita amnhĩ to nê amã ano ho mex? Anê.

²⁷ Hãmri nhũm tee ri axte mē kot hã hkukjêr ã mē kuma nê mē kãm:

—Kwa ra ixte mē amã âm hãmri amnhĩ jarênh griã. Tã ka mē inhma nê âm inhma nê arĩ hã ixkukja. Mãn ka mē amã hkôt amnhĩ xunhwýr prãm hã na ka mē aprĩ hã ixkukja nà? Mē ate kot amnhĩ nhĩpêx ã aprĩ hã harênh mar nê hkôt amnhĩ xunhwýr prãm xàj na ka mē aprĩ hã amã harênh prãm nê. Anê.

²⁸ Hãmri nhũm mē tee ri kuma nê kamã gryk nê. Nê hã kãm akir nê kãm:

—Tk. Ka na ka hte kapēr kôt amnhĩ nhĩpêx. No kêt mē pajaja na pa htem finat Mojes kapēr kôt pix mã amnhĩ nhĩpêx. ²⁹ Mojes mã na pre hte Tĩrtũm kapēr o pa. Jakamã pa htem âm hkôt pix mã amnhĩ nhĩpêx o ri ixpa. No ate kot ano ho mex ã harênh xwýnhhta mē ixte omunh kêt. Nê mēhō nhỹ hã kot tanhmã amnhĩ nhĩpêx to ho pa xwýnhja mē ixte omunh kêt. Anê.

³⁰ Hãmri nhũm tee ri mē kuma nê mē kãm:

—Kwa kot inhmã inhno ho mex nhũm ra ixrít mex tã ka mē tee ri hkukamã ajamaxpêr nê mēhō nhỹ hã kot ã amnhĩ nhĩpêx anhýr o pa hã omunh kêt ã amnhĩ jarê. ³¹ Mē pahte Tĩrtũm kot amnhĩ nhĩpêx ã omunh mex. Kojã mēhō kot

amnhĩ tomnuj xwỳnh mẽmoj tã kuwỳ nhũm kuma nê ãm kuma. No kêt mẽ kot hkôt ri amnhĩ nhĩpêx xwỳnhjaja. Nê mẽ kot kãm mex o mex ã harênh xwỳnhjaja na htem mẽmoj tã kuwỳ nhũm mẽ kuma nê mẽ kãm tanhmã mẽmoj nhĩpêx to rỳ mẽ kãm mẽmoj gô. ³² Tã aa mẽ pahte mēhō kot mẽ no ho mex ã harênh mar kêt tã nhũm ã Jejus inhmã inhno ho mex anê. ³³ Kêp Tĩrtũm kwỳ hkêt ronhỹx pre inhno ho mex kêt nê. Anê.

³⁴ Hãmri nhũm mẽ kuma hãmri nê kãm:

—Tk. Kwa pěr ãm akator kôt ate amnhĩ tomnuj o ri apa htã na ka ã mẽ inhmã akapěr anê. Kwa ixkreja rũm akato nê ma atēm kurê kumrêx.

Anhỹr o kãm kapěr hãmri nê mẽ amnhĩ nê hano nhũm kato nê ma tē.

³⁵ Tã nhũm Jejus ra mẽ kot amnhĩ nê hanor ã harênh ma nê ma hapêr o tē nê nhỹri omu. Hãmri nê amnhĩ tã hkukja nom te nhãm mēhō hã hkukjêr pyrã nê kãm:

—Pa? Xàn ka ra Tĩrtũm kot mẽ awỳr mẽnh xwỳnhhta amnhĩ kaxyw hkôt ajamaxpêr nã? Anê.

³⁶ Hãmri nhũm kormã kot no ho omunh kêt jakamã kêp Jejus ã omunh kêt nê. Na pre kormã no hkre nê ãm kapêr pix ma. Tã ra akupỹm rĩt mex nom kormã no ho omunh kêt nê. Jakamã nhũm Jejus hwỳr tē nê ã kãm kapêr anê nhũm omu nê kormã kêp Jejus ã omunh kêt nê kãm:

—Tỳ kot kaj inhmã ahkre pa omu nê hkôt amnhĩ xãm kurê kumrêx. Anê.

³⁷ Hãmri nhũm kãm:

—Kwa paa. Ixte amã ixkapêr xwỳnhhta pa na pa. Anê.

³⁸ Hãmri nhũm kãm:

—Kwa xōwehe Pahihti? Nà kot paj amnhĩ kaxyw akôt pix mã ijaxpêr nê akôt pix mã amnhĩ nhĩpêx o ri ixpa. Anê.

Hãmri nê kutã hkôn krã ho tēm nê nhỹ nê kãm mex o mex ã harênh o nhỹ. ³⁹ Hãmri nhũm Jejus kãm:

—Nà ixte mẽ apiitã tanhmã mẽ ajarênh to kaxyw na pa pre kaxkwa rũm man mẽ awỳr wrỳ. Ahpỹnhã mẽ amã ixprãm xwỳnhjê jarênh nê ahpỹnhã mẽ kãm ixprãm kêt xwỳnhjê jarênh kaxyw. Mẽ kãm ixprãm kêt xwỳnhjaja kot hpri hã Tĩrtũm kapêr mar mex kêt tã na htem htỹx ri kot mar mex ã amnhĩ jarênh o pa. Jakamã te mẽ nohkre xwỳnhjaja kot amnhĩ nhĩpêx pyrãk. Nom koja mẽ Tĩrtũm kapêr ma nê ixkôt amnhĩ xunhwỳr japêr. Hãmri nê te ra rĩt mex pyrãk o amnhĩ nhĩpêx. Jao ra hpri hã Tĩrtũm kapêr mar mex o pa. Anê.

⁴⁰ Nhũm pre ã Jejus kãm kapêr anê. Nhũm Parijew nhō xwỳnh kwỳjaja kot kuri mar o kuhê xwỳnhjaja ã kapêr anhỹr ã kuma nê amnhĩ tã kãm:

—Kwa nã. Xà we mẽ pajaja na ka ã mẽ inhnokre hã mẽ ijarênh anê? Xà mẽ ixte ixpri hã Tĩrtũm kapêr mar mex kêt ã na ka mẽ ijarê nã? Anê.

⁴¹ Hãmri nhũm mẽ kãm:

—Ỗy kop apu mẽ ate aprĩ hã kapêr mar mex kêt ã amnhĩ jarênh ronhỹx ja mẽ amã mex nê. Tã mẽ ate aprĩ hã mar mex ã amnhĩ to axêx o apa jakamã na ka mẽ ra amnhĩ tomnuj tỹx nê. Na hte Tĩrtũm ja hã mẽ apumu nê amnhĩm mẽ ate amnhĩ tomnuj xwỳnh ã mẽ ajarê. Anê.

10

ôwêhti jarênh

Matêwre 9.36, 12.11-12; Rukre 15.3-7

¹ Nhũm Jejus arĩ Ijaew mã kapêr nê mẽ kãm:

—E pa mẽ amã awjarê ka mẽ inhma nê amnhĩ krã him haxàr tỹx nê ho apa. Mẽ hkrit ôwêhti kot paj mẽ amã harê ka mẽ inhma. Na hte ôwêhti jamãr o pa xwỳnhjaja

ôwêhti apkur kaxyw mẽ o pa hãmri nhũm kamàt nhũm akupỹm kahê hwỳr mẽ o pa. Kahê jakwakreja àm pixii. Tã koja mẽhõ kahê xà hkôt hwỳr àr kêt nê axtem nê tẽ nê nhỹhỹnh kahê hã api nê ôwêhti hwỳr àr japêr nhũm mẽ omu nê kot hkwy ho àhkĩnh ã omunh kurê kumrêx.

²—No ôwêhti jamãr o pa xwỳnhja na hte mẽ kurom katàt kôt kahê jakwakre rũm ôwêhti hwỳr agjê.

³ Nhũm kahê xà jamãr xwỳnhja amnhĩ wỳr omu nê kãm kahê xà rênh kurê kumrêx nhũm axà. Na hte apkati mẽ ma nhỹhỹm apkur kaxyw mẽ o pa. Nê nojarêt nê mẽ kãm akir. Ahpỹnhã tanhmã mẽ hixi kute hã mẽ omunh xà hkôt mẽ kãm àkjêr o pa. Hãmri nhũm mẽ kuma nê hwỳr mra nê hã pikuprõnh pa nhũm mẽ ho hapõj nê ma nhỹhỹm ri mẽ apkur kaxyw mẽ o pa. ⁴ Ma mẽ apkur kaxyw nhỹhỹm mẽ o pa. Nhũm ôwêhti ra kot kapêr mar mex jakamã ma àmnhĩx ri hkôt apkur o pa.

⁵—Na hte hamãr o pa xwỳnh pix kapêr ma nê hkôt pa nê nhãm mẽhõ hkôt ri pa hkêt nê. Kot kapêr mar kêt jakamã tee ri kuma nê umaj axkakhũm nê hprõt nê ma mra. Na hte ôwêhti ã amnhĩ nhĩpêx anê. Anê.

Jejus te kêp ôwêhti gjênh xà hã hakwakre pyræk

⁶ Nhũm pre ã Jejus mẽ kãm ujarênh anê. Nê ujarênhja kamã amnhĩ kwỳjê jarê nê mãânên tãm amnhĩ jarê. Nom mẽ amnhĩ tã kuxi nê mẽ kãm amnhĩ jarênh o te ho ôwêhti jarênh pyræk nhũm mẽ tee ri kuma nê mar mex kêt nê. ⁷ Jakamã nhũm axte mẽ kãm awjarê nê mẽ kãm:

—E pa ixprĩ hã mẽ amã ixu-jarênhta jarê ka mẽ inhma. Te ixpê ôwêhti jagjênh xà hã hakwakre pyræk. Kwa mẽ ja ma nê amnhĩ krã him haxàr tỳx nê. ⁸ Na pre ra ixkukamã mẽ ohtõ nê te ãm hãmri

mẽ amã Tirtũm kapêr jarênh pyræk o mẽ akôt ri pa. Nom mẽ amã hêx o pa. Te mẽ kot ôwêhti o àhkĩnh xwỳnhhta kot amnhĩ nhĩpêx pyræk. Nom na hte ôwêhtija àm hamãr xwỳnh pix kapêr ma nê nhãm mẽhõ kapêr mar kêt nê. Ja pyrã nê mẽ kot ixkôt amnhĩ xunhwỳr xwỳnhjaja na htem Tirtũm kapêr o hêx o mẽ pa xwỳnhjê ma nê ãm mẽ kuma nê mẽ hkôt amnhĩ nhĩpêx kêt nê. Na htem ãm ixkapêr pix ma nê ixkôt pix mã amnhĩ nhĩpêx o pa.

⁹⁻¹⁰ —Te ixpê ôwêhti gjênh xà hã hakwakre pyræk. Na hte ôwêhti mẽmoj punuj pymaj kahê hwỳr agjê nê kamã mex nê kuhê. Nê kurũm hapõj nê ma apkur o pa. Ja pyrã nê mẽ kot ixkôt amnhĩ xunhwỳr xwỳnhjaja koja mẽ ixkukwak ri hkĩnh nê mex nê hamakêtkati nê pa ho pa. Nê nhỹrmã Tirtũm mẽ wa ixri htĩr tũm nê pa ho pa. Ja kaxyw na pa pre man mẽ awỳr pika hwỳr wrỳ.

—No ôwêhti ho àhkĩnh xwỳnhjaja na htem amnhĩm ho ahkĩ nê kupa nê ma amnhĩm o pa. Tã mẽ kot Tirtũm kapêr o hêx o mẽ pa xwỳnhjaja te mẽ kot jajaja kot amnhĩ nhĩpêx pyræk. Anê.

Jejus te kêp ôwêhti jamãr xwỳnh pyræk

Eprêw 13.20; Apokarip 7.17

¹¹ —Nê ôwêhti jamãr mex xwỳnhja koja nhỹri mẽhõ kêp ôwêhti hõxpĩr kaxyw hwỳr htêm ã omu nê wa hã axpu. Nhũm ho àhkĩnh mã xwỳnhhta ôwêhti jamãr xwỳnh pĩ nhũm ôwêhti nê ty. Tã ixkwỳjaja hamakêtkati nê mex nê pa kaxyw na pa pre amnhĩ grõnh kôt mẽ hwỳr wrỳ. Jakamã kot paj te ôwêhti jamãr xwỳnh kot amnhĩ nhĩpêx pyræk o amnhĩ nhĩpêx.

¹²⁻¹³ —Nê na htem tõhã ôwêhti jamãr xwỳnh nhỹhỹm pa kaxyw nê mẽhõ mã amnhĩre nhũm wakre kamã kãm hkrit jamãr o pa. Kàxpore pix prãm xaj kãm hamãr

o pa. Jakamā koja nhỹhỹnh mry xoprê ra hwỳr kato nhũm amnhĩ wỳr omu nê umaj ôwêhti re nê ma hprôt nê tẽ. Kãm ôwêhti japê hkêt âm kãm htĩr pix prãm xàj ôwêhti mả hamaxpêr kêt nê rer pa nê ma tẽ. Nhũm mry xoprêta ôwêhti hwỳr hprôt nê hkwỳ pynê nhũm hkwỳ umaj axkahkũm nê hprôt nê ma mra. No kêt pa na te ixte ôwêhti mả hamaxpêr kêt nê kot rer nê ma hprôt nê htẽm xwỳnhhta pyrakhêt. Kot paj aa ixkwỳjê rer kêt nê. Kot paj mễ hkôt ixpa ho ixpa rảhả nê.

¹⁴⁻¹⁵ —Te ixte ôwêhti jamảr xwỳnh mex pyrakhêt jakamả na pa hte urakh nê ahpỹnhả mễ kot ixkôt amnhĩ xunhwỳr xwỳnhjê pumunh mex o ri mễ hkôt ixpa. Te mễ kêp ixkrit ôwêhti pyrakhêt nhũm te ixpê mễ hamảr mex o ri mễ hkôt ixpa nê aa mễ rer kêt xwỳnhhta pyrakhêt.

—Nê mễ kot ixkôt amnhĩ xunhwỳr xwỳnhjaja ra mễ ixte amnhĩ nhĩpêx kôt axpên pumunh mex. Nê mễ inhmả axpên japêê. Te Inhĩpêxả mễ wa inhmả axpên japê pyrakhêt. Tả kot paj nhỹrmả mễ nê tanhmả amnhĩ nhĩpêx to.

¹⁶ —Mễ kot ixkôt amnhĩ xunhwỳr xwỳnhjaja piitả kêp Ijaew pix kêt. Kojả Ijaew kêt xwỳnh kwỳjaja mảănên ixkapêr ma nê ixkôt amnhĩ xunhwỳ nê ixkôt amnhĩ nhĩpêx. Jao ra te kêp ixkrit ôwêhti pyrakhêt. Tả kot paj mễ ho ixpimrảả tả mễ ho tipxi nê mễ hamảr o ri mễ hkôt ixpa.

¹⁷ —Nê mễ kot ixkôt amnhĩ nhĩpêx o mễ pa xwỳnhjaja mễ mex kaxyw na pa pre amnhĩ grônkhêt mễ hwỳr wrỳ. Jakamả kot paj nhỹrmả mễ nê ty. Tả inhmả mễ nê ixtyk puma hkêt jakamả na Inhĩpêxả kãm ijapêê. Kojả akupỹm ixto ixtĩr. ¹⁸ Kop apu inhmả mễ nê ixtyk prảm kêt ronhỹx mễ kãm ixkurê xwỳnhjaja tee ri kãm ixpĩr prảm kaprỳ. Nom ixte mễ kot ixkôt amnhĩ nhĩpêx xwỳnhjê nê amnhĩ grônkhêt mễ

hwỳr ixwrỳk kênả. Jakamả kot paj arĩ mễ kãm amnhĩ grônkhêt amnhĩ gô nê arĩ mễ kãm xa nhũm mễ ixpĩ. Nom kot paj akupỹm ixtĩr. Mễhỏ kojả tanhmả ixto nê ixpĩr o ixpĩ? Nả kojả mễhỏ ixpĩr o ixpĩr kêt nê. Inhĩpêxả nhỹ hả kot paj nhỹrmả ả amnhĩ nhĩpêx anê nê akupỹm ixtĩr. Anê.

Nhũm pre ả Jejus mễ kãm amnhĩ jarênh anê. ¹⁹ Hảmri nhũm Ijaew tee ri ả kot amnhĩ jarênh anhỹr ả kuma nê kê axte axpên kwỳm ri tanhmả harênh to ho kuhê. ²⁰ Nê kamả mễ hkwỳjaja harênh o:

—Tk. Kwa mễ mar kêt nê. Satanastĩ nhỹ hả na hte htỹx ri ả mễ pamả amnhĩ jarênh anhỹr o pa. Anê.

²¹ Hảmri nhũm mễ hkwỳjaja mễ kuma nê mễ kãm:

—Nả kot anhỹr kêt. Xả na htem Satanastĩ nhỹ hả ả kapêr mex anê nê ả mễ no hkre xwỳnhjê ho mex anê? Nả kot anhỹr kêt. Satanastijả ukaprĩre hả. Anê.

Ijaew nhỏ pahijaja kot Jejus kaga hả mễ harênh

Juāw 5.18, 8.59

²² Tả nhũm ra amgrả hapêx pa mễ ixpê Ijaew akupỹm krĩ pê Jerujarê kamả axpên wỳr akuprỏ. Axte mễ ixte mễ ixkĩnh kaxyw axpên wỳr akuprỏ. Amnepêm mễ inhĩgêjtjaja kot akupỹm Tĩrtũm mả amnhĩ jarênh xả hả ixkre ho mex pa nê ho Tĩrtũm wỳr mả hamaxpêr nê hả ixkĩnh ả arĩgrojả ả pa mễ hwỳr akuprỏ. ²³ Hảmri nhũm Jejus ma mễ ixkôt Tĩrtũm mả amnhĩ jarênh xả hả ixkreta wỳr tẽ no âm hwỳr ảr kêt nê. Âm ixkre hpu hả kahê xả kape hả ri pa. Mễ kot kãm: “Pahi finat Sarumảw pa xả” anhỹr xwỳnhhta kamả ri pa. ²⁴ Hảmri nhũm kê ra mễ inhỏ pahijaja omu nê hả akuprỏ nê hêx rom kãm kapêr nê kãm:

—Kwa tokyx aprĩ hả mễ inhmả amnhĩ jarê. Xả apê Tĩrtũm Kra na ka nả? Xả ka na pre Tĩrtũm

mē ixkaxyw axām? Kwa aprī hā mē inhmā amnhī jarē pa mē ama. Mon ka hte aprī hā mē inhmā amnhī jarēnh kēt nē? Na pa mē tee ri ate amnhī nhīpēx ā apumu nē akukamā ijamaxpēr rūnh kumrēx o ri ixpa. Xā ām hāmri apē Tīrtūm kot mē ixkaxyw axām xwýnhhta na ka? Anē.

²⁵ Hāmri nhūm mē kām:

—Tk. Ra ixte mē amā amnhī jarēnh xohtō htā ka mē inhma nē ām inhma. Na pa hte xatā Inhīpēēxā nhỹ hā mē amā mē ate aa mēmoj pumunh kēt kwý ho anhỹr o ri ixpa ka mē ja hā ixpumu nē ām ixpumu nē ixkōt ajamaxpēr kēt nē. ²⁶ Mē apē ixkwý hkēt jakamā na ka mē ixkōt ajamaxpēr kēt nē. Te mē apē ixkrit ōwēhti pyrāk kēt. ²⁷ Ixkwýjaja na te ho ōwēhti kot hamār xwýnh kapēr mar nē hkōt ri pata pyrā nē ixkapēr ma nē ixkōt amnhī nhīpēx o pa. Ixpē mē ō pahihiti hā mē kot ixpumunh mex jakamā na htem ixkōt amnhī nhīpēx mex o pa. Ixte ja hā mē omunh mex nē. ²⁸ Koja mē nhỹrmā htyk tā no ām ixkukwak ri akupým htīr hāmri nē Tīrtūm mē wa ixri htīr tūm nē pa ho pa nē aa hapēx kēt nhūm mēhō ixpē mē utār kēt nē. Te inhīhkra hpo nhīpōk ri mē hkrī nhūm te mē hā inhīhkra pikamýr pyrāk nhūm mēmoj tee ri ixpē tanhmā mē ho hprām kaprý. ²⁹⁻³⁰ Inhīpēēxā tām kot inhmā mē ōr kēnā. Hihitýx o kot mē piitā mē hakrenh par jakamā koja mē inhīhkra po nhīpōk ri hkrī nē määnēn Inhīpēēxā nhīhkra hpo nhīpōk ri hkrī. Te ixpē Inhīpēēxā Tīrtūm pyrāk jakamā mēhō kot wa ixpē wa inhīhkra rūm mē utā? Nā amrakati kumrēx.

Anhỹr o mē kām amnhī jarē. ³¹ Hāmri nhūm mē te kēp Tīrtūm pyrāk ā amnhī jarēnh ā kuma nē kamā gryk týx nē. Hāmri nē kot kēn o htak kaxyw ra kaxyw hkwy

kawrà ho ri hprōt. ³² Hāmri nhūm amnhī tā mē omu nē mē kām:

—Kwa ra ixte Inhīpēēxā nhỹ hā mē amā aa mē ate mēmoj pumunh kēt kwý ho anhỹr rax o ixpa. Jao tanhmā mē ho mex to pix o ri ixpa. Tā ka mē axtem nē ā inhīpēx anhỹr kaxyw. Anē.

³³ Hāmri nhūm mē kām:

—Nā ā ate amnhī nhīpēx anhỹr ja mýrapē hkēt. Kēt apē mē inhīō htā ri axtem nē te apē Tīrtūm pyrāk ā amnhī jarēnhja mýrapē na pa mē kēn o atak kaxyw. Na pu htem ā amnhī jarēnh anhỹr o papa hkēt nē. Anē

³⁴ Hāmri nhūm mē kām:

—No ām hāmri ixte ā amnhī jarēnh anhỹr kēnā. Tanhmā na Tīrtūm kapēr ā kaga htūm kot ja jarēnh to wehe? Na pre Tīrtūm Ijaew nhō pahijē mā kapēr nē mē kām:

E mē ate inhỹ hā mē ho amnhīptār jakamā te mē apē pa ixpē Tīrtūm pyrāk.

Anhỹr o kot mē harēnh. ³⁵ Ām hāmri na Tīrtūm kapērja. Tām kot ā mē harēnh kot anhỹr. Mē kot ý hā mē kām kapēr jakamā te mē kēp urāk ā mē harēnh anhỹr kēnā.

³⁶ Tā tām kot ā mē harēnh anhỹr tā hpānhā mē akaxyw pa ixpē Kra hā ixām nē mē awýr inhmēnh nhūm ixwryk nē ixpē Kra hā amnhī jarēnh tā ka mē ja hā inhma nē ām inhma nē ixkōt ajamaxpēr kēt nē. Kwa mon ka mē ja hā ixpumunh nē ixkōt ajamaxpēr kēt nē? ³⁷ Kot paj Inhīpēēxā mē wa ixāhpumunh kōt mē amā aa mē ate mēmoj pumunh kēt kwý ho anhỹr kēt ka mē ja hā ixpumu nē mē rī kam nē māmri ixkōt ajamaxpēr kēt nē. ³⁸ Mē amā ixkapēr mar prām kēt tā kwa ixte Tīrtūm pyrā nē aa mē ate mēmoj pumunh kēt kwý ho anhỹr ā ixpumu nē Inhīpēēxā mē wa ixte amnhī nhīpēx tipxi hkōt ajamaxpēr. Anē.

³⁹Hãmri nhùm mē kuma nhùm ja mē kēp omnuj tỳx nē. Te kot Tĩrtũm pyrãk ã amnhĩ jarēnhja nhùm mē kēp omnuj nē. Jakamã nhùm mē ra kot unēnh nē ixkre rũm ho kator nē kapôt ã mēnh nē kēn ho htak kaxyw nhùm kē axte mē kēp akunok nē ma nhỹhỹm tē.

Jejus kot Jotãw nhĩhkjē hã ri pa hã harēnh

⁴⁰Tã nhùm Jejus ma tē nē pyhti pē Jotãw ã rē. Pa mē hkôt ri ixpa ho ixpa xwỹnhjaja ma hkôt mō. Finat Juãw Paxis kot Tĩrtũm mã wam mē hkrã kumrãr o pa xata wỳr. ⁴¹Hãmri nhùm mē ohtô nē mē ixwỳr mra nē Jejus kapēr ma nē kot tanhmã amnhĩ nhĩpēx to hã omunh o kuhê. Hãmri nē hã tanhmã axpēn mã kapēr to nē axpēn mã:

—Kwa ãm hãmri na pre finat Juãw Paxisja mē pamã Jejus jarēnh o pa. Aa kot mē pamã mē pahte mēmoj pumunh kēt kwỳ ho anhỹr kēt tã ãm xatã hkukamã mē pamã jarēnh o pa. Kēp Tĩrtũm Kra hã Juãw rom hihtỳx o hihtỳx ã harēnh o pa. Nē Tĩrtũm kot mē pakaxyw ãm xwỹnh ã nhùm mē pamã harēnh o pa. Nã ãm hãmri na pre ã mē pamã harēnh anē. Anē.

⁴²Hãmri nhùm mē ohtô nē amnhĩ kaxyw Jejus kôt hamaxpēr nē hkôt amnhĩ xunhwỳ.

11

*Rajare htyk jarēnh
Juãw 5.21-29, 6.40*

¹Rôm nhùm krĩ pē Petãn kamã mēhō my pē Rajareja ra à htỳx nē nō. Na pre htōx wa hamēxkrut. Hō kēp Matre nhùm hō kēp Marir. ²Marir na pre kormã arĩgro hō hã kot Jejus o mex kaxyw mē hkuxwaxà ho hkuxwa nē amnhĩ kĩ ho hpar pōnh kaxyw. Nom kormã. Jakamã nhùm wa hkamyja wa kēp à htỳx nē nō. ³Hãmri nhùm wa tee ri hkukamã hamaxpēr nē ma krĩ hō hwỳr Jejus wỳr mēhō mē nhùm

ma hwỳr tē. Nē hwỳr pōj nē omu nē kãm:

—Pa Pahihti. E ot pa awỳr tē. Na ra amã akrãmnhwỳ japē htỳx xwỹnhta à htỳx nē nō nhùm htōx wa tee ri hkukamã hamaxpēr nē awỳr inhmē pa tē. Kwa tokyx pu ma hwỳr tē ka akupỹm wa kãm ho mex nã? Anē.

⁴Hãmri nhùm kuma nē kãm:

—Nã à htỳx nē nōr tã koja akupỹm mex. Mē kot akupỹm mex ã harēnh mar hãmri nē Tĩrtũm mē wa ixtã hpijaam nē wa ixihitỳx o wa ixihitỳx ã wa ixpumunh kaxyw na ã à htỳx nē nōr anē. Nē pa ixpē Tĩrtũm Kra hã akupỹm ho mex ã ixpumunh nē ixkôt hamaxpēr kaxyw na ã à htỳx nē nōr anē. Anē.

⁵Na pre Jejus kãm Rajare mē htōx wa mē hapē nē. ⁶Tã à htỳx ã harēnh ma nē hwỳr mōr tokyx anhỹr kēt nē. Pa mē arĩ amnhĩm hikranh xà kamã ri ixpaja o ixtã axte apkati axkrut. ⁷Hãmri nhùm rĩ kormã hwỳr nojarēt nē mē inhmã:

—E ma pu mē jarãhã akupỹm Jutej kamã Rajare hwỳr mō nē omu. Anē.

⁸Hãmri pa mē tee ri ja hã kuma nē kãm:

—Kwa ham mē panhō pahijaja kot kēn o atak o apĩr mã tã ka ra akupỹm mē hwỳr akrã. Kwa pu mē hwỳr pamōr kēt nē nã? Anē.

⁹Hãmri nhùm mē inhmã:

—Nã koja mē kormã tanhmã ixto hkēt nē. Kormã ixte Tĩrtũm mã tanhmã amnhĩ nhĩpēx to jatur xãm mēnhre hã. Te ixte kormã arĩgro hã ixrĩt mex nē ixpa pyrã nē kormã Tĩrtũm kot mēmoj tã inhmã karō xà hkôt pix mã tanhmã amnhĩ nhĩpēx to ho ri ixpa. ¹⁰Tã kot paj hatur xãm kumē nhùm te myt àr nhùm ra kamãt kô pyrãk nhùm mē rĩ kormã tanhmã ixto nē ixpĩ. Jakamã e ma pu mē hwỳr. Koja mē tokyx tanhmã ixto hkēt nē. Anē.

¹¹Hãmri nē mē inhmã Rajare jarēnh o:

—Na mẽ pahkràmnhwỳ Rajareta ra gōr nē nō. Tā kot puj mẽ ma hwỳr mō pa kumra. Anē.

¹²⁻¹³ Ra htyk ã omunh tā ã mẽ inhmã harēnh anē. Pa mẽ kuma nē ixtỳx ho ãm òt nē nōr ã hkamnhĩx nē kãm:

—Kwa mǎn ra akupỹm amnhĩ kãm hamak o mōr jakamã na ra amnhĩ krit nē gōr nē nō. Kwa pu mẽ awjanã nē hwỳr pamōr kêt nē nà? Anē.

¹⁴ Hāmri nhũm mẽ inhma nē hprĩ hã mẽ inhmã harē nē mẽ inhmã:

—Nà na pre ty. ¹⁵ Nom kormã à nē hikwỳta ã na pa hwỳr inhmōr kêt nē. Tā kot paj ma hwỳr mō nē hã mẽ amã ixàhpumunh tỳx ã amnhĩ to amnhĩrit. Ka mẽ ja hã ixpumu nē amnhĩ kaxyw ixkôt ajamaxpēr tỳx o ri apa. ã mẽ ate amnhĩ nhĩpêx anhỳr kaxyw na pa kormã à nē nōr ã hwỳr inhmōr kêt nē. E ma pu mẽ hwỳr. Anē.

¹⁶ Hāmri nhũm mẽ inhĩo pē Tomas pihpohti tee ri ã kapēr anhỳrja ã kuma nē mẽ inhmã:

—Tōe ma pu mẽ hkôt. Kê mẽ mamrĩ hkôt mẽ pahto hpimràatã mẽ panhĩmex pa ri. Anē.

¹⁷ Tã pa mẽ ma hkôt mẽ hwỳr mō nē ra Rajare nhō krĩ hwỳr ixpōx o mō hāmri nē harēnh ma. Ra htyk nhũm mẽ kot haxãr ã arĩgro pē kwat ã harēnh ma. ¹⁸⁻¹⁹ Nhũm Matre mẽ Marir wa hkamy ho hamak xàj arĩ mỳr o hkrĩ. Jakamã nhũm Ijaew kwỳjaja Jerujarē rũm ma wa hwỳr mra. Mẽ kot wa kãm kapēr nhũm tokyx akupỹm tãm wa hkrã kaxyw nhũm mẽ wa hwỳr mra. Wa ò krĩ pē Petãnja Jerujarē hwỳr ãm 3 kirōm pix jakamã nhũm mẽ ma wa hwỳr mra nē wa kuri wa kãm kapēr o hkrĩ. ²⁰ Rôm nhũm Matre Jejus hpōx o mōr ã harēnh ma nē kànhmã xa nē man mẽ ixkutã tē. Nò nhũm Marir arĩ mỳr o nhỹ nē hkôt htēm kêt nē. ²¹ Hāmri nhũm Matre mẽ ixkutã tē nē mẽ ixkaxpa nē Jejus pumu nē mỳr kamã kãm kapēr nē kãm:

—Hêxta gàa nē Pahihti. Na pre ra wa ixkamy wa ixpê ty. Kop apu jar mẽ ixkôt ri apa ronhỹx pre htyk kêt nē. Xê mon ka pre we tokyx mẽ ixwỳr atēmre hkêt nē? ²² Tã na pa arĩ akôt ijamaxpēr tỳx nē. Kot kaj mẽmoj tã tanhmã Tirtũm wỳr to nhũm ama nē tanhmã amã mẽmoj to. Ra ixte ja hã apumunh mex kênã. Anē.

²³ Hāmri nhũm Jejus kuma nē kãm:

—Kwa tee ri ajamaxpēr nē akaprĩ hkêt nē. Koja akamy akupỹm war amã htĩr kãm ga. Anē.

²⁴ Hāmri nhũm kuma nē kãm:

—Ma koja anē. Nhỹrmã Tirtũm kot mẽ piitã akupỹm mẽ ho htĩr xà hã arĩgrota ã koja akupỹm htĩr. Anē.

Kamy akupỹm htĩr ã harēnh mar tã Jejus kot akupỹm ho htĩr tokyx anhỳr ã hkamnhĩx kêt nē ã kãm kapēr anē.

²⁵⁻²⁶ Jakamã nhũm kãm:

—Nà pa na ixpê akupỹm mẽ ho mẽ htĩr xwỳnh. Jakamã mẽ kot amnhĩ kaxyw ixkôt hamaxpēr nē ixkôt amnhĩ xunhwỳr xwỳnhjaja koja mẽ htyk tã koja mẽ hkarō Tirtũm mẽ wa ixri htĩr tũm nē mex nē pa ho pa. Xà ate ja kaxyw ixkôt ajamaxpēr tỳx nà? Anē.

²⁷ Hāmri nhũm Matre kuma nē kãm:

—Xê nhũm. Apê Tirtũm Kra hã na pre mẽ ixkaxyw axãm. Ka na pa htem amnhĩ wỳr akãm ijamak o ixpa. Anē.

Hāmri nhũm Jejus kãm:

—Nà ãm hāmri na ka ã ijarēnh anē. E ma akupỹm tē nē atōx mã anē kê tokyx man ixwỳr tē pa omu. Anē.

²⁸ Hāmri nhũm kuma nē ma akupỹm tē. Hāmri nē Marir wỳr axà nē kãm Jejus jarē. Kôt mẽ hkrĩ xwỳnhjê hkax ã kãm harē nē kãm:

—An xê hāmri amỳr kêt nē. Na ra mẽ pajahkre xwỳnhhta hpōx o mō nē mũtar nhỹ nē atã karō. Anē.

²⁹ Hāmri nhũm kuma nē kànhmã xa nē ma mẽ ixwỳr htēm kurē

kumrêx. ³⁰ Hâmri pa mẽ kormã krîm ixpôx kêt nê. Arî Matreja Jejus wÿr htêm xà kamã arî ixkrî. ³¹ Jakamã nhùm Matre ma tẽ nê Marir mã Jejus jarê nhùm kato nê man mẽ ixwÿr tẽ. Hâmri nhùm Jerujarê rûm wa hwÿr mẽ mrar xwÿnhjaja omu nê htÿx kot hkamy hã pika pumunh nê mÿr kaxyw htêm ã hkamnhîx nê man hkôt mra. ³² Hâmri nhùm Marir mẽ hkukamã mẽ ixwÿr tẽ nê Jejus pumu nê hpar pê tẽm nê kãm kapêr pê hipô nê mÿr o nhÿ. Nê kãm:

—Hêxta gàa nê Pahihti. Na pre ra wa ixkamy wa ixpê ty. Kop apu jar mẽ ixkôt ri apa ronhÿx pre htyk kêt nê. Hô mon ka pre we tokyx man mẽ ixwÿr atêmre hkêt nê? Anê.

³³ Hâmri nhùm Jejus kuma nê mÿr ã omu. Nê hkôt mẽ mrar xwÿnhjaja mẽ mÿr ã mẽ omu nê kãm mẽ hkaprî nê. ³⁴ Hâmri nê mẽ kãm:

—Nhÿri na ka prem haxà? E mẽ hwÿr ixto tẽ pa omu. Anê.

Hâmri nhùm mẽ kuma nê ma hã pyka hwÿr mẽ ixto mō ³⁵ nhùm Jejus mẽ urak nê hwÿr mÿr o tẽ ³⁶ nhùm mẽ ja hã omu nê axpên mã:

—Kwa mân kãm hapê htÿx. Hã na ho ama nê hwÿr mÿr o tẽ. Anê.

³⁷ Nom nhùm mẽ hkwyjaja axtem nê mẽ kãm:

—Tk. Ra kot no hkre xwÿnhta o mex tâ mo na we tokyx man kormã htîr ri hwÿr htêm nê omunh nê akupÿm ho mex kêt nê? Anê.

Jejus kot akupÿm Rajare ho htîr ã harênh

³⁸ Tã pa mẽ ra kên kre kamã mẽ kot Rajare jaxàr xàta wÿr ixpôx o mō nhùm Jejus hkaprî nê hwÿr tẽ nê omu. Nhùm prem ra kên rax o hitom ³⁹ nhùm omu nê mẽ kãm:

—E mẽ akwyjaja nhãm inh mã nê kahê xà mẽ. Anê.

Hâmri nhùm Matre kuma nê tee ri hamaxpêr nê kãm:

—Xê ma Jejus. Mẽ ri ã anhÿr kêt nê. Ra htyk ã arîgro kêp 4 kênã. Mãn

ra hkato k nê hkro htÿx kumrêx. Anê.

⁴⁰ Hâmri nhùm kuma nê kãm:
—Kwa ri ã ajamaxpêr anhÿr kêt nê Matre. Na pa ra amã ixkapêr nê amã ixkapêr o: “Kot kaj amnhî kaxyw ixkôt ajamaxpêr tÿx nê. Hã kot kaj Tirtum mẽ wa ixihtÿx o wa ixihtÿx xàja pumu.” Anhÿr o amã ixkapêr. Jakamã kwa ja kaxyw Tirtum mẽ wa ixkôt mân ajamaxpêr tÿx nê hkêt wehe. Anê.

Hâmri nhùm kuma nê kãm:
—Ma ãm hãmri na ka inh mã akapêr. Ma kot paj kaxyw war amã ijamaxpêr tÿx nê. Anê.

⁴¹ Rôm nhùm mẽ kãm nhãm kên jakwa kre kahê xà mẽ. Hâmri nhùm Jejus Tirtum mã amnhî jarênh kaxyw kànhmã kaxkwa hwÿr rît nê kãm:

—Pa Papaj. Nà na pa hte tanhmã mẽmoj tâ awÿr to ka inh mã nê tanhmã inh mã mẽmoj nhîpêx to. Amex o amex Papaj. ⁴² Na ka hte ã inh mã amnhî nhîpêx anê. Tã pa jajê noo mã ã amã ixkapêr anê. Ate inhmar nê tanhmã Rajare hto nhùm mẽ kot ja hã ixpumunh nê ixte anhÿ hã pix mã tanhmã amnhî nhîpêx to ho ri ixpa hã ixpumunh kaxyw. Nê ka ate mẽ hwÿr inh mã nê ã apumunh kaxyw. Anê.

⁴³ Nhùm pre ã Tirtum mã kapêr anê. Hâmri nê kÿx pê Rajare mã kapêr nê kãm:

—Pa Rajare. Kwa tokyx kànhmã nhÿ nê amnê mẽ ixwÿr tẽ nê akato. Anê.

⁴⁴ Puh nhùm akupÿm htîr nê hkupu xà rãhã tẽ nê mẽ ixwÿr kato nê xa. Arî hkuk nê ìhkra nê hpar kupu rãhã mẽ ixwÿr kato nê xa. Hâmri nhùm Jejus mẽ kãm:

—Kwa mẽ atô nê kupu xà hpôt kê ma akupÿm ôrkwÿ hwÿr tẽ. Anê.

⁴⁵ Hâmri nhùm mẽ kot Marir mẽ Matre wa hwÿr mrar xwÿnh kwÿjaja ã Jejus kot Rajare nhîpêx anhÿr ã omu nê amnhî kaxyw hkôt hamaxpêr nê hkôt amnhî xunhwÿr

kuré kumrēx. ⁴⁶ Nom nhūm mē hkwyjaja axtem nē omu nhūm ja mē kēp omnuj nē. Jakamā nhūm mē ma Parijew nhō xwýnhjê hwýr mra nē mē kām harē.

Mē kot Jejus pīr ā amnhī grōnh

Matēwre 26.1-5; Makre 14.1-2; Rukre 22.1-2

⁴⁷ Hāmri nhūm Parijew nhō xwýnhjaja tee ri Jejus kot akupým Rajare ho htīr ā harēnh ma hāmri nē patre krāhtūmjê mē amnhī wýr mē inhō juisti ho akuprō nē axpēn mā Jejus o kapēr punuj pē hā axpēn mar o hkri. Hāmri nhūm mēhō mē kām:

—Kwa tanhmā kot puj mē ho? Na ra mē kām mēmoj pumunh kēt kwý ho anhýr rax o pa. ⁴⁸ Kot puj mē ām omu nē tanhmā ho hkēt nhūm mē pahkwýjaja kot ā amnhī nhīpēx anhýr ā omu nē htýx ām hāmri ā kot amnhī nhīpēx anhýr ā hkamnhīx. Hāmri nē amnhī kaxyw hkōt hamaxpēr nē hkōt amnhī xunhwý. Jao ra amnhī kaxyw kēp mē ō pahihtī hā ām. Koja mē ā amnhī nhīpēx anē nhūm Rōm kamā pahihtija mē kot kator nē hpānhā Jejus xām ā harēnh ma. Hāmri nē gryk xāj mē pahwýr ō pôristi hkwy rē nhūm mē pahwýr mra nē mē panhīmex pa nē Tirtūm nhōrkwy grānh pa. Kwa tanhmā kot puj wem tokyx amnhī nē ho? Anē.

⁴⁹ Hāmri nhūm Kajpas mē kām kapēr. Kajpasja na pre angrāja kamā kēp mēō patre nhō pahi maati. Jakamā mē kām:

—Nā na pa ra ijamaxpēr. Kwa mē inhma. ⁵⁰ Nā kot puj mē hpīr tokyx anē kê tapxipix ty pu mē arī mýrpē pahpiitā pajamakétkati nē ri papa. Anē.

⁵¹ Nhūm pre ā mē kām kapēr anē. Nom amnhī krā hkōt ā mē kām kapēr anhýr kēt nē. Arī kēp mēō patre krāhtūmjê nhō pahi maati jakamā Tirtūm nhý hā Jejus kot Ijaew nē tykja kukamā ā harēnh anē. Nom ja hā amnhī pumunh

kēt nē. ⁵² Na pre Jejus mē ixpē Ijaew pix nē htyk kēt nē. Krī piitā hkōt Tirtūm krajē nē na pre ty. Mē piitā mē kot axpēn to hkwy nē ri axpēn to pa kaxyw na pre mē nē ty. ⁵³ Hāmri nhūm ā Kajpas mē kām kapēr anē nhūm mē inhō pahijaja kuma nhūm ja mē kām mex nē. Jakamā nhūm mē kot tanhmā Jejus ā āmnēnh to nhūm mē kot mē kām tanhmā hpīr to kaxyw ā axpēn mar anhýr o pa. ⁵⁴ Jakamā nhūm Jejus axte mē noo mā ri pa hkēt nē. Hāmri ma krī pē Epraī hwýr ma mō. Pa mē hkōt ixpa ho ixpa xwýnhjaja ma hkōt ixpa. Epraīja kapōt ā krī na pre. Jakamā pa mē ma hwýr mō hāmri nē kamā ri ixpa.

⁵⁵ Tā nhūm arīgro pē Pasja ra ahtēp o mō. Amnepēm finat Mojes kot Ejit rūm mē panhīgētjê kator mā hamaxpēr kaxyw na pa pre htem hā ixkīnh kaxyw Pas ā Jerujarē hwýr akuprō. Na pa pre htem hwýr pōj nē kamā Tirtūm noo mā mē inhmex kaxyw tanhmā amnhī nhīpēx to.

⁵⁶⁻⁵⁷ Jakamā nhūm ra Ijaew ohtō nē ma Jerujarē hwýr pa. Nē kām Jejus pumunh prām xāj Tirtūm mā amnhī jarēnh xā hā ixkre wýr mra nē hwýr agjē nē kamā hapēr nē axpēn mā:

—Kwa nok? Xā koja mē hpakīnh wýr mōr kēt nē nà? Anē.

Nhūm Parijew nhō xwýnhjê mē mē inhō patre krāhtūmjaja haxwýja hapēr o kuhē. Nom mē kot axtem nē unē nē haxār kaxyw. Jakamā mē kām hā karō nē mē kām:

—E kēr ka mē nhýri Jejus pumu nē man mē ixwýr mra nē mē inhmā harēnh kuré kumrēx. Anē.

12

Marir kot Jejus kuxwa hā harēnh
Matēwre 26.6-13; Makre 14.3-9; Rukre 7.36-50

¹ Tā nhūm ra Pas wýr apkati grēre. Ra hwýr apkati kēp 6. Jakamā pa mē ma akupým krī pē

Petān wŷr Jejus kōt mō. Jejus kot akupŷm Rajare ho htŷr xwŷnhŷta mē ō krŷ hwŷr pa mē akupŷm mō nē Rajare nhōrkwŷ hwŷr pōj nē mē hwŷr agjē. ² Hāmri nhŷm mē Jejus pumu nē hkŷnh nē. Nē mē inhmā mēmoj mex nhŷpēx pa mē ixàpkur o ixkrŷ. Nhŷm Rajare haxwŷja mē ixkutā apkur o nhŷ. Nhŷm htōx Ma-tre mē inhmā mēō ho pa nē mēsti hā unhwŷr o xa. ³ Hāmri nhŷm wa htōx Marir Jejus kukamā tanhmā hamaxpēr to nē hamaxpēr o:

—Ma kot paj tokyx mē kot mē ixpē hpŷr kukamā mē hkuxwaxà ho hkuxwa. Anē.

Hāmri nē kàx rax kām mē hkuxwaxàja py nē o tē. Ra rit kahti hkōt hitep xà nhŷm kupy nē hwŷr o tē. Mē kot mēmo htwŷm o mē hkuxwaxà mex nhŷpēxja na pre hā kàxpore xohtō rax kumrēx. Jakamā nhŷm kupy nē Jejus wŷr o tē nē hpar ā hkapŷr pa nē amnhŷ krā hkŷ ho hpar grā ho nhŷ nhŷm ra ixkre kuxwa htŷx kumrēx. ⁴ Hāmri nhŷm mē inhŷō pē Jut Kariotja. Kot kormā mē ĩhkram Jejus nhōr mā xwŷnhŷta tee ri ā kot amnhŷ nhŷpēx anhŷr ā omu nhŷm ja kēp omnuj nē ⁵ nhŷm mē inhmā:

—Tk. Kwa pēr mē hkuxwaxà hā kàxpore xohtō rax kumrēx tā nhŷm ri axtem nē Jejus par ā hkapŷr pa. Mo na ma o htēm nē ho wēnē nē hpānhā kàxpore ho rax nē hpyr nē ho mē kēp amrakati xwŷnhjē nhŷpēx kēt nē? Kot ho wēnē ronhŷx hpānhā kàxpore ho rax kumrēx nē kupy nē ho mēmoj japrōr rax o rax. Tā axtem nē amarŷ Jejus par ā hkapŷr pa. Anē.

⁶ Te kām mē kēp amrakati xwŷnhjē japē pyrāk tā kām mē hapē hkēt. Ām hēx rom ā kapēr anē. Na pre hte mē inhmā mē ixkàxpore jamŷ nē mē ixkōt mē inhmā hamār o pa. Nom tōhā axtem nē mē ixpē hkwy ho ahkŷ nē ho amnhŷm mēmoj japrō. Jakamā Marir kot mē hkuxwaxà ho hapēx par ā omu

nē tee ri hpānhā kàxpore rax mā hamaxpēr nē kamā gryk nē ā mē inhmā kapēr anē. ⁷ Hāmri nhŷm Jejus amnhŷ tā hamaxpēr ā omu nē kām:

—Tk. Kwa tanhmā kām akapēr to hkēt nē. Ixtyk nhŷm mē kot ixkuxwa hkukamā na ā inhŷpēx anē. ⁸ Na hte mē kēp amrakati xwŷnhjaja mē akōt pa rāhā nē. Ka mē amā mēmo arŷgro hā tanhmā mē ho ajuta hto hprām nē rŷ mē ho ajuta nē mē kām mēmoj gō. No kēt pa kot paj ri mē akōt ixpa ka mē ixto mex ry ho apa hkēt nē. Kot paj tokyx mē apiitā mē are. Jakamā ām hāmri na ā inhŷpēx anē. Anē.

Patre krāhtŷmjaja kot Rajare hā àmnēnh ā harēnh

⁹ Rōm nhŷm Jerujarē nhō xwŷnhjaja ra Jejus Petān wŷr hpōx ā harēnh ma nē kot omunh mā ma hwŷr mra. No ām tapxipix pumunh mā hwŷr mrar kēt nē. Māānēn kot akupŷm ho htŷr xwŷnhŷta pumunh mā nhŷm mē ma hwŷr mra. ¹⁰⁻¹¹ Na pre ra Ijaew ohtō nē Jejus kot akupŷm Rajare ho htŷr ā harēnh ma hāmri nē mē inhō patre kaga nē Jejus kōt amnhŷ xunhwŷ. Jakamā nhŷm patre krāhtŷmjaja tee ri ja hā mē omu nē axpēn mā:

—Nà kot puj mē Jejus pix pŷr kēt nē. Kot puj mē māānēn hkōt Rajare pŷ hāmri nhŷm wa hixi hamē mē kēp hapēx japēr. Anē.

Jejus kot Jerujarē hwŷr àr ā harēnh

Matēwre 21.1-11; Makre 11.1-11; Rukre 19.28-40

¹² Tā nhŷm apkati nhŷm Ijaew Jerujarē kamā mē hkŷnhja kryx nē Jejus ra mē hwŷr àhtēp o mōr ā harēnh ma. ¹³ Hāmri nē axpēn mā:

—Kwa ma pu mē mō nē pō hkwy jakà nē kutā ho mra. Anē.

Hāmri nē hkwy jakà nē hamŷ nē ma kutā ho mra. Hāmri nē ra hkaxpa nē omu nē hkŷnh nē. Nē kām:

Pa. Nà ām hāmri na ka mẽ ixwỳr mō. Tirtūm na pre mẽ ixwỳr amē ka ā amōr anē.

Tirtūmja mex o mex. Ām hāmri na pre mẽ ixwỳr amē.

Kot kaj mẽ inhō pahi hpānhā mẽ ixto amnhīptār o ri apa. Anē.

¹⁴ Hāmri nhūm Jejus nhỹri jumēnre pumu nē hwỳr tē nē hā nhỹ nhūm mẽ pimràatā ma akupỳm Jerujarē hwỳr mō. Tirtūm kapēr ā kagā htūm ra kot ja jarēnh kot:

¹⁵ Pa Jerujarē nhō xwỳnhjaja. Kwa mẽ tee ri amnhī kukamā ajamaxpēr ho amā ma hkēt nē.

Ota mẽ anhō pahi nyw ra mẽ awỳr jumēnre hā nhỹ nē hpōx o tē. Anē.

¹⁶ No Jejus kōt mẽ ixpa ho mẽ ixpa xwỳnhjaja pa mẽ ā kot amnhī nhīpēx anhỹrja ā omu nē tee ri hkukamā ijamaxpēr nē axpēn mā:

—Kwa mo na ri ā amnhī nhīpēx anē nē jumēnre hā nhỹ nē mẽ hkōt mō? Anē.

Tā nhūm arīgro hō hā ty nē akupỳm kaxkwa hwỳr api pa prem hā omu hāmri nē kormā Tirtūm kapēr ā kagā htūm kot hkukamā ā harēnh kot anhỹrja mā ijamaxpēr kurē kumrēx. Hāmri nē axpēn mā harēnh o:

—Kwa ām hāmri na Tirtūm kapēr ā kagā htūm kot ra ā Kraja jumēnre hā ỳr nē mẽ hkōt mōr ā hkukamā kot harēnh anhỹrta. Anē.

¹⁷ Hāmri nhūm Jejus kot Rajare mā kapēr pē akupỳm ho htūr ā omunh xwỳnhjaja arī nhām mẽ hkwỳjē mā ujarēnh o pa. ¹⁸ Nhūm mẽ kuma nē ma Jejus wỳr omunh mā mra. ¹⁹ Hāmri nhūm Parijew nhō xwỳnhjaja tee ri ja hā mẽ omu nē axpēn mā:

—Kwa na pu mẽ tee ri Jejus nē mẽ kām pakapēr kaprỳ nhūm mẽ pamar kēt nē ra piitā hkōt amnhī nhīpēx o pa. Kwa nà. Anē.

Ijaew kēt xwỳnhjē jarēnh

²⁰ Tā nhūm ra Gres kwỳjaja Ijaew kōt hkīnh kaxyw ma Jerujarē hwỳr

mē hkōt mra nē mẽ ĩhkō hā Tirtūm mā mex o mex ā harēnh o hkōt mra. ²¹ Jakamā nhūm mẽ nhỹri mẽ inhīō pē Firipti pumu nē hwỳr mra. Firipti kēp pyka pē Garirej kamā krī pē Pesēj nhō xwỳnh nhūm Gres nhō xwỳnhjaja omu nē hwỳr mra nē kām:

—Pa. Kwa na pa mẽ inhmā Jejus pumunh prām nē. Tanhmā kot pa wem amnhī to nē omu nē kām ixkapēr? Anē.

²² Hāmri nhūm mẽ kuma nē ma Andre hwỳr mẽ o mra nē kām mẽ harē. Hāmri nē wa ma Jejus wỳr mẽ o mra nē kām mẽ harē nē kām:

—Pa Pahihti. Ota Gres nhō xwỳnhjaja kām apumunh prām nē awỳr mō. Mē pahkīnhā mẽ kēp Ijaew kēt tā mẽ kām apumunh prām nē. Anē.

Jejus kot amnhī kukamā amnhī jarēnh

Matēwre 16.24-28; määnēn Apokarip 2.10, 12.11

²³ Hāmri nhūm Jejus mẽ omu nē mẽ kām tanhmā amnhī jarēnh to. Kot mẽ ohtō nē mẽ nē htyk nhūm mẽ kukwak ri Tirtūm wa kuri htūr tūm nē pa ho pa hā mẽ kām amnhī jarē nē mẽ kām:

—Nà na ra ixyk ā arīgro hwỳr apkati grēre. Ixpē Tirtūm kot mẽ akaxyw ixām xwỳnh jakamā kot paj mẽ apiitā mẽ anē ty hāmri nē akupỳm ixtūr nē ma kaxkwa hwỳr akupỳm api. ²⁴ Mē axohtō nē nhỹrmā Tirtūm mẽ wa ixri atūr tūm nē apa ho apa kaxyw kot paj ā amnhī nhīpēx anē. Kwa mẽ ā ixte amnhī jarēnh anhỹrja ma nē mẽ amnhī krām haxār tỳx nē ri hā apa. Te ixte mēmo hy kot amnhī nhīpēx pyrāk. Na htem pikap hagiē nhūm te htyk pyrā nē pika kaxwỳnh kām hikwỳ. Tā gaa nē higrōt nē hprēk nē ô. Nē ô rax kumrēx. Hyja pyxire nē hikwỳ htā kamā ô rax kumrēx. Nom koja mẽ hkre hkēt nē nhūm ô hkēt nē. Na hte ā mēmo hyja amnhī nhīpēx anē. Ja pyrā nē kot paj mẽ

anê ixyk kêt nê te mê kot mêmoy hy hkre hkêt nhũm hprêk nê ô hkêeta pyrak ka mê ixkukwak ri Tirtũm mê wa ixri atĩr tũm nê apa hkêt nê. Jakamã kot paj mê anê ty nhũm mê ijaxà. Hãmri pa akupỹm ixtĩr ka mê axohtô nê ixkukwak ri wa ixri atĩr tũm nê apa ho apa.

²⁵—Nê koja mê ixpĩ pa mê anê ty. Tã mê ate ixkôt amnhĩ nhĩpêx o apa xwỹnhjaja. Koja mê ixtã mê apar mã tã kwa kêt ka mê atyk pymaj ixkaga hkêt nê. Kwãr mê mãmri tanhmã ixtã mê ato ka mê nhỹrmã Tirtũm mê wa ixri axte amnhĩ xà kamã ajamak kêt kumrêx nê atĩr tũm nê amex nê apa ho apa. No kot kaj mê ixkĩnhã jar amã amex pix prãm hãmri nê nhỹrmã wa ixri atĩr tũm nê apa hkêt nê. ²⁶ Kot kaj mê ã ixkôt amnhĩ nhĩpêx anhỹr o ri apa hãmri nhũm mê kot inhĩpêx pyrak o mê anhĩpêx. Hãmri ka mê nhỹrmã ma ixkôt kaxkwa hwỹr api nê kamã ixri atĩr tũm nê apa ho apa. Hãmri nhũm Inhĩpêêxã ixtã mê apumu nê mê ato mex kumrêx. Anê.

Tirtũm kot Jejus mã kapêr ã harênh

Matêwre 3.17, 17.5

²⁷ Tã nhũm Jejus tee ri amnhĩ kukamã htyk mã hamaxpêr nê hkaprĩ htỹx nê. Nê hkôt mê ixpa ho mê ixpa xwỹnhjê mã amnhĩ jarê nê mê inhmã:

—Hêxta waa nê. Na pa tee ri amnhĩ kukamã ijamaxpêr. Nê tee ri amnhĩ xà htỹx kamã ijamak kukamã ijamaxpêr pê ra amnhĩ kamã ixkahak nê. Nom ixte pika piitã hkôt mê kot ixkôt amnhĩ xunhwỹr xwỹnhjê nê ixyk kaxyw ixwryk kênã. Jakamã kot paj Inhĩpêêxã kot mê kêp ixpytãr kaxyw tanhmã amnhĩ to hwỹr to hkêt nê. Anê.

²⁸ Hãmri nê hpãnhã Hipêêxã mã kapêr nê kãm:

—Pa Papaj. ãm mêmoy pixi na inhmã hprãm. Kê mê piitã ixkukwak ri amex o amex ã apumu. Ja na kêt inhmã hprãm tỹx kumrêx.

Anhỹr o Tirtũm mã amnhĩ jarê. Hãmri nhũm kuma nê kaxkwa rũm kãm kapêr. Kỹxpê kãm kapêr nê kãm:

—Nà na pa pre ra ã mê kãm amnhĩ to amnhĩrit anê nhũm mê ja hã ixpumu. Tã kot paj axte akukwak ri amnhĩ to amnhĩrit nhũm mê piitã axte inhmex o inhmex ã ixpumu. Anê.

²⁹ Nhũm pre ã Tirtũm Jejus mã kapêr anê. Hãmri nhũm mê kot mê ixkuri mar o kuhê xwỹnhjaja kuma no ãm hprĩ hã kot kãm tanhmã kapêr toja mar mex kêt nê. Nê htỹx ho ãm mêmoy tã hkamnhix. Jakamã nhũm mê hkwỹjaja xpên mã:

—Kwa mo na wehe? Na mãn katôtok nã? Anê.

Nhũm mê hkwỹjaja mê kãm:

—Nà na katôtok kêt. Tirtũm kapêr o wryk xwỹnh mãn tanhmã kãm kapêr to. Anê.

³⁰ Hãmri nhũm Jejus mê kãm:

—Nà Tirtũm tãm na inhmã kapêr. Nom pa ixte mar kaxyw inhmã kapêr kêt nê. Mê kajaja mê ate ixtã mar kaxyw na kỹx pê ã inhmã kapêr anê. Anê.

Hãmri nê mê kãm:

³¹—E hãmri. Kot paj tokyx mê apiitã mê ate amnhĩ tomnuj pãnhã amnhĩrer kaxyw tanhmã amnhĩ nhĩpêx to. Jao mããnên Satanasti pê hihtỹx xà ho ijapêx. ³² Koja mê pĩ kahpa hã inhô pa kỹxpê ajêt. Tirtũm kot mê awyr inhmênh tã nhũm mê ã inhĩpêx anê pa ty. Jakamã koja pika piitã hkôt mê ohtô nê ixkôt amnhĩ xunhwỹ nê amnhĩ kaxyw inhmã hamaxpêr rãhã ho pa. Anê.

³³ Mê ixte tanhmã htyk to hã harênh mar kaxyw nhũm pre ã mê inhmã amnhĩ jarênh anê. ³⁴ Hãmri nhũm mê kot mê ixkuri mar o kuhê xwỹnhjaja tee ri kot htyk ã amnhĩ jarênhja ma nê kãm:

—Kwa mẽ ixte amnhĩ wỳr kamā ijamak o ixa xwỳnhja htĩr tũm nē pa ho pa xwỳnh na. Tĩrtũm kapēr ā kagā htũm kot ā harēnh kot anhỳr tā ka ā ri mẽ kot apĩr nhũm atyk ā amnhĩ jarēnh anē. Ate Tĩrtũm kot mẽ ixwỳr amēnh xwỳnh ā amnhĩ jarēnh tā ā ri atyk ā amnhĩ jarēnh anē. Kwa xà apē mẽ ixte amnhĩ wỳr kamā ijamak o ixa xwỳnh kēt? Anē.

³⁵ Hāmri nhũm mẽ kuma nē amnhĩ tā mẽ kām:

—Tỳ ixpē tām kēnā. Tā kot paj tokyx mẽ are. Jakamā kēr ka mẽ ixte arĩ mẽ akamā ixa ri ixkõt amnhĩ xunhwỳ nē amnhĩ kaxyw ixkõt ajamaxpēr o ri apa. Te ixpē kanē hpòk pyrāk jakamā na pa hte mẽ kām Tĩrtũm kapēr o mẽ ahkre o ri ixa. Nom kot paj kritpēm mẽ akõt ixa ry hkēt nē. Jakamā kwa kēr ka mẽ tokyx te mẽ kot kanē hpòk nhĩrā kamā ri mẽ pa xwỳnh kot amnhĩ nhĩpēx pyrā nē Tĩrtũm kõt amnhĩ nhĩpēx o ri apa. Kormā mẽ akõt ixa ri. Kot paj tokyx ma mō nhũm te ra kamāt kō pyrāk. Na hte kamāt kō kamā mẽ pa xwỳnhjaja tee ri rīt mex mǎ nom rīt mex kēt nē. Nē mẽmoj pumunh mex kēt nē. ³⁶ Jakamā kwa ri tokyx ixte arĩ mẽ akamā ixa ri amnhĩ kaxyw inhmā ajamaxpēr nē ixkõt amnhĩ xunhwỳ. Te ixpē kanē hpòk nhũm kamā mẽ arīt mex pyrāk. Jao ixpyrā nē te mẽ apē kanē hpòk nhĩrā mex pyrāk o amnhĩ nhĩpēx. Nē ixpyrā nē tām ri amnhĩ nhĩpēx o apa. Anē.

Nhũm pre ā mẽ kām kapēr anē hāmri pa mẽ kēp ixkato nē ma nhām mō.

Mē hkwỳjaja kot Jejus kõt hamaxpēr kēt ā mẽ harēnh

³⁷ Na pre hte Jejus mẽ noo mǎ mẽ kot aa mẽmoj pumunh kēt kwỳ ho anhỳr rax o pa. Tā nom nhũm mẽ ohtō nē hā omu nē ām hā omu nē kēp Tĩrtũm kot mẽ pahwỳr mẽnh xwỳnh ā hkõt hamaxpēr kēt nē.

³⁸ Nom ra mẽ hkukamā Tĩrtũm nhỹ hā kapēr jarēnh o pa xwỳnh pē finat Ijaisja mẽ hkukamā ja hā mẽ harē nē hā kagā. Nē hā kagāja o:

Pa Pahi Maati. Nà ra ixte mẽ kām ajarēnh o ixa ryy htā no nhũm mẽ inhma nē ām inhma.

Nē mẽ kot axihtỳx o axihtỳx ā ajarēnh mar tā no ām ajarēnh ma nē amnhĩ kaxyw akõt hamaxpēr kēt nē. Anē.

³⁹ Mē kām Tĩrtũm kapēr mar prām kēt jakamā na prem mǎnēn Jejus kēp Tĩrtũm kot mẽ pahwỳr mẽnh xwỳnh hkõt hamaxpēr kēt nē. Nhũm pre finat Ijaisja axte mẽ hkukamā ja hā mẽ harē nē mẽ hā kagā. Nē hā kagā ho:

⁴⁰ Na pre Tĩrtũmja tanhmā amnhĩ nē mẽ hkrā hto nhũm mẽ hkõt hamaxpēr kēt nē.

Ra mẽ kot hihtỳx o hihtỳx ā omunh tā omu nē ām omu.

Nē mẽ kot kapēr mar tā amnhĩ tomnuj kaga hkēt nē.

Nē Tĩrtũm kot mẽ nē mẽ kot amnhĩ tomnuj o hapēx prām xāj hkõt amnhĩ xunhwỳr kēt nē. Anē.

⁴¹ Kormā Jejus mẽ hwỳr wrỳk kēt ri nhũm finat Ijaisja hpimtir kām kot amnhĩ to rax kumrēx ā omu nē hkukamā ā harēnh nē hā kagā anē.

⁴² Hāmri nhũm Ijaew krāhtũm kwỳjaja hkwỳjē rom amnhĩ kaxyw Jejus kõt hamaxpēr nē hkõt amnhĩ xunhwỳ. Tā Parijew nhō xwỳnhjaja kot ā mẽ kot amnhĩ nhĩpēx anhỳr ā mẽ harēnh mar pymaj ja hā amnhĩ to amnhĩrīt kēt nē. Mē kot Tĩrtũm kapēr o mẽ ahkre xà hā ixkreja nē mẽ kator pymaj nhũm mẽ kām amnhĩ to amnhĩrīt kēt nē. ⁴³ Na prem hamaxpēr o:

—Nà kot paj ja hā amnhĩ to amnhĩrīt nhũm mẽ amnhĩ nē ixtomnuj nē. Hāmri nē amnhĩ pyrā nē xpēn mǎ inhmex ā ijarēnh kēt nē.

Anhỳr o mẽ umaj amnhĩ kukamā hamaxpēr o pa. Nom Tĩrtũm tām

kot amnhĩm mẽ mex ã mẽ harēnhja nhũm mẽ hkukamã hamaxpēr kēt nē.

Jejus kot Hipêêxà nhỹ hã kapēr ã harēnh

⁴⁴ Nhũm Jejus axte mẽ kãm kapēr nē kÿx pē kapēr nē mẽ kãm:

—Nà koja mēhō amnhĩ kaxyw ixkôt hamaxpēr hãmri nē ixkôt pix mã hamaxpēr kēt nē. Määnēn amnhĩ kaxyw kot mẽ awÿr inhmēnh xwÿnhja kôt hamaxpēr. ⁴⁵ Wa ixte amnhĩ nhĩpêxa te tĩpxi pyrãk jakamã koja mẽ tanhmã ixte amnhĩ nhĩpêx to hã ixpumu nē te kot Tĩrtũm kot amnhĩ nhĩpêx ã omunh pyrãk.

⁴⁶ —Nē te ixpê kanê hpôk nhũm inhĩrã kamã mẽ apa pyrãk kaxyw na pre Inhĩpêêxà mẽ awÿr inhmē pa mẽ awÿr wrÿ. Ixte kapēr o mẽ ajahkre ho ri mẽ akôt ixpa kaxyw. Jakamã koja mēhō amnhĩ kaxyw ixkôt hamaxpēr nē ixkôt amnhĩ xãm hãmri nē te kanê hpôk nhĩrã kamã rĩt mex o pa pyrãk o amnhĩ nhĩpêx. Jao amnhĩ nhĩpêx nyw o amnhĩ nhĩpêx o pa. ⁴⁷⁻⁴⁸ No mẽ kot ixkapēr mar nē ãm mar xwÿnhjaja te määnēn Inhĩpêêxà kapēr mar nē ãm mar pyrãk. Mÿrapê koja mẽ nhÿrmã ma kuwy hwÿr pa nē mẽ kot amnhĩ tomnuj mÿrapê kamã pa ho pa. Tã no ã mẽ ate amnhĩ nhĩpêx anhÿr o ri mẽ apa kaxyw na pa pre mẽ awÿr ixwrÿk kēt nē. Ixte mẽ ate amnhĩ tomnuj pãnhã amnhĩrer par kaxyw na pa pre mẽ awÿr wrÿ.

⁴⁹ —Nē na pa hte amnhĩ krã hkôt tanhmã ri mẽ amã ixkapēr to ho ri ixpa hkēt nē. ãm kot mẽ awÿr inhmēnh xwÿnhja nhỹ hã na pa hte tanhmã mẽ amã ixkapēr to ho ri mẽ akôt ixpa. ⁵⁰ Tã mẽ kot Tĩrtũm kapēr mar nē amnhĩ kaxyw hkôt hamaxpēr xwÿnhjaja koja mẽ nhÿrmã wa ixri htĩr tũm nē mex nē pa ho pa. Jakamã na pa hte tanhmã kot inhmã karõ hto xà hkôt pix mã

tanhmã mẽ amã ixkapēr to ho ri ixpa. Anē.

13

Jejus kot hkwyjê hpar kuhõnh ã harēnh

Rukre 22.24-27

¹ Tã nhũm ra Pas ã mẽ ixkĩnhhta ahtêp. Pas ã na hte mẽ ixpê Ijaewjaja axpēn wÿr akuprõ nē hã ôwēhti hkra nyw pa nē ho anē nē hkur o ixkrĩ. Amnepēm Tĩrtũm kot pika pē Ejit rũm mẽ inhĩgêxjê kator kaxyw nhũm mẽ nojarêt nē ã hkwy hpar nē ho anhÿr nē hkwy hkurta pyrãk. Na prem nojarêt nē mẽ hkra my kot wa mẽ kēp htyk pumaj ôwēhti hkra nyw kwÿ hpa nē ho anē nē ĩ hku. Jakamã nhũm arĩ mẽ ixpê mẽ hkanrēhã mẽ htãmnhwÿjaja ã mẽ kot amnhĩ nhĩpêx anhÿrja mã ijamaxpēr nē hã ixkĩnh kaxyw mẽ urãk nē hkwy hpa nē kuku. Jakamã nhũm ra Pas ahtêp nhũm Jejus amnhĩ kukamã tanhmã hamaxpēr to kurê kumrêx. Ra ma akupÿm Hipêêxà hwÿr àpir xà hã arĩgro hwÿr apkati grêre. Jakamã nhũm akupÿm nojarêt ã amnhĩ pumu nē kãm mẽ pahte hkôt amnhĩ xunhwÿr xwÿnhjê japê jakamã kãm mẽ pajapê rãhã mẽ panê htyk mã. ² Tã nhũm myt axà pa mẽ Pas ã ixãpkur o ixkrĩ. Nhũm Simãw Kariot kra Jut Kariotja määnēn mẽ ixkutã apkur o nhỹ. Kēp mẽ ixkwÿ htã nhũm pre Satanasti tanhmã hkrã hto nhũm ra axtem nē kot mẽ kãm Jejus kurê xwÿnhjê nhĩhkram haxàr kaxyw.

³⁻⁴ Tã pa mẽ kormã axpēn kutã ixãpkur kaxyw ixkrĩ hpa nhũm Jejus kãnhmã xa nē hinòkà kapa nē toajti py nē ho amnhĩ krax pre. Kot amnhĩ to rax ã amnhĩ pumunh tã ja hã amnhĩ to jarkrar pē tanhmã ri mẽ inhnoo mã amnhĩ nhĩpêx to ho pa hkēt. Kēp mẽ inhō pahĩ htã te kēp mẽ inhmã àpēnh xwÿnh pyrãk o amnhĩ nhĩpêx o pa. ⁵ Jakamã toajti py nē ho amnhĩ krax pre nē pasiiti hō py nē kamã gô hkwy ru nē ho

mē ixpar kuhō nē toajti o mē ixpar grā ho mō. ⁶ Ā mē inhīpēx anhÿr o mō. Pē ra hpānhā Simāw Pētre hpar kuhōnh kaxyw nhūm tee ri amnhī tā omu nē kām:

—Tk. Kwa apē inhmā axàpēnh xwÿnh kêt kēnā kot ka kêt ri axtem nē ixpar kuhō Pahihti. Apē mē inhō Pahi kēnā kot ka kêt ā mē inhīpēx anē. Anē.

⁷ Hāmri nhūm kām:

—Kwa nā. Kormā ate ja hā amnhī tā ixpumunh mex kêt. Nom kot kaj nhÿrmā aprī hā amnhī tā ixpumu. Anē.

⁸ Hāmri nhūm kām:

—Nā nom kot kaj ām ixpar kuhōnh kêt nē. Kwarī. Anē.

Hāmri nhūm Jejus kām:

—Tōe. Kot paj apar kuhōnh kêt nē ka te apē ixkwÿ hkêt pyrāk. Anē.

⁹ Hāmri nhūm tee ri kuma nē kām:

—Tōe mamrī ixpar kuhō. Nom ixpar pix kuhōnh kêt nē. Māānēn inhīhkra kuhō nē ixkuk kuhō. Inhmā ixte apyrāk prām tÿx kumrēx kēnā. Anē.

¹⁰ Hāmri nhūm Jejus kām:

—Nā amÿkry hkôt mē wÿr xwÿnhjaja na htem mex nē axte wÿr kêt rāhā hikwÿ. Na htem ām amnhī par pix kuhō nē hikwÿ. Ja pyrā nē Tirtūm kot mē anē mē ate amnhī tomnuj ho hapēx par xwÿnhjaja te amÿkry hwÿr mē axwÿr nē amex pyrāk. Ka mē te mē kot amnhī par pix kuhōnh ta pyrā nē axte tanhmā amnhī tomnuj to hāmri nē Tirtūm mā amnhī jarēnh kurē kumrēx kē anē amnhī katut kôt ate amnhī tomnujta mē nē ho hapēx. Na pre ra mē anē mē ate amnhī tomnuj o hapēx. No ām mē apiitā hkêt. Ota arī mē anhīōja pyxire nē arī amnhī tomnuj rāhā ri pa. Jakamā te wÿr kêt nē arī grā htyk rax kām ri pa pyrāk. Anē.

¹¹ Nhūm pre ā Jejus mē inhmā kapēr anē. Ra kot hprī hā mē kot kām hkurē xwÿnhjē mā ōr mā xwÿnhja pumunh jakamā te wÿr

kêt nē arī grā htyk rax kām ri pa pyrāk ā ā harēnh anē.

¹² Tā mē ixpar kuhōnh pa nē akupÿm hinōkà py nē haxà nē nhÿ hāmri nē mē inhmā:

—E mēmo kaxyw na pa we ā mē apar kuhōnh anē? Kot paj ixprī hā mē amā amnhī jarē ka mē inhma. ¹³⁻¹⁴ Na ka htem ixto “mē ijahkre xwÿnh” nē ixto “pahihti” anhÿr o ijarēnh o ri apa. Ām hāmri na ka htem ā axpēn mā ijarēnh anē. Ixpē mē ajahkre xwÿnh nē māānēn ixpē mē anhō pahihti htā inhmā mē ate tanhmā axpēn nhīpēx to ho apa hprām xāj na pa ā mē apar kuhōnh anē. Tā kēr ka mē ixpyrā nē tanhmā axpēn to mex to ho ri apa. ¹⁵ Jao amnhī kuxwar axpēn to mex pē mēmoj to axpēn kutā anojarēt rāhā ho ri apa. ¹⁶ Kwa mē ixkapēr ma nē kām amnhī krām haxàr tÿx rāhā ho ri apa. Mē ate amnhī to rax o ijakrenh kêt. Te ixpē mē anhō patrāw nhūm mē ate inhmā tanhmā amnhī nhīpēx to ho apa xwÿnh pyrāk. Nē te ixte mēmoj tā mē amā karō nhūm mē ate inhmar nē inhmā tanhmā mēmoj nhīpēx to pyrāk. Tā te ixpē mē anhō patrāw pyrāk tā pa ā mē apar kuhōnh anē. Ka mē amnhī tā ixpumu hāmri nē amnhī xwar tanhmā axpēn to ajuta hto ho ri apa. No ri axpēn pumu nē ajamaxpēr o: “Tk. Nā ixte amnhī to rax o hakrenh kēnā kot pa kêt ri tanhmā ho ajuta hto. Kē tām mān pa ixto ajuta.” Anhÿr o ajamaxpēr o ri apa hkêt nē.

¹⁷ —E na pa ā mē amā ixujarēnh anē. Kot kaj mē inhma nē ixujarēnh kôt ā axpēn nhīpēx anhÿr o ri apa. Hā kot kaj mē akīnh nē ri apa. Anē.

Jejus kot amnhī tā hā àmnēnh xwÿnh o amnhīrit ā harēnh

Matēwre 26.20-25; Makre 14.17-21; Rukre 22.21-23

¹⁸ Nhūm Jejus arī mē inhmā kapēr nē mē inhmā:

—Kot kaj mẽ apiitã mẽ akĩnh nẽ apa hkêt nẽ. Ixte mẽ arẽnh xwýnhjaja mẽ apiitã mẽ apumunh mex. Jakamã na pa Tĩrtũm kot mẽ apiitã mẽ ate amnhĩ tomnuj o hapêx par kêt ã mẽ anhĩõja jarẽ. Tĩrtũm kapêr ã kagã htũm kot harẽnh kot:

Ixkutã apkur o ýr xwýnhjê hõ koja axtẽm nẽ mẽ kot kãm ixkurê xwýnhjê nhĩhkram ijaxã. Kêp ixkõt pa ho pa xwýnh tã koja axtẽm nẽ ã inhĩpêx anẽ.

Anhýr o kot harẽnh. Tã koja tokyx ã inhĩpêx anẽ. ¹⁹ Nom kormã kot ã inhĩpêx anhýr kêt ri na pa hkukamã mẽ amã harẽ. Jakamã koja ã inhĩpêx anẽ ka mẽ ja hã ixpumu nẽ ra ixte amnhĩ kukamã mẽ amã amnhĩ jarẽnhta mã ajamaxpêr nẽ ixpê Tĩrtũm rũm mẽ awýr ixwryk xwýnh kõt ajamaxpêr týt kurê kumrêx.

²⁰ —Kwa mẽ ixkapêr ma nẽ amnhĩ krã kamã kãm ajamaxpêr týt o ri apa. Koja mẽhõ ixte mẽ hwýr mẽ arẽnh xwýnhjê hã tanhmã mẽ ato mex to. Hãmri nẽ te pa kot tanhmã ixto mex to pyrãk. Nẽ koja mẽhõ tanhmã pa ixto mex to nẽ mããnẽn te kot mẽ awýr inhmẽnh xwýnhhta tanhmã ho mex to pyrãk. Anẽ.

²¹ Nhũm pre ã Jejus mẽ inhmã kapêr anẽ. Hãmri nẽ tee ri amnhĩ kukamã hamaxpêr nẽ hkaprĩ nẽ mẽ inhmã:

—Hẽxta waa nẽ. Nà kot kaj mẽ atõ mẽ kot kãm ixkurê xwýnhjê nhĩhkram ijaxã. Kwa mẽ amnhĩ krã kamã ixkapêrja mã ajamaxpêr týt nẽ. Anẽ.

²² Hãmri pa mẽ amnhĩ tã kuma nẽ tee ri axpẽn pumunh o ixkrĩ.

²³ Ixpê Juãw na pa pre ixpê Jejus krãmnhwý mex ã ãhkõ hã ixãpkur o inhýr ²⁴ nhũm Simãw Pêtreja ixpumu nẽ inhmã nomgõr nẽ kawax pẽ inhmã:

—Kwa mẽ pahtõ nhĩxi hã hkukja nã? Anẽ.

²⁵ Hãmri pa kuma nẽ Jejus mã kãm:

—Kwa Pahihti. Mẽ ixtõ koja we ã anhĩpêx anẽ? Anẽ.

²⁶ Hãmri nhũm mẽ inhmã:

—Nà kot paj pãwti hõ py nẽ guhkrax kãm ho mry kagõ nhek nẽ kot mẽ ãhkram ijaxãr mã xwýnhhta mã kugõ ka mẽ hkõt omu. Anẽ.

Hãmri nẽ kupy nẽ ho mry kagõ nhek nẽ Simãw Kariot kra Jut Kariotja mã kugõ nhũm kupy. ²⁷ Pyrja kõt nhũm Satanasti tanhmã hkrã hto. Hãmri nhũm Jejus te kot kãm amnhĩ to nojarêt pyrãk o amnhĩ tã kãm kapêr nẽ kãm:

—E kwa tokyx nã. Anẽ.

²⁸⁻³⁰ Hãmri nhũm kuma nẽ kato nẽ ma kamãt kõ kamã htẽm kurê kumrêx. Hãmri pa mẽ ixãpkur o ixkrĩ xwýnhjaja Jejus kot ã kãm kapêr anhýrja ã kuma nẽ tee ri hkukamã ijamaxpêr. Hãmri nẽ kot ma mẽ hkĩnh ã mẽõ hkwy japrõr kaxyw ma htẽm ã hkamnhĩx. Nhũm mẽ ixkwýjaja axtẽm Jejus kot mẽ kêp amrakati xwýnhjê mã mẽmoj nhõr ã kãm karõ nhũm ma mẽ hwýr htẽm ã hkamnhĩx. Kêp mẽ inhmã mẽ ixkãxpore jamãr o pa xwýnh jakamã pa mẽ ã ixtýt mẽmoj tã hkamnhĩx anẽ.

Jejus akupým nojarêt nẽ mẽ kãm mẽmoj tã karõ hã harẽnh

Matêwre 22.39-40; mããnẽn Wam Juãw 3.11-24

³¹⁻³² Hãmri nhũm Jejus mẽ inhmã:

—Nà kot kaj mẽ tokyx mẽmoj pumu nẽ Tĩrtũm mã mex o mex ã harẽ nẽ ijaxwýja inhmã inhmex o inhmex ã ijarẽ. Kot kaj mẽ tokyx mẽmojta pumu kãm ga.

³³ —Te mẽ apê ixkra pyrãk tã kot paj arĩ ri mẽ akõt ixpa grire hãmri nẽ ma akupým api. Kot kaj mẽ tee ri jar ijapêr o ri apa nom nhýri ixpumunh kêt nẽ. Nẽ kormã tokyx ma ixkõt apa hkêt nẽ.

³⁴ —E kot paj axte mẽ amã mẽmoj tã karõ. Kormã ixte mẽ amã ja hã karõ hkêt. Kêr ka mẽ amã axpẽn

kĩnh o ri apa. Te pa inhmã mẽ ajapê pyrâk o axpên nhĩpêx rãhã ho ri apa. ³⁵ Kot kaj mẽ ã amnhĩ nhĩpêx anê nhũm mẽ akwýjaja ja hã mẽ apumunh mẽ mẽ apê ixkwý hã mẽ apumunh kurê kumrêx. Anê.

Simãw Pêtre kot Jejus ã amnhĩ to hêx kukamã harênh

Matêwre 26.31-35; Makre 14.27-31; Rukre 22.31-34

³⁶ Nhũm Jejus ã kot mẽ ixrer mẽ ma nhỹhỹm môr ã amnhĩ jarênh anê hãmri nhũm Simãw Pêtre tee ri kot amnhĩ jarênh ma mẽ kãm:

—Kwa Pahihti. Nhỹhỹm kot kaj kêt mō pa mẽ akôt ixpa hkêt mẽ? Anê.

Hãmri nhũm kãm:

—Nã ma inhmôr xàta wýr kot kaj mẽ kormã ma ixkôt apa hkêt mẽ. Nom kot kaj mẽ nhỹrmã ma ixkôt apa. Anê.

³⁷ Hãmri nhũm Simãw Pêtre kãm:

—Kwa mo kot pa mẽ omu mẽ tokyx ma akôt inhmrar kêt mẽ? Inhmã akôt ixtyk pyma hkêt kênã. Kwãr mẽ mãmri atã ixpĩ. Inhmã ajapê htýx kumrêx kênã. Anê.

³⁸ Hãmri nhũm Jejus kãm:

—Xà ãm hãmri na ka ã inhmã amnhĩ jarênh anê Simãw Pêtre? Xà amã ixkôt atyk pyma hkêt? Kwa o kora. Koja apkati hkôt krãhyre hkãr kêt ri ka ra mẽ umaj ate ixkôt apa hkêt ã amnhĩ tã axãprãr o axkrunêpxi kãm ga. Kwa amnhĩ krã kamã ixkapêrja mã ajamaxpêr týx mẽ. Anê.

14

Jejus kot Tirtũm nhõ krĩ jarênh Eprêw 11.16

¹ Nhũm Jejus arĩ mẽ inhmã kapêr mẽ mẽ inhmã:

—Kwa ã ixte mẽ amã amnhĩ jarênh anhýrja ma mẽ tee ri amnhĩ kukamã ajamaxpêr mẽ akaprĩ hkêt mẽ. Arĩ amnhĩ kaxyw Tirtũm mẽ wa inhmã ajamaxpêr týx rãhã ho ri apa. ² Inhĩpêêxã nhõ krĩ kamã ixkre xohtôô. ãm hãmri na pa ã

mẽ amã harênh anê. Tã kot paj ma akupým hwýr api mẽ mẽ akutêp mã amã mẽ anhõrkwý ho mex. ³ Hãmri mẽ ho mex pa mẽ ri man akupým mẽ awýr wrý. Hãmri mẽ ma akupým amnhĩ kôt mẽ ato ixàpir pa ka mẽ Tirtũm mẽ wa ixkôt apa rãhã apa ho apa. Jakamã kwa mẽ ri akaprĩ mẽ apa hkêt mẽ. Anê.

Jejus te kêp Tirtũm wýr pry pyrâk Epes 2.18

⁴ —Nẽ ma nhỹhỹm inhmôr xàta ra mẽ ate harênh mar mex. Nẽ hwýr pryja mããnẽn mẽ ate harênh mar mex. Anê.

⁵ Hãmri nhũm Tomas tee ri kuma mẽ kãm:

—Kwa mẽ ixte nhỹhỹm amôr xàta pumunhre hã kot pa kêt mẽ hwýr pryja pumu. Anê.

⁶ Hãmri nhũm kãm:

—Kwa paa. Te ixpê Inhĩpêêxã hwýr pry pyrâk. Na htem amnhĩ kaxyw inhmã hamaxpêr mẽ ixkôt amnhĩ xunhwý hãmri mẽ nhỹrmã ixkukwak ri pix mã ma Inhĩpêêxã mẽ wa inhõ krĩ hwýr api. Ixkukwak ri pix mã na htem hprĩ hã Tirtũm kapêr ma. Nẽ ixkukwak ri pix mã na htem wa ixri htĩr tũm mẽ pa ho pa. ⁷ Kot kaj mẽ aprĩ hã ixpumu mẽ mããnẽn te aprĩ hã Inhĩpêêxã pumunh pyrâk. Tã ra mẽ ate tanhmã ixte amnhĩ nhĩpêx to hã ixpumunh mex jakamã mããnẽn te ra mẽ ate Inhĩpêêxã kot amnhĩ nhĩpêx ã omunh mex pyrâk. Anê.

Jejus mẽ Tirtũm wa kot amnhĩ nhĩpêx tipxi hã wa harênh

Juāw 1.1, 10.30; Piripos 2.6; Korosê 2.9

⁸ Nhũm Jejus ã mẽ inhmã kapêr anê nhũm Firipti kuma mẽ mẽ kãm:

—Kwa nom mẽ inhmã inhno ho Anhĩpêêxã pumunh prãm. Kot pa mẽ omu mẽ ixkĩnh týx kumrêx. Anê.

⁹ Hãmri nhũm Jejus kãm:

—Kwa na pa pre ra mẽ akôt ri ixpa ryy mẽ. Ka mẽ aprĩ hã ixpumunh mex mẽ. Kêt ra mẽ kot ixpumunh mex xwýnhjaja te mẽ kot

māānēn Inhīpēēxàja no ho omunh mex pyrāk. ¹⁰ Wa ixte amnhī nhīpēxja ām tipxi. Xà ate kormā amnhī krā hi mā ixkapēr jaxr t̄yx kēt? Inhīpēēxà mè wa ixte amnhī nhīpēxja ām tipxi. Nē kot axpēn pyrāk. Jakamā na pa hte amnhī krā hkôt ri tanhmā amnhī nhīpēx to ho ri ixpa hkēt nē. Ām Inhīpēēxà nh̄y hā na pa hte ri tanhmā mè amā ixkapēr to ho ri ixpa. Nē hiht̄yx xà ho tanhmā amnhī nhīpēx to ho ri ixpa. Ka mè ja hā ixpumu nē te ano ho Inhīpēēxà pumunh pyrāk. ¹¹ Kwa mè ixkapēr ma nē hkôt ajamaxpēr t̄yx nē. Inhīpēēxà mè wa ixte amnhī nhīpēxja ām tipxi. Nē kot axpēn pyrāk. R̄y ka mè tee ri ja kukamā ajamaxpēr japēr hāmri nē ixte aa mè ate mēmoj pumunh kēt kw̄y ho anh̄r ā m̄n ixpumu nē ja hā wa ixte amnhī nhīpēx tipxi kôt ajamaxpēr.

¹² —Kwa mè ixkapēr ma nē amnhī krā kamā amnhī krām hax̄r t̄yx nē. Mē ate amnhī kaxyw ixkôt ajamaxpēr xw̄ynhjaja kot kaj mè ixte tanhmā amnhī nhīpēx to ho ixpa hā ixpumu nē ixkôt ā amnhī nhīpēx anh̄r o ri apa. Kot paj akup̄ym Inhīpēēxà hw̄yr api nē kuri ixpa ho ixpa. Ka mè ixwakre kamā ixih̄t̄yx xà ho tanhmā mè akw̄ȳjē mā amnhī nhīpēx to ho ri apa.

¹³ —Nē kot kaj mè apē ixkw̄y hā tanhmā mēmoj tā ixw̄yr to pa mè ama nē mè amā tanhmā mēmoj nhīpēx to. Mē kot omunh nē Inhīpēēxà mex o mex ā omunh kurē kumrēx kaxyw. ¹⁴ Nà kot kaj mè apē ixkw̄y hā mēmoj tā ixw̄y pa mè ama nē mè amā tanhmā mēmoj to. Anē.

Jejus kot mè pahw̄yr Tirtūm mè wa Karō rēnh ā kot amnhī jarēnh

Juāw 7.37-39, 16.7-17; Atre 2.1-4; māānēn Rōmān 5.5; Wam Korīt 12.7-11; Epes 3.16; Wam Juāw 2.27

¹⁵ Nhūm Jejus arī mè inhmā kapēr nē mè inhmā:

—Nà kot kaj mè amā ixkīnh hā kot kaj mè ixkapēr kôt pix mā ri amnhī nhīpēx rāhā ho ri apa.

¹⁶ —Kot paj akup̄ym kaxkwa hw̄yr api hāmri nē mè ato Inhīpēēxà w̄y nhūm inhma nē mè aw̄yr kot mè ato ajuta xw̄ynh maatita rē nhūm man mè aw̄yr wr̄y nē mè akaxw̄ynh mā agjē. Hāmri nē mè akôt tanhmā mè ato ajuta hto ho pa rāhā ho pa. ¹⁷ Wa Ixkarō koja mè aw̄yr kurē nhūm mè amā agjē. Hāmri nē hprī hā mè amā Tirtūm kapēr o amnhīrīt o mè akôt pa ka mè aprī hā mar mex nē. No mè kēp Tirtūm kra hkēt xw̄ynhjaja koja hprī hā wa Ixkarō jarēnh mar kēt nē. Mē kot wa ixkôt amnhī xunhw̄yr kēt jakamā koja mè hkarō mā gjēx kēt nē. Ām mè ate ixkôt amnhī nhīpēx o apa xw̄ynhjē pix w̄yr koja wr̄y nē mè aw̄yr agjē nē mè akamā pa ho pa.

¹⁸ —Nē ixte mè arer nē ma inhmōr mā tā kot kaj mè te mè hā awrāre pyrā nē ahte at̄yx ri apa pyrāk kēt nē. Kot paj te pa akup̄yn mè aw̄yr ixwr̄yk pyrā nē mè aw̄yr wa Ixkarō rē nhūm mè akām agjē nē mè akamā pa ho pa.

¹⁹ —Nē koja tokyx mè kot amnhī kaxyw Tirtūm mā hamaxpēr kēt xw̄ynhjaja axte ixpumunh kēt nē. No mè papajaja kot puj mè tokyx axte nh̄yri axpēn pumu.

—Nē kot paj akup̄ym ixtīr hāmri nē ixtīr tūm nē ixpa ho ixpa ka mè ixkukwak ri ajaxw̄yja nh̄ymā Tirtūm mè wa ixri atīr tūm nē apa ho apa.

²⁰ —Tā koja wa Ixkarō mè aw̄yr wr̄y nē mè akarō mā agjē ka mè aprī hā Tirtūm mè wa ixte amnhī nhīpēx ā wa ixpumunh mex kurē kumrēx. Te wa ixte amnhī nhīpēx tipxi pyrāk o ka mè hā wa ixpumu. Nē māānēn mè papajaja te ra mè pah̄tipxi nē ri mè papa pyrāk ka

mē hā amnhī pumunh mex kurē kumrēx.

²¹ —Nē mē kām ixkīnh xwýnhjaja na htem ixkapēr ma nē hkôt amnhī nhīpêx o pa. Jakamā nhūm Tīrtūm ixtā mē omu nē kām mē hapê htýx nē. Pa māānēn amnhī tā mē omu nē inhmā mē hapê htýx nē. Jakamā kot paj mē kām amnhī to amnhīrīt nhūm te mē kot no ho ixpumunh pyrāk. Anē.

Nhūm pre ā Jejus hkôt mē ixpa ho mē ixpa xwýnhjê mā amnhī jarēnh anē. ²² Hāmri nhūm Jutre hōja. Jut Kariot kêt axtem Jutre hōja Jejus axte kot mē inhmā pix mā kot amnhī to amnhīrīt ā harēnhja ma nē kām:

—Kwa aprī hā mē inhmā mēmoj jarē mē ijahkre xwýnh. Mon ka mē kēp akwý hkêt xwýnhjê mā axte amnhī to amnhīrīt kêt ā amnhī jarē? Nē ām mē papxipix mā amnhī to amnhīrīt ā amnhī jarē? Anē.

²³ Hāmri nhūm kām:

—Nā mē amā ixkīnh xwýnhjaja na ka htem ixkapēr ma nē hkôt amnhī nhīpêx. Nhūm Inhīpêxà ja hā mē apumu nē ixtā kām mē ajapê htýx nē. Hāmri pa wa mē akôt ixpa ho ixpa. Jao mē amā amnhī to amnhīrīt mex o ixpa. ²⁴ Na pa hte amnhī krā hkôt ri mē kām ixkapēr o ixpa hkêt nē. Ām Inhīpêxà nhý hā na pa hte mē kām ixkapēr o ri ixpa. Kot mē awýr inhmēnh xwýnhhta nhý hā. Tā nhūm mē kām inhmar prām kêt jakamā na pa hte wa mē kām mē apyrā nē amnhī to amnhīrīt o ixpa hkêt nē.

²⁵ —E na pa kormā ixte mē akôt ri ixpa ri ā mē amā amnhī jarēnh anē. ²⁶ Tā koja Inhīpêxà ixpānhā mē awýr wa Ixkarō rē. Ixte hā mē amā ixàhwýr xà hkôt. Hāmri nhūm man mē awýr wrý nē mē akaxwýnh mā agjê nē mē akôt ri tanhmā mē ato ajuta hto ho pa. Nē ra ixte ā mē amā ixkapēr anhýrja koja hprī hā mē amā ho amnhīrīt

mex nē. Ka mē amnhī krā kamā kām ajamaxpēr nē hā ano htýx nē ho apa. Anē.

Jejus kēp mē pajamakêtkati nhōr xwýnh

Rōmān 5.1; Karatas 5.22; Piripos 4.7; Korosē 3.15

²⁷ Nhūm Jejus arī mē inhmā kapēr nē mē inhmā:

—Nē mē kēp ixkwý hkêt xwýnhjaja na htem tee ri amnhī kukamā hamaxpēr o ri pa. Jao hkaprī nē pa. No pa na pa hte mē kurom ijamakêtkati nē ixkīnh nē ri ixpa ho ixpa. Tā kot paj tanhmā mē ato ka mē ixpyrā nē ajamakêtkati nē axāmnhīx akīnh nē ri apa. Jakamā kwa mē ixte amnhī jarēnh ma nē tee ri amnhī kukamā ajamaxpēr o amā ma ho ri apa hkêt nē.

²⁸ —Na pa pre ra mē amā ma ixàpir nē nhýrmā man akupýn mē awýr ixwryk ā mē amā amnhī jarē. Tā na pa ra ma akupým Inhīpêxà hwýr ixàpir mā. Kot amnhī to rax o kot ijakrenh. Kot paj akupým hwýr api nē kuri inhmex nē ixpa ho ixpa. Tā ka mē amā ixkīnh hā kot kaj mē ma akupým hwýr ixàpir ā ijarēnh ma nē inhý hā akīnh nē.

²⁹ —Kormā ma akupým ixàpir kêt ri na pa ā mē amā amnhī kukamā amnhī jarēnh anē. Kēr pa mēmo arīgro hā ma akupým api ka mē ja hā ixpumu nē ajamaxpēr o: “Nā ām hāmri na pre mē inhmā amnhī kukamā akupým Hipêxà hwýr àpir ā amnhī jarē.” Anhýr o ajamaxpēr. Jao ixkôt ajamaxpēr týx rāhā ho ri apa.

³⁰ —Kot paj tokyx axte tanhmā mē amā ixkapēr to hkêt nē. Mē kēp ixkwý hkêt xwýnhjê nhō pahihtī Satanastija na ra kot tanhmā ixto kaxyw. Nom koja tee ri tanhmā kām ixto hprām kaprý. Kurom ixihtýx o ixihtýx o ixte hakrenh par jakamā koja tanhmā ixto hkêt nē.

³¹ Kwār kām tanhmā ixto hprām xà

hkôt tanhmā ixto pa omu. Inhmā Inhīpêêxà hkôt ixte amnhī nhīpêx prām jakamā kot paj jahti mā arī xa nhūm te tanhmā kot ixto pyrāk o inhīpêx nom tanhmā ixto hkêt nê. Mē ate inhmā Inhīpêêxà japê ht̄ȳx ā ixpumunh kaxyw kot paj ā mē anoo mā amnhī nhīpêx anê. Nê mē ate ixte kām tanhmā amnhī nhīpêx to ho ri ixa rāhā mē kot xpir ā ixpumunh kaxyw. E hāmri. Ma pu mē mō nê amnhī to Tirtūm w̄y. Anê.

Nhūm pre ā Jejus hkôt mē ixa ho mē ixa xw̄ynh̄jê mā kapêr anê. Pa mē kuma nê kānhmā ixkuhê nê inhnojārēt nhūm axte mē inhmā awjarê.

15

*Jejus te kēp mēmo krô pyrāk
Karatas 2.20; Wam Juāw 2.28*

¹ Nhūm Jejus arī mē inhmā kapêr nê mē inhmā:

—Nā te ixpê mēmo pī pē “uwa” anh̄ȳr xw̄ynhta kakhô maati pyrāk. Nê Inhīpêêxāja te kot uwa hkre nê hamār o pa xw̄ynhta pyrāk. ² Nê mē kot ixkôt amnhī xunhw̄ȳr xw̄ynhjaja te mē kot uwa kakhô rūm krô pyrāk. Na hte mē hkwȳjaja ht̄ȳx ri kēp ixkw̄ȳ hā amnhī jarēnh ā amnhī to hêx. Jao te kot krôja rā htā ô hkêt pyrāk. Koja rā htā ô hkêt nê nhūm kot hamār xw̄ynhja tee ri omu nê kakhô nê krāhta nê kumê. No koja ô mex nê nhūm omu nê hkīnh nê. Hāmri nê rā nê ô rax kaxyw tanhmā ho mex to. Tā na hte Tirtūm uwa krô jamār xw̄ynhta pyrā nê ā mē ate ixkôt amnhī xunhw̄ȳr xw̄ynh̄jê nhīpêx anê. ³ No mē kajaja na ka prem mē kot ixkw̄ȳ hā amnhī to hêx xw̄ynh̄jê rom ixkapêr mar t̄ȳx nê. Nê amnhī kaxyw inhmā ajamaxpêr nê ixkôt amnhī nhīpêx mex o apa. Jao te mē ate krô rā nê ô rūnh pyrāk o amnhī nhīpêx.

⁴ —Na hte krôja amnhī krā hkôt ô hkêt nê. Ām kakhô pix kukwak ri na hte rā nê ô. Ja pyrā nê kot

kaj mē ixkukwak ri pix mā inhmā hprām xā hkôt ri tanhmā amnhī nhīpêx to ho apa. Jakamā kwa kēr ka mē ixkapêr pix mām mar o apa pa mē akôt ixa ho ixa. ⁵ Te ixpê kakhô nhūm te mē apê krô pyrāk jakamā kot kaj mē inhmā hprām xā hkôt tanhmā amnhī nhīpêx to ho ri apa nê te krô rā nê ô rūnh pyrāk o amnhī nhīpêx. No kot kaj mē amnhī krā hkôt ri amnhī nhīpêx o ri apa nê te krô grā nê ô hkêt pyrāk o amnhī nhīpêx.

⁶ Na hte uwa krô nhō dōnja nh̄ȳri hā krô grā pumu hāmri nê kakhô nê hakā nê ma o mra nê kuwy kamā kurê nê ho hxêt pa. Ja pyrā nê mē kot ht̄ȳx ri ixkôt amnhī xunhw̄ȳr ā amnhī jarēnh xw̄ynhjaja koja mē nh̄ȳmā amnhī xā ht̄ȳx kamā hamak rāhā ho pa.

⁷ —Tā no mē kajaja. Kêr ka mē ixkapêr kôt pix mā amnhī nhīpêx rāhā ho ri apa. Te mē pahtipxi nê ri papa pyrāk o amnhī nhīpêx. Hāmri nê māmri amā hprām xā hkôt mēmoj tā Tirtūm w̄ȳ nhūm ama nê amā mēmoj tā ate hw̄ȳr xāta kôt kugō. ⁸ Kot kaj mē Inhīpêêxà mē wa ixkapêr kôt amnhī nhīpêx o ri apa nhūm mē piitā ja hā mē apumu nê hamaxpêr o: “Hêxta waa nê. Jajaja na htem Tirtūm kot amnhī nhīpêx o amnhī nhīpêx o pa. Mām Tirtūmja mex o mex.” Anh̄ȳr o hamaxpêr.

⁹ —Nê na pa hte Inhīpêêxà kām ijapê pyrāk o inhmā mē ajapê nê. Tā kēr ka mē amarī inhmā mē ajapê hā ri ixkôt amnhī nhīpêx mex o apa. ¹⁰ Na pa hte am Inhīpêêxà kapêr kôt pix mā ri amnhī nhīpêx o ri ixa. Jakamā na pa hte kām ijapê hā ixkīnh nê ri ixa. Tā kēr ka mē ixpyrā nê ixkapêr kôt pix mā tanhmā amnhī nhīpêx to ho ri apa. Nê ixpyrā nê inhmā mē ajapê hā amnhī pumu nê akīnh nê ri apa.

¹¹ —E na pa ā mē amā ixkapêr anê. Mē ate inhmar nê ixpyrā nê

axàmnhĩx ajamakêtkati nê akĩnh nê ri apa kaxyw. Tã kêr ka mē ã amnhĩ nhĩpêx anê nê te pa ixte ã amnhĩ nhĩpêx anhÿr pyrãk. Anê.

Jejus kot mē pamã axpên kĩnh tÿx ã mē pamã karô

¹² Nhũm Jejus arĩ mē inhmã kapêr nê mē inhmã:

—E kêr ka mē te inhmã mē ajapê pyrãk o mē amã axpên japê ho mē amã axpên kĩnh o ri apa. Jao axpên to mex o ri axpên kôt apa. ¹³ Koja mēhõ kãm hkrãmnhwÿ japê htÿx nê nhũm ra mēhõ mēmo mÿrapê kot kêp hpĩr mã nhũm tee ri hã omu nê nê kãm amnhĩ mē nhũm kupĩ. Hãmri nhũm mē ja hã omu nê kãm hkrãmnhwÿ japê htÿx ã nê htyk ã axpên mã harê.

¹⁴⁻¹⁵ —E kot paj axte mē apê inhmã mē axapênh xwÿnh ã mē ajarênh kêt nê. Na hte mē õ patrãwaja hpĩr hã kãm mē apênh xwÿnhjê mã amnhĩ jarênh kêt nê. Na htem ãm mē apênh pix ã mē kurê. Nom mē kajaja mē ate ixkapêr mar nê hkôt pix mã amnhĩ nhĩpêx jakamã kot paj hpãnhã mē apê ixkrãmnhwÿ hã mē ajarê. Na htem axpên to hkrãmnhwÿ nê ma nhÿhÿm pa kaxyw nê tanhmã amnhĩ kukamã hkrãmnhwÿ mã amnhĩ jarênh to. Tã mē apê ixkrãmnhwÿ jakamã na pa hte ã amnhĩ kukamã mē amã amnhĩ jarênh anê. Nom ja pix jarênh kêt nê. Na pa hte mãânên Inhĩpêêxã xô ri mē amã mēmoj piitã ho amnhĩrĩt o mē akôt ixpa.

¹⁶ —Nê mē kajaja na ka prem ixpê mē akrãmnhwÿ kaxyw ixãm kêt nê. Pa na pa pre amnhĩ kaxyw inhmã mē aprãm. Ixkapêr kôt pix mã ri mē ate tanhmã amnhĩ nhĩpêx to ho apa kaxyw. Te uwa krô ô rũnh nê aa grã hkêeta pyrãk. Jakamã kot kaj mē mēmoj tã Inhĩpêêxã wÿ nhũm mē ama nê mē ate mēmoj tã hwÿr xã hkôt amã kugô.

¹⁷ —E. Kwa kêr ka mē amã axpên kĩnh nê tanhmã axpên to ajuta hto ho axpên mã mēmoj kutã anojarêt pix o mãn kêt ri apa. Nã ja na kêt inhmã hprãm. Anê.

Mê kot Jejus kwÿjê kamã gryk xwÿnhjê jarênh

Matêwre 10.22; mãânên Juāw 7.7, 17.14; Wam Juāw 3.13

¹⁸ —Nê koja ixkwÿ hkêt xwÿnhjaja kãm mē aprãm nõkati. Tã kêr ka mē amnhĩ tã mē omu nê tee ri amnhĩ kukamã ajamaxpêr kêt nê. Ixkumrêx na prem kãm ixprãm nõkati. Tã koja mē mã ixtã mē ato anê nê kãm mē aprãm kêt nê. ¹⁹ Mē apê mē hkwy ronhÿx mē amnhĩ tã mē apumu nê kãm mē ajapê nê. Nom apê mē hkwy hkêt. Ra ixte amnhĩ kaxyw mē arênh jakamã na htem tee ixtã mē apumu nê kãm mē akĩnh kêt o kãm mē akurê nê. ²⁰ Koja mē ixtã hpijaam kêt nê nê mãânên mē atã hpijaam kêt nê. Nê mē anhĩpêx o te mē kot pa ixpê mē anhõ patrãw nhĩpêx pyrãk. Ka mē ixpyrã nê amnhĩ xã htÿx kãm ajamak o ri apa. Na pa pre ra mē amã ja jarê. Nom koja mē akwÿjaja jajê rom te ra mē kot ixkapêr mar nê hkôt amnhĩ nhĩpêxã pyrã nê mãânên mē akapêr ma nê hkôt amnhĩ nhĩpêx o pa. Kwa kêr ka mē ixkapêrja mã mãn ajamaxpêr tÿx rãhã ho ri apa.

²¹ —Koja mē ixtã tanhmã mē anhĩpêx to. Mē kot Tĩrtũm kapêr kôt amnhĩ nhĩpêx kêt jakamã koja mē ã ixtã mē anhĩpêx anê. Tĩrtũm kot mē awÿr inhmênh kôt hamaxpêr kêt nê ã mē anhĩpêx anê. ²² Ixwryk nê mē kãm Tĩrtũm kapêr jarênh o ri ixpa htã nhũm mē inhma nê ãm inhma nê ixkôt amnhĩ nhĩpêx kêt nê. Jakamã koja mē kot amnhĩ tomnuj xwÿnh ã amnhĩ to hpimxur kêt nê.

²³ —Nê koja mēhõ kêp ixprãm nõkati nê mãânên te kêp Inhĩpêêxã prãm nõkati pyrãk. ²⁴ Na pa pre

mê piitã mê hkôt aa mê kot mëmoj pumunh kêt kwý ho anhÿr o ri mê hkôt ixpa nhùm mê hã ixpumu. Æm papxipix na pa pre ã amnhĩ nhĩpêx anhÿr o ri mê hkôt ixpa nhùm mê hã ixpumu. Kêp ãm mê kot ja hã ixpumunh kêt ronhÿx prem axpên mã ijarênh o: “Tk. Mê pahte mëhõja nhÿhÿnh mê pahwÿr hpôx ã omunhre hã kot puj kêt mê ri hã pahpijaam o ri papa.” Anhÿr o nhÿx prem axpên mã ijarê. Tã ra mê kot ja hã ixpumunh mex tã axtem nê Inhĩpêêxã mê wa mê kãm wa ixkurê nê. Jao mê kot amnhĩ tomnuj xwÿnh ã amnhĩ to hpimxur kêt nê. ²⁵ No Tirtùm kapêr ã kagã htùm kot mê hkukamã mê harênh nê mê hã kagã nê kot mê hã kagã kot:

Mëmo tanhmã kute mÿrapê na htem kãm ixkurê? Nã ãm amarĩ na htem kãm ixkurê ho pa. Anê.

Tã ã ixtã kagã kot anhÿr xã hkôt na htem ã kãm ixkurê anê. Jakamã koja mê mãânên ixtã kãm mê akurê nê. Nom kêr ka mê arĩ mê kãm ixkapêr jarênh o ri mê hkôt apa nê tee ri amnhĩ kukamã ajamaxpêr kêt nê.

²⁶ —Nê tokyx ma akupÿm Inhĩpêêxã hwÿr ixàpir mã tã kot paj hwÿr pój nê aa mê ato ijamakêtkati hkêt nê. Kot paj amnhĩ pãnhã mê awÿr wa Ixkarõ rê. Mê kot kãm: “Mê kutã nojarêt xwÿnh maati” anhÿr xwÿnhnta kot paj mê awÿr kurê nhùm ixpãnhã mê awÿr wrÿ nê mê amã agjê nê hprĩ hã mê amã Tirtùm mê wa ixto amnhĩrit o ri mê akôt pa. ²⁷ Kot kaj mê ama hãmri nê ma mê piitã mê hkôt ri mê kãm ixkapêr jarênh o ri apa. Na pa pre ra mê kãm Tirtùm kapêr jarênh ryy ho mê hkôt ri ixpa ka mê ixkôt ri inhmar o apa ry nê. Jakamã kêr ka mê ixwakre kamã arĩ mê kãm ixkapêr jarênh o ri mê hkôt ri apa. Anê.

16

¹ Nhùm Jejus arĩ mê inhmã kapêr nê mê inhmã:

—Nê mê kot nhÿrmã ixtã tanhmã mê anhĩpêx to nhùm mê ate tee ri amnhĩ kukamã ajamaxpêr nê mê umaj ixkaga pymaj na pa hte ã mê amã ixprĩ hã mëmoj jarênh ry anê. ² Kot kaj mê kãm ixkapêr jarênh o ri apa nhùm mê hkwÿjaja tee ri mê ama nhùm ja mê kêp omnuj nê. Nhùm mê Tirtùm kapêr o mê ahkre xã hã ixkreja rùm amnhĩ nê mê ajano nê mê akwÿjê hpar o pa. Hãmri nê hamaxpêr o: “E pu mê axte mê hkwÿjê pynê nê mê kupa. Tirtùm kãm ja mex kênã.” Anhÿr o htÿx hamaxpêr o pa. ³ Mê kot hprĩ hã Inhĩpêêxã mê wa ixkapêr mar mex kêt nê ã htÿx wa inhmã ja mex ã wa ijarênh anê. ⁴ Nom mê ate ixkôt amnhĩ xunhwÿrta krax kãm na pa pre ã mê amã mê harênh anhÿr kêt nê. Arĩ mê akôt ixpa kênã. Kot ka mê ixkôt apa rãhã amã mê uma hkêt nê. Tã pa ra akupÿm inhnojarêt nê ã mê amã mê harênh anê. Jakamã koja mê nhÿrmã ã mê anhĩpêx anê ka mê amnhĩ tã mê omu nê ra ixte mê akukamã ã mê harênh anhÿrja mã ajamaxpêr kurê kumrêx nê tee ri amnhĩ kukamã ajamaxpêr kêt nê. E kwa ixkapêrja mãn mê amnhĩ krã him haxàr tÿx nê ri hã apa. Anê.

Jejus mê Tirtùm wa hkarõ jarênh

⁵⁻⁶ Nhùm Jejus arĩ mê inhmã kapêr nê mê inhmã:

—E na pa ra kot mê awÿr inhmênh xwÿnhnta wÿr ra akupÿm inhnojarêt ka mê ixte amnhĩ jarênh ã inhma nê akaprĩ nê. Nê tee ri amnhĩ kukamã ajamaxpêr tã mê atõ aprĩ hã ma inhmõr xã ã ixkukjêr kêt nê. Rÿ inhmã: “Kwa mo kaxyw kot kaj kêt mê ixre nê ma akupÿm mõ? Xã we ja amã mex?” Anhÿr o mê atõ ixkukjêr kêt nê. ⁷ Kêt ma akupÿm ixàpirja mê amã mex kumrêx. Kop ãm akupÿm

ixàpir kêt ronhỹx mẽ amã mẽmoj kutã nojarêt xwỹnhta ixpãnhã mẽ awỳr wrỳk kêt nê. Tã kot paj ma akupỹm api nê amnhĩ pãnhã mẽ awỳr kurê. Jakamã kwa mẽ ja ma nê tãm ajamaxpêr o ri apa. ⁸ Koja ixpãnhã mẽ awỳr wrỳ hãmri nê mẽ kêp ixkwỳ hkêt xwỹnhjê mã mẽmoj to axkrunêpxi nê ho amnhĩrît. Koja mẽ kãm mẽ kot tanhmã amnhĩ tomnuj to xà ho amnhĩrît. Nê mãânên mẽ kãm tanhmã mẽ kot amnhĩ to mex to xà ho amnhĩrît. Nê mãânên Tirtũm kot nhỹrmã mẽ kot amnhĩ tomnuj mỳrapê tanhmã mẽ homnuj to xàta nhũm mãânên mẽ kãm ho amnhĩrît. Koja mẽ kãm ja piitã ho amnhĩrît.

⁹ —Jakamã koja mẽ ja kukamã tanhmã hamaxpêr to nê hamaxpêr o: “Kwa kot paj xep amnhĩ tomnuj kaga nê amnhĩ kaxyw Tirtũm Kra Jejus mã ijamaxpêr nê hkôt amnhĩ xãm kêt nhũm Tirtũm nhỹrmã ixte amnhĩ tomnuj mỳrapê tanhmã ixto. ¹⁰ Nà kot paj hkôt amnhĩ xãm hãmri nê ra uràk nê Tirtũm kapêr kôt tãm ri amnhĩ nhĩpêx o ixpa. Na pre Jejus tãm ri amnhĩ nhĩpêx o pa nhũm Tirtũm amnhĩ wỳr ho api pa mẽ axte jar nhỹri omunh kêt nê. ¹¹ Na xep Tirtũm nhỹrmã kot ma kuwy hwỳr mẽ kêp Jejus kwỳ hkêt xwỹnhjê nhõ pahi maatija mẽnh ã ra amnhĩ kukamã hã amnhĩ jarê. Jakamã kwa arĩ ixpê hkwy jakamã kot paj tokyx Jejus kôt amnhĩ xãm kêt nhũm hkôt kuwy hwỳr inhmê.” Anhỹr o hamaxpêr. Koja ã wa Ixkarõja mẽ kêp ixkwỳ hkêt xwỹnhjê mã mẽmoj to amnhĩrît mex anê.

¹² —Nê na pa kormã mẽ amã mẽmoj piitã ho amnhĩrît kêt nê. Kormã mẽ ate aprĩ hã mẽmoj pumunh nê mar mã tãm kêt. ¹³ Tã koja ixpãnhã wa Ixkarõ mẽ awỳr wrỳ nê mẽ akarõ mã agjê hãmri nê hprĩ hã mẽ amã Tirtũm kot amnhĩ nhĩpêx o amnhĩrît o mẽ akôt pa ho pa. Nom koja amnhĩ krã hkôt tanhmã mẽ

amã ho amnhĩrît to hkêt nê. Koja ãm Tirtũm pix xõ ri mẽ amã ho amnhĩrît o mẽ akôt pa. Jao hprĩ hã mẽ amã ixkôt mẽ ate amnhĩ nhĩpêx nyw o mẽ amã amnhĩrît o mẽ akôt pa. ã koja hprĩ hã ra ixte mẽ amã ixujarênh xà hkôt axte mẽ amã mẽmoj to amnhĩrît mex o pa anê.

¹⁴ —Nê koja hprĩ hã mẽ amã pa ixto amnhĩrît o pa. Jao mẽ amã inhmex o inhmex ã ixto amnhĩrît o mẽ akôt pa. ¹⁵ Inhipeêxã mẽ wa ixkapêrja ãm htipxi. Tã koja wa Ixkarõ ixkapêr xõ ri ã mẽ amã mẽmoj to amnhĩrît anê. Jao ra wa ijamê wa ixkapêr o amnhĩrît mex o pa. Koja ã wa mẽ apê ixkwỳ hã mẽ ato mex o pa anê. Anê.

Mê kot akupỹm Jejus tĩr ã omunh ã mẽ harênh

¹⁶ Nhũm Jejus arĩ mẽ inhmã kapêr nê mẽ inhmã:

—Nê kot paj tokyx mẽ ano pê akunok ka mẽ axte amnhĩ kaêx ã ixpumunh kêt nê. Nom kwa kêr ka mẽ tee ri ixkapêrja kukamã ajamaxpêr kêt nê. Kot paj ixtã apkati grêre ka mẽ axte ixpumu. Anê.

¹⁷⁻¹⁸ Nhũm pre ã Jejus hkôt mẽ ixpa ho mẽ ixpa xwỹnhjê mã kapêr anê. Pa mẽ tee ri ã kapêr anhỹr ã kuma nê axpên mã:

—Kwa mo na ri ã amnhĩ jarênh anê? Nê tokyx mẽ pano pê pikunor tã hã apkati grêre nhũm axte mẽ pahte omunh ã amnhĩ jarê nê akupỹm Hipêêxã hwỳr àpir ã amnhĩ jarê. Pêr kapêrja ãm ri katii. Anê.

¹⁹ Nhũm amnhĩ tã mẽ inhma nê mẽ inhmã:

—Kwa xà na ka mẽ kormã aprĩ hã ixkapêr ã inhmar kêt nê? ²⁰ Kot paj ty nhũm mẽ kêp ixkwỳ hkêt xwỹnhjaja ijarênh ma nê hkĩnh nê. No mẽ kajaja kot kaj mẽ akaprĩ nê amỳr o apa. Nê gaa nê akupỹm akĩnh nê. Kwa mẽ ixkapêrja ma nê kãm ajamaxpêr tỳx o apa. ²¹ Te mẽ ate mẽ hpijagri xwỹnh kot amnhĩ nhĩpêx pyràk. Na htem õhy xà nê

gaa nē ra ōhy xà htỳx nē. Nē hkĩnh kêt nē tee ri amnhĩ nhĩpêx o hikwỳ. Tā gaa nē hpìjagri nhũm hkrare kato nhũm omu nē akupỳm hkĩnh nē axte ōhy xà htỳx mã hamaxpêr kêt nē. ²²Tā ã mē ate amnhĩ nhĩpêx anhỳr kaxyw. Kot kaj mē akĩnh kêt nē ri apa. Tā kot paj akupỳm tokyx ixtĩr nē axte mē awỳr ixkato ka mē ixpumu nē akĩnh nē. Hāmri nē akĩnh rāhã ri apa ho apa. Nhũm mēhō mē apumu nē tee ri tanhmã mē akĩnh nē mē ato kaprỳ ka mē arĩ akĩnh rāhã ri apa ho apa.

²³—Nē ixte akupỳm kaxkwa hwỳr ixàpir nē amnhĩ pānhã mē awỳr wa Ixkarō rēnh nhũm mē awỳr wrỳk nē hprĩ hã mē amã mēmoj piitã ho amnhĩrĩt jakamã kot kaj mē axte amã mēmoj tã ixkukjêr prãm kêt nē. Anē.

Jejus kwỳjaja kot àmnhĩx mēmoj tã Tĩrtũm wỳr

Matêwre 18.19-20; Juāw 14.13-14

Nhũm Jejus arĩ mē inhmã kapêr nē mē inhmã:

—E kwa mē ã ixkapêr anhỳrja ma nē amnhĩ krã kamã kãm ajamaxpêr tỳx nē ho apa. Kot kaj mē apê ixkwỳ hã mēmoj tã Inhĩpêêxà wỳ nhũm mē ama nē mē ate hã axàhwỳr xà hkôt mē amã mēmoj tanhmã ho rỳ mē amã mēmoj gō. ²⁴Na ka mē kormã apê ixkwỳ hã mēmoj tã axàhwỳr kêt nē. Tã kêr ka mē amã mēmoj tã hwỳr prãm nē māmri mēmoj tã hwỳr o apa. Kê mē ama hāmri nē tanhmã mē amã mēmoj nhĩpêx to ka mē amnhĩ tã omu nē akĩnh nē.

²⁵—Nē na pa pre mē amã mēmoj jarēnh kaxyw nē mēmoj tã haxwỳ nē mē amã ixujarēnh rax nē. Nom kot paj axte ã mē amã ri ixujarēnh anhỳr kêt nē. Kot paj tã ixprĩ hã mē amã tanhmã Inhĩpêêxà jarēnh to ka mē aprĩ hã mar mex kurê kumrêx. ²⁶Hāmri nē mē kamjaja mē apê ixkwỳ hã tanhmã amnhĩ to hwỳr to ho apa. Jakamã mo nē kaxyw kot pa

kêt axte tanhmã mē ato hwỳr to? Kot kaj mē kamjaja amnhĩ to hwỳr jakamã arĩ ixte mē ato hwỳr kaxyw ixto presija hkêt nē.

²⁷—Na ka mē ra amã ijapê nē. Nē ixte Inhĩpêêxà rũm mē awỳr ixwrỳk ã ixpumu. Jakamã nhũm Inhĩpêêxàja ixtã mãânēn kãm mē ajapê nē. Tã kot kaj mē kamjaja mēmoj tã amnhĩ to hwỳr o apa nhũm mē ama nē kãm mē ajapê htỳx kãm mē amã mēmoj gō.

²⁸—Na pa pre Inhĩpêêxà rũm amnē mē awỳr wrỳ. Hāmri nē kãm hprãm xà hkôt tanhmã amnhĩ nhĩpêx to hpar o mō nē ra akupỳm hwỳr inhojarêt kaxyw. Anē.

Nhũm pre ã Jejus mē inhmã amnhĩ jarēnh anē. ²⁹Pa mē tã ixprĩ hã mar mex nē. Hāmri nē kãm:

—Tỳ. Nà na pa mē tã ixprĩ hã ate amnhĩ jarēnh ma. Ka amnhĩ tã haxwỳr nē axujarēnh kêt jakamã pa mē tã ixprĩ hã amar mex nē. ³⁰Pêr ãm ate mēmoj piitã omunh par xwỳnh na ka. Jakamã ate mē ijamaxpêr piitã hkôt aprĩ hã mē ixpumunh par kumrêx kênã kot ka tanhmã mē ijamaxpêr to hã mē ixkukja. ãm hāmri na ka Tĩrtũm rũm awrỳk ã amnhĩ jarê. Anē.

³¹Hāmri nhũm mē inhma nē mē inhmã:

—Xà ãm hāmri na ka mē ixkôt ajamaxpêr tỳx nē? ³²Kwa mē o kora. Kot kaj mē tokyx mē umaj ixre nē anhrã nē ma ahpỳnhã mē anhō krĩ hwỳr mra. Mē kot ixkôt tanhmã mē anhĩmex to pymaj kot kaj mē ã amnhĩ nhĩpêx anē kãm ga. Kot paj ahte mē kãm ixãm pyrãk o amnhĩ nhĩpêx nom ahte ixãm kêt nē. Inhĩpêêxà aa kot ixrere hã.

³³—E ixkukwak ri mē ajamakêtkati nē axàmnhĩx mē apa kaxyw na pa ã mē amã ixkapêr anē. Nom mē kêp ixkwỳ hkêt xwỳnhjaja koja nhỹrmã ixtã mē atomnuj tỳx o pa. Tã kêr ka mē amã mē uma nē tee ri amnhĩ kukamã ajamaxpêr o ri apa hkêt nē. Nhỹrmã ixte mēmoj

punuj piitā ho ijpapêx par ā arīgrota
ā kot paj mē atā mē ho ijpapêx par
kumrêx. Anê.

17

*Jejus kot amnhī to Tirtūm wūr ā
harēnh*

Rōmān 8.34; Eprêw 7.25

¹ Tā nhūm Jejus mē inhmā kapēr
pa nē hpānhā kaxkwa hwūr rīt nē
Tirtūm mā amnhī jarē nē kām:

“Pa Papaj. E na pa ra amā
hprām xā hkôt tanhmā amā
amnhī nhīpêx to hpar o mō nē
akupŷm awūr inhnojarêt kaxyw.
Jakamā kot kaj ixpê Akra hā
ma akupŷm amnhī wūr ixto api.
Mē kot ja hā ixpumunh nē amā
amex o amex ā ajarēnh o pa
kaxyw. ² Na ra pyka piitā hkôt
ri mē pa xwŷnh kwŷjaja amnhī
kaxyw ixkôt hamaxpēr nē ixkôt
amnhī xunhwŷ nom ka na ka pre
inhmā mē agō. Ixte mē htūr tūm
nē mē pa mā xwŷnh ā mē harēnh
kaxyw. Jakamā koja mē nhŷrmā
ixkukwak ri pakuri htūr tūm nē
pa ho pa. ³ Na mē ra ixkapēr mar
mex nē. Nē ixpê Jejus Kris pē
ate mē hwūr inhmēnh xwŷnhja
kôt hamaxpēr mex nē. Nē apē
Tirtūm ā ām apyxi mex ā mǎānēn
akôt hamaxpēr mex nē. Nē amex
o amex ā akôt hamaxpēr nē
kām akīnh nē. Jakamā koja mē
nhŷrmā pakuri htūr tūm nē pa ho
pa. Nā koja mē anē.

⁴ Amnepēm amnē pyka ja hwūr
inhnojarêt nhūm ate tanhmā
ixte amnhī nhīpêx to hā inhmā
karōta na pa ra hatur xām mēnh
kaxyw. Na pa xatā mē kām
akapēr jarēnh o ri mē hkôt
ixpa. Jao ra mē kām apē Pahi
Maati hā apixi mex ā ajarē nē
amex o amex nē axāhpumunh o
axāhpumunh ā mē kām ajarēnh o
ri ixpa. ⁵ Jakamā e Papaj. Kēr ka
tokyx ixpê akra hā ma akupŷm
amnhī wūr ixto api. Pa akupŷm

awūr pōj nē te amnepēm akuri
ixpaja pyrā nē axte akuri ixpa
ho ixpa.” Anê.

*Jejus kot hkwyjê ho Tirtūm wūr ā
harēnh*

Nhūm Jejus arī Tirtūm mā kapēr
nē kām:

⁶ “E Papaj. Nā ra ate pyka hkôt
inhmā mē ōr xwŷnhjaja na pa ra
mē kām akapēr jarēnh ryy ho ri
mē hkôt ixpa nhūm mē akapēr
kôt pix mā amnhī nhīpêx o pa.
⁷ Tā ixte anhŷ hā tanhmā amnhī
nhīpêx to ho ri ixpaja ra mē kot ja
hā ixpumunh mex. ⁸ Na pa pre
hte axō ri mē ahkre ho ri ixpa
nhūm mē amnhī kaxyw ixkôt
hamaxpēr mex nē. Nē ate mē
hwūr inhmēnh nhūm mē hwūr
ixwŷrkja ā mē kot ixpumunh
mex.

⁹⁻¹⁰ Tā ot pa mē ho awūr o xa.
Nom na pa mē kēp ixkwŷ hkêt
xwŷnhjê ho awūr kêt nē. Ām ate
inhmā mē ōr xwŷnhjê pix o na
pa awŷ. Mē kēp akra jakamā
mǎānēn mē kēp ixkraa. Jakamā
na htem pamā pamex o pamex ā
pajarēnh o ri pa.

¹¹ Axihŷtŷx o axihŷtŷx jakamā na
ka pre amnhī xwar inhmā axi-
htŷx xā hkwy gō pa te ixte axi-
htŷx pyrāk. Tā na pa ra akupŷm
awūr inhnojarêt kaxyw. Kot paj
jar pyka hkôt ri ixpa ry hkêt nē.
Nom ixkwŷjaja koja mē arī kamā
pa jakamā kwa Papaj. Kēr ka
inhmā mē omunh mex nē kē mē
inhŷ hā tām ri amnhī nhīpêx o
pa. Nē pahpyrā nē te ixkre tipxi
kamā mē htixpi nē mē pa pyrāk o
axpēn kôt pa.

¹² Kormā mē kamā ixpata ā ate
inhmā axihŷtŷx xā hkwy nhōrta
o pa mē htānopxar mex o ri mē
hkôt ixpa. Jakamā nhūm mē ri
ixkôt amnhī nhīpêx o pa. Ām
Jut Kariot pix koja mē hkīnhā
tanhmā amnhī tomnuj to nē
hapêx. No ām ra akapēr ā kagā

kot hkukamã ã kot amnhĩ nhĩpêx anhÿr ã harênh xàja kôt koja ã amnhĩ nhĩpêx anê nê hapêx.

¹³ Tã na pa ra akupÿm awÿr inhnojarêt kaxyw jakamã na pa ixte tokyx mē rer mã xwÿnhjê ho awÿr o xa. Kormã mē hkôt ri ixpa ri. Mē kot inhmar nê ixpyrà nê hkĩnh nê hamakêtkati nê ri pa kaxyw. ¹⁴ Na pa pre ra mē kãm akapêr jarênh ry nê nhũm mē ixpyrà nê akôt pix mã amnhĩ nhĩpêx o ri pa. Jakamã nhũm hte mē kêp ixkwÿ hkêt xwÿnhjaja tee ri ja hã mē omu nê axtem nê kãm mē hkurê nê. Nom mē kêp mē hkwÿ hkêt jakamã na htem ã mē kamã gryk anê.

¹⁵ Tã na pa ã mē ho awÿr anhÿr o xa. Nom mē kot amnhĩ tomnuj xwÿnhjê hkãx ã mē pa kaxyw na pa mē ho awÿr kêt nê. Koja mē arĩ mē hkôt ri pa. Nom mē urak nê amnhĩ tomnuj o pa pumaj na pa ã mē ho awÿr anê. ¹⁶ Mē kêp mē hkwÿ hkêt. Axtem mē kot amnhĩ nhĩpêx. Te mē kot mē pahte amnhĩ nhĩpêx pyrãk jakamã kē mē amarĩ mē hkôt pa htã mē kot amnhĩ nhĩpêx kôt amnhĩ nhĩpêx o pa hkêt nê. ãm pahkôt pix mã amnhĩ nhĩpêx o pa. ¹⁷ Akapêr pix na mex o mex jakamã koja mē hkôt amnhĩ nhĩpêx o pa nê gaa nê te pahte amnhĩ nhĩpêx pyrãk o amnhĩ nhĩpêx.

¹⁸ Na ka pre amnê mē hwÿr inhmê pa pre ixte mē kãm akapêr jarênh o ri ixpa kaxyw mē hwÿr wrÿ. Nê amnhĩ pyrã nê mē kot akapêr jarênh o mē hkôt pa kaxyw pa mē kurê nê ma mē hwÿr mē kurê. ¹⁹ Inhmã mē hapê jakamã kot paj amnhĩ grônh kôt nhãm mē kot axpên mã ri inhgrônh o pa xwÿnhjê mã amnhĩ gô. Amã hprãm xà hkôt. Ixkwÿjaja kot ja hã xpumunh nê ixpyrà nê amã hprãm xà hkôt pix

mã tanhmã amnhĩ nhĩpêx to ho pa kaxyw.” Anê.

Jejus kot hkrajê pütã ho Tirtũm wÿr

²⁰ Nhũm Jejus arĩ Tirtũm mã amnhĩ jarê nê kãm:

“Tã na pa ã jajê ho awÿr anê Papaj. Nom ixkôt mē pa ho mē pa xwÿnhjê pix o na pa awÿr kêt nê. Mããnên mē ô ri nhÿrmã mē kot ixkôt amnhĩ xunhwÿr mã xwÿnhjaja na pa mē ho ixpimràã tã mē ho awÿ. ²¹ Kê mē pahpyrà nê te hamaxpêr tipxi pyrã nê ri axpên to pa. Nê pahte amnhĩ nhĩpêx kôt pix mã amnhĩ nhĩpêx o pa. Koja mē ã amnhĩ nhĩpêx anhÿr o pa nhũm mē kêp pahkwÿ hkêt xwÿnhjaja pahtã mē omu nê ate mē hwÿr inhmênh ã apumunh kurê kumrêx.

²² Nê koja mē ixkukwak ri panhÿ hã te pahpyrà nê hamaxpêr tipxi nê ri pa pyrãk o amnhĩ nhĩpêx o pa. ²³ Na pa htem te ixkre tipxi kamã mē ixtipxi pyrãk o axpên nhĩpêx o ri ixpa. Te pahte axpên nhĩpêxta pyrãk. Tã koja mē ixwakre kamã ã axpên nhĩpêx anhÿr o pa nhũm mē kêp pahkwÿ hkêt xwÿnhjaja ja hã mē omu nê hamaxpêr o: ‘Nã pêr ãm hãmri na pre Tirtũm tãm mē pahwÿr Jejus mē. Kãm hapê htÿx tã mē pahwÿr kumê nhũm wrÿ nê amnhĩ xwar kãm hkwÿjê japê nê.’ Anhÿr o koja axpên mã pajarênh o pa.

²⁴ Amnepêm amrakati ri pa pre amã ijapê hã ri ixpa. Tã ot pa jajê ho awÿ. Ka na ka pre inhmã mē agô. Tã ma awÿr inhmôr mã xàta wÿr na pa inhmã mē àpir prãm nê. Koja mē nhÿrmã ma pahwÿr api pu mē pahpiitã pahpimràãtã pamã axpên japê hã ri papa ho papa.

²⁵ E Papaj. Amex o amex tã mē kêp ixkwÿ hkêt xwÿnhjaja na kormã ate mē hwÿr inhmênh

xwýnh ã ixkôt hamaxpêr kêt nê. Nom mê kot ixkôt amnhĩ xunhwýr xwýnhjaja na mê kurom ja hã ixkôt hamaxpêr mex nê.

²⁶ Na pa ra ixprĩ hã mê kãm akapêr o amnhĩrĩt o ri ixpa. Tã kot paj axte mê kãm akapêr kwý jarê. Amã ijapêta pyrã nê mê kãm axpên kĩnh ã axpên to pa kaxyw na pa mê kãm hã karõ. Kot paj inhĩ hã mê hkôt ixpa hkêt tã koja Pahkarõja mê hwýr wrý nê mê hkarõ mã agiê nê te pa mê hkôt ixpa pyrãk o mê hipêx. Ja na pa inhãmã hprãm. Tã koja anê. Jakamã na pa ã mê ho awýr anê. Tã ãm ja pix Papaj.” Anê.

Nhũm pre ã Jejus õ Papaj mã mê inhnoo mã amnhĩ jarênh anê pa mê ixpiitã hã kuma.

18

Mê kot Jejus pynênh ã mê harênh Matêwre 26.47-56; Makre 14.43-50; Rukre 22.47-53

¹ Tã nhũm Jejus mê ixto Hipêêxã hwýr pa. Hãmri nê ixkreja rũm ma tẽ nê Jerujarê rũm kato nê ma gô pê Kirõ hwýr tẽ pa mê hkôt ixpa ho ixpa xwýnhjaja ma hkôt mra. Nê gô hã rê nê hikjê hã mê kot mêmopĩ hkô hkre xwýnhja wýr mra nê parpê ixkrĩ hpa. ² Na pre hte Jejus xatã hwýr amnhĩ kôt mê ixto pa ho kuhê. Jakamã nhũm Jut Kariot kot mê kãm õr mã xwýnhta ra kot hwýr mê ixpa ho ixkuhê xàta pumunh mex. ³ Jakamã pa mê hwýr pøj nê ixkrĩ hpa nhũm mê mê ixwýr mra. Jut Kariot mê pôristijaja. Rõm nhõ xwýnhjê nhõ pôristijê mê patre nhõ pôristijaja nhũm mê mê ixwýr Jut Kariot kôt mra. Ijaew nhõ pahijê nhý hã mê ixwýr mra. Piitã wapohti jamý nê pô hpòk nê kanê jamý nê mê ixwýr hpòk o kato. ⁴⁻⁵ Hãmri nhũm Jejus amnhĩ wýr mê omu nê kãnhmã xa nê ma mê kutã tẽ. Jut Kariot kot mê kãm õr kaxyw nhũm amnhĩ tã omunh

mex jakamã amnhĩ wýr mê omu nê ma mê kutã tẽ. Hãmri nê mê hkaxpa nê mê omunh o xa nhũm Jut Kariot mê kuri xa nhũm Jejus mê omu nê mê kãm:

—Pa. Mêmoj japêr na ka mê pô hpòk o ri apa? Anê.

Hãmri nhũm mê kãm:

—Nã Jejus pê Najare nhõ xwýnh japêr o na pa mê ri ixpa. Anê.

Hãmri nhũm mê kãm:

—Tý ot pa xa. Pa na ixpê Jejus. Anê.

⁶ Hãmri nhũm mê kuma nê tee ri axpên pumu nê umaj katê ho axkamêh nê kuhê. Nom katê ho pikamênh o ra rôròk pa nê hikwý.

⁷ Hãmri nê kãnhmã kuhê hpa nhũm Jejus axte mê kãm:

—Kwa mê inhãmã amnhĩ jarê. Mêhõ japêr o na ka mê apa? Anê.

Hãmri nhũm mê kãm:

—Jesús pê Najare nhõ xwýnhta japêr o na mê ri ixpa kênã. Anê.

⁸ Hãmri nhũm mê kãm:

—Kwa ra ixte mê amã amnhĩ jarênh kênã. Paa. Ijapêr o na ka mê ri apa. Jakamã kwa kêr ka mê ixkôt ri mê pa xwýnhtaja tanhmã mê ho hkêt nê. Kê mê mãmrĩ anhgrã nê ma mra.

⁹ Anhýr o mê inhnê mê kãm kapêr. Na pre ra ham Hipêêxã mã mê ixtã kãm amnhĩ jarê nê kãm:

—Kormã mê kamã ixpa ri ate inhãmã ixih Týx xã nhõrta o na pa mê htãnopxar mex o ri mê hkôt ixpa.

Anhýr o mê ixtã kãm amnhĩ jarênh jakamã nhũm ã mê inhnê mê kot unênh mã xwýnhjê mã kapêr anê.

Simãw Pêtre kot mêhõ pê hamak krãhyr ã harênh

Matêwre 26.51-54; Makre 14.47; Rukre 22.49-51

¹⁰ Hãmri nhũm Simãw Pêtre tee ri Jejus ã mê omu hãmri nê õ wapo kapa nê jam ho apê nê ho hamak nhĩkjê krãhta. Mawti jamak krãhta. Mawtija mêõ patre mã apênh xwýnhjê hõ na pre nhũm Simãw Pêtre hamak krãhta.

11 Hãmri nhùm Jejus ja hã omu nê nê kãm kapêr nê kãm:

—Tk. Kwa nã amarĩ xa nê akupÿm awapota hkãm haxã. Ixte mẽ anê amnhĩ xã htÿx kamã ijamak kaxyw na pa pre Inhĩpêêxã rùm amnê mẽ awÿr pika hwÿr wrÿ. Kêt inhmã kãm hprãm xã hkôt pix mã na inhmã tanhmã amnhĩ nhĩpêx to ho ixpa hprãm. Jakamã kwãr mẽ mãmrĩ tanhmã kãm ixto hprãm xã hkôt mãmrĩ tanhmã ixto. Anê.

Mẽ kot Anas wÿr Jejus o htêm ã mẽ harênh

Matêwre 26.57-58; Makre 14.53-54; Rukre 22.54

12 Tã nhùm pôristi mẽ mẽ hkrãhtùm nê mẽõ patre nhõ pôristijaja Jejus pynê nê hpa hpre hpa 13 nê ma Anas wÿr o tẽ. Anasja Kajpas piinhõ na pre. Nhùm Kajpas kormã amgrãja ã Anas pyrã nê kêp mẽõ patre maati. 14 Jakamã na pre ra Ijaew nhõ pahijê mã Jejus jarênh o:

—Nã kot puj mẽ Jejus pĩr tokyx anê. Kê tapxipix ty pu mẽ arĩ mÿrÿpê pahpiitã pajamakêtkati nê ri papa. Anê.

Jakamã nhùm mẽ Jejus pynê nê kormã ma patre maati hwÿr o tẽ.

Simãw Pêtre kot Jejus kôt pa hkêt ã kot amnhĩ jarênh

Matêwre 26.69-75; Makre 14.66-72; Rukre 22.54-62

15 Hãmri pa ixpê Juãw mẽ ixkrãmnhwÿ Simãw Pêtre mẽ pa wa ma mẽ hkôt wa tẽ. Nhùm mẽ ra mẽ inhõ patre maati nhõrkwÿ hwÿr Jejus o axã. Nhùm patre maati kot ixpumunh jakamã nhùm kãm ápênh xwÿnhja ixpumu nê inhmã anê pa mẽ hkôt axã. 16 Nom nhùm Simãw Pêtre arĩ kapôt ã hakwa krem xa. Hãmri pa omu nê akupÿm hwÿr tẽ nê mẽõ niti kot hakwa kre jamãr o ãm xwÿnhja mã anê nhùm kãm kahê xã mẽ nhùm mẽ ixkôt axã. 17 Hãmri nhùm nita hprĩ hã omu nê kãm:

—Xêê. Pêr apê mẽ kot unênh nê o mör mÿj kôt ri mẽ pa xwÿnhjê hõ na ka mẽ? Anê.

Hãmri nhùm kuma nê kãm:

—Tk. Nã ixte mẽõ myti ata pumunhre hã. Anê.

18 Hãmri nhùm ra kôt ã kamãt nê ra kryy nê nhùm mẽ ápênh xwÿnh kwÿ mẽ mẽõ patre nhõ pôristi hkwÿjaja amnhùm kuto nê hã ànhunh o kuhê. Nhùm Simãw Pêtre mẽ omu nê mẽ hwÿr tẽ nê mẽ ãhkô hã ànhunh o xa.

Patre maati kot Jejus kukjêr ã harênh

Matêwre 26.59-66; Makre 14.55-64; Rukre 22.66-71

19 Rôm nhùm Anasja hêx rom tanhmã Jejus kukjêr to nê kãm:

—E kwa inhmã amnhĩ jarê. Tanhmã na ka hte we akôt mẽ pa ho mẽ pa xwÿnhjê jahkre hto ho apa wehe? Anê.

20 Hãmri nhùm amnhĩ tã kãm:

—Nã na pa hte mẽ piitã mẽ noo mã ri mẽ kãm ixkapêr o ixpa. Tirtùm kapêr o mẽ ahkre xã hã ixkre kamã nê Tirtùm mã amnhĩ jarênh xã hã ixkre kamã pa hte mẽ piitã mẽ noo mã ri mẽ kãm tanhmã ixkapêr to ho ri ixpa. Na pa hte nhÿri ixpimxur pê ri mẽ kãm tanhmã ixkapêr to ho ri ixpa hkêt nê. 21 Tã ka ixtã mẽ kot inhmar o kuhê xwÿnhjaja tanhmã ixtã mẽ hkukjêr to hkêt nê. ãm papxipix ri ixkukja. Kwa ixtã mẽ hkukja kê mẽ kot tanhmã ixkapêr mar to xã hkôt tanhmã amã ijarênh to nã? Anê.

22 Hãmri nhùm patre nhõ pôristi hõja kuma nê hwÿr tẽ nê kãm:

—Tk. Kwa na htem ã patre maati mã kapêr anhÿr kêt nê. Na htem hã hpijaãm o kãm kapêr. Tã na ka axtem nê ri ã kãm akapêr anê. Anê.

Hãmri nê hinep hkura.

23 Hãmri nhùm Jejus amnhĩ tã omu nê kãm:

—Kwa kot pa tanhmã mẽ amã amnhĩ to ixêx to ka mẽ hã inhma nê ri kormã tanhmã axpên mã ixto akapêr to rÿ hã ixtak. Nom ãm

hãmri ixte mẽ amã amnhĩ jarênh tâ ka axtem nê ri inhĩnep ixtak. Anê.

²⁴ Hãmri nhũm Anas tanhmã mar to hpa hãmri nê umre Kajpas wýr kumê. Na pre Kajpasja kormã hitom kãm ri tanhmã amnhĩ nhĩpêx to ho nhỹ nhũm Anas mẽ kãm anê nhũm mẽ kuma nê hwýr Jejus o tẽ nê ho axà. Arĩ hpa hpre rãhã hwýr o tẽ nê ho axà nhũm xa nê kãm amnhĩ jarê.

Simãw Pêtre kot axte Jejus kôt pa hkêt ã amnhĩ tâ aprãr ã harênh

Matêwre 26.71-75; Makre 14.69-72; Rukre 22.58-62

²⁵ Nhũm Simãw Pêtre arĩ mẽ ìhkô hã ànhunh o xa nhũm mẽhõja kãm kapêr nê kãm:

—Kwa pêr apê Jejus kôt ri mẽ pa xwýnhjê hõ na ka. Anê.

Hãmri nhũm kuma nê kãm:

—Tk. Kokỹ ixte mẽhõ nêj pumunhre hã. Anê.

²⁶ Hãmri nhũm hpãnhã mẽõ patre maati mã àpênh xwýnhja mãânên omu. Simãw Pêtre kot kêp hamak krãhyr xwýnhhta kwý na pre. Jakamã nhũm hprĩ hã omunh mex kurê kumrêx nê kãm:

—Kwa nà ka na ka mũtar pĩ hkôta kamã mẽ ìhkô hã xa pa apumu. Anê.

²⁷ Hãmri nhũm tee ri kuma nê axte mẽ kãm amnhĩ tâ aprãr kãm hihtýx nê. Jao ra mẽ kãm amnhĩ tâ aprãr o axkrunêpxija mẽ nhũm krãhyre hkâr kurê kumrêx. Ra Jejus kot hkukamã harênh xà hkôt kêp hkwy hkêt ã amnhĩ tâ aprãr o axkrunêpxi.

Jejus kot Pirat mã amnhĩ jarênh

Matêwre 27.1-2, 27.11-31; Makre 15.1-20; Rukre 23.1-5, 23.13-25

²⁸ Hãmri nhũm mẽ ixpê Ijaew hkrãhtũmjaja ra Kajpas rũm Jejus o kato nê ma Pirat wýr o tẽ. Piratja na pre te Rômjê nhõ pahi pê Sesti mã mẽ ixpê Ijaew jamãr o pa nhũm mẽ ma hwýr o tẽ. Nhũm ra myt kator grire nhũm mẽ hwýr o tẽ nê òrkwý kapem o xa. Pirat kêp Ijaew

kêt jakamã nhũm mẽ òrkwý hwýr gjêx kêt nê kapôt ã kuhê. Na hte Ijaew kormã Pas ã hkĩnh hãmri nê nhãm mẽ kêp Ijaew kêt xwýnhjê nhõrkwý hwýr gjêx kêt nê. Kojã mẽ hwýr agjê nê amnhĩ tomnu nê Pas ã apkur kêt nê. Jakamã nhũm mẽ Pirat wýr Jejus o tẽ no ãm hwýr o àr kêt nê. ãm ixkre kapem o xa. ²⁹ Hãmri nhũm Pirat mẽ hwýr kato nê omu nê hã mẽ hkukja nê mẽ kãm:

—Kwa tanhmã na we amnhĩ tomnuj to ka mẽ ixwýr o tẽ? Anê.

³⁰ Hãmri nhũm mẽ kãm:

—Nà kot amnhĩ tomnuj o pa xwýnh kênã. Jakamã na pa mẽ awýr o tẽ. Ate tanhmã kot amnhĩ tomnuj to hã harênh mar nê mýrapê tanhmã ho kaxyw. Anê.

³¹ Hãmri nhũm mẽ kuma nê mẽ kãm:

—Tk. Kwa mẽ kamjaja ma amnhĩ kôt o tẽ nê amnhĩ krã hkôt tanhmã ho. Mẽ ate tanhmã kot amnhĩ nhĩpêx to hã omunh xà hkôt. Anê.

Hãmri nhũm mẽ tee ri kuma nê kãm:

—Kwa amnepêm mẽ ixpê Ijaewjaja na pa pre htem kên o mẽ kot amnhĩ tomnuj xwýnhjê tak o mẽ kupa. Tã na ra Rôm nhõ pahĩtija mẽ pamjaja mẽ ixte mẽ hpar nê mẽ ixkurê. Tapxipix kãm mẽ hpar ã àmnênh prãm. Jakamã kot kaj ý hã mẽ inhmã tanhmã hã axãmnhênh to kê mẽ kupĩ. Ra ja kaxyw mẽ kot mẽ ixkaxyw axãm kênã. Anê.

³² Rôm nhõ xwýnhjaja na htem mẽ kot amnhĩ tomnuj xwýnhjê hpar kaxyw nê pĩ kahpa hã mẽ hanhõ nê mẽ kupa. Nhũm Jejus amnhĩ kukamã tanhmã mẽ kot hprĩ to hã mẽ omunh mex jakamã ra hprĩ hã mẽ inhmã mẽ kot tanhmã hipêx to hã mẽ harê. Jakamã nhũm pre ã Ijaew Pirat kot mẽ kãm hprĩ prãm xãj ã kãm kapêr kãm xihtýx anê. ³³ Hãmri nhũm mẽ kuma nê akupým òrkwý hwýr axà

nē amnhī wŷr Jejus ā karō nhūm hwŷr axā nhūm kām:

—E kwa inhmā amnhī jarē. Xà apē Ijaew nhō pahi na ka? Xà ka na htem amnhī wŷr akām hamak o pa? Anē.

³⁴⁻³⁶ Hāmri nhūm kām:

—Tŷ ām hāmri na ka ā ijarēnh anē. Nom jar pika ja kamā ixpē mēō pahi hkēt. Axtem ixpē mēō pahi na pa. Mo kaxyw na ka ā ixkukjēr anē? Xà na pre mēhō ixte mē anhō pahi Sesti kutā ixām ā amā ijarē ka ama nē tee ri ixkukamā ajamaxpēr? Nà xà ām hāmri amā Tirtūm kot Ijaew wŷr inhmēnh ā ixpumunh prām? Mo kaxyw na ka ā ixkukjēr anē? Anē.

Hāmri nhūm tee ri kuma nē kām:

—Tk. Mo kot pa kēt ri axtem nē Tirtūm kot Ijaew wŷr amēnh ā akukja? Mē apyrā nē ixpē Ijaew kēt kēnā. Mē kot ixwŷr ato htēm xwŷnhjaja na mē ā ate amnhī jarēnh anhŷr ā ajarēnh anē. Nà mē akwŷjē mē mē anhō patre krāhtūmjaja na mē ā inhmā ajarēnh anē. Jakamā e aprī hā inhmā amnhī jarē. Tanhmā na ka we amnhī tomnuj to nhūm mē ixwŷr ato tē? Anē.

Hāmri nhūm kuma nē kē axte kām:

—Nà ixpē pyka ja kamā mē ō pahi hkēt. Kop ām ixpē pyka ja kōt mē ō pahi ronhŷx ra ixkōt ri mē pa xwŷnhjaja tanhmā ixtā mē ato. Nom jar ixpē mē ō pahi hkēt. Ām axtem ixpē mē ō pahi na pa. Ām hāmri na pa ā amā amnhī jarēnh anē. Anē.

³⁷ Nhūm ā kām amnhī jarēnh anē hāmri nhūm tee ri kuma nē kām:

—Xà apē mē ō pahi hō na ka? Anē.

Hāmri nhūm kām:

—Tŷ. Nà ām hāmri na ka ā ijarēnh anē. Na pa pre amnē pikaja wŷr wrŷ nē jar mē akamā ixkato nē mē akamā ixāptār. Ixte tanhmā mē kām ixkapēr to ho ri ixpa kaxyw na pa pre wrŷ nē mē akamā ixpa nē

ām hāmri mē kām ixkapēr o ri ixpa. Na pa hte tām ixkapēr o ri ixpa. Tā mē kot ixkapēr mar nē ixkōt ri amnhī nhīpēx o mē pa xwŷnhjaja na htem ixpē mē ō pahihti hā ijarēnh o pa. Anē.

³⁸ Hāmri nhūm Pirat kot tām kām kapēr ā amnhī jarēnhja ā kuma nē kām:

—Tk. Aa ixte pika ja kamā mēhō pumunh nhūm tām kapēr o pare hā. Anē.

Hāmri nē kapēr ā kuma nē tee ri hkukamā hamaxpēr. Hāmri nē akupŷm Ijaew wŷr ho kato nē mē kutā o xa nē mē kām:

—Kwa tanhmā kot amnhī tomnuj tore hā. ³⁹ E mē inhma. Na pa hte amgrā mē arīgro pē Pas kām mē amā mē hagjēnh xā rūm mē akwŷjē ho hpŷnh nē mē hapōj nhūm mē hamakētkati nē amnhīx ri pa. Ka mē ja hā omu nē Pas ā akīnh nē. Jakamā e. Pa mē amā mē anhō “pahihti” jarēnhja mā inhūre. E na pa ra kām inhūre. Anē.

⁴⁰ Hāmri nhūm mē tee ri ā kapēr anhŷr ā kuma nhūm ja mē kēp omnuj tŷx nē. Nhūm mē hā kax pé gryk kamā kām kapēr kām hihtŷx nē kām:

—Tk. Kwa nà kām anhūrēr kēt nē. Kēt Parapas mā mǎn anhūre. Anē.

Parapasja na pre hte tanhmā amnhī tomnuj tŷx to ho ri pa nhūm prem mŷrapē unē nē haxā. Tā nhūm mē axtem nē Pirat kot kām urer prām xāj Jejus kaga.

19

Mē kot Jejus tak ā mē harēnh

Matêwre 27.27-31; Makre 15.16-21; Rukre 23.20-25

¹ Tā nhūm Pirat akupŷm ōrkwŷ hwŷr Jejus o axā nē ō pōristijē mā hā amŷnē nhūm mē hwŷr mra nē htak o kuhē. ² Hāmri nē kēp pahi hā hpēr o pikēnh kaxyw kām pahi hā mē ahkà nhīpēx nē hkrām haxā. Nom axtem mēmo mrōnhī te kot ronh kanēre pyrāk xwŷnhja nhūm

mē hikāx nē hkrām haxà. Nē kēp pahi hā mē ê kamrêk py nē kām haxà. ³Hāmri nē xatà hwÿr mra nē hinep htak nē hā hpēr o pikēnh o xa nē kām:

—E apê Ijaew nhō pahi punuti na ka. Anē.

⁴Hāmri nhūm Piratja akupÿm Ijaew wÿr kato nē mē kām:

—E koja inhō pôristi akupÿm mē awÿr ho kato ka mē omu. Na pa tee ri kot tanhmā amnhī tomnuj to hā hkukja. Pēr tanhmā kot amnhī tomnuj to hkêt kēnā. Anē.

⁵Hāmri nhūm Jejus kato nē arī pahi hā àhkà tu nē ê kamrêk jaxà nē o xa nhūm Pirat mē kām:

—E kwa mē omu nē kamā axukapri hkêt wehe. Anē.

⁶Hāmri nhūm patre krāhtūmjē mē mēō pôristijaja tee ri ja hā kuma nhūm ja mē kēp omnuj nē. Hāmri nē hā kām kapēr kām hihtÿx nē kām:

—Tk. Kwa nà pī kahpa hā mǎn anhō. Kē pī kahpa hā mǎn ajēt nē ty. Anē.

Hāmri nhūm tee ri hā mē kuma nē mē kām:

—Nà mē kam nē ma amnhīm o tē nē mē kam amnhīm ho anē. No pa kot paj ho anhÿr kêt nē. Mo mÿrapê kot pa kêt hā amÿnē nhūm mē kupi? Nà kwarī kot pa ho anhÿr kêt nē. Anē.

⁷Hāmri nhūm mē tee ri kuma nē kām:

—Kwa kēp Tirtūm Kra hā amnhī jarēnh kēnā. Mē inhīgētjaja na prem ā mē ixte amnhī jarēnh anhÿrja nē mē inhmā kapēr pa htem ā amnhī jarēnh anhÿr kêt nē. Koja mēhō ā ri amnhī jarēnh anē nhūm mē ja mÿrapê kupi. Anē.

⁸Hāmri nhūm Pirat tee ri Jejus kēp Tirtūm Kra hā amnhī jarēnhja ma nē kām uma nē kām tanhmā ho hprām kêt nē. ⁹Hāmri nē akupÿm ōrkwÿ hwÿr ho axà nē axte hkukja nē kām:

—Kwa aprī hā inhmā amnhī jarē. Nhÿhÿnh na ka pre mē ixwÿr mō? Anē.

Nom nhūm axte tanhmā kām nē hkêt nē. Am arī akryk mar o xa.

¹⁰Nhūm tee ri omu hāmri nē kām:

—Kwa xà ate ixpumunh kêt? Inhÿ hā na htem mē kupa nē inhÿ hā akupÿm mē hapôj. Tā ka pēr aprī hā inhmā tanhmā amnhī jarēnh to hkêt nē ri akryk akuhē. Anē.

¹¹Hāmri nhūm Jejus kām:

—Nom Tirtūm nhÿ hā pix mā na ka hte ā amnhī nhÿpêx anē. Kēp am Tirtūm kām ja prām kêt ronhÿx ka tee ri tanhmā amā ixto hprām hkaprÿ. Tām kot mē ixkaxyw axām kēnā. Tā mē kot awÿr inhmēnh nē ri ixtyk ā ijarēnh xwÿnh pē Ijaew nhō pahijaja. Ra mē kot ixkaga jakamā na mē ā amā ijarēnh anē. Jakamā mē kot amnhī tomnuj tÿx o ajakrenh. Anē.

¹²Hāmri nhūm Piratja tee ri ā kapēr anhÿr ā kuma nē kot kām urer prām nē. Hāmri nē akupÿm Ijaew wÿr kato nē hā mē kām kapēr nhūm mē tee ri kot kām urer kaxyw ā amnhī jarēnhja ma nē kām ja prām kêt kumrêx. Jakamā kàxpê nē kām kapēr nē kām:

—Kwa nà ra kēp mē inhō pahi hā kot amnhī to hēx kēnā. Kot mēhō ā ri amnhī jarēnh anē nhūm Rōm kamā mē panhō pahi Sestija ja hā harēnh ma nē kamā gryk tÿx nē. Tā kot kaj kām anhÿre nhūm ajarēnh ma nē akamā gryk nē. Anē.

¹³Hāmri nhūm tee ri mē kuma hāmri nē ma pahi kot tanhmā mē harēnh to xà hā kēn pota wÿr ma tē nē hā nhÿ. Mē ixpê Ijaew kapēr kām mē ixte kām: “Kapata” jarēnh xwÿnhnta wÿr kot tanhmā Jejus jarēnh to kaxyw ma hwÿr tē nē hā nhÿ nhūm mē hwÿr o tē.

¹⁴Hāmri nhūm ra arīgro pē sēsta. Mē ixpê Ijaewjaja mē ixte Pas ā amnhī tomnuj mÿrapê mry hkwy hpar nē Tirtūm kôt pix mā amnhī nhÿpêx ā amnhī jarēnh xà hā arīgroja kato. Jakamā nhūm kaxkwa nhÿpòk ri myt nhÿ nhūm

Piratja mẽ kot Jejus kator ã harēnh prām xàj arĩ mẽ kām ho mẽ õ pahi hã harē nē mẽ kām:

—E ota mẽ anhõ Pahihtita. Anē.
¹⁵ Hāmri nhũm mẽ tee ri ã harēnh anhỹrja ã kuma nē kām:

—Kwa apĩ ri. Ma o tē nē pĩ kahpa hã anhõ kē tokyx ty.

Anē nhũm tee ri mẽ kuma nē mẽ kām:

—Kwa nà. Kêp mẽ anhõ pahi kēnã kot paj kêt ri axtem nē mẽ apē kupĩ. Anē.

Hāmri nhũm mẽ kām:

—Nà kēp mẽ inhõ pahi hkêt. Pahi Sesti pix na kēp mẽ inhõ pahi. Anē.

Mẽ kām Sesti hkĩnh kêt tã ã kām Jejus htyk prām xàj ri harēnh anē.

¹⁶ Hāmri nhũm Pirat tee ri ja hã mẽ kuma nē tã Jejus ã pōristi mã karõ nē mẽ kām:

—E mẽ māmĩ ma o tē nē pĩ kahpa hã anhõ kē ty. Anē.

Hāmri nhũm mẽ kuma nē ma o tē.

Mẽ kot pĩ kahpa hã Jejus nhõ ã mẽ harēnh

Matêwre 27.32-44; Makre 15.21-32; Rukre 23.26-43

¹⁷ Hāmri nhũm pōristija Jejus mã õ pĩ kahpa gõ nhũm kutu nē ma mẽ hkôt hkjēnh o mō. Nhũm mẽ krĩ rũm ho kato nē ma hixêt prêk wýr o tē. Hixêt prêkja mẽ kot harēnh o: “Korkot” anē. No mẽ ixpê Ijaewjê kapêr kām na pa pre htem harēnh o “Mẽ hkrã hi xà” anhỹr xwýnhnta wýr nhũm mẽ ma o tē nē hã ho api. ¹⁸ Hāmri nē pikap pĩ kahpa xi nē hã Jejus xi nhũm hã nõ nhũm mẽ prek o ãkra ho htýx nē hpar o htýx. Hāmri nē kaxyw hkakwý nē hkakwýnh pa nē kamã pĩ kahpata xãm nē hity hpa nhũm Jejus kýx pē ajêt. Hāmri nhũm mẽ mãânēn wa ho hamēxkrut nē pĩ kahpa hã wa kunhõ nhũm wa kuri ajêt. Wa kot tanhmã amnhĩ tomnuj to xwýnhja wa ho akutã Jejus nhijê nhũm wa urak nē kýxpê ajêt.

¹⁹ Hāmri nhũm Piratja õ pōristi mã anē nhũm mẽ tap õ py nē hã tanhmã kagã hto nē kagã ho:

IJAEW NHÕ PAHI JEJUS NA JA

KÊP NAJARE NHÕ XWÝNH

²⁰ Nom mẽ ixpê Ijaew kapêr pix kām hã kagã hkêt nē. Mãânēn Gresjê kapêr kām nē Raxijê kapêr kām nhũm mẽ mãânēn hã kagã nē Jejus mýri kunhõ. Hāmri nhũm Ijaew kwýjaja Jerujarē rũm hwýr mra nē mẽ kot ã hã kagã nhípêx anhỹrta pumu nē kamã harē. Jerujarēja hixêt prêeta wýr jawý jakamã nhũm mẽ kurũm ohtõ nē hwýr mra nē omunh o kuhê.
²¹ Hāmri nhũm patre hkrãhtũmjaja tee ri ã Jejus jarēnh anhỹr ã kagãta pumu nhũm ja mẽ kēp omnuj nē. Jakamã nhũm mẽ ma Pirat wýr mra nē kām:

—Kwa mon ka ri hã mẽ kām anē nhũm mẽ axtem nē ã ri kagã nhípêx anē? Kwa nà kēp mẽ inhõ pahi hkêt. ãm htýx ri kot ã kot amnhĩ jarēnh anhỹr o pa kēnã. Kwa hã kagãja o anhĩpa nē hpãnhã hã kagã ho: “Kêp Ijaew nhõ pahi hã kot amnhĩ to hêx xwýnh.” Anhỹr o hpãnhã hã hipêx nē anhõ nà? Anē.

²² Hāmri nhũm mẽ kuma nē mẽ kām:

—Tk. Nà pa ho ixpinhpanh kêt nē. Ra ixte hã kagã hpar kēnã. Anē.

Pōristijaja kot axpēn mã Jejus xê ho pigrãnh

Matêwre 27.35-36, 27.55-56; Makre 15.24; Rukre 23.34

²³ Hāmri nhũm pōristijaja kot axpēn mã Jejus xê o pigrãnh kaxyw amnhĩ tã haxwýr o tē. Mẽ kēp 4 no nhũm Jejus xê kēp 5 jakamã nhũm mẽ amnhĩ kôt ho 4 nē haxwý nhũm pyxi nē hprã. ê rytita. Na pre hipêx muxre. Nhỹhỹnh hkayr xã pumunh kêt kumrêx.

²⁴ Jakamã nhũm mẽ omu nē kām hkĩnh nē. Hāmri nhũm hõ kot amnhĩm hpyr nē ho arĩk kaxyw nhũm mẽ hã kēnre ho jõka. Na pre ra Tĩrtum kapêr ã kagã htũm kot mẽ hkukamã ja hã mẽ harēnh nē mẽ harēnh kot:

Na prem axpēn mā ixē o anhrà nē
hā kēne ho jōka ho hkrī.
Anhÿr o kot mē hkukamā mē
harēnh. Tā nhūm mē ra hkōt ā
amnhī nhīpēx anhÿr o hkrī.

*Jejus kot Juāw nhīhkram katorxà
jaxâr ā harēnh*

²⁵ Nhūm Jejus par pē katorxà xa.
Nē htōx nē Kropti hprō Marir nē
Marir Matarēn mē nhūm mē Jejus
katorxà nhīhkō hā Jejus pumunh
o kuhē. Nhūm amnhī tā mē omu
²⁶ nē mē kuri pa ixpē Juāw pumu.
Hāmri nē kēp ixkrāmnhwÿ mex ā
ixtā katorxà mā kapēr nē kām:

—E ota Juāwta. Koja ixpānhā
te kēp akra pyrāk o anhīpēx nē
tanhmā ato ajuta hto ho pa. Anē.

²⁷ Hāmri nē hpānhā pa inhmā
kapēr nē inhmā:

—E Juāw. Kēr ka te kēp akatorxà
pyrāk o inhmā hipēx mex o ri apa.

Anhÿr jakamā pa kuma nē kot
inhmā hā karō xà hkōt inhōrkwÿ
hwÿr haxà nē amnhī kōt ri ho ixpa.

Jejus htyk ā harēnh

*Matêwre 27.45-56; Makre 15.33-
41; Rukre 23.44-49*

²⁸ Tā nhūm Jejus ra amnhī pumu
hāmri nē hamaxpēr o:

—Nà Inhīpēxà kot mēmoj tā
inhmā karōta na pa ra kām ho
anhÿr o hitēp xà xir kaxyw. Anē.

Hāmri nē kām kōr ā amnhī jarē.
Nom ra hkukamā Tīrtūm kapēr ā
kagà htūm kot htyk kaxyw nē kām
kōr kukamā harēnh jakamā nhūm
ā amnhī jarēnh anē nē kapēr o:
Nà na pa ra inhmā kōr nē. Anē.

²⁹ Nhūm hpar pē guhkrax kām wīhti
punureta ām jakamā nhūm mē ā
kot amnhī jarēnh anhÿrja ma nē
kaxyw mēmo rerek py nē o tē nē
kaxyw pī ryti hō py nē ho hkan-
hwÿ. Nē akupÿn o tē nē ho wīhti mā
haxà nē kām kupē. ³⁰ Nhūm hkaō
nē hkaōr pa hāmri nē kapēr o:

E nà hāmri na pa ra mē piitā
mē kot amnhī tomnuj
pānhā amnhīrer pa. Jao ra

Inhīpēxà kām hprām xà
hkōt kām tanhmā amnhī
nhīpēx to jatur xām kumē.

Anhÿr o amnhī jarēnhja kōt ahpar
mā hkrā nē ty.

*Mē kot kō xwa ho Jejus kamn-
hwÿr ā harēnh*

Wam Juāw 5.6-8

³¹ Nhūm ra sēsta nhūm apkati
nhūm mē inhō arīgromnu pē sap
kaxyw. Sapja ā na hte mē ixpē
Ijaew mē ixkīnh pē Pas ā ixkīnh
rūnh o ixpa. Nhūm mē kām sap ā
arī mē htyk nē mē harir xwÿnhjē
pumunh prām kēt jakamā nhūm
Ijaew krāhtūmjaja ma Pirat wÿr
mra nē kām:

—Kwa pōristi mā anē kē mē
tokyx mē hte hi kukē kē mē htyk
tokyx anē. Kē mē tokyx mē o wÿr
nē ma mē o mra nē mē haggē. Ko-
rmā sap kēt ri. Anē.

³² Hāmri nhūm mē kuma nē ō
pōristijē mā anē nhūm mē ma mē
hwÿr mra nē akutā wa kot Jejus
nhījē nē jēt xwÿnhata wa kumrēx wa
hte hi hkwÿr. ³³ Hāmri nē hpānhā
Jejus wÿr tē nē omu nhūm ra htyk
mex nē ajēt nhūm mē ja hā omu nē
kēp hte hi hkwÿnh kēt nē. ³⁴ Nhūm
pōristi hōja kō xwa py nē ho ihkjē
rūm hkanhwÿ nhūm hkamrō mē
ī kagō ahkà nē hprōt nhūm mē
hkwÿja omunh o kuhē. ³⁵ Nē ixpē
Juāw na pa pre ijaxwÿja mē ihkō
hā xa nē ja hā omunh jakamā pa
ā mē amā hā kagà anē. Ām hāmri
na pa mē amā harē nē hā kagà.
Mē ate kamā harēnh nē harēnh mar
nē hkōt ajamaxpēr kaxyw. ³⁶ Na
pre ra Tīrtūm kapēr ā kagà htūm
kamā ra hkukamā tanhmā kot mē
pahwÿr mēnh xwÿnhata jarēnh to nē
hā kagà. Nē hā kagà kot:

Koja mē nhÿhÿnh hi hkwÿnh kēt nē.
Anē.

Tā nhūm mē ra hā kagàja kōt ā
hipēx anē nē kēp hi hkwÿnh kēt nē.

³⁷ Nē Tīrtūm kapēr ā kagà htūmja
māānēn ja hā harēnh kot:

Mě kot hpīr nē hkanhwȳr xwȳnhja
koja mẽ hpar pē omunh o
kuhē. Anē.

Tirtūm kapēr ā kaga htūm kamā ā
Jejus tyk kukamā harēnh kot anhȳr.

Mě kot Jejus jaxàr ā mẽ harēnh

*Matêwre 27.57-61; Makre 15.42-
47; Rukre 23.50-56*

³⁸ Tā nhūm Juje pē Arimatej nhō
xwȳnhja Jejus ra htyk ā omu nē ma
Pirat wȳr tē nē hā kām kapēr. Kot
ma o mōr nē tokyx haxàr kaxyw.
Na pre ra Jejus kōt amnhī xām nom
Ijaew krāhtūmjē pymaj mẽ kām
amnhī to amnhīrit kēt nē. Jakamā
nhūm ma Pirat wȳr tē nē hā kām
kapēr nē kām:

—Pa e ot pa awȳr tē. Ixte mẽmoj
tā amā ixkapēr kaxyw. Kot kaj apu
inhmā “y” anhȳr japēr. Kwa xà kot
pa ma Jejus o mō nē haxà? Anē.

Hāmri nhūm kuma nē kām: “Nà
māmri ho anē.” Anē hāmri nhūm
ma hwȳr tē nē ho wrȳ nē kumȳ
nē ma haxàr mā o mō. ³⁹ Nhūm
Nīkotēja ma hkōt tē. Amnepē mā
kot kamāt kām Jejus wȳr htēm nē
wa expēn mā kapēr o ȳr xwȳnhja.
Jakamā ma Juje hkōt tē. Nē amnhī
kōt mẽ hkuxwa xà hkwy ho mō.
Ām ho mōr rax kumrēx. Ho 34
kir nē kutu nē o mō. Mě hkuxwa
xàja na pre mẽ kot mẽmo kuxwa xà
mā “mīra” nē “aroe” anhȳr jarēnhja
nhūm kaxyw hkwy jakà nē ho
ahkà nē ho mẽ hkuxwa xà nhīpēx.
Hāmri nē kutu nē ma Juje kot Jejus
jaxàr nhūm kot ho hkuxwa kaxyw
hkōt o mō. ⁴⁰ Hāmri nhūm wa
ho kupēxē kukōnh pa nē ho Jejus
kupu. Mě ixpē Ijaew mẽ ixte mẽ
htykjē jagjēnh kaxyw ā mẽ hipēx
anhȳr xà hkōt nhūm wa ā hipēx
anē nē haxà. ⁴¹ Nhūm ra mẽ kot pī
kahpa hā nhōr xà tā mẽ kot mẽmo
pī ho pa nē hkre xwȳnh kwȳ kuhē.
Nē kamā kēn kre nyw. Kormā mẽ
kot kamā mẽ htykjē hō jaxàr kēt
xwȳnhja. ⁴² Jakamā nhūm wa omu
nē expēn mā:

—E kwa pu hwȳr Jejus o tē nē
kamā mǎn tokyx haxà. Kēr pu ko-
rmā sap kēt ri ra tanhmā amnhī to
hpa. Anē.

Hāmri nē hwȳr kumȳ nē o tē nē
kamā haxà nē hā hitom pa hāmri
nē ma akupȳm krīm wa tē.

20

Jejus akupȳm htīr ā harēnh

*Matêwre 28.1-10; Makre 16.1-8;
Rukre 24.1-12*

¹ Tā nhūm sap tē nē hapēx nē
hpānhā semān nyw krax xà pē
tōmĭk. Hāmri nhūm Marir Matarēn
kwȳhtā kànhmā nhȳ. Kormā myt
kator kēt ri kànhmā nhȳ nē ma
kēn kreta wȳr tē. Nē hwȳr pōj nē
tee ri hitom xà hā kēn rax pumu.
Nhūm ra nhām hakwa kre kuhpa
hā ri hikwȳ nhūm omu nē tee ri
hkukamā hamaxpēr pē omunh o
xa. ² Hāmri nē awjanā nē ma
akupȳm hprōt nē nhȳri Simāw Pētre
nē pa ixpē Jejus krāmnhwȳ mex ā
wa ixpumu nē hkaprī kamā wa
inhmā harē nē wa inhmā:

—Xē na pēr mẽ pahpē mẽ panhō
Pahihti kapa nē nhȳhȳm ma o tē. Xē
nhȳhȳm mǎn pre wem o tē? Anē.

³ Hāmri pa wa kuma nē hwȳr
ixprōt kurē kumrēx. ⁴ Hāmri pa
Simāw Pētre mā wa nē ixkumrēx
hwȳr pōj. ⁵ Nom kormā kēn kre
hwȳr ixàr kēt ri kormā hakwa
krem inhīkōt nē kaxwȳnh kām nōr
xà kamā Jejus japēr ixrīt o xa.
Nhūm kupēxē nhīré pix nō pa omu.
⁶ Hāmri nhūm Simāw Pētre ixkōt tē
nē ixrom krem ār kurē kumrēx nē
kupēxē nhīréta pumu. ⁷ Nē hkrā
kupu xà pumu nhūm axtem hkrā
muxre nē ahte nō. ⁸ Hāmri pa hkōt
axà nē nōr xà kaprȳ pumu nē ija-
maxpēr o:

—Hēxta waa nē. Nà mǎn akupȳm
htīr. Hā na nōr xà hkaprȳ mex nē.
Nà mǎn akupȳm htīr kām ga. Anē.

⁹ Ra Tirtūm kapēr ā kaga htūm kot
ja kukamā akupȳm htīr ā harēnh tā
pa wa kormā ixprī hā ja hā omunh

kêt nê. Tã kên kre kaprÿ pumu nê kãm ijamaxpêr kurê kumrêx. ¹⁰Hãmri nê wa ixkato nê awjanã nê ma akupÿm wa ixkwÿjê hwÿr wa tê.

Jejus kot Marir Matarên wÿr kator ã harênh

Makre 16.9-11

¹¹No nhũm Marir Matarênja arĩ kên kre kapem hkaprĩ nê mÿr o xa. Nê mÿr pê hikôt nê kên kre kamu ¹²nê kamã Tĩrtũm kapêr o wrÿk xwÿnh wa ho axkrut nê wa omu. Nhũm wa ê jakajre kamã wa nhÿ. Nhũm hõja hkrãm nhÿ nhũm hõja htem nhÿ. ¹³Hãmri nê wa Marir Matarên mã kapêr nê kãm:

—Kwa mon ka ri omu nê amÿr o xa? Anê.

Nhũm kãm:

—Xê nhũm. Na prem ma nhÿhÿm mẽ ixpê mẽ inhõ Pahihtija mÿ nê ma o tẽ nê hpãnhã nhÿri kuxi. Anê.

¹⁴Rôm nhũm Jejus tãm tẽ nê hkatut kôt xa nhũm Marir Matarên ho hakêx nê omu nom hprĩ hã omunh kêt nê. Omu nê htÿx ho axtem mẽhõ hã hkamnhÿx. ¹⁵Hãmri nhũm kãm:

—Kwa mon ka ri amÿr o xa? Mẽhõ na ka ri hapêr arit pê amÿr o xa? Anê.

Hãmri nhũm kuma nê htÿx ho pĩ hkre jamãr xwÿnh ã hkamnhÿx nê kãm:

—Xê xà ka na ka mẽ ixpê mẽ inhõ Pahihti ho ahkĩ nê ma o tẽ nê nhÿri axi mê? Xê ka japêr nê akatãt kôt inhmã harê. Nhÿri inhmã nõr xà jarê pa ma hwÿr tẽ nê kumÿ nê man akupÿn o tẽ nê akupÿm kên kre kamã kuxi. Anê.

¹⁶Hãmri nhũm Jejus kãm hixi jarê nê kãm:

—Kwa Marir Matarên. Amnê ixpumu nê arĩ ã akapêr anê nã. Anê.

Hãmri nhũm jatã hprĩ hã kuma nê ho hakêx nê amnhĩ jaêr pê hprĩ hã omu nê kãm:

—Xê Pahihti. Xep ka na ka. Hêxta gãa nê. Anê.

Nom mẽ ixpê Ijaew kapêr kãm Pahita jarênh o: “Raponĩ” anê. Nhũm ã kãm kapêr anê hãmri nê axte ma nhÿhÿm kêp htem pymaj hpa hã kupy. ¹⁷Hãmri nhũm kãm:

—Kwa inhmã anhũre. Na pa kormã ma akupÿm Inhĩpêêxã hwÿr ixãpir kêt nê. E tokyx ma akupÿm tẽ nê ixtõ nê ixtõxjê mã ijarê. Na ka prem apê ixkrãmnhwÿ pix tã ra mẽ apê ixtõ nê ixtõx na ka mẽ. Jakamã ma akupÿm mẽ hwÿr tẽ nê mẽ kãm ijarê. Nê mẽ kãm: “Na Jejus mẽ awÿr pêr mẽnh o: ‘Kot paj tokyx ma akupÿm Inhĩpêêxã Tĩrtũm wÿr api. Nom kêp pa Inhĩpêêxã pix kêt mããnên kêp mẽ Anhĩpêêxã na. Nê mããnên kêp mẽ anhõ Tĩrtũm na.’ Anhÿr o mẽ awÿr pêr mẽ.” Anê. E ma akupÿm mẽ hwÿr tẽ nê tokyx ã mẽ kãm ijarênh anê. Anê.

¹⁸Hãmri nhũm kuma nê ma akupÿm mẽ ixwÿr tẽ nê mẽ inhmã awjarê nê mẽ inhmã:

—Xê na pa ham mẽ panhõ Pahihtita pumu. Na akupÿm mẽ pamã htĩr. Anê.

Hãmri nê mẽ inhmã kot tanhmã kãm kapêr to hã harê pa mẽ kuma nê tee ri hkukamã ijamaxpêr.

Jejus kot hkwyjê hwÿr kator ã harênh

Rukre 24.36-43

¹⁹Tã nhũm tãmĩk nê kamãt pa mẽ Jejus kôt ixpa ho ixpa xwÿnhjaja axpên wÿr akuprõ hãmri nê Ijaew krãhtũmjê pymaj hakwakre kahê hpa nê axpên mã ixkapêr o ixkrĩ. Nhũm Jejus mẽ ijaêr pê nhÿhÿnh mẽ ixwÿr axã nê mẽ ixkuri xa nê mẽ inhmã:

—Pa. Xà kormã mẽ anhõt kêt? Anê.

²⁰Hãmri nê mẽ inhmã amnhĩ nhĩhkra kamã prek tatak xã jahkre nê hakÿx kôt mẽ kot hkanhwÿr xãja nhũm mẽ inhmã hahkre. Pa mẽ akupÿm htĩr kãm omu nê ixkũnh tÿx kumrêx. ²¹Hãmri nhũm mẽ inhmã:

—E kwa kêr ka mẽ tee ri amnhĩ kukamã ajamaxpêr o amã ma ho ri apa hkêt nê. Na pre Inhĩpêêxãja mẽ

awÿr inhmē pa pre wrÿ. Tā kot paj amnhī pyrā nē mē piitā mē hwÿr mē arē. Anē.

²² Hāmri nē mē ixkaxyw htyyxā mē nē mē inhmā Tīrtūm mē wa Karō jarē nē mē inhmā:

—E koja Tīrtūm mē wa Ixkarōja wrÿ nē mē akarō mā gjēx pa. ²³ Ka mē ŷ hā ma mē piitā mē hwÿr apa nē mē kām Tīrtūm kapēr jarēnh o ri mē hkōt apa. Nē nhÿri mēhō pumu nē inhÿ hā kām: “Kot kaj Tīrtūm kōt amnhī xām nhūm amnhī tā apumu nē anē ate amnhī tomnuj rēnh pa.” Anē. Ka mē ā kām akapēr anē nhūm mē ama nē hkōt amnhī xām nhūm Tīrtūm amnhī tā omu nē nē kot amnhī tomnuj rēnh pa. Nom koja mē ama nē ām mē ama nē hkōt amnhī xām kēt japēr ka mē inhÿ hā kām: “Nā kot kaj Tīrtūm kōt amnhī xām kēt nē nhūm anē ate amnhī tomnuj rēnh kēt nē.” Anhÿr o kām akapēr nhūm Tīrtūm ho anē nē nē rēnh kēt nē. E kēr ka mē ā inhÿ hā amnhī nhīpēx anhÿr o ri apa. Anē.

Nhūm pre ā Jejus mē inhmā kapēr anē hāmri nē kato nē ma nhÿhÿm tē.

Jejus kot Tomas mā kapēr ā harēnh

Matēwre 28.17

²⁴ No nhūm mē inhīō pē Tomas pihpohtita kormā mē ixkīnhā akupÿm Jejus htīr kām omunh kēt nē. Na pre ma kape hā tē nhūm wakre kamā mē ixwÿr axā nē mē inhmā kapēr hāmri nē ma nhÿhÿm tē. Jakamā nhūm Tomas akupÿn mē ixwÿr tē nē axā pa mē kām harē nhūm tee ri mē inhma nē mē ixkōt hamaxpēr kēt nē. ²⁵ Nē mē inhmā:

—Nā kot pa ĩhkra kamā prek tatak xā pumu nē kamā inhīhkra hkrā jaxā. Nē hakÿx kōt hkanhwÿr xāta pa mā ho anē nē omu nē kamā inhīhkra hkrā jaxā nē rī kormā akupÿm htīr kōt ĩjamaxpēr. Anē.

²⁶ Tā nhūm semān pyxi nē hapēx pa mē axte axpēn wÿr akuprō nē axte ĩjaew krāhtūmjē pymaj amnhī

tā kahē htÿx nē ixkrī. Nhūm Tomas tā mē ixkuri nhÿ. Hāmri nhūm Jejus axte nhÿhÿnh mē ixwÿr axā nē mē inhmā:

—Pa. Na ka mē rī akrī. Anē.

²⁷ Hāmri nē Tomas pumu nē hwÿr tē nē kām ĩhkra pē nē kām:

—E ota inhīhkra kamā prek tatak xāta. Māmri kamā anhīhkra hkrā jaxā. Nē hpānhā ĩjakÿx kōt mē kot ixkanhwÿr xā kamā mā ho anē nē haxā nē akupÿm ĩxtīr kōt ĩpumunh kurē kumrēx. Anē.

²⁸ Hāmri nhūm kuma nē kām:

—Nā pēr ām hāmri apē inhō Pahihti Tīrtūm na ka. Anē.

²⁹ Hāmri nhūm kām:

—Tÿ. Ām ano ho ĩpumunh kōt pix mā na ka ĩxkōt ajamaxpēr. Tā no ām koja mē nhÿrmā mē amÿr pē mē pa xwÿnhjaja mē akīnhā mē no ho ĩpumunh kēt tā akupÿm ĩxtīr ā ĩjarēnh mar pix tā ĩxkōt hamaxpēr. Ja na mex kumrēx. Anē.

Juāw kot tanhmā amnhī jarēnh to hā harēnh

Rōmān 15.4; Wam Juāw 5.13

³⁰ Na pre Jejus kormā mē ixto pa ri mē inhnoo mā mēmoj tanhmā hipēx to rax nē nom kot paj kagāja kamā piitā hā kagā hpar kēt nē.

³¹ Ām hkwȳ pix na pa mē amā hā kagā. Mē ate mē ĩxpyrā nē omunh nē kēp Tīrtūm Kra hā kot mē pakaxyw ām xwÿnh ā omunh nē hkōt amnhī xunhwÿr kaxyw na pa ā mē amā harēnh nē hā kagā anē. Tā kot kaj mē amnhī kaxyw hkōt ajamaxpēr nē hkōt amnhī xunhwÿ hāmri nē nhÿrmā atyk tā nhūm akupÿm mē ato mē atīr ka mē ĩxpyrā nē kuri amex nē atīr tūm nē apa ho apa. Tā pa ā mē amā mēmoj piitā harēnh nē hā kagā anē.

21

Jejus kot hkwȳjē hwÿr kator ā harēnh

Matēwre 26.32, 28.7, 28.10

¹ Tā nhūm Jejus axte hkōt mē ĩxpa ho mē ĩxpa xwÿnh kwÿjē hwÿr

kato. Himô pê Tipeja mÿri. ² Pa mē ixpê 7 nê axpên wÿr akuprô. Na pre Simāw Pêtre nê Tomas pihpohti nê Natānaew. Natānaewja Garirej kamā krī pê Kanā nhô xwÿnh na pre. Nê wa pa wa ixpê Jepetew krata wa nê wa inhîo wa pijakru-uta wa. Pa prem wa mē nhÿri axpên wÿr akuprô. ³ Hāmri nhūm Simāw Pêtre mē inhmā:

—E pa jarāhā ma tep wÿr tē nê hkwȳmnê. Anê.

Pa mē kuma nê kām:

—Tôe. Nā pa mē ijaxwÿja ma akôt mō. Anê.

Hāmri nê mē ma himô rax pê Tipeja wÿr mō nê kanôre mā agjê nê gôx kām kryhti rēnh o ixkuhê. Nom tee ri ho tep ômnênh kaxyw rēnh o ixkuhê nê hōmnênh kêt nê ixtā apkati nhūm tep amrakati kumrêx.

⁴ Tā nhūm myt kato nhūm Jejus gô mÿri xa. Pa mē ixpiitā omu no ām ixprī hā kēp Jejus ā omunh kêt nê. Tā no nhūm tām xa. ⁵ Hāmri nê mē inhmā kapêr nê mē inhmā:

—Pa. E măn ka mē ra tep kwÿmnênh rax nê nà? Anê.

Hāmri pa mē kām:

—Tk. Nā mo tep? Amrakati kumrêx kênā. Anê.

⁶ Hāmri nhūm mē inhmā;

—Xô wehe? Tôe. Axtē mē axupôk rūm kryhti mē nê omu. Anê.

Hāmri pa mē mar xà hkôt ho anê nê kumê. Hāmri nhūm kamā tep hipu rax kumrêx nhūm utī rax nê. Pa mē tee ri ixte ho ixāpir kaxyw ri hkukjê. ⁷ Hāmri pa kēp Jejus ā omunh kurê kumrêx nê Simāw Pêtre mā kām:

—Kwa pēr mē panhō Pahihtita na. Anê.

Hāmri nhūm inhma nê hkÿnh tÿx nê akupÿm hinôkà jaxà nê gôx kām mrô nê ma hwÿr ho nana ho tē. ⁸ Hāmri pa mē hkôt kanôre kamā kryhti kjênh o mō. Ra amgrā hwÿr amgrire. Wÿr 100 met pix jakamā pa mē hwÿr ixpôx tokyx anê. ⁹ Nê pâr o hkre kura nê kuxi nê ijapôx

pa nê Jejus wÿr ixprôt nê mra. Nhūm ra mē ixkutêp kuto nê par nhÿpêx nê nhÿhÿnh tep kwÿ par kām haxwÿ nê ho àr o nhÿ. Nê kaxyw pāwti nê amnhÿ ri haxwÿ nê o nhÿ. ¹⁰ Hāmri nê mē ixpumu nê mē inhmā:

—E mē amnê anhô tep o mra pu mē hkuxôt nê kuku. Anê.

¹¹ Hāmri nhūm Simāw Pêtre akupÿm pâr wÿr tē nê kryhti ho htÿx xà hpôt nê amgrā hwÿr hkjênh o mō. Kamā tep rūnh pix. Nê ohtô nê. Kamā kēp 153 nê hikwÿ htā nhūm nhÿhÿnh kryhti hkwȳ pikaxôn h kêt nê. ¹² Hāmri nhūm Jejus mē inhmā:

—E kwa mē tokyx mra pu mē apku. Anê.

Hāmri pa mē kuma nê hwÿr mra nê ixkrī pa. Hāmri nê tee ri omunh o ixkrī. Mē ixprī hā omunh mex kêt tā kot ā mē inhmā amnhÿ nhÿpêx anhÿr ā omu nê kēp mē inhô Pahihti hkôt omunh kurê kumrêx jakamā hixi hā hkukjêr kêt nê. Ām akryk omunh o ixkrī. ¹³ Hāmri nhūm mē inhmā pāwti ho hkry pa. Nê hpānhā tep jamÿ nê mā ho anê nê ho hkry pa nê ho mē inhÿpêx pa pa mē ixāpkur o ixkrī.

¹⁴ Nhūm Jejus akupÿm htÿr kām ra ahpÿnhā mē ixwÿr hapôx o axkrunêpxi.

Jejus kot akupÿm tām Simāw Pêtre xām

Atre 20.28-31; Wam Pêtre 5.1-4

¹⁵ Tā pa mē ra ixāpkur pa nê kànhmā ixkuhê nê gô mÿ ri mra. Hāmri nhūm Jejus Juāw hkra Simāw Pêtre mā tanhmā kapêr to. Nom ixpê Juāw nhūm kēp ixkra hkêt axtem Juāw ô hkra na pre. Jakamā nhūm Jejus kām kapêr nê kām:

—Kwa Simāw. Xà we amā ijapê ho ate pika hkôt mēmoj piitā hakrenh par nà? Anê.

Hāmri nhūm kuma nê kām:

—Tÿ inhmā ajapê htÿx kênā Pahihti. Ra ate ja hā amnhÿ tā

ixpumunh mex. Inhmã ajapêê. Anê.

Hãmri nhũm kuma nê kãm:

—Tôe. Nà kër ka inhmã mẽ kot ixkôt amnhĩ xunhwýr xwýnhjê jahkre mex o ri mẽ hkôt apa. Te ho ôwêhti hkrare jamãr xwýnh kot hamãr mex o ri hkôt pata pyrãk. Anê.

Hãmri nhũm kãm:

—Tôe. Nà kot paj amã mẽ ho anê. Anê.

¹⁶ Tã nhũm hã ahtũmre nhũm kê axte kãm:

—Kwa Simãw. Xà we ãm hãmri na ka inhmã amnhĩ jarê. Xà we amã ijapêê nà? Anê.

Hãmri nhũm kãm:

—Tý. Ra ate inhmã ajapê hã ixpumunh kênã. Anê.

Hãmri nhũm kê axte kãm:

—Tôe. Kër ka inhmã mẽ kot ixkôt amnhĩ xunhwýr mã xwýnhjê jahkre mex o ri mẽ hkôt apa. Te ho ôwêhti jamãr xwýnh kot ôwêhti jamãr mex o hkôt pa xwýnh kot amnhĩ nhípêx pyrãk. Anê.

Hãmri nhũm kãm:

—Nà kot paj amã mẽ ahkre mex o ri mẽ hkôt ixpa. Anê.

¹⁷ Tã hãmri nhũm hã ahtũmre nhũm kê axte kãm:

—Kwa Simãw. Xà we ãm hãmri na ka inhmã amnhĩ jarê? Xà we amã ijapêê htýx kumrêx nà? Anê.

Hãmri nhũm tee ri amnhĩ tã kuma nê hkaprĩ nê. Ra kot amnhĩ tã hkukjêr o axkrunêpxi jakamã nhũm hkaprĩ nê tee ri hamaxpêr. Hãmri nê kãm:

—Kwa Pahihti. Ate mẽmoj piitã omunh par. Nê ate inhmã ajapê htýx ã ixpumunh par kênã. Anê.

Hãmri nhũm kê axte kãm:

—Tôe. Kër ka inhmã mẽ kot ixkôt amnhĩ xunhwýr mã xwýnhjê jahkre mex o ri mẽ hkôt apa. Te ho ôwêhti jamãr xwýnh kot hamãr mex o ri pata pyrãk. Anê.

Hãmri nhũm kãm:

—Nà kot paj amã mẽ ho anê Pahihti. Anê.

Simãw Pêtre tanhmã htyk to hkukamã harênh

¹⁸ Nhũm Jejus arĩ Simãw Pêtre mã kapêr nê kãm tanhmã htyk to hkukamã harênh to nê kãm:

—Kwa ixkapêr ma nê amnhĩ krã him haxàr týt nê hã apa Simãw Pêtre. Nà kormã anyw ri na ka pre hte ma nhýhým apa kaxyw nê anojarêt hãmri nê anhĩnôhkã mex jagjê nê ma nhýhým amã apa hprãm xà hkôt ri apa. Tã kot kaj apigêt nhũm mẽ apynê nê akahti hpre nê apa hpre nê ma nhýhým ato mō ka mẽ kãm amnhĩ gō nê amnhĩ nê tanhmã mẽ kãm nê hkê nê. Amã mẽ hkôt amōr prãm kêt tã mãmrĩ mẽ kãm amnhĩ gō kê mẽ ma nhýhým ato mō. ¹⁹ Tã kër ka arĩ ixkôt amnhĩ xãm týt nê atír prãm xàj mẽ umaj axte ixkaga hkê nê. Hãmri nhũm mẽ apĩ nê tanhmã atyk to hã apumu nê amã Tirtũm Kĩnh ã apumunh mex kurê kumrêx. Hãmri nê atã Pahi Maati Tirtũm mex o mex ã harê. Anê.

Nhũm pre ã Jejus Simãw Pêtre tyk kukamã kãm ujarênh anê. Hãmri nê kãm:

—E kër ka ixte amnhĩ to htýt nê amarĩ mẽ kãm ixãm nhũm mẽ kot ixpírja pyrã nê ã amnhĩ nhípêx anê. Anê.

Hãmri nhũm kuma nê kãm:

—Tôe. Nà kot paj hãmri tã ã amnhĩ nhípêx anê Pahihti. Anê.

Juãw tyk kukamã tanhmã harênh to hkê ã harênh

²⁰ Nhũm pre ã Jejus Simãw Pêtre mã tanhmã htyk to hkukamã harênh anê. Hãmri nhũm kuma nê ixpê Juãw ã ixto hakêx nê ixpê Jejus krãmnhwý mex ã ixpumu. Kormã Jejus htyk kêt ri kamàt kãm mẽ ixàpkur o ixkrĩta ã na pa pre ãhkô hã ixàpkur o nhý nê kot mẽ kãm òr mã xwýnhnta nhĩxi hã hkukja. ²¹ Jakamã nhũm Simãw Pêtre ixto hakêx nê ixpumu nê ixtã Jejus kukja nê kãm:

—Kwa no pêr pahkôt mōr mũj? Tanhmã koja we htyk to? Anê.

Hãmri nhũm kãm:

22 —Nà kot paj amã tanhmã htyk to hkukamã harênh hkêt nê. Kot pa inhmã arĩ kritpêm pa rãhã pa akupÿn ixwryk prãm nhũm arĩ pa nê htyk kêt rãhã pa akupÿn wry. Kêr ka ri htyk kukamã tee ri tanhmã ajamxpêr to hkêt nê. Æm ixkôt pix mã ate amnhĩ nhĩpêx tÿx pix kukamã mãn ajamxpêr o ri apa.

23 Anhÿr o kãm ijarênh jakamã nhũm mẽ ixkwÿjaja kot ã ijarênh anhÿrja ã kuma ma nê htÿx nhÿrmã ixtyk kêt ã ixkamnhix. Nê gaa nê rĩ piitã axpên mã ã ijarênh anhÿr o pa. Nom na pre ã ijarênh anhÿr kêt nê. Na kêt pre ijarênh o:

—Kot pa inhmã arĩ ri kritpêm pa rãhã pa akupÿn ixwryk prãm nhũm arĩ pa nê htyk kêt rãhã pa akupÿn wry.

Anhÿr o ijarê. Nom ãm hãmri ixtyk kêt rãhã nhũm akupÿn wryk ã ijarênh kêt nê.

Juãw kot Jejus kot tanhmã amnhĩ to hã kagà hpar kêt ã kot amnhĩ jarênh

Juãw 20.30-31

24 E na pa mẽ amã Jejus kot tanhmã amnhĩ nhĩpêx to ho pa hã harê nê hã kagà. Ixpê hkôt ri ixpa ho ixpa xwÿnhjê hõ na pa ãm hãmri ã hã kagà anê. Ka mẽ kamã harê nê ama nê ãm hãmri ixte kagà nhĩpêx kôt ixpumunh mex kurê kumrêx.

25 No na pre Jejus ãm ja pix o anhÿr o pa hkêt nê. Na pa ãm mẽ amã hkwy pix jarê nê hã kagà. Na pre tanhmã ri mẽmoj to rax kumrêx o ri pa. Nom kêp ãm ixte kot tanhmã ri amnhĩ nhĩpêx to piitã hã kagà hpar ronhÿx hã kagàja katutxô rax kumrêx. Jao te ra kaxkwa htêp o mõi pyràk.

Tã ãm ja pix. Na hapêx.

Atre

Jejus nhỹ hã mẽ ahkre ho mẽ pa xwỳnhjaja kot tanhmã amnhĩ nhĩpêx to ho pa hã mẽ harênh

Rukre na pre kagàja nhĩpêx. Na pre kêp tôtô nê hkwỳjê kane ho pa. Nê Jejus nhỹ hã mẽ ahkre ho pa xwỳnh pê Pawre kôt pa ho pa. Hâmri nê hamaxpêr nê hkràmnhwỳ Teopre mã kagàja nhĩpêx nê hwỳr kumê. Nê kagàja kamã Jejus nhỹ hã mẽ ahkre ho mẽ pa xwỳnh maati-jaja kot Jejus mỳr pê tanhmã amnhĩ nhĩpêx to ho pa hã mẽ harê.

Nê Ijaew nhõ patrejaja nê mẽ hkwỳ pê Parijew nhõ xwỳnhjaja nê mẽ hkwỳ pê Satusew nhõ xwỳnhjaja kot Tirtùm kapêr ã kagà htùm kamã harênh nê mar nê hkôt amnhĩ nhĩpêx tã Tirtùm Kra Jejus kôt amnhĩ nhĩpêx kêt ã mẽ harê. Mẽ kot kêp Tirtùm Kra hkêt ã hkamnhix jakamã na prem kãm mẽ kot hkôt amnhĩ xunhwỳr xwỳnhjê kurê nê. Tã nhũm Simãw Pêtre mẽ Pawre mẽ Jejus nhỹ hã mẽ ahkre ho mẽ pa xwỳnh kwỳjaja mẽ urak nê kêp Ijaew tã mẽ kurom Jejus hkôt amnhĩ xunhwỳ nhũm mẽ tee ri ja hã mẽ omu mẽ kamã gryk tỳx nê tanhmã mẽ hipêx to ho pa. Tã nom nhũm mẽ tee ri amnhĩ kukamã hamaxpêr nê Jejus kaga hkêt nê. Mẽ kot mẽ hipêx kati htã na prem arĩ Tirtùm Karõ nhỹ hã mẽ piitã mẽ kãm tanhmã Jejus kot mẽ panê amnhĩ nhĩpêx to hã harênh o pa. Kam nê kapit 1 kamã wesik 8 japêr nê kamã harê. Hâmri nhũm Rukre ã mẽ kot amnhĩ nhĩpêx anhỹrja piitã hã kagà nê Teopre hwỳr kumê. Nê kãm mẽ harênh o:

Tirtùm Karõ jarênh

*Matêwre 28.16; Makre 16.14;
Rukre 24.36; Juãw 20.19*

¹ Pa Teopre? Xà amex? E ot pa axte awỳr kagà nhĩpêx nê kumê. Nà wam ixte awỳr kagà nhĩpêx nê mênhta kamã na pa pre amã Jejus kot tanhmã amnhĩ nhĩpêx to hã harê nê hã kagà. Kot tanhmã amnhĩ nhĩpêx to ho pa nê tanhmã mẽ ahkre hto ho paja krax rùm pa pre piitã hã kagà hpa nê awỳr kumê. ²⁻⁴ Kormã akupỳm kaxkwa hwỳr àpir xwỳj ri na pre ÿ hã mẽ ahkre ho pa kaxyw hkôt mẽ pa xwỳnh kwỳjê rê. Tã nhũm mẽ kãm hkurê xwỳnhjaja kupĩ nhũm amnhĩ xà htỳx kãm hamak rax kãm ty. Hâmri nhũm Tirtùm akupỳm ho htĩr. Nom nhũm ma akupỳm kaxkwa hwỳr àpir kurê kumrêx kêt nê. Na pre xatã mẽ kot ÿ hã mẽ ahkre ho mẽ pa xwỳnh maati-jê hwỳr hapôj nhũm mẽ akupỳm htĩr kãm omu. Na pre hte nhỹri mẽ hwỳr hapôj nê tanhmã mẽ ahkre hto nê mẽ kãm:

—Na pre Tirtùm mẽ ato hkra nê tãm mẽ ate amnhĩ nhĩpêx o apa kaxyw mẽ axunhwỳ.

Anhỹr o mẽ ahkre hã arĩgro ho 40. Hâmri nê kormã mẽ kamã pa ri axte tanhmã mẽ kãm kapêr to. Tirtùm Karõ nhỹ hã mẽ kãm kapêr nê mẽ kãm:

—E kêr ka mẽ krĩ ja kamã ri apa nê tokyx ma nhỹhỹm apa hkêt nê. Kê Inhĩpêxã Tirtùm mẽ awỳr amnhĩ Karõ rê măn. Ra ixte mẽ amã harênh xà hkôt koja mẽ awỳr kurê nhũm mẽ awỳr wrỳ nê mẽ akarõ mã agjê ka mẽ rĩ kormã anghrã nê ma nhỹhỹm krĩ hkôt ri mẽ kãm kapêr jarênh o ri mẽ hkôt apa.

⁵—Juãw Paxis na pre hte Tirtùm mã gôx kãm mẽ hkrã kumrãr o pa. Tã koja Tirtùm tokyx mẽ awỳr amnhĩ Karõ rê. Kot ixpãnhã amnhĩ kaxyw mẽ ato mẽ amã ma hkêt kaxyw mẽ awỳr kurê. Koja hã apkati grêre nhũm mẽ awỳr kurê nhũm ixpãnhã mẽ awỳr wrỳ nê mẽ amã agjê nê mẽ akamã mẽ akôt pa ho pa. Ka mẽ rĩ kormã Jerujarê rùm

ajapôj nê ma mē kām Tirtūm kapēr jarēnh o ri mē hkôt apa. Anê.

Jejus akupÿm kaxkwa hwÿr àpir ã harēnh

Makre 16.19; Rukre 24.50

⁶ Tã nhūm mē axte akuprō. Jejus nê ÿ hã mē ahkre ho mē pa xwÿnh maatijaja nhūm mē hixêt pē Oriwēhti nhūmōk ã axte axpēn wÿr akuprō. Hāmri nhūm mē amnhī tā Jejus kukja nê kām:

—Kwa Pahihti mē inhmã mēmoj jarē. Xà kot kaj tokyx apē Tirtūm kot mē ixwÿr amēnh xwÿnh ã amnhī jarē nê Rōm nhō xwÿnhjê nê mē pahpê Ijaew kator nà? Hāmri pa mē pamjaja amnhī to amnhīptār o ri ixpa. Anê.

⁷ Hāmri nhūm mē kām:

—Nà Inhīpēēxà pix na ã mēmoj kot anhÿrja kukamã àhpumunh. Tapxipix na kot mēmoj tanhmã ho hã arīgro nê mēmoj tanhmã ho hã mytwrÿ pumunh mex. No mē kajaja mo kaxyw kot ka mē amnhī katorta kukamã amnhī jarēnh ma? ⁸ Nà kot paj ãm mē amã mēmoj to pyxire nê hkukamã harē. Kojã Tirtūm tokyx mē awÿr amnhī Karō rē nhūm ixpānhã kot mē ato amnhīptār kaxyw mē akarō mã agjê. Hāmri ka mē ma pyka piitã hkôt anhrã nê ma mē kām ixkapēr jarēnh o ri mē hkôt apa. Jar Jerujarē kamã nê pika pē Jutej kôt nê nhām pika pē Samar kamã nê pika piitã hkôt mē kām ijarēnh o ri mē hkôt apa. ã mē ate amnhī nhīpēx anhÿr pix kukamã kot paj mē amã harē. Anê.

⁹ Nhūm pre ã Jejus mē kām kapēr anê hāmri nê mē kēp kãnhmã àpir o tē nê mē noo mã ma kaxkwa hwÿr àpir o tē nê kakrãm axà nê mē kēp akunok. ¹⁰ Hāmri nhūm mē tee ri hapēr o kuhē rãhã nhūm mēhō myja wa axkrut nê mē hwÿr wrÿ nê mē kutã wa xa. Wa ê hakaj nê wa xa. ¹¹ Hāmri nê mē kām:

—Pa Garirej nhō xwÿnhjaja? Kwa mo kaxyw na ka mē tee ri

kaxkwa pumunh o akuhê? Tirtūm na akupÿm amnhī wÿr Kra Jejus o api ka mē àpir kām omu. E mē tee ri hkukamã ajamaxpēr kêt nê. Kojã nhÿrmã man akupÿn mē awÿr wrÿ. Te mē arūm kaxkwa hwÿr àpirja pyrã nê akupÿn mē awÿr wrÿ ka mē omu. Anê.

Akupÿm Jerujarē hwÿr mē mrar ã mē harēnh

Rukre 24.52

¹² Tã nhūm Jejus nhÿ hã mē ahkre ho mē pa xwÿnh maatijaja wa kuma nê awjanã nê ma akupÿm krīm mra. Hixêt pē Oriwēhti rūm ma akupÿm Jerujarē hwÿr mra. Wÿr jawÿ nhūm mē akupÿm hpōx tokyx anê. ¹³ Hāmri nê akupÿm kÿx pē ixkreja wÿr api nê agjê. Na pre

Simãw Pêtre nê

Juãw nê

Xiakre nê

Andrehti nê

Firipti nê

Tomas nê

Patoromew nê

Matêwre nê

Xiakre hō pē Apew kraja nê

Simãw Jerox nê

Jut pē Xiakre hkraja.

Mē piitã Jejus nhÿ hã mē ahkre ho mē pa xwÿnh maatijaja na pre mē.

¹⁴ Nê mãânēn mē hkôt mē hkwyjaja. Jejus katorxà Marir nê Jejus tōjaja nê Jejus kot tanhmã mēni ho mex to xwÿnh kwÿjaja nhūm prem kÿx pē ixkreja wÿr Jejus nhÿ hã mē ahkre ho mē pa xwÿnh maatijê hkôt gjêx pa. Hāmri nê xatã axpēn wÿr akuprō nê Tirtūm mã amnhī jarēnh o hkrī.

Tirtūm kot Jut Kariot pãnhã mēhō xãm ã harēnh

Matêwre 27.3-10; Juãw 15.27

¹⁵⁻¹⁹ Tã nhūm mē kot Jejus kôt amnhī xunhwÿr xwÿnhjaja ra kēp 120. Jakamã nhūm mēmo arīgro hã axpēn wÿr akuprō nê hkrī. Nhūm Simãw Pêtre kãnhmã xa nê tanhmã mē kām Jut Kariot jarēnh to nê mē kām:

—E Jejus kôt ixtô nê ixtôxjaja. Pa mē amā tanhmā finat Jut Kariot jarēnh to ka mē inhma. Na pre axtem nê mē pahkwýjê mā Jejus ā amýnê nê hpānhā kaxpore hkwy jamý nê o tē nê ho amnhīm pyka hkwy japrô. Tā tanhmā amnhī to nê nhýri ô pyka kamā tēm nê amnhī tu katôk nê hkrêx kato nê ty nê hkamrô ho ô pyka xy hpa. Jakamā nhūm Jerujarē nhô xwýnhjaja harēnh ma nê pykaja ā hixi mē nhūm kêp “pyka kamrôhti.” No mē pahpê Ijaew kapêr kām kêp “Ajetām.” Annepêm na pre Tirtūm Karô finat Tawi mā Jut Kariot kukamā tanhmā harēnh to. Kormā kator nê kot tanhmā amnhī to hkêt tā nhūm ra hkukamā omu nê Tawi mā harê. Kot axtem nê mē kām Jejus ā amnênhja nhūm hkukamā omu nê Tawi mā harê nhūm kuma nê ô ri hā kagā. Tā nhūm kot hkukamā hā kagā hkôt nhūm ā Jejus nhīpêx anê. Jut Kariotja mē panhīo na pre. Na pre Jejus mē pahpyrā nê amnhīm kuta. Mē pahpyrā nê ý hā kapêr jarēnh o pa kaxyw. Tā nhūm axtem nê ā hipêx anê.

²⁰ Nom na pre Tawi kot Tirtūm mex ā grer ā kagā kot ra hkukamā tanhmā harēnh to. Kagā hkwy pē Sam kamā kot harēnh kot:

Kot amnhī tomnuj xwýnhnta nhôrkwy koja hkaprýn kuhê ho kuhê nhūm mēhōj mýr pē kamā pa hkêt kumrêx. Kojā ām arī hkaprýn kuhê ho kuhê.

Nom kot Jejus mā tanhmā amnhī nhīpêx to ho paja kē mēhō mýr pē ho amnhīptā nê hpānhā Jejus nhý hā mē ahkre ho pa. Anê.

Ā Tirtūm kapêr ā kagā htūm kot Jut Kariot kukamā harēnh kot anhýr.

²¹ Jakamā e ixkwýjaja. Kot puj mē hpānhā mē atô xām ka Jut mýr pē mē pahpê Jejus nhý hā mē ahkre ho ixpa xwýnhjê hkôt Jejus akupým htír ā harēnh o apa. ²² E mē atô na

ka pre mē ixpyràn finat Juāw Paxis kot Jejus hkrā kumrār ā omu? Nê Jejus kot ri tanhmā amnhī nhīpêx to ho pa xā hkrax rūm ka mē ixkôt ri omunh o ri apa? Nê htyk kām omu nê akupým htír kām omu nê ma akupým kaxkwa hwýr àpir kām omu? E mē atô na ka pre mē ixpyràn ā kot amnhī nhīpêx anhýr ā omunh par o ri hkôt apa? ā mē ate kot amnhī nhīpêx anhýr ā omunh o apa xwýnhjê hō kot paj mē ata ka Jut Kariot mýr pē mē ixpyràn ma mē kām Jejus akupým htír ā harēnh o ri apa. Anê.

²³ Nhūm pre ā Simāw Pêtre mē kām kapêr anê. Hāmri nhūm mē kuma nê axpên pumunh o hkrī hāmri nê Maxitre mē Jujere wa kām hamaxpêr. Jujere na pre hixi axkrunêpxi. Na pre kêp Jujere nê kêp Pasapas nê kêp Justi. ²⁴⁻²⁵ Hāmri nhūm mē wa hā Tirtūm kukja nê kām:

—Pa Tirtūm? Nà na pre finat Jut Kariotja Jejus kaga nê ty nê kot amnhī tomnuj mýrapê ma mē kot amnhī xā htýx kamā hamak tūm xāta wýr ma mō. Tā ot pa mē ixte mēhō kot mýr pē mē ixpyrā nê Jejus nhý hā mē ahkre ho pa kaxyw mēhō hā akukjêr kaxyw akuprô. Ate mē ixpiitā tanhmā mē ixte amnhī nhīpêx to ho ixpa hā mē ixpumunh par Tirtūm. Ate mē ijamaxpêr kôt mē ixpumunh par nê mē ixte tanhmā amnhī nhīpêx to hā mē ixpumunh par. Jakamā e. Ota Maxitre mē Jujereja wa nhý. Nhý kot kaj amnhīm ata? Kot paj mē kên pijakrutja ā wa hixi xi nê ho àk nê hō py. Hāmri ka amā hprām xwýnhnta ta. Kêr pa mē kên pumunh kêt rāhā hō py nê hā hixi pumu nê amā hprām xwýnh kôt omunh kurê kumrêx. Anê.

²⁶ Nhūm prem ā Tirtūm mā kapêr anê hāmri nê kênja o axkamur nê ho àk nê omunh kêt rāhā ja py nê omu nhūm hā Maxitre nhīxi nô. Jakamā nhūm Jejus nhý hā mē

ahkre ho mẽ pa xwỳnh maatijaja amnhĩ kôt kumẽ nhũm mẽ akupỳm kệp 12.

2

Tĩrtũm Karõ kot mẽ hwỳr wrỳk ã harẽnh
Rukre 24.49; Atre 4.31, 8.15, 10.44, 19.2

¹ Tã nhũm mẽ hkĩnh pẽ Pêtekos kato nhũm mẽ kot Jejus kôt amnhĩ xunhwỳr xwỳnhjaja nhỹri axpẽn wỳr akuprõ nẽ hã hkĩnh. Pêtekosja ã na pre hte Ijaew mẽ hpur kãm mẽõ rũnh ã hkĩnh kaxyw axpẽn wỳr akuprõ nẽ hã hkĩnh. Jakamã nhũm mẽ kot Jejus kôt amnhĩ xunhwỳr xwỳnhjaja haxwỳja axpẽn wỳr akuprõ. ² Hãmri nẽ kaxkwa kamã mẽmoj ma. Nhũm mẽmoj te kôk xàpêr tỳx krihkrit pyrak o mẽ hwỳr wrỳk o mỗ nẽ mẽ pikuprõnh xà hã ixkreja wỳr axà nhũm mẽ pitã kuma. ³ Hãmri nhũm mẽmoj te kuwy jakrax pyrækja ahpỳnhã mẽ hwỳr anhrã nẽ mẽ hkrã nhĩmõk ã hikwỳ. ⁴⁻¹³ Tĩrtũm Karõ na pre. Tãm mẽ hwỳr wrỳk jakamã ã ri mẽ hipêx anẽ. Hãmri nẽ kot mẽ ho amnhĩptar kaxyw mẽ hkarõm gjêx pa nhũm mẽ ỹ hã tanhmã kapêr to ho kuhê. Nom mẽ kapêr o kapêr kêt nẽ. Axtem mẽ kapêr kwỳ ho kapêr. Tĩrtũm Karõ kot tanhmã mẽ ho jakamã nhũm mẽ axtem mẽ kapêr kwỳ ho kapêr. Jao ahpỳnhã mẽ kapêr kwỳ ho Tĩrtũm mã mex o mex ã harẽ. Na pre Ijaew kwỳjaja ahpỳnhã pyka hõ kamã ri mẽ hkôt pa nẽ mẽ kapêr ma nẽ ho kapêr o pa. Tã akupỳm Jerujarẽ hwỳr pan pøj nẽ kamã ri pa ho pa. Hãmri nẽ mẽmojta ma nẽ ma Jejus kwỳjê hwỳr hprõt nẽ ahpỳnhã mẽ kapêr ã mẽ kuma nẽ tee ri mẽ omunh o kuhê. Amnhĩ jaêr pẽ mẽ kuma nẽ tanhmã axpẽn mã mẽ harẽnh to ho:

—Kokỳỹ. Garirej nhõ xwỳnhjaja kot mẽ pakapêr mar kêt tã ra tanhmã amnhĩ to nẽ ahpỳnhã ri mẽ pakapêr o kapêr. Ahpỳnhã

mẽ pakapêr nẽ ahpỳnhã mẽ panhõ pyka htã nhũm mẽ ã ri mẽ pakapêr o kapêr anẽ.

Na pika pẽ Pat

nẽ Met

nẽ Erãw

nẽ Mêsopotãm

nẽ Jutej

nẽ Kapatos

nẽ Põt

nẽ As

nẽ Prik

nẽ Pãpir

nẽ Ejit

nẽ Sirẽn wỳr Ripja

nẽ krĩ pẽ Rõm

nẽ gô hipòk pẽ Kret

nẽ Arap.

Nẽ mẽ pahkwỳjaja mẽ pahpê Ijaew kumrêx

nẽ mẽ pahkwỳjaja amarĩ ri amnhĩ to Ijaew.

Ãm ahpỳnhã mẽ panhõ pyka nẽ ahpỳnhã ri mẽ pakapêr.

—Tã pu mẽ ahpỳnhã mẽ pakapêr kãm mẽ kapêr ma. Tĩrtũm mex ã mẽ kot axpẽn mã harẽnhja pu mẽ hã mẽ mar mex nẽ. Anẽ.

Nhũm prem ã axpẽn mã mẽ harẽnh anẽ nẽ tee ri mẽ omunh o kuhê. Amnhĩ jaêr pẽ amnhĩ kapêr kãm mẽ kapêr ma nẽ tee ri hamaxpêr nẽ axpẽn mã:

—Kokỳỹ. Tanhmã mãn pre wem amnhĩ to nẽ ra mẽ pakapêr ma nẽ mẽ pakapêr o kapêr? Anẽ.

Nhũm mẽ hkwỳjaja axtem nẽ ri mẽ hã hpêr o axkê nẽ axpẽn mã:

—Tk. Ãm mẽ pipãnh ã ã ri mẽ kot amnhĩ nhĩpêx anhỹr kênã. Anẽ.

Simãw Pêtre kot mẽ kãm ujarẽnh
Atre 3.12-26

¹⁴ Hãmri nhũm Simãw Pêtre ã mẽ kapêr anhỹrja ma hãmri nẽ kỳx pẽ mẽ kãm kapêr nẽ mẽ kãm:

—E Jerujarẽ nhõ xwỳnhjaja nẽ mẽ apê ixkwỳ Ijaew. Pa mẽ amã mẽmoj jarê ka mẽ inhma nẽ inhmar tỳx nẽ. ¹⁵ Na ka mẽ atỳx ri mẽ ixpipãnh ã mẽ ixkamnhĩx. Mẽ ixkrã pipãnh kêt. Kormã myt

kaxkwa nhîpôk wÿr htêm kênâ. Na hte Ijaew kwÿhtâ kagôxÿhti ho hkôm kêt nê. ¹⁶ Ja na pre Tîrtûm amnepê mâ â mê ixte amnhî nhîpêx anhÿrja kukamâ mê ijarê nhûm ÿ hâ kapêr o pa xwÿnh finat Joew mê ixkukamâ hâ kagâ. Nê hâ kagâ ho:

¹⁷ Koja nhÿrmâ mêmoj piitâ hapêx kaxyw pa mê piitâ mê hwÿr Ixkarô rê nhûm ma mê hwÿr wrÿ nê mê hkarô mâ agjê. Hâmri nhûm mê hkanrêhâ mê hkra xàptâr nywjaja ma mê kâm ixkapêr jarênh o ri mê hkôt pa. Koja mê hpimtir kâm amnhî kukamâ mêmoj pumu. Nê mêhpigêtjaja haxwÿja. Kot paj mê hpimtir kâm tanhmâ mê kâm ixkapêr to.

¹⁸ Nê kot paj mê kot ixkôt ri tanhmâ amnhî nhîpêx to ho mê pa xwÿnhjê hwÿr Ixkarô rê nhûm mê ÿ hâ ma mê kâm tanhmâ ixkapêr jarênh to ho ri mê hkôt pa.

¹⁹ Kot paj kaxkwa kamâ nê pyka kamâ aa mê kot mêmoj pumunh kêt kwÿ ho anê nhûm mê amnhî jaêr pê omu. Jao nhÿri mê hkamrô pumu nê kuwy pumu nê kuwy hkûm pumu hâmri nê tee ri amnhî kukamâ hamaxpêr.

²⁰ Nê koja myyti ahtyk nhûm mytwrÿre haxwÿja te mry kamrô pyrâk. Pahihti Jejus akupÿn hpôx xâ hâ arÿgro xwÿj ri koja mêmoj â amnhî nhîpêx anê. Akupÿn hpôx xâ hâ arÿgro koja mex kumrêx.

²¹ Tâ koja mêhõ mêmoj kot â amnhî nhîpêx anhÿr â omu nê amnhî kaxyw inhmâ hamaxpêr nê amnhî to ixwÿ pa kuma nê ho ixkra nê mêmoj punujta pê utâ. Anê.

Na pre â Tîrtûm kapêr anê nhûm finat Joewja mê pamâ hâ kagâ. ²² E pa mê amâ tanhmâ Jejus jarênh to ka mê inhma. Nà Najare nhô xwÿnh na pre. Mê pahte Tîrtûm nhÿ hâ kot tanhmâ amnhî nhîpêx to ho pa hâ omunh kaxyw na pre Tîrtûm mê pahwÿr kumê nhûm ÿ hâ mê panoo mâ tanhmâ amnhî nhîpêx to ho pa. Nê aa mê pahte mêmoj pumunh kêt kwÿ ho anhÿr o pa pu prem hâ omu.

²³ —Tâ ka prem tanhmâ kaxyw ajamaxpêr punuj to nê apî. Tîrtûm ra kot amnepê mâ ja kukamâ ja hâ mê apumunh mex tâ mê pahwÿr kumê ka mê axtem nê apî. Jao mê kot htÿx ri amnhî nhîpêx o mê pa xwÿnhjê mâ agô nhûm mê kupî. Pî kahpa hâ kunhõ nhûm ty. No âm mê kajaja na ka prem mê kâm hâ amÿnê nhûm mê â mê amâ hprâm xâ hkôt hipêx anê nê mê amâ kupî.

²⁴ —Tâ nhûm Tîrtûm akupÿm ho htîr nhûm akupÿm htîr o htîr nhûm mê htykja tee ri kot amnhî kôt mênh prâm kaprÿ. ²⁵ Amnepêm na pre finat Tawîja Jejus akupÿm htîr kukamâ harê. Te Jejus tãm kapêr pyrâk o kapêr nê kapêr o:

Na hte Pahi Maati ixkôt pa ho pa râhâ nê. Kot inhîhkô hâ ixtânopxar o pa jakamâ kot paj inhmâ ma hkêt nê ri ixâmnhîx ijamakêtkati nê ri ixpa.

²⁶⁻²⁷ Pa Tîrtûm? Nà kot paj nhÿrmâ ixytk tâ arÿ amnhî wÿr akâm ama. Kot kaj mê htykjê kamâ ixkarô rer kêt nê. Ixte akapêr kôt amnhî nhîpêx mex o ri ixpa jakamâ koja inhî kormâ omnu nê hkro hkêt ri ka akupÿm ixto ixtîr. Jakamâ na pa inhmâ ixytk pyma hkêt nê ixkînh nê ijamakêtkati nê ri ixpa. Nê amnhî kînh jarênh râhâ ho ri ixpa.

²⁸ Na ka pre akupÿm ixto ixtîr â amnhî jarê pa ixtîr tûm nê

ixpa ho ixpa kaxyw. Tã ate
ixkôt ri apa rãhã jakamã pa
ixkĩnh nê ri ixpa. Anê.

²⁹ Æ na pre mē panhīgēt finat
Pahi Tawija Jejus htyk nē akupỹm
htĩr kukamã harēnh anê. No tãm
amnhĩ jarēnh kêt nē. Tawija na
pre ty nhũm mē haxà nhũm htem
arĩ haxàr xà hã pika ho mex o
pa. Tã tãm ã kot amnhĩ jarēnh
anhỹr ro nhỹx akupỹm htĩr nhũm
mē arĩ haxàr xà kaprỹ ho mex
o pa hkêt nē. ³⁰ Pahi Tawi kēp
Tĩrtũm nhỹ hã kapēr jarēnh o
pa xwỹnh jakamã nhũm Tĩrtũm
kãm hkanrēhã htãmnhwỹ Jejusja
kukamã harē nē kãm:

Koja nhỹrmã akanrēhã atãmnhwỹjê
hõ amỹr pē apyrà nē mē ho
amnhĩptār o pa. Æm hãmri na
pa amã ja jarē. Anê.

³¹ Nhũm pre ã Tĩrtũm Tawi mã mē
pakaxyw ãm mã xwỹnhhta jarēnh
anê nhũm kuma. Nê mar tỹx
jakamã hkukamã htyk nē akupỹm
htĩr ã harē nē hã kagà. Nê hã kagà
ho:

Koja Tĩrtũm mē htykjê kamã hkarō
rer kêt nē nhũm aa ĩ omnu
nē hkro kêt. Anê.

Æ na pre finat Tawija Jejus Kris
kukamã harē nē hã kagà anê. ³² Kot
harēnh xwỹnh Jejusja tãm na pre
Tĩrtũm akupỹm ho htĩr pa mē pam-
jaja akupỹm htĩr kãm omu. Hãmri
nē mē ixte omunh xà hkôt ã mē
amã harēnh anê. Anê.

Nhũm pre ã Simãw Pêtre mē kãm
Jejus jarēnh anê. Hãmri nē mē kãm:

³³ —Na pre Tĩrtũm akupỹm
amnhĩ wỹr Kra Jejus o api. Hãmri
nē kãm anê nhũm ĩhkô hã mēmoj
piitã ho amnhĩptār o hkrĩ. Hãmri
nhũm Tĩrtũm kot kãm amnhĩ jarēnh
xà hkôt kãm amnhĩ Karō gō. Tã
nhũm ra amnhĩ pyrà nē mē ixwỹr
kurē nhũm jarãhã mē ixwỹr te
kuwy jakrax pyrà nē mē ixwỹr wrỹ
nē mē ixkarō hwỹr gjêx pa. Hãmri
pa mē ý hã ahpỹnhã mē akapēr
o ixkapēr ka mē inhma. Tã mē

akwỹjaja axtem nē mē xpipãnh ã
mē ixkamnhĩx. ³⁴ No finat Tawija
na pre tãm kaxkwa hwỹr àpir ã
amnhĩ jarēnh kêt nē. Jejus kot ĩ ho
kaxkwa hwỹr àpirja na pre harē nē
harēnh o:

Na pre Tĩrtũm inhō Pahihti mã
kapēr nē kãm:

³⁵ “E jar inhĩhkô hã nhỹ.

Pa amã mē kãm akurē xwỹnhjê gō
ka mē ho amnhĩptār o akrĩ.”
Anê.

Æ na pre finat Tawija Tĩrtũm kapēr
jarēnh anê. Nom tãm ĩ rãhã kaxkwa
hwỹr àpir ã amnhĩ jarēnh kêt nē.
Pahihti Jejus na pre ã hã harēnh
anê. ³⁶ Jakamã kwa ixkwỹ Ijaew.
Mē inhma nē inhmar tỹx nē. Mē
ate Jejus ã axãmnhēnh nhũm mē kot
mē amã pĩ kahpa hã hpĩr xwỹnhhta.
Tãm na pre Tĩrtũmja kēp mē panhō
Pahihti kaxyw ãm. Nê kēp mē pa-
pytār xwỹnh kaxyw mē pakaxyw
ãm. Anê.

³⁷ Nhũm pre ã Simãw Pêtre mē
kãm ujarēnh anhỹr o xa. Hãmri
nhũm mē tee ri ujarēnhja ma nē
hkaprĩ nē. Nê tee ri amnhĩ kukamã
hamaxpēr nē hamaxpēr o:

—Hêxta waa nê. Pēr ãm hãmri na
pre Jejus mē pamã amnhĩ jarēnh tã
pu prem amnhĩ kaxyw hkôt paja-
maxpēr kêt nē axtem nē kupĩ. Anê.

Hãmri nē amnhĩ tã mē hkukja nē
Simãw Pêtre mã:

—Kwa ã kot anhỹr jakamã
tanhmã kot paj mē amnhĩ nhĩpêx
to? Anê.

³⁸ Hãmri nhũm mē kãm:

—Nã kēr ka mē tee ri ate amnhĩ
tomnuj mã ajamaxpēr nē akaprĩ
nē. Hãmri nē Jejus Kris kôt amnhĩ
xunhwỹ. Pa mē ja hã mē apumu nē
Jejus nhỹ hã mē akrã kumrã. Hãmri
nhũm Tĩrtũm ja hã mē apumu nē
te amnhĩ katut kôt mē ate amnhĩ
tomnuj piitã rēnh par pyrà nē axte
kãm hamaxpēr kêt nē. Hãmri nē
mē ixkuxwar mē awỹr amnhĩ Karō
rê. ³⁹ Kãm mē awỹr rēnh prãm. Mē
amã nē mē akanrēhã mē akra nē

mê atâmnhwÿjê mã nê mê kot ko-
rmã Tirtûm kapêr mar kêt xwÿnhjê
mã. Âm mê kot amnhî to hwÿr
xwÿnh piitã nhûm kãm mê hwÿr
rênh prãm. Anê.

⁴⁰ Nhûm pre ã Simãw Pêtre mê
kãm ujarênh anê. Mê kãm kapêr
xihtÿx o kapêr ry nê. Hãmri nê mê
kãm:

—Koja nhÿrmã Tirtûm mê kot
tanhmã amnhî tomnuj to ho mê pa
xwÿnhjaja tanhmã mê homnuj tÿx
to. Jakamã kwa mê tokyx mê ate
amnhî tomnuj kaga kê tanhmã mê
ato hkêt nê. Anê.

⁴¹ Hãmri nhûm mê hkwÿjaja
kapêr mar tÿx nê amnhî kaxyw
Jejus kôt hamaxpêr nê hkôt amnhî
xunhwÿ. Mê ohtô rax nê hkôt
amnhî xunhwÿ. Mê kêp 3.000 nê
hkôt amnhî xunhwÿ. Hãmri nhûm
mê kot Jejus nhÿ hã kapêr jarênh o
mê pa xwÿnhjaja mê hkrã kumrãr
pa. Mê kêp Jejus kwÿ hã amnhî to
amnhîrit kaxyw mê hkrã kumrãr
pa. ⁴² Hãmri nhûm mê ra mê kot
Jejus kôt amnhî nhîpêx xwÿnhjê
hkôt amnhî nhîpêx o pa nhûm Jejus
nhÿ hã mê ahkre xwÿnh maatiijaja
apkati mê Jejus kapêr o mê ahkre
nhûm mê mar tÿx nê ra Jejus kôt
amnhî nhîpêx mex o mō. Nê gaa nê
hkôt amnhî nhîpêx mex o pa. Mê
kãm kapêr mar prãm tÿx jakamã
na pre htem axpên wÿr akuprō
nê axpên kutã apku nê Tirtûm mã
amnhî jarênh o hkrî. Nê mê kãm
axpên to mex pix prãm o axpên kôt
pa ho pa.

*Jejus kwÿ kot tanhmã amnhî
nhîpêx to hã mê harênh*

Atre 4.32-35

⁴³ Tã nhûm Jejus nhÿ hã mê
ahkre ho mê pa xwÿnh maatiijaja
xatã Tirtûm nhÿ hã aa mê kot
mêmoj pumunh kêt kwÿ ho anhÿr
o ri krî nhō xwÿnhjê hkôt pa nhûm
mê piitã ja hã mê omu. Amnhî
jaêr pê mê omu nê mê kamã no
pyma ho tee ri tanhmã Tirtûm mã

hamaxpêr to. ⁴⁴ Nhûm mê kot Je-
jus kôt amnhî xunhwÿr xwÿnh pi-
itã mêmoj to axpên kutã nojarêt
o pa. Jao axpên pê ri mêmoj to
ōxy hkêt nê pa. ⁴⁵ Jakamã nhûm
mêhō kêp amrakati nhûm mê ja
hã omu hãmri nê ò pyka hkwÿ
ho wênê rÿ mê hikukrêx kwÿ ho
wênê nê kãxpore jamÿ nê ma o mra
nê mê kãm kugō. Na pre hte ã
mê kot Jejus kôt amnhî xunhwÿr
xwÿnhjaja axpên nhîpêx anhÿr o pa.
⁴⁶ Hãmri nê apkati mê Tirtûm mã
amnhî jarênh xà hã ixkre hwÿr
mra nê kãm mex o mex ã harê.
Nê hamakêtkati nê àmnhîx ri hkînh
kãm axpên nhōrkwÿ hkôt ri apkur
o pa. ⁴⁷ Pê Tirtûm mã mex o mex
ã harênh o ri axpên kôt pa. Æ
mê kot amnhî nhîpêx anhÿr o pa
jakamã nhûm krî nhō xwÿnh piitã
kãm mê hkînh nê. Nê mê hkwÿjaja
apkati mê mê hwÿr mra nê mê hkôt
axkamê nê mê urak nê Jejus kôt
amnhî xunhwÿ nhûm Tirtûm ja hã
mê omu nê mê ho hkra. Jakamã
nhûm mê ra ohtô rax kumrêx o mō.

3

Te grã xwÿnh jarênh

Juãw 14.12-14; Atre 14.8-10

¹ Tã nhûm apkati hō hã nhûm
Simãw Pêtre mê Juãw wa ma Tirtûm
mã amnhî jarênh xà hã ixkre hwÿr
wa tē. Na pre hte myt àhpanh
grire nhûm mê piitã kot Tirtûm mã
amnhî jarênh kaxyw hwÿr mra.
Jakamã nhûm Simãw Pêtre mê Juãw
wa haxwÿja ma hwÿr wa mra.
² Nhûm mêhōja hakwakrem hkrî.
Katorxà nhōxà hkre rûm hte grã
nê kator xwÿnhnta. Nê arî hkrî ho
hkrî nê aa kãnhmã âm nê ri pa hkêt
nê. Nhûm hte hkrãmnhwÿjaja ap-
kati mê hamÿ nê ma o pa nê Tirtûm
mã amnhî jarênh xà hã ixkre jak-
wakrem hkrî nhûm mê hwÿr o
hkrî. Hakwakreja mê kot kãm: “Mê
gÿêx xà mex” anhÿr xwÿnhnta kapem
hwÿr mê mrar xwÿnhjê hwÿr o

hkrī. ³ Tã nhũm Simãw Pêtre mẽ Juãw wa tê nê ixkreja wÿr wa àr o tê nhũm hte grà xwÿnhhta wa omu nê kàxpore hã wa kuwÿ ⁴ nhũm Simãw Pêtre omu nê kãm:

—E amnê wa ixpumu. Anê.

⁵ Hãmri nhũm kuma nê htÿx ho wa kot kãm kàxpore hkwÿ nhôr ã wa hkamnhix nê wa omu ⁶ nhũm Simãw Pêtre kãm:

—Nà ixkàxpore hkêt. Nom kot paj Jejus Kris xàhpumunh xà ho tanhmã anhîpêx to. E pa Jejus Kris pê Najare nhõ xwÿnhhta nhÿ hã amã ixkapêr jakamã tokyx kãnhmã xa nê ri mra. Anê.

⁷ Hãmri nê upòk rũm hpa hã kupy nê kãnhmã ãm nhũm hte mex nê kãnhmã xa nê amnhî te karo ho ri mra. ⁸ Hãmri nê hte mex ã amnhî pumu nê hkĩnh tÿx nê. Nê hkĩnh xàj ma wa hkôt harĩ ho tê nê wa hkôt ixkrem axà. Tirtũm mã mex o mex ã harênh pê harĩ ho wa hkôt tẽn axà. ⁹ Hãmri nhũm mẽ piitã amnhî jaêr pê akupÿm mex ã omu nê kamã no puma nê. ¹⁰ Nê axpên mã:

—Kokÿÿ mÿjti na pre hte mẽ gjêx xà mex kamã mẽ hwÿr rãhã ho hkrī htã nhũm Tirtũm tanhmã ho nhũm kãnhmã xa nê ri mra mex kurê kumrêx. Hêxta waa nê. Anê.

Simãw Pêtre kot mẽ kãm ujarênh Rukre 24.46-47; Atre 2.14-36

¹¹ Hãmri nhũm hte mex xwÿnhja Simãw Pêtre mẽ Juãw wa hkôt ixkre hwÿr axà nê wa kuri xa. Nhũm mẽ piitã amnhî jaêr pê harênh ma nê hwÿr hprôt nê agjê nê omu. Mẽ kot ixkre nhĩkjê jarênh o: “Pahi Sarumãw nhõ” anhÿr xwÿnh jarênhja wÿr nhũm mẽ hprôt nê hte mex xwÿnhhta kamã no puma ho kuhê. Nê kuri Simãw Pêtre mẽ Juãw wa omu nê axpên mã wa harênh o:

—Hêxta waa nê. Tanhmã na we wa amnhî to nê akupÿm kãm hte ho mex nhũm ri mra?

Anê nê wa kamã no puma nê. ¹² Hãmri nhũm Simãw Pêtre mẽ kuma nê mẽ kãm:

—Pa ixkwÿjaja. Kwa mẽmo na ka mẽ ri mẽ ixkamã ano puma ho akuhê? Xà wa ixàhpumunh tÿx xà ho na pa wa ho mex? Nà ja kot anhÿr kêt. Rÿ xà wa ixte Tirtũm kôt amnhî nhîpêx mex o ixpaja o na pa wa ho mex? Nà mãânên ja kot anhÿr kêt. ¹³⁻¹⁷ Mẽ ate omunh xwÿnhhta Jejus tãm kot ho mex kênã. Kot amnhî kaxyw kãm hamaxpêr tÿx jakamã nhũm akupÿm ho mex ka mẽ omu.

—Finat Apraãw nê Ijak nê Jako mẽ hkwÿjaja kot hkôt amnhî nhîpêx o pa xwÿnh pê Tirtũmja. Tãm na pre akupÿm Kra Jejus o htÿr nê mex o mex ã harê. Mẽ ate hã axàmnên nhũm mẽ kot hpîr xwÿnhhta. Pahihti Pirat kot kãm urer kaxyw tã ka mẽ nê kãm akapêr kãm axihtÿx nê. Nom Jejus tãm kot amnhî nhîpêx o pa xwÿnh na pre. Na pre hte amnhî nhîpêx mex rãhã ho pa htã ka mẽ axtem nê hkaga. Nhũm pahihti Pirat mẽ ate kot kãm urer kêt ã axihtÿx nhũm kãm urer kêt nê ò pôristi mã kugõ nhũm mẽ amã kupî. Mẽ kajaja mẽ amã hprãm xà hkôt mẽ amã kupî. Tirtũm kot mẽ pahwÿr mẽnh tã ka mẽ axtem nê apî.

—Nom mẽ ate kêp Tirtũm Kra hã omunh kêt jakamã na ka prem ã hipêx anê. Mẽ kot mẽ ato amnhîptàr xwÿnhjê mẽ na ka prem amarĩ apî. Na prem mẽ axàmnên xà hkôt mẽ amã pî kahpa hã kunhõ nê ã hpîr anê. Kêp akupÿm mẽ pahto mẽ pahÿr xwÿnh tã ka prem axtem nê apî. No nhũm Tirtũm akupÿm ho htÿr pa prem akupÿm htÿr kãm omu.

¹⁸ —Amnepêm Tirtũm nhÿ hã kapêr jarênh o mẽ pa xwÿnhjaja na prem Tirtũm kot mẽ pakaxyw ãm xwÿnhja kukamã tanhmã harênh to nê hã kagà nê mẽ kãm harênh o pa. Kot amnhî xà htÿx kãm hamak kãm htykja kukamã nhũm pre htem harênh o pa. Tã ã Tirtũm kot kukamã harênh anhÿr xàja kôt ka mẽ ã hipêx anê nê apî.

19 —Jakamã kwa mẽ tee ri mẽ ate amnhĩ tomnuj ã amnhĩ pumu nẽ tokyx hkaga. Hãmri nẽ amnhĩ to Tĩrtũm wý kẽ mẽ anẽ mẽ ate amnhĩ tomnuj piitã amnhĩ katut kõt rēnh pa. 20 Hãmri nẽ mẽ ato mex nẽ ka mẽ kukwak ri akĩnh nẽ ajamakētkati nẽ axãmnhĩx ri apa. Koja nhỹrmã akupỹn mẽ pahwýr Jejus mẽ. Ra kot mẽ pakaxyw ãm kēnã.

21 —Nom koja tokyx akupỹn wrýk kēt nẽ. Koja kormã kaxkwa kamã pa rãhã nhũm Tĩrtũm akupỹm kot mẽmoj piitã ho mex par mẽ nhũm rĩ kormã akupỹn mẽ pahwýr wrý. Amnepēm Tĩrtũm nhỹ hã kapēr jarēnh o pa xwýnhjaja kot ja kukamã harēnh nẽ hã kagã xà hkõt.

22 —Na pre finat Mojes haxwýja Tĩrtũm nhỹ hã mẽ pahpãmjẽ mã tanhmã ja jarēnh to nẽ harēnh o:

Koja nhỹrmã mẽ panhõ Pahi Maati Tĩrtũmja te kot ra mẽ akaxyw pa ixãmja pyrà nẽ axte mẽ panhĩõ xãm. Mẽ panhĩõ koja. Koja nhỹrmã inhmyr pē mōn pōj nẽ mẽ amã Tĩrtũm kapēr jarēnh o pa. Ka mẽ kapēr ma nẽ mar týx nẽ kapēr kõt amnhĩ nhĩpēx o ri apa.

23 Koja mẽhõ kuma nẽ ãm kuma nẽ hkõt amnhĩ nhĩpēx kēt nẽ nhũm Tĩrtũm tee ri ja hã omu nẽ kēp hkra hkēt ã harēnh kurē kumrēx. Anẽ.

24 ã na pre finat Mojesja mẽ kãm Jejus kukamã ujarēnh anẽ. No ãm tapxipix na pre ã harēnh anhýr kēt nẽ. Tĩrtũm nhỹ hã mẽ kapēr o mẽ pa xwýnh piitã na prem ã mẽ kãm harēnh anhýr o pa. Kot harēnh o pa xwýnh kot wa finat Sãmuewja nẽ hkõt mẽ hkwyjẽ piitã ã Jejus kukamã hkwyjẽ mã harēnh anhýr o pa.

25 —Tã mẽ pahpẽ mẽ hkamrõ hkwy na pu mẽ. Mẽ pahpẽ mẽ hkanrēhã mẽ htãmnhwýy. Mẽ

pakaxyw na pre Tĩrtũm ã mẽ kãm kapēr anẽ. Nẽ Kraja kukamã finat Apraãw mã kãm:

Koja nhỹrmã akanrēhã atãmnhwýjẽ hõ pyka piitã hkõt mẽ piitã mẽ ho mex o pa nhũm mẽ kukwak ri mex kumrēx nẽ ri pa. Anẽ.

26 ã kot Kra hkukamã harēnh anhýr tã mẽ pakumrēxjẽ hwýr na pre kumẽ. Kot mẽ pahto mex nhũm mẽ pahte amnhĩ tomnuj kaga kaxyw nhũm mẽ pahpẽ Ijaew kumrēxjẽ hwýr kumẽ. Anẽ.

Nhũm pre ã Simãw Pētreja hte grã xwýnh pumunh o mẽ kuhẽ xwýnhjẽ mã ujarēnh anẽ.

4

Simãw Pētre mẽ Juãw wa kot mẽ aptàr tũmjẽ mã kapēr ã wa harēnh

Rukre 21.12-13

1-4 Nhũm Simãw Pētre mẽ Juãw wa arĩ mẽ kãm Tĩrtũm kapēr jarēnh o wa xa nẽ mẽ kãm:

—Nã na pre Jejus ty nhũm Tĩrtũm akupỹm hõ htĩr. Tã kot akupỹm ho htĩr jakamã koja nhỹrmã urak nẽ akupỹm mẽ htyk xwýnh piitã mẽ ho htĩr pa. Anẽ.

Hãmri nhũm mẽ kot wa mar o kuhẽ xwýnh kwýjaja wa kuma nẽ wa hkõt hamaxpēr nẽ wa urã nẽ Jejus kõt amnhĩ xunhwý. Jakamã nhũm ra mẽ kot Jejus kõt amnhĩ xunhwýr xwýnhjaja ohtõ rax kumrēx. Ra mẽ kēp 5.000.

Hãmri nhũm axtem mẽ hkwyjaja wa hwýr mra nẽ wa mar o kuhẽ. Mẽ õ patre nhõ pōristũm mẽ Satusew nhõ xwýnh kwýjẽ mẽ nhũm mẽ ma Simãw Pētre mẽ Juãw wa hwýr mra nẽ tee ri wa kot mẽ ahkre hã wa mar o kuhẽ. Nẽ mẽ kãm akupỹm mẽ htĩr jarēnhja ma nẽ wa kamã gryk nẽ. Satusew nhõ xwýnhjaja na pre htem akupỹm mẽ htĩr kõt hamaxpēr kēt jakamã nhũm wa akupỹm mẽ htĩr jarē nhũm mẽ tee ri wa kuma nẽ hamaxpēr punuj nẽ wa kamã gryk

kato. Hāmri nē wa hā amýnē nhūm mē wa unē nē ma wa o tē nē mē hagjēnh xà kamā wa haxà. Ra myt grire nhūm mē wa haxà. Wa kot mē hagjēnh xà kamā hā apkati nhūm rī kormā mē kot ujarēnh ā tanhmā wa ho kaxyw.

⁵⁻⁶ Tā nhūm apkati nhūm mē ohtô nē wa ujarēnh ā wa mar kaxyw Jerujarē kamā axpēn wýr akuprô. Ijaew pigêtjaja nē mē àptâr tūm kwýjaja. Nē mē kot finat Mojes kapēr o mē ahkre ho mē pa xwýnhjaja. Nē mē ô patre maati Anas mē hkwýja. Nē Ijaew nhô juisti Kajpas mē Juāw ô mē Aresānja. Nhūm mē kot Simāw Pêtre mē Juāw wa mar kaxyw axpēn wýr akuprô. ⁷ Hāmri nē wa hā karô nhūm pôristi wa hwýr tē nē wa haprô nē ma mē hwýr wa o tē nē wa ho axà nē mē kutā wa ýr nhūm wa nhý. Hāmri nhūm mē wa omu nē wa kām:

—E mē inhmā amnhī jarē. Mēhō xàhpumunh xà ho na ka pre wa hte grà xwýnhhta ho mex? Mēhō na pre hwýr war amē ka wa ho mex? Anē.

⁸ Hāmri nhūm Simāw Pêtre mē kām awjarē. Tirtūm Karô kot kām hamaxpēr o hihtýx jakamā nhūm ý hā Ijaew pigêtjē mē mē àptâr tūmjē mā awjarē nē mē kām:

⁹—Tôe mēhō kot ho mex xwýnhja ā mē ate wa ixkukjêr ¹⁰ jakamā kot paj mē amā harē ka mē ixte harēnhja ma. Wa ixpyrà nē mē apē Ijaew kēr ka mē wa ixkapēr mar týx nē. Jejus Kris pé Najare nhô xwýnhhta. Mē ate hpír nhūm Tirtūm kot akupým ho hür xwýnhhta. Tām na pre àhpumunh týx o akupým hte grà xwýnhhta o mex. ý hā ixte kaxyw kām ixkapēr nhūm tām akupým ho mex. ¹¹ Tirtūm kot mex o mex ā harēnh nē mē pakaxyw ām tā ka prem axtem nē hkaga. Nom Tirtūm kapēr ā kagà htūm kot ra mē akukamā ā mē ate amnhī nhīpēx anhýr ā mē ajarēnh nē mē ajarēnh kot:

Mē kot kēn o amnhīm òrkwý nhīpēx kaxyw nē nhýri kēn maati pumu nē htýx omnuj ā hkamnhix nē hkaga. Mē kot hkaga htā nhūm Tirtūm mē kurom mex o kot kēn piitā hakrenh par ā omunh kurē kumrēx.

Anhýr o kot mē ajarēnh. Te mē ate kēn maati kaga xwýnh ā mē ajarēnh pyrāk. Tā ka mē ā mē kot mē akukamā mē ajarēnh anhýrja kôt te mē ate kēn maati kaga pyrā nē Jejus kaga nē apī. Tirtūm kot amnhīm mex o mex ā omunh nē harēnh tā ka prem axtem nē hkaga. ¹² Tapxipix na hte mē panē mē pahte amnhī tomnuj ré. Mēhō koja urāk nē àhpumunh týx o mē panē kurē? Mēhō koja ahpýnhā pyka piitā hkôt urāk nē ā mē panhīpēx mex anē? Nā ām amrakati kumrēx. Ām Jejus pix. Tapxipix na pre Tirtūm ja kaxyw ām jakamā tapxipix na kēp mē pahkaprī xwýnh maati. Anē.

¹³ Nhūm pre ā Simāw Pêtreja mē kām kapēr anē. Hāmri nhūm mē amnhī jaér pé kuma nē axpēn mā:

—Kwa wa kām mē pahpyma wa hā hkwy jēt kēt kumrēx. Te ri wa htýx ri wa pa pyrāk tā wa hamaxpēr týx kumrēx. Mān wa kēp Jejus kôt mē pa ho mē pa xwýnh kwý jakamā na wa ā kapēr anē nā? Anē.

¹⁴ Hāmri nē tee ri kot tanhmā mēmoj tā wa kām àkjêr to hkukamā hamaxpēr. No nhūm hte grà xwýnh ra kot mē hwýr àr nē Simāw Pêtre wa kuri mex nē ām nhūm mē kot no ho omunh jakamā wa kām àkjêr kēt nē. ¹⁵ Hāmri nē wa kām anē nhūm wa mē kēp kato nē kapôt ā xa nhūm mē tanhmā wa kām nē kaxyw wa hā axpēn ma nē axpēn mā:

¹⁶—Kwa tanhmā kot puj mē wa ho? Ra jar Jerujarē kamā mē piitā mē kot akupým hte grà xwýnhhta mex ā wa omunh kēnā kot puj kēt mē kām wa kot ho mex hkēt ā wa harē. ¹⁷ Tā mē kot harēnh o hprôt pymaj kot puj mē axte Jejus jarēnh

o pa nê wa hkurê. Kê hte grà xwÿnh jarênhja âm jar mẽ pakamã hapêx. Nà kot puj mẽ ã wa kãm karô anê. Anê.

¹⁸ Nhũm mẽ wa hã axpên mar pa hãmri nê akupÿn wa hã karô nhũm wa akupÿn mẽ hwÿr axà nhũm mẽ wa kãm:

—E Simãw Pêtre mẽ Juãw wa. Wa mãmri ma tẽ. Nom kêr ka wa mẽ ixkapêr mar kumrêx. Kêr ka wa axte ri tanhmã mẽ kãm Jejus jarênh to ho ri apa hkêt nê. Âm kwarĩ ho kwarĩ. Anê.

¹⁹ Hãmri nhũm wa tee ri mẽ kuma nê mẽ kãm:

—Nà Tirtũm tãm kot ja hã wa inhmã karô kênã kot pa kêt wa mẽ akapêr ma nê harênh o ixpa hkêt nê. ²⁰ Na pa pre wa Jejus kôt ri ixpa nê xatã kot tanhmã amnhĩ nhĩpêx to hã omunh o hkôt ixpa. Nê xatã tanhmã mẽ ahkre htô hã mar o hkôt ixpa. Nê akupÿm htĩr kãm omu. Jakamã tanhmã kot pa wa amnhĩ to nê mẽ kãm ja jarênh kêt nê? Nà kot pa wa mẽ akapêr mar xà hkôt ã amnhĩ nhĩpêx anhÿr hkêt nê. Anê.

²¹⁻²² Hãmri nhũm mẽ kuma nê tee ri mẽ kot tanhmã wa ho kaxyw. Te grà xwÿnhhta hte grà nê hkrĩ ho hã amgrã pê 40 tã ra akupÿm mex nhũm mẽ piitã ja hã omu nê hã axpên mã Tirtũm mex o mex ã harênh o ri pa. Jakamã nhũm mẽ utãr xwÿnhjaja mẽ kuma nê kãm mẽ uma nê. Hãmri nê mẽ umaj tanhmã Simãw Pêtre mẽ Juãw wa ho hkêt nê. Âm axte wa kot Jejus jarênh o pa nê wa kãm kapêr kãm hihtÿx nê wa hano nhũm wa ma tẽ.

Mẽ kot amnhĩ to Tirtũm wÿr ã mẽ harênh

Matêwre 18.19-20

²³ Tã nhũm Simãw Pêtre mẽ Juãw wa ma akupÿm Jejus kôt htô nê htôxjê hwÿr wa tẽ nê mẽ kãm amnhĩ jarê. Nê patre krãhtũmjê mẽ mẽ ãptãr tũmjaja kot Jejus kapêr jarênh nê wa hkurê kamã hihtÿxja nhũm amnhĩ tã mẽ kãm mẽ harê.

²⁴ Hãmri nhũm mẽ wa kuma nê amnhĩ to Tirtũm wÿr kurê kumrêx nê kãm:

—Pa Pahi Maati? Nà mẽmoj piitã ho akator xwÿnhhta na ka. Na ka pre kaxkwa ho akato nê pyka ho akato nê gô xujanãr o akato. Hãmri nê kamã mẽmoj piitã ho akator pa. ²⁵⁻²⁶ Amnepêm na pre mẽ inhĩgêt Tawija amã tanhmã amnhĩ nhĩpêx to ho pa. Nê Akarô nhÿ hã akapêr kwÿ jarê nê hã kagã. Nê kagãja kamã mẽ kot Pahihti Jejus kutã amnhĩ xunhwÿr xwÿnhjê jarê nê mẽ hã kagã. Mẽ hkukamã mẽ hã kagã nê mẽ hã kagã ho:

Mẽmo mÿrapê na prem Ijaew kêt xwÿnhjaja Tirtũm kutã amnhĩ xunhwÿ?

Nê Ijaew haxwÿja. Mẽmo mÿrapê na prem htÿx ri hamaxpêr o ri pa?

Nê pyka piitã hkôt pahijaja na prem Pahi Maati kutã amnhĩ xunhwÿr pa.

Nê kot mẽ pakaxyw âm xwÿnh Jejus Krisja nhũm mẽ mãânên kutã amnhĩ xunhwÿr pa.

Nê mẽ kot hpĩr kaxyw mẽ kãm hã amÿnê.

Kwa mẽmo mÿrapê na prem axtem nê ã amnhĩ nhĩpêx anê? Anê.

Ã na pre finat Tawija Akarô nhÿ hã mẽ harê nê hã kagã anê Tirtũm.

²⁷ Âm hãmri na pre mẽ hkukamã mẽ hã kagã. Ra mẽ kot ã amnhĩ nhĩpêx anhÿr kênã. Krĩ ja kamã na prem ã amnhĩ nhĩpêx anhÿr kaxyw axpên wÿr akuprô. Pahi Eroxo nê pahi Pôn Pirat nê mẽ ixkwÿjaja nê mẽ kêp Ijaew kêt xwÿnhjaja axpên wÿr akuprô nê Akra Jejus kutã amnhĩ xunhwÿ nê mẽ kot hpĩr kaxyw hã amÿnê. Kot tãm amnhĩ nhĩpêx o pa nhũm ate mẽ ixkaxyw âm xwÿnhja nhũm mẽ axtem nê kutã amnhĩ xunhwÿ.

²⁸ —Nom amnepêm kormã mẽ ixkêt ri na ka pre mẽ hkukamã ã mẽ kot amnhĩ nhĩpêx anhÿr ã mẽ

omu. Mě kot tanhmã apê Akra Jejus to nê hpîrta kukamã ka pre hã mẽ omu. Tã mẽ ixwÿr amê nhùm prem kupî. No âm ajamaxpêr xã hkôt.

²⁹—Tã ka mẽ omu. Na mẽ Jejus ã mẽ ixkamã gryk tÿx nê tanhmã hã mẽ ixto kaxyw. Jakamã kot kaj mẽ ixpê amã tanhmã amnhĩ nhîpêx to ho ixpa xwÿnhjaja ka tanhmã mẽ ixkrã hto pa mẽ inhmã mẽ uma hkêt nê mẽ hkôt ixpa ho ixpa. Mě kot tanhmã mẽ ixto hã mẽ ixka-grônã tã pa mẽ inhmã mẽ uma hkêt nê ixãmnhîx ri ixkînh nê ri ixpa. Nê anhÿ hã mẽ kutã amnhĩ to htÿx nê arî mẽ kãm akapêr jarênh o ri mẽ hkôt ixpa. Mě kot Jejus ã tanhmã mẽ ixto htãã.

³⁰—Akra Jejus mex o mex jakamã kot paj mẽ àhpumunh tÿx xã ho tanhmã mẽ piitã mẽ ho mex to ho ri mẽ hkôt ixpa. Mě à xwÿnhjaja akupÿm mẽ o mex. Nê mẽ kot aa mẽmoj pumunh kêt kwÿ ho anê. Kê mẽ omu nê axàhpumunh o axàhpumunh ã apumunh mex kurê kumrêx. E âm ja pix na ra hapêx. Anê.

³¹Nhùm prem ã amnhĩ to Tîrtùm wÿr anê. Puh nhùm ixkreja mẽ kãm htertet tÿx nê nhùm Tîrtùm Karô axte tanhmã mẽ hkrã hto nhùm mẽ ý hã kãm mẽ uma hkêt nê. Âm amnhĩ to htÿx nê mẽ kãm Tîrtùm kapêr jarênh rãhã ho ri mẽ hkôt pa.

Jejus kwÿjaja tanhmã kot axpên nhîpêx to hã mẽ harênh

Atre 2.42-47

³²⁻³³Nhùm Jejus nhÿ hã mẽ ahkre ho mẽ pa xwÿnh maatiijaja. Na pre Tîrtùmja mẽ ho mẽ kãm ma hkêt jakamã nhùm pre htem akupÿm Jejus htîr kôt mẽ kãm harênh o ri mẽ hkôt pa. Nhùm Tîrtùm mẽ kot Jejus kôt amnhĩ xunhwÿr xwÿnh piitã mẽ kutã nojarêr rãhã ho pa nhùm mẽ ra ohtô rax nê. Nê mẽ kãm axpên to mex pix prãm o ri axpên kôt pa. Mě ohtô htã te mẽ tipxi pyrãk. Nê axpên pê mẽmoj to

õxÿ hkêt nê. Na pre htem axpên mã mẽ hikukrêx nê mẽ apkur xã jarênh o: “Inhõ pix kêt mẽ pah-piitã mẽ panhõ na.” Anhÿr o ri mẽmoj tã axpên kutã nojarêr o ri pa. No kêt axpên mã mẽmoj jarênh o: “Tk. Nà âm inhõ pix na.” Anhÿr o harênh kêt nê. ³⁴⁻³⁵Na pre htem tōhã õ ixkre hõ ho wênê. Rÿ õ pyka hkwÿ ho wênê nê kàxpore jamÿ nê ma o mra nê Jejus nhÿ hã mẽ ahkre ho mẽ pa xwÿnhjê mã kugõ nhùm mẽ hamÿ nê mẽ kêp amrakati xwÿnhjê mã ho anhrã. Hãmri nhùm mẽ amnhîm hamÿ nê ho amnhîm awjaprô. Jakamã na pre hte mẽ hkwÿjaja kãm prãm nê ri pa rÿ ê hkêt nê ri pa hkêt nê.

³⁶⁻³⁷Jujere na pre ã amnhĩ nhîpêx anê nê mẽ kaxyw õ pika hkwÿ ho wênê. Hãmri nê kàxpore py nê o tẽ nê Jejus nhÿ hã mẽ ahkre xwÿnh maatiijê mã kugõ. Jujereja ljaew nhõ patre ho ajuta xwÿnh na pre. Gô hipôk pê Sipre kamã na pre kato. Kêp Jujere htã no nhùm Jejus nhÿ hã mẽ ahkre ho mẽ pa xwÿnhjaja na prem kãm: “Panãpe” Anê. Mě kapêr kãm Panãpeja te kêp “mê hamaxpêr o mẽ hihtÿx o pa xwÿnh” anhÿr pyrãk. Jakamã nhùm õ pika hkwÿ ho wênê nê kàxpore py nê o tẽ nê Jejus nhÿ hã mẽ ahkre xwÿnhjê mã kugõ nhùm mẽ kupy nê mẽ kêp amrakati xwÿnhjê mã ho anhrã.

5

Ananîs mẽ Sapire wa kot amnhĩ to hêx ã wa harênh

Karatas 6.7; Eprêw 10.26-31

¹Tã nhùm Ananîs mẽ hprô Sapire wa Jujere jarênh ma nê urãk nê õ pyka hkwÿ ho wênê. ²Hãmri nê kàxpore py. Nom na pre wa ra hã axpên ma. Jakamã nhùm Ananîs Jujere kînhã kàxpore hkwÿ pix py nê o tẽ nê Jejus nhÿ hã mẽ ahkre xwÿnh maatiijê mã kugõ. Nom katàt kôt mẽ kãm ôr ã amnhĩ

jarēnh kêt nē. Kot kàxpore ho pikjēr nē amnhīm hkwý ho àrik ā amnhī jarēnh kêt nē. Ām mē kām amnhī jarēnh o hēx. Te piitā ōr par pyrāk o amnhī nhīpēx nē mē kām:

—E ota ixkàxporeta. Na pa wa inhō pika hkwý ho wēnē nē kàxpore hpy nē hpānhā Jujere pyrā nē man mē awýr piitā o tē. Anē.

³ Hāmri nhūm Simāw Pētre ra ā kot amnhī nhīpēx anhýr ā omu hāmri nē kām:

—Tk. Kwa mon ka axtem nē Satanasti kapēr ma nē hkôt amnhī nhīpēx nē te akàxpore piitā ōr pyrāk ā amnhī to axēx anē? Te ate piitā ōr pyrāk tā no ām hkwý pix gō. Hēxta waa nē. Na ka axtem nē Tirtūm Karō mā akàxpore nhōr par o axēx. ⁴ Anhō pyka kēnā. Nē hpānhā kàxporeja anhō kēnā. Kot kaj amā tanhmā ho hprām xā hkôt māmri tanhmā ho. Amā piitā ho axārīk prām nē māmri piitā ho arīk. Rý amā hkwý hpix nhōr prām nē māmri hkwý pix gō. No ri ate ōr par pyrāk o amnhī to axēx kêt nē. Te ate mē inhmā pix mā axēx pyrāk nom mē inhmā pix mā hkêt. Na ka mǎānēn te Tirtūm mā axēx pyrāk. Anē.

⁵⁻⁶ Nhūm pre ā Simāw Pētre Ananīs mā kapēr anē nhūm kuma nē pykap tēm nē htyk kurē kumrēx. Hāmri nhūm mē àptār nywjaja hwýr tē nē kupēxē ho hkupu nē kumý nē ma o tē nē haxà. Hāmri nhūm mē kot ā kot amnhī nhīpēx anhýr ā harēnh mar xwýnhjaja tee ri harēnh ma nē kām ma htýx nē.

⁷ Tā nhūm ra hā ahtūm nē. Ra hā 3 ore nē hapēx nhūm Ananīs prō Sapireja htýx hamakētkati nē mē hwýr tē nē axà. Kormā mjēn htyk ā harēnh mar kêt nē hamakētkati nē hkīnh nē mē hwýr tē nē axà. ⁸ Hāmri nhūm Simāw Pētre omu nē hēx rom hkukja nē kām:

—Pa? E kwa inhmā mēmoj jarē. Tanhmā na prem war anhō pykaja pānhā war amā amnhīrer to? Xā ām

hāmri na amjēn mē inhmā harē nà? Anē.

Hāmri nhūm kuma nē mjēn pyrā nē kām ho hēx nē kām:

—Ýý. Ām hāmri kot amā harēnh kēnā. Anē.

⁹ Hāmri nhūm Simāw Pētre tee ri kuma nē kām:

—Tk. Hēxta waa nē. Kwa mon ka war ajamē war akàxpore ho te Tirtūm mā axēx pyrāk? Mān ka wa ajamaxpēr o: “Koja Tirtūm ja hā wa ixpumu nē ām hā wa ixpumu nē tanhmā hā wa ixto hkêt nē.” Anhýr o mān ka wa ajamaxpēr nà? Nom na ka wa ām kām axēx kapry. Onēj ra mē kot amjēn jaxār xwýnhjaja akupýn hpōx o mra. Koja mē anhīpēx o te hipēx pyrā nē mǎānēn ato tē nē ajaxà ka rī amnhī pumu.

¹⁰ Anē nhūm kuma nē mjēn pyrā nē pykap tēm nē htyk kurē kumrēx. Hāmri nhūm mē kot mjēn jaxār xwýnhjaja mra nē mē hwýr agjē nē omu nhūm ra htyk mex nē nō nhūm mē kumý nē ma o tē nē mjēn nhīhkō hā haxà. ¹¹ Hāmri nhūm mē piitā wa harēnh ma nē kām ma htýx nē. Mē kot Jejus kôt amnhī xunhwýr xwýnhjē mē amarī ri mē pa xwýnhjaja nhūm mē tee ri wa hkukamā hamaxpēr o kām ma htýx kumrēx.

Mē kot aa mēmoj pumunh kêt kwý ho anhýr ā mē harēnh

Makre 16.17-20; Atre 19.11-12

¹²⁻¹⁴ Na pre hte Jejus kôt mē kot amnhī xunhwýr xwýnhjaja xatā Tirtūm mā amnhī jarēnh xā hā ixkre hwýr akuprō. Mē kot ixkre nhīkjē mā: “Pahi Sarumāw nhō” anhýr xwýnh jarēnhja wýr nhūm pre htem akuprō. Nhūm mē piitā kām mē hkīnh nē mē ohtō nē mē hkôt akuprō nē mē urāk nē Jejus kôt amnhī xunhwý. Mēnijaja nē mēmyjaja. No nhūm mē hkwýja Ananīs mē Sapire wa kot amnhī nhīpēxja mā hamaxpēr nē kām mē hkôt mrar pyma nē. Kām mē hkīnh tā kām mē hkôt mrar pyma nē.

Nhũm pre hte Jejus nhỹ hã mẽ ahkre ho mẽ pa xwỹnhjaja aa mẽ kot mẽmoj pumunh kêt kwỹ ho anhỹr o ri mẽ piitã mẽ hkôt pa. ¹⁵ Jakamã nhũm pre htem mẽ à xwỹnhjê jamỹ nẽ ma mẽ hwỹr mẽ o mra nẽ Simãw Pêtre kutêp pry kamã mẽ haxwỹ nẽ mẽ kãm:

—E mẽ jar anhĩkwỹ. Kê Simãw Pêtre ja kôt mẽ ajãnh tẽ nẽ mẽ akupênh o akupỹm mẽ ato mex rỹ nhũm hkarô pix mẽ atã harir ka mẽ akupỹm amex japêr.

Anhỹr o mẽ kãm kapêr hãmri nhũm mẽ kupĩp kãm kutêp hikwỹ. ¹⁶ Nẽ Jerujarẽ pu hã krĩ hkwy kamã. Mẽ à xwỹnhjaja nẽ mẽkarômnuti kot tanhmã mẽ ho xwỹnhjaja nhũm pre htem mẽ hamỹ nẽ ma mẽ ìhkrep mẽ o mra nhũm mẽ piitã akupỹm mex pa.

Mẽ kot Jejus kwỹjê jagjênh ã mẽ harênh

Rukre 21.12-15; Juãw 15.26-27; Atre 4.1-22

¹⁷ Tã nhũm mẽ õ patre maati mẽ hkrãmnhwỹ Satusew nhõ xwỹnhjaja tee ri akupỹm mẽ mex ã mẽ harênh ma nẽ axpên mã:

—Tk. Kwa na mẽ ra ohtô nẽ Jejus gryk ã mẽ pahte mẽ ahkre kaga nẽ ãm hkôt pix mã ri amnhĩ nhĩpêx o pa. Anẽ.

Hãmri nẽ Jejus nhỹ hã mẽ ahkre maati xwỹnhjê kamã gryk nẽ ra tanhmã mẽ ho kaxyw. ¹⁸ Hãmri mẽ unê nẽ mẽ hagjê nhũm mẽ hagjênh xà kamã hkrĩ hpa.

¹⁹ Tã nhũm kamãt nhũm Tĩrtũm kapêr o mẽ wrỹk xwỹnhja ma mẽ hagjênh xà hwỹr mẽ hwỹr wrỹ nẽ mẽ hwỹr axà nẽ mẽ kãm hakwakre kahê xà mẽ nẽ mẽ kator pa. Hãmri nẽ mẽ kãm:

²⁰ —E mẽ ma akupỹm Tĩrtũm mã amnhĩ jarênh xà hã ixkre hwỹr mra nẽ axte mẽ kãm awjarê. Tanhmã mẽ kot amnhĩ nhĩpêx to nẽ Jejus kôt amnhĩ nhĩpêx nyw o amnhĩ nhĩpêx ã mẽ kãm hã karô kê mẽ ama. Anẽ.

²¹ Hãmri nhũm mẽ kuma nẽ ma akupỹm hwỹr hapêx kurê kumrêx. Nhũm myt kator o mõi mẽ nhũm mẽ hwỹr agjê nẽ mẽ kãm Tĩrtũm kapêr jarênh o kuhê.

Tã nhũm mẽõ patre maati mẽ hkôt ri mẽ pa xwỹnhjaja amnhĩ wỹr mẽ ãptâr tũm xwỹnhjê hwỹ nhũm mẽ piitã axpên wỹr pikuprõnh pa. Hãmri nẽ htỹx arĩ Jejus kwỹjaja mẽ hagjênh xà kamã mẽ hkrĩ hã mẽ hkamnhĩx nẽ amnhĩ wỹr mẽ hã karô. ²² Nhũm põiристijaja ma kot mẽ haprôr kaxyw mẽ hagjênh xà hã ixkre hwỹr mra nẽ tee ri kamã mẽ hapêr nhũm mẽ kamã amrakati. Hãmri nhũm mẽ akupỹm mẽ pikuprõnh xwỹnhjê hwỹr hprôt nẽ mẽ kãm:

²³ —Nà na põiристи hkwyjaja arĩ hakwakrem ixkre jamãr mex nhũm hakwakre arĩ kahê htỹx nẽ xa. Tã pa mẽ hwỹr agjê nẽ tee ri hkre kamã mẽ hapêr nhũm mẽ kamã amrakati kumrêx. Anẽ.

²⁴ Hãmri nhũm mẽ kuma nẽ tee ri hamaxpêr. ²⁵ Rôm nhũm ja mẽ hwỹr tẽn axàn mẽ kãm:

—Kwa jãã mẽ ate mẽ hagjênh xwỹnhjaja na mẽ axte Tĩrtũm mã amnhĩ jarênh xà hã ixkre kamã mẽ ahkre ho kuhê pa ham mẽ omu nẽ mẽ kurũm tẽ. Anẽ.

²⁶ Hãmri nhũm patre nhõ põiристи krãhtũmja kuma nẽ mẽ hwỹr põiристи hkwy rê nhũm mẽ ma mẽ hwỹr mra nẽ mẽ hwỹr agjê nẽ kê axte mẽ unê nẽ akupỹm mẽ o mra. Nom tanhmã mẽ ho hkêt nẽ. Mẽ kot hkôt ri mẽ pikamênh xwỹnhjê pymaj mẽ ho mex nẽ mẽ o mõi. Nẽ mẽ hã axpên mã:

—Nà kot puj mẽ tanhmã mẽ ho nhũm mẽ ja hã mẽ pahpumu nẽ kên o mẽ pahkapê nẽ tanhmã amnhĩ to nẽ hã mẽ panhĩmex. Anẽ.

²⁷ Hãmri nẽ mẽ ho mex nẽ akupỹm mẽ o mõi mẽ hwỹr mẽ ho agjê nẽ mẽ pikuprõnh xwỹnhjê kutã mẽ hkrĩ. Hãmri nhũm mẽõ patre maatija mẽ kãm:

28 —Kwa ra mẽ ixte Jejus kapër jarênh nê mẽ akurê htâ ka xep mẽ âm mẽ inhma nê arĩ mẽ kãm harênh o ri apa. Nê jar Jerujarê kamã mẽ piitã mẽ kãm harê. Nê mẽ pajaja mẽ ixte Jejus pĩr ã ka mẽ ri mẽ kãm mẽ ijarênh o apa. Anê.

29 Hãmri nhũm Simãw Pêtre mẽ kuma nê mẽ amnhĩ tã mẽ kãm kapër nê mẽ kãm:

—Tỳ kot kaj mẽ Tĩrtũm kapër kuhpa hã mẽ inhmã mẽmoj tã karõ pa mẽ ama nê âm mẽ ama nê âm Tĩrtũm kapër pix ma nê hkõt ri amnhĩ nhĩpêx. 30 Amnepêm mẽ panhĩgêjtaja na prem Tĩrtũm kõt pix mã amnhĩ nhĩpêx o pa. Tã ka prem axtem nê kêp mẽ kãm Kra Jejus ã amýnê nhũm mẽ pĩ kahpa hã kunhõ nê kupĩ. Nom nhũm Tĩrtũm akupým ho htĩr 31 nê kêp mẽ panhõ Pahĩti hã harê. Nê kêp mẽ pahkaprĩ xwýnh mex ã harê. Hãmri nê ra amnhĩ ri ýr nhũm ìhkõ hã mẽmoj piitã ho amnhĩptãr o hkrĩ. Nhũm kãm: “Koja Ijaew mẽ kot amnhĩ tomnuj kaga nê akõt amnhĩ xunhwý pa ja hã mẽ omu nê amnhĩ katut kõt mẽ kot amnhĩ tomnuj rênh pa nê mẽ ho ixkra.” Anê. 32 Tã mẽ pajaja mẽ ixte Jejus htyk nê akupým htĩr ã omunh mex jakamã na pa hte Tĩrtũm Karõ nhỹ hã ã mẽ amã harênh anê. Karõja na pre Tĩrtũm mẽ ixte hkõt amnhĩ nhĩpêx xwýnhjê hwýr kurê nhũm mẽ ixwýr wrý nê mẽ ixkarõ mã agjê. Tã ý hã na pa htem ri ã harênh anhýr o ri mẽ akõt ixpa. Anê.

33 Hãmri nhũm mẽ kuma nê mẽ kamã gryk týt nê. Nê mẽ kãm mẽ himex prãm nê mẽ kãm mẽ hã amýnê. 34 Hãmri nhũm Kamariewtija tee ri ja hã mẽ omu hãmri nê kãnhmã xa nê Jejus nhỹ hã mẽ ahkre xwýnh maatijê xyr pê hkwýjê mã kapër. Parijew nhõ xwýnh na pre. Nê kêp Tĩrtũm kapër ã kagã htũm o mẽ ahkre ho pa xwýnhjê hõ na pre. Nhũm mẽ piitã kãm hkĩnh nê. Jakamã

nhũm kãnhmã xa nê pòristi mã anê nhũm mẽ amnhĩ nê Jejus nhỹ hã mẽ ahkre ho mẽ pa xwýnhjê kator nhũm mẽ kapõt ã kuhê. 35 Hãmri nhũm Kamariewtija mẽ nê tanhmã mẽ kãm kapër to nê mẽ kãm:

—E ixkwýjaja. Kwa kêr pu mẽ tanhmã mẽ ho hkukamã pajamaxpêr mex nê. 36 Mãn arĩ mẽ ate finat Tetastija jarênh ã anohtýt nê ho apa japêr. Mytwrý hõ hã na pre mẽ kãm amnhĩ to rax ã amnhĩ jarênh o pa. Hãmri nhũm hkõt ri mẽ pa xwýnhjaja ohtõ nê. Mẽ kêp 400. Tã nhũm prem mẽ kêp Tetasti pĩ nhũm hkõt ri mẽ pa xwýnhjaja axpên pê anhrã nê ma hapêx.

37 —Tã nhũm mẽ kot mẽ piitã mẽ ho kõta xa hã arĩgroja ã nhũm Garirej nhõ xwýnh pê finat Jut haxwýja hkõt mẽ pa xwýnhjaja ohtõ nê. Tã nhũm mẽ mãănên mẽ kêp kupĩ nhũm hkõt ri mẽ pa xwýnhjaja haxwýja axpên pê anhrã nê ma hapêx.

38 —Jakamã kwa pu mẽ tanhmã jajê ho hkêt nê. Pu mẽ âm mẽ omu. Koja mẽ amnhĩ krã hkõt ã ujarênh anhýr o pa japêr hã koja Tetasti mẽ Jut wa hkõt pa xwýnhjê pyrã nê tokyx axpên pê anhrã nhũm Jejus jarênh o paja hapêx o hapêx. 39 Nom koja mẽ âm hãmri Tĩrtũm nhỹ hã ã mẽ ahkre ho pa anhýr japêr hã kot puj mẽ tee ri ja ho pajapêx mã. Jakamã kwarĩ. Kot puj mẽ tanhmã mẽ ho nê te mẽ pahte Tĩrtũm kutã amnhĩ xunhwýr pyrãk. Anê.

Nhũm pre ã Kamariewti Jejus nhỹ hã mẽ ahkre ho mẽ pa xwýnh maatijê xyr pê hkwýjê mã kapër anê. 40 Hãmri nhũm mẽ kuma nê kãm:

—Tỳ nã âm hãmri na ka ã akapêr anê. Kot puj xep mẽ tanhmã mẽ ho hkêt nê. Anê.

Hãmri nê akupýn mẽ hã karõ nhũm mẽ akupýn mẽ hwýr agjê. Hãmri nhũm mẽ pòristi mã mẽ hã

amÿnê nhÿm mẽ htak. Hãmri nhÿm mẽ àptàr tùmrejaja mẽ kãm:

—E mẽ mãmri ma akupÿm mra. Nom kêr ka mẽ axte mẽ kãm Jejus kapêr jarênh o ri apa hkêt kumrêx. Anê.

⁴¹ Hãmri nhÿm mẽ kãm ure nhÿm mẽ ma mra. Kĩnh nê ma mra nê axpên mã:

—Nà kwâr mẽ Jejus ã mẽ pahtak nê tanhmã hã mẽ pahto. Kwâr mẽ mãmri ã hã mẽ pahto anê. Kot pu mẽ hkaga hkêt nê. Ra Tirtÿm kot ja hã mẽ pahpumunh mex kênã.

Anhÿr o axpên mã kapêr o axpên jamaxpêr o hihtÿx mex o pa.

⁴² Hãmri nê arĩ apkati mẽ hkwyjê mã Jejus kapêr jarênh o mẽ ahkre ho mẽ hkôt pa. Tirtÿm mã amnhĩ jarênh xà hã ixkre kamã nê nhãm mẽ òrkwÿ kamã ri mẽ ahkre ho pa. Tirtÿm kot mẽ pakaxyw Jejus xãm ã mẽ kãm harênh o ri mẽ hkôt pa.

6

Mê kêp mẽ mjên htyk xwÿnhjê jarênh

Wam Ximotre 3.8-9

¹ Tã nhÿm mẽ kot Jejus kôt amnhĩ xunhwÿr xwÿnhjaja ohtô rax kumrêx o mō. Mẽ piitã kêp Ijaew no nhÿm mẽ hkwyjaja axtem Gres kapêr o kapêr nhÿm mẽ hkwyjaja Ijaew kapêr o kapêr. Na pre hte Ijaew kapêr o kapêr xwÿnhjaja apkati mẽ mẽ kêp mẽ mjên htyk xwÿnhjê mã mẽō ho pa. No ãm mẽ piitã mẽ hipêx o axpên pyrãk kêt jakamã nhÿm Gres kapêr o mẽ kapêr xwÿnhjaja tee ri ã mẽ kot amnhĩ nhĩpêx anhÿr ã mẽ omu nê mẽ kamã gryk nê. Hãmri nê mẽ kãm:

—Kwa na ka htem amnhĩ kamã mẽ kêp mẽ mjên htyk xwÿnhjê mã mẽō ho rÿnh nê agō. No mẽ ixkamã jajê mã na ka htem ãm ho hkryre nê agō. Kwa mẽ ri ã mẽ hipêx anhÿr kêt nê. Mẽ hipêx o axpên pyrãk nã. Anê.

² Hãmri nhÿm Jejus nhÿ hã mẽ ahkre xwÿnh maatijaja mẽ hã mẽ kapêr ma hãmri nê mẽ piitã mẽ ho akuprô nê mẽ kãm:

—Kwa kêr ka mẽ ja hã axpên mã axàkjêr kêt nê. E pu mẽ kot mẽ kêp mẽ mjên htyk xwÿnhjê mã ò ho pa kaxyw mẽ akwÿjê rê. No mẽ pajaja kot paj ja ho anhÿr o ri ixpa hkêt nê. Kot pa mẽ anê nê Jejus kapêr o ri mẽ ajahkre hkêt nê nhÿm ja mex kêt nê. Jakamã mẽ atō kot kaj mẽ akatàt kôt mẽ kãm mẽ ò ho apa? ³ E mẽ amnhĩ kamã mẽ ho 7 nê mẽ arê pu mẽ kêp mẽ mjên tyk xwÿnhjê mã ò ho pa kaxyw mẽ unhwÿ.

Tãm mẽ hamaxpêr xwÿnhjaja.

Nê mẽ ate axpên mã mẽ mex ã mẽ harênh xwÿnhjaja.

Nê Tirtÿm Karō nhÿ hã mẽ kot amnhĩ nhĩpêx o mẽ pa xwÿnhjaja.

Ã mẽ kot amnhĩ nhĩpêx anhÿr xwÿnhjaja ka mẽ ho 7 nê arê pu mẽ kaxyw mẽ unhwÿ. ⁴ Nom mẽ pajaja kot paj mẽ akôt arĩ mẽ amã Tirtÿm kapêr jarênh o ri mẽ ajahkre pix tânopxar o ri ixpa. Anê.

⁵ Hãmri nhÿm mẽ kuma nhÿm ja mẽ kãm mex nê. Nhÿm mẽ ma mra nê axpên mã hkwyjê nhĩxi jarê hãmri nê mẽ ho 7 nê mẽ kurê. ã mẽ hixi kot anhÿr.

Estewãw. Estewãwja na pre Jejus kôt amnhĩ nhĩpêx mex o pa.

Tirtÿm Karō kaxwÿnh mã àr nê ho amnhĩptàr jakamã nhÿm pre hte tãm ri amnhĩ nhĩpêx o pa.

Nê kaxyw Firipti

nê Prokot

nê Nìkanō

nê Timã

nê Parmènti

nê Nìkoraw. Nìkorawja krĩ pè ãxiok nhō xwÿnh na pre. Kêp Ijaew kêt tã kãm Tirtÿm kĩnh o pa. Tã ra mãânên Kra Jejus kôt amnhĩ xãm.

⁶ Jakamã nhÿm mẽ mẽ kêp 7tajê rê nê Jejus nhÿ hã mẽ ahkre xwÿnh maatijê hwÿr mẽ o mra. Hãmri

nhũm mẽ omu nẽ mẽ àpênh ã mẽ unhwỳr kaxyw mẽ hã ìhkra jaxwỳ nẽ mẽ ho Tìrtũm wỳ. Hãmri nhũm mẽ kệp mẽ mjên htyk xwỳnhjê mã mẽ õ ho pa nẽ mẽ piitã mẽ hipêx o axpên pyræk.

⁷ Tã nhũm mẽ ra ohtô rax nẽ Tìrtũm kapêr ma nẽ hkôt amnhĩ nhĩpêx o pa. Jakamã nhũm Jerujarê kamã mẽ kot Jejus kôt amnhĩ xunhwỳr xwỳnhjaja ra ohtô rax kumrêx. Nẽ mẽ õ patre hkwy haxwỳja ohtô nẽ mẽ uræk nẽ amnhĩ kaxyw hkôt hamaxpêr nẽ hkôt amnhĩ xunhwỳ.

Mẽ kot Estewãw pynênh ã mẽ harênh

Rukre 21.14-15

⁸ Tã nhũm Estewãwja. Kot mẽ kệp mẽ mjên htyk xwỳnhjê mã mẽ õ ho pa xwỳnhjê hõja. Tìrtũm kot kutã nojarêr mex jakamã na pre hte ý hã àhpumunh týx o aa mẽmoj pumunh kêt kwỳ ho anhỳr o ri mẽ hkôt pa. ⁹ Hãmri nhũm Ijaew kwỳjaja tee ri ja hã omu nhũm ja mẽ kệp omnuj týx nẽ nhũm mẽ hã kãm akir. Uræk nẽ mẽ kệp Ijaew nẽ Jerujarê kamã ri mẽ hkôt pa htã ahpỳnhã mẽ õ pyka. Mẽ kot kãm “Ripetat” xwỳnh kwỳ na pre mẽ. Nẽ ahpỳnhã mẽ õ krĩ.

Mẽ hkwyjaja kệp Sirên nhõ xwỳnh.

Nẽ mẽ hkwyjaja kệp Aresãn nhõ xwỳnh.

Nẽ mẽ hkwyjaja kệp Siris nhõ xwỳnh.

Nẽ mẽ hkwyjaja kệp As nhõ xwỳnh.

Ahpỳnhã mẽõ pika nẽ mẽ õ krĩ htã na prem Jerujarê kamã ri axpên kôt pa ho pa. Tã Estewãw kot ã amnhĩ nhĩpêx anhỳr o pa hã omu nhũm ja mẽ kệp omnuj týx nẽ nhũm mẽ hã kãm akir. ¹⁰ No nhũm Tìrtũm Karõ nhỹ hã hamaxpêr týx o mẽ kãm kapêr nhũm mẽ kuma nẽ tee ri kutã tanhmã kãm nẽ hprãm kaprỳ. ¹¹ Hãmri nẽ ma mra nẽ tanhmã ho hêx to kaxyw amnhĩ kwỳjê rê nẽ mẽ kãm hã amỳnê nẽ mẽ kãm:

—E kêr ka mẽ krĩ nhõ xwỳnhjê mã Estewãw o axêx nẽ tanhmã mẽ kãm ho akapêr punuj to ho ri mẽ hkôt apa. Kê mẽ ama nẽ kamã gryk kato. Kot kaj mẽ ã amnhĩ nhĩpêx anê pa mẽ hpãnhã mẽ amã amnhĩre. Anê.

Hãmri nhũm mẽ kuma nẽ ma mra nẽ hapôj nẽ ma krĩ nhõ xwỳnhjê mã tanhmã ho hêx to ho ri mẽ hkôt pa nẽ mẽ kãm:

—E mẽ amnê akuprõ nẽ mẽ inhma. Kwa kêr ka mẽ Estewãwti kapêr mar kêt nẽ. Na hte finat Mojes mẽ Tìrtũm wa ho kapêr punuj pix o ri pa. Pa mẽ ra kot wa ho kapêr punuj ã kuma. Anê.

¹² Hãmri nhũm mẽ kuma. Krĩ nhõ xwỳnhjê mẽ nẽ mẽ àptâr tũmrejê mẽ Tìrtũm kapêr tũm o mẽ ahkre ho mẽ pa xwỳnhjaja nhũm mẽ tee ri mẽ kot Estewãw o hêxja ma nẽ kamã gryk nẽ. Hãmri nẽ ma hwỳr mra nẽ unê nẽ ma mẽ õ juisti hwỳr o tẽ. ¹³ Hãmri nhũm mẽ kãm ho hêx xwỳnhjaja mẽ hkôt mra nẽ juisti mã tanhmã ho hêx to nẽ mẽ kãm:

—E jahti na hte finat Mojes kot Tìrtũm nhỹ hã mẽ pahte tanhmã amnhĩ nhĩpêx to hã karõ ho hêx rãhã ho pa. Nẽ Tìrtũm mã amnhĩ jarênh xã hã ixkreja nhũm tanhmã ho hêx to pa mẽ kuma. ¹⁴ Na hte mẽ kãm: “Koja nhỹrmã Jejus pê Najare nhõ xwỳnh Tìrtũm mã amnhĩ jarênh xã hã ixkreja grành pa kãm ga.” Anhỳr o mẽ kãm hêx o pa. Nẽ Mojes kot mẽ pahte amnhĩ nhĩpêx ã karõ nẽ mẽ pahkurê pa prem kuma. Anê.

¹⁵ Nhũm prem ã mẽõ juisti mã Estewãw o hêx anê. Hãmri nhũm mẽ kuma nẽ Estewãw wỳr rít nẽ hkuk pumu nhũm te kot Tìrtũm kapêr o mẽ wrỳk xwỳnhjê kuk nhĩrã rax pyrã nẽ xa nhũm mẽ tee ri omu nẽ kamã no pyma nẽ.

7

Estewãw kot juistijê mã ujarênh

¹ Hãmri nhũm mẽ õ patre maatija Estewãw mã kapêr nẽ kãm:

—E mẽ inhmã amnhĩ jarẽ. Xà ãm hãmri na mẽ ri ã ajarẽnh anẽ nà? Anẽ.

² Hãmri nhũm kuma nẽ mẽ piitã mẽ kãm kapër. Mẽ kãm kapër ryy nẽ mẽ kãm:

—Tõe kot paj mẽ amã mẽ panhĩgêt finat Apraãw tanhmã harẽnh to ka mẽ inhma. Amnepêm na pre Tirtũm maatija Apraãw wỳr kato. Kormã pyka pẽ Mēsopotãm kamã pa ri. Kormã kot ma krĩ pẽ Arã hwỳr mõi kêt ri nhũm hwỳr kato nẽ kãm: ³ “E kêt ka mẽ anhõ krĩ pẽ akato nẽ akwỳjê re nẽ ma mõi. Kot paj ma nhỹhỹm hpãnhã pyka hõ hwỳr mẽ ato mõi.” Anẽ.

⁴ —Hãmri nhũm kuma nẽ amnhĩ to akuprõ nẽ ma mõi. Õ pyka pẽ Katej pẽ kato nẽ ma krĩ pẽ Arã hwỳr mõi nẽ hpãnhã kamã pa. Tã nhũm hipêêxã Terahti kệp ty nhũm Tirtũm amnẽ jar mẽ panhõ pyka hwỳr kumẽ. Jar mẽ papapxã hwỳr kumẽ.

⁵ —Nom nhũm kormã kãm pykaja nhõi kêt nẽ. Kormã kãm hkwy ho grire nẽ õr kêt nẽ. Na pre ãm kãm:

E kot paj nhỹrmã amã pykaja gõ. Amã nẽ akanrêhã akra nẽ atãmnhwỳjê mã kugõ ka mẽ kamã ri apa ho apa.

Anhỹr o kãm mẽ panhõ pika pẽ Kanaãja jarẽ. Apraãw kormã hkra hkêt ri nhũm ã kãm kapër anẽ.

⁶ Hãmri nẽ kãm:

Koja akanrêhã atãmnhwỳjaja nhỹrmã ma nhỹhỹm pyka hõ hwỳr pa nẽ hpãnhã kamã pa. Mẽ õ pyka kamã pa hkêt tã nhãm pyka hõ kamã pa hãmri nẽ pika nhõ xwỳnhjê mã àpênh rũnh o pa nhũm pyka nhõ xwỳnhjaja mẽ hipêx kati rũnh o pa. Nẽ mẽ àpênh ã mẽ kãm amnhĩrer kêt nẽ. ãm mẽ homnuj o pa hã amgrã xohtõ rax kumrêx. Nhũm mẽ hã amgrã pẽ 400.

⁷ Nom kot paj mẽ hã mẽ homnuj tỳx nẽ. Akanrêhã atãmnhwỳjê hã

mẽ homnuj tỳx nẽ nhũm mẽ rĩ kormã mẽ kurũm kato nẽ man akupỳn pa nẽ jar põi. Hãmri nẽ jar inhmã inhmex o inhmex ã ijarẽnh rãhã ho pa. Anẽ.

⁸ Hãmri nẽ kãm:

E pu axpên ma. Koja ka nẽ akanrêhã akra nẽ atãmnhwỳjaja ka mẽ ixkõt ri amnhĩ nhĩpêx o apa hã kot paj mẽ ato ixkra. Tã koja ja amã mex japêr hã kêt ka mẽ amnhĩ my kwỳt kã hkwy jakã. Nẽ koja mẽ akrajaja hapõi nẽ my ka mẽ mã mẽ ho anẽ nẽ mẽ kệp mẽmy kwỳt kã hkwy jakã. Mẽ piitã mẽ kot mẽ apê ixkra hã mẽ apumunh kaxyw kot kaj mẽ ã amnhĩ nhĩpêx anẽ.

Anhỹr o Apraãw mã kapër nhũm kuma nẽ mar xã hkõt hkra Ijak my kwỳt kã hkwy krãhta. Kormã hkarare ri. Kormã hã arĩgro pẽ 8 pix ri nhũm kệp hkwy krãhta.

—Tã nhũm Ijak hprêk nẽ hprõ nẽ hkra. Hãmri nẽ mã hkra Jako ho anẽ nẽ. Nhũm Jako hprêk nẽ mã hkra pẽ 12jê ho anẽ nẽ mẽ piitã mẽmy kwỳt kã hkwy jakar pa. Æ na pre mẽ pahpãr kraxjaja amnhĩ nhĩpêx anhỹr o pa.

⁹ —Jako hkrajê hõ na pre kệp Juje. Nhũm Juje htõjaja hipêêxã hkõt kamã gryk nẽ axtem nẽ mẽ urojê mã ho wênê nhũm mẽ kệp haprõ nẽ ma pyka pẽ Ejit wỳr o mõi. Amarĩ Ejit nhõ xwỳnhjê mã àpênh o pa kaxyw. Tã no nhũm Tirtũm arĩ tãnopxar rãhã ho hkõt pa. ¹⁰ Hãmri nẽ Ejit kãm mẽ kot homnuj xwỳnhjê nhĩhkra rũm hkapa nẽ tanhmã hkrã hto nhũm àhpumunh tỳx nẽ hamaxpêr mex nẽ. Jakamã nhũm Ejit nhõ xwỳnhjê nhõ pahĩ Paraohtija omu nẽ kãm hkĩnh nẽ. Kot tãm amnhĩ nhĩpêx nẽ àhpumunh tỳx kõt omu nẽ kãm hkĩnh nẽ. Hãmri nẽ amnhĩ ri kumẽ nhũm ãhkõ hã àpênh o pa. Kãm õrkwy pumu nẽ

Ejit nhõ xwýnhjê ho amnhĩptàr o pa.

11 —Rôm nhũm mẽ hpur kãm mẽmoj nhĩgrõt mex kêt nê nhũm mẽ kêp mẽ apkur xà hã mẽ òja ra ri mẽ kêp kryre. Ejit kamã nê jar Kanaã kamã nhũm mẽ apkur xà hã mẽ òja mẽ kêp hapêx par o mõi. Nhũm mẽ piitã prãm xaj ra hiire nê kãm prãm týx o pa nhũm mẽ panhĩgêjtaja hãmri prãm xaj tee ri amnhĩ xapkur xà hã mẽmoj japêr.

12 —Tã nhũm Jakoja Ejit kãm arĩ mẽ apkur xà hã mẽ ò rax ã harênh ma nê ma hwýr hkra hkwýjê rê. Mẽ panhĩgêjtaja nhũm ma mẽ hwýr mẽ kurê nhũm mẽ ma mẽ hwýr mra. Hãmri nê mẽ hwýr pøj nê mẽ kêp mẽmo hy hkwý japrõ nê ma akupým o mra. Wam mẽ mörta ã mẽ kêp mẽmoj japrõ nê ma akupým o mra.

13 —Tã nhũm mẽ kêp mẽmo hy japrõr xwýnhja hapêx nhũm mẽ axte akupým mẽ hwýr mra. Hãmri nhũm mẽ htõ Juje mẽ kãm amnhĩ to amnhĩrit nê kêp mẽ htõ hã mẽ kãm amnhĩ jarê. Mẽ kot ra htyk ã hkamnhix tã nhũm mẽ kãm amnhĩ jarê. Hãmri nhũm Paraohiti mẽ kêp Juje htõ hã mẽ harênh ma.

14 —Tã nhũm Juje amnhĩ wýr hipêêxà Jako mẽ htãmnhwýjaja mẽ hã karõ nhũm mẽ piitã ma Ejit wýr hapêx. Mẽ kêp 75 nê ma Ejit kamã Juje hwýr hapêx hãmri nê kamã pa ho pa.

15 —Ã kot anhýr jakamã nhũm Jakoja ma Ejit wýr mõi nê hpãnhã kamã pa ho pa. Tã hãmri kamã ty. Nhũm hkrajê piitã Ejit kãm pa hãmri nê gaa nê htyk pa. 16 Hãmri nhũm mẽ hkanrêhã mẽ hkrajaja mẽ hamý nê ma akupým Kanaã hwýr krĩ pê Sikê hwýr mẽ o pa nê kamã mẽ hagjê. Na pre mẽ hkukamã finat Apraãw kot Amõr krajê pê kênkre japrõ nê kamã hprõ jaxà. Jakamã nhũm prem mýr pê ma hwýr mẽ o pa nê kamã mẽ

hagjê hãmri nê ma akupým Ejit wýr pa.

17 —Tã gaa nê rĩ ohtõ rax kumrêx o mõi. Mẽ panhĩgêjtaja ohtõ rax kumrêx o mõi. Hãmri nhũm Tirtũm kot Apraãw mã mẽ ò pyka jarênh xwýnhja nhũm kot mẽ kãm òr kaxyw. 18 No nhũm Ejit nhõ pahi kot Juje ho mex xwýnhnta na pre ra ty nhũm axtem hpãnhã hõja mẽ ho amnhĩptàr o pa. Nê aa Juje jarênh mar kêt nê. Kormã pahi xàr nyw kêt ri htyk jakamã nhũm mýr pê harênh mar kêt nê. 19 Hãmri nê hkwýjê homnuj o pa. Tanhmã mẽ panhĩgêjtê nhĩpêx to ho pa. Nê mẽ kãm mẽ hkra my hapõx xwýnhjê hã amýnê. Mẽ hapõx nhũm mẽ kot pikap mẽ rênh nhũm mẽ htyk kaxyw nhũm mẽ kãm mẽ hã amýnê.

20 —Rôm nhũm finat Mojesja kato. Nê mexre. Hãmri nhũm katorxà Ejit nhõ xwýnhjê kot kêp hpĩr pymaj òrkwý kamã ri mẽ kêp ho hpimxur o pa hã mytwrý axkrunêpxi.

21 —Tã nhũm ra htýxre nhũm katorxà mẽ hipêêxà wa tee ri hkukamã hamaxpêr hãmri nê mẽ kot wa kêp hpĩr pymaj kumý nê ma o tẽ nê kaxyw à nhĩpêx nê nhýri gõ nhĩpõk ri põi kamã ho amũxu. Tã nhũm Paraohiti hkra nija ra gõx mã wýr mã tẽ nê ra omu hãmri nê amnhĩm kumý nê ma o tẽ nê ho hkra. 22 Jakamã nhũm Mojes Ejit nhõ xwýnhjê kamã hprêk. Hãmri nê mẽ àhpumunh xà hã kagà pumunh pa. Nê hihtýx nê mẽ kãm kapêr kãm hihtýx mex o pa.

23 —Tã hãmri ra hã amgrà pê 40 nê hapêx nhũm Mojes hamaxpêr nê ra kãm amnhĩ kwý pê Ijaewjê pumunh prãm nê ma mẽ hwýr tẽ. 24-25 Hãmri nê htêm kõt ja wa omu. Nhũm Ejit nhõ xwýnhja Ijaewja homnuj o xa nhũm Mojes tẽn tee ri hã omu nê hamaxpêr o: “E pa ma wa hwýr tẽ nê ixkwý müj ã Ejit nhõ xwýnhnta pĩ kê ixkwýjaja ja hã ixpumu nê Tirtũm kot mẽ hwýr

inhmēnh ã ixpumu. Ixte Ejit nhõ xwýnhjê nê mē kator kaxyw mē ja hã ixpumunh kurê kumrêx.”

—Anhÿr o hamaxpēr hãmri nê wa hwÿr tē nê amnhĩõja nê Ejit nhõ xwýnh pĩ. Tã no nhũm hkwyjaja kot hpĩr ã harēnh mar tã tanhmã amnhĩ kaxyw kãm hamaxpēr to hkêt nê. ²⁶ Nhũm apkati nhũm mēhõja war axkrut nê axte pijapu ho wa xa. Hamē wa kēp Ijaew. Jakamã nhũm Mojes akupÿm mē hwÿr tē nê tee ri axpēn tã wa omu nhũm ja kēp omnuj nê. Hãmri nhũm wa hwÿr tē nê axpēn nê wa kãm kapēr nê wa kãm: “Pa? Kwa war ajamē war apē Ijaew kēnã na ka wa ri axtem nê ã axpēn nhĩpêx anē.” Anē. ²⁷ Hãmri nhũm kot amnhĩ kaxyw hkryx xwýnhja kuma nê nhãm amnhĩ nê hkujate nê kãm: “Tk. Kwa xà apē mē inhõ pahi hã na ka ã wa inhmã akapēr anē? Nà apē mē inhõ pahi hkêt kēnã. ²⁸ Kot kaj inhĩpêx o te ate Ejit nhõ xwýnhnta nhĩpêx pyrà nê wa ixtõ hpĩr kêt nê.” Anē.

²⁹ —Hãmri nhũm tee ri kuma nê ra kãm ma nê Ejit rùm kator kurê kumrêx nê ma pyka pē Mijiã hwÿr mō nê kamã hpãnhã pa. Kamã hprõ nê hkra. Nhũm hkra myja wa hamēxkrut.

³⁰ —Tã nhũm Mijiã kamã pa hã axte hã amgrã pē 40. Hãmri nê mēmo arĩgro hã kapôt ã krã hakÿx pē Sinai kape hã ri pa nhũm Tĩrtũm kãm kapēr. Nom nhũm Mojes omunh kêt nê. ãm utĩ kaõk kamã kuwy hpõk pix pumu. ³¹ Amnhĩ jaēr pē ã kot amnhĩ nhĩpêx anhÿr ã omu hãmri nê amnhĩ tã hprĩ hã omunh kaxyw hwÿr tē nhũm Tĩrtũm kãm:

³² Pa Mojes? E ixpē Tĩrtũm na pa. Ixpē akukamã anhĩgēt Apraãw nhõ Tĩrtũm na pa. Nê ixpē Apraãw kra Ijak mē htãmnhwÿ jako wa õ Tĩrtũm na pa. Anē.

Hãmri nhũm tee ri kuma nê kãm ma xaj httertēt tÿx nê. Hãmri nê umaj axte pĩ hpõkja wÿr rĩt kêt nê. ãm nhãm hkrã nê rĩt o xa. ³³ Hãmri nhũm Tĩrtũm kãm:

E kwa ixpē Tĩrtũm maati hã ixtã apijaãm ã aparkã kapa nê apar kēnh nê xa.

³⁴ Na pa ra ixkra Ijaewjaja Ejit kãm mē omu. Na ra Ejit nhõ xwýnhjaja ixpē mē homnuj tÿx kumrêx rãhã ho pa nhũm mē amnhĩ xà hã maj tee ri amnhĩ nhĩpêx. Pa ja hã mē omu nê inhmã mē hkaprĩ nê. Jakamã kot paj Ejit nhõ xwýnhjê nhĩhkra rùm mē kator pa. E ka kot paj mē hwÿr amē ka ma akupÿm mē hwÿr mō nê mē kurũm mē kator.

Anhÿr o kãm mē kaxyw karõ. ³⁵ Ra Ijaew kot Mojes hkaga tã nhũm mē kaxyw ãm nê ma akupÿm kot mē hwÿr mēnh kaxyw. Na prem ra omu nê hkaga. Te mē ate Jējus kagaja pyrà nê hkaga. Jakamã nhũm pijapu xwýnhnta tee ri amnhĩ tã omu nê kamã gryk nê amnhĩ nê kãm kapēr nê kãm: “Tk. Kwa xà apē mē inhõ pahi hã na ka ã wa inhmã akapēr anē? Nà apē mē inhõ pahi kêt.” Anhÿr tã nhũm Tĩrtũm mē kaxyw tãm xãm. Kot mē ho amnhĩptar nê Ejit nhõ xwýnhjê rùm mē kator kaxyw. Ja kaxyw na pre pĩ hpõk kamã kãm kapēr nê mē kaxyw ãm.

³⁶ —Jakamã nhũm Mojes ma akupÿm Ejit wÿr mō nê mē kurũm hkwyjê kator nê ma mē o pa. Na pre mē ho mex nê Tĩrtũm nhÿ hã mē kãm aa mē kot mēmoj pumunh kêt kwÿ ho anhÿr o ri mē o pa. Ejit kamã nê mããnēn mē kot gō xujanãr mã: “Gō kamrêk” anhÿr xwýnhnta kamã. Nê kapôt ã mē kãm ã amnhĩ nhĩpêx anhÿr o mē o pa. Nê kapôt ã ri mē o pa ho ra hã amgrã pē 40.

³⁷ —Tã tãm na pre mē panhĩgētjê mã mēhõ hkukamã mē kãm tanhmã harēnh to nê mē kãm

harēnh o: “Koja Tirtūm nhǎrmã te ra mẽ akaxyw pa ixãm pyrà nē inhmǎr pē mẽ panhĩõ xãm. ý hã mẽ amã kapēr jarēnh o pa kaxyw nhũm nhǎrmã mẽ akaxyw ãm ka mẽ omu.”

—Anhǎr o ã Jejus kukamã harēnh anē. ³⁸ Na pre Mojes kapõt ã mẽ panhĩgētjê ho pa nhũm mẽ krã hakýx pē Sinaija wýr pa. Mẽ panhĩgētjaja hãmri hwýr pa nhũm Tirtūm kapēr o mẽ wrýk xwýnhja mẽ kaxyw Mojes mã kapēr nhũm ô ri mẽ kãm awjarē nē hã kagã. Mẽ kot mar nē hkõt amnhĩ nhĩpêx nyw o amnhĩ nhĩpêx o pa kaxyw nhũm mẽ kãm Tirtūm kapēr jarēnh o pa. Nē mẽ pajaxwýja. Mẽ pahte hkõt amnhĩ nhĩpêx nyw o amnhĩ nhĩpêx o papa kaxyw na pre mẽ pamã hã kagã. ³⁹ Tã no nhũm mẽ panhĩgētjaja Mojes ma nē ãm kuma nē hkaga kumrêx nē akupým Ejit wýr hkrã. ⁴⁰ Jakamã nhũm Mojes kormã nhýri mẽ kaxyw Tirtūm mã kapēr o ãm rôm nhũm mẽ wakre kamã htõ Arãw wýr mra nē kãm; “Kwa Mojes ra kot tanhmã amnhĩ to kēnã. Kot Ejit rùm mẽ pakator nē mẽ pahto mõr tã ra nhýri arĩk nē tanhmã amnhĩ to. Jakamã e. Kwa hpãnhã mẽ inhmã mẽmo karõ nhĩpêx pu mẽ ho panhõ sãnti kē tãm ma akupým Ejit wýr mẽ pahto pa.” Anē.

⁴¹ —Hãmri nhũm mẽ kuma nē mẽ kãm kãx o mõx krare karõ ho sãnti nhĩpêx nē mẽ kãm ãm. Hãmri nhũm mẽ axtem nē te ho Tirtūm nhĩpêx pyràk o hipêx nē kãm ôwêhti hkwy pa nē kãm haxwý nē hã apku. Hãmri nē ã amnhĩ nhĩpêx anhýr ã amnhĩ pumu nē hkĩnh nē. ⁴² Hãmri nhũm Tirtūm tee ri ja hã mẽ omu nhũm ja kêp omnuj týt nē nhũm mẽ hkaga hpa. Jakamã nhũm prem amnhĩ krã hkõt ri myyti nē mytwrýre nē kanhêti karõ nhĩpêx nē te mẽ kot Tirtūm nhĩpêx pyràk o hipêx o pa. Hãmri nē amnhĩ kaxyw kumã pix mã hamaxpēr o

pa hã amgrã xohtõ nē. Tã nhũm Tirtūm nhý hã kapēr jarēnh o mẽ pa xwýnhjaja tanhmã mẽ kãm kapēr to nē mẽ hã kagã. Te Tirtūm tãm mẽ kãm kapēr pyràk o mẽ kãm kapēr nē hã kagã kot:

Pa mẽ apē Ijaewjaja? E mẽ inhma. Amnepêm mẽ ate kapõt ã ri mẽ apa hã amgrã pē 40ta ã. Xà we inhmã na ka prem akrit kwý hpar o apa?

⁴³ Nã inhmã hkêt. Na ka prem axtem nē ri amnhĩ krã hkõt amnhĩm mẽmo karõ nhĩpêx nē hipêx o te mẽ ate pa inhi pêx pyràk. Pē mẽ akrit kwý hpar nē ör o ri apa.

Mẽ anhõ mẽmo karõ nhĩpêxta mẽ ate amnhĩm hã hixi pē Mõrok mẽnh xwýnhja ka pre htem à kamã amnhĩ kõt ho apa.

Nē amnhĩm kanhêti karõ nhĩpêx nē hã hixi mẽ nhũm kêp Repã. Ka mẽ ixkuhpa hã wa kêp mẽ apãm ã harēnh o ri apa.

Tã ã mẽ ate amnhĩ nhĩpêx anhýrja myrapê kot paj pãnhã nhýhým mẽ arē.

Koja mẽ akutã amnhĩ xunhwýr xwýnhjaja mẽ apynê nē ma pyka pē Papirõn rùm hamũ mẽ ato hapêx ka mẽ amarĩ mẽ kãm axápênh rũnh o ri apa kãm ga. Anē.

Ã na pre Tirtūm mẽ panhĩgētjê mã kapēr anē nhũm ý hã kapēr jarēnh o pa xwýnhja mẽ kãm hã kagã.

⁴⁴ —Tã nhũm mẽ panhĩgētjaja kormã kapõt ã ri pa ri amnhĩ kõt mry kã ho ixkre ho pa. Tirtūm mã kapēr xã hã ixkreja nhũm prem amnhĩ kõt ri o pa. Mẽ kot kãm “Tirtūm nhõrkwy kaàkre” anhýr xwýnhja. Tirtūm kot mẽ kãm hã karõ xã hkõt nhũm mẽ hipêx nē amnhĩ kõt ri o pa. Na pre Tirtūm hprĩ hã Mojes mã tanhmã kot hipêx to hã karõ nhũm mẽ hkõt hipêx nē amnhĩ kõt ri o pa.

⁴⁵ —Tã nhũm Mojes ty nhũm hpãnhã Jojueja amnhĩ kõt mẽ o

pa. Ma Tirtûm kot mē kām pyka mex nhôrta wÿr Mojes mÿr pē mē o pa. Hāmri nē hwÿr mē o pōj nhûm Tirtûm mē nē mē kot ra kamā mē pa ho mē pa xwÿnhjê japôj nhûm mē pānhā kamā pa ho pa. Nē amnhī kôt Tirtûm nhôrkwÿ kaākreta o pa. Rāhā nhûm finat Tawija mē hpānhā mē ho amnhīptā. ⁴⁶ Na pre Tirtûm Tawi kot tanhmā amnhī nhîpêx to ho pa hā omu nē kām hapê nē. Jakamā nhûm Tawi kām kapêr nē kām: “Pa Tirtûm? Kwa xà kot paj amā ixkre mex ô nhîpêx nà? Mē ixpê Ijaewjaja mē ixte kamā amā amex o amex ã ajarênh o ixkrī kaxyw pa hipêx. Xà kot paj amā hipêx?” Anhÿr tā no nhûm Tirtûm kormā kām ja prām kêt nē. ⁴⁷ Jakamā nhûm Tawi hkra Sarumāwja hipêêxā mÿr pē hpānhā kēp mē ô pahi nē kām hipêx. ⁴⁸ Nom xà na hte Tirtûm maatija mē pahte kām panhîhkra ho ixkre nhîpêx xwÿnh kamā hkrī? Nà kaxkwa kamā na hkrī xà. Na pre ra Tirtûm nhÿ hā kapêr jarênh o pa xwÿnhja Tirtûm kot tanhmā mē pajamār to ho pa hā kagà nē hā kagà ho:

⁴⁹ Na pa hte kaxkwa rûm pyka hkôt mē piitā mē hamār mex o ixkrī.

Tā tanhmā kot paj amnhī to nē mē ïhkra ho mē kot inhmā ixkre nhîpêxta wÿr axà nē kamā ixpa ho ixpa?

⁵⁰ Nà ixte mēmoj piitā ho ixkator xwÿnh kēnā kot pa kêt ã amnhī nhîpêx anē. Anē.

Nhûm pre ã Tirtûm amnhī tā mē kām kapêr anē nhûm ÿ hā kapêr jarênh xwÿnhja ô ri mē pamā hā kagà.

⁵¹ —E kwa mē inhma ixkwÿjaja. Mē akrā hihtÿx kumrêx jakamā mē amā Tirtûm kapêr mar prām kêt. Na ka htem mē panhîgêjtê pyrā nē amnhī nē Tirtûm Karô kaga nē kapêr mar kêt nē. ⁵² Na pre hte Tirtûm nhÿ hā kapêr o mē pa

xwÿnhjaja mē panhîgêjtê hwÿr mra nē mē kām kapêr jarênh o ri mē hkôt pa. Tā nhûm mē hkaga nē mē hipêx kati ho pa. Na pre htem Jejus wÿr k kukamā mē kām: “E koja nhÿrmā kot Tirtûm kapêr mar nē hkôt amnhī nhîpêx mex rāhā xwÿnh maatija mē pahwÿr wÿr.” Anhÿr o mē kām harênh o pa. Tā no nhûm mē kām ja mar prām kêt jakamā axtem nē hā mē hpar o pa. Mē kot mē kām Jejus jarênh o mē pa xwÿnhjê hpar o pa. Tā nhûm tam mē pahwÿr wÿr ka mē omu nē mē kot amnhī nhîpêxta pyrā nē hā amÿnê nhûm prem mē amā kupi.

⁵³ —Tirtûm kapêr o mē wÿr k xwÿnhjaja kot Tirtûm nhÿ hā tanhmā mē pahte amnhī nhîpêx to ho papa hā mē pamā karô nhûm mē ate mar tā mē apê hprām nōkati. Nē ama nē ãm ama nē hkôt amnhī nhîpêx o ri apa hkêt nē. Anē.

Mē kot Estewāw pîr ã mē harênh Rukre 21.16-19, 23.34; Atre 22.20

⁵⁴ Hāmri nhûm juistijaja tee ri Estewāw xujarênh ma nē kamā gryk tÿx nē kām kapêr punuj nē. ⁵⁵ Nom nhûm Tirtûm Karôja tanhmā hkrā hto nhûm kām mē uma hkêt nē. Hāmri nē kânhmā rît nē kaxkwa pumunh o xa nē kamā Tirtûm rûm hirā rax pumu. Nhûm Jejus Tirtûm nhîhkô hā xa nhûm omu nē hkînh nē mē kām:

⁵⁶ —Kokÿÿ. Na kaxkwa axkjê nhûm kamā Tirtûm nhÿ pa omu. Nhûm kuri kot mē pahwÿr mēnh xwÿnh Jejusja xa. Hêxta waa nē. Nà na pa jarāhā wa omu nē ixkînh tÿx kumrêx. Anē.

⁵⁷ Hāmri nhûm mē kumā nē kamā gryk tÿx nē. Hāmri nē kām mar prām kêt nē kēp amnhī jamak pro. Hāmri nē gryk xàj àmra htÿx nē hwÿr hprôt ⁵⁸ nē unē nē krī pē ho kato nē ma o tē nē nhÿri o xa. Hāmri nē kēn o htak o hpîr kaxyw amnhī nhînôkà hkwrÿ nē mēhō my pē Sawti mā kugô nhûm mē kām hamÿ. Hāmri nhûm mē kēn rûnh

kwÿ jamÿnẽ o mra nẽ Estewãw wÿr rẽnh prẽprẽk o kuhẽ. Nẽ ho ï kamã htak nẽ hkrãx pẽ htak. ⁵⁹ Hãmri nhũm ra htyk kaxyw nẽ Jejus mã amnhĩ jarẽ nẽ kãm:

—Pa Pahihti Jejus? E koja ixkarõ awÿr api ka ixto amnhĩptã. Anẽ.

⁶⁰ Hãmri nẽ hkõn krã ho tẽm nẽ nhÿ nẽ axte kãm amnhĩ jarẽ nẽ mẽ kot hpĩr xwÿnhjẽ nẽ kãm kapẽr nẽ kãm:

—Kwa Pahihti. Mẽ kot ixpĩr tã kwa tanhmã ixtã mẽ ho hkêt nẽ.

Anhÿr o mẽ nẽ Jejus mã kapẽrja kôt ra ty.

8

Mẽ kot Estewãw jaxàr ã mẽ harẽnh

Atre 22.4, 26.9-11

¹⁻² Hãmri nhũm mẽ kot Jejus kôt amnhĩ nhĩpẽx xwÿnhjaja Estewãw wÿr mra nẽ htyk kãm omu nẽ hkaprĩ nẽ. Nẽ mur nẽ kumÿ nẽ ma o mõi nẽ haxã. Nom nhũm Sawtija mẽ kot hpĩr ã omu nhũm ja kãm mex nẽ.

Sawti kot Jejus kwÿjẽ nhĩpẽx kati ho pa hã harẽnh

Atre 1.8

Tã nhũm Jerujarẽ kamã Ijaewjaja mẽ kot Jejus kôt amnhĩ xunhwÿr xwÿnhjẽ homnuj tÿx o pa. Hãmri nhũm mẽ tee ri amnhĩ kukamã hamaxpẽr nẽ mẽ hkwyjaja mẽ umaj hapõj nẽ ma pika hkwy hkôt hpigrãnh pa. Mẽ hkwyjaja Jutej wÿr ma pa nhũm mẽ hkwyjaja Samar hwÿr ma pa. ã na prem mẽ umaj nhÿhÿm hpigrãnh par anẽ. ãm Jejus nhÿ hã mẽ ahkre xwÿnh maati pixjaja na prem Jerujarẽ kamã arĩk nẽ nhÿhÿm mõi kêt nẽ. Simãw Pẽtre nẽ Juãw nẽ Xiakre nẽ Andre nẽ Firipti nẽ Patoromew nẽ Matẽwre nẽ Makre nẽ Tomas nẽ Xiakre hõja nẽ Simãw õ nẽ Maxitreja. ãm jajaja pix na prem arĩk.

³ Nhũm Sawti haxwÿja Jejus kôt mẽ kot amnhĩ xunhwÿr xwÿnhjẽ

homnuj o pa. Mẽ kot Jejus kaga hprãm xaj tanhmã mẽ hipẽx to ho pa. Na pre hte mẽ õrkwÿ hwÿr agjẽ nẽ mẽ unẽ. Mẽmyjẽ pynẽ nẽ mënijẽ pynẽ nẽ ma mẽ o mra nẽ mẽ hagiẽnh xã kamã mẽ hagiẽ. Mẽ urak nẽ kęp Ijaew tã ã mẽ hipẽx anhÿr o pa.

⁴ Tã nhũm mẽ umaj Jerujarẽ rũm pika hõ hwÿr mẽ hpigrãnh xwÿnhjtaja amarĩ pika hkwy hkôt ri pa hkêt nẽ. Na prem ma mẽ piitã mẽ kãm Jejus kapẽr jarẽnh o ri mẽ hkôt pa. Kęp Tirtũm kot mẽ pakaxyw ãm xwÿnh ã harẽnh rãhã ho ri mẽ hkôt pa.

Wajaga kot amnhĩ tã Firipti mar ã harẽnh

Juãw 2.23-24

⁵⁻¹² Tã nhũm Firipti haxwÿja ma mõi. Ma krĩ pẽ Samar hwÿr mõi nẽ kamã mẽ kãm Tirtũm kot mẽ pakaxyw ãm xwÿnhjtaja jarẽnh o pa. Samar kamã na pre wajaga Simãwti ri Samar nhõ xwÿnhjẽ hkôt mẽ no kupyr rãhã ho ri mẽ hkôt pa. Nẽ àhpumunh tÿx ã amnhĩ to jarkrar o ri pa. Jakamã nhũm mẽ kot amnhĩ nhĩpẽx ã omu nẽ kamã no pyma nẽ. Nẽ htÿx ho ãm hãmri kot amnhĩ jarẽnh ã hkamnhĩx. Jakamã nhũm pre mẽ kãm tanhmã ri amnhĩ to hẽx to ho pa pẽ mẽ no kupyr rãhã ho ri pa nhũm mẽ amnhĩ jaer pẽ omu. Mẽ kot amnhĩ to hkryre xwÿnhjaja nẽ mẽ kot amnhĩ to rũnh xwÿnhjaja nhũm mẽ amnhĩ jaer pẽ kot tanhmã amnhĩ nhĩpẽx to hã omunh o hkôt pa. Nẽ ri axpẽn mã harẽnh o:

—Kokÿÿ. Wajagaja àhpumunh tÿx kumrẽx. Tirtũm nhÿ hã mãn te ã amnhĩ nhĩpẽx anhÿr o pa nã? Mãn pre Tirtũm kãm àhpumunh xã hkwy gõ nhũm ÿ hã ã amnhĩ nhĩpẽx anhÿr o pa. Anẽ.

Hãmri nẽ hkôt hamaxpẽr o ri hkôt amnhĩ nhĩpẽx o pa.

Tā nhūm Firipti mē ō krī hwÿr mō nē mē kām Jejus Kris jarēnh o ri mē hkōt pa nē mē kām:

—Jesús kēp Tirtūm kot mē pahwÿr mēnh xwÿnh jakamā kot kaj mē amnhī kaxyw hkōt ajamaxpēr nē hkōt amnhī xunhwÿ nhūm Tirtūm hā mē apumu nē mē ato hkra. Anē.

Hāmri nē Tirtūm nhÿ hā akupÿm tanhmā mē kute xwÿnhjē ho mex to ho pa. Mē ī kamā mē htyk xwÿnhjaja nē mē hyk o mē pa xwÿnhjaja nhūm mē ohtō nē akupÿm mē ho mex o pa. Nē mē hkwyjē nē mēkarōmnuti hkwy jano nhūm mē àmra htÿx o mē hkaga nē ma mē kurūm hapōx nē mra. Ā Firiptija Jejus nhÿ hā mē ho mex o pa anē nhūm mē piitā ja hā omu nē kapēr ma nē hkīnh nē. Nē kapēr mar tÿx nē hkōt hamaxpēr. Jao wajaga Simāwti kaga nē hpānhā amnhī kaxyw Jejus kōt pix mā hamaxpēr nē hkōt amnhī xunhwÿ. Hāmri nhūm Firipti ja hā mē omu nē mē hkrā kumrā. Mēmyjaja nē mēnijaja nē mē piitā mē hkrā kumrā. Ra mē kot Jejus kōt amnhī xunhwÿr ā mē piitā mē kām amnhī to amnhīrīt kaxyw nhūm mē hkrā kumrār pa.

¹³ Hāmri nhūm wajaga Simāwti haxwÿja Jejus kapēr ma nē mē urāk nē amnhī kaxyw hkōt hamaxpēr nē hkōt amnhī xām nhūm Firipti hkrā kumrā. Hāmri nhūm hkīnh nē Firipti hkōt ri pa. Nē aa mē kot mēmoj pumunh kēt kwÿ ho anhÿr o ri pa hā omu nē kamā no puma ho hkōt ri pa. Nē kot Tirtūm nhÿ hā akupÿm mē ho mex ā omu nē tee ri hamaxpēr.

¹⁴ Tā hāmri nhūm Jerujarē kamā Jejus nhÿ hā mē ahkre xwÿnh maatijaja Samar nhō xwÿnhjē jarēnh ma. Ra mē kot Tirtūm kapēr kōt amnhī nhīpēx ā mē harēnh ma nē hkīnh nē. Hāmri nē ma mē hwÿr Simāw Pētre mē Juāw wa kumē. ¹⁵⁻¹⁷ Hāmri nhūm wa ma mē

hwÿr wa mō nē pōj. Hāmri nhūm Firipti wa omu nē wa kām krī nhō xwÿnhjē jarē nē wa kām:

—Nā na pa pre mē kām Jejus kapēr jarē nhūm mē inhma nē hkōt amnhī xunhwÿ. Jakamā pa pre mē hkrā kumrā. Nom na kormā Tirtūm Karōja mē hkarō mā gjēx kēt nē. Anē.

Hāmri nhūm wa mē harēnh ma nē mē himōk ā wa ihkra jaxwÿr o ri mē hkōt mra. Ja kōt nhūm Tirtūm Karō mē hwÿr wrÿ nē mē hkarō mā gjēx pa. ¹⁸⁻¹⁹ Hāmri nhūm wajaga Simāwja mē amnhī tā wa omunh o xa nē hamaxpēr o:

—Kokÿÿ. Kwa wa kot mē hā ihkra jaxwÿrja kōt na hte Tirtūm Karō mē hkarō mā agjē. Hēxta waa nē. Inhmā ā mē hipēx anhÿr o ri ixpa hprām tÿx. E pa ixkāxpore hkwy jamÿ o tē nē wa kām kugō kē wa tanhmā ixto pa wa urāk nē ā mē hipēx anhÿr o ri ixpa. Nā kot paj anē. Anē.

Hāmri nē wa hwÿr tē nē wa kām:

—E ota ixkāxporeta. Kwa amnhīm apy nē hpānhā tanhmā ixto pa war apyrā nē mē hā inhīhkra jaxwÿr o ri mē hkōt ixpa kē Tirtūm Karōja mē hkarō mā agjē. Inhmā ja ho anhÿr prām tÿx. Anē.

²⁰⁻²³ Hāmri nhūm wa tee ri ā kapēr anhÿrja ā omu nhūm Pētre kām:

—Tk. Kwa ajamaxpērja mex kēt. Xā na htem kāxpore ho Tirtūm mā amnhīrer pē ŷ hā mē ho hwÿr o pa nhūm Karō mē hwÿr agjē? Nā na htem kāxpore ho Tirtūm Karō japrōr kēt nē. Kot kaj wa ixpyrā nē ā mē hipēx anhÿr kēt nē. Ajamaxpērja mexre hā. Kormā ate Tirtūm kōt amnhī xām tÿx kēt jakamā na ka atÿx ā ri ajamaxpēr anē.

—Nā ka ā wa ixte Tirtūm nhÿ hā mē hipēx anhÿr ā wa ixpumu nē amā wa ixpyrā nē ā mē hipēx anhÿr o ri apa hprām xāj ajamaxpēr punuj nē. Nhūm ajamaxpēr punuj te kot apa hā apyr ka

tee ate kêp amnhî kjênh pyrâk. Kwa tokyx ajamxpêr punuj â amnhî pumu nê akaprî nê tokyx hkaga. Hâmri nê amnhî to Tirtûm wý kê amnhî katut kôt ajamxpêr punujja mē ka axte â ajamxpêr anhÿr kêt nê. Æ mē hamxpêr punuj anhÿr xwÿnhjaja koja mē nhÿrmã ma kuwy hwÿr pa. Anê.

²⁴ Hâmri nhûm tee ri amnhî tâ kuma nê hkaprî nê wa kãm:

—Kwa xà wehe? Tô tokyx ixto Tirtûm wý kê â ijamxpêr anhÿrja mÿrapê hwÿr inhmēnh kêt nê. Anê.

²⁵ Tã nhûm Simãw Pêtre mē Juãw wa Samar nhõ xwÿnhjê mã Pahihti Jejus kapêr jarēnh pê ho mē ahkre hãmri nê ma akupÿm Jerujarē hwÿr mō. Ma pyka pê Samar hkôt mē kãm Jejus kapêr jarēnh o ma akupÿm mō.

Firipti mē Exiop nhõ xwÿnh wa harēnh

Ijais 53.7-8

²⁶ Hâmri nhûm Firipti arî Samar kamã arîk. Hâmri nhûm Tirtûm kapêr o mē wrÿk xwÿnhja hwÿr wrÿ nê kãm:

—Pa? E ot pa awÿr wrÿ nê tē. Nã kêr ka tokyx akato nê ma mō nê Jerujarē rûm kãnhmã Kas wÿr pry kahpêr ta nê hã juk nê ma hã mō. Kapôt â pry nôrta kahpêr ta nê hã mō. E kwa tokyj.

Anhÿr o kãm kapêr hãmri nê ma akupÿm tē nê kaxkwa hwÿr api.

²⁷ Hâmri nhûm Firipti kuma nê kato nê ma hwÿr mōr kurê kumrêx. Mōõ hãmri nê pryja kahpêr ta nê hã mō.

Hâmri nhûm ra mēhõ myja mō. Exiop nhõ xwÿnh na pre. Exiop kamã mēõ pahi na pre niti. Hixi pê na pre Kãtatre. Nhûm pry hã mōr xwÿnhja kêp kãm kãxpore jamãr o pa xwÿnh. Exiop kamã te kêp mē õ kōwenatõ pyrâk. Tã kot Tirtûm mã mex o mex â harēnh kaxyw ma Jerujarē hwÿr mō. ²⁸ Hâmri nê akupÿm Exiop wÿr kormã mō. Õ

pãr kãm nhÿ nê Tirtûm kapêr â kagã htûm kamã kapêr o mō. Tirtûm nhÿ hã kapêr o pa xwÿnh pê Ijais kot Tirtûm kapêr â kagã htûmja nhûm kamã kapêr o mō. ²⁹ Hâmri nhûm Tirtûm Karõ Firipti mã harē nê kãm:

—E mēhõ mÿj wÿr aprõt nê tē nê hã ajêt nê ma hkôt tē. Anê.

³⁰ Hâmri nhûm kuma nê ma hwÿr hprõt nê hã ajêt nê kot kagã kamã kapêr â kuma. Ijais kot Tirtûm kapêr â kagã htûm kamã kapêr â kuma nê kãm:

—Pa? Mãn ka aprî hã ate kamã akapêr xwÿnhnta ma nã? Anê.

³¹ Hâmri nhûm kãm:

—Nã ixte maare hã. Mēhõ kot hprî hã inhmã harē pa ixprî hã kuma? Xãt ka ixwÿr api nê ixri nhÿ nê aprî hã inhmã harēnh o ixkôt mō nã? Anê.

Hâmri nhûm kuma nê hwÿr api nê ìhkõ hã nhÿ nê kagãta pumunh o nhÿ. ³² Nhûm hã kagã kot:

Na htem ôwēhti par kaxyw nhûm amarî mē kãm akryk kuhê.

Nê mē kot kêp hkî jakãr kaxyw nhûm ma anê nê amarî mē kãm akryk kuhê.

Tã na pre mēhõja ôwēhti kot amnhî nhîpêx pyrâk o amnhî nhîpêx.

Jakamã nhûm mē kot tanhmã hipêx to htã no nhûm arî mē kãm akryk xa. Amnhî nê tanhmã mē kãm kapêr punuj to hkêt nê. Æm arî mē kãm xa.

³³ Na prem homnuj tÿx nê ri hipêx kati rax nê.

Aa kot tanhmã amnhî tomnuj to hkêt kumrêx tã nhûm mē â hipêx anê nhûm mēhõ yr pê tanhmã nê mē kãm kapêr to hkêt nhûm prem kupî.

Nhûm amnhî kanrêhã hkra hkêt rãhã ty. Jakamã kot puj mē hkrajê nhîi mar kêt nê. Kra hkêt rãhã htyk kênã. Anê.

³⁴ Nhûm pre â Exiop nhõ xwÿnh Tirtûm kapêr â kagã htûm kamã

harēnh anē. Hāmri nē tee ri ā kot mēhō jarēnh anhÿrja kukamā hamaxpēr nē hā Firipti kukja nē kām:

—Kwa aprī hā inhmā mēhōja jarē. Mēhō na prem ā hipêx rax anē? Xà kot kagā xwÿnhnta na prem ā hipêx anē nà xà nhām mēhō na prem ā hipêx anē? E kwa aprī hā inhmā harē pa ā mē kot hipêx anhÿr xwÿnh kôt omu. Anē.

³⁵ Hāmri nhūm kām:

—Tōe kot paj amā harē. Nà Jejus na prem ā hipêx anē nhūm prem hā kagā. Anē.

Hāmri nē hprī hā kām kot kamā harēnh xwÿnhnta jarē. Jejus kot tanhmā mē panē amnhī nhīpêx toja nhūm hprī hā kām harēnh o hkôt mō.

³⁶ Hāmri nhūm wa kormā mō nē pry htā himō hānh mō nhūm Exiop nhō xwÿnh omu nē Firipti mā kām:

—E mÿj gō mÿj nō. Xà kot kaj kamā ixkrā kumrā nà? Anē.

³⁷ Nhūm kām:

—Nà kot kaj amnhī kaxyw Jejus Kris kôt ajamaxpēr nē hkôt amnhī xām hā kot paj akrā kumrār kurē kumrēx. Anē.

Hāmri nhūm kām:

—Tÿ. Kêp Tirtūm Kra kēnā kot paj kêt amnhī kaxyw hkôt ijamaxpēr kêt. Anē.

³⁸ Hāmri nē pâr o mrar xwÿnhnta mā anē nhūm pâr o nō nhūm wa kato nē himō hwÿr wrÿ nhūm Firipti hkrā kumrā. Kot Jejus kôt amnhī xām ā hkrā kumrā. ³⁹ Hāmri nē wa akupÿm api nhūm Tirtūm Karō Firipti mÿ nē ma nhÿhÿm o mō nhūm Exiop nhō xwÿnhnta axte omunh kêt nē. Hāmri nē ma akupÿm papxā hwÿr mō. Ra kot Jejus kôt amnhī xām jakamā hkñnh nē ma akupÿm mō.

⁴⁰ Rôm nhūm Firipti krī pē Ajôt kamā pōj. Tirtūm Karō kot Exiop nhō xwÿnhnta pē kator nē tanhmā ho nē Ajôt wÿr o mō hāmri nē kamā kumē. Hāmri nhūm mē kām Jejus kot tanhmā mē panē amnhī nhīpêx

to hā harēnh pē ma krī hō hwÿr mē kām ujarēnh anhÿr o pa rāhā krī pē Sejarej wÿr mō nē pōj.

9

Sawti kot Jejus kôt amnhī xām ā harēnh

Atre 22.6-11, 26.12-18

¹ Rôm nhūm Sawtija xatā Jeru-jarē kamā Pahihti Jejus kôt mē kot amnhī xunhwÿr xwÿnhnta tanhmā mē homnuj tÿx to ho ri mē hkôt pa. Kām mē himex par prām jakamā na pre hte ā amnhī nhīpêx anhÿr pix o pa. Tā ra hamaxpēr nē ma patre maati hwÿr tē nē mē hā amnhī jarē nē kām:

² —E ot pa awÿr tē. Kwa inhmā kagā nhīpêx pa kupy nē ma krī pē Tamas kām mē pahpē Ijaew xàptār tūmrejē hwÿr o mō nē mē kām kugō. Kē mē kamā harē nē omu hāmri nē hkôt inhīhkra kamā Jejus kôt mē kot amnhī nhīpêx xwÿnhnta jagjē. Mēnijaja nē mēmyjaja. Hāmri pa mē unē nē man akupÿn awÿr mē o mō ka mē omu nē kam tanhmā mē hipêx to. Anē.

Hāmri nhūm kuma nhūm ja kām mex nē. Hāmri nhūm kām kagā nhīpêx nē kugō nhūm kupy nē hkôt mē pa xwÿnhnta mē ro hā ma Tamas wÿr mē hwÿr mōr kurē kumrēx.

³ Mōō mē ra hpôx o mōr mē nhūm puh kaxkwa rūm hirā rax kumrēx wrÿ nē hā ajēt nhūm hipôk ri xa. ⁴ Hāmri nē tee ri omu nē kām ma xāj pykap tēm nē akryk nō. Hāmri nhūm kaxkwa rūm mēhō kām kapēr nē kām:

—Pa Sawti? Hēxta waa nē. Kwa mon ka hte ixtomnuj tÿx o ri apa? Anē.

⁵ Hāmri nhūm amnhī jaēr pē kuma nē kām:

—Kwa mē atō na ka ā inhmā akapēr anē pahihti? Anē.

Hāmri nhūm kām:

—Kwa nhūm ixpē Jejus ixte amā ixkapēr kēnā. Pa na ka hte ixpē ixkôt mē kot amnhī xunhwÿr xwÿnhnta nhīpêx kati ho apa. Jao te

pa ate ixtomnuj tỳx pyrək. ⁶ Nom kot kaj axte ā amnhī nhīpēx anhỳr kēt kumrēx. E kànhmā xa nē māmri ma krī hwỳr tē. Kot kaj hwỳr pōj nhūm mēhō awỳr tē nē mēmoj tã amā karō ka ama nē hkôt amnhī nhīpēx. Anē.

⁷ Nhūm pre ā Jejus Sawti mǎ kapēr anē. Nhūm hkôt mē pa xwỳnhjaja mēmoja ma no ām hpri mar nē mēmoj pumunh kēt nē. Hāmri nē tee ri hamaxpēr nē kām ma xàj akryk kapēr kēt kumrēx nē kuhē. ⁸ Hāmri nhūm Sawti kànhmā xa nom rīt kēt nē tee ri rīt mǎ nhūm mē hpa hā kupy nē ma krīm o mō. ⁹ Nē Tamas wỳr o pōj nē nhỳri mēhō nhōrkwỳ hwỳr ho axà nhūm kamā nohkre nē arī hkrī. Tee ri amnhī kukamā hamaxpēr o hkrī. Nē apkur kēt nē hkôm kēt o ra hā apkati axkrunēpxi.

¹⁰ Tamas kamā na pre mēhō my pē Ananīsja pa. Kot Jejus kôt amnhī xunhwỳr xwỳnhjē hō na pre. Jakamā nhūm Jejus hwỳr kato nē kām kapēr. Te hpimtir kām hwỳr kator nē kām kapēr pyrà nē kām:

—Pa Ananīs? Anē.

Nhūm kām:

—Ỗ? Ot pa xa. Mo na Pahihti? Anē.

¹¹ Nhūm Jejus kām:

—E kēr ka akato nē ma mē kot kām: “Pry katāt” anhỳr xwỳnhnta wỳr tē. Hāmri nē kamā jut nhōrkwỳ japēr. Kamā na Tas nhō xwỳnh pē Sawtija hkrī. Na no hkre nē inhmā amnhī jarēnh o hkrī. Ka hwỳr axà nē omu. ¹² Ate hwỳr atēm nē inhỳ hā hā anhīhkra xir nhūm akupỳm rīt mex kaxyw na ato amỳti. Jakamā e ma hwỳr tē nē ā hipēx anē. Anē.

¹³ Hāmri nhūm Ananīs tee ri kuma nē kām Sawti puma ho amnhī kamā kahak nē. Hāmri nē kām:

—Kwa nà Pahihti. Tām na xep hte Jerujarē kamā mē kot amnhī kaxyw akôt mē hamaxpēr xwỳnhjē nhīpēx kati ho pa. Pa ra mē hā

harēnh ma. ¹⁴ Tã na xep ra jar Tamas wỳr pōj. Patre krāhtūm kapēr nhỳ hā kot mē ixpē akôt amnhī xunhwỳr xwỳnhjē pynēnh nē ma akupỳm hwỳr mē ixto mōr kaxyw. Tãn ka ri hwỳr ijano. Kwa nà ri ixto anhỳr kēt nē Pahihti. Anē.

¹⁵ Nhūm Jejus kām:

—Nà māmri ma hwỳr tē. Ra ixte amnhī kaxyw ām kēnā. Jakamā koja ā mē anhīpēx anhỳrta hpānhā ma mē piitā mē kām ixkapēr jarēnh o pa. Mē apē Ijaew mǎ nē mē anhō pahi hkwyjē mǎ nē mē kēp Ijaew kēt xwỳnhjē mǎ. Koja mē piitā mē kām ixkapēr jarēnh mex o ri mē hkôt pa. ¹⁶ Koja mē ixtã homnuj tỳx nē nhūm amnhī xà htỳx kamā hamak o pa. Nom kot paj ixpri hā mē kot tanhmā ixtã hipēx to hkukamā kām ixujarēnh pa nhūm amnhī kukamā amnhī jarēnh ma. E tokyx māmri ma axāmnhix hwỳr tē. Anē.

¹⁷ Hāmri nhūm kuma nē kato nē ma Sawti hwỳr htēm kurē kumrēx. Hāmri nē ixkre hwỳr axà nē omu nē hkrā hā ihkra xi nē kām:

—Pa Jejus kôt ixtō Sawti? E na Pahihti Jejus awỳr inhmē pa awỳr tē. Pry kahti ri kot awỳr kator xwỳnhnta. Tã akupỳm arīt nhūm Tirtūm Karō kot akarō mǎ àr kaxyw na awỳr inhmē pa tē. Anē.

¹⁸ Hāmri nhūm mēmoj te tep kà pyrəkja Sawti no rūm hapōj nē rōrōk nhūm akupỳm rīt mex kurē kumrēx. Hāmri nē kànhmā xa nhūm Ananīs hkrā kumrā. Ra amnhī kaxyw Jejus kôt hamaxpēr ā hkrā kumrā. ¹⁹ Hāmri nhūm nhỳ nē apku nē akupỳm hihtỳx.

Sawti kot Tamas kamā Jejus kapēr jarēnh

Sikūn Korīt 11.22-23

Nhūm Sawti Tamas kām mē kot Jejus kôt amnhī xunhwỳr xwỳnhjē hkôt amnhī xām nē mē hkôt ri pa nē tokyx ma akupỳm mōr kēt nē. ²⁰ Kormā mē hkôt ri pa nē Ijaew nhō Tirtūm kapēr o mē ahkre xà hā

ixkre hwÿr mra nê kamã mê kãm Jejus kapêr jarê. Kêp Tirtûm Kra hã harênh o kuhê. ²¹ Hãmri nhùm mê amnhĩ jaêr pê â harênh anhÿrja ma nê tee ri hamaxpêr nê axpên mã:

—Kokÿÿ. Kwa tãm na xep pre Jerujarê kamã amnhĩ kaxyw Jejus kôt mê kot amnhĩ xunhwÿr xwÿnhjê homnuj tÿx o pa. Tã xep jar kot mê hkwÿjê pynênh nê ma mê o môr nê Jerujarê kamã patre krãhtûmjê mã mê ôr kaxyw na pre man mê pahwÿr mô. Tã ra tanhmã hamaxpêr to nê axtem nê mê pamã Jejus kapêr jarênh o mê pajahkre ho pa. Anê.

²² Hãmri nhùm Sawti arĩ Tamas kãm Ijaew mã tanhmã Jejus jarênh to kamã hihtÿx o mê hkôt pa nê mê kãm:

—Nã Jejus Krisja na pre Tirtûm mê pakaxyw âm nê mê pahwÿr kumê. Âm hãmri na pa mê amã ja jarê. Anê.

Hãmri nhùm mê kuma nê tee ri kutã tanhmã kapêr to hkukamã hamaxpêr.

²³ Tã ra hã apkati sohtô nê nhùm Tamas kãm Ijaew kwÿjaja kot Sawti pÿr kaxyw hã axpên ma. ²⁴ Hãmri nhùm mēhōja hã ama nê Sawti hwÿr tē nê kãm mê harē nê kãm:

—Kwa Sawti kêr ka axkãm ajamak rom. Na mê pahkwÿjaja atã amÿnê. Na mê ra krĩ puhã kahê xã hã hakwakre piitã hamãr ho kuhê. Kot kaj nhÿhÿm akato nhùm mê apumu nê apynê nê apĩ. Anê.

²⁵ Jakamã nhùm kamãt nhùm Sawti hkôt ri mê pa xwÿnhjaja kawã rax ô mÿ nê hwÿr o tē nê kãm âm nhùm hwÿr axã nê nhÿ. Hãmri nhùm mê hkagrĩ nê kēn o krĩ puhã kahêja nhĩrô pê ho wrÿ nhùm mê kêp kato nê ma mô.

Sawti kot Jejus kwÿjê hkôt pikamēnh ā harēnh

Karatas 1.15-24

²⁶ Tã nhùm Sawti krĩ pê Tamas rûm kato nê ma akupÿm Jerujarê hwÿr mô hãmri nê hwÿr pōj. Hãmri

nê mê kot Jejus kôt amnhĩ xunhwÿr xwÿnhjê hkôt amnhĩ jarênh kaxyw mê hwÿr tē. Hãmri nhùm mê tee ri amnhĩ wÿr omu nê kot Jejus kôt amnhĩ xãm â amnhĩ to hêx â hkamnhĩx hãmri nê amnhĩ kamã kahak o amnhĩ nê hkurê nê mê piitã kãm uma nê. ²⁷ Âm Panãpe pix âm hãmri kot Jejus kôt amnhĩ xãm kôt hamaxpêr. Hãmri nê ma hwÿr tē nê haprô nê ma Jejus nhÿ hã mê ahkre xwÿnh maatijê hwÿr o tē nê yr pê mê kãm kapêr nê mê kãm:

—Kwa âm hãmri na Sawti amnhĩ jarê. Na ra mê pahpyrà nê Jejus kôt amnhĩ xãm. Na xep pre Tamas wÿr pry hã kormã mô nhùm xep Pahihti Jejus hwÿr kato nê kaxkwa rûm kãm kapêr nhùm kuma nê hkôt amnhĩ xãm. Jakamã nhùm xep ra axtem kot amnhĩ nhĩpêx nyw o Tamas nhõ xwÿnhjê mã Jejus kapêr jarênh o ri mê hkôt pa. Ra amnhĩ kamã kãm mê uma hkêt nê âmnhĩx ri mê kãm harênh o ri mê hkôt pa. Anê.

²⁸ Hãmri nhùm mê kuma nê amnhĩ kôt Sawti mê nhùm mê hkôt ri pa. Hãmri nê Jerujarê kamã mê piitã mê kãm Jejus kapêr jarênh o pa. Kãm Jejus kôt amnhĩ xunhwÿr kêt xwÿnhjê puma hkêt nê âmnhĩx ri mê kãm kapêr jarênh o ri mê hkôt pa. ²⁹ Nê Ijaew kwÿpê Gresjê kapêr o mê kapêr xwÿnhjê mã nhùm xatã mê kãm Jejus jarênh o ri mê hkôt pa. Kêp Tirtûm kot mê pakaxyw âm xwÿnh â harênh rãhã ho ri mê hkôt pa. No nhùm mê kãm mar prãm kêt nê ra kot Jejus â hpĩr mã. ³⁰ Hãmri nhùm mê kot Jejus kôt amnhĩ xunhwÿr xwÿnh kwÿjaja mê harênh ma nê mê kêp ho kato nê ma krĩ pê Sejurej wÿr o mô. Hãmri nê kurûm ma akupÿm ô krĩ pê Tas wÿr kumê nhùm ma akupÿm mô.

³¹ Tã ra Sawti kot Jejus kôt amnhĩ xãm jakamã nhùm mê kãm mê hkurê xwÿnhjaja axte Jejus â tanhmã hkwÿjê hto hkêt nhùm mê piitã hamakêtkati nê âmnhĩx ri pa.

Pika pê Jutej kamã në Garirej kamã në Samar kamã nhùm më piitã hamakêtkati në àmnhĩx ri pa. Hãmri në Tirtùm mã mex o mex ã harênh o ri pa. Nhùm Tirtùm Karõ tanhmã më hkrã hto nhùm më ra kapêr kôt amnhĩ nhĩpêx mex o mō. Hãmri nhùm më ohtō rax në më urak në Jejus kôt amnhĩ xunhwý në hkwyjê hkôt axkamê.

Enejti akupým mex ã harênh

Atre 3.1-10

³² Tã nhùm Simãw Pêtreja ma më kot Jejus kôt amnhĩ xunhwýr xwýnhjê mã Tirtùm kapêr jarênh o më ahkre kaxyw ma krĩ piitã hkôt pa. Jakamã krĩ pê Rit wýr mō ³³ në hwýr pōj në kamã Enejti pumu. Nhùm i kamã htyk pa në kupip kãm hikwý rãhã hã amgrã pê 8. ³⁴ Hãmri nhùm Simãw Pêtre omu në Jejus nhỹ hã kãm kapêr në kãm:

—Pa Enejti? E na Jejus Kris akupým ato mex. Jakamã e kãnhmã xa në akupipta py. Anê.

Hãmri nhùm akupým mex në kãnhmã xa në amnhĩ pumu në hkĩnh o hkĩnh. ³⁵ Hãmri nhùm krĩja kamã në krĩ hō pê Sarō kamã më piitã harênh ma në më kot amnhĩ tomnuj kaga hpa në hpãnhã Jejus kôt amnhĩ xunhwý në hkôt amnhĩ nhĩpêx o pa.

Tapitre akupým htĩr ã harênh

Rukre 8.49-56; Atre 20.7-12

³⁶ Nhùm Tapitreja krĩ pê Jope kamã na pre pa. Gres kapêr kãm hixi pê Nokre. Më kapêr kãm Nokreja te kêp “karà” anhýr jarênh pyrak. Na pre ra Tapitre pê Nokreja Jejus kôt amnhĩ xãm në më piitã më ho mex o ri më hkôt pa. Nê më kêp amrakati xwýnhjê kamã ukapri ho ri mëmoj to më kutã nojarêt o ri më hkôt pa. ³⁷ Tã ra à htýx në hãmri ty. Hãmri nhùm më tee ri omu në hkapri në mýr rax në. Nê kumý në kuhō hãmri në kormã haxàr kêt ri kýx pê ixkre kamã kuxi në kuri mýr o hkrĩ.

³⁸ Nhùm Simãw Pêtre kormã krĩ hō pê Rit kamã ri pa. Rit rùm Jope hwýr jawý jakamã nhùm Jope kamã më kot Jejus kôt amnhĩ xunhwýr xwýnhjaja Simãw Pêtre jarênh ma hãmri në hwýr ja wa ho hamêxkrut në wa kumê. Nhùm wa ma hwýr tẽ në hwýr pōj në omu në kãm:

—Pa? E jar na pa wa awýr tẽ. Na Jejus kôt më pahdōx Tapitre ham më pahpê ty. Kwa tokyx kormã më kot haxàr kêt ri ma wa ixkôt hwýr tẽn omu nã? Anê.

³⁹ Hãmri nhùm wa kuma në ma wa hkôt htẽm kurê kumrêx. Hãmri në Jope hwýr pōj në më hwýr tẽ nhùm më kýx pê htyk në nōr xwýnhja wýr ho api nhùm hwýr axà. Nhùm kuri më kêp më mjên htyk xwýnhjaja hkapri në mýr o hkrĩ. Hãmri nhùm Simãw Pêtre më hwýr axà nhùm më omu në kãm Tapitre kormã htĩr ri kot tanhmã më ho mex to hã harê. Nê më ê hkwy jamý në kãm kupê në kãm:

—Ga ja pumu. Tyk xwýnhnta na pre më inhmã hkay në kugō. Na pre hte më ixto mex o pa. Tã më ixpê ty. Hêxta gãa në. Na pa më ixkapri htýx kumrêx. Anê.

⁴⁰ Hãmri nhùm më kuma në më kator pa hãmri në htyk xwýnhnta ri hkõn krã ho nhỹ në ho Tirtùm wý. Hãmri në htyk xwýnhnta mã kapêr në kãm:

—Pa Tapitre? E kwa kãnhmã nhỹ. Anê.

Pu nhùm no amra në Simãw Pêtre pumu në kãnhmã nhỹ. ⁴¹ Hãmri nhùm hpa hã kupy në kãnhmã ãm në kapôt ã më kuhê xwýnhjê mã anê nhùm më akupým wa hwýr agjê nhùm më kãm:

—E ota. Na Tirtùm akupým më amã ho htĩr. Anê.

Hãmri nhùm më amnhĩ jaêr pê omu në hkĩnh týx në. ⁴² Hãmri nhùm Jope kamã më piitã harênh ma në më ohtō në amnhĩ kaxyw Jejus kôt hamaxpêr në hkôt amnhĩ xunhwý. ⁴³ Hãmri nhùm Simãw Pêtre Jope kamã ri pa hã apkati

xohtë nê tokyx mẽ kurũm kato nê ma krĩ hõ hwÿr mõi kêt nê. Na pre mry kà ho mẽmoj nhĩpêx o pa xwÿnh pê Simãw ri pøj nê kuri pa hã apkati xohtë nê.

10

Konêre kot Simãw Pêtre hã karõ hã harênh

Rukre 7.1-10

¹ Tã nhũm Ijaew kêt xwÿnh Konêre. Kêp Rõmjê nhõ põristi krãhtũm na pre. Õ põristija pika pê Itar nhõ xwÿnh na pre mẽ nhũm Konêre kêp mẽ hkrãhtũm. Krĩ pê Sejarej kamã. ² Konêreja kot amnhĩ to mex o pa xwÿnh na pre. Kêp Ijaew kêt tã na pre hte òrkwÿ kamã hkwyjê mẽ Tĩrtũm ã hpijaàm nê kãm mex o mex ã harênh o pa. Apkati mẽ kãm amnhĩ jarê. Nê mẽ kêp amrakati xwÿnhjê mã kãxpore hkwy nhõr o pa. ³ Jakamã nhũm mẽmo arĩgro hã ra myt japanh grire nhũm mẽmoj pumu. Te hpimtir kãm kot omunh pyrà nê kaxkwa kamã Tĩrtũm kapêr o wrÿk xwÿnh pumu. Nhũm hwÿr wrÿ nê tanhmã kãm kapêr to nê kãm:

—Pa Konêre? Anê.

⁴ Nhũm tee ri omu nê kãm ma htÿx kumrêx. Hãmri nê kãm:

—Mo na? Anê.

Hãmri nhũm kãm:

—Nà ate amnhĩ to Tĩrtũm wÿr o apaja nhũm ra amnhĩ tã ama nhũm ja kãm mex nê. Nê ate mẽ kêp amrakati xwÿnhjê mã kãxpore hkwy nhõr o apaja nhũm ja mãânên kãm mex nê.

⁵ —Jakamã e inhma. Kêr ka ma Jope hwÿr amã mẽ ãpênh xwÿnh kwÿ rê kê mẽ ma hwÿr mra nê kamã mẽhõ pê Simãw Pêtre japró nê man akupÿn awÿr o mẽ. ⁶ Simãw kot mry kà ho mẽmoj nhĩpêx o pa xwÿnhhta nhõrkwÿ kamã na hte pa. Òrkwÿja gõ mÿ ri na. E hwÿr mẽ arê kê mẽ ma hwÿr mẽ nê hapró nê man awÿr o mẽ kê amã mẽmoj mex jarê ka ama. Anê.

⁷ Nhũm pre ã Tĩrtũm kapêr o wrÿk xwÿnhja Konêre mã kapêr anê hãmri nê kato nê ma akupÿm api. Hãmri nhũm kot mar xà hkõt jajê rê nê Simãw Pêtre hwÿr mẽ kurê. Kãm ãpênh xwÿnhjê ho hamêxkrut nê kaxyw ò põristi hõ. Põristija na pre hte Konêre pyrà nê Tĩrtũm ã hpijaàm o pa. ⁸ Jakamã nhũm mẽ kurê nê mẽ kãm kapêr hãmri nê ma Jope hwÿr Simãw Pêtre hwÿr mẽ kurê nhũm mẽ kato nê ma hwÿr mẽ. ⁹ Hãmri nhũm apkati nhũm kaxkwa nhĩpøk ri myt nhÿ nhũm mẽ hwÿr hpõx o mẽ.

Simãw Pêtre tanhmã hpimtir to hã harênh

Atre 11.5; Karatas 2.11-21

Rõm nhũm Simãw Pêtre kot Tĩrtũm mã amnhĩ jarênh kaxyw ixkre nhĩmøk ã api nê himøk po hã kãm amnhĩ jarênh o nhÿ. ¹⁰ Hãmri nê ra kãm prãm nê nom nhũm mẽ kormã kãm ò hã ãpênh jakamã nhũm arĩ ixkre nhĩmøk ã Tĩrtũm mã amnhĩ jarê.

Hãmri nê Konêre pyrà nê te hpimtir kãm kot mẽmoj pumunh pyrà nê mẽmoj pumu nhũm Tĩrtũm Konêre hkukamã tanhmã kãm mẽmoj to amnhĩrit to. No ãm hã kuxi nê kãm harênh jakamã nhũm Simãw Pêtre te hpimtir kãm kot mẽmoj pumunh pyrà nê mẽmoj pumu. ¹¹ Nhũm kaxkwa katêr nhũm kurũm mẽmoj te kot mẽ hpiipro xà pyràk xwÿnhja pyka hwÿr wrÿk o mẽ. Nê hatur xà piitã axpên tã akupró nê ajêt nê wrÿk o mẽ nhũm omu. ¹² Mẽ hpiipro xàta kamã mẽmo mry piitã hikwÿ. Mẽmo mry hpar o ri pa xwÿnhjaja nê htu mÿr pê ri pa xwÿnhjaja nê mẽmo ãk kÿx pê htor o ri mrar xwÿnh piitã mẽ hpiipro xàja kamã hikwÿ nhũm omu. ¹³ Hãmri nhũm Tĩrtũm kãm:

—Pa Simãw Pêtre? Mãn ka ra amã prãm nê nà? E kãnhmã xa nê axãmnhĩx mãmrĩ mryta ò kapi nê

apĩ nê ho anê nê aku. Piitã mẽ ate hkur mã mex. Anê.

¹⁴ Hãmri nhũm tee ri kuma nê kãm:

—Kwa nà Pahi Maati. Mẽ xipê Ijaew mẽ ixte mry piitã hkur kêt. Âm hkwỳ pix na pa htem kuku. No mry jaja aa mẽ ixte hõ hkwỳ hkrêr kêt. Anê.

¹⁵ Hãmri nhũm Tĩrtũm kãm:

—Nà kot anhỹr tã kot paj pam amã mẽmoj jarê ka kamã anhõkre kahak kêt nê. Mãmri amnhĩm hõ kapi nê apĩ nê ho anê nê axãmnhĩx hkwỳ hkre. Anê.

¹⁶ Nhũm pre ã kãm mry hã karõ anhỹr o axkrunêpxi. Simãw Pêtre kot mãmri Ijaew kêt xwỳnhjê hkõt pa nê ãmnhĩx ri mẽ kutã apkur nhũm Tĩrtũm kãm ja mex nhũm kot hã amnhĩ pumunh kaxyw nhũm ã kãm harênh anhỹr o axkrunêpxi. Hãmri nhũm mẽ hpiro xãja ma akupỹm kaxkwa hwỳr àpir o mõi nê akunok. ¹⁷ Hãmri nhũm Pêtre te hkrãkator pyrãk jao tee ri hpimtir kukamã hamaxpêr o nhỹ nê hamaxpêr o:

—Kwa mo kaxyw na Tĩrtũm ã inhãm ja hã karõ anê? Anê.

Rôm nhũm Konêre kot hwỳr mẽ rênh xwỳnhjaja ra hwỳr hpõx o mõi. Ijaew kêt xwỳnhhtaja Simãw nhõrkwỹ hã mẽ hkukjêr o mõi nê hwỳr pøj nê hakwakrem kuhê. ¹⁸ Hãmri nê õrkwỹ nhõ xwỳnhjê mã kãm:

—Pa na ka mẽ arĩ akrĩ? E Simãw Pêtre hwỳr na pa mẽ mõi. Xã jar na hte pa nà? Anê.

Hãmri nhũm mẽ kãm: —Tỳ. Omũj kỳx pê ixkre nhĩmõk ã na nhỹ. Anê.

¹⁹ Nhũm Simãw Pêtre arĩ kot mẽmoj pumunhta kukamã hamaxpêr o nhỹ nhũm Tĩrtũm Karõ kãm mẽ hpõx xwỳnhjê jarê nê kãm:

—E Simãw Pêtre. Ota Ijaew kêt xwỳnhjaja axkrunêpxi nê ajapêr o mõi nê ra anhõrkwỹ hwỳr pøj. ²⁰ Mẽ hwỳr wrỳ nê mẽ kot amã mẽmoj jarênh ma nê mãmri axãmnhĩx ma mẽ hkõt mõi. Tanhmã ajamxpêr to

hkêt nê. Pa na pa awỳr mẽ kumê nhũm mẽ mõi. Anê.

²¹ Hãmri nhũm kuma nê mẽ hwỳr wrỳ nê mẽ omu nê mẽ kãm:

—Pa? Xã pa na ka mẽ ijapêr o mõi? E ot pa xa. Kam nê mẽ inhãm mẽmoj jarê pa mẽ ama. Mẽmo kaxyw na ka mẽ ixwỳr mõi? Anê.

²² Hãmri nhũm mẽ kãm:

—Nà mẽ inhõ patrãw Konêre na awỳr mẽ inhãm pa mẽ mõi. Na hte tãm amnhĩ nhĩpêx o pa. Nê Tĩrtũm ã hpijaãm nê kãm mex o mex ã harênh o pa. Nhũm mẽ inhõ krĩ kamã Ijaew kãm hkĩnh nê. Tã na Tĩrtũm kapêr o wrỳk xwỳnhja ham hwỳr wrỳ nê kãm ajarê. Kot amnhĩ wỳr atã karõ nhũm ate hwỳr amõr nê kãm axujarênh kaxyw kãm ajarênh jakamã nhũm mẽ ixte ajaprõr kaxyw awỳr mẽ inhãm pa mẽ man awỳr mõi. Anê.

²³ Hãmri nhũm mẽ kuma nê mẽ kãm:

—Tõe nà na pa mẽ ama. E mẽ agjê nê akrĩ nê jar mẽ ixri nõ kê apkati pu mẽ rĩ ma akupỹm mõi. Anê.

Hãmri nhũm mẽ kuma nê mẽ hwỳr agjê.

Tã nhũm apkati nhũm mẽ akupỹm nojarêr nhũm Simãw Pêtre ma mẽ hkõt mõi. Nhũm Jope kamã mẽ kot Jejus kõt amnhĩ xunhwỳr xwỳnh kwỳjaja ma mẽ hkõt mõi. Nhũm mẽ mõi o kamàt.

²⁴ Hãmri nhũm apkati nhũm mẽ Sejarej wỳr hpõx o mõi. Nhũm ra Konêre mẽ kutêp amnhĩ wỳr hkwỳjê ho akuprõ nhũm mẽ Simãw Pêtre kutêp õrkwỹ kamã akuprõ nê hkrĩ. ²⁵ Hãmri nhũm mẽ hwỳr pøj nê mẽ hwỳr àr kaxyw nhũm Konêre amnhĩ wỳr omu nê kànhmã xa nê kutã tẽ nê hpar pê hkõnkrã ho tẽm nê nhỹ. ²⁶ Hãmri nhũm tee ri ja hã omu nê pa hã kupy nê kànhmã ãm nê kãm:

—Kwa kànhmã xa. Ixpê Tĩrtũm kêt tã ka ri ã inhĩpêx anê. Anê.

²⁷ Hāmri nē hkôt ōrkwỹ hwýr axà nē kutēp mē pikuprōnh xwýnhjê pumu nē mē kām:

²⁸ —Pa na ka mē arĩ akrĩ? E mǎn ra mē ate mē ixpê Ijaew kot amnhĩ nhĩpêx ā mē ixpumunh mex. Na pa htem mē apê axtem nhō xwýnhjê hkôt ri ixpa hkêt nē. Nē mē anhōrkwỹ hwýr inhgjêx kêt nē. Tǎ ham Tĩrtũm inhmǎ mē ixte ā amnhĩ nhĩpêx anhýr o ixpaja nē ixkurê nē inhmǎ: “Kot paj pam mē hkwjaja mex ā mē harê ka mē kamǎ anhōkre kahak kêt nē.”

²⁹ —Anhýr jakamǎ ka xep pre ixtǎ karō pa inhĩtōt kêt nē man mē awýr inhmōr kurê kumrêx. E mē inhmǎ mēmoj jarê pa mē ama. Mēmo kaxyw na ka mē ixtǎ karō? Anê.

³⁰ Hāmri nhũm Konêre kām:

—Nǎ jǎǎ na pa pre jar inhōrkwỹ kamǎ Tĩrtũm mǎ amnhĩ jarênh o nhỹ. Ra myt xǎpanh grire pa kām amnhĩ jarê. Hāmri nhũm Tĩrtũm kapêr o wrýk xwýnh ixwýr wrý nē hirǎ rax kām xa. ³¹ Hāmri nē inhmǎ: “Pa Konêre? E na hte Tĩrtũm ate kām amnhĩ jarênh ta mar o hkrĩ. Nē ate mē kêp amrakati xwýnhjê ho mex o apaja nhũm hǎ apumu.

³² Jakamǎ e ma Jope hwýr amǎ mē ãpênh xwýnh kwý rē kē mē ma hwýr mō nē kamǎ Simǎw Pêtre japrō nē man akupýn awýr o mō. Mry kǎ ho mēmoj nhĩpêx o pa xwýnh Simǎw nhōrkwỹ kamǎ na hte pa. Ōrkwỹja gō mý ri na.” Anê.

³³ —ǎ kot inhmǎ kapêr anhýr jakamǎ na pa kuma hāmri nē awýr jajê rênh kurê kumrêx. Tǎ ka mē hkôt man mē ixwýr mō nē ā apōx anê. Ām hāmri na ka mē hkôt mō. Mē apê Ijaew kot amnhĩ nhĩpêx kuhpa hǎ amnhĩ nhĩpêx nē axǎmnhix man mē ixwýr mō. Tǎ ot pa mē Tĩrtũm noo mǎ ixkrĩ. Kam nē mǎmrĩ ý hǎ mē inhmǎ mēmoj jarê pa mē ama. Anê.

Simǎw Pêtre kot Konêre mǎ ujarênh

³⁴ Hāmri nhũm Simǎw Pêtre Konêre kot kām amnhĩ jarênhja ma nē mē kām awjarê nē mē kām:

—Nǎ ģm hāmri na Tĩrtũm mē akukamǎ tanhmǎ inhmǎ kapêr to. Xep kām mē ixpê Ijaew pix japê hkêt. Kām mē pahpiitǎ mē pajapê nē mē panhĩpêx o axpên pyrǎk.

³⁵ Kojǎ ahpýnhǎ pyka piitǎ hkôt mēhō mē ixpyrǎ nē kêp Ijaew kêt tǎǎ hkôt amnhĩ xǎm nē hǎ hpijaam pē kām mex o mex ā harê nē tǎm amnhĩ nhĩpêx. Hāmri nhũm Tĩrtũm ja hǎ omu nhũm ja kām mex nē.

³⁶ —Na pre ra mē ixpê Ijaew mǎ tanhmǎ Kra Jejus Kris jarênh to. Jejus kot mē panê htyk kukwak ri na hte mē ixte hkôt amnhĩ xunhwýr xwýnhjê ho hkra. Tǎ ra mǎǎnēn ā mē apê Ijaew kêt xwýnhjê mǎ ā amnhĩ jarênh anê nē Jejus htyk kukwak ri mē ate mē ixpyrǎ nē hkôt amnhĩ xunhwýr xwýnhjê ho hkra. Jakamǎ Jejus Krisja kêp mē pahpiitǎ mē panhō Pahiti.

³⁷⁻³⁸ —Mǎn ka prem ra harênh ma. Mē ixpê Ijaew nhō pika pē Jutej kumrêx kām na pre Juǎw Paxisja Jejus kukamǎ mē kām harê nē mē hkrǎ kumrǎr o pa. Mē piitǎ mē kot amnhĩ tomnuj kaga nē Tĩrtũm kôt amnhĩ xunhwýr ā mē omunh xǎ hkôt mē hkrǎ kumrǎ. Jejusja krĩ pē Najare kamǎ na pre hprêk. Tǎ hwýr na pre Tĩrtũm amnhĩ Karō mē nhũm wrý nē hkarō mǎ axà nē hkôt pa ho pa. Jakamǎ nhũm ãhpumunh o ãhpumunh nē ma krĩ piitǎ hkôt tanhmǎ mē ho mex to ho ri mē hkôt pa. Pika pē Garirej kumrêx kamǎ mē piitǎ ri mē kām Tĩrtũm kapêr jarênh o pa. Nē mēkarōmnuti kot Satanasti nhỹ hǎ tanhmǎ mē ho xwýnhjaja nhũm mē nē mēkarōmnuti japōx o pa. Ā na pre Tĩrtũm nhỹ hǎ amnhĩ nhĩpêx anhýr o pa.

³⁹ —Tǎ Jejus nhỹ hǎ hkrajê jahkre ho mē ixpa xwýnhjaja na pa prem kot ri tanhmǎ amnhĩ to ho

pa hã omunh par o ri hkôt ixpa. Mẽ ixpê Ijaew nhõ pyka kamã nẽ mẽ inhõ krĩ pẽ Jerujarẽ kamã nõ ri tanhmã amnhĩ nhĩpêx to ho paja pa prem piitã omunh o hkôt ri ixpa. Tã nhũm prem axtem nẽ mẽ ixpê pĩ kahpa hã kunhõ nẽ kupĩ. ⁴⁰ Hãmri nhũm htyk o apkati axkrunẽpxi nhũm Tirtũm akupỹm ho htĩr nẽ akupỹm mẽ ixwỳr kumẽ pa prem akupỹm htĩr kãm omu. ⁴¹ No nhũm mẽ piitã akupỹm htĩr kãm omunh kêt nẽ. ãm mẽ ixwỳr pix na pre kato nẽ mẽ ixkutã apku pa mẽ papxipixjaja akupỹm htĩr ã omu. Hãmri nhũm Tirtũm mẽ ixte ma mẽ piitã mẽ kãm akupỹm htĩr ã harẽnh o ri ixpa kaxyw mẽ ixrẽ. ⁴²⁻⁴³ Amnepẽm Tirtũm nhỹ hã kapẽr jarẽnh o mẽ pa xwỳnhjaja na prem Jejus kukamã tanhmã hã kagã hto nẽ mẽ kãm harẽnh o pa. Nẽ mẽ kãm: Koja nhỹrmã mẽhõja man mẽ pahwỳr wrỳ nẽ mẽ panê tanhmã amnhĩ nhĩpêx to. Ka mẽ atõ amnhĩ kaxyw hkôt ajamaxpẽr nẽ hkôt amnhĩ xãm hã koja Tirtũm ja hã apumu nẽ mẽhõ kot tanhmã mẽ panê amnhĩ nhĩpêx to xwỳnhhta kukwak ri amnhĩ katut kôt ate amnhĩ tomnuj rẽnh pa nẽ axte kãm hamaxpẽr kêt nẽ. Anẽ.

Na pre Tirtũm nhỹ hã kapẽr jarẽnh o mẽ pa xwỳnhjaja Jejus kukamã ã harẽnh nẽ hã kagã anẽ. Tã koja Jejus nhỹrmã akupỹn wrỳ hãmri nẽ mẽ htyk xwỳnhjê nẽ arĩ mẽ htĩr xwỳnhjê mẽ pahto pimràatã tanhmã mẽ pajarẽnh to. Mẽ pahte tanhmã amnhĩ nhĩpêx to ho papa hã mẽ pahpumunh kôt tanhmã mẽ pajarẽnh to. Hãmri nẽ Tirtũm mẽ wa kuri mẽ pahtĩr tũm nẽ mẽ papa ho papa mã xwỳnhjê jarẽ nẽ mããnẽn wa kuri mẽ htĩr tũm kêt xwỳnhjê jarẽ. Mẽ pahpita tanhmã mẽ pajarẽnh to kaxyw na pre Tirtũm mẽ pakaxyw Jejus xãm. Tã ã kot mẽ pajarẽnh anhỳrja

kukamã na pre mẽ ixte mẽ amã tanhmã harẽnh to ho ixpa kaxyw mẽ awỳr mẽ ixrẽ. Mẽ ate kapẽr mar nẽ tokyx Jejus kôt amnhĩ xunhwỳr kaxyw. Anẽ.

⁴⁴ Nhũm Simãw Pẽtre ã mẽ kãm ujarẽnh anhỳr rôm nhũm Tirtũm mẽ kot mar o hkrĩ xwỳnhjê hwỳr amnhĩ Karõ rẽ nhũm mẽ hwỳr wrỳ nẽ mẽ hkarõ mã gjêx pa. ⁴⁵⁻⁴⁶ Hãmri nhũm mẽ Tirtũm mã mex o mex ã harẽnh o hkrĩ. No ãm mẽ kapẽr kãm harẽnh kêt nẽ. Mẽ kapẽr kwỳ hõ ho kãm mex o mex ã harẽ. Aa mẽ kot mẽ kapẽr mar kêt tã ra ho kapẽr mex nẽ. Jakamã nhũm Jope rũm mẽ kot Simãw Pẽtre hkôt mẽ mõi xwỳnhjaja. Ijaew kwỳ kot ra Jejus kôt amnhĩ xunhwỳr xwỳnhjaja amnhĩ jaer pẽ ja hã mẽ omu nẽ axpẽn mã:

—Hẽxta waa nẽ. Mẽ kệp Ijaew kêt tã nhũm Tirtũm kot mẽ panhĩpêx pahpyrà nẽ mẽ hwỳr amnhĩ Karõ rẽ nhũm mẽ hwỳr wrỳ nẽ mẽ kãm agjê. Nã ãm hãmri na mẽ pahpyrà nẽ ã mẽ hipêx anẽ. Anẽ.

Hãmri nhũm Simãw Pẽtre mẽ kuma nẽ mẽ kãm:

⁴⁷ —Kwa pu mẽ hkrã kumrãr kurẽ kumrẽx. Ra Tirtũm Karõ kot mẽ pahpyrà nẽ mẽ hkarõ mã gjêx kẽnã kot kêt mẽhõ mẽ nẽ tanhmã mẽ pahpẽ ãnnar to. Ra mẽ kot mẽ pahpyrà nẽ Jejus kôt amnhĩ xunhwỳr kẽnã. Anẽ.

⁴⁸ Hãmri nẽ Konẽre mẽ hkwyjê mã kãm:

—E kot paj mẽ ate Jejus Kris kôt amnhĩ xunhwỳr ã mẽ akrã kumrã. Anẽ.

Hãmri nẽ mẽ hkrã kumrãr pa nhũm mẽ Simãw Pẽtre mã kãm:

—Kwa kormã anojarêt kêt nẽ. Kritpẽm ri mẽ ixkôt ri apa hã atã apkati grẽre nẽ kormã ma akupỹm mõi. Anẽ.

Hãmri nhũm mẽ kuma nẽ mẽ hkôt ri pa hã apkati grẽre hãmri nẽ nojarêt nẽ ma akupỹm mõi.

11

*Simāw Pêtre kot hkwýjê mã
Konêre jarênh*

Atre 10.1-48

¹⁻² Hâmri nhùm Simāw Pêtre ma akupým mô. Jutej kamã krĩ pê Jeru-jarê wýr ma akupým mô hãmri nê pøj. Hâmri nhùm Jutej kamã Jejus nhỹ hã mẽ ahkre xwýnh maati-jê mẽ mẽ kot Jejus kôt amnhĩ xun-hwýr xwýnhjaja Ijaew kêt xwýnhjê jarênh ma. Konêre mẽ hkwý kot mẽ urak nê Jejus kôt amnhĩ xunhwýr ã mẽ harênh ma. Jakamã nhùm Simāw Pêtre akupým mẽ hwýr pøj nhùm mẽ omu nê mẽ hã àhkukjêr kurê kumrêx. Hâmri nhùm mẽ hkwýjaja mẽ hã kãm akir nê kãm:

³—Kwa mẽ pahpê Ijaew pyrã nê mẽ kot amnhĩ my kwrýt kã jakàr kêt tã ka mẽmo hwýr mẽ hwýr mô mẽ kuri pøj nê mẽ kutã apku. Anê.

⁴ Hâmri nhùm Pêtre tee ri mẽ kuma hãmri nê hprĩ hã mẽ kãm amnhĩ jarê. Nê tanhmã Tirtùm kot kãm Ijaew kêt xwýnhjê jarênh to hã mẽ kãm harê nê mẽ kãm:

⁵—Kwa mẽ ã ri ajamaxpêr anhýr kêt nê. E pa mẽ amã amnhĩ jarê ka mẽ inhma mãn. Nà na pa pre jãã Jope kamã Tirtùm mã amnhĩ jarênh o nhỹ nê te xpimtir kãm mẽmoj pumunh pyrãk. Nhùm mẽmojja te mẽ hpiro xà pyrã nê kaxkwa rùm ixwýr wrýk o mô pa ixprĩ hã omu. ⁶ Nhùm kamã mry piitãã. Mry xoprê nê mry xuwapô nê mry hpar o ri pa xwýnhjaja nê mry htu mýr pê ri pa xwýnhjaja nê àk. Nê mẽ pahte hkur xwýnhjaja nê mẽ pahte hkur kêt xwýnhjaja. ⁷ Kamã mry piitã pa omu. Hâmri nhùm Tirtùm inhmã: “Pa Simāw Pêtre? Mãn ka ra amã prãm nê nã? E kãnhmã xa nê axãmnhĩx mãmrĩ mryta õ kapi nê apĩ nê ho anê nê aku. Piitã mẽ ate hkur mã mex.” Anê.

⁸—Pa tee ri kuma nê kãm: “Kwa Pahi Maati. Mẽ ixpê Ijaewjaja mẽ ixte mryja piitã hkur kêt. ãm hkwý hpix na pa htem kuku. No ja hkwý

aa mẽ ixte hõ hkwý hkrê kêt.” Anê. ⁹ Nhùm inhmã: “Nà nom kot anhýr tãã. Kot paj pam amã mẽmoj jarê ka kamã anhõkre kahak kêt nê. Jakamã e mãmrĩ amnhĩm hõ kapi nê apĩ nê ho anê nê axãmnhĩx hkwý hkrê.” Anê.

¹⁰—Na pre ã Ijaew kêt xwýnhjê hwýr inhmõr kukamã inhmã karõ ho axkrunêpxi anê. Nom hã kuxi nê inhmã mẽ pahte mry kur kêeta jarê. Hâmri nhùm mẽ hpiro xaja ma akupým kaxkwa hwýr api nê kakrãm axã nê akunok. ¹¹ Hâmri nhùm Ijaew kêt xwýnhjaja mẽ ixwýr axkrunêpxi nê mra nê pøj. Konêreja Sejarej rùm ixwýr mẽ rênh xwýnhjaja nhùm mẽ mra nê ixwýr pøj. ¹² Hâmri nhùm Tirtùm Karõ ma mẽ hkôt inhmê. Mẽ kêp Ijaew kêt tã nhùm ixãmnhĩx ma mẽ hkôt ixpa kaxyw mẽ hkôt inhmê pa ma mẽ hkôt mô. Nhùm Jope kamã mẽ kot Jejus kôt amnhĩ xunhwýr xwýnh kwýjaja kêp oja ma mẽ ixkôt mô. Pa mẽ mô nê Sejarej kamã Konêreja wýr pøj. ¹³ Hâmri nhùm mẽ ixpumu nê mẽ inhmã amnhĩ jarê. Tirtùm kapêr o wrýk xwýnh kot hwýr wrýk nê õrkwý hwýr àr nê tanhmã kãm kapêr toja nhùm inhmã harê. Na xep pre kãm: “E kêr ka ma Jope hwýr amã mẽ àpênh xwýnh kwýjê rê kê mẽ ma hwýr mô. Hâmri nê kamã Simāw Pêtre japrõ nê man akupýn awýr o mô kê tanhmã mẽ amã ujarênh to. ¹⁴ Koja mẽ amã tanhmã mẽ apê Tirtùm kra hprãm xaj tanhmã mẽ ate amnhĩ nhĩpêx to hã mẽ amã karõ ka mẽ ama nê mar týx nê hkôt amnhĩ nhĩpêx. Ka mẽ anhõrkwý kamã akwýjê mẽ apimràatã ama nê mar týx nê. Hâmri nê kot mẽ amã hã karõ xà hkôt amnhĩ nhĩpêx nhùm Jejus mẽ ate amnhĩ tomnuj pê mẽ apytãr pa.” Anê.

—Na xep pre ã Tirtùm kapêr o wrýk xwýnhja kãm ijarênh anê. Jakamã nhùm ixwýr jajê rê pa ma mẽ hkôt mô. ¹⁵ Hâmri nê

kormã mẽ kãm tanhmã Jejus jarënh to. Tanhmã kot mẽ panê amnhĩ nhĩpêx to hã harê. Nê kormã mẽ kãm ixujarënh o ixãm rôm nhũm Tirtũm Karõ te wam kot mẽ panhĩpêxta pyrà nê mẽ hwỳr wrỳ nê mẽ hkarõ mã gjêx pa. ¹⁶ Pa ja hã mẽ omu nê Pahihti Jejus kot akupỹm kaxkwa hwỳr nojarêt nê tanhmã mẽ pamã kapêr tota mã ijamaxpêr kurê kumrêx. Na pre mẽ pamã: “Finat Juãw Paxis na pre hte gô ho mẽ hkrã kumrãr o pa. Tã koja Tirtũm ta hpãnhã mẽ awỳr amnhĩ Karõ rê nhũm mẽ akarõ mã agjê.” Anê.

—Á na pre Pahihti Jejus akupỹm nojarêt nê mẽ pamã kapêr anê. Jakamã pa ã kot mẽ hipêx anhỳr ã mẽ omu nê ã kapêr anhỳrja mã ijamaxpêr kurê kumrêx. ¹⁷ Na pu prem Pahihti Jejus Kris kôt amnhĩ xunhwỳ nhũm Tirtũm ja hã mẽ pahpumu nê mẽ pahwỳr amnhĩ Karõ rê. Tã te kot mẽ panhĩpêxta pyrà nê mããnên Ijaew kêt xwỳnhtajê hwỳr kurê nhũm mẽ hkarõ mã agjê. Mẽ kêp Ijaew kêt tã nhũm mẽ pahpyrà nê mẽ hwỳr kurê nhũm mẽ hkarõ mã agjê. Tirtũm tãm kot amnhĩ krã hkôt mẽ hwỳr rênh kênã kot pa kêt mẽ nê tanhmã kêp ixãmnrã to. Anê.

¹⁸ Nhũm pre ã Simãw Pêtre mẽ kãm amnhĩ jarënh anê nhũm mẽ kuma nê tãm hamaxpêr nê hkĩnh nê. Nê axte mẽ hã tanhmã kãm nê hkêt nê. Ám mẽ hã Tirtũm mã mex o mex ã harê. Hãmri nê axpên mã:

—Nã ãm hãmri. Mẽ kêp Ijaew kêt tã na prem Jejus kôt amnhĩ xunhwỳ nhũm Tirtũm kot mẽ panhĩpêxta pyrà nê amnhĩ katut kôt mẽ kot amnhĩ tomnuj rênh pa. Nhỹrmã wa hkuri mẽ pahpyrà nê hũr tũm nê pa ho pa kaxyw nhũm ã mẽ hipêx anê. Nã ãm hãmri na ã kot mẽ panhĩpêx pyrà nê mẽ hipêx anê. Anê.

*ãxiok kamã Jejus kwỳ jarënh
Atre 4.36-37*

¹⁹ Tã ra mẽ kot kên o Estewãw kapêr o hpĩr xwỳj ri mẽ kot ã hipêx anhỳrta pyrà nê mẽ kot Jejus kôt amnhĩ xunhwỳr xwỳnhjaja omnuj tỳx o pa. Jakamã nhũm mẽ hkwỳjaja mẽ umaj ma ahpỳnhã krĩ hkwỳ hkôt pigrãnh pa. Wênĩs wỳr nê Sipre hwỳr nê ãxiok hwỳr nhũm mẽ ma ahpỳnhã krĩ hkwỳ hkôt angrã nê kamã pa ho pa. Nê mẽ kãm tanhmã Pahihti Jejus kot mẽ panê amnhĩ nhĩpêx to hã harënh o ri mẽ hkôt pa. No ãm kormã Ijaew pix mã harënh o pa.

²⁰ Tã hãmri nhũm mẽ hkwỳjaja Sipre mẽ Sirên rũm ãxiok hwỳr pan pøj. Hãmri nê kamã mẽ kêp Ijaew kêt xwỳnhjê mã Pahihti Jejus kot amnhĩ nhĩpêx jarënh o pa. Á mẽ kot amnhĩ nhĩpêx anhỳr jakamã na mẽ ra ahpỳnhã ri mẽ kãm harënh o ri pa. Ijaew mã nê mããnên Ijaew kêt xwỳnhjê mã ²¹ nhũm mẽ ma mẽ hkôt ri Pahihti Jejus nhỹ hã mẽ kãm kapêr jarënh o ri mẽ hkôt pa. Hãmri nhũm mẽ ohtô nê amnhĩ nhĩpêx tũm kaga hpa nê hpãnhã amnhĩ kaxyw Jejus kôt hamaxpêr nê hkôt amnhĩ xunhwỳ.

²² Hãmri nhũm Jerujarê kamã Jejus kwỳjaja mẽ harënh ma nê mẽ hwỳr Panãpe mẽ. ãxiok hwỳr mẽ hwỳr kumê. Ma mẽ hwỳr mör nê Jejus kôt mẽ hamaxpêr o hihtỳx kaxyw. ²³ Hãmri nhũm ma mẽ hwỳr mō nê mẽ hwỳr pøj nê mẽ omu. Tirtũm kot mẽ ho mex ã mẽ omu hãmri nê mẽ ý hã hkĩnh nê. Nê mẽ kãm:

—Nã ãm hãmri na ka mẽ ra Jejus kôt amnhĩ xunhwỳ nê hkôt amnhĩ nhĩpêx mex o ri apa. Tã kêt ka mẽ ãm kapêr kôt pix mã ri amnhĩ nhĩpêx rãhã ho ri apa nê aa hkaga hkêt nê. Anê.

²⁴ Panãpeja na pre tãm amnhĩ nhĩpêx o pa. Nê amnhĩ kaxyw Jejus kôt pix mã hamaxpêr mex o pa. Nê Tirtũm Karõ hkôt amnhĩ nhĩpêx rãhã jakamã na pre hte ý hã mẽ kãm Pahihti Jejus kot mẽ panê

tanhmã amnhĩ nhĩpêx to hã harênh o ri mẽ hkôt pa. Hãmri nhũm mẽ kuma nê ohtô nê Jesus kôt amnhĩ xunhwý.

²⁵ Tã nhũm Panãpe ãxiok rũm kato nê kot Sawti japrôr kaxyw ma krĩ pê Tas hwýr mō. ²⁶ Hãmri nê hwýr pōj nê Sawti pumu nê haprô nê ma akupỹm amnhĩ kôt ãxiok hwýr o mō. Hãmri nê kamã mẽ kot Jesus kôt amnhĩ xunhwýr xwýnhjê hkôt wa ri pa hã amgrã pyxi nê hapêx. Nê mẽ ho ohtô nê ri mẽ kãm Jesus kapêr o mẽ ahkre ho ri mẽ hkôt pa. Jakamã nhũm krĩ nhõ xwýnhjaja mẽ kot Jesus kôt amnhĩ nhĩpêx xwýnhjê pumu nê mẽ hã mẽ hixi rê nê mẽ harênh o: “Kris tō nê htōxjaja” anhýr o mẽ harê. ãxiok kumrêx kãm na prem ã mẽ kot Jesus kôt amnhĩ xunhwýr xwýnhjê jarênh anê. Jakamã nhũm mẽ piitã ã mẽ harênh anhýr o pa.

²⁷ Tã nhũm Panãpe mẽ Sawti wa kormã ãxiok kamã paja rôm nhũm Tirtũm nhỹ hã kapêr jarênh xwýnh kwýjaja mẽ hwýr mran pōj. Jerujarê rũm mẽ hwýr mran pōj. ²⁸ Hãmri nhũm mẽ piitã mẽ kot mẽ kapêr mar kaxyw mẽ hwýr akuprô. Jakamã nhũm hõ pê Akapôja kãnhmã xa nê tanhmã mẽ kãm ujarênh to. Tirtũm Karō nhỹ hã mẽmoj kukamã mẽ kãm awjarê nê mẽ kãm:

—Kwa okora kër ka mẽ axkãm ajamak rom. Kojã tokyx pika piitã hkôt mẽ apkur xã hã mẽõja mẽ kêp hkryre nê mẽ piitã mẽ hipêx kêt nê. Anê.

Tã nhũm gaa nê ujarênh xàja kôt mẽmoj ã amnhĩ nhĩpêx anê. Kormã Pahihti Krawti kot mẽ ho amnhĩptar ri nhũm mẽmoj ã amnhĩ nhĩpêx anê. No nhũm kormã ã amnhĩ nhĩpêx anhýr kêt ri nhũm Akapôja kukamã ã mẽ kãm ujarênh anê. ²⁹ Hãmri nhũm mẽ kuma nê tee ri Jutej kamã Jesus kôt mẽ hkwyjê hkukamã hamaxpêr nê axpên mã:

—E kwa pu mẽ Jutej kamã Jesus kôt mẽ pahtō nê pahtōxjê mã pahkãxpore hkwy gō kê mẽ ho amnhĩm awjaprō nê hkur o pa. Anê.

Hãmri nê mẽ kaxyw kãxpore hkwy ho akuprô. Nhũm mẽ hikãxpore hkryre xwýnhjaja ãm mẽ kãm ho hkryre nê kugō nhũm mẽ hikãxpore rũnh xwýnhjaja mẽ kãm ho rũnh nê kugō. ³⁰ Jakamã nhũm mẽ ho hpikuprõnh pa nê Panãpe mẽ Sawti wa kot mẽ hwýr o mōr nê mẽ kãm òr kaxyw wa kãm kugō. Hãmri nhũm wa hamý nê ma Jutej kamã Jerujarê hwýr mẽ hwýr o mō. Hãmri nê hwýr pōj nê mẽ kot Jesus kapêr o mẽ ahkre xwýnhjê mã kugō. Hãmri nhũm mẽ kãm Jesus kôt mẽ htō nê htōxjê mã o anhgrã nhũm mẽ hamý nê hkĩnh nê ho amnhĩm awjaprō.

12

Mẽ kot Simãw Pêtre pynênh nê haxã ã mẽ harênh

Matêwre 18.19-20

¹ Tã nhũm mẽ ò pahi Eroxxa ò pōristi mã Kris kwýjê hã amýnê nhũm mẽ mẽ hipêx kati nê nhũm mẽ amnhĩ xã htýx kamã hamak o pa. ² Juãw tō Xiakreja nhũm mẽ pahi Eroxx nhỹ hã unê nê hkanhwýr o kupĩ. ³ Hãmri nhũm Ijaew kãm ja mex jakamã nhũm pahi Eroxx hpãnhã mẽ kãm Simãw Pêtre hã amýnê nhũm unê nê haxã. Mẽ kot pãwti kaxkrit kêt kur ã mẽ hkĩnh xã hã arĩgro pê Pasja ã nhũm prem unê. ⁴ Na pre Eroxx Simãw Pêtre hkukamã hamaxpêr o:

—Nã koja mẽ hkĩnh hapêx pa Ijaew nom kupĩ nhũm rĩ amnhĩ pumu. Anê.

Hãmri nhũm pōristi kot Simãw Pêtre jamãr xwýnhjaja kêp 16. Nhũm mẽ axpên pãnhã kêp 4 kapên nê hamãr rãhã ho kuhê. ⁵ Nhũm arĩ mẽ hagjênh xã kamã hkrĩ ho hkrĩ. Hãmri nhũm Kris kôt htō nê htōxjaja harênh ma nê tee ri hkukamã

hamaxpêr hāmri nê axpên wÿr akuprô nê ho Tirtûm wÿr rāhā ho hkrī.

Tirtûm kapêr o wrÿk xwÿnh kot Simāw Pêtre kator ā harēnh

⁶ Tā nhûm ra mē hkīnh hapêx nhûm kamāt. Hāmri nhûm pahi Erox kot tanhmā Simāw Pêtre ho xā hā arigroja wÿr nhûm kamāt nhûm pôristijaja arī mē hagjênh xā kamā hamār mex o kuhê. Nhûm kuri wa hamêxkrut nê akutā hijê nê hamār o nō. Kàx o akutā kām ê nê wa ho nō nhûm wa hkaêx kām htÿx gôr nê nō. Nhûm ja wa hakwa krem māānēn hamār o xa. ⁷ Puh nhûm Tirtûm kapêr o wrÿk xwÿnhjê hōja mē hwÿr axā nê wrÿhtak rax kām xa. Hāmri nê Simāw Pêtre grêk nê kumra nê kām:

—Pa Simāw Pêtre? E kwa tokyj kànhmā xa pu mō. Anê.

Hāmri nhûm hkrākato nê omu nê kànhmā âm kurê kumrêx nhûm kaxprexā hā kàxja axrê nê pykap rôrôk nê hikwÿ. No nhûm kuri pôristi wa nôr xwÿnhhta wa mar kêt nê. Wa arī ôt tÿx nê nō. ⁸ Hāmri nhûm Tirtûm kapêr o wrÿk xwÿnhja Simāw Pêtre mā:

—E tokyx anhō kamīs jaxā nê amnê ixkôt tē pu pakato nê ma tē. Anê.

⁹ Hāmri nhûm kamīs nê hparkā jaxā nê ma hkôt tē. No âm kormā amnhī pumunh mex kêt nê. Te hpimtir kām ā kot amnhī nhîpêx anhÿr pyrāk ā amnhī kamnhîx.

¹⁰ Hāmri nhûm wa hakwakrem pôristi wa kot hamār o wa âm xwÿnhja hānh wa tē nê wa hakre nê hpānhā ihōja wa hānh wa tē no nhûm mē ôt tÿx nê hkrī nê wa omunh kêt nê. Nhûm wa hakwakre nhîtep xā hkôt wa tēn kato nê hpānhā krī nê kahê xā hā hakwakreja wÿr wa tē. Hāmri nhûm tām wa kām amnhī kahê xā mē nhûm wa kato nê pry hā tē. Ja kôt nhûm Tirtûm kapêr o wrÿk xwÿnhja akunok nhûm Simāw Pêtre axte omunh kêt nê. ¹¹ Hāmri

nê hprī hā amnhī pumunh kurê kumrêx nê hamaxpêr o:

—Kwa te ixpimtir kām ā ixte amnhī nhîpêx anhÿr pyrāk tā xep ixpimtir kêt. Tirtûm na ixwÿr kapêr o wrÿk xwÿnhja mē nhûm ixwÿr wrÿ nê mē kêp ixkator. Pahi Erox ra kot ixpîr nhûm ixkwÿ Ijaew kām ja prām tā nhûm mē kêp ixkator. Nà âm hāmri na Tirtûm ā mē kêp ixkator anê. Anê.

¹² Hāmri nê Marir nhôrkwÿ hwÿr htēm kurê kumrêx. Juāw Makre katorxā Marirja nhûm ôrkwÿ hwÿr tē nhûm mē ra kamā hpikuprôn h rax nê ho Tirtûm wÿr o hkrī nhûm tām mē hwÿr tē. ¹³ Hāmri nê kormā kapôt ā hakwa krem mē kām kahê xā tatak o xa nhûm ixkre kamā mē kām âpênh xwÿnh Rotreja kuma nê hwÿr tē. ¹⁴ Hāmri nhûm kām kapêr nhûm amnhī jaêr pê kuma nê hkīnh nê. Nê kormā kām kahê xā mēnh kêt ri ma akupÿm tē nê mē kot ho Tirtûm wÿr xwÿnhjê hwÿr axā nê mē kām:

—Xê pêr Simāw Pêtre na tē nê kapôt ā hakwakrem xa nê inhmā kapêr.

¹⁵ Hāmri nhûm mē tee ri kuma nê kām:

—Kwa arī mē hagjênh xā kamā hkrī kênā. Mān ka tanhmā amnhī krā amnhī to hā na ka ri atÿx ā akapêr anê. Anê.

Hāmri nhûm mē kām:

—Ma tanhmā kot pa kêt ri ixkrā amnhī to? âm hāmri na pa mē amā harê. Mē kam nê mra nê omu. Anê.

Nom nhûm mē kuma nê âm kuma nê kām:

—Nà tām kêt. Kaxkwa rûm Tirtûm mā hamār o pa xwÿnh mân amā kapêr nom tām kêt. Anê.

¹⁶ Rôm nhûm Simāw Pêtre arī hakwakre tatak o xa. Hāmri nhûm mē jatā hwÿr mra nê kām kahê xā mē nê amnhī jaêr pê omu nê hkīnh nê. ¹⁷ Hāmri nhûm kànhmā mē kām îhkra hpê nê mē ho hpinhkrênh pa nê mē kām:

—Nà Tirtùm na ixwỳr kapēr o wryk xwỳnhja mẽ nhũm ixwỳr wry nē pōristi pē ixkator. Anē.

Hāmri nē mẽ kām:

—E kêr ka mẽ Xiakre nē Jejus kôt mẽ pahtō nē pahtōxjê mã ijarē kê mẽ ijarēnh mar kurê kumrêx. Nom kot paj ixkato nē ma krī hō hwỳr mō. Anē.

Hāmri nē mẽ kêp kato nē ma mō.

¹⁸ Tã nhũm apkati nhũm pōristi kot hamār o hkrī xwỳnhjaja hkrã hapôj nē tee hapēr nē nhỹri omunh kêt nē. Hāmri nē tee ri amnhĩ kukamã hamaxpēr o kãm ma htỳx kumrêx nē axpên mã:

—Kwa tanhmã na pre we amnhĩ to nē mẽ pahpê akunok? Tanhmã koja we pahi Erox hã mẽ pahkukja pu mẽ harēnh to? Anē.

¹⁹ Hāmri nhũm pahi Erox hpikunor ã harēnh ma nē axtem pōristi hkwyjê mã anē nhũm mẽ mra nē tee ri mẽ hagjēnh xà kamã hapēr nom nhỹri omunh kêt nē. Hāmri nhũm Erox mẽ kot hamār xwỳnhjê kamã gryk tỳx kumrêx nē amnhĩ wỳr mẽ hã karō nē mẽ kãm:

—Kwa nok? Mẽ ate hamār rãhã ho akuhê hã ixte mẽ amã karō htã nhũm tanhmã amnhĩ to nē akunok. Nà kot paj mẽ anhmex ka mẽ rĩ amnhĩ pumu. Anē.

Hāmri nhũm mẽ tee ri kãm amnhĩ tã aprãr kaprỳ nhũm mẽ hã amỳnê nhũm mẽ ho kator nē ma mẽ o mra nē mẽ himex. Hāmri nhũm pahi Erox Jutej rũm kato nē ma Sejarej wỳr mō nē hpãnhã kamã pa ho pa.

Pahi Erox tanhmã htyk to hã harēnh

Wam Pêtre 1.24-25

²⁰ Krī pē Xir mẽ Sito wa kamã mẽ pa xwỳnhjaja na pre htem pahi Erox nhō pyka hwỳr pa nē mẽ kêp amnhĩm apkur xà hã mẽõ japrôr o pa. Tã nhũm Erox kot mẽmoj mỳrapê mẽ kamã gryk jakamã nhũm mẽ tee ri mẽ kêp ujaprôr kaxyw mẽ hwỳr mra nom nhũm mẽ kãm mẽmoj kwỳ ho wēnê hkêt nē. Hāmri nhũm mẽ tee ri amnhĩ

kukamã hamaxpēr nē pahi Erox nhō kōwenatō Pratōja wỳr mra nē kãm:

—E awỳr na pa mẽ mra. Kwa mẽ ixyr pē pahi Erox mã tanhmã akapēr to kê ama nē mẽ ixkamã gryk kêt nē. Pa mẽ axte mẽ awỳr mra nē mẽ apê mẽmoj kwỳ japrôr o ri ixpa. Anē.

²¹ Hāmri nhũm mẽ kuma nē hwỳr tē nē mẽ yr pē tanhmã kãm kapēr to nhũm kuma hāmri nē kot tanhmã mẽ kãm kapēr to kaxyw mẽ kãm arĩgro hta.

Tã nhũm ra kot arĩgro hyr xwỳnhta kato nhũm Erox kêp pahi hã ê mex jaxà nē tē nē kêp pahi hã mẽ hkrī xà kamã nhỹ nē tanhmã mẽ kãm kapēr to. ²² Mẽ kãm kapēr ryy nē. Hāmri nhũm mẽ kuma nē hêx rom kãm mex o mex ã harê. Nē kỳx pēê axpên mã harê nē harēnh o:

—Kwa pahi Erox kêp mẽ panhĩõ hkêt. Pēr kaxkwa rũm Mẽpahpãm na pre mẽ pahwỳr wry nē ã mẽ pamã kapēr mex anē. Anē.

Hāmri nē te kêp Tirtùm pyrãk o hipêx nē kãm mex o mex ã harê. Nom hêx rom ã harēnh anē. Kot mẽ mar nē kãm mẽ hkĩnh nē akupỳm mẽ kãm mẽmoj to wēnê hprãm xaj nhũm mẽ hêx rom ã axpên mã mex ã harēnh anē. ²³ Hāmri nhũm mẽ kuma nhũm ja kãm mex nē nhũm hkĩnh nē mẽ mar o nhỹ nē kêp Tirtùm pyrãk ã harēnhja nē tanhmã mẽ kãm nē hkêt nē. Jakamã nhũm tee ri amnhĩ tã omu nē hwỳr kapēr o wryk xwỳnhjê hō mẽ nhũm hwỳr wry nē tanhmã ho nhũm õhy kamã kutôj rax nē htyk tokyx anē.

Panãpe mẽ Sawti wa akupỳm ãxiok hwỳr mōr ã wa harēnh

Atre 11.27-30

²⁴ Tã nhũm mẽ ra ohtō nē Tirtùm Kra Jejus kot tanhmã mẽ panê amnhĩ nhĩpêx to hã harēnh ma nē hkôt amnhĩ xunhỳ.

²⁵ Hāmri nhũm Panãpe mẽ Sawti wa ra Kris kôt htō nē htōxjê mã

kàxporeta jamý nê ma Jerujarê hwýr o mō nê mē kām kugō. Hāmri nê ma akupým āxiok hwýr nojarê nê war amnhî kôt Juāw Makre o mō. Hāmri nê mē ma mō nê akupým mē hwýr pōj.

13

Tirtūm kot Panāpe mē Sawti wa hyr

Atre 9.15-16; Rōmān 1.1

¹ Āxiok kamā Kris kôt mē kot axpēn to htōjaja kot Tirtūm nhý hā kapēr o mē ahkre ho pa xwýnhjē nhīxi ā kot anhýr. Na pre Panāpe nê Sawti nê Simeāw kà htykre nê Rusti pē Sirēn nhō xwýnh nê pahi Eroxkrāmnhwý Mānahēja. ² Jakamā nhūm prem mēmo arīgro hā axpēn wýr akuprō nê Tirtūm mā mex o mex ā harēnh kaxyw apkur kêt rāhā kām amnhî jarēnh o hkrī. Hāmri nhūm Tirtūm Karō mē kām tanhmā kapēr o amnhîrit to nê mē kām:

—E kêr ka mē Panāpe mē Sawti war ata nê wa kot inhmā tanhmā amnhî nhīpêx to ho pa kaxyw wa ām. Anê.

³ Hāmri nhūm mē kuma nê wa hyr kurê kumrêx nê wa himōk ā mē ĩhkra jaxwý nê wa ho Tirtūm wý. Hāmri nê wa kot Tirtūm mā tanhmā amnhî nhīpêx to ho pa kaxyw wa kumê nhūm wa ma mō.

Wajaga kot Jejus nê hkrāmnhwý kurê hā harēnh

Atre 8.9-24

⁴⁻⁵ Tā nhūm Tirtūm Karō krī pē Serêw wýr Panāpe mē Sawti wa kumê nhūm wa ma hwýr mō. Nê amnhî kôt Juāw Makre ho mō. Kot tanhmā wa ho ajuta hto ho wa hkôt pa kaxyw. Hāmri nê wa mē mō nê Serêw wýr pōj nê pàr krem axà nê ma gō hipôk pē Sīpre hwýr mō. Hāmri nê gō hipôk ā krī pē Saramīn wýr pōj nê Ijaew nhō Tirtūm kapēr o mē ahkre xà hā ixkre hwýr tē nê kamā Jejus kot mē panê tanhmā amnhî nhīpêx to hā mē kām harēnh o wa xa.

⁶⁻⁸ Tā nhūm mē krīja rūm kato nê hpānhā gō hipôk kôt mō nê hatur xà kamā krī pē Papos wýr pōj. Hāmri nê kamā wajaga Pajejus pumu. Gresjê kapēr kām hixi pē Erīm. Erīm haxwýja kêp Ijaew. Na pre hte hêx rom te kêp Tirtūm nhý hā kapēr jarēnh o pa xwýnh pyrāk o amnhî nhīpêx nê ma mē kām ujarēnh o ri mē hkôt pa. No ām mē kām amnhî to hêx o pa. Gō hipôkja ā pahi Sejupaw hkrāmnhwý na pre. Pahi Sejupawja āhpumunh tỳx jakamā na pre Panāpe mē Sawti wa harēnh ma nê kām wa kapēr mar prām nê wa kot kām Tirtūm kapēr jarēnh kaxyw amnhî wýr wa kuwý. Nom nhūm hkrāmnhwý wajaga Erīmja kām wa hkīnh kêt nê wa nê kām kapēr kām hihtỳx nê kām:

—Kwa nà wa kapēr mar kêt nê. Kot kaj war ama nê wa urāk nê amnhî kaxyw Jejus kôt ajamaxpēr nê hkôt amnhî xām. Kwarī wa kapēr mar kêt nê. Anê.

⁹ Hāmri nhūm Sawti ra axtem pānhā hixi. Ra hpānhā kêp Pawre. Nhūm Tirtūm Karō ra hkarō mā àr jakamā nhūm ý hā wajagata pumu nê wa nê hkrāmnhwý mā kapēr ā kām akir nê kām:

¹⁰ —Tk. Kwa pēr apê Satanasti hkwy hā na ka ā wa inhnē kām akapēr anê. Na ka hte mēmoj punuj pix kukamā ajamaxpēr nê mēmoj mex nê mē no kupyw o apa. Tirtūm kapēr mex kumrêx tā ka axtem nê nê mē hkurê ho ri apa. ¹¹ Ā ate amnhî nhīpêx anhýrja mýrapê koja Tirtūm tanhmā ato ka ano hkre nê arīt kêt o atā apkati xohtō nê kām ga. Anê.

Hāmri nhūm no hkre kurê kumrêx nê tee ri rīt kaxyw no pikrar pýnh o xa nom mēmoj pumunh kêt nê. Hāmri nê mēhō kot hpa hā hpyr nê ōrkwý hwýr ho mōr kaxyw ri amnhî pu hā mē hapēr pēnh o xa. ¹² Hāmri nhūm hkrāmnhwý pahīhtija tee ri ja hā omu nê amnhî kaxyw Jejus kôt

hamaxpêr nê hkôt amnhî xâm kurê kumrêx. Hâmri nê Pawre mē Panāpe wa kot tanhmā Tirtūm kapêr jarênh to hā wa kuma nê hamaxpêr o:

—Hêxta waa nê. Aa ixte ā mēhō kapêr kot anhÿr mar kêt tā pa jarāhā kuma. Nā ām hāmri na Jejus jarênhja. Anê.

Pawre mē Panāpe āxiok ō hwÿr wa mōr ā wa harênh

Atre 15:38

¹³ Tā nhūm Pawre mē Panāpe mē Juāw Makre wa mē krī pē Papos rūm kato nê hpānhā ma pyka hō hwÿr mō. Pār kām ma pyka pē Pāpir wÿr mō nê kamā krī pē Perke hwÿr pōj. Hāmri nhūm Juāw Makre tanhmā hamaxpêr to nê tee ri axte wa hkôt mōr kukamā hamaxpêr hāmri nê wa hkaga nê awjanā nê ma akupÿm Jerujarē hwÿr ahte mō. ¹⁴ Jakamā nhūm Pawre mē Panāpe wa ahte Perke rūm kato nê hamū pika pē Pisit kām krī pē āxiok wÿr mō nê hwÿr pōj. Nhūm Ijaew nhō arīgromnu pē sap kato nhūm wa Tirtūm kapêr o mē ahkre xā hā ixkre hwÿr wa tē nê hwÿr axā nê nhÿ. ¹⁵ Hāmri nhūm mēhō mē kām Tirtūm kapêr ā kaga htūm kwÿ kamā harênh o xa. Mojes mē Tirtūm nhÿ hā kapêr o mē pa xwÿnhj kot kapêr ā kaga hkwy kamā nhūm mē kām kamā harênh o xa. Hāmri nê kamā harênh pa nhūm mē ahkre xwÿnhjaja Pawreja wa omu nê wa hwÿr mēhō mē nhūm wa hwÿr tē nê wa kām:

—E na mē ijahkre xwÿnhjaja war ate mē inhmā axujarênh prām nê māmri mē inhmā mēmoj jarênh kaxyw nhūm mē war atā anê. Anê.

¹⁶ Hāmri nhūm wa kuma nhūm Pawre kānhmā xa nê mē hpinhkrênh kaxyw mē kām kānhmā ĩkra nhūm mē omu nê hpinhkrênh pa nhūm mē kām awjarē. Amnhî kwÿ pē Ijaewjē mē mē kēp Ijaew kêt xwÿnhjē kām Tirtūm kĭnh xwÿnhjē mā nhūm mē kām awjarē. Nê mē kām kapêr

ryy nê. Tirtūm kot tanhmā mē hkukamā Ijaew nhĭgêt nê pāmjē nhĭpêx to hā mē kām awjarē nê mē kām:

—E kot paj mē amā awjarē ka mē inhma. ¹⁷ Nā mē ixpê Ijaew nhō Tirtūmja amnepēm na pre mē ixpê Ijaew pāmjē rē. Kormā Ejit kām mē pa ri nhūm amnhî kaxyw mē kurê nê mē ho ohtō rax kumrêx. Hāmri nê mē kaxyw hihtÿx jakamā Ejit rūm mē kator pa. ¹⁸ Hāmri nê mē ho mex ryy ho mē hkôt pa. Mē kot kapôt ā ri pa hā amgrā pē 40 kamā mē kot htÿx ri tanhmā amnhî nhĭpêx to ho pa htā nhūm mē kamā ukapri ryy ho mē hkôt pa. ¹⁹⁻²⁰ Na pre mē kām pyka pē Kanaā kamā mē pa xwÿnhjē nhĭmex pa. Kanaā kamā mē pa xwÿnhjaja ahpÿnhā xpēn kaxyw mēō krī pē 7ja nhūm mē kām mē ho hapêx pa. Hāmri nê hpānhā mē inhĭgêtjē mā pykaja o hpigrānh pa. Mē ixpê Ijaew nhĭgêtjē mā ho hpigrānh pa nhūm mē kamā pa hā amgrā xohtō nê. Hā amgrā pē 450. Tā nhūm Tirtūm hpānhā mē kām juisti hkwy rē nê mē kaxyw mē unhwÿ nhūm mē ho pa. Tā nhūm hpānhā Sāmuew mē ho amnhĭptā nê mē o pa. Kēp Tirtūm nhÿ hā kapêr jarênh o pa xwÿnhjē hō nhūm Tirtūm mē kaxyw ām.

²¹ —Tā nhūm mē ixpāmjaja xpēn ma nê ra te krī hkwy kamā mē urāk nê mēō pahi kot Sāmuew pānhā mē ho amnhĭptār o pa hprām xāj amnhî to Tirtūm wÿ nê kām: “Pa Tirtūm. Kwa mē ixkaxyw pahi hō xām kē mē ixto amnhĭptār o pa nā. Ja na mē inhmā hprām tÿx kumrêx.”

—Anhÿr o amnhî to hwÿr jakamā nhūm mē kuma nê mē kaxyw Sawti xām. Kisti hkra na pre. Nê mē inhĭgêt Pējamī kanrēhā htāmnhwÿ na pre. Hāmri nhūm Tirtūm mē kaxyw ām nhūm kēp mēō pahi nê mē ho amnhĭptār o pa hā amgrā pē 40. ²² Tā nhūm Tirtūm kator nê hpānhā mē kaxyw Tawi

xām. Hāmri nē harēnh o: “Nà Jese hkra Tawija na hte inhmā hprām xà hkôt amnhī nhīpēx mex o pa.” Anē.

²³—Tā Jejus kēp Tawi hkanrēhā htāmnhwý na pre. Kukamā na pre Tirtüm mē ixpē Ijaew nhīgētjē mā harē nē harēnh o: “Koja nhýrmā Tawi hkanrēhā htāmnhwýjē hō mē ate amnhī tomnuj pē mē apytā.” Anhýr o hkukamā mē kām harē. ²⁴No nhūm kormā Jejus kot mē ixpē Ijaewjē mā amnhī to amnhīrīt kēt ri nhūm Juāw Paxis kumrēx hkukamā mē ixwýr mō nē mē inhmā Tirtüm kapēr jarēnh o ri mē ixkôt pa. Nē mē ixte amnhī tomnuj kaga nē hpānhā tām amnhī nhīpēx o ixpa hā mē ixpumunh kôt mē ixkrā kumrār ā mē inhmā karō ho pa.

²⁵—Tā mē kām kapēr o pa ryy nē ra hatur xām mēnh kaxyw nē amnhī tā tanhmā mē inhmā kapēr to nē mē inhmā: “Na ka mē ixpumu nē atýx Tirtüm kot mē akaxyw pa ixām ā ixkamnhīx nom pa hkēt. Kot mē pakaxyw ām mā xwýnhta kukamā na pa pre mō. Tām kot amnhī to rax o ijakrenh. Nē kot amnhī to mex o kot ijakrenh. Jakamā na pa hte ām kukwak ri ixpa nē amnhī tā hā xpijaām o ixpa.” Anē.

—Na pre ā Juāw Paxisja mē inhmā Jejus jarēnh anhýr o pa.

²⁶—Tā kwa mē inhma mē apē Apraāw kanrēhā htāmnhwýjaja nē mē apē Ijaew kēt xwýnh kām Tirtüm kīnh xwýnhjaja. E mē apiitā ixkapēr ma nē kām ajamaxpēr týx rāhā ho ri apa. Nà mē pahpiitā mē pakaxyw na Tirtüm kapērja. Kot mē pahte amnhī tomnuj pē mē papytār ā amnhī jarēnhja mē ixpē Ijaew pix kaxyw kēt. Mē pahpiitā mē pakaxyw na. Mē pahpiitā mē pahte ja mar nē hkôt amnhī nhīpēxja na Tirtüm kām hprām. ²⁷Nom Jerujarē nhō xwýnhjē mē mē àptār tūmrejaja na prem

Jejus kēp Tirtüm kot mē pakaxyw ām xwýnh ā harēnh mar tā hkôt hamaxpēr kēt nē. Na pre htem mē inhō arīgromnu pē sap ā akuprō nē xpēn mā Tirtüm kapēr ā kagà htüm kamā ujarēnh o hkrī. Kagāja kamā Tirtüm nhý hā mē kapēr o mē pa xwýnhjaja kot hprī hā Jejus jarēnh nē hā kagà nhūm mē kot mar tā hprī hā mar týx kēt nē. Jakamā na prem axtem nē mē kām hā amýnē. Tirtüm nhý hā kapēr jarēnh xwýnhjaja kot mē hkukamā mē harēnh xāja kôt nhūm mē kot hpír kaxyw mē kām hā amýnē.

²⁸⁻²⁹ Kot tanhmā amnhī tomnuj to hkēt tā nhūm mē amarī hā pahī Pirat wý. Kot mē kām hā àmnēnh nhūm ō pōristijaja kot hpír kaxyw nhūm mē hā kuwý nhūm mē kām kupī. Ra Tirtüm kapēr ā kagà htüm kot mē hkukamā mē harēnh xà hkôt. Hāmri nhūm mē kot hkôt pa ho pa xwýnhjaja pī kahpa nē ho wrý nē ma o tē nē kēn kre kamā haxà. ³⁰Tā nhūm Tirtüm akupým ho htūr ³¹nhūm xatā hkôt mē pa ho pa xwýnhjē hwýr hapōj. Kormā htyk kēt ri ra Garirej rüm Jerujarē hwýr hkôt mē pa ho mē pa xwýnhjē hwýr xatā mē hwýr hapōx o pa. Jao hā arīgro xohtō nē nhūm prem piitā omu. Tā mē tāmjaja na htem mē ixpē Ijaew mā harēnh o pa.

³²⁻³³ —Amnepēm Tirtüm na pre mē ixpē Ijaew nhīgētjē mā tanhmā Kra Jejus jarēnh to. Kormā mē pahwýr wrýk kēt ri tanhmā mē kām harēnh to. Jakamā ra kot hkukamā harēnh xà hkôt nhūm pre mē pahwýr wrý nē tanhmā mē panē amnhī nhīpēx to. Tā mē ate harēnh mar kaxyw na pa wa man mē awýr mō. Amnepēm finat Tawi na pre Tirtüm kapēr kwý hā kagà. Tirtüm mex ā mē grer xà pē Sam 2ja kamā hā kagà. Te Tirtüm tām Jejus mā kapēr pyrāk o hā kagà nē hā kagà ho:

Apē Ixkra na ka.

Tã mẽ piitã mẽ kot apê Ixkra
hã apumunh kurê kumrêx
kaxyw na pa jarãhã mẽ kãm
ato amnhĩrĩt. Anê.

Nhũm pre ã Tĩrtũm Jejus mã kapêr
anê nhũm Tawi ô ri mẽ pamã hã
kagà.

³⁴ —Amnepê m na pre Tĩrtũm
tanhmã Kra Jejus kukamã harênh
to. Mẽ kot hpĩr nhũm kot akupỹm
ho htĩr kukamã hã amnhĩ jarê.
ĩ hkro pymaj kot mẽ htykjê pê
hkaxàr nê akupỹm ho htĩr ã nhũm
hkukamã hã amnhĩ jarê. Te Kraja
mã amnhĩ jarênh pyrã nê amnhĩ
jarênh o:

E kot paj ato mex rax nê. Ixte Tawi
mã amnhĩ jarênh xà hkôt.

Anhỹr o hkukamã harênh xà hkôt
akupỹm ho htĩr nhũm axte htyk kêt
ã harê.

³⁵ —Nê kagàja nhãm hô hõ kot
tanhmã Jejus jarênh kute. Te Je-
jus tãm Tĩrtũm mã kapêr pyrã nê
harênh o:

Ixpê Akra hã ixte akapêr kôt ri
amnhĩ nhĩpêx rãhã ho ixpa
jakamã kot kaj ixpumunh
mex pa inhĩ hkro hkêt nê.
Anê.

Tĩrtũm kapêr ã kagà htũm kot ã
Jejus jarênh kot anhỹr. ³⁶ Nom ã
Tawi jarênh anhỹr kêt nê. Tawi
na pre Tĩrtũm kapêr kôt amnhĩ
nhĩpêx mex o pa hãmri nê ty nhũm
prem mẽ panhĩgêjtjê nhĩhkô hã
haxã hãmri nhũm ĩ hkro nê hapêx.

³⁷ —Tã no Jejusja Tĩrtũm kot
akupỹm ho htĩr jakamã nhũm Tawi
pyrãn ĩ hkro nê hapêx kêt nê.

³⁸ —E mẽ inhmar tỳx nê
ixkwỳjaja. Kra Jejus pix kukwak
na hte Tĩrtũm amnhĩ katut kôt mẽ
pahte amnhĩ tomnuy rê. ³⁹ Jakamã
kot kaj mẽ ãm Mojes kapêr kôt pix
mã ri amnhĩ nhĩpêx nhũm Tĩrtũm
tee ri ja hã mẽ apumu nê amnhĩ
katut kôt mẽ ate amnhĩ tomnuy
rênh kêt nê. Jejusja tapxipix na pre
htyk o Tĩrtũm mã mẽ pahte amnhĩ
tomnuy piitã hpãnhã amnhĩrer pa.

⁴⁰⁻⁴¹ Amnepê m na pre Tĩrtũm kapêr
nhỹ hã kapêr xwỳnhjê hõja mẽ kãm
Tĩrtũm kapêr jarê nê hã kagà. Te
Tĩrtũm tãm mẽ kot kapêr ã hpêr o
pikênh xwỳnhjê mã kapêr pyrã nê
mẽ kãm:

E kot paj aa mẽ ate mẽmoj pumunh
kêt ô ho anê.

Nhũm mẽhõ mẽ amã harê ka mẽ
harênh ma nê ãm ama.

Nhũm mẽ kot omunh mex xwỳnhjê
hõ kot hprĩ hã mẽ amã
harênh tã ka mẽ ãm ama nê
hkôt ajamaxpêr kêt nê.

Hãmri nê tee ri tanhmã kãm aja-
maxpêr to ho ri apa. Anê.

Ã Tĩrtũm mẽ kãm kapêr anhỹr
jakamã kwa mẽ o kora. Apu mẽ
kajaja na pre ã mẽ ajarênh anê rỳ
ko. Anê.

⁴² Nhũm pre ã Pawre mẽ kãm
ujarênh ryy anê. Hãmri nê Panãpe
mẽ wa ixkreta rũm kator kaxyw
nhũm mẽ kot mar o hkrĩ xwỳnhjaja
tee ri ma wa mõi ã wa omu nê ma
wa hkôt mra nê wa kãm:

—Kwa war axujarênhja na mex
kumrêx. Mẽ inhmã axte mar prãm.
Xà koja axte sap kato ka wa akupỹn
mẽ ixwỳr wa tẽ nê axte mẽ inhmã
awjarê? Anê.

Hãmri nhũm wa mẽ kãm:

—Tõe. Nà kot paj war anê. Anê.

⁴³ Hãmri nê wa ma tẽ nhũm mẽ
hkwỳja ma wa hkôt mra. Ijaew
kwỳjaja nê Ijaew kêt xwỳnh kãm
Tĩrtũm kĩnh xwỳnhjaja nhũm mẽ ma
wa hkôt mra. Hãmri nhũm wa pry
hã mẽ kãm kapêr o mõi. Tĩrtũm kot
mẽ kutã nojarêr rãhã ho pa nhũm
mẽ kot amnhĩ tã omunh nê hkôt
amnhĩ nhĩpêx tỳx rãhã ho pa nê
hkaga hkêt ã mẽ kãm kapêr o mõi.

⁴⁴ Tã nhũm axte sap nhũm krĩ
nhõ xwỳnh piitã axte Tĩrtũm kapêr
mar kaxyw ixkre wỳr akuprõ.
Ijaewjaja nê Ijaew kêt xwỳnhjaja.
⁴⁵ Hãmri nhũm Ijaew kwỳjaja tee ri
mẽ amnhĩ wỳr Ijaew kêt xwỳnhjê
pumu nê mẽ hã Pawre mẽ Panãpe
wa kamã gryk nê. Mẽ kãm Ijaew
kêt xwỳnhjaja kot Tĩrtũm kapêr mar

prām kêt jakamā mẽ hã wa kamã gryk nê. Hãmri nê Pawre kapêr ma nê xatã kãm kapêr punuj nê kãm:

—Tk. Kwa na ka Tirtüm kapêr jarênh o axêx. Ja kot anhÿr kêt. Anê.

⁴⁶ Nom nhùm wa kãm mẽ uma hkêt nê. Wa âm Tirtüm Karô nhÿ hã amnhĩ to htÿx nê wa mẽ kãm kapêr. Nê amnhĩ tã tanhmã mẽ kãm kapêr to nê mẽ kãm:

—Nã wa ixpyrà nê mẽ apê Ijaew jakamã na pa mẽ akumrêxjê mã Tirtüm kot mẽ pakaxyw Jejus xãm ã harê. Tã ka mẽ ama nê âm ama nê te mẽ ate hkaga pyrà nê ã wa inhmã akapêr anê nê wa ixte kapêr o ixêx ã wa ijarê. Pêr âm mẽ ate mẽ amã Tirtüm mẽ Kra wa kuri mẽ atir tùm nê mẽ apa hprãm kêt. Jakamã kot paj wa mẽ apê ixkato nê hpãnhã ma Ijaew kêt xwÿnhjê mã Jejus kapêr jarênh o ri mẽ hkôt ixpa. ⁴⁷ Tirtüm kapêr ã kagã htüm ã kot mẽ ixte amnhĩ nhípêx anhÿrja kukamã mẽ ijarê nê mẽ ijarênh o: Mẽ ate Ijaew kêt xwÿnhjê mã ixkapêr jarênh o ri apa kaxyw na pa pre mẽ kaxyw mẽ arê.

Jakamã koja pyka piitã hkôt mẽ pa xwÿnhjaja ohtô nê mẽ akapêr ma nê ixkra hkôt amnhĩ xunhwÿ.

Koja mẽ ã amnhĩ nhípêx anê pa ja hã mẽ omu nê mẽ ho ixkra. Anê.

Tirtüm kot ã ja kukamã mẽ ijarênh anhÿr jakamã kot paj wa mẽ apê ixkato nê mẽ apãnhã ma Ijaew kêt xwÿnhjê mã Tirtüm kapêr jarênh o ri mẽ hkôt ixpa. Anê.

⁴⁸ Hãmri nhùm Ijaew kêt xwÿnhjaja amnhĩ tã wa kapêrja ma nê hkĩnh nê Tirtüm kapêr mex o mex ã harê. Hãmri nhùm ra Tirtüm kot nhÿrmã amnhĩ ri mẽ htir tùm nê mẽ pa ho mẽ pa kaxyw mẽ rênh xwÿnhjaja amnhĩ kaxyw Pahihti Jejus kôt hamaxpêr nê hkôt amnhĩ xunhwÿ.

⁴⁹ Tã nhùm pika pê ãxiok kamã mẽ piitã Tirtüm kapêr jarênh ma.

⁵⁰ Nom nhùm Ijaew xaptàr tùmrejaja kãm Pawre mẽ Panãpe wa hkĩnh kêt jakamã na prem krĩ hkôt mẽ kot amnhĩ to rũnh xwÿnhjê mã wa ho kapêr punuj o pa. Mẽ ô pahi mẽ mênĩ kot amnhĩ to rũnh xwÿnhjaja nhùm mẽ kãm tanhmã wa ho kapêr to nhùm mẽ kuma nê mẽ hkôt hamaxpêr. Mênijaja kãm Tirtüm prãm tã amnhĩ kaxyw Jejus kôt hamaxpêr kêt jakamã tanhmã mẽ kot Pawre mẽ Panãpe wa ho hêx toja ma nê hkôt hamaxpêr nê wa kamã gryk nê. Jakamã nhùm mẽ ohtô nê tanhmã wa hipêx to nê amnhĩ nê wa hano. ⁵¹ Hãmri nhùm wa mẽ kêp kato nê xa nê mẽ kot Tirtüm kapêr kaga hã amnhĩ pumunh kaxyw mẽ noo mã wa hparkã kapa nê nê awjagrô kapĩ nê ma wa tẽ. Hãmri nê ma krĩ pê Ikõn wÿr hpãnhã wa mō. ⁵² Hãmri nhùm ãxiok kamã mẽ kot Jejus kôt amnhĩ xunhwÿr xwÿnhjaja hkĩnh nê ri pa. Tirtüm Karô kot mẽ hkarô mã gjêx jakamã nhùm mẽ hkĩnh nê ri pa ho pa.

14

Pawre mẽ Panãpe wa kot Ikõn wÿr mōr ã wa harênh

Matêwre 10.34-35

¹ Hãmri nhùm Pawre mẽ Panãpeja wa ãxiok rùm kato nê hpãnhã ma krĩ pê Ikõn wÿr wa mō. Hãmri nê hwÿr pøj nê Ijaew nhô Tirtüm kapêr o mẽ ahkre xà hã ixkre hwÿr wa tẽ nê kamã mẽ kãm Jejus jarênh o nhÿ. Mẽ kãm harênh kãm hihtÿx jakamã nhùm mẽ hkwyjaja wa kuma nê amnhĩ kaxyw hkôt hamaxpêr nê hkôt amnhĩ xunhwÿ. Ijaew kwÿjaja nê mẽ kêp Ijaew kêt xwÿnh kwÿjaja nhùm mẽ ohtô nê Jejus kôt amnhĩ xunhwÿ.

² Tã nhùm mẽ hkwyjaja kãm Jejus jarênh mar prãm kêt nê. Hãmri nê kato nê ma Ijaew kêt xwÿnh kwÿjê hwÿr mra nê tanhmã mẽ kãm Pawre mẽ Panãpe wa ho hêx

to nê wa ho kapêr punuj nê nhùm mē mar xà hkôt wa kamã gryk nê. ³ Nom nhùm wa tokyx kator nê ma mōr kêt nê arī Tirtūm Karō nhỹ hã amnhĩ to htỹx nê mē kãm Tirtūm kapêr jarēnh o ri mē hkôt pa. Nê kēp mē kutã nojarêt xwỹnh ã harēnh o pa. Nê ý hã mē kãm aa mē kot mēmoj pumunh kêt kwỹ ho anhỹr o ri mē hkôt pa. Jakamã nhùm mē hkwyjaja ja hã wa omu nê wa kapêr ma nê hamaxpêr o:

—Kwa ãm hãmri na wa Tirtūm kēp mē pakamã ukaprĩ xwỹnh ã harē. Pêr ý hã wa kot ã amnhĩ nhĩpêx anhỹr o pa kēnã. Anê.

⁴ Hãmri nhùm Ijaew kêt xwỹnh kwỹjaja wa hkôt hamaxpêr nê wa hkôt amnhĩ xunhwỹ. No nhùm mē hkwyjaja wa hkôt hamaxpêr kêt nê. Ra mē kot Ijaew kwỹ kot tanhmã wa ho kapêr punuj toja ma nê mē hkôt hamaxpêr jakamã nhùm krĩ nhō xwỹnhjaja axpēn kwỹm ri tanhmã wa hkôt hamaxpêr to ho pa. Jao axpēn kwỹm ri wa hkôt hamaxpêr o pa.

⁵ Tã nhùm wa hkôt hamaxpêr kêt xwỹnhjaja axpēn wỹr akuprō nê wa hã amỹnê. Ijaew kwỹjaja nê Ijaew kêt xwỹnh kwỹjaja nê mē ô pahijaja nhùm mē kot kēn o wa htak o wa hpĩr kaxyw wa hã amỹnê. ⁶ Hãmri nhùm wa amnhĩ tã ama nê mē kēp kato nê hpãnhã ma pika hō hwỹr mō. Ma Rikōn kãm krĩ hkwy hwỹr hpãnhã mō. Risti wỹr nê Tepe wỹr nê pu hã krĩ hkwy hwỹr wa mō. ⁷ Wa mō nê pōj nê ma mē kãm Jejus kot tanhmã mē panē amnhĩ nhĩpêx to hã harēnh o ri mē hkôt pa.

*Te grã xwỹnh jarēnh
Atre 3.1-10*

⁸ Nhùm Risti kamã mēhō my hte grã nê hkrĩ xwỹnhja. Katorxã nhōxã kre rům hte grã nê kator jakamã ri pa hkêt nê arī hkrĩ xà kamã hkrĩ ho hkrĩ. ⁹ Jakamã nhùm Pawre mē kãm ujarēnh o xa nhùm kuri mar o nhỹ. Hãmri nê hamaxpêr o:

—Nà pêr Tirtūm àhpumunh o àhpumunh. Mãn kot ixto mex kaxyw àhpumunh tỹx. Nà koja ixto mex. Anê.

Hãmri nhùm Pawre ã hamaxpêr anhỹr ã omu ¹⁰ nê kàx pē kãm kapêr nê kãm:

—E kwa kãnhmã xa. Anê.

Hãmri nhùm kuma nê kãnhmã ãm kurē kumrêx nê ri mra. Nê amnhĩ te kamã hamak o ri mra nê hkĩnh tỹx kumrêx. ¹¹ Hãmri nhùm kuri mē kuhê xwỹnhjaja Pawre kot ã hipêx anhỹrja ã omu nê htỹx wa kēp kaxkwa kamã mēhpãm ã wa hkamnhĩx nê hkĩnh nê axpēn mã:

—Kwa pêr mēpahpãm na wa. Mēpahpãm Jupti mē Mēkurtija na wa panhĩ hã amnhĩ jahkre nê mē pahwỹr wrỹ. Nà ãm hãmri na wa mē pahwỹr wrỹ. Anê.

Nom mē kapêr pē Rikaôn o axpēn mã kapêr jakamã nhùm Pawre mē Panãpe wa mē mar kêt nê. Wa kot mē kapêr mar kêt jakamã ã mē kot wa harēnh anhỹrja mar kêt nê htỹx wa xa. ¹² Nhùm mē ã wa kēp mēhpãm ã wa harēnh anê nê hkĩnh tỹx nê. Panãpeja nhùm prem kēp mē hpãm Jupti hã hkamnhĩx no Pawreja nhùm prem kēp mēhpãm Mēkurti hã hkamnhĩx. Pawreja Mēkurti pyrã nê kapêr japjê rũnh jakamã nhùm mē kēp hã hkamnhĩx. ¹³ Na prem krĩ htã mēhpãm Juptija mã amnhĩ jarēnh xà hã ixkre nhĩpêx nê hkarō nhĩpêx. Hãmri nê hwỹr akuprō nê kãm mex o mex ã harē nê amnhĩ to hwỹr o pa. Jakamã nhùm Jupti nhō patrejaja Pawre mē Panãpe wa kēp mēhpãm ã wa harēnh ma hãmri nê wa hã hkwyjê mã kãm:

—Kwa pu mē wa kãm mōx kwỹ hpa nê pixorã hkwy rê. Hãmri nê wa kãm wa mex o wa mex ã wa harē nê wa kēp mēpahpãm ã amnhĩ to wa kuwỹ. Wa kēp mēpahpãm kēnã. Anê.

Hãmri nê ra ã wa hipêx anhỹr kaxyw ¹⁴ nhùm wa tee ri mē kot amnhĩ nhĩpêx ã mē omu nhùm ja

wa kĕp omnuj tÿx nĕ. Jakamā nhŭm wa amnhĭ pĕ hinōkà kaxōnh pa nĕ mĕ kutā hprōt nĕ ā mĕ kot wa hipĕx anhÿrja nĕ mĕ kām kapĕr kām hihtÿx nĕ. ¹⁵ Nĕ mĕ kām:

—Kwa mĕ ri ā wa inhĭpĕx anhÿr kĕt nĕ. Wa ixpĕ mĕapām kĕt kĕnā kot ka kĕt mĕ ā wa inhĭpĕx anĕ. Nom mĕapāmja na ka htem ām amnhĭ to hwÿr kaprÿ nĕ kām mex o mex ā harĕnh kaprÿ o ri apa. Tā mĕ ate ā amnhĭ nhĭpĕx anhÿr kaga nĕ hpānhā Tĭrtŭm kōt amnhĭ xunhwÿr nĕ amnhĭ to pix wÿr o apa kaxyw na pa pre wa mĕ awÿr mō nĕ pōj. Tĭrtŭmja mĕ ate mĕ apām jarĕnhhta rom hĭr o htĭr. Na pre mĕmoj piitā ho kato. Kaxkwa ho kato nĕ pyka ho kato nĕ gō xujanār o kato. Nĕ kamā ri mĕmoj piitā ho kator pa.

¹⁶ —Amnepĕm mĕ pa xwÿnhjaja na pre htem amnhĭ krā hkōt pix mā tanhmā ri amnhĭ nhĭpĕx to ho pa nhŭm Tĭrtŭm ja hā mĕ omu nĕ ām mĕ omu nĕ tanhmā mĕ ho hkĕt nĕ. ¹⁷ Mĕ pahte amnhĭ tā omunh kaxyw na hte amarĭ tanhmā mĕ pahto mex to ho pa. Na hte mĕ pahwÿr na rĕ nhŭm mĕ pahpur go mex nĕ. Nhŭm mĕ pamā tanhmā mĕ pahpur kām mĕmo hyja to nhŭm ra mĕ pamā ô rŭnh nĕ. Pu htem hamÿ nĕ ho paxāpkur mex nĕ pahkĭnh nĕ ri papa. Tĭrtŭm pix kukwak ri na pu htem ā amnhĭ nhĭpĕx anhÿr o ri papa. Anĕ.

¹⁸ Nhŭm pre ā Pawre mĕ kot wa kām mōx parja nĕ mĕ kām kapĕr kām hihtÿx anĕ. No nhŭm mĕ kuma nĕ ām kuma nĕ wa kām mry hkwy hpar kaxyw wa hā hihtÿx nĕ. Jakamā kritpĕm nhÿx prem wa kām hkwy pa. Tā tanhmā hamaxpĕr to nĕ hkaga nĕ wa kām hpar kĕt nĕ.

Mĕ kot Pawre pÿr ā àmnĕnh ā mĕ harĕnh

Sikŭn Ximotre 3.10-11

¹⁹ Tā nhŭm Ijaew kwÿjaja mĕ hwÿr mran pōj. Krĭ pĕ āxiok mĕ

Ikōn rŭm ma mĕ hwÿr mran pōj nĕ mĕ kām Pawre ho hĕx o mĕ hkōt pa nhŭm mĕ kuma nĕ axtem nĕ Pawre kamā gryk kato. Hāmri nĕ mĕ kot hpĭr kaxyw kĕn runh kwÿ jamÿ nĕ ho htak prĕprĕk o kuhĕ. Hāmri nhŭm amnhĭ xā htÿx kamā ama nĕ tĕm nĕ akryk nō nhŭm mĕ omu nĕ htÿx ho ra htyk ā hkamnhĭx. Hāmri nĕ hwÿr tĕ nĕ hpa hā kupy nĕ ma hkĭĕnh o mō nĕ krĭ pum kumĕ nĕ ma akupÿm mra. ²⁰ Hāmri nhŭm Jejus kōt mĕ kot axpĕn to htōjaja tee ri ā mĕ kot hipĕx anhÿr ā omu nĕ hkaprĭ htÿx nĕ hwÿr hprōt nĕ omu nĕ mÿr o kuhĕ. Hāmri nhŭm te htyk pyrā nĕ nōr tā Jejus nhÿ hā akupÿm hihtÿx mex nĕ kànhmā nhÿ hāmri nĕ ma akupÿm mĕ hkōt krĭm tĕ.

Tā nhŭm apkati nhŭm Panāpe mĕ wa krĭja rŭm kato nĕ ma wa mō. Pānhā ma krĭ pĕ Tepe hwÿr wa mō.

Pawre mĕ Panāpe akupÿm āxiok wÿr wa mōr ā wa harĕnh

²¹⁻²² Tā nhŭm wa ma Tepe hwÿr mō nĕ pōj. Hāmri nĕ kamā mĕ kām Jejus tanhmā kot mĕ panĕ amnhĭ nhĭpĕx to hā harĕnh o ri mĕ hkōt wa pa nhŭm mĕ wa kuma nĕ ohtō nĕ Jejus kōt amnhĭ xunhwÿ.

Tā nhŭm wa kato nĕ awjanā nĕ ma akupÿm pika pĕ Pisit wÿr wa mō. Nĕ kamā krĭ hkwy hkōt ri ra mĕ kot Jejus kōt amnhĭ xunhwÿr xwÿnhĭ jahkre ho ri mĕ hkōt pa. Krĭ pĕ Risti nĕ Ikōn nĕ āxiokja kōt. Nĕ mĕ ahkre kamā Jejus kōt mĕ ho mĕ hihtÿx o wa pa nĕ mĕ kām:

—E ra mĕ ate Jejus kōt amnhĭ xunhwÿr jakamā koja mĕ kām Jejus kurĕ xwÿnhjaja tee ri ja hā mĕ apumu nĕ hā tanhmā mĕ anhĭpĕx tō. Tā kĕr ka mĕ ām amnhĭ tā mĕ omu nĕ ām mĕ omu nĕ Jejus kaga hkĕt nĕ. Nĕ arĭ hkōt amnhĭ nhĭpĕx mex o ri apa rāhā nhÿrmā ma ô krĭ hwÿr api nĕ Tĭrtŭm wa kuri amex kumrĕx nĕ atĭr tŭm nĕ apa ho apa. Anĕ.

23 Hāmri nē ahpÿnhā krī piitā hkôt ri mē kot pastô nhÿ hā mē ahkre kaxyw mē hkwÿjê rê nē mē kaxyw mē unhwÿ nē mē ho Tirtûm wÿ. àpkur kêt rāhā mē ho kuwÿ nē kām:

—Pa Tirtûm? E jajê pumu. Mē kot krī ja kamā pastô nhÿ hā akrajê jahkre ho pa kaxyw na pa wa mē unhwÿ. Jakamā e kêr ka mē kutā anojarêt rāhā ho ri mē hkôt apa. Anê.

Hāmri nē wa mē kêp kato nē ma hpānhā nhÿhÿm wa mō. 24 Pyka pē Pisit kamā mō nē hpānhā nhām pyka pē Pāpir kôt mō. Wa ma mē kām tanhmā Jesus kapêr jarēnh to ho mē hkôt mō. 25 Hāmri nē krī pē Perke hwÿr wa pōj nē kamā mē kām Jesus kot tanhmā amnhÿ nhÿpêx to hā harē hāmri nē mē kurûm kato nē axte mō. Pānhā ma krī pē Atari hwÿr wa mō. 26 Hāmri nē hwÿr pōj nē hpānhā kurûm akupÿm āxiok wÿr wa mō. Pār rax kām ma akupÿm mō. Āxiokja kamā na pre wa nojarêt nhÿm Jesus kôt wa htō nē wa htōxjaja wa ho Tirtûm wÿ nē ma krī hkwÿ hwÿr wa kumê. Wa kot ma mē hkôt tanhmā Jesus kot mē panê amnhÿ nhÿpêx to hā harēnh o wa pa kaxyw wa kumê. Jakamā nhÿm wa ra ja ho anhÿr pa nē akupÿm mē hwÿr wa mō. 27 Hāmri nē wa akupÿm pōj nē Jesus kôt mē kot axpên to htō nē htōxjê ho akuprō nē mē kām amnhÿ jarē nē mē kām:

—Nà ãm hāmri na pa wa ra ixkâhkînĥ pē akupÿm mē awÿr pōj. Na pre Tirtûm wa ixkutā nojarêt rāhā ho wa inhÿhkô hā pa. Jakamā pa pre wa ma ÿ hā Ijaew kêt xwÿnhjê mā Jesus jarēnh o ixpa nhÿm mē hkwÿjaja wa inhma nē hkôt amnhÿ xunhwÿ.

28 Anhÿr o wa mē kām kapêr hāmri nē wa tokyx ma nhÿhÿm krī hō hwÿr axte mōr kêt nē. War arĭ āxiok kamā Jesus kôt wa htō nē htōxjê hkôt ri pa.

15

Jerujarē kamā Jesus kwÿ hpikuprōnh ā mē harēnh

Matêwre 23.1-4; Karatas 2.1-5, 5.1-16

¹ Tā hāmri nhÿm Ijaew kwÿjaja āxiok wÿr Jesus kwÿ pē Ijaew kêt xwÿnhjê hwÿr mōn pōj. Pika pē Jutej rûm mē hwÿr pōj nē tanhmā mē ahkre hto ho pa. Nom axtem nē Tirtûm kapêr kuhpa hā mē ahkre nē mē kām:

—Kot ka mē amā Jesus kôt amnhÿ xunhwÿr prām hāmri nē mē ixpyrà nē finat Mojes kot mē pamā karō xā hkôt amnhÿ my kwÿrÿt kà kwÿ jakà nē rĭ kormā hkôt amnhÿ xunhwÿ. Kot kaj mē ā amnhÿ nhÿpêx anhÿr kêt nē nhÿm Tirtûm tee ri ja hā mē apumu nē amnhÿ katut kôt mē ate amnhÿ tomnuj rēnh nē mē ato hkra hkêt nē. Anê.

² Hāmri nhÿm Pawre mē Panāpe tee ri mē kapêr anhÿrja ma nhÿm wa kēp ja omnuj tÿx nē. Hāmri nhÿm wa mē kām:

—Tk. Kwa kot anhÿr kêt. Na hte Tirtûm mē pahte amnhÿ my kwÿrÿt kà jakàr ā mē pahpumunh kôt mē pahto hkra hkêt nē. Anê.

Hāmri nē tee ri mē kapêrja nē mē kām kapêr no nhÿm mē ãm wa kuma nē wa hkôt hamaxpêr kêt nē. Nē arĭ ā mē ahkre anhÿr o mē hkôt pa. Jakamā nhÿm mē ja hā axpên mā kapêr rax nē. Hāmri nhÿm Jesus kwÿ pē Ijaew kêt xwÿnhjaja amnhÿ tā Pawre mē Panāpe wa hkukja nē wa kām:

—Kwa xā kot paj mē apyrà nē amnhÿ my kwÿrÿt kà jakà nhÿm Tirtûm kām ja mex nē nà? Kwa wa ma akupÿm Jerujarē hwÿr mō nē ja hā Jesus nhÿ hā mē ahkre xwÿnh maatijê mē mē kot Jesus kwÿ jahkre xwÿnhjê kukja nē hā mē ama. Nē ota mē ixkwÿjaja koja ma war akôt mra. Kê mē tanhmā mē amā ja jarēnh to ka mē ama nē man akupÿn mē ixwÿr mra nē

tanhmã mẽ inhmã mẽ kapër jarënh to. Anë.

Hãmri nhùm wa mẽ kãm: “Tõe. Nà kot paj mẽ anë.” Anë. ³ Hãmri nẽ wa mẽ ma Jerujarẽ hwỳr mō. Ma pyka pê Wẽnĩs mẽ Samar hkõt ma hwỳr mō. Hãmri nẽ nhỳri Jejus kõt mẽ htō nẽ htōxjê pumu nẽ mẽ kãm Ijaew kêt xwỳnhjê jarẽ. Mẽ hkwỳjaja mẽ uràk nẽ Jejus kõt amnhĩ xunhwỳr ã mẽ harënh o mō. Hãmri nhùm mẽ harënh ma nẽ mẽ ý hã hkĩnh nẽ. ⁴ Hãmri nhùm mẽ ra Jerujarẽ hwỳr Jejus kõt mẽ htōjê hwỳr mōn pōj. Hãmri nẽ mẽ ahkre xwỳnhjê mẽ Jejus nhỹ hã mẽ ahkre xwỳnh maatijê pumu nhùm mẽ haxwỳja amnhĩ wỳr mẽ omu nẽ hkĩnh nẽ. Nẽ tanhmã mẽ ho mex to nẽ mẽ kãm kapër mex nẽ. Hãmri nhùm Pawre mẽ Panãpe wa mẽ kãm amnhĩ jarẽ. Tĩrtũm kot wa ìhkō hã wa hkõt pa nhùm wa ý hã kot Ijaew kêt xwỳnhjê mã kapër o pa nhùm mẽ hkwỳja kot wa mar nẽ Jejus kõt amnhĩ xunhwỳr ã nhùm wa mẽ kãm amnhĩ jarẽ. ⁵ Nhùm Jejus kwỳjê kamã mẽ kệp Parijew nhō xwỳnh kwỳjaja. Mẽ kệp Parijew tã hkwỳjê rom Jejus kõt amnhĩ xunhwỳ. Jakamã nhùm mẽ tee ri Pawre mẽ Panãpe wa kot Ijaew kêt xwỳnhjê jarënh ma nẽ kànhmã kuhẽ nẽ wa kãm:

—Kwa kê mẽ pahpyrà nẽ amnhĩ my kwỳt kà jakà nẽ finat Mojes kot Tĩrtũm nhỹ hã mẽ pamã mẽmoj tã karō hkõt amnhĩ nhĩpêx o pa. No kot mẽ ã amnhĩ nhĩpêx anhỳr kêt nhùm ja mẽ pahpê omnuij nẽ. Anë.

⁶ Hãmri nhùm Jejus nhỹ hã mẽ ahkre xwỳnh maatijê mẽ mẽ hkwỳjê jahkre xwỳnhjaja mẽ kuma nẽ hapōj nẽ nhỳri akuprō. Ijaew kêt xwỳnh kot Jejus kõt amnhĩ xunhwỳr xwỳnhjaja kot tanhmã amnhĩ nhĩpêx to hã axpẽn mar kaxyw nhỳri akuprō. ⁷ Hãmri nẽ mẽ hã axpẽn mar ryy nẽ. Hãmri nhùm Simãw Pêtre tã kànhmã xa nẽ mẽ kãm:

—Nà na pre Tĩrtũm mẽ pahkapi nẽ Ijaew kêt xwỳnhjê kaxyw pa ixta. Ixte mẽ kãm Jejus kot tanhmã mẽ panẽ amnhĩ nhĩpêx to hã harënh o ri mẽ hkõt ixpa nhùm mẽ kot inhmar nẽ hkõt amnhĩ xunhwỳr kaxyw nhùm mẽ kaxyw ixta. Ra mẽ ate ja hã ixpumunh mex. ⁸⁻⁹ Tĩrtũm kot tanhmã ri mẽ pakute hkõt mẽ pahpumunh par jakamã te kot ra mẽ panhĩpêxta pyrà nẽ mãnẽn Ijaew kêt xwỳnhjê nhĩpêx. Mẽ kot mẽ pahpyrà nẽ amnhĩ kaxyw Jejus kõt hamaxpër jakamã nhùm Tĩrtũm te ra mẽ panhĩpêx pyrà nẽ amnhĩ katut kõt mẽ kot amnhĩ tomnuj rẽ nẽ mẽ ho hkra. Hãmri nẽ mẽ hwỳr amnhĩ Karō rẽ nhùm mẽ hkarō mã agjê. Tĩrtũm tãm kot amnhĩm mẽ rënh kënã.

¹⁰—Tã xà mẽ pahpê Ijaew na pu htem wam Tĩrtũm kot finat Mojes mã kapër kõt amnhĩ nhĩpêx mex o papa? Nà na pu htem hkõt amnhĩ nhĩpêx mex kêt nẽ. Nẽ mẽ panhĩgêjtaja na xep prem haxwỳja hkõt amnhĩ nhĩpêx mex o pa hkêt nẽ. Mẽ pahpiitã mẽ pahpê hihtỳx kënã. Tã Ijaew kêt xwỳnhjaja kot hkõt amnhĩ nhĩpêx o pa hã ka mẽ ra mẽ kãm karō kaxyw. Kwa kot kaj mẽ anẽ nhùm Tĩrtũm tee ri ja hã mẽ apumu nhùm ja kệp omnuij nẽ. Kãm ja prãm kêt. ¹¹ Kwa mẽ ã mẽ kãm hã karō anhỳr kêt nẽ. Mẽ panhō pahihiti Jejus na hte mẽ pahpiitã mẽ pakutã nojarêt o axpẽn pyràk. Jakamã Ijaew kêt xwỳnhjaja nẽ mẽ pahpê Ijaewjaja kot puj mẽ amnhĩ kaxyw hkõt pajamaxpër nẽ hkõt amnhĩ xunhwỳ. Hãmri nhùm Tĩrtũm ja hã mẽ pahpumu nẽ mẽ panhĩpêx o axpẽn pyrà nẽ Jejus kukwak ri amnhĩ katut kõt mẽ pahte amnhĩ tomnuj rẽ nẽ mẽ pahto hkra. No na hte mẽ pahte amnhĩ my kwỳt kà jakà rỳ finat Mojes kapër kõt amnhĩ nhĩpêx ã mẽ pahpumunh kõt mẽ pahto hkra hkêt nẽ. Anë.

12 Nhũm pre ã Simãw Pêtre mẽ kãm kapêr anê. Hãmri nhũm hpãnhã Panãpe mẽ Pawreja mẽ kãm amnhĩ jarê. Tĩrtũm kot tanhmã wa ho nhũm wa kot Ijaew kêt xwỳnhjê hwỳr wa mõi ã amnhĩ jarê. Nê Tĩrtũm nhỹ hã mẽ kãm aa mẽ kot mẽmoj pumunh kêt kwỳ ho anhỹr o ri mẽ hkõt pa hã mẽ kãm amnhĩ jarê nhũm mẽ piitã akryk wa mar o hkrĩ nê wa ujarēnhta hkukamã hamaxpêr. 13 Hãmri nhũm Simãw Pêtre mẽ Panãpe wa mẽ kãm ujarēnh pa hãmri nhũm Xiakre wa hpãnhã kãnhmã xa nê mẽ kãm kãnhmã ãhkra pê nê mẽ kãm:

14 —E pa ijaxwỳja mẽ amã ixkapêr ka mẽ inhma. Nà na pu mẽ ra Simãw Pêtre kapêr ma. Tĩrtũm kot wam amnhĩ kaxyw Ijaew kêt xwỳnh kwỳjê rēnh ã mẽ harēnhja pu mẽ ra kuma. 15 ãm hãmri na ã mẽ harēnh anê. Amnepê m Tĩrtũm kapêr nhỹ hã mẽ kapêr o mẽ pa xwỳnhjaja na prem ra ja kukamã Tĩrtũm kot tanhmã mẽ hipêx to hã amnhĩ jarēnh kukamã hã kagã. Te ho tãm kot kãm kapêr pyrà nê hã kagã ho:

16 Amnepê m finat Tawija na pre hte inhmã amnhĩ kwỳjê ho amnhĩptar o pa.

Mẽ kêp Ijaewjaja nhũm pre inhmã mẽ ho amnhĩptar o pa.

Hãmri nhũm mẽ gaa nê axpên pê anhgrã nê ahpỹnhã ri pa.

Tã ixpê Tĩrtũm kot paj nhỹrmã ma mẽ hwỳr wrỹ nê axte mẽ ho akuprõ nê tãm mẽ unhwỳr pa.

17 Jakamã Ijaewjê kukwak ri koja Ijaew kêt xwỳnh kwỳjaja mããnēn ixkõt amnhĩ xunhwỳ.

Pa te ixte Ijaewjê nhĩpêx pyrà nê mẽ ho ixkra.

18 ã mẽ hkukamã ijamaxpêr anhỹr xã hkõt.

19 Anhỹr o mẽ harēnh jakamã nhũm ra mẽ hkwỳjaja mẽ higêt kot amnhĩ

nhĩpêx kaga hpa nê hpãnhã Tĩrtũm kõt amnhĩ xunhwỳ. Jakamã kwa kêr pu mẽ axte ja nhĩjuk ri mẽ kãm mẽmoj tã karõ hkêt nê. Ja pix na mex. 20 ãm ja pix kot puj mẽ kãm hã karõ nê hã kagã nê mẽ hwỳr kumê:

Mẽ kot sãnti hã mẽ õ hkur nê kot puj mẽ hkurê.

Nê mẽ kot mẽmo mry hpar nê hkamrõ runh kêt rãhã hkur nê mẽ hkurê.

Nê mẽ kot mẽmo mry kamrõ kur nê mããnēn mẽ hkurê.

Nê mẽmyjaja kot amnhĩ prõ pix tãnopxar ã mẽ kãm karõ.

Nê mẽnijaja haxwỳja kot amnhĩ mjên pix tãnopxar ã mẽ kãm karõ.

—ãm ja pix kot puj mẽ kãm hã kagã nê mẽ kãm hã karõ. 21 Mẽ panhigêtjê mã finat Mojes kot ã mẽ kãm karõ anhỹrja na htem arĩ krĩ piitã hkõt ã mẽ kãm hã karõ anê. Mẽ panhõ arĩgromnu pê sap ã na htem arĩ ri Tĩrtũm kapêr o mẽ ahkre xã hã ixkre kamã ã mẽ kãm hã karõ anê. Anê.

Mẽ kot Ijaew kêt xwỳnhjê hwỳr kagã mẽnh ã mẽ harēnh

Karatas 5.1

22 Hãmri nhũm mẽ Xiakre kapêr mar o hkrĩ. Jejus nhỹ hã mẽ ahkre ho mẽ pa xwỳnh maatijaja nê mẽ kot hkwỳjê jahkre xwỳnhjaja nê Kris kwỳjê piitã Xiakre kapêr ma nhũm ja mẽ kãm mex nê. Jakamã nhũm mẽ axpên mã:

—Tõe. Nã ãm hãmri na Xiakre ã Ijaew kêt xwỳnhjê jarēnh anê. Nã ja mex. Pu mẽ ã ãxiok nhõ xwỳnhjê mã ja hã kagã anê hãmri nê mẽ hwỳr kumê. Kojã Pawre mẽ Panãpeja wa kupy nê ma akupỹm mẽ hwỳr o mõi nê mẽ kãm kugõ. E mẽ pahtõ kot puj mẽ ma wa hkõt mẽ hwỳr mõi? Anê.

Hãmri nhũm mẽ kuma nê Siras mẽ Jut Pasapas wa kuta. Jejus kõt mẽ kot axpên to htõ nê htõxjaja kot axpên mã hamê wa kot amnhĩ to mex xwỳnh ã wa harēnh jakamã nhũm mẽ ma Pawre mẽ Panãpe wa

hkôt mōr kaxyw wa kuta. ²³ Hāmri nē āxiok kamā Kris kwỳ pē Ijaew kêt xwýnhjê kaxyw kagà nhípêx nē kamā ā mē kām kapêr anê nē mē kām:

Pa? āxiok mē Sir mē Siris kamā Ijaew kêt xwýnhjaja? Xà mē amex? Mē ixpê Jejus kôt mē atōjaja na pa mē awýr kagàja nhípêx nē mē awýr kumê. Mē ixpê Jejus kôt mē kot amnhĩ xunhwýr xwýnhjê jahkre ho ixpa xwýnhjaja nē Jejus nhỹ hã mē ahkre ho mē pa xwýnh maatiijaja pa mē awýr kumê.

²⁴ Na xep ra ja rüm mē ixkwýjaja ma mē awýr mō nē mēmoj tã tanhmã mē amã karō hto. Mē ate amnhĩ my kwryt kà jakàr nē amnepê mē inhĩgêt Mojes kapêr kôt amnhĩ nhípêx o apa hã mē amã karō. Ka xep mē tee ri ja kukamã ajamaxpêr. No mē pajaja na pa prem mē awýr mē rēnh kêt nē. Ām amnhĩ krã hkôt na prem mē awýr mō nē ā mē amã ja hã karō anê.

²⁵ Tã pa tee ri mē harēnh ma nhũm ja mē ixpê omnuj tỳx nē. Jakamã na pa mē jar akuprō nē mē akaxyw mē inhĩōja wa kuta. Wa kot ma Panãpe mē Pawre wa hkôt mē awýr wa mōr nē mē amã mē ixkapêr jarēnh kaxyw. Panãpe mē Pawreja mē inhmã wa hapê htỳx. ²⁶ Na hte mē amã Pahĩti Jejus Kris kapêr jarēnh o pa kaxyw wa amnhĩ grōnh kôt mē amã harēnh o pa.

²⁷ Tã pa mē akupým mē awýr wa kumê nē wa hkôt mē pahťo Jut mē Siras wa kumê. Mē ixte mē amã kagà kamã mē ixkapêrja nhũm wa kot hprĩ hã mē amã harēnh kaxyw pa mē wa hkôt mē awýr wa kumê.

²⁸⁻²⁹ E ja pix nê kot paj mē akurê:

Kêr ka mē sãnti hã mē õ hkur kêt nê.

Nê mēmo mry kamrô kur

kêt nê. Jao mēmo mry pa nê hkamrô runh kêt rãhã hkur kêt nê. Kamrô runh pa nê ri kormã tanhmã ho nê aku.

Nê kêr ka mē amyjaja amnhĩ prō pix tãnopxar o apa.

Nê mē anijaja ajaxwýja amnhĩ mjên pix tãnopxar o apa.

E ãm ja pix kot paj mē amã hã karō. Tirtũm Karō kãm ja mex. Nê mē inhmã mããnên ja mex. Kot kaj mē ā amnhĩ nhípêx anhýr o ri apa nê amex nê apa.

Tã ãm ja pix. Mē ixpê Jejus kwýjê jahkre xwýnhjê mē Jejus nhỹ hã mē ahkre xwýnh maatiijê mē pa mē mē awýr kagàja nhípêx nê kumê. E kêr ka mē amex nê akĩnh nê ri axpên kôt apa. Ām ja pix na hapêx. Anê.

Nhũm prem ā kagà kamã mē kãm mēmoj tã karō anê. ³⁰ Hāmri nē Jut wa mē kãm kugō nē ma āxiok wýr wa mē kumê nhũm wa mē ma akupým hwýr o mō. Jut nē Siras nē Pawre nē Panãpeja nhũm wa mē ma akupým mē hwýr o mē mō. Mōō hãmri nē mē hwýr pōj. Hãmri nē Jejus kwýjê ho akuprō nē mē kãm kagàja gō ³¹ nhũm mē kupy nē kamã harê nê kuma. Kamã mē kot mē kãm mēmoj tã karō kamã harê nê kuma nê ý hã hkĩnh nē akupým tãm hamaxpêr.

³² Jut mē Siras wa kêt Tirtũm nhỹ hã kapêr o pa xwýnh na pre wa. Jakamã na prem mē hwýr mōn pōj hãmri mē kãm tanhmã ujarēnh to ho pa. Mē kot Jejus kôt pix mã hamaxpêr o pa kaxyw mē kãm ujarēnh o pa nê mē kãm:

—E kêr ka mē mãmrĩ Jejus kôt amnhĩ nhípêx mex rãhã ho ri apa nê aa hkaga hkêt nê. Anê.

³³ Hãmri nē mē hkôt ri pa hã apkati xohtō nê. Hãmri nē wa akupým Jerujarê hwýr nojarêt nē mē kãm amnhĩ jarê nhũm mē wa kuma nê wa kãm:

—Tõe. Nà wa mãmrĩ ma akupým mō. Kojã Tirtũm war apumunh

mex nê ka wa ma akupÿm amex nê akã hkĩnh pê akwÿjê hwÿr akato. Anê.

³⁴ Hãmri nhũm wa nojarêť tã nhũm Siras tanhmã hamaxpêr to nê hitôt nê mẽ kuri arĩk nhũm Jut Pasapas pix ma akupÿm hkwyjê kot mẽ hwÿr wa mẽnh xwÿnhjê hwÿr mō.

³⁵ Hãmri nhũm Pawre mẽ Panãpe wa Siras pyrà nê kormã äxiok kamã pa. Hãmri nê Jejus kôt mẽ htō hkwyjê mẽ pimràatã mẽ ahkre ho pa. Tirtũm kapêr o mẽ hkôt mẽ ahkre ho pa.

Pawre mẽ Panãpe wa kot axpên pê pikjêr ã wa harênh

Atre 13.13; Korosê 4.10

³⁶ Hãmri nhũm Pawre mẽ Panãpe war arĩ mẽ hkôt ri pa hã apkati xohťo nê. Tã nhũm Pawre hamaxpêr nê Panãpe mã:

—Kwa ma pu ma akupÿm ra pahte krĩ hkwy hkôt mẽ kãm Jejus jarênh o papa xwÿnhjê hkôt akupÿm mō. Pu ma mẽ hwÿr mō nê Jejus kôt pahtō nê pahtōxjê kot tanhmã ri amnhĩ nhĩpêx to hã mẽ omu. Anê.

³⁷ Hãmri nhũm kuma nê kãm:

—Tõe. Nã pu ma mō. Nom kêr pu ma amnhĩ kôt Juãw Makre ho mō kê axte pahto ajuta ho pahkôt mō. Anê.

³⁸ Hãmri nhũm Pawre tee ri kuma nhũm ja kêp omnuj nê nhũm kãm:

—Tk. Kwa na pre pahkôt pa htã Pãpir kamã tanhmã hamaxpêr to nê pahkaga nê ma akupÿm Jeru-jarê hwÿr mō. Jakamã kwarĩ koja axte pahkôt mōr kêt nê. Anê.

³⁹ Hãmri nhũm Panãpe tee ri hã hihtÿx no nhũm kêp hkaga kumrêx. Jakamã nhũm wa ja hã axpên pê axkjê nê ma ahpÿnhã mō. Nhũm Panãpe amnhĩ kôt Juãw Makre ho mō nê wa ma pãr kãm gō hipôk pê Sipre hwÿr wa mō. ⁴⁰ Nhũm Pawre axtem amnhĩ kôt Siras wÿ nê ma wa mō. Hãmri nê wa nojarêť nhũm

Jejus kôt wa htōjaja wa ho Tirtũm wÿ nê kãm:

—Pa Tirtũm. E koja Pawre mẽ Siras wa ma krĩ hkwy hkôt mẽ kãm akapêr jarênh o ri wa pa. Jakamã kêr ka wa htãnopxar o ri wa hkôt apa. Anê.

Hãmri nhũm wa kato nê ma krĩ hkôt ri Jejus kapêr o mẽ ahkre ho wa pa. ⁴¹ Wa ma pyka pê Sir mẽ Siris kôt Jejus kôt mẽ htō nê mẽ htōxjê pumunh nê Jejus kôt mẽ ho mẽ hihtÿx o wa pa kaxyw.

16

Ximotre kot Pawre mẽ Siras wa hkôt ri pa hã harênh

Wam Ximotre 1.1-2; Sikũn Ximotre 1.5; Piripos 2.19-22

¹⁻³ Tã nhũm Pawre mẽ Siras wa ma akupÿm krĩ pê Tepe hwÿr wa mō nê hwÿr pōj nê hpãnhã kurũm ma Risti hwÿr mō. Hãmri nê wa hwÿr pōj nê kamã Ximotre pumu. Ximotre na pre ra katorxã pyrà nê Jejus kôt amnhĩ xãm nhũm mẽ kot Jejus kôt axpên to htō xwÿnhjaja kãm hapê nê. Nê kot Jejus kapêr kôt amnhĩ nhĩpêx mex o pa hã axpên mã harê.

Krĩ pê Risti mẽ Ikõn kamã nhũm prem ã axpên mã Ximotre jarênh anhÿr o pa. Jakamã nhũm Pawre mẽ Siras wa mō nê mẽ hwÿr pōj nê Ximotre kot amnhĩ nhĩpêx ã omu nhũm Pawre kãm war amnhĩ kôt o mōr prãm nê. Nom Ximotre hkamrō pihkãr na pre. Katorxã kêp Ijaew nhũm hipêêxã kêp Gres jakamã nhũm ã Ximotre hkamrō pihkãr anê. Nhũm Ijaew kot katorxã hkôt kêp Ijaew ã omunh jakamã nhũm Pawre hamaxpêr nê mẽ kaxyw kêp my kwÿrÿt kã krãhta nê arĩ kormã mẽ hwÿr amnhĩ kôt o mō. ⁴ Hãmri nê mẽ ma krĩ hkwy hkôt mō. Mōõ nê Ijaew kêt xwÿnhjaja ra kot amnhĩ kaxyw Jejus kôt hamaxpêr xwÿnhjê jahkre ho mẽ hkôt pa. Ra Jerujarê kãm mẽ kot Jejus kwÿjê jahkre ho pa

xwÿnhjê mē Jejus nhÿ hã mē ahkre xwÿnh maatiſaja mē kot mē kãm mēmōj tâ karōta nhÿm mē ma mē kãm harēnh o ri mē hkôt pa. ⁵Hãmri nhÿm mē kuma nē ra Jejus kôt amnhÿ nhÿpêx mex o mō. Hãmri nhÿm apkati mē krÿ nhō xwÿnh kwÿjaja mē urak nē Jejus kôt amnhÿ xunhwÿ. Jakamã nhÿm mē ra ohtō rax o mō.

Pawre tanhmã hpimtir to hã harēnh

Rômãn 15.18-21

⁶Tã nhÿm Pawre mē Siras mē Ximotre mē ma pyka pē As wÿr no-jarēt. Mē kot mē kãm tanhmã Jejus jarēnh to ho pa kaxyw mē hwÿr no-jarēt tâ nhÿm Tÿrtÿm Karō kormã mē nē mē hkurê. Jakamã nhÿm mē hpãnhã ma pyka hkwy pē Prik mē Karatas wa hkôt pa. Ixpê Rukre na pa pre mē hã ajêt nē ma mē hkôt ixpa ho ixpa. ⁷Hãmri nē mē pyka pē Mÿs ã mō nē hpãnhã ma Pitÿn wÿr inhmōr mã tâ no nhÿm Tÿrtÿm Karō axte kê mē nē mē ixkurê. ⁸Jakamã pa mē arÿ Mÿs jakar ã mō nē gō xujanar mÿ ri krÿ pē Tôx wÿr pōj.

⁹Tã nhÿm kamãt pa mē ixpitã gōr nē inhÿkwÿ nhÿm Pawre tanhmã hpimtir to. Nhÿm xep pika pē Masetōn nhō xwÿnhja mē amnhÿ wÿr hwÿr kãm hihtÿx o xa nhÿm hprÿ hã omu nē kapēr ma. Nhÿm xep pre kãm:

—Pa Pawre? Kwa amnē Masetōn wÿr mē ixwÿr mō nē tanhmã mē ijahkre hto. Anē.

¹⁰Hãmri nhÿm Pawre hkrãkato nē mē inhmã hpimtir jarê. Pa mē kuma nē axpēn mã:

—Tô kwa tokyx pu mē hwÿr. Tÿrtÿm kot mē hwÿr mē parēnh kēnã. E pu mē ma mē hwÿr mō nē mē kãm Jejus jarēnh o mē ahkre. Anē.

Hãmri nē amnhÿ to akuprō nē mē hwÿr inhnojarēt kurê kumrêx.

Ritre kot Jejus kôt amnhÿ xãm ã harēnh

Piripos 1.1

¹¹Hãmri pa mē ma Masetōn wÿr mō. Tôx rÿm ma pàr kãm hwÿr mō. Hãmri nē gō nhÿpōk pē Samōtas wÿr pōj nhÿm mē hã pàr nhō. Hãmri nhÿm apkati pa mē axte mō nē Masetōn kamã krÿ pē Nēap wÿr pōj. ¹²Hãmri nē pàr rÿm iſapōj nē hpãnhã kurÿm hamÿ krÿ pē Piri-pos wÿr ixpar o mō. Piriposja Masetōn kamã krÿ maati na. Rôm nhō xwÿnhjaja na prem ho kato. Jakamã pa prem ma hwÿr mō nē pōj nē tokyx axte kurÿm nhÿhÿm inhmōr kêt nē. ¹³Hãmri nhÿm sap kato pa mē axpēn mã:

—Kwa pyhti mÿri mãn hte Ijaew-jaja axpēn wÿr akuprō nē Tÿrtÿm mã amnhÿ jarēnh o hkrÿ nã. E kwa pu mē hwÿr nē gō mÿri mē hapēr o ri papa. Anē.

Hãmri nē ma hwÿr mra nē mē hapēr o ri ixpa nhÿm ãm mēni pix-jaja axpēn wÿr akuprō. Pa mē omu nē mē kuri ixkrÿ nē mē kãm Jejus kapēr jarēnh o mē ahkre o ixkrÿ. ¹⁴Nhÿm mē kot mē inhmã o hkrÿ xwÿnhjê hō pē Ritreja. Krÿ pē Xijaxir nhō xwÿnh na pre. Nē kēp kupêxê mex o wēnê xwÿnh. Na pre hte kãm Tÿrtÿm prãm o pa. Jakamã nhÿm Pawre kot mē ahkre ho ÿrja rôm nhÿm Pahihti Jejus tanhmã Ritre hkrã hto nhÿm hprÿ hã Pawre kapēr mar tÿx nē. ¹⁵Hãmri nē amnhÿ kaxyw Jejus kôt hamaxpēr nē hkôt amnhÿ xãm kurê kumrêx. Ōrkwÿ kamã hkwyjê mē nhÿm mē hkôt amnhÿ xunhwÿr pa. Jakamã pa mē kēp Jejus kwÿ hã mē hkrã kumrã. Mē piitã mē kot mē kēp Tÿrtÿm kra hã mē omunh kaxyw. Hãmri nhÿm Ritre amnhÿ kôt mē ixwÿ nē mē inhmã:

—An kot kaj mē ixte Jejus kôt amnhÿ xãm tÿx ã ixpumu hã kot kaj mē ma ixkôt mō nē hpãnhã inhōrkwÿ kamã pōj nē apa. Anē.

Pa mē kuma nē ma hkôt mō.

Mē kot Pawre mē Siras wa haxar ã mē harēnh

Makre 1.23-26, 1.34

16 Tã nhũm arĩgro hõ hã pa mẽ Tĩrtũm mã amnhĩ jarẽnh kaxyw axte pyhti mỳri mẽ pikuprõnh xãja wỳr mõ. Hãmri nẽ pry kamã mẽ kãm àpẽn xwỳnh nija pumu. Ra mẽkarõmnuti kot tanhmã hkrã hto nhũm ỹ hã àhpumunh tỳx xwỳnhja. Nhũm hte mẽkarõmnuti nhỹ hã mẽ kãm mẽmo hkukamã tanhmã ujarẽnh to ho pa. Jakamã nhũm õ patrãwjaja kukwak ri ujamỳnh rũnh pẽ hkĩnh nẽ pa. 17 Jakamã pa mẽ mõ nhũm nija mẽ xipumu nẽ mẽ ixtã ajẽt nẽ ma mẽ ixkõt mõ. Hãmri nẽ mẽ kãm mẽ ijarẽnh o mẽ ixkõt mõ nẽ mẽ kãm:

—Xẽ mẽ mran jajẽ pumu. Na htem Tĩrtũm maati mã tanhmã amnhĩ nhĩpẽx mex to ho pa. Tĩrtũm kot mẽ ate amnhĩ tomnuj pẽ tanhmã mẽ apytãr to hã mẽ amã ujarẽnh kaxyw na mẽ awỳr mra. Anẽ.

18 Nẽ ãm xatã mẽ kãm mẽ ijarẽnh o mẽ ixkõt paja o ra hã apkati xohtõ nẽ. Tã nhũm Pawre ra kãm mar kaga nẽ nẽ mẽkarõmnuti mã kapẽr nẽ kãm:

—Tk. Kwa kệp akato nẽ ma tẽ. Pa Jejus Kris nhỹ hã amã ixkapẽr ka inhma nẽ kệp akato nẽ ma atẽm kurẽ kumrẽx. Anẽ.

Hãmri nhũm kuma nẽ kệp kato nhũm akupỳm tãm hkrã. 19 Jakamã nhũm õ patrãwjaja tee ri ja hã omu nẽ gryk tỳx nẽ axpẽn mã:

—Kwa ra mẽkarõmnutijaja kệp kator jakamã koja axte mẽmoj kukamã tanhmã ujarẽnh to hkết nẽ. Pu mẽ kukwak ri axte paxu-jamỳnh kêt nẽ. Anẽ.

Hãmri nẽ Pawre mẽ Siras wa kamã gryk tỳx nẽ. Hãmri nẽ wa unẽ nẽ ma mẽ kot axpẽn mar xã hã ixkre hwỳr wa hkjẽnh o tẽ 20 nẽ mẽ kot mẽ ho amnhĩptãr xwỳnhjẽ mã tanhmã wa ho hẽx to nẽ mẽ kãm:

—Kwa mẽ amnẽ Ijaewja wa omu. Na hte wa mẽ panhõ krĩ kamã hẽx pix o pa nhũm mẽ tee ri wa kapẽr ma nẽ wa kamã gryk tỳx nẽ. 21 Mẽ ixte amnhĩ nhĩpẽx te

kot axpẽn pyrãk kêt tã nhũm wa mẽ kot amnhĩ nhĩpẽx o mẽ pajahkre kaxyw nhỹhỹnh mẽ pahwỳr mõ. Nom mẽ pahpẽ Rõm nhõ xwỳnhjaja axtem mẽ pahte amnhĩ nhĩpẽx kẽnã kot pu kêt wa kuma nẽ wa kapẽr kôt amnhĩ nhĩpẽx. Anẽ.

22 Hãmri nhũm mẽ kuma nẽ piitã wa kamã gryk tỳx nẽ. Hãmri nhũm mẽ ho amnhĩptãr xwỳnhjaja wa kệp wa ê kaxõnh o hkapa nẽ wa hã mẽ õ põristi mã amỳnẽ nẽ mẽ kãm:

—E mẽ ma wa o tẽ nẽ mẽ htak xã ho wa htak. Anẽ.

23 Hãmri nhũm mẽ kuma nẽ ma wa o tẽ nẽ wa htak rax nẽ. Hãmri nẽ wa haxã nẽ mẽ hagjẽnh xã jamãr xwỳnh mã kãm:

—E kêt ka ja wa omunh mex nẽ kẽ wa kator kêt nẽ. Anẽ.

24 Hãmri nhũm mẽ kuma nẽ wa o tẽ nẽ ixkre jatur xã kamã wa haxã nẽ wa kator pymaj hamẽ wa htem pĩjaxã nẽ ho htỳx nhũm wa arĩ hte tỳx nẽ nhỹ.

25 Tã nhũm kamãt. Nẽ kôt ã kamãt nhũm wa Tĩrtũm mã amnhĩ jarẽ nẽ mex o mex ã wa grer o wa nhỹ nhũm wa urãk nẽ mẽ hagjẽnh xwỳnhjaja wa mar o hkrĩ. 26 Puh nhũm pyka mẽ kãm htertẽt tỳx nẽ nhũm mẽ hã ixkreja amnhĩ to àpẽr tỳx nẽ amnhĩ kahẽ xã rẽnh pa. Nhũm mẽ hagjẽnh xwỳnhjẽ kaxpre xã piitã mẽ nẽ pirẽnh pa. 27 Hãmri nhũm mẽ hamãr o kuhẽ xwỳnhja pika tertẽt kamã ama nẽ hkrãkato. Hãmri nẽ mẽ hã ixkre jakwakre kahẽ xã rẽnh parja pumu nẽ mẽ hagjẽnh xwỳnhjaja hapõx par ã mẽ hkamnhĩx nẽ tee ri amnhĩ kukamã hamaxpẽr. Hãmri nẽ pahĩ kot mẽ hã hpĩr pymaj õ wapo kapa nẽ ra tãm kot ho amnhĩ pĩr kaxyw. 28 Hãmri nhũm Pawre tee ri ja hã omu nẽ kax pẽ kãm amỳra nẽ kãm:

—Kwa amnhĩ pĩr kêt nẽ. Ot pa mẽ arĩ ixpiitã ixkuhẽ. Na pa mẽ ixtõ ixkator nẽ ixprõt kêt nẽ. Anẽ.

29 Hãmri nhũm kuma nẽ kanẽ hã ahwỳn nẽ kuwy nẽ mẽ hwỳr axã nẽ mẽ piitã mẽ omu. Hãmri nẽ Pawre

mě Sirasja wa omu nē wa hwÿr kām ma ho htertet o tē. Hāmri nē wa hā hpijaam kaxyw wa kutā tēm nē hkōnkrā ho nhÿ. ³⁰ Hāmri nē kånhmā xa nē wa ho kato nē ixkre kapem wa o xa nē wa kām:

—Kwa tanhmā kot pa amnhÿ nhÿpêx to kê Tirtûm war apyrā nē ixte amnhÿ tomnuj pē ixpytā? Anē.

³¹ Hāmri nhÿm wa kām:

—Nā kot kaj amnhÿ kaxyw Jejus Kris kôt ajamaxpēr nē hkôt amnhÿ xām nhÿm Tirtûm ja hā apumu nē amnhÿ katut kôt ate amnhÿ tomnuj piitā rēnh pa. Nhÿm anhōrkwÿ kamā akwÿjaja apyrā nē Jejus kôt amnhÿ xunhwÿ nhÿm ā mē hipêx anē. Anē.

³² Hāmri nē wa ma hkôt ōrkwÿ hwÿr tē nē hprÿ hā mē kām Tirtûm kapēr jarē nhÿm mē wa mar o hkrÿ. ³³ Hāmri nhÿm mē hagjēnh xā jamār xwÿnhja wa kām wa htak xā kuhō. Kormā kamāt kō hkwy kamā wa kām kuhō nē hkane. Hāmri nhÿm wa mē kot Jejus kôt amnhÿ xunhwÿr par ā mē omu nē mē hkrā kumrā. Mē hamār xwÿnh mē hkwyjē mē hkrā kumrār pa. ³⁴ Hāmri nhÿm mē kot amnhÿ kaxyw Tirtûm kôt hamaxpēr jakamā piitā hkÿnh nē. Hāmri nhÿm mē hamār xwÿnhja ōrkwÿ hwÿr Pawre mē Siras wa o tē nē wa kām ō nhÿm wa apku nhÿm ma akupÿm mē hagjēnh xā hwÿr wa o tē nē akupÿm wa haxā.

Mē kot Pawre mē Siras wa kām urer ā mē harēnh
Atre 22.25-29

³⁵ Hāmri nhÿm apkati nhÿm krÿ pytār xwÿnhja mē ō pōristi mā anē nhÿm mē hagjēnh jamār xwÿnh wÿr tē nē kām:

—E na mē papytār xwÿnhja ate Pawre mē Siras wa kām anhÿrer nhÿm wa māmri ma akupÿm htēm kaxyw hā karō. Anē.

³⁶ Hāmri nhÿm mē kuma nē wa hwÿr axā nē wa kām:

—E na krÿ pytār xwÿnhja ixte war akator kaxyw war atā

inhmā karō. Jakamā e wa māmri axāmhÿx ma mō. Anē.

³⁷ Hāmri nhÿm Pawre kām:

—Nā wa ixte tanhmā amnhÿ tomnuj to hkēt tā nhÿm mē kot wa ixpynēnh nē wa ixtak. Wa ijaxwÿja wa ixpē Rōm nhō xwÿnh tā nhÿm prem axtem nē mē piitā mē noo mā wa ixtak nē wa ijaxā. Mē kot amarÿ Rōm nhō xwÿnh tak nē mē hagjēnh kēt tā nhÿm mē ā mē noo mā ā wa inhÿpêx anē. Kormā wa ixte tanhmā amnhÿ tā ixāprār to hkēt tā nhÿm mē ā wa inhÿpêx anē. Jakamā kwarÿ kot kaj mē no hkax ā wa ixkator kēt nē. Kē mē kot wa ijaxār xwÿnhja tām man mra nē wa ixkator pa war arÿ ma mō. Anē.

³⁸ Hāmri nhÿm pōristija kuma nē ma akupÿm mē hwÿr mra nē mē kām wa kapēr jarē. Hāmri nhÿm mē tee ri mē urān wa kēp Rōm nhō xwÿnh ā wa harēnh ma nē kām ma htÿx nē. ³⁹ Hāmri nē ma wa hwÿr tē nē wa hwÿr axā nē wa kām:

—Pa? E māmri war akato nē axāmhÿx ma mō. Na pa prem war anhÿpêx kati rax nē. Tā kêr ka wa axte ja mā ajamaxpēr hkēt nē. Kē ja ām jar mē pakamā hapêx. Anē.

Hāmri nē wa kator nē wa kām:

—E kwa wa mē inhō krÿ pē akato nē ma nhÿhÿm mō. Anē.

⁴⁰ Hāmri nhÿm wa kuma nē kaço nē ma akupÿm Ritre nhōrkwÿ hwÿr wa tē. Hāmri nē Jejus kôt wa mē htōjē pumu nē wa mē kām amnhÿ jarē nē mē kām:

—E kot paj hāmri wa mā mō. Nom kêr ka mē arÿ Jejus Kris kôt amnhÿ nhÿpêx mex rāhā ho ri apa nē aa hkaga hkēt nē. Anē.

Hāmri nē wa mē kurūm kato nē ma krÿ hō hwÿr wa mō.

17

Tesarōn kamā mē kot wa kamā gryk ā mē harēnh

Wam Tesarōn 1.1, 2.13-14

1-2 Tā nhÿm Pawre mē Sirasja wa ma krÿ hkwy hkôt pa. Piripos rūm ma Apiporip mē Apōrōn kôt wa mō

hāmri nē ra Tesarōn wūr wa pōj. Na pre hte Pawre nhūrri pōj nē Ijaew nhō Tirtūm kapēr o mē ahkre xà hā ixkre hwūr agjē nē kamā mē kām Jejus kapēr jarēnh o kuhē. Jakamā nhūm wa mō nē Tesarōn wūr pōj nē ixkre hwūr mē hwūr tē nē mē kām ujarēnh o xa. Nē mē kām ujarēnh o hā arīgromnu pē sap o axkrunēpxi. ³Nē hprī hā mē kām tanhmā Tirtūm kapēr jarēnh to nē mē kām:

—Nà Tirtūm kapēr ā kagā htūm kot mē pakaxyw ām xwūnh jarēnh. Amnhī xà htýx kamā hamak kām htyk hāmri nē akupým htír ā nhūm kot hkukamā harēnh. Tā na pre Jejusja ā amnhī nhīpēx anē. Tām kēp Krisja. Tirtūm kot mē pakaxyw ām xwūnh ta na. Anē.

⁴Hāmri nhūm mē hkwýja kuma nē wa hkôt hamaxpēr nē wa urāk nē Jejus kôt amnhī xunhwý. Ijaew kwýjē nē Ijaew kêt xwūnh kwýjaja nē mēni kot amnhī to rūnh xwūnh kwýjaja nhūm mē ohtō nē amnhī kaxyw Jejus kôt hamaxpēr nē hkôt amnhī xunhwý. ⁵Tā nhūm Ijaew kwýjaja tee ri hkwý kot wa hkôt amnhī xunhwūr ā mē omu nē mē hā Pawre mē Siras wa kamā gryk týx nē. Hāmri nē ma mra nē wa kaxyw mē kot amnhī tomnuj týx xwūnh kwýjē ho akuprō nē mē kām wa hā amýné. Jakamā nhūm mē ma kapēr punuj pē wa hapēr o ri mra nhūm mē piitā mē omu nē mē kuma. Hāmri nhūm mē wa hapēr o ra Jasāw nhōrkwý hwūr mra. Nē mē kot Pawre mē Siras pynēnh nē ma mē utār xwūnhjē hwūr wa o htēm kaxyw mē kēp kahé xà mē nē mē hwūr agjē. ⁶Hāmri nē tee ri ōrkwý kamā wa hapēr nhūm wa kamā amrakati. Jakamā nhūm mē Jasāw mē kot Jejus kôt axpēn to htō xwūnh kwýjē pynē nē ma mē kot mē ho amnhīptār xwūnhjē hwūr mē o mra. Hāmri nē mē kām tanhmā Pawre mē Siras wa ho hēx to. Ām kapēr punuj kām kax pē mē kām wa

harē nē mē kām:

—Kwa na hte Pawre mē Siras wa pyka piitā hkôt mē kām ri mēmoj to hēx o pa. Tā wa ra mē panhō krī hwūr pōj nē jar mē pamā ri tanhmā hēx to ho ri mē pahkôt pa. ⁷Jasāw nhōrkwý kamā na pre wa pōj nhūm amnhī wūr wa kuwý. Na hte wa hkôt mē hamaxpēr xwūnhjaja pahihiti Sesti kapēr kwým ri kuhpa hā kapēr o pa nē axtem nē mēō pahi pē “Jejus” anhūr xwūnhja kapēr kôt amnhī nhīpēx o pa. Anē.

⁸Hāmri nhūm mē kot mē ho amnhīptār xwūnhjē mē krī nhō xwūnhjaja mē kuma nē gryk týx kumrēx. ⁹Hāmri nē Jasāw mā kām:

—E kot paj mē apē mē akàxpore hkwý jamý. Ka mē ajapōj nē ma mē panē Pawre mē Siras wa hano nhūm wa kato nē ma mō pa rī akupým mē amā kugō. Anē.

Hāmri nē mē kēp mē hikàxpore hkwý jamý.

Pawre mē Siras kot Perej wūr mōr ā wa harēnh

¹⁰Tā nhūm ra kamāt nhūm mē kot Jejus kôt axpēn to htōjaja hāmri Pawre mē Sirasja wa ma krī pē Perej wūr wa kumē. Hāmri nhūm wa kato nē ma hwūr mō nē hwūr pōj. Hāmri nē Ijaew nhō Tirtūm kapēr o mē ahkre xà hā ixkre hwūr htēm kurē kumrēx nē wa axà. ¹¹Perej kamā Ijaew na pre te mē kot Tesarōn kamā Ijaew pyrāk kêt nē. Mē kurom mē kām Tirtūm kapēr mar prām nē. Jakamā nhūm pre Pawre mē Siras Tirtūm kapēr o mē ahkre ho pa. Apkati mē mē ahkre mex o pa nhūm mē wa kuma nē hkīnh nē. Nē Tirtūm kapēr ā kagā htūm kamā wa kot mē ahkreta japēr nē kamā omu nē axpēn mā wa harēnh o:

—Nà ām hāmri na wa ā Tirtūm kapēr o mē pajahkre anē. Tirtūm kapēr ā kagā htūm hkôt na hte wa mē pajahkre. Anē.

¹²Hāmri nē ohtō nē Jejus kôt amnhī xunhwý. Ijaew kwý nē

Ijaew kêt xwÿnh kwÿ nê mēni kot amnhî to rÿnh xwÿnhjaja nhÿm mē ohtô nê Jejus kôt amnhî xunhwÿ.

¹³ Tã nhÿm Tesarôn kãm Ijaew-jaja Pawre jarēnh ma. Kot Perej nhô xwÿnhjê mã Tirtÿm kapēr jarēnh o pa hã harēnh ma. Hãmri nê ma mē hwÿr mra nê mē kãm tanhmã ho hêx to nhÿm krî nhô xwÿnhjaja mē kuma nê ra Pawre kamã gryk tÿx nê. ¹⁴ Jakamã nhÿm Jejus kôt mē htôjaja mē harēnh ma nê mē umaj Pawre kator nê ma gô xujanâr wÿr o mō. No nhÿm Siras mē Ximotre wa Perej kamã mē kuri arîk. ¹⁵ Hãmri nhÿm mē hkwÿjaja ma Pawre o mō. Ma krî pê Atenas wÿr o mō. Hãmri nê hwÿr o pôj nê kamã kure. Hãmri nê ra akupÿm Perej wÿr nojarêt nhÿm Pawre mē kãm:

—E kêr ka mē ma akupÿm mō nê Siras mē Ximotre wa kãm ijarê kê war amnhîm nojarêt nê tokyx man ixkôt wa mō. Anê.

Pawre kot Atenas nhô xwÿnhjê mã kapēr ã harēnh

Rômãn 1.18-20

¹⁶ Tã nhÿm Pawreja kormã Atenas kamã pa. Siras mē Ximotre wa kamã hamak o ri kormã kamã mē kot amnhî nhîpêx ã mē omunh o pa. Na pre Atenas nhô xwÿnhjaja sãnti ho ohtô rax nê mē ô krî kamã unhwÿ nhÿm Pawre ri omunh o ri kuhê ho pa. Na pre htem ahpÿnhã mēmo karô nhîpêxja o te Tirtÿm nhîpêx pyrà nê kutã hkôn krã ho rôrôk nê hkrî nê kãm mex o mex ã harēnh o pa. Hãmri nhÿm Pawre tee ri ja hã mē omunh o ri mē hkôt pa nê hkaprî nê. ¹⁷ Hãmri nê ma amnhî kwÿjê nhô Tirtÿm kapēr o mē ahkre xã hã ixkre hwÿr pa nê kamã mē ahkre ho kuhê. Ijaewjê mē Ijaew kêt xwÿnh kot Tirtÿm ã hpijaãm xwÿnhjê mã nhÿm Tirtÿm kapēr jarēnh o kuhê. Nê apkati mē mē kot mēmoj to wēnê xã hwÿr mra nê mē ujaarôr xwÿnhjê mã Tirtÿm kapēr jarēnh o kuhê. ¹⁸ Hãmri nhÿm

mē mar o pa. Atenas nhô xwÿnhjaja na prem axpēn kôt amnhî nhîpêx o pa hkêt nê. Mē hkwÿjaja kêp Epikure hkôt amnhî nhîpêx xwÿnh. Nê mē hkwÿjaja axtem kêp Etok kôt amnhî nhîpêx xwÿnh. Hãmri nhÿm Pawre mē kãm Jejus kot tanhmã mē panê amnhî nhîpêx to hã harēnh o pa nê akupÿm htÿr ã harēnh o pa. Hãmri nhÿm mē tee ri kuma nê hã axpēn kujêr o kuhê nê axpēn mã:

—Tk. Kwa mo na hte myti ata harēnh o pa? Anê.

Nhÿm mē hkwÿjaja mē kãm:

—Ko. Axtem mēpahpãm ô na hte tanhmã harēnh to. Anê.

¹⁹⁻²¹ Atenas nhô xwÿnhjê mē axtem krî hō nhô xwÿnhjaja na prem kãm mē ujarēnh nyw mar prãm nê. Jakamã nhÿm prem mēmoj jarēnh nyw ma hãmri nê ãm axpēn mã harēnh pix o ri pa. Tã ra Pawre xujarēnh nyw ma nê ma amnhî kôt mē kot axpēn mar xã hã ixkre hwÿr o tē. Ixkre pê Areopja wÿr nhÿm prem amnhî kôt o tē nê kãm:

—E kwa aprî hã mē inhmã ate mēmo jarēnh nywta jarē pa mē ama. Mē inhmã mar prãm. Anê.

²² Hãmri nhÿm mē kuma nê mē kãm ujarēnh o xa. Mē kot axpēn mar xã hã ixkre kamã Atenas nhô xwÿnhjê mã awjarê nê mē kãm:

—E nã na ka htem anhô mēmo karô nhîpêx xohtôta ã apijaãm pê kãm amnhî jagrer o ri apa. Pa hte ja hã mē apumunh o mē akôt ixpa. ²³ Na pa ra mē anhô sãnti piitã hkôt omunh o ri ixpa nê o mÿj hō kuhê xã kaprÿja wÿr ixkato. Nhÿm himök ã mēmo karô nhîpêx amrakati nom ã hã kagã kot:

MĚPAHPĀM PUMUNH KĚT KUHĚ
XĀ NA JA

Ã mē ate hã kagã kot anhÿr. Mē ate omunh kêt tã ka htem arî hã apijaãm o ri apa. No pa na ixte mēhōja jarēnh mar mex. Tã kot paj mē amã harê ka mē inhma.

24 —Měpahpām mẽ ate omunh kêt ā amnhī jarēnhta Tirtūm na. Tām na pre pyka ho kato nē kamā mẽmoj piitā ho kator pa. Gō ho kato nē mry ho kato nē panhī ho kato. Ām mẽmoj piitā ho kator par kumrēx. Na hte pika kamā nē kaxkwa kamā mẽmoj piitā ho amnhīptār mex rāhā ho pa. Jakamā mẽmo kaxyw kot puj mẽ jar kām ōrkwý nhīpēx? Tām kēp mẽmoj piitā ho kator xwýnh jakamā kot mẽmoj to presija hkêt. 25 Kēp mẽmoj piitā hpām jakamā mẽmoj piitā ō na. Jakamā tanhmā kot pu wem amnhī to nē kām mẽmoj gō? Tām kot mẽmoj piitā ho kator nē ho htír nē kot mẽmoj piitā ōr kēnā kot puj kêt mẽ amnhī pyrà nē kām mẽmoj gō. 26 Na pre mẽ pahkukamā ahpýnhā mẽ pahpiitā mẽ papapxà jarē nē mẽ pakator hā arīgro jarē. Na pre mẽ pahpām kot wa Atāwja nhīpēx. Jakamā nhūm Atāw kēp mẽ pahpiitā mẽ pahpār krax.

27 —Tā mẽmo kaxyw na pre ā Tirtūm mẽ panhīpēx mex anē? Nā ām mẽ pahte amnhī kaxyw hkôt pajamxpēr nē hkôt amnhī xunhwýr kaxyw na pre mẽ panhīpēx. Ja mẽ pahpē hihtýx kêt. Koja mēhō kām Tirtūm prām nhūm amnhī tā omunh kurē kumrēx.

28 —Nē Tirtūm pix kukwak ri na pu htem pahtír nē tanhmā amnhī nhīpēx to ho ri papa. Mě akwý kot kagà jahkre xwýnhja na pre ja hā kagà nē hā kagà ho: “Mě pahpē mẽpahpām kra na pu htem papa.” Anē. Ā hā kagà kot anhýr.

29 —Tā ka prem amnhīm mẽmo karō nhīpēx. ōr o hkwy nhīpēx nē prat o hkwy nhīpēx nē kēn o hkwy nhīpēx. Hāmri nē hipēx pa nē ho mẽpahpām ā harē nē ri hā apijaam o apa. No mẽ ām amnhī krā hkôt mẽ ate hipēx. Tirtūm te kot ja pyràk kêt.

30 —Amnepēm mẽ pa xwýnhjaja na prem mẽ apyrà nē ā mẽmoj nhīpēx anhýr o pa nhūm Tirtūm ja

hā mẽ omu nē ām mẽ omu nē hā tanhmā mẽ hipēx to hkêt nē. Kormā mẽ kot kapēr mar kêt jakamā nhūm pre ja hā mẽ omu nē ām mẽ omu. Tā na ra mẽ pahte mẽmo karō nhīpēx o mẽpahpām nē mẽ pamā kapēr. Mě pahte hpānhā amnhī kaxyw ām kôt pix mā pajamxpēr o papaja na kām hprām. 31 Koja nhýrmā tanhmā mẽ pahte amnhī nhīpēx to ho papa hā mẽ pahpumunh kôt tanhmā mẽ pajarēnh to. Nē amnhī ri mẽ htír tūm nē mẽ pa ho pa xwýnhjē jarē nē amnhī ri mẽ pa hkêt xwýnhjē jarē. Na pre ra ā mẽ harēnh anhýr kaxyw arīgro hta. Arīgrota ā kot hprī hā kām tanhmā mẽ pajarēnh to kaxyw na pre ra Jejusja xām. Kaxyw na pre akupým ho htír. Nē akupým ho htír jao kot nhýrmā kām tanhmā mẽ pajarēnh to xwýnh ā ho amnhīrit. Anē.

32 Nhūm pre ā Pawre mẽ kām Tirtūm kapēr jarēnh anē nhūm mẽ mar o kuhē. Kot mẽ kām Jejus tyk nē akupým htír ā harē nhūm mẽ mar o kuhē. Nhūm mẽ hkwyjaja kuma nē ām kuma nē axtem nē ri hā akunha. Nom nhūm mẽ hkwyjaja mẽ kurom mar týx nē Pawre mā kām:

—E kwa mẽ inhmā ja mar prām. Apkati hō hā ka axte mẽ inhmā ja jarē pa mẽ ixprī hā mar mex nē. Anē.

33 Hāmri nhūm Pawre akupým nhýri hpōx xà hā ixkre hwýr ma tē. 34 Hāmri nhūm Xiónīs pē Areop kām mẽ kām kapēr xwýnh nē mēhō ni pē Tāmaris nē mẽ hkwyjaja kapēr mar týx nē amnhī kaxyw Jejus kôt hamaxpēr nē hkôt amnhī xunhwý. Hāmri nē Pawre kôt pa.

18

*Pawre Korīt wýr mōr ā harēnh
Wam Korīt 1.1-3*

¹ Tā nhūm Pawre krī pē Atenas rūm kato nē ma krī pē Korīt wýr mō nē pōj. ² Hāmri nē nhýri Akirti pumu. Haxwýja kēp Ijaew. Krī pē

Põt kamã na pre kato. Tã ma pyka pë Itar wÿr mõ nê Itar kamã krï pë Rôm kamã hpãnhã pa. Pa ho pa htã nhÿm mẽ õ pahïhti Krawti tanhmã hamaxpër to hãmri nê mẽ amnhï nê Ijaew piitã mẽ hanor pa. Jakamã nhÿm Akirti kato nê hprõ Prisire mẽ wa ma Korït wÿr mõ. Hãmri nê hwÿr pøj nê kamã pa ho pa. Jakamã nhÿm Pawre Korït wÿr pøj nê wa omu ³ nê wa kuri pøj nê wa hkôt ri pa. Nê Siras mẽ Ximotre wa kamã hamak pë wa ïhkô hã àpênh o pa. Wa uràk nê kupêxé pyti ho ixkre nhïpêx nê ho wênê ho ri wa hkôt pa. ⁴ Hãmri nhÿm sap kato nhÿm ma Tirtÿm kapër o mẽ ahkre xà hã ixkre hwÿr pa nê kamã mẽ kãm Tirtÿm kapër jarênh o hkrï. Ijaew mẽ Ijaew kêt xwÿnhjê mã nhÿm mẽ kãm ujarênh o hkrï. Nê mẽ kãm Jejus kot mẽ panê tanhmã amnhï nhïpêx to hã harê.

⁵ Tã nhÿm Siras mẽ Ximotre wa ma Masetõn rÿm Pawre wÿr mõn pøj. Jakamã nhÿm Pawre axte ixkre nhïpêx ã àpênh kêt nê. Pãnhã apkati mẽ Ijaewjê jahkre ho pa. Mẽ kãm tanhmã Jejus jarênh to ho ri mẽ hkôt pa. Kêp Tirtÿm kot mẽ pakaxyw ãm xwÿnh ã harênh o ri mẽ hkôt pa. Xatã mẽ kãm ujarênh o pa. ⁶ Nom nhÿm mẽ kãm mar prãm kêt nê kamã gryk kato nê kãm kapër punuj nê. Nhÿm Pawre tee ri amnhï tã mẽ kuma nê mẽ kãm:

—E ixte mẽ amã Jejus kot mẽ panê tanhmã amnhï nhïpêx to hã harênh tã ka mẽ amã mar prãm kêt nê. Nã mẽ kam nê mẽ mãmrï ate amnhï tomnuj kãm ty nê arï kam amnhï pumu no ãm amnhï tã tanhmã inhmã nê hkêt nê. Ra mẽ ate Tirtÿm kapër kaga kênã. Nã kot paj mẽ akaga nê ma hpãnhã Ijaew kêt xwÿnhjê hkôt ri mẽ kãm ja jarênh o ri ixpa. Anê.

Hãmri nê kãnhmã xa nê hinôkã kapa nê ho apê. Mẽ kot hkaga hã amnhï pununh kaxyw nhÿm mẽ noo mã ã amnhï nhïpêx anê.

⁷ Hãmri nê ixkre rÿm kato nê hijuk ri Ijaew kêt xwÿnh pë Xijutre nhõrkwÿ hwÿr tẽ nê hpãnhã Xijutre hkôt pa ho pa. Xijutre kêp Ijaew kêt tã amnhï kaxyw Tirtÿm mã hamaxpër rãhã ho pa.

⁸ Tã nhÿm Ijaew õ pë Kriptija hkwyjê rom amnhï kaxyw Pahïhti Jejus kôt hamaxpër nê hkôt amnhï xãm. Kêp Ijaew nhõ Tirtÿm kapër o mẽ ahkre xà hã ixkre kamã mẽ ahkre xwÿnh na pre. Jakamã õrkwÿ kamã hkwyjê mẽ mẽ hpimràatã Pahïhti Jejus kôt amnhï xunhwÿr pa. Nê krïja kamã ra Ijaew kêt xwÿnh ohtõ nê Kripti pyrà nê amnhï kaxyw Jejus kôt hamaxpër nê hkôt amnhï xunhwÿ. Jakamã nhÿm Pawre mẽ kêp Jejus kwÿ hã mẽ piitã mẽ hkrã kumrà.

⁹ Tã nhÿm kamàt nhÿm Pawre gõr nê nõ nê amÿti nhÿm kêwe Pahïhti Jejus axte hwÿr kato nê kãm kapër nê kãm:

—Pa Pawre? E kwã kêr ka mãmrï axãmnhix ri atar mẽ kãm ijarênh rãhã ho ri apa nê amnhï kamã akahak o ri mẽ hkôt apa hkêt nê. ¹⁰ Kot paj atãnopxa nhÿm mēhõ tanhmã ato hkêt nê. Krï ja kamã koja mẽ ohtõ nê ixkôt amnhï xunhwÿ. Anê.

¹¹ Nhÿm pre ã Pahïhti Jejus Pawre hpimtir kãm kãm kapër anê. Jakamã nhÿm Korït kãm arï ri mẽ hkôt pa ryy nê. Arï mẽ hkôt pa hã amgrã pyxi nê hkôt mytwryê kêp 6. Jao Tirtÿm kapër o mẽ ahkre ho ri mẽ hkôt pa.

¹² Tã nhÿm Korït nhõ xwÿnhjê nhõ pika pë Gres kamã mẽ ho amnhïptãr xwÿnh nyw Gartija. Korït kãm pa jakamã nhÿm Ijaew xãptãr tÿmrejaja Pawre pynê nê ma hwÿr o tẽ nê kãm tanhmã ho hêx to. ¹³ Jakamã nhÿm Ijaew pikuprõnh xà hã ixkre kamã mẽ kãm kapër xwÿnh Sostenesja Garti mã Pawre o hêx nê kãm:

—Kwa jahti na hte mẽ ixpê Ijaew kot amnhï nhïpêx kwÿm ri mẽ ahkre ho pa. Jao mẽ ixte axtem nê

tanhmã Tirtũm kôt ri amnhĩ nhĩpêx to ho ri ixpa kaxyw mẽ inhmã karô ho pa. Nom mẽ ixte amnhĩ nhĩpêx kuhpa hã mẽ inhmã karô. Anê.

¹⁴ Hãmri nhũm ra Pawre kot Garti mã amnhĩ jarênh mã tâ nhũm Garti amnhĩ to wa nê hã mẽ kãm kapêr nê mẽ kãm:

—Tk, Kwa kot tanhmã amnhĩ tomnuj tore hã. Kot tanhmã amnhĩ tomnuj to nhũm mẽ ate inhmã harênh ronhỹx pa arĩ mẽ ama nê tanhmã mẽ amã hipêx to. ¹⁵ No xep ãm kot mẽ axaptãr tũmrejaja kot amnhĩ nhĩpêx kuhpa hã pix mã kot amnhĩ nhĩpêx o pa kênã. Nê mẽ ate mẽ ahkre kuhpa hã kot ri mẽ ahkreja pix mýrapê na ka mẽ kamã agryk nê ã inhmã ho akapêr anê. Nã kot paj ja hã tanhmã ho hkêt nê. Ka mẽ kam nê amnhĩ krã hkôt tanhmã ho hprãm xã hkôt tanhmã ho. Anê.

¹⁶ Hãmri nê amnhĩ nê mẽ hano. ¹⁷ Hãmri nhũm mẽ tee ri kuma nê ra Sostenes kamã gryk nê. Kot Garti mã tanhmã Pawre jarênh to htã nhũm kuma nê ãm mar jakamã nhũm mẽ hã Sostenes kamã gryk. Hãmri nê unê nê Garti noo mã htak o xa. Nê htak rax nê. Nom nhũm hã mẽ omu nê ãm mẽ omu nê nê tanhmã mẽ kãm nê hkêt nê.

Pawre kot akupỹm ãxiok wýr mōr ã harênh

¹⁸ Tã nhũm Pawre arĩ Korĩt kamã mẽ hkôt pa nê gaa nê nojarêt nê Jejus kôt htôjê mã amnhĩ jarê nê mẽ kãm:

—E kot paj ma akupỹm pika pê Sir wýr mō. Anê.

Hãmri nê mẽ kêp kato nê ma hwýr mō. Nê ma amnhĩ kôt Akirti mẽ hprō Prisire wa o mō. Mōō nê krĩ pê Sênkrej wýr pōj. Nhũm Pawre amnhĩ kukamã mẽmoj tâ tanhmã Tirtũm mã amnhĩ jarênh to nê amnhĩ jarênh xã hkôt amnhĩ krã hkênh pa. Ijaew kot amnhĩ nhĩpêx xã hkôt ã amnhĩ nhĩpêx anê. Hãmri nê mẽ pãr wýr agjê nê Sênkrej rũm kato nê ma Sir wýr mō. ¹⁹⁻²¹ Mōō

nê krĩ pê Epes wýr pōj. Hãmri nhũm Pawre mẽ hkwýjjaja pãr rũm hapōj nê krĩ hwýr agjê nê Ijaew nhō Tirtũm kapêr o mẽ ahkre xã hã ixkre hwýr mra nê hwýr agjê nhũm Pawre mẽ kãm Tirtũm kapêr jarênh o nhỹ. Hãmri nhũm mẽ kuma nê kãm mar prãm nê. Nê kãm:

—Kwa anojarêt kêt nê. Kritpêm mẽ ixkôt ri apa ryre nê Tirtũm kapêr o mẽ ijahkre. Mẽ inhmã ja mar prãm.

Anhýr tâ no nhũm mẽ kãm:

—Nã kot paj ma mō. Nom koja Tirtũm nhỹrmã akupỹn mẽ awýr inhmẽ pa man akupỹn mẽ awýr mō nê axte kapêr o mẽ ajahkre. Anê.

Hãmri nê ma mō. Ma Epes rũm pãr kãm mō. Nom nhũm Akirti mẽ Prisireja wa Epes kamã arĩk nê hpãnhã kamã pa ho pa.

²² Tã nhũm Pawre krĩ pê Sejarej wýr pōj. Hãmri nê hpãnhã kurũm ma akupỹm Jerujarê hwýr mō. Kot Jejus kôt htôjê pumunh mã ma mẽ hwýr mō. Hãmri nê mẽ hwýr pōj nê mẽ omu nê tanhmã mẽ kãm amnhĩ jarênh to nê mẽ kêp kato nê ma akupỹm ãxiok wýr mō. ²³ Hãmri nê hwýr pōj nê mã mẽ hkôt ri pa ryy nê mẽ kurũm kato nê hpãnhã ma akupỹm pyka pê Prik mẽ Karatas wa hwýr mō. Nê kamã mẽ kot Jejus kôt amnhĩ xunhwýr xwýnhjê jahkre ho pa. Mẽ kot Jejus kôt amnhĩ nhĩpêx tỹx rãhã ho pa kaxyw mẽ hkôt mẽ ahkre mex o ri mẽ hkôt pa.

Apor kot Epes kãm Tirtũm kapêr jarênh

Epes 1.1-2; Wam Korĩt 3.6-9

²⁴ Tã nhũm Epes wýr Ijaew ò pê Aporja mō nê hwýr pōj. Krĩ pê Aresãn kamã na pre kato. Na pre hte amnhĩ kaxyw Tirtũm kôt pix mã hamaxpêr nê kapêr ã kagã htũm mar tỹx nê. Jakamã mẽ kãm harênh mex o pa nhũm mẽ piitã kãm mar prãm nê. ²⁵ Nom kormã Jejus jarênh natur xã mar

kêt jakamã ãm mẽ kãm hkrax pix jarênh o pa. Juãw Paxis kot tanhmã mẽ ahkre htoja nhũm mar týx nê. Nê tanhmã kot mẽ hkrã kumrãr to ho paja nhũm mãânên mar týx nê. Jakamã na pre hte mẽ kãm ja pix jarênh o pa. No Jejus kêp Tirtũm kot mẽ pahwỳr mẽnh xwỳnh ã harênhja nhũm kormã mar kêt nê. Tã Epes wỳr mỗ nê pøj. ²⁶ Hãmri nê Ijaew nhõ Tirtũm kapêr o mẽ ahkre xà hã ixkre hwỳr axà nê kamã mẽ kãm ujarênh o nhỹ. Amnhĩ kamã kahak kêt nê ãmnhĩx ri mẽ kãm ujarênh mex nê. Hãmri nhũm Prisire mẽ Akirti wa kot mẽ kãm ujarênh ã kuma nê war axpên mã:

—Kwa mãn kormã Jejus jarênh piitã mar kêt. E pu amnhĩ kôt panhõrkwỹ hwỳr o tẽ nê pahprĩ hã kãm harênh jatur xàm kumẽ kê hprĩ hã mar pa. Anê.

Hãmri nê war amnhĩ kôt kuwỳ nê hprĩ hã kãm ujarênh jatur xàm kumẽ nhũm hprĩ hã harênh piitã mar týx nê.

²⁷ Tã ra pyka pê Gres wỳr nojarêt nê Jejus kôt htõjê mã amnhĩ jarê nhũm mẽ kuma nhũm ja mẽ kãm mex nê. Hãmri nê Gres kamã Jejus kôt mẽ htõjê mã kagã nhĩpêx. Apor kot mẽ hwỳr amnhĩ kôt o mỗr nê mẽ kãm õr nhũm mẽ kot omunh nê kamã harênh nê ho mex kaxyw mẽ kãm hipêx. Hãmri nê hipêx pa nê kãm kugõ nhũm kupy nê mẽ kurũm kato nê mã mẽ hwỳr mỗ. Hãmri nê mẽ hwỳr pøj. Gres nhõ xwỳnh kwỳjaja na prem ra Jejus kôt amnhĩ xunhwỹ. Tirtũm kot mẽ kutã nojarêt jakamã nhũm mẽ ra hkôt amnhĩ xunhwỹ. Jakamã nhũm Apor mẽ hwỳr pøj hãmri nê mẽ ãhkõ hã tanhmã mẽ ho ajuta hto ho pa. ²⁸ Nê xatã Ijaew mã tanhmã Jejus jarênh to kamã hihtỳx o mẽ hkôt pa nê mẽ kãm:

—Nà Jejusja tãm na pre Tirtũm mẽ pakaxyw ãm. Tirtũm kapêr ã kagã htũm kamã ã harênh kot anhỹr. Anê.

19

Pawre akupỳm Epes wỳr mỗr ã harênh

Rukre 3.15-16

¹ Tã nhũm Apor kormã Korĩt kãm pa ri nhũm Pawre ma akupỳm Epes wỳr mỗ. Ma krãhakỳx kôt akupỳm hwỳr mỗ. Hãmri nê hwỳr pøj nê mẽ kot Jejus kôt amnhĩ nhĩpêx o mẽ pa xwỳnhjê pumu. Nhũm mẽ kormã Jejus jarênh jatur xà mar kêt nê. ² Jakamã nhũm Pawre mẽ hwỳr mỗ nê mẽ omu nê Tirtũm Karõ hã mẽ hkukja nê mẽ kãm:

—Kwa mẽ ate Jejus kôt amnhĩ xunhwỳr xà hã arĩgrota ã xà na pre Tirtũm Karõ mẽ akarõ mã agjê? Anê.

Hãmri nhũm mẽ kuma nê kãm:

—Nà mẽ ixte Tirtũm Karõ jarênh mar kêt. Anê.

³ Hãmri nhũm mẽ kãm:

—No mẽmoj kôt na prem mẽ akrã kumrã? Anê.

Nhũm mẽ kãm:

—Nà Juãw Paxis kot mẽ hkrã kumrãr o paja kôt na prem mẽ ixkrã kumrã. Anê.

⁴ Hãmri nhũm Pawre mẽ kãm:

—Nà Juãw Paxis na pre Ijaew mã kapêr o: “Kot kaj mẽ mẽ ate amnhĩ tomnuj kaga nê hpãnhã tãm amnhĩ nhĩpêx pa hã mẽ akrã kumrã.” Anhỹr o mẽ kãm kapêr o pa. Nê mẽ kãm Jejus jarênh o: “Koja tokyx mẽhõ ixkôt hapu hã mẽ pahwỳr kato nê tanhmã amnhĩ nhĩpêx to ho pa. Ka mẽ omu nê amnhĩ kaxyw hkôt ajamaxpêr nê hkôt amnhĩ xunhwỹ.” Anê. Tã Jejusja na pre ã mẽ kãm harênh anhỹr o pa. Anê.

⁵ Nhũm pre ã Pawre mẽ kãm Juãw Paxis mẽ Jejus wa harênh anê nê hpãnhã Jejus nhỹ hã mẽ hkrã kumrã. ⁶ Hãmri nê hpãnhã mẽ hã ãhkra jaxwỳ nhũm Tirtũm Karõ mẽ hwỳr wrỳ nê mẽ hkarõ mã gjêx pa. Hãmri nhũm mẽ ý hã ahpỳnhã axtem mẽ kapêr kwỳ ho kapêr nê ý hã Tirtũm mex o mex ã harênh

o kuhê. ⁷ Ā mẽ kot amnhĩ nhĩpêx anhÿr xwÿnhjaja kêp 12.

⁸ Tã nhũm Pawre Epes kãm Ijaew nhõ Tĩrtũm kapêr o mẽ ahkre xà hã ixkre hwÿr m̄rar ã mytwrÿ axkrunêpxi. Amnhĩ kamã kahak kêt nê hprĩ hã Ijaew mã hprĩ hã Jejus jarê nê mẽ kãm:

—E pa mẽ amã Jejus jarê ka mẽ inhma. Nà Tĩrtũm kot mẽ pahwÿr mênh xwÿnhhta na. Nê mẽ pahte kamã pajamak o papa xwÿnhhta na. Jakamã kot ka mẽ amnhĩ kaxyw hkôt ajamaxpêr nê hkôt amnhĩ xunhwÿ nhũm Tĩrtũm ja hã mẽ apumu nê mẽ ato hkra. Anê.

Hãmri nhũm mẽ hkwyjaja kuma nê hkôt hamaxpêr kurê kumrêx. ⁹ Nom nhũm mẽ hkwyjaja kuma nê ãm kuma nê Jejus o kapêr punuj nê. Mẽ piitã mẽ noo mã kuhê nê ho kapêr punuj tÿx nê. Nhũm Pawre tee ri ja mẽ omu hãmri nê mẽ kurũm kato. Mẽ pikuprõnh xà hã ixkreta rũm kato nê hpãnhã nhãm mẽ kot kãm “Xirãn kot mẽ ahkre xà hã ixkre” anhÿr xwÿnhjaja wÿr hpãnhã mō. Nê amnhĩ kôt mẽ kot Jejus kôt amnhĩ xunhwÿr xwÿnhjê ho pa nê hpãnhã ixkreta kamã mẽ ahkre ho pa. Apkati mẽ hwÿr mra nê mẽ ahkre. ¹⁰ Jao hã amgrã axkrut. Jakamã nhũm pyka pê As kamã mẽ piitã Pahihti Jejus jarênh ma. Ijaew nê Ijaew kêt xwÿnhjaja nhũm mẽ piitã harênh ma.

Wajaga hkwy jarênh

¹¹ Tã nhũm Pawre Tĩrtũm nhÿ hã mẽ kãm aa mẽ kot mẽmoj pumunh kêt kwÿ ho anhÿr o ri mẽ hkôt pa. ¹² Jakamã nhũm pre htem hwÿr mra nê kêp ê hkwy jamy nê ma mẽ à xwÿnhjê hwÿr o mra nê mẽ hã haxwÿ nhũm mẽ akupÿm mex. Nê mẽkarõmnuti kot tanhmã mẽ ho ho pa xwÿnhjê hã nhũm prem mããnênh mẽ hã ê kwÿ jaxwÿ nhũm mẽkarõmnutija mẽ kurũm hapôj nê ma m̄rar kurê kumrêx nhũm mẽ akupÿm tãm hkrã.

¹³⁻¹⁴ Tã nhũm mẽõ patre maati Sewahtija hkra my kêp 7 nê piitã kêp wajaga. Hãmri nê mẽ kãm Pawre pyrã nê mẽ nê mẽkarõmnuti japôx o pa hprãm nê. Jakamã kormã Jejus kôt amnhĩ xunhwÿr kêt tã mẽ kot ÿ hã Pawre pyrã nê mẽhõ nê hkwy janor kaxyw nê kãm:

—E Pawre kot Jejus jarênh o ri pa xwÿnhhta nhÿ hã kot paj amã ixkapêr. Jakamã e kwa tokyx myta rũm akato nê ma tẽ. Anê.

¹⁵ Hãmri nhũm mẽkarõmnutija mẽ kuma nê ãm mẽ kuma nê mẽ kãm:

—Tk. Mẽ apê Jejus mẽ Pawre wa hkwy hkêt tã mẽ nê ã mẽ inhmã akapêr anhÿr o apa. Nà Jejus mẽ hkwy pixjaja na htem Tĩrtũm nhÿ hã mẽ kêp mẽ ijapôx o pa. Mẽ apê mẽ hkwy hkêt kênã. Nà pa ixkatoore kaxyw ã. Anê.

¹⁶ Hãmri nhũm mẽkarõmnuti kot tanhmã ho xwÿnhhta mẽkarõmnuti nhÿ hã wajagajê pynê nê mẽ htak rax o kêp mẽ ê kaxõnh pa nhũm mẽ tee ri amnhĩ nhĩpêx. Hãmri nê hkênh nê õrkwÿ rũm hapôj nê ma umaj hprõt nê mra. ¹⁷ Hãmri nhũm Epes kamã mẽ piitã ã kot mẽ hipêx anhÿr ã mẽ harênh ma nê tee ri hamaxpêr nê kãm ma nê. Ijaew nê Ijaew kêt xwÿnhjaja nhũm mẽ piitã tee ri kãm hamaxpêr o pa. Nê Pahihti Jejus mã mex o mex ã harê. ¹⁸ Jakamã nhũm mẽ kot Jejus kôt amnhĩ xunhwÿr nyw xwÿnhjaja piitã tanhmã amnhĩ jarênh to. Nê mẽ hkwyjaja amnhĩ jarênh o:

—Nà kormã ixte Jejus kôt amnhĩ xãm kêt ri na pa pre ã amnhĩ tomnuj anhÿr o ri ixpa. Tã Jejus kôt amnhĩ xãm hãmri nê axte ã amnhĩ nhĩpêx anhÿr kêt nê. Anê.

Nhũm mẽ hkwyjaja kêp wajaga htã mẽ urak nê Jejus kôt amnhĩ xunhwÿ hãmri nê amnhĩ jarênh o:

—Nà ijaxwÿja kormã Jejus kôt amnhĩ xãm kêt ri na pa pre hte nê mẽ no kupyre nê mẽ y pix o ri mẽ hkôt ixpa. Tã Jejus kôt amnhĩ xãm hãmri nê axte ã amnhĩ nhĩpêx

anhÿr kêt nê. Pãnhã axtem amnhĩ nhĩpêx nyw o amnhĩ nhĩpêx o ri xpa. Anê.

¹⁹ Hãmri mē ò wajaga xàhpumunh xà hã kagà jamý nê ma o mra nê kaxyw kuto nê kamã rēnh pa nê mē piitã mē noo mã ho xêt pa. Wajaga xàhpumunh xà hã kagàja ã kàxpore xohtô rax kumrêx tã nhũm mē Jesus gryk ã hamý nê o mra nê ho hxêt pa nhũm hapêx. ²⁰ Hãmri nhũm krĩ nhõ xwýnhjaja ã mē kot amnhĩ nhĩpêx anhÿr ã mē omu nê ohtô rax nê mē uràk nê Jesus kôt amnhĩ xunhwý.

Pawre kot Rôm wýr hkrà hã harēnh

Rômãn 1.13-15, 15.22-29

²¹ Tã nhũm Pawre ra akupÿm Jerujarê hwýr nojarêt nê hamaxpêr o:

—E kot paj ixkato nê hpãnhã ma Masetõn mē Gres wa hkôt ma akupÿm Jerujarê hwýr mō. Ma mē kot Jesus kôt amnhĩ xunhwýr xwýnhjê pumunh o mē hkôt mō. Hãmri nê Jerujarê hwýr pøj nê kamã tanhmã amnhĩ to hpa hãmri nê hpãnhã ma Rôm wýr mō. Anê.

²² Hãmri nê hkôt ho ajuta ho wa pa xwýnh Ximotre mē Eras wa kãm amnhĩ jarê nê wa kãm:

—E kêr ka wa ma ixkukamã Masetõn wýr wa mō. Kot paj kormã jar As kamã ixpa grire hãmri nê ma war akôt mō pu mē hamũ ma Jerujarê hwýr mō. Anê.

Hãmri nhũm wa kuma nê kato nê ma hkukamã Masetõn wýr mō.

Mē kot sãnti hã Pawre mã àkjêr ã mē harēnh

Sikũn Korĩt 1.8-9

²³ Rôm nhũm Epes nhõ xwýnhjaja tee ri Pawre kot tanhmã Pahihti Jesus jarēnh to hã kuma nhũm ja mē kêp omnuj nê. Nhũm mē Jesus ã kamã gryk tÿx nê. ²⁴ Na prem amnhĩ kaxyw Tirtũm kôt hamaxpêr kêt nê. Na prem axtem sãnti ho mē hpãm nê amnhĩ to hwýr pê hã hpijaàm nê kãm mex o mex ã

harēnh o pa. Mē ò sãntija ni Xiãnre na pre. Nhũm mē kãm ixkre nhĩpêx nê kamã hkarõ nhĩpêx xãm. Hãmri nê hwýr akuprõ nê hã hkĩnh nê hkarõ hã hpijaàm nê kãm mex o mex ã harê. Nhũm pre hte Temêtja Xiãnre nhõrkwý karõ hkryre hkwy nhĩpêx nê mē kãm ho wēnê ho pa. Prat o hipêx nê ho wēnê ho pa. Jao ra hã mē àpēnh xwýnhjê mē nhũm mē kot haprõr xwýnhjê kukwak ri kàxpore jamýnh rũnh o pa.

²⁵ —Jakamã nhũm Pawre mē hwýr mō nê pøj nê mē kãm Mēpahpãm Tirtũm jarēnh o ri mē hkôt pa nhũm Temêt tee ri kuma nhũm ja kêp omnuj nê. Hãmri nhũm hamaxpêr nê mē kot uràk nê Xiãnre nhõrkwý karõ hkryre nhĩpêx nê ho wēnê ho pa xwýnhjê ho akuprõ nê mē kãm:

—E kwa mē inhma. Na pu htem mēpanã Xiãnre nhõrkwý karõ hkryre pãnhã kàxpore jamýnh rũnh o papa. ²⁶ Tã mãn ka mē ra ham hpõx xwýnh Pawreja pumu nê kapêr ma. Na hte jar mē panhõ krĩ kamã nê As piitã hkôt mē kãm mēpanã Xiãnre karõ nê mē kãm kapêr o pa. Xep mē pahte mē hkarõ nhĩpêxja kêp mēpanã kumrêx kêt ã mē kãm harēnh o pa nhũm xep mē ohtô nê kuma nê ra hkôt hamaxpêr.

²⁷ —Kwa ja mex kêt. Koja mē kapêr ma nê hkôt amnhĩ nhĩpêx hãmri nê axte mē pahte ixkre karõ hkryre nhĩpêx xwýnhnta japrõr kêt nê. Hãmri nê mē paxàpēnh o kapêr punuj nê. No ãm ja pix omnuj kêt. Koja mēpanã Xiãnre mã amnhĩ jarēnh xà hã ixkreja kaga hpa. Nê haxwýja karõja kaga. Mē piitã kãm hapê kēnã. As kamã nê pyka piitã hkôt mē piitã kãm hapê nê hwýr mra nê amnhĩ to hwýr o pa. Kêp mēpanã mex kumrêx tã koja mē Pawre kapêr gryk ã hk-aga hpa nê axte kãm hamaxpêr kêt nê. Hãmri pu mē axte mē kukwak ri pakàxpore rax nê papa hkêt

ně. Kwa tanhmã kot puj mẽ amnhĩ nhĩpêx to? Aně.

²⁸ Hãmri nhũm mẽ tee ri ã kapêr anhÿr ã kuma nê Pawre kamã gryk tÿx kumrêx. Nê gryk xàj kàx pèê kapêr nê xatã kapêr tÿx kãm kapêr punuj nê. Nê kapêr o:

—Xiãnre na mex kumrêx. Kêp mẽ pahpê Epes nhõ xwÿnhjê nã maati na.

Anhÿr o kàxpèê kapêr o kuhê. ²⁹ Hãmri nhũm krĩ nhõ xwÿnh piitã mẽ kuma nê mẽ hwÿr hprôt nê haxwÿja gryk nê kàxpèê mẽ hkôt ã harênh anhÿr o kuhê. Hãmri nê gryk xàj Pawre hkôt ri wa pa xwÿnhja wa unê nê ma mẽ kot axpên mar xà hã ixkre hwÿr wa hkjênh o tẽ. Masetôn nhõ xwÿnh wa kêp Gajore mẽ Aristakja nhũm mẽ wa unê. ³⁰ Hãmri nhũm Pawre mẽ kot wa unênh ã mẽ omu nê tee ri wa hkukamã hamaxpêr nê mẽ hkôt hprôt nê mẽ kãm tanhmã kapêr to kaxyw nom nhũm mẽ kot Jejus kôt amnhĩ xunhwÿr xwÿnhjaja ja nê kãm kapêr kãm hihtÿx nê. ³¹ Hãmri nhũm As kamã mẽ kot mẽ ho amnhĩptãr xwÿnh kwÿjaja ã mẽ kot amnhĩ nhĩpêx anhÿr ã mẽ omu nê Pawre hwÿr hpêr mẽ. Mẽ kãm hkĩnh jakamã kot mẽ hkôt htêm nhũm mẽ kot hpĩr pymaj hwÿr hpêr mẽ nê mẽ hkôt htêm nê hkurê kamã hihtÿx nê.

³² Rôm nhũm mẽ piitã mẽ kot axpên mar xà hã ixkre hwÿr pikuprõnh pa nê kàx pè kapêr punuj o kuhê. Nom axpên kôt kapêr kêt nê. ãm axpên kwÿm ri kàx pè tanhmã kapêr punuj to ho. Nhũm mẽ hkwÿjaja hprĩ hã mẽ mar kêt tã amarĩ amnhĩ krã hkôt kàx pè kapêr punuj nê. ³³ Nhũm Ijaew kwÿjaja tee ri ja hã mẽ omu nê axpên mã:

—Tk. Kwa okora. Koja mẽ nã Xiãnre hã gryk hãmri nê tanhmã mẽ pahpê Ijaew to nã? Aně.

Hãmri nê hamaxpêr nê mẽ hwÿr amnhĩõ pè Aresãnja mẽ nê kãm:

—Kwa ma mẽ hwÿr tẽ nê mẽ kãm tanhmã mẽ pahpã axãprãr to. Pawre kêp mẽ pahkwÿ htã tãm na mẽ kãm mẽ gryk jaxã. No mẽ papajaja na pu mẽ kãm mẽ gryk jaxãr kêt nê. Aně.

Hãmri nhũm mẽ kuma nê mẽ hwÿr tẽ nê xa nê tee ri kot mẽ ho hpinhkrênh kaxyw kãnhmã mẽ kãm ãkra pêr kaprÿ. ³⁴ Nhũm mẽ omu nom hpinhkrênh kêt nê arĩ kàx pèê kapêr punuj ã 2 or. Nê kàx pè kapêr o:

—Mêpanã Xiãnreja mex o mex. Kêp mẽ pahpê Epes nhõ xwÿnhjê nã mex na. Aně.

³⁵ Tã nhũm mẽ õ pahi nhõ kôwenatõ jatã tanhmã Epes nhõ xwÿnhjê ho hpinhkrênh to hãmri nê ja nê mẽ kãm kapêr nê mẽ kãm:

—Kwa mẽ anhĩkrê. Mẽ piitã kot Xiãnre mex o mex ã omunh kênã. Nê mẽ pahpê kãm amnhĩ jarênh xà hã ixkre jamãr xwÿnh ã mẽ kot mẽ pahpumunh mex. Nê kaxkwa rùm karõ kot mẽ pahwÿr tẽm nhũm mẽ pahpê hamãr o papa xwÿnh ã nhũm mẽ kot mẽ pahpumunh mex. ³⁶ Jakamã mēhõ kot kêt we mẽ pahpê hamãr xwÿnh kêt ã mẽ pajarê? Ra mẽ piitã mẽ kot ja hã mẽ pahpumunh jakamã kwa mẽ anhĩkrê nê ri ã akapêr anhÿr kêt nê. ³⁷ No mẽ ate wa unênh nê amnhĩ kôt wa ho atêm xwÿnhhta wa. Wa kot tanhmã mẽpanã Xiãnre ho kapêr punuj to rÿ kêp õ ixkre kamã ãhkĩnh kêt tã ka mẽ amarĩ wa unê nê amnê amnhĩ kôt wa o tẽ.

³⁸ —Kwa kê Temêt mẽ hkwÿjaja kãm tanhmã wa ho kapêr to hprãm nê ma pahihiti hwÿr wa o tẽ nê kumã mãn tanhmã wa ho kapêr to. Měmoj tã axpên mã mẽ kapêr xà hã arĩgrota ãã. ³⁹ Rÿ ka mẽ amã mẽmoj jarênh prãm nê arĩgroja ã mãn rĩ kormã mẽmoj jarê. ⁴⁰ No jarãhã mẽ ate amnhĩ nhĩpêxja te mẽ ate pahihiti kutã amnhĩ xunhwÿr nê ho akapêr punuj pyrãk. Koja Rôm nhõ xwÿnhjê nhõ pahi mẽ ajarênh

ma hāmri nē mē ate kamā agryk ā amnhī kamnhīx. Hāmri nē mē atā ixkukja pa tanhmā kām mē ajarēnh to? Mēhō nhỹ hā na ka mē ā apikuprōnh nē amnhī nhīpēx anē? Nā amnhī krā hkôt na ka mē akuprō nē ā amnhī nhīpēx anē. Anē.

⁴¹ Hāmri nē mē kām kapēr pa nē mē hano nhūm mē anhrà nē ma akupym ōrkwỹ hwyr hapēx.

20

Pawre ma Masetōn mē Gres wa hwyr mōr ā harēnh

¹ Hāmri nhūm Pawre ra nojarēt. Jerujarē hwyr mōr mā nom kormā pika pē Masetōn kumrēx wyr mōr nē kurūm ma akupym Jerujarē hwyr mōr mā. Hāmri nē nojarēt nē mē kot Jejus kôt amnhī xunhwyr xwýnhjē ho akuprō nē mē kām amnhī jarē nē mē kām:

—E kot paj ma mō. Nom kêr ka mē arī ixwakre kamā Tirtūm kapēr kôt amnhī nhīpēx mex rāhā ho ri apa nē aa hkaga hkēt nē. Anē.

Hāmri nē mē kām:

—E mē māmri ixwa kre kamā axamnhīx ajamakētkati nē ri apa. Anē.

Hāmri nē kato nē ma Masetōn wyr mō. ² Nē hwyr pōj nē kamā krī hkwy hkôt mō nē nhỹri mē kot Jejus kôt amnhī xunhwyr xwýnhjē pumu nē Tirtūm kapēr o mē ahkre. Mē kot hkôt amnhī nhīpēx mex nē kām hprām xā hkôt pix mā amnhī nhīpēx kaxyw mē kām kapēr o ri mē hkôt pa. Hāmri nē kato nē ma mō nē pyka pē Gres wyr pōj. ³ Nē kamā mē hkôt pa hā mytwry axkrunēpxi hāmri nē akupym pyka pē Sir wyr nojarēt. Nē ma pàr kām hwyr mōr kaxyw nē amnhī tā Sir kamā Ijaew kwý kot tanhmā harēnh to hā amnhī jarēnh ma. Na prem ra hā axpēn mā amýnē nē axpēn mā:

—E koja amnē mē pahwyr mō pu mē nhỹri omu nē hpīr kurē kumrēx. Anē.

Hāmri nhūm Pawre amnhī tā mē kapēr ma nē pàr kaga nē mē hwyr mōr kēt nē. Hāmri nē awjanā nē Jerujarē hwyr Masetōn kamā pa. ⁴ Nhūm Jejus kôt htō hkwyjaja ma hkôt mō. Ā mē hixi kot anhyr.

Perej nhō xwýnh Sopatōja. Piro hkra na pre.

Nē Tesarōn nhō xwýnh Aristak mē Sikūn wa.

Nē Tepe nhō xwýnh Gajoreja.

Nē As nhō xwýnh Xikitre mē Torow wa.

Nē Ximotreja.

Jajaja na prem ma Pawre hkôt Jerujarē hwyr mō. ⁵ Nē pa ixpē Rukre ixte mē amā ja jarēnh nē hā kagā xwýnhja na pa axte Pawre hā ajēt nē hkôt mō. Jakamā nhūm jajaja piitā ma wa ixkukamā Tōx wyr mō nē kamā wa ixkām hamak o pa.

⁶ Tā pa wa ma krī pē Piripos rūm ixkato nē pàr kām ma mē hkôt mō. Arīgro pē Pas jakānh mē ma mē hkôt mō.

Tā wa ixtā arīgro pē 5 nē mē hkôt Tōx wyr pōj nē kamā mē omu nē mē hkôt ixpa hā ixtā ū semān.

Pawre kot akupym Exik o htīr ā harēnh

Juāw 5.21; Atre 9.36-43

⁷ Tā nhūm sap nē kamāt pa mē kot Jejus kôt amnhī xunhwyr xwýnhjē hkôt akuprō nē axpēn kutā apku nhūm Pawre mē kām kapēr. Ra apkati hkôt mē inhnojarēt kaxyw jakamā nhūm mē kām Tirtūm kapēr jarēnh ryy nē. Ra kôt ā kamāt nhūm arī mē kām harēnh o nhỹ. ⁸⁻⁹ Ixkre hprêk axpēn nhīpy axkrunēpxi nhītep xā kamā na pa prem akuprō nē mar o ixkrī. Ixkreja kamā kanē ohtō nē hpōk o harir. Jakamā nhūm Pawre arī mē kām ujarēnh o nhỹ nhūm mēhō xàptār nyw Exikja ra ōtxwa htýx nē mē ixkuri ōt o nhỹ. Janere hā ōt o nhỹ. Tā ra gōr nē janere pē kato nē ahparmā tē nē pykap tēm. Pa mē tee ri omu nē ahparmā hwyr

ixprôt nê wrý nê omu nhùm htyk mex nê nõ. Kÿj rùm ahpar mã htêm ryy jakamã htyk mex nê nõ. Hãmri nhùm hkwyjaja tee ri omu nê hkaprî htýx nê kumý nê mÿr o hkrî. ¹⁰ Hãmri nhùm Pawre mẽ ixkôt wrý nê hwÿr tẽ nê htyk ã omu nê kumý nê mẽ kãm:

—E mẽ amÿr kêt nê. Ra htyk tâ koja Tirtùm akupÿm mẽ pamã ho htír.

Anhÿrja kôt nhùm akupÿm htír. ¹¹⁻¹² Hãmri nhùm mẽ akupÿm htír ã omu nê hkính tÿx kumrêx. Hãmri pa mẽ akupÿm kÿx pê ixkre hwÿr api nhùm Pawre mẽ inhmã pãwti hkwy nhîrê nê mẽ inhmã kugô pa mẽ Jejus kot mẽ panê htyk mã ijamaxpêr pê kuku. Hãmri nhùm Pawre axte mẽ kãm kapêr o ÿr rãhã nhùm myt kato pa mẽ kêp anhgrã nê ma ixa.

Pawre Mîrêt wÿr môr ã harênh

¹³ Hãmri pa mẽ inhnojarêt nhùm Pawre mẽ ixte hkôt mẽ inhmôr xwÿnhjê mã:

—E kêr ka mẽ ma pàr kãm ixkukamã mō. Kot paj ahte ma kÿx pê mẽ akôt ixpar o Asôt wÿr mō. Hãmri nê hwÿr pōj nê mẽ anhō pàr mã axà pu mẽ ma pahpimràatã ma hamũ mō. Anê.

¹⁴ Hãmri pa mẽ kuma nê ma mō nê mẽmo arîgro mã Asôt kamã axpên wÿr pōj. Hãmri nhùm Pawre mẽ ixkôt pàr wÿr axà pa mẽ ma krî pê Mîtirên wÿr mō. ¹⁵ Nê hwÿr pōj nê kurùm kormã mō nhùm apkati pa mẽ gô hipôk pê Kiw jakrenh o mō. Nê hakre nê mō nhùm apkati pa mẽ gô hipôk pê Sãm wÿr pōj nê mã pàr nhô. Hãmri nhùm apkati pa mẽ axte mō nê Mîrêt wÿr pōj. ¹⁶ Nom nhùm ra Pawre nojarêt nê. Kãm tokyx As rùm kator nê Jerujarê hwÿr môr nê tokyx hpôx prãm nê. Kãm mẽ hkính pê Pêtekos xwÿj ri hwÿr hpôx prãm jakamã nojarêt tÿx pa mẽ Epes wÿr inhmôr kêt nê.

Pawre kot Epes kamã Kris kwÿjê mã amnhî jarênh

¹⁷ Tã pa mẽ Mîrêt wÿr pōj nhùm Pawre amnhî wÿr Epes wÿr Jejus kwÿ jahkre ho mẽ pa xwÿnhjê mã karô. ¹⁸ Hãmri nhùm mẽ man mẽ ixwÿr mō nhùm Pawre mẽ omu nê mẽ kãm amnhî jarê nê mẽ kãm:

—Nã ixte mẽ amã amnhî jarênh kaxyw na pa mẽ atã karô. Ra mẽ ate tanhmã ixte amnhî nhîpêx to mã ixpumunh mex. Wam mẽ awÿr As wÿr ixpôxtã ã ka prem aprî mã ixpumunh mex nê. ¹⁹ Na pa pre mẽ akôt ri mẽ amã tanhmã amnhî nhîpêx to ho ri ixa. Te ixpê mẽ amã ixapênh xwÿnh pyrãk. Nê Pahihti Jejus mã tanhmã amnhî nhîpêx to ho ri mẽ akôt ixa. Nê ixkwÿ Ijaew kwÿ kot Jejus kapêr kaga mã mẽ omu nê ixkaprî nê inhmÿr o ixa. Nhùm prem Jejus ã ixtomnuj pa amnhî xã htýx kamã ijamak o ri mẽ hkôt ixa. ²⁰ Nom arî ri Tirtùm kapêr o mẽ ajahkre ho ri mẽ akôt ixa rãhã nê aa hkaga hkêt nê. Mẽ anhôrkwÿ kamã nê mẽ ahkre xã mã ixkre kamã. Mẽ ate tãm amnhî nhîpêx prãm xàj pa pre ã mẽ ajahkre mex anhÿr rãhã ho ri mẽ akôt ixa.

²¹ —Nê mẽ ixpê Ijaewjê mẽ mẽ apê Ijaew kêt xwÿnhjê mẽ pa pre mẽ ajahkre ho axpên pyrãk. Mẽ apiitã mẽ ate amnhî tomnuj kaga nê hpãnhã Tirtùm kôt amnhî nhîpêx kaxyw. Nê amnhî kaxyw mẽ panhō Pahihti Jejus Kris kôt ajamaxpêr kaxyw na pa pre mẽ akôt ri mẽ ajahkre rãhã ho ri ixa.

²² —Tã ra Tirtùm Karô kot akupÿm Jerujarê hwÿr inhmênh jakamã pa kormã hwÿr mō. Kot paj hwÿr pōj nhùm krî nhô xwÿnhjaja Jejus ã ixtomnuj nê nom tanhmã mẽ kot ixtoja kukamã ixte ixprî mã ixãhpumunh kêt. ²³ Ja pix na ixte omunh. Na pa hte nhÿri pōj nhùm htem Jejus ã ixpynê nê mẽ hagjênh xã kamã ijagjê nê tanhmã inhîpêx to. Tirtùm Karô na pre ra ã mẽ kot

inhîpêx anhÿrja kukamã inhmã mẽ harê. Jakamã ixte amnhî kukamã amnhî tâ ixâhpumunh mex. Kot paj xep akupÿm Jerujarê hwÿr pøj nhÿm mẽ ixpumu nê Jejus ã tanhmã inhîpêx to. ²⁴ Tã no pa amnhî kamã ixkahak kêt o inhmã mẽ uma hkêt nê. Koja mẽ kãm ixpÿr prãm nê mãmrî ixpÿ. Inhmã ixtyk puma hkêt. Æm mẽmoj pixi na inhmã hprãm. Ra Pahihti Jejus kot mẽmoj tâ inhmã karõ xàja na inhmã kormã ixtÿr ri hatur xãm mẽnh prãm. Tÿrtÿm kãm mẽ pajapê hã kot mẽ pahto mex prãm xäj mẽ pahwÿr Kra Jejus mẽnh nhÿm mẽ panê tanhmã amnhî nhîpêx to hã harênhja na inhmã mẽ piitã mẽ kãm harênh jatur xãm mẽnh prãm.

²⁵ —Tã e ixkràmnhwÿjaja. Na pa pre mẽ akôt mẽ ajahkre rãhã ho ri ixpa. Mẽ ate Jejus kôt amnhî nhîpêx mex rãhã ho ri apa kaxyw. Tã kot puj pêr mẽ axte xepën pumunh kêt nê.

²⁶⁻²⁷ —Na pa pre ra mẽ amã Tÿrtÿm kapêr piitã harênh pa. Mẽ ate mar tÿx nê hkôt pix mã amnhî nhîpêx o apa kaxyw. Jakamã koja mẽ anhõ krî nhõ xwÿnhjê hõ amnhî kaxyw Jejus kôt hamaxpêr prãm kêt nê rî tãm. Kwãr mãmrî kot amnhî tomnuj kamã ty nê arî tãm amnhî pumu no ãm kê amnhî tâ tanhmã inhmã nê hkêt nê.

²⁸ —E mẽ ate Kris kwÿ jahkre ho apa xwÿnhjaja. Kêr ka mẽ amnhî pumunh mex o ri apa. Nê mẽ kot Jejus kôt amnhî xunhwÿr xwÿnhjê jamãr mex o ri apa. Ja kaxyw na pre Tÿrtÿm Karõ mẽ kaxyw mẽ ax-unhwÿ. Tÿrtÿm Kra Jejus kot htyk o Tÿrtÿm mã mẽ pahte amnhî tomnuj piitã hpãnhã amnhîrer pa jakamã kêr ka mẽ kãm mẽ omunh mex o ri mẽ hkôt apa. Te ôwêhti jamãr xwÿnh kot ôwêhti jamãr mex o ri pata pyrãk.

²⁹ —Kot paj ma mõ nhÿm mẽmojjaja ixpãnhã mẽ awÿr pøj nê mẽ ate Jejus kaga hprãm xäj

tanhmã mẽ amã hêx to ho ri mẽ akôt pa. ³⁰ Nê mẽ akwÿjaja mẽ urã nê tanhmã hamaxpêr punuj to nê mẽ ate Jejus kaga hprãm xäj hêx rom tanhmã mẽ amã kapêr to ho ri mẽ akôt pa. ³¹ Jakamã kwa mẽ o kora. Kêr ka mẽ axkãm ajamak rom nê ri apa. Kê jajaja nhÿrmã ã mẽ amã kapêr anê ka mẽ ama nê mẽ hkôt ajamaxpêr kêt nê. Mẽ ate mẽ mar nê mẽ hkôt ajamaxpêr pymaj na pa pre mẽ akôt ri mẽ ajahkre ho ri ixpa hã ixtã amgrã axkrunêpxi. Arîgro hã nê kamãt kãm mẽ ajahkre rÿnh o ri ixpa. Nê mẽ ate mẽ amã mẽ hêx xwÿnhjê hkôt amnhî xunhwÿr pymaj mẽ ajahkre pê te inhmÿr pyrãk o ri mẽ akôt ixpa.

³² —E kot paj Tÿrtÿm nhîhkram mẽ ajagjênh pa. Koja mẽ atãnopxar o ri mẽ akôt pa nê mẽ akutã no-jarêr rãhã ho pa. Hãmri ka mẽ ãm hkôt pix mã amnhî nhîpêx. Jao Jejus kaga hkêt nê. Hãmri nhÿm nhÿrmã Tÿrtÿm mẽ pahpê hkrajê piitã tanhmã mẽ pahto mex to.

³³ —Na pa pre mẽ akôt ixpa ry htã no ãm aa mẽmoj tâ mẽ awÿr kêt nê. Mẽ axê hkwy hã mẽ awÿ rÿ mẽ akãxpore hã mẽ awÿr o ri ixpa hkêt nê. ³⁴ Na pa pre amnhî pa kukwak ri amnhîm ixujaprôr pê ixãpkur o ri mẽ akôt ixpa. Nê ixkôt mẽ pa xwÿnhjê mã ixujaprôr o ri ixpa. Ra mẽ ate ja hã ixpumunh mex.

³⁵ —Tã mẽmo kaxyw na pa pre ã mẽ akôt amnhî nhîpêx anhÿr o ri ixpa? Nê mẽ ate ja hã ixpumunh nê ixpyrà nê ã amnhî nhîpêx anhÿr o ri apa kaxyw. Nê ixpyrà nê tanhmã mẽ kute xwÿnhjê ho ajuta hto ho ri mẽ apa kaxyw. Na pre Pahihti Jejus ja jarênh o: “Koja mẽhõ amã mẽmoj gõ ka amnhîm apy nê akînh nê. Nom kot kaj kam nhãm mẽhõ mã mẽmoj gõ hãmri nê akînh tÿx o ate mẽhõ mã mẽmoj nhõrta jakre.” Anê.

³⁶ Na pre ã Pawre mẽ kãm ujarênh anhÿr pa hãmri pa mẽ ra

inhnojarêt. Hâmri nhùm mē piitã hkônkrã ho hkrĩ pa nhùm Pawre mē ho Tirtũm wý. ³⁷⁻³⁸ Hâmri nhùm mē piitã kãm Pawre hkĩnh týt jakamã mýr rax o kuhê. Tee ri kot axte mē kot axpẽn pumunh kêt ã mē kãm amnhĩ jarẽnhja ma nē hkaprĩ htýt nē. Nē hkaprĩ xaj kahti hkôt hamý nē mur. Hâmri nē ma Jerujarẽ hwýr hkujaæk kaxyw mē ixkôt pàr wýr hkaprĩ nē mē ixkôt mýr o mō.

21

Pawre kot Jerujarẽ hwýr hpôx ã harẽnh

¹ Tã pa mē gô mýri Jejus kôt mē ixtôjê re nē pàr krem agjê nē axte mō. Ma gô hipòk pē Kosti hwýr ixkatat kôt mō nē hã ajêt. Hâmri nhùm apkati pa mē axte hamũ mō nē hpãnhã gô hipòk pē Roxti hwýr mō nē hwýr pøj nē hã pàr xi. Hâmri nē hpãnhã axte krĩ pē Patar wýr mō. ² Hâmri nē hwýr pøj nē pàr rũm ijapøj nē pàr õ pumu. Nhùm ra pyka pē Wẽnĩs wýr nojarêt pa mē hwýr agjê nē ma kamã axte mō. ³ Mōõ nē amým amnhĩ kukamã gô hipòk pē Sipre pumu. Hâmri nē upòk rũm hakrenh mã mō nē pyka pē Sir wýr mō nē kamã Xir hwýr pøj nē hã pàr nhô. Pàr pãm kot krĩ kamã pàr kukrêx rer kaxyw pa mē kormã hã ajêt nē tokyx axte nhãm inhmõr kêt nē. ⁴ Hâmri pa mē kutêp api nē krĩ kamã mē kot Jejus kôt axpẽn to htõ nē htõx xwýnhjê japêr o mō. Hâmri nē nhýri mē omu nē mē hkôt ri ixpa ho ixtã ù semã. Nhùm prem Tirtũm Karõ nhý hã Pawre mã kapêr nē kãm:

—Kwa Pawre mē inhma. Kot ka Jerujarẽ hwýr pøj nhùm xep mē kãm akurê xwýnhjaja tanhmã anhĩpêx to. Tirtũm Karõ na ã akukamã mē inhmã ajarẽnh anê. Jakamã kwa hwýr amõr kêt nē. Na pa mē tee ri akukamã ijamaxpêr. Anê.

⁵ Hâmri nhùm amnhĩ tã mē kuma nē ãm mē kuma nē Jerujarẽ wýr hkrã kamã hihtýt nē. Jakamã nhùm semã hapêx pa mē axte inhnojarêt. Axte Jerujarẽ hwýr kormã inhmõr kaxyw inhnojarêt. Nhùm Jejus kôt mē ixtôjaja mē kot mē ixkujaæk kaxyw piitã pàr wýr mē ixkôt mō. Mē hprõ nē mē hkrajê mē nhùm mē pimràatã mē ixkôt mō. Hâmri pa mē pàr wýr pøj nē gô mý ri ixpiitã ixkônkrã ho ixkrĩ hpa nē amnhĩ to Tirtũm wý. ⁶ Hâmri nē mē kãm amnhĩ jarẽnh pa nē mē noo mã pàr krem agjê nē ma axte mō nhùm mē awjanã nē ma akupým òrkwý hwýr hapêx. Hâmri pa mē kurũm kormã ma Jerujarẽ hwýr mō. ⁷ Mōõ nē krĩ pē Poremax wýr pøj nē hã ajêt. Hâmri nē pàr rũm ijapøj nē axte krĩ kamã Jejus kôt mē ixtõ nē mē ixtõxjê japêr o mō nē nhýri mē omu nē mē kuri amnhĩm hikra.

⁸ Tã nhùm apkati pa mē axte mō. Pãnhã ma krĩ pē Sejarej wýr mō. Hâmri nē hwýr pøj nē Firipti kuri pøj. Firiptija kormã nyw ri mē kot Jerujarẽ kamã mē mjên htyk xwýnhjê mã mē apkur xà nhõr ho pa kaxyw mē ho 7 nē mē unhwýr xwýnhjê hõ na pre. Tã hpãnhã kêp Tirtũm kapêr jarẽnh o pa xwýnh. ⁹ Nhùm hkra nijaja kêp kwat. Piitã mjên kêt nē hkukrit rãhã pa. Mē kêp Tirtũm nhý hã kapêr o mē pa xwýnh na pre mē. Jakamã pa mē mē kuri pøj. ¹⁰ Hâmri nē mē hkôt ri ixpa hã ixtã apkati grêre nhùm Akapõ Jutej rũm man mē ixwýr mõn pøj. Kêp Tirtũm nhý hã kapêr jarẽnh o pa xwýnh na pre. ¹¹ Hâmri nē mē ixwýr pøj nē Pawre pumu nē hkukamã kot tanhmã harẽnh to kaxyw hwýr tẽn kêp hprexã kapa nē ho amnhĩ te hpre nē ho amnhĩ pa hpre nē xa. Hâmri nē mē inhnoo mã Tirtũm Karõ nhý hã mē kot tanhmã hipêx to hkukamã kãm awjarẽ nē kãm:

—E kot kaj Jerujarẽ hwýr pøj

nhũm Ijaew xàptàr tũmjaja apumu nē ā anhĩpêx anē nē apa hpre nē ate hpre hãmri nē Ijaew kêt xwýnhjê nhĩhkram ajaxà. Kojà mē ā anhĩpêx anē. Anē.

¹² Hãmri pa mē tee ri ā ujarênh anhÿrja ma nē Pawre kamā ixkahak tÿx nē ixkaprĩ nē inhmÿr o ixkrĩ. Nē xatà kot mē hwÿr mōr nē kām ixkapêr kām ixihitÿx nē kām:

—Kwa mē ixkapêr ma Pawre. Mē hwÿr amōr kêt o mē hwÿr amōr kêt. Anē.

¹³ Hãmri nhũm mē inhmā:

—Tk. Kwa mē amÿr kêt nē. Na pa mē apumu nē ixkaprĩ nē. Nà kot paj ma mē hwÿr mō. Kwār mē māmri Pahihti Jejus ā tanhmā ixto rÿ hã xipĩ. Ixte amnhĩ kamā ixkahak kêt. Anē.

¹⁴ Hãmri pa mē tee ri mē hwÿr mōr nē hkurê kaprÿ nē kām:

—Tōe. Nà kam nē Tirtũm kām hprām xà hkôt māmri mē hwÿr mō rÿ mē hwÿr amōr kêt nē. Anē.

¹⁵ Tã pa mē ra inhnojarêt nē amnhĩ to ixpikuprõnh pa nē ma Pawre hkôt Jerujarê hwÿr tã ma mō. ¹⁶ Hãmri nhũm Sejarej kamā Jejus kôt mē ixtō hkwyjaja ma mē ixkôt mō. Pa mē mōõ nē Jerujarê hwÿr pōj. Hãmri nhũm mē ixkôt mē mōr xwýnhjaja mē ixto mō nē Mēnasō nhõrkwÿ hwÿr mē ixto pōj. Mēnasōja Sipre kamā na pre kato. Tã hpānhã Jerujarê hwÿr ahpã nē kamã ri pa ho pa. Na pre ra Jejus kôt amnhĩ xãm ā hã amgrà xohtō nē. Tã pa mē kuri pōj.

Pawre mē Xiakre wa harênh

Atre 15.3-21; Wam Korit 9.19-22, 10.32-33

¹⁷ Tã pa mē Jerujarê hwÿr pōj nhũm Jejus kôt mē ixtōjaja mē ixpumu nē hkĩnh nē. ¹⁸ Hãmri nhũm apkati pa mē ma Pawre hkôt Xiakre hwÿr mō. Nhũm mē kot Tirtũm kapêr o mē ahkre xwýnh piitã ra kuri akuprõ nē mē ixkutêp hkrĩ. ¹⁹ Jakamã nhũm Pawre mē hwÿr axà nē mē kām tanhmã

amnhĩ nhĩpêx to ho pa hã amnhĩ jarê nē mē kām:

—Pa na ka mē rĩ akrĩ. E ot pa axte mē apumunh mã mō. Ixte mē amã amnhĩ jarênh ā amnhĩ jarênh kaxyw. Nà na pa pre ma Ijaew kêt xwýnhjê hkôt ixpa nē mē kām Jejus kot mē panê tanhmã amnhĩ nhĩpêx to jarênh o ri mē hkôt ixpa. Nhũm Tirtũm inhĩhkô hã ixkutã nojarêt mex jakamã nhũm prem inhma nē ohtō rax nē mē pahpyrà nē Jejus kôt amnhĩ xunhwÿ. Anē.

²⁰⁻²⁵ Hãmri nhũm mē Ijaew kêt xwýnh kwÿjaja kot Jejus kôt amnhĩ xunhwÿr ā mē harênh ma nē mē ÿ hã hkĩnh nē mē hã Tirtũm mã mex o mex ā harê. Hãmri nē Pawre mã kām:

—Nà na pa prem ra mē harênh ma. Hãmri nē mē kām kagã nhĩpêx nē mēmoj tã mē kām karō nē mē hwÿr kumê. Mē kot omunh nē kamã harênh nē hkôt amnhĩ nhĩpêx o pa kaxyw.

Na pa prem kagãja kamã mē kot sãnti nhõ hkur nē mē hkurê. Nē mry kamrô hkur nē mē hkurê. Nē mēmo mry hpar nē hkamrô runh kêt rãhã hkur nē mē hkurê.

Nē mē kot amnhĩ prõ pix tânopxar kaxyw mē kãm hã karō.

Nē mēnijaja kot amnhĩ mjên pix tânopxar kaxyw mē kãm hã karō.

Nē nhãm mē kot axpên to amnhĩkati nē mē hkurê.

Ã na pa prem ja hã kagã nē mē hwÿr mēnh anē. Jakamã e mē inhma. Na ra mē pahpê Ijaew kwÿjaja ohtō rax kumrêx nē mē pahpyrà nē Jejus kôt amnhĩ xunhwÿ. Mãn ka pre mē harênh ma. Na htem Jejus kôt amnhĩ nhĩpêx o pa jao mãânên Tirtũm nhÿ hã Mojes kapêr kôt amnhĩ nhĩpêx mex o pa. Tã nhÿri mē kot tanhmã ato hêx to hã ajarênh ma. Na ka xep hte Ijaew kêt xwýnhjê nhõ krĩ kamã pōj hãmri nē mē õ krĩ kamã Ijaew kwÿjê pumu nē mēmoj nē tanhmã

mê kãm akapêr to ho ri apa. Nom Ijaew kêt xwÿnhjê mã ka xep hte ã mêmoy nê akapêr anhÿr kêt nê. Âm Ijaew mã pix mã ka xep hte mê kot finat Mojes kapêr kôt amnhĩ nhĩpêx nê mê hkurê ho ri apa. Nê mê panhĩgêt kot amnhĩ nhĩpêx kuhpa hã mê kot mê hkra my kwÿt kà jakâr nê ka xep hte mê hkurê ho ri apa. Nê mê kot mê panhĩgêt kôt amnhĩ nhĩpêx nê ka xep hte mãânên mê hkurê ho ri apa. Mê kêp Ijaew tâ ka xep pre hte ã mêmoy nê mê hkurê anhÿr ho ri apa. Na prem jar ã Ijaewjê mã ato hêx o pa anê nhũm mê kuma nê mê hkôt hamaxpêr kurê kumrêx. Jao ra ate mê pahpê Ijaew kot amnhĩ nhĩpêx kôt amnhĩ nhĩpêx kêt ã akamnhĩx.

—Tã ra mê kot apôx ã ajarênh mar jakamã tanhmã kot kaj we mê kãm amnhĩ tâ axàprâr to? Nê tanhmã kot kaj we mê noo mã amnhĩ nhĩpêx to kê mê arĩ mê pahte amnhĩ nhĩpêx kôt ate amnhĩ nhĩpêx o apa hã apumu? E na pa mê ra ijamaxpêr. Kot ka ã amnhĩ nhĩpêx anê. Na ra jar mê pahkwÿjaja kêp kwat nê Tirtũm mã tanhmã amnhĩ jarênh to jatur xàm mênh kaxyw amnhĩ krã hkênh mã. Jakamã e kêr ka ma mê hkôt tê nê mê uràk nê amnhĩ krã hkênh nê kam nê mê ate amnhĩ krã kênhta pãnhã amnhĩre. Kot kaj ã mê hkôt amnhĩ nhĩpêx anê hãmri nhũm mê pahkwÿjaja arĩ mê pahte amnhĩ nhĩpêx o ate amnhĩ nhĩpêx o apa hã apumu nê mê kot ato hêx ã apumunh kurê kumrêx. Nê arĩ ate finat Mojes kapêr kôt amnhĩ nhĩpêx o ri apa hã apumu. Anê.

²⁶ Hãmri nhũm Pawre mê kuma nê mê kãm:

—Tôe. Nã ãm hãmri na ka mê inhmã awjarê. Nã kot paj ã amnhĩ nhĩpêx anê. Anê.

Jakamã nhũm apkati nhũm ma mê kêp 4tajê o mō nê mê mex kaxyw tanhmã amnhĩ nhĩpêx to. Hãmri nê Tirtũm mã amnhĩ jarênh

xà hã ixkre hwÿr mra nê agjê nê mê ò patre mã mê amnhĩ jarê nê kãm:

—E ot pa mê awÿr mra. Na pa prem ra mêmoy tâ tanhmã Tirtũm mã amnhĩ jarênh to. Tã kot paj mê axte ixtã ù semãn hãmri nê hatur xàm mênh kaxyw akupÿn awÿr mra nê amã mêmoy gō ka mê inhmã Tirtũm mã agō nê hkôt kãm mê ijarê. Nê pa kot paj mê ixpiitã hpãnhã amã amnhĩre. Anê.

Mê kot Pawre pynênh ã mê harênh

Atre 24.12

²⁷ Tã nhũm semãnja hapêx kaxyw nhũm pika pê As rũm Ijaew kwÿjaja ma mra nê Tirtũm mã amnhĩ jarênh xà hã ixkre hwÿr agjê. Hãmri nê kamã Pawre pumu nê kamã gryk tÿx nê hwÿr hprôt nê unê nê tanhmã hkwyjê mã ho hêx to nê ho kapêr punuj nê. Nê mê kãm:

²⁸ —E mê amnê mra nê jahti pumu. Na hte krĩ piitã hkôt ri mê pahkwÿjê mã tanhmã ri hêx to ho pa. Tirtũm nhÿ hã finat Mojes kapêr nhũm mê kãm ho kapêr punuj o pa. Nê mê pahte Tirtũm mã amnhĩ jarênh xà hã ixkreja nhũm hte mãânên tanhmã mê kãm ho kapêr punuj to. Mê pahpyrà nê kêp Ijaew tâ mê pahpê hkwy ho kapêr o pa. Tã ra axtem nê amnhĩ kôt Tirtũm nhõ ixkre hwÿr Ijaew kêt xwÿnh kwÿjê ho agjê. Mê kot hwÿr gjêx kêt kumrêx tâ nhũm axtem nê amnhĩ kôt mê ho agjê. Anê.

²⁹ Na pre krĩja kamã Ijaew kêt xwÿnh Topĩja Pawre hkôt pa nhũm mê omu. Kêp Epes nhõ xwÿnh nhũm mê kot pry ã Pawre hkôt pa hã omu. Tã hã ahtũm nê Tirtũm mã amnhĩ jarênh xà hã ixkre kamã Pawre pumu nê htÿx amnhĩ kôt Topĩ ho àr ã hkamnhĩx nê ã mê kãm harênh anê. ³⁰ Hãmri nhũm mê kuma nê Pawre kamã gryk tÿx nê. Nê hwÿr hprôt nê unê nê ixkre rũm ho kato nê kêp hakwa kre kahê. ³¹⁻³² Hãmri nê ma o tê nê htak rax nê. Ra mê kot htak o hpĩr mã tâ

nhũm mēhōja pōristi krāhtũm wỳr hprōt nē kām awjarē nē kām:

—Kwa o mũj mē ra kot axpēn nhĩmex kaxyw pijapu ho kuhē. Anē.

Hāmri nhũm tee ri kuma nē pōristi hkwỳjē mã anē nē mē ma mē hwỳr hprōt kurē kumrēx. Nhũm mē arĩ Pawre htak tã amnhĩ wỳr mē omu nē mē umaj kām ure. ³³ Hāmri nhũm pōristi krāhtũm Pawre hã amỳnē nhũm pōristijaja unē nē kàx o mē hkaxprexã ho axkrut nē ho hkaxpre pa. Hāmri nhũm mē hkrāhtũm Pawre hã mē hkukja nē mē kām:

—Kwa mē atō inhmã jahti jarē. Tanhmã na hixi te? Tanhmã na we amnhĩ tomnuj to hã na ka mē ã hipēx anē? Anē.

³⁴ Hāmri nhũm mē kuma nē piitã anhĩpē kàxpē kām tanhmã harēnh to. Nom axpēn kwỳm tanhmã ri kām harēnh to. Hāmri nhũm tee ri hprĩ hã kot mē mar kaxyw hāmri nē pōristi mã anē nhũm mē kēp Pawre ho kato nē ma mē àpēnh xã hã ixkre hwỳr o tē. ³⁵⁻³⁶ Hāmri nhũm Ijaew kwỳ ohtō nē pry hã axpēn nhĩgãnh o hkôt mra. Nē gryk xaj kapēr punuj tỳx o mē hkôt mō nē kàx pē pōristi mã kapēr nē mē kām:

—Kwa mē apĩhti ri. Mexti hã. Mēmo kaxyw na ka mē ri amã hapē ho apahti? Anē.

Jakamã nhũm pōristija tee ri mē kuma hāmri nē mē kot tanhmã ho pymaj kumỳ nē kỳx pē mē kēp kupē nē o mō. Jao ixkreja wỳr mē àpir xã hã ho àpir o mō. ³⁷ Nē kot ho ãr kaxyw tã nhũm Pawre mē hkrāhtũm mã kām:

—E pa amã mēmoj jarē ka inhma. Anē.

Mē kapēr o kām kapēr hāmri nhũm amnhĩ jaēr pē kuma nē kām:

—Kwa xã na ka mē ixpyrà nē Gresjē kapēr o akapēr? ³⁸ Na pa ixtỳx apē Ejit nhō xwỳnh pē mē hpar o apa xwỳnhã ã akamnhĩx. Ham na pre mē inhō pahihiti kutã amnhĩ xãm nē kot hkurē kaxàr

kaxyw mē ho ajuta xwỳnhjē ho 4.000 nē mē hkurē nē ma kapôt ã mē o pa. Nom tãm na xep Gresjē kapēr o kapēr kēt nē. Anē.

³⁹ Hāmri nhũm Pawre kām:

—Nã ixpē Ejit nhō xwỳnhã kēt. Ixpē Ijaew na pa. Pyka pē Siris kamã krĩ rax pē Tas kamã na pa pre ixkato. E xã kot paj ixkôt mē mōr xwỳnh nēj mã ixkapēr nã? Anē.

⁴⁰ Hāmri nhũm kām:

—Tōe. Kam nē māmri tanhmã mē kām akapēr to. Anē.

Hāmri nhũm mē àpir xãta ã kỳx pē mē mỳri xa nē kànhmã mē kām ĩhkra pē nhũm mē omu nē hpinhkrēnh pa nhũm mē kām amnhĩ jarē.

22

Pawre kot kām hkurē xwỳnhjē mã amnhĩ jarēnh

Atre 9.1-19, 26.1-23

¹⁻² Nhũm Pawre amnhĩ kwỳ Ijaew kapēr o mē kām kapēr nē mē kām:

—E ixkwỳjaja. Pa mē amã amnhĩ jarē ka mē inhma. Anē.

Hāmri nhũm kot mē kapēr o kapēr ma nē hpinhkrēnh pa nē akryk mar o kuhē nhũm mē kām:

³ —Nã ixpē mē anhĩō na pa. Ijaxwỳja ixpē Ijaew. Pyka pē Siris kamã krĩ pē Tas kamã na pa pre ixkato no ãm jar Jerujarē kamã na pa pre ixaptãr. Kamariew na pre hte ijahkre ho pa. Finat Mojes kot Tĩrtũm nhỹ hã mē panhĩgētjē mã kapērja nhũm pre hprĩ hã ho ijahkre ho pa. Na pa pre mē apyrã nē inhmã Tĩrtũm kôt amnhĩ nhĩpēx prãm nē.

⁴ —Jakamã na pa pre mē pahkwỳ kot Jesus kôt amnhĩ xunhwỳr xwỳnhjē japēr o ixpa nē nhỹri mē kām ixkato nē mē unē. Mēmyjē pynē nē mēnijē pynē. Hāmri nē mē kot mē hpar kaxyw mē hagjēnh o ri ixpa. ⁵ Na pa pre ã mē hipēx o ri ixpa anē. Mē panhō patre maati nē mē àptãr tũmrejaja ra mē kot ja hã ixpumunh mex. Mē

tāmja na prem krī pē Tamas kām mē pahkwýjê kaxyw kagà nhîpêx nê inhmâ kugô pa kupy nê ma mē hwýr o mô. Ixte mē ô krī kamâ Jejus kwýjê pynênh par nê man akupýn Jerujarê hwýr mē ho inhmôr nhûm mē kot tanhmâ mē ho kaxyw.

6 —Tâ ra myt apha pa mē hwýr ixâhtêp o mô. Puh nhûm kaxkwa rûm hirâ rax kumrêxja ixwýr wrý nê ixtâ ajêt pa hipôk ri xa. ⁷Hâmri nê umaj pykap tēm nhûm mēhō kapêr nê inhmâ: “Pa Sawti? Hêxta waa nê. Kwa mon ka hte axtem nê ixtomnuj týt o ri apa?” Anê. ⁸Hâmri pa kām: “Kwa mē atô na ka ri ã inhmâ akapêr anê pahihtî?” Anê nhûm inhmâ: “Ixpê Najare nhô xwýnh Jejus. Pa na ka hte ixpê ixkôt mē kot amnhî xunhwýr xwýnhjê homnuj týt o ri apa. Jao te pa ixtomnuj pyrâk.”

9 —Anhýr o inhmâ kapêr nhûm ixkôt mē pa xwýnhjaja kuma no âm hprî hâ mar mex kêt nê. Âm hirâ raxta pix pumu. ¹⁰Tâ pa kām: “No tanhmâ kot pa we amnhî to Pahihti?” Anê nhûm inhmâ: “E kânhmâ xa nê māmri ma Tamas wýr mô. Kot kaj hwýr pôj nhûm mēhō awýr tē nê mēmoj tâ amâ karô ka ama nê hkôt amnhî nhîpêx.” Anê.

11 —Nhûm pre ã inhmâ kapêr anê. Hâmri pa hirâ rax pumunh o ixâm kurê ra inhno hkre nê ixrît kêt nhûm ixkôt mē pa xwýnhjaja ixpa hâ ixpy nê ma Tamas wýr ixto mô nê ixto pôj.

12 —Tâ nhûm Tamas nhô xwýnh pē ânâñisti ixwýr tē. Na pre hte Tirtûm kapêr ã kagà htûm kôt amnhî nhîpêx mex nhûm Tamas kamâ Ijaew piitâ kām hkîn nê axpên mã mex ã harê. ¹³Jakamâ nhûm ixwýr tē nê inhmâ: “Pa Jejus kôt ixtô Sawti? E akupým rît.” Anhýrja kôt pa akupým ixrît mex kurê kumrêx nê omu. ¹⁴Hâmri nhûm inhmâ: “Nâ mē panhîgêjtjê nhô Tirtûm na amnhî kaxyw ata.

Ate kapêr mar nê hkôt tanhmâ amnhî nhîpêx to ho apa kaxyw. Nê ate kaxkwa kamâ Kra mex pumunh nê kapêr mar kaxyw. Tâ ka xep ham hirâ rax kamâ omu nê kapêr ma. ¹⁵Jakamâ kêr ka ma mē piitâ mē kām ate omunh xwýnhja jarênh o ari mē hkôt apa. Nê mē kām kapêr jarênh o mē ahkre ho ri apa. ¹⁶E tokyx kânhmâ xa nê Jejus mã amnhî jarê nê hkôt amnhî xâm kê anê ate amnhî tomnuj rênh pa. Hâmri pa apê hkwý hâ akrâ kumrâ ka ma mē kām kapêr jarênh o ri apa.” Anê.

—Nhûm pre ã ânâñisti inhmâ kapêr anê.

17 —Tâ pa man akupýn jar Jerujarê hwýr mē awýr mô. Hâmri nê jar Tirtûm mã amnhî jarênh xâ hâ ixkre kamâ kām amnhî jarênh o ixâm rôm axte mēmoj pumu. ¹⁸Nhûm Jejus axte ixwýr kato nê xa nê inhmâ kapêr nê inhmâ: “E inhma. Jerujarê nhô xwýnhjaja kām ixkapêr mar prâm kêt jakamâ kot kaj mē kām ixkapêr jarê nhûm mē amar kêt nê. Jakamâ kwa tokyx akato nê hpânhâ ma nhýhým mô.” Anê.

—Hâmri pa tee ri ã kapêr anhýrja ã kuma nê kām: ¹⁹“Kwa nâ koja mē inhma Pahihti. Ra mē kot ixte amnhî nhîpêx ã ixpumunh mex. Ixte amnhî nhîpêx tûmta kôt mē kot ixpumunh mex. Na pa pre hte krī piitâ hkôt mra nê Tirtûm kapêr o mē ahkre xâ hâ ixkre kamâ mē kot akôt amnhî kaxyw hamaxpêr xwýnhjê pynê nê mē htak nê mē hagiênh xâ kamâ mē hagiê nhûm mē kot ja hâ ixpumunh mex. ²⁰Nhûm mē kot akapêr jarênh o pa xwýnh Estewâw pírta pa pre hâ mē omu nhûm ja inhmâ mex pa mē kām mē hinôkâ jamýnh o hâ mē omunh o xa. Na pa pre ã amnhî nhîpêx anhýr o ri ixpa. Tâ hpânhâ akôt amnhî xâm hâmri nê akôt amnhî nhîpêx o ri ixpa. Jakamâ koja mē ixte amnhî nhîpêx

nyw ã ijarênh ma nê kãm ixkapêr mar prãm nê." Anê.

21 —Pa pre ã Jejus mã amnhĩ jarênh anê nhũm inhmã: "Nà. Kêr ka mãmrĩ krĩja rũm akato nê ma nhỹhỹm mō. Kot paj hpãnhã ma Ijaew kêt xwỹnhjê hwỹr amê ka hpãnhã ma mẽ hwỹr mō nê mẽ hkôt mẽ kãm ixkapêr jarênh o ri apa." Anê.

22 Nhũm pre Pawre ã amnhĩ hkwyjê mã amnhĩ jarênh anê nhũm mẽ arĩ mar o kuhê rãhã Ijaew kêt xwỹnhjê jarênh ma nê kamã gryk tỹx nê. Ijaew kêt xwỹnhjaja kot mẽ urak nê Tirtũm kapêr marja nhũm mẽ kãm hprãm kêt jakamã nhũm Pawre ã mẽ harênh anê nhũm mẽ kuma nê kamã gryk tỹx kumrêx. Nê gryk xaj kapêr punuj nê kapêr o:

—Kwa mẽ mãmrĩ apĩhti ri. Æm hpĩr mã htãmti kênã. Anê.

23 Hãmri nê gryk xaj amnhĩ nhĩnôkã hkwrỹ nê ho apê nê pyka jamỹ nê kãnhmã ri ho ahkapê.

Pawre kot pôristi krãhtũm mã amnhĩ jarênh

Atre 16.35-39

24 Hãmri nhũm pôristi krãhtũmja tee ri ã mẽ kot amnhĩ nhĩpêx anhỹr ã mẽ omu nê mẽ kapêr ma nê pôristijê mã kapêr nê mẽ kãm:

—Kwa tanhmã na we jahti amnhĩ tomnuj to nhũm mẽ ã kamã gryk tỹx anê? E mẽ tokyx ixkre hwỹr ho axà nê mẽ htak xà ho htak kê mẽ pamã tanhmã amnhĩ jarênh to. Anê.

25 Hãmri nhũm mẽ kuma nê ho axà nê htak kaxyw kormã hpre ho xa. Hãmri nhũm pôristi krãhtũm nhõ kôwenatôja mẽ hkôt axà nê hã mẽ omunh o xa nhũm Pawre omu nê amnhĩ tã kãm kapêr nê kãm:

—Kwa kormã ixte tanhmã mẽ amã amnhĩ jarênh to hkêt tã ka mẽ ixtak kaxyw. Ixpê Ijaew tã mããnên ixpê Rõm nhõ xwỹnh kênã. Xà na htem ã Rõm nhõ xwỹnhjê nhĩpêx anê? Anê.

26 Hãmri nhũm tee ri ã amnhĩ jarênh anhỹrja ã kuma nê pôristi krãhtũmja wỹr hprõt nê kãm:

—Kwa taxy pu mẽ tanhmã ho hkêt nê. Xep kêp Rõm nhõ xwỹnh kênã. Anê.

27 Hãmri nhũm tee ri kuma nê Pawre hwỹr axà nê kãm:

—Kwa xà ãm hãmri na ka amnhĩ jarê? Xà apê Rõm nhõ xwỹnh na ka? Anê.

Hãmri nhũm kãm:

—Tỹ. Æm hãmri ixte mẽ amã amnhĩ jarênh kênã. Ixpê Rõm nhõ xwỹnh na pa. Anê.

28 Hãmri nhũm kãm:

—Kwa pa na pa pre amnhĩ to Rõm nhõ xwỹnh prãm xaj amnhĩ pãnhã mẽ kãm amnhĩrer rax nê. Anê.

Nhũm Pawre kãm:

—Tỹ nom pa na pa pre amnhĩ pãnhã mẽ kãm amnhĩrer kêt nê. Inhĩpêxã hkôt ixpê Rõm nhõ xwỹnh na pa. Anê.

29 Hãmri nhũm mẽ kuma nê tee ri hamaxpêr o kãm ma nê. Nê kãm ma ho hkaga kurê kumrêx. Nhũm mẽ hkrãhtũm nhõ pahija mããnên kãm ma nê. Kêp Rõm nhõ xwỹnh tã nhũm mẽ axtem nê kot unênh nê kax o hkaxpreja mã hamaxpêr nê kãm ma nê. Na htem ã Rõm nhõ xwỹnhjê nhĩpêx anhỹr kêt nê. Na htem tanhmã mẽ hkukjêr to nê hprĩ hã mẽ kuma nê rĩ kormã tanhmã mẽ hipêx to.

Pawre kot Ijaew xaptar tũmrejê mã amnhĩ jarênh

Matêwre 23.27-28

30 Tã nhũm apkati nhũm pôristi krãhtũmja Ijaew kwỹ ho akuprõ. Mẽõ patre maati nê patre krãhtũmjaja nê mẽ aptar tũmrejaja nhũm kot mẽ kãm tanhmã Pawre jarênh to kaxyw mẽ ho hpikuprõnh pa. Hãmri nê Pawre pê hkaxpre xà rê nê ma mẽ hwỹr o tẽ nê mẽ kutã ýr.

23

¹Hãmri nhũm mẽ omu nê mẽ kãm amnhĩ jarê nê mẽ kãm:

—E ixkwýjaja. Pa mẽ amã amnhĩ jarê ka mẽ inhma. Na pa hte Tirtũm nom tãm amnhĩ nhĩpêx o ixpa nẽ mẽ pahpê Ijaew mẽ pahte amnhĩ nhĩpêx kwým ri tanhmã amnhĩ nhĩpêx to hkêt nẽ. Anẽ.

² Hãmri nhũm mẽ õ patre maati ãnãnísti kuma nẽ kamã gryk nẽ. Axtem ãnãnísti hõ na pre. Hãmri nẽ ã Pawre kot amnhĩ jarênh anhýrja ã kuma nẽ kamã gryk nẽ. Hãmri nẽ mẽ kot mar o kuhê xwýnhjê mã kãm:

—Kwa mẽ atõ hakwap hkurahti ri. Tãm kot amnhĩ nhĩpêxti hã. Na ãm mẽ pamã amnhĩ to hêx o xa. Anẽ.

³ Hãmri nhũm Pawre kuma nẽ hwýr rít nẽ omu nẽ kãm:

—Nã ka koja Tirtũm akura kãm ga. Te ate finat Mojes kot ýhã kapêr kôt amnhĩ nhĩpêx pyrãk tã ri axtem nẽ ri mẽ kot ijakwap ixkuranh kaxyw ri mẽ kãm ixtã amýnẽ. Anẽ.

⁴ Hãmri nhũm kuri mẽ kuhê xwýnhja tee ri ã kãm kapêr anhýrja ã kuma nẽ kãm:

—Kwa kêp patre maati kênã kot ka kêt ri ã kãm akapêr anẽ. Anẽ.

⁵ Hãmri nhũm amnhĩ jaêr pê ja hã kuma nẽ kãm:

—Kwa ixte ja hã omunh kêt jakamã na pa ã ixtýx kãm ixkapêr anẽ. Ixte kêp patre maati hã omunh ronhýx pa ã kãm ixkapêr anhýr kêt nẽ. Tirtũm kapêr ã kagã htũm kot ja nẽ mẽ pamã kapêr kênã. Mẽ pahte tanhmã mẽ panhõ pahi ho pakapêr punuj to nẽ mẽ pamã kapêr. Tã pa ãm ixtýx ã kãm ixkapêr anẽ. Anẽ.

⁶⁻⁸ Hãmri nẽ hprĩ hã mẽ kot mar o hkrĩ xwýnhjê pumu. Nhũm mẽ kamã Satusew nhõ xwýnh kwý nẽ Parijew nhõ xwýnh kwý. Satusew mẽ Parijew nhõ xwýnhjaja na htem axpên kwým ri tanhmã mẽ htykjê jarênh to. Satusew nhõ xwýnhjaja na htem mẽ htyk nẽ mẽ hkarõ mẽ ro hã mẽ hapêx o mẽ hapêx ã mẽ hkamnhĩx. Nẽ Tirtũm kapêr o

mẽ wrýk xwýnh kêt ã mẽ harênh o pa. No Parijewjaja na hte mẽ kurom mẽ htyk nẽ akupým mẽ htír ã mẽ hkamnhĩx nẽ Tirtũm kapêr o mẽ wrýk xwýnh ã mẽ hkamnhĩx. Nhũm Pawre kot ja hã mẽ omunh jakamã tanhmã hamaxpêr to hãmri nẽ mẽ kãm kapêr. Na pre Parijew nhõ xwýnhjê pyrã nẽ mẽ htyk nẽ akupým mẽ htír kôt hamaxpêr nẽ Tirtũm kapêr o mẽ wrýk xwýnh kôt hamaxpêr. Jakamã mẽ omu nẽ kãx pê mẽ kãm kapêr nẽ mẽ kãm:

—Nã ijaxwýja ixpê Parijew nhõ xwýnh. Nhũm inhĩpêêxã haxwýja kêp Parijew nhõ xwýnh. Jakamã na pa hte mẽ apê Parijew nhõ xwýnhjê pyrã nẽ mẽ htyk nẽ akupým mẽ htír kôt ijamaxpêr. Tã ãm ja pix mýrapê na ka mẽ ixpynê nẽ ã inhĩpêx anẽ. Anẽ.

Hãmri nhũm Parijew mẽ Satusew nhõ xwýnhjaja kuma nẽ ja hã axpên kãm gryk nẽ. Nẽ hã axpên mã akir. ⁹ Hãmri nẽ ra axpên mã àkjêr rax nẽ. Hãmri nhũm Parijew kwý pê Mojes kapêr o mẽ ahkre ho mẽ pa xwýnhjaja kãnhmã kuhê nẽ mẽ kãm Pawre hã àprãr kãm hihtýx nẽ mẽ kãm:

—Kwa pêr tanhmã kot amnhĩ tomnuj tore hã. Mãn ãm hpimtir kãm na pre ã ri kaxkwa kamã mẽmoj mar anẽ. Rý apu Tirtũm kapêr o wrýk xwýnh kãm tanhmã kapêr to nhũm pre Tamas wýr pry kamã mar o xa rý ko. Anẽ.

¹⁰ Hãmri nhũm Satusew nhõ xwýnhjaja tee ri Tirtũm kapêr o mẽ wrýk xwýnh kot kãm kapêr ã harênhja ma nẽ hã axpên mã àkjêr rax nẽ. Hãmri nhũm pôristi krãhtũmja tee ri mẽ kot axpên mã àkjêr ã mẽ omu hãmri nẽ pôristi mã kãm:

—Kwa mẽ Pawre hwýr tẽ nẽ mẽ kêp utã nẽ ma akupým o tẽ nẽ haxã. Kot ka mẽ ho anhýr kêt nhũm mẽ tanhmã hamaxpêr to nẽ gryk xãj axpên nhĩhkra kamã hkaxõnh pa. Anẽ.

Hāmri nhūm mē kuma nē hwÿr tē nē mē kēp utà nē akupÿm o tē nē ixkre hwÿr ho axà.

Jejus kot Pawre jamaxpēr o hitÿx ā harēnh

Atre 18.9-10

¹¹ Tā nhūm kamàt nhūm Jejus tām Pawre hwÿr kato nē kām:

—Pa Pawre? Kwa tee ri amnhī kukamā ajamaxpēr o amnhī kamā akahak kēt nē. Kot kaj te ra ate jar Jerujarē kamā mē kām ijarēnh ta pyrà nē ma krī pē Rōm wÿr mō nē krī nhō xwÿnhjē mā ijarē. Anē.

Mē kot Pawre hā àmnēnh ā mē harēnh

Sīkūn Ximotre 4.18

¹²⁻¹³ Tā nhūm apkati nhūm Ijaew kwÿjaja axpēn wÿr akuprō. Mēmyjaja kēp 40 nē axte hkōt mē hkwyjaja axpēn wÿr akuprō. Mē kot Pawre pīr kaxyw hā axpēn mar kaxyw hā akuprō nē hā axpēn mā amÿnē nē axpēn mā:

—Tōe. Nà kot puj mē hpīr kaxyw amnhī jagri htÿx o paxàpkur kēt rāhā kupī nē ri kormā apku nē ixkō. Nà kot puj mē ho anē. Ra Tīrtūm noo mā mē pahte ja hā amnhī jarēnh kēnā. Anē.

¹⁴ Hāmri nē mē ma mē ō pa-tre krāhtūmjē mē mē àptār tūmrejē hwÿr mra nē mē kām hā amnhī jarē nē mē kām:

—Ot pa mē amā amnhī jarēnh mā mra. Nà kot paj mē tā Pawre pī. Kot paj mē kormā hpīr kēt ri ixàpkur kēt rāhā kupī. Ra mē ixte Tīrtūm noo mā ja hā amnhī jarēnh xà hkōt. ¹⁵ Jakamā e mē inhma. Kēr ka mē axēx rom pōristi krāhtūm mā anē kē apkati kē man mē awÿr Pawre ho tē. Te mē ate aprī hā hkukjēr kaxyw pyrāk o kām axēx. Koja mē kormā mē awÿr ho hpōx kēt ri pa mē unēn kupī. Anē.

¹⁶ Hāmri nhūm Pawre tāmnhwÿ mē kot ā hā amnhī jarēnh anhÿrja ma hāmri nē ma pōristi xāpēnh xà hā ixkrej wÿr Pawre hwÿr hprōt nē kām mē harē. ¹⁷ Hāmri nhūm kuma

nē amnhī wÿr pōristi krāhtūm nhÿ hā mē hamār xwÿnh ā karō nē kām:

—Kwa ma mē akrāhtūm wÿr ixtāmnhwÿta o tē kē kām mēmoj jarē nà? Anē.

¹⁸ Hāmri nhūm kuma nē ma hwÿr o tē nē kām:

—E Pawre na inhmā anē pa awÿr htāmnhwÿ ho tē. Kot tanhmā amā ujarēnh to kaxyw. Anē.

¹⁹ Hāmri nhūm omu nē hpa hā kupy nē o tē nē ahte mē hkàx ā o xa nē kām:

—E māmri inhmā mēmoj jarē pa ama. Mēmo na ka te inhmā harēnh kaxyw? Anē.

²⁰⁻²¹ Hāmri nhūm kām:

—Nà Ijaew xàptār tūmrejaja na mē kot inhīgēt Pawre pīr kaxyw hā amnhī jarē pa amā harēnh o tē. Koja xep mē hā awÿ. Xep apkati nhūm ate ma mē hwÿr mē hkukjēr xà hā ixkre hwÿr ho amōr nhūm mē kot hprī hā kot amnhī nhīpēx ā hkukjēr kaxyw. Nom koja mē am amā amnhī to hēx. Koja xep mē kēp 40 nē pry kamā kutēp amūxu nē kuhē. Na mē ra hā axpēn mar pa nē axpēn mā: “Kot puj mē paxàpkur kēt rāhā Pawre pī nē ri kormā apku nē ixkō.” Anhÿr o amnhī jarē pa mē kuma. Jakamā na mē kormā ate mē hwÿr mēnh kaxyw akām ama. Kwa mē hwÿr ho amōr kēt nē. Anē.

²² Hāmri nhūm kuma nē kām:

—Tōe. Nà na pa ra ama. Māmri ma akupÿm tē. Nom kēr ka inhmar kumrēx. Kēr ka nhām mēhō mā ja jarēnh kēt kumrēx. Am kwarī ho kwarī. Anē.

Hāmri nhūm kuma nē kato nē ma akupÿm tē.

Mē kot Ijaew pymaj nhÿhÿm Pawre mēnh ā mē harēnh

²³⁻²⁴ Tā nhūm pōristi krāhtūmja amnhī wÿr ÿ hā pōristi jamār o mē pa xwÿnh wa ho hamēxkrut nē wa hā karō nē wa kām:

—E wa inhma. Koja kōt ā kamàt ka wa ma krī pē Sejarēj wÿr Pawre ho mō kē hkà hkīnh pé pahilhi Peris wÿr pōj.

Nē amnhī kôt pôristi ho 200 nē o mō.

Nē kē mē kēp 70 nē kawar ā hkrī nē mē akôt mō.

Nē kē mē kēp 200 nē wapo jamý nē mē akôt o mō.

Kē mē ā ohtô rax anē.

Nē Pawre kot kawar ā ýr nē mōr kaxyw ka mē kām hō ho mō.

E kēr ka mē ā axohtô nē hkôt amōr anē kē hkā hkīnh pē pahihiti Peris wýr pōj. Anē.

²⁵ Hāmri nē pahihiti Peris mā kagā nhīpēx nē kamā kām Pawre jarē nē kām:

²⁶ Pa pahihiti Peris? Xà amex? Ixpē Kraw Risas na pa awýr kagā mē.

²⁷ E ot pa awýr Ijaew pē Pawre mē. Na pre hkwyja kot hpīr kaxyw unēnh tā pa mǎānēn kēp Rōm nhō xwýnh ā harēnh ma hāmri nē hwýr inhō pôristi rē nhūm mē hwýr hprôt nē mē kēp utā. ²⁸ Hāmri nē Ijaew xǎptār tūmrejē hwýr o tē. Mē kot inhmā tanhmā kot amnhī tomnuj to hā harēnh kaxyw. ²⁹ Tanhmā kot amnhī tomnuj to nhūm mē kot haxār rý hpīr ronhýx ja mex nē. No xep ām kot mē higētjē kot amnhī nhīpēx kôt amnhī nhīpēx kēt pix mýrapē na mē kamā gryk.

³⁰ Tā pa mē kot hpīr kaxyw hā mē harēnh ma nē mē umaj awýr kumē. Hāmri nē kamā mē gryk xwýnhjē mā ajarē. Jakamā koja mē mēmo arīgro hā awýr pōj nē tanhmā kot amnhī nhīpēx to hā amā harē ka kam ja hā mē ama nē tanhmā ho.

Tā ām ja pix na pa amā harē. Ixpē Kraw Risas na pa awýr kagāja mē. Tā mǎn ka arī ixte amā harēnhja ma. Anē.

³¹ Tā nhūm kamāt nhūm mē hkrāhtūm kot mē kām karō xà hkôt nhūm pôristijaja ma Pawre o mō. Hāmri nē krī pē āxipat wýr pōj nē kamā amnhūm hikra.

³² Nhūm apkati nhūm mē kot mē hkôt pykap mōr xwýnhjaja mē ō

pahi kot mē kām hā karō xà hkôt awjanā nē ma akupým mō nhūm kawar ā mē mōr xwýnh pixjaja ma Pawre ho mō. ³³ Hāmri nē mō nē Sejarej wýr pōj nē pahihiti Peris nhīhkram Pawre jaxà nē kām kagāja gō nē awjanā nē ma akupým hapēx. ³⁴ Hāmri nhūm Perisa kagāja py nē omu. Nē omunh pa nē Pawre mā kām:

—E inhmā amnhī jarē. Tanhmā na anhō pyka hixi te? Anē.

Nhūm kām:

—Kēp Siris. Anē.

³⁵ Nhūm kām:

—Tōe. Kē mē kot ato kapēr xwýnhjaja pōj pa kormā ixprī hā mē kot tanhmā ajarēnh to ma mǎn. Anē.

Hāmri nē ō pôristi mā anē nhūm mē ma Pawre o tē. Ma pahi Erox htyk xwýnh nhōrkwý hwýr o tē nē kamā haxà nhūm hkrī ho hkrī.

24

Ijaew kot tanhmā Pawre ho kapēr punuj to hā mē harēnh

Rukre 21.12-13; Atre 25.7

¹ Tā nhūm arīgro kēp 5 nē hapēx nhūm Ijaew kwýjaja Sejarej wýr pōj. Mē ō patre maati ānānīsti nē Tetur nē kaxyw mē aptār tūmrejaja nhūm mē ma hwýr mō nē pōj. Tetur kēp axiwōkat ā mē yr pē kapēr xwýnh jakamā nhūm mē kot tanhmā Pawre o kapēr punuj to kaxyw pahi Peris wýr amnhī kôt o mō. ² Hāmri nhūm mē amnhī wýr Pawre hā karō nhūm pôristi haprô nē mē hwýr o tēn ho axà. Hāmri nhūm Teturja pahihiti Peris mā Pawre kot tanhmā amnhī tomnuj to hā harē nē kām:

—E pahihiti inhma. Nà na ka hte tām mē inhīpēx nē mē ixto mex o apa. Jakamā nhūm hte nhām pika hkwy nhō xwýnhjaja mē ixkurē kaxār kaxyw mē ixwýr hprôt kēt nē. Pa htem ixpiitā akukwak ri ijamakētkati nē ixāmnhix inhmex nē ixpa. ³ Nē mē ixkīnh rāhā ho

ixpa. Hêxta waa në. Mě ixpi-itã inhmã akĩnh. ⁴ E kot paj amã awjarê ka inhma. Kot paj ixu-jarênh o hakotre ka inhma në tokyx ma akupÿm tẽ. ⁵ Nã Pawre na hte amnhĩ tomnuj pix o pa. Kêp Jejus pê Najare nhõ xwÿnhnta kôt amnhĩ nhĩpêx o mẽ pa xwÿnhjê nhõ pahi na. Jakamã na hte pyka piitã hkôt mẽ ixpê Ijaew tanhmã axpên kaxyw mẽ ixkryx to ho pa. ⁶ Jãã na pre Tirtũm mã amnhĩ jarênh xà hã ixkre hwÿr amnhĩ kôt mẽ kêp Ijaew kêt xwÿnh kwÿjê ho agjê në mẽ ixpê ixkreja omnu kaxyw mã tã pa mẽ omu në unê. ⁷ Tã nhũm pōristi krãhtũm Risasja mẽ ixpê utã ⁸ në awÿr mẽ ixte tanhmã amã harênh to xwÿnhjê rẽ. Tã ot pa mẽ ixkrĩ. Nẽ ota Pawre nhÿ. Kam kot amnhĩ nhĩpêx ã hkukja kê tanhmã amã amnhĩ jarênh to ka ama në ixte amã harênh xà hkôt tanhmã mar to. Anê.

⁹ Hãmri nhũm Ijaew hkwy haxwÿja kãm:

—Nã ãm hãmri na ã amã harênh anê pahihiti. Anê.

Pawre kot pahihiti mã amnhĩ jarênh

Rukre 21.14-19

¹⁰ Hãmri nhũm pahihiti Peris Pawre mã anê nhũm kot kãm amnhĩ tã aprãr kaxyw kãnhmã xa në kãm:

—Nã na ka ra inhõ pyka kamã mẽ ixto amnhĩptãr mex o atã amgrã sohtõ në pahihiti. Jakamã na pa pre ate ixkapêr mar kaxyw ã ajarênh ma në ixkĩnh në.

¹¹ —E kot paj amã amnhĩ jarê ka inhma. Ham na pa pre Jeru-jarê hwÿr mō mẽ pōj. Na pa hwÿr ixpōx ã ixtã arĩgro pê 12 pix. Kam mẽ ixtã ixkwÿjê kukja mẽ mẽ ama. Ixte Tirtũm mã amnhĩ jarênh xà hã ixkre kamã Tirtũm mã mex o mex ã harênh kaxyw na pa pre hwÿr mō. ¹² No na pa pre nhÿri axpên kaxyw tanhmã ri mẽ hkryx to hkêt në. Nẽ mẽ ixte Tirtũm mã

amnhĩ jarênh xà hã ixkre kamã rÿ kapêr o mẽ ahkre xà hã ixkre kamã rÿ nhÿri pry kamã tanhmã axpên kaxyw ri mẽ hkryx to hkêt në. ãm amrakati ho amrakati. ¹³ Mẽ kot ã ri ijarênh anhÿrja amrakati kumrêx. Mẽhõ kot ã ixte amnhĩ nhĩpêx anhÿr ã ixpumunh kêt tã na htem amnhĩ krã hkôt amã ijarênh o hêx. ¹⁴ Na htem mẽ ixte Jejus kôt amnhĩ nhĩpêx xwÿnhjaja mẽ ixte amnhĩ nhĩpêx mex kêt ã mẽ ijarê nom kot anhÿr kêt. ãm mẽ inhĩgêjtê nhõ Tirtũm kapêr nywja kôt na pa hte amnhĩ nhĩpêx mex o ri ixpa rãhã në. Nhũm ixkwÿjaja htÿx axtem kapêr õ hkôt ixte amnhĩ nhĩpêx o ixpa hã ixkamnhĩx no ãm kapêr õ hkêt. Ijaxwÿja na pa hte mẽ urãk mẽ finat Mojes kapêr ã kagã mar o ixpa. Nẽ Tirtũm nhÿ hã mẽ kapêr o mẽ pa xwÿnh kot kapêr ã kagãja pa hte mẽ urãk mẽ hkôt amnhĩ nhĩpêx mex o ri ixpa. ¹⁵ Nẽ mẽ urãk mẽ Tirtũm kot nhÿrmã akupÿm mẽ ho hÿir kôt pa hte ijaxwÿja ijamaxpêr tÿx në. Mẽ htyk xwÿnh piitã. Mẽ kot amnhĩ to mex xwÿnhjê mẽ mẽ kot amnhĩ tomnuj xwÿnhjê mẽ mẽ ho hpimrãatã akupÿm mẽ ho hÿirja kôt pa hte mẽ urãk mẽ ijamaxpêr tÿx o ri ixpa. ¹⁶ Jakamã na pa hte tãm amnhĩ nhĩpêx rãhã në. Tirtũm noo mã mẽ mẽ piitã mẽ noo mã tãm ri amnhĩ nhĩpêx mex rãhã në.

¹⁷ —Tã na pa pre pyka hkwy hkôt ri ixpa hã ixtã amgrã sohtõ në. Hãmri mẽ ma akupÿm Jerujarê hwÿr ixkwÿjê hwÿr mō. Amarĩ ixte mẽ kãm kãxpore hkwy nhõr kaxyw pa akupÿm mẽ hwÿr mō. Nẽ mãânên Tirtũm mã mẽmoj nhõr kaxyw. ¹⁸ Hãmri mẽ mẽ ixte amnhĩ nhĩpêx xà hkôt pa mẽ amnhĩ to mex pa mẽ ma tẽn Tirtũm mã amnhĩ jarênh xà hã ixkre hwÿr axà nhũm mẽ kamã ixpumu. Nom na pa pre ri ixkreja kamã tanhmã amnhĩ tomnuj to hkêt në. Rÿ tanhmã ixkapêr punuj to hkêt në. Na pa

prem ãm inhgrêre nê akryk ixkuhê nhũm mē ixpumu. ¹⁹ Pika pē As rŭm Ijaew kwŷjaja na prem ixkre kamã ixpumu. Nar mē tãmjaja mãn awŷr mra nê tanhmã amã ijarênh to.

²⁰ —Nê jar mē kot ixto kapêr xwŷnhjaja. Na pa pre mē àptâr tũmrejê mã amnhĩ jarênh pa nhũm mē inhma nê tanhmã inhmã nê hkêt nê. Kam nê ja hã mē hkukja nê mē ama. ²¹ Rŷko. Koja apu mē amã ãm ja pix ã ijarênh japêr. Na pa pre mē kãm ixkapêr nê mē kãm: “Na pa hte mē htyk nê akupŷm mē htĩr kôt ijamaxpêr tŷx nê. Tã ja pix mŷrapê na ka prem ixpynê nê ã inhĩpêx anê.” Anhŷr o mē kãm ixujarênh jakamã nhũm apu mē hkwŷjaja kêp ja omnuj nê. Jakamã koja apu mē amã ja hã ijarênh japêr. Nom ja pix jarê. Anê.

Ã na pre Pawreja pahi Peris mã amnhĩ jarênh anê.

Peris mē hprõ wa kot Pawre mar ã wa harênh

²² Tã nhũm pahihiti Peris kot mē kot Jejus kôt amnhĩ xunhwŷr xwŷnhjê kot amnhĩ nhĩpêx ã mē omunh mex jakamã hãmri Pawre mar pa nê ho kapêr xwŷnhjê mã kãm:

—Nã hãmri. Na pa ra mē ama. E mē mamrĩ ma mra. Kê pôristi krãhtũm Risasja mō nê pōj pa wa ixprĩ hã mē ate tanhmã harênh toja ma nê rĩ kormã tanhmã Pawre jarênh to. Anê.

²³ Hãmri nê hpãnhã pôristi pytâr xwŷnh mã Pawre jarê nê kãm:

—E mē ma akupŷm ixkre hwŷr o tē nê kamã hamãr o apa. No ãm kwãr mãmrĩ àmnhĩx ri ixkre kamã tanhmã amnhĩ to ho ri pa. Nê kê hkrãmnhwŷjaja mãmrĩ hwŷr mēmoj to mra kê kuku. Anê.

Hãmri nhũm mē kuma nê ma o tē nê akupŷm ixkre hwŷr ho axã nhũm kamã pa ho pa.

²⁴ Tã ra hã apkati grêre nhũm Peris mē hprõ wa ma Pawre hwŷr

tê. Prõ haxwŷja kêp Ijaew. Hixi pē na pre Turujire. Jakamã nhũm wa ma Pawre nhõrkwŷ hwŷr wa tē. Nhũm Peris Pawre hã karõ nhũm kato nê wa hwŷr tē nê wa kãm awjarê. Tanhmã wa kot amnhĩ to nê amnhĩ kaxyw Jejus Kris kôt hamaxpêr nê hkôt amnhĩ xãm prãm xàj hprĩ hã wa kãm harê. ²⁵ Nê wa kãm:

—Nã na htem Jejus Kris kôt amnhĩ nhĩpêx nê tãm ri amnhĩ nhĩpêx o pa. Kãm tanhmã amnhĩ tomnuj to hprãm tã ho anhŷr kêt nê. Nê arĩ Jejus kot amnhĩ nhĩpêx kôt amnhĩ nhĩpêx o pa. Koja Tĩrtũm nhŷrmã mē pahpiitã mē pahte tanhmã amnhĩ nhĩpêx to ho papa hã mē pahpumunh xà hkôt tanhmã mē pajarênh to. Mē pahte tãm amnhĩ nhĩpêx xwŷnh ã mē pajarê rŷ mē pahte amnhĩ tomnuj xwŷnh ã mē pajarê. Anê.

Nhũm pre ã Pawre Peris mē Turujire wa kãm kapêr anê. Hãmri nhũm Peris tee ri ujarênhja ma nê kãm ma nê. Kot amnhĩ tomnuj o pa xwŷnh ã amnhĩ pumu nê ã kãm kapêr anhŷrja mar puma nê. Hãmri nê Pawre mã kãm:

—E hãmri. Nã na pa wa ra ama. Mamrĩ ma akupŷm tēn axã. Kot paj mēmo arĩgro hã mēmoj to anhŷr kêt nê axte amnhĩ wŷr atã karõ ka axte tanhmã wa inhmã axujarênh to. Anê.

²⁶ Nê htŷx hamaxpêr o:

—Nã kot paj mēmo arĩgro hã axte amnhĩ wŷr hã karõ kê ixwŷr tē nê ixte kator prãm xàj inhmã amnhĩrer japêr. Anê.

Hãmri nê xatã amnhĩ wŷr hã karõ htã no nhũm aa kot kator kaxyw tanhmã kãm nê hkêt nê.

²⁷ Tã nhũm amgrã axkrut nê hapêx nhũm Pos Pesti pahi Peristi hpãnhã kêp mē õ pahi nê mē ho amnhĩptã. Jakamã nhũm Peris akupŷm õ krĩ hwŷr nojarêr nê Pawre mã ãhkra karõ hkêt rãhã ma mō. Na pre hamaxpêr o:

—Nà kot paj Pawre kator nhùm Ijaew ja hã ijarènh ma nê ixkamã gryk nê. Nà kwâr mê hãgjênh xà hã ixkre kamã hkrî ho hkrî. Kot paj kator kêt nê. Anê.

Hãmri nê kãm ìhkra karô hkêt rãhã ma akupÿm ô krî hwÿr mō. Jakamã nhùm Pawre arî ixkre kamã kêp prês nê hkrî ho hkrî.

25

Pawre Rôm wÿr hkrà ã harènh

¹ Tã nhùm pahi nyw Pos Pesti krî pê Sejarej wÿr mōn pōj. Hãmri nê kamã ri pa hã apkati axkrunêpxi pix nê ma Jerujarê hwÿr mō. ² Hãmri nê hwÿr pōj nhùm Ijaew kwÿjaja omu nê hwÿr mra nê kãm Pawre ho kapêr nê hã hwÿr kurê kumrêx. Mēō patre krãhtümjê mê Ijaew xàptâr tùmrejaja nhùm mê hwÿr mra nê kãm:

³ —Pa pahihti? E ot pa mê awÿr mra. Kwa xà kot ka Pawre hã karô kê man awÿr mō ka jar kot tanhmã amnhî tomnuj to hã hkukja nê ama? Anê.

No ãm hêx rom ã hã kãm kapêr anê. Kot hã karô nhùm mê kot pry hã hpîr kaxyw nhùm mê hêx rom ã kãm kapêr anê. ⁴ Hãmri nhùm mê kuma nê mê kãm:

—Tk. Kwa ra Sejarej kamã kêp prês nê hkrî kênã kot pa kêt amnhî wÿr hã karô. Kot pa tokyx ma akupÿm hwÿr mō. ⁵ Jakamã kêr ka mê axãptâr tùmjaja ma ixkôt mra. Hãmri nê Sejarej kamã inhmã tanhmã kot amnhî tomnuj to hã harènh to pa mê ama nê rî kormã tanhmã harènh to. Anê.

⁶ Hãmri nê mê kamã pa hã apkati grêre nê ma akupÿm Sejarej wÿr mō. Hãmri nê hwÿr pōj nhùm apkati nhùm mê hkukjêr xà hã ixkre hwÿr tē nê mê kot mê mar xà hã mê hkrî xà kamã nhÿ nê amnhî wÿr Pawre hã karô. ⁷ Nhùm mê hwÿr o tē nê ÿr nhùm hkwy kot Jerujarê rùm mê mōr xwÿnhjaja kãm hipòk nê pahi Pos Pesti mã tanhmã ho

kapêr to nê ho kapêr punuj tÿx nê. Kot tanhmã amnhî tomnuj to ho pa hã ho kapêr o kuhê. Nom mê kot ã kot amnhî nhîpêx anhÿr ã omunh kêt tã ãm amnhî hkrã hkôt ri tanhmã ho hêx to. ⁸ Jakamã nhùm Pawre tee ri amnhî tã mê kot ho hêxja ma nê kãnhmã xa nê Pos Pesti mã amnhî tã aprã nê mê kãm:

—Nà aa ixte ã amnhî nhîpêx anhÿr kêt. Na pa finat Mojes kot Tirtüm nhÿ hã kapêr nhîròp ixãm nê hkwy mri tanhmã amnhî nhîpêx to hkêt nê. Nê mê ixte Tirtüm mã amnhî jarènh xà hã ixkre kamã ri tanhmã ixtÿx ri amnhî nhîpêx to hkêt. Nê pahihti Sesti kapêrja pa pre hiròp ixãm nê tanhmã amnhî tomnuj to hkêt nê. Aa ixte ã amnhî nhîpêx anhÿr kêt kumrêx. Anê.

⁹ Hãmri nhùm Pos Pesti kuma nê tanhmã hkukamã hamaxpêr to nê hamaxpêr o:

—Kwa nhÿ krî kamã kot pa we Pawre kot inhmã tanhmã amnhî jarènh toja ma nhùm Ijaew ja hã kãm ixkînh japêr? Nà mēō krî pê Jerujarê hwÿr kot paj akupÿm mê hwÿr o mō nê kamã mãn hkukja nê kuma. Nà ja na mex. Nà kot paj anê. Anê.

Hãmri nê Pawre mã kãm:

—E xà kot puj ma akupÿm Jerujarê hwÿr mō pa kamã axte mê kot ajarènh ma nê tanhmã ajarènh to nà? Anê.

¹⁰ Hãmri nhùm kãm:

—Nà jar ixte pahihti Sesti nhÿ hã mê kot mê hkukjêr xà hã ixkre kamã inhÿr nê amnhî jarènh kênã. Jar na htem mê hkukja nê tanhmã ri mê mar to. Na pa pre tanhmã ixkwÿjê ho hkêt nê. Mēmo kaxyw kot pa akupÿm mê hwÿr mō nê axte mê kãm amnhî jarê? ¹¹ Kop apu pa tanhmã ixte amnhî tomnuj to ronhÿx mê mãmri ja hã xipî pa mê kêp tanhmã ri amnhî to hkêt nê. Nom mê kot ixto hêx pix o ã ijarènh anhÿr kênã. Jakamã mēmo mÿrapê kot kaj mê ìhkram ijaxà? E Rôm kãm

pahi maati Sesti hwÿr mǎn inhmě pa kumǎ mǎn amnhĩ jarě. Aně.

Pahi Sesti kěp pyka piitǎ hkôt mě ho amnhĩptǎr xwÿnh maati jakamǎ nhũm Pawre kot mar kaxyw hwÿr hkrǎ. ¹² Hǎmri nhũm Pos Pesti kuma ně ma tě ně hǎ ō kōwenatōjě ma. Hǎmri ně hǎ axpēn mar pa ně akupÿm hwÿr tě ně kǎm:

—Tōe. Nǎ kot paj pahi maati Sesti wÿr amě. Ra hwÿr akrǎ kěnǎ. Aně.

Pos Pesti kot Akrip mǎ Pawre jarěnh

¹³ Tǎ nhũm apkati grěre ně hapěx nhũm pahi hō pě Akripja ma Pos Pesti hwÿr mō. Tōx Perěniš mě wa mō. ¹⁴ Hǎmri ně wa hwÿr pōj ně kuri wa pa hǎ apkati grěre nhũm Pos Pesti wa kǎm Pawre jarě ně wa kǎm:

—E pa war amǎ mēhō jarě. Na pre pahi Perisja mě hǎgjěnh xǎ kamǎ mēhō jaxǎ ně kormǎ kator kět ri nhũm mě àpěnh ně kator pa hpǎnhǎ àpěnh o amnhĩptǎ. ¹⁵ Tǎ ra ma Jerujarě hwÿr mō nhũm Ijaew nhō patre krǎhtũmjě mě mě àptǎr tũmrejaja inhmǎ ho kapěr punuj rax ně. Ně ixte mě kǎm hpěr kaxyw inhmǎ hǎ àmněnh kǎm hihtÿx ně. ¹⁶ Nom pa mě kěp ja kaga ně mě kǎm: “Nǎ mě ixpě Rōm nhō xwÿnhjaja na pa htem ǎ mě hipěx anhÿr kět ně. Na pa htem mě kot ho kapěr xwÿnh noo mǎ tanhmǎ hkukjěr to nhũm tanhmǎ amnhĩ tǎ àprǎr to pa htem kuma ně rĩ kormǎ tanhmǎ mě ho. No na pa htem kormǎ mě kot tanhmǎ amnhĩ jarěnh to hkět ri tanhmǎ mě ho hkět ně.” Aně.

¹⁷ —Jakamǎ nhũm prem kaxyw Sejarej wÿr pōj nhũm apkati pa hǎ mě hkukjěr kurě kumrěx. Ně mě kot mě hkukjěr xǎ hǎ mě hkrĩ xǎ kamǎ nhÿ ně ixte hkukjěr kaxyw amnhĩ wÿr Pawre hǎ karō. ¹⁸ Na pa pre ijamaxpěr o: “Mǎn pre tanhmǎ amnhĩ tomnuj tÿx to hǎ na mě inhmǎ harěnh kaxyw.” ¹⁹ Anhÿr ǎ

hkamnhix tǎ te kot amnhĩ to mex xwÿnh pyrǎk. ǎm kot mě hkôt amnhĩ nhĩpěx kět pix ǎ nhũm mě inhmǎ harě. Ně kaxyw mēhō htyk xwÿnh jarě. Mě kot kǎm “Jejus” anhÿr xwÿnhja na xep hte mě kǎm akupÿm htír ǎ harěnh o pa. ǎm ja pix na prem inhmǎ harě. ²⁰ Pa tee ri ixte nhÿri ixprĩ hǎ tanhmǎ mě kot harěnh to hǎ mě mar kaxyw hkukamǎ ijamaxpěr. Hǎmri ně hǎ Pawre kukja ně kǎm: “Xǎ kot puj ma akupÿm Jerujarě hwÿr mō pa axte akwÿ kot tanhmǎ ajarěnh to ma ně rĩ kormǎ tanhmǎ ajarěnh to nǎ?” ²¹ Anhÿr tǎ no nhũm akupÿm Jerujarě hwÿr mōr kaga kumrěx ně amnhĩm Rōm kǎm pahi maati Sesti jarě. Ixte ma hwÿr měnh nhũm kot kǎm amnhĩ jarěnh nhũm kot mar ně tǎm tanhmǎ harěnh to kaxyw. Jakamǎ pa kormǎ ixte hwÿr měnh kaxyw amnhĩ xa hǎ akupÿm mě hǎgjěnh xǎ kamǎ haxǎ nhũm arĩ hkrĩ ho hkrĩ. Aně.

²² Hǎmri nhũm Akrip kuma ně kǎm:

—Xōwehe? Kwa na pa inhmǎ tanhmǎ kapěr to mar prǎm ně. Aně.

Hǎmri nhũm kǎm:

—Tōe. Nǎ kě apkati pa hǎ karō ka tanhmǎ kapěr mar to. Aně.

²³ Jakamǎ nhũm apkati nhũm Akrip mě htōx Perěniš wa pahi hǎ mě é mex jagjě ně ma mě hkukjěr xǎ hǎ ixkre hwÿr wa tě. Pōristi krǎhtũm kwÿjě mě Sejarej kamǎ mě kot amnhĩ to rũnh xwÿnh kwÿjě mě nhũm mě hwÿr akuprō. Nhũm mě piitǎ Akrip mě htōx wa kěp pahi hǎ wa é mex ǎ wa omu ně wa kamǎ no puma ně. Hǎmri nhũm Pos Pesti Pawre hǎ karō nhũm mě haprō ně ma mě hwÿr o tě. ²⁴ Hǎmri nhũm Pos Pesti omu ně Akrip mě htōx mě mě kot mar o hkrĩ xwÿnhjě mǎ kǎm:

—E pahihti Akrip mě mě apikuprōnh xwÿnhjaja. Ota Pawre xa. Jerujarě kamǎ ně jar Sejarej kamǎ na pre hkwÿjaja inhmǎ ho

kapêr rax nê. Hâmri nê ixte hpîr kaxyw inhmã hã àmnênh kãm hihtýx nê. ²⁵ Nom mëmoj mýrapê kot pa kêt kupî? Tã nhùm amnhîm pahi maati Sesti jarê pa ma hwýr mênh kaxyw. ²⁶⁻²⁷ Nom na htem amarî pahi maati Sesti hwýr më rênh kêt nê. Na htem kãm më kot tanhmã amnhî tomnuj to hã kagã nê hwýr kagã më ro hã më kurê. No jahti kot tanhmã amnhî tomnuj toja na ixte omunh kêt. Te inhmã tanhmã kot amnhî tomnuj to hkêt pyrãk. Jakamã na pa më awýr o tẽ. Më ate kapêr mar nê kot tanhmã amnhî tomnuj to hã inhmã harênh nhùm ixte hã kagã nê pahi Sesti hwýr mênh kaxyw. Jakamã e më kam nê hkukja nê ama nê tanhmã mar to. Anê.

26

Pawre kot pahihtî Akrip mã amnhî jarênh

Atre 8.3, 9.1-19, 22.1-21

¹ Hâmri nhùm Akrip Pos Pesti kot tanhmã Pawre jarênh toja ma nê Pawre mã kãm:

—E mãmrî më inhmã amnhî jarê pa më ama. Anê.

Hâmri nhùm kuma nê kãm amnhî jarênh kaxyw kànhmã kãm îhkra pẽ nê kãm:

²⁻³ —Hêxta waa nê. Nã na pa amã amnhî jarênh kaxyw nê ixkînh nê pahi Akrip. Ra ate më ixpê Ijaew kot amnhî nhîpêx ã më ixpumunh mex. Nê më ixte tanhmã amnhî nhîpêx to hã më ixte axpên kukjêrta ate hã më ixpumunh mex. Jakamã na pa amã amnhî jarênh kaxyw nê ixkînh nê. E tokyx anojarêt kêt nê inhma. Pa amã ixujarênh jatur xãm kumê ka aprî hã inhma. ⁴ Nã ixkwýjaja ra më kot ixte amnhî nhîpêx ã ixpumunh mex. Ixprîre rûm ixpapxã kamã nê mãânên Jerujarê kamã ixte tanhmã amnhî nhîpêx to ho ixpaja më kot hã ixpumunh mex. ⁵ Ixpê më hkwyê pẽ Parijew nhõ xwýnh kwýjê hã më

kot ixpumunh. Kojã më apu ja hã amã ijarênh japêr rý ko. Më ixpê Parijew nhõ xwýnhjaja na pa htem amnepêm finat Mojes kot Tirtûm nhý hã më inhîgêjtjê mã mëmoj tã karõ xà hkôt amnhî nhîpêx mex o ixkwýjê jakre.

⁶ —Amnepêm na pre Tirtûm më inhîgêjtjê mã tanhmã amnhî jarênh to. Kot nhýrmã më piitã akupým më ho htîr ã amnhî jarê. Tã ixte ja kôt ijamaxpêr pix mýrapê na prem kot hã amã ixto kapêr kaxyw awýr ixto mõ. ⁷ Më ixpê Ijaew nhîgêjtjê piitã na prem Tirtûm kapêr kôt hamaxpêr o ri pa. Kot nhýrmã akupým më ho htîr ã amnhî jarênh kôt hamaxpêr týx o pa. Amnepêm finat Jako më hkra pê 12jaja na prem hkôt hamaxpêr. Nê ixpê më hkanrêhã më htãmnhwý na pa hte ijaxwýja ja kôt ijamaxpêr týx rãhã ho ri ixpa. Tã ãm mëmoj pixi mýrapê na ixkwýjaja ã amã ixto kapêr punuj anê. ⁸ Më kot ixpyrà nê ja kôt hamaxpêr ã amnhî jarênh tã nhùm pre Tirtûm akupým Kra Jejus o htîr nom nhùm më ixkînhã ja kôt hamaxpêr kêt. Nom Tirtûm kêp akupým më pahto pahtîr xwýnh kênã.

⁹ —Amnepêm kormã Jejus kôt ijamaxpêr kêt ri na pa pre ijaxwýja më urãk nê akupým htîr kôt ijamaxpêr kêt nê. Nê ixtýx ijamaxpêr o: “Kot paj Jejus pê Najare nhõ xwýnh kôt më kot amnhî xunhwýr xwýnhjê nhîpêx kati ho ixpa nhùm Tirtûm ja hã ixpumu nhùm ja kãm mex nê.”

¹⁰ —Anhýr jakamã pa pre hte tanhmã më homnuj týx to ho ri ixpa. Jao Jerujarê kamã më inhõ patre krãhtúmjê nhý hã më unê nê më hagiênh xã kamã më hagiênh o ixpa nhùm më kot më himex kaxyw më hã inhmã amnhî jarê nhùm ja inhmã mex nê. Pa më harênh ma nê ixkînh nê. ¹¹ Pa pre hte xatã tanhmã më hipêx to nê më kot Jejus kaga hprãm xãj më hipêx

kati rûnh nê. Tîrtûm kapêr o mē ahkre xà hā ixkre piitā kamā pa pre hte ā mē hipêx anê. Nê mē kamā inhgryk tÿx jakamā ma krī hkwỳ hkôt mē hapêr o ri ixpa. Ā na pa pre mē hipêx anhÿr o ri ixpa.

12 —Tā axte ixte mē hkwỳjê pynênh nê mē hagjênh kaxyw ma Tamas wÿr mō. Mē inhō patre krāhtûmjê nhÿ hā ma mē hwÿr mō. 13 Hāmri nhûm ra kaxkwa nhîpôk ri myt nhÿ pa kormā pry hā inhmōr ri kaxkwa rûm mēmo nhîrāja pumu. Nhûm hirā htÿx o myt jakre nê ixtā ajêt pa ixkôt ri mē pa xwÿnhjê mē hipôk ri ixkuhê. 14 Hāmri nê mē inhmā ma xà pykap ixrôrôk pa nhûm kaxkwa rûm mēhōj inhmā kapêr. Mē ixpê Ijaew kapêr o kapêr nê inhmā: “Pa Sawti? Hêxta waa nê. Kwa mon ka hte axtem nê ixtomnuj tÿx o ri apa? Nom na ka tee ri ā amnhî nhîpêx anhÿr kaprÿ.” Anê. 15 Hāmri pa tee ri kuma nê kām: “Kwa mē atō na ka ā inhmā akapêr anê?” Anê.

—Hāmri nhûm inhmā: “Ixpê Je-
jus na pa amā ixkapêr. Pa na ka hte
ixpê ixkôt mē kot amnhî xunhwÿr
xwÿnhjê homnuj tÿx o apa ho te pa
ixtomnuj tÿx pyrāk. 16 E kânhmā xa.
Ate inhmā tanhmā amnhî nhîpêx
to ho apa kaxyw na pa amā amnhî
to amnhîrît. Jarāhā ate ixpumunh
xà hkôt ate mē kām ma ijarênh nê
mē kām ixkapêr jarênh o mē ahkre
ho ri mē hkôt apa kaxyw na pa
amnhî kaxyw ata. Kot paj nhÿrmā
axte awÿr ixkato nê tanhmā amā
ixkapêr to ka inhma nê ma mē
kām ixkapêr jarênh o ri mē hkôt
apa. Ja kaxyw na pa amnhîm ata.”
Anhÿr o inhmā kapêr. 17 Hāmri nê
inhmā: “E kot paj Ijaew mē Ijaew
kêt xwÿnhjê hwÿr amē nê anê mē
omunh mex nê nhûm mēhō apîr kêt
nê. 18 Kêr ka ma mē hkôt mē kām
ixkapêr jarênh o ri apa kê mēhpri
hā kuma. Mē kot amnhî tom-
nuj kaga nê amnhî kaxyw ixkôt
hamaxpêr nê ixkôt amnhî xun-

hwÿr kaxyw. Hāmri nhûm Tîrtûm ja
hā mē omu nê ixkukwak ri amnhî
katut kôt mē kot amnhî tomnuj pi-
itā rênh pa nê axte kām hamaxpêr
kêt nê. Hāmri nê mē ho hkra.
Koja mē ā amnhî nhîpêx anê hāmri
nê axte Satanasti nhÿ hā tanhmā
amnhî nhîpêx to hkêt nê. Pānhā
Tîrtûm kôt pix mā amnhî nhîpêx o
pa.” Anê.

19 —Ā na pre Pahihti Jejus inhmā
kapêr anê. Tā kot kaxkwa rûm
inhmā ixâpênh jarênh ā karōja
pa pre mar tÿx nê hkôt amnhî
nhîpêx rāhā ho ri ixpa pahi Akrip.
20 Jakamā na pa pre ma mē hkôt
mē kām kapêr jarênh o ri ixpa.
Tamas kumrêx hwÿr nê hpānhā
Jerujarê hwÿr nê hpānhā pika pē
Jutej piitā hkôt Ijaew mā kapêr
jarênh o ri ixpa. Tā hpānhā Ijaew
kêt xwÿnhjê mā harê. Na pa hte mē
kām ixkapêr o: “Kwa mē ate amnhî
tomnuj kaga nê hpānhā Tîrtûm kôt
amnhî xunhwÿ. Hāmri nê hkôt pix
mā amnhî nhîpêx o ri apa. Mē piitā
mē kot apê hkwỳ hā mē apumunh
kaxyw.” Anê.

21 —Ām ja pix mÿrapê na pre
ixkwÿjaja ixpynê. Tîrtûm mā amnhî
jarênh xà hā ixkre kamā ixpynê nê
ra mē kot ixpîr kaxyw. 22-23 Nom
na hte Tîrtûm ixtānopxa nê ixto ix-
ihtÿx mex rāhā ho pa pa arî mē
kām harênh o ri ixpa. Mē kot
amnhî to rûnh xwÿnhjê mā nê mē
kêp amrakati xwÿnhjê mā nê mē
piitā mē kām harênh o ri ixpa. Fi-
nat Mojes mē Tîrtûm nhÿ hā kapêr
jarênh o mē pa xwÿnhjaja kot ra
hkukamā tanhmā harênh to xà
hkôt pa hte mē kām harênh o ri
ixpa. Nê mē kām: “Tîrtûm kot
mē pakaxyw ām xwÿnhhta na pre
amnhî xà htÿx kamā hamak kām
ty. Tā nhûm Tîrtûm akupÿm ho
htîr. Kumrêx na pre akupÿm ho
htîr jakamā kumrêx na pre tanhmā
mē kām kapêr to ho ri mē hkôt
pa. Mē kot amnhî kaxyw hkôt
hamaxpêr nê hkôt amnhî xunhwÿr

xwÿnh piitã urak nê nhÿrmã Tirtÿm mē wa ò krī kamã htÿr tÿm nē pa ho pa hprãm xaj mē harēnh o pa. Mē ixpē Ijaew nē määnēn mē apē Ijaew kêt xwÿnhjaja nhÿm pre ã mē pajarēnh anē.” Anhÿr o pa hte mē kãm harēnh o ri mē hkôt ixpa pahi Akrip. Anē.

²⁴ Nhÿm Pawre kormã kot mē kãm amnhÿ jarēnh par kêt ri nhÿm Pos Pesti tee ri tanhmã Jejus jarēnh to hã kuma nē kax pē kãm kapēr nē kãm:

—Kwa na ka akrã axpã nà? Pēr ate kagã pumunh tÿx kurē akrã pipānh pyrãk o ri atÿx ã ri mē inhmã axujarēnh anē. Anē.

²⁵ Hãmri nhÿm kãm:

—Nã ixkrã pipānh kêt. ãm hãmri na pa mē amã awjarē. ²⁶ Jerujarē kamã na prem Jejus pÿ nhÿm mē piitã omu. Tã nhÿm akupÿm htÿr hãmri nē hpimxur pē ri pa hkêt nē. Na pre mē ohtô nē akupÿm htÿr kãm omu. Pahi Akrip ra kot ja mar mex jakamã na pa ixamnhÿx ã mē amã harēnh anē.

²⁷ Anhÿr o kãm kapēr hãmri nē pahi Akrip wÿr rÿt nē kãm:

—Kwa pahi Akrip. Xã Tirtÿm nhÿ hã kapēr jarēnh o mē pa xwÿnhjaja kot Jejus kukamã tanhmã harēnh toja kôt na ka hte ajamaxpēr? Nã ra hkôt ajamaxpēr kênã. Ra ixte ajamaxpēr kôt apumunh mex. Anē.

²⁸ Hãmri nhÿm tee ri kuma nē kãm:

—Tk. Kwa xà kot kaj ã inhmã akapēr anē pa ama nē apyrã nē amnhÿ kaxyw Jejus kôt ijamaxpēr? Nã na ka ixte ã ate Jejus jarēnh anhÿrja kôt ijamaxpēr ã ixkamnhÿx kaprÿ. Anē.

²⁹ Hãmri nhÿm Pawre kãm:

—Ko. Kot kaj ixpyrà nē amnhÿ kaxyw hkôt ajamaxpēr pa ixkÿnh nē. Nom kaxipix kêt. Mē apiitã mē ate inhmar o akrÿ xwÿnhjaja määnēn. Mē ate mē ixpyrà nē Jejus kôt amnhÿ xunhwÿr na inhmã

hprãm. ãm ixpyrà nē mē apē prēs pix na inhmã hprãm kêt. Anē.

³⁰ Hãmri nhÿm pahi Akrip nē htõx Perēnÿs nē pahi Pox Pesti nē mē hkôt mē mör xwÿnhjaja kãnhmã kuhê nē ma mrar kaxyw. ³¹ Nē nojarêt nē Pawre hã axpēn mã:

—Kwa tanhmã kot amnhÿ tom-nuj to hkêt kênã kot kêt mē haxà rÿ kupÿ. Anē.

³² Hãmri nhÿm Akripja Pos Pesti mã kãm:

—Kwa kop apu kot amnhÿ kaxyw pahi maati Sesti hwÿr hkrã hkêt ronhÿx pu mē ra kator. Anē.

27

Mē kot Röm wÿr Pawre mēnh ã mē harēnh

Atre 23.11, 25.12

¹ Tã nhÿm mē pyka pē Itar wÿr pahi maati Sesti hwÿr Pawre mēnh kaxyw. Itar kamã mē ò krī maati na pre kēp Röm. Jakamã nhÿm Pawre mē mē kot mē hagjēnh xà kamã mē hkrÿ xwÿnh mē ho hpimràatã ma mē o mra nē pôristi krãhtÿm Jurti nhÿhkram mē haxàr pa. Kot ma Röm wÿr mē o mör kaxyw. Jurtija kēp Itar kamã mē ò pahi maati hã pôristi krãhtÿm nhÿm prem ma mē kãm mē o mör kaxyw ÿhkram mē hagjēnh pa. Ixpē Rukre na pa pre inhmã Pawre hkôt inhmör prãm nē mē hã ajêt nē mē hkôt mō.

² Tã pa mē ra inhnojarêt nhÿm Aristak haxwÿja ma mē ixkôt mō. Pyka pē Masetõn nhõ xwÿnh na pre. Ò krÿ pē na pre Tesarõn. Jakamã nhÿm ma wa ixkôt mō. Hãmri nhÿm pãrja nojarêt. Atamÿx rÿm pãr nhÿm ra As wÿr nojarêt pa mē hwÿr inhgÿx pa nē ma kamã mō. ³ Hãmri nhÿm apkati pa mē krÿ pē Sito hwÿr pøj nē hã pãr xi. Nhÿm pôristi krãhtÿm Jurtija Pawre ho mex jakamã pa mē Sito hwÿr pøj nhÿm Pawre mã anē pa mē ixkato nē ma ixkrãmnhwÿjê hwÿr mra nē

mê kutã apku nê ma akupÿm pãr wÿr mra.

⁴ Tã pa mê axte mô. Nom nhÿm kôk mê ixkutã àpêr tÿx jakamã pa mê umaj juk nê gô hipôk kupu ho mô. Gô hipôk pê Sipreja pa mê upôk rÿm ma hkupu ho mô nhÿm mê inhnê kôk pê àmnàr mex nê. ⁵ Hãmri pa mê môô nê pyka pê Siris mê Pãpir wa hakrenh o mô nê pyka pê Ris kamã Mira hwÿr pøj nê hã pãr xi nê ijapôx pa. ⁶ Hãmri nhÿm pôristi krãhtÿmja Aresãnrir rÿm pãr pumu nhÿm ra Itar wÿr nojarêt. Pa mê hwÿr inhgjêx kurê kumrêx hãmri nê ma kamã axte mô. ⁷ Hãmri nhÿm pãrja kôk kutã tee ri môr prêprêk kaxyw nê ãm amnhÿm hprÿ nê môr ã apkati xohtô nê pa mê tokyx ixpôx kêt nê. Tã Sito hwÿr ixãhtêp o mô nom nhÿm kôk mê ixkutã hihtÿx rax kumrêx. Jakamã pa mê juk nê gô hipôk pê Kret jatur xã jahpa nê ma kape hã mô nhÿm mê inhnê kôk pê àmnàr mex nê. Hãmri pa mê ma Sarmôn jakrenh o mô ⁸ nhÿm pãr kôk kutã amnhÿm hprÿ nê kape hã mô. Pa mê mô nê jatã Rasej tã pãr nhÿkwÿ xã mex wÿr pøj nê kamã pãr xi. ⁹ Nom pãr kot amnhÿm hprÿ nê môr jakamã nhÿm ra kôk xãpêr tÿx nê kamã kry htÿx ã mytwrÿy mê ixtã kato. Mytwrÿya ã mê kot kôk xãpêr tÿx pymaj nhÿhÿm pãr kãm mrar kêt. Jakamã nhÿm Pawre tokyx mê inhmôr nê pãr nhô xwÿnhjê mã kapêr kãm hihtÿx nê mê kãm:

¹⁰ —Kwa pu mê jar kôk xãpêr tÿx jamãr o ri papa nã. Kê kôk mê kry htÿxja hapêx pu mê rÿ kormã axte mô. Kot puj mê anhÿr kêt nê kôk xãpêr tÿx kãm mô nhÿm nhÿri pãrja mê pahpê axã nhÿm gô mê apê mê akukrêx o hapêx pa. Pu mê pajaxwÿya axkaprã.

¹¹ Anhÿr o mê kãm kapêr tã no nhÿm mê kuma nê ãm kuma. Pãr pãm mê pãr o mrar xwÿnh wa nojarêt tÿx nê kapêr ma nê ãm kuma. Nhÿm pôristi krãhtÿm wa nojarêt ã

wa kuma nê haxwÿya Pawre mar kêt nê. ¹² Nhÿm mê kot pãr nhÿkwÿ xã mex jarênhja mê kot mex ã harênh tã mê kêp omnuj nê. Hã na wrÿk nê kôk xãpêr tÿx nhÿm mê kêp omnuj tÿx nê. Jakamã nhÿm mê piitã Pawre rom ra nojarêt nê. Mê kãm tokyx krÿ pê Wênÿs wÿr hpôx prãm jakamã nojarêt tÿx nê. Gô hipôk pê Kret kamã na Wênÿsja. Nê kamã kôk xãpêr tÿx kêt jakamã nhÿm mê hwÿr nojarêt nê axpên mã:

—E kwa pu mê tokyx Wênÿs wÿr mô nê kamã mân kôk xãpêr tÿx japêx jamãr o papa. Anê.

Hãmri nê piitã hwÿr nojarêt.

Kôk kot pãr o àpêr tÿx ã harênh

¹³ Tã nhÿm kahpa hkôt kôk xãpêrja katat kôt kawax pê apê nhÿm mê kamã ama nê axpên mã:

—E hãmri. Tokyx pu mê mô. Anê.

Jakamã pa mê pãr o htÿx xã ho api nê axte mô. Ma gô hipôk pê Kret jakãr ã mô. ¹⁴ Puh nhÿm na wrÿ nê kôk àpêr tÿx kumrêx. Mê kot kãm “kôk xãpêr tÿx maati” anhÿr xwÿnhja gô hipôk rÿm mê ixto àpêr tÿx kumrêx o mô. ¹⁵ Hãmri nê mê ixkutã àpêr tÿx nhÿm pãr tee ri kutã hkarôt. Pa mê kormã Wênÿs wÿr ixpôx kêt ri ra ho awjanã nhÿm amnhÿ krã hkôt kôk kôt mô. ¹⁶⁻¹⁷ Hãmri nê mô nê gô hipôk pê Krawti jahpa nê hakãr ã mô nhÿm mê inhnê kôk pê amyãta nhÿm amnhÿm hprÿ nê kawax pê apê. Hãmri pa mê pãr krare kot mê ixkôt môr xwÿnhja pa mê kumÿ nê pãr rax kãm kumê. Ra kamã gô rax tã pa mê ixkarôt tÿx nê nê hkapÿr pa nê ho api nê pãr rax kãm kumê nê ho htÿx. Hãmri nê hpãnhã kôk xãpêr tÿx pymaj pãr rax kaxpre hpa. Hãmri nê kôk kot pykahti grã maati pê Sirteja wÿr pãr mênh nhÿm kot amnhÿ to pykahti xãm o htêm pymaj nhÿm mê kot ho mrar xã hã kupêxê rax o wrÿ nhÿm pãr amnhÿ krã hkôt ma kôk kôt mô.

¹⁸ Tã nhũm apkati nhũm kôk arĩ mẽ ixpê pàr o àpêr tỳx nê arĩ na wrỳk rax rãhã nê. Jakamã pa mẽ pàr àr pymaj nê mẽ hikukrêx kwỳ gôx kãm rênh pa. Kaxkritre nê àr kêt kaxyw.

¹⁹ Tã nhũm apkati pa mẽ hpãnhã pàr kre kamã ri nê hikukrêx kwỳ rê nê gôx kãm kurê. ²⁰ Nhũm kôk arĩ àpêr tỳx kumrêx ã apkati xohtô nê. Nê na wrỳk rax rãhã jakamã pa mẽ kanhêti pumunh kêt nê myt pumunh kêt o mẽ ixtã apkati xohtô rax kumrêx. Hãmri nê tee ri ahkapi nê tee ri amnhĩ kukamã ijamaxpêr. Nê ixtyk par pix kukamã ijamaxpêr o ixkaprĩ nê ixkrĩ.

²¹ Hãmri nê mẽ inhmã ma xàj ixàpkur kêt ryy nê. Hãmri nhũm Pawre tee ri ja hã mẽ ixpumu nê pàr nhõ xwỳnh wa kãm kapêr nê wa kãm:

—Kwa na pa pre tee ri Kret kãm man mẽ pamôr nê war amã ixkapêr. Kop apu mũtar mãn mẽ kuri arĩ ri mẽ hkôt mẽ papa ronhỹx pu mẽ pajamakêtkati nê paxãmnhĩx ri papa. Tã nhỹx pu mẽ ri mẽ hikukrêxja gôx kãm rênh par kêt nê. ²² Nom kwa kêr ka mẽ tee ri amnhĩ kukamã ajamaxpêr kêt nê. Kot puj mẽ pahtô pahtyk kêt nê. Æm pàrja pix koja axà nê hapêx. ²³ Ixpê Tĩrtũm krajê hõ na pa. Na pa hte kãm tanhmã amnhĩ nhĩpêx to ho ri ixpa. Jakamã na pre kamàt ja kamã ixwỳr kapêr o wrỳk xwỳnhjê hõ mẽ nhũm ixwỳr wrỳ nê inhmã awjarê ²⁴ nê inhmã: “Pa Pawre? Kwa tee ri amnhĩ kukamã ajamaxpêr o amã ma hkêt nê. Kot kaj akã hkĩnh pê ma Itar kamã Rõm wỳr mõi nê põi nê pahi maati Sesti pumu nê kãm amnhĩ jarê. Jakamã koja Tĩrtũm akôt mẽ mõi xwỳnh piitã omunh mex nê ka mẽ atõ tanhmã amnhĩ to hkêt nê.” Anê.

²⁵ —Æ kot inhmã kapêr anhỹr jakamã kwa mẽ amnhĩ to htỳx nê tee ri amnhĩ kukamã ajamaxpêr kêt nê. Tĩrtũm kapêr o wrỳk xwỳnh

kot inhmã ujarênh xà hkôt koja Tĩrtũm ã mẽ panhĩpêx anê. Ixte ja hã omunh mex kênã. ²⁶ Koja xep kôkja nhỹri gõi hipók ã pàr krakrak pa. Nom mẽ papajaja kot puj mẽ pahkã hkĩnh pê hwỳr pahpôx pa. Anê.

²⁷ Tã pa mẽ mõi nê ã inhmõr anhỹrja ã ixtã semãn axkrut nê ra gõi rax pê Ariax kôt axà. Kamàt kãm hkôt axà nhũm kôkja arĩ pàr o apêr tỳx rãhã ho mõi. Hãmri nhũm kôt ã kamàt nhũm pàr o mrar xwỳnhja ra pàr kot pykahti grã htêp ã hkamnhĩx. ²⁸ Jakamã nhũm mẽ gõi xupỳm pumunh xà ho gõi pumu nhũm upỳm kêp 36 met. Hãmri nhũm hã ahtũmre nê axte omu nhũm ra hpãnhã kêp 27 met pix. Jao ra pàr kot gõi kokwe htêp o mõi ã omu. ²⁹ Hãmri nê kot kên kuranh nê hã pikrakrak pymaj katê rũm ho htỳx xà ho 4 nê gõi kãm kurê nhũm arĩ ajêt. Hãmri nhũm mẽ tokyx kãm arĩgro hprãm o arĩgro mã nojarêt o hkrĩ. ³⁰ Hãmri nhũm pàr kãm mẽ àpênh xwỳnhjaja tanhmã hamaxpêr to nê hêx rom pàr krare ho wrỳk o tẽ. Mẽ kot mẽ ixrer nê ahte xarmã mõi nê rêr nê tokyx gõi hipók wỳr hpôx kaxyw. No ãm hêx rom te mẽ kot axte pàr krã rũm ho htỳx xà hõ mênh kaxyw pyrãk o amnhĩ nhĩpêx nê kaxyw ho wrỳk o tẽ. ³¹ Nom nhũm Pawre mẽ hamaxpêr ã mẽ omu hãmri nê põiisti mẽ mẽ hkrãhtũm mã mẽ harê nê mẽ kãm:

—Kwa koja mũjjaja mẽ pare nê ahte pàr krare kamã xarmã mõi nê ka mẽ apikaprãr pa kãm ga. Anê.

³² Hãmri nhũm mẽ tee ri kuma nê mẽ hwỳr hprõt nê mẽ kêp pàr krare pê hkaxpre xà jakã nhũm gõi kãm tẽm nê ma gõi hkôt hkaprỳn mõi.

³³ Tã hãmri nhũm ra myt kator o mõi nhũm Pawre akupỳm mẽ piitã mẽ ho mẽ hamaxpêr o hihtỳx kaxyw mẽ kãm:

—Kwa na ka mẽ tee ri amnhĩ kukamã ajamaxpêr o akaprĩ nê axàpkur kêt o atã semãn axkrut.

³⁴ E pu mē mēmoj krē nē ho amnhī xihťýx. Kot puj mē pahtō pahtyk kēt nē. Ām hāmri na pa mē amā ixkapēr. Anē.

³⁵ Hāmri nē mēmoj py nē mē noo mā Tirtūm mā harē nē hkur o xa ³⁶ nhūm mē ja hā omunh xā hkôt akupŷm tām hamaxpēr o mō. Hāmri nē amnhīm mēō hkwŷ jamŷ nē kumē kuku. ³⁷ Pār kām mē inhmōr xwŷnhjaja na pa prem ixpē 276. ³⁸ Tā pa mē ra ixāpkur pa. Hāmri nē pār kaxkrit kaxyw mē apkur xā hā mēmoj y jakrēxja gōx kām hkapīr pa.

Pār mē kēp pikrakrak ā harēnh

³⁹ Tā nhūm ra myt kator mex nē nhūm mē amnhī kukamā gō hipōk pumu nē xapēn mā:

—Kwa nhŷ pika na mŷj wehe? Anē.

Hāmri nē nhŷri hakàx ā amnhīm nōr xā mex pumu nē hwŷr pār o mōr kaxyw hā xapēn ma. ⁴⁰ Hāmri nē kaxyw pār o htŷx xā jakā nhūm axrē nē gōx kām rôrōk pa. Nē pī ho pār o juk xā nhō xē xāja nhūm mē määñēn krāhta. Hāmri nē akupŷm mrrar xā hā kupēxē nhō nhūm kōk ho hikot nē ma gō jakàx wŷr o mō. ⁴¹ Nom nhūm pār kormā hakàx pē awry hā mōr ri amnhī to kokwe kura nē pyka nhīmōk ā nō nhūm mē tee ri kot hkaxàr nē akupŷm gō xupŷm mā mēnh kaxyw. Nom nhūm gō kot pār nhīxō htak tŷx kurē nhūm mē ixpē pikrakrak par o mō. ⁴² Jakamā nhūm pōristijaja tee ri omu hāmri nē ra mē kēp prēsŷē nhūmex kaxyw. Mē kot gōx kām rôrōk nē gō hipōk wŷr hpa ho nana nē mē kēp pikunor pymaj kot mē himex kaxyw. ⁴³ Nom nhūm mē hkrāhtūmja kām Pawre pīr prām kēt jakamā ja nē mē hkurē nē mē inhmā:

—E mē ate apa ho gō rēnh mex xwŷnhjaja. Akumrēx mra nē mrō nē ho nana ho mra nē rē. ⁴⁴ No mē ate apa ho nana punuj xwŷnhjaja

kēr ka mē tapti rŷ pār kukrēx ō mŷ nē hā ajēt nē hā ma mōn rē. Anē.

Hāmri pa mē ā amnhī nhūpēx anē nē ixpiitā ixkà hkīnh pē ixrēr pa.

28

Gō hipōk pē Maw kamā mē pa hā mē harēnh

Makre 16,17-18

¹ Tā pa mē ixpiitā ixkà hkīnh pē ixrēr pa. Nhūm gō hipōk ā mē pa xwŷnhjaja mē inhmā gō hipōk nhīxi jarē nhūm xep kēp Maw.

² Nhūm Maw nhō xwŷnhjaja mē ixto mex nē. Nhūm axte na wrŷk rax nē nhūm kry htŷx kumrēx nhūm mē ixkamā ukapīr nē mē inhmā kuto nē mē inhmā kapēr mex nē.

³ Hāmri nhūm Pawre kuwy kaxyw ri pī kawrà ho mra nē kuwy hwŷr o tē nē hā haxwŷr o xa. Hāmri nhūm kagā xoprē ō wēnēn xihťŷxja kuwy kagro pymaj pī rūm kato nē ĩhkra hā kunha nē hā àpēr o ajēt. ⁴⁻⁵ Hāmri nhūm Pawre omu nē amnhī nē ho apē nē kuwy kamā kumē nhūm kamā tēm nē xēt pa. Hāmri nhūm gō hipōk nhō xwŷnhjaja tee ri ja hā omu nē xapēn mā:

—Kwa ga mēmyti mŷj pumu. Mān kēp mē hpar o pa xwŷnh na. Hā na kagā ō wēnēn xihťŷxta kunha. Nā koja ty nē rī amnhī pumu. Ra hkà hkīnh pē gō rūm mē pahwŷr rēr tā koja tā ty kām ga. Anē.

⁶ Hāmri nhūm mē tee ri kot tanhmā amnhī to hā hkamnhīx nē hamār o kuhē. ā htŷx nē ĩhkra hikot rŷ htyk kurē kumrēx ā hkamnhīx tā nhūm tanhmā amnhī kamā hamak to hkēt nē. Ām htŷx ri hkīnh nē kapēr nē hpikunhar o ri mra. Hāmri nhūm mē tee ri omu nē xapēn mā:

—Kwa tanhmā kot amnhī tore hā. Kēp mē hpar o pa xwŷnh kēt. Mān kēp kaxkwa kamā mēpahpāmŷē hō nà? Hā na kagā kunha nhūm tanhī to hkēt nē. Anē.

⁷ Nhūm gō hipōk ā mē ō pahĩhti pē Puptija. Ōrkwŷ hā jawŷ jakamā

nhũm amnhĩ kôt mẽ ixwỳ pa mẽ ma hkôt mō nē kuri hkôt ixpa ho ixtā apkati axkrunēpxi nhũm mẽ ixtō mex nē. ⁸ Nhũm ra Pupti nhĩpēêxà kēp à nē nō. Kà kagro htỳx nē haôk. Hāmri nhũm Pawre hwỳr tē nē omu nē hā ìhkra xi nē ho Tirtũm wỳ nhũm akupỳm ho mex kurê kumrēx. ⁹ Hāmri nhũm gô hipôk nhô xwỳnhja harēnh ma nē Pawre hwỳr mẽ à xwỳnh piitā o mra nhũm mẽ omu nē Tirtũm nhỹ hā akupỳm mẽ ho mex pa. ¹⁰⁻¹¹ Hāmri nhũm gô hipôk nhô xwỳnhjaja mẽ ixtō mex rax nē.

Pawre axte Rôm wỳr nojarēt ã harēnh

Rômãn 1.10-12, 15.30-32

Tā pa mẽ gô hipôôta kamā ixpa hā mytwrỳ axkrunēpxi. Hāmri nhũm kôk xàpēr tỳxta hapêx pa mẽ axte inhnojarēt nē ma mō. Pār ô kamā hpānhā mō. Aresānrir rũm pàrja pa mẽ hpānhā kamā mō. Mē kot kām “sānti pihpo” anhỹr xwỳnhja kamā. Na pre gô hipôk kamā haxwỳja kôk xàpēr tỳx hapêx jamār xa hā hikwỳ htā ra axte nojarēt. Hāmri nhũm gô hipôk nhô xwỳnhja ma mẽ inhmōr xà hā mẽ inhmā mẽ ixàpkur xà hkwỳ nhōr rax nē. Hāmri pa mẽ pàr wỳr ingjêx pa nē ma kamā mō. ¹² Mōō nē Sirakus wỳr pôj nē hā pàr xi. Hāmri nē krĩa kamā mẽ ixtā apkati axkrunēpxi nē axte mō. ¹³ Mōō hāmri nē Rekre hwỳr pôj nē hā pàr xi. Hāmri nē kamā mẽ ixtā apkati. Nhũm ra kahpa hkôt kôkja kawax pē àpēr mex jakamā pa mẽ ma hkôt mō. Nē mẽ ixtā apkati axkrut nē Potew wỳr pôj nē hā pàr xi. ¹⁴ Hāmri nē pàr rũm ijapôj nē krĩa kamā Jejus kôt mẽ ixtō nē htōx kwỳjê pumu nhũm mẽ amnhĩ wỳr mẽ ixwỳ. Pa mẽ ma mẽ hkôt mra nē mẽ hkôt ri ixpa hā ixtā ù semān. Hāmri nē ma Rôm wỳr hpānhā ixpar o mō. ¹⁵ Hāmri nē kormā amỳm inhmōr ri nhũm Rôm kām Jejus kôt mẽ ixtō nē ixtōxjaja mẽ ijarēnh ma nē man

mẽ ixkutā mra. Ma krĩa pē Prasxi Apja mẽ “Wēn Pijakrunēpxi” anhỹr xwỳnh jarēnhja wa hwỳr mẽ ixkutā mra. Hāmri pa mẽ axpēn kaxpa nhũm Pawre mẽ omu nē hkĩnh nē. Nē mẽ hā Tirtũm mã amnhĩ jarē nē kām:

—Pa Tirtũm? Nà ãm hāmri na ka mẽ ixkutā jajê rē. Na pa mẽ omu nē ixkĩnh nē. Nà amex o amex Tirtũm. Anē.

¹⁶ Hāmri pa mẽ ma mẽ hkôt Rôm wỳr mō nē pôj. Jatā Itar kām Rôm wỳr pôj. Hāmri nhũm pôristi krāhtũm Pawre mã:

—E kot paj mẽ hagjēnh xà kamā ajaxàr kêt nē. Kot kaj amā nhỹri ixkre kamā apa hprām nē mamrĩ kamā apa. Nom koja pôristi hō akôt pa ho pa.

Anhỹr jakamā nhũm nhỹri ixkre kamā pahihtti Sesti kot mar kaxyw kamā hamak o pa.

Pawre kot Rôm kamā tanhmã amnhĩ nhĩpêx to hā harēnh

Atre 17.5-6

¹⁷ Tā nhũm Pawre Rôm kamā hā apkati axkrunēpxi nē amnhĩ wỳr Ijaew xàptàr tũmrejê hwỳ nhũm mẽ hā akuprô nhũm mẽ kām amnhĩ jarē nē mẽ kām:

—E ixkwỳjaja. Pa mẽ amā amnhĩ jarē ka mẽ inhma. Nà na pa pre mẽ panhigētjê kapēr nhĩrôp tanhmã ixām to hkêt nē rỳ ixte tanhmã mẽ pahkwỳjê hō hto hkêt tã nhũm mẽ pahkwỳjaja amarĩ ixpynê. Jerujarē kamā ixpynê nē Rôm nhô xwỳnhjê nhĩhkram ijaxà. ¹⁸ Hāmri nhũm mẽ ixte amnhĩ nhĩpêx ã ixkukja nē tee ri mẽ kot mẽmoj mỳrapê ixpĩr kaxyw tanhmã ixkukjêr to kaprỳ. Jakamā nhũm mẽ kām ixkator prām nē. ¹⁹ Nom nhũm mẽ pahkwỳjaja kām ja mex kêt jakamā pa pre jar pahi maati Sesti kot ixte kām amnhĩ jarēnh ã inhmar kaxyw amnhĩm harē nē man hwỳr mō. Kot paj tanhmã kām mẽ pahkwỳjê ho ixkapēr punuj to hkêt nē. ãm

ixte amnhĩ tã tanhmã mar to hpix kaxyw na pa hwÿr mō.

²⁰ —Tã pa amnhĩ wÿr mẽ awÿ. Ixte mẽ amã amnhĩ jarēnh kaxyw. Mẽ pahkaprĩ xwÿnhhta. Mẽ pahte kormã kamã pajamak o papa xwÿnh Jejusta. Ām ixte amnhĩ kaxyw hkōt ijamaxpēr pix mÿrapē na prem ã kàx o ixkaxpre anē. Anē.

²¹ Hāmri nhũm mẽ kuma nē kām: —Nà jar tanhmã ajarēnh kute hkēt. Na pre Jutej kamã mẽ pahkwÿjaja tanhmã ajarēnh to hã kagã nē mẽ ixwÿr mēnh kēt nē. Nē ham mẽ kurũm mẽ hpōx xwÿnhjaja na prem tanhmã mẽ inhmã ajarēnh to hkēt nē. ²² No na xep hte pyka piitã hkōt mẽ kām mẽ ate Jejus kōt amnhĩ xunhwÿr xwÿnhjē kurē nē. Na pa pre mẽ ajarēnh ma nē mẽ inhmã axujarēnh mar prām nē. Anē.

²³ Hāmri nhũm mẽ kot mar kaxyw arĩgro hta.

Tã nhũm mẽ kot arĩgro hyr kato nhũm mẽ Pawre nhōrkwÿ hwÿr pikuprōnh rax nē nhũm mẽ kām awjarē. Mẽ kām ujarēnh ry nē. Nē ho kamāt. Nē mẽ kām:

—Nà mẽ pahte amnhĩ wÿr kamã pajamak o papa xwÿnh Jejusta. Kot kaj mẽ atō amnhĩ kaxyw hkōt ajamaxpēr nē hkōt amnhĩ xãm nhũm Tĩrtũm ja hã apumu nē ato hkra. Anē.

Nhũm pre ã mẽ kām kapēr anē. Nē finat Mojes kot Tĩrtũm nhÿ hã Jejus kukamã tanhmã hã kagã htoja nhũm mẽ kām harē. Nē Tĩrtũm nhÿ hã kapēr jarēnh o mẽ pa xwÿnhjaja kot tanhmã hã kagã htoja nhũm mẽ kām harē. ²⁴ Hāmri nhũm mẽ hkwÿjaja kuma nē hkōt hamaxpēr nē amnhĩ kaxyw Jejus kōt hamaxpēr nē hkōt amnhĩ xunhwÿ. No nhũm mẽ hkwÿjaja kuma nē ãm kuma nē kām axte mar prām kēt nē.

²⁵⁻²⁹ Jakamã kànhmã kuhē nē nojarēt nhũm Pawre mẽ kām:

—Nà amnepēm na pre Tĩrtũm finat Ijaisti mã tanhmã kapēr to. ŷ hã kot mẽ panhīgētjē mã tanhmã kapēr jarēnh to kaxyw. Tĩrtũm Karō nhÿ hã kot mẽ kām kapēr nē tanhmã mẽ harēnh to kaxyw. Te Tĩrtũm tãm mẽ kām kapēr pyrāk mẽ kām kapēr. Nē ãm hāmri tanhmã mẽ pahkwÿjē jarēnh to. Na pre mẽ kām:

E Ijaisti. Kēr ka ma akwÿjē hkōt ri mẽ kām tanhmã ixkapēr jarēnh to ho ri apa.

Nē mẽ kām: “Kot kaj mẽ ajamak o axumar tÿx tã aprĩ hã ixkapēr mar kēt nē.

Nē mẽ ano ho arīt tÿx tã aprĩ hã ixte amnhĩ nhĩpēx ã ixpumunh kēt nē.

Mẽ amã ixkapēr mar prām kēt jakamã te mẽ ate mar pymaj amnhĩ jamak pro pyrāk o amnhĩ nhĩpēx o ri apa.

Nē mẽ amã ixte amnhĩ nhĩpēx ã ixpumunh prām kēt jakamã te mẽ ate ixte amnhĩ nhĩpēx ã ixpumunh pymaj te mẽ anomnhōt pyrāk o amnhĩ nhĩpēx o ri apa.

Jao amnhĩ kaxyw ixkōt ajamaxpēr kēt nē.

Kop mẽ amã ixkapēr mar prām ronhÿx ka mẽ aprĩ hã inhmar tÿx nē.

Nē aprĩ hã ixte amnhĩ nhĩpēx ã ixpumunh mex nē.

Jao amnhĩ tomnuj kaga hpa nē ixkōt amnhĩ xunhwÿ.

Pa ja hã mẽ apumu nē mẽ ato mex nē.

Tã ka mẽ ã amnhĩ nhĩpēx anhÿr kēt nē.” Anhÿr o kēr ka mẽ kām ixkapēr jarēnh o ri mẽ hkōt apa Ijaisti. Anē.

Na pre ã Tĩrtũm mẽ panhīgētjē kaxyw Ijaisti mã kapēr anē nhũm ô ri mẽ kām ujarēnh o pa nē mẽ pamã hã kagã. Jakamã kwa mẽ okora. Kēr ka mẽ jajē pyrã nē ã amnhĩ nhĩpēx anhÿr hkēt nē. Kwa mẽ inhma nē inhmar tÿx nē. Ijaew

kêt xwÿnhjaja kot kapêr marja na ra Tirtûm kãm hprãm nê. Jakamã koja mẽ hwÿr mẽ kot kapêr jarênh o mẽ pa xwÿnh kwÿjê rê nhũm mẽ hkôt mẽ kãm ujarênh o pa nhũm mẽ kuma nê mẽ akurom kãm mar prãm nê. Anê.

Hãmri nhũm mẽ kuma nê hapôx pa nê ma akupÿm expên mã tanhmã kapêr jarênh to ho mra.
³⁰ Hãmri nhũm pahi maati Sesti tokyx amnhĩ wÿr Pawre hwÿ nê tanhmã mar to hkêt nhũm ôrkwÿ kamã kêp prês nê pa ho hã amgrã axkrut. Nê tãm ôrkwÿ pãnhã mẽ kãm amnhĩre. Nhũm pre krĩ nhõ xwÿnhjaja ohtô nê hwÿr mra nhũm amnhĩ wÿr mẽ omu nê hkĩnh nê.

³¹ Na pre hte amnhĩ wÿr mẽ kuwÿ nê mẽ kãm Tirtûm kapêr jarênh o hkrĩ. Mẽ kot Tirtûm Kra Pahihti Jejus Kris kôt amnhĩ xunhwÿr nhũm Tirtûm kot ja hã mẽ omunh nê amnhĩ katut kôt mẽ kot amnhĩ tomnuj rênh par nê mẽ ho hkra hã mẽ kãm ujarênh o hkrĩ. Nê mẽ kot hkôt amnhĩ xunhwÿr xwÿnhjê jahkre. Tanhmã mẽ kot Jejus kôt amnhĩ nhĩpêx mex to ho pa hã mẽ kãm karõ ho hkrĩ. Hãmri nhũm mēhõ ja nê tanhmã kãm kapêr to hkêt nê.

Tã ãm ja pix Teopre. Ixpê Rukre na pa awÿr kagàja nhĩpêx nê kumê. Nê kamã amã tanhmã mẽ pahkwÿjê jarênh to. Tã ãm ja pix na hapêx.

Römän Pawre kot Röm kām Jejus kôt hkwyjê hwÿr kagà nê mênh

Kagà ja na pre Pawre hipêx. Kêp Jejus nhÿ hã mē ahkre ho pa xwÿnh na pre. Na pre hte mry kà ho ixkre nhÿpêx nê mē kām ho wēnê ho mē hkôt pa pē mē piitã mē kām Tirtüm kapêr jarênh o pa. Tã krî pē Röm kamã mē kot Jejus kôt amnhî xunhwÿr xwÿnhjê hwÿr kagàja nhÿpêx nê mē hwÿr kumê. Kormã ma mē hwÿr mör nê mē omunh kêt ri.

Nê Jejus kêp Tirtüm mã tanhmã mē pajarênh to xwÿnh ã nhÿm pre mē kām harê nê hã kagà. Jejus kot mē pahte amnhî tomnuj pãnhã mē panê htyk jakamã na hte Tirtüm mē pahte hkôt amnhî xunhwÿr ã mē pahpumu nê Jejus kukwak ri mē pahte amnhî to mex xwÿnh ã mē pajarê.

Nê Tirtüm Karô nhÿ hã mē kot amnhî nhÿpêx nyw nê hamaxpêr nyw o pa hã nhÿm Pawre mē kām karô nê hã kagà. Æ na pre mē kām mēmoj jarê nê hã kagà anê. Nê hã kagà ho:

¹ Pa Röm nhö xwÿnhjaja? Xà mē amex? E ot pa mē awÿr kagà nhÿpêx nê kumê. Tirtüm na pre mē akaxyw ixãm. Ixte mē amã Jejus kot tanhmã mē panê amnhî nhÿpêx to hã harênh o ri ixpa kaxyw. Na pre ixpê Pawre hã ixpumu nê ixãm. Jakamã na pa ã mē awÿr kagà nhÿpêx nê mênh anê. Ixte Jejus nhÿ hã mē ahkre ho ri ixpa xwÿnh na pa. Na pa hte kām tanhmã amnhî nhÿpêx to ho ri ixpa. Tã ã mē awÿr kagà nhÿpêx nê mênh anê.

² Amnepê m na pre Tirtüm nhÿ hã kapêr jarênh o ri mē pa xwÿnhjaja mē pakukamã mē panhîgêjtê mã Jejus kukamã tanhmã harênh to ho

ri pa. Nê mē kām kapêr jarênh o mē hkôt pa nê mē kām:

—Koja nhÿrmã Tirtüm mē pah-piitã mē panê tanhmã kot amnhî nhÿpêx to mã xwÿnh mē nhÿm mē hpiitã hprî hã harênh ma nê omu. Anê.

Nhÿm prem ã Jejus kukamã mē kām harênh anhÿr o ri mē hkôt pa. Tirtüm kapêr ã kagà htüm kamã harênh xà hkôt tanhmã mē kām harênh to. ³ Tirtüm Kra Jejus Krisja na pre mē kām harênh o ri mē hkôt pa. Mē panhõ Pahihti na. Kêp Tirtüm Kra htã na pre mē pahpyrà nê ì ho amnhî nhÿpêx nê wrÿ nê katorxà nhöxà hkre rüm kato. Jakamã kêp Tirtüm Kra pix kêt mãânên katorxà hkôt kêp higêt Tawi hkanrêhã htãmnhwÿ.

⁴ Kêp Tirtüm Kra htã nhÿm prem axtem nê tanhmã hamaxpêr to nê kupî. Nom nhÿm Tirtüm kêp amnhî Kra hã akupÿm ho htîr. Jakamã na pu htem harênh ma nê kām pajamaxpêr o:

—Jesús kêp Tirtüm Kraa. Mē kot kêp hpîr tã nhÿm akupÿm ho htîr. Jakamã nhÿm Tirtüm pyrà nê hihtÿx o hihtÿx. Anê.

⁵ Tã ã Tirtüm kot Kra nhÿpêx anhÿrja ri na mãânên pa ixto mex nê mē akaxyw ixãm. Jakamã na pa hte ma krî piitã hkôt mē kām tanhmã Jejus Kris jarênh to ho ri mē hkôt ixpa. Ijaew mã nê Ijaew kêt xwÿnhjê mã. Mē kot harênh mar nê amnhî kaxyw kām hamaxpêr nê kapêr kôt pix mã amnhî nhÿpêx mex kaxyw. ⁶⁻⁷ Nê mē apê Röm nhö xwÿnhjaja. Na ka prem Jejus kôt amnhî xunhwÿ nhÿm Tirtüm ja hã mē apumu nê mē ato hkra nê mē apê Jejus mē wa hkwy hã mē ajarê. Mē ate hkôt amnhî nhÿpêx kaxyw nhÿm pre ã mē ajarênh anê.

Tã ot pa kagà nhÿpêx nê mē awÿr mênh kaxyw. Tirtüm kot mē ato hkra xwÿnhjê hwÿr. Tirtüm kām mē ajapêê.

Na pa hte mẽ ato mẽ panhîpêêxã maati Tîrtûm mẽ Pahihti Jejus Kris wa hwÿr rãhã ri ixpa. Nê mẽ ato wa hwÿr o:

—Kwa kêr ka wa Rôm kamã war akrajê pumunh mex nê mẽ kutã anojarêt rãhã nê. Kê mẽ hamakêtkati nê amnhîx ri tanhmã amnhî nhîpêx to ho ri pa. Anê.

Pawre kot Rôm nhõ xwÿnhjê pumunh prãm ã amnhî jarênh

Atre 28.15-16; Rômân 15.22-29

⁸ Nê na ka prem amnhî kaxyw Jejus Kris mã ajamaxpêr nê hkôt amnhî xunhwÿ nhũm krî piitã hkôt mẽ pa xwÿnhjaja mẽ ajarênh ma. Nê mẽ ate amnhî nhîpêx nyw ã mẽ ajarênh ma nê axpên mã tanhmã mẽ ajarênh to ho pa. Nê mẽ ajarênh o:

—Kwa na xep Rôm kãm mẽ hkwÿjaja amnhî kaxyw Jejus mã hamaxpêr tÿx nê. Nê hkôt amnhî nhîpêx mex rãhã ho ri pa. Anê.

Pa ã mẽ kot mẽ ajarênh anhÿrja ma nê ixkînh tÿx nê. Nê Tîrtûm mã mẽ anhÿ hã ixkînh ã amnhî jarênh o ri ixpa. ⁹ Na pa hte mẽ ato hwÿr rãhã ho ri ixpa. Nê nhÿri mẽ kãm Tîrtûm Kra Jejus kapêr jarênh o ri ixpa nê mẽ amã ijamaxpêr nê mẽ ato kuwÿ. Nê tanhmã Tîrtûm mã amnhî nhîpêx to ho ixpa pê mẽ amã ijamaxpêr nê mẽ ato kuwÿ. Tîrtûm kot ja hã ixpumunh mex. ¹⁰ Na pa hte tanhmã kãm amnhî jarênh to kaxyw nê mẽ akaxyw amnhî to kuma nê kãm:

—Pa Tîrtûm? Na pa ra inhmã ma Rôm wÿr inhmôr nê kamã akôt ixkwÿjê pumunh prãm tÿx kumrêx. Xà kot ka tokyx mẽ hwÿr inhmê nà? Anê.

¹¹ Na pa ra inhmã mẽ awÿr inhmôr prãm tÿx nê. Na pre Tîrtûm Karõ tanhmã ixkrã hto pa ÿ hã kapêr ã kagã mar tÿx nê. Nê hkôt mẽmoj mex pumunh rax nê. Tã ra inhmã ma mẽ awÿr inhmôr nê amnhî xô ri mẽ amã harênh prãm

nê. Mẽ ate inhmar nê aprî hã Jejus Kris kôt amnhî xunhwÿr tÿx nê hkôt amnhî nhîpêx mex rãhã ho ri apa kaxyw. ¹² Kot paj nhÿrmã ma mẽ awÿr mō. Nê mẽ awÿr pōj pu mẽ axpên pumu nê pahkînh nê. Mẽ pahte amnhî kaxyw Jejus Kris mã pajamaxpêr mex o papa hã axpên pumu nê pahkînh nê. Nê mẽ pahpiitã hkôt amnhî nhîpêx mex o ri papa.

¹³ E ixkwÿjaja. Xatã ixte mẽ awÿr ixkrã htã nhũm mẽmoj xatã tanhmã ixpê amtàr to pa kormã jar ixpa. Nom kot paj nhÿrmã ma mẽ awÿr mō. Mẽ ate ja hã inhmar kaxyw na pa ã Tîrtûm noo mã mẽ amã amnhî jarênh anê. Na pa pre krî hkwy kamã mẽ apê Ijaew kêt xwÿnh kwÿjê hwÿr ixpa. Nê mẽ kãm Jejus kot mẽ panê tanhmã amnhî nhîpêx to hã harênh o ri mẽ hkôt ixpa. Nhũm mẽ hkwyjaja inhma nê hkôt amnhî xunhwÿ. Ja kaxyw na pa inhmã ma mẽ anhõ krî hwÿr inhmôr prãm nê. Mẽ akwÿjaja kot ixkapêr mar nê mẽ apyrã nê Jejus kôt amnhî xunhwÿr kaxyw. ¹⁴ Na pre ra Tîrtûm ixte kapêr o mẽ ajahkre ho ixpa kaxyw mẽ piitã mẽ kaxyw ixãm. Tanhmã ri mẽ kute xwÿnhjê kaxyw. Mẽ kãm ma ho mẽ pa xwÿnhjê mẽ mẽ kãm ma hkêt o mẽ pa xwÿnhjê mã. Nê mẽ kot kagã pumunh xwÿnhjê mẽ mẽ kot kagã pumunh kêt xwÿnhjê mã. Mẽ piitã mẽ kaxyw na pre ixãm. Ixte mẽ kãm Jejus kot tanhmã mẽ panê amnhî nhîpêx to hã harênh o ri mẽ hkôt ixpa kaxyw. ¹⁵ Jakamã na pa ra inhmã mẽ apê Rôm nhõ xwÿnhjê hwÿr inhmôr prãm nê. Ixte mẽ anhõ krî kamã mẽ piitã mẽ mẽ kãm ja jarênh o ri ixpa nhũm mẽ kot inhmar nê mẽ pahpyrã nê Jejus kôt amnhî xunhwÿr kaxyw.

Jejus kot mẽ panê htyk ã harênh Sikûn Ximotre 1.6-12

16 Nê Jejus kot mē panê htyk ã harênhja ãm hãmri na. Harênhja mex o mex. Na htem kuma nê kãm hamaxpêr nê amnhĩ kaxyw hkôt hamaxpêr nê hkôt amnhĩ xunhwý. Hãmri nhũm Tirtũm ja hã mē omu nê mē nê mē kot amnhĩ tomnuj o hapêx pa nê mē ho hkra. Nom mē ixpê Ijaew nhõ xwýnhjê pix kêt. Mããñên mē apê Ijaew kêt xwýnhjaja nhũm kãm mē pajapê ho axpên pyrãk. Jakamã na pu htem Jejus kôt amnhĩ xunhwý nhũm Tirtũm ja hã mē pahpumu nê mē pahto hkra. Ja kaxyw àhpumunh tỳx o àhpumunh tỳx. 17 ãm mē kot amnhĩ kaxyw Jejus mã hamaxpêr xwýnh pixjaja na hte mē ho hkra. Kapêr ã kagà htũm kot tanhmã ja jarênh to nê harênh kot:

Na hte Tirtũm mē kot amnhĩ kaxyw Kra mã hamaxpêr ã mē omunh xà hkôt mē ho hkra nhũm mē amnhĩ kaxyw kãm hamaxpêr rãhã ho pa. Jao ra ô ri tãm amnhĩ nhĩpêx o pa. Anê.

Mē pahpiitã mē pahte amnhĩ tomnuj xwýnh ã mē pajarênh

Atre 14.15, 17.22-29; Apokarip 9.20-21

18 Nê mē kot amnhĩ tomnuj o ri mē pa xwýnhjaja na hte Tirtũm axtem tanhmã mē harênh to. Na htem Tirtũm kapêr ma nom amnhĩ tomnuj gryk ã ãm kuma. Nê mē hkwyjaja kot kapêr mar pymaj kapêr õ ho mē kêp àmnar rãhã ho ri pa nhũm Tirtũm ja hã mē omu nhũm ja kêp omnuj nê. 19-20 Te mē kot Tirtũm kot amnhĩ nhĩpêx ã omunh kêt pyrãk o amnhĩ nhĩpêx tã mē kot omunh mex. Tirtũm kot mēmoj to kator krax rũm ra kot mē pamã amnhĩ to amnhĩrit mex. Pu mē pano ho omunh kêt tã no ãm kot amnhĩ nhĩpêx kôt ra kêp Tirtũm ã omunh mex nê. Nê kêp mēmoj piitã ho kator xwýnh ã omunh mex nê. Nê mex o mex ã omu nê hihtỳx o hihtỳx hã omu. Tirtũm kot

amnhĩ nhĩpêx kot amnhĩrit mex nhũm mē kot omunh mex tã hkôt amnhĩ xunhwýr kêt nê. Nê axtem nê hamaxpêr o:

—Tk. Tirtũm kot inhmã amnhĩ to amnhĩritre hã kot pa kêt ri hkôt amnhĩ nhĩpêx. Kot pa inhno ho omu nê rĩ kormã hkôt amnhĩ nhĩpêx japêr. Anê.

Ra mē kot amnhĩ nhĩpêx ã omunh mex tã ri ã hamaxpêr anê. Jakamã nhũm Tirtũm tee ri ja hã mē omu nhũm ja kêp omnuj tỳx nê. 21 Mē kot amnhĩ nhĩpêx ã omunh mex tã amnhĩ kaxyw tanhmã kãm hamaxpêr hto hkêt. Rỳ arĩ hamaxpêr japêr nê kãm:

—Nà Tirtũm. ãm hãmri amex kumrêx. ãm amex o amex. Apê Tirtũm ã ãm apixi mex kumrêx na ka. ãm hãmri na ka hte mē ixto mex o apa.

Anhỳr o amnhĩ kaxyw kãm kapêr kêt nê. Nê ãm htỳx tanhmã hamaxpêr punuj to pix o ri pa. Te kamãt kô kamã ri mē pa xwýnhjê kot amnhĩ nhĩpêx pyrã nê mēmoj mex pumunh kêt nê.

22 Mē kot àhpumunh tỳx ã amnhĩ to jarkrar o ri pa htã no ãm te mē hkrã kanhĩn kêt nê mē hamaxpêr kêt pyrãk o amnhĩ nhĩpêx. 23 Jakamã na htem amnhĩm mēmo karõ nhĩpêx. Mēmo htyk mã xwýnhjê hõ karõ nhĩpêx. Tanhmãn panhĩ karõ rỳ mēmo mry karõ rỳ mēmo kuwênh karõ. Rỳ mēmo kagã karõ nhĩpêx. Hãmri nê ho õ sãnti nê te ri ho Tirtũm nhĩpêx pyrãk o hipêx. Jao hpar pê hkõn krã ho rôrõk nê amnhĩ to kuwý nê kãm amnhĩ jagrer pê kãm mex o mex ã harê. Tirtũmja sãnti rom htĩr o htĩr tã nhũm mē axtem nê sãnti gryk ã hkaga nê ã amnhĩ nhĩpêx o pa anê. 24 Jakamã nhũm tee ri ã mē kot amnhĩ nhĩpêx anhỳr ã mē omu nê amnhĩ pyrã nê mē hkaga nê ãm mē omu. Jakamã nhũm mē ãm amnhĩ krã hkôt tanhmã ri amnhĩ tomnuj to ho pa. Nê axpên kãm ri tanhmã

hpijaàm kêt to. Ǻ na htem htÿx ri amnhî tomnuj anhÿr o pa.

²⁵ Tîrtûm kapêrja âm hāmri htã nhûm mẽ axtem nê te amnhî pum rênh pyrāk o hipêx nê kām hamaxpêr kêt nê. Nê hpānhā ri mẽ hêx xwÿnhjê kapêr pix ma nhûm ja te mẽ kām mex pyrāk. Na htem Ǻ amnhî nhîpêx anê hāmri nê axtem nê Tîrtûm kot mẽmoj nhîpêx pix parpê rôrôk nê amnhîm mex o mex Ǻ harê. Nom kot hipêx xwÿnh Tîrtûm parpê mân Ǻ amnhî nhîpêx anhÿr kêt nê. Nom kot mẽmoj nhîpêx xwÿnhnta mex o mex jakamã koja mẽ kot hkôt amnhî nhîpêx xwÿnhjaja jajê rom kām mex o mex Ǻ harênh tûm rāhā ho ri pa. ²⁶ No mẽ kot amnhî tomnuj xwÿnhjaja na hte Tîrtûm amnhî pyrā nê mẽ hkaga nhûm mẽ htÿx amnhî krā hkôt ri tanhmā amnhî tomnuj to ho ri pa. Jao mẽni hkwyjaja axtem nê axpên gryk Ǻ mjên kaga nê axpên nhîo ho mjên. ²⁷ Nhûm mẽmy hkwyjaja mǺânên axtem nê amnhî kwÿjê my gryk Ǻ hprô kaga nê axpên nhîo ho hprô. Na htem Ǻ axpên kamā hpijaàm kêt o pa anê. Mÿrapê koja mẽ Ǻ pix kām amnhî xà htÿx kamā hamak o pa. ²⁸ Na htem amnhî tomnuj gryk Ǻ Tîrtûm mã hamaxpêr kêt nhûm tee ri amnhî tã mẽ omu nê hamaxpêr o:

—Mê kām amnhî tomnuj pix prām jakamā kwār mẽ mǺmri Ǻ amnhî nhîpêx anê. Kot paj axte ja nê tanhmā mẽ kām ixkapêr to hkêt nê. Anê.

Jakamā nhûm mẽ arî htÿx ri amnhî krā hkôt tanhmā amnhî tomnuj to ho ri pa rāhā nê.

²⁹ Hāmri nê mẽmoj punuj pix mã hamaxpêr.

Nê kām amnhî mex pix prām mã hamaxpêr.

Nê kām axpên tomnuj pix prām.

Nê mẽmoj tã axpên kām gryk pix prām.

Nê mẽ kām axpên par pix prām.

Nê mẽmoj tã ri kām axpên mã àkjêr prām.

Nê mẽmoj tã kām axpên mã hêx prām.

Nê kām axpên kaxyw tanhmā hamaxpêr punuj to pix prām.

Nê kām tanhmā axpên to kapêr punuj to pix prām.

³⁰ Nê kām mẽmoj tã axpên to hêx pix prām.

Nê kām Tîrtûm prām kêt o ri pa.

Nê mẽmoj tã axpên mã àkjêr o ri pa.

Nê mẽmoj tã amnhî to jarkrar rāhā ho ri pa.

Nê tanhmā amnhî tomnuj to pix kukamā hamaxpêr. Nhûm mẽ katorxà nê mẽ hipêxà tee ri ja nê tanhmā mẽ kām kapêr to no nhûm mẽ mar kêt kumrêx.

³¹ Ǻ mẽ kot amnhî nhîpêx anhÿr o ri mẽ pa xwÿnhjaja na hte Tîrtûm kām mẽmoj mex nhûm mẽ kêp omnuj nê nhûm Tîrtûm kêp mẽmoj omnuj nhûm mẽ kām mex nê. Nê axpên mã mẽmoj tanhmā ho hā amnhî jarênh tã ho anhÿr kêt nê. Nê axpên kām ukaprî ho ri pa hkêt nê.

³² Tîrtûm kapêr Ǻ kagà htûm kot tanhmā mẽ hkukamā mẽ harênh to nê mẽ harênh kot:

Ǻ mẽ kot amnhî nhîpêx anhÿr o ri mẽ pa xwÿnhjaja koja mẽ nhÿrmā ty hāmri nê amnhî xà htÿx kamā hamak rāhā ho ri pa ho pa. Anê.

Nhûm mẽ kot amnhî tã ja mar tÿx tã aa amnhî tomnuj kaga hkêt nê. Arî Ǻ amnhî nhîpêx anhÿr o pa rāhā nê. Nhûm mẽ hkwyjaja mẽ kot amnhî tomnuj Ǻ mẽ omu nê mẽ urāk nê Ǻ amnhî nhîpêx anhÿr o ri mẽ hkôt pa nhûm mẽ amnhî pyrā nê mẽ omu nê hkînh nê. Na htem Ǻ amnhî nhîpêx anhÿrja gryk Ǻ Tîrtûm kaga nhûm tee ri amnhî tã mẽ omu nê amnhî pyrā nê mẽ hkaga nê âm mẽ omu. Jakamā nhûm mẽ amnhî tomnuj tÿx pix rāhā ho pa.

Mē kot amnhī tomnuj xwýnhjê hkukamã mē harēnh

Matēwre 7.1-5; Sikūn Tesarōn 1.6; Eprēw 9.27; Sikūn Pētre 2.4, 3.7; Jutre 6-14; Apokarip 6.15, 20.11

¹ Nē kot ka mē atō ã mē kot amnhī tomnuj anhýr xwýnhjê kot amnhī nhīpēx ã mē harēnh ma nē ã ajamaxpēr anē nē ajamaxpēr o:

—Tk. Mē kot amnhī tomnuj pix o ri pa xwýnh kēnã. No pa na ã ixte amnhī nhīpēx anhýr o ri ixpa hkēt. Mē kurom ixte tãm amnhī nhīpēx o ri ixpa xwýnh na pa.

Anhýr o amnhī jarē. Kwa nã mē ã ajamaxpēr anhýr kēt nē. Mē pajaxwýja na pu htem tōhã mē urāk nē tanhmã amnhī tomnuj to. Tã ka mē ã mē kot amnhī tomnuj ã mē harēnh anē nē te ka ate amnhī jarēnh pyrāk. ² Tirtūm kapēr ã kagã htūm kot mē kot amnhī tomnuj o ri mē pa xwýnhjê jarēnh kot:

Mē kot amnhī tomnuj mýrapê koja mē nhýrmã amnhī xã htýx kamã hamak rãhã ho ri pa. Anē.

Ãm hãmri ã mē harēnh kot anhýr. ³ Mãn ka mē atō tanhmã amnhī kukamã ajamaxpēr to nē ajamaxpēr o:

—Nã koja Tirtūm nhýrmã amnhī nē kuwy hwýr mē kot amnhī tomnuj xwýnhjê rē. No pa koja hwýr inhmēnh kēt nē. Anē.

Kwa mē ã ajamaxpēr anhýr kēt nē. Kot ka mē ã amnhī kukamã ajamaxpēr anhýr tã tōhã mē urāk nē tanhmã amnhī tomnuj to. Jakamã koja Tirtūm mē urāk nē hã tanhmã mē ato. ⁴ Kot kaj mē atō tanhmã amnhī tomnuj to hãmri nē ãm ja hã amnhī pumu nē ajamaxpēr o:

—Ixte amnhī tomnuj xwýnh tã na hte Tirtūm ja hã ixpumu nē ãm ixpumu nē hã tanhmã ixto hkēt nē. Kēp mē ixkamã ukaprī xwýnh jakamã na hte gryk tokyx anhýr kēt nē. Jakamã kot paj arī tanhmã amnhī tomnuj to ho ri ixpa nē aa

jam inhūrer kēt nē. Tirtūm kot ja hã tanhmã ixtore kaxyw hã.

Anhýr o ajamaxpēr. No ãm ja kot anhýr kēt. Na hte Tirtūm kormã amnhī tã mē pajamã. Mē pahte amnhī tomnuj kaga nē hpãnhã hkôt amnhī xunhwýr kaxyw na hte kormã amnhī tã mē pajamã. Jakamã na kormã tanhmã ate amnhī tomnuj tota ã tanhmã ato hkēt nē.

⁵ Mē akrã hihtýx jakamã mē amã hkôt amnhī xunhwýr prãm kēt. Na ka htem tanhmã amnhī tomnuj to pix kukamã ajamaxpēr o ri apa. Nē gaa nē ra anhýr kumrēx. Nhūm Tirtūm tee ri ja hã mē apumu nhūm ja kēp omnuj týx o mō. Jakamã koja nhýrmã tanhmã mē ajarēnh to nē gryk týx kãm tanhmã mē atomnuj týx to. ãm hãmri na hte mē pahte amnhī nhīpēx ã mē pahpumunh xã hkôt ahpýnhã tanhmã mē panhīpēx to.

⁶ Koja nhýrmã mē pahpiitã kormã mē pahfir ri mē pahte amnhī nhīpēx ã mē pahpumunh xã hkôt tanhmã mē panhīpēx to. Mē kot amnhī to mex o ri mē pa xwýnhjaja nhūm mē ho mex nē. Nē mē kot amnhī tomnuj o ri mē pa xwýnhjaja nhūm mē homnuj nē. Koja nhýrmã mē pahpiitã mē pahto hpimràatã ã mē panhīpēx anē. ⁷ Mē kot hkôt tãm ri amnhī nhīpēx o pa pé kãm Tirtūm kot amnhīm mē mex ã mē harēnh prãm xwýnhjaja koja nhýrmã amnhīm mē mex ã mē harē. Hãmri nhūm mē kuri htír tūm nē hkính nē mex kumrēx nē pa ho pa. ⁸ Nom mē kot amnhī mã pix mã ri hamaxpēr o ri mē pa xwýnhjaja. Nē mē kot tanhmã amnhī tomnuj to gryk ã Tirtūm kapēr kaga xwýnhjaja koja kãm mē hkính kēt nē tanhmã mē homnuj týx to. ⁹ Mē kot amnhī tomnuj xwýnh piitã koja mē nhýrmã amnhī xã htýx kamã hamak rãhã nē pa ho pa. Ijaew kumrēxjaja nē hpãnhã Ijaew kēt xwýnhjaja nhūm mē amnhī xã htýx

kamã hamak rãhã nê pa ho pa. Mê kot amnhĩ tomnuj tÿx o paja mÿrapê.

¹⁰ No kêt tãm mẽ kot amnhĩ nhĩpêx xwÿnhjaja koja Tirtũm mẽ ho mex rax rãhã ho pa ho pa. Nê amnhĩm mẽ kot amnhĩ to mex xwÿnhjê hã mẽ harê. Nê tanhmã mẽ ho mex to nhũm mẽ kamã amnhĩ kriet nê pa ho pa. Hamakêtkati nê hkĩnh nê àmnhix ri pa ho pa. Ijaew kwÿ kumrêxjaja nê mãânên Ijaew kêt xwÿnh kwÿjaja nhũm mẽ mex nê hamakêtkati nê hkĩnh nê àmnhix ri pa ho pa. ¹¹ Koja Tirtũm nhÿrmã ahpÿnhã mẽ pahte amnhĩ nhĩpêx ã mẽ pahpumunh xà hkôt tanhmã mẽ pajarênh to pê tanhmã mẽ panhĩpêx to. Mẽ ixpê Ijaewjaja nê mẽ apê Ijaew kêt xwÿnhjaja nhũm ã mẽ pahpiitã mẽ panhĩpêx anê.

¹² Amnepêm na pre finat Mojes mã tanhmã kapêr to nhũm kuma nê ô ri hã kagã hpa. Mẽ ixpê Ijaew ri na kapêr ã kagãja. Ra mẽ ixte mar tÿx jakamã koja mẽ ixtõ ra kapêr mar tÿx tã hkôt amnhĩ nhĩpêx kêt hãmri nhũm Tirtũm tee ri amnhĩ tã omu nê ã amnhĩ nhĩpêx anhÿrja mÿrapê nhÿrmã ma mẽ kot amnhĩ xà htÿx kamã hamak tũm xàta wÿr kumê. Kot kapêr mar tÿx tã hkôt amnhĩ nhĩpêx kêt mÿrapê nhũm ã hipêx anê. No kêt mẽ apê Ijaew kêt xwÿnhjaja mẽ ixkĩnhã mẽ ari Tirtũm kapêr ã kagã hkêt jakamã koja mẽ ate kapêr nhĩrõp mẽ akuhê hã mẽ apumunh kôt tanhmã mẽ anhĩpêx to hkêt nê. Koja hpãnhã mẽ ate tanhmã amnhĩ tomnuj to ho apa mÿrapê mẽ kot amnhĩ xà htÿx kamã hamak o pa tũm xàta wÿr mẽ arê.

¹³ Na hte mẽ kot kapêr mar ã mẽ omunh xà hkôt amnhĩm mẽ kot amnhĩ to mex xwÿnh ã mẽ harênh kêt nê. ãm mẽ kot kapêr kôt amnhĩ nhĩpêx ã mẽ omunh xà hkôt pix mã na hte amnhĩm mẽ kot amnhĩ to mex xwÿnh ã mẽ harê. ¹⁴ No mẽ hkwÿjaja kormã kot kapêr mar kêt tã te ra mẽ kot mar mex pyrãk o

amnhĩ nhĩpêx. Jao amnhĩ krã hkôt tãm ri amnhĩ nhĩpêx kurê kumrêx. Te kot Ijaew pyrã nê Tirtũm kapêr mar tÿx nê hkôt amnhĩ nhĩpêx o ri pata pyrãk. ¹⁵ Na htem amnhĩ krã hkôt tanhmã amnhĩ nhĩpêx mex to. Te Tirtũm kapêr kot mẽ hkrãm gjêx pyrãk o amnhĩ nhĩpêx o pa. Jakamã tee ri tanhmã amnhĩ tomnuj to hã amnhĩ pumu nê hkaprĩ nê. Nê tãm amnhĩ nhĩpêx ã amnhĩ pumu nê hkĩnh nê.

¹⁶ Tã koja nhÿrmã Tirtũm Jejus Kris mã anê nhũm kuma hãmri nê mẽ piitã kormã mẽ htir ri tanhmã mẽ kot amnhĩ nhĩpêx to hã mẽ omunh xà hkôt tanhmã mẽ harênh to. Nê mẽ hamaxpêr kôt mẽ omunh mex xà hkôt tanhmã mẽ harênh to. Mẽ papajaja mẽ pahte axpên jamaxpêr kôt axpên pumunh kêt tã Jejus kot mẽ pajamaxpêr kôt mẽ pahpumunh par.

Tã na pa hte mẽ kãm Jejus kot tanhmã amnhĩ nhĩpêx to hã harênh o ixpa pê ã mẽ kãm ixujarênh anhÿr o ri ixpa.

*Pawre kot hkwÿjê mã kapêr
Römân 3.19-20*

¹⁷ Nê ixpyrà nê mẽ apê Ijaew kwÿjaja na ka mẽ axtem nê Ijaew kêt xwÿnhjê mã tanhmã amnhĩ to jarkrar o ri apa nê mẽ kãm:

—Nã mẽ ixpê Ijaew ri Tirtũm kapêr ã kagã jakamã ãm mẽ papxipixjaja na hte Tirtũm amnhĩm mẽ inhmex ã mẽ ijarê. Nê ãm mẽ papxipixjaja na hte mẽ ixto hkra. ¹⁸ Nê mẽ papxipixjaja na mẽ ixte Tirtũm kãm hprãm xà hkôt mẽmoj pumunh par nê mẽ kot amnhĩ to mex xà pumunh par nê mẽ kot amnhĩ tomnuj xà pumunh par. Mẽ apê Ijaew kêt xwÿnhjê rom mẽ ixte mẽmoj piitã omunh par kumrêx. Anê.

¹⁹⁻²⁰ Nê amnhĩ jarênh o:

—Nã te mẽ ixpê mẽ nohkre xwÿnhjê pa hã mẽ hamÿnh nê ri mẽ ho ixpa xwÿnh pyrãk. Jakamã Ijaew kêt xwÿnh pê htÿx ri mẽ

pa xwÿnhjaja na pa htem mē kām Tirtūm kapēr tūm o mē ahkre mex o ri ixpa. Kormā mē kot hprī hā mar kêt jakamā na pa htem ho mē ahkre ho ri mē hkôt ixpa. Mē kurom mē ixte mar par kēnā.

²¹ Anhÿr ā amnhī jarēnh nē mē ate kapēr o mē ahkre ho apa htā hkôt amnhī nhīpêx kêt nē.

Nē mē ate mē kot axpēn pē àhkīnh nē mē hkurē htā no ām mē kamjaja axpēn pē axàhkīnh o ri apa.

²² Nē mē amā sānti hkīnh kêt ā amnhī jarēnh tā axtem nē hwÿr agjē nē hpar pē kàxpore nhīkwÿ xwÿnh o axàhkīnh o ri apa.

Nē mē kot axpēn prō ho amnhīkati nē mē hkurē ho apa htā mē kamjaja ā ri amnhī nhīpêx anhÿr o ri apa.

²³ Nē mē ate Tirtūm kapēr ā kagà mex o mex ā harēnh tā hkôt amnhī nhīpêx hkêt nē. Jakamā nhūm mē akwÿjaja ja hā mē apumu nē mē apyrā nē Tirtūm ā hpijaàm kêt o pa.

²⁴ Tirtūm kapēr ā kagà htūm kot tanhmā mē ate amnhī nhīpêx ā mē ajarēnh to nē mē ajarēnh kot:

Mē kēp Ijaew kêt xwÿnhjaja na htem Ijaew kot htÿx ri amnhī nhīpêx o ri mē pa hā mē omu nē mē ŷ hā tanhmā Tirtūm o kapēr punuj to ho ri pa. Anē.

²⁵ Mē pahpē Ijaew na pu htem mē pahkrajaja mē hapôx kôt kormā mē hkryre ri pu htem mē kēp mēmy kwryt kà jakà. Finat Mojes kot Tirtūm nhÿ hā mē panhīgétjē mā hā karō xà hkôt na pu htem ā mē hipêx anē. Mē pahte Tirtūm mā mē pahkrajē nhōr ā amnhī to amnhīrit kaxyw. Jakamā na pu htem arī Mojes kapēr kôt ā mē hipêx anē nhūm Tirtūm kām ja mex nē. Nom kot pu mē kapēr kwÿm ri tanhmā amnhī nhīpêx to ho papa nhūm ja kēp omnuj tÿx nē hāmri pu mē

tee ri mē pahkrajē my kwryt kà jakàr kapry. Na hte Tirtūm ā mē pahkrajē nhīpêx anhÿr ā mē pahpumunh kôt amnhīm mē pamex ā mē pajarēnh kêt nē. Nom mē pahte kapēr kôt amnhī nhīpêx mex o papa pē mēmy kwryt kà jakàrja nhūm kām mex nē. ²⁶ Ijaew kêt xwÿnhjaja kot ā mē hkrajē nhīpêx anhÿr kêt tā ra mē hkwyjaja Tirtūm kapēr ma nē hkôt amnhī nhīpêx o ri pa. Jao te mē kot amnhī my kwryt kà jakàr pyrāk o amnhī nhīpêx. Jakamā nhūm Tirtūm ja hā mē omu nē mē kām:

—Nā ām hāmri. Mē ate amnhī my kwryt kà jakàr kêt tā mē apē ixkra na ka mē. Anē.

²⁷ Mē kot amnhī jakàr kêt tā Tirtūm kapēr kôt amnhī nhīpêx mex o ri pa nhūm amnhī tā mē omu nē mē arom amnhīm mē kot amnhī to mex xwÿnh ā mē harē. Mē kot amnhī jakàr kêt tāā.

No mē kajaja mē ate Tirtūm nhÿ hā Mojes kapēr ā kagà mar tÿx tā hkôt amnhī nhīpêx kêt nē. Ja mÿrapē koja ja hā mē apumu nē Ijaew kêt xwÿnhjē kīnhā mē ate amnhī tomnuj xwÿnh ā mē ajarē. Ra mē ate amnhī jakàr tā mē ate amnhī tomnuj xwÿnh ā mē ajarē.

²⁸ Nē kot ka mē atō tanhmā amnhī to jarkrar to nē amnhī jarēnh o:

—Nā ixpē Ijaew jakamā na hte Tirtūm mē kot inhmy kwryt kà krāhyr kôt ixto kraa. Anē.

Nom xà na hte Tirtūm ā mē pahte amnhī nhīpêx anhÿr ā mē pahpumunh kôt mē pahto hkra? Nā kot anhÿr kêt. Na htem ām htÿx ā amnhī to jarkrar anhÿr kapry ho pa.

²⁹ Nē Tirtūm Karō kot mē hkarō mā gjêx xwÿnhjaja kēp Tirtūm kra jakamā na htem Tirtūm kām hprām xà hkôt amnhī nhīpêx. Nom ri amnhī krā hkôt tanhmā amnhī nhīpêx to ho pa hkêt nē. Rÿ htÿx hamaxpēr o:

—Nà kot paj Mojes kapër ã kagà hkôt amnhî nhîpêx nhûm Tîrtûm ja hã ixpumu nê amnhîm inhmex ã ijarê nê ixto hkra.

Anhÿr o hamaxpêr kêt nê. Na htem hamaxpêr o:

—Nà ra Tîrtûm Karô kot ixkarôm àr jakamã ixpê hkra nhûm amnhîm inhmex ã ijarê. Jakamã kot paj ãm kôt pix mã ri amnhî nhîpêx o ri ixpa rãhã ty. Kwâr mãmrî ixkwÿjaja amnhîm inhmex kêt ã ijarê. Anê.

Kêr ka mê ã ajamaxpêr anhÿr o ri pa. Æ mê hamaxpêr anhÿr na mex o mex.

3

¹ Nê mãn ka mê ra tee ri tanhmã amnhî kukamã ajamaxpêr to nê ajamaxpêr o:

—Kwa mo kaxyw na pa ixpê Ijaew? Mon pa pre we ixpê Ijaew kêtêre hkêt nê? Mê kêp Ijaew kêt xwÿnhjaja kot amnhî jakâr kêt tâ nhûm Tîrtûm mê pahpyrà nê mê ho hkra. Anê.

Kwa mê ã ri ajamaxpêr anhÿr kêt nê. ² Mê pahpê Ijaew na pre Tîrtûm Ijaew kêt xwÿnhjê rom mê pahto mex rax nê. Na pre amnepê mã mê panhîgêt mã tanhmã kapêr to. Mê pahpiitã mê pahte mar nê hkôt amnhî nhîpêx kaxyw. Nom Ijaew kêt xwÿnhjê nhîgêt mã ã kapêr anhÿr kêt nê. Æm mê pahpê Ijaew nhîgêt pix mã kapêr. Jakamã mê pahpê Ijaew mã ja mex kumrêx. ³ Nom kot kaj mê atô ja ma nê ajamaxpêr o:

—Nà Tîrtûm kot mê ixto mex mã mê ixtã amnhî jarênh tâ no nhûm xep mê inhîgêt kwÿjaja hkôt amnhî nhîpêx kêt nê. Na xep prem kapêr kwÿm ri amnhî tomnuj o pa. Jakamã ko. Koja Tîrtûm mê ixpê mê hkanrêhã mê htãmnhwÿjaja tanhmã mê ixto mex to japêr ko. Anê.

⁴ Kwa mê ri ã ajamaxpêr anhÿr kêt nê. Tîrtûm na hte mê pahpiitã mê pakuum mêmoj tâ amnhî jarênh o hêx kêt nê. Tã ra kot

tanhmã mê pahtã amnhî jarênh to xà hkôt koja ã mê pahto mex anê. Kapêr ã kagà htûm kot mêhõ tanhmã Tîrtûm mã kapêr to nê harênh kot:

Pa Tîrtûm. Nà ãm kapxipix na ka hte mêmoj tâ amnhî jarênh xà hkôt amnhî nhîpêx o ri apa.

Jakamã na htem ãm axpên mã axêx ã akapêr ã ajarênh kaprÿ. Anhÿr o harê.

⁵ No kot ka mê atô atÿx ajamaxpêr nê ajamaxpêr o:

—Xà koja Tîrtûm tanhmã mê ixte amnhî tomnuj to hã mê ixpumu nê gryk? Nà koja gryk kêt nê. Jakamã kot paj arî amnhî tomnuj o ri ixpa. Kê mê piitã ja hã ixpumu nê ixrom Tîrtûm tapxipix kot amnhî to mex o pa xwÿnh ã harênh o pa. Nà ja mex. Jakamã kot paj arî amnhî tomnuj rãhã ho ri ixpa nhûm mê Tîrtûm pix mã mãn kot tãm amnhî nhîpêx xwÿnh ã harê. Hãmri nhûm Tîrtûm amnhî tâ ixpumu nê tanhmã ixto hkêt nê. Koja tanhmã ixto japêr hãmri nê ixpyrà nê amnhî tomnuj nê. Anê.

Kot kaj mê ã ajamaxpêr anê nê ãm amnhî krã hkôt ã ajamaxpêr anhÿr kaprÿ. Nom ã ajamaxpêr anhÿrja Tîrtûm jamaxpêr kôt kêt. ⁶ Kwa mê ri ã ajamaxpêr punuj anhÿr kêt nê. Tîrtûm kot mê pahpyrà nê aa kot amnhî tomnujre hã. Kop ãm mê pahpyrà nê tanhmã kot amnhî tomnuj to ronhÿx tanhmã kot we amnhî to nê mê pahte amnhî tomnuj xwÿnh ã mê pajarê? Nhÿx mê pahpyrà nê ã amnhî jarênh anê. Nà ã mê ajamaxpêr anhÿrja mex kêt.

⁷⁻⁸ E pa ixprî hã mê amã ja jarê ka mê inhma. Kot kaj mê atô amnhî kukamã ajamaxpêr o:

—E kot paj mãmrî ri mêmoj tâ ixêx o ri ixpa kê mê ixêx nhi hã ixpumu nê ixrom Tîrtûm pix mã mãn kot amnhî to mex ã harê. Nê ãm pix mã mãn hêx kêt xwÿnh ã

harê. Hâmri nhùm Tirtùm amnhî tâ ixpumu nê mê â mê kot harênh anhÿrja ma nhùm ja kãm mex nê nhùm hkînh nê. Jakamã ixêx o ri ixpaja â tanhmã ixto hkêt nê. Ra mê kot ixrom tâm kot amnhî nhîpêx o pa xwÿnh â harênh jakamã nhùm ixêx nhita â tanhmã ixto hkêt japêr. Jakamã kot paj ixte amnhî tomnuj o ri ixpaja mã inhûrer kêt nê. Kêr kê mê ja hã ixpumu nê ixrom Tirtùm tapxipix kot amnhî to mex xwÿnh â harê.

Anhÿr o ajamaxpêr nom mê ajamaxpêrja kot anhÿr kêt. Na hte akwÿjaja pa ixpê Pawre ixêx o ixpa hã ri axpên mã ijarê no na pa hte ixêx o ri ixpa hkêt nê. Â mê ajamaxpêr anhÿr o ri apa xwÿnhjaja koja Tirtùm mê atomnuj tÿx nê kãm ga.

Mê mê pahte amnhî tomnuj xwÿnh â mê pajarênh

Wam Korît 6.9; Karatas 3.22; Xitre 3.3

⁹ Tã tanhmã kot puj mê pahpê Ijaew amnhî jarênh to? Xà kot pu mê pahte amnhî to mex o Ijaew kêt xwÿnhjê jakrenh â amnhî jarê? Nã mê pahte â amnhî nhîpêx anhÿÿre hã. Mê pahpê Ijaew nê Ijaew kêt xwÿnhjaja. Mê pahpiitã mê pahte amnhî tomnuj o axpên pyrâk. Na pa pre ra mê amã ja jarê. ¹⁰ Tirtùm kapêr â kagã htùm kot ja jarênh kot: Mêhõ na we aa kot amnhî tomnuj kêt kumrêx nê pa?

¹¹ Nê mêhõ na we kot mëmoj mex piitã omunh par?

Nê mêhõ na kãm Tirtùm prãm?

¹² Nã amrakati kumrêx. Na mê ra piitã hkaga hpa.

Nê kapêr kwÿm ri tanhmã amnhî tomnuj to ho pa.

Âm mêhõ pyxire nê amnhî to mex o ri pa hkêt kumrêx.

¹³ Na htem kapêr punuj pix o ri pa. Jakamã Tirtùm noo mã mê kot amnhî nhîpêxja te kot mëmoj tyk nê hkro punuj pyrâk.

Na htem âm ri hêx pix kukamã ri hamaxpêr o pa. Tanhmã mê hêx to xàja te kêp kagã xoprê nhõ wenên xihÿtÿx pyrâk.

¹⁴ Nê na htem mê piitã mëmoj nhÿxi ho ri axpên mã mê hixi jarênh o pa. Nê ri tanhmã axpên japrÿ hto ho pa.

¹⁵ Nê tanhmã kapêr mã gêt kãm mê kãm kapêr to.

¹⁶ Nê tanhmã mê hkwyÿjê homnuj to. Jakamã nhùm mê piitã ri hkaprÿ nê mex kêt nê pa.

¹⁷ Nhùm htem âm axpên mã mê gryk xà pix o kapêr o pa.

¹⁸ Nê Tirtùm â hpijaàm kêt o pa. Na htem kapêr ma nê âm kuma nê kãm hkînh kêt o pa.

Â na htem amnhî nhîpêx anhÿr rãhã ho pa. Anê.

Â Tirtùm kapêr â kagã htùm kot mê pajarênh anhÿr. ¹⁹ Mê pahpê Ijaew ra mê pahte ja jarênh mar tÿx. Tirtùm kapêr â kagã htùm kwÿ na. Na hte â mê kot amnhî tomnuj xwÿnhjê jarênh anê. Nê mãânên mê papajaja. Mê pahpê Ijaew na hte â mê pajarênh anê. No âm mê papapxipix hkêt. Krÿ piitã hkôt ri mê pa xwÿnhjaja nhùm â mê harênh kot anhÿr. Ijaew kêt xwÿnhjaja nê mê pahpê Ijaew. Mê pahpiitã mê pahte amnhî tomnuj xwÿnh jakamã mëmo kaxyw kot pu mê pahte amnhî tomnuj kêt â ri amnhî to jarkrar o papa? Kot puj mê â amnhî jarênh anhÿr kaprÿ. Jakamã koja Tirtùm mê pahpiitã mê pahte amnhî tomnuj mÿrapê tanhmã mê panhîpêx to. ²⁰ Mê pahpê koja mê pahte kapêr kôt pix mã amnhî nhîpêx o papa hã mê pajarê? Nê mê pahpê mã koja mê pamã kapêr nê mê pamã:

—Nã na ka hte akatãt kôt ixkapêr kôt pix mã amnhî nhîpêx mex nê. Âm hãmri na ka hte â amnhî nhîpêx anhÿr o apa.

Anhÿr o mê pahpê mã kot we â kapêr anê? Nã aa kot mê pahpê mã

kapêr anhÿr kêt. Na pu htem âm kapêr ma nê tee ri amnhî kukamâ pajamaxpêr. Mê pahte amnhî tomnuj â amnhî pumunh kaxyw na pre mê pamâ kapêr â kagâ htÿmja gô. Mê pahtô mê pahte kapêr â kagâ hkôt amnhî nhîpêx mex o papa hkêt kênâ kot kêt ri amnhîm mê pahte amnhî to mex xwÿnh â mê pajarê.

Tanhmâ Tîrtÿm kot mê pahto hkra to hâ harênh

Atre 17.30-31; Karatas 2.16-21; Piripos 3.7-9; Xitre 3.5; Xiakre 2.10

²¹ Nê na hte Tîrtÿm mê pahte kapêr kôt amnhî nhîpêx â mê pahpumunh kôt amnhîm mê pahte amnhî to mex xwÿnh â mê pajarênh kêt nê. Jakamâ mêhō kukwak ri koja we â mê pajarênh anê? Nâ nhâm mêhō kot tām amnhî nhîpêx rāhā ho pa hā omunh pix kukwak ri koja â mê pajarênh anê. Tā mēhō kukwak ri kot ā mê pajarênh anhÿr xwÿnh ta na pre ra mê pamâ ho amnhîrit. Amnepê m Tîrtÿm kapêr â kagâ htÿm kāmā na pre mēhō hkukamā tanhmā harênh to. Nê Tîrtÿm nhÿ hā mê kapêr jarênh o pa xwÿnhjaja haxwÿja kukamā tanhmā harênh to ho pa. ²² Jejus Krisja na prem hkukamā harênh o pa. Tām na pu htem hkôt amnhî xunhwÿ nê amnhî kaxyw kām pajamaxpêr rāhā ho papa nhÿm Tîrtÿm ja pix â mê pahpumunh kôt amnhîm mê pahte amnhî to mex xwÿnh â mê pajarê. Mê kot Jejus kôt amnhî xunhwÿr xwÿnh piitāā. Mē ixpê Ijaew nê mê apê Ijaew kêt xwÿnhjaja. Mē pahpiitā mê pahte axpên pyrāk jakamā kot puj mê pahtô Jejus kôt amnhî xām nhÿm Tîrtÿm Kra Jejus kot amnhî to mex pix o pa kukwak ri mê pahpumu nê amnhîm pajarênh o:

—Nâ âm hāmri. Ra kot ixkra Jejus kôt amnhî xām jakamā ra inhmā te Jejus kot amnhî nhîpêx pyrā nê amnhî to mex o pa. Anê.

²³ No mê pahtô na mê pahte Tîrtÿm mê Jejus wa urāk nê amnhî nhîpêx mex rāhā ho ri papa? Nâ amrakati kumrêx. Mē pahpiitā mê pahte amnhî tomnuj xwÿnh kênā. ²⁴ Tā Tîrtÿm kot mēmoj tā mê pakutā nojarêt rāhā jakamā na hte Jejus Kris kukwak ri amarī amnhîm mê pahte amnhî to mex xwÿnh â mê pajarênh o pa. Mē pahte Jejus kôt amnhî xunhwÿr xwÿnh piitāā nhÿm â mê pajarênh anê. Ra Jejus kot htyk o mê pahte amnhî tomnuj piitā hpānhā amnhîrer par jakamā na hte Tîrtÿm Jejus kukwak ri amarī mê pahte amnhî to mex xwÿnhjê hā mê pajarê. Te mê pahte amnhî tomnuj kêt kumrêx pyrāk mê pajarê. ²⁵⁻²⁶ Na pre mê pahwÿr Jejus mē nhÿm mê pahwÿr wrÿ nê mê panê ty nê htyk o mê pahte amnhî tomnuj piitā hpānhā amnhîrer pa. Jakamā kot pu mê pahtô amnhî kaxyw hkôt pajamaxpêr nhÿm Tîrtÿm ja hā mê pahpumu nê Kra kukwak ri amnhî katut kêt mê pahte amnhî tomnuj piitā rēnh pa. Jao te aa mê pahte amnhî tomnuj kêt kumrêx pyrāk â mê pahpumu.

No kêt amnepê m kormā Jejus wrÿk nê mê panê htyk kêt ri mê pa xwÿnhjaja. Tanhmā na pre Tîrtÿm mê kot hkôt amnhî xunhwÿr xwÿnhjê nhîpêx to? Kormā Jejus mē panê htyk kêt ri mê pa xwÿnhjaja tanhmā na pre mê hipêx to? Nâ na pre mê hkwyjaja amnhî kaxyw Tîrtÿm kôt hamaxpêr nê hkôt amnhî xunhwÿr nhÿm amnhî tā mê omu nê amnhîm mê harênh o:

—Nâ âm hāmri. Koja nhÿrmā Ixkra ma mê hwÿr wrÿ nê mê nê ty nê htyk o mê kot amnhî tomnuj pānhā amnhîrer pa. Jakamā koja mē tāmjaja amnhî tomnuj pānhā amnhîrer kêt nê. Anê.

Tā nhÿm Jejus tām mê pahwÿr wrÿ nê mê pahpiitā mê panê ty. Jakamā nhÿm Tîrtÿm ra mê pahte

hkôt amnhī xunhwÿr xwÿnhjaja Kra kukwak ri amnhī kaŕut kôt mẽ pahte amnhī tonnuj piitã rēnh pa. No na hte amarī ã mẽ panhīpêx anhÿr kêt nē. Æm Jeſus tyk pix kukwak ri na hte ã mẽ panhīpêx anē. Æm hāmri na hte ã mẽ panhīpêx mex anē. Na hte tãm mẽ panhīpêx rãhã ho pa. ²⁷Jakamã kot puj mẽ ã pajamexpêr anē nē pajamexpêr o:

—Nà na pa hte amnhī to mex rãhã o ri ixpa. Amnhī to mex o mẽ piitã mẽ hakrenh pa.

Anhÿr o pajamexpêr kêt nē. Koja mẽhō ã hamexpêr anē nē ãm amnhī jarēnh o hêx. Na hte Tirtüm mẽ pahte amnhī to mex ã mẽ pahpumunh kôt amnhīm mẽ pahte amnhī to mex xwÿnh ã mẽ pajarēnh kêt nē. Mẽ pahte amnhī to mex rãhãre hã. Nom na pu htem amnhī kaxyw Jeſus mã pajamexpêr nē hkôt amnhī xunhwÿ nhūm ja hã mẽ pahpumu nē rī kormã amnhīm mẽ pamex ã mẽ pajarē.

²⁸E pa axte tanhmã mẽ amã ja jarēnh to ka mẽ aprī hã inhma. Mẽmoj pumunh kôt na hte Tirtüm mẽ pahte amnhī to mex xwÿnh ã mẽ pajarēnh wehe? Xà mẽ pahte kapêr tüm kôt amnhī nhīpêx o ri papa hã mẽ pahpumunh kôt? Nà na hte ja hã mẽ pahpumunh kôt ã mẽ pajarēnh anhÿr kêt nē. Mẽ pahte hkôt amnhī nhīpêx rãhã ho papare hã. Æm mẽ pahte amnhī kaxyw Kra Jeſus kôt pajamexpêr nē hkôt amnhī xunhwÿr ã mẽ pahpumunh kôt pix mã na hte mẽ pahte amnhī to mex xwÿnh ã mẽ pajarē. Ja pix ã mẽ pahpumunh kôt na hte ã mẽ pajarēnh anē.

²⁹Nē xà Tirtüm kêp mẽ ixpê Ijaew pix nhō Tirtüm pix na? Nà kêp mẽ ixpê nhō Tirtüm kêt. Kêp mẽ ixpê Ijaew nhō Tirtüm nē mãanēn kêp mẽ apê Ijaew kêt xwÿnhjê nhō Tirtüm.

³⁰Nē Tirtüm ãm pyxi mex. Axtem hō kêt. Na hte mẽ pahpiitã mẽ panhīpêx o axpēn pyrãk. Jakamã na hte mẽ kot amnhī kaxyw Jeſus kôt hamexpêr o mẽ pa xwÿnhjê pumu nē mẽ kot amnhī to mex xwÿnh ã mẽ harē. Mẽ ixpê Ijaew nē mãanēn mẽ apê Ijaew kêt xwÿnhjaja.

³¹Tã koja mẽhō htÿx hamexpêr o: —Nà ixte amnhī kaxyw Jeſus kôt ijamexpêr mex o ixpa nhūm Tirtüm kot amnhīm inhmex ã ijarēnh jakamã kot paj axte kapêr kôt amnhī nhīpêx kêt nē. Kot paj ãm amnhī krã hkôt amnhī nhīpêx o ri ixpa. Ra Tirtüm kot ixto hkra kēnã.

Anhÿr o ajamexpêr japêr. Kwa mẽ ã ri ajamexpêr anhÿr kêt nē. Na htem amnhī kaxyw Jeſus kôt hamexpêr hāmri nē kãm hkôt amnhī nhīpêx prãm rãhã nē pa ho pa.

4

Apraãw kot amnhī kaxyw Tirtüm kôt hamaxpêr

Karatas 3.6-18; Xiakre 2.23

¹Nē mẽ panhīgêſ finat Apraãwja kêp mẽ pahpê Ijaew pãr krax. Tã mẽmoj tã na pre Tirtüm omu nē kot amnhī to mex xwÿnh ã harē? ²Xà kot kãm tanhmã amnhī nhīpêx to hã karō xà hkôt amnhī nhīpêx mex ã omunh xà hkôt nhūm pre ã harēnh anē? Nà ja kôt kêt. Kop apu ja kôt ã kot harēnh anhÿr ronhÿx Apraãw amnhī tã omu nē Tirtüm mã amnhī to jarkrar nē kãm:

—Pa Tirtüm? E mãn ka ixpumu. Na pa hte akapêr kôt amnhī nhīpêx mex o ri ixpa.

Anhÿr o nhÿx pre kãm amnhī to jarkrar. No na pre tanhmã kãm amnhī to jarkrar to hkêt nē. ³Tã mẽmoj tã omunh xà hkôt na pre Tirtüm amnhīm mex ã harē? Nà Tirtüm kapêr ã kagã htüm kot tanhmã Apraãw jarēnh to kot:

Na pre Apraâw amnhî kaxyw Tîrtûm kôt hamaxpêr nê hkôt amnhî xâm nhûm amnhî tâ omu nê amnhîm mex â harê. Anê.

⁴ Mê õ patrâwjaja na htem kâm mê âpênh xwýnhjaja âpênh mex â mê omunh xâ hkôt mê kâm amnhîre. ⁵ No Tîrtûm na hte â mê panhîpêx anhÿr kêt nê. Na hte mê pahte tãm amnhî nhîpêx â mê pahpumunh kôt amnhîm mê pahte amnhî to mex xwýnh â mê pajarênh kêt nê. Âm mê pahte amnhî kaxyw Kra Jejus kôt pajamaxpêr nê hkôt amnhî xunhwÿr â mê pahpumunh kôt pix mã na hte amnhîm â mê pajarênh anê. Ra mê pahte amnhî tomnuj o ri papa htâ hpânhâ amnhî kaxyw Jejus kôt pajamaxpêr xwýnh pixjaja na hte â mê pajarênh anê.

⁶ Jakamâ na hte mê pamâ amnhî jarênh o:

—Ixte mê amex â mê ajarênh tâ no âm mê ate amnhî to mex kôt mê apumunh kôt na pa â mê ajarênh anhÿr kêt nê. Âm mê ate amnhî kaxyw Ixkra mê wa ixkôt ajamaxpêr nê wa ixkôt amnhî xunhwÿr â mê apumunh kôt na pa hte â mê ajarênh anê. Anê.

Pu mê â kot pamâ kapêr anhÿr â amnhî tâ kuma nê pahkînh nê. Pahi finat Tawi na pre haxwÿjaja jarênh o:

⁷ Na hte Tîrtûm amnhî katut kôt mê pahte amnhî tomnuj piitâ rênh pa nê axte kâm hamaxpêr kêt nê.

Jakamâ pu mê ja hâ amnhî pumu nê pahkînh nê.

⁸ Nê amnhî kukamâ pajamaxpêr o: “Hêxta waa nê. Na pa pre amnhî tomnuj o ixpa nê tee ri ja hâ amnhî pumu nê ixkaprî nê.

Hâmri nê amnhî to Tîrtûm wÿnhûm inhma nê ixte amnhî tomnuj o hapêx pa nê axte kâm hamaxpêr kêt nê.

Nâ âm hâmri. Ja mex kumrêx.” Anê.

⁹ Tâ mê kot ja hâ amnhî pumunh nê hkînh xwýnhjaja mêmojaja na mê? Xâ mê kot amnhî my kwÿrÿt kâ jakâr xwýnh pix kwÿjaja na pre pahi Tawija â mê harênh anê nâ? Nâ mê tapxipixjaja kêt. Mâânên mê kot amnhî jakâr kêt xwýnh kwÿjaja. Tanhmâ na pre ra Tîrtûm kapêr â kagâ htûm kot finat Apraâw jarênh to? Na pre harênh o:

Na pre Apraâw amnhî kaxyw Tîrtûm kôt hamaxpêr nê hkôt amnhî xâm nhûm amnhî tâ omu nê amnhîm mex â harê. Anê.

¹⁰ Xâ Apraâw ra kot amnhî my kwÿrÿt kâ krâhyr nhîrô pê na pre Tîrtûm amnhîm mex â harê? Nâ kormâ kot amnhî krâhyr kêt ri na pre â harênh anê. ¹¹ Kormâ kot amnhî krâhyr kêt ri kâm kapêr nê kâm:

—E ate amnhî kaxyw inhmâ ajamaxpêr nê ixkôt amnhî xâm â ixte apumunh kôt na pa amnhîm amex â ajarê.

Anhÿr o kâm kapêr hâmri nê rî kormâ kâm tanhmâ amnhî krâhyr to hâ kâm karô nhûm kuma nê mar xâ hkôt amnhî my kwÿrÿt kâ hkwy krâhta. Kot Tîrtûm mã amnhî nhôr â amnhî to amnhîrit kaxyw â amnhî nhîpêx anê.

Nom kormâ amnhî krâhyr kêt ri na pre Tîrtûm amnhîm mex â harê. Tâ Ijaew kêt xwýnhjaja kot amnhî jakâr kêt tâ mê hkwyjaja Apraâw pyrà nê amnhî kaxyw Tîrtûm mã hamaxpêr nê kâm amnhî nhôr jakamâ Apraâw te kêp mê hpâr krax maati pyràk. ¹² Nê mâânên mê pahpê Ijaew. Kot puj mê pahô amnhî kaxyw Tîrtûm kôt pajamaxpêr nhûm amnhî tâ mê pahpumu nê mê pamex â mê pajarê. No âm mê pahte amnhî jakâr â mê pahpumunh kôt â mê pajarênh anhÿr kêt nê. Âm Apraâw pyrà nê amnhî kaxyw Tîrtûm kôt pajamaxpêr pix â mê pahpumunh kôt na hte mê pamex

ã mẽ pajarê. Kormã Apraãw kot amnhĩ my kwryt kã krãhyr kêt ri ra kot amnhĩ kaxyw Tĩrtũm mã hamaxpêr jakamã kêp mẽ pahpê Ijaew mẽ pahte urãk nê amnhĩ kaxyw Tĩrtũm mã pajamaxpêr xwýnhjê hpãr krax maati. Ijaew kêt xwýnhjê pyrà nê kêp mẽ pahpãr krax maati.

Tĩrtũm kot Apraãw mã mẽmoj mexjarênh

Karatas 3.22

¹³ Amnepêm na pre Tĩrtũm Apraãw mã tanhmã kapêr to nê kãm:

—E koja nhỹrmã akanrêhã akra nê atãmnhwýjaja amýrpê apyrã nê krĩ piitã hkôt mẽ kêp mẽ õ pahi. Anê.

Tã tanhmã Apraãw kot amnhĩ nhĩpêx to hã omunh xã hkôt na pre ã kãm kapêr anê? Xã kot kãm tanhmã amnhĩ nhĩpêx to hã karõ nhũm kot hkôt amnhĩ nhĩpêx mex ã omunh xã hkôt na pre hkĩnh nê ã kãm kapêr anê? Nã kot anhỹr kêt. Mẽ pahtõ kot pu we Tĩrtũm kapêr xã hkôt pix mã amnhĩ nhĩpêx mex rãhã ho ri papa? Mẽ pahpê hihtýx kênã. ãm kot amnhĩ kaxyw Tĩrtũm kôt hamaxpêr nhũm kot amnhĩ tã omunh nê amnhĩm mex ã harênh kôt pix mã na pre ã kãm kapêr anê. ¹⁴ Kop apu kot kãm tanhmã kapêr to nê kãm:

—E Apraãw. Kot kaj ixkapêr piitã ama nê hkôt amnhĩ nhĩpêx mex rãhã ho ri apa. Hã koja nhỹrmã akanrêhã akra nê atãmnhwýjaja kêp krĩ piitã hkôt mẽõ pahihti.

Anhỹr o kãm kapêr ronhỹx ãm kãm ã kapêr anhỹr kaprý. Apraãw aa kot kapêr piitã hkôt amnhĩ nhĩpêx mex o pare hã. Kop apu ã kãm kapêr anhỹr ronhỹx pre kuma nê tee ri amnhĩ kukamã hamaxpêr nê hamaxpêr o:

—Kwa nã. Ra ixte Tĩrtũm kôt amnhĩ xãm tã tanhmã kôt pa amnhĩ to nê kapêr piitã hkôt amnhĩ nhĩpêx mex rãhã ho ri ixpa? Kot

paj tee ri inhmã ã amnhĩ nhĩpêx anhỹr o ixpa hprãm kaprý. Jakamã koja nhỹrmã ixkanrêhã ixkra nê ixtãmnhwýjaja kêp mẽ õ pahi hkêt nê pa. Hêxta waa nê. ¹⁵ Kojã Tĩrtũm ixte kapêr kwým ri tanhmã ixte amnhĩ tomnuj to hã ixpumu nê tanhmã ixtomnuj to. No mẽhõ kot we kapêr piitã hkôt amnhĩ nhĩpêx mex rãhã ho pa? Nã amrakati kumrêx.

Anhỹr o nhỹx pre hamaxpêr. ¹⁶ No na pre Tĩrtũm ã kãm kapêr anhỹr kêt nê. Ra kot hprĩ hã mẽ pahte amnhĩ nhĩpêx ã mẽ pahpumunh mex kênã. Na pre ãm kãm:

—E ate amnhĩ kaxyw ixkôt ajamaxpêr nê ixkôt amnhĩ xãm jakamã kot paj amarĩ ato mex nê. Anê.

Tĩrtũm na hte mẽmoj tã amnhĩ jarênh o amnhĩ to hêx kêt nê. Na hte mẽmoj tã amnhĩ jarênh xã hkôt tanhmã mẽmoj nhĩpêx to ho ri pa. Jakamã koja mẽ pahte Apraãw pyrà nê amnhĩ kaxyw hkôt pajamaxpêr xwýnh piitã mẽ pahto mex nê.

Nê xã na pre ã mẽ pamã kapêr anê nê mẽ pamã:

—E kot kaj mẽ ixkapêr kôt pix mã ri amnhĩ nhĩpêx o ri apa hã kot paj mẽ ato mex rax nê.

Anhỹr o mẽ pamã kapêr? Nã na pre ã mẽ pamã kapêr anhỹr kêt nê. Na pre mẽ pamã:

—Kot kaj mẽ finat Apraãw pyrà nê amnhĩ kaxyw ixkôt ajamaxpêr nê ixkôt amnhĩ xunhwý hã kot paj mẽ ato mex nê.

Anhỹr o mẽ pamã kapêr. Tã Apraãw kumrêx kot mẽ pakukamã amnhĩ kaxyw hkôt hamaxpêr jakamã te kêp mẽ pahpiitã mẽ pahte urãk nê ã amnhĩ nhĩpêx anhỹr xwýnhjê pãr krax maati pyràk.

¹⁷ Amnepêm na pre Tĩrtũm tanhmã Apraãw mã kapêr to. Kot tanhmã kãm kapêr toja Tĩrtũm

kapêr ã kagà htùm kamã na. Na pre kãm:

Kot kaj apê ahpÿnhã ri mẽ urojê hpàr krax. Anê.

Kormã Apraãw kra hkêt tâ nhùm hkra hkukamã ã kãm kapêr anê. Hãmri nhùm kuma nê hkôt hamaxpêr kurê kumrêx nê hamaxpêr o:

—Hêxta waa nê. Ra ixprô mẽ wa ijamê wa ixpigêt tÿx nê wa ixkra hkêt kumrêx. Kot paj wa tanhmã amnhĩ to nê tokyx ty. Tã ra Tirtùm kot ixkra nê ixtãmnhwÿjê hkukamã ã inhmã mẽ harênh anhÿr kênã. Jakamã kot pa xep wa ixpigêt tÿx tâ tanhmã amnhĩ to nê ixkra. Nã kot pa xep wa anê. Nê koja ixkraja tanhmã amnhĩ to nê ixpê htyk japêr tâ koja Tirtùm akupÿm inhmã ho htír. Nã koja inhmã ho anê. Ra kot inhmã ixkra nê ixkanrêhã ixtãmnhwÿ xohtô jarênh kênã. Anê.

¹⁸⁻¹⁹ Na pre ra hpigêt tÿx nê. Ra hã amgrã pê 100 nê hkurê kêt nê pa. Nhùm hprô mãânên hpigêx tÿx nê. Nê ôhy kamã hkra hkêt kumrêx. Kormã wa hkra hkêt tâ nhùm Tirtùm Apraãw mã hkra nê htãmnhwÿ xohtô hã harê. Nê kêp mẽ urojê xohtôjê pàr krax ã kãm harê. Hãmri nhùm kuma nê amnhĩ kaxyw hkôt hamaxpêr tÿx kurê kumrêx. ²⁰ Nê ã amnhĩ nhípêx anhÿr rãhã ho pa. Na pre war amnhĩ kra hã amnhĩ jarênh ma nê tee ri amnhĩkukamã hamaxpêr kêt nê. Æm Tirtùm tãm kot wa kãm wa hkra jarênh pix mã hamaxpêr pê amnhĩ kaxyw kãm hamaxpêr tÿx o ri wa pa. Nê hamaxpêr o:

—Nã ra wa ixpigêt tÿx kumrêx tâ koja xep Tirtùm wa inhmã wa ixkra hõ gõ. Nã koja wa inhmã kugõ. Hêxta waa nê. Æm hãmri Tirtùmja mex o mex. ²¹ Nã kot wa inhmã wa ixkra jarênh xã hkôt koja wa inhmã kugõ. Ja kaxyw ahpumunh o ahpumunh. Tirtùmja hêx kêt. Anê.

²² Hãmri nhùm Tirtùm ã hamaxpêr anhÿr ã omu nê amnhĩm

mex ã harê. Nê kot kãm amnhĩ jarênh xã hkôt wa kãm wa hkraja gõ.

²³ Nom na pre amnhĩm Apraãwja pix mex ã harênh kêt nê. ²⁴ Kot puj mẽ pahtõ uràk nê amnhĩ kaxyw hkôt pajamaxpêr nhùm amnhĩ tâ mẽ pahpumu nê ra kot Apraãw jarênhhta pyrã nê amnhĩm mẽ pamex ã mẽ pajarê. Na pre mẽ panhõ Pahihti Jejus ty nhùm Tirtùm akupÿm ho htír. Tã mẽ papajaja na pu prem amnhĩ kaxyw Jejus kôt pajamaxpêr nhùm Tirtùm ja hã mẽ pahpumunh kôt mẽ pahte amnhĩ to mex xwÿnh ã mẽ pajarê. ²⁵ Na pre mẽ pahwÿr Kra Jejus mẽ nhùm mẽ pahwÿr wrÿ. Tã nhùm mẽ axtem nê kupĩ nom nhùm amarĩ htyk kêt nê. Na pre htyk o mẽ pahte amnhĩ tomnuj pãnhã amnhĩrer pa. Ja kaxyw na pre Tirtùm mẽ pahwÿr kumê. Jakamã nhùm prem kupĩ nhùm akupÿm ho htír. Tã mẽmo kaxyw na pre Tirtùm ã mẽ pahwÿr Kraja mênh nhùm mẽ panê htyk anê nhùm akupÿm ho htír? Æm kot kukwak ri amnhĩm mẽ pahte amnhĩ kaxyw hkôt pajamaxpêr xwÿnhjaja mẽ pahte amnhĩ to mex xwÿnh ã mẽ pajarênh pix kaxyw.

5

Tirtùm kot mẽ pahto hkwÿ hã harênh

Matêwre 5.12; Sikün Korît 4.8, 5.18-21; Xiakre 1.2-4; Wam Pêtre 4.12, 5.9

¹ Nê na pu prem amnhĩ tomnuj o ri papa nhùm Tirtùm ja hã mẽ pahpumu nhùm ja kêp omnuj nê. Jakamã nhùm Jejus amnhĩ grõnh kôt wrÿ nê mẽ panê ty. Nhùm Tirtùm htykja kukwak ri mẽ pahto hkwÿ. Mẽ pahte amnhĩ kaxyw hkôt pajamaxpêr nê hkôt amnhĩ xunhwÿr ã mẽ pahpumu hãmri nê ã mẽ panhípêx anê pu mẽ ra pahpê hkwÿ hã papa. ² Na pre Jejus Tirtùm mã mẽ pajarênh o:

—E jajê pumu. Na mẽ ra amnhĩ kaxyw pamã hamaxpêr nê pahkôt amnhĩ xunhwÿ. Anê.

Hãmri nhũm kuma nê mẽ pahto mex nê mẽ pakutã nojarêr rãhã ho pa. Tã kot puj mẽ pahpê hkra-jaja nhÿrmã pano ho Tĩrtũm mex o mex xwÿnhja pumu. Jakamã na pu htem amnhĩ kukamã ã pajamaxpêr anhÿr o pahkĩnh nê papa nê pajamaxpêr o:

—Hêxta waa nê. Kot paj nhÿrmã inhno ho Tĩrtũm mex o mex ã omu nê kuri ixpa ho ixpa. Nã ãm hãmri. Inhmã omunh prãm tÿx kumrêx. Anê.

³⁻⁴ Nê na htem Jejus ã mẽ pah-tomnuj nê pu mẽ pahpunuj nê ri papa. Pamex kêt nê tã tee ri amnhĩ kukamã pajamaxpêr o ri pahkaprĩ nê papa hkêt nê. Kwãr mẽ mãmri ã mẽ panhĩpêx anê. Pu mẽ pahpunuj kurê Jejus kôt amnhĩ xunhwÿr tÿx o kormã mõi. Nê mẽ umaj hkaga hkêt nê. Arĩ amnhĩ wÿr kamã pajamak o papa. Jao amnhĩ kaxyw kumã pix mã kãm pajamaxpêr tÿx rãhã pahkĩnh nê ri papa.

Kot puj mẽ ã amnhĩ nhĩpêx anhÿr o ri papa nhũm Tĩrtũm ja hã mẽ pahpumu nhũm ja kãm mex nê. Hãmri nhũm ja kaxyw tanhmã mẽ pahto paxihtÿx to pu mẽ pahpunuj tã hkôt pajamaxpêr tÿx rãhã nê.

⁵ Nê ra mẽ kot Jejus ã tanhmã mẽ panhĩpêx to htã pu mẽ amnhĩ kaxyw tee ri kãm pajamaxpêr kaprÿ hkêt nê. Ra kot mẽ pamã amnhĩ Karõ nhõr nhũm kot mẽ pahkarõ mã gjêx kênã kot pu kêt mẽ ri tee ri amnhĩ kaxyw kãm pajamaxpêr kaprÿ. Na hte Karõja mẽ pahkarõ kamã mẽ pamã Tĩrtũm kapêr jarênh o amnhĩrĩt nê kãm mẽ pajapê htÿx ã harênh o amnhĩrĩt rãhã nê.

⁶ Amnepê mã na pre mẽ piitã amnhĩ tomnuj o ri pa nê tee ri kãm amnhĩ to mex rãhã hprãm kaprÿ. Mêhõ kot we ja kaxyw tanhmã mẽ hkrã hto? Jakamã nhũm Tĩrtũm ja

hã mẽ omu hãmri nê mẽ kaxyw Kra Jejus mã kãm:

—E inhma. Ka kot kaj mẽ kot tanhmã amnhĩ tomnuj to ho paja ã ma mẽ hwÿr wrÿ. Ixte mẽ nê atyk kaxyw agrõnh kôt mẽ hwÿr amênh jakamã kot kaj wrÿ nê mẽ kãm ixkapêr jarênh o ri mẽ hkôt apa. Rãhã nhũm mẽ hkwyjaja apĩka mẽ piitã mẽ nê ty. Anê.

Hãmri nhũm kuma nê kãm:

—Tõe. Nã kot paj amã hprãm xà hkôt ã amnhĩ nhĩpêx anê. Anê.

Hãmri nê man amnhĩ grõnh kôt mẽ pahwÿr wrÿ. ⁷⁻⁸ Xà koja mêhõ kãm axpên japê xaj axpên nê ty na? Xà kot mêhõ tãm kot amnhĩ nhĩpêx xwÿnh tã nhũm mẽ kot hpĩr kaxyw nhũm hkrãmnhwÿja kãm hapê nê. Nê nê amnhĩ grõnh kôt mẽ kãm xa nhũm mẽ kupĩ nhũm nê ty? Nã kot apu nê htyk japêr ko. No mẽ papajaja. Na pu htem mêhõ hkrãmnhwÿta kĩnhã arĩ amnhĩ tomnuj rãhã ho ri papa htã nhũm Tĩrtũmja arĩ kãm mẽ pajapê nê. Nê kãm mẽ pajapê xaj mẽ pahwÿr Kris mẽ nhũm mẽ panê ty. Arĩ mẽ pahte amnhĩ tomnuj rãhã ho papa tãã. Na pre ã Tĩrtũmja kãm mẽ pajapê hã ã mẽ pahwÿr mênã anê. ⁹ Na pre ty nhũm hkamrõ hkwy axkapĩ nhũm Tĩrtũm ja hã omunh xà hkôt tãm amnhĩm mẽ paxunhwÿ. Tã Jejus kukwak ri koja ma mẽ kot amnhĩ xà htÿx kamã hamak tũm xàta wÿr mẽ parênh kêt nê. Mẽ pahpê hkwy kênã kot kêt hwÿr mẽ parê.

¹⁰ Nom kormã mẽ pahpê hkwy hkêt ri na pu prem te ra kutã amnhĩ xunhwÿr pyrãk o amnhĩ nhĩpêx. Tã nhũm Kra mẽ panê ty pu mẽ hkôt amnhĩ xunhwÿ. Jakamã nhũm Tĩrtũm Jejus tyk kukwak ri mẽ pahto hkwy. Nê ra akupÿm Kra ho htĩr jakamã kot puj mẽ pahte hkôt amnhĩ xunhwÿr xwÿnhjaja nhÿrmã wa urak nê wa kuri pahtrĩ tũm nê pamex kumrêx nê papa ho papa.

¹¹Ně mẽ pahpê kuwy rax wÿr mẽ papa mã xwÿnh kêt jakamã na pu htem pahkĩnh nê pajamakêtkati nê ri papa. Nom ja pix ã na pu htem ã amnhĩ nhĩpêx anhÿr kêt nê. Mẽ pahpê Tĩrtũm krãmnhwÿ jakamã na pu htem mãânên pahkĩnh nê ri papa. Pahihti Jejus Kris kot mẽ panê htyk ã omunh xà hkôt na pre Tĩrtũm mẽ pahte hkôt amnhĩ xunhwÿr xwÿnhjê ho hkwy jakamã na pu htem pahkĩnh nê pajamakêtkati nê ri papa.

*Atãw mẽ Kris wa harênh
Wam Korĩt 15.20-22, 45-49*

¹²⁻¹³Ně amnepêm na pre Tĩrtũm finat Mojes mã tanhmã kapêr to. Hãmri nhũm kuma nê Ijaew kot tanhmã amnhĩ nhĩpêx to ho pa kaxyw mẽ kãm mẽmoja ã karõ nê mẽ kãm hã hkagã. Mẽ kot kamã harênh nê mar nê Tĩrtũm kôt amnhĩ nhĩpêx kaxyw. Hãmri nhũm mẽ tee ri ã kot mẽ kãm mẽmoj tã karõja ma nê tanhmã axpên mã kapêr to nê axpên mã:

—Kwa na pu htem ã amnhĩ nhĩpêx anhÿr kêt nê. Na pu htem ãm amnhĩ tomnuj tÿx kumrêx o ri papa nê amnhĩ to mex kêt kumrêx. Anê.

Ãm hãmri na prem ã amnhĩ jarênh anê. Mẽ pahpiitã mẽ pahte amnhĩ tomnuj xwÿnh kênã. My kot wa pê finat Atãwja kumrêx na pre tanhmã mẽ pahte amnhĩ tomnuj to ho hkrax. Mÿrapê na pre htĩr tũm nê ri pa ho pa hkêt nê. Na pre ri pa nê gaa nê rĩ hpigêt tÿx nê ty. Tã mÿr pê ri mẽ papa xwÿnhjaja na pu htem urak nê tanhmã amnhĩ tomnuj to ho ri papa. Mÿrapê na pu htem ri papa nê gaa nê Atãw pyrã nê pahtyk pa. Tĩrtũm kot mẽ pahtã Atãw mã kapêr xà hkôt. ¹⁴⁻¹⁹Jakamã na prem kormã Mojes kator xwÿj ri pika piitã hkôt ri pa nê gaa nê haxwÿja htyk pa. Mẽ kot amnhĩ tomnuj mÿrapê ty. Atãw pyrã nê Tĩrtũm kot mẽmo xõ nê

hkurê xwÿnhhta krêr kêt tã urak nê tanhmã amnhĩ tomnuj to ho ri pa. Hãmri nê mÿrapê ty.

Na pre ã Atãwja mẽ pahpiitã mẽ pamã Tĩrtũm kapêr nhĩrôp ãm nê amnhĩ tomnuj o hkrax anê nê mẽmo xõta krê. Jao te mẽ pahpiitã mẽ pahte urak nê kumê hkur pyrãk o mẽ panhĩpêx. Mÿrapê nhũm htem arĩ pika piitã hkôt hapôj nê kormã hprĩre htã ra Atãw pyrã nê tanhmã amnhĩ tomnuj to ho ri pa. Jakamã nhũm Tĩrtũm Atãw kot tanhmã amnhĩ tomnuj to hã omunh xà hkôt mẽ pakukamã hamaxpêr o:

—Nã koja mẽ Atãw pyrã nê amnhĩ tomnuj o ri pa. Mÿrapê kot paj ma mẽ kot amnhĩ xà htÿx kamã hamak tũm xãta wÿr mẽ rênh pa. Anê.

Tã Jejus Kris mẽ Atãw wa harênhja kot axpên pyrãk jakamã na hte Atãw kanrêhã hkra nê htãmnhwÿjaja Atãw kot amnhĩ nhĩpêx kôt amnhĩ nhĩpêx o ri pa rãhã nê. Urak nê amnhĩ tomnuj rãhã ho ri pa. Nhũm axtem Jejus kôt mẽ kot amnhĩ xunhwÿr xwÿnhjaja Jejus kôt amnhĩ nhĩpêx rãhã ho ri pa. Te mẽ kêp hkanrêhã hkra nê htãmnhwÿjê pyrã nê urak nê tãm amnhĩ nhĩpêx. Na htem ã ahpÿnhã amnhĩ nhĩpêx anhÿr o ri pa. Na pre Jejus mẽ pahte amnhĩ tomnuj pãnhã amnhĩrer par kaxyw mẽ panê ty. Jakamã mẽ pahte hkôt amnhĩ xunhwÿr xwÿnhjaja na hte Tĩrtũm ja hã mẽ pahpumunh kôt mẽ pahto hkra. Kot puj mẽ nhÿrmã pahtyk tã nhũm akupÿm mẽ pahto mẽ pahťir pu mẽ wa kuri pahťir tũm nê papa ho papa.

Atãw kot Tĩrtũm kapêr nhĩrôp ãm jakamã na hte Tĩrtũm mẽ pahpiitã mẽ pahte amnhĩ tomnuj xwÿnh ã mẽ pajarê. Nom nhũm Jejus Atãw rom kot Tĩrtũm kapêr mar nê hkôt amnhĩ nhĩpêx rãhã jakamã na hte Tĩrtũm mẽ pahte hkôt amnhĩ xun-

hwÿr xwÿnhjaja amnhîm mẽ pahte amnhî to mex xwÿnh ã mẽ pajarê.

Nhùm Atãw kot Jejus kînhã Tîrtùm kapêr nhîrôp ãm mÿrapê na hte mÿr pê mẽ pa xwÿnhjaja ohtô nê pa nê gaa nê Atãw pyrà nê htyk pa. Hãmri nê kormã htîr ri amnhî to mex o pa hkêt mÿrapê ma mẽ kot amnhî xà htÿx kamã hamak tùm xàta wÿr ma hapêx. Tã nhùm Tîrtùmja mex o mex jakamã na hte Jejus Kris mẽ wa mẽ pakamã ukaprî nê. Jakamã na pre mẽ pahwÿr Jejus mẽ nhùm mẽ pahwÿr wrÿ hãmri nê htyk o mẽ pahte amnhî tomnuj pãnhã amnhîre. Nhùm Tîrtùm ã kot amnhî nhîpêx anhÿr kukwak ri mẽ pahte hkôt amnhî xunhwÿr xwÿnhjaja amarî tanhmã mẽ pahto mex to ho ri pa. Atãw kot amnhî tomnuj pix pumunh kôt na pre Tîrtùm mẽ pahpiitã mẽ pahte amnhî tomnuj xwÿnh ã mẽ pajarê. Tã nhùm Jejus mẽ pakamã ukaprî nê mẽ panê ty nhùm Tîrtùm ja hã omunh xà hkôt ra mẽ pahte amnhî kaxyw hkôt pajamxpêr xwÿnhjaja te mẽ pahte aa tanhmã amnhî tomnuj to hkêt pyràk o mẽ panhîpêx. Na hte amarî ã mẽ panhîpêx anê.

Nê Atãw kot amnhî tomnuj mÿrapê na htem piitã ri pa nê tanhmã amnhî to nê ty rÿ ri pa nê gaa nê wejre nê ty. No na pre Jejus Krisja aa kot amnhî tomnuj kêt kumrêx tã amarî mẽ panê ty. Jakamã nhùm Tîrtùm ra kukwak ri mẽ pahte hkôt amnhî xunhwÿr xwÿnhjê kutã nojarêt rãhã nê mẽ pakukamã hamaxpêr o:

—Nà mẽ kot Ixkra hkôt amnhî xunhwÿr xwÿnhjaja na pa mẽ omunh pa. Tã kot paj Ixkrata kukwak ri tãm mẽ unhwÿ nhùm mẽ nhÿrmã wa ixri mex nê htîr tùm nê pa ho pa. Anê.

20-21 Nê na pre Tîrtùm tanhmã finat Mojes mã kapêr to. Mẽ piitã mẽ kot amnhî tomnuj o ri mẽ pa hã

amnhî pumunh kaxyw. Hãmri nê mẽ kot kapêr mar nê hkôt amnhî nhîpêx o pa kaxyw tanhmã mẽ kaxyw Mojes mã kapêr to. Nhùm kuma nê amnhî xô ri mẽ kãm hã kagà nê mẽ kãm harênh o ri mẽ hkôt pa. No nhùm prem kapêr ma nê ãm kuma nê hkwyòm pix mã ri tanhmã amnhî tomnuj to ho pa. Nê pika piitã hkôt ja arî rãhãã. Ja mÿrapê koja mẽ nhÿrmã ty nê ma mẽ kot amnhî xà htÿx kamã hamak tùm xàta wÿr ma pa. Nom Tîrtùm arî kãm pika piitã hkôt mẽ papa xwÿnhjê japê nê. Mẽ pahte amnhî tomnuj o papa tã nhùm kãm mẽ pahto mex prãm nê. Jakamã na pre mẽ pahwÿr Kra Jejus Kris mẽ nhùm mẽ pahwÿr wrÿ. Mẽ panê htyk o kot mẽ pahte amnhî tomnuj pãnhã amnhîrer kaxyw. Tã kukwak ri kot puj mẽ pahte amnhî kaxyw hkôt pajamxpêr xwÿnhjaja nhÿrmã Tîrtùm mẽ wa kuri pahtîr tùm nê pa mex nê papa ho papa.

6

Mẽ kot mẽ pahkrã kumrâr ã mẽ harênh

Sikÿn Korît 5.17; Karatas 2.19-20, 5.24, 6.14; Epes 4.17-24; Korosê 3.1-11; Wam Pêtre 4.1-6

¹ Nê mẽ pahte arî tãhã tanhmã amnhî tomnuj to htã nhùm Tîrtùm arî kãm nê pajapê nê. Nê arî mẽ pakutã nojarêt rãhã nê. Jakamã xà kot kaj mẽ atô ã harênh anhÿrja ma nê atÿx ri ã ajamxpêr anê nê ajamxpêr o:

—Nà Tîrtùm kãm ijapê nê kot ixkutã nojarêt rãhã ho ri pa jakamã mo kaxyw kot pa Jejus kôt amnhî nhîpêx o ri ixpa? Nà kot paj ho anhÿr kêt nê. Anê.

Ka ã mẽ atô atÿx ri ajamxpêr anhÿr japêr. Kwa xà ajamxpêrja mex? Nà mex kêt. ² ã ajamxpêr anhÿrja mẽ hamaxpêr mex xà hkôt kêt. Ra mẽ pahte Jejus kôt amnhî xunhwÿr nê mẽ pahte amnhî tomnuj kaga jakamã nhùm mẽ pahte

amnhî tomnujja te ra mẽ pahpê hapêx pyrâk. Jakamã kot puj mẽ arî tanhmã amnhî tomnuj to ho ri papa hkêt nê. ³ Mêmô kaxyw na htem Tîrtûm mã mẽ pahkrã kumrã? Nà mẽ pahte ra Jejus kôt amnhî xunhwÿr ã amnhî to amnhîrît kaxyw. Te Jejus htyk nhûm mẽ pahte amnhî tomnujja haxwÿja hkôt htyk nê hapêx par pyrâk o amnhîrît kaxyw. Jakamã na pu htem pajamexpêr o:

—Nà kot paj axte tanhmã amnhî tomnuj to ho ri ixpa hkêt nê. Anê.

⁴ Na htem Tîrtûm mã gôx kãm mẽ pahkrã kumrã nhûm mẽ pahte amnhî nhîpêx tûmja te mẽ kot Jejus kôt haxwÿja haxâr pyrâk. Hâmri nhûm mẽ akupÿm mẽ pahto api. Te Tîrtûm hihtÿx o hihtÿx o kot akupÿm Kra Jejus ho htîr pyrâk. Te mẽ pahtyk tâ nhûm akupÿm kot mẽ pahto mẽ pahtîr pyrâk. Pãnhã mẽ pahte amnhî nhîpêx nyw o amnhî nhîpêx kaxyw. ⁵ Nhûm mẽ pahte amnhî nhîpêx tûmja te Jejus kôt htyk nê hapêx par pyrâk. Nê mẽ pahte amnhî nhîpêx nywja te Jejus akupÿm htîr pyrâk o amnhî nhîpêx.

⁶ Amnepêm na pu pre htem amnhî tomnuj rãhã ho ri papa. Te mẽ kãm mẽ àpênh xwÿnhjaja kot mẽ õ patrãw mã àpênh rãhãta pyrâk. Tã nhûm Kris mẽ panê ty. Kot mẽ panê mẽ pahte amnhî tomnuj pãnhã amnhîrer nê ho hapêx par kaxyw mẽ panê ty. Jakamã te mẽ pahte amnhî tomnuj mẽ pajamexpêr punujja te pî kahpa hã Jejus kôt harir nê htyk nê hapêx par pyrâk. Pãnhã mẽ pahte amnhî nhîpêx nyw pix o amnhî nhîpêx kaxyw. Nê mẽ pajamexpêr nyw pix o pajamexpêr papa kaxyw. ⁷ Na hte mẽ htyk xwÿnhjaja axte tanhmã amnhî tomnuj to hkêt nê. Tã kêr pu mẽ urâk nê axte ã amnhî nhîpêx anhÿr kêt nê. ⁸ Na pu prem Jejus kot mẽ panê htyk ã harênh ma nê pajamexpêr o:

—Nà ra Jejus kot mẽ panê htyk jakamã kot paj ixte amnhî nhîpêx tûm kaga hpa nê hpãnhã kot amnhî nhîpêx kôt pix mã ri amnhî nhîpêx o ri ixpa. Te ra ixtyk nê axte tanhmã ixte amnhî tomnuj to ho ri ixpa hkêt pyrâk. Jao amnhî nhîpêx nyw pix o amnhî nhîpêx o ri ixpa. Anê.

⁹ Nê Jejus htyk nhûm Tîrtûm akupÿm ho htîr jakamã koja axte htyk kêt nê. Ra mẽ pahte ja mar mex. ¹⁰ Na pre ãm htyk tipxi htã htykja o mẽ pahpiitã mẽ pahte amnhî tomnuj pãnhã amnhîre. Tã ra akupÿm htîr o htîr nê kaxkwa kamã Tîrtûm mã tanhmã amnhî nhîpêx to ho ri pa. ¹¹ Tã mẽ papa-jaja kot puj mẽ ã kot amnhî nhîpêx anhÿrja ma nê ã pajamexpêr anê nê pajamexpêr o:

—Nà ãm hãmri. Te ixte Jejus pyrã nê ra ixtyk pyrâk jakamã kot paj axte amnhî tomnuj o ri ixpa hkêt nê. Te ixte Jejus pyrã nê akupÿm ixtîr nê ãm Tîrtûm kôt pix mã amnhî nhîpêx o ri ixpata pyrâk o kot paj hpãnhã amnhî nhîpêx o ri ixpa. Anê.

¹² Jakamã kot ka mẽ atõ nhÿrmã tanhmã amnhî kukamã ajamexpêr punuj to japêr hãmri nê ajamexpêr o:

—Nà inhmã ã amnhî tomnuj anhÿr prãm nê. Omnuj tâ kot paj ho anê. Nà ixte ho anhÿr mã kênã.

Anhÿr o ajamexpêr japêr tâ kwa mẽ ã ajamexpêr anhÿr kêt nê.

¹³ Kêt Tîrtûm mã mãn amnhî gõ nê hkôt amnhî nhîpêx o ri apa. Hãmri nê amnhî krã kamã mêmôj mex pix mã ajamexpêr nê tãm akapêr. Nê mẽ kot amnhî to mex xwÿnhjê kôt pix mã mãn ri apa.

Na ka pre htem akapêr punuj nê.

Nê ajamexpêr punuj nê.

Nê mẽ kot amnhî tomnuj o mẽ pa xwÿnhjê hkôt ri apa.

Nê kagôxyhti japrô nê ho akôm o ri mẽ hkôt apa.

Tā ra hpānhā Tīrtūm mā amnhī gō nē axte ā amnhī nhīpēx anhÿr kēt nē.

¹⁴ Amnepēm na pu prem tanhmā mẽ pahte amnhī nhīpēx to ho papa hkukamā pajamxpēr nē pajamxpēr o:

—Nà kot paj Tīrtūm kapēr kôt pix mã măn ri amnhī nhīpēx o ri ixpa nē amnhī to mex o ri ixpa nhūm Tīrtūm ja hā ixpumu nē amnhīm inhmex ā ijarē. Nà kot paj anē.

Anhÿr tā no ām tee ri mẽ pamā hkôt amnhī nhīpēx o ri papa hprām kaprÿ nē arī ri kapēr kwÿm tanhmā amnhī nhīpēx to ho ri papa. Tā ra hpānhā axtem pajamxpēr o:

—Nà Tīrtūm kot ixkutā nojarēt rāhā ho pa xwÿnh. Tā ra ixte hkôt amnhī xām jakamā koja tanhmā ixto pa hkôt amnhī nhīpēx mex o ri ixpa. Nà koja ixto anē.

Anhÿr jakamā ra amnhī kaxyw kām pajamxpēr tÿx o mẽmoj punuj kutā amnhī to htÿx nē.

Mē pahte Tīrtūm mã tanhmā amnhī nhīpēx to hā mẽ pajarēnh

Juāw 8.34

¹⁵ Tā ā kot anhÿr jakamā tanhmā kot puj wem pajamxpēr to? Xà kot pu mẽ ā pajamxpēr anē nē pajamxpēr o:

—Nà na hte Tīrtūmja ixte kapēr kôt amnhī nhīpēx o ixpa hā ixpumunh kôt amnhīm inhmex ā ijarēnh kēt nē. Ām kēp ixkutā nojarēt rāhā nē amarī amnhīm inhmex ā ijarēnh xwÿnh jakamā kot paj arī amnhī tomnuj rāhā nē aa ja kaga hkēt nē.

Anhÿr o kot puj mẽ pajamxpēr? Nà kot puj mẽ ā pajamxpēr anhÿr kēt nē. Ā mẽ pajamxpēr anhÿrja mex kēt. ¹⁶ Koja mẽhō nhÿri kot amnhī tomnuj tÿx xwÿnhjē hō pumu nē kām amnhī jarēnh japēr nē kām:

—E inhma. Kot paj ām akôt pix mã tanhmā amnhī nhīpēx to ho ri ixpa. Jakamā e inhmā mẽmoj tā

karō pa ama nē amā tanhmā ho ho ri ixpa.

Anhÿr o kām kapēr japēr. Hāmri nē ā amnhī nhīpēx anhÿr tā amnhī tomnuj pix o ri pa. Tā ā mẽ kot amnhī nhīpēx anhÿr o mẽ pa xwÿnhjaja koja nhÿrmā ty hāmri mẽ kot amnhī xà htÿx kamā hamak tūm xàta wÿr ma hapēx.

No koja mẽhō Tīrtūm mã amnhī jarēnh nē kām:

—Pa Tīrtūm. E kot paj ām akapēr kôt pix mã ri amnhī nhīpēx o ri ixpa.

Anhÿr o kām amnhī jarē nē hkôt amnhī nhīpēx mex o pa. Nē tām amnhī nhīpēx o ri pa. Hāmri nē nhÿrmā ty nē ma ō krī hwÿr api nē Jejus mẽ Tīrtūm wa kuri htūr tūm nē mex rāhā nē pa ho pa.

¹⁷ Tā mẽ kajaja na ka xep prem tee ri mẽ amā mẽ ate amnhī tomnuj mã anhÿrer prām tā nhūm te tām kot amnhī tā mẽ ato htÿx pyrāk o mẽ anhīpēx ka mẽ tee ri kām anhÿrer prām kaprÿ. Tā nhūm Tīrtūm tanhmā mẽ akrā hto ka mẽ kapēr ma nē amnhī kaxyw hkôt ajamxpēr tÿx nē ām hkôt pix mã amnhī nhīpēx. Pa ja hā mẽ ajarēnh ma nē mẽ anhÿ hā ixkīnh nē. Nē Tīrtūm mã ixte mẽ ajarēnh mar nē mẽ anhÿ hā ixkīnh ā amnhī jarē. ¹⁸ Na pre Tīrtūm tanhmā mẽ akrā hto ka mẽ amnhī tomnuj mã anhÿrer pa nē hpānhā hkôt pix mã amnhī nhīpēx.

¹⁹ E kot paj ixprī hā tanhmā mẽ amā ja jarēnh to. Te ixte ixkrajē jahkre pyrāk o kot paj mẽ amā awjarē. Nà amnepēm na ka prem ajamxpēr punuj kôt amnhī tomnuj o ri apa. Nē gaa nē ra amnhī tomnuj pix kukamā ajamxpēr. Tā kēt ka mẽ arī ā amnhī nhīpēx anhÿr kēt nē. Pānhā tām ri ajamxpēr o ri apa. Jao gaa nē ra Tīrtūm kām hprām xà hkôt tām amnhī nhīpēx mex nē. ²⁰ Na ka prem tee ri amā amnhī tomnuj mã anhÿrer prām kaprÿ. Te tām kot amnhī tā

mê ato htÿx nê amnhî kôt mê ato pa pyrâk o mê anhîpêx. ²¹ Xân ka prem â amnhî tomnuj anhÿr o apa nê akînh nê ajamakêtkati nê ri apa? Nà na ka prem akînh nê apa hkêt nê. Tâ na ka prem Jejus kôt amnhî xunhwÿ nê tee ri ate tanhmâ amnhî tomnuj to hâ amnhî pumu nê akaprî nê apijaàm nê. Â mê kot amnhî tomnuj anhÿr o pa xwÿnhjaja na htem ja mÿrapê ty nê ma mê kot amnhî xâ htÿx kamâ hamak tûm xâta wÿr pa. ²² No na pre ra Tîrtûm tanhmâ mê akrâ hto ka mê amnhî tomnuj kaga hpa. Te Tîrtûm tãm kot hpânhâ amnhî tâ mê ato htÿx nê amnhî kôt mê ato pa pyrâk ka mê ra âm hkôt pix mã amnhî nhîpêx mex o ri apa. Nê hpânhâ amâ kapêr kôt pix mã amnhî nhîpêx mex prâm. Nê hkôt pix mã amnhî nhîpêx hprâm. Jakamâ kot kaj mê nhÿrmâ kuri amex kumrêx nê atîr tûm nê ri apa ho apa.

²³ Na hte mê kâm àpênh o ri mê pa xwÿnhjaja mê kâm mêmoj tâ apê nê àpênh pa nê hpânhâ amnhîrer xâ jamÿ. Ja pyrâ nê koja mê kot amnhî tomnuj xwÿnhjaja nhÿrmâ ty hãmri nê ma mê kot amnhî xâ htÿx kamâ hamak tûm xâta wÿr ma pa.

No mê pahte amnhî kaxyw Jejus Kris kôt pajamexpêr xwÿnhjaja na hte Tîrtûm ja hâ mê pahpumu nê mê pajarênh o:

—Nà âm hãmri. Jajaja koja nhÿrmâ Ixkra mê wa Ixkuri mex kumrêx nê htîr tûm nê pa ho pa. Hêxta waa nê. Nà âm hãmri koja mê anê. Anê.

Xâ tãm mê pahte amnhî nhîpêx â mê pahpumunh kôt na hte â mê pajarênh anê? Nà âm mê pahte Kra Jejus Kris kôt amnhî xunhwÿr â mê pahpumunh kôt pix mã na hte â mê pajarênh anê.

7

Mê pahte amnhî tomnuj kot axte

amnhî tâ mê pahto htÿx kêt â harênh Rômân 8.2, 10.4; Karatas 4.1; Epes 2.2; Korosê 3.7

¹ E Jejus kôt ixkwÿjaja. Nà Tîrtûm kot mê pakaxyw tanhmâ Mojes mã kapêr tota na ka mê ra mar tÿx nê. Na pu htem kormâ pahtîr ri hkôt amnhî nhîpêx o ri papa. Tâ ty hãmri nê axte hkôt amnhî nhîpêx kêt nê. Ra mê ate ja mar tÿx. E pa mê amâ ja hâ ejêp jarê ka mê inhma.

² Nà finat Mojes kot Tîrtûm nhÿ hâ mênijaja kot tanhmâ amnhî nhîpêx to ho pa hâ mê kâm karôja. Koja mêhõ ho mjên hãmri nê âm kôt pix mã ri pa ho pa nê aa hkaga hkêt nê. No koja nhÿrmâ mjên kêp ty nhùm ahte ri pa. Hãmri nê kâm axte mêhõ ho mjên prâm nê mãmri axte mêhõ ho mjên. Ja tanhmâ kute hkêt.

³ Nom koja wam mjên arî htîr japêr nhùm hprõ tanhmâ hamaxpêr to nê hkaga nê hpânhâ nhâm mêhõ ho mjên. Hâ koja Tîrtûm pê ja homnuj nê. Nom koja mjên ra kêp ty nhùm mÿrpê axte kâm mêhõ ho mjên prâm nê mãmri ho mjên. Ja na Tîrtûm pê homnuj kêt. Ra wam mjênja htyk kênâ. Â Tîrtûm kot Mojes mã mê pakaxyw mêmoj tâ karõ kot anhÿr.

⁴ Tâ ja pyrâ nê na pu prem anepêm pajamexpêr o:

—Ixte Tîrtûm kapêr kôt pix mã amnhî nhîpêx o ri ixpa jakamâ nhùm Tîrtûm ja hâ ixpumu nê amnhîm inhmex â ijarê. Anê.

Tâ pu mê ra tanhmâ pajamexpêr to nê hpânhâ pajamexpêr õ ho pajamexpêr o:

—Nà na xep hte Tîrtûm mê ixte kapêr kôt amnhî nhîpêx â mê ixpumunh kôt amnhîm mê inhmex xwÿnh â mê ijarênh kêt nê. Mê ixte hkôt amnhî nhîpêx mex o ri ixpare hâ. Kêt âm Kris kot mê inhnê htyk nhùm mê ixte amnhî kaxyw hkôt ijamexpêr nê hkôt amnhî xunhwÿr pix â mê ixpumunh kôt na hte mê inhmex â mê ijarê. Âm ja pix â

mê ixpumunh kôt na hte mê ixto hkra nê mê ixkutâ nojarêt o pa. Kra Jejus pix kukwak ri na hte â mê inhîpêx anhÿr o pa. Anê.

Â mê pajamaxpêr nyw kot anhÿr. Jakamâ te mê pahte mêhō kot mjên nyw xwÿnh gryk â axte mjên htyk xwÿnh mâ hamaxpêr kêêta pyrâk o na pu htem amnhî nhîpêx o papa. Jao Kris kapêr kôt pix mâ amnhî nhîpêx o ri papa. Nê Tîrtûm noo mâ tâm ri amnhî nhîpêx. Nê axte mê pahte amnhî tomnuj kukamâ tanhmâ pajamaxpêr to hkêt nê.

⁵ Nê amnepê mâ mê pahte amnhî krâ hkôt tanhmâ mê pahte amnhî nhîpêx to ho ri papata â na pu prem amnhî tomnuj pix o ri papa. Ra mê pahte Tîrtûm kapêr mar tÿx tâ kuma nê âm kuma nê ri papa nê ri hkôt amnhî nhîpêx kêt nê. Mÿrapê nhûm Tîrtûm tee ri ja hâ mê pahpumu nê mê pahtyk nê ma mê kot amnhî xâ htÿx kamâ hamak tûm xâ hwÿr papa mâ xwÿnhjê hâ mê pajarê.

⁶ Nê amnepê m na pu pre htem â pajamaxpêr anhÿr o:

—Nâ kot paj Tîrtûm kapêr kôt pix mâ amnhî nhîpêx o ri ixpa nhûm amnhî tâ ixpumu nê ixte amnhî tomnuj kêt xwÿnh â ijarê.

Anhÿr o pajamaxpêr no âm tee ri â pajamaxpêr anhÿr kaprÿ. Nê arî tanhmâ amnhî tomnuj to ho ri papa. Tâ hpânhâ te Jejus Kris kôt pahtyk pyrâk o amnhî nhîpêx nê hpânhâ Karō nhÿ hâ tâm amnhî nhîpêx. Jao ra tee ri mê pamâ Tîrtûm kapêr kôt amnhî nhîpêx prâm kaprÿ hkêt nê. Ra Tîrtûm Karō nhÿ hâ amnhî nhîpêx nyw o amnhî nhîpêx mex o ri papa.

Tîrtûm kapêr â kagâ htûm kot tanhmâ mê pajarênh to

Römân 3.20, 5.20; Karatas 3.23-24

⁷ Tâ Tîrtûm mê pahte kapêr kôt ri amnhî nhîpêx â mê pahpumunh

kôt amnhîm mê pamex â mê pajarênh kêt jakamâ mêmō kaxyw na kapêr â kagâ htûmja? Nâ mê pahte mar nê pahprî hâ Tîrtûm noo mâ mê kot amnhî tomnuj xâ jarênh mar nê omunh mex kaxyw na. Na hte mê pahkwÿjê kukrêx kînh o pamâ ho panhō hprâm nê mê pamâ karō. Â kot mêmōj punuj piitâ nê mê pamâ karō kot anhÿr. Tâ mê pahte ja mar kêt ronhÿx pu mê Tîrtûm kêp ja homnuj â harênh mar kêt nê. ⁸ Tâ ra mê pahte harênh mar nê kêp ja homnuj â harênh ma. Mê pamâ axpên kukrêx kînh o ho pamâ panhō hprâmja mâânên kêp ja homnuj â harênh mar tâ nom aa hkaga hkêt nê arî pamâ axpên kukrêx kînh o pamâ ho panhō hprâm tÿx râhâ ho ri papa. Kop âm Tîrtûm kapêr kêt ronhÿx pu mê kot amnhî tomnuj xâja aa mar kêt kumrêx nhûm te mê pamâ amrakati pyrâk. ⁹ Amnepê mâ ixte Tîrtûm kapêr mar kêt ri na pa pre ixtÿx ri amnhî kukamâ ijamaxpêr o ri ixpa nê ijamaxpêr o:

—E kot paj nhÿrmâ Tîrtûm ri ixtîr tûm nê inhmex nê ixpa ho ixpa.

Anhÿr tâ hpânhâ pamâ axpên kukrêx kînh o ho pamâ panhō hprâm nê kapêrta ma nê ja hâ amnhî pumunh kurê kumrêx. Hâmri nê tee ri amnhî kukamâ ijamaxpêr nê ijamaxpêr o:

—Hêxta waa nê. Nâ â ixte amnhî nhîpêx anhÿr o ixpa jakamâ kot paj nhÿrmâ ty nhûm Tîrtûm akupÿm ixto ixtîr pa kuri ixtîr tûm nê ixpa ho ixpa hkêt nê. Hêxta waa nê. Ixte amnhî tomnuj xwÿnh na pa. Kot paj nhÿrmâ ty nhûm Tîrtûm ma mê kot amnhî xâ htÿx kamâ hamak tûm xâta wÿr amnhî nê inhmê. Anê.

Hâmri nê ixkaprî nê tee ri amnhî kukamâ ijamaxpêr o ri ixpa. ¹⁰ Tâ hpânhâ axtem ijamaxpêr o:

—Nâ kot paj Tîrtûm kapêr kôt pix mâ mân ri amnhî nhîpêx o ri ixpa hâmri nê nhÿrmâ ixtyk tâ hwÿr api

nê kuri ixtîr tûm nê inhmex nê ixpa ho ixpa. Nà kot paj anê.

Anhÿr ã ijamaxpêr tâ no ãm tee ri inhmã hkôt amnhî nhîpêx o ixpa hprãm kaprÿ. Na pa pre xatã kapêr nhîrôp ixkuhê nê tee ri ja hã amnhî pumu nê ijamaxpêr o:

—Kwa tanhmã kot pa amnhî nhîpêx to nê ãm Tîrtûm kôt pix mã ri amnhî nhîpêx? Na pa hte tee ri inhmã ã amnhî nhîpêx anhÿr prãm tÿx kaprÿ. ãm ixte amnhî tomnuj pix o ri ixpa xwÿnh jakamã ãm hãmri koja amnhî nê kuwyta wÿr inhmê. Nà koja ixto anê. Hêxta waa nê. Tanhmã kot paj we ja nê kãm ixkapêr to? Anê.

¹¹ No mêhõ koja Tîrtûm kapêr kôt amnhî nhîpêx mex o ri pa? Na pu htem pahpiitã tee ri pamã ho anhÿr prãm kaprÿ. Mê pahpê hihtÿx kumrêx jakamã na pa pre ixtÿx ixte Tîrtûm kuri ixtîr tûm nê ri ixpa hã amnhî kukamã amnhî jarênh kaprÿ. ãm xatã kapêr nhîrôp ixkuhê nê amnhî tomnuj pix o ri ixpaja mÿrapê koja mẽ kot amnhî xã htÿx kamã hamak tûm xãta wÿr amnhî nê inhmê. ¹² Kot anhÿr tâ tanhmã kot paj mẽ Tîrtûm kapêr ã kagã htûmta jarênh to? Nà kot mẽ pamã mẽ pahte amnhî nhîpêx ã karõta mex kumrêx. Mex o mex. ¹³ Mex kumrêx tâ na htem kuma nê tee ri kãm hkôt amnhî nhîpêx hprãm kaprÿ. Jao nhÿrmã ty nê ma kuwy hwÿr pa. Kêt pa na pa pre ra mar nê omunh mex tâ hkôt amnhî nhîpêx mex kêt nê. Jao ra ixte amnhî tomnuj xwÿnh ã amnhî pumu. Na pa pre tee ri inhmã hkôt amnhî nhîpêx o ri ixpa hprãm tâ no ãm xatã kapêr nhîrôp ixkuhê nê hkwyãm ri amnhî nhîpêx rãhã ho ri ixpa. Tã ra tee ri ja hã amnhî pumu nê amnhî kukamã ijamaxpêr o:

—Nà na pa hte ãm tee ri inhmã Tîrtûm kôt amnhî nhîpêx prãm kaprÿ no ãm ho anhÿr kêt nê. ãm ixte amnhî tomnuj pix o ixpa

xwÿnh na pa. Ja mÿrapê koja Tîrtûm amnhî nê ma kuwy hwÿr inhmê. Nà koja ixto anê. Anê.

Mê pahte mẽ pamã amnhî tomnuj kaga hprãm kaprÿ hã mẽ pa-jarênh

Karatas 5.17

¹⁴ Nê Tîrtûm kapêr ã kagã htûmta Tîrtûm kapêr na. Nê Tîrtûm kînhã ãm inhî pix na pa ri ixpa jakamã tanhmã kot pa amnhî to nê kapêr kôt ri amnhî nhîpêx mex o ri ixpa? ¹⁵ Inhmã tãm ixte amnhî nhîpêx prãm tâ no ãm amnhî tomnuj pix o ri ixpa. Mêmoj ixpê omnuj tâ pa hte ra hkôt tanhmã amnhî tomnuj to ho ri ixpa. Hãmri nê ja hã amnhî pumu nê tee ri amnhî kukamã ijamaxpêr o:

—Hêxta waa nê. Mon pa hte axtem nê ã amnhî nhîpêx anhÿr o ri ixpa? Mêmoj ixpê omnuj nhûm inhmã ho anhÿr prãm kêt tâ ra ho anê. Nhûm mêmoj mex nhûm inhmã ho anhÿr prãm tâ ho anhÿr kêt nê. Mon pa hte axtem nê ã amnhî nhîpêx anhÿr o ri ixpa? Anê.

¹⁶ ã ixte amnhî nhîpêx anhÿr o ri ixpa htã ra Tîrtûm kapêr mexta ma hãmri nê ra ijamaxpêr o:

—Nà Tîrtûm kapêrja mex kumrêx tâ pa tee ri inhmã hkôt amnhî nhîpêx mex hprãm kaprÿ ho ri ixpa. Hêxta waa nê. Anê.

¹⁷ Inhmã amnhî tomnuj prãm kêt tâ arî ixkaxwÿnh kãm ijamaxpêr punuj nhÿ hã ã amnhî nhîpêx anhÿr o ri ixpa. ¹⁸ Nê inhmã tãm amnhî nhîpêx prãm tâ no ãm tee ri ã inhmã amnhî nhîpêx anhÿr prãm kaprÿ. Tanhmã kot pa amnhî to nê tãm amnhî nhîpêx o ri ixpa? Na pa tee ri inhmã ja ho anhÿr prãm kaprÿ. Ixte amnhî tomnuj xwÿnh na pa. Nê aa ixte amnhî to mex kêt kumrêx xwÿnh. ¹⁹ Inhmã mêmoj mex kôt pix mã amnhî nhîpêx prãm tâ no ãm ã amnhî nhîpêx anhÿr kêt nê. Nê ãm hkwyãm ri tanhmã amnhî tomnuj to ho ri ixpa. Mêmoj ixpê

8

omnuj tä pa hkôt amnhĩ nhĩpêx o ri ixpa. ²⁰ Ixte Tĩrtũm kapêr kôt amnhĩ nhĩpêx kêt jakamã na pa hte ã amnhĩ tomnuj anhÿr o ri ixpa. Mẽmoj ixpê omnuj pa inhmã ho anhÿr prãm kêt tä ra hkôt amnhĩ nhĩpêx. Ixte Tĩrtũm kapêr kôt amnhĩ nhĩpêx kêt jakamã ã amnhĩ nhĩpêx anhÿr o ri ixpa. ²¹ Nẽ mẽmoj mex nhũm inhmã hkôt amnhĩ nhĩpêx prãm tä ra hkwým ri amnhĩ nhĩpêx. ã ixte amnhĩ nhĩpêx anhÿr xwýnh na pa. ²² Nẽ inhmã Tĩrtũm kapêr mar nẽ hkôt ri amnhĩ nhĩpêx prãm tä ²³ nom ixte amnhĩ tomnuj xwýnh jakamã hkôt amnhĩ nhĩpêx kêt nẽ. Na pa tee ri ja hã amnhĩ pumu nẽ amnhĩ kukamã ijamaxpêr o:

—Nà kot paj axte amnhĩ tomnuj kêt nẽ. Kot paj ãm amnhĩ to mex pix kukamã ijamaxpêr o ri ixpa.

Anhÿr tä no ãm arĩ amnhĩ tomnuj o ri ixpa nẽ amnhĩ to mex kêt. Ixte amnhĩ tomnuj xwýnh jakamã na pa hte ã amnhĩ nhĩpêx anhÿr rãhã ho ri ixpa nẽ tee ri inhmã amnhĩ tomnuj kaga hprãm kaprÿ. ²⁴ Hêxta waa nẽ. Na pa ixkaprĩ htÿx nẽ ri ixpa. ã ixte amnhĩ nhĩpêx anhÿr o ri ixpaja mÿrapê kot paj nhÿrmã ty nẽ ma mẽ kot amnhĩ xà htÿx kamã hamak tũm xàta wÿr ma mō. Mẽhō kot tanhmã ixkrã hto pa ã amnhĩ nhĩpêx anhÿrja kaga? ²⁵ Nã mẽ panhō Pahihti Jejus Krisja pix. Tãm koja ixte amnhĩ tomnuj kutã tanhmã ixto ixihtÿx to. Jakamã na pa axte tee ri amnhĩ kukamã ijamaxpêr kêt nẽ. Pãnhã ixkĩnh nẽ ri ixpa nẽ Tĩrtũm mã kãm:

—Pa Tĩrtũm. Nã ãm hãmri amex o amex. Anẽ.

Tã ra ixte Jejus Kris kôt amnhĩ xãm jakamã koja tãm tanhmã ixto ixihtÿx to pa rĩ kormã Tĩrtũm kapêr kôt amnhĩ nhĩpêx mex o ri ixpa. No kot pa pam amnhĩ krã hkôt amnhĩ tomnuj rãhã ho ri ixpa. ã ixte amnhĩ anhÿr xwýnh na pa.

Tĩrtũm Karō kot mẽ pahto tãm mẽ pahte amnhĩ nhĩpêx xwýnh ã harēnh Karatas 5.16-26

¹ Nẽ Jejus Kris kêp mẽmoj punuj kutã mẽ pahto mẽ paxihtÿx xwýnh jakamã mẽ pahte hkôt amnhĩ xunhwÿr xwýnhjaja na pu htem ÿ hã amnhĩ tomnuj o ri papa hkêt nẽ. Jao mẽ pahte kuwy hwÿr papa mã xwýnh kêt. ² Te ra mẽ pahtyk nhũm Tĩrtũm kot akupÿm mẽ pahto mẽ pahtĩr pyrãk jakamã nhũm Karōja mẽ pahkarō mã agjê pu mẽ ÿ hã tãm amnhĩ nhĩpêx o ri papa. Te tãm kot amnhĩ nhĩpêx pyrãk o amnhĩ nhĩpêx nhũm Karō mẽmoj punuj piitã kutã mẽ pahto mẽ paxihtÿx. Kêp mẽ pajamaxpêr punuj kutã mẽ pahto mẽ paxihtÿx xwýnh jakamã kot puj mẽ nhÿrmã mẽ kot amnhĩ xà htÿx kamã hamak tũm xàta wÿr papa hkêt nẽ.

³ Nom kormã mẽ pahte Jejus kôt amnhĩ xunhwÿr kêt ri na pu prem tee ri pamã Tĩrtũm kapêr piitã hkôt amnhĩ nhĩpêx prãm kaprÿ nhũm mẽ pahpê hihtÿx kumrêx. Jakamã tanhmã koja Tĩrtũm amnhĩ to nẽ amnhĩ mã mẽ pamex xwýnh ã mẽ pajarê? Na pre tee ri amnhĩ tä mẽ pajamã hãmri nẽ mẽ pahwÿr Kraja mẽ nhũm man mẽ pahwÿr wrÿ nẽ mẽ pahpyrà nẽ ï ho mẽ pakamã kato. Nom mẽ parom aa tanhmã amnhĩ tomnuj to hkêt kumrêx nẽ ri pa. Tã mẽ kot hpĩr tä nhũm amarĩ htyk kêt nẽ. Na pre htyk o mẽ pahte amnhĩ tomnuj piitã hpãnhã amnhĩrer pa. Jakamã tãm kêp mẽ pajamaxpêr punuj kutã mẽ pahto paxihtÿx xwýnh. Na pu htem hkôt amnhĩ xunhwÿ hãmri nẽ kukwak ri amnhĩ tomnuj o ri papa hkêt nẽ. ⁴ Pãnhã Tĩrtũm kot amnhĩ nhĩpêx kôt amnhĩ nhĩpêx o ri papa nẽ axte mẽ pahte amnhĩ nhĩpêx tũm kôt amnhĩ nhĩpêx kêt nẽ. Hãmri hpãnhã Tĩrtũm Karō kot amnhĩ nhĩpêx kôt pix mã amnhĩ

nhîpêx. Nê hamaxpêr kôt pix mâ pajamaxpêr. Ja kaxyw na pre Tîrtûm mê pahwÿr Kraja mê nhûm wrÿ nê mê pahpiitâ mê panê ty.

⁵ Nê mê kot amnhî krâ hkôt tanhmâ amnhî nhîpêx to ho ri mê pa xwÿnhjaja na htem htÿx ri tanhmâ hamaxpêr to xâ hkôt amnhî nhîpêx o ri pa. No kêt Tîrtûm Karô kot mê pahkarô mâ gjêx xwÿnhjaja na pu htem mê kurom te Jejus jamaxpêr pyrâk o pajamaxpêr o papa.

⁶ Nê mê kot amnhî krâ hkôt amnhî nhîpêx xwÿnhjaja koja mê nhÿrmâ ty nê ma kuwy hwÿr pa nê kamâ pa ho pa. No mê pahte Tîrtûm Karô hkôt amnhî nhîpêx xwÿnhjaja kot puj mê pajamaxpêr nyw o pajamaxpêr nê amnhî nhîpêx nyw o amnhî nhîpêx. Jao paxâmnhîx ri pajamakêtkati nê ri papa. Nê nhÿrmâ ty hâMRI nê Tîrtûm mê Jejus wa kuri akupÿm pahÿr tûm nê pamex kumrêx nê papa ho papa.

⁷ Nê mê kot amnhî krâ hkôt ri amnhî nhîpêx xwÿnhjaja kâm Tîrtûm kînh kêt. Nê kâm kapêr mar prâm kêt jakamâ tanhmâ kot mê amnhî to nê hkôt amnhî nhîpêx? ⁸ Koja mêhō amnhî krâ hkôt kâm hprâm xâ hkôt pix mâ amnhî nhîpêx hâMRI nhûm Tîrtûm tee ri ja hâ omu nê hkînh kêt nê. ⁹ No mê papajaja na pu htem mê urâk nê â amnhî nhîpêx anhÿr kêt nê. Ra Tîrtûm Karô kot mê pahkarô mâ gjêx jakamâ na pu htem hkôt pix mâ amnhî nhîpêx hprâm. No koja Tîrtûm Karô mêhō kaxwÿnh mâ àr kêt nê nhûm kêp hkra hkêt nê.

¹⁰⁻¹¹ Tâ mê papajaja. Mê pahte amnhî tomnuj mÿrapê koja mê pakrâhkâja nhÿrmâ ty. No nhûm Tîrtûm ra kot amnhîm mê pahte amnhî to mex xwÿnh â mê pajarênh nhûm Kris Karô kot mê pahkarô mâ gjêx jakamâ koja mê pahkarôja htyk kêt nê. Mê pakrâhkâ pix koja ty nhûm mê

pahkarôja ma kaxkwa hwÿr àpir kurê kumrêx. Tâ nhûm nhÿrmâ Tîrtûm akupÿm mê pakrâhkâ ho htÿr nê akupÿm mê pahkarôja mê pakrâhkâm hagjê pu mê wa kuri pahÿr tûm nê papa ho papa. ¹² Jakamâ e kwa ixkwÿjaja. Kêr pu mê axte ri mê pajamaxpêr tûm kôt amnhî nhîpêx o ri papa hkêt nê. ¹³ Kot puj mê arî â amnhî nhîpêx anhÿr o ri papa hâMRI nê nhÿrmâ ty nê ma mê kot amnhî xâ htÿx kamâ hamak tûm xâta wÿr papa. Jakamâ kêr pu mê mêmō arîgro hâ pamâ tanhmâ amnhî tomnuj to hprâm hâMRI nê amnhî kukamâ pajamaxpêr o:

—Nâ inhmâ â amnhî nhîpêx anhÿr prâm tâ kot paj Tîrtûm Karô nhÿ hâ ja kutâ amnhî to htÿx nê ho anhÿr kêt nê. Anê.

Kot puj mê â pajamaxpêr anê hâMRI nê nhÿrmâ kuwy wÿr papa hkêt nê. Pânhâ Tîrtûm mê Jejus wa kuri pamex nê pahÿr tûm nê ri papa ho papa. ¹⁴ Mê kot Tîrtûm Karô hkôt amnhî nhîpêx xwÿnhjaja kêp Tîrtûm kraa.

¹⁵ Nom amnepêem kormâ mê pahte hkôt amnhî xunhwÿr kêt ri. Nê kormâ mê pamâ kapêr mar prâm kêt ri nhûm kot amnhî tâ mê pahpumunh nê tanhmâ mê pahte pumaj na pu prem pamâ uma ho ri papa. Tâ hkôt amnhî xunhwÿ nhûm Karôja mê pahkarô mâ gjêx jakamâ na pu htem ra pamâ uma hkêt nê ri papa. Karô kot mê pahpê Tîrtûm kra hâ mê pajarênh jakamâ pu mê amnhî kamâ kot tanhmâ mê panhîpêx to puma hkêt nê ri papa. Nê paxâmnhîx pajamakêtkati nê kâm amnhî jarê nê kâm amnhî jarênh o:

—Pa Inhîpêêxâ maati? Ot pa ixpê akra hâ amâ amnhî jarênh kaxyw amnhî kaxyw amâ ijamaxpêr. Anê.

Jao ra mê pamâ uma hkêt nê ri papa. ¹⁶ Karô kot mê pahkarô mâ gjêx nhûm mê pahte amnhî tâ

omunh jakamã na pu htem paja-maxpêr o:

—Nà Tirtûm Karô kot ixkarô mã àr jakamã ixpê hkra na pa. Anê.

Nhÿrmã mëmoj piitã akupÿm mex par ã harênh

Sikûn Korût 4.16-18; Korosê 3.4; Wam Pêtre 4.13

¹⁷ Nê më kãm Tirtûm prãm kêt xwÿnhjaja na htem te më kot Tirtûm Kra Jejus nhÿpêx pyrãk o më panhÿpêx pu më pahpunuj nê ri papa. Nom kot puj më nhÿrmã Tirtûm mex o mex xwÿnhja kuri pamex kumrêx nê papa. Më pahpê hkra jakamã kot puj më Kra Jejus pyrã nê ô krÿ kamã kuri pamex kumrêx nê ri papa ho papa. ¹⁸ Jar Jejus ã më pahpunuj nê ri papa htã kot puj më nhÿrmã kuri pamex kumrêx nê papa ho papa. Hãmri nê më pamex o pamex ã amnhÿ pumu nê jar pika ja kamã tanhmã më pahpunuj toja mã axte pajamaxpêr kêt kumrêx.

¹⁹ Nê pika hkôt Tirtûm kot mëmoj ho kator xwÿnhjaja na htem Tirtûm kot më pahto mex par jatur xãm mënh ã arÿgro jamãr rãhã ho pa. àk nê mry nê pÿ nê gô nê mëmoj piitã më pajamãr o pa. Te kot më pakukamã hamaxpêr o:

—Kwa mëmo arÿgro hã koja Tirtûm hkrajê piitã ho amnhÿrÿt nê më ho mex par jatur xãm kumê pu më ja hã më omu? Hêxta waa nê. Inhmã tokyx ja hã më omunh prãm tÿx. Koja tokyx ã më hipêx anê pa ixkÿnh tÿx kumrêx.

Anhÿr o hamaxpêr pyrãk. ²⁰ Mëmo kaxyw na hte mryja ã më pakukamã hamaxpêr anê? Nà amnepê mã Tirtûm kot mëmoj piitã ho katorta ã nhÿm pre piitã mex o mex. Pÿ nê mry nê gô. Mëmoj piitã mex kumrêx rãhã nê. Aa grã nê htyk kêt kumrêx. Tã Atãw kot amnhÿ tomnuj mÿrapê nhÿm ra ÿ hã mëmoj piitã homnu par jakamã na hte mëmoj htÿr nê pa nê gaa nê ty nê hapêx. Nê më pahpur

kãm ahkagrôt punuj hapôj. Atãw kot amnhÿ tomnuj mÿrapê nhÿm Tirtûm kapêr xã hkôt ã mëmoj omnu hpar anê. ²¹ Nom koja arÿ rãhã ho rãhã hkêt nê. Koja nhÿrmã Tirtûm akupÿm mëmoj piitã ho mex pa nhÿm mex o mex nê axte grã rÿ axte htyk nê hapêx kêt nê. Nê axte omnu nê hikwÿ hkêt nê. Koja më pahpyrà nê mex o mex. Jakamã na htem Tirtûm kot më pahto mex par jatur xãm mënh xã hã arÿgro jamãr rãhã ho pa. ²² Te mëhõ ni hpijagri kaxyw ôhy xã htÿx nê tokyx kãm hpijagri hprãm xãj àmra ho nôr pyrãk o amnhÿ nhÿpêx pê më pahto mex jatur xãm mënh ã arÿgrota jamãr o pa.

²³ Nê më papajaja na pu htem tanhmã pahpunuj to nê jajê pyrã nê te amnhÿ kamnhêr o ri papa pyrãk. Rÿ tanhmã paxà kute nê ri papa. Rÿ pamã prãm nê paxàà nê ri papa. Nê tanhmã më pahpunuj to nê ri papa. Jao te pÿ nê gô nê mryja pyrã nê amnhÿ tã Tirtûm kot më pahto mex par jatur xãm mënh ã arÿgro jamãr rãhã ho ri papa.

Na pre Tirtûm më pahwÿr Karô rê nhÿm më pahkarô mã agjê nê më pakukamã Tirtûm tanhmã kot më pahto mex to hã më pamã ho amnhÿrÿt nê më pamã ho amnhÿrÿt o:

—Koja nhÿrmã Tirtûm më ato mex par jatur xãm kumê nê më piitã më kãm më apê hkra hã më ato amnhÿrÿt. Hãmri nê më amã më anhÿ nyw gô ka më axte axà nê ri apa nê atyk kêt nê. Hãmri nê Tirtûm ri amex kumrêx nê ri apa ho apa. Nà kot kaj më nhÿrmã ã amnhÿ nhÿpêx anê. Anê.

Ã Tirtûm Karô kot më pakukamã më pajarênh anhÿr jakamã na pu htem amnhÿ tã kot më pahto mex jatur xãm mënh pix jamãr o ri papa. ²⁴ Nom na kormã ã më pahto mex anhÿr kêt nê. Kormã më pamã më panhÿ nyw nhôr kêt nê. Nom ra kot

mê pahto hkra jakamã pu mê ja hã amnhĩ pumu nê pajamexpêr o:

—Nã ra Tirtũm kot ixto hkra jakamã koja nhỹrmã mããnên inhmã inhĩ nyw gõ. Nã koja inhmã kugõ.

²⁵ Anhỹr o pajamexpêr tã kormã. Na pu htem kormã amnhĩ tã hamãr rãhã ho ri papa nê aa hkaga hkêt nê papa.

Mê pahte Tirtũm Karõ nhỹ hã Tirtũm mã amnhĩ jarênh

²⁶ Nê na pu htem Tirtũm mã amnhĩ jarênh kaxyw nhũm hte Karõja mê pahto ajuta pu mê ý hã pakatãt kôt kãm tanhmã amnhĩ jarênh to. No kot puj mê amnhĩ krã hkôt kãm amnhĩ jarênh mex kêt nê. Na pu htem ja kaxyw tee ri amnhĩ kukamã pajamexpêr o:

—Kwa tanhmã kot pa Tirtũm mã amnhĩ jarênh to? Tanhmã kot pa mêmoy tã ixãhwýr to rý amnhĩ to hwýr to? Nã kot paj amnhĩ krã hkôt ja ho anhỹr mex kêt nê. Hêxta waa nê. Anê.

No nhũm Tirtũm Karõ ra kot mê pahkarõ mã gjêx jakamã na hte tanhmã mê pahkrã hto pu mê ý hã kãm amnhĩ jarênh mex nê pakatãt kôt mêmoy tã kuwý. Te Karõja tanhmã mê pakute hã mê pahpumunh nê mê pakamã ukapri xãj tãm mê pahto hwýr pyrãk.

²⁷ Jakamã pu mê ý hã tanhmã Tirtũm mã amnhĩ jarênh to nhũm mê pamar kurê kumrêx. Ra kot mê pajamexpêr kôt mê pahpumunh par kênã. Nhũm ra Karõ kot mê pahkarõ mã gjêx jakamã na pu htem kãm hprãm xã hkôt kãm amnhĩ jarê nê tanhmã amnhĩ to paxãhwýr to.

Tirtũm kot mê pamã mêmoy piitã ho mex ã harênh

Rômân 8.37; Piripos 1.12; Wam Pêtre 5.10

²⁸ Nê mê pamã Tirtũm kĩnh xwýnhjaja. Tirtũm kot mê pahto hkra xwýnhjaja. Koja mêmoy mê pakamã tanhmã amnhĩ to htã kër

pu mê ãm ja hã amnhĩ pumu nê tee ri amnhĩ kukamã pajamexpêr kêt nê. Koja te mê pahpê omnuj pyrãk tã koja nhỹrmã hpãnhã mê pamã mex nê. Koja Tirtũm nhỹrmã tanhmã mê pamã mêmoyta o mex to. ²⁹ Amnepê mã mêmoy piitã hkêt ri na pre Tirtũm mê pakukamã tanhmã mê pajarênh to nê mê pajarênh o:

—E kot paj nhỹrmã mê kot Ixkra Jejus kôt amnhĩ xunhwýr xwýnhjê ho ixkra jakamã nhũm mê Jejus pyrã nê kêp ixkraa. Nê urãk nê ixkapêr kôt amnhĩ nhĩpêx o pa. Jao pa ra ixkra xohtõ nê. Nã ja na inhmã hprãm. Anê.

³⁰ Tã pu htem pajapõj nê ri papa. Hãmri nê kapêr ma nê amnhĩ kaxyw Kra Jejus kôt pajamexpêr nê hkôt amnhĩ xunhwý. Hãmri nhũm Tirtũm ja hã mê pahpumu nê pahto hkra nê amnhĩm mê pamex xwýnh ã mê pajarê nê mê pahto mex nê. Nê te ho Kra Jejus nhĩpêx pyrãk o mê panhĩpêx. Jao nhỹrmã wa kuri mê pahtir tũm nê papa ho papa mã xwýnh ã mê pajarê.

Mêhõ kot Tirtũm pê aa mê papytãr kêt ã harênh

Rômân 5.1

³¹ Tã ã Tirtũm kãm mê pajapê nê mê pahto mex kot anhỹr. ã kot mê panhĩpêx mex anhỹr jakamã ra mê pahkôt pa ho pa rãhãã. Jakamã mêhõ koja ãhkra pê mê pahpytã? Nê mêhõ koja tanhmã ri kêp mê pahto? Nã koja kêp mê papytãr rý tanhmã kêp mê pahto hkêt nê.

³² Tirtũm kãm Kra Jejus japê htýx tã na pre mê pahpê nê hkêt nê mê pahwýr kumê. Te kot mê pamã ôr pyrãk o hipêx nhũm mê pahwýr wrý nê mê panê ty. Tã ra Tirtũm kot mê pamã ôr jakamã koja mããnên kãm mê pahte Kra hkôt amnhĩ xunhwýr xwýnhjê japê nê mê pahto mex rãhã ho ri pa. Nã koja ã mê pahto mex anê.

33 Jakamã mēhō koja kām mē pahte amnhī tomnuj xwýnh ã mē pajarē? Ra tām kot mē pahto hkra nē mē pahte amnhī to mex xwýnh ã mē pajarēnh kēnã kot kêt mēhō kām tanhmã mē pahto kapēr punuj to nhūm mē kuma. Koja mē tee ri kām tanhmã mē pahto kapēr to kaprý. ³⁴ Na pre ra Jesus Kris mē pahte amnhī tomnuj pānhã amnhīrer kaxyw mē pané ty nhūm Tirtūm akupým ho htír. Hāmri nhūm ma akupým kaxkwa hwýr api nē Pahi Maati krī xà kamã Tirtūm nhīhkô hã hkrī ho hkrī. Nē Tirtūm mã mē pakutã nojarêt rãhã ho kuri hkrī ho hkrī. Jakamã mēhō koja kēp mē kot amnhī xà htýx kamã hamak tūm xãta wýr mē pajano? Nã amrakati kumrêx.

³⁵ Nē Krisja kaxkwa kamã Tirtūm nhīhkô hã hkrī ho hkrī htã mãānēn jar mē pahkôt pa ho pa. Kām mē pajapê htýx jakamã kot puj mē tanhmã pahpunuj to htã nhūm arī kām mē pajapê nē mē pahkôt pa ho pa.

Rý nhūm mē kot hkôt amnhī xunhwýr kêt xwýnhjaja tanhmã hã mē pahto htã nhūm arī kām mē pajapê kamã mē pahkôt pa ho pa.

Rý mē pamã prãm nē ri papa. Rý mē paxê hkêt nē pamã kry nē ri papa htã nhūm arī kām mē pajapê kamã mē pahkôt pa ho pa.

Rý ra mē kot hã mē panhīmex kaxyw rý hã mē pahpar kumrêx. Tã nhūm arī kām mē pajapê kamã mē pahkôt pa ho pa rãhã nē.

Kām mē pajapê kamã mē pahkôt pa ho pa rãhã jakamã pu mē tee ri amnhī kukamã pajamxpēr kêt nē. Ām hkôt paxãmnhīx ri pajamakêtkati nē ri papa ho papa.

³⁶ Tirtūm kapēr ã kagã htūm te mē papajaja mē pahte kām tanhmã amnhī jarēnh to pyrã nē mē pajarēnh kot:

Pa Tirtūm. Na htem atã mē ixtomnuj týx o pa.

Nē ra mē kot mē inhīmex kaxyw.

Nē mē inhīpêx o te mē kot ôwēhti ho mōr nē hpar kaxyw tanhmã hipêx to pyrãk.

Jakamã na pa mē ra ixtyk kaxyw.

Anhýr o kot mē pajarēnh. ³⁷ Tã kwār mē ã mē panhīpêx anē. Arī Kris kām mē pajapê kamã mē pahkôt pa ho pa rãhã jakamã mē kot tanhmã mē pahto htã pu mē arī amnhī kaxyw kām pajamxpēr týx rãhã ho ri papa. Nhūm arī mē kutã mē pahto paxihtýx pu mē arī mē kām pakuhê.

³⁸ Mēmoj koja tanhmã mē pahto nhūm Tirtūm tee ri ja hã mē pahpumu nē kām mē pajapê hkêt nē? Nã amrakati kumrêx. Koja mēhō rý mēmoj mē pahpê ãmnâr kêt nē. Na hte jar pika ja kamã Kris kām mē pajapê kamã mē pahkôt pa ho pa. Nē kot puj mē nhýrmã ty nhūm arī kām mē pajapê kamã mē pahkôt pa ho pa rãhã nē. Jakamã koja mēkarō rý mēkarōmnuti rý jar pika ja kamã mē kām Tirtūm prãm kêt xwýnhjaja mē pahpê ãmnâr kêt nē. Rý mēmoj tanhmã kute. Rý kormã hapu hã mēmoj tanhmã kute. Koja mēmoj piitã tee ri tanhmã kēp mē pahto htã nhūm Kris arī kām mē pajapê kamã mē pahkôt pa ho pa rãhã nē nhūm mēmoj tee ri mē pahpê ãmnâr kaprý. ³⁹ Nē koja kýj rūm mēmoj wrý nē tanhmã kēp mē pahto japêr. Rý pyka rūm mēmoj kato nē tanhmã kēp mē pahto japêr. Rý kuwy rý kók xápêr týx tanhmã kēp mē pahto. Tã nhūm mē panhō Pahihti Jesus Kris arī kām mē pajapê kamã mē pahkôt pa ho pa rãhã nē. Te Tirtūm kām mē pajapê pyrãk o kām mē pajapê htýx kām mē pahkôt pa ho pa rãhã jakamã nhūm mēmoj tee ri mē pahpê ãmnâr kaprý.

9

Ijaew jarēnh

Atre 3.25; Römān 3.1-2

¹⁻² Nē na pa tee ri ixkwý Ijaew kot tanhmā amnhī nhīpēx to ho pa hā mē omu nē ixkaprī nē. Ixpyrà nē mē kēp Ijaew tā ixkīnhā amnhī kaxyw Kris kôt hamaxpēr kêt jakamā nhūm Kris tee ri kām mē hamakêtkati nē àmnhīx ri mē pa hprām kaprý. Pa tee ri mē hkukamā ijamaxpēr nē ixkaprī nē ri ixpa. Nē aa ixkaprī ixpêkator kêt kumrēx. Mē kot inhmā mē hkīnh kêt ā amnhī tā ijarēnh tā inhmā mē hkīnh kēnā. Ām hāmri na pa ā amnhī jarēnh anē. Tirtūm Karō kot ja hā ixpumunh mex nē inhmā:

—Nā ām hāmri na ka amā mē hkīnh ā amnhī jarē. Anē.

³ Mē kēp ixkwý na mē. Mē ixpār kraxja ām pixi mex. Tā nhūm mē ixkīnhā amnhī kaxyw Kris kôt hamaxpēr kêt jakamā kop ām Tirtūm kot mē nē kuwy hwýr pa inhmēnh ronhýx ja inhmā mex. Nhýx pa kām:

—Kwa Tirtūm. Amnhī nē kuwy hwýr ixkwýjē rēnh kêt nē. Inhmā mē hapē htýx kumrēx. Mē hpānhā pa mǎn mē nē hwýr inhmē nā.

Anhýr o nhýx pa kām ixkapēr. Nom kot paj amnhī to ā ixàhwýr anhýr kaprý. Tirtūm kot mē kamā ukaprī htā no nhūm mē amnhī kaxyw Kris mā hamaxpēr kêt jakamā tanhmā koja amnhī to nē mē hpānhā pa mē nē kuwy wýr inhmē nhūm mē ixrom kuri htír tūm nē pa ho pa? Mē kot hkôt amnhī sunhwýyēre hā. ⁴ Mē ixpê Ijaew nhīgétjaja na pre Tirtūm amnepē mā mē ho mex rax nē. Nē kām mē ho hkra hprām nē. Nhūm prem tanhmā kot amnhī nhīpēx mex to hā no ho omunh o pa. Nē hirā htýx kām ri pa hā omu nhūm mē kām:

—E kot kaj mē ixkapēr ma nē ixkôt amnhī nhīpēx o ri apa. Hā kot paj mē akôt ixpa ho ixpa nē mē

ato mex nē ka mē axpēn kanrēhā axāmnār rax nē. Hāmri pa mē amā pika mex gō ka mē kamā ajamakêtkati nē axāmnhīx ri apa ho apa.

Anhýr o mē kām kapēr. Hāmri nē mē kaxyw Mojes mā tanhmā kapēr to nē mē kaxyw kām mēmoj piitā hā karō. Mē kot tanhmā amnhī tomnuj to hāmri nē tee ri ja hā amnhī pumunh nē tanhmā amnhī to Tirtūm wýr to nhūm kot mē mar nē mē nē ja ho hapēx par kaxyw. Finat Mojes kot amnhī xō ri mē kām ujarēnh nhūm mē kot mar nē hkôt amnhī nhīpēx mex o ri pa kaxyw. ⁵ Mē ixkukamā mē ixpāmjaja. Apraāw nē Ijak nē Jako kanrēhā mē hkra nē mē htāmnhwýjaja na pre mē. Mē hwýr na pre Tirtūmja Kra Jejus Kris mē nhūm mē hwýr wrý nē mē kamā ī ho ī ho kator jakamā haxwýja kēp Ijaew na pre. Kēp Mēpahpām nē mex o mex nē hihtýx o hihtýx tā Ijaew wýr wrý nē mē kamā kato. Hāmri nhūm Ijaew kêt xwýnhjaja harēnh ma nē tee ri hamaxpēr nē hamaxpēr o:

—Héxta waa nē. Kēp ām Jejus mē papa kamā mǎn kator ronhýx mē pamā mex kumrēx. Anē.

⁶ No nhūm kormā Ijaew hwýr wrýk kêt ri nhūm Tirtūm ra kot mē ho hkra kaxyw mē hā amnhī jarē nhūm mē hkwýja kām ja prām kêt nē hkaga. Tā xà na pre Tirtūm kot mē ho hkra hā amnhī jarēnh ā amnhī to hēx? Nā aa hēx kêt kēnā kot kêt ri mēmoj tā amnhī jarē nē hā amnhī to hēx. Jakamā na pre mē hkwýjaja hkwýjē rom hkaga hkêt nē nhūm amnhī tā mē omu nē mē ho hkra. Nom mē piitā mē ho hkra hkêt nē. Mē hkwýjaja kot hkaga jakamā nhūm ām mē hkwýjē pix o hkra.

⁷ Nē finat Apraāwja na pre hkanrēhā hkra nē htāmnhwý sohtō nē. Tā xà na pre Tirtūm htāmnhwý piitā mē ho hkra hā amnhī jarē?

Nà mẽ piitã ã mẽ harēnh anhÿr kêt nē. Æm mẽ hkwÿjê pix na pre mẽ ho hkra hã mẽ harē. Apraãw kra Ijak kôt hkanrēhã htàmnhwÿ pixjaja nhũm kot mẽ ho hkra hã mẽ harē.

⁸⁻⁹ Nē Apraãw kormã hprõ kamã hkra hkêt ri na pre kãm àpēnh xwÿnh kamã hkra nhũm kato nē myre nē hixi pē Ismael. Nom kēp Apraãw prõ kumrēx kamã hkra hkêt. Prõ kupÿy kamã hkra na pre. Tã nhũm Tirtũm kãm hkra kumrēx kukamã harē nē kãm:

—E kot paj ma tē hãmri nē mẽmo arÿgro hã akupÿn awÿr tē nhũm ra aprõ hpìjagri nhũm war akra myre. Anē.

Tã nhũm hprõ Saraja htujarô. Nē gaa nē hpìjagri nhũm hkraja myre. Hixi pē Ijak. Kēp Apraãw prõ kamã hkra jakamã Tirtũm nom kēp Apraãw kra kumrēx. Jakamã hkra Ijak kanrēhã htàmnhwÿjaja na pre Tirtũm kot mẽ ho hkra hã mẽ harē. Ra kot Apraãw mã ja hã amnhÿ jarēnh xà hkôt.

¹⁰ Tã nhũm Ijakja hprêk nē Repek o hprõ. Nē gaa nē ra haxwÿja wa hkra nhũm hkraja wa ahpo nē kato nē wa hamē my. Kot wa pē Ejau nhũm kot hapu pē Jako. ¹¹⁻¹² Nom nhũm kormã wa kator kêt ri nhũm Tirtũm wa hkukamã tanhmã wa harēnh to. àhpumunh xà hkôt wa katorxà mã wa harē nē kãm:

—E kot paj amã war akra wa hkukamã tanhmã wa harēnh to ka inhma. Nà koja wa kato nē gaa nē hprêk hãmri nhũm kot haputa amnhÿ to rax o kot wa jakre. Anē.

Kot wata koja kot hapu kÿnhã amnhÿ to grire nē ri pa nhũm ã wa hkukamã wa harēnh anē. Kãm wa kot tanhmã amnhÿ nhÿpēx to hprãm xà hkôt ã wa harēnh anē. Kormã wa kot tanhmã amnhÿ tomnuj to rÿ tanhmã amnhÿ to mex to hã kot wa omunh kêt tã kãm hprãm xà hkôt ã wa hkukamã wa harēnh anē. ¹³ Tirtũm kapēr ã kagã htũm kot wa harēnh nē wa hã kagã kot:

Ejau rom Jako kanrēhã hkra nē htàmnhwÿ pixjaja na pre Tirtũm amnhÿm mẽ ho hkra. Anē.

¹⁴ Mãn ka mẽ Tirtũm kot ã wa harēnh anhÿrja ma nē ajamaxpēr o:

—Tk. Kwa ja mexti hã. Mo na pre hamē wa hkanrēhã wa hkra nē wa htàmnhwÿ piitã ho hkra hkêt nē? Anē.

Kwa mẽ ã ajamaxpēr anhÿr kêt nē. Tirtũm na hte kãm hprãm xà hkôt tanhmã mẽ panhÿpēx to ho pa pu mẽ kot tanhmã mẽ panhÿpēx to hã omu nē ãm omu nē amnhÿ tã tanhmã kãm nē hkêt nē. ¹⁵ Na pre finat Mojes mã amnhÿ jarēnh o:

Inhmã hprãm xà hkôt na pa hte mẽ omu nē tanhmã mẽ kamã ixukapÿri hto ho ri ixpa.

Nē inhmã hprãm xà hkôt na pa hte ahpÿnhã tanhmã mẽ hipēx to ho ri ixpa.

Anhÿr o kãm amnhÿ jarē. ¹⁶ Nom tanhmã mẽ pahte amnhÿ nhÿpēx to hã mẽ pahpumunh kôt na hte mẽ pakamã ukapÿri hkêt nē. Æm tãm kãm hprãm xà hkôt na hte tanhmã mẽ pakamã ukapÿri hto ho pa. ¹⁷ Amnepê mã Ejit kãm mẽ õ pahihiti Paraohti hwÿr na pre Mojes mẽ nhũm ma hwÿr mō nē kãm tanhmã Tirtũm kapēr jarēnh to nē kãm:

—E Tirtũm na awÿr inhmē pa mō. Tãm na pre apē Ejit nhõ xwÿnhjê nhõ pahì kaxyw axãm. Akrã hihtÿx tã nhũm mẽ kaxyw axãm. Tã ra xatã àhpumunh tÿx o tanhmã anhÿpēx to. Krÿ piitã hkôt ri mẽ pa xwÿnhjaja kot atã harēnh mar nē àhpumunh o àhpumunh ã omunh kaxyw. Tã ixte amã ja jarēnh kaxyw na pre awÿr inhmē pa man awÿr mō. Anē.

¹⁸ Æ na hte Tirtũm kãm hprãm xà hkôt tanhmã mẽ panhÿpēx anhÿr to ho pa. Jao mẽ hkwÿjê kamã ukapÿri ho pa. No mẽ hkwÿjaja nhũm tee ri mẽ hkrã hihtÿx ã mẽ omu nē ãm mẽ omu nhũm mẽ amnhÿ krã hkôt ri tanhmã amnhÿ tomnuj to ho ri pa.

Tirtûm kêp mē pakamā ukapri xwÿnh ā harēnh

¹⁹ Nē kot kaj mē atō Tirtûm kot ā mē hipêx anhÿrja ā harēnh ma nē tanhmā hā ixkukjêr to nē inhmā:

—Kwa na xep hte Tirtûm ahpÿnhā tanhmā mē hipêx to. Nē mē hkwÿjê kamā ukapri ho pa nē mē hkwÿjaja mē hkrā hihtÿx ā mē omu nē ām mē omu nē mē kamā ukapri hkêt nē. Jakamā kwa mo na hte mē kot amnhī tomnuj xwÿnh ā mē harē? Tām kot ā mē hipêx anhÿr kēnā kot kêt mē kot amnhī tomnuj xwÿnh ā mē harē.

Anhÿr o ajamxpêr japêr. ²⁰ Kwa mē ri ā atÿx Tirtûm jarēnh anhÿr kêt nē. E pa mē amā ejêw jarē ka mē inhma. Xà kot mēhō gyw kwÿ ho amnhīm poti nhîpêx nhūm tee ri amnhī tā omu nē amnhī tā tanhmā kām kapêr to nē kām: “Tk. Kwa mon ka ri ā inhîpêx anē?” Anhÿr o amnhī tā kām kapêr? Nà koja kām tanhmā nē hkêt nē. ²¹ Hipêx xwÿnh kām hprām xā hkôt kot ā hipêx anhÿr kēnā kot kêt amnhī tā kām akir. Koja amnhīm gyw kwÿ kakwÿ nē ho poti ho axkrut nē hipêx. Nē hō ho muxre. Ho mex kumrêx nhūm xa. Nhūm ihōja mā ho anē nē hipêx no ām wamta kînhā ho hanhàjti nhūm omnajti nē xa. No ām tām kot hamē wa hipêx prām xā hkôt wa hipêx kēnā.

²² Tā na hte ā Tirtûm mē panhîpêx anē. Te poti pynajre pyrā nē mē pahkwÿjê nhîpêx nhūm mē kām kapêr mar prām kêt nē htÿx ri tanhmā amnhī tomnuj to ho ri pa. Hāmri nhūm amnhī tā mē omu nē te amnhī nē mē rēnh kaxyw pyrāk o mē hipêx no ām kormā hamaxpêr o:

—Nà kot paj nhÿrmā mē kot amnhī tomnuj mÿrapê mē ho ijapêx pa nhūm mē piitā ja hā ixpumu nē inhmā ixāhpumunh o ixāhpumunh ā ijarē. Nē inhmā mēmoj punuj piitā hkînh kêt kumrêx ā axpên mā ijarē. Anē.

²³ Nom na hte jajê rom mē pahkwÿjê nhîpêx o te poti mexta nhîpêx pyrā nē amnhī kaxyw mē paxunhwÿ nē mē pahto hkra kaxyw. Nē mē pajarēnh o:

—Nà koja mē amnhī kaxyw Ixkra Jejus mā hamaxpêr nē hkôt amnhī xunhwÿ pa ja hā mē omu nē mē kamā ixukapri ho ri ixpa. Nē mē ho mex pē mē kutā inhnojarêt rāhā ho ri ixpa. Hāmri nhūm mē nhÿrmā Ixkra mē wa ixri htîr tûm nē mex nē pa ho pa. Kot paj ā mē ho mex anē nhūm mē amnhī tā ixpumu nē inhmā inhmex o inhmex ā ijarēnh o pa. Anē.

Ā na hte Tirtûm ahpÿnhā mē pahpiitā mē panhîpêx anē.

²⁴ Nē na hte mē ixpê Ijaew pix o hkra hkêt nē. Na hte māānēn mē apê Ijaew kêt xwÿnhjê ho hkra. ²⁵ Amnepê mā mē kām kapêr jarēnh o ri mē pa xwÿnhjê hō pē finat Ojejja na pre te Tirtûm tām kot Ijaew kêt xwÿnhjê jarēnh pyrā nē mē harēnh o:

Amnepê mē na pa pre mē ho ixkra hkêt tā kot paj mē hkwÿjê ho ixkra.

Na pa pre mē kamā ixukapri hkêt tā pa ra inhmā mē hapê nē.

²⁶ Nē ixte mē kêp ixkra hkêt ā mē harēnh tā kot paj ra mē kêp ixkra hā mē harē.

Ixpê mēō Tirtûm kot paj ā mē harēnh anē. Anē.

²⁷ Hāmri nhūm finat Ijais Ojej pānhā tanhmā Ijaew jarēnh to. Ijaisja Tirtûm nhÿ hā kapêr jarēnh o ri pa xwÿnhjê hō na pre. Jakamā nhūm Tirtûm kām tanhmā mē ijarēnh to nhūm kuma nē ô ri mē ixkukamā mē inhîgêxjê mā ujarēnh o pa nē hā kagā. Nē hā kagā ho:

Ijaew na mē ohtō rax kumrêx.

Te gō xujanār mÿri pykahti grā hkryre xohtō pyrāk.

Tā koja mē piitā ixkôt amnhī xunhwÿr kêt nē.

Koja mẽ ãm grêre nê amnhî kaxyw inhmã hamaxpêr nê ixkôt amnhî xunhwý.

Jakamã mẽ tapxipixjaja koja hkwyjê rom nhÿrmã inhô krî hwÿr api.

²⁸ No mẽ kot amnhî kaxyw inhmã mẽ hamaxpêr kêt xwÿnhjaja kot paj tokyx tanhmã mẽ harênh to.

Mẽ kot amnhî tomnuj mÿrapê tanhmã mẽ harênh to nhÿm mẽ ma mẽ kot amnhî xà htÿx kamã hamak tÿm xàta wÿr ma pa.

Nà kot paj tokyx ã mẽ hipêx anê.

Anhÿr o mẽ harê. ²⁹ Nom nhÿm kormã ã mẽ harênh anhÿr kêt ri nhÿm ra waŋ tanhmã mẽ harênh to nê mẽ harênh o:

Amnepêm Sotô mẽ Komo kamã mẽ pa xwÿnhjaja na prem amnhî tomnuj tÿx rãhã ho ri pa.

Mÿrapê nhÿm Tirtÿm xàhpumunh o àhpumunh xwÿnhja tee ri ja hã mẽ omu hãmri nê kaxkwa rÿm mẽ ô krî wa hipy mẽmoj pôôta rê.

Nhÿm mẽ hã rôrôk nê mẽ ho hkaxàr pa nhÿm mẽ hapêx.

Tã na pu htem mẽ uràk nê amnhî tomnuj o ri papa.

Jakamã kop ãm Tirtÿm kot mẽ pahkwýjê kamã ukaprí kêt ronhÿx pu mẽ ra mẽ uràk nê pahpiitã pajapêx pa. Anê.

Ijaew kwý kot Jejus kôt amnhî xunhwÿr kêt ã mẽ harênh

Römân 10.1-4

³⁰ Nê Ijaew kêt xwÿnhjaja na prem Ijaew pyrã nê kãm Tirtÿm prãm kêt tã Jejus jarênh ma nê Ijaew rom amnhî kaxyw hkôt hamaxpêr nê hkôt amnhî xunhwý. Hãmri nhÿm Tirtÿm ja hã mẽ omu nê mẽ ho hkra nê mẽ kot amnhî to mex xwÿnhjê hã mẽ harê.

³¹⁻³² Hãmri nhÿm Ijaew tee ri mẽ kot Jejus kôt amnhî xunhwÿr ã mẽ omu nhÿm ja mẽ kãm mex kêt nê. Hãmri nhÿm mẽ hamaxpêr o:

—Tk. Kwa ra mẽ ixte finat Mojes kapêr kôt amnhî nhípêx mex o ri mẽ ixpa xwÿnh jakamã koja Tirtÿm ja hã mẽ ixpumu nê mẽ ixte amnhî to mex xwÿnhjê hã mẽ ijarê nê mẽ inhnê mẽ ixte amnhî tomnuj rênh pa. No kot paj mẽ Ijaew kêt xwÿnhjê pyrã nê Jejus kôt amnhî xunhwÿr kêt nê. ãm kwarí ho kwarí.

Anhÿr ã amnhî jarê. No ãm ã mẽ hamaxpêr anhÿrja mex kêt. Na prem htÿx Tirtÿm noo mã kot amnhî to mex ã amnhî jarênh kaprÿ nê arí ri tanhmã amnhî tomnuj to ho ri pa. Te pry kamã kên nôr nhÿm mẽ kot nhãm nê mênh kaxyw hkamnâr nê ho amnhî par krã hi kukênh pyrãk o na htem amnhî nhípêx. Jao amnhî krã hkôt tanhmã amnhî nhípêx to ho pa hprãm xàj te Jejus kapêrja nhãm amnhî nê rênh pyrãk o hipêx. Jakamã koja mẽ Tirtÿm nhô krî hwÿr àpir kêt nê. ³³ Tirtÿm kapêr ã kagã htÿm kot ja jarênh kot:

E mẽ inhma. Kot paj nhÿrmã Ijaewjê hwÿr mēhō mẽ nhÿm mẽ hkôt kapêr o pa.

Nom koja mẽ kapêr mar kêt nê. Koja mẽ kuma nê ãm kuma.

Te pry kamã kên nôr nhÿm mẽ kot nhãm pry nê mênh kaxyw hkamnâr nê ho amnhî par krã hi kukênh pyrãk o koja mẽ amnhî nhípêx.

No te mẽ kot nhãm pry nê mênh kaxyw hkamnâr kêt pyrãk xwÿnhjaja koja mẽ kurom nhÿrmã ma Tirtÿm nhô krî hwÿr api.

Hãmri nê hkĩnh nê pa ho pa. Anê. Nom kên kumrêx jarênh kêt nê. Na prem Jejus ã kuxi nê ã harênh anê. Ijaew te mẽ kot kên nhípêx pyrãk o Jejus nhípêx nê amnhî kaxyw hkôt hamaxpêr kêt nê axtem nê hkaga nê ãm kamã gryk pix o ri pata ã nhÿm mẽ harê. No mẽ kot amnhî kaxyw hkôt hamaxpêr ronhÿx Jejus te kên kot mẽ kēp àmnâr pyrãk

kêt nê. Jakamã ã mẽ harênh kot anhÿr.

10

¹ Hêxta waa nê. Ijaxwÿja ixpê Ijaew. Mê kêp ixkwÿ jakamã kêp apu mẽ kot amnhÿ kaxyw Jejus mã hamaxpêr nê hkôt amnhÿ xunhwÿr ronhÿx pa ixkÿnh tÿx kumrêx. Inhmã mẽ kêp Tÿrtÿm kra hprãm tÿx kumrêx kênã. Inhmã ja prãm xà na pa hte mẽ ho Tÿrtÿm wÿr rãhã ho ri ixpa. ² Ra ixte mẽ omunh mex. Mẽ kãm Tÿrtÿm mã tanhmã amnhÿ nhÿpêx to hprãm tã no ãm mẽ kot hprÿ hã kapêr mar kêt. Jakamã na htem tee ri tanhmã kãm amnhÿ nhÿpêx to ho ri pa hprãm kaprÿ. ³ Nhÿm pre Tÿrtÿm tee ri amnhÿ tã mẽ omu nê hamaxpêr o:

—Koja mẽhõ amnhÿ kaxyw Ixkra Kris kôt hamaxpêr nê hkôt amnhÿ xãm pa ja hã omu nê kot amnhÿ to mex xwÿnh ã harê nê ho ixkra kurê kumrêx. Nom na hte Ijaew ohtõ nê ã amnhÿ nhÿpêx anhÿr kêt nê.

Anhÿr o mẽ harê. ãm hãmri na ã mẽ harênh anê. Na htem ãm axtem nê hamaxpêr o:

—Tk. Kot paj amnhÿ kaxyw Kris kôt ijamaxpêr nê hkôt amnhÿ xãm kêt nê. Kot paj ãm pam amnhÿ krã hkôt tãm ri amnhÿ nhÿpêx o ri ixpa. Mẽ ixpê Ijaewjê mẽ ixte amnhÿ nhÿpêx xà hkôt. Hãmri nhÿm Tÿrtÿm ja hã ixpumu nê amnhÿm inhmex ã ijarê. Nom kot paj Kris kôt amnhÿ xãm kêt nê. ãm kwarÿ ho kwarÿ.

Anhÿr ã amnhÿ jarê. ⁴ Nom na htem ãm htÿx ri amnhÿ krã hkôt amnhÿ to mex o pa hã amnhÿ kamnhÿx kaprÿ. Koja mẽ tee ri kãm finat Mojes kapêr kôt amnhÿ nhÿpêx o ri pa hprãm kaprÿ. Jejus tapxipix na pre tãm amnhÿ nhÿpêx mex rãhã ho pa. Na pre Tÿrtÿm kapêr kôt amnhÿ nhÿpêx mex o ri pa nê aa kapêr õ nhÿrõp ãm nê hkwÿm ri tanhmã amnhÿ tomnuj to hkêt nê. Kot amnhÿ tomnuj kêt xwÿnh ã

ãm pixi mex na. Jakamã tapxipix kukwak ri na hte Tÿrtÿm amnhÿm mẽ pahte amnhÿ to mex xwÿnh ã mẽ pajarê.

Tÿrtÿm kãm mẽ pahpiitã mẽ pahto hkra hprãm ã harênh

⁵ Nê amnepê m na pre finat Mojes Tÿrtÿm nhÿ hã Ijaew mã tanhmã ujarênh to nê hã kagã. Nê mẽ kãm ujarênh o:

—E kot kaj mẽ atõ Tÿrtÿm nhÿ hã ixujarênh ma nê hkôt amnhÿ nhÿpêx mex o ri apa nê hkwÿm ri tanhmã amnhÿ nhÿpêx to hkêt nê. Hã koja Tÿrtÿm hã apumu nê amnhÿm ate amnhÿ to mex xwÿnh ã ajarê ka nhÿrmã kuri atÿr tÿm nê amex nê apa ho apa. Anê.

⁶ ã mẽ kãm kapêr anhÿr tã mẽ pahte Mojes kapêr xà hkôt amnhÿ nhÿpêx o papaja na mẽ pahpê hitÿx kumrêx. Tÿrtÿm kapêr tÿm na. Kapêr ã kagã kamã kot mẽ pamã mẽ pahte tanhmã amnhÿ nhÿpêx to hã karõja ohtõ rax kumrêx jakamã pu mẽ tee ri pamã piitã hkôt amnhÿ nhÿpêx prãm kaprÿ. Nhÿm Tÿrtÿm tee ri amnhÿ tã mẽ pajamã hãmri nê mẽ pahwÿr Kra Jejus mẽ. Jakamã na pu htem amnhÿ kaxyw hkôt pajamaxpêr nê hkôt amnhÿ xunhwÿ nhÿm Tÿrtÿm hã mẽ pahpumu nê kukwak ri mẽ pahto hkra kurê kumrêx. Kra kukwak ri kot mẽ pahto hkra kaxyw kot mẽ pahwÿr mênh nhÿm mẽ kot hpÿr nhÿm akupÿm ho htÿr jakamã na pu htem harênhja ma nê pajamaxpêr o:

—Nà na xep pre Jejus ixto ixpê Tÿrtÿm kra. Anê.

Nom xà na hte Tÿrtÿmja ã mẽ pamã kapêr anê nê mẽ pamã:

—E kot kaj mẽ ma kaxkwa hwÿr api nê Kris japrõ nê man amnhÿ kôt akupÿn o wÿr pa ja hã mẽ apumu nê mẽ ato ixkra.

Anhÿr o mẽ pamã kapêr? Nà na hte ã mẽ pamã kapêr anhÿr kêt nê. Tanhmã kot puj mẽ amnhÿ to nê ã amnhÿ nhÿpêx anê? ⁷ Rÿ xà na hte ã mẽ pamã kapêr anê nê mẽ pamã:

—E na pre Krisja ty. Jakamã më kam në ma hwÿr mra në akupÿm amnhim ho htir. Hãmri pa ja hã më apumu në më ato ixkra.

Anhÿr o më pamã kapër? Na na hte ã më pamã kapër anhÿr kêt në. Tanhmã kot pu më amnhĩ to në akupÿm ho htir? Ja pyrã në na hte Tirtum më pamã mëmoj tã karõ pu më kãm ho anhÿr nhum ja hã më pahpumunh kôt më pahto hkra hkêt në. ⁸ Æm më pahte amnhĩ kaxyw Jejus kôt pajamexpër në hkôt amnhĩ xunhwÿr ã më pahpumunh kôt pix mã na hte më pahto hkra. Hãmri në më pahwÿr Karõ rë nhum më pahkarõ mã gjëx jakamã më pahte Tirtum kãm hprãm xã hkôt amnhĩ nhípëx o papaja na më pahpë hihtÿx kêt. Te kapër ra më pahkrã hi kaxwÿnh kãm hikwÿ pyrãk o pu më piitã më kãm harënh o ri më hkôt papa. Jakamã na pa hte më piitã më kot amnhĩ kaxyw Jejus kôt hamaxpër kaxyw tanhmã më kãm harënh to ho ri më hkôt ixpa në më kãm:

⁹ —Kot ka më atõ Jejus kęp anhõ Pahihti hã harë në Tirtum kot akupÿm ho htir kôt ajamexpër. Hã koja Tirtum ja hã apumu në anë ate amnhĩ tomnuj o hapëx në ato hkra. Æm ja pix ã më pahpumunh kôt na hte më pahto hkra. Anë.

¹⁰ Në na pu htem më pahkrãhi kaxwÿnh kãm amnhĩ kaxyw Jejus mã pajamexpër. Në më pajakwa ho kęp më panhõ Pahihti hã harë. Hãmri nhum Tirtum ja hã më pahpumu në amnhim më pahte amnhĩ to mex xwÿnh ã më pajarë në më pahto hkra. ¹¹⁻¹³ Tã më pahte amnhĩ kaxyw Jejus kôt pajamexpër në hkôt amnhĩ xunhwÿr xwÿnhjaja kot puj më pahkĩnh në papa ho papa. Më pahpiitã. Ijaew në Ijaew kêt xwÿnhjaja. Më pahpiitã më panhõ Pahi Maati ja ãm pyxi mex na. Jakamã koja Ijaewjê hõ rÿ Ijaew kêt xwÿnhjê hõ amnhĩ

to kuwÿ nhum kuma në ho hkra. Kapër ã kagã htum kot ja jarënh kot: Më kãm kęp Tirtum kra hprãm xwÿnhjaja koja më amnhĩ to Tirtum wÿ nhum më kuma në Jejus kot më në htyk kukwak ri më në më kot amnhĩ tomnuj o hapëx në më ho hkra nhum më hkĩnh në pa. Anë.

¹⁴⁻¹⁵ Xã na htem kormã amnhĩ kaxyw Kris mã hamaxpër kêt rãhã amnhĩ to Tirtum wÿ nhum më kuma në më ho hkra? Nã tanhmã kot wem amnhĩ to në amnhĩ kaxyw kãm hamaxpër kêt rãhã amnhĩ to kuwÿ? Na hte Tirtum ma më hwÿr më hkwÿjê rë nhum më ma më hwÿr mra në Tirtum kapër o më ahkre ho ri më hkôt pa. Nhum më hkwÿjaja më kuma në amnhĩ kaxyw Jejus kôt hamaxpër në amnhĩ to Tirtum wÿ. Kapër ã kagã htum kot ja jarënh kot:

Koja mëmoj mex jarënh xwÿnhjaja ma më hwÿr mra.

Në më hwÿr hpõx o mõ nhum më amÿm amnhĩ wÿr më omu në hkĩnh në. Anë.

¹⁶ Tã ra më piitã kot kapër mar tã piitã amnhĩ kaxyw hkôt hamaxpër kêt në. Jakamã nhum finat Ijais tee ri ja hã më omu në Tirtum mã më harënh o:

Pa Pahi Maati. Kwa ra më kot akapër mar tÿx tã akôt amnhĩ nhípëx kêt në. Më kãm akapër kôt amnhĩ nhípëx o pa hprãm kêt. Na htem ãm grêre në akôt amnhĩ xunhwÿr në akôt amnhĩ nhípëx o ri pa. Anë.

¹⁷ Kot anhÿr tã ãm më kot Kris kapër jarënh mar kôt pix mã na htem amnhĩ kaxyw hkôt hamaxpër. Kojã më harënh mar kêt tã tanhmã koja wem amnhĩ to në amnhĩ kaxyw hkôt hamaxpër në hkôt amnhĩ xunhwÿr? ¹⁸ Mãn ka më atõ atÿx ã ajamexpër anhÿr o:

—Ko mãn Ijaew kormã Jejus kot më panë tanhmã amnhĩ nhípëx to

hã harênh mar kêt jakamã na mẽ kormã hkôt amnhĩ xunhwÿr kêt nê.

Anhÿr o ajamaxpêr. Nom ja kot anhÿr kêt. Ijaew piitã ra mẽ kot harênh mar kênã. Tirtũm kapêr ã kagã htũm kot ja hã mẽ harênh kot: Na prem ma mẽ piitã mẽ kãm ja jarênh o ri mẽ hkôt pa nhũm mẽ piitã kuma. Anê.

¹⁹ Tã mãn ka prem ra ja ma nê atÿx ajamaxpêr o:

—Kot anhÿr tã no mãn kormã hprĩ hã Jejus jarênh mar kêt jakamã mẽ hkôt amnhĩ xunhwÿr kêt nê. Anê.

Nom ja haxwÿja kot anhÿr kêt. Ra mẽ kot hprĩ hã harênh mar mex tã kuma nê ãm kuma nê amnhĩ kaxyw kãm hamaxpêr kêt nê. No mẽ apê Ijaew kêt xwÿnh kwÿjaja na ka mẽ kurom harênh ma nê amnhĩ kaxyw hkôt ajamaxpêr nê hkôt amnhĩ xunhwÿr kurê kumrêx. Hãmri nhũm Ijaew tee ri ja hã mẽ apumu nê mẽ akamã gryk tÿx nê. Nom ra Tirtũm kot ã mẽ hkukamã mẽ kot amnhĩ nhĩpêx anhÿr ã mẽ omunh nê mẽ harênh kot anhÿr kênã. Na pre finat Mojes mẽ kãm tanhmã hã kagã hto. Te Tirtũm tãm kot mẽ hã kagã pyrà nê kapêr ã kagã htũm kamã kot mẽ harênh kot:

Mê ate mẽ kamã mẽ akahak o apa xwÿnhjaja.

Mê kot htÿx ri amnhĩ nhĩpêx o mẽ pa hã mẽ ate mẽ harênh tã no kot paj mẽ arom amnhĩm mẽ kot amnhĩ to mex xwÿnhjê hã mẽ harê.

Kot kaj mẽ tee ri ja hã mẽ omu nê mẽ kamã agryk tÿx kumrêx. Nê mãânên pa ixte mẽ ho mex ã ixpumu nê mẽ hã ixkamã agryk nê. Anê.

²⁰ Nê finat Ijais na pre haxwÿja ã mẽ harênh anê. Na pre kãm amnhĩ kwÿ pê Ijaew puma hkêt nê xatã Tirtũm nhÿ hã tanhmã mẽ kãm Ijaew kêt xwÿnhjê jarênh to ho pa.

Te Tirtũm tãm kot mẽ harênh pyràk o mẽ kãm:

Nã Ijaew kêt xwÿnhjaja kot Tirtũm japêr kêt tã koja tãm mẽ kãm amnhĩ to amnhĩrit nhũm mẽ hkôt amnhĩ xunhwÿ.

Mê kot kormã amnhĩ kaxyw kãm hamaxpêr kêt tã koja tãm mẽ kãm amnhĩ to amnhĩrit. Anê.

²¹ ã Ijaew kêt xwÿnhjê jarênh kot anhÿr. Nê axte mã tanhmã Ijaewjê jarênh to kot:

Te mẽ katorxã kot tanhmã hkrajê ho mex to kaxyw tee ri amnhĩ wÿr mẽ kãm ãkjêr pyràk o na hte Tirtũm Ijaewjê nhĩpêx o pa.

Jao tee ri kãm tanhmã mẽ ho mẽ mex to hprãm tã no nhũm mẽ amnhĩ tã kuma nê ãm kuma nê hkôt amnhĩ nhĩpêx kêt nê. Anê.

11

Tirtũm kot Ijaew kamã ukapri hã harênh

Matêwre 13.10-17

¹ Tã ra Ijaew kot Tirtũm kaga jakamã mãn ka mẽ atõ mẽ harênh ma nê ajamaxpêr o:

—Mãn pre Tirtũm tee ri amnhĩ tã mẽ omu nê amnhĩ pyrà nê mẽ hkaga.

Anhÿr o ajamaxpêr. Nom na pre mẽ hkaga hkêt nê. Ijaxwÿja ixpê Ijaew na pa. Mẽ uràk nê ixpê Ijaew pàr krax pê finat Apraãw kanrêhã htãmnhwÿ Pêjamĩ kanrêhã hõ na pa. Tã xà na pre Tirtũm ixkaga? Nã kot ixkaga hkêt. ² Amnepêm kormã mẽmoj piitã hkêt ri na pre mẽ ixpê Ijaew hkukamã mẽ ixto hkra hã amnhĩ jarê. Tã nhũm amgrã xohtô nê hapêx nhũm mẽ hapôj hãmri nê Tirtũm kôt amnhĩ nhĩpêx o pa hkêt nê. Hãmri nhũm finat Erisja tee ri mẽ kot amnhĩ nhĩpêx ã mẽ omunh o pa nê Tirtũm mã tanhmã mẽ harênh to nê mẽ hã kagã. Nê hã kagã ho:

³ Kwa Tirtũm. Mẽ ixte amã amnhĩ jarênh xã hã mẽsti hkwy na

prem ra hkrakrak pa. Nē anhÿ hā akapēr jarēnh o ri mē pa xwÿnh kwÿ nhimex rax nē. Ām papxipix na pa arĭ ixtĭr nē ri iŕpa nom nhūm mē ra kot ixpĭr kaxyw ixtā amnhĭ jarē. Anē.

⁴ Tā tanhmā na Tĭrtūm kutā kām kapēr to? Na pre kām:

Nā kapxipix na ka arĭ atĭr kēt nē. Arĭ mē ohtō nē apyrā nē amnhĭ kaxyw ixkōt hamaxpēr. Mē ohtōō. Arĭ mē kēp 7.000 nē akwÿjē rom ri sānti Paaw kutā hkōnkrā ho hkrĭ nē kām mex ā harēnh kēt nē. Anē.

⁵ Tā arĭ ā jarāhā mē kot ā amnhĭ nhĭpēx anhÿr kēnā. Tĭrtūm kām Ijaew japē jakamā mē kamā ukaprĭi. Jakamā nhūm ra mē hkwyjaja mē pahpyrā nē amnhĭ kaxyw Kris kōt hamaxpēr nhūm Tĭrtūm mē ho hkra. ⁶ Nom mē kot amnhĭ to mex ā mē omunh xā hkōt mē ho hkra hkēt nē. Amarĭ kām mē hapē htūm xā hkōt na hte mē ho hkra. Kop apu mē kot amnhĭ to mex ā mē omunh xā hkōt kot mē ho hkra ronhÿx amarĭ mē ho hkra hkēt nē. Nhÿx mē kot tanhmā amnhĭ nhĭpēx to ho pa hā mē omunh xā hkōt pix mā mē ho hkra.

⁷ Ijaew piitā Tĭrtūm kot amnhĭm mē mex ā mē harēnh prām tā no ām mē grēre nē hamaxpēr xā hkōt Jejus kōt amnhĭ xunhwÿ. Na htem ohtō rax nē kapēr ma nē ām kuma nē tee ri kot amnhĭm mē mex ā mē harēnh prām xāj amnhĭ krā hkōt tanhmā amnhĭ nhĭpēx to ho ri pa. Nom ra mē kot Jejus kaga jakamā ā amnhĭ nhĭpēx anhÿr kaprÿ. Mē kot hkaga jakamā te ri mē hamak kro nē Tĭrtūm kapēr mar kēt pyrā nē pa. ⁸ Tĭrtūm kapēr ā kaga htūm kot mē harēnh kot:

Tĭrtūm na hte mē kām kapēr mar prām kēt xwÿnhjē pumu nē ām mē omu nhūm htem htÿx ri pa ho pa. Nē Tĭrtūm mā

hamaxpēr kēt o ri pa. Mē kot kapēr mar tā hprĭ hā mar tÿx kēt nē. Nē mē kot kapēr ā kaga kamā harēnh tā hprĭ hā mar tÿx kēt nē. Jakamā na htem amnhĭ kaxyw hkōt hamaxpēr kēt o pa.

Tā na htem arĭ jarāhā ā amnhĭ nhĭpēx anhÿr o ri pa. Te mē nohkre nē mē hamak kro xwÿnh kot amnhĭ nhĭpēx pyrāk. Anē.

⁹ Nē amnepēm na pre pahi finat Tawija amnhĭ kwÿ Ijaew jarēnh o: Na htem htÿx ri hkĭnh kām apkur o pa.

Te tutre kām prām nē kot rapuuti hwÿr ār nē tee ri kām kator prām kaprÿ pyrāk.

Ja pyrā nē mē kot Tĭrtūm kapēr mar kēt mÿrapē koja Tĭrtūm tanhmā mē ho nhūm mē tee ri kām mex prām kaprÿ.

¹⁰ Te mē nohkre xwÿnhjaja tee ri mē hpa nhĭpēx o pa pyrāk.

Nē omnuj nē ā nē ho gjēx o ri pa pyrāk o amnhĭ nhĭpēx o ri pa.

Anhÿr o mē harē. ¹¹ Tā arĭ Ijaew Jejus kaga nē kām kapēr mar prām kēt jakamā xā na Tĭrtūm tee ri ja hā mē omu nē mē hkaga kumrēx? Nā kot mē hkaga hkēt. Ām mē tāmjaja kēp Jejus prām nōkati jakamā nhūm tee ri ja hā mē omu nē mē hpānhā Ijaew kēt xwÿnhjē mā amnhĭ to amnhĭrĭt nē mē hkwyjē ho hkra. Jakamā koja Ijaew kwÿjaja ja hā mē omu nē tee ri hamaxpēr nē hamaxpēr o:

—Kwa na xep Ijaew kēt xwÿnh kwÿjaja Jejus kōt amnhĭ xunhwÿ nhūm Tĭrtūm ja hā mē omu nē mē ho hkra. Kwa mon pu prem axtem nē ri Jejus kaga? E pu mē kuxwar amnhĭ kaxyw hkōt mǎn pajamaxpēr nē hkōt amnhĭ xunhwÿ kē Tĭrtūm ja hā mē pahpumu nē Ijaew kēt xwÿnhjē pyrā nē mē pahto hkra. Hāmri nē amnhĭ mā mē pahte amnhĭ to mex xwÿnh ā mē pajarē. Anē.

Ã Ijaewjaja hamaxpêr anhÿr kaxyw na pre Tirtûm Ijaew kêt xwÿnhjê mã amnhî to amnhîrit. ¹² Hâmri nhûm mẽ amnhî tâ omu nê hkÿnh nê pa. No nhûm Ijaew kwÿjaja. Mẽ kãm Jejus prãm nõkati ho mẽ pa xwÿnhjaja mẽ hkÿnhã hkaprî nê pa. Tã koja mẽ nhÿrmã amnhî kaprî hã amnhî pumu nê amnhî kÿnh kêt ã amnhî pumu hãmri nê Tirtûm kôt amnhî xunhwÿr nê amnhî kaxyw Kra Jejus Kris mã hamaxpêr japêr. Koja mẽ ã amnhî nhîpêx anê hãmri nê Ijaew kêt xwÿnhjê pyrã nê hkÿnh nê ri pa. Hãmri nhûm Tirtûm ja hã mẽ omu nê Ijaew kêt xwÿnhjê mẽ mẽ ho hpimràatã mẽ ho mex rax nê nhûm mẽ hkÿnh nê hamakêtkati nê pa ho pa.

Tirtûm kot Ijaew kêt xwÿnhjê ho hkra hã harênh

¹³ E kot paj hpãnhã mẽ apê Ijaew kêt xwÿnhjê mã ixkapêr nê mẽ atã kagã. Na pre Jejus ma mẽ awÿr inhmẽ. ÿ hã ixte mẽ ajahkre ho ri mẽ akôt ixpa kaxyw. Pa pre ma krî hkwy kamã mẽ akwÿjê hwÿr mō nê ixkÿnh kãm mẽ kãm kapêr jarênh o ri mẽ hkôt ixpa. Nhûm mẽ hkwyjaja inhma nê amnhî kaxyw Jejus kôt hamaxpêr nê hkôt amnhî xunhwÿ. ¹⁴ Tã koja apu ixkwÿjaja mẽ harênh mar japêr. Ijaew tee ri mẽ apê Ijaew kêt xwÿnhjê jarênhja ma hãmri nê ra amnhî kamã gryk japêr. Jao mẽ apyrã nê Jejus kôt amnhî xunhwÿ nê nhÿrmã kuri htîr tûm nê mex nê pa ho pa. ¹⁵ Kormã mẽ kot amnhî kaxyw kãm hamaxpêr kêt jakamã na pre Tirtûm hpãnhã mẽ apê Ijaew kêt xwÿnhjê mã amnhî to amnhîrit. Ka mẽ ra krî piitã hkôt axohtô nê hkôt amnhî xunhwÿ nê hkôt amnhî nhîpêx mex o ri apa. Tã koja Ijaewjaja nhÿrmã amnhî kaxyw Tirtûm mã hamaxpêr nê mẽ apyrã nê Jejus kôt amnhî xunhwÿr japêr. Hãmri nê te mẽhō hkra kêp htyk nhûm hkaprî htã nhûm hkraja

tanhmã amnhî to nê akupÿm kãm htîr nhûm kot omunh nê hkÿnh tÿx kumrêxta pyrãk o amnhî nhîpêx. Jao Tirtûm mẽ kot hkôt amnhî xunhwÿr ã mẽ omu nê hkÿnh nê. Pu mẽ pahpimràatã urãk nê pahkÿnh nê ri papa.

¹⁶ E pa mẽ amã mẽ ujarênhja ã ejêp kwÿ jarê. Koja mẽmo pî hpàr jarê mex nê hã koja pàr mex nê xa. Ja pyrã nê Ijaew pàr krax finat Apraãwja kumrêx na pre amnhî kaxyw Tirtûm mã hamaxpêr nhûm ho hkra. Jakamã koja nhÿrmã hkanrêhã htãmnhwÿjaja urãk nê amnhî kaxyw kãm hamaxpêr nhûm mã mẽ ho anê nê mããñen mẽ ho hkra nhûm mẽ mex nê pa. Te kot mẽmo pî hpàr jarê mexja nhÿ hã pàr mexta pyrãk.

¹⁷ Nê na htem akunî kamã mẽmo pî hpa jakã nê hamÿ nê ma amnhî kôt o mra. Nê ixkre kapem ra mẽ kot mẽmo pî hkreja hpa jakãr nê rênh xwÿnh xwakre kamã wam pî hpa jakãr xwÿnhnta nhô nê axpên tã hkaxpre nê gaa nê axpên jamÿnh mex nê grã hkêt nê. Nê arî htîr mex nê. Te kêp hpa kumrêx pyrãk. Tã Ijaew kwÿ kot amnhî kaxyw Jejus kôt hamaxpêr xwÿnhjaja te mẽ kêp ixkre kapem pî hpãrta pyrãk. No mẽ hkwyjaja mẽ kot Jejus kaga xwÿnhjaja te mẽ kêp mẽ kot kêp hpa jakãr nê rênhta pyrãk. Jakamã nhûm Tirtûm te mẽ kot pàr pè hpa jakãr nê rênhta pyrãk o mẽ hipêx nê mẽ hkaga. Nê axtem te mẽ kot mẽmoj pàr pa jakãr nê hpãnhã kamã axtem pî hpa janhôr nê hã hkaxpreta pyrãk o mẽ apê Ijaew kêt xwÿnhjê nhîpêx nê mẽ amã amnhî to amnhîrit. Ka mẽ ra amnhî kaxyw Jejus mã aja-maxpêr nê hkôt amnhî xunhwÿ nhûm Tirtûm mẽ ato mex nê.

¹⁸ Tã kêr ka mẽ arî Ijaew o mex o ri apa. Tanhmã ri mẽ hipêx to mã ajamaxpêr to hkêt nê. Rÿ aja-maxpêr o:

—Nà ãm hãmri na Tirtùm mẽ hkaga nê ãm kãm mẽ papxipixjê japê.

Anhÿr o ajamaxpêr kêt nê. Ijaew te ixkre kapem pĩ hpàr mexta pyràk. No mẽ kajaja te mẽ ate akunĩ rùm pĩ hpa kot ixkre kapem pàr mex pix kukwak ri htĩr nê hã harirta pyràk. Kêt akunĩ rùm pĩ hpa jakàr kukwak ri na hte ixkre kapem pàrta htĩr nê kuhê hkêt nê. Kop apu pàrta mex kêt ronhÿx ra akunĩ rùm hpaja grà pa. Ja pyrà nê Ijaew kukwak ri kot kaj mẽ nhÿrmã Tirtùm ri atĩr tùm nê apa ho apa. Jakamã kwa kêt ka mẽ ate amnhĩ to rũnh o mẽ hakrenh ã amnhĩ to jarkrar kêt nê. ¹⁹ Mãn ka mẽ atõ ajamaxpêr o:

—Ra Tirtùm kot Ijaew kaga nê hpãnhã mẽ pajaja mẽ ixto hkra jakamã mãn kãm mẽ ijapê ho mẽ hakre. Ra mẽ hpãnhã mẽ ixto hkra kênã. Anê.

²⁰ Nà ãm hãmri na pre Tirtùm Ijaew kwÿ kaga. Mẽ kot Jejus kôt amnhĩ xunhwÿr kêt mÿrapê na pre te mẽmo pĩ hpa jakàr nê rênhta pyràk o mẽ hipêx. Ka mẽ ra mẽ kurom amnhĩ kaxyw hkôt ajamaxpêr jakamã nhùm Tirtùm te kot akunĩ kamã pĩ hpa jakàr nê ho htêm nê ixkre kapem pĩ hpàr mex ã hanhôr nê hã hkaxpre pyràk o mẽ anhîpêx. Nom kwa kêt ka mẽ ja hã amnhĩ pumu nê ri hã Ijaewjê mã amnhĩ to jarkrar kêt nê. ãm amnhĩ to mex nê Tirtùm kapêr kôt amnhĩ nhîpêx mex o ri apa. No kot kaj mẽ ã amnhĩ nhîpêx anhÿr kêt nhùm amnhĩ tã mẽ apumu nê ra kot Ijaew kwÿ nhîpêxta pyrà nê tanhmã mẽ ato nê mẽ akaga.

²¹ ã Ijaew jarênh kot anhÿr. Te mẽ kêt pàr mex pyràk. Tã nhùm mẽ kot Jejus kôt amnhĩ xunhwÿr kêt jakamã nhùm Tirtùm te kot pĩ hpa jakàr nê rênhta pyràk o mẽ hipêx nê mẽ homnuj nê. Kot kaj mẽ uràk nê ã amnhĩ nhîpêx anê nhùm mã mẽ ato anê nê. ²² Ijaew kot Jejus kôt amnhĩ xunhwÿr kêt jakamã nhùm

Tirtùm mẽ hpãnhã mẽ apê Ijaew kêt xwÿnhjê mã amnhĩ to amnhîrit. Tã ka mẽ Ijaew rom amã Jejus prãm nhùm Tirtùm ja hã mẽ apumu nê amnhĩ pyrà nê kãm mẽ aprãm nê mẽ akamã ukapri rãhã nê pa ho pa. Tã kwa mẽ okora. Kêr ka mẽ hkôt pix mã amnhĩ nhîpêx o ri apa rãhã ty. Kot kaj mẽ hkaga nhùm amnhĩ tã mẽ apumu nê te Ijaew kot hkaga xwÿnhjê nhîpêx pyràk o mẽ anhîpêx nê mẽ akaga.

²³ Koja Ijaew nhÿrmã Jejus kôt amnhĩ xunhwÿr japêr nhùm Tirtùm ja hã mẽ omu nê mẽ ho hkra. Te mẽ kot pàr pa jakàr nê rênh nhùm grà par xwÿnh nhùm kot akupÿm amnhim hamÿnh nê ixkre kapem pàr wÿr o htêm nê akupÿm hã hanhôr nê hã hkaxpre ho htÿx nhùm kukwak ri akupÿm htirta pyràk. Ja kêt tanhmã kute hkêt. Kot ã hipêx anhÿr kaxyw àhpumunh tÿx. ²⁴ Mẽ apê Ijaew kêt xwÿnhjaja te mẽ ate akunĩ kamã pĩ hpa jakàr nê ixkre kapem pàr ã hanhôr nê hã kaxpreta pyràk. Jao Jejus kôt amnhĩ xunhwÿr nhùm mẽ ato hkra kurê kumrêx. No Ijaew te mẽ kêt ixkre kapem pàrta pyràk jakamã Tirtùm kot akupÿm hanhôrta tanhmã kêt kute hkêt. Kêt Tirtùm kênã kot tanhmã kêt kute. Jakamã koja mẽ hkôt amnhĩ xunhwÿr nhùm amnhĩ tã mẽ omu nê mẽ ho hkra kurê kumrêx.

Tirtùm kot mẽ piitã mẽ kamã ukapri hã harênh

Matêwre 23.37-39; Rukre 21.24; Juãw 10.16

²⁵ E kot paj mẽ amã mẽmoj to amnhîrit ka mẽ inhma. Nà na pa ra mẽ amã Ijaew krã xihitÿx xwÿnhjê jarê ka mẽ harênh ma. Ra mẽ kot Jejus kaga hã mẽ harênhja. Tã koja mẽ ã amnhĩ nhîpêx anhÿr o pa rãhã hkêt nê. Na hte Tirtùm kormã amnhĩ tã mẽ apê Ijaew kêt xwÿnhjê jamâr o pa. Amnepêm na pre amnhĩ kaxyw mẽ akukamã

tanhmã mê akwýjê jarênh to. Tã kot kaj mê kot tanhmã mê ajarênh to xwýnh piitã Jejus kôt amnhî xunhwýr pa nhùm rî Ijaew amnhî to hapu nê kormã hkôt amnhî xunhwý. ã mê kot amnhî nhîpêx anhýr kaxyw. Jakamã kwa kêr ka mê ri ja hã amnhî to jarkrar o ri mê hkôt apa hkêt nê. Mê pahpyrà nê mê kot Jejus kôt amnhî xunhwýr mã xwýnh kênã. ²⁶ Koja Tirtüm nhýrmã Ijaew piitã ho hkra. Kapêr ã kagã htüm kot mê harênh kot:

Nhýrmã kot mê ate amnhî tomnuj pê mê apytãr mã xwýnhja Ijaew ô koja.

Jako hkanrêhã htãmnhwýjê hõ koja. Koja nhýrmã wrý nê mê ate amnhî tomnuj pê mê apytã nê mê ate amnhî tomnuj o hapêx pa. Anê.

Anhýr o kot harênh. ²⁷ Nê mãänën ja:

Kot paj mê nê mê kot amnhî tomnuj o ijapêx pa.

Amnepê mã ixte mê hkukamã mê hã amnhî jarênh xà hkôt. Anê.

²⁸ Nom arî mê kãm Jejus mar prãm kêt jakamã te mê kot kutã amnhî xunhwýr pyrãk o amnhî nhîpêx. Tã ã mê kot amnhî nhîpêx anhýrja ri ka mê kamjaja mê hpãnhã mê apê Tirtüm kra. Nom nhùm Tirtüm arî kãm mê hapêê. Na pre amnepê mã kot tanhmã mê ho mex to hkukamã tanhmã mê hã amnhî jarênh to. Mê hpãr kraxjê mã tanhmã mê hã amnhî jarênh to. Finat Apraãw mê Ijak mê Jakoja mã mê hkanrêhã mê htãmnhwýjê hã tanhmã amnhî jarênh to.

²⁹ Na hte Tirtüm mëmoj tã tanhmã amnhî jarênh to nê ãm hãmri hã amnhî jarê nê amnhî jarênh xà hkôt tanhmã hipêx to. No na hte mëmoj tã amnhî jarênh tã gaa nê ho hamakêtkati hkêt nê. Rý hpãnhã axtem tanhmã hipêx to hkêt nê. Na hte mëmoj tã amnhî jarênh xà hkôt tanhmã hipêx to. Tã

ra amnepê mã kot Ijaew o mex ã amnhî jarênh jakamã koja nhýrmã mê ho mex rax nê ã mê hipêx anhýrja o hamakêtkati hkêt nê.

³⁰ No mê kajaja mê apê Ijaew kêt xwýnhjaja. Amnepêm na ka prem ajaxwýja Tirtüm kôt amnhî nhîpêx kêt nê. Tã nhùm mê akamã ukapri nê kãm mê ajapê nê. Ka mê ra harênh ma nê hkôt amnhî xunhwý nê hkôt amnhî nhîpêx mex nê. No ãm Ijaew kukwak ri. Mê kot kapêr kôt amnhî nhîpêx o pa hkêt jakamã nhùm Tirtüm mê hpãnhã nhãm mê amã amnhî to amnhîrit nê mê ato mex rax nê. Jakamã te Ijaew kukwak ri mê amex nê ri mê apa pyrãk. ³¹ Tã koja nhýrmã kot mê anhîpêxta pyrã nê Ijaew ho hkra. Nê mê apyrã nê mê kamã ukapri nê. Mê kot mê apyrã nê amnhî kaxyw Kra hkôt hamaxpêr xwýnhjaja nhùm mê apyrã nê mê ho hkra nê mê ho mex nê. ³² Mê apê Ijaew kêt xwýnhjaja nê mê ixpê Ijaew mê pahte axpên pyrãk. Na pu htem pahpiitã Tirtüm kapêr piitã hkôt amnhî nhîpêx rãhã ho ri papa hkêt nê. Tã kot puj mê tee ri ja hã amnhî pumu nê amnhî to kuwý nhùm mê pama nê amarî mê pakamã ukapri nê mê pahto mex nê.

Pawre kot Tirtüm mex o mex ã harênh

Epes 3.20; Korosê 1.16; Wam Korî 2.9, 2.16

³³ Tirtümja àhpumunh týx o àhpumunh týx. Nê ukapri ho ukapri nê mex o mex. Mê pahtõ na pu urãk nê ã amnhî nhîpêx anhýr o papa? Nã amrakati kumrêx. Nê mê pahtõ na pahte Tirtüm jamaxpêr kôt omunh? Nã mê pahte hamaxpêr kôt omunh kêt. ³⁴ Kapêr ã kagã htüm kot ja jarênh kot:

Mê pahte Tirtüm jamaxpêr kôt omunh kêt.

Nê kot pu mê pahtõ mëmoj tã hakre hkêt nê.

Mê parom àhpumunh o àhpumunh xwÿnh kênâ.

³⁵ Nê mê pahto kot puj we kâm pakapêr nê kâm: “Kwa Tirtûm. Ra ixte amâ mêmoj nhôrta pânâhâ kwa amnhî xwar inhmâ mêmoj gô.” Anê.

Nà mêmoj piitâ õ kênâ kot puj kêt ri â kâm mêmoj nhôr â amnhî jarênh anê. Anê.

³⁶ Tãm na pre amnhî kaxyw mêmoj piitâ ho kator pa. Nê âm pix kukwak ri na mêmoj piitâ htîr nê pa. Jakamâ kwa pu mê kâm mex o mex â mân harênh rãhã ho ri papa.

12

Mê pahte Tirtûm mã amnhî nhôr ã mê pajarênh

Wam Korît 6.20; Epes 4.1; Piriþos 4.8-9; Korosê 1.10; Wam Tesarõn 4.1-3; Wam Pêtre 2.11

¹ Kwa Jeþus kôt ixkwÿjaja. Tirtûm na hte mê pahto mex nê mê pakamã ukapri rãhã jakamã na pa ã mê amã ixkapêr anê. Kwa mê tokyx kâm amnhî jarê nê kâm amnhî gô. Te mê ate kâm hkînh xà nhôr pyrãk o amnhî nhîpêx nê kâm amnhî gô. Jao mê amã kapêr kôt pix mã amnhî nhîpêx o ri apa hprãm ã kâm amnhî jarê. Nê kâm hprãm xà hkôt pix mã tanhmã amã amnhî nhîpêx to ho ri apa hprãm ã kâm amnhî jarê. Kot kaj mê ã kâm amnhî jarênh anê nhũm amnhî tã mê ama nê hkînh nê. ã mê pahte kâm amnhî jarênh anhÿrja na kâm mar prãm.

² Nê kêr ka mê kâm Tirtûm prãm kêt xwÿnhjaja kot amnhî nhîpêx o ri amnhî nhîpêx o ri apa hkêt nê. Nê mê amnhî to Tirtûm mãn wÿ kê mê amã mê ajamaxpêr mex jagjê. Koja mê ama nê mê amã hagjê ka mê ra aprî hã hamaxpêr xà hkôt mê pahte amnhî to mex xà pumunh mex nê. Na pu htem hkôt amnhî nhîpêx o ri papa nhũm amnhî tã

mê pahpumu nê hkînh nê. Pu mê pajaxwÿja ÿ hã pahkînh nê ri papa.

Kris kwÿjaja kot tanhmã axpên nhîpêx to hã mê kâm karõ

Römân 12.1-11; Epes 4.11-16;

Wam Pêtre 4.10-11

³ Nê na pre Tirtûm ixto mex nê. Nê mê akaxyw ixãm. Ixte mê amã Kra Jeþus kot tanhmã mê panê amnhî nhîpêx to hã harênh o ri mê akôt ixpa kaxyw. Tã na pa ã kagàja kamã mê amã harênh anê.

Jakamã kwa kêr ka mê amnhî to jarkrar o ri mê kâm apa hkêt nê. Âm kwarî ho kwarî. Rÿ atÿx ri ajamaxpêr o:

—Nà pa na ixte amnhî to mex o ixte ixkwÿjê piitã mê hakrenh par.

Anhÿr ã amnhî to jarkrar o ri mê hkôt apa hkêt nê. Kêt mê âm amnhî jarênh o:

—Na pa pre amnhî kaxyw Jeþus kôt ijamaxpêr nhũm Tirtûm ixpumu nê ixto hkra. Jakamã na pa hte Jeþus Kris pix kukwak ri tãm amnhî nhîpêx o ri ixpa. No amnhî krã hkôt ã amnhî nhîpêx anhÿr kêt nê. Anê.

⁴ E pa mê amã mêmoj jarê ka mê inhma. Nà mê panhija pyxi htã kamã mêmoj xohtõ. Na kamã mê pano nê mê pajakwa. Nê kamã mê pajamak nê mê pahte. Na pu htem mê pano ho rît nê mê pajakwa ho pakapêr. Nê mê pajamak o ri ama nê mê pahte ho ri mra. ⁵ Ja pyrã nê Kris kôt mê pahte amnhî xunhwÿr xwÿnhja âm pyxi tã hkôt mê pahte amnhî xunhwÿr xwÿnhjaja mê paxohtõ. Jakamã na pu htem ahpÿnhã tanhmã axpên to mex to ho ri papa. Jao Kris kôt axpên to pahto nê pahtõx o papa.

⁶ Tirtûm na hte mê pahpê hkwy hã ahpÿnhã mê pamã tanhmã mêmoj tã karõ to nê kaxyw mê pahto mê paxihtÿx. Tã kêr pu mê ra kot mê pamã mêmoj tã karõ xà hkôt kâm amnhî nhîpêx rãhã ho ri papa. Jakamã koja mêhõ ate Tirtûm

kapêr jarênh o ri apa kaxyw axâm nê amâ anê ka Tîrtûm kamnâr rom mê kâm kapêr jarênh mex o ri mê hkôt apa.

⁷ Rỳ ate akwỳjê mã tanhmã axàpênh to ho ri apa kaxyw axâm ka mê kâm axàpênh mex o ri mê hkôt apa.

Rỳ ate Tîrtûm kapêr ho mê ahkre ho ri apa kaxyw axâm ka ho mê ahkre mex o ri apa.

⁸ Rỳ ate Tîrtûm kapêr o ri Jejus kôt mê akwỳjê jamaxpêr o hihtỳx o ri apa kaxyw axâm ka mê kâm kapêr jarênh pê mê ho mê hihtỳx mex o ri mê hkôt apa.

Rỳ ka mê atô akukrêx rax japêr nê ate mê kêp amrakati xwỳnhjê mã mêmoy nhôr o ri apa kaxyw axâm ka axàmnhix ri mê kâm mêmoy nhôr o ri mê hkôt apa.

Rỳ ate akwỳjê ho amnhiptâr kaxyw axâm ka mê ho amnhiptâr mex o ri apa.

Rỳ ate tanhmã mê akwỳjê ho mex to nê mêmoy to mê kutã anojarêto o ri apa kaxyw axâm ka akĩnh kãm ã mê hipêx anhỳr rãhã ho ri apa nê tanhmã akapêr punuj to hkukamã ri ajamaxpêr o ri mê hkôt apa hkêt nê.

⁹ Nê kêr ka mê apiitã amã axpên kĩnh kãm axpên to mex rãhã ho ri apa nê ri axêx rom amã axpên kĩnh ã amnhĩ jarênh o ri apa hkêt nê. Nê mê kot amnhĩ tomnuj xà piitã hkaga hpa nê hpãnhã mê kot amnhĩ to mex xà pix pyr tỳx nê hkôt amnhĩ nhĩpêx rãhã ho ri apa. ¹⁰ Nê mê apê Kris kwỳ hã amã axpên kĩnh kãm tãm axpên nhĩpêx o ri apa. Nê mê akwỳjaja mê kot amnhĩ to mex xwỳnh ã mê harênh o ri mê hkôt apa. No mê ri atỳx ajamaxpêr o:

—Nà koja mêmô ixkumrêx ixte tãm amnhĩ nhĩpêx xwỳnh ã ijarê pa rĩ kormã amnhĩ xwar tãm kot amnhĩ nhĩpêx xwỳnh ã harê.

Anhỳr o ajamaxpêr kêt nê. Kêr ka akumrêx tãm kot amnhĩ nhĩpêx xwỳnh ã harê.

¹¹ Nê kêr ka mê Tîrtûm mã mêmoy to anhỳr kaxyw nê kamã amã kaga hkêt kãm tanhmã kãm mêmoy to ho ri apa. Jao akĩnh kamã kãm ho anhỳr mex nê. ¹² Nê mê nhỹrmã Tîrtûm kot kaxkwa kamã mê ato mex rax kukamã ajamaxpêr nê akĩnh rãhã kãm mêmoy to anhỳr o ri apa.

Nê kêr ka mê tanhmã amnhĩ to rỳ nhũm mêmô tanhmã mê ato ka mê akaprĩ nê ri apa htã no ãm tee ri amnhĩ kukamã ajamaxpêr o Tîrtûm kaga hkêt nê. Arĩ amnhĩ to hwỳr rãhã ho ri apa. ¹³ Nê koja Kris kôt atôjê hõ kêp amrakati ka mê ja hã omu nê anhõ mêmoy japêr nê mãmri kãm hkwygõ. Nê amnhĩ wỳr awỳ nê tanhmã ho mex to.

¹⁴ Nê mê kot tanhmã mê atomnuj to xwỳnhjaja kêr ka mê amnhĩ tã mê omu nê agryk nê wajaga kot tanhmã amã ho kaxyw hwỳr atêm nê kãm tanhmã hã axàmnhênh to hkêt nê. Kêt ãm ho Tîrtûm pix wỳ nê kãm:

—Pa mê ijamâr mex xwỳnh maati. Nà na ixkwỳjê hõja ã inhĩpêx anê. Tã nom kêr ka ixtã tanhmã homnuj to hkêt nê. ãm tanhmã ho mex to.

Anhỳr o mãn mê ho awỳ.

¹⁵ Nê koja akwỳjê hõ mêmoy tã hkĩnh nê. Ka omu nê urak nê ý hã akĩnh nê. No koja mêmoy tã hkaprĩ nê mỳr o nhỹ ka omu nê ra urak nê ý hã akaprĩ nê.

¹⁶ Nê kêr ka mê piitã mê hipêx o axpên pyrak o ri apa. Te mê ate amnhĩ to rax o akwỳjê jakrenh o te mêmoy kamã akahak o amnhĩ nhĩpêx pyrak kêt nê. Nê axàhpumunh tỳx o ate mê piitã mê hakrenh par pyrak o ri amnhĩ nhĩpêx o ri apa hkêt nê.

¹⁷ Nê koja mêmô tanhmã ato htã ka ãm amnhĩ tã omu nê tanhmã amnhĩ tã ho hkêt nê. Nê mê piitã

mê noo mã tãm ri amnhĩ nhĩpêx o ri apa.

18-19 Nê kêr ka mê tãm ri axpên mã akapêr rãhã ho ri apa.

Nê kot kaj akrãmnhwý mê wa tanhmã axpên nhĩpêx to. Hãmri ka wa akupým tãm axpên xãm kaxyw kãm akapêr tã nhũm ama nê ãm ama nê akaga. Ka ãm amnhĩ tã omu nê kamã agryk kêt nê. Kojã Tĩrtũm tãm tanhmã atã ho. Kapêr ã kagã htũm kot ja jarênh kot:

Kêr ka mê amnhĩ tã tanhmã kot ato xwýnh to hkêt nê. Pa kot paj mê atã tanhmã ho. Anê.

Nê harênh kot:

²⁰ Kêr ka mê amã mê kãm mê akurê xwýnhjê o mex pix o ri apa.

Kê mê kãm prãm ka ja hã mê omu nê mê kamã axukapri nê mê kãm mêmoj kwý gô kê mê kuku.

Rý nhũm mê kãm kôr ka mê kãm gô hkwý kê mê ho ixkô.

Kot kaj mê ã amnhĩ tã mê hipêx mex anê nhũm mê tee ri amnhĩ tã mê apumu nê amnhĩ kamã hpijaãm jao mê atã amnhĩ kamã gryk nê. Anê.

²¹ Nom kot kaj mê amnhĩ tã tanhmã mê homnuj to hãmri nê ajaxwýja urãk nê amnhĩ tomnuj nê. Ja pymaj kêr ka mê amnhĩ rom tãm mê hipêx. Hãmri nhũm mê amnhĩ tã mê apumu nê mê apyrã nê tãm mê anhĩpêx japêr.

E kêr ka mê ã axpên nhĩpêx o ri apa anê.

13

Mê pahto amnhĩptãr xwýnhjê jarênh

Matêwre 22.21; Xitre 3.1; Wam Pêtre 2.13-17

¹ Nê kêr ka mê kot mê ato amnhĩptãr xwýnhjê kapêr ma nê kapêr kôt ri amnhĩ nhĩpêx rãhã ho ri apa. Tĩrtũm kot mê pakaxyw mê unhwýr kênã. Mê kot mê pahto amnhĩptãr o pa kaxyw na hte mê unhwý. ² Jakamã kojã mêmõ mê

kapêr ma nê ãm kuma nê hkôt amnhĩ nhĩpêx kêt nê hãmri nê te kot Tĩrtũm kapêr mar nê ãm mar pyrãk o amnhĩ nhĩpêx. Hãmri nhũm Tĩrtũm tee ri ja hã omu nê nhýrmã tanhmã hã ho.

³ Xã na hte tãm mê kot amnhĩ nhĩpêx xwýnhjaja kãm mê kot mê ho amnhĩptãr xwýnhjê pyma ho pa? Nã na htem kãm mê uma hkêt kãm ri pa. ãm mê kot amnhĩ tomnuj xwýnh pixjaja na amnhĩ kamã kãm mê uma ho pa. Tã ka mê amã mê kot mê ato amnhĩptãr xwýnhjê pyma hprãm kêt xwýnhjaja kêr ka mê kapêr ma nê hkôt amnhĩ nhĩpêx kê amnhĩ tã mê apumu nê hkĩnh nê. Nê amnhĩm mê ate amnhĩ to mex xwýnh ã mê ajarê. ⁴ Tĩrtũm nhý hã mê panhõ pahi kot mê pahto amnhĩptãr jakamã na htem mê kãm mê pahto mex prãm nê. Nê kot pu mê pahtõ axtem nê tanhmã amnhĩ tomnuj to hãmri nhũm tee ri ja hã pajarênh ma nê tanhmã hã mê pahto. ãm hãmri na hte ã mê pahto amnhĩptãr xwýnhjaja mê panhĩpêx anê. Tĩrtũm kãm hprãm xã hkôt. ⁵ Jakamã kwa mê kapêr ma nê hkôt ri amnhĩ nhĩpêx mex rãhã ho ri apa. Nom amã kot tanhmã ato pix pymaj hkôt ri amnhĩ nhĩpêx kêt nê. Mããnen ã amnhĩ kukamã ajamaxpêr anê nê ajamaxpêr o:

—Nã Tĩrtũm kot mê ixkaxyw unhwýr jakamã na pa hte kapêr ma nê hkôt amnhĩ nhĩpêx mex o ri ixpa.

Anhýr o ajamaxpêr.

⁶ Nê mê pahto amnhĩptãr xwýnhjaja kot Tĩrtũm nhý hã tanhmã mê panhĩpêx to ho pa jakamã na pu htem mê àpênh pãnhã mê kãm amnhĩre. Mê pahpiitã axpên kaxyw kãm kãxpore ho hkryre nê kugõ. Tanhmã kot ho mê pamã mêmoj to mex to kaxyw. ⁷ Jakamã kêr ka mê hã apijaãm o ri apa kamã mãmrĩ mê kãm kãxpore

hkwȳ ho hkryre nê ôr o ri apa. Mê kot hã àhwÿr xà hkôt.

Mê pahte tanhmã axpên nhîpêx to hã mê pamã karô

Matêwre 22.39-40; Karatas 5.13-15; Wam Juãw 3.11-24

⁸ Nê kër ka mēhō ho tewēn japêr nê tokyx kãm amnhîre. Nê mê amã axpên kînh o aa ho ajamakêtkati hkêt nê. Jao mēmoj to axpên kutã anojarêt rãhã ho ri apa. Kot kaj mê ã axpên nhîpêx anê nê Tîrtüm kapêr piitã hkôt amnhî nhîpêx mex o ri apa.

⁹ Amnepê mã na pre finat Mojesja Tîrtüm nhÿ hã Ijaew mã mēmoj tã karô nê mê kãm:

Kêr ka mê aprô pix tânopxa nê nhãm mēnijê hō kamã ri akurê ho apijaàm kêt o apa hkêt nê.

Nê mê anijaja mê amjên pix tânopxa nê nhãm ri mēmyjê hō kamã akurê ho apijaàm kêt o ri apa hkêt nê.

Nê mê ri axpên par kêt nê.

Nê mê ri axpên pê axàhkînh o ri apa hkêt nê.

Nê mê amã ri axpên kukrêx kînh o ri amã ho anhō hprãm o ri apa hkêt nê. Anê.

Nê mãânên ja:

Kêr ka mê nhãm mê axpên nhîpêx o te ka amã amnhî tã ma pyrãk. Jao tãm axpên nhîpêx o ri apa. Anê.

Ã kot mê kãm hã karô kot anhÿr. Kot puj mê ã pamã pahkwÿjê kînh anê nê mãânên wam finat Mojes kot mēmoj tã mê panhîgêjtê mã karô hkôt amnhî nhîpêx o ri papa rãhã nê. Jao axpên par kêt nê. Nê axpên pê paxàhkînh kêt nê. Nê axpên kutã panojarêt rãhã nê. ¹⁰ Kojã mēhō kãm amnhî tã ma pyrãk o hkwȳjê nhîpêx nê mê ho mex pix o pa. Jakamã kot kaj mê amã ri axpên kînh nê mēmoj to axpên kutã anojarêt pix nê. Jao Tîrtüm kapêr piitã hkôt amnhî nhîpêx mex o ri apa.

¹¹ Amnepê mã mê pahte amnhî kaxyw Jejus kôt pajamaxpêr xà hã arîgrota ã na pre kormã akupÿn mê pahwÿr hpôx xà hã arîgro kormã hwÿr awry rax nê. Tã ra hwÿr ahtêp o mō. Kojã tokyx akupÿn mê pahwÿr wrÿ nê ma akupÿm kaxkwa hwÿr mê pahto api. Jakamã kwa kër pu mê arî hamãr rãhã ho ri apa. Jao tanhmã amnhî tomnuj to kaxyw nê pajamaxpêr o:

—Kwa kojã Jejus tanhmã amnhî to nê jarãhã akupÿn wrÿk japêr. Tã kot pa ri ã amnhî nhîpêx anê nhüm wrÿ nê tee ri ja hã xpumu pa amnhî kamã ixpijaàm tÿx nê. Nã kot paj ã amnhî tomnuj anhÿr kêt nê. Anê.

Hãmri nê Jejus kamã ajamak pê kutêp Tîrtüm kapêr kôt pix mã ri amnhî nhîpêx mex rãhã ho ri papa.

¹² Na pu htem kamãt kãm gôr nê arîgro jamãr pê kamã pajamak o panhîkwÿ. Arîgro te kêp Jejus akupÿn wrÿk pyrãk. Jakamã kwa pu mê kamã pajamak pê kãm panojarêt rãhã ho ri papa nê amnhî nê tanhmã mê omnu xà kute pumunh mex o ri papa. Te ho pôristi kot amnhî nê mê kot kãm mê hkurê xwÿnhjê pumunh mex pyrãk o Jejus kutêp tãm amnhî nhîpêx o ri papa. Na pre tanhmã mê pahkrã hto pu mê ÿ hã tãm ri amnhî nhîpêx. Tã kër pu mê arî ã amnhî nhîpêx anhÿr o ri papa nê te mê pahte arîgro hã mê pa xwÿnhjê kot amnhî nhîpêx pyrãk o amnhî nhîpêx. ¹³ Kot puj mê ã amnhî nhîpêx anê nê mê piitã mê noo mã tee ri tanhmã mê pahte amnhî tomnuj to mã pajamaxpêr kêt nê. Jao amnhî kamã pahpijaàm nê ri papa hkêt nê. Nê pajamakêtkati nê paxãmnhîx ri papa. Te ho hirã kamã ri mê pa xwÿnhjê kot amnhî nhîpêx pyrã nê ãm ri paxãmnhîx tãm amnhî nhîpêx o ri papa.

Nê mê pahprô pix tânopxar o ri papa.

Ně mẽ pahpipānh nē ri papijapu ho ri papa hkēt nē.

Ně mẽmoj tā axpēn mā paxàkjēr hkēt nē.

Ně mẽmoj tā axpēn kām pagryk kēt nē.

¹⁴ Nom kot puj mẽ axtem nē ā amnhī tomnuj anē nē mẽ pahte amnhī nhīpēx tūm kôt pix mā amnhī nhīpēx. Tā kēr pu mẽ ā amnhī nhīpēx anhÿr pumaj hpānhā amnhī to Pahihti Jejus Kris wÿ nē kām:

—Pa Jejus. Nà kormā jar apa ri na ka pre mẽ kot tanhmā amnhī tomnuj to kutā axihtÿx o axihtÿx nē aa tanhmā amnhī tomnuj to hkēt nē. Tā inhmā apyrā nē ixte amnhī tomnuj kutā ixihtÿx o ixihtÿx o ixpa hprām. Anē.

Jaο mẽ pajamaxpēr tūmja te ra kot amnhī tā mẽ pahto htÿx kēt pyràk o pu mẽ amnhī nhīpēx o ri papa.

14

Mě pahte Kris kôt pahkwÿjê mā paxàkjēr kēt ā mẽ pamā karō

Matêwre 7.1-5; Römân 2.1; Wam Korīt 10.23-33; Xiakre 4.11

¹ Nē koja mēhō kormā Jejus kôt amnhī xām nyw ri kormā hkôt hamaxpēr tohtuj anē. Hāmri nē htÿx tanhmā hamaxpēr to nē mẽmoj mex kaga. Ka mẽ ja hā omu nē ām omu nē hā tanhmā kām nē hkēt nē. Kwār māmri ā amnhī nhīpēx anē. Koja gaa nē rī hprī hā Tirtūm kapēr mar tÿx nē hāmri nē hkôt mẽmojta pumunh mex nē. ² Jakamā koja Jejus kôt akwÿjê hō mẽ apkur xà piitā hkur pymaj tanhmā hō kute hā harē nē hkaga nē hamaxpēr o:

—Nà kot pa ja hkur kēt nē. Kot pa apu kuku nē hkur o amnhī tomnuj nē. Anē.

Kwār māmri ā hamaxpēr anē nē hkur kēt nē. Nom mẽ pahte Jejus kôt amnhī xunhwÿr tÿx xwÿnhjaja na pu htem paxāmnhīx Jejus karnār rom mẽmoj piitā

kuku. Nom mẽ pahkīnhā ham mẽ kot hkôt amnhī xunhwÿr xwÿnhjaja kormā kapēr piitā mar kēt jakamā kwār mẽ māmri anē nē mẽmoj kur kēt nē. ³ Nom kēr ka mẽ ri tanhmā hā mẽ kām akapēr to hkēt nē. Rÿ mẽ kām:

—Kwa mẽ ixpyrà nē mẽmoj piitā aku.

Anhÿr o mẽ kām akapēr kēt nē. Ano ho ām hā mẽ omu.

Ně mẽ ate mẽmoj piitā hkur kēt xwÿnhjaja kēr ka mẽ ajaxwÿja mẽ ixte mẽmoj piitā hkur ā tanhmā mẽ inhmā axàkjēr to hkēt nē. Mě ixte mẽmoj piitā hkur o ixpa hā mẽ ixpumu nē ām hā mẽ ixpumu nē hā tanhmā mẽ inhmā axàkjēr to hkēt nē. Rÿ hā mẽ inhmā:

—Kwa nà kot kaj mẽ ja kur o amnhī tomnuj nē.

Anhÿr o hā mẽ inhmā akapēr kēt nē. Ano ho ām ja hā mẽ ixpumu. Mě pahte ahpÿnhā tanhmā paxàpkur to htā Tirtūm kot mẽ pahte Kra Jejus kôt amnhī xunhwÿr xwÿnh piitā mẽ pahto hkra kēnā. ⁴ Jakamā kwa mẽmoj tā tanhmā axpēn mā axàkjēr to ho ri apa hkēt nē. Koja Kris kôt atōjē hō axtem tanhmā hamaxpēr to ka mẽ tee ri ja hā omu nē tanhmā hā kām nē hkēt nē. Rÿ ajamaxpēr o:

—Tk. Na hte ā ri amnhī nhīpēx anhÿr o pa. Ja omnuj. Pa na pa hte ā amnhī nhīpēx anhÿr kēt nē.

Anhÿr o ri axpēn kukamā ajamaxpēr hkēt nē. Mě pahpé Tirtūm kēt kēnā kot pu kēt mẽ ā ri axpēn kukamā pajamaxpēr anē. Tirtūm pix na hte tanhmā mẽ pajarēnh to xwÿnh. àhpumunh o àhpumunh xwÿnh jakamā koja tanhmā mẽ hkrā hto nhūm mẽ rī kormā tām hamaxpēr pē àmnhīx ri tanhmā amnhī nhīpēx to ho pa.

⁵ Nē koja Jejus kôt atōjē hō mẽmo arīgromnu jarē nē hā àpēnh kēt nē. Ka mẽ apē hkwÿjaja tee ri ja hā omu nē ajamaxpēr o:

—Nà arıgro piitã mē pamã mex kēnã. Kot paj māmri arıgro piitã hã apē.

Anhÿr o ajamaxpēr japēr. Nom kēr ka mē ja hã axpēn mã tanhmã axàkjēr to hkêt nē. Na pu htem ahpÿnhã pamã tanhmã mē pahte amnhĩ nhĩpêx to hprãm xà hkôt tanhmã amnhĩ nhĩpêx to. No tanhmã ri hã axpēn mã paxàkjēr to ho ri papa hkêt nē. ⁶ Kêt mē kot arıgromnu jarēnh xwÿnhjê mē mē pahte arıgro piitã mex ã harēnh xwÿnhjaja mē pahpiitã mē pahpê Tirtüm kraa. Jakamã mē pahpiitã na pu htem pajamaxpēr o:

—Na pa hte Tirtüm kãm hprãm xà hkôt ã amnhĩ nhĩpêx anhÿr o ri ixpa. Anē.

Nē mē pahte mēmoj piitã hkur xwÿnhjaja nē mē kot mēmoj kwÿ hkur kêt xwÿnh piitã mē pahpê Tirtüm kraa. Mē pahpiitã mē pamã kãm hprãm xà hkôt amnhĩ nhĩpêx prãm jakamã na pu htem paxàpkur kaxyw nē Tirtüm mã amnhĩ jarē nē kãm:

—Pa mē ijamār mex xwÿnh maati. Nà ãm hãmri na ka hte apkati mē mē inhmã mē inhõ ho apa. Amex o amex Tirtüm.

Anhÿr o kãm amnhĩ jarē. Hãmri nē kormã hkamnār rom paxàmnhix ri tanhmã mēõ kuteta ku. ⁷⁻⁸ Mē pahpê Tirtüm kra jakamã na pre ra mē pakukamã tanhmã mē pajarēnh to. Mē pakukamã pahtyk ã arıgro jarē nē mē pahte pahtır ri tanhmã ri amnhĩ nhĩpêx to ho papa hkukamã hamaxpēr. No mē papajaja na pu htem amnhĩ krã hkôt tanhmã mē pahte amnhĩ nhĩpêx to kukamã paxàhpumunh kêt. ⁹ Jakamã na pre Kris ja hã mē pahpumu nē tãm mē pakaxyw amnhĩ to kēp mē panhõ Pahihti nē mē panē ty. Hãmri nē akupÿm htır. Kēp mē panhõ Pahihti hã akupÿm htır. Kēp mē pahte hkôt amnhĩ xunhwÿr xwÿnhjê nhõ Pahihti kaxyw. Jakamã kēp ra

mē pahkwÿ htyk xwÿnhjê nhõ Pahihti nē mãânēn kēp arı mē pahtır xwÿnhjê nhõ Pahihti. ¹⁰ No mē papajaja mē pahpê Kris kôt mē pahkwÿjê nhõ pahi hkêt jakamã kēr mē Kris kôt akwÿjê hõ tanhmã amnhĩ nhĩpêx to hã omu hãmri nē tanhmã ho akapēr to hkêt nē. Rÿ ajamaxpēr o:

—Kwa na ã amnhĩ nhĩpêx anē. Inhmã ja mex kêt.

Anhÿr o ajamaxpēr kêt nē. Koja nhÿrmã Tirtüm tãm mē pahpiitã tanhmã mē pahte amnhĩ nhĩpêx to hã mē pahpumunh xà hkôt tanhmã mē pajarēnh to. Nom kēr pu mē papajaja amnhĩ hkrã hkôt ã axpēn jarēnh anhÿr kêt nē. ¹¹⁻¹² Kot puj mē nhÿrmã pahpiitã Tirtüm kutã pahkrı nē kãm tanhmã amnhĩ jarēnh to. Kormã mē pahtır ri tanhmã mē pahte amnhĩ nhĩpêx to ho papa hã kãm pahprı hã amnhĩ jarē. Kē mē pama nē tanhmã mē pajarēnh to. Kapēr ã kaga htüm kot mē pakukamã mē pajarēnh kot:

Koja nhÿrmã mē piitã ixpê mē õ pahi hã ixkutã hkõn krã ho rôrõk nē hkrı nē inhmã inhmex ã inhmẽ ã ijarē.

Nē mē piitã ixpê Tirtüm ã ixpyxi mex ã ijarē. ãm hãmri na pa ã mē hkukamã mē harēnh anē. Anē.

Mē pahte Kris kôt pahkwÿjê ho mex ã mē pamã karõ

Wam Korıt 8.9-13

¹³ Nē kwa kēr ka mē akwÿ kot Jejus kôt amnhĩ xunhwÿr tohtuj anhÿr xwÿnhjaja tanhmã mē kot amnhĩ nhĩpêx to ho pa hã mē omu nē ja nē tanhmã mē kãm akapēr to hkêt nē. ãm mē noo mã tãm ri amnhĩ nhĩpêx rãhã ho ri apa. Mē kot ja hã mē apumunh nē mē akôt amnhĩ nhĩpêx kaxyw. No kot ka mē kot tanhmã amnhĩ nhĩpêx toja ã kãm akapēr nhüm ama nē tee ri amnhĩ kukamã hamaxpēr nē hkaprı nē.

14 E kot pa hpānhā mẽ paxàpkur xà hā tanhmā mẽ panhō jarēnh to. Ixte Pahihti Jejus jamaxpēr xà hkôt tanhmā ijamaxpēr to ho ri ixpa jakamā kot paj ixkatàt kôt mẽ amā tanhmā mẽ panhō jarēnh to nē ām hāmri harē. Nà mẽ paxàpkur xàja ām pixi nē omnu hkêt. Piitā mex o mex. Nom koja mēhō tee ri mẽmo mẽ apkur xà hō pumu nē hamaxpēr o:

—Nà kot paj ja hkur kêt nē. Kot paj apu kuku nē ho amnhī tomnuj nē. Anē.

Hāmri nē hkur kêt nē. Tā kwār māmri ā hamaxpēr anē nē hkur kêt nē. Nom na ām amnhī krā hkôt Tirtüm kēp ja omnuj ā hkamnhīx. Kēp omnuj kêt. Ra kot mẽmo mẽ paxàpkur xà piitā mex ā harēnh. 15 Tā kot kaj mẽ kot mẽmoj kur kêt xwýnhnta py nē o tē nē kot hkaga xwýnh noo mã hkur o xa nhüm apumu nē tee ri hamaxpēr nē hkapri nē. Jakamā kot ka mẽ ā noo mã amnhī nhīpēx anhýrja o ho mex kêt nē. Kwa mẽ ā ri axpēn nhīpēx anhýr hkêt nē. Kot ka mẽ ā axpēn nhīpēx anē nē te amnhī pix kukamā ajamaxpēr pyrāk o amnhī nhīpēx. Jao akwýjē ho mex kukamā ajamaxpēr kêt nē. Kris kām mẽ hapē htýx kôt mẽ kot amnhī tomnuj pānhā amnhīrer kaxyw ra nē htyk kēnā kot ka kêt mẽ axtem nē ri ā mẽ noo mã mẽ kot mẽmoj kur kēeta kur anē. Rý koja apu tee ri kot mẽmoj kur kēeta kur ā mẽ apumu nē tanhmā amnhī tomnuj to. Jao Kris kaga japēr. Jakamā kwa mẽ ā mẽ noo mã mẽmojta kur kêt nē. 16 Mēmo mẽ apkur xàja mex tā nhüm mẽ akwýjē hō kām mex kêt japēr ka mẽ noo mã hkur kêt nē. Nē tanhmā hā kām nē hkêt nē. Kot kaj mẽ anē nhüm Kris kra hkêt xwýnhjaja tee ri ja hā mẽ apumu nē tanhmā axpēn mã mẽ apē Kris kwýjē ho kapēr punuj to. 17 Mē pahpē Tirtüm krajaja na pu htem paxàpkur xà nē pahkôm

xà pix kukamā pajamaxpēr o ri papa hkêt nē. Na pu htem amnhī mẽ pahkwýjē mex kukamā pajamaxpēr. Nē mẽ pahte tām amnhī nhīpēx kukamā pajamaxpēr. Nē tām axpēn nhīpēx kukamā pajamaxpēr. Kot puj mẽ ā amnhī nhīpēx anē nhüm Tirtüm Karō ja hā mẽ pahpumu nē mẽ pahto mẽ pahkính nē. Pu mẽ pahkính nē pajamakētkati nē ri axpēn kôt papa. 18 Tā kot puj mẽ ā Kris mã tanhmā amnhī nhīpēx to ho ri papa anē nhüm Tirtüm ja hā mẽ pahpumu nhüm ja kām mex nē. Nē Kris kôt mẽ pahkwýjē mã haxwýja ja mex nē.

19 Jakamā kēr pu mẽ tām axpēn mã pakapēr o ri papa. Nē pajamakētkati nē axpēn kôt ri pajapōj. Nē Kris kôt tanhmā axpēn to paxihtýx to ho ri papa. 20 No kot ka mẽ axàpkur xà gryk ā akwý hkukamā ajamaxpēr kêt nē atýx ri mēhō noo mã mẽmoj kur japēr. Kēp omnuj tā ka mẽ ām amnhī pix kukamā ajamaxpēr nē noo mã hkur japēr. Hāmri nhüm ja hā mẽ apumu nē ra kot Tirtüm kaga mã. Ra kēp hkra jakamā kwa mẽ noo mã mẽ kot mẽmoj punuj ā harēnh xwýnhnta kur kêt nē. Nom mẽ paxàpkur xàja piitā mex. Tirtüm kot mẽ pamā ōr jakamā piitā mẽ panhō. Tā koja akwýjē hō Tirtüm kēp mẽmoj omnuj ā hkamnhīx tā ka mẽ noo mã aku nē ho amnhī tomnuj nē. 21 Kēr pu mẽ pahkwýjaja tanhmā kot amnhī tomnuj to pymaj pu mẽ pahte amnhī nhīpēx kukamā pajamaxpēr mex o papa. Mēmo mẽō nē mẽmo kagō pē wíhtija. Tirtüm kot mẽ pamā mẽmoj piitā ōr tā no nhüm mẽ pahkwýjaja kēp ja omnuj nē pu mẽ noo mã hkur rý ho pahkôm kêt nē. Mēmo mry nē mẽmo wíhti pu mẽ noo mã hkur rý ho pahkôm kêt nē.

22 Nē kēr ka mẽ atō mẽmoj krēr kaxyw nē hkukamā ajamaxpēr o:

—Nà kot paj ja krë. Tirtüm kãm ja mex kênã. Anë.

Hãmri në mãmri Tirtüm kamnàr rom axàmnhix akrë. Kãm ja mex kênã kot ka kêt ri tee ri hkrër kaxyw hkukamã ajamaxpër në hk-aga. ²³ No kot kaj mẽ atõ mẽmoj to anhÿr kaxyw në tee ri amnhĩ kukamã ajamaxpër në ajamaxpër o:

—Ko kot paj apu ja ho anë nhũm Tirtüm hã ixpumu nhũm ja kęp omnuj në rÿ ko. Anë.

Hãmri në tee ri amnhĩ kukamã ajamaxpër. Tã ra ã amnhĩ nhĩpëx anë në akrë rÿ mẽmoj to anë. Hãmri nhũm Tirtüm tee ri ã ate amnhĩ nhĩpëx anhÿr ã apumu nhũm ja kęp omnuj në. Ate hkamnàr rom mẽmoj to anhÿr kêt në amarĩ amnhĩ krã hkôt ho anhÿr jakamã ho amnhĩ tomnuj në.

15

Më pahte amnhĩ pix kukamã pajamaxpër kêt ã mẽ pamã karõ

Makre 10.45; Wam Korit 10.24; Piriapos 2.3-5

¹ Në kër pu mẽ pahte ra Jejus kôt amnhĩ xunhwÿr tÿx xwÿnhjaja amnhĩ kôt kormã mẽ kot Jejus kôt amnhĩ xunhwÿr totuj janhÿr xwÿnhjê jamãr mex në. Jao mẽ kamã pagryk tokyx anhÿr kêt në. Æm mẽ kutã panojarêt pix o papa. Jao ra amnhĩ pix kukamã pajamaxpër kêt në. ² Mããnën amnhĩ mẽ Kris kôt mẽ pahkwÿjê hkukamã mãm mẽ pajamaxpër. Jao mẽ kot tãm amnhĩ nhĩpëx kaxyw mẽ ho mex o ri papa. ³ Kris na pre jar pa ri amnhĩ pix kukamã hamaxpër kêt në. Na pre mããnën õ Papaj kukamã hamaxpër. Jakamã Tirtüm kapër ã kagã htüm kot kãm kapër jarënh kot:

Pa Papaj. Na hte mẽ pahkurê xwÿnhjaja ixto kapër punuj në. Nom mããnën ã ato kapër o pa anë. Anë.

⁴ Më pakaxyw na Tirtüm kapër ã kagãja. Më pahte kamã harënh

në mar në amnhĩ kaxyw hkôt pajamaxpër tÿx o ri papa kaxyw. Jakamã na pu htem tanhmã pahpunuj to htã kapër kwÿ ma në pahkÿnh në. Jao tee ri amnhĩ kukamã pajamaxpër o ri pahkaprĩ hkêt në. Æm nhÿrmã Tirtüm kot mẽ pahto mex kukamã pajamaxpër o akupÿm paxihtÿx në pahkÿnh në ri papa. Më pahkÿnh në ri papa kaxyw na Tirtüm kapër ã kagãja. ⁵⁻⁶ Na pu htem Tirtüm kamnàr rom pahkÿnh në. Në axpën kamã paxukaprĩ ho ri papa. Jakamã na pa hte tanhmã mẽ ato Tirtüm wÿr to në kãm:

—Pa Tirtüm. Apê mẽ ijamãr xwÿnh maati na ka. Në apê mẽ inhõ Pahihti Jejus Kris nhõ Papaj na ka. Nà xep ra Rõm nhõ xwÿnh kwÿjaja kãm akapër kôt amnhĩ nhĩpëx prãm jakamã kwa tanhmã mẽ hkrã ho mex to kê mẽ hamakêtkati në ajamaxpër kôt hamaxpër rãhã ho ri akõt pa. Hãmri nhũm mẽ amnhĩ tã apumu në piitã amex o amex ã ajarë.

Anhÿr o pa hte mẽ ato kuwÿ.

Ijaew kêt xwÿnhjê jarënh

Atre 10.34; Rõmân 9.24; Karatas 3.28

⁷ Në kwa kër ka mẽ amã axpën tã ma ho ri apa. Te ho Kris kãm mẽ pahtã mata pyrãk. Jao axpën to mex pix o apa. Kot kaj mẽ ã axpën nhĩpëx anë nhũm mẽ piitã axpën tã mẽ apumu në mẽ anhÿ hã Tirtüm mã mẽ mex o mex ã harë.

⁸ Amnepêm Tirtüm Ijaew mã tanhmã Kris jarënh to. Kormã pika hwÿr wrÿk kêt ri nhũm hkukamã nhÿrmã mẽ hwÿr wrÿk në mẽ kamã kator ã harë.

Tã nhũm mẽ hwÿr wrÿ mẽ mẽ kamã kato. Ijaew hkanrêhã htãmnhwÿjê kamã kato në mẽ ho mex o ri mẽ hkôt pa. Më kot amnhĩ tã omunh në ã hamaxpër anhÿr kaxyw. Në hamaxpër o:

—Amnepêm Tirtüm kot mẽ panhÿgêt mã hkukamã harënh xà

hkôt na mẽ ixwỳr Kraja mẽ nhũm wry nê mẽ ixto mex o ri pa. Nà ãm hãmri na pre mẽ ixwỳr kumê.

Anhỳr o hamaxpêr kaxyw. ⁹ Nê mẽ apê Ijaew kêt xwỳnhjaja mẽ ajaxwỳja mẽ ate tanhmã kot amnhĩ nhĩpêx to hã harênh mar nê Tĩrtũm mã mex o mex ã harênh kaxyw. Nê Tĩrtũm kot mẽ akamã ukapĩrĩ hã mẽ ate amnhĩ tã omunh nê mex o mex ã harênh kaxyw na pre wry. Tĩrtũm kapêr ã kagà htũm kot tanhmã mẽ ixpê Ijaew jarênh to nê mããnênh tanhmã mẽ apê Ijaew kêt xwỳnhjê jarênh to nê mẽ pajarênh kot:

Kot paj Ijaew kêt xwỳnhjê jamak mã amã amex ã ajarênh o ri mẽ hkôt ixpa.

Nê amex ã inhgrer o ri mẽ hkôt ixpa. Anê.

¹⁰ Nê ja:

Kwa mẽ apê Ijaew kêt xwỳnh mẽ mẽ apê Ijaew. Kêr ka mẽ apiitã Tĩrtũm nhỹ hã akĩnh nê ri apa. Anê.

¹¹ Nê mããnênh ja:

E kêr ka mẽ apê Ijaew kêt xwỳnhjaja nê krĩ piitã hkôt mẽ apa xwỳnhjaja mẽ apiitã Tĩrtũm mã mex o mex ã harênh o ri apa.

Anhỳr o kot harênh. ¹² Nê Tĩrtũm nhỹ hã kapêr o pa xwỳnh finat Ijais haxwỳja Ijaew mã Jesus jarênh o:

Koja nhỹrmã Jese kanrêhã htãmnhwỳjê hõja mẽ pahwỳr kato.

Hãmri nê mẽ pahpê Ijaew mẽ Ijaew kêt xwỳnhjê ho amnhĩptàr o pa.

Jakamã nhũm mẽ amnhĩ kaxyw hkôt hamaxpêr o pa. Anê.

¹³ Nê na pa hte tanhmã mẽ ato Tĩrtũm wỳr to ho ri ixpa nê kãm:

—Pa Tĩrtũm. Kwa kêr ka Rôm nhõ xwỳnhjê ho mex kê mẽ amnhĩ kaxyw Akra hkôt hamaxpêr mex o ri pa. Jao hkôt hkĩnh nê hamakêtkati nê ri axpên to pa. Nê kê Akarõ mẽ ho mẽ hihtỳx o pa

kê mẽ amnhĩ kaxyw amã mãn hamaxpêr tỳx rãhã ho ri pa. Anê.

Pawre kot hprĩ hã amnhĩ jarênh Sikũn Pêtre 1.12-13

¹⁴ E Kris kôt ixkwỳjaja. Nà ra ixte mẽ ajarênh mar mex. Na ka xep htem amnhĩ to mex o ri apa. Nê mẽmoj to axpên kutã anojarêt rãhã ho ri apa. Nê mẽ kot tanhmã Tĩrtũm kapêr kôt amnhĩ nhĩpêx to xàja ka mẽ omunh mex nê ho axpên jahkre ho ri apa. ¹⁵ Tã ot pa kagà ja kamã mẽ amã ixujarênh kãm ixihỳx nê. Tĩrtũm nhỹ hã. Ra mẽ ate mẽmoj mar mex tã pa axte mẽ amã harê. Mẽ ate mar tỳx nê hã anohtỳx kaxyw. Nà ã ixte amnhĩ nhĩpêx anhỳr kaxyw na pre Tĩrtũm mẽ akaxyw ixãm. ¹⁶ Ixte Jesus Kris mã mẽ apê Ijaew kêt xwỳnhjê mã kapêr jarênh o ri mẽ akôt ixpa kaxyw. Nê mẽ ato hwỳr o ri ixpa kaxyw. Tã pa hte krĩ hkwy kamã ã mẽ akwỳjê mã harênh anhỳr o ri mẽ hkôt ixpa. Nê Jesus jarênhja pa hte mẽ hkôt mẽ kãm harênh o ri ixpa. Mẽ kot mar nê hkĩnh kãm hkôt amnhĩ nhĩpêx mex kaxyw. Hãmri nhũm Tĩrtũm Karõ mẽ kãm mẽ hamaxpêr nyw jagjê nhũm Tĩrtũm hã mẽ omu nhũm ja kãm mex nê nhũm hkĩnh nê hamaxpêr o:

—Nà ãm hãmri. Koja mẽ nhỹrmã wa ixri htũr tũm nê mex nê pa ho pa. Anê.

¹⁷ Tã na pa ixte Jesus Kris nhỹ hã Tĩrtũm mã tanhmã amnhĩ nhĩpêx to ho ixpa hã amnhĩ pumu nê ixkĩnh nê. ¹⁸⁻¹⁹ Na pa hte y hã mẽ apê Ijaew kêt xwỳnhjê mã Tĩrtũm kapêr jarênh o ri mẽ akôt ixpa. Nê mẽ anoo mã tanhmã ri Kris kot mẽ amã amnhĩ nhĩpêx to hã harê. Nê mẽ amã aa mẽ kot mẽmoj pumunh kêt kwỳ ho anhỳr o ri mẽ akôt ixpa. Tĩrtũm Karõ nhỹ hã. Nhũm hte mẽ akwỳjaja amnhĩ jaêr pê omu nê kamã no pyma nê. Hãmri nê mẽ pahpyrà nê Jesus kôt amnhĩ xunhwỳ. Nom pa hte ã amnhĩ nhĩpêx anhỳr ã amnhĩ pumu nê ri

hã amnhî to jarkrar kêt nê. Âm ixte Kris pix nhÿ hã mē kām ixkapēr ā mē kām amnhî jarēnh o ri mē hkôt ixpa. Tã pa ra Jerujarē rûm Irir wÿr krî piitã hkôt mē kām Kris kapēr jarē. Tirtûm Karō kot tanhmã ixto hihtÿx to jakamã pa mē piitã mē kām harēnh mex nê. ²⁰ Na pa hte mē hwÿr inhnojarēt nê ā ija-maxpēr anê nê ijamaxpēr o:

—Kormã mē kot Kris jarēnh mar kêt xwÿnhjê hwÿr kot paj mō. Nom ra mē kot harēnh mar xwÿnhjê nhō krî hwÿr inhmōrja inhmã prām kêt. Anê.

²¹ Tirtûm kapēr ā kagã htûm kot kapēr mar kêt xwÿnhjê jarēnh kot: Kormã mē kot Tirtûm kapēr mar kêt xwÿnhjaja koja mē kuma nê hprî hã mar tÿx nê. Anê.

Pawre kot Rôm wÿr hkrã hã amnhî jarēnh

Römân 1.8-15

²² Hêxta waa nê. Inhmã mē apumunh prām tÿx nê Rôm kām Jesus kôt ixkwÿjaja. Na pa hte xatã mē awÿr ixkrã nom kormã mē awÿr inhmōr kêt nê. Kormã ixte krî hkwÿ kamã mē kām Kris jarēnh o ri ixpa jakamã kormã mē awÿr inhmōr kêt nê. ²³ Na pa ra xatã mē awÿr ixkrã hã ixtã amgrã sohtō nê. Tã ra jar mē kām Kris kot mē panê tanhmã amnhî nhîpêx toja jarēnh pa. ²⁴ Jakamã kot paj tokyx ma mē awÿr mō. Hãmri nê mē awÿr pōj pu mē axpēn pumu nê pahkînh nê axpēn mã pakapēr o papa. Pa mē akôt ri ixpa tãmtã hamũ pyka pê Espãnhã wÿr ma mō. Nê kot paj inhnojarēt ka mē ixto Tirtûm wÿ nê inhmã ixãpkur xã hkwÿ gō pa ma mē hwÿr pry hã hkur o mō.

²⁵⁻²⁶ No na pa kormã mē awÿr inhnojarēt kêt nê. Kot paj ja rûm awjanã nê akupÿm Jerujarē hwÿr mō. Kamã Kris kôt mē pahkwÿjaja kēp amrakati nê ri pa nhûm pika pê Gres mē Masetōn kamã Kris kôt mē pahkwÿjaja mē harēnh ma nê mē kām kãxpore hkwÿ ho akuprō

nê mē kaxyw inhmã kugō. Tã kot paj ma mē hwÿr o mō nê mē kām kure nê rî kormã ma mē awÿr mō. ²⁷ Jerujarē kamã Kris kôt mē pahkwÿjaja Ijaew na mē. Mē kumrêx na prem Kris kôt amnhî xunhwÿ. Hãmri nhûm mē hkwÿjaja ma mē apê Ijaew kêt xwÿnhjê mã kapēr jarēnh o ri mē akwÿ hkôt pa. Hãmri nhûm pika pê Gres kamã mē pa xwÿnhjaja mē kapēr ma nê mē urak nê Kris kôt amnhî xunhwÿr kurê kumrêx. Jakamã amnhî xwar kām nhãm krî hō kamã Kris kôt mē pahkwÿjê ho mex prām nê. Hãmri mē kām kãxpore hkwÿ ho akuprō nê mē kaxyw inhmã kugō.

²⁸⁻²⁹ Tã kot paj ma Jerujarē hwÿr mē kām o mō nê mē kām kure hãmri nê awjanã nê rî kormã ma Rôm wÿr mē awÿr mō. Hãmri nê mē awÿr pōj pu mē axpēn pumu nê pahkînh nê. Nê axpēn mã Jesus Kris mex o mex ā harê nê kām tanhmã amnhî jarēnh to ho papa. Jao pahkînh nê papa. Tã pa hpãnhã hamũ ma Espãnhã wÿr mō.

³⁰ Nê na pu prem Jesus Kris o panhō Pahihti. Jao te mē pahpê hkôt axpēn to pahtō nê pahtōx pyrak o axpēn nhîpêx. Nê Karō nhÿ hã pamã axpēn kînh nê. Jakamã kwa Jesus kôt ixkwÿjaja. Kêr ka mē ixpê mē atō hã ixto Tirtûm wÿr kām axihtÿx nê. ³¹ Kêr pa ma pyka pê Jutej kamã Jerujarē kamã Kris kôt mē pahkwÿjê hwÿr mō nê mē kām kãxporeta gō nhûm mē omu nê Ijaew kêt xwÿnhjê kot mē kām ôr ā mē omunh tã tee ri hamaxpēr kêt nê. Âm hkînh kām mãmrî àmnhîx hamÿ nê ho amnhûm awjaprō.

Nê kêr ka mē ixto awÿ kē inhne mē kēp mē pahkwÿ hkêt xwÿnhjê pumunh mex nê.

³² E kêr ka mē ā ixto Tirtûm wÿr anê. Kê ixte ma Jerujarē rûm ma Rôm wÿr pâr kām inhmōrta ā kê ixpumunh mex nê. Pa inhmex pê mē kurûm ma mē awÿr mōn pōj pu mē tokyx axpēn pumu nê pahkînh nê.

Pa mẽ ate tanhmã amnhĩ nhĩpêx to ho ri apa hã mẽ apumunh o mẽ akôt ri ixpa nê ixkĩnh nê. ³³ Tã ãm ja pix. Kê Tĩrtũm mẽ akôt pa ho pa. Tãm na hte tanhmã mẽ pahto pu mẽ ỹ hã pajamakêtkati paxãmnhĩx ri pahkĩnh nê ri papa.

16

Pawre kot ahpyñhã hkrãmnhwýjê mã kapêr

¹ Ku nê mããnên ja. Ot pa mẽ awýr Kris kôt pahtõx Pepreja mẽ awýr kumê. Na hte krĩ pê Sênkrej kamã Kris kôt mẽ pahkwýjê tanhmã mẽ ho mex to ho ri mẽ hkôt pa. ² Nê mããnên pa na hte tanhmã ixto mex to. Tã kê mẽmo arĩgro hã mẽ awýr pøj ka mẽ kêp Kris kôt mẽ pahtõx ã omu nê ho mex nê tanhmã ho ajuta hto.

³ Nê kêr ka mẽ atar Kris kôt ixkrãmnhwýjê mã ijarê. Na pa hte mẽ kãm ijamaxpêr rãhã ho ri ixpa. Nê Akirti mẽ hprõ Prisireta ka mẽ wa kãm ijarê. Na pre hte wa inhĩhkô hã Jejus Kris mã tanhmã amnhĩ nhĩpêx mex to ho wa pa. ⁴ Jao wa amnhĩ grõnh kôt mẽ kãm ixkurê xwýnhjê pê ixpyta. Pa amnhĩ tã wa omu nê inhmã wa hkĩnh nê. No ãm papxipix inhmã wa hkĩnh kêt nê. Na pre Ijaew kêt xwýnh kwý pê Kris kwýjaja ixtã wa harênh ma nê haxwýja kãm wa hkĩnh nê.

⁵ Nê na hte Kris kwýjaja wa õrkwý kamã axpên wýr akuprõ. Mẽ kot Tĩrtũm mã amnhĩ jarênh nê kapêr ã kagã hkwy mar kaxyw axpên wýr akuprõ. Tã kêr ka mẽ mẽ kãm ijarê.

Nê Kris kôt mẽ pahtõ Epênre mã ijarê. Kêp ixkrãmnhwý mex na. Inhmã hkĩnh. Kumrêx na pre jar pika pê As kamã amnhĩ kaxyw Kris kôt hamaxpêr nê hkôt amnhĩ xãm.

⁶ Nê Kris kôt mẽ pahtõx Marir ka mẽ kãm ijarê. Na xep hte tanhmã mẽ ato mex to rũnh o pa.

⁷ Nê Kris kôt mẽ pahtõ ãrõhti mẽ Jũhti wa kãm ijarê. Ixpyrà nê wa

kêp Ijaew na wa. Kormã ixte Kris kôt amnhĩ xãm kêt ri na pre wa kumrêx hkôt amnhĩ xãm. Na hte Jejus nhỹ hã mẽ ahkre ho mẽ pa xwýnhjaja wa kot Kris kapêr jarênh mex ã wa harê. Tã ã amnhĩ nhĩpêx anhýrja mýrapê na pre mẽ hkwýjaja wa unê nê wa haxã pa prem ixpim-ràatã ixpê prês nê mẽ hãgênh xã kamã ixkrĩ.

⁸ Nê Kris kôt mẽ pahtõ ãpritre mã ka mẽ ijarê. Kêp Kris kôt ixkrãmnhwý mex na.

⁹ Nê Kris kôt mẽ pahtõ Upãnre mã ijarê. Na hte ixpyrà nê Kris mã tanhmã amnhĩ nhĩpêx to ho ri pa.

Nê Kris kôt mẽ pahtõ Etaki mẽ ijarê. Kêp ixkrãmnhwý mex na.

¹⁰ Nê Kris kôt mẽ pahtõ Apes ka mẽ kãm ijarê. Na prem ra Kris ã hipêx punuj nê no nhũm mẽ kutã amnhĩ to htýx nê Kris kaga hkêt nê.

Nê Aristopti nhõrkwý kamã hkwýjê mã ijarê.

¹¹ Nê Kris kôt mẽ pahtõ Erojãwti mã ijarê. Ixpyrà nê kêp Ijaew na.

Nê Nasisti nhõrkwý kamã Kris kwýjaja ka mẽ kãm ijarê.

¹² Nê Kris kôt mẽ pahtõx Xiripêre mẽ Xiripos wa kãm ijarê. Wa kêp Pahihti Jejus mã tanhmã amnhĩ nhĩpêx mex to xwýnh na wa.

Nê Kris kôt mẽ pahtõx Pesixti mã ijarê. Haxwýja kêp ixkrãmnhwý na. Na hte Pahihti Jejus mã tanhmã amnhĩ nhĩpêx mex to ho ri pa.

¹³ Nê Kris kôt mẽ pahtõ Rupti mã ijarê. Na hte Kris kôt amnhĩ nhĩpêx mex o ri pa. Nê katorxã mã ijarê. Na pre te ixpê hkra nhĩpêx pyràk o inhĩpêx.

¹⁴ Nê Kris kôt mẽ pahtõ Asĩnre mã nê Prekõxti nê Emes nê Patopas nê Emas mẽ. Jajê piitã mẽ pahkwý kot mẽ hwýr pikuprõnh xwýnhjê mẽ mẽ ho apimràatã mẽ kãm ijarê.

¹⁵ Nê Kris kôt mẽ pahtõ Pirorti mã nê mẽ pahtõx Juure mẽ Nêrew wa nê htõxja nê mẽ pahtõ Orĩpti wa mẽ kãm ijarê. Nê mẽ pahkwý kot

mê hwÿr pikuprôn timer xwÿnhjê mê mê ho apimràâtâ mê kâm ijarê.

E kêr ka mê jajê piitâ mê kâm ijarê. Na pa hte mê kâm ijamaxpêr râhâ ho ri ixpa.

¹⁶ Nom mê tapxipixjaja kêt. Â mê apiitâ mâ na pa hte ijamaxpêr râhâ ho ixpa.

Nê ota jar Kris kwÿjaja mê awÿr hpêr mê.

¹⁷ Kwa ixkràmnhwÿjaja. Na ka mê ra aprî hâ Tîrtûm kapêr mar tÿx nê. Tâ kêr ka mê amnhî nê mê kot Tîrtûm kapêr o hêx xwÿnhjê pumunh mex o apa. Mê kâm axpên nê mê ato hpigrânh par prâm. Nê mê ate Kris kaga nê hpânhâ mê kot amnhî nhîpêx o amnhî nhîpêxja mê kâm hprâm jakamâ kwa mê amnhî nê mê omunh mex nê axkâm ajamak rom. ¹⁸ Na htem â amnhî nhîpêx anhÿr o Pahihti Kris mâ tanhmâ amnhî nhîpêx to ho pa hkêt nê. Âm amnhî hkrâ hkôt tanhmâ ri hkwÿjê jahkre hto ho pa. Kot mê no kupyr kaxyw tanhmâ mê kâm hêx to ho ri mê hkôt pa. Te mê ahkre mex pyrâk tâ mê ahkre mex kêt nê. Jakamâ nhûm htÿx ri mê pa xwÿnhjaja mê kot mê ahkreja ma nhûm te mê kâm mex pyrâk. Jakamâ kwa mê okora mê amnhî nê mê omunh mex nê. ¹⁹ Na ka htem mê kurom Kris kôt amnhî nhîpêx mex nê nhûm xep mê piitâ mê apumu nê axpên mâ ja hâ mê ajarênh o ri pa. Pa mê ajarênh ma nê ixkînh nê. Tâ kêr ka mê arî ajamaxpêr mex râhâ ho ri ajamaxpêr o apa. Nê amnhî nhîpêx mex râhâ nê. No tanhmâ ajamaxpêr punuj to ho ri amnhî tomnuj o ri apa hkêt nê. Â mê ate amnhî nhîpêx anhÿrja na inhmâ hprâm.

²⁰ Nê na hte Satanasti mê hkwÿjaja mê ate Jejus kaga hprâm xâj mê akôt tanhmâ ri mê anhîpêx to ho ri pa htâ kêr ka mê amnhî tâ mê omu nê tee ri amnhî kukamâ ajamaxpêr kêt nê. Koja gaa nhûm Tîrtûm mê hipêx o te mê kot kagâ

xoprê hkrâ xôm nê hpîr pyrâk o mê hipêx. Jakamâ â mê kot mê anhîpêx anhÿr tâ koja Tîrtûm mê amâ mê ajamakêtkati xâja gô. Tapxipix na kot mê pajamakêtkati xâ nhôr kaxyw âhpumunh tÿx.

Nê na pa hte mê ato Pahihti Jejus wÿ nê kâm:

—Pa Pahihti. Kwa kêr ka Rôm kâm akwÿjê pumu nê mê ho mex nê mêmoj to mê kutâ anojarêt râhâ ho ri apa. Anê.

²¹ Nê ota mê pahtô Ximotreja mê awÿr hpêr mê. Na hte inhîhkô hâ Kris mâ tanhmâ amnhî nhîpêx to ho ri pa. Nê ixtô Rusti mê Jasâwti mê Sosipa wa mê haxwÿja mê awÿr hpêr mê.

²² Nê kot inhmâ ixkapêr â kaga xwÿnh Testi haxwÿja mê awÿr hpêr mê. Kêp Kris kôt mê pahtô na. ²³ Nê Kris kôt mê pahtô Gajre haxwÿja mê awÿr hpêr mê. Ôrkwÿ kamâ na hte Kris kwÿjaja axpên wÿr akuprô nê kamâ Tîrtûm mâ amnhî jarê nê kapêr â kagâ kamâ harê nê mar o hkrî. Ôrkwÿ kamâ na pa pre pøj.

Nê mê pahtô Eras haxwÿja mê awÿr pêr mê. Na hte jar krî ja kamâ Rôm nhô pahihti mâ ô kâxpore jamâr pê ho mêmoj to anhÿr o pa.

Nê Kris kôt pahtô Kwatre haxwÿja mê awÿr hpêr mê. E jajaja piitâ na mê awÿr hpêr rê.

²⁴ E kê Pahihti Jejus Krisja mê akutâ nojarêt râhâ ho pa.

Pawre kot Tîrtûm mex o mex â harênh

Epês 1.3, 3.20-21; Wam Ximotre 1.17; Eprêw 13.20; Jutre 24-25

²⁵ Nê kwa kêr pu mê Tîrtûm mâ mex â harênh râhâ ho ri papa.

Nê ixte mê amâ Jejus Kris jarênhata â ka prem ama nê hkôt amnhî xunhwÿ. Tâ koja mê ato mê axihtÿx ka mê hkôt axihtÿx kâm hkôt ri amnhî nhîpêx mex o ri apa. Amnepêm na pre Tîrtûm mê apê Ijaew kêt xwÿnhjê ho hkra kaxyw hâ amnhî jarênh kêt nê. Kormâ

ja ho hpimxur ryy në. ²⁶ Tã ã mẽ anhĩpêx anhÿrja o amnhĩrĩt në ŷ hã mẽ kapêr jarênh o ri pa xwÿnhjê mã kapêr në mẽ kãm:

—E Jejus kot tanhmã amnhĩ nhĩpêx to ho pata kêr ka mẽ piitã mẽ kãm hã kagà kê mẽ pyka piitã hkôt kamã harê në kuma. Nom kê Ijaew pixjaja mar kêt në. Kê pika piitã hkôt kamã harê në kuma. Panhĩ në kupê në kupê hkà htykre në mẽ hkà haka në mẽ hkà kamrêkjaja. Kê mẽ piitã Jejus jarênh ma në amnhĩ kaxyw hkôt hamaxpêr në hkôt amnhĩ xunhwÿ. Hãmri në hkôt amnhĩ nhĩpêx mex o ri pa. Anê.

Nhũm pre ã mẽ pakaxyw mẽ kãm kapêr anê nhũm prem kuma në hã kagà.

²⁷ Nà Tĩrtũmja tapxipix na àhpumunh tÿx xwÿnh ã ãm pyxi mex. Nê tapxipix kêp mẽ pahpiitã Mêpahpãm. Tã kêr pu mẽ Jejus Kris kot mẽ panê htyk ã omunh xà hkôt Tĩrtũm pix mã mex o mex ã mãn harênh rãhã ho papa.

Tã ãm ja pix. Ixpê Pawre na pa ã mẽ awÿr ixpêr mẽnh anê. Na hapêx.

Wam Korît Pawre kot Korît kãm Jejus kôt hkwyjê hwÿr kagà nê mênh

Pawre na pre kagàja nhîpêx. Jejus nhÿ hã kapêr jarênh o pa xwÿnhjê hô na pre. Na pre hipêx nê ma krî pê Korît kãm Jejus krajê hwÿr kumê. Nê kagàja kamã mê kãm tanhmã mêmôj tâ karô hto. Na pre mê kot àhpumunh tÿx ã amnhî to jarkrar o pa nê mê kãm kapêr. Nê tanhmã amnhî tomnuj to nê mê kãm kapêr. Nê mê hprô nê mê mjên xwÿnhjaja tanhmã wa kot axpên nhîpêx to hã mê kãm karô. Nê mê kot Tîrtûm mã mex o mex ã harênh kaxyw axpên wÿr mê pikuprônê nê tanhmã amnhî nhîpêx to hã nhûm mê kãm karô. ã na pre Pawre mê kãm mêmôj tâ karô nê hã kagà anê. Nê mê kãm:

¹ Pa Korît kãm Jejus kôt ixkwÿjaja. Xà mê amex? Ot pa mê awÿr kagàja nhîpêx nê kumê. Ixpê Pawre na pa Kris kôt mê pahô Sostenes mê wa awÿr ixpêr mê. Tã kagàja nhîpêx nê mê awÿr kumê. Tîrtûm na pre ixte Jejus Kris nhÿ hã mê ajahkre ho ri ixpa kaxyw ixãm. ² Tã ot pa mê awÿr kagà nhîpêx nê mênh mã. Korît kãm ixpyrà nê mê apê Tîrtûm krajê hwÿr.

Tîrtûm kot amnhî kaxyw mê axunhwÿr jakamã na ka prem amnhî tomnuj kaga nê Kris kôt amnhî xunhwÿ nê hkôt amnhî nhîpêx mex o ri apa. Krî piitã hkôt mê kot amnhî to Jejus Kris wÿr o mê pa xwÿnhjê pyrà nê. Mê panhõ Pahihti Jejus Krisja ãm pixi mex na.

³ Nê Tîrtûm kêp Mêpahpãm maati nê Jejus Kris kêp mê panhõ Pahihti jakamã na pa hte mê ato wa hwÿr rãhã o ri ixpa nê mê ato wa hwÿr o:

—Kwa Tîrtûm mê Jejus wa. Kêr ka wa Korît nhõ xwÿnhjê kutã anojarêt rãhã ho wa ri apa. Nê mê ho mex rãhã nê. Kê mê amnhî tâ war apumunh kôt ri hamakêtkati nê hkînh nê àmnhîx tanhmã ri amnhî nhîpêx to ho ri pa. Anê.

Tîrtûm kot Jejus Kris kukwak ri mê pahô mex ã harênh

Sikûn Pêtre 1.2; Wam Tesarôn 5.23-24

⁴ Nê mê ate amnhî kaxyw Jejus Kris kôt ajamaxpêr o ri apa jakamã na hte Tîrtûm mê ato mex nê. Tã pa hte kãm amnhî jarênh kaxyw nê kãm mê ajarênh o:

—Pa Tîrtûm. ãm hãmri na ka pre Korît nhõ xwÿnh kwÿjê ho akra. Nã ja mex o mex. Anê.

⁵ Nê ra mê ate Kris kôt amnhî xunhwÿr jakamã na ka mê ra amex kumrêx nê ri apa. Nê aprî hã Kris kot amnhî nhîpêx pumunh mex nê aprî hã akwÿjê mã harênh o ri mê hkôt apa. ⁶ Na pa pre mê awÿr mô nê mê amã Kris kot amnhî nhîpêx ã harênh o ri mê akôt ixpa. Ka prem inhma nê hkôt amnhî xunhwÿr tÿx kurê kumrêx. ⁷ Jakamã nhûm Tîrtûm mê ate kãm tanhmã amnhî nhîpêx to ho apa kaxyw mê ato mê axihtÿx. Nê kaxyw mê amã mê ate axpên to mex xà piitã mê amã kugô. Mê ate Jejus kot akupÿn mê pahwÿr wrÿk jamãr pê hapêr arît o apa pê tanhmã kãm axpên nhîpêx to ho apa kaxyw. ⁸ Koja Tîrtûm tanhmã mê akrà hto ka mê hkôt pix mã ri amnhî nhîpêx rãhã nhûm Pahihti Jejus Krisja akupÿn mê pahwÿr wrÿ. Hãmri nê mê ate amnhî nhîpêx ã mê apumu nê mê ajarênh o:

—Nã ãm hãmri na hte jajaja amnhî to mex pix o ri pa. Anê.

⁹ Nê koja Tîrtûm ra kot amnhî jarênh xà hkôt mê ato mex nê. Ra kot mê ate Pahihti Jejus Kris kôt apa kaxyw amnhîm mê axunhwÿr jakamã koja ra kot amnhî jarênh xà hkôt mê ato mex rãhã nê.

Mê pahte mëmoj tâ axpên pê pah-pigrânh kêt ã më pamã karõ

Rômân 15.5-6; Sikûn Korîit 13.11; Epes 4.1-6; Piripos 2.1-4; Wam Pêtre 3.8

¹⁰⁻¹¹ E Kris kôt ixkwýjaja. Na ka xep htem mëmoj tâ axpên mã axàkjêr pix o ri apa nhùm pre Krojre hkwýjaja amnê ixwýr pøj nê inhmã më ajarê. Kwa nã më ã amnhî nhîpêx anhýr kêt nê. Kêr ka më axpên kôt ri amnhî nhîpêx rãhã ho ri apa. Nê axpên kôt ri ajamaxpêr rãhã nê. Te ixkre tipxi kamã më ri apa pyrãk o mãn kêt më axpên nhîpêx o ri axpên kôt apa. Nê më axpên kutã anojarêr rãhã ho ri apa. No mëmoj tâ axpên mã axàkjêr pê axpên pê apigrânh kêt nê. Na pa Pahihti Jejus Kris nhý hã më amã ã ja hã karõ anê.

¹² Nê na ka xep htem ahpýnhã ri më apê më ixkwý hã amnhî jarênh o ri apa. Jao më akwýjaja pa ixkôt ri amnhî nhîpêx xwýnh ã amnhî jarê. Nê më akwýjaja axtem Apor kôt ri amnhî nhîpêx xwýnh ã amnhî jarê. Nê më akwýjaja axtem Simãw Pêtre hkôt amnhî nhîpêx xwýnh ã amnhî jarê. Nê më akwýjaja axtem Kris kôt amnhî nhîpêx o ri apa xwýnh ã amnhî jarê. Æ na ka xep htem ahpýnhã amnhî jarênh anhýr o ri pa.

¹³ Kwa nã ka më ã ahpýnhã amnhî jarênh anê nê te më ate Kris o apigrânh pyrãk o hipêx. Kwa mon ka hte më akwýjaja apê ixkwý hã amnhî jarê? Xã pa na pa pre pî kahpa hã ajêt nê më anê ty? Nã Kris pix na pre më panê hã ajêt nê ty. Xã më apê pa ixkwý hã amnhî jarênh kaxyw na prem më akrã kumrã? Nã më apê Kris kwý hã amnhî jarênh kaxyw na prem ã më anhîpêx anê. Mê kot ja hã më apumunh xwýnhjaja kot më apê Kris kwý hã më apumunh kaxyw. Tã na ka xep htem axtem nê ã ri ahpýnhã më kãm amnhî jarênh anhýr o ri apa.

¹⁴⁻¹⁵ Kop ãm ixte amnhî kôt më axunhwýr prãm ronhýx pa më ato më axohtõ nê më akrã kumrã nê më amã: “E ra më apê ixkwý na ka më.” Anê. Nom na pa pre ã më amã ixkapêr anhýr kêt nê. Æm hãmri na pa pre ãm më ato grêre nê më akrã kumrã. Æm Kripti më Gajre wa pix. ¹⁶ Ku nê xep mãânên Estepti nê kaxyw më hkwýjaja. Æm jajê pixjaja. Nom ko apu axte më hkwý ko. Ixte më hkrã kumrãr xwýnhjê mã ijamaxpêr týx kêt. ¹⁷ Na pre Kris ixte më hkrã kumrãr o ri ixpa kaxyw ixãm kêt nê. Æm ixte më kãm kapêr jarênh o ri më hkôt ixpa pix kaxyw na pre ixãm.

Nê na pa hte amnhî krã hkôt ri ixujarênh o ri më akôt ixpa hkêt nê. Kot pa ã amnhî nhîpêx anê nhùm më ixkapêr mex ã inhma nê pa ixkôt amnhî xunhwý. Ja pymaj na pa hte amnhî krã hkôt ri tanhmã ixujarênh to ho ri ixpa hkêt nê. Na pa hte ãm ixprî hã Kris kot tanhmã më panê amnhî nhîpêx to hã harênh o ri më hkôt ixpa. Mê pahpiitã më panê htyk ã harênhja pa hte më kãm harê. Mê kot hprî hã mar nê hkôt amnhî xunhwýr kaxyw. Jao amnhî krãm më ujarênh mexta jagjênh nê hã no htýx kaxyw. Pa ja hã më omu nê ixkînh nê ijamaxpêr o:

—Na htem ixkapêr ma nê Jejus kôt amnhî xunhwýr kurê kumrêx. Nã ãm hãmri na pa hte më kãm ixkapêr kaprý ho ri ixpa hkêt nê. Anê.

¹⁸ No kêt më pahte Tirtûm kot më pahto hkra xwýnhjaja ra më pahte Kris pî kahpa hã më panê htyk ã harênh mar nê pahkînh nê papa xwýnh na pu më. Jakamã na pu htem pajamaxpêr o:

—Nã ãm hãmri na Tirtûm Kraja htyk kukwak ri më ixto mex nê më ixto hkra. Mê ujarênhja mex kumrêx. Anê.

No kêt mẽ kêp hkra hkêt xwỳnhjaja na htem tee ri Kris tyk ã harênh ma nê hamaxpêr o:

—Tk. Tanhmã kot kêt we amnhĩ to nê mẽ panê ty? ãm amarĩ mẽ kot amnhĩ krã hkôt pĩ kahpa hã nhôr nê hpĩr kênã. Anê.

Tĩrtũm kra hkêt xwỳnhjê jarênh

Matêwre 11.25-26; Wam Korĩt 3.19

¹⁹ Nê Tĩrtũm kapêr ã kagã htũm kot mẽ kêp hkra hkêt xwỳnhjê jarênh kot:

Mẽ kot htỳx ri àhpumunh tỳx ã amnhĩ to jarkrar o pa htã kot paj mẽ kêp ja ho ijpêx pa nhũm mẽ ã amnhĩ jarênh anhỹr kaprỹ. Anê.

²⁰ Jakamã mẽ àhpumunh tỳx ã mẽ kot amnhĩ to jarkrar xwỳnhjaja nê mẽ kot Mojes kapêr o mẽ ahkre ho ri mẽ pa xwỳnhjaja nê mẽ kapêr rũnh xwỳnhjaja. Mẽ kot Tĩrtũm Kra hkôt amnhĩ xunhwỳr kêt jakamã te mẽ àhpumunh kêt pyrãk. Tĩrtũm kra hkêt xwỳnhjaja kot mẽ àhpumunh tỳx ã mẽ harênh tã no ãm Tĩrtũm noo mã te mẽ àhpumunh kêt pyrãk. Nê te htỳx ri mẽ kot amnhĩ nhĩpêx o pa pyrãk. ²¹ Tĩrtũm àhpumunh o àhpumunh jakamã na pre ra mẽ hkukamã hamaxpêr o:

—Nà kot paj mẽ àhpumunh tỳx ã mẽ omunh xà hkôt mẽ ho ixkra hkêt nê. ãm mẽ kot ixkra Jejus kot mẽ nê htyk ã harênh mar nê amnhĩ kaxyw hkôt hamaxpêr pix ã mẽ omunh xà hkôt kot paj mẽ ho ixkra. Anê.

²²⁻²⁴ No Ijaewjaja kãm amnhĩ krã hkôt pix mã amnhĩ nhĩpêx prãm jakamã na pa hte mẽ ixpê Jejus kwỳjaja mẽ hwỳr mra nê mẽ kãm Kris kapêr jarênh o ri ixpa nhũm mẽ inhma nê ãm mẽ inhma. Nê te mẽ kot mẽ inhmar kêt pyrã nê mẽ inhmã:

—Tk. Nà kot paj mẽ tokyx axujarênh kôt amnhĩ nhĩpêx kêt nê. Kot kaj mẽ inhmã mẽ ixte aa mẽmoj pumunh kêt õ ho anê pa mẽ ja hã

apumu nê axihtỳx ã apumu nê rĩ kormã hkôt amnhĩ nhĩpêx.

Anhỹr o inhmã kapêr. Tã no pa mẽ kãm ã amnhĩ nhĩpêx anhỹr kêt nê. ãm Kris kot mẽ panê pĩ kahpa hã htykja pix pa htem mẽ kãm harênh o ri ixpa. Ja kamã nhũm mẽ hkwỳjaja mẽ inhma nê ãm mẽ inhma nê Kris xihtỳx kêt ã ãm amarĩ htyk ã harê. No mẽ hkwỳjaja. Tĩrtũm kot amnhĩ kaxyw mẽ unhwỳr xwỳnhjaja na htem mẽ kurom mẽ inhma nê ra mẽ inhmar tỳx kurê kumrêx. Nê mẽ inhmã kapêr o:

—Nà ãm hãmri na Krisja Tĩrtũm pyrã nê hihtỳx o hihtỳx. ãm hãmri na ka ã harênh anê. Anê.

No Ijaew kêt xwỳnhjaja na Ijaew pyrã nê kãm amnhĩ krã hkôt amnhĩ nhĩpêx o pa hprãm kêt nê. Nê mẽ kãm mẽ àhpumunh tỳx pix prãm o pa. Jakamã na pa htem mẽ kãm Kris kapêr jarênh o ri mẽ hkôt ixpa nhũm mẽ hkwỳjaja mẽ inhma nê Ijaew kwỳjê pyrã nê ãm mẽ inhma nê mẽ inhmã:

—Tk. Nà na ka htem ãm ri axêx o ri apa. Kot pa mẽ akapêr mar kêt nê. Kot paj mẽ axàhpumunh tỳx ã mẽ apumu nê rĩ kormã mẽ ama nê mẽ akôt amnhĩ nhĩpêx.

Anhỹr tã pa mẽ ãm arĩ Kris kot mẽ panê htykja pix pa mẽ kãm harênh o ri mẽ hkôt ixpa. Nhũm mẽ hkwỳjaja mẽ inhma nê mẽ inhmã:

—Nà mẽ axàhpumunh kêt jakamã na ka htem atỳx ri ã ja jarênh anê.

Anhỹr tã no nhũm mẽ hkwỳjaja. Tĩrtũm kot amnhĩ kaxyw mẽ unhwỳr xwỳnhjaja na htem mẽ inhma nê mẽ inhmã kapêr o:

—Nà ãm hãmri na ka mẽ ã Krisja jarênh anê. Tĩrtũm pyrã nê àhpumunh o àhpumunh kênã. Anê.

²⁵ Tĩrtũm mẽ Jejus wa mẽ pakurom àhpumunh o àhpumunh nê hihtỳx o hihtỳx.

*Tîrtûm mē parom hihtýx o hihtýx
ã harēnh*

Matēwre 11.25; Sikûn Korîit 12.7-10; Xiakre 2.5

²⁶ E Kris kôt ixtō nē ixtōxjaja. Amnepê mã Tîrtûm kot amnhîm mē axunhwýrta ã tanhmã na ka prem amnhî nhîpêx to ho ri apa? Nã na ka prem axohtô nē jar mē noo mã axâhpumunh kêt nē ri apa. Nē mē apê pahi hkêt nē ri apa. Mē axohtô nē amnhî to hkryre nē ri apa. ²⁷ Tã nhûm Tîrtûm amnhî kôt mē ate amnhî to hkryre xwýnhjê xunhwý. Koja nhýrmã kot tanhmã mē pahpiitã mē pajarēnh to xã hã arîgrota kato hãmri nhûm mē âhpumunh týx ã amnhî to jarkrar xwýnhjaja Tîrtûm kot mē kurom mē pahto hkra hã mē pahpumu hãmri nē tee ri amnhî kukamã hamaxpêr nē amnhî kamã hpijaam týx nē. Nē mē hihtýx ã amnhî to jarkrar xwýnhjaja haxwýja. Nhûm Tîrtûm kot mē kurom mē pahto hkra hã mē pahpumu nē tee ri amnhî kukamã hamaxpêr nē amnhî kamã hpijaam týx nē.

²⁸ Na hte Tîrtûm amnhî kaxyw mē kot amnhî to hkryre xwýnhjê xunhwý. Nē mē kot mē kamã kahak o pa xwýnhjê xunhwý. Jar pyka ja kamã mē hkwy kot mē hkaga htã nhûm Tîrtûm amnhî mã mē unhwý. Mēmo kaxyw na hte ã amnhîm mē unhwýr anê? Nã mē kot nhýrmã tee ri mē âhpumunh týx ã amnhî jarēnh xwýnhjê pumunh nē axpēn mã mē harēnh o:

—Kwa mē pahte mē âhpumunh týx ã mē harēnh tã nhûm Tîrtûm mē pahpyrà nē amnhî kaxyw mē unhwýr kêt nē. Nã te mē âhpumunh kêt pyràk.

Anhýr o axpēn mã mē harēnh kaxyw na pre Tîrtûm amnhîm mē kot amnhî to hkryre xwýnhjê xunhwý. ²⁹ Jakamã kot puj mē nhýrmã Tîrtûm mã amnhî to jarkrar pē tanhmã kãm amnhî jarēnh to hkêt nē. Rý kãm:

—Kwa ga ixpumu Tîrtûm. Na pa hte ã amnhî nhîpêx anê nē ã amnhî nhîpêx anê. Kwa ja hã ixpumu nē ixtō akra nã?

Anhýr o amnhî to hwýr kêt nē. ³⁰ Æm Jejus pix kukwak ri na hte Tîrtûm mē pahto hkra. Tãm na pre Tîrtûm noo mã amnhîm mē paxunhwý. Mē pahte uràk nē pahpê hkra kaxyw. Jakamã na pu htem ãm pix kukwak ri amnhî nhîpêx mex o ri papa. Nhûm mē pamã âhpumunh týx xã hkwy gõ. Tã ra kot mē pahte amnhî tomnuj pē mē papytãr jakamã kot puj mē nhýrmã pahtyk tã no ãm akupým pahfür nē Tîrtûm mē wa kuri pahfür tûm nē pamex kumrêx nē papa ho papa. ³¹ Tã ã Jejus kot mē panhîpêx kot anhýr jakamã Tîrtûm kapêr ã kagã htûm kot ja jarēnh kot:

Kot ka mē amã mēmoj tã jarkrar prãm nom kêr ka mē kamjaja amnhî to jarkrar kêt nē. Mē panhõ Pahihti ra kot mē panê tanhmã amnhî nhîpêx toja pix ã tanhmã ho jarkrar to ho ri apa. Anê.

2

*Pawre kot tanhmã Kris jarēnh to
hã harēnh*

Sikûn Korîit 4.1-7; Wam Pêtre 3.15

¹⁻² E Kris kôt ixtō nē ixtōxjaja. Amnepê mã ixte mē awýr inhmôrta ã na pa pre inhnojarêr nē ijamaxpêr o:

—Kot paj ma mē hwýr mõ nē mē kãm Kris kapêr jarê. Kot amnhî grõnh kôt mē inhnê htykja pa mē kãm harê. Æm ja pix jarēnh o ri mē hkôt ixpa. Nom kot paj mē kapêr japjê xwýnhjê pyrà nē mē kãm ixkapêr japjê hkêt nē. Rý mē uràk nē te ixâhpumunh týx o ri ixkapêr japjê pyràk o ri mē kãm ixkapêr japjê hkêt nē. Kot paj ãm ixkatãt kôt ri mē kãm tanhmã Jejus jarēnh to pix o ri mē hkôt ixpa.

Anhýr o mē akukamã ijamaxpêr. Hãmri nē ma mē awýr mõ nē mē

awÿr pøj në mẽ amã Jejus kot mẽ panê htyk në akupÿm htĩrja pix jarênh rãhã ho ri ixpa. ³ Na pa pre tee ri amnhĩ kukamã ijamaxpêr në ijamaxpêr o:

—Hêxta waa në. Tanhmã kot pa we mẽ kãm Tĩrtũm kapêr jarênh to nhũm mẽ inhmar tÿx në hkôt amnhĩ xunhwÿr kurê kumrêx wehe? Kot paj amnhĩ krã hkôt mẽ kãm harênh kêt në. Ja kaxyw ijamaxpêr tÿx kêt kênã. Kot paj amnhĩ krã hkôt mẽ kãm harê nhũm mẽ ãm inhma në hkôt amnhĩ xunhwÿr kêt në. Nã kot paj Tĩrtũm nhÿ hã mẽ kãm tanhmã ixkapêr to kê tãm tanhmã mẽ hkrã hto kê mẽ inhma në hkôt amnhĩ xunhwÿr japêr.

Anhÿr o ijamaxpêr. ⁴ Nê mẽ ate inhmar kaxyw na pa pre ixêx rom tanhmã mẽ ano kupyr to ho ri ixpa hkêt në. Rÿ mẽ pajaja mẽ ixãhpumunh xã hkôt tanhmã mẽ amã ixkapêr to hkêt në. Na pa pre ãm Tĩrtũm Karõ nhÿ hã mẽ amã awjarê. Mẽ ate mar në hihtÿx o hihtÿx ã omunh kaxyw. ⁵ Jakamã na ka prem Tĩrtũm xihtÿx ã omu në amnhĩ kaxyw hkôt ajamaxpêr kurê kumrêx. No pa ixãhpumunh tÿx ã ixpumunh kôt ixkôt ajamaxpêr kêt në. Na ka prem ixkapêr ma në ajamaxpêr o:

—Nã Tĩrtũm na mẽ parom ãhpumunh o ãhpumunh në hihtÿx o hihtÿx.

Anhÿr o ajamaxpêr kôt ajamaxpêr kurê kumrêx.

Tĩrtũm Karõ kot mẽ pamã ãhpumunh xã nhõr ã harênh

Matêwre 7.6; Juãw 14.22, 16.13-15; Xiakre 3.13-18

⁶ Nê na hte Tĩrtũm kra hkwyjaja Tĩrtũm kot amnhĩ nhĩpêx ã omunh mex. Nê hamaxpêr ã omunh mex. Jakamã na pa hte mẽ ahkre japjê ho mẽ hkôt ixpa. Nom jar pika ja kamã mẽ pajamaxpêr tÿx xã ho mẽ ahkre hkêt në. Rÿ pika piitã hkôt

mẽ utar xwÿnhjê jamaxpêr tÿx xã ho ri mẽ ahkre ho ri ixpa hkêt në. Kojã nhÿrmã mẽ ãhpumunh xãja mẽ kêp hapêx pa. ⁷ Jakamã na pa hte ãm Tĩrtũm xãhpumunh xã pix o mẽ ahkre o ri ixpa.

Amnepê mã kormã mẽmoj piitã hkêt ri na pre Tĩrtũm amnhĩ kukamã amnhĩ jarênh o:

—Mẽ kot amnhĩ kaxyw Ixkra hkôt mẽ hamaxpêr o mẽ pa xwÿnhjaja kot paj mẽ ho ixkra nhũm mẽ mex kumrêx në pa ho pa.

Anhÿr o mẽ harê. Nom mẽ kot hkôt amnhĩ xunhwÿr kêt xwÿnhjaja nhũm kormã mẽ kãm ja ho amnhĩrit kêt në. Tã ja na pa hte ra mẽ kãm harênh rãhã ho ri mẽ hkôt ixpa nhũm mẽ Tĩrtũm kãm mẽ pahto hkra hprãm hã harênh ma. ⁸ Nom pika piitã hkôt mẽ ho amnhĩptar xwÿnhjaja na mẽ kormã ja mar kêt në. Kêp apu mẽ kot mar ronhÿx prem pĩ kahpa hã mẽ panhõ Pahihti nhõr në hpĩr kêt në. Mex o mex tã nhũm prem axtem në ã hipêx anê. ⁹ Mẽ kot mẽmoj mex pumunh kêt tã Tĩrtũm kapêr ã kagã htũm kot mẽmoj mex jarênh kot:

Na pre Tĩrtũm mẽ kãm hkĩnh xwÿnhjê kutêp mẽmoj mex kwÿ jaxwÿ nhũm mex o mex në mẽ ahã hikwÿ.

Aa mēhõ kot mẽmoj mex o mexja pumunh kêt.

Nê aa mēhõ kot ã mẽmoj kot anhÿr pumunh kêt.

Nê aa ã mẽmoj mex kot anhÿr kukamã hamaxpêr kêt.

Tã nhũm Tĩrtũm mẽ kutêp hkwy jaxwÿ.

Anhÿr o kot harênh tã no nhũm mẽ kot hkôt amnhĩ xunhwÿr kêt xwÿnhjaja ã kapêr anhÿrja mar kêt në. ¹⁰ Mẽ pamã na pre Tĩrtũm ja ho amnhĩrit. Na pre ra mẽ pamã Karõ gõ nhũm mẽ pamã gjêx o mẽ pamã mẽmoj to amnhĩrit mex në. Tĩrtũm Karõja ãhpumunh tÿx o ãhpumunh

tÿx. Nê kot hprî hã Tîrtûm jamaxpêr pumunh par. ¹¹ No mê papajaja na pu htem axpên jamaxpêr kôt axpên pumunh kêt nê. Na pu htem papam amnhî jamaxpêr ã amnhî pumu. Ja pyrã nê Tîrtûm Karô pix na hte Tîrtûm jamaxpêr pumunh. ¹² No mê pahpê hkra-jaja na hte mê pahkarôja pix mê pakamã pa hkêt nê. Na hte mâânên Tîrtûm Karôja mê pakamã pa nê mê pamã tanhmã mëmoj to amnhîrit to ho mê pahkôt pa. Nê Tîrtûm kot mê pakutêp mëmoj mex jaxwÿrja nhûm ja kukamã mê pamã harênh o amnhîrit.

¹³ Jakamã na pa htem amnhî krã hkôt ri mê kãm ixujarênh kêt nê. ãm Tîrtûm Karô nhÿ hã na pa hte ixprî hã mê kãm kapêr jarênh o ri mê hkôt ixpa. Ra Tîrtûm Karô kot mê amã gjêx xwÿnhjê mã pa ŷ hã ixkapêr. ¹⁴ No mê kãm Tîrtûm Karô kapêr mar prãm kêt xwÿnhjaja na htem Tîrtûm kot amnhî nhîpêx pumu nê hprî hã omunh kêt nê. Mê kãm kapêr mar prãm kêt jakamã na htem ri kot tanhmã mê pahto mex to hã harênh ma nê hamaxpêr o:

—Tk. Kwa mo kaxyw na htem ri ã Tîrtûm jarênh anê? Tanhmã kot we amnhî to nê mê pahto mex? Nã kot anhÿr kêt. Anê.

¹⁵ Nom mê pahpê Tîrtûm kra hkwy hã mê pahte Karô kapêr mar mex xwÿnhjaja na pu hte mê kurom Tîrtûm kot amnhî nhîpêx ã omunh mex nê. Nê Karô xô ri mar mex nê nhûm mê kot Karô kapêr mar kêt xwÿnhjaja tee ri ã mê pahte amnhî nhîpêx anhÿr ã mê pahpumu. Nom hprî hã mê pahte Tîrtûm kôt amnhî nhîpêx pumunh kêt nê. ¹⁶ Tîrtûm kapêr ã kagã htûm kot ja jarênh kot: Mêhõ na kot Tîrtûm jamaxpêr pumunh?

Nê mêhõ na pre we kãm hamaxpêr gõ?

Nã amrakati kumrêx. Tapxipix na àhpumunh tÿx o àhpumunh

tÿx. Anê.

Tã mê papajaja mê pahte Tîrtûm Karô kapêr mar tÿx xwÿnhjaja na pu htem Kris xô ri pahprî hã hamaxpêr kôt omunh mex nê.

3

Mê kot Tîrtûm mã tanhmã amnhî nhîpêx to xwÿnhjê jarênh

Wam Korîit 14.20; Karatas 5.16-21; Epes 4.14; Eprêw 5.11

¹ E Kris kôt ixtõ nê ixtõxjaja. Pa mê amã mëmoj jarê ka mê inhma nê kãm ajamaxpêr. Nã amnepê mã kormã mê ate Kris kôt amnhî nhîpêx tohtuj anhÿrta ã tanhmã na ka prem amnhî nhîpêx to ho ri apa wehe? Na ka prem arî ajamaxpêr tûm kôt pix mã amnhî nhîpêx. Kormã mê ate Tîrtûm Karô hkôt amnhî nhîpêx mex kêt jakamã na ka pre htem mëhprîre kot amnhî nhîpêx pyrãk o amnhî nhîpêx. Nê mê urãk nê kormã mëmoj piitã omunh kêt nê. Jakamã na pa pre mê amã ixujarênh kaxyw nê te mê ate kormã Tîrtûm kapêr mar kêt xwÿnhjê pyrãk o mê anhîpêx nê mê amã tanhmã ixujarênh to. ² Mê hkarare na htem mê hkã kagô pix kaõ nê kormã mê apkur xã mex kur kêt nê. Ja pyrã nê na pa pre te ixte mê ato hpîjaõr pyrã nê mê amã Tîrtûm kapêr piitã harênh par kurê kumrêx kêt nê. ãm mê amã hkwy pix jarê ka pre amã nê Jejus kôt amnhî xunhwÿ. Tã na pa hte arî mê amã hkwy pix jarênh o ri ixpa nê kormã piitã ho mê ajahkre jatur xãm mênh kêt nê. ³ Na ka htem arî te mê apê Kris kwÿ hkêt pyrãk o amnhî nhîpêx o apa. Nê mëmoj kôt axpên kãm agryk axpên mã axãkjêr o apa. ã amnhî nhîpêx anhÿr jao arî mê ate amnhî nhîpêx tûm kôt amnhî nhîpêx rãhã nê.

⁴ Na hte mê akwÿjjaja amnhî jarênh o: “Ixpê Pawre hkwy na pa.” Anê. Nê mê akwÿjjaja amnhî jarênh o: “Pa na ixpê Apor kwÿ na

pa.” Anē. Kwa na ka htem ā amnhī jarēnh anhūr o te mē apē Kris kwý hkēt pyrāk. ⁵ Apor mē pa ām wa ixte Tirtūm kapēr o mē ajahkre xwýnh pix na pa wa. Wa ixpē mē anhō pahihiti hkēt kēnā kot ka kēt mē axtem nē mē apē ahpýnhā wa ixkwý hā amnhī jarē. Na pa pre wa mē amā Tirtūm kapēr jarēnh o ri mē akôt ixpa ka prem wa inhma nē amnhī kaxyw hkôt ajamaxpēr tỳx nē. Nē hkôt amnhī xunhwý nom wa pa wa ixkôt amnhī xunhwýr kēt nē. Na pa wa ām Tirtūm kapēr o mē ajahkre nom amnhī kôt mē axunhwýr kēt nē.

⁶⁻⁹ E pa ixprī hā mē amā war amnhī jarē ka mē inhma. Te wa ixpē Tirtūm pur kām wa ixápēnh xwýnh pyrāk no mē kajaja te mē apē hpur pyrāk. Na htem hpur karē nhūm hirā nhūm mē kamā ahkre ho pa. Ja pyrā nē na pa pre ixkumrēx mē awýr ixpa nē mē amā Tirtūm kapēr jarēnh o ri mē akôt ixpa. Te mē kot pur kām ahkre ho ri pata pyrāk. Tā nhūm Apor ixpānhā ma mē awýr pa nē te mē kot pur karēta pyrāk o mē anhīpēx nē mē amā Tirtūm kapēr o mē ajahkre mex o ri pa. Xà na hte pur karēr xwýnhja rý kamā ahkre xwýnhja tām tanhmā mēmo hy hto nhūm ra higrôt nē hprēk nē ô? Nà na htem ām ahkre hpa nhūm arī hikwý. Nhūm Tirtūm tām tanhmā hyta to nhūm higrôt nē hprēk nē ô. Ja pyrā nē na hte Tirtūm mē ho hkra nē tanhmā mē ho nhūm mē amnhī kaxyw hkôt hamaxpēr tỳx nē hkôt amnhī nhīpēx mex o pa. Nom mē kām harēnh o pa xwýnhnta kôt amnhī xunhwýr kēt nē.

Nē na hte pur karēr xwýnh rý kamā ahkre xwýnhja tām tanhmā hyta to nē ho htūr kēt nē. Tirtūm pix na hte tanhmā ho nhūm higrôt. Ja pyrā nē na pa hte Tirtūm kapēr o mē ajahkre o ri mē akôt ixpa nom pa tanhmā mē ato ka mē apē Tirtūm kra nē ri apa hkēt nē.

Tanhmā kot pa mē ato ka mē apē hkra? Tapxipix na kot mē pahto hkra kaxyw āhpumunh. Nē tapxipix na hte tanhmā mē pahkrā hto pu mē kām hprām xà hkôt amnhī nhīpēx mex o ri papa.

Nē pur karēr xwýnh mē pur kām ahkre xwýnhja wa. Hamē wa ápēnh mex jakamā koja hamē wa kot pur kām ápēnh pānhā amnhīm ujamýnh rax nē. Ja pyrā nē kot paj mē ixte Tirtūm kapēr o mē ajahkre ho ri mē akôt ixpa xwýnhjaja nhūm Tirtūm nhýrmā mē ixápēnh pānhā mē inhma amnhīrer mex nē.

Nē te mē ate Tirtūm nhō ixkre pyrāk. ¹⁰ Nē pa te ixpē Tirtūm mā ixkre hā ixápēnh xwýnh pyrāk jakamā na pre Tirtūm mē akaxyw tanhmā ixto pa mē amā tanhmā kot amnhī nhīpēx to hā harēnh o ri mē akôt ixpa. Te ixte ô ixkre kaxyw ām xà maati xām pyrāk o mē anhīpēx. Jao mē amā kapēr jarēnh o ri mē akôt ixpa. Mē ate amnhī kaxyw hkôt ajamaxpēr nē hkôt amnhī xunhwýr kaxyw. Tā na ka prem hkôt amnhī xunhwý nhūm ixpānhā Tirtūm kapēr o mē ahkre ho mē pa xwýnh kwýjaja mē awýr mra nē mē amā kapēr jarēnh jatur xām kurē. Nē hprī hā ho mē ajahkre ho ri mē akôt pa. Te ho mē kot ixkre krax nhīpēx pyrāk o mē anhīpēx.

Nē kwa mē ate mē ahkre o mē apa xwýnhjaja kēr ka mē akatāt kôt mē ahkre mex rāhā ho ri mē hkôt apa.

¹¹ Nē Jejus Kris tapxipix na pu htem hkôt amnhī xunhwý nhūm mē panē mē pahte amnhī tomnuj o hapēx. Jakamā te kēp kýxpē ixkre nhīmōk ā nōr xà maatita pyrāk.

¹² Nē na htem tōhā ixkre nhīpēx kaxyw nē pī htỳx jakā nē ho hipēx nhūm kritpēm mē kām mex ry nē kuhē. No na htem tōhā nojarēt kām ixkre hā apē nē pī rerek o hipēx nhūm mē kām mex ry hkēt nē. Koja rôr nhyre hwýr mra nē mē kēp

hapôk nê homnu. Ja pyrâ nê na hte Tîrtûm kapêr o mê ahkre ho ri mê pa xwýnh kwýjaja te mê kot katât kôt pî htýx o ixkre nhîpêxta pyrâ nê katât kôt mê ahkre ho ri mê hkôt pa. No nhûm mê hkwýjaja axtem nê te mê kot pî rerek o ixkre nhîpêxta pyrâk o amnhî nhîpêx nê htýx ri Tîrtûm kapêr kwým ri tanhmâ mê ahkre hto ho pa. Jao hkwým ri amnhî nhîpêx râhâ ho ri pa.

¹³ Nê koja mêhõ pî htýx pix o amnhîm ôrkwý nhîpêx hâmri nhûm mêmo arîgro hâ tanhmâ amnhî to nê kêp pôr. No âm hâ pôja pix xêt pa nhûm kâm hikwý xâ nê ôkwa êja arî piitâ mex nhûm ixkre hpâm axte hâ pô janhôr o nyw. No koja pî rerek o hipêx nhûm mêmo arîgro hâ kêp pôr hâmri nê piitâ kêp kaxâr pa. Ja pyrâ nê koja nhýrmâ Krisja akupýn mê pahwýr wry hâmri nê mê pahte kâm tanhmâ amnhî nhîpêx to ho papaja piitâ hâ mê pahpumunh kôt tanhmâ mê pajarênh to. Koja mê pahkwýjaja mê pahte mê kot pî htýx o ixkre nhîpêxta pyrâ nê Tîrtûm mã mê pahte amnhî nhîpêx mex o mê papa xwýnhjê xâpênh pumu nê mê pahte amnhî to mex xwýnh â mê pajarê. Hâmri nê hpânâ mê kot pî rerek o ixkre nhîpêxta pyrâ nê mê kot kâm amnhî nhîpêx mex kêt xwýnhjê pumu nê mê kot amnhî to mex kêt xwýnh hâ mê harê.

¹⁴ Nê pî htýxja na hte tanhmâ amnhî to nê hpôr no âm arî mex nê kuhê nhûm mê piitâ arî mex â omu. Ja pyrâ nê koja Krisja mê kot kâm tanhmâ amnhî nhîpêx mex to ho mê pa xwýnhjê pumu nê mê kot tanhmâ kâm amnhî nhîpêx to hpânâ mê kâm amnhîre nhûm mê piitâ mê kot amnhî to mex â mê omu. ¹⁵ No pî rerekja na hte pôr nê kaxâr pa. Ja pyrâ nê mê kot Kris mã amnhî nhîpêx mex hkêt xwýnhjaja koja Tîrtûm mê kâm amnhîrer kêt nê. Nom arî mê kêp hkra jakamâ koja mê arî kuri htîr tûm nê pa. No

âm mê kot Tîrtûm mã amnhî nhîpêx mex kêt jakamâ koja mê hkwýjê hkînh â amnhîm mêmoj mex kwý jamýnh kêt nê. Te mêhõ nhôrkwý kêp hpôr nhûm mê hkukrêx kwý jamýnh kêt nê ý kamâ kurûm hapôx pyrâk.

¹⁶⁻¹⁷ E pa mê amâ mêmoj jarê. Ra mê ate mar tâ mân ka mê ra tanhmâ amnhî to nê hâ ano hkêt rý ko. Nà te mê pahpê Tîrtûm nhôrkwý pyrâk. Tîrtûm nhôrkwýja ô na. Tâ mê pahpê hkra nhûm Karô kot mê pakaxwýnh mã gjêx jakamâ te mê pahpê ôrkwý pyrâk. Jakamâ mê kot kapêr kwým ri mê ajahkre o ri mê pa xwýnhjaja te mê kot Tîrtûm nhôrkwý grânh xwýnh pyrâk. Koja mê nhýrmâ amnhî xâ htýx kamâ hamak o pa.

Mê pahte amnhî to jarkrar kêt â mê pamâ karõ

Wam Korîit 1.10-25

¹⁸ Nê kot kaj mê atõ axâhpumunh týx o amnhî to jarkrar o ri apa japêr. Kwa mê jam anhûre nê axte ri â amnhî nhîpêx anhýr kêt nê. Nê te mê ate amnhî nê axâhpumunh týx xâja nhâm rênh par pyrâk o amnhî nhîpêx. Mê paxâhpumunh xâja pika kamâ mê âhpumunh pix jakamâ kêt ka mê te amnhî nê nhâm rênh pyrâ nê hpânâ Tîrtûm xâhpumunh xâ hkôt pix mã amnhî nhîpêx o ri apa. ¹⁹ No pika kamâ mê âhpumunh xwýnhjaja Tîrtûm noo mã te mê hkrâ pipân nê htýx ri pata pyrâk. Tîrtûm kapêr â kagâ htûm kot mê harênh kot:

Pika ja kamâ mê âhpumunh týx â mê kot amnhî to jarkrar xwýnhjaja Tîrtûm noo mã te mê kot amnhî to hêx o pa pyrâk. Anê.

²⁰ Nê mãânên mê harênh kot:

Mê kot amnhî xâhpumunh týx â amnhî to jarkrar o ri mê pa xwýnhjaja na hte Tîrtûm mê omu nê mê kot â amnhî jarênh anhýr kaprý hâ mê harê. Anê.

21-22 Jakamã kwa kêr ka mẽ axte mẽ apê ixkwý rý mẽ apê Apor kwý hã amnhĩ jarênh o ri apa hkêt nê. Mẽ apê wa ixkwý hkêt kênã. Nẽ mẽ apê nhãm mēhõ hkwy hkêt. Mẽ pahpiitã mẽ pahpê Kris kwý na pu mẽ.

Nẽ kot puj mẽ nhÿrmã pahtyk tã akupÿm pahťir nẽ Tirtũm mẽ Jejus wa kuri pamex nẽ pahťir tũm nẽ ri papa. Jakamã kwa mẽ tee ri amnhĩ kukamã ajamaxpêr kêt nê.

Nẽ jarãhã mẽmoj piitã mẽ panhõ. Nẽ kormã mẽmoj kot amnhĩrit kêt xwÿnhjaja haxwýja mẽ panhõ na. Æm mẽmoj piitã mẽ panhõ jakamã te mẽ pahpê mẽmoj piitã mẽõ pahi pyrãk. ²³ No mẽ papajaja axtem Kris kêp mẽ panhõ Pahihti. Nẽ Tirtũm kêp Kris nhõ Pahihti.

4

*Tirtũm pix kot tanhmã mẽ pajarênh to xwÿnh ã harênh
Eprêw 13.17*

¹ Nẽ mẽ pajaja mẽ ixpê mẽ anhõ pahi hkêt. Æm mẽ ixte Kris mã tanhmã amnhĩ nhĩpêx to ho ixpa xwÿnh pix jakamã Tirtũm kormã kapêr kwý ho amnhĩrit kêtja na pa htem mẽ amã ho amnhĩrit o ri mẽ akôt ixpa. Ja kaxyw na pre mẽ ixunhwý. ² Na pre Kris tanhmã mẽ inhmã kapêr to nẽ mẽ inhmã:

—E kêr ka mẽ ixkapêr pix o mãn mẽ ahkre ho ri mẽ hkôt apa. Anê.

³⁻⁴ Kumã pix mã ixte amnhĩ nhĩpêx o ri ixpa jakamã koja tapxipix ixte kãm amnhĩ nhĩpêx ã ixpumunh kôt tanhmã ijarênh to. Ixte kãm amnhĩ nhĩpêx mex ã ijarê rý ixte kãm amnhĩ nhĩpêx mex kêt ã ijarê. Æm tapxipix koja tanhmã ijarênh to. No koja nhãm mēhõ rý mẽ atõ ã ijarênh anê pa ama nẽ ãm ama. Rý papam tanhmã kãm ixte amnhĩ nhĩpêx mex to hã kãm amnhĩ jarênh japêr hãmri nẽ ãm ixtÿx kãm ã amnhĩ nhĩpêx anhÿr ã amnhĩ jarênh kaprý. Pahihti Kris

pix kot hprĩ hã mẽ pahte amnhĩ nhĩpêx kôt pahpumunh jakamã tapxipix koja tanhmã mẽ pajarênh to.

⁵ Jakamã kwa kêr ka mẽ ri mẽ kot Tirtũm mã tanhmã amnhĩ nhĩpêx to hã mẽ omunh xã hkôt tanhmã mẽ harênh to hkêt nê. Koja nhÿrmã Pahihti Krisja akupÿn mẽ pahwÿr wrý nẽ rĩ tãm tanhmã mẽ pahte amnhĩ nhĩpêx to hã mẽ pahpumunh xã hkôt tanhmã mẽ pajarênh to. Nẽ mẽ kot hpimxur pê tanhmã amnhĩ tomnuj to ho mẽ pa xwÿnhjaja nhũm mẽ piitã mẽ noo mã mẽ kãm ja ho amnhĩrit nhũm mẽ ja hã mẽ omu. Nẽ mẽ pahpiitã mẽ pajamaxpêr xã ho amnhĩrit nhũm mẽ piitã hprĩ hã ja hã axpên pumu. Hãmri nhũm Tirtũm rĩ kormã mẽ pahte kãm tanhmã amnhĩ nhĩpêx mex to ho pa xwÿnhjê jarê.

⁶ E Jejus kôt ixkwýjaja. Nã na pa ã mẽ amã Apor mẽ wa amnhĩ jarênh anê. Mẽ ate inhmar nẽ Tirtũm kapêr ã kagã hkôt tanhmã wa ijarênh to kaxyw. Kot kaj mẽ ã amnhĩ nhĩpêx anê hãmri nẽ ahpÿnhã tanhmã mẽ ixte Kris kapêr jarênh xwÿnhjê jarênh to hkêt nê. Nẽ axpên mã mẽ ijarênh o:

—Nã tãm kot Kris kapêr jarênh mex o kot hkwyjê jakrenh jakamã kot paj hkôt pix mã mãn ri ixpa.

Anhÿr o axpên mã mẽ ixtõ jarênh kêt nê. Kot kaj mẽ ã mẽ ixtõ jarênh anê nẽ te mẽ ixtõ jarkrar pyrãk o amnhĩ nhĩpêx. ⁷ Kwa mēhõ na pre mẽ amã tanhmã ri mẽ ijarênh to ka mẽ mar xã hkôt ã mẽ ijarênh anê? Nẽ mẽ ixkapêr mex ã mẽ ixkwýjê jarê nẽ mẽ ixkapêr mex kêt ã mẽ ixkwýjê jarê. Nã na ka mẽ ãm amnhĩ krã hkôt ã mẽ ijarênh anê nom Kris xãhpumunh xã ho ã mẽ ijarênh anhÿr kêt nê. Æm mẽ ixte Tirtũm kapêr o mẽ ajahkre xwÿnhjaja na pa prem mẽ amã mẽmoj jarê ka mẽ ama nẽ mẽ

inhÿ hã hkôt axàhpumunh mex nê. No amnhî krã hkôt mê axàhpumunh kêt kênã kot ka kêt mê ã ahpÿnhã tanhmã mê ixto jarkrar anhÿr to ho ri apa.

⁸ Te mê ate Apor mê wa ixrom Tîrtûm kapêr mar par nê hkôt amnhî nhîpêx mex pyrãk. Te wa ixrom mê ate Jejus nhîhkô hã mê ho amnhîptâr pyrãk. Hêxta waa nê. Kop apu âm hãmri mê ate îhkô hã mê ho amnhîptâr ronhÿx pa ijaxwÿja mê apyrã nê ã amnhî nhîpêx anê. Hãmri nê ixkînh tÿx kumrêx. ⁹ Nom ja kot anhÿr kêt.

Jejus nhÿ hã mê ahkre xwÿnhjê jarênh

Sikûn Korîit 4.8-10; Eprêw 12.1

Nê mê ixpê Jejus nhÿ hã mê ajahkre ho mê ixpa xwÿnhjaja te Tîrtûmja axtem tanhmã mê inhîpêx to pyrãk pa mê inhmex kêt nê ixpa. Te mê ixte gyw kãm amnhî rênh nhûm mê kot mê ixkamã ôkre kahak pyrãk o na htem mê inhîpêx. Jakamã na hte mê hkwÿjaja mê ixpumu nê mê ixkapêr ma nê âm mê inhma nê axpên mã mê ijarênh o:

—Tk. Kot mê ahkreja mexti hã. Kwa pu mê himex ri.

Anhÿr jakamã te ra mê ixtyk nê mê inhîkwÿ nhûm mê piitã mê ixtã htu nê mê ixpumunh nê ma pa pyrãk o amnhî nhîpêx. Jakamã na htem mê ixte mê ahkre ma nê âm kuma nê ma pa. Nom Tîrtûm kapêr o mê wrÿk xwÿnhjaja na htem ja hã mê pahpumu nê axpên mã mê pajarênh o:

—Kwa mê kot Jejus ã mê hipêx kati htã nhûm mê arî hkôt amnhî nhîpêx mex nê aa hkaga hkêt nê. Hêxta waa nê. Nã âm hãmri na htem ã amnhî nhîpêx anhÿr o pa. Anê.

¹⁰ Na hte mê kot mê ixkapêr mar xwÿnh kwÿjaja kãm mê ixkînh kêt nê tanhmã mê ixto kapêr punuj to. No mê kajaja nhûm mê ã mê ato kapêr anhÿr kêt nê. Na htem mê ixkrã pipãnh ã mê ijarê no mê kajaja nhûm mê Kris nhÿ hã mê

axàhpumunh tÿx ã mê ajarê. Nê mê ixte Tîrtûm kapêr kôt amnhî nhîpêx mex kêt ã mê ijarê no mê kajaja na htem Tîrtûm kôt mê ate amnhî nhîpêx mex ã mê ajarê. Nê mê kot mê ixkamã ôkre kahak tÿx tã mê akamã ôkre kahak kêt nê mê kãm mê akapêr mar prãm nê. ¹¹ Na pa htem arî Kris ã ixpunuj nê ixpa. Nê mê inhmã prãm nê mê inhmã kôr nê ri ixpa. Nê mê ixê pikaxônhre nê ri ixpa. Nhûm htem Kris ã mê ixtak rûnh nê. Pa mê inhôrkwÿ hkêt nê nhãm ri ixpa nê nhãm ri ixpa. Na pa htem arî ã amnhî nhîpêx anhÿr o ri ixpa. ¹²⁻¹³ Nê ixàpkur xà kaxyw ixàpênh rûnh o ri ixpa. Nhûm hte mê kãm Jejus prãm kêt xwÿnhjaja mê ijaarÿ ho pa htã pa mê amnhî kurom mê kãm ixkapêr mex nê mê kãm:

—E kê Tîrtûm mê ato mex nê ka mê amex nê apa. Anê.

Nê mê kot mê inhîpêx kati htã pa htem mê kutã amnhî to htÿx nê arî mê hkôt ixpa. Na htem te mê kot ahpunuj nhîpêx pyrãk o mê inhîpêx nê mê ixwÿr mrar kêt nê. Æ na htem mê ixte Jejus nhÿ hã mê ahkre o mê ixpa xwÿnhjê nhîpêx anê.

Pawre te kêp mê hpãm pyrãk ã kot amnhîjarênh

Wam Tesarôn 2.11-12

¹⁴⁻¹⁵ E Kris kôt ixkwÿjaja. Na pa ã mê amã kagã nê mênh anê. Nom mê ate inhmar nê amnhî kamã apijaàm kaxyw kêt. Inhmã mê ajapê jakamã na pa ã mê amã ixkapêr nê hã kagã nê mênh anê. Na mê ra ohtô nê ixpãnhã mê awÿr pa nê mê amã Tîrtûm kapêr o mê ajahkre. Nom ixkumrêx na pa pre mê amã kapêr jarê ka prem inhma nê Kris hkôt amnhî xunhwÿ nê amnhî kaxyw hkôt ajamaxpêr tÿx nê. Jakamã paxipix te ixpê mê apãm nhûm te mê apê ixkra pyrãk. ¹⁶ Jakamã kwa mê ixte amnhî nhîpêx kôt ixpumu nê ixkôt mãnh kêt mê amnhî nhîpêx o ri apa.

17 ã mẽ ate amnhĩ nhĩpêx anhÿr kaxyw na pa pre ijamaxpêr nê ma mẽ awÿr Ximotre mẽ. Haxwÿja Kris kôt te kêp ixkra pyrâk. Nê inhmã hapêê. Na hte jar Kris mẽ tanhmã amnhĩ nhĩpêx mex to ho pa. Tã pa pre mẽ awÿr kumê. Kojã ma mẽ awÿr mō nê pōj nê mẽ amã Kris kapêr jarênh o ri mẽ akôt pa. Nê mẽ amã tanhmã ijarênh to nê mẽ amã:

—Nã Pawre na hte Jejus Kris jamaxpêr kôt hamaxpêr o pa. Nê kot amnhĩ nhĩpêx kôt amnhĩ nhĩpêx o pa. Nê krĩ piitã hkôt mẽ kot urâk nê ã amnhĩ nhĩpêx o pa anhÿr kaxyw mẽ ahkre mex o pa. Anê.

18 Nê na xep mẽ akwÿjaja te ra àhpumunh tÿx pyrã nê tanhmã ijarênh to nê ijarênh o:

—Pawreja akupÿn mẽ pahwÿr mōr ã amnhĩ jarênh tã kojã akupÿn mōr kêt nê kãm ga. ãm kapêr kati xwÿnh na.

19 Anhÿr ã ijarênh tã kojã Tirtũm kãm tokyx ma mẽ awÿr inhmōr prãm hã kot pa ma mẽ awÿr inhmōr kurê kumrêx. Hãmri nê pōj nê ixprĩ hã ã mẽ kot ixto kapêr anhÿr xwÿnhajê pumu. Nê mẽhō kot ã mẽ kãm ijarênh anhÿr xwÿnhata ã ahkukja. 20 Tirtũm krajaja na htem hkôt pix mã amnhĩ nhĩpêx jakamã na htem hkôt tanhmã amnhĩ nhĩpêx to hã mẽ omu nê rĩ kormã kêp hkra hã mẽ harê. Tã kot paj nhÿrmã mẽ awÿr pōj nê ã ixto kapêr anhÿr xwÿnhjê pumu nê ixprĩ hã mẽ kot amnhĩ nhĩpêx ã mẽ omu nê rĩ kormã tanhmã mẽ harênh to. Jao Tirtũm nhÿ hã mẽ kot mẽ ajahkre hã mẽ omu rÿ amnhĩ krã hkôt mẽ kot mẽ ajahkre hã mẽ omu nê rĩ kormã tanhmã mẽ harênh to. 21 Jakamã kwa mẽ tokyx ixkutêp tãm amnhĩ nhĩpêx o ri apa. Kêr pa mō nê mẽ awÿr pōj nê mẽ ate tãm amnhĩ nhĩpêx ã mẽ apumu nê ixkĩnh nê. Nê mẽmoj tã mẽ amã ixâkjêr kêt nê. Nê mẽ amã ixkapêr mex pix o ri mẽ amã ixkapêr. Te

mê hipêêxã kot hkrajê mã kapêr mex pyrâk o mẽ amã ixkapêr mex nê. Hãmri pu mẽ axpên pumu nê pahkĩnh nê.

5

Mêhō kot tanhmã amnhĩ tomnuj to hã harênh

Sikũn Korîṭ 2.5-11

1 Nê kwa na pa pre tee ri mẽ anhĩōja jarênh ma nê ixkaprĩ htÿx nê. Na xep hte amnhĩ tomnuj tÿx pè nã puro hã hpijaàm kêt o pa. Kwa mẽ pahpê Kris kwÿjaja mẽ pahte ã amnhĩ nhĩpêx anhÿr kêt nhũm mẽ kot Kris kôt amnhĩ xunhwÿr kêt xwÿnhjaja haxwÿja ã amnhĩ nhĩpêx anhÿr kêt tã nhũm ra mẽ anhĩōja kot Kris kôt amnhĩ xãm tã ã amnhĩ nhĩpêx anê. Kwa ja omnuj tÿx kumrêx. 2 Na xep ri ã amnhĩ nhĩpêx anhÿr o pa ka mẽ ja hã omu nê ãm omu nê nê tanhmã kãm nê hkêt nê. Amarĩ hã omunh o ri hkôt apa. Mẽ ate Tirtũm kôt axàhpumunh tÿx ã amnhĩ jarênh tã no ãm ja hã omu nê ãm hã omu nê nê tanhmã kãm nê hkêt nê. Kwa nã. Mẽ tee ri kot ã amnhĩ nhĩpêx anhÿrja ã omu nê akaprĩ nê hkêt wehe. Nê mẽ tokyx amnhĩ nê hano kê mẽ akôt Tirtũm mã amnhĩ jarênh xã hã ixkre hwÿr axte mrrar kêt nê.

3-5 Ixte mẽ apê awry htã ã kot amnhĩ nhĩpêx anhÿr ã harênh ma nê hkukamã tanhmã ijamaxpêr to. Nã ra ixte mẽ awÿr ixpôx ronhÿx pa mẽ ato akuprō. Pahihti Jejus nhÿ hã mẽ ato akuprō nê mẽ amã kot amnhĩ tomnuj xwÿnhata jarê nê mẽ anê hanor kurê kumrêx. Jakamã e kêr ka mẽ mãmri ã amnhĩ nê hipêx anê. Mẽ panhō Pahihti Jejus nhÿ hã amnhĩ nê hano nê te Satanasti mã rer pyrâk kê tee ri ja hã amnhĩ pumu nê tokyx kãm urer japêr. Hãmri nê akupÿm tãm amnhĩ nhĩpêx. Kê nhÿrmã Pahihti akupÿn mẽ pahwÿr wrÿ nhũm ma mẽ pahkôt ò krĩ hwÿr api.

6 Mē ate Tirtūm kapēr jarēnh mar mex ā amnhī jarēnh tā kormā amnhī nē ā kot amnhī nhīpēx anhÿr xwÿnhhta janor kêt nē. Kwa mē tokyx amnhī nē hano. Na htem pāwti nhīpēx kaxyw nē kamā kot ho hikot xà ho hkryre nē kamā kurē nē gaa nē rī ho piitā hikot pa. Ja pyrā nē kot ka mē amnhī nē kot amnhī tomnuj xwÿnhhta janor kêt nē hāmri nē gaa nē ra urāk nē apiitā ā amnhī nhīpēx anhÿr o ri apa.

7 Kwa mē tokyx amnhī nē hano. Kēr ka mē arī amnhī to mex pix o ri axpēn kôt apa nē tām ri amnhī nhīpēx o ri axpēn kôt apa. Na pre ra Jesus Kris mē pahte amnhī to mex o papa kaxyw mē panē ty. Mē pahpiitā mē panē ty. ⁸ Jakamā na pu htem ām amnhī to mex pix o ri papa. Nē tām amnhī nhīpēx o ri papa. Jao tanhmā amnhī tomnuj to ho ri papa hkêt nē.

⁹ Nē wam ixte mē awÿr kagā nē mēnhhta kamā na pa pre mē amā:

—Kēr ka mē nhām mē kot mēnijē kamā hpijaām kêt o mē pa xwÿnhjê hkôt ri apa hkêt nē. Ām ri mē hkàx ā apa.

Anhÿr o mē amā hā karō. ¹⁰⁻¹¹ Nom na pa pre mē piitā ā mē nē mē akurē anhÿr kêt nē. Ām mē kēp Kris kwÿ hā amnhī jarēnh tā ā ri amnhī tomnuj anhÿr xwÿnh pixjaja na pa pre mē nē mē akurē. Koja mēhō kēp Kris kôt mē pahtō rÿ mē pahtōx ā amnhī jarēnh tā mē kamā hpijaām kêt o ri pa ka mē ja hā omu nē hkôt ri apa hkêt kurē kumrēx.

Nē mē kām nhām mē hkukrēx kīnh o kām ho ō hprām o ri mē pa xwÿnhjaja.

Nē sānti kutā hkōn krā ho rôrōk nē hkrī nē kām mex ā harēnh o ri mē pa xwÿnhjaja.

Nē mē kot axpēn to kapēr punuj o ri mē pa xwÿnhjaja.

Nē mē pipānh o ri mē pa xwÿnhjaja.

Nē axpēn pē ri mē àhkīnh o mē pa xwÿnhjaja.

Koja mēhō kēp Kris kwÿ hā amnhī jarēnh tā ā amnhī nhīpēx anhÿr o ri pa ka mē ja hā mē omu nē hkôt ri apa hkêt kumrēx. Nē mē kutā axàpkur kêt nē. Ām mē hkàx ā ri mra.

No mē kēp Kris kwÿ hkêt xwÿnhjê nē na pa pre ā mē akurē anhÿr kêt nē. Mē piitā ā mē kot amnhī nhīpēx anhÿr o pa kēnā. Na htem axpēn kām hpijaām kêt o ri pa.

Nē mē kām axpēn kukrēx kīnh o kām ho ō hprām o ri pa.

Nē sānti kutā hkōn krā ho rôrōk nē hkrī nē kām amnhī jagerer pē amnhī to hwÿr o pa.

Nē mē axpēn pē àhkīnh pix o pa. Kris kwÿ hkêt xwÿnhjaja na htem ā amnhī nhīpēx anhÿr o pa. Tā tanhmā kot ka wem amnhī to nē mē hkàx ā ri apa? Mē piitā ā mē kot amnhī nhīpēx anhÿr kēnā. Kot puj mē nhÿrmā Tirtūm nhō krī mex wÿr api nē rī kormā mē hkàx ā ri papa.

¹²⁻¹³ Nē mē kēp Kris kwÿ hkêt xwÿnhjaja na pa hte mē kot amnhī tomnuj ā mē omu nē ām mē omu nē tanhmā hā mē kām nē hkêt nē. Tirtūm tām koja nhÿrmā ja hā tanhmā mē hipēx to. No koja Kris kôt mē pahtō rÿ mē pahtōxjê hō tanhmā amnhī tomnuj to ho pa pu mē pahtō ja hā omu nē nē tanhmā kām pakapēr to kurē kumrēx. Tirtūm kapēr ā kagā htūm kot ja jarēnh kot:

Kēr ka mē amnhī nē Kris kôt akwÿjê hō kot tanhmā amnhī tomnuj to ho pa xwÿnhjê jano. Ā harēnh kot anhÿr.

6

Mē pahte Kris kwÿjê ho pakapēr kêt

Matêwre 5.38-40

¹ Nē na ka xep htem Kris kôt atō rÿ atōxjê hō mē ka wa tanhmā axpēn tomnuj to nē axtem nē juisti

hwÿr axpën to mra. Më apyrã nê kêp Kris kwÿ hkêt tã ka htem ma hwÿr amnhĩ to mra nhũm war axpën tã war ama nê tanhmã war ajarënh to. Kwa mon ka htem axtem nê ã Kris kwÿ hkêt xwÿnhjê hwÿr më amnhĩ to amrar anê? Kêt më Kris kôt anhĩõ hwÿr mãn kêt më amnhĩ to mra nê kumã mãn amnhĩ jarê kê axpën tã war ama nê axpën tã tanhmã war amã kapër to.

² Ra më ate ja mar tÿx tã hkôt amnhĩ nhĩpêx kêt nê. Mëmoj ãm grire htã ka wa tokyx akupÿm hã tãm axpën xãm kêt nê. Rÿ Kris kôt war atôjê hõ hwÿr wa amnhĩ to atëm nhũm akupÿm tãm axpën tã war axãm kêt nê. ãm axtem nê më kêp Kris kôt më atô hkêt xwÿnhjê hwÿr amnhĩ to mra. Kwa më ã amnhĩ nhĩpêx anhÿr kêt nê. Më pahpê Kris kwÿjaja kot puj më nhÿrmã Kris nhĩhkô hã më kêp hkwy hkêt xwÿnhjê tanhmã më harënh to. ³ Nê Tirtũm kapër o më wrÿk xwÿnhjaja kot puj më mãânën nhÿrmã tanhmã më harënh to ho pahkrĩ. Jakamã kwa mãmrĩ ã më pahte amnhĩ nhĩpêx anhÿrja kukamã akupÿm tanhmã axpën xunhwÿr to ho apa. Mëmoj tã më atôjê hõ wa kot tanhmã axpën to hã wa omu nê tokyx akupÿm axpën tã wa kãm akapër kê wa tokyx akupÿm tãm axpën nhĩpêx. ã më kot axpën nhĩpêx anhÿr o paja na kêt mex. ⁴ No na ka xep htem arĩ Kris kôt më akwÿ hkêt xwÿnhjê hwÿr axpën to mra nê më kãm amnhĩ jarê. Kwa më ri ã amnhĩ nhĩpêx anhÿr kêt nê. ⁵ Më tokyx tee ri ja hã amnhĩ pumu nê amnhĩ kamã apijaãm kêt wehe. Xà më akamã Kris kôt më atôjê hõ pixire nê kot tãm akupÿm më axunhwÿr kaxyw amrakati kumrêx? ⁶ Na ka xep htem mëmoj tã axpu. Kris kôt më atôjê hõ më mëmoj tã axpu nê ra më kêp Kris kwÿ hkêt xwÿnhjê hwÿr amnhĩ to mra. Kot

tãm akupÿm më unhwÿr xwÿnhjê hwÿr amnhĩ to mra.

⁷ Më apijapu ho apa jakamã na ka më amnhĩ tomnuj tÿx nê. Hãmri nê te më apê Kris kwÿ hkêt xwÿnh pyrà nê më hwÿr amnhĩ to mra. Kwa kwãr Kris kôt anhĩõ mãmrĩ apê ahkĩ rÿ tanhmã anhĩpêx to. Ka më ãm amnhĩ tã omu kê tapxipix tanhmã amnhĩ tomnuj to. ⁸ Ja mex tã më ate ã amnhĩ nhĩpêx anhÿr kêt. Na ka htem axpën pê ahkĩ. Më ate Kris kôt axpën to atô nê atôx tã axtem nê ã axpën nhĩpêx anê. Te më apijaãm kêt pyrãk o amnhĩ nhĩpêx o ri apa. ⁹⁻¹⁰ Më kot tanhmã amnhĩ tomnuj to xwÿnhjaja koja më nhÿrmã ma Tirtũm nhõ krĩ mex wÿr àpir kêt nê. Ra më ate ja jarënh mar tÿx.

Mëmyjê hõ kot nhãm mënijê hõ ho amnhĩ kati xwÿnhjaja.

Nê mënijê hõ kot nhãm mëmyjê hõ ho amnhĩ kati xwÿnhjaja.

Nê mënijaja axtem nê më kot amnhĩõ ho mjên o ri më pa xwÿnhjaja.

Nê mëmyjaja haxwÿja axtem nê amnhĩõ ho hprõ ho ri më pa xwÿnhjaja.

Nê më àhkĩnh o ri më pa xwÿnhjaja.

Nê më kãm nhãm më hkukrêx kĩnh o kãm ho õ hprãm o ri më pa xwÿnhjaja.

Nê ri më pipãnh o më pa xwÿnhjaja.

Nê ri axpën to kapër punuj o më pa xwÿnhjaja.

Nê më kot amnhĩ to sãnti hwÿr o më pa xwÿnhjaja.

ã më kot amnhĩ nhĩpêx anhÿr xwÿnh piitã koja më Tirtũm nhõ krĩ hwÿr àpir kêt nê.

¹¹ Kormã më ate Kris kôt amnhĩ xunhwÿr kêt ri na ka pre më akwÿjaja ã amnhĩ nhĩpêx anhÿr o ri apa. Tã amnhĩ kaxyw Jejus kôt ajamaxpër nê hkôt amnhĩ xunhwÿ. Hãmri nhũm Tirtũm Karõ më Pahihti Jejus Krisja wa më

anê mê ate amnhî tomnuj piitâ rênh pa nê mê apê Tîrtûm kra hâ mê axunhwÿ nê amnhîm mê ate amnhî to mex xwÿnh â mê ajarê.

Mê pahte tãm amnhî nhîpêx o papa hâ mê pamâ karô

Matêwre 5.27; Rômân 12.1-2; Epes 5.3; Korosê 3.5; Wam Tesarôn 4.1-8

¹² Nê na ka hte mê akwÿjjaja amnhî jarênh o:

—Nà na pa hte pa inhmâ tanhmâ amnhî nhîpêx to hprâm xâ hkôt amnhî krâ hkôt amnhî nhîpêx o ri ipxa. Anê.

Mê ate â amnhî jarênh anhÿr tâ no âm mê ate amnhî jarênhja mex kêt. Mëmoj piitâ mê pamâ mex kêt. Na pu htem pamâ hprâm xâ hkôt mëmoj to anê nê gaa nê ra ho amnhî pyrà nê ho anhÿr pix o papa. Nê gaa nê kãm panhÿrer kêt kumrêx. Jao ra pahpipãnh pix o ri papa. Rÿ paxêx pix o ri papa. Rÿ paxâhkînh pix o ri papa. Jakamâ kêr pu mê pamâ tanhmâ amnhî nhîpêx to hprâm xâ hkôt tanhmâ amnhî nhîpêx to ho papa hkêt nê. Âm amnhî mê amnhî kaxyw Jejus mã pajamaxpêr pix nê.

¹³ Nê na htem amnhî jarênh o:

—Nà kot paj inhmâ prâm nê mämri mëmoj ku. Nê inhmâ nhâm mëhō kamâ ixpijaâm kêt prâm nê mämri â amnhî nhîpêx anê. Ja tanhmâ inhmâ kute hkêt. Anê.

Tâ koja nhÿrmâ Tîrtûm mê panhÿja o hapêx pa. Na pre mê pahte nhâm mê kamâ pahpijaâm kêt o papa kaxyw mê panhîpêx kêt nê. Âm mê pahte mê panhîpêx xwÿnh maatija mã tanhmâ amnhî nhîpêx mex to ho papa pix kaxyw na pre mê panhîpêx.

¹⁴ Nê na pre Pahihtija ty nhÿm Tîrtûm akupÿm ho htîr. Ja pyrà nê kot puj mê nhÿrmâ mê pajaxwÿja ty nhÿm akupÿm mê pahto mê pahÿr. Ja kaxyw tapxipix pix na âhpumunh tÿx o âhpumunh tÿx. ¹⁵ Na pu

htem Kris kôt amnhî xunhwÿr kôt pahpê hkwÿ nê te pahpê î pyràk. Jakamâ kwa mê ja hâ anohtÿx nê axte nhâm mê hkuprÿjê hwÿr amrar nê mê ho amnhîkati hkêt nê. Tîrtûm kêp ja omnuj. Te mê pahte Kris nhî pyràk jakamâ kot kaj mê â amnhî nhîpêx anhÿr jao te Kris tãm kot â amnhî nhîpêx anhÿr o pa pyràk. Kwa ja mex kêt. Xâ kot we Krisja â amnhî nhîpêx anê? Nà koja â amnhî nhîpêx anhÿr kêt nê. ¹⁶ Tîrtûm kapêr â kagâ htûm kot ja jarênh kot:

Kot ka mê atō mënijê hō ho aprō nhÿm kêp aprō kumrêx. Hämri nê te ra war atipxi pyràk o axpên nhîpêx. Anê.

Â kot aprō mê wa ajarênh anhÿr jakamâ kwa kêr ka mê atÿx ri nhâm mê hkuprÿjê hwÿr apa hkêt nê. Kot kaj mê â amnhî nhîpêx anê nê Tîrtûm noo mã te ate aprō kuhpa hâ hkuprÿta o aprō pyràk. Te wam aprōta kuhpa hâ war atipxi pyràk. ¹⁷ Na pu htem Pahihti Jejus Kris kôt amnhî xunhwÿ nhÿm amnhî tâ mê pahpumu nê mê pamâ Karō gō nhÿm mê pamâ agjê. Pu mê ra Karōja kôt te ra Jejus mê wa pahÿtipxi nê ri papa pyràk o axpên nhîpêx. Jao Kris jamaxpêr mê mê pajamaxpêrja te wa kot axpên pyràk. Nê Kris kot amnhî nhîpêx mê mê pahte amnhî nhîpêxja te kot axpên pyràk.

¹⁸ Jakamâ kwa kêr ka mê amnhî prō pix tânopxar o ri apa. Nê mê anijaja amjên pix tânopxar o ri apa. No mê nhâm mëmyjê ho amnhîkati ho ri apa hkêt nê. Nê mê amyjaja nhâm mënijê ho amnhîkati ho ri apa hkêt nê. Kot ka mê nhâm mëmoj tanhmâ omnuj kute ho anê no âm amnhî nhî homnu hkêt nê. Nom kot kaj mê nhâm mënijê ho amnhîkati rÿ nhâm mëmyjê ho amnhîkati hāmri nê ra amnhî nhî homnu hpa. ¹⁹ Mê panhî kamâ na hte Tîrtûm Karō agjê nê kamâ hkrî. Tîrtûm na pre mê pahwÿr

kurê nhùm mē pahkarō mā agiê pu mē te mē pahpê ôrkwÿ pyrâk. Jakamâ na pu htem amnhî krâ hkôt pahṭÿx ri mēmoj tanhmâ ho ho papa hkêt nê. ãm Tîrtûm jamaxpêr xâ hkôt pix mâ na pu htem tanhmâ mēmoj nhîpêx to ho papa. ²⁰ Na pre ra Jejus mē pahte amnhî tomnuj pânâ amnhîrer kaxyw mē pahpitiâ mē panê ty. Te htyk o amnhîm mē pajaprôr pyrâk o mē panhîpêx. Jakamâ kwa kêr pu mē ãm hkôt pix mâ mân ri amnhî nhîpêx râhâ ho ri papa. Kê mē pahkwÿjaja ja hâ mē pahpumunh kôt Tîrtûm mâ mex o mex ã harênh o ri pa.

7

Mê mjên mê mē hprô wa kot axpên to mex ã mē pamâ karô

Epes 5.22; Korosê 3.18; Eprêw 13.4

¹ Nê ota mē ate ixwÿr kagâ nê mênhta na pre ixwÿr pôj pa omu. Nê kamâ mē ate mē aprô hâ ixkukjêr xwÿnhṭa pa kamâ harê nê omu. Tâ kot paj mē amâ tanhmâ harênh to ka mē inhma.

Nâ kot ka mē amyjê hō amâ aprô hkêt nê ahte ri apa hprâm nê kam nê aprô hkêt apa. Ja tanhmâ kute hkêt. Nom kêr ka mē hkuprÿjê ho presija ho ri apa hkêt nê. ² Na htem tôhâ kâm hprô hprâm kêt nê ri pa nê gaa nê mē hkuprÿjê hō pumu rÿ mē kêp mē hprôjê hō pumu nê kamâ hpijaâm kêt o ri pa. Ja pymaj kêr ka mē amyjaja māmri aprô nê mē anijaja māmri amjên.

³ Nê mē anijaja. Koja mē amjên akamâ hkurê ka mē māmri kâm amnhî gô kê mē anî. Nê mē amyjaja määnên. Koja mē aprô mē akamâ hkurê ka mē māmri mē anî.

⁴ ãm ka amâ tanhmâ amnhî nhîpêx to hprâm xâ hkôt pix mâ amnhî nhîpêx kêt nê. Määnên amâ aprô kot kâm tanhmâ amnhî nhîpêx to hprâm xâ hkôt määnên hkôt kâm amnhî nhîpêx.

⁵ Nê kot kaj mē mēmo arîgro hâ amâ Tîrtûm mâ amnhî jarênh rÿy hprâm japêr. Hāmri nê aprô mâ:

—E kot puj jarâhâ axpên to amnhîkati hkêt nê. Kot puj ãm Tîrtûm pix mâ amnhî jarênh o amÿkry. Anê.

Hāmri nê māmri ã amnhî nhîpêx anê. No kwa kêr ka mē ãm ja ho anhÿr o apkati pixi nê kâm anhÿre. Nhùm jââ ka mē amâ axpên to amnhîkati hprâm nê māmri tanhmâ axpên nhîpêx to. No kot kaj mē ã amnhî nhîpêx anhÿr kêt o hâ atâ apkati xohtô nê gaa nê ra akurê xâj axtem nê Satanasti jamaxpêr o ajamaxpêr. Jao nhâm mēhō ni hwÿr mra nê aprô kuhpa hâ kamâ akurê ho kamâ apijaâm kêt. Rÿ nhùm mēnijaja nhâm mēmyjê hō hwÿr mra nê mjên kuhpa hâ kamâ hkurê ho war axpên kamâ hpijaâm kêt.

⁶ E mē ate ja hâ ixkukjêr jakamâ na pa ã ixprî hâ mē amâ ja jarênh anê. Ka mē akwÿjaja amâ aprô hprâm nê māmri aprô nê ri apa. Nê mē akwÿjaja amâ aprô hprâm kêt nê māmri aprô hkêt nê ri apa. Nom kot pa paa mē amâ mē aprô hâ ixâmnên kêt nê. Ka mē kam amnhî krâ hkôt ajamaxpêr xâ hkôt tanhmâ amnhî nhîpêx to. ⁷ Na pa hte ixprô hkêt nê ri ixpa nom inhmâ ja mex pa hte ahte ixpa.

Mê mjên kêt nê mē hprô kêt xwÿnhjê jarênh

Nê kormâ mē aprô hkêt xwÿnhjaja. Ka mē ixpyrà nê aprô hkêt nê ri apa ronhÿx inhmâ ja mex nê. Na hte mēmy hkwÿjaja hprô kêt nê ri pa nhùm Tîrtûm ja hâ mē omu nê tanhmâ mē ho nhùm mē mex nê ri pa nê mēnijê kamâ hkurê ho mē kamâ hpijaâm kêt o ri pa hkêt nê. No na hte mē hkwÿjaja hprô hkêt nê ri pa nê gaa nê ra hkurê xâj mēnijê kamâ hpijaâm kêt. ã mē ate amnhî nhîpêx anhÿr pymaj kêr ka mē amâ

aprô hprâm nê māmri aprô. Tirtüm mā ja mex kênã.

⁸ E mē aprô hkêt nê mē amjên kêt xwýnhjaja. Nê ra mē apê mē aprô htyk rý mē amjên htyk xwýnhjaja. Pa mē amã mēmoj jarê. Nà kot kaj mē ixpyrà nê mē aprô hkêt nê ri apa rý mē amjên kêt nê ri apa nhũm ja inhmã mex nê. ⁹ No kot ka mē atô ra akurê japêr nê māmri aprô rý māmri amjên. Ja määnên tanhmã kute hkêt.

Mê pahte axpên kaga hkêt ã mē pamã karô

Matêwre 5.31, 19.3-9; Makre 10.2

¹⁰ E kot paj hpãnhã ra mē ate axpên to amjên nê axpên to aprô xwýnhjê mã ixkapêr. Nom kot paj amnhĩ krã hkôt tanhmã ixkapêr to hkêt nê. Pahihti Jejus Kris kapêr xã hkôt kot paj mē amã ixkapêr. Jakamã e kêr ka mē anijaja mē amjên kaga hkêt nê. ¹¹ Nom kot kaj mē tanhmã ajamaxpêr to nê hkaga japêr hãmri nê ahte ri apa nê axte nhãm mēhõ ho amjên kêt nê. Rý tee ri amnhĩ kukamã ajamaxpêr nê māmri akupým amjênta wýr tē nê akupým hkôt ri apa. No kêr ka mē axte nhãm mēhõ ho amjên kêt nê.

Nê ra mē amyjaja kêr ka mē ajaxwýja ã amnhĩ nhĩpêx anê nê mē aprô kaga hkêt nê. E kêr ka mē ã amnhĩ nhĩpêx anhýr o ri apa.

¹² Nê mē ate ixwýr kagã mēnh kamã axpên mã ixkukjêrta kot paj hpãnhã mē amã harê. Na Pahihti Jejusja ja hã tanhmã inhmã nê hkêt nê. ãm amnhĩ krã hkôt kot paj mē amã tanhmã harênh to ka mē inhma.

Ka mē amyjê hõ ra Kris kôt amnhĩ xãm nom nhũm aprô kormã hkôt amnhĩ xãm kêt japêr. Nom koja kãm arĩ ri akôt pa hprãm ka hkaga hkêt nê. Kê arĩ ri akôt pa. ¹³ Nê mē anijaja. Ka mē ajaxwýja ra apê Kris kwý hã ri apa nhũm amjên kêt hkwy hkêt tã arĩ ri akôt pa hprãm nê arĩ ri akôt pa ka hkaga hkêt

nê. ¹⁴ Kêp Kris kwý hkêt tã koja akôt Kris kwýjê hkôt ri pa. Rý mē aprô kêp Kris kwý hkêt tã koja akôt Kris kwýjê hkôt ri pa. Jao Tirtüm kapêr mar o pa nê gaa nê apyrã nê hkôt amnhĩ xãm japêr. Nê mē akra kêp Kris kwý hkêt xwýnhjaja haxwýja mē akôt Kris kwýjê hkôt ri pa nê Tirtüm kapêr mar o pa nê gaa nê akôt Jejus kôt amnhĩ xunhwýr japêr.

¹⁵ Nom koja aprô kêp Kris kwý hkêt ã kãm akaga hprãm nê rĩ tãm māmri akaga. Rý amjên kêp Kris kwý hkêt ã kãm akaga hprãm nê rĩ tãm māmri akaga. Kêr ka mē kot akaga nê tee ri kãm tanhmã akapêr to hkêt nê. Kwâr māmri akaga ka ahte ajamakêtkati nê axãmnhix ri apa. Mē pajamakêtkati nê mē pamex nê ri papaja na Tirtüm kãm hprãm.

¹⁶ No koja amjên kêp Kris kwý hkêt tã kãm mē akaga hprãm kêt nê ka mē hkaga hkêt nê. Rý aprô kêp Kris kwý hkêt tã ka mē kam hkaga hkêt nê. Koja arĩ ate amnhĩ nhĩpêx ã apumunh o ri akôt pa nê gaa nê rĩ apyrã nê Kris kôt amnhĩ xãm japêr. ¹⁷ Jakamã kot ka mē aprô rý amjên ra Kris kôt ahte amnhĩ xãm. Hãmri nê wa arĩ ri axpên kôt ri apa ho apa. Na pa hte krĩ piitã hkôt Jejus kôt mē pahkwýjê mã ã ixujarênh anhýr o ri ípa. Tã kêr ka mē ã amnhĩ nhĩpêx anhýr o ri apa.

Kris kôt amnhĩ xunhwýr kêt ri tanhmã mē pakute hã mē pajarênh

¹⁸ Ja pyrà nê kot kaj mē ra amy kwryt kã jakâr japêr. Tã ra Kris kôt amnhĩ xãm nê arĩ arãhã ri apa. Rý amnhĩ jakâr kêt rãhã hkôt amnhĩ xãm japêr nê arĩ arãhã ri apa. Mo kaxyw kot ka kêt amnhĩ jakã? ¹⁹ Tirtüm na hte mē pahte amnhĩ my kwryt kã jakâr ã mē pahpumunh kôt tanhmã mē pajarênh to hkêt nê. Rý mē pahte amnhĩ jakâr kêt ã mē pahpumunh kôt määnên tanhmã mē pajarênh to hkêt nê. ãm mē pahte hkôt amnhĩ

nhîpêx pix ã mẽ pahpumunh kôt na hte tanhmã mẽ pajarênh to. ²⁰ Jakamã kêr pu mẽ pahte Kris kôt amnhî xunhwÿr kêt ri tanhmã mẽ pakuteja arî rãhã ri papa. ²¹ Ka mẽ akwÿjaja ate nhãm mẽ kãm mẽ axàpênh o apa htã Jejus kôt amnhî xunhwÿ. Tã kêr ka mẽ mãmri mẽ kãm axàpênh o ri apa. Nom koja anhõ patrãwja amnhî nê mẽ ajano ka mẽ mãmri ma mra nê amnhî mã tanhmã axàpênh to ho ri apa.

²² Nê koja mēhõ Kris kôt amnhî xãm. Tanhmãn kêp mẽ õ patrãw rÿ kot mẽ kãm mẽ àpênh xwÿnhjê hõ. Tã Kris kôt amnhî xãm hãmri nê arî amnhî nhîpêx tũm kôt ri amnhî nhîpêx o pa hkêt nê. Ra Kris kôt amnhî nhîpêx nyw o amnhî nhîpêx o pa. Jao ra tanhmã amnhî tomnuj to hkêt nê. Te kot õ patrãw punuj kaga nê hpãnhã õ patrãw mex kapêr kôt amnhî nhîpêx pix o pa pyrãk.

²³ Na pre Jejus mẽ pahte amnhî tomnuj piitã hpãnhã amnhîrer kaxyw mẽ panê ty. Te htyk o kot amnhîm mẽ pajaprõr pyrãk o mẽ panhîpêx. Jakamã kwa kêr ka mẽ jar mẽ anhõ patrãw kôt pix mã amnhî nhîpêx o ri apa hkêt nê. Mẽ mãânên Tirtũm kapêr kôt amnhî nhîpêx o ri apa. ²⁴ Jakamã kêr pu mẽ pahte Kris kôt amnhî xunhwÿr kêt ri tanhmã mẽ pakuteta pu mẽ arî rãhã ri hã papa.

Ra mẽ pahte amnhî jakà rÿ mẽ pahte amnhî jakàr kêt.

Rÿ ra mẽ pahte nhãm mēhõ mã paxàpênh o papa rÿ amnhî mã paxàpênh o papa.

Rÿ ra mẽ pahprõ nê ri papa rÿ mẽ pahprõ hkêt nê ri papa.

Pu mẽ pahte Kris kôt amnhî xunhwÿr kêt ri tanhmã mẽ pakuteta ãm arî rãhã hã ri papa. Jao Tirtũm kãm hprãm xà kôt pix mã amnhî nhîpêx o ri papa.

Mẽ hprõ nê mẽ mjên kêt xwÿnhjê jarênh

Matêwre 19.10-12

²⁵ Nê mẽ ate ixwÿr kaga mēnhta kamã na ka mẽ mãânên kormã mẽ hprõ hkêt xwÿnhjê hã ixkukja. Tã kot paj mẽ amã tanhmã mẽ harênh to. Nom Pahihti Jejus Kris na pre ja hã tanhmã inhmã nê hkêt nê. ãm pa kot paj ãm amnhî krã hkôt tanhmã hã mẽ amã ixkapêr to. Na pre Pahihti mẽ akaxyw tanhmã ixkrã hto pa hte ÿ hã tanhmã mẽ amã mẽmoj tã karõ hto ho ri ixpa. Jakamã e mẽ inhma nê inhmar tÿx nê.

²⁶⁻²⁷ Nà ra mẽ kãm mẽ pahkurê xwÿnhjaja Kris ã mẽ pahtomnuj o pa jakamã koja ixpyrà nê mẽ hprõ hkêt rãhã mẽ pa xwÿnhjaja ahte ri pa nhũm ja mex nê. Nhũm mẽ umaj amnhî pix tânopxar o ri pa. Nê mẽ aprõ xwÿnhjaja kêr ka mẽ kãm mẽ pahkurê xwÿnhjê pymaj mẽ aprõ kaga hkêt nê. ãm pix tânopxar o ri apa.

²⁸ Tã kot ka mẽ atõ amã aprõ hprãm nê mãmri aprõ. Ja mãânên tanhmã ixpê kute hkêt. Nê mẽ anijaja mẽ amã amjên prãm nê mãmri amjên. Ja tanhmã ixpê kute hkêt. Nom kot ka mẽ akwÿjê pyrã nê aprõ rÿ amjên. Nê gaa nê akra. Hãmri nê tanhmã mẽmoj kute kamã ka tee ri wa mẽ amnhî kukamã ri ajamaxpêr o ri apa. Ja pymaj na pa hte mẽ amjên kêt nê mẽ aprõ hkêt ã mẽ amã awjarê.

²⁹ Nê Kris tokyx akupÿn mẽ pahwÿr wrÿk kaxyw jakamã kwa ra mẽ aprõ nê apa xwÿnhjaja. Kêr ka mẽ amnhî prõ nê amnhî kra pix kukamã ajamaxpêr o ri apa hkêt nê. Te ho mẽ hprõ hkêt nê mẽ pa xwÿnhjaja kot amnhî nhîpêx pyrã nê Kris kutêp kumrêx mã ajamaxpêr pê tanhmã amnhî nhîpêx to ho apa nê arî kormã aprõ nê akrajê ho hapu nê tanhmã mẽ kutã anojarê to ho apa.

³⁰ Kris kot tokyx akupÿn mẽ pahwÿr wrÿk jakamã kwa mẽ ri amÿr o ri mẽ apa xwÿnhjaja. Kêr ka mẽ kutêp tee ri amnhĩ kaprĩ pix mã ajamaxpêr o akaprĩ nê ri apa hkêt nê. Nê mẽ akĩnh nê ri apikunhar o ri mẽ apa xwÿnhjaja kêr ka mẽ Kris kutêp amnhĩ kĩnh xà pix mã ajamaxpêr o ri apa hkêt nê. Nê ri mẽ axujaprôr o ri mẽ apa xwÿnhjaja kêr ka mẽ Kris kutêp tanhmã axujaprôr to pix kukamã ri ajamaxpêr kêt nê. ³¹ Nê mẽ apê mẽ ate mẽmoj to wênê ho ri mẽ apa xwÿnhjaja Kris kutêp ãm ri mẽ akukrêx pix kukamã ajamaxpêr kêt nê. Koja mẽ panhõ pika piitã hkôt mẽ pakukrêxja nê mẽmoj piitã arĩ rãhã hkêt nê. ³² Jakamã kot kaj mẽ akukrêx pix kukamã ajamaxpêr nê amnhĩ pix kukamã ajamaxpêr nhũm ja apê omnuj nê. Kris kwÿ pê mẽ hprõ hkêt xwÿnhjaja na htem Pahihti Jejus Kris kãm hprãm xà hkôt pix mã kãm tanhmã amnhĩ nhĩpêx to ho ri pa hprãm. Jao ãm pix kutã tanhmã nojarêt to rãhã ho ri pa. ³³ No kêt ra mẽ hprõ nê mẽ pa xwÿnhjaja na htem hprõ pix kukamã kãm tanhmã amnhĩ nhĩpêx to ho pa hprãm. Jao pix kukamã amnhĩ nhĩpêx o pa. ³⁴ Mẽ kãm Tirtũm kapêr kôt amnhĩ nhĩpêx prãm tã no ãm mãânên kãm hprõ kapêr mar nê hkôt kãm tanhmã amnhĩ nhĩpêx to ho ri pa hprãm.

Nê mẽnijaja kot Jejus kôt amnhĩ nhĩpêx nê kormã mẽ mjên kêt xwÿnhjaja na htem kãm Pahihti Jejus kãm hprãm xà hkôt pix mã kãm tanhmã amnhĩ nhĩpêx to ho pa hprãm. Nê ãm pix mã hamaxpêr o pa. Nê ãm hkôt pix mã amnhĩ nhĩpêx o pa. No ra mẽ mjên nê mẽ pa xwÿnhjaja na htem arĩ ri mẽ hikukrêx tânopxar o pa. Nê mjên mã hprãm xà hkôt tanhmã kãm amnhĩ nhĩpêx to ho pa. Jakamã tanhmã kot wem amnhĩ to nê Jejus

kãm prãm xà hkôt pix mã amnhĩ nhĩpêx o pa?

³⁵ E ixte mẽ ato ajuta kaxyw na pa ã mẽ amã ixkapêr anê. Jakamã na pa mẽ ate mẽhõ ho aprõ nê mẽ akurê hkêt nê. ãm mẽ ate Tirtũm kapêr kôt pix mã amnhĩ nhĩpêx o apa hã na pa mẽ amã karõ. Mẽ ate kumã pix mã ajamaxpêr o ri apa pix kaxyw. Nê kumã pix mã tanhmã ri amnhĩ nhĩpêx to ho apa kaxyw na pa mẽ amã tanhmã mẽmoj tã karõ hto.

Mẽ kot mẽ hprõ mã xwÿnhjê jarênh

³⁶ E kot paj hpãnhã mẽ ate mẽhõ ho aprõ mã xwÿnhjê mã ixkapêr ka mẽ ixkapêr ma. Nã kot kaj mẽ atõ ate ho aprõ mã xwÿnhhta kukamã ajamaxpêr o:

—Nã kot paj ho ixprõ hkêt nê. Inhmã hkĩnh tÿx tã kot paj ho ixprõ hkêt nê. Kot paj ãm ixprõ hkêt nê ahte ri ixpa. Anê.

Hãmri nê ahte ri apa. Tã ra tee amnhĩ kurê kamã ama nê ajamaxpêr o:

—Hêxta waa nê. Mon pa pre ho ixprõ hkêt nê ahte ri ixpa? Anê.

Hãmri nê mãmrĩ ma hwÿr tẽ nê kãm amnhĩ jarê nê ho aprõ. Ra ate aprõ hkêt nê ahte ri apa hã amnhĩ jarênh tã no ãm mãmrĩ ho aprõ. Ja tanhmã kute hkêt kênã. ³⁷ Nom kot kaj ho aprõ hkêt ã amnhĩ jarê nê mãânên akurê hkêt nê ri apa. Hãmri nê mãmrĩ ho aprõ hkêt nê ri ahte ri apa. Ja mãânên tanhmã kute hkêt. ³⁸ Kot ka ho aprõ nê war amex nê apa. Rÿ kot ka ho aprõ kêt nê mãânên amex kumrêx nê ri apa. Ja na mex o ate mẽhõ ho aprõ nê ho apata jakrenh.

Mẽ kêp mẽ mjên tyk xwÿnhjê jarênh

³⁹ E kot paj hpãnhã mẽ apê mẽ amjên tyk xwÿnhjê mã ixkapêr. Nã koja amjên arĩ htĩr ri ka ãm hkôt pix mã axkamê nê hkaga hkêt nê. No koja nhÿrmã apê ty hãmri ka

tee ri amnhĩ kukamã ajamaxpēr hāmri nē amã axte amjēn prām nē māmri axte amjēn. Nom kwa kēr ka mē amnhĩ pyrã nē Kris kōt akwýjē hō pix o amjēn. No mamrĩ nhām mēhō ho amjēn kēt nē. ⁴⁰ No kot ka mē axte amjēn kēt nē ahte ri apa hāmri nē axāmnhĩx ri ajamakētkati nē apa. No na pa am amnhĩ krã hkōt mē amã ā ja jarēnh anē. Mān Tirtūm Karō mā määnēn ja mex nē.

8

Sānti hã mē apkur xà jarēnh

Rōmān 14.13-23; Wam Korit̄ 10.14-22, 13.2; Karatas 5.13; Wam Pētre 4.8; Wam Juāw 3.18

¹ Nē mē ate ixwýr kagã mēnhta kamã na ka prem määnēn sānti hã mē apkur xà hã ixkukja. Tã kot paj mē amã tanhmã ja jarēnh to ka mē inhma.

Nà na hte Kris kōt pahkwý hkēt xwýnhjaja mēmo karō ho sānti nhĩpēx mã mēō hkwy nhĩpēx nē hwýr o mra. Hāmri nē hpar pē haxwý nē kutã hkōn krã ho rōrōk nē hkrĩ nē kām mex o mex ā harē nē kām amnhĩ jagrer pē amnhĩ to kuwý. Hāmri nē kām amnhĩ jagrer pa nē akupým amnhĩm mēōta jamý nē ma o mra nē hkwyjē mã ho wēnē. Na htem ā amnhĩ nhĩpēx anhýr o pa. Tã na ka prem kagãta kamã mē ate mē kēp mēō japrōr nē hkur ā ixkukja. Na ra mē ate sānti pumunh mex. Am mē kot ihkra pix o hipēx ā omunh mex jakamã na pu htem hã pamã mē apkur xàta hkur prām nē māmri paxāmnhĩx ri kuku. Ja tanhmã Tirtūm pē kute hkēt. Ra mē pahte ja pumunh mex. Tã nom kwa kēr pu mē ja hã Kris kōt mē pahkwýjē mã amnhĩ to jarkrar o ri papa hkēt nē. Nē ja hã mē kurom paxāhpumunh týx ā mē kām amnhĩ to jarkrar hkēt nē. Kot pu mē ā amnhĩ nhĩpēx anhýr o mē hamaxpēr o hihtýx hkēt nē. Kēr pu mē am mē kamã paxukapri pē tanhmã mē ho mex to ho papa. Nē

Kris kōt mē hamaxpēr o hihtýx o papa. Ā mē pa hte amnhĩ nhĩpēxja na Tirtūm kām hprām. ² No koja mēhō mēmoj pumunh týx ā amnhĩ to jarkrar o ri pa nē am tee ri ā amnhĩ jarēnh anhýr kaprý. ³ No koja mēhō āhpumunh týx kēt tã kām Tirtūm kīnh nhūm amnhĩ tã omu nē kām hapē nē ho hkra. Kēt ja na mex o mex.

⁴ E kot paj ixpri hã mē amã tanhmã sānti hã mē apkur xàta jarēnh to ka mē inhma. Nà Mēpahpāmja pixii. Axtem hō hkēt. Nom mē kot sānti nhĩpēxta am mē kot ihkra o hipēx jakamã htir kēt. Ra mē pahte ja jarēnh mar týx nē omunh mex. ⁵ Na htem ohtō nē ri sānti kēp Mēpahpām ā hkamnhĩx o pa. Kaxkwa kamã mēmo karō nhĩpēxja nē pika kamã mēmo karō nhĩpēxja nhūm htem kēp Mēpahpām ā harēnh ho pa. Nom ja kot anhýr kēt. ⁶ Mēpahpāmja am pixi ho pixi mex. Mē panhō Tirtūmja. Tām na pre mēmoj piitã ho kator pa. Jakamã na pu htem kapēr kōt pix mã amnhĩ nhĩpēx o ri papa.

Nē mē panhō Pahihti haxwýja pixii. Pahihti Jesus Krisja. Na pre Tirtūm nhĩhkō hã mēmoj piitã ho kator pa. Na pu htem ja hã omunh xà hkōt ri pamex nē ri papa. Ra mē pahte ja jarēnh mar týx nē omunh mex. Jakamã na pu htem paxāmnhĩx ri mēmoj piitã hkur o papa. Tirtūm kot mēmoj piitã ho kator par kēnã. ⁷ Tã no am ham mē kot Kris kōt amnhĩ xunhwýr xwýnhjaja na htem mē pahkīnhã kām sānti hã mē apkur xà hkur puma nē. Ham mē kot sānti kaga nē amnhĩ kaxyw Kris kōt amnhĩ xunhwýr jakamã kormã Tirtūm kōt amnhĩ nhĩpēx tohtuj anē. Jakamã na htem tee ri sānti hã mē apkur xàja pumu nē hamaxpēr o:

—Nà kot paj ja kur kēt nē. Kot paj anē nhūm apu Tirtūmja pē ja omnuj nē. Anē.

⁸ Nom na kêt hte Tîrtûm mē paxàpkur xà hā mē pahpumunh kôt mē pahte amnhî to mex xwÿnh ã mē pajarēnh kêt nē. Kot puj mē mēmoj ku rÿ mēmoj kur kêt nē nhûm ja hā mē pahpumunh kôt tanhmā mē pamex ã pajarēnh to hkêt nē. Jakamā na pu htem māmri paxàmnhîx ri mēmoj tâ mē apkur xà hkur o papa nē tanhmā amnhî to hkêt nē. ⁹⁻¹⁰ Nom kwa mē okora. Kêr ka mē sânti mē amnhî jarēnh xà hā ixkre hwÿr agjêx nē kamā axàpkur hkêt nē. Kot kaj mē atō ã amnhî nhîpêx anê nhûm mēhō kormā kot Kris kôt amnhî xām tohtuj anhÿr xwÿnhja ja hā mē apumu nē tee ri hamaxpêr. Axàhpumunh tÿx ã ate amnhî jarēnh tâ sânti nhōrkwÿ kamā axàpkur o nhÿ nhûm ja hā apumu nē tanhmā amnhî nhîpêx to wehe? Koja ja kêp omnuj tâ apyrà nē tē nē axà nē mē kutā apku. Hāmri nē apkur pa nē tee ri amnhî kukamā hamaxpêr o:

—Hêxta waa nē. Kwa mon pa axtem nē ri ã mēmojja kur anê? Nà na pa anê nē ra amnhî tomnuj tÿx nē. Anê.

Hāmri nē hkaprî nē pa. ¹¹ Ate axàhpumunh tÿx ã amnhî jarēnh tâ amnhî kôt atōja mex kukamā ajamaxpêr kêt nē. Kris ra mÿrapê htyk tâ nhûm ã ate sânti hā mēo hkur ã apumu nē tee ri hamaxpêr o Jesus hkôt amnhî nhîpêx mex kêt nē. ¹² Kormā kot Kris kôt amnhî xām tÿx kêt tâ tee ri ja hā mē apumu nē hamaxpêr mex kêt nē. Jakamā ka Kris noo mē amnhî tomnuj nē. ¹³ Tã ã ixte Kris kôt ixkwÿjê nhîpêx anhÿr pymaj koja ixtōjê hō kām mēmoj kur puma nē. Nē htÿx ho Tîrtûm kêp omnuj ã hkamnhîx. Pa ja hā omu nē ijaxwÿja axte hkur kêt nē. Ixte mex ã omunh tâ no ãm kot tee ri ja hā ixpumunh nē hamaxpêr o:

—Kwa Tîrtûm kêp ja mex kêt tâ nhûm Pawreja ri kuku. Jakamā kot paj ijaxwÿja uràk nē kuku. Omnuj tãã.

Anhÿr o hamaxpêr pymaj kot paj uràk nē mēmota kur kêt nē. Na pa hte ã Kris kôt ixtōjê mex kukamā ri ijamaxpêr anhÿr o ixpa.

9

Pawre kot amarî Tîrtûm kapêr o mē ahkre hā amnhî jarēnh

Atre 9.1-18, 20.33-35; Sikûn Korîit 11.7-9

¹ Nē ixte Jesus nhÿ hā mē ahkre ho mē pa xwÿnhjê hō jakamā na pa hte Tîrtûm kapêr o mē ajahkre ho ri ixpa. Na pa pre inhno ho mē panhō Pahihti Jesus pumu nē mē amā harēnh o ri mē akôt ixpa ka prem inhma nē hkôt amnhî xunhwÿ. ² Mē hkwÿjaja kot axpên mē ixpê Jesus nhÿ hā mē ahkre xwÿnh kêt ã ijarēnh tâ mē kajaja mē ate ja hā ixpumunh mex. Ixte mē amā mē ujarēnh mexja jarēnh nhûm mē ate mar nē hkôt amnhî xunhwÿrja kukwak ri na ka mē apê Jesus kwÿjê. ³ Jakamā koja mē atã ixto kapêr japêr kot paj ã mē kām mē ajarēnh anê. ⁴ Nē ixte Jesus nhÿ hā kapêr jahkre o ixpa xwÿnh jakamā kot paj inhmā Kris kwÿjê kutā amarî ixàpkur prām nē māmri mē kutā apku. Ja tanhmā kute hkêt tâ kot paj ã amnhî nhîpêx anhÿr kêt nē. Kot paj ixàpkur kaxyw nē amnhî pānhā amnhîre nē rî kormā apku. Na pa hte ã amnhî nhîpêx anhÿr o ri mē akôt ixpa. ⁵ Rÿ kot pa ixkwÿjê pyrà nē inhmā Kris kôt ixkwÿjê hō ho ixprō hprām nē māmri ho ixprō. Nē wa ma krî piitã hkôt Kris kwÿjê kukwak ri ixàpkur o ixpa hprām nē wa māmri ã amnhî nhîpêx anhÿr o ixpa. Ja mex kēnã. Na hte ã Simāw Pêtre mē Jesus tō kot hapujaja amnhî nhîpêx anhÿr o pa nhûm ja tanhmā kêp kute hkêt. No ãm mē hkînhã ixprō hkêt na pa hte ri ixpa.

⁶ Nē ixkwÿjaja na htem apkur xà hpānhā àpēnh o pa hkêt nē. Na htem Jesus nhÿ hā kapêr jarēnh o ri pa nhûm hte Jesus kwÿjaja mē

kām mẽ apkur xà gō nhũm mẽ amarĩ hkur o pa. Tã no pa na pa hte Panãpe mẽ wa ã amnhĩ nhĩpêx anhỹr kêt nê. Na pa hte wa mry kà ho ixkre nhĩpêx nê mẽ kãm ho wênê nê hpãnhã amnhĩm awjaprô. Na pa hte wa ã amnhĩ pa kukwak ri ixujaprôr nê ho ixàpkur o ri ixpa anê.

⁷ Mẽ kãm pur kãm harôj jamýnh o mẽ pa xwýnhjaja na htem amarĩ hkwy jamý nê ho apkur o pa. Nê motre jamâr o mẽ pa xwýnhjaja haxwýja amarĩ hkà kagô janê nê ho hkôm o pa. Nê pòristijaja na hte mẽ ô pahija mẽ àpênh pãnhã mẽ kãm amnhĩrer o pa. Jajê pitã itã na htem mẽ àpênh pãnhã mẽ kãm amnhĩrer o pa. Ja pyrã nê te ixpê mẽ amã ixàpênh o ixpa xwýnh pyrãk jakamã ixte mẽ ajahkreta pãnhã kot ka mẽ inhmã inhô ho apa nhũm ja mãânên mex nê. ⁸ No ãm papxipix na pa hte ja mex ã harênh kêt nê. Tirtũm kapêr ã kagã htũm haxwýja kot ja mex ã harênh. ⁹ Kamã na pre finat Mojesja Tirtũm nhỹ hã harênh kot:

Koja akrit amã àpênh o pa ka omu nê ho mex nê. Kãm ô mex nê. Anhỹr o kot harênh. Xà na pre Tirtũmja ãm mẽ pahkrit pix kukamã ukapri nê ã harênh anê nã? Nã kot anhỹr kêt. ¹⁰ Mãânên mẽ pahpê panhĩ kaxyw na pre ã ja jarênh anê. Mẽ pahte mẽ hpur kãm paxãhkre xwýnhjaja nê mẽ pahte kamã paxujamýnh o papa xwýnhjaja. Jajê kaxyw mẽ pahte pur kukwak ri amarĩ paxàpkur o ri papa kaxyw ã pre ã ja jarênh anê. ¹¹ Tã ja pyrã nê na pa hte mẽ awýr mō nê mẽ amã Tirtũm kapêr jarênh o ri mẽ akôt ixpa. Nê mẽ akôt ho mẽ ajahkre ho ri ixpa ka htem inhmã ixàpênhhta pãnhã amnhĩrer kêt nê. Ixkwýjaja kot Tirtũm kapêr o mẽ ajahkre hpãnhã mẽ ate mẽ kãm amnhĩrer tã pa inhmã amnhĩrer kêt nê. Na pa pre mẽ ajahkreta pãnhã

mẽmoj tã mẽ awýr kêt nê. ãm nhãm ixàpênh ôta kukwak ri na pa hte ixàpkur o ri ixpa.

¹² Nê na hte mẽ ixkwýjaja mẽ awýr mra nê Tirtũm kapêr o mẽ ajahkre o ri mẽ akôt pa. Hãmri nê hpãnhã mẽ apkur xà hã mẽ awý ka mẽ kãm mẽmoj gō. No kêt pa na pa hte mẽ uràk nê ixàpkur xà hã mẽ awýr kêt nê. Kot pa apu hã mẽ awý ka mẽ tanhmã ixto akapêr to nê axpên mã ijarênh o:

—Pêr ãm mẽ pahte kãm amnhĩrer pix kaxyw na hte Pawre mẽ pahwýr mra nê mẽ pamã Jejus Kris kot tanhmã mẽ panê amnhĩ nhĩpêx to hã harênh o pa. Pêr ãm apkur xà pix prãm xajã kot mẽ pamã ujarênh anhỹr o pa. Jakamã kot puj mẽ kuma nê ãm kuma.

Anhỹr o axpên mã ijarênh pymaj na pa hte mẽ ajahkre hpãnhã mẽmoj tã mẽ awýr kêt nê. Na pa hte ãm mry kà ho ixkre nhĩpêx nê ho wênê nê ja pix kukwak ri ixàpkur o ri ixpa. Nê amarĩ ri mẽ ajahkre ho ri mẽ akôt ixpa.

¹³ Nê Tirtũm mã amnhĩ jarênh xà hã ixkre kamã mẽ àpênh xwýnhjaja na htem hwýr mẽ mrrar xwýnhjaja mẽ àpênh pãnhã mẽ kãm amnhĩre. Nê mẽ kot mẽ kãm Tirtũm mã mẽmoj nhôr o kuhê xwýnhjaja na htem mãânên mẽ àpênh pãnhã mẽ kãm amnhĩre. ¹⁴ Nê Pahihti Krisja na pre ja hã mẽ pakukamã pahtã karô kot:

—Kêr ka mẽ kot tanhmã mẽ amã ijarênh to ho ri mẽ pa xwýnhjê mã amnhĩrer o ri apa. Anê.

¹⁵ Tã no na pa hte aa mẽmoj tã ixàhwýr kêt nê. Nê mẽ ate inhmã amnhĩrer kaxyw pa mẽ amã ja jarênh kêt nê. Aa ixte mẽmoj tã mẽ awýr kêt. Kot paj apu anê nê ixpijaam nê. Rý kot pa apu anê nê mẽ akukwak ri ixàpkur o ri ixpa hãmri nhũm mẽ akwýjaja ja hã ixpumu nê hã ijarênh o:

—Tk. Na hte amarĩ mẽ pajahkre o ri pa hkêt nê. ãm mẽ apkur xà pix

prâm xàj na hte ã mẽ pajahkre ho pa anê. Anê.

Jakamã na pa hte mẽmoj tâ mẽ awÿr kêt nê. ¹⁶ Ixte mẽ amã mẽ ujarênh mexja jarênh o ri ixpa htã na pa hte ja hã amnhĩ to jarkrar o ri ixpa hkêt nê. Pahihti Jejus na pre ja hã inhmã karõ pa hte kãm ho anhÿr o ri ixpa. Kot paj kãm ho anhÿr kêt nê ixpunuj nê ri ixpa. ¹⁷ Kêp ãm amnhĩ krã hkôt mân tanhmã mẽ amã ixujarênh to ho mẽ akôt ri ixpa ronhÿx pa hpãnhã ixãmnhĩx kãxpore hã mẽ awÿ. No ãm ã ixte amnhĩ nhĩpêx anhÿr kêt. Tĩrtũm tãm kot inhmã ja hã karõ jakamã na pa hte amarĩ ixãmnhĩx ri mẽ amã kapêr jarênh o mẽ ajahkre ho ri mẽ akôt ixpa nê mẽmoj tâ ixãhwÿr o ri ixpa hkêt nê. ¹⁸ Ixte amarĩ ri mẽ amã mẽ ujarênh mexta jarênh o ri ixpaja na inhmã hprãm. Ja na inhmã mex. Na pa hte ã amnhĩ nhĩpêx anhÿr o ri ixpa nhũm ja inhmã mex pa ixkĩnh nê ri ixpa. Jakamã na pa hte hpãnhã ixãhwÿr kêt nê. Nê inhmã mẽmoj prãm o ri ixpa hkêt nê. ¹⁹ Nê nhãm mẽ kãm tanhmã ixapênh to ho ixpa hkêt tâ pa hte mẽ piitã tanhmã mẽ kãm amnhĩ nhĩpêx to ho ri ixpa. Pê mẽ kãm Jejus kapêr jarênh o ri ixpa. Jakamã na mẽ ra ohtõ nê ixujarênh ma nê amnhĩ kaxyw Jejus kôt hamaxpêr nê hkôt amnhĩ xunhwÿ.

Pawre kot tãm mẽ piitã mẽ hipêx o pa hã amnhĩ jarênh

Wam Korîit 10.33

²⁰ Nê na pa hte Ijaewjê hwÿr ixpa nê mẽ kot amnhĩ nhĩpêx kôt amnhĩ nhĩpêx o ri mẽ hkôt ixpa. Ixte mẽ kurom Tĩrtũm kot finat Mojes mã mẽmoj tâ karõ hkôt amnhĩ nhĩpêx o ixpa hkêt tâ mẽ hkôt ri ixpa nê mẽ urãk nê hkôt amnhĩ nhĩpêx o ri ixpa. Mẽ kot ja hã ixpumunh nê ixte mẽ kãm Jejus jarênh mar nê ixpyrà nê amnhĩ kaxyw hkôt hamaxpêr kaxyw.

²¹ Tã pa hpãnhã mẽ kêp Ijaew kêt xwÿnhjê hwÿr ixpa nê mẽ kot amnhĩ nhĩpêx kôt amnhĩ nhĩpêx o ri mẽ hkôt ixpa. Mẽ kot ja hã ixpumunh nê ixkapêr mar nê ixpyrà nê amnhĩ kaxyw Jejus kôt hamaxpêr kaxyw. Tĩrtũm mẽ Kris wa hamaxpêr xã hkôt na pa hte ahpÿnhã mẽ kot amnhĩ nhĩpêx xwÿnhjê hwÿr mra nê ã amnhĩ nhĩpêx anhÿr o ri mẽ hkôt ixpa.

²² Nê na pa hte kormã mẽ kot Kris kôt amnhĩ xunhwÿr tohtuj anhÿr xwÿnhjê hkôt ri ixpa nê te ixte ho mẽ urãk nê kormã hkôt amnhĩ xãm nyw pyràk o amnhĩ nhĩpêx o ri mẽ hkôt ixpa. Mẽ kot ja hã ixpumunh nê ixkapêr mar nê hkôt amnhĩ nhĩpêx mex kaxyw. ã na pa hte mẽ piitã mẽ hkôt ri ixpa nê mẽ hkôt amnhĩ nhĩpêx o ri ixpa anê. Mẽ kot ja hã ixpumunh nê inhmã nê ixpyrà nê Kris kôt amnhĩ nhĩpêx tÿx kaxyw. ²³ Mẽ kot mẽ ujarênh mex mar kaxyw na pa hte mẽ piitã mẽ hkôt ã amnhĩ nhĩpêx anhÿr o ri ixpa. Tĩrtũm kot mẽ ho hkra nê mẽ ho mex kaxyw. Nê mããnen pa kot mẽ hã ixto mex kaxyw.

Pawre kot htÿx ri amnhĩ nhĩpêx kêt ã kot amnhĩ jarênh

Sikũn Ximotre 4.7; Eprêw 12.1-3

²⁴ Mẽ hprõt xwÿnhjaja na htem hprõt tÿx no nhũm mẽhõ pixi nê wam hkwyjê re nê wam tẽn pøj nhũm htem ja hã omu nê kãm mẽ hkĩnhxã gõ. Ja pyrà nê kêr ka mẽ apiitã tãm amnhĩ nhĩpêx mex rãhã ho ri apa kê Tĩrtũm mẽ apumu nê nhÿrmã ja pãnhã mẽ amã mẽmoj mex gõ.

²⁵ Nê mẽ hprõt xwÿnhjaja na htem mẽ hkĩnhxã hpyr prãm xàj mẽ hprõt xã hã arĩgro hwÿr apkati mẽ hprõt o kuhê. Prõt tÿx prãm xàj. Tã mẽ hprõt xã hã arĩgrota ã nhũm hkwyjê pê amnhĩ to wa nê amnhĩm hkĩnhxã py. Nom koja hkĩnhxãja kripêm kãm mex ry hkêt nê. Koja gaa nê hapêx tokyx anê. Tã nom

kot puj më Tirtüm kapër kôt amnhî nhîpêx mex o ri papa. Nê më hprôt xwÿnhjê kot hkînhxà hpyr prâm xàj apkati më hprôt o kuhêta pyrà nê apkati më hkôt amnhî nhîpêx mex o ri papa. Hâmri nhùm amnhî tâ më pahpumu nê nhÿrmã më pamã hkînhxà mex ò gõ. No âm jar hkînhxà kurom koja aa më pahpê hapêx kêt nê. Koja më pamã mex rãhã ho rãhã.

²⁶ Nê na hte më hprôt xwÿnhjaja htÿx ri tanhmã hprôt to ho pa hkêt nê. Na htem hkwyjê pê amnhî to wa kaxyw hprôt nê nhÿri më àhuk xàta pix pumunh pê hwÿr hprôt nê mra hãmri nê kamã ahtwÿ. Nê kamã àhuk pix kukamã hamaxpêr o hprôt tÿx nê mra. Ja pyrà nê na pa hte apkati më Tirtüm kôt pix mã amnhî nhîpêx o ri ixpa. Nhÿrmã kot inhmã mëmoj mex nhôr kaxyw.

Nê më pijapu mex xwÿnhjaja na htem htÿx ri nhÿhÿnh axpên tak kêt nê. Na htem nhÿhÿnh kot më htak o më rênh xà pix kamã më htak o më rênh kukamã hamaxpêr pê kamã më htak. Ja pyrà nê na pa hte ixtÿx ri tanhmã amnhî nhîpêx to ho ri ixpa hkêt nê. Na pa hte Tirtüm mã ijamaxpêr pê tanhmã amnhî nhîpêx to rãhã ho ixpa. Kot nhÿrmã inhmã mëmoj mex nhôr kaxyw. ²⁷ No na pa hte ixtÿx ri amnhî jamaxpêr xà hkôt tanhmã amnhî nhîpêx to ho ri ixpa hkêt nê. Kot pa ã amnhî nhîpêx anê nê ixte më kãm Jejus kapêr jarênh o ri ixpa htã âm ri ixtÿx ri ã amnhî nhîpêx anhÿr kaprÿ nhùm Tirtümja tee ri ja hã ixpumu nê inhmã mëmoj mex nhôr kêt nê.

10

Ijaew kot amnhî nhîpêx

Rômân 15.4; Eprêw 3.8-11; Jutre 5

¹ E Kris kôt ixkwÿjaja. Kot paj më amã amnepê mã më ixpê Ijaew hkukamã më inhîgêjtaja tanhmã më harênh to ka më inhma. Më kot pahî finat Mojes kôt ri më pa

xwÿnhjaja kot paj më amã harê. Më pahte më urak nê pahtÿx ri amnhî nhîpêx pymaj kot paj më amã tanhmã më harênh to ka më inhma. Mãn ka më arî më harênh ã anohtÿx japêr. Na prem piitã pika pê Ejit kamã pa htã kurüm kator pa. Hâmri nê ma kapôt ã kakrã pumunh o hkôt pa ho pa. Pry hkêt jakamã nhùm pre Tirtüm tanhmã kakrã hto nhùm ma më hkukamã pa nhùm më omu nê hkôt pa. Hâmri nê ra gõ xujanâr më kot kãm: “Gô kamrêk” anhÿr xwÿnhjaja wÿr pøj nê tee ri rêr prâm xàj amnhî kukamã hamaxpêr. Hâmri nhùm Tirtüm më kãm hkôt ã ho angrà nhùm më hkôt mex pê rêr pa nê axte kakrã hkôt pa ho pa. ² Finat Mojes kot më o pa jakamã nhùm prem kêp hkwy hã amnhî jarê nê kãm amnhî jarênh o:

—Nà kot paj më akapêr ma nê akôt ri amnhî nhîpêx o ixpa. Anê.

Te më pahpê Kris kwÿ hã amnhî jarênh kaxyw më kot gôx kãm më pahkrã kumrâr nhùm më pahte Kris mã amnhî jarênhhta pyràk. ³ Na prem kapôt ã ri pa nhùm Tirtüm tãm kaxkwa rùm më hwÿr më apkur xà rê nhùm më hkawrà nê ho apkur o pa. ⁴ Tã ra kôr xàj hirôt nhùm Tirtüm tanhmã më kãm kên prêkja to nhùm kurüm më kãm gõ axkapî nhùm më ho ixkò nê akupÿm hihtÿx. Æ Krisja më hkôt më ho më hihtÿx o pa anê. Më kot no ho omunh kêt tâ nhùm më hkôt më ho më hihtÿx o pa.

⁵ Tã no nhùm më ohtô nê Tirtüm kôt amnhî nhîpêx kêt nê. Kot më ho mex kumrêx tâ nhùm më âm amnhî tâ omu nê âm omu nê kapêr kôt amnhî nhîpêx kêt nê. Âm kapêr kwÿm ri tanhmã amnhî tomnuj to ho pa nhùm tee ri amnhî tâ më omu nê tanhmã më ho nhùm më hkwyja hpikaprâr pa. Hâmri nhùm arî më htîr xwÿnhjaja kapôt ã më hagiênh pa nê axte ma pa.

⁶ Jakamã kwa kër pu më kot ã

amnhî nhîpêx anhÿr ã më harênh ma nê hã pano htÿx nê ho papa hãmri nê ho më uràk kêt nê. Më uràk nê pahtÿx ri tanhmã amnhî nhîpêx to ho ri papa hkêt nê.

⁷ Nê na pre më hkwÿjaja sânti kutã hkôn krã ho rôrôk nê hkrî nê kãm amnhî jagrer pé amnhî to kuwÿ. Tîrtûm kapêr ã kagã htûm kot më kot amnhî nhîpêx anhÿr ã më harênh kot:

Na prem sânti kutã apkur o hkrî
nê kãm amnhî jagrer o hkrî
nê gaa nê pipãnh pix o pa.
Jao axpên kamã hpijaàm kêt
o pa.

Anhÿr jakamã kwa kêr pu më ã më kot amnhî nhîpêx anhÿrja ã pano htÿx nê ho më uràk hkêt nê.

⁸ Nê na pre më hkwÿjaja htÿx ri mjên nê hprô kuhpa hã nhãm ri më kamã hpijaàm kêt o pa. Mÿrapê nhûm arÿgro pixi hã më ohtô rax kumrêx nê axkaprã. Më kêp 23.000 nê pikaprãr pa. Tã ã Tîrtûm kot më panhîpêx anhÿr pymaj kêr pu më ja hã pano htÿx nê ho më uràk kêt nê. Æm kwarî ho kwarî.

⁹ Nê na pre më hkwÿjaja axtem nê htÿx ri tanhmã axpên mã Tîrtûm jarênh to nê harênh o:

—Nã Tîrtûmja gryk tokyx anhÿr kêt jakamã kwa pu më ã amnhî tomnuj anhÿr o papa. Kojã më pahpumu nê tanhmã më pahto hkêt nê.

Anhÿr tã nhûm tee ri ja hã më kuma nê më omu nhûm ja kãm mex kêt nê nhûm më hwÿr kagã xoprê nhô wenên xihtÿx kwÿrê nhûm më hwÿr mra nê më hkamnhar o më hkwÿjê pa. Tã ã kot më panhîpêx anhÿr pymaj kwa kêr pu më ja hã pano htÿx nê më uràk nê amnhî tã Tîrtûm kamã pajamak o papa hkêt nê. Kwarî ho kwarî.

¹⁰ Nê na pre më hkwÿjaja axtem nê Tîrtûm o kapêr punuj nê nhûm tee ri amnhî tã më kuma nê më hwÿr kapêr o wrÿk xwÿnh më nhûm ma më hwÿr wrÿy nê ý hã më hkwÿjê nhîmex. Tã ã kot më

panhîpêx anhÿr pymaj kwa kêr pu më ja hã pano htÿx nê ho më uràk nê Tîrtûm o pakapêr punuj kêt nê.

¹¹ Na pre më ixpê Ijaew nhîgêjtjaja ã htÿx ri amnhî nhîpêx o pa anê. Tîrtûm kapêr ã kagã htûm kot ã më kot amnhî nhîpêx anhÿr pi-itã harênh par. Më panhõ ejêp kaxyw. Më pahte kamã harênh nê më harênh mar tÿx nê më uràk nê ã amnhî nhîpêx anhÿr kêt kaxyw. Ra Jejus akupÿn më pahwÿr wrÿk xã hã arÿgro hkukamã grêre jakamã kwa kêr pu më kutêp më kurom kapêr kôt pix mã ri amnhî nhîpêx mex rãhã ho ri papa.

Më pahte mëmoj punuj nê amnhî to htÿx ã më pamã karô

Matêwre 4.1, 6.9-13; Wam Korîit 1.8; Sikûn Pêtre 2.9; Jutre 24

¹² Tã kêr ka më ã Ijaew kot amnhî nhîpêx anhÿr ã më harênhja ma nê ã ajamaxpêr anhÿr kêt nê. Rÿ më ajamaxpêr o:

—Nã mëmoj piitã kutã ixihÿtÿx kênã kot pa hkêt më uràk nê ã amnhî nhîpêx anhÿr o ri ixpa.

Anhÿr o më ajamaxpêr kêt nê. Kot kaj më ã amnhî jarênh anê nê ra më uràk nê tanhmã amnhî tomnuj to.

¹³ Nê na prem kapôt ã pare ri omnuj nê ri pa. Nhûm mëkarômnuti tanhmã më hkrã hto nhûm më tanhmã amnhî tomnuj to ho pa. Ja pyrã nê na hte arÿ më pahte amnhî tomnuj hprãm xãj tanhmã më pahkrã hto ho pa. Më pahpiitã ã më pahto anhÿr o ri më pahkôt pa. Nom nhûm Tîrtûm ra kot më pamã amnhî jarênh xã hkôt më panê omunh mex rãhã ho pa. Jakamã na pu htem tanhmã amnhî tomnuj to hkukamã pajamaxpêr nhûm ja hã më pahpumu nê më panê mëkarômnuti mã kapêr. Nê kutã më pahto paxihÿtÿx nê pu më ý hã amnhî tomnuj kêt nê. Nê ãm kôt pix mã amnhî nhîpêx mex o ri papa.

Mê kot sânti mā mẽmoj nhõr xwýnhjê jarênh

Wam Korîṭ 8.1-13; Karatas 4.8; Apokarip 9.20

¹⁴ Jakamã e Kris kôt ixkwýjaja. Kêr ka mẽ amnhî kaxyw sânti hkôt ajamaxpêr o ri apa hkêt nê. Nê amnhî to hwýr kêt nê. Âm kwarî ho kwarî.

¹⁵ E mẽ axàhpumunh tỳx ã amnhî jarênh jakamã kot paj mẽ amã mẽmoj jarê ka mẽ aprî hã inhmar tỳx japêr. ¹⁶ Nà na pu htem tõhã Jejus kot mẽ panê htyk mã pajamaxpêr kaxyw axpên wýr akuprô. Hãmri nê mẽmo kagô hkwý ru nê Tirtùm mã mex ã harê nê mẽmoj o pahkôm pê Jejus kot mẽ panê hkamrô pikapîr mã pajamaxpêr. Nê hpãnhã pãwti hõ py nê axpên mã ho hkry nê mẽ kot Kris pîr nê ï kamã hkamnhwýr nhùm mẽ panê htykja mã pajamaxpêr pê kuku. ¹⁷ Pãwtita âm pixire htã pu htem axpên mã ho hkry nê pahpita kuku. Mẽ pahpê Kris kwý hã mẽ pahte amnhî jarênh nhùm mẽ pahkwý kot ja hã mẽ pahpumunh kaxyw. Te mẽ pahtipxi nê ri mẽ papa pyrãk nê pãwti pixire htã pu mẽ pahpiitã kuku.

¹⁸ E kot paj hpãnhã mẽ amã amnepê mã Ijaew kot tanhmã amnhî nhîpêx to jarê ka mẽ inhma. Na pre htem Tirtùm mã mex ã harênh nê kãm amnhî nhõr ã kot amnhî tã mẽ omunh kaxyw nhùm prem tanhmã amnhî nhîpêx to. Jao kãm mẽ apkur xà hkwý gõ nê kãm mex o mex ã harê. Hãmri nê amnhî mã mẽmojta kwý xà nê hkur o hkrî. Jao ra Tirtùm mã mex o mex ã harê nê kãm kêp hkra hã amnhî jarê.

¹⁹ Nom mẽ kot sânti mã mẽmoj nhõr xwýnhjaja na htem kãm mẽmo mẽ apkur xà hkwý gõ nom âm kãm ôr kaprý. Tanhmã kot we amnhî to nê amnhî tã mẽ omu? Mo rît kaxyw no? Âm mẽ ïhkra ho mẽ kot amnhîm hipêx kênã.

Jakamã na htem âm kãm mẽ apkur xà hkwý nhõr kaprý. ²⁰ Mẽ kot sânti mã mẽmoj nhõr xwýnhjaja na htem Tirtùm mã ôr kêt nê. Mêkarõmnuti mã na htem kugô. Jakamã kot kaj mẽ urãk nê sânti mã mẽmoj gõ nê apê mêkarõmnuti hkwý hã amnhî to amnhîrît nê apê hkwý hã ri apa. Jakamã mẽ ate sânti mã mẽmoj nhõrta na inhmã hprãm kêt kumrêx. ²¹ Kot kaj mẽ panhõ Pahihti Jejus kot mẽ panê htyk ã mẽmoj kagô hkwý ho ixkõ hãmri nê ma mra nê hpãnhã sânti pê mêkarõmnuti hã mẽmoj to ixkõ. Hãmri nhùm Tirtùmja tee ri ja hã mẽ apumu nhùm ja kêp omnuj tỳx nê. Rý ka mẽ Pahihti Jejus kot mẽ panê htyk ã pãwti hkwý hku nê hpãnhã ma mra nê sânti pê mêkarõmnuti hã mẽmoj hku. Hãmri nhùm Tirtùm kêp ja omnuj tỳx nê. Mẽ pahte ã amnhî nhîpêx anhýrja na axpên kuhpa hã. ²² Jakamã kot ka mẽ ã amnhî nhîpêx anê nê te ra mẽ amã mêkarõmnuti hkînh nê mãânên amã Tirtùm kînh pyrãk o amnhî nhîpêx. Nê te Tirtùm kurom mẽ kajaja mẽ axàhpumunh tỳx pyrãk o amnhî nhîpêx. Nhùm tee ri amnhî tã mẽ apumu nê mẽ akamã gryk tỳx nê. Kwa mẽ okora. Koja Tirtùm akamã gryk ka amex kêt kumrêx.

Mẽ pamã Kris kôt mẽ pahkwýjê hkînh pê mẽ ho mex ã mẽ pamã karõ

Matêwre 20.28; Rõmãn 14.1–15.7; Piripos 2.1–4

²³ Nê na htem tõhã amnhî jarênh o:

—Nà kot pa inhmã mẽmoj to anhýr prãm nê ixãmnhîx ã amnhî nhîpêx anhýr o ri ixpa. Anê.

Tã no âm mẽmoj piitã mẽ pamã mex kêt. Na htem kãm mẽmoj to anhýr prãm xà hkôt mẽmoj piitã tanhmã ho ho ri pa nê tanhmã amnhî tomnuj to. Hãmri nhùm mẽ hkwýjaja ja hã mẽ omu nê mẽ urãk nê tanhmã ri amnhî tomnuj to. Jao Kris kôt amnhî xunhwýr tỳx kêt nê. ²⁴ Jakamã kwa kêt nê mẽ

amnhî pix kukamã pajamaxpêr pê tanhmã amnhî nhîpêx to ho papa hkêt nê. Määnên amnhî kwýjê hkukamã pajamaxpêr pê tanhmã mê ho mex to ho ri papa pê tãm ri amnhî nhîpêx o papa.

²⁵ Nê kot kaj mê amnhî xàpkur xà japrôr kaxyw ma nhÿhÿm mra nê mãmri axàmnhîx ri amã mëmoj prãm xà hkôt mëmoj japrô. Nom kêr ka mê axujaprôrja kêp sânti xàpkur xà hã mê hkukjêr kêt nê. Æm axàmnhîx ri mê kêp mëmoj japrôr o ri apa. ²⁶ Tirtùm kapêr ã kagã htùm kot ja jarênh kot:

Pika piitã hkôt mëmoj piitã kêp Tirtùm nhô na. Anê.
Jakamã mê mãmri axàmnhîx ri mëmoj piitã haprô nê mëmoj piitã hkur o apa.

²⁷ Tã koja mê kêp Kris kwý hkêt xwÿnhjê hõ ate kutã axàpkur kaxyw amnhî wÿr awÿ ka amã hwÿr amôr prãm nê mãmri ma hwÿr mô. Nhùm mëmoj to amã anhô ka axàmnhîx ri mãmri aku. No ri tee ri amnhî kukamã ajamaxpêr nê tanhmã hã hkukjêr to hkêt nê. Rÿ kãm:

—Kwa xà we mryja sânti hã mê apkur xà na nà?

Anhÿr o hã mê hkukjêr kêt nê. Æm mãmri axàmnhîx hkur o akrî. ²⁸⁻²⁹ Nom koja Kris kôt mê kot amnhî xãm tohtuj anhÿr xwÿnhjê hõ mê awÿr axà nê tee ri ja hã apumu nê amã:

—Kwa sânti hã mê apkur xà na ka ri mê kutã hkur o akrî.

Anhÿr o amã kapêr ka ama nê hkaga kurê kumrêx nê hkur kêt nê. Amã mex tã Kris kôt atôja kêp omnuj jakamã ka hkaga nê hkur kêt nê. No kot ka ãm ama nê arî hkur o anhÿr japêr. Kot amã harênh xwÿnhÿta kêp omnuj tã ka arî noo mã hkur japêr. Nhùm ja hã apumu nê tee ri Tirtùm kapêr kukamã tanhmã hamaxpêr to. Hãmri nê apyrã nê kuku nê gaa nê tee ri amnhî kukamã hamaxpêr nê amnhî mã:

—Hêxta waa nê. Sânti nhôja mex kêt tã pa ri kuku. Kwa na pa pêr hkurja o amnhî tomnuj nê. Hêxta waa nê. Anê.

Hãmri nê tee ri amnhî kukamã hamaxpêr o hkapri nê. Æ kot amnhî nhîpêx anhÿr pymaj koja mëhõ ã mëmo më apkur xà nê amã kapêr anê ka ama nê hkaga kurê kumrêx. Jao amnhî pix kukamã ajamaxpêr kêt nê. Määnên Kris kôt atô nê atôxjê mex kukamã ajamaxpêr. Nom koja amã kêp sânti hã mê apkur xà hã harê ka ama nê ã ajamaxpêr anhÿr japêr nê ajamaxpêr o:

—Nà kêp omnuj tã kot paj mamri kuku. Ja inhmã mex kênã. ³⁰ Ra ixte Tirtùm mã harênh nê ixàmnhîx hkur o inhÿr kênã kot kêt ã nê inhmã kapêr anê. Anê.

Kwa mê ã ajamaxpêr anhÿr kêt. Kot kaj mê ã ajamaxpêr anê hãmri nê Kris kôt atô rÿ atôx mex kukamã ajamaxpêr kêt nê.

³¹ Jakamã kêr ka mê tãm tanhmã amnhî nhîpêx to ho ri apa. Nê axapênh mex nê. Kêr kê mê piitã ja hã mê apumu nê mê apumunh kôt amnhîm Tirtùm mex ã harê. ³² Nê kêr ka mê piitã mê noo mã tãm ri amnhî nhîpêx o apa. Ijaew noo mã nê Ijaew kêt xwÿnhjê noo mã. Nê Jejus kwýjê noo mã. Mê piitã mê noo mã tãm ri amnhî nhîpêx rãhã ho ri apa. Mê kot tee ri mëmoj tã mê apumunh nê hpijaãm pymaj ka mê tãm ri mê piitã mê noo mã tanhmã amnhî nhîpêx mex to ho ri apa. ³³ Na pa hte ã amnhî nhîpêx anhÿr o ri ixpa. No na pa hte pa amnhî pix kukamã ijamaxpêr kêt nê. Mê piitã mê mex kukamã na pa hte ijamaxpêr o ri ixpa. Pê tanhmã amnhî nhîpêx to ho ri ixpa. Mê kot ja hã ixpumunh nê ixpyrà nê Jejus kôt amnhî xunhwÿr nê ãm kôt pix mã ri amnhî nhîpêx o pa kaxyw.

11

¹ Na pre hte Kris ã ã amnhî

nhîpêx anê nê mē piitā mē mex kukamā hamaxpēr rāhā ho ri pa. Tā na pa hte urāk nê ā amnhî nhîpêx anê. Jakamā kwa kēr ka mē ixpyrā nê ā amnhî nhîpêx anhÿr o mǎn ri apa.

Mēnijaja mē mjên ā hpijaàm ā mē kām karō

Epes 5.22; Wam Pêtre 3.1-6

² Nê na ka xep htem arî ra ixte tanhmā mē amā ixkapēr toja mǎ ajamaxpēr tÿx o ri apa. Na pa pre Kris kôt mē pahō nê mē pahōxjaja axpēn wÿr pikuprōnh nê tanhmā amnhî nhîpêx to hā mē amā karō ka prem inhma nê mē urāk nê ā amnhî nhîpêx anê. Ām hāmri na ka htem ā amnhî nhîpêx anhÿr o apa. Ja na inhmā mex.

³ Na pa pre krî hō kamā mēnijaja kot amnhî krā hpro hā mē amā mē harē. Ka prem inhma nhūm mē akwÿjaja kām ja mex nê nhūm mē akwÿjaja tee ri ja kukamā ajamaxpēr. No mēmo kaxyw na hte mēnijaja amnhî krā hpro? E kot paj ixprî hā mē amā ja jarē ka mē inhma. Nā Tirtūm kēp Kris jamār xwÿnh nhūm Kris kēp Tirtūm mǎ mē inhmyjē jamār xwÿnh. No mē anijaja mē amjên kēp Kris mǎ mē ajamār xwÿnh. Na hte mēnijaja ohtō nê ra mē mjên ā amnhî to amnhîrit kaxyw amnhî krā hpro nê ri pa. No mē inhmyjaja na pa htem ā amnhî nhîpêx anhÿr kêt nê. Na pa htem amarî ixkrā hkênh nê ixpa. ⁴ Jakamā na pa htem Tirtūm kapēr mar xā hā ixkre hwÿr axpēn wÿr akuprō nê Tirtūm nhÿ hā mē anijē mǎ kapēr jarēnh o ixkuhē. Rÿ Tirtūm mǎ tanhmā mē pajarēnh to. No ām amnhî krā hpro hkêt rāhā kām mē ajahkre rÿ kām mē pajarē. Kot pa mē amnhî krā hpro nê te mē apē ixprōjaja mē apē mē ijamār xwÿnh ā mē ajarēnh pyrāk. Jao te mē ixte mē ijamār xwÿnh Kris ā ixpijaàm kêt pyrāk o amnhî nhîpêx. ⁵ No mē anijaja mē ixte Kris

mǎ mē ajamār xwÿnh jakamā na ka htem Tirtūm nhÿ hā mē inhmā kapēr jarēnh rÿ kām mē pajarēnh kaxyw nê amnhî krā hpro. Mē ixte Kris mǎ mē ajamār xwÿnhjē hā apijaàm kaxyw ā amnhî nhîpêx anê nê mē amnhî krā hpro. Kot ka mē ā amnhî nhîpêx anhÿr kêt nê te mē ate mē ixtā apijaàm kêt pyrāk o amnhî nhîpêx nhūm mē amjên tee ri ja hā apumu nê hpijaàm nê. Te ate amnhî krā hkênh nê ri apa nhūm tee ri apumunh nê hpijaàm pyrāk. ⁶ Kot kaj mē amnhî krā hkênh nê ri apa nê amnhî kamā apijaàm nê ri apa. Mē anijaja na ka htem akrā hkî japjē nê kamā amex nê ri apa. No kot ka mē amnhîm akrā hkênh nê apunuj nê amnhî kamā apijaàm nê ri apa. Jakamā kēr ka mē Tirtūm mǎ amnhî jarēnh kaxyw nê amnhî krā hpro. Nom kot ka mē amjên ā apijaàm kêt nê ri apa hprām japēr nê mamrî amnhîm akrā hkênh nê ri amnhî kuk ā apijaàm kêt nê ri apa.

⁷ No mē inhmyjaja na pa htem amnhî krā hpro hkêt nê. Te mē ixpē Tirtūm pyrāk nhūm mē anijaja te mē apē Tirtūm kra pyrāk o na pu htem axpēn nhîpêx. Tirtūm krajaja na htem mēmoj tā Tirtūm mǎ karō hkêt nê. Ja pyrā nê mē anijaja na ka htem mē inhmyjē mǎ mēmoj tā karō kamā axihtÿx o apa hkêt nê. Na ka htem mē ixtā apijaàm kām mēmoj tā mē ixwÿ.

⁸ Amnepē mǎ Tirtūm kot mēmoj to kator krax rūm na pre myja kumrēx nhîpêx hāmri nê kēp ōkwa i hō kapa nê ho kām hprō nhîpêx. No na pre nija kumrēx nhîpêx nê ōkwa i ho kām mjên nhîpêx kêt nê. ⁹ Myja mǎ na pre hprō nhîpêx. No nija mǎ mjên nhîpêx kêt nê. ¹⁰ Jakamā kēr ka mē anijaja amjên ā apijaàm ā amnhî to amnhîrit kaxyw hāmri nê mē inhmā Tirtūm nhÿ hā tanhmā akapēr jarēnh to kaxyw rÿ kām amnhî jarēnh kaxyw hāmri nê

amnhî krâ hpro nê akuhê. Hâmri nhûm Tîrtûm kapêr o mē wryk xwÿnhjaja ja hã mē apumu nê hkînh nê tee ri mē akukamã hamaxpêr kêt nê.

11-12 Nê wam ni kator xwÿnhnta na pre myja rûm kato. Tã na pa htem jarãhã mē inhmyjaja hpãnhã mē anijê rûm ijapôj. Tîrtûm jamaxpêr xã hkôt. Tãm na pre ã mē pahte amnhî nhîpêx anhÿr kaxyw ã mē panhîpêx anê. Tã mē ixpê Pahihti Kris kwÿ hã mē inhmyjaja nê mē anijaja na pu htem ri ahte papa hkêt nê. Na pu htem axpên kutã pamã axpên hkînh o papa nê mêmoj to axpên kutã panojarêt o ri papa. Nê axpên to presija ho papa. Na hte mē anijaja mē amjên o presija ho apa. Nê mē amyjaja na ka htem mē aprô ho presija ho apa. Tã kêr ka mē anijaja mē amjên ã apijaãm o ri hkôt apa. ¹³ Jakamã kwa mē kot amnhî krâ hproja kukamã ajamaxpêr tÿx nê. Xã mē anhô krî kamã mênijaja mē mjên ã hpijaãm ã amnhî to amnhîrit kaxyw amnhî krâ hpro nã? Koja mē ja kaxyw ã amnhî nhîpêx anhÿr japêr kê mē rî mē anoo mã Tîrtûm mã amnhî jarênh kaxyw nê kupê xê hkwy ho amnhî krâ hprô nê rî kãm amnhî jarê. Nom koja mē ã amnhî nhîpêx anhÿr kêt nhûm mêmoyjaja tee ri ja hã mē omunh nê ho kapêr hkêt japêr hãmri kê mē rî amnhî krâ hpro hkêt nê ri pa.

¹⁴ Mē kot mē pahte amnhî nhîpêx ã mē pahpumunh nê hkînh kaxyw na pu htem tanhmã amnhî nhîpêx to ho ri papa. Na htem mē pahkrã hkî jarênh o: “Koja mêmoyjaja hkrã hkî japjê nê ri pa nê ra kamã omnajtî.” Anhÿr jakamã na pa htem amnhî krâ hkênh nê ri ixpa. ¹⁵ No mē anijaja na htem mē ajarênh o: “Mênijaja na htem hkrã hkî japjê nê ri pa nê kamã muxti.” Anhÿr jakamã na ka htem akrã hkî japjê nê ri apa. Mē akî te kêp mē akrã

hpro xã pyrãk. Na ka htem ã amnhî nhîpêx anhÿr o apa.

¹⁶ E na pa ra mē amã krî hkwy kamã Kris kwÿ nijaja kot mjên ã hpijaãm ã amnhî to amnhîrit kaxyw tanhmã amnhî nhîpêx to hã mē harê. Tã koja mēhõ nija tee ri ja ma nhûm ja kêp omnuj japêr. Nhûm amnhî jarênh o:

—Kêt. Kot paj tanhmã inhmã amnhî nhîpêx to hprãm xã hkôt tanhmã ri amnhî nhîpêx to ho ri ixpa. Koja inhmjên ja hã ixpumu nê hpijaãm nê rî tãm.

Anhÿr ã amnhî jarê ka mē tee ri ã kot amnhî jarênh anhÿrja ã ama nê kãm:

—Kwa nã ã ri ajamaxpêr anhÿr kêt nê. Na hte Kris kwÿjaja ã hamaxpêr anhÿr kêt nê. Anê.

Jejus tyk mã mē pajamaxpêr pê tanhmã mē pahte amnhî to hã mē pajarênh

Matêwre 26.26-30; Makre 14.22-26; Rukre 22.19-20

¹⁷ Nê na ka xep htem Tîrtûm mã amnhî jarênh xã hã ixkre hwÿr axpên wÿr akuprô nê kamã amnhî to mex kêt nê. Na ka htem tanhmã amnhî tomnuj to pa tee ri mē ajarênh ma nê ixkaprî nê. Nê amnhûm mē amex ã mē ajarênh kêt nê. ¹⁸ Na ka xep htem axpên wÿr akuprô nê mêmoyjã axpên mã akir nê axpên pê anhgrã. Nê ahpÿnhã mêmoyjã ajamaxpêr jao ra mē amã axpên kînh kêt nê. Na pa tee ri ã mē ajarênh anhÿrja ma nê ixkaprî htÿx nê. ¹⁹ Xã na hte Tîrtûm ahpÿnhã tanhmã mē pahte amnhî anhîpêx to hã mē pahpumunh kôt kãm mē pajapê hkêt ã amnhî jarê? Nã na hte ã amnhî nhîpêx anhÿr kêt nê. Kãm mē pajapê ho axpên pyrãk kênã.

²⁰ Nê na hte Kris kwÿjê piitã tãhã axpên wÿr akuprô nê Jejus tyk mã hamaxpêr kaxyw pãwti hkwy hku. Tã mē kajaja na ka xep htem ja kaxyw axpên wÿr akuprô nom axtem nê Jejus tyk

mã ajamaxpēr pē axàpkur kêt nē. Ām mẽ axàpkur pix kukamã ajamaxpēr nē axtem nē axàpkur rũnh o akrī. ²¹ Jao amnhī pix kukamã ajamaxpēr. Mē akwýjaja wam mñar nē hpõx nē mẽ apkur xà hã mẽ hkrī xwýnhjaja na xep htem hkwyjé rom mẽõta pinh pa. Nē wĩhtija nhũm mẽ mãânēn hpenh pa nē axtem nē ho axpã. Jakamã nhũm mẽ akwýjaja kot amnhī to hapu nē hpõx xwýnhjaja mẽmojta ã hprār pa. ²² Kwa mon ka mẽ amã hprãm nē anhõrkwý kamã axàpkur kêt nē? Mē kot Tĩrtũm mã amnhī jarēnh xà hã ixkre kamã na htem apkur rũnh hkêt nē. Ka mẽ ã amnhī nhĩpēx anē nhũm mẽõ hkêt xwýnhjaja amnhī to hapu nē mra nē mẽõ hã prã nē amnhī kamã hpijaam nē. Kwa xà kot pa ã mẽ ate amnhī nhĩpēx anhỹr ã mẽ ajarēnh ma nē ixkĩnh nē mẽ ate amnhī nhĩpēx mex ã mẽ ajarē? Nà kot paj ã mẽ ajarēnh anhỹr kêt nē.

²³ Pahihti Jejus na pre ja hã tanhmã inhmã kapēr to nē inhmã:

—Kēr ka mẽ tõhã axpēn wýr akuprõ nē axàpkur pē ixtyk mã mãn mẽ ajamaxpēr pē ã amnhī nhĩpēx anē nē ã amnhī nhĩpēx anē. Anē.

Jakamã kot paj ixprī hã amnhī xõ ri mẽ amã kot tanhmã inhmã kapēr tota jarē ka mẽ inhma. Nà Jejus kormã htyk kêt ri Jut Kariot ra kot põristi mã hã àmnēnh kaxyw nhũm kamã nhũm Jejus mẽ ý hã mẽ ahkre xwýnhjē mẽ apkur kaxyw hkrī hpa. Hãmri nhũm Jejus pãwti hõ py nē o xa ²⁴ nē Tĩrtũm mã harē nē kãm:

—Pa Papaj. Nà ãm hãmri na ka hte mẽ inhmã mẽ inhõ mex o apa. Anē.

Nē hpãnhã pãwja o hkry pa nē ho mẽ kot ý hã mẽ ahkre ho mẽ pa xwýnhjē nhĩpēx pa nē mẽ kãm:

—E na pa ã pãwti ho hkry nē mẽ amã õr anē. Koja mẽ ã inhĩpēx anē nē te mẽ kot ixto hkry hpar pyrãk

o inhĩpēx pa amnhī xà htýx kamã ijamak kãm ty. Nom mẽ anē kot paj ty. Jakamã e kēr ka mẽ ixwakre kamã tõhã axpēn wýr akuprõ nē ixte mẽ ate amnhī tomnuj pãnhã amnhĩrer kaxyw mẽ anē ixtyk mã ajamaxpēr pē akĩnh nē pãwta kur o akrī. E mẽ mãmri axãmnhĩx aku. Anē.

²⁵ Hãmri nē hpãnhã kop kãm wĩhtita py nē o xa nē mẽ kãm:

—E kop kãm wĩhtija te kēp Tĩrtũm kot mẽ atã amnhī jarēnh nyw xà jarēnh pyrãk. Ixtyk kukwak ri koja mẽ ato hkra. Kot paj ty nhũm ixkamrõ mẽ anē axkapĩ. Jakamã e. Mē kopja kamã wĩhti ho akõm o axpēn nhĩpēx. Nē ho akõm pē ixte mẽ anē ixtyk mã ajamaxpēr. Anē.

²⁶ Tã ã kot amnhī jarēnh anhỹr jakamã na pu htem axpēn wýr akuprõ nē pãwti hkwy hku nē mẽmo kagõ hkwy o ixkõ. Nē ho pahkõm pē axpēn mã Jejus tyk jarēnh o pahkrī. Tã kēr pu mẽ arĩ ã amnhī nhĩpēx anhỹr o ri papa rãhã nhũm Jejus akupýn mẽ pahwýr wrý. ²⁷ Jakamã kot kaj mẽ tõhã mẽmo arĩgro hã kot mẽ panē htykja mã ajamaxpēr kaxyw axpēn wýr akuprõ. Hãmri nhũm mẽ anhĩõ mẽ awýr axà nē nhỹ. Nom axtem nē Jejus tyk mã hamaxpēr kêt japēr. Nē htýx pãwti kur o nhỹ. Nē hkõt amarĩ mẽmo kagõ ho hkõm o nhỹ. Koja ã htyk mã hamaxpēr kêt rãhã amnhī nhĩpēx anē nē te Jejus o kapēr pyrãk o amnhī nhĩpēx. Te ho kapēr o:

—Nà Jejus amarĩ htyk nhũm hkamrõ amarĩ hpikapĩr kēnã. Na pre mẽ panē htyk kêt nē.

Anhỹr o ho kapēr pyrãk. ²⁸ Jakamã kwa kēr ka mẽ ate pãwta kur kaxyw nē taxy kormã tanhmã ate amnhī nhĩpēx to mã ajamaxpēr nē ajamaxpēr o:

—Kwa mãn pa Tĩrtũm kapēr kõt amnhī nhĩpēx mex rãhã ho ri ixpa nà?

Anhÿr o mǎn ajamaxpêr. Hāmri nê ate hkôt amnhî nhîpêx mex ã amnhî pumu nê amarî axâmnhîx aku. No kot ka mē kormã mēmoj punuj kaga hkêt nê arî ri ho anhÿr o pa hāmri nê kām ajamaxpêr nê hkur kêt nê. Rÿ tanhmǎn tee ri tanhmǎ ate amnhî tomnuj tota mǎ ajamaxpêr nê akaprî nê. Hāmri nê tokyx Tirtûm mǎ amnhî jarê nê amnhî to mex prǎm xàj amnhî to awÿ hāmri nê arî kormã axâmnhîx pǎwtita ku. ²⁹ Kojã mēhō mē akôt axà nê mēmoj kukamã hamaxpêr pē htÿx pǎwti nhîrēnhata ò py hkur o nhÿ. Hāmri nhûm Tirtûm tee ri ja hǎ omu nê hǎ tanhmǎ ho. ³⁰ Na ka mē ra axohtō nê ã amnhî nhîpêx anê nê atÿx ri mēmoj kukamã ajamaxpêr pē pǎwta ku. Jejus kot mē panê htykja mǎ ajamaxpêr kêt pē atÿx tanhmǎ ajamaxpêr to pē hkwÿ hkur o akrî. Mÿrapê na ka mē ra ja hǎ axà nê ri apa. Nê mē akwÿjaja ra htyk rax nê. ³¹ Nom kot ka mē xapên wÿr akuprō hāmri nê akupÿm tām xapên kôt ajamaxpêr nê xapên kôt amnhî nhîpêx nê rî kormã pǎwtita ku. Hāmri nhûm Tirtûm ja hǎ mē apumu nê tanhmǎ mē ato hkêt nê. ³² Na hte mē pahte tanhmǎ amnhî tomnuj to hǎ mē pahpumu nê hǎ tanhmǎ mē pahto. Mē pahte ja hǎ amnhî pumunh nê axte ã amnhî nhîpêx anhÿr kêt kaxyw na hte ã mē pahpê hkrajê nhîpêx anê. Jakamã kot puj mē nhÿrmã mē kēp hkra hkêt xwÿnhjê hkôt kuwyta wÿr ma papa hkêt nê. ³³ Jakamã e Kris kôt ixtō nê ixtōxjaja. Kêr ka mē axte Pahihti Jejus tyk mǎ ajamaxpêr kaxyw xapên wÿr akuprō. Hāmri nê ra xapên wÿr apikuprōnh pa hǎ xapên pumu nê rî kormã pǎwti hkwÿ hku nê hkur pē Jejus kot mē panê htyk mǎ ajamaxpêr o akrî. ³⁴ Nê ka mē atō ra amã prǎm japêr nê anhōrkwÿ kamã apku nê rî kormã mē hkôt tē. Jao ra anhōhy htu nê ajamakêtkati

nê akwÿjê jamār o nhÿ. Kê mē hpôx pa ka mē atixpi nê Pahihti Jejus tyk mǎ ajamaxpêr pē hkur o akrî. Hāmri nhûm Tirtûm ja hǎ mē apumu nê hkînh nê tanhmǎ mē ato hkêt nê.

Na ka prem mē ate inhmã kaga nê mēnhata kamã mēmoj tã ixkukjêr rax nê. Tã na pa ra kagã ja kamã mē amã hkwÿ jarēnh rax nê. Nom kot paj piitã harēnh par kêt nê. Kot paj ãm mē amã hkwÿ pix jarê. Hāmri nê nhÿrmã ma mē awÿr mō nê mē apumu nê kormã axte mē amã harēnh jatir xãm kumê.

12

Mē kot Tirtûm kapêr o hêx xwÿnhjê jarēnh

Rômǎn 12.6-8; Wam Korîit 14.29; Wam Pêtre 4.10-11; Wam Juǎw 4.1-2

¹ Nê kot paj hpānhã mē amã tanhmǎ Tirtûm Karō jarēnh to ka mē inhma. Tanhmǎ kot mē pahkrã hto nhûm mē pahte ahpÿnhã tanhmǎ kām amnhî nhîpêx to ho papaja kot paj mē amã harê.

² Amnepê mǎ kormã mē ate Kris kôt amnhî xunhwÿr kêt ri na ka prem sǎnti hkôt ri amnhî nhîpêx o ri apa. Kapêr kêt tã ka prem hkôt ri amnhî nhîpêx rǎhã ho ri apa. Te kot mē ano kupyrr pyrāk ka mē kām mex o mex ã harēnh o ri apa. Nê kām amnhî jagrer pē amnhî to hwÿr o ri apa. Á na ka prem amnhî nhîpêx anhÿr o ri apa.

³ Tã ra hpānhã Tirtûm kôt amnhî xunhwÿ.

Na htem ohtō nê Tirtûm nhÿ hǎ kapêr jarēnh o pa hǎ amnhî jarēnh tã no ãm mē hkwÿjaja ja hǎ amnhî to hêx. Tã kot paj îxprî hǎ mē amã tanhmǎ mē harēnh to. Kojã mēhō mē kām Tirtûm nhÿ hǎ kapêr jarēnh o pa hǎ amnhî jarê hǎ kojã Jejus o kapêr punuj o pa hkêt nê. Kojã harēnh o:

—Jesús kēp mē panhō Pahihti jakamã kwa pu mē hkôt amnhî

xunhwý nê hkôt amnhĩ nhĩpêx o ri papa.

Anhÿr o harê. Koja mēhō ã mē amã kapêr anê ka mē ama nê mē kot Tirtũm nhỹ hã kapêr jarênh o pa xwýnh ã omunh kurê kumrêx. No koja mē amã ã kapêr anhÿr kêt nê ka mē ama nê Tirtũm kapêr o hêx o pa hã omunh kurê kumrêx.

Tirtũm Karō kãm mē pahte axpên to mex prãm ã harênh

Rômãn 12.6; Epes 4.7; Wam Pêtre 4.10

⁴ Nê ahpÿnhã kot tanhmã mē panhĩpêx to xwýnhja ãm pixii. Kêp Tirtũm Karō. Na hte mē pahkarō mã agjê nê ahpÿnhã tanhmã mē pahte axpên to mex kaxyw tanhmã mē panhĩpêx to. Kot tanhmã mē panhĩpêx to xàja ohtô. Mē pahte ahpÿnhã ri tanhmã kãm amnhĩ nhĩpêx to nê tanhmã axpên to mex to ho ri papa kaxyw na. Tirtũm Karō na hte ja kaxyw tanhmã mē pahkrã hto.

⁵ Nê mē pahte kãm tanhmã amnhĩ nhĩpêx to ho papa xwýnhja haxwýja ãm pixii. Kêp Pahihti Jejus. Tã na pu htem ahpÿnhã kãm tanhmã amnhĩ nhĩpêx to ho ri papa.

⁶ Nê kot mē pahto ajuta nhũm mē pahte ahpÿnhã tanhmã axpên to mex to ho papa xwýnhja haxwýja ãm pyxii. Kêp Tirtũm. Na pu htem ahpÿnhã tanhmã hkôt axpên xunhwÿr tÿx to kaxyw tanhmã axpên to mex to ho papa.

⁷ Nê Karōja na hte ahpÿnhã tanhmã axpên kaxyw mē panhĩpêx to pu mē axpên to ajuta mex o ri papa.

⁸ Jakamã na pu hte mē pahkwÿjaja Tirtũm Karō nhỹ hã ma mē pahkwÿjê mã Tirtũm kapêr jarênh o ri mē hkôt papa. Nê mē pahkwÿjaja ma ÿ hã paxãhpumunh mex pê ma ri kapêr o mē ahkre ho mē hkôt papa.

⁹ Nê mē pahkwÿjaja Karō nhỹ hã Tirtũm kot tanhmã mē pahto ajuta hto kaxyw hkôt paja-maxpêr tÿx nê.

Nê mē pahkwÿjaja akupÿm mē à xwýnhjê ho mex o papa nhũm mē akupÿm mex nê pa.

¹⁰ Nê mē pahkwÿjaja aa mē kot mēmoj pumunh kêt kwÿ ho anhÿr o ri mē hkôt papa.

Nê mē pahkwÿjaja Tirtũm kapêr mar tÿx nê ô ri mē kãm harênh o mē hkôt ri papa.

Nê mē pahkwÿjaja Tirtũm Karō nhỹ hã tanhmã mē kot amnhĩ nhĩpêx to hã mē omunh o papa. Rÿ pahprĩ hã mēkarōmnuti nhỹ hã mē kot amnhĩ nhĩpêx ã mē omunh o papa.

Nê mē pahkwÿjaja nhãm mē kapêr mar kêt tã ra mē kapêr o pakapêr.

Nê mē pahkwÿjaja mē kapêr o pakapêrja ma nê mē kot mar kêt xwýnhjê mã harê. Kormã aa pahte mar kêt tã ra pahprĩ hã mar mex nê mē kãm harê.

¹¹ Æ na hte Tirtũm Karō kãm hprãm xà hkôt tanhmã mē panhĩpêx to pu mē ahpÿnhã ÿ hã ã axpên nhĩpêx anhÿr o ri axpên kôt papa.

Te mē pahpê Kris nhĩ pyrãk ã mē pajarênh

Rômãn 12.3-8; Epes 1.22-23, 4.11-16; Korosê 3.15

¹² E pa hpãnhã mē amã mē panhĩ kamã tanhmã mēmoj jarênh to ka mē inhma nê hã anohtÿx nê. Mē panhija ãm pixi htã no ãm kamã mēmoj xohtô. Kamã mē pahte nê kamã mē pahpa nê kamã mē pajakwa. Nê mē panhĩnhu nê mē pano. Æ mē panhĩ kamã mēmoj xohtô kot anhÿr. Ja pyrã nê Kris nhija ãm pixi htã te mē pahpê ï kamã mēmoj xohtôta pyrãk. Mē pahkwÿjaja te mē pahpê hte pyrãk. Nê mē pahkwÿjaja te mē pahpê

ihkra pyrək. Nē mẽ pahkwỳjaja te mẽ pahpê no pyrək.

¹³ Mẽ pahpê Kris kwỳjaja axpên kaxyw mẽ paxohtôo. Mẽ ixpê Ijaewjaja nē mẽ apê Ijaew kêt xwỳnhjaja. Nē amari ri mẽ kām mẽ axâpênh o mẽ apa xwỳnhjaja nē amnhĩ mã ri mẽ axâpênh o mẽ apa xwỳnhjaja. ã ahpỳnhã mẽ paxohtô kot anhỳr tã nhũm Tirtũm Karõ te mẽ pahpê Kris nhĩ pixi pyrək o mẽ panhĩpêx. Nhũm Krisja mẽ pahpiitã mẽ pamã Karõ gõ nhũm mẽ pahkarõ mã agjê. Pixi htã mẽ pahpiitã mẽ pahkarõ mã agjê.

¹⁴ Nē mẽ panhĩja pixi tã kamã tanhmã mẽ pakute xàja ohtôo. Tã Kris nhĩja te kot mẽ panhĩja pyrək. Urək nē kamã mẽ paxohtôo. Jakamã na pu htem ahpỳnhã tanhmã kām amnhĩ nhĩpêx to ho ri papa. Karõ kot tanhmã amnhĩ kaxyw mẽ panhĩpêx to xà hkôt.

¹⁵ Nē kop ãm mẽ pahparja kapêr ronhỹx tee ri mẽ panhĩhkra pumu nē amnhĩ mã:

—Hêxta waa nê. Kêp ãm ixpê mẽ ihkra ronhỹx pa inhmex nê ijarir. No ãm ixpê mẽ hpar pix jakamã pêr ãm mẽ hkĩnhã ixpê mẽ hkwy hkêt ãm ixpê mẽ hatur xà pix na pa.

Anhỳr o amnhĩ jarênh japêr. Nom ja kot anhỳr kêt. Axtem nhỹhỹm kot mẽ pahto pa kaxyw na mẽ pahparja. Nê axtem mẽmoj tã mẽ paxâpênh rỳ mẽmoj jamỳnh kaxyw na mẽ panhĩhkraja. Na pu htem hamê wa ho presija rãhã ho papa. Ja pyrã nê kot puj mẽ pahkwỳjê hõ mẽ parom Tirtũm Karõ nhỹ hã mẽmoj tã âpênh tỳx ã omu nê hkĩnhã mẽ pahte amnhĩ to warê hkêt ã amnhĩ jarênh o papa hkêt nê.

¹⁶ Nē mẽ pajamakja kapêr ronhỹx kapêr o:

—Hêxta waa nê. Kêp apu ixpê mẽ no ronhỹx pa inhmex nê ijarir. No ãm ixpê mẽ umar xà pix jakamã pêr ãm ixte ho warê hkêt kumrêx.

Anhỳr o amnhĩ jarênh japêr. Nom ja kot anhỳr kêt. Hamê wa mex kênã. Axtem ho mẽ paxumar kaxyw na mẽ pajamakja. Nê axtem ho mẽ parit kaxyw na mẽ panoja. ¹⁷ Kêp ãm mẽ pano pix ronhỹx pu mẽ parit pix nê paxumar kêt nê ri papa. Rỳ kêp ãm pajamak pix ronhỹx pu mẽ paxumar pix nê parit kêt nê mẽ paxupâr kêt nê ri papa. ¹⁸ Mẽ panhĩja pixi htã kamã hikukrêx xohtôo. Na pre Tirtũm amnhĩ krã hkôt kamã mẽmoj piitã hipêx nê hanhõ. ¹⁹ Kêp ãm mẽ panhĩja kamã ãm mẽmoj pixi ronhỹx pu mẽ pamex kêt nê papa. ²⁰ Tã no ãm kot anhỳr kêt. Mẽ panhĩja ãm pixi htã kamã hikukrêx xohtôo. ²¹ Jakamã na hte mẽ panoja amnhĩ nê mẽ panhĩhkra mã kãm:

—Tk kwa ma tẽ. Ixte ato presi-jare hã.

Anhỳr o kãm kapêr kêt nê. Rỳ mẽ pahkrãja amnhĩ nê mẽ pahpar mã kãm:

—Tk kwa ma tẽ. Na pa ato presija hkêt nê.

Anhỳr o kãm kapêr kêt nê. Ja pyrã nê kot puj mẽ nhỹri Kris kôt panhĩõ pumu nê pamex o pahte hakrenh ã amnhĩ jarênh kêt nê. ²² Nê mẽ panhĩ kamã mẽmoj kwỳ te hirerek pyrək tã no pu mẽ arĩ pamã hapê nê. Ja pyrã nê kêr pu mẽ kormã mẽ kot Kris kôt amnhĩ xunhwỳr tohtuj anhỳr xwỳnhjaja pu mẽ pamã mẽ hkĩnh kãm tanhmã mẽ kutã pano-jarêt to ho ri papa.

²³⁻²⁴ Nê na pu htem mẽ panhĩ kamã mẽ pakukrêx kwỳ hã pahpi-jaam nê hpro nê ri ho papa. Nê hkwy hã pahpijaam kêt nê hpro hkêt nê ho ri papa. Nê hkwy mẽ pahpê omnajti htã pu mẽ ho mex nê ri ho papa. Tirtũm kot ã mẽ panhĩpêx anhỳr jakamã na pu htem mẽ pakamã mẽ pakukrêx kwỳ mẽ pahpê omnajti htã pu mẽ ho mex nê ri ho papa. Ja pyrã nê kêr pu mẽ Tirtũm kôt mẽ pahtõ nê

mě pahťōx piitā ho mex o ri papa. Ně tām mẽ hipêx. Mě pahkwýjaja muxre ně mẽ pahkwýjaja omnajti htāā. Tanhmā mẽ kute htā pu mẽ kêp mẽ Jejus kôt mẽ pahťō ně mẽ pahťōx ā mẽ ho mex o ri papa.

²⁵ Ně na hte mẽ panhī kamā mẽ pahpar ně mẽ panhīhkra ně piitā axpēn kôt àpēnh mex o pa. No na hte mẽ pahparja nhýhým ma mra nhūm ihōja hkwým nhýhým ma mrar kêt ně. Na hte wa axpēn kôt àpēnh mex o pa. Ja pyrā ně kêr pu mẽ pahpê Tirtūm krajaja axpēn kôt amnhī nhīpêx rāhā ho ri papa. Ně axpēn to mex rāhā ho ri papa. No ri axpēn kwým ri tanhmā amnhī nhīpêx to ho ri papa hkêt ně.

²⁶ Na pu htem tōhā nhýhýnh panhī kamā paxā ně ri papa. Pahkrā tātāk rý pakatut gêk. Jao te mẽ panhī piitā kamā mẽ paxā pyrāk. Ně nhýhýnh akupým pamex ně te panhī piitā hkôt akupým pamex pyrāk. Ja pyrā ně koja Kris kôt panhīō nhýhýnh à ně ri pa. Rý tanhmā amnhī to ně ra hkaprī ně ri pa pu mẽ ja hā omu ně ý hā pahkaprī ně papa. No koja mẽmoj tā hkīnh ně pa pu mẽ ja hā omu ně ý hā pahkīnh ně papa.

Te mẽ pahpê Kris nhī pixi pyrāk ā mẽ pa jarēnh

²⁷ Ně mẽ pahpê Kris kwýjaja te mẽ pahpê Kris nhī pixi pyrāk. Ahpýnhā mẽ pahte tanhmā amnhī nhīpêx to ho papa htā mẽ pahpê Kris kwý jakamā te mẽ pahpê ī pixi pyrāk.

²⁸ Ně mẽ pahte Kris kôt tanhmā pahkwýjê ho ajuta hto ho papa kaxyw na pre Kris ahpýnhā tanhmā mẽ paxunhwýr to.

Mě pahkwýjaja mẽ pahte ý hā nhām mẽ kām kapêr jarēnh o papa kaxyw mẽ paxunhwý.

Ně mẽ pahkwýjaja mẽ pahte ý hā tanhmā kapêr jarēnh to ho ri papa kaxyw mẽ paxunhwý.

Ně mẽ pahkwýjaja Tirtūm kapêr jarēnh o mẽ ahkre ho ri mẽ papa kaxyw mẽ paxunhwý.

Ně mẽ pahkwýjaja mẽ pahte aa mẽ kot mẽmoj pumunh kêt kwý ho anhýr o ri papa kaxyw mẽ pa xunhwý.

Ně mẽ pahkwýjaja akupým mẽ à xwýnhjê ho mex o mẽ papa kaxyw mẽ pa xunhwý.

Ně mẽ pahkwýjaja mẽ kapêr o mẽ hihtýx o mẽ papa kaxyw mẽ pa xunhwý.

Ně mẽ pahkwýjaja mẽ pahte tanhmā mẽ ho ajuta ho ho ri papa kaxyw mẽ pa xunhwý.

Ně mẽ pahkwýjaja nhām mẽ kapêr ô ho mẽ pakapêr o mẽ papa kaxyw mẽ pa xunhwý.

Ā na pre ahpýnhā mẽ pahpê hkwýjê piitā mẽ paxunhwýr anê. ²⁹ No na pu htem pahpiitā axpēn kôt Tirtūm kapêr o mẽ ahkre ho ri papa hkêt ně.

Ně mẽ pahpiitā ý hā tanhmā pakapêr to ho ri papa hkêt ně.

Ně mẽ pahpiitā kapêr jarēnh o ri papa hkêt ně.

Ně mẽ pahpiitā aa mẽ kot mẽmoj pumunh kêt kwý ho anhýr o ri papa hkêt ně.

³⁰ Ně mẽ pahpiitā akupým mẽ à xwýnhjê ho mex o ri papa hkêt ně.

Ně mẽ pahpiitā mẽ kapêr ô ho ri pakapêr o ri papa hkêt ně.

Ně mẽ pahpiitā ri mẽ kapêrja ma ně pakapêr kām pahkwýjê mã harēnh o ri papa hkêt ně.

Na pu htem ahpýnhā tanhmā Kris kôt mẽ pahkwýjê ho ajuta hto ho ri papa. ³¹ Tā kêr pu mẽ pahpiitā pamā axpēn kīnh pê tanhmā axpēn to mex to ho ri papa. Ja na mex o kot mẽmoj piitā hakrenh par. E kot paj ixprī hā tanhmā mẽ amā ja jarēnh to ka mẽ inhma.

13

*Mê pahte axpên kamã paxukapri ho papa hã mê pamã karõ
Juãw 13.31-35; Karatas 5.13-15;
Korosê 3.12-14*

¹ Kot pa ma mê piitã ahpÿnhã mê kapêr kãm mê kãm Tirtûm kapêr jarênh o ri ixpa japêr. Âm mê piitã mê kapêr o ixkapêr mex o mê kãm harênh o ri ixpa japêr. Nê Tirtûm kapêr o mê wrÿk xwÿnhjê kapêr o mê ahkre ho ri ixkwÿjê hkôt ixpa japêr. Tã inhmã mê hkÿnh kêt kãm ixte mê ahkre ho ri ixpa ronhÿx mê inhma nê âm inhma. Nhûm ixkapêrja te ixte rat tatak pyrãk o pa tee ri Tirtûm kapêr o mê ahkre kaprÿ ho ri mê hkôt ixpa nhûm Tirtûm tee ri inhmã mê hkÿnh kêt ã xipumu nê inhmã:

—Nà amã mê hkÿnh kêt jakamã na ka tee ri ixkapêr o mê ahkre kaprÿ. Anê.

² Rÿ kot paj Tirtûm xàhpumunh tÿx o mê kãm kapêr pimxur kwÿ jarênh o ri ixpa japêr. Rÿ Tirtûm mê kurom inhmã mêmoj to amnhÿrit pa omu nê mê kãm harênh o ri ixpa japêr. Rÿ pa Tirtûm kot amnhÿ nhÿpêx piitã omunh par japêr. Rÿ ixte amnhÿ kaxyw hkôt ijamaxpêr tÿx kôt ÿ hã kên krã hprêk õ mã ixkapêr nhûm kot inhmar nê inhmar xà hkôt nhâm pikamênh japêr. Tã inhmã ixkwÿjê hkÿnh kêt kãm ã amnhÿ nhÿpêx anê nhûm Tirtûm tee ri ja hã xipumu nê inhmã:

—Nà amã mê hkÿnh kêt jakamã te axàhpumunh tÿx kêt kumrêx pyrãk. Na ka tee ri ã mê kãm ixkapêr jarênh anhÿr o ri apa kaprÿ. Anê.

³ Rÿ pa mê kêp amrakati xwÿnhjê mã ixkukrêx nhôr par japêr. Rÿ Kris ã mê kãm amnhÿ grôn timer kôt mê kãm xa nhûm mê hã xipÿr japêr. Tã inhmã mê hkÿnh kêt kãm ã amnhÿ nhÿpêx anê nhûm Tirtûm tee ri ja hã xipumu nê inhmã:

—Nà ã ate mê kãm amnhÿ nhÿpêx anhÿr o ri apa htã amã mê hkÿnh

kêt jakamã na ka tee ri ã mê kãm amnhÿ nhÿpêx anhÿr kaprÿ. Anê.

⁴ Kot puj mê pamã axpên kÿnh hã kot puj mê kritpêm mê piitã mê kãm pahprÿ ho papa.

Jao axpên kãm pagryk tokyx anhÿr kêt nê.

Nê pamã axpên to mex pix prãm.

Nê mêmoj tã axpên kamã pagryk kurê kumrêx kêt nê.

Nê mêmoj tã amnhÿ to jarkrar o ri papa hkêt nê.

Kot puj mê pamã axpên kÿnh hã kot puj mê ã amnhÿ nhÿpêx anhÿr o ri papa hkêt nê.

⁵ Nê kot puj mê axpên kamã paxukapri ho papa hã kot puj mê tãm axpên nhÿpêx rãhã ho papa. Jao amnhÿ pix kukamã pajamaxpêr o ri papa hkêt nê. Nê mê pagryk tokyx anhÿr kêt nê. Rÿ axpên kãm pagryk tokyx anhÿr hkêt nê. Rÿ koja mêhõ tanhmã mê panhÿpêx kati hto pu mê âm amnhÿ tã omu nê axte kot tanhmã mê panhÿpêx tota mã pajamaxpêr kêt nê.

⁶ Nê kot puj mê pamã axpên kÿnh o papa hã kot puj mê tee ri mêhõ kot tanhmã amnhÿ tomnuj to hã omu nê pahkapri nê. Rÿ tanhmã kot amnhÿ to mex to hã omu nê pahkÿnh nê.

⁷ Nê kot puj mê pamã axpên kÿnh o papa hã kot puj mê arÿ Tirtûm kot mê pahto mex par jatur xà mênh xà hã arÿgro jamãr rãhã ho ri papa. Nê mê kot Kris ã tanhmã mê pahto htã pu mê tee ri amnhÿ kukamã tanhmã pajamaxpêr to hkêt nê. Âm mê kutã amnhÿ to htÿx nê mê kãm pakuhê nê arÿ amnhÿ kaxyw Tirtûm mã pajamaxpêr tÿx rãhã nê.

⁸ Nê kot puj mê pamã axpên kÿnh o papa hãmri nê aa mê pahte ã amnhÿ nhÿpêx anhÿrja mã panhÿrer kêt nê. Nê arÿ mê pamã axpên kÿnh rãhã ho papa ho papa. Jar pika ja kamã mê pahte Tirtûm nhÿ hã mê kãm kapêr jarênh o ri papa htã kot puj mê nhÿrmã ma õ krÿ hwÿr api hãmri nê kuri axte ã kãm amnhÿ

nhîpêx anhÿr kêt nê. Mo kaxyw kot puj mē axte ri mēhō mā kapêr jarê? Kot puj mē ô krî hwÿr api nê ra mē pahpiitā paxâhpumunh o axpên pyrāk.

Nê na pu htem tōhā mē kapêr ô ho pakapêr o ri papa. Nom kot puj mē nhÿrmā Tîrtûm nhō krî hwÿr api hāmri nê kuri axte nhām ri mē kapêr o pakapêr kêt nê.

Nê na pu htem jar mē pahkwÿjaja mē paxâhpumunh mex kôt Tîrtûm kapêr jarênh o ri papa. Tā kot puj mē nhÿrmā ô krî hwÿr api hāmri nê axte ā amnhî nhîpêx anhÿr kêt nê. Ām mē pamā axpên kînh pixja kot puj mē arî ô krî kamā mē pamā axpên kînh tûm rāhā papa ho papa. ⁹ Jar mē pahpiitā mē paxâhpumunh tohtuj anhÿr o pakapêr jakamā na pu htem kormā Tîrtûm kapêr jarênh tohtuj anhÿr o ri papa. ¹⁰ Tā kot puj mē nhÿrmā ô krî hwÿr api nê kuri paxâhpumunh jatur xām mēnh pa. Jakamā nhûm jar mē paxâhpumunh tohtuj anhÿr xwÿnhhta mē pahpê hapêx.

¹¹ E pa mē amā ja hā ejêp jarê ka mē inhma. Nā amnepé mā ix-prîre ri na pa pre ixtÿx ri mēhprîjê kot amnhî nhîpêx o amnhî nhîpêx nê mē hamaxpêr o ijamaxpêr. Nê mē kapêr mex kêt o ixkapêr o ri ixa. Tā ra ixaptâr hāmri nê mē aptârjê jamaxpêr o ijamaxpêr o ri ixa. Te ra mē pahte kaxkwa kamā mē paxâhpumunh jatur xām mēnh parta pyrāk mē aptârjê jamaxpêr o ijamaxpêr o ri ixa.

¹² Ja pyrā nê na pu htem kormā Tîrtûm kot amnhî nhîpêx ā omunh tohtuj anhÿr. Te mē pahte amnhî pumunh xā pynajre kamā pahprî hā amnhî pumunh mex kēeta pyrāk. Nom kot puj mē nhÿrmā ô krî hwÿr api hāmri nê pahprî hā paxâhpumunh jatur xām kumê. Te Tîrtûm kot hprî hā tanhmā mē pakute hā mē pahpumunh parja pyrāk.

¹³ E arî mē pahte Tîrtûm kôt amnhî nhîpêx o papa xāja na axkrunêpxi. Mē pahte hkôt amnhî nhîpêx o papa rāhā ho papa kaxyw. Wamta na ja: Kêr pu mē arî amnhî kaxyw Tîrtûm mā pajamaxpêr mex rāhā ho ri papa. Nê hkôt ja: Kêr pu mē arî Tîrtûm kot mē pahto mex par jatur xā mēnh xā hā arîgro jamâr rāhā ho papa. Nê hkôt ja: Kêr pu mē arî pamā axpên kînh pê tanhmā axpên to mex to rāhā ho papa. Ja na mex o kot wamta wa hakrenh. E kêr pu mē ā amnhî nhîpêx anhÿr rāhā ho ri papa.

14

Tîrtûm Karō kot mē pahto mē paxihtÿx ā harênh

Wam Korît 12.7-11, 12.27-31

¹ E kêr ka mē arî amā axpên kînh pê axpên to mex rāhā ho ri apa nê aa jam anhÿrer nê ho ajamakêtkati hkêt nê. Nê amnhî to Tîrtûm Karō mân amnhî to awÿ kê mē amā tanhmā mē ajamaxpêr to ka mē ahpÿnhā tanhmā axpên to mex to ho ri axpên kôt apa. Nê kêr ka mē ā ajamaxpêr anê nê ajamaxpêr o:

—Inhmā mē hkînh o ri ixpa hprâm tÿx. Nê Tîrtûm Karō kot tanhmā ixto nhûm ixte ahpÿnhā tanhmā mē ho ajuta hto ho ixpaja pa määnên inhmā ho anhÿr prâm. Nê kot tanhmā ijakwa hto nhûm ixte ahpÿnhā mē kapêr ô ho ixkapêrja pa määnên inhmā ho anhÿr hprâm. No kêt ixte Tîrtûm nhÿ hā mē kām kapêr jarênhja na inhmā ho anhÿr prâm tÿx kumrêx. Anê.

²⁻⁴ Mē pakamā mē kapêr ô ho Tîrtûm mā kapêr xwÿnhjaja na htem Tîrtûm Karō nhÿ hā ām kumā pix mā kapêr ôta o kām kapêr nhûm tapxipix mē kuma. No mē papajaja na pu htem tee ri mar o pahkrî nom mar kêt nê. Ām kapêr xwÿnhhta pix koja mē pakurom amnhî ma. Nom koja mē pakapêr kām Tîrtûm mā amnhî jarê pu mē mar mex

nê. Nhùm mē pakapēr kām Tirtūm nhỹ hã mē pamã kapēr jarē pu mē pahprĩ hã kuma. Jao mē pamã kapēr kôt amnhĩ nhĩpêx prãm nê. Nê mēmoj tã pahkaprĩ nê ri papa htã mē kuma nê amnhĩ kaxwýnh kãm amnhĩ to paxihtýx.

⁵ Mē apiitã mē ate nhãm mē kapēr ô ho Tirtūm mã amnhĩ jarēnhja na mex. Nom mē ate mē akapēr o mē akwýjê mã Tirtūm kapēr jarēnh o ri mē apaja na mex o wamta jakre. Kot ka mē nhãm mē kapēr ô ho Tirtūm mã amnhĩ jarē nhùm mē akwýjaja mē amar kêt jakamã ka mē ã akapēr anhýrja o Kris kôt mē ho mē hamaxpēr o hihtýx kêt nê. Æm kapxipix amnhĩ ma. Rý koja kapēr ôja mar mex xwýnhjê hõ amar japēr nê mē akapēr kãm akwýjê mã harê. Hã koja ja mex nê. Nom kot kaj mē apiitã ma mē kapēr kãm mē kãm Tirtūm kapēr jarēnh o ri apa nhùm mē piitã hprĩ hã amar mex nê. Nê amar xã hkôt Tirtūm kapēr kôt amnhĩ nhĩpêx mex nê. ⁶ Jakamã e Kris kôt ixtõ nê ixtõxjaja. Kot paj apu nhýrmã ma mē awýr mõ hãmri nê nhãm mē kapēr ô ho mē amã ixkapēr japēr ka mē inhmar kêt nê. Nom kot paj mē akapēr o mē amã ixkapēr ka mē apiitã aprĩ hã inhmar mex nê. Pa Tirtūm nhỹ hã mē amã mēmoj jarē rý tanhmã kot amnhĩ nhĩpêx toja pa mē amã harê. Rý Karõ nhỹ hã mē amã mēmoj jarēnh o ã mē amã Tirtūm kapēr jarēnh anê ka mē aprĩ hã inhmar mex nê. ⁷ Nom mē kapēr ô ho mē kapēr o mē akôt ri mē pa xwýnhjaja te mēhõ kot htýx ri wiorãwti kakrēnh xwýnh pyrãk. Koja htýx ri hkakrēnh o xa nhùm mē tee ri kot grer mar mã. Rý nhùm mēhõ htýx ri pifti kakôr o xa nhùm mē tee ri mēmo mē grer mar mã.

⁸ Pôristijaja na htem amarĩ ri tanhmã amnhĩ nhĩpêx to ho pa nhùm mē hkrãhtũmja mē kãm pifti

kakô nhùm mē kuma nê mē pi-japu mã hamaxpēr kurê kumrêx nê hwýr hprôt. Nom koja kawax pê hkakô rý htýx ri tanhmã hkakôr to nhùm mē kuma nê ãm kuma. ⁹ Ja pyrã nê kot kaj mē kapēr ô ho akwýjê mã akapēr nhùm mē ama nê ãm mē ama. Ka te ãm mē kãm ajakwa momok pyrãk o axãm o amnhĩ nhĩpêx.

¹⁰ Nê ahpýnhã mē pakapēr xoh-tõõ. Na htem ahpýnhã mē kapēr o amnhĩ kwýjê mã kapēr nê xpēm mar mex nê. ¹¹ Nom koja mēhõ nhỹhýnh pika hõ rùm ixwýr mõ nê mē kapēr o inhãm kapēr pa mar kêt nê. Nê amnhĩ xwar kutã ixkapēr o kãm ixkapēr nhùm ixpyrã nê inhmar kêt nê. ¹² Jakamã kot kaj mē amã Tirtūm Karõ xihtýx xã ho amã tanhmã kãm amnhĩ nhĩpêx to ho apa hprãm hã kot kaj mē amnhĩ to awý nê kãm:

—Kwa amnhĩ kôt ijamaxpēr o axihtýx Tirtūm. Pa anhỹ hã ixkapēr o ma Kris kôt ixkwýjê ho mē hamaxpēr o ixihtýx o ri mē hkôt ixpa. Kê mē akapēr ma nê Kris kôt amnhĩ xunhwýr týx nê. Nê hkôt amnhĩ nhĩpêx mex o ri pa. Anê.

¹³ Nê kêr ka mē nhãm mē kapēr ô ho Tirtūm mã amnhĩ jarēnh xwýnhjaja amnhĩ to Tirtūm Karõ wý nê kãm:

—Ixte mē kapēr ô ho ixkapēr tã ixte amnhĩ mar kêt. Jakamã kwa tanhmã ixto ijamaxpēr mex to pa amnhĩ mar mex nê ixkapēr kãm ixprĩ hã Kris kôt ixkwýjê mã ja jarē kê mē inhmar týx nê. Anê.

¹⁴ Nom kot paj nhãm mē kapēr ô ho Tirtūm mã mex ã harēnh tã amnhĩ mar kêt nê. Te ixpimtir kãm ixkarõ pix kapēr pyrãk. No kot paj pam amnhĩ krã hkôt ixkapēr o kãm mex ã harê hãmri nê ra amnhĩ mar mex nê. ¹⁵ Nã ja na inhãm mex jakamã kot paj nhãm mē kapēr ô ho Tirtūm mã mex ã harê nê kãm gre. Nê mãänēn ija-maxpēr xã hkôt ixkapēr o mãänēn

kām mex ā harē nē kām gre. Nà ja na inhmā mex. ¹⁶ Nom kot paj mē ma mē kot Tirtūm kapēr mar xà hā ixkre hwȳr mra nē kamā Tirtūm mā mex ā harē. Tā pa nhām mē kapēr ō ho kām ixkapēr japēr. Ka mē ate inhmar o akri xwȳnhjaja tee ri inhma. Jakamā tee ri inhma nē ixkōt Tirtūm mā akapēr kēt nē. Rȳ kām:

—Nà ām hāmri na ā amex ā ajarēnh anē Tirtūm.

Anhȳr o kām akapēr kēt nē. Mē ate inhmaare hā kot ka mē ā kām akapēr anē. Jakamā kot paj ri mē akamā mē kapēr ō ho ixkapēr kēt nē. Ām mē akapēr pix o mē anom Tirtūm mā mex ā harē. ¹⁷ Kot paj mē kapēr ō ho Tirtūm mā mex o mex ā harēnh mex tā ka mē mēmo mē kapērja aprī hā mar kēt jakamā inhmar pē Tirtūm kōt amnhī xunhwȳr tȳx kēt nē.

¹⁸ Na pa hte tōhā mē arom nhām mē kapēr ō ho Tirtūm mā amnhī jarē. Nom nhȳri ahte nhȳ nē ā kām amnhī jarēnh anē. Ām hāmri na pre Tirtūm ja kaxyw tanhmā ixto pa hte ā amnhī nhīpēx anhȳr o ri ixpa.

¹⁹ Tā na pu htem Tirtūm mā mex o mex ā harēnh kaxyw nē ma mē kot kām amnhī jarēnh xà hā ixkreta wȳr xepēn wȳr mra pa mē pikuprōnh xwȳnhjē kapēr o mē kām ixkapēr. Nom kot paj nhām mē kapēr ō ho mē kām ixkapēr ry rax kumrēx tā no nhūm mē inhmar kēt nē. Nom kot paj mē kapēr o ām ixkapēr krānre htā no nhūm mē inhmar mex kurē kumrēx. Ja na inhmā mex. ²⁰ Kwa mē ixkapēr ma nē mar tȳx nē. Nē mēhprīrejē jamaxpēr o ajamaxpēr kēt nē. Ām Kris kōt mē aptār tūmjē jamaxpēr o mǎn kēt mē ajamaxpēr o ri apa. Ām mēmoj pixire hkōt kot kaj mē ām hāmri te mēhprījē jamaxpēr pyrāk o ajamaxpēr. Mēhprījaja na htem mēmoj punuj kukamā hamaxpēr kēt nē. Na htem ām htȳx pa. Tā kēr ka mē urāk nē mēmoj punuj

kukamā ajamaxpēr o ri apa hkēt nē.

²¹ Amnepēm na pre Tirtūm tanhmā Ijaewjē mā kapēr to. Mē kapēr o mē kām kapēr tā no nhūm mē kuma nē ām kuma. Jakamā nhūm tee ri ja hā mē omu nē amnhī tā tanhmā mē harēnh to. Tanhmā mē harēnh toja Tirtūm kapēr ā kagā htūm kamā na. Kot mē harēnh kot: E kot paj ma mē hwȳr axtem pika hō rūm pōristi hkwȳr rē kē mē ma mē hwȳr mra nē mē unē. Hāmri nē amnhī kapēr o mē kām kapēr nhūm mē tee ri mē kuma no ām hkōt mēmoj pumunh kēt nē.

Koja mē ā mē hipēx anhȳr tā nhūm mē arī kām ixkapēr mar nē amnhī kaxyw ixkōt hamaxpēr prām kēt nē. Anē.

Tirtūm kapēr ā kagā htūm kot ā mē harēnh kot anhȳr. ²² Jakamā kot kaj mē Tirtūm mā amnhī jarēnh xà hā ixkre hwȳr akuprō nē mē kapēr ō ho Tirtūm mā amnhī jarēnh japēr. Nhūm Kris kōt amnhī xunhwȳr kēt xwȳnhjaja mē akōt agjē nē hkrī nē tee ri mē akapēr ma nē Kris kōt amnhī xunhwȳr kēt nē. Tanhmā kot mē amnhī to nē hkōt amnhī xunhwȳ? Mē kot akapērta maare hā. No kot ka mē akapēr o Tirtūm nhȳ hā mē kām akapēr nhūm mēhprī hā amar mex nē. Jao tanhmā hamaxpēr to nē mē apyrā nē Kris kōt amnhī xunhwȳr japēr. ²³ Nom kot ka mē apiitā nhām mē kapēr ō ho Tirtūm mā mex ā harē nhūm amarī ri mē pa xwȳnhjaja mē awȳr agjē nē mē akapēr ā mē ama nē hā mē apumu. Hāmri nē tee ri hamaxpēr nē mē akrā pipānh ā xepēn mā mē ajarē. ²⁴ Nom koja mē awȳr agjē ka mē akatāt kōt mē amnhī kapēr o Tirtūm kapēr jarēnh o akuhē nhūm mēhprī hā mē amar mex nē. Hāmri nē amnhī kapēr o akapēr ma nē hamaxpēr o:

—Hēxta waa nē. Xep ixte amnhī tomnuj xwȳnh na pa. Nà ām hāmri

na mẽ Tirtûm kapêr jarê. Nà ãm hãmri na kêt ja. Anê.

²⁵ Hãmri nê mẽ amã tanhmã kot amnhĩ tomnuj to hã amnhĩ jarênh pa hãmri nê hkaga nê Jejus kôt amnhĩ xunhwý. Nê hkônkrã ho htêm nê hkrĩ nê Tirtûm mã mex o mex ã harê. Hãmri nê mẽ amã:

—Nà ãm hãmri na hte Tirtûm mẽ akamã pa ho pa. Anê.

Tirtûm nhõrkwý kamã mẽ pahte tanhmã amnhĩ nhĩpêx to hã mẽ pamã karõ

Atre 2.42, 5.12-13; Eprêw 10.25

²⁶ E Jejus kôt ixkwýjaja. Kot paj hpãnhã axtem mẽ amã mẽmoj tã karõ. Mẽ kot Tirtûm mã amnhĩ jarênh xã hã ixkre kamã tanhmã mẽ ate amnhĩ nhĩpêx to hã karõ ka mẽ inhma.

Nà kêr ka mẽ axpên wýr akuprõ nê akrĩ ka mẽ atõ amã Tirtûm mã mex ã harênh ã mẽ grer o agrer prãm hãmri nê mãmri kãm ho gre. Hãmri nê agrer pa kê apãnhã mẽhõ kãnhmã xa nê Tirtûm kapêr kwý ho mẽ ajahkre. Nê ho anhýr pa nhũm hpãnhã mẽhõ kãnhmã xa nê Tirtûm kot tanhmã ho mex to hã mẽ amã amnhĩ jarê. Nê amnhĩ jarênh pa hãmri nhũm mẽhõ nhãm mẽ kapêr õ ho mẽ amã ujarênh japêr. Hãmri nê ujarênh pa kê mẽhõ hpãnhã mẽ akapêr o hprĩ hã mẽ amã kapêrta jarê.

E kêr ka mẽ axpên wýr akuprõ nê Kris kôt axpên to axihtýx kaxyw ã axpên pãnhã amnhĩ nhĩpêx anê.

²⁷ Nê ka mẽ atõ amã nhãm mẽ kapêr õ ho mẽ kãm akapêr prãm japêr. Nom kêr ka mẽ axohtõ nê ã mẽ kãm amnhĩ nhĩpêx anhýr kêt nê. ãm mẽ atõ wa axkrutre rý axkrunêpxire nê mẽ kapêr õ ho mẽ kãm akapêr. Hãmri nê axpên pãnhã akapêr pa kê mẽhõ kot hprĩ hã mẽ kapêr õta mar japêr nê mẽ apãnhã xa nê mẽ akapêr o mẽ kãm harê kê mẽhprĩ hã mar mex nê. ²⁸ Nom koja ja kaxyw mẽhõ amrakati japêr ka mẽ kapêr õ ho akapêr kêt nê.

ãm kapxipix nhýri ahte Tirtûm mã akapêr.

²⁹ Nê kê Tirtûm nhý hã kapêr jarênh xwýnhjê hõ wa axkrut rý axkrunêpxi nê mẽ ajahkre ka mẽ aprĩ hã mar o akrĩ. Hãmri nê mar pa nê tanhmã mẽ harênh to. ãm hãmri Tirtûm nhý hã kapêr ã mẽ harê rý ho hêx ã mẽ harê.

³⁰ Nê koja mẽhõ Tirtûm nhý hã mẽmoj jarênh o xa. Rõm nhũm Tirtûm mẽ kaxyw mẽ atõ mã ajamaxpêr kwý gõ. Ka kapêr o ãm xwýnhta mã kãnhmã anhĩhkra pẽ kê apumu nê anhĩkrê. Hãmri ka hpãnhã xa nê mẽ kãm tanhmã ajamaxpêr tota jarê. ³¹ Nom kêr ka mẽ anhĩpê mẽ kãm akapêr hkêt nê. ãm axpên pãnhã Tirtûm kapêr o axpên jahkre nê ho axpên jamaxpêr o axihtýx. Ja mex. ³²⁻³⁴ Nom kêr ka mẽ axpên wýr akuprõ nê apiitã anhĩpê atýx ri akapêr kêt nê. Ja na Tirtûm kêp hprãm nõkati. Mẽ ate axpên pãnhã axpên mã akapêrja na kãm hprãm. Jakamã kê mẽ kot Tirtûm nhý hã mẽ kapêr jarênh o pa xwýnhjaja taxy axpên jahkre hã axpên jamã. Nhũm mẽhõ kumrêx kapêr pa hãmri ka hpãnhã mẽ kãm akapêr.

Nê kê mênijaja amarĩ mẽ ahkreja mar o hkrĩ. Ijaew kot amnhĩ nhĩpêx xã hkôt. Jakamã kwa mẽ anijaja. Kêr ka mẽ amarĩ akryk mẽ mar o akrĩ nê axpên mã akapêr o akrĩ hkêt nê. ³⁵ No kot kaj mẽ tee ri mẽmoj ma nê mar mex kêt japêr tã hã axpên kukjêr kêt nê. ãm akryk arĩ mar o akrĩ. Hãmri nê akupým anhõrkwý hwýr tẽ nê rĩ kormã hã amjên kukja. Nom kot ka mẽ apikuprõnh xã hã ixkre kamã axpên mã akapêr o akrĩ nhũm mẽ amjênjaja tee ri ja hã mẽ apumu nê hpijaam nê.

³⁶ E na pa ã Tirtûm mã amnhĩ jarênh xã hã ixkre kamã tanhmã mẽ pahte amnhĩ nhĩpêx to hã mẽ amã karõ anê. Tã te mẽ apê ja mex

kêt pyrâk. Kwa mon ka wem ja ma nhùm mē apê omnuj nē? Xà mē ate Tirtùm kapêr mar mex o ijakrenh kôt na ka mē â ajamaxpêr anê? Xà na pre Tirtùm mē akumrêx mǎ kapêr? Hǎ na ka mē â ajamaxpêr anê? Rỳ xà mē kapxipix mǎ na pre kapêr? Hǎ na ka mē ixkapêr ma nhùm mē apê omnuj nē? Nà ixkumrêx na pa pre mē awỳr inhmōr nē mē amǎ Tirtùm kapêr jarênh kênǎ kot ka kêt mē axtem nē â ajamaxpêr anê. ³⁷ Kot kaj mē atō â ajamaxpêr anhỳr japêr nē ajamaxpêr o:

—Nà na pre Tirtùm tanhmǎ inhmǎ kapêr to pa ô ri mē kǎm ixujarênh mex o ri ixpa.

Anhỳr o ajamaxpêr. Rỳ ajamaxpêr o:

—Nà na pre Tirtùm Karō mē kaxyw tanhmǎ ixto pa ý hǎ tanhmǎ mē ho mex to ho ri ixpa.

Anhỳr o ajamaxpêr. Kot kaj mē â ajamaxpêr anê hǎmri nē mǎânên pa â ixte amnhĩ nhĩpêx anhỳr â ixpumunh mex kurê kumrêx. Amnhĩ pyrǎ nē ixte Tirtùm nhỹ hǎ mē kǎm ixkapêr xwỳnh â ixpumunh nē hǎ ijarênh kurê kumrêx. ³⁸ Nom koja ja hǎ ijarênh kêt ka mē ja hǎ omu hǎmri nē tanhmǎ kot mē amǎ kapêr toja ma nē ǎm ama.

³⁹ E Kris kôt ixtō nē ixtōxjaja. Kêr ka mē amnhĩ to Tirtùm Karō wỳ kē ma mē ate mē kǎm Tirtùm kapêr jarênh o ri apa kaxyw mē ato mē axihtỳx.

Nē koja mēhō kǎm nhǎm mē kapêr ô ho kapêr prǎm ka mē ja nē kǎm akapêr kêt nē. Kwār mǎmri â amnhĩ nhĩpêx anê. ⁴⁰ Nom kêr ka mē ate Tirtùm mǎ amnhĩ jarênh xà hǎ ixkre kamǎ axpên pǎnhǎ axpên mǎ akapêr nom anhĩpê kǎm akapêr hkêt nē.

15

Kris akupỳm htír kumrêx â harênh

Atre 2.23-36, 10.39-41; Wam Korit 6.14

¹ E Kris kôt ixkwỳjaja. Kot paj axte mē amǎ Jesus kot mē pané tanhmǎ amnhĩ nhĩpêx to hǎ harê ka mē inhma. Na pa pre ra mē amǎ ja jarê ka mē ama nē hkôt amnhĩ xunhwỳ. Nē hkôt amnhĩ nhĩpêx mex o ri apa. ² Na pa pre mē amǎ harê ka mē amnhĩ kaxyw kǎm ajamaxpêr tỳx nē nhùm Tirtùm mē ato hkra. Tǎ ka htem arĩ kapêr kôt amnhĩ nhĩpêx mex o ri apa. Koja mēhō kot Tirtùm kapêr mar tǎ amnhĩ kaxyw hkôt hamaxpêr kêt nē nhùm Tirtùm tee ri amnhĩ tǎ omu nē ho hkra hkêt nē.

³ Na pa pre amnhĩ krǎ hkôt mē amǎ tanhmǎ Kris jarênh to hkêt nē. Ixte kapêr mar xà hkôt na pa hte amnhĩ xō ri mē amǎ tanhmǎ harênh to ho ri ixpa. Jesus jarênhja na mex o kot mē ujarênh piitǎ hakrenh par kumrêx. Tǎ tǎm kot paj mē amǎ harê. Na pre Krisja mē pahte amnhĩ tomnuj pǎnhǎ amnhĩrer kaxyw mē pané ty. Tirtùm kapêr â kagǎ htùm kot hkukamǎ harênh xà hkôt. ⁴ Hǎmri nhùm mē kên kre kamǎ haxà nhùm kamǎ nōr o apkati. Nē axte hǎ apkati. Hǎmri nhùm Tirtùm akupỳm ho htír. Kapêr â kagǎ htùm kot hkukamǎ harênh xà hkôt. ⁵ Tǎ nhùm Simǎw Pêtre kumrêx akupỳm htír â omu nhùm hpǎnhǎ Jesus nhỹ hǎ mē ahkre ho mē pa xwỳnh maatijaja haxwỳja omu. ⁶ Hǎmri nhùm mē kot hkôt mē pa xwỳnh pē 500 jakrenh xwỳnh piitǎ anhĩpê haxwỳja akupỳm htír kǎm omu. Na pre ra mē hkwỳjaja ty nhùm mē hkwỳjaja arĩ htír nē pa. ⁷ Jakamǎ nhùm prem ra akupỳm htír kǎm omu. Hǎmri nhùm hpǎnhǎ Xiakreja omu. Nhùm hpǎnhǎ ý hǎ mē ahkre o mē pa xwỳnh piitǎ omu. Akupỳm htír kǎm omu. ⁸ Tǎ pa

na pa pre ijaxwýja amnhĩ to hapu nē akupým htĩr kām omu. Te ixpē mē hkra kot hapu pyrà nē amnhĩ to hapu nē omu. Na pre kaxkwa kamā inhmā kapēr o xa pa ixprĩ hā omu. ⁹ No mē kot ixpyrà nē Kris nhỹ hā mē ahkre ho mē pa xwýnh maati hkwýjaja na mē mex o kot ijakrenh. Na pa pre hte mē hkĩnhā amnhĩ tomnuj tỳx nē. Jao Kris pē hkrajē homnuj tỳx o ri ixpa. Tā hkôt amnhĩ xām hāmri nē tee ri ā amnhĩ nhĩpēx anhỹr ā amnhĩ pumu nē amnhĩ kamā ixpijaàm tỳx nē. Jakamā na pa hte Kris nhỹ hā kapēr jarēnh o ixpa hā amnhĩ pumu nē ixte hkôt amnhĩ xām kêt ri tanhmā ixte amnhĩ nhĩpēx toja mā ijamaxpēr nē ixpijaàm nē. ¹⁰ Na pa pre amnhĩ tomnuj tỳx o ixpa htā nhũm Tĩrtũm arĩ kām ijapē nē. Nē ixkamā ukaprĩ nē. Pa pre hkôt amnhĩ xām nhũm ixto hkra pa ra kām tanhmā amnhĩ nhĩpēx to mex rāhā ho ixpa. Jakamā na hte tee ri amnhĩ tā ixpumu nē tanhmā hamaxpēr to hkêt nē. Rỳ hamaxpēr o:

—Hêxta waa nē. Inhmā Pawre japē nē ixte ho mex tā nhũm ixkôt amnhĩ nhĩpēx kêt kumrēx.

Anhỹr o tee ri hamaxpēr kêt nē. Na pa hte kām tanhmā amnhĩ nhĩpēx to ho ixpa rũnh o ý hā mē kapēr o pa xwýnh kwýjē jakre ho ixpa. Nom amnhĩ krā hkôt mē ahkre hkêt nē. Ja kaxyw na pre Tĩrtũmja ixto ixihtỳx pa ý hā kām tanhmā amnhĩ nhĩpēx to ho ri ixpa nhũm ja hā ixpumu nē hkĩnh nē.

¹¹ Nē Jejus jarēnhja ām pixii. Axtem hō hkêt. Nē ý hā mē ahkre ho mē pa xwýnhjē kapērja nē pa ixte mē amā harēnhja kot axpēn pyràk. Harēnh tipxi. Kris kot mē pahte amnhĩ tomnuj mýrapē mē panē htyk nhũm Tĩrtũm kot akupým ho htĩr ā wa harēnhja na pa hte pix jarēnh o ri mē akôt ixpa. Ka prem inhma nē amnhĩ kaxyw hkôt ajamaxpēr tỳx nē.

Tĩrtũm kot akupým mē pahto mē pahťĩr ā harēnh

Rukre 20.37

¹² Nē kwa ra ixte mē amā Kris htyk nē akupým htĩr ā harēnh tā ka xep mē akwýjaja axtem nē mē htyk nē akupým mē htĩr kêt ā mē hkamnhĩx o ri apa. ¹³ Kwa mē ajamaxpērja mex kêt. Kêp apu ām hāmri mē ate ā mē harēnh anhỹr ronhỹx pre Kris haxwýja akupým htĩr kêt nē. Nhỹx pre htyk o ty.

¹⁴ Nē kêp apu Kris akupým htĩr kêt ronhỹx pa mē ām mē amā kapēr jarēnh o ixpa kaprỳ. Ka mē ajaxwýja amnhĩ kaxyw hkôt ajamaxpēr kaprỳ.

¹⁵ Nē kêp ām akupým mē htĩr kêt ronhỹx pa mē ixte mē amā Tĩrtũm kapēr jarēnh o ri ixpa xwýnhjaja mē amā ho ixēx o ri ixpa. Na pa htem mē amā Tĩrtũm ra kot akupým Jejus o htĩr ā harēnh o mē akôt ixpa. Tā kêp apu akupým mē htĩr kêt ronhỹx pa mē ām mē amā harēnh o ixēx.

¹⁶ Nē kêp apu akupým mē htĩr kêt ronhỹx pre Kris haxwýja akupým htĩr kêt nē. Nhỹx pre ām amarĩ tyn hapēx.

¹⁷ Nē Kris amarĩ htyk nē hapēx ronhỹx kot pu mē ri amnhĩ kaxyw hkôt pajamaxpēr nē hkôt amnhĩ xunhwýr kaprỳ.

Nē Kris amarĩ htyk nē hapēx ronhỹx pre Tĩrtũm Jejus kukwak ri mē panē mē pahte amnhĩ tomnuj o hapēx kêt nē. Nhỹx pu mē pahpiitā nhỹrmā ma kuwy hwýr pajapēx pa.

¹⁸ Nē kêp apu Kris htyk nē hapēx ronhỹx ra mē kot amnhĩ kaxyw hkôt hamaxpēr tā ra htyk xwýnhjaja ma mē kot amnhĩ tomnuj mýrapē kuwyta wýr hapēx.

¹⁹ Nē kêp apu Kris htyk kumrēx nē hapēx ronhỹx pu mē kormā

pahtyk kêt xwÿnhjaja tee ri amnhî wÿr kamã pajamak o ri papa kaprÿ. Nê pahpê hkra hã amnhî jarênh kaprÿ. Jao pahkaprî htÿx o mêmoj piitã hakrenh par kumrêx nê ri papa.

Kris kumrêx akupÿm htîr ã harênh

Atre 26.23; Sikûn Korîť 4.14; Piri-pos 3.10-11; Wam Tesarôn 4.15-18; Apokarip 20.1-15

²⁰ Nã mē htyk nē nhÿrmã akupÿm mē htîr kêt ã mē harênhja kot anhÿr kêt. Ra Tîrtûm kot akupÿm Kris o htîr jakamã koja mãânên hkra htyk xwÿnhjaja nhÿm mē piitã Je-jus pyrã nē nhÿrmã akupÿm mē ho htîr pa. Jakamã na pu htem Kris akupÿm htîrja mã pajamxpêr nē amnhî kukamã pajamxpêr o:

—Nã ra Tîrtûm kot akupÿm Jejus o htîr jakamã koja urãk nē nhÿrmã akupÿm mē pahte hkôt amnhî xunhwÿr xwÿnh piitã mē pahto mē pahtîr. Nã koja ã mē panhîpêx anê. Ja kaxyw ãhpumunh tÿx kumrêx xwÿnh kênã. Anê.

²¹ Nê amnepêm na pre Tîrtûm my kot waja nhîpêx. Hãmri nhÿm kot tanhmã amnhî tomnuj to ho ra mē htykja o hkrax. Tã nhÿm wamta kôt my hõta wamta rom amnhî to mex o mē htyk tã akupÿm mē ho htîr o hkrax. ²²⁻²³ Tã mē pahpê wam my pê Atãw kanrêhã tãmnhwÿ jakamã kot puj mē urãk nē nhÿrmã ty. No ãm mãânên mē pahpê Kris kraa. Kris kumrêx na pre akupÿm htîr. Tã koja nhÿrmã akupÿn mē pahwÿr wrÿ hãmri nhÿm Tîrtûmja kot hipêx pyrã nē akupÿm mē pahto mē pahtîr. Mē pahte hkôt amnhî xunhwÿr ã mē pahpumunh kôt akupÿm mē pahto mē pahtîr pa. No ãm kormã.

Kris nhÿrmã kot mē htyk o hapêx ã harênh

Juãw 11.25; Rõmãn 6.23; Wam Korîť 15.54; Sikûn Ximotre 1.10;

Eprêw 2.14; Apokarip 20.14

²⁴⁻²⁸ Nê koja Kris arî mē ho amnhîptâr rãhã nhÿm Tîrtûm mē kot kutã amnhî xunhwÿr xwÿnhjê pê mē hihtÿx xã ho hapêx pa. Kapêr ã kagã htûm kot ja jarênh kot:

Koja nhÿrmã Tîrtûm Kris kot kãm mē ho amnhîptâr kaxyw ãm. Anê.

Jakamã Jejus tapxipix koja mē ho amnhîptâr o pa. Kojã Tîrtûm pix mē ho amnhîptâr kêt nê. Nom koja pahi hkwÿjê hõ axte nhãm mē ho amnhîptâr kêt kumrêx.

Tã mē kot mēkarõmnuti hkôt kãm tanhmã amnhî to ho mē pa xwÿnhjaja koja Tîrtûm ma amnhî nê kuwy hwÿr mē rênh pa. Nê mēhtykja o hapêx nhÿm mēhõ axte htyk kêt kumrêx. Jakamã koja Jejus Kris mêmoj punuj piitã ho hapêx nê Mēpahpãm Tîrtûm nhîhkram akupÿm mêmoj piitã haxãr pa. Tîrtûm jamaxpêr xã hkôt ã mêmoj to anhÿr par anê hãmri nê ihkram mêmoj jaxãr pa. Nê mãânên tãm kãm amnhî gõ. Jakamã nhÿm Tîrtûm tapxipix mêmoj piitã ho amnhîptâr pa.

Mē htyk xwÿnhjê jarênh

²⁹ Nê na hte mē pahkwÿjaja kormã kêp Tîrtûm kra hkêt tã Jejus kôt mē kot amnhî xunhwÿr nê mē htyk xwÿnhjê mã hamaxpêr o pa. Hãmri nê mē kãm nhÿrmã axte mē omunh prãm xãj mē urãk nê Jejus kôt amnhî xunhwÿr nhÿm mē hkrã kumrã. Tã akupÿm mē htîr kêt ronhÿx mē ãm ã pajamxpêr anhÿr kaprÿ. ³⁰ Nê paa. Na pa hte ma mē kãm Tîrtûm kapêr jarênh o ri mē hkôt ixpa. Nhÿm mē hkwÿjaja ja hã inhma nê ixkamã gryk nê ixtã amÿnê pa mē mÿrapê ixpunuj nê ri ixpa. No ãm amnhî to htÿx nê arî ri mē kãm Kris kapêr jarênh o ri mē hkôt ixpa. Tã kêp ãm nhÿrmã akupÿm ixtîr mã kêt ronhÿx pa tee ri ã amnhî nhîpêx anhÿr o ri ixpa kaprÿ. ³¹ Na htem apkati mē ixtã

tanhmã àmnênh to ho ri pa. Æm hãmri na pa mẽ amã ã mẽ harênh anê. Nom na pa hte tee ri amnhĩ kukamã ijamaxpêr o ri ixkaprĩ nê ixpa hkêt nê. Mẽ kot ixpîr mã tâ pa hte mẽ ate Pahihti Jejus Kris kôt amnhĩ nhĩpêx mex ã mẽ apumunh kôt ixkĩnh nê ri ixpa. Nhũm te ixkamã mẽmoj kêt pyrãk pa hte ri ixpa. ³²Na pa hte jar Epes kamã mẽ oprê xwýnhjê kutã amnhĩ to htýx pê mẽ kãm Jejus kapêr jarênh o ri mẽ hkôt ixpa nhũm mẽ kãm mar prãm kêt jakamã hã ixtomnuj týx nê. No nhỹrmã ixyk nê akupým ixtîr mã kêt ronhýx pa mẽ kêp Kris kwý hkêt xwýnhjê jamaxpêr o ijamaxpêr nê mẽ urãk nê ijamaxpêr o: Ixte ixyk ã arĩgro pumunh kêt jakamã kot paj mãmrĩ mẽmoj piitã hkur o ri ixpa.

Nê mãmrĩ mẽmoj piitã ho ixkõm o ri ixpa.

Nê mãmrĩ mẽmoj piitã ri tanhmã ho ho ri ixpa.

Ixyk nê axte ixte ã amnhĩ nhĩpêx anhýr o ixpare kaxyw ã.

Anhýr o nhýx pa ijamaxpêr o ixpa. Kêp ãm Tirtũm kot akupým mẽ pahto mẽ pahťîr mã kêt ronhýx pu mẽ ã mẽ kêp Kris kwý hkêt xwýnhjê jamaxpêr anhýrja kôt pajamaxpêr pix o ri papa. No ãm ja kot anhýr kêt.

³³Na htem mẽmoj jarênh o:

—Mẽ kot htýx ri amnhĩ tomnuj xwýnhjê hkôt ri mẽ pa xwýnhjaja koja mẽ gaa nê mẽ kot amnhĩ nhĩpêx kôt amnhĩ nhĩpêx o ri pa. Anê.

Æm hãmri na ã mẽ harênh anhýrja. Jakamã kwa mẽ okora. Kêr ka mẽ ã amnhĩ nê mẽ kot amnhĩ nhĩpêx anhýr o mẽ pa xwýnhjê pumunh mex o ri apa.

³⁴Kwa mẽ tokyx mẽ ate tanhmã amnhĩ tomnuj to hã amnhĩ pumu nê axte ã amnhĩ nhĩpêx anhýr kêt nê. Nê mẽ ate Tirtũm kot akupým mẽ ho htîr kêt ã harênh xwýnhjaja. Te mẽ ate Tirtũm kot amnhĩ nhĩpêx

ã omunh kêt pyrãk. Tã mẽ ate tokyx ja hã amnhĩ pumunh nê amnhĩ kamã apijaãm kaxyw na pa ã mẽ amã ixkapêr anê.

Mẽ panhĩ nyw jarênh

Rukre 20.34-36; Rõmãn 8.10-11; Sikũn Korîit 5.1; Piripos 3.20-21

³⁵Nê mãn ka mẽ atõ akupým mẽ htîr ã mẽ harênh ma nê tee ri mẽ hkukamã ajamaxpêr nê hã ri tanhmã axpên kukjêr to nê axpên mã:

—Kwa tanhmã koja we Tirtũm akupým hkra htyk xwýnhjê ho htîr to? Ra mẽ htyk nê mẽ ĩ katõk nê hapêx par mã kênã. Tanhmã kot wem amnhĩ to nê akupým htîr? Nê tanhmã koja we mẽ ĩ nywja kute wehe? Anê.

³⁶Nã na ka mẽ atýx ri ã ajamaxpêr anê nê tee ri mẽ hkukamã ajamaxpêr. E kot paj ixprĩ hã ja hã ejêp jarê ka mẽ inhma. Nã na htem mẽmo y hkre. Te mẽ kot mẽ htyk jaxãr pyrãk o hipêx nê hkre nhũm hikwý nê gaa nê higrõt hapõj. Nom te kêp mẽmo yta pyrãk kêt. ³⁷Æm hy pix na htem hkre. No higrõt kre hkêt nê. Rý tanhmãn pãr nywja kre hkêt nê. Æm hy pix na htem hkre. Tã nhũm higrõt hapõj nê hprêk nê gaa nê ô. ³⁸Tirtũm na hte hamaxpêr xã hkôt tanhmã ho nhũm higrõt hapõj nê hprêk nê ô. Tã ja pyrã nê kot puj mẽ Tirtũm jamaxpêr xã hkôt pahtyk tã koja akupým mẽ pahto mẽ pahťîr nê mẽ pamã mẽ panhĩ nyw gõ.

³⁹Nê mẽmo hy piitã te kot axpên pyrãk kêt. Ahpýnhã na. Ja pyrã nê ahpýnhã ri mẽmoj piitã ĩ. Na axtem mẽ panhĩ nê axtem mry nhĩ nê axtem àk nhĩ nê axtem tep nhĩ. Mẽmoj piitã ahpýnhã ri ĩ.

⁴⁰⁻⁴¹Nê kaxkwa kamã haxwýja mẽmoj piitã ahpýnhã no ãm muxre. Myytija mex. Nê mytwrýreja axte mã no ãm haxwýja mex. Nê kanhêti haxwýja mex. Haxwýja axte mã.

Kamā hkwý hpôk kryre nê kamā hkwý hpôk rûnhti no âm piitā mex.

Nê jar pika ja kamā haxwýja mêmoj piitā mex. No âm te kot kaxkwa kamā mêmoj jarir xwýnhja mex pyrāk kêt. Axtem na raa.

⁴² Tā koja mē panhī nywja haxwýja axte mā. Te kot panhī htūm pyrāk kêt. Na htem ty nhūm mē ma mē o mra nê mē haggē. Nhūm mē hikwý nê gaa nê ī rerek nê hapêx. Tā koja Tirtūm akupým tanhmā mē pahto mē pahťir to pu mē hpānhā pamex kumrêx. Hāmri nê axte mā mē panhī nyw mex o mex jakamā koja axte htyk nê ī rerek kêt nê.

⁴³ Na htem ty nhūm mē haggē nhūm htyk xwýnhja tanhmā amnhī to hkêt nê amarī hikwý. Omnuj nê ī nhenhek nê hikwý. Tā koja Tirtūm akupým mē ho mē hťir nê mē kām mē ī nyw gō nhūm mē hpānhā mex kumrêx nê hihtýx nê Tirtūm nhō krī kamā pa ho pa.

⁴⁴ Mē htyk nhūm mē kot mē haggēnh xwýnhja na htem arī ī htūm ā hikwý. Âm jar pika ja pix kām ri mē papa kaxyw na mē panhī htūmja. No mē panhī nywja axtem Tirtūm nhō krī kamā ri mē papa kaxyw jakamā koja mē panhī nywja axte mā. Tirtūm Karō koja mē pamā kugō.

Mē panhī nyw te kot Kris nhī pyrāk ā harēnh

Rukre 20.34-36

⁴⁵⁻⁴⁶ Nê Tirtūm kapēr ā kagā htūm kot Atāw jarēnh kot:

Na pre Tirtūm my kot wa Atāwja nhīpêx. Jakamā Atāw kēp pika nhō xwýnh na pre. Anē.

Ā Atāw jarēnh kot anhýr. Ja pyrā nê na pu htem pakatorxā nhōhy rūm pajapōj nê Atāw pyrā nê pahpê pika nhō xwýnh. Tā nhūm Atāwja pa nê gaa nê hpigēt nê ty. Jakamā kot puj mē urāk nê papa nê gaa nê ty. Nom nhūm Krisja Atāw kurōm kēp akupým mē ho mē hťir xwýnh

jakamā kot puj mē pahpê hkwýjaja Atāw pyrā nê nhýrmā mē pahtyk tā nhūm Kris akupým mē pahto mē pahťir. Hāmri nhūm Tirtūm Karō mē pamā mē panhī nyw gō pu mē axte pahtyk kêt nê. Pānhā axte mā mē pahpê kaxkwa nhō xwýnh.

⁴⁷ Nê Atāw na pre Tirtūm pika ho hipêx nê ho hťir nhūm ri pa. Nom Kris na pre Atāw rom kaxkwa rūm mē pahwýr wrý. ⁴⁸ Tā mē pahpê pika nhō xwýnhjaja te mē pahpê Tirtūm kot wam my nhīpêx xwýnhja pyrāk. No mē pahte kaxkwa hwýr ma papa mā xwýnhjaja te mē pahte kaxkwa rūm my kot mē pahwýr wrýk xwýnh Krista pyrāk. ⁴⁹ Tā kormā mē pahpê pika nhō xwýnh jakamā te mē pahpê my pika ho hipêx xwýnhja nhī pyrāk. Nom kot puj mē nhýrmā ty hāmri nê hpānhā te pahpê kaxkwa rūm my kot mē pahwýr wrýk xwýnhja nhī pyrāk.

Axte mē pahtyk kêt kumrêx ā mē pajarēnh

Juāw 11.25; Sikūn Korit 5.4; Wam Tesarōn 4.13-18

⁵⁰ Nê kot puj mē panhī htūm rāhā Tirtūm nhō krī hwýr paxāpir kêt nê. Panhī htūm na hte ty nê rerek nê hapêx. Jakamā koja Tirtūm Karō mē pamā mē panhī nyw gō pu mē rī kormā ma ō krī hwýr pajapêx pa nê kamā papa ho papa.

⁵¹⁻⁵² E mē inhma. Na pre kormā Tirtūm mē amā mêmoj to amnhīrīt kêt tā ra inhma ho amnhīrīt. Jakamā kot paj ý hā mē amā harē ka mē inhma. Nā kot puj mē pahpiitā mē pahtyk kêt nê. Koja nhýrmā Tirtūm kapēr o mē wrýk xwýnhjē hōja mē pamā pifti kakō. Mē pajaêr pē hkakō. Hāmri nhūm Tirtūm kra ra mē htyk nê mē hikwý xwýnhja akupým ī nyw o hťir kurē kumrêx. Nê kormā mē pahtyk kêt xwýnhjaja kot pu mē mē pahpê kêt ri mē urāk nê panhī nyw kurē kumrêx. Hāmri

pu mẽ pahpiitã pahtîr o pahtîr tûm nê papa. ⁵³ Koja Tîrtûm mẽ panhîpêx o te mẽ pahte paxê htûm o papinhîpanh nê hpãnhã paxê nyw jagjênh pyrâk. Jao mẽ panhî htûm o hapêx nê hpãnhã mẽ pamã mẽ panhî nyw gô pu mẽ axte pahtyk kêt kumrêx nê ri papa ho papa. ⁵⁴ Tîrtûm kapêr ã kagã htûm kot ja jarênh kot:

Na ra Tîrtûmja mẽhtyk ho hapêx pa. Anê.

Te ra kot ho hapêx par pyrâk o ã harênh kot anhÿr. No âm kormã. Jakamã kot puj mẽ nhÿrmã panhî nyw nê ri papa nê mẽ pahtô axte pahtyk kêt kumrêx. ⁵⁵ Mẽ pahtykja te mẽ kot makre par nhûm axte kot mẽ hkamnhwÿr kêtja pyrâk. Urã nê koja Tîrtûm akupÿm mẽ pahto mẽ pahtîr pu mẽ axte pahtyk kêt nê. Nê axte ri pamã ma hkêt nê papa. Nê axte paxã hkêt nê. ⁵⁶ Tîrtûm kapêr ã kagã htûmja ã mẽ pakukamã mẽ pajarênh kot anhÿr. Mẽ pahte amnhî tomnuj xwÿnh jakamã kot puj mẽ nhÿrmã ty. ⁵⁷ Nom nhûm Tîrtûm ãhpumunh tÿx o ãhpumunh tÿx jakamã na hte Pahihti Jejus Kris kukwak ri mẽ pahte hkôt amnhî xunhwÿr xwÿnhjê nê mẽ pahte amnhî tomnuj rênh pa. Pu mẽ nhÿrmã mẽ pahtyk tã nhûm akupÿm mẽ pahto pahtîr.

Mẽ pahte Jejus mã tanhmã amnhî nhîpêx mex to hã mẽ pamã karô

Karatas 6.9; Korosê 1.10

⁵⁸ Jakamã e kwa Jejus kôt ixkwÿjaja. Kêr ka mẽ arî Pahihti Jejus kôt mân amnhî xunhwÿr tÿx rãhã ho ri apa. Nê kapêr kôt pix mã ri amnhî nhîpêx rãhã nê kãm tanhmã amnhî nhîpêx mex to ho ri apa. Kot kaj mẽ ã amnhî nhîpêx anê hãmri nê kãm tanhmã amnhî nhîpêx to kapry ho ri apa hkêt nê. Âm hãmri kãm mẽmoj to anhÿr mex rãhã ho ri apa.

16

Mẽ kêp amrakati xwÿnhjê jarênh Atre 11.27-30; Rômãn 15.25-27; Sikûn Korîit 8.1-24, 9.1-5; Wam Xîmotre 6.18

¹ Nê na pa pre krî pê Karatas kamã tanhmã Jerujarê kamã Kris kwÿjê jarênh to. Ijaew kwÿ kot mẽ pahpyrà nê Jejus kôt amnhî xunhwÿr ã mẽ harê nê mẽ kêp amrakati hã mẽ harê hãmri nê mẽ kãm; —E. Kwa kêr ka mẽ kãm mẽ akàxpore hkwy ho akuprô nê ma mẽ hwÿr amê.

Anhÿr o mẽ kãm ixkapêr. Jakamã kwa kêr ka mẽ urâk nê mẽ kaxyw mẽ kãm kàxpore hkwy ho akuprô. ² Mẽ panhõ arîgromnu pê sap ã hkwy ho akuprô. Kot kaj mẽ akàxpore rax japêr nê mẽ kaxyw hkwy ho rax nê axi. Nom kot kaj akàxpore grire japêr nê mẽ kaxyw mẽ kãm ho grire nê agô. Kêr pa mẽmo arîgro hã ma mẽ awÿr mō ka mẽ ra mẽ kaxyw ho apikuprônh rax nê.

³ Nê ma mẽ kot mẽ kãm ho mōr mã xwÿnhjaja ka mẽ ixkutêp mẽ akwÿjê rê. Kêr pa pøj nê mẽ omu hãmri nê mẽ kaxyw kagã nhîpêx nê kamã mẽ harê. Nê mẽ kãm kugô nhûm mẽ ma Jerujarê hwÿr kàxpore mẽ ro hã amnhî kôt o mō nê mẽ kãm kugô. Mẽ kot kamã harênh nê mar hãmri nê mẽ kamjaja mẽ ate mẽ kaxyw mẽ rênh ã mẽ ajarênh ma. ⁴ Rÿ kot ka mẽ amã mẽ hkôt inhmênh prãm nê mãmri mẽ hkôt inhmê pa ma mẽ hkôt mō.

Pawre kot amnhî kukamã amnhî jarênh

Atre 19.21-22

⁵ Nom kot paj tokyx mẽ awÿr inhmōr kêt nê. Kot paj ja rûm ixkato nê hpãnhã ma pika pê Masetôn wÿr mō. Hãmri nê mẽ hkôt ixpa grire nê ma kormã mẽ awÿr Korîit wÿr mō. ⁶ Hãmri nê pøj nê mẽ akôt ri ixpa ryy nê. Nê ixtã amgrã pixi nê hapêx nê rî kormã ma axte nhãm krî hō hwÿr mō. Nê inhnojarê ka mẽ ixto Tîrtûm wÿ

nē inhmā ixàpkur xà hkwý gō pa ma mē hwýr pry hā hkur o mō. ⁷ No ixte mē awýr ixpōx nē tokyx mē akurūm ixkator nē hpānhā ma nhām krī hō hwýr inhmōrja na inhmā hprām kêt. Jakamā koja Tirtūm kām ja mex pa arī ri mē akôt ri ixpa hā ixtā mytwrý xohtō nē tokyx ma nhām inhmōr kêt nē. ⁸ Kot paj kormā jar Epes kamā ri ixpa rāhā nhūm mē hkīnh pē Pētekos kato nē hapêx pa rī kormā ma Masetōn wýr mō. ⁹ Na pa hte jar kormā mē kām Jejus kapēr jarēnh o ri mē hkôt ixpa nhūm mē ohtō nē inhmar o pa. Mē kām mar prām. Tā no nhūm mē hkwýjaja ohtō nē mē kēp ja omnuj nē nhūm mē hā ixkamā gryk nē ixtomnu o pa.

Mē kot Ximotre ho mex ā mē harēnh

Hapuhā Juāw 5

¹⁰ Nē kwa koja Ximotre mēmo arīgro hā mē awýr pōj ka mē omu nē ho mex nē. Nē mē amnhī nhōrkwý hwýr awý kē mē akutā apkur o pa. Na hte ixpyrā nē Pahihti Jejus mā tanhmā amnhī nhīpêx to mex o pa. ¹¹ Kormā mē pahkīnhā nyw tā kēr ka mē tee ri ja hā omu nē ri axpēn mā tanhmā harēnh to hkêt nē. Mē ām akapēr mex pix o kām akapēr. Nē koja akupýn nojarēt ka mē pry hā kām apkur xà hkwý gō kē mex pē man akupýn ixwýr mō pa tokyx omu. Kot paj jar mē pahkwýjê mē akupýn hpōx kamā ijamak o ixpa.

¹² Nē na pa hte xatā jar mē pahtō Aporja ma mē awýr mōr kaxyw mē awýr hano. Kot jar mē pahtō hkwýjê mē ma mē awýr mōr kaxyw. Nom kormā. Koja xep mē jar tanhmā amnhī to hpa nē rī kormā ma mē awýr mō.

Kagà jatur xà kamā Pawre kot mēmoj tā karō

Epes 6.10-12; Sikūn Ximotre 1.7; Wam Pêtre 5.8-9

¹³ E kwa kēr ka mē arī amnhī wýr Jejus kamā ajamak rāhā ho ri apa. Nē hamār pē kutêp tām amnhī nhīpêx o ri apa. Nē amnhī kaxyw hkôt ajamaxpēr týx rāhā nē.

¹⁴ Nē mē amā axpēn kīnh pē tanhmā axpēn to mex to.

¹⁵ Mān ka mē ra Estepti mē hkwýjê jarēnh ma. Mē hkumrêxjaja na prem pika pē Gres kamā Kris kôt amnhī xunhwý. Tā xep mē ra Kris kôt hkwýjê ho mex o ri mē hkôt pa. ¹⁶ Kēr ka mē ā mē kot amnhī nhīpêx anhýr xwýnhjê kapēr ma nē hkôt ri amnhī nhīpêx o ri apa. Mē kot Kris mā mē ajamār xwýnh piitā kēr ka mē kapēr ma nē mē hkôt ri amnhī nhīpêx mex nē.

¹⁷ Nē ota Estepti nē Akajkre nē Putunatreto na mē ra jar pōj. Pa mē Sostenes mē wa mē omu nē wa ixkīnh nē. Te ixte mē apumunh nē ixkīnh týxta pyrāk. ¹⁸ Na xep prem ma mē awýr mō nē tanhmā mē amā kapēr to ka prem mē ama nē akīnh nē. Tā mē ra amnē ixwýr mō nē tanhmā inhmā kapēr mex to pa mē kuma nē ijaxwýja ixkīnh nē. Kwa kēr pu mē ā mē kot mē panhīpêx anhýr xwýnhjê ho mex o papa.

¹⁹⁻²⁰ Nē ota jar pika pē As kamā Kris kôt mē pahkwýjaja piitā mē awýr hpēr mē. Nē Akir mē hprō Prisireja wa. Nē wa ōrkwý kamā mē kot Tirtūm mā amnhī jarēnh kaxyw mē pikuprōnh xwýnh piitā mē awýr hpēr mē.

Nē kēr ka mē nhýri axpēn pumu nē mē apē Kris kôt mē ate axpēn to atō nē atōx ā axpēn mā akapēr mex nē akīnh nē.

²¹ E kot paj kagà jatur xà kamā inhīhkra ho mē amā amnhī nhīxi nhīpêx ka mē omu. Koja inhmā ixkapēr ā kagà xwýnhhta ja hā kagà hkêt nē. Pa kot paj hipêx. Ixpē Pawre na pa ā amnhī nhīxi nhīpêx anē ka mē omu.

²² Nē kwa kēr ka mē arī amā Pahihti Jejus kīnh o ri apa. Koja

mēhō kām hkĩnh kêt hã koja Tĩrtũm
ja hã homnuj tỳx kumrēx.

E “maranat.” Mē pakapēr kām
na htem maranat jarēnh o: “Kwa
tokyx akupỹn mē ixwỳr wrỳ Pahi-
hti.” Anē.

²³E kê Pahihti Jejus Krisja mē ato
mex nē mē akutã nojarêt rãhã ho
pa. ²⁴Ixpyrà nē mē apê Jejus Kris
kwỳ jakamã na pa hte inhmã mē
akĩnh nē.

Tã ãm ja pix. Ixpê Pawre na pa ã
mē awỳr kagà nhĩpêx nē mēnh anē.

Sikūn Korīt Pawre wam Korīt kām Jejus kôt hkwýjé hwýr kagà nē mēnh kôt kagà hō mēnh

Pawre na pre kagàja nhīpēx. Kēp mry hkà ho ixkre nhīpēx nē ho wēnē ho pa xwýnh na pre. Tā hpānhā kēp Jejus nhỹ hā hkrajé jahkre ho pa xwýnh. Jakamā na pre kagàja nhīpēx nē Korīt kām mē kot Jejus kôt amnhī xunhwýr xwýnhjé hwýr kumē. Na pre ra mē hwýr wamta nhīpēx nē kumē. Wam kagà nhīxi pē Wam Korīt. Tā axte hkôt ja nhīpēx nē mē hwýr mēnh jakamā kagà nhīxi pē Sikūn Korīt.

Na pre Korīt kām Jejus kôt mē htōjé hō axtem nē nā puro kamā hpījaam kēt o pa nhūm Pawre tee ri harēnh ma nē mē hwýr wam kagàta mē nē kamā tanhmā mē kot hipēx to hā mē kām karō. Tā kagà ja kamā axte tanhmā hā mē kām karō hto.

Na pre ra Korīt wýr mē kēp Kris nhỹ hā mē ahkre hā amnhī to hēx xwýnhjaja mē hwýr pōj nē tanhmā mē kām kapēr jarēnh to ho mē hkôt pa. Nē tanhmā mē kām Pawre ho hēx to. Jakamā nhūm kagàja kamā tanhmā mē kām amnhī tā àprār to nē kām mē hkīnh tỳx ā amnhī jarē. Ā na pre Pawre mē kām mēmoj jarēnh nē hā kagà anē. Nē mē kām hā kagà ho:

¹ Pa Korīt kām Tirtūm krajaja. Xà mē apiitā mē amex na ka mē apa? E ot pa mē awýr kagà nhīpēx nē kumē. Mē amā nē mē anhō pika pē Gres kamā Tirtūm krajé mē mē ato ixpimràatā mē awýr hipēx nē kumē. Ixpē Pawre na pa hte Tirtūm jamaxpēr xà hkôt ma Jejus Kris nhỹ hā krī piitā hkôt hkrajé jahkre ho ri xpa. Tā Kris kôt mē pahtō Ximotre mē wa mē awýr hipēx nē kumē.

² E kē Mēpahpām Tirtūm mē Pahihti Jejus Kris wa mē ato mex rāhā ho pa. Nē mēmoj to mē akutā nojarēt rāhā ho pa. Ka mē wa kukwak ri ajamakētcati nē amex nē ri akīnh nē apa ho apa.

Pawre kām amnhī xà htỳx kamā hamak pyma hkēt ā harēnh

Rōmān 1.11-12; Korosē 1.11; Sikūn Tesarōn 2.16

³⁻⁴ Nā Tirtūm kēp mē panhō Pahihti Jejus Kris nhīpēxà na. Nē kēp Mēpahpām maati jakamā na hte mē pakamā ukapri nē tanhmā mē pahto mex to ho pa. Kot puj mē mēmoj tā tanhmā amnhī to nē pahkapri nē ri papa nhūm ja hā mē pahpumu hāmri nē hamaxpēr pix o akupým mē pahto mē paxihtỳx. Mēmo kaxyw na hte ā mē pahto mex anē? Nā mē pahte amnhī tā omunh nē amnhī pyràk mē hkapri nē ri mē pa xwýnhjé jamaxpēr o hihtỳx o mē hkôt papa kaxyw. Ja kaxyw na hte mē pajamaxpēr o hihtỳx. Jakamā kwa pu mē kām mex o mex ā mán harēnh rāhā ho pa.

⁵ Na htem tōhā ixto Kris nhīpēx pyrà nē tanhmā ixto pa amnhī xà htỳx kamā ijamak o ri xpa. Tā nhūm Tirtūm inhīpēx o te Kris nhīpēx pyrà nē hamaxpēr pix o tanhmā ixkrā hto pa mē kutā amnhī to htỳx nē arī mē hkôt xpa. ⁶⁻⁷ Na pa hte mē amā Kris kapēr jarēnh o xpa. Mē ate inhar nē hkôt amnhī nhīpēx kaxyw. Jakamā na hte mē kām Tirtūm kapēr mar prām kēt xwýnhjaja tōhā mē atā ixtomnuj nē pa amnhī xà htỳx kamā ijamak o ri xpa. Tā kwār mē māmri ā inhīpēx anē. Mē ate Jejus kôt amnhī xunhwýr tỳxja na inhmā hprām. Na htem tanhmā Kris ā inhīpēx to nhūm Tirtūm mē hā ixpumu nē tanhmā ixkrā hto pa inhmā amnhī xà htỳx kamā ijamak pyma hkēt nē xpa. Nē arī mē hkôt mē kām kapēr jarēnh rāhā ho ri xpa. Na hte Tirtūm amarī ā inhīpēx

anhÿr kêt nê. Mê ate ã kot inhîpêx anhÿr ã ixpumunh nê ixpyrà nê amnhî kaxyw kãm ajamaxpêr tÿx kaxyw na hte ã inhîpêx anê. Mê ate ja hã ixpumunh nê ã ajamaxpêr anhÿr kaxyw nê mê ajamaxpêr o:

—Nà kot pa nhÿrmã Pawre pyrà nê tōhã mê mÿrapê amnhî xà htÿx kamã ijamak o ixpa. Hãmri nhÿm Tîrtÿm ja hã ixpumu nê te ho Pawre nhîpêx pyrà nê tanhmã ixto pa inhmã amnhî xà htÿx kamã ijamak pyma hkêt nê ixpa. Nà koja ã inhîpêx anê.

Anhÿr o mê ajamaxpêr kaxyw na hte Tîrtÿm mê kutã ixto ixihtÿx. Mê ate ja hã ixpumunh nê akupÿm tãm ajamaxpêr pê Karō nhÿ hã amnhî to axihtÿx kaxyw. Jakamã na pa tee ri mê akukamã ijamaxpêr kêt nê.

Tîrtÿm kêp mê papytâr xwÿnh ã harênh

⁸ E Kris kôt ixkwÿjaja. Kot paj ixprî hã mê amã tanhmã amnhî jarênh to ka mê inhma. Na pa pre ma pika pê As wÿr mō nê mê kãm Jesus kapêr jarênh o ri mê hkôt ixpa. Hãmri nhÿm mê hkwyjaja ja hã ixtomnuj tÿx nê pa amnhî xà htÿx kamã ijamak pê mê hkôt ixpa. Kironhÿx pa pre mê kamã ty. ⁹ Na pa pre tee ri amnhî kukamã ijamaxpêr o:

—Koja pêr mê ixpî. Tanhmã kot pa we amnhî to nê tokyx mê kêp amnhî pytà? Kot paj tee ri inhmã mê kêp amnhîptâr prãm. Tîrtÿm pix na ja kaxyw mê kutã àhpumunh tÿx. Rÿ nhÿm mê kot ixpîr tã nhÿm kot akupÿm ixto ixtîr kaxyw tapxipix na àhpumunh tÿx. Nà kot paj amnhî kaxyw tapxipix mã mãn ijamaxpêr o ri ixpa nhÿm amnhî tã ixpumu nê hkînh nê. ã ixte amnhî nhîpêx anhÿr o ixpaja na kãm hprãm. Anê.

¹⁰ Tã nhÿm pre ã inhîpêx anê nê xatã mê kêp ixpytâr o ixkôt pa. Koja ã mê kêp inhîpêx anhÿr rãhã ho pa. Nã ã kot inhîpêx anhÿr mã kênã.

¹¹ Nom kwa kêr ka mê apiitã arî ixto Tîrtÿm wÿr rãhã ho ri apa kê mê ama nê mê kãm ixkurê xwÿnhjê kutã ixto ixihtÿx rãhã ho pa. Nê ixto mex rãhã nê. Hãmri nhÿm mê ohtō nê kot mê kêp tanhmã ixpytâr to hã ixtã omu nê ixtã kãm mex o mex ã harê.

Pawre kot mê kãm amnhî tã aprâr ã harênh

Wam Korît 2.1-5

¹² Nê na xep pre atar Kris kôt mê pahkwÿjaja tanhmã ixto kapêr punuj to nê Jesus kot mê awÿr inhmênh kêt ã mê amã ixto hêx. Nê ijakwa nhîkjê ho inhmã mê akînh nê ijakwa nhîkjê ho mê ato ixkapêr punuj ã ijarênh o ri pa. Nom ixte ã amnhî nhîpêx anhÿr kêt. Aa ixte tanhmã mê ano kupyw to hkêt. ãm hãmri na pa mê amã amnhî jarê nê tãm mê amã ixkapêr o ri ixpa nê tãm ri mê anhîpêx o ri ixpa. No ijamaxpêr tÿm kôt tanhmã mê anhîpêx to hkêt nê. ãm Tîrtÿm kot mêmoj to mê pakutã nojarêt ã omunh xà hkôt pix mã na pa hte ÿ hã mê ato mex o ri ixpa. Ijamaxpêr nyw o. Na pa hte Tîrtÿm pyrà nê mê piitã mê ho mex nê. No mê kajaja ixpyràn mê apê hkra jakamã na pa hte mê ato mex kumrêx o ri ixpa. ¹³ Na pa hte mê amã kagã hkwy nhîpêx nê ixprî hã mê amã tanhmã mêmoj jarênh to. Mê ate kamã harênh nê mar mex kurê kumrêx kaxyw. No na pa hte mê amã tanhmã ixêx to rÿ tanhmã mê ano kupyw to hkêt nê. ¹⁴ ã ixte amnhî nhîpêx anhÿr o ri ixpa htã kormã mê apiitã ja hã ixpumunh mex kêt nê. Nê Jesus kot mê awÿr inhmênh ã ixpumunh mex kêt nê. Jakamã na hte mê akwÿjaja ixto akapêr punuj o pa. Tã kot kaj mê nhÿrmã ãm hãmri Jesus kot mê awÿr inhmênh ã axpên mã ijarê pa mê ama nê ixkînh nê. Hãmri nhÿm nhÿrmã mê panhō Pahihti Jesus mê pahwÿr akupÿn wrÿ pa kãm mê ajarê nê kãm:

—E Pahihti. Jajê mã na pa pre akapêr jarênh o ixpa nhũm mẽ inhma nê akôt amnhĩ xunhwýr kurê kumrêx nê tãm amnhĩ nhĩpêx mex o pa.

Anhýr o kãm mẽ ajarê. Hãmri nê ã mẽ ate amnhĩ nhĩpêx anhýr ã mẽ apumunh kôt ixkĩnh nê. Ka mẽ ajaxwýja akĩnh pê tanhmã kãm ijarênh to ho akuhê.

*Pawre hêx kêt ã kot amnhĩ jarênh
Wam Korîit 16.5-6*

¹⁵⁻¹⁶ Nê na pa pre ra mẽ awýr ixkrã. Ixte ma mẽ awýr inhmõr nhũm mẽ ate ixpumunh nê akĩnh ã mẽ akamnhĩx nê mẽ awýr ixkrã nê ijamaxpêr o:

—Nã ma Masetõn wýr inhmõr xwýj ri kot paj ma Korîit kumrêx wýr mõ. Hãmri nê Kris kôt ixkwýjê pumu nê rĩ kormã hamũ Masetõn wýr mõ. Nê mẽ kamã ri ixpa tãmtã awjanã nê akupýn Korîit wýr mõ nê axte mẽ omu. Jao Tirtũm kapêr o mẽ ahkre ho axkrut nhũm mẽ amnhĩ tã ixpumu nê hkĩnh nê. Hãmri pa akupým Jutej wýr inhno-jarêt nhũm mẽ pry hã ixãpkur xã hã inhmã mẽmoj kwý nhõr japêr.

Anhýr o ijamaxpêr. ¹⁷ Tã kormã jar tanhmã amnhĩ nhĩpêx to ho ixpa ka xep mẽ tee ri amnhĩ wýr ixkãm ama nê axpên mã ijarênh o:

—Kwa Pawre kot ra mẽ pahwýr nojarêt ã amnhĩ jarênh tã amnhĩm nojarêt kêt kumrêx. Mãn pre ãm mẽ pamã amnhĩ to hêx nã? Ra kot mẽ pamã amnhĩ jarênh tã tokyx hpõx kêtne hã. Anê.

¹⁸ Kwa mẽ ri ã inhmã ajamaxpêr anhýr kêt nê. Na pa pre mẽ amã ixêx kêt nê. Na pa hte Tirtũm noo mã ãm hãmri mẽmoj jarênh o ri ixpa nê mẽ amã mẽmoj jarênh o ixêx kêt nê. Nã ãm hãmri na pa pre ma mẽ awýr inhmõr ã amnhĩ jarê.

¹⁹ Na pa pre ra Ximotre mẽ Siras mẽ wa mẽ amã Jejus Kris jarênh o ri mẽ akôt ixpa. Jejus kêp Tirtũm Kra hã harê nê kot amnhĩ nhĩpêx te

kot Tirtũm kot amnhĩ nhĩpêx pyrãk ã harênh o ri ixpa. Jejus haxwýja amnhĩ to hêx kêt. Kot mẽmoj tã amnhĩ jarênh xã hkôt na hte ãm hãmri tanhmã amnhĩ nhĩpêx to. Tã ã kot amnhĩ nhĩpêx anhýrja kôt na pa inhmã ixte amnhĩ nhĩpêx o ixpa hprãm nê. ²⁰ Ra Tirtũm Jejus Kris kukwak ri kot mẽ pahto mex ã amnhĩ jarênh jakamã na pu htem axpên mã harênh o:

—Koja Tirtũm Jejus kukwak ri mẽ pahto mex rax nê. Ra kot mẽ pahtã amnhĩ jarênh xã hkôt. Nã Tirtũm mex o mex. Anê.

*Tirtũm kot mẽ pa hwýr Karõ rênh
ã harênh*

Rõmãn 8.14; Epes 1.13

²¹ Nã Tirtũmja mex o mex. Kot mẽ pahpê hkra kaxyw amnhĩm mẽ paxunhwýr jakamã na hte tanhmã mẽ pahkrã hto pu mẽ Kris kôt amnhĩ nhĩpêx mex o papa.

²² Na pu htem Kris kôt amnhĩ xunhwý nhũm Tirtũm ja hã mẽ pahpumu nê mẽ pahwýr Karõ rê nhũm mẽ pahwýr agjê. Mẽ piitã mẽ kot mẽ pahpê hkra hã mẽ pahpumunh kaxyw. Te mẽ kot tanhmã mẽ hikukrêx kagã hto nhũm mẽ kot kêp õ dõn ã omunhta pyrãk. Tã koja Tirtũm Karõ mẽ pakamã hkrĩ pu mẽ ja hã amnhĩ pumunh kôt Tirtũm kot nhýrmã mẽ pahto mex rax ã amnhĩ tã omunh kurê kumrêx. Ra kot mẽ pahto mex tã koja nhýrmã mẽ pahto mex rax o wam kot mẽ pahto mex raxta jakre.

*Pawre kãm mẽ kãm ãkjêr prãm kêt
ã kot amnhĩ jarênh*

Wam Korîit 4.21; Sikûn Korîit 10.1-2

²³ E Kris kôt ixtõ nê ixtõxjaja. Kot paj kormã ma mẽ awýr inhmõr kêt ri ixprĩ hã mẽ amã tanhmã amnhĩ jarênh to ka mẽ ixte amnhĩ jarênh ma. Tirtũm tãm mẽ arom kot ijamaxpêr kôt ixpumunh mex jakamã kot paj noo mã ixprĩ hã mẽ

amā tanhmā amnhī jarēnh to ka mē inhma.

Na pa pre ra mē awyr inhnojarēt tā no ām tee ri amnhī kukamā ijamaxpēr nē ijamaxpēr o:

—Nā kot paj taxy kormā ma mē hwyr inhmōr kēt nē. Kot paj tokyx mē hwyr mōn pōj nē kot amnhī tomnuj xwŷnh̄ta ā mē kām akir nē nē tanhmā mē kām ixkapēr to. Hāmri nhūm mē amnhī tā inhma nē hkaprī nē tee ri amnhī kukamā hamaxpēr. Ā mē kot amnhī nhīpēx anhŷr pymaj kot paj kormā mē hwyr inhmōr kēt nē.

Anhŷr o ijamaxpēr. ²⁴ Inhmā ma mē awyr inhmōr nē tanhmā mē ate amnhī nhīpēx to hā axte mē amā karō kamā ixih̄tŷx prām kēt. Mē akwŷjē rom ra mē ate Kris hkōt amnhī xunhwyr tŷx kēnā. Tā mē ate hkōt amnhī nhīpēx mex o akīnh nē apaja na inh̄mā hprām.

2

¹ Na pa pre ma mē awyr mō nē mēmoj tā mē amā akir nē nē tanhmā mē amā ixkapēr to ka prem inhma nē akaprī nē ri apa. Tā inh̄mā akupŷm mē awyr inhmōr nē axte mē amā ixākjēr prām kēt jakamā na pa kormā mē awyr inhmōr kēt nē. ² Kot kaj mē akīnh nē apa pa ijaxwŷja ixkīnh nē ixpa. No kot paj ma mē awyr mō nē mēmoj tā mē amā akir ka mē tee ri inhma nē akaprī nē. Pa mē apumu nē ijaxwŷja ixkaprī nē.

³ Ja pymaj na pa pre wam ixte mē awyr kagā mēnh̄ta kamā mēmoj nē tanhmā mē amā ixākjēr to. Mē ate kamā harēnh nē mar nē tokyx kormā mē awyr inhmōr xwŷj ri tanhmā mē ate amnhī tomnuj tota kaga nē tām amnhī nhīpēx kaxyw. Kēr pa mēmo arīgro hā ma mē awyr mōn pōj nē mē ate tām amnhī nhīpēx o apa hā mē apumu nē ixkaprī hkēt nē ixkīnh nē. Ka mē ajaxwŷja ixpumu nē akīnh nē. ⁴ Jakamā na pa pre ā mē amā

kagāta nhīpēx nē mē awyr mēnh̄ anē. Nē kamā mēmojta nē tanhmā mē amā ixākjēr to. Na pa pre ixkaprī htŷx nē tee ri mē akukamā ijamaxpēr o inh̄mŷr rax pē mē amā mēmojta ā kagā. No ām mē akaprī kaxyw na pa pre mē amā hipēx kēt nē. Ām mē ate kamā harēnh nē inhmar nē ajamaxpēr o:

—Hēxta waa nē. Nā Pawre na kām mē pahkīnh tŷx kumrēx. Hā na pre mē pahte tanhmā amnhī tomnuj to hā mē pajarēnh ma nē tee ri mē pakukamā hamaxpēr pē kagāja kamā hā mē pamā akir nē mē pahwyr kumē. Nā kām mē pahkīnh tŷx kām na ā mē pamā kapēr kām hihtŷx anē.

Anhŷr o ajamaxpēr kaxyw na pa pre hipēx nē mē awyr kumē.

Mē kot axte amnhī tomnuj mā hamaxpēr kēt ā mē kām karō

Rukre 17.3-4; Wam Korīt 5.1-13; Karatas 6.1-2

⁵⁻⁹ Nē wam kagāta kamā na pa pre mē amā mē akwŷjē hō kot nā kaakre kamā hpijaam kēeta pa mē amā tanhmā hā karō hto. Ra mē ate harēnh mar tā nē kām akapēr kēt nē. Tā mē ate inhmar nē nē tanhmā kām akapēr to nē amnhī nē hanor kaxyw na pa pre mē awyr kagāja mē. Hāmri nē ijamaxpēr o:

—Ko. Koja mē ixkapēr mar xā hkōt amnhī nē hanor japēr. Anē.

Tā ka xep prem kamā harē nē ama nē tee ri ja hā amnhī pumu nē akaprī nē. Nē ixpyrā nē apijaam nē. Hāmri nē ijamaxpēr xā hkōt amnhī nē hanor kām axih̄tŷx nē. Ām hāmri na ka prem ā hipēx anē. Nhūm xep tee ri ja hā amnhī pumu nē hkaprī nē hkaprī xāj ri mŷr o pa. Jao ra ā amnhī nhīpēx anhŷrta kaga nē akupŷm tām amnhī nhīpēx. Tā ra ā kot amnhī nhīpēx anhŷr jakamā kwa mē tokyx akupŷm amnhī wŷr awŷ kē axte mē awyr mra nē mē akōt pa. Ra kot amnhī tomnujta kaga jakamā kēr ka mē axte kām ajamaxpēr kēt nē. Akupŷm tām

kām akapēr kē tokyx akupŷm tām hamaxpēr nē hkīnh nē pa. Kot kaj mē tokyx ā hipēx anhŷr kēt nē nhūm tee ri amnhī kukamā hamaxpēr nē hkaprī nē pa. Ja pymaj kwa mē amā hkīnh ā kām amnhī jarē nē akupŷm tām kām akapēr pē tām hipēx o ri apa. Kē amnhī tā mē apumu nē akupŷm hkīnh nē tām hamaxpēr. ¹⁰ E kēr ka mē axte kot tanhmā amnhī tomnuj tota mā ajamaxpēr kēt nē. Kwarī ho kwarī. Kot kaj mē ā hipēx anē pa ijaxwŷja ma hipēx anē. No pa na pre tanhmā ixtomnuj to hkēt nē. Ām Jejus kapēr kwŷm na pre ri ā amnhī nhīpēx anē. Tā ra kot amnhī tomnujta kaga jakamā kot paj Jejus nhŷ hā akupŷm tām hipēx nē kot amnhī tomnujta o ijamakētkati tokyx anē nē axte kām ijamaxpēr kēt nē. Mē apiitā mē amex nē ri mē apa kaxyw. Jakamā kēr ka mē ajaxwŷja mē amex nē apa kaxyw ā amnhī nhīpēx anē nē axte kām ajamaxpēr kēt nē. ¹¹ Kwa mē tokyx ja ho ajamakētkati. Kē Satanasti tee ri ja hā mē apumu nē mē amā mē ate tanhmā amnhī tomnuj to hprām xàj tee ri tanhmā ri mē ato ho pa kaprŷ. Kēr pu mē Satanasti kot amnhī nhīpēx kōt amnhī nhīpēx o ri papa hkēt nē. Ra mē pahte Tirtūm kapēr kuhpa hā tanhmā kot amnhī nhīpēx to ho pa hā omunh mex kēnā.

Pawre kot Xitre japēr o pa hā harēnh

¹² Nē na pa pre ja rūm ixkato nē ma Tōx wŷr mō. Ixte mē kām Kris jarēnh o mē hkōt ixpa kaxyw ma mē hwŷr mō. Nhūm Pahihti Kris ixkukamā tanhmā mē hkrā hto jakamā pa pre mē hwŷr pōj nhūm mē piitā kām ixujarēnh mar prām nē. Pa pre mē kām Tirtūm kapēr jarēnh ryy ho mē hkōt ixpa. ¹³ Na pa pre Xitre ra mē hwŷr ixkukamā hpōx ā hkamnhix tā nhŷri omunh kēt nē. Hāmri nē ijamaxpēr o:

—Hēxta waa nē. Inhmā Korit kām Jejus kwŷjē jarēnh mar prām. Na pa tee ri mē hkukamā ijamaxpēr o ixpa. Nom kormā Xitre mē kurūm akupŷn hpōx kēt. Mān kormā Masetōn kamā pa.

Anhŷr o ijamaxpēr hāmri nē mē kām amnhī jarē nē ixkato nē ma Masetōn wŷr krī hkwy hkōt hapēr o mō. Tā ra hwŷr ixkato nē omu.

Te mē pahpē mēhkuxwa xà pyrāk ā mē pajarēnh

Epes 5.2; Piripos 4.18

¹⁴⁻¹⁶ Nā Tirtūmja mex o mex. Na hte mē pahto mex rāhā ho pa. Nē mē kot mē panē àmnar xwŷnhjaja nhūm hte tanhmā mē ho pu mē ma paxàmnhix ri mē hkōt mē kām Kris kapēr jarēnh o ri papa. Te mē pahte mē hkuxwa xà ho ri mē hkuxwa ho papa pyrāk. Mē pahte Kris kōt amnhī nhīpēx jakamā Tirtūm mā te mē pahkuxware nē ri mē papa pyrāk. Nē te mē kām Kris jarēnh o ri papa pē te mē hkuxwa xà ho mē hkuxwa ho ri mē hkōt papa pyrāk. Nhūm hte mē hkwyjaja mē pama nē kām mar prām nē. Nē mē paxujarēnhja haxwŷja te kot mē hkuxwa xà kuxwa mex nhūm htem hpār nē kām ho amnhī kuxwa hprām pyrāk. Jao kām mē pamar prām nē Kris kōt amnhī xunhwŷ. No nhūm mē hkwyjaja axtem nē mē kēp mē pamar prām nōkati. Mē kumā Tirtūm kapērja te kēp wenēn kuxŷ htŷx nhūm mē kot hpār nē htyk pymaj amŷm kuhē pyrāk. Jao kapēr kaga nē kēp amŷm amnhī xunhwŷ.

Nē na pu htem amnhī krā hkōt mē kām Kris kapēr jarēnh o ri papa hkēt nē. Ām Tirtūm nhŷ hā pix mā tanhmā harēnh to ho papa.

Pawre kot katāt kōt Tirtūm kapēr o mē ahkre hā harēnh

¹⁷ Na hte mē kot mē kēp Kris nhŷ hā mē ahkre hā amnhī to hēx xwŷnhjaja te Tirtūm kapēr o wēnē pyrāk o mē hkōt pa. Jao kàxpore hprām xàj amnhī krā hkōt

tanhmā mẽ kām harēnh to nhūm htem mẽ kuma nē hpānhā tanhmā mẽ kām amnhīrer to. Nom pa na pa hte ã amnhī nhīpēx anhỹr kēt nē. Nē mẽ urāk nē amnhī krā hkôt Tirtūm kapēr jahkre ho ixpa hkēt nē. Tirtūm kot mẽ akaxyw ixām jakamā na pa hte ixkatāt kôt Kris nhỹ hā amarī mẽ amā kapēr jarēnh o ri mẽ akôt ixpa. No mẽ urāk nē kàxpore prām xāj mẽ amā harēnh kēt nē. Tirtūm kot ja hā ixpumunh mex.

3

¹ Mẽ kēp Kris nhỹ hā mẽ ahkre hā amnhī to hēx xwýnhjaja na htem nhỹhỹm nojarēt nē mẽ kot mar xwýnhjê mã:

—E kot paj ma nhām krī hō hwýr mō nē Tirtūm kapēr o mẽ ahkre. Jakamā kwa mẽ kaxyw inhmā kagā nhīpēx nē kamā ixte Tirtūm kapēr o mẽ ajahkre mex xwýnh ã ijarē nē hā kagā. Hāmri nē inhmā agō pa ma amnhī kôt o mō nē mẽ kot inhmar mã xwýnhjê mã kugō kē mẽ kamā harē nē ijarēnh ma nē kām ixkapēr mar prām nē.

Anhỹr o na htem amnhī to mẽ hwýr o pa. No pa na inhmā ã amnhī nhīpēx anhỹr prām kēt. Inhmā nhām mẽ kām amnhī to jarkrar prām kēt. Mẽ ate ja hā ixpumunh mex. Ra mẽ piitā mẽ kot ixkatāt kôt ixte Tirtūm kapēr jarēnh mex ã ixpumunh mex jakamā mo kaxyw kot pa ri amnhī kôt kagā jamý nē ho ixpa? Nà kot pa amnhī kôt hō ho inhmōr kaxyw hā ixāhwýr kēt nē. ²⁻³ Mẽ kajaja te mẽ apē inhō kagā pyrāk. Na ka prem ixte mẽ ajahkre ma nē Jejus kôt amnhī xunhwýr kurē kumrēx. Hāmri nhūm Tirtūm mẽ amā amnhī Karō rē nhūm mẽ amā agjē ka mẽ ý hā amnhī nhīpēx nyw o amnhī nhīpēx o apa. Hāmri nhūm mẽ akwýjaja amnhī jaēr pē mẽ ate amnhī nhīpēx nyw ã mẽ apumu nē mẽ atā xypēn mã ijarēnh o:

—Hêxta waa nē. Pēr ãm hāmri na pre Kris mẽ hwýr Pawre mẽ. Na pre ma mẽ hwýr mō nē mẽ kām Tirtūm kapēr o mẽ ahkre nhūm mẽ kuma nē amnhī tomnuj kaga hpa nē hpānhā Tirtūm kapēr kôt amnhī nhīpēx nē tām ri amnhī nhīpēx o pa. ãm hāmri na hte Pawre mẽ ahkre mex o pa. Hêxta waa nē.

Anhỹr o mẽ atā ijarēnh jakamā mo kaxyw kot pa kagā hkwy jamý nē amnhī kôt ho ixpa? Nà mẽ kajaja te mẽ apē inhō kagā pyrāk.

⁴ Na pa pre Jejus kôt amnhī xām nhūm Tirtūm ja hā ixpumu nē tanhmā inhmā kapēr o amnhīrit to nē inhmā:

—E Pawre. Kēr ka ma mẽ kām ixkapēr jarēnh o ri mẽ hkôt apa.

Anhỹr jakamā na pa hte Tirtūm kamnār rom ã amnhī nhīpēx anhỹr o ri mẽ hkôt ixpa. ⁵ Nom amnhī krā hkôt mẽ ahkre hkēt nē. Tanhmā kot pa we amnhī to nē amnhī krā hkôt mẽ kām kapēr o mẽ ahkre mex nē? Nà Tirtūm pix na hte ja kaxyw tanhmā ixkrā hto pa ô ri mẽ ahkre ho ri ixpa.

Tirtūm kapēr nyw jarēnh

⁶ Nē Tirtūm na hte tanhmā ixkrā hto pa Karō nhỹ hā mẽ piitā mẽ kām kapēr nyw jarēnh o ri ixpa. Amnepēm Tirtūm kot Ijaew mã mēmoj tā karō xwýnhhta. Mojes kot kapēr tūm jarēnh o pa xwýnhhta mex tā no nhūm mẽ tee ri hkôt kām amnhī nhīpēx prām o pa. Nē xatā kamā harē nē omunh tā tee ri kot hkôt kām amnhī nhīpēx prām. Tā mẽ kot hkôt amnhī nhīpēx kēt mýrapē na prem pikaprār pan hapēx. No kēt Tirtūm kapēr nywja. Jejus jarēnhja. Na hte Tirtūm Karō tanhmā mẽ pahkrā hto pu mẽ Jejus kôt amnhī nhīpēx o ri papa. Jao mẽ pahpē pahūr tūm nē papa mã xwýnh. No na hte nhām mẽ hkwyjaja kām harēnhja mar prām kēt nē amnhī jarēnh o:

—Nà kot paj amnhī krā hkôt ã amnhī nhīpēx anē nē ã amnhī

nhîpêx anê nhûm Tîrtûm ja hâ ixpumu nê ixtîr tûm nê ixpa mā xwÿnh â ijarê.

Anhÿr tâ no âm â amnhî jarênh anhÿr kaprÿ. Tîrtûm Karô nhÿ hâ mê kot amnhî to mex o mê pa xwÿnh pixjaja koja mê htîr tûm nê pa ho pa.

⁷ Nê Tîrtûm kapêr tûmta na pre Mojes mê kâm harênh kaxyw nhûm mêmôj tanhmâ amnhî nhîpêx to rax kumrêx. Naja hkrakrak nê haxênh nê kamâ kamât kô htyk. Hâmri nhûm Tîrtûm mê kot hkôt amnhî nhîpêx kaxyw kên po hâ mê kâm mêmôj tâ karô nhûm Mojes kumÿ nê mê hwÿr o wrÿ nê mê kâm kamâ harê. Tîrtûm kot hirã htÿx kamâ kâm kapêr nhûm kuri mar o âm jakamâ urak nê ÿ hâ hkuk nhîrã htÿx kumrêx nê mê kâm kapêr jarênh o xa. Jakamâ nhûm mê tee ri kot hprî hâ omunh mex kaxyw no âm nom gêk tÿx nê. Tã gaa nhûm hkuk kâm hirãja amnhîm hprî nê hapêx o mô. Na pre â Tîrtûm Ijaewjê mã kapêr tûm nhôr anê. Hâmri nhûm Mojesja ô ri mê kâm kamâ harê nê harênh pa hãmri nê mê kâm:

—E kêr ka mê Tîrtûm kapêr mar tÿx nê hkôt amnhî nhîpêx mex rãhã ho ri apa. Kêr ka mê nhÿrmã atyk tâ kê akupÿm mê ato mê atîr ka mê ô krî kamâ kuri atîr tûm nê amex nê apa ho apa. Anê.

Hâmri nhûm mê kuma nê kâm:

—Tôe. Nà kot paj mê hkôt pix mã ri amnhî nhîpêx mex rãhã ho ri ixpa.

Anhÿr â amnhî jarênh tâ no âm hkôt amnhî nhîpêx kêt nê nhûm Mojes tee ri mê kot amnhî nhîpêx â mê omu nê mê kâm:

—Nà mê ate Tîrtûm kapêr kôt amnhî nhîpêx kêt jakamâ kot kaj mê nhÿrmã ty nê Tîrtûm pê awry rax kumrêx nê ri apa. Anê.

⁸ Tã na hte Tîrtûm jarãhã axtem tanhmâ mê pamã kapêr to. Pãnhã kapêr nyw o kapêr nê mê pamã:

—Kot kaj mê Ixkra Jejus kôt amnhî xunhwÿ pa hâ mê apumu nê mê ato ixkra. Hâmri nhûm Ixkarô mê amã agjê. Anê.

Kapêr ja na mex kumrêx o kot kapêr tûm jakrenh. ⁹ Kapêr tûmja mex tâ nhûm htem hkôt amnhî nhîpêx kêt nê. Jakamâ na htem ty nê Tîrtûm pê awry rax â ri pa. No kapêr nywja na tûmta rom mex o mex. Na hte Tîrtûm mê pamã kapêr nywja jarênh o:

—Kot paj tanhmã mê akrã hto ka mê amnhî to mex pix o ri apa. Jao ixkôt ri amnhî nhîpêx mex o ri apa. Anê.

¹⁰ Nê kapêr tûmja te kot kanê hpôk kryre pyrãk. No kapêr nywja mex o kot tûm jakrenh jakamã te kot mêmô hpôk rûnh o kanê hpôk kryre jakrenh pyrãk. Jakamã nhûm mê kot hirã rax kâm ri mrar gryk â hpôk grire nhîrã kamã mrar kêt pyrãk. ¹¹ Tîrtûm kapêr tûm te kot Mojes kuk pyrãk. Na pre kamã hirã rax tâ gaa nê amnhîm hprî nê kamã hirã hapêx o mô. Nê gaa nê hapêx. No kêt Tîrtûm kapêr nywja te kot Tîrtûm nhîrã htÿx rãhã ho rãhãta pyrãk. Koja urak nê aa hapêx kêt kumrêx.

Ijaewjê jarênh

Rômân 11.7-10

¹² Nê Tîrtûm kapêr nywja mex o mex jakamã na pa hte ixãmnhîx mê kâm harênh o ri ixpa. ¹³ Te ixte Mojes kot amnhî nhîpêx pyrãk kêt. Na pre hte Mojes ixkînhã âmnhîx Ijaewjê mã Tîrtûm kapêr jarênh o ri pa hkêt nê. Mê kot hkuk kâm hirãta ra hapêx o môr â omunh nhûm hpijaam pymaj na pre kupêxê puroore ho amnhî kuk pro nê ri mê hkôt pa.

¹⁴ Jakamã nhûm prem hprî hâ hkuk kâm hirã pumunh mex kêt nê. Nê Tîrtûm kapêr â kagã htûmja nhûm prem mãânên hprî hâ mar mex kêt nê. Mê hkrã hihtÿx jakamã te mê kot amnhî jamak pro nê mêmôj mar mex kêt pyrãk jakamã mê kot mar tâ hprî hâ mar kêt nê. Nê

hkôt ri amnhī nhīpêx mex kêt nê. No mē kot Kris kôt amnhī xunhwÿr xwÿnhjaja na hte Tirtūm amnhī tā mē omu nê te mē nê mē hamak hpro xàta rēnh par nê rēnh pyrāk o mē hipêx nhūm mēhprī hā kapêr mar tÿx nê.

¹⁵ Tā na hte Ijaewjaja arī jarāhā Mojes kot Tirtūm kapêr ā kagā htūm kamā harēnh o pa. Nom arī mē hkrā hihtÿx jakamā te mē kot amnhī jamak pro nê kamā harēnh o pa pyrāk o amnhī nhīpêx jakamā kormā hprī hā mar kêt nê. ¹⁶ Tā koja mē hkwyjaja Pahihti Jejus Kris kôt amnhī xunhwÿr nhūm amnhī tā omu nê te kot mē hamak nê hpro xà hpyr nê mēnh pyrāk o mē hipêx nhūm mēhprī hā kapêr nyw mar tÿx nê. ¹⁷ Pahihti mē Karōja wa htixi jakamā na hte mē pakamā agjê nê hprī hā mē pamā kapêr o amnhīrīt o pa. ¹⁸ Ra mē pahte Pahihti Kris kôt amnhī xunhwÿr jakamā te mē pahte mē kot amnhī jamak pro xwÿnh kot amnhī nhīpêx pyrāk kêt. Nhūm Pahihti Karōja tanhmā mē panhīpêx to pu mē ra hkôt amnhī nhīpêx mex o mō. Jakamā na htem mē pahte amnhī nhīpêx nyw pumunh kôt Tirtūm kot tām amnhī nhīpêx ā omunh kurê kumrêx. Kormā mē pahte hkôt amnhī nhīpêx mex kumrêx kêt tā ra hkôt amnhī nhīpêx mex o mō. Jao te tām kot amnhī nhīpêx pyrāk o amnhī nhīpêx o mō.

4

Jejus kapêr te kēp kanē pyrāk ā harēnh

Wam Korīt 2.1-5; Sikūn Korīt 1.12; Wam Tesarōn 2.1

¹ Nê na pre Tirtūm ixto mex nê tanhmā kām ixàpēnh to hā inhmā karō. Ixte ma mē kām kapêr jarēnh o ri mē hkôt ixpa kaxyw. Jakamā na pa hte ixāmnhīx mē hkôt mē kām harēnh o ri ixpa. ² Nhūm mē hkwyjaja axtem nê ixêx o ri ixpa hā ijarēnh tā ixte ā amnhī nhīpêx

anhÿr kêt. Na pa hte amnhī tomnuj o ri ixpa hkêt nê. Mē hkwyjaja kot mē no kupyr kaxyw mē kām Tirtūm kapêr o hêx o pa htā pa na pa hte ā amnhī nhīpêx anhÿr kêt nê. Ixprī hā mē kām harēnh o ix-paja na inhmā hprām jakamā na pa hte ixkatāt kôt harēnh o ri mē hkôt ixpa. Mē piitā mē kot ixêx kêt kôt ixpumunh mex kaxyw. Tirtūm kot ixêx kêt kôt ixpumunh mex. ³ No nhÿrmā mē htyk nê ma kuwy hwÿr mē pa mā xwÿnh pixjaja na htem hprī hā ixkapêr mar mex kêt nê. ⁴⁻⁶ Satanasti tām kēp mē hpām. Kēp mē kām Tirtūm kapêr mar prām kêt xwÿnh piitā mē hpām. Jakamā na pa hte mē kām tanhmā Jejus jarēnh to. Kēp Tirtūm Kra hā harē nê te kot Tirtūm kot amnhī nhīpêx pyrāk ā harēnh o ri ixpa. Hāmri nhūm Satanasti tee ri ja hā ixpumu nhūm ja kēp omnuj nê. Jakamā nhūm tanhmā Tirtūm nê mē hkrā hto nê te mē hamak pro pyrāk o mē hipêx. Mē kot hprī hā Jejus jarēnh mar nê hkôt amnhī xunhwÿr pymaj nhūm ā nê mē hipêx anê. Jejus jarēnh te kēp kanē hpōk mex pyrāk jakamā mē kot mar kêt xwÿnhjaja te kamāt kō kamā ri mē pa pyrāk. No nhūm Satanasti tām kot nê mē no kupyr jakamā nhūm htem ā ri kamāt kō kamā mē pa pyrāk o amnhī nhīpêx anê.

Amnepê mā kormā mēmoj kêt ri nhūm kamāt kō pix. Tā nhūm Tirtūm tanhmā kapêr to nê kapêr o:

—E kē hirā kato. Anê.

Hāmri nhūm ra kapêr xà hkôt hirā kator kurê kumrêx. Tā ja pyrā nê na pa pre kamāt kō kamā ixtÿx ri ixpa pyrāk nhūm Tirtūm te kot inhmā kanē hpōk nhūm hirā pyrāk o inhīpêx pa mex o mex ā omunh kurê kumrêx. Hāmri nê Jejus Kris kot amnhī nhīpêx ā omu nê te Tirtūm kot amnhī nhīpêx ā omunh pyrāk. Wa kot amnhī nhīpêx te kot axpēn pyrāk.

Nē na pa hte pam tanhmā amnhī jarēnh to ho ri ixpa hkēt nē. Ām Jejus Krisja pix na pa hte harē. Tapxipix na kēp mē panhō Pahihti. Jakamā hkīnhā te ixpē mē amā ixāpēnh xwýnh pyrāk o na pa hte mē amā kapēr jarēnh o ri mē akôt ixpa.

Pawre te kēp poti grāre nhīpēx pyrāk ā harēnh

Wam Korīt 2.4-5; Sikūn Korīt 11.23, 12.9

⁷ Nē Tirtūm ixrom hihtýx o hihtýx. No pa na hkīnhā ixihtýx kēt. Te ixpē poti grāre nhīpēx pyrāk jakamā na pa hte Tirtūm xihtýx xwýnh pix nhý hā mē kām kapēr jarēnh o ri mē hkôt ixpa. Nhūm htem inhma nē ām hāmri ixte ý hā ixkapēr ā ixpumunh kurē kumrēx. No pa ixte amnhī krā hkôt ixkapēr ā ijarēnh kēt nē.

⁸ Na pa hte mē hkôt mē kām Jejus jarēnh o ri ixpa nhūm mē hkwyjja tōhā inhma nē ja hā inhīpēx kati nē pa amnhī xā htýx kamā ama. Nom nhūm Tirtūm mē kutā tanhmā ixkrā hto pa inhmā amnhī xā kamā ijamak pyma hkēt nē arī mē kām kapēr jarēnh o ri mē hkôt ixpa. Nē amnhī kaxyw Jejus kôt pix mā ijamaxpēr týx rāhā pē tee ri amnhī kukamā ijamaxpēr o ri ixpa hkēt nē.

⁹ Nē mē kām ixkurē xwýnhjaja ohtôô. Na htem xatā Jejus ā tanhmā ixtomnuj to htā pa kormā ixytk kēt nē. Na pa hte Tirtūm kamnār rom arī mē hkôt ixpa nhūm Tirtūm ixkôt pa ho pa. ¹⁰ Na htem Jejus pyrā nē ixpīr kaxyw tanhmā inhīpēx to. No ām ko. Koja mē nhýrmā ixpī rý ko. Ixte amnhī kukamā ixāhpumunh kēt. Kot paj ām arī ixtīr ri mē kām Jejus jarēnh o ri mē hkôt ixpa. Kēr kē mē hkwyjja ixkapēr ma nē axpēn mā tanhmā Jejus jarēnh to nē harēnh o:

—Nā pēr ām hāmri na pre Jejus akupým htīr nē tanhmā hkwyjē ho

mex to. Ām hāmri na hte Pawre ja hā harē. Anē.

¹¹ Mē kot Jejus ā ixpīr mā tā pa arī mē kām akupým htīr ā harē. Tirtūm na hte ja kaxyw tanhmā ixkrā hto pa arī mē kām harēnh o ri mē hkôt ixpa. ¹² Na pa pre ra mē amā harē ka prem inhma nē Jejus kôt amnhī xunhwýr kurē kumrēx nē amnhī nhīpēx nyw o amnhī nhīpēx o ri apa. Jakamā ixpyrā nē mē apē atīr tūm nē apa mā xwýnh. Nhūm htem piitā mē ate Jejus kôt amnhī xunhwýr ā mē apumu. Tā nhūm mē kot Jejus ā ixpīr kaxyw. Nom kwār mē māmri ixpī. Ja inhmā tanhmā kute hkēt. Mē kot ixpīr mā tā kot paj arī Jejus kapēr jarēnh o ri ixpa rāhā ty. Ra mē kot ixkapēr mar nē Jejus kôt amnhī xunhwýr xwýnhjaja mē pahpyrā nē kēp htīr tūm nē pa ho pa mā xwýnh kēnā. ¹³ Jakamā kwār mē māmri ixpī. Na pa hte arī amnhī kaxyw Tirtūm kôt ijamaxpēr mex rāhā nē. Amnepē mā na pre Pahi finat Tawija tanhmā Tirtūm kapēr jarēnh to nē harēnh o:

Ām hāmri na Tirtūm kapērja. Hēx kēt jakamā na pa hte mē kām harēnh rāhā ho ri ixpa. Anē. Tā pa hte Tawi pyrā nē mē piitā mē kām Tirtūm kapēr jarēnh o ri ixpa. Tirtūm kot mē pamā tanhmā mēmoj to hēx to hkēt. ¹⁴ Ra kot amnhī jarēnh xā hkôt akupým Pahihti Jejus o htīr jakamā kot puj mē nhýrmā urāk nē ty nhūm akupým mē pahto mē pahtīr nē ma war amnhī wýr mē pahto api.

¹⁵ Amnepēm na pa pre ma mē awýr mō nē mē akôt mē amā Tirtūm kapēr jarēnh o ri ixpa. Ka prem inhma nē Jejus kôt amnhī xunhwý nē ixpyrā nē Tirtūm mā mex o mex ā harē. Jakamā kwār mē māmri Jejus ā tanhmā inhīpēx to. Koja mē gaa nē rī mē hkwyjja mē pahpyrā nē Jejus kôt amnhī xunhwý nē Tirtūm mā mex o mex ā harē.

Pawre tee ri amnhī kukamā hamaxpēr kêt ā kot amnhī jarēnh

Rōmān 8.17; Sikūn Korīt 1.7; Wam Pētre 1.3-9, 4.12-16, 5.10

¹⁶ Jakamā na pa tee ri amnhī kukamā ijamaxpēr o ixkaprī nē ixpa hkêt nē. Mē kot Jejus ā tanhmā ixtomnuj to htāā pa hte ixāmnhīx kapēr jarēnh o ri ixpa. Ra ixpigêt nē ixirerek o inhmōr tā inhōpinh xā kaxwŷnh kām ijamaxpēr o Jejus kôt amnhī nhīpēx mex o mō. ¹⁷ Mē kām ixkurē xwŷnhjaja na htem Jejus ā inhīpēx kati htā ā inhīpēx anhŷr japijē hkêt nē. Nom kot paj nhŷrmā ty nhūm Jejus akupŷm ixto ixtīr pa Tīrtūm mē wa kuri inhmex kumrēx nē ixpa ho ixpa. Mē kot ixtomnujja na mē ho apkati grēre no kot paj nhŷrmā Tīrtūm mē Krata wa kuri inhmex kumrēx nē ixtīr tūm nē ri ixpa ho ixpa. Jao rāhā ho rāhā.

¹⁸ Jakamā na pa tee ri mē kot tanhmā ixtomnuj tota kukamā ijamaxpēr o ri ixpa hkêt nē. Ja koja tokyx hapēx. Na pa hte ām nhŷrmā Tīrtūm nhō krī kamā inhmex nē ixkīnh rāhā ri ixpaja pix kukamā ijamaxpēr o ri ixpa.

5

Mē panhī nyw jarēnh

Piripos 3.21; Sikūn Pētre 1.13-14

¹ Nē mē panhīja te kot tyrti hō ho ixkre pyrāk. Na htem tyrti hō ho ixkre nhīpēx nhūm gaa nē hapēx. Tā mē panhīja na hte urāk nē hapēx tokyx anē. Na pu htem ri papa nē gaa nē pawej nē ty. Tā nhūm Tīrtūm hpānhā mē pahpē hkrajē mā mē panhī nyw gō pu mē kuri ō krī kamā pamex kumrēx nē pahťir tūm nē papa ho papa. ²⁻³ Na pu htem jar pahpunuj nē papa. Nē mē paxā nhi nē mē pahkaprī nē. Mē panhī htūmja te kot mē paxē htūm pyrāk jakamā na pu htem ty nē te paxē htūm kwŷnh nē hpānhā nyw jagjēnh pyrāk o amnhī nhīpēx. Tā na pu htem amnhī kukamā panhī nywja mā pajamaxpēr o ri papa.

Kot pu mē kaxkwa kamā pahkarō pix nē ri papa hkêt nē. Mē panhī nyw ā kot puj mē ri papa ho papa.

⁴ Nē na pu htem jar pahpunuj nē pamex kêt nē ri papa. Nē tokyx mē pahtyk nē panhī htūm o pajapēx nē hpānhā panhī nyw ā mē papa hprām. Tā koja Jejus tokyx akupŷn wrŷk japēr pu mē pahtyk kêt rāhā tokyx panhī nywta o panhī nyw. Nom koja tokyx akupŷn wrŷk kêt japēr pu mē nhŷrmā ty nhūm Tīrtūm akupŷm mē pahto mē pahťir nē mē pamā mē panhī nyw gō pu mē ho panhī nyw. ⁵⁻⁶ Na pre ra Tīrtūm mē panhī nyw kukamā hamaxpēr nē mē pahťā tanhmā amnhī jarēnh to. Nē mē pahwŷr Karō rē nhūm mē pahkarō mā agjē pu mē ja hā amnhī pumu nē pahkīnh nē pajamaxpēr o:

—Na ra Tīrtūm kot ixwŷr amnhī Karō mēnh nhūm ixkarō mā àr jakamā koja määnēn nhŷrmā inhmā inhī nyw gō. Kormā inhī htūm kamā ixpa nē Pahihti Jejus mē wa ō krī kamā ixpa hkêt tā koja nhŷrmā inhmā inhī nywja gō pa inhī nyw o wa kuri ixpa ho ixpa. Nā koja ā inhīpēx anē.

Anhŷr o pajamaxpēr pē pahkīnh nē papa.

⁷ Nē mē pahte jar pano ho nhŷri Jejus pumunh kêt tā no ām panhōpinh xā kaxwŷnh kām kām pajamaxpēr mex nē. ⁸ Jakamā na pu mē tee ri amnhī kukamā pajamaxpēr o papa hkêt nē. Na pu htem ām tokyx mē pahtyk nē ma Pahihti Jejus nhō krī hwŷr paxāpir jamār o papa. Ō krīja kēp mē papapxā kumrēx jakamā na pu htem ma hwŷr paxāpir pix kukamā pajamaxpēr rāhā nē. ⁹ No ām mē pamā ja pix prām kêt. Na pu htem määnēn pamā Jejus mā hprām xā hkôt nhŷri tanhmā kām amnhī nhīpēx to ho ri papa hprām o papa. Jar mē panhī htūm rāhā rŷ mŷtar kuri ō krī mex kām mē panhī nyw

ã tanhmã kãm amnhĩ nhĩpêx to ho ri papaja na mẽ pamã hprãm.

¹⁰ Nê na hte Krisja jar mẽ pahte tanhmã amnhĩ nhĩpêx to hã mẽ pahpumunh o hkrĩ. Mẽ pahte tãm amnhĩ nhĩpêxja nê mẽ pahte amnhĩ tomnujja nhũm hte hã mẽ pahpumunh rãhã ho hkrĩ. Tã koja nhỹrmã kot mẽ pahte tanhmã amnhĩ nhĩpêx to hã mẽ pahpumunh kôt tanhmã mẽ panhĩpêx to. Mẽ pahte tãm amnhĩ nhĩpêx o ri papa xwýnhjaja koja ra mẽ panê htyk kukwak ri mẽ pahto mex nê. No mẽ kot amnhĩ tomnuj o mẽ pa xwýnhjaja koja mẽ homnuj tỳx nê. Jakamã na pa inhmã kãm hprãm xà hkôt pix mã amnhĩ nhĩpêx o ixpa hprãm nê.

Mẽ pajamaxpêr nyw jarênh

Rômãn 6.4-6; Sikûn Korîit 4.2; Epes 4.22-24; Korosê 3.9-10

¹¹ Nê Tirtùm kot hprĩ hã mẽ pahpumunh rãhã ho hkrĩ jakamã inhmã kãm hprãm xà hkôt pix mã amnhĩ nhĩpêx o ri ixpa hprãm. Mãn ka mẽ ra ja hã ixpumunh mex nê rỳ ko. Mẽ piitã mẽ kot hkôt amnhĩ xunhwýr prãm xàj na pa hte mẽ kãm kapêr jarênh o ri ixpa. ¹² Nom ixte ja hã amnhĩ to jarkrar o ri ixpa hkêt. ãm mẽ ate inhmar nê mẽ kêp Kris nhỹ hã mẽ ahkre hã amnhĩ to hêx xwýnhjê mã tanhmã ijarênh to kaxyw na pa ã mẽ amã amnhĩ jarênh anê. Mẽ kot Tirtùm kapêr jahkre mex kumrêx ã amnhĩ to jarkrar tã na htem hkôt amnhĩ nhĩpêx kêt nê. Tã mẽ ate aprĩ hã ixte Tirtùm kapêr kôt amnhĩ nhĩpêx mex ã ixpumunh nê tanhmã mẽ kãm ijarênh to kaxyw na pa ã te ixte amnhĩ to jarkrar pyrãk o mẽ amã amnhĩ jarênh anê. ¹³⁻¹⁴ Mẽ kot ixkrã pipãnh ã ijarênh tã Tirtùm na mẽ akaxyw ixãm pa hte mẽ amã kapêr jarênh o ri mẽ akôt ixpa. Ixkrã pipãnh kêt. Ixte Tirtùm kãm hprãm xà hkôt tanhmã amnhĩ nhĩpêx to xwýnh na pa. Tã mẽmo

kaxyw na pa hte ã kapêr jarênh rũnh anhỹr o ri mẽ akôt ixpa? Nà inhmã mẽ akĩnh kênã. Mẽ ate Tirtùm kôt tãm amnhĩ nhĩpêx prãm xàj na pa hte ã mẽ amã kapêr jarênh anhỹr rãhã nê. Kris na pre tanhmã ixto pa inhmã mẽ akĩnh nê. Te tãm kãm mẽ ajapê pyrãk. Na pre Kris amnhĩ grõnh kôt mẽ pahpiitã mẽ nê ty. Tirtùm kot mẽ pahte amnhĩ tomnuj mýrapê tanhmã mẽ pahto pymaj nhũm mẽ pahpiitã mẽ panê ty. Jakamã te mẽ pahpiitã Jesus kôt mẽ pahtyk pyrãk o na pu htem amnhĩ nhĩpêx. Jao te mẽ pahte amnhĩ nhĩpêx tũmjja mẽ pahpê hapêx par pyrãk o pu mẽ amnhĩ nhĩpêx nyw o amnhĩ nhĩpêx o ri papa. ¹⁵ Mẽ pajamaxpêr nyw o tãm mẽ pahte amnhĩ nhĩpêx o papa kaxyw na pre Jesus mẽ panê ty. Jakamã na pu htem axte amnhĩ pix kukamã ri pamã mẽmoj prãm o ri papa hkêt nê. Na pu htem mãânên Tirtùm kãm hprãm xà hkôt tanhmã kãm amnhĩ nhĩpêx to ho ri papa. Ja kaxyw na pre Tirtùm akupým Kris o htir pu mẽ kukwak ri pajamaxpêr nyw o amnhĩ nhĩpêx o papa. ¹⁶ Jao mẽ piitã mẽ hkrã hkã hã mẽ omunh xà hkôt pix mã tanhmã mẽ harênh to hkêt nê. Mẽ kot amnhĩ tomnuj ã mẽ harênh rỳ mẽ kot amnhĩ to mex ã mẽ harênh kêt nê. Amnepê mã na pa pre ã Kris jarênh anê nê harênh o:

—Nà Krisja na hte mẽ pahte amnhĩ nhĩpêx kôt amnhĩ nhĩpêx kêt nê. ãm ri kot mẽ pahte amnhĩ nhĩpêx kwým ri amnhĩ nhĩpêx jakamã kot amnhĩ tomnuj tỳx xwýnh na.

Anhỹr ã harênh o ixpa. Tã axte ã harênh anhỹr hkêt nê. Kot amnhĩ tomnuj xwýnh kêt jakamã na pa hte hpãnhã hkôt pix mã tanhmã kãm amnhĩ nhĩpêx to ho ri ixpa.

Mẽ pahpê Tirtùm krãmnhwý hã mẽ pajarênh

Rômãn 5.1, 5.10; Epes 6.20; Ko-

rosë 1.20

¹⁷ Nê koja mēhō Kris kōt amnhī xām nhūm kot amnhī nhīpēx tūmja kēp hapēx nhūm hpānhā kot amnhī nhīpēx nyw pix o amnhī nhīpēx nē hamaxpēr nyw pix o hamaxpēr. ¹⁸ Tirtūm na hte tanhmā mē pahto pu mē ā amnhī nhīpēx anhÿr o ri papa. Na pu prem pamā hkurē htā nhūm Kris kukwak ri mē pahte hkōt amnhī nhīpēx xwÿnhjē ho hkrāmnhwÿ. Hāmri nē tanhmā mē pahte amnhī nhīpēx to hā mē pamā karō nē mē pamā:

—E kēr ka mē ma krī piitā hkōt ri mē kām ixkapēr jarēnh o ri apa kē mē ama nē mē apyrā nē Kris kōt amnhī xunhwÿ. Pa ja hā mē omu nē ixte mē anhīpēx pyrā nē mē ho ixkrāmnhwÿ. Anē.

¹⁹ Jakamā na pa hte ma mē kām kapēr jarēnh o ri mē hkōt ixpa nē mē kām:

—E pa mē amā mēmoj mex jarē ka mē inhma. Nā na pre Krisja mē pahte amnhī tomnuj mÿrapē mē panē ty. Nē htyk o Tirtūm mā mē pahpānhā amnhīrer par kumrēx. Jakamā na ra Tirtūmja Kris kukwak ri kām mē pahpiitā mē pahto hkrāmnhwÿ prām. Koja kukwak ri mē pahte amnhī tomnuj piitā ho hamakētkati nē axte kām hamaxpēr kēt kumrēx. Kām mē pahto hkrāmnhwÿ hprām jakamā koja ā mē panhīpēx anē. Jakamā e kwa mē tokyx Kris kōt amnhī xunhwÿ kē Tirtūm kot inhīpēx pyrā nē mē ato hkra nē mē ato hkrāmnhwÿ.

Anhÿr o mē kām harēnh o ri mē hkōt ixpa. ²⁰ Kris kot mē apiitā mē awÿr inhmēnh jakamā na pa hte ŷ hā mē amā kapēr jarēnh o ri mē akōt ixpa nē mē amā:

—E Tirtūm kām mē ajapē jakamā na mē awÿr inhmē pa mō. Jakamā kwa mē tokyx amnhī tomnuj kaga nē hkōt amnhī xunhwÿ. Kē amnhī tā mē apumu nē mē ato hkrāmnhwÿ. Anē.

²¹ Krisja aa kot tanhmā amnhī tomnuj to hkēt kumrēx tā nhūm pre Tirtūmja te mē kot amnhī tomnuj tÿx kumrēx xwÿnh pyrāk o hipēx. Tā mēmo kaxyw na pre ā hipēx anē? Nā mē panē kēnā. Mē pahte hkōt amnhī xunhwÿr nhūm kot mē panhīpēx o te aa mē pahte amnhī tomnuj kēt kumrēx xwÿnh pyrāk o mē panhīpēx kaxyw na pre ā mē panē Krata nhīpēx anē.

6

¹ Tā kot ā Kra nhīpēx anhÿr jakamā kwa mē ixkapēr ma nē mar tÿx nē. No mē ama nē ām mar kēt nē. Tirtūm kām mē pajapē htÿx jakamā mē pakutā nojarēt rāhā ho pa. Kumā na pa hte ā mē amā kapēr jarēnh anhÿr o ri mē akōt ixpa. ² Amnepē mā na pre Ijaew mā kapēr nē mē kām:

Na ka prem amex kēt nē ri apa nē amnhī to ixwÿ pa pre mē ama nē mēmojta pé mē apytā nē mē ato mex nē. Anē.

Jakamā kwa mē inhma. Tirtūm kām mē ate amnhī tomnuj pé mē apytār prām tÿx jakamā kwa mē tokyx amnhī to awÿ kē ā kēp mē apytār anē.

Mē kot Kris ā tanhmā Pawre nhīpēx to hā mē harēnh

Sikün Korît 4.7, 11.23-33; Korosë 1.10

³⁻⁴ Nē mē kot Tirtūm kapēr mar nē hā ixtomnuj tā pa hte amnhī katut kōt mē kot tanhmā ixtomnuj toja rē nē ho ijamakētkati tokyx anē. Nē arī mē kām kapēr jarēnh rāhā ho ri mē hkōt ixpa. Mē kot mar nē ām mar nē hkaga pymaj na pa hte ā amnhī nhīpēx anhÿr rāhā nē. Mē kot ja hā inhīpēx punuj tā pa arī mē kām harēnh o ri mē hkōt ixpa. ⁵ Mē kot Kris ā ixtak nē ijagjēnh nē tanhmā ixto kaxyw ixtā htu htā pa hte mē kutā amnhī to htÿx nē ixkuhē. Na pa pre hte Tirtūm mā mē kām kapēr jarēnh rax nē. Jao tōhā inhōt kēt nē inhōtxwa

ho ri mē hkôt ixpa. Nē tōhā inhmā prām t̄yx nē ri ixpa. Tā no ām arī mē kām kapēr jarēnh rāhā nē. ⁶ Inhmā tanhmā ixte amnhī tomnuj to hprām kêt. Inhmā Tirtūm kot amnhī nhīpēx kôt pix mā amnhī nhīpēx prām. Nē inhmā inhgryk tokyx anh̄yr prām kêt. Ām inhmā mē piitā mē hkīnh kām mē ho mex pix prām. Ā na pa hte Tirtūm Karō nh̄y hā amnhī nhīpēx anh̄yr o ri mē hkôt ixpa. Mē kot ja hā ixpumunh nē ra Tirtūm kapēr ma nē hkôt amnhī xunhw̄yr kaxyw. ⁷ Na pa hte ixkatāt kôt mē kām ixkapēr mex pix nē. Tirtūm xiht̄yx xw̄yñhja nh̄y hā ri mē kām kapēr jarēnh jao tām amnhī nhīpēx nē tām ri ijamaxpēr o ri mē hkôt ixpa. Jakamā na htem ja hā ixpumu nē ixte Tirtūm kapēr jarēnh ma nē hkôt amnhī xunhw̄y. ⁸ Na hte mē hkw̄ȳjaja kām ixkīnh nē nh̄um mē hkw̄ȳjaja axtem kām ixkurē nē. Nē mē hkw̄ȳjaja amnhīm inhmex ā ijarē nh̄um mē hkw̄ȳjaja axtem axpēn mā tanhmā ixto kapēr punuj to. Mē kot ixēx nhi hā ijarēnh tā pa hte ixkatāt kôt mē kām ixkapēr o ri ixpa. Nom kw̄ār mē mām̄rī tanhmā ri ixto kapēr to. Ja tanhmā inhmā kute hkêt. ⁹ Na hte mē hkw̄ȳjaja ixkamā ōkre kahak nē pika piitā hkôt axpēn mā tanhmā ijarēnh to ho pa. Mē kām ixp̄ir prām tā no pa arī ixt̄ir nē ixpa. Mē kot Jejus ā ixtomnuj t̄yx tā kormā ixp̄ir kêt nē pa ri ixt̄ir nē ixpa. ¹⁰ Ixte Kris ā amnhī xā ht̄yx kamā ijamak o ri ixpa htā arī ixkīnh nē ixpa. Nē ixkāxpore hkêt tā nh̄um mē ohtō nē ixte mē kām Jejus kapēr jarēnh kukwak ri mex nē pa. Nē ixkukrēx rax kêt tā nh̄um Tirtūm ixto mex nē pa inhmex nē ixpa. Tā kot paj nh̄yrmā ō krī kamā kuri inhmex kumrēx nē ixt̄ir tūm nē ixpa ho ixpa. Jakamā na pa hte arī mē kām Jejus kapēr jarēnh o ri mē hkôt ixpa. ¹¹ E Korît kām ixkrāmnhw̄ȳjaja. Na pa ixprī hā

mē amā amnhī nhīpēx jarēnh par kumrēx. ¹² Inhmā mē akīnh t̄yx tā te mē amā ixkīnh kêt pyrāk. ¹³ Kwa te mē ate ixto mē akatut nē akuhē pyrāk o inhīpēx kêt nē. Amnhī pyrā nē amā ixkīnh nē hkêt wehe. Te mē apē ixkra pyrāk o na pa ā mē amā ixkapēr anē.

Te mē pahpē Tirtūm nhōrkw̄y pyrāk ā mē pajarēnh

Wam Korît 10.20-22, 15.33; Epes 5.3-14; Sikün Ximotre 2.4; Xiakre 4.4-5; Wam Pētre 2.11, 4.1-6

¹⁴ Nē kēr ka mē kot Kris kôt amnhī xunhw̄yr kêt xw̄yñh̄jē mē mēmoj tā tanhmā axpēn mar to hkêt nē. R̄y mēhō ho amjēn r̄y mēhō ho aprō hkêt nē. Ahp̄yñhā mē pajamaxpēr kēnā. Tanhmā kot we mē hamaxpēr nyw xw̄yñh̄jaja nē mē hamaxpēr tūm xw̄yñh̄jaja amnhī to nē axpēn kôt hamaxpēr nē ri axpēn kôt pa? Nā koja mē ā amnhī nhīpēx anh̄yr kêt nē. Ahp̄yñhā mē pajamaxpēr. Na hte hirā ht̄yxja kamāt kō mē pihkār kêt nē. ¹⁵ Xā na hte Kris mē Satanasti wa axpēn kôt hamaxpēr? Nā wa kot axpēn kôt hamaxpēr kêt. Ahp̄yñhā wa hamaxpēr nē ahp̄yñhā wa kot amnhī nhīpēx. Nē ahp̄yñhā hirā nē ahp̄yñhā kamāt kō. Nē mē pahpē Kris kw̄ȳjaja nē mē kēp hkw̄ȳ hkêt xw̄yñh̄jaja ahp̄yñhā mē pajamaxpēr nē ahp̄yñhā mē pahte amnhī nhīpēx. ¹⁶ Na pu htem Tirtūm mā amnhī jarēnh xā hā ixkre kamā sānti xunhw̄yr nē amnhī to hw̄yr pē kām mex o mex ā harēnh kêt nē. Axtem na sāntija. Mē panhō Tirtūmja sānti rom ht̄ir tūm rāhā nē pa ho pa xw̄yñh. Nē mē papajaja te mē pahpē Tirtūm nhōrkw̄y pyrāk. Kapēr ā kagā htūm kot ja jarēnh kot:

Ixkrajaja te kēp inhōrkw̄y nh̄um ixpē ō dōn pyrāk. Te ixpē inhōrkw̄y kamā ixpa xw̄yñh pyrāk jakamā kot paj ixkrajē kamā ri ixpa ho ixpa. Ixpē Mēhpām na pa. Anē.

17-18 ā Tirtūm xihtýx xwýnhja kot amnhī jarēnh anhýr jakamā na hte mē kot amnhī tomnuj xwýnhjē nē mē pahkurē ho:

Kēr ka mē hkôt ri apa hkêt nē.

Kwarī ho kwarī.

Nē mē hkôt ri amnhī nhīpêx o apa hkêt nē.

Kot kaj mē ixkapêr ma nē ixkôt amnhī nhīpêx hā kot paj amnhī wýr mē awý nē mē ato ixkra.

Nē pa kot paj ixpê Mēapām maati. Anē.

7

¹ Tā ā Tirtūm kot mē pahto hkra nē mē pahkôt pa ho pa hā amnhī jarēnh kot anhýr jakamā kwa ixkrāmnhwýjaja. Kēr pu mē kapêr ma nē tanhmā amnhī tomnuj to hkêt nē. Nē mēmoj punuj kukamā pajamaxpêr kêt nē. Nē ām kapêr kôt pix mā amnhī nhīpêx mex rāhā nē.

Pawre kot Korīt nhō xwýnhjē nhý hā hkīnh ā harēnh

² Nē kwa Kris kôt ixtō nē ixtōxjaja. Kēr ka mē tee ri amnhī tā tanhmā inhmā ajamaxpêr to hkêt nē. Na pa pre tanhmā mē atō hto hkêt nē. Rý tanhmā mē atō hto ka mē ja hā ixpumu nē ixkôt tanhmā amnhī tomnuj to hkêt nē. Rý pa pre ixêx rom tanhmā mē anokupyr to ho ri ixpa hkêt nē. Kwa mē amā ixkīnh nē tokyx ixkôt ajamaxpêr kêt wehe. ³ Mē ate inhmar nē amnhī tā apijaām kaxyw na pa ā mē amā ixkapêr anhýr kêt nē. Inhmā mē akīnh kēnā. Na pa pre inhmā mē akīnh ā amnhī jarēnh rax nē. Inhmā ri mē akôt ixpa rāhā ho ixpa hprām. Rý ka mē nhýrmā apiitā apikaprār par japêr pa inhmā mē akôt ixyk prām nē.

⁴ Na pa hte ra mē amā ijamaxpêr pē ixkīnh nē ixpa. Nā kot kaj mē ixkapêr ma nē Jejus kôt amnhī nhīpêx mex nē. Tā kēr ka mē ā amnhī nhīpêx anhýr rāhā nē. Na pa hte jar ra amnhī xā htýx kamā

ijamak o ri ixpa htā no ām mē amā ijamaxpêr nē ixkīnh nē.

⁵ Nē na pa pre amnē Masetōn wýr kormā Xitre japêr o mō. Hāmri nē Masetōnja wýr pōj nē hapêr pē mē kām Jejus kapêr jarēnh o ri mē hkôt ixpa. Hāmri nhūm mē kām ixkurē xwýnhjaja Kris ā inhīpêx punuj nē hā inhmā ākjêr pix o pa. Hāmri nē ma Masetōn kamā krī piitā hkôt ri mē kām ixto kapêr punuj nē pa amnhī tā mē mar o ri mē hkôt ixpa. Nē mē kajaja mē ate Kris kaga nē nhām mē hamaxpêr kôt amnhī nhīpêx pymaj na pa pre tee ri mē akukamā ijamaxpêr o ri mē hkôt ixkaprī nē ixpa. ⁶ Tā Tirtūm kēp mē hkaprī xwýnhjē pumunh nē akupým mē ho mē hkīnh xwýnh jakamā na pre ixkaprī hā ixpumu nē ixwýr Xitre mē. Pa pre omu nē akupým ixkīnh nē tām ijamaxpêr.

⁷ No ām Xitre pumunh kôt pix mā ixkīnh kêt. Na pre ixwýr pōj nē tanhmā inhmā mē ajarēnh to nē mē ate tanhmā ho mex to hā mē ajarē. Nē mē amā ixpumunh prām týx ā mē ajarē. Nē Kris kôt mē atōta hpijaām kêt o pa nhūm ixte kagā kamā hā mē amā ixākjêr nhūm mē ate ja hā omunh nē ra amnhī kamā apijaām o akaprī htýx ā mē ajarē. Nhūm Tirtūm kot inhnē mē kām ixkurē xwýnhjē pumunh mex kaxyw mē ate ixto hwýr ā mē ajarē. Na pre ā inhmā mē ajarēnh anē pa kuma nē mē anhý hā ixkīnh týx kumrêx.

⁸⁻⁹ Nē wam ixte mē amā kagāta nhīpêx kêt ri na pa pre tee ri mē ate amnhī nhīpêx ā mē ajarēnh ma nē mē akaxyw hipêx. Nē kamā mē ate hpijaām kêt xwýnhhta kot tanhmā amnhī nhīpêx to hā omunh nē ām omunh o arī hkôt apa hā kagāta kamā mē amā akir hāmri nē Xitre mā kugō nhūm kupy nē ma mē awýr o mō. Tā ka xep prem kamā harē nē ama nē amnhī kamā apijaām nē. Nē akaprī nē ajamaxpêr o:

—Hêxta waa nē. Ām hāmri na

Pawre ă mē ijarēnh anē. Na pa mē ă amnhī nhīpēx anē nē amnhī tomnuj tŷx nē. Anē.

Tă nhŭm Xitre akupŷn ixwŷr pōj nē inhmă mē ajarē. Pa mē ajarēnh ma nē tee ri ijamaxpēr nē ijamaxpēr o:

—Hēxta waa nē. Mon pa pre axtem nē ă ri mē kām ixăkjēr anē? Nă na xep prem kagăta kamă harē nē kuma nē hkaprī htŷx nē. Anē.

Tă ăm hămri na pa pre ă mē akaxyw hipēx nē mēmojta ă mē amă ixăkjēr anē. Na ka xep prem kamă harē nē ama nē tee ri ajamaxpēr o ra akaprī nē. Nom Tirtŭm kām hprām xă hkôt na ka prem ja hă amnhī pumu nē ă akaprī anē. Tă xep ra akupŷm tām amnhī nhīpēx nē akupŷm Tirtŭm kôt amnhī nhīpēx mex nē. Jao akupŷm akĭnh nē ri apa. Jakamă ăm hămri na pa pre mē awŷr wam kagăta mēnh nē mēmoj tă ă mē amă ixăkjēr anē.

¹⁰ Koja Tirtŭm krajê hō tanhmă amnhī tomnuj to. Hămri nē tee ri ja hă amnhī pumu nē amnhī kamă hpijaam nē akupŷm Tirtŭm kôt tām amnhī nhīpēx. Hămri nē akupŷm mex nē tām hamaxpēr pē hkĭnh nē ri pa. Nē axte tee ri amnhī kukamă hamaxpēr hkêt nē. Ja na Tirtŭm kām hprām. Tă koja mē kēp hkra hkêt xwŷnhjê pyră nē tanhmă amnhī tomnuj to nē ra hpijaam japēr. Nom hkwyjaja kot ja hă omunh pix mŷrapê hpijaam nē arī Tirtŭm kôt amnhī nhīpēx kêt japēr. Hă koja nhŷrmă ty nē Tirtŭm kra kot akupŷm hkôt tām amnhī nhīpēx xwŷnhjê kĭnhă Tirtŭm pē awry rax kumrēx nē ri pa.

¹¹ Mē pahte Tirtŭm kapēr kwŷm ri tanhmă amnhī nhīpēx to hă tee ri amnhī pumunh nē amnhī kamă hpijaam nē akupŷm tām amnhī nhīpēxja na Tirtŭm kām hprām. Tă na ka xep ă amnhī nhīpēx anē. Wam ixte mē awŷr kagă mēnhta na

ka xep prem kamă tanhmă ixte nă puro kamă hpijaam kêt xwŷnhta ă mē amă ixăkjēr tota kamă akapēr nē ama. Hămri nē tee ri mē ate kormă kot amnhī tomnuj ă kām axăkjēr kêt ă amnhī kukamă ajamaxpēr nē amnhī kamă apijaam nē. Nom Tirtŭm kām hprām xă hkôt. Mē ate jam ajamaxpēr pē amnhī kamă apijaamja na kām hprām. Tă ka mē hpijaam xwŷnhta kamă agryk nē kām akapēr o:

—Kwa mē pahpê Jejus kwŷjaja mē pahte ă amnhī nhīpēx anhŷr kêt tă ka ă amnhī nhīpēx anē. Nă na ka amnhī tomnuj tŷx kumrēx. Kot kaj ă amnhī nhīpēx anē pa mē hă apumu nē gaa nē apyră nē ă amnhī tomnuj anē. Kwa ja kaga nē axte ă amnhī nhīpēx anhŷr kêt nē. Nē akupŷm Tirtŭm kôt amnhī xăm tŷx nē hkôt amnhī nhīpēx răhă ho ri apa. Anē.

Hămri nhŭm krĭ nhō xwŷnhjaja ja hă mē ajarēnh ma nē mē apê jamnuj ă mē apumunh kurê kumrēx. Ăm hămri na ka prem ă kām akapēr anē.

¹² Nē ixte mē awŷr kagă nē mēnhta kamă na pa pre nă puro kamă hpijaam kêt xwŷnhta mă tanhmă ixăkjēr to hkêt nē. Rŷ nă purota mă tanhmă ixăkjēr to hkêt nē. Na pa pre mē apê Kris kwŷjê hwŷr kagă nhīpēx nē kamă tanhmă mē amă hpijaam xwŷnhta ă karō hto. Mē ate kamă harēnh hămri nē inhŷ hă amnhī nē hanor nhŭm Korŭt nhō xwŷnh piită kot ă mē ate amnhī nhīpēx anhŷr ă mē apumunh kaxyw. Nē mē ate Tirtŭm nom ă hipēx anhŷr jao mē amă ixkĭnh pē ixkapēr kôt ă hipēx anhŷr ă amnhī pumunh kaxyw.

¹³ Tă nhŭm Xitre ixwŷr pōj nē tanhmă inhmă mē ajarēnh to. Na xep pre mē awŷr nojarêt nē tee ri amnhī kukamă hamaxpēr. Mē ate kagăta kamă harēnh nē ijarēnh mar nē kamă agryk pymaj tee ri amnhī kukamă hamaxpēr. Tă ma

mē awýr mōn pōj nē mā amā kugō. Ka xep prem kamā harē nē ama nē hkôt amnhī nhīpēx kurē kumrēx nhūm mē ate amnhī nhīpēx ā mē apumu nē hkīnh nē. Hāmri nē tām hamaxpēr. Tā ra akupýn ixwýr mō nē inhmā mē ajarē pa mē ajarēnh ma nē ijaxwýja ixkīnh nē. ¹⁴ Na pre kormā mē awýr nojarēt pa kām tanhmā mē amex ā mē ajarēnh to. Tā nhūm xep ma mē awýr mōn pōj nē mē apumu nē hamaxpēr o:

—Nà pēr ām hāmri na pre Pawre inhmā mē mex ā harē. Mē mex kēnā. Anē.

¹⁵ Tā nhūm pre mē arūm kato nē ra man akupýn ixwýr mōn pōj nē inhmā mē ajarēnh o:

—Na pa pre ma mē hwýr mō nē mē kām ixkapēr o ri mē hkôt ixpa nhūm mē ixkapēr ma nē ixkôt amnhī nhīpēx kurē kumrēx nē ixto mex nē. Kormā ixte mē hwýr inhmōr kēt tā mē harēnh ma nē inhmā mē hkīnh nē. Tā pa ma mē hwýr mō nhūm mē ixto mex rax nē pa ra inhmā mē hkīnh týx kumrēx. Anē.

¹⁶ Ā inhmā mē ajarēnh anē pa mē ajarēnh ma nē ixkīnh týx nē. Ām hāmri na ka htem mēmoj tā amnhī jarēnh xā hkôt tanhmā amnhī nhīpēx to ho apa.

8

Mē kot Kris kôt mē hkwýjê pē õxý hkēt ā mē kām karō

Atre 11.27-30; Rōmān 15.25-27; Wam Korīt 16.1-4

¹ E Kris kôt ixkwýjaja. Kot paj hpānhā mē amā jar Masetōn kamā tanhmā Jejus kwýjaja kot amnhī nhīpēx to hā mē harē ka mē harēnh ma. Na hte Tirtūm mē kutā nojarēt nhūm mē mex nē pa. ² Mē hkwýjaja kot Kris ā mē hipēx kati nhūm mē kot amnhī xā htýx kām hamak o pa htā hkīnh nē hamakētkati nē ri pa. Nē mē hkāxpore hkryre htā ho õxý hkēt nē pa. Na htem àmnhīx ri

mē kēp amrakati xwýnhjē mā hkwý nhōr o pa.

³⁻⁴ Tā na prem Jerujarē kamā Kris kôt mē pahkwýjê jarēnh ma. Mē kēp amrakati hā mē harēnh ma nē kām mē hkaprī nē. Nē mē kām mē hwýr mēmoj rēnh nē mē ho ajuta hprām nē. No ām pa ixte mē kām hā karō xā hkôt kēt. Mē tāmjaja mē hamaxpēr xā hkôt na prem ā hamaxpēr anē nē mē kaxyw kàxpore ho pikuprōnh rax nē. Hāmri nē inhmā kugō nē inhmā:

—Kwa na pa prem Jerujarē kamā Kris kôt mē pahkwýjê jarēnh ma nē mē inhmā mē hkaprī nē mē kām mē ixkàxpore hkwý ho akuprō. Jakamā e amy nē ma mē hwýr o mō nē mē kām agō kē mē tokyw ho amnhīm awjaprō nē kuku. Anē.

⁵ Pa mē kuma nē itýtýx ho ām kàxpore grire hā hkamnhīx nē ijamaxpēr o:

—Kwa mo mē hikàxpore rax koja mē ri ho akuprō nē mē kām kugō? ām mē hikàxpore hkryre kēnā.

Anhýr o ijamaxpēr tā no nhūm mē kaxyw ho rax nē ho akuprō. Mē hikàxpore hkryre htā mē kām õr rax nē. Hāmri nē inhmā amnhī jarēnh o:

—Na pa mē ra Pahihti Jejus Kris mā amnhī gō. Mē ixte tanhmā kām amnhī nhīpēx to ho ri ixpa kaxyw. Jakamā e tanhmā mē inhmā mēmoj tā karō hto. Kot pa mē ama nē akapēr kôt amnhī nhīpēx. Ja na pa mē inhmā hprām nhūm Tirtūm haxwýja kām ja prām. Anē.

⁶ Na pa pre ā mē kot amnhī nhīpēx anhýr ā mē omu nē mē apē Korīt nhō xwýnhjē mā ijamaxpēr kurē kumrēx. Hāmri nē Xitre mā mē ajarē. Na pre mē awýr mō nē mē amā Jerujarē nhō xwýnhjē jarē. Mē ate mē kām kàxpore hkwý ho apikuprōnh kaxyw. Tā pa pre jam ijamaxpēr nē ra akupým mē awýr mēnh mā nē kām:

—Kwa ma akupÿm Korîit wÿr mō nē mē kām anē kē mē ra kot amnhî jarēnh xà hkôt Jerujarē nhō xwÿnhjê kaxyw kàxpore hkwȳ ho akuprō nē tokyx mē hwÿr kumē. Ra mē kām Kris kôt mē hkwȳjê hkīnh ā amnhî jarēnh kēnā. E kwa tokyj. Anē.

⁷ Na ka htem amnhî to mex o ri apa. Nē amnhî kaxyw Kris hkôt ajamaxpēr tÿx nē. Nē ma mē kām Tirtûm kapēr jarēnh mex o ri mē hkôt apa. Nē mē ajamaxpēr mex nē. Nē mē piitā mē ho mex o ri apa. Nē mē amā ixkīnh o ri apa. Jakamā kwa kēr ka mē axāmnhīx mē kēp amrakati xwÿnhjê mā mē akàxpore hkwȳ nhōr o apa. Jao mē amā Tirtûm kīnh tÿx ā amnhî to amnhîrīt. ⁸ Ixe ā mē amā ja hā karō anhÿr tā hā mē atā ixihtÿx kêt nē. Ām mē kamā axukaprī hkôt mē ate mē kām axāmnhōr o apa kaxyw na pa ā mē amā ixkapēr anē. Masetōn kamā mē pahkwÿjaja kot amnhî nhīpēxta pyrà nē. ⁹ Ra mē ate Jejus Kris kām mē pajapē hā kot tanhmā amnhî nhīpēx to hā mar mex. Amnepēm na pre kaxkwa kamā mex kumrēx nē ri pa ho pa nhūm mēmoj piitā kēp ō htā nhūm rer pa nē mē pahwÿr wrȳ nē mē pakamā kēp amrakati nē ri pa. Hikàxpore hkêt nē ri pa. Tā mēmo kaxyw na pre ā mēmoj mex piitā rer par nē mē pahwÿr wrȳk anē? ām kot mē pahto mex pix kaxyw. Kot mē pahto mex nhūm mē pahte kukwak ri mē paxāmnhīx ri mē pajamakētkati nē mē papa kaxyw na pre ā amnhî nhīpēx anē. Mē pahte nhÿrmā urāk nē kaxkwa kamā pamex kumrēx nē ri papa ho papa kaxyw.

¹⁰ E kwa kēr ka mē tokyx kàxpore hkwȳ ho apikuprōnh pa nē Jerujarē nhō xwÿnhjê hwÿr amē. Mē akumrēxjaja na ka prem ham amgrā hapēxta kamā ra mē kaxyw ho apikuprōnhja krax. Mē amā mē ho mex prām xāj ham ho hkrax

tā no ām kormā hatur xām mēnh nē mē hwÿr mēnh kêt nē. ¹¹ Kwa mē tokyx ja ho ajapēx nā. Na ka prem ate ho anhÿr krax ā akīnh pē kàxpore hkwȳ ho apikuprōnh o apa. Tā kēr ka mē arī akīnh rāhā ho apikuprōnh par jatur xām amē. No mē ri atÿx tanhmā ajamaxpēr to hkêt nē. Rÿ mē ajamaxpēr o:

—Nā kormā. Kot paj nhÿrmā ixkàxpore rax nē rī kormā mē hwÿr hkwȳ mē.

Anhÿr o mē ri ajamaxpēr hkêt nē. Mē ate tanhmā akàxpore hkre kamā kute hā omunh xā hkôt mē kām hkwȳ pix gō. ¹² Kēr ka mē axāmnhīx akīnh kām mē kām ho akuprō. Ate amnhî kàxpore pumunh xā hkôt. Ka mē akàxpore rax nē mē kām ho rax nē agō. Rÿ mē akàxpore grire nē mē kām ho grire nē agō. Ja na kêt mex. ¹³ No mē ate mē kām ōr par nhūm mē arom mē hikàxpore rax nē ri paja mex kêt. ¹⁴ Nom ra mē akàxpore rūnh jakamā kwa mē amnhî kutā mē kām hkwȳ ho hkryre nē ho akuprō kē mē apyrā nē hikàxpore nē ri pa. Kēr ka mē nhÿrmā tanhmā amnhî to nē axā nē nhūm akàxpore apē hapēx nhūm mē ajarēnh ma nē amnhî kuxwar mē ato ajuta nē mē amā hkwȳ ho akuprō nē mē awÿr kumē. Ka mē akàxpore ho axpēn pyrà nē ri apa. ¹⁵ Amnepēm Tirtûm kot kaxkwa rūm Ijaewjē hwÿr mēō rēnh nhūm mē kot apkati mē amnhīm hkawrà nē ho apkur o pata ā na pre Tirtûm kapēr ā kagā htūmja ā mē harēnh anē nē mē harēnh kot:

Na pre mē hkra xohtō xwÿnhjaja mē apkur xā hkawrà rūnh nē. Nē gōj kām unhwÿ nē kuku nē piitā ho ōhy htū. Nhūm mē hkra grēre xwÿnhjaja haxwÿja hkwȳ kawrà no ām ho hkryre nē hkawrà. Nē gōj kām unhwÿ nē kuku nē haxwÿja ho ōhy htū hpa. Na pre htem apkati

mē ã amnhĩ nhĩpêx anhÿr o pa. Anê.
Ja pyrã nê kêr ka mē akàxpore ho axpên pyrãk o ri ho apa.

Xitre mē hkràmnhwÿjê jarênh

¹⁶ Nê Xitre na pre ixpyrà nê kãm mē ato ajuta hprãm nê. Na pre inhmã mē atã amnhĩ jarê pa pre kuma nhũm ja inhmã mex nê pa ixkĩnh nê. Nê ijamaxpêr o:

—Nã ãm hãmri na Tirtũm tanhmã Xitre hkrã hto nhũm ã hamaxpêr mex anê. Anê.

¹⁷ Tã pa ma akupÿm mē awÿr mōr ã hkukja nhũm inhma nê hkĩnh nê mē awÿr nojarêr kurê kumrêx. Nom kormã ixte kãm mē ajarênh kêt ri nhũm tãm amnhĩ kukamã hamaxpêr nê mē awÿr hkrã. ¹⁸ Tã na ra nojarêr kaxyw. Kot paj ma hkôt Kris kôt mē pahtôjê hō mē kê ma hkôt mō. Kôt ixte mênh xwÿnhhta na hte mē kãm Tirtũm kapêr jarênh mex nê nhũm htem amnhĩm mex ã harê. ¹⁹ Na pre jar Jejus kwÿjaja kot ma ixkôt Jerujarê hwÿr kàxpore hkwÿ ho mōr kaxyw nhũm prem amnhĩm mē kurê. Tã koja Xitre mē wa mē awÿr mōn pōj ka mē kãm kàxporeta gō nhũm man akupÿn o mō pa wa rĩ kormã ma Jerujarê hwÿr mē kãm o mō. Mē kot hamÿnh nê mē pamã mē hkĩnh ã kot amnhĩ tã mē pahpumunh kaxyw. Nê Tirtũm mã mex o mex ã harênh kaxyw. ²⁰⁻²¹ Nom kàxpore rax nhũm ixte mē hwÿr o inhmōr nhũm mē kot hã ixkamnhĩx pymaj kot paj ma amnhĩ kôt Kris kôt mē pahtōta o mō. Ixte Xitre hkôt mē awÿr mênh xwÿnhhta pa ma amnhĩ kôt o mō. Nom ixàhkĩnh o ixpare hã. Tirtũm kot ja kôt ixpumunh mex tã kot paj ma amnhĩ kôt o mō.

²² Nê ot pa ma Xitretra wa hkôt axte mē awÿr ja mē. Kêr kê mē axkrunêpxi nê ma ixkukamã mē awÿr mō. Ixte wa hkôt mênh xwÿnhhta ixte kot amnhĩ nhĩpêx ã omunh mex. Na hte kãm mē piitã

mē ho ajuta ho pa hprãm nê. Tã mē ajarênh ma nê inhmã mē ajarênh o:
—Nã koja mē Jerujarê nhō xwÿnhjê mã kàxpore nhōr rax nê kãm ga. Mē kot amnhĩ to mex kênã. Anê.

Jakamã ra mē awÿr hkrã. Tã koja ma Xitre wa hkôt mō nê mē ato ajuta ka mē tokyx kàxpore ho apikuprōnh pa.

²³ Nê koja mēhō tanhmã Xitre hã mē akukjêr to ka mē kêp ixkràmnhwÿ mex ã harê. Nê kot inhĩhkō hã mē ho ajuta mex o pa hã harê. Na pre ra jar Kris kwÿjaja mē akaxyw kuta nê ma mē awÿr kumê. Jakamã koja ma mē awÿr mō nhũm Kris kôt mē pahtôjê hō wa pijakrutja wa ma hkôt mō. Na hte wa haxwÿja Kris kôt amnhĩ nhĩpêx mex o pa. ²⁴ Kojã mē awÿr pōj ka mē omu nê mē ho mex nê. Nê mē amã mē hkĩnh nê. Kê krĩ piitã hkôt Kris kôt mē pahkwÿjê piitã mē hã mē ajarênh ma nê axpên mã mē amex ã mē ajarê. Nê mē ajarênh o:

—Pêr ãm hãmri na pre Pawreja mē pamã Korīt kãm mē pahkwÿjê jarê. Na xep pre Xitre mē hkwÿta ma mē hwÿr mō nhũm mē ho mex rax nê. Ra Pawre kot mē pamã mē harênh xà hkôt. Anê.

9

Mē kot kàxpore ho pikuprōnh ã mē harênh

¹⁻² Kwa ixkràmnhwÿjaja. Kot paj Jerujarê nhō xwÿnhjê kaxyw mē atã ixihitÿx kêt nê. Ra mē amã mē ho ajuta hprãm jakamã na pa pre Masetōn kamã Kris kôt mē pahkwÿjê mã mē ajarênh o:

—Pika pê Gres kamã Kris kôt mē pahkwÿjaja na prem ham amgrã hapêxta kamã Jerujarê kamã mē pahkwÿjê jarênh ma nê kãm mē ho ajuta hprãm. Anê.

Hãmri nhũm mē ajarênh ma nê mē apyrã nê kãm tanhmã mē ho ajuta hto hprãm. ³⁻⁴ Tã ot pa mē

awÿr Xitre mē hōta wa mē ho ix-pimràatā wa mē kumē. Mē kot kàxpore hā mē akukjêr kaxyw. Kêr pa mytwrÿ hō hā ma Masetōn nhō xwÿnh kwÿjê mē mē awÿr mō nē ra ixte mē kām kàxpore hkwy ho mē apikuprōnh ā mē ajarēnh kōt mē ate ho apikuprōnh rax ā mē apumu nē ixkīnh nē. Nom kot pa mō nē tee ri hapêr nē te ixte Masetōn nhō xwÿnhjê mā mē ato ixêx pyrā nē ix-pijaam nē. Ka mē ajaxwÿja amnhī kamā apijaam nē. ⁵ Ā mē pahte amnhī nhīpêx anhÿr pymaj na pa ā mē amā kagāja nhīpêx nē Xitre mā ōr nē ma amnhī kukamā mē awÿr mēnh anē. Nē hkōt wa mōr mā xwÿnhnta mē ho ixpimràatāā amnhī kukamā wa mē kumē. Tā kê mē awÿr pōj nē mē amā kagāja gō ka mē kamā harē nē ama nē tokyx kàxpore ho apikuprōnh jatur xām amē. Kêr pa mē hapu hā mē awÿr mō ka mē ra mē ixkutêp ho apikuprōnh pa nē mē kām agō nē ajamakêtkati nē apa. No pa ixte mē amā mē ate ho apikuprōnh kaxyw mē atā ixihytÿx kêt. ⁶ Na htem piitā ā hamaxpêr anhÿr o pa nē hamaxpêr o:

—Kot ka apur rax nē kamā anhō rax nē. Nom kot ka apur grire nē kamā anhō grire.

Anhÿr o hamaxpêr jakamā kêr ka mē apiitā ajamakêtkati nē Jerujarē nhō xwÿnhjê mā kàxpore nhōr mex nē. Kêr ka mē ho apikuprōnh pa nhūm rax nē. Te mēhō ihpur rax nē kamā ō raxta pyrāk. Kê Tirtūm ā mē ate amnhī nhīpêx anhÿr ā mē apumu nē nhÿrmā mē ato mex nē. ⁷ Nom kêr ka mē anhōxy kamā mē kām ōr kêt nē. Mē pahte pahkīnh kām panhōxy hkêt kām mē kēp amrakati xwÿnhjê mā mēmoj nhōr o papaja na Tirtūm kām hprām. ⁸⁻⁹ Koja mē hā mē apumu hāmri nē amnhīm mē amex ā mē ajarēnh rāhā ho pa. Mē kām Tirtūm kīnh xwÿnhjaja na htem àmnhīx ri mē kēp amrakati xwÿnhjê mā mēmoj

nhōr o pa. Te Tirtūm kot amnhī nhīpêx pyrāk. Na hte àmnhīx ri mē pamā mēmoj nhōr o pa. Mē pahwÿr na rē nhūm wrÿ. Nhūm mē pamā mē paxàpkur xā nhōr o pa. Nē tanhmā mē pahto pu mē paxà hkêt nē pajamakêtkati nē paxàpēnh o papa. Nē pamex nē ri papa. Panhō rūnh nē ri papa. Jakamā kwa pu mē urāk nē paxàamnhīx ri mē kēp amrakati xwÿnhjê mā mēmoj nhōr o papa.

¹⁰ E pa ixprī hā mē amā ja jarē ka mē inhma. Nā na hte ā Tirtūm mē pamā mē paxàpkur xā nhōr o pa anē. Kot kaj apur kām ahkre nhūm tanhmā amā mēmo hyta nhīpêx to nhūm amā hapōx mex nē amā ō rūnh nē ka anhō rax nē. Nē hkwy ho axàpkur o apa nē axte hkwy hkre. Tā kêr ka mē ā Tirtūm kot mē ato mex anhÿr ā amnhī pumu hāmri nē urāk nē axàamnhīx ri mē kēp amrakati xwÿnhjê mā axàamnhōr pē mē ho mex o ri apa. Nhūm Tirtūm mē hā mē apumu nē mē amā mēmoj nhōr rāhā nē. Ka mē amnhī pyrā nē mē kēp amrakati xwÿnhjê mā hkwy nhōr o apa. ¹¹ Koja Tirtūm mē ato mex rax nē ka mē anhō mēmoj rax nē. Ja o amnhī xwar mē kēp amrakati xwÿnhjê kaxyw kàxpore hkwy jaxwÿ. Kêr pa mē amā hkwy jamÿ nē ma Tirtūm kōt mē pahkwÿjê mā o mō nē mē kām kugō kê mē omu nē hkīnh nē. Nē mē atā Tirtūm mā mex o mex ā harē. ¹² Hāmri nē mē akukwak ri mex nē ri pa. Nē axpēn mā Tirtūm mex o mex ā harēnh o ri pa. ¹³ Koja mē amnhī tā mē apumu nē hkīnh nē. Hāmri nē Tirtūm mā amnhī tā tanhmā mē ajarēnh to nē kām:

—Pa Tirtūm. Nā àm hāmri na pre Korîit kām akōt mē ixkwÿjaja amnhī jarē. Na htem akōt pix mā amnhī nhīpêx mex o ri pa. Jao mē ixpê ōxy hkêt nē mē inhmā kàxpore hkwy nhōr rax nē. àmnhīx ri hamakêtkati nē mē inhmā hkwy nhōr rax nē. No àm mē papxipix na htem ā mē

inhīpêx anhÿr kêt nê. Na htem mē kēp amrakati xwÿnh piitā ā mē hipêx anhÿr o pa. Ām hāmri na ka pre tanhmā mē hkrā hto nhūm mē anhÿ hā ā amnhī nhīpêx anhÿr o pa. Amex o amex Tirtūm. Anē.

¹⁴ Hāmri nê mē ato hwÿr o:

—Pa Tirtūm. Ām hāmri na hte Korīt nhō xwÿnhjaja amnhī pyrā nê mēmoj to mē ixkutā nojarēt o pa. Jakamā aa mē ixte amnhī tā mē inhno ho mē omunh kêt tā mē inhmā mē hkīnh nê. Kwa kēr ka mē ixtā mēmoj to mē kutā anojarēt rāhā ho apa Tirtūm.

Anhÿr o mē ato kuwÿ. ¹⁵ Tirtūmja mex o mex. Nom na hte mē pahto mex pē mē pamā kăxpore nhōr kêt nê. Kra Jejusja na pre mē pamā kugō. Kām mē pajapē ho mē pahwÿr kumē nhūm mē pahwÿr wrÿ nê mē pahpiitā mē pahte amnhī tomnuj pānhā amnhīrer kaxyw mē panē ty. Ja na mex o kot mē pamā kăxpore nhōr jakrenh. Mēhō koja urāk nê ā mē panē htyk anē? Nā amrakati ho amrakati. Ām Jejus pix na pre ā amnhī nhīpêx anē.

10

Pawre kēp Tirtūm Karō nhÿ hā kapēr xwÿnh ā harēnh

Epes 6.10-20; Wam Tesarōn 5.8

¹ E Kris kôt ixkwÿjaja. Nā ixpē Pawre kot paj mē akwÿ kot tanhmā ixto kapēr to xwÿnhjē mā amnhī jarē ka mē apiitā inhma. Nā na hte Kris mē pakamā gryk tokyx anhÿr kêt nê. Na hte mē pahto mex japjē nê. Tā inhmā urāk nê ā mē anhīpêx anhÿr prām nê. No na hte mē akwÿjaja axpēn mā tanhmā ixto kapēr punuj to nē ri axpēn mā:

—Pawre na hte nhÿri krī kamā pa nē mē pamā kagā nhīpêx nē mē pahwÿr kurē nē kamā mēmoj tā mē pamā kapēr kām hiltÿx nē hā mē pamā akir. Tā amnē mē pahwÿr mō hāmri nē te kām mē pahpyma pyrāk o mē pamā kapēr o pa.

Anhÿr o ijarē. ² Nom inhmā mē awÿr inhmōr nē mēmoj tā mē amā ixākjēr prām kêt tā kot paj nhÿrmā mē awÿr mō ka mē tanhmā amnhī tomnuj to ho apa japēr. Pa ja hā mē apumu nē hā mē amā akir kām ga. ³ Na pa htem jar pika ja kamā Tirtūm kwÿ hkêt xwÿnhjē kaêx ā ri ixpa nom mē urāk nē amnhī krā hkôt tanhmā amnhī nhīpêx to ho ixpa hkêt nê. Nē mē urāk nē amnhī krā hkôt tanhmā ijamaxpēr to ho ixpa hkêt nê. Na pa htem Tirtūm Karō nhÿ hā àhpumunh xà ho amnhī nhīpêx o ri ixpa. ⁴ Nē Tirtūm xàhpumunh tÿx xà ho mē kām kapēr jarēnh o ri ixpa. Mē kot mar nē hkôt amnhī nhīpêx kaxyw. Nē àhpumunh tÿx o na pa htem mē kot Tirtūm kôt amnhī xunhwÿr pymaj mē kēp àmnār xwÿnhjaja tanhmā mē nē mē ho. ⁵ Na htem htÿx ri tanhmā Tirtūm nē hkwyjē mā kapēr to ho pa. Amnhī kaxyw hkôt mē hamaxpēr kêt kaxyw tanhmā nē mē kām kapēr to. Na pa htem ja hā mē omu nē Tirtūm xàhpumunh tÿx xà ho tanhmā mē kām ixkapēr to nhūm mē tee ri inhma nē axte mē kēp àmnār kêt nê. Pa mē kām Tirtūm kapēr jarē nhūm mē ohtō nē kuma nē Kris kôt amnhī xunhwÿ nē hkôt amnhī nhīpêx o pa. ⁶ Tā mē kajaja kot kaj mē Tirtūm kôt amnhī nhīpêx mex tā mē atō ra kapēr nhīrōp xa nē tanhmā amnhī tomnuj to. Pa ja hā apumu rÿ hā ajarēnh ma nē hā amā akir. ⁷ Mē ate Tirtūm kot mē awÿr inhmēnh kêt ā axpēn mā ijarēnh tā kot kaj mē atō ām hāmri apē Kris kwÿ hā amnhī pumu nē ra määnēn pa ixpē hkwy hā ixpumunh kurē kumrēx. Mē apyrā nē ixpē hkwy kēnā. ⁸ Na pa pre ma mē awÿr mō nē tanhmā mē amā amnhī jarēnh to nē mē amā:

—Tirtūm na pre mē awÿr inhmē pa mō. Ixte ŷ hā mē amā kapēr jarēnh o ri mē akôt ixpa kaxyw. Anē.

Tâ pa hte arî ã amnhî jarênh anhÿr o ri ixpa. Âm hãmri na pre Tîrtûm mê awÿr inhmê pa hte âm hãmri mê amâ kapêr jarênh o ri mê akôt ixpa. Na pa hte Tîrtûm nhÿ hã mê amâ ixkapêr nê kapêr o ixêx o amnhî to jarkrar kêt nê. Ixte tanhmã mê atomnuj to ho ri ixpa kaxyw na pre Tîrtûm mê awÿr inhmênh kêt. Mê amâ ixkapêr mex nhûm mê ate inhmar nê Kris kapêr kôt amnhî nhîpêx mex o apa kaxyw na pre mê awÿr inhmê. ⁹ E kwa Kris kôt ixkwÿjaja. Na pa hte mê amâ ixpuma kaxyw mê awÿr kagà rênh kêt nê. Mê ate kamã harênh nê tee ri amnhî kukamã ajamaxpêr o amnhî kamã amâ ma kaxyw kêt. ¹⁰ Mê akamã mê kãm ixkînh kêt xwÿnhjaja na htem ijarênh o:

—Pawre na hte awry hã pa nê mê pahwÿr kagà rênh nê kamã te kêp pahî ho amnhî nhîpêx pyrã nê mêmoy tâ mê pamã kapêr kãm hihtÿx nê. Tã mê pahwÿr pøj hãmri nê kapêr kaxyw nom kapêr kãm hihtÿx o kapêr kêt nê. Jakamã mo kaxyw kot puj mê hwÿr mra nê kapêr ma?

Anhÿr o ijarê. ¹¹ Nom ã ixte anhÿr kêt. Kwa mê inhma. Kot paj nhÿrmã ma mê awÿr mô hãmri nê te kagà ja kamã mê amâ ixkapêr pyrãk o mê amâ ixkapêr nê ixkapêr xihtÿx o mê amâ ixkapêr kãm ga.

¹² Na hte mê akwÿjaja kot amnhî to mex o mê ajakrenh ã amnhî to jarkrar o ri pa. No âm amnhî krã hkôt pix mã na htem ã ri amnhî jarênh anê. Na hte Tîrtûm ã mê harênh anhÿr kêt nê. ¹³ Tã inhmã mê uràk nê ã amnhî jarênh anhÿr prãm kêt. Âm ixte Tîrtûm kot tanhmã inhmã karô hto xà hkôt amnhî nhîpêx o ixpaja na inhmã hprãm. Tã mê kajaja mê awÿr na pre inhmê. ¹⁴ Ra kot mê awÿr inhmênh jakamã ixkumrêx na pa pre mê awÿr mô nê mê akôt ri mê amâ tanhmã Kris jarênh to ho

ri ixpa. Tîrtûm kãm nhÿhÿm ixpa hprãm xà pix wÿr na inhmã ixpa hprãm.

¹⁵ No kêt mê kot amnhî krã hkôt htÿx ri Tîrtûm kapêr jahkre o mê pa xwÿnhjaja na htem nhÿri krî kamã mê kot Kris kôt amnhî xunhwÿr ã mê harênh ma nê mê hã amnhî to jarkrar o ri pa. Te tãm kot mê hwÿr mör nê mê kãm ujarênh nhûm mê kot mê mar xà hkôt Kris kôt amnhî xunhwÿr pyrãk. Nê mê hã amnhî to jarkrar o:

—E na pa pre ma mê hwÿr mô nê mê kãm Tîrtûm kapêr jarê nhûm mê inhma nê hkôt amnhî xunhwÿr kurê kumrêx. Ixkukwak ri na prem ã amnhî nhîpêx anê. Anê.

Nom ã amnhî nhîpêx anhÿrja ã amnhî to hêx. No pa na pa hte ho mê uràk kêt nê. Koja Tîrtûm ma nhÿri krî hwÿr ixkwÿjê hô mê nhûm ma hwÿr mô nê mê kãm Kris kapêr jarê. Hãmri nhûm nê kuma nê Kris kôt amnhî xunhwÿ. Pa mê harênh ma nê mê ÿ hã ixkînh nê nom pa ixkukwak ri mê kot hkôt amnhî xunhwÿr ã amnhî to jarkrar kêt nê. Ixte mê hwÿr ixpa nê mê kãm ixujarênhre hã kot pa hkêt mê hã amnhî to jarkrar. Âm Tîrtûm kãm nhÿhÿm ixpa hprãm xà pix wÿr na pa hte ixpa nê mê kãm kapêr jarê. Jakamã kot kaj mê nhÿrmã Kris kôt amnhî nhîpêx mex o ri apa pa ja hã mê apumu nê mê are nê hpãnhã ma krî hô hwÿr Kris kot mê hwÿr inhmênh xà hô hwÿr mô. Ka mê ja hã ixto Tîrtûm wÿr o apa. ¹⁶ Kot paj mê anhö krî kamã mê piitã mê kãm Jejus kapêr jarênh pa hãmri nê hpãnhã ma krî hkwÿ hkôt ijapôx o ri ixpa nê kamã mê kãm harênh o ri mê hkôt ixpa. Kormã aa mê kot mar kêt kumrêx xwÿnhjê mã harênh o ri mê hkôt ixpa. Na pa hte ã mê hwÿr ixpa nê mê kãm ixujarênh anê. Jakamã nhûm mê ja hã ixpumu nê mê kot Tîrtûm kapêr mar xwÿnhjê pix wÿr ixpa hã ijarênh kêt nê.

17 Nē Tirtūm kapēr ā kagā htūm kot mēmoj tā mē kot amnhī to jarkrar ā harēnh kot:

Kēr ka mē kamjaja amnhī mex ā amnhī to jarkrar kēt nē. Ām Tirtūm pix mā mān mex o mex ā harēnh o ri ho jarkrar o ri apa. Anē.

18 Kot pu mē Tirtūm noo mā amnhī to mex ā amnhī to jarkrar nē ām amnhī to jarkrar kaprý. Nom koja Tirtūm tām ja hā mē pahto jarkrar nē ām hāmri mē pahte amnhī to mex xwýnh ā pahto jarkrar.

11

Jejus kot mē hwýr mē rēnh ā amnhī to hēx xwýnhjē jarēnh

Matēwre 7.15; Rōmān 16.17; Karatas 1.6-9; Korosē 2.8; Sikün Pētre 2.1

¹ E kot paj te mē hkrā pipānh xwýnh kot htýx ri amnhī jarēnh pyrāk o tanhmā mē amā amnhī to jarkrar to. Kwa mē inhma nē ixkamā agryk kēt nē. No mē ixkapēr kumrēx mān ma. ² Inh mā mē akīnh. Te ho Mēpahpām Tirtūm kām mē akīnh ta pyrāk. Te mē apē mēhō kukrit kām my hkīnh nē kot ho mjēn prām xwýnh ta pyrāk. Kām mēmyjē piitā mē hkīnh kēt ām kām pix kīnh. Ja pyrā nē kēr ka mē amā Kris kīnh o nhām amā mē hkīnh xwýnhjē jakre. Te ho mēhō ni kot kām myta pix kīnh nē kām ho mjēn prām xwýnh ta pyrāk. Ja na pa inh mā hprām. ³ Ra mē amā Kris kīnh týx o apa nē hkōt amnhī nhīpēx mex o ri apa htā nhūm mē kot amnhī krā hkōt htýx ri Tirtūm kapēr jahkre ho mē pa xwýnhjaja tee ri ja hā mē ajarēnh ma nē axpēn mā mē ajarēnh o:

—Kwa nā ja mex kēt. Koja mē Pawre kapēr ma nē ām kuma nhūm ja mex nē. No mē pahkōt mē kot amnhī nhīpēxja na mē pamā mex. Ja na kēt mē pamā mex o mex. Anē. Hāmri nē ra kot Kris nē tanhmā mē amā hēx to kaxyw. Te amnepē

mā kagā kot mē panā kot wa pé Ewa mā hēx nhūm kot mar nē hkōt amnhī nhīpēx ta pyrāk. ⁴ Na pa pre ra mē awýr mō nē mē amā tanhmā Jejus jarēnh to. Nē tanhmā mē amā Tirtūm Karō jarēnh to. Nē tanhmā wa kot mē pahto hkra hto hā mē amā wa harē ka prem inhma nē mar týx nē. Tā nhūm ra mē kot htýx ri Tirtūm kapēr jahkre xwýnhjaja ixpānhā mē awýr mō nē Jejus kapēr kwým ri tanhmā mē amā ujarēnh to nē mē amā harēnh o hēx rāhā ho pa. Nē Tirtūm Karōja nhūm mē amā tanhmā ho hēx to. Nē ixte mē amā Tirtūm kapēr jarēnh kwým ri ixpānhā tanhmā mē amā harēnh to ho pa. Na ka prem mē ama nē ām hāmri harēnh ā hkamnhīx. Kwa kēr ka mē ri mē ujarēnh piitā mar nē hkōt amnhī nhīpēx kēt nē. Mē kot Jejus jarēnh tā no ām katāt kōt harēnh kēt nē. Ām ri ho hēx o pa. Ka htem ama nē ām hāmri harēnh ā hkamnhīx nē mē amā mē mar prām nē. Mē kot mē amā harēnh o hēx o pa htā ka mē ama nē ra mē hkōt amnhī nhīpēx kaxyw. Kwa mē ri ā amnhī nhīpēx anhýr hkēt nē. ⁵ Kris kot mē awýr mē rēnh ā mē kot amnhī jarēnh tā amnhī to hēx. Ka prem ama nē ām hāmri mē kot mē amā harēnh ā mē hkamnhīx. Nom na pre Krisja mē awýr mē rēnh kēt nē. Kēt pa na pre mē awýr inh mē. ⁶ Mē hkīnhā ixkapēr krór pyrāk tā no ām ixte Tirtūm kapēr mar týx. Nē kot amnhī nhīpēxja na ixte omunh par. Ra mē ate ja hā ixpumunh mex.

⁷ Na pa pre mē akōt ri mē amā Jejus jarēnh o ri ixpa no ām hpānhā mēmoj tā mē awýr o ri ixpa hkēt nē. Xā amarī ixte mē amā harēnh nē hpānhā mēmoj tā mē awýr kētja mē apē omnuj? ⁸⁻⁹ Kormā ixte mē amā Tirtūm kapēr jarēnh o ri ixpata ā na pa pre hte tōhā kaxpore ho presija no ām aa hā mē awýr kēt nē. Jar Masetōn kamā Kris kōt mē pahkwýjaja na prem ixwýr hkwy rēnh o pa pa ho ixàpkur xā japrór

o ri mē akôt ixpa. Mē kumā ixte Tirtūm kapēr jarēnh o ri ixpa hkēt tā pa hte mē kukwak ri mē akôt ho ixāpkur o ri ixpa. Tā kot paj arī ā mē akôt ixpa nē ā amnhī nhīpēx anē nē mēmoj tā mē awyr o ri ixpa hkēt nē. ¹⁰ Ja inhmā mex. Jakamā kot paj amarī mē anhō pika pē Gres kām ā mē amā Tirtūm kapēr jarēnh o ixpa anē nē mēmoj tā mē awyr kēt nē. Ām hāmri na pa ā mē amā amnhī jarēnh anē. Kris pyrā nē ixēx kēt kēnā. ¹¹ Xà we inhmā mē akīnh kēt kôt na pa hte ā mē amā Tirtūm kapēr jarēnh pānhā mē awyr kēt anē? Nā inhmā mē akīnh jakamā na pa hte kapēr jarēnh pānhā mē awyr o ri ixpa hkēt nē. Inhmā mē akīnh tỳx kēnā. Tirtūm kot ja hā ixpumunh mex. ¹² No mē kot amnhī krā hkôt htỳx ri Tirtūm kapēr jahkre xwỳnhjaja na htem mē ajahkre hpānhā kàxpore hā mē awyr pix o pa. Nē mē amā tanhmā amnhī to hēx to nē mē amā:

—Nā mē ixte Pawre kot amnhī nhīpēx pyrāk. Mē ixte amnhī nhīpēxja kot axpēn pyrāk.

Anhỳr o mē amā amnhī to hēx. Nom ixte ho mē urāk kēt kumrēx. Mē ixte amnhī nhīpēx kot axpēn pyrāk ronhỳx pa mē urāk nē kàxpore hā mē awyr o ri ixpa. Nom ixte ā amnhī nhīpēx anhỳr kēt. Kot paj aa ā amnhī nhīpēx anhỳr o ixpa hkēt nē. ¹³ Ā mē kot amnhī nhīpēx anhỳr xwỳnhjaja na pre Tirtūm mē awyr mē rēnh kēt nē. Mē kot Kris nhỳ hā mē ahkre xwỳnh ā amnhī jarēnh tā ām amnhī to hēx. ¹⁴ Mē õ pahi Satanastija te mēmoj mex jarēnh pyrāk tā no ām na hte mē pano kupyri pē mē pamā tanhmā hēx to ho mē pahkôt pa. Te kot mēmoj mex ā ām hāmri kot harēnh pyrāk tā no ām ho hēx. ¹⁵ Tā hkôt mē kot amnhī nhīpēx xwỳnhjaja na htem urāk nē te tām mē kot amnhī nhīpēx xwỳnhjē pyrā nē mē pahwỳr mra nē tanhmā mē pamā

hēx to. Satanasti pyrā nē mē pano kupyri kaxyw tanhmā mē pamā hēx to. Nom koja Tirtūm nhỳrmā mē pahatā mē homnuj tỳx kumrēx nhūm mē rī amnhī pumu.

*Tanhmā mē kot Kris ā Pawre nhīpēx to ā mē harēnh
Atre 9.23-25*

¹⁶ E kot paj axte te ixtỳx ri amnhī to jarkrar pyrāk o mē amā tanhmā amnhī jarēnh to ka mē inhma nē ixkamā agryk kēt nē. ¹⁷ Pahihti Kris nhỳ hā kot paj mē amā amnhī jarēnh kēt ām amnhī krā hkôt kot paj mē amā amnhī jarē. ¹⁸ Na htem ohtō nē mē ate mē hā apijaam kaxyw tanhmā mē amā amnhī to jarkrar to ho pa. Tā kot paj mē urāk nē amnhī krā hkôt mē amā amnhī to jarkrar ka mē inhma. ¹⁹ Mē ate amnhī xāhpumunh tỳx ā amnhī jarēnh tā ka htem htỳx ri mē kot amnhī to jarkrar o ri mē pa xwỳnhjē kapēr ma nē mē hkôt ajamaxpēr nē mē hkôt amnhī nhīpēx kurē kumrēx. ²⁰ Mē kot Kris nhỳ hā mē ahkre hā amnhī to hēx xwỳnhjaja mē pakurom mē kot amnhī to rax xwỳnh ā amnhī jarēnh jakamā na htem mēmoj tā mē amā karō ho pa.

Nē mē kām hprām xà hkôt nhỳhỳm mē arē nē nhỳhỳm mē arē.

Nē mē apa pix kukwak ri apkur o pa.

Nē mēmoj tā mē ajakwap mē atak o pa.

Ā mē kot mē anhīpēx anhỳr tā ka te mē ate atūm kēt pyrā nē atỳx ri mē kapēr ma nē mē hkôt amnhī nhīpēx o ri apa. ²¹ Tā ixte mē urāk nē ā mē anhīpēx anhỳr kēt tā kot paj mē urāk nē mē amā tanhmā amnhī to jarkrar to ka mē inhmar japēr. Te ixtỳx ri amnhī jarēnh pyrāk o kot paj mē amā amnhī jarē nom ām hāmri mē amā amnhī jarē. ²² Mē kot Jejus nhỳ hā mē ahkre hā amnhī to mē hēx xwỳnhjaja na

htem më amã tanhmã amnhĩ to jarkrar to nê më amã:

—E më inhma. Më ixpê Ijaew na pa më. Më arom më ixpê finat Apraãw kanrêhã htãmnhwý jakamã kwa më ixkapêr ma nê më ixkôt amnhĩ nhĩpêx. Anê.

Nom ijaxwýja ixpê Ijaew tã pa hte më urak nê ja hã amnhĩ to jarkrar hkêt nê. ²³ Nê më kot Kris kapêr jarênh mex o pa hã amnhĩ jarênh tã pa na pa hte harênh mex o më hakre. Te ixkrã pipãnh pyrak o ã më amã amnhĩ jarênh anhýr tãã.

E pa më amã tanhmã amnhĩ jarênh to ka më inhma. Na na pre Kris ã më kãm ixkuré xwýnhjaja më kot amnhĩ to jarkrar xwýnhjê hkĩnhã Kris ã ixpynênh nê ijagjênh xohtô nê. Nê më hkĩnhã tãhã ixtak rûnh kumrêx. Pa më hkĩnhã xatã më kot tanhmã ixto hã kritpêm ronhýx pa pre ty. ²⁴ Na pre Ijaew krãhtümjaja Kris ã ixkatut kãm ixtak rûnh nê. Nê ixtak xàja pĩ hã mry kã janhô o ixtak. Nê ixtak kaxyw nê ixtak xà jatur xà kamã kàx xwa gixre janhô nê ho ixtak rûnh o ixkatut kã rê. Ixtak o 39 hãmri nê rĩ kormã më kot ixpĩr pymaj inhmã ure. Na pre htem nhýri ixpynê nê ã inhĩpêx anê. Na prem ã inhĩpêx anhýr o 5 wês.

²⁵ Nê na prem ra më kot ixpĩr kaxyw nê kên rûnh kwý jamý nê ho ixtak o kuhê. Nê Rôm nhô xwýnhjaja haxwýja pĩ ho ixtak rax kumrêx. ã inhĩpêx anhýr o axkrunêpxi.

Nê na pa pre hte gô xujanãr kãm nhýhým Jejus jarênh o ri ixpa kaxyw pãr kãm më hwýr ixpa nhüm pãrja tanhmã amnhĩ to nê agjê. Kritpêm nhýx pre hte gôja ixpĩ. Pa pre ã amnhĩ nhĩpêx anhýr o axkrut. Tã arĩgro hõ hã kê axte pãr õ mã axà nê ma axte krĩ hõ hwýr mō. Nhüm kê pãrta axte më ixpê axà nhüm gôja nhýx kê axte ixpĩ. Pa pãr jakã hã kumý nê hã ijêt o amýkry. Nê ho apkati. Tã nhüm

nhýhýnh pãr ôja mō nhüm kamã më mör xwýnhjaja ixpumu nê ixwýr pãr o mō nê amnhĩ wýr ixto api nê ma amnhĩ kôt ixto mō.

²⁶ Na pa pre amnhĩ xà htýx kamã ijamak o ri ã më kãm Kris kapêr jarênh o ri ixpa anê. Kironhýx pre gô tãmja ixpĩ. Nhüm më àhkĩnh nhi xwýnhjaja kironhýx prem mããnen ixpĩ. Nê Ijaew nê Ijaew kêt xwýnhjaja tãhã tanhmã ixtomnuj to ho pa. Pa pre krĩ hkwy hwýr ixpa rý kapôt ã ixpa nhüm më ixtã amýné. Pa pre gô xujanãr kãm pãr kãm ri ixpa nê nhýx kamã ty. Nhüm më kêp Kris kwý hã amnhĩ to hêx xwýnhjaja haxwýja tanhmã ixtomnuj to pa më ý hã amnhĩ xà htýx kamã ijamak o ri ixpa. ã na prem Kris ã inhĩpêx anhýr o pa.

²⁷ Nê na pa Jejus kapêr jarênh o ri ixpa kuré ixkêngrã nê ri ixpa. Nê tãhã inhôt kêt ã ixtã apkati. Nê tãhã inhmã prãm nê inhmã kôr nê ri ixpa. Nê tãhã ixê mex kêt nê inhmã kry nê ri ixpa. ²⁸ Na pa hte Kris kapêr jarênh o ri ixpa pê ã amnhĩ nhĩpêx anê. Nom ja pix kêt. Na pa hte krĩ piitã hkôt Kris kwýjê hkukamã tee ri ijamaxpêr nê ijamaxpêr o:

—Hêxta waa nê. Mãn më arĩ Kris kôt amnhĩ nhĩpêx mex japêr rý ko. Mãn më ra kapêr kwým ri tanhmã amnhĩ tomnuj to rý ra hkaga.

Anhýr o ijamaxpêr o ixpa.

²⁹ Nê na hte mëhõ Tirtüm kapêr nhĩrôp xa nê tanhmã amnhĩ tomnuj to pa tee ri omu nê ixkaprĩ htýx kumrêx. Koja mëhõ tanhmã Tirtüm nê mëhõ mã kapêr to nhüm kuma nê Tirtüm kôt amnhĩ nhĩpêx kêt pa tee ri ja hã omu nê nê kêp àmnãr xwýnhta kamã inhgryk týx kumrêx.

³⁰ E Kris kôt ixkwýjaja. Na pa ã më amã amnhĩ jarênh anê. Te ixte amnhĩ to ijarkrar pyrãk no ãm më ate ixirerek xwýnh ã ixpumunh pix kaxyw. ³¹ ãm hãmri na pa ã më amã amnhĩ jarênh anê. Ixêx kêt.

Pahihti Jejus nhîpêêxà Tirtüm kot ja hã ixpumunh mex. Tirtümja mex o mex. Koja mex o mex tüm në pa rãhã ho pa. Tãm kot ixirerek â ixpumunh mex. ³² Kormã krî pê Tamas kãm ixpare ri na pre mẽ õ pahi Arêtja mẽ kãm ixtã amÿnê nhùm pòristijaja krî hpu hã kahê xà nhõ hakwakre piitã kãm hipòk pa në ixkãm hamak o kuhê. Pa tee inhmã nhÿhÿnh ixkator në ma mẽ umaj ixpròt në ixtêm prãm në ixirerek xwÿnh ã amnhî pumunh kurê kumrêx. ³³ Tã nhùm Kris kòt mẽ pahkwÿjaja hamaxpêr në kawà rax mÿ në o tẽ në inhmã ãm pa hwÿr axà në kamã nhÿ. Hãmri nhùm mẽ pàr nhõr o kahê nhîrò pê ixto wrÿ pa ixkato në mẽ kêp amÿxu në amnhùm ixprî në ma tẽ në mẽ kêp akunok. Æ na pre Tirtüm ixirerek xwÿnh ã inhmã ixto amnhîrit anê.

12

Tirtüm kot Pawre mã mẽmoj to amnhîrit ã harênh

¹ E Kris kòt ixkwÿjaja. Nã inhmã amnhî to jarkrar hprãm kêt tã kot paj tanhmã mẽ amã amnhî jarênh to ka mẽ inhma në hã ixtã apijaãm japêr. Na hte Tirtüm tõiã inhõt kãm ixkarõ mã tanhmã kapêr to. ²⁻³ Amnepê mã amgrã hõ hã na pre tanhmã ixkrã hto në õ krî hwÿr amnhî wÿr ixto api. Na pre ra hã amgrã pê 14 ãn. Apu inhî rãhã ixto api rÿ apu ãm ixkarõ pix o api rÿ ko. Ixte ja hã amnhî pumunh mex kêt. Tirtüm pix kot ja hã ixpumunh. ⁴ Na pre ixto api pa pòj në õ krî kamã axtem tanhmã mẽ kapêr to hã mẽ kuma. Na prem mẽmoj mex kumrêx jarê pa kuma në ixkính në. Nê inhmã mar prãm në. Hãmri në ijamaxpêr o:

—Hêxta waa në. Mẽmoj jarênhja mex kumrêx. Nã kot paj akupÿm wrÿ në ixkwÿjê mã harê kê mẽ ixpyrà në kuma. Nã kot paj anê.

Anhÿr tã nhùm Tirtüm Karõ ja në ixkuré në inhmã:

—Nã kêr ka mẽ kãm ja jarênh kêt në. Æm kapxipix kot kaj ama në ri hã apa.

⁵ Anhÿr jakamã pa pre paxipix mẽ arom mẽmojja pumu në kuma nom kot paj ri hã amnhî to jarkrar kêt në. Kòt paj ãm Jejus pix tanhmã harênh to ho ri ixpa. Jao ixrom mex o mex ã harê. Nê ixrom hihtÿx o hihtÿx në ãhpumunh o ãhpumunh ã harênh o ri ixpa.

⁶ Nê ixte Tirtüm nhõ krî hwÿr ixàpirja ãm hãmri ixte hã amnhî jarênh tã kot paj ja hã amnhî to jarkrar o ri ixpa hkêt në. Mẽ ate ja hã inhmar kòt inhmex ã ijarênhja na inhmã hprãm kêt. Nom kot ka mẽ ixte tãm amnhî nhîpêx ã ixpumu në tãm ixkapêr ã inhma hãmri në rÿ kormã inhmã inhmex ã ijarê. Æ mẽ ate amnhî nhîpêx anhÿrja na inhmã hprãm. ⁷ Na pre Tirtüm inhõt kãm inhmã mẽmoj mex kwÿ jarênh rax në. Hãmri në hpãnhã inhmã:

—E na ka akwÿjê rom inhõ krî hwÿr api në mẽ kurom mẽmoj mex pumunh rax në. Tã ate ja hã amnhî pumunh në ma mẽ kãm hã amnhî to jarkrar o ri apa pymaj kot paj Satanasti mã anê nhùm inhma në tanhmã atomnuj to ho pa. Nom ijamaxpêr xà hkòt koja ã anhîpêx anê.

Anhÿr jakamã nhùm tanhmã inhîpêx to pa inhmex kêt në ixpa. Te mrõnhî rax nhÿhÿnh kot ixkamnhwÿr nhùm inhmã tee ri hkaxàr prãm kaprÿ në ÿ hã ho inhgêx rãhã në ixpaja pyràk. ⁸ Tã pa tee ri ja hã amnhî pumu në amnhî to Jejus wÿr në kãm:

—Kwa Pahihti. Na pa ra mẽmojta nhÿ hã ixpunuj në ixirerek në ixpa. Kwa inhnê ata pa akupÿm ixihtÿx në ijamakêtkati në ri ixpa nã?

Anhÿr o amnhî to hwÿr o axkrunêpxi. ⁹ Hãmri nhùm inhmã:

—Nà kot paj anê hyr kêt nê. Kot paj âm akutâ inhnojarêt rāhā ho ri akôt ixpa. Ka axirerek nê apa htā ixihtýx xwýnh ā xpumunh kôt ixkamnār rom tanhmā inhý hā amnhī nhīpêx to ho ri apa. Anê.

Ā inhmā kapêr anhýr jakamā na pa ixpunuj nê ri inhīrot nê ixpa htā ixrom hihtýx xwýnhhta nhý hā ixkīnh nê ixpa. Nê kurom ixirerek xwýnh pix ā amnhī to jarkrar o ri ixpa. ¹⁰ Jakamā kot paj Kris ā ixpunuj nê ri ixpa htā ixkīnh nê ijamakêtkati nê ri ixpa. Kwār mē māmri hā tanhmā ixto kapêr to nê tanhmā hā inhīpêx to pa amnhī xā htýx kamā ijamak o ri ixpa. Nê ixpê amrakati nê inhīrot nê ri ixpa htā Kris nhý hā tanhmā kām amnhī nhīpêx mex to rāhā ho ri ixpa.

Pawre kot tee ri mē hkukamā hamaxpêr ā harēnh

¹¹ Tā mēmo kaxyw na pa ā mē amā amnhī jarēnh anê? Nā mē ate ixtā apijaàm kêt jakamā na pa ā mē amā amnhī jarēnh anê. Mē kēp Kris nhý hā mē ajahkre xwýnh ā amnhī to hēx xwýnhjaja na ka htem ixrom kot amnhī to rūnh xwýnh ā mē harē nê mē hā apijaàm o ri apa. Nom ixte amnhī to grire xwýnh tā mē kot amnhī to rūnh o ijakrenh kêt. ¹² Na pa pre mē akamā ri ixpa nê Tirtūm nhý hā aa mē ate mēmoj pumunh kêt kwý ho anhýr rax o ri mē akôt ixpa. Nê ý hā akupým mē à xwýnhjê ho mex. Nê mē nohkre xwýnhjê no ho mex. Na pa pre hte ā mē amā mēmoj nhīpêx anhýr o ri mē akôt ixpa. Amnhī xā htýx kamā ijamak o ri ixpa htā Tirtūm xihtýx xā ho amnhī to htýx nê ā mē amā mēmoj to anhýr o ri mē akôt ixpa. Mē ate omunh nê Tirtūm àhpumunh týx ā omunh kurê kumrêx kaxyw. Nê ixpê Kris nhý hā mē ajahkre hā xpumunh kurê kumrêx kaxyw na pa pre ā mē amā amnhī nhīpêx anhýr o ri mē akôt ixpa. ¹³ Xān pa pre nhām krī hkwy kamā Kris

kôt mē pahkwýjê ho mex tā mē kajaja tanhmā mē ato mex to hkêt nê? Nā na pa pre hte mē anhīpêx o axpēn pyrāk. Ām mēmoj pixire na pa pre mē urāk nê mē awýr kêt nê. Nhām krī hkwy kamā ixpata ā na pa pre mēmoj to presija nhūm prem inhmā ōr o pa. Tā pa pre mē mō nê mē akôt ixpa nê mēmoj to presija htā hā mē awýr kêt nê. Kwa mē ā ixte amnhī jarēnh anhýrja ma nê ixkamā agryk kêt nê.

¹⁴ Tā ot pa ra akupým mē awýr inhnojarêt kaxyw. Na pa pre ra mē awýr inhmōr o axkrut. Tā ra axte mē awýr inhnojarêt kaxyw. Kot paj mē awýr mō nê mē akôt ixpa nom te wam ixtēmta pyrā nê mēmoj tā ri mē awýr kêt nê. Ām mē amā ixkīnh pix na inhmā hprām. Mē apiitā te mē apē ixkra pyrāk. Na hte mē hkrarejaja mē katorxā nê mē hipêêxā mā ujaaprōr o pa hkêt nê. Mē hipêêxā nê mē katorxā na hte hkrare mā kot mēmoj to presija xā hkôt kām haprōr o pa nom mēmoj tā hwýr kêt nê. Ja pyrā nê kot paj mē apē ixkra pyrāk ā mēmoj tā mē awýr kêt nê. ¹⁵ Kot kaj mē mēmoj to presija japêr nê inhmā harē pa ixāmnhīx ixkīnh kām mē amā ixkāxpore piitā ōr par pyrāk o amnhī nhīpêx. Nê mē amā tanhmā amnhī nhīpêx to ho ixpa rāhā ixtykja na inhmā hprām. Inhmā mē akīnh týx kumrêx tā mē kajaja mē amā ixkīnhja mē atā hkwy jêt kêt kumrêx. ¹⁶ Ixte amnhī mā mēmoj tā mē awýr kêt tā na hte mē akwýjaja ixêx rom ixte nhām mē kēp amrakati xwýnhjê mā kāxpore hā mē awýr o ixpa hā ixkamnhīx.

¹⁷ Kwa tanhmā na pa pre ri mē ano kupyw to? Xā ja kaxyw na pa pre mē awýr ixkrāmnhwýta wa kumê? ¹⁸ Na pa pre Xitre hā ixihtýx nê mē awýr kumê. Nê Kris kôt mē pahtōja pa Xitre hkôt kumê nhūm wa ma mē awýr mō. Tā xā na pa pre Xitre tanhmā mē ano kupyw to? Nā

na pre ā mẽ anhīpêx anhÿr kêt nê. Tã wa ixte amnhī nhīpêx nê wa ijamaxpêrja kot axpên pyrãk. Nã na pa hte urãk nê mẽ ano kupyř o ri ixpa hkêt nê. ¹⁹ Mãn ka mẽ axpên mã mẽ ijarênh o:

—Nã Pawre mẽ hkwyjaja mẽ kãm amnhī to rũnh xwÿnh prãm jakamã na ã Pawre kagàja kamã mẽ pamã amnhī tã àprãr anê.

Anhÿr o mẽ ijarênh japêr nom mẽ inhmã amnhī tã tanhmã ixàprãr to hprãm kêt. Æm mẽ inhmã mẽ akĩnh nê mẽ ato mex prãm jakamã na pa htem tanhmã mẽ amã amnhī nhīpêx to ho ri ixpa. Na pa Tĩrtũm noo mã Kris nhÿ hã ã mẽ amã mẽ amnhī jarênh anê.

²⁰ Tã kot paj jatã ma mẽ awÿr mō ka mẽ akwyjaja tanhmã amnhī tomnuj to japêr.

Mẽmoj tã axpên mã axãkjêr o apa.

Rÿ mẽmoj tã axpên kãm agryk.

Rÿ axpên kãm agryk tokyx anhÿr o apa.

Rÿ axpên pê anhōxÿ.

Rÿ axpên to akapêr punuj o apa.

Rÿ mẽ ajakwa kamã nhãm mẽ hixi ho rêr o ri apa.

Rÿ amnhī to rũnh prãm xaj anhmã amnhī nhīpêx to ho apa.

Kot kaj mẽ ã amnhī nhīpêx anhÿr o ri apa pa ja hã mẽ apumu nê ixkaprĩ htÿx kumrêx ka mẽ tee ri amnhī tã ixpumu. ²¹ Xã kot paj mẽ awÿr mō nê mẽ apumu ka mẽ akwyjaja arĩ mẽ aprō kuhpa hã nhãm mẽnijê ho amnhĩkati ho ri apa? Rÿ arĩ tanhmã ajamaxpêr punuj to ho apa? Rÿ atÿx ri apijaãm kêt o apa? Kot ka mẽ arĩ ã amnhī nhīpêx anê pa ja hã mẽ apumu nê ixkaprĩ xaj inhmÿr rax nê. Nê mẽ anhÿ hã Tĩrtũm noo mã ixpijaãm tÿx kumrêx.

13

Pawre kot tanhmã amnhī kukamã mẽ kãm karō hto

¹ Tĩrtũm kapêr ã kagã htũm tanhmã mẽ kot amnhī tomnuj to xwÿnhjê jarênh kot:

Koja mẽhō tanhmã amnhī tomnuj to nhũm mẽhō pyxi nê ã amnhī nhīpêx anhÿr ã omu nê awÿr tẽ nê amã harê ka mẽ ama nê ãm ama nê hkôt ajamaxpêr kêt nê. No koja mẽmojaja axkrut rÿ axkrunêpxi nê hã omu nê awÿr mra nê axpên kôt amã harê ka mẽ ama nê mẽ hkôt ajamaxpêr kurê kumrêx. Anê.

Tã ra mẽ awÿr inhmōr o axkrut tã kot paj akupÿm mẽ awÿr mō nê mẽ apumu. ² Hapu hã mẽ awÿr inhmōrta ã na pa pre mẽ akwÿ kot tanhmã amnhī tomnuj to hã mẽ omu nê hã mẽ kãm akir nê mẽ kãm:

—Kot kaj mẽ amnhī tomnuj kaga nê tãm amnhī nhīpêx kêt kot paj nhÿrmã akupÿn mẽ awÿr mō nê ã mẽ ate amnhī nhīpêx anhÿr ã mẽ apumu nê hã mẽ atomnuj tÿx kumrêx kãm ga. Anê.

Jakamã kot paj mẽ ma mẽ awÿr mō nhũm mẽ akwyjaja arĩ mẽ ate amnhī tomnuj o apa hã inhmã mẽ ajarê pa mẽ atã mẽ kuma nê tanhmã mẽ ato htÿx nê. ³ Kot kaj mẽ ja hã ixpumu nê aprĩ hã ixte Kris nhÿ hã ixkapêr xwÿnh ã ixpumunh tÿx kurê kumrêx. Kris ixrom hihtÿx o hihtÿx. Na pre ra mẽ ate amnhī tomnuj o apata mÿrapê tanhmã mẽ anhīpêx to. Tã kot kaj mẽ kormã ã ate amnhī nhīpêx anhÿrja kaga hkêt hã koja tee ri ja hã mẽ apumu nê mẽ anhīpêx kati nê. ⁴ Amnepêm na pre Krisja te hihtÿx kêt pyrã nê ãm arĩ mẽ kãm xa nhũm mẽ unê nê pĩ kahpa ã kunhō nê kupĩ. Tã nhũm Tĩrtũmja àhpumunh tÿx o akupÿm ho htĩr nhũm akupÿm htĩr o htĩr nê Tĩrtũm nhÿ hã hihtÿx o hihtÿx ã amnhī to amnhĩrĩt. Ja pyrã nê wam mẽ awÿr inhmōrta ã na pa pre hte mẽ akamã te Kris kormã htÿk kêt ri

hihtýx kêêta pyrã nê mē akôt ixpa. Tã kot paj ma akupým mē awýr mō hãmri nê te Kris ra akupým htír nê hihtýx o hihtýxta pyrã nê Tirtüm xihhtýx xà ho tanhmã mē kot amnhĩ tomnuj xwýnhjê nhĩpêx to. Hãmri nhũm mē amnhĩ tã ixpumu nê Tirtüm nhỹ hã ijamaxpêr týx ã ixpumunh kurê kumrêx.

⁵ Kwa mē aprĩ hã tanhmã mē ate amnhĩ nhĩpêx to hã amnhĩ pumu. Xàn ka htem ãm hãmri amnhĩ kaxyw Jejus Kris kôt ajamaxpêr o ri apa nã? Kot kaj mē apê hkwy hã koja mē akaxwýnh kãm mē akamã hkrĩ rãhã nê. Nom koja mē akaxwýnh kãm mē akamã hkrĩ hkêt ka mē ãm apê hkwy hã amnhĩ jarênh kaprý. ⁶ No pa na ixte ja hã amnhĩ pumunh mex. Ixpê Jejus kwý na pa. Ra ixkamã hkrĩ nê ixkôt pa ho pa jakamã ixpê hkwy na pa. Tã mē ate ja hã ixpumunh mexja na inhmã hprãm. Na pa hte ixpê Jejus kwý hã amnhĩ jarênh kaprý hkêt nê.

⁷ Nê na pa hte mē ato tanhmã Tirtüm wýr to ho ri ixpa nê mē ato hwýr o:

—Pa Tirtüm. Kwa tanhmã Korīt nhõ xwýnhjê hkrã hto kê mē tanhmã amnhĩ tomnuj to ho pa hkêt nê.

Anhýr o mē ato kuwý. Měmo kaxyw na pa hte ã mē ato hwýr anê? Ixte mē ajahkre mex ã amnhĩ to amnhĩrĩt kaxyw kêt. ãm mē ate amnhĩ to mex rãhã ho ri apa kaxyw. Kot kaj mē ã amnhĩ nhĩpêx anhýr o ri apa hãmri nhũm axtem mēhõ mē awýr mōn pōj nê tanhmã mē amã mē ijarênh to nê mē ijarênh o:

—Kwa Pawre mē hkwyjaja na htem Tirtüm kapêr kwým ri Korīt nhõ xwýnhjê jahkre ho pa.

Anhýr tã pa amnhĩ tã mē kuma nê ãm mē kuma. ⁸ Na pa hte Tirtüm kapêr kutã amnhĩ xunhwýr kêt nê. Na pa hte ãm mē ate hkôt amnhĩ nhĩpêx o ri apa hã mē amã karõ

kamã ixihhtýx rãhã ho ri mē akôt ixpa. ⁹ Jakamã kot kaj mē hkôt amnhĩ nhĩpêx mex o apa pa ja hã mē apumu nê ixkĩnh nê. Mē kot axpên mã ixirerek ã ijarênh o pa htãã. ã mē ate amnhĩ nhĩpêx anhýr o apa kaxyw na pa hte mē ato Tirtüm wýr o ri ixpa nê kãm:

—Pa Tirtüm. Kwa tanhmã Korīt nhõ xwýnhjê hkrã hto kê mē kot amnhĩ tomnuj kaga hpa nê hpãnhã akapêr kôt pix mã mãn amnhĩ nhĩpêx rãhã nê. Anê.

¹⁰ Tã pa kormã mē awýr inhmõr xwýj ri ã amnhĩ kukamã kaga nhĩpêx nê mēnh anê. Mē ate kamã harênh nê mar nê tokyx akupým tãm amnhĩ nhĩpêx kaxyw. Kot pa mē awýr mō nê Pahihti nhỹ hã mē ate amnhĩ tomnuj ã mē amã akir. Nom inhmã ã mēmoj tã mē amã ixãkjêr anhýr prãm kêt. ãm ý hã kapêr o mē ajahkre mex nhũm mē ate inhmar nê hkôt amnhĩ nhĩpêx rãhã ho apaja na inhmã hprãm.

¹¹ E Kris kôt ixkwýjaja. ãm ja pix. Kwa kêr ka mē ixkapêr mar týx nê hkôt amnhĩ nhĩpêx mex nê. Nê Tirtüm kôt pix mã ri tanhmã amnhĩ nhĩpêx to ho apa rãhã ho apa. Nê tãm ri amnhĩ nhĩpêx. Nê axpên kôt ajamakêtkati nê akĩnh nê axãmnhĩx ri apa. Kot kaj mē ã amnhĩ nhĩpêx anhýr o apa nhũm Tirtüm mē akôt pa ho pa. Kãm mē pajapê htýx kumrêx. Kêp mē pamã mē pahkĩnh nê mē pajamakêtkati jagjênh xwýnh.

¹²⁻¹⁴ Nê ota jar Kris kôt mē pahkwýjaja pa mē ixpimrãatã mē awýr ixpêr mē. Mē ixpiitã mē inhmã mē akĩnh týx jakamã na pa mē awýr ixpêr mē.

Nê kê Pahihti Jejus Kris mēmoj to mē akutã nojarêr rãhã ho pa. Nhũm Tirtüm arĩ kãm mē ajapê rãhã ho pa. Nhũm Karõ tanhmã mē akrã hto ka mē axpên to mex pix kukamã mãn ajamaxpêr o apa.

Tã e ixkwỳjaja. ãm ja pix. Ixpê
Pawre na pa mẽ awỳr kagàja
nhĩpêx nê ã mẽnh anê.

Karatas Pawre kot Karatas kamã Jejus kôt hkwÿjê hwÿr kagã në mēnh

Pawre na pre kagàja nhîpêx në pika pê Karatas kamã Kris kwÿjê hwÿr kumê. Na pre ra Ijaew kwÿjaja më hwÿr mra në Tirtûm kapêr kwÿm ri më ahkre ho pa në më kãm:

—Kot kaj më amnhî kaxyw Jejus Kris kôt ajamaxpêr hãmri në määnên më ixpê Ijaew nhîgêt kot amnhî nhîpêx kôt amnhî nhîpêx. Kê Tirtûm ja hã më apumu në më ato hkra. Anê.

Nom ã më kapêr anhÿrja kot anhÿr kêt. Mē pahte amnhî kaxyw Jejus Kris kôt pajamaxpêr në hkôt amnhî xunhwÿr pix ã më pah-pumunh kôt na hte Tirtûm më pahto hkra. Tã nhûm prem ã më kãm ho hêx anhÿr o pa nhûm Pawre tee ri ã më kapêr anhÿrja ã më harênh ma nhûm ja kêp om-nuj në. Jakamã nhûm Karatas nhô xwÿnhjê mã kagàja nhîpêx në më hwÿr kumê. Nê kamã hprî hã Tirtûm kot më ho hkra kaxyw tanhmã amnhî nhîpêx to hã më kãm harê në hã kagã. Nê më kãm:

1-2 Pa Karatas nhô xwÿnhjaja? Xà më amex? Ixpê Pawre na pa më awÿr ixpêr më në mëmoj tã më amã karô.

Mêpahpãm Tirtûm më Jejus Kris na pre wa më akaxyw ixãm. Ixte wa ÿ hã ma ri më akôt më ajahkre o ri ixpa kaxyw. Na pre Jejus ty nhûm Tirtûm akupÿm ho hÿr. Hãmri nhûm wa më akaxyw ixãm. Pyka ja kamã na pre mēhō më akaxyw ixãm kêt në. Tirtûm më Jejus Kris na pre wa ixãm. Jakamã na pa ã më awÿr kagã nhîpêx në mēnh anê. Mē apê Tirtûm krajê hwÿr.

Nê ota jar krî ja kamã ixpyrà në Kris kôt më pahkwÿjaja më awÿr hpêr më.

³ E kê Mēpahpãm Tirtûm më Pahihti Jejus Kris wa mëmoj to më akutã nojarêr rãhã ho pa. Nê më ato mex rãhã në. Ka më wa ÿ hã akînh në ajamakêtkati në axãmnhîx ri apa.

⁴ Nã na pre Krisja amnhî grônh kôt më pahwÿr wrÿ në më panê ty. Mē pahte amnhî tomnuj pãnhã amnhîrer kaxyw më panê ty. Mēpahpãm Tirtûm kãm hprãm xà hkôt. Tã mëmo kaxyw na pre ã më panê amnhî nhîpêx anê? Nã pika ja kamã më kot amnhî nhîpêxja omnuj tÿx jakamã nhûm amnhî grônh kôt te më kot amnhî tomnuj pê më papytãr pyrãk o më panhîpêx në ã më panê htyk anê. ⁵ Jakamã kwa kêr pu më Tirtûm mã mex o mex ã mãn harênh o ri papa. Nã kot puj më ã amnhî nhîpêx anhÿr rãhã ho ri papa.

Mē ujarênh pixi ãm hãmri hã harênh

Rômãn 16.17; Sikûn Korût 11.3-4; Epes 4.14; Korosê 2.8; Sikûn Pêtre 2.1-3

⁶ Kwa ixkrãmnhwÿjaja. Na pa pre më ate tanhmã amnhî nhîpêx to hã më ajarênh ma në ixkaprî në tee ri më akukamã ijamaxpêr. Na pre Tirtûmja Kris kukwak ri më ato mex në. Nê më ate hkôt amnhî nhîpêx o apa hprãm xãj te kot amnhî wÿr më awÿr pyrãk o më anhîpêx ka më hkôt amnhî xunhwÿ. Tã xep tanhmã më ajamaxpêr to në ra hkaga kaxyw. Ra axtem më ujarênh ôja ma në gryk ã Tirtûm kaga kaxyw. Pa tee ri më ajarênh ma në ixkaprî në. Kwa moñ ka më axtem në ri ã amnhî nhîpêx anhÿr mã? ⁷ Jejus jarênh pix na ãm hãmri. Mo më ujarênh mex ô kot ka kêt më ama në hkôt amnhî nhîpêx? Nã amrakati kumrêx. Æ më amã ujarênh anhÿr xwÿnhjaja na htem Kris kapêr o pihkãr rûnh kumrêx o pa në katãt kôt harênh

kêt nê. Ka xep mê ama nê aja-maxpêr kati rûnh nê.

⁸ Na pa pre ma mê awÿr mô nê âm hāmri mê amā Jejus kot tanhmā mê panê amnhī nhīpêx to hā harê ka prem inhma. Tā koja mēhō mê awÿr mô nê mê amā nhām mê ujarēnh ō jarē nhūm Tirtūm ja hā omu nê nhÿrmā ma mê kot amnhī xā htÿx kamā hamak tūm xā hwÿr kumê nhūm ma hwÿr mô nê aa kator kêt nê. Mē pahtō rÿ Tirtūm kapêr o wrÿk xwÿnhjê hō koja ā amnhī nhīpêx anê nhūm ja hā omu nê ma kuwy pē himōta wÿr amnhī nê kumê. ⁹ E kot paj axte mê amā ja jarê ka mê aprī hā inhma. Koja mēhō mê awÿr mô nê mê ate hkôt amnhī xunhwÿr xwÿnhhta kwÿm ri tanhmā mê amā ujarēnh to. Hā koja Tirtūm omu nê nhÿrmā ma mê kot amnhī xā htÿx kamā hamak tūm xā hwÿr kumê nhūm ma hwÿr mô nê kamā pa ho pa nê aa kator kêt kumrêx.

Tirtūm pix kām Pawre hkĭnh hprām ā kot jarēnh

Juāw 5.44; Atre 26.9-20; Karatas 2.6

¹⁰ Nê koja mēmojaja ixkapêr ma nê kām mar prām kêt o kām ixkĭnh kêt japêr nê māmri kām ixkĭnh kêt. Tirtūm kām ixkĭnhja pix na inhmā hprām. Kop apu mê piitā kām ixkĭnhja mĭn inhmā hprām ronhÿx pa Kris nhÿ hā kapêr jarēnh o ri ixpa hkêt nê.

Tirtūm kot Pawre mā Kra Jejus o amnhĭrīt ā harēnh

Sikūn Korīt 1.12; Wam Tesarōn 2.4

¹¹⁻¹² E Jejus kôt ixkrāmnhwÿjaja. Nā ixte mê ujarēnh mex jarēnh o ix-paja na pre jar pika ja kamā mēhō amnhī krā hkôt inhmā harēnh rÿ inhmā ahkre hkêt nê. Jejus Kris tām na pre ixwÿr kato nê inhmā ho amnhĭrīt. Jakamā mex o kot pika jakamā mê ujarēnh piitā hakrenh par. ¹³⁻¹⁵ E kot paj ixprī hā mē

amā tanhmā amnhī jarēnh to ka mê inhma. Tanhmā Tirtūm kot amnhī kaxyw ixām to hā pa mê amā amnhī jarē. Nā na pre kormā ixkêt ri ixkukamā hamaxpêr nê amnhīm ixta nê amnhī kaxyw ixām nê kot ixto mex ā ixtā amnhī jarē. Tā pa pre ixkato nê gaa nê ixaptār nom kormā Jejus Kris kôt amnhī xām kêt nê. Na pa pre axtem nê inhmā mê ixpē Ijaew kot amnhī nhīpêx kôt pix mā amnhī nhīpêx o ri ixpa hprām nê. Nhūm pre ixpyrā nê arī mê nywjaja haxwÿja kām mê hkôt pix mā ri amnhī nhīpêx o pa hprām nê. No inhmā mê hkôt amnhī nhīpêx mex o mê hakrenh par prām jakamā na pa pre mê inhġēt kôt amnhī nhīpêx mex kumrêx o ri ixpa. Mē kapêr pi-itāā hkôt amnhī nhīpêx mex nê. Tā ā amnhī nhīpêx anhÿr o ixpa kaprÿ. Na pa pre axtem nê mê kot Tirtūm Kra Jejus Kris kôt amnhī xunhwÿr xwÿnhjê nhīpêx kati ho ri mê hkôt ixpa nê inhmā mê himex prām tÿx kumrêx. Ā na pa pre amnhī nhīpêx anhÿr o ri ixpa. Ra mê ate ja hā ixpumunh mex.

¹⁶⁻¹⁷ Tā pa pre ma Tamas wÿr mô. Kamā tanhmā Kris kwÿjê nhīpêx to kaxyw ma mê hwÿr mô. Hāmri nê kormā mê hwÿr ixāhtêp o inhmōr mê nhūm Tirtūm tanhmā ixto nê inhmā Kra Jejus o amnhĭrīt pa jatā omu. Kêp Tirtūm Kra hā pa ixprī hā omu. Nhūm inhmā kapêr nê ixte kām tanhmā amnhī nhīpêx to ho ri ixpa kaxyw ixapênh ā inhmā karō nê Ijaew kêt xwÿnhjê hwÿr inhmê. Ixkwÿ Ijaew wÿr inhmēnh kêt nê. Na pre inhmā:

—E kêr ka ma Ijaew kêt xwÿnhjê hkôt ri mê kām ixkapêr jarēnh o ri apa.

Anhÿr jakamā pa pre kuma nê hkôt amnhī xām kurê kumrêx nê ā amnhī nhīpêx anhÿr o ri ixpa. Jao tanhmā ixte kêp hkwyjê nhīpêx tota kaga nê ma pyka pē Arap wÿr mô. Nom tanhmā amnhī

tã Jejus kwÿjê kukjêr to hkêt nê. Nê Jerujarê hwÿr inhmôr nê Jejus nhÿ hã mē ahkre xwÿnh maati-jaja tanhmã amnhî tâ mē kukjêr to hkêt nê. ãm Tirtûm kot inhmã hã karô xã hkôt ma Arap wÿr mō nê kamã kapôt ã ri ixpa. Kamã na pre Tirtûmja inhmã Jejus Kris kot tanhmã amnhî nhîpêx to ho amnhîrit o pa. Hãmri nê inhmã kapêr pa amnhî tâ kuma hãmri nê ma akupÿm Tamas wÿr mō.

¹⁸ Tã nhûm ra amgrã axkrunêpxi nê hapêx pa Tamas rûm ixkato nê ma Jerujarê hwÿr Simãw Pêtre hwÿr mō. Hãmri nê kuri pøj nê hkôt ixpikamênh ã ixtã semãn axkrut. ¹⁹ Nom mē kot Jejus nhÿ hã hkwyjê jahkre ho mē pa xwÿnh maati hkwyjê hō pumunh kêt kumrêx. ãm Simãw Pêtre mē Pahihti Jejus tō Xiakreja pix wa omu. ²⁰ ãm hãmri na pa ã amnhî jarênh anê. Tirtûm kot ja hã ixpumunh mex. ²¹ Tã pa pre mē kurûm ixkato nê hpãnhã ma pika hkwyjê hkôt ijapôx o mē hkôt ixpa. Ma pika pê Sir mē Sirisja wa hwÿr mō.

Mê kot amnhî jaêr pê Pawre kot amnhî nhîpêx nyw ã omunh ã mē harênh

²² Nom Jutej kamã Kris kwÿjjaja na prem kormã ixpumunh kêt nê. ãm Simãw Pêtre mē Xiakre pix na pre wa ixpumu. ²³ Na pre ra mē hkwyjjaja tanhmã hkwyjê kot axpên mã ijarênh toja ma. Na prem ijarênh o:

—Kwa Jejus ã mē panhîpêx kati htÿx o pa xwÿnhnta na pre tanhmã hamaxpêr to nê hpãnhã mē kãm Jejus kapêr jarênh o ri mē hkôt pa. Mē kot amnhî kaxyw hkôt hamaxpêr kaxyw. Ra kot Jejus nê mē pahkurê htã hpãnhã mē kãm kapêr jarênh o ri mē hkôt pa. Anê.

²⁴ Hãmri nhûm Kris kwÿjjaja amnhî jaêr pê ijarênh ma nê inhÿ hã hkÿnh nê. Nê ixtã Tirtûm mã mex o mex ã harê.

2

Pawre kot Kris kwÿ hkrãhtûmjê mã amnhî jarênh

Atre 15.1-11

¹⁻² Tã nhûm amgrã pê 14 nê hapêx nhûm Tirtûm akupÿm Jerujarê hwÿr inhmê pa ma akupÿm mō. Panãpe nê Xitre mē pa mē mō nê mē hwÿr pøj. Hãmri nê Kris kwÿ hkrãhtûmjê hwÿr mra nê mē kãm amnhî jarê. Mē tapxipixjê mã amnhî jarê nê ixte Ijaew kêt xwÿnhjê mã Jejus kapêr jarênh o ixpa hã amnhî jarê. Na pa pre ra amnhî kukamã ijamaxpêr o:

—Koonên. Kot pa apu mē kãm amnhî jarê nhûm mē inhma nê ixte Tirtûm kapêr kwÿm ri mē ahkre ho ixpa hã ixkamnhîx rÿ hã inhmã akir. Na pa hte Ijaew kêt xwÿnhjê mã Kris jarênh o ixpa no ãm mē ixpê Ijaew pyrà nê finat Mojes kapêr kôt mē kot amnhî my kwrÿt kã jakàr ã mē kãm karô hkêt nê. ãm mē kot Kris kôt amnhî xunhwÿr pix kaxyw na pa hte mē kãm hã karô ho ixpa. Tã kot paj Kris kôt mē ixkrãhtûmjê mã ja hã amnhî jarê nhûm mē inhma nê tanhmã hamaxpêr to nhûm ja mē kêp omnuj japêr nhûm mē tanhmã amnhî to nê ixte Kris kapêr jarênh o ixpaja nê ixkurê. Jakamã nhûm ra ixte mē kãm Kris kapêr jarênh o ixpa nhûm mē kot inhmar xwÿnhjaja ijarênh ma nê tee amnhî kukamã hamaxpêr o ra hkapri nê pa.

Anhÿr o ijamaxpêr. ³ Tã na prem ixte amnhî jarênhja ma nê ja nê tanhmã inhmã nê hkêt nê. Pa mē kãm amnhî jarênh pa nhûm mē inhma nhûm Ijaew kêt xwÿnhjaja kot amnhî jakàr kêtja nhûm mē kãm mex nê. Mē kêp tanhmã kute hkêt nê. Nhûm Ijaew kêt xwÿnh Xitre ixkôt pa nhûm mē kot omunh tâ kot mē ixpyrà nê amnhî my kwrÿt kã krãhyr ã kãm karô hkêt nê.

⁴ Tã nhûm mē kêp Jejus kwÿ hã amnhî jarênh o hêx xwÿnhjaja mē

ixtā akuprō. Nom hêx rom mē ixte Kris kôt amnhî nhîpêx ā mē ixpumunh pix kaxyw. Hāmri nē ixkapêr ma nē Xitre hā inhmā akir nē inhmā:

—Kwa na pre Xitre Jejus kôt pix mā amnhî xām nom finat Mojes kot mē pahpê Ijaew kot amnhî nhîpêx ā karō hkôt amnhî nhîpêx kêt nē. Kwa ja mex kêt. Na htem Jejus kôt amnhî xunhwÿ nē mǎānēn finat Mojes kapêr kôt amnhî nhîpêx. Jakamā kwa kām anē kē amnhî my kwryt kà krāhta. Finat Mojes kot mē panhîgêjtjē mā hā karō xā hkôt.

⁵ Anhÿr tā pa prem mē kuma nē ām mē kuma. Kot pa ri mē kām ja hā karō hkêt nē. Ām Jejus kapêr kôt pix mā kot puj mē amnhî nhîpêx o papa nē finat Mojes kapêr mē Jejus kapêr o papihkār kêt nē. Kot puj mē anhÿr o Jejus kapêr o ahkà nhūm ja mex kêt nē. Jejus kapêr kām mo mē kot mēmy kwryt kà jakār ā mē kām karō? Amrakati. Jakamā na pa pre ām mē pano kupyr o mē pa xwÿnhtajê kapêr ma nē ām mē kuma.

⁶ Tā pa pre ra Ijaew kwÿ pē Jejus kôt ixkwÿ hkrāhtūmjē mā amnhî jarēnh pa. Tanhmā ixte Ijaew kêt xwÿnhjê mā Jejus kapêr jarēnh to hā mē kām amnhî jarē nhūm mē inhma nhūm ja mē kām mex nē. Jakamā Ijaew kêt xwÿnhjaja kot mē ixpê Ijaew pyrā nē finat Mojes kapêr kôt amnhî nhîpêxja nhūm mē tanhmā mē kaxyw inhmā hā karō hto hkêt nē. Tirtūm na hte mē kēp mē hkrāhtūm ā mē omunh xā hkôt mē hkwyjê rom tanhmā mē ho mex to hkêt nē. Na hte mē pahpiitā mē panhîpêx o xspēn pyrāk. Jakamā na pa hte ijaxwÿja Jejus kôt mē ixkrāhtūmjaja kot amnhî to rax o ijakrenh ā tanhmā ijamaxpêr to hkêt nē. ⁷ Na pa pre mē kām amnhî jarēnh pa nhūm mē inhma nē xspēn mā:

—Nā ām hāmri na pre Tirtūm ahpÿnhā Pawre mē Simāw Pêtre wa

kām wa àpēnh ā karō nē Ijaewjê hwÿr Simāw Pêtre mē nē axtem Ijaew kêt xwÿnhjê hwÿr Pawre mē. Wa kot ahpÿnhā mē hkôt mē kām Jejus kapêr jarēnh o ri pa kaxyw. Nā ām hāmri na hte wa ā amnhî nhîpêx anhÿr o pa. Nā ja mex. Anē.

⁸ Ra Tirtūm kot Ijaew wÿr Simāw Pêtre mēnh tā hpānhā Ijaew kêt xwÿnhjê kaxyw pa ixām. ĩ hā wa ixte mē kām Jejus kapêr jarēnh o ri mē hkôt wa ixpa kaxyw. ⁹ Jakamā nhūm mē ixkrāhtūm Xiakre mē Simāw Pêtre mē Juāwja ixte mē kām amnhî jarēnh ma nē hkīnh nē. Tirtūm kot ixto mex nē Ijaew kêt xwÿnhjê hwÿr inhmēnh ā ixte amnhî jarēnhja ma nē hkīnh nē. Hāmri nē Panāpe mē wa inhmā kapêr nē wa inhmā:

—Nā ām hāmri. Kot puj xep mē anē. Ka mē Panāpe wa kot kaj wa ma Ijaew kêt xwÿnhjê hkôt mē kām Jejus kapêr jarēnh o ri apa. No mē pajaja kot paj mē axtem mē pahkwÿ Ijaew kôt harēnh o ri ixpa. Ā kot puj mē ahpÿnhā mē hwÿr papa anē. ¹⁰ Nom kêr ka wa inhmar kumrêx. Kêr ka wa mē ixpyrā nē Kris kôt mē pahkwÿjê pē amrakati xwÿnhjê ho mex o ri apa. Mēmoj to mē kutā anojarêt rāhā ho ri apa.

Anhÿr o wa inhmā kapêr pa wa mē kuma nē mē kām:

—Tôe. Nā kot paj wa anē. Ra ā wa ixte amnhî nhîpêx anhÿr kaxyw kēnā. Anē.

Pawre kot Simāw Pêtre mā àkjêr ā harēnh

Atre 10; Rômān 3.21-31, 6.1-14

¹¹⁻¹⁴ Tā nhūm Simāw Pêtreja man mē ixwÿr krī pē āxiok wÿr mō. Nē jar mē ixkôt ri pa. Ixpyrā nē kēp Ijaew tā Kris kôt Ijaew kêt xwÿnhjê hkôt pa nē mē kutā apkur o pa. Ixpyrā nē àmnhix ri mē kutā apkur o ri mē hkôt pa. Ijaew kêt xwÿnhjaja kot amnhî my kwryt kà jakār kêt jakamā na pa htem mē kutā ixāpkur kêt nē. Tā ra mē ixte Kris kôt amnhî xunhwÿr jakamā

ja mē ixpē tanhmā kute hkēt. Na pa htem ixàmnhīx mē hkôt ixpa nē mē kutā apku. Ra mē ixte Kris kôt amnhī xunhwÿr kēnā kot pa hkēt ri mē hkôt ixpa hkēt. Na pa htem ixàmnhīx mē hkôt tanhmā amnhī nhīpēx to ho ri ixpa.

Tā nhūm Xiakre kot mē ixwÿr mē rēnh xwÿnhjaja haxwÿja mē ixwÿr mō. Mē ixpyrà nē mē kēp Ijaew tā mē ixpyrà nē Kris kôt amnhī xunhwÿ. Jakamā ra mō nē mē ixwÿr pōj. Hāmri nhūm Simāw Pētre mē omu nē mē umaj axte Ijaew kēt xwÿnhjē kutā apkur kēt nē. Axtem nē ōja py nē o tē nē mē hkàx ā ahte apkur o nhÿ. Hāmri nhūm ra mē ixri Ijaew kwÿ pē Kris kôt mē pahkwÿjaja ja hā omu nē piitā urāk nē ā amnhī nhīpēx anē nē Simāw Pētre ri Ijaew kēt xwÿnhjē hkàx ā apkur o hkrī. Nhūm ixkôt pa xwÿnh Panāpeja haxwÿja ja hā mē omu nē mē urāk nē ā amnhī nhīpēx anē nē mē hkàx ā apku. Hāmri pa tee ri ja hā mē omu nhūm ja inh mā mex kēt nē. Na prem ā amnhī nhīpēx anhÿr o Tirtūm kapēr ā kagā htūm kamā mē ujarēnh mex kwÿm ri amnhī nhīpēx. Jakamā pa ā mē kot amnhī nhīpēx anhÿrja nē Simāw Pētre mā ixkapēr. Mē piitā mē noo mā xa nē ā kot amnhī nhīpēx anhÿrja nē kām ixkapēr nē kām:

—Tk. Kwa nā Simāw Pētre. Ri ā amnhī nhīpēx anhÿr kēt nē. Pahpē Ijaew tā kormā pahkwÿjaja hpōx kēt ri ka hte ixpyrà nē axàmnhīx Ijaew kēt xwÿnhjē kutā axàpkur o ri apa. Tā amnhī wÿr mē pahkwÿjē pumu nē axtem nē mē hkàx ā axàpkur o akrī. Kwa nā na ka ā amnhī nhīpēx anē nē ra axtem amnhī nhīpēx. Te ate mē kām akapēr nē mē kām: “Kot kaj mē ixpyrà nē amnhī my kwÿrēt kā jakā pa rī mē akôt ri ixpa nē mē akutā ixàpkur o ixpa.” Anhÿr pyrāk. Kwa ja mex kēt.

15 —Mē pahpē Ijaew na pu htem mē kēp Ijaew kēt xwÿnhjē jarēnh

o: “Mē kot mē pahte amnhī nhīpēx kôt amnhī nhīpēx kēt xwÿnhjaja.” Anē. 16 Tā mē pahpē Ijaew tā na hte Tirtūmja mē pahte mē panhīgēt kot amnhī nhīpēx kôt mē pahte amnhī nhīpēx ā mē pahpumunh kôt mē pahto hkra hkēt nē. Ra mē pahte ja pumunh mex. Ām mē pahte amnhī kaxyw Jejus Kris kôt pajamxpēr ā mē pahpumunh kôt pix mā na hte mē pahto hkra. Kot pu mē amnhī kaxyw hkôt pajamxpēr nhūm ja hā mē pahpumunh kôt pix mā mē pahto hkra.

17 —Mē pahpē Kris kwÿ jakamā na hte Tirtūm amnhīm mē pamex ā mē pajarē nē mē pahte amnhī tomnuj xwÿnh kēt ā mē pajarē. Jakamā na pu htem paxàmnhīx ri Ijaew kēt xwÿnhjē kot Kris kôt amnhī xunhwÿr xwÿnhjē hkôt ri papa ho papa. Ra Tirtūm kot mē pahpyrà nē amnhīm mē mex ā mē harēnh kēnā. Tā koja mēhō kormā ja mar kēt nē tanhmā hā mē pajarēnh to nē mē pajarēnh o: “Tk. Ra mē kot amnhī kaxyw Kris kôt hamxpēr tā axtem nē Ijaew kēt xwÿnhjē hkôt ri pa. Jakamā arī mē kot amnhī tomnuj xwÿnh kēnā.” Anhÿr o mē pajarēnh japēr. Nom ām mē pahte amnhī tomnuj xwÿnh ā mē pajarēnh kaprÿ. Na pu htem Kris kôt amnhī nhīpēx nē ra tām amnhī nhīpēx mex o papa. 18 No kot pu mē hkôt ri amnhī nhīpēx o papa htā tanhmā pajamxpēr to nē pahte amnhī nhīpēx tūm o awjanā hāmri nē amnhī tomnuj tÿx kumrēx.

19 —Tā tanhmā kot puj wem amnhī to nē mē panhīgēt kot amnhī nhīpēx piitā hkôt amnhī nhīpēx mex o ri papa? Na pu htem pajamxpēr o: “Kot paj ā amnhī nhīpēx anē nē ā amnhī nhīpēx anē nhūm Tirtūm ja hā ixpumu nē amnhīm inh mex ā ijarē.” Anhÿr o pajamxpēr. Hāmri nē finat Mojtes kot mē panhīgētjē mā kapēr piitā hkôt ri mnhī nhīpēx o papa

nom tōhā hkwým ri tanhmā amnhī tomnuj to. Jakamā nhūm Tirtūm ja hā mē pahpumunh kōt mē pamex ā mē pajarēnh kēt nē. Kapēr ā kagā htūm kot ā ja jarēnh kot anhÿr. Nom kot puj mē amnhī kaxyw Kris kōt pajamaxpēr nhūm ja hā mē pahpumunh kōt amnhīm mē pamex ā mē pajarē. Hāmri pu mē Tirtūm kōt amnhī nhīpēx o ri papa nē axte mē pahpē Ijaew nhīgētjē kot amnhī nhīpēx kōt amnhī nhīpēx hkēt nē. Te ra mē pahtyk nē axte hkōt amnhī nhīpēx kēt pyrā nē pānhā Tirtūm kapēr kōt pix mā ri amnhī nhīpēx o ri papa.

²⁰ —Nē na prem pī kahpa hā Kris nhō nē kupī nhūm mē pahte amnhī tomnuj te ĩhkō hā jēt nē haxwÿja htyk pyrāk. Jakamā na pu htem amnhī tomnuj kaga nē Kris kōt amnhī xunhwÿ nhūm Karō mē pahkarōm agjē pu mē te Jējus Kris kot amnhī nhīpēx pyrāk o amnhī nhīpēx o papa. Jao hpānhā mē pahte amnhī nhīpēx nyw pix o amnhī nhīpēx o ri papa. Kris kām hprām xā hkōt pix mā tanhmā ri amnhī nhīpēx to ho papa. Kris kēp Tirtūm Kra htā kām mē pajapē kamā mē panē htyk jakamā na pu htem amnhī kaxyw kōt pix mā pajamaxpēr rāhā ho papa.

²¹ —Ām hāmri na pre Tirtūm mē pahto mex kumrēx nē mē pahwÿr Krisja mē nhūm mē pahwÿr wrÿ nē mē panē ty. Tā na pa pre kapērja ma nē mar tÿx nē hā ri ixpa nē ho ijamakētkati hkēt nē. Tā kop apu Tirtūm kot mē pahte mē panhīgētjē kot amnhī nhīpēx o amnhī nhīpēx ā mē pahpumunh kōt mē pamex ā mē pajarēnh ronhÿx pre Krisja ām mē panē htyk kaprÿ. Mo kaxyw nhÿx pre mē panē ty? Anē.

Ā na pa Simāw Pētre mā ixkapēr anē nhūm mē piitā apkur pē hā inhmar o hkrī.

3

Mē pahte amnhī krā hkōt pahpē Tirtūm kra hkēt ā mē pajarēnh

*Karatas 5.16-23; Epes 2.8; Piri-
pos 3.9; Sikūn Ximotre 1.9; Xitre 3.4-
7*

¹ Kwa Karatas nhō xwÿnhjaja. Te ri mē ajamaxpēr kēt kumrēx pyrāk. Amnepē mā mē awÿr inhmōrta ā na pa pre mē amā tanhmā Kris htykja jarēnh to. Pī kahpa hā mē panē htyk ā harē ka mē aprī hā inhma. Tā nhūm Tirtūm kapēr jarēnh o mē hēx xwÿnhjaja ixpānhā mē awÿr mra nē tanhmā mē amā ujarēnh to ka mē ama nē mē ajamaxpēr o apihkār rax nē. Jao axte Kris tyk mā ajamaxpēr kēt nē. ² E mē inhmā mēmoj jarē. Mēmoj tā mē apumunh kōt na pre Tirtūm mē awÿr amnhī Karō rē nhūm mē awÿr agjē? Xā mē anhīgēt kot amnhī nhīpēx kōt mē ate amnhī nhīpēx ā mē apumunh kōt? Nā na pre ja hā mē apumunh kōt mē awÿr rēnh kēt nē. Na ka prem Kris jarēnh ma nē amnhī kaxyw hkōt ajamaxpēr nhūm ja hā mē apumunh kōt mē awÿr kurē nhūm mē awÿr agjē.

³ Na pu htem amnhī krā hkōt tanhmā amnhī nhīpēx to ho pahpē Tirtūm kra hkēt nē. Tirtūm Karō pix kukwak ri na pu htem pahpē hkra. Tā ka mē axtem nē ajamaxpēr o:

—Nā Tirtūm ra kot ixto hkra jakamā kot paj arī ri mē inhīgēt kot amnhī nhīpēx kōt amnhī nhīpēx o ixpa rāhā nē inhmex kumrēx nē ri ixpa. Anē.

Kwa ā mē ajamaxpēr anhÿrja mex kēt. ⁴ Mē akwÿ kot Kris ā mē atomnuj tā ka mē amnhī xā htÿx kamā ajamak o ri apa htā Kris kaga hkēt nē. Tā ra axtem nē mē kapēr o mē hēx xwÿnhjē jamaxpēr kōt ajamaxpēr o te Kris ā amnhī xā kamā ajamak kaprÿ pyrāk. Kwa nā mē ri mē hkōt ajamaxpēr kēt nē. ⁵ Na pre Tirtūm mē awÿr amnhī Karō rē nhūm mē awÿr agjē nē mē amā aa mē ate mēmoj pumunh kēt

kwý ho anhÿr o ri mẽ akamã pa ho pa. Xà mẽ anhÿgêť kot amnhĩ nhĩpêx kôt mẽ ate amnhĩ nhĩpêx ã mẽ apumunh kôt na pre ã mẽ amã amnhĩ nhĩpêx anê? Nà ja kôt kêt. Æm mẽ ate Kris kapêr mar mẽ amnhĩ kaxyw hkôt ajamaxpêr ã mẽ apumunh kôt pix mã na pre ã mẽ amã amnhĩ nhĩpêx anê.

Tĩrtũm kot amnhĩ tã finat Apraãw pumunh kôt mex ã harênh

Rômãn 4.1-25; Xiakre 2.23

⁶ Nê mẽ ixpê Ijaew pãr krax finat Apraãw na pre amnhĩ kaxyw Tĩrtũm kôt hamaxpêr nhũm amnhĩ tã omu mẽ kãm:

Nà ate amnhĩ kaxyw inhmã ajamaxpêr tÿx jakamã na pa amnhĩm amex ã ajarê. Amex kumrêx Apraãw.

⁷ Anhÿr o kãm kapêr jakamã mẽ pahte urak mẽ amnhĩ kaxyw hkôt pajamaxpêr xwÿnhjaja te mẽ pahpê Apraãw tãmnhwÿ pyrak. ⁸ Nê mẽ apê Ijaew kêt xwÿnhjaja. Na hte Tĩrtũm mẽ pahto hpimrãk tã mẽ pahte amnhĩ kaxyw kãm pajamaxpêr ã mẽ pahpumunh kôt amnhĩm mẽ pamex ã mẽ pajarê mẽ mẽ pahto hkra. Amnepêm na pre Apraãw mã kapêr mẽ kãm:

E ate amnhĩ kaxyw ixkôt ajamaxpêr jakamã kot paj akukwak ri pyka piitã hkôt mẽ piitã mẽ ho mex mẽ.

Anhÿr o kãm kapêr jao mããnên mẽ apê Ijaew kêt xwÿnhjê jarê.

⁹ Jakamã mẽ pahte Apraãw pyrã mẽ amnhĩ kaxyw Tĩrtũm kôt pajamaxpêr xwÿnhjaja kot puj mẽ pahpiitã urak mẽ pamex kumrêx mẽ mẽ papa ho papa.

Tanhmã Tĩrtũm kot mẽ panê pĩ kahpa hã jêt xwÿnh nhĩpêx to hã harênh

Rômãn 4.14, 7.10; Wam Korĩť 15.56

¹⁰ Nê koja mẽhõ hamaxpêr o:

—E kot paj finat Mojes kapêr kôt ri amnhĩ nhĩpêx o ri ixpa nhũm

Tĩrtũm ja hã ixpumu mẽ amnhĩm inhmex ã ijarê mẽ ixto hkra. Anê.

No ãm ja kot anhÿr kêt. Tĩrtũm kapêr ã kagã htũm kot ja jarênh kot: Ixte amnhĩm mẽ mex ã mẽ harênh kaxyw mẽ kot Mojes kapêr kôt amnhĩ nhĩpêx xwÿnhjaja koja mẽ ãm mẽmoj pixire mẽ hirõp kuhê. Rÿ mẽmoj pixire mẽ hkôt amnhĩ nhĩpêx kêt pa ja hã mẽ omu mẽ hã mẽ homnuj tÿx kumrêx.

Anhÿr jakamã tanhmã kot pu mẽ amnhĩ to mẽ Mojes kapêr piitã hkôt amnhĩ nhĩpêx mẽ aa ho pixi mẽ hirõp pakuhê hkêť? Nà kot puj mẽ ho anhÿr kêt mẽ. Kot puj mẽ tee ri pamã ja ho anhÿr prãm kaprÿ. Jakamã Tĩrtũm kot amnhĩm mẽ mex ã mẽ harênh kaxyw mẽ kot ã amnhĩ nhĩpêx anhÿr mã xwÿnhjaja koja mẽ mex kêt mẽ.

¹¹ Na hte Tĩrtũm mẽ kot finat Mojes kapêr kôt amnhĩ nhĩpêx o mẽ pa hã mẽ omunh xà hkôt mẽ mex ã mẽ harênh kêt mẽ. Æm mẽ kot amnhĩ kaxyw hkôt hamaxpêr xwÿnhjaja na hte ã mẽ harênh anê. Kapêr ã kagã htũm kot mẽ harênh kot:

Mẽ kot amnhĩ kaxyw ixkôt hamaxpêr xwÿnhjaja na pa hte mẽ mex ã mẽ harênh o ixpa. Mẽ tapxipixjaja koja mẽ nhÿrmã Ixkra mẽ wa ixri mex kumrêx mẽ htĩr tũm mẽ pa ho pa. Anê.

¹² Nom na htem amnhĩ kaxyw Tĩrtũm mã hamaxpêr pê finat Mojes kapêr kôt amnhĩ nhĩpêx o pa hkêť mẽ. Mojes kapêr ã kagã kot ja jarênh kot:

Mẽ kot ixkapêr piitã hkôt amnhĩ nhĩpêx mex o mẽ pa xwÿnh pixjaja koja mẽ htĩr tũm mẽ pa ho pa. Anê.

¹³ Tã kot pu mẽ ãm kapêr o pixire mẽ hirõp pakuhê hãmri mẽ mÿrapê pahtĩr tũm mẽ papa hkêť mẽ. Nê hpãnhã mẽ kot amnhĩ xà htÿx kamã hamak tũm xata hwÿr ma papa. Ja pymaj na pre Krisja

ĩ ho mẽ pahwÿr wrÿ nẽ mẽ pahte amnhĩ tomnuj mÿrapê mẽ panê ty. Tirtũm kot mẽ pahte amnhĩ tomnuj mÿrapê tanhmã mẽ pahto pymaj ã mẽ panê htyk anẽ. Jakamã nhũm Tirtũm mẽ pahte amnhĩ tomnuj ã mẽ pahpumunh kôt mẽ pakuhpa hã Kraja homnuj nẽ. Kapêr ã kagã htũm kot ja jarẽnh kot:

Pĩ kahpa hã jêt xwÿnhhta na pre Tirtũm homnuj tÿx kumrêx. Anẽ.

Mẽ kot amnhĩ kaxyw Kris kôt mẽ hamaxpêr xwÿnhjê jarẽnh

¹⁴ Tã ã Jejus Kris kot mẽ panê amnhĩ nhĩpêx anhÿr kukwak ri na pre Tirtũm kot Apraãw nhĩpêx pyrà nẽ mẽ ixpê Ijaew pix o mex kêt nẽ. Mããnen mẽ apê Ijaew kêt xwÿnhjê ho mex nẽ. Jakamã koja mēhō. Ijaew ō rÿ Ijaew kêt xwÿnhjê hō amnhĩ kaxyw Kris kôt hamaxpêr nhũm Tirtũm hã omu nẽ ho hkra nẽ hwÿr Karō mẽ nhũm kãm axã.

Tirtũm kot finat Mojes kukamã mẽ pahto mex ã harẽnh

Rômãn 3.19-20, 5.20-21, 11.32; Eprêw 6.13-18

¹⁵ E ixkrãmnhwÿjaja. Kot paj ixprĩ hã mẽ amã ja jarê ka mẽ inhma. Nã koja mēhō wa hamêxkrut nẽ mẽmoj tã axpẽn ma. Pika hã war axpẽn ma rÿ mẽmoj tã war axpẽn ma. Hãmri nẽ wa hã axpẽn mar pa nhũm ja ãm hãmri nẽ ãm rãhãã. Koja nhãm mēhō tẽ nẽ axtem tanhmã harẽnh to hkêt nẽ. ¹⁶ Ja pyrà nẽ na hte ã Tirtũm mẽmoj tã amnhĩ jarẽnh anẽ. Na hte mẽmoj jarê nhũm arĩ rãhãã. Na hte jarãhã mẽmoj jarê nhũm jãã nhũm axtem hijuk ri mẽmoj jarẽnh kêt nẽ. Na hte ãm kapêr pÿnh nẽ. Tã na pre Apraãw mã hkanrêhã htãmnhwÿjê hō kukwak ri Apraãw o mex ã amnhĩ jarê. Tãmnhwÿ piitã kukwak ri ho mex ã amnhĩ jarẽnh kêt nẽ. ãm kanrêhã htãmnhwÿ Krisja pix kukwak ri ã Apraãw o mex ã kãm amnhĩ jarẽnh anẽ.

¹⁷ E kot paj hpãnhã axtem tanhmã mẽ amã harẽnh to. Na hte Tirtũm kot mẽmoj tã amnhĩ jarẽnh xã hkôt tanhmã mẽmoj to ho pa rãhã nẽ. ã na pre finat Apraãw mã kot ho mex ã amnhĩ jarẽnh anẽ. Tã ra hã amgrã pê 430 nẽ hapêx nhũm hpãnhã finat Mojes mã kapêr. Kot mar nẽ amnhĩ xō ri Ijaew mã harẽnh o ri mẽ hkôt pa kaxyw. Tã no nhũm ra kot Apraãw mã mẽmoj jarẽnhhta arĩ hã no htÿx rãhã nẽ aa ho hamakêtkati hkêt nẽ. Nẽ kot Mojes mã tanhmã kapêr toja nẽ Apraãw mã tanhmã kapêr toja nhũm hamẽ wa ho hamakêtkati hkêt nẽ. Nhũm wa hamẽ arĩ rãhã ho rãhã. ¹⁸ Tã mẽ ano kupyr o ri mẽ pa xwÿnhjaja na htem htÿx tanhmã mẽ amã harẽnh to nẽ mẽ amã harẽnh o:

—Kwa kot puj mẽ Mojes kapêr kôt amnhĩ nhĩpêx o papa hkêt nẽ nhũm Tirtũm tee ri ja hã mẽ pahpumu nẽ mẽ pahto mex kêt nẽ. Anẽ.

Nom ja kot anhÿr kêt. Kop apu ã kot anhÿr ronhÿx Tirtũm ra wam kot tanhmã Apraãw mã kapêr tota ra ho hamakêtkati. Nom na hte arĩ kãm hamaxpêr rãhã nẽ ho pigrãnh nẽ ho hapêx kêt nẽ. Na pre Apraãw mã kãm:

Kot kaj amnhĩ kaxyw ixkôt ajamaxpêr hã kot paj ato mex kumrêx. Anẽ.

Tã kot ho mex ã amnhĩ jarẽnhja arĩ rãhãã. Na hte arĩ mẽ kot amnhĩ kaxyw hkôt hamaxpêr xwÿnhjê ho mex nẽ. Nom mẽ kot Mojes kapêr kôt amnhĩ nhĩpêx o pa hã mẽ omunh xã hkôt mẽ ho mex kêt nẽ. ãm mẽ kot amnhĩ kaxyw hkôt hamaxpêr xwÿnh pixjaja na hte mẽ ho mex.

Mo kaxyw na Mojes kapêr ã kagã?

Rômãn 3.20, 5.20, 7.7

¹⁹⁻²⁰ Tã mo kaxyw na Mojes kapêr ã kagãja? Nã mẽ pahte tanhmã amnhĩ tomnuj to ho papa hã amnhĩ pumunh nhũm Tirtũm

kot ã më pahte amnhĩ nhĩpêx anhÿrja nê më pahkurê kaxyw. Na pre Mojes Tirtùm nhÿ hã mëmoj nê më pahkurê. Më pahte axpên pê paxàhkĩnh nê më pahkurê. Nê më pahte axpên mã paxêx o ri papa nê më pahkurê. ã mëmoj nê më pahkurê anê. Më pahprĩ hã kapêr mar nê tãm amnhĩ nhĩpêx o papa kaxyw. Ja kaxyw na pre Tirtùm Ijaew kaxyw Mojes mã kapêr gô. Na pre kaxkwa rùm kapêr o wrÿk xwÿnhjaja kumrêx kãm harê nhùm kuma nê Ijaew mã hã kagà. Jakamã na htem harênh o: “Mojes kapêr” anhÿr o harê.

Tã Apraãw kanrêhã htãmnhwÿ Krisja kormã kator kêt ri nhùm Ijaew Mojes kapêr ma nê hkôt ri amnhĩ nhĩpêx o pa. Tã nhùm Krisja kator o Mojes kapêr o hapêx. Ra Tirtùm kot Kris kukamã ho mex ã amnhĩ jarênh xà hã arĩgrota kator më nhùm Mojes kapêr hapêx.

No na pre Tirtùm Ijaew mã ujarênh kaxyw tãm më kãm ujarênh kêt nê. Kapêr o wrÿk xwÿnhjê mã na pre harê nhùm më amnhĩ xô ri Mojes mã më kaxyw kãm awjarê. Kot më ô ri më kãm harênh kaxyw. No Apraãw mã na pre Tirtùm tãm kapêr. Na pre hwÿr kapêr o wrÿk xwÿnhjê hõ mênh kêt nê. Tãm kot kãm kapêr jakamã kapêrja na mex o Ijaew kaxyw Mojes mã kapêr jakrenh.

²¹ Nê na pre Tirtùm tanhmã më pamã kapêr o amnhĩrit to nê më pamã:

—E kot paj amnhĩ kaxyw ixkôt më ajamaxpêr ã më apumunh kôt pix mã më amex ã më ajarê.

Anhÿr o më pamã kapêr. Tã xà na pre kapêrja nhĩjuk ri axte amnhĩ jarê nê amnhĩ jarênh o:

—E kot paj më ate Mojes kapêr kôt amnhĩ nhĩpêx mex o apa hã më apumunh kôt më amex ã më ajarê.

Anhÿr o më pamã kapêr? Xà na hte mëmoj jarê nhùm jãã nhùm

ra hijuk ri axtem mëmoj jarê? Nã Tirtùm kapêr ãm hpÿnh kênã. Kop ãm më pahte Mojes kapêr kôt amnhĩ nhĩpêx o papa hã më pahpumunh kôt më pamex ã më pajarênh ronhÿx më pamã:

—ãm ja pix ã më apumunh kôt kot paj më amex ã më ajarê. Anê.

²² Nom na pre ã kapêr anhÿr kêt nê. Kapêr ã kagà htùm kot ja jarênh o:

Më apiitã më ate amnhĩ tomnuj o më apa xwÿnh na ka më.

Anhÿr jakamã tanhmã kot puj më amnhĩ to nê Mojes kapêr kôt amnhĩ nhĩpêx mex o papa? Më pahpiitã më pahte amnhĩ tomnuj xwÿnh kênã. Më pahte kapêr piitã hkôt amnhĩ nhĩpêx kêt jakamã koja Tirtùm ja hã më pahpumunh kôt më pamex ã më pajarênh kêt nê. Kojã ãm më pamã kapêr o:

—Kot kaj më amnhĩ kaxyw Jejus Kris mã ajamaxpêr pa ja hã më apumunh kôt më amex ã më ajarê nê më ato ixkra nê më ato mex o ri ixpa. Anê.

Mojes kapêr te kêp Kris xwÿj ri më hamãr xwÿnh pyrãk ã harênh

Rômãn 10.4; Karatas 4.1

²³ Nê kormã Kris kot më pahwÿr wrÿk nê më panê htyk xwÿj ri na pre Ijaew Mojes kapêr ma nê hkôt amnhĩ nhĩpêx o ri pa. Nhùm kapêrja te kot amnhĩm më unênh nhùm më kot hkôt pix mã amnhĩ nhĩpêx o ri pa pyrãk. Na prem Tirtùm kot më mex ã më harênh prãm xaj ãm pix ma nê hkôt amnhĩ nhĩpêx o pa. Nom kapêr piitã hkôt amnhĩ nhĩpêx mex kêt nê. ²⁴ Te mëhprĩre nhùm Mojes kapêr te kêp më hamãr xwÿnh pyrãk. Mëhprĩ jamãr xwÿnhjaja na htem mëhprĩjê pumu nê tãm më kot amnhĩ nhĩpêx kaxyw tanhmã më ahkre hto ho më hkôt pa. Ja pyrã nê na pre Ijaew tãm amnhĩ nhĩpêx o pa kaxyw Mojes kapêr ma nê hkôt amnhĩ nhĩpêx o ri pa. Jejus Kris kutêp ã amnhĩ nhĩpêx anhÿr o ri pa. Tã

nhùm Jejus tãm kaxkwa rùm wrý pa mē ixkwý pixjaja mē ixkwýjé rom amnhí kaxyw hkôt ijamaxpēr. Hāmri nhùm Tirtùm ja hã mē ix-pumunh kôt mē inhmex ã mē ijarēnh kurê kumrēx.

Jejus kukwak ri mē pahpê Tirtùm kra ã mē pajarēnh

Juãw 1.12; Rômãn 8.14; Epes 1.5

²⁵⁻²⁶ Tã ra mē ixte amnhí kaxyw Kris kôt ijamaxpēr jakamã na pre Tirtùm mē ixto hkra pa mē ra te ixpê hkra xàptår pyræk o amnhí nhípêx nē kapēr kôt amnhí nhípêx mex o ri ixpa. Jao Mojes kapēr kaga. Te mēhprîre ra mē ahkre kamã mē àptår nē kot mē ahkre xwýnh kaga pyræk. Hāmri pa mē ixpê Tirtùm kra xàptårjaja hāmri axte Mojes kapēr kôt amnhí nhípêx hkêt nē.

²⁷ Tã mē kajaja na ka pre mē ix-pyrã nē amnhí kaxyw Kris kôt ajamaxpēr nhùm mē akwý kot mē apê Jejus kwý hã mē apumunh kaxyw nhùm mē akrã kumrã. Hāmri ka mē Jejus kot amnhí nhípêx kôt pix mã amnhí nhípêx o ri apa. ²⁸ Tã ra mē pahpê Jejus Kris kôt amnhí xunhwýr xwýnh jakamã na hte Tirtùm ahpyñhã ri tanhmã mē pakute hkôt mē pahpumunh kêt nē. Mē pahpê Ijaew rý mē pahpê Ijaew kêt xwýnhjaja. Rý mē pahpê nhãm mē kãm paxâpênh xwýnh rý amnhí mã mē paxâpênh xwýnh nhùm hte ja hã mē pahpumunh kôt tanhmã mē pajarēnh to hkêt nē. Rý mē anijê hkôt rý mē inhmyjê hkôt mē pahpumunh kôt tanhmã mē pajarēnh to kêt nē. ãm mē pahte Jejus Kris kôt amnhí xunhwýr ã mē pahpumunh kôt pix mã na hte ã mē pahpumunh o pa anê.

²⁹ Nē na pre Tirtùm Apraãw mã hkanrêhã htãmnhwý Jejus Kris o mex ã amnhí jarê. Tã Kris kēp mē panhõ Pahihti jakamã pu mē Tirtùm noo mã uræk nē te mē pahpê Apraãw tãmnhwý pyræk. Jakamã

koja Apraãw nhípêxta pyrã nē mē pahto mex rax nē.

4

Mojes kapēr te axte mē pah-pynênh kêt pyræk ã harēnh

Rômãn 7.1, 8.14-17; Karatas 3.23

¹ E kot paj axte mē amã tanhmã mēhprîjê jarēnh to ka mē inhma. Koja mēhõ ra hkra mã mēmo hikukrêx nhõr kaxyw. Hikukrêx nē õ pika. Õ mēmoj piitã õr kaxyw. No nhùm hkraja kormã hprîre nē hamaxpēr mex kêt jakamã nhùm kormã hprêk jamãr o pa. Nhùm hkraja arî te kãm àpênh o pa xwýnh kot amnhí nhípêx pyrã nē amnhí krã hkôt ri amnhí nhípêx o pa hkêt nē. Kormã hipêêxã kapēr kôt ri amnhí nhípêx o pa. Nhùm hipêêxãja kot kãm õ mēmoj piitã õr kaxyw no ãm kormã hprêk jamã. ² Tã kormã hkraja hprîre ri nhùm hipêêxã tanhmã amnhí to nē ty. Nom nhùm hkraja mýr pê kormã õ mēmoj o amnhiptår kêt nē. Kormã hprîre jakamã nhùm hipêêxã mýr pê kot kãm hamãr o pa xwýnhja kormã kãm hamãr o pa. Tã nhùm hipêêxã kot kãm amgrã jarēnh xwýnhhta kato nhùm tãm mēmoj piitã ho amnhiptã. Ra àptår mex nē hamaxpēr mex nē amnhim ho amnhiptår pa. ³ Tã Ijaew na prem ã amnhí nhípêx anê. Amnepêm kormã mē kot Mojes kapēr kôt ri amnhí nhípêx o pata ã na prem te mēhprîre hamaxpēr kēêta pyræk. Te kormã mē àptår kêt pyrã nē jar pika ja kamã mē kot amnhí nhípêx tùm kôt pix mã amnhí nhípêx o pa. Mē kot amnhí nhípêx tùm te kot amnhim mē unênh nē mē kãm ê pyræk o mē hipêx nhùm mē hkôt pix mã amnhí nhípêx o ri pa. ⁴ Tã nhùm Tirtùm kot Kra hkukamã mē pahwýr mēnh xã hã arîgrota kato hāmri nhùm mē pahwýr kumê nhùm mē pahwýr wrý nē mē pahpyrã nē mēhõ nhõhy

rũm kato. Nē mẽ pahpyrà nē gaa nē hprêk nē mẽ ixpê Ijaew rom Mojes kapêr piitã hkôt amnhĩ nhĩpêx mex kumrêx o ri pa. ⁵ Jao te kot Mojes kapêr pê mẽ papytãr pyrãk o mẽ panhĩpêx pu mẽ hpãnhã pahpê Tĩrtũm kra kaxyw. ⁶ Tã mẽ ixpê Ijaew kwỳjaja nē mẽ apê Ijaew kêt xwỳnh kwỳjaja ra mẽ pahpê Tĩrtũm kra jakamã na pre mẽ pahwỳr Kra Jejus Karõja rē nhũm mẽ pamã agjê. Hãmri nē mẽ pamã kapêr o:

—Ra mẽ apê Tĩrtũm kra jakamã kêt ka mẽ kãm amnhĩ jarēnh kaxyw nē kãm: “Pa Papaj” anê. Kêt ka mẽ ã kãm akapêr anê. Anê.

⁷ Jakamã na pu mẽ ra te pahpê mẽ kãm paxãpênh xwỳnh pyrãk kêt nē. Ra mẽ pahpê Tĩrtũm kra jakamã na hte mẽ panhĩpêx o te Kra Jejus nhĩpêx pyrã nē mẽ pahto mex nē.

Mojes kapêr kôt mẽ kot amnhĩ nhĩpêx xwỳnhjê jarēnh

Sikũn Korĩt 11.3-4; Korosê 2.16-19; Eprêw 6.1; Wam Pêtre 1.14

⁸ Nē amnepê mã kormã mẽ ate amnhĩ kaxyw Jejus kôt ajamaxpêr kêt ri na ka prem Tĩrtũm jarēnh mar kêt nē. ãm atỳx ri sãnti mã mex ã harê nē kãm amnhĩ jagrer o ri apa. Nē amã mẽmoj kĩnh nē amã hprãm xàj tanhmã amnhĩ to hwỳr to ho ri apa. Te mẽ kãm mẽ ãpênh o mẽ pa xwỳnhjaja kot amnhĩ nhĩpêx pyrã nē sãnti mã tanhmã amnhĩ nhĩpêx to ho ri apa. Nom sãntija kêp Tĩrtũm kêt.

⁹ Tã ka prem Tĩrtũm jarēnh ma nē hkôt amnhĩ xunhwỳ nhũm amnhĩ tã mẽ apumu. Tã tãm kot amnhĩ kaxyw mẽ paxunhwỳr jakamã kwa mon ka mẽ ra axtem nē akupỳm sãnti hkôt amnhĩ nhĩpêx kaxyw? Nã mẽ ajamaxpêja mex kêt. Sãnti nhĩpêxta tanhmã koja amnhĩ to nē mẽ ato ajuta? ãm mẽ kot ãhkra ho hipêx pix jakamã hihtỳxti hã. Amari kuhê xã kamã kuhê ho kuhê xwỳnh kênã. Tã te kot akupỳm

amnhĩ kôt mẽ arēnh kaxyw pyrãk o mẽ anhĩpêx ka mẽ ra axtem nē akupỳm hkôt amnhĩ nhĩpêx kaxyw. Kwa nã mẽ ã ri amnhĩ nhĩpêx anhỳr kêt nē.

¹⁰ Nē na ka htem amnhĩ kukamã ajamaxpêr o:

—Na pre hte Ijaewjaja Mojes kapêr xã hkôt arĩgro hkwy hã axtem tanhmã amnhĩ nhĩpêx to nē mẽmo mytwrỳ hã tanhmã amnhĩ nhĩpêx to nē mẽmo amgrã hã tanhmã amnhĩ nhĩpêx to. Tã kot paj mẽ urãk nē ã amnhĩ nhĩpêx anhỳr o ixpa. Kê Tĩrtũm ja hã ixpumu nē inhmex ã ijarê. Anê.

Kwa mẽ ã ajamaxpêr anhỳr kêt nē. Mon ka htem axtem nē ri ã ajamaxpêr anê? Na hte Tĩrtũm ã mẽ pahte amnhĩ nhĩpêx anhỳr ã mẽ pahpumunh kôt mẽ pamex ã mẽ pajarēnh kêt nē. ¹¹ Na pa ja hã mẽ ajarēnh ma nē tee ri mẽ akukamã ijamaxpêr. Te ixte Tĩrtũm kapêr o mẽ ajahkre kaprỳ ho ri ixpa pyrãk.

Karatas nhõ xwỳnhjaja kot Pawre ho mex ã mẽ harēnh

Wam Korĩt 9.21-23

¹² Kwa ixkrãmnhwỳjaja. Ixpê Ijaew tã te ixpê Ijaew kêt pyrãk o amnhĩ nhĩpêx o ri mẽ apê Ijaew kêt xwỳnhjê hkôt ri ixpa. Jao Kris kapêr gryk ã mẽ inhĩgêtjaja kot amnhĩ nhĩpêx kaga nē axte hkôt amnhĩ nhĩpêx kêt nē. Tã kwa mẽ ixpyrã nē ã amnhĩ nhĩpêx anê. Wem ma amnhĩ to amõr gri kêt wehe. Wam ixte mẽ awỳr inhmõrta ã na pa pre mẽ amã Tĩrtũm kapêr jarēnh o ri mẽ akõt ixpa ka prem inhma nhũm ja mẽ amã mex nē ka mẽ ja hã tanhmã ixto hkêt nē. ¹³ Na pa pre ixãã nē mẽ awỳr mõ nhũm ixãja ixto htỳx nē pa tokyx ixkator nē ma akupỳm mẽ arũm inhmõr kêt nē arĩ mẽ amã Tĩrtũm kapêr jarēnh o ixpa. ¹⁴ Kormã ixã nē tanhmã ixkute htã ka prem ja hã ixpumu nē ixto mex nē ixkamã anhõkre kahak kêt nē. Na ka prem te ixto Jejus Kris nhĩpêx pyrãk o inhĩpêx. Nē te ixto Tĩrtũm

kapër o wrÿk xwÿnh nhÿpêx pyrâk o inhÿpêx. ¹⁵ Jao mẽ amâ ixkÿnh nê ã inhÿpêx anê mẽ amâ ixto mex pix prâm. Nê nhÿri ixpumu nê ixkamâ axukaprÿ nê inhmâ akapër o:

—Hêxta waa nê. Anopxâà. Inhmâ amnhÿ no kaxâr nê amâ òr prâm nom tanhmâ kot pa mẽ amnhÿ to nê hkapa nê amâ kugõ? Anê.

Nê mẽ amâ inhmâ mẽmoj mex pix nhõr prâm. Tã ra tanhmâ ajamaxpêr to nê axtem nê te mẽ amâ ixkÿnh kêt pyrâk o inhÿpêx.

Mẽ no kupyw xwÿnhjaja kot mẽ hamaxpêr o pihkâr ã mẽ harênh

¹⁶ Nê na pa pre ãm hãmri mẽ amâ Tÿrtùm kapêr jarênh o ri mẽ akôt ixpa. Nom ra mẽ amâ mar prâm kêt jakamâ na ka mẽ axtem nê inhÿpêx o te ixte mẽ akutã amnhÿ xãm pyrâk. ¹⁷ Mẽ amâ Tÿrtùm kapêr o mẽ hêx xwÿnhjaja te mẽ kãm mẽ akÿnh pyrâk o mẽ anhÿpêx no ãm mẽ kãm akÿnh kêt. Na htem mẽ amex kaxyw tanhmâ mẽ amâ kapêr to hkêt nê. ãm mẽ ate mẽ mar nê mẽ gryk ã ixkaga nê mẽ hkôt ri amnhÿ nhÿpêx o apa pix prâm xaj na htem mẽ akôt tanhmâ mẽ amâ hêx to ho pa. ¹⁸ Pa mẽ harênh ma hãmri nê mẽ kamâ inhgryk o ã mẽ amâ mẽ harênh anhÿr kêt nê. Koja mẽhõ mẽ awÿr mra nê ixwakre kamã rÿ inhnoo mã mẽ amâ mẽmoj mex jarê nhÿm ja inhmã mex nê. No nhÿm mẽ amâ mẽ hêx xwÿnhjaja axtem nê mẽ ajamaxpêr o pihkâr pix kaxyw na htem mẽ awÿr mrar nê mẽ amâ ã ujarênh o pa anê.

Pawre kot tee ri mẽ hkukamã hamaxpêr ã harênh

¹⁹ Te mẽ apê ixkra pyrâk jakamã na pa hte mẽ ate amnhÿ nhÿpêx ã mẽ apumu nê tee ri ijamaxpêr nê ixkaprÿ htÿx nê. Te nhÿhÿnh ixà htÿx nê ixte amnhÿ xà htÿx kamã ijamak o ri ixpaja pyrâk. Rÿ te mẽ hpÿjagri ho mẽ hikwÿ xwÿnh õhy xà htÿxta pyrâk. Mẽ ate Kris kôt

amnhÿ nhÿpêx mex o apa hprãm xaj na pa hte ã amnhÿ nhÿpêx anhÿr o ri ixpa. ²⁰ Hêxta waa nê. Kop apu ra mẽ awÿr ixpõx nê mẽ akôt ixpa ronhÿx pa ixkÿnh tÿx kumrêx. Nhÿx pa ra ixprÿ hã mẽ amâ ixkapêr ka mẽ inhma. Nê amnhÿ tã inhmã mẽ akÿnh tÿx ã mẽ akamã inhgryk kêt ã ixpumunh kurê kumrêx. No kaga pix kãm ixkapêrja ka mẽ kamã harê nom aprÿ hã inhmar mex kêt nê. Na pa tee ri mẽ akukamã ijamaxpêr o ixkaprÿ htÿx nê ixpa.

Mojes kapêr kôt mẽ kot amnhÿ nhÿpêx xwÿnhjê jarênh

Eprêw 12.18-29

²¹ Kwa mẽ amâ arÿ Mojès kapêr kôt amnhÿ nhÿpêx o ri mẽ apa hprãm xwÿnhjaja. Mãn ka mẽ kormã aprÿ hã Mojès kapêr piitã mar par kêt jakamã na ka mẽ amâ hkôt amnhÿ nhÿpêx prâm. E pa ixprÿ hã mẽ amâ tanhmã harênh to ka mẽ inhma. ²² Nã Tÿrtùm kapêr ã kaga htÿm kot finat Apraãw jarênhja. Na pre hkra myja wa hamêkrut. Prõ Sara kamã ja nê kot amnhÿm haprõr nhÿm ri kãm àpênh o pa xwÿnh Aga kamã ja. ²³ Kãm àpênh xwÿnh kamã ja na pre mẽ pahpiitã mẽ pahpyrà nê amarÿ kato. No hprõ Sara kamã ja. Sara na pre ra hpigêx tÿx nê. Ra hkamrõ hkêt rÿy nê pa htã nhÿm Tÿrtùm kot wa hkra hkukamã wa kãm ujarênh xà hkôt nhÿm Apraãwja htu nhÿm wa hkrata kato. Tÿrtùm kot hkukamã wa kãm harênh xà hkôt nhÿm kamã hkra nhÿm kato.

²⁴⁻²⁵ Tã wa nita ã wa harênh kot anhÿr. Na pre Tÿrtùm mẽmoj jarê. Te ho wa uràk o wa harê no ãm hã kuxi nê ã wa harênh anê. Jakamã ni wa harênhja te kot Tÿrtùm kapêr pijakruuta pyrâk. Wam ni Agata te kot hixêt prêk pê Sinai nhÿmõk ã Tÿrtùm kot Mojès mã kapêrta pyrâk. Hixêtja pika pê Arap kamã na pre. Jakamã nhÿm Tÿrtùm Ijaew kaxyw Mojès mã kapêr nhÿm kuma nê amnhÿ xõ ri mẽ kãm hã

kagà. Tã na hte arĩ jarãhã mẽ hkwyjaja hamaxpēr o:

—E kot paj mẽ panhĩgēt finat Mojes kapēr kōt amnhĩ nhĩpēx o ri i xpa nhũm Tĩrtũm ja hã i xpumu mẽ amnhĩm inhmex ã ijarē mẽ i xto hkra.

Anhỹr o hamaxpēr no ãm ã hamaxpēr anhỹr kaprỹ. Æ mẽ hamaxpēr anhỹr xwỹnhjaja te mẽ kēp Apraãw mã ãpēnh xwỹnh Aga hkrata pyrãk. Nē krĩ pē Jerujarē kēp Ijaew nhõ krĩ jakamã haxwỹja te kēp Agata pyrãk. Nhũm krĩ nhõ xwỹnhjaja haxwỹja te mẽ kēp Aga hkrata pyrãk. Na htem htỹx Tĩrtũm kot mẽ omunh mẽ mẽ ho hkra hprãm xaj Mojes kapēr kōt amnhĩ nhĩpēx o pa hã amnhĩ jarēnh kaprỹ. Jakamã haxwỹja te mẽ kēp mẽ kãm mẽ ãpēnh o pa xwỹnh pyrãk.

Jejus kōt mẽ kot amnhĩ kaxyw hamaxpēr xwỹnhjē jarēnh

²⁶ Nē hapu hã Tĩrtũm kapērta. Apraãw prõ kumrēx Saraja te kēp kaxkwa kamã Jerujarē òja pyrãk. Krĩ ja kamã mẽ pa mã xwỹnhjaja te mẽ kēp mẽ kãm mẽ ãpēnh xwỹnhjē pyrãk kēt. Ra mẽ kot amnhĩ kaxyw Kris mã hamaxpēr mẽ hkōt amnhĩ xunhwỹr jakamã na htem hamaxpēr o:

—Ixte amnhĩ kaxyw Kris mã ijamaxpēr mẽ hkōt amnhĩ xãm jakamã na Tĩrtũm i xpumu mẽ amnhĩm inhmex ã ijarē mẽ i xto hkra. Anē.

ãm hãmri na mẽ ã wamtajē rom hamaxpēr anē. Tã ã mẽ hamaxpēr anhỹr xwỹnhjaja te mẽ kēp Sara hkra pyrãk.

²⁷ Tĩrtũm kapēr ã kagà htũm kot ja jarēnh kot:

E kormã akra hkēt mẽ apa htã kēr ka mãmrĩ akĩnh mẽ ri apa.

Nē kormã apijagri hkēt tã kēr ka akĩnh tỹx mẽ ri apa.

Kormã amjēn kot akamã hkra hkēt mẽ te kot akaga pyrãk tã

kot kaj akra mẽ akanrēhã atãmnhwỹ xohtō rax nē.

Mē ohtō rax o ra amjēn kot nhãm hprō hõ kamã hkrata jakre. Anē.

Æ kapēr kot anhỹr o mẽ kot amnhĩ kaxyw Kris kōt hamaxpēr xwỹnhjē hkukamã mẽ ohtō hã mẽ harē.

²⁸ E ixkrãmnhwỹjaja. Te mẽ apē Ijak kanrēhã htãmnhwỹ pyrãk. Kojã mēhõ amnhĩ kaxyw Kris kōt hamaxpēr hãmri mẽ te kēp Apraãw mẽ hprō Sara wa hkra Ijak kanrēhã htãmnhwỹ pyrãk. Na pre Tĩrtũm amnep mẽ mã kormã Ijak kator kēt ri ra hkukamã hamaxpēr mẽ Apraãw mã harē. Nē mẽ papajaja nhũm Tĩrtũm Ijak pyrã mẽ mẽ pakukamã mẽ pamã hamaxpēr mẽ amnhĩm mẽ paxunhwỹr ã amnhĩ jarē. Tã ra mẽ ate amnhĩ kaxyw Kris kōt ajamaxpēr jakamã te mẽ apē Ijak kanrēhã htãmnhwỹ pyrãk.

²⁹ Nhũm Apraãw kot Aga kamã hkra Ismaewja na pre hprō kumrēx kamã hkrata pumu mẽ mẽ kãm hkĩnh kēt mẽ kamã gryk pix o pa. Nē tanhmã hipēx to pē ri haprỹ ho ri hkōt pa. Tã mẽ kot amnhĩ krã hkōt amnhĩ to Tĩrtũm kra hprãm xwỹnhjaja na htem ã mẽ pahte Kris kōt amnhĩ xunhwỹr xwỹnhjē nhĩpēx anhỹr o pa. Na htem Tĩrtũm kot mẽ pahto hkra hã mẽ pahpumu mẽ Ismaew kot Ijak nhĩpēx pyrã mẽ mẽ pakamã gryk pix o pa. Nē tanhmã mẽ pahtomnuj to pē mẽ pahto kapēr o ri pa. ³⁰ Tã no ãm kwār mẽ mãmrĩ ã mẽ panhĩpēx anē. Kojã mẽ pahpyrã mẽ nhỹrmã Tĩrtũm nhõ krĩ hwỹr ãpir kēt nē. Tĩrtũm kapēr ã kagà htũm kot mẽ harēnh kot:

Na pre Tĩrtũm Apraãw mã kapēr mẽ kãm: “E kēr ka amnhĩ nē ate haprōr nhũm kot amã ãpēnh o ri pa xwỹnh mẽ hkrata wa hano. Kojã hkrata amỹr pē amnhĩm mẽmoj to ãrĩk kēt mẽ. Ate aprō kumrēx kamã akrata pix kojã hõja rom amỹr pē

mëmoj piitã ho amnhĩptãr pa.” Anë.

³¹ Tã te më pahpê àpênh xwýnh kamã hkrata pyrãk kêt. Te më pahpê Apraãw prõ kumrëx kamã hkrata pyrãk. Te Tirtũm kot Ijak kukamã hamaxpër pyrãk o na pre më pakukamã hamaxpër.

5

¹ Në Kris kot më pahte amnhĩ nhĩpëx tũm pë më papytãr jakamã kwa ixkrãmnhwýjaja. Kër ka më arĩ ate amnhĩ nhĩpëx tũm kõt amnhĩ nhĩpëx kêt nê. Ra Kris kot ja pë më papytãr nhũm më paxãmnhĩx ri papa kênã.

Më pahpê Tirtũm kra hprãm xãj tanhmã më pahte amnhĩ nhĩpëx to Juãw 8.32, 8.36; Korosë 2.20

² E më inhma. Kot kaj më atõ Tirtũm kot ato hkra hprãm xãj amnhĩ my kwryt kã krãhta hã kot kaj më ãm amarĩ ã amnhĩ nhĩpëx anhÿr kaprý. Na hte Tirtũm ja hã më omu nê ãm hã më omu. Kot kaj ã amnhĩ nhĩpëx anë nhũm Krisja ãm ate amnhĩ tomnuj mýrapê anë htyk kaprý pyrãk o amnhĩ nhĩpëx. ³Hãmri nhũm Tirtũm tee ri ja hã më apumu nê te kot ã më amã kapër anhÿr pyrã nê më amã kapër o:

—E ra amã apê Kris kwý hprãm xãj amnhĩ my kwryt kã krãhyr jakamã kot kaj mããnën Mojes kapër piitã hkõt amnhĩ nhĩpëx o ri apa.

Anhÿr o më amã kapër pyrãk.

⁴ Nom kot kaj më atõ amnhĩ kukamã ajamaxpër o:

—Nã kot paj Mojes kapër piitã hkõt amnhĩ nhĩpëx o ri ixpa nhũm Tirtũm ja hã ixpumu nê inhmex ã ijarë nê ixto hkra kãm ga. Anë.

No ãm ja kot anhÿr kêt. Na hte Tirtũm ã më pahte amnhĩ nhĩpëx anhÿr ã më pahpumunh kõt më pahto hkra hkêt nê. Jakamã kot kaj më ã amnhĩ nhĩpëx anë nê te ate Kris kutã amnhĩ xãm pyrãk nhũm

Tirtũm ato mex kêt nê. ⁵Nom kot ka më axtem ajamaxpër o:

—Ra ixte amnhĩ kaxyw Kris kõt ijamaxpër nê hkõt amnhĩ xãm jakamã koja Tirtũm hã ixpumu nê inhmex ã ijarë. Karõ ra kot ã inhmã ja ho amnhĩrĩt anhÿr kênã.

Anhÿr o ajamaxpër. ãm hãmri ã më ajamaxpër anhÿrja. ⁶Jakamã më pahpê Kris kõt amnhĩ xunhwýr xwýnhjê kamã ra më kot amnhĩ my kwryt kã jakãr xwýnhjaja nhũm më pahkwýjaja ã amnhĩ nhĩpëx anhÿr kêt nê. Tã nhũm Tirtũm ja hã më pahpumu nhũm ja tanhmã kęp kute hkêt. Na hte më pahte amnhĩ my kwryt kã jakãr ã më pahpumu nê ãm hã më pahpumu. No kot pu më Jejus Kris kõt amnhĩ nhĩpëx mex o ri papa. Në amnhĩ kaxyw hkõt pajamaxpër tÿx o ri papa. Në më pamã axpën kĩnh pë tãm ri axpën nhĩpëx o ri papa. Ja na kêt Tirtũm kãm hprãm.

⁷ Ra më ate Kris kõt amnhĩ nhĩpëx mex o ri apa htã nhũm më hëx xwýnhjaja më awýr mra nê tee ri ã më ate amnhĩ nhĩpëx anhÿr ã më apumu nê tanhmã më amã Tirtũm kapër o hëx to. Ka më ama nê axte Tirtũm kõt amnhĩ nhĩpëx mex hkêt nê. ⁸No ãm ã më kot më amã më ujarënh anhÿr xwýnhjaja na pre Tirtũm më awýr më rënh kêt nê. Tirtũm kot amnhĩ wýr më awýr xwýnh kênã kot kêt axtem nê më awýr kapër o më amã hëx o më pa xwýnhjê rë.

⁹ Në koja mëhõ pixi nê tanhmã amnhĩ tomnuj to nhũm më piitã ja hã omu nê urãk nê kãm tanhmã amnhĩ tomnuj to hprãm. ¹⁰No kêt më apê Kris kwý na ka më. Ixte ja hã më apumunh mex. Kot kaj më axte ixkapër ma nê akupým Kris kõt amnhĩ nhĩpëx mex o ri apa. Nã kot kaj më ã amnhĩ nhĩpëx anë nê axte më kot më apê ãmnãr xwýnhjê kapër mar nê më hkõt amnhĩ nhĩpëx kêt nê. Koja Kris më

atã mē homnuj tỳx kumrēx nhũm mē rī amnhī pumu.

Pawre kot mē kot amnhī jakār ā mē kām karō hkēt ā harēnh

¹¹ Nē na hte Tirtūm kapēr o mē hēx xwýnhjaja tanhmã mē amã ixto hēx to ho pa. Ixte mē kām Tirtūm kot mē ho hkra kaxyw mē kot amnhī my kwryt kà jakār ā mē kām karō hã ixto ri hēx o pa. Nom ixte anhÿr kēt ixkrãmnhwýjaja. Kop apu ixte mē kām ja hã karō ho ixpa ronhÿx Ijaew krãhtũmjaja ja hã ijarēnh ma nhũm ja mē kām mex nē nhũm mē axte Kris ā tanhmã inhīpēx to hkēt nē. Nom ixte ja hã mē kām karō hkēt. Ām ixte mē kām Kris kot mē panē pī kahpa hã htyk jarēnh pix mÿrapē na htem ixkamã gryk nē.

¹² Hēxta waa nē. Mē kot mē amã hēx o pa pē mē ajamaxpēr o pihkār xwýnhjaja kop mē am mē anhō krī rūm hapōx nē ma nhÿhÿm hapēx ronhÿx pa ixkīnh tỳx kumrēx.

Mē pahte axpēn to mex o papa hã mē pamã karō

Wam Korīt 13; Eprēw 13.3, 13.16; Wam Pētre 1.22; Wam Juãw 3.11

¹³⁻¹⁴ Kwa ixkrãmnhwýjaja. Nà na pre Kris amnhī kaxyw mē parē. Axte mē pahte amnhī nhīpēx tũm kōt amnhī nhīpēx kēt kaxyw. Ra kot ā mē pahte amnhī nhīpēx anhÿr pē mē papytār jakamã kēr ka mē amnhī tã ja ma nē axte atỳx ri amã hprãm xà hkōt tanhmã amnhī nhīpēx to ho ri apa hkēt nē. Mē am amã axpēn kīnh pix o ri axpēn kōt apa. Nē nhãm mē hipēx o te ka amã amnhī tã ma pyrāk o mē hipēx. Jao mē piitã tãm mē hipēx o ri apa. Kot kaj mē ā amnhī nhīpēx anē nē te mē ate wam Tirtūm kapēr piitã hkōt amnhī nhīpēx pyrāk. ¹⁵ No kot kaj mē axtem nē axpēn kām axoprē ho ri apa hãmri nē te ra mē ate axpēn to ajapēx par o amōr pyrāk o amnhī nhīpēx. Te mry xoprē kot axpēn par o pata pyrāk. Kwa mē ā

amnhī nhīpēx anhÿr hkēt nē. Mē am axpēn to mex pix nē mē axpēn kām axukaprī ho ri axpēn kōt apa.

Mē pahte amnhī nhīpēx nyw jarēnh

Matēwre 26.41; Rōmãn 8.1-11

¹⁶ Nē kwa kēr ka mē amnhī to Tirtūm Karō wý kē mē amã mē ate amnhī nhīpēx nyw jagjē ka mē axte ate amnhī nhīpēx tũm kōt amnhī nhīpēx hkēt nē. Ām mē ate amnhī nhīpēx nyw kōt pix mã mãm amnhī nhīpēx o ri apa. ¹⁷ Tirtūm Karō kot amnhī nhīpēxja nē mē pahte amnhī nhīpēx tũmja wa kot axpēn pyrāk kēt. Te wa kot axpēn kutã amnhī xãm nē wa pijapu pyrāk. Jakamã kot puj mē pahte amnhī nhīpēx tũm o amnhī nhīpēx nē Tirtūm Karō mã hprãm xà hkōt amnhī nhīpēx hkēt nē. ¹⁸ No kot puj mē Tirtūm Karō hkōt amnhī nhīpēx nē ra jar pika ja kamã mē kot amnhī nhīpēx kōt ri amnhī nhīpēx kēt nē. Ra axtem mē pahte amnhī nhīpēx nyw o amnhī nhīpēx. ¹⁹ Jar mē kot amnhī nhīpēx tũmta mex kēt. Ra mē piitã mē kot ja pumunh mex.

Na htem htỳx ri hkwýjē kamã hpijaam kēt o pa.

Jao mēmyjaja hprō kuhpa hã nhãm mēnijē ho amnhīkati.

Nhũm mē hprōjaja mē mjēn kuhpa hã nhãm mēmyjē ho amnhīkati.

Nē mēmy hkwýjaja axtem nē mēmyjē hkwý ho amnhīkati.

Nē mēni hkwý haxwýja axtem nē mēnijē hkwý ho amnhīkati.

²⁰ Nē mē kām mēmoj mē hikukrēx japē htỳx o kām Tirtūm kīnh jakre.

Nē mēmoj kaxyw ma wajaga hwÿr amnhī to pa.

Nē hkwýjē kamã oprē ho ri pa.

Nē mēmoj tã axpēn kām gryk pix nē.

Nē mēmoj to axpēn pē õxý nē.

Nē mēmo mÿrapē axpēn pē angrã nē amÿm ahpÿnhã ri pa.

21 Nē mēmoj tā axpēn kamnhīx rāhā ho ri pa.

Nē axpā nē mē grer kām ri axpēn kām hpijaam kēt o ri pa.

Ā na htem mē kot amnhī nhīpēx tūm kōt amnhī nhīpēx o ri mē pa xwýnhjaja amnhī nhīpēx anē. Ā mē kot amnhī nhīpēx anhýr xwýnhjaja koja mē Tirtūm nhō krī hwýr gjēx kēt nē. Ra ixte mē amā ja jarēnh tā pa axte mē amā harē. Mē ate hā ano htýx rāhā ho ri apa kaxyw. 22 No mē kot amnhī nhīpēx nywja axtem na.

Tirtūm Karō hkōt mē kot amnhī nhīpēx nyw o amnhī nhīpēx xwýnhjaja na htem axtem kām axpēn kīnh nē.

Nē hkīnh nē ri hamakētkati nē àmnhīx ri axpēn kōt pa.

Nē gryk tokyx anhýr hkēt nē. Ām axpēn to mex pix o ri axpēn kōt pa.

Nē tām axpēn nhīpēx.

Nē kot mēmoj tā amnhī jarēnh xā hkōt tanhmā mēmoj to.

23 Nē axpēn mā kapēr mā hprī ho ri axpēn mā kapēr.

Nē mēmoj punuj piitā nē amnhī to htýx o ri pa.

Ā na hte mē kot Tirtūm Karō hkōt amnhī nhīpēx o mē pa xwýnhjaja Karō nhý hā amnhī nhīpēx nyw o amnhī nhīpēx anhýr o pa. Jao māānēn Mojes kapēr kwým ri amnhī nhīpēx hkēt nē. Jakamā koja mēhō mē pahte amnhī nhīpēx nyw nē tanhmā mē pahkurē hto hkēt nē. 24 Tā mē pahpē Jejus Kris kwý jakamā na pu mē pahte amnhī nhīpēx tūmja nhīpēx o te mē pahte amnhī nē hpir pyrā nē axte hkōt amnhī nhīpēx kēt nē.

Tirtūm Karō hkōt mē pahte amnhī nhīpēx ā mē pamā karō
Epes 4.23-24; Korosē 3.10

25 Tā ra Tirtūm Karō kot mē pahto hkra jakamā kwa kēr pu mē ām kōt pix mā amnhī nhīpēx nyw o amnhī nhīpēx o ri papa. 26 Kot puj

mē ā amnhī nhīpēx anē hāmri nē mēmoj tā mē pahkwýjē mā amnhī to jarkrar o ri papa hkēt nē. Kot puj mē ā amnhī nhīpēx anē nhūm mē pakamā gryk nē. Jakamā kēr pu mē ā amnhī nhīpēx anhýr o ri papa hkēt nē.

6

Mē pahte tanhmā axpēn to ajuta hto hā mē pamā karō

Matēwre 18.15-17; Rukre 17.3-4; Sikūn Tesarōn 3.14-15; Xiakre 5.19-20

1-3 Kwa ixkrāmnhwýjaja. Mē apē Tirtūm Karō hkōt amnhī nhīpēx o ri mē apa xwýnhjaja. Kojā Kris kōt akwýjē hō tanhmā amnhī tomnuj to ka mē ja hā omu nē ā amnhī nhīpēx anhýrja nē kām akapēr. Nom kēr ka mē kamā agryk kamā kām tanhmā nē hkēt nē. Ām kām akapēr mā aprī ho kām akapēr nē akupým tām ām. Nom kwa kēr ka mē amnhī pumunh mex nē urāk nē ā amnhī tomnuj anhýr kēt nē.

Kot ka mē atō ā kot amnhī nhīpēx anhýr ā omu nē ām omu nē nē tanhmā kām akapēr to hkēt nē. Nē ajamaxpēr o:

—Tk. Kwār māmri ā amnhī nhīpēx anē. Pa ja nē tanhmā kām ixkapēr to hkēt nē. Kurom ixte amnhī nhīpēx mex o ri ixpa kēnā.

Anhýr o ajamaxpēr japēr. Kwa mē ā ajamaxpēr anhýr kēt nē. Kot kaj mē ā ajamaxpēr anē nē nē kām akapēr kēt nē hāmri nē te ate amnhī to mex ā amnhī jarēnh kaprý pyrāk.

Nē kēr ka mē axpēn to ajuta mex o ri axpēn kōt apa. Jao Kris kōt amnhī nhīpēx mex nē.

4-5 Nē na htem piitā amnhīm àpēnh pix tānopxar o pa. Jakamā kēr ka mē amnhī tānopxar pē tām amnhī nhīpēx rāhā ho ri apa. Hāmri nē ja hā amnhī pumu nē akīnh nē. Nom kwa kēr ka mē ate amnhī nhīpēx mex o akwýjē jakrenh ā mē kām amnhī to jarkrar o ri apa hkēt nē.

6 Nê kêr ka mê kot Tirtûm kapêr o mê ajahkre xwÿnhjê ho mex nê mê kâm mêmoj nhôr o ri apa.

7 Koja Tirtûm nhÿrmã mê pahtÿr ri mê pahte amnhÿ nhÿpêx ã mê pahpumunh kôt tanhmã mê pajarênh to. Hâmri pu mê tee ri amnhÿ kukamã pajamaxpêr nom amnhÿ nê tanhmã kâm paxêx to hkêt nê. Koja mêhõ kâm amnhÿ to hêx nê te tãm kot amnhÿ mã hêx pyrãk nom kot puj mê Tirtûm mã amnhÿ nê tanhmã paxêx to hkêt nê. ⁸ Jakamã kot kaj mê amnhÿ krã hkôt tanhmã ri amnhÿ nhÿpêx to rãhã ho apa hãmri nê nhÿrmã ty nê Tirtûm pê awry rax ã ri apa. Nom kot kaj mê Tirtûm Karõ mã hprãm xà hkôt pix mã amnhÿ nhÿpêx nê nhÿrmã ty nhÿm Tirtûm akupÿm ato atÿr ka kuri amex nê ajamakêtkati atÿr tûm nê ri apa ho apa.

Mê pahte axpên to mex rãhã hã mê pamã karõ

Atre 20.35; Wam Korÿt 15.58; Xitre 3.14; Eprêw 13.3, 13.16; Xiakre 1.27

⁹ Jakamã kwa kêr ka mê arÿ tãm ri amnhÿ nhÿpêx nê tãm axpên nhÿpêx o ri axpên kôt apa nê jam anhÿrer kêt nê. Mê ã amnhÿ nhÿpêx o ri apa anhÿr rãhã ty nhÿm Tirtûm nhÿrmã ja hã mê ato mex rax nê. ¹⁰ Tã kêr pu mê arÿ Kris kôt pahtõjê ho mex rãhã ho ri papa. Nom mê tapxipixjê ho mex kêt nê. Pu mê mê piitã mê ho mex o axpên pyrãk.

¹¹ E ixte mê amã kagã nhÿpêx nê mênh nhÿm mê ate ja hã ixpumunh kaxyw kot paj pam kagã jatur xà hã inhÿkra ho inhÿxi nhÿpêx ka mê ixte inhÿxi hã kagã rÿnhtita pumu.

Jejus kot mê panê htyk ã Pawre kãm harênh prãm ã harênh

Wam Korÿt 1.22-24, 2.1-2

¹² Nê mê amã Tirtûm kapêr o mê hêx xwÿnhjaja na htem hamaxpêr o:

—Nà kot paj Karatas nhõ xwÿnhjê mã Kris pÿ kahpa hã htyk

ã harênh o ri ixpa hkêt nê. Kot pa anê nhÿm mê ixpê Ijaew kwÿjjaja ja hã inhma nê hã tanhmã inhÿpêx to. Ja pymaj kot paj mê kãm tanhmã harênh to hkêt nê. Kot paj ãm mê kot amnhÿ my kwÿrÿt kã jakãr pix ã mê kãm karõ kê mê ixkapêr xà hkôt ã amnhÿ nhÿpêx anê. Pa hã mê omu nê ma ixkwÿjê mã mê hã amnhÿ to jarkrar o ri ixpa. Anê.

¹³ Te mê kot finat Mojes kapêr kôt ri amnhÿ nhÿpêx pyrãk tã no na htem ã amnhÿ nhÿpêx anhÿr kêt nê. Ra mê kot amnhÿ jakãr tã no ãm Mojes kapêr piitã hkôt amnhÿ nhÿpêx hkêt nê. Æm hkwy hkôt pix mã amnhÿ nhÿpêx o pa. Nom kot kaj mê ama nê mê urãk nê amnhÿ jakã nhÿm mê ja hã mê apumu nê hkÿnh nê. Nê ma ri mê hkwyjê mã mê atã amnhÿ to jarkrar o ri pa nê mê kãm:

—E Karatas nhõ xwÿnhjaja na pa prem mê kot amnhÿ my kwÿrÿt kã jakãr ã mê kãm karõ nhÿm mê inhma nê mê pahpyrã nê ã amnhÿ nhÿpêx anê. Anê.

¹⁴ No pa na pa hte ã mê kãm mêmoj tã karõ anhÿr o ri ixpa hkêt nê. Æm Tirtûm kot mê pahto hkra kaxyw mê panhõ Pahihti Jejus Kris kot mê nê htykja pix na pa hte mê kãm harê. Ra kot inhne htyk jakamã te pa ixte kuri ijê nê ixytyk pyrãk. Jakamã ra jar pika ja kamã mê kot amnhÿ nhÿpêxja te ixpê htyk nê hapêx pyrãk pa axte hkôt amnhÿ nhÿpêx kêt pyrãk.

¹⁵ No mê kot amnhÿ my kwÿrÿt kã jakãr xwÿnhjaja nê mê kot amnhÿ jakãr kêt xwÿnhjaja na hte Tirtûm ja hã mê omu nê ãm mê omu. Æm mê pahte amnhÿ nhÿpêx nyw o amnhÿ nhÿpêx o ri papaja pix na kãm hprãm. ¹⁶ Kot kaj mê ã amnhÿ nhÿpêx anhÿr o ri apa nê apê Tirtûm kra mex nhÿm mê ato mex rax nê. Nê mêmoj to mê akutã nojarêt rãhã nê. Ka mê axãmnhÿx ajamakêtkati nê ri apa ho apa.

¹⁷ Nē na prem Kris ã ixtak rax nē nhũm ixkatut ã ixtak xà arĩ rãhã nē pa hte hã ixpa. Ixte Jejus Kris mã tanhmã amnhĩ nhĩpêx to xwỳnh ã ixto amnhĩrĩt xà na. Jakamã kê mēhõ axte Jejus kot mē awỳr inhmēnh ã tee ri ixpumu nē tanhmã hã ixkukjêr to hkêt nē.

¹⁸ E ixkràmnhwỳjaja. Kê Pahihti Jejus Kris mēmoj to mē akutã nojarêt nē mē ato mex rãhã ho pa. Nà koja mē ato anē.

Ãm ja pix na hapêx. Ixpê Pawre na pa ã mē amã kagà nhĩpêx nē mē awỳr mēnh anē.

Epes

Pawre kot Epes kām Jejus kôt hkwýjê hwýr kagà nê mēnh

Pawre na pre kagàja nhîpêx. Jejus nhî hã hkrajê jahkre o pa xwýnhjê hõ na pre. Jakamã na pre krî pê Epes kãm Kris kwýjê hwýr hipêx nê kumê. Epes nhõ xwýnhjaja Ijaew kêt xwýnh na pre mē. Nhũm pre ra Pawre ma mē hwýr mō nê mē kãm Tirtũm kapêr jarênh o ri mē hkôt pa nhũm mē hkwýjaja kuma nê Jejus kôt amnhî xunhwýr.

Na pre hte Pawre ma krî piitã hkôt ri Tirtũm kapêr jarênh o ri mē hkôt pa. Hãmri nhũm mē hkwýjaja Jejus ã unê nê krî pê Rõm wýr kumê nê kamã haxà nhũm arî hkrî ho hkrî. Nom amarî hkrî hkêt nê. Na pre hte mē kot hwýr mmar xwýnhjê mã Tirtũm kapêr jarê. Nê krî hkwý hkôt Jejus kôt hkwýjê mã kagà nhîpêx nê mē hwýr kurê. Jakamã na pre Epes kamã hkwýjê hwýr kagàja nhîpêx nê mē hwýr kumê.

Nê kagàja kamã hprî hã mē kot Jejus kôt amnhî xunhwýr xwýnhjê kot tanhmã amnhî nhîpêx to ho pa hã mē kãm karõ. Ra mē kot hkôt amnhî xunhwýr jakamã te mē htipxi nê ri mē pa xwýnh kot amnhî nhîpêx pyrãk o amnhî nhîpêx o pa hã mē kãm hã karõ. Nê jar pika hkôt te mē kêp Kris nhî pyrã nê pa hã mē harê. Æ na pre Pawre mē kãm mēmoj jarê nê hã kagà anê nê mē kãm:

¹ Pa Epes kãm Kris kôt ixkwýjaja. Xà mē amex na ka mē apa? E ot pa mē awýr kagà nhîpêx nê kumê. Ixpê Pawre na pa hipêx nê mē awýr kumê. Ixpê Jejus Kris nhî hã mē ahkre ho mē ixpa xwýnh na pa. Tirtũm kãm hprãm xà hkôt. Tã pa ã mē awýr kagà nhîpêx nê mē awýr mēnh anê. Mē apê Tirtũm krajê

hwýr. Na ka xep htem Jejus Kris kôt amnhî nhîpêx mex o ri apa. Æm hãmri na ka htem ã amnhî nhîpêx anê.

² E kê Mēpahpãm Tirtũm mē Pahihti Jejus Kris wa mē ato mex nê mēmoj to mē akutã nojarêt rãhã ho pa. Ka mē wa ý hã axãmnhîx ajamakêtkati nê akînh pê tanhmã amnhî nhîpêx to ho ri apa.

Tirtũm kot mē pakukamã amnhũm mē parênh ã harênh

Rõmãn 8.28-30; Wam Korît 1.21-22; Wam Tesarõn 1.4; Sikũn Tesarõn 2.13; Wam Pêtre 1.2

³ Na hte mē panhõ Pahihti Jejus Kris nhîpêxã Tirtũmja mē pahto mex rãhã ho pa. Mē pahpê Kra Kris kwý hã mē pahpumunh kôt tanhmã mē pahto mex to ho pa. Ra wa Karõja mē pahkarõ mã gjêx jakamã te ra mē pahte kaxkwa kamã wa kuri mē pamex nê mē papa pyrãk. Tã ra mē pahte jar pika ja kamã paxãmnhîx pajamakêtkati mē pamex nê ri papa jakamã kwa kê pu mē amnhîm ãm mex o mex ã harênh rãhã nê.

^{4,5} Annepê mã kormã mēmoj kêt ri na pre Tirtũm mē pakukamã amnhîm mē parê. Kris kukwak ri amnhîm mē parê. Tã mēmo kaxyw na pre ã mē pakukamã mē parênh anê? ãm mē pahte kapêr kôt pix mã amnhî nhîpêx o ri papa kaxyw. Jao tãm kot amnhî nhîpêx pyrã nê noo mã tãm amnhî nhîpêx o ri papa. Kãm mē pajapê jakamã na pre mē pakukamã tanhmã hamaxpêr to nê hamaxpêr o:

—Nà Ixkra Jejus Kris koja nhýrmã ma mē hwýr wrý nê mē nê ty. Tã mē kot mē nê htyk ã harênh mar nê amnhî kaxyw hkôt hamaxpêr xwýnhjaja kot paj mē ho ixkra. Nà kot paj ã mē hipêx anê. Anê.

⁶ No mē papajaja tanhmã mē pahte amnhî nhîpêx mex to hã mē pahpumunh kôt na pre ã mē pahto hkra hã mē pajarênh anhýr kêt nê.

Ām Kra Kris pix kukwak ri na pre ā mē pajarēnh anē. Kām Kra japē jakamā na hte mēmoj to mē pahpē hkwāy hā mē pakutā nojarēt rāhā ho pa. Jakamā na pu htem amnhī tā kām mex o mex ā harēnh o papa.

⁷⁻⁸ Na pre Krisja mē panē htyk o Tirtūm mā mē pahte amnhī tomnuj pānhā amnhīre. Nhūm Tirtūm ā kot amnhī nhīpēx anhūr ā omunh xā hkōt mē pahte hkōt amnhī xunhwūr xwūnhjē nē mē pahte amnhī tomnuj rēnh pa. Koja aa tanhmā hā mē pahto hkēt nē. Pu mē axte amnhī amnhī tomnuj o papa hkēt nē. Hēxta waa nē. Kām mē pajapē htyx kumrēx jakamā na pre ā mē pahto mex rax anē. Ām mex o mex nē āhpumunh o āhpumunh.

⁹⁻¹⁰ Amnepēm na pre hamaxpēr o:

—Nā na pa ra kaxkwa ho ixkato nē kamā mēmoj piitā ho ixkato. Nē pika ho ixkato nē kamā mēmoj piitā ho ixkato. Tā koja nhūr mā Ixkra Kris mēmoj piitā ho amnhīptār o pa. Kaxkwa kamā nē pika piitā hkōt mēmoj piitā ho amnhīptā nē tapxipix inhūr hā kēp mēō Pahihti. Koja ā amnhī nhīpēx anhūr xā hā arīgro kato nhūm ā amnhī nhīpēx o pa anē. Nā ja na inhmā hprām. Anē.

Ā Tirtūm amnhī kukamā hamaxpēr anhūrja kōt na pre Kris kēp mē panhō Pahihti hā harē. Tā nhūr mā mē pahto amnhīptār kaxyw koja mē pakaxyw ām. Amnepēm ri mē pa xwūnhjē mā kot kormā ja ho amnhīrīt kēt tā ra jarāhā mē pamā ho amnhīrīt.

¹¹ Kris kukwak ri na pre amnhīm mē parē. Ra kot mē pakukamā mē pahtā amnhī jarēnh xā hkōt. ¹² Tā mē ixpē Ijaew kwū kumrēx mē ixte Kris kōt amnhī xunhwūr jakamā koja mē piitā mē inhūr hā Tirtūm mā mex o mex ā harēnh o ri pa.

¹³ Nē mē kajaja na ka prem mē ixpyrā nē Tirtūm kapēr ma nē ajaxwūja hkōt amnhī xunhwūr. Ām

hāmri na Tirtūm kapērja. Tā ka prem ama nē hkōt amnhī xunhwūr. Hāmri nhūm amnhī tā mē apumu nē kot inhīpēx pyrā nē mē anē mē ate amnhī tomnuj piitā rēnh pa nē mē ato hkra. Hāmri nē mē awūr Karō rē nhūm mē awūr wrū nē mē akarō mā agjē nē mē akamā pa ho pa. Kris kukwak ri na pre mē awūr kurē. Amnepē mā na pre mē pakukamā hamaxpēr o:

—Koja mē Ixkra hkōt amnhī xunhwūr pa ja hā mē omu nē mē ho ixkra nē mē hwūr Ixkarō rē. Hāmri nhūm mē hkarō mā agjē nē mē kamā hkrī ho hkrī.

¹⁴ Anhūr jakamā na pre mē pahwūr kurē nhūm mē pahwūr wrū nē mē pahwūr agjē nē mē pakamā hkrī ho hkrī. Pu mē ja hā amnhī pumu nē pajamaxpēr o:

—Nā ra Tirtūm kot ixwūr Karō mēnh jakamā na ixkarō hwūr axā nē kamā hkrī ho hkrī. Tā koja ra kot mē ixtā amnhī jarēnh xā hkōt ja hā ixto mex nē. Ra kot ixto hkra kēnā. Jakamā koja nhūr mā ma amnhī wūr ixto api pa kuri inhmex kumrēx nē ixpa ho ixpa. Hāmri nē kukwak ri axte tanhmā amnhī tomnuj to ho ri ixpa hkēt nē. Anē.

Jakamā koja mē piitā ā kot mē ho mex anhūr ā amnhī tā kamā ama nē amnhī tā omu nē kamā mex o mex ā harēnh rāhā ho pa.

Pawre kot Epes nhō xwūnhjē ho Tirtūm wūr ā harēnh

Piripos 1.9; Korosē 1.9-12; Wam Tesarōn 5.23; Sikūn Tesarōn 1.11, 2.16; Eprēw 13.20

¹⁵ Nē na ka xep htem amnhī kaxyw Kris kōt ajamaxpēr tūx pē amā Tirtūm krajē piitā mē hkīnh o mē ho mex o apa. Na pa pre mē ajarēnh ma nē ixkīnh tūx nē. ¹⁶⁻¹⁸ Nē xatā mē ato Tirtūm wūr o ri ixpa nē mē ato hwūr o:

—Pa Mēinhīpēēxā maati Tirtūm. Nā amex o amex. Ka na ka pre mē ixwūr mē inhō Pahihti Jejus Krisja mē nhūm mē ixwūr wrū nē hprī

hã mẽ inhmã ate tanhmã amnhĩ nhĩpêx to ho apa hã ato amnhĩrit. Tã Epes kãm akrajaja na xep htem akôt pix mã ri amnhĩ nhĩpêx rãhã ho ri pa. ãm hãmri na htem ã amnhĩ nhĩpêx anê.

—Nê kwa Tirtũm. Kê Akarõ tanhmã mẽ hkrã hto kê mẽhrĩ hã akapêr mar tỳx rãhã ho pa. Jao ra ate mẽ ixkukamã mẽ ixtã tanhmã mẽ ixto mex to hã amnhĩ jarênhja kê mẽ kãm hamaxpêr tỳx rãhã ho pa. Nê ate nhỹrmã mẽ ixpê akrajaja mẽ ixpiitã tanhmã mẽ ixto mex to jarênhja kê mẽ kãm hamaxpêr tỳx pê hkĩnh rãhã ho pa ho pa.

19-20 —Nê kê mẽ axãhpumunh o axãhpumunh ã ate akupỹm Akra Kris o htĩr ã apumunh mex nê Tirtũm. Na ka pre axãhpumunh xã ho akupỹm ho htĩr nê ma akupỹm anhõ krĩ hwỹr ho api nê amnhĩ nhĩkõ hã yr nhũm arĩ hkrĩ ho hkrĩ. Apyrã nê kot mẽ ixto amnhĩptãr kaxyw. ã axãhpumunh xã htỳx kot anhỹr. Tã kê akrajê piitã ja hã apumu nê axãhpumunh tỳx o ate tanhmã mẽ ixto ajuta hto ho apa hã apumu.

Anhỹr o na pa hte mẽ ato hwỹr o ri xpa.

21 Nê Krisja ãhpumunh tỳx o mẽkarõmnuti piitã hakrenh. Nê hihtỳx o mẽ hakrenh jakamã krĩ nhõ xwỹnhjê mã te mẽ ãhpumunh tỳx kêt pyrãk o na htem htỳx ri amnhĩ nhĩpêx o pa pyrãk. Nê Krisja hihtỳx o pika piitã hkôt pahi piitã mẽ hakrenh par kumrêx. Nê hihtỳx o kot pika piitã hkôt mẽmoj piitã mẽ hakrenh par. Jakamã mẽhõ koja we tanhmã kot amnhĩ nhĩpêx to hã kãm karõ rỳ kãm hamaxpêr gõ? Nã amrakati kumrêx. Ra kot ã amnhĩ nhĩpêx anhỹr rãhã nê pa ho pa xwỹnh kênã. Nê hihtỳx o hihtỳx rãhã nê pa ho pa xwỹnh. Nê ãhpumunh o ãhpumunh rãhã nê pa ho pa xwỹnh. Nê hihtỳx o kot jar pika ja kôt mẽ pajakrenh par nê hihtỳx o Tirtũm nhõ krĩ

kamã mẽ mẽmoj piitã hakrenh par. Tã koja mẽmoj piitã ho amnhĩptãr rãhã htĩr tũm nê pa ho pa.

Kris te kêp mẽ pahkrã pyrãk ã harênh

Rõmãn 12.4; Wam Korõt 12.12; Epes 4.16; Korosê 3.25

22 Na pre Tirtũmja Kra Kris nhĩhkram mẽmoj piitã haxãr pa. y hã kot nhỹrmã ho amnhĩptãr o pa kaxyw. Jakamã kot mẽ pahto amnhĩptãr xwỹnh ã kêp mẽ panhõ Pahihti. Nê te kêp mẽ pahkrã pyrãk. Nê mẽ papajaja te mẽ pahpê i pyrãk jakamã na pu htem hkôt ri amnhĩ nhĩpêx o papa. 23 Na hte mẽ panhĩja mẽ pahkrã kamã mẽ pajamaxpêr xã hkôt tanhmã amnhĩ nhĩpêx to. Ja pyrã nê na pu htem mẽ pahkrã pyrãk xwỹnh Krisja kapêr ma nê hkôt tanhmã ri amnhĩ nhĩpêx to ho ri papa.

Koja mẽhõ ãm hkrã pix nê i hkêt nê pa hãmri nê mex kêt nê. Na htem hkrã nê mããnên i nê pa nê mex nê. Ja pyrã nê na hte Kris mẽ pahte hkôt amnhĩ nhĩpêx o papa hã mẽ pahpumu nê hkĩnh nê mex nê pa. Pu mẽ pajaxwỹja hkôt ri amnhĩ nhĩpêx ã amnhĩ pumu nê pahkĩnh nê pamex nê papa ho papa.

2

Tanhmã Tirtũm kot mẽ pahto hkra hto ã harênh

Wam Korõt 6.11; Xitre 2.11–3.7

1 Nê amnepê mã na pu pre htem Tirtũm kãx ã tanhmã amnhĩ tomnuj to ho ri papa. 2 Nê jar mẽ kot amnhĩ nhĩpêx o amnhĩ nhĩpêx. Jao amnhĩ tomnuj pix o ri papa. Nê mẽkarõmnuti nhõ pahi Satanasti kapêr kôt pix mã ri amnhĩ nhĩpêx rãhã nê. Na pre hte tanhmã mẽ pahkôt mẽ pahto ho pa. Mẽ pahte tanhmã amnhĩ tomnuj to kaxyw mẽ pamã mẽ pajamaxpêr punuj jagjê. Pu mẽ amnhĩ tã omunh kêt tã y hã amnhĩ tomnuj o papa. Satanastija kêp mẽ kot Tirtũm kapêr kwỹm ri amnhĩ nhĩpêx o mẽ pa

xwÿnhjê nhô pahiht na. Tã pu pre htem pahtÿx ri hkôt amnhî nhîpêx pix o ri papa. ³Mê pahpiitã tanhmã amnhî tomnuj to hprãm xà hkôt pix mã tanhmã amnhî nhîpêx to. Nê mẽmoj punuj kukamã pajamaxpêr nê ra hkôt ã amnhî tomnuj anê. Æ na pu prem mnhî nhîpêx anê nhÿm Tirtÿm ja hã mẽ pahpumu nhÿm ja kãm mex kêt nê. Jakamã nhÿm tee ri mẽ pakukamã hamaxpêr nê hamaxpêr o:

—Hêxta waa nê. Na htem ixkapêr kwÿm ri tanhmã amnhî tomnuj to rãhã ho pa. Æ mẽ kot amnhî nhîpêx anhÿr o mẽ pa xwÿnhjaja koja mẽ nhÿrmã ixri htÿr tÿm nê mex nê pa ho pa hkêt nê. Ixkÿnhã mẽ kot amnhî tomnuj xwÿnh jakamã tanhmã kot mẽ amnhî to nê ixri htÿr tÿm nê pa ho pa? Nà mẽ kot amnhî tomnuj mÿrapê koja mẽ nhÿrmã ma amnhî xà htÿx kamã hamak tÿm xàta wÿr ma hapêx pa. Nà koja mẽ anê. Hêxta waa nê. Inhmã ma hwÿr mẽ pa prãm kêt tã ra ma hwÿr mẽ pa kaxyw.

Anhÿr o hamaxpêr. ⁴⁻⁵Nê amnepêm kormã mẽ pahte amnhî tomnuj o papata ã te mẽ pahte amnhî xà htÿx kamã pajamak tÿm xà hwÿr pryta ã mẽ papa pyrãk. Nom Tirtÿm kãm mẽ pajapê nê mẽ pakamã ukaprî jakamã na pre mẽ pahto mex rax nê. Nê akupÿm Kris o htÿrja ri te ra mẽ pahte amnhî xà htÿx kamã pajamak tÿm xà hwÿr pryta nê mẽ pahto ujanãr pyrãk o mẽ panhîpêx. Mẽ pakamã ukaprî nê kãm mẽ pajapê ho ã mẽ panhîpêx anê. Amarî ã mẽ panhîpêx anê nê mẽ panê mẽ pahte amnhî tomnuj rênh pa. Jakamã kot puj mẽ pahte Kra hkôt amnhî xunhwÿr xwÿnhjaja nhÿrmã amnhî xà htÿx kamã mẽ hamak tÿm xàta wÿr papa hkêt nê. ⁶Ra Tirtÿm akupÿm Jejus Kris o htÿr jakamã te ra Jejus kôt akupÿm mẽ pahpê hkwyjê ho

mẽ pahtÿr pyrãk. Jakamã te ra ô krî kamã ðhkô hã mẽ pamex kumrêx nê pahkrî pyrãk. ⁷Mẽmo kaxyw na pre Tirtÿm kãm mẽ pajapê hkôt ã mẽ pahwÿr Jejus Kris mẽnh nhÿm mẽ panê htyk anê? Nà kãm mẽ pajapê htÿx ã mẽ pahte pahprî hã amnhî tã omunh kaxyw na pre ã mẽ pahwÿr mẽnh anê. Tã kot puj mẽ nhÿrmã kaxkwa kamã hwÿr pøj nhÿm mẽ pamã amnhî jarênh o:

—E mẽ amnê ixpumu. Inhmã mẽ ajapê htÿx jakamã na pa pre mẽ akamã ixukaprî xàj ma mẽ awÿr Ixkra Jejus Krisja mẽ nhÿm amnhî grõnh kôt mẽ awÿr wrÿ nê mẽ anê ty. Inhmã mẽ ajapê htÿx jakamã na pa pre ã mẽ awÿr mẽnh nhÿm mẽ anê htyk anê. Inhmã mẽ apê ixkrajê japê xàj na pa pre ã mẽ ato mex rax anê.

Anhÿr o mẽ pamã kapêr hãmri nê mẽ pahto mex rãhã ho pa. ⁸⁻⁹Xà na pu prem pahpê hkra hprãm xàj amnhî krã hkôt mẽ papamjaja kãm tanhmã amnhî to mex to nê kãm:

—E kwa Tirtÿm. Na pa ã amnhî to mex anê nê ã amnhî to mex anê. Jakamã kwa ja hã ixpumu nê ixto akra nã?

Anhÿr o na pu prem amnhî to kuwÿ? Nà na pu prem ã amnhî to hwÿr anhÿr kêt nê. Na pu prem amnhî kaxyw hkôt pajamaxpêr nê hkôt amnhî xunhwÿ nhÿm ja pix ã mẽ pahpumunh kôt mẽ panê mẽ pahte amnhî tomnuj rê nê mẽ pahto hkra. Kãm mẽ pajapê nê mẽmoj to mẽ pakutã nojarêr rãhã ho pa jakamã na hte ã mẽ panhîpêx mex anê. Jakamã na pu htem amnhî tã omu nê pajamaxpêr o:

—Nà na xep hte Tirtÿmja mẽ pahte tanhmã amnhî nhîpêx to ho papa hã mẽ pahpumunh kôt mẽ pahto hkra hkêt nê. Æm mẽ pahte amnhî kaxyw kãm pajamaxpêr ã mẽ pahpumunh kôt pix mã na hte mẽ pahto hkra. Anê.

¹⁰Nê Tirtÿm tapxipix na hte tanhmã mẽ pahto pu mẽ amnhî to

mex rāhā ho papa. Nom kormā kot mē pahto hkra hkēt ri na pu prem ā amnhī nhīpēx anhūr kēt nē. Tā Jejus Kris kōt amnhī xunhwū nhūm Tīrtūm ja hā mē pahpumu nē mē pamā mē pahte amnhī nhīpēx nyw jagjē pu mē ŷ hā tām amnhī nhīpēx o ri papa. Amnepēm tanhmā kot mē pakukamā hamaxpēr to xā hkōt. No na hte tanhmā mē pahte amnhī krā hkōt amnhī nhīpēx to hā mē pahpumunh kōt mē pahto hkra hkēt nē.

Tīrtūm krajaja te kot axpēn to htō nē htōx pyrāk

Karatas 3.28; Korosē 1.21-23

¹¹ E mē apē Ijaew kēt xwūnhjaja. Na ka htem mē akatorxā nhōhy rūm ajapōj hāmri nē mē ixpē Ijaew pyrā nē amnhī my kwryt kà jakār kēt nē. Jakamā na pre ixkwūjaja mē akurom amnhī jakār ā amnhī to jarkrar o ri pa nē amnhī jarēnh o:

—Ra mē ixte amnhī my kwryt kà jakār ā mē xpumunh kōt na hte Tīrtūm mē ixto hkra. Tā Ijaew kēt xwūnhjaja kot mē ixkīnhā amnhī jakār kēt jakamā mē kēp hkra hkēt. Nē māānēn mē kēp mē pahkwū hkēt.

Anhūr o mē ajarēnh o pa. ¹² ām hāmri na prem mē apē mē ixkwū hkēt ā mē ajarē. Na pa prem mē akurom amnhī my kwryt kà jakā nē mē akurom Kris kamā ijamak o ri ixpa. Jakamā nhūm Tīrtūm kot mē ixto mex ā amnhī jarē pa mē mē apyrā nē tee ri amnhī kukamā ijamaxpēr o ri ixpa hkēt nē. Nē mē akurom amnhī kaxyw Tīrtūm mā ijamaxpēr. Nā ām hāmri na prem mē apē mē ixkwū hkēt ā mē ajarē. ¹³ Te Tīrtūm kax ā ri mē apa pyrāk tā ka mē arī ā amnhī nhīpēx anhūr kēt nē. Jejus Kris kot mē panē htyk nhūm mē ate hkōt amnhī xunhwūr jakamā ra mē apē hkwyū. Jao arī hkax ā ri apa hkēt nē. Te mē ixpē Ijaew kwū pyrā nē hpānhā kuri ra ri apa pyrāk.

¹⁴ Jakamā na pu htem Kris kukwak ri ra axpēn nhīpēx nyw o axpēn nhīpēx o ri papa. Mē ixpē Ijaew-jaja nē mē apē Ijaew kēt xwūnhjaja na pu htem te ra ixkre tipxi kamā ri papa pyrāk. Nom amnepēm na pu prem ā axpēn nhīpēx anhūr kēt nē. Mē pahte amnhī nhīpēx tūmja ahpūnhā na pre. Na pu prem pamā axpēn kurē nē axpēn kax ā ri papa. Nē nhūri axpēn pumu nē te pahte axpēn pumunh kēt pyrā nē nhām parit o ri mra. Tā nhūm Kris mē panē htyk o mē pahte amnhī tom-nuj piitā hpānhā amnhīrer pa. Mē ixpē Ijaew nē mē apē Ijaew kēt xwūnhjaja. Nē htyk o te ra kot mē pahte axpēn nhōrkwū hwūr axpēn wūr o papa pyrāk. Jao mē pamā axpēn kurē ho hapēx nē hpānhā tām axpēn kaxyw mē paxunhwū pu mē hpānhā axpēn to mex rāhā ho ri papa. ¹⁵ Amnepēm Mojes kot Tīrtūm nhū hā mē ixpē Ijaew mē ixte tanhmā amnhī nhīpēx to ho ixpa hā karōja. Na pa prem mē apē Ijaew kēt xwūnhjaja mē ate Tīrtūm kōt amnhī nhīpēx kēt ā mē apumu nē mē akamā inhgryk nē. Nē axpēn mā mē ajarēnh o:

—Nā mē pahkīnhā mē kot Mojes kapēr kōt amnhī nhīpēx kēt jakamā koja Tīrtūm mē ho hkra hkēt nē.

Anhūr tā nhūm Kris mē pahwūr wrū nē mē pahpiitā mē panē htyk o mē pahte hkōt amnhī xunhwūr ā mē pahpumunh kōt pix mā mē pahto Tīrtūm kra. Jakamā pa mē axte mē ate Mojes kapēr kōt amnhī nhīpēx kēt ā mē apumunh kōt mē apē Tīrtūm kra hkēt ā mē ajarēnh kēt nē. Hāmri nē mē ixpē Ijaew nē mē apē Ijaew kēt xwūnhjaja pu mē axte axpēn kām pagryk o ri papa hkēt nē. Ra te ixkre tipxi kamā mē pahte axpēn kōt ri papa pyrāk.

¹⁶ Kris na pre pī kahpa hā mē panē htyk o ā mē panhīpēx anē nē mē pahte axpēn kōt amnhī nhīpēx o papa kaxyw mē paxunhwū. Nom

Tirtüm jamaxpër xà hkôt ã mẽ panhîpêx anê. Jakamã na pu htem arî pamã axpên kurê ho papa hkêt nê. ¹⁷ Na pre Kris mẽ pahwÿr wrÿ nê ã mẽ panhîpêx anê. Mẽ apê Ijaew kêt xwÿnhjaja mẽ ate kormã Tirtüm kapêr mar kêt xwÿnhjaja nê mãânên mẽ ixpê Ijaew mẽ ixte kapêr mar mex xwÿnhjaja nhùm pre akupÿm tãm mẽ pahte axpên kôt amnhî nhîpêx o papa kaxyw mẽ paxunhwÿ. ¹⁸ Hãmri nhùm Tirtüm mẽ pahwÿr amnhî Karô rê nhùm mẽ pahkarô mã agjê. Kris kukwak ri pix mã mẽ pahwÿr kurê pu mẽ ý hã paxàmnhîx ri kãm tanhmã amnhî jarênh to ho ri papa. ¹⁹ Hãmri nê te mẽ pahpê nhãm axpên kaxyw mẽ urojê pyrã nê axpên kàx ã ri papa hkêt nê.

Te mẽ pahpê Tirtüm nhôrkwÿ pyrãk ã mẽ pajarênh

Wam Korît 3.16; Sikûn Korît 6.16; Wam Pêtre 2.5

²⁰ Nê mẽ pahpê Jejus kwÿ jakamã te mẽ pahte ixkre tipxikamã ri papa pyrãk. Nê te mẽ pahpê ixkre nhîpêx mex pyrãk. Nê Kris te kêp ixkre hkrax mã kuhê xà nê kÿxpê kãm nôr xà maatiya pyrãk. Nê mẽ kot Jejus nhÿ hã mẽ ahkre xwÿnhjaja nê mẽ kot Tirtüm nhÿ hã kapêr o ri mẽ pa xwÿnhjaja te mẽ kêp ixkre nhôkwa êja pyrãk. Nê mẽ papajaja te mẽ pahpê ixkre nhîmök ã pôja pyrãk. ²¹ Ixkre mã kuhê xà nê kÿxpê kãm nôr xà maati kukwak ri pix mã na hte ôkwa ê nê hã pôja kÿxpê mex nê axpên tã harir. Ja pyrã nê ãm Kris kukwak ri pix mã na pu htem te ixkre tipxi kamã ri papa pyrãk o axpên nhîpêx mex o ri papa. Te mẽ pahpê mẽ kot ixkre rax kumrêx nhîpêx o môr nhùm muxre nê ãm xwÿnhnta pyrãk.

²² Na htem amnhîm ôrkwÿ nhîpêx nê hipêx pa nê hwÿr agjê nê kamã pa ho pa. Ja pyrã nê na hte Tirtüm Karôja mẽ pahpê hkrajê karô mã agjê nê mẽ pakamã pa ho pa. Te

mẽ pahpê Tirtüm nhôrkwÿ pyrãk. Mẽ ixpê Ijaew nê mẽ apê Ijaew kêt xwÿnhjaja Tirtüm mã te mẽ pahpê ôrkwÿ pyrãk.

3

Pawre kot Ijaew kêt xwÿnhjê mã mẽmoj to amnhîrît ã harênh

Rômãn 15.14-21; Korosê 1.24-29

¹ Tã te mẽ pahpê Tirtüm nhôrkwÿ pyrãk jakamã na pa hte jar mẽ hagiênh xà kamã mẽ ato hwÿr rãhã ho ixkrî. Na pa pre hte ma mẽ apê Ijaew kêt xwÿnhjê hwÿr ixpa nê ixprî hã mẽ amã Jejus kapêr jarênh o ri mẽ akôt ixpa. Mÿrapê na prem ixpynê nê ijaxã pa arî jar ixkrî ho ixkrî. Nom arî amnhî kaxyw Tirtüm mã ijamaxpêr tÿx pê mẽ ato hwÿr rãhã ho ixkrî. ² Na pre kãm ijapê hã mẽ apê Ijaew kêt xwÿnhjê kaxyw ixãm. Ma ixte ri mẽ akôt ixpa nê mẽ amã kapêr jarênh o ri mẽ akôt ixpa kaxyw. Ra mẽ ate ja hã ijarênh mar mex. ³ Na pre mẽ pahto hpimràatã tanhmã mẽ pahto mex to hã inhmã amnhî to amnhîrît pa pre omu. Mẽ kajaja nê mẽ pajaja. Pika piitã hkôt mẽ piitãã tanhmã mẽ ho mex to. Na pre kormã kot mẽhõ mã ja jarênh kêt tã inhmã ho amnhîrît pa pre omu. Tã kagã ja kamã kot paj mẽ amã hkwÿ ho grêre nê ho amnhîrît nê mẽ amã hã kagã ka mẽ ixpyrà nê kamã harê nê ama. ⁴ Ja aprî hã mar mex nê. ⁵ Amnepêm mẽ pahkêr ri mẽ pa xwÿnhjê mã Tirtüm kot ja ho amnhîrît kêt tã nhùm Karô mẽ ixkwÿjê kumrêx mã ho amnhîrît. ý hã kapêr o ri mẽ pa xwÿnh mẽ mẽ ixpê Jejus nhÿ hã mẽ ajahkre o mẽ ixpa xwÿnhjê kumrêx mã ho amnhîrît. Mẽ ixte kãm tanhmã amnhî nhîpêx to ho ixpa xwÿnhjê mã ho amnhîrît pa prem omu. ⁶ Na pre mẽ inhmã tanhmã mẽ ato amnhîrît to pa prem ja hã mẽ apumu nê mẽ akukamã ijamaxpêr o:

—Nà ãm hãmri koja xep Ijaew kêt xwÿnhjaja mẽ ixpê Ijaew pyrà nê Tirtùm kapêr ma nê Jejus Kris kôt amnhĩ xunhwÿ nhũm Tirtùm ã mẽ kot amnhĩ nhĩpêx anhÿr ã mẽ omu nê mẽ ixpyrà nê mẽ ho hkra nê mẽ ho mex o pa. Anê.

⁷ Tã nhũm Tirtũmja mẽ awÿr inhmê. Ixte mẽ amã ja jarênh o ri mẽ akôt ixpa nhũm tokyx mẽ ate mar kaxyw. Na pre ixto mex nê kãm hprãm xà hkôt mẽ akaxyw ixãm nê ixte ÿ hã kãm tanhmã amnhĩ nhĩpêx to ho ixpa kaxyw ixto ixihtÿx nê mẽ awÿr inhmê. ⁸ Tã mo kaxyw na pre mẽ akaxyw ixãm? Te ixte ja kaxyw inhmex kêt pyràk. Ixkwÿjaja ja kaxyw mex o kot ijakrenh tã nhũm pre ixpumu nê tanhmã hamaxpêr to nê mẽ akaxyw ixãm nê mẽ awÿr inhmê. Ixte mẽ amã mẽmoj mex kumrêx jarênh o ri mẽ akôt ixpa kaxyw. Na pre inhmã:

—Kêr ka ma Ijaew kêt xwÿnhjê hwÿr mō nê mẽ kãm Jejus Kris kapêr jarênh o ri mẽ hkôt apa. Nê mẽ kãm: “Kot kaj mẽ Jejus Kris kôt amnhĩ xunhwÿ hãmri nê kukwak ri amex nê apa.” Anê. ⁹ Koja mẽ apê Ijaew kwÿjê pyrà nê amnhĩ kaxyw Ixkra Kris kôt hamaxpêr nê hkôt amnhĩ xunhwÿ pa hã mẽ omu nê mẽ ho ixkra. Kormã aa ixte mẽ kãm ja hã amnhĩ to amnhĩrit kêt tã pa akumrêx mã harê. E ma mẽ hkôt ri mẽ kãm ã ijarênh anhÿr o ri apa kê mẽ ijarênh ma.

Anhÿr o mẽ pahto kator xwÿnh maati ja inhmã kapêr. ¹⁰ Tã mẽmo kaxyw na hte mẽ pahto hpimràatã mẽ pahto hkra? Nà kaxkwa kamã kapêr o mẽ wryk xwÿnh pytãr xwÿnhjaja nê mẽkarõmnuti kot mẽ pahte amnhĩ nhĩpêx nyw o papa hã mẽ pahpumunh kôt axpên mã tanhmã Tirtùm jarênh to kaxyw. Nê harênh o:

—Kokÿÿ. Tirtùm àhpumunh tÿx o àhpumunh tÿx jakamã na hte tanhmã mẽ hipêx to nhũm mẽ tãm

amnhĩ nhĩpêx mex o pa. Nà Tirtùm àhpumunh o àhpumunh nê hihtÿx o hihtÿx. Anê.

Koja mẽ ate amnhĩ to mex o apa hã mẽ apumu nê ã axpên mã Tirtùm jarênh anê.

¹¹ Amnepêr kormã mẽmoj kêt ri na pre Tirtùm mẽ pakukamã mẽ pahtã tanhmã amnhĩ jarênh to hãmri nê Jejus kukwak ri ã mẽ panhĩpêx anê. Jao mẽ piitã mẽ kãm àhpumunh o àhpumunh ã amnhĩ to amnhĩrit. ¹² Tã pu mẽ ra Jejus kukwak ri amnhĩ kamã pamã Tirtùm pyra hkêt nê. Kãm mẽ pajapê kênã kot pu kêt mẽ ri amnhĩ kamã pamã uma ho papa. Kot puj mẽ paxãmnhix ri kãm amnhĩ jarênh rãhã ho ri papa. Te ra pahte hwÿr paxapir nê pano ho omunh nê kãm pakapêr o pakuhê pyràk. ¹³ Jakamã kwa kêr ka mẽ kot mẽ atã tanhmã ixtomnuj to hã ijarênhja ma nê tee ri ixkukamã ajamaxpêr hkêt nê. Kwãr mẽ mãmri tanhmã inhĩpêx to. ãm ixte mẽ amã amnhĩ jarênh ma nê axpên mã ijarênh o:

—Hêxta waa nê. Mãn Pawre kãm mẽ pajapê hã na pre amnhĩ grõnh kôt mẽ pamex kaxyw mẽ pahwÿr mra nê mẽ pamã Tirtùm kapêr jarênh o pa. Mê kot ja hã tanhmã hipêx kati hto htã nhũm jam urer kêt nê. Anê.

*Kris kãm mẽ pajapê kamã tanhmã mẽ panê amnhĩ nhĩpêx to
Juãw 3.16; Wam Juãw 3.1*

¹⁴ Nê na pa hte mẽ ato Mëpanhĩpêxã maati hwÿr kãm ixihtÿx o ixpa. ¹⁵ Kêp mẽ pahte hkôt amnhĩ xunhwÿr xwÿnhjê nhõ Pahi Maati mex kumrêx na. Kra hkwyjaja ra kaxkwa kamã kuri hÿr tũm nê pa ho pa nê arĩ pyka ja kamã mẽ pahpê hkwyjaja kormã jar papa. Nom te mẽ pahpiitã mẽ pahte ixkre tipxi kamã Tirtùm kôt ri papa pyràk. ¹⁶ Jakamã na pa hte mẽ ato hwÿr o:

—Pa Tirtùm. Nà amex o amex. E ot pa Epes nhô xwýnhjê ho awýr o ixkrî. Kwa kê Akarô mẽ kãm axâhpumunh xà hkwy gô kê mẽ akôt ri amnhî nhîpêx rãhã ho pa.

¹⁷—Nê kê mẽ amnhî kaxyw Kris kôt hamaxpêr tỳx o pa. Te mẽmo pĩ hpàr jarê kot pika kaxwýnh kãm pimãnh nê pika jamýnh tỳxta pyrâk. Nhũm kôk xâpêr tỳx tã tee kot kãm mẽnh prãmta pyrâk. Kê mẽ pĩ hpàr jarê kot pika jamýnh pyrã nê kãm axpên kĩnh o pa. Jao mẽmoj to axpên kutã nojarêr rãhã ho pa.

¹⁸⁻¹⁹—Nê kê krî piitã hkôt mẽ akrajê pyrã nê amnhî tã Kris kãm mẽ hapê htỳx o mẽ hapê htỳx ã amnhî pumu. Jao uràk nê mẽ kãm axpên kĩnh tỳx o pa. Nê kê mẽ ate amnhî nhîpêx pix o amnhî nhîpêx rãhã ho pa. Nê ajamaxpêr pix o hamaxpêr rãhã ho pa. Jao te mẽmo pĩ hpàrta pyrã nê akôt hihtỳx nê. Anê.

²⁰ Kot puj mẽ ã amnhî to Tirtùm wýr anê nhũm mẽ pama nê ra àhpumunh tỳx xà ho ã mẽ panhîpêx anê. Ra kot mẽ pakamã pa ho pa kênã. ²¹ ã Tirtùm Jejus Kris kukwak ri mẽ pahpê hkrajê nhîpêx anhýr jakamã kwa pu mẽ pahpê hkra xwýnhjaja kêr pu mẽ kãm mex o mex ã harênh rãhã ho papa. Nà kot puj mẽ ã kãm anhýr o papa.

4

Te ixkre tipxi kamã axpên kôt ri mẽ papa pyrâk

Rômãn 15.5; Piripos 2.1-4; Korosê 3.12-17; Wam Pêtre 3.8

¹ Nê ra mẽ kot Kris ã ijaxâr nhũm ixkrî htã pa ã inhãm mẽ akĩnh xàj mẽ amã ixkapêr nê hã kagà anhýr o ixkrî. Kwa kêr ka mẽ Tirtùm kot amnhî nhîpêx kôt amnhî nhîpêx mex rãhã ho ri apa. Ja kaxyw na pre amnhî kôt mẽ awý ka prem hkôt amnhî xunhwý.

² Nê kêr ka mẽ amã amnhî to rax o akwýjê jakrenh prãm o ri apa hkêt nê. Nê mẽ agryk tokyx anhýr

kêt nê. ãm axpên kãm axukapri pix o mãn ri axpên kôt apa. Kê mẽhõ tee tanhmã ri mẽ ato htã ka mẽ kamã agryk tokyx anhýr kêt nê. ãm mẽ amã ri axpên hkĩnh pix o mãn ri axpên kôt apa. ³ Ra Tirtùm Karô kot mẽ pahkarô mã gjêx par jakamã te mẽ pahte ixkre tipxi kamã axpên kôt ri mẽ papa pyrâk. Jakamã kêr ka mẽ axpên to mex pix kukamã mãn kêt ajamaxpêr o ri axpên kôt apa. Nê tãm axpên nhîpêx. Jao ajamakêtkati nê axãmnhix ri axpên kôt ri apa ho apa. ⁴ Te mẽ pahte ixkre tipxi kamã ri axpên kôt papa pyrâk jakamã mẽ pahpiitã mẽ pahkarô kamã Tirtùm Karôja hkrî ho hkrî. Jakamã kot puj mẽ nhýrmã ma ô krî hwýr api nê kamã mẽ pamex rãhã papa ho papa.

⁵ Nê mẽ panhõ Pahihtija ãm pixii. Na pu prem pahpiitã amnhî kaxyw hkôt pajamaxpêr jao ra mẽ pahpê hkraa. Tã mẽ pahpê Kris kwý hã amnhî to amnhîrit kaxyw na prem Tirtùm mã mẽ pahkrã kumrã. ã mẽ panhîpêx anhýr o axpên pyrâk o mẽ panhîpêx o pa anê.

⁶ Nê Tirtùm haxwýja ãm pixii. Kêp mẽ pahpiitã mẽ panhîpêxã maati na. Na hte mẽ pahpê hkrajê mã àhpumunh xà hkwy gô pu mẽ ý hã kãm tanhmã amnhî nhîpêx to ho papa. Nhũm hte mẽ pahkarô kamã pa ho pa. Jakamã te mẽ pahte ixkre tipxi kamã ri axpên kôt papa pyrâk.

Kris kot ahpýnhã tanhmã mẽ pahto mex to hã harênh

Rômãn 12.3-8; Wam Korüt 12.1-12; Wam Pêtre 4.10-11

⁷⁻⁸ Nê Tirtùm kapêr ã kagà htũm kot Kris jarênh kot:

Na pre mẽ kot kutã amnhî xunhwýr xwýnhjê pytãr pa nê ma akupým kaxkwa hwýr api.

Tã arî jar pika hkôt mẽ pahpê hkwyjê mã tanhmã mẽ pahto paxihtỳx to ho pa.

Na hte Krisja tanhmã mẽ pahte ahpÿnhã kãm amnhĩ nhĩpêx to ho papa kaxyw tanhmã mẽ pahto paxãhpumunh to. Kãm hprãm xà hkôt. ⁹ Tĩrtũm kapêr ã kagà htũm kot akupÿm kaxkwa hwÿr àpir ã harênh. Âm tapxipix na pre ã pika hwÿr wrÿk nê akupÿm kaxkwa hwÿr àpir anê. Na pre ty nhũm mẽ haxà. Hãmri nhũm akupÿm htĩr nê kato nê ma akupÿm api. Tapxipix na pre ã amnhĩ nhĩpêx anê. ¹⁰ Tã akupÿm kaxkwa hwÿr àpir xwÿnhnta na hte kaxkwa kamã nê pika hkôt amnhĩm mẽmoj piitã tanhmã ho ho hkrĩ. ¹¹ Na pre ahpÿnhã tanhmã mẽ pahto mex to. Ahpÿnhã mẽ pahte tanhmã kãm amnhĩ nhĩpêx to ho papa kaxyw na pre mẽ paxunhwÿ.

Nê mẽ pahkwÿjaja mẽ pahte krĩ piitã hwÿr pamrar nê ÿ hã hkrajê mã kapêr jarênh o papa kaxyw mẽ paxunhwÿ.

Nê mẽ pahkwÿjaja mẽ pahte krĩ pixi kamã Tĩrtũm nhÿ hã hkrajê jahkre ho ri mẽ hkôt papa kaxyw mẽ paxunhwÿ.

Nê mẽ pahkwÿjaja mẽ pahte pahprĩ hã mẽ piitã mẽ kãm tanhmã mẽ kot amnhĩ nhĩpêx to nê Jesus kôt amnhĩ xunhwÿr ã mẽ kãm harênh o papa kaxyw mẽ paxunhwÿ.

Nê mẽ pahkwÿjaja mẽ pahpê pastô kaxyw mẽ paxunhwÿ.

Nê mẽ pahkwÿjaja mẽ pahte mẽ kãm Tĩrtũm kapêr ã kagà jarênh o mẽ ahkre ho papa kaxyw mẽ paxunhwÿ.

¹² ã kot puj mẽ pahpiitã ahpÿnhã Kris mã tanhmã amnhĩ nhĩpêx to ho ri papa anê. Kot puj mẽ ã mẽ hipêx anhÿr o ri papa nhũm mẽ pammar tÿx nê. Nê gaa nê mẽ pahpyrà nê Tĩrtũm mã amnhĩ nhĩpêx mex o pa. Pu mẽ pahpiitã hkôt amnhĩ nhĩpêx mex o papa. ¹³ Nê gaa nê mẽ pahpiitã mẽ pahpê Tĩrtũm kra hã Jesus kot amnhĩ nhĩpêx kôt omunh mex nê. Nê amnhĩ kaxyw hkôt

pajamaxpêr tÿx nê. Jao te ra hkôt mẽ paxãptàr mex pyràk. Nê te kot amnhĩ nhĩpêx pyràk o amnhĩ nhĩpêx.

¹⁴ Mêhprĩrejaja na htem nhãm hamaxpêr nê nhãm hamaxpêr o pa. Te kôk xàpêr nê nhãm mẽmoj to mrar nê nhãm mẽmoj to mrar pyràk. Nom kêr pu mẽ ho mẽ uràk kêt nê. Âm Kris kôt pix mã pajamaxpêr tÿx o papa. Jakamã nhũm mẽ tee ri mẽ pahte hkwÿm ri tanhmã amnhĩ tomnuj to hprãm xà tanhmã mẽ pahto kaprÿ. Nom kêr pu mẽ mẽ mar kêt nê. Âm pakatãt kôt mẽ àptàr kot amnhĩ nhĩpêx o amnhĩ nhĩpêx o papa. Jao Kris kôt axpên to paxihtÿx o papa. ¹⁵ Tãm axpên mã pakapêr nê pamã axpên kĩnh o axpên mã paxêx kêt nê. Kwa kêr pu mẽ ã amnhĩ nhĩpêx anhÿr o mãn papa. Jao te mẽ pahkrã Kris kot amnhĩ nhĩpêx pyràk o amnhĩ nhĩpêx mex o mō.

¹⁶ Nê mẽ panhĩ kamã tanhmã mẽ pakuteja piitã na hte mẽ pahkrã kamã mẽ pajamaxpêr xà hkôt axpên kôt ahpÿnhã tanhmã axpên to ajuta hto. Te ixkre pixi kamã mẽ pahte axpên kôt tanhmã axpên to ajuta hto ho ri papa pyràk.

Kris kôt mẽ pahte amnhĩ nhĩpêx nyw ã mẽ pamã karō

Korosê 3.5-11; Wam Pêtre 4.7

¹⁷ E kot paj Pahihti nhÿ hã mẽ amã mẽmoj jarê nê nê mẽ amã ixkapêr kãm ixihtÿx nê ka mẽ inhma. Nà kêr ka mẽ axte mẽ kêp Tĩrtũm kra hkêt xwÿnhjê kot amnhĩ nhĩpêx o amnhĩ nhĩpêx o ri apa hkêt nê. Na htem htÿx ri tanhmã hamaxpêr punuj to ho ri amnhĩ tomnuj o pa. ¹⁸ Jao Tĩrtũm mã hamaxpêr kêt nê pa. Kãm hamaxpêr prãm kêt kumrêx nê pa. Te mẽ kot omunh nê nhãm hkrã pyràk o amnhĩ nhĩpêx. Rÿ te mẽhō wa kot axpên kãm gryk kãm axpên nhĩpêx pyràk o hipêx. Jao te kamãt kô kamã ri pa pyrà nê

Tirtüm kot amnhĩ nhĩpêx pumunh kêt nê pa. Jakamã koja mẽ nhỹrmã kuri htĩr tũm nê pa hkêt nê. ¹⁹ Na htem tanhmã amnhĩ tomnuj to htã amnhĩ kamã hpijaam kêt nê pa. Nê axpên kamã hpijaam kêt rãhã ho pa. ãm amnhĩ pix kukamã hamaxpêr nê tanhmã amnhĩ tomnuj to ho ri pa. ²⁰⁻²¹ Nom Jejus Krisja ã kot amnhĩ nhĩpêx anhỹr kêt. Mẽ kurom tãm kot amnhĩ nhĩpêx mex o pa xwỹnh nê tãm kapêr o pa xwỹnh na. Na pa pre ma mẽ awỹr mõi nê ixprĩ hã mẽ amã ja hã harê ka prem inhma nê inhmar tỹx nê. ²² Na pa pre mẽ amã:

—Kwa mẽ ri axte amnhĩ nhĩpêx tũm kôt amnhĩ nhĩpêx o ri apa hkêt nê. Ja na omnuj tỹx. Na ka prem ã amnhĩ nhĩpêx anê nê ajamaxpêr punuj pix o ri apa. Jao amnhĩ tomnuj rãhã nê. Tã kêt ka mẽ amnhĩ nê awry hã mẽnh pyrã nê axte ã amnhĩ tomnuj anhỹr o ri apa hkêt nê.

²³ —Nê kêt ka mẽ axte mẽ ajamaxpêr tũm nê mẽ ate amnhĩ nhĩpêx tũm kôt ri amnhĩ nhĩpêx kêt nê. Nê mẽ ajamaxpêr nyw nê mẽ ate amnhĩ nhĩpêx nyw kôt pix mã ri amnhĩ nhĩpêx o ri apa. Te mẽ kot mẽ ê htũm kwrynh nê rênh nê hpãnhã nyw jagjêx nê ri hã pata pyrã nê ãm amnhĩ nhĩpêx nyw kôt pix mã amnhĩ nhĩpêx o ri apa. ²⁴ Mẽ ajamaxpêr nyw nê mẽ ate amnhĩ nhĩpêx nywja axtem na. Te Tirtüm jamaxpêr nê kot amnhĩ nhĩpêxta pyrãk. Jakamã kwa kêt ka mẽ kãm hprãm xã hkôt pix mã tanhmã amnhĩ nhĩpêx to ho ri apa. Jao kãm amnhĩ nhĩpêx mex o ri apa. Nê kapêr kôt ri amnhĩ nhĩpêx. Anê.

Na pa pre ã mẽ amã ixkapêr anê. Tã kêt ka mẽ arĩ ixkapêr kôt pix mã amnhĩ nhĩpêx. ²⁵ Mẽ pahpê Kris nhĩ jakamã te pahte ixkre htĩpxi kamã axpên kôt amnhĩ nhĩpêx pyrãk jakamã kwa mẽ axte axpên mã mẽmoj to axêx kêt nê. Nê

amarĩ axpên xõ ri axpên mã mẽmoj to axêx kêt nê. ãm tãm axpên mã mẽmoj jarênh o ri apa.

²⁶ Nê kot kaj mẽ mẽmoj tã agryk japêr. Rỹ mẽhõ kamã agryk rỹ amarĩ agryk japêr. Tã kêt ka ho ajapêx tokyx anê agryk japjê hkêt nê. Kêr kê kormã kamãt kêt ri ka akupỹm tãm akrã nhũm ja amã mex nê. ²⁷ Nom kot ka mẽ arĩ kamã agryk o ri apa nhũm mẽkarõmnuti nhõ pahi Satanastija ja hã mẽ apumu nê te mẽ ate amnhĩ tomnujta ã mẽ apynênh pyrãk o mẽ anhĩpêx. Ka mẽ ra hkôt tanhmã amnhĩ tomnuj to. Ja pymaj kêt ka mẽ agryk japjê hkêt nê. Satanasti kãm hprãm xã hkôt ã amnhĩ nhĩpêx anhỹr kêt nê.

²⁸ Nê mẽ axãhkĩnh o mẽ apa xwỹnhjaja kêt ka mẽ axte mẽ kêt axãhkĩnh hkêt nê. Mẽmoj tã apê nê hpãnhã kãxpore jamỹ nê ho amnhĩm awjaprõ. Nê mẽ kêt amrakati xwỹnhjê mã mẽmoj japrõ o ri apa. Kêt ka mẽ ate amnhĩ nhĩpêx tũmta pãnhã ã amnhĩ nhĩpêx nyw o amnhĩ nhĩpêx anhỹr o ri apa.

²⁹ Nê kêt ka mẽ amã axpên kĩnh kamã tãm axpên mã akapêr o ri apa. Nê akapêr mã agêt kãm ri axpên mã akapêr kêt nê. ãm axpên mã akapêr mã aprĩ ho axpên mã akapêr. Nê mẽ amã axpên kĩnh nê mẽ amã axpên to mex pix prãm xãj tãm axpên mã ri akapêr o ri apa.

³⁰ Tirtüm na pre mẽ pahwỹr amnhĩ Karõ rê nhũm mẽ pahpê hkra hã mẽ pahkarõ mã agjê nê mẽ pakamã hkrĩ ho hkrĩ. Koja mẽ pakamã hkrĩ ho hkrĩ rãhã nhũm nhỹrmã Tirtüm amnhĩ wỹr mẽ pahto api pu mẽ kuri pahĩr tũm nê papa ho papa. Jakamã kwa kêt ka mẽ tanhmã amnhĩ tomnuj to ho amnhĩ kamã Tirtüm Karõ mã hkaprĩ jagjênh kêt nê. Nê kãm hpijaam jagjênh kêt nê. Koja mẽ pahte amnhĩ tomnuj ã mẽ pahpumu nê mẽ pahkaga hkêt tã

tee ri ja hã mẽ pahpumu nẽ hkaprĩ nẽ. Jakamã kër pu mẽ ãm kãm hprãm xà hkõt pix mã tanhmã ri amnhĩ nhĩpêx to ho ri papa.

³¹ Nẽ kër ka mẽ axte ri axàhkurê ho ri apa hkêt nẽ. Nẽ agryk kãm axpẽn mã tanhmã akapër punuj to hkêt nẽ. Rỳ axpẽn japrỳ ho ri apa hkêt nẽ. Nẽ atỳx ri axpẽn tã apër o apikênh kêt nẽ. Nẽ ri axpẽn tã mẽ kãm axàmnhênh kêt nẽ. ³² Kêt mẽ ãm xpẽn to mex pix nẽ axpẽn kãm axukaprĩ ho ri apa. Nhũm mẽhõ tanhmã mẽ ato ka mẽ ãm amnhĩ tã omu nẽ tanhmã ho hkêt nẽ tanhmã kot atoja ho ajamakêtkati kurê kumrêx. Tĩrtũm na pre Kris kukwak ri mẽ pahte amnhĩ tomnuj grành pa nẽ axte kãm hamaxpër kêt nẽ. Tã kër ka mẽ uràk nẽ mẽhõ kot tanhmã atomnuj tota tokyx ho ajamakêtkati nẽ axte kãm ajamaxpër kêt nẽ.

5

¹ Nẽ koja mẽhõ kãm hkra japê nhũm amnhĩ tã omu nẽ hkĩnh nẽ. Hãmri nẽ nhỹrmã hkra nẽ amnhĩ pyrã nẽ kãm hapê nẽ. Ja pyrã nẽ Tĩrtũm kãm mẽ pahpê hkwyjê japê jakamã kër pu mẽ amnhĩ pyrã nẽ pamã pahkwỳjê hkĩnh tỳx o papa. ² Kris haxwỳja kãm mẽ pajapê jakamã na pre htyk o mẽ panê mẽ pahte amnhĩ tomnuj pãnhã amnhĩrer pa. Kêp Tĩrtũm Kra htã amnhĩ mex pix kukamã hamaxpër kêt nẽ ã mẽ panê amnhĩ nhĩpêx anê. Tã ã kãm mẽ pajapê anhỹr jakamã nhũm Tĩrtũm ja hã omu nhũm ja kãm mex nẽ. Te ho mẽ hkuxwa xà mex kuxwa pyrãk. Jakamã kër pu mẽ amnhĩ tã omu nẽ uràk nẽ pamã axpẽn kĩnh o axpẽn to mex o mãn ri papa.

Mẽ pahte amnhĩ tomnuj kaga hã kot mẽ pamã karõ

Sikũn Korõt 6.14-7.1; Korosê 3.16-17; Wam Juãw 1.5-10, 2.15

³ Nẽ mẽ pahpê Tĩrtũm kra jakamã kër pu mẽ pahprõ pix tãnopxar o

ri papa nẽ nhãm mênijê hõ kamã pahpijaam kêt o ri papa hkêt nẽ.

Nẽ kër pu mẽ amnhĩ pix kukamã pajamaxpër kêt nẽ. ãm ja ho anhỹr hkêt kumrêx. Mẽ pahpê Tĩrtũm kra kênã kot pu kêt axtem nẽ ã amnhĩ nhĩpêx anhỹr o ri papa. Tĩrtũm kra-ja na htem ã amnhĩ nhĩpêx anhỹr kêt nẽ.

⁴ Nẽ mãănên mẽ pakapërja. Kër pu mẽ ri tanhmã axpẽn mã pakapër punuj to hkêt nẽ. Nẽ ri axpẽn japrỳ hkêt nẽ. Nẽ amnhĩ krã hkõt pahtỳx ri tanhmã pakapër to hkêt nẽ. ãm tãm axpẽn mã pakapër mex nẽ axpẽn mã Tĩrtũm mex o mex ã harênh o ri papa.

⁵ Nẽ Tĩrtũm kapër kõt amnhĩ nhĩpêx kêt xwỳnhjaja nẽ axpẽn kãm mẽ hpijaam kêt xwỳnhjaja nẽ amnhĩ pix kukamã mẽ hamaxpër o pa xwỳnhjaja. ã mẽ kot amnhĩ nhĩpêx anhỹr xwỳnhjaja kêp Tĩrtũm mẽ Kris wa hkra hkêt. Na htem ã amnhĩ nhĩpêx anhỹrja gryk ã wa kãm hamaxpër kêt nẽ.

⁶ Nẽ koja nhỹrmã mẽhõ mẽ awỳr mõ nẽ mẽ ate tanhmã amnhĩ tomnuj to prãm xà hêx rom amã kapër nẽ mẽ amã:

—Kwa mon ka hte mẽ ixpyrà nẽ ã amnhĩ nhĩpêx anhỹr kêt nẽ? Ja mex kênã. Anê.

Koja ã mẽ amã kapër anê ka mẽ ama nẽ ãm ama. ã mẽ kot amnhĩ nhĩpêx anhỹr xwỳnhjaja koja Tĩrtũm nhỹrmã ja hã mẽ homnuj tỳx kumrêx. ⁷ Jakamã kwa kër ka mẽ ate ho mẽ kot amnhĩ nhĩpêx pyrãk pymaj mẽ hkõt ri apa hkêt nẽ. Kwarĩ ho kwarĩ.

Mẽ pahte amnhĩ nhĩpêx nyw jarênh

Juãw 1.4, 3.19, 8.12, 12.35; Rõmãn 13.12; Wam Tesarõn 5.5; Wam Juãw 1.5

⁸ Amnepêm kormã mẽ ate Tĩrtũm kõt amnhĩ xunhwỳr kêt ri na ka prem te kamã kô kamã ri apa pyrã nẽ atỳx ri tanhmã amnhĩ tomnuj to ho ri apa. Tã ra Jejus kõt amnhĩ

xunhwý hāmri nē te hirā kamā mē apa xwýnh pyrāk. Jakamā kwa kêr ka mē hpānhā Tirtūm kām hprām xā hkôt pix mē mām ri amnhī nhīpêx o apa. Ra mē apê hirā kamā mē apa xwýnh kēnā. ⁹ Kot kaj mē ã amnhī nhīpêx anē nē tām amnhī nhīpêx mex nē tām akapēr o apa. ¹⁰ Jao Tirtūm kām hprām xā hkôt pix mē amnhī nhīpêx o ri apa ¹¹⁻¹² nē te kamāt kô kamā ri mē pa xwýnhjaja kot amnhī nhīpêx pyrāk o amnhī nhīpêx kêt nē. ã mē kot amnhī nhīpêx anhÿr xwýnhjaja na htem hpimxur pê tanhmā amnhī tomnuj tÿx to ho pa. Nom kot paj ixprī hā mē amā tanhmā mē kot amnhī tomnuj to hā mē harēnh kêt nē. Kot pa mē amā harē nē ixpijaàm tÿx nē. Ixte harēnh mē xwýnhja omnuju. Tā kêr ka mē urāk nē ã amnhī nhīpêx anhÿr kêt nē. ãm mē noo mē tām ri amnhī nhīpêx o ri apa. ¹³ Mē kot ja hā mē apumunh nē tee ri tanhmā kot amnhī tomnuj to hkukamā hamaxpēr kaxyw. Jao amnhī tomnuj kaga japêr. ¹⁴ Te mē kot kanē hpôk rax kām mēmoj piitā omunh mexta pyrāk. Tirtūm kapêr ã kagā htūm kot ja jarēnh kot:

Mē amā Tirtūm prām kêt xwýnhjaja te ra mē atyk nē mē anhīkwý pyrāk.

Nē te kamāt kô kamā mē anhôt nē mē anhīkwý pyrāk.

Jakamā kwa te mē akrā hapôx nē kånhmā mē akrī pyrāk o amnhī nhīpêx nē Tirtūm kôt amnhī xunhwý.

Kê Kris tanhmā mē akrā hto ka mē te myt kato nhūm mē ate arīgro hā ri apa pyrāk o amnhī nhīpêx. Anē.

Tirtūm krajaja kot tanhmā amnhī nhīpêx to hā mē kām karō Korosé 4.5; Sikūn Ximotre 4.2

¹⁵ Nē kwa kêr ka mē amnhī pumunh mex o ri apa. Nē mē ri htÿx ri mē kot amnhī nhīpêx xwýnhjê hkôt amnhī nhīpêx kêt nē.

Nē ãm amnhī to mex pix o ri apa. ¹⁶ Na htem ra Kris ã mē pahtomnuj o pa pu mē pamex kêt nē ri papa. Tā nom kêr pu mē apkati mē arī Tirtūm mē tanhmā amnhī nhīpêx to ho papa mē panhūrer kêt nē.

¹⁷ Nē ãm Tirtūm pix mē amnhī jarēnh o ri papa nē kām:

—Pa Tirtūm. Inhmā akôt pix mē amnhī nhīpêx prām jakamā kwa ixte amā mēmoj to anhÿr kaxyw ixkrām ijamaxpēr mex jagjê nē ho amnhīrit mex pa tanhmā amā amnhī nhīpêx to ho ri ipxa.

Anhÿr o amnhī to kuwý. Nom kêr pu mē pahtÿx ri pajamaxpēr kôt tanhmā kām amnhī nhīpêx to hkêt nē.

¹⁸ Nē kêr pu mē ri pahpipānh o papa hkêt nē. Kwarī ho kwarī. Kot puj mē ã amnhī nhīpêx anē nē te kagôxyhti kot amnhī tã mē pahkaxpre pyrāk o mē panhīpêx pu mē tee ri pamā hkaga hprām kaprÿ. Te kot amnhīm mē pahto arīk pyrāk o mē panhīpêx nhūm ja mex kêt nē. Na htem pipānh kām hamaxpēr mex kêt nē ãm htÿx ri tanhmā amnhī nhīpêx to ho pa. Tā kêr pu mē ã amnhī nhīpêx anhÿr hkêt nē ãm Tirtūm Karō pix hkôt mām ri amnhī nhīpêx o ri papa.

¹⁹ Nē kêr pu mē axpēn wÿr akuprō nē pahkīnh kām Tirtūm mē mex o mex ã harēnh pê ho pagrer o pahkrī. ²⁰ Nē mē pamex nē ri papa rÿ pahpunuj nē ri papa htā arī kām mex o mex ã harēnh rāhā ho ri papa. Kêp Mēpanhīpêxā maati jakamā mē pahpê Pahihti Jejus Kris kwý hā pu mē kām mex ã harēnh rāhā ho papa nē aa ho pajamakêtkati hkêt nē.

²¹ Nē kêr ka mē Kris ã apijaàm rāhā o ri apa. Jao axpēn kôt ajamaxpēr nē axpēn kôt ri amnhī nhīpêx mex o ri apa.

*Tanhmã mẽ hprõ nẽ mẽ mjên kot
axpên nhĩpêx to hã mẽ kãm karõ*

*Wam Korõt 11.3; Korosẽ 3.18-19;
Wam Pẽtre 3.1-7*

²² Nẽ kêr ka mẽ anijaja mẽ amjên ã apijaam o ri apa. Nẽ mẽ hamaxpêr mex ã mẽ omu nẽ mẽ hkõt ri amnhĩ nhĩpêx o ri apa. Te mẽ ate Pahihti Kris kapêr kõt amnhĩ nhĩpêx o ri apata pyræk.

²³ Kris kêp mẽ pakamã ukapri xwýnh nẽ kêp mẽ papytâr xwýnh jakamã te kêp mẽ pahpiitã mẽ pahkrã pyræk. Nẽ mẽ papajaja te mẽ pahpê i pyræk. Jakamã na pu htem pahpê ija te mẽ pahkrã kot tanhmã hamaxpêr to xà hkõt amnhĩ nhĩpêx o papaja pyræk. Ja pyrà nẽ kêr ka mẽ anijaja mẽ amjên jamaxpêr mex ã mẽ omu nẽ mẽ hkõt amnhĩ nhĩpêx mex nẽ. ²⁴ Mẽ pahpê Kris kwý jakamã na pu htem hkõt amnhĩ nhĩpêx mex o ri papa. Ja pyrà nẽ kêr ka mẽ amjên kõt amnhĩ nhĩpêx mex o ri apa.

²⁵ Nẽ mẽ amyjaja. Kêr ka mẽ amã aprõ hã ma ho ri apa. Te ho Kris kot mẽ pahtã ma ho pata pyræk. Na pre kãm mẽ pajapê xàj amnhĩ grõnh kõt mẽ pahwýr wrý nẽ mẽ panê ty. Tã kêr ka mẽ uræk nẽ ã amã aprõ hã ma ho apa anê. ²⁶ Na pre Kris kãm mẽ pajapê xàj mẽ pahte amnhĩ tomnuj pẽ mẽ pahpytã. Te mẽhõ my kãm mẽhõ ni hkĩnh nẽ mẽmoj punuj pẽ utâr nẽ ho hprõta pyræk. Nhũm te mẽ kot axpên mã wa rer kaxyw nhũm nija ma gõx mã htem nẽ wýr nẽ amnhĩ to mex nhũm mẽ kot axpên kaxyw wa ho mexta pyræk. Hãmri nẽ te ra axpên mã wa rer nhũm wa kot axpên kõt pa ho pata pyræk.

Ja pyrà nẽ na pre Jejus kãm mẽ pajapê nẽ kãm amnhĩ kuri mẽ papa ho mẽ papa hprãm xàj mẽ pahwýr wrý nẽ mẽ pahte amnhĩ tomnuj pẽ mẽ pahpytã nẽ mẽ pamã Tĩrtũm kapêr jarênh o pa. Tã mẽ pahpê hkrajaja na pu htem kapêr ma

nẽ hkõt amnhĩ nhĩpêx o papa ho amnhĩ tomnuj kaga. Te gõx kãm mẽ paxwýr nẽ mẽ pahte amnhĩ nẽ amnhĩ grã htyk kuhõnh par pyræk. Jao Tĩrtũm kapêr kõt pix mã amnhĩ nhĩpêx o ri papa. Te ra paxwýr nẽ amnhĩ nẽ tanhmã mẽ pahte amnhĩ tomnuj to grãnh par pyræk. Nẽ te mjên mã xwýnh wýr nẽ amnhĩ to mex pyræk.

²⁷ ã mẽ pahte amnhĩ nhĩpêx anhýr jakamã te mẽ pamex nẽ ri papa pyræk. Hãmri nhũm Krisja ja hã mẽ pahpumu nẽ kãm mẽ pajapê htýx nẽ. Jakamã koja nhýrmã akupýn wrý nẽ ma akupým amnhĩ kõt mẽ pahto api pu mẽ kuri pa htĩrtũm nẽ papa ho papa.

²⁸ Nẽ xà mẽ amyjaja mẽ amã amnhĩ japêê? Nã mẽ amã amnhĩ japê ho na ka htem amã amnhĩ tã ma ho apa. Tã kêr ka mẽ aprõ nhĩpêx o te ka amã amnhĩ tã mata pyræk. Jao tãm mẽ hipêx o ri apa. Te war apixire nẽ war apa pyræk o wa axpên nhĩpêx. Kot kaj mẽ tanhmã hipêx to nẽ te ate amnhĩ nhĩ tanhmã hipêx to pyræk. ²⁹⁻³⁰ Na htem amnhĩ nhĩ ho mex pix o pa nẽ kamã gryk kêt nẽ. Nẽ kãm prãm nẽ apku. Nẽ kãm kôr nẽ ixkõ. Nẽ nhýhýnh à nẽ amnhĩ kane. Na pu htem ã amnhĩ to mex o ri papa anê. Ja pyrà nẽ te mẽ pahpê Kris nhĩ pyræk jakamã na hte mẽ pahto mex o pa. Te mẽ pamã mẽ papa mẽ pahte amnhĩ nhĩ hã mata pyræk. ³¹ Tĩrtũm kapêr ã kagã htũm kot ja jarênh kot:

Koja mẽmyjê hõ hprõ kaxyw hãmri nẽ hipêêxà nẽ katorxà wa òrkwý kaga nẽ ãm hprõ kõt pix mã hpãnhã ri pa ho pa. Te wa tipxi nẽ ri pa pyræk o wa axpên nhĩpêx o pa. Anê.

³² Na pre Tĩrtũm ã ja jarênh anê. Kapêrja mex tã amnepê mã mẽ pa xwýnhjaja na prem hprĩ hã mar týx kêt nẽ. Na prem htýx mẽ mjên kot tanhmã mẽ hprõ nhĩpêx to pix ã

hkamnhix no ãm ja pix kêt. Määnên te mẽ pahpê Kris nhĩ pyrã nê tãm mẽ pahte amnhĩ nhĩpêx nê axpên nhĩpêx o papa hã ã mẽ pajarênh kot anhÿr. Te ixkre tipxi kamã mẽ pahte Kris kôt mẽ papa pyrãk o ã mẽ pajarênh anê.

³³ Jakamã kwa kêr ka mẽ amyjaja mẽ amã mẽ aprõ japê ho ri apa. Te ka amã amnhĩ tã ma pyrãk o mẽ hipêx. Jao tãm mẽ hipêx. Nê mẽ anijaja kêr ka mẽ ajaxwÿja mẽ amjên ã apijaam o ri apa.

6

Mẽ hkrajaja kot tanhmã hipêêxã nê katorxã nhĩpêx to hã mẽ kãm karõ Korosê 3.20-21

¹ Nê mẽ apê mẽ hkrajaja kêr ka mẽ anhĩpêêxã nê mẽ akatorxã wa kapêr ma nê hã ano htÿx nê wa hkôt ri amnhĩ nhĩpêx rãhã ho ri apa. Mẽ amã Pahihti Kris kôt amnhĩ nhĩpêx prãm xaj ã amnhĩ nhĩpêx anhÿr o ri apa. Kot kaj mẽ ã amnhĩ nhĩpêx anhÿrja o amnhĩ nhĩpêx mex o ri apa. ²⁻³ Tirtũm kapêr ã kagã htũm kot ja jarênh kot: Kêr ka mẽ anhĩpêêxã nê mẽ akatorxã wa kapêr ma nê wa hkôt ri amnhĩ nhĩpêx. Kot kaj mẽ ã amnhĩ nhĩpêx anê nê amex nê kritpêm atĩr nê ri apa ry nê.

Anhÿr jakamã kot kaj mẽ amã kritpêm atĩr nê ri apa hprãm hã kêr ka mẽ ã amnhĩ nhĩpêx anhÿr o ri apa. Kormã mẽ aprĩre htã ã amnhĩ nhĩpêx anê. E kêr ka mẽ ã mẽ anhĩpêêxã nê mẽ akatorxã nhĩpêx anhÿr o ri apa.

⁴ Nê mẽ apê mẽ hipêêxã nê mẽ katorxã kêr ka mẽ akrajê gryk kaxyw mẽ kãm apê o apikênh hkêt nê. Tãm mẽ kãm akapêr nê Pahihti Jejus kapêr o mẽ ahkre ho ri apa. E kêr ka mẽ ã akrajê nhĩpêx anhÿr o ri apa.

Mẽ pahte mẽ panhõ patrãw kapêr kôt amnhĩ nhĩpêx ã mẽ pamã karõ

Korosê 3.22-4.1; Wam Ximotre 6.1-2; Xitre 2.9-10; Wam Pêtre 2.18-25

⁵ Nê mẽ ate mẽ kãm mẽ axapênh o mẽ apa xwÿnhjaja kêr ka mẽ anhõ patrãw kapêr ma nê hkôt amnhĩ nhĩpêx mex o ri apa. Te mẽ ate Kris kapêr mar nê hkôt amnhĩ nhĩpêx pyrãk. Jao mẽ hã apijaam rãhã nê. ⁶ Nom kêr ka mẽ ãm mẽ noo mã pix mã ri mẽ kãm axapênh mex kêt nê. Määnên mẽ wa kre kamã mẽ kãm axapênh mex rãhã nê. Ja na Tirtũm kãm hprãm. Mẽ apê Tirtũm Kra Kris mã tanhmã amnhĩ nhĩpêx to ho apa xwÿnh jakamã kêr ka mẽ anhõ patrãw mã axapênh mex o ri apa.

⁷ Nê mẽ akĩnh kãm mẽ kãm axapênh mex nê. Te mẽ ate Pahihti mã akĩnh kãm tanhmã kãm amnhĩ nhĩpêx to pyrã nê mẽ mẽ kãm tãm amnhĩ nhĩpêx pê axapênh mex o ri apa. ⁸ Kot puj mẽ amnhĩ kaxyw Tirtũm mã pajamaxpêr pê pahkĩnh kãm tãm amnhĩ nhĩpêx o ri papa nhũm Pahihti ja hã mẽ pahpumu nê nhÿrmã ja hã mẽ pahto mex rax nê. Mẽ pahpê hkrajê piitãã. Mẽ pahte mẽ kãm paxapênh xwÿnhjaja nê amnhĩ mã mẽ paxapênh xwÿnhjaja nhũm nhÿrmã mẽ pahpiitã mẽ pahte tãm amnhĩ nhĩpêx xwÿnhjê ho mex rax nê.

Mẽõ patrãwjaja kot tanhmã kãm mẽ ãpênh xwÿnhjê nhĩpêx to

Korosê 4.1

⁹ Nê mẽ apê mẽ õ patrãwjaja kêr ka mẽ amã mẽ ãpênh xwÿnhjê ho mex nê mẽ ãpênh ã mẽ kãm axàkjêr o ri apa hkêt nê. Tãm mẽ hipêx. Kaxkwa kamã mẽ panhõ Pahi Maatija mãânên kêp mẽ õ Pahi Maati jakamã ã mẽ hipêx mex anhÿr o apa. Tãm na kãm mẽ pahpiitã mẽ pajapê ho axpên pyrãk. E kêr ka mẽ ã mẽ hipêx anhÿr o ri apa.

Tanhmã mẽ pahte Satanasti kutã amnhĩ to htỳx to hã mẽ pamã karõ

Rõmãn 16.20; Sikũn Korõt 10.3-5; Wam Tesarõn 5.8-11; Xiakre 4.7; Wam Pêtre 5.8-11

¹⁰ E kot paj hpãnhã tanhmã mẽ pahte mẽkarõmnuti nhõ pahi Satanasti kutã amnhĩ to htỳx to jarẽ ka mẽ inhma. Kêr ka mẽ Pahihti nhỹ hã kutã amnhĩ to htỳx rãhã nẽ apa. Ate tanhmã amnhĩ tomnuj to hprãm xàj tanhmã kot ato htã ka Tĩrtũm xihtỳx o anhõpinh xà kaxwỳnh kãm kutã amnhĩ to htỳx nẽ. Rỳ koja ate mẽmoj mex o anhỹr nẽ tanhmã ato ka mẽ amnhĩ tã hamaxpêr ã omu nẽ ãm omu nẽ arĩ Tĩrtũm xihtỳx nhỹ hã tãm ajamaxpêr mex rãhã ho ri apa. ¹¹ Na hte põristijaja pijapu kaxyw hãmri nẽ amnhĩ nẽ kàx o mẽ ê jagjê nhũm mẽ tee ri kãm mẽ hkamnhwỳr prãm hkapyrỳ. Tã ja pyrà nẽ koja Satanasti mẽ ate kapêr kõt tanhmã amnhĩ nhĩpêx to hprãm xàj tanhmã mẽ ato ka mẽ amnhĩ tã hamaxpêr ã omu hãmri nẽ Tĩrtũm xihtỳx nhỹ hã kutã amnhĩ to htỳx nẽ. Jao mẽ ate amnhĩ nhĩpêx nyw pix o amnhĩ nhĩpêx nẽ mẽ ajamaxpêr nyw pix o ajamaxpêr. Kot kaj mẽ ã amnhĩ nhĩpêx anẽ nhũm Satanasti tee ri tanhmã kãm mẽ ato hprãm hkapyrỳ.

¹² Mẽ pahpê Tĩrtũm kra jakamã mẽ kot mẽ pakutã amnhĩ xunhwỳr xwỳnh maatiijaja axtem na mẽ. Mẽ kệp mẽkarõmnuti jakamã mẽ pahkĩnhã mẽ ĩ hkêt. ãm mẽ hkarõ kaxkrit pix na mẽ. Na htem kõt kõt tanhmã amnhĩ tomnuj tỳx to ho pa. Nẽ mẽ hihtỳx. Na htem arĩ jar pika ja kamã mẽ kệp Tĩrtũm kra hkêt xwỳnhjê ho amnhĩptã nhũm htem mẽ hkõt ri htỳx tanhmã ri amnhĩ tomnuj tỳx to ho pa. Nom amnhĩ tã mẽ omunh kêt nẽ. ¹³ Jakamã kwa kêr ka mẽ Tĩrtũm kot mẽ akarõ mã amnhĩ Karõ jagjênh xwỳnhnta kõt pix mã amnhĩ nhĩpêx o apa. Jao mẽ ate amnhĩ nhĩpêx nyw kõt pix mã

mãn ri mẽ amnhĩ nhĩpêx. Kêr kê mẽkarõmnuti tee ri kãm tanhmã mẽ ato hprãm kaprỳ ka mẽ arĩ Tĩrtũm Karõ xihtỳx nhỹ hã kutã amnhĩ to htỳx rãhã ho apa.

¹⁴ Jakamã kwa kêr ka mẽ axkãm ajamak rom nẽ te ho sõrdat kot pijapu kaxyw ê jagjênh pyrãk o amnhĩ nhĩpêx. Na htem amnhĩ nẽ moux kà ho mẽ ê jagjê nẽ mẽ hpre xà ho amnhĩ pre hpa. Nẽ hipy kàx o mẽ hinõ kà jagjê. Hãmri nẽ rĩ kormã ma mẽ kãm mẽ hkurê xwỳnhjê kutã mra nẽ axpu. No mẽ kajaja kêr ka mẽ kurom amnhĩ krãm Tĩrtũm kapêr jaxàr tỳx nẽ hkõt pix mã ri ajamaxpêr rãhã ho ri apa. Nẽ hkõt ri amnhĩ nhĩpêx mex nẽ. Jao te sõrdat pijapu kaxyw kot amnhĩ nhĩpêxta pyrãk.

¹⁵ Na hte sõrdatjaja hpar kà jagjê nẽ aa hopoux kêt nẽ. ãm rãhã gõr nẽ hikwỳ. Jao ra mẽ kutã pijapu kaxyw amnhĩ grõnh rãhã gõr nẽ hikwỳ. Tã kêr ka mẽ ma mẽ kãm Jejus kot tanhmã mẽ panẽ amnhĩ nhĩpêx to hã harênh o apa kaxyw nẽ sõrdat pyrà nẽ amnhĩ grõnh kõt ma mẽ hwỳr apa nẽ amnhĩ kamã akahak kêt nẽ.

¹⁶ Nẽ sõrdatjaja na htem amnhĩ nẽ amnàr xà hã kàx po jamỳ nẽ ho kuhê nhũm mẽ tee ri kãm mẽ hkamnhwỳr prãm kaprỳ. Ja pyrà nẽ koja Satanasti tanhmã mẽ ato ka mẽ Tĩrtũm kệp mẽ anhõ pahi hã hihtỳx o kot Satanasti jakrenhja mã ajamaxpêr kurê kumrêx nẽ ãm hkõt pix mã amnhĩ nhĩpêx. Na hte Satanasti te kot mẽ pahwỳr krur rênh pyrãk o mẽ panhĩpêx. Jao xatã mẽ pahte Tĩrtũm kaga hprãm xàj tanhmã mẽ pahto. Nẽ mẽ pahte Tĩrtũm mã tanhmã amnhĩ nhĩpêx to pymaj xatã tanhmã mẽ pahto kaprỳ. Pu mẽ amnhĩ tã omu hãmri nẽ Tĩrtũm Karõ xihtỳx nhỹ hã Tĩrtũm kõt pix mã amnhĩ nhĩpêx.

¹⁷ Nẽ na hte sõrdatjaja kàx o mẽ hkrãjapap jagjê nẽ pijapu kaxyw mẽ kutã mra nhũm mẽ tee ri mẽ

hkrā jayr prām kaprý. Ja pyrā nē kēr ka mē amnhī kaxyw Tirtūm kôt pix mā ajamaxpēr rāhā ho ri apa. Nē ra kot mē ato hkra mā ajamaxpēr rāhā nē. Kē Satanasti tee ri kām mē akrā kamā mē amā mē ajamaxpēr punuj jagjēnh prām hkapyrý.

Nē sōrdatjaja na htem mē kutā wapo jamý nē ho kuhê. Nom mē papajaja mē panhō wapoja na axtem kêp Tirtūm kapēr. Na hte Tirtūm Karō mē pahkrā kamā kapēr o amnhīrit pu htem pix mā pajamaxpēr o papa nhūm Satanasti tee ri kām mē pahkrām mē pajamaxpēr punuj jagjēnh prām kaprý. Te mē papijapu nhūm mē pahte amnhī nē ho pakrihkrit pyrāk o hipêx.

¹⁸ ā Satanasti pē mē pahte amnhī nē amnhī nhīpêx kot anhÿr. Jakamā kēr pu mē amnhī to Tirtūm pix wÿr o ri papa kê Satanasti kutā mē pahto paxihtýx pu mē hkôt tanhmā amnhī tomnuj to hkêt nē.

Nē kēr pu mē mēmoj to anhÿr kaxyw nē ra Tirtūm Karō nhÿ hā amnhī to Tirtūm wÿ. Nē kām amnhī jarēnh rāhā ho papa nē aa ja ho pajamakêtkati hkêt nē. Nē Tirtūm krajē piitā mē ho hwÿr rāhā ho ri papa.

¹⁹ Nē kwa kēr ka mē määnēn ixto Tirtūm wÿr rāhā nē. Kot tanhmā ixto nhūm ixāmnhīx ixte mē kām kapēr jarēnh mex o ri mē hkôt ixpa kaxyw. Mē kot ja hā tanhmā ixto htā pa arī ixāmnhīx mē kām harēnh mex o ri mē hkôt ixpa. Nē ixprī hā mē kām Jesus kot tanhmā mē panē amnhī nhīpêx to hā harē. Kormā mē kot hprī hā ja mar mex kêt. ²⁰ Tā ixte mē kām ja jarēnh kaxyw na pre Tirtūm mē hwÿr inhmē nhūm prem hā ijaxā pa arī mē hagjēnh xā kamā ixkrī ho ixkrī. Jakamā kwa mē ixto Tirtūm wÿ kê tanhmā ixto ixihtýx to pa arī mē kām kapēr jarēnh o ixkrī. Ja na Tirtūm kām hprām nē ijaxwÿja inhmā ja prām.

Kagà jatur xà

Korosē 4.7-8

²¹ Nē ot pa mē awÿr Xikitre mē. Kot paj mē amā kagàja nhīpêx pa nē kām kugō nhūm kupy nē ma mē awÿr o mō. Hāmri nē mē awÿr o pōj nē mē amā kugō nē mē amā tanhmā ijarēnh to ka mē ijarēnh ma nē akīnh nē. Xikitre na hte Pahihti mā tanhmā amnhī nhīpêx mex to o pa. Kris kôt mē pahto na. Nē inhmā hapêê. ²² Tā ot pa mē awÿr kumē. Kē mē awÿr pōj nē mē amā ijarē ka mē kam ama nē akupÿm tām akrā nē tee ri ixkukamā ajamaxpēr kêt nē. ²³ E ixkrāmnhwÿjjaja. Kē Mēpahpām Tirtūm mē Pahihti Jesus Krisja wa tanhmā mē akrā hto ka mē ajamakêtkati nē axāmnhīx ri apa. Nē mē amā axpēn kīnh o ri axpēn kôt apa. Nē mē apiitā wa hkôt ajamaxpēr mex o ri apa. ²⁴ E mē amā mē panhō Pahihti Jesus Kris kīnh rāhā ho apa xwÿnhjaja. Kē Tirtūm mē ato mex nē mēmoj to mē akutā nojarêt rāhā ho pa.

Tā ām ja pix na hapêx. Ixpē Pawre na pa mē awÿr kagàja nhīpêx nē kumē.

Piripos

Pawre kot Piripos kamã Jejus kôt hkwyjê hwÿr kagà nê mênh

Pawre na pre kagàja nhîpêx. Jejus nhÿ hã mẽ ahkre o mẽ pa xwÿnhjê hô na pre. Na pre Jejus ã mẽ kãm hkuré xwÿnhjaja unê nê ma krî pê Rôm wÿr kumê nê kamã haxà nhùm mẽ haghênh xà kamã hkrî ho hkrî. Tã nhùm arî hkrî rãhã Piripos kamã Jejus kôt hkwyjê hwÿr kagàja nhîpêx nê kumê. Na prem Pawre jarênh ma nê kãm ukapri nê. Jakamã axpên kaxyw kàxpore hkwy ho akuprô nê hwÿr kumê. Hãmri nhùm omu nê hkînh nê amnhî tã kagàja nhîpêx nê kamã mẽ kãm amnhî jarê nê mẽ hwÿr kumê. Kot amnhî xà htÿx kamã hamak o hkrî htã arî hwÿr mẽ mrar xwÿnhjê mã Tirtûm kapêr jarênh rãhã ho hkrî hã amnhî jarê. Nê kãm Jejus kot amnhî nhîpêx kôt pix mã amnhî nhîpêx o pa hprãm ã amnhî jarê. Nê kãm Jejus jamaxpêr kôt pix mã hamaxpêr prãm ã amnhî jarê. ã na pre Pawre kagàja kamã mẽ kãm amnhî jarênh anê. Nê mẽ kãm:

¹ Pa Piripos kamã Jejus Kris kôt ixkwÿjaja. Xà mẽ amex na ka mẽ apa? E ixpê Pawre na pa mẽ amã kagàja nhîpêx nê kamã mẽ amã amnhî jarê nê mẽ awÿr kumê. Nhùm Ximotre haxwÿja kãm ja mex nê. Wa ixpê Jejus mã tanhmã amnhî nhîpêx to ho wa ixpa xwÿnh jakamã na pa wa mẽ awÿr hipêx nê kumê. Mẽ ate Tirtûm kapêr o mẽ ajahkre xwÿnhjê hwÿr nê mẽ kãm mẽ ate tanhmã amnhî to xwÿnhjê hwÿr nê mẽ ate mẽ mar o akrî xwÿnhjê hwÿr. Mẽ apê Kris kôt wa ixtô nê wa ixtôxjê ho ixpimràatã mẽ awÿr hipêx nê kumê. ² E kê Mëpanhîpêxã maati Tirtûm mẽ Pahîhti Jejus Kris wa mẽmoj to

mẽ akutã nojarêt rãhã nê ka mẽ axàmnhîx ri ajamakêtkati nê ri apa ho apa.

*Pawre kot Piripos nhõ xwÿnhjê ho Tirtûm wÿr ã harênh
Epes 1.15-19; Korosê 1.9-12*

³ Na pa hte xatã mẽ amã ijamaxpêr o ixkrî nê mẽ panhõ Tirtûm kot tanhmã mẽ ato mex toja pa kãm ijamaxpêr nê ixkînh nê ixkrî. ⁴ Nê Tirtûm mã mẽ ajarênh nê mẽ ato kuwÿ. Ixkînh kãm mẽ ato kuwÿ.

⁵ Wam ixte mẽ awÿr inhmôrta ã na pa pre mẽ amã Jejus kot mẽ panê tanhmã amnhî nhîpêx to hã harênh o ri mẽ akôt ixpa. Ka prem inhma nê hkôt amnhî xunhwÿr tÿx nê hkôt amnhî nhîpêx o ri apa. Jakamã inhmã axpên kaxyw ri kàxpore hkwy nhôr o apa. Te ham mẽ ate ixwÿr mênhta pyrãk pa pre mẽ akukwak ri amnhîm ho ixujaprôr o ri ixpa pê nhãm ri mẽ kãm Jejus jarênh o ri mẽ hkôt ixpa. Na pa hte arî jam ijamaxpêr rãhã ho ixkînh nê ixkrî. Nê Tirtûm mã mẽ ate ixto mex ã kãm mẽ ajarênh o ixkrî.

⁶ Nê na pa pre ma mẽ awÿr mō nê mẽ amã Jejus jarê ka prem inhma nê hkôt amnhî xunhwÿr nhùm Tirtûm ja hã mẽ apumunh mex nê. Hãmri nê mẽ ate hkôt amnhî to htÿx kaxyw tanhmã mẽ ato mẽ axihtÿx to. Tã koja arî mẽ ato mẽ axihtÿx rãhã nhùm Jejus Kris nhÿrmã akupÿn mẽ pahwÿr wrÿ. Koja ã mẽ ato mex anê. ⁷ Na hte tanhmã ixto mex tota pyrã nê tanhmã mẽ ato mex to ho pa nê mẽ akutã nojarêt rãhã ho pa.

Nê kormã mẽ kot ijaxàr kêt ri pa pre ma mẽ piitã mẽ kãm Jejus jarênh o ri ixpa. Nê ãm hãmri mẽ kãm harê. Mẽ kot mar nê hkôt amnhî xunhwÿr tÿx kaxyw pa pre mẽ hkôt harênh rãhã ho ri ixpa. Ka prem ja kaxyw inhmã kàxpore hkwy gô pa pre ho amnhîm ixujaprôr pê mẽ hkôt ri mẽ kãm harênh o ri ixpa. Tã nhùm prem jar Rôm

kamã ijaxà pa arĩ ixkrĩ htã ka mẽ axte ixwÿr hkwȳ mẽ. Jakamã na pa hte mẽ amã ijamaxpër rãhã ho ixkrĩ nẽ inhmã mẽ akĩnh tÿx nẽ. ⁸Te Jejus Kris kãm mẽ ajapê htÿx pyrãk. Tĩrtũm kot ja hã ixpumunh mex.

⁹⁻¹⁰ Na pa hte mẽ ato kuwÿ nẽ kãm:

—Pa Tĩrtũm. E Piripos nhõ xwÿnhjê pumu. Na mẽ ra kãm axpën kĩnh o axpën kõt pa. Kwa tanhmã mẽ hipêx to kê mẽ arĩ kãm axpën kĩnh tÿx pix nẽ. Jao axpën to mex rãhã ho pa. Nẽ tanhmã mẽ hkrã hto kê mẽ amnhĩ krãm akapër jaxàr tÿx nẽ. Jao tãm amnhĩ nhĩpêx mex nẽ hamaxpër mex o ri pa. Nom kormã mẽ kot ja pumunh tohtuj anhÿr. Tã kêr ka tanhmã mẽ ho kê mẽ ã amnhĩ nhĩpêx anhÿr rãhã Jejus Kris akupÿn mẽ ixwÿr wrÿ.

Anhÿr pa hte mẽ ato hwÿr o ixpa. ¹¹ Nã koja Jejus Kris mẽ akaxwÿnh kãm mẽ ato mẽ axihtÿx ka mẽ ŷ hã axihtÿx pẽ tãm ri amnhĩ nhĩpêx nẽ tãm axpën nhĩpêx o ri axpën kõt apa. Nhũm mẽ piitã ja hã mẽ apumu nẽ axpën mã Tĩrtũm mex o mex ã harê.

Pawre kãm Kris kõt amnhĩ nhĩpêx prãm ã harênh

Atre 28.30-31; Epes 6.19-20; Sikũn Xĩmotre 2.9

¹² E Kris kõt ixtõ nẽ ixtõxjaja. Kot paj mẽ amã tanhmã amnhĩ jarênh to ka mẽ inhma. Na prem ra Jejus ã ixtomnuj tÿx nẽ hã ijaxà pa amnhĩ xà htÿx kamã ijamak o ixkrĩ. Nom mẽ kot ã nhĩpêx anhÿr tã pa hte arĩ ixkrĩ xà kamã mẽ kãm Jejus jarênh o ixkrĩ. Jakamã na mẽ ra ohtõ nẽ tanhmã kot mẽ panê amnhĩ nhĩpêx to hã harênh ma. ¹³ Põristi kot inhĩhkõ hã ixtãnopxar xwÿnhjê mẽ ixwÿr mẽ mrar xwÿnh piitã ixte Kris kapër jahkre ho ixpa pix ã mẽ kot ijaxàr ã ijarênh ma. ¹⁴ Nẽ jar Kris kõt mẽ pahtõ nẽ mẽ pahtõxjaja haxwÿja ijarênh ma nẽ ohtõ nẽ ixpyrà nẽ Kris nhÿ hã amnhĩ to htÿx

nẽ arĩ hkwȳjê mã kapër jarênh rãhã ho pa. Ixpyrà nẽ kãm mẽ uma hkêt nẽ mẽ kutã amnhĩ to htÿx pẽ mẽ kãm harênh rãhã ho pa.

¹⁵⁻¹⁸ Nẽ na pre mẽ hkwȳjaja ixte mẽ amã Kris jarênh o ixpa hã ijarênh ma nẽ hã ixkamã gryk nẽ axtem hamaxpër nẽ ixwakre kamã gryk kãm mẽ kãm Kris kapër jarênh o pa. Na htem hamaxpër o:

—E kot paj ma Pawre kot ra mẽ hwÿr mõr xwÿnhjê hwÿr mõ nẽ kot ra mẽ kãm Jejus kapër jarênh nhĩpy axte mẽ kãm harênh o ri mẽ hkõt ixpa. Hãmri nhũm mẽ inhma nẽ inhgryk ã Pawre kaga. Hãmri nhũm mẽ hagjênh xà kamã arĩ hkrĩ tã tee ri mẽ hã ijarênh ma nẽ hkaprĩ nẽ rĩ amnhĩ pumu. Nã kot paj anẽ.

Anhÿr o hamaxpër tã pa mẽ harênh ma nẽ ixkaprĩ hkêt nẽ. Mẽ kot mẽ amã hprĩ hã Kris kapër jarênh kênã kot pa kêt tee ri mẽ harênh ma nẽ ixkaprĩ. Kwãr mẽ mãmrĩ ri ixkamã gryk kãm kapër jarênh o ri pa. Pa mẽ harênh ma nẽ ixkĩnh nẽ. Nom na hte mẽ hkwȳjaja jajê rom kãm ixkĩnh kãm mẽ kãm Kris kapër jarênh o pa. Nẽ tãm hamaxpër pẽ mẽ kãm harênh o pa. Ra mẽ kot ixpumunh mex jakamã nhũm Tĩrtũm kot jar mẽ hwÿr inhmênh nhũm ixte ãm hãmri mẽ kãm kapër mex jarênh o ri ixkrĩ hã ixpumunh mex. Jakamã kwãr mẽ mãmrĩ tanhmã inhmã hamaxpër to xà hkõt mẽ ujarênh mexja jarênh o pa. Mẽ kãm ixkĩnh kãm harê rÿ ixkamã gryk kãm ri harênh o pa. ãm hãmri Kris kapër jarênh o pa jakamã pa mẽ harênh ma nẽ ixkĩnh nẽ.

¹⁹ Nẽ ra mẽ ate ixto Tĩrtũm wÿr o apa jakamã koja Karõja ixkaxyw tanhmã jar Rõm kamã pahĩhti nhĩpêx to nhũm tokyx ixkator japêr. Pa ixãmnhĩx ijamakêtkati nẽ ri ma mẽ akõt ixpa. ²⁰ Nom inhmã Jejus kãm hprãm xà hkõt pix mã tanhmã amnhĩ nhĩpêx to ho ixpa hprãm. Jakamã koja mẽ ixkator pa ixkĩnh

ně arī kām tanhmā amnhī nhīpêx to ho ri ixa. Nom koja mē tanhmā hamaxpēr to nē ixpī pa mē kutā mē kām amnhī to htýx nē ixām rāhā nhūm mē ixpī pa ijamakêtkati nē ty. Kê mē ja hā ixpumu nē ixtā Kris mex o mex ā harē. Ām Jejus kām hprām xā hkôt pix mā na inhmā amnhī nhīpêx prām. ²¹ Tā kot paj tanhmā amnhī to nē arī ixtīr japēr hā kot paj ām kôt pix mā amnhī nhīpêx rāhā ho ixa. Nom koja mē tanhmā hamaxpēr to nē hā ixpī pa ty nhūm Tīrtūm ma kaxkwa hwýr ixkarō ho āpir kurē kumrêx. Pa Tīrtūm mē Krata wa kuri inhmex o inhmex nē wa kuri ixa ho ixa. ²²⁻²³ Tā nhý na we inhmā mex o hō jakrenh wehe? Na pa tee ri amnhī kukamā ijamaxpēr. Inhmā tokyx ixyk nē Kris kuri ixa hprām. Ja na inhmā hprām o inhmā hprām. Nom ko. Kot pa arī ixtīr nē arī mē kām Jejus kot tanhmā mē panē amnhī nhīpêx to hā harēnh rāhā ho ri ixa. Ko. Ja määnēn inhmā mex. ²⁴ No mē amā na arī ixtīr nē ixpaja mē amā hprām ²⁵ jakamā kot paj pēr tokyx ixyk kêt nē. Kot paj arī ri mē amā Kris kôt mē ato mē axihtýx o ri mē akôt ixa. Jao ām ho hkrānre ka mē ra amnhī kaxyw kām ajamaxpēr nē hkôt amnhī xunhwýr týx nē. Jao akīnh nē apa. ²⁶ Tā kot paj nhýrmā akupým ixtīr rāhā mē awýr mō ka mē ixpumu nē akīnh nē. Jejus Kris kot akupým ixkator ā akīnh nē. Hāmri nē ixtā Jejus mā mex o mex ā harē.

Mē pahte Jejus ā pahpunuj tā mē pahte amnhī to htýx ā mē pamā karō Rukre 6.22; Sikūn Korīt 2.14-16; Xiakre 1.12; Jutre 3

²⁷ Jakamā e kêr ka mē Jejus Kris kapēr kôt pix mā amnhī nhīpêx. Nē axpēn kôt axpēn to axihtýx pē mē kām Jejus kot tanhmā mē panē amnhī nhīpêx to hā harēnh o ri apa kê mē ama nē mē pahpyrà nē hkôt amnhī xunhwý. E kêr ka mē ā amnhī nhīpêx anhýr o ri

apa. Kêr pa nhýrmā mē hagiēnh xāja rūm ixkator japēr nē nhýri ja hā mē ajarēnh ma rý ma mē anhō krī hwýr mō nē ja hā mē apumu nē ixkīnh nē. ²⁸ Nom kwa kêr ka mē amā mē kot Kris ā tanhmā mē ato xwýnhjê puma hkêt nē. Mē kot tanhmā mē anhīpêx kati hto htā kêr ka mē kutā amnhī to htýx nē mē hkôt apa. Kêr kê mē amnhī tā mē apumu nē tee ri hamaxpēr hāmri nē axpēn mā:

—Kwa mē pahte Kris ā tanhmā mē hipêx to htā na htem amnhī to htýx nē arī mē pamā harēnh o ri pa. Pēr mē kām mē pahpuma hkêt. Mān hte Tīrtūm tanhmā mē ho nhūm mē ý hā kām mē pahpuma hkêt nā? Kwa tanhmā kot puj mē ho nhūm mē Jejus kapēr jarēnh o pata kaga? Nā kot puj mē ām tee ri hā tanhmā mē ho kaprý. Mān ām hāmri na htem nhýrmā Tīrtūm kuri htīr tūm nē pa ho pa hā amnhī jarēnh o pa nā? Anē.

Koja mē ā mē ajarēnh anē. Tīrtūm kot mē ato mē axihtýx ā mē apumunh kôt. ²⁹ Na pre tanhmā mē ato ka mē Kris kôt amnhī xunhwý. Tā mē kot tanhmā hā mē anhīpêx to htā na hte Tīrtūm mē kutā tanhmā mē ato ka mē ý hā amnhī to htýx nē apa. ³⁰ Ijaxwýja na pa hte amnhī xā htýx kamā ijamak o ixkrī. Na pre htem Jejus ā ixtomnuj o pa ka prem ja hā ijarēnh ma nē hā ixpumu. Tā ota kê mē ra axte tanhmā hā inhīpêx to. Pa kê amnhī xā htýx kām ijamak o ixkrī ka mē ijarēnh ma. Tā xep mē ixpyrà nē Kris ā amnhī xā htýx kamā ajamak o apa. Nom kwa kêr ka mē tee ri amnhī kukamā ajamaxpēr o akapri nē apa hkêt nē.

2

Jejus kām mē pajapê xàj tanhmā kot amnhī nhīpêx to hā harēnh Rômān 15.5-6; Epes 4.1-6; Piripos 2.18

1 Nē ra mē pahte Jejus kôt amnhī xunhwÿr jakamā pu mē tee ri amnhī kukamā pajamāxpēr o pahkaprī nē ri papa hkêt nē. Ām kām mē pajapēja mā pajamāxpēr rāhā ho pahkīnh nē pajamakêtkati nē ri papa. Nhūm Karō mē pahkarō mā agjê nē mē pahto mex nē mēmoj to mē pakutā nojarêt o ri mē pakamā pa. ² Tā kēr ka mē axpēn mar mex nē mēmoj tā axpēn mā axàkjêr o ri apa hkêt nē. Te ri ixkre pixi kamā mē atipxi nē axpēn kôt amnhī nhīpêx pyrāk. Nē Tirtūm kām hprām xà hkôt pix mā ajamāxpēr o ri apa. Nē mē amā axpēn kīnh o ri apa. Kot kaj mē ā amnhī nhīpêx anē pa ja hā mē apumu rÿ hā mē ajarēnh ma nē ixkīnh tÿx kumrêx.

³ Nē kwa kēr ka mē axpēn pumu nē ā ajamāxpēr anhÿr kêt nē. Mē ajamāxpēr o:

—Tk. Kot pa ri tanhmā jahti ho ajuta hto ho ixpa hkêt nē. Ixte amnhī to rax o hakrenh kēnā kot pa hkêt ri ho ajuta. Kê tām mān tanhmā ixto ajuta hto.

Anhÿr o ajamāxpēr kêt nē. Kêt nhÿri mēhō pumu nhūm tanhmā kute ka hā omu nē ajamāxpēr o:

—Hêxta waa nē. Kwa tanhmā kot pa we ho ajuta hto?

Anhÿr o ajamāxpēr hāmri nē ajamāxpēr xà hkôt tanhmā ho ajuta hto.

⁴ Jao Jejus pyrā nē mēmoj to axpēn kutā anojarêt o ri apa. No ri amnhī pix kukamā ajamāxpēr o apa hkêt nē. ⁵ Kēr pu mē te Jejus tanhmā hamāxpēr toja pyrāk o pajamāxpēr o ri papa.

⁶ Kêp Tirtūm Kra kumrêx jakamā te urāk tā xà na pre ja hā amnhī pumu nē amnhī pix kukamā ā hamāxpēr anē nē hamāxpēr o:

Te ixte Tirtūm pyrāk jakamā mēmoj piitā inhō na. Jakamā kot paj jar kaxkwa kamā inhmex nē ixkīnh nē ixpa ho ixpa nē

aa rer nē nhÿhÿm inhmōr kêt kumrêx. Anhÿr o na pre hamāxpēr? Nā na pre ā hamāxpēr anhÿr kêt nē.

⁷⁻⁸ Kām mē pajapê xàj na pre kaxkwa kamā mēmoj mex piitā rer pa nē man mē pahwÿr wrÿ nē mē pahpyrà nē ĩ ho katorxā nhōhy rūm kato.

Kêp mē panhō Pahihti htā te kêp mē panhō nē te kot amnhī to grire pyrāk o amnhī nhīpêx o ri pa.

Nē Tirtūm kām hprām xà hkôt pix mā amnhī nhīpêx o pa.

Nē ām kôt pix mā amnhī nhīpêx o pa rāhā nhūm prem kupī nhūm arī mē kām xa nē tanhmā amnhī tā mēhō hto hkêt nē.

Na prem hipêx kati nē. Te kêp mē kot amnhī tomnuj tÿx xwÿnhjê nhīpêx pyrāk o hipêx nē pī kahpa hā kunhō nē kupī.

Tā no nhūm mē kêp tanhmā amnhīmnuj to hkêt nē arī mē kām xa. Mē panê na pre ā amnhī nhīpêx anē.

⁹ Hāmri nhūm Tirtūm ā kot amnhī nhīpêx anhÿr ā omu nē akupÿm ho htīr nē akupÿm amnhī wÿr ho api.

Nē mex o mex ā harē.

Nē kot nhÿrmā mē pahpiitā mē pahto amnhīptār kaxyw mē pakaxyw ām.

¹⁰ Jakamā kot puj mē nhÿrmā pahpiitā Jejus kutā pahkōnkrā ho rôrōk nē pahkrī hpa nē kax pēê kām mex o mex ā harē.

Mē pahpiitā. Kaxkwa kamā mē pa xwÿnhjaja nē pika piitā hkôt mē papa xwÿnhjaja.

Nē mē htyk xwÿnh piitā koja mē akupÿn htīr pu mē pahpimràatā Jejus kutā pahkōnkrā ho parôrōk nē pahkrī hpa nē kām mex o mex ā harē.

¹¹ Nē kām:

Pa Pahihti Jejus. Nà ãm hãmri na apê mê inhô Pahi Maati hã apyxi mex na ka.

Jakamã mê ixtô kot paj mẽmoj tâ tanhmã amã karô hto? Nà kot paj mẽ ixtô ã amnhĩ nhĩpêx anhÿr kêt nê. Anê.

Kot puj mẽ nhÿrmã ã Jejus mã pakapêr anê.

Jao mããñen Tirtũm hihtÿx o hihtÿx nê àhpumunh o àhpumunh ã omu. Nê mex o mex ã omu.

Te mẽ pahpê kanhêti pyrãk ã mẽ pajarênh

Matêwre 5.14-16

¹²⁻¹³ Tã kwa ixkrãmnhwÿjaja. Inhmã mẽ akĩnh. Kwa kër ka mẽ arĩ Tirtũm kôt amnhĩ nhĩpêx mex rãhã nê. Te ixte mẽ akamã ixpare ri mẽ ate amnhĩ nhĩpêx mexta pyrãk o ixwakre kamã amnhĩ nhĩpêx mex o ri apa. Na pre ra Tirtũm mẽ panê mẽ pahte amnhĩ tomnuj rê nê tanhmã mẽ pahto pu mẽ ý hã kapêr kôt amnhĩ nhĩpêx o ri papa. Jakamã kwa kër pu mẽ axte tanhmã amnhĩ tomnuj to ho papa hkêt nê. Nê mẽ pahte Tirtũm kapêr kwÿm ri amnhĩ nhĩpêx pymaj ãm hkôt pix mã amnhĩ nhĩpêx o ri papa.

¹⁴ Nê kër ka mẽ mẽmoj to anhÿr kaxyw nê agryk kãm tanhmã ri ho hkêt nê. Nê mẽmoj tâ axapênh kaxyw nê ri hã axpên mã akapêr kati kamã ho anhÿr kêt nê. ¹⁵⁻¹⁶ Mẽ kot amnhĩ tomnuj xwÿnhjaja na htem ã amnhĩ nhĩpêx anhÿr o pa. No kêt mẽ kajaja. Mẽ ate mẽ hkôt apa htã kër ka mẽ hkôt amnhĩ nhĩpêx kêt nê. Mẽ kurom mẽ apê Tirtũm kra jakamã kër ka mẽ hkôt pix mã amnhĩ nhĩpêx o ri apa. Nê tanhmã amnhĩ tomnuj to rÿ tanhmã ajamaxpêr punuj to hkêt nê. Mẽ kot amnhĩ tomnuj xwÿnhjaja te ri kamãt kô kamã ri mẽ kêp àhkĩnh o ri mẽ pa xwÿnhjê kot amnhĩ nhĩpêx pyrãk. Tã kot kaj mẽ hkôt tãm ri amnhĩ nhĩpêx o apa nê te ate kanhêtiija kamãt kô

kamã hirã ho harir pyrãk o amnhĩ nhĩpêx. Jao mẽ kãm Tirtũm kapêr jarênh o ri mẽ hkôt apa. Mẽ kot amar nê apyrã nê nhÿrmã kuri htĩr tũm nê pa ho pa kaxyw. Kot kaj mẽ ã amnhĩ nhĩpêx anê nhũm nhÿrmã Jejus Kris akupÿn mẽ pahwÿr wrÿk ã arĩgrota ã pa mẽ apumu nê ixkĩnh nê. Nê ixkĩnh kãm Jejus mã mẽ ajarê nê kãm mẽ ajarênh o:

—Kwa Pahihti. E jajê pumu. Na pa pre mẽ kãm akapêr jarênh o ri mẽ hkôt ixpa nhũm mẽ inhmar tÿx nê nê akapêr kôt amnhĩ nhĩpêx o ri pa. Jakamã na pa pre mẽ kãm akapêr jarênh kaprÿ hkêt nê.

Anhÿr o kãm mẽ ajarê. ¹⁷ Na pa pre mẽ akôt mẽ amã Tirtũm kapêr jarênh o ri ixpa ka prem inhma nê hkôt amnhĩ xunhwÿ. Jakamã te ixte Tirtũm mã mẽ ato ixkĩnh xà nê kãm mẽ anhôr pyrãk.

Nê koja jar Rôm nhô pahihtiija tanhmã ixto hkêt japêr. Rÿ tanhmã ixto. Nom kwãr mẽ mãmri tanhmã kãm ixto hprãm xà hkôt tanhmã ixto rÿ xpi. Koja mẽ ã ixte mẽ anhĩpêx anhÿr ã xpi pa ixkĩnh nê. Nê tanhmã ijamaxpêr to hkêt kãm ty. Jakamã na pa ra ã mẽ kot inhĩpêx anhÿrja kukamã mẽ amã amnhĩ kĩnh ã amnhĩ jarê ka mẽ inhma. ¹⁸ Tã kër ka mẽ ixpyrà nê ajaxwÿja ixtã akĩnh nê apa.

Ximotre mẽ Eparoxit wa harênh

¹⁹ Nê koja Pahihti Jejus kãm ja prãm hã kot paj ma mẽ awÿr Ximotre mẽ nhũm ma mẽ awÿr mō nê ri mẽ akôt pa nê tanhmã mẽ ate amnhĩ nhĩpêx to hã mẽ apumu. Hãmri nê man akupÿn ixwÿr mō nê inhmã mẽ ajarê pa mẽ ajarênh ma nê ixkĩnh nê tee ri mẽ akukamã ijamaxpêr o ixkrĩ hkêt nê. ãm tãm mẽ akukamã ijamaxpêr o ixkrĩ. ²⁰ Ximotre tapxipix na ixpyrà nê kãm mẽ akĩnh nê kãm mẽ ato ajuta hprãm. Na hte mẽ ajarênh rãhã ho pa. ²¹ Nom jar mẽ pi-itã Ximotre kĩnhã amnhĩ mex pix

kukamā hamaxpēr o pa nē kām Je-
jus Kris kôt tanhmā amnhī nhīpêx
to ho pa hprām kêt nē.

²² Ximotre te kêp ixkra pyrāk. Na
hte ixkôt pa nē ixpyrà nē Jejus mā
tanhmā amnhī nhīpêx mex to ho
pa. Pa pre wa ijamē mē kām mē
ujarēnh mex jarēnh o wa ri mē hkôt
ixpa. ²³ Tā koja mē tanhmā ixtā
axpēn mar to. Apu mē kot ixpīr ā
amnhī jarē rý ixkator ā amnhī jarē.
Pa tanhmā amnhī tā mē mar to
nē rī kormā ma mē awýr Ximotre
mē kê ma mē awýr mō nē mē amā
tanhmā ijarēnh to.

²⁴ Nē koja Pahihti Jejus kām ja
mex pa ijaxwýja ma mē awýr mō
pu mē axte axpēn pumu.

²⁵ Nē kot paj tokyx ma akupým
mē awýr Kris kôt mē pahtō
Eparoxit mē. Na ka prem kām
kàxpore gō nhūm man ixwýr o
mō nē inhmā kugō. Hāmri nē jar
inhmā àpēnh rax nē ixpyrà nē mē
ujarēnh mexja jarēnh o pa. ²⁶⁻²⁷ Tā
ra à htýx nē. Kironhýx pre mē
pahpê ty. Tā nhūm Tirtūm omu
nē kamā ukaprī nē. Nē määnēn
pa ixkamā ukaprī nē. Nē tee ri
ixte à htýx ā omunh nē ixkaprī
htýx pymaj akupým inhmā ho mex
nhūm ra akupým mex nē ri pa.
Hāmri nē kām mē apumunh prām
nē. Mē ate à htýx ā harēnh mar nē
akaprī hā mē ajarēnh ma nē tee ri
mē akukamā hamaxpēr. ²⁸ Jakamā
inhmā akupým tokyx mē awýr
mēnh prām. Tā koja mēmo arīgro
hā mē awýr pōj ka mē omu nē akīnh
nē tām ajamaxpēr. Pa ijaxwýja jar
ixkīnh nē tām ijamaxpēr. ²⁹⁻³⁰ Na ka
prem ixwýr amē nhūm man ixwýr
mō nē jar ixri mē kām Kris kapēr
jarēnh o ri mē hkôt pa rāhā nhýx hā
ty nom kot amnhī kamā kahak kêt.
Jakamā kê akupým mē awýr pōj ka
mē omu nē akīnh nē. Nē kahti hkôt
amý nē ho mex nē. Kêp Kris kôt mē
pahtō mex kēnā. Ā na htem Kris
mā mē kot tanhmā amnhī nhīpêx

to ho mē pa xwýnhjē nhīpêx mex
anhýr o pa.

3

*Mēmoj tā mē pahpumunh kôt
Tirtūm kot tām mē paxunhwýr ā
harēnh*

Piripos 2.18, 4.4

¹ E Kris kôt ixtō nē ixtōxjaja. Kris
kêp mē panhō Pahihti jakamā kwa
mē jam ajamaxpēr nē akīnh rāhā
ho ri apa.

Na ra ra mē amā mēmoj jarēnh
rax nē. Nē hā kagà rax tā ko-
rmā inhmā ja ho anhýr kaga hkêt
nē. Kot paj axte mē amā hkwy hā
kagà. Mē ate hā ano htýx nē ho apa
kaxyw. ² Jakamā e kwa mē okora.
Kêr ka mē amnhī nē mē kot Tirtūm
kapēr o hêx xwýnhjē pumunh mex
o ri apa. Na htem tanhmā mē amā
kapēr ho pa nē mē amā:

—Kot kaj mē ixpê Ijaewjê pyrà
nē amnhī my kwryt kà jakà hāmri
nē apê Tirtūm kra. Anē.

³ Nom ja kot anhýr kêt. Mē pahte
amnhī jakār kôt mē pahpê Tirtūm
kra hkêt. Ā kot anhýr ronhýx pu
mē amnhī krā hkôt tanhmā amnhī
nhīpêx to ho pahpê hkra. Nom ja
kot anhýr kêt. Mē ate amnhī jakār
kêt tā mē ixpyrà nē amnhī kaxyw
Jejus Kris mā ajamaxpēr jakamā
mē ixpyrà nē mē apê Tirtūm kra
na ka mē. Na ka htem mē ixpyrà
nē Karō nhý hā kām mex o mex ā
harēnh o ri apa nē mē ixpyrà nē Je-
jus kukwak ri akīnh nē ri apa. Nom
na pu htem pahpê hkra kaxyw
amnhī jakār kêt nē. ⁴ Kop ām amnhī
krā hkôt mē pahte amnhī to Tirtūm
kra ronhýx pa ra amnepēm amnhī
to hkra nē ri ixpa. Na pa pre ixpê
hkra hprām xāj amnhī krā hkôt
tanhmā ri amnhī nhīpêx to rax o
ixpa nom ā amnhī nhīpêx anhýr
kaprý. E pa ja hā mē amā amnhī
jarē ka mē ijarēnh ma.

⁵ Na pa pre ixkato nē kormā
ixtā semān pixire nhūm mē ixpê

Ijaew ā inhmy kwrýt kà krāhta. Nom pa ā mẽ kot inhîpêx anhÿr kôt ixpê Tirtüm kra hkêt nê. Nê inhîpêxà hkôt ixpê finat Pêjamî kanrêhâ htâmhwy jakamâ ixpê Ijaew mex na pa. Nê Ijaew kapêr o ixkapêr o ri ixpa. Nom ja kôt ixpê Tirtüm kra hkêt. Nê mãânên ixpê Parijew nhô xwÿnh jakamâ na pa pre Tirtüm kot finat Mojes mã mẽ pakaxyw mẽmoj tâ karô kôt pix mã amnhî nhîpêx o ixpa hprâm. ⁶ Jao tee ri mẽ kot Jejus kôt amnhî nhîpêx xwÿnhjê pumu nê mẽ homnuj tÿx o ri ixpa. Na pa pre ijamaxpêr o: “Nà müjjaja na htem mẽ ixkwÿm ri amnhî nhîpêx o pa.” Anê nê mẽ hipêx kati ho ri ixpa. Nê ijamaxpêr o: “Ra ixte finat Mojes kot Tirtüm nhÿ hâ kapêr piitâ hkôt amnhî nhîpêx mex jakamâ na pa hte tanhmâ ri amnhî tomnuj to ho ri ixpa hkêt nê.” Anê.

⁷ ā na pa pre ixpê Tirtüm kra hprâm xâj amnhî nhîpêx anhÿr o ixpa. Tâ nom âm ā amnhî nhîpêx anhÿr hkapyrÿ. Na htem ā ri amnhî nhîpêx anhÿr kôt kêp Tirtüm kra hkêt nê. Tâ pa hpânâ amnhî kaxyw Kris kôt ijamaxpêr nhüm ixto hkra kurê kumrêx.

⁸ Ra ixte Jejus Kris kôt amnhî xâm jakamâ Jejus kêp inhô Pahihti pa inhmâ kapêr kôt pix mã amnhî nhîpêx o ri prâm. No hkrax rüm ixte amnhî nhîpêx tÿmja na pa ra Jejus gryk ā hkaga hpa. Te ixte mẽmoj punuj pyr nê amnhî katut kôt mênh nê axte kâm ijamaxpêr kêt pyrâk. Jao amnhî kaxyw Jejus kôt pix mã ijamaxpêr o ri ixpa. ⁹ Nom kormâ ā ijamaxpêr anhÿr kêt ri na pa pre ixtÿx ri ijamaxpêr o:

—Nà ixte Mojes kot Tirtüm nhÿ hâ kapêr kôt amnhî nhîpêx o ixpa jakamâ koja Tirtüm ja hâ xpumu nê ixto hkra.

Anhÿr tâ nom ja kot anhÿr kêt. Na htem amnhî krâ hkôt tanhmâ ri amnhî nhîpêx to ho pa nhüm Tirtüm âm ja hâ mẽ omu nê âm

hâ mẽ omu nê mẽ ho hkra hkêt nê. Nom koja mẽ Kris kôt amnhî xunhwÿ nhüm ja hâ mẽ omu nê mẽ ho hkra kurê kumrêx. Jakamâ ixte Kris kôt amnhî xâm ā ixpumunh kôt pix mã na pre ixto hkra nê inhmex ā ijarê. ¹⁰ Hâmri pa ra inhmâ Kris kôt pix mã amnhî nhîpêx o ri ixpa hprâm. Na pre ty tâ akupÿm htÿr nê hihtÿx nê âhpumunh tÿx o tanhmâ amnhî nhîpêx to ho pa. Tâ ijaxwÿja inhmâ urân ā amnhî nhîpêx anhÿr prâm. Nê inhmâ urâk nê amnhî xâ htÿx kutâ amnhî to htÿx nê ixpa hprâm. Mê kot hâ ixpÿr mã tâ pa urâk nê Tirtüm kapêr kaga hkêt nê âm kôt pix mã amnhî nhîpêx o ri ixpa rāhâ urâk nê hâ ty. Ja na inhmâ ho anhÿr prâm. ¹¹ Kê Tirtüm kot hipêxta pyrâ nê akupÿm ixto ixtÿr pa wa kuri ixtÿr tÿm nê ixpa ho ixpa. ¹² Inh mâ Kris kôt pix mã amnhî nhîpêx o ixpa hprâm tÿx kumrêx. Kormâ ixte hkôt amnhî nhîpêx o inhmôr nê kormâ hatur xâm mênh kêt tâ inhmâ tokyx hatur xâm mênh prâm. Na pa ā inhmâ amnhî nhîpêx anhÿr prâm tÿx kumrêx.

Nê na pa hte ixte amnhî tomnuj kêt ā amnhî to jarkrar o ri ixpa hkêt nê. Na pa hte arî tōhâ tanhmâ amnhî tomnuj to nom inhmâ ā amnhî nhîpêx anhÿr prâm kêt. Nê na pa kormâ ixprî hâ Kris kot amnhî nhîpêx mar o inhmôr nê hatur xâm mênh kêt tâ inhmâ hkôt amnhî nhîpêx o inhmôr nê tokyx hatur xâm mênh prâm. Ja kaxyw na pre Jejus Kris amnhî kaxyw ixta. ¹³ Na pa hte mẽ akurom papxipix ixte Jejus kâm hprâm xâ hkôt amnhî nhîpêx o ixpa hâ amnhî to jarkrar kêt nê. Nom ra ixte tanhmâ amnhî tomnuj to ho ixpata pa axte kâm ijamaxpêr kêt nê. Te amnhî katut kôt ixte rênh par pyrâk o hipêx nê axte kâm ijamaxpêr kêt nê. Nê Jejus kâm hprâm xâ hkôt pix mã amnhî nhîpêx prâm xâj amnhî kaxyw kâm ijamaxpêr o ri ixpa.

¹⁴ Koja nhÿrmã Tirtüm ixpê Kris kwÿ hã amnhÿ wÿr ixwÿ në inhmã:

—E amnê ixwÿr api Pawre. Kot kaj jarãhã amnê më ixwÿr api.

Anhÿr o nhÿrmã inhmã kapêr jakamã na pa hte amnhÿ tã ãm pix jamãr rãhã ho ixpa. Pê ra Jejus kot amnhÿ nhÿpêx piitã omunh par o mō. Nã kot paj gaa në hkôt pix mã amnhÿ nhÿpêx mex o ri ixpa. ¹⁵ Kwa kêr pu më pahpiitã ã pajamaxpêr anê. Jao amnhÿ wÿr hamãr pê hkôt pix mã amnhÿ nhÿpêx o ri papa. Më pahpiitã më pahpê Kris kwÿ kênã. Nom kot ka më atō ja kaxyw tee ri amnhÿ kukamã ajamaxpêr në ajamaxpêr o:

—Nã tanhmã kot paj we amnhÿ to në Jejus kôt amnhÿ nhÿpêx mex rãhã o ri ixpa? Ja kaxyw ixãhpumunh tÿxre hã. Anê.

Hãmri në ã ajamaxpêr anhÿr o apaja apê hihtÿx japêr. Hã koja Tirtüm hprÿ hã tanhmã amã ja kukamã harênh to në kaxyw ato axihtÿx ka ixpyrà në hkôt pix mã ri amnhÿ nhÿpêx o opa. ¹⁶ Jakamã kêr pu më ãm Tirtüm kãm hprãm xã hkôt pix mã tanhmã kãm amnhÿ nhÿpêx to ho papa. Ra më pahte hkôt amnhÿ nhÿpêx o papa xãja kôt pix mã arÿ amnhÿ nhÿpêx rãhã ho papa.

¹⁷ E Kris kôt ixtō në ixtōxjaja. Na pa ra më anoo mã Jejus kôt tãm ri amnhÿ nhÿpêx o ri ixpa. Tã kêr ka më ja hã ixpumu në ixpyrà në hkôt amnhÿ nhÿpêx o ri apa. Hãmri në nhÿri më kot ixpyrà në ã amnhÿ nhÿpêx anhÿr xwÿnhjê hō pumu në urãk në ã amnhÿ nhÿpêx anê. ¹⁸⁻¹⁹ Jejus kot më pamã më pahte amnhÿ tomnuj mÿrapê pÿ kahpa hã më panê htykja nhÿm më ra ohtō në hprÿ hã mar tã hkôt amnhÿ xunhwÿr kêt në. Më kãm ã kot amnhÿ nhÿpêx anhÿrja ã mar prãm nōkati. Jakamã te më kãm Jejus kurê xwÿnh pyràk. Na htem hã hpijaam kêt kãm tanhmã

ri amnhÿ tomnuj to ho pa. Nê kãm amnhÿ mex pix prãm. Nê tanhmã amnhÿ tomnuj to në ja hã amnhÿ pumu në hkÿnh në. Nom tee ri ja hã amnhÿ pumu në hkaprÿ në ri pa hkêt në. Tã ã më kot amnhÿ nhÿpêx anhÿr jakamã koja më nhÿrmã ma më kot amnhÿ xã htÿx kamã hamak o pa tÿm xãta wÿr hapêx. Nã koja më ã amnhÿ nhÿpêx anê. Ra ixte më amã ja hã më harênh rax tã pa axte më amã më harê. Inhmã më hkaprÿ hkôt na pa hte xatã më amã ja hã më harê. ²⁰ Kêt më papajaja më kurom më pahpê kaxkwa nhō xwÿnh nom kormã. Koja nhÿrmã Jejus Kris akupÿn më pahwÿr kaxkwa rÿm wÿr. Më papytãr xwÿnh maati Pahihtija akupÿn wÿr hãmri në ma akupÿm amnhÿ kôt më pahto api. Jakamã na pu htem arÿ pahkÿnh pê amnhÿ wÿr kamã pajamak rãhã ho ri papa. ²¹ Na pu htem jar pyka ja kamã Jejus kÿnhã paxirerek në pahpunuj në ri papa. Nom koja nhÿrmã akupÿn më pahwÿr wÿr hãmri në amnhÿ pyrà në më pamã më panhÿ nyw gō pu më urãk në paxihtÿx kãm pahtrÿ tÿm në papa ho papa. ã kot më panhÿpêx anhÿr kaxyw ãhpumunh o ãhpumunh. Tã koja ãhpumunh tÿx kãm mëmoj piitã ho amnhÿptãr pa. Pu më pahpiitã hkôt amnhÿ nhÿpêx mex rãhã ho ri papa.

4

*Pawre kot mëmoj tã më kãm karō
Epes 4.3; Piripos 2.2; Korosê 3.15*

¹ E Kris kôt ixtō në ixtōxjaja. Inhmã më ajapêê. Na pa hte më ato ijamak o iãkrÿ në më amã ijamaxpêr në iãkÿnh në. Nê jar më pahkwÿjê mã më ajarênh o ri iãkrÿ. E kwa kêr ka më arÿ Pahihti kapêr kôt pix mã mãn amnhÿ nhÿpêx mex rãhã ho ri apa.

² Nê wa ka Ewox më Sÿxika wa. Na ka xep hte wa mëmoj tã axpên

kamā agryk rāhā ho ri apa. Kwa wa ā amnhī nhīpêx anhÿrja mā anhÿre nê tām axpên nhīpêx. Pahihti Kris kôt war ate axpên to war atôx kênā kot ka kêt wa axtem nê mēmoj tā axpên kamā agryk o ri apa.

³ Nê ka Xikitre. Apê ixkràmnhwÿ mex jakamā kêt ka axpên tā wa nita wa kām akapêr kām axihtÿx nê kê war ama nê akupÿm tām axpên nhīpêx. Na pre wa ra Kremên mē hkwyjê mē hpimràatā ixpyrà nê Jejus kot tanhmā mē panê amnhī nhīpêx to hā harênh o ri pa. Tirtûm nhô kagā kamā mē hixi piitā hikwÿ. Mē pahÿr tûm nê mē papa mā xwÿnhjaja ra Tirtûm nhô kagā kamā mē panhīxi jaxwÿr par.

⁴ Nê kêt ka mē apê Pahihti hkwy hā akînh nê ri apa. Mē ate ā amnhī nhīpêx anhÿr o apaja na pa inhmā hprām tÿx jakamā kot paj axte mē amā harê. Kwa kêt ka mē akînh nê ri axpên kôt apa.

⁵ Pahihti Jejus ra akupÿn mē pahwÿr nojarêt jakamā kêt ka mē kutêp mē piitā ri mē ho mex o ri mē hkôt apa.

⁶ Nê kêt ka mē tee ri amnhī kukamā ajamaxpêr o ri apa hkêt nê. Arī amnhī to Tirtûm wÿr rāhā nê. Kot ka mē mēmo arigro hā apê amrakati japêr nê tee ri ja hā amnhī pumu nê amnhī to awÿ kê mē ama nê mē amā mēmoj gō. Rÿ mē ate mēmoj tā hwÿr xwÿnhnta tanhmā mē amā hipêx to ka mē amnhī tā omu nê kām:

—Nā âm hāmri na ka ā inhīpêx anê nê inhmā ja gō Tirtûm. Amex o amex.

Anhÿr o kām amnhī jarê. ⁷ Kot kaj mē ā amnhī to hwÿr anhÿr o ri apa nhûm tanhmā mē akrā hto ka mē mē apê Jejus Kris kwÿ hā ajamakêtkati nê axâmnhix ri apa. Hāmri nê mēmoj tā tee ri amnhī kukamā ajamaxpêr o ri akapri nê apa hkêt nê. Âm akînh rāhā ri apa. Tirtûm kot tanhmā mē pahto nhûm mē pajamakêtkati nê ri mē papaja

mê pahte amnhī tā omunh kêt. Âm tapxipix kot ā mē panhīpêx anhÿr kukamā ahpumunh tÿx.

⁸ E Kris kôt ixtô nê ixtôxjaja. Nā ixkapêr ā kagā jatur xā na ja. Kwa kêt ka mē ixujarênh mar tÿx nê hkôt amnhī nhīpêx o apa.

Nê kêt ka mē axapênh mex pix kukamā ri ajamaxpêr o apa.

Nê mēmoj mex pix kukamā ri ajamaxpêr.

Nê axpên mā akapêr mex pix kukamā ri ajamaxpêr.

Nê akatāt kôt akapêr xaptâr pix o axpên mā akapêr hkukamā ri ajamaxpêr o ri apa.

Nê tām ri amnhī nhīpêx hkukamā mân ajamaxpêr o ri apa.

Nê mē piitā ri mē ho mex o apa hkukamā ajamaxpêr.

Nê mē akapêr mex pix kukamā mân ajamaxpêr o ri apa.

E kêt ka mē ā amnhī nhīpêx anhÿrja kukamā ajamaxpêr rāhā ho ri apa.

⁹ Nê mē akôt ixpare ri na pa pre Kris kôt amnhī to mex pix nê tām ixkapêr o ri ixpa. Tā kêt ka mē ixpyrà nê ā amnhī nhīpêx anê. Koja Tirtûm ja hā mē apumu nê mē akôt ri pa ho pa. Kêp mē pamā mē paxâmnhix pajamakêtkati xā nhôr xwÿnh na.

Mê kot Pawre hwÿr mēmoj mēnh nhûm kot omunh nê hkînh ā harênh Sikûn Korî 11.7-9; Piripos 1.5

¹⁰ Nê amnepêm na ka prem xatā tanhmā ixto mex to ho ri apa. Tā axte ā inhīpêx anhÿr prām nom mē apê awry nê ixpa jakamā ka xep prem tee ri tanhmā ixto mex to hkukamā ajamaxpêr kaprÿ. Tā jar mē kot ijaxâr ā ijarênh ma nê ixwÿr Eparoxit mē nhûm man ixwÿr mō nê inhmā kâxporeta gō. Mē amā ijapê hā ixwÿr amê pa omu nê ixkînh tÿx nê. Nê ixkînh kām Tirtûm mā mē ajarê. Âm hāmri na ka prem ixwÿr amê.

11-12 Nē na pa hte tanhmā ixkute htā arī ixkīnh nē ijamakētkati nē ri xpa. Jakamā kot pa mēmo arīgro hā xipē amrakati nē inhmā prām japēr tā no ām tee ri amnhī kukamā ijamaxpēr o ri ixkaprī hkēt nē. Arī ixkīnh rāhā ixāmnhīx ri xpa. Rỳ pa inhō mēmoj rax japēr nē määnēn ixkīnh nē ixāmnhīx ri xpa. Na pa pre tōhā inhō rax nē xpa. Nē tōhā inhō hkēt nē xpa. Tā arī ixkīnh rāhā nē xpa ho xpa. ¹³ Na hte Kris mēmoj piitā hkukamā ixto ixihtỳx pa ỳ hā mēmoj kutā ixihtỳx nē xpa. Jao mēmo arīgro hā inhmā prām tỳx nē ri xpa htā ỳ hā kutā ixihtỳx nē ixāmnhīx ri xpa. ¹⁴ Tā jar ixpunuj nē ixkrī ka mē ijarēnh ma nē ixwỳr kàxpore hkwy rē. Ām hāmri na ka prem ixwỳr arē. ¹⁵ Amnepēm na pa pre mē anhō pika pē Masetōn rùm ixkato nē mē piitā mē kām Jejus kot tanhmā mē panē amnhī nhīpēx to hā harēnh o ri xpa ka mē xatā ixwỳr kàxpore hkwy rē pa ho amnhīm ixujaprōr o ri mē hkōt xpa. Mē apē Piripos kamā Kris kōt ixtō nē ixtōx pixjaja na ka prem ā inhīpēx anē. Krī hkwy kamā Kris kōt mē pahkwỳjaja na mē akīnhā ā inhīpēx anhỳr kēt nē. Ām mē kapxipix na ka pre ā ixto mex anē. ¹⁶ Tesarōn kamā ixpare ri na pa pre xipē amrakati kumrēx nē ri mē hkōt xpa ka mē xatā ixwỳr kàxpore hkwy rē pa pre ho amnhīm ixujaprōr rāhā ho ri mē hkōt xpa. ¹⁷ Nom mē ate ixwỳr hkwy rēnh kaxyw mē akamā ijamak o ri xpa hkēt nē. Rỳ ijamaxpēr o:

—Ko. Koja Piripos nhō xwỳnhjaja ijarēnh ma nē kām ixkaprī nē ixwỳr kàxpore hkwy rēnh japēr.

Anhỳr o mē akukamā ijamaxpēr kēt nē. Nom ra mē ate ixwỳr hkwy rēnh jakamā koja Tirtūm ja hā mē apumu nē mē ato mex nē. Ā mē pahte axpēn kutā panojarēt anhỳrja na kām hprām.

¹⁸ Tā nhūm Eparoxitja ham mē

arūm kato nē man ixwỳr mō nē inhmā kàxporeta gō. Kwa na ka mē inhmā ōr rax nē. Koja tokyx xipē hapēx kēt pa kritpēm ho ixàpkur o ixkrī. Tā ot pa ho kōta nē tanhmā hkre kamā kute pumunh xà hkōt hā kagà nē mē awỳr kumē. Nà mē ate ixwỳr axāmnhōrta na Tirtūm omu nē ixtā mē apumu nhūm ja kām mex kumrēx. Te mē kot mē hkuxwaxà hpār nhūm mē kām mexta pyrāk nhūm ja kām mex nē. ¹⁹ Nà koja Tirtūm mē apē Jejus Kris kwỳ hā mē amā mē ate mēmoj to presija xà nhōr rāhā ho pa. Mēmoj piitā kēp ō kēnā.

²⁰ E kēr pu mē Mēpanhīpēēxà maati Tirtūm mā mex o mex ā harēnh rāhā o papa. Ja na inhmā hprām.

²¹⁻²² Nē ot pa mē jar ixpiitā mē apē Jejus Kris kōt mē ixkwỳjē hwỳr kagàja kamā mē xipēr mē. Mē xpyrà nē mē apē Tirtūm kra hā. Pa nē Kris kōt mē pahtō nē mē pahtōxjaja. Nē Rōm nhō pahi mā mē àpēnh xwỳnh kot Kris kōt amnhī xunhwỳr xwỳnhjaja määnēn. Ām jar mē xipē Tirtūm krajē piitā pa mē awỳr xipēr mē.

²³ E kē Pahihti Jejus Kris mēmoj to mē akutā nojarēt rāhā nē. Jao mē ato mex o pa.

Tā ām ja pix. Xipē Pawre na pa mē awỳr kagàja nhīpēx nē kumē.

Korosê Pawre kot Koros kamã Jejus kôt hkwyjê hwÿr kagà nê mênh

Pawre na pre kagàja nhîpêx. Jejus nhÿ hã hkrajê jahkre o mē pa xwÿnhjê hõ na pre. Tã nhũm mē kēp Jejus kra hkêt xwÿnh kwÿjjaja Jejus ã unê nê haxà nhũm arî hkrî ho hkrî. Hãmri nê krî pē Koros kamã Jejus krajê mã kagà nhîpêx nê mē hwÿr kumê. Koros kamã Jejus kwÿjê kamã Ijaew kwÿ nê kamã Ijaew kêt xwÿnh kwÿ nhũm Pawre mē ho hpimràatã mē hwÿr kumê. Kormã mē hwÿr mōr nê mē omunh kêt tãã. Nê kagàja kamã mē kot tanhmã Jejus o hêx to ho pa xwÿnhjê jarênh to. Jejus kēp Tirtũm Kra hkêt ã mē kot ho hêx xwÿnhjê jarê nê mē nê mē kãm kapêr. Mē kot mē hkôt amnhî nhîpêx kêt kaxyw mē kãm kapêr nê hã kagà nê mē hwÿr kumê nê mē kãm:

¹ Pa Koros kamã Kris kôt ixkwÿjjaja. Xã mē amex na ka mē apa? Ixpê Pawre na pa mē awÿr kagàja nhîpêx nê mē awÿr kumê. Kris kôt mē pahtõ Ximotre mē wa kumê. Ixte Jejus Kris nhÿ hã mē ahkre ho mē ixpa xwÿnhjê hõ na pa. Tirtũm kãm hprãm xã hkôt. ² Tã pa mē awÿr kagà nhîpêx nê kumê. Mē apê Kris kôt mē ixtõ nê ixtõx na ka mē. Na ka xep htem Kris kapêr kôt amnhî nhîpêx mex o ri apa. E kê Tirtũm mē apê hkra hã mē akutã nojarêt rãhã nê. Ka mē amex nê ajamakêtkati nê axãmnhîx ri tanhmã amnhî nhîpêx ho ri apa.

Koros nhõ xwÿnh kwÿjjaja kot Jejus kôt amnhî xunhwÿr ã mē harênh Wam Tesarõn 1.2-5

³⁻⁴ Na pa ra Ximotre mē wa mē ajarênh ma. Mē ate amnhî kaxyw Jejus Kris kôt ajamexpêr tÿx nê

hkôt amnhî nhîpêx mex o apa hã mē ajarênhja ma. Nê mē kot Tirtũm kôt amnhî xunhwÿr xwÿnh piitã mē amã mē hkînh ã mē ho mex o apa hã mē ajarênhja ma nê wa ixkînh nê. Jakamã na pa wa Pahihti Jejus Nhîpêxã Tirtũm mã amnhî jarênh kaxyw nê kãm mē anhy hã wa ixkînh ã amnhî jarê. ⁵ Na pre Epas ma mē awÿr mō nê mē amã Jejus kot tanhmã mē panê amnhî nhîpêx to hã harênh o mē akôt pa. ãm hãmri kot mē amã harênhja. Tã ka xep prem ama nê amnhî kaxyw hkôt ajamexpêr nê hkôt amnhî xunhwÿ. Hãmri nê amnhî wÿr Jejus jamãr o ri apa. Kojã nhÿrmã akupÿn mē pahwÿr wrÿ nê amnhî pyrã nê ma akupÿm kaxkwa hwÿr mē pahto api nê mē pahto mex kumrêx o mē pahkôt pa ho pa. Tã ka xep htem amnhî kaxyw hkôt ajamexpêr tÿx nê ã kot amnhî nhîpêx anhyr kutêp amnhî wÿr kamã ajamak rãhã nê. Nê mē amã mē kot Tirtũm kôt amnhî xunhwÿr xwÿnhjê hkînh tÿx nê.

⁶ Na hte Tirtũm ãm hãmri mē pahto mex pix rãhã ho pa. Nê mēmoj to mē pakutã nojarêt rãhã nê. Tã wam mē ate harênh marta ã ka mē hkôt amnhî xunhwÿr kurê kumrêx nê ri kapêr kôt axpên kôt amnhî nhîpêx mex pix o ri apa. Jao hkôt pix mã amnhî nhîpêx mex nê. Tã na hte pika piitã hkôt ri mē pa xwÿnh kwÿjjaja mē apyrã nê Jejus jarênh ma nê hkôt amnhî xunhwÿ. Nê mē apyrã nê axtem hkôt pix mã amnhî nhîpêx nê kapêr kôt amnhî nhîpêx mex o ri pa.

⁷ Nê mē awÿr mōrta ã na pre Epasja mē amã Tirtũm kapêr jarênh o ri mē akôt pa ka prem ama nê amnhî kaxyw hkôt ajamexpêr nê hkôt amnhî xunhwÿ. Epasja wa ixpyrã nê kot Kris mã tanhmã amnhî nhîpêx to ho pa xwÿnh. Nê wa inhã hapêê. Na pre katã kôt mē amã Tirtũm kapêr jarênh pa. Kot mēmoj to mē pakutã nojarêt rãhã

hã harênh o ri mẽ akôt pa. ⁸ Tã man akupÿn wa ixwÿr môn pôj nê wa inhmã tanhmã mẽ ajarênh to. Tirtûm Karô nhÿ hã mẽ amã Kris kôt atô nê atôx piitã mẽ hkĩnh o ri apa hã mẽ ajarê. Pa wa mẽ ajarênh ma nê wa ixkĩnh tÿx kumrêx.

Pawre mẽ Ximotre wa kot Koros kãm hkwÿjê ho Tirtûm wÿr ã wa harênh

Epes 1.15-23, 3.14-21; Piripos 1.9; Wam Tesarôn 5.23-24; Sikûn Tesarôn 1.11, 2.16

⁹ Nê na pre Epas akupÿn wa ixwÿr pôj nê wa inhmã tanhmã mẽ ajarênh to. Mê ate amnhĩ kaxyw Jejus kôt ajamaxpêr o apa nê mẽ amã Kris kôt akwÿjê piitã mẽ hkĩnh o ri apaja nhũm wa inhmã mẽ ajarê. Pa wa mẽ ajarênh ma nê mẽ ato Tirtûm wÿr rãhã o jar mẽ hagiênh xà kamã ixkrĩ. Nê arĩ mẽ ato hwÿr rãhã ho ixkrĩ. Nê mẽ ato hwÿr o:

—Pa Tirtûm. Ot pa Ximotre mẽ wa Korosê nhô xwÿnhjê ho awÿr kaxyw amã mẽ harê. Kwa tanhmã mẽ hamaxpêr to kê mẽ amã hprãm xà hkôt pix mã amã tanhmã amnhĩ nhĩpêx to ho pa. Nê Akarô nhÿ hã hprĩ hã akapêr ma nê ãm hkôt pix mã tanhmã amnhĩ nhĩpêx to ho pa. Anê.

¹⁰ Na pa hte wa ã mẽ ato Tirtûm wÿr anhÿr rãhã ho ixkrĩ. Kot kaj mẽ ã amnhĩ nhĩpêx anhÿr o ri apa nê Jejus kot amnhĩ nhĩpêx o amnhĩ nhĩpêx mex o ri apa. Nê aprĩ hã Tirtûm kot amnhĩ nhĩpêx ã omunh mex o mō. Jao mẽmoj to axpên kutã anojarêt pix o ri apa hprãm. Hãmri nhũm Tirtûm ja hã mẽ apumu nê hkĩnh nê. ¹¹ Tirtûmja mẽ pakurom mẽmoj piitã kaxyw àhpumunh o àhpumunh. Nê mẽmoj piitã kaxyw hihtÿx o hihtÿx. Jakamã na pa hte wa mẽ ato hwÿr o:

—Pa Tirtûm. Kwa tanhmã Koros nhô xwÿnhjê ho kê mẽ axihtÿx nhÿ hã mẽmoj punuj kutã amnhĩ to htÿx nê. Mê kot Jejus ã tanhmã mẽ ho nhũm mẽ kot amnhĩ xà

kamã hamak tã kê mẽ tee ri amnhĩ kukamã hamaxpêr o hkaprĩ nê ri pa hkêt nê. ãm anhÿ hã mẽ hkurê xwÿnhjê kutã amnhĩ to htÿx nê hkĩnh kãm ri pa ho pa. Anê.

Na pa hte wa ã mẽ ato hwÿr anê.

¹² Na pre ra Tirtûm amnhĩ ri mẽ pakutêp mẽmoj mex kwÿ jaxwÿ. Mê pahpê hkrajê mã haxwÿ. Tã ka mẽ ÿ hã tãm amnhĩ nhĩpêx o apa jao mẽ ate mẽmoj mex jamÿnh mã tãm. Õ krĩ nhĩrã rax kumrêx kamãã. Jakamã kwa mẽ kot Jejus ã tanhmã mẽ pahto htã kêr pu mẽ arĩ Tirtûm mã mex o mex ã harênh rãhã ho ri papa.

¹³ Nê Satanasti kêp kamãt kô kamã mẽ kot amnhĩ tomnuj ho mẽ pa xwÿnhjê pãm. Tãm na hte mẽ ho amnhĩptâr o pa nê hkôt na pu prem amnhĩ nhĩpêx o papa rãhã nhũm Tirtûm tee ri ja hã mẽ pahpumu. Hãmri nê kãm kêp mẽ papÿtâr prãm xaj mẽ pahwÿr Kra japê htÿx kumrêx xwÿnhja mẽ. Nhũm mẽ pahwÿr wrÿ nê mẽ panê htyk o mẽ pahte amnhĩ tomnuj pãnhã kãm amnhĩre. Tã pu prem hkôt amnhĩ xunhwÿ nhũm Tirtûm hã mẽ pahpumu nê mẽ panê mẽ pahte amnhĩ tomnuj o hapêx pa. Te kot amnhĩ katut kôt rênh par pyrãk. Jao Satanasti pê mẽ pahpytã nhũm hpãnhã Jejusja tãm kêp mẽ pahto amnhĩptâr o pa xwÿnh.

¹⁴ Ra htyk o mẽ pahte amnhĩ tomnuj piitã hpãnhã amnhĩrer jakamã na pu htem hkôt amnhĩ xunhwÿ nhũm mẽ pahte amnhĩ tomnuj o hapêx pu mẽ axte Satanasti hkôt ri amnhĩ nhĩpêx kêt nê. ãm Jejus kôt pix mã amnhĩ nhĩpêx o ri papa.

Kris mẽ Tirtûm wa kot amnhĩ nhĩpêx te wa kot axpên pyrãk ã harênh

Juãw 1.1-5; Korosê 2.9; Eprêw 1.1-

14

¹⁵ Nê Krisja te kot Tirtûm pyrãk. Mê pahte pano ho Tirtûm pumunh kêt tã Kra Kris kot amnhĩ nhĩpêx ã harênh mar kôt mãänên Tirtûm

kot amnhî nhîpêx ã omunh mex nê. Amnepê mã kormã mëmoj kêt ri nhũm Jejus pa ho pa rãhã nê. Jakamã kot amnhî to rax o Tirtũm kot mëmoj to katorja piitã hakrenh par kumrêx. ¹⁶ Na pre hipêêxã Tirtũm nhỹ hã mëmoj piitã ho kator pa. Kaxkwa kamã nê pika hkôt mëmoj piitã ho kator pa. Nê kaxkwa kamã mẽ pahte pano ho mëmoj pumunh par xwýnhjaja nhũm pre ho kato. Nê kamã mẽ pahte pano ho mëmoj pumunh kêt xwýnhjaja nhũm pre mãânên ho kato. Nê kapêr o wrýk xwýnhjaja nê mẽ hkrãhtũmjaja nhũm pre mẽ ho kato. Nê pika kamã mẽ ho amnhĩptàr xwýnhjaja nhũm pre mẽ piitã mẽ ho kator pa. Kãm hprãm xã hkôt Tirtũm nhỹ hã mëmoj piitã ho kator pa.

¹⁷ Tã na hte arĩ kaxkwa kamã nê pika hkôt mëmoj piitã hamãr rãhã ho pa. Kêp apu kot hamãr kêt ronhỹx mëmoj piitã akupým hapêx pa.

¹⁸ Nê tãm na hte mẽ pahpê hkrajê ho amnhĩptàr o pa. Te kêp mẽ pahkrã nhũm te mẽ pahpê ã pyrãk jakamã na pu htem kapêr kôt pix mã amnhî nhîpêx o papa. Kumrêx na pre akupým htĩr o htĩr jakamã kot amnhî to rax o mëmoj piitã hakrenh par.

¹⁹ Nê na pre Tirtũm ã hamaxpêr anê nê hamaxpêr o: “Nà Ixkra mẽ wa ixte amnhî nhîpêxja te kot axpên pyrãk. Nê wa ixhtỹx mãânên te kot axpên pyrãk. Nê wa inhmex xã mẽ wa ixãhpumunhja te kot axpên pyrãk. ã wa ixte amnhî nhîpêx kot anhỹr. Wa ixte amnhî nhîpêxja na mex kumrêx.” Anê.

²⁰ Tã Jejus kot pĩ kahpa hã mẽ panê tyk nê hkamrô pikapĩr kukwak ri na hte Tirtũm mẽ kot hkôt amnhî xunhwýr xwýnh piitã mẽ ho hkra nhũm mẽ hamakêtkati nê ãmnhĩx pa ho pa. Kaxkwa kamã nê pika piitã hkôt mẽ kot Jejus kôt amnhî xunhwýr xwýnhjaja na

htem ã amnhî nhîpêx mex anhỹr o pa. ã Jejus kot mẽ panê htyk anhỹr jakamã kot amnhî to rax o kot mëmoj piitã hakrenh par.

Jejus kêp tãm mẽ paxunhwýr xwýnh ã harênh

²¹ Nê mẽ papajaja na pu prem pamã Tirtũm prãm kêt o ri papa. Te hkàx ã ri papa pyrã nê kutã amnhî xunhwý nê pajamaxpêr punuj nê tanhmã amnhî tomnuj to pix o ri papa. ²² Tã Jejus kôt amnhî xunhwý nhũm amnhî tã mẽ pahpumu. Hãmri nê ra mẽ panê htyk jakamã amnhî tã mẽ pahpumu nê Tirtũm noo mã tãm mẽ paxunhwý. Te aa mẽ pahte tanhmã amnhî tomnuj to hkêt pyrãk o mẽ panhîpêx nê tãm mẽ paxunhwý. Pu mẽ arĩ pahpê Tirtũm kutã amnhî xunhwýr xwýnh kêt nê hpãnhã pahpê hkrãmnhwýy. ²³ Na pre Tirtũm mẽ pahte amnhî kaxyw Kra Kris kôt pajamaxpêr nê hkôt amnhî xunhwýr ã mẽ pahpumunh kôt ã mẽ pahto mex anê. Tã kêr pu mẽ arĩ hkôt amnhî nhîpêx o ri papa nê aa hkaga hkêt nê. Mẽ kot Kris ã tanhmã mẽ pahto htã pu mẽ arĩ hkôt amnhî nhîpêx mex rãhã ho ri papa.

Kormã mẽ kot jar ijaxàr kêt ri na pa pre hte mẽ kãm ã harênh anhỹr o ri mẽ hkôt ixpa. Tã ka prem Jejus jarênh ma nê hkôt amnhî xunhwýr kurê kumrêx. Nhũm krĩ piitã hkôt ri mẽ pa xwýnh kwýjaja mẽ apyrã nê harênh ma nê hkôt amnhî xunhwý nê hkôt amnhî nhîpêx o pa.

Pawre kêp Ijaew kêt xwýnhjê mã Jejus jarênh xwýnh ã harênh

Epes 3.1-13

²⁴ Nê ixte mẽ amã Kris kot tanhmã mẽ panê amnhî nhîpêx to hã harênh o ixpaja ã na prem tanhmã ixto htỹx nê pa amnhî xã htỹx kãm ijamak o ri ixpa. Tã arĩ Tirtũm kãm hprãm xã hkôt ã amnhî nhîpêx anhỹr jakamã na pa ixkĩnh nê jar ixkrĩ. Ixte Kris kwýjê kaxyw

amnhî xà kamã ijamak tỳx o ixkrî. Te mê apê Kris nhî pyrãk xwỳnhjê mãã. Tã pa te ixpê Kris kot amnhî nhîpêx pyrãk o mê akaxyw amnhî xà htỳx kãm ijamak o ixkrî.

²⁵ Na pre Tirtùm mê apê Ijaew kêt xwỳnhjê kaxyw ixãm. Ixte mê amã kapêr piitã harênh par nhũm mê ate mar nê hkôt amnhî nhîpêx mex o ri apa kaxyw. ²⁶ Na pre kormã mēhō mê awỳr mōr nê mê amã harênh kêt nê. Tã ra Tirtùm kãm mê ate mar prãm nê. Kãm mê apê Ijaew kêt xwỳnhjê mê mê pahpê Ijaew xwỳnhjê japê o axpên pyrãk. Nom na pre amnepêm ri mê pa xwỳnhjê mã kormã ja hã amnhî to amnhîrît kêt nê. Tã ra jarãhã mê pahpê Kris kwỳjê mã ja ho amnhîrît. Mãânên kãm mê apê Ijaew kêt xwỳnhjê japê hã amnhî to amnhîrît. ²⁷ Mê apê Ijaew kêt tã na ka prem Kris kôt amnhî xunhwỳ nhũm Tirtùm Karō mê akarō mã agjê nê mê akamã pa ho pa. Ka mê ra hkôt amnhî nhîpêx jakamã kot kaj mê ixpyrà nê nhỹrmã kuri atĩr tũm nê amex rãhã ho apa ho apa. Ja na mex kumrêx. Tã ja na Tirtùm kãm mê ate mar prãm nê mê akaxyw ixãm. ²⁸ Jakamã na pa pre Ximotre mê wa mê apiitã mê amã Kris kot mê panê tanhmã amnhî nhîpêx to hã harênh kãm ixihitỳx o ri mê akôt ixpa. Nê kapêr o mê ajahkre ho ri mê akôt wa ixpa. Nê jar mê hagjênh xà kamã krĩ piitã hwỳr kagã nhîpêx nê mê hwỳr kurê. Mê kot kamã harênh nê mar nê amnhî tomnuj kaga nê hpãnhã Kris kôt amnhî xunhwỳr nê âm kôt pix mã amnhî nhîpêx o pa kaxyw. Kêr pa nhỹrmã kãm mê ate inhmar nê hkôt amnhî xunhwỳr xwỳnhjê jahkre nê kãm:

—E Pahiiti. Ota akwỳjaja. Na htem akôt amnhî nhîpêx mex rãhã ho ri pa. Anê.

²⁹ ã ixte kãm mê piitã mê harênh anhỹrja na inhãm hprãm. Ja kaxyw na pre Jejus ixto ixihitỳx. Jakamã na

pa hte Tirtùm nhỹ hã tanhmã kapêr o mê ahkre hto ho ri mê hkôt ixpa. Jao mê ho Tirtùm wỳr o ri ixpa nê mê kãm kagã nhîpêx nê mê hwỳr kurê nê kamã kapêr o mê ahkre o ri ixpa.

2

*Pawre kot Jejus kapêr o Koros nhō xwỳnhjê o hihtỳx ã harênh
Epes 3.14-19; Piripos 1.9*

¹ E kot paj mê amã tanhmã amnhî jarênh to ka mê inhma. Na pa hte mê ato Tirtùm wỳr rãhã ho ixkrî. Mê kajaja nê krĩ pê Ratisej kamã Jejus kôt mê pahkwỳjaja. Kormã ixte mê apumunh kêt tã pa hte mê ato Tirtùm wỳr kãm ixihitỳx ãhã ho ixkrî. ² Mēmo kaxyw na pa hte ã mê ato hwỳr anê? Nê mēmo kaxyw na pa hte mê amã kagã nhîpêx nê mê awỳr kurê? Nã âm mê ate kamã harênh nê mar nê Jejus kapêr kôt axpên to axihitỳx o ri apa kaxyw. Nê mê amã axpên kĩnh o ri apa kaxyw. Pê te mê ate ixkre tipxi kamã axpên kôt amnhî nhîpêx o ri apa pyrãk. Jao aprĩ hã Tirtùm kot amnhî nhîpêx pumunh mex nê amnhî kaxyw hkôt ajamaxpêr tỳx nê. Kot kaj mê ã amnhî nhîpêx anê nê Kris kot amnhî nhîpêxta pumunh pa. Na pre Tirtùm tokyx mê kãm Kris o amnhîrît kêt tã ra mê pamã ho amnhîrît. ³ Tirtùm kot amnhî nhîpêx nê kapêrja na pu htem Kris nhỹ hã pahprĩ hã omunh nê mar mex nê. ⁴ Jakamã koja mēmojaja mê awỳr mra hãmri nê hêx rom Tirtùm kapêr kwỳm ri tanhmã mê amã mēmoj jarênh to. Te mê ãhpumunh tỳx pyrãk o mê amã harê no âm mê ãhpumunh kêt. Ka mê ama nê âm mê ama nê Kris kaga hkêt nê.

⁵ Nê kormã arĩ Jejus ã ijaxàr nê ixkrî nê kormã mê akôt ixpa hkêt tã ot pa hte mê amã ijamaxpêr rãhã ho ixkrî. Nê ra tanhmã mê ajarênh mar to. Na ka xep htem Kris kôt

amnhî nhîpêx tỳx o ri apa. Te ahkrô pè kukryt mut kuxêeti kot pĩ kupu htỳxta pyrâk. Nê ka xep htem arĩ amnhĩ kaxyw Kris mã ajamaxpêr tỳx o ri apa. Pa mẽ ajarênh ma nê ixkĩnh tỳx nê.

⁶ Na ka prem Pahihti Jejus Kris kôt amnhĩ xunhwỳr pa. Tã kêr ka mẽ arĩ hkôt amnhĩ nhîpêx mex rãhã ho apa. Kêp mẽ panhõ Pahihti kênã. ⁷ Jakamã mẽ ãm kôt pix mã amnhĩ xunhwỳr tỳx nê aa hkaga hkêt nê. Te mẽmo pĩ hpâr jarêja pika kaxwỳnh kãm pimãnh nê kot pika jamỳnh tỳxta pyrâk. Nhũm kôk xàpêr tỳx tã tee kot mẽnh kaxyw pyrâk. Tã kêr ka mẽ pĩ hpârta pyrã nê hkôt amnhĩ xunhwỳr tỳx nê hkôt amnhĩ nhîpêx mex o ri apa. Ra Epas kot mẽ ajahkre ho pa xà hkôt. Nê amnhĩ krãm Kris kapêr jaxâr tỳx nê aa ho ajamakêtkati hkêt nê. Pê akĩnh kãm Tĩrtũm mã mex o mex ã harênh rãhã ho ri apa.

⁸ Nê kwa kêr ka mẽ kot hêx rom mẽ amã tanhmã kapêr to ho mẽ pa xwỳnhjaja ka mẽ amnhĩ nê mẽ omunh mex nê. Nê mẽ kapêr mar hkêt nê. Mẽ ate Kris kaga hprãm xài na htem tanhmã mẽ amã hêx to ho ri mẽ akôt pa. Te amnepêm mẽ kot Tĩrtũm kapêr kwỳm ri tanhmã mẽ ahkre hto xwỳnhjê pyrâk. Hinhu hikôoti kapêr kôt na htem tanhmã mẽ amã hêx to nom Kris nhỹ hã mẽ amã kapêr kêt nê. Jakamã kwa mẽ amnhĩ nê mẽ omunh mex nê.

⁹ Nê Kris mẽ Tĩrtũm wa kot amnhĩ nhîpêx kot axpên pyrâk. Nê wa hamaxpêr kot axpên pyrâk. ¹⁰ Tã kêr pu mẽ pajaxwỳja wa hamaxpêr o pajamaxpêr nê wa kot amnhĩ nhîpêx o amnhĩ nhîpêx. Jakamã kwa mẽ kot Tĩrtũm kapêr kwỳm ri tanhmã mẽ kapêr to xwỳnhjê kot amnhĩ nhîpêx o amnhĩ nhîpêx kêt nê. Nê mẽ kapêr ma nê ãm mẽ ama. Kris na hihtỳx o hihtỳx o kot mẽkarõmnuti nhõ pahi piitã mẽ hakrenh par. Nê hihtỳx o hihtỳx o kot Tĩrtũm kapêr o mẽ

wrỳk xwỳnhjê piitã mẽ hakrenh par. Nê ãhpumunh o ãhpumunh o kot mẽmoj piitã hakrenh par jakamã kêr ka mẽ kapêr kôt pix ma nê hkôt pix mã ri amnhĩ nhîpêx o ri apa.

Mẽ pahte amnhĩ nhîpêx nyw jarênh

Rõmãn 6.3; Karatas 5.24

¹¹ Nê na hte ixkwỳ Ijaewjaja mẽ hkra nhỹrmã hprêk nê Tĩrtũm kôt amnhĩ nhîpêx ã mẽ harênh kaxyw mẽ kêp mẽmy kwrýt kà jakã. Tã mẽ kajaja. Mẽ apê Ijaew kêt xwỳnhjaja na pre Kris mẽ anhîpêx o te mẽ kot amnhĩ jakarta pyrâk. Jao te kot mẽ anê mẽ ate amnhĩ nhîpêx tũm jakar par pyrâk o mẽ anhîpêx ka mẽ ra amnhĩ nhîpêx nyw o amnhĩ nhîpêx o apa. Nhũm htem mẽ ate amnhĩ nhîpêx nyw ã mẽ apumu nê mẽ ate Jejus kapêr kôt amnhĩ nhîpêx ã mẽ apumunh kurê kumrêx. ¹² Tã na pu htem jarãhã mẽ pahte Tĩrtũm kôt amnhĩ nhîpêx o papa hã amnhĩ jarênh kaxyw amnhĩ jakar kêt nê. Na pu htem hpãnhã amnhĩ kaxyw Tĩrtũm xihtỳx o hihtỳx xwỳnhja kôt pajamaxpêr. Kot mẽ panê pahte amnhĩ tomnuj rênh par kôt pajamaxpêr hãmri nhũm mẽ gôx kãm mẽ pahkrã kumrã. Te mẽ pahte gôx kãm mẽ pahte amnhĩ nhîpêx tũm rer par pyrâk o amnhĩ nhîpêx. Te Jejus htyk nhũm mẽ kot haxâr nhũm nõr nhũm mẽ pahte amnhĩ tomnuja ãhkô hã nõr nê hapêx par pyrâk. Tã pu htem ra gôj rũm pahkrã hapôj. Te Tĩrtũm kot akupỳm Kris o htĩr pyrâk. Jao ra mẽ pahte Kris kôt amnhĩ nhîpêx nyw o amnhĩ nhîpêx o papa hkrax ã amnhĩ to amnhĩrit. ¹³ Amnepêm kormã mẽ pahte Jejus kôt amnhĩ xunhwỳr kêt ri na pu prem ri amnhĩ tomnuj to nê tanhmã pajamaxpêr punuj to ho ri papa. Tĩrtũm noo mã te ra mẽ pahtyk pyrâk. Tã Tĩrtũm te akupỳm Kris kôt mẽ pahto pahtĩr pyrâk o mẽ panhîpêx nê mẽ panê mẽ pahte

amnhî tomnuj piitâ ho hapêx nê axte kâm hamaxpêr kêt kumrêx. ¹⁴Te mê pahte tanhmâ amnhî tomnuj to ho papa nhûm Tirtûm kot ja hã mê pahpumunh nê mê pahte amnhî tomnuj piitâ hã kagà hpar pyrâk. Nê kot kagàja pyr nê Kris nhîhkô hã pî kahpa hã nhôr pyrâk. Jao te kot mê pahte amnhî tomnuj â kagàta hkaxônh nê rênh par pyrâk o hipêx. ¹⁵Hâmri nhûm Krisja pî kahpa hã htykja o mêkarômnuti mê mê õ pahi Satanasti wa mê ho hirerek pa. Jao hihtÿx o kot mê hakrenh par â amnhî to amnhîrit. Te mê kot kutâ amnhî xunhwÿr xwÿnh piitâ mê noo mã mê ho krihkrit par nê ma akupÿm õ krî hwÿr hkînh nê grer o môrta pyrâk.

¹⁶Nê koja mëmojaja mê awÿr mra nê tee ri mê ate mëmoj kur o akrî hã mê apumu nê mê amâ:

—Kwa na hte Tirtûm kôt mê kot amnhî xunhwÿr xwÿnhjaja ja kur kêt nê. Nê ja ho hkôm kêt nê. Nê mê panhõ arîgromnu pê sap â ri mëmoj tâ âpênh kêt nê. Nê mytwrÿ nyw â mëmoj tâ âpênh kêt nê. Na htem â Tirtûm â hkînh o pa anê. Tâ â mê ate mê ixkôt amnhî nhîpêx anhÿr kêt jakamâ mãn mê apê Tirtûm kra hkêt nà. Anê.

Tâ nom kêr ka mê kapêr ma nê âm ama. ¹⁷Amnepêm kormâ mê pahte Kris kôt amnhî xunhwÿr kêt ri na pu prem â amnhî nhîpêx anhÿr o papa. Tâ Jesus kôt amnhî xunhwÿ hãmri nê axte â amnhî nhîpêx anhÿr kêt nê. Pânã kapêr pix ma nê hkôt pix mã amnhî nhîpêx o ri papa.

Mê pahte mê kot Tirtûm kapêr o mê hêx xwÿnhjê mar kêt â mê pamã karõ

¹⁸Nê koja mëmojaja mê awÿr mra nê hêx rom tanhmâ mê amâ amnhî jarênh to nê mê amâ:

—Na pre Tirtûm âm mê papxipix mê inhmâ amnhî to amnhîrit. Jakamâ kwa mê ixkapêr ma. Kot

kaj mê inhmar kêt nê hãmri nê mê amex kêt nê apa.

Anhÿr o mê amâ kapêr japêr ka mê ama nê âm mê ma. Rÿ nhûm mê amâ:

—Tirtûm mê parom kot amnhî to rax o kot mê pahpiitâ mê pajakrenh par jakamâ kwa mê tanhmâ amnhî to hwÿr to hkêt nê. Kot ka mê anê nhûm mê ama nê mê akamâ gryk nê. No kêt mê amnhî to kapêr o wrÿk xwÿnhjê mãn wÿ. Koja mê ama nê mê akamâ gryk kêt nê tanhmâ mê amâ mëmoj nhîpêx to. Anê.

Koja mê â mê amâ kapêr anê ka mê ama nê âm mê ama. Te ho mê âhpumunh tÿx kâm mê kot â mê amâ kapêr anhÿr pyrâk no âm mê kapêrja mex kêt. Na htem amnhî krâ hkôt te amnhî to rax pyrâk o â mê amâ kapêr jao mê hamaxpêr tûm o hamaxpêr o ri pa. No mê apyrâ nê mê hamaxpêr nyw o hamaxpêr kêt nê. ¹⁹âm mê kot Tirtûm kapêr kwÿm ri mê ahkre jakamâ mê kêp Jesus kwÿ hkêt. No mê papajaja mê pahpê Jesus kwÿ na pu mê. Nhûm Jesus kêp mê panhõ Pahihti jakamâ na hte tanhmâ mê pahto paxihtÿx to pu htem kukwak ri tanhmâ axpên to ajuta hto ho ri papa. Nê hkôt axpên to paxihtÿx o ri papa. Mê pahpiitâ mê pahte hkôt amnhî nhîpêx mex o ri papa kaxyw. Tirtûm kâm hprâm xà hkôt.

Mê pahte amnhî krâ hkôt tãm amnhî nhîpêx kêt â mê pajarênh

Karatas 3.1-5, 5.1-9; Epes 2.8; Piripos 3.9

²⁰⁻²¹Nê wam mê pahte amnhî nhîpêx tûm nê mê pajamaxpêr tûmta te kot Kris kôt htyk nê mê pahpê hapêx par pyrâk jakamâ na pu htem arî hkôt amnhî nhîpêx kêt nê. Nê mêkarômnuti hkôt amnhî nhîpêx kêt nê. Tâ no nhûm xep ra mëhõja mê awÿr mō nê hêx rom mëmoj nê tanhmâ mê amâ kapêr to nê mê amâ:

—Kwa mẽ ja jamýnh kêt nê. Nê ja hkur kêt nê. Nê ja kupênh kêt nê.

Anhÿr o mẽmoj nê mẽ akurê ho pa. Xep mẽ ã mẽmoj nê mẽ akurê anê ka xep mẽ ama nê mẽ hkôt amnhĩ nhĩpêx. Kwa nà mon ka mẽ ri axtem nê mẽ hkôt amnhĩ nhĩpêx? ²² Tĩrtũm kot mẽmojja nê tanhmã mẽ pahkurê htore hã. ãm mẽ kot amnhĩ krã hkôt mẽmoj nê mẽ akurê ka mẽ ama nê mẽ hkôt amnhĩ nhĩpêx. Mẽmoj kur nê mẽ mẽ akurê xwýnhnta na htem kuku nhũm hapêx kurê kumrêx. Mo koja we Tĩrtũm omu nhũm kêp omnuj? Nà ja kot anhÿr kêt kênã. Mẽ ãm amnhĩ krã hkôt mẽ kot ja nê mẽ akurê. ²³ Tã ã mẽmoj nê mẽ akurê anhÿr xwýnhjaja na ka htem nhÿri mẽ omu nê mẽ kapêr ma nê atýx ajamaxpêr o:

—Nà te Tĩrtũm kôt amnhĩ nhĩpêx mex o pa pyrãk. Te mẽ àhpumunh týx pyrãk o ã mẽ inhmã mẽmoj jarênh anê. Anê.

No ãm mẽ kot mẽmoj jarênhja kot anhÿr kêt. ã mẽ kot amnhĩ nhĩpêx anhÿr xwýnhjaja kêp Tĩrtũm kra hkêt. Na htem ãm amnhĩ krã hkôt mẽmoj nê mẽ akurê ho pa. Nê hã amnhĩ to jarkrar o ri pa. Mẽ ate ja hã mẽ mar nê mẽ kot amnhĩ to rũnh ã mẽ hkamnhĩx kaxyw. Na htem kot amnhĩ tomnuj pymaj tanhmã amnhĩ nhĩ hto ho pa. No ãm ri ã amnhĩ nhĩpêx anhÿr kaprý. Nê ãm htýx Tĩrtũm kapêr o mẽ wrýk xwýnhjê hwÿr kaprý ho pa.

3

Mẽ pajamaxpêr nyw nê mẽ pahte amnhĩ nhĩpêx nyw jarênh

Rômãn 6.4-11

¹ Nê na pre Tĩrtũm akupým Kris o htĩr nhũm mẽ pahte hkôt amnhĩ xunhwÿr jakamã te Tĩrtũm kot Kris nhĩpêx pyrã nê akupým mẽ pahto mẽ pahĩr pyrãk o mẽ panhĩpêx. Jakamã kwa kêr pu mẽ axte pahte amnhĩ nhĩpêx tũm kôt amnhĩ nhĩpêx kêt nê. Te Kris pyrã nê ra

kaxkwa hwÿr paxàpir nê kamã ri papa pyrãk o amnhĩ nhĩpêx. Jao pajamaxpêr nyw pix o pajamaxpêr nê pahte amnhĩ nhĩpêx nyw pix o amnhĩ nhĩpêx o ri papa. Te Kris kot amnhĩ nhĩpêx pyrãk. Na pre akupým kaxkwa hwÿr api nê Tĩrtũm nhĩkhó hã mẽ ho amnhĩptãr xà kamã hkrĩ ho hkrĩ.

²⁻³ Nê ra mẽ pahte Kris kôt amnhĩ xunhwÿr jakamã te jar pika hkôt pajapêx par nê Tĩrtũm wa kuri kaxkwa kamã pamex nê papa ho papa pyrãk. Jakamã kwa kêr pu mẽ pahte amnhĩ nhĩpêx nyw mã mãn pajamaxpêr rãhã ho papa. Nê axte mẽ pahte amnhĩ nhĩpêx tũm mã pajamaxpêr kêt nê.

⁴ Kris kêp akupým mẽ pahto mẽ pahĩr xwýnh. Koja nhÿrmã akupýn mẽ pahwÿr wrý hãmri nhũm Tĩrtũm te ho mex raxta pyrãk o mẽ panhĩpêx nê mẽ pahto mex rax kumrêx.

Mẽ pahte akupým amnhĩ nhĩpêx tũm o paxujanãr kêt ã mẽ pamã karõ
Epes 4.17-5.2

⁵ Jakamã kwa kêr ka mẽ axte ate amnhĩ nhĩpêx tũm kôt amnhĩ nhĩpêx kêt nê. Te ra mẽ apê htyk nê hapêx par pyrã nê axte kãm ajamaxpêr kêt nê.

Jakamã axte ri axpên mjên rý axpên prõ ho amnhĩkati hkêt nê.

Nê nhãm ri mẽmyjê hõ rý mẽnijê hõ ho amnhĩkati hkêt nê.

Nê mẽ amã tanhmã amnhĩ tomnuj to hprãm kêt nê.

Nê mẽ amã akukrêx rax prãm kêt nê. Kot ka mẽ ã amnhĩ nhĩpêx anê nê gaa nê akukrêx rax gryk ã axte Tĩrtũm mã ajamaxpêr kêt nê.

⁶ ã mẽ kot amnhĩ nhĩpêx anhÿr xwýnhjaja Tĩrtũm kãm mẽ hprãm kêt. Koja nhÿrmã tanhmã ja hã mẽ homnuj týx to. ⁷ Amnepêm kormã mẽ ate Kris kôt amnhĩ xunhwÿr kêt ri na ka pêt ã amnhĩ nhĩpêx

anhÿr o ri apa. ⁸⁻⁹Tā kēr ka mē axte
ã amnhĩ nhĩpêx anhÿr kêt nē.

Nē mē ri axpên kām agryk o ano
hkā karôt o axpên pumunh kêt
nē.

Nē mē axpên kamā axàhkurê
hkêt nē. Ri tanhmā axpên tom-
nuj to ho apa hkêt nē.

Rÿ axpên jakwa kamā mēmoj ma
nē ri axpên xô ri tanhmā ri
axpên mã ho axêx to ho ri apa
hkêt nē.

Nē mē akapêr mã agêt o ri mē
kām akapêr kêt nē.

Nē mē ri mēmoj to axpên mã axêx
hkêt nē.

Ã mē ate amnhĩ nhĩpêx anhÿr tũmta
ra mē apê hapêx par kênã.

*Mē pahte amnhĩ nhĩpêx nyw kôt
amnhĩ nhĩpêx ã mē pamã karô*

*Rômân 12.2; Epes 4.23; Wam
Pêtre 2.11*

¹⁰Nē na ka mē ra mē ate amnhĩ
nhĩpêx nyw o amnhĩ nhĩpêx o ri
apa. Jao ra mē pahto kator xwÿnh
maatija kôt amnhĩ nhĩpêx mex o
mô. Kot kaj mē gaa nē rĩ hkôt
amnhĩ nhĩpêx mex kumrêx o ri apa.
Kām hprãm xà hkôt.

¹¹Nē mē pahpê Kris kwÿjaja
ahpÿnhã na pu mē. Na mē pakamã
Ijaew nē Ijaew kêt xwÿnhjaja. Nē
mē pakamã panhĩ nē kupê. Nē
mē kām àpênh xwÿnhjaja nē mē kot
amnhĩ mã ri àpênh xwÿnhjaja. ãm
ahpÿnhã mē pahpê Kris kwÿjaja
mē pahte anhÿr tã na hte Tirtũm
tanhmã mē pakute hkôt mē
pahpumunh kêt nē. Na hte mē
panhĩpêx o axpên pyrã nē mē
pahpiitã mē pakamã pa ho pa pu
htem pahpimràatã hkôt ri amnhĩ
nhĩpêx o papa.

¹²Nē Tirtũm kām mē pajapê nē
kām mē pajapê xàj mē pakukamã
amnhĩm mē parê. Mē pahte kām
tanhmã amnhĩ nhĩpêx to ho ri papa
kaxyw mē pakukamã mē parê.

Jakamã kēr ka mē axpên kamã
axukaprĩ ho ri axpên kôt apa.

Nē axpên to mex pix o ri axpên
kôt apa.

Nē mē amã amnhĩ to rax o axpên
jakrenh prãm kêt nē.

Nē mē ãm amnhĩ pix kukamã ri
ajamaxpêr kêt nē. Amnhĩ mē
nhãm mē hkukamã ajamaxpêr
o ri apa.

Nē mē ri agryk tokyx anhÿr kêt
nē.

¹³Nē koja mēhõ tanhmã mē
ato ka mē amnhĩ tã omu nē
tanhmã amnhĩ tã ho hkêt
nē. ãm ja ho ajamakêtkati
kurê kumrêx nē axte kām
ajamaxpêr o ri apa hkêt nē.
Ra Jejus kot mē panê mē pahte
amnhĩ tomnuj piitã rênh par
kênã kot pu kêt mē amnhĩ tã
tanhmã mēhõ hto. Tã kēr ka
mē axpên to mex o ri apa nē
amnhĩ tã tanhmã axpên to ho
ri apa hkêt nē.

¹⁴E kēr ka mē ã axpên nhĩpêx anhÿr
o ri apa. No ãm ja pix kêt. Nē mē
mãânên amã axpên kĩnh pê axpên
kutã anojarêt rãhã nē. Kot kaj mē
ã amnhĩ nhĩpêx anê nē mãânên ra
ixte mēmoj tã mē amã karôta ka mē
ho anhÿr mex kurê kumrêx. Mē
pamã axpên kĩnhja na mex kumrêx
o kot mēmoj piitã hakrenh par.

¹⁵Nē kēr ka mē Kris kukwak
ri anhõxàhkre kaxwÿnh kām akĩnh
nē ajamakêtkati nē tãm ri axpên
nhĩpêx o ri axpên kôt apa. Te
ixkre tipxi kamã mē ate axpên
kôt ri amnhĩ nhĩpêx pyrãk. ã mē
pahte amnhĩ nhĩpêx anhÿr o papa
kaxyw na pre Tirtũm amnhĩ wÿr
mē pahwÿ. Mē pahte hkôt amnhĩ
xunhwÿr kaxyw.

Nē kēr ka mē Tirtũm mã amnhĩ
jarênh kaxyw nē kām Kra Jejus ã
akĩnh ã amnhĩ jarênh o ri apa.

*Mē pahte Tirtũm mã mex ã pa-
grer ã mē pamã karô*

Epes 5.19

¹⁶Nē kēr ka mē Kris kapêr piitã
hkôt amnhĩ nhĩpêx mex nē. Nē
kapêr o axpên jahkre mex o ri

axpên kôt apa. Tirtûm kot amnhî nhîpêx o axpên jahkre ho ri axpên kôt apa. Nê kâm agrer o ri apa. Kâm mex o mex â agrer o ri axpên kôt apa. Nê kâm kukwak ri akînh â amnhî jarênh o kâm gre.

¹⁷ Nê kêr ka mê Mêpahpâm Tirtûm mã amnhî jarênh o:

—Pa Tirtûm. Nà âm hāmri na ka pre mê ixwÿr Akra Jejus mê nhûm mê ixwÿr wrÿ nê mê inhnê ty.

Anhÿr o kâm amnhî jarê. Hāmri nê âm Pahihti Jejus kot amnhî nhîpêx kôt pix mã tanhmã ri amnhî nhîpêx to rÿ âm kôt pix mã tanhmã akapêr to ho ri apa.

Tanhmã mê pahte axpên nhîpêx to hã mê pamã karô
Epes 5.22–6.9

¹⁸ Nê mê anijaja. Tirtûm kot myja kumrêx nhîpêx nê hkôt kâm hprô nhîpêx jakamã kêr ka mê amjên â apijaam o apa. Nê mê hamaxpêr mex â mê omu nê mê hkôt ri amnhî nhîpêx mex nê. Â mê ate amnhî nhîpêxja na Tirtûm kâm hprâm.

¹⁹ Nê mê amyjaja kêr ka mê amã mê aprô japê nê. Te amã amnhî tâ ma pyrâk o mê hipêx o ri apa. Jao tanhmã mê homnuj to hkêt nê.

²⁰ Nê mê apê mê hkrajaja kêr ka mê anhîpêxâ nê akatorxâ wa hã apijaam nê wa kapêr ma nê wa hkôt ri amnhî nhîpêx. Â mê ate amnhî nhîpêx anhÿrja na Tirtûm kâm hprâm. Koja â mê ate amnhî nhîpêx anhÿr â mê apumu nê hkînh nê.

²¹ Nê kêr ka mê apê mê hipêxâ nê mê katorxâ mê akra gryk kaxyw mê kâm apêr o apikênh kêt nê. Kot kaj mê â mê hipêx anê nhûm mê tee ri amnhî tâ mê ama nê hkaprî nê.

²² Nê mê ate mê kâm tanhmã amnhî nhîpêx to ho ri mê apa xwÿnhjaja kêr ka mê anhô patrâw kapêr ma nê hkôt amnhî nhîpêx. Nê mê noo mã mê kâm tanhmã amnhî nhîpêx mex to nê mãânên mê wa kre kamã mê kâm tanhmã amnhî nhîpêx mex to. Nom mê

kot axapênh â apumunh nê hã kâm akînh pix kaxyw axapênh mex kêt nê. Mãânên mê amã Pahihti Kris kînh â akatât kôt mê kâm mêmoj tâ axapênh mex nê. Mê noo mã nê mãânên mê wakre kamã. ²³ Nê mê akînh kâm mê kâm axapênh mex o ri apa. Te mê ate Pahihti mã akînh kâm tanhmã kâm amnhî nhîpêx to pyrâ nê tâm amnhî nhîpêx o tâm mê kâm axapênh mex o ri apa. ²⁴ Te mê anhô patrâw pix mã axapênh pyrâk nom kumã pix mã hkêt. Mãânên mê panhõ Pahihti Krisja mã. Jakamã kot kaj mê â amnhî kaxyw Tirtûm mã ajamaxpêr pê akînh kâm anhô patrâw mã mêmoj tâ apê nhûm Pahihtija ja hã mê apumu nê nhÿrmã mê ato mex rax nê. ²⁵ E kêr ka mê â mê anhô patrâw mã axapênh mex o ri apa anê. No kot kaj mê kapêr kwÿm amnhî krã hkôt ri tanhmã amnhî nhîpêx to nhûm Tirtûm tee ri ja hã mê apumu hāmri nê nhÿrmã tanhmã hã mê anhîpêx to. Na hte â mê kot amnhî tomnuj xwÿnhjê piitã mê hipêx anê nê mê hipêx o axpên pyrâk. Jakamã kwa kêr ka mê anhô patrâw mã axapênh mex rãhã ho ri apa.

4

¹ Nê mê apê mê ô patrâw kêr ka mê kot mê amã mê âpênh xwÿnhjê ho mex nê tanhmã mê homnuj to hkêt nê. Mê urâk nê kaxkwa kamã mê anhô Patrâw maatija hkrî. Kot mê pahte tanhmã amnhî nhîpêx to nê tanhmã mê pajamaxpêr to hã mê pahpumunh rãhã jakamã kêr ka mê noo mã mê ho mex rãhã ho ri apa.

E kêr ka mê apiitã â axpên to mex anhÿr o ri apa.

Mê pahte Tirtûm mã amnhî jarênh rãhã hã mê pamã karô

Matêwre 7.7; Rukre 11.1-8; Atre 1.14; Epes 6.18

² Nê kêr ka mê xatã Tirtûm mã amnhî jarênh rãhã ho ri apa. Nê tanhmã mēhõ kot amnhî nhîpêx to

hã harênh ma nê ho Tirtûm wÿ. Nê mē ate kãm amnhĩ jarênh kamã kãm mex o mex ã harê. ³⁻⁴ Nê mãânên ixto awÿ kê mē tokyx ixkator japêr. Pa ixãmnhĩx mē kot kormã Kris jarênh mar kêt xwÿnhjê mã harênh o ri mē hkôt ixpa. Á ixte amnhĩ nhĩpêx anhÿrta ã na prem ixpynê nê ijaxã pa kormã jar ixkrĩ. Jakamã kwa mē mãmrĩ ja hã ixto Tirtûm wÿr o apa.

Mê pahte apkati mê mê pahkwÿjê mã Jejus jarênh ã mê pamã karô

Epes 5.16

⁵ Nê kêr ka mē kêp Kris kwÿ hkêt xwÿnhjê hkôt nhÿhÿm ri apa nê tãm ri Tirtûm kapêr kôt amnhĩ nhĩpêx o mē hkôt ri apa.

⁶ Nê kê mēhō awÿr tē nê tanhmã Jejus ã akukjêr to ka amã hkĩnh ã aprĩ hã kãm awjarê. Ahpÿnhã tanhmã mē kot hã akukjêr to xã hkôt tanhmã mē kãm harênh to kê mēhprĩ hã mar mex nê.

Pawre kot Koros wÿr Xikitre mê Ones wa mēnh ã harênh

Epes 6.21-22

⁷⁻⁸ Nê ot pa mē awÿr mē pahtō Xikitre mēnh mã. Kot ma mē awÿr ixte mē amã ixkapêr ã kagã nhĩpêx o mōr kaxyw. Na hte ixkôt Tirtûm mã amnhĩ nhĩpêx o ri pa. Inhmã hapêê. Tã kot paj mē awÿr kumê kê ma mē awÿr mō nê hprĩ hã mē amã ijarê. Mē ate ijarênh mar nê tãm ajamaxpêr nê akĩnh kaxyw. ⁹ Mē akwÿ Onesti hkôt koja ma mē awÿr mō. Mãânên Kris kôt kêp mē pahtō hã mē pamã hapê xwÿnh na. Na hte Tirtûm kapêr kôt amnhĩ nhĩpêx mex rãhã ho ri pa. Tã Xikitre mē koja wa ma mē awÿr mō. Hãmri nê mē awÿr pōj nê jar tanhmã mē ixte amnhĩ nhĩpêx to hã mē ijarê ka mē ama.

Kris kôt mê hkwy kot mê hwÿr hpêr mēnh ã mê harênh

¹⁰ Nê ota Aristakja ixpyrà nê kêp prês nê hkrĩ. Tã mē awÿr hpêr

mê. Nê Panãpe htō Juãw Makreja mãânên mē awÿr hpêr mē. Na pa pre ra mē amã Juãw Makre jarê. Tã koja mēmo arĩgro hã akupÿn mē awÿr mōr japêr ka mē omu nê ho mex nê.

¹¹ Nê Jejus Justija mãânên mē awÿr hpêr mē. Jajaja mē ixpyrà nê kêp Ijaew. Tã mē tapxipixjaja na htem ixpyrà nê mē ixpê Ijaew kwÿjê rom mē kãm Tirtûm kapêr nyw o mē ahkre ho ri mē hkôt pa. Tirtûm kot Kra Kris kôt mē kot amnhĩ xunhwÿr xwÿnhjê ho hkra hã harênh nywja na htem mē kãm harênh o ri mē hkôt pa. Pa ja hã mē omu nê ixkĩnh nê. ¹² Nê mē anhĩō Epasja mãânên mē awÿr hpêr mē. Na hte Jejus Kris mã tanhmã amnhĩ nhĩpêx mex to ho pa. Nê mē ato Tirtûm wÿr rãhã ho pa nê mē ato hwÿr o:

—Pa Tirtûm. E kwa tanhmã Koros kamã akrajê ho kê mē akôt amnhĩ xunhwÿr tÿx nê. Nê amã hprãm xã hkôt pix mã amnhĩ nhĩpêx o ri pa. Nê amnhĩ kaxyw Kris kôt pix mã hamaxpêr tÿx rãhã nê. Anê.

¹³ ãm hãmri na hte mē ato hwÿr o pa. Nom mē kapxipix o hwÿr kêt nê. Mãânên krĩ pê Ratisej kamã nê krĩ pê Jerop kamã Kris kôt mē pahtōjê ho hwÿr o ri pa. Mē ate Tirtûm kôt amnhĩ nhĩpêx mex o apa kaxyw. Ixte ja hã omunh mex.

¹⁴ Nê jar mē pahtō tōtō Rukre mē Tēmtija wa mãânên mē awÿr hpêr mē. Tōtō Rukreja kêp ixkrãmnhwÿ mex na.

¹⁵ Nê kêr ka mē krĩ pê Ratisej kamã Kris kôt mē pahkwÿjê mã ijarê. Nê Nĩpare mã nê òrkwÿ hwÿr mē pikuprõnh nê Tirtûm mã mex o mex ã harênh o mē hkrĩ xwÿnhjê mã mãânên ijarê.

¹⁶ Nê e kêr ka mē ixte mē awÿr kagã mēnhja kamã harênh pa nê hpãnhã krĩ pê Ratisej kamã Kris kôt mē pahkwÿjê hwÿr amê kê mē apyà nê kamã harê nê piitã kuma.

Nê mē kām anē kê ra ixte mē hwÿr kagà mēnh xwÿnhhta kê mē amā kugō ka mē kuxwar kamā harē nē amā.

¹⁷ Nê kêr ka mē Akip mā ijarē kê ra Tirtûm kot kām mēmoj tâ karō xwÿnhhta kê ho anhÿr jatur xàm kumē. Kêp hkra hã kê tãm kām àpênh jatur xàm kumē.

¹⁸ Tã ãm ja pix. E paj pam amnhĩ nhĩhkra ho hatur xà hã kagà. Mē ate ixte mēmoj tâ kagà pumunh nē hkôt inhmã ajamaxpêr kaxyw. Nê ixte mē awÿr mēnh ã ijarēnh mar kaxyw. Kwa kêr ka mē arĩ ixpê prês ã ixto Tirtûm wÿr rãhã ho ri apa.

E kê Tirtûmja mēmoj to mē akutã nojarêt nē mē ato mex nē ka mē amex nē ajamakêtkati nē apa ho apa. Tã ãm ja pix. Ixpê Pawre na pa mē awÿr kagàja nhĩpêx nē ã mē awÿr mēnh anē.

Wam Tesarõn Pawre kot Tesarõn kamã Jesus kõt hkwyjê hwÿr kagã nê mênh

Pawre na pre kagàja nhîpêx. Kêp Jesus nhÿ hã mē ahkre ho pa xwÿnhjê hõ na pre. Jakamã na pre kagàja nhîpêx nê ma krî pê Tesarõn kamã Jesus kõt hkwyjê hwÿr kumê. Tesarõn kamã Jesus ã kãm mē hkurê xwÿnhjaja na prem Jesus ã mē homnuj o pa nhũm mē amnhî xà htÿx kamã hamak o pa. Hãmri nhũm Pawre mē harênh ma nê kagàja nhîpêx nê mē hwÿr kumê. Kot mē kãm mē hamaxpêr o hihtÿx kaxyw mē kot arî Jesus kõt amnhî nhîpêx mex o pa nê aa hkaga hkêt ã mē kãm karõ. Nê nhÿrmã Jesus akupÿn kaxkwa rũm mē pahpê hkwyjê hwÿr wrÿk nê ma akupÿm amnhî kõt mē pahto àpirja nhũm mē kãm harê. Æ na pre mē kãm mêmõj jarê nê hã kagã anê nê mē kãm:

¹ Pa mē apê Tesarõn kamã Jesus kwÿ hã axpên wÿr mē apikuprõnh xwÿnhjaja? Xà mē amex na ka mē apa? Ixpê Pawre na pa mē awÿr kagàja nhîpêx nê mē awÿr kumê. Siras mē Ximotre mē pa mē awÿr kumê. Mē pahpê Mëpanhîpêêxà maati Tirtũm mē Pahihti Jesus Kris wa hkwy jakamã na pa htem mē ato Tirtũm wÿr rãhã ho ri ixpa. Kot mē akutã nojarêt rãhã nhũm mē ajamakêtkati nê axãmnhîx mē apa kaxyw.

²⁻³ Nà mêmõj kêt. Na pa htem mē amã ijamaxpêr nê mē anhÿ hã ixkĩnh nê ixpa hãmri nê mē awÿr kagàja mē. Na pa htem mē ato Tirtũm wÿr rãhã ho ri ixpa nê kãm mē ajarênh o:

—Pa Tirtũm. E mãn ka Tesarõn kamã akrajê pumu. Æm hãmri na ka pre tanhmã mē hkrã hto

nhũm mē akõt amnhî nhîpêx mex o pa. Na htem amnhî kaxyw akõt hamaxpêr tÿx nê. Jao mē piitã mē kamã ukapri kamã tanhmã mē ho ajuta hto ho pa. Nhũm mē kãm mē ixkurê xwÿnhjaja Pahihti Jesus Kris ã tanhmã mē ho ho pa htã nhũm mē tee ri amnhî kukamã hamaxpêr o hkapri nê Jesus mē war akaga hkêt nê. Arî war anhÿ hã amnhî to htÿx nê Pahihti Jesus kutêp tanhmã kãm amnhî nhîpêx to ho pa. Æm hãmri na htem ã amnhî nhîpêx anê Tirtũm. Na pa htem mē kot ã amnhî nhîpêx anhÿrja mã ijamaxpêr nê ixkĩnh nê.

Anhÿr o pa htem mē ato kuwÿ. ⁴ E Kris kõt ixkwÿjaja. Nà Tirtũm kãm mē ajapê jakamã na pre amnhîm mē arê. Kot mē ato hkra nhũm nhÿrmã kuri mē amex nê atir tũm nê apa ho apa kaxyw. Ra mē ixte ja hã mē ajarênh mar mex.

*Mê piitã mē kot Tesarõn nhõ
xwÿnhjê jarênh mar ã mē harênh*

⁵ Nê na pa prem ma mē awÿr mõ nê mē amã Jesus jarênh o mē akõt ixpa. Kot mē panê tanhmã amnhî nhîpêx to hã harênh o ri mē akõt ixpa. Nom pa mē amnhî krã hkõt mē amã ixujarênh kêt nê. Æm Tirtũm Karõ nhÿ hã na pa prem hihtÿx xà ho tanhmã mē amã ixkapêr to ka prem mē inhma nê mē ixkõt ajamaxpêr kurê kumrêx. Na pa prem tãm amnhî nhîpêx o ri ixpa ka mē ja hã mē ixpununh o ri mē ixkõt apa. ⁶ Tã Jesus kõt amnhî xunhwÿ nê hkõt amnhî nhîpêx mex nê. Nê mē ixkõt amnhî nhîpêx mex nê. Mē kot Jesus ã tanhmã mē ato htã ka htem Tirtũm Karõ nhÿ hã akĩnh nê hkõt amnhî nhîpêx mex rãhã ho ri apa. ⁷ Tã nhũm pika pê Masetõn mē Gres wa kamã Jesus kõt mē pahkwÿjaja ã mē ate amnhî nhîpêx anhÿr ã mē ajarênh ma nê mē apyrã nê ã amnhî nhîpêx anhÿr o pa. ⁸ Na ka prem tanhmã Jesus kot mē panê amnhî nhîpêx to hã

harēnh o ri mē hkôt apa nhūm mē piitā mē akapēr ma. Nom mē tapx-
ipixjaja mar kêt nē. Na mē ra ohtō
nē mē ajarēnh ma nē mē apyrā nē
ma mē kām Jejus jarēnh o pa. Ra
mē ate Jejus kôt amnhī xunhwÿr ā
amnhī jarēnh o ri apa nhūm mē pi-
itā kot mē amar jakamā mē pajaja
na pa htem mē kām ā mē ajarēnh
anhÿr kêt nē. Mo kaxyw? Ra mē kot
mē ajarēnh mar mex kēnā. ⁹ Na pa
htem nhÿri krī hō hwÿr pōj nhūm
mē xpumu nē ra mē tāmjaja mē
inhmā mē ajarēnh kurē kumrēx.
Nē mē ajarēnh o:

—Kwa Tesarōn kamā Kris kôt
mē pahkwÿjaja na xep kām mē
akīnh nē. Amnepēm na pre
htem amnhīm sānti nhīpēx nē kēp
mēhpām ā harē nē amnhī to hwÿr
o pa. Tā ka xep prem ma mē hwÿr
mō nē mē kām Tirtūm kapēr jarē
nhūm mē ama nē Tirtūmja sānti
rom ām hāmri hā omunh kurē
kumrēx. Hāmri nē gryk ā sānti kaga
hpa nē Tirtūm kôt amnhī xunhwÿ
nē hkôt pix mā amnhī nhīpēx mex
o pa. ¹⁰ Nē amnhī wÿr Tirtūm Kra
kamā hamak rāhā ho ri pa. Anē.

Ām hāmri na ka htem amnhī wÿr
kamā hamak rāhā ho apa. Na pre
ty nhūm Hipēēxā Tirtūm akupÿm
ho htīr. Tā koja nhÿrmā akupÿn
mē pahwÿr kumē nhūm akupÿn mē
pahwÿr wrÿ. Hāmri pu mē ām pix
kukwak ri mē kot amnhī xā htÿx
kām hamak o pa htūm xāta wÿr
papa hkêt nē.

2

Pawre kot amnhī jarēnh

Sikūn Korīt 1.12, 4.1-6

¹⁻² Nē kormā mē awÿr mē inhmōr
kêt ri na pa prem kormā Piri-
pos nhō xwÿnhjē mā Tirtūm kapēr
jarēnh o ri mē hkôt ixpa. Nom
nhūm mē hkwÿjaja kām mē inhmar
prām kêt nē. Na prem Jejus ā mē
inhmā kapēr punuj nē mē inhīpēx
kati pa prem amnhī xā htÿx kamā

ijamak o mē hkôt ixpa. Na ka prem
ja hā mē ijarēnh ma. Ā mē kot mē
inhīpēx anhÿr tā pa mē tee ri amnhī
kukamā ijamaxpēr pē Tirtūm kapēr
jarēnh kaga hkêt nē. Na pa prem
arī mē kām Jejus kot tanhmā mē
panē amnhī nhīpēx to hā harēnh o
ri mē hkôt ixpa. Tā mē awÿr inhno-
jarēt nē Tirtūm nhÿ hā amnhī to
htÿx nē ma mē awÿr mō. Hāmri nē
mē amā tanhmā Jejus jarēnh to ho
ri ixpa. Ka prem mē inhma hāmri
nē axohtō nē hkôt amnhī xunhwÿ.
³ Nom pa prem ixēx rom tanhmā
mē amā ixkapēr to hkêt nē. Rÿ
mē inhmā mēmoj prām xāj mē ano
kupyrr pē mē amā ixkapēr kêt nē.
⁴ Rÿ mē ate mē ixkapēr mar nē
mē inhmex ā mē ijarēnh kaxyw pa
tanhmā mē amā ixkapēr to hkêt nē.
Ām Tirtūm kot mē inhmar nē tapx-
ipix mē inhmex ā mē ijarēnh pix
prām xāj na pa prem mē amā kapēr
jarēnh o ri mē akôt ixpa. Tirtūm
tapxipix na hte tanhmā mē pakute
hkôt mē pahpumunh rāhā ho pa.
Tām na pre mē ixte kapēr jarēnh o
ri ixpa kaxyw mē ixunhwÿ.

⁵ Xàn pa prem mē ijakwa nhīkjē
ho mē ate tām amnhī nhīpēx ā mē
ajarē hāmri nē mē ijakwa nhīkjē ho
mē ato ixkapēr punuj nē? Nā na
pa prem ā amnhī nhīpēx anhÿr kêt
nē. Na pa prem ixkatāt kôt mē ate
amnhī nhīpēx ā mē apumunh kôt
tanhmā mē ajarēnh to ho ri ixpa.

Nē xā mē ate mē ixkapēr mar
nē akīnh nē hpānhā mē inhmā
amnhūrer kaxyw na pa prem mē
awÿr mō nē mē amā Jejus kapēr
o mē ajahkre? Nā na pa prem
kàxpore prām xāj mē amā ixkapēr
kêt nē. Tirtūm kot ja kôt mē ix-
pumunh mex.

⁶ Rÿ xā mē ate mē inhmex ā mē
ixto jarkrar kaxyw na pa prem mē
awÿr mō? Nā māānēn ja kaxyw kêt.
Ā mē ate mē ijarēnh anhÿr prām
xāj na pa htem Tirtūm kapēr o mē
ajahkre ho ri ixpa hkêt nē.

⁷ Rỳ xàn pa pre mẽ awỳr mō nē mẽ amā amnhĩ jarēnh o:

—E mẽ ixte Jejus nhỹ hã ixkapēr o ixpa xwỳnh jakamā kot paj mẽ amā tanhmā ixkapēr to ka mẽ inhma nē hpānhā mẽ inhmā amnhĩre.

Anhỹr o mẽ amā ixkapēr? Nà na pa pre ã mẽ amā ixkapēr anhỹr kêt nē. Na pa prem te mẽ katorxà kot hkrajê nhĩpêx pyrək o mẽ anhĩpêx nē amarĩ mẽ ajahkre ho ixpa nē mẽmoj tã mẽ awỳr kêt nē.

⁸ Mẽ inhmā mẽ akĩnh jakamā na pa prem mẽ amā ixprĩ hã Tirtũm kapēr piitã harēnh par o mẽ akõt ixpa nē mẽ kot ja hã tanhmā mẽ ixto pymaj tee ri amnhĩ kukamā ijamaxpēr o ri ixkaprĩ hkêt nē. Ām ixamnhĩx ri tanhmā Jejus kot mẽ panē amnhĩ nhĩpêx to hã harēnh o mẽ akõt ixpa. ⁹ Mẽ apê mẽ ixkwỳ jakamā na pa prem tanhmā mẽ amā ixkapēr to hpānhā mẽ ixàpkur xà rỳ mẽmoj tã mẽ awỳr kêt nē. Na pa prem mẽ pamjaja mẽmoj tã ixàpênh pē mẽ amā ixkapēr o ri ixpa. Nē ixàpênh rũnh kumrêx. Arĩgro hã nē kamāt kām. Mãn arĩ mẽ ate ã mẽ ixte amnhĩ nhĩpêx anhỹrja ã anohtỳx japêr ko. ¹⁰ Na pa prem tãm amnhĩ nhĩpêx o mẽ akõt ixpa. Tirtũm kām hprām xà hkõt. Jao tanhmā amnhĩ to mex to rāhā ho ri ixpa ka prem amnhĩ tã mẽ ixpumu. Nhũm Tirtũm haxwỳja ja hã mẽ ixpumu. ¹¹ Na pa pre mẽ apê mẽ ixkra pyrək mẽ anhĩpêx o ri mẽ akõt ixpa. ¹² Jao mẽ amā ixkapēr mex nē. Nē mẽ akaprĩ nē apa xwỳnhjaja pa prem akupỳm mẽ ajamaxpēr o mẽ axihtỳx hāmri nē mẽ apiitã mẽ amā ixkapēr nē mẽ amā:

—Kwa kêt ka mẽ Tirtũm kõt amnhĩ nhĩpêx mex rāhā ho ri apa nē aa hkaga hkêt nē. Anē.

Tirtũm tãm na pre amnhĩ wỳr mẽ pahwỳ pu prem hkõt amnhĩ xunhwỳ. Tã koja nhỹrmā amnhĩ wỳr

mẽ pahto api pu mẽ Kra Jejus kukwak ri wa kuri pamex kumrêx nē ri papa ho papa. Jakamā kwa kêt ka mẽ hkõt amnhĩ nhĩpêx mex rāhā ho ri apa.

Jejus kwỳjaja kām Jejus kõt amnhĩ xunhwỳr hkêt xwỳnhjê pyma hkêt

Atre 17.1-9

¹³ Nē ma mẽ awỳr mẽ inhmōrta ã na pa prem mẽ amā Tirtũm kapēr jarēnh o ri mẽ akõt ixpa ka prem mẽ inhma nē mẽ ixte amnhĩ krā hkõt mẽ ixkapēr ã mẽ ixkamnhĩx kêt nē. Na ka prem ãm hāmri mẽ ixte Tirtũm kapēr jarēnh ã mẽ ixpumunh kurê kumrêx nē amnhĩ kaxyw hkõt ajamaxpēr nē Jejus mẽ Hipêêxà wa hkõt amnhĩ xunhwỳ. Jakamā na pa hte mẽ amā ijamaxpēr nē mẽ anhỹ hã ixkĩnh nē. Hāmri nē Tirtũm mã mẽ anhỹ hã ixkĩnh jarēnh o ri ixpa. Nà na ka htem arĩ Tirtũm kapēr kõt amnhĩ nhĩpêx mex nē. ¹⁴ Nhũm hte mẽ akwỳjaja tee ri ja hã mẽ apumu nē Jejus ã mẽ atomnuj nē. Nom mẽ kapxipixjaja ã mẽ anhĩpêx anhỹr kêt nē. Jutej kamā Ijaew kwỳjaja na prem mẽ apyrã nē Jejus kõt amnhĩ xunhwỳ nhũm mẽ hkwỳjaja tee ri ja hã mẽ omu nē hã mẽ hipêx kati ho pa.

¹⁵ Amnepêm Ijaew na prem Tirtũm nhỹ hã mẽ kām kapēr o mẽ pa xwỳnhjê homnuj nē mẽ hkwỳjê hpar o pa. Hāmri nhũm hpānhā mẽ hkanrêhã mẽ htāmnhwỳjaja mẽ urək nē Pahihti Jejusja pĩ. Tã jarāhã määnēn ã Jejus ã mẽ panhĩpêx anē nhũm Tirtũm tee ri mẽ pahta mẽ omu nhũm ja kêp omnuj tỳx kumrêx nhũm mẽ pahta mẽ kamā gryk nē.

Na hte mẽ apê Ijaew kêt xwỳnhjê ho hkra nhũm Ijaew kām ja prām kêt ¹⁶ jakamā na htem mẽ akwỳ kot Tirtũm kõt amnhĩ xunhwỳr pymaj mẽ anē mẽ ixkurê nē mẽ inhmā:

—Kwa Ijaew kêt xwỳnhjê mã Tirtũm kapēr jarēnh kêt nē. Ja mex kêt. Anē.

Mē ate Jejus kōt amnhī xunhwȳr nē nhȳrmā Tīrtūm wa kuri atīr tūm nē apaja mē kām hprām kēt jakamā na htem ā mē anē āmnār o pa anhȳrja o amnhī tomnuj nē. Mē kot amnhī tomnuj tȳx o mē pa xwȳnh jakamā na Tīrtūm mē kamā gryk nē. Koja nhȳrmā mē kot amnhī xā htȳx kamā hamak tūm xā hwȳr mē rēnh pa.

Pawre akupȳm Tesarōn nhō xwȳnhjē hwȳr hkrā hā harēnh

Atre 17.10-13

¹⁷ Nē ma mē awȳr mē inhmōr tā mē anhō krī kamā mē kēp Kris kwȳ hkēt xwȳnhjaja na pre mē ixpumu nē mē anē mē ijano pa prem ijapōj nē hpānhā ma nhȳhȳm krī hō hwȳr ixpa. Nom arī mē amā ijamaxpēr rāhā nē mē ato ijamak o ri ixpa nē xatā akupȳm mē awȳr ixkrā. ¹⁸ Na pa prem inhmā akupȳm mē awȳr inhmōr prām tȳx nē. Ixpē Pawre na pa pre xatā mē awȳr ixkrā htā nhūm Satanasti tanhmā mē anē ixpē amnār to pa kormā mē awȳr inhmōr kēt nē. Ām tee ri inhmōr prām kaprȳ. ¹⁹⁻²⁰ Mē inhmā mē akīnh tȳx. Mē ate Tīrtūm kōt amnhī nhīpēx mex jakamā koja nhȳrmā Pahihti Jejus akupȳn mē pahwȳr wrȳ pa mē akuri xa nē kām mē ajarēnh o:

—Pa Pahihti. E Tesarōn nhō xwȳnhjē pumu. Na ka pre mē hwȳr inhmē pa mē hwȳr mō nē mē kām ajarē nhūm prem inhma nē amnhī kaxyw akōt hamaxpēr tȳx nē akōt amnhī xunhwȳ. Tā na htem akōt tām amnhī nhīpēx rāhā ho pa.

Anhȳr o kām mē ajarē nē mē anhȳ hā ixkīnh tȳx kumrēx.

3

Pawre kot Tesarōn wȳr Ximotre mēnh ā harēnh

Atre 17.14-15, 18.5

¹⁻⁵ Nē kormā mē akōt ixpa ri na pa pre Kris kwȳ hkēt xwȳnhjaja kot Kris ā tanhmā mē atomnuj to hkukamā mē amā mē harē ka

prem mē inhma. Na htem ā Kris ā mē pahkurē xwȳnhjaja mē panhīpēx anhȳr o pa. Tā nhūm prem ā mē anhīpēx anē pa mē ajarēnh ma nē tee ri mē akukamā ijamaxpēr nē axpēn mā mē ajarēnh o:

—Hēxta waa nē. Kwa mē kot Jejus ā tanhmā mē homnuj toja mȳrapē mān mē tee ri amnhī kukamā hamaxpēr nē Jejus kaga rȳ ko. Mān ra Satanasti tanhmā mē kām Jejus o hēx to nhūm mē kuma nē tanhmā hamaxpēr to nē hkaga. Kwa mān pu prem ām mē kām Tīrtūm kapēr jarēnh kaprȳ nā? Anē.

Hāmri nē tee ri mē akukamā ijamaxpēr nē mē awȳr Ximotre mēnh kaxyw nē kām:

—Mān ra Tesarōn nhō xwȳnhjaja Jejus ā tanhmā mē homnuj to nhūm mē amnhī xā htȳx kamā hamak o ra tee ri amnhī kukamā hamaxpēr. Kwa ma mē hwȳr mō nē ja hā mē omu. Hāmri nē mē kot Kris kōt amnhī xunhwȳr tȳx kaxyw mē hamaxpēr o axihtȳx. Hāmri nē akupȳn wa ixwȳr mō nē wa inhmā tanhmā mē harēnh to. Kot paj Siras mē wa akutēp jar Atenas kamā wa arīk. Anē.

Hāmri nē mē awȳr kumē. Ximotre na hte Siras mē wa inhīhkō hā mē kām Tīrtūm kapēr jarēnh o pa. Nē Kris kot tanhmā mē panē amnhī nhīpēx toja nhūm wa inhīhkō hā mē kām harēnh o pa. Tā pa pre mē awȳr kumē nhūm ma mē awȳr mō pa Siras mē wa Atenas kamā kutēp arīk.

Ximotre akupȳn mōr nē Pawre mā mē harēnh

⁶ Tā nhūm ra ham akupȳn mē arūm wa ixwȳr mō nē wa inhmā tanhmā mē ajarēnh to pa wa mē ajarēnh ma nē ixkīnh nē. Na ka xep htem arī amnhī kaxyw Kris kōt ajamaxpēr tȳx rāhā nē. Jao mē amā mē piitā mē hkīnh nē tanhmā mē ho mex to ho ri apa. Nē arī

mê inhmã ajamaxpêr nê ixpyrà nê mê amã mê ixpumunh prãm o ri apa. ⁷ Nà ãm hãmri na ka htem ã amnhĩ nhĩpêx anê. Na pa wa ra jar ixpunuj nê ixpa nê Kris ã amnhĩ xà htỳx kamã ijamak tã mê ajarênh ma nê tãm ijamaxpêr. ⁸ Tesarõn nhõ xwỳnhjaja kot Kris ã tanhmã mê anhīpêx to htã ka mê arĩ hkõt amnhĩ xunhwỳr tỳx rãhã nê. Pa wa mê ajarênh ma nê mê anhỹ hã ixkĩnh pê tanhmã Pahihti Jejus mã amnhĩ nhĩpêx to ho ri ixpa. ⁹ Nà na pa hte wa mê anhỹ hã ixkĩnh nê. Nê xatã Tĩrtũm mã mê ajarê nê kãm:

—Pa Tĩrtũm, Nà ãm hãmri na ka pre amnhĩ kõt Tesarõn kãm akwỳjê xunhwỳr tỳx nê nhũm htem akõt amnhĩ nhĩpêx mex rãhã ho pa. ãm hãmri na ka hte ã mê hipêx anê. Na pa hte mê kot amnhĩ nhĩpêx mã ijamaxpêr o ri ixpa nê ixkĩnh nê.

Anhỹr o kãm mê ajarê. ¹⁰⁻¹¹ Nom kãm ja pix jarênh kêt nê. Na pa hte wa mãânên arĩgro hã nê kamãt kãm amnhĩ to Mẽpanhĩpêexã Tĩrtũm mê Pahihti Jejus Kris wa hwỳr kãm ixihỳtỳx rãhã ho ixpa nê wa kãm:

—Kwa Tĩrtũm mê Jejus wa. Na pa wa ra inhmã Tesarõn wỳr inhmõr nê mê pahkwỳjê pumunh prãm tỳx nê. Kormã mê kot akapêr jatur xà mar kêt. Tã wa inhmã akupỹm mê hwỳr wa inhmõr nê mê kãm akapêr jatur xàm mẽn̄h prãm. Mê kot mar nê akõt amnhĩ nhĩpêx mex o pa kaxyw. Kwa xat ka wa akupỹm mê hwỳr wa inhmẽ nã? Anê.

Na pa hte wa ã amnhĩ to wa hwỳr rãhã ho ixpa anê. Tã koja wa akupỹm mê awỳr wa inhmẽ pa wa ma mê awỳr inhmõr kurê kumrêx. ¹² Koja Tĩrtũm tanhmã mê akrã hto ka mê amã xpên kĩnh pê tanhmã xpên to ajuta hto ho ri apa. Nê mê amã akwỳjê hã ma ho te mê kam amã amnhĩ tã ma pyrãk o ri apa. ã kot kaj mê apiitã xpên nhĩpêx anê. Te wa inhmã mê akĩnh pê tanhmã mê ato mex to pyrãk.

¹³ Koja Tĩrtũm ja kaxyw tanhmã mê akrã hto ka mê tãm ajamaxpêr mex nê. Kêr kê Jejus nhỹrmã akupỹn wrỳ. Mê kot hkõt amnhĩ xunhwỳr xwỳnhjê mê ro hã akupỹn wrỳ. Hãmri ka mê Mẽpanhĩpêexã Tĩrtũm kutã amnhĩ kukamã ajamaxpêr nê tãm mê ate amnhĩ nhĩpêx ã amnhĩ pumunh kõt akĩnh nê apikunhar o kuri akuhê. No ri tee ri amnhĩ kamã ajamaxpêr nê ajakwamnaire nê akuhê hkêt nê.

4

Tĩrtũm kãm mẽmoj prãm ã harênh Rõmãn 13.11-14; Epes 5.3-14

¹ E Jejus kõt ixkwỳjaja. Na pa prem ma mê awỳr mō nê Tĩrtũm kapêr o mê ajahkre ho ri mê akõt ixpa. Mê ate mar nê Tĩrtũm kãm hprãm xà hkõt tanhmã amnhĩ nhĩpêx to kaxyw. Ka prem mê inhma nê hkõt amnhĩ nhĩpêx mex o ri apa. Tã kot paj axte ja hã tanhmã mê amã karō hto. Pahihti Jejus nhỹ hã axte mẽmoj tã mê amã karō. Jakamã kwa kêr ka mê arĩ Tĩrtũm kapêr kõt pix mã ri amnhĩ nhĩpêx mex nê ÿ hã amnhĩ to htỳx pê ã amnhĩ nhĩpêx anhỹr o ri apa. ² Na pa prem ra Jejus nhỹ hã mê amã mẽmoj tã karō. Mê ate hkõt amnhĩ nhĩpêx prãm xài mê amã hã karō ka prem mê inhma. ³ Nà mê pahte tãm amnhĩ nhĩpêx o papaja na Tĩrtũm kãm hprãm. No kêt mẽ pahtỳx ri nhãm mẽnijê ho amnhĩkati o papaja na kãm hprãm kêt. ⁴ Jakamã kwa kêr ka mê amyjaja aprō pix tãnopxar o ri apa. No mê ri nhãm mẽnijê ho amnhĩkati ho ri apa hkêt nê. Nê mẽ anijaja kêr ka mẽ amjên pix tãnopxar o ri apa. No mẽ ri nhãm mẽmyjê ho amnhĩkati ho ri apa hkêt nê. ⁵ Jejus kwỳ hkêt xwỳnhjaja kot htỳx ri kãm hprãm xà hkõt mẽnijê hwỳr mrar nê mê ho amnhĩkati htã kêr ka mê ho mẽ urak kêt nê. Kwarĩ ho kwarĩ. ⁶ ã mẽ kot amnhĩ nhĩpêx anhỹr xwỳnhjaja koja Tĩrtũm

nhÿrmã mẽ homnuj tÿx kumrëx. Na pa prem ra mẽ amã ja jarë ka prem mẽ inhma. Jakamã kwa kër ka mẽ ã amnhĩ nhĩpëx anhÿr o ri apa hkêt nê. ⁷ Xà na pre Tirtùm ã mẽ pahte amnhĩ nhĩpëx anhÿr kaxyw amnhĩ wÿr mẽ pahwÿ nê mẽ pahto hkra? Nà ja kaxyw na pre mẽ pahto hkra hkêt nê. ãm mẽ pahte tãm amnhĩ nhĩpëx o ri papa kaxyw nê tãm ri axpën nhĩpëx o ri papa kaxyw na pre mẽ pahto hkra. ⁸ Jakamã kot kaj mẽ atō ja hã mẽ inhma nê ãm mẽ inhma nê arĩ ã amnhĩ nhĩpëx anê. Hãmri nê mẽ pajaja mẽ ixkapër nhĩrōp axãm kêt nê. Tirtùm kapër nhĩrōp kot kaj xa. Nê mãänën kot mẽ pahwÿr Karō mënň xwÿnhja kapër nhĩrōp kot kaj xa.

⁹ Nê mẽ amã axpën kĩnh pë axpën to mex o apa hprãm xàj na pre Tirtùm tanhmã mẽ amã kapër o amnhĩrit to ka htem ã axpën nhĩpëx anhÿr o ri apa. Jakamã kot paj mẽ axte ja hã tanhmã mẽ amã nê hkêt nê. ¹⁰ Na ka mẽ ra amã axpën kĩnh pë te mẽ kam amã amnhĩ tã ma pyrak o axpën nhĩpëx o ri apa. Nê pika pë Masetōn kamã Kris kôt mẽ akwÿjaja ka mẽ mãänën amã mẽ hkĩnh pë ã mẽ hipëx anê. Tã kër ka mẽ arĩ ã amnhĩ nhĩpëx anhÿr rãhã nê. ¹¹ Kot kaj mẽ ã amnhĩ nhĩpëx anê hãmri nê ajamakëtkati nê axãmnhĩx axapënh pix tãnopxar o ri apa. Jao mẽ hakwa kamã nhãm tanhmã mẽ hixi jarënh to ho ri apa hkêt nê. Nê ãm amnhĩ pix tãnopxar o ri apa. Nê amnhĩ pa kukwak ri axàpkur kaxyw amnhĩm axapënh mex o ri apa. Na pa prem ra ã ja hã mẽ amã karō anê. ¹² Kot kaj mẽ ã amnhĩ nhĩpëx anê hãmri nê amã prãm xàj axahwÿr o ri apa hkêt nê. Nhũm Kris kwÿ hkêt xwÿnhjaja mẽ ate amnhĩ nhĩpëx ã mẽ apumu nê axpën mã mẽ ate tãm amnhĩ nhĩpëx xwÿnhjê hã mẽ ajarënh kurë kumrëx.

Kris kwÿ htyk xwÿnhjê jarënh

Matêwre 24.29-31; Wam Korit 15.51-58

¹³ E Kris kôt ixkwÿjaja. Na ka xep mẽ tee ri Kris kôt akwÿ htyk xwÿnhjê hkukamã ajamaxpër. Jakamã kot paj ixprĩ hã tanhmã mẽ amã mẽ harënh to ka mẽ inhma. Nà Kris kwÿ hkêt xwÿnhjaja na htem ty nhũm mẽ hkwÿjaja tee ri mẽ hkukamã hamaxpër o hkaprĩ nê. Mẽ htyk nê ma Jejus wÿr àpir kêt jakamã na htem mẽ mÿr pë hkaprĩ htÿx nê pa. No mẽ papajaja na pu htem ho mẽ urak kêt nê. ¹⁴ Jejus na pre ty nhũm Tirtùm akupÿm ho htĩr. Tã ra ã kot hipëx anhÿr jakamã koja nhÿrmã Jejus akupÿn wrÿ nê mẽ kot hkôt amnhĩ xunhwÿr nê htyk xwÿnhjê karō nhũm man amnhĩ kôt kaxkwa rũm mẽ o wrÿ. Na pu htem ã ja kôt pajamaxpër anê. ¹⁵⁻¹⁶ Na pre Pahihti Jejus inhma hkôt mẽ pahkwÿ htyk xwÿnhjê jarënh o:

—Kot paj nhÿrmã akupÿn mẽ awÿr wrÿ ka mẽ ate ixkôt amnhĩ nhĩpëx xwÿnh piitã ma ixkutã axàpir o mō. Nom kot kaj mẽ arĩ atĩr nê apa xwÿnhjaja akumrëx axàpir kêt nê. Kormã. Koja Tirtùm kapër o mẽ wrÿk xwÿnh krãhtũmja Tirtùm mã pifti kakō. Kakōr tÿx pa ixkwÿ htyk nê hikwÿ xwÿnhjê mã ixkapër nê ixàmra kamã mẽ kumra. Nhũm mẽ hkarō akupÿn mẽ hwÿr wrÿ nê mẽ kãm gjëx pa. Hãmri nhũm mẽ akupÿm htĩr nê kãnhmã hkrĩ hpa nê ma kumrëx ixkutã àpir o mō. ¹⁷ Hãmri ka mẽ ate ixkôt amnhĩ xunhwÿr xwÿnh arĩ mẽ atĩr nê apa xwÿnhjaja ka mẽ hã ajët nê mẽ atipxi nê ma ixkutã axàpir o mō pu mẽ kakrã kamã axpën kaxpa. Hãmri nê mẽ pahpimràatã ma kaxkwam api nê inhō krĩ hwÿr pōj. Kaj mẽ Tirtùm mẽ wa ixkuri amex kumrëx nê atĩr tũm nê apa ho apa. Anê.

¹⁸ ã Pahihti Jejus inhma mẽ pakukamã mẽ pajarënh anê.

Jakamã kwa kêr ka mẽ tee ri mẽ pahkwý htyk xwýnhjê hkukamã ajamaxpêr hkêr nê. Æ ixujarênh anhÿrta ã anohtýx pê axpên jamaxpêr o axihtýx o ri axpên kôt apa.

5

Mê pahte akupÿn Jejus wrýk xà hã arıgro pumunh kêt ã harênh

Matêwre 24.32–25.13; Wam Pêtre 3.8-13

¹⁻² Nê mẽ pahte Jejus akupÿm wrýk xà hã arıgro pumunh kêt jakamã kot paj mẽ amã tanhmã hã kagà hto hkêr nê. Koja nhÿrmã akupÿn mẽ pahwÿr nojarêr hãmri nê te kot mẽ ahkĩnh xwýnh kot amnhĩ nhĩpêx pyrã nê mẽ pajaêr pê mẽ pahwÿr wrý. ³ Jakamã koja kormã wrýk kêt ri nhũm Kris kwý hkêr xwýnh kot amnhĩ wÿr kamã hamak kêt xwýnhjaja hãmri mex nê pa hã amnhĩ pumu nê hkĩnh nê pa. Nê axpên mã kapêr o:

—Nà koja Tirtũm tanhmã mẽ pahto hkêr nê. Arĩ mẽ pamex nê ri mẽ papa kênã. Nà kot puj mẽ paxamnhĩx ri pajamakêtkati nê ri papa ho papa.

Anhÿr o axpên mã kapêr rôm nhũm puh Jejus mẽ haêr pê akupÿn wrý. Hãmri nê ma mẽ kot amnhĩ xà htýx kamã hamak o pa htũm xà hwÿr mẽ rênh pa nhũm mẽ tee ri kêp hpimxur prãm kaprÿ. Te mẽ htujarô xwýnh kot amnhĩ nhĩpêx pyrãk. Na htem mex nê pa htã hpi-jagri kaxyw ôhy xà htýx kumrêx nê tee ri kãm ôhy xà hkêr prãm kaprÿ ho hikwÿ. ⁴ Nom mẽ kajaja kot kaj mẽ urã nê amnhĩ jaêr pê akupÿm wrýk kãm omu nê tee ri amnhĩ kukamã ajamaxpêr o akaprĩ hkêr nê. ⁵ Mẽ pahpê Jejus kwý jakamã na pu htem kapêr kôt ri tãm amnhĩ nhĩpêx o ri papa. Jao te mẽ pahte mẽ kêp Jejus kwý hkêr xwýnhjê kot amnhĩ nhĩpêx pyrãk kêt. ⁶ Na htem mẽ pahkĩnhã akupÿn wrýk

kukamã hamaxpêr kêt nê. Te htýx ri mẽ ôt rãhã ho hikwÿ pyrãk. Nom mẽ papajaja na pu htem akupÿn wrýk kamã pajamak o papa pê kãm tanhmã amnhĩ nhĩpêx mex to rãhã ho ri papa. ⁷ Te kot ja pyrãk. Na htem kamãt kãm gõr nê mẽmoj mã hamaxpêr kêt nê htýx hikwÿ. Nê mẽ hkwyjaja kamãt kãm axpã nê htýx ri tanhmã amnhĩ tomnuj to ho pa. Jao hamaxpêr mex kêt nê. Tã mẽ kêp Jejus kwý hkêr xwýnhjaja hte mẽ urãk nê htýx ri tanhmã amnhĩ tomnuj to ho pa nê akupÿn Jejus wrýk mã hamaxpêr kêt nê. ⁸ No kêt mẽ papajaja. Mẽ pahte hkôt amnhĩ xunhwÿr xwýnhjaja. Kêr pu mẽ ho mẽ urãk kêt nê. Satanasti kãm mẽ pahte amnhĩ tomnuj prãm tã mẽ pahte kãm hprãm xà hkôt amnhĩ nhĩpêx pymaj kêr pu mẽ mẽmoj punuj pê amnhĩ to htýx rãhã ho ri papa.

Nê amnhĩ kaxyw Jejus kôt pajamaxpêr tÿx rãhã nê.

Nê mẽ pamã mẽ piitã mẽ hkĩnh pê mẽ kutã panojarêr rãhã ho ri papa.

Nê nhÿrmã Tirtũm mẽ hkra Jejus wa kuri pahtĩr tũm nê papa ho papa hkukamã mãn pajamaxpêr rãhã o ri papa.

Kot puj mẽ ã amnhĩ nhĩpêx anê hãmri nhũm Satanasti tee ri mẽ pahte amnhĩ tomnuj prãm xaj mẽ pahkrãm pajamaxpêr punuj jagjênh kaprÿ.

⁹ Xà na pre Tirtũm mẽ pakamã gryk kãm mẽ kot amnhĩ xà htýx kamã hamak tũm xà hwÿr mẽ pajanor kaxyw mẽ parê? Nà na pre ja kaxyw mẽ parênh kêt nê. Æm Pahihti Jejus Kris kukwak ri kot amnhĩ katut kôt mẽ pahte amnhĩ tomnuj rênh par nê mẽ pahto hkra kaxyw na pre mẽ parê.

¹⁰ Tã mẽmo kaxyw na pre Krisja mẽ panê ty? Nã nhÿrmã Tirtũm mẽ wa kuri mẽ pamek kumrêx nê pahtĩr tũm nê papa ho papa hprãm

xàj na pre mẽ panê ty. Jakamã koja nhÿrmã akupÿm amnhÿ kôt ma mẽ pahto àpir kaxyw akupÿn mẽ pahwÿr wrÿ pu mẽ amnhÿ kaxyw hkôt pajamaxpêr xwÿnh piitã ma hkôt kaxkwa hwÿr api hãmri nê Tÿrtÿm wa kuri pamex nê pahÿtÿr tÿm nê papa ho papa. Kormã mẽ pahÿtÿr ri mẽ papa xwÿnhjaja nê ra mẽ htyk nê hikwÿ xwÿnhjaja nhÿm akupÿm mẽ ho htÿr. Hãmri nê mẽ pahto hpimràatã amnhÿ kôt mẽ pahto àpir pa. Mẽ pahte hkôt amnhÿ xunhwÿr xwÿnh piitã koja Jejus nhÿrmã akupÿn wrÿ nê ã mẽ panhÿpêx mex anê.

¹¹ Tã ã kot anhÿr jakamã kwa kêr ka mẽ jam ajamaxpêr o apa pê axpên jamaxpêr o hihtÿx o ri axpên kôt apa. Nê Jejus kôt axpên jamaxpêr o hihtÿx o ri axpên kôt apa. Ra ã mẽ ate axpên nhÿpêx anhÿr tã kêr ka mẽ arÿ ho anhÿr rãhã ho ri apa nê aa hkaga hkêt nê.

Tÿrtÿm kapêr o mẽ pajahkre xwÿnhjê jarênh

Karatas 6.6; Wam Ximotre 5.17-19

¹² Nê kwa Kris kôt ixkwÿjaja. Na hte mẽ kot Tÿrtÿm kapêr o mẽ ajahkre xwÿnhjaja mẽ ajahkre mex pê Tÿrtÿm mã mẽ ajamãr mex o pa. Na htem ã mẽ anhÿpêx mex anhÿr rãhã ho ri mẽ akôt pa. Tã kwa kêr ka mẽ amnhÿ tã mẽ omu nê mẽ kapêr mar tÿx nê. ¹³ Nê mẽ hã apijaam pê tanhmã mẽ ho mex to ho apa.

Nê kwa kêr ka mẽ tãm axpên nhÿpêx nê axamnhÿx ri ajamakêtkati nê axpên kôt ri apa ho apa.

Mẽ pahte tanhmã Kris kôt mẽ pahkwÿjê nhÿpêx to hã mẽ pamã karō

Epes 4.1-6

¹⁴ Nê koja Kris kôt mẽ anhÿo kãm kaga nê pa ka mẽ ja hã omu nê kãm anê kê ã amnhÿ nhÿpêx anhÿr kêt nê. Kê hpãnhã amnhÿ xàpkur xà kaxyw àpênh o pa.

Nê mẽ kãm ma ho mẽ pa xwÿnhjaja ka mẽ kãm mẽ hamaxpêr o axihtÿx o ri mẽ hkôt apa.

Nê kormã amnhÿ kaxyw Jejus kôt mẽ hamaxpêr tohtuj anhÿr xwÿnhjaja ka mẽ tanhmã Jejus kôt mẽ ho mẽ axihtÿx to kê mẽ hkôt amnhÿ nhÿpêx mex o pa.

E kêr ka mẽ ã mẽ axpên nhÿpêx anhÿr o ri apa nê axpên kamã agryk tokyx anhÿr kêt nê.

¹⁵ Nê koja mēhō tanhmã atom-nuj to ka mẽ ãm omu nê amnhÿ tã tanhmã ho hkêt nê. ãm ho mex o ri apa. Nê mẽ piitã tanhmã mẽ ho mex to hpix kukamã ajamaxpêr rãhã nê.

¹⁶ Æ mẽ pahte amnhÿ nhÿpêx anhÿr o papaja na Tÿrtÿm kãm hprãm.

Mẽ pahpê hkra hã pahkÿnh rãhã papaja na kãm hprãm.

¹⁷ Nê mẽ pahte Tÿrtÿm mã amnhÿ jarênh rãhã ho papaja na mãânên kãm hprãm.

¹⁸ Nê tanhmã mẽ pakute htã arÿ Tÿrtÿm mã mex o mex ã harênh o papaja na mãânên kãm hprãm. Mẽ pahkÿnh nê papa kamã kãm mex o mex ã harê. Rÿ mẽ pahpunuj nê papa htã arÿ kãm mex o mex ã harê. Rÿ nhÿm mēhō tanhmã mẽ panhÿpêx to htã pu mẽ arÿ kãm mex o mex ã harê.

Æ mẽ pahte amnhÿ nhÿpêx anhÿr o papaja na Tÿrtÿm kãm hprãm.

Mẽ pahte tanhmã Tÿrtÿm Karō nhÿpêx to hã mẽ pamã karō

¹⁹ Nê koja Tÿrtÿm Karō mẽ amã mēmoj tã tanhmã kapêr o amnhÿrÿt to ka mẽ ama nê hkôt amnhÿ nhÿpêx kurê kumrêx. Rÿ mēhō mã tanhmã akapêr to kurê kumrêx. No kêr ka mẽ ama nê ãm ama nê atÿx ri hã apa hkêt nê. ²⁰ Rÿ nhÿm mēhō Tÿrtÿm Karō nhÿ hã tanhmã mẽ amã kapêr to ka mẽ ama nê agryk nê tanhmã ho akapêr punuj to hkêt nê. ²¹ Kojã Tÿrtÿm kapêr

kôt tanhmã mẽ amã mẽmoj jarēnh to nē ãm hãmri Tĩrtũm Karō nhỹ hã harēnh ã amnhĩ jarē. Ka mẽ ama nē hkôt amnhĩ nhĩpêx. ²² No koja Tĩrtũm kapêr kwỳm ri tanhmã mẽmoj jarēnh to hãmri nē Tĩrtũm Karō nhỹ hã ja jarēnh kêt nē. ãm amnhĩ krã hkôt harē. Ka mẽ tee ri ama nē amnhĩ krã kamã kapêr xir tỳx kêt nē. Jao hkôt amnhĩ nhĩpêx kêt nē.

Tanhmã Pawre kot mẽ ho Tĩrtũm wỳr to hã harēnh

Wam Tesarōn 3.3, 16

²³ Nē na pa hte mẽ ato Tĩrtũm wỳr o ri ixpa nē kãm:

—Pa Tĩrtũm. Nà ate mẽ inhmã mẽ ijamakêtkati xà nhõr jakamã na pa htem anhy hã ixãmnhĩx ijamakêtkati nē ri ixpa. Jakamã kwa kêr ka tanhmã Tesarōn kamã akwỳjê ho kê mẽ amnhĩ to mex rãhã ri pa. Jao tãm amnhĩ nhĩpêx nē tãm ri hamaxpêr rãhã nhũm Pahihti Jejus Kris akupỳn mẽ ixwỳr wrỳ.

Anhyr o mẽ ato kuwỳ. ²⁴ Tã koja ã mẽ anhyr anē. Ra kot amnhĩ jarēnh xà hkôt. ã mẽ anhyr anhyr kaxyw na pre amnhĩm mẽ arē.

Kagà jatur xà

²⁵ E Kris kôt ixkwỳjaja. Kwa kêr ka mẽ amnhĩ xwar ixto Tĩrtũm wỳr o apa.

²⁶ Nē kêr ka mẽ atar Kris kôt mẽ pahkwỳjê piitã mẽ kãm mẽ ijarē.

²⁷⁻²⁸ Nē kê Pahihti Jejus Kris mẽ akutã nojarêt rãhã ho pa. Ixte Pahihti nhỹ hã ã mẽ amã ixkapêr nē hã kagà anhyr jakamã kêr ka mẽ atar Kris kwỳjê piitã mẽ kãm kamã harē kê mẽ piitã ixkapêr ma.

Tã ãm ja pix na hapêx. Ixpê Pawre na pa ã mẽ amã kagà nhĩpêx nē mẽ awỳr mẽnh anē.

Sikūn Tesarōn
Pawre kot Tesarōn
kamā Jejus kôt kwỳjê
hwỳr wam kagà nê mēnh
kôt hō kagà nê mēnh

Pawre na pre kagàja nhīpêx nê ma Tesarōn kamā Jejus kôt hkwyjê hwỳr kumê. Na pre hte Tesarōn kamā mē kām Jejus ā mē hkurê xwỳnhjaja Jejus ā tanhmā mē homnuj to nhūm mē amnhī xà htỳx kamā hamak o pa. Hāmri nhūm Pawre mē harēnh ma nê kagàja nhīpêx nê mē hwỳr kumê. Nê kamā mē kām mē hamaxpêr o hihtỳx. Nê mē kot arī Tirtūm kôt amnhī nhīpêx mex o pa nê hamaxpêr kôt hamaxpêr o pa hā mē kām karō. Nê nhỹrmā Jejus akupỳn kaxkwa rūm mē pahpê hkrajê hwỳr wrỳk nê pika ho hapêx par ā mē kām harê. Ā na pre Pawre mē kām kagàja kamā mē kām ujarēnh anê. Nê mē kām:

¹ Pa Tesarōn nhō xwỳnh kot Tirtūm kapêr mar kaxyw axpên wỳr mē apikuprōnh xwỳnhjaja? Xà mē amex na ka mē apa? Ixpê Pawre na pa axte mē awỳr kagà nhīpêx nê kumê. Siras mē Ximotre mē pa mē awỳr kumê. Na mē pahpê Mēpanhīpêxà maati Tirtūm mē Kra Jejus Kris kwỳ na pu mē. ² Jakamā na pa htem mē ato wa hwỳr rāhā ho ri ixpa. Wa kot mē akutā nojarêt rāhā ka mē ajamakêtkati nê apa kaxyw. Nê mēmoj to mē akutā wa nojarêt rāhā ho pa kaxyw.

Tirtūm kot nhỹrmā hkrajê nhīpêx kati xwỳnhjê homnuj tỳx ā harēnh

Wam Pêtre 4.12-19

³ Nê na ka htem amnhī kaxyw Tirtūm mā ajamaxpêr tỳx mex o ri apa. Nê axpên kutā anojarêt rāhā nê. Na pa htem ā mē ate amnhī nhīpêx anhỹrja mā ijamaxpêr nê mē anhỹ hā ixkīnh nê Tirtūm

mā mē anhỹ hā ixkīnh ā amnhī jarê. ⁴ Nê nhỹhỹm ixpa nê nhỹri krīm agjê nê kamā Tirtūm kôt mē pahkwỳjê mā mē ato amỹra nê mē kām:

—E pa mē amā Tesarōn kamā Kris kwỳjê jarê ka mē inhma. Nà mē ō krī kamā mē hkwyjaja na htem Kris ā mē hipêx kati ho pa nhūm htem amnhī xà htỳx kamā hamak pê mex kêt nê pa. Tā nom tee ri amnhī kukamā hamaxpêr o Jejus kaga hkêt nê. Na htem arī hkôt amnhī nhīpêx mex rāhā ho pa. Anê.

⁵ ā mē ate mē kutā amnhī nhīpêx anhỹr o apaja na hte Tirtūm hā mē apumu nê hkīnh nê pa. Nê mē akukamā hamaxpêr o:

—Mê kot Ixkra Jejus ā tanhmā mē hipêx to ho pa htā ām hāmri na htem mē kutā amnhī to htỳx o pa nê mē umaj wa ixkaga hkêt nê. Na htem ā amnhī nhīpêx anê nê mē kēp ixkra hā amnhī to amnhīrīt mex nê. Nà koja mē nhỹrmā wa ixri mex kumrêx nê htīr tūm nê pa ho pa.

Anhỹr o hamaxpêr. ⁶ Nê mē kot Kris ā mē anhīpêx punuj xwỳnhjaja koja Tirtūm nhỹrmā mē atā mē homnuj tỳx nê nhūm mē amnhī xà htỳx kamā hamak rāhā ho pa. Ām hāmri koja ā mē atā mē hipêx anê. ⁷⁻¹⁰ Koja Pahihti Jejusja nhỹrmā man akupỳn pika hwỳr hirā htỳx kām wrỳ nhūm Tirtūm kapêr o mē wrỳk xwỳnh xihtỳx xwỳnhjaja man hkôt wrỳ. Koja mē wrỳ hāmri nê mē kot amnhī tomnuj xwỳnhjê homnuj tỳx kumrêx. Jao ma mē kot amnhī xà htỳx kamā hamak tūm xàta wỳr mē rēnh pa nhūm mē kamā htīr tūm nê amnhī xà htỳx kamā hamak rāhā ho pa ho pa. Koja ā Pahihtija amnhī nê mē kot hkôt amnhī xunhwỳr kêt xwỳnhjê rēnh anê nhūm mē pahkīnhā Tirtūm mē Krata wa kuri mex nê pa hkêt nê. Nê mē pahkīnh ā wa mex o wa mex nê wa hihtỳx o

wa hihtÿx ã wa omunh kêt nê. Koja Pahihtî Jejus nhÿrmã akupÿn wrÿ nê ã mê panê mê hipêx anê. Koja wrÿ pu mê amnhî kaxyw hkôt paja-maxpêr xwÿnhjaja amnhî wÿr omu nê pahkînh nê. Hâmri nê amnhî nhî nyw ã amnhî pumu nê kãm:

—Hêxta waa nê. Amex o amex Pahihtî. Na ka pre mê inhnê ty hãmri nê mê inhmã mê inhî nyw gô. Kot paj mê Tirtûm mê war ari inhmex kumrêx nê ixtîr tûm nê ixpa ho ixpa. Âm hãmri na ka ã mê ixto mex anê. Nà amex kumrêx o amex kumrêx Pahihtî. Anê.

À kot puj mê pahpê hkwyÿjaja amnhî tâ kãm mex o mex ã harênh anê. Ra mê ate mê ixkapêr mar nê hkôt amnhî xunhwÿr jakamã kot kaj mê ixpyrà nê ã kãm mex o mex ã harênh anê.

Pawre kot Tesarôn nhô xwÿnhjê ho Tirtûm wÿr ã harênh

¹¹⁻¹² Nê na pa htem mê ato Tirtûm wÿr rãhã ho ixpa nê kãm:

—Pa Tirtûm? E Tesarôn kãm akrajaja na pa mê ho awÿ. Na ka hte Akra Pahihtî Jejus Kris mê wa mê ho mex rax o apa. Jao amnhîm mê arê nhûm mê ra kãm amnhî to mex prãm nê. Na htem amnhî kaxyw Jejus mã hamaxpêr rãhã pê mêmoy to axpên kutã nojarêt o pa. Jakamã kwa tanhmã mê hkrã hto kê mê akôt ã amnhî nhîpêx anhÿr rãhã ho pa. Kêr ka mê kot akôt amnhî nhîpêx o pa hã mê omu nê akînh nê mê kãm mê mex ã mê harê. Nhûm mê ate tanhmã mê ho mex to hã amnhî tâ apumu hãmri nê mê amnhî pyrà nê amã amex o amex ã ajarênh rãhã ho pa. Anê.

2

Kot amnhî tomnuj tÿx kumrêx xwÿnh maati jarênh

Matêwre 24.23-25; Makre 13.14-23; Rukre 21.20-24; Wam Juãw 2.18-19; Apokarip 13.1-18

¹ Nê koja nhÿrmã mê panhõ Pahihtî Jejus Kris akupÿn wrÿ pu mê ma

kutã api nê kakrã kamã hkaxpa. Jakamã kwa Jejus kôt ixkwÿjaja. ² Koja mêhõ mê awÿr mô nê mê amã Jejus ra akupÿn wrÿk ã harênh japêr. Rÿ tanhmã mê amã Jejus hpôx xà hã arÿgro jarênh o hêx to nê mê amã:

—Kwa na ra Jejus akupÿn nojarêt. Koja tokyx akupÿn mê pahwÿr wrÿ. Semãn ja kamã rÿ ko. Apu hõ hã koja apu wrÿ rÿ ko.

Anhÿr o harê. Nê Tirtûm Karô nhÿ hã ã kot mê amã harênh anhÿr ã amnhî jarê rÿ nhãm mêhõ kot ã kãm harênh anhÿr ã harê. Rÿ pa ixte harênh nê hã kagã hã ijarê. Nom kwa kêr ka mê kapêr ma nê âm ama nê hkôt ajamaxpêr kêt nê. Rÿ ama nê tee ri amnhî kukamã ajamaxpêr kêt nê. Koja mêhõ ã mê amã Jejus tokyx wrÿk ã harênh anê nê âm amnhî krã hkôt ã harênh anhÿr o hêx. Nom Tirtûm Karô nhÿ hã rÿ pa inhÿ hã rÿ nhãm Kris kôt mê panhîõ nhÿ hã ã harênh anhÿr kêt nê. ³⁻⁴ Jakamã kêr ka mê âm mê kot harênh o hêxja ma nê hkôt ajamaxpêr kêt nê. Kormã Pahihtî Jejusja akupÿn nojarêt kêt. E kot paj ixprî hã mê amã ja jarê ka mê inhma. Nà kormã Pahihtî akupÿn nojarêt kêt ri koja mê ohtó rax kumrêx nê Tirtûm kutã amnhî xunhwÿ nê kãm hkurê ho pa. Nê amnhî tomnuj tÿx o pa. Hãmri nhûm ra kot amnhî tomnuj tÿx kumrêx xwÿnh maatija amnhî to amnhîrit. Nom na pre ra Tirtûm tanhmã kot hipêx to hkukamã hã amnhî jarê. Koja xep gaa nê ma mê kot amnhî xà htÿx kamã hamak tûm xàta wÿr kumê nhûm kamã amnhî xà htÿx kamã hamak o pa rãhã nê pa ho pa.

Tã nom kormã Pahihtija akupÿn wrÿk nê ma hwÿr mênh kêt ri koja mê piitã omu nê kêp Mêhpãm maati pixi hã harênh kaxyw mê kêp mê õ sãnti piitã hkrakrak pa. Nê mê kot mêmoy karô ho amnhî pãm ã harênh xwÿnhja nhûm piitã hkrakrak pa. Hãmri nê axtem

nē Tirtūm mā amnhī jarēnh xà hā ixkre jatur xà kamā hitom wūr axà nē kamā nhỹ nē hēx rom mē piitā mē kām kēp Tirtūm ā amnhī to hēx nē mē kām:

—E mē amnē ixpumu. Ixpē mē anhō Tirtūm na pa. Pa kot kaj mē inhmā inhmex o inhmex ā ijarē. No kēr ka mē anhō sānti ho apām o apa hkēt nē. Kwarī ho kwarī. Ām paxipix ixpē Mēapām maati nē paxipix ixpē mē anhō Tirtūm.

Anhỹr o amnhī to hēx. ⁵ Na pa pre arī mē akōt ixpa ri ā mē amā harēnh anē. Mān arī mē ate ja hā anoht̄x r̄y ko. ⁶ Nom kormā ā kot amnhī nhīpēx anhỹr xà hā arīgrota kormā kator kēt. Mēhō kormā kot kēp àmnār jakamā nhūm kormā kator kēt nē. Ra mē ate kēp àmnār xwýnhja jarēnh mar. Tā koja hpōx xà hā arīgro kato nhūm kēp àmnār xwýnhhta kām pry kaprā nhūm rī kormā mō. ⁷ Nom na hte ra hpimxur pē Tirtūm nē mē piitā mē hkurē ho pa. Mē kot Tirtūm kōt amnhī xunhwūr pymaj tanhmā nē mē ho ho pa. Nom kormā kēp àmnār xwýnhja kēp àmnār jakamā nhūm hte mē noo mā tanhmā mē ho hkēt nē. Tā koja Tirtūm nhỹrmā kēp àmnār xwýnhja mā anē nhūm kuma nē kām ure nhūm rī kormā amnhī to amnhīrit nē mē piitā mē noo mā mō nē Tirtūm nē tanhmā mē kām hēx to ho pa. ⁸⁻¹² Koja kato nē Satanasti mē wa mē piitā tanhmā mē nokupyr to ho ri mē hkōt pa. Nē hēx rom mē kām aa mē kot mēmoj pumunh kēt kw̄y ho anhỹr o ri pa. Koja wa hēx rom te Tirtūm kot amnhī nhīpēx pyrāk o ā amnhī nhīpēx anē. Hāmri nhūm mē kot Jejus kōt amnhī xunhwūr kēt xwýnhjaja ja hā wa omu nē wa hkōt hamaxpēr kurē kumrēx. Nē ām hāmri wa kapēr ā wa hkamnhīx. Kop apu ra mē kot Tirtūm kapēr mar nē hkōt amnhī xunhwūr ronhỹx ra Tirtūm amnhī tā mē omu nē mē ho hkra. Nom koja mē kām kapēr mar prām kēt

nē. Ām wa kot amnhī to hēx o wa pa xwýnhhta kōt pix mā koja mē kām amnhī nhīpēx prām.

Ja m̄yrapē koja Tirtūm tee ri ja hā mē omu hāmri nē mē nē wa kot amnhī tomnuj t̄yx xwýnhhta wa omunh kēt nhūm wa tanhmā mē kām amnhī nhīpēx to nhūm mē wa omu nē wa hkōt hamaxpēr kurē kumrēx. Hāmri nē wa gryk ā Tirtūm kaga jakamā nhūm nhỹrmā mē kot amnhī xà ht̄yx kamā hamak tūm xàja wūr mē rēnh pa.

Koja Satanasti mē kot amnhī tomnuj t̄yx kumrēx xwýnh maatita ā hēx rom tanhmā mē no kupyr to anhỹr o pa rāhā nhūm Pahihti Jejusja hirā rax kām akup̄yn mē pahwūr wr̄y. Hāmri nē kot amnhī tomnuj t̄yx kumrēx xwýnh maatita ā am̄ynē nhūm mē kām hp̄ir kurē kumrēx nhūm hapēx. Koja ā amnhī nhīpēx anē.

Tirtūm kot tanhmā mē pahto mex to hā harēnh

Rōmān 8.28-30; Wam Tesarōn 2.13, 5.23-24

¹³ Nē amnepēm kormā mēmoj kēt ri na pre Tirtūm amnhīm mē arē. Mē ate kapēr mar nē hkōt amnhī xunhwūr nhūm kot mē ato hkra kaxyw mē arē. Kām mē ajapēē. Na pre mē awūr amnhī Karō rē nhūm mē akarō mā agjē nē tanhmā mē ajamxpēr to ka mē ŷ hā tām amnhī nhīpēx rāhā ho ri apa. Na pa htem ja hā mē amā ijamxpēr nē mē anhỹ hā ixkīnh kām Tirtūm mā mē ajarēnh o ri ixpa. ¹⁴ Na pre mē awūr mē ixrē. Mē ixte mē awūr ixpa nē mē amā tanhmā Jejus kot mē panē amnhī nhīpēx to hā harēnh o ixpa kaxyw. Mē ate mē inhmar nē Jejus kōt amnhī xunhwūr nhūm Tirtūm kot Pahihti Jejus Kris o mex pyrā nē tanhmā mē ato mex to kaxyw. ¹⁵ Jakamā kwa kēr ka mē ra mē ixte wam mē awūr kagā mēnhhta kamā harē nē mar t̄yx nē. Nē mē akōt mē ixpa ri tanhmā mē ixte mē ajahkre htoja mā ajamxpēr mex nē hā ano

htýx nê hkôt amnhĩ nhĩpêx rãhã ho ri apa. Jao Jejus kôt amnhĩ nhĩpêx mex o ri apa Kris kôt ixkwýjaja.

¹⁶ Mēpanhĩpêêxã maati mē Pahihiti Jejus Kris wa kãm mē pajapê htýx kumrêx. Na hte wa tanhmã mē pajamexpêr o hihtýx to ho pa pu mē wa ý hã tãm pajamexpêr o ri papa. Nê wa ý hã nhỹrmã wa kuri pamex nê pahfir tũm nê papa hkukamã pajamexpêr kapry ho papa hkêt nê. ¹⁷ Na pa htem mē ato wa hwýr o ixpa nê wa kãm:

—Pa Tirtũm mē Jejus wa? Kwa kër ka wa tanhmã Tesarôn kamã akrajê mã mē hamaxpêr o hihtýx to kē mē war anhỹ hã tãm amnhĩ nhĩpêx nê tãm hamaxpêr. Jao kapêr mex rãhã nê pa ho pa. Anê.

3

Tanhmã mē pahte xpên to Tirtũm wýr to hã kot mē pamã karõ Korosê 4.2-4

¹ Nê kwa Kris kôt mē ixtõ nê ixtõxjaja. Kër ka mē amnhĩ xwar mē ixtõ Tirtũm wýr rãhã ho ri apa. Mē ixte krĩ piitã hkôt mē kãm Jejus jarênh o ri mē hkôt ixpa nhũm mē kot mē inhmar nê amnhĩ kaxyw Jejus kôt hamaxpêr kaxyw. Jao mē apyrã nê hkôt amnhĩ nhĩpêx mex o pa kaxyw. ² Nom koja mē piitã ã amnhĩ nhĩpêx anhỹr kêt nê. Mē hkwyjaja kãm Jejus jarênh mar prãm kêt jakamã kwa mē ixtõ Tirtũm wý kē mē inhnê mē omunh mex nê nhũm mē Jejus ã tanhmã mē ixtõ hkêt nê.

³ Nê koja Pahihiti tanhmã mē akrã hto ka mē ajamexpêr mex nê ý hã hkôt amnhĩ xunhwýr týx o ri apa. Jakamã nhũm Satanasti mē ate amnhĩ tomnuj hprãm xäj tee ri tanhmã mē anhĩpêx to kapry nhũm Pahihiti mē anê omunh mex nê. Ra kot mē atã amnhĩ jarênh xã hkôt. ⁴ Koja ã mē anê hipêx anê ka mē ý hã tanhmã mē ixte mēmoj tã mē amã karõ xã hkôt amnhĩ nhĩpêx mex o ri apa. ⁵ Tã kē

Pahihti tanhmã mē akrã hto ka mē Tirtũm pyrã nê mē piitã mē kamã axukapri ho ri apa. Nê Pahihiti Kris pyrã nê mēmoj punuj kutã amnhĩ to htýx nê. Jao hkôt amnhĩ nhĩpêx mex rãhã ho ri apa.

Mē kãm kaga xwýnhjê jarênh

Wam Korît 4.12; Epes 4.28; Wam Tesarôn 4.9-12

⁶ E kot paj hpãnhã Kris kôt mē pahkwý kãm kaga xwýnhjê jarê ka mē inhma. Pahihiti Jejus nhỹ hã kot paj mē amã tanhmã mē harênh to. Nã koja mē akwýjaja kãm kaga nê amnhĩm mēmoj tã àpênh kêt japêr. Nê mē ixte mē axàpênh mex o apa hã mē amã karõja kuhpa hã amnhĩm mēmoj tã àpênh kêt japêr. Koja mē ã amnhĩ nhĩpêx anê ka mē ja hã mē omu hãmri nê mē hkôt ri apa hkêt nê. ⁷⁻⁸ Xã mē pajaja na pa prem ma mē awýr mō nê mē akôt inhmã kaga nê mēmoj tã ixàpênh kêt nê ri ixpa? Nã na pa prem mē apa kukwak ri ixàpkur py-maj ixàpênh rũnh nê amnhĩ pa pix kukwak ri ixàpkur o ri ixpa. Na ka prem mē inhmã mēmo mē apkur xã ho mra pa prem amarĩ amnhĩm hamýnh nê hkur kêt nê. Na pa prem hpãnhã mē amã amnhĩre nê kormã kuku. Tã kër ka mē ã amnhĩ nhĩpêx anhỹr o ri xpên kôt apa nê amnhĩ pa pix kukwak ri apku. Nê mē amã kaga hã nhãm akwýjê hpa kukwak ri axàpkur o ri apa kêt nê. ⁹ Na pa prem amnhĩ pa pix kukwak ri ixàpkur o ri mē akôt ixpa. Mē ate ja hã mē ixpumunh nê mē ixpyrã nê ã amnhĩ nhĩpêx anhỹr kaxyw. Nom mē ixte Jejus mã tanhmã mē ajahkre hto nhũm mē ate mē inhmar nê hpãnhã mē inhmã mē ixàpkur xã nhõrja Jejus mã tanhmã kute hkêt tã pa prem ã amnhĩ nhĩpêx anhỹr kêt nê. Mē ate ja hã mē ixpumunh nê mē ixpyrã nê ã amnhĩ nhĩpêx anhỹr kaxyw na pa prem amnhĩ pa pix kukwak ri

ixàpkur o ri mẽ akôt ixpa. ¹⁰ Na pa prem mẽ amã ja hã karō ho:

—Koja mẽhō kãm kaga nẽ àpênh kêt nẽ ka mẽ ja hã omu nẽ kãm ô hkêt nẽ. Kwār māmri apkur kêt nẽ kãm prãm nẽ ri pa nẽ amnhĩ pumu. Anẽ.

¹¹ Tã xep ra mẽ akwýjaja ã amnhĩ nhĩpêx anẽ nẽ kãm kaga nẽ àpênh kêt nẽ amarĩ ri pa. Nẽ xep htýx ri axpên jakwa kamã nhãm mẽ hixi ho rër o ri pa. ¹² Kwa mẽ inhma Jejus kôt ixkwýjaja. Kot paj Pahihti Jejus nhỹ hã mẽ amã mẽ kot ã amnhĩ nhĩpêx xwýnhjê jarẽ ka mẽ inhma nẽ mẽ inhmar týx nẽ. Kêr ka mẽ kãm kaga xwýnhjê mã anẽ kê mẽ jam ure nẽ hpãnhã àpênh mex o pa. Jao mẽ apyrã nẽ amnhĩ pa kukwak ri apkur o pa. Kêr ka mẽ ã mẽ kãm ixkapêr jarênh anẽ.

¹³ Nẽ kwa kêr ka mẽ axpên to mex o apata kaga hkêt nẽ.

¹⁴ E na pa mẽ ã Tirtúm nhỹ hã mẽmoj tâ mẽ amã karō nẽ hã kagã anẽ. Tã koja mẽhō kamã harẽ nẽ kuma nẽ ãm kuma nẽ hkôt amnhĩ nhĩpêx kêt ka mẽ ja hã omu nẽ hkôt ri apa hkêt nẽ. Tokyx kot ja hã amnhĩ pumunh nẽ amnhĩ tâ hpi-jaam kaxyw. ¹⁵ Nom arĩ Kris kôt kêp mẽ akwý jakamã kêr ka mẽ arĩ kêp mẽ atō rý atōx ã tãm hipêx nẽ kãm akapêr mex o ri apa. Nom te ho kêp mẽ akwý hkêt pyrãk o kãm akapêr kêt nẽ.

Tanhmã Pawre kot mẽ ho Jejus wýr to hã harênh

¹⁶⁻¹⁸ Nẽ na pa hte mẽ ato Pahihti Jejus wýr rãhã ho ixpa. Kot mẽ pamã mẽ pajamakêtkati xã nhõr jakamã na pa htem mẽ ato kuwý nẽ kãm:

—Pa Pahihti? Kwa kêr ka Tesarōn kamã akwýjê pumu nẽ mẽmoj to mẽ kutã anojarêt rãhã ho ri mẽ hkôt apa. Kê mẽ hamakêtkati nẽ àmnhix pa ho pa. Anẽ.

Tã ãm ja pix. Ixpê Pawre na pa kagã jatur xã kamã inhĩkra ho amnhĩ nhixi nhĩpêx. Na hte

kagã nhĩpêx xwýnh inhmã ixkapêr ã kagã. Nẽ hã kagã hpa pa hpãnhã hatur xã kamã pam inhixi nhĩpêx. Tã na hapêx.

Wam Ximotre Pawre kot Ximotre hwÿr kagà nê mênh

Pawre na pre kagàja nhîpêx. Kêp Jejus nhÿ hã hkrajê jahkre ho pa xwÿnhjê hô na pre. Nê Ximotre kêp Pawre ho ajuta ho hkôt pa xwÿnh na pre. Tã hpãnhã krî pê Epes kamã arîk nê Tirtûm kapêr o Jejus kôt hkwÿjê jahkre ho pa. Hãmri nhûm Pawre krî hô kamã pa nê kagàja nhîpêx nê hwÿr kumê. Nê kamã kãm mêmôj tã karô. Na pre ra Epes kamã mê hkwÿjaja Tirtûm kapêr o hêx o mê ahkre ho pa nhûm Pawre mê harênh ma nê kagàja kamã Ximotre mã tanhmã mê harênh to. Nê kot Tirtûm kapêr o Jejus kwÿjê jahkre mex xwÿnhjê xunhwÿr kaxyw kãm karô. Nê Tirtûm kãm hprãm xà hkôt pix mã mê ahkre ho pa hã kãm karô nê hwÿr kagà nê kumê. Nê kãm:

¹ Pa Ximotre? Xà amex? Ixpê Pawre na pa awÿr kagà nhîpêx nê kumê. Ixte Jejus Kris nhÿ hã mê ahkre ho ixpa kaxyw na pre Mëpapytâr xwÿnh Tirtûm mê Jejus Kris wa ixta nê ixãm. Jejus kamã na pu htem pajamak rãhã ho ri papa.

² Nà ra ate ixkapêr mar xà hkôt Jejus kôt amnhî xãm jakamã te apê ixkra pyrãk Ximotre. Jakamã na pa hte ato Mëpanhîpêxã maati Tirtûm mê panhõ Pahihti Jejus Kris wa hwÿr o ixpa nê ato wa hwÿr o:

—Pa Tirtûm mê Pahihti wa. E Ximotre ho na pa war awÿr kaxyw. Kwa kêr ka wa kamã axukaprî nê kutã war anojarêr rãhã ho wa ri apa. Kot kaj wa ã ho mex anê nhûm war anhÿ hã hamakêtkati nê àmnhîx pa ho pa.

Anhÿr o na pa hte war ato kuwÿ

Tirtûm kapêr o mê ahkre xwÿnhjê jarênh

Rômãn 16.17; Wam Ximotre 6.3; Sikûn Ximotre 2.23; Xitre 1.5-16

³ Nê na pu pre wa Epes kamã papa tã pika pê Masetôn wÿr panojarêr nê tee ri Epes kamã Tirtûm kapêr ho hêx o mê ahkre xwÿnhjê kapêr ma. Jakamã na pa pre amã:

—E Ximotre kêr ka Masetôn wÿr ixkôt amôr kêt nê. Âm jar Epes kamã arîk nê ixwakre kamã Tirtûm kapêr o mê hêx xwÿnhjê mã akapêr nê ã mê hêx anhÿrja nê mê hkurê ho ri mê hkôt apa.

Anhÿr o amã harê hãmri nê Epes kamã are nê ma Masetôn wÿr ahte mō. ⁴ Mê hêx xwÿnhjaja amnepêm panhîgêtjaja kot tanhmã amnhî nhîpêx to nê tanhmã ujarênh toja nhûm htem mê kãm harênh pix o pa. Nê mê hixi piitã harênh o pa. Na htem ã amnhî krã hkôt hkwÿjê mã ujarênh anhÿr o pa. Jao axpên kwÿm ri mê ahkre nê mê hã axpên mã àkjêr o pa. Â mê kot amnhî nhîpêx anhÿr jao Tirtûm nhÿ hã kãm hprãm xà hkôt mê ahkre hkêt nê. Kojã mēhõ Tirtûm nhÿ hã kapêr o mê ahkre hãmri nê amnhî kaxyw kãm hamaxpêr tÿx pê tanhmã mê ahkre hto. Nom ixte amã mê harênh xwÿnhjaja Tirtûm nhÿ hã mê ahkre hkêt jakamã na pa pre inhnojarêr nê ã amã mê harênh anê nê mê kuri Epes kamã are.

⁵ Tã kêr ka arî mê ahkre ho ri mê hkôt apa Ximotre. Nê Kris kôt mê pahkwÿjê mã anê kê mê amnhî kaxyw Jejus kôt hamaxpêr tÿx pê hamaxpêr mex o pa. Jao tanhmã hamaxpêr punuj to hkôt amnhî nhîpêx kêt nê. Nê mê kãm anê kê mê te kãm amnhî tã ma pyrãk o nhãm kãm mê hã ma ho pa. ⁶ Ixte amã mê hêx xwÿnh jarênh xwÿnhjaja na htem ã mê ahkre anhÿr kêt nê. Na htem htÿx ri amnhî krã hkôt tanhmã mê ahkre hto. ⁷ Tirtûm kot finat Mojes mã

měmoj tā karōja mě kot mar tỳx ā amnhī kamnhīx nē ho mě ahkre hprām tā no ām hprī hā mar kêt nē htỳx ri ho mě ahkre ho pa. ⁸ Tirtūm kot Mojes mā mẽmoj tā karōja mex. Mě kot mar nē hkôt amnhī nhīpêx o pa kaxyw na pre. ⁹ No na pre mẽ kot tām amnhī nhīpêx xwỳnhjê mā ā hā karō anhỳr kêt nē. Ām mẽ kot amnhī tomnuj xwỳnhjê mā na pre hā karō.

Mě kot mẽ õ pahi kapêr mar kêt xwỳnhjê mā.

Nē mẽ kot Tirtūm kapêr nhĩrôp kuhê ho mẽ pa xwỳnhjê mā.

Nē Tirtūm ā mẽ hpiaaam kêt xwỳnhjê mā.

Nē mẽ kot mẽ hipêexà nē mẽ katorxà hpar xwỳnhjê mā.

¹⁰ Nē mẽ hprô kuhpa hā nhām mēnijê ho amnhīkati xwỳnhjê mā.

Nē mẽ mjên kuhpa hā nhām mēmyjê ho amnhīkati xwỳnhjê mā.

Nē mẽmyjaja kot mēnijê kuhpa hā kām amnhī kwỳ myjê hkĩnh nē mẽ ho amnhīkati xwỳnhjê mā.

Nē mẽnijaja kot mẽmyjê kuhpa hā kām amnhī kwỳ nijê hkĩnh nē mẽ ho amnhīkati xwỳnhjê mā.

Nē mẽ kot mẽmoj to àhkĩnh nē nhām mẽ kām ho wēnê o mẽ pa xwỳnhjê mā.

Nē ri mẽ hêx o mẽ pa xwỳnhjê mā.

Ā mẽ kot Tirtūm kapêr kwỳm ri amnhī nhīpêx anhỳr o mẽ pa xwỳnh piitā mẽ kaxyw na pre Mojes mā mẽmojta ā karō. Mě kām Jejus prām kêt xwỳnhjê mā. Mě kot mar nē tām amnhī nhīpêx kaxyw. ¹¹ Tā pa na pa hte Pahihti kot tanhmā mẽ panê amnhī nhīpêx to hā harênh o ri mẽ hkôt ixpa. Ja kaxyw na pre Tirtūm ixām. Tirtūnja mex o mex. Tām na pre ja kaxyw ixām.

*Tanhmā Pahihti Jejus Kris kot Pawre ho mex to hā harênh
Atre 26.9-18*

¹² Nē Pahihti Jejus Kris na hte ixto mex rāhā ho pa. Na hte tanhmā ixto pa ý hā mẽ piitā mẽ kām tanhmā kot mẽ panê amnhī nhīpêx to hā harênh o ri mẽ hkôt ixpa. Na pre ixte ā amnhī nhīpêx anhỳrja kukamā inhmā ixàpênh ā karō nē inhmā:

—E ate amnhī kaxyw ixkôt ajamaxpêr mex jakamā kêr ka ma mẽ piitā mẽ hkôt ri mẽ kām ixkapêr jarênh o ri apa. Anê.

¹³ Nom amnepêm na pa pre hkôt ijamaxpêr kêt nē. Ām axtem nē haprý rűnh nē ho ixkapêr punuj o ri ixpa. Nē hkwyjê ho ixkrihkrit nē mẽ haprý nē mẽ htak. Nom kormā amnhī kaxyw Kris kôt ijaxmaxpêr kêt jakamā ixtỳx ā mẽ hipêx anhỳr o ixpa nhũm Pahihti ja hā ixpumu nē ixkamā ukapri nē mẽ hā tanhmā ixto hkêt nē. ¹⁴ Nē kām ijapê xaj mẽmoj to ixkutā nojarêt rāhā ho pa nē tanhmā ixkrā hto pa ra amnhī kaxyw hkôt ijaxmaxpêr nē hkôt amnhī xām. Hāmri nē kukwak ri ra inhmā hkwyjê hkĩnh nē hpānhā mẽ ho mex o ri mẽ hkôt ixpa.

¹⁵ Nē Jejus Kris ra wrỳk nē mẽ pahte amnhī tomnuj piitā hpānhā amnhĩrer kaxyw mẽ panê htyk ā harênhja na pa hte harênh o ri ixpa. Ā kot amnhī nhīpêx anhỳrja na mex o mex. Kê mẽ piitā kuma nē hā nohtỳx rāhā ho pa.

Kormā ixte hkôt amnhī xām kêt ri na pa pre amnhī tomnuj tỳx kumrêx o mẽ piitā mẽ hakrenh ¹⁶ nhũm Tirtūm ixpumu nē ixkamā ukapri nē. Hāmri nē amnhī kaxyw ixām. Mě piitā mẽ kot ja hā ixpumunh nē axpên mā ā ijarênh anhỳr kaxyw. Nē ijarênh o:

—Kwa Pawre na pre amnhī tomnuj tỳx kumrêx o pa nhũm Jejus Kris ja hā omu nē kamā gryk tokyx anhỳr kêt nē. Na pre tanhmā hkrā hto nhũm ra tām amnhī nhīpêx o pa. Kwa pu mẽ urāk nē amnhī kaxyw Jejus kôt pajamaxpêr nē

hkôt amnhî xunhwÿ. Kêr pu mē Pawre pyrā nē nhÿrmā Tirtūm mē Kraja wa kuri pamex nē pahŧir tūm nē papa ho papa.

Anhÿr o axpēn mā ijarēnh nē ix-pyrā nē Jejus kôt amnhî xunhwÿr kaxyw na pre Tirtūm ā ixto mex anē. ¹⁷ Jakamā na pa hte kām amnhî jarēnh kaxyw nē kām:

—Pa Tirtūm? Nā kapxipix apē Pahi Maati. Nē arāhā ho arāhā nē amex o amex. Mē ixte inhno ho aa apumunh kêt tā kapxipix apē Mēinhîpēxā maati. Tā koja nhÿrmā mē piitā ā amā amex o amex ā ajarēnh anhÿr o pa. Anē.

Ximotre kot tanhmā Epes nhō xwÿnhjē jahkre hto hā kām karō

Wam Korīt 5.1-5

¹⁸ Nē te apē ixkra pyrāk Ximotre. Tā kot paj mēmoj tā amā karō ka inhma nē inhmar tÿx nē. Nā Pahihti Jejus mā ate tanhmā amnhî nhîpēx to ho apa kaxyw na pa prem axām nhūm Tirtūm nhÿ hā kapēr o mē pa xwÿnhjaja axāpēnh kukamā amā kapēr nē amā:

—E ate ma mē kām Pahihti Jejus jarēnh o apa kaxyw Tirtūm kot axām jakamā kêr ka ā amnhî nhîpēx anhÿr o ri mē hkôt apa. Anē.

Tā kot paj ijaxwÿja kagāja kamā amā ixkapēr nē mēmoj tā amā karō. Ka mar tÿx nē hkôt amnhî nhîpēx mex pē Tirtūm mā amnhî nhîpēx mex o ri apa. Jao aprī hā mē kām tanhmā Jejus jarēnh to ho ri mē hkôt apa. ¹⁹ Nē amnhî kaxyw Jejus mā ajamaxpēr mex nē. Nē mēmoj punuj pumu nē amā ho anhÿr prām tā Jejus nhÿ hā nē amnhî to htÿx nē ho anhÿr kêt nē. Jao tām amnhî nhîpēx ā amnhî pumunh mex o ri apa. Nom kot kaj ja nē amnhî to htÿx kêt nē tanhmā amnhî tomnuj to hāmri nē te ate Pahihti Jejus kaga pyrāk. Na pre pahkwÿjaja ā amnhî nhîpēx anhÿr o hkaga nē axte kām hamaxpēr kêt nē. ²⁰ Imēnew mē Aresānja na pre wa ā amnhî nhîpēx

anē nē tanhmā Tirtūm o kapēr punuj to. Mÿrapē na pa pre Sa-tanasti nhîhkram wa haxā. Kot tanhmā wa ho nhūm wa kot tee ri amnhî tomnujta ā amnhî pumunh nē tokyx tām amnhî nhîpēx nē axte ā amnhî nhîpēx anhÿr kêt kaxyw.

2

Tanhmā mē pahte Tirtūm mā amnhî jarēnh to hā mē pamā karō

Rukre 11.2-4; Atre 10.34-35; Epes 6.18

¹ E kot paj hpānhā tanhmā mē pahte Tirtūm mā amnhî jarēnh to hā amā karō Ximotre. Ka inhma nē ixō ri ho mē pahkwÿjē jahkre ho ri mē hkôt apa. E ja kumrēx kot paj mē kaxyw amā hā karō. Kêr ka mē piitā mē ho Tirtūm wÿr ho ri pa. Nē kām mē harē nē mē kaxyw mēmoj tā axāhwÿr o ri apa. Kêr kê ama nē tanhmā mē ho mex to. Kê mē amnhî tā omu nē ā kām kapēr anē nē kām:

—Pa Tirtūm? Nā ām hāmri na ka ā mē ixto mex anē. Amex o amex. Anē.

² Nē mē kām anē kê mē ō pahi nē mē ho amnhîptār xwÿnh piitā mē ho ahwÿr o pa ho:

—Pa Tirtūm? Kwa kêr ka mē inhō pahi mē mē kot mē ixto amnhîptār xwÿnh piitā tanhmā mē ho kê mē ixto mex o pa. Kêr pa mē ija-makêtkati nē ixāmnhîx ixpa pē amā tanhmā amnhî nhîpēx to ho ri ixpa. Nē ixāmnhîx mē hkôt tām amnhî nhîpēx. Anē.

³ Kot puj mē ā mē ho mē pa-pytār xwÿnh Tirtūmja wÿr o papa anē nhūm mē pama nhūm ja kām mex nē.

E kêr ka ā mē kām ja hā karō anē Ximotre.

Tirtūm kām mēmoj prām ā harēnh Sikūn Pētre 3.9

⁴ Nē mē piitā mē kot kapēr mar nē amnhî kaxyw Jejus kôt hamaxpēr nē hkôt amnhî xunhwÿrja na Tirtūm kām hprām.

⁵ Ja kaxyw na pre mē pahwyr Kra Jeus mē nhūm man mē pahwyr wr̄y. Tirtūmja tapxipix na kēp Mēpahpām. Nē Kra Jeusja tapxipix na kot Tirtūm mā tām mē paxunhwyr mā xw̄ynh. Ja kaxyw na pre amnhī grōnh kōt wr̄y mē pahpyrā nē ī ho ī nē kato.

⁶ Hāmri nē gaa nē aptār hāmri nē mē pahpiitā mē panē ty. Jao Tirtūm mā mē pahte amnhī tomnuj piitā hpānhā amnhīrer pa. Tā mē pahpiitā mē pahte kot ā amnhī nhīpēx anh̄yr ā harēnh mar nē tokyx hkōt amnhī xunhwyrja na Tirtūm kām hprām.

⁷ Ja kaxyw na pre ixām. Ixte Ijaew kēt xw̄ynh̄jē mā Tirtūm kapēr jarēnh o ri mē hkōt ixpa kaxyw. Nē Jeus nh̄y hā tanhmā mē kām ixkapēr to ho ri ixpa kaxyw. Nē tanhmā kot mē panē amnhī nhīpēx to hā harēnh kaxyw. Ām hāmri na pa ā amnhī jarēnh anē. Ixēx kēt. Na pa hte Ijaew kēt xw̄ynh̄jē hkōt ixpa nē ā mē kām ixkapēr anē nē mē kām:

—E mē ate Tirtūm Kra Jeus kōt amnhī xunhwyrja na Tirtūm kām hprām. Jakamā kwa mē tokyx amnhī kaxyw hkōt ajamaxpēr nē hkōt amnhī xunhw̄y. Anē.

Ikrēsti kamā tanhmā mē pahte amnhī nhīpēx to hā mē pamā karō

⁸ Nē kot kaj mē tōhā Tirtūm kapēr mar kaxyw axpēn w̄yr akuprō. Hāmri nē Tirtūm mā amnhī jarē nom kēr ka mē mēmoj tā axpēn kamā agryk kamā kām amnhī jarēnh kēt nē. R̄y mēmoj tā axpēn mā axāk̄jēr kamā kām amnhī jarēnh kēt nē. Ām tām mē ajamaxpēr pix o kām amnhī jarē. Nē tām amnhī nhīpēx kamā kām amnhī jarē. Ja na inh̄mā hprām. Tā kēr ka ā Epes nhō xw̄ynh̄jē mā ja hā akarō anē Ximotre.

Mēnijaja kot tanhmā amnhī nhīpēx to kaxyw mē hā kām karō
Wam Korīt 14.34; Epes 5.22;
Xitre 2.3; Wam Pētre 3.1-7

⁹ Nē kot paj hpānhā Kris kōt mē pahtōxjaja tanhmā kot amnhī nhīpēx to hā mē kaxyw amā karō ka inh̄ma. Nā mēmyjaja kot mē omunh nē kām mē hkīnh prām xāj kē mē ht̄yx ri mē noo mā tanhmā amnhī nhīpēx to hkēt nē. Nē ja prām xāj tanhmā ē jagiēnh to hkēt nē r̄y tanhmā ri mrar to hkēt nē. R̄y mē kām mē hkīnh prām xāj ōkrexē mex jagiēnh r̄y mē īhkra kamā kax mex jagiēnh nē ri hā mē hkōt pa kēt nē. R̄y ja kaxyw tanhmā ri amnhī kījaxw̄yr to nē ri hā mē hkōt pa kēt nē. R̄y mē ē mex jagiē nē mē noo mā ht̄yx ri hpijaam kēt o pa hkēt nē. Kē mēmyjaja kām mē hkīnh prām xāj ā ht̄yx ri amnhī nhīpēx anh̄yr o pa hkēt nē. ¹⁰ Mē kām anē kē mē kām Tirtūm mān kīnh xāj mē piitā mē kutā mēmoj to nojarēt o pa.

¹¹ Nē mē kām anē kē mē Tirtūm kapēr mar kaxyw mē pikuprōnh xā hw̄yr agiē nē akryk Tirtūm kapēr mar o hkrī nē ht̄yx ri axpēn mā kapēr o hkrī kēt nē.

¹² Nē kē mē ikrēsti kamā Tirtūm kapēr o mēmyjē jahkre hkēt nē. R̄y kamā mēmoj tā tanhmā mē kām karō hto hkēt nē. Ām akryk Tirtūm kapēr mar o hkrī. ¹³ Mēmo m̄yrapē koja mē ā amnhī nhīpēx anē? Nā na pre Tirtūm my kot wa finat Atāwja kumrēx nhīpēx nē kormā hprō Ewa o hapu nē hipēx. ¹⁴ Nē Atāwja na pre kagā kapēr mar nē hkōt amnhī nhīpēx kēt nē. Prō na pre mar xā hkōt Tirtūm kapēr nhīrōp xa nē tanhmā amnhī tomnuj to. ¹⁵ M̄yrapē na htem mēnijaja hpija-gri ho hikw̄y nhūm mē hkrajaja ā ht̄yx kām hapōj. Tā nom koja mē Jeus kōt amnhī xunhw̄y nē ā ixte mē kaxyw amā mēmoj tā karō xā hkōt amnhī nhīpēx hāmri nē nh̄yrmā mex kumrēx nē ht̄ir tūm nē

pa ho pa. E kêr ka ã mēnijê mã mēmoj tâ karô anê Ximotre.

3

Pastô kot tanhmã amnhĩ nhĩpêx to kaxyw mē hã kãm karô

Xitre 1.5-9

¹ E kot paj hpãnhã tanhmã pastô jarēnh to. Koja mēhō kãm kêp Kris kwýjê nhō pastô nê Tirtũm kapēr o mē ahkre hprãm nê ãm hãmri ã hamaxpēr anê. Ja mex. ² Jakamã koja mēhō kãm kêp pastô hprãm hãmri nê ã amnhĩ nhĩpêx anhỹr o apa.

Koja mē piitã mē noo mã tãm ri amnhĩ nhĩpêx.

Nê hprō pix tânopxar o pa.

Nê mēmoj punuj kutã amnhĩ to htýx nê.

Nê tãm hamaxpēr.

Nê àmnhĩx amnhĩ wýr mē piitã mē kuwý.

Nê Tirtũm kapēr o mē ahkre mex nê.

³ No kê mē kagôxyhti japrôr nê ho pipãnh o pa hkêt nê.

Nê àhkurê ho pa hkêt nê.

Nê mē piitã mē kamã ukaprĩ ho ri mē hkôt pa. Jao mē kutã nojarêt rãhã ho pa.

Nê amnhĩm kãxpore rax o pikuprõnh prãm xaj tanhmã amnhĩ nhĩpêx to hkêt nê.

⁴⁻⁵ Nê hkrajê jahkre mex o pa nhũm mē kapēr ma nê hkôt amnhĩ nhĩpêx. Nê hã hpijaãm kãm tãm amnhĩ nhĩpêx.

Koja mē hkrajê jahkre mex kêt nê hãmri nê mãânēn Kris kwýjê jahkre mex kêt nê. Jakamã nhũm hkrajê mē Kris kwýjaja tãm amnhĩ nhĩpêx kêt nê.

⁶⁻⁷ Nê kê mē kot Jejus kôt amnhĩ xunhwýr kêt xwýnhjê noo mã tãm amnhĩ nhĩpêx rãhã ho pa.

Mê kot ja hã mē omunh nê mē hã hpijaãm o pa kaxyw. Nom koja mē tanhmã amnhĩ tomnuj to nhũm mē tee ri ja

hã mē omu nê mē ho kapēr punuj nê. Satanasti kãm hprãm xã hkôt.

Nê kê mē kot Kris kôt amnhĩ xunhwýr nyw xwýnhjaja kêp pastô hkêt nê.

Koja mē kêp pastô hãmri nê mēmo arĩgro hã tanhmã hamaxpēr to nê amnhĩ to rax prãm xaj tanhmã amnhĩ to jarkrar to ho pa. Hãmri nhũm Tirtũm tee ri ja hã omu nê te kot Satanasti nhĩpêx pyrãk o hipêx nê tanhmã homnuj to. Ja pymaj kê mē kot Kris kôt amnhĩ xunhwýr nyw xwýnhjaja kêp pastô hkêt nê.

E pastô na hte ã amnhĩ nhĩpêx anhỹr o pa kamã Jejus kwýjê jahkre nê tanhmã mē ho ajuta hto ho mē hkôt pa Ximotre.

Mê kot Kris kôt hkwyjê ho ajuta xwýnhjê kaxyw mē hã kãm karô

Atre 6.1

⁸ Nê kot paj hpãnhã amã mē kot Kris kôt hkwyjê ho ajuta xwýnhjê jarē ka inhma Ximotre. Nã koja mēhō kãm Kris kôt hkwyjê ho ajuta hprãm hã koja ã amnhĩ nhĩpêx anhỹr o pa.

Koja mē htýx ri mēmoj tâ mē kãm hpēr o pikēnh o pa hkêt nê.

Nê tanhmã mēmoj to hêx to ho pa hkêt nê.

Nê kagôxyhti japrôr nê ho pipãnh o pa hkêt nê.

Nê amnhĩm kãxpore ho pikuprõnh nê ho rax prãm xaj tanhmã amnhĩ nhĩpêx to hkêt nê.

⁹ Nê kê Tirtũm kapēr piitã hkôt hamaxpēr o pa. Ra Tirtũm kot mē pamã kapēr piitã ho amnhĩrĩt jakamã koja Kris kôt hkwyjê ho ajuta xwýnhjaja kapēr piitã hkôt hamaxpēr pē hkôt amnhĩ nhĩpêx mex rãhã ho pa.

¹⁰⁻¹³ Nê kê mē amnhĩ prō pix tânopxar o pa.

Nē pastô pyrà nē mē hkrajê jahkre mex nhùm mē hkôt ri amnhî nhîpêx mex o pa.

Nē kê mē hprôjaja mjên pyrà nē mē piitâ mē noo mǎ tǎm ri amnhî nhîpêx.

Nē hkwýjê ho kapêr rý mē axpên jakwa kamǎ ri axpên mǎ mē hixi ho rêr o pa hkêt nê.

Nē mjên pyrà nē mēmoj punuj kutâ amnhî to htýx o ri pa. Nē amnhî to mex rǎhǎ nê.

E koja mēhō kām Kris kwýjê ho ajuta ho pa hprām hǎ koja ã amnhî nhîpêx anhýr o pa. Nom kêr ka mē kot mē ho ajuta kaxyw mē unhwýr tokyx anhýr kêt nê Ximotre. Taxy mē kamǎ ama nê aprî hǎ mē kot ri tanhmǎ amnhî nhîpêx to hǎ mē omu mǎn. Hāmri nhùm mē piitâ mē mex ã mē harê ka mē hǎ mē ama nê rî kormǎ mē kot mē ho ajuta ho pa kaxyw mē unhwý. Hāmri nhùm mē amnhî tǎ omu nê axpên mǎ mex ã harê. Nē amnhî kaxyw Jejus Kris mǎ hamaxpêr mex o pa hǎ mē omu nê mē hǎ hpijaàm o pa.

Pawre kot Ximotre mǎ amnhî jarênh

¹⁴ Nē inhmǎ awýr inhmör nê apumunh prām Ximotre. Nom kot pa amnhî kukamǎ ã mēmoj tǎ amǎ karō nê hǎ kagà anê. ¹⁵ Kêr pa tokyx awýr inhmör kêt japêr ka ixte amǎ mēmoj ã kagàta kamǎ harê nê ixkutêp ho mē ahkre ho ri apa. Mē kot mar nê hprî hǎ mē õ pastô nê mē kot mē ho ajuta ho mē pa xwýnhjaja kot tanhmǎ amnhî nhîpêx to hǎ mē harênh mar kaxyw.

Mē pahpê Kris kwýjaja mē pahpê Tirtüm kra jakamǎ na pu htem kapêr kôt ri amnhî nhîpêx nê pakatàt kôt mē piitâ mē kām pakapêr o papa. Jao tanhmǎ mē kām Jejus Kris jarênh to ho ri papa.

Pawre kot Jejus mex o mex ã mē grer jarênh

¹⁶ Nē Jejusja mex o mex. Amnepêm kormǎ mē pahte harênh mar kêt tǎ pu prem harênh ma hāmri nê mex o mex ã pagrer o papa. Nē pagrer o:

Kris kêp Mēpahpām tǎ na pre mē pahwýr wrý nê mē pahpyrà nê ï ho ï nê kato.

Nhùm pre Tirtüm Karôja mex o mex ã harê.

Nhùm Tirtüm kapêr o mē wrýk xwýnhjaja omunh o pa.

Nhùm ahpýnhǎ pika piitâ hwýr tanhmǎ kot mē panê amnhî nhîpêx to hǎ harênhja angrà.

Nhùm hte mē hkwýjaja harênh ma nê amnhî kaxyw hkôt hamaxpêr nê hkôt amnhî xunhwý.

Tǎ nhùm pika kamǎ ãpênh jatur xàm kumê nhùm Tirtüm akupým amnhî wýr ho api.

Na pu htem ã Jejus mex o mex ã pagrer anê.

4

Mê kot Tirtüm kapêr kwým ri tanhmǎ Kris kwýjê jahkre hto xwýnhjê jarênh

Matêwre 24.4-13; Korosê 2.16-19; Sikün Ximotre 3.1-9; Sikün Pêtre 2.1-3; Jutre 3-16

¹ Nê nhýrmǎ Jejus akupýn mē pahwýr wrýk kaxyw koja pika nhō xwýnh kwýjaja ma hkwýjê mǎ tanhmǎ Tirtüm kapêr o hêx to ho pa. Na pre Tirtüm Karō hprî hǎ mē hkukamǎ tanhmǎ mē harênh to. Kojaxep Satanasti hkwýjaja Jejus kwýjê hwýr mra nê hêx rom tanhmǎ mē kām kapêr to. Satanasti nhý hǎ mē kām hêx o pa nhùm mē hkwýjaja mē kuma nê mē hkôt hamaxpêr nê Jejus kaga. ã koja mē Jejus akupýn mē pahwýr wrýk kukamǎ amnhî nhîpêx anê.

² Nê Satanasti nhý hǎ mē kām mēmoj to hêx xwýnhjaja ãm Satanasti pix mar o pa jakamǎ koja mē hamaxpêr mex kêt nê. Kojax mē

měmoj punuj pumu nê htÿx mex ã hkamnhÿx. ³ Tã koja mẽ Tirtũm kapêr kwÿm ri ã Jejus kwÿjê mã hêx ho pa anê nê mẽ kãm:

—Kwa kêr ka mẽ axpên mã ri mẽ rer o apa hkêt nê. Tirtũm kãm ja prãm kêt. ãmhte ri mẽ papaja na kãm hprãm. Anê.

Nê mẽ kot mẽmoj mex kur ã mẽ omu nê nê mẽ kãm kapêr nê mẽ kãm:

—Kwa na htem ata hkur kêt nê. Tirtũm pè omnuj kênã kot ka kêt ri aku.

Anhÿr o koja mẽ kãm kapêr o pa. ⁴ Nom Tirtũm na pre mẽ pamã mẽ apkur xà piitã ho kato. Mẽ paxàmnhÿx mẽ pahte piitã hkur o papa kaxyw. Jakamã mẽ pahpê hkrajaja na pu htem mẽmoj kaga hkêt nê. Na pu htem mẽmoj kur kaxyw nê Tirtũm mã harê hãmri nê paxàmnhÿx kuku. ⁵ Tirtũm kot mẽ paxàpkur xà piitã mex ã harênh jakamã na pu htem kãm harênh pè paxàmnhÿx piitã hkur o papa.

Pawre kot mẽmoj tã Ximotre mã karõ

Sikũn Ximotre 1.6-14; Xitre 2.1-8

⁶ E Ximotre. Ixte mẽmoj tã amã karõta kêr ka ho Kris kôt pahkwÿjê jahkre mex o ri mẽ hkôt apa. Kot kaj ã mẽ ahkre anhÿr jao ra Jejus Kris mã axapênh mex nê. Na ka pre harênh ma nê hkôt amnhÿ xãm hãmri nê hkôt amnhÿ nhÿpêx mex nê. Tã kêr ka arÿ hkôt amnhÿ nhÿpêx mex rãhã kê mẽ piitã ja hã apumu.

⁷ Nê mẽ ujarênhja kot paj tanhmã amã hã karõ hto. Mẽ panhÿgêt xujarênh kamã mo Tirtũm jarênh? Amrakati kumrêx. Jakamã kêr ka mẽ hkôt ajamaxpêr o ri apa hkêt nê. ãm Tirtũm kapêr kôt pix mã ajamaxpêr tÿx rãhã ho ri apa. Tirtũm kapêrja ãm hãmri na.

⁸ Nê na htem amnhÿ karo hprãm xàj tanhmã amnhÿ karo hto ho pa. Ja mex. Tanhmã kute hkêt. Na htem tanhmã amnhÿ karo hto nê gaa nê ra hkarore nê pa. No kêt

mẽ kot Tirtũm kapêr kôt ri amnhÿ nhÿpêx o paja na mex o mẽ hkarota jakre. Na htem Tirtũm kapêr kôt ri amnhÿ nhÿpêx hãmri nê mex nê hkÿnh nê pa ho pa. Hãmri nê nhÿrmã kaxkwa kamã Tirtũm mẽ Kra Jejus wa kuri mex nê htÿr tũm nê pa ho pa. Ja na mex o mex. ⁹ ãm hãmri ixte amã ja jarênh jakamã kwa kêr ka ja hã anohtÿx nê ri ho apa Ximotre.

¹⁰ Nê Tirtũmja rãhã ho rãhã. Tã na pu pre amnhÿ kaxyw Kra Jejus kôt pajamaxpêr nê hkôt amnhÿ xãm nhũm Tirtũm pahto hkra. Kãm mẽ piitã mẽ ho hkra hprãm jakamã na htem pahpyrà nê amnhÿ kaxyw Kra hkôt hamaxpêr nê hkôt amnhÿ xunhwÿ nhũm amnhÿ tã mẽ omunh xà hkôt mẽ ho hkra. Ja kaxyw na pu htem mẽ piitã mẽ kãm Jejus kot tanhmã mẽ panê amnhÿ nhÿpêx to hã harênh rãhã o ri mẽ hkôt papa. Jao Tirtũm mã paxapênh mex nê.

¹¹ E kêr ka ã ja ho pahkwÿjê jahkre anhÿr ho ri mẽ hkôt apa. Mẽ kot amar nê akapêr kôt amnhÿ nhÿpêx mex ho pa kaxyw.

¹² Nê kormã anyw tã kêr ka mẽ piitã mẽ noo mã tãm ri akapêr nê tãm amnhÿ nhÿpêx o apa. Mẽ kot Jejus ã tanhmã ato htã arÿ amnhÿ kaxyw kãm ajamaxpêr tÿx nê. Nê mẽ piitã mẽ kutã anojarêt nê ajamaxpêr mex pix o ri apa. Kot kaj kormã anyw tã ã mẽ noo mã amnhÿ nhÿpêx anê nhũm mẽ hã apumu nê kãm akapêr mar prãm nê. Anyw ã apumunh tã kãm akapêr mar prãm nê.

¹³ Nê kêr ka mẽ ate Tirtũm kapêr mar kaxyw axpên wÿr akuprõ ka arÿ ixkutêp mẽ kãm Tirtũm kapêr tũm ã kagã kamã akapêr rãhã ho apa. Nê aprÿ hã tanhmã ho mẽ ahkre hto nê ho mẽ ahkre mex nê Ximotre.

¹⁴⁻¹⁵ E kêr ka ã amnhÿ nhÿpêx anhÿr o ri mẽ hkôt apa nê amã ho anhÿr kaga hkêt nê. Mẽ piitã

mě kot ate Jejus mā amnhĩ nhĩpêx mex o amõr ã apumunh kaxyw. Kormã ate mẽ kãm Jejus jarênh o apa hkêt ri na pre pastõ nhỹ há mẽ kapêr xwýnhjaja ate Jejus mã tanhmã amnhĩ nhĩpêx to ho apa kaxyw axãm. Hãmri nê anhĩmõk ã mẽ ìhkra jaxwýnê axápênh kukamã tanhmã ajarênh to nê ato Tĩrtũm wý. Hãmri nhũm ate mẽ kãm kapêr jarênh o ri apa kaxyw amã ajamaxpêr o hihtýx. Tã kêr ka ý há ã kãm amnhĩ nhĩpêx anhýr rãhã ho ri apa.

¹⁶ Nê kwa kêr ka amnhĩ pumunh mex nê Ximotre. Jao tãm ri amnhĩ nhĩpêx nê akatàt kôt Tĩrtũm kapêr o mẽ ahkre ho ri mẽ hkôt apa. Kot kaj ã amnhĩ nhĩpêx anê hãmri nhũm mẽ ama nê apyrã nê Jejus kôt amnhĩ xunhwý. Hãmri nê pahpyrà nê nhýrmã Tĩrtũm wa kuri htĩr tũm nê pa ho pa.

5

Tanhmã mẽ pahte Kris kôt mẽ pahkwýjê nhĩpêx to kaxyw mẽ pamã karõ

Sikũn Ximotre 2.24-25

¹⁻² E kot paj hpãnhã Kris kôt pahkwýjê hõ kot tanhmã amnhĩ tomnuj to nhũm ate tanhmã ja nê kãm akapêr to há amã karõ.

Nã koja mēhõ tanhmã ri amnhĩ tomnuj to ka harênh ma hãmri nê ma hwýr tē nê ja nê tanhmã kãm akapêr to. Nom kêr ka kãm akapêr mã agêt kêt nê.

Koja mẽwejjê õ tanhmã amnhĩ tomnuj to ka te kêp anhĩpêxã rý akatorxã pyrãk o kãm akapêr. Jao há apijaãm o tanhmã kãm akapêr to.

Rý koja apyrã nê mẽ nywjê hõ tanhmã amnhĩ tomnuj to ka te kêp atõ pyrãk o kãm akapêr.

Rý mẽnijê nyw õ amnhĩ tomnuj japêr ka te kêp atõx pyrãk

o kãm akapêr. Jao há apijaãm o kot amnhĩ tomnujja nê tanhmã kãm akapêr to.

E kêr ka mẽ kot amnhĩ tomnuj nê ã mẽ pahkwýjê mã akapêr anhýr o apa Ximotre.

Mẽ kêp mẽ mjên htyk xwýnhjê jarênh

Xiakre 1.27

³ Nê kot paj hpãnhã Kris kôt pahkwýjê mẽ mjên htyk xwýnhjê jarê. Nã koja mēhõ nija hkra hkêt nê htãmnhwý hkêt nê pa nhũm mjên kêp ty ka mẽ apê Kris kôt hkwyjaja ja há omu nê mẽmoj to kutã anojarêt rãhã ho ri apa. ⁴ Nom koja ra hkra rý ra htãmnhwý japêr kê mẽ tãmjaja tanhmã ho ajuta hto ho pa. Kãm õ nê kãm mẽmoj nhõr o pa. Kormã mẽhprĩre ri na pre mẽ õ wõwõ nê mẽ katorxã nê mẽ hipêxã mẽ hamãr mex pẽ mẽ kãm õ ho pa. Tã ra mẽ àptãr jakamã kê mẽ amnhĩ pyrã nê mẽ hamãr mex pẽ mẽmoj to mẽ kutã nojarêt rãhã ho pa. Ja na Tĩrtũm kãm hprãm. ã mẽ kot hkwyjê kamã ukapri ho pa jakamã te mẽ kot Tĩrtũm mã àpênh pyrãk.

⁵ No koja mēhõ ni ra wejre nê ahte ri pa. Nê hkra nê htãmnhwý hkêt nê ri pa. Tã kê ja há amnhĩ pumu nê Tĩrtũm kamnãr rom amnhĩ to hwýr o pa. Nê mẽ piitã mẽ ho hwýr o pa. Jao tãm hamaxpêr. Ka mẽ apê Kris kôt hkwyjaja ja há omu hãmri nê mẽ kam nê tanhmã kutã anojarêt to ho ri apa. ⁶ No koja mẽ ã amnhĩ nhĩpêx anhýr kêt nê. Nê htýx ri mẽ grer wýr mra nê hpijaãm kêt o ri mra ka mẽ ja há mẽ omu nê mẽ ho ajuta hkêt nê. Na htem ã amnhĩ nhĩpêx anhýr o pa nê arĩ htĩr tã te ra htyk nê hikwý pyrãk.

⁷ E kêr ka ã ja há Kris kôt pahkwýjê mã karõ anê. Kê mẽ ama nê ã mẽ mjên htyk xwýnhjê nhĩpêx anhýr o pa. ⁸ Nom koja mēhõ amnhĩ kwýjê ho mex kêt japêr.

Ně ōrkwý kamā hprō ně hkrajaja ně hipéêxā ně katorxā nhūm mẽ kām mẽ apkur xā nhōr kêt japêr. Koja mẽ ā amnhī nhīpêx anhýr jao Jejus kaga ně te mẽ kot hkôt amnhī xunhwýr kêt xwýnhjaja kot amnhī nhīpêx pyrāk o amnhī nhīpêx nom amnhī tomnuj tỳx o mẽ hakre.

⁹ Ně mẽ mjên htyk ně mẽ hkra ně mẽ htāmnhwý hkêt xwýnhjaja kêt ka mẽ tanhmā mẽ ho ajuta hto kaxyw hāmri ně mẽ hixi piitā hā kagā. Nom kwa kêt ka aprī hā tanhmā mẽ amnhī nhīpêx to hā mẽ omu ně rī kormā mẽ hixi hā kagā.

Koja mēhō kormā mjên htīr ri tām hipêx ně nhām mẽmyjê ho amnhīkati hkêt ně.

Ně ra hā amgrā pē 60 rý ra hā 60 jakre.

¹⁰⁻¹¹ Ně tām mẽ piitā mẽ hipêx o pa.

Ně hkrajaja kormā htīr ri nhūm mẽ hāmār mex ně mẽ ahkre mex o pa.

Ně nhām krī hō nhō xwýnhjaja ō krī hwýr pōj nhūm mẽ omu ně amnhī nhōrkwý hwýr mẽ kuwý.

Ně mẽ kēp amrakati xwýnhjê ho mex o pa.

Koja mẽ ā amnhī nhīpêx aně ka ja hā mẽ omu ně rī kormā mẽ ho ajuta kaxyw mẽ hixi hā kagā. Nom mẽ hixi hā kagā kaxyw ně mẽmoj tām mẽ hkukja ně mẽ kām:

—E kot kaj ā amnhī nhīpêx anhýr o apa hā inhmā amnhī jarē pa ama ně rī kormā anhīxi hā kagā.

Kot kaj axte amjên kêt ně.

Ně tanhmā Kris kôt akwýjê ho mex to ho ri apa.

Nhūm mēhō mẽmo myrapê hkaprī ně pa ka ja hā omu ně tanhmā ho ajuta hto.

E kot kaj ā amnhī nhīpêx anhýr o apa hā amnhī jarē pa ama ně anhīxi hā kagā. Hāmri nhūm Kris kôt akwýjaja amā axāpkur xā nhōr o pa. Aně.

Ā mẽ kām akapêr aně nhūm mẽ ama ně amā:

—Ý. Ma kot paj ā amnhī nhīpêx aně.

Anhýr ā amnhī jarē ka mẽ ama ně mẽ hixi hā kagā. No kormā mẽ hā amgrā pē 60 kêt xwýnhjaja kêt ka kormā mẽ hixi hā kagā hkêt ně. Koja mẽ tanhmā mẽ kot amnhī nhīpêx to ho pa hā mẽ kām karōja ma ně wam tajê pyrā ně amā:

—Ý. Ma kot paj ā amnhī nhīpêx aně. Na pa Jejus Kris noo mā ā amnhī jarēnh aně.

Anhýr ā amnhī jarēnh tã gaa ně ra hkurē hapōj ně ra kot amnhī jarēnh ta kwým ri tanhmā amnhī nhīpêx to ně axte mjên. ¹² Ra amnhī jarēnh o:

—Ma kot paj ām Jejus mā pix mā tanhmā amnhī nhīpêx to ho ri ixpa ně axte inhmjên kêt ně.

Anhýr tã tanhmā hamaxpêr to ně kot amnhī jarēnh kwým ri axte mjên. Jao te Jejus mā amnhī to hêx pyrāk nhūm Tirtūm pē jamnuj. Ja pymaj kêt ka mẽ kormā mẽ hā amgrā pē 60 kêt xwýnhjê nhīxi hā kagā hkêt ně. Kormā mẽ hā amgrā pē 60 kêt xwýnhjaja arī mẽ hkīnh tỳx ¹³ jakamā kot kaj mẽ kām mẽ apkur xā nhōr o apa nhūm mẽ ja hā amnhī tã mẽ apumu ně axte amnhīm āpênh kêt ně. Ām kām kaga ně htỳx rī nhām mẽ hwýr mra ně nhām mẽ hwýr mra. Ně amnhī pumunh mex kêt ně htỳx ri axpên jakwa kamā ri mẽ hixi ho rêr o pa. Ně nhýri mẽmoj pumu rý tanhmā mẽmoj jarēnh mar to hāmri ně ma htỳx ri hkwýjê mā harēnh o mra. Koja mẽ ā amnhī nhīpêx anhýr o pa hāmri nhūm mẽ kēp Kris kwý hkêt xwýnhjaja ja hā mẽ omu ně mẽ hkôt mẽ pahpé Kris kôt pahkwýjê ho kapêr punuj ně. ¹⁴ ā mẽ kot amnhī nhīpêx anhýr o pa pymaj kêt ka kormā mẽ nyw xwýnhjê mē aně kē mẽ māmri axte mjên ně o pa. Hāmri ně hkra ně hkrajê jamār o

pa. Ja na inhmã hprãm. Koja mẽ ã amnhĩ nhĩpêx anê hãmri nhũm mẽ kêp Kris kôt pahkwý hkêt xwýnhjaja mẽ hkôt tanhmã mẽ pahto kapêr punuj to hkêt nê. ¹⁵ Mãn ka ra Kris kôt pahkwýjê nyw pê mẽ mjên htyk xwýnh kwýjaja tanhmã amnhĩ tomnuj to hã mẽ harênh ma. Na prem Jejus kaga nê Satanasti hkôt amnhĩ nhĩpêx o pa.

¹⁶ E kêr ka mẽ ã Kris kwý pê mjên htyk xwýnhjê nhĩpêx o apa anê Ximotre. Nom koja mẽ akwý kamã mēhõ nhõ wôwô mjên rý katorxã mjên kêp ty kê tãm kãm ô ho pa. Kêr kê Kris kôt pahkwýjaja ãm mẽ kêp mẽ mjên htyk xwýnh pê mẽ hkra nê mẽ htãmnhwý hkêt nê ahte ri mẽ pa xwýnh pixjaja tanhmã mẽ ho ajuta hto ho pa.

Mê pahpê Kris kôt pahkwýjê hkrãhtũm kaxyw mẽ pahtã kãm karõ

Atre 14.23; Wam Korĩt 9.7-14; Karatas 6.6; Wam Tesarõn 5.12; Wam Pêtre 5.1-4

¹⁷⁻¹⁸ Nê kot paj hpãnhã amã Kris kôt mẽ pahkrãhtũmjê jarê. Tĩrtũm kapêr ã kaga htũm kot mẽ harênh kot:

Kêr ka Tĩrtũm kapêr o mẽ ajahkre xwýnhjaja mẽ ahkre pãnhã mẽ kãm amnhĩre. Anê.

Nê mããnen mẽ harênh ã kuxi nê mẽ harênh o:

Koja akrit amã àpênh o pa ka ho mex nê kãm ô mex o apa.

Anê.

Ã ja jarênh kot anhỹr jakamã koja Kris kôt mẽ akrãhtũmja Kris mã tanhmã mẽ ato mex to ho pa ka mẽ amnhĩ tã kãm amnhĩrer mex o ri apa. Kot Tĩrtũm kapêr o mẽ ajahkre mex jakamã ka mẽ amnhĩ tã kãm amnhĩrer mex nê.

¹⁹ Nê koja mēhõ pixi nê mẽ awýr tẽ nê amã Kris kôt mẽ akrãhtũm kot tanhmã amnhĩ tomnuj to hã harênh to ka ama nê ãm ama. Nom koja wa hamêxkrut rý mẽ axkrunêpxi nê mẽ awýr mra nê axpên kôt tanhmã harênh to ka mẽ ama nê ãm hãmri mẽ kot tanhmã

kot amnhĩ tomnuj tota kôt aja-maxpêr. ²⁰ Hãmri nê Kris kwýjê piitã mẽ noo mã kot amnhĩ tomnuj xwýnhnta mã tanhmã kot amnhĩ tomnuj to nê kãm akapêr kê axte ã amnhĩ nhĩpêx anhỹr kêt nê. Mẽ piitã mẽ kot hã amar nê nhỹrmã tanhmã amnhĩ tomnuj to nhũm ate urak nê hã tanhmã mẽ kãm axakjêr to pymaj tanhmã amnhĩ tomnuj to hkêt nê.

²¹ E Tĩrtũm noo mã na pa ã amã mẽ kaxyw mẽmoj tã karõ anê Ximotre. Nê Jejus Kris mẽ Tĩrtũm kapêr o mẽ wrýk xwýnhjê noo mã pa ã amã karõ anê. Jakamã kêr ka inhmar týx nê hkôt amnhĩ nhĩpêx o ri apa. Jao mẽ piitã mẽ hipêx o axpên pyrãk. Nom kêr ka akrãmnhwý kot tanhmã amnhĩ tomnuj to hã omu nê axtem nê ãm omu nê ajamaxpêr o:

—Nà kêp ixkrãmnhwý kênã kot paj kêt ja nê tanhmã kãm ixkapêr to. Pa ho anhỹr kêt nê.

Anhỹr o ajamaxpêr kêt nê. Mẽ piitã mẽ hipêx o axpên pyrãk.

²² Nê kêr ka anojarêr kãm mẽ kot Tĩrtũm mã tanhmã amnhĩ nhĩpêx to ho mẽ pa kaxyw mẽ unhwýr kêt nê. Aprĩ hã tanhmã mẽ kot amnhĩ nhĩpêx ã hã mẽ omu nê mẽ hkapi nê rĩ kormã mẽ unhwý rý tee ri mẽmoj tã mẽ omu nê mẽ hkaga.

Nê koja mēhõ tanhmã amnhĩ tomnuj to ka ja hã omu rý harênh ma hãmri nê urak nê ã amnhĩ nhĩpêx anhỹr kêt nê. Arĩ Tĩrtũm kôt amnhĩ nhĩpêx pê tãm ri amnhĩ nhĩpêx pix o apa. ²³⁻²⁵ Na htem tōhã tanhmã amnhĩ tomnuj to nhũm mēhõ ja hã mẽ omu nê mẽ harênh kurê kumrêx. Kris kôt mẽ hkrãhtũm kormã kot tanhmã hã kãm nê hkêt ri nhũm mẽ ja hã mẽ omu nê tanhmã mẽ harênh to. Nom na htem tōhã hpimxur pê tanhmã amnhĩ tomnuj to nhũm Tĩrtũm pix ja hã mẽ omu. Tã koja nhỹrmã mẽ piitã mẽ kãm ja ho

amnhîrit nhûm mẽ piitâ harênh ma nê hkôt omu.

Nê mẽ kot amnhî to mex xwýnhjaja haxwýja. Na htem tōhã mẽ noo mã tanhmã mẽhō ho mex to nhûm hkwýjaja ja hã omu nê axpên mã mex ã mẽ harê. Nê tōhã hpimxur pê tanhmã mẽhō ho mex to nhûm mẽhō ja hã omunh kêt nê. ãm Tirtûm pix ã kot amnhî nhîpêx anhýr ã omu. Tã koja nhýrmã mẽ piitâ mẽ kãm ja ho amnhîrit nhûm mẽ piitâ harênh ma nê hkôt omu.

Nê kwa Ximotre. Axà nê anhōhymnuj nê ri apa jakamã kwa kër ka gō pix o akôm o apa hkêt nê. Mãânên wîhti hkwy ho ixkō kër ka anhōhy mex japêr.

6

Mẽ kãm mẽ àpênh xwýnhjê kaxyw mẽ hã kãm karō

Epes 6.5-9; Korosê 3.22-4.1; Xitre 2.9-10; Wam Pêtre 2.18-25

¹ E kot paj mẽ akwýjaja mẽ kãm mẽ àpênh o mẽ pa xwýnhjê kaxyw mẽmoj tâ amã karō. Mẽ kãm anê kê mẽ õ patrãw ã hpijaam o ri pa. Jao mẽ kapêr ma nê hkôt kãm àpênh mex nê. Koja mẽ ã amnhî nhîpêx anê nhûm amnhî tâ mẽ omu nê hamaxpêr o:

—Kwa pêr Tirtûm kapêr na mex kumrêx. Inhmã àpênh xwýnhja na hte hkôt amnhî nhîpêx pê amnhî to mex o pa. Pêr ãm hãmri na hte Pawre ho mẽ ahkre ho pa.

Anhýr o hamaxpêr. ² Nê koja mẽ õ patrãw ra Kris kôt amnhî xãm japêr ka kãm mẽ àpênh xwýnhjê mã anê kê Kris kôt mẽ kêp mẽ htō hã mẽ kãm àpênh mex o ri pa. Nom kê mẽ urak nê kêp Kris kôt hkwy hã mẽ omu nê hamaxpêr o:

—Nà Kris kôt ixtō kênã kot paj kêt ri kapêr kôt amnhî nhîpêx nê kãm ixàpênh mex o ri ixpa.

Anhýr o hamaxpêr kêt nê. Kê kêp Kris kôt htō hã kãm ho mex prãm xàj kãm àpênh mex o pa.

E kër ka mẽ kãm mẽ àpênh o mẽ pa xwýnhjê mã ã tanhmã mẽ àpênh to ho pa hã karō anê Ximotre.

Tirtûm kapêr kwým ri mẽ ahkre xwýnhjê jarênh

Rukre 12.13-21; Xiakre 5.1-6

³ Nê na hte Kris kwý hkêt xwýnhjê kwýjaja Kris kwýjê mã Tirtûm kapêr o hêx o pa. Nê htýx ri Jejus kapêr kwým ri tanhmã harênh to ho pa. ãm hãmri na Tirtûm mẽ Pahihti Jejus Kris wa kapêr tâ nhûm htem htýx ri tanhmã ho hêx to ho ri mẽ hkôt pa. ⁴ Mẽ kot amnhî to rûnh xwýnh ã amnhî to jarkrar tâ mẽ àhpumunh týx kêt. Na htem tanhmã Tirtûm kapêr kute hã axpên mã akir nê mẽmoj tâ axpên kãm gryk o pa. Nê axpên mã kapêr punuj nê mẽmoj tâ axpên kamnhix o pa. ⁵ Nê hamaxpêr mex kêt jakamã mẽmoj tâ axpên mã àkjêr pix o pa. Na htem ã amnhî nhîpêx anhýr o Tirtûm kapêr mar týx kêt nê. Hãmri nê htýx ri hamaxpêr nê hamaxpêr o:

—Kot paj Tirtûm kapêr o mẽ ahkre ho ixpa nhûm mẽ inhma nê inhmã amnhîrer mex nê pa ixkàxpore rax nê ri ixpa. Nà kot paj ã amnhî nhîpêx anhýr o ri ixpa. Ja inhmã mex.

Anhýrja o kãm hikàxpore rûnh prãm o amnhî to amnhîrit o pa.

Kàxpore jarênh

⁶⁻⁸ E kot paj hpãnhã amã tanhmã kàxpore jarênh to ka inhma Ximotre. Xà na pu htem pakatorxà nhōhy rûm pajapôj nê amnhî kôt kàxpore hkwy jamý nê ho pajapôj? Nà na pu htem pahkênh nê panhý kamã pajapôj. Tã kot puj mẽ ja pyrà nê nhýrmã ty nê mã ho anê nê panhý kamã ma papa. Jakamã kër pu mẽ kormã pika ja kamã pahúr nê papa ri paxàpkur xà nê mẽ paxê pix tânopxar pê pahkînh nê ri papa. Pakàxpore rûnh kêt tâ na pu htem Tirtûm kamnàr rom

pahkĩnh nê pajamakêtkati nê papa. Jao pajamaxpêr o:

—Nà ixkàxpore rax kêt nê ixkukrêx rax kêt tâ na hte Jejus ixkôt pa ho pa nê mëmoj to ixkutâ nojarêr rãhã ho pa. Jakamã ixkàxpore rax kêt tâ ixkĩnh nê ijamakêtkati nê ixàmnhĩx ixpa.

Anhÿr o pajamaxpêr o papa.

⁹⁻¹⁰ Mě kot amnhĩm kàxpore o pikuprõnh rũnh xwÿnhjaja na htem kàxpore pix kukamã hamaxpêr o pa nê gaa nê kàxpore rũnh gryk ã amnhĩ tomnuj o pa. Na pre mẽ pahkwÿjaja kàxpore rũnh prãm xàj Jejus kaga. Tã ra mẽ hikàxpore rũnh tâ hkĩnh nê hamakêtkati nê pa hkêt nê. Na htem omnuj nê hkaprĩ nê pa. ã na htem mẽ hikàxpore rũnh xwÿnh kwÿjaja amnhĩ nhĩpêx anhÿr o pa. Jao kàxpore pix kukamã hamaxpêr nê gaa nê ra gryk ã mẽ kot amnhĩ to mex xà kaga hpa nê htÿx ri tanhmã amnhĩ tomnuj to ho pa. Nê tanhmã hkwyjê nhĩpêx punuj to. Te tutre kot harõj xành ã htÿx rapuuti hwÿr gjêx nê tee ri kãm kator prãm kaprÿ pyrãk. ã mẽ kot amnhĩ nhĩpêx anhÿr o pa jakamã koja nhÿrmã Tĩrtũm ma mẽ kot amnhĩ xà htÿx kamã hamak tũm xà hwÿr mẽ kurê.

Pawre kot Ximotre mã mẽmoj tã karõ

Korosê 4.17; Wam Ximotre 4.14; Sikũn Ximotre 2.1-7

¹¹ Nê kwa Ximotre kêt ka mẽ urãk nê kàxpore rax prãm xàj amnhĩ tomnuj o apa hkêt nê. Ate Tĩrtũm mã tanhmã amnhĩ nhĩpêx to ho apa xwÿnh jakamã kêt ka kãm hprãm xà hkôt pix mã amnhĩ nhĩpêx o ri apa. Jao Tĩrtũm pyrã nê ate amnhĩ jarênh xà hkôt amnhĩ nhĩpêx o ri apa. Nê amã Kris kôt akwÿjê hkĩnh pê mẽmoj to mẽ kutã anojarêr o ri apa. Nê Kris kôt mẽ hkwyjê hkêt xwÿnhjaja kot Kris ã tanhmã ato htã ka arĩ hkôt amnhĩ nhĩpêx mex nê mẽ piitã mẽ ho mex

o ri mẽ hkôt apa. ¹² Na ka pre Kris kôt mẽ pahkwÿjê noo mã tanhmã amnhĩ jarênh to. Tĩrtũm kot amnhĩ wÿr awÿr nhũm ate Jejus kôt amnhĩ xãm nê amã kãm tanhmã amnhĩ nhĩpêx to ho apa hprãm ã amnhĩ jarê nhũm ikrêsti kamã mẽ piitã ja hã ama. Jakamã kwa kêt ka arĩ Jejus kôt amnhĩ nhĩpêx mex rãhã ho ri apa. Hãmri nê nhÿrmã Tĩrtũm mẽ Kra wa kuri amex kumrêx nê atĩr tũm nê apa ho apa.

¹³⁻¹⁴ E na pa mẽmoj tã amã karõ rax ka piitã kamã harê nê mar pa. Tã kêt ka inhmã ja hã tanhmã amnhĩ jarênh to. Mẽmoj piitã ho htĩr xwÿnh Tĩrtũm mẽ Jejus Kris wa noo mã tanhmã ja hã inhmã amnhĩ jarênh to. Jejus htyk kaxyw nê àmnhĩx kot Pahi Põn Pirat mã amnhĩ jarênh xwÿnhhta noo mã amnhĩ jarê nê inhmã amnhĩ jarênh o:

—Nà kot paj ate mẽmoj tã inhmã karõ piitã hkôt amnhĩ nhĩpêx rãhã nhũm Pahihti Jejus Kris akupÿn mẽ pahwÿr wrÿ. ãm hãmri na pa ã amã amnhĩ jarênh anê Pawre.

Anhÿr o inhmã amnhĩ jarê.

Tĩrtũm mex o mex ã mẽ grer

¹⁵ Nê koja Tĩrtũm akupÿn mẽ pahwÿr Jejus mẽnh xà hã arĩgro jarê hãmri nhũm kot harênh xàta wÿr pøj nhũm akupÿn mẽ pahwÿr kumê. Tĩrtũmja mex o mex. Tapxipix kêt mẽmoj piitã ho amnhĩptar xwÿnh maati. Nê kêt jar mẽ ho amnhĩptar xwÿnh piitã mẽ õ Pahi Maati.

¹⁶ Nê tapxipix na rãhã ho rãhã nê mex o mex jakamã puhã hirã rax kumrêx. Tã hkĩnhã mẽ pahte amnhĩ tomnuj xwÿnh jakamã kot puj mẽ puhã hirã raxja kutã hkêt nê. Jao hwÿr mẽ pamrar kêt nê.

Nê aa mẽhõ kot no ho Tĩrtũm pumunh kêt tã kwa kêt pu mẽ pahpiitã kãm mex o mex

ně hihtỳx o hihtỳx ă harēnh
rāhā ho papa.

*Axte mē hikàxpore rūnh xwỳnhjê
jarēnh*

Rukre 16.9

¹⁷ Nē kēr ka Kris kwỳjê kamā
mē hikàxpore rūnh xwỳnhjê mā
anē kē mē kot amnhī to rūnh kôt
amnhī to àmra ho pa hkêt nē. Nē
amnhī kaxyw mē hikàxpore rūnh
kôt hamaxpēr o pa hkêt nē. Kàxpore
na hte hapêx tokyx anē. Mē kām
anē kē mē hpānhā amnhī kaxyw
Tirtūm kôt mǎn hamaxpēr tỳx rāhā
ho pa. Na hte àmnhīx tanhmā mē
pahto mex to ho pa nē mē pahpê
ōxỳ hkêt nē. Jao mē pahwỳr na
rē nhūm mē pahpur go mex nē
pu mē kamā panhō rūnh o papa.
Nē mē pamā myyti ho hirā pu
mē kukwak ri parīt mex pē mēmoj
tǎ paxàpēnh o papa. ǎ Tirtūm
kot mē pahto mex kot anhỳr pu
mē kukwak ri pahkīnh nē paja-
makêtkati nē ri papa. Tǎ kēr ka
mē hikàxpore rūnh xwỳnhjê mā anē
kē mē amnhī kaxyw kumā pix mā
mǎn hamaxpēr rāhā ho pa. ¹⁸ Nē
mē kām anē kē mē hikàxpore ho
hkwỳjê pē ōxỳ hkêt nē ho tanhmā
mē ho mex to ho pa. Nē àmnhīx ho
tanhmā mē kēp amrakati xwỳnhjê
ho ajuta hto ho pa. ¹⁹ Koja mē
ă amnhī nhīpêx anē nhūm Tirtūm
ja hā mē omu nē hkīnh nē ō krī
kamā mē kutêp mē kām mēmoj mex
o akuprō. Jakamā nhūm mē ko-
rmā jar htīr nē pa ri mex nē pa
nē mǎānēn nhỳrmā kaxkwa kamā
mex kumrêx o jar pika ja kamā
mex nē pata jakre. E kēr ka ă mē
hikàxpore rūnh xwỳnhjê mā ja hā
karō anē Ximotre.

*Pawre kot Ximotre mā mēmoj tǎ
karō jatur xà*

*Korosē 4.17; Wam Ximotre 6.14;
Sikūn Ximotre 1.13, 4.5*

²⁰ Nē ra Tirtūm kot ate kapēr o mē
ahkre ho apa kaxyw axām jakamā
kēr ka tām amnhī nhīpêx pē mē

ahkre mex rāhā ho ri apa. Jao
Tirtūm kapēr o hêx o ri mē ahkre
xwỳnhjê hkôt apa hkêt nē. Na htem
mē kuma nē mē kapēr mex ă mē
hkamnhīx nom mē kapēr mex kêt.
Jakamā kwa kēr ka mē kot tanhmā
mē ahkre hto hā mē ama nē ăm mē
ama. ²¹ Na pre ra mē pahkwỳjaja
mē kuma nē mē kapēr gryk ă Jejus
kaga.

E ăm ja pix. Kê Tirtūm mē apiitǎ
mē akutǎ nojarêt rāhā ho pa. Ixpê
Pawre na pa ă amā ixkapēr ă kagǎ
anē.

Sikūn Ximotre Pawre kot Ximotre hwÿr wam kagà nē mēnh kôt hō mēnh

Pawre na pre kagàja nhîpêx. Na pre Jejus kwÿ hkêt xwÿnhjaja Jejus ã unê nē krî pê Rôm kamã haxà nhùm arî hkrî ho hkrî. Tã ra mē kot hpîr kaxyw nhùm Ximotre mã kagàja nhîpêx nē hwÿr kumê. Na pre Ximotre Pawre hkôt pa ho pa hã mytwrÿ xohtô nē. Tã hpãnhã krî pê Epes kamã arîk nē Tîrtûm kapêr o Jejus kôt hkwÿjê jahkre ho ri mē hkôt pa. Jakamã nhùm Pawre kagàja nhîpêx nē kamã kãm mēmoj tã karô nē hwÿr kumê. Nē nhÿrmã mē kot Pawre pyrã nē Jejus ã hpîr mã htã tee ri amnhî kukamã hamaxpêr kêt ã kãm karô.

Nē mē hkwÿjaja kêp Tîrtûm kra hã amnhî jarênh tã nhùm Pawre Tîrtûm kãm hprãm xà kuhpa hã mē kot tanhmã amnhî nhîpêx to ho pa hã Ximotre mã mē harê. Kot mē harênh mar nē Jejus kwÿjê nē mē omunh mex o pa kaxyw. Nē Ximotre kot Tîrtûm kãm hprãm xà kot pix mã amnhî nhîpêx o pa hã kãm karô. ã na pre Pawreja Ximotre mã mēmoj tã karô kamã hihtÿx nē hã kagà nē hwÿr mēnh anê. Nē kãm:

¹ Pa Ximotre? Xà amex? Ixpê Pawre na pa amã ixkapêr nē hã kagà nē awÿr kumê. Ixpê Jejus nhÿ hã hkwÿjê jahkre ho ixpa xwÿnh na pa. Tîrtûm na pre ja kaxyw ixãm. Tîrtûm Kra Jejus Krisja kot puj mē pahpê hkwÿjaja nhÿrmã kukwak ri pamex kumrêx nē pahfîr tûm nē ri papa ho papa.

Pawre kot Ximotre ho Tîrtûm mē Jejus wa hwÿr ã harênh

Atre 16.1-2

²⁻³ Te apê ixkra pyrãk Ximotre. Jakamã na pa hte ato Mēpanhîpêêxã maati Tîrtûm mē Pahihtî Jejus Kris wa hwÿr rãhã ho

ri ixpa. Na pa hte mē pakukamã mē panhîgêt pyrã nē tãm ijamaxpêr o ixpa pê Tîrtûm mã tanhmã amnhî nhîpêx to ho ri ixpa. Jakamã na pa hte ato Kra Jejus mē wa hwÿr rãhã ho ri ixpa. Arîgro hã nē kamãt kãm amã ijamaxpêr nē ato wa kuwÿ nē wa kãm:

—Pa Tîrtûm mē Pahihtî wa. E ixte ixkra puro Ximotre ho war awÿr kaxyw war amã ijamaxpêr. Na ka hte wa ho mex nhùm war akôt amnhî nhîpêx mex o pa. Te ò wôwô mē katorxã wa kot amnhî nhîpêx pyrãk. Na pa hte kot amnhî nhîpêx o paja mã ijamaxpêr nē ÿ hã ixkînh nē. War ate kamã axukapri ho ri apa kaxyw na pa ho war awÿ. War ate kutã war anojarêt rãhã ho ri war apa nhùm hamakêtkati nē amnhîx ri pa ho pa kaxyw. Anê.

Pawre kot Ximotre nhÿ hã hkînh ã harênh

⁴ Nē na ka pre hte ixkôt ixto ajuta ho ri ixkôt apa htã pa pre nhÿhÿm inhnojarêt nē axtem axapênh ò hã amã karô hãmri nē Epes kamã are nē ma mō. Ka amã ijpapê xaj tee ri ma inhmôr ã ixpumu nē amÿr rax nē. Na pa hte arîja hã inhnohtÿx nē ri ho ixpa Ximotre. Jao ra ato ama nē. Tã kot puj nhÿrmã axte axpên pumu nē pahkînh tÿx nē.

⁵ Nē na pa hte akatorxã Enître mē anhô wôwôre Rojti wa kãm ijamaxpêr rãhã ho ri ixpa. Na pre wa kumrêx amnhî kaxyw Jejus kôt hamaxpêr nē hkôt amnhî xãm. Tã ka wa hkanrêhã wa urãk nē ã amnhî nhîpêx anê. Ixte ja hã apumunh mex. ⁶ Na pa pre ate tanhmã Jejus mã amnhî nhîpêx to ho ri apa kaxyw axãm kaxyw anhîmök ã inhîhkra xi nē ato Tîrtûm wÿ. Kot tanhmã akrã hto nhùm ate Karô nhÿ hã tanhmã amnhî nhîpêx to ho apa kaxyw. Tã kêr ka arî ã kãm amnhî nhîpêx anhÿr rãhã ho ri apa. ⁷ Na pu htem Tîrtûm Karô nhÿ hã pamã ma ho papa hkêt nē. Na pu htem ÿ hã pamã mē piitã

mê hkînh pê paxàmnhîx tanhmã mê ho ajuta hto ho papa. Nê ý hã kapêr o mê ahkre htýx o ri mê hkôt papa. Nê mêmoj punuj kutã amnhî to htýx rãhã nê. Jao amnhî to mex pix nê.

⁸ Jakamã kwa kêr ka amã mê kãm Jejus jarênh o apa pymaj tee ri amnhî kukamã ajamaxpêr kêt nê. Nê mê kot Jejus ã ijaxàr nhùm arî ixkrî hã ijarênh ma nê mê kot ixkuxwar ajaxàr pymaj mê kãm Tirtûm kapêr o mê ahkre hkukamã tee ri ajamaxpêr kêt nê. Mê kot ã anhîpêx anhÿr mã tâ kêr ka amnhî kamã akahak kêt nê. ãm Tirtûm nhÿ hã hihtýx xã ho amnhî to htýx nê ixpyrà nê ma mê kãm Jejus kot mê panê tanhmã amnhî nhîpêx to hã harênh to rãhã ho ri mê hkôt apa. Mê kot tanhmã hã anhîpêx to htãã. ⁹ Na pu htem Jejus kôt amnhî xunhwÿ nhùm Tirtûm ja hã mê pahpumu nê Jejus kukwak ri amnhî katut kôt mê pahte amnhî tomnuj piitã rênh pa nê mê pahto hkra. Hãmri nê mê pahte hkôt pix mã amnhî nhîpêx o papa kaxyw mê paxunhwÿ. ãm Jejus pix kukwak ri na hte mê pahto hkra nê ã mêmoj to mê pakutã nojarêt rãhã ho pa anê. No na hte mê pahte amnhî to mex ã mê pahpumunh kôt mê pahto hkra hkêt nê. Amnepêm kormã mêmoj piitã hkêt ri na pre mê pakukamã hamaxpêr o:

—Koja mê nhÿrmã Ixkra Jejus Kris kôt amnhî xunhwÿ pa ja hã mê omu nê Ixkra kukwak ri mê ho mex nê. Anê.

¹⁰ Tã kormã mê pahte amnhî tâ ã kot mê pajarênh anhÿrja mar kêt jakamã na pre Jejus mê pahwÿr wrÿ nê tanhmã mê pahto mex to. Na pre ty nhùm Tirtûm akupÿm ho htîr. Jakamã na pu htem ra amnhî kaxyw hkôt pajamaxpêr nê hkôt amnhî xunhwÿ hãmri nê nhÿrmã mê pahtyk tâ nhùm Tirtûm kot Kra Jejus nhîpêx pyrà nê akupÿm mê

pahto mê pahtîr pu mê Jejus kukwak ri wa kuri pamex nê pahtîr tûm nê papa ho papa. Jakamã na pu htem mê pamã pahtyk pyma ho papa hkêt nê.

¹¹ Amnepêm na pre Tirtûm ixãm nê tanhmã inhmã ixâpênh ã karô hto nê inhmã:

—E Pawre kêr ka Jejus nhÿ hã ma hkwyjê jahkre ho ri mê hkôt apa. Nê ixkapêr o mê ahkre mex nê. Kêr ka ã amnhî nhîpêx anhÿr rãhã ho ri mê hkôt apa. Anê.

¹² Tã ã kot inhmã kapêr anhÿr nhùm ixte kapêr kôt amnhî nhîpêx o ixpaja mÿrapê na htem Jejus ã tanhmã inhîpêx kati hto ho pa. Pa hte ixpunuj nê amnhî xã htýx kamã ijamak o ri Jejus mã tanhmã amnhî nhîpêx to ho ri mê hkôt ixpa. Tã nom tee ri ja hã amnhî pumu nê amnhî kamã ixpijaãm nê ixkaprî hkêt nê. Ixte amnhî kaxyw hkôt ijamaxpêr xwÿnhja na ixte tanhmã kot amnhî nhîpêx to hã omunh mex jakamã kot paj ty nhùm mê arî inhmÿr pê Tirtûm kapêr mar o pa. Mê kot ja hã ixpîr tâ koja mê apê Kris kôt ixkwÿjaja inhmÿr pê arî mê kãm harênh o apa. Koja mê ã axpên mÿr pê amnhî nhîpêx anhÿr o pa rãhã nhùm Pahшти Jejus akupÿn mê pahwÿr wrÿ.

¹³ Kwa Ximotre. Ra ixte amã mêmoj tâ karô rax jakamã kêr ka mar tÿx nê hkôt amnhî nhîpêx rãhã o ri apa. Jao Jejus Kris nhÿ hã mê piitã mê noo mã amnhî kaxyw kãm ajamaxpêr tÿx rãhã nê. Nê mê piitã mê ho mex o ri apa. ¹⁴ Ate mê kãm tanhmã Jejus jarênh to ho ri apaja ãm hãmri na. Tã koja mēhō htýx ri tanhmã ho kapêr punuj to rÿ axtem nê tanhmã harênh to ka ja hã ama nê nê kãm akapêr kãm axihtýx nê. Tirtûm Karô ra kot akarô hwÿr àr jakamã kêr ka ý hã ã Jejus jarênhja jamãr mex o ri apa anê.

*Pawre kot tanhmã amnhî jarênh to
Sikûn Ximotre 4.16-18*

15 Nē mǎn ka pre ra pika pē As kamā Kris kwý kot ixkaga hā mē harēnh ma. Na pre Pijerti mē Emosti mē mē ohtō nē tanhmā hamaxpēr to nē ixto ajuta hkēt nē. 16-18 ām Onēsipti pix na pre mē kurom ijarēnh ma nē man ixwýr Rōm wýr mō nē ijpær o ri mē hkôt mra nē ixwýr kato. Hāmri nē xatā ixwýr mra nē tanhmā ixto mex to. Jao akupým ijamaxpēr o hihtýx. Ixpē prēs nē ixkrī htā kēp ixkrāmnhwý hā amnhī jarēnh ā hpi-jaâm kēt nē. Nē annepēm kormā krī pē Epes kamā ixpa ri na pre mǎānēn tanhmā ixto mex to ho pa. Tā ā kot inhīpēx mex anhýr o pa jakamā na pa hte ho Pahihti Jejus wý nē kām:

—Pa Pahihti? Onēsipti o na pa awý. Kot ixto mex rāhā ho pa jakamā kwa kēr ka ixtā omu nē kutā anojarēt rāhā ho apa. Nē ōrkwý kamā hkwýjaja mǎānēn tanhmā mē ho mex to. Hāmri nē nhýrmā akupým mē ixwýr wrý nē ixtā kamā axukaprī hā tanhmā ho mex to. Anē.

2

*Mē pahte Jejus kôt amnhī nhīpēx
pix prām ā mē pamā karō*

Wam Ximotre 6.11-16

1 E Ximotre. Jejus Kris kot mēmoj to mē pakutā nojarēt rāhā jakamā kwa kēr ka ý hā amnhī to htýx nē kām tanhmā amnhī nhīpēx to ho apa hā amnhī kamā akahak o ri apa hkēt nē. 2 Ra ate pa tanhmā Tirtüm kapēr o mē ahkre htoja mar jakamā kēr ka amnhī xō ri ā Jejus kôt mē pahkwýjē jahkre ho apa anē. Mē kot amar nē pahpyrān axpēn xō ri ho axpēn jahkre ho pa kaxyw.

3-4 Sōrdat na htem mē hkrāhtüm kām prām xā hkôt tanhmā amnhī nhīpēx to. Jao tanhmā kute htā kapēr ma nē hkôt amnhī nhīpēx. Tanhmān à rý kām prām rý tanhmā omnuy to htā kutā amnhī to htýx

nē mē hkrāhtüm kôt amnhī nhīpēx. Na htem amnhī xāpēnh kukamā tee ri hamaxpēr o pa hkēt nē. Ām mē hkrāhtüm kapēr kôt pix mā amnhī nhīpēx o pa hprām. Tā kēr ka mē urāk nē Pahihti Jejus kôt amnhī nhīpēx rāhā ho ri apa hprām. Mē kot hā tanhmā atomnuy to htāā.

5 Nē mē hprōt týx xwýnhjaja na htem hkwýjē pē amnhī to wa hprām xāj ām ja pix kukamā hamaxpēr. Hāmri nē hprōt týx prām xāj mēmoj kot mē ho hirerek kēt nē amnhī jagri htýx nē. Hāmri nē hprōt týx o hkwýjē jakre nē amnhī to wa nē pōj nē kot amnhī to wa hā mēmoj to kǎnja. Tā kēr ka mē urāk nē amā Pahihti Jejus kot amnhī nhīpēx kôt pix mā amā amnhī nhīpēx prām.

6 Nē pur kām mē àpēnh xwýnhjaja na htem mē hpur kām àpēnh pix tǎnopxar o pa nē àpēnh rūnh nē. Kām kaga hkēt kām àpēnh o pa. Tā àpēnh rūnhja kukwak ri ihpur kām ō rūnh nē ho apkur mex o pa. Nom koja mē kām kaga nē àpēnh mex kēt nē hāmri nē ō grire nē apkur mex kēt nē. Tā kēr ka pur kām mē àpēnh rūnh xwýnhjē pyrà nē Pahihti Jejus mā amnhī nhīpēx mex o apa. Nē mē urāk nē amā kaga hkēt kām axàpēnh pix tǎnopxar o ri apa.

7 E na pa ā ajahkre anē Ximotre. Tā kēr ka ixte ajahkreja ma nē kām ajamaxpēr rāhā nē. Koja Pahihti tanhmā akrā hto ka aprī hā mar týx nē.

8 Nē kēr ka Pahihti Jejus Kris mā ajamaxpēr rāhā ho ri apa. Na pre katorxā hkôt kēp Pahi finat Tawi kanrēhā htāmnhwý hā mē pahpyrà nē ĩ ho ĩ nē kato nē panhō pika kamā pa ho pa. Tā nhūm prem kupī nhūm amnhī xā htýx kamā hamak kām ty. Hāmri nhūm Tirtüm akupým ho htír nhūm akupým htír o htír. Á na pre hte harēnh anhýr rāhā ho ri mē hkôt ixpa. 9 Mýrapē na prem ijaxā pa arī jar ixkrī ho

ixkrī. Na htem ixte amnhī tomnuj xwýnh pyrāk o inhīpêx nê axte ixte Jejus kapêr jarênh o ixpa py-maj ijaxà. Tã ã mẽ kot inhīpêx anhÿr tã na hte Kris kôt pahtôjaja arī ixpãnhã mẽ kãm harênh o ri pa. Koja mẽ tee ri kãm Jejus jarênh o hapêx prãm kaprÿ. ¹⁰ Jakamã kwâr mẽ mãmrī ã inhīpêx anê. Koja mẽ arī Jejus kot tanhmã mẽ panê amnhī nhīpêx toja mar o pa nhũm mẽ hkwyjaja hkôt amnhī xunhwÿ nê nhÿrmã pahpyrà nê kêp Jejus Kris kwÿ hã Tirtũm mẽ wa kuri mex nê htír tũm nê pa ho pa.

Kris kwÿ kot tanhmã amnhī tã grer to hã mẽ harênh

¹¹ Na pu htem mẽ pahpê Kris kwÿ hã ã amnhī tã pagrer anê:

Mẽ kot Kris ã mẽ panhīmex tã kot puj mẽ akupÿm pahtír nê kuri pamex nê pahtír tũm nê papa ho papa.

¹² Mẽ kot tanhmã Kris ã mẽ pah-tomnuj to htã kot puj mẽ arī hkôt amnhī nhīpêx o papa rãhã ty nê nhÿrmã ìhkô hã mẽ ho amnhīptar o papa.

Nom kot puj mẽ amnhī kamã paka-hak pê mẽ pahpê Jejus kwÿ hkêt ã amnhī jarê hã koja Jejus amnhī xwar mẽ pahpê hkwy hkêt ã mẽ pajarê.

¹³ Nê mẽ pahte amnhī kaxyw Je-jus kôt pajamaxpêr kêê tã tanhmã amnhī jarênh to xà hkôt tanhmã amnhī nhīpêx to.

Aa kot mẽmoj tã amnhī jarênh kuhpa hã ri tanhmã amnhī nhīpêx to hkêt. Anê.

Mẽ kot Tirtũm kapêr o mẽ ahkre mex xwýnhjê jarênh

Wam Pétre 3.15-16

¹⁴E Ximotre. Ixte ã mẽmoj tã amã karô anhÿrja kêr ka ho mẽ ahkre rãhã ho ri mẽ hkôt apa. Kê mẽ ama nê kãm hamaxpêr rãhã nê.

Nê mẽ kãm anê kê mẽ Tirtũm kapêr o mẽ ahkre mex o ri pa nê

kapêr ã tanhmã axpên mã àkjêr to hkêt nê. Koja mẽ hã axpên mã akir hãmri nê amnhī to mex kêt nê. Hãmri nhũm mẽ kot mẽ kapêr mar xwýnhjaja ja hã mẽ omu nê tee ri Tirtũm kapêr kukamã hamaxpêr nê hkôt amnhī nhīpêx mex kêt nê.

¹⁵ Nê na htem mẽ kãm mẽ àpênh mex xwýnhjaja mẽ ô patrãw kapêr ma nê hkôt mẽmoj tã àpênh mex nê. Nhũm ô patrãwja hwÿr mra nê àpênh ã omu. Hãmri nhũm amnhī wÿr omu nê àmnhīx noo mã apê. Kãm àpênh mex jakamã amnhī kamã kãm uma hkêt nê. Ja pyrà nê kêr ka Tirtũm noo mã kãm amnhī nhīpêx mex rãhã nê aprī hã kapêr o mẽ ahkre mex o ri mẽ hkôt apa. Kê ã ate amnhī nhīpêx anhÿr ã apumu nê anhÿ hã hkĩnh nê. Ka àpênh xwýnhhta pyrà nê amnhī kamã amã uma hkêt nê noo mã kãm amnhī nhīpêx mex o ri apa.

¹⁶ No mẽ kot Tirtũm kapêr o hêx o mẽ pa xwýnhjaja kêr ka mẽ hkôt ri apa hkêt nê. Nê mẽ kapêr mar nê ri mẽ hkôt axãm hkêt nê. Na htem mẽ kapêr ma nê mẽ hkôt amnhī nhīpêx o pa nê kãm Tirtũm kapêr mar prãm kêt nê. Nê gaa nê te kêp mar pumaj amnhī jamak pro pyrāk o amnhī nhīpêx. ¹⁷ Týx ri tanhmã mẽ ahkre hto xàja te kot mẽ hkànhy aa mex kêt nê ra omnuj týx o mörja pyrāk. Jao mẽ kot mẽ kapêr mar o mẽ pa xwýnhjaja mẽ mar pê ra mẽ hkôt amnhī tomnuj týx o mō. Na hte ra Imēnew mẽ Pijertija wa ã htýx ri amnhī krã hkôt mẽ ahkre anhÿr o pa. ¹⁸ Nê Tirtũm o hêx o mẽ hkôt pa nê nhÿrmã akupÿm mẽ pahto mẽ pahtír kêt ã harênh o pa. Hãmri nhũm mẽ amnhī tã wa kuma nê tee ri amnhī kukamã hamaxpêr pê Je-jus kaga nê axte amnhī kaxyw hkôt hamaxpêr kêt nê. Nom wa kapêrja kot anhÿr kêt. ¹⁹ Kêt Tirtũm kapêrja ãm hãmri na. Kot mẽmoj to hêx kêt jakamã na pu htem amnhī kaxyw hkôt pajamaxpêr kaprÿ hkêt nê. Kapêr ã kagã htũm kot tanhmã mẽ

pahpê hkrajê jarēnh to nê harēnh kot:

Tirtūm na kot hkrajê piitā omunh mex rāhā ho pa xwýnh.

Anhýr o mẽ pajarēnh. Nê mẽ pamā mẽmoj tã karō kot:

Kê mẽ kot Jejus kôt amnhĩ xunhwýr xwýnhjaja amnhĩ tomnuj o pa hkêt nê. Anê.

Tirtūm krajaja te kêp prat mex pyrāk ā mẽ harēnh

²⁰ Nê mẽ hikàxpore rūnh xwýnhjaja mẽ õ xijere nê mẽ õ prat xohtōō. Prat kwý muxre nê hkwy omnajre. Prat pynajre na htem māmri kamā apku no prat muxreja ām mẽmoj mex pix kaxyw na htem mēsti hā haxwý nê kamā apku. Kasamēt ā rý mẽ hkra krā hkēnh ā mẽ hkīnh nhūm htem mēsti hā haxwý nê kamā apku. ²¹ Tã mẽ kot Tirtūm kapêr o hêx o mẽ pa xwýnhjê hkôt hamaxpêr kêt nê mẽ hkôt amnhĩ tomnuj kêt xwýnhjaja te mẽ kot prat muxre pyrāk. Na htem tām amnhĩ nhĩpêx nê tanhmā hamaxpêr punuj to ho pa hkêt nê. Hāmri nhūm Tirtūm ja hā mẽ omu nê mẽ ý hā hkīnh nê. Hāmri nê te mẽ kot prat muxre jaxwýr nê kamā apkur pyrā nê mẽ kot kām tanhmā amnhĩ nhĩpêx to ho pa kaxyw mẽ unhwý.

Mẽ pahte tām amnhĩ nhĩpêx ā mẽ pamā karō

²² Nê mẽ àptār nyw jamaxpêr punujja kêr ka te ate hamýnh nê amnhĩ katut kôt rēnh par pyrāk o hipêx Ximotre. Jao axte ho ajamaxpêr o ri apa hkêt nê. Nom mẽ hamaxpêr mexja kêr ka hamý nê amnhĩ krā him hagjê nê ho ajamaxpêr rāhā ho ri apa. Jao tām amnhĩ nhĩpêx nê amnhĩ kaxyw Tirtūm kôt ajamaxpêr rāhā nê. Nê amā mẽ kêp Kris kôt akwýjê hkīnh pê tanhmā mẽ ho ajuta hto ho ri mẽ hkôt apa. Jao mẽmoj to mẽ kutā anojarêt rāhā nê. Na hte ā Pahihiti

Jejus kôt amnhĩ nhĩpêx xwýnhjaja amnhĩ nhĩpêx anhýr o pa.

²³ Nê kêr ka mẽ kot htýx ri amnhĩ krā hkôt mẽ ahkre ho mẽ pa xwýnhjê hkôt apa hkêt nê. Te ate mẽ kêp awry hā ri apa pyrā nê mẽ kapêr ma nê ām ama. Na htem mẽ kapêr mar o pa nê ra hā axpên mã tanhmā àkjêr to ho pa. Jakamā kwarĩ mẽ hkôt ri apa hkêt nê. ²⁴ Mẽ pahte Tirtūm mã amnhĩ nhĩpêx o papa xwýnhjaja na pu htem mẽ kurom mẽmoj tã axpên mã paxàkjêr o ri papa hkêt nê. Na pu htem ām mẽ piitā mẽ kamā paxukapri pê mẽ ho mex nê mẽ kamā pagryk tokyx anhýr kêt nê. Nê Tirtūm kapêr o mẽ ahkre mex nê. Na hte ā mẽ pahte Tirtūm mã tanhmā amnhĩ nhĩpêx to xwýnhjaja amnhĩ nhĩpêx o papa anê.

²⁵⁻²⁶ Jakamā koja mēhō ate Tirtūm kapêr o mẽ ahkreja ma nê tanhmā ho amā kapêr to ka ama nê amnhĩ tã tanhmā kām akapêr punuj to hkêt nê. Ām kamā axukapri ho tanhmā hā kām akapêr mex to. Na hte Satanasti te kot amnhĩm mẽ unēnh pyrāk o mẽ hipêx nê tanhmā mẽ kām Tirtūm kapêr o hêx to nhūm mẽ kuma nê hkôt hamaxpêr nê kapêr kôt amnhĩ nhĩpêx. Tã kot kaj mẽ kamā axukapri ho mẽ kām akapêr mex nê nhūm Tirtūm tanhmā mẽ hkrā hto nhūm mẽ ama nê hkôt amnhĩ xunhwýr japêr. Te Tirtūm kot Satanasti pê amnhĩm mẽ utār pyrāk. Jakamā nhūm mẽ hpānhā Tirtūm kapêr mex ā harē nê harēnh o:

—Nà pēr ām hāmri na Tirtūm kapêrja. Ām mex o mex. Anê.

3

Jejus akupýn wrýk kukamā mẽ kot amnhĩ tomnuj xwýnhjê jarēnh

Matêwre 24.4-13; Korosê 2.16-19; Wam Ximotre 4.1-5; Sikūn Pêtre 2.1-3; Jutre 3-16

¹ Nē Jejus akupŷn mē pahwŷr wrŷk xwŷj ri mē kot tanhmā amnhī nhīpēx toja kot paj hpānhā ixprī hā amā harē ka inhmar tŷx nē Ximotre. Koja Jejus akupŷn mē pahwŷr nojarēt pu mē pahpē hkwyjaja pahpunuj nē papa. ² Nē Kris kwŷ hkēt xwŷnhjaja koja mē amnhī pix kukamā hamaxpēr o pa.

Jao hikāxpore rax o pikuprōnh pix kukamā hamaxpēr pē hkwyjē pē ōxŷ htŷx o pa.

Nē mēmoj tā amnhī to jarkrar o pa.

Nē tanhmā hkwyjē japry hto ho pa.

Nē mē hipēēxā nē mē katorxā hā hpijaām kēt o pa.

Nē Tirtūm ā hpijaām kēt o pa.

Nhūm mēhō tanhmā mē ho mex to nhūm mē amnhī tā mē omu nē ām mē omu nē amnhī tā tanhmā mē kām nē hkēt nē. Rŷ mē kām: “Nā ām hāmri na ka ā ixto mex anē. Nā ja mex.” Anhŷr o mē kām kapēr kēt nē.

³ Mē ukapri hkēt jakamā koja mēhō tanhmā mē homnuj to nhūm amnhī tā mē omu nē kamā gryk kurē kumrēx nē aa gryk o hapēx kēt nē.

Nē amnhī tā tanhmā hkwyjē ho hēx to ho pa.

Nē htŷx ri kām hprām xā hkōt tanhmā amnhī tomnuj to.

Nē oprē ho pijapu pix kukamā hamaxpēr.

Nē axtem nē kām mēmoj mex pumunh prām rŷ mēmoj mex mar prām kēt nē.

⁴ Nē mēhō ho hkrāmnhwŷ htā axtem nē mē kām mē hkurē xwŷnhjē nhīhkram haxā.

Nē hamaxpēr mex kēt o tanhmā amnhī tomnuj to rāhā ho ri pa.

Nē amnhī to rūnh o mē piitā mē hakrenh par ā amnhī to jarkrar o ri pa.

Nē amnhī krā hkōt kām amnhī nhīpēx prām xā hkōt amnhī nhīpēx o pa nē kām Tirtūm kām

prām xā hkōt amnhī nhīpēx prām kēt nē.

⁵ Hāmri nē mē kēp hkra hā amnhī jarēnh o pa htā aa hkōt amnhī nhīpēx kēt. Ā Tirtūm kra hkēt xwŷnhjaja amnhī nhīpēx kot anhŷr jakamā kwa kēr ka ā mē hkōt apa hkēt nē Ximotre.

⁶⁻⁷ Na htem hēx rom hkwyjē nhōrkwŷ hwŷr agjē nē kamā tanhmā mēnijē mā hēx to. Mē kot mē mar nē tanhmā amnhī tomnuj to hāmri nē ja hā amnhī pumu nē tee ri amnhī kukamā hamaxpēr kaxyw. Nē mē kām mē kapēr nyw mar prām tā nhām mē kapēr ma nē nhām mē kapēr mar nē aa Tirtūm kapēr mar nē amnhī kaxyw hkōt hamaxpēr kēt nē. Jakamā nhūm mē kot amnhī tomnuj xwŷnhjaja hēx rom mē hwŷr mra nē mē ōrkwŷ hwŷr agjē nē tanhmā mē kām mēmoj to hēx to. ⁸ Te kot amnepēm finat Jānre mē finat Jāmtija wa kot amnhī nhīpēxta pyrāk. Na pre finat Mojestija Tirtūm nhŷ hā tanhmā mē ahkre hto ho pa nhūm Jānre mē Jāmti wa kām mar prām kēt nē. Nē tanhmā ja nē hkwyjē mā kapēr to ho pa. Tā ā mē kot amnhī tomnuj anhŷr o mē pa xwŷnhjaja na htem wa urāk nē kām Tirtūm kapēr mar prām kēt nē kapēr nē tanhmā hkwyjē mā kapēr to ho pa. Nhūm mē hamaxpēr mex kēt jakamā ām mēmoj punuj pix kukamā hamaxpēr nē mē kuma nē amnhī kaxyw Jejus kōt hamaxpēr kēt nē. ⁹ Tā nom koja mē hkwyjaja tokyx hprī hā mē kot mēmoj to hēx ā mē omu hāmri nē axte mē hkōt hamaxpēr kēt nē nhūm mē rī amnhī pumu. Te amnepēm mē kot hprī hā Jānre mē Jāmti wa kot tanhmā amnhī tomnuj to hā wa omunhta pyrāk.

*Mē pahte Jejus ā pahpunuj tā hka-
aga hkēt ā mē pamā karō
Atre 13.50–14.7, 14.19–22*

10 E Ximotre. Ate ixkôt apa ryy jakamā ra ate tanhmā ixte amnhī nhīpêx ho ixpa hā ixpumunh mex.

Ixte tanhmā Tirtūm kapēr o mē ahkre hto ho ixpaja.

Nē inhmā mēmoj to anhÿr prām xwÿnhja.

Nē ixte amnhī kaxyw Kris kôt ijamaxpêrja.

Nē inhgryk tokyx anhÿr kêtja.

Nē ixte tanhmā Kris kôt ixkwÿjê ho mex to ho ri ixpaja.

Nē ixpunuj nē ixpa htā arī Kris kôt amnhī nhīpêx mex o ixpaja.

Ā ixte amnhī nhīpêx anhÿr o ixpaja ate ixpumunh mex.

11 Na pa pre krī pē āxiok nē Ikōn nē Ristija kamā mē kām Jejus jarēnh o ixpa nhūm mē hkwyjaja Jejus ā tanhmā inhīpêx to pa amnhī xā htÿx kamā ijamak o ri mē hkôt ixpa. Tā nhūm Pahihti Kris xatā mē kēp ixpytā pa itÿr pē mē ĩhkra rūm ijaarōx o ixpa. 12 Na hte Kris kwÿ hkēt xwÿnhjaja mē pahte Kris kôt amnhī nhīpêx o papa hā mē pahtomnuj o pa.

13 Nē mē kot Tirtūm kapēr o hêx o mē pa xwÿnhjaja koja arī mē kēp Kris kwÿ hā amnhī to hêx pē mē nokupyr. Nē mē kām Tirtūm kapēr o hêx o pa. Jao ra mē tāmjaja amnhī nokupyr o pa nē amnhī tomnuj tÿx kumrêx.

Pawre kot tanhmā Tirtūm kapēr ā kagā jarēnh to

Rōmān 15.4; Sikūn Pêtre 1.19-21

14-15 No ka Ximotre. Amnepēm aprīre rūm na pa pre mē ixohtō nē Tirtūm kapēr o ajahkre ho ixpa. Akatorxā nē anhō wōwōre nē pa nē Kris kwÿjaja pa prem ho ajahkre rāhā ho akôt ixpa ka mē inhmar tÿx nē amnhī kaxyw Jejus kôt ajamaxpêr. Jakamā kwa kēp ka arī hkôt ajamaxpêr mex rāhā ho ri apa. Tirtūm kapêrja na htem mar pē amnhī kaxyw Jejus Kris kôt hamaxpêr nē hkôt amnhī xunhwÿ

nhūm Tirtūm ja hā mē omunh xā hkôt mē ho hkra. 16 Tirtūm kapēr ā kagāja Tirtūm kapēr na. Na htem ho mē ahkre ho pa. Koja mēhō hkwȳm ri tanhmā amnhī tomnuj to nē kapēr ma nē tee ri amnhī tomnujja kukamā hamaxpêr o ra hkaprī nē. Rÿ tanhmā amnhī tomnuj to htā kapēr ā kagā kamā kapēr nē Tirtūm kot ā kot amnhī tomnuj anhÿrja nē mē pamā kapēr ā harēnh ma nē amnhī tomnujta kaga kurē kumrêx. Rÿ kamā kapēr nē Tirtūm kot tanhmā mē pahte amnhī to mex to hā mē pamā karō kamā harē nē kuma. Hāmri nē ŷ hā hkôt amnhī nhīpêx mex rāhā nē. Ā na hte Tirtūm kapēr kagāja mē kot mar nē hkôt amnhī nhīpêx xwÿnhjê ho mex anē. 17 Na hte mē kot Tirtūm mā amnhī nhīpêx o mē pa xwÿnhjaja kamā harē nē hkôt amnhī nhīpêx mex pē mē piitā mē ho mex nē ho mē ahkre mex rāhā ho pa.

4

Pawre kot mēmoj tā Ximotre mā karō

Korosē 4.5-6

1 Nē koja nhÿrmā Jejus Krisja akupÿn mē pahwÿr wrÿ hāmri nē mē pahpiitā tanhmā mē pajarēnh to. Ra mē htyk xwÿnhjaja nē arī mē pahtÿr xwÿnhjaja nhūm tanhmā mē pahte amnhī nhīpêx to ho papa hā mē pahpumunh kôt tanhmā mē pajarēnh to. Jao Tirtūm mē wa kuri mē pahtÿr tūm nē papa ho papa hā mē pajarē rÿ wa kuri pahtÿr tūm nē papa hkēt ā mē pajarē. Jakamā kwa Ximotre kot paj Tirtūm mē Jejus Krisja wa noo mā mēmoj tā amā karō ka inhmar tÿx nē. 2-4 Koja nhÿrmā mē kēp Tirtūm kra hkēt xwÿnhjaja axte kām Tirtūm kapēr mar prām kēt nē nhām mē kapēr pix mar prām o ri pa. Jao amnhī kukamā hamaxpêr o:

—Nā inhmā Tirtūm kapēr mar prām kēt. Kot mēmoj piitā nē

mē hkurē kēnā. Kot paj hpānhā mēhō kot mēmoj nē mē hkurē hkēt xwýnhjē kapēr pix mar o ri ixpa. Nā kot paj anē. Ja na inhmā hprām. Nom kot paj axte Tirtūm kapēr mar kēt nē.

Anhūr jao kapēr kaga nē hpānhā htýx ri nhām mē ujarēnh pix ma nē hkôt hamaxpēr. Koja mē ā amnhī nhīpēx anhūr o pa. Jakamā kwa kēr ka arī mē kām Jejus kot tanhmā mē panē amnhī nhīpēx to hā harēnh rāhā ho ri mē hkôt apa Ximotre. Mē kām mar prām kēt tā māmri ri mē kām harē. Nē nhūrī mēhō pumu nē kām harē. Mē kām mar prām xwýnhjē mā harē nē mē kām mar prām kēt xwýnhjaja ka māānēn mē kām harē. Nhūm mēhō tanhmā amnhī tomnuj to ka hā omu nē tanhmā nē kām akapēr to kē hkaga tokyx anē nē akupým tām amnhī nhīpēx. Rý nhūm mēhō tām amnhī nhīpēx o pa ka ja hā omu nē hā kām akapēr nē kām:

—Ām hāmri na ka hte Tirtūm kôt amnhī nhīpēx mex nē. Anē.

Hāmri nē anojarēt kēt kām mē kām Tirtūm kapēr o mē ahkre rāhā ho ri apa. ⁵ Nē tām ri amnhī nhīpēx rāhā nē. Mē kot Jejus ā tanhmā anhīpēx to htā kēr ka ŷ hā amnhī to htýx nē arī mē kām kapēr jarēnh o ri mē hkôt apa. Jao Tirtūm mā amnhī nhīpēx mex rāhā nē. Kēr ka ā mē hkôt amnhī nhīpēx anhūr o ri apa Ximotre.

Pawre kot ra htyk kaxyw ā amnhī jarēnh

Atre 20.17-35

⁶ Nē mē kot ixpīr xā hā arīgroja ra hwūr ahtēp o mō. Kot paj pēr tokyx ty. Amnepēm na prem Tirtūm mā mēmoj nhōr kaxyw nē mē hkōm xā kamā mēmo kagōja py nē mē kot Tirtūm mā mēmoj nhōr xā hā mēstija ā hkapīr pa nhūm hapēx. Tā te ixpē mē hkōm xā kamā mēmo kagō pikapīrta pyrāk. Kot paj tokyx ty nē jar ijapēx. ⁷ Na pa ra Pahihti Jejus mā amnhī nhīpēx mex o ri

ixpa. Mē kot tanhmā hā ixtomnuj to htā pa hkaga hkēt nē arī hkôt amnhī nhīpēx mex rāhā ra ixtyk kaxyw. ⁸ Ixte Pahihti kām hprām xā hkôt amnhī nhīpēx mex o ri ixpa jakamā koja amnhī tā tanhmā ixto mex to. Nom papxpix ixto mex kēt nē. Na hte ām hāmri tām mē pahpiitā mē panhīpēx. Jakamā nhūr mā kot mē piitā tanhmā mē harēnh to xā hā arīgrota ā koja mē pahkīnh pē mē pahte amnhī wūr kamā pajamak o papa xwýnh piitā mē pamā mā mēmoj mex gō.

Pawre kot amnhī wūr Ximotre hwūr

⁹ Kwa na pa ra ato ijamak týx nē Ximotre. Kwa kēr ka amnhīm anojarēt nē tokyx tanhmā amnhī to hpa nē man ixwūr mō.

¹⁰ Na pre ra Kresēx ma Karatas wūr mō nhūm Xitre ma pika pē Tawmas wūr mō. Nhūm Tēnti ra tanhmā hamaxpēr to nē àpēnh gryk ā ixkaga nē ma akupým Tesarōn wūr mō. ¹¹ ām Rukre pix na arī ixkôt pa jakamā kēr ka anojarēt hāmri nē ahte amōr kēt nē. Makre mā anē kē man akôt ixwūr mō nē tanhmā ixto ajuta hto ho pa.

¹² Nē Xikitre na pa pre ra Epes wūr kumē.

¹³ Nē Torôt kām Kapti nhōrkwý kamā ixte kry pē inhō kamīs pa hkā ryti rer jakamā kēr ka anojarēt nē inhmā apy nē man inhmā o mō. Nē inhō kagāta ka māānēn inhmā amý nē o mō. Nē mēmo mry kà hā ixte mēmoj tā kagāta ka māānēn apy nē mán inhmā o mō. E kēr ka anojarēt nē ixkukrēxja jamý nē ixwūr ho mō.

Tanhmā Aresānti kot Pawre nhīpēx to hā harēnh

¹⁴⁻¹⁵ Nē na pre kàx o mēmoj nhīpēx xwýnh Aresāntija ixtomnuj nē. Pa pre mē kām Tirtūm kapēr o mē ahkre ho ri mē hkôt ixpa nhūm tee ri inhma nē kām mar prām kēt nē. Hāmri nē ixkutā amnhī xām nē inhīpēx kati nē. Nom koja Pahihti

Jejus ixtā tanhmā ho. Kwa kêr ka amnhĩ nê omunh mex nê Ximotre.

Pahihti Jejus kot Pawre mǎ hamaxpêr o hihtỳx ā harênh

¹⁶Nê pahi kot mē mar xà hā ixkre kamā wam ixte mē kām amnhĩ jarēnh̄ta ā na pre mēhō ixyr pē mē kām tanhmā ijarēnh̄ to hkêt nē. Na prem piitā mē umaj ixkaga hpa. Nom kwār mē mām̄rī ā amnhĩ nh̄ipêx anē. Tirtūm kot ixtā tanhmā mē hoja na inhmā hprām kêt. ¹⁷ām Pahihti Jejusja pix na pre mē kurom ixkaga hkêt nē. Na pre ixto ixihtỳx nē pa ỳ hā mē kām tanhmā mē panē kot amnhĩ nh̄ipêx to hā harēnh̄ pa. Nhūm Ijaew kêt xwỳnh̄ kot inhmar o hkrī xwỳnh̄jaja ixujarēnh̄ mar o hkrī nhūm Tirtūm inhnē tanhmā mē ho nhūm mē ixp̄r kêt nē. ¹⁸Koja Pahihti mē kutā ixto ixihtỳx rāhā nē mēmo arīgro hā amnhĩ wỳr ixto api. Pa Tirtūm mē wa kuri inhmex kumrêx nē ixtīr tūm nē ixpa ho ixpa. Pahihti mex o mex jakamā kêr pu mē kām mex o mex ā harēnh̄ rāhā ho papa nē aa jam panhūrer kêt nē.

Pawre kot tanhmā hkrāmnhwỳjê jarēnh̄ to

¹⁹Nê kêr ka Prisire mē mjên Akir wa kām ijarē. Nê Onēsipti hprō nē hkrajaja ka mǎānēn mē kām ijarē.

²⁰No Eras kormā Korīt kām pa. Nê Toropti na pre à nē pa Mīrêt kām kure nhūm ixkôt mōr kêt nē.

²¹Kwa kêr ka amnhīm anojarêt nē amgrà pē man tokyx ixwỳr mō Ximotre.

Nē ota Epti mē Prutēhti mē Rīnre mē Krawreja awỳr hpêr mē. Nē jar Kris kôt pahkwỳjê piitā awỳr hpêr mē.

²²E kê Pahihti Jejus ato mex rāhā nē mē apiitā mē akutā nojarêt rāhā ho pa.

Tā ām ja pix. Ixpê Pawre na pa awỳr kagàja nh̄ipêx nē kumē.

Xitre Pawre kot Xitre hwÿr kagà nê mēnh

Pawre na pre kagàja nhîpêx. Kêp Jejus nhÿ hã hkrajê jahkre ho pa xwÿnhjê hõ na pre. Nhũm pre Xitre Pawre hkõt pa hã mytwrÿ sohtõ nê. Tã kêp Jejus kõt hkwyjê nhõ pastõ kaxyw gõ hipõk pê Kret ã arîk nê Tirtũm kapêr o mē ahkre ho mē hkõt pa. Jakamã nhũm Pawre kãm kagàja nhîpêx nê kamã kãm mēmoj tã karõ. Tirtũm kapêr o mē hêx xwÿnhjaja tanhmã kot ja nê mē hkurê to hã kãm karõ. Nê mē kot Tirtũm kapêr o mē ahkre mex pix xwÿnhjaja Jejus kwÿjê kaxyw kot mē rēnh ã kãm karõ. Nê Jejus kwÿjaja kot axpēn to mex o pa hã kot mē kãm karõ kaxyw kagàja kamã mē kaxyw kãm hã kagà. Á na pre Pawre Xitre mã mēmoj tã karõ nê hã kagà nê hwÿr mēnh anê. Nê kãm:

¹ Pa Xitre? Xà amex? Ixpê Pawre na pa awÿr kagà nhîpêx nê kumê. Na pa hte Tirtũm mã tanhmã amnhî nhîpêx to ho ixpa. Nê ixpê Jejus Kris nhÿ hã hkrajê jahkre o ixpa xwÿnh jakamã na pa hte mē kot amnhî kaxyw hkõt hamaxpêr tÿx kaxyw tanhmã mē kãm ixkapêr to ho ri ixpa. Nê mē kot hprî hã mar kaxyw Tirtũm kapêr o mē ahkre mex nê. ² Mē kot inhmar nê nhÿrmã htyk nê ma Tirtũm mē Jejus wa hwÿr àpir nê wa kuri htîr tũm nê pa ho pa hã amnhî kukamã hamaxpêr kaxyw. Amnepê m na pre Tirtũm ã mē pahpê hkrajê hkukamã mē pajarēnh anê. Nê ãm hãmri ã mē pajarēnh anê. Na hte mēmoj tã amnhî to hêx kêt nê. ³ Tã ra mē pakukamã mē pamã mēmoj to amnhîrit nê inhmã kapêr o:

—E Pawre kêr ka ma mē hpi-itã mē hkõt ri apa nê mē kãm

ixkapêr jarē nê mē kãm: “Kot kaj mē amnhî kaxyw Tirtũm Kra hkõt ajamaxpêr nê hkõt amnhî xunhwÿ nhũm Tirtũm ja hã mē apumu nê mē ato hkra. Ka mē nhÿrmã atyk tã nhũm amnhî wÿr mē ato api ka mē wa kuri amex kumrêx nê atîr tũm nê apa ho apa.” Anhÿr o mē kãm ixkapêr jarēnh o ri mē hkõt apa Pawre.

⁴ Anhÿr o inhmã kapêr tã pa ã amã ixkapêr nê hã kagà anê Xitre. Pajamê pahte amnhî kaxyw Jejus kõt pajamaxpêr nê hkõt amnhî xãm jakamã te apê ixkra pyrãk. Jakamã na pa hte ato Mēpanhîpêêxã maati Tirtũm mē mē papytãr xwÿnh Jejus Krisja wa hwÿr rãhã ho ri ixpa nê wa kãm:

—Pa Tirtũm mē Pahihti wa. Nã Xitre ho na pa wa awÿ. Kwa kêr ka wa kutã anojarêt rãhã ho ri apa. Kê wa akukwak ri hamakêtkati nê ãmnhîx pa ho pa. Anê.

Kris kwÿ hkrãhtũmjaja kot tanhmã amnhî nhîpêx to kaxyw mē hã kãm karõ

Wam Ximotre 3.1-13

⁵ Nê na pa pre Kret rũm inhnojarêt hãmri nê amã axapēnh ã karõ nê Kret kãm are nê man mõ. Na pa pre amã:

—E kêr ka jar arîk nê mē kãm ixkapêr jarēnh jatur xãm mēnh o mē hkõt apa. Nê Kris kõt pahkwÿjê mã mē hkrãhtũmjê xunhwÿ. Kret kãm krî piitã hkõt. Na pa pre ixprî hã tanhmã amã mē harēnh to. Tã kêr ka ate inhmar xã hkõt mē hkwyjê kapi nê mē unhwÿ. Koja mē ã amnhî nhîpêx anhÿr o pa ka ja hã mē omu nê mē unhwÿ.

⁶ Koja mē tãm amnhî nhîpêx o pa nhũm mē piitã axpēn mã mē mex ã mē harê.

Nê mē hprõ pix tânopxar o pa nê kuhpa hã nhãm mēnijê ho amnhîkati hkêt nê.

Nê kê mē hkrajaja hipêêxã pyrã nê amnhî kaxyw Jejus kõt hamaxpêr o pa. Jao hipêêxã nê katorxã wa kapêr ma nê wa

hkôt amnhĩ nhĩpêx. No ri htỳx ri amnhĩ tomnuj o pa hkêt nê.
 Anhỳr o na pa pre mẽ hã amã karõ.
 7 Jeus kôt pahkwỳjê hkrãhtũmjaja kot Tĩrtũm nhỹ hã hkrajê mã kapêr mex o pa jakamã na htem tãm amnhĩ nhĩpêx o pa.

Nê amnhĩ pix kukamã hamaxpêr o pa hkêt nê.

Nê gryk tokyx anhỳr kêt nê.

Nê kagôxyhti japrôr nê ho pipãnh o pa hkêt nê.

Nê oprê ho pa hkêt nê.

Nê kàxpore rũnh prãm xàj hêx rom tanhmã amnhĩ nhĩpêx to hkêt nê.

Na htem ã amnhĩ nhĩpêx anhỳr hkêt nê.

8 ãm àmnhĩx amnhĩ nhõrkwỳ hwỳr mẽ hwỳr o pa.

Nê mẽ piitã mẽ kutã nojarêr rãhã nê.

Nê tãm hamaxpêr nê tãm mẽ piitã mẽ hipêx o pa.

Nê amnhĩ tomnuj pymaj amnhĩ to htỳx pê Tĩrtũm kôt amnhĩ nhĩpêx mex rãhã ho pa.

9 Nê mẽ kot Tĩrtũm kapêr mar tỳx jakamã kê mẽ arĩ hã nohtỳx nê mar tỳx xà hkôt amnhĩ xô ri ho hkwỳjê jahkre mex o pa.

Nê ho mẽ piitã mẽ hamaxpêr o hihtỳx o pa.

Nhũm mễhõ Tĩrtũm kapêr kwỳm ri tanhmã ujarênh to nhũm hã kuma nê hprĩ hã kãm tanhmã harênh to kê mar mex nê.

E Xitre. Na hte ã Jeus kwỳjê hkrãhtũmjaja amnhĩ nhĩpêx anhỳr o pa. Jakamã kêr ka aprĩ hã Kret kãm Jeus kôt pahkwỳjê kapi nê mẽ kot tanhmã amnhĩ nhĩpêx to ho pa hã mẽ omu. Nhũm mễhõ ã amnhĩ nhĩpêx anê ka ja hã omu hãmri nê kêp Jeus kwỳjê hkrãhtũm kaxyw ãm.

Kret nhõ xwỳnhjaja kot tanhmã amnhĩ tomnuj to hã mẽ harênh

Xitre 3.9-11

10 Nê atar Kret kãm na hte mẽ ohtô nê kãm mẽ ô pahi kapêr mar

prãm kêt nê htỳx ri tanhmã Kris kwỳjê mã kapêr to ho pa. Na hte Ijaew kwỳjaja ã amnhĩ nhĩpêx anhỳr o pa. Jao Ijaew kêt xwỳnh kot Jeus kôt amnhĩ xunhwỳr xwỳnhjê mã kãm:

—Kwa mẽ ixpyrà nê mẽ ixpê Ijaewjê kot amnhĩ nhĩpêx kôt mãn amnhĩ nhĩpêx kêt wehe.

11 Anhỳr o mẽ kãm kapêr jakamã kwa kêr ka ã mẽ kapêr anhỳrja nê mẽ kãm akapêr kãm axihtỳx nê. Na htem hpijaam kêt o hikàxpore hprãm xàj ã mẽ kãm kapêr anhỳr o pa. Jao mẽ hamaxpêr o ahkã nhũm mẽ kuma nê tee ri hamaxpêr. 12 Na pre ra mẽ hkwỳjê hõ tanhmã mẽ harênh to. Mễ ahkre xwỳnhjê hõja mẽ harênh o:

—Kret nhõ xwỳnhjaja na htem hêx pix o pa. Nê oprê nê kãm kaga nê apkur xà pix kukamã hamaxpêr o pa. Anê.

13 ãm hãmri ã mẽ harênh kot anhỳr. ã mẽ kot amnhĩ nhĩpêx anhỳr jakamã kwa mẽ kot amnhĩ nhĩpêxja nê mẽ kãm akapêr kãm axihtỳx o ri mẽ hkôt apa Xitre. Kê mẽ ã amnhĩ nhĩpêx anhỳr kêt nê. Nê mẽ kãm anê kê mẽ amnhĩ kaxyw Tĩrtũm kôt mãn hamaxpêr tỳx nê. 14 Nê kê mẽ axte Ijaewjê xujarênh nê mẽ kot amnhĩ nhĩpêx kôt amnhĩ nhĩpêx kêt nê. ã mẽ kot amnhĩ nhĩpêx o pa hã mẽ kãm karõ xwỳnhjaja na prem Tĩrtũm kapêr kaga hpa. 15 Mễ kot Jeus kôt amnhĩ xunhwỳr xwỳnhjaja tãm mẽ hamaxpêr o pa jakamã na htem Tĩrtũm kot mễmoj piitã ho kator xwỳnh pumu nê piitã mex ã harê. No mẽ kêp Jeus kwỳ hêt xwỳnhjaja na htem hamaxpêr punuj pix o pa. Nê mễmoj mex pumu nê mex kêt ã harê. Mex tã nhũm mex kêt ã harênh o pa. 16 Nê mẽ kêp Tĩrtũm kra hã amnhĩ jarênh tã amnhĩ tomnuj pix o pa. Jao kêp hkra hã amnhĩ jarênh o hêx nê kapêr kwỳm ri amnhĩ nhĩpêx pix o pa. Nhũm Tĩrtũm tee ri ja hã mẽ omu nê kãm

mě hkĭnh kêt nē. Tĭrtŭm mā mẽ kot amnhĭ to mex kwÿ mẽ hā jêt kêt kumrĕx.

2

¹ E Xitre kot paj tanhmā ate mẽ ahkre hto hā amā karō ka inhma nē amnhĭ xō ri mẽ kām hā karō ho ri apa.

Mĕmy wejjaja kot tanhmā amnhĭ nhĭpĕx to kaxyw mẽ hā kām karō

² Nē kĕr ka mĕmy wejjĕ mā anĕ kĕ mẽ amnhĭ to àptār mex nē pa.

Nē pipānh nē ri pa hkĕt nē.

Nē mẽ gryk kaxyw htÿx ri hkwyjĕ hā hpĕr o pikĕnh kêt nē.

Kĕ mẽ tām hamaxpĕr nē tām amnhĭ nhĭpĕx o pa.

Nē amnhĭ kaxyw Jejus kôt hamaxpĕr tÿx rāhā nē.

Nhŭm mẽ hkwyjaja kot mĕmoj tā tanhmā mẽ homnuj to htā kĕ mẽ arĭ tām amnhĭ nhĭpĕx o pa nē amnhĭ tā tanhmā mẽ ho hkĕt nē.

E kĕr ka ā mĕmy wejjĕ mā ja hā akarō anĕ.

Mĕni wejjaja kot tanhmā amnhĭ nhĭpĕx to kaxyw mẽ hā kām karō

Wam Korĭt 14.34-35; Wam Ximotre 2.9-15, 3.11; Wam Pĕtre 3.1-6

³⁻⁴ Nē mẽni wejjĕ mā anĕ kĕ mẽ kām Jejus kĭnh xāj tām ri amnhĭ nhĭpĕx o pa.

Ja axpĕn jakwa kamā nhām mẽ hixi ho rĕr o pa hkĕt nē.

Nē kagôxyhti ho pipānh o pa hkĕt nē.

Nē mẽ kām anĕ kĕ mẽni xàptār nywjĕ jahkre mex o pa. Mĕ kot mẽ mar nē mẽ urāk nē tām amnhĭ nhĭpĕx kaxyw. Jao mẽ kām mẽ mjĕn nē mẽ hkrajĕ japĕ hā mẽ kām mẽmoj to anhÿr o mẽ kutā nojarĕt rāhā ho pa.

Kĕr ka ā mẽni wejjĕ mā akapĕr anĕ.

Mĕni xàptār nywjaja kot tanhmā amnhĭ nhĭpĕx to kaxyw mẽ hā kām karō

⁵ Nē mẽni xàptār nywjĕ mā anĕ kĕ mẽ tām hamaxpĕr pĕ tām amnhĭ nhĭpĕx o pa.

Nē mẽ òrkwÿ kamā àpĕnh mex o pa.

Nē mẽ mjĕn kapĕr ma nē hkôt amnhĭ nhĭpĕx.

E. Ā mẽni xàptār nywjĕ mā karō anĕ. Koja mẽ ā amnhĭ nhĭpĕx anhÿr o pa hāmri nhŭm mẽ piitā mẽ kot amnhĭ nhĭpĕx ā mẽ omu nē mẽ harĕnh o:

—Tĭrtŭm kapĕrja mex kumrĕx.

Mĕ kot hkôt amnhĭ nhĭpĕx o mẽ pa xwÿnhjaja na htem tām amnhĭ nhĭpĕx mex o pa. Anĕ.

Mĕmy xàptār nywjaja kot tanhmā amnhĭ nhĭpĕx to kaxyw mẽ hā kām karō

Wam Ximotre 4.12; Sikŭn Ximotre 2.22; Wam Pĕtre 5.5

⁶ Nē kĕr ka mĕmy xàptār nywjĕ mā anĕ kĕ mẽ mẽmoj punuj pĕ amnhĭ to htÿx o pa. Mĕ hamaxpĕr punuj nē mẽ kot tanhmā amnhĭ tomnuj to pĕ amnhĭ to htÿx o pa.

⁷ Nē kĕr ka ajaxwÿja tām amnhĭ nhĭpĕx rāhā ho ri mẽ hkôt apa Xitre. Mĕ kot ja hā apumunh nē akôt amnhĭ nhĭpĕx o pa kaxyw. Nom kĕr ka tanhmā mẽ ahkre hto hkwyĕm ri tanhmā amnhĭ nhĭpĕx to hkĕt nē. Ām Tĭrtŭm ā apijaàm o akatāt kôt mẽ kām kapĕr o mẽ ahkre pĕ tām amnhĭ nhĭpĕx o ri apa.

⁸ Nē kĕr ka tām akapĕr rāhā ho ri apa. Kĕr kĕ mẽ kām mẽ pahkurĕ xwÿnhjaja ja hā ama nē amnhĭ kamā hpĭjaàm hāmri nē apĕ Kris kwÿ hā tanhmā ato kapĕr punuj to hkĕt japĕr.

Mĕ kām mẽ àpĕnh xwÿnhjaja kot tanhmā amnhĭ nhĭpĕx to kaxyw mẽ hā kām karō

Epes 6.5-8; Korosĕ 3.22-25; Wam Ximotre 6.1-2; Wam Pĕtre 2.18-25

⁹ Nē kĕr ka mẽ kām mẽ àpĕnh o mẽ pa xwÿnhjĕ mā anĕ kĕ mẽ ò

patrāw kām hprām xà hkôt amnhĩ nhĩpêx o pa.

Jao mẽ kapêr ma nê hkôt amnhĩ nhĩpêx mex nê.

Nê amnhĩ tã tanhmã mẽ kām kapêr punuj to hkêt nê.

¹⁰ Nê kê mẽ kêp mẽmoj to àhkĩnh kêt nê.

Nê tãm mẽ hipêx rãhã nê.

Nê kām hkukrêx jamār mex o pa.

Koja mẽ ã amnhĩ nhĩpêx anhÿr o pa nhũm mẽ õ patrāw amnhĩ tã mẽ omu nê mẽ ý hã hkĩnh nê pa. Hāmri nê hamaxpêr o:

—Hêxta waa nê. Inhmã àpênh xwÿnhnta na hte inhmã àpênh mex o pa. Na hte ixkukrêx nê ixkrit jamār mex nê ixpê mẽmoj to àhkĩnh kêt nê. Nà mẽ kot Tĩrtũm kapêr kôt amnhĩ nhĩpêx o mẽ pa xwÿnhjaja na htem tãm amnhĩ nhĩpêx o pa. Pêr Tĩrtũm kapêr ãm hāmri na. ãm mex o mex. Anê.

E Xitre kêr ka mẽ kām mẽ àpênh xwÿnhjê mã ã mẽ kot amnhĩ nhĩpêx anhÿr ã karõ.

Tanhmã Jejus kām mẽ pajapê xàj amnhĩ nhĩpêx to hã harênh

Epês 2.8-10; Wam Tesarõn 1.9-10

¹¹ Nê Tĩrtũm kot mẽmoj to mẽ pakutã nojarêr rãhã ho pa jakamã na hte mẽ pahte Kra hkôt amnhĩ xunhwÿr xwÿnhjê ho hkra pu mẽ nhÿrmã wa kuri pahtĩr tũm nê papa ho papa. ¹² Na hte ã mẽ pamã kapêr o amnhĩrit anê nê mẽ pamã:

—E kêr ka mẽ apê ixkra hã tãm amnhĩ nhĩpêx rãhã ho ri apa nê axte tanhmã amnhĩ tomnuj to nê tanhmã ajamaxpêr punuj to hkêt nê. Mẽ ate amnhĩ tomnuj pê amnhĩ to htÿx nê ixkapêr kôt pix mã ri amnhĩ nhĩpêx rãhã nê. Anê.

¹³ Na pu htem ã amnhĩ nhĩpêx anhÿr o papa jao pahkĩnh nê mẽ papytār xwÿnh Jejus Kris jamār o papa. Koja nhÿrmã mẽ panhõ Tĩrtũm xihtÿx xwÿnhja akupÿn mẽ pahwÿr kumê pu mẽ mex o mex ã omu.

¹⁴ Na pre Jejus amnhĩ grõnh kôt mẽ pahwÿr wrÿ nê mẽ pahpiitã mẽ pahte amnhĩ tomnuj pãnhã amnhĩrer kaxyw htyk o Tĩrtũm mã amnhĩrer pa. Mẽmo kaxyw na pre ã mẽ panê amnhĩ nhĩpêx anê? Nà mẽ pahpê hkwyja na kām hprām. Nê mẽ pahte tãm ri Tĩrtũm kapêr kôt amnhĩ nhĩpêx o papaja na kām hprām. Nê mẽ pahte urāk nê mẽ piitã mẽ kutã panojarêr rãhã ho papaja na kām hprām. Jakamã na pre ã mẽ panê amnhĩ nhĩpêx anê.

¹⁵ E Xitre. Ixte mẽmoj tã amã karõja kêr ka ho Kris kwÿjê jahkre mex o apa kê mẽ ama nê kapêr kôt amnhĩ nhĩpêx o pa. Nhũm mẽhõ tanhmã amnhĩ tomnuj to ka hã omu nê Tĩrtũm nhÿ hã tanhmã nê kām akapêr to kê axte hkêt nê. Tã mãn ka inhma. Kêr ka ã Kris kwÿjê jahkre mex o apa anê.

3

Tanhmã Kris kwÿ kot amnhĩ nhĩpêx to hã mẽ kām karõ

Rõmãn 13.1-10; Epês 2.1-10

¹ Nê kêr ka Kris kôt akwÿjê mã anê kê mẽ ho amnhĩptār xwÿnhjê kapêr ma nê mẽ hkôt amnhĩ nhĩpêx o pa. Nê mẽmoj to mẽ kutã nojarêr rãhã ho pa.

² Nê mẽ kām anê kê mẽ tanhmã hkwyjê mã kapêr punuj to ho pa hkêt nê. Rÿ mẽmoj tã mẽ kām àkjêr kêt nê. Kê mẽ tãm mẽ hipêx nê mẽ kamã ukapri pê mẽ ho mex rãhã ho pa. Na hte ã Kris kwÿjaja axpên nhĩpêx o pa anê. ³ Kormã mẽ pahte hkôt amnhĩ xunhwÿr kêt ri na pu prem ã amnhĩ nhĩpêx anhÿr kêt nê. Na pu prem Tĩrtũm mã pajamaxpêr kêt nê kapêr kôt ri amnhĩ nhĩpêx hkêt nê. Nê amnhĩ tomnuj pix kukamã pajamaxpêr o ri papa. Nê amnhĩ pix kukamã pajamaxpêr. Jao mẽ pamã pam amnhĩ nhĩpêx prãm xà kôt pix mã tanhmã amnhĩ nhĩpêx to ho ri papa. Nê axpên tomnuj nê. Nê axpên kām pagryk rãhã

ho papa. Ā mẽ pahte amnhĩ nhĩpêx anhÿr ho papa jakamã nhũm pre mẽ piitã kãm mẽ pahkĩnh kêt nê. Pu mẽ pajaxwýja pamã mẽ hkĩnh kêt nê.

*Tanhmã Tĩrtũm kot mẽ pahto mex to hã harênh
Rômãn 5.6-8; Epes 2.4-10*

⁴ Tã pu prem Tĩrtũm kêp mẽ papytãr xwýnh ã harênh ma. Kot tanhmã mẽ panê amnhĩ nhĩpêx to hã harênh ma nê mex o mex nê mẽ pakamã ukaprĩ hã harênh ma. ⁵⁻⁶ Hãmri nê amnhĩ kaxyw hkôt pajamaxpêr nê hkôt amnhĩ xunhwý nhũm amnhĩ tã mẽ pahpumu nê mẽ pahto hkra. Nom mẽ pahte tanhmã amnhĩ to mex to hã mẽ pahpumunh kôt mẽ pahto hkra hkêt nê. Mẽ pahte tanhmã amnhĩ to mex tore hã. Na pre mẽ pakamã ukaprĩ nê ã mẽ papytãr anê. Tã tanhmã na pre mẽ papytãr to wehe? Nã na pre Jejus Kris kukwak ri te kot mẽ pane mẽ pahte amnhĩ tomnuj piitã kuhõnh par pyrãk o mẽ panhĩpêx. Hãmri nê mẽ pahwýr amnhĩ Karõ rê nhũm mẽ pahwýr agiê nê mẽ pamã mẽ pahte amnhĩ nhĩpêx nyw gõ. Ā na pre Tĩrtũm Jejus Kris kot mẽ panê htyk kukwak ri mẽ pahto mex rax anê hãmri nê mẽ pahwýr amnhĩ Karõ rênh anê. ⁷ Tã mẽmo kaxyw na pre ã mẽ pahto mex anê? Nã kãm mẽ pajapê jakamã na pre ã mẽ panhĩpêx anê. Mẽ pahte amnhĩ tomnuj xwýnh tã kãm mẽ pajapê htýx nê kãm tanhmã mẽ pahto hprãm kêt nê. Nê mẽ pahwýr Kra Jejus mẽ nhũm wrý nê mẽ pahte amnhĩ tomnuj pãnhã mẽ panê ty. Jakamã mẽ pahte amnhĩ kaxyw hkôt pajamaxpêr nê hkôt amnhĩ xunhwýr xwýnhjaja Jejus kukwak ri mẽ pahpê Tĩrtũm kraa. Ā na pre Jejus mẽ pahto mex anê. Jakamã kot puj mẽ nhÿrmã Tĩrtũm mẽ wa kuri pahtĩr tũm nê pamex nê papa

ho papa. Koja wa nhÿrmã ã mẽ pahto mex anê.

⁸ Ām hãmri na pa amã ã ja jarênh anê Xitre. Jakamã kwa kêr ka inhma nê inhmar týx nê. Nê ho amnhĩ kaxyw Tĩrtũm kôt mẽ hamaxpêr xwýnhjê jahkre mex o ri apa. Kê mẽ amar xà hkôt tãm ri amnhĩ nhĩpêx o pa.

⁹ Nê mẽ kot htýx ri mẽmoj tã axpên mã àkjêr o mẽ pa xwýnhjaja kêr ka mẽ hkôt apa hkêt nê. Nê mẽ hkukamã mẽ higêt kôt apa hkêt nê. Rý finat Mojes kot Tĩrtũm nhÿ hã kapêr ã axpên mã mẽ àkjêr xwýnhjê hkôt apa hkêt nê. Na htem ã ri axpên mã àkjêr anhÿr o pa nê tãm amnhĩ nhĩpêx kêt nê.

¹⁰ Nê koja mẽ akwýjê hõ amnhĩ krã hkôt tanhmã hkwyjê mã kapêr to nhũm mẽ kuma nê hã axpên mã akir nê axpên pê pikjêr kaxyw. Ka ja hã omu nê ã kapêr anhÿrja nê kãm akapêr kê axte hkêt nê. Hãmri nhũm ama nê ãm ama nê arĩ ã mẽ kãm kapêr anhÿr japêr ka axte nê kãm akapêr. Tã ra ate nê kãm akapêr o axkrut tã nhũm arĩ ã kapêr anhÿr o axkrunêpxi japêr ka ja hã omu hãmri nê mẽ amnhĩ nê hano kê axte mẽ apê Kris kwýjê hkôt ri pa hkêt nê. ¹¹ Ā mẽ kot amnhĩ nhĩpêx anhÿr o mẽ pa xwýnhjaja na mẽ ra Jejus wýr pry kaga nê htýx ri tanhmã amnhĩ tomnuj to ho pa. Nê ã amnhĩ nhĩpêx anhÿr o pa jao kêp Kris kwý hkêt ã amnhĩ to amnhĩrĩt.

Pawre kot kagà jatur xà kamã tanhmã Xitre mã kapêr to

¹² Nê kot paj tokyx ma Nĩkop wýr mō. Kêr pa tokyx hwýr pōj nê amgrã pê krĩ nhõ xwýnhjê hkôt ixpa. Jakamã kot paj tokyx ma awýr Atẽmti rý Xikitre mẽ. Kê mō nê awýr pōj ka tokyx tanhmã amnhĩ to hpa nê man ixwýr mō pu mẽ Nĩkop kamã axpên pumu.

¹³ Nê ota mẽ akuri Apor mẽ axiwōkat Jẽntija. Koja wa mẽmo

arĩgro hã ma krĩ hõ hwỳr nojarêt ka
wa kãm mẽ apkur xà hkwỳ gõ kê
wa ma ÿ kamã mõr kêt nẽ.

¹⁴ Nẽ kêt ka Kris kwỳjê mã anẽ
kê mẽ arĩ õrkwỳ pix kãm hkrĩ ho
hkrĩ hkêt nẽ. Kê mẽ tanhmã axpẽn
to mex to ho axpẽn kôt pa. Nhũm
mẽhõ kêp amrakati kê mẽ tanhmã
ho ajuta hto. Mẽ kãm anẽ kê mẽ ã
axpẽn nhĩpêx anhỳr o pa.

¹⁵ Nẽ ota jar Kris kôt pahkwỳjê
piitã awỳr hpěr mẽ Xitre. Nẽ kêt
ka atar Kris kôt mẽ pahkràmnhwỳjê
mã mẽ ijarẽ.

E ãm ja pix. Kê Pahihti Jejus
mẽ akutã nojarêt rãhã ho pa. Ixpê
Pawre na pa amã ã ixkapěr nẽ hã
kagà nẽ awỳr mẽnh anẽ.

Piremō Pawre kot Piremō hwÿr kagà nē mēnh

Pawre na pre kagàja nhîpêx nē hkràmnhwÿ Piremō hwÿr kumē. Na pre Piremōja amnhîm kām àpēnh xwÿnh Onesti japrō. Kàxpore ho haprō nhûm amarî kām àpēnh o pa. Tā tanhmā hamaxpēr to nē hkaga nē ma umaj krî hō hwÿr hprōt nē tēn amūxu nē kamā pa ho pa. Hāmri nē Pawre pumu nē kām amnhî jarē. Pawre arî kēp prēs nē hkrî ho hkrî nhûm Onesti omu nē kām amnhî jarē. Hāmri nhûm Pawre kām Jejus jarē nhûm kuma nē hkôt amnhî xām kurē kumrēx. Hāmri nhûm Pawre ja hā omu nē hkràmnhwÿ Piremō mā kagà nhîpêx nē kamā Onesti xyr pē kām kapēr. Hāmri nē hipêx pa nē Onesti mā kugō nē ma akupÿm ò patrāw Piremō wÿr kumē nhûm ma mō. Nhûm Pawre kagàja kamā kām kapēr nē kām:

¹ Pa ixkràmnhwÿ Piremō? Xà amex? Ixpê Pawre na pa awÿr kagà nhîpêx nē kumē. Apê Kris kôt ixtō hā inhmā akînh. Na ka hte ixpyrà nē Kris mā tanhmā amnhî nhîpêx to ho apa. Ta ot pa awÿr kagàja kamā ixpēr mē. ² Amā nē anhōrkwÿ kamā Tîrtûm kapēr mar kaxyw mē kēp Jejus kwÿ hā mē pikuprōnh xwÿnhjê hwÿr. Nē Kris kôt pahtōx Apti mē Akip wa hwÿr kumē. Akipja na hte mē pahpyrà nē Pahihti Jejus mā tanhmā amnhî nhîpêx to ho pa.

³ Na pa hte mē ato Mēpanhîpêêxà maati Tîrtûm mē Pahihti Jejus Kris wa hwÿr rāhā ho ri ixpa. Kot mēmoj to mē akutā nojarêt rāhā nhûm wa ÿ hā mē ajamakêtkati nē axāmnhîx apa ho apa kaxyw.

Pawre kot Piremō nhÿ hā hkînh ā harēnh

⁴⁻⁵ Na pa pre ajarēnh ma Piremō. Na htem xatā tanhmā inhmā ajarēnh to nē ajarēnh o:

—Hêxta waa nē. Piremō na hte amnhî kaxyw Pahihti Jejus Kris kôt hamaxpēr tÿx nē kām mē ixpê Kris kôt hkwyjê piitā hkînh pē tanhmā mē ixto mex to ho ri mē ixkôt pa.

Anhÿr o inhmā ajarē pa mē kuma nē anhÿ hā ixkînh nē ato Tîrtûm wÿr rāhā ho ixpa nē ato hwÿr o:

—Pa Tîrtûm. Na xep hte Piremō kām akînh tÿx nē akwyjê ho mex rāhā ho pa. ām hāmri na hte ā mē hipêx anhÿr o pa. ⁶ Na xep mē piitā mē kām tanhmā Jejus kot mē inhnē amnhî nhîpêx to hā harēnh o ri mē hkôt pa. Jakamā kēr ka tanhmā mē kot mar xwÿnhjê hkrā hto kē mēhprî hā mar tÿx nē Kris kot tanhmā mē ho mex to hā amnhî tā omu.

Anhÿr o ato kuwÿ. ⁷ Ate Kris kwÿjê ho mex o apa jakamā te ate pa ixto mex pyrāk Piremō. Na htem anhÿ hā hkînh nē pa. Pa ijaxwÿja ajarēnh ma nē anhÿ hā ixkînh tÿx nē jar mē haggjēnh xà kamā ixkrî.

Piremō kot Onesti kamā ukapri hā Pawre kot kām karō Rômân 15.7; Epes 4.31

⁸ Nà ixte amā mēmoj jarēnhja tanhmā kute hkêt. Kot paj ām amā mēmoj jarē nē hā awÿ. Nom kot paj Kris nhÿ hā amā tanhmā hā karō hto hkêt nē. ⁹ Kot paj ām pahte axpēn to pahkràmnhwÿ hā hā awÿ. Ra ixwej tÿx nē Kris ā arî mē haggjēnh xà kamā ixkrî htā mēmoj tā awÿ ka inhma nē inhmā ho anhÿr japēr ko.

¹⁰ E amā àpēnh xwÿnh Onestija na ixte amā harēnh kaxyw. Na pre man ixwÿr mō. Ixpê prēs nē ixkrî nhûm ixwÿr mō. Pa omu nē kām Jejus jarē nhûm inhma nē pahpyrà nē amnhî kaxyw hkôt hamaxpēr nē hkôt amnhî xām. Jakamā te kēp ixkra pyrāk. Hāmri nē ixto ajuta mex o pa. ¹¹ Xep kormā Jejus kôt

amnhĩ xãm kêt ri na pre amã àpênh mex kêt nê. Nê kãm kaga nê htỳx ri tanhmã àpênh to ho pa. Tã ra Jejus kôt amnhĩ xãm hãmri nê katàt kôt inhmã àpênh mex o pa. Nê ixto ajuta mex nê. Koja akupỳm amã apê hãmri nê amã àpênh mex nê.

¹² Jakamã ot pa akupỳm awỳr kumê ixkràmnhwỳ. Nom inhmã hapê jakamã koja ma akupỳm mỗ pa ho ama nê. Tã kot paj akupỳm awỳr kumê. ¹³ Kot jar ixri arĩk nê apãnhã tanhmã ixto ajuta hto ho paja na inhmã hprãm. ¹⁴ Jakamã kot kaj amã akupỳn ixwỳr mênh prãm nê mãmri ixwỳr amê. Nom ixte ja pumunh kêt. Kam nê amã hprãm xã hkôt tanhmã kãm akapêr to. Kãm anê kê akuri arĩk nê amã àpênh o pa rỳ akupỳn ixwỳr amê. ¹⁵ Nom konên. Mãn akupỳm awỳr mỗr nê kêp Kris kôt akwỳ hã amã àpênh mex kaxyw na pre Tĩrtũm ixwỳr kumê nhũm ixwỳr mỗ nê ixri Jejus kôt amnhĩ xãm nê ixri pa hã mytwrỳ hkwỳ hapêx pa akupỳm awỳr kumê. ¹⁶ Nom ra kêp amã àpênh xwỳnh pix kêt mẫnh nê kêp Kris kôt atỗ. Jakamã kot kaj wa atar axpên kôt Pahihti Jejus kôt tãm amnhĩ nhĩpêx o ri apa. Nom mẫnh nê kêp ixkràmnhwỳ mex ã inhmã hapêê. ¹⁷ Jakamã kot kaj ixpê Kris kôt akràmnhwỳ hã ijarê hã kot kaj mẫnh nê inhmã ho mex o apa.

¹⁸ Nê wam amã àpênh o pata ã mãn pre apê mễmoj to ahkĩ rỳ akaxpore hkwỳ ho ahkĩnh japêr. Tã pa kot paj hpãnhã amã amnhĩre. Ka inhmã tanhmã kaxpore jarênh to pa amã amnhĩre. ¹⁹ Ixpê Pawre kot paj tanhmã kot ato tewên toja pãnhã amã amnhĩre. E pa amnhĩ nhĩhkra ho ã amã amnhĩ jarênh ã kagã anê. Nom ajaxwỳja na ka tanhmã ixto tewên to Piremỗ. Na pa pre amã Jejus kot mễ panê htyk ã harê ka pre inhmar xã hkôt hkôt amnhĩ xãm. Jao ixpyrà nê atĩr tũm nê apa ho apa mã xwỳnhta pãnhã te ate ixto tewên

pyràk.

²⁰ E kwa ixkràmnhwỳ. Ixpyrà nê apê Kris kwỳ jakamã kêr ka ixkamã axukapri hã inhmã Onesti ho mex nê. Kêr pa ja hã ajarênh ma nê ixkĩnh nê tãm ijamaxpêr. ²¹ Nã ra ixte apumunh mex kênã. Kot kaj ixte hã awỳrta kôt hipêx. Ja kaxyw na pa amã kagãja nhĩpêx nê awỳr kumê. Nom kot kaj ãm ja pix ho anhỳr kêt nê. Kot kaj ixte hã awỳrja kôt amnhĩ krã hkôt tanhmã ho mex to. Nã kot kaj ho anê.

Pawre kãm Piremỗ hwỳr mỗr nê omunh prãm ã harênh

²² Nê Tĩrtũm kot mễ awỳr inhmênh kaxyw mễ ate ixto hwỳr o apa jakamã koja apu tokyx ma mễ awỳr inhmê. Jakamã kwa kêr ka ixkutêp tanhmã mễmoj to mex to. Kêr pa mễmo arĩgro hã mỗn awỳr pỏj ka ra ixkutêp tanhmã amnhĩ to hpa nê ãm ixpix kãm ajamak o apa.

²³ Nê ota Epasja awỳr hpêr mễ. Na hte ixpyrà nê Jejus Kris ã mễ hagjênh xã kamã kêp prês nê hkrĩ ho hkrĩ. ²⁴ Nê Makre nê Aristak nê Tễmti nê Rukre mễ awỳr hpêr mễ. Na htem ixpyrà nê Kris mã tanhmã amnhĩ nhĩpêx to ho pa nom ixrom mễ kêp prês kêt.

²⁵ E kê Pahihti Jejus Krisja akutã nojarêr rãhã ho pa. Ta ãm ja pix. Ixpê Pawre na pa amã kagã nê awỳr kumê.

Eprêw Ijaew hwÿr kagà

Kagà ja na pre Ijaew ò amnhĩ kwÿjê mã hipêx nom mẽ pahte hipêx xwÿnh nhĩxi mar kêt. Na pre tanhmã hamaxpêr to nê amnhĩ nhĩxi hã kagà hkêt nê. Apu Pawre rÿ apu axtem mēhōja na pre hipêx. Ijaew kwÿjaja uràk nê Jejus kôt amnhĩ xunhwÿr xwÿnhjê mã na pre hipêx nê mẽ hwÿr kumê. Ijaewjaja mẽ hixi hō pē Eprêw. Jakamã nhũm kagà nhĩpêx xwÿnhja mẽ hwÿr hipêx nê kumê. Nê kamã mẽ kãm mẽmoj jarênh rax nê tanhmã Jejus jarênh to.

Nê mẽ kwÿjaja kwÿjê hkĩnhã kãm Jejus prãm kêt jakamã na prem hkaga nê mẽ kot amnhĩ nhĩpêx tũm o ujanâr prãm xàj tanhmã mẽ homnuj to ho pa. Jakamã nhũm kagà nhĩpêx xwÿnhja tanhmã ja hã mẽ kãm kapêr to.

Nê na pre tanhmã Tĩrtũm nhõrkwÿ kaàkre hã kagà hto. Nê kaxkwa kamã òrkwÿ mexja nhũm tanhmã hã kagà hto nê mex o òrkwÿ kaàkre jakrenh ã harê.

Nê mẽ kot Jejus ã amnhĩ xà htÿx kamã hamak o pa htã mẽ kot tee ri ja hã amnhĩ pumunh nê Jejus kaga nê mẽ hkurê kamã hihtÿx nê. ã mēhōja mẽ kãm kapêr anê nê hã kagà nê mẽ hwÿr kumê. Nê mẽ kãm kapêr o:

¹ Pa Kris kôt ixkwÿjaja? Xà mẽ amex? E ot pa mẽ amã kagà nhĩpêx nê mẽ awÿr kumê. Amnepê m Tĩrtũm na pre mẽ panhĩgêtjê hwÿr ÿ hã kapêr jarênh o ri mẽ pa xwÿnhjê rē nhũm mẽ xatã mẽ kãm kapêr jarênh o ri mẽ hkôt pa. Ahpÿnhã tanhmã mẽ kãm kapêr to ho amnhĩrĩt o mẽ hkôt pa. Nhũm Tĩrtũm xatã mẽ hkanrēhã mẽ hkra nê mẽ htãmnhwÿjê hwÿr mẽ kwÿjê rē nhũm mẽ kãm kapêr

jarênh o ri mẽ hkôt pa. Nom mẽ kãm kapêr piitã harênh kurê kumrêx kêt nê. Na prem ãm kwÿ pix jarê. Tã nhũm hpãnhã mẽ kwÿjaja wamtajê mÿr pē mẽ hwÿr mra nê axte mẽ kãm kwÿ jarênh o ri pa. Jao ra mẽ kãm harênh jatur xãm mēnh o mō, ²⁻³ Tã nhũm Tĩrtũm Kraja mẽ pahwÿr wrÿ nê mẽ pamã kapêr jarênh jatur xãm kumê. Kêp Tĩrtũm Kra jakamã te kot amnhĩ nhĩpêx pyrã nê pa. Uràk nê mex o mex. Nê wa hihtÿx xàja tipxi. Nê wa àhpumunh tÿxja mãânēn tipxi. Jakamã mẽ pahte pano ho Tĩrtũm pumunh kêt tã Jejus pumunh pē te mẽ pahte Tĩrtũm pumunh pyrãk. Uràk nê kot amnhĩ to rax o mẽ pahpiitã mẽ pajakrenh par. Amnepê m kormã mẽmoj kêt ri nhũm Jejus Tĩrtũm kukwak ri mẽmoj piitã ho kator pa. Tã koja Tĩrtũm nhÿrmã kãm mẽmoj piitã òr pa. Kaxkwa kamã mẽmoj piitã nê jar pika piitã hkôt nhũm kãm piitã òr pa.

Nê Jejus xàhpumunh xà pix kukwak ri na mẽmoja arĩ rãhãã. Na pre mẽ panê mẽ pahte amnhĩ tomnuj piitã hpãnhã amnhĩrer par kaxyw mẽ panê ty. Hãmri akupÿm htĩr hãmri nê ma akupÿm kaxkwa hwÿr api. Tĩrtũm xihtÿx o hihtÿx xwÿnhja wÿr akupÿm api. Nê ò krĩ kamã upòk rũm pahĩ maati hkrĩ xà hã kuri hkrĩ ho hkrĩ. Nê ìhkò hã mẽ pahto amnhĩptâr rãhã ho hkrĩ.

Jejus mẽ Tĩrtũm kapêr o mẽ wrÿk xwÿnhjê jarênh

⁴⁻⁵ Nê Jejus kot amnhĩ to rax o Tĩrtũm kapêr o mẽ wrÿk xwÿnhjê jakrenh jakamã na pre ã Tĩrtũm kãm kapêr anê nê kãm:

Na ka amnhĩ to rax o mẽ kot ixkapêr o mẽ wrÿk xwÿnhjê jakre.

Mê kot ìnhmã tanhmã amnhĩ nhĩpêx to ho mẽ pa xwÿnh na mẽ.

No mẽ kurom apê Ixkra kumrêx jakamã amex o ate mẽmoj piitã hakrenh par.

Nê apê pika nhô xwÿnhjê hwÿr ixte amênh mã xwÿnh na ka. Nà apê Ixkra kumrêx.

Kot paj jarâhâ ixpê anhîpêêxà hâ mē piitâ mē kām amnhî to amnhîrît. Pa na ixpê anhîpêêxà.

Anhÿr o Kra Jejus mã kapêr. Na pre kapêr o mē wrÿk xwÿnhjê mã ã kapêr anhÿr kêt nê. Jejus mã pix mã ã kapêr anê.

⁶ Nê koja nhÿrmã akupÿn mē pahwÿr Kra mēnh kaxyw hāmri nê kapêr o mē wrÿk xwÿnhjê mã kām: E ota Ixkrata. Ixkra kumrêx na. Kot amnhî to rax o mē piitâ mē hakrenh par.

Jakamã kêr ka mē apiitâ kutâ arôrôk nê kām mex o mex ã harê.

Anhÿr o mē kām kapêr. ⁷ Nê kapêr o mē wrÿk xwÿnhjê na pre axtem tanhmã mē harênh to nê mē harênh o:

Ixkapêr o mē wrÿk xwÿnhjaja na pa hte nhÿhÿm mē kurê nhÿm htem inhmar xà hkôt ma nhÿhÿm mra nê inhmã tanhmã amnhî nhîpêx to.

Te ixte ma nhÿhÿm kôk nê kuwyja mēnh nhÿm ixkapêr kôt nhÿhÿm môrja pyrâk.

Anhÿr o mē harê. ⁸ No ã Krata jarênh anhÿr kêt nê. Na pre tanhmã kām kapêr to nê amnhî pyrâ nê kêp Tîrtûm ã harê nê kām: Pa Tîrtûm? E ka kot kaj mē ho amnhîptâr rāhâ ho akrî. Nê akatât kôt mē ho amnhîptâ.

⁹ Koja mē tām amnhî nhîpêx ka ja hâ mē omu nhÿm ja amã mex nê.

No koja mē tanhmã amnhî tomnuj to ka ja hâ mē omu nhÿm ja apê omnuj nê. Mē kot tanhmã amnhî tomnuj to ho paja na omnuj tÿx.

Tâ ate inhmã hprâm xà hkôt amnhî nhîpêx jakamã na pa mē kaxyw axâm ka akînh kām mē ho amnhîptâ.

Ixpê anhô Tîrtûm na pa ã amã ixkapêr anê. Anê.

¹⁰ Hāmri nê kām:

Pa Pahihti. Nà amnepê mormã mēmojkêt ri na ka pre ixkukwak ri pika nê kaxkwa ho akato. ãm hāmri na ka pre ã amnhî nhîpêx anê.

¹¹ Tâ nom koja nhÿrmã hamê wa hapêx pa. ãm kaxipix kot kaj kurom arî arāhãã nê aa ajapêx kêt nê.

Kaxkwa nê pika koja wa nhÿrmã te ixkre hâ pô htûm kot amnhî nhîpêx pyrâk.

¹² Kot kaj wa hipêx o te mē kot ixkre nê pô htûm mã hikranh par nê hpānhâ hâ nyw janhôr pyrâk.

Jao pika nê kaxkwa htûm o ajapêx pa nê hpānhâ nyw nhîpêx. Kaxkwa nyw nhîpêx nê pika nyw nhîpêx.

Nom kot kaj pika nê kaxkwa tûmta pyrâ nê aa awej nê axirerek kêt nê.

Kot kaj arî anyw nê axihtÿx rāhâ apa ho apa nê aa ajapêx kêt nê. Arāhâ atîr tûm nê apa ho apa xwÿnh na ka.

¹³ E jar inhîhkô hâ nhÿ nê inhmã mē ho amnhîptâr o akrî.

Kot paj mē kām akurê xwÿnhjê pynênh pa nê man awÿr mē o mra nê anhîhkram mē haxâr pa. Anê.

ã na pre Tîrtûmja Kra Jejus mã kapêr anê. No kapêr o mē wrÿk xwÿnhjê mã ã kapêr anhÿr kêt nê.

¹⁴ E kot paj hpānhâ ixprî hâ mē amã Tîrtûm kapêr o mē wrÿk xwÿnhjê jarê ka mē inhma. Tîrtûm mã na htem tanhmã amnhî nhîpêx to ho pa. Na hte nhÿrmã kuri mē htîr tûm nê mē pa mã xwÿnhjê hwÿr mē kurê nhÿm mē ma mē hwÿr wrÿ nê tanhmã mē ho ajuta hto ho pa. Na htem ã amnhî nhîpêx anhÿr o pa.

2

Mê pahte Jejus kaga hkêt ã mê pamã karõ

¹ Tã ã Tirtümja Kra kot amnhĩ to rax o kapêr o mê wrÿk xwÿnhjê jakrenh ã harênh kot anhÿr jakamã kwa kêr pu mê kapêr mar tÿx rãhã nê hkôt pix mã amnhĩ nhĩpêx o papa. Kot pu mê ho anhÿr kêt hãmri nê gaa nê hkaga. ² Na pre Tirtüm kapêr o mê wrÿk xwÿnhjaja amnepê mã mê panhígêjtjê hwÿr wrÿ nê Tirtüm nhÿ mã mê kot tanhmã amnhĩ nhĩpêx to ho pa mã mê kãm karõ nê ma akupÿm api. Nê katát kôt ri mê kãm Tirtüm kapêr jarênh o pa. Hãmri nhÿm mê kot hkôt amnhĩ nhĩpêx nê mar mex xwÿnhjaja nhÿm mëmoj mê kãm mex nê. No nhÿm mê kot mar nê ãm mar xwÿnhjaja koja mëmoj mê kêp omnuj nê. ³ Koja nhÿrmã mëmoj mê kêp omnuj tÿx kumrêx nhÿm mê tee ri amnhĩ tã omu nê tee ri kêp amnhĩptâr prãm kaprÿ nê mex kêt nê pa. Nom mê kot Tirtüm kapêr mar tÿx xwÿnhjaja koja mëmoj mê kãm mex o mex. Koja Tirtüm amnhĩ katut kôt mê kot amnhĩ tomnuj rênh pa nê axte kãm hamaxpêr kêt nhÿm mê kuri htÿr tÿm nê mex rãhã nê pa ho pa. Na pre Pahihti Jejus mê kot kapêr mar o kuhê xwÿnhjê kumrêx mã ã ja jarênh anê nê mê kãm:

—Nà kot kaj mê amnhĩ kaxyw inhmã ajamaxpêr nhÿm Tirtüm ixtã mê apumu nê mê anê mê ate amnhĩ tomnuj piitã ho hapêx pa nê axte kãm hamaxpêr kêt nê. Anê.

Hãmri nhÿm mê kot kapêr mar nê hkôt mê pa ho mê pa nê xwÿnhjaja mar tÿx nê amnhĩ xô ri mê pamã harênh o ri pa. Nê mê pamã:

—Nà ãm hãmri. Nà ã ja jarênh kot anhÿr. Anê.

⁴ Hãmri nê mê pamã aa mê pahte mëmoj pumunh kêt kwÿ ho anhÿr o ri mê pahkôt pa. Tirtüm Karõ kot ja kaxyw mê ho mê àhpumunh

tÿx jakamã nhÿm mê ÿ mã ahpÿnhã tanhmã mê pamã amnhĩ nhĩpêx to ho pa. Mê pahte ja mã mê omunh nê kamã pano pyma kaxyw. Nê ã mê pajamaxpêr anê nê pajamaxpêr o:

—Nà ãm hãmri na mê pamã ã Jejus jarênh anê nê ÿ mã ã amnhĩ nhĩpêx anhÿr o pa.

Anhÿr o pajamaxpêr kaxyw na prem ã mê pahkôt amnhĩ nhĩpêx anhÿr o pa.

Mê pahpê Jejus tã nê htõx ã mê pajarênh

Juãw 1.14; Rõmãn 8.3-4; Piripos 2.5-11; Korosê 2.9; Wam Juãw 4.2

⁵ Nê na pre Tirtüm amnhĩ kukamã tanhmã amnhĩ jarênh to nê nhÿrmã kot akupÿm mëmoj piitã ho nyw nê tãm mëmoj piitã ho amnhĩptâr o pa mã amnhĩ jarê. No na pre kapêr o mê wrÿk xwÿnhjê mã ã mê kot amnhĩ nhĩpêx anhÿr ã mê kãm karõ hkêt nê. Koja jajaja mê pahto amnhĩptâr o pa hkêt nê. ⁶ Tirtüm kapêr ã kaga htÿm kot ja jarênh kot:

Kwa Tirtüm. Nà ãm hãmri na ka hte pika ja kamã ri mê ixpa xwÿnhjê jamãr mex rãhã ho apa.

Akĩnhã amarĩ ri mê ixpa xwÿnh tã amã mê ijapêê.

Nê mê ixkutã anojarêt rãhã ho apa.

⁷ Na ka hte tanhmã mê inhĩpêx to pa mê te mê ixpê akapêr o mê wrÿk xwÿnhjê pyrãk.

Jao mê urãk nê akukwak ri mê inhmex nê ixpa ho ixpa.

Mê urãn mê ixãhpumunh nê ixihitÿx kêt tã mê inhmex nê ixpa.

⁸ Na ka pre ra ate mëmoj to akator xwÿnh piitã mê inhĩhkram haxã.

Nà ãm hãmri na ka pre ã mê inhĩpêx anê Tirtüm. Amex o amex. Anê.

Na pre ra mëmoj piitã mê panhĩhkram haxã. Pika nê kaxkwa nê kapêr o mê wrÿk xwÿnhjaja nê mëkarõmnuti nê kot mëmoj piitã

hipêxa nhùm mē panhĩhkram haxàr pa. Mē pahte ìhkô hã ho amnhĩptàr o papa kaxyw. No na pu mē kormã piitã ho amnhĩptàr kêt nē. ⁹ No kêt Jejusja na Tirtùm mē pakurom ìhkram mēmoj piitã haxàr par kumrêx. Kormã pika ja kamã ri pare ri na pre tanhmã amnhĩ nhĩpêx to nē Tirtùm kapêr o mē wrÿk xwÿnhjê hkĩnhã te amnhĩ to grire pyrã nē amnhĩ xà htÿx kamã hamak kãm ty. Tirtùm kãm mē pahto mex prãm xaj ã mē pahpiitã mē panê htyk anê. Tã nhùm Tirtùm akupÿm ho htÿr nē akupÿm amnhĩ wÿr ho api nē kêp Pahi Maati mex o mex ã harê. Na pre ã Jejusja mē panê amnhĩ nhĩpêx anê nhùm Tirtùm ja hã omu nē kukwak ri mē pahto mex nē.

¹⁰ Nē Tirtùm kot mēmoj piitã ho kator jakamã mēmoj piitã ò na. Na pre mē pakukamã hamaxpêr o:

—Inhmã ixkra xohtô hprãm. Kot paj nhÿrmã man amnhĩ wÿr mē ho api kê mē ixri mex rãhã nē pa ho pa. Nã kot paj ã mē hipêx anê. Nē Ixkra Jejus koja kêp mē ò Pahihti. Koja mē urãk nē mēmoj punuj pumunh o pa hãmri nē à htÿx kamã hamak o kêp mē ò Pahihti mã tãm. Anê.

¹¹ Na hte Jejus mē panê mē pahte amnhĩ tomnuj rê nē hpãnhã mē pamã mē pahte amnhĩ nhĩpêx nyw jagjê nhùm Tirtùm ja hã mē pahpumunh kôt mē pahto hkra. Kêp Jejus Nhĩpêêxã nē kêp Mēpanhĩpêêxã maati jakamã nhùm Jejusja mē pahpê htô nē mē pahpê htôx ã mē pajarê nē mē panhÿ hã hkĩnh nē.

¹² Tirtùm kapêr ã kagã htÿm ã mē pajarênh kot anhÿr. Kamã Jejusja Mēpanhĩpêêxã maati mã mē pajarênh kot:

Koja ixtô nē ixtôxjaja akapêr mar kaxyw axpên wÿr akuprô pa ma mē hkôt mra nē mē kãm akapêr jarê nē mē ìhkô hã amex ã gre. Anê.

¹³ Hãmri nē kãm:

Kot paj amnhĩ kaxyw akôt pix mã ijamaxpêr mex o ri ixpa. Anê.

Hãmri nē hpãnhã kãm:

Ot pa akrajê hkôt ri ixpa ho ixpa.

Ka na ka pre mē kêp ixtô nē ixtôx kaxyw inhmã mē agô.

Koja mē ixpyrà nē amnhĩ kaxyw amã hamaxpêr rãhã ho pa Tirtùm. Anê.

¹⁴ Nē mē pahpê pika nhõ xwÿnhjaja na pu htem ãm ri panhĩ pix ã papa. Nē panhĩ kamã pahkamrô hã ri papa. Jakamã na pre Jejus kot mē panê htyk kaxyw mē pahwÿr wrÿ nē mē pahpyrà nē ì ho mē pakamã kato. Tã mēmo kaxyw na pre ì ho ì nē mē pahkôt pa? Nã ì ho htyk o Satanasti pê hihtÿx xà ho hapêx par kaxyw na pre ã amnhĩ nhĩpêx anê. Satanasti kêp mē kot amnhĩ tomnuj xwÿnhjê hpãm nē kêp mē htyk xwÿnhjê hpãm.

¹⁵ Jakamã na hte kot mē pahpê ìhkra pikamÿr pyrãk o mē panhĩpêx pu mē ÿ hã pamã pahpyk pyma nē ri papa. Tã ra Jejus kot mē pahwÿr wrÿk nē te kêp mē papytãr pyrãk o mē panhĩpêx jakamã pu mē tee ri pahpyk kukamã pajamaxpêr o ri pamã ma ho papa hkêt nē.

¹⁶ Nē Tirtùm kapêr o mē wrÿk xwÿnhjê ho mex kaxyw na pre Jejus pika hwÿr wrÿk kêt nē. Mē panhĩgêt finat Apraãw pyrã nē mē panhĩ ho panhĩ xwÿnhjê ho mex kaxyw na pre wrÿ. ¹⁷ Ijaew nhõ pãtrejaja na pre htem mē kot amnhĩ tomnuj mÿrapê mē hpãnhã Tirtùm mã mry hkwy pa nē hkamrô kapÿ nē mē ho Tirtùm wÿ. Kot hã mē omunh nē mē mex ã mē harênh kaxyw. Tã nhùm Jejus wrÿ nē mēmo mryta pyrã nē ã mē panê hkamrô pikapÿr anê. Kaxyw na pre mē pahpê maati mē pahwÿr ì ho ì nē wrÿ nē mē pahpyrà nē ni nhõhy rùm kato. Jao kêp mē pahto Tirtùm wÿr xwÿnh maati. Na pre Tirtùm kãm hprãm xà hkôt mē panê mē pahte amnhĩ tomnuj

pãnhã amnhîrer pa. Tã kot mẽ pahpyrà nê mẽmoj punuj pumunh nê amnhî xà htỳx kamã hamak o pa jakamã kêp mẽ pakamã ukaprí xwỳnh ã pixi mex na. ¹⁸ Kormã htỳk kêt ri na pre mẽ pahpyrà nê omnuj nê ri pa. Nhũm mẽkarõmnuti nhõ pahi kot tanhmã amnhî tomnuj to hprãm xàj tee ri hkôt kãm ahkrox o pa hkapyrỳ nhũm hkôt amnhî nhĩpêx kêt nê amnhî nê ho axtem nê. Jakamã koja Satanas-tija urak nê tanhmã mẽ panhĩpêx to nhũm Jejus mẽ pahtã omu nê amnhĩ pyrà nê tanhmã kêp mẽ panhĩpêx to pu mẽ ý hã kutã amnhĩ to htỳx nê papa.

3

Jejus kot amnhĩ to rax o Mojes jakrenh ã harênh

Juãw 1.17-18

¹ E ixkrãmnhwỳjaja. Ra Tĩrtũm kot mẽ pahte kapêr mar nê tãm amnhĩ nhĩpêx o ri papa kaxyw mẽ pahto hkra jakamã kwa kêr ka mẽ Jejus kot tanhmã mẽ pamã amnhĩ nhĩpêx toja mã ajamaxpêr rãhã ho ri apa. Na pre Tĩrtũm mẽ pahwỳr kumê nhũm mẽ pahwỳr wrỳ nê Tĩrtũm kapêr o mẽ pajahkre ho ri mẽ pahkôt pa. Nê te kêp mẽ panhõ patre pyrà nê mẽ pahto Tĩrtũm wỳr o pa. ² Na pre Tĩrtũm finat Mojes kwỳ kaxyw Mojesja xãm nhũm kãm hprãm xà hkôt tanhmã mẽ hipêx to ho pa. Tã nhũm hpãnhã mẽ pakaxyw Kra Jejusja xãm nhũm Mojes pyrà nê Tĩrtũm kãm hprãm xà hkôt pix mã tanhmã mẽ panhĩpêx to ho pa. Hamê na pre wa Tĩrtũm jamaxpêr xà hkôt tanhmã kãm mẽ panhĩpêx to ho pa.

³ Koja mẽhõ amnhĩm ixkre mex nhĩpêx nê hipêx pa nhũm hkwỳjaja hwỳr mra nê omu nê mex kumrêx ã harê. Nom kot hipêx xwỳnhnta àhpumunh xà hkôt hipêx jakamã tãm na mex o kot ixkreta jakrenh. Ja pyrà nê finat Mojes kot amnhĩ to

rax tã nhũm Jejus kot amnhĩ to rax o kot hakrenh. Mojes te kêp ixkre nhĩpêxta pyràk no Jejus te kêp ixkre nhĩpêx xwỳnhnta pyràk jakamã kot amnhĩ to rax o kot Mojes jakrenh.

⁴ Nê mẽ kot ahpỳnhã amnhĩ krã hkôt tanhmã ixkre nhĩpêx to jakamã kot hipêx xwỳnhnta na mex o ixkreja jakrenh. Tã ja pyrà nê Tĩrtũm kot mẽmoj piitã ho kator jakamã kot amnhĩ to rax o kot mẽmoj piitã ho kator xwỳnh jakrenh par.

⁵ Nê finat Mojes na pre hte Tĩrtũm kãm hprãm xà hkôt tanhmã amnhĩ nhĩpêx to ho pa. Nê ma kãm hkwỳjê piitã hkôt mẽ kãm kapêr jarênh o ri pa. Tĩrtũm tanhmã kot mẽ kãm kapêr tota kukamã nhũm mẽ kãm harênh o mẽ hkôt pa. No ãm Tĩrtũm mã tanhmã amnhĩ nhĩpêx to ho hpa xwỳnh pix na pre.

⁶ Nê Kris haxwỳja na pre hte Tĩrtũm kãm hprãm xà hkôt tanhmã amnhĩ nhĩpêx to ho pa. Nom Mojes rom kêp Tĩrtũm Kra kumrêx jakamã kurom kêp mẽ panhõ Pahihti kumrêx. Tã kwa kêr pu mẽ kãm hprãm xà hkôt pix mã tanhmã kãm amnhĩ nhĩpêx to ho ri papa. Mẽ kot hã tanhmã mẽ panhĩpêx to htã pu mẽ ý hã mẽ kutã amnhĩ to htỳx nê papa nê pajamaxpêr o:

—Nã ixpunuj nê ixpa htã kot paj ixpunuj rãhã ixpa ho ixpa hkêt nê. Koja nhỹrmã Tĩrtũm ixto mex kumrêx pa axte tanhmã ixpunuj to nê ixpa hkêt nê. Hêxta waa nê. Nã ja inhmã hprãm tỳx kumrêx.

Anhỹr o amnhĩ kukamã pajamaxpêr o papa.

Mẽ pahte Tĩrtũm kaga hkêt ã mẽ pamã karõ

Wam Korõt 10.1-11; Jutre 5

⁷⁻⁸ Amnepêm na pre mẽhõja tanhmã Tĩrtũm Karõ nhỹ hã kapêr to nê kapêr o:

E kêr ka mẽ Tĩrtũm kapêr mar tỳx o apa.

No ama nê ãm ama nê ri hã apa hkêt nê. Rÿ kapêr pê akra hihtÿx o apa hkêt nê.

Mê akukamã mê anhîgêjtaja na prem ã amnhî nhîpêx anê nê Tirtûm kapêr pê hkrã hihtÿx o pa. Kapôt ã Mojes kôt mê pata ã na prem kãm Tirtûm kapêr mar prãm kêt nê. Nê tee ri amnhî kukamã hamaxpêr nê akupÿm Ejit wÿr hkrã nê axpên mã: “Kwa na pu mê ra pahpunuj tÿx nê papa nhûm Tirtûm ãm ja hã mê pahpumu nê tanhmã mê pahto mex to hkêt nê. Mãn ra mê pahkaga nã? E kwa pu mê awjanã nê ma akupÿm Ejit wÿr mãn papa.” Anê.

⁹⁻¹⁰ Na prem ã axpên mã kapêr anhÿr o ri pa hã amgrã pê 40.

Tirtûm xatã kot tanhmã mê ho mex to nhûm mê kot amnhî tã omunh tã ãm omu nê htÿx ri amnhî hkrã hkôt pa.

Nhûm tee ri amnhî tã mê omu nê mê kamã gryk nê.

Hãmri nê hamaxpêr o: “Nã pêr mê hamaxpêr kot mê hã hkwÿ jêt kêt kumrêx. Te mê hamak kre hkêt pyrã nê ixkapêr mar kêt nê.” Anhÿr o hamaxpêr.

¹¹ Hãmri nê mê kãm: “E mê inhma. Æ mê ate amnhî nhîpêx anhÿrja mÿrapê kot kaj mê ma ixte mê amã pika mex nhôr mã xwÿnhta wÿr apa hkêt nê.” Anhÿr o mê kãm kapêr. Anê.

Æ mêmôja Tirtûm Karô nhÿ hã te Tirtûm tãm kot mê kãm kapêr pyrãk o mê harênh anê. ¹² Jakamã kwa mê okora ixkrãmnhwÿjaja. Kêr ka mê amnhî to mex o apa. Tirtûm kêp Mêpahpãm ã pixi mex tã kot kaj mê tanhmã ajamaxpêr punuj to rÿ amnhî kaxyw hkôt ajamaxpêr kêt hãmri nê te ate amnhî katut kôt ãm pyrãk o hipêx nê hkaga. Kwa mê ã amnhî nhîpêx anhÿr kêt nê. ¹³ Kêt

mê Kris kôt axpên to axihtÿx o ri apa. Nê apkati mê ã axpên nhîpêx anhÿr rãhã nê. Kot kaj mê anhÿr kêt hãmri nê mê amã Tirtûm kapêr mar prãm kêt ã amnhî to amnhÿrit. Jao tanhmã amnhî tomnuj to ho ri apa nê atÿx ajamaxpêr o: —Nã ixte ã amnhî tomnuj anhÿr tã nhûm Tirtûm ja hã ixpumu nê ãm hã ixpumu.

Anhÿr o ajamaxpêr japêr. Rÿ mê ajamaxpêr o:

—Nã na pa hte ã amnhî tomnuj anê nhûm Tirtûm ja hã ixpumu nhûm ja kãm mex nê.

Anhÿr o ajamaxpêr japêr. ¹⁴ Kwa mê ri ã ajamaxpêr anhÿr kêt nê. Amnepê mã mê pahte Kris kôt amnhî xunhwÿr nhûm kot mê pahto hkrata ã na pu prem amnhî kaxyw hkôt pajamaxpêr o papa. Tã kêr pu mê arã ã amnhî nhîpêx anhÿr tÿx o papa rãhã ty. ¹⁵ Tirtûm kapêr ã kagã htûm kot ja jarênh kot:

E kêr ka mê Tirtûm kapêr ma nê mar tÿx nê.

No ama nê ãm mar nê ri hã apa hkêt nê.

Rÿ mê kot hkaga xwÿnhjê pyrã nê kêp akra hihtÿx kêt nê. Anê.

¹⁶ Mê panhîgêjtaja na prem Mojes kôt pika pê Ejit rûm kato nê hkînh nê ma kapôt ã kormã pika mex wÿr pa. Nom Tirtûm kapêr mar nê hkôt amnhî nhîpêx rãhã hkêt nê. Na prem kuma nê hkôt amnhî nhîpêx o hã apkati grêre htã ra mêmoy nhÿ hã omnuj nê pa hã amnhî pumu nê tee ri amnhî kukamã hamaxpêr.

¹⁷ Jao xatã kapêr nhîrôp kuhê nê amnhî hkrã hkôt pix mã amnhî nhîpêx o pa ho ra hã amgrã pê 40. Hãmri nhûm tee ri amnhî tã mê omu nhûm ja kêp omnuj nê. Jakamã nhûm mê piitã kapôt ã ri pa nê gaa nê pikaprãr pa. ¹⁸ Mê kot kapêr mar kêt jakamã nhûm mê kãm:

—Nã ã mê ate amnhî nhîpêx anhÿr o ri apaja mÿrapê kot kaj mê

ixte mē amā mē amex nhōr mā xwŷnh̄ta wŷr apa hkêt nē. Anē.

¹⁹ Tā mē kot amnhī kaxyw Tīrtūm kôt hamaxpēr o pa hkêt jakamā na prem pika mexta wŷr hpôx kêt rāhā pikaprār pa. Nhūm mē hkra nē mē htāmnhwŷjē pixjaja na prem mē mŷr pē hwŷr pōj nē kamā pa.

4

Mē pahte Tīrtūm kukwak ri paja-makêtkati nē ri papa hā mē pajarēnh

¹ Mē pahte Tīrtūm kukwak ri pajamakêtkati nē ri papa ho papaja Tīrtūm kām hprām jakamā kwa kēr pu mē amnhī pumunh mex o papa. Nē wam mē panhīgēt rom Tīrtūm kapēr mar tŷx nē hkôt mān kêt ri amnhī nhīpēx mex rāhā nē. Kēr pu mē kurom mē pajamak kām amnhī krit xā hā pika mexta wŷr pōj. ² Mē kot mē pahpyrā nē Tīrtūm kapēr mar mex tā na htem amnhī kaxyw hkôt hamaxpēr kêt nē. Te mē kot mar kêt pyrāk. ³ Ām mē kot amnhī kaxyw Kris mā hamaxpēr xwŷnh̄ pixjaja na htem kukwak ri hamakêtkati nē ri pa ho pa. Amnepē mā mēmoj piitā hkêt ri na pre Tīrtūm mēmoj piitā ho kator pa hāmri nhūm apkati nhūm axte mēmoj tā àpēnh kêt nē. Ām ō krī kamā arī hamakêtkati nē hkôkôt o hkrī. Tā mē pahte urāk nē pajamakêtkati nē papa ho papaja na kām hprām. No wam ri mē pa xwŷnh̄jaja mē kot amnhī tomnuj mŷrapē na pre Tīrtūm mē kot urā nē hamakêtkati nē paja nē mē hkurē. Kapēr ā kagā htūm kot harēnh kot: Na pre Tīrtūm tee ri amnhī tā mē kot hipēx ā mē omu nhūm ja kēp omnuy nē. Hāmri nhūm mē kām: “Nà kot kaj mē ixkukwak ri axāmnhīx ajamakêtkati nē apa hkêt nē.” Anē.

⁴ Nē kot harēnh kot:

Na pre Tīrtūm àpēnh ā arīgro kēp
6 hāmri nhūm arīgro pē 7ta
ā nhūm axte mēmoj tā àpēnh

kêt nē. Na pre arī hkôkôt o nhŷ.

Arīgro pē 7 ā arī hamakêtkati nē hkôkôt o nhŷ. Anē.

⁵ Nē mē kot kapēr mar nē ām mar xwŷnh̄jē jarēnh kot:

Kot kaj mē aa ixkukwak ri axāmnhīx nē ajamakêtkati nē apa hkêt nē. Anē.

⁶ Mē panhīgētjaja kot amnhī kaxyw Tīrtūm kôt hamaxpēr kêt jakamā na prem hamakêtkati nē ri pa hkêt nē. Tā mē papajaja na Tīrtūm arī kām mē paxāmnhīx nē pajamakêtkati nē papa hprām.

⁷ Amnepēm Ijaew Tīrtūm kôt hamaxpēr kêt jakamā na prem kapôt ā pikaprār pa. Hāmri nhūm amgrā xohtō nē hapēx nhūm Tīrtūm mē hkanrēhā mē htāmnhwŷjē hō pē finat Tawija mā kapēr nhūm kuma nē mē pamā tanhmā kapēr tota ā kagā nē hā kagā kot:

Kwa kēr ka ixkapēr ma nē mar tŷx nē.

No mē anhīgētjē pyrā nē akrā hitŷx ho inhma nē ām inhmar kêt nē. Anē.

Na pa pre ra mē amā ā ja jarēnh anē. ⁸ Na pre finat Jojueja finat Mojes mŷr pē ma pika pē Kanaā hwŷr mē hkanrēhā mē hkrajē o pa nē hwŷr mē o pōj. Tā nhūm prem Jojue kukwak ri hamakêtkati nē pa ho pa hkêt nē. Kēp ām kukwak ri ā amnhī nhīpēx anhŷr ronhŷx Tīrtūm axte mē kām mē hamakêtkati nē mē hamak kām amnhī krit nē mē pata hkukamā harēnh kêt nē. ⁹ Nom mē pahte kukwak ri pajamakêtkati nē pajamak kām amnhī krit nē ri papa ho papaja na Tīrtūm arī kām hprām. ¹⁰ Na pre arīgro pē 6ja ā mēmoj piitā ho kator pa nhūm apkati nhūm hamakêtkati nē hkôkôt o nhŷ. Tā kot puj mē pahpē hkrajaja amnhī to kuwŷ nhūm tanhmā mē pahkrā hto pu mē kukwak ri urāk nē paxāmnhīx nē pajamakêtkati nē papa ho papa. Te Tīrtūm àpēnh

pa nhùm apkati nhùm hamakêtkati nê hkôkôt o ýrta pyrâk. ¹¹ Jakamã kwa kêr pu mẽ amnhĩ to kuwý kê ã mẽ panhĩpêx anê pu mẽ urâk nê ã amnhĩ nhĩpêx anhÿr rãhã ho papa. Nom kot pu mẽ pahkwý Ijaewjê pyrã nê kapêr kwým amnhĩ nhĩpêx o papa hãmri nê mẽ urã nê paxãmnhĩx pajamakêtkati nê papa hkêr nê.

Tĩrtũm kapêr te kot wapo xwa gix pyrãk ã harênh

¹² Nê Tĩrtũm kapêrja te ĩ ho tanhmã kot mẽmoj to kaxyw hihtýx pyrãk. Nê te wapo xwa gix pyrãk. Koja mẽhõ õ wapo xwa mex nê ho mẽmoj jakàr mex nê. Ho mry hi jakàr mex pê kaxwýnh kãm hi kanhĩn o amnhĩrĩt. Ja pyrã nê na hte Tĩrtũm kapêr mẽ pajamaxpêr o amnhĩrĩt nê mex ã harê rý omnuj ã harê.

¹³ Nê na htem Tĩrtũm pê mẽmoj to pimxur kêt nê. Na hte hprĩ hã mẽmoj piitã omunh pa. Nê mẽ pajamaxpêr kôt mẽ pahpumunh pa. Na pu htem ã kot mẽmoj piitã omunh par anhÿr xwýnhja noo mã tanhmã amnhĩ nhĩpêx to rãhã ho papa.

Jejus kêp mẽ panhõ patre maati hã harênh

Eprêw 10.19-25; Wam Juãw 2.1-2

¹⁴ Nê Ijaew nhõ patrejaja na pre htem Tĩrtũm mã amnhĩ jarênh xã hã ixkre hwýr agjê nê kamã mẽ ho Tĩrtũm wýr o pa. Ja pyrã nê na pre ra Jesus Tĩrtũm nhõ krĩ hwýr api nê kamã mẽ pahto hwýr o hkrĩ. Kêp Kra kumrêx jakamã kêp mẽ pahto Tĩrtũm wýr xwýnh maati. Jakamã kwa kêr pu mẽ amnhĩ kaxyw hkôt pajamaxpêr týx rãhã ho papa. ¹⁵ Satanasti na pre te kot mẽ panhĩpêx pyrãk o Jesus nhĩpêx. Nê tee ri kot tanhmã kãm kapêr to nhùm kot mar nê tanhmã amnhĩ tomnuj to hprãm xãj ãm ri kãm ahkrox kaprý nhùm kutã amnhĩ to htýx nê hkôt amnhĩ nhĩpêx kêt nê. Tã kot Satanasti

kot amnhĩ nhĩpêx ã omunh mex jakamã na hte kêp mẽ pahpãmopxar mex o pa. Kot mẽ paxirerek kôt mẽ pahpumunh mex. ¹⁶ Jakamã kwa kêr pu mẽ amnhĩ tã kamã pahpijaam kêt kãm paxãmnhĩx ri amnhĩ to hwýr o papa. Kêp mẽ pakutã nojarêt xwýnh nê kêp mẽ pakamã ukaprĩ xwýnh jakamã kêr pu mẽ tee ri mẽmoj tã amnhĩ pumu nê amnhĩ to hwýr kurê kumrêx. Hãmri nê ý hã paxãmnhĩx nê pajamakêtkati nê ri papa.

5

¹ Nê mẽ panhõ patre maati Jejusja Tĩrtũm na pre mẽ pakaxyw ãm. Kêp mẽ pahkwý hã mẽ pakaxyw ãm nhùm hte mẽ pahto Tĩrtũm wýr o pa. Nê kãm mẽ pahkĩnh xã nhõr o pa. Kot ja hã mẽ pahpumunh nê mẽ pahte kapêr kwým tanhmã amnhĩ nhĩpêx to ho papa hã mẽ pakamã gryk o hapêx tokyx anhÿr kaxyw.

² Mẽ panhĩgêjtaja na pre htem mẽ õ patre maati hwýr mra nê kãm tanhmã amnhĩ tomnuj to hã amnhĩ jarê nhùm mẽ kuma nê mẽ kamã ukaprĩ nê. Mẽ urã nê kormã kot Tĩrtũm kôt amnhĩ nhĩpêx totuj anhÿr jakamã na pre mẽ kot tanhmã amnhĩ jarênh toja ma nê mẽ kamã ukaprĩ nê. ³ Hãmri nê mẽ hpãnhã Tĩrtũm mã mẽmoj gõ nê mããnhên amnhĩ pãnhã kãm mẽmoj gõ. Mẽ urãk nê kot amnhĩ tomnuj o paja mýrapê amnhĩ pãnhã kãm mẽmoj gõ. ⁴ No na pre hte patrejaja amnhĩ krã hkôt kêp patre maati kaxyw amnhĩ xunhwýr kêt nê. Tĩrtũm kot mẽ kaxyw mẽ unhwýr jakamã na pre mẽ kaxyw finat Arãwja xãm nhùm kêp mẽ õ patre maati hã mẽ ho Tĩrtũm wýr o pa.

⁵ Nê Kris haxwýja kêp mẽ panhõ pahi maati hã tãm kot amnhĩ xãm kêt. Tĩrtũm na pre mẽ pakaxyw ãm nê tanhmã kãm kapêr to nê kãm: Nã apê Ixkra na ka.

Kot paj jarähâ ixpê Anhîpêêxâ hä më kãm amnhî jarê. Anê.

⁶ Nê hpãnhâ kãm:

Kot kaj Mekijetek pyrã në apê patre maati hä më ho ixwÿr rãhã ho ri apa. Anê.

⁷ Jejus kormã pika ja kamã pa ri na pre amnhî to Tirtûm wÿr rãhã ho pa. Tôhã hkaprî në tee ri mëmoj tâ amnhî pumu në amnhî to kuwÿ. Nê tee ri më kot hpîrta kukamã hamaxpêr në mÿr kãm amnhî to kuwÿ. Kop apu Tirtûm kãm më kot kêp hpîr prãm kêt ronhÿx pre tanhmã në më kãm hkurê xwÿnhjê ho nhûm më hpîr kêt në. Jakamã nhûm pre ã amnhî to hwÿr anê. No ãm Tirtûm kãm prãm xã hkôt kãm amnhî nhîpêx prãm jakamã nhûm kuma no ãm tanhmã në më ho hkêt nhûm prem kupî. ⁸ Kêp Tirtûm Kra kumrêx tâ amnhî xã htÿx kãm hamak kãm ty. Jao Tirtûm kãm hprãm xã hkôt amnhî nhîpêx ã amnhî pumunh mex në. ⁹ Na pre amnhî xã htÿx kãm hamak o amnhî mex o amnhî mex ã më kãm amnhî to amnhîrît. Jakamã na hte më kot kapêr kôt ri amnhî nhîpêx o më pa xwÿnhjê mã më kot amnhî nhîpêx nyw jagjê në nhÿrmã Tirtûm më wa kuri më htîr tûm në më pa mã xwÿnhjê hä më harê. ¹⁰ Jakamã na pre Tirtûm Mekijetek pyrã në kêp patre maati kaxyw ãm.

Më pahte Kris kaga në më pahkurê

Wam Korîť 3.1-2, 13.11, 14.20; Epes 4.11-16

¹¹ Nê Jejus kêp më pahto Tirtûm wÿr xwÿnh maati hä harênhja inhmã ixprî hä më amã harênh par prãm tâ ka më kormã inhmar tÿx kêt në. Pa tee ri ixprî hä më amã harênh kaprÿ. Te më amã mar prãm kêt o amôr pyrãk. ¹² Amnepê mã më ate Kris kôt amnhî xunhwÿr në kapêr mar tÿx tâ kormã nhãm amnhî xô ri ho amnhî kwÿjê jahkre ho ri apa hkêt në. Te më ate hä ano

hkêt pyrãk jakamã na pa hte arî më amã kapêr kot amnhîrît mex xwÿnh kwÿ ho më ajahkre ho pa. No kot amnhîrît mex kêt xwÿnh o më ajahkre hkêt në. Te më hkarãre kot amnhî nhîpêx pyrãk o na ka htem amnhî nhîpêx o apa. Na hte më hkarãre mëo mex kur kêt në. ãm kormã katorxã hkã pix kaô. Ja pyrã në ãm Tirtûm kapêr kot amnhîrît mex xwÿnhnta pix na ka më mar tÿx o apa nom kapêr kot amnhîrît mex kêt xwÿnhja ka më mar mex kêt në.

¹³ Nê më hkarãre kormã Tirtûm kapêr mar kêt jakamã na htem kormã mëmoj mex në mëmoj punuj pumunh kêt në. Tã te më ate më kot amnhî nhîpêx pyrãk.

¹⁴ Më kot Tirtûm kapêr mar mex xwÿnhjaja na htem hprî hä kapêr piitã mar tÿx në. Kot amnhîrît mex xwÿnhnta mar tÿx në mãânên kot amnhîrît mex kêt xwÿnhja nhûm mëhprî hä piitã mar tÿx në. Te ho më ãptãr kot mëo mex kur o pata pyrãk. Jao ra më ãptãr jamaxpêr o hamaxpêr o ri pa në hamaxpêr o:

—Kot paj tãm amnhî nhîpêx o ri ixpa nhûm ja inhmã mex në. Nom kot paj axtem tanhmã amnhî tomnuj to nhûm ja ixpê omnuj në. Jakamã kot paj tãm amnhî nhîpêx pix o ri ixpa nhûm Tirtûm mã ja mex në. Anê.

6

¹⁻² Na pu prem ra Tirtûm kapêr kot amnhîrît mex xwÿnhnta kwÿ ma. Tãm na ja:

Kris kot më panê tanhmã amnhî nhîpêx to hä harênhja.

Nê më pahte amnhî tomnuj kaga hä kot më pamã karôja.

Nê amnhî kaxyw Tirtûm kôt më pajamaxpêr ã më pamã karôja.

Nê më pahpê Tirtûm kra hä amnhî to amnhîrît kaxyw më kot më pahkrã kumrãr ã pamã karôja.

Nê mē pahte Tirtūm mā tanhmā amnhī nhīpêx to ho papa hkukamā mē kot mē pahkrā hā ihkra jaxwÿr nê mē pahto Tirtūm wÿr ā mē pamā karōja. Nê mē pahtyk nê akupÿm mē pah-tÿr ā mē pajarēnhja.

Nê Tirtūm kot nhÿrmā mē kot amnhī xà htÿx kām hamak tūm xà hwÿr mē kēp hkra hkēt xwÿnhjê janorja.

Mēmoja piitā pu mē ra harēnh mar tÿx nê. Prī hā kot amnhīrit mex. Tā kwa kêr pu mē hpānhā hijuk ri kot amnhīrit mex kêt xwÿnh kwÿ ma. Jao mē pahpê Tirtūm kra xāptār mex nê ri papa. ³ Jakamā kwa kêr pu mē kot amnhīrit mex xwÿnh kumrêx kwÿ ma nê hpānhā hijuk ri kot amnhīrit mex kêt xwÿnh kwÿ ma. Nê axpēn mā harēnh rāhā ho ri papa. Nā koja Tirtūm kām ja prām pu mē ā amnhī nhīpêx anhÿr rāhā o ri papa.

⁴⁻⁶ Na pre ra mē pahkwÿjaja Kris kaga nê htÿx ri amnhī nhīpêx o pa. Mē kot kapêr mar tÿx tā axtem nê hkaga jakamā koja mē axte kapêr mar kêt nê. Ra mē kām mar prām kêt. Kot puj mē tee ri axte mē kām harēnh o papa kaprÿ. Na prem hprī hā kuma. Tirtūm kām mē ho hkra hprām ā harēnhja nhūm prem hprī hā kuma nê kām mar prām nê hkôt amnhī xunhwÿ. Hāmri nhūm Tirtūm Karō te mē panhīpêx pyrā nê mē hkarō mā agjê nê mē kot amnhī to mex o pa kaxyw tanhmā mē hkrā hto nhūm prem ŷ hā tanhmā kām amnhī nhīpêx to ho pa. Nê kām Tirtūm kapêr mar prām nê. Nê axpēn mā mex o mex ā harēnh o pa. Nê aa mē kot mēmoj pumunh kêt kwÿ pumu nê axpēn mā harēnh o:

—Nā Krisja ām hāmri āhpumunh tÿx o āhpumunh tÿx. Kōja nhÿrmā akupÿn mē pahwÿr wrÿ nê axte mē pamā āhpumunh tÿx o amnhīrit pu mē omu.

Anhÿr o kapêr tā tanhmā hamaxpêr to nê hkaga. Jakamā te mē kot axte Tirtūm pē Krata pī hā nhôr nê hprÿ pyrāk. Nê te mē piitā mē noo mā tanhmā haprÿ hto nê tanhmā kām kapêr punuj to pyrāk. Jakamā kot pu mē tee ri akupÿm tām mē unhwÿr prām kaprÿ.

⁷ Na hte Tirtūm mē pahto mex rāhā ho pa. Jao mē pamā mē pahpur ā na rē pu mē kamā panhō rūnh nê. Jakamā mē kot amnhī kaxyw Kris kôt hamaxpêr nê hkôt amnhī xunhwÿr prām xwÿnhjaja te mē hpur mex nê kamā mēmoj ô rūnh pyrāk. Nê urāk nê amnhī to mex o pa. ⁸ Nom koja mē hpur kām mēmoj nhīgrôt mex kêt japêr. Kamā mrônhi nê kahpare nê mēmoj punuj pix hapôj nhūm mē tee ri omu nê hkaga kurê kumrêx. Tā mē kot Kris kaga xwÿnhjaja te pur punuj kot amnhī nhīpêxta pyrāk nhūm Tirtūm te kēp pur nhō dôn pyrāk. Jao tee ri amnhī tā mē kot amnhī nhīpêx ā mē omu nê mē hkaga kurê kumrêx nê ma mē kot amnhī xà htÿx kām hamak tūm xà pē kuwyta wÿr mē rēnh pa.

⁹ E ixkrāmnhwÿjaja. Inhmā mē akīnh jakamā na pa ā mē amā mē kot Kris kaga xwÿnhjê jarēnh anê. Nom te mē ate mē urāk kêt. Kris kôt mē ate amnhī xunhwÿr xwÿnh mex na ka mē. Ra mē ate hkôt amnhī xunhwÿr tÿx jakamā te mē apê pur mexta pyrāk. ¹⁰ Na ka htem Kris kôt mē akwÿjê ho mex o ri apa. Te mē amā amnhī tā ma pyrāk o axpēn nhīpêx o ri apa nhūm Tirtūm ja hā mē apumu. Tā koja tanhmā ja hā mē ato mex to. Kot tām mē panhīpêx o pa jakamā koja tanhmā mē ate axpēn nhīpêx mex tota ā tanhmā mē ato mex to.

¹¹ Tā kêr ka mē arī ā axpēn nhīpêx anhÿr o ri apa rāhā ty kê nhÿrmā ja hā mē ato mex nê. Ā mē ate amnhī nhīpêx anhÿr o apaja na inhmā hprām tÿx kumrêx. ¹² Kot kaj mē ā amnhī nhīpêx anê hāmri nê amā

kaga nê apa hkêt nê. Nê amnhî nhîpêx o te Tîrtûm kra hkwy htyk xwýnhjaja kormã htîr ri kot amnhî nhîpêxta pyrãk. Na prem amnhî kaxyw Tîrtûm mã hamaxpêr tÿx rãhã ho pa. Kot mê ho mex ã mê hã amnhî jarênhja nhûm prem amnhî tã kamã hamak rãhã ho pa. Tã amnhî tã kamã hamak o pa ry rax rãhã ty nhûm Tîrtûm ra kot mê hã amnhî jarênh xà hkôt mê ho mex nê. Tã kêr ka mê urãk nê ã amnhî nhîpêx anhÿr o ri apa rãhã ty. ¹³⁻¹⁵ ã na pre finat Apraãwja amnhî nhîpêx anê. Kormã hkra hkêt tã nhûm Tîrtûm kãm hkra nê kanrêhã htãmnhwÿjê hkukamã tanhmã mê harênh to nê kãm:

—Pa Apraãw. E inhma. Kot paj aprô mê war ato mex nê. Kot kaj war akra hãmri nê gaa nhûm akanrêhã war atãmnhwÿjaja ohtô rax kumrêx. ãm hãmri na pa ã mê hkukamã amã mê harênh anê. Kot paj amã amnhî jarênh xà hkôt ã anhîpêx anê. Ixpê mê anhîpêx xwýnh na pa ã amã amnhî jarênh anê. Anê.

Tã ã kãm wa hkra jarênh anhÿr tã nhûm wa tokyx hkra hkêt nê. Nom tee ri ja hã amnhî pumu nê Tîrtûm kot wa kãm hêx ã hkamnhîx kêt nê. ãm hkamnâr rom ã hamaxpêr anê nê hamaxpêr o:

—Nà kot paj wa nhÿrmã ixkra. Tîrtûm tãm kot wa inhmã wa ixkra jarênh kênã. Anê.

Tã nhûm amgrã xohtô rax kumrêx nê hapêx nhûm wa hkra. Nhûm axte amgrã hkwy hapêx nhûm wa hkanrêhã htãmnhwÿ hkwy. Ra Tîrtûm kot mê hkukamã Apraãw mã mê harênh xà hkôt. Tîrtûmjaja hihtÿx o hihtÿx nê ãhpumunh o ãhpumunh jakamã na pre amnhî jarênh xà hkôt ã wa kãm wa hkra nê wa htãmnhwÿjê nhôr anê. Kot ra wa kãm hã amnhî jarênh xà hkôt. No ri nhãm mêhõ nhîxi jarênh kôt wa kãm wa hkra jarênh kêt nê. Mêhõ kot we hihtÿx o hihtÿx o Tîrtûm jakre nhûm we ri

hixi jarênh kôt ã wa kãm mê harênh anê? Amrakati kumrêx. Jakamã na pre wa kãm amnhî jarênh o:

—Nà ixãhpumunh xà hkôt na pa ã war amã war akra jarênh anê. Anê.

¹⁶ No pika ja kamã na htem ã amnhî jarênh anhÿr kêt nê. Na htem mêhõ mã tanhmã mêmoy tã amnhî jarênh to kaxyw nê mêhõ hihtÿx o kot hakrenh xwýnh nhîxi jarênh kôt amnhî jarê. Nê amnhî jarênh o:

—Nà ixte jahti noo mã ã amã amnhî jarênh anhÿr jakamã ãm hãmri na pa ã amnhî jarênh anê. Anê.

Kot hã amnhî to hêx nhûm hihtÿx o kot hakrenh xwýnhhta kot hã harênh mar nê hã tanhmã homnuj to pymaj na htem ã mê hixi jarênh kôt mêmoy tã amnhî jarênh anê. Hãmri nê kot tanhmã hã ho pymaj ra kot amnhî jarênh xà hkôt tanhmã mêmoy nhîpêx to. ¹⁷ Nom Tîrtûm na hte urãk nê nhãm mêhõ nhîxi jarênh kôt ri mêmoy tã amnhî jarênh kêt nê. Na hte tãm amnhî jarênh xà hkôt mêmoy to anê nê aa hã amnhî to hêx kêt nê. Na pre mê pahpê hkrajê mã kãm:

—Kot paj nhÿrmã mê ato mex rax nê. ãm hãmri na pa mê amã amnhî jarê. Ixte amnhî pumunh xà hkôt na pa ã mê amã amnhî jarênh anê. Anê.

Mê pahte ãm hãmri kot amnhî jarênhja mar nê amnhî to hêx kêt ã omunh kurê kumrêx kaxyw. Koja Tîrtûm mêmoy tã ã amnhî jarênh anê hãmri nê hijuk ri axtem hpãnhã tanhmã amnhî jarênh to hkêt nê. ¹⁸ Jakamã koja nhÿrmã ma amnhî wÿr mê pahto àpir ã amnhî jarê hãmri nê ãm hãmri amnhî jarê nê amnhî jarênh o:

—Nà ãm hãmri ixte amnhî pumunh xà hkôt na pa mê amã ja hã amnhî jarê. Anê.

Koja ã amnhî jarênh anê hãmri nê hijuk ri axte hpãnhã tanhmã mêmoy jarênh to hkêt nê. Ra kot ã

amnhî jarênh anhyrja koja arî râhã nê. Jakamã e kwa kêr ka mê tee ri amnhî kukamã ajamaxpêr o ri apa hkêt nê. Ra mê pamex nê ri papa kaxyw Tirtûm kôt amnhî xunhwyr jakamã kêr pu mê arî kot mê pahto mex rax xà hã arîgrota jamâr râhã ho ri papa.

¹⁹ Na hte kanôre ho htÿx xàja kanôre ho htÿx nhûm ma gô hkôt pa hkêt nê. Ja pyrà nê kot puj mê Tirtûm kot mê pahto mex xà kamã pajamak o papa hãmri nê hkaga hkêt nê.

Amnepê mã na pre hte mê panhõ patre maatija Tirtûm mã amnhî jarênh xà hã ixkre hwyr agjê nê hkôt ã kupêxê ho hitom maati hwyr agjê nê kamã mê ho Tirtûm wÿr o kuhê. Tã nhûm Jesus akupÿm kaxkwa hwyr api nê Tirtûm ri hkrî hãmri nê patre maatita pânã tãm mê pahto hwyr o hkrî. ²⁰ Na pre ra mê pakukamã kaxkwa hwyr api nê kamã pa ho pa nê finat Mekijetekja pyrà nê kêp mê panhõ patre maati. Tã koja mê pahto Tirtûm wÿr râhã nê pa ho pa.

7

Patre Mekijetek jarênh

¹⁻³ E kot paj ixprî hã mê amã tanhmã finat Mekijetekja jarênh to ka mê inhma. Krî pê Sarê kamã na pre kêp mê ô pahî nê mãânên kêp mêõ patre. Sarêja mê pakapêr kãm kêp: “Mê hamakêtkati nê ri mê pa xwÿnhjê nhõ krî.” Jakamã Mekijetekja mê pakapêr kãm kêp: “Mê hamakêtkati nê ri mê pa xwÿnhjê nhõ pahî.” Nê mãânên kêp: “Pahî kot tãm amnhî nhîpêx o pa xwÿnh.” Nê Mekijetek nhîpêêxà nê katorxà nê higêt nhîxija mê pahte harênh mar kêt. Nê kator ã arîgro nê htyk ã arîgroja mãânên mê pahte harênh mar kêt. Tirtûm kapêr ã kagà htûm kot tanhmã ja jarênh to hkêt. Æm Jesus pyrà nê kêp patre hã mê ho Tirtûm wÿr râhã ho pa xwÿnh pix

ã kot harênh. Æm ja pix na mê pahte harênh mar. Nê kot amnhî to rax xwÿnh jakamã na pre Apraãw nhÿri omu nê hã hpijaam kaxyw kãm hikukrêx kwÿ gô. Na pre hkwyjê mê ra mê urojê kutã amnhî xunhwÿ nê pijapu nê mê kêp mê ô pahî ho 4 nê mê himex. Nê mê kêp mê hikukrêx kwÿptã nê hamÿ nê ma ô krî hwÿr o mô. Nê kormã pry hã môr ri Mekijetek kaxpa nhûm amnhî wÿr omu nê kãm:

—Pa Apraãw? E kê Tirtûm ato mex nê ka amex nê apa. Anê.

Nhûm amnhî tã kuma nê hkînh nê. Hãmri nê kãm mê hikukrêx kwÿptãr xwÿnhãta hkwy gô nhûm hamÿ nê ma amnhîm o mô. ⁴ Na pre Apraãw kot amnhî to rax ã omu nê kãm mêmota kwÿ gô. Kêp mê pahpê Ijaew pâr krax jakamã mãânên kot amnhî to rax tã Mekijetekja uråk nê kot amnhî to rax ã omu nê kãm mêmota kwÿ gô. ⁵ Finat Mojes kot Ijaew mã Tirtûm kapêr jarênh xà hkôt kãm kugô. Na pre mê kãm:

—Mê akwy pê finat Rewi hkanrêhã htãmnhwÿjaja kêp mê anhõ patre jakamã kêr ka mê kãm mê akukrêx kwÿ nhõr o ri apa. Kot kaj mê akrit kêp 10 nê kãm ho pixi nê agô. Nê mê akàxpore kêp 10 nê kãm hõ gô. Kêr ka mê ã mê kãm mê akukrêx nê mê akrit kwÿ nhõr o apa anê. Nê kêr ka mê kãm mêmoj mex pix gô. Mê kêp mê akwy na mê. Mê apiitã mê apê Apraãw kanrêhã htãmnhwÿ jakamã kêr ka mê ã mê hipêx anhyr o apa. Anê.

⁶ Tã Mekijetekja kêp Rewi hkwy hkêt tã nhûm Apraãw amarî ã hipêx anê nê kãm pahî htyk xwÿnhjê kukrêxta kwÿ gô. Jao hikukrêxta kamã mêmoj kêp 10 nhûm omu nê kamã kãm ho hpÿnh nê kugô. Na pre ã kãm mêmoj nhõr anê. Hãmri nhûm amnhîm hamÿ nê kãm:

—Nã ãm hãmri koja Tirtûm ato mex rax nê. Anê.

Ra Tirtûm kot Apraâw kanrêhã kãm htâmnhwý ho ohtô nê mê hkukamã mê harênh jakamã nhûm Mekijetekja â kãm Tirtûm kot ho mex â harênh anê. ⁷Mê kot amnhî to rûnh o mê hakrenh xwýnh pixjaja Tirtûm kot mê ho mex kaxyw mê ho âhwýr o pa jakamã na pre Apraâw o Tirtûm wý. Jao kot amnhî to rax o kot hakrenh â amnhî to amnhîrit. ⁸Hâmri nê Rewi hkanrêhã htâmnhwý kot amnhî nhîpêx pyrã nê Apraâw o Tirtûm wý nê kêp mêmojta jamý. Mê urák nê mêmoj kamã kêp 10ja rûm ho hpýnh nê amnhîm hamý. Nom kot amnhî to rax o Rewi hkanrêhã htâmnhwýjê jakrenh. Tirtûm kapêr â kagã htûm kot Rewi hkanrêhã htâmnhwýjê htyk par â mê harênh tâ tanhmã Mekijetek htyk â harênh to hkêt jakamã kot amnhî to rax o kot Rewi hkwyjê jakrenh.

⁹⁻¹⁰Nê kot pry kamã Apraâw kaxparta â kormã Rewi kator kêt tâ kêp Apraâw kanrêhã htâmnhwý mã xwýnh. Jakamã nhûm Apraâwja Mekijetek mã mê hikukrêxta kwý nhôr jao te Rewi mã ôr pyrãk. Tã nhûm amgrã xohtô nê hapêx nhûm Rewi hkanrêhã htâmnhwýjajaja hapôj nê kêp mê ô patre nê ri pa. Jao Mekijetek pyrã nê mê kêp mê hikukrêx kwý jamýnh o ri pa.

¹¹Nê finat Mojes na pre Ijaewjê mã tanhmã Rewi hkanrêhã htâmnhwýjê jarênh to. Kormã mê hapôx kêt ri nhûm hkwyjê mã tanhmã mê harênh to. Mê kêp patre hã mê harê. Tã nhûm mê hapôj nê hprêk nê mê ho Tirtûm wýr o ri mê hkôt pa. Nom mê kot tãm amnhî nhîpêx o pa kaxyw na prem tanhmã mê hkrã hto hkêt nê. Tanhmã kot mê amnhî to nê â mê hipêx anê? Jakamã nhûm Tirtûm mê hpãnhã mê pahwýr kýj rûm mêmôja mê nhûm mê pahwýr wrý. Nom kêp Rewi hkanrêhã htâmnhwý hkêt. Nê mãânên kêp Rewi hpãm Arãw kanrêhã htâmnhwý hkêt.

Axtem te Mekijetek kot amnhî nhîpêx pyrãk xwýnh na pre. Jejus Krisja. Tãm na pre mê pahwýr wrý hãmri nê tanhmã mê pahkrã hto pu mê ý hã tãm amnhî nhîpêx o papa. ¹²No Mojes kapêr kot Rewi hkanrêhã htâmnhwý pixjaja kêp mê ho Tirtûm wýr xwýnh â mê harênh. Tã nhûm Krisja mê pahwýr wrý nê mê hpãnhã kêp mê pahto âhwýr o pa xwýnh. Jakamã na pu htem axte Mojes kapêr kôt amnhî nhîpêx kêt nê. Pãnhã Jejus kapêr kôt pix mã amnhî nhîpêx o papa.

¹³⁻¹⁴Nê Jejus kêp Rewi hkanrêhã htâmnhwý hkêt. Katorxã hkôt kêp Apraâw tãmnhwý Juta hkanrêhã htâmnhwý na pre. Ra mê pahte ja mar mex. Aa Juta hkanrêhã htâmnhwýjajaja kêp patre hkêt. Na pre Tirtûm jajê mã mê kot mêmoj nhôr xã hã mêmsti kunîhtita â kãm mêmoj nhôr nê hkwyjê ho hwýr â mê kãm karô hkêt nê. Âm Apraâw tãmnhwý Rewi hkanrêhã htâmnhwýjê mã pix mã na pre â mê kãm ja hã karô anê. Tã nhûm Jejus wrý nê mê hpãnhã mê pahto hwýr o pa. Mê urák nê kêp Rewi hkanrêhã htâmnhwý hkêt axtem kêp Juta hkanrêhã htâmnhwý htã Rewi hkwyjê hpãnhã mê pahto Tirtûm wýr o pa.

Mekijetek pyrã nê mê pahto Tirtûm wýr xwýnh jarênh

¹⁵⁻¹⁹Nê Ijaewja na prem Mojes kapêr mar týx nê hkôt amnhî nhîpêx tâ aa amnhî to mex kêt nhûm Tirtûm tee ri ja hã mê omu nê hamaxpêr o:

—Nã Rewi hkanrêhã htâmnhwýjajaja kêp mê ô patre nê mê ho ixwýr o pa htã nhûm mê arî htýx ri amnhî tomnuj pix o pa. Jakamã koja mê axte ri mê ho ixwýr o pa hkêt nê. Anê.

Hâmri nê mê pakaxyw mê pahto âhwýr xwýnhja ta nê âm. Kra Jejusja nhûm kuta nê âm. Tãm na hte Rewi hkwyjê rom tanhmã mê

pahkrâ hto pu mê kukwak ri tām amnhî nhîpêx nê Tirtûm kôt amnhî nhîpêx mex nê. Jao nhÿrmâ ma mê pahte Tirtûm nhô krî hwÿr paxâpirja jamâr o papa.

Jejus na hte Mekijetek pyrâ nê kêp mê panhõ patre maati nê mê pahto Tirtûm wÿr râhâ ho pa. Kêp Rewi hkanrêhâ htâmnhwÿ hkêt tâ Tirtûm pyrâ nê kêp htîr tûm nê pa ho pa xwÿnh jakamâ na pre Tirtûmja mê pakaxyw kuta nê mê pahwÿr kumê. Kapêr â kagâ htûm kot harênh kot:

Kot kaj Mekijetek pyrâ nê mê ho ixwÿr râhâ ho ri apa. Anê.

20-21 No Rewi hkwÿjê mã na pre â kapêr anhÿr kêt nê. Âm Jesus pix mã â kapêr anê nê kâm:

E kot kaj apê mê ho ixwÿr râhâ o apa xwÿnh. Kot paj nhÿrmâ apânhâ axtem mêhõ xâm kêt nê. Âm kapxipix kot kaj mê ho ixwÿr o apa râhâ ho râhâ. Âm hãmri na pa amâ â ixkapêr anê. Ixpê Pahi Maati hâ â ajarênh anê.

22 Anhÿr jao Jesus kot amnhî to rax o Rewi hkwÿjê jakrenh par â ho amnhîrit. Mê kot Ijaew mã Tirtûm kapêr jarênh nhûm mê kot mar nom hkôt amnhî nhîpêx kêt jakamâ nhûm Tirtûm mê hpânhâ Jesus xâm. Tapxipix na hte tanhmâ mê pahkrâ hto pu mê tām amnhî nhîpêx mex o ri papa. 23 Rewi hkwÿjêjaja na prem axpên mÿr pê kêp mêõ patre nê ri pa htâ htyk pa nê hapêx. 24 Nom Jesusja htîr tûm nê pa ho pa xwÿnh jakamâ koja mê urâk nê aa hapêx kêt. Koja mê pahto Tirtûm wÿr râhâ ho pa nê aa jam urer kêt nê. 25 â Jesus kot amnhî nhîpêx anhÿr jakamâ te kêp Tirtûm wÿr mê panhõ pry pyrâk. Na pu htem hkôt amnhî xunhwÿ nhûm mê panê mê pahte amnhî tomnuj piitâ rênh pa nê mê pahpê Tirtûm kra hâ mê pajarê.

26 Nê âm hãmri kêp mê pahto Tirtûm wÿr xwÿnh maati mex na. Mê pakuyrom tām kot amnhî nhîpêx mex o pa nê aa kot tanhmâ amnhî tomnuj to hkêt. Tâ ra Tirtûm kot amnhî wÿr ho àpir jakamâ nhûm ra kuri mê pahto hwÿr râhâ ho pa. 27 Nê kot amnhî to rax o wam mêõ patre maati jê jakrenh. Wamtaja na prem hkwÿjê pyrâ nê amnhî tomnuj o pa. Jakamâ na prem apkati mê amnhî tomnuj pânâ Tirtûm mã mêmoy gô nê kâm amnhî jarê nê amnhî to kuwÿ. Hãmri nê rî kormâ kot nhâm mê hwÿr mê mrrar xwÿnhjê mã mê ho anê nê mê hpânhâ Tirtûm mã mêmoy nhôr pê mê ho kuwÿ. No kêt Jesusja wam patre maati rom aa kot amnhî tomnuj kêt jakamâ na pre hte mê urâk nê amnhî tomnuj pânâ Tirtûm mã mêmoy nhôr o pa hkêt nê. Âm mê papajaja na pre mê pahte amnhî tomnuj pânâ htyk o kâm amnhîre. Âm htyk tipxi htâ mê pahpiitâ mê pahpânâ amnhîrer pa. Jakamâ koja axte â amnhî nhîpêx anhÿr kêt nê. Mo kaxyw kot kêt axte mê panê ty?

28 Mojes kapêr kôt na pre Ijaew amnhîm Rewi hkwÿjê xunhwÿ nhûm mê kêp mê õ patre nê ri pa. Tâ no nhûm mê urâk nê arî amnhî tomnuj o pa nhûm Tirtûm tee ri mê omu nê mê hpânhâ mê pakaxyw Krata xâm nê kâm:

—Nâ kapxipix mê kurom ate tām amnhî nhîpêx o apa jakamâ kapxipix kot kaj mê hpânhâ mê ho ixwÿr o apa râhâ ho râhâ. Anê.

8

Jejus kêp mê pahto Tirtûm wÿr xwÿnh maati hâ harênh

Rukre 22.20; Sikûn Korî 3.6-11

1 E kot paj axtem tanhmâ mê amâ mê pahto Tirtûm wÿr xwÿnh maatita jarênh to ka mê inhma. Na hte kaxkwa kamâ Tirtûm nhîhkô hâ hkrî. Îhkô hâ kêp Pahi Maati hâ hkrî xâ hâ upôk rûm hkrî ho hkrî.

2 Wam patre maatiyaja na prem Tirtûm nhôrkwÿ kaàkre wÿr mra nê kamã hitom maati kamã mē ho Tirtûm wÿr o pa. Nom nhûm Jejus na hte mē kurom kaxkwa kamã Tirtûm nhôrkwÿ mex kãm mē pahto àhwÿr o hkrî. Ôrkwÿ kaàkreja na prem ïhkra ho hipêx nom kaxkwa kamã ôrkwÿ mexja na pre mēhõ ïhkra ho hipêx kêt nê. Tirtûm na pre tanhmã hipêx to nhûm kamã Jejusja mē pahto hwÿr o hkrî.

3 Nê mē pahpê Ijaew nhõ patre maatiyaja na prem mē ho hwÿr kaxyw nê mē kot amnhî tomnuj pãnhã Tirtûm mã mēmoj nhôr kôt mē ho kuwÿ. No Kris na hte ã amnhî nhîpêx anhÿr kêt nê. Ra htyk o kot kãm amnhî nhî nhôr jakamã na hte wam patre maati pyrà nê xatã kãm mēmoj nhôr kêt nê.

4 Tã na hte arî Ijaew Mojes kapêr kôt amnhîm Rewi hkwÿ kêp mē õ patre kaxyw mē unhwÿ nhûm mē ho Tirtûm wÿr o pa. No Jejus kêp Rewi hkanrêhã htãmnhwÿ hkêt. Katorxã hkôt kêp Juta hkanrêhã htãmnhwÿ jakamã kop apu arî jar pika ja kamã htîr nê pa ronhÿx Ijaew nhõ patre pyrà nê kêp mē ho Tirtûm wÿr o pa xwÿnh kêt. Æm Rewi hkanrêhã htãmnhwÿ pixjaja na htem mē kaxyw kãm mēmoj gõ nê hkôt mē ho kuwÿ. 5 Jar na htem arî ã amnhî nhîpêx anhÿr o pa nom kaxkwa kamã na htem ã amnhî nhîpêx anhÿr hkêt nê.

Nê jar Tirtûm nhôrkwÿ kaàkreja te kot kaxkwa kamã ôrkwÿ mexta pyràk. Na pre Mojes ôrkwÿ kaàkre nhîpêx kaxyw nhûm Tirtûm tanhmã kãm hã karõ hto nê kãm:

—E jãã hixêt prêk nhîmõk ã axãmta ã na pa pre amã ixkreta kukamã ixprî hã tanhmã mē ate hipêx to hã amã karõ. Tã kêr ka ã hipêx anê. Anê.

Hãmri nhûm kuma nê kot kãm hã karõ xã hkôt hipêx. Hãmri nhûm mē õ patre maati ixkreja kamã mē

ho Tirtûm wÿr o pa. Na prem ã amnhî nhîpêx anhÿr o pa.

6 Tã nhûm ra Tirtûm axtem mē hpãnhã mē pakaxyw Kris xãm nhûm hte mē pahto hwÿr mex o wamtajê jakre. Na hte kaxkwa kamã mē pahpiitã mē pahpumunh mex rãhã ho hkrî nê wamtajê rom tanhmã mē pahkrã hto pu mē tãm amnhî nhîpêx o ri papa. Tirtûm kot finat Mojes mã kapêrja mex nê nom axtem na pre. Tã kapêr nyw na mex o kot wam kapêr jakrenh. Kapêr nyw kôt kot puj mē pahtyk tã akupÿm pahtîr nê nhÿrmã Tirtûm mē Jejus wa kuri pamex nê pahtîr tûm nê papa ho papa nê axte pahtyk kêt nê. 7 Kêp apu Tirtûm kot Mojes mã kapêr kôt mē kot tãm amnhî nhîpêx o pa ronhÿx pre Tirtûm axte kapêr nyw ã kagã hkêt nê. 8 Nom wam kapêr tûmta na pre mē mar tÿx htã arî amnhî tomnuj rãhã ho pa nhûm tee ri ja hã mē omu nê mē kãm:

Nà kot paj axte nhÿrmã mē apê Ijaew mã axtem tanhmã ixkapêr to.

9 Amnepê mē anhîgêtjê mã na pa pre ixkapêr.

Na pa pre Ejit pê mē kator nê mē kot tanhmã amnhî nhîpêx to ho pa kaxyw tanhmã hã mē kãm karõ hto.

Nom na prem ixkapêr ma nê ãm kuma nê ixkôt amnhî nhîpêx kêt nê. Pa tee ri ja hã mē omu hãmri nê mē hkaga.

10 Tã kot paj mē apê mē hkanrêhã mē htãmnhwÿ nywjê mã axtem ixkapêr ka mē ixkapêr nywja ma.

Kot paj nhÿrmã tanhmã mē akrã hto ka mē ixkapêr nyw mar tÿx nê hã ano htÿx nê ho apa.

Nê akînh nê apa.

Nê ixkôt ri amnhî nhîpêx mex o apa.

Nê axpên mã ijarênh o: “Nà ãm hãmri Tirtûm kêp mē panhõ

Tirtûm na.” Anhÿr o ri axpên mã ijarênh o apa.

Pa amnhî tâ mê ama nê mê apumu nê amnhî xwar mê apê ixkra hã amnhîm mê ajarê.

11 Kot kaj mê apiitã ixte amnhî nhîpêx kôt ixpumunh mex o ri apa. Mê akàxpore rûnh xwÿnhjaja nê mê akàxpore hkryre xwÿnhjaja mê apiitã ixpumunh mex jakamã kot kaj mê ri axte ixtã tanhmã axpên kujêr to ho ri apa hkêt nê.

12 Nê kot paj mê ato mex rax o ixpa. Nê axte tanhmã mê ate amnhî tomnu hto ho apaja mã ija-maxpêr kêt nê. Anê.

13 Nê koja mëmoj ra htûm hãmri nê hapêx tokyx anê. Ja pyrã nê na pre Tirtûm mê pamã kapêr tûmta jarênh o:

—E kêr ka mê axte ixkapêr tûm mar kêt nê. Pãnhã ixkapêr nyw pix mãn mar o apa nê âm kôt pix mã mãn amnhî nhîpêx rãhã ho ri apa. Anê.

9

Tirtûm nhõrkwÿ kaàkre jarênh

1 Nê amnepêm na pre finat Mojesja mê panhîgêt nê mê pahpãmjê mã tanhmã Tirtûm nhõrkwÿ kaàkre jarênh to. Tanhmã mê kot hipêx to nê kamã tanhmã amnhî nhîpêx to hã mê kãm karõ. Nê kamã tanhmã mê kot amnhî to Tirtûm wÿr to hã mê kãm karõ. Nê tanhmã mê hkwyjê ho hwÿr toja nhûm pre mãânên mê kãm hã karõ. No Tirtûm nhõrkwÿ kaàkreja kêp õrkwÿ kumrêx kêt. Âm mê kot omunh nê kaxkwa kamã õrkwÿ kumrêx mã hamaxpêr kaxyw na pre. 2 Jakamã nhûm prem Mojes kapêr ma nê hipêx. Kamã hitom hamêxkrut. Wam hitom kamã na pre kanê hprêeti xãm nê kutã mêsti xãm. Nê mêsti nhîmõk ã Tirtûm mã õ pãwti jaxwÿ. Mê panhõ patre na pre htem Tirtûm mã kugõ nê mêsti ã

kãm haxwÿ hãmri nê hkwyjê ho kuwÿ. Tã hitom ja na prem kêp Tirtûm nhõ hitom mex ã harê.

3-4 Nê hitom wa hkaêx kãm na pre kupêxê ho hakwakre kahê xãja ajêt. Haturxã kamã hitomja na prem Tirtûm nhõ hitom maati hã harê. Tirtûm na pre te hirã htÿx kãm hwÿr wrÿ nê te kamã hkrÿ pyrãk. Nê kamã na pre Tirtûm mã mëhkuxwã xã ho xêt xã hã mê kunÿhtija kuhê. Na prem õr o hipêx nê kamã âm nhûm kuhê. Nhûm pre hte mëõ patre hwÿr agjê nê kutã kuhê nê mê ho Tirtûm wÿ. Nê mê kunÿhti haxwÿja hitom maati kamã kuhê. Na prem pÿ ho hipêx nê õr o hpro nê kamã âm. Mêstija kaxwÿnh kãm na pre htem mëmoj jagjê.

Tirtûm kot Ijaew mã tanhmã mê kot amnhî nhîpêx to ho pa hã karõ nê kên po hã mê kãm hã kagãja nhûm prem kamã kuxã nhûm hikwÿ.

Nê mãânên õr o xijereja xã nhûm hikwÿ. Nê xijere kamã amnepê mã Tirtûm kot kaxkwa rûm mê hwÿr mëõ rênh kwÿ hikwÿ. Mêõja mê kot kãm: “Manã” anhÿr xwÿnhja na prem hkwy hkawrà nê xijere kamã kugjê hãmri nê mêsti kamã kuxã.

Nê finat Arãw nhõ kô kot ho amnhî kaxpar xã htûmta nhûm prem kamã kuxã. Tirtûm kot tanhmã ho nhûm kurûm pixõrã muxre hapõx xwÿnhnta nhûm prem mãânên mê kunÿhti kamã kuxã nhûm hikwÿ.

5 Nê himõk ã Tirtûm kapêr o wrÿk xwÿnh wa hkarõ nhîpêxja wa hamêxkrut nê axpên kutã wa hkõn krã ho hkrÿ. Axpên wÿr hara koror nê wa hkrÿ. Patre maati kot omunh nê Tirtûm kot mê hkôt pa ho paja mã hamaxpêr kaxyw. Nê wa hkaêx kãm ahkaprÿja Tirtûm kot mê nê mê kot amnhî tomnuj rênh mã hamaxpêr xã na pre.

Ã Tirtûm nhõrkwÿ kaàkre kot

anhÿr. No kot paj ixprî hã mē amã piitã harēnh par kêt nē. ⁶Na pre hte mēō patre apkati mē wam hitom wÿr agjê nē kamã Ijaew ho Tirtûm wÿr o pa. ⁷No hitom maatiã am mē õ patre maati pix na pre hwÿr agjê. Nom apkati mē hwÿr pa nē gjêx kêt am amgrã pÿnh kãm hwÿr gjêx pÿnh nē. Nē hwÿr gjêx kaxyw nē mēmo mry pa nē hkamrô ru nē o pa nē hitom maati hwÿr ho agjê. Hãmri nē ho mēs kunÿhti nhîmök kamî nē Tirtûm mã kãm:

—Pa Tirtûm. E ota mry kamrôta. Mē ixpê akwÿyaja mē ixte amnhî tomnuj jakamã na pa mē amnhî pãnhã mēmo mry nhökre jakã nē kupî nē hkamrô ru nē man awÿr o mra. Te kot mē ixte amnhî tomnuj mÿrapê htyk pyrãk. Jakamã kwa ã mē ixte amnhî nhîpêx anhÿrja ã mē ixpumunh hkôt mē inhnê mē ixte amnhî tomnuj rê.

Anhÿr o mē amnhî to kuwÿ. ⁸Nē patre maati pix na pre hitom maatiã wÿr agjê nē mē ho Tirtûm wÿ. Ijaew na prem ixkre kapem hamãr o kuhê nē hwÿr gjêx kêt nē. Tirtûm Karô kot hã mē kãm karô xã hkôt. Te Tirtûm pê amÿm kuhê pyrãk. Tã na htem jarãhã arî Ijaew kanrêhã mē hkra nē mē htãmnhwÿyaja ã amnhî nhîpêx anhÿr o pa. Jao mē higêtjê pyrã nē Tirtûm pê amÿm kuhê.

⁹Mē kot arî Tirtûm mã mry hpar nē hkamrô ho mēmoj kamîr nē amnhî to hwÿr o pa htã na htem arî hamaxpêr punuj pix o pa.

¹⁰Tirtûm kapêr tûm kot tanhmã mēmoj tã mē kãm karô hto.

Na pre tanhmã mē apkur xã hã mē kãm karô hto nhûm htem pix kur o pa.

Nē tanhmã mē hkôm xã hã mē kãm karô hto nhûm htem pix o hkôm o pa.

Nē tanhmã amnhîmnuj to hã tanhmã mē kot amnhî kuhônho to hã karôja nhûm htem hkôt

pix mã tanhmã amnhî kuhônho to ho pa.

Nē tanhmã mē kot ri mē hikukrêx kuhônho to hã mē kãm karôja nhûm htem kôt pix mã tanhmã kuhônho to ho pa.

Ã na pre Tirtûm Kris kukamã mē kãm mēmoj tã karô rax anê. Kris kutêp pix mã ã mē kot amnhî nhîpêx anhÿr kaxyw. No mē pahte arî ã amnhî nhîpêx anhÿr kaxyw kêt. Na pre ra Kris mē pahwÿr wrÿ nē Tirtûm kapêr tûm o hapêx nē hpãnhã mē pamã kapêr nyw jarê pu mē hpãnhã nywta kôt pix mã amnhî nhîpêx o papa. Kapêr nywja mex o mex. Nē mex o wamta jakrenh.

Kris htyk o mē pahte amnhî tomnuj pãnhã amnhîrer ã harēnh

¹¹Tã na pre Krisja tãm mē pahwÿr wrÿ nē kêp mē pahto Tirtûm wÿr xwÿnh maati nē patre hpãnhã mē pahto hwÿr o pa. Nom jar pika ja kamã mē kot mē îhkra ho Tirtûm nhôrkwÿ kaàkre nhîpêxta wÿr àr nē kamã mē pahto hwÿr kaxyw na pre wrÿk kêt nē. Na pre ra akupÿm kaxkwa hwÿr api nē kamã ôrkwÿ mex wÿr axà nē kamã tanhmã mē pahto mex to nē tanhmã mē pahto Tirtûm wÿr to rãhã ho hkrî. ¹²ã kaxkwa kamã Tirtûm nhô hitom maatiã wÿr àr tipxi htã mē pahpiitã mē pahte amnhî tomnuj pãnhã amnhîrer pa. Nom mēmo mry kamrô ho mē pahpãnhã amnhîrer kêt nē. Môx kamrô rÿ motre kamrô ho mē pahpãnhã amnhîrer kêt nē. Amnhî kamrô ho na pre mē pahpãnhã amnhîre. Tyk nē hkamrô pikapîrta o mē pahpiitã mē pahpãnhã amnhîrer pa.

¹³Nē amnepêm Ijaew kot Tirtûm kapêr tûm kôt amnhî nhîpêx mex o pa hkêt jakamã nhûm tee ri mē omu nē mē kot amnhî tomnuj o mē pa xwÿnh ã mē harê. Jakamã na pre mēō patre xatã mry kamrô

ho mē hkamī. Mōx kamrō nē motre kamrō ho mē hkamī. Na pre mōx krare hkwȳ hpa nē ho hxēt nē hprà ho hkwȳjē kamī. Ā na prem xatā mē hipêx anhÿr o pa. Tirtūm kot ja hā mē omunh nē mē mex ā mē harēnh kaxyw. Nom te mē krāhkā pix mex pyrā nē mē hkrā kaxwÿnh kām arī hamaxpēr punuj o pa. ¹⁴ ā na prem amnhī nhīpêx anhÿr o pa. Nom Krisja mē kurom aa tanhmā amnhī tomnuj to hkēt jakamā na pre mē pahte amnhī tomnuj xwÿnhjē nē ty. Te mē kot amnhī nē mōx rÿ motre hpar nē hkamrō runhta pyrāk o amnhī nhīpêx nē mē panē Tirtūm mā amnhī gō nhūm pre mē kām hkurē xwÿnhjaja kupī. Na pre Tirtūm Karōja ā kot mē panē htyk anhÿr kaxyw tanhmā ho hihtÿx to. Karōja aa hapêx kēt kumrêx rāhā nē pa ho pa xwÿnh jakamā na pre Kris tykja kukamā tanhmā ho hihtÿx to nhūm mē panē ty. Tapxipix na mē pahte tām amnhī nhīpêx o papa kaxyw kēp tanhmā mē pahkrā hto xwÿnh. Jakamā na pu htem ra pajamaxpēr nyw o pajamaxpēr o papa nē pajamaxpēr o:

—Na pa pre tee ri inhmā amnhī krā hkôt tām amnhī nhīpêx o ixpa hprām kaprÿ nē ām amnhī tomnuj pix o ri ixpa. Tā Kris kot inhnē htyk o hkamrō pikapīr ā harēnh ma nē amnhī kaxyw hkôt ijamaxpēr tÿx nē nhūm amnhī tā ixpumu nē ixte tām amnhī nhīpêx o ixpa kaxyw ixām. Jakamā kot paj ām Tirtūm pix mā kām tanhmā amnhī nhīpêx to ho ri ixpa. Tīr rāhā nē pa ho pa xwÿnh jakamā kot paj nhÿrmā kuri urāk nē ixtīr tūm nē ixpa ho ixpa. Anē.

¹⁵ Nē amnepē mā na prem piitā Tirtūm kapēr tūm kôt amnhī nhīpêx mex o pa hkēt nē. Mē kot xatā hkôt amnhī nhīpêx o pa hā amnhī jarēnh tā hkôt amnhī nhīpêx kēt nē. Jakamā na pre Kris wrÿ nē mē pahte hkôt amnhī xunhwÿr mā

xwÿnhjē mā Tirtūm kapēr nyw jarē nē mē pamā:

—Kot paj mē anē ty nhūm Tirtūm ā ixte amnhī nhīpêx anhÿrja kukwak ri mē ato mex rāhā ho pa. Anē.

Hāmri nē amnhī jarēnh xā hkôt mē pahte amnhī tomnuj piitā hpānhā amnhīrer kaxyw mē panē ty. ¹⁶⁻¹⁷ Te jar pika ja kamā mēhō htyk kukamā hkrajē mā tanhmā amnhī jarēnh to pyrāk. Na htem htyk kaxyw nē hkrajē mā:

—Nā kot paj mēmo arīgro hā ty ka mē inhmÿr pé ixpē ixkukrêx kwÿ o arīk.

Anhÿr o na htem amnhī jarē. Hāmri nē ty nhūm hkrajaja amnhīm ō mēmoj to arīk pa. Mē hipêxā kukwak ri mē hikukrêx mex nē mÿr pé o pa. No kormā htīr ri nhūm mē kormā kēp hamÿnh kēt nē. Ja pyrā nē na pre Tirtūmja Jejus htyk kukwak ri tanhmā mē pahto mex to pu mē kukwak ri mē pamex nē pahkīnh nē ri papa.

¹⁸ Nē Tirtūm kapēr tūm kôt na pre hte mē ō patre mry pa nē ām hkamrō runh kôt pix mā mē ho Tirtūm wÿr o pa nhūm amnhī tā mē omunh xā hkôt mē kuma nē tanhmā mē ho mex to.

¹⁹ Na pre finat Mojesja Ijaew mā Tirtūm kapēr tūm piitā harē nē harēnh pa hāmri nē mōx ōxpī nē kaxyw motre hōxpī. Hāmri nē xijere kamā hamē wa hkamrō runh pa nē kamā gō hkwȳ ru. Hāmri nē kaxyw mēmo pī hpa hkryre pé “isop” jarēnhja kwÿ kukē. Nē kaxyw ōwēhti hkī kamrêkre hkwȳ hpy nē isop mē ho pihkār pa nē mry kamrō o go. Hāmri nē ho hkwȳjē kamī. Nē ho Tirtūm kapēr ā kagā tūmta kamī. ²⁰⁻²² Hāmri nē ho anhÿr pa nē mē kām:

—Nā na Tirtūmja ixte mry kamrō ho mē akamīr pumunh kôt mē pamā kapēr o: “E kot kaj mē ixkapēr kôt amnhī nhīpêx o ri apa hā kot paj tanhmā mē ato mex to rāhā ho ri ixpa ka mē amex nē

akĩnh nê ajamakêtkati nê ri apa. Jakamã kêr ka mê mry kamrô ho mêmôj piitã hkamĩr pa. Nê ho amnhĩ kamĩ. Kêr pa ja hã mê apumu hãmri nê axte tanhmã mê ate amnhĩ tomnuj tota mã ija-maxpêr kêt nê.” Anê. ã na Tĩrtũm mê pamã kapêr anê. Anê.

Hãmri nê hpãnhã mry kamrôta o ôrkwỹ kaàkre kamĩ. Nê hkre kamã mêmôj kuhê xwỹnh piitã nhũm ho hkamĩr pa. ã na pre mê ô patre mê mex kaxyw mê hipêx anhỹr o pa. Mê kot tōhã mêmôj to hpỹnhre nê ho hkamĩr kêt jakamã kironhỹx pre mêmôj piitã ã hipêx anhỹr o pa. Kop apu mê kot mry hpar nê hkamrô runh kêt ronhỹx pre Tĩrtũm arĩ mê kot amnhĩ tomnuj mã hamaxpêr rãhã ho pa.

²³ Na prem ã Tĩrtũm nhôrkwỹ kaàkre kamã mêmôj kuhê xwỹnh piitã mex kaxyw hipêx anê. Te Tĩrtũm kot mê pahto mex nhũm mê pahte nhỹrmã ma kaxkwa hwỹr ô krĩ hwỹr paxàpirta pyrã nê. Nom mê kot mry hpar nê hkamrô runhta kukwak ri mê pamex nê papa hkêt. ãm mēhō kamrō kukwak ri mê pamex xwỹnhã pix kukwak ri na mê pahpê pahtĩr tũm nê papa mã xwỹnh. Ja na mex o mry kamrô piitã hakrenh pa. ²⁴ Jejus Krisja pix kukwak ri. Tãm na pre patre pyrã nê mê pahto Tĩrtũm wỹr kaxyw mê ãkra ho Tĩrtũm nhôrkwỹ kaàkre nhĩpêxta wỹr gjêx kêt nê. ãm ixkre kaàkre pix na pre. Na pre kaxkwa kamã Tĩrtũm nhô krĩ hwỹr axã. Tã arĩ kamã Tĩrtũm nhĩhkô hã mê pahto hwỹr rãhã ho hkrĩ.

²⁵ Nê Ijaew nhô patre maati na hte amgrã mê ôrkwỹ kaàkre kamã hitom maati hwỹr gjêx tipxi. Nê amnhĩ kôt mry kamrô ru nê ho agjê. Tĩrtũm kot hã omunh nê axte mê kot amnhĩ tomnuj mã hamaxpêr hkêt kaxyw. Nom Kris na pre mê urak nê mêmô mry pa nê Tĩrtũm mã hkamrô kapĩr kêt

nê. Kamrô na pre mê panê axkapĩ. Nom patre pyrã nê amgrã mê ã amnhĩ nhĩpêx anhỹr kêt nê. Na pre htyk o Tĩrtũm mã amnhĩ nhôr tipxi. ²⁶ Kêp apu patre pyrã nê amgrã mê mê panê htyk o pa ronhỹx ra mê panê htyk xohtô rax kumrêx. Nhỹx pre amnepê mã Tĩrtũm kot mêmôj piitã ho katorta rũm amgrã mê mê panê htyk o pa ho hkrax. Jao xatã htyk o amgrã xohtô rax kumrêx. Nom ja kot anhỹr kêt. Na pre mê pahwỹr wrỹ nê mê panê htyk tipxi htã htykja o mê pahte amnhĩ tomnuj piitã hpãnhã amnhĩrer par kumrêx. Jakamã mo kaxyw koja axte ty?

²⁷ ãm pahtyk tipxi htã koja Tĩrtũm nhỹrmã akupỹm mê pahpiitã mê pahto pahtĩr nê ahpỹnhã tanhmã mê pajarênh to nê ahpỹnhã tanhmã mê panhĩpêx to. Kormã mê pahtĩr ri mê pahte amnhĩ nhĩpêx ã mê pahpumunh xã hkôt tanhmã mê panhĩpêx to. ²⁸ Ja pyrã nê na pre Krisja ãm mê panê htyk tipxi htã mê pahto ohtô nê mê panê mê pahte amnhĩ tomnuj piitã rênh pa. Hãmri nhũm Tĩrtũm akupỹm ho htĩr nê akupỹm amnhĩ wỹr ho api. Tã koja nhỹrmã akupỹn mê pahwỹr wrỹ. Nom axte mê pahte amnhĩ tomnuj pãnhã amnhĩ rer kaxyw mê panê htyk kaxyw wrỹk kêt nê. Ra kot mê pahte amnhĩ tomnuj pãnhã amnhĩrer kênã. Koja akupỹn wrỹ nê mê pahte amnhĩ wỹr kamã pajamak o papa xwỹnhjaja ma akupỹm amnhĩ kôt kaxkwa hwỹr mê pahto àpir pa. Ra mê pahtyk tã nhũm akupỹm mê pahto mê pahtĩr nê ma amnhĩ kôt mê pahto àpir pa pu mê kuri pamex nê pahtĩr tũm nê papa ho papa.

10

Kris kot mê panê htyk tipxi hã harênh

¹ Nê arĩ mê kot Tĩrtũm kapêr tũm kôt amnhĩ nhĩpêx o mê pa

xwÿnhjaja kormã hprĩ hã Tĩrtũm kot tanhmã mẽ pahto mex to hã harênh mar tÿx kêt. Na prem kormã hkwy pix ma. Na hte mẽ õ patreja amgrã mẽ kãnhmã kaxkwa hwÿr mry kamrõta pẽ nẽ mẽ amnhĩ to Tĩrtũm wÿ. Kot ja hã mẽ omunh nẽ axte mẽ kot amnhĩ tomnuj mã hamaxpêr hkêt kaxyw. Tã ã mẽ kot amnhĩ nhĩpêx anhÿr tã arĩ Tĩrtũm kapêr kwÿm amnhĩ nhĩpêx rãhã ² jakamã na prem xatã kãm mẽmo mry kamrõ runh o pa. Kêp apu tãm amnhĩ nhĩpêx nẽ tãm ri hamaxpêr ronhÿx arĩ ã amnhĩ nhĩpêx anhÿr o pa hkêt nẽ. Nẽ xatã amnhĩ pãnhã mry hpar nẽ hkamrõ ho Tĩrtũm nhõrkwÿ kaàkre kamã mẽmoj kamĩr kêt nẽ. ³ Nom na prem tãm amnhĩ nhĩpêx o pa hkêt nẽ. Mẽ kot amgrã mẽ Tĩrtũm kot mẽ nẽ mẽ kot amnhĩ tomnuj rênh kaxyw mẽ kot kãm mẽmo mry hpar o pa htã no ãm hkôt amnhĩ nhĩpêx xwÿnh ã amnhĩ jarênh kêt nẽ. Arĩ mẽ kot amnhĩ tomnuj o pa jakamã na prem mry hparta ã amnhĩ pumax nẽ tee ri amnhĩ kukamã hamaxpêr o hkaprĩ nẽ pa. ⁴ Nom na hte mõx kamrõ rÿ motre kamrõja mẽ panê mẽ pahte amnhĩ tomnuj rênh kêt nẽ. ⁵⁻⁸ Jakamã na pre Krisja mẽ pahwÿr nojarêt nẽ Tĩrtũm mã amnhĩ jarênh o:

Pa Tĩrtũm? E kot paj ma mẽ hwÿr wrÿ.

Mẽ kot amnhĩ pãnhã amã mry hparta apê hprãm nõkati nẽ amã hkĩnh kêt.

Ate mẽ nẽ mẽ kot amnhĩ tomnuj rênh kaxyw mẽ kot amã mẽmo mry hparta amã hprãm kêt. ãm ixkukamã na ka pre ã mẽ kot amnhĩ nhĩpêx anhÿr kaxyw mẽ kãm ja hã karõ.

Mẽ kot mry nhĩpêx o te pa ixte mẽ nẽ ixtyk nẽ ixkamrõ pikapĩr pyrãk o na prem ixkukamã ã amnhĩ nhĩpêx anê.

Jakamã na ka ra mẽ kaxyw inhmã inhi gõ pa mẽ urãk nẽ inhi ho inhi.

Tã kot paj ma mẽ hwÿr wrÿ. Ixte amã hprãm xã hkôt pix mã ixte tanhmã amã mnhĩ nhĩpêx to ho ixpa kaxyw. Akapêr ã kagã htũm kot tanhmã ixkukamã ijarênh to xã hkôt kot wrÿ nẽ ã amã amnhĩ nhĩpêx anê. Anê.

Hãmri nẽ man mẽ pahwÿr wrÿ. ⁹ Kot Tĩrtũm kapêr tũm o hapêx par nẽ hpãnhã tãm mẽ panê htyk kaxyw wrÿ. Jakamã na pre nojarêt nẽ Tĩrtũm mã amnhĩ jarênh o:

—E ixte amã hprãm xã hkôt amnhĩ nhĩpêx kaxyw kot paj ma mẽ hwÿr wrÿ.

¹⁰ Anhÿr jakamã wrÿ nẽ Tĩrtũm kãm hprãm xã hkôt mẽ panê ty. Na pre nhãm mẽhõ mẽ kãm hkurê xwÿnhjê mã õr nhũm mẽ kot hpĩr nhũm amarĩ htyk kêt nẽ. Na pre amnhĩ grõnh kôt mẽ kãm amnhĩ gõ nhũm prem kupĩ. Hãmri nhũm htyk o mẽ pahte hkôt amnhĩ xunhwÿr xwÿnhjê o Tĩrtũm kra. Mẽ kot xatã mry hparta rom htyk tipxi tã mẽ pahpiitã mẽ pahte amnhĩ tomnuj pãnhã amnhĩrer pa.

¹¹ Nẽ mẽ õ patrejaja na htem apkati mẽ Tĩrtũm nhõrkwÿ kaàkre kamã kãm tanhmã amnhĩ nhĩpêx to. Nẽ apkati mẽ hkwyjê hpãnhã mry hkwy hpa nẽ hkamrõ ru nẽ mẽ ho Tĩrtũm wÿ. Tã nom ja hã mẽ omunh xã hkôt mẽ nẽ mẽ kot amnhĩ tomnuj rênh kêt nẽ.

¹² No kêt Kris na pre mẽ kot xatã mry hpar xwÿnhnta rom ãm htyk tipxi htã mẽ pahte amnhĩ tomnuj piitã hpãnhã amnhĩre. Hãmri nẽ ma akupÿm kaxkwa hwÿr api nẽ Tĩrtũm nhĩhkõ hã Pahi Maati hkrĩ xã kamã upõk rũm hkrĩ ho hkrĩ. ¹³ Kojã kuri hkrĩ rãhã nhũm Tĩrtũmja ihkram mẽ kot kutã amnhĩ xunhwÿr xwÿnhjê jaxãr pa. Ja kaxyw na kormã kuri hamãr o hkrĩ. ¹⁴ ãm htyk tipxi htã htykja

o mẽ pahte hkôt amnhĩ xunhwÿr xwÿnhjê ho Tirtũm kra pu mẽ ra hpãnhã tãm amnhĩ nhĩpêx rãhã ho papa. Nê pajamaxpêr mex o ri papa. Tirtũm kãm hprãm xà hkôt.

¹⁵ Amnepê m mẽ kot Tirtũm nhÿ hã kapêr jarênh o mẽ pa xwÿnhjaja na prem mẽ panhĩgêjtê mã kapêr o pa. Tirtũm Karô nhÿ hã mẽ kãm kapêr nê mẽ kãm:

¹⁶—E na Tirtũm mẽ pamã amnhĩ jarê nê amnhĩ jarênh o:

Kot paj nhÿrmã axtem ixkapêr nyw o mẽ amã ixkapêr.

Nê mẽ akrãm hajê ka mẽ mar tÿx pê hã ano htÿx nê ho apa.

Ixkapêr tũm na pa pre mẽ amã kên pota ã hã kagã.

Nom ixkapêr nyw kot paj axtem mẽ akrãm hajê.

¹⁷ Nê kot paj axte mẽ ate amnhĩ tomnuj mã ijamaxpêr kêt nê.

Anhÿr o mẽ pamã amnhĩ jarênh. Anê.

¹⁸ Tã ra axte mẽ pahte amnhĩ tomnuj mã hamaxpêr kêt ã kot amnhĩ jarênh jakamã mo kaxyw kot pu mẽ arĩ amnhĩ pãnhã kãm mẽmo mry hpar nê hkamrô runh o papa? Tã mẽ pahkwÿjaja na hte arĩ kãm ja ho anhÿr prãm o pa. E kwa mẽ axte ã amnhĩ nhĩpêx anhÿr kêt nê ixkwÿjaja.

Akupÿm mẽ pahte amnhĩ nhĩpêx tũm o paxujanãr kêt ã mẽ pamã karô

Matêwre 27.51; Rukre 23.45; Rômãn 5.1-2; Epes 3.12; Eprêw 4.14-16

¹⁹⁻²⁰ E ixkrãmnhwÿjaja. Ra Jejus kot mẽ panê htyk o hkamrô pikapÿr jakamã na pu htem arĩ tee ri amnhĩ kukamã pajamaxpêr hkêt nê. Tirtũm axte kot mẽ pahte amnhĩ tomnuj mã hamaxpêr kêt jakamã na pu htem paxãmnhĩx amnhĩ to hwÿr o papa. Te paxãmnhĩx ôrkwÿ kaãkre kamã hitom maati hwÿr pagjêx nê kamã amnhĩ to hwÿrta pyrãk. Jao ra mẽ papamjaja amnhĩ to hwÿr o papa nhũm patre axte

mẽ pahto hwÿr kêt nê. Jejus na pre htyk o mẽ pamã hitom maati wÿr hakwakre kahêxã hã kupêxêja kôt ã ho axkjê. Jao mẽ paxãmnhĩx hwÿr mẽ pagjêx kaxyw mẽ pamã kahê xà mẽ. ²¹ Tã ra kêp Tirtũm nhô krĩ kamã mẽ pahto hwÿr xwÿnh maati na. Nê mex kumrêx o jar pika ja kamã patre kot mẽ ho hwÿr o pa xwÿnhnta jakrenh. ²² Jakamã e kwa kêr pu mẽ mãmri paxãmnhĩx amnhĩ to Tirtũm wÿr o papa. Ra Jejus kot mẽ panê htyk nhũm mẽ pahte amnhĩ kaxyw hkôt pajamaxpêr rãhã ho papa jakamã kêr pu mẽ axte mẽ pahpê amnhĩ tomnuj xwÿnh ã amnhĩ jarênh kêt nê. Kêr pu mẽ nhÿrmã tanhmã pajamaxpêr punuj to rÿ tanhmã amnhĩ tomnuj to hãmri nê tee ri ja hã amnhĩ pumu nê pahkaprĩ kamã amnhĩ to Tirtũm wÿr kurê kumrêx. Jejus ra kot mẽ pahte amnhĩ tomnuj pãnhã amnhĩrer par jakamã kot puj mẽ Tirtũm mã tanhmã mẽ pahte amnhĩ tomnuj to hã amnhĩ jarê nhũm mẽ pama nê axte kãm hamaxpêr kêt nê. Pu mẽ te paxwÿr nê pahte amnhĩ nê pagrã htyk kuhõnh par nê akupÿm pamex pyrãk. Nê axte paxãmnhĩx amnhĩ to Tirtũm wÿr o papa.

²³ Nê mẽ kot Kris ã tanhmã mẽ pahto htã kwa kêr pu mẽ tee ri amnhĩ kukamã pajamaxpêr kêt nê. Rÿ pajamaxpêr o:

—Konên. Koja mẽ tanhmã hamaxpêr to nê Kris ã ixpĩ rÿ ko. Pa apu mẽ kot ixpĩr pymaj akupÿm ixte amnhĩ nhĩpêx tũm o awjanã nê akupÿm hkôt amnhĩ nhĩpêx japêr rÿ ko. Anê.

Kwa pu mẽ tee ri ã pajamaxpêr anhÿr hkêt nê. Pu kêt mẽ pajamaxpêr o:

—Nã mẽ kot Kris ã tanhmã ixto htã kot paj aa hkaga hkêt nê. Mẽ kot hã ixpĩr mã tã kot paj hkaga hkêt kumrêx.

Anhÿr ã amnhĩ jarê. ²⁴ Nê kêr ka mẽ akwÿjê mã anê kê mẽ mẽmoj

to axpên kutâ nojarêt rāhā ho ri axpên kôt pa. Jao tanhmā axpên to mex to o ri axpên kôt pa.

²⁵ Na pre ra mẽ pahkwýjaja tanhmā hamaxpêr to nê axte mẽ pahkôt pikuprõnh nê Tirtûm kapêr mar o hkrî hkêt nê. No kêr pu mẽ ho mẽ urāk kêt nê. Kêr pu mẽ arî xatā axpên wýr akuprõ nê mẽ pahte tee ri amnhî kukamā pajamaxpêr nê axpên mã pakapêr o papa. Kêt mẽ panhõ Pahihtija ra akupýn mẽ pahwýr wrýk kaxyw jakamā kwa kêr pu mẽ kutêp arî axpên mã pajamaxpêr mex nhõr pê tām axpên nhîpêx mex rāhā ho i papa.

²⁶ Mẽ pahkwýjaja kot Tirtûm kapêr mar mex tã na htem kuma nê âm kuma. Kwa kêr ka mẽ ho mẽ urāk kêt nê. Kris kot mẽ panê htyk ã harênhja mẽ kot mar mex tã na htem kuma nê âm kuma nê hkaga kumrêx. Jakamā mẽhõ koja Kris pyrà nê htyk o mẽ kot amnhî tomnuj pānhā amnhîre? Nà amrakati kumrêx. Âm Jejus pix na pre Tirtûm ja kaxyw âm. Tapxipix na pre ã mẽ panê amnhî nhîpêx anê. Tã nhũm mẽ kot hkagaja mýrapê koja mẽ nhýrmā mẽ tāmjjaja mẽ kot amnhî tomnuj pānhā amnhîre. ²⁷ Mẽ kot Tirtûm kutā amnhî xunhwýr xwýnh na mẽ. Amnepêm na pre Tirtûm mẽ kot kutā amnhî xunhwýr xwýnhjê kaxyw mẽ kot amnhî xā htýx kamā hamak tũm xāta nhîpêx. Tã ra mẽ kot Jejus kaga jakamā koja nhýrmā ma hwýr mẽ rênh pa nhũm mẽ tee ri kām hwýr pa hprām kêt kaprý.

²⁸ Amnepêm finat Mojesja kormā htír ri na pre hte mẽhõ pixi nê kapêr kaga nê akupým kot amnhî nhîpêx tũm o awjanā nê tanhmā amnhî tomnuj to nhũm hkwyjaja ja hā omu. Tanhmān axkrut rý axkrunêpxi nê ja hā omu. Hāmri nê ma Mojes wýr mra nê axpên kôt kām tanhmā kot amnhî tomnuj to hā harê. Hāmri nhũm harênh ma

nê mẽ kām hā amýnê nhũm tee ri kām htír prām kaprý. Mẽ kot akupým amnhî nhîpêx tũm o ujanār nê amnhî tomnuj o paja mýrapê na prem mẽ kupa. Á na pre htem mẽ hipêx anhýr o pa.

²⁹ Nê koja mẽhõ tanhmā Tirtûm Kra Jejus o kapêr punuj to. Tirtûm kapêr ã kagā htũm kot ra mẽ kot kêp Tirtûm Kra hā harênh mar mex tã axtem nê tanhmā ho kapêr punuj to ho pa. Kot mẽ panê htyk nê hkamrõ pikapír kôt kot mẽ pahte amnhî tomnuj pānhā amnhîrer ã harênh mar tã kuma nê âm kuma nê harênh o:

—Nà mẽ pahpyrà nê kot amnhî tomnuj xwýnh nhũm mẽ kot hā hpír kênā. Na pre mẽ panê htyk kêt nê.

Anhýr ã harê. Nê Tirtûm Karõja nhũm mãānên tanhmā ho kapêr punuj to. Kêp mẽ pakutā nojarêt xwýnh tã nhũm axtem nê tanhmā ho kapêr punuj to. Mýrapê koja nhýrmā Tirtûm tanhmā homnuj týx to. Homnuj týx o mẽ kot Mojes kapêr kaga nhũm mýrapê kot mẽ hparta jakre. Jakamā kwa kêr ka mẽ ã amnhî nhîpêx anhýr hkêt nê. ³⁰ Tirtûm kapêr ã kagā htũm kot ja jarênh kot:

Ixpê Tirtûm kot paj mẽ kot amnhî tomnuj xwýnhjê homnuj týx nê. Anê.

Nê mẽ kot tām amnhî nhîpêx xwýnhjê jarênh kot:

Mẽ kot amnhî to mex o mẽ pa xwýnhjaja kot paj nhýrmā mẽ ho mex rax nê. No mẽ kot amnhî tomnuj o mẽ pa xwýnhjaja kot paj nhýrmā mẽ homnuj týx nê. Anê.

Ra mẽ pahte ã kapêr anhýr xwýnhja kot amnhî nhîpêx ã omunh mex.

³¹ Jakamā kwa mẽ okora. Kêr ka mẽ amnhî to mex rāhā ho ri apa. Tirtûm rāhā ho rāhā nê hihtýx o hihtýx jakamā koja mẽmoj tã akamā gryk ka amex kêt o amex kêt.

³² Nê amnepê mē ate Jejus kôt amnhî xunhwÿr krax kām na prem Jejus ā mē atomnuj tÿx tā ka prem mē umaj hkaga hkêt nê. Tā kēr ka mē arî ā amnhî nhîpêx anhÿrja kukamā mǎn ajamaxpêr nê hā anohtÿx rāhā ho apa. Jao arî ā amnhî nhîpêx anê nê mē umaj Jejus kaga hkêt nê. ³³ Na prem mē piitā mē noo mǎ tanhmā mē amā kapêr punuj to nê tanhmā mē anhîpêx to. Nê tōhā tanhmā mē akwÿjê homnuj tÿx to ka mē tee ri ja hā mē omu nê mē kamā axukaprî nê. Nê mē hkôt axkamê nhūm prem mǎ mē ato anê nê. ³⁴ Na prem mē akwÿjê jagjê ka prem ja hā mē omu nê ma mē hagiĕnh xā hā ixkre hwÿr mē hwÿr mra nê tanhmā mē ho mex to. Nhūm prem mē apê mē akukrêx kwÿptā nê ma amnhîm o pa ka mē am amnhî tā mē omu nê ajamaxpêr o:

—Kwār mē māmri ma amnhîm hamÿn o pa. Koja nhÿrmā Tirtūm inhmā ixkukrêx mex o kot ja jakrenhta kwÿ nhōr rax nê pa amnhîm hamÿ nhūm aa ixpê hapêx kêt nê. Hāmri nhūm axte mēhō aa ixpê utār kêt nê. Jar mē ixkukrêxta mexti hā. Anê.

Jao mē kot mē apê utār tā ka mē akaprî nā apa hkêt nê. Ā amnhî kukamā ajamaxpêr anhÿr pē akĭnh nê apa. Ām hāmri na ka prem ā amnhî kukamā ajamaxpêr anê. ³⁵ Na ka prem mē kutā amnhî to htÿx kām ā apa anê. Tā kwa kēr ka mē arî ā amnhî nhîpêx anhÿr o ri apa. Kēr kē nhÿrmā Tirtūm ja hā mē ato mex rax nê.

³⁶ Nê kēr ka mē arî amnhî kaxyw Tirtūm mǎ ajamaxpêr rāhā ho ri apa. Mē kot Jejus ā tanhmā mē ato htā ka mē hkaga hkêt nê. Kot kaj mē ā amnhî nhîpêx anhÿr o apa nhūm Tirtūm ja hā mē apumu nhūm ja kām mex nê. Hāmri nhūm ra kot amnhî jarēnh xā hkôt nhÿrmā amā mēmoj mex nhōr rax

nê. Jakamā kwa mē kot tanhmā mē anhîpêx to hā amnhî pumu nê tee ri amnhî kukamā ajamaxpêr o ri akaprî hkêt nê. Kot kaj mē Kris ā apunuj rāhā apa hkêt nê. ³⁷ Tirtūm kapêr ā kaga htūm kot Jejus jarēnh kot:

Koja mē pahwÿr wrÿk mǎ xwÿnhhta tokÿx wrÿ. Na ra wrÿk kaxyw nojarêt. Anê.

³⁸ Nê harēnh kot:

Ixkôt mē kot amnhî nhîpêx mex o mē pa xwÿnhjaja koja mē amnhî kaxyw ixkôt hamaxpêr tÿx rāhā nê. Jao nhÿrmā ixri htĭr tūm nê mex rāhā nê pa ho pa.

Nê koja mēhō ixkaga pa tee ri kām ixkĭnh kêt ā omu. Anê.

³⁹ No mē papajaja te mē pahte mē kot Jejus kaga nhūm kot amnhî tā mē homnuj mǎ xwÿnhjê pyrāk kêt. Arî mē pahte amnhî kaxyw hkôt pajamaxpêr rāhā jakamā koja nhÿrmā amnhî wÿr mē pahto api.

11

Amnhî kaxyw Tirtūm kôt mē hamaxpêr mex xwÿnhjê jarēnh

Sikūn Pêtre 3.5-7

¹ Nê na htem Kris ā mē panhîpêx kati ho pa pu mē pahpunuj rāhā nê ri papa. Te Kris kot mē pahto mex kêt pyrāk pu htem mēmoj punuj pix kām ri papa nê kormā Tirtūm kot mē pahto mex ā amnhî tā omunh kêt nê. Tā ā mē pahte anhÿr tā kwa kēr pu mē arî kapêr kôt amnhî nhîpêx rāhā ho papa. Mē pahte pano ho Tirtūm pumunh kêt tā kot mē pahkôt pa ho pa hā amnhî kaxyw kām pajamaxpêr tÿx rāhā ho papa. Jakamā na pu htem am kapêr kôt pix mǎ amnhî nhîpêx o papa. ² Amnepê mǎ mē pakukamā mē panhîgêjtaja na prem no ho Tirtūm pumunh kêt tā amnhî kaxyw kām hamaxpêr nê kapêr kôt amnhî nhîpêx o pa nhūm amnhî tā mē omu nhūm ja kām mex nê.

³ Nê mē papajaja na pu htem pajwýja mē pano ho omunh kêt tâ amnhîm harênh o:

—Nà amnepêm kormã mēmoj pitã amrakati ri nhûm Tirtûm ãm kapêr pix o mēmoj piitã ho kato. Ixte inhno ho ja hã omunh kêt tâ kot ã amnhî nhîpêx anhÿr ã amnhî jarênhja jakamã kot paj hkôt ijamaxpêr tÿx rãhã ho ri ixpa. Anê.

⁴ Na pre finat Atãw nhîpêx nê kaxyw hprô Ewa nhîpêx. Hãmri nhûm wa hkra Apewja htô Kaï rom amnhî kaxyw Tirtûm kôt hamaxpêr tÿx o pa. Jakamã nhûm wa Tirtûm mã mēmoj gô. Nhûm Apew kot Kaï rom Tirtûm kãm hprãm xà hkôt kãm mēmoj nhôr jakamã nhûm amnhî tâ omu nê kot amnhî to mex xwýnh ã harê nê kot kãm ôr xwýnhnta nhûm mex ã harê. Tã Apew amnepêm htyk tâ pu htem arî harênh mar rãhã ho papa nê kãm pajamaxpêr o:

—Apew na pre hte amnhî kaxyw Tirtûm kôt hamaxpêr tÿx rãhã ho pa.

Anhÿr ã kãm pajamaxpêr.

⁵ Nê Atãw kanrêhã htãmnhwý Enojja na pre haxwýja amnhî kaxyw Tirtûm mã hamaxpêr tÿx o pa. Jao hkamnâr rom kãm hprãm xà hkôt pix mã tanhmã kãm amnhî nhîpêx to ho pa nhûm amnhî tâ omu nê amnhîm mex ã harê. Jakamã na pre htyk kêt nê. Na pre Tirtûm htîr rãhã ma amnhî wÿr ho api nhûm hkwyjaja tee ri hapêr o pa. Jakamã na pu htem arî axpên mã Enok kot amnhî kaxyw Tirtûm kôt hamaxpêr mex o pa hã harênh o papa. ⁶ Mē kot amnhî kaxyw Tirtûm mã mē hamaxpêr kêt xwýnhjaja na hte Tirtûm mē mex ã mē harênh kêt nê. Tã mē papajaja kêr pu mē Enok pyrã nê amnhî kaxyw kãm pajamaxpêr tÿx rãhã ho papa. Nê pajamaxpêr o:

—Tirtûmja htîr rãhã ho rãhã. Koja nhÿrmã mē ixte amnhî kaxyw hkôt

ijamaxpêr xwýnhjê ho mex rax nê. Nã koja mē ixto anê.

Anhÿr o mē pajamaxpêr nhûm Tirtûm amnhî tâ mē pajamaxpêr ã mē pahpumu nê mē pahte amnhî to mex ã mē pajarê. No mē kot amnhî kaxyw kãm hamaxpêr kêt xwýnhjaja na hte ã mē harênh anhÿr kêt nê.

⁷ Nê Enok kanrêhã htãmnhwý Noehtija na pre haxwýja amnhî kaxyw Tirtûm mã hamaxpêr tÿx o pa. Jao hkamnâr rom amnhîm pâr raxja nhîpêx. Na pre ra Tirtûm na rax kukamã tanhmã kãm ujarênh to. Kormã aa na wrÿk nhûm Noehiti kot omunh kêt tâ Tirtûm kapêr ma nê mar xà hkôt amnhîm pâr rax kumrêxta nhîpêx. Ôrkwÿ kamã hkwyjê mē mē amnhîm hipêx. No mē kot Tirtûm kapêr mar nê ãm mar xwýnhjaja na pre Tirtûm gô tam o mē hanhi nê mē himex pa. Nom Noehtija nhûm kot amnhî to mex xwýnh ã harê. Kot amnhî kaxyw hkôt hamaxpêr rãhã ho pa jakamã nhûm pre ã mex ã harênh anê.

⁸ Nê Noehiti kanrêhã htãmnhwý Apraãwja na pre haxwýja amnhî kaxyw Tirtûm mã hamaxpêr tÿx o pa. Na pre Tirtûm kot kãm pika nhôr ã kãm amnhî jarê nê ra kot ma hwÿr mênh kaxyw. Hãmri nhûm Apraãw kuma nê hkamnâr rom ô pika kaga nê ma pika hõja wÿr pa. Aa kot ma hwÿr môr nê omunh kêt tâ Tirtûm kapêr mar xà hkôt ô pika kaga nê ma hwÿr pa ho pa. ⁹ Hãmri nê hwÿr pøj nê omu nhûm Tirtûm kãm:

—E pika ja kot paj nhÿrmã akanrêhã akra nê atãmnhwýjê mã kugô. Anê.

Hãmri nhûm kuma nê pikaja kamã pa ho pa. Ra kamã axtem mē uro hkwyjaja ri pa nhûm Tirtûm kormã mē kator kêt ri nhûm mē ô pika hwÿr pøj nê mē kamã pa ho pa. Nom amnhîm ôrkwÿ mex nhîpêx kêt nê. Kormã kêp ô pika

kumrêx kêt ã hkamnhîx jakamã ãm mry kà o ixkre nhîpêx nê kamã pa ho pa. Nê nhÿhÿm pa kaxyw nê kugrà nê ma amnhî kôt o pa. Amnhî kaxyw Tîrtûm mã hamaxpêr rãhã jakamã ã amnhî nhîpêx anhÿr o pa.

Nê Apraãw kra Ijak nê htãmnhwÿ Jakoja wa Apraãw pyrã nê mry kà ho òrkwÿ nê ma amnhî kôt o pa. Nhÿm Tîrtûm kot Apraãw mã kapêr pyrã nê wa kãm wa hkanrêhã wa hkra nê wa htãmnhwÿjê mã pika nhôr ã amnhî kukamã wa kãm amnhî jarê. ¹⁰ Jakamã nhÿm Apraãw kormã Tîrtûm nhô krî hwÿr àpir xa hã amnhî tã hamãr pê kot ho ò pika mã xwÿnhjê kamã pa ho pa. Kaxkwa hwÿr àpir mã xwÿnhhta mex kumrêx. Tîrtûm kot hipêx jakamã koja mry kà ho ixkre nhîpêxta rom aa hapêx kêt nê. Jakamã nhÿm Apraãw mẽ pahpyrà nê ma kot hwÿr àpir xa hã amnhî tã Tîrtûm jamãr rãhã ho pa. ¹¹⁻¹² Tã ra hpigêt tÿx nê hkurê hkêt nê pa. Te ra ri htyk kaxyw pa pyrãk. Nhÿm hprô Sara haxwÿja hpigêx tÿx nê. Kamrô hkêt ã amgrã xohtô rax kumrêx. Nhÿm wa aa hkra hkêt nê pa htã nhÿm Tîrtûm nhÿrmã wa hkra hã wa kãm awjarê nhÿm wa kuma nê amnhî kaxyw hkôt hamaxpêr kurê kumrêx. Nom amnhî tã kuma nê tee ri amnhî kukamã hamaxpêr hkêt nê. Na pre wa kuma nê axpên mã:

—Nã kot puj xep hãmri tã pahkra. Tîrtûm kot hã ã pajarênh anhÿr kênã. Anê.

Tã ã wa kot hkra kaxyw Tîrtûm mã hamaxpêr anhÿr jakamã na pre Apraãwja hprô htu. Ra wa hamê hpigêt tÿx kumrêx tã nhÿm htu. Nhÿm wa hkra Ijakja gaa nê wa kãm kato. Jakamã nhÿm wa gaa nê rî wa hkanrêhã wa htãmnhwÿ xohtô rax o ohtô rax. Ohtô ho kaxkwa kamã kanhêti xohtô jakre. Nê ohtô ho gô xujanãr mÿri pikahti grã hkryre jakre. Jakamã nhÿm mẽ

tee ri mẽ ho kôta hpar mã. Nhÿm Apraãw kêp mẽ hpar krax. ¹³ Tã nhÿm Apraãw nê Ijak nê Jakoja mẽ ri pa tãmtã nê htyk pa nê hapêx. Tîrtûm kormã kot mẽ kãm pika jarênhhta nhôr xwÿj ri ra htyk pa. Nom kormã mẽ htÿr ri tanhmã kãm hamaxpêr to nê hamaxpêr o:

—Nã kormã Tîrtûm kot mẽ inhmã pika jarênhja nhôr kêt tã koja nhÿrmã inhmÿr pê ixkanrêhã ixkra nê ixtãmnhwÿjê mã kugô. Nã koja mẽ kãm kugô. Ra kot hã inhmã amnhî jarênh kênã kot kêt mẽ kãm òr kêt.

Anhÿr o kaxyw kãm hamaxpêr rãhã ho pa. Jao hkÿnh nê hamaxpêr o:

—Nã inhô krîja axtem na. Na pa hte jar pika ja kamã ri mẽ hkôt ri ixpa. Te ixpê mẽ uro pyrã nê ri mẽ hkôt ixpa nom jar inhô krî hkêt. Inhô krî na kêt axte mã. Anê.

¹⁴⁻¹⁵ Na prem ã ò krî hõ hkukamã hamaxpêr anhÿr o pa. No ò krî htÿmta mẽ kot hkaga nê pika hõ hwÿr môr xwÿnhhta na prem ã harênh anhÿr kêt nê. Kop apu mẽ kot amnhÿm tãm mãn jarênh ronhÿx prem awjanã nê ma akupÿm hwÿr pa. Na prem axtem krî hõ jarê nê kormã hwÿr môr kêt ã amnhî jarênh o pa. ¹⁶ Tã nhÿ krî na prem ã harênh anê? Nã kaxkwa kamã Tîrtûm nhô krîja. Tãm na mex kumrêx jakamã nhÿm prem kormã hwÿr ma àpir xa hã mẽ pahpyrà nê amnhî tã Tîrtûm jamãr rãhã ho pa nhÿm amnhî tã mẽ omu nê hkÿnh nê. Nê mẽ kot tãm amnhî nhîpêx ã mẽ omu nê mẽ kêp hkra hã mẽ harênh ã hpijaãm kêt nê. Hãmri nê mẽ kutêp tanhmã ò krî ho mex to ho pa.

¹⁷⁻¹⁸ Na pre ra tanhmã Apraãw mã hkra Ijakja jarênh to nê kãm:

—Akra Ijak kanrêhã hkra nê htãmnhwÿjaja koja mẽ kêp ixkra. Anê.

Tã ra kot amnhî tã Apraãw kamã hamak kaxyw hkukamã hamaxpêr nê hamaxpêr o:

—Xà we Apraãw kãm ixkĩnh tỳx kumrêx nê kãm ixkôt amnhĩ nhĩpêx rãhã ho pa hprãm nà? Xà we kãm ixkĩnh tỳx o hkraata jakrenh? E pa kop we ja hã amnhĩ tã kamã ama nê omu mãn. Anê.

Hãmri nê kot hkra hpĩr nê kãm òr ã kãm karõ. Hãmri nhũm kuma nê ra kot kãm hpĩr kaxyw. Kot Tĩrtũm kot amnhĩ nhĩpêx ã omunh mex jakamã hkamnãr rom kot kãm hpĩr kaxyw. ¹⁹ Nê hamaxpêr o:

—Nà Tĩrtũm akupỹm kot mẽ ho htĩr xwỹnh kênã.

Anhỹr jakamã kãm hkra hpĩr pyma hkêt nê ra kot kãm hpĩr mã tã nhũm Tĩrtũm amnhĩ tã omu nê nê kãm kapêr nhũm kuma nê hpĩr kêt nê wa ma akupỹm òrkwỹ hwỹr mõ. Tã ã kot hkra nhĩpêx anhỹr jakamã Apraãw mã te Ijak htyk nê akupỹm htĩr pyrãk.

²⁰ Nê Ijakja na pre haxwỳja amnhĩ kaxyw Tĩrtũm mã hamaxpêr tỳx o pa. Jao hkamnãr rom amnhĩ kra wa kãm Tĩrtũm kot wa ho mex kukamã wa kãm harê. Kra Jako mẽ Ejauta wa kãm harê nê wa kãm:

—E koja nhỹrmã Tĩrtũm inhmỹr pẽ war ato mex rãhã ho pa. Anê.

²¹ Nê Jakoja na pre haxwỳja amnhĩ kaxyw Tĩrtũm mã hamaxpêr tỳx o pa. Jao hkamnãr rom hkra Juje mã Tĩrtũm kot mẽ ho mex kukamã harê. Na pre Jakoja hkra nê htãmnhwỳ mẽ hpimràatã hprãm xàj ma Ejit wỳr pa nê kamã pa ho pa. Tã nhũm Jako hpigêt tỳx nê ra htyk kaxyw. Hãmri nê hkra Juje mẽ hkra wa mẽ kãm kapêr nê mẽ kãm:

—E na pa tee amnhĩ kamã ama. Na pa ra ixyk kaxyw. Nom koja Tĩrtũm nhỹrmã inhmỹr pẽ mẽ ato mex rax nê. Anê.

Hãmri nê amnhĩ kaxpar xà hã pĩ hã amnhĩ kaxpa nê kãnhmã xa nê Tĩrtũm mã mex o mex ã harê. Hãmri nê akupỹm nõr xà kamã nõn ty.

²² Nê Jujeja na pre haxwỳja amnhĩ kaxyw Tĩrtũm mã hamaxpêr tỳx o pa. Jao htyk kaxyw nê hkamnãr rom hkwyjê mã tanhmã amnhĩ jarênh to. Ra hpigêt nê htyk kaxyw nê hkwyjê mã tanhmã amnhĩ tã karõ hto nê mẽ kãm:

—E na pa ra ixyk kaxyw. Tã koja Tĩrtũm inhmỹr pẽ nhỹrmã Ejit rũm mẽ akator nê ma akupỹm mẽ panhõ pika hwỹr mẽ ato pa. Ra kot mẽ panhigêt Apraãw mã amnhĩ jarênh xà hkôt. Jakamã kwa mẽ inhma. Kêr ka mẽ akupỹm ano-jarêt nê ma amnhĩ kôt ixtã kasãwja mỳ nê amnhĩ kôt ixto mõ. Hãmri nê mũtar mẽ panhõ pika kamã mẽ anhõ krĩ htã ijaxã pa jawỳ mẽ akuri ixtã pyka. Anê.

²³ Nê Mojes katorxã mẽ hipêêxãja na pre wa haxwỳja jajê pyrã nê amnhĩ kaxyw Tĩrtũm mã hamaxpêr tỳx o pa. Juje hkanrêhã htãmnhwỳ na pre wa. Jakamã nhũm Ejit nhõ pahija tee ri Ijaew xohtõ rax kumrêx ã mẽ omu nhũm ja kęp omnuj nê. Hãmri nhũm mẽ hkra myjaja mẽ hapõx kôt mẽ hamỹnh xwỹnhjaja kot mẽ hpar ã mẽ kãm karõ. Tã nhũm Mojes kato nhũm hipêêxã mẽ katorxãja wa omu nhũm muxre nhũm wa tee ri hkukamã hamaxpêr. Hãmri nê pahi Paraohti mã mẽ hkra jamỹnh xwỹnh kot wa kęp hpĩr pymaj ho pimxur o hã mytwrỹ axkrunêpxi. Tĩrtũm kamnãr rom wa amnhĩ tã kãm uma hkêt nê ã kęp hkra ho hpimxur anê.

²⁴ Nê Mojes na pre haxwỳja amnhĩ kaxyw Tĩrtũm mã hamaxpêr tỳx o pa. Kormã karãre ri na pre Paraohti hkra nija omu nê amnhĩm kumỳ nê ho hkra nê amnhĩ kôt o pa. Rãhã nhũm ãptãr nhũm Ejit nhõ xwỹnhjaja kęp pahi Paraohti htãmnhwỳ hã axpên mã harê. Hãmri nhũm tee ri amnhĩ tã mẽ kuma nê amnhĩ tã mẽ kãm aprã nê mẽ kãm:

—Kwa mē ã ijarēnh anhÿr kêt nē. Ixpē mē akwÿ hkêt. Anē.

²⁵ ãm kãm Tirtūm kwÿjē kôt pix mǎ ri pa ho pa hprām. Nē kãm Ejit nhō pahi hkôt amnhī tomnuj prām kêt nē. ãm mē kot amnhī tomnuj pix o paja na mē kãm hprām nhūm ja hǎ mē omu nē tee ri mē hkukamǎ hamaxpēr nē hamaxpēr o:

—Nà kot paj mē hkôt ri ixpa hkêt kumrēx. Mē hkīnh nē pa htǎ koja mē gaa nē ty nhūm mē hkīnhja mē kēp hapēx. Nà kot paj Tirtūm kwÿjē hkôt mǎn ri ixpa ho ixpa. Mē kot Tirtūm ã mē inhīpēx kati htǎ pa arī mē hkôt ixpa ho ixpa. ²⁶ Inhmǎ Ejit nhō xwÿnhjē hkôt ixkukrēx rax nē ri ixpa hprām kêt. Kwār mē māmri Tirtūm ã tanhmǎ inhīpēx to. Koja mē ã inhīpēx anē pa ixpunuj nē ri ixpa htǎ koja Tirtūm nhÿrmǎ ixto mex rax nē. Nà kot paj Ejit nhō pahihiti hkôt ri ixpa hkêt nē.

Anhÿr jao ra mē pahpyrà nē Kris gryk ã mē hkaga. ²⁷ Tǎ akupÿm mēō pika hwÿr Ijaewjja ho mōr kaxyw nhūm Ejit nhō pahihitija tee ri ja hǎ omu nē kamǎ gryk tÿx nē. No nhūm Mojesja amnhī kaxyw Tirtūm kôt hamaxpēr tÿx o hkamnār rom kãm mē uma hkêt nē. Nē mē kēp hkwyjē kator pa nē ma akupÿm mēō pika hwÿr amnhī kôt mē o pa. Tirtūm kamnār rom ã mē kēp mē ho kator anē. Aa kot no ho omunh kêt tǎ amnhī kaxyw kãm hamaxpēr tÿx nē hkamnār rom mē kator nē hamakētkati nē mē o pa. ²⁸ Nē hkamnār rom mē hkīnh ã arġgro mē kot kãm “Pas” anhÿr xwÿnhhta ho hkra. Kormǎ Ejit rūm kator kêt ri. Nē kaxyw amnhī kwÿjē mǎ hǎ karō nē mē kãm:

—E pa mē amǎ Tirtūm kapēr jarē ka mē inhma. Nà kot puj xep mē jarǎhǎ ôwēhti hkwy pa nē hkamrō ru. Nē hkamrō ho panhōrkwÿ jakwakre hǎ pī kukō. Hāmri nē ĩ kuxōt nē kuku. Koja kamāt nhūm mē kot amnhī tomnuj xwÿnhjē pē mē

hkra my kot wa piitǎ mē hpar mǎ xwÿnhja mō. Hāmri nē mē pamÿ ri mō nē ã mē pahte mē panhōrkwÿ nhīpēx anhÿrja ã omu nē tanhmǎ mē pahkrajē ho hkêt nē. Tirtūmja ã mē pahte amnhī nhīpēx anhÿr kaxyw ã inhmǎ karō anē. Jakamǎ e pu mē hkamnār rom ã amnhī nhīpēx anē kē mē pahkrajaja mē pahpē htyk kêt nē. Anē.

Hāmri nē ã mē kot Ejit rūm kator xǎ hǎ arġgota ã mē hkīnh o kator kra. Anē. Mē hkīnhja na htem kãm “Pas” anē.

²⁹ Nē Ijaewjja na prem haxwÿja Ejit rūm kormǎ Mojes kôt mē pa ri urāk nē amnhī kaxyw Tirtūm mǎ hamaxpēr. Jakamǎ na prem ra gō xujanār pē “Gō Kamrēk” anhÿr xwÿnhja mÿ ri kuhē nhūm Tirtūm mē kãm ho axkjē. Nē mē kãm hkôt ã ho amgrǎ nhūm mē hǎ hkamnār rom mex nē rēr pa. No nhūm mē hkôt mē kot mē himex kaxyw mē mra xwÿnhjaja. Ejit nhō pōristijaja nhūm gōja akupÿm mē hǎ axkamur nē mē himex pa.

³⁰⁻³¹ Nē Ijaew kot Mojes mÿr pē Jojue hkôt pa ri mē urāk nē amnhī kaxyw Tirtūm kôt hamaxpēr o pa. Na prem ra Tirtūm kot mē kãm pika nhōr xwÿnhhta wÿr pōj nhūm Tirtūm krī pē Jeriko hwÿr mē kurē. Mē kot kamǎ mē pa xwÿnh pē utār kaxyw mē hwÿr mē kurē. Mēō krī pu hǎ kahēja kēn tÿx pix o na pre. Nē hprēk rax kumrēx. Nē krī nhō xwÿnhjaja kãm Tirtūm kapēr mar prām kêt. Hāmri nhūm Tirtūm mē hǎ Ijaewjē mǎ amÿnē nē mē kãm:

—E mēō krīja kot paj mē amǎ kugō nom kēr ka mē inhmar kumrēx. Kēr ka mē apkati mē mē ō krī hwÿr mra nē kupu hpÿnh o atǎ apkati kēp 7 nē rī ma akupÿm mra. Anē.

Hāmri nhūm mē kuma nē mar xǎ hkôt ma Jeriko hwÿr mra. Hāmri nē hwÿr pōj nē Tirtūm kamnār rom krī puhǎ kahēja kupu hpÿnh o hǎ apkati kēp 7. Hāmri nhūm apkati

pê 7ta ã nhũm kên tỳx o kahêja mē kēp amnhī krakrak nē rōrōk pa. Nhũm mē mra nē hkôt krī hwỳr agjê nē krī nhō xwỳnhjê nhĩmex pa. Nom krī kamã kuprỳ pê Raapja Ijaew pyrà nē amnhī kaxyw Tĩrtũm mã hamaxpêr o pa jakamã nhũm mē kormã mē himex kaxyw mē hwỳr mōr kêt ri amnhī kukamã mē hkwyjaja kot mē hã ukapi ho pa kaxyw mē hwỳr mē kurê. Hãmri nhũm Raapja mē kēp amnhī pyrà nē Tĩrtũm kôt hamaxpêr ã mē omu nē hkwy kot mē himex pymaj amnhī nhōrkwy kamã mē kēp mē ho amũxu nhũm mē hkã hkĩnh pê ma akupỹm hkwyjê wỳr mō. Jakamã nhũm mē kot mē himex kaxyw mē hwỳr mra hãmri nē amnhī pyrà nē tanhmã Raap mē õ fãmii ho hkêt nhũm mē arĩ htĩr nē pa. Mē urak nē amnhī kaxyw Tĩrtũm kôt hamaxpêr o pa hã omunh xà hkôt tanhmã mē ho hkêt nē.

³² ã na pre mē kot amnhī kaxyw Tĩrtũm kôt mē hamaxpêr xwỳnhjaja Tĩrtũm kamnàr rom amnhī nhĩpêx anhỹr o pa. Nom jajê pixjaja na prem ã amnhī nhĩpêx anhỹr hkêt nē. Mããnên Giteaw nē Parak nē Sãsõ nē Jepte nē Tawi nē Sãmuew nē Tĩrtũm nhỹ hã mē kapêr o pa xwỳnhjaja. Jajê piitã na prem wamtajê pyrà nē amnhī kaxyw Tĩrtũm kôt hamaxpêr tỳx rãhã ho pa. Nom kot paj ixprĩ hã tanhmã mē kot hkamnàr rom amnhī nhĩpêx to hã mē harênh kêt nē. Kot pa anê nē tokyx harênh par kêt nē. Mē ohtô rax kumrêx jakamã na pa ãm hkwy pix jarê nē hã kagà.

³³ Na prem hkwyjaja Tĩrtũm kamnàr rom ma mē kot amnhī tomnuj xwỳnhjê nhō krī hwỳr mra nē mē kēp mē õ pika pytà. Nē mē hkwyjaja Tĩrtũm kamnàr rom mē ho amnhĩptàr mex o pa. Nhũm prem kãm Tĩrtũm kurê xwỳnhjaja mē hkwyjê pynê nē ahkrehti

kamã mry xoprê hkwy nhĩpy mē kurê. Nhũm prem amnhī tã mē omu nē amnhī kaxyw Tĩrtũm mã hamaxpêr kurê kumrêx nhũm amnhī tã mē omu mē nê te mry jakwa ho pikamỳr tỳx pyràk o mē hipêx nhũm ãm mē omunh o kuhê nē tanhmã mē ho hkêt nē. ã na prem Tĩrtũm kamnàr rom amnhī nhĩpêx anhỹr o pa.

³⁴ Nhũm mē kot kuwy rax kãm mē hkwyjê rênh tã nhũm mē kot amnhī kaxyw Tĩrtũm mã hamaxpêr tỳx nhũm amnhī tã mē omu nē mē nê tanhmã kuwy ho nhũm mē hxêt kêt nē. Nhũm pre mē hkwyjaja wapo ho mē hkamnawỳr o mē hkwyjê hpar kaxyw nhũm mē amnhī kaxyw Tĩrtũm mã hamaxpêr nhũm amnhī tã mē omu nē mē nê tanhmã mē ho nhũm mē amnhī rê nē mē umaj hprôt nē ma mra. Mē hihtỳx kêt tã Tĩrtũm kamnàr rom y hã hihtỳx nē mē kãm mē hkurê xwỳnhjê ho krihkrit pa nhũm mē ma akupỹm hapêx.

³⁵ Nē mēni hkwyjaja na prem haxwỳja amnhī kaxyw Tĩrtũm mã hamaxpêr tỳx o pa. Jao mē hkrajaja mē kēp htyk tã nhũm prem Tĩrtũm kamnàr rom mē ho kuwy nhũm mē kuma nē akupỹm mē kãm mē ho htĩr.

ã na prem amnhī kaxyw Tĩrtũm mã hamaxpêr pê mex nē pa anê. No na pre mē hkwyjaja mē urak nē amnhī kaxyw kãm hamaxpêr tỳx tã nhũm Tĩrtũm tokyx mē ho mex kêt nē. Na pre mē kãm mē hkurê xwỳnhjaja Tĩrtũm ã mē par kaxyw. Nē mē hkwyjaja Tĩrtũm ã mē hipêx kati ho pa nhũm mē amnhī xà htỳx kãm hamak kãm ty. Nhũm mē himex kaxyw nē mē kãm:

—Kwa mē Tĩrtũm kaga. Kot kaj mē hkaga pa mē amã inhũre nē mē anhĩmex kêt nē. Anê.

No nhũm mē kuma nē ãm mē kuma nē amnhī kaxyw kãm hamaxpêr tỳx pê mē kãm:

—Nà mẽ kam nê māmri ixpĩ. Inhmã ixtyk pyma hkêt. Kot paj ty nhũm Tĩrtũm akupỹm ixto ixťĩr pa kuri inhmex kumrêx nê ri ixťĩr tũm nê ixpa ho ixpa.

Anhỹr o mẽ kãm amnhĩ jarênh jakamã hãmri Tĩrtũm kaga hkêt rãhã nhũm mẽ himex.

³⁶ Nê mẽ kãm mẽ hkurê xwỹnhjaja na prem Kris ã mẽ hkwyjê mã hpêr o pikênh pê mẽ htak xà ho mẽ htak rũnh o pa. Nê kàx o mẽ hkwyjê hpa hpre nê mẽ hte hpre nhũm mẽ kêp prês nê hkrĩ ho hkrĩ.

³⁷⁻³⁸ Nhũm prem kên rũnh o mẽ hkwyjê htak o mẽ kupa. Nê mẽ hayr o mẽ hkwyjê pa. Nê mẽ hkamnhwỳr o mẽ hkwyjê pa. ã na prem Kris kôt mẽ hamaxpêr ã mẽ omunh xà hkôt mẽ hipêx anhỹr o pa. Jakamã na pre mẽ hkwyjaja mẽ umaj mẽõ krĩ rũm hapôj nê ma hprôt nê mra. Nê te mẽ õ krĩ hkêt pyrã nê kapôt ã kêp amrakati nê ri pa. Mẽ ê hkêt nê ôwêhti hkà ho ê nê ri hã pa. Nê motre kà ho amnhĩ pre nê ri hã pa. Nê kên prêk ã api nê kre kamã hpimxur o pa. Nê pika hkre kamã hpimxur o pa. Nhũm mẽ kãm mẽ hkurê xwỹnhjaja te mẽ kêp ahpunu nê mẽ kêp ahkro pyrãk o mẽ hipêx nê axpên mã mẽ harênh o:

—Nà mẽ mexti hã. Kwa pu mẽ piitã mẽ himex paa ri.

Anhỹr o mẽ harênh tã nhũm Tĩrtũm mẽ urak nê ã mẽ harênh anhỹr kêt nê. Na pre mẽ mex kumrêx ã mẽ harê. Nê nhỹrmã kuri mẽ mex nê pa ho pa hkukamã mẽ harê.

³⁹ ã na prem Tĩrtũm kamnãr rom mẽ kãm mẽ hkurê xwỹnhjê kutã amnhĩ to htỹx kãm htyk o pa anê. Nhũm Tĩrtũm ja hã mẽ omu nê hkĩnh nê kãm mẽ hapê htỹx nê. No nhũm mẽ kormã htĩr ri amnhĩm Tĩrtũm kot mẽ ho mex xà jamỹnh kêt rãhã ty. ⁴⁰ Tã mo na pre Tĩrtũm kormã mẽ htĩr ri hkwyjê pyrã nê

mẽ ho mex kêt nê? Nà na pre kormã mẽ hkukamã hamaxpêr o:

—Nà kot paj kormã mẽ ho mex kêt nê. Kot pa mẽ mỳr pê mẽ kot ixkôt amnhĩ xunhwỳr mã xwỹnhjê jamãr grire mãn. Kêr pa inhõ krĩ kamã mẽ ho ixpimràatã mẽ ho mex rax kumrêx. Nà kot paj ã mẽ ho mex anê. Ja na kêt inhmã mex o kormã mẽ htĩr ri ixte mẽ ho mexta jakrenh. Anê.

Ja ra ã mẽ papajaja mẽ pakukamã hamaxpêr anê.

12

Mẽ pahte Jejus pyrã nê mẽmoj kutã amnhĩ to htỹx ã mẽ pamã karõ Pĩripõs 3.12-21

¹ Na pre mẽ pakukamã mẽ panhĩgêt kwỹjaja amnhĩ kaxyw Tĩrtũm mã hamaxpêr pê ã amnhĩ xà htỹx kamã hamak o pa anê. Tã te ra mẽ kot kỹj rũm kaxkwa rũm mẽ pahpumunh nê tanhmã mẽ pamã kapêr to pyrã nê mẽ pamã kapêr o:

—E mẽ inhma mẽ ixkanrêhã mẽ ixtãmnhwỹjaja. Na pa prem ã Tĩrtũm kamnãr rom amnhĩ nhĩpêx o ixpa anê. Mẽ kot ja hã mẽ inhĩpêx kati htã pa prem Jejus kaga hkêt nê. Tã kêr ka mẽ ixpyrã nê ã mẽ kãm mẽ akurê xwỹnhjê kutã amnhĩ to htỹx anê. Nê mẽ ixpyrã nê amnhĩ kaxyw Tĩrtũm kôt pix mã ajamaxpêr tỹx rãhã ho ri apa. Anê.

Jakamã kwa kêr pu mẽ urak nê ã amnhĩ nhĩpêx anhỹr rãhã ho mãn ri papa. Te mẽ hprôt xwỹnhjaja kot amnhĩ nhĩpêx pyrãk o amnhĩ nhĩpêx. Na htem hprôt tỹx kaxyw mẽmoj pyťĩ jamỹnh nê ho hprôt hkêt nê. Na htem ý kamã hprôt o hprôt tỹx nê wam hkwyjê mã wa nê mra. Ja pyrã nê kêr pu mẽ pahte Tĩrtũm kapêr kôt amnhĩ nhĩpêx mex o papa kaxyw tanhmã mẽ pahte amnhĩ tomnuj to hã amnhĩ pumu nê hkaga kurê kumrêx. Mẽ pahte amnhĩ tomnuj o papa xãja te mex pyrãk no ãm mex kêt. Te

ho mē hprôt xwÿnh kot axtem nē mēmoj pytī mÿnh nē tee ri ho hprôt tÿxta pyrāk. Kot puj mē tanhmā amnhī tomnuj to ho papa nē Tirtūm kapēr kôt amnhī nhīpêx mex kêt nē. Jakamā kwa kēr pu mē Tirtūm kapēr gryk ā amnhī tomnuj nē amnhī to htÿx rāhā ho papa. Te ho mē hprôt nē nhÿri mē āhuk xā pix kukamā hamaxpēr rāhā hprôt tÿx xwÿnhhta pyrā nē ām Jejus mā pajamaxpēr tÿx rāhā ho papa.

² E kot paj mē amā Jejus kot tanhmā mē panē amnhī nhīpêx toja jarē ka mē inhma. Nā kot mē panē mē pahte amnhī tomnuj pānhā amnhīrer kaxyw htyk nhūm mē pahte hkôt amnhī xunhwÿr jakamā na hte mē pamā pajamaxpēr nyw gō pu mē amnhī kaxyw hkôt pajamaxpēr ho ri papa. Na pre mē kām hkurē xwÿnhjaja kot pī kahpa hā nhôr nē hpīr mā nhūm mē kutā mē kām amnhī to htÿx nē arī mē kām xa nhūm prem kupī. Tā tee ri amnhī kukamā hamaxpēr o Tirtūm kaga hkêt nē. Na pre hamaxpēr o:

—Nā kwār mē māmri ixpī. Kot paj ty nhūm Inhīpêxā akupÿm ixto ixtīr pa kuri inhmex kumrêx nē ixtīr tūm nē ixpa ho ixpa. Anē.

Tā na ra kaxkwa kamā Tirtūm xupōk rūm mex nē hkrī ho hkrī. ³ Jakamā kwa kēr pu mē kot ā mē panē amnhī nhīpêx anhÿrja mā pajamaxpēr rāhā ho ri papa. Mē kot hipêx kati htā nhūm mē kutā amnhī to htÿx nē xa. Tā kēr pu mē urāk nē mē kām mē pahkurē xwÿnhjê kutā amnhī to htÿx rāhā ri papa. Jao tee ri amnhī kukamā pajamaxpēr o mē umaj Tirtūm kaga hkêt nē.

⁴ Na ka htem ma mē kot amnhī tomnuj xwÿnhjê hwÿr mra nē mē kot amnhī tomnuj kaga kaxyw tanhmā mē kām akapēr to nhūm mē ja hā mē ama nhūm ja mē kēp omnuj nhūm mē amnhī tā tanhmā mē atomnuj to. Nom wam mē kot

mē pahkwÿjê nhīpêxta pyrā nē kor mā mē atōxpīr kêt nē.

Tirtūm kot tanhmā hkrajê nhīpêx to hā harēnh

Juāw 15.1-2; Eprêw 5.7-8; Xiakre 1.2-4

⁵ Nē mān ka mē arī Tirtūm kapēr ā kagā htūm kwÿ hā ano htÿx japēr. Mē pahpê Tirtūm krajê mā kapēr jarēnh kot:

Koja Pahi Maati tanhmā mē ate amnhī tomnuj to nē mē amā kapēr ka mē ama nē mar tÿx nē mēmojta kaga kurē kumrêx. No mē ama nē tee ri kot nē akurē xwÿnhhta kukamā ajamaxpēr o ri akapri o axtem nē Tirtūm kaga hkêt nē. Ama nē kot amā mēmoj nē kapēr xwÿnhhta kaga kurē kumrêx.

⁶ Na hte Tirtūm kām mē pajapê hā tanhmā mē pahte amnhī tomnuj to hā mē pahpumu nē hā tanhmā mē panhipêx to. Tām mē pahte amnhī nhīpêx o papa kaxyw. Kot mē pahpê hkra hā mē pajarēnh jakamā na hte ā mē pahte tām amnhī nhīpêx o papa kaxyw mē panhipêx anē. Anē.

⁷ Jakamā kot kaj mē tanhmā amnhī tomnuj toja mÿrapê tanhmā apunuj kute nē ri apa htā no ām tee ri amnhī kukamā ajamaxpēr hkêt nē. Kêt mē ām ajamaxpēr o:

—Nā ixte tām amnhī nhīpêx kaxyw na Tirtūm ā inhīpêx anē. Ixpê hkra hā ixte amnhī to mex o ixpa prām xā ā inhīpêx anē.

Anhÿr o mān kêt ajamaxpēr. Na hte mē hipêxā mē hkra kot amnhī to mex kaxyw ā mē hipêx anē. Tā Tirtūm na hte mē urāk nē ā mē panhipêx anē. ⁸ No koja mēhō hkra kot tanhmā amnhī tomnuj to hā omu nē ām omu nē hā tanhmā ho hkêt nē. Hā koja hkraja te hipêxā hkêt nē hā awrāre nē ri pa pyrāk. Tā mē pahpê Tirtūm krajaja kot puj

mê tanhmã amnhî tomnuj to nhûm ja hã mê pahpumu nê hã tanhmã mê pahto. Nom mê kêp hkra hkêt xwýnhjaja nhûm hte ja hã mê omu nê ãm hã mê omu nê hã kormã tanhmã mê hipêx to hkêt nê.

⁹ Nê na hte mê panhîpêêxã mêmôj tâ mê pamã karô pu htem kuma nê hkôt amnhî nhîpêx. Ja mex. Nom kaxkwa kamã Mëpahpãm maatija mê pahte mar nê hkôt amnhî nhîpêxja na kêt mex kumrêx. Kot puj mê ã amnhî nhîpêx anê nê nhÿrmã kuri pamex nê pahtîr tûm nê papa ho papa.

¹⁰ Nê mëhprîre na htem hamaakro nhûm mê hipêêxã tanhmã hã mê ho. Hã mê hkaprêprêk rÿ hã mê kãm akîr. Amnhî krã hkôt tanhmã mê hipêx to. Mê kot ja hã amnhî pumunh nê axte hkêt kaxyw. Ja mex. Tã mê papajaja. Mê pahpê Tîrtûm kra na pu htem tôhã tanhmã amnhî tomnuj to nhûm mê pahpumu nê tanhmã hã mê pahto. Mê pahte amnhî pumunh nê axte hkêt kaxyw. Uràk nê amnhî to mex pix o papa kaxyw. ¹¹ Na hte mêmôj tâ tanhmã mê panhîpêx to pu mê tee ri amnhî pumu nê pahkaprî nê pahkînh kêt nê ri papa. Nom kot puj mê tokyx tanhmã amnhî tomnuj tota kaga nê akupÿm Tîrtûm kôt tãm amnhî nhîpêx o papa nê akupÿm pahkînh nê pajamakêtkati nê ri papa.

Mê pahte Tîrtûm kaga hkêt ã mê pamã karô

¹² Jakamã e kwa kêr ka mê amnhî to htÿx nê apa. Mê kot Kris ã tanhmã mê anhîpêx to htãã. ãm Tîrtûm kôt pix mã amnhî nhîpêx mex pê akînh nê apa. ¹³ Kêr kê Kris kôt atôjê hõ tee ri mêmôj tâ amnhî pumunh kôt ra Tîrtûm kaga kaxyw tâ ã mê ate amnhî nhîpêx anhÿr ã mê apumu nê mê apyrã nê akupÿm hkôt amnhî xãm tÿx nê hkaga hkêt nê.

¹⁴ Nê kêr ka mê tãm ri axpên nhîpêx o ri apa. Jao axpên kôt ajamakêtkati nê ri apa nê amnhî to mex pix kukamã ajamaxpêr. No kot kaj mê anhÿr kêt nê nhÿrmã mê panhõ Pahi Maati hwÿr axàpir nê kuri amex nê apa hkêt nê.

¹⁵ Na hte Tîrtûm mê pahto mex nê mêmôj to mê pakutã nojarêt rãhã o pa. Jakamã kwa kêr ka mê hkaga hkêt nê. Nê tanhmã ri ajamaxpêr punuj to ho ri apa hkêt nê. Kot ka mê ã amnhî nhîpêx anê nhûm Kris kôt mê pahkwÿjaja ja hã mê apumu nê mê apyrã nê tanhmã amnhî tomnuj.

¹⁶ Nê kêr ka mê axpên kãm apijaãm kêt o ri apa hkêt nê. Nê te finat Ejau kot amnhî nhîpêx pyrãk o ri apa hkêt nê. Na pre Tîrtûm ã hpijaãm kêt nê hkwyjê kamã hpijaãm kêt o pa. Nê Tîrtûm mã hamaxpêr kêt kumrêx. Kêp Ijak kra kot wa jakamã koja nhÿrmã hipêêxã mÿr pê kêp hikukrêx nê ô pika piitã ho àrîk pa. Hãmri nhûm hipêêxã kot ho Tîrtûm wÿr nhûm kot ho mex kaxyw mã tâ nhûm axtem nê mêmô arîgro hã kãm prãm xàj kot kêp mêmôj to àrîk mã xwÿnhhta htõ Jako mã hkaga hpa. Mãnkwÿrtre gôj kãm ãm prãm xàj kãm hkaga hpa. Jakamã nhûm Jako hpãnhã te kêp Ijak kra kot wa pyrã nê mÿr pê ô mêmôj piitã ho àrîk mã. ¹⁷ Gaa nhûm Ejau tee ri ã amnhî nhîpêx anhÿrja mã hamaxpêr o hkaprî nê. Nê tee ri kãm Jako kot akupÿm kãm mêmôjta nhõr prãm kaprÿ. Nê mur nê hã hipêêxã wÿ no nhûm axte kãm mêmôj nhõr kêt nê. Nhûm kot ho Tîrtûm wÿr kaxyw tee ri amnhî to kuwÿ no nhûm kuma nê ãm kuma nê kãm ho anhÿr kêt nê.

¹⁸ Nê amnepê mã Tîrtûm kot mê panhîgêxjê mã kapêr kaxyw na prem hixêt prêk pê Sinai jarênhja wÿr akuprô nê hparpê kuhê. Hãmri nhûm hixêt nhîmök ã kuwÿ hpök rax kumrêx. Nê kuwÿ mÿr ri kraã

htyk ajêt. Nê kôk àpêr tỳx nê. Nhũm Ijaewjaja hixêt krax ã omu nê kãm maa ho htertet o kuhê. ¹⁹⁻²¹ Hãmri nhũm mēhō pifti kakō nhũm Tirtũm hixêt nê mē kãm kapêr nê mē kãm:

—E mē inhma. Kêr ka mē hixêt ã axàpir kêt nê. Kot kaj mē atō hã api rỳ mē akrit ò hã api ka mē ja hã omu nê kaxyw kên rũnh kwỳ jamỳ nê ho htak o apĩ. Anê.

Hãmri nhũm mē piitã tee ri kuma nê kãm ma htỳx kumrêx nê amnhĩ nê kãm:

—Kwa hãmri Tirtũm. Axte mē inhmã mēmoj jarênh kêt nê. Mojes pix mã mãn mē ixkaxyw tanhmã kãm akapêr to. Anê.

Jakamã nhũm Mojes Tirtũm mã amnhĩ jarênh nê kapêr mar kaxyw hixêta ã api. Kãm ma nê htertet rãhã mō nê hã api. ²² Nom mē kãm ma ho Tirtũm mã amnhĩ jarênh tã mē papajaja na pu htem mē kurom paxãmnhĩx kãm amnhĩ jarênh o papa. Na pu htem kãm amnhĩ jarênh kaxyw nê hixêt prêk ã paxàpir kêt nê. Te ra mē pahte ma kaxkwa hwỳr ò krĩ hwỳr paxàpir nê pano ho omunh pê kãm amnhĩ jarênh pyrãk. Ò krĩja mex o mex. Kamã kapêr o mē wrỳk xwỳnhjaja ohtō o ohtō. Na htem kamã hkĩnh rãhã ho pa ho pa.

²³ Nê ò krĩ hwỳr na hte hkra xàpir xwỳnhjaja ri pa. Nê mē papajaja na pu htem kãm amnhĩ jarênh kaxyw nê te kaxkwa kamã kuri pakuhê nê kãm amnhĩ jarênh pyrãk o amnhĩ nhĩpêx. Te mē pahpê hkra kot wa pyrãk jakamã mē pamã uma hkêt. Nhũm pre Tirtũm ra ò kagã kamã mē pakutêp amnhĩm mē panhĩxi hã kagã hpa. Na hte mēmoj piitã hamãr o hkri. Nê krĩja kamã amnepê m kormã Kris kot mē pahwỳr wrỳk kêt ri nhũm ra amnhĩ kaxyw Tirtũm kôt hamaxpêr mex xwỳnhjaja haxwỳja ra kamã ri pa. Ra Tirtũm kot mē ho hkra jakamã nhũm mē kuri ri pa ho pa. ²⁴ Nê Jesus haxwỳja kamã pa ho pa. Na pre

mē panê htyk nê hkamrô pikapĩrja o mē pahte amnhĩ tomnuj pãnhã amnhĩre. Jakamã na pu htem hkôt amnhĩ xunhwỳr nhũm mē pahto hkra pu mē paxãmnhĩx ri Tirtũm mã amnhĩ jarênh nê amnhĩ to hwỳr o papa.

Amnepê m na pre Tirtũm tee ri Kaĩ kot htō Apew pĩr nê hkamrô pikapĩrja ã omu nê hamaxpêr o:

—Nã ã kot amnhĩ nhĩpêx anhỳr jakamã kot paj hã homnuj tỳx nê. Anê.

Tã ra hpãnhã Jesus kot mē panê htyk nê hkamrô pikapĩrja ã omu nê ra axtem hamaxpêr o:

—Nã ãm hãmri na Ixkraja mē nê ty. Jakamã mē kot hkôt amnhĩ xunhwỳr xwỳnhjaja kot pa Ixkra kukwak ri mē kot amnhĩ tomnuj mỳrapê tanhmã mē ho hkêt nê.

Anhỳr o mē pakukamã hamaxpêr. ã hamaxpêr anhỳrja mex o mex.

²⁵ Na pre Mojes Tirtũm nhỹ hã mē panhĩgêxjê mã xatã mē kãm Tirtũm kapêr jarênh o ri pa nhũm mē kuma nê hkôt amnhĩ nhĩpêx o pa. Tã gaa nê ra hã nohkêt pa nê akupỳm mē kot amnhĩ nhĩpêx tũm o awjanã nhũm Tirtũm tee ri ja hã mē omu nê mỳrapê tanhmã mē hipêx to. Tã nhũm Kraja kaxkwa rũm mē pahwỳr wrỳ nê mē pamã kapêr. Jakamã kwa mē okora kêr pu mē panhĩgêtjê pyrã nê mē pahte amnhĩ nhĩpêx tũm o paxujanãr kêt nê. Kot puj mē anê nhũm Tirtũm ja hã mē pahpumu nê mē urak nê ja hã tanhmã mē panhĩpêx to.

²⁶ Amnepê m Tirtũm kot hixêt prêk pê Sinai kamã mē kãm kapêrja. Na pre kapêr tỳx o pika ho ãk nhũm htertet tỳx nê. Tã koja nhỹrmã axte pika ho ãk nê kaxkwa ho ãk nhũm wa hamê htertet tỳx kumrêx. Koja axte ho anhỳr ho pixi nê axte ho anhỳr kêt nê. ²⁷ Tã nhỹrmã axte mēmoj to ãk ã amnhĩ jarênh jakamã koja mēmoj to kator xwỳnhhta piitã ho

àk. Nê mē pahte panhîhkra ho mēmoj nhîpêx xwÿnhja nhûm ho àk nhûm htetert tÿx kām hpigràn pa nê hapêx. Nhûm mēmoj htetert nê hpigràn kêt xwÿnh pixjaja arî rāhā ho rāhā. ²⁸ No Tîrtûm nhô krî koja htetert nê hapêx kêt nê. Nê mē papajaja mē pahpê hkra jakamā te ra kuri ô krî kamā ri mē papa pyrāk. Jakamā kot puj mē mē urāk nê pajapêx kêt nê. Jakamā e kwa kêr pu mē amnhî tã Tîrtûm mā mex o mex ā harênh nê hā pahpijaam rāhā ho papa. Nê tanhmā amnhî tomnuj to hā amnhî pumu nê Tîrtûm pumaj mēmojta kaga kurê kumrêx. Ā mē pahte amnhî nhîpêx anhÿr o papaja na Tîrtûm kām hprām. ²⁹ Hihtÿx o hihtÿx jakamā koja mēmoj tã akamā gryk kot kaj amex kêt o amex kêt.

13

Mē pahte Tîrtûm kām hprām xā hkôt amnhî nhîpêx ā mē pamā karō

Rômân 12.1-2; Epes 4.1-3; Korosê 1.10-11; Wam Tesarôn 4.1-12; Wam Pêtre 2.11-12; Wam Juâw 3.17-18

¹ Nê e kwa Kris kôt ixtō nê ixtōxjaja. Kêr pu mē arî Kris kôt pahkwÿjê ho mex o măn axpên kôt ri papa. Nê kêr pu mē tanhmā pahpunuj to hā amnhî pumunh tã axpên to mex mā panhûrer kêt nê. Ā axpên nhîpêx anhÿr rāhā ho papa.

² Nê amnepê mā na pre mēmojaja nhÿhÿnh mra nê mē panhîgêtjê hō hwÿr pôj. Hāmri nhûm mē omu nê htÿx axtem krî hō nhô xwÿnh ā mē hkamnhîx tã no nhûm mē kêp Tîrtûm kapêr o mē wrÿk xwÿnh kwÿ na prem. Hāmri nhûm amnhî nhôrkwÿ hwÿr mē kuwÿ nhûm mē ma hkôt mra nê kuri pôj nê kutā apku. Jakamā kwa koja nhÿhÿnh krî hō rûm mēmojaja ma mē awÿr mō ka mē omu nê axamnhîx amnhî nhôrkwÿ hwÿr mē hwÿr kurê kumrêx kê mē ari pôj. Ā mē hipêx anhÿr o apa hāmri

nê nhÿrmā mē panhîgêtja pyrā nê amnhî wÿr Tîrtûm kapêr o mē wrÿk xwÿnhjê hō hwÿr japêr. Mē urāk nê ja hā mē omunh kêt tã atÿx amnhî wÿr mē awÿ nhûm ja mē amā mex o mex.

³ Nê kêr ka mē ra mē kot Jejus ā mē akwÿjê pynênh nê mē hagiênh xwÿnhjê mā ajamaxpêr rāhā ho ri apa nê mē ho ajamakêtkati hkêt nê. Te mē kajaja mē îhkô hā mē hagiênh xā kamā apunuj nê akri pyrāk o mē kām ajamaxpêr o ri apa. Jao mē kamā axukapri ho mē hwÿr mra nê mē kām mēmoj nhôr o ri apa.

⁴ Nê mē kot axpên to hprōja na mex. Nom kêr ka mē amyjaja âm aprō pix tânopxar o ri apa. Nê mē anijaja mē ajaxwÿja amjên pix tânopxar o ri apa. No mē hkuprÿjê hwÿr mē mrar xwÿnhjaja nê nhām mē kêp mē hprō ho amnhîkati xwÿnhjaja nê nhām mē kêp mē mjên o amnhîkati xwÿnhjaja koja Tîrtûm ja hā mē omu nê mē homnuj tÿx kumrêx.

⁵⁻⁶ Nê kêr ka mē akàxpore rûnh kêt ā amnhî pumu nê tee ri amnhî kukamā ajamaxpêr o akapri hkêt nê. Na pre Tîrtûm mē pamā kapêr o: Kot paj akôt ri ixpa rāhā ho ixpa nê aa arer rÿ akaga hkêt kumrêx.

Anhÿr jakamā kot kaj mē akàxpore grire htā akapri nê apa hkêt nê. Aa Tîrtûm kot mē pahkaga hkêt ā amnhî jarênh jakamā mēmoj kot pu wem omu nê pamā nhām ri mē uma ho papa? Tîrtûm kot mē pahkôt pa ho pa kênā. Jakamā na pu htem pajamaxpêr o:

Nā Pahi Maatija ra kot ixkôt pa ho pa xwÿnh jakamā mēmo kot pa hkêt ri inhmā uma ho ixpa?

Mēmo kot kêt ri tanhmā kêp ixto? Anhÿr o pajamaxpêr o papa. ⁷ Nê mē kot Kris mā mē ajamār o mē pa xwÿnh ra mē htyk xwÿnhjaja ka mē arî mē kot tanhmā amnhî nhîpêx

to ho paja mã ajamaxpêr rãhã ho ri apa. Na prem Tirtûm kapêr o mẽ ajahkre mex nê. Nê tãm ri amnhĩ nhĩpêx o ri mẽ akôt pa. Nê amnhĩ kaxyw Tirtûm kôt pix mã hamaxpêr rãhã ty. Tã kêr ka mẽ urak nê ã amnhĩ nhĩpêx anhÿr o ri apa rãhã ty.

⁸ Nê Jejus Krisja arĩ rãhãã. Nê amnepê mã kot amnhĩ nhĩpêxja mããñn arĩ rãhãã. Aa kot amnhĩ nhĩpêxja nhĩjuk ri axtem tanhmã amnhĩ nhĩpêx to hkêt.

⁹ Nê kwa kêr ka mẽ Tirtûm kôt amnhĩ nhĩpêx rãhã ho ri apa. Na hte kapêr o hêx xwÿnhjaja mẽ awÿr mra nê mẽ amã:

—Amnepêm mẽ ate Tirtûm kot mẽ amex ã mẽ ajarênh kaxyw mẽ ate kãm mẽmo mry nhôr nê akupÿm hamÿnh nê hkur o apa htã ra ja ho anhÿr kaga. Kwa mẽ ja ho awjanã nê axte ã amnhĩ nhĩpêx anhÿr o ri apa. Kê Tirtûm ja hã mẽ apumunh kôt mẽ amex ã mẽ ajarê.

Anhÿr o mẽ amã kapêr. Nom xã na hte Tirtûm ã mẽ pahte amnhĩ nhĩpêx anhÿr ã mẽ pahpumunh kôt mẽ pamex ã mẽ pajarê? Xã na htem mẽmo mẽ apkur xã hkur pê amnhĩ kaxyw Jejus kôt hamaxpêr tÿx o pa? Nã na htem anhÿr kêt nê. Na pu htem mẽmoj kur kôt pamã Tirtûm kĩnh kêt nê. Kêt mẽ paxãpkur xãja mẽ panhĩ pix o hihtÿx kaxyw na. Na hte Jejus kôt mẽ pahto paxihtÿx kêt nê. ãm Tirtûm kot amarĩ kãm mẽ pajapê nê mẽmoj to mẽ pakutã nojarêť jakamã na pu htem ja hã amnhĩ pumu nê amnhĩ kaxyw hkôt pajamaxpêr tÿx o papa.

¹⁰ Tirtûmja Jejus kot mẽ panê htyk ã omunh xã hkôt ra kot mẽ pamex ã mẽ pajarênh jakamã mo kaxyw kot pu mẽ axte kot mẽ pamex ã mẽ pajarênh kaxyw kãm mẽmo mry gô nê hkwy hku? Koja mẽhõ akupÿm Tirtûm kapêr tûm o ujanãr jao Jejus kot nê htyk nê hkamrô pikapĩrja kaga.

¹¹ Amnepêm na pre patre maatijaja tõiã mẽ kãm mẽmo mry hpar xwÿnh hkamrô ru nê guhkrax kãm kuru nê hamÿ nê ma o mra nê Tirtûm nhõrkwy kaãkre hwÿr hitom maati hwÿr ho agjê. Tirtûm kot mẽ omunh nê axte mẽ kot amnhĩ tomnuj mã hamaxpêr kêt kaxyw. Hãmri nhũm hpãnhã ĩ mÿ nê krĩ pê ho kato nê ma o mra nê nhÿri amÿm hkwyjê hkax ã ho hxêt pa. Tirtûm kapêr tûm kôt na prem ã amnhĩ nhĩpêx anhÿr o pa. ¹² Tã ja pyrà nê na prem ma krĩ pê amÿm Jejus o tẽ nê kupĩ nhũm hkamrô axkapĩ. Kot mẽ pahte amnhĩ tomnuj pãnhã amnhĩrer nê mẽ pahto mẽ pahpê Tirtûm kra kaxyw ã htyk nê hkamrô pikapĩr anê. ¹³ Na prem Tirtûm kapêr tûm gryk ã Jejus kaga nê põiřtijê mã anê nhũm mẽ ma krĩ pê ho kato nê o tẽ nê kupĩ. Tã kêr pu mẽ jajê rom Jejus gryk ã mãn Tirtûm kapêr tûm kaga. Kwãr mẽ mãmrĩ Jejus pyrà nê Tirtûm ã tanhmã mẽ pahto nê amnhĩ nê nhÿhÿm mẽ pajano. ¹⁴ Kêt jar mẽ papapxãja kêp mẽ papapxã kumrêx kêt. Nê jar mẽ panhõ krĩja kêp mẽ panhõ krĩ kumrêx kêt. Mẽ pamã te kot pô nhĩrõnh o ixkre pix pyràk. No kêt mẽ panhõ krĩ kumrêx koja jar mẽ panhõ krĩ rom aa hapêx kêt nê. Tã tãm na pu mẽ kormã ma hwÿr papa kaxyw arĩ amnhĩ tã Tirtûm jamãr o papa.

¹⁵ Nê na htem Ijaew arĩ ohtô nê amnhĩ pãnhã Tirtûm mã mry hpar ho pa. Nom mẽ papajaja kot puj mẽ axte ã amnhĩ nhĩpêx anhÿr hkêt nê. Kot puj mẽ ãm Jejus kukwak ri Tirtûm mã mex o mex ã harênh rãhã ho mãn papa. Jao te mẽ pahte kãm hkĩnh xã nhõr pyràk o amnhĩ nhĩpêx.

¹⁶ Nê kêr pu mẽ arĩ axpên to mex o ri axpên kôt papa. Nê kê mẽhõ kêp amrakati japêr ka ja hã omu nê amnhĩ kutã kãm anhõ mẽmoj kwÿ. ã kot puj mẽ axpên nhĩpêx anhÿr

râhâ ho ri axpên kôt papa. Kot puj mê anê nê te mê pahte Tîrtûm mã hkînâ xâ nhôr pyrâk o amnhî nhîpêx. Â mê pahte amnhî nhîpêx anhÿrja na mex o mex.

¹⁷ Nê kêr ka mê Kris kôt mê akrâhtûmjê kapêr ma nê mê hkôt amnhî nhîpêx mex nê. Na htem Tîrtûm mã mê ajamâr o ri mê akôt pa. Kojâ mê nhÿrmâ mê kot tanhmâ mê anhîpêx to hã Tîrtûm mã amnhî jarê. Jakamâ mê kãm mê ato ajuta prâm. Tã kêr ka mê kapêr ma nê mê hkôt ri amnhî nhîpêx mex o ri apa. Kêr kê mê amnhî tã mê apumu nê hkînâ nê. No kot kaj mê ama nê ãm mê ama nhÿm mê tee ri amnhî tã mê apumu nê hkaprî nê. Jao tee ri kot tanhmâ mê ato ajuta mex to hkukamâ hamaxpêr.

¹⁸ Nê kwa kêr ka mê ixto Tîrtûm wÿr râhâ ho apa. Inhmâ Tîrtûm noo mã tanhmâ amnhî tomnuj to hprâm kêt. ãm inhmâ amnhî to mex pix o ri ixpa hprâm.

¹⁹ Nê kêr ka mê ixto awÿ kê tokyx akupÿm mê awÿr inhmê. Na pa ra inhmâ mê apumunh prâm tÿx nê.

Kagà nhîpêx xwÿnh kot tanhmâ mê ho Tîrtûm wÿr to hã harênh

Epes 3.14-19; Piripos 1.0-11; Wam Tesarôn 3.9-13, 5.23; Sikûn Tesarôn 1.11-12, 2.16-17

²⁰ Nê mê panhõ Pahihti Jejus Krisja na hte mê panhîpêx o te ôwêhti jamâr xwÿnh kot hkrit jamâr pyrâk o pa. Jakamâ kêp mê pajamâr xwÿnh maati mex na. Na pre mê panê ty nhÿm Tîrtûm akupÿm mê pamâ ho htîr nê mê pamâ harênh o:

—E ra Ixkra kot mê anê htyk jakamâ kêr ka mê ãm ixkapêr nyw kôt pix mã ri amnhî nhîpêx o ri apa. Kot kaj mê ã amnhî nhîpêx anê hãmri nê nhÿrmâ ty pa akupÿm mê ato mê atîr ka mê ixri atîr tûm nê apa ho apa. Anê.

Tîrtûm kêp mê pahto mê paja-makêtkati nê ri mê papa xwÿnh na.

²¹ Tã na pa hte tanhmâ mê ato hwÿr to ho ixpa nê mê ato hwÿr o:

—Pa Tîrtûm. E kwa tanhmâ ixkwÿjê ho mex to kê mê kãm akapêr kôt pix mã amnhî nhîpêx o pa hprâm. Nê mê kãm tãm amnhî nhîpêx o pa hprâm. Nê kê Jejus haxwÿja tanhmâ mê ho mex to kê mê war amã hprâm xâ hkôt pix mã war amã tanhmâ ri amnhî nhîpêx to ho pa. Anê.

E kêr pu mê arî Jejus Kris mã mex o mex ã harênh râhâ ho papa.

Kagà jatur xâ kamã mêmoj jarênh

²² E Kris kôt ixkrâmnhwÿjjaja. Nã na pa ã mê amã kagà nhîpêx anê. Jejus kôt mê ato mê axihtÿx kaxyw. No na pa ho ry nê hipêx kêt nê. Ixte ho grire nê hipêx jakamã kwa kêr ka mê kamã harê nê mar tÿx nê hkôt amnhî nhîpêx mex o ri apa.

²³ Nê mãn ka mê ra Ximotre jarênh mar japêr. Na pre Kris ã mê hagiênh xâ kamã hkrî hã apkati xohtô nê. Tã nhÿm xep mê ra kator. Tã kojâ kormã mê awÿr inhmôr xwÿj ri man ixwÿr mō nê hpôx japêr kot paj ma amnhî kôt mê awÿr o mō ka mê omu.

²⁴ Nê kêr ka mê kot Kris mã mê ajamâr xwÿnhjê mã ijarê. Nê atar Tîrtûm krajê piitã mê kãm ijarê.

Nê ota jar Tîrtûm kra hkwÿja piitã mê awÿr hpêr mê.

²⁵ E kê Tîrtûm mê apiitã mê ato mex o pa. Tã ãm ja pix. Na pa ã mê amã hã kagà ho anê. Na hapêx.

Xiakre Xiakre kot Jejus kôt hkwýjê piitâ hwýr kagà nê mēnh

Xiakre na pre kagàja nhîpêx. Kêp Jejus tō nê kêp Jerujarê kamâ mē kot Jejus kôt amnhî xunhwýr xwýnhjê nhô pastô na pre. Nê kêp Ijaew. Jakamâ na pre hkwýjê mã kagàja nhîpêx nê krî piitâ hkôt urâk nê Jejus kôt mē kot amnhî xunhwýr xwýnhjê hwýr kurê. Jejus ã mē kãm mē hkurê xwýnhjaja na prem mē hipêx kati nhùm mē amnhî xà htýx kamâ hamak o pa. Jakamâ nhùm Xiakre kot mē hamaxpêr o mē hihtýx kaxyw kagàja nhîpêx nê mē hwýr kurê nê mē kãm:

¹ Pa ixkwýjaja. Xà mē amex? E ixpê Xiakre na pa. Ixte Tirtüm mē Pahihti Jejus Kris wa kãm tanhmâ amnhî nhîpêx to xwýnh na pa. Jakamâ kot paj kagàja nhîpêx nê pika piitâ hkôt mē apiitâ mē awýr kurê. Mē apê Tirtüm krajê hwýr.

Mē pahpunuj tâ mē pahte amnhî kaxyw Tirtüm kôt pajamaxpêr

Rukre 6.20-23; Rômân 5.3-5; Korosê 1.11; Wam Pêtre 4.12-19

²⁻³ E ixkwýjaja. Kêr ka mē atô tanhmâ amnhî to rý tanhmâ apunuj to. Rý mēhō tanhmâ Jejus ã mē anhîpêx to. Tã kêr ka mē ja hã amnhî pumu nê tee ri amnhî kukamâ ajamaxpêr o ri akaprî hkêt nê. Arî akînh kãm amnhî kaxyw Tirtüm kôt ajamaxpêr týx rãhã ho ri apa. Kot kaj mē ã amnhî nhîpêx anê nê gaa nê rî mēmoj punuj pê Jejus kôt amnhî xunhwýr týx nê. Jakamâ kwa kêr ka mē tanhmâ apunuj to hã amnhî pumu nê ã mē ate amnhî nhîpêx anhýrja kukamâ ajamaxpêr pê akînh nê ri apa. ⁴ Nom kêr ka mē tee ri tanhmâ apunuj to hã amnhî pumu nê akaprî xàj Tirtüm kaga hkêt nê.

Ãm amnhî kaxyw hkôt ajamaxpêr týx rãhã ho ri apa. Kot kaj mē ã amnhî nhîpêx anê nê gaa nê Tirtüm noo mã tãm amnhî nhîpêx mex o ri apa. Nê kãm hprãm xà hkôt pix mã amnhî nhîpêx o apa.

Mē pahte tanhmâ amnhî kute hã amnhî pumunh kôt amnhî to Tirtüm wýr ã mē pamâ karô

Matêwre 21.18-22

⁵ Nê kêr ka mē mēmoj mýrapê tanhmâ apunuj to hãmri nê tee ri ja hã amâ Tirtüm mã ajamaxpêr týx prãm nhùm apê ja hihtýx japêr. Rý mēmoj tanhmâ apê amnhî nhîpêx to ka tee ri hkukamâ ajamaxpêr japêr. Kêr ka mē ã ajamaxpêr anhýr japêr hãmri nê amnhî to Tirtüm wýr kurê kumrêx. Kot amâ ajamaxpêr mex nhôr nhùm ate ý hã tãm ajamaxpêr kaxyw amnhî to awý. Kot kaj mē ã amnhî to hwýr anê nhùm amnhî tã mē ama nê mēmojta kutã tanhmâ ato axihtýx to kurê kumrêx ka ý hã hkôt ajamaxpêr týx mex o ri apa. Jao tanhmâ akute htã akînh nê ajamakêtkati nê ri apa. Koja Tirtüm tee ri amâ mēmoj kôt ajamaxpêr týx prãm kapry hã apumu nê hã amâ àkjêr kêt nê. Koja ate amnhî to hwýrta ma nê tanhmâ ato mex to. ⁶ Nom kêr ka mē amnhî to hwýr kãm tee ri amnhî kukamâ ajamaxpêr kati hkêt nê. Rý ajamaxpêr o:

—Koonên. Koja apu Tirtüm inhmã ja ho anhýr japêr.

Anhýr o tee ri amnhî kukamâ ajamaxpêr kati hkêt nê. Ãm akînh kãm tanhmâ ate amnhî to hwýr toja kukamâ ajamaxpêr o:

—Nã koja inhmã ho anê. Ixte amnhî kaxyw kãm ijamaxpêr nê amnhî to hwýr xà hkôt koja inhmã tanhmâ amnhî nhîpêx to.

Anhýr o hkamnâr rom ã amnhî kukamâ ajamaxpêr anê.

Nom kot kaj mē tanhmâ amnhî to hwýr to nê tee ri amnhî kukamâ ajamaxpêr kati nê hkôt ajamaxpêr

tỳx kêt nê. Nê te kôk nhâm àpêr nê nhâm àpêrta pyrà nê nhâm ri ajamaxpêrja o hkôt ajamaxpêr kêt nê. Kot kaj mê ã amnhĩ nhĩpêx anê nhũm Tirtũm tee ri ja hã mẽ apumu nhũm ja kãm mex kêt nê. ⁷⁻⁸ ã mẽ hamaxpêr anhỹr xwỳnhjaja na htem nhâm hamaxpêr nê nhâm hamaxpêr jao hamaxpêr mex kêt nê. Jakamã kot kaj mẽ ã ajamaxpêr anhỹr o amnhĩ to Tirtũm wỳ hãmri nê ãm amnhĩ to hwỳr kaprỳ. Koja ama nê ãm ama. Nom kot kaj mẽ tanhmã akute hã amnhĩ kaxyw hkôt ajamaxpêr tỳx pê amnhĩ to awỳ. Nê tee ri amnhĩ kukamã ajamaxpêr kati hkêt kãm tanhmã amnhĩ to hwỳr to nhũm amnhĩ tã ama nê hkĩnh nê tanhmã amã mẽmoj nhĩpêx to. Mẽ ate hã axàhwỳr xà hkôt tanhmã mẽ amã mẽmoj nhĩpêx to.

Mẽ kêp amrakati xwỳnh mẽ mẽ kot amnhĩ to rũnh xwỳnhjê jarênh

Eprêw 13.5-6; Wam Pêtre 1.24-25

⁹ Nê kwa mẽ akàxpore hkêt xwỳnhjaja. Jar mẽ apê amrakati htã mẽ apê Tirtũm kra na ka mẽ. Jakamã kêr ka mẽ akàxpore rũnh kêt tã mẽ apê Tirtũm kra hã amnhĩ pumunh kôt ajamakêtkati nê nê akĩnh nê apa.

¹⁰⁻¹¹ Nê mẽ akàxpore rũnh xwỳnhjaja. Mẽ akàxpore rũnh nê mẽ akukrêx rũnh tã kot kaj mẽ nhỹrmã ty nê piitã rer pa nê mẽ kêp amrakati xwỳnhjê pyrà nê anhỹ kamã Tirtũm kuri akrĩ nhũm tanhmã mẽ ajarênh to. Te mẽ apê mẽmo pixôrà kot amnhĩ nhĩpêx pyràk. Na hte kwỳhtã axpên pê axpôt nê muxre nê mex nê harir. Tã gaa nê rĩ hã myt xàhpanh mẽ nhũm ra nhôôre. Nê gaa nê ra grà pa nê rôrôk nê hapêx. Tã kot kaj mẽ nhỹrmã uràk nê ty nê akukrêx rer pa. Jakamã kwa kêr ka mẽ akàxpore rũnh pumunh kôt akĩnh nê ri apa hkêt nê. Kêt ãm mẽ apê Tirtũm kra

hã măn amnhĩ pumunh kôt akĩnh nê apa.

Mẽ pahpunuj kôt pagryk nê mẽ pahkurê

¹² Nê kot kaj mẽ atô tanhmã apunuj to htã arĩ amnhĩ kaxyw Tirtũm mã ajamaxpêr tỳx rãhã ho ri apa. No tanhmã apunuj to hã amnhĩ pumu nê hkaga hkêt nê. Rỳ kot tanhmã ato xwỳnhhta kêr ka mẽ amnhĩ tã kamã agryk nê tanhmã ho hkêt nê. ãm Jejus kôt pix mã amnhĩ nhĩpêx rãhã ho ri apa. Kêr kê Tirtũm amã hkĩnh ã amnhĩ tã apumu nê amex ã ajarê. Ka nhỹrmã kuri amex kumrêx nê atĩr tũm nê apa ho apa. Ra kot mẽ pakukamã mẽ pahtã amnhĩ jarênh xà hkôt. Jakamã kêr ka mẽ tanhmã apunuj to htã ã amnhĩ kukamã ajamaxpêr anhỹr pê akĩnh nê apa.

¹³ Nê Tirtũm aa kãm tanhmã amnhĩ tomnuj to hprãm kêt. Nê mẽ papajaja mẽ pahte tanhmã amnhĩ tomnuj to kaxyw na hte mẽ pamã tanhmã àmnênh to rỳ mẽ pamã mẽ pajamaxpêr punuj jagjênh kêt nê. Jakamã kot ka mẽ atô amã tanhmã amnhĩ tomnuj to hprãm tã kwa kêr ka Tirtũm tãm kot ja kaxyw mẽ akrãm mẽ ajamaxpêr punuj jagjênh to hã hkamnhĩx kêt nê. ¹⁴⁻¹⁵ Mẽ papamjaja na pu htem pajamaxpêr punuj xà hkôt tanhmã amnhĩ tomnuj to. No Tirtũm Karô na hte mẽ pamã mẽ pajamaxpêr punuj jagjênh kêt nê. Mẽ papamjaja na pu htem pajamaxpêr punuj nê gaa nê ra hkôt tanhmã amnhĩ tomnuj to. Hãmri nê gaa nê ã amnhĩ nhĩpêx anhỹr rãhã ho ri papa. Mẽ kot amnhĩ tomnuj o mẽ pa xwỳnhjaja koja mẽ nhỹrmã ty hãmri nê Tirtũm mẽ Kra wa kuri htĩr tũm nê pa ho pa hkêt nê.

Tirtũm kot tanhmã mẽ pahto mex to hã harênh

Xiakre 3.17-18; Sikũn Pêtre 1.3-4

¹⁶ Nê e ixkwỳjaja. Tirtũm kot mẽ pahte amnhĩ tomnuj prãm xàj

mē pamā mē pajamaxpēr punuj jagjēnh kêt jakamā kwa kêr ka mē ā ajamaxpēr anhÿr kêt nē. ¹⁷ Na hte mē pahto mex pix o pa. Na pre myyti ho kato. Kapēr pix o ho kato. Nē mytwrÿre ho kato. Nē kanhêti ho kato. Ja piitā ho kato nhūm mē pamā hirā mex o harir. Na hte mytwrÿre tōhā hirā mex o pa. Nē gaa nē nyw kaxyw nē kamāt kō. Nē gaa nē nyw mē nhūm akupÿm hirā. Ā na hte amnhī nhīpêx anhÿr o pa. No Tirtūmja ā kot anhÿr kêt. Kot amnhī nhīpêxja ām rāhā ho rāhā. Na hte mē pahto mex pix o pa. No tōhā tanhmā mē pahto mex to nhūm jāā nhūm tanhmā mē pah-tomnuj to hkêt nē. ¹⁸ Tā kapēr pix o kot ā mēmoj to kator kot anhÿr. Nē mē pamā kapēr o amnhīrīt. Kām mē pahto hkra hprām xāj mē pamā Jejus kot tanhmā mē panē amnhī nhīpêx toja nhūm pre mē pamā ho amnhīrīt. Na pu prem kuma nē hkôt amnhī xunhwÿ nhūm amnhī tā mē pahpumu nē mē pahto hkra. Mē pahpē Ijaew kumrēxjaja na pre mē pahto hkra.

Mē pagryk o papa nē mē pahkurē Rōmān 12.17-21; Epes 4.25-5.2

¹⁹ E ixkwÿjaja. Kwa mē ixkapēr ma nē hā anohtÿx nē ho apa. Koja mēhō Tirtūm kapēr o mē ajahkre kaxyw mē awÿr mō nē mē amā kapēr jarē ka mē mar tÿx nē. Koja mē ate tanhmā amnhī tomnuj to nē mē amā kapēr ka mē amnhī tā ama nē kamā agryk kêt nē. ²⁰ Mē gryk o mē pa xwÿnhjaja na htem Tirtūm kapēr kôt ri amnhī nhīpêx kêt nē. ²¹ Jakamā kwa kêr ka mē axte amnhī tomnuj rÿ ajamaxpēr punuj o ri apa hkêt nē. Na htem ohtō nē ā amnhī nhīpêx anhÿr o pa nom kêr ka mē kurom Tirtūm kapēr mān amnhī krā him haxār tÿx nē. Kapēr o mē ajahkre xwÿnhjaja na htem ho mē ajahkre mex o pa. Tā kêr ka mē ama nē amā hkôt amnhī nhīpêx prām rāhā ho ri apa.

Na pu htem Tirtūm kapēr ma nē hkôt amnhī nhīpêx o papa hāmri nē nhÿrmā Tirtūm mē Kra wa kuri pahÿr tūm nē pa mex nē papa ho papa.

Mē pahte Tirtūm kapēr kôt amnhī nhīpêx ā mē pamā karō

Matêwre 7.24-27; Wam Juāw 2.3-6

²² Nē kwa mē okora. Kêr ka mē ām Tirtūm kapēr ma nē ām mar kêt nē. Māānēn hkôt amnhī nhīpêx rāhā ho ri apa. Kot kaj mē ama nē ām ama nē hkôt amnhī nhīpêx kêt nē hāmri nē apē Tirtūm kra hā amnhī jarēnh kaprÿ. Jao nhÿrmā Tirtūm mē Kra wa kuri atÿr tūm nē apa hkêt nē. ²³⁻²⁴ Te ho mēhō kot amnhī pumunh xā hpyr nē kamā amnhī pumunh nē amnhī krā hkī jaē rÿ amnhī kuk tyk pumunh pyrāk. Tā te kot ām ja hā amnhī pumunh nē kot amnhī to mex kêt rāhā akupÿm amnhī pumunh xā xir nē ma htēm nē axte amnhī kuk tyk rÿ amnhī krā kī jaērta mā hamaxpēr kêt pyrāk. Mē kot Tirtūm kapēr mar nē ām mar nē hkôt amnhī nhīpêx kêt xwÿnhjaja te kot ja jarēnh pyrāk. ²⁵ Tā kêr ka mē ā amnhī nhīpêx anhÿr kêt nē. Mē ate Tirtūm kapēr kôt amnhī nhīpêx o apa kaxyw xatā kamā harē nē mar tÿx o apa. Jao hkôt amnhī nhīpêx mex o apa. Tirtūm kot mē pahte tanhmā amnhī nhīpêx to ho papa hā mē pamā karō xāja ām hāmri na. Na htem hkôt amnhī nhīpêx nhūm Tirtūm ja hā mē omu nē mē ho mex nē nhūm mē āmnhīx hamakētcati nē hkôt amnhī nhīpêx o pa. ²⁶ Nom koja mēhō kēp Tirtūm kra hā amnhī jarēnh tā htÿx ri kapēr punuj o ri pa hāmri nē ām kēp hkra hā amnhī jarēnh kaprÿ. Mē pahpē Tirtūm krajaja na pu htem ā pakapēr anhÿr kêt nē. ²⁷ Axtem mē pahte amnhī nhīpêx. Na pu htem mē hā awrā rÿ mē kēp mē mjēn tyk xwÿnhjē ho mex nē mē hā pahpēr o pahpikēnh o papa hkêt

ně. Ně tanhmã mě kute hã mě omu ně mě ho ajuta ho papa. Á na pu htem pahpê Tirtũm krajaja amnhĩ nhĩpêx anhÿr o papa nhũm Měpanhĩpêêxà Maati Tirtũm ja hã mě pahpumu ně hkĩnh ně. No na pu htem mě kot amnhĩ tomnuj o mě pa xwÿnhjê hkôt ri amnhĩ nhĩpêx kêt ně âm Tirtũm kapêr xà kôt pix mã amnhĩ nhĩpêx nhũm amnhĩ tã mě pahpumu ně hkĩnh ně.

2

Mě pahte mě piitã mě hipêx o axpên pyrãk ã mě pamã karõ

Rõmãn 2.11; Korosẽ 3.25

¹ E ixkwÿjaja. Pahihti Jejus Krisja mex o mex. Tã ra mě ate hkôt amnhĩ xunhwÿr jakamã kwa kêr ka mě apê hkwÿ hã mě piitã tãm mě hipêx o apa. Ně mě hipêx o axpên pyrãk. ² Jakamã kot kaj mě nhÿrmã Tirtũm kapêr mar kaxyw axpên wÿr akuprõ nhũm hikàxpore rax xwÿnhta mě akôt axà. ê mex ně ôr o ïhkra kamã kãx hãmri ně mě akôt axà. Nhũm hkôt mēhõ pē amrakati xwÿnhja tē ně axà. Nom wamta kĩnhã kêp amrakati ně ê omnajti ně pikaxõnhti. Hãmri ně hikàxpore rax xwÿnhta hkôt mě awÿr tēn axà. ³ Tã tanhmã kot kaj wem ri wa hipêx to? Xà kot kaj mě wa hipêx o axpên pyrãk nà? Nà xà kot kaj mě ã wa hipêx aně ně wam àr xwÿnhta ê mex ã omunh xà hkôt kãm kadêre hõ gõ ně kãm:

—E ota kadêre. Mãmri hã nhÿ. Aně.

Hãmri ně ê pynajti xwÿnhta pumu ně axtem ně kãm:

—E atar pikap nhÿ.

Anhÿr o ahpÿnhã wa kãm akapêr? ⁴ Kot kaj mě ahpÿnhã ã wa hipêx aně ně amnhĩ tomnuj ně. Wam àr xwÿnhta ka kãm akapêr mex ně tanhmã ho mex to. No hkôt hõta omnajti hã omunh xà hkôt te kamã anhõkre kahak pyrãk o hipêx. Kot kaj mě ã ahpÿnhã wa

hipêx aně nhũm Tirtũm tee ri ja hã mě apumu nhũm ja kêp omnuj ně. ⁵ Kwa mě inhma ixkwÿjaja. Mě kêp amrakati xwÿnhjaja mě hikàxpore hkêt tã na hte mě hkwÿjaja amnhĩ kaxyw Tirtũm kôt hamaxpêr ně hkôt amnhĩ xunhwÿ nhũm amnhĩ tã mě omu ně kot mě panhĩpêx pyrãk ně mě ho hkra. Jakamã jar mě kêp amrakati htã na htem amnhĩ kaxyw Tirtũm kôt hamaxpêr tÿx rãhã ho pa. Jakamã koja mě nhÿrmã kuri htÿr tũm ně mex kumrêx ně pa ho pa. Mě kãm Tirtũm kĩnh o mě pa xwÿnh piitã koja mě nhÿrmã ã mex ně ri pa aně. ⁶ Nom kot kaj mě ahpÿnhã mě hipêx ně amnhĩ tomnuj ně. E pa mēmoj tã mě akukja. Mēmojaja na htem tanhmã mě ato hêx to? Ně mēmojaja na htem juisti mã tanhmã mě ato kapêr punuj to? Xà mě kêp amrakati xwÿnhjaja? Nà mě tãm kêt. Mě hikàxpore rũnh xwÿnhjaja na htem ã mě anhĩpêx anhÿr o pa. ⁷ Ně ra mě ate hkôt amnhĩ xunhwÿr xwÿnhja nhũm mě axtem ně tanhmã mě apê ho kapêr to ho pa. Tã ka htem mě kêp amrakati xwÿnhjê rom mě kãm akapêr mex ně mě kãm kadêre mex gõ nhũm mě hã hkrĩ. ⁸ Tirtũm kapêr ã kagà htũm kot ja jarēnh kot:

Kêr ka mě piitã mě hipêx o te ka amã amnhĩ tã ma pyrãk. Aně.

Ã kot mě pamã karõ kot anhÿr. Kapêrja mex kumrêx. Kot puj mě ã axpên nhĩpêx anhÿr jao Tirtũm kãm hprãm xà hkôt amnhĩ nhĩpêx mex ně. ⁹ Nom kot puj mě ã amnhĩ nhĩpêx anhÿr kêt ně ahpÿnhã tanhmã mě hikàxpore rũnh xwÿnhjê ho mex to ně ahpÿnhã tanhmã mě kêp amrakati xwÿnhjê nhĩpêx to japêr. Hã kot puj mě Tirtũm kapêr htũmta nhĩrõp pakuhê ně amnhĩ tomnuj ně. ¹⁰ Kot pu mě kapêr tũm piitã hkôt ri amnhĩ nhĩpêx mex o ri papa htã

ãm pixire në hirôp pakuhê. Jao te pahte kapër piitã hirôp pakuhê pyrãk. ¹¹ Na pre Tirtûm mẽ pahte mẽ pahprô pix tânopxar o papa hã mẽ pamã karô. Nê mẽ pamjên pix tânopxar o papa hã mẽ pamã karô. Nê mẽ pahte axpên par në mẽ pahkurê. Jakamã kot puj mẽ pahprô pix tânopxar mex o ri papa japêr. Nê mẽ pamjên pix tânopxar mex o ri papa japêr tã tanhmã pajamxpêr to në pahkwýjê hõxpĩ. Jao te Tirtûm kapêr tûm piitã hirôp pakuhê hpar pyrãk o amnhĩ nhĩpêx.

¹²⁻¹³ Koja nhỹrmã Tirtûm mẽ pahtir ri tanhmã axpên nhĩpêx to ho papa hã mẽ pahpumunh kôt tanhmã mẽ pajarênh to. Mẽ pamã axpên kĩnh ã axpên to mex o papa hã mẽ pahpumunh kôt mẽ pajarê rý mẽ pamã axpên kĩnh kêt ã axpên nhĩpêx o papa hã mẽ pahpumunh kôt mẽ pajarê. Jakamã mẽ kamã mẽ ukapri kêt xwýnhjaja koja nhỹrmã ja hã mẽ omu në mẽ urãk në mẽ kamã ukapri hkêt në. Nom mẽ kamã mẽ ukapri ho mẽ pa xwýnhjaja koja ja hã mẽ omu në mẽ urãk në mẽ kamã ukapri në mẽ në mẽ kot amnhĩ tomnuj piitã rênh pa. Jakamã kwa kêr ka mẽ amnhĩ to mex në tãm axpên nhĩpêx o ri axpên kôt apa. Nê axpên mã akapêr mex në axpên kamã axukapri pix kukamã ajamxpêr o apa.

Amnhĩ kaxyw Tirtûm kôt mẽ hamaxpêr xwýnhjê jarênh

Rukre 3.8-14

¹⁴ Nê kwa ixkwýjaja. Koja mẽhõ kot amnhĩ kaxyw Jejus kôt hamaxpêr në hkôt amnhĩ xãm ã amnhĩ jarênh tã hkôt ri amnhĩ nhĩpêx kêt në. Hã koja nhỹrmã ty hãmri në tanhmã kot we amnhĩ to në Tirtûm mẽ Jejus wa kuri htir tûm në pa ho pa? Nã koja anhỹr kêt në. Kêp hkra hã amnhĩ jarênh tã hkôt amnhĩ nhĩpêx kêt jakamã koja nhỹrmã wa hwýr àpir kêt në.

¹⁵ Nê xà koja mẽhõ kêp amrakati në ri pa. Nê é pynajre pix jagjê në ri hã pa. Nê õ hkêt në ri kãm prãm në pa. ¹⁶ Ka mẽ ja hã omu në tanhmã kãm akapêr to në kãm:

—Kwa ã amnhĩ nhĩpêx anhỹr kêt në. Anhõrkwý hwýr tèn axé mex japêr në axà në amnhĩm mẽmoj japêr në aku. Koja Tirtûm ato mex rax në.

Anhỹr o kãm akapêr tã kãm mẽmoj nhõr kêt në. Tã xà koja we ama në amar xà hkôt é mex jagjê në apkur mex o ri pa? Nã kot ka mẽ ã kãm akapêr anê në ho ajuta hkêt në nhũm arĩ kãm prãm në é hkêt në omnuj në ri pa. Na htem mẽ kapêr pix o mẽ ho mex kêt në. Kot kaj mẽ ã kãm akapêr anê në ãm kãm mẽmoj tã karô kaprý. ¹⁷ Ja pyrã në koja mẽhõ ra amnhĩ kaxyw Jejus kôt hamaxpêr në hkôt amnhĩ xãm ã amnhĩ jarênh tã kapêr kôt ri amnhĩ nhĩpêx kêt japêr. Hã koja ãm kêp hkra hã amnhĩ jarênh kaprý.

¹⁸ Nê kot kaj mẽ atõ ã ajamxpêr anê në ajamxpêr o:

—Nã Jejus kwýjaja na htem ahpýnhã tanhmã amnhĩ nhĩpêx to ho pa. Na hte mẽ hkwýjaja amnhĩ kaxyw Jejus kôt hamaxpêr tỳx pix o ri pa. Nê mẽ hkwýjaja tanhmã hkwýjê ho mex to ho ri pa. ã na htem ahpýnhã tanhmã amnhĩ nhĩpêx anhỹr to ho pa. Anê.

Kwa mẽ ri ã ajamxpêr anhỹr kêt në. Mẽ hkwýjê ho mex o mẽ pa xwýnhjaja na htem Tirtûm hkôt hamaxpêr pẽ mãânên hkôt amnhĩ nhĩpêx në hkwýjê ho mex o pa. Koja mẽhõ amnhĩ kaxyw Jejus kôt hamaxpêr hã koja mãânên hkôt amnhĩ nhĩpêx pẽ tanhmã hkwýjê ho mex to ho pa. Na htem amnhĩ kaxyw hkôt hamaxpêr pix o pa hkêt në. Na htem mãânên hkôt mẽ piitã mẽ ho mex o ri pa.

¹⁹ Na ka hte mẽ akwýjaja ã ajamxpêr anê në ajamxpêr o:

—Nà Tirtùmja pyxi mex o pyxi mex. Tã kot paj jam ijamaxpër rãhã ho ri ixpa nê ra ixpê hkra hã ri ixpa. Nom kot paj kapêr kôt amnhĩ nhĩpêx o ri ixpa hkêt nê.

Anhÿr o ajamaxpër nê ã ajamaxpër anhÿr kaprÿ.

Nê ãm hãmri na ka htem Tirtùm pyxi mex o pyxi mex ã harê. Nom na htem jam hamaxpër kôt pix mã kêp hkra hkêt nê. Mêkarõmnutijaja na htem haxwÿja Tirtùm pyxi mex o pyxi mex kôt hamaxpër tã mẽ kêp hkra hkêt. Na htem ã hamaxpër anhÿr pê kãm uma ho pa. ²⁰ ã mẽ ajamaxpër anhÿrja mex kêt. Kojã mẽhõ amnhĩ kaxyw Tirtùm kôt hamaxpër ã amnhĩ jarênh tã hkôt amnhĩ nhĩpêx o pa hkêt japêr. Hãmri nê ãm amnhĩ kaxyw hkôt hamaxpër ã amnhĩ jarênh hkaprÿ. E kot paj ixprĩ hã mẽ amã ja jarê ka mẽ inhma. ²¹ Mẽ panhigêt finat Apraãw na pre amnhĩ kaxyw Tirtùm mã hamaxpër nê hkôt ri amnhĩ nhĩpêx mex o pa. Tã nhũm amnhĩ tã kamã hamak kaxyw hkra Ijak ã kuwÿ nhũm kuma nê ra kot kãm hpĩr nê õr kaxyw nhũm Tirtùm amnhĩ tã omu nê amnhĩm mex ã harê. Hãmri nê kot hkra hpĩr nê kãm kapêr. ²² Ra kot amnhĩ kaxyw hkôt hamaxpër nê hkôt amnhĩ xãm jakamã mããnen hkôt amnhĩ nhĩpêx nê ra kot kãm hkra nhõr kaxyw Tirtùm amnhĩ tã omu nê amnhĩm mex ã harê. Na pre ã finat Apraãw Tirtùm kapêr kôt amnhĩ nhĩpêx mex anhÿr o pa. Jao amnhĩ kaxyw hkôt hamaxpër mex ã amnhĩ to amnhĩrĩt.

²³ Nê kormã Apraãw wa hkra hkêt ri nhũm Tirtùm wa kãm hkra jarê nhũm kuma nê hkra hkukamã amnhĩ kaxyw Tirtùm kôt hamaxpër tÿx o pa nhũm amnhĩ tã omu nê mex ã harê. Nê kêp hkrãmnhwÿ hã harê. Kapêr ã kagã htũm kot ja jarênh kot:

Na pre Apraãw hkra hkukamã amnhĩ kaxyw Tirtùm kôt

hamaxpër tÿx nhũm amnhĩ tã omu nê amnhĩm mex ã harê. Anê.

²⁴ ã na pre finat Apraãwja hkra kaxyw Tirtùm kôt hamaxpër anhÿrja o ra hkôt amnhĩ nhĩpêx nê ra kot kãm hpĩr kaxyw. Nom kop apu amnhĩ kaxyw hkôt hamaxpër pix nê hkôt amnhĩ nhĩpêx kêt ronhÿx pre Tirtùm tee ri amnhĩ tã omu nê amnhĩm mex ã harênh kêt nê. Na htem amnhĩ kaxyw Tirtùm mã hamaxpër nê mããnen hkôt ri amnhĩ nhĩpêx mex o pa nhũm amnhĩ tã mẽ omu nê amnhĩm mẽ mex ã mẽ harê. ²⁵ Mẽhõ ni kuprÿ finat Raapja na pre ã amnhĩ nhĩpêx anê nê amnhĩ kaxyw Tirtùm kôt hamaxpër pê tanhmã hkôt amnhĩ nhĩpêx to ho pa. Na pre Ijaew myja wa hamëxkrut nê ma Raap nhõ krĩ hwÿr wa tẽ. Mẽ hã ukapi nê kot mẽ hkurê kaxàr kaxyw mẽ hwÿr wa tẽ. Hãmri nhũm Raap Tirtùm kot wa mẽnh ã wa omunh kurê kumrêx nê pòristi kot tanhmã wa ho pymaj amnhĩ nhõrkwÿ kamã mẽ kêp wa ho amũxu nê wa nê mẽ kãm tanhmã hêx to. Nê hpãnhã nhãm pry hõ hkôt akupÿm wa kumê nhũm wa hkà hkĩnh pẽ ma akupÿm mex nê tẽ. Hãmri nhũm Tirtùm wa hã Raap pumu nê amnhĩm mex ã harê.

²⁶ Tã kot kaj mẽ atõ amnhĩ kaxyw Tirtùm kôt ajamaxpër ã amnhĩ jarênh tã hkôt amnhĩ nhĩpêx kêt japêr. Hãmri nê apê hkra hã amnhĩ jarênh kaprÿ. Te ra mẽhõ htyk nê nõr tã nhũm mẽ kot arĩ htĩr ã harênh kaprÿta pyràk.

3

Mẽ kot Tirtùm kapêr o mẽ ahkre xwÿnhjê jarênh

¹ Nê kwa Kris kôt ixkwÿjaja. Mẽ axohtõ nê mẽ amã Tirtùm kapêr o mẽ ahkre hprãm tã kormã ja kaxyw mẽ apiitã mẽ amex kêt. Mẽ ixte Tirtùm kapêr o mẽ ajahkre xwÿnhjaja kot paj mẽ tanhmã amnhĩ tomnuj to japêr nhũm

Tĩrtũm ja hã mẽ ixpumu nhũm ja kęp omnuj nẽ. Mẽ ixte kapěr o mẽ ajahkre ho mẽ ixpa kẽnã kot pa hkêt mẽ ri tanhmã amnhĩ tomnuj to ho ri ixpa. Jakamã kot kaj mẽ Tĩrtũm kapěr piitã hkôt ri amnhĩ nhĩpêx mex nẽ rĩ kormã ho akwỳjê jahkre ho ri apa.

²Nẽ mẽ pahpiitã na pu htem tũhã mẽ pajakwa ho tanhmã amnhĩ tomnuj to. Mẽmoj tã axpẽn kãm pagryk nẽ tanhmã mẽ kãm pakapěr punuj to. Nom koja mẽhũ tanhmã kapěr punuj toja nẽ amnhĩ to htỳx nẽ hãmri nẽ tãm amnhĩ nhĩpêx o pa.

Mẽ pajakwa jarẽnh
Epes 4.29

³Na htem nhỹhỹm kawar o juk kaxyw hakwam kãx jagjê nẽ kãm nhỹhỹm o htẽm prãm xã hkôt ma nhỹhỹm ho juk o tẽ. Kãxja hkryre nhũm kawar rũnh tã no nhũm kãm ma nhỹhỹm ho mrar prãm xã hkôt ho juk o mra.

⁴Nẽ gũ xujanãr kãm pãr rũnh ta rũnh tã na hte kũk àpêr tỳx nẽ ma nhỹhỹm o pa. Nẽ pĩ ho pãr o juk xãta hkryre htã ma nhỹhỹm ho juk o mũ. Nhỹhỹm pãr o mrar xwỳnh kãm o mũr prãm xã hkôt o mũ.

⁵Ja pyrà nẽ mẽ pajakwaja hkryre htã na htem ho kapěr o tanhmã mẽ hipêx to ho pa. Tũhã ho kapěr mex nẽ nhũm mẽ kuma nẽ hkĩnh nẽ. Nẽ tũhã ho kapěr punuj nẽ nhũm mẽ tee ri mẽ kapěr ã mẽ kuma nẽ hkaprĩ nẽ rỳ kapěr xwỳnh ta kamã gryk nẽ. Mẽ pajakwa hkryreja te kot kuwy jakrax kryre pyràk. Kot ka kuwy jakrax grire ho tẽ nẽ nhỹri pũti kamã amẽ nhũm kũk ho apê nhũm hpũk rax tokyx anẽ. Hãmri nẽ ma pã ho hkaxãr par o mũ nẽ ho hkaxãr pa. ⁶Mẽ pajakwaja mã kot anhỹr. Kot kaj atỳx ri tanhmã ho akapěr punuj to nhũm mẽ ama nẽ axpẽn mã anhĩxi ho krĩ nhĩpêx ka amex kêt nẽ apa. Rỳ ka atỳx ri ajakwa ho tanhmã akwỳjê ho akapěr to nhũm mẽ tee ri amnhĩ tã

ama nẽ hkaprĩ nẽ rỳ akamã gryk nẽ. Satanasti nhỹ hã na htem ã mẽ hakwa ho kapěr punuj anẽ.

⁷Na htem tũhã mẽmo mry xoprê pynê nẽ tanhmã ho nẽ ra ho kãm ma hkêt. Kagã rỳ hagrũre rỳ àati rỳ gũx kãm mẽmo mryja nhũm htem unê nẽ tanhmã ho nhũm kãm ma hkêt nẽ mẽ hkôt pa ho pa. Nom na htem mry piitã ã hipêx anhỹr kêt nẽ. ⁸Tã mẽ pajakwa te mẽ kot tee ri mẽmo mry ho kãm ma hkêt kaprỳ xwỳnh ta pyràk. Na pu htem amnhĩ krã hkôt pajakwa ho pakapěr mex pix kêt nẽ. Tanhmã kot puj mẽ pakapěr punuj kêt kaxyw amnhĩ jakwa hto? Mẽ pakapěr punuj te kot kagã xoprê kot mẽ hkamnhar nẽ õ wenẽn o mẽ hparta pyràk. ⁹⁻¹⁰Na pu htem tũhã pajakwa ho tãm pakapěr nẽ tũhã pakapěr punuj nẽ. Nẽ tũhã Pahi Maati Tĩrtũm mã mex o mex ã harẽn h tã ra axtem nẽ tanhmã mẽhũ japrỳ hto. Tĩrtũm kot mẽ pahto amnhĩ pyrà nẽ mẽ panhĩpêx tã pu htem axtem nẽ tanhmã axpẽn japrỳ hto ho ri papa. Jao te pahte Tĩrtũm japrỳ pyràk. Kwa ixkwỳjaja. Kêr pu mẽ pahpê Tĩrtũm krajaja ã pakapěr punuj anhỹr hkêt nẽ. ãm mẽ pajakwa ho mẽmoj mex pix jarẽn h o ri papa.

¹¹⁻¹²Xã koja pã kamã hinore pyxi htã kamã gũ xãnh nẽ mããnẽn kamã gũ xenh nũkati? Nã koja anhỹr kêt nẽ. Na hte kamã gũ mex pix nẽ rỳ kamã gũ xenh nũkati pix nẽ.

Nẽ xã koja jãxũ hpãr ã rãrãj harir? Rỳ ahkrũ xũ hã mãnkwrỹtre harir? Nã na hte ahpỹnhã hpãr ã harir. Ja pyrà nẽ kêr pu mẽ pahpê Tĩrtũm krajaja pajakwa ho pakapěr punuj pẽ ho papikamỹr tỳx nẽ. Nẽ te hinore kamã gũ mex pixa pyrà nẽ ãmoj mex pix jarẽn h o ri papa. No mẽ pajakwa nhĩkê ho tãm pakapěr nẽ hikjê ho pakapěr punuj kêt nẽ. ãm pakapěr mex pix o pakapěr o ri papa. Kwa kêr pu

mê ã amnhĩ nhĩpêx anhÿr rãhã ho papa.

Tĩrtũm kõt mẽ àhpumunh xwÿnhjê jarênh

Wam Korĩt 2.6-16

¹³ Nê kwa mẽ axàhpumunh tÿx xwÿnhjaja kêr ka mẽ amnhĩ to mex o ri apa. Nê mẽ piitã tãm mẽ hipêx mex nê mẽ amã axpên japê hã axpên to ajuta mex o ri apa. Tĩrtũm kapêr xà hkôt. Kot kaj mẽ ã amnhĩ nhĩpêx anê nê axàhpumunh mex ã amnhĩ to amnhĩrit. ¹⁴ Nom kot ka mẽ mẽmoj tã axpên kamã agryk o ri apa. Rÿ amnhĩ pix kukamã ajamaxpêr o ri apa hãmri nê ãm ate Tĩrtũm kapêr kõt amnhĩ nhĩpêx ã amnhĩ jarênh kaprÿ. ¹⁵ ã mẽ kot amnhĩ nhĩpêx anhÿr xwÿnhjaja na htem Tĩrtũm kõt amnhĩ nhĩpêx kêt nê. Mẽ kêp Tĩrtũm kra hkêt xwÿnh pixjaja na htem ã amnhĩ nhĩpêx anhÿr o pa. Jao mẽkarõmnuti kot amnhĩ nhĩpêx kõt pix mã amnhĩ nhĩpêx o pa. ¹⁶ Axpên kamã mẽ gryk o mẽ pa xwÿnhjaja na htem amnhĩ pix kukamã hamaxpêr jao tanhmã amnhĩ tomnuj to ho pa. Nê amnhĩ tã mẽ kamã mẽ gryk xwÿnhjê homnuj o pa. Tã ã mẽ pahte amnhĩ nhĩpêx anhÿr pumaj kwa kêr pu mẽ mẽmoj tã axpên kamã pagryk o ri papa hkêt nê. ¹⁷ Mẽ kot Tĩrtũm kõt amnhĩ nhĩpêx xwÿnhjaja na htem jajê rom tãm axpên nhĩpêx rãhã o pa.

Nê axpên kamã ukapri pix o ri axpên kõt pa.

Nê tãm hamaxpêr o pa.

Nê mẽ piitã mẽ hipêx o axpên pyrãk.

Nê axpên tã hpijaam o ri pa.

Nê tanhmã ri axpên no kupyr to hkêt nê.

Nê ri oprê ho pa hkêt nê.

Nê mẽ axpên kamã òkre kahak kêt nê.

Nê mẽ piitã mẽ ho mex o axpên pyrãk.

Nê tãm mẽ piitã mẽ hipêx rãhã nê.

Ã na htem Tĩrtũm kõt mẽ kot amnhĩ nhĩpêx xwÿnhjaja amnhĩ nhĩpêx anhÿr o pa. ¹⁸ Kot puj mẽ ã amnhĩ nhĩpêx anê nê pajamakêtkati nê paxamnhix pahkĩnh nê ri papa. Nhũm nhÿri mẽhõ wa axpên kãm gryk pu mẽ wa omu rÿ wa harênh ma hãmri nê mẽ pahtõ ma wa hwÿr tẽ nê wa kãm pakapêr nê tãm akupÿm wa ãm. Hãmri nhũm wa ra mẽ pahpyrã nê tãm amnhĩ nhĩpêx pê hamakêtkati nê wa ri pa. amnhix ri hkĩnh nê wa ri pa.

4

Mẽ kot amnhĩ pix kukamã mẽ hamaxpêr xwÿnhjê jarênh

Matêwre 20.20-28; Juãw 16.24

¹ Nê kwa mon ka hte mẽ akwÿjaja axpên mã akapêr mã agêt o axpên kãm agryk pix o apa? Na ka htem ã amnhĩ nhĩpêx anhÿr o amnhĩ pix kukamã ajamaxpêr. Nê mẽ amã amnhĩ jamaxpêr kõt pix mã ri amnhĩ nhĩpêx prãm. No Tĩrtũm kãm hprãm xà hkôt amnhĩ nhĩpêx prãm kêt nê. ² Na ka htem nhÿri mẽmoj pumu nê tee ri ho amã anhõ hprãm kaprÿ. Nê amã ho anhõ hprãm xaj õ xwÿnhhta pĩr nê kêp utar mã.

Nê na ka htem tanhmã axpên kukrêx kute hã omu nê amã ho anhõ hprãm nê hã õ xwÿnhhta mẽ wa axpu. No mẽ amã hprãm xwÿnhhta mẽ ate hõ hã Tĩrtũm wÿr ronhÿx ra mẽ ama nê mẽ amã hõ gõ. Tã mẽ ate hã axàhwÿr kêt jakamã nhũm mẽ amã òr kêt nê.

³ Rÿ ka mẽ tõhã mẽmoj tã awÿ nhũm kot mẽ amar tã mẽ amã òr kêt nê. Kot mẽ amã òr nhũm mẽ ate ho anhõxÿ ho apa pymaj na hte tõhã mẽ amã mẽ ate hã axàhwÿr xwÿnhhta nhõr kêt nê.

⁴ Kormã mẽ ate hkôt amnhĩ nhĩpêx mex kêt. Te mẽni hõ ra mjên tã nhãm kot mẽhõ my ho amnhĩkati pyrãk o na ka htem amnhĩ nhĩpêx o apa. Jao mẽ amã mẽ apê Tĩrtũm kra hprãm tã axtem nê mẽ kãm hprãm kêt xwÿnhjê hkôt amnhĩ nhĩpêx

o ri apa nē mē uràk nē tanhmā amnhī tomnuj to ho ri apa. Nē mē ate amnhī tomnuj gryk ā mē amā Tirtūm prām kêt ā amnhī to amnhīrīt.

⁵ Tirtūm kapēr ā kagà htūm kot tanhmā Karō jarēnh to nē harēnh kot:

Na pre Tirtūm mē pahwūr amnhī Karō rē nhūm mē pahwūr wrū nē mē pakamā agjē nē mē pahkôt pa ho pa. Mē pahte hkôt pix mā amnhī nhīpêx o papaja na kām hprām. Anē.

Ām hāmri ā harēnh kot anhūr jakamā kwa kêt ka mē harēnh ma nē kām ajamaxpēr tỳx rāhā ho ri apa.

⁶ Na hte Tirtūm mēmoj to mē pakutā nojarēt rāhā pu mē ŷ hā tām amnhī nhīpêx o ri papa. Kapēr ā kagà kot ja jarēnh kot:

Mē kām Tirtūm kôt amnhī nhīpêx prām kêt xwỳnhjaja na hte Tirtūm amnhī tã mē omu nē mē kutā amnhī xunhwỳ.

No mē kām hkôt ri amnhī nhīpêx prām xwỳnhjaja na hte amnhī tã mē omu nē mē ho mex o pa nhūm htem hihtỳx xà nhỹ hā mē kām hprām kêt xwỳnhjê hkôt ri amnhī nhīpêx kêt nē. Anē.

⁷ Jakamā kwa kêt ka mē Tirtūm kapēr kôt pix mā mǎn ri amnhī nhīpêx o ri apa. Kêt kē Satanasti tanhmā mē ate amnhī tomnuj to hprām xàj tanhmā mē ato ka mē Tirtūm Karō nhỹ hā ām ama nē hkôt amnhī nhīpêx kêt nē. Nhūm tee ri amā àhkrox kaprỳ nē akaga nē ma tē.

⁸ Nē kot kaj mē Tirtūm kapēr kôt pix mā ri amnhī nhīpêx o apa nhūm amnhī tã mē apumu nē te kot mē apa hā mē ajamỳnh nē mē ato pa pyrāk o mē anhīpêx. Jao mē ato mex o ri mē akôt pa ho pa. Nē mē atānopxar rāhā ka mē ajamakêtkati nē akīnh nē ri apa.

Nē kêt ka mē tanhmā amnhī tomnuj to hāmri nē tee ri ja hā amnhī pumu nē hkaga kuré kumrêx nē axte ā amnhī nhīpêx anhūr kêt nē. Rỳ ka mē tanhmā ajamaxpēr punuj to hāmri nē ja hā amnhī pumu nē hkaga nē hpānhā tām ajamaxpēr pix o ri apa. Mē apē Tirtūm kra hā kêt ka mē ām hkôt pix mā ri tām amnhī nhīpêx o ri apa.

Mē pahte amnhī tomnuj ā tanhmā amnhī nhīpêx to hā mē pamā karō

Wam Juāw 1.5-10

⁹ Nē kêt ka mē tee ri ate tanhmā amnhī tomnuj to hā amnhī pumu nē akapri xàj mur nē akīnh kêt nē. Nē akapri xàj amūr rax nē. ¹⁰ Hāmri nē Tirtūm mā amnhī jarēnh o:

—Pa Tirtūm. Na pa ā amnhī tomnuj anē. Nom kot paj axte hkêt nē. Ām inhmā akapēr kôt pix mā ri amnhī nhīpêx prām.

Anhūr o kām akapēr kē mē ama nē mē ate amnhī tomnujta ā tanhmā mē ato hkêt nē. Ām mē ato mex nē ka mē akupỳm ajamakêtkati nē axāmnhīx akīnh nē ri apa.

Mē pahte axpēn to pakapēr nē mē pahkurē

Matêwre 7.1-5; Rōmān 2.1-3, 14.10-13; Wam Korīt 4.5

¹¹ E ixkwỳjaja. Kwa kêt ka mē anhīō kot tanhmā amnhī tomnuj to hā omu nē tanhmā ho akapēr punuj to hkêt nē. Tirtūm kapēr ā kagà htūm kot ja nē mē pahkurē kamā hihtỳx jakamā kot ka mē ri ā amnhī nhīpêx anē nē te ate Tirtūm kapēr tūm kwỳ omnuj ā harēnh pyrāk. Rỳ te axàhpumunh tỳx o ate Tirtūm jakrenh ā amnhī to jarkrar pyrāk. Jao kapēr kôt amnhī nhīpêx kêt nē. Na htem Tirtūm kapēr ā kagà htūm kwỳ mex ā harē nē hkwy omnuj ā harēnh kêt nē. Piitā mex kēnā.

¹² Nē Tirtūmja tapxipix na kēp mē pahto amnhīptār xwỳnh maati.

Ně tapxipix na hte mẽ pahte tanhmã amnhĩ nhĩpêx to hã mẽ pahpumunh hkôt tanhmã mẽ pajarênh to. Mẽ pahte amnhĩ to mex xwỳnh ã mẽ pajarẽ rỳ mẽ pahte amnhĩ tomnuj xwỳnh ã mẽ pajarẽ. ãm tapxipix kot ã mẽ pajarênh kot anhỹr xwỳnh. Tã ka mẽ axtem nẽ kapêr kwỳm ri tanhmã akwỳjê ho akapêr punuj to ho ri apa.

Mẽ pahte Tĩrtũm mã pajamaxpêr pê kãm amnhĩ jarênh ã mẽ pamã karõ

Rukre 12.13-21

¹³E kwa mẽ inhma ixkwỳjaja. Na ka hte mẽ akwỳjaja tanhmã amnhĩ kukamã ajamaxpêr to nẽ akwỳjê mã amnhĩ jarênh o:

—Koja apkati pa ma krĩ hõ hwỳr mõ nẽ kamã mẽ kãm ixàpênh o ixpa hã ixtã amgrã pyxi nẽ hpãnhã kàxpore jamỳnh rax nẽ man akupỳn mõ.

Anhỹr o amnhĩ jarê. ¹⁴Kwa mẽ ã amnhĩ kukamã amnhĩ jarênh anhỹr kêt nẽ. Mẽ pahtõ mẽ pahte amnhĩ kukamã paxàhpumunh mex? Amrakati kênã. Kot ka mẽ ã amnhĩ kukamã amnhĩ jarênh anhỹr tã kormã ã amnhĩ nhĩpêx anhỹr kêt ri tanhmã amnhĩ to nẽ ty. Rỳ tanhmã amnhĩ to nẽ axà hãmri nẽ nhỹhỹm amõr kêt nẽ. Te mẽ pahpê namê pyrãk na pu htem ri papa nẽ tanhmã amnhĩ to nẽ ty nẽ pajapêx tokyx anẽ. ¹⁵Jakamã mẽ ã amnhĩ kukamã amnhĩ jarênh anhỹr kêt nẽ. Kêt amnhĩ jarênh o:

—Koja Tĩrtũm kãm ja prãm koja apkati pa ã amnhĩ nhĩpêx anẽ nẽ ã amnhĩ nhĩpêx anẽ.

Anhỹr o Tĩrtũm kamnàr o tanhmã amnhĩ kukamã amnhĩ jarênh to. ¹⁶No mẽ ate amnhĩ krã hkôt amnhĩ kukamã amnhĩ jarênh ta Tĩrtũm jamaxpêr xà hkôt kêt. ãm amnhĩ krã hkôt mẽ ate amnhĩ kukamã amnhĩ jarênh kênã. ã mẽ ate amnhĩ jarênh anhỹrja mex kêt.

¹⁷Ně mẽ kot tãm amnhĩ nhĩpêxja kot kaj mẽ ate mar mex tã hkôt amnhĩ nhĩpêx kêt japêr hãmri nẽ amnhĩ tomnuj o apa.

5

Mẽ hikàxpore rũnh xwỳnhjê jarênh Rukre 12.13-21; Wam Ximotre 6.9-10; Apokarip 18.14

¹Ně kwa mẽ akàxpore rũnh xwỳnhjaja. Mẽ inhma nẽ inhmar tỳx nẽ. Nhỹrmã mẽ amex kêt jakamã kwa mẽ tee ri amnhĩ kukamã ajamaxpêr o ra akaprĩ nẽ amỳr o apa kurê kumrêx. ²Tĩrtũm noo mã mẽ akàxpore te ra mẽ apê hapêx par pyrãk. Te ra mẽ anhỹ kamã mẽ ate amnhĩ tomnuj xwỳnh ã kutã akrĩ pyrãk. ³Mẽ ate mẽ akukrêx nẽ mẽ akàxpore ho apikuprõnh rũnh tã ka htem mẽ akwỳjê pê ho anhõxỳ ho ri apa. Mỳrapê koja nhỹrmã tanhmã mẽ apê amnhĩ to nẽ omnu pa ka mẽ ho apikuprõnh rax kaprỳ. Hãmri nẽ mẽ ate amnhĩ tomnuj mỳrapê Tĩrtũm mẽ Kra wa kuri atĩr tũm nẽ apa ho apa hkêt nẽ. ãm kuwy kamã mẽ amnhĩ xà htỳx kamã ajamak rãhã ho ri apa. ⁴Na ka htem apur kãm mẽ àpênh xwỳnhjê mã amnhĩrer kêt nẽ. Nhũm mẽ tee ri amnhĩ tã mẽ ajamã hãmri nẽ mẽ atã amnhĩ to Pahi Maati Tĩrtũm xihtỳx xwỳnh ta wỳr o pa nhũm mẽ atã mẽ kuma. ⁵Mẽ akĩnhã mẽ kêp amrakati htã ka htem ãm ja hã mẽ omu nẽ mẽ àpênh pãnhã mẽ kãm amnhĩrer kêt nẽ amnhĩ pix kukamã ajamaxpêr. Nẽ amã prãm xà hpix kukamã amnhĩm mẽmoj japrõr pê akĩnh o ri apa. Jao te mẽ apê mõx htwỳm nhũm mẽ kot hpĩr nẽ hkrêr mã mex ã harênh xwỳnh ta pyrãk. Mỳrapê kot kaj mẽ mõxta pyrã nẽ nhỹrmã ty hãmri nẽ Tĩrtũm mẽ Kra wa kuri atĩr tũm nẽ apa ho apa hkêt nẽ. ⁶Nom ja pix kêt. Na ka htem mẽ anhõ krĩ kamã mẽ anhõ pahi mã tanhmã akwỳjê ho axêx to ho ri apa. Mẽ kot tanhmã atomnuj to

hkêt tâ ka mê kãm mê ho axêx rûnh nê. Tã koja nhÿrmã Tirtûm mê hã tanhmã mê ato rax kumrêx ka mê ri amnhî pumu.

Mê pahte Jesus kutêp amnhî kaxyw kãm pajamaxpêr o papa hã mê pamã karô

Sikûn Pêtre 3.1-13

⁷ E ixkwÿjaja. Koja mêmhõ tanhmã mê atomnuj to htã ka mê arî amnhî kaxyw Jesus mã ajamaxpêr rãhã ho ri apa. Pê akupÿn hpôx xã hã arîgro jamãr rãhã nê. Te pur nhõ dõn kot amnhî nhîpêx pyrãk. Koja hpur kãm ahkre nê ahkre hpa hãmri nê arî hamãr o pa nê kãm nojarêt kêt nê hã na wrÿk jamãr o pa. Jao hamakêtkati nê ô jamãr rãhã ho pa. ⁸ Tã kêr ka mê uràk nê arî Pahihti akupÿn hpôx xã hã arîgro jamãr rãhã ho ri apa. Koja tokyx akupÿn mê pahwÿr wrÿ. Jakamã kêr ka mê kutêp mê kot mê atomnuj xwÿnhjê kutã amnhî to htÿx nê ri apa. Nom tee ri amnhî kukamã ajamaxpêr o Jesus kaga hkêt nê. Arî hamãr pê akînh nê ajamakêtkati nê ri apa. Koja akupÿn mê pahwÿr wrÿ nê mê pahto mex rax kumrêx.

⁹ Nê kêr ka mê axpên to akapêr o ri apa hkêt nê. Kot ka mê ã amnhî nhîpêx anê nhûm Tirtûm mê ama nê tanhmã mê ajarênh to. Kot mê pahpumunh xã hkôt tanhmã mê pajarênh to xwÿnh na. Tã ra tanhmã kot mê pahpiitã mê pajarênh to xã hã arîgroja ra ahtêp o mō.

¹⁰ E ixkwÿjaja. Kêr ka mê wam mê kot Tirtûm nhÿ hã kapêr jarênh xwÿnhjaja kot amnhî nhîpêx mã ajamaxpêr rãhã nê. Na prem Tirtûm nhÿ hã mê kãm kapêr o ri mê hkôt pa nhûm mê hkwÿjaja ja hã tanhmã mê hipêx to nhûm mê amnhî xã htÿx kamã hamak rãhã ho pa. Tã tee ri amnhî kukamã hamaxpêr pê Tirtûm kaga hkêt nê. Na prem arî ÿ hã kapêr jarênh rãhã ho ri mê hkôt pa. Tã kêr ka mê kot amnhî nhîpêx pyrãk o amnhî

nhîpêx nê Tirtûm kaga hkêt nê. ¹¹ Na prem amnhî xã htÿx kamã hamak o pa rãhã ty hãmri nê Tirtûm kuri mex nê hkînh nê pa ho pa. Ra mê ate finat Johti jarênh mar mex. Na pre omnuj tÿx nê pa htã amnhî tã Pahi Maati Tirtûm kamã gryk nê hkaga hkêt nê. Hãmri nhûm amnhî tã omu nê gaa nê ho mex rax nê nhûm akupÿm mex kumrêx nê pa. Pahi Maati ja ukaprî ho ukaprî nê mex o mex jakamã na pre ã Johti ho mex anê. Tã koja ho mexta pyrã nê ã mê pahto mex anê.

Mê pahte tanhmã amnhî nhîpêx to hã mê pamã karô

Matêwre 5.33-37, 18.15; Rômãn 12.15; Karatas 6.1-2; Jutre 22-23

¹² E ixkwÿjaja. Pa mê amã mêmoj jarê ka mê inhma nê inhmar tÿx nê. Kêr ka mê mêmoj tã amnhî jarênh kaxyw hãmri nê akatàt kôt amnhî jarênh kurê kumrêx. Nê amnhî jarênh o: “Nà kot paj ja ho anê.” Anê. Rÿ amnhî jarênh o: “Nà kwarî pa ja ho anhÿr kêt nê.” Anhÿr o amnhî jarênh kurê kumrêx. Kê mê akwÿjaja ãm hãmri mê ate amnhî jarênh ã mê apumunh kurê kumrêx nê axêx ã mê akamnhîx kêt nê. Mê apê Tirtûm kra kênã kot ka kêt mê ri axtem nê amnhî jarênh o axêx.

¹³ Nê koja mê anhîõ mêmoj tã tanhmã amnhî to nê omnuj nê. Ka mê ja hã omu nê kãm anê kê amnhî kaxyw Tirtûm mã hamaxpêr pê amnhî to hwÿr rãhã ho pa. Rÿ koja hkînh nê ri pa ka mê ja hã omu nê kãm anê kê hkînh kãm mex o mex ã grer o pa. ¹⁴ Rÿ koja ã nê nõ ka mê ja hã omu nê kãm anê kê amnhî wÿr pastô nhÿ hã mê kapêr xwÿnh kwÿjê hã karô. Kê mê hwÿr mra nê Jesus nhÿ hã mêmō twÿm kwÿ ho hkukō nê ho Tirtûm wÿ. ¹⁵ Kê mê ã mê ã xwÿnhjê hwÿr mrar nê mê ho Tirtûm wÿr o pa anê. Koja mê ho kuwÿ nhûm mê kuma nê akupÿm mê ho mex. Nhûm mê tanhmã amnhî tomnuj

to japêr kê mẽ ja hã amnhĩ jarê kê Tĩrtũm mẽ kuma nê ja hã tanhmã mẽ ho hkêt nê. ¹⁶ Jakamã kêr ka mẽ atõ tanhmã amnhĩ tomnuj to nê tee ri ja hã amnhĩ pumu hãmri nê tokyx akwýjê mã amnhĩ jarê kê mẽ tokyx ato Tĩrtũm wý. Kê atã mẽ kuma nê tanhmã akrã hto ka axte ã amnhĩ nhĩpêx anhýr kêt nê. Nê ra amex nê apa.

Nê koja mẽhõ Tĩrtũm kõt pix mã amnhĩ nhĩpêx mex rãhã ho pa. Hãmri nê mẽmoj tã kuwý nhũm kuma nê kãm tanhmã mẽmoj to. ¹⁷ Te finat Eris kot mẽmoj tã hwýr nhũm kot mar nê kãm ho anhýrta pyrãk. Erisja kêp mẽ panhĩõ na pre. Tã na pre hkwyjaja amnhĩ tomnuj pix o pa nhũm tee ri mẽ omu nê mẽ hã na wrýk kêt kaxyw ho Tĩrtũm wýr kãm hihtýx nê. Hãmri nhũm kuma nê kãm ho anê nhũm na wrýk kêt ry rax kumrêx. Hã amgrã axkrunẽpxi nê hkõt mytwrý kêp 6. Mẽ kot amnhĩ tomnuj týx o paja mýrapê. ¹⁸ Tã nhũm Eris axte mẽ ho kuwý nhũm axte mẽ hwýr na rê nhũm akupým katat kõt wrýk mex nê. Nhũm akupým mẽ hpur kãm mẽ õja mẽ kãm mex nê akupým mẽ kãm ô rũnh nê. Tã ã Tĩrtũm kot Eris mar nê kãm mẽmoj nhĩpêx anhýrja pyrã nê koja mẽ pama nê mẽ pamã mẽmoj tanhmã ho.

¹⁹ Nê e mẽ inhma ixkwýjaja. Koja mẽhõ Tĩrtũm kapêr mar týx nê te kêp hkra pyrãk o amnhĩ nhĩpêx. Tã tanhmã hamaxpêr to nê kapêr kaga nê htýx ri amnhĩ tomnuj pix o pa. Ka mẽ ja hã omu nê hwýr mra nê kot amnhĩ tomnuj nê kãm akapêr kãm axihtýx kê tokyx hkaga nê akupým Tĩrtũm kõt amnhĩ xãm týx nê ãm hkõt pix mã amnhĩ nhĩpêx. ²⁰ Koja amnhĩ tã mẽ ama nê Tĩrtũm kõt amnhĩ xãm týx nhũm amnhĩ tã omu nê kot tanhmã amnhĩ tomnuj tota ho hamakêtkati nê amnhĩ katut kõt kurê nhũm nhýrmã kuri hfír tũm nê mex nê pa ho pa. Koja amnhĩ tomnuj týx o pa

htã hkaga hpa nhũm Tĩrtũm ja hã omu nê hã tanhmã ho hkêt nê axte tanhmã kot amnhĩ tomnuj tota mã hamaxpêr kêt nê.

Tã ãm ja pix. Ixpê Xiakre na pa ã mẽ awýr kaga nhĩpêx nê mẽnh anê.

Wam Pêtre Simãw Pêtre kot Jejus kôt hkwyjê hwyr kagà nê mēnh

Simãw Pêtre na pre kagàja nhîpêx. Kêp tep pynênh o pa xwýnh tâ hpânâ kêp Jejus nhÿ hã hkrajê jahkre ho pa xwýnh. Nê krî pê Jerujarê kamã kêp Jejus krajê nhô pastô. Na pre krî piitã hkôt Jejus ã mē kãm mē hkurê xwýnhjaja tanhmã hã mē hipêx to nhÿm Pêtre mē harênh ma nê mē hamaxpêr o hihtÿx kaxyw mē kãm kagàja nhîpêx nê krî piitã hkôt mē hwyr kurê. Mē kot kamã harênh nê mar nê amnhî kamã kahak kêt nê arî Tirtûm kôt amnhî nhîpêx mex o pa kaxyw. Nê Jejus ã mē kot amnhî xà htÿx kamã hamak tâ nhÿrmã kaxkwa kamã mex nê pa ho pa hã mē kãm awjarê. Æ mē kãm mēmoj jarê nê hã kagà anê. Nê mē kãm:

¹ Pa mē ate Jejus kôt amnhî xunhwyr nhÿm Tirtûm kot mē ato hkra xwýnhjaja. Xà mē amex? Ot pa mē awyr kagà nhîpêx nê kumê. Ixpê Simãw Pêtre na pa. Ixte Jejus nhÿ hã hkrajê jahkre ho mē ixpa xwýnhjê hõ na pa mē awyr kagà nê kumê.

Na xep pre Kris ã mē kãm mē pahkurê xwýnhjaja tanhmã mē anhîpêx to ka mē panhõ pika rûm mē umaj anhrã nê ma ahpÿnhã krî hkôt ri apa.

Jao mē akwýjaja ma pika pê Pôt kamã krî hkwyjê hkôt apa.

Nê mē akwýjaja pika pê Karatas wÿr apa.

Nê mē akwýjaja pika pê Kapatos wÿr apa.

Nê mē akwýjaja pika pê As wÿr apa.

Nê mē akwýjaja Pitîn wÿr apa.

Æ ahpÿnhã pika hkôt mē apigrãnh par anê. Tã ot pa mē awyr kagà nhîpêx nê mē apiitã mē awyr

kurê. Mē apÿnh nê mē ate kamã harênh nê ixkapêr mar kaxyw. ² Na pre Mēpahpãm Tirtûmja amnhîm mē pahte amnhî kaxyw kãm pajamaxpêr xwýnhjê ré nê mē pahtã amnhî jarênh o:

—Kot paj jajê ho ixkra. Na pre ra Ixkra Jejus Kris ixpê mē nê ty nê htyk o hkamrô axkapî nhÿm mē harênh ma nê hkôt amnhî xunhwÿ. Tã nhÿm Ixkarô mē hkarô mã agjê nhÿm mē ra inhmã hprãm xà kôt pix mã ri inhmã tanhmã amnhî nhîpêx to ho pa.

Anhÿr o mē pahtã amnhî jarênh. Tã kê mē akutã nojarêr rãhã ho ri mē akôt pa ka mē ÿ hã axãmnhix ajamakêtkati nê akînh nê ri apa.

Mê pahte amnhî kukamã pajamaxpêr pê pahkînh o papa hã mē pamã karô

Rukre 12.32-34; Rômãn 8.18-25; Sikûn Korît 4.16-18

³ Nê na pre mē panhõ Pahihti Jejus Krisja ty nhÿm Hipêêxã Tirtûm akupÿm ho htîr. Tã kot mē pakutã nojarêr rãhã ho pa jakamã na pre mē pahpê hkrajê mã mē pajamaxpêr nyw jagjê pu mē ÿ hã pahte amnhî nhîpêx nyw o amnhî nhîpêx o papa. Hãmri nê Jejus akupÿm htîrja mã pajamaxpêr nê amnhî kukamã pajamaxpêr o:

—Kot paj nhÿrmã ty nhÿm Tirtûm kot Jejus nhîpêx pyrã nê akupÿm ixto ixtîr pa wa kuri ixtîr tûm nê inhmex kumrêx rãhã ixpa ho ixpa. Nã koja ã inhîpêx anê.

Anhÿr o pajamaxpêr jakamã kwa kêr pu mē Tirtûm mã mex o mex ã mãn harênh rãhã ho papa. ⁴ Na ra mē pakutêp ô krî kamã mēmoj piitã ho mex nê. Ô krî kamã mēmoj kot omnu nê hapêx kêt jakamã na pu htem amnhî tâ hamãr rãhã ho papa.

⁵ Nê mē kot Kris ã mē atomnuj mÿrapê na ka mē amnhî xà htÿx kamã ajamak o ri apa nom arî

amnhî kaxyw Tîrtûm mã aja-
maxpêr rãhã ho ri apa. Hihtÿx o
hihtÿx jakamã koja mẽ pahkôt pa
ho pa nê mẽ pamã pajamaxpêr o
hihtÿx rãhã nhũm nhÿrmã Jejus
akupÿm mẽ pahwÿr wrÿ. Hãmri
pu mẽ hkôt ri amnhî nhîpêx mex
rãhã ho ri papa. Ra Tîrtûm kot
mẽ pakukamã mẽ pajarênh xà
hkôt. ⁶ Jar mẽ pahte arî amnhî
xà htÿx kãm pajamak o papa htã
na pu htem Tîrtûm nhÿrmã kot mẽ
pahto mexta kukamã pajamaxpêr
hãmri nê tee ri amnhî kukamã
pajamaxpêr kêt nê. Mẽ pahpê mẽ
pahpunuj tũm nê ri papa ho papa
mã xwÿnh kêt. ⁷ Na hte Tîrtûm
mẽ panhîpêx o te mẽ kot ôr nhîpêx
pyrãk. Na htem hprî hã tanhmã ôr
kute hã omu. Kêp ôr kumrêx ã omu
rÿ mẽmoj mẽ ho pihkâr ã omunh
kaxyw kuwy kamã kurê. Nhũm
piitã ôr nê pigãnh pa japêr nhũm
mê omu nê harênh o:

—Nã ãm hãmri. Kêp ôr kumrêx nê
mẽmoj mẽ ho pihkâr kêt. Anê.

Na hte Tîrtûm ã mẽ panhîpêx
anê. Jakamã mẽ pahpê Jejus kôt
amnhî nhîpêx o mẽ papa xwÿnhjaja
mẽ pahte tãhã tanhmã pahpunuj to
htã no nhũm mẽ panê ja rênh kêt
nê. Na hte amnhî tã mẽ pahpumu
nê hamaxpêr o:

—Kot paj kormã ja hã mẽ hamã
nê tokyx akupÿm mẽ ho mex kêt
nê. Koja mẽ omnuj nê pa htã
tee ri amnhî kukamã hamaxpêr nê
ixkaga hkêt nê arî amnhî kaxyw
ixkôt hamaxpêr rãhã ho pa. Hãmri
nhũm mẽ hkwyjaja ja hã mẽ omu
nê mẽ kêp ixkra hã mẽ omunh
kurê kumrêx. Te mẽ kot hprî hã
ôr pumunh nê kêp ôr kumrêx ã
omunhta pyrãk. Anê.

Jakamã kêr pu mẽ arî amnhî
kaxyw hkôt pajamaxpêr rãhã ho
papa. Mẽmo myrapê mẽ pahpunuj
nê ri papa htã arî hkôt pajamaxpêr
rãhã nhũm Jejus nhÿrmã akupÿm
mẽ pahwÿr wrÿ. Hãmri nhũm
Tîrtûm mẽ pahpumu nê mẽ pamã:

—Nã ãm hãmri na ka prem
amnhî kaxyw ixpîx mã ajamaxpêr
rãhã ho ri apa. Mẽ kot ixtã tanhmã
mẽ atomnuj to nhũm mẽ ate amnhî
xà htÿx kamã ajamak o apa htã aa
ixkaga hkêt nê arî amnhî kaxyw
inhmã ajamaxpêr rãhã ho ri apa.
Nã ãm hãmri mẽ ate amnhî to mex
kumrêx xwÿnh na ka mẽ. Kot paj
mẽ piitã mẽ kãm ja hã mẽ ajarê.

Anhÿr o mẽ pamã kapêr.

Nê ôr o mẽ hikukrêxja mex tã
koja arî mex rãhã hkêt nê. Koja
mêhõ kãm tanhmã homnu hto
hprãm nê homnu hpa. No mẽ
papajaja kot puj mẽ arî amnhî
kaxyw Tîrtûm mã pajamaxpêr rãhã
ho papa hãmri nê ôrta pyrã nê
pajapêx kêt nê. Kurom mẽ pamex
tũm nê aa pajapêx kêt nê papa ho
papa.

⁸⁻⁹ Nê Jejusja aa mẽ ate ano ho
omunh kêt tã na ka htem kãm mẽ
ajapê htÿx nê kot mẽ panê tanhmã
amnhî nhîpêx to hã harênh ma nê
mẽ amã hkînh nê. Nê amnhî kaxyw
hkôt ajamaxpêr mex rãhã ho ri apa.
Jakamã na pre Tîrtûm ja hã mẽ
apumu nê mẽ ato hkra nê mẽ apê
õ krî kamã wa kuri amex nê apa
mã xwÿnh ã mẽ ajarê. Ja kaxyw
na pu prem amnhî kaxyw hkôt pa-
jamaxpêr rãhã jao pahkînh nê ri
papa. Nê tee ri tanhmã amnhî kînh
tÿx ã amnhî jarênh to hukamã pa-
jamaxpêr. Kormã aa ã mẽ pahkînh
anhÿr kêt tã mẽ pahkînh tÿx nê ri
papa.

¹⁰ Nê Tîrtûm kot mẽ pahto mex
pê mẽ panê mẽ pahte amnhî tom-
nuj rênh par nhũm kuri mẽ pahpêr
tũm nê mẽ papa hã mẽ pajarênhja.
Amnepê mã Tîrtûm nhÿ hã kapêr
jarênh o ri mẽ pa xwÿnhjaja na
pre mẽ pakukamã ã mẽ pajarênh
anhÿrja ma nê tee ri hamaxpêr nê
tee ri hã axpên kukjê o ri axpên kôt
pa. Nom hprî hã mar mex kêt nê.
Tã arî ri mẽ pakukamã hkwyjê mã
ja hã mẽ pajarênh o ri pa.

11 Na pre Tirtûm Karôja Kris tyk kukamã mê kãm ã mê pajarênh anhÿr o amnhîrit. Kormã Kris kaxkwa kamã pa ri. Kormã wrÿk nê katorxã nhõxàhkre rûm kator kêt ri nhûm pre hkukamã mê kãm tanhmã ho amnhîrit to. Mê kot hpîr nhûm kot amnhî xà htÿx kãm hamak kãm mê panê htykja ã hkukamã mê kãm harênh o amnhîrit. Nhûm Tirtûm kot akupÿm ho htîr nê kãm mex o mex ã harênhja nhûm hkukamã mê kãm harênh o amnhîrit. No ãm hprî hã mê kãm mēhõ nhîxi hkôt harênh kêt jakamã nhûm prem harênh ma nê tee ri hkukamã ri hamaxpêr nê tee ri hã axpên kukjêr o ri axpên kôt pa. Nê hã axpên kukjêr o:

—Kwa mēhõ koja we ã amnhî nhîpêx anê? Xà koja tokyx ã amnhî nhîpêx anê nã kormã?

Anhÿr o hã axpên kukjêr o ri pa. 12 Hãmri nhûm Tirtûm axte mê kãm Jesus jarênh kwÿ ho amnhîrit nê mê kãm:

—Nà mê anoo mã koja ã amnhî nhîpêx anhÿr hkêt nê. Mê amÿr pê mê akanrêhã mê akra nê mê atãmnhwÿjê noo mã koja kato nê mê hkôt ã amnhî nhîpêx anhÿr o pa. Anê.

Mê papamjaja mê panoo mã kator nê ã kot amnhî nhîpêx anhÿr o paja o ã mê kãm ho amnhîrit anê.

Amnepêm Tirtûm nhÿ hã kapêr o ri mê pa xwÿnhjaja nê jarãhã mê ixte Jesus nhÿ hã mê ahkre ho ri ixpa xwÿnhjaja mê ixkapêr ãm pixii. Na pa htem wamtajê pyrã nê Tirtûm Karô nhÿ hã àhpumunh tÿx xà ho mê amã tanhmã Jesus jarênh to ho ri mê akôt ixpa. Nhûm hte Tirtûm kapêr o mê wrÿk xwÿnhjaja mê ixkapêr ma nê tee ri hamaxpêr o mê pahpyrã nê kãm hprî hã harênh mar par prãm nê.

Mê pahte Tirtûm pyrã nê tãm amnhî nhîpêx ã mê pamã karô

Epes 4.1-3; Korosê 1.10-12; Sikûn Pêtre 3.10-13; Wam Juãw 3.1-6

13 E kwa Kris kôt ixtõ nê ixtõxjaja. Kêr ka mê Jesus kutêp mēmoj punuj kutã amnhî to htÿx rãhã ho ri apa. Nê Tirtûm mã amnhî nhîpêx mex rãhã nê. Pê tãm ajamaxpêr nê tãm amnhî nhîpêx o apa. Nê mê ã ajamaxpêr anhÿr o:

—Nà koja nhÿrmã Jesus akupÿn mê ixwÿr wrÿ hãmri nhûm Tirtûm ixto mex rax nê. Nà koja ã inhîpêx anê. Anê.

14 Nê kêr ka mê Tirtûm kapêr kôt pix mã mãn ri amnhî nhîpêx mex rãhã ho ri apa. Te mēhprîre kot mê hipêêxã kapêr mar nê hkôt amnhî nhîpêx pyrãk. Kormã mê ate Kris kôt amnhî xunhwÿr kêt ri na ka prem ate amnhî nhîpêx tùm kôt ri tanhmã amnhî tomnuj to ho ri apa. 15 Tã kêr ka mê hpãnhã amnhî to mex o mãn ajamaxpêr o apa nê Tirtûm pyrã nê amnhî tomnuj o apa hkêt nê. Tirtûmja kot amnhî to mex pix o pa xwÿnh na. 16 Kapêr ã kagã htûm kot ja jarênh kot:

Kêr ka mê ixpyrã nê amnhî to mex pix o ri apa. Anê.

17 Tã koja nhÿrmã kêp Mēpahpãm maati hã hprî hã mê pahte amnhî nhîpêx ã mê pahpumunh hkôt tanhmã mê pajarênh to. Tãm mê pahte amnhî nhîpêx kôt mê pajarê rÿ mê pahte amnhî tomnuj kôt mê pajarê. Hãmri nê ahpÿnhã mê panhîpêx. Mê pahto mex nê rÿ mê pahtomnuj nê. Jakamã kwa pu mê nhÿrmã kot tanhmã mê pahtomnuj to pymaj hkôt pix mã amnhî nhîpêx o ri papa rãhã nê.

18 Nê kormã mê pahte Jesus kôt amnhî xunhwÿr kêt ri na pu prem mê panhîgêt pyrã nê pahtÿx ri amnhî tomnuj o ri papa. Tã nhûm Krisja te amnhîm mê pajaprôr pyrãk o mê panhîpêx. Mê pahte hpãnhã kapêr kôt pix mã amnhî nhîpêx o papa kaxyw. No mēmoj to na pre mê pahpãnhã amnhîre? Nà ra mê pahte ja jarênh mar tÿx. Nà pre kãxpore ho mê pahpãnhã

amnhîrer kêt nê. Rÿ ôr o mē hikukrêx â ohtô ho mē pahpânhâ amnhîrer kêt nê. Rÿ prat o mē hikukrêx â ohtô ho mē pahpânhâ amnhîrer kêt nê. Jajaja hapêx tokyx anhÿr mǎ xwÿnh na. ¹⁹ Na pre â mē hpânhâ amnhîrer anê nê tām mē panê ty nê htyk o amnhî nhî ho mē pahpânhâ amnhîrer pa. Nhûm hkamrô axkapî. Te amnepê mǎ mē panhîgêt kot amnhî pânhâ Tîrtûm mǎ ôwêhti hkrare hpar nhûm hkamrô pikapîrta pyrâk. ôwêhti krare mexre pix na prem kām kupa. Mex nê tanhmâ kute hkêt xwÿnh pix. Tâ Krisja aa tanhmâ amnhî tomnuj to hkêt kumrêx nê mē panê ty nê htyk o Tîrtûm mǎ mē pahte amnhî tomnuj piitâ hpânhâ amnhîrer pa. ²⁰ Amnepê mǎ kormâ mēmoj kêt ri na pre Tîrtûm kot â mē pahpânhâ amnhîrer anhÿr kaxyw mē pakukamâ kuta nê âm. Tâ nhûm amgrà ohtô nê hapêx nhûm mē pahwÿr kumê nhûm man mē pahwÿr wrÿ. Kot â mē pahpânhâ amnhî nhîpêx anhÿr kaxyw. ²¹ Tâ nhûm prem kupî nhûm Tîrtûm akupÿm ho hÿr nê mex o mex â harê. Mē pahte ja hǎ harênh mar kôt amnhî kaxyw Tîrtûm pix mǎ pajamexpêr o ri papa kaxyw. Nê mē pahte amnhî wÿr Jejus jamâr rǎhâ ho ri papa kaxyw.

²² Tâ pu prem ra kot â mē panê amnhî nhîpêx anhÿr â harênh ma nê mē pahte amnhî tomnuj kaga nê hkôt amnhî xunhwÿ. Jao amnhî to mex pix o ri papa. Nê mē pamâ Kris kôt mē pahkwÿjê hkînh o papa. Tâ kwa kêr pu mē arî pamâ axpên kînh tÿx rǎhâ ho papa.

Te mē pakatorxà rûm mē pajapôx pyrâk o axte mē pajapôx â mē pajarênh

Juǎw 3.1-21

²³ Nê na pu prem mē pakatorxà nhôxâhkre rûm mē pajapôx pyrâ nê axte mē pajapôx pyrâk o amnhî nhîpêx. Jao ra mē pahpê Tîrtûm

kra nê ri papa. Na hte mē pakatorxà nê mē panhîpêxâja wa ri pa nê gaa nê mē pahpê ty. No kêt Mēpanhîpêxâ maati Tîrtûmja wa kurom rǎhâ ho rǎhâ. Tâ ra mē pahte amnhî kaxyw kapêr kôt pajamexpêr o pahpê hkra jakamâ kot puj mē urâk nê nhÿrmâ pahÿr tûm nê papa rǎhâ ho papa.

Nê Tîrtûm kapêrja Tîrtûm pyrâ nê rǎhââ. Koja aa hapêx kêt nê. ²⁴ Kapêr â kaga htûm kot ja jarênh kot:

Pika piitâ hkôt mē pa xwÿnhjaja te mē kot pôti grà pyrâk.

Nê mē kot amnhî to mex xâja te kot kapôt â pixôrâ pyrâk.

Na hte pôti tokyx grà nê hapêx.

Nê pixôrâja haxwÿja arîgro htÿx mē nhûm grà tokyx anê nê rarak pa nê hapêx.

²⁵ No Tîrtûm kapêr koja pôti mē pixôrâta wa kurom aa hapêx kêt nê. Koja arî rǎhâ ho rǎhâ. Anê.

Tâ kapêrja tām na htem mē pamâ kamâ harê pu mē pahpiitâ mar o papa.

2

Mē pahte Tîrtûm kot amnhî nhîpêx kôt amnhî nhîpêx â mē pamâ karô

Rômân 12.2; Wam Korît 3.16-17; Epes 2.19-22

¹ Nê kwa kêr pu mē axte tanhmâ amnhî tomnuj to ho ri papa hkêt nê.

Rÿ tanhmâ axpên mǎ paxêx to hkêt nê.

Nê paxêx rom tanhmâ ri axpên nokupyr to hkêt nê.

Nê mēmoj tâ axpên kām pagryk kêt nê.

Nê tanhmâ axpên japrÿ hto hkêt nê.

Kêr pu mē â amnhî nhîpêx anhÿr o papa hkêt kumrêx.

² Mē hkaràre na htem âm kām pijaôr pix prâm. Nê gaa nê htÿxre nê ra hprêk o mô. Tâ kêr ka mē pijaôr pix prâm xwÿnhjê pyrâ nê

amã Tirtûm kapêr mar nê hkôt pix mã amnhî nhîpêx o apa hprãm. Jao mar tÿx pê ra hkôt amnhî nhîpêx mex o mô nê gaa nê hkôt amnhî nhîpêx mex o apa. Te mê karàre pijaôr nê gaa nê ra hprêk o môrta pyrãk. ³ Ra mê ate Jejus kot mê pahto mex ã omunh mex kênã.

⁴ Nê na htem kên o ixkre nhîpêx kaxyw hãmri nê hkwy kawrà nê ri hkapi. Nhùm hô mex kêt nhùm mê teÿ ri omu nê nhãm kumê. Tã ja pyrã nê na pre mê pahkwÿjaja tee ri Kris pumu nê htÿx mex kêt ã hkamnhîx nê te mê kot kên mênhta pyrãk o hipêx nê hkaga. No nhùm Tirtûmjaja amnhîm Kris mex o mex ã harê. Te ho mênhô kot kên mex kêt ã hkamnhîx nê mênh nhùm mênhô kot mex ã omunh nê amnhîm mÿnhta pyrãk. Nom Krisja kên rom kêp htÿr tûm nê pa xwÿnh jakamã nhùm pre Tirtûm mê pakaxyw ãm pu prem hkôt amnhî xunhwÿ.

⁵ Nê Tirtûm na hte nhÿrmã mê pahtÿr tûm nê wa kuri mê papa mã xwÿnh ã mê pajarê. Te mê pahpê kên nhùm Tirtûm te kot amnhî Karô mã mê pahto ixkre nhîpêx pyrãk. Jakamã na hte Jejus Kris tanhmã mê pahkrã hto pu mê Tirtûm kôt amnhî nhîpêx mex rãhã ho ri papa. Nê tanhmã kãm amnhî nhîpêx mex to nhùm ja hã mê pahpumu nê hkÿnh nê.

⁶ Tirtûm kapêr ã kagã htûm kot tanhmã Kris jarênh to. Nê hã kuxi nê tanhmã harênh to. Te kêp kên pyrãk ã harê nê harênh kot:

Kot paj nhÿrmã Ijaew wÿr mênhô mê nhùm mê hkôt pa ho pa.

Koja te kêp kên o inhörkwÿ nhîpêx kaxyw kên maati mex kumrêxta pyrãk.

Koja amnhî kaxyw hkôt mê hamaxpêr xwÿnhjaja nhÿrmã ma inhô krÿ hwÿr apÿ nê hkÿnh nê mex rãhã nê pa ho pa. Anê.

⁷ Tã ra amnhî kaxyw hkôt mê pajamaxpêr xwÿnhjaja. Kên pyrãk

xwÿnh pê Jejusja na mê pamã mex o mex. No mê kot hkaga xwÿnhjaja na htem hamaxpêr punuj xwÿnh ã hkamnhîx nê hkaga nê kãm hkÿnh kêt nê. Tirtûm kapêr ã kagã htûm kot mê harênh kot:

Na prem kên o amnhîm örkwÿ nhîpêx kaxyw hkawrà ho pa nê kên maati ja pumu nê htÿx omnuj ã hkamnhîx nê hkaga.

Mê kot hkaga htã nhùm Tirtûm mê kurom mex o kot kên piitã hakrenh par ã omunh kurê kumrêx. Anê.

⁸ Nê mãânên harênh kot:

Koja mê kapêr mar kêt kumrêx.

Te pry kamã kên nör nhùm mê kot nhãm pry nê mênh kaxyw hkamnãr o amnhî par krã hi kukênh pyrãk o koja mê amnhî nhîpêx. Anê.

Mê kot Kris kapêr mar tã hkôt amnhî xunhwÿr kêt jakamã te ho mê kot amnhî nê kên kamnãr o amnhî par krã hi kukênh pyrãk o koja mê amnhî nhîpêx. Jakamã koja nhÿrmã Tirtûmjaja ja hã tanhmã mê ho htÿx kumrêx. Ra kot amnhî kukamã mê kãm amnhî jarênh xã hkôt. ⁹ No mê papajaja na pre Tirtûm jajê rom amnhî kôt mê pax-unhwÿ. Nhÿrmã ô krÿ kamã mê papa ho papa kaxyw. Nê mê pahte mex o mex ã harênh kaxyw. Na pu htem Ijaew nhô patre pyrã nê Pahi Maati Tirtûm mã tanhmã amnhî nhîpêx to ho papa. Nom korrmã mê pahte Kris kôt amnhî xunhwÿr kêt ri te mê pahpê kamãt kô kamã mê pahtÿx ri mê papa xwÿnh pyrãk. Tã Jejus kôt amnhî xunhwÿ nê hpãnhã te mê pahpê hirã mex kãm ri mê papa xwÿnh pyrã nê tãm amnhî nhîpêx rãhã ho papa. Ra mê pahpê Tirtûm kra jakamã na pu htem amnhî to mex rãhã ho ri papa. Nê Mëpahpãm maati Tirtûm mã tanhmã amnhî nhîpêx to ho ri papa. Te mê kot mê ho àhwÿr xwÿnhjaja kot kãm amnhî nhîpêx o

pata pyrâk. Ā na pre Tirtûm mē pahte amnhî nhîpêx anhÿr o papa kaxyw mē panhîpêx.

¹⁰ Annepêm kormã mē pahpê hkra hkêt ri na pre mēhō mē pakamã ukaprî hkêt kumrêx pu htem pahpunuj nē ri papa. Tã Jejus kôt amnhî xunhwÿ nhûm Tirtûm mē pahto hkra pu mē pahpê hkra hã ri papa nhûm mē pakamã ukaprî rãhã ho mē pahkôt pa.

Mē pahpê Tirtûm mã tanhmã amnhî nhîpêx to xwÿnh ã mē pajarênh

Rômãn 13.1-7; Xitre 3.1

¹¹ E ixkrãmnhwÿjaja. Ra mē pahpê Tirtûm kra jakamã mē pahpê ô krî nhō xwÿnh. Te mē pahpê jar pika nhō xwÿnh kêt pyrâk jakamã kwa kër pu mē arî mē pahte amnhî nhîpêx tûm o amnhî nhîpêx kêt nē. Nē mē pajamaxpêr tûm o pajamaxpêr kêt nē. Ra axtem mē pajamaxpêr nyw nē axtem mē pahte amnhî nhîpêx nyw kênã. Mē pahte amnhî nhîpêx tûmja te kãm akupÿm mē pahte hkôt amnhî to paxujanâr prãm pyrâk. Mē pahte axte hkôt amnhî nhîpêx o ri papa kaxyw. Tã nom kër pu mē anhÿr kêt nē. ¹² E kwa kër ka mē anhō krî kamã akwÿ kot Kris kôt amnhî xunhwÿr kêt xwÿnhjê noo mã tãm ri amnhî nhîpêx o ri apa. Mē kot Kris ã tanhmã mē anhîpêx to rÿ tanhmã hã mē ato kapêr punuj to htãã. Kot kaj mē ã mē hkôt amnhî nhîpêx anhÿr o ri apa hãmri nhûm mē tee ri mē apumu nē hamaxpêr o:

—Kwa mē ixte mē kot amnhî tomnuj xwÿnh ã mē harênh tã mē kot amnhî to mex pix xwÿnh na mē. Anê.

Hãmri nē nhÿrmã mē pahpyrà nē Tirtûm kôt amnhî xunhwÿ nē kãm mex o mex ã harê nē kãm:

—Kwa Tirtûm. Na pre hte akra-jaja anhÿ hã amnhî to mex rãhã nē pa ho pa pa ja hã mē omu. Nã xep amex o amex Tirtûm. Anê.

¹³ Nē mē apê Pahihti Jejus Kris kôt amnhî nhîpêx xwÿnh jakamã kër ka mē anhō krî kamã mē anhō pahihti kapêr ma nē kapêr kôt mân amnhî nhîpêx mex o ri apa. Nē mē anhō pika kamã mē anhō prêjitênja ka mē kapêr ma nē hkôt amnhî nhîpêx. Mē kot mē ato amnhîptâr xwÿnhjaja ka mē piitã mē kapêr ma nē mē kapêr kôt pix mã amnhî nhîpêx rãhã ho ri apa. ¹⁴ Nē mē anhō pahi nhÿ hã mē kapêr o mē pa xwÿnhjaja na htem mē akaxyw mē unhwÿ. Mē kot amnhî tomnuj xwÿnhjaja nhûm tanhmã mē kot mē ho kaxyw. Nē tãm mē kot amnhî nhîpêx o ri mē pa xwÿnhjaja nhûm mē kot mē ô pahi mã mex ã mē harênh kaxyw. ¹⁵ Tã kër ka mē kapêr ma nē mē hkôt tãm amnhî nhîpêx rãhã ho ri apa. Hãmri nhûm mē ato kapêr punuj xwÿnhjaja ja hã mē apumu nē axte tanhmã mē ato kapêr to hkêt nē. Ā mē ate amnhî nhîpêx anhÿr o apaja na Tirtûm kãm hprãm.

¹⁶ Nē mē pahpê Tirtûm kra jakamã na pu htem paxãmnhîx kãm tanhmã amnhî nhîpêx to ho ri papa. Nom kër pu mē pahpê hkra hã pahtÿx ri amnhî nhîpêx kêt nē.

¹⁷ Nē kër ka mē piitã mē ho mex o ri apa.

Nē mē ato amnhîptâr xwÿnhjê ho mex nē mē hã apijaãm rãhã ho ri apa.

Nē mē apê Kris kôt mē ate axpên to mē atō nē mē atōxjê hã amã axpên kînh pê axpên to mex nē. Nē Tirtûm ã apijaãm rãhã nē.

Mē kãm mē apênh xwÿnhjaja kot tanhmã amnhî nhîpêx to hã mē kãm karō

Epes 6.5-8; Korosê 3.22-25; Wam Ximotre 6.1-2; Xitre 2.9-10

¹⁸ Nē mē apê mē kãm mē axapênh xwÿnhjaja kër ka mē anhō patrãw kapêr ma nē hkôt ri amnhî nhîpêx. Kot mē ato mex o pa rÿ mē atomnuj o pa htã ka mē arî mē hã apijaãm pē

hkôt ri amnhî nhîpêx. ¹⁹ Tanhmã kot mē anhîpêx punuj to htã ka mē arî kãm axâpênh mex rãhã nê. Kêr kê Tirtûm ja hã mē apumu nê mē ato mex nê ka mē ajamakêtkati nê axãmnhîx ri kãm axâpênh o apa. ²⁰ Nom kot kaj tanhmã amnhî tomnuj to nhûm anhõ patrãw ja hã apumu nê hã atak ka amnhî xà htýx kamã ama nê ri amnhî pumu. No kot kaj akatãt kôt kãm axâpênh mex tã nhûm amarî atak japêr tã kêr ka amnhî tã kamã agryk kêt nê. Arî kãm amnhî to htýx kamã kãm xa nê amnhî tã tanhmã ho hkêt nê. Hãmri nhûm Tirtûm ja hã apumu nê ato mex nê. ²¹ Amnepê m na pre mē pahte hkôt amnhî xunhwýr xwýnhjaja Kris pyrã nê mē paxã htýx kamã pajamak o papa hkukamã ja hã mē pahpumunh mex. Na pre Kris mē pakaxyw amnhî xà htýx kãm hamak týx tã amnhî to htýx nê mē kãm xa. Tã kêr pu amnhî xà htýx kamã pajamak tã ý hã urãk nê amnhî to htýx nê papa. ²² Krisja aa tanhmã amnhî tomnuj to hkêt nê pa ho pa. Nê aa mēmoj tã amnhî to hêx o pa hkêt. ²³ Mē kot kãm kapêr punuj tã nhûm amnhî tã tanhmã mē kãm nê hkêt nê. Nê mē kãm kapêr punuj kêt nê. Nhûm prem homnuj týx kumrêx nhûm amnhî xà htýx kamã hamak tã amnhî tã mē kãm ãkjêr nê tanhmã mē haprý hto hkêt nê. Na pre ãm hamaxpêr o: “Nã Tirtûm kot ixtã mē omunh mex kênã. Koja nhýrmã mē piitã tanhmã mē kot amnhî nhîpêx to hã mē omunh xà hkôt tanhmã mē hipêx to. Tãm koja ãhpumunh týx xà hkôt tanhmã ixtã mē harênh to. Mē kurom ãhpumunh týx o ãhpumunh týx xwýnh kênã.” Anê.

²⁴ Kris na pre te kawã kamã mē pahte amnhî tomnuj piitã gjênh nê ho nýt nê htur rãhã pî kahpa hã mē panê htyk pyrãk o amnhî nhîpêx. Mē pahte axte tanhmã amnhî tomnuj to hkêt prãm xaj. Pãnhã mē

pahte amnhî to mex pix o ri papa kaxyw. Tã ã kot amnhî xà htýx kãm hamak anhýr o jêt jakamã kot puj mē pahte hkôt amnhî xunhwýr xwýnhjaja aa mē pahte amnhî tomnuj pãnhã amnhîrer kêt nê. Ra Jejus htyk o kot mē panê amnhîrer par kênã.

²⁵ Na pu pre te mē pahpê ôwêhti pikunor pyrã nê pahtýx ri papa. Tanhmã amnhî tomnuj to rãhã ho ri papa. Tã nhûm Kris te kot ôwêhti jamãr xwýnh kot ôwêhti pikunor mã katorta pyrãk o mē panhîpêx. Pu mē hkôt amnhî xunhwý nê hkôt amnhî nhîpêx mex o ri papa. Jao hkôt papa ho papa.

3

Mē mjên mē mē hprõ kot tanhmã axpên nhîpêx to hã mē kãm karõ

Wam Korît 7; Epes 5.22-25; Korosê 3.18-19; Wam Ximotre 2.9-15

¹ Nê kêr ka mē anijaja mē amjên kapêr ma nê hkôt amnhî nhîpêx. Akînhã kormã kot Tirtûm kôt amnhî nhîpêx kêt japêr tã arî kapêr ma nê hkôt amnhî nhîpêx mex o ri apa. Kê mē ate amnhî nhîpêx ã mē apumu nê mē apyrã nê Kris kôt amnhî xunhwýr japêr. Mē kãm Tirtûm kapêr mar prãm kêt tã koja mē ã mē ate amnhî nhîpêx anhýr ã mē apumunh kôt mē apyrã nê amnhî kaxyw hkôt hamaxpêr japêr. ² Na htem mē ate Tirtûm kapêr kôt tãm ri amnhî nhîpêx o apa hã mē apumunh o ri mē akôt pã.

³ Jakamã kêr ka mē anijaja amnhî mex pix kukamã ajamaxpêr o ri apa hkêt nê. Rý ajamaxpêr o:

—Ma kot paj mē hkuxwaxã ho amnhî krã hkî kuxwa mex nê inhökrexê mex jagjê nê ri hã mra. Nê kupêxê mex kwý japrõ nê ho amnhîm ixê mex nhîpêx hãmri nê hagjê nê ri hã mra. Kot paj ã amnhî nhîpêx anê nhûm mē piitã ja hã ixpumu nê kãm ixkînh nê inhmex

ã ijarê. Ma kot paj ã amnhĩ nhĩpêx anê.

Anhÿr o ri amnhĩ kukamã ajamaxpêr kêt nê. ⁴ Tĩrtũm na hte ã mẽ pahte amnhĩ nhĩpêx anhÿr ã mẽ pahpumu nê ãm hã mẽ pahpumu. Mẽ ôkrexê nê mẽ ê mex na hte hapêx tokyx anê. No mẽ panhõpinhxã kaxwÿnh kãm tãm ri mẽ pajamaxpêr nê pakamã amnhĩkrit nê papaja. Kot kaj mẽ ã amnhĩ nhĩpêx anhÿr o ri apa hãmri nhũm Tĩrtũm ja hã mẽ apumu nhũm ja kãm mex nê. ⁵ Amnepê mã mẽ pakukamã mẽ panhõ wówô nê mẽ panãjaja. Mẽ hkwy kot Tĩrtũm kôt amnhĩ nhĩpêx xwÿnhjaja na prem ã amnhĩ nhĩpêx anhÿr o pa. Mẽ kot mjên kôt amnhĩ nhĩpêx o pa jakamã na prem amnhĩ tã mẽ omu nê mẽ ho mex nê kãm mẽ hapê nê. ⁶ Mẽ panhõ wówô finat Saraja na pre ã amnhĩ nhĩpêx anhÿr o pa. Jao mjên Apraãw kapêr ma nê hkôt amnhĩ nhĩpêx. Nê kêp õ pahi hã harê nê hkôt pix mã amnhĩ nhĩpêx o ri pa. Tã kot kaj mẽ urãk nê amnhĩ to htÿx nê ã amnhĩ nhĩpêx anhÿr o apa. Hãmri nê amnhĩ tã amã amjên puma hkêt nê apa nê te apê Sara hkra pyrãk.

⁷ Nê mẽ amyjaja kêr ka mẽ tãm mẽ aprõ nhĩpêx o ri mẽ hkôt apa. Mẽ akĩnhã mẽ hihtÿx kêt jakamã mẽ kamã axukapřĩ rãhã ho ri mẽ hkôt apa. War ajamê war apê Jejus kukwak ri war atĩr tũm nê apa mã xwÿnh jakamã kêr ka mẽ ho mex rãhã ho ri mẽ hkôt apa. Tĩrtũm kãm war ajamê war ajapê jakamã kot kaj mẽ ã mẽ hipêx anhÿr o ri apa hãmri nê ra axãmnhĩx mẽmoj tã amnhĩ to Tĩrtũm wÿ nhũm mẽ amar kurê kumrêx.

Tĩrtũm krajaja kot amnhĩ xã htÿx kamã hamak ã mẽ harênh

Rômãn 12.9-21; Korosê 1.10; Wam Tesarôn 5.14-15

⁸ E Kris kôt ixkrãmnhwÿjaja. Nã ixkapêr jatur xã na ja. Kêr ka mẽ ri axpên kôt ajamaxpêr mex pê axpên

to mex rãhã ho ri apa. Nê mẽ ate Kris kôt axpên to atõ nê atõx ã amã axpên kĩnh o ri apa. Jao axpên kamã axukapřĩ nê mẽmoj to axpên kutã anojarêr rãhã nê. ⁹ Na pu prem Jejus kôt amnhĩ xunhwÿ nhũm Tĩrtũm mẽ pahto hkra nê mẽ pahto mex ã amnhĩ jarê. Tã koja mẽhõ tanhmã mẽ anhĩpêx to rÿ tanhmã mẽ ato kapêr punuj to. Nom kêr ka mẽ ama nê amnhĩ tã tanhmã ho rÿ tanhmã ho akapêr punuj to hkêt nê. ãm te Tĩrtũm kot mẽ panhĩpêx pyrãk o mẽ hipêx nê mẽ ho mex pix o ri mẽ hkôt apa. Ja na Tĩrtũm kãm hprãm. ¹⁰ Kapêr ã kagã htũm kot ja jarênh kot:

Kot kaj mẽ amã amex nê akĩnh nê
ri apa hprãm hã kot kaj mẽ ã
amnhĩ nhĩpêx anê:

Kot kaj mẽ ri akapêr punuj o ri apa
hkêt nê.

Nê mẽmoj tã amnhĩ to axêx o ri apa
hkêt nê.

¹¹ Nê te mẽ ate amnhĩ katut kôt
ate amnhĩ tomnuj rênh o apa
pyrã nê hpãnhã amnhĩ to
mex pix o ri apa.

Nê mẽ amã tãm axpên nhĩpêx pix
prãm o ri axpên kôt apa.

Nê mẽ amã ajamakêtkati nê axpên
kôt apa hprãm rãhã ho ri
apa.

¹² Na hte Tĩrtũmja ã mẽ kot amnhĩ
nhĩpêx anhÿr o pa xwÿnhjê
jamãr mex rãhã ho pa.

Nhũm mẽ tanhmã amnhĩ to hwÿr
to nhũm mẽ mar kurê
kumrêx.

No mẽ kot amnhĩ tomnuj o mẽ
pa xwÿnhjaja na hte mẽ kutã
amnhĩ xãm nê ãm mẽ omu
nê mẽ ho mex kêt nê. Anê.

Tĩrtũm kapêr ã kagã htũm kot ã mẽ
harênh kot anhÿr.

¹³ Nê kot kaj mẽ amã amnhĩ to
mex pix o apa hprãm nhũm mẽhõ ja
hã tanhmã mẽ atomnuj to hkêt nê.

¹⁴ No kot kaj mẽ amnhĩ to mex pix
o apa htã nhũm mẽhõ ja hã apumu
nê tanhmã hamaxpêr to mẽ atom-
nuj ka amnhĩ xã htÿx kamã ajamak

japêr. Tã koja Tirtũm nhÿrmã ja hã tanhmã mẽ ato mex to. Jakamã kwa kêr ka mẽ tee ri mēhõ kot tanhmã mẽ atomnuj to hkukamã ajamexpêr pê amã mẽ uma ho ri apa hkêt nê. Nê tee ri amnhĩ kukamã ajamexpêr o akaprĩ nê ri apa hkêt nê. ¹⁵ ãm amnhĩ kaxyw Kris mã mãn ajamexpêr tÿx rãhã nê mẽ panhõ Pahihti hã apijaãm rãhã ho ri apa. Nhũm mēhõ ja hã mẽ apumu nê tanhmã hã mẽ akukjêr to nê mẽ amã:

—Kwa mēmo kaxyw na ka pre Kris kôt amnhĩ xãm nê hkôt ri amnhĩ nhĩpêx o apa? Anê.

Ka mẽ ama hãmri nê aprĩ hã kãm amnhĩ jarênh kurê kumrêx. ¹⁶ Nom kêr ka mẽ akapêr mã aprĩ kamã kãm amnhĩ jarê. Tirtũm kapêr kôt amnhĩ nhĩpêx o apa hã mẽ kãm amnhĩ jarê. Koja mẽ Kris ã mẽ ato kapêr punuj rÿ hã mẽ atã hpêr o axkê nê pikunhar japêr ka mẽ ãm amnhĩ tã mẽ ama nê ãm mẽ ama. Kwãr mẽ mãmrĩ ã mẽ anhĩpêx anê. Kêr ka mẽ amnhĩ tã mẽ omu nê arĩ amnhĩ to mex rãhã ho ri apa. Kêr kê mẽ tee ri amnhĩ tã mẽ apumu nê hpijaãm nê.

¹⁷ Nê koja mẽ akwÿjaja mẽ ate Tirtũm kapêr kôt amnhĩ nhĩpêx mex o apa hã mẽ apumu nê hã tanhmã mẽ anhĩpêx to htã kêr ka mẽ arĩ Tirtũm kôt amnhĩ nhĩpêx o ri apa. Ja na kãm hprãm. Nom kot kaj mẽ tanhmã amnhĩ tomnuj to nhũm mẽ ja hã mẽ apumu nê pahihti mã mẽ ajarê nhũm kuma nê ja hã tanhmã mẽ amã ãkjêr to ka mẽ ra apijaãm nê.

¹⁸ Nê Krisja na pre mẽ panê ty. ãm htyk tipxi tã mẽ pahpiitã mẽ pahpãnhã amnhĩre. Mẽ pakurom aa kot tanhmã amnhĩ tomnuj to hkêt tã mẽ pahte amnhĩ tomnuj pitã hpãnhã amnhĩrer pa. Mẽ pahte hkôt amnhĩ xunhwÿr nê nhÿrmã ma Tirtũm nhõ krĩ hwÿr paxãpir nê kamã pahĩr tũm nê papa ho papa kaxyw. Mẽ kot hpĩr tã nhũm

Tirtũm akupÿm ho htĩr nhũm htĩr o htĩr. ¹⁹⁻²⁰ Nom kormã akupÿm htĩr kêt ri na pre hkarõ pix o mẽ htyk xwÿnhjê hwÿr mō. Ahpunu kamã mẽ hkarõ kêp prês nê hkrĩ xwÿnhjê hwÿr mō nê mẽ kot Noehti kapêr mar nê hkôt amnhĩ nhĩpêx kêt nhũm gō htãm kot mẽ hanhir par xwÿnhjê mã kapêr. Tirtũm kot nhÿrmã mẽ kot amnhĩ tomnuj mÿrapê kuwy maati wÿr mẽ rēnh ã mẽ hkukamã mẽ kãm awjarê. Amnepêm kormã Noehti kot pãr raxta nhĩpêx o kuhê ri na prem kãm Tirtũm kapêr mar prãm kêt nê. Nhũm amnhĩ tã mẽ omu nê mẽ kamã gryk tokyx anhÿr kêt nê. Arĩ amnhĩ tã mẽ hamãr o pa. Mẽ kot hkôt amnhĩ xunhwÿr nê hkôt amnhĩ nhĩpêx prãm xãj arĩ mẽ hamãr ry ho pa. No ãm tee ri mẽ hamãr kaprÿ nhũm mẽ amnhĩ kaxyw hkôt hamaxpêr kêt nê htÿx ri amnhĩ tomnuj o pa. Mẽ ãm grêre nê Noehti kapêr ma nê gō htãm pymaj hkôt pãr raxta wÿr agjê. ãm mẽ kêp 8 pix nê hwÿr agjê nhũm gō htãm mẽ hanhir kêt nê. Tirtũm na pre mẽ nê omunh mex nê. No mẽ kot amnhĩ tomnuj xwÿnhjaja nhũm gō htãmja mẽ hanhir o mẽ himex pa. Nhũm mẽ kêp 8ja pix arĩ htĩr nê mex nê pãr raxta kamã gō krãhkã hã mex rãhã pa.

²¹ Gō tãmja kêp hprĩ hã mẽ pahte Jejus kôt amnhĩ xunhwÿr ã mẽ pahto amnhĩrĩt xã na. Mẽ pahte amnhĩ nhĩpêx tũm kaga nê hpãnhã amnhĩ nhĩpêx nyw o amnhĩ nhĩpêx o papa hã mẽ pahto amnhĩrĩt xã. Jakamã na htem mẽ pahkrã kumrã. Nom mẽ kot mẽ panê mẽ pagrã kugrãnh kaxyw kêt ra mẽ pahte Jejus kôt amnhĩ xunhwÿr ã amnhĩ to amnhĩrĩt kaxyw na htem mẽ pahkrã kumrã. Ra mẽ pahte Tirtũm kapêr kôt amnhĩ nhĩpêx o papa hã amnhĩ to amnhĩrĩt kaxyw. Pu mẽ ra mẽ pahte amnhĩ nhĩpêx nyw o amnhĩ nhĩpêx ã amnhĩ to

amnhîrît. Te mê pahte gôx kām mê pahte amnhî tomnuj rer par pyrà nê hpânâ amnhî nhîpêx nyw o amnhî nhîpêx o papa.

²² Nê na pre Jejus akupÿm htîr nê ma akupÿm Tîrtûm nhô krî hwÿr api nê Tîrtûm nhîhkô hâ pahihti hâ mê hkrî xà kamâ hkrî ho hkrî. Hâmri nê ra Tîrtûm kapêr o mê wrÿk xwÿnh nê pahi piitâ mê ho amnhîptâr o hkrî.

4

Mê pahte amnhî nhîpêx nyw o amnhî nhîpêx â mê pamâ karô

Epes 4.17-24; Korosê 3.1-11

¹ Nê na prem Kris pînhûm amnhî xà htÿx kām hamak kām htyk kaxyw tâ arî mê kām xa. Ra kot amnhî xà hkukamâ amnhî tâ mê omunh tâ tee ri amnhî kukamâ hamaxpêr o amnhî tâ tanhmâ ri mê kot hpîr mǎ xwÿnhjê homnuj to hkêt nê. Arî mê kām xa nhûm prem kupî. Tâ kêr pu mê urâk nê â amnhî nhîpêx anhÿr o ri papa. Mê kot hâ tanhmâ mê panhîpêx to htâ pu mê urâk nê amnhî xà htÿx kām pajamak tâ tanhmâ amnhî tâ mê ho hkêt nê. Na hte ra mê htyk nê mê hikwÿ xwÿnhjaja axte amnhî tomnuj kêt nê. Tâ kêr pu mê urâk nê axte tanhmâ amnhî tomnuj to ho ri papa hkêt nê. ² Jakamâ kêr pu mê axte mê pahte amnhî nhîpêx tûm kôt amnhî nhîpêx o papa hkêt nê. Nê mê pajamxpêr tûm kôt axte pajamxpêr o papa hkêt nê. Âm Tîrtûm kām hprâm xà hkôt pix mǎ tanhmâ amnhî nhîpêx to ho papa rāhâ ty.

³ Amnepêm kormâ mê pahte Jejus kôt amnhî xunhwÿr kêt ri na pu prem mê kêp Tîrtûm kra hkêt xwÿnhjê hkôt amnhî nhîpêx.

Jaο nhām mēnijê pumu nê mê kamâ pahpijaam kêt hprâm.

Nê pahpipānh o ri papa.

Nê mê pahpipānh kaxyw axpēn wÿr akuprô nê mēnijê kamâ pahpijaam kêt.

Nê sānti hwÿr pahkônkrā ho pahkrî nê kām amnhî jagrer.

⁴ Tâ Kris kôt amnhî xunhwÿ hāmri nê mê pahte amnhî nhîpêx nyw o amnhî nhîpêx o papa. Hāmri nhûm arî mê kot amnhî nhîpêx tûm o amnhî nhîpêx xwÿnhjaja tee ri ja hâ mê pahpumu nê hêx rom amnhî kôt mê pamâ tanhmâ ri àhkrox to ho pa. Pu mê axte mê hkôt amnhî nhîpêx kêt nhûm mê tee ri ja hâ mê pahpumu nê mê pakamâ gryk kato nê tanhmâ mê pahto kapêr punuj to. ⁵ Tâ koja Tîrtûm nhÿrmâ amnhî wÿr mê hâ karô nhûm mê ma hwÿr mra nê kutâ hkrî. Nê kormâ mê htîr ri tanhmâ mê kot amnhî nhîpêx to ho pa hâ kām amnhî jarēnh pa. Hāmri nhûm mê kot amnhî nhîpêx â tanhmâ mê hipêx to. Kojā mê pahpiitâ tanhmâ mê pajarēnh to. Mê htyk xwÿnhjaja nê kormâ mê pahÿr nê mê papa xwÿnhjaja nhûm mê pahpiitâ tanhmâ mê pajarēnh to.

⁶ Na pre Jejus ty hāmri nê kormâ akupÿm htîr kêt rāhâ hkarô pix o mā amex wÿr tē nê kamâ mê htîr ri amnhî kaxyw Tîrtûm mā hamaxpêr xwÿnhjê mā awjarē. Na prem mê kot amnhî tomnuj mÿrapê ra wej nê ty nê arî amex kām ri pa. Jakamâ nhûm Jejusja hkarô ho ma mê hwÿr tē nê mê kām:

—E na pa ra mê ate amnhî tomnuj pānhâ amnhîrer pa. Tâ kormâ mê atîr ri mê ate amnhî kaxyw Tîrtûm kôt ajamaxpêr jakamâ kot kaj mê ma hwÿr api nê wa ixkuri wa ixpyrà nê atîr tûm nê amex nê apa ho apa. Anê.

Mê pahpê Kris kwÿ hâ tanhmâ mê pahte axpēn nhîpêx to hâ mê pamâ karô

Rômān 12.6-8; Wam Korût 12.1-11

⁷ Nê koja tokyx mê panhō pikaja mê pahpê hapêx nê kamâ mēmoj piitâ hapêx pa. Jakamâ kwa kêr

ka mẽ ate amnhĩ nhĩpêx ã amnhĩ pumunh mex o apa.

Nẽ mẽ atỳx ri ajamaxpêr ri apa hkêt nê.

Nẽ mẽmoj punuj nê amnhĩ to htỳx o ri apa ho ajamaxpêr nyw pix o amnhĩ to Tĩrtũm wỳr rãhã ho ri apa.

⁸ Nẽ kwa kêr ka mẽ amã axpên kĩnh o ri axpên kôt apa. Ja na mex o mex. Kot kaj mẽ ã axpên nhĩpêx anê nhũm Kris kôt atô rỳ atôxjê hõ tanhmã atomnuj to japêr ka amnhĩ tã omu nê ãm omu. Amã hkĩnh o ãm amnhĩ tã omu. Jao axte kot tanhmã atoja mã ajamaxpêr kêt nê.

⁹ Nẽ kêr ka mẽ axãmnhĩx ajamakêtkati nê amnhĩ nhõrkwỳ hwỳr axpên wỳ nê axpên to mex o ri apa. Nom kêr ka mẽ agryk kãm amnhĩ wỳr mẽ hwỳr kêt nê. ¹⁰ Na pre ra Tĩrtũm mẽ pahpê hkra hã ahpỹnhã tanhmã mẽ pamã mẽmoj tã karõ hto nê ã mẽ pahte amnhĩ nhĩpêx anhỳr o papa kaxyw mẽ pahto mẽ paxihtỳx. Mẽ pahte ahpỹnhã tanhmã axpên to mex to ho ri axpên kôt papa kaxyw. Tã kêr ka mẽ ra kot mẽmoj tã mẽ amã karõ hkôt axpên nhĩpêx o ri axpên kôt apa. ¹¹ Kojã ma mẽ ate akwỳjê mã kapêr jarênh o ri apa kaxyw mẽ amã karõ ka mẽ ama nê akatàt kôt ý hã mẽ kãm harênh mex o ri mẽ hkôt apa. Rỳ tanhmã axpên to ajuta hto ho ri apa kaxyw mẽ axunhwỳr japêr ka mẽ amnhĩ tã omu nê hkamnàr rom mẽ ho ajuta mex rãhã ho ri apa. Mẽ apiitã Jejus nhỹ hã ã amnhĩ nhĩpêx anhỳr o ri apa. Kêr kê Jejus kôt mẽ akwỳjaja amnhĩ tã mẽ apumu nê mẽ anhỹ hã Tĩrtũm mã mex o mex ã harê.

Jejus kwỳjaja kot amnhĩ xà htỳx kamã hamak o pa hã mẽ harênh

Rukre 6.20-23; Juãw 16.1-4; Sikũn Tesarõn 1.3-12; Sikũn Ximotre 3.13; Eprêw 12.3; Xiakre 1.2-4

¹² E Kris kôt ixkrãmnhwỳjaja. Kojã Kris kwỳ kêt xwỳnhjaja Kris ã tanhmã mẽ anhĩpêx to nom kwa

kêr ka mẽ tee ri amnhĩ kukamã ajamaxpêr o akapri nê apa hkêt nê. Kêt mẽ akĩnh rãhã axpên kôt ri apa. Na htem ã mẽ pahpê Kris kwỳjê nhĩpêx anhỳr o pa. Jakamã kwa mẽ amnhĩ tã mẽ omu nê tee ri amnhĩ kukamã ajamaxpêr kêt nê.

¹³ Mẽ arĩ akĩnh nê ri apa. Mẽ kot Kris pyrà nê mẽ panhĩpêx punuj tãã. Kêr kê Jejus nhỹrmã akupỹn mẽ pahwỳr wỳr pu mẽ omu nê pahkĩnh tỳx o pahkĩnh tỳx. ¹⁴ Kwãr mẽ mãmrĩ mẽ pahpê Kris kwỳ hã tanhmã mẽ panhĩpêx to. Na htem ã Tĩrtũm Karõ kot mẽ pahkarõ mã gjêx xwỳnhjê nhĩpêx o pa anê.

¹⁵ Nẽ mẽ apê Kris kwỳ jakamã kwa kêr ka mẽ amnhĩ to mex rãhã o ri apa.

Jao mẽ hpar o ri apa hkêt nê.

Nê ri axãhkĩnh o ri apa hkêt nê.

Nê nhãm mẽ hkaêx mã agjêx o ri apa hkêt nê.

Nê tanhmã mẽ homnuj to ho ri apa hkêt nê.

Kot kaj mẽ ã amnhĩ nhĩpêx anhỳr o ri apa nhũm mẽ anhõ pahihti ja hã tanhmã mẽ ato ka mẽ amnhĩ kamã apijaam tỳx nê. ¹⁶ Nom koja mẽ apê Kris kwỳ hã tanhmã mẽ anhĩpêx to ka mẽ ja hã amnhĩ tã mẽ omu nê amnhĩ kamã apijaam kêt nê. ãm Tĩrtũm pix mã amnhĩ jarê nê kãm:

—Pa Tĩrtũm. Ixpê akra Kris kwỳ hã na mẽ ã ixtomnuj anê. Nom ixpê akra jakamã kwãr mẽ mãmrĩ tanhmã inhĩpêx to. Amex o amex o ate ixto akra jakamã kwãr mẽ mãmrĩ ã inhĩpêx anhỳr o pa. Anê.

¹⁷ Nẽ koja Tĩrtũm tokyx mẽ pahpiitã tanhmã mẽ pahte amnhĩ nhĩpêx to hã mẽ pahpumu nê tanhmã mẽ panhĩpêx to. Mẽ pahpê hkrajaja koja tanhmã mẽ pahte amnhĩ nhĩpêx to hã tanhmã mẽ pahto mex to. Hãmri nê hpãnhã mẽ kêp hkra hkêt xwỳnhjê ho hapu nê tanhmã mẽ hipêx to. Mẽ kot amnhĩ kaxyw hkôt hamaxpêr kêt jakamã nhũm mẽ pahkĩnhã tanhmã mẽ

homnuj tÿx to. ¹⁸ Kapêr ã kagà htÿm kot ja hã mē pajarēnh kot:

Mē kot Tirtÿm kapêr kôt amnhî to mex xwÿnhjaja na htem àmnhîx amnhî xà htÿx kamã hamak o pa kamã ty nhÿm Tirtÿm ma õ krî hwÿr amnhî wÿr mē ho àpir kuré kumrēx.

Nom mē kot amnhî tomnuj xwÿnhjaja koja mē hkînhã amnhî xà htÿx kamã hamak rãhã nē pa ho pa nē aa mex kêt nē. Anē.

¹⁹ Tã koja Tirtÿm kãm ja prãm japêr kwâr mē mãmri Kris ã tanhmã mē pahomnuj to. Nom kêt pu mē Tirtÿm kamnâr rom amnhî to mex pix o ri papa. Kêp mē panhîpêx xwÿnh maati jakamã ra kot amnhî jarēnh xà hkôt koja tanhmã ri mē pamã amnhî nhîpêx to ho pa.

5

Tirtÿm krajaja kot tanhmã amnhî nhîpêx to hã mē kãm karõ

Atre 20.28-31

¹ E kot paj hpãnhã mē apê Kris kwÿ hkrãhtÿmjê mã ixkapêr ka mē inhma. Ijaxwÿja ixpê mē akrãhtÿmjê hõ na pa. Na pa pre mē akurom Kris htyk kãm omu. Nom kot puj mē nhÿrmã pahpimràatã mex o mex ã omu nē urãk nē mē pamex nē ri papa ho papa. ²⁻³ Jakamã e Kris kôt mē hkrãhtÿmjaja kêt ka mē atar Kris kôt pahkwÿjê jamâr mex nē. Ra Tirtÿm kot mē ate kãm hkwyjê jamâr kaxyw mē axunhwÿr jakamã kêt ka mē omunh mex rãhã ho mē hkôt ri apa. Te ho ôwêhti jamâr xwÿnh kot ôwêhti jamâr mexta pyrãk. Te mē kêp Tirtÿm krit ôwêhti nhÿm mē ate kãm mē hamâr o apa xwÿnh pyrã nē kãm mē omunh mex rãhã ho ri mē hkôt apa. Nē akînh pê tanhmã ri mē ho ajuta hto ho ri mē hkôt apa. Ja na Tirtÿm kãm hprãm. Nom kêt ka mē ano hkà karôt kãm mē ho ajuta hkêt nē. Rÿ kãxpore hprãm xãj mē kãm tanhmã amnhî nhîpêx to

hkêt nē. ãm amarî tanhmã mē kutã anojarêt to pix kukamã ajamaxpêr o ri mē hkôt apa.

Nē kêt ka mē kãm mēmoj tã karõ kamã axihtÿx kêt nē. Mē akapêr mã aprî kamã mē kãm mēmoj jarê kê mē amnhî tã mē apumu nē mē apyrã nē ã axpên nhîpêx anhÿr o pa.

⁴ E kêt ka mē ã Kris kôt mē akwÿjê jamâr mex pê mē hipêx o apa anē. Hãmri nhÿm mē pajamar xwÿnh maati ja hã mē apumu nē nhÿrmã akupÿn mē pahwÿr wrÿ nē mē ato mex rax nē.

⁵ Nē e mē amy xãptâr nywjaja. Kêt ka mē Kris kôt mē akrãhtÿmjê kapêr ma nē mē hkôt ri amnhî nhîpêx mex o ri apa.

Nē kwa kêt ka mē apiitã axpên nhîpêx o te anhîõ kot amnhî to rax o ajakrenh pyrãk. Tirtÿm kapêr ã kagà htÿm kot ja jarēnh kot:

Mē kot amnhî to jarkrar o ri mē pa xwÿnhjaja na hte Tirtÿm mē kutã amnhî xunhwÿ.

No mē kot amnhî to hkryre nē axpên tã hpijaàm o mē pa xwÿnhjaja na hte mē ho mex o pa.

⁶ Anhÿr ã mē harēnh jakamã kwa kêt ka mē Tirtÿm ã apijaàm rãhã ho ri apa ixkwÿjaja. Nē axpên mã ri amnhî to jarkrar o ri apa hkêt nē. Kêt kê Tirtÿm xihtÿx xwÿnhja ja hã mē apumu hãmri nē nhÿrmã kot mē pahto mex xà hã arîgroja kato nhÿm mē ate amnhî to mex xwÿnh ã mē ajarē nē mē ato mex rax nē.

⁷ Nē kêt ka mē tee ri amnhî kukamã ajamaxpêr pê akaprî ho ri apa hkêt nē. ãm te mē ate Tirtÿm mã akaprî nhôr pyrãk o amnhî nhîpêx nē axãmnhîx akînh nē akaprî hkêt nē apa. Tirtÿm kêp mē pajamâr xwÿnh maati kênã kot ka kêt mē ri akaprî nē ri apa.

⁸ Nē kwa mē okora. Kêt ka mē amnhî nē kot mē pakutã amnhî xunhwÿr xwÿnh maati Satanastija pumunh mex rãhã ho ri apa. Na

hte mẽ panhîpêx o te ropkror kot akunî kamã mry ho krihkrit o ri mrar pyrãk o mẽ panhîpêx. Jao mẽ pahte Kris kaga hprãm xaj apkati mẽ tanhmã nê mẽ pahto ho ri mẽ pahkôt pa. ⁹ Na hte ã pika piitã hkôt Kris kôt mẽ pahtõ nê mẽ pahtõxjê nhîpêx anhÿr o pa nhũm mẽ pahpyrà nê amnhî xà htÿx kamã hamak o pa pè omnuj nê pa. Jakamã kwa kêr ka mẽ Kris kôt amnhî xunhwÿr tÿx nê kutã amnhî to htÿx rãhã ho ri apa. ¹⁰ Tirtũm kãm mẽ pajapê jakamã na hte mẽmoj to mẽ pakutã nojarêt rãhã ho ri pa. Na pre mẽ pamex nê nhÿrmã mẽ pahte kuri tãm amnhî nhîpêx o papa mã xwÿnh ã mẽ pajarê. Kris kukwak ri ã mẽ pajarênh anhÿr jakamã mẽ ate jar Kris ã apunuj nê ri apa htã kot kaj mẽ kritpêm ã amnhî nhîpêx anhÿr ry hkêt nê. Koja Tirtũm mẽ akrã kamã mẽ ajamaxpêr xihtÿx jagjê ka mẽ akupÿm amex nê axihtÿx pê ate amnhî nhîpêx nyw o amnhî nhîpêx rãhã ho ri apa.

¹¹ Tirtũmja hihtÿx o hihtÿx nê àhpumunh o àhpumunh. Nê hihtÿx xà nê àhpumunh xà koja aa kêp hirerek nê hapêx kêt kumrêx. Æm hãmri na mẽ kot harênh kot anhÿrja.

Pêtre kapêr jatur xà

¹² Nê ota Kris kôt mẽ pahtõ Sirastija na inhmã mẽ akaxyw kagàja nhîpêx pa mẽ awÿr mẽnh kaxyw. Na pa hte kãm ixkapêr nhũm inhma nê inhmã hã kagà. Na hte Kris kapêr kôt amnhî nhîpêx rãhã ho ri pa. Tã inhmã kagàja nhîpêx. Mẽ ate kamã harênh nê mar nê tãm ajamaxpêr kaxyw. Nê Tirtũm kãm mẽ ajapê nê kot mẽmoj to mẽ akutã nojarêt ã mẽ ate kamã harênh kaxyw. Tã kêr ka mẽ kãm mẽ ajapê hã amnhî tã harênh ma nê kapêr kôt pix mã amnhî nhîpêx mex rãhã ho ri apa. Mẽ akwÿjjaja kot tanhmã hã mẽ ato htãã.

¹³ Nê ota jar Papirõn kamã Kris kôt mẽ pahtõ nê mẽ pahtõxjaja mẽ awÿr hpêr mẽ. Tirtũm kot mẽ pahpyrà nê mẽ ho hkra jakamã mẽ kêp mẽ atõ nê mẽ atõx ã mẽ awÿr hpêr mẽ. Nê Xiakre mãänênh mẽ awÿr hpêr mẽ. Te kêp ixkra pyrãk.

¹⁴ Nê kêr ka mẽ nhÿri apê Kris kwÿ hã axpên pumu nê mẽ axpên to atõ nê atõx ã axpên mã akapêr mex kurê kumrêx.

E kê Tirtũm mẽ apê Kris kwÿ hã mẽ amã mẽ ajamakêtkati nê mẽ apa xà gõ ka mẽ axãmnhîx ajamakêtkati nê amex nê ri apa ho apa.

Tã ãm ja pix. Ixpê Simãw Pêtre na pa ã mẽ awÿr kagà nê mẽnh anê.

Sikûn Pêtre
Simãw Pêtre kot Jejus
kôt hkwýjê hwýr wam
kagà nê mênh kôt hõ
mênh

Simãw Pêtre na pre kagàja nhîpêx. Jejus nhÿ hã hkrajê jahkre ho mē pa xwýnhjê hõ na pre. Mē kēp Jejus kra hkēt xwýnhjaja ra kot Jejus ã hpîr kaxyw nhûm pre kagàja nhîpêx nê krî piitã hkôt Jejus kwýjê hwýr kurê nê kamã hpri hã mē kãm mēmoj tâ karõ. Mē kot arî Tirtûm kot amnhî nhîpêx kôt amnhî nhîpêx rãhã ho pa hã mē kãm karõ. Nê hamaxpêr o mē hamaxpêr rãhã ho pa hã mē kãm karõ.

Nê mē hkwý kot Tirtûm kôt amnhî nhîpêx ã amnhî jarênh tâ hkôt amnhî nhîpêx kêt xwýnhjaja nhûm pre tanhmã mē harênh to. Æ na pre mē kãm mēmoj jarênh nê hã kagà nê krî piitã hkôt mē hwýr rênh anê. Nê mē kãm:

¹ Pa Kris kôt ixtõ nê ixtõxjaja. Xà mē amex? Ot pa mē awýr kagà nhîpêx nê krî piitã hkôt mē awýr kurê. Ixpê Simãw Pêtre na pa wam ixte kagà nhîpêx nê mē awýr mênh tâ axte hõ nhîpêx. Ixte Jejus Kris nhÿ hã mē ajahkre ho ixpa xwýnh ã mē amã hipêx nê kumê. Na pa hte Jejus mã amnhî nhîpêx mex o ri ixpa.

Nê mē papytâr xwýnh Jejus Krisja Tirtûm pyrã nê mex o mex. Nê wa kot amnhî nhîpêxja mex o mex. Jakamã na pre wa tanhmã mē pahkrã hto pu mē amnhî kaxyw wa hkôt pajamaxpêr tÿx rãhã ho ri papa. Na ka htem ixpyrà nê ã amnhî nhîpêx anê. Tã pa mē amã kagàja nhîpêx.

² Nà Tirtûm mē mē panhõ Pahihti Jejus wa kot amnhî nhîpêxja na ka mē ra harênh mar tÿx nê. Wa kot tanhmã amnhî nhîpêx to nê

tanhmã wa hamaxpêr toja ka mē mar tÿx nê wa hkôt pix mã amnhî nhîpêx. Tã kēr ka mē arî ã amnhî nhîpêx anhÿr rãhã ho ri apa. Jao axãmnhix ajamakêtkati nê akînh nê apa ho apa. Na pa hte ã mē ato Tirtûm mē Pahihti Jejus Kris wa hwýr o ri ixpa anê. Na hte Tirtûm mē ato mex nê mē akutã nojarêt rãhã ho pa.

Tirtûm kot mē pahto mex o pa hã harênh

Epes 2.12-13; Wam Tesarõn 1.2-4; Sikûn Pêtre 3.18

³ Nê Tirtûmja àhpumunh tÿx o àhpumunh tÿx jakamã na pu htem hkôt amnhî xunhwý nhûm amnhî tâ mē pahpumu nê mē pamã àhpumunh tÿx xà hkwý gõ. Hãmri pu mē ra urak nê amnhî to mex nê tãm amnhî nhîpêx o ri papa. Tã kot puj mē nhÿrmã ma õ krî hwýr api. ⁴ Na pre mē pakukamã amnhî jarênh o:

—Kot paj nhÿrmã ixkrajê mã ixte amnhî nhîpêx mex kwý gõ nhûm mē inhÿ hã ho tãm ri amnhî nhîpêx mex o pa. Nê ixpyrà nê hamaxpêr mex o pa.

Anhÿr jao te ra mē pamã hkînh xà mex kwý nhõr pyrãk o mē panhîpêx. Nê te ra kot mē pahkrãm hamaxpêr mex jagjênh nê mē pamã kot amnhî nhîpêx mex jagjênh pyrãk. Mēmo kaxyw na pre ã mē panhîpêx mex anê? Nà urak nê tãm mē pahte amnhî nhîpêx mex rãhã o ri papa kaxyw. Jao mē pahte mē kēp hkwý hkēt xwýnhjê hkôt amnhî nhîpêx kêt nê. Nê mē hamaxpêr punuj o pajamaxpêr kêt nê. Nê hpãnhã mē pahte Tirtûm kôt pix mã amnhî nhîpêx rãhã ho papa. Æ mē pahte amnhî nhîpêx anhÿrja na mex o mex. ⁵ Tã ã Tirtûm kot mē panhîpêx mex anhÿr jakamã kwa kēr ka mē kapêr mar tÿx nê hkôt pix mã amnhî nhîpêx mex o ri apa. Jao amnhî kaxyw hkôt ajamaxpêr rãhã nê. Kot kaj mē ã amã amnhî

nhîpêx anhÿr o apa hprâm hã kot kaj mê mãânên amã tãm amnhî nhîpêx o apa hprâm. Nê mê amã Tirtûm kapêr piitã mar prâm o ri apa. ⁶ Hãmri nê piitã mar pa nê mêmôj punuj piitã nê amnhî to htÿx nê. Nhûm mê kêp Kris kwÿ hkêk xwÿnhjaja Kris ã tanhmã mê anhîpêx to htã ka mê ãm amnhî tã mê omu nê mê umaj mê amã Kris kaga hprâm kêt nê.

Nê mê amã Tirtûm mã amnhî jarênh rãhã ho apa hprâm.

Nê mê amã kapêr mar rãhã ho apa hprâm.

⁷ Nê mê amã Kris kôt mê atõ nê mê atõxjê ho mex pix o ri apa hprâm. Jao te mê amã amnhî tã ma pyrãk o mê piitã mê hipêx o ri mê hkôt apa.

⁸ E kêr ka mê ã amnhî nhîpêx anhÿr o ri apa. Kot ka mê ã amnhî nhîpêx anê nê mê panhõ Pahihti Jejus Kris kôt amnhî nhîpêx mex o mõ. Hãmri nhûm mê akwÿjjaja mê apumu nê mê apê Kris kwÿ hã mê ajarênh kurê kumrêx. ⁹ No kot ka mê atõ ixkapêr mar tã hkôt amnhî nhîpêx kêt nê hãmri te Tirtûm kot anê ate amnhî tomnuj rênh par mã ajamaxpêr kêt pyrãk. ¹⁰⁻¹¹ No na ka htem ã amnhî nhîpêx anhÿr kêt nê. Ra mê ate Pahihti Jejus Kris kôt amnhî nhîpêx mex jakamã na htem ja hã mê apumu nê Tirtûm kot mê ato hkra hã mê ajarênh kurê kumrêx. Kot kaj mê ã hkôt amnhî nhîpêx anhÿr o apa nê mêmô arîgro hã apunuj nê apa htã Jejus kaga hkêk nê. Hãmri nê nhÿrmã ma Tirtûm nhõ krî hwÿr api nhûm mê apumu nê mê ato mex rax nê. Hãmri ka mê õ krî kamã mê panhõ Pahihti Jejus Kris wa kuri atîr tûm nê amex nê apa ho apa.

¹² Nê na ka mê ra Tirtûm kot amnhî nhîpêx mar tÿx nê amnhî krã kamã kot amnhî nhîpêx mã ajamaxpêr tÿx o ri apa. Tã nom kot paj arî mê amã ja jarênh rãhã ho ri ixpa. ¹³ Kormã ixtîr ri kot paj

xatã mê amã harênh o amnhîrît. Ja na kêt inhmã hprâm. Mê ate nhÿrmã tanhmã ri ajamaxpêr to nê hkaga pumaj. ¹⁴ Na pre mê panhõ Pahihti Jejus Krisja inhmã tokÿx ixtÿk ã ijarê. Kot paj xep kritpêr ri ixtîr nê ixpa hkêk nê. ¹⁵ Jakamã na pa kormã ixtîr ri ã mê amã kagã nhîpêx anê. Mê ate inhmÿr pê arî omunh nê kamã harênh nê Tirtûm kot amnhî nhîpêx mã ajamaxpêr tÿx rãhã ho ri apa kaxyw.

Pêtre kot no ho Jejus pumunh ã amnhî jarênh

Matêwre 17.1-5; Makre 9.1-8; Sikün Ximotre 3.16-17

¹⁶ Nê na pa pre ra tanhmã mê amã mê panhõ Pahihti Jejus Krisja jarênh to. Hihtÿx o hihtÿx ã harê nê àhpumunh tÿx o àhpumunh tÿx ã harê. Nê nhÿrmã akupÿn mê pahwÿr wrÿk ã harê. No na pa pre amnhî krã hkôt ã harênh anhÿr kêt nê. Na pa pre inhno ho Jejus hihtÿx o hihtÿx ã omunh o hkôt ixpa nê ixte omunh xã hkôt ã mê amã harênh anê. ¹⁷⁻¹⁸ Amnepê mã kormã ixkwÿjê mê mê ixte arî hkôt ixpa ri pa prem hkôt hixêk prêk nhîmõk wÿr api. Pa nê kaxyw Xiakre nê Juãw mê pa mê hkôt ixpimràatã hixêk ã api nê himõk ã ixkuhê. Hãmri nhûm Tirtûm tanhmã Jejus to nhûm hirã htÿx kãm xa. Hãmri nhûm Mëpahpãm Tirtûmja mê inhmã kapêr. Kaxkwa kamã hirã htÿx rax rûm mê inhmã kapêr o:

—E ota Ixkrata xa. Inhmã hapê ho inhmã hapê. Anê.

Tã ra ixte mar xã hkôt pa amnhî xõ ri mê amã harê nê hã kagã. ¹⁹ Na pa prem ã hixêk prêk nhîmõk ã Jejus pumunh nê Tirtûm kot tanhmã harênh to hã mar anê. Hãmri nê ijamaxpêr o:

—Nã ãm hãmri na pre amnepêr Tirtûm nhÿ hã kapêr jarênh o mê pa xwÿnhjaja Jejus kukamã ã harênh anhÿr o pa. Anê.

Mê kot tanhmã Jejus kukamã harênh toja te kot kamãt kô kamã kanê hpók nhîrã hkryre pyrãk. Tã koja nhÿrmã akupÿn wrÿ hãmri nê te myt kator nê hirã mex nhÿm mẽ pahte mẽmoj pumunh mex pyrãk. Jakamã kwa kêr pu mẽ kot tanhmã Jejus kukamã harênh toja mar tÿx rãhã nhÿm nhÿrmã te myt kator pyrã nê akupÿn mẽ pahwÿr wrÿ. ²⁰ Tirtÿm kapêr ã kagã htÿm kot tanhmã ÿ hã kapêr jarênh xwÿnhjê jarênh to. Mẽ kot mẽmoj kukamã ujarênh ã mẽ harê. Nê Jejus kukamã tanhmã ujarênh to hã mẽ harê. Æ mẽ kot mẽmoj kukamã harênh kot anhÿr. Nom na pu htem amnhÿ krã hkôt ã mẽ ujarênh anhÿrja mar tÿx kêt nê. Koja Tirtÿm Karô hprÿ hã mẽ pamã ho amnhÿrÿt pu mẽ rÿ kormã pahprÿ hã mar tÿx nê. ²¹ Na pre ÿ hã kapêr jarênh o mẽ pa xwÿnhjaja amnhÿ krã hkôt hkwyjê mã ujarênh o pa hkêt nê. Tirtÿm Karô na pre tanhmã mẽ hkrã hto nhÿm mẽ ÿ hã hkwyjê mã tanhmã harênh to ho pa nê ÿ hã mẽ pamã hã kagã.

2

Tirtÿm kapêr jarênh o hêx xwÿnhjê jarênh

Korosê 2.16-17; Wam Ximotre 4.1-5; Sikün Ximotre 3.1-9; Jutre 3-16

¹ Nê amnepêm na pre Ijaew kwÿjaja te mẽ kêp Tirtÿm nhÿ hã kapêr jarênh xwÿnh pyrãk. Nom Tirtÿm kapêr kwÿm ri hkwyjê mã tanhmã ho hêx to ho pa. Tã koja nhÿrmã mẽmojaja mẽ urãk nê mẽ awÿr mra nê ã mẽ amã Tirtÿm kapêr o hêx o pa anê. Nê kapêr kwÿm ri tanhmã mẽ ajahkre hto ho mẽ amã hêx o mẽ akôt pa. Mẽ ate mẽ mar nê amnhÿ nhÿpêx nyw kaga nê hpãnhã mẽ kot amnhÿ tomnuj kôt apa hprãm xãj nhÿm mẽ hêx rom tanhmã mẽ ajahkre hto ho pa. Pahihti Jejus kot mẽ nê htyk

tã nhÿm mẽ hkôt amnhÿ nhÿpêx kêt nê axtem nê ri kapêr o hêx o pa. Mÿrapê koja Tirtÿm tokyx mẽ kot amnhÿ xã htÿx kamã hamak tÿm xã hwÿr mẽ rênh pa.

² Koja mẽ ohtô nê mẽ kapêr ma nê kãm mẽ mar prãm nê. Nê mẽ hkôt hamaxpêr nê mẽ hkôt amnhÿ nhÿpêx o pa. Jao ra hpijaãm kêt nê mẽ hkôt htÿx ri tanhmã amnhÿ tomnuj to ho ri pa. Tã ã mẽ kot Tirtÿm kapêr o mẽ hêx xwÿnhjê mar nê mẽ hkôt amnhÿ nhÿpêx anhÿr jakamã koja mẽ kãm Tirtÿm kapêr mar prãm xwÿnhjaja mẽ kot amnhÿ nhÿpêx ã mẽ omu nê Tirtÿm kapêrja mex kêt ã harênh japêr. ³ Tirtÿm kapêr o mẽ hêx o mẽ pa xwÿnhjaja na htem kãxpore pix prãm xãj mẽ awÿr mra nê tanhmã mẽ amã kapêr jarênh o hêx to ho pa nhÿm Tirtÿm ja hã mẽ omunh rãhã ho hkrÿ. Na hte nhÿhÿm mrar kêt nê rÿ htÿx ôt o hikwÿ hkêt nê. Na hte arÿ mẽ kot amnhÿ nhÿpêx ã mẽ omunh rãhã ho hkrÿ. Tã koja nhÿrmã ma mẽ kot amnhÿ xã htÿx kamã hamak tÿm xãta hwÿr mẽ kurê nhÿm mẽ ma hwÿr hapêx pa.

⁴ Nê amnepê mã kaxkwa kamã Tirtÿm kapêr o mẽ wrÿk xwÿnh kwÿjaja na prem axtem nê Tirtÿm kapêr nhÿrôp kuhê nhÿm tee ri amnhÿ tã mẽ omu hãmri nê amnhÿ nê mẽ kator pa. Mẽ kamã ukapri hkêt nê amnhÿ nê mẽ kator pa hãmri nê mẽ kot amnhÿ xã htÿx kamã hamak tÿm xãta wÿr mẽ hano. Nhÿm prem ma hwÿr pa nê ahkre xupÿm kãm kamãt kô kamã arÿ hkrÿ ho hkrÿ. Tirtÿm kot mẽ piitã tanhmã mẽ harênh to xã hã arÿgroja jamãr o hkrÿ. Nê tee ri kãm hapôx prãm kaprÿ ho hkrÿ.

⁵ Nê amnepêm pika kamã ri mẽ pa xwÿnhjaja na prem haxwÿja piitã amnhÿ tomnuj pix o ri pa. Jakamã nhÿm Tirtÿm ja hã mẽ omu nê mẽ kamã ukapri hkêt nê. Nê mẽ hwÿr na rax mẽ. Mẽ kãm kapêr mar

prām kêt jakamā nhūm mē hwÿr kumē nhūm wrÿk rax kumrēx nē mē hanhir pa nē mē himex. Ām Noehti mē hkwȳ pē 7 pixjaja nhūm mē kurom htīr nē hkā hkīnh nē mex nē pa. Noehti kormā na xwÿj ri kot mē kām Tirtūm kapēr jarēnh o ri mē hkôt pa htā nhūm mē kuma nē ām kuma. Mÿrapē na prem piitā pikaprār pa.

⁶ Nē Sotō mē Gomo wa kamā mē pa xwÿnhjaja haxwÿja na prem amnhī tomnuj tÿx kumrēx o pa nhūm Tirtūm wamtajē pyrā nē mē kamā ukaprī hkēt nē. Na pre kaxkwa rūm mē hipy mēmo hpōk kwÿ rē nē ho mē ho hapēx pa. Tā mēmo kaxyw na pre ā mē hipēx anē? Nā mē piitā mē kot mē harēnh mar nē hamaxpēr o:

—Na hte ā Tirtūm mē kot amnhī tomnuj xwÿnhjē nhīpēx anē.

Anhÿr o hamaxpēr kaxyw na pre ā mē hipēx anē. ⁷⁻⁸ Nom Rohtija na pre Tirtūm Sotō nē kator jakamā nhūm htyk kêt nē. Na pre hkwȳjē rom tām amnhī nhīpēx tā mē kot amnhī tomnuj tÿx xwÿnhjē nhō krī kamā ōrkwȳ nē ri pa. Nē apkati mē tee ri mē kot amnhī nhīpēx ā mē omu nē mē ŷ hā hkaprī nē tee ri mē hkukamā hamaxpēr o pa. No nhūm mē amnhī tomnuj ā amnhī pumunh nē tokyx tām amnhī nhīpēx kêt nē. Nē apkati mē tanhmā amnhī tomnuj to nē kapēr punuj o pa nhūm Rohti tee ri mē omu nē hkaprī htÿx nē pa. ⁹ Tā nhūm Tirtūm mē himex kaxyw nē mē nē kator nē mē himex pa. Na hte ā Tirtūm mēmoj punuj pē mē kot amnhī kaxyw kām hamaxpēr nē hkôt amnhī nhīpēx xwÿnhjē pytār anē. No mē kot amnhī tomnuj xwÿnhjaja na hte axtem mē hipēx. Tā koja nhÿrmā mē pahpitiā tanhmā mē pajarēnh to xā hā arīgro kato nhūm ma mē kot amnhī xā htÿx kamā hamak tūm xā wÿr mē rēnh pa. Ām tapxipix kot ā mē hipēx anhÿr kaxyw āhpumunh tÿx.

¹⁰ Tā mē hpijaam kêt kām amnhī tomnuj o mē pa xwÿnhjaja nē mē kot Tirtūm kapēr mar nē ām mar xwÿnhjaja koja nhÿrmā mē homnuj tÿx nē.

Nē Tirtūm kapēr o hēx o ri mē pa xwÿnhjaja na htem amnhī to jarkrar pix o pa. Nē Tirtūm kapēr o mē wrÿk xwÿnhjē hā hpijaam kêt nē. Nē axtem nē mē ho kapēr punuj pē tanhmā mē haprÿ hto ho pa. ¹¹ Tā nhūm htem amnhī tā mē kuma nē ām mē kuma. Mē kurom mē hihtÿx kumrēx tā no ām amnhī tā Tirtūm mā tanhmā mē ho kapēr to hkēt nē.

¹² Nē mry xoprē na hte htÿx ri pa ho pa. Tā Tirtūm kapēr o mē hēx o mē pa xwÿnhjaja htem mry xoprēta pyrā nē htÿx ri hamaxpēr mex kêt o pa. Jao hprī hā mēmoj mar kêt tā htÿx ri hijuk ri tanhmā mēmoj jarēnh to.

Nē mry xoprēja htÿx pa nhūm mē kot hparja pyrā nē mē kot Tirtūm kapēr o hēx o mē pa xwÿnhjaja koja Tirtūm nhÿrmā kuwy hwÿr mē ho hapēx nē kamā mē rēnh pa.

¹³ Nē koja nhÿrmā Tirtūm mē kot tanhmā mē ama hēx to ho pa hā mē omunh xā hkôt mē homnuj tÿx nē. Na htem hpijaam kêt nē mē piitā mē noo mā tanhmā amnhī tomnuj to ho pa. Kamāt kām nē arīgro hā. Nē mē kām tanhmā amnhī nhīpēx to hprām xā hkôt pix mā amnhī tomnuj o pa.

Na htem te mē kēp Kris kôt mē atōjē pyrā nē mē akôt Tirtūm kapēr mar xā hā ixkre hwÿr agjē nē mē anhīhkō hā mē kot Jesus tyk mā hamaxpēr kaxyw pāwti hkwȳ hku. Nom htÿx hkur o hkrī nē htyk mā hamaxpēr kêt nē. Kām Jesus kīnh kêt tā hēx rom hpijaam kêt kām mē anhīhkō hā htÿx ri hkur o hkrī.

¹⁴ Nē nhÿri krī hwÿr pōj nē mēnijē pumu nē kām mē hkīnh nē. Ra mē mjēn ri pa htā nhūm mē kām mē ho amnhīkati hprām nē mē kamā hpijaam kêt o ri pa.

Nē kormā mẽ kot Kris kôt amnhĩ xunhwÿr tohtuj anhyr xwÿnhjê hwÿr mra nê hêx rom tanhmã mẽ kãm kapêr to pê mẽ no kupyri o ri mẽ hkôt pa. Mẽ kot mẽ mar nê Kris kaga nê mẽ hkôt ri amnhĩ nhĩpêx prãm xaj ã mẽ hipêx anhyr o pa.

Na htem hikàxpore rûnh o pikuprõnh pix kukamã hamaxpêr o ra ho õxÿ nê.

Ã na htem amnhĩ nhĩpêx anhyr o pa. Tã ra Tirtũm kot mẽ homnuj tÿx kaxyw mẽ hã amnhĩ jarê. ¹⁵⁻¹⁶ Te mẽ kot kamãt kô kamã pry juk ã hpikunor nê htÿx ri pa pyrãk o na htem amnhĩ nhĩpêx nê kãm Tirtũm kapêr mar prãm kêt nê amnhĩ tomnuj pix o pa.

Amnepê m Peo hkra Paraãwta kêp Tirtũm nhÿ hã kapêr jarênh o pa xwÿnh tã axtem nê kàxpore rax prãm xaj tanhmã amnhĩ tomnuj to kaxyw. Nhũm Tirtũm tee ri ja hã omu nê Paraãw krit jumênreja tanhmã hakwa hto nhũm kãm kapêr. Jumênre kapêr kêt tã nhũm Tirtũm tanhmã hakwa hto nhũm kãm kapêr nê tanhmã kot amnhĩ tomnuj to kaxywta ã kãm akir nhũm amnhĩ tã kuma hãmri nê ã amnhĩ nhĩpêx anhyr kêt nê. Tã mẽ kot Tirtũm kapêr o mẽ hêx ho mẽ pa xwÿnhjaja na htem Paraãw pyrã nê kàxpore rax prãm xaj tanhmã amnhĩ tomnuj to pix prãm. ¹⁷ Te hino ra grã nhũm mẽ tee ri kamã gô japêr pyrãk o na htem amnhĩ nhĩpêx. Rÿ te kakrã hapôx nhũm mẽ kot omunh nê na wrÿk ã hkamnhĩx kaprÿ pyrãk. Tã ra Tirtũm mẽ kaxyw kamãt kô htÿx pê mẽ kot amnhĩ xã htÿx kamã hamak tũm xata o mẽ nê. ¹⁸ Na htem htÿx ri amnhĩ tomnuj o pa hã mẽ amã amnhĩ to jarkrar o ri pa. Jakamã nhũm mẽhõ ra amnhĩ tomnuj kaga kaxyw nhũm mẽ tee ri ja hã omu nê kot ã amnhĩ nhĩpêx anhyr pymaj tanhmã nê kãm kapêr to nê mẽ kãm:

—Kwa ixte amnhĩ tomnuj o ixpa htã nhũm Tirtũm ja hã ixpumu nê ãm ixpumu nê arĩ inhmex ã ijarê. Na pa hte mẽ hkupyryê hwÿr mra nhũm ja hã ixpumu nê ãm ixpumu nê hã tanhmã ixto hkêt nê. Jakamã kwa mẽ ixpyrà nê arĩ ã amnhĩ nhĩpêx anhyr o ri apa. Koja Tirtũm tanhmã hã ato hkêt nê. Anê.

Hãmri nhũm mẽ tee ri kuma nê ra hamaxpêr kati nê. ¹⁹ Na htem mẽ kãm kapêr o:

—Kwa mẽ ixpyrà nê mãmrĩ amã tanhmã amnhĩ tomnuj to hprãm xã hkôt amnhĩ nhĩpêx o ri apa. Mẽhõ kot kêt ja nê tanhmã amã kapêr to? Anê.

Mẽ kot amnhĩ tomnuj xaja te kêp mẽ õ patrãw pyrãk jakamã na htem ãm kôt pix mã amnhĩ nhĩpêx o pa. Jakamã kot pu mẽ tanhmã amnhĩ tomnuj to. Nê gaa nê axte. Nê gaa nê ra ho amnhĩ pyrãk. Hãmri nê tee ri pamã hkaga hprãm kaprÿ nhũm te kêp mẽ panhõ patrãw pyrãk o mẽ panhĩpêx pu mẽ ãm kôt pix mã ri amnhĩ nhĩpêx o ri papa.

²⁰ Nê koja mẽhõ ra Tirtũm kapêr ma. Nê mẽ panhõ Pahihti Jejus Kris jarênhja nhũm hprĩ hã kuma. Kêp mẽ pahte amnhĩ tomnuj pê mẽ papytãr xwÿnh ã harênh ma. Tã nhũm mẽ kot Tirtũm kapêr o mẽ hêx xwÿnhjaja hwÿr mra nê tanhmã kãm ho hêx to nhũm mẽ kuma nê kot amnhĩ nhĩpêx tũm o awjanã. Jao amnhĩ tomnuj tÿx o kormã kot Tirtũm kapêr mar kêt ri kot amnhĩ tomnujta jakre. ²¹ Kêp ãm aa kot Tirtũm kapêr mar kêt rãhã htyk ronhÿx ja kãm mex nê. Nom ra kot mar mex tã ãm kuma nê hkaga jakamã koja mex kêt kumrêx. ²² Mẽ kot ã mẽ kot amnhĩ nhĩpêx anhyr ã mẽ harênh kot:

Rop na hte õjaïr nê akupÿm õjaïrta ku.

Nê hagrõ na htem unê nê hkumrã nhũm muxre. Tã nhũm mẽ kãm ure nhũm akupÿm hprõt nê mra nê akupÿm gyw o amnhĩ tomnu pa. Anê.

Tã mẽ kot Tirtūm kapēr o mẽ hêx xwýnhjê mar nê mẽ hkôt amnhĩ nhĩpêx xwýnhjaja te mẽ kot rop mẽ hagrô wa kot amnhĩ nhĩpêxta pyrà nê Tirtūm kapēr kaga nê akupým mẽ kot amnhĩ nhĩpêx tūm o awjanã nê htýx ri amnhĩ nhĩpêx o pa.

3

Tirtūm kot pika ho hapêx kaxyw kormã amnhĩ tã mẽ pajamãr ã harênh

Matêwre 24.29-31; Xiakre 5.7-11; Apokarip 19.11-16, 21.1-8

¹ E Kris kôt ixkrãmnhwýjaja. Na pa pre ra wam kagàta nhĩpêx nê mẽ awýr kurê. Tã ra axte hkôt ja nhĩpêx. Hamê wa kamã na pa mẽ amã Tirtūm kot tanhmã amnhĩ nhĩpêx to hã harê. Nê Jejus Kris nhỹrmã akupýn mẽ pahwýr wrýk ã harê. Mẽ ate mar nê tãm amnhĩ nhĩpêx nê tãm ajamxpêr o kutêp mẽ apa kaxyw.

² Amnepê mã Tirtūm nhỹ hã kapēr jarênh o ri mẽ pa xwýnhjaja na prem Tirtūm kot nhỹrmã mẽ pahwýr mēhō mēnh mã xwýnhhta jarênh o pa. Kot nhỹrmã mẽ pahwýr wrýk nê mẽ pahto amnhĩptar o pa hã harênh o pa. Tã kêr ka mẽ kapēr ma nê hã ano htýx nê hkôt ajamxpêr týx rãhã ho ri apa. Nê Jejus kot mẽ awýr mẽ rênh xwýnhjaja ka mẽ kapēr ma. Mẽ kot mẽ amã mẽmoj jarênh o mẽ pa xwýnhjaja na htem tanhmã mẽ amã Pahihti Kris jarênh to ho ri mẽ akôt pa. Nê tanhmã kot mẽ panê amnhĩ nhĩpêx to hã harê. Tã kêr ka mẽ kapēr ma nê hã ano htýx nê kãm ajamxpêr týx rãhã ho ri apa.

³ Nê kwa mẽ inhma. Nhỹrmã Kris akupýn mẽ pahwýr wrýk xwýj ri koja mẽ kot amnhĩ tomnuj týx xwýnhjaja mẽ awýr mra. Mẽ hpi-jaam kêt o pa xwýnh jakamã koja mẽ tanhmã mẽ akamã amnhĩ tomnuj to ho pa. Nê mẽ apê Kris kwý hã mẽ apumu nê mẽ atã hpêr o pikênh

o pa. ⁴ Nê htýx ri Kris ã mẽ akukja nê mẽ amã:

—Kwa no Krisja? Amnepêm akupýn wrýk nê mẽmoj piitã tanhmã hipêx to hã amnhĩ jarênh tã arĩ Tirtūm kot mẽmoj to kator krax rŭm mẽmoj amarĩ rãhãã. Ra mẽ panhígêjtaja pikaprãr par tã nhŭm kormã akupýn wrýk kêt nê. Kot mẽ pamã amnhĩ to hêx kênã. Mo kaxyw koja kêt akupýn mẽ pahwýr wrý? Kot mẽ pamã amnhĩ to hêx kênã. Anê.

⁵⁻⁶ Nom ã mẽ kot harênh anhỹrja kot anhỹr kêt. Tirtūm kot mẽmoj to kator krax rŭm mẽmoj amarĩ rãhã hã mẽ kot harênhja kot anhỹr kêt. Na pre Tirtūm kapēr pix o kaxkwa nê pika ho kato. Nhŭm gô hkwýja kapēr mar xà hkôt pika hã amnhĩ jahkre. Nhŭm hpãnhã panhĩ nhĩpêx. Tã no nhŭm mẽ kapēr mar kêt kumrêx. Nê mẽ kot amnhĩ tomnuj týx mýrapê na pre Tirtūm gô ho mẽ himex pa. Jao mẽ hwýr na rax mẽ nhŭm mẽ hanhir o mẽ ho hapêx. No nhŭm mẽ kot Jejus wrýk ã hpêr o pikênh xwýnhhtaja kãm ã mẽ harênh anhỹrja mar prãm kêt. Ra mẽ kot mar tã kãm mar prãm kêt nê arĩ mẽmoj piitã rãhã hã ri harênh o pa. ⁷ Pika nê kaxkwaja arĩ rãhã htã koja Tirtūm nhỹrmã mẽ pahpiitã mẽ pahte tanhmã amnhĩ nhĩpêx to hã mẽ pahpumunh kôt tanhmã mẽ pajarênh to. Nê mẽ kot amnhĩ xà htýx kamã hamak tŭm xà hwýr mẽ kot amnhĩ tomnuj xwýnhjê rênh pa. Hãmri nhŭm rĩ kormã kaxkwa nê pikaja wa pôr nhŭm himök ã mẽmoj piitã hkaxàr pa nê hapêx.

⁸ Nê amgrã pê 1.000ja mẽ pamã amgrã xohtô rax kumrêx no Tirtūm mã te arĩgro pixire pyræk. ⁹ Tã ra kot mẽ pamã tokyx Jejus akupýn wrýk ã harênh tã nhŭm kormã wrýk kêt jakamã nhŭm htem tōhã tee ri hamãr o pa nê hamaxpêr o:

—Hêxta waa nê. Tirtūm kot tokyx akupýn mẽ pahwýr Jejus mēnh ã amnhĩ jarênh tã tokyx mēnh kêt nê.

Anhÿr o harênh tâ no âm kot anhÿr kêt. Na kormã amnhî tâ mê kot amnhî tomnuj xwÿnhjê jamâr o pa. Mê kot amnhî tomnuj kaga nê hkôt amnhî xunhwÿr prãm xaj kormã amnhî tâ mê hamã. Kãm mê kot amnhî xà htÿx kamã hamak tûm xàta wÿr mēhō ho pixire nê mōr prãm kêt jakamã na kormã amnhî tâ mê hamã. ¹⁰ Tã koja nhÿrmã mê panhō Pahihtija akupÿn mê pahwÿr wrÿ. Te mê àhkÿnh xwÿnh kot amnhî nhÿpêx pyrãk o mê pajaêr pê akupÿn wrÿ. Pu mê pahÿtÿx ri tanhmã paxàpênh to ho ri papa nê akupÿn wrÿk ã hkamnhÿx kêt rãhã nhÿm mê pajaêr pê akupÿn wrÿ. Hãmri nê ma akupÿm amnhî kôt mê pahte hkôt amnhî xunhwÿr xwÿnhjê ho àpir par kurê kumrêx. Hãmri nhÿm rÿ kormã kaxkwa kaxàr o hkrihkrit tÿx kãm hapêx pa. Nê kanhêti mê myt nê mytwÿrÿre kaxàr pa. Nê pikaja nê mãânên kamã mēmoj piitã kaxàr pa. ¹¹⁻¹² Koja nhÿrmã ã mēmoj hapêx par anê. Jakamã kwa kêr pu mê Jejus kutêp tãm ri amnhî nhÿpêx rãhã ho ri papa. Nê Tirtûm kapêr kôt pix mã amnhî nhÿpêx rãhã nê. Nê kãm hprãm xà hkôt tanhmã kãm amnhî nhÿpêx to ho ri papa. Kêr kê Jejus akupÿn wrÿ nê ã mê pahte amnhî nhÿpêx anhÿr ã mê pahpumu. Koja wrÿ nhÿm rÿ kormã kaxkwa nê pikaja wa kaxàr pa. Nhÿm kuwy mÿri kaxkwa kamã mēmoj harir xwÿnhja xêr nê ôr pa nê hapêx. ¹³ Tã kwãr mãmrÿ mēmoj ã amnhî nhÿpêx anê. Koja Tirtûm axte mēmoj mex nhÿpêx. Na pre amnhî kukamã ja jarênh o:

Kot paj axte pika nê kaxkwa hō nhÿpêx nhÿm mex o mex. Nhÿm mê kot amnhî kaxyw Jejus mã hamaxpêr nê hkôt amnhî xunhwÿr nhÿm ixte mê mex ã mê harênh xwÿnh pixjaja koja mê pika nywja kamã mex nê pa ho pa. Anê.

¹⁴ Jakamã kwa ixkrãmnhwÿjaja. Kêr

ka mê Kris kutêp kapêr kôt amnhî nhÿpêx mex rãhã ho ri apa. Jao kutêp ajamakêtkati nê axãmnhÿx axpên kôt apa. Kêr ka mê nhÿrmã amnhî wÿr omu nê tee ri amnhî kukamã ajamaxpêr kêt nê. Ate tãm amnhî nhÿpêx o apa hã amnhî pumu nê akÿnh nê amnhî wÿr omunh o akuhê.

¹⁵ Nom arÿ Jejus kãm mê pahkwÿjê ho hkra hprãm jakamã na kormã amnhî tâ mê hamã nê tokyx akupÿn wrÿk kêt nê. Na pre Jejus kôt mê pahÿtō Pawre Tirtûm nhÿ hã ã mê pamã ja hã kaga anê. Pawreja ixkrãmnhwÿ mex na. ¹⁶ Na hte mê pakaxyw kaga nhÿpêx nê kamã mê pahte Jejus kutêp tãm amnhî nhÿpêx o papa hã mê pamã karō. Na hte tōhã mēmoj tâ kaga pu mê kamã harê nê tee ri pahprÿ hã mar mã no âm mar mex kêt nê. Hãmri nhÿm Tirtûm kapêr o mê hêx o mê pa xwÿnhÿtaja haxwÿja kuma hãmri nê amnhî krã hkôt hijuk ri tanhmã ho hêx to. Te mê kot hprÿ hã mar nê harênh pyrãk nom hprÿ hã mar kêt nê. ã na htem Tirtûm kapêr ã kaga piitã ho hêx o pa anê. Mÿrapê koja mê nhÿrmã amnhî xà kamã hamak tÿx kumrêx.

¹⁷ Tã e Kris kôt ixkrãmnhwÿjaja. Ra mê ate mê harênh mar jakamã kwa mê okora. Mê amnhî nê mê omunh mex nê mê hkôt amnhî nhÿpêx kêt nê. Kot kaj mê anê nê Tirtûm kôt amnhî nhÿpêx mex kêt nê. ¹⁸ Na ka htem mê papÿtãr xwÿnh Pahihti Jejus Kris kôt ri amnhî nhÿpêx o apa. Tã kêr ka mê arÿ hkôt amnhî nhÿpêx mex rãhã ho ri apa. Nê hkôt amnhî xunhwÿr tÿx nê. Kêr kê amnhî tâ mê apumu nê mēmoj to mê akutã nojarêr nê. Krisja mex o mex nê hihtÿx o hihtÿx. Tã kêr pu mê kãm mex o mex ã mãn harênh rãhã ho ri papa.

Tã âm ja pix. Ixpê Simãw Pêtre na pa ã mê amã ja hã kaga nê mê awÿr mēnh anê.

Wam Juāw Juāw kot Jejus kôt hkwýjê hwýr kagà nê mênh

Juāw na pre kagàja nhîpêx. Na pre kagà hkwý nhîpêx rax nê. Na pre määnên Juāw kot tanhmã Jejus kot amnhî nhîpêx to ho pa ã kagà nê Apokarip nê Sikün Juāw nê Hapuhã Juāw nhùm pre ja piitã Tirtüm nhÿ hã hã kagà.

Juāwja Jejus nhÿ hã hkrajê jahkre ho mê pa xwýnhjê hô na pre. Nê kêp Xiakre htô na pre. Tã ra hpigêt tÿx nê kagàja nhîpêx. Urak nê mê kot Tirtüm kôt amnhî xunhwýr xwýnhjê mã hipêx. Mê kot kamã harênh nê mar nê kãm axpên kînh o pa kaxyw. Nê mê kot amnhî tomnuj ã amnhî pumunh kôt tanhmã amnhî nhîpêx to hã mê kãm karô nê hã kagà. ã na pre Juāw mê kãm mêmôj jarênh nê hã kagà anê nê mê hwýr kumê. Nê mê kãm:

Jejus kêp Tirtüm kapêr o amnhîrît xwýnh ã harênh

Juāw 1.1-4; Eprêw 1.1-4

¹ Pa ixpyrà nê mê ate Jejus kôt amnhî xunhwýr xwýnhjaja? Xà mê amex? E ot pa mê amã kagàja nhîpêx nê mê awýr kumê. Ixte mê amã Tirtüm kapêr o amnhîrît xwýnh jarênh kaxyw. Amnepê mã kormã mêmôj amrakati ri nhùm pre ra rãhã ri pa ho pa. ãm kukwak ri pix mã na pu htem Tirtüm mê wa kuri pahür tüm nê papa ho papa mã xwýnh. Tã ÿ hã mê ixte kapêr o mê ajahkre ho ri mê ixpa xwýnhjaja na pa prem ixpiitã kormã akupÿm kaxkwa hwýr àpir kêt ri inhno ho omunh o ri hkôt ixpa. Nê mê ijamak o kapêr mar o ri hkôt ixpa. Nê mê inhîhkra ho hkupênh o ri hkôt ixpa. ² Na pre kaxkwa kamã Hipêxã hkôt ri pa ho pa htã

amne pika hwýr mê pahwýr wrÿ. Hãmri nê jar mê pakamã kato pa pre mê ixkwýjaja omu. Tã mê ixte omunh xà hkôt na pa htem amnhî xô ri tanhmã mê amã harênh to. Kojã nhÿrmã akupÿm mê pahto mê pahür pu mê kuri pahür tüm nê pamex nê papa ho papa. ³ Na pa prem tanhmã kapêr to hã mar o ri hkôt ixpa. Nê kot tanhmã mê kãm amnhî nhîpêx to hã omunh o ri hkôt ixpa. Ta kagàja kamã amnhî xô ri ixprî hã mê amã harê nê hã kagà. Mê ate ixpyrà nê aprî hã kot tanhmã amnhî nhîpêx to ho pa hã harênh mar kaxyw. Jao mê pahpiitã te ixkre tipxi kamã mê papa pyrak o amnhî nhîpêx o papa nê axpên kôt pajamexpêr o ri papa. Jao Mëpanhîpêxã Maati mê Kra Jejus Kris wa hkôt amnhî nhîpêx mex o ri papa. ⁴ Tã pa mê amã kagàja nhîpêx nê mê awýr kumê. Mê ate kamã harênh nê mar hãmri nê mê ixpyrà nê ajamakêtkati nê akînh nê ri apa kaxyw.

Tirtüm mex o mex ã harênh

Juāw 8.12; Epes 5.3-21; Wam Tesarôn 5.5; Eprêw 4.14-16, 9.11-14

⁵ Nê Jejus kot tanhmã mê inhmã Tirtüm jarênh toja kot paj amnhî xô ri mê amã hã kagà. Nã Tirtüm kot amnhî nhîpêxja mex o mex. Aa kot tanhmã amnhî tomnuj to hkêt. Mex o mex jakamã na hte tanhmã mê kot amnhî tomnuj to mã amnhî jagjênh kêt. ãm kot amnhî to mex o kot amnhî to mex rãhã nê pa ho pa xwýnh na. ⁶ Kot mê pahte amnhî tomnuj kêt ã mê pamã karô jakamã kot puj mê pahpê hkra hã amnhî jarênh tã amnhî tomnuj pix o ri papa nê ãm pahpê hkra hã amnhî jarênh kaprÿ nê amnhî to paxêx. Tirtüm krajaja na htem amnhî tomnuj o pa hkêt nê. ⁷ Nom kot puj mê hkôt amnhî nhîpêx nê urak nê tãm ri amnhî nhîpêx o papa. Nê kapêr kôt ri amnhî nhîpêx. Hãmri nê te ixkre tipxi kamã ri Tirtüm

mê Kra Jejus Kris wa hkôt axpên to papa pyrâk o amnhî nhîpêx. Na pre Jejus mê panê ty nê hkamrô axkapî. Jao mê pahte hkôt amnhî xunhwýr xwýnhjaja mê panê mê pahte amnhî tomnuj piitã hpãnhã amnhîrer pa. Jakamã ãm kukwak ri pix mã na pu htem tãm amnhî nhîpêx o ri papa.

Mê pahpiitã mê pahte amnhî tomnuj xwýnh ã mê pajarênh

⁸ Nê mê pahte tãhã tanhmã amnhî tomnuj to jakamã kot puj mê aa pahte amnhî tomnuj kêt ã amnhî jarê hãmri nê ã amnhî jarênh anhýr o paxêx. Tirtûm kot mê pahpiitã mê pahte amnhî tomnuj ã mê pahpumunh xwýnh kênã.

Mê pahte amnhî tomnuj nê tanhmã amnhî nhîpêx to hã mê pamã karô

Xiakre 4.9-10

⁹ Nê mê pahpê Tirtûm krajaja na pu htem tanhmã amnhî tomnuj to hãmri nê tee ri ja hã amnhî pumu nê pahkaprî nê. Nê tokyx amnhî to Tirtûm wý. Hãmri nhùm mê pama nê Jejus kukwak ri tanhmã hã mê pahto hkêt nê. ãm amnhî katut kôt tanhmã mê pahte amnhî tomnuj tota rê nê axte kãm hamaxpêr kêt nê. Ra kot mê pahtã amnhî jarênh xã hkôt. Na hte Tirtûm amnhî jarênh xã hkôt tanhmã amnhî nhîpêx to. Tã ra kot mê pahpê hkrajaja mê pahte amnhî tomnuj piitã amnhî katut kôt rênh par ã amnhî jarênh jakamã na pre ã mê panhîpêx anê. Na hte mêmoj tã tanhmã amnhî jarênh to hãmri nhùm apkati nhùm ihkjê ho kumê nê axtem tanhmã mêmoj jarênh to hkêt nê. ¹⁰ Ra kot mê pahpiitã mê pahte amnhî tomnuj xwýnh ã mê pajarênh jakamã kot puj mê pahtô ã mê pajarênh anhýrja ma nê hkôt pajamaxpêr kêt japêr. Rý kuma nê ãm kuma nê pajamaxpêr o:

—Nã ixte tanhmã amnhî tomnuj tore hã.

Anhýr o amnhî jarê. Hãmri nê te ate Tirtûm hêx xwýnh ã harênh pyrâk. Jao amã kapêr mar prãm kêt ã amnhî to amnhîrît.

2

Jejus kêp mê paxyr pê Tirtûm mã kapêr xwýnh ã harênh

Wam Ximotre 2.5; Eprêw 9.11-14

¹⁻² E mê ate amnhî tomnuj o apa hkêt kaxyw na pa ã mê amã ixkapêr nê hã kagã anê. Mê ate kamã harênh nê mar hãmri nê tanhmã amnhî tomnuj to hkêt kaxyw. Jejus Kris na pre mê pahpiitã mê pahte amnhî tomnuj pãnhã amnhîrer kaxyw mê panê ty. Jakamã kot puj mê pahpê hkrajaja tanhmã amnhî tomnuj to nhùm ja hã mê pahpumu nê te kêp mê paxyr pê Tirtûm mã kapêr xwýnh pyrâk o amnhî nhîpêx. Mê pakurom aa kot amnhî tomnuj kêt jakamã na hte mê paxyr pê Tirtûm mã kapêr nhùm kuma. Hãmri nê kukwak ri pix mã mê pahte tanhmã amnhî tomnuj to piitã amnhî katut kôt rênh pa nê axte kãm hamaxpêr kêt nê.

Tirtûm krajaja kot Tirtûm kôt amnhî nhîpêx ã mê kãm karô

³ Nê na pu htem Tirtûm kôt ri amnhî nhîpêx o papa hã amnhî pumunh kôt pahpê hkra hã amnhî pumunh mex nê. ⁴ Nom koja mêmhõ kêp hkra hã amnhî jarênh tã hkôt amnhî nhîpêx kêt nê ãm kêp hkra hã amnhî to hêx. ⁵ Na htem Tirtûm kapêr kôt amnhî nhîpêx o pa pê kãm hkĩnh tỳx ã amnhî to amnhîrît. Nê kêp hkra hã amnhî to amnhîrît mex o pa. ⁶ Jakamã kêr ka mê apê Jejus Kris kwý hã amnhî jarênh xwýnhjaja hkôt pix mã amnhî nhîpêx mex o ri apa.

Mē pamā axpēn kīnh ā mē pamā karō
Juāw 13.34-35; Wam Juāw 3.14-18

⁷ E Kris kôt ixkràmnhwỳjaja. Inhmā mē akīnh jakamā na pa ā mē amā mēmoj jarēnh nē hā kagā anē. Kot paj mē amā mēmoj nyw jarēnh kêt nē. Ra mē ate mēmoj mar xwỳnhhta kot paj axte mē amā harē. Mē pamā axpēn kīnh nē tām axpēn nhīpēx o papa hā Tīrtūm kot mē pamā karōta. Ra mē ate mar tā kot paj axte mē amā harē nē hā kagā. ⁸ Wam Tīrtūm kot mē pamā axpēn kīnh ā mē pamā karōja kormā Jejus kot mē panē htyk hkêt ri kot mē pamā hā karōta na. Tā ra Jejus kām mē pajapē xàj mē panē htyk jakamā na pa axte ā mē ate axpēn nhīpēx anhỳr o apa hā mē amā karō nē hā kagā. Mē ate Kris pyrà nē amā axpēn kīnh xàj tanhmā axpēn kutā anojarēt to ho ri apa kaxyw. Nom kormā mē pahte Jejus kôt amnhī xunhwỳr kêt ri na pu prem ā axpēn nhīpēx anhỳr kêt nē. Tā hkôt amnhī xunhwỳ hāmri nē ā axpēn to mex o papa anē. ⁹⁻¹¹ Tā koja mēhō kot Jejus kôt amnhī nhīpēx ā amnhī jarēnh tā kām hkwỳjē hkīnh kām àmnhīx ri mē kutā nojarēt o pa hkêt nē. Hāmri nē kot Jejus kôt amnhī nhīpēx ā amnhī jarēnh ā amnhī to hēx. Jao te htỳx ri kamāt kō kamā pa pyràk. No koja mēhō kām hkwỳjē hkīnh kām mē kutā nojarēt o pa nē määnēn Jejus kôt amnhī nhīpēx mex o pa. Jao te hirā kamā ri pa pyràk. Jakamā tanhmā hkwỳjē homnuj to ho pa hkêt nē mē piitā mē ho mex o axpēn pyràk o pa.

Juāw kot mē piitā ahpỳnhā tanhmā mē kām kapēr to

¹²⁻¹⁴ E kot pa ahpỳnhā tanhmā mē amā ixkapēr to nē hā kagā. Mē apiitā te mē apē ixkra pyràk. Na ka prem Jejus kôt amnhī xunhwỳ nhūm Tīrtūm ja hā mē apumu

nē Kra kukwak ri mē ate amnhī tomnuj piitā amnhī katut kôt rēnh pa nē axte kām hamaxpēr kêt nē. Jakamā ra mē ate Tīrtūm kēp Mēpanhīpēxà Maati hā omunh mex.

Nē mē ate Jejus kôt amnhī xunhwỳr ā amgrā xohtō xwỳnhjaja. Amnepēm amrakati ri Jejus ra rāhā ri pa ho pa xwỳnhja kôt mē ate amnhī xunhwỳr xwỳnhjaja kot paj mē amā tanhmā ixkapēr to nē hā kagā.

Nē mē akwỳjaja ham Jejus kôt mē ate amnhī xunhwỳr xwỳnhjaja ra mē ate Tīrtūm kapēr mā ajamaxpēr rāhā ho ri apa. Jakamā na hte Satanasti mē ate amnhī tomnuj prām xàj tee ri tanhmā mē akrā hto ka mē Jejus nhỳ hā kutā amnhī to htỳx pē hkôt amnhī nhīpēx kêt nē.

Mē kot amnhī tomnuj xwỳnhjaja tanhmā kot amnhī nhīpēx to

Matêwre 6.24; Eprēw 11.24-26; Xiakre 4.4

¹⁵ Nē kēr ka mē amā Tīrtūm kôt amnhī nhīpēx prām xàj mē kot amnhī tomnuj xwỳnhjē hkôt amnhī nhīpēx kêt nē. Nē mē hamaxpēr punuj xwỳnhjē hkôt ri amnhī nhīpēx kêt nē. Kot kaj mē hkôt amnhī nhīpēx hāmri nē amā Tīrtūm kīnh kêt ā amnhī to amnhīrit. ¹⁶ Mē kot amnhī tomnuj xwỳnhjaja na htem mēmoj punuj mā hamaxpēr nē hkôt tanhmā amnhī tomnuj to. Nē mēmoj pumu nē ra kām ho ō hprām nom Tīrtūm pē ja omnuj ā hkamnhīx kêt nē. Rỳ tanhmā mēhō kot amnhī tomnuj to hā omu nē hkôt kām amnhī nhīpēx prām. Nē tanhmā amnhī to jarkrar to ho ri pa. Ā na hte mē kot amnhī tomnuj xwỳnhjaja amnhī nhīpēx anhỳr o pa. Mē kot amnhī nhīpēxja Mēpanhīpēxà Tīrtūm kām hprām kêt. ¹⁷ Koja nhỳrmā mē kot tanhmā amnhī tomnuj toja piitā hapēx pa. Nē mē hamaxpēr punujja määnēn nhỳrmā hapēx pa. Nē mē kot amnhī tomnuj o mē pa xwỳnhjaja koja mē

amnhĩ xà htỳx kamā hamak rāhā ho pa ho pa. No Tirtūm kôt mē kot amnhĩ nhĩpêx o mē pa xwỳnhjaja koja mē kuroom kuri htĩr tūm nē mex nē hkĩnh nē pa ho pa.

Kām Kris kurê xwỳnh maati jarēnh

Wam Juāw 4.1-6; Sikūn Juāw 7-11

¹⁸ E Kris kôt ixkwỳjaja. Kris akupỳn mē pahwỳr wrỳk kukamā koja mēmoj tanhmā amnhĩ nhĩpêx to. Na pre ra Kris kôt mē panhĩōja mē pamā ā harēnh anē nē harēnh o:

—Koja mē panhō Pahihti Kris akupỳn mē pahwỳr wrỳk kaxyw hāmri nhūm kēp Kris ā amnhĩ to hêx xwỳnh maati kumrêx nhỹhỹnh kato. Hāmri nē hêx rom te Kris pyrā nē tanhmā mē kām kapêr to nē tanhmā mē hipêx to ho pa nhūm rĩ kormā Kris akupỳn mē pahwỳr wrỳ. Anē.

Na pre hkukamā ā harēnh anē ka mē harēnh ma. Tā ra mē kēp Kris ā amnhĩ to hêx xwỳnhjaja ohtō nē mra nē kām hkurê xwỳnh maatita kukamā tanhmā amnhĩ nhĩpêx to pē mē kām amnhĩ to hêx o pa. Jakamā na pa ixprĩ hā mē amā tanhmā mē harēnh to. Koja tokyx kēp Kris ā amnhĩ to hêx xwỳnh maatita nhỹhỹnh mē pahwỳr kato. ¹⁹ Na pre hkwỳjaja mē pahpê Kris kwỳjê hkôt ri pa htā mē pahkĩnhā kēp Kris kwỳ hkêt. Kēp hkwỳ ronhỹx arĩ mē pahkôt Kris kôt amnhĩ nhĩpêx o pa. Nom axtem nē āhpumunh tỳx pyrā nē mē pahkaga nē htỳx tanhmā amnhĩ tomnuj to ho pa. Jao kēp Jejus kwỳ hkêt ā amnhĩ to amnhĩrīt.

²⁰ No kêt mē pahpê Tirtūm krajaja na pre Jejus mē pahwỳr Karō rē nhūm mē pahkarō mā agjê nē mē pahkrām kapêr mex jagjê. Jakamā na pu mē mē kēp Kris kwỳ hkêt xwỳnhjê rom Tirtūm kapêr mar mex nē.

²¹ Xà mē ate Tirtūm kapêr ā kaga pumunh kêt kôt na pa ā mē amā

ixkapêr nē hā kaga anē? Nà ra mē ate omunh nē mar mex kēnā. Tā mē ate mē kot tanhmā Jejus o hêx to xwỳnhjê pumunh mex nē mē harēnh mar mex kaxyw na pa ā mē awỳr kaga nhĩpêx nē mēnh anē. Kêr kē mē mēmo arĩgro hā mē awỳr agjê nē tanhmā mē amā Jejus o hêx to ka mē aprĩ hā mē omunh mex kurê kumrêx. ²² Tanhmā na htem Jejus o hêx to? E kot paj ixprĩ hā mē amā tanhmā mē harēnh to ka mē inhma. Nà koja mēhō mē amā tanhmā harēnh to nē harēnh o:

—Nà Jejus kēp Tirtūm Kra hkêt. Tirtūm kot mē pahwỳr mēnh kêt tā ka htem atỳx kapêr kôt ri amnhĩ nhĩpêx o ri apa. Kwa kêt mē ixkapêr kôt mām ri amnhĩ nhĩpêx o ri apa.

Anhỹr o mē amā kapêr ka mē ama nē kām Kris mē Tirtūm wa hkĩnh kêt xwỳnh ā omunh kurê kumrêx. ²³ Koja mēhō Tirtūm Kra Jejus kaga nē määnēn Hipêêxà kaga. No koja mēhō Tirtūm Kra hkôt amnhĩ xām nē määnēn Hipêêxà hkôt amnhĩ xām.

Mē pahte Kris kaga pymaj tanhmā amnhĩ nhĩpêx to hā mē pamā karō

²⁴ Annepê mē ate Jejus kôt amnhĩ xunhwỳrta ā na ka prem kēp Tirtūm Kra hā Tirtūm kot mē pahwỳr mēnh xwỳnh ā harēnh ma. Tā kēr ka mē arĩ amnhĩ kaxyw hkôt ajamaxpêr nē hkôt pix mā amnhĩ nhĩpêx o ri apa. Kot kaj mē anē nē Mēpanhĩpêêxà Maati mē Kra wa hkôt amnhĩ nhĩpêx mex o apa rāhā ty. ²⁵ Hāmri nē wa kuri atĩr tūm nē amex kumrêx nē apa ho apa. Ra Jejus kot ja jarēnh xà hkôt.

²⁶ Na pa ā mē amā ixkapêr nē hā kaga anē. Mē aprĩ hā mē amā Jejus o hêx xwỳnhjê kapêr mar nē mē kot mē amā hêx kôt mē omunh mex kaxyw. ²⁷ Tirtūm Karō na pre mē akarō mā gjêx pa nē mē amā Tirtūm kapêr piitā o amnhĩrīt mex o mē akôt pa. Jakamā mēmo

kaxyw kot kaj mẽ Tĩrtũm kapēr o hêx xwỹnhjaja kot tanhmã harênh toja ma? Ra Tĩrtũm Karõ kot mẽ amã ho amnhĩrĩt o mẽ ajahkre mex o pa kênã kot ka kêt mẽ nhãm mẽ kapēr ma. Na hte Tĩrtũm Karõja mẽ urã nê Tĩrtũm kapēr ho hêx kêt nê. Æm katat kôt kot ho amnhĩrĩt mex jakamã kwa kêr ka mẽ mar tỳx nê hkôt ri amnhĩ nhĩpêx mex rãhã ho ri apa.

Mẽ pahte tãm ri amnhĩ nhĩpêx ã mẽ pamã karõ

Juāw 14.25-26, 15.1-8

²⁸ E Jejus kôt ixkrajaja. Kêr ka mẽ arĩ Kris kôt amnhĩ nhĩpêx mex rãhã ho ri apa. Kê nhỹrmã akupỹn mẽ pahwỳr wrỳk o tẽ ka mẽ amnhĩ wỳr omu nê akĩnh nê. Nê akĩnh kãm axãmnhĩx kutã mra nê hkaxpa nê amnhĩ kamã amã uma hkêt nê. Rỳ mẽmoj tã amnhĩ tã apijaam kêt nê. Æm axãmnhĩx akĩnh nê ma kutã mra. ²⁹ Krisja mex o mex jakamã na pu htem urãk nê amnhĩ to mex o ri papa. Mẽ pahte amnhĩ to mex o papa xwỹnhjaja urãk nê mẽ pahpê Tĩrtũm kra na pu mẽ.

3

Tĩrtũm krajê hkukamã tanhmã mẽ harênh to

Rõmãn 8.18; Sikũn Korĩt 3.18; Sikũn Pêtre 3.11-14

¹ Nê Mẽpanhĩpêxã Maati kãm mẽ pajapê htỳx kumrêx jakamã na pre mẽ pahte hkôt amnhĩ xunhwỳr ã mẽ pahpumunh kôt mẽ pahpê hkra hã mẽ pajarẽ pu mẽ pahpê hkra nê ri papa. Ja na mẽ pamã mex o mex. Nom mẽ kot hkôt amnhĩ xunhwỳr kêt xwỹnhjaja kot hprĩ hã ja hã mẽ pahpumunh kêt jakamã na htem mẽ pahte tãm amnhĩ nhĩpêx ã mẽ pahpumu nê tee ri hamaxpêr.

² E Kris kôt ixkwỳjaja. Ra mẽ pahpê Tĩrtũm kra htã kormã mẽ pahte amnhĩ kukamã mẽ pahprĩ hã ja hã amnhĩ pumunh mex kêt. Kojã nhỹrmã Jejus akupỹn

mẽ pahwỳr wrỳ pu mẽ pano ho tanhmã kute hã omunh mex nê. Hãmri nê tã te kot amnhĩ nhĩpêx pyrãk o amnhĩ nhĩpêx mex o papa. Ra mẽ pahte ja mar mex. ³ ã mẽ pahte amnhĩ kukamã pajamaxpêr anhỳr o papa xwỹnhjaja na pu htem kormã amnhĩ wỳr Jejus kamã pajamak o papa. Pê urãk nê mẽmoj punuj mã pajamaxpêr kêt o papa. Nê urãk nê tanhmã amnhĩ tomnuj to hkêt nê.

Tĩrtũm krajaja kot amnhĩ tomnuj o pa hkêt ã mẽ kãm karõ

⁴ Nê mẽ kot amnhĩ tomnuj o mẽ pa xwỹnhjaja na htem Tĩrtũm kapêr kwỳm ri amnhĩ nhĩpêx o pa. Tã kot puj mẽ tanhmã amnhĩ tomnuj to hãmri nê mẽ urãk nê kapêr kwỳm ri amnhĩ nhĩpêx. ⁵ No Jejus na pre mẽ pahte amnhĩ tomnuj pãnhã amnhĩrer kaxyw mẽ pahwỳr wrỳ. Aa kot amnhĩ tomnuj kêt jakamã tapxipix kot mẽ pahpãnhã amnhĩrer mã tãm. Ra mẽ pahte ja jarênh mar mex. ⁶ Jakamã mẽ pahpê hkwỳjaja na pu htem ri pahtỳx tanhmã amnhĩ tomnuj to ho papa hkêt nê. Æ mẽ kot amnhĩ nhĩpêx anhỳr xwỹnhjaja kêp hkwy hêt. ⁷ Nom koja mẽhõ Kris pyrã nê tãm amnhĩ nhĩpêx o pa hãmri nê kêp Tĩrtũm kraa. Jakamã kwa koja mẽhõ Tĩrtũm kapêr kwỳm ri tanhmã mẽ amã kapêr to ka mẽ ama nê ãm ama. ⁸ Mẽ kot amnhĩ tomnuj o mẽ pa xwỹnhjaja na htem Satanasti hkôt ã amnhĩ nhĩpêx anhỳr o pa. Satanastija Tĩrtũm kot mẽmoj to kator krax rũm nhũm ã kot amnhĩ tomnuj anhỳr o pa xwỹnh na. Tã ã kot amnhĩ nhĩpêx anhỳr o paja o hapêx par kaxyw na pre Tĩrtũm Kra Jejusja amnê pika hwỳr wrỳ.

⁹ Nom mẽ papajaja mẽ pahpê Tĩrtũm kra na pu mẽ. Na pre mẽ pahwỳr amnhĩ Karõ rê nhũm mẽ pahkarõ mã gjêx pa nê mẽ pahkôt pa ho pa. Jakamã tanhmã kot

puj wem amnhī to nē Satanasti pyrā nē pahtýx ri amnhī tomnuj o papa? Nā kot puj mē ā amnhī nhīpēx anhýr kēt nē. ¹⁰ Koja mēhō tām amnhī nhīpēx kēt nē hāmri nē määnēn hkwyjē kamā ukapří hkēt nē. Hāmri nē ā amnhī nhīpēx anhýr o kēp Tirtüm kra hkēt ā amnhī to amnhīrit. Ām kēp Satanasti hkra hā amnhī to amnhīrit kurē kumrēx.

Mē pamā axpēn kīnh o te Jejus kām mē pahkīnh pyrāk ā mē pamā karō

Matēwre 22.39; Rukre 10.25-37; Juāw 13.31-35

¹¹ Nē kēr ka mē arī amā axpēn kīnh pē tām axpēn nhīpēx o ri apa rāhā nē. Te amnepē mā mē ate Jejus kōt amnhī xunhwýr ā arīgrota ā mē kot mē amā ja hā karō pyrā nē. ¹² No mē ri finat Kaī kot amnhī nhīpēx pyrāk o amnhī nhīpēx kēt nē. Kēp Satanasti hkra jakamā na pre htōja pī. Kurom kot tām amnhī nhīpēx ā omu nē kamā gryk nē kupī. ¹³ Tā koja mē kēp Tirtüm kra hkēt xwýnhjaja Kaī pyrā nē kēp mē aprām nōkati nom kēr ka mē amnhī tā mē omu nē tee ri amnhī kukamā ajamaxpēr kēt nē. ¹⁴ Kormā mē pahte Jejus kōt amnhī xunhwýr kēt ri na pu prem mē urāk nē amnhī tomnuj o papa. Jao mē pahpē kuwy hwýr papa mā xwýnh. Tā mē pahte Jejus kōt amnhī xunhwýr jakamā ra pahpē Tirtüm mē Kra wa kuri pahtír tūm nē papa mā xwýnh. Jakamā na pu htem mē kēp hkra hkēt xwýnhjē kurom pamā mē piitā mē hkīnh o tanhmā mē ho mex to ho papa. Mē kām amnhī kwýjē hkīnh kēt xwýnhjaja arī mē kēp kuwy hwýr mē pa mā xwýnh na mē. Ra mē pahte ja jarēnh mar mex. ¹⁵ Mē kām mē hpar prām o mē pa xwýnhjaja koja nhýrmā Tirtüm mē Kra wa kuri htír tūm nē pa ho pa hkēt nē. Ra mē pahte määnēn ja mar mex. Jakamā kwa mē amā akwýjē hprām nōkati ho ri mē apa xwýnhjaja. Tirtüm noo mā te ra mē

ate mē hpar pyrāk jakamā kot kaj mē arī ā amnhī nhīpēx anhýr o ri apa hāmri nē nhýrmā Tirtüm nhō krī hwýr axàpir kēt nē.

¹⁶⁻¹⁸ E ixkwýjaja. Kwa kēr pu mē pajakwa pix o pamā axpēn kīnh ā amnhī jarēnh kēt nē. Määnēn axpēn kutā panojarēt o ri papa. Nē tanhmā axpēn to mex to. Tanhmā na pre Jejus kām mē pajapē hā amnhī nhīpēx to? Nā na pre kām mē pamex prām xāj mē panē ty. Kām amnhī tā ma hkēt kām mē pakamā ukapří xāj mē panē ty. Tā kēr pu mē urāk nē pahkwýjē kamā paxukapří ho mē kutā panojarēt rāhā ho papa. Jao mē paxàpkur xā hā panhō pumu nē nhýri pahkwýjē hō pumu nhūm kēp amrakati. Pu mē tee ri ja hā omu hāmri nē kām mē panhōta kwý gō. Kot pu mē ā amnhī nhīpēx anhýr kēt nē hāmri nē pamā Tirtüm kīnh ā amnhī jarēnh kapry. ¹⁹ Nē kot puj mē ā axpēn to mex o papa anē nē ra pahte Tirtüm kōt amnhī nhīpēx mex ā amnhī to amnhīrit. Hāmri nē ra paxāmnhīx kām tanhmā amnhī jarēnh to ho papa. Amnhī kamā pamā uma hkēt nē paxāmnhīx pajamakētkati nē kām tanhmā amnhī jarēnh to.

Mē paxāmnhīx amnhī to Tirtüm wýr ā mē pamā karō

²⁰ Nē kot puj mē mēmo arīgro hā tanhmā amnhī tomnuj to hāmri nē tee ri ja hā amnhī pumu nē amnhī kamā pagryk nē. Na hte Tirtüm tanhmā mē pahte amnhī tomnuj to hā mē pahpumu nom arī kām mē pajapēē. Mē parom àhpumunh o àhpumunh jakamā kot mē pahte amnhī tomnuj prām kēt ā mē pahpumunh mex. ²¹ Jakamā puj mē ā kām pajamaxpēr anē nē amnhī kamā pamā uma hkēt kām paxāmnhīx tanhmā ri amnhī to hwýr to ho ri papa. ²² Kot puj mē hkōt amnhī nhīpēx o papa rāhā nē mēmoj tā kuwý. Nē kām

hprām xà hkôt amnhĩ nhĩpêx o papa hã amnhĩ pumunh kôt mẽmoj tâ kuwỳ. Hāmri nhũm mẽ pama nẽ tanhmã mẽ panã mẽmoj to rỳ mẽ panã mẽmoj gõ.

Te ixkre pixi kamã mẽ pahtipxi pyrāk ã mẽ panã karõ

²³ Nẽ tanhmã mẽ pahte amnhĩ nhĩpêx to ho papa hã na hte Tĩrtũm mẽ panã karõ? Nã mẽ pahte amnhĩ kaxyw Kra Jejus Kris kôt pajamaxpêr nẽ hkôt amnhĩ nhĩpêx o papa hã na hte mẽ panã karõ. Nẽ kapêr xà hkôt panã axpên kĩnh o mẽmoj to axpên kutã panojarêt o papa hã na hte mẽ panã karõ. Na hte ã mẽ pahte amnhĩ nhĩpêx anhỹr ã mẽ panã karõ anẽ. ²⁴ Jakamã kot puj mẽ kapêr xà hkôt axpên nhĩpêx o papa nẽ te ixkre tipxi kamã mẽ pahte axpên kôt Tĩrtũm kôt ri papa pyrāk. Ra kot mẽ pahwỳr Karõ rênh nhũm kot mẽ pahkarõ mã gjêx jakamã na hte mẽ pahkôt pa ho pa hã amnhĩ to amnhĩrit.

4

Mẽ kot Kris kapêr jarênh ã amnhĩ to hêx xwỳnhjê jarênh

Wam Korõt 12.1-3; Wam Juāw 2.18-26; Sikũn Juāw 7-11

¹⁻³ Nẽ koja mẽhõ Tĩrtũm kapêr o mẽ ajahkre kaxyw mẽ amã tanhmã Jejus Kris jarênh to nẽ ãm hāmri harẽ nẽ harênh o:

—Na pre Tĩrtũm Kra Jejus mẽ pahwỳr wrỳ nẽ í ho í ho mẽ pakamã kato. Tĩrtũm tãm na pre mẽ pahwỳr kumê nhũm wrỳ.

Anhỹr o mẽ amã harẽ ka mẽ ama nẽ kapêr kôt ajamaxpêr kurê kumrêx. ãm hāmri na hte Tĩrtũm Karõ nhỹ ã harênh anẽ. No koja Jejus kêp Tĩrtũm Kra hkêt ã harẽ ka mẽ ama nẽ ãm ama nẽ hkôt ajamaxpêr kêt nẽ. Kãm Kris kurê xwỳnh maati nhỹ hã kapêr xwỳnhjaja na hte ã harênh anhỹr o pa. Na ka pre ra kãm Kris kurê xwỳnh maati tokyx hpôx ã

harênh ma. Tã na ra ý hã kapêr xwỳnhjaja ohtõ nẽ pika piitã hkôt mẽ hkôt pa nẽ te Tĩrtũm Karõ nhỹ hã mẽ kãm kapêr pyrāk o amnhĩ nhĩpêx o pa. Nom ãm amnhĩ to hêx o pa. Jakamã e kwa ixkwỳjaja. Koja mẽhõ mẽ awỳr mra nẽ tanhmã mẽ amã Tĩrtũm kapêr jarênh to ka mẽ aprĩ hã ama nẽ rĩ kormã kêp Tĩrtũm nhỹ hã kapêr jarênh xwỳnh ã harẽ rỳ kot amnhĩ to hêx xwỳnh ã harẽ.

⁴ Kêt mẽ papajaja jajê rom mẽ pahpê Tĩrtũm kra na pu mẽ. Nẽ Tĩrtũm Karõ kot ra mẽ pahkarõ mã gjêx xwỳnhhta hihtỳx o jajê piitã mẽ hakrenh. Jakamã na pu htem ý hã mẽ kutã amnhĩ to htỳx o papa nhũm mẽ tee ri tanhmã mẽ panã Jejus o hêx to kaprỳ. Pu mẽ kuma nẽ ãm mẽ kuma. ⁵ Mẽ kêp Tĩrtũm kra hkêt jakamã na htem hkôt amnhĩ nhĩpêx kêt nẽ. Mẽ kot amnhĩ nhĩpêxja axtem na. Jakamã na htem Tĩrtũm kapêr kwỳm ri tanhmã hkra hkêt xwỳnhjê mã kapêr to ho pa nhũm mẽ kuma nẽ kãm mẽ mar prãm nẽ. ⁶ Nom mẽ ixte Tĩrtũm kapêr o mẽ ajahkre xwỳnhjaja na pa htem mẽ kurom Tĩrtũm nhỹ hã ixkatat kôt ãm hāmri mẽ amã kapêr jarênh o ri ixpa. Jakamã ka mẽ apê hkra hã mẽ amã mẽ inhmar prãm nẽ. No mẽ kêp hkra hkêt xwỳnhjaja kãm mẽ inhmar prãm kêt.

Na pu htem pahprĩ hã mẽ kapêr ã mẽ kuma nẽ rĩ kormã tanhmã mẽ harênh to. Tĩrtũm nhỹ hã kapêr ã mẽ harẽ rỳ kãm hkurê xwỳnh maati nhỹ hã kapêr ã mẽ harẽ.

Tĩrtũm kãm mẽ pajapê hã tanhmã amnhĩ nhĩpêx to hã harênh

Juāw 3.16-21; Rõmãn 5.5-9, 8.35-37

⁷ E ixkwỳjaja. Na hte Tĩrtũm tanhmã mẽ pahpê hkrajê ho pu mẽ panã axpên kĩnh nẽ. Jakamã kêp pu mẽ ã axpên nhĩpêx anhỹr jao axpên to mex pix nẽ. ã Tĩrtũm kot mẽ panhĩpêx anhỹr jakamã kêp pu

mē pahpê hkrajaja ŷ hã ã axpēn nhīpêx anhÿr o ri papa.

⁸ Koja mēhō Tirtūm kīnhã kām mē hkwyjê hkīnh kêt hāmri nē mē kamã ukapri hkêt o pa. Hāmri nē kēp Tirtūm kra hkêt ã amnhī to amnhīrit mex nē.

⁹⁻¹⁰ Tirtūm kām mē pajapê htÿx kumrêx. Kormã mē pamã hkīnh kêt ri nhūm kumrêx amnhī rom kām mē pajapê ho pa. Nē kām mē pajapê xaj mē pahwÿr Kra pyxita mē. Mē pahte amnhī tomnuj pānhã kot mē panê htyk kaxyw. Mē pahte kukwak ri amnhī nhīpêx nyw o amnhī nhīpêx nē nhÿrmã wa kuri pahtir tūm nē pamex nē papa ho papa kaxyw. Å na pre Tirtūm mē pahwÿr Kra mēnh anhÿr o kām mē pajapê hã amnhī to amnhīrit.

¹¹ E ixkwÿjaja. Tirtūm kām mē pajapê htÿx jakamã kwa kēr pu mē urak nē pamã axpēn kīnh o papa. Nē axpēn kamã paxukapri nē. ¹² Aa mē pahtō pahte pano ho Tirtūm pumunh kêt tā na hte mē pakamã pa ho pa. Pu mē kām mē pajapêta pyrà nē ŷ hã pamã axpēn kīnh o papa. ¹³ Na pre mē pahwÿr Karō rē nhūm mē pahkarō mã agjê pu mē ŷ hã kot amnhī nhīpêx o amnhī nhīpêx o papa.

¹⁴ Nē mē ixpê Jejus nhÿ hã mē ajahkre xwÿnhjaja. Mē ixte kot amnhī nhīpêx nē kot mēmoj tanhmã ho hã omunh o ri hkôt ixpa jakamã na pa htem ma mē piitã mē kām harēnh o ri mē hkôt ixpa. Nē mē kām harēnh o:

—Tirtūm na pre mē pahwÿr Kraja mē. Kot mē pahpiitã mē panê htyk kaxyw mē pahwÿr kumê. Anê.

¹⁵ Mē kot Jejus kēp Tirtūm Kra hã harēnh o pa xwÿnhjaja na hte Tirtūm mē kamã pa ho pa nhūm htem ŷ hã ã Kra jarēnh anhÿr o pa.

¹⁶ Na pu mē ra pahpri hã Tirtūm kām mē pajapê hã amnhī tā omu. Kām mē pajapê htÿx kumrêx ã amnhī tā omu. Jakamã kot puj

mē urak nē ŷ hã pamã mē piitã mē hkīnh o papa. Tirtūm mē mē pahtixi nē ri papa kēnã.

Mē kām axpēn kīnh xwÿnhjaja kām Tirtūm puma hkêt ã mē harēnh

¹⁷ Nē kot puj mē pamã axpēn kīnh o papa nē määnēn Kris kôt amnhī nhīpêx ho papa. Hāmri nhūm nhÿrmã Tirtūm kot Kra mē wa kuri mē htir tūm nē mē pa ho mē pa mã xwÿnhjê nhixi jarēnh kaxyw pu mē tee ri amnhī kukamã pajamexpēr kêt nē. Ra amnhī nhixi jarēnh ma nē pahkīnh nē.

¹⁸ Nē koja mēhō kām hkwyjê hkīnh kêt nē tanhmã hō homnuj to. Hāmri nē kot amnhī tā tanhmã ho pymaj kām uma ho hwÿr mrar kêt nē. No koja kām hkwyjê hkīnh nē tanhmã mē ho mex to ho pa nē kām mē uma hkêt nē. ¹⁹ Tirtūm kumrêx na pre kām mē pajapê nē mē pakukamã tanhmã mē pahto mex to. Tā pu mē ra amnhī pyrà nē pamã hkīnh o papa. Nē pamã mē piitã mē hkīnh o papa.

²⁰ Nē koja mēhō kām Tirtūm kīnh ã amnhī jarēnh tā kām hkwyjê hō hprām nōkati hāmri nē ra kām Tirtūm prām kêt ã amnhī to amnhīrit. Kot kaj mē ano ho akwyjê pumunh o apa xwÿnhhta amã hkīnh kēê tā tanhmã kot ka we amnhī to nē ate ano ho Tirtūm pumunh kēêta amã hkīnh ã amnhī jarê? Nã ka ã amnhī jarēnh anhÿr o amnhī to axêx. ²¹ Na pre Tirtūm mē pamã kapēr o amnhīrit o:

Kot kaj mē amã ixkīnh hã kot kaj mē määnēn amã akwyjê hkīnh o mē ho mex o ri apa. Anê.

5

Tirtūm nhÿ hã mē pamã axpēn kīnh ã mē pamã karō

¹ Nē Tirtūm kot mē pahwÿr Jejus mēnh ã harēnhja. Koja mēhō kuma nē amnhī kaxyw hkôt hamaxpēr nē Jejus kôt amnhī xãm hã koja Tirtūm ja hã omu nē ho hkra.

Nē koja mēhō kām Tīrtūm kīnh hā koja määnēn kām hkwýjê hkīnh o pa. ² Ja pyrà nē kot puj mē pamā Tīrtūm kīnh nē kapēr kôt amnhī nhīpêx. Hāmri nē määnēn pamā krajê piitā mē hkīnh ho papa.

³ Nē kot puj mē pamā Tīrtūm kīnh nē nhūm kapērja mē pahpê hihtýx kêt nē. Pu mē pamā Tīrtūm kīnh ā kapēr kôt amnhī nhīpêx mex o ri papa.

⁴⁻⁵ Na pu prem amnhī kaxyw Tīrtūm Kra Jejus kôt pajamaxpēr nē hkôt amnhī xunhwý nhūm Tīrtūm ja hā mē pahpumu nē mē pahto hkra pu mē ý hā amnhī nhīpêx nyw o amnhī nhīpêx o papa. No ri tanhmā amnhī tomnuj to ho ri papa hkêt nē.

Mēmoj axkrunēpxi nē kot Jejus kēp Tīrtūm Kra hā ho amnhīrīt Juāw 1.32-34, 3.36, 5.31, 15.26

⁶ Nē Jejus pix na pre Tīrtūm mē pakaxyw ām nhūm kēp Kra hā mē pahwýr wrý. Hāmri nhūm Juāw Paxisja pyhti kamā hkrā kumrā. Kēp Tīrtūm Kra hā hkrā kumrā. Tā nhūm Tīrtūm kapēr kôt ma tanhmā amnhī nhīpêx to ho pa. Nē ri hkwýjê mā kapēr jarēnh o ri mē hkôt pa. Tā nhūm mē kupī nhūm kēp Tīrtūm Kra hā pī kahpa hā ajêt nē ty nē hkamrô axkapī. Ā mē panê amnhī nhīpêx anē nhūm Tīrtūm Karōja kēp Kra hā mē pamā ho amnhīrīt. Ām hāmri na hte ā tanhmā mēmoj to amnhīrīt to anē. Mēmoj to hēx kêt jakamā na pre Jejus kēp Tīrtūm Kra hā mē pamā ho amnhīrīt.

⁷ Nē kēp Tīrtūm Kra hā mē pamā mēmoj to axkrunēpxi nē ho amnhīrīt. ⁸ Tīrtūm Karō na pre kēp Kra hā mē pamā ho amnhīrīt pu prem kēp Kra hā omu. Nē Juāw Paxis kot hkrā kumrārta ā pu mē määnēn kēp Tīrtūm Kra hā kot ho amnhīrītja ā omu. Nē määnēn kēp Tīrtūm Kra hā pī kahpa hā jêt nē htyk nē hkamrô pikapīrta ā mē

pamā ho amnhīrīt pu mē kēp Kra hā omu. E mē pamā mēmoj to axkrunēpxi nē Jejus kēp Tīrtūm Kra hā kot ho amnhīrīt xwýnh na jajaja.

⁹ Nē na pu htem jar pahkwýjaja kot axpēn mar xà hā íxkre kamā mē kapēr ma nē mē hkôt pajamaxpēr. Tā koja Tīrtūm tanhmā mē pamā mēmoj to amnhīrīt to pu mē hkôt pajamaxpēr kurê kumrēx. Kēp Tīrtūm kēnā kot pu kêt mē kapēr prā nē hkôt pajamaxpēr kêt. Tām na pre mē pamā Jejus kēp Kra hā ā ho amnhīrīt anē. ¹⁰ Jakamā mē pahte Tīrtūm Kra hkôt amnhī xunhwýr xwýnhjaja na pu prem Jejus kēp Kra hā harēnh ma nē hkôt pajamaxpēr kurê kumrēx. No mē kēp hkra hkêt xwýnhjaja na htem Tīrtūm kot kēp Kra hā harēnh ma nē ām kuma nē amnhī kaxyw hkôt hamaxpēr kêt nē. Jao te Tīrtūm kēp Hipēêxà hā amnhī to hēx pyràk ā harē.

¹¹ E kot paj ixprī hā mē amā tanhmā ja jarēnh to ka mē inhma. Nā na pre Tīrtūm Krata mē pahpiitā panē ty. Jakamā kot puj mē pahte hkôt amnhī xunhwýr xwýnhjaja nhýrmā ty nhūm Tīrtūm akupým mē pahto mē pahtír. Pu mē wa kuri pamex nē pahtír tūm nē papa ho papa. ¹² Mē pahpê Jejus kwýjaja kot puj mē ā pahtír tūm nē papa anē. No mē kēp hkwý hkêt xwýnhjaja koja mē nhýrmā ty nē mē pahpyrà nē wa hwýr àpir kêt nē.

¹³ Na ka prem ixpyrà nē amnhī kaxyw Tīrtūm Kra hkôt ajamaxpēr nē hkôt amnhī xunhwý. Tā pa ā mē amā kagàja nhīpêx anē. Mē ate kamā harēnh nē mē pahte nhýrmā Tīrtūm mē Kra wa hwýr mē paxàpir ā mē pajarēnhja mar nē amnhī kaxyw hkôt ajamaxpēr o ri apa kaxyw nē kapēr prār o ri apa hkêt nē.

Mē pahte paxàmnhīx mēmoj tā Tīrtūm wýr ā mē pajarēnh Juāw 14.13-14

¹⁴ Nē mẽ pahpê Tirtūm krajaja na pu htem paxāmnhīx pajamakêtkati nē mẽmoj tā tanhmā hwÿr to ho papa. Kot puj mẽ kām hprām xà hkôt mẽmoj tā kuwÿ nhūm mẽ pama. ¹⁵ Na pu htem mẽmoj tā kuwÿ nhūm mẽ pamar mex nē mẽ pahte mẽmoj tā hwÿr xà hkôt tanhmā mẽ pamā mẽmoj nhōr to rÿ tanhmā mẽmoj to. Ra mẽ pahte ja mar mex.

Tirtūm kot tanhmā hkra hkêt xwÿnhjê nhīpêx to hā harênh

Rukre 22.31-32

¹⁶⁻¹⁷ Nē koja Kris kôt mẽ anhīō tanhmā amnhī tomnuj to ka mẽ atō tee ri ja hā omu nē ho Tirtūm wÿ. Ho awÿ kê nē tanhmā kot amnhī tomnuj tota o hapêx nē ja nē ho htÿx kê axte ā amnhī nhīpêx anhÿr kêt nē. Kot puj mẽ pahtō tanhmā amnhī tomnuj to nhūm Tirtūm tee ri ja hā mẽ pahpumu nhūm ja kêp omnuj nē. Tā kot puj mẽ amnhī tomnujta kaga nhūm ja hā mẽ pahpumunh kôt tanhmā hā mẽ pahto hkêt nē. Ām mẽ kot amnhī nhīpêx pixi koja ho hamakêtkati hkêt nē. Koja mēhō Tirtūm kaga ho hkaga nē aa hkôt amnhī xām kêt nē. Hāmri nhūm tee ri amnhī tā omu nhūm ja kêp omnuj tÿx kumrêx. Jakamā koja aa ho hkra hkêt nē. Nē aa kot hkaga ho hamakêtkati hkêt nē pa ho pa. Jakamā koja hkaga xwÿnhnta nhÿrmā ty nē kuri htīr tūm nē pa ho pa hkêt nē.

¹⁸ Nē mẽ pahpê Tirtūm krajaja na pu htem amnhī tomnuj o papa hkêt nē. Tirtūm Kra Jejus kot ja pymaj mẽ panē Satanasti pumunh mex jakamā nhūm tee ri mẽ pahte tanhmā amnhī tomnuj to hprām xà mẽ pano kupyrr kaprÿ ho ri pa. Ra mẽ pahte ja mar mex. ¹⁹ Mē pahpê Tirtūm kra na pu mẽ. No mẽ kêp hkra hkêt xwÿnhjaja Satanasti kot amnhī tā mẽ ho htÿx pyrāk o mẽ hipêx jakamā nhūm htem tanhmā amnhī tomnuj to ho pa. Mē pahte ja mar mex.

²⁰ Nē määnēn ja mẽ pahte mar mex. Na pre Tirtūm Kra mẽ pahwÿr wrÿ nē mẽ pamā tanhmā Tirtūm o amnhīrīt to ho pa. Tapxipix kêp Mēpahpām ā mẽ pamā ho amnhīrīt. Tā Jejus kukwak ri mẽ pahpê Tirtūm kra jakamā kot puj mẽ nhÿrmā wa kuri pahtīr tūm nē pa mex nē papa ho papa.

²¹ E Kris kôt ixkwÿjaja. Kêr ka mẽ Tirtūm kapêr kôt pix mā mǎn ri amnhī nhīpêx o ri apa rāhā nē. No nhām mẽ kot Tirtūm kapêr kwÿm ri mẽ amā kapêr o hêx xwÿnhjê kapêr ma nē ām mẽ ama nē mẽ hkôt amnhī nhīpêx hkêt nē.

Tā ām ja pix. Ixpê Juāw na pa krī piitā hkôt mẽ amā kaga nhīpêx nē kurē.

Sikūn Juāw
Juāw kot Jejus kôt
hkwýjê hwýr wam kagà
ně mēnh kôt hō mēnh

Juāw na pre kagàja nhīpēx. Je-
 jus nhý hā hkrájê jahkre ho ri pa
 xwýnhjê hō na pre. Jakamā na
 pre hkrī hō kamā Kris kôt htōx mē
 ō fāmii mā kagàja nhīpēx ně mē
 hwýr kumē. Na pre hte Tirtūm
 kapēr o mē hēx o pa xwýnhjê hō
 mē ō krī hwýr mra nhūm Juāw
 kràmnhwý nita omu ně htýx kot mē
 ahkre mex ā hkamnhīx. Hāmri ně
 kot Tirtūm kapēr o hkwýjê jahkre
 kaxyw amnhī nhōrkwý hwýr kuwý.
 Hāmri nhūm Juāw tee ri harēnh
 ma ně kām kagàja nhīpēx ně kamā
 kot amnhī wýr hwýr ně kām kapēr
 ně hprī hā kām tanhmā mē kot
 Tirtūm o hēx to ho pa hā tanhmā
 mē harēnh to. Kot kamā harēnh
 ně mē harēnh mar hāmri ně mē
 axkām hamak rom ně ri pa kaxyw.
 ā na pre Juāwja hkràmnhwý ni mē
 hkwýjê mā mēmoj jarēnh ně hā
 kagà ně mē hwýr mēnh anē. Ně mē
 kām:

¹ Pa Jejus kôt ixtōx. Xà mē amex?
 E ot pa mē amā kagà nhīpēx ně mē
 awýr kumē. Akrajaja ně apē mē
 hkatorxà mē mē ato ixpimràatā mē
 awýr kumē. Ixpē Juāw pigētre na
 pa. Inhmā mē akīnh nom papxipix
 inhmā mē akīnh kêt. Mē pahpyrà
 ně mē kot Tirtūm kôt amnhī xun-
 hwýr xwýnhjaja haxwýja kām mē
 akīnh. ² Mē pahte Tirtūm kapēr kôt
 ri amnhī nhīpēx rāhā ho ri papa
 jakamā na pu htem pamā axpēn
 kīnh o ri papa.

³ Na pa hte mē pahto
 Mēpanhīpēxà maati Tirtūm wýr o
 ixpa ně kām:

—Pa Tirtūm. Ot pa mē amnhī
 to awý. Akra Jejus Kris mē mē
 amnhī to war awý. Kêr ka wa mē
 ixkamā axukaprī ně mē ixkutā war

anojarêt rāhā ho ri apa. Ně tanhmā
 mē ixkrā hto pa mē ixàmnhīx ija-
 makêtkati ně ixkīnh ně mē inhmā
 axpēn kīnh ně axpēn to mex o ri
 axpēn kôt ixpa. Ně tām ri amnhī
 nhīpēx. Anē.

*Mē pamā axpēn kīnh kām axpēn
 to mex ā mē pamā karō*

*Juāw 13.34-35; Wam Juāw 2.7-9,
 3.14-18*

⁴ Ně na pa pre akra hkwýjê pumu
 nhūm mē inhmā amnhī jarē pa mē
 kuma ně mē ý hā ixkīnh ně. Na xep
 prem Tirtūm kôt amnhī xunhwý ně
 hkôt ri amnhī nhīpēx mex o pa.
 Mē kot Mēpanhīpēxà Maati Tirtūm
 kapēr ā kagà hkôt amnhī nhīpēx ā
 inhmā amnhī jarē pa mē kuma ně
 ixkīnh ně. ⁵⁻⁶ Jakamā na pa ā amā
 ixkapēr ně hā kagà anē. E kwa
 Kris kôt ixtōx. Kêr pu mē pamā
 axpēn kīnh o ri papa hā mēmoj to
 axpēn kutā panojarêt rāhā ho ri
 papa. ā ixujarēnh anhýrja nyw kêt.
 Amnepē mā mē ate Jejus kôt amnhī
 xunhwýr ā arīgrota ā na prem ā mē
 amā karō anē. Tā kêr pu mē arī
 pamā axpēn kīnh pê Tirtūm kapēr
 piitā hkôt amnhī nhīpēx mex o ri
 papa. Kapēr ā kagà kot ā mē pahte
 amnhī nhīpēx anhýr ā mē pamā
 karō.

*Tirtūm kapēr o mē hēx xwýnhjê
 jarēnh*

*Rōmān 16.17-18; Wam Ximotre
 5.22; Wam Juāw 2.18-26, 4.1*

⁷ Ně mē kot Tirtūm kapēr o hēx o
 ri mē pa xwýnhjaja na mē ra ma krī
 piitā hkôt mē kām tanhmā ho hēx
 to ho pa ně mē kām:

—Jesús kêp Tirtūm Kra hkêt ām
 mē panhīō na pre. Na pre Tirtūm
 mē pahwýr mēnh kêt ně. ām mē
 panhīō rūm na pre kato.

Anhýr o mē kām ho hēx o pa.
 Kām Kris kurê xwýnh maati ja nhý
 hā na htem ā ri ho hēx o pa anē.
⁸ Jakamā kwa mē amnhī ně mē
 omunh mex ně mē ama ně ām mē
 ama. Kot kaj mē kapēr ma ně mē

hkôt ajamexpēr hāmri nē mē ixte Tirtūm kapēr o mē ajahkreta kaga. Kwa mē arī mē ate amnhī nhīpêx nyw pix o mân amnhī nhīpêx rāhā o ri apa. Nē arī mē amā axpēn kīnh kām tanhmā axpēn to ajuta hto rāhā ho ri apa. Kêr kê Tirtūm ja hā mē apumu nē nhỹrmā mē ato mex nē. ⁹ Nom kot kaj mē nhām mē kapēr punujja kôt amnhī nhīpêx nē Kris kôt amnhī nhīpêx kêt nē nhūm Tirtūm mē akôt pa hkêt nē. Nom kot ka mē arī Kris kôt amnhī nhīpêx mex nē hāmri nhūm Tirtūm mē Kra Jejusja wa mē akôt ri pa ho pa rāhā nē. ¹⁰ Jakamā koja ā Tirtūm kapēr ā kagà kuhpa hā Jejus o hêx xwỹnhjaja mēmo arīgro hā mē anhō krī hwýr pōj ka mē omu nē amnhī nhōrkwỹ hwýr mē hwýr kêt nē. Nē tanhmā mē kām akapēr to hkêt nē. ām ri mē hkàx ā ri mra. ¹¹ No kot kaj mē ā mē hipêx anhỹr kêt nē mē hwýr mra nē mē mar o akuhē hāmri nē te mē ate mē hkôt amnhī nhīpêx o amnhī nhīpêx pyrāk. Ja pumaj kêr ka mē nhỹri mē omu nē mē htêp kêt kumrêx.

Kagà jatur xà

Hapuhā Juāw 13-15

¹² E Kris kôt ixtōx. Ixkapēr jatur xà na ja. Ixkapēr ā kagàja ām hakotre nom inhmā mē amā ixkapēr ry hprām. Jakamā kot paj mēmo arīgro hā ma mē awýr mō pu mē axpēn pumu nē pahkīnh nē. Pa rīkormā mē amā ixkapēr jatur xàm kumē ka mē aprī hā inhma.

¹³ Nē ota jar Kris kôt atōx krajaja awýr hpēr mē.

E ixpê Juāw pigêtre na pa ā awýr kagàja nhīpêx nē mēnh anē.

Hapuhã Juãw Juãw kot Jejus kôt hkwýjê hwýr kagã nê mênh o axkrut kôt hõ mênh

Juãw na pre mãânên kagàja nhípêx. Jejus nhỹ hà hkrajê jahkre ho mẽ pa xwýnhjê hõ na pre. Tã hkràmnhwý Gajore mã kagàja nhípêx nê hwýr kumê. Na pre Jejus kwýjaja ma krĩ piitã hkôt mẽ kãm Jejus kapêr jarênh o ri mẽ hkôt pa. Jao Gajore nhõ krĩ hwýr pøj nhũm Gajore mẽ hpôx ã mẽ harênh ma nê amnhĩ nhõrkwý hwýr mẽ kuwý. Jakamã nhũm pre htem ma õ krĩ hwýr pa hãmri nê kuri pøj. Nhũm Juãw ã Gajore kot amnhĩ nhípêx anhýr ã harênh ma nê hkĩnh nê hwýr kagàja nhípêx nê kumê. Nê kamã kãm mẽhõ pê Xotre kot tanhmã amnhĩ tomnuj to ho pa hã harê. ã na pre Juãwja Gajore mã mẽmoj jarênh nê hà kagã nê hwýr mẽnh anê. Nê kãm:

¹ Pa ixkràmnhwý Gajore? Xà amex? E ot pa awýr kagàja nhípêx nê kumê. Apê ixkràmnhwý mex na ka. Inhmã akĩnh.

²⁻³ Na pre ra Kris kôt pahtõ hkwýjaja ixwýr pøj nê tanhmã inhmã ajarênh to. Na ka xep hte Tĩrtũm kôt amnhĩ nhípêx mex rãhã ho ri apa. Pa ajarênh ma nê anhỹ hà ixkĩnh nê. Nê ato Tĩrtũm wýr o ixpa. Kot ato mex nhũm amex nê ajamakêtkati nê apa ho apa kaxyw. Nê axã hkêt nê amex nê ri apa kaxyw.

⁴ Ixte Tĩrtũm kapêr o mẽ ajahkre o ri ixpa jakamã te mẽ apê ixkra pyrãk. Tã pa tanhmã ate mẽ pahkwýjê nhípêx to ho apa hã ajarênh ma nê ixkĩnh nê.

*Gajore kot tanhmã Jejus kôt
hkwýjê ho mex to hã harênh
Wam Korĩt 16.10-11*

⁵ E ixkràmnhwý. Na ka xep hte Jejus kôt pahtõjê ho mex o ri apa. Aa ate mẽ omunh kêt tã nhũm htem ma anhõ krĩ hwýr pa ka mẽ omu nê apê Jejus kôt mẽ htõ hã mẽ ho mex nê. ãm hãmri na ka hte ã mẽ hipêx anhýr o ri apa Gajore. ⁶ Na pre ra mẽ hkwýjaja akupýn ixwýr pøj nê mẽ ixpê Kris kwýjê mã amnhĩ tã ajarê. Amã mẽ hkĩnh nê ate tanhmã mẽ ho mex to hã ajarê. Nhũm prem nojarêt ka xep pre mẽ kãm pry hã mẽ apkur xã hã mẽmoj gõ nhũm mẽ inhmã ajarê. Na ãm hãmri na ka hte ã mẽ ho mex o apa anê. ã ate mẽ hipêx anhýr o apata ã na hte Tĩrtũm apumu nê hkĩnh nê. ⁷ Na htem krĩ piitã hkôt mẽ kãm Kris kot tanhmã mẽ panê amnhĩ nhípêx to hã harênh kaxyw ma mẽ hwýr pa. Nom mẽ apkur xã hprãm xàj mẽ kot Kris kôt amnhĩ xunhwýr kêt xwýnhjê hwýr pa hkêt nê. ⁸ Jakamã kwa kêr pu mẽ papajaja mẽ pahpê Jejus kôt mẽ htõ hã mẽ kãm mẽõ hkwý nhõr o papa. Kot puj mẽ ã mẽ ho ajuta anê nê te mẽ pajaxwýja mẽ ãhkõ hã ri mẽ kãm Kris jarênh o ri papa pyrãk.

*Xotre kãm Juãw kapêr mar prãm
kêt ã harênh*

Matêwre 20.25-28, 23.1-12

⁹ Nê ra ixte anhõ krĩ kamã mẽ apê Kris kwýjê mã kagã nê mẽnh nhũm mẽ ate kamã harênhnta. Na xep pre Xotreja kuma nê ãm kuma. Kêp mẽ akrãhtũm prãm xàj kãm ixkapêr mar prãm kêt nê. ¹⁰ Na xep hte tanhmã ixto hêx to ho pa. Nom papxipix ixto hêx kêt nê. Mãânên Kris kôt mẽ pahtõjaja nhỹhýnh krĩ hõ rũm mẽ awýr pan pøj nhũm xep tanhmã mẽ amã mẽ ho hêx to. Nê mẽ hpôx ã mẽ omu nom amnhĩ nhõrkwý hwýr mẽ hwýr kêt nê. Tã ka mẽ kurom amnhĩ nhõrkwý hwýr mẽ awý nhũm xep tee ri ja hã mẽ apumu nê mẽ akamã gryk nê mẽ hã mẽ amã akir nê Tĩrtũm mã amnhĩ jarênh xã hã ixkre nê mẽ ajano. Na xep hte ã amnhĩ nhípêx

anhÿr o pa. Jakamā kot paj nhÿrmā ma mē awÿr mō hāmri nē mē apiitā mē anoo mā hā kām akir. Tanhmā kot mē ixto hêx to nē tanhmā kot amnhī tomnuj to hā kām akir ka mē apiitā hā inhma.

Mē pahte mē kot amnhī tomnuj xwÿnhjê hkôt amnhī nhīpêx kêt ā mē pamā karō

Rukre 6.45; Rōmān 12.9

¹¹ E kwa ixkrāmnhwÿ. Kêr ka ā Xotre kot amnhī tomnuj o pa anhÿrja kôt amnhī nhīpêx kêt nē. Mē kot amnhī tomnuj o mē pa xwÿnhjaja na htem Tirtūm kôt amnhī nhīpêx kêt nē. No kêt mē kot amnhī to mex o ri mē pa xwÿnhjaja na mē kēp Tirtūm kra jakamā kêr ka mē ā mē kot amnhī nhīpêx anhÿr xwÿnhjê kôt pix mā amnhī nhīpêx.

Temētre jarēnh

¹² Nē Temētre na hte tām ri amnhī nhīpêx nē ām hāmri Tirtūm kapêr o mē ahkre mex nē nhūm mē piitā axpēn mā mex ā harē. Pa hte ijaxwÿja mē kām mex ā harēnh o ri mē hkôt ixpa ka htem inhma. ām hāmri na pa hte tanhmā harēnh to ho ri ixpa.

Kagà jatur xà

Sikūn Juāw 12-13

¹³ E kagàja kamā na pa ām ja pix jarē nē hā kagà nē awÿr kumē Gajore. Na pa kormā harēnh jatur xà mēnh kêt nē. ¹⁴ Nom kot paj tokyx ma awÿr mō hāmri nē rī kormā amā hatur xām kumē.

E kê Tirtūm akutā nojarêt rāhā ho pa.

Nē ota jar Kris kôt akrāmnhwÿjaja awÿr hpêr mē. Nē kêr ka atar Kris kôt ixkrāmnhwÿjê mā ijarē.

Tā ām ja pix. Ixpê Juāw pigêtre na pa ā awÿr kagà nhīpêx nē mēnh anē.

Jutre Jutre kot Jejus kôt hkwýjê piitã hwýr kagã nê mênh

Jutre na pre kagãja nhîpêx. Xi-akre pyrà nê kêp Jejus tō na pre. Tã kagãja nhîpêx nê krî piitã hkôt Jejus kôt hkwýjê hwýr kurê. Na pre mē hkwýjaja kêp Jejus kwý hã amnhî jarênh tã axtem nê tanhmã amnhî tomnuj to ho pa. Jakamã nhũm Jutre kagãja kamã Jejus kwýjê mã hprî hã tanhmã mē harênh to nê mē kot mē hkôt amnhî nhîpêx nê mē kãm kapêr kãm hihtýx nê. Nê mē kãm:

¹ Pa Jejus kôt ixtō nê ixtōxjaja. Xà mē amex? E ot pa mē amã kagã nhîpêx nê mē awýr kurê. Tirtũm kot ixpyrà nê amnhî kaxyw mē axunhwýr xwýnhjê hwýr. Mēpanhîpêêxã Maati Tirtũm kãm mē pahpiitã mē pajapê jakamã na hte Kra Jejus Kris mē wa mē pahãnopxar mex rãhã ho pa.

Ixpê Jutre na pa hte Jejus Kris mã tanhmã amnhî nhîpêx to ho ri ixpa. Nê ixpê Xiakre htō na pa.

² Na pa hte mē ato Tirtũm wýr ho ixpa nê kãm:

—Pa Tirtũm. Kwa mē kot Akra Jejus kôt amnhî xunhwýr xwýnhjê pumu nê amã mē hapê hã mē kamã axukaprî rãhã ho apa. Kê mē kamã amnhî krit nê amnhîx hamakêtkati nê ri tanhmã amnhî nhîpêx to ho pa. Nê mē kãm axpên kînh o ri axpên kôt pa. Anê.

Mē kot Tirtũm kapêr o hêx xwýnhjê jarênh

Wam Ximotre 1.18-20, 6.12

³ E ixkrãmnhwýjaja. Nã inhmã mē akînh. Na pa pre jãã mē amã kagã hkwý nhîpêx kaxyw. Mē pahte Jejus Kris kukwak ri amnhî nhîpêx nyw ã tanhmã mē pajarênh to nê hã kagã kaxyw tã kormã harênh

kêt nê. Kot paj axtem mēmoj jarê. Na pre Tirtũm mē pamã kot amnhî nhîpêx o amnhîrit pa. Nê kapêr o amnhîrit pa. Mē pahte mar nê hkôt amnhî nhîpêx kaxyw. Jakamã kêr pu mē kapêr mar týx nê amnhî krã hi kamã haxãr týx nê hã papa. Nom koja mēhō kapêr kuhpa hã tanhmã mē amã kapêr o hêx to ka mē ama nê amã.

⁴ Na xep ra kapêr o mē hêx xwýnhjaja mē akôt pa nê mē apyrã nê Jejus kôt amnhî xunhwýr ã amnhî jarê nom amnhî to hêx. Ka xep mē aprî hã mē hêx ã mē omunh kêt nê mē kêp Jejus kôt mē atō hã mē hkamnhîx nê atýx amnhî nhōrkwý hwýr mē awý. Nom mē kot Tirtũm kapêr o hêx pix kaxyw na htem mē akôt pa nê mē amã kapêr o:

—Tirtũm kãm mē pajapê htýx kumrêx nê mē pakutã nojarêt ho pa jakamã kwa kêr pu mē mãmrî nhãm mênijê ho amnhîkati ho papa. Koja ja hã mē pahpumu nê tanhmã hã mē pahto hkêt nê. Kãm mē pajapê kênã kot kêt hã tanhmã mē pahto. No kêt Jejus Krisja mē ate kêp mē panhō Pahihti hã harê nom kêp mē panhō patrãw rý kêp mē panhō Pahihti hkêt. Anê.

Ã Tirtũm kapêr kuhpa hã mē amã harênh anhýr o pa. Tirtũm kapêr ã kagã htũm kot amnepê mē hkukamã tanhmã mē harênh to nê mē harênh kot:

Ã mē kapêr anhýr o paja mýrapê koja mē mex kêt nê pa.

Koja Tirtũm mē homnuj týx kumrêx.

Anhýr o kot mē harênh. Tã pa mē amã ixprî hã mē harê nê hã kagã. Mē ate inhmar nê amnhî nê mē omunh mex kaxyw.

Tirtũm kot tanhmã mē kot amnhî tomnuj xwýnhjê nhîpêx to hã harênh Sikũn Pêtre 2.1-17; Sikũn Ximotre 3.1-9

⁵ Nê amnepê mã mē panhîgêttjaja kormã Ejit kamã mē pa ri nhũm

Tirtùm Ejit nhõ xwýnhjê rùm mẽ kator pa. Hãmri nhùm mẽ hkwyjaja tanhmã hamaxpêr to nê axtem nê amnhĩ kaxyw hkõt hamaxpêr kêt nê. Nhùm tee ri amnhĩ tã mẽ omu nê ã mẽ kot amnhĩ nhĩpêx anhÿr xwýnhjê nhĩmex pa. Ra mẽ ate mẽ harênh mar mex tã pa axte mẽ amã mẽ harê.

⁶ Nê Tirtùm kapêr o mẽ wrÿk xwýnh kwýjaja. Na prem Tirtùm nhÿ hã kapêr o pa htã tanhmã hamaxpêr punuj to nê ra kãm ja ho anhÿr prãm nõkati nê Tirtùm kaga. Jakamã nhùm mẽ hã amÿné nhùm mẽ unê nê kàx o mẽ hkaxpre pa. Nê nhÿri pika kaxwýnh kãm kamàt kô htyk kãm mẽ kurê nhùm mẽ arĩ kamã hkrĩ ho hkrĩ. Nom koja nhÿrmã Tirtùm kot tanhmã mẽ pahpiitã mẽ pajarênh to xà hã arĩgro kato nhùm mẽ rĩ kormã hapôx pa. Hãmri nê kot amnhĩ tomnuj mÿrapê ma mẽ kot amnhĩ xà htÿx kamã hamak tùm xàta wÿr ma hapêx.

⁷ Nê krĩ pê Sotõ nê Komo nhõ xwýnhjaja na prem haxwýja kãm Tirtùm kapêr kõt amnhĩ nhĩpêx prãm kêt nê. Nê krĩa wa hpuhã krĩ hkwy kamã ri mẽ pa xwýnhjaja haxwýja mẽ uràk nê nê kãm kapêr mar prãm kêt nê. Na prem amnhĩ tomnuj tÿx rãhã ho pa. Nê axtem nê axpên pê ri mẽ hprõ ho amnhĩkati ho pa. Nê mẽmy hkwyjaja ri axtem nê axpên to amnhĩkati ho pa. Hãmri nhùm Tirtùm tee ri mẽ kot amnhĩ nhĩpêxja ã omu nê mẽ hipy kuwy hpòk kwý rê nhùm mẽ amnhĩ wÿr omu nê kãm ma xàj tee ri hprõt kaprÿ. Nê hprõt kaxyw òrkwÿ rùm hapôj nê hxêt pa nê hapêx. Na hte ã Tirtùm mẽ kot amnhĩ tomnuj o mẽ pa xwýnhjê nhĩpêx anê. Jakamã koja nhÿrmã kuwy hpòk rãhã xwýnhta wÿr mẽ piitã mẽ rênh pa nhùm mẽ kamã amnhĩ xà htÿx kamã hamak rãhã ho pa ho pa nê aa ã hapêx kêt nê. Nê ã htÿx rãhã papa ho pa. Tã mẽ pahte Sotõ mẽ Komo nhõ xwýnhjê jarênh mar nê

mẽ pahte amnhĩ tomnuj kaga kurê kumrêx kaxyw na pre Tirtùm ã mẽ pamã mẽ harênh o amnhĩrit anê.

Mẽ hpijaàm kêt xwýnhjê jarênh

Sikùn Pêtre 2.10

⁸ Nê mẽ kot Tirtùm kapêr o pihkàr xwýnhjaja na htem ã mẽ kot amnhĩ nhĩpêx anhÿr xwýnhjê pyrã nê amnhĩ tomnuj tÿx pix o ri pa. Jakamã na htem tanhmã hpimtir punuj to hãmri nê hkrã hapôj nê hpimtir xà hkõt tanhmã amnhĩ tomnuj to. Jao hkwyjê kamã hpijaàm kêt o pa. Rÿ mênijê hõ rÿ mẽmyjê hõ nhùm mẽ axpên kãm hpijaàm kêt o pa. Rÿ Tirtùm kapêr o mẽ wrÿk xwýnhjê ho kapêr punuj nê. Kapêr mã gêt o tanhmã mẽ ho kapêr punuj to. ã na htem hpimtir punuj xà hkõt amnhĩ tomnuj o pa anê. ⁹ Tirtùm kapêr o mẽ wrÿk xwýnh krãhtùm Mikewja. Kêp mẽ hkrãhtùm tã aa mẽ kãm kapêr mã gêt kêt nê. Na pre Mojes ty nhùm Mikew ra ma hwÿr tèn wrÿ. Nê kuri Satanasti pumu hãmri nê Mojes nhĩ nê tanhmã kãm kapêr to. Nom kapêr mã gêt o kãm kapêr kêt nê. ãm kapêr mã hprĩ ho kãm kapêr nê kãm:

—Kwa ãm omu kê nõ. Kot kaj tanhmã ho nhùm Tirtùm apumu nê hã tanhmã hã ato. Anê.

¹⁰⁻¹¹ Nom ixte mẽ amã mẽ hpimtir punuj jarênh xwýnhjaja. Mẽ kot Tirtùm kapêr o pihkàr xwýnhjaja kot hprĩ hã Tirtùm kot amnhĩ nhĩpêx ã harênh mar kêt jakamã na htem htÿx ri ho kapêr o haprÿ ho pa. Te ho mry xoprêja hamaxpêr kêt nê htÿx ri amnhĩ nhĩpêx o pa pyrãk. Nom koja nhÿrmã Tirtùm mẽ homnuj tÿx nê.

Te mẽ kot finat Kaĩ kot amnhĩ tõ hprĩ xwýnh kot amnhĩ nhĩpêxta pyrãk. Nê te mẽ kot finat Paraãw kot amnhĩ nhĩpêx pyrã nê kàxpore rũnh prãm xàj Tirtùm kapêr kuhpa hã tanhmã amnhĩ nhĩpêx to ho pa. Nê te mẽ kot finat Kore kot amnhĩ nhĩpêx pyrã nê Tirtùm kot

mê kaxyw mẽ õ pahi xãm xwỳnhnta kutã amnhĩ xunhwỳ. Mỳrapê koja mẽ jaje pyrã nê kuwy hpòk rãhã xwỳnhnta wỳr ma hapêx pa.

¹² Na ka htem apê Jejus kwỳ hã axpẽn wỳr akuprõ. Nê tõiã mẽ apê hkwy hã amã axpẽn kĩnh ã axàpkur kaxyw axpẽn wỳr akuprõ. Nhũm ixte mẽ amã mẽ harẽn xwỳnhjaja mẽ akõt agjê nê mẽ akutã apku. Jakamã kwa mẽ o kora mẽ amnhĩ nê mẽ omunh mex nê. Mẽ hipêx o te mẽ ate mẽ axàpkur xà hã mẽ anhõ kamã kẽnre pumunh nê hanhir nê rẽn pyrã nê amnhĩ nhĩhkõ hã mẽ pumu nê amnhĩ nê hanor kurẽ kumrêx. Na htem hpijaam kêt kãm amnhĩ pix kukamã hamaxpêr pê apkur rũnh o pa.

Te na wrỳk kaxyw htyk rax nê mõi nhũm mẽ kot omunh nê wrỳk ã hkamnhĩx tã nhũm kòk kot nhãm mẽn nhũm wrỳk kêeta pyrãk o na htem amnhĩ nhĩpêx. Jao te mẽ kot ãm hãmri mẽ amã Tĩrtũm kapêr jarẽn mex pyrãk tã mẽ amã ho hêx.

Nê te mẽ kêp mẽmo pĩ hpàr ra õ mã tãm tã ãm htỳx rã nê aa õ hkêt nhũm mẽ kot krãhyr nê mẽn nhũm grã parta pyrãk.

¹³ Nê te mẽ kêp gõ xujanãr kot amnhĩ nhĩpêx pyrãk. Na hte gõ xujanãrja hakax wỳr kapê nê mra nhũm hamrõ kỳxpê amgrã kamã arĩk nhũm gõ awjanã nê ma akupỹm hipòk wỳr mra. Ja pyrãk na htem ma nhỹhỹm mra nê mẽ kãm mẽmoj jarẽ nê nhãm mra nê mẽ kãm mẽmoj jarẽ nê ma akupỹm mẽ kurũm mra. Nhũm mẽ mar xà hkõt amnhĩ tomnuj rãhã ho pa.

Nê te mẽ kot kaxkwa hã kanhêre nhỹhỹm htêm nhũm mẽ kot nhỹhỹm htêm xà hkõt omunh kêeta pyrãk. Jakamã koja Tĩrtũm nhỹmã kamãt kò kamã mẽ rẽn pa nhũm mẽ aa hapõx kêt nê.

*Mẽ kot amnhĩ tomnuj xwỳnhjê hkukamã mẽ harẽn
Apokarip 20.11-15*

¹⁴ Nê na pre finat Enokja anepê mã ã mẽ kot amnhĩ tomnuj anhỹr xwỳnhjê hkukamã tanhmã mẽ harẽn to. Mẽ kot Tĩrtũm kapêr o pihkàr o ri mẽ pa xwỳnhjaja nhũm mẽ hkukamã mẽ harẽ. Enokja finat Atãw kanrêhã htãmnhwỳ na pre. Tã ã mẽ kot amnhĩ tomnuj anhỹr xwỳnhjê hkukamã mẽ harẽn o:

Koja nhỹmã Pahihtija man pika hwỳr akupỹn wrỳ. Kapêr o mẽ wrỳk xwỳnh xohtõ rax mẽ mẽ hpimrãatã akupỹn wrỳ.

¹⁵ Hãmri nê mẽ pahpiitã kormã mẽ pahtır ri mẽ pahte tanhmã amnhĩ nhĩpêx to ho papa hã mẽ pahpumunh xà hkõt tanhmã mẽ pajarẽn to. Hãmri nê mẽ kot Tĩrtũm kapêr o hêx o pa xwỳnhjê pumu nê tanhmã mẽ harẽn to nê mẽ harẽn o: “Jajaja na pre mẽ kãm Inhĩpêxã Tĩrtũm prãm kêt nê ri kapêr kwỳm pix mã amnhĩ nhĩpêx o pa. Nê kapêr punuj o pa. Æ na prem amnhĩ nhĩpêx anhỹr rãhã ho pa.” Anhỹr o mẽ harẽ nê amnhĩ nê kuwy hwỳr mẽ kurẽ nhũm mẽ amnhĩ xà htỳx kãm hamak o pa rãhã nê pa ho pa. Anê.

Æ na pre finat Enokja mẽ hkukamã mẽ harẽn anê. ¹⁶ Æm hãmri na mẽ harẽ. Tã na hte arĩ mẽ hkwỳjaja ã amnhĩ nhĩpêx anê. Nê hamaxpêr mex kêt nê. Na htem nhãm tanhmã mẽ ho kapêr punuj to pix kukamã hamaxpêr. Nê amnhĩ krã hkõt htỳx ri tanhmã amnhĩ tomnuj to ho pa. Nê amnhĩ to jarkrar rãhã nê. Nê hêx rom mẽ kêp mẽmoj jamỳnh kaxyw tanhmã mẽ kãm hêx to.

¹⁷ E Kris kõt ixkrãmnhwỳjaja. Koja mẽ ã mẽ amã Tĩrtũm kapêr o hêx anhỹr o mẽ akõt pa ka mẽ ama nê ãm mẽ ama nê mẽ kapêr mar kêt nê. ãm mẽ panhõ Pahihti Jejus Kris nhỹ hã mẽ ajahkre o mẽ pa xwỳnhjaja kot tanhmã mẽ amã mẽ harẽn toja mã mãn kêt ajamaxpêr

týx rāhā o ri apa. ¹⁸ Na prem mē amā mē harēnh o:

—Jejus akupŷn wrýk xwýj ri koja mēmojaja mē awýr mran pój. Nom mē kot Jejus kapēr kwým amnhī krā hkôt tanhmā amnhī nhīpēx to xwýnhjaja koja mē. Hāmri nē mē apē Jejus kwý hā mē apumu nē mē atā akunha nē mē atā hpēr o axkē nē Tirtūm ā hpēr o axkē nē kapēr ā kagā hā hpēr o axkē. Anē.

¹⁹ Ā mē kot amnhī nhīpēx anhýr xwýnhjaja mē pahpē Jejus kwýjaja mē pahte expēn kutā amnhī xunhwýrja na mē kām hprām. Mē kamā Tirtūm Karō gjēx kēt jakamā mē kām amnhī krā hkôt pix mā tanhmā amnhī tomnuj to ho pa hprām.

Mē pahte Kris akupŷn wrýk jamār pē tanhmā amnhī nhīpēx to hā mē pamā karō

Matēwre 24.45-51; Rukre 12.25-40; Karatas 6.1-2; Xiakre 5.19-20; Siktūn Pētre 3.12-15

²⁰ Kwa mē apē Jejus kôt ixtō nē ixtōxjaja kēr ka mē ā mē kot amnhī nhīpēx anhýr o mē pa xwýnhjē rom apkati mē amnhī kaxyw Jejus pix mā mán ajamaxpēr rāhā ho ri apa. Te mē kot mē hakre hā ra āptār nē amnhī krām mē hakre xā jagjēnh týtta pyrāk.

Jao Tirtūm kapēr mar týx nē hkôt amnhī nhīpēx mex o ri apa.

Nē Karō nhý hā amnhī to hwýr rāhā nē.

²¹ Nē Tirtūm kām mē pajapē hā kām ajamaxpēr rāhā ho ri apa. Nē Pahihti Jejus Kris kām mē pajapē hā kām ajamaxpēr týx rāhā ho apa.

Koja nhýrmā kām mē pajapē hā akupŷn mē pahwýr wrý nē tanhmā mē pahto mex to pu mē kuri pahtír tūm nē pahkīnh nē papa ho papa. Tā kēr pu mē arī akupŷn mē pahwýr wrýk xā hā arīgro jamār rāhā ho papa.

²² Nē mē pahkwýjaja kormā mē kot Jejus kôt amnhī xunhwýr týx kēt xwýnhjaja kēr ka mē kamā axukapri nē aprī hā mē kām Tirtūm kapēr jarēnh o ri mē hkôt apa. ²³ Na pre ra mē hkwýjaja mē kot Tirtūm kapēr o pihkār xwýnhjē kapēr ma nē mē hkôt amnhī nhīpēx. Jakamā kēr ka mē ja hā mē omu nē te mē ate kuwy hpōk rūnh nē mē hpa hā mē hamýnh nē nhām mē rēnh pyrāk o mē hipēx. Jao mē kot nhýrmā Tirtūm kapēr o pihkār xwýnhjē hkôt kuwy hpōk rūnhta wýr pa pymaj mē nē mē kām akapēr kām axihtýx o ri mē hkôt apa. Kē mē ama nē mē hkaga nē mē hkôt ri amnhī nhīpēx kēt nē.

Nē htýx ri mē kot amnhī tomnuj o mē pa xwýnhjaja kēr ka mē kamā axukapri ho ri apa nē mē kamā agryk tokyx anhýr kēt nē. Xatā mē kām Tirtūm kapēr jarēnh rāhā ho ri mē hkôt apa. Nom kwa mē okora kēr ka mē kot amnhī nhīpēx o amnhī nhīpēx o ri apa hkēt nē. Kwarī ho kwarī.

Jutre kot Tirtūm mā mex o mex ā harēnh

Wam Pētre 1.5-7

²⁴ Nē kēr pu mē Tirtūm mā amnhī jarēnh kaxyw nē ā kām amnhī jarēnh anē nē kām:

—Pa Tirtūm. Nā ām hāmri na ka hte amnhī kôt mē ixunhwýr týx nē pa mē akaga hkēt nē akôt amnhī nhīpēx rāhā ho ri ixpa. Kot kaj nhýrmā amnhī wýr mē ixtō api pa mē Akra mē war akuri axte tanhmā amnhī tomnuj to hkēt nē. Nē amnhī to mex pē anhīrā htýx rax kām ixpa. Jao ixkīnh týx nē ixpa ho ixpa.

²⁵ —Apē mē inhō Tirtūm ā apyxi mex kumrēx na ka. Na ka pre Pahihti Jejus Kris kukwak ri mē xpiitā mē ixte amnhī tomnuj pē mē ixpytā. Nē na ka hte anhīrā htýx rax rāhā ri apa. Nē amex o amex nē axihtýx o axihtýx nē axāhpumunh o axāhpumunh. Nē apē mē inhō Pahi

Maati hã apyxi mex na ka. Amnepê
 mã kormã mẽmoj kêt ri ka pre ã
 amnhĩ nhĩpêx anhỹr o apa rãhã nẽ.
 Tã arĩ ã ate amnhĩ nhĩpêx anhỹr ho
 apa ho rãhãã. Nẽ kot kaj apkati mẽ
 ã ate amnhĩ nhĩpêx anhỹr ho rãhãã.
 ã ate amnhĩ nhĩpêx anhỹr o apa ho
 rãhã ho rãhã. Tã ãm ja pix na hapêx.
 Anẽ.

E kêr pu mẽ ã Tĩrtũm mã mex o
 mex ã harẽnh anhỹr o papa.

Ãm ja pix. Ixpê Jutre na pa mẽ
 awỹr kagàja nhĩpêx nẽ kumẽ.

Apokarip

Juãw kot Jejus nhỹ hã mẽmoj kukamã harẽnh

Juãw na pre mẽ pamã kagàja nhĩpêx. Juãw Paxis kêt axtem Jejus nhỹ hã hkrajê jahkre ho mẽ pa xwýnhjê hõ pè Juãw na pre hipêx. Na pre Jejus ã mẽ kãm hkurê xwýnhjaja uné nẽ ma gô hipòk pè Patos wýr kumẽ nhũm kęp prês nẽ gô hipòk kãm pa ho pa nẽ aa kurũm kator kêt rãhã ty.

Jakamã kormã htĩr ri nhũm Tĩrtũm kapêr o wrýk xwýnhjê hõ gô hipòkja wýr wrý nẽ kãm mẽmoj kukamã awjarẽ nhũm kuma nẽ hkôt mẽmoj pumu. Te hpimtir kãm mẽmoj pumunh pyrãk. Hãmri nẽ omu nẽ kuma nẽ amnhĩ xô ri mẽ pamã hã kagà. Na pre mẽmoj to axkrunêpxi nẽ hã kagà. Mẽ kot Jejus kutã amnhĩ xunhwýr xwýnhjaja kot Jejus ã tanhmã kęp hkwyjê to ho pa nhũm mẽ hkwyjaja pikaprãr ã kagà. Nẽ Jejus kęp Pahi Maati hã kot nhỹrmã mẽ kot Tĩrtũm kutã amnhĩ xunhwýr xwýnh piitã ma mẽ kot amnhĩ xà htýx kamã hamak tũm xà hwýr mẽ rẽnh par ã kagà. Nẽ Tĩrtũm kot nhỹrmã hkrajê ho mex kumrêx ã nhũm mããnẽn hã kagà. Hãmri nẽ mẽ pamã hã kagà o:

¹⁻² E kot paj mẽ amã awjarẽ nẽ hã kagà. Ixpê Juãw ixte Tĩrtũm mã tanhmã amnhĩ anhĩpêx to ho ixpa xwýnh kot paj mẽmoj jarẽ nẽ hã kagà. Na pre Tĩrtũmja Jejus mã mẽmoj kukamã tanhmã ujarẽnh to ho ra kãm ho amnhĩrĩt pa. Kot amnhĩ xô ri mẽ pahte hkôt amnhĩ xunhwýr xwýnhjê mã harẽnh kaxyw. Hãmri nhũm kuma nẽ kot amnhĩ xô ri inhmã ujarẽnh kaxyw man ixwýr kapêr o wrýk xwýnh mẽ nhũm man ixwýr wrý nẽ ô ri inhmã mẽmoj to amnhĩrĩt

pa. Æm hãmri ã inhmã mẽmoj to amnhĩrĩt anẽ. Tã kot paj amnhĩ xwar mẽ apê Jejus kot ri mẽ apa xwýnhjê mã harẽ nẽ hã kagà. Mẽ ate mar nẽ axkãm ajamak rom nẽ ri apa kaxyw. Nà ixte hã kagà mã xwýnhja koja tanhmã amnhĩ to nẽ tokyx mẽ pahwýr wrý. ³ Jakamã kwa kêr ka mẽ aprĩ hã kagàja kamã harẽ nẽ ama nẽ hkôt pix mã amnhĩ nhĩpêx nẽ mẽ piitã mẽ kãm kamã harẽnh o ri mẽ hkôt apa. Kot kaj mẽ ã amnhĩ nhĩpêx anẽ nhũm Tĩrtũm ja hã mẽ ato mex ka mẽ akĩnh nẽ apa ho apa. Nẽ mẽ kot mẽ axjarẽnh mar nẽ hkôt amnhĩ nhĩpêx xwýnhjaja koja Tĩrtũm ja hã mẽ omu nẽ mẽ ho mex nẽ nhũm mẽ apyrã nẽ hkĩnh nẽ pa ho pa.

Juãw kot krĩ pè 7 kôt Jejus kwýjê hwýr kagà rẽnh

⁴ E ixpê Juãw kot paj atar pika pè As kamã krĩ pè 7 piitã hkôt mẽ apê Jejus kwý hã axpẽn wýr mẽ apikuprõnh xwýnhjê hwýr kagà nẽ kurê ka mẽ kamã harẽ nẽ ama.

Na pa hte mẽ ato Tĩrtũm wýr rãhã ho ri ixpa. Nẽ mẽ ato hwýr o:

—Pa Tĩrtũm. Kwa kêr ka pika pè As kamã akrajê ho mex nẽ mẽmoj to mẽ kutã anojarêt rãhã ho apa. Kẽ mẽ hamakêtkati nẽ amnhĩx ri pa ho pa. Ja na inhmã hprãm. Anẽ.

Tĩrtũmja rãhã ho rãhã. Amnepêm kormã mẽmoj kêt ri nhũm pre ra rãhã ho rãhã. Nẽ koja nhỹrmã mẽmoj akupým hapêx par tã nhũm Tĩrtũm aa hapêx kêt kumrêx. Koja arĩ rãhã ho rãhã. Na hte kaxkwa kamã kot mẽ pahto amnhĩptãr ã hkrĩ xà kamã mẽ papytãr rãhã ho hkrĩ.

Nẽ Tĩrtũm Karõ te kot Tĩrtũm kot mẽ pahto amnhĩptãr xà hã hkrĩ xà kapem kanê maati pixi kamã kwýr pè 7 xãm xwýnhhta pyrãk. Na hte Tĩrtũm nhĩhkõ hã hkrĩ ho hkrĩ. Tã kẽ mẽ ato mex rãhã ho pa.

⁵ Nẽ Jejusja na pre hte Tĩrtũm kapêr o mẽ ahkre mex o pa nẽ aa

hkaga hkêt nê. Tã nhũm prem ax-tem nê kupĩ. Hãmri nhũm Tĩrtũm akupỹm ho htĩr. Jejus kumrêx ho htĩr nhũm htĩr o htĩr. Nê kêp pika piitã hkôt pahi piitã nhõ Pahihti. Kãm mē pajapê htỹx jakamã na pre mē panê ty nê hkamrõja te mē panê hpikapĩr pyrãk o amnhĩ nhĩpêx. Nê htyk o mē pahte amnhĩ tomnuj pãnhã amnhĩre. Jao te mē pahte amnhĩ tomnuj pē mē papytãr par pyrãk o mē panhĩpêx. ⁶ Nê na pre mē pahpê patre nê mē piitã mē ho Hipêêxã Tĩrtũm wỹr o papa kaxyw mē paxunhwỹ. Nê kêp mē panhõ Pahi Maati hã kãm hprãm xã hkôt mē pahte kãm tanhmã amnhĩ nhĩpêx to ho papa kaxyw mē paxunhwỹ. Jakamã kwa kêr pu mē kãm mex o mex nê hihtỹx o hihtỹx ã mãn harênh rãhã ho papa.

⁷ Nê koja tokyx akupỹn mē pahwỹr kakrã kamã wrỹ pu mē pahpiitã wrỹk kãm omu. Nhũm mē kot hpĩr xwỹnhjaja tee ri amnhĩ wỹr omu. Nê pika piitã hkôt ri mē pa xwỹnhjaja omu nê mē kot amnhĩ tomnuj jakamã tee ri amnhĩ kukamã hamaxpêr o kãm na htỹx kumrêx. Hãmri nê kãm ma xaj mur nê htertet o kuhê. Koja nhỹrmã Jejus akupỹn wrỹ nhũm mē amnhĩ wỹr omu nê ã amnhĩ nhĩpêx anê.

⁸ Nê Tĩrtũm na hihtỹx o hihtỹx nê ãhpumunh o ãhpumunh. Nê aa kot mēhõ ni rũm kator kêt. Na hte amnhĩ jarênh o:

—Ixrãhã ixpa xwỹnh na pa. Amnepê mã kormã mēmoj piitã hkêt ri pa pre ra ixrãhã ri ixpa ho ixpa. Nê koja nhỹrmã mēmoj akupỹm hapêx tã pa arĩ ixrãhãã. Anê.

Juãw kot Jejus akupỹm htĩr ã omunh

⁹ Nê ixpê Jejus kôt mē atõ Juãw na pa hte mē apyrã nê Jejus kôt amnhĩ nhĩpêx nhũm hte mē kãm Jejus kurê xwỹnhjaja mē apyrã nê hã inhĩpêx kati ho pa. Mē pahte hkôt ri amnhĩ nhĩpêx o papa jakamã na

htem hã mē pahptomnuj tỹx rãhã ho pa. Tã pu htem ý hã mē kutã amnhĩ to htỹx nê arĩ hkôt amnhĩ nhĩpêx. Jakamã na pa pre Tĩrtũm kapêr o mē ajahkre rãhã ho ri mē akôt ixpa. Nê Jejus kêp mē panhõ Pahihti hã mē amã harê. Mỹrapê na prem hã ixpynê nê man amnê ixto tē nê jar gô hipôk pē Patos kãm inhmê pa kamã ixpê prês nê ixpa ho ixpa.

¹⁰ Tã nhũm tãmĩk pa Tĩrtũm mã amnhĩ jarênh o nhỹ. Hãmri nhũm Karõ tanhmã ixkrã hto pa te ixpimtir kãm mēmoj pumunh pyrã nê amnhĩ katut kôt mēhõ kapêr ma. Te kot pifti kakôr tỹx pyrãk pa kuma. ¹¹ Hãmri nhũm inhmã kapêr nê inhmã:

—Pa Juãw? E kot paj amã mēmoj to amnhĩrit ka omu nê akwỹjê mã hã kagã. Nê hã kagã hpa hãmri nê ahpỹnhã krĩ hkwy hkôt mē kêp ixkwỹ hã axpên wỹr mē pikuprõnh xwỹnhjê hwỹr arê. Mē kot kamã harênh nê mar nê axkãm hamak rom nê ri pa kaxyw. Epes wỹr nê Emĩnã hwỹr nê Pekamõ hwỹr nê Xijaxir wỹr nê Satre hwỹr nê Pirate hwỹr nê Raxisej wỹr. Krĩ pē 7ja piitã hwỹr ixkapêr ã kagã nê mē hwỹr arê kē mē apyrã nê mēmoj jarênhja ma. Anê.

¹² Hãmri pa ixte mēhõja pumunh kaxyw ho ijakêx nê kanê hkwy pumu. Kanê kêp 7 nê piitã ôr o.

¹³ Nê kanê nhĩpôk ri mēhõja te panhĩ pyrã nê pahi hã ê mex kãm xa. êja hpar kõn kôt hitep nhũm xa. Nê pahi hã mē hinô hpre xã ho amnhĩ nhĩnô hpre nê xa. Hinô pre xãja ôr pix o. ¹⁴ Nê hkrã hkĩ te kaxãt nhĩ jaka pyrã nê hakaajre. Nê no te kuwy hpôk pyrã nê hkarỹr tỹx nê. ¹⁵ Nê hpar te mēmo kãx karỹr tỹx pyrãk. Nê kapêr te gô hprôt tỹx koko pyrãk. ¹⁶ Na pre upôk rũm kanhêti ho 7 nê hamỹ nê o xa. Nê hakwa rũm wapo pôm kato nê akutã wa gixre nê ajêt. Nê hkuk kamã hirã htỹx kumrêx. Te myt

kot mē pano hã harir nhũm gêk tỳx pyràk. Ā mēhōja kot anhỳr.

¹⁷ Pa tee ri tanhmã kute hã omu nē inhmã ma htỳx kumrêx nē umaj tēm nē hpar pē te ixytk pyrà nē nō. Hãmri nhũm ixtã upòk rũm ìhkraja xi nē inhmã kapēr nē inhmã:

—Kwa amã ixpuma hkêt nē. Pa na pa. Amnepê mã kormã mēmoj kator kêt ri pa pre raa. Nē ixrãhãã. Koja nhỹrmã mēmoj akupỹm hapêx pa arĩ ixrãhã ixpa ho ixpa.

¹⁸ —Na pa pre ty tã akupỹm ixtĩr. Nē ixtĩr o ixtĩr. Kam ixpumu. Kot paj axte ixytk kêt nē. Ixpê mēhtykjê hpãm jakamã papxpix na pa hte mē htyk ã arĩgro jarê nhũm mē hã ty nē ma mēhtykjê papxã hwỳr ma pa.

¹⁹ —E kêr ka ate mēmoj pumunh xwỳnhhta pumunh tỳx nē akwỳjê mã hã kagà. Nē mēmoj kormã kot amnhĩ nhĩpêx kêt nhũm ate omunh mã xwỳnhhta ka inhỹ hã mē kãm hã kagà. Mē kot kamã harênh nē mar tỳx kaxyw.

²⁰ —Nē kot paj axte ixprĩ hã ate mēmoj pumunh xwỳnhhta jarê ka inhma. Nã kanê pē 7ta te mē kot krĩ hkwỳ pē 7 kamã mē kêp ixkwỳ hã axpên wỳr mē pikuprõnh xwỳnhjê pyràk. Nē inhĩkra kamã kanhêti pē 7ta te kêp inhmã mē kot mē hamãr xwỳnhjê pyràk. Anê.

2

Epes kamã Jesus kwỳjê hwỳr kagà

¹ Nhũm Jesus arĩ inhmã kapēr nē inhmã:

—E kêr ka krĩ pē Epes kamã ixkwỳjê jamãr xwỳnh wỳr kagà nē amê. Nē kagàja kamã mē kãm ixkapēr jarê nē mē kãm:

Pa Epes kamã ixkapēr mar kaxyw axpên wỳr apikuprõnh xwỳnhjaja. Ot pa mē awỳr ixpêr mē. Ixpê ixupòk o kanhêti ho 7 nē hamỳnh nē ho ixãm xwỳnhhta na pa. Nē ixpê ôr o kanê pē 7

nhĩpòk ri ixpa xwỳnhhta na pa ã mē awỳr ixpêr mēnh anê.

² Na pa hte tanhmã mē ate amnhĩ nhĩpêx to ho apa hã mē apumunh mex o ixpa. Na ka htem inhmã amnhĩ nhĩpêx mex nē pa ja hã mē apumu. Mē kot ixtã mē anhĩpêx kati htã ka mē kutã amnhĩ to htỳx nē ixkaga hkêt nē. Nē mē kot amnhĩ tomnuj xwỳnhjê hkôt amnhĩ nhĩpêx o ri apa hkêt nē. Nhũm ixte mē awỳr mē rênh ã amnhĩ to hêx xwỳnhjaja mē awỳr pan pøj ka mē aprĩ hã mē kot amnhĩ to hêx ã mē omu. Hãmri nē tee ri mē kot amnhĩ nhĩpêx ã mē omu nē amnhĩ nē mē hanor kurê kumrêx. Ām hãmri na ka htem ã mē hipêx anê.

³ Nē mē kãm ixkurê xwỳnhjaja kot tanhmã ixtã mē atomnuj tỳx to htã ka mē kutã amnhĩ to htỳx nē aa ixkaga hkêt nē. Nē ixkôt amnhĩ nhĩpêx mex rãhã ho ri apa. Ām hãmri na ka htem ã amnhĩ nhĩpêx anhỳr o ri apa.

⁴ Ām mēmoj pixi na ixpê omnuj. Amnepê mã kormã mē ate ixkôt amnhĩ xunhwỳr nyw ri na ka prem amã axpên kĩnh nē axpên to mex o ri apa. Nē mē amã axpên tã ma ho te mē amã amnhĩ tã ma pyràk o axpên nhĩpêx. Tã tanhmã ajamaxpêr to nē axte ã axpên nhĩpêx anhỳr kêt nē. Jao te mē amã ixkĩnh kêt pyràk o amnhĩ nhĩpêx. Pa tee ri ja hã mē apumu nhũm ja inhmã mex kêt nē.

⁵ Kwa mē tokyx ja hã amnhĩ pumu nē akupỹm mē ate ixkôt amnhĩ xunhwỳr nyw ri mē ate axpên nhĩpêxta o akupỹm axpên nhĩpêx o apa. Kot kaj mē anhỳr kêt kot paj te mē apê mē anhõ kanê hpyr nē kapôt ã mēnh pyràk o mē anhĩpêx ka mē ri apa nē gaa nē apikaprãr pa. Tã mēhõ koja mē amỳr pē mē anhõ krĩ kamã mē kãm ijarênh o pa?

⁶ Nē mē kêp Nikoraw nhõ

xwýnhjaja na ka htem mē kot tanhmā amnhī tomnuj to hā mē omu nē ixpyrā nē apē ja hprām nōkati nē mē hkôt ri amnhī nhīpēx kêt nē. Pa ja hā mē apumu nē ixkīnh nē.

⁷ Tā ixte mē amā ixkapēr jatur xà na ja. Kot kaj mē amā ixkapēr mar prām hā kot kaj mē ā Tirtūm mē wa Ixkarō nhý hā ixte mē amā ixkapēr anhýrja ma nē kām ajamaxpēr týt rāhā ho ri apa.

Tirtūm nhō krī kamā mēmo pī hpār kuhē xwýnh. Mē kot ô hkur nē axte htyk kêt nē pa ho pa mā xwýnhhta. Kot kaj mē ate amnhī tomnuj nē amnhī to htýt nē arī inhmā hprām xà hkôt amnhī nhīpēx rāhā ty pa akupým mē ato mē atír nē ma pī hpārta wýr mē arē. Ka mē ma hwýr mra nē ô hō hta nē akrē nē axte atyk kêt kumrēx nē apa ho apa.

E ām ja pix na hapēx. Anē.

—E Juāw. Kēr ka Epes kamā ixkwýjē jamār o pa xwýnhhta wýr ā ixkapēr ā kagā anē nē mē hwýr amē. Anē.

Hāmri pa kuma nē ô ri mē kām hā kagā hpa.

Emīnā kamā Jejus kwýjē hwýr kagā

⁸ Hāmri nhūm hpānhā Emīnā nhō xwýnhjē kaxyw inhmā kapēr nē inhmā:

—Nē hpānhā Emīnā kamā ixkwýjē jamār xwýnh wýr kagā nē mē hwýr amē. Nē mē kām ixkapēr jarē nē nē mē kām:

Pa Emīnā kamā ixkapēr mar kaxyw axpēn wýr mē apikuprōnh xwýnhjaja. Ot pa mē awýr ixpēr mē. Ixrāhā ho ixrāhā ixpa xwýnhhta na pa. Amnepēm kormā mēmoj piitā hkêt ri na pa pre ixrāhā nē ri ixpa. Koja nhýrmā mēmoj akupým hapēx pa arī ixrāhā ho ixrāhā nē ri ixpa. Na pa pre ty no ām akupým ixtír

o ixtír. Tā pa ā mē awýr ixpēr mēnh anē.

⁹ Nā na pa hte mē ate tanhmā amnhī nhīpēx to ho apa hā mē apumunh rāhā ho ixpa. Na hte mē kām ixkurē xwýnhjaja ixtā mē atomnuj to ka mē apē amrakati nē ri apa. Nom mē ate tām amnhī nhīpēx jakamā te mē apē mē hikukrēx rūnh kumrēx xwýnhjē kot amnhī nhīpēx pyrā nē ixkukwak ri akīnh rāhā ri apa. Na hte mē kēp Ijaew ā amnhī to hēx xwýnhjaja mē ato kapēr punuj rūnh o pa. Mē kot Tirtūm kôt amnhī nhīpēx ā amnhī jarēnh tā no ām hkôt amnhī nhīpēx kêt nē. Ām Satanasti kôt pix mā na htem amnhī nhīpēx o pa.

¹⁰ Tā mē kām ixkurē xwýnhjaja kot ixtā mē atomnuj týt o pa htā kēr ka mē amnhī tā mē omu nē tee ri amnhī kukamā ajamaxpēr kêt nē. Nē arī mē kutā amnhī to htýt nē. Koja Satanasti mē akwýjē pynē nē mē ajagjē. Hāmri nē mē ate ixkaga hprām xàj tanhmā mē anhīpēx kati hto ka mē hagjēnh xà kamā amnhī xà htýt kamā ajamak o atā arīgro pé 10. Nom kēr ka mē kutā amnhī to htýt nē ixkaga hkêt nē. Mē kot mē apar mā tā ka mē kutā amnhī to htýt nē. Kot kaj mē aa ixkaga hkêt nē ixkôt ri amnhī nhīpēx rāhā ty pa akupým mē ato mē atír nē ma amnhī wýr mē ato api. Hāmri ka mē Tirtūm mē wa ixri amex nē atír tūm nē apa ho apa nē axte atyk kêt nē apa.

¹¹ E ixkrajaja. Kot kaj mē amā ixkapēr mar prām hā kot kaj mē ā Tirtūm mē wa Ixkarō nhý hā ixte mē amā ixkapērja anhýr ma nē kām ajamaxpēr týt rāhā ho ri apa. Kot kaj mē ate amnhī tomnuj nē amnhī to htýt nē inhmā hprām xà hkôt pix mā amnhī nhīpēx rāhā ty. Hā kot paj akupým mē ato mē atír ka mē ma kuwyta wýr apa hkêt nē.

E. Ām ja pix. Na hapêx. Anê.
—E Juāw. Kêr ka Emīnā kamā
ā ixkrajê mā ixkapêr ā kagā anê.
Anê.

Hāmri pa kuma nê ô ri mē kām hā
kagā.

*Pekamō kamā Jejus kwỳjê hwỳr
kagā*

Sikūn Korīt 6.14–7.1

¹² Nhūm Jejus arī inhmā kapêr nê
hpānhā inhmā:

—E hpānhā Pekamō kamā
ixkrajê jamār o pa xwỳnhja wỳr
kagā nê mē hwỳr amê. Nê mē kām
ixkapêr jarê nê mē kām:

Pa Pekamō kamā ixkapêr
mar kaxyw axpên wỳr mē
apikuprōnh xwỳnhjaja. Ot pa mē
awỳr ixpêr mē. Ixpê ijakwa rūm
pōm wapo akutā wa gix nê kator
nê ām xwỳnhhta na pa mē awỳr
ixpêr mē.

¹³ Na pa hte mē anhō krī nhō
xwỳnhjaja kot tanhmā amnhī
tomnuj to ho pa hā mē omunh
mex nê. Mē kot Satanasti kôt pix
mā ri amnhī nhīpêx o pa jakamā
mē anhō krī te kēp Satanasti nhō
krī pyrāk. Āxipas kot mē hkôt mē
kām ixkapêr o mē ahkre ho pa
nê aa hkaga hkêt tâ nhūm prem
axtem nê ixtā kupī. Ka mē ja hā
mē omunh tâ mē umaj ixkaga
hkêt nê arī ixkôt amnhī nhīpêx
rāhā ho ri apa. Ām hāmri na ka
htem ā amnhī nhīpêx anê.

¹⁴ Mēmoj pixi na ixpê omnuj.
Na hte mē akwỳjaja axtem nê
Paraāw kapêr kôt amnhī nhīpêx
o pa. Na pre Paraāwja Parak mā
tanhmā kapêr to nhūm kuma nê
amnhī xō ri tanhmā mē anhīgêt
mā kapêr to ho pa. Nom ixkapêr
kôt kêt ixkapêr kuhpa hā tanhmā
mē kām kapêr to nê mē kām:
“Mē māmri ma sānti hā mē hkīnh
mā xwỳnhjê hkôt mra nê sānti
hā apku nê hā akīnh. Nê mē
urāk nê axpên pē axpên prō ho
amnhīkati nê axpên pē ri axpên

mjên o amnhīkati nê mē ā ri
amnhī nhīpêx anhỳr o ri apa. Ja
mex kēnā.” Anhỳr o mē anhīgêt
mā kapêr o pa nhūm mē kuma
nê mē hkôt amnhī nhīpêx. Tā ka
mē akwỳjaja mē urāk nê ā amnhī
nhīpêx anhỳr o apa. Kwa ja mex
kêt.

¹⁵ Na hte mē akwỳjaja Niko-
rawjê kapêr kôt ixkapêr kuhpa
hā tanhmā amnhī nhīpêx to ho
pa. Ja mēānēn mex kêt. ¹⁶ Tā
ra mē akwỳjaja ā amnhī tomnuj
anhỳr o pa ka mē ja hā mē omu
nê ām mē omu nê nê tanhmā
mē kām akapêr to hkêt nê. Kwa
mē ate ā amnhī nhīpêx anhỳr
xwỳnhjaja. Kêr ka mē tokyx ja
kaga nê akupỳm ixkôt ri amnhī
nhīpêx mex nê. Kot kaj mē anhỳr
kêt kot paj tokyx mē awỳr wrỳ
nê te ijakwa rūm pōm wapo kator
xwỳnhhta o mē hkanhwỳr pyrāk o
mē anhīpêx. Nom ixkapêr xihtỳx
pix o tanhmā mē anhīpêx to.

¹⁷ E kot kaj mē amā ixkapêr
mar prām hā kot kaj mē ā Tirtūm
mē wa Ixkarō nhỹ hā ixte mē
amā ixkapêr anhỳrja ma nê kām
ajamaxpêr tỳx rāhā ho ri apa.

Nê kot kaj mē ate amnhī tom-
nuj nê amnhī to htỳx nê inhmā
hprām xā hkôt amnhī nhīpêx
rāhā ty. Hā kot paj akupỳm
mē ato mē atīr hāmri nê ra pam
mē amā mē anhō ka mē hkur o
apa. Te amnepēm Ijaew kapôt ā
pa nhūm ixte mē hwỳr “manā”
anhỳr xwỳnhhta rēnh nhūm mē kot
hkur o pata pyrāk. Nom ixte mē
amā mē anhōja na hpimxur. Ām
papxipix na pa hte mē kām ôr o
ixpa.

Nê kot paj mē atā mē anhīxi
nyw rē. Jao kēn jakare hkwỳ hā
ahpỳnhā mē anhīxi nyw jaxwỳ
nê mē amā kugō. Ka mē hamỳ
nê kapxipix amnhī nhīxi nyw
pumunh o apa.

E ām ja pix. Na hapêx. Anê.
—E Juāw. Kêr ka Pekamō kamā

ixkrajê hwÿr ã ixkapêr anhÿr ã kagà nê mê hwÿr amê. Anê.

Hãmri pa kuma nê ô ri mê kãm hã kagà.

Xijaxir kamã Jesus kwÿjê hwÿr kagà

Jutre 3-23

¹⁸ Nhũm Jesus arĩ inhmã kapêr nê inhmã:

—E hpãnhã Xijaxir kamã ixkwÿjê jamãr xwÿnh wÿr kagà nê amê nê mê kãm ixkapêr jarê nê mê kãm:

Pa Xijaxir kamã ixkapêr mar kaxyw mê apikuprõnh xwÿnhjaja. E ot pa mê awÿr ixpêr mê. Ixpê Tirtũm Kra na pa. Ixpê inhno te kot kuwy hpõk karÿr tÿx pyrãk xwÿnhhta na pa. Nê ixpê ixpar te kot kãx karÿr tÿx pyrãk xwÿnhhta na pa mê awÿr ixpêr mê.

¹⁹ Na pa hte mê ate amnhĩ nhĩpêx kõt mê apumunh mex o ri xpa. Na ka htem amnhĩ kaxyw inhmã ajamaxpêr pê inhmã amnhĩ to mex o ri apa. Mê akwÿ kot ixtã tanhmã mê anhĩpêx to htã ka mê umaj aa ixkaga hkêt nê. Nê arĩ amã ixkĩnh tÿx kãm tanhmã amnhĩ nhĩpêx to ho ri apa. Nê axpên to mex nê ixkõt pix mã amnhĩ nhĩpêx o ri apa. Jao ra ixkõt amnhĩ nhĩpêx mex o wam mê ate ixkõt amnhĩ nhĩpêxta jakre. Nã ja inhmã mex kumrêx.

²⁰ ãm mêmoj pixi na ixpê omnuj. Mê akõt niti ri pa xwÿnh Jejapewtita. Kêp Tirtũm nhÿ hã kapêr jarênh o pa xwÿnh ã amnhĩ to hêx xwÿnhhta. Na hte ixkapêr kupa hã tanhmã mê ajahkre hto ka htem ama nê nê tanhmã kãm nê hkêt nê. Na hte mê amã: “Xê mê mãmrĩ ri mê hkuprÿjê hwÿr mra nê mê ho amnhĩkati. Nê axpên pê mê aprõ nê mê amjên o amnhĩkati. Nê mê kot sãnti hã mê hkĩnh nê hã apkur xwÿnhjê hkõt mra nê mê hkõt amnhĩ nhĩpêx. Tirtũm kãm ja mex kênã.” Anhÿr

o mê amã kapêr o pa. Nê inhmã ja mex ã ijarê nom inhmã ja mex kêt. Tã ra mê akwÿjaja kapêr ma nê hkõt amnhĩ nhĩpêx ka mê ja hã mê omunh tã amnhĩ nê nitita janor kêt nê nhũm arĩ ri mê amã hêx o ri mê akõt pa. ²¹ Ra kot ã amnhĩ nhĩpêx anhÿr o mê akõt pa ry rax kumrêx tã pa kormã ja hã tanhmã ho hkêt nê kormã amnhĩ tã hamã. Kot ã amnhĩ nhĩpêx anhÿr kaga kaxyw na pa kormã hamã o ri ixpa. No nhũm aa hkaga hkêt nê.

²² Mÿrapê kot paj tokyx tanhmã ho nhũm amnhĩ xà htÿx kamã hamak o hikwÿ. Tã mê kot kapêr mar nê hkõt amnhĩ nhĩpêx xwÿnhjaja kot amnhĩ tomnuj ã amnhĩ pumu nê hkaga hkêt hã kot paj mã mê ho anê nê. Mãänên tanhmã mê homnuj to nhũm mê nitita pyrã nê amnhĩ xà htÿx kamã hamak o hikwÿ.

²³ Nê nitita kot paj kêp hkrajê nhĩmex pa. Ka mê apê ixkrajaja ja hã ixpumu nê ixte mê apiitã ahpÿnhã tanhmã mê ajamaxpêr to hkõt mê apumunh ã ixpumu. Nê ixte ahpÿnhã mê apiitã tanhmã mê ate amnhĩ nhĩpêx to ho apa hã mê apumunh xà hkõt tanhmã mê anhĩpêx to hã ixpumu.

²⁴ Na hte mê akwÿjaja akwÿjê rom nita kapêr ma nê ãm kuma nê hkõt amnhĩ nhĩpêx kêt nê. Nê mê kapêrja mê kot kãm: “Satanasti kapêr pimxur” anhÿr xwÿnhhta kõt nhũm mê amnhĩ nhĩpêx kêt nê. Na htem ixkõt pix mã amnhĩ nhĩpêx mex o ri pa. Tã ã mê ate ixkõt amnhĩ nhĩpêx anhÿr o apa xwÿnhjaja kot paj mê amã ja pix ã karõ ka mê inhma. ²⁵ Kêr ka mê arĩ ixkõt pix mã amnhĩ nhĩpêx o ri apa rãhã pa akupÿn mê awÿr wrÿ. ãm ja pix ã kot paj mê amã karõ.

²⁶ Nê kot kaj mê ate amnhĩ

tomnuj nê amnhĩ to htỳx nê arĩ inhmã hprãm xà hkôt amnhĩ nhĩpêx rãhã ty. Hãmri pa ja hã mẽ apumu nê nhỹrmã mẽ ate krĩ hkwỳ hkôt mẽ pa xwỳnhjê ho amnhĩptàr o apa kaxyw mẽ axunhwỳ. Ka mẽ apê mẽ õ pahihti nê inhmã mẽ ho amnhĩptàr o ri apa.

²⁷ Na pre Inhĩpêêxà ixte pika piitã hkôt ri mẽ pa xwỳnhjê ho amnhĩptàr kaxyw ixãm.

Tã kot paj nhỹrmã amnhĩ pyrà nê mẽ kaxyw mẽ axunhwỳ ka mẽ inhmã mẽ hamãr o apa.

Nhũm mễhõ ixkapêr kwỳm ri tanhmã amnhĩ nhĩpêx to ka mẽ ja hã omu nê hã tanhmã ho. Te mẽ kot poti punuj mỳnh nê mễnh nê hkrakrak pyràk.

²⁸ Kot paj ã mẽ ate mẽ hipêx anhỹr o apa kaxyw mẽ axunhwỳ. No ãm ja pix kêt. Kot paj te ixte mẽ amã kanhêti hõ nhõr pyràk o mẽ anhĩpêx. Arĩgro hkôt kanhêti no hpók rax japõx xwỳnhta kot paj te ixte mẽ amã õr pyràk ka mẽ ixri atĩr tũm nê apa ho apa.

²⁹ E ixkrajaja. Kot kaj mẽ amã ixkapêr mar prãm hã kot kaj mẽ ã Tĩrtũm mẽ wa Ixkarõ nhỹ hã ixte mẽ amã ixkapêr anhỹrja ma nê kãm ajamaxpêr tỳx rãhã ho ri apa. Anê.

—E Juãw. Kêr ka ã Xijaxir kamã ixkrajê kaxyw ixkapêr ã kagã nê mẽ hwỳr mễnh anê. Anê.

Hãmri pa kuma nê õ ri mẽ kãm hipêx nê mẽ hwỳr kumê.

3

Satre kamã Jejus kwỳjê hwỳr kagã

Rukre 12.35-40

¹ Nhũm Jejus arĩ inhmã kapêr nê inhmã:

—E hpãnhã Satre kamã ixkwỳjê jamãr xwỳnh wỳr kagã nê mẽ kãm ixkapêr jarê nê mẽ kãm:

Pa Satre kamã ixkrajaja. E ot pa mẽ awỳr ixpêr mẽ. Ixpê

inhĩhkra ho kanhêti pê 7 jamỳnh nê xãm xwỳnhta na pa. Nê ixpê inhĩhkra ho Tĩrtũm Karõ ãm pyxi htã te kamã kêp 7 jamỳnh nê ho ixãm xwỳnhta na pa mẽ amã ixkapêr.

Na pa hte mẽ ate tanhmã ri amnhĩ nhĩpêx to hã mẽ apumunh rãhã ho ixpa. Mễ piitã kot axpên mã mẽ ate ixkôt amnhĩ nhĩpêx ã mẽ ajarênh tã ã mẽ ate amnhĩ nhĩpêx anhỹr kêt. Na ka htem ixkuhpa hã pix mã amnhĩ nhĩpêx o apa. Jakamã te inhmã ra mẽ atyk nê mẽ anhĩkwỳ pyràk.

² Na ka htem ãm akrành mã ixkôt ri amnhĩ nhĩpêx nom Tĩrtũm mẽ wa ixkôt amnhĩ nhĩpêx mex kêt nê. Ra Tĩrtũm mẽ wa ixte ja hã mẽ apumunh mex. Mễ ate kormã wa inhnoo mã tãm ri amnhĩ nhĩpêx kêt jakamã kwa mẽ tokyx ja hã amnhĩ pumu nê ate amnhĩ tomnuj mã anhũre nê wa ixkôt amnhĩ xunhwỳr tỳx nê.

³ Kêr ka mẽ amnepê mã kormã mẽ ate ixkôt amnhĩ nhĩpêx nyw ri mẽ kot ixkapêr o tanhmã mẽ ajahkre htoja mã ajamaxpêr nê amnhĩ tomnuj mã anhũre. Nê ixkapêr kôt pix mã mãn amnhĩ nhĩpêx o ri apa. Kot kaj mẽ anhỹr kêt kot paj nhỹrmã mẽ ajaêr pê akupỳn mẽ awỳr wrỳ nê ja hã tanhmã mẽ ato.

⁴ ãm mẽ agrêre nê amã ixkôt amnhĩ nhĩpêx prãm. Jao tãm ri amnhĩ nhĩpêx nê mẽ kot amnhĩ tomnuj xwỳnhjê hkôt amnhĩ nhĩpêx kêt nê. Te mẽ axê jakare kamã apa nê tanhmã amnhĩ pê htyk to hkêt pyràk. Tã kot kaj mẽ nhỹrmã ixri mẽ axê jakare kamã apa ho apa. Ra mẽ ate ja ho anhỹr mã tãm kênã. Ja na Tĩrtũm kãm hprãm.

⁵ Nê krĩ piitã hkôt mẽ ate amnhĩ tomnuj nê amnhĩ to htỳx nê inhmã hprãm xà hkôt amnhĩ nhĩpêx rãhã atyk xwỳnh piitã kot ka mẽ nhỹrmã Tĩrtũm mẽ wa ixri

amex nê atîr tûm nê apa ho apa. Ra mē hixija Mēpahpām Maati nhō kagàja kamā na. Kamā mē atîr o mē atîr mā xwýnhjê nhîxi piitā hā kagà. Kot paj kagàta kamā aa mē anhîxi grānh kêt nê. Hāmri nê Inhîpêêxā mē kapêr o mē wrýk xwýnhjê mā mē ajarēnh o: “E mē jajê pumu. Ixkwý na mē.” Anhýr o mē kām mē ajarê.

⁶ E ixkwýjaja. Kot kaj mē amā ixkapêr mar prām hā kot kaj mē ā Tirtûm mē wa Ixkarō nhý hā ixte mē amā ixkapêr anhýrja ma nê kām ajamaxpêr týt rāhā ho ri apa.

Tā ām ja pix. Na hapêx. Anê.
—E Juāw. Kêr ka ā Satrejê mā ixkapêr ā kagà nê mē hwýr mēnh anê. Anê.

Hāmri pa kuma nê ô ri mē kām hā kagà.

Pirate kamā Jejus kwýjê hwýr kagà

Wam Tesarōn 2.13-16

⁷ Nhûm Jejus arî inhmā kapêr nê inhmā:

—E hpānhā Pirate kamā ixkwýjê jamār xwýnh hwýr kagà nhîpêx nê amê nê mē kām ixkapêr jarê nê mē kām kām:

Pa Pirate kamā mē ate ixkapêr mar kaxyw mē apikuprōnh xwýnhjaja. E ot pa mē awýr ixpêr mē. Inhmex o inhmex xwýnh na pa. Aa ixêx kêt nê ixpa xwýnh. Amnepê mā na pre mēhōja pahi Tawî mā ôrkwý mex ā saf jamār o pa. Tā pa hte urāk nê Inhîpêêxā Tirtûm nhō krî hwýr mē gjêx xā hā saf jamý nê ho ixpa. Ām papxipix inhō saf jakamā papxipix na pa hte mē ate ixkôt amnhî xunhwýr xwýnhjaja mē agjêx kaxyw mē amā kahê xā rê nê ixkra hkêt xwýnhjê pê kahê. Kot paj mē apê ixkrajê mā kahê xā rê ka mē hwýr agjê. Hāmri pa mē atā kahê nhûm ixkra hkêt xwýnhjaja tee ri kām mē akôt gjêx prām kaprý.

⁸ Na pa hte tanhmā mē ate amnhî nhîpêx to ho apa hā mē apumunh mex o ri ixpa. Mē agrêre htā na ka htem ixkapêr kôt amnhî nhîpêx mex nê aa ixk-aga hkêt nê. Jakamā kot paj te ixte mē amā Tirtûm nhō hakwakre kahê xā mēnh pyrāk o mē anhîpêx ka mē axāmnhîx ajamakêtkati nê ma mē kām Tirtûm kapêr o mē ahkre ho ri mē hkôt apa. Nhûm mē hkwyjaja tee ri ā mē ate amnhî nhîpêx anhýrja nê mē amā kapêr kaprý ka mē arî ho mē ahkre ho ri mē hkôt apa.

⁹ Nê mē anhō krî kamā mē akwýjaja na prem ra Satanasti hkôt amnhî xunhwý nê hêx rom mē amā amnhî to hêx nê mē amā: “E mē ixpê Ijaew mex jakamā kwa mē ixkapêr ma nê mē ixkôt amnhî nhîpêx.” Anhýr o mē amā karō htā nō ām mē kot Satanasti hkôt amnhî nhîpêx xwýnh na mē. Tā kot paj nhýrmā tanhmā mē homnuj to nhûm mē tee ri amnhî pumu nê akupým mē awýr mra nê mē akutā hkônkrā ho rōrōk nê hkrî nê mē amā: “Nā mē kajaja na ka pêr mē ixrom Jejus kôt amnhî nhîpêx. Mān kām mē ajapêê.” Anê.

¹⁰ Mē kot ixtā mē atomnuj týt nhûm mē ate amnhî xā htýt kamā ajamak tā aa mē umaj ixk-aga hkêt nê. Nê arî ixte mē amā mēmoj tā karō xā hkôt mē kutā amnhî to htýt rāhā arî ixkôt ri amnhî nhîpêx o apa. Jakamā mē kot nhýrmā mē kām ixkurê xwýnhjaja pika piitā hkôt tanhmā mē homnuj týt to nhûm mē amnhî xā htýt kamā ama. Tā kot paj mē anê mē omunh mex nê nhûm mē tanhmā mē ato hkêt nê ka mē amex nê ri apa ho apa.

¹¹ E kot paj tokyx akupýn mē awýr wrý nê mē ate ixkôt pix mā amnhî nhîpêx ā mē ato mex rax kumrêx. Jakamā kwa mē māmri ā amnhî nhîpêx anhýr o inhmā hprām xā hkôt pix mā amnhî

nhĩpêx rāhā ty. Kot ka mẽ anhỹr kêt kot pa mẽ amā mẽmoj mex nhõr kêt nê.

¹² Nê kot kaj mẽ kot amnhĩ tomnuj xwỳnhjê kutā amnhĩ to htỳx nê inhmā hprām xà hkôt pix mã amnhĩ nhĩpêx rāhā ty. Hā kot paj amnhĩ kôt mẽ ato mẽ axihtỳx nê ka mẽ aa ixkaga hkêt nê. Nê kot paj nhỹhỹnh mẽ atā mẽ inhĩxi ho axkrunêpxi nê haxwỳ. Inhipeêxà nhĩxi nê inhĩxi nyw nê Inhipeêxà nhõ krĩ nhĩxija kot paj nhỹhỹnh mẽ atā haxwỳ. Tirtũm nhõ krĩ mẽ kot kām: “Jeru-jarê nyw” anhỹr xwỳnhhta koja nhỹrmā tanhmā amnhĩ to nê ra kaxkwa rũm pika wỳr wry.

¹³ E ixkwỳjaja. Kot kaj mẽ amā ixkapêr mar prām hā kot kaj mẽ ã Tirtũm mẽ wa Ixkarõ nhỹ hā ixte mẽ amā ixkapêr anhỹrja ma nê kām ajamaxpêr tỳx rāhā ho ri apa.

Tā ãm ja pix. Na ra hapêx. Anê. —E Juãw. Kêr ka ã Pirate kamā ixkrajê mã ixkapêr ã kagà anê. Anê.

Hāmri pa kuma nê ô ri mẽ kām hā kagà.

Raxisej kamā Jejus kwỳjê hwỳr kagà

¹⁴ Nhũm pre Jejus arĩ inhmā kapêr nê inhmā:

—E hpānhā krĩ pê Raxisej kamā ixkrajê jamār xwỳnh wỳr kagà nhĩpêx nê amê. Nê mẽ kām ixkapêr jarênh o:

Pa Raxisej kamā ixkrajaja. Ot pa mẽ awỳr ixpêr mẽ. ãm hāmri ixkapêr o ixpa nê aa ixêx kêt xwỳnhhta na pa. Jakamā ãm hāmri na pa hte Tirtũm kapêr o mẽ ajahkre o ixpa nê aa ja kaga hkêt nê. Pa na ixpê mẽmoj piitā hpār krax.

¹⁵⁻¹⁶ Na pa hte mẽ ate tanhmā amnhĩ nhĩpêx to ho apa hā mẽ apumunh rāhā ho ixpa. Kop apu mẽ ate ixkôt amnhĩ nhĩpêx mex

ronhỹx pa ja hā mẽ apumu nê ixkĩnh nê. Nom mẽ ate ã amnhĩ nhĩpêx anhỹr kêt. No mãânên aa ixkaga hkêt nê. Na ka htem ri atỳx amnhĩ krā hkôt pix mã tanhmā amnhĩ nhĩpêx to ho apa nhũm ja ixpê omnuj nê. Kot kaj mẽ arĩ ã amnhĩ nhĩpêx anhỹr o apa pa hpānhā amnhĩ nê mẽ akurê. Te mẽ kot gô xenh nõkati janhir nê tee hkakinh nê akupỳm hkapĩr pyrāk.

¹⁷ Mẽ ate inhmā hprām xà hkôt amnhĩ nhĩpêx ã amnhĩ jarênh tā ã amnhĩ nhĩpêx anhỹr kêt nê. Nê ixkapêr mar tỳx nê amnhĩ kaxyw inhmā ajamaxpêr mex kêt nê.

¹⁸ Kwa mẽ tokyx ja hā amnhĩ pumu nê akupỳm ixkôt amnhĩ xunhwỳr tỳx nê. Kêr pa ja hā mẽ apumu nê amnhĩ katut kôt mẽ ate amnhĩ tomnuj rê nê tanhmā mẽ akrā hto ka mẽ inhnoo mã tām amnhĩ nhĩpêx mex o ri apa. Hāmri pa mẽ amā tanhmā amnhĩ to amnhĩrit to ka mẽ aprĩ hā ixte amnhĩ nhĩpêx ã ixpumunh mex nê ixkôt amnhĩ nhĩpêx mex rāhā o ri apa.

¹⁹ Xà inhmā mẽ ajapê hkêt ã na pa ã mẽ amā ixkapêr anê? Nà inhmā mẽ apiitā mẽ ajapê htỳx kênā. Nom inhmā mẽ ajapê htā ka htem ixkôt amnhĩ nhĩpêx kêt nê. Na pa tee ri amnhĩ tā mẽ apumu nê ja hā tanhmā mẽ atomnuj tỳx to. Tokyx mẽ ate amnhĩ tomnuj mã anhũrer nê hpānhā tām amnhĩ nhĩpêx kaxyw. Jakamā kwa mẽ tokyx ate amnhĩ tomnuj kaga nê akupỳm amnhĩ kaxyw inhmā ajamaxpêr ho ri apa.

²⁰ Na htem hkwỳjê nhõrkwỳ hwỳr gjêx kaxyw hakwa krem kām àkêr o kuhê nhũm mẽ kuma nê mẽ kām anê nhũm mẽ hwỳr agjê. Nê mẽ ixkre hkre kamā axpên mã kapêr o hkrĩ rỳ axpên mã kapêr pê mẽmoj to hkôm o hkrĩ. Ja pyrā nê ot pa mẽ ajamār

o ixpa. Mē ate inhmā anhÿr nhūm ixte mē akôt ixpa ho ixpa nhūm mē pahte axpēn to mex o papa kaxyw.

²¹ Kormā mē kot ixpīr kēt ri na pa pre mē kot amnhī tomnuj xwÿnhjê kutā amnhī to htÿx o ixpa. Amnhī to htÿx nē ri ixpa kamā ixtyk jakamā nhūm Inhīpēēxā akupÿm ixto ixtīr nē akupÿm amnhī wÿr ixto api. Hāmri nē amnhī nhīhkô hā mē ho amnhīptār ā hkrī xā kamā inhÿr pa ixkrī ho ixkrī nē ĩhkô hā mē piitā mē ho amnhīptār o ixkrī. Tā kot kaj mē atō ixpyrā nē ate amnhī tomnuj nē amnhī to htÿx nē. Nē inhmā hprām xā hkôt pix mā amnhī nhīpēx rāhā ty. Hā kot paj amnhī pyrā nē wa ixte mē ato amnhīptār ā ixkrī xāja kamā amnhī nhīhkô hā mē akrī ka mē wa inhīhkô hā wa inhmā mē ho amnhīptār o akrī.

²² E ixkwÿjaja. Kot kaj mē amā ixkapēr mar prām hā kot kaj mē ā Tīrtūm mē wa Ixkarō nhÿ hā ixte mē amā ixkapēr anhÿrja ma nē kām ajamxpēr tÿx rāhā ho ri apa.

Tā ām ja pix. Na hapēx. Anē.

—E Juāw. Kēr ka Raxisej kamā ixkrajē mā ixkapēr ā kagā nē mē hwÿr amē. Nē kagāja piitā krī hkwy kamā ahpÿnhā ixkwÿjê hwÿr arē kē mē kamā harē nē ixkapēr ma. Anē.

Nhūm pre ā Jejus inhmā kapēr anē. Pa kuma nē ô ri mē piitā mē kām hā kagā hpa.

4

Tīrtūm kot mē ho amnhīptār ā hkrī xā jarēnh

¹ Tā pa axte mēmoj pumu nhūm kaxkwa hwÿr mē gjêx xā hā hakwakreja amnhī kahē xā mē pa omu. Hāmri nhūm axte mēhō kapēr tÿx xwÿnhta. Te kot pifti kakōr tÿx pyrāk xwÿnhta axte inhmā kapēr nē inhmā:

—E amnē ixwÿr api pa mēmoj nhÿrmā kot tanhmā amnhī nhīpēx to hkukamā amā ho amnhīrīt ka omu. Anē.

² Hāmri nhūm Tīrtūm Karō tanhmā ixto nē ixto api pa kaxkwa kamā mēmoj pumunh o xa. Tīrtūm kot mē ho amnhīptār ā hkrī xā maatita pa pre omu. Nhūm kamā mēhōja nhÿ. ³ Kuk kamā hirā htÿx kumrēx. Te mēmo kēn kamrēk karÿr jaxēnh tÿx pyrāk. Nē kot mē ho amnhīptār ā hkrī xā puhā māxwÿxti grāgrāreja kām hipōk nē harir pa omunh o xa.

⁴ Nhūm hkrī xā maati puhā mē ho amnhīptār o hkrī xā kēp 24. Kamā mē aptār tūmjaja hkrī. Mē piitā ôr o mē ahkà htu nē ē jakare nē hkrī.

⁵ Nē Tīrtūm hkrī xā maati rūm na katōtōk nē hkrakrak nē haxēnh japā nē hikwÿ. Nē hkrī xā kapem kanē maati pixi kamā kwryt pē 7ja pōk rāhā ho kuhē. Kanēja te Tīrtūm Karō pyrāk.

⁶ Nē hkrī xā kapem mēmo te gō rax pyrākja hkarÿr jaxēnh tÿx kumrēx nē nō. Te ho kax karÿr jaxēnh tÿx pyrā nē hkarÿÿre. Nē hkrī xā puhā mēmoj tīr nē kuhē pē kwat kuhē. Nē ōkwa nē katut piitā hkôt no. Ām no xohtō rax kumrēx. Na pre ā mēmoj kēp kwatja no xohtō anē pa omu.

⁷ Wamta te kot mry pē rēawti pyrāk. Nē hkôt ja te kot mōx myti pyrāk. Nē hapu hā hkuk te panhī hkuk pyrāk. No hapu hā ja te kot àanhāhti htor kaxyw hara koror pyrāk.

⁸ Nē piitā hara kēp 6. Nē ĩ piitā kamā no. Nhūm prem Tīrtūm mā mex o mex ā grer rāhā ho kuhē nē aa pinhkrēnh kēt nē. Nē kām grer o:

Amex o amex Tīrtūm.

Nē axihtÿx o axihtÿx.

Nē aa ate amnhī tomnuj kēt kumrēx.

Amnepē mā kormā mēmoj kēt ri ka ra arāhā ri apa. Tā arī arāhā ri

apa xwýnh na ka. Kot kaj aa ajapêx
kêt nê.

ãm hãmri na ka hte mê ixto mex
râhã ho apa.

Nê amex o amex Tirtûm. Anê.

9-10 Nhũm prem xatã mê ho
amnhĩptâr hkrĩ xã kamã hkrĩ
xwýnhja mê kot kãm “Rãhã pa
xwýnh” anhÿr xwýnhhta mã ã grer
anhÿr o kuhê. Kãm mex o mex ã
grer pê tanhmã kot mê ho mex
to hã harê. Hãmri nhũm mê àptâr
tùm pê 24jaja mãânên kutã hkõn
krã ho rôrôk nê hipô hpa nê hkrĩ.
Nê amnhĩ krã rûm ôr o mê ahkãja
kwrÿ nê hpar pê haxwÿ. Kêp mê ô
Pahi Maati hã hã hpijaãm kaxyw
wamtajê pyrã nê mex o mex ã
harênh o hkrĩ nê kãm:

11 ãm hãmri na pa htem amex o
amex ã ajarê Tirtûm

Apê mê inhô Pahi Maati na ka.

Nê apê mê inhô Tirtûm na ka.

Na ka pre mêmoj piitã ho akato.
Axãhpumunh tÿx nê aja-
maxpêr tÿx o mêmoj piitã
amã hprãm xã hkôt ho
akator pa.

Jakamã na pa htem ã amex o amex
ã ajarênh anê. Mê ixrom ax-
ihtÿx mex kumrêx na ka hte
apa Tirtûm. Anê.

5

*Mê pahte amnhĩ tomnuj pãnhã
amnhÿrer xwýnh jarênh*

Juãw 1.29; Piriapos 2.5-11

1 Tã pa pre arĩ te kaxkwa kamã
mêmoj pumu. Mê ho amnhĩptâr ã
hkrĩ xã maatita kamã hkrĩ xwýnh
nhĩhkra kamã kagã pa omunh o xa.
Upôk rûm omu. No ãm axtem kagã
kaxkep na pre. Nê akutã hã kagã
nê menh ê ho ho htÿx xãja kêp 7.

2 Hãmri nhũm Tirtûm kapêr o
wryk xwýnh xihtÿx xwýnhja kapêr
tÿx kãm kapêr o:

—E mê atô na ate kagã mÿj pyr
nê ho htÿx xã hpôt mã tãm? Anê.

3 Hãmri nê tee ri mê piitã
mê hkapi nom nhũm ja kaxyw

mêhõ amrakati kumrêx. Kaxkwa
kamã amrakati nê pika kamã
mãânên amrakati nê pika hkrak
ri amrakati. Nhÿri mêhõ kot kagã
kaxkepta pyr nê hpôt nê omunh
mã tãm xwýnhja amrakati ho
amrakati.

4 Nhũm tee ri mêhõ japêr nom
mêhõ pumunh kêt nê. Pa tee ri ja
hã omu nê ixkaprĩ htÿx nê inhmÿr
o xa.

5 Hãmri nhũm pahi hõja ixpumu
nê inhmã:

—Kwa amÿr kêt nê. E mêhõ mÿj
pumu. Juta kanrêhã htãmnhwÿ xi-
htÿx xwýnhhta. Pahi Tawi kanrêhã
htãmnhwÿ te kêp mry pê rêãw xi-
htÿx pyrãk o hihtÿx xwýnh mÿj
pumu. Kot mê kãm hkurê xwýnhjê
kutã amnhĩ to htÿx nê mêmoj punuj
piitã ho hapêx kaxyw mã xwýnh
jakamã tapxipix na kot kagãta hpyr
nê ho htÿx xã hpôt par mã tãm. E ka
omu. Anê.

6 Hãmri pa kuma nê hwÿr rĩt nê
Jejusja pumu. Kot mê pahte amnhĩ
tomnuj pãnhã amnhÿrer xwýnhhta
mê ho amnhĩptâr o hkrĩ xã maati
kapem xa. Mêmoj htĩr pê kwat
mê àptâr tùm pê 24jê nhĩpôk ri xa.
Mê kãm hkurê xwýnhjaja kot hpĩr
nhũm ra akupÿm htĩr nê xa. Nom
ra axtem nê xa. àhpumunh tÿxja te
kot pahi xãhpumunh pyrãk. Nê hpàr
kêp 7. Nê no mãânên kêp 7. Noja te
Tirtûm Karô pyrã nê kêp pika piitã
hkôt pa xwýnh. ã Jesusja axtem nê
ãm anê pa omu.

7 Hãmri nhũm mê pahto
amnhĩptâr o hkrĩ xwýnhhta wÿr tẽ
nê ïhkra kamã kêp kagã kaxkepta
py.

8 Hãmri nhũm mê htĩr pê kwat mê
mê àptâr tùmjaja hpar pê hkõn krã
ho rôrôk nê hkrĩ hpa nê hipô nê
hkrĩ. Piitã wiorãwti jamÿ nê ôr o
xijere kamã mêhkuxwa xã jamÿ nê
o hkrĩ. Nhũm Tirtûm krajaja Tirtûm
mã tanhmã amnhĩ jarênh to nhũm
mê mar o hkrĩ. Te xijere kamã

mēhkuxwa xà hpār o hkrī pyrà nē mē kuma.

⁹⁻¹⁰ Jakamā nhūm mē hkōn krā ho hkrī xwýnhjaja mē pahte amnhī tomnuj pānhā amnhīrer xwýnhhta kutā kām grer o hkrī. Mē grer nyw o kām gre nē kām:

Na prem apī ka atyk o mē piitā mē kot amnhī tomnuj pānhā amnhīrer pa.

Ahpýnhā pika piitā hkôt mē urojē piitā hpānhā amnhīrer pa.

Nē ahpýnhā ri mē kapēr xwýnh kwýjē piitā mē hpānhā amnhīrer pa. Atyk o mē kot amnhī tomnuj piitā hpānhā amnhīrer pa.

Jakamā nhūm mē kot akôt amnhī xunhwýr xwýnhjaja kēp Tirtūm kra nē ri pa.

Ka ra mē panhō Tirtūm mā mē kēp patre kaxyw mē unhwý nhūm htem pika piitā hkôt mē ho amnhīptār o pa.

Tā atyk o ate pika piitā hkôt mē hpānhā amnhīrer jakamā kapxipix na ate kagāta pyr nē ho htýx xà hpôt mā tām. Anē.

¹¹ Hāmri nhūm Tirtūm kapēr o mē wrýk xwýnhjaja nhýhýnh hapōj nē kuhê. Mē ohtō rax o ohtō rax. Ohtō rax o mē pajamexpēr jakrenh. Hāmri nē Tirtūm kot mē ho amnhīptār ā hkrī xà maatija wýr mra nē kām hipōk pa. Nē mēmoj tír nē kuhê xwýnhjē mē mē aptār tūmjē mā hipōk pa nē mē pahte amnhī tomnuj pānhā amnhīrer xwýnhhta mā kapēr.

¹² Kàx pē kām kapēr nē kām:

Ām hāmri na pa htem amex o amex ā inhgrer o ixkuhê.

Mē ixrom axihtýx o axihtýx.

Nē mēmoj piitā anhōō.

Nē ate mēmoj piitā hkukamā axāhpumunh par.

Nē amex o amex jakamā na pa htem amā amex pix ā inhgrer o ri ixpa. Anē.

¹³ Tā nhūm mēmoj piitā Tirtūm mē Jejus wa kām wa mex o wa mex ā harē. Pika hkôt panhī nē mry nē àk nē mēmoj piitāā. Nē pika hkrak ri nē gō hkrak ri mēmoj piitāā. Nē mē htykjaja. Nhūm mē piitā wa kām wa mex o wa mex ā wa harē nē wa kām:

E ate mē ixto amnhīptār ā akrī xà kamā akrī xwýnh mē kot mē ixte amnhī tomnuj pānhā amnhīrer xwýnh mē war amex o wa amex.

Nē war axihtýx o war axihtýx.

Nē war axāhpumunh o war axāhpumunh.

Na pa htem ā war ajarēnh anhýr rāhā ixpa ho ixpa. Anē.

¹⁴ Hāmri nhūm mēmoj tír pē kwatjaja mē kuma nē mē kām:

—Nā ām hāmri na ka mē ā wa harēnh anē.

Wa mex o wa mex kumrēx. Anē.

Hāmri nhūm mē aptār tūmjaja Tirtūm mē Jejus wa hpar pē hkōn krā ho rōrōk nē hkrī hpa nē haxwýja wa kām wa mex o wa mex ā wa harē.

6

Kagà ho htýx xà pē 7 jarēnh

Matēwre 24.3-14; Sikūn Tesarōn 2.3; Wam Juāw 2.18

¹ Tā pa arī kaxkwa kamā mē pahte amnhī tomnuj pānhā amnhīrer xwýnh kot tanhmā amnhī nhīpēx to hā omunh o xa. Nhūm kagà kaxkepta py nē wam ho htýx xà pôt. Hāmri nhūm mēmoj tír pē kwatjē hōja kapēr týx kumrēx. Te na katōtōk týx pyrāk o mēhōj mā kapēr nē kām:

—E amnē mē ixwýr tē. Anē.

² Hāmri nhūm kawar jakajre nhýhýnh hwýr hpōx o tē. Nhūm mēhōja ō kuxê mý nē hā nhý nē tē. Hāmri nhūm nhām mēhōja hwýr tē nē kām pahi hā mē ahkà htū. Hāmri nē kām tanhmā kapēr to nhūm kuma nē mē kot kām Tirtūm mē Jejus wa kurē xwýnhjē nhīmex

par kaxyw hakêx nê ma pika hwÿr tèn wrÿ.

³ Hâmri nhÿm mē pahte amnhĩ tomnuj pānhā amnhĩrer xwÿnhja wam kagā ho htÿx xāta kôt axte ja pôt. Hâmri nhÿm mēmoj tĩr pē kwatjê hōja axtem mēhōj mā kapêr nê kām:

—E amnē mē ixwÿr tē. Anē.

⁴ Hâmri nhÿm kawar kamrêk mē hwÿr hpôx o tē. Nhÿm mēhō hā nhÿ nê tē. Nhÿm nhām mēhōja kām wapo gō nê ma pika hwÿr htēm nê wrÿk kaxyw hano. Kot hwÿr wrÿk nê pikap mē pa xwÿnhjê kurê huk kaxyw. Mē kot axpēn par kaxyw ma mē hwÿr kumē. Hâmri nhÿm kuma nê wapota py nê hakêx nê ma mē hwÿr tèn wrÿ.

⁵ Hâmri nhÿm mē pahte amnhĩ tomnuj pānhā amnhĩrer xwÿnhja kagā ho htÿx xā hō pôt. Na pre ra ho axkrut nê hpôt tā hpānhā axte hkôt ja pôt. Hâmri nhÿm mēmoj tĩr pē 4jê hōta mēhōj mā kapêr nê kām:

—E amnē mē ixwÿr tē. Anē

Hâmri nhÿm kawar tykre mē hwÿr hpôx o tē. Nhÿm hā ÿr xwÿnhja mēmoj to peja xā hā parās mÿ nê o tē.

⁶ Hâmri nhÿm mē htĩr pē kwatjê rūm mēhōja kām kapêr nê kām:

—E kēr ka ma pika hwÿr mē hwÿr tèn wrÿ nê mē kām myt pyxi kamā mē apēnh pānhā mē kām mēmoj to hkryre nē anhō parāsta kamā ho peja nê mē kām ōr o apa. Nom mē apkur xā hā orti nê wĩhti ka mē kēp tanhmā ho hkêt nê. Anē.

Hâmri nhÿm kuma nê hakêx nê ma tèn mē hwÿr wrÿ.

⁷ Tā nhÿm mē pahte amnhĩ tomnuj pānhā amnhĩrer xwÿnhja axte kagā ho htÿx xā hō hpôt. Na pre ra ho axkrunēpxi nê hpôt tā hpānhā axte hkôt ja pôt. Hâmri nhÿm mēmoj tĩr pē kwat kot hitep xwÿnhja mēhōj mā kām:

—E amnē mē ixwÿr tē. Anē.

⁸ Hâmri nhÿm kawar rārāare mē hwÿr hpôx o tē. Nhÿm mēhō hā nhÿ

nê tē. Hā ÿr xwÿnh nhĩxi na pre kēp “Mēhtyk” anē. Hâmri nhÿm mēhōja kām kapêr nê kām:

—E ma pika hwÿr wrÿ nê tanhmā mē ho kē mē ohtô nê tanhmā amnhĩ to nê axkaprā. Kē mē hkwyjaja pijapu kamā axpēn pa nê mē hkwyjaja prām xāj ty nê mē hkwyjaja tanhmā à htÿx kute kamā ty. Nē mēmo mry xoprēja mē hkwyjê pa. E ma mē hwÿr wrÿ nê tanhmā mē ho ho apa. Anē.

Hâmri nhÿm kuma nê hakêx nê ma pika hwÿr tèn wrÿ. Hâmri nhÿm mē htykjê papxāja tanhmā amnhĩ to nê te kot hā jēt nê ma hkôt mōr nê pika hwÿr wrÿk pyrāk pa pre arĩ omunh o xa.

⁹ Hâmri nhÿm mē pahte amnhĩ tomnuj pānhā amnhĩrer xwÿnhja axte kagā ho htÿx xā hō hpôt. Na pre ra ho kwat nê hpôt tā hpānhā axte ja pôt. Hâmri nê hpôtja kôt pa ra mē kot Tirtūm mā mēmoj nhōr xā hā mēsti pumu. Nē hkrak ri mē hkarōjê pumu. Mē kot hkwyjê hkôt ri mē kām Tirtūm kapêr jarēnh nē Jejus kēp mē ō Pahihti hā harēnh o pa nhÿm mē kot hā mē hpar xwÿnhjê karōja pa pre mē omu. Nhÿm mē mēsti hkrak ri amnhĩ to Tirtūm wÿr o hkrĩ. ¹⁰ Kÿx pē kām kapêr nê kām:

—Ām hāmri amex o amex Pahi Maati. Aa ate mēmoj tā tanhmā amnhĩ to axēx to hkêt kumrēx. Kwa xā kot kaj tokyx pika hkôt mē kot mē inhīmex xwÿnhjaja tanhmā mē ixtā mē ho nā? Anē.

¹¹ Hâmri nhÿm mēhōja mē hwÿr tē nê mē kām mē ê jakajre gō nhÿm mē hagjê. Hâmri nhÿm mē kām:

—E mē mamrĩ atar akōkôt o akrĩ. Koja Tirtūm kormā tanhmā mē kot mē atomnuj xwÿnhjê ho hkêt nê. Kē mē axte mē apyrā nê mē akwyjê nhīmex mān. Koja mē Tirtūm jamaxpêr xā hkôt axte mē akwyjê pa nhÿm rĩ kormā mē ato hpim-rāatā tanhmā mē atā mē hipēx to. Jakamā e mē atar kutēp māmri akōkôt o akrĩ. Anē.

¹² Hāmri nhūm mē pahte amnhī tomnuj pānhā amnhīrer xwýnhhta axte kagà ho htýx xà hō hpôt pa omu. Na pre ra ho 5 nē hpôt tā hpānhā hkôt axte ja pôt. Hāmri nhūm pika htertēt týx kumrēx. Nē myyti ahtyk nē mytwryre te kēp mē hkamrō kamrēk týx pyrà nē ajēt.

¹³ Nē kanhēti tanhmā amnhī to nē axrē nē pikap rōrōk pa. Te kōk xāpēr týx nē kot pàrerekre kormā ràx tā kot kām hikranh par pyrà nē piitā rēnh pa nhūm rōrōk.

¹⁴ Hāmri nhūm kaxkwaja te kagà kaxkep pyrà nē amnhī to kaxkep o tē. Nē pika piitā hkôt kēn prēk nē hixēt prēk maati piitā te hkrī xà rūm hapôx nē mrar nē nhām hkrī pyràk. Nhūm gō hipôk piitā haxwýja te hikwý xà rūm hapôx nē mrar nē nhām hikwý pyràk. Pika htertēt týx nhý hā ã mēmoj amnhī nhīpēx anē. ¹⁵ Hāmri nhūm pika hkôt mē piitā tee ri mēmoj ã amnhī nhīpēx anhýr ã omu nē kām ma nē htertēt týx kumrēx. Mē ho amnhīptār xwýnhjaja nē pōristi krāhtūmjaja nē mē kot amnhī to rūnh xwýnhjaja nē mē hihtýx xwýnhjaja nē mē kām mē àpēnh xwýnhjaja nē amnhī mā mē àpēnh xwýnhjaja. ãm piitā mēmoj ã kot amnhī nhīpēx anhýr ã omu nē tee ri amnhī kukamā hamaxpēr nē kām ma ho kām ma. Hāmri nē hpimxur kaxyw ma kēn prēk kre japēr o hprôt nē mra. ¹⁶⁻¹⁷ Hāmri nē amnhī to kēn prēk wý nē kām:

—Kwa na ra mē ixto amnhīptār ã hkrī xà maati kamā hkrī xwýnh mē kot mē ixte amnhī tomnuj pānhā amnhīrer xwýnhhta wa mē íxkamā gryk týx kumrēx. Ra wa kot tanhmā mē ixtomnuj to xà hā arīgrota kato. Koja wa mē ixtomnuj týx nē pa mē kutā hkēt nē. Kwa tokyx mē inhīpy arōrōk nē wa kēp mē ixto amūxu. Anē.

7

Mē kot Tirtūm mā hkrajé kagà Apokarip 9.4

¹ Tā pa arī kaxkwa kamā mēmoj pumu. Nhūm Tirtūm kapēr o mē wrýk xwýnh pē kwatja piitā ahpýnhā pika nhītep xà hkôt kōk jatúr xà hā hamý nē ho kuhê. Pika piitā hkôt kōk hpinhkrēnh par nē àpēr kēt nē gō xujanār kôt àpēr kēt kaxyw hatur xà hā hamý nē ho kuhê. Nē pā piitā hkôt àpēr nē tanhmā pī hkwy ho pymaj nhūm mē ã amnhī nhīpēx anē nē hatur xà hā hamý nē ho kuhê. ² Na pre ra Tirtūm ja hā mē kām karō nē mē kām:

—E kēr ka mē ma pika hwýr wrý nē pika nē gō xujanārja tanhmā wa homnu hto. Anē.

Hāmri nhūm mē kuma nē hwýr wrý nē kormā nē kōk ho htýx. Hāmri nhūm Tirtūm kapēr o wrýk xwýnhjē hōja myt japôx xà rūm mē hwýr hpôx o tē. Nē íhkra kamā mē kot Tirtūm kra hā mē hixi jarēnh xà hā kagàta py nē o tē. Hāmri nē kàx pē mē kot pika mē gō xujanār homnu mā xwýnhjē mā kapēr nē mē kām:

³ —Kwa taxy pa Tirtūm krajé nhōkrā kagà hpa mán. Kēr ka mē omu nē mē tapxipixjaja tanhmā mē ho hkēt nē. Anē.

⁴⁻⁸ Hāmri nē mē hkagà pa. Ahpýnhā Ijaew pigrānh xwýnhjaja mē ho ohtō rax kumrēx nē tanhmā mē hkagà hto. Pa tanhmā mē kute hā mē harēnh ma nhūm xep mē ohtō rax kumrēx.

Juta kamā mē kēp 12.000.

Nē Rupē kamā mē kēp 12.000.

Nē Gax kamā mē kēp 12.000.

Nē As kamā mē kēp 12.000.

Nē Natari kamā mē kēp 12.000.

Nē Manase kamā mē kēp 12.000.

Nē Simeāw kamā mē kēp 12.000.

Nē Rewi kamā mē kēp 12.000.

Nē Isaka kamā mē kēp 12.000.

Nē Jepurō kamā mē kēp 12.000.

Nē Juje kamā mē kēp 12.000.

Nē Pējami kamā mē kēp 12.000.

Ã më ohtô rax kot anhÿr. Hãmri nê më piitã më pikamÿr par kãm më kêp 144.000. Piitã kêp Apraãw kanrêhã htãmnhwÿ na pre më. Tã ã axpên kaxyw më ohtô rax kumrêx kot anhÿr tã nhÿm më hkagã pa.

*Tÿrtÿm kra hkwÿjê jarênh
Apokarip 14.1-5*

⁹ Tã pa axtem mëmoj pumu. Nhÿm më ohtô rax nê Tÿrtÿm nhô krÿ kamã kuhê. Ahpÿnhã ri pika piitã hkôt më urojaja. Nê ahpÿnhã ri më kapêr xwÿnhjaja nhÿm prem pika piitã kurÿm kot më ho amnhÿptãr ã hkrÿ xã maati ja kamã hkrÿ xwÿnh pê Tÿrtÿm më më pahte amnhÿ tomnuj pãnhã amnhÿrer xwÿnhja wa kutã kuhê. Më ohtô rax kumrêx jakamã pa tee ri më piitã më ho kôta hpar prãm kaprÿ. Nê piitã ê jakare kamã kuhê. Nê hkÿnh nê hkÿnh xaj pô hkwÿ jamÿ nê ho àpêr o kuhê. ¹⁰ Hãmri nê kÿx pêê Tÿrtÿm më Jejus wa kãm kapêr nê wa kãm:

Hêxta waa nê. War amex o war amex Pahi Maati.

Na ka pre Akra Jejus kukwak ri më ixte amnhÿ tomnuj ã tanhmã më ixto hkêr nê.

War ajamê më ixkamã axukapri rãhã ho apa xwÿnh na ka wa.

Jakamã pa më inhmex nê war awÿr api nê war akuri inhmex nê ijamakêtkati nê ixpa ho ixpa.

Ãm hãmri na ka hte wa më ixto mex rax kumrêx o apa. War amex o war amex. Anê.

¹¹ Hãmri nhÿm Tÿrtÿm kapêr o më wrÿk xwÿnhjaja Tÿrtÿm krÿ xã mã hipôk nê hkôn krã ho rôrôk nê hkrÿ hpa. Nê më àptãr tÿmjê më më htÿr nê kuhê xwÿnhjaja më ìhkô hã kãm hipôk nê wam tajê pyrãk nê hkôn krã ho rôrôk nê hkrÿ. Hãmri nê më ohtô kot Tÿrtÿm më Jejus wa kãm kapêr ã më kuma hãmri nê Tÿrtÿm ã hpijaãm kaxyw hpar pê htu mÿr pê hikwÿ hpa nê kãm mex o mex ã harê nê kãm:

¹² “Ãm hãmri na më ã ajarênh anê Tÿrtÿm. Amex o amex.

Na ka hte më ixto mex o apa.

Më ixrom axãhpumunh o axãhpumunh.

Nê më ixrom axihtÿx o axihtÿx.

Jakamã na ka hte më ixpiitã më ixto mex kumrêx rãhã ho apa.

Ã ate anhÿr rãhã o rãhã jakamã na pa htem amã amex o amex ã ajarênh rãhã ho ixpa.” Anê.

¹³ Hãmri pa më omunh o ixãm rôm nhÿm më àptãr tÿmjê hõja ixwÿr tẽ nê më ê jaka kamã më hkÿnh xaj pô jamÿnh nê ho kuhê xwÿnhjê hã ixkukja nê inhmã:

—E mãn ate më ê jakare kamã më kuhê xwÿnh mÿjê pumunh nã? Tanhmã na prem amnhÿ nhÿpêx to nê amnê api? Xã ate më omunh? Anê.

¹⁴ Hãmri pa kuma nê kãm:

—Nã ixte më omunh kêt. Kêt ka na ixrom ate më omunh. Anê.

Hãmri nhÿm inhmã më harênh o:

—Nã na pre më hkwÿjaja Jejus ã më homnuj tÿx kumrêx nê më kupa. Tã më kêp Jejus kwÿ jakamã na pre më nê më kot amnhÿ tomnuj o hapêx nê te amnhÿ kamrô ho më nê më kot amnhÿ tomnuj piitã kuhôn par pyrãk o më hipêx. Jakamã nhÿm më ê jaka kamã mex nê hkÿnh tÿx nê pa.

¹⁵ Nê Tÿrtÿm kot më pahto amnhÿptãr ã hkrÿ xã maati kutã kãm mex o mex ã harênh rãhã ho kuhê.

Na hte më ho mex rãhã ho pa. Më hkôt pa ho pa jakamã koja mëmoj tanhmã kêp më ho hkêr nê.

¹⁶⁻¹⁷ Nê më pahte amnhÿ tomnuj pãnhã amnhÿrer xwÿnh kot Tÿrtÿm krÿ xã maati kamã ãm xwÿnhnta na hte më hamãr mex rãhã ho më hkôt pa.

Te më kot më hkrit jamãr mex pyrãk.

Nê te më kot më hkrit kôm o pa nhÿm htÿr nê pa pyrãk.

Koja mẽ kuri htĩr tũm nẽ hkõt pa ho pa.

Nẽ axte kãm prãm kêt nẽ.

Nẽ axte kãm kôr kêt nẽ.

Nhũm arĩgro htỳxja axte mẽ hkà ho hxêt kêt nẽ.

Koja Tĩrtũm te mẽ kot mẽ hkra no kagô nhĩnhĩnh par pyræk o mẽ hipêx nhũm mẽ axte hkaprĩ nẽ mỳr o pa hkêt nẽ.

Pãnhã hkĩnh nẽ mex rãhã kuri pa ho pa. Anẽ.

8

Kagà kaxkep o htỳx xà kot hitep jarẽnh

¹ Tã pa arĩ kaxkwa kamã mẽmoj pumu nhũm mẽ pahte amnhĩ tom-nuj pãnhã amnhĩrer xwỳnhja kagà kaxkep o htỳx xà kot hitepta põt. Hãmri nhũm kaxkwa kamã mẽmoj piitã hpinhkrẽnh pa nhũm mẽhõ kapër kêt kumrêx. Nẽ hpinhkrẽnh par o ra hã ahtũm ry mex nẽ.

² Hãmri nhũm Tĩrtũm kutã kapër o wrỳk xwỳnh pẽ 7 nẽ mẽ kuhẽ xwỳnhja. Nhũm kapër o wrỳk xwỳnhjẽ hõja mẽ hwỳr tẽ nẽ mẽ piitã mẽ kãm pifti gõ.

³⁻⁴ Hãmri nhũm kapër o wrỳk xwỳnhjẽ hõja ôr o xijere py nẽ Tĩrtũm mã mẽhkuxwa xà ho xêt xà hã mės kunĩhti hwỳr o tẽ. Mẽ ho amnhĩptar ã hkrĩ xà maati kutã ôr o mēstija wỳr o tẽ nẽ kuri o xa. Hãmri nhũm mẽ kãm kamã mẽhkuxwa xà hkwy runh rax nẽ nhũm mēsti hã ho xêt o xa. Rôm nhũm Tĩrtũm krajaja Tĩrtũm mã tanhmã amnhĩ jarẽnh to. Jakamã nhũm mẽhkuxwa xà xêt kũm mẽ mẽ kot Tĩrtũm mã amnhĩ jarẽnh xaja mẽ nhũm ahkà nẽ Tĩrtũm kapër o wrỳk xwỳnh nhĩhkra kamã xijere rũm Tĩrtũm kutã kàx mã àpir o pa.

⁵ Hãmri nhũm kapër o wrỳk xwỳnhja xijere kamã kuwy hpøk kwỳ ho nỳt nẽ ahtar mã pika hwỳr kumẽ nhũm ma tẽ nẽ pikap tẽm nhũm pika htertet tỳx nẽ kamã na katõtõk nẽ haxênh nẽ hkrakrak.

Mẽ kot pifti kakôr ã mẽ harẽnh

⁶ Hãmri nhũm Tĩrtũm kapër o wrỳk xwỳnh pẽ 7 kot pifti jamỳnh xwỳnhja ra kot pifti kakôr mã.

⁷ Jakamã nhũm wamta õ pifti kakô nhũm na mẽ te kot jêr krã jakot pyræk xwỳnh mẽ kuwy te kot mẽmo kamrô kamrêk pyræk xwỳnhhta pikap rôrøk pa. Nẽ nhỹhỹnh pika hkwy ho rax nẽ ho kaxàr pa. Nẽ põtĩ nẽ akunĩ hkwy ho rax kumrêx nẽ ho kaxàr pa. ⁸ Hãmri nhũm wam ãm xwỳnh nhĩjuk ri ãm xwỳnhja õ pifti kakô nhũm mẽmoj te kẽn krã hprêk pøk pyrã nẽ kaxkwa rũm ahtar mã tẽ nẽ gõ xujanãr nhĩkjẽ kamã hpøk rãhã tẽn mrõ. Hãmri nhũm gõ nhĩkjẽ kamã gõja mẽmo hkamrô hã amnhĩ jahkre hpa. ⁹ Jakamã nhũm gõx kãm mẽmoj htĩr nẽ ri mrar xwỳnhja pikaprãr pa. Nẽ gõx kãm pãr gõ krãhkã hã pa xwỳnhja haxwỳja gjêx pa. Nẽ pãr kãm mẽ pa xwỳnhja haxwỳja hagjẽ nẽ pikaprãr pa. No nhũm gõ mex kãm pãr kãm mẽ pa xwỳnhja mẽ kurom arĩ htĩr nẽ.

¹⁰ Tã nhũm wam ãm xwỳnhta wa hijuk ri ãm xwỳnhja õ pifti kakô. Hãmri nhũm kanhêti rax kumrêxja axta nẽ hpøk o ma ahtar mã tẽn pikap tẽm nẽ pyhti nẽ hino hkwy ho ohtõ nẽ homnu hpa. ¹¹ Kanhêti nhĩxi pẽ na pre “mẽmoj xỳ xà” anhỹr jakamã nhũm tẽm nẽ pyhti nẽ hino hkwy ho ohtõ nẽ homnu pa. Nhũm prem hwỳr mra nẽ hkwy janhi nẽ ho ixkõ nhũm ý nẽ nhũm mẽ ohtõ nẽ ho ixkõ nẽ axkaprã.

¹² Hãmri nhũm hpãnhã Tĩrtũm kapër o wrỳk xwỳnhjẽ hõja õ pifti kakô. Na pre ra ho axkrunêpxi nẽ hkakôr tã hpãnhã ra axte hõ ja kakô. Hãmri nhũm mẽhõja tẽ nẽ myyti kura nhũm hkwy ahtyk nẽ hirã hkêt nẽ. Nhũm mytwrỹre nẽ kanhêti mã ho anẽ nẽ myyti pyrã nẽ hkwy ahtyk nẽ hirã hkêt nẽ harir. Jakamã nhũm kamãt kãm

hirā mex kêt nê. Nê arīgro hā myytija haxwýja hirā mex kêt nê.

¹³ Hāmri pa kaxkwa kamā àanhàhti pumu nhùm kýt pê ri htor o pa pê tanhmā kapêr to nê kapêr o:

—Hêxta waa nê. Kormā kot pifti kakôr xwýnhjaja axkrunêpxi nê kormā hkakôr kêt nê. Koja mē tokyx hkakô nhùm pika hkôt ri mē pa xwýnhjaja amnhī xà htýx kamā hamak týt o pa. Na pa tee ri mē hkukamā ijamaxpêr nê inhmā mē hkaprī htýx nê. Hêxta waa nê. Koja mē omnuj týt kumrêx. Anê.

9

¹ Tā pa axte mēmoj pumu. Nhùm Tirtüm kapêr o wrýk xwýnhjê hō ò pifti kakô. Na prem ra ho kwat nê hkakôr tā hpānhā axte hōja ja kakô. Hāmri nhùm kanhêti hō axta nê pikap tēm kurê kumrêx nhùm mēhōja omu nê hwýr tē nê kām mēmoj tā saf gō. Satanasti jagjênh xà hā ahkre xupým o htýx xà hā safja nhùm kanhêti mā kugō.

² Hāmri nhùm kupy nê ahkrehtita wýr o tē nê kahê xà mē nhùm kurüm kuwy hkùm hapôx rax nê. Nê ma kàx mā àpir o pa nê myyti hpro hpa nhùm kamàt kô rax kumrêx.

³⁻¹¹ Nê kuwy hkùmja rüm mēmoj te krit pyrāk xwýnh kwýjaja pikap rôrôk nê kuhê. Te kot krit pyrāk tā mē hkuk te panhī hkuk pyrāk. Nê mē hkrā hkī te mēnijê hkrā hkī japjê pyrāk. Nê ôr o mē ahkà jagjê. Nê mē wa japjê htýx kumrêx. Te rêawti xwa japjê pyrāk. Nê kàx o mē hinô hkā. Nhùm mē htor o hara hkoko htýx o mra. Te ho kawar xohtô pijapu kaxyw kot mē hkjênh xà kamā mē htur nê mē hkjênh o hprôt nhùm hkoko htýx pyrāk. Nê mē hkamnhwýr o pa kaxyw mē hanhyja te kot makre janhy pyrāk. Ā kriitija kot anhýr. Nê te nhýhým oprê kaxyw nojarêt nê mē hkrit kawar hā hikukrêx mex rênh pyrāk. Mēõ pahija ahkre

xupýmta kamā kêp mē hkrāhtüm. Ijaew kapêr kām hixi pê “Apatô.” No Gres kapêr kām kêp “Aporiâw.” No mē pakapêr kām kêp “mê hpar o pa xwýnh.” Hāmri nhùm Tirtüm kriiti mā kapêr nê mē kām:

—E kêr ka mē ma pika piitā hkôt te makre kot amnhī nhîpêx pyrā nê ri mē hkôt mē hkamnhwýr o apa. Ā amnhī nhîpêx anhýr o mē atā mytwrý pê sîk. No âm kêr ka mē hpar kumrêx kêt nê. Âm mē kot amnhī xà htýx kām hamak pix kaxyw tanhmā mē ho ho apa. Te makre kot mē hkamnhwýr nhùm à htýx kumrêxta pyrāk. No mē ate mē hkamnhwýr nhùm mē hkamnhwýr xàja koja à htýx o makre kot mē hkamnhwýr jakre. Nom ra mē kot Tirtüm kra hā mē hkagà xwýnhjaja kêr ka mē omu nê âm mē omu nê tanhmā mē ho hkêt nê. Mē kêp ixkwý na mē. Nê pō nê prát ka mē âm omu nê tanhmā ho hkêt nê. Âm mē kot panhī nhôkrā kagà hkêt xwýnh pixjaja ka ā mē hipêx anhýr o ri mē hkôt apa. Nom kêr ka mē hpar kêt nê. Kê mē tee ri amnhī xà hā maj kām tokyx htyk nê hapêx prām hkaprý ho pa. E ma mē hwýr mra nê ā mē hipêx anhýr o ri apa. Anê.

Hāmri nhùm mē kuma nê ma mē hwýr mra.

¹² Na ra pika hkôt wam mē homnu xà pyxi nê hapêx. No âm arī hamêxkrut.

¹³ Jakamā nhùm Tirtüm kapêr o wrýk xwýnhjê hōja axte ò pifti kakô. Na prem ra ho sîk nê hkakôr tā axte hkôt hōja hkakô. Nhùm Tirtüm kutā ôr o mēsti rüm mēhōja tanhmā kapêr to. Mēsti janhà rüm kapêr. ¹⁴ Pifti kakôr xwýnhhta mā kapêr nê kām:

—E na ra mē kot mē hkwyjê nhîmex ā arīgrota kato. Jakamā kêr ka ma pyhti pê Erax wýr wrý nê gō mý ri Satanasti mā mē àpênh xwýnh pê kwatja pumu. Na prem ra mē hpa hpre nhùm mē gō mýr ri

arī hkrī ho hkrī. Ka mẽ omu nẽ mẽ kãm mẽ hpa hpre xà hpôt pa kẽ mẽ ma mẽ hkôt ri mẽ hpar o pa. Anẽ.

¹⁵ Na pre ra Tirtũm mẽ kot mẽ hkwyjẽ nhĩmex o pa kaxyw mẽ kurẽ nẽ gô mỳ ri mẽ unhwỳ nhũm mẽ kormã mẽ hpar xà hã arĩgro jamãr o hkrī. Jakamã nhũm ã pifti kakôr xwỳnhhta mã mẽ harẽnh anẽ nhũm kuma nẽ ma tẽ nẽ mẽ hwỳr wrỳ nẽ mẽ kãm mẽ hpa hpre xà hpôt pa. Hãmri nhũm mẽ ma pika piitã hkôt ri mẽ hpar o mẽ hkôt pa. Nẽ mẽ ho ohtô rax kumrẽx nẽ mẽ himex. ¹⁶ Nẽ ma amnhĩ kôt põristi ho ohtô rax nẽ o pa. Piitã kawar ã hkrī nẽ mẽ hkôt hprôt nẽ hkoko ho mra. Mẽ kẽp 200.000.000 hã mẽ harẽ pa mẽ harẽnh ma. Mẽ ohtô rax o mẽ ohtô rax.

¹⁷ Na pa pre arĩ te ixpimtir kãm mẽ omunh pyrãk. Nhũm kawar ã mẽ hkrī xwỳnhjaja. Mẽ hinô kàja axtem kàx o. Nẽ hkamrẽkja te kuwy hpôk kamrẽk pyrãk. Nẽ rãrãrja te mẽ hkurôt kane xà pẽ ẽsôf rãrãr pyrãk. Nẽ kakrã htyk. ã kàx o mẽ hinô hkã kot anhỹr. Nẽ mẽ hkrit kawarti hkrãja te rãawti krã pyrãk. Nẽ mẽ hakwa rũm kuwy hpôk mẽ ẽsôfti mẽ kuwy hkũm axpẽn kôt hapôx o pa. ¹⁸⁻¹⁹ Nẽ kawarti jamy axtem te kẽp kagã xoprẽ hkrã pyrãk nhũm mẽ hamy ho mẽ hkamnhar o mẽ kupa. Nẽ mẽ hakwa rũm kuwy hkũm mẽ kuwy hpôk mẽ ẽsôfti hapôx xwỳnhhta mã mẽ ho anẽ nẽ. Jakamã nhũm kawartijaja mẽ hkôt ri hamy mẽ hakwa ho mẽ hpar o pa nẽ mẽ ohtô rax kumrẽx nẽ mẽ himex.

²⁰⁻²¹ Tã nom nhũm arĩ mẽ htĩr nẽ ri mẽ pa xwỳnhjaja. Mẽ kot mẽ hkwyjẽ hpar kêt xwỳnhjaja hãmri ja hã mẽ omunh tã arĩ amnhĩ tomnuj o pa nẽ kãm urer kêt nẽ. Arĩ tanhmã amnhĩ tomnuj to ho pa. Axpẽn pẽ hprõ nẽ mjẽn o amnhĩkati nẽ axpẽn pẽ ahkĩ. Nẽ axpẽn par o ri pa nẽ tanhmã axpẽn xyhto ho pa. ã htỳx ri amnhĩ nhĩpẽx anhỹr o pa nẽ

kãm urer kêt nẽ. ãm Satanasti hkôt pix mã ri amnhĩ nhĩpẽx o pa. Nẽ amnhũm sãnti hkwy nhĩpẽx. Pĩ ho hipẽx nẽ kàx o hipẽx nẽ kẽn o hipẽx. Nẽ hipẽx pa nẽ amnhĩ to hwỳr o pa. Nom mo kot mẽ mar kaxyw sãnti jamak kre? Nẽ kot mẽ omunh kaxyw mo no? Nẽ ri mrrar nẽ mẽ ho utar kaxyw mo hte? Na htem arĩ ã amnhĩ to hwỳr kaprỳ anhỹr o pa.

10

Kagã kaxkep grire jarẽnh

¹ Tã pa arĩ mẽmoj pumu. Nhũm axte Tirtũm kapër o wrỳk xwỳnh xihtỳxjẽ hõja pika hwỳr wrỳk o tẽ. Nẽ ẽja kakrã ho na pre. Nẽ hkrã mỳ ri mãxwỳxti ajêt. Nẽ hkuk te myt no kamã hirã htỳx pyrãk. Nẽ akutã hte kamã te kuwy hpôk pyrãk. ² Nẽ ãhkra kamã kagã kaxkep grire ra pipôt nhũm ma o tẽ nẽ o wrỳ nẽ o xa. Nẽ gô xujanãr kãm upôk rũm hte xãm nẽ kỳx pẽ amgrã kamã apke rũm hte xãm nẽ o xa pa ixprĩ hã omu.

³ Hãmri nhũm kàx pẽ ẽ amỹra. Te rãaw hkrã tỳx pyrãk. Nhũm hpãnhã kaxkwa kamã mẽhõja kãm kapër. Te na katõtõk o 7 wẽs pyrãk pa ixprĩ hã tanhmã kapër to hã kuma. ⁴ Hãmri nẽ ra mẽ amã ã kagã kaxyw nhũm mẽ ja nẽ inhmã kapër nẽ inhmã:

—Kwa nã kwarĩ ja kot kaj hã kagã hkêt nẽ. ãm ja pix kot kaj akwỳjẽ mã hã kagã hkêt nẽ. ãm kapxipix mãn ama nẽ ri hã apa.

Anhỹr jakamã pa mẽ amã hã kagã hkêt nẽ. ãm papxipix kuma nẽ ri hã ixpa.

⁵ Tã nhũm Tirtũm kapër o wrỳk xwỳnh kot gô xujanãr kãm upôk rũm hte xãm nẽ apke amgrã kamã ãm xwỳnhhta hãmri Tirtũm nhỹ hã kapër kaxyw nẽ kãnhmã ãhkra pẽ. ⁶⁻⁷ Tirtũm pẽ kaxkwa nẽ pika nẽ gô xujanãr o kator nẽ kamã kot mẽmoj piitã ho kator xwỳnhja. Nẽ htĩr rãhã

nê pa ho pa xwÿnhja. Nhÿm ÿ hã kapêr nê kapêr o:

—E hãmri. Amnepê mã na pre Tirtÿm ÿ hã mē kãm kapêr o ri mē pa xwÿnhjê mã tanhmã amnhĩ kukamã amnhĩ jarênh to. Tanhmã kot pika piitã hkôt mē pa xwÿnhjê nhĩpêx to hã amnhĩ jarê. Nê mēmo arĩgro hã mē kot amnhĩ tomnuj mÿrapê tanhmã kot mē hipêx to hã mē hkukamã mē hã amnhĩ jarê. Tã ra ã mē hipêx anhÿr xà hã arĩgro kato. Jakamã koja kapêr o wrÿk xwÿnh kot hitepta õ pifti kakô hãmri nhÿm mēmojja ã amnhĩ nhĩpêx anhÿr kurê kumrêx. ãm hãmri na pa mē amã ja jarê. Anê.

⁸ Pa mar o ixãm rôm nhÿm wam inhmã kapêr xwÿnhhta axte inhmã kapêr nê inhmã:

—E ma pika hwÿr wrÿ nê gô xujanãr kãm upók rÿm hte xãm nê amgrã kamã apke rÿm hte xãm xwÿnhhta wÿr tē nê kēp kagã kaxkep grire pipôt xwÿnhhta py. Anê.

⁹ Hãmri pa kuma nê ma hwÿr wrÿ nê hã kuwÿ nhÿm inhmã kugõ nê inhmã:

—E mĩ. Apy nê akrê. ànhre. Te kot menh xành pyrãk. Nom kot kaj akrê nê anhõhy xà. Nom mãmrĩ apy nê akrê. E mĩ. Anê.

¹⁰ Hãmri pa kēp kupy nê hkaki nhÿm ànhre. Pa hkrêr pa hãmri nê inhõhy xà kurê kumrêx.

¹¹ Hãmri nhÿm kot inhmã õr xwÿnhhta inhmã:

—Nã ãm hãmri na ka apy nê akrê. Jakamã kêr ka ano ho ate mēmoj piitã omunh xwÿnhja nê ajamak o ate mēmoj mar xwÿnhja nê ate tanhmã Tirtÿm kapêr mar toja ka piitã hã kagã hpa. Hãmri nê ate omunh xà hkôt akwÿjê mã piitã harênh o apa. Mē kot nhÿrmã Tirtÿm kot tanhmã mē piitã mē hipêx to hã harênh mar kaxyw. Ahpÿnhã ri pika piitã hkôt mē urojê piitã koja nhÿrmã ã mē hipêx anê. Ahpÿnhã ri mē kapêr xwÿnh piitã. Nê mē õ pahijaja. ãm

mē piitã koja nhÿrmã ã mē hipêx anê. Anê.

11

Tirtÿm nhÿ hã kapêr xwÿnh pi-jakrut wa harênh

¹ Tã nhÿm mēhõj inhmã mēmoj to mĩdi xà hã pĩ ryre gõ nê inhmã:

—E ja py nê Jerujarê hwÿr wrÿ nê kamã Tirtÿm mã amnhĩ jarênh xà hã ixkreja o mĩdi. Nê ixkre kamã amnepê mē kot amnhĩ tomnuj pãnhã Tirtÿm mã õwêhti nhõr xà hã mēstita mã ho anê nê ho mĩdi. Nê ixkre kamã mē kot Tirtÿm mã amnhĩ jarênh o mē hkrĩ xwÿnhjaja ka aprĩ hã mē ho kõta.

² —No ixkre kapem pikaja ka ho mĩdi hkêt nê. Ra Tirtÿm kot mē kot amnhĩ tomnuj xwÿnhjê mã hkaga jakamã koja mē htÿx ri kãm hprãm xà hkôt tanhmã homnu hto ho pa. Nê Jerujarê piitã hkôt ri homnu ho paja ã hã amgrã axkrunêpxi nê hkôt mytwrÿ kēp 6.

³ —Koja Tirtÿm ma ÿ hã kapêr xwÿnh ho hamêxkrut nê mē hwÿr wa kumê nhÿm wa ma mē hwÿr wrÿ nê mē kãm Tirtÿm kapêr jarênh o ri mē hkôt pa. Hãmri nê tee ri mē kot tanhmã amnhĩ tomnuj to hã mē omu nê hkaprĩ nê. Hãmri nê wa hkaprĩ xàx xak punure kaxô nê haxà nê mē kãm Tirtÿm kapêr jarênh o ri wa pa hã amgrã axkrunêpxi nê hkôt mytwrÿ kēp 6. Jakamã e. Pÿja py nê ma mē hwÿr wrÿ nê ixkreta o mĩdi. Anê.

⁴ Wa pijakrut wa kot Tirtÿm nhÿ hã kapêr jarênh o wa pa xwÿnhhta wa. Na htem wa kot amnhĩ nhĩpêx ã wa harênh ma nê mēmo pĩ hpàr pē oriwêhti kot tanhmã amnhĩ nhĩpêx toja mã hamaxpêr kurê kumrêx. Nê amnepê mē Tirtÿm nhÿ hã kapêr o pa xwÿnh pē Jakaris kot kanê hpók xãmta mã mãânên hamaxpêr. Oriwêhti xõja htwÿm rax kumrêx nhÿm htem htwÿm opõj nê ho kanê ho nÿt nê hpók nê kÿx pē unhwÿ nhÿm mē piitã hirã kamã rĩt mex

o ri mra. Nē kanē hpōk mexja te kot Tirtūm kapēr pyrāk. Nē kanē xām xāja te kot Tirtūm nh̄y hā kapēr jarēnh o wa pa xw̄ynhta wa urāk. Nē oriwēhtija haxw̄yja te kot wa urāk. Ra Tirtūm Karō kot wa hkarō mā ar jakamā na hte wa hprī hā mē kām Tirtūm kapēr jarēnh o pa nh̄um mē kot mar xw̄ynhjaja te kanē nh̄irā kamā ri rīt mex nē ri pa pyrā nē hprī hā mar t̄yx nē.

⁵ Tā koja mēhō tanhmā wa hipēx to kaxyw wa hw̄yr tē nh̄um wa hakwa rūm kuwy hpōk kato nē kot tanhmā wa ho mā xw̄ynhta o hxēt o kupī.

⁶ Nē koja wa Tirtūm xāhpumunh t̄yx xā ho tanhmā ri mē hā mēmoj nh̄ipēx to pē mē kām kapēr jarēnh o ri mē hkōt pa. Jao tanhmā na hto nh̄um mē hā wr̄yk kēt ry nē. R̄y tanhmā mē kēp gō hto nh̄um mē hkamrō hā mē kēp amnhī jahkre. Koja wa ā Tirtūm nh̄y hā mē kēp mēmoj nh̄ipēx anh̄yr ho wa pa. Nē xatā wa kām hprām xā hkōt tanhmā mēmoj tomnu hto. ⁷ Nē mē kām kapēr o pa pē ā mē hipēx anh̄yr o wa hā amgrā axkrunēpxi nē hkōt mytwr̄y kēp 6 nē rī kormā ho hapēx. Hāmri nh̄um ahkre xup̄ym rūm Satanasti nhō kōwenatōja kato nē ma wa hw̄yr tē nē nh̄yri pry kahti ri wa unē nē wa kupī nh̄um wa pry kamā ty nē nō. ⁸ Hāmri nh̄um mē wa haxār kēt nē nh̄um wa arī pry kamā nō. Krī kapem na prem pī kahpa hā Jejus nhō nē kupī. Krī nhō xw̄ynhjaja mē kot amnhī tomnuj t̄yx xw̄ynh na mē. Te ho amnepēm krī pē Sotō mē pika pē Ejit kamā mē kot amnhī tomnuj xw̄ynhjē kot amnhī nh̄ipēx pyrāk. ⁹ Jakamā nh̄um mē kot wa haxār nē axpēn kurē nh̄um wa pry kamā arī ty nē nō nh̄um mē piitā wa hw̄yr mra nē wa omu. Nē ahp̄ynhā krī piitā hkōt mē pa xw̄ynhjaja tanhmā amnhī to nē ja hā wa omu. Ahp̄ynhā ri pika pi-

itā hkōt mē urojaja. Nē ahp̄ynhā ri mē kapēr xw̄ynh piitā. Hāmri arī ahp̄ynhā mē ō krī kamā pa htā tanhmā amnhī to nē wa htyk ā wa omunh ā hā apkati axkrunēpxi nē hkōt hā myt ahpa. ¹⁰ Koja mē wa htyk ā wa omu hāmri nē hk̄inh nē. Nē hk̄inh xāj axpēn mā hk̄inh xā nhōr o pa. Wa kot kormā ht̄ir ri tanhmā mē homnuj to ho ri mē hkōt paja mā hamaxpēr nē wa htyk ā wa omu nē hk̄inh t̄yx nē.

¹¹ Tā koja wa htyk ā apkati axkrunēpxi nē hkōt hā myt ahpa hāmri nh̄um Tirtūm wa kamā htyxā rē nē akup̄ym wa ho wa ht̄ir nh̄um wa k̄anhmā xa nē ri mra. Hāmri nh̄um mē kot wa omunh xw̄ynhjaja tee ri hā wa omu nē kām wa uma ht̄yx kumrēx. Ām kām wa uma ho kām wa uma.

¹² Hāmri nh̄um kaxkwa kamā mēhōja wa kām kapēr nē wa kām:

—E war amnē mē ixw̄yr war api. Anē.

Hāmri nh̄um wa kuma nē ma kakrā kamā āpir o mō. Nh̄um mē kām wa hkurē xw̄ynhjaja tee ri wa āpir ā wa omu.

¹³ Hāmri nh̄um pika ht̄ertet t̄yx nē. Nē krī kamā ixkre ohtō nē grānh pa nē mē hk̄w̄y nh̄imex rax nē nh̄um mē ohtō rax kumrēx nē axkaprā. Mē kēp 7.000 nē pikaprār pa. Hāmri nh̄um arī mē ht̄ir nē ri mē pa xw̄ynhjaja tee ri mē omu nē kām ma xāj ht̄ertet t̄yx nē axpēn mā:

—Kwa Tirtūm m̄an ā mē panh̄ipēx anē. Hiht̄yx o hiht̄yx jakamā kaxkwa rūm ā mē panh̄ipēx anē pu mē pahpiitā pano ho ixkre pigrānh ā omu. Anē.

¹⁴ E na ra amnhī xā ht̄yx kamā hamak xāja hamēxkrut nē hapēx. Tā no ām arī mē kaxyw pyxi nē arīk.

Mē kot pifti kot hitep kakōr ā harēnh

Apokarip 4,8, 5.9-14, 7.9-12, 14.2-5, 15.3-4, 19.1-2

¹⁵ Tā nh̄um Tirtūm kapēr o wr̄yk xw̄ynh kot hitepja ō pifti

kakô nhũm kaxkwa kamã mẽ pa xwýnhjaja kàx pè kapèr o:

E ãm hãmri. Na ra Mèpahpãm Maati mẽ Jesus Krisja wa kèp krĩ pi-itã hkôt mẽ piitã mẽ ô Pahihti na wa.

Koja Mèpahpãm Maatija kèp Pahi Maati rãhã nẽ pa ho pa xwýnh. Anẽ.

¹⁶ Hãmri nhũm mẽ àptàr tũm pè 24jaja. Tirtũm kot mẽ pahto amnhĩptàr o hkrĩ xà mã hipòk nẽ mẽ hkrĩ xwýnhjaja. Hãmri ã mẽ kapèr anhýrja ma nẽ Tirtũm ã hpijaàm kaxyw hpar pè ròròk pa nẽ htu mýr pè hikwý. Hãmri nẽ kãm mex o mex ã harẽ nẽ kãm:

¹⁷ Pa Pahi Maati Tirtũm. Nà ãm hãmri mẽ ixrom axàhpumunh o axàhpumunh nẽ axihtýx o axihtýx.

Amnepè mã kormã mẽmoj kêt ri na ka pre arãhã apa ho apa.

Tã arĩ arãhã apa ho apa.

Ãm hãmri apè mẽ ixpiitã mẽ ixto amnhĩptàr xwýnh. Nà ãm hãmri amex o amex.

¹⁸ Kot kaj tokyx mẽ piitã tanhmã mẽ kot amnhĩ nhĩpèx to ho pa hã mẽ omunh xà hkôt tanhmã mẽ harènh to.

Nẽ ra mẽ htyk xwýnhjaja kot kaj mẽ piitã akupým mẽ ho mẽ htír pa nhũm mẽ pika rũm hapòx pa nẽ ma mra nẽ arĩ mẽ htír xwýnhjè nhĩhkò hã akutã hkrĩ pa.

Ka mẽ piitã mẽ omu nẽ tanhmã mẽ kot amnhĩ nhĩpèx to ho pa hã mẽ omunh hkôt tanhmã mẽ harènh to.

Mẽ kot amnhĩ tomnuj xwýnhjaja kot kaj ma mẽ kot amnhĩ xà htýx kamã hamak o pa htũm xà hwýr amnhĩ nẽ mẽ arẽ nhũm mẽ ma hwýr hapèx. Hãmri nẽ tee ri amnhĩ kukamã hamaxpèr nẽ gryk týx kumrèx.

Ka hpãnhã mẽ kot akòt amnhĩ xunhwýr nẽ akapèr kòt amnhĩ

nhĩpèx o mẽ pa xwýnh piitã mẽ omu nẽ tanhmã mẽ ho mex to.

Mẽ kot amnhĩ to rũnh xwýnhjaja nẽ mẽ kot amnhĩ to hkryre xwýnhjaja.

Nẽ amnepèm mẽ kot anhý hã mẽ kapèr o mẽ pa xwýnhjaja.

Akrajè piitã kot atã hpijaàm xwýnhjaja kot kaj kormã mẽ htír ri tanhmã amnhĩ to mex hã mẽ omunh xà hkôt tanhmã mẽ ho mex to.

Ã kot kaj tokyx mẽ piitã ahpýnhã mẽ omunh xà hkôt mẽ hipèx anẽ. Anẽ.

¹⁹ Hãmri nhũm kaxkwa kamã Tirtũm nhòrkwy hã hakwakre kahè xà amnhĩ mẽ pa kamã ôr o mès kunĩhtita pumu. Pu nhũm na hkatòtòk nẽ haxènh nẽ hkrakrak nẽ na mẽ te kot jèr krã hakotre pyrãk xwýnhja pikap ròròk rax nẽ. Nẽ pika htertèt týx o htertèt týx pa arĩ omunh o xa.

12

Mèhõ ni mẽ kagãmnuti wa harènh

¹ Tã pa axte mẽmoj pumu. Kaxkwa kamã aa mẽ pahte mẽmoj pumunh kêt xwýnhja pa omu. Nhũm mèhõ nija xè te myt no mã hirã htýx pyrãk. Nẽ hpar nhòkwa kamã mytwrýre ajèt. Nẽ kanhèti ho 12 o mẽ ahkà tu nẽ o xa. ² Na ra htujarò nẽ hpijagri kaxyw ôhy xà nẽ amnhĩ kamnhèr o xa.

³ Tã pa axte mẽmoj pumu. Aa mẽ pahte mẽmoj ã kot anhýr pumunh kêt xwýnh ôja pa omu. Kagãmnuti nom ãm axtem hkà kamrèk týx kumrèx. Nẽ rax kumrèx. Nẽ hkrã kèp 7. Nẽ hkrã piitã kamã ôr o pahi hã mẽ ahkà htu nẽ o nõ. Nẽ hkrã kamã pàr kèp 10.

⁴ Tã nhũm hamy ho apèr o kaxkwa kamã kanhèti ho ohtò nẽ pikap kurè. Hãmri nẽ ôhy xà nẽ amnhĩ kamnhèr o ãm xwýnhhta wýr tẽ nẽ hkra kator nhũm kot kèp krèr kaxyw kutã hamãr o nõ.

⁵ Hãmri nhũm hkra kato nẽ myre. Hihtýx o hihtýx ã kot pika piitã

hkôt mē piitā mē ho amnhīptār mā xwýnh na pre. Nhūm kagāmnutija kot kēp utār nē hkrēr mā tā nhūm Tirtūm kapēr o wrýk xwýnhjē hōja hwýr wrý nē kēp kumý nē ma Tirtūm wýr kaxkwa kamā kot mē pahto amnhīptār ā hkrī xà maatija wýr ho api.

⁶ Hāmri nhūm kagāmnuti tee ri ma kot kēp o mōr ā omu nē hpānhā nita o apkjē nē kot tanhmā ho kaxyw nhūm amnhī tā omu nē umaj hprōt nē ma tē nē nhýri kapōt ā amūxu. Ra Tirtūm kot hkukamā kām hpimxur xà nhīpēx xà hwýr hprōt nē ma tē nē kamā kēp amūxu. Nhūm Tirtūmja nē kagā pumunh mex nhūm kēp hpimxur mex ā amgrā axkrunēpxi nē hkôt hā mytwrý kēp 6.

Mē kot kaxkwa kamā mēkarōmnuti kurē kaxār ā mē harēnh

⁷ Tā nhūm mē ra kaxkwa kamā kurē kaxār kaxyw. Kagāmnuti mē hkwyjaja nhūm mē ra Tirtūm kurē kaxār kaxyw kutā amnhī xunhwý. Jakamā nhūm Tirtūm kapēr o mē wrýk xwýnhjē hkrāhtūm Mikewja ma mē hwýr amnhī kôt hkwyjē o mra nē mē pijapu ho kuhē.

⁸ Hāmri nhūm kagāmnuti tee mē kutā amnhī to htýx kaprý nhūm Tirtūm kapēr o mē wrýk xwýnhjaja amnhī nē mē ho axtem nē kaxkwa rūm mē kator o mē kator.

⁹ Satanasti pē kagāmnutita kagā kot ni kator ewa mā hēx xwýnh na pre. Nē hēx rom tanhmā hēx to ho pa xwýnh. Jakamā nhūm Mikew mē hkwyjaja hkwyjē mē mē ho hpimrāatā amnhī nē pikap mē rēnh pa.

¹⁰ Hāmri nhūm kaxkwa kamā mēhōja axte kàxpē kapēr nē kapēr o:

E ām hāmri. Na ra Tirtūm hihtýx o hihtýx o mē panē mēmoj punuj piitā ho hapēx par kumrēx.

Na pre hte Satanasti pē mēkarōmnutija xatā hwýr mra nē kām

tanhmā Jejus kwýjē ho kapēr punuj to ho pa.

Tā koja axte mē ho kapēr kēt kumrēx. Ra Tirtūm kot amnhī nē kator o kator nhūm ra ma mōr o mōr kēnā.

Koja Tirtūm pika piitā hkôt mē ho amnhīptār xwýnhjē japōx pa nē hpānhā mē kaxyw Kra Krisja xām nhūm pika piitā hkôt mē ho amnhīptār rāhā ho pa.

Nā ām hāmri. Ja mex o mex.

¹¹ Na pre Jejus kôt mē pahtō nē mē pahtōxjaja mēkarōmnuti kutā amnhī to htýx nē pa. No ām amnhī nhý hā ā kutā amnhī nhīpēx anhýr kēt.

Mē pahte amnhī tomnuj pānhā amnhīrer xwýnhnta na pre ty nē hkamrō ho mē kuhō nē mē nē mē kot amnhī tomnuj o hapēx.

Jakamā nhūm prem kukwak ri Satanasti kutā amnhī to htýx rāhā pa.

Nhūm mē kot Jejus ā mē himex par kaxyw tā nhūm mē kām htyk pyma hkēt nē. Ām Jejus kôt arī amnhī to htýx nē mē hkôt pa rāhā nē.

Jao arī mē kām Jejus kot mē panē tanhmā amnhī nhīpēx to hā harēnh o ri mē hkôt pa.

¹² Tā Tirtūm ra kot mē panē mēmoj punuj o hapēx par jakamā kwa kaxkwa kamā mē apa xwýnhjaja kēr ka mē akīnh nē apa.

Nom gō ujanār kām nē pika kamā mē pa xwýnhjaja hēxta waa nē. Koja mē mex kēt nē.

Nē ra Mikew mē hkwyjaja kot amnhī nē kaxkwa rūm mēkarōmnuti mē hkwyjē kator nē pikap mē rēnh par jakamā nhūm Satanastija gryk týx kumrēx.

Tirtūm kot ma mē kot amnhī xà htýx kamā hamak o pa tūm xàta wýr mēnh xà hā arīgro

hwÿr amgrà grêre nhÿm tee ri amnhÿ kukamã hamaxpêr nê gryk tÿx o gryk tÿx. Anê.

¹³ Hãmri nhÿm kagãmnutija mê kot amnhÿ nê kaxkwa rÿm kator ã amnhÿ pumu nê gryk tÿx nê. Nê gryk xàj ma akupÿm ni kot hkra myre ho pijagri xwÿnhÿta wÿr tê nê tanhmã ho kaxyw hkôt ho krihkrit.

¹⁴⁻¹⁶ Hãmri nhÿm Tirtÿm kapêr o mê wrÿk xwÿnhÿjê hõja omu nê nija mã àanhãhti jara gõ. Kot kagãmnuti pê ho htor nê ma nhÿri hpimxur xà wÿr htêm kaxyw. Nê kormã htor kaxyw nhÿm kagãmnuti omu nê kot gõ ho hanhir kaxyw hkôt hakwa rÿm gô kapÿ nhÿm hpikapÿr rax kumrêx. Te pyhti hprôt tÿx pyrãk. Hãmri nhÿm Tirtÿm omu nê nija nê tanhmã pika hto nhÿm kãm axkjê nhÿm gô hprôt nê kamã pikapÿr pa. Jakamã nhÿm mex pê àanhãhti jara ho to nê ma kapôt ã pimxur xà hwÿr ma tê. Nê kamã pa hã amgrà axkrunêpxi nê hkôt mytwrÿ kêp 6 nhÿm prem hamãr mex rãhã ho pa.

¹⁷ Hãmri nhÿm kagãmnuti tee ri kãm hpÿr prãm kaprÿ nê gryk tÿx kumrêx. Hãmri nê ma ni hkwyjê hwÿr mõ. Mê kot Tirtÿm mê Jesus wa hkôt amnhÿ nhÿpêx o mê pa xwÿnhÿjê hwÿr tanhmã mê homnuj to kaxyw ma mê hwÿr mõ. Hãmri nê tanhmã kot mê ho kaxyw gô xujanãr mÿ ri nõ.

13

Satanasti nhõ kôwenatô wa kot gô xujanãr rÿm kator ã wa harênh Sikÿn Tesarôn 2.3-5

¹ Tã pa axte mêmoj pumu. Nhÿm gô xujanãr rÿm Satanasti nhõ kôwenatôjê hõja te mrymnuti pyrã nê ãpir o mõ. Kagãmnuti pyrã nê hkrã kêp 7. Nê urãk nê hpàr kêp 10. Nê hpàr piitã kamã pahi hã mê ahkã. Nê ahkã piitã hã axtem tanhmã Tirtÿm o kapêr punuj to nê tanhmã haprÿ hto hã kagãja hikwÿ.

² Nê hkã te kêp ropkrorti kã pyrãk. Nê hakwa te kot rêãwti jakwa pyrãk. Nê ñhkra te kot pãati nhÿhkra pyrãk. Jakamã na pre kagãmnuti nhÿ hã hihtÿx o kêp pahi hã pika nhõ xwÿnhÿjê ho amnhÿptãr o pã.

³ Nê hkrã hõ te mê kot hayr o hpÿr nhÿm ra akupÿm htÿr nê arÿ hayr xà wakre rã nyw pyrãk. Jakamã nhÿm pika kamã mê pa xwÿnhÿjaja amnhÿ jaêr pê omu nê kamã no puma nê. Hãmri nê hkôt amnhÿ nhÿpêx o pa.

⁴ Hãmri nê kagãmnuti kot tanhmã mrymnuti ho nhÿm ÿ hã mê ho amnhÿptãr jakamã nhÿm mê piitã hamê wa hã hpijaãm kaxyw wa kãm wa mex o wa mex ã wa harênh o pa. Nê mrymnuti hã axpên mã:

—Hêxta waa nê. Mê pahtõ na mê pahte mrymnutita pyrã nê ã mê pahte amnhÿ nhÿpêx kot anhÿr? Mê pahtõ kot pu kutã xa nê paxihtÿx o hkurê kapa? Nã amrakati kumrêx. Anê.

⁵⁻⁶ Hãmri nhÿm Satanasti tanhmã mrymnuti ho nhÿm kapêr o ri mê hkôt pa nê mê ho amnhÿptãr o hã amgrà axkrunêpxi nê hkôt mytwrÿ kêp 6. No ãm axtem nê Tirtÿm o kapêr punuj o ri mê hkôt pa. Nê ri tanhmã haprÿ hto nê õ krÿja mex kêt ã harênh o ri mê hkôt pa.

⁷ Hãmri nhÿm Satanasti ra kot mê hkurê kaxãr kaxyw kãm anê nhÿm axtem nê Tirtÿm pê hkrajê kutã amnhÿ xãm nê mê hwÿr hprôt nê tanhmã hpijapu hto ho pa nê mê ho axtem nê mê ho krihkrit pa nê ahpÿnhã ri pika piitã hkôt mê uro hkwyjê ho amnhÿptãr o pa. Nê ahpÿnhã mê kapêr xwÿnhÿ piitã mê ho amnhÿptã.

⁸ Jakamã nhÿm mê ohtõ rax kumrêx nê mrymnuti hkôt amnhÿ nhÿpêx. Nê kutã hkõn krã ho rôrõk nê hkrÿ nê kãm mex o mex ã harê. No ãm mê piitã hkêt. Kot mê pahte amnhÿ tomnuj pãnhã amnhÿre xwÿnhÿ kôt ra mê kot amnhÿ xunhwÿr xwÿnhÿjaja

tapxipixjaja na prem hkôt amnhĩ xunhwÿr kêt nê. Amnepê mã kormã amrakati ri Tirtũm mẽ Jesus wa ô kagã kamã mẽ htĩr tũm nê mẽ pa mã xwÿnh nhĩxi xwÿnh pixjaja na prem mrymnuti pumu nê hkwyjê rom hprĩ hã kot amnhĩ nhĩpêx ã omunh kurê kumrêx nê hkôt amnhĩ nhĩpêx kêt nê.

⁹ E ka mẽ atô axumar kaxyw ajamak kre hã kot kaj ixujarênh piitã ama nê kãm ajamaxpêr tÿx rãhã ho apa.

¹⁰ Jakamã kwa Tirtũm kôt ixkwÿjaja. Kwãr mẽ mãmrĩ mẽ apynê nê mẽ ajagjê.

Nê kwãr mẽ mãmrĩ wapo ho mẽ ajayr o mẽ apa.

Nom kêr ka mẽ umaj ixkaga hkêt nê. Ixkaga hkêt o ixkaga hkêt.

Mẽ ãm ixkôt pix mã amnhĩ nhĩpêx o ri apa rãhã ty.

Pika rũm mrymnuti hõ kator ã harênh

Makre 13.22

¹¹ Tã pa mrymnuti hõ pumu. Nom wamta pyrã nê gô xujanãr rũm kator kêt axtem pika rũm kato. Nê ôwêhti hkrare pyrã nê hpãr pijakrutre. Nê te ho kagãmnuti kapêr tÿx pyrã nê kapêr tÿx kumrêx o pa.

¹² Gô xujanãr rũm mrymnuti xãpir xwÿnhhta nhÿ hã pika nhõ xwÿnhjê mã kapêr tÿx nê mẽ kãm:

—E pika piitã hkôt mẽ apa xwÿnhjaja mẽ inhma. Kêr ka mẽ kot hkrã hõ jayr o hpĩr nhũm akupÿm htĩr xwÿnhhta kôt pix mã amnhĩ nhĩpêx rãhã ho ri apa. Nê kãm mex o mex ã harênh rãhã nê.

Anhÿr o mẽ kãm kapêr. ¹³ Hãmri nê Satanasti nhÿ hã mẽ kãm aa mẽ kot mẽmoj pumunh kêt kwÿ ho anhÿr o pa. Jao kaxkwa rũm tanhmã mẽ kãm kuwy ho wrÿk to nhũm pikap rôrok nhũm mẽ amnhĩ jaêr pê omu nê kamã no puma nê.

¹⁴ ã ri mẽ noo mã mẽ kãm amnhĩ nhĩpêx anhÿr o ri mẽ hkôt pa. Gô xujanãr rũm mrymnutija noo mã

ã hêx rom amnhĩ nhĩpêx anhÿr o mẽ no kupyro pa nhũm mẽ omu nê hkôt amnhĩ nhĩpêx. Hãmri nhũm mẽ kãm mẽmoj tã karô nê mẽ kãm:

—E wam mrymnutita. Mẽ kot hkrã hõ jayr o hpĩr nhũm akupÿm htĩr xwÿnhhta kêr ka mẽ kãm hkarô nhĩpêx nê ho mẽ anhõ sãnti. Kê mẽ piitã hwÿr mra nê kutã hkôn krã ho rôrok nê hkrĩ nê amnhĩ to kuwy nê kãm mex o mex ã harê.

Anhÿr o mẽ kãm hã karô. ¹⁵ Hãmri nhũm mẽ kuma nê mar xã hkôt hipêx nê ãm nhũm xa. Hãmri nhũm mrymnuti kot hitepta omu nê hwÿr tẽ nê tanhmã ho nhũm ra kapêr nê mẽ kãm:

—E kêr ka mẽ kot inhmex ã ijarênh kêt xwÿnhjê pynê nê mẽ himex pa. Anê.

¹⁶ Hãmri nhũm pika rũm mrymnuti kator xwÿnhhta haxwÿja mẽ kãm kapêr nê mẽ kãm:

—E koja ixkwÿjaja inhÿ hã mẽ apiitã mẽ apê ixkwÿ hã mẽ akagã. Mẽ ate amnhĩ to rũnh xwÿnhjaja nê mẽ ate amnhĩ to hkryre xwÿnhjaja. Nê amarĩ mẽ kãm mẽ axãpênh xwÿnhjaja nê amnhĩ mã mẽ axãpênh xwÿnhjaja. Nê mẽ akãxpore rũnh xwÿnhjaja nê mẽ apê amrakati xwÿnhjaja. Koja mẽ apiitã mẽ akagã hpa. Mẽ akwÿ nhõkrã kagã nê mẽ akwÿ xupôk rũm mẽ anhĩhkra katut kagã.

¹⁷—Gô xujanãr rũm mrymnutita nhĩxi kot paj mẽ atã hipêx. Rÿ hixi hã nũm nhĩpêx. Hãmri ka mẽ axãpkur xã japrôr kaxyw nhÿhÿm mra nhũm mẽ atã hixita pumu nê ri kormã mẽ amã mẽmoj kwÿ ho wênê ka mẽ amnhĩm haprô nê ho axãpkur o ri apa. Nê mẽ ate mẽmoj to wênê xwÿnhjaja koja mẽ apê mẽmoj japrôr kaxyw mẽ awÿr mra ka mẽ tee ri nhÿhÿnh mẽ hã hixi japêr hãmri nê mẽ kãm mẽmoj to wênê hkêt nê. ãm nhÿhÿnh mẽ atã hixi hã kagãta pumunh pix kukwak ri kot kaj mẽ awjaprô rÿ mẽmoj to wênê. Anê.

¹⁸ E kwa kêr ka mê ixte mêmoj pumunh nê mê amâ hâ kagâta pumu nê ama nê kâm ajamaxpêr tÿx o apa. Mrymnutita nhîxi na kêp nÿm. Nÿmja kêp 666. E kaj mê akrâ hi mex xwÿnhjaja kot kaj mê aprî hâ ja mar tÿx kurê kumrêx.

14

*Tÿrtÿm mex ã mê grer
Apokarip 7.1-8*

¹ Tã pa axte mêmoj pumu. Nhÿm mê pahte amnhî tomnuj pãnhã amnhîrer xwÿnhja hixêt pê Siãwja nhîmök ã xa. Nê puhã mê ohtô rax kumrêx nê kuhê. Mê ohtô ho mê ohtô. Piitã kamã mê kêp 144.000. Nê piitã ôkrã hã mê pahte amnhî tomnuj pãnhã amnhîrer xwÿnh mê Hipêêxã wa hixi jaxwÿr pa mê omu.

² Nhÿm mê kaxkwa kamã grer o kuhê. Mê grerja mex o mex. Te kot gô hprôt tÿx hkoko htÿx pyrãk. Nê te na katôtök tÿx pyrãk. Nê te wiorãw môr xwÿnhjaja kot hkakrênh mex pyrãk pa mê mar o xa.

³ Nê mê grer xwÿnhjaja. Jejus puhã mê ohtô rax kumrêx nê mê kuhê xwÿnhjaja na prem Tÿrtÿm kot mê ho amnhîptâr ã hkrî xãta kuri grer o kuhê. Nê mêmoj tÿr pê kwat xwÿnhjê mê mê ãptâr tÿm pê 24jê kuri grer o kuhê. Mê grer nyw o gre. ãm mê tapxipixjaja mê kot mê grer nywja mar. Ra mê kêp Tÿrtÿm kra hã mê kot mê ôkrã hã Tÿrtÿm mê Kra Jejus wa hixi ã kagã nhÿm Tÿrtÿm kot ra mrymnuti mê hõta wa kêp mê utâr nê amnhî wÿr mê ho ãpir xwÿnh na pre mê. ãm mê tapxipixjaja mê grer nywja ma nê wa kãm ho grer o kuhê.

⁴⁻⁵ Na prem tãm amnhî nhîpêx nê Tÿrtÿm kôt amnhî nhîpêx rãhã ho pa. Te mê kot amnhî prô pix tânopxar rãhã ho pata pyrãk. Nê ri tanhmã hêx to rÿ tanhmã ri amnhî tomnuj to ho pa hkêt nê. ãm tãm ri amnhî nhîpêx mex o pa. Mê kêp

Tÿrtÿm mê mê pahte amnhî tomnuj pãnhã amnhîrer xwÿnh kwÿ jakamã na prem mê pahte amnhî tomnuj pãnhã amnhîrer xwÿnhhta kôt pix mã amnhî nhîpêx o pa. Jakamã na prem mrymnuti kutã rôrök nê kãm mex o mex ã harênh kêt nê. Tã mê kumrêxjaja Tÿrtÿm mê Kra wa kuri wa kãm grer o kuhê.

*Tÿrtÿm kapêr o wrÿk xwÿnh pi-
jakrunêpxi jarênh*

⁶ Tã pa axte Tÿrtÿm kapêr o wrÿk xwÿnhjê hõ pumu nhÿm kÿx pê ri htor o pa. Ahpÿnhã ri pika piitã hkôt mê uro hkwyjê hkôt. Na ahpÿnhã ri mê kapêr xwÿnhjê piitã mê hkôt mê kãm Tÿrtÿm kot tanhmã mê hipêx to hã harênh kaxyw. Ahpÿnhã mê kapêr xwÿnh piitã mê kãm harênh o pa. Nê htor o pa pê kÿx pê mê kãm kapêr nê mê kãm:

⁷ “E na ra Tÿrtÿm mê ate amnhî tomnuj mÿrapê tanhmã mê ato kaxyw. Jakamã kwa mê tokyx hã apijaãm kaxyw akôn krã ho arôrök nê akrî nê kãm mex o mex ã harê. Kêp mêmoj piitã ho kator xwÿnh na. Na pre kaxkwa ho kato nê pika ho kato nê gô xujanâr o kato nê hino ho kato nê mêmoj piitã ho kator pa. Jakamã kwa kêr ka mê tapxipix ã mân apijaãm nê kãm mex o mex hã harênh rãhã ho apa.”

Anhÿr o mê kãm kapêr. ⁸ Hãmri nhÿm hõja wamta kôt tê nê uräk nê kÿx pê mê kãm kapêr o:

—Koja Tÿrtÿm tokyx Papirôn grãnh pa. Na hte krî nhõ xwÿnhjaja amnhî tomnuj pix rãhã ho pa. Mê kot amnhî nhîpêx te mê kot kagôxyhti ho hkôm nê amnhî mê mê piitã mê kãm ôr nê ho mê ho pipãnh pyrãk. Na htem mênijê piitã ho amnhîkati o pa. Nê amnhî kwÿjê pê mê hprô ho amnhîkati. Nê amnhî mê pika piitã hkôt mê pa xwÿnhjê mã anhÿr o pa. Mê kot mê uräk nê ã amnhî nhîpêx anhÿr o pa kaxyw mê kãm anhÿr o pa. Ja mÿrapê na ra Tÿrtÿm kot tanhmã

mê ho kaxyw mê hã amnhĩ jarê. Anê.

⁹ Tã nhũm wa hkôt hõja tẽ nê wa urak nê kax pê pika nhõ xwýnhjê mã kapêr nê mê kãm:

—E mê ate mrymnuti kutã akõn krã ho arõrõk nê akri nê kãm mex ã harênh xwýnhjaja. Nê mê ate karõ nhĩpêx nê kutã akõn krã ho akri nê kãm mex ã harênh xwýnhjaja. Nê mê anhõkrã nê mê anhĩkra hã hixi hã kagã xwýnhjaja.

¹⁰⁻¹¹ —Tirtũm na tee ja hã mê apumu nê mê akamã gryk tỳx kumrêx. Mê ate kapêr kuhpa hã mrymnuti hkôt amnhĩ xunhwýr jakamã nhũm mê akamã gryk tỳx o mê akamã gryk tỳx. Jakamã koja kuwy hpõk rãhã ho rãhã xwýnhhta kamã mê arênh pa ka mê amnhĩ xà htỳx kamã ajamak rãhã apa ho apa. Koja kuwy hpõkja aa hapêx kêt nê kurũm kax mã hkũm àpir o pa rãhã nê. Koja ã mê ate amnhĩ tomnuj o mê apa xwýnhjê nhĩpêx anê ka mê kamã apa ho apa nê aa kurũm ajapõx kêt nê kamã amnhĩ xà htỳx kãm ajamak rãhã apa ho apa. Arĩgro hãn kamàt kãm arĩ ã amnhĩ nhĩpêx anhỹr rãhã apa ho apa. Mê ate gõj rũm mrymnuti mê hkarõ ho sãnti wa kutã akõn krã ho arõrõk nê akri nê wa kãm wa mex ã wa harênhja mýrapê kot kaj mê ã amnhĩ nhĩpêx anê. Kot mê pahte amnhĩ tomnuj pãnhã amnhĩrer xwýnh mê Tirtũm kapêr o mê wrỳk xwýnhjê noo mã kot kaj mê ã amnhĩ nhĩpêx anhỹr o apa.

¹² Anhỹr o mê kãm kapêr jakamã kwa kêr pu mê pahte Tirtũm kôt amnhĩ xunhwýr xwýnhjaja mê hkukamã mê harênhja ma nê Tirtũm kapêr kôt pix mã amnhĩ nhĩpêx rãhã ho ri papa. Mê kot tanhmã hã mê pahto htã pu mê hkaga hkêt nê amnhĩ kaxyw Jejus kôt pajamaxpêr tỳx rãhã nê. Hãmri nê nhỹrmã mê kurom ma õ kri hwýr api nê kamã pamex kumrêx nê papa ho papa.

Mê kêp Jejus kwý hã mê htyk xwýnhjê jarênh

Wam Tesarõn 4.16

¹³ Tã nhũm kaxkwa kamã mêhõja axte inhmã kapêr nê inhmã:

E Juãw. Kêr ka ã akwýjê mã mẽmoj tã kagã anê nê mê kãm hã kagã ho: “E mê ate Tirtũm kôt ri amnhĩ nhĩpêx xwýnhjaja. Mê kot Tirtũm ã mê apar nhũm mê atyk tã koja amnhĩ tã mê ato mex rax kumrêx.” Anhỹr o mê kãm hã kagã.

Anhỹr o inhmã kapêr. Hãmri nhũm Tirtũm Karõja kuma nê kãm:

—Nã ãm hãmri na ka ã mê harênh anê. Ra Tirtũm kot amnhĩ tã mẽ omunh rãhã ho pa. Mê kot kôt pix mã amnhĩ nhĩpêx o pa pê mê kãm mẽ hkurê xwýnhjê kutã amnhĩ to htỳx rãhã htykja nhũm Tirtũm kot amnhĩ tã mẽ omunh mex. Koja mẽ ho mex kumrêx. Mê kot Jejus ã mẽ hpar tã koja mẽ ho mex rax nê nhũm mẽ kuri mex rãhã nê pa ho pa nhũm mẽhõ axte tanhmã mẽ ho hkêt nê. Anê.

Tirtũm kot tanhmã mê kãm hkĩnh xwýnhjê nhĩpêx to

¹⁴ Tã pa axte mẽmoj pumu. Kaxkwa kamã kakrã jakajre pumu. Nê kamã mẽhõj te panhi pyrà nê nhỹ. Nhũm õr o pahi hã mẽ ahkã htu nê kuteere xwagixre py nê o nhỹ.

¹⁵ Hãmri nhũm kaxkwa kamã Tirtũm kapêr o mê wrỳk xwýnhjê hõja Tirtũm mã amnhĩ jarênh xà hã ixkre rũm kato nê kakrã jaka kamã ýr xwýnhhta mã kapêr. Kax pê kãm kapêr nê kãm:

—E pika nhõ xwýnhjaja te mẽ hpur kãm mẽmo hy ra hkamrêk nê hikênh mã mex pyrãk. Jakamã anhõ kuteere ata py nê ma mẽ hkôt tanhmã ri mẽ ho ho ri mẽ hkôt apa. Te mẽ kot mẽmo hy nhĩkênh o ri pa pyrãk o mẽ hipêx nê ma ho mẽ himex o ri apa. Anê.

¹⁶ Hāmri nhūm kuma nē pika pi-itā mÿri ò kuteere ho apē nē te mēmo hy jakār pyrāk o mē hipēx.

¹⁷ Hāmri nhūm axte Tirtūm mā amnhī jarēnh xā hā ixkre rūm kapēr o mē wrÿkjē hōja kato. ĩhkra kamā kuteere xwa gixre py nē o xa. ¹⁸ Hāmri nhūm axte hōja ixkre rūm kē hkôt kato nē hkukamā kator xwÿnh̄ta mā kapēr. Kāx pē kām kapēr nē kām:

—E na ra Tirtūm tanhmā mē kot amnhī tomnuj to hā tanhmā mē hipēx to kaxyw. Te mē kēp mē hpur kām mēmo xō pē uwa ra hkamrēk nē rēnh mā tām pyrāk. Jakamā ma pika hwÿr mē hwÿr wrÿ nē mē hkôt ri anhō kuteere ho mē himex o ri apa. Anē.

¹⁹ Hāmri nhūm kuma nē ma pika hwÿr wrÿ nē mē hipēx o te mē kot uwa xō rēnh nē prēs kām hkapīr nē kagō janēnh pyrā nē mē hkôt ri kuteere ho mē hpar o pa. Tirtūm ra mē kamā gryk tÿx o mē kamā gryk tÿx jakamā nhūm ā mē hkôt mē hipēx anhÿr o ri pa.

²⁰ Jakamā nhūm mē hkamrô hpikapīr rax kumrēx o uwa kagō jakre. Te ho pyhti hprôt o nōr pyrāk. Jao upÿm o 2 met nē hkôt ho mēj met. Nom hprôt xā hkôt ry rax o ry rax. Ho 300 kirōm. Nhūm ā mē kamrô hprôt rax anē.

15

Tirtūm mex ā mē grer

¹ Tā pa axte kaxkwa kamā mēmoj pumu. Hāmri nē amnhī jaēr pē omu nē tee ri hkukamā ijamaxpēr. Aa mē pahte mēmoj ā kot anhÿr pumunh kēt xwÿnh pa pre omu. Nhūm Tirtūm kapēr o mē wrÿk xwÿnh pē 7jaja ahpÿnhā pika hkôt mē kot amnhī tomnuj xwÿnhjē homnuj kaxyw akuprō nē kuhē. Ām jajē pixjaja koja Tirtūm nhÿ hā axte tanhmā mē homnuj to nē ho anhÿr pa hāmri nhūm ra ja hapēx o hapēx.

² Jakamā pa axte Tirtūm kapem gō rax pumu. Te kot kāk karÿr jaxēnh mē kuwy hpōk o pihkār pyrāk xwÿnhja hprôt o nō. Nhūm Tirtūm kra hkwyjaja gō mÿ ri ohtō rax kumrēx nē kuhē. Na pre ra mrymnutija tee ri amnhī kôt mē rēnh mā nē tee ri mē hā amnhī nhÿxi hā kagā hprām kapry nom nhūm mē hkaga nē Jesus kôt amnhī nhÿpēx rāhā ho pa. Nē mrymnuti karō ho sānti mā mex ā harēnh kēt rāhā ty nē kaxkwa hwÿr api. Jakamā nhūm Tirtūm amnhī tā mē omu nē mē kām wiorāwti hkwy gō nhūm mē piitā hamÿ nē gō rax mÿ ri ho kuhē.

³ Hāmri nē Tirtūm mā tanhmā amnhī to ho pa xwÿnh pē Mojes mē mē pahte amnhī tomnuj pānhā amnhīrer xwÿnh̄ta wa kot Tirtūm mā gerta nhūm mē Tirtūm mā ho grer o kuhē nē grer o:

E Pahi Maati Tirtūm. Na pa mē ra inhmex pē awÿr ixāpir pa.

Ām hāmri na ka hte tanhmā amnhī nhÿpēx to ho ri apa.

Aa tanhmā axēx to hkēt.

Nē mē ixrom axihtÿx o axihtÿx.

Nē mē ixrom axāhpumunh o axāhpumunh.

Jakamā na ka hte mē inhmā aa mē ixte mēmoj pumunh kēt kwÿ ho anhÿr o apa.

Pika piitā hkôt ahpÿnhā mē ho amnhīptār xwÿnhjē nhō Pahi Maati na ka.

Nē ate tām amnhī nhÿpēx xwÿnh na ka.

⁴ Jakamā na htem piitā atā hpijaām o pa.

Nē amā mē kapēr xāptār pix o amā kapēr.

Nē amā amex o amex ā ajarēnh rāhā nē. Ām hāmri mē ixrom kapxipix amex o amex.

Jakamā koja ahpÿnhā pika piitā hkôt akrajē piitā ate tām amnhī nhÿpēx nē tām mē piitā tanhmā mē harēnh to hā ajarēnh ma nē awÿr mra nē akutā hkōn krā ho rôrōk

ně hkrī ně amā amex o amex
ā ajarē. Anē.

*Mě homnu xà hā xijere jamýnh
xwýnh jarēnh*

⁵ Tā na pa axte mēmoj pumu.
Kaxkwa kamā Tirtūm nhōrkwý hā
hitom xà piitā amnhī kahē xà rē
ně kuhē pa omu. Ně ixkre kamā
ō hitom mex maati haxwýja amnhī
kahē xà mě ně xa.

⁶ Hāmri nhūm ixkreja rūm Tirtūm
kapēr o mě wrýk xwýnh pē 7jaja
hapōj ně kuhē. Mě é hakajre ně
hirā htýx kumrēx. Ně mě hinō pre
xàja ōr pix o. Ně piitā Tirtūm mā
tanhmā kot mě homnuj to xà hā
xijere pē 7ta jamýnh kaxyw kuhē.

⁷ Hāmri nhūm mēmoj tír pē
kwatjē ōja mě kām xijere hkwy
jamý ně mě hwýr o tē. Xijere kēp
7 ně piitā ōr o. Nhūm hamý ně
Tirtūm kapēr o mě wrýk xwýnhhtajē
hwýr o tē ně ho mě hipēx nhūm mě
ahpýnhā hamý. Xijere kamā Tirtūm
gryk xà jamý ně o kuhē.

⁸ Pu nhūm Tirtūm rūm kuwy
hkūm hapōj. Tirtūm mex ně hihtýx
xwýnhhta rūm hapōx rax o ixkreta
kunor pa nhūm mě tee ri hwýr gjēx
prām kapry.

16

*Xijere kamā mě homnu xà pē 7
jarēnh*

¹ Tā pa arī mēmoj pumu nhūm
Tirtūm nhōrkwý kamā mēhōja
kapēr o wrýk xwýnh pē 7jē mā kax
pē kapēr ně mě kām:

—E na pa ra mě kot ixkapēr
kwým ri amnhī nhīpēx xwýnhjē
pumu nhūm ixpē ja omnuj týx o
ixpē omnuj týx. Jakamā e mě anhō
xijereta jamý ně ma pika hwýr mě
hwýr wrý ně axpēn pānhā mě hā
xijere kamā mě homnu xà kapī. E
mě tokyx ma mě hwýr wrý. Anē.

² Hāmri nhūm mě kuma ně axpēn
pānhā mě hwýr wrý. Nhūm wamta
kumrēx pika piitā hkôt mě homnu

xàta kapī. Pu nhūm mě kot mrym-
nuti mě ō sānti wa kām mex ā
harēnh ně amnhī tā wa hixi jaxwýr
xwýnh piitā hkānhy hpa ně à htýx
kumrēx ně ri pa.

³ Hāmri nhūm wamta kôt hōja ō
xijere py ně gō xujanār kām hkapīr
pa nhūm gō te mě htykjē kamrō
pyrà ně kamā mēmo mry htýyxà
rēnh xwýnh piitā pikaprār pa.

⁴ Tā ra xijere kapīr xwýnh o
axkrut ně ō xijere kapī hāmri nhūm
hkôt hōta ō xijere py ně hpānhā gō
hkryre piitā hkôt hkapīr pa. Py-
hti ně ri hino piitā hkôt hkapīr pa
nhūm piitā gō xujanār pyrà ně mě
hkamrō hā amnhī jahkre hpa.

⁵ Hāmri nhūm axtem Tirtūm
kapēr o mě wrýk xwýnhjē hō kot
kām gō piitā hamār xwýnhhta ja hā
omu ně Tirtūm mā kām:

Pa amex rāhā apa ho apa xwýnh.
Ně arāhā apa ho apa xwýnh.
Nà ām hāmri na ka ā mě kēp gōta
nhīpēx anē.

⁶ Na prem mě kot akôt amnhī
nhīpēx xwýnhjē mě mě kām
ri akapēr jarēnh xwýnhjē
hpar o pa nhūm mě hkamrō
hpikapīr rax ně.

Tā ka ra mě hā mě kēp mě hkōm
xà homnu hpa nhūm mě kēp
mě hkamrō ā amnhī jahkre
nhūm mě tee ri ho hkōm mā.
Nà ām hāmri na ka ā mě kēp
gō nhīpēx anē Tirtūm. Anē.

⁷ Hāmri nhūm mě kot Tirtūm mā
mēmoj nhōr xà hā mēsti hpar pē
hkrī xwýnhjē hōja kuma ně kām:
Nà ām hāmri na ā ajarēnh anē
Tirtūm.

Ām hāmri na ka ā akrajē hā mě
hipēx anē.

Ra ate mě hā amnhī jarēnh xà hkôt
na ka hte tanhmā mě hipēx
to.

Nà apē mě inhō Tirtūm Maati na
ka. Mě ixrom axihtýx o
axihtýx ně axāhpumunh o
axāhpumunh. Anē.

⁸ Tā ra axkrunēpxi ně ō xijere kapī.
Jakamā nhūm mě hpānhā hōja ō

xijere o tē nē myyti hā hkapīr pa nhūm hkagro ht̄ȳx nē pika hkôt mē pa xw̄ȳnhjē hkà ho hxēt o pa.

⁹ Kagro ht̄ȳx o hkagro ht̄ȳx jakamā mē hkà ho hxēt nhūm mē kamā hkà kajē hpa. Hāmri nē tee ri amnhī pumu nē hamaxpēr o:

—Nā Tīrtūmtija na ā mē pahtomnuy t̄ȳx anē. Anē.

Hāmri nē kamā gryk t̄ȳx nē hapry nē tanhmā ho kapēr punuj to ho pa. Nom mē kot amnhī tomnuy kaga nē kām mex o mex ā harēnh kēt nē arī tanhmā amnhī tomnuy to ho pa.

¹⁰ Nhūm ra kēp kwat nē ō xijere kamā mēmojja kapī. Jakamā nhūm ra hpānhā hōja ō xijere o tē nē gōj rūm mrymnuti kot mē ho amnhīptār xà hā hkrī xà hā hkapīr pa. Jakamā nhūm ra kot mē ho amnhīptār xà hā pikaja kamā kamàt kō htyk par kumrēx. Hāmri nhūm mrymnuti mē hkôt mē kot amnhī nhīpēx xw̄ȳnhjē hā kamàt kō hpa nhūm mē amnhī xà ht̄ȳx ā maj amnhī nham o axpēn kamnhar t̄ȳx kumrēx. ¹¹ Nē ā Tīrtūm kot mē hipēx anh̄ȳr ā amnhī tā omu nē kamā gryk t̄ȳx nē tanhmā ho kapēr punuj to ho pa. No ām kot amnhī tomnuy xw̄ȳnh ā amnhī pumunh nē kot amnhī tomnuy kaga hkēt nē.

¹² Nhūm prem ra kēp sīk nē ō xijere kamā mēmoj kapī. Jakamā nhūm hpānhā hōja ō xijere kamā mēmojta o tē nē pyhti pē Erax kamā hkapīr pa nhūm gōja grà pa nē te kēp pry pyrā nē nō. Jakamā nhūm myt japōx xà rūm mē ho amnhīptār xw̄ȳnhjaja nē pōristijaja hāmri pijapu kaxyw Jerujarē hw̄ȳr nojarēt nē hā hw̄ȳr pa.

¹³ Tā nhūm kagāmnuti mē ŷ hā mē kām hēx o pa xw̄ȳnh mē mrymnutita wa mē hakwa rūm mēmoj te priti pyrā nē hapōx o pa. No ām priti hkēt mē kēp Satanasti mā mē āpēnh xw̄ȳnh kw̄ȳy.

¹⁴ Jakamā na prem pika piitā hkôt mē kot aa mēmoj pumunh kēt

kw̄ȳ ho anh̄ȳr o hēx rom mē no kupyro o mē hkôt pa. Tā pika piitā hkôt mē ho amnhīptār xw̄ȳnhjē mē ho pikuprōnh kaxyw mē hapēr o pa. Mē kot Tīrtūm xiht̄ȳx o hiht̄ȳx kurē kaxàr kaxyw mē pijapu xà hā arīgro kukamā mē ho pikuprōnh o pa.

Jejus kot amnhī kw̄ȳjē mā kapēr ā harēnh

¹⁵ Tā nhūm Jejus pika hkôt hkrajaja arī mē ht̄ir nē pa xw̄ȳnhjē mā kapēr nē mē kām:

E mē inhma ixkw̄ȳjaja. Akup̄ym ixte mē aw̄ȳr ixwr̄yk xà hā arīgroja ā kot paj te mē àhkīnh xw̄ȳnh kot amnhī nhīpēx pyrā nē mē ajaēr pē mē aw̄ȳr wr̄y. Jakamā kēr ka mē amnhī w̄ȳr ijamār rāhā ho apa. Kēr pa akup̄yn wr̄y ka mē amnhī w̄ȳr ixpumu nē akīnh nē amnhī kamā amā ixpuma hkēt nē. Anē.

Mē kot axpēn kurē kaxàr kaxyw mē pikuprōnh ā mē harēnh

¹⁶ Tā nhūm Satanasti hkwȳjaja pika piitā hkôt mē ho amnhīptār xw̄ȳnhjē ho pikuprōnh pa nē mē hkurē kaxàr kaxyw ma Ijaew kot kām “Amaketō” jarēnhja w̄ȳr mra.

¹⁷ Hāmri nhūm Tīrtūm kapēr o mē wr̄yk xw̄ȳnh pē 7 kot hitepta ō xijere py nē kàx mā kamā mēmoj kapīr pa. Jakamā nhūm Tīrtūm nhōrkw̄ȳ kamā mē ho amnhīptār ā hkrī xà rūm Tīrtūm kàx pē kapēr o:

—E hāmri. Na pa ra mē kot amnhī tomnuy m̄yrapē tanhmā mē ho jatur xàm mēnh kaxyw. Anē.

¹⁸ Pu nhūm na hkatōtōk nē hkrakrak nē haxēnh nhūm pika htertēt t̄ȳx nē. Aa mē kot pika htertēt t̄ȳx kot anh̄ȳr ā omunh kēt kumrēx.

¹⁹ Jakamā nhūm Papirōnja kajē axkrunēpxi. Papirōn nhō xw̄ȳnhjaja kot amnhī tomnuy t̄ȳx o paja m̄yrapē nhūm Tīrtūm ā mē hipēx anē. Nē pika htertēt o pika piitā

hkôt krī grānh pa. ²⁰ Nhũm gô hipôk piitã gôja hã axkamur nhũm hapêx pa. Nê kên prêk nê hkrã hixêr rôrôk nê hpigrānh pa. Pika httertet tỳx kumrêx jakamã ã mẽmoj amnhĩ nhĩpêx anê. ²¹ Nê na mê pê jêr krã jakootija mẽ piitã mẽ hipy rôrôk. No ãm hkrã hkryre hkêr hkrã rũnh kumrêx. ãm hpỹnh nê kamã kêp 40 kir nê mẽ hã rôrôk nhũm mẽ tee ri amnhĩ tã ã omu nê Tirtũm kamã gryk tỳx nê haprỳ nê ho kapêr punuj nê.

17

Tirtũm kra hkêr xwỹnhjê jarênh

¹ Tã pa pre kê axte mẽmoj pumu. Nhũm kot xijere jamỹnh xwỹnhjê hõja ixwỳr tẽ nê inhmã:

—E ma ixkôt tẽ nê mẽmoj pumu. Anê.

Hãmri pa kuma nê ma hkôt tẽ nhũm inhmã:

—Nà ahpỹnhã gô rax mỳri krī nhõ xwỹnhjaja te ho ni hkuprỳ gô mỳ ri ỳr nê kãm mẽmyjê piitã hkĩnh o ỳr xwỹnhhta pyrãk. Na htem urãk nê Tirtũm kapêr kôt ri amnhĩ nhĩpêx kêt nê. ãm htỳx ri tanhmã amnhĩ tomnuj to ho pa. Jakamã koja Tirtũm tanhmã mẽ homnuj tỳx to nê mẽ ho hapêx. ² Krī piitã hkôt mẽ ho amnhĩptar xwỹnhjaja na hte ma mẽ õ krī hwỳr mra nê te mẽ kot mẽ hkuprỳjê ho amnhĩkati pyrãk o amnhĩ nhĩpêx. Nê te pipãnh nê htỳx ri amnhĩ nhĩpêx pyrãk o amnhĩ nhĩpêx o pa. Nhũm krī nhõ xwỹnhjaja mẽ urãk nê amnhĩ krã hkôt pix mã tanhmã amnhĩ tomnuj to ho ri pa. E ma ixkôt tẽ nê ja hã mẽ omu. Anê.

³⁻⁴ Hãmri nhũm Tirtũm Karõ tanhmã ixto nhũm kapêr o wrỳk xwỹnhja ma kapôt wỳr ixto mõ pa kapôt ã mrymnuti hkrã kêp 7 nê kamã hpàr kêp 10 xwỹnhhta pumu nhũm hkamrêeti nê xa. Nê ã piitã hã tanhmã Tirtũm o kapêr punuj to hã kagã. Nhũm katut ã mẽhõ ni kuprỳta nhỹ. Mẽ ho

amnhĩptar xwỹnh ã mẽ ê kakrã htyk nê hkamrêk o hkukar jaxã nê hã nhỹ. Nê õr o õkrexê. Nê õr o hinwỳyê nê ãhkra kamã kãx. ãm õr pix o hikukrêx. Nê kên mex karỳr pix o amnhĩ jamrêx. Nê õr o kopti hõ py nê hã nhỹ. Kopti kamã ni kuprỳ kot amnhĩ tomnuj xà. ãm kot mẽ kêp mẽ mjên o amnhĩkati ho pa xà pix nhũm kupy nê o nhỹ.

⁵ Nê õkrã hã amnhĩ nhĩxi hã kagã kot:

Inhĩxi pimxur pê PAPIRÕN RAXTI. Nê ixpê mẽ kêp mẽ mjênjê ho amnhĩkati ho mẽ pa xwỹnhjê nã na pa.

Nê ixpê mẽ kot axpên prõ ho amnhĩkati o mẽ pa xwỹnhjê nã na pa.

Nê ixpê mẽ kot Tirtũm nê mẽ kãm hêx o ri mẽ pa xwỹnhjê nã na pa.

Nê ixpê mẽ kot Tirtũm kapêr kôt amnhĩ nhĩpêx o pa hkêr xwỹnhjê nã na pa.

Anhỳr o õkrã hã amnhĩ nhĩxi hã kagã kot anhỳr. ⁶ Nhũm axpã nê nhỹ pa omu. No ãm kagõxyhti ho hpipãnh kêt. Mẽ kot Jejus kôt amnhĩ xunhwỳr nê ri mẽ kãm Jejus kêp mẽ õ pahшти hã harênh xwỹnhjê kamnhwỳr o mẽ hpar nhũm mẽ hkamrô pikapĩr xwỹnhjê kamrô ho na pre axpã nê nhỹ. Pa ã kot amnhĩ nhĩpêx anhỳr ã omu nê tee ri ijamaxpêr.

⁷ Hãmri nhũm Tirtũm kapêr o wrỳk xwỹnhja inhmã:

—Kwa mon ka ri ja pumu nê tee ri ajamaxpêr? E kot paj ixprĩ hã amã harê ka inhma. Nitĩ mẽ hã ỳr xwỹnh pê mrymnutita. Krã pê 7 nê kamã hpàr pê 10 xwỹnhhta kot paj ixprĩ hã amã hamê wa harê ka wa harênh ma.

⁸—Nà mrymnutija na pre htĩr nê ri pa tã ty nê ahkre xupỹmti kamã hikwỹ. Nom koja akupỹm htĩr nê kurũm kato nhũm mẽ piitã omu nê ahpỹnhã tanhmã hamaxpêr to. Amnepêm kormã amrakati ri

Tirtüm kot õ kagà kamã mẽ htír tùm nê mẽ pa mã xwýnhjê nhíxi jaxwýr xwýnhjaja koja kator ã omu nê ãm omu nê tanhmã hamaxpêr to hkêt nê. No mẽ kot Jejus kôt amnhĩ xunhwýr kêt xwýnhjaja koja mẽ amnhĩ jaêr pê akupým kator ã omu nê tee ri hkukamã hamaxpêr. Hãmri nê axpên mã: “Kwa amnepêm htyk tâ ra tanhmã amnhĩ to nê akupým htír nê api nê mõ.” Anhýr o axpên mã harê. Hãmri nhùm kato nê ma tê nhùm Tirtüm tâ ho hapêx kumrêx nhùm hapêx o hapêx.

⁹ —Kwa inhma nê jam ajamaxpêr týx nê. Mrymnuti krã pê 7ta te kêp hixêt prêk pê 7 pyrà nê hã ýr xwýnh ni kupryta te hixêt prêk pê 7ta ã ýr pyràk.

¹⁰ —Nê mrymnuti hkrã pê 7ja te kêp mẽ ho amnhĩptâr xwýnh pê 7 pyràk. Nhùm mẽ ho amnhĩptâr xwýnhjaja te mẽ kêp 5 nê ra htyk pyràk nhùm hkôt hõja arí mẽ ho amnhĩptâr o pa. No kot hitepta kormã. Nom koja mẽ ho amnhĩptâr ry hkêt nê.

¹¹ —Mrymnuti htír nê pa htã htyk nê ra akupým htír nê àpir xwýnhta koja hkrã hitepta pãnhã mẽ ho amnhĩptâr o pa. Jakamã te mẽ ho amnhĩptâr xwýnh pê 7jê hõ pyràk. Koja hkrã pê 7ja mẽ ho amnhĩptã nê gaa nê htyk mẽ nhùm hpãnhã mrymnutita hpãnhã mẽ ho amnhĩptã. Hãmri nhùm rí kormã Tirtüm tâ mẽ ho hapêx par kumrêx.

¹² —Nê ate mrymnuti hkrã kamã pâr pê 10 pumunh xwýnhta te mẽ kêp mẽ ho amnhĩptâr xwýnh pê 10 pyràk. No ãm jaja na kormã mẽ ho amnhĩptâr kêt nê. Koja mẽ nhýrmã anhĩpê mrymnuti nhý hã ahpýnhã ri mẽ ho amnhĩptâr o pa nom mẽ ho amnhĩptâr japijê hkêt nê. ¹³ Koja mẽ tanhmã ja hã axpên mar to hãmri nê mrymnuti mã anê nhùm mẽ hpãnhã mẽ piitã mẽ ho amnhĩptã.

¹⁴ —Nê mẽ ho amnhĩptâr xwýnh pê 10jaja koja mẽ pahte amnhĩ

tomnuj pãnhã amnhírer xwýnh kurê kaxàr kaxyw hwýr mra nê kutã pijapu ho kuhê. No ãm tee ri kãm tanhmã ho hprãm hkapry nhùm mẽ ho axtem nê amnhĩ tâ mẽ himex pa. Hihtýx o hihtýx o kot mẽ ho hpimràatã mẽ hakrenh par. Nê kêp pika piitã hkôt mẽ ho amnhĩptâr xwýnhjê nhõ Pahihti. Tãm na pre amnhĩ wýr mẽ kot hkôt amnhĩ nhípêx o mẽ pa xwýnhjê wý nhùm htem amnhĩ kaxyw hkôt hamaxpêr mex rãhã ho pa. ¹⁵ — Nê krí pê Papirõn kapem gõ xohtõ mý ri ni kupry hkrí xwýnhta. Gõ xohtõja te kêp ahpýnhã ri pika piitã hkôt mẽ uro hkwy pyràk. Nê te ahpýnhã ri mẽ kapêr xwýnh kwý pyràk.

¹⁶ —Nê mrymnuti hpâr pê 10ta kêp mẽ ho amnhĩptâr xwýnh pê 10 pyràk. Jakamã koja mẽ kãm ni kupryta prãm nõkati nê kamã gryk týx kumrêx. Hãmri nê hwýr mra nê kêp hikukrêx piitã utã nê kêp ê hkwrýnh pa nhùm hkênh mex nê xa. Hãmri nhùm mẽ kupí nê í hkrêr pa nê kuwy kamã hi rê nhùm kaxàr pa nê hapêx.

¹⁷ —Na pre pahi pê 10jaja mrymnuti hkôt amnhĩ xunhwý nhùm Tirtüm ãm ja hã mẽ omu nê tanhmã nê mẽ kãm nê hkêt nê. Jakamã koja mẽ ãm hkôt pix mã amnhĩ nhípêx o pa rãhã nhùm Tirtüm mẽ ho hapêx. Nê mẽ õ krí mẽ mẽ ho hpimràatã mẽ ho hapêx pa. Hãmri nê mẽ ho hapêx o mẽ ho hapêx.

¹⁸ —Nê ate mēhõ ni kupry pumunh xwýnhta te kêp krí rax pê Papirõn nhõ xwýnhjê pyràk. Nê mẽ ho amnhĩptâr xwýnhja pika piitã hkôt mẽ ho amnhĩptâr xwýnhjê hkrãhtüm na. Anê.

Ã Tirtüm kapêr o mẽ wryk xwýnhja inhã mẽ harênh anê. Pa kuma nê õ ri mẽ amã hã kagà. Mê ate kamã harênh nê aprí hã mar týx kaxyw.

18

Tirtūm kot Papirōn grành par ā harēnh

¹ Tā pa kê axte mēmoj pumu. Nhūm axte Tirtūm kapēr o mē wrýk xwýnhjê hōja kaxkwa rūm ahpār mā wrýk o tē. Tirtūm nhý hā hihtýx nē kamā hirā rax kumrēx o pika piitā hkôt mē kām hirā pa. ² Nē ahpār mā tēn wrý nē kàx pē kapēr o:

E koja Papirōnja pigrành pa nē hpānhā kēp Satanasti mā mē àpēnh xwýnhjê papxà nē kēp nhōnhti papxà. Hāmri nē aa kamā mēmoj mex kēt kumrēx.

³ Krī nhō xwýnhjaja na htem Tirtūm kapēr kôt amnhī nhīpēx kēt nē amnhī krā hkôt kām prām xà hkôt pix mā tanhmā amnhī tomnuj to ho pa. Te mēhō pipānh nē htýx ri amnhī nhīpēx o pa pyrāk.

Nhūm krī piitā hkôt mē ho amnhīptār xwýnhjaja mē hwýr mra nē mēnijē ho amnhīkati ho pa.

Nē krī nhō xwýnhjaja mēmoj pumu nē kām hkīnh nē haprōr kurē kumrēx o pa nē aa uaprōr o hapēx kēt nē.

Jakamā na hte krī hkwy nhō xwýnhjaja mē hwýr mēmoj to pa nē xatā mē kām ho wēñē nē mē kukwak ri mē hikāxpore rūnh nē pa.

Anhýr o kapēr. ⁴ Hāmri nhūm Tirtūm Papirōn kamā hkrajê mā kapēr nē mē kām:

E mē tokyx mē kot ri htýx amnhī nhīpēx xwýnhjê nhō krīta rūm ajapōj ixkrajaja.

Kot kaj mē anhýr kēt nē ra mē hkôt amnhī nhīpēx pa mē ato apimràtā mē ate amnhī tomnuj ā mē atomnuj týx nē.

⁵ Krī nhō xwýnhjaja na htem amnhī tomnuj rūnh o pa.

Mē kot amnhī tomnuj xà te mē kot kēn katutxō nhūm hprēk

rax o kot kaxkwa kanhwýr kaxyw pyrāk.

Na pa hte ā mē kot amnhī nhīpēx anhýr ā mē omunh rāhā ho ri ixpa. Jakamā kwa ixkrajaja mē tokyx mē kurūm ajapōj.

Anhýr o hkrajê mā kapēr. Hāmri nē kapēr o mē wrýk xwýnhjê mā kām:

⁶ E kwa mē ma mē hwýr wrý nē tanhmā ixkrajê hā mē ho.

No ām kēr ka mē tanhmā mē ho htýx o mē kot ra tanhmā ixpē ixkrajê nhīpēx tota jakre.

Kē mē tanhmā ixpē mē ho grire htā ka mē hā tanhmā mē ho htýx kumrēx o mē kot mē hipēxta jakre.

⁷ Krī nhō xwýnhjaja na prem mex nē pa.

Nē mē hikukrēx rūnh nē hkīnh nē pa.

Nē tanhmā amnhī to jarkrar to ho ri pa nē amnhī jarēnh o:

“Ot pa mē te pahi ni kot amnhī nhīpēxta pyrā nē ixkrī xà mex pix kām ixkrī pyrāk.

Nē te Tirtūm kot amnhī nhīpēx pyrāk o na pa htem amnhī nhīpēx o ri ixpa.

Nē mē ixkīnh nē mē inhmex rāhā ri ixpa.

Ā mē ixte amnhī nhīpēx anhýr xwýnh na pa mē.”

Anhýr ā amnhī to jarkrar o pa.

Tā kēr ka mē tanhmā mē homnuj to kê mē mexta pānhā omnuj týx nē pa.

Nē kê mē hkaprī nē amnhī xà htýx kām hamak rāhā nē pa ho pa.

⁸ E kê mē ā amnhī nhīpēx anhýr o pa.

Jakamā koja mē arīgro hpýnh kām mē hkwyjaja hpikaprar rūnh nē nhūm arī mē htír xwýnhjaja omnuj nē pa.

Nē tee ri amnhī pumu nē hkaprī xàj mýr o pa.

Nē amnhī xà htýx kām hamak o pa. Nē tee ri amnhī nhīpēx o pa.

Nē kām prām nē pa rāhā ty nhūm
kuwy mē ho hkaxàr pa.

Ixpê Pahi Maati Tirtūm kot paj ix-
ihtȳx kām ā mē hipêx anē.
Anē.

⁹ Hāmri nhūm krī piitā kurūm mē
ho amnhīptār xwýnhjaja. Mē kot
mē hwýr mrar nē mē hkuprýjê ho
amnhīkati nē mē uràk nē mēmoj
pumunh nē haprôr rāhā ho pa
xwýnhjaja tee ri krī kaxàr nē kàx mā
kuwy hkūm àpir o paja pumu nē
hkaprī nē mýr o kuhê.

¹⁰ Nē Tirtūm kot mē ho hapêx
par ā mē omu nē kām ma htýx
kumrêx. Amým mē omunh o kuhê
nē tee ri amnhī kukamā hamaxpêr
nē htertet týx nē. Nē mýr kām kapêr
o:
Hêxta waa nē Papirôn nhō
xwýnhjaja.

Mē amex nē axihtýx mex nē
apa htā nhūm Tirtūm mē
anhīmex pa. Hêxta waa nē.
Anē.

¹¹ Nē mē hwýr mrar nē mē kām
mēmoj to wēnê ho mē pa xwýnhjaja
haxwýja krī pumu nē tee ri amnhī
kukamā hamaxpêr nē hkaprī nē
mýr o kuhê. Nhýri koja mē tokyx
axte mēmoj to wēnê? Mē kêp mēmoj
japrôr rūnh xwýnhjaja hkaxàr par
kumrêx kēnā.

¹² Na prem mēmoj piitā ho pa
nē mē kām ho wēnê. Mēmoj mex
piitā. ôr o mē hkukrêx nē prat o mē
hkukrêx nē kēn jaxênh ā kàxpore
xohtô. Nē kupêxê mex. Kakrā
htyk nē hkamrêk nē hkroore nē
hā hapjê. Nē mēmo pī kuxware
nē pī htýx nē kēn jakār nē kàx o
ri mēmo nhīpêxja nhūm prem mē
kām ho wēnê ho pa. ¹³ Nē mēmo
htwým nē mē hkuxwa xà. Nē mē
ô ho ành xà nē mē ô kuxwa xà nē
xwýgrā nē harôj. Nē môx nē ôwêhti
nē kawar nē kaxyw kawarti hkjênh
xà hā karrotre. Nē nhýhýnh krī
hō kamā panhī hkwy pynê nē mē
hwýr mē o pa nē mē kām mē ho
wēnê nhūm mē amarī mē hkôt ri
ápênh rūnh o pa. Na prem ā mē

kām mēmoj to wēnê anhýr o pa. Tā
ra mē kot mē haprôr xwýnh mē mē
pimràatā hapêx pa.

¹⁴ Jakamā nhūm mē tee ri mē
hkukamā hamaxpêr nē te kot mē
kām kapêr pyrā nē mē kām:

Hêxta waa nē. Mē amā mēmoj
prām nē amnhīm haprôr
xwýnhhta na mē apê hapêx
par kumrêx.

Nē mē akàxpore rūnh nē mē
akukrêx rūnhhta mē mē
apimràatā ajapêx pa. Kot
kaj mē axte tanhmā amnhī
nhīpêx to ho apa hkêt nē.
Anē.

¹⁵ Hāmri nē amým ri Tirtūm kot
tanhmā mē hipêx to hā mē omu nē
kām ma xàj mur nē htertet o kuhê.

¹⁶ Nē mýr kām kapêr o:

Hêxta waa nē. Na pre htem ê mex
pix jagjê nē ri hā mra. Kakrā
htykre nē hkamrêkre.

Nē mē hikukrêx mex o amnhī
jamrêx nē ri hā mra.

Nē ôr nē kēn mex ā ohtô xwýnh o
amnhī jamrêx nē ri hā mra.

¹⁷ Tā ra hapêx par kumrêx. Anē.

Hāmri nhūm gō xujanār kām pàr
nhō dôn nē mē kot mē kām pàr o ri
mrar xwýnhjaja nē mē kot kamā tep
pynênh xà ho tep pynênh o ri mē
pa xwýnhjaja nē pàr kām amarī mē
pa xwýnhjaja hāmri mē hwýr mra
nē wantajê pyrā nē tee ri amým
ri mē ô krī pumu nē mýr o kuhê.

¹⁸ Nē kurūm kuwy hkūm xàpir o
pa hā omu nē tee ri mē hkukamā
hamaxpêr nē axpên mā:

Hêxta waa nē. Krī mýj na pre
mex o mex. Mex o krī piitā
hakrenh par htā hapêx pa.
Anē.

¹⁹ Hāmri nē mur nē hkaprī xàj pika
hkwy jamý nē ho amnhī kamī nē
mýr kām kapêr o:

Hêxta waa nē. Krī mýj na pre rax o
rax.

Nhūm pre nhýhýnh pàr kām mēmoj
to wēnê ho pa xwýnhjaja mē
hwýr mēmoj to pa nē mē kām

ho wēnē nē mē hkukwak ri
hikāxpore rūnh nē ri pa.

Tā hāmri mē hapêx pa. Anē.

²⁰ Hāmri nhūm Tirtūmja krajē pi-
itā mē kām kapēr nē mē kām:

E ixpê Tirtūm na pa ā mē hipêx anē.
Mē kot mē apē ixkrajaja tanhmā
mē atomnuj to ho paja
mýrapê na pa mē atā ā mē
hipêx anē.

Jakamā e kaxkwa kamā mē apē
ixri mē apa xwýnhjaja.

Nē mē ate inhỹ hā ri mē kām
ixkapēr jarēnh o mē apa
xwýnhjaja.

Nē Jejus nhỹ hā mē akapēr o ri mē
apa xwýnhjaja. Mē apiitā mē
apē ixkra na ka mē.

E mē amnhĩ tā ja pumu nē akĩnh
nē axpēn mā apikunhar o
akuhê. Pa na pa mē atā ā mē
ho ijapêx anē. Anē.

²¹ Tā nhūm kapēr o mē wrýk
xwýnhjê hōja hihtýx o kēn rax
kumrêxja mý nē o tē nē gô xujanār
kamā kām gēt nē kumē nhūm mrō
nē akunok. Hāmri nhūm kapēr o:

E krīta koja Tirtūm te ho ixte gōx
kām kēn mēnh nhūm mrōr
nē hpikunor pyrāk o hipêx
nhūm hapêx par kumrêx.

²²⁻²⁴ Na pre hte krīja kamā mē kot
ri mē kām mēmoj to wēnē
xwýnhjaja amnhĩ to rūnh o
krī piitā hkôt mē hakrenh
pa.

Nē krī nhō xwýnhjaja na prem
pika piitā hkôt hêx rom
tanhmā mē no kupyr to ho
ri pa. Jakamā ra mēmoj to
wēnē xwýnhjê pyrā nē mē
hikukrêx rūnh gryk ā Tirtūm
kaga.

No ām ja pix kêt. Tirtūm krajē
mē Tirtūm nhỹ hā kapēr o
mē pa xwýnhjaja na prem
mē himex rax nē. Hāmri
nhūm krī piitā kamā mē pa
xwýnhjaja mē kot mē hipêx ā
mē omu nē mē urāk nē ā mē
hipêx anhýr o pa.

Tā Papirōn nhō xwýnhjaja kot
mē hipêx anhýrja mýrapê
koja Tirtūm mē himex par
kumrêx.

Jakamā koja mē axte hkĩnh nē
hkĩnh xāj ri grer kêt nē.

Nē axte hkĩnh nē grer kām hakwa
kōr o ri pa kêt nē.

Nē axte ri wiorāw kakrēnh hkêt nē.
Nē axte ri amnhūm kawā hyr o hkrī
hkêt nē.

Nē axte harōj kahuk o kuhê hkêt
nē.

Nē axte mē ōrkwỹ kamā kanê hpōk
kêt nē.

Nē axte axpēn mā ri hkrajē rer o ri
pa hkêt nē. Koja ā mēmoj kot
anhýr piitā hapêx pa. Anē.

19

Mē kot Tirtūm mex ā mē harēnh

¹ Tā pa kē axte mēmoj pumu. Nē
kaxkwa kamā mē kapēr ma nhūm
mē ohtō rax kumrêx nē tanhmā
axpēn mā kapēr to. Nē anhīpê kāk
pē kapēr týx nē kapēr o:

E pu mē pahpiitā Tirtūm mā mex o
mex ā harē.

Tapxipix na hihtýx o hihtýx.

Nē tapxipix na āhpumunh o
āhpumunh.

Nē tapxipix na mex o mex.

Tapxipix na mex o kot mēmoj piitā
hakrenh par.

Ra kot mēmoj punuj pē mē papytār
par jakamā kēp mē papytār
xwýnh ā pixi mex na.

² Na hte amnhĩ jarēnh xā hkôt
tanhmā mēmoj to ho pa.

Nē amnhĩ to hêx kêt nē.

Tā ām hāmri na ā Papirōn nhō
xwýnhjê nhīpêx anē.

Na prem mē kām Tirtūm kapēr
jarēnh o mē pa xwýnhjê
nhīmex rax kumrêx.

Nē krī piitā hkôt ri pa nē amnhĩ kôt
mē kurē nhūm mē kuma nē
mē hkôt amnhĩ tomnuj o pa.

Nhūm Tirtūm tee ri hā mē omu nē ā
hkrajē hā mē hipêx kati anē.
Ām hāmri na ā mē hipêx anē.

Anhÿr o axpën mã harë. ³Hãmri nê xatã axpën mã:

Nã ãm hãmri na ã mẽ panhõ
Tĩrtũmja mẽ hipêx anê nhũm
mẽ kurũm kuwy hkũm kãx
mã àpir o pa.

Koja krĩ nhõ xwÿnhjaja amnhĩ xà
htÿx kamã hamak rãhã ho
pa nê aa à htÿx hapêx kêt.

E pu mẽ hã Tĩrtũm mã mex o mex ã
harë. Anê.

⁴Hãmri nhũm mẽ àptàr tũm pê 24
mẽ mẽmoj tĩr pê kwatjaja hãmri
Tĩrtũm kot mẽ ho amnhĩptàr ã hkrĩ
xà maati kutã rôrök nê kãm hipõ
hpa. Hãmri nê ã mẽ kapër anhÿr
xwÿnhjê mã kapër nê kãm:

Nã ãm hãmri na ka mẽ ã Tĩrtũm
mex ã harënh anê. E pu mẽ
pahpiitã kãm mex o mex ã
harë. Anê.

⁵Hãmri nhũm mẽhõja Tĩrtũm krĩ xà
maati kamã kapër o:

E mẽ axte Tĩrtũm mã mex o mex ã
harë.

Mẽ ate Měpahpãm kôt amnhĩ
nhĩpêx o mẽ apa xwÿnhjaja.

Nê mẽ apê mẽ ho amnhĩptàr
xwÿnhjaja nê amarĩ ri mẽ
apa xwÿnhjaja nê mẽ apiitã
mẽ ate Tĩrtũm ã apijaãm o
mẽ apa xwÿnhjaja kãm mex
o mex ã harë. Anê.

*Kot mẽ pahpãnhã amnhĩrer
xwÿnh mẽ hkwÿjê jarënh*

⁶Tã pa tanhmã mẽ kapër to hã
mẽ kuma nhũm mẽ kãx pê kapër
tÿx nê. Te mẽ ohtõ rax kumrêx
kapër pyrãk. Nê te gõ koko htÿx rÿ
na katõtök tÿx pyrãk. Hãmri nê mẽ
kapër o:

E na ra Tĩrtũm kêp mẽmoj piitã ho
amnhĩptàr xwÿnh.

Nê kêp mẽ panhõ Pahi Maati.

Nê hihtÿx o hihtÿx nê àhpumunh o
àhpumunh.

E pu mẽ kãm mex o mex ã mãn
harë.

⁷⁻⁸Nê hã pahkĩnh nê.

Nê kãm hihtÿx o hihtÿx ã harë.

Te mẽ kot axpën mã mẽ rer xwÿnh
kot amnhĩ nhĩpêx pyrãk.

Jao mẽ pahte amnhĩ tomnuj pãnhã
amnhĩrer xwÿnhhta te kêp
myja pyrãk.

Nê mẽ kot hkôt amnhĩ nhĩpêx
xwÿnh piitã te mẽ kêp nija
pyrãk.

Nê te mẽ kot axpën mã wa rer
nhũm wa kot axpën kôt pa
ho pa pyrãk o koja mẽ amnhĩ
nhĩpêx.

Nê te mẽ kot mjên mã xwÿnh mã
ê mex jakare nhõr nhũm kot
hagjênh pyrãk. Nê ê mexja te
mẽ kot tãm amnhĩ nhĩpêx xà
pyrãk. Anê.

⁹Hãmri nhũm Tĩrtũm kapër o wryk
xwÿnhja inhmã:

—E Juãw. Pa amã mẽmoj jarë
ka mar tÿx nê akwÿjê mã hã kagã.
Tĩrtũm kapër kwÿ kot paj amã harë.
Kêp Tĩrtũm kapër jakamã ãm hãmri
na. Na hte mẽmoj jarënh o hêx kêt
nê. E kapër ã kagã ho:

Na htem axpën mã mẽ rer kaxyw
nê amnhĩ wÿr hkwÿjê wÿ
nhũm mẽ hwÿr mra nê wa
hã hkĩnh nê apkur mex nê.

Ja pyrã nê Tĩrtũm kot amnhĩ wÿr
mẽ hwÿr xwÿnhjaja koja mẽ
nhÿrmã mẽ pahte amnhĩ
tomnuj pãnhã amnhĩrer
xwÿnhhta wÿr api nê ã amnhĩ
nhĩpêx anê nê hkĩnh nê
apkur mex nê.

Hãmri nhũm Tĩrtũm mẽ ho mex rax
kumrêx. Anê.

—E kêr ka ã akwÿjê mã ja hã kagã
anê Juãw. Anê.

Hãmri pa kuma nê kagã ja kamã
mẽ amã hã kagã. ¹⁰Hãmri nê hã
kagã hpa nê ra ixte kãm mex o mex
ã harënh kaxyw kutã ixkõn krã ho
têm nê nhÿ nhũm tee ri amnhĩ tã
ixpumu nê inhmã:

—Kwa ã ri inhĩpêx anhÿr kêt nê.
Apyrà nê ixte Jejus mã tanhmã
amnhĩ nhĩpêx to xwÿnh kênã. Je-
jusja apyrã nê kêp inhõ pahihiti
na. Jejus kapër na prem hkukamã

mê kot Tirtûm nhÿ hã kapêr o mê pa xwÿnhjaja hã kagà nê mê kãm harênh o pa. Jakamã kwa pu mê Tirtûm pix kutã mân pahkôn krã ho parôrok nê pahkrî nê kãm mex o mex ã harê. Anê.

Kawar jaka hã ÿr xwÿnh jarênh

11-16 Tã pa kê axte mêmoj pumu. Nhũm kaxkwa axkjê nhũm kamã kawar jakajre xa nhũm mêmhõja hã nhÿ. Hixi na pre kêp “Aa kot Tirtûm kaga hkêr xwÿnh.” Anê nê hixi hõ na pre kêp: “Tirtûm kôt pix mã amnhî nhîpêx o pa xwÿnh.” Anê. ã hixi kot anhÿr jakamã na hte katãt kôt ahpÿnhã mê kot amnhî nhîpêx ã mê omunh xã hkôt tanhmã mê harênh to. Mê kot amnhî to mex ã mê omunh xã hkôt tanhmã mê hkwyjê jarênh to nê mê kot amnhî tomnuj ã mê omunh xã hkôt ahpÿnhã tanhmã hkwyjê jarênh to. Na pre mê kot tanhmã hkwyjê nhîpêx to ho pa xwÿnhjê kutã amnhî xunhwÿ nê mê hã tanhmã mê ho. ã na pre kawar ã ÿr xwÿnhja amnhî nhîpêx anhÿr o pa.

Nê no te kot kuwy hpôk pyrãk jakamã hprî hã mêmoj piitã omu nhũm mêmoj kêp hpimxur kêt nê. Nê kêp pahi hã mê ahkã ho ohtô nê kutu. Nê nhÿhÿnh ï hã hixi hõ hã kagà nom ãm tapxipix kot amnhî tã amnhî nhîxija pumunh. Na pre ra amnhî kamrô ho ê xy hpa nê xa. Nê hixi hõ pê:

TIRTÛM KAPÊR O AMNHÎRÎT
XWÿNH

Nê ê ryti hã hixi hõ hã kagà. Nê ihkjê hã ãm tãm. Hã kagà jarênh kot:

Ixpê mê ho amnhîptãr xwÿnh piitã mê õ Pahi Maati na pa.

Nê hakwa rûm wapo xwa gixre pôm katon ajêt. Kot ho tanhmã mê kot Tirtûm mê wa kutã amnhî xunhwÿr xwÿnhjê nhîpêx to kaxyw. Jakamã ra mê piitã mê ho pikuprõnh pa nê mê hipêx o te mê kot prês kãm uwa xô kagô janênh

pyrãk nhũm mê hkamrô hpikapîr rax kumrêx. Tirtûm xihtÿx xwÿnh kot mê kamã gryk tÿx jakamã nhũm ã kãm mê hipêx anê. Mê kot amnhî tomnuj o paja mÿrapê.

Nhũm õ pôristi piitã urãk nê kawar jakare hã hkrî nê hkôt ri pa. Mê ê jaka muxre jagjê nê hã ma hkôt ri pa.

17-18 Tã pa axte Tirtûm kapêr o mê wrÿk xwÿnh õja pumu nhũm myyti kutã xa nê kãx pê nhônhti mã kapêr nê mê kãm:

—E mê amnê mê ixwÿr wrÿ nê Tirtûm ã akînh nê mê htyk nê mê hikwÿ xwÿnhjê hã atu nê aku. Mê ho amnhîptãr xwÿnhjaja nê pôristijaja nê mê hkrãhtûm nê kawar nê kawar ã mê hkrî nê ri mrar xwÿnhjaja nê mê kot amnhî to rûnh xwÿnhjaja nê mê kot amnhî to hkryre xwÿnhjaja. Nê mê kãm mê àpênh xwÿnhjaja nê amnhî mã ri mê àpênh xwÿnhjaja. ãm mê htyk nê mê hikwÿ xwÿnh mÿj piitã mãmrî mê hwÿr wrÿ nê mê hã atu nê mê aku. E mê tokyx nhônhti. Anê.

19 Tã nhũm mrymnuti nê krî piitã hkôt mê õ pahi nê mê õ pôristijaja piitã axpên wÿr akuprô. Wam kawar jakare hã ÿr nê htêm xwÿnh mê õ pôristijê hwÿr hprôt nê mê hkurê kaxãr kaxyw axpên mar kaxyw akuprô.

20-21 Hãmri nê mê hwÿr mra nê mê hkurê kapa. No ãm tee ri amnhî nhîpêx nê tee ri kãm tanhmã mê ho hprãm hkapyr nhũm wam kawar jakare hã ÿr nê htêm xwÿnhhta hakwa rûm wapo xwagixre kator o mê himex pa. Hãmri nhũm mê hkwyjê pyrãn htyk pa nê hikwÿ. Nhũm nhônhti mê omu nê mê hwÿr wrÿk o mra nê mê kuku hãmri nê kãm mê hkur kaga nê mê hkaga. No nhũm mrymnuti nê ÿ hã mê kãm hêx o pa xwÿnhhta wa nhũm mê axtem nê htîr rãhã wa unê nê ma wa o tê nê êsôf o kuwy maati kamã wa kumê. Hãmri nhũm wa kamã

htír tùm nê hxêt rãhã nê pa ho pa nê aa htyk kêt nê.

20

Mê kot Satanasti hpa hpre hã mê harênh

Wam Korît 15.20-28

¹ Tã pa kê axte mêmoj pumu. Nhùm Tirtùm kapêr o mê wrÿk xwÿnhjê hõja kaxkwa rùm wrÿ nê ahkre xupÿmti hpro xà ho htÿx xà hã safja py nê kàx pytÿhti ho mê hpre xàja õ py. ²⁻³ Hãmri nê kagãmnuti pê hêx xwÿnh maati Satanastija pynê. Amnepê m Atãw mê Ewa wa kãm hêx xwÿnhnta pynê nê kàx pytÿ o hpa hpre nê hte hpre hãmri nê ahkre xupÿmti nhÿtom xà mê nê kamã kumê. Hãmri nê akupÿm hpro xà ho hpro nê saf o hã ho htÿx. Kot pika piitã hkôt mê kãm hêx o pa pymaj ã hipêx anê. Koja tokyx kator kêt ry rax kumrêx. Koja kamã arÿ hkrÿ hã amgrã xohtô nê. Hã amgrã pê 1.000 nhùm rÿ kormã Tirtùm akupÿm kator nhùm kato nê ri pa. Nom pa hkrãnre.

⁴ Tã pa mê htyk nê akupÿm mê htír xwÿnh kwÿjê pumu. Kormã mê htír ri na prem Tirtùm kapêr kôt pix mã amnhÿ nhÿpêx o pa. Nê Jejus kêp mê õ pahÿhti hã harênh rãhã ho pa. Aa mê kot mrymnuti kutã hkõnkrã ho rôrôk nê kãm mex ã harênh kêt. Nhùm prem tee mê ôkrã hã nê mê ïhkra katut ã mrymnuti nhÿxi nhÿpêx kaxyw nom nhùm prem hkaga kamã hihtÿx nhùm prem kãm mê hkurê xwÿnhjaja tee ri ja hã mê omu nê mê mut jakãr o mê kupa. Hãmri nhùm Tirtùm akupÿm mê ho mê htír nê mê kot mê ho amnhÿptãr ã hkrÿ xà kamã mê hkrÿ. Jejus nhÿhkô hã mê hkrÿ hã amgrã pê 1.000 kaxyw. ⁵ Mê kumrêx na pre Tirtùm akupÿm mê ho mê htír nhùm mê hkwyjaja mê hkÿnh ã arÿ ty nê hikwÿ hã amgrã pê 1.000 jakre nhùm rÿ kormã akupÿm mê ho mê htír.

⁶ Wam akupÿm mê htír xwÿnhjaja kêp Tirtùm kra jakamã koja mê Tirtùm kra hkêt xwÿnhjê kurom hkÿnh nê pa ho pa. Nê mê kurom mê kot amnhÿ xà htÿx kamã hamak o pa htùm xà wÿr pa hkêt nê. Nê mê kurom Tirtùm mê Kra Jejus Kris wa kuri mex kumrêx nê wa kãm tanhmã ri amnhÿ nhÿpêx to ho pa. Nê Jejus nhÿhkô hã mê ho amnhÿptãr o pa hã amgrã pê 1.000.

Tirtùm kot kuwy hwÿr Satanasti mênh ã harênh

⁷ Tã koja amgrã pê 1.000 hapêx nhùm rÿ kormã Tirtùm kapêr o wrÿk xwÿnhjaja akupÿm ahkre xupÿm wÿr tẽ nê Satanasti mã kahê xà mê nhùm kato. ⁸ Hãmri nê kê axte pika piitã hkôt tanhmã mê kãm hêx to ho ri pa. Gorti nhõ xwÿnhjê mã nê Makok nhõ xwÿnhjê mã nê krÿ piitã hkôt Tirtùm nê tanhmã mê kãm hêx to ho mê hkôt pa. Hãmri nê mê kot Tirtùm krajê kutã amnhÿ xunhwÿr nê mê hkurê kaxãr kaxyw amnhÿ kwÿjê ho akuprõ nhùm mê ohtô rax kumrêx nê axpên wÿr akuprõ. Te pikahti grã xohtô pyrãk.

⁹ Hãmri nê ma Tirtùm krajê nhÿmex par kaxyw mê hwÿr mra nê mê õ krÿ mã hipôk pa nê kuhê. Mê õ krÿja Tirtùm mã mex tã nhùm mê kot kêp grãnh par kaxyw ma hwÿr mra. Hãmri nhùm kaxkwa rùm kuwy hpôjja mê haêr pê mê hã rôrôk nê mê ho hxêt pa.

¹⁰ No mê kãm hêx xwÿnh maati Satanastita nhùm Tirtùm kapêr o wrÿk xwÿnhjaja axte unê nê ma êsôf o kuwy maatita wÿr o tẽ nê kamã kumê. Ra mê kot kamã mrymnuti wa kot Tirtùm nê mê nokupyr o pa xwÿnh wa mênh tã wa hkôt Satanasti mã ho anê nê kamã kumê nhùm kamã pa ho pa. Koja mê aa kator kêt kumrêx. Nê arÿ kamã amnhÿ xà htÿx kamã hamak rãhã nê pa ho pa.

Tirtüm kot ahpÿnhã tanhmã më piitã më harënh to kaxyw

Matêwre 25.31-46; Juãw 5.25-29

¹¹ Tã pa axte mëmoj pumu nhùm kaxkwa më pikaja wa ra hapêx pa. Pa Tirtüm kot tanhmã më piitã më harënh to hã hkrĩ xà raxja pumu. Nhùm hakajre nhùm Tirtüm kamã nhÿ.

¹²⁻¹³ Hãmri nhùm ra më htyk nê më hikwÿ xwÿnh piitã akupÿm hapôx pa nê Tirtüm kot tanhmã më harënh to hã hkrĩ xàta kutã hkrĩ pa. Më piitãã. Më kot amnhĩ to rûnh xwÿnhjaja nê më kot amnhĩ to hkryre xwÿnhjaja nê më ho amnhĩptâr xwÿnhjaja nê gô xujanâr kãm më mrôr nê më htyk xwÿnhjaja. Ra më htyk nhùm më kot më hagjênh xwÿnhjaja piitã më htykjê papxà rûm hapôx pa nê Tirtüm kutã ohtô ho ohtô nê hkrĩ. Hãmri nhùm Tirtüm ô kagà py nê kamã më piitã më hixi japêr. Kagà kamã ra më hkukamã më htĩr tùm nê më pa ho më pa mã xwÿnhjê nhĩxi japêr. Nê kagà hõ kamã më htĩr ri tanhmã më kot amnhĩ nhĩpêx to ho pa hã më piitã më hã kagàja. Nhùm kupy nê kamã tanhmã më harënh to nê hkôt hprĩ hã më piitã më omunh pa nê rĩ kormã ahpÿnhã tanhmã më harënh to.

¹⁴⁻¹⁵ Hãmri nê më htĩr tùm nê më pa mã xwÿnhjê nhĩxi hã kagàja kamã tee ri më hkwyjê nhĩxi japêr nhùm kamã amrakati. Jakamã nhùm më ma kuwy maatita wÿr më o mra nê kamã më rënh pa. Te axte më htyk nhùm më kot kuwy kamã më hagjênh pyrãk nhùm më kamã rôrôk nê tee ri amnhĩ xà htÿx kamã hamak rãhã nê pa ho pa nê aa kator kêt kumrêx.

21

Pika më kaxkwa wa nyw jarënh

Sikũn Pêtre 3.8-13

¹ Tã pa axte mëmoj pumu. Nhùm Tirtüm ra pika më kaxkwa nyw wa ho kato. Ra pika nê kaxkwa nê

gô xujanâr tùmja hapêx pa nhùm kaxkwa më pika nyw wa ho kato. Nom axte gô xujanâr o kator kêt nê.

² Hãmri nhùm Tirtüm nhõ krĩ mex pê Jerujarê nywja tanhmã amnhĩ to nê pika nyw wÿr wrÿk o mō. Krĩja mex kumrêx. Mex o mex. Te mjên mã xwÿnh ê mex jaxàr nê amnhĩ to muxre nê mjên wÿr htêm pyrã nê pika nyw wÿr mex kumrêx nê wrÿk o mō.

³ Hãmri nhùm Tirtüm kot më ho amnhĩptâr ã hkrĩ xà maatija kamã mëhõja kapêr o:

—Nà ãm hãmri. Na ra Tirtüm hkrajê hkôt pa ho pa. Pika nyw kamã më hkôt pa ho pa nhùm më tã no ho omu nê hkôt pa ho pa rãhã nê. Nà ãm hãmri. Ja mex o mex.

⁴ —Koja hkrajaja hkôt pa ho pa nê axte htyk kêt kumrêx. Nhùm Tirtüm më nê më no kagô nhĩnhĩnh pa nhùm më axte hkaprĩ nê mÿr kêt nê. Nê ri axte amnhĩ xà kamã hamak kêt nê. Nê axte ri tanhmã omnu hto hkêt nê. Ra më hkaprĩ nê à nê mÿr o pata hapêx par kumrêx nhùm hpãnhã mëmoj nyw pix. Anê.

⁵ Hãmri nhùm Tirtüm tãm tanhmã inhmã kapêr to. Krĩ xà maati kamã ÿr xwÿnhhta tãm inhmã kapêr o:

—E na pa ra akupÿm mëmoj piitã ho nyw pa. Jakamã e Juãw. ãm hãmri na pa ã amnhĩ kukamã amã mëmoj jarënh anê. Ixêx kêt. Jakamã kêr ka akwyjê mã piitã hã kagà hpa. Kê më kamã harê nê tokyx kuma nê hkôt hamaxpêr rãhã ho pa.

⁶ —Ra ixte amnhĩ kukamã mëmoj mã ijamaxpêr xwÿnhja na pa ra ho anhÿr pa. Ixpê mëmoj piitã ho anhÿr o hkrax xwÿnh nê mãânên ixpê mëmoj piitã ho ijapêx par xwÿnh. Nê ixrãhã ixpa xwÿnh. Amnepêm kormã mëmoj kator kêt ri na pa pre ixrãhã ixpa. Nê ot pa arĩ ixrãhã ixpa. Tã më kãm kôr nê kãm gô hkwy ho hkôm hprãm xwÿnhjê pyrã nê më kãm ixpix prãm xwÿnhjaja kot paj te më kãm inhõ hino rûm gô hkwy nhõr nhùm

mě kot ho hkõm pyræk o mẽ hipêx. Hâmri nhũm mẽ htĩr tũm nẽ ixri pa ho pa nẽ axte htyk kêt nẽ. Kot paj ă mẽ hipêx mex anẽ.

7 —Mẽ ate tanhmă amnhĩ tomnuj to nẽ amnhĩ to htỳx nẽ ixkõt pix mã amnhĩ nhĩpêx o mẽ apa rãhã mẽ atyk xwỳnhjaja kot paj ă mẽ anhĩpêx mex anẽ. Ka mẽ apẽ ixkra hã amex nẽ ixkõt ri apa rãhã ho apa. Pa ixpẽ mẽ anhõ Tĩrtũm ă tanhmă mẽ ato mex to rãhã ho ixpa.

8—No mẽ kot amnhĩ kaxyw ixkõt hamaxpêr kêt xwỳnhjaja. Nẽ mẽ kot amnhĩ tomnuj xwỳnhjaja nẽ mẽ kot ri mẽ hpar prãm xwỳnhjaja. Nẽ mẽ kot nhãm ri mẽnĩjẽ ho amnhĩkati xwỳnhjaja. Nẽ wajagajaja. Nẽ mẽ kot amnhĩ to sãnti hwỳr o pa xwỳnhjaja. Nẽ ri mẽ hẽx nhi xwỳnhjaja. Ă mẽ kot amnhĩ nhĩpêx anhỹr xwỳnh piitã koja mẽ apẽ ixkrajẽ hkĩnhã ma kuwy maati wỳr hapêx par kumrêx. Te axte mẽ htyk pyræk nom koja mẽ axte htyk kêt nẽ. Anẽ.

Jerujarẽ nyw jarẽnh

Sikũn Korĩt 6.16; Karatas 4.26; Eprẽw 12.22-24

9 Tã nhũm mẽ kot xijere pẽ 7 kamã Tĩrtũm gryk xà jamỳnh xwỳnhjẽ hõja hãmri ixwỳr tẽ nẽ inhmã:

—E ma ixkõt tẽ nẽ mẽmoj pumu. Na ra krĩ nywja pika nyw wỳr wrỳk o mẽ. Te mjên mã xwỳnh ẽ mex jaxàr nẽ amnhĩ to muxre nẽ mjên wỳr htẽm pyræk nẽ mex kumrêx nẽ kaxkwa rũm pika nyw wỳr wrỳk o mẽ. Nẽ kot ho mjên mã xwỳnhnta te mẽ pahte amnhĩ tomnuj pãnhã amnhĩrer xwỳnhnta pyræk. E tokyx tẽ nẽ omu. Anẽ.

10 Hãmri nhũm Tĩrtũm Karõ tanhmă ixto pa ma kot inhmã kapêr xwỳnhnta kõt tẽ nhũm ma ixto mẽ nẽ kẽn krã hprêeti hwỳr ixto api nẽ himõk ă ixãm. Pa Tĩrtũm nhõ krĩ mex pẽ Jerujarẽ nywja pumunh o xa. Nhũm mex o mex. Ăm hãmri te mjên mã xwỳnh kot ẽ mex jaxàr nẽ

amnhĩ to muxre nẽ mjên wỳr htẽm pyræk nẽ ahpar mã wrỳk o mẽ pa ixprĩ hã omu.

11 Na pre rax o rax nẽ mex o mex. Tĩrtũm kamã pa ho pa jakamã nhũm kamã hirã htỳx kumrêx. Te kẽn mex ă kàxpore xohtõ jaxênh mex tỳx pyræk.

12-13 Nẽ krĩ puhã kahêja hprêk rax nẽ. Nẽ hwỳr mẽ gjêx xà kêp 12. Na pre myt japõx xà rũm axkrunêpxi. Nẽ myt gjêx xà rũm haxwỳja axkrunêpxi. Nẽ akutã kahpa hkõt haxwỳja axkrunêpxi. Nẽ ahpỳnhã hakwakre hã Tĩrtũm kapêr o wrỳk xwỳnhjaja hamãr o kuhẽ. Nẽ hakwa kre piitã hã Ijaew pẽ ahpỳnhã mẽ pikjêr kãm mẽ kêp 12jaja mẽ hixi hã kagã.

14 Nẽ kahẽ xunhwỳr xà hkukamã kẽn pytyrja ahpỳnhã kêp 12. Kẽn pytyrta ă na mẽ kot Jesus nhỹ hã mẽ ahkre o mẽ pa xwỳnh maati pẽ 12jẽ nhĩxi hikwỹ.

15 Tã nhũm kot ixto mõi nẽ inhmã mẽmoj jahkre xwỳnhnta õr o mẽmoj pĩ py nẽ kot ho krĩ ho mĩdi kaxyw xa. Nẽ ho kahẽ piitã ho mĩdi kaxyw. Nẽ mẽ gjêx xàja ho mĩdi kaxyw.

16-17 Hãmri nẽ ho mĩdi hpa. Krĩja ry nẽ kahpa piitã axpên pyræk. Nẽ hprêk piitã mããnẽn axpên pyræk. Kamã mẽmoj piitã ahpỳnhã kêp 2.200 kirõm. No puhã kahêja hprêk o 64 met pix nẽ.

18 Nẽ kahêja kẽn jaxênh pix o kot amnhĩ nhĩpêx jakamã mex o mex. Nẽ hkarỳr tỳx kumrêx. Nẽ kahẽ hkre kamã krĩ kamã ahpỳnhã ri ixkreja õr pix o kot amnhĩ nhĩpêx. Nẽ piitã hkarỳr tỳx.

19-20 Nẽ kahẽ xunhwỳr xà hkukamã kẽn pytyrta ahpỳnhã ri kẽn mex pix o kot amnhĩ nhĩpêx. Piitã mex kumrêx nẽ hkarỳrti.

Wamta kawax pẽ grãgrãre.

Nẽ hkõt ja kawax pẽ grãgrã kakrã htyk.

Nẽ hkõt ja kakrã htyk.

Nẽ hkõt hõja grãgrã karỳr.

Nē hkôt ja hkamrêk pihkàrti.
 Nē hkôt ja grāgrā kakrā htyk.
 Nē hkôt ja hkamrêk tỳx kumrêx.
 Nē hkôt ja ràrààre.
 Nē hkôt ja grāgrā mē pihkàr.
 Nē hkôt ja ràràr mē pihkàr.
 Nē hkôt ja grāgrā karỳyre.
 Nē hkôt ja kakrā htyk pihkàr.

Ã kên pytyr mex kot anhyr.

²¹ Nē mē gjêx xà hã hakwakre kahê xà pê 12ja mēmo kên jakooti rûnh kumrêx pix o. Nē krī kahti hkôt pry nhīkwỳ xwỳnhja ãm ôr pix o. Nē hkarỳyre.

²² Pa pre tee ri krī kamã Tirtũm mã amnhĩ jarênh xà hã ixkre japêr nhũm amrakati. Mo kaxyw koja mē axte ixkreja hwỳr mra? Ra Pahi Maati Tirtũm xihtỳx xwỳnh mē mē pahte amnhĩ tomnuj pãnhã amnhĩrer xwỳnhnta ra hkrajê kamã pa ho pa kênã kot kêt mē axte ri ixkreta o presija. Koja mē kãm wa mex ã wa kãm harênh prãm nē nhỹri tãm wa hwỳr mra nē ã wa kãm kapêr anê. Te mē pahte pahi hwỳr pamrar nē kãm pakapêrta pyrà nē wa hwỳr mra nē wa kãm kapêr.

²³ Nē koja krīja kamã myyti nē mytwrỳre hkêt. Mo kaxyw kot kêt myyti nē mytwrỳreja arĩ ri hirã ho pa? Krī kamã Tirtũm pa ho pa jakamã kamã hirã mex kumrêx. Nē mē pahte amnhĩ tomnuj pãnhã amnhĩrer xwỳnhnta haxwỳja kamã pa ho pa. Te kêp kanê hpôk rax kumrêx pyrà nē hirã mex o pa. Kot hirã mex o kot myyti jakrenh. ã Tirtũm mē Kra wa krīja kamã pa ho pa jakamã nhũm mē axte myyti ho presija hkêt nē.

²⁴ Koja krī nhõ xwỳnhjaja hirã mex pix kãm ri pa ho pa nē tãm ri amnhĩ nhĩpêx o ri pa. Tã koja mē ho amnhĩptàr xwỳnhjaja Tirtũm wỳr mra nē amnhĩ rom kãm mex o mex ã harê nē kãm:

—Na pre mē ixkwỳjaja mē ixpê mē ho amnhĩptàr xwỳnh

ã axpên mã mē inhmex nē mē ixàhpumunh ã ri axpên mã mē ijarê. Nom mē ixrom amex o amex nē axàhpumunh o axàhpumunh. Jakamã ãm hãmri na htem amã amex o amex ã ajarê Tirtũm. Anê.

²⁵ Nē krī hwỳr hakwakre koja amnhĩ kahê xà rênh rãhã kuhê nē aa amnhĩ kahê hkêt nē. Jar mē panhõ pika kamã na hte kamãt kaxyw nhũm htem amnhĩ tã hakwakre kahê hpa. No mo kaxyw koja mē axte pika nywja kamã ã amnhĩ nhĩpêx anê? Koja kamãt kêt nē hirã rãhã ho rãhã jakamã nhũm mē amnhĩ tã kahê hkêt rãhã nē pa ho pa.

²⁶ Nē koja mē piitã Tirtũm wỳr mra nē kãm mex o mex ã harê nē kãm:

—Pa Tirtũm. Hêxta waa nē. Anhõ krīja mex kumrêx. Mex o mex. Nē mē ixrom amex o amex nē axihtỳx o axihtỳx. Nē mē ixrom axàhpumunh o axàhpumunh. ãm hãmri na ka ra mē ixpê akrajê kamã apa ho apa Tirtũm. Anê.

²⁷ Nē koja mēmoj punuj krīja wỳr gjêx kêt kumrêx. Mē hpi-jaãm kêt xwỳnhjaja nē ri mē hêx xwỳnhjaja hwỳr gjêx kêt nē. ãm mē pahte amnhĩ tomnuj pãnhã amnhĩrer xwỳnhnta nhõ kagã kamã Tirtũm ri mē htĩr tũm nē mē pa mã xwỳnhjê nhĩxi nhĩpêx xwỳnh pix-jaja koja mē hwỳr agjê nē kamã pa ho pa.

22

¹⁻² Tã pa pre axte mēmoj pumu. Nhũm Tirtũm kapêr o wrỳk xwỳnhja axte inhmã mēmoj jahkre. Nhũm Tirtũm mē kot mē pahpãnhã amnhĩrer xwỳnhja wa kot mē ho amnhĩptàr ã hkrĩ xà maati rũm pyhti hprôt. Krī kahti hkôt pry pohti nõr xwỳnhnta kahti hkôt hprôt o nõ. Pyhti kamã gõja na htem ho ixkõ nē htĩr tũm nē pa ho pa. Gõ karyyre. Nhũm mēmo pĩ hpàr muxre xwỳnhja akutã hijê nē xa. Pĩ

xôja na htem kuwô nê htîr tûm nê pa ho pa. Na hte apkati mê ô rãhã nê kuhê. Nê axtem hôja mê piitã mê mex nê à hkêt kaxyw na hôja.

³ Amnepêm na pre Tirtûm Atãw mã kapêr nê kãm:

—Ate amnhî tomnuj mÿrapê kot paj tanhmã pika homnu hto nhûm apê mex kêt nê. Ka kamã apur nê kamã axapênh rûnh o apa rãhã nê rî kormã kamã axãpkur o ri apa. Apê jamnuj tâ kot kaj mê ã amnhî nhîpêx anhÿr o apa rãhã ty. Anê.

Tã ra Tirtûm nhô krî nyw kamã mê omnuj xãja amrakati kumrêx. Nê Tirtûm mê kot mê pahpãnhã amnhîrer xwÿnhta wa ô krî kamã pa ho pa jakamã mê pahte kamã mê papa xwÿnhjaja kot puj mê wa kãm tanhmã amnhî nhîpêx to ho ri papa.

⁴ Kot puj mê tâ pano ho Tirtûm pumunh o papa. Hãmri nhûm te mê pahpiitã mê panhõkrã hã amnhî nhîxi nhîpêx pyrãk o mê panhîpêx.

⁵ Nê kot puj mê Pahi Maati Tirtûm nhîrã kamã ri papa nê axte myyti nhîrã ho presija hkêt nê. Koja kamãt hapêx pa pu mê axte kanê ho presija hkêt nê. Nê Jejus nhîhkô hã hirã kamã mêmoj to amnhîptãr rãhã ho papa.

Jejus tokyx akupÿn wrÿk ã harênh Apokarip 1.1-3

⁶ Tã nhûm Tirtûm kapêr o mê wrÿk xwÿnh kot ixto mõi xwÿnhta axte inhmã kapêr nê inhmã:

—E nã ãm hãmri na ixte amã mêmoj piitã harênh xwÿnhja. ãm hãmri na. Jakamã kwa kêr ka arî hã ano htÿx rãhã ho apa. Amnepêm Tirtûmja ÿ hã mê kapêr o pa xwÿnhjê mã tanhmã kapêr o amnhîrit to. Kot tanhmã amnhî nhîpêx to hkukamã mê kãm ho amnhîrit nhûm prem kuma nê ô ri ma hkwÿjê mã harênh o ri mê hkôt pa. Tã ra mê hpãnhã pa mê awÿr inhmê. Mê ate Tirtûm mã tanhmã amnhî to ho apa xwÿnhjê mã ixte ja

jarênh kaxyw Pahihti Tirtûmja mê awÿr inhmê pa wrÿ. Nã koja mêmoj tokyx ã amnhî nhîpêx anê. ⁷ Na pre Jejus mê amã amnhî jarênh o: “Kot paj tokyx akupÿm mê awÿr wrÿ. Tã mê ate ijarênh ã kagã kamã harênh nê mar nê amnhî kaxyw hkôt ajamãxpêr nê hkôt amnhî nhîpêx xwÿnhjaja kot kaj mê akînh nê ri apa.” Anhÿr o amnhî jarê. Anê.

⁸ Nã ixpê Juãw na pa pre ã inhno ho mêmoj pumunh anê. Hãmri nê omunh pa nê Tirtûm kapêr o wrÿk xwÿnh kot inhmã harênh xwÿnhta kutã ixkõn krã ho ixtêm nê inhÿr kaxyw. Nom nhûm amnhî nê inhmã kapêr kãm hihtÿx nê inhmã:

⁹ —Kwa nã ri ã inhîpêx anhÿr kêt nê. ãm Tirtûm pix kutã na pu htem ã amnhî nhîpêx anê. Apyrà nê ixpê Jejus kwÿ kênã. Na pa hte apyrã nê ÿ hã tanhmã amnhî nhîpêx to ho ixpa. Nê mê apyrã nê kapêr ã kagã hkôt pix mã amnhî nhîpêx. Na pu htem axpên kutã pahkõn krã ho parõrok kêt nê. ãm Tirtûm pix kutã na pu htem ã amnhî nhîpêx anê.

¹⁰ —E ã ate mêmoj pumunh nê mar anhÿr xwÿnhja koja tokyx ã amnhî nhîpêx anê. Jakamã kwa kêr ka akwÿjê pê ho apimxur kêt nê. Piitã hã kagã hpa kê mê kamã harê nê kuma nê mêmoj kot ã amnhî nhîpêx anhÿr mã xwÿnhta piitã hkukamã harênh ma. Koja tokyx mêmoj ã amnhî nhîpêx anê.

¹¹ —Jakamã kwãr mê mãmrî piitã tanhmã kãm amnhî nhîpêx to ho pa hprãm xã hkôt amnhî nhîpêx o pa. Kwãr mê mê kot amnhî tomnuj xwÿnhjaja ã amnhî anhîpêx anhÿr o pa. Nê kwãr mê kot tanhmã kapêr punuj to xwÿnhjaja mãmrî ã amnhî nhîpêx anhÿr o pa. Nê kwãr mê kot tãm amnhî nhîpêx o ri mê pa xwÿnhjaja mãmrî Tirtûm kôt pix mã ri tãm amnhî nhîpêx o pa. Anê.

Nhûm pre ã kaxkwa hwÿr ixto àpir xwÿnhta inhmã kapêr anê.

12 Hāmri nhūm hpānhā Jejus tām inhmā kapēr nē inhmā:

—E kot paj tokyx akupŷm mē awŷr wrŷ. Nē akupŷm pōj hāmri nē mē kot amnhī tomnuj o mē pa xwŷnhjaja pa ja mŷrapē ma mē kot amnhī xà htŷx kamā hamak tūm xàta wŷr mē rēnh pa. No mē kot ixkôt amnhī nhīpēx xwŷnhjaja kot paj akupŷn inhō krī hwŷr amnhī kôt mē ho api.

13 —Nē ixrāhāã xwŷnh na pa. Amnepē mā kormā mēmoj kêt ri na pa pre ra ixrāhāã. Nē koja nhŷrmā mēmoj piitā akupŷm hapēx pa arī ixrāhā nē ixpa ho ixpa.

14 —Nē Tirtūm kot mē anē mē ate amnhī tomnuj kuhōnh par xwŷnhjaja kot kaj mē amex kumrēx nē apa ho apa. Nē akīnh nē ajamakêtkati nē ri atŷx apa ho apa. Te ho mē kot amnhī xē kahōnh nē mex jagiēnh nē ri hā pata pyrāk. Koja Tirtūm mē amā anē ka mē ajamakêtkati nē ō krī hwŷr agjē nē kamā ri amex kumrēx nē ri apa ho apa. Nē kamā mēmo pī xō mē kot kur nē htŷr tūm nē pa mā xwŷnhhta wŷr mra nē amnhīm ō rē nē hkur o ri apa. Ra mē ate Jejus kôt amnhī xunhwŷr jakamā kot kaj mē axamnhīx hwŷr mra nē amnhīm hkwy rē nē hkur o ri apa. Kot kaj mē ã amnhī nhīpēx anē.

15 —Nom mē kot amnhī tomnuj o mē pa xwŷnhjaja koja mē akīnhā inhō krī hwŷr gjēx kêt nē. Mē kot ri mē y ho mē pa xwŷnhjaja. Nē mē kot nhām ri mēnijē ho amnhīkati ho mē pa xwŷnhjaja. Nē mē kot ri mē hpar o mē pa xwŷnhjaja. Nē mē kot ri sānti nhīpēx o te Tirtūm nhīpēx pyrāk o mē pa xwŷnhjaja. Nē mē kām ri hēx prām o ri mē pa xwŷnhjaja. Koja mē akīnhā inhō krī hwŷr pa hkêt nē.

16 —E Juāw. Nà ixpē Jejus na pa awŷr ixkapēr o mē wrŷk xwŷnhhta mē. Kot ixkwŷjē kaxyw amā ixkapēr jarēnh kaxyw. Ixpē Tawi pâr krax na pa. Te ixpē arīgro hkôt

kanhēti hpōk rax kot arīgro ho mōr ã ho amnhīrit xwŷnhhta pyrāk. Anē.

Nhūm pre ã Jejus inhmā kapēr anē. 17 Tirtūm Karō mē Jejus kwŷjaja na htem ã Jejus kot amnhī jarēnh anhŷrja ma nē hkīnh nē. Nē kām kapēr o:

—Hēxta waa nē. Kwa amnhīm anojarēt nē tokyx akupŷn mē ixwŷr wrŷ Pahihti. Pa mē tokyx ã amnhī nhīpēx anhŷr o ri war akôt ixpa. Anē.

Nē mē ate ja mar xwŷnhjaja kêt ka mē urāk nē ã kām akapēr anē.

Nē te mē amā kôr nē ri mē apa pyrāk xwŷnhjaja kêt ka mē te Jejus wŷr amrar nē ō gō ho akōm pyrā nē hkôt amnhī xunhwŷ. Te Jejus amarī mē pamā ō gō nhōr pyrāk o mē panhīpēx pu mē hkôt amnhī xunhwŷ nē ra pahpē pahŷr tūm nē papa mā xwŷnh. Hāmri nē amnhī pānhā tanhmā kām amnhīrer to hkêt nē.

Nhŷrmā mēmoj nyw par ã harēnh jatur xà

18 E ixpē Juāw na pa Jejus nhŷ hā mē amā mēmoj tanhmā kot amnhī nhīpēx to hkukamā ã mē amā hā kagā anē. Tā kwa mē o kora. Kêt ka mē atō amnhī krā hkôt ri ajamaxpēr o te ho ja pyrā nē hijuk ri axte mēmoj nhīpēx kêt nē. Ām kwarī ho kwarī. Kot ka mē atō anē nhūm Tirtūm ja hā apumu nē kagāja kamā tanhmā mē hipēx kati hto xàta o tanhmā anhīpēx to ka arī amnhī pumu.

19 Rŷ ka mē atō kagā kamā harē nē ama nē tanhmā ajamaxpēr to nē ajamaxpēr o:

—Nà ja kot anhŷr kêt. Na mē ãm harēnh o hēx. Kot paj kuma nē ãm kuma.

Anhŷr o ajamaxpēr japēr. Hāmri nhūm Tirtūm amnhī tā ama nē kagā mexta kamā kot tanhmā mē ho mex toja o ato mex kêt nē. Ka ō krī hwŷr axāpir nē mēmo pī xō mē kot hkur nē htŷr tūm nē pa kaxyw mā xwŷnhhta ka amnhīm hō hyr nē

hkrēr kêt nē. Jakamā e kwa mē o kora. Kêr ka mē kagàta kamā ā mēmoj kot amnhĩ nhĩpêx anhỹr mā xwỳnh̄ta jarēnh̄ ma nē aprĩ hã piitã hkôt ajamaxpēr tỳx rãhã ho ri apa.

²⁰ E Jejus kot inhmã mēmoj kukamã tanhmã ujarēnh̄ to xwỳnh̄ta na pre inhmã amnhĩ jarēnh̄ o: “Kot paj tokyx akupỹn mē awỳr wrỳ.” Anē. Ām hãmri na pre ā amnhĩ jarēnh̄ anē. Koja tokyx akupỹn mē pahwỳr wrỳ hãmri nhũm mēmoj piitã mex o mex.

Jakamā kwa kêr ka amnhĩm anojarêt nē tokyx akupỹn mē ixwỳr wrỳ Pahihti Jejus.

²¹ Nē ixpyrà nē mē apê Tĩrtũm krajaja na pa hte mē ato Pahihti Jejus wỳr rãhã ho ri ixpa nē kãm:

—Kwa akwỳjê pumu nē mē kutã anojarêt rãhã ho ri apa Pahihti. Anē.

E mē ujarēnh̄ja na hapêx. Ixpê Juãw na pa Jejus kot inhmã tanhmã ujarēnh̄ toja pa amnhĩ xô ri mē amã hã kagà hpa. E na hapêx.